



Tnúhu ní cáháⁿ yă ndiöxí xito cùu uú

Peñoles Mixtec New Testament

Contents

SAN MATEO	1
SAN MARCOS	65
SAN LUCAS	104
SAN JUAN	165
LOS HECHOS	207
ROMANOS	263
1 CORINTIOS	289
2 CORINTIOS	315
GÁLATAS	332
EFESIOS	341
FILIPENSES	350
COLOSENSES	356
1 TESALONICENSES	362
2 TESALONICENSES	367
1 TIMOTEO	370
2 TIMOTEO	377
TITO	382
FILEMÓN	385
HEBREOS	387
SANTIAGO	407
1 PEDRO	413
2 PEDRO	420
1 JUAN	425
2 JUAN	431
3 JUAN	432
JUDAS	433
APOCALIPSIS	435

Tnúhu ní cáháⁿ yă ndiǒxí xito cùu uú
New Testament in Mixtec, Peñoles (MX:mil:Mixtec, Peñoles)

copyright © 2002 Wycliffe Bible Translators, Inc.

© 2002, Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright information.

You do not sell this work for a profit.

You do not change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

ISBN 978-1-5313-0419-5

PDF generated on 21 Sep 2016 from source files dated 21 Sep 2016

872f7754-0986-5ecd-a059-925a708a6939

This print-on-demand edition of Scripture is designed, produced, and provided at cost by the Digital Bible Society. This is made possible through partnerships with the Bible League of Canada, Open Doors International and other missions and translation agencies. We are deeply grateful for the sacrifices made in translating this edition of Scripture and the generosity of others in making this Bible available to you.

To order additional copies of this Bible or hundreds of translations like it or to learn more about our ministries and the mission of Scripture distribution in every language, we invite you to visit www.DBS.org (USA), www.BibleLeague.ca (Canada), and www.OpenDoors.org (Europe). May God bless your work in sharing and teaching these Scriptures, until, as it is written, the earth is *“filled with the knowledge of the glory of the LORD, as the waters cover the sea.”* (Habakkuk 2:14)

TNÚHU NÍ CHÍDÓ TǸUNÍ TÉ MATEÚ

*Nchaa cue tée ní xíndecu ndéé sanaha cüt-
nàhà vátá quíxí-gà Xítóhó Jesucristú*
(Lc. 3:23-38)

¹ Te ñani tnáhá Xítóhó Jesucristú ní cuu ndíi Dàvíí ndíhi ndíi Àbrahám, cue tée ní xíndecu ndéé sanaha vihi-gá ñuyíú-a. Te duha ndùu cuendá dava-gá cue tée ní cuu ñani tnáhá-gá ní xíndecu ndéé sanaha.

² Ndíi Àbrahám ní xóo ñiⁿ déhe ndíi, te ndíi-áⁿ ní xínani ndíi Isàác. Te déhe ndíi Isàác-áⁿ ní cuu ndíi Jàcób, te déhe ndíi Jàcób-áⁿ ní cuu ndíi Jùdá, te diu-ni ndíi Jàcób-áⁿ ní cuu tātá dava-gá cue ñani ndíi Jùdá-áⁿ. ³ Te déhe ndíi Jùdá-áⁿ ndíhi ñadihí ndíi, ndíi Tàmár ní cuu ndíi Fàrès ndíhi ndíi Zàrá. Te déhe ndíi Fàrès-áⁿ ní cuu ndíi Èsróm, te déhe ndíi Èsróm-áⁿ ní cuu ndíi Àrám. ⁴ Te déhe ndíi Àrám-áⁿ ní cuu ndíi Aminadáb, te déhe ndíi Aminadáb-áⁿ ní cuu ndíi Nàsón, te déhe ndíi Nàsón-áⁿ ní cuu ndíi Sàlmón. ⁵ Te ñadihí ndíi Sàlmón-áⁿ ní xínani-a Ràháb, te ní xóo ñiⁿ déhe-yu ní xínani-dě Bòóz. Te ñadihí ndíi Bòóz-áⁿ ní xínani-a Rüt, te ní xóo ñiⁿ déhe-yu ní xínani-dě Òbéd, te déhe ndíi Òbéd-áⁿ ní cuu ndíi Isàí. ⁶ Te déhe ndíi Isàí-áⁿ ní cuu ndíi Dàvíí tée ní xíndaha ñaha xii cue ñáyiú isràél. Te déhe ndíi Dàvíí-áⁿ ndíhi ñadihí ndíi ní cuu ndíi Salòmón. Te díhna-gá ndíi Ùriás ní cándeca ndíi ñadihí-áⁿ te dàtnùni ní naqueheⁿ ñaha ndíi Dàvíí-áⁿ.

⁷ Te déhe ndíi Salòmón ní cuu ndíi Ròboám, te déhe ndíi Ròboám-áⁿ ní cuu ndíi Àbíás, te déhe ndíi Àbíás-áⁿ ní cuu ndíi Àsá. ⁸ Te déhe ndíi Àsá-áⁿ ní cuu ndíi Josáfát, te déhe ndíi Josáfát-áⁿ ní cuu ndíi Jòrám, te déhe ndíi Jòrám-áⁿ ní cuu ndíi Ùziás. ⁹ Te déhe ndíi Ùziás-áⁿ ní cuu ndíi Jòtám, te déhe ndíi Jòtám-áⁿ ní cuu ndíi Àcáz, te déhe ndíi Àcáz-áⁿ ní cuu ndíi Ezèquiás. ¹⁰ Te déhe ndíi Ezèquiás-áⁿ ní cuu ndíi Manàsés, te déhe ndíi Manàsés-áⁿ ní cuu ndíi Amón, te déhe ndíi Amón-áⁿ ní cuu ndíi Jòsiás. ¹¹ Te déhe ndíi Jòsiás-áⁿ ní cuu ndíi Jecóniás. Te diu-ni ndíi Jòsiás-áⁿ ní cuu tātá nchaa dava-gá cue ñani ndíi Jecóniás-áⁿ. Te dàvá-áⁿ ní quide yica cuè

tée ñuú Babiloniá ndécá-güedé ñáyiú isràél cuáháⁿ ñuú-güedé cuendá yacáⁿ cundecú-yu.

¹² Te sátá ní yáha ducaⁿ ní cuu, te ndíi Jecóniás ní xóo ñiⁿ déhe ndíi ndíhi ñadihí ndíi, te tée-áⁿ ní xínani-dě Salatiél. Te déhe ndíi Salatiél-áⁿ ní cuu ndíi Zorobàbél. ¹³ Te déhe ndíi Zorobàbél-áⁿ ní cuu ndíi Àbíúú, te déhe ndíi Àbíúú-áⁿ ní cuu ndíi Eliàquím, te déhe ndíi Eliàquím-áⁿ ní cuu ndíi Àzór. ¹⁴ Te déhe ndíi Àzór-áⁿ ní cuu ndíi Sàdóc, te déhe ndíi Sàdóc-áⁿ ní cuu ndíi Àquím, te déhe ndíi Àquím-áⁿ ní cuu ndíi Èliúú. ¹⁵ Te déhe ndíi Èliúú-áⁿ ní cuu ndíi Eleázár, te déhe ndíi Eleázár-áⁿ ní cuu ndíi Mátán, te déhe ndíi Mátán-áⁿ ní cuu ndíi Jàcób. ¹⁶ Te déhe ndíi Jàcób-áⁿ ní cuu ndíi Chèé tée ní cuu yíí tã Màriá xíchí ní cuu nãhá Jèsús Yaa ní tendaha Dütú Ndiöxi ní quixi ñuyíú-a.

¹⁷ Te sa ní cuu úxúú tnáhá cue tée cùu ñani tnáhá ndíi Àbrahám ndécú dàvá-áⁿ, te dàtnùni ní cacu ndíi Dàvíí diu-ni ñani tnáhá ndíi. Te núú tnáhá meé ndíi Àbrahám ndíhi ndíi Dàvíí ní cuu úxícúmi tnáhá-güedé. Te ducaⁿ te sa ní xínu úxícúmi-gá tucu-güedé ní cacu, te dàtnùni ní tñi ñaha cuè tée ñuú Babiloniá xii ñáyiú isràél ndécá ñaha-güedé xíí-yu cuáháⁿ ñuú-güedé cuendá yacáⁿ cundecú-yu. Te sátá ní yáha sá dúcáⁿ ní cuu, te ní cacu úxúni tucu cue tée ní cuu ñani tnáhá ndíi Àbrahám ndíhi ndíi Dàvíí, te dàtnùni ní cacu Xítóhó Jesucristú ñuyíú-a. Te núú tnáhá meé-gá ní cuu úxícúmi tnáhá-güedé.

Ní cacu Jèsús
(Lc. 2:1-7)

¹⁸ Te duha ní cuu cùtnáhá ní cacu Xítóhó Jesucristú, chi dàvá-áⁿ ní xíndecu ñiⁿ xíchí cuèchí ní xínani Màriá. Te xíchí-áⁿ sa ní cundáá tnúhu sá tnándaha-xi ndíhi ñiⁿ tée nani Cheé. Te cùmání-gá tnándaha-xi ndíhi tée-áⁿ te Espiritú Yã Ndiöxi ní quide ní ngúhuⁿ déhe-xi. ¹⁹ Te tã Chèé tée cuini cándeca ñaha xii xíchí-áⁿ ní cùtnùni iní-dé sá ñúhú dèhe-xi. Te cùu-dé ñiⁿ tée quide ndáá, núú xíáⁿ duuⁿ duuⁿ ní sani iní-dé sá vã tnándaha-gá-dé ndíhi-xi, te dícó-ni sá ñà túú ní cãháⁿ-dè chi ní cuini-dé sá vã cãháⁿ cuèhé cãháⁿ duha ñáyiú cuendá-xi. ²⁰ Te sátá dúcáⁿ ní sani iní-dé te ní ngáva-dé ní xídí-dé, te núú sàni-dé ní sáháⁿ ñiⁿ espíritú xínú cuèchi núú Yã Ndiöxi ní xáhaⁿ-xi xii-dé:

—Yòhó té Chèé tée cùu ñani tnáhá ndíi Dàvíí, yúhú càchí tnúhu-í xii-n sã

ñà túú nã cani iní-n, tnãndaha nahi-ni-n ndihí tá Màriá cuéí ñùhu déhe-xi, chi mee Espiritú Yã Ndiõxí ní quide-xi ducaⁿ ní ngúhuⁿ déhe-xi. ²¹ Te na cacú déhe-xi-áⁿ te danàni-n-dé Jèsús. Te ducaⁿ cùnani-dé, chi tée-áⁿ cada-dé cuendá sá vã cùndècu-gá cue ñani tnáhá-dé ñáyiu isràèl ichi cuèhé ichi duha —duha ní xáhaⁿ espíritú-áⁿ xii té Chèé-áⁿ nũ sàni-dé.

²² Te ducaⁿ ní cuu chi ní quee ndáá-xi nàcuáa ní xáhaⁿ Yã Ndiõxí xii ìⁿ tée ní cáháⁿ tnúhu-gá ndéé sanaha. Te tée-áⁿ ní chídó tnùnì-dé núú tùtú-gá nàcuáa ní xáhaⁿ-gã xii-dé, te duha ní xáhaⁿ-gã:

²³ Cundecu ìⁿ xichí cuéchí ndéé cuèé-gá.

Te òré ndécú íí-xi vátá ñihí-gá yíí-xi te ngúhuⁿ déhe-xi.

Te òré ná cacú dèhe-xi te danàni ñahá-yu Emànuél.

Duha ní xáhaⁿ-gã xii tée-áⁿ ní chídó tnùnì-dé núú tùtú-gá. Te tnúhu Emànuél-áⁿ queé-xí: Yá Ndiõxí ndécú ndihí-o. Núú xiãⁿ ducaⁿ ní cuu vitna.

²⁴ Te òré ní ndiquíú iní té Chèé-áⁿ te ní quide-dé nàcuáa ní xáhaⁿ espíritú-áⁿ xii-dé chi ní tnãndaha-dé ndihí tá Màriá. ²⁵ Dico ndí dîⁿ ní xíndecú-yu ndéé ní sáá nduu ní cacú déhe-xi. Te òré ní cacú déhe-xi-áⁿ te ní dánání ñaha-dé Jèsús.

2

Cue tée cuàngoto ñaha xii Jèsús

¹ Te Jèsús ní cacú-gá ìⁿ ñuú nání Belén, te ñuú-áⁿ yíndèhu-xi distritú Jùdeá. Te dàvã-áⁿ cùnùu té Hèrodés yíndaha-dé ñáyiu. Te ñuú Jerusàlén ní quexio cue tée véxi ndàa xio nacuáa quène nchíanchii, cue tée túha dàcuaha cuendá nchaa sá ndéé andiú. ² Te ndùcu tnúhu-güedé núú ñáyiu ñuú-áⁿ, te xáhaⁿ-güedé:

—¿Vã cùndèe iní-ndó càchí tnúhu-ndo ndéé ndécú tée quíndaha ñaha xii ñáyiu isràèl-ãⁿ? Chi ní xiní-ndí ní quene chódíní-dé ndàa xio nacuáa quène nchíanchii, núú xiãⁿ véxi-ndí chi cuíní-ndí quíní-ndí-dé te chiñuhu-ndí-dé —càchí-güedé xáhaⁿ-güedé xíí-yu.

³ Te òré ní ñihí tée cùnùu nani Herodés tnúhu sã ndúcú tnúhu cue tée-áⁿ ndéé ndécú tée quíndaha ñaha xii ñáyiu isràèl, te ná túú tnáhí ní cùu váha iní-dé, te diu-ni ducaⁿ ñà túú ní cùu váha iní tnáhá nchaa ñáyiu ñuú-áⁿ. ⁴ Te ní cana-dé cue tée cùu

dútú cùnùu, ndihí cue tée dàcuaha ñaha xii ñáyiu nchaa tnúhu ní chídó tnùnì ndí Moisés, te ní xicáⁿ tnúhú-dé núú-güedé nũu xiní-güedé ndéé cacú Crístú tée ten-daha Yã Ndiõxí quixi ñuyú-a. ⁵ Te ní xáhaⁿ-güedé xii-dé:

—ìⁿ ñuú yíndèhu distritú Jùdeá cacú-dé, te ñuú-áⁿ nání-xí Belén, chi quee ndáá-xi nàcuáa ní xáhaⁿ Yã Ndiõxí xii ìⁿ tée ní xóo cáháⁿ tnúhu-gá ndéé sanaha. Te duha ndùu tnúhu ní chídó tnùnì-dé núú tùtú-gá:

⁶ Ñuú Belén cúu-xí ìⁿ ñuú líhli yíndèhu distritú Jùdeá, te ío-gá cùnùu-xi dacúúxí dàva-gá ñuú cùnùu yíndèhu distritú-áⁿ,

chi diu ñuú-áⁿ quee ìⁿ tée ío cùnùu.

Te tée cùnùu-áⁿ quíndaha-dé ñáyiu cùu cuendá-í ñáyiu isràèl.

Duha ní xáhaⁿ-gã xii tée ní xóo cáháⁿ tnúhu-gá, te ducaⁿ ní chídó tnùnì-dé núú tùtú-gá —càchí-güedé xáhaⁿ-güedé xii té Hèrodés.

⁷ Te sátá dúcáⁿ te té Hèrodés dayuhu ní cana-dé cue tée ndùcu tnúhu núú ndéé ní cacú tée quíndaha ñaha xii ñáyiu isràèl, te ní xicáⁿ tnúhú-dé núú-güedé ná nduu cùu-xi nduu díhna nuu ní xiní-güedé chódíní. ⁸ Te sátá dúcáⁿ te ní xáhaⁿ-dè xii-güedé:

—Chí cuáháⁿ ñuú Belén te nducu tnúhu váha-ndo nũu ndéé ní cacú tée ducaⁿ quíndaha ñaha xii ñáyiu isràèl. Te òré ná nãníhí-ndó-dé te quixi-ndo càchí tnúhu-ndo cuendá quíhí-í tnáhá-í chiñuhu-í-dé —càchí-dé xáhaⁿ-dè xii-güedé.

⁹ Te sátá dúcáⁿ ní xáhaⁿ tã Hèrodés-áⁿ te ní xica-güedé cuáháⁿ-güedé. Te chódíní ní xiní-güedé ní quene ndàa xio nacuáa quène nchíanchii-áⁿ yódo nuu-di núú-güedé cuáháⁿ. Te ní ngúíñí chódíní-áⁿ, te núú ní ngúíñí-di-áⁿ yíndáá núú ndécú Jèsús.

¹⁰ Te òré ní xiní cue tée-áⁿ ní ngúíñí chódíní-áⁿ nũu yíndáá ndécú-gã, te ní cudíí víhí iní-güedé. ¹¹ Te ducaⁿ te ní quexio-güedé ndéé núú cáá vèhe ndecu Jèsús. Te òré cuànguihu-güedé xití vehe te ní xiní-güedé Jèsús ndécú-gã ndihí nãná-gã Màriá. Te ní ngúíñí xití-güedé, te ní ngúíta-güedé ní cachí-güedé sá ío càhnu cuu Jèsús. Te dàtnùnì ní nacaáⁿ-güedé càjá xínehe-güedé, te ní tava-güedé díhúⁿ

cuàán, ndihi dúsa sá ïo váha sàháⁿ tnámí nàni insiensú, ndihi yúcu sá nání mirrá ní taxi ndecu-güedé núú Jèsús cuendá cuu-xi ìⁿ táhú sá cúu-xí-gǎ. ¹²Te Yá Ndiòxí ní cáháⁿ-gá núú sàní-güedé, te xàhaⁿ-gá xii-güedé sá vǎ náyáha-gǎ-güedé cáháⁿ ndihi-güedé té Hèrodés. Núú xíǎⁿ cue té-áⁿ cuánuhú-güedé ìngá ichi, te ñá túú-gǎ ní náyáha-güedé núú ndécú té Hèrodés.

Cuáháⁿ-yu ndihi Jèsús nàcióⁿ Ègiptú

¹³Te sáta ní yáha cuánuhú cue téé ní sǎngoto ñaha xii Jèsús, te ní quexio ìⁿ espíritú xínú cuèchi núú Yá Ndiòxí núú sàní té Chèé, te xàhaⁿ-xi xii-dé:

—Véxi-í cǎchí tnúhu-í xii-n sǎ ndacóo-n, te ndee-n ñúú-a ndihi Jèsús, ndihi náná-gǎ cunu-ndo quíhíⁿ-ndó nàcióⁿ Ègiptú, chi té Hèrodés tendaha-dé cue téé quixi nanducu ñaha xii Jèsús cuendá cǎhni ñaha-güedé. Te yàcáⁿ cundecu-ndo ndéé cǎchí tnúhu-í xii-n ndúu ndixi-ndo —cǎchí espíritú-áⁿ xàhaⁿ-xi xii té Chèé núú sàní-dé.

¹⁴Te té Chèé-áⁿ ní ndacóo-dé, te niú ní xica-dé ndihi tá Mária ndécá-yu Jèsús cuáháⁿ nàcióⁿ Ègiptú. ¹⁵Te nàcióⁿ Ègiptú-áⁿ ndécú-yu ní xíhí té Hèrodés. Te ducaⁿ ní cuu chi ní quee ndáá-xi nàcuáa ní cǎchí ìⁿ téé ní xóo cáháⁿ tnúhu Yá Ndiòxí ndéé sanaha ní quide-dé núú-gǎ ní cáháⁿ-dé yuhu-gǎ, te duha ní xàhaⁿ-gǎ ní cáháⁿ-dé: “Nàcióⁿ Ègiptú ndécú Dèhe-í ní cuu, te ní xàhaⁿ-í xii-dé sá ndéé-dé ñúú-áⁿ vǎ cündècu-gǎ-dé”, duha ní xàhaⁿ-gǎ xii téé ní cáháⁿ tnúhu-gǎ ní quide-dé núú-gǎ.

Té Hèrodés ní táuchíúⁿ-dè cǎhni-güedé cue landú

¹⁶Te cue téé ní sǎngoto ñaha xii Jèsús ní dándahú-güedé té Hèrodés, chi ñá túú ní náyáha-güedé cúñaha-güedé sá ní naníhí-güedé Jèsús. Te sáta ní cutnùní iní té Hèrodés sá ní dándahú ñáhá-güedé xii-dé te ní cudééⁿ víhí-dé, te ní tendaha-dé cue téé cuáháⁿ ñúú Bèlèn, ndihi nchaa dava-gǎ ñúú cáá yàtni xíǎⁿ cuendá cǎhni-güedé mee-ni cuè landú téé. Te ndéé cue landú íchí ní cacu, ndihi ndéé cue landú sa ní núnahá úú cuá-xi nchaa-güexi cǎhni-güedé ní xàhaⁿ-dè. Te ducaⁿ ní quide-dé chi ní quide cuendá-dé nàcuáa ndúu tnúhu ní xàhaⁿ cuè téé ní sǎngoto ñaha xii Jèsús nduu ní xiní-güedé chódíní,

núú xíǎⁿ ducaⁿ ní táuchíúⁿ-dè ní quide cue téé-áⁿ. ¹⁷Te ducaⁿ ní cuu chi ní quee ndáá-xi nàcuáa ní cǎchí ndí Jeremiás téé ní xóo cáháⁿ tnúhu Yá Ndiòxí ndéé sanaha, te duha ní cǎchí ndí:

¹⁸Ní tecú ndáhí víhí ñáyiú ñúú Rámá sá ndíhí iní-yu, te ñáyiú xíndáhyú-áⁿ cúú-yu ñaní tnáhá tǎ Ràquél, te ndáhyú-yu cuendá sá ní xíhí dèhe-yu.

Te ñáyiú-áⁿ ñá túú ní cuiní-yu dàná-yu sá ndíhí iní-yu cuendá sá ní xíhí dèhe-yu.

Duha ní cǎchí ndí Jeremiás.

¹⁹Te sáta ní xíhí té Hèrodés te ní sáháⁿ tucu espíritú xínú cuèchi núú Yá Ndiòxí núú sàní té Chèé òré ndécú-dé nàcióⁿ Ègiptú, te ní xàhaⁿ-xi xii-dé:

²⁰—Véxi tucu-í cǎchí tnúhu-í xii-n sǎ ndacóo-n, te nùhú-n ndihi Jèsús ndihi náná-gǎ ñúú cue ñaní tnáhá-n ñáyiú isràél cundecu-ndo, chi sa ní xíhí cue téé cuiní cǎhni ñaha xii Jèsús ní cuu —cǎchí espíritú-áⁿ xàhaⁿ-xi xii té Chèé núú sàní-dé.

²¹Te té Chèé-áⁿ ní ndacóo-dé, te ní ndee-dé ndihi Jèsús ndihi náná-gǎ cuánuhú-yu ñúú cue ñáyiú isràél ñáyiú cuu ñaní tnáhá-yu. ²²Te té Chèé ní níhí-dé tnúhu sá tǎ Arquèlaú ní nucúnutnùú-dé núú tǎtá-dé té Hèrodés distritú Júdeá yíndàha-dé ñáyiú. Te ní yùhú té Chèé-áⁿ, te ñá túú ní cuiní-dé quíhíⁿ-dé cundecu-dé distritú-áⁿ. Te Yá Ndiòxí ní cáháⁿ-gá núú sàní-dé, te ní xàhaⁿ-gǎ xii-dé sá quíhíⁿ-dé distritú Galileá, núú xíǎⁿ yàcáⁿ cuáháⁿ-yu.

²³Te òré ní quexió-yu distritú Galileá, te ní sáháⁿ-yu ìⁿ ñúú nání Nàzarét ní xíndecú-yu. Te ducaⁿ ní cuu chi ní quee ndáá-xi nàcuáa ní cǎchí cue téé ní xóo cáháⁿ tnúhu Yá Ndiòxí ndéé sanaha sá Jèsús cuu-gǎ téé ñúú Nàzarét.

3

Té Juáá téé dàcuandute ñaha xii ñáyiú cǎháⁿ-dé tnúhu Yá Ndiòxí xití yucu

(Mr. 1:1-8; Lc. 3:1-9, 15-17; Jn. 1:19-28)

¹Te ní xica nduu sá dúcáⁿ ní cuu, te téé nàni Juáá téé dacuandute ñaha xii ñáyiú ní quexio-dé yucu distritú Júdeá cǎháⁿ-dé tnúhu Yá Ndiòxí núú ñáyiú xití yucu-áⁿ. ²Te xàhaⁿ-dè xii-yu:

—Chí dándixi túu iní sá ñá túú quide váha-ndo ndècu-ndo, te dañá-ndo nchàa

ichi cuehé ichi duha, chi sa ní cuyatni nduu ndíhu ndaha ñaha Yá Ndiöxí xii-ndo — cächí-dé xáhaⁿ-dë xii-yu.

³ Te diu cuendá té Juää-án nǐ chídó tnùnǐ ndíi Chàiiá téé ní xóo cáháⁿ tnúhu Yá Ndiöxí ndéé sanaha, te duha ndúu tnúhu ní chídó tnùnǐ ndíi cuendá-dé:

Tècú càháⁿ nǐhi ìⁿ téé yìhi xití yucu, te cächí-dé:

“Chí dáña nchàa ichi cuehé ichi duha ndècu-ndo, te tni-ndo ìchi váha,

Te ducaⁿ càda-ndo cuendá cundecu túha-ndo chi véxi Yáá ío cùnuu”, duha quesaha tée-án.

Duha ndúu tnúhu ní chídó tnùnǐ ndíi Chàiiá-án cuendá té Juää.

⁴ Te té Juää-án nǐ xóo cuihu-dé dóó idi caméyu, te ìⁿ ñii ní cuu pàñú xití-dé, te ní xóo caxi-dé tíca langóstá ndíhi ndudí ñúú cuéchi. ⁵ Te ñáiyu ñúú Jerusalén, ndíhi ñáiyu nchaa ñúú yíndèhu distritú Júdeá, ndíhi ñáiyu nchaa ñúú cáá yàtni yúte Jòrdán ní sáháⁿ-yu ní xíndedóho-yu nacúaa ní cáháⁿ té Juää. ⁶ Te ní ngúita-yu ní náhmá-yu nchaa cuéchi-yu núú Yá Ndiöxí. Te òré ducaⁿ ní náhmá-yu te ní dácuañdute ñaha té Juää xii-yu yúte Jòrdán.

⁷ Te vai cue téé cùu fariséu ndíhi cue téé cùu saducéu cuáháⁿ-güedé núú ndécú tē Juää cuiní-güedé dacuandute ñaha-dé xii-güedé. Te òré ní quexio-güedé núú ndécú-dé, te ní xáhaⁿ-dë xii-güedé:

— ¡Nchaa nchòhó cùú-ndó dàtná ìⁿ cóó dëéⁿ chi ío cuihna ìní-ndó! ¿Te nása ní cuu núu tnáhá nchòhó ndúcú-ndó nacúaa cada-ndo càcu nihnu-ndo núú tnündòho cahnu vihi ta cuyatni ñaha xii-ndo véxi-i?

⁸ Te chí cáda váha vitna cundecu-ndo cuendá ducaⁿ cùnuni sá ní dáña-ndó nchàa ichi cuehé ichi duha ndècu-ndo. ⁹ Te vá cächí-ndó sǎ ío càhnu cuu-ndo cuendá sá cùú-ndó ñànǐ tnáhá ndíi Àbrahám. Chi cuéi ndéé yúu te ndacu Yá Ndiöxí ndada-gá ñáiyu te cuú-yu ñànǐ tnáhá ndíi Àbrahám.

¹⁰ Te caá chi ndècu túha-xi sá quèhndé-xi nchaa yutnu sá dúcáⁿ ñà túú càváha sávídí-xi-án, chi nchaa yutnu-án tēhndé-xi te cuánee-xi núú ñuhú càyú-xi. Te duha sàtnahá-xi ndoho nchaa ñáiyu ñá túú quide váha-án chi nchaa ñáiyu ñá túú quide váha cùu-yu dàtná nchaa yutnu sá ñà túú càváha sávídí-xi. ¹¹ Te na cächí tnúhu ndáá-í xii-ndo sǎ yúhú dacuandute-í

mee-ni ñáiyu ní dáña nchàa ichi cuehé ichi duha. Dico nchícúⁿ tucu íngá téé véxi, te téé-án taxi-dé Espíritú Yá Ndiöxí cundecu ndíhi-ndo. Te cùu-xi datná ìⁿ ñuhú, chi ndada ndoo ndada nine-xi ìní-ndó. Te téé-án ío-gá cùnùu-dé dàcúxí yúhú, chi yúhú cùú-í ìⁿ téé duuⁿ duuⁿ ñá túú tàú cuita nehe ni chàú-dé dico quide-í chiuⁿ-dé. ¹² Te téé-án sa véxi túha-dé sá cáda dèⁿ ñaha-dé xii-o dàtná quidé ñáiyu ndàda ndoo triú, chi ñáiyu-án sa nehe túha-ná-yu yaxíⁿ-yu òré nánǐni cuendá ndada ndoo-yu. Te òré ndádá ndòó-yu triú-án te dàquee dèⁿ-yu mihi-xi, te tàxúha-yu mee-ñá triú-án te sàhmí-yu mihi-xi-án. Te dàtná quidé-yu mihi triú-án ducaⁿ sàtnahá-xi cada ñaha téé-án xii nchaa ñáiyu ñá túú quide váha, chi daquihíⁿ ñáhá-dé xii-yu núú ñuhú núú càyú, te ñuhú-án ñà túú tnáhí ndàhvá — cächí-dé xáhaⁿ-dë xii-güedé.

Sàndute Jesús

(Mr. 1:9-11; Lc. 3:21-22)

¹³ Te Jèsús ní quee-gá distritú Galiléa cuáháⁿ-gá yúte Jòrdán núú ndécú tē Juää cuendá dacuandute ñaha-dé xii-gá. ¹⁴ Te òré ní quexio Jesús núú ndécú tē Juää, te ñá cuiní-dé dacuandute ñaha-dé xii-gá ní cùu, te ní xáhaⁿ-dë xii-gá:

— Yúhú tàú-í sá dacuandute ñaha-n xii-í, te ñá díú dà yúhú dacuandute ñaha-í xii-n — cächí-dé xáhaⁿ-dë xii-gá.

¹⁵ Te Jèsús ní xáhaⁿ-gá xii-dé:

— Queheⁿ dañá, chi dacuítí xini ñuhu-xi ducaⁿ cada-o nacúaa cundáá-ó núú Yá Ndiöxí — cächí-gá xáhaⁿ-gá xii-dé.

Te té Juää-án nǐ sáháⁿ uuⁿ-dé tnúhu ní xáhaⁿ Jèsús xii-dé. ¹⁶ Te ní dácuañdute-dé Jèsús. Te òré ní nene-gá xití ndute te ní xini-gá nchí andíu, te ní quee Espíritú Yá Ndiöxí véxi cuuⁿ-xi ngündecu ndíhi ñaha-xi xii-gá, te dàtná cáá ìⁿ lómá cáá Espíritú-án véxi cuuⁿ-xi. ¹⁷ Te òré-án nǐ tecú ní cáháⁿ Yá Ndiöxí ndéé andíu, te xáhaⁿ-gá xii Jèsús:

— Yòhó cùú-n Dèhe-í téé ío cùu ìní-í te ío cùdí ìní ñáhá-í xii-n — cächí-gá xáhaⁿ-gá xii Jèsús.

4

Sácuíhñá quidé yica-xi cada Jesús sá ñà túú tàú-gá cada-gá ní cùu

(Mr. 1:12-13; Lc. 4:1-13)

¹ Te Espiritú Yá Ndióxi ndécá-xí Jèsus cuáháⁿ ìⁿ xití yucu cuèndá yàcáⁿ cundecu tnaa-gá, te yàcáⁿ quexio sácufhná coto ndéé ñáhá-xí xii-gá te núu ndisa sá vâ cáda-gá ìⁿ sá ñà túú tàù-gá cada-gá.

² Te Jèsus ñá ní xèxi-gá údico nduu údico níú, te ducaⁿ te dätñuní ní xicáⁿ iní-gá caxi-gá. ³ Te sátá dúcáⁿ te ní quexio sácufhná quidé yica-xi cada Jesús ìⁿ sá ñà túú tàù-gá cada-gá, te xáhaⁿ-xi xii-gá:

—Te núu ndisa sá cúu-n Dêhe Yá Ndióxi te cñaha xii yúú-a na nduu-xi paá — cächí-xi xáhaⁿ-xi xii-gá.

⁴ Te Jèsus ní xáhaⁿ-gá xii-xi:

—Núú tütú Yá Ndióxi cächí-xi: “Ñá díú mèe-ni paá candeca-xi iní ñáyiú ñuyúú, chi tnàhá nchaa tnúhu càháⁿ Yá Ndióxi candeca-xi iní-yu”, duha cächí-xi núú tütú-gá —cächí-gá xáhaⁿ-gá xii-xi.

⁵ Te dätñuní sácufhná-áⁿ ndécá ñaha-xi xii-gá cuáháⁿ ñuu Jerusálén, te yàcáⁿ ní xáhaⁿ-xi xii-gá cuasaá-gá díquí vénñuhu càhnu sá ïo cñuu núú ñáyiú isràél, ⁶ te dätñuní ní xáhaⁿ tùcu-xi xii-gá:

—Te núu ndisa cùu-n Dêhe Yá Ndióxi te cuandé ndava núú ñúhú cuèndá quee ndáá-xi nàcuáa càháⁿ-xi núú tütú-gá núú cächí-xi: “Yá Ndióxi tendaha-gá cue espíritu xínú cuèchi núú-gá quixi-xi cuèndá coto ñaha-xi xii-n, te núú ndáhá-xí cãundodo-n cuèndá sá vâ dãnícuehé yúú sáhá-n”, duha cächí-xi núú tütú-gá —cächí sácufhná-áⁿ xáhaⁿ-xi xii Jesús.

⁷ Te Jèsus ní xáhaⁿ-gá xii-xi:

—Te cächí tucu-xi núú tütú Yá Ndióxi: “Vá cání ìní-n còto ndeé-n Dütú Ndióxi Yaá cúú Ndióxi-n cuèndá-ni sá cuìní-n sã dácãcu nihnu ñaha-gá xii-n ìⁿ sá sání ìní-n càda-n”, duha cächí-xi núú tütú-gá — cächí-gá xáhaⁿ-gá xii-xi.

⁸ Te sácufhná ndécá tùcu-xi Jesús cuáháⁿ ìⁿ núú tìndúú dúcú, te uuⁿ ní dánèhé núú ñáhá-xí xii-gá nchaandi túhú nacióⁿ cáá ñuyúú, ndíhi nchaa sá vâha ïó ìⁿ ìⁿ nacióⁿ-áⁿ. ⁹ Te ní xáhaⁿ-xi xii-gá:

—Te núu yòhó nguñí xití-n nùú-í chiñuhu ñaha-n xii-í ñá, te taxi cuèndá-í nchaa sá ní dánèhé ñáhá-í-a cuu cuèndá-n —cächí-xi xáhaⁿ-xi xii-gá.

¹⁰ Te Jèsus ní xáhaⁿ-gá xii-xi:

—Xocuñí yòhó sácufhná nùú ndécù-í-a, chi vá cúú càda-í nàcuáa cächí-n, chi núú

tütú Yá Ndióxi cächí-xi: “Chiñuhu-ndo Dütú Ndióxi Yaá cúú Ndióxi-ndó, te diu-ni-gá cada-ndo nchaa nacuáa càháⁿ-gá”, duha cächí-xi núú tütú-gá — cächí-gá xáhaⁿ-gá xii-xi.

¹¹ Te dätñuní sácufhná ní dáñá-xí Jèsus ní xica-xi cuáháⁿ-xi. Te sátá dúcáⁿ te ní quexio cue espíritu xínú cuèchi núú Yá Ndióxi ní xinu cuechi-xi núú Jèsus.

Distritú Galiléa ní chisaha Jèsus chiúⁿ ní tãhú Tãtã-gá Dütú Ndióxi cada-gá

(Mr. 1:14-15; Lc. 4:14-15)

¹² Te òré ní ñíhi Jèsus tnúhu sá ñ ngava té Juáá tée dàcuandute ñaha xii ñáyiú vecaá, te ní xica-gá cuáháⁿ-gá distritú Galiléa. ¹³ Te ni ñà túú ní xìndecu-gá ñuu Nazàrét, chi ní yáha-gá cuáháⁿ-gá ndéé ñuu Capèrnaúm yàcáⁿ ní xìndecu-gá, te ñuu-áⁿ cáá yàtni yuhu lagúná, te yatni xíáⁿ cáá ñuhu nani Zabolón, ndíhi ñuhu nani Neftalí. ¹⁴ Te ducaⁿ ní cuu chi ní quee ndáá-xi nàcuáa ní chídó tnùní ndí Chàia tée ní xóo càháⁿ tnúhu Yá Ndióxi ndéé sanaha núú tütú-gá núú cächí-xi:

¹⁵ Ñuhu nani Zabolón, ndíhi ñuhu nani Neftalí, ñuhu-áⁿ yíndèhu-xi distritú Galiléa,

te xíáⁿ xìndecu cue ñáyiú ñá túú cùu ñáyiú isràél,

te càa-xi yatni yuhu lagúná te ndaa ìngá xio yúte Jòrdán cúú-xí.

¹⁶ Te cue ñáyiú-áⁿ ndécú-yu ìⁿ núú néé chi ndécú-yu ichi cuèhé ichi duha, te sáá nduu te cada iní-ndó sã ñáyiú-áⁿ queé-yu núú dító chi vá cündècu-gá-yu ichi cuèhé ichi duha.

Te diu-ni ñáyiú-áⁿ cúú-yu ñáyiú ta xíta nihnu duuⁿ cuáháⁿ,

dico sáá nduu te vá cuíta nihnu-gá-yu. Duha ní chídó tnùní ndíi núú tütú-gá.

¹⁷ Te dàvã-áⁿ ní nguíta Jèsus ní dánèhé-gá ñáyiú, te ní xáhaⁿ-gá xii-yu:

—Chí dándixi túu iní sá ñà túú quide váha-ndo ndècu-ndo te dañã-ndo nchaa ichi cuèhé ichi duha, chi sa ní cuyatni nduu ndíhu ndaha ñaha Yá Ndióxi xii-ndo — cächí-gá xáhaⁿ-gá xii-yu.

Jèsus càháⁿ-gá cúmí tnàhá cue tée tnñ chácá

(Mr. 1:16-20; Lc. 5:1-11)

¹⁸ Te Jèsus ñúhú-gá ichi cuáháⁿ-gá tá yáha-gá yuhu lagúná Galiléa, te ní

xiní-gá úu tñhá cue téé xídáquëe-güedé ñunu-güedé xití ndute tñhí-güedé chácá, chí quití tñhí-áⁿ cúu chiùn-güedé tñhí-güedé-di. Te ñⁿ-dé nání-dě Xímú, àdi Pelú chi úu ñu-dé, te ñaní-dé cúu ñngá téé ndíhi-dé te téé-án nání-dě Ndríxi. ¹⁹Te Jèsús ní xáhaⁿ-gã xii-güedé:

—Chí dǎná chiùn quide-ndo-án te quixi-ndo chitnahá ñáhá-ndó xii-í, te taxi-í ñngá núu chiùn cada-ndo chi quíhíⁿ-ndó dǎcaháⁿ-ndó ñáyiú cuendá tuha ñáhá-yu xii-í —cáchi-gá xáhaⁿ-gã xii-güedé.

²⁰ Te òré-ni-án ní dǎná cuè téé-án ñunu-güedé, te ní tuha-güedé Jèsús.

²¹ Te ní xica tucu Jèsús cuáháⁿ-gá luha-gá, te ní xiní tucu-gá úu-gá tñhá cue téé tñhí chácá. Te ñⁿ téé-án nání-dě Jàcobó, te ñaní-dé cúu ñngá téé ndíhi-dé te téé-án nání-dě Juàá, te ndí ndúu-güedé cúu-güedé déhe té Zebèdeú. Te xixínucóo-güedé ndíhi tǎtá-güedé xití bàrcú xínatícu-güedé ñunu-güedé, te Jèsús ní cana ñaha-gá xii-güedé.

²² Te òré-ni-án ní dándóo-güedé bàrcú-güedé, ndíhi tǎtá-güedé, te ní tuha ñaha-güedé xii-gá.

Jèsús dánèhé-gá cuèhé víhí ñáyiú
(Lc. 6:17-19)

²³ Te Jèsús tá xica ndodo-gá nihíi distritú Galileá cuáháⁿ tá dǎnehé-gá ñáyiú tñúhu váha tñúhu sá sánú ìchi ñaha xii-yu nàcuáa ndíhu ndaha ñaha Yá Ndióxi xii-yu. Te ndí tnahá ñⁿ ñⁿ ñuú sáá-gá te ducaⁿ cuǎnguíhu-gá xití veñúhu dǎnehé-gá ñáyiú tñúhu-án. Te ndí ñⁿ ndí ñⁿ núu cuèhé tñhá ñⁿ ñⁿ ñáyiú dico nchaa-ní-yu ta quide tǎtna-gá cuáháⁿ. ²⁴ Te ndéé nchaa ñáyiú yíndehu distritú Siríá ní níhí-yu tñúhu nchaa nàcuáa quide Jèsús. Te ní quèé-yu ñuú-yu te ndécá-yu nchaa ñáyiú tñhá ndí ñⁿ núu cuèhé cuáháⁿ núu ndécú Jèsús. Te cuèí ñáyiú xiyíhí, ndíhi ñáyiú ñá túú-gá càndá nihnu, ndíhi ñáyiú yíhí ñaha espíritú cundíhi yucu ñáváha ndécá-yu cuáháⁿ núu-gã, te nchaa-yu ní quide tǎtna ñaha-gã xii-yu. ²⁵ Te ío vai ñáyiú ní chinchícúⁿ ñáhá xii Jèsús, chí ní chinchícúⁿ ñáhá ñáyiú distritú Galileá, ndíhi ñáyiú nchaa ñuú xíndáa Dècápolís, ndíhi ñáyiú ñuú Jerusàlén, ndíhi cue ñáyiú

nchaa ñuú yíndèhu distritú Jùdeá, ndíhi ñáyiú xíndecu yatni yúte Jórdán ndáa xio quene nchícanhíi.

5

Jèsús núcòo-gá ñⁿ núu tìndúú dǎnehé-gá ñáyiú

¹ Te sǎtá ní xiní Jèsús sá cuèhé víhí ñáyiú nchícúⁿ ñáhá xii-gá, te ní xica-gá cuásaá-gá ñⁿ núu tìndúú te xíaⁿ ní ngóo-gá, te cue téé xica cue ndíhi-gá ní nadúcúⁿ ndéé ñáhá-güedé xii-gá. ² Te ní nguíta-gá dǎnehé ñáhá-gã xii-güedé ndíhi cue ñáyiú-án, te xáhaⁿ-gã:

Cuendá ñáyiú ío váha tǎhú-xi
(Lc. 6:20-23)

³ —Váha tǎhú nchaa ñáyiú cùtnuní iní-xi sá ío-gá cùmǎní-yu cudíú-yu núu Yá Ndióxi, chí ñáyiú-án nduu tǎhú-yu ndíhu ndaha ñaha-gá xii-yu.

⁴ 'Váha tǎhú nchaa ñáyiú ndàhyú sá ndíhú iní-yu, chí Yá Ndióxi cuǎñaha-gã tñúhu ndee ñí cundecu ndíhí-yu.

⁵ 'Váha tǎhú nchaa ñáyiú ndàhú iní-xi, chí ñáyiú-án nduu tǎhú-yu cundecú-yu ñⁿ xichi núu cuǎñaha Yá Ndióxi xii-yu.

⁶ 'Váha tǎhú nchaa ñáyiú ío cuíní cada nchaa nàcuáa càháⁿ Yá Ndióxi, chí ñáyiú-án ío nduu vétú iní-yu.

⁷ 'Váha tǎhú nchaa ñáyiú cundahú iní tñaha ñáyiú-xi, chí ñáyiú-án diu-ni ducaⁿ càda ñaha Yá Ndióxi xii-yu cundàhú iní ñáhá-gã.

⁸ 'Váha tǎhú nchaa ñáyiú ní nduu ndoo ní nduu nine iní-xi, chí cue ñáyiú-án nduu tǎhú-yu cundecú-yu ndíhi Yá Ndióxi.

⁹ 'Váha tǎhú nchaa ñáyiú càháⁿ dóho tñaha ñáyiú-xi nàcuáa cundecu ndíhi váha tñáhá-yu, chí cùtnuní sá ñáyiú-án cuú-yu déhe Yá Ndióxi.

¹⁰ 'Váha tǎhú nchaa ñáyiú ío ndòho ndecu ñuyú-a sá cuendá sá quidè-yu nàcuáa càháⁿ Yá Ndióxi, chí ñáyiú-án nduu tǎhú-yu ndíhu ndaha ñaha-gá xii-yu.

¹¹ 'Te cùu-ndo ñáyiú ío váha tǎhú-xi te núu na cùcuèhé ñáhá ñáyiú, àdi cada úhú ñáhá-yu xii-ndo, àdi daciaa díquí ñáhá-yu nándí cuèchi neñúú xii-ndo sá cuendá-í. ¹² Te òré ducaⁿ na càda ñáhá-yu xii-ndo te cudíí víhí-ní ñí-ndó cundecu-ndo, chí ío váha càa sá ndécú àndiu nduu tǎhú-ndó

cùndecu ndìhi-ndo nduu na saá-ndó yàcáⁿ cundecu-ndo, chi diu-ni ducaⁿ ní xóo cada ñaha cuè ñani tnáhã-yu xii cue tée ní xóo cáháⁿ tnúhu Yá Ndiòxí ní xíndecu ndéé sanaha.

*Cuèndá ñíí ndìhi cuèndá ñuhú
(Mr. 9:50; Lc. 14:34-35)*

¹³ Te nchòhó cada iní-ndó sá cúú-ndó dàtná ñíí cuèndá ñuyíú-a. Te ñíí chi nándìhi-xi dico núu na nduu víxíⁿ-xi, te ñá túú-gã nándìhi-xi chi dǎngoyo-ná-ó, te yáha ñáyíu xènihnú-yu. Te ducaⁿ sǎt-nahá-xi cúu nchohó chi cùu-ndo datná ñíí vǎha te núu na càda váha-ndo, te núu vá cádá vǎha-ndo te quee tǎhú-ndó.

¹⁴ Te nchòhó cada iní-ndó sá cúú-ndó dàtná ñíí sá dáyhé ndécú ñuyíú-a, chi sǎnu ichi-ndo ñáyíu ichi váha. Te nchòhó xini-ndó sá núu ñíí ñuu cáá ñíí núú tǎndúú te vá cúú càchí-ó sǎ nguǎvǎha-xi. ¹⁵ Te ñá túú xini-ó ñíí ñáyíu teñuhú-yu ñíí lín-térná te chiváha-yu xití ñíí càjá, chi tàxi ndecú-yu núu ñíí cuèndá cutnùní núú nchàa ñáyíu ndecu vehe. ¹⁶ Te ducaⁿ càda nchohó cada váha-ndo dàtná quidé ñíí ñuhú dayèhe-xi núú ñáyíu, te ducaⁿ quini ñáyíu nàcuáa quide-ndo ndecu-ndo, te tnáhã-yu cachí-yu sá ño càhnu cuu Dútú Ndiòxí Yáá cúú Tǎtá-ndó ndècu andiú chi quini-yu sá quidé vǎha-ndo ndècu-ndo.

Cuèndá tnúhu ní chídó tnùnì ndíí Moisés

¹⁷ Te vá cání iní-ndó sá yǎhú véxi-í xocàni-í tnúhu ní chídó tnùnì ndíí Moisés, te ní vǎ cání iní-ndó sá véxi-í xocàni-í tnúhu ní chídó tnùnì cue tée ní xóo cáháⁿ tnúhu Yá Ndiòxí ndéé sanaha, chi yǎhú véxi-í sá càdá-í nàcuáa càháⁿ nchaa tnúhu-áⁿ. ¹⁸ Te na càchí tnúhu nchaa-í xii-ndo sǎ tnúhu ní chídó tnùnì ndíí Moisés ío ndáá càháⁿ-xi, chi dacuitíí cùu nchaa nacuáa càháⁿ-xi. Te yáchí-gá naa andiú ndìhi ñuyíú dàcúúxí sǎ quèe cáva ñíí tnúhu-áⁿ. ¹⁹ Núu xíáⁿ nchaa ñáyíu na càchí sǎ dává tnúhu ní chídó tnùnì ndíí Moisés ñá túú xini ñuhú-xi chi ñá túú cùnuu-xi, te ñáyíu-áⁿ diu-ni ducaⁿ dànehé-yu nchaa dava-gá tnàha ñáyíú-yu, te sá dúcáⁿ quidé-yu te vá cùnúu vihi-yu núú ndécú Yá Ndiòxí táxí tnùnì-gá, chi cuú-yu dàtná ñíí ñáyíu nchìcúⁿ cuíí-nǎ. Dico nchaa ñáyíu nchìcúⁿ nihnu quide nchaa nacuáa càháⁿ nchaa tnúhu-áⁿ, te

diu-ni ducaⁿ dànehé-yu nchaa dava-gá tnàha ñáyíú-yu, te ñáyíu-áⁿ ño cùnúú-yu núú ndécú Yá Ndiòxí táxí tnùnì-gá. ²⁰ Te na càchí tnúhu-í xii-ndo sǎ ño xini ñuhú-xi càda-ndo nchaa nacuáa càháⁿ Yá Ndiòxí, te vá cádá-ndó dàtná xǐquide cue tée dànehé ñáhá xii ñáyíu nchaa tnúhu ní chídó tnùnì ndíí Moisés, ndìhi dàtná xǐquide cue tée cùu fariséú, chi núu na càda-ndo datná xǐquide cue tée-áⁿ ñá, te vá ndúú tǎhú-ndó ndíhu ndaha ñàha Yá Ndiòxí xii-ndo.

*Jèsús càháⁿ-gá cuèndá ñáyíu cùdèéⁿ
(Lc. 12:57-59)*

²¹ Te nchòhó sa xini-ndó sǎ nchǎá ñáyíu ní cuu ñani tnáhã-ndó ní xíndecu ndéé sanaha ní ñíhi-yu tnúhu sá vǎ cúú càhni-yu tnàha ñáyíú-yu, chi núu ducaⁿ na càdá-yu te nacháhu-yu cuéchi-yu. ²² Dico vitna na càchí tnúhu-í xii-ndo sǎ núu ndédani càa-ndo na cudééⁿ-ndó núú tnàha ñáyíu-ndo, te nacháhu-ndo sǎ dúcáⁿ quide-ndo, àdi núu na cǔcuèhé-ndó-yu te núú chítú núú tàcá cundáá cuéchi-ndo te núu ducaⁿ na càda-ndo, àdi núu nà cùu-ndo tnàha ñáyíu-ndo ñíí tnúhu vée vihi, te cucuéchi vihi xii-ndo chi quíhíⁿ-ndó núú ùhú núú ndáhú.

²³ Te xíáⁿ núu nchòhó òré ndécú ndìhi-ndo ñíí sá cùnì-ndó cuáha-ndo Yá Ndiòxí nduu tǎhú-gǎ, te òré cuáhãⁿ-ndó cuáñaha-ndo xii-gá, te òré ní quexìo-ndo núú dúcáⁿ cuáñaha-ndo xii-gá sá ndúú tǎhú-gǎ, te ní ndacu iní-ndó sǎ ndécú ñáyíu ñá túú cùu váha iní ñáhá xii-ndo cuèndá ñíí sá ní cumání núú tnáhã-ndó. ²⁴ Te dàndóo-ndo sǎ dúcáⁿ nèhe-ndo cuáhãⁿ nduu tǎhú Yá Ndiòxí, te díhna-gá quíhíⁿ-ndó nàcáhãⁿ càhnú iní tnáhã-ndó ndìhi ñáyíu ñá túú cùu váha iní ñáhá xii-ndo-áⁿ, te dàtnùnì ducaⁿ te quíhíⁿ-ndó cuáha-ndo Yá Ndiòxí sá ndúú tǎhú-gǎ.

²⁵ Te núu ío ñíí-ndo ní sáhãⁿ ñáyíu núú tǎe cùchiuⁿ ní sacáⁿ cuéchi-yu cuèndá-ndó cuèndá ñíí sá ní quide-ndo, te òré ní naníhí tnáhã-ndó ndìhí-yu cuáhãⁿ-ndó núú tǎe cùchiuⁿ-áⁿ, te nacáhãⁿ càhnú iní tnáhã-ndó ndìhí-yu cuèndá sá vǎ cuáha cuèndá ñáhã-gǎ-yu xii-ndo núú tǎe cùchiuⁿ, chi núu ducaⁿ na càdá-yu te tée cùchiuⁿ-áⁿ cuáha cuèndá ñáhã-dǎ xii-ndo núú cuè tée cùu polecía, te cue tée-áⁿ chihi ñàha-güedǎ vecaá xii-ndo. ²⁶ Te na càchí tnúhu ndáá-í

xii-ndo sã vã cãcu-ndo te núu na ngáva-ndo
vecaá ndéé nacháhu-ndo nchãa sã tãú-ndó.

Cuendá cue ñáyiú ñã túú quide váha

²⁷ Te nchòhò sa xiní-ndó nacuaá ndùu
tnúhu ní cáháⁿ cue téé ní xíndecu ndéé
sanaha, te duha ní cachí-güedé: “Nchaa
cue téé vá cúú cáháⁿ ndihí-güedé ñadìhí te
núu ñã díú ñadìhí-güedé cúú-yu, te diu-ni
ducaⁿ tucu nchaa cue ñáyiú ñãhí vá cúú
cáháⁿ ndihí-yu téé te núu ñã díú yíi-yu
cùu-güedé”, duha ní cachi-güedé. ²⁸ Dico
yúhú cãhí tnúhu-í xii-ndo sã ndéda-ni cãa
cue téé na cùndehé ìⁿ ñadìhí te núu na cãni
iní-güedé cundecu díí ín-güedé ndihí-yu
te cada ín-ndó sã dàtná sã sã ní cáháⁿ
ndihí ñaha-güedé xí-yu sã dúcáⁿ ní sani
iní-güedé.

²⁹ Te núu ìⁿ xio tinùu-ndo quide-xi
quide-ndo nãndi sã cuèhé sã dúhá te
tava-ndo, chi váha-gá sã ná cuíta te ñã díú
ñihí ní ndúú yiqui cuñú-ndó quíhíⁿ-xi núú
ùhú núú ndáhú. ³⁰ Te núu ìⁿ xio ndaha-ndo
quide-xi quide-ndo nãndi sã cuèhé sã dúhá
te quehndé-ndó, chi váha-gá sã ná cuíta
ìⁿ xio ndaha-ndo te ñã díú sã ñihí ní
ndúú yiqui cuñú-ndó quíhíⁿ-xi núú ùhú
núú ndáhú.

*Jesús cáháⁿ-gá cuendá cue ñáyiú dàña
tnaha*

(Mt. 19:9; Mr. 10:11-12; Lc. 16:18)

³¹ Te nchòhò sa ñaha tucu-ndo nacuaá
ní cáháⁿ tucu cue téé ní xíndecu ndéé
sanaha, te duha ní cachí-güedé: “Te núu
ìⁿ téé na dàña tnaha-dé ndihí ñadìhí-dé, te
xini ñuhu-xi cadúha-dé ìⁿ tutú cuãñaha-dé
núú cáháⁿ-xi sã ní dàñá ñaha-dé”, duha
ní cachí-güedé. ³² Dico yúhú cãhí tnúhu-í
xii-ndo sã cúú dàña ìⁿ téé ñadìhí-dé, te núu
cutnuni ndáá ín-dé sã cáháⁿ ndihí-aⁿ ingá
téé. Dico núu ñã túú dùcaⁿ quide-aⁿ te ñã
túú ndùu váha-xi dàña ñaha-dé. Te núu ñã
túú dùcaⁿ quide ñadìhí-dé, te cada ín-ó sã
méé-dé ní sanu ichi ñaha-dé xii-aⁿ cáháⁿ
ndihí-aⁿ ingá téé te núu na dàña ñaha-dé.
Te téé na nãqueheⁿ ñaha xii ñaha ní dàñá
ñaha yíi-xi-áⁿ, te diu-ni ñã túú ní quide
váha-dé sã dúcáⁿ ní naqueheⁿ-dé ñaha-áⁿ.

*Ñáyiú cãcunehe ñaha xii Yá Ndiòxí cuendá
cutnuni ínì tnaha ñáyiú-yu sã ndáá cada-yu ìⁿ
sã sání ínì-yu cada-yu*

³³ Te sa ñaha tucu-ndo nacuaá ní
cáháⁿ tucu cue téé ní xíndecu ndéé

sanaha, chi cue téé-áⁿ ní cachí-güedé:
“Te núu cãcunehe-ndo Yá Ndiòxí núú
tnaha ñáyiú-ndo nacuaá cutnuni ínì-yu
sã ndáa cada-ndo ìⁿ sã sání ínì-ndó
cãda-ndo, te cada-ndo”, duha ní cáháⁿ dóho
tnaha-güedé. ³⁴ Dico yúhú cãhí tnúhu-í
xii-ndo sã ñã túú nã cacunehe-ndo sã ndáa
cada-ndo ìⁿ sã sání ínì-ndó cãda-ndo. Te
ni vã cãcú ñehé-ndo andiu chi yacáⁿ cúú-xí
núú núcõo Yá Ndiòxí táxí tnuní-gá. ³⁵ Te
ni vã cãcú ñehé-ndo ñuyú-a, chi tnahá
ñuyú-a ndècu-gá, te ni vã cãcú ñehé-ndo
ñuu Jerusalén chi ñuu-áⁿ cúú cuendá-gá,
te diu-gá cúú-gã Yaá ío cunu. ³⁶ Te ni vã
cãcú ñehé-ndo díquí-ndó chi ñaha-ndo sã
ni ìⁿ idi díquí-ndó ñã ndácú-ndó ndada
cuixíⁿ-ndó àdi ndada tnuu-ndo. ³⁷ Te
váha-gá sã núu ìⁿ sã sání ínì-ndó cãda-ndo,
te cachí-ni-ndo: “Cuu cada-ndí, àdi vá cúú
cãda-ndí”, cachí-ni-ndo. Chi nchaa dava-gá
sã chídó-ndó cáháⁿ-ndó òré ducaⁿ sání
iní-ndó cãda-ndo ìⁿ sã cáda-ndó cùu-xi sã
dácàhu ínì ñáhá yucu ñávãha.

*Cuendá ñáyiú nãchinaa sã quidé ñaha
tnaha ñáyiú-xi*

(Lc. 6:29-30)

³⁸ Te sa ñaha tucu-ndo nacuaá ní cáháⁿ
tucu cue téé ní xíndecu ndéé sanaha,
chi cue téé-áⁿ ní cachí-güedé: “Ñáyiú na
cãda ñaha tnaha ñáyiú-xi ìⁿ sã ñã túú
váha, te nanchòcáva-yu nachinaá-yu sã
ní quide ñaha tnaha ñáyiú-yu”, duha ní
cachí-güedé. ³⁹ Dico yúhú cãhí tnúhu-í
xii-ndo sã ñã túú nã cada-ndo nchãa
cue ñáyiú cuihna ínì-xi te núu quide
ñahá-yu ìⁿ sã ñã túú váha xii-ndo. Te
núu ní canihá-yu ìⁿ xito te cuini tucú-yu
canihá-yu ingá xito te dañe-ndo na
cãnihá-yu. ⁴⁰ Àdi ní sacáⁿ cuèchi-yu núú
cuè téé cùchiuⁿ cuendá-ndó, te cuini-yu
quendeé-yu dúhnú-ndó te dañe-ndo na
cãnehé-yu quíhíⁿ, te tnahá-ni dóó ndíxí
ndòdo-ndo dañe-ndo na canehé-yu quíhíⁿ.
⁴¹ Te núu quide yicá-yu caca-ndo dàtná úú
kilómetrú cuido-ndo ndàchiúⁿ-yu ña, te
chido-ndo úú-gá tucu kilómetrú cuido-ndo
ndàchiúⁿ-yu. ⁴² Te núu ío ìⁿ sã xicáⁿ-yu
núú-ndó te cuãñaha-ndo, àdi ío ìⁿ sã
sánùu-yu núú-ndó te cuãñaha nùu-ndo.

*Cuu ínì-ó nchãa ñáyiú cùu úhú ínì ñáhá
xii-o*

(Lc. 6:27-28, 32-36)

⁴³ Te sa nàha tucu-ndo nacuaá ní cachí tucu cue tée ní xindecu ndéé sanaha, chi cue tée-án ní cachí-güedé: “Cuu iní-ndó cuè ñáyi ndècu ndíhi váha-ndo, te cuu úhú iní-ndó cuè ñáyi cuu úhú iní ñáhá xii-ndo”, duha ní cachí-güedé. ⁴⁴ Dico yúhú càchí tnúhu-í xii-ndo sá cúú iní-ndó cuè ñáyi cuu úhú iní ñáhá xii-ndo, te cáháⁿ váha-ndo cuendá cue ñáyi cuè cáháⁿ úhú ñáhá xii-ndo, te cada-ndo sá váha sá cúú-xí cuè ñáyi cuu úhú iní ñáhá xii-ndo, te cáháⁿ ndíhi-ndo Yá Ndióxi cuendá cue ñáyi xicuehé ñáhá xii-ndo, ndíhi cuendá cue ñáyi quide úhú ñáhá xii-ndo. ⁴⁵ Te núu na càda-ndo nchaa nacuaá càháⁿ-í-a, te ducaⁿ te cutnùni sá cúú-ndó dèhe Tátá-ndó Dútú Ndióxi Yaá ndécú àndiu. Te diu-gá cúú-gá Yaá quidé quene nchanchii, te diu-ni-gá cúú-gá Yaá dácùuⁿ dáu ñuyíú-a, te ducaⁿ quide-gá cuendá cuu-xi sá váha sá cúú-xí cuè ñáyi quide váha, ndíhi sá cúú-xí cuè ñáyi ñá túú quide váha. ⁴⁶ Te núu nchòhó ná cúú iní-ndó mèe-ni ñáyi na cuu iní ñáhá xii-ndo, te vá càchí-ndó sá Yá Ndióxi taxi-gá sá ndúú tǎhú-ndó sá dúcáⁿ quide-ndo, chi cuèi cue tée cuihna iní-xi quide cobrá ñáhá xii cue ñáyi cuendá impuèstú ducaⁿ xíquide-güedé. ⁴⁷ Te núu mee-ni ñáyi ndècu ndíhi váha-ndo ìo váha cáháⁿ ndíhi-ndó-yu, te vá càchí-ndó sá ìo váha quide-ndo sá dúcáⁿ quide-ndo, chi cuèi ndéé nchaa ñáyi ñá túú xini dana cuendá Yá Ndióxi ducaⁿ xíquide-yu. ⁴⁸ Te duha ndúu tnúhu càháⁿ-í cuendá sá nchòhó cada ndáá-ndó cùndecu-ndo datná quidé ndáá méé Tátá-ndó Dútú Ndióxi Yaá ndécú àndiu —duha ní dánèhé ñáhá Jèsús xii cue tée xica cuu ndíhi-gá ndíhi nchaa ñáyi.

6

Jèsús dánèhé-gá ñáyi nacuaá cada-yu sá váha

¹ Te Jèsús ndécú-ní-gá dánèhé-gá cue tée xica cuu ndíhi-gá ndíhi nchaa ñáyi, te xáhaⁿ-gá:

—Te òré quidé-ndó sá váha te vá cada-ndó núú ñáyi cuendá-ni sá cuini-ndó cáháⁿ váha-yu cuendá-ndó, chi núu núú ñáyi ducaⁿ na càda-ndo te Dútú Ndióxi Yaá cúú Tátá-ndó vá taxi-gá sá ndúú tǎhú-ndó.

² Te xíãⁿ núu nchòhó òré chindèe-ndo ñáyi ndàhú, te vá cñaha-ndo xii cue ñáyi sá chindèe-ndo cue ñáyi ndàhú-áⁿ datná xíquide cue ñáyi dandahú méé-xí

sá quidé ndáá te ñá ndáá sá quidé ndáá-yu, chi ñáyi-áⁿ ducaⁿ xíquide-yu òré sáháⁿ-yu veñuhu, chi datecú tnúhu-yu nchaa ñáyi òré ducaⁿ chindee-yu ñáyi ndàhú. Te diu-ni ducaⁿ quidé-yu xáhãⁿ-yu xii cue ñáyi sá chindèe-yu cue ñáyi ndàhú-áⁿ nchaa núu xíca cúú-yu, te ducaⁿ xíquide-yu cuendá cuini-yu cáháⁿ váha ñáyi cuendá-yu. Te yúhú na càchí tnúhu ndáá-í xii-ndo sá ñá túú ná nduu tǎhú ñáyi-áⁿ núú Yá Ndióxi sá dúcáⁿ quidé-yu chi mee-ni núú tnàha ñáyi-yu cùdiú-yu. ³ Te nchòhó òré chindèe-ndo ñáyi ndàhú, te cuèi ñáyi ío-gá váha ndècu ndíhi-ndo dico vá cñaha-ndo sá dúcáⁿ chindee-ndo cue ñáyi ndàhú-áⁿ, te ni cuèi dava-gá ñáyi vá cñaha-ndo. ⁴ Chi váha-gá sá iní méé-ní-ndó ná cùhuⁿ sá dúcáⁿ chindee-ndo cue ñáyi ndàhú-áⁿ. Te núu ducaⁿ na càda-ndo ña, te Dútú Ndióxi Yaá cúú Tátá-ndó taxi-gá sá ndúú tǎhú-ndó chi diu-ni mee-gá ndéhé-gá nacuaá quide-ndo ndecu-ndo.

Jèsús dánèhé-gá ñáyi nacuaá cáháⁿ ndíhi-yu Yá Ndióxi

(Lc. 11:2-4)

⁵ Te nchòhó òré cáháⁿ ndíhi-ndo Yá Ndióxi, te vá cada-ndó datná xíquide cue ñáyi dandahú méé-xí cachí sá quidé ndáá te ñá ndáá sá quidé ndáá-yu, chi ñáyi-áⁿ tnàhá iní-yu cunutñi-yu cáháⁿ ndíhi-yu Yá Ndióxi òré yíñi-yu veñuhu. Te diu-ni ducaⁿ xíquide-yu nchaa núu xíca cúú-yu, te ducaⁿ quidé-yu cuendá sá cuini-yu quini ñáyi nacuaá xíquide-yu. Te na càchí tnúhu ndáá-í xii-ndo sá ñá túú ná nduu tǎhú ñáyi-áⁿ núú Yá Ndióxi sá dúcáⁿ quidé-yu chi mee-ni núú tnàha ñáyi-yu cùdiú-yu. ⁶ Te nchòhó òré cuini-ndó cáháⁿ ndíhi-ndo Yá Ndióxi, te ndíhi ndedí nihnu-ndo xiti vehe-ndo, chi diu-gá cúú Tátá-ndó te ndècu ndíhi ñaha-gá xii-ndo, te diu-ni mee-gá ndéhé ñaha-gá xii-ndo nacuaá quide-ndo, te núu ducaⁿ na càda-ndo te taxi-gá sá ndúú tǎhú-ndó.

⁷ Te òré cáháⁿ ndíhi-ndo Yá Ndióxi te vá súúni cuendá-ni dacáá-ndó tnúhu cáháⁿ ndíhi-ndo-gá datná xíquide cue ñáyi ñá túú xini tnúhu-gá, chi ñáyi-áⁿ sání iní-yu sá tédòho ñaha víhi-gá Yá Ndióxi xií-yu sá dúcáⁿ súúni dacáá-yu tnúhu cáháⁿ ndíhi ñáhá-yu xii-gá dico ñáhá. ⁸ Dico nchòhó, vá

cadá-ndó dàtná xíquide cue ñáyiú-án, chi mee Tátá-ndó Dútú Ndiòxí sa ñaha-gá ná cúú nchàa sá xíní ñùhu-ndo cuéí òré vátá càcá-ndó-gá-ndó núú-gá. ⁹ Te duha càhá-ndó òré càháⁿ ndihi-ndo Yá Ndiòxí:

Yòhò Tátá-ndí Dútú Ndiòxí Yaá ndécú àndiú,
nchaa ñáyiú na càháⁿ-yu sá cúú-n Yàà ío yíñùhu.

¹⁰ Te xicáⁿ táhú-ndí núú-n sá ná sàà nduu ndíhu ndàhá-n-yu.

Te cada-n dàtná càchí iní-n ñùyúú-a dàtná quidé-n àndiú.

¹¹ Te xicáⁿ táhú-ndí núú-n sá táxí-n sá cóhó-ndí sá caxí-ndí ìíⁿ nduu ìíⁿ nduu.

¹² Te cada càhnu iní-n nchàa yíca cuèchi-ndí, chi tñàhá nchúhú quidé càhnu iní-ndí nchaa sá quidé ñaha tñaha ñáyiú-ndí.

¹³ Te vá dáñá-n dàcàháⁿ ñàhá yùcu ñávàha xii-ndí cada-ndí sá ñà túú vaha, chi coto ñaha-n xii-ndí cuendá sá vá dúcáⁿ càda ñaha-xi.

Te diu-n cùu-n Yaá ío cùnuu nchaa nduu nchaa quíú, te ío càhnu cuu-n, te diu-ni-n quindaha ñaha-n xii-ndí ni caa ni quíhíⁿ. Te ducaⁿ na cùnduu.

Duha dànehé ñàhá-í xii-ndo càháⁿ ndihi-ndo Yá Ndiòxí.

¹⁴ Te núu nchòhó quidé càhnu iní-ndó nchàa sá quidé ñaha tñaha ñáyiú-ndo, te ducaⁿ te Tátá-ndó Dútú Ndiòxí Yaá ndécú àndiú cada cahnu iní-gá nchaa sá ñà túú vaha quide-ndo tucu. ¹⁵ Dico núu nchòhó vá cáda càhnu iní-ndó nchàa sá quidé ñaha tñaha ñáyiú-ndo ña, te ni Dútú Ndiòxí Yaá cúú Tátá-ndó vá cáda càhnu iní-gá nchaa sá quidé-ndó tucu.

Cuendá ñáyiú ñà túú tñahí ná xéxí àma càháⁿ ndihí-yu Yá Ndiòxí

¹⁶ Te nchòhó, nduu ñà túú tñahí ná xéxí-ndó càháⁿ ndihi-ndo Yá Ndiòxí, te vá cùndiyí-ndó dàtná xíquide nchaa ñáyiú dándahú méé-xí càchí sá quidé ndáá te ñà ndàá sá quidé ndáá-yu, chi ñáyiú-án ducaⁿ xíquidé-yu cuendá sá cuiní-yu cut-nuní iní ñáyiú sá ñà túú tñahí ná xéxí-yu càháⁿ ndihí-yu Yá Ndiòxí. Te yúhú càchí tñúhu-í xii-ndo sá sà dúcáⁿ quidé-yu te ñà túú ñà chindee ñaha-xi xíí-yu cuendá ñihí-yu ìíⁿ sá ndúú tãhú-yu núú Yá Ndiòxí.

¹⁷ Dico nchòhó, nduu dùcaⁿ quide-ndo ñà túú tñahí ná xéxí-ndó càháⁿ ndihi-ndo Yá Ndiòxí, te váha váha naquete-ndo núú-ndó, te váha váha chihi-ndo cùcá ¹⁸ cuendá sá vá cùtnuní iní ñáyiú sá ñà túú ñà xéxí-ndó nduu ducaⁿ càháⁿ ndihi-ndo Yá Ndiòxí. Te Dútú Ndiòxí Yaá cúú Tátá-ndó ndècu ndihi-ndo diu-ni mee-gá ndéhé-gá ñacuáa quide-ndo ndecu-ndo, te diu-gá taxi-gá sá ndúú tãhú-ndó.

Cuendá nchaa sá váha nduu táhú-ó (Lc. 12:33-34)

¹⁹ Te vá cání iní-ndó cùu-ndo ñáyiú cuica ñàndí sá cùndècu ndihi-ndo ñuyúú-a chi vá cudíí-xi, chi dava quee tíquidi, te dava caxi cudí ñùhu, àdi quíhu ñadúhú vehe-ndo te duhu-güedé. ²⁰ Te váha-gá chí ndúcú ñacuáa cada-ndo cuendá ducaⁿ ngúndecu sá ndúú tãhú-ndó àndiú, te xíáⁿ cudíí-xi cundecu ndihi-ndo ñi caa ni quíhíⁿ, chi yàcáⁿ vá queé-gá tíquidi, te ni vá caxí-gá cudí ñùhu, te ni vá quini-gá-ndó ñadúhú duhu-güedé ndachüuⁿ-ndo. ²¹ Te núu cùu-ndo ñáyiú cuica ndècu ñuyúú-a, te diu-ni nchaa sá ndécú ndihi-ndo ñuyúú-a ñùhu iní-ndó. Àdi cuu-ndo ñáyiú quide nacuaá ngúndecu sá ndúú tãhú-ndó àndiú, te diu-ni sá ndúú tãhú-ndó ndècu àndiú-án ñùhú iní-ndó.

Núú-ó cùu-xi datná ìíⁿ ñùhu (Lc. 11:34-36)

²² Te cada iní-ndó sá núú-ndó cùu-xi datná ìíⁿ ñùhu. Te núu núú-ndó càváha te cùtnuní iní-ndó ñà cúú sá ndécú núú-ndó. ²³ Dico núu cùhú núú-ndó ñà túú cùtnuní cundehe-ndo ña, te ñà túú cùtnuní iní-ndó ñà cúú sá ndécú núú-ndó. Te sá dúcáⁿ cùhú núú-ndó te cada iní-ndó sá ndécú-ndó dàtná ìíⁿ núú néé. Te duha ndiú tñáhu càháⁿ-í chi núu sàni váha iní-ndó cuendá Yá Ndiòxí ñà, te cùu vii cuu váha iní-ndó ndècu-ndo. Áⁿ te núu ñà túú sàni váha iní-ndó cuendá-gá ñà, te ñà túú tñahí cùu váha iní-ndó ndècu-ndo. Te sá dúcáⁿ ñà túú sàni váha iní-ndó cuendá-gá te cada iní-ndó sá ndécú-ndó dàtná ìíⁿ núú néé.

Vá ndácú ìíⁿ téé cunu cuechi-dé núú úú patróóⁿ

(Lc. 16:13)

²⁴ Te ni ìíⁿ téé xinu cuechi vá ndácú-dé cunu cuechi-dé núú úú patróóⁿ, chi téé-án cuu váha iní-dé núú ìíⁿ patróóⁿ-dè te tñi-dé nchaa tñúhu càháⁿ patróóⁿ téé cùu

váha iní-dé núu-xi-án. Te núu ìngá tucu pàtróón-dě vá cúú váha iní-dé, te ni vǎ tñíí-dě tñúhu càháⁿ ìngá téé-án. Te ducaⁿ sǎtnahá-xi cúu nchohó chi vá ndácú-ndó cùnu cuechi-ndo núú Yǎ Ndióxi te cuhuⁿ iní-ndó nchàa sǎ ìó ñuyú-a.

Yá Ndióxi xító-gǎ nchaa ñáyiú cùu déhe-gǎ (Lc. 12:22-31)

²⁵ Te na càchí tñúhu-í xii-ndo sǎ vǎ ìo cani iní-ndó ñúu nása níhí-ndó sǎ cóhó sǎ cǎxí-ndó, te ni vǎ ìo cani iní-ndó ñúu nása níhí-ndó dǒó cuihnu-ndo, chi cùnnu-gǎ méé-ndó dàcúúxí sǎ nchító-ndó, te ducaⁿ cùnnu-gǎ yiquí cùñú-ndó dàcúúxí dǒó sácúihnu-ndo. ²⁶ Te chí cǎdá cuendá sǎ nchǎá quiti ndava ñǎ túú tñàhí ná xítú-güedi, te ni ñǎ túú ndèè cuáhǎⁿ-güedi nàtahu-güedi, te ni ñǎ túú nǎ nǎtàxúha-güedi, te ni ñǎ túú ndèè cǎá yacá-güedi, chi mee Tǎtá-ó Dǔtú Ndióxi Yǎa ndécú àndiu xito ñaha-gǎ xii-güedi níhí-güedi sǎ xéxi-güedi. Te núu cue quiti-án ducaⁿ xito ñaha-gǎ xii-güedi, jte uuⁿ-gǎ xító ñaha-gǎ xii nchòhó, chi nchòhó ìo-gǎ cùnnu-ndo dacúúxí cuè quiti-án!²⁷ Te cuèi nándi sǎ sání vihi iní-ndó ndècu-ndo, dico ñǎ ndácú-ndó càda-ndo nacuáa cuehnu-ndo cuèdicó ìíⁿ yiquí-gǎ.

²⁸ Te vá ìo cani iní-ndó ñúu nása níhí-ndó dǒó cuihnu-ndo. Te chí cǎdá cuendá nacuáa sǎhnu nchaa itá ìó yucu, chi nchaa itá-án ñǎ túú quide chiuⁿ-xi, te ni ñǎ túú quèheⁿ-xi idi. ²⁹ Te na càchí tñúhu-í xii-ndo sǎ ndíi Salómón cuèi ìo vii ní xínduu dǒó ní xóo cuihnu ndíi, dico ñǎ túú nǔtnahá-xi nàcuáa cǎa nchaa itá, chi ìo-gǎ vii cǎa nchaa itá. ³⁰ Te nchaa itá ìó yucu tnaa-ni cùdíi-xi, te yichí-xi te sǎhmi ñáyiú. Te cuèi ducaⁿ dico mee Yǎ Ndióxi quidé-gǎ ìo vii sàcúnduu-xi. Te núu nchaa itá-án ducaⁿ quide-gǎ xító-gǎ sàcúnduu vii-xi, te xíǎⁿ cùtnuní sǎ ìo-gǎ coto ñaha-gǎ xii-ndo, dicó-ni sǎ ñǎ túú sàndǎá váha iní-ndó-gǎ. ³¹ Te xíǎⁿ ñúu ñǎ túú xini ñuhu vihi-xi cani iní-ndó ñúu nása níhí-ndó sǎ cóhó sǎ cǎxí-ndó, àdi nása níhí-ndó dǒó cuihnu-ndo. ³² Chi nchaa ñáyiú ñǎ túú xini nàcuáa càháⁿ tñúhu Yǎ Ndióxi mee-ni nchàa xíǎⁿ ñúhú ìní-yu. Dico nchòhó chi mee Tǎtá-ndó Dǔtú Ndióxi sa ñaha-gǎ ná cúú sǎ xini ñuhu-ndo. ³³ Te xíǎⁿ ñúu ìo xini ñuhu-xi sǎ cúhúⁿ iní-ndó sǎ Yǎ Ndióxi yíndàha ñaha-gǎ xii-ndo, te ducaⁿ càda-ndo nchaa nacuáa cuini-gǎ, te ducaⁿ te taxi-gǎ nchaa

sǎ xini ñuhu-ndo. ³⁴ Núu xíǎⁿ vá ìo cani iní-ndó nása cundecu-ndo ndúu tneé, chi cani iní-ndó nàcuáa cada-ndo cundecu-ndo vitna, chi ndúu tneé-ánⁿ te òrè-nǎ te cut-nuní ñúu nása cada-ndo cundecu-ndo. Chi nchòhó sa ñaha-ndo sǎ ìo titni núú sǎ quidé-xí ìíⁿ nduu ìíⁿ nduu —duha ní dánèhè ñǎhá Jèsús xii cue téé xica cuu ndíhi-gǎ ndíhi nchaa ñáyiú.

7

Vá càháⁿ cuèhé-ó cuendá tñaha ñáyiú-o (Lc. 6:37-38, 41-42)

¹ Te Jèsús ndècuu-ni-gǎ dánèhè-gǎ cue téé xica cuu ndíhi-gǎ ndíhi nchaa ñáyiú, te xǎhaⁿ-gǎ:

—Vá càháⁿ cuèhé-ndó cuendá tñaha ñáyiú-ndo, te ducaⁿ te Yǎ Ndióxi ñǎ túú nǎ tñúhu cúñaha-gǎ xii-ndo. ² Chi núu na càháⁿ cuèhé-ndó cuendá tñaha ñáyiú-ndo, te Yǎ Ndióxi ìó ìíⁿ sǎ cǎdá ñaha-gǎ xii-ndo. Te núu nchòhó ná càháⁿ cuèhé vihi-ndó cuendá tñaha ñáyiú-ndo te Yǎ Ndióxi ìo-gǎ dandòho ñaha-gǎ xii-ndo.

³ Te ná cuendá ndéhé-ndó ìíⁿ sǎ ñǎ túú váha quide tñaha ñáyiú-ndo te mee-ndo vihi-gǎ quidé-ndó-í? Te sǎ dúcáⁿ quide-ndo te cada iní-ndó sǎ ndéhé-ndó dàtná ìíⁿ mihi líhli ñuhu núú tñaha ñáyiú-ndo te mee-ndo ñuhu ìíⁿ mihi cahnu-gǎ núú-ndó te ñǎ túú quide cuendá-ndó. ⁴ Te núu na nàcanu ichi-ndo tñaha ñáyiú-ndo cuendá sǎ ñǎ túú quide váha-yu ndècu-yu, te mee-ndo vihi-gǎ quidé-ndó ñǎ, te cada iní-ndó sǎ xǎhaⁿ-ndo xii tñaha ñáyiú-ndo sǎ nǎtàva-ndo mihi líhli ñuhu núú-yu sǎ dúcáⁿ quide-ndo, te mihi cǎhnu ñuhu núú méé-ndó ñǎ túú quide cuendá-ndó. ⁵ Te sǎ dúcáⁿ quide-ndo te ìo dándahú-ndó mèe-ndo sǎ quidé ndǎá-ndó te ñǎ ndǎá sǎ quidé ndǎá-ndó, te xini ñuhu-xi díhna-gǎ dañu-ndo nchàa sǎ ñǎ túú váha quide-ndo, te dàtnuní ducaⁿ te cuu nacanu ichi-ndo tñaha ñáyiú-ndo cuendá nchaa sǎ ñǎ túú váha quidé-yu.

⁶ Te nchaa ñáyiú ìo sǎà ìní-xi, te vá cǎdá yica-ndó-yu cundedóho-yu tñúhu Yǎ Ndióxi, chi núu na càda yica-ndó-yu te ngóo-yu cuu úhú ìní ñǎhá-yu xii-ndo. Te ñáyiú-ánⁿ cúú-yu dàtná ìnǎ chí quiti-ánⁿ ñúu na cuǎnaha-o ìíⁿ sǎ cuǎnaha-o, te núu ñǎ túú cùtnuní ìní-dí ná cúú xíǎⁿ te tñíi ñaha-dí xii-o. Te cúu tucú-yu dàtná cùchí

chi quiti-áⁿ núu na chùcu-o núu-di yúu vâha sá ío vii càa nani pérllá, te dicó-ni cùnu sâhá-di chi ñá túú cùtnuní iní-di sá cúu-xí yúu vâha.

Cácáⁿ-ó núú Yá Ndióxi núu ná cùiní-ó
(Lc. 11:9-13; 6:31)

⁷ Te na càchí tnúhu-í xii-ndo sá cãcãⁿ-ndó núú Yá Ndióxi te núu ná cùiní-ndó te taxi-gá, te vá dáñá ndèé-ndó cãcãⁿ-ndó núú-gã núu ná cùiní-ndó te ducaⁿ te nihí-ndó. Te cada iní-ndó sá ñi quexìo-ndo vehe ìⁿ tnahá ñáyiú-ndo te ní cãháⁿ-ndó, te ñáyiú-áⁿ ñi tedóho ñàhá-yu xii-ndo te ní nacaáⁿ-yu yuyèhe. Te ducaⁿ càda iní-ndó chi Yá Ndióxi tedóho ñàhá-gã xii-ndo, te taxi-gá sá ná cãcãⁿ-ndó núú-gã.

⁸ Chi nchaa ñáyiú ducaⁿ xíquide, te Yá Ndióxi tédóho ñàhá-gã xii-yu te nihí-yu sá cùiní-yu. Te ñi-ni ducaⁿ tucu nchaa ñáyiú na cãcãⁿ núú-gã ìⁿ sá cùiní-yu, chi sãñaha-gã sá xicãⁿ-yu núú-gã. Te ñi-ni ducaⁿ tucu nchaa ñáyiú ñá túú ñá ñá ndeé xicãⁿ núú Yá Ndióxi sá cùiní-yu chi nihí-yu.

⁹ Te nchòhó cue téé cùu tátá, ñá túú cùndee iní-ndó cuãñaha-ndo xii cue déhe-ndo ìⁿ yúu caxi-güexi òré xicãⁿ-güexi ìⁿ páá núú-ndó cãxi-güexi. ¹⁰ Te ñi ñá túú cùndee iní-ndó cuãñaha-ndo ìⁿ cóó caxi-güexi òré xicãⁿ-güexi ìⁿ chácá núú-ndó cãxi-güexi. ¹¹ Te nchòhó cuèi ndéé dau-na sãá iní-ndó dico sãha-ndo cuè déhe-ndo sá vâha xèxi-güexi òré ná cúú sá xicãⁿ-güexi núú-ndó cãxi-güexi. Te núu nchòhó ducaⁿ quide-ndo, jte uuⁿ-gã ducaⁿ quide Tátá-ndó Dútú Ndióxi Yaá ndécú àndiu, chi taxi-gá sá vâha sá cúu-xí-ndó te núu na cãcãⁿ-ndó núú-gã!

¹² Te nchaa sá vâha cùiní-ndó càda tnahá ñáyiú-ndo, te cada-ndo tnahá-ndó ndíhí-yu, chi ducaⁿ sànu ichi ñàhá tnúhu ní chídó tñuní ndí Moisés, te ñi-ni ducaⁿ sànu ichi ñàhá tucu nchaa tnúhu ní chídó tñuní cue téé ní xóo cãháⁿ tnúhu Yá Ndióxi ndéé sanaha.

Yuyèhe cuiñi
(Lc. 13:24)

¹³⁻¹⁴ Te xini ñuhu-xi nducu-ndo nacuaá cada-ndo tñi-ndo ichi Yá Ndióxi. Te ichi-gã-áⁿ cúu-xí dátñá ìⁿ ichi cuiñi, àdi dátñá ìⁿ yuyèhe cuiñi. Te duha càháⁿ-í chi ío úhú xínu iní-ndó tñi-ndo ichi Yá Ndióxi, te sacú-ni nchòhó cue ñáyiú ndécú ñuyúú-a tñi-ndo ichi-gã. Te nchaa ñáyiú ndécú ichi

cuehé ichi duha ta xíta nihnú-yu cuháñⁿ. Te ichi ndécú-yu-áⁿ cada iní-ndó sá cúu-xí ìⁿ ichi cahnu ichi quehéⁿ, àdi ìⁿ yuyèhe quehéⁿ. Te duha càháⁿ-í chi ío vai ñáyiú ndécú-yu ichi-áⁿ.

Ndi díiⁿ núu yutnu xini-ó ná yutnu
cùu-xi cuendá sá sãvidí-xi

(Lc. 6:43-44)

¹⁵ Te càchí tnúhu-í xii-ndo sá ío quihí iní-ndó cùndecu-ndo cuendá sá vâ dándahú ñàhá cuè téé càchí sá càháⁿ tnúhu Yá Ndióxi te ñá ndáá sá càháⁿ-güedé tnúhu-gã. Chi cue téé-áⁿ sànuu sá quidé-güedé dátñá quidé mbéé quiti ío vâha iní-xi, dico ñá ndáá chi ñá túú ñuhu vâha iní-güedé, chi quide-güedé dátñá quidé quiti dééⁿ quiti nàni yíhí. ¹⁶ Te òré quexìo-güedé núu ndécú-ndó te cada cuendá-ndó nacuaá quide-güedé cuendá ducaⁿ cùtnuní iní-ndó ñá ñáyiú cùu-güedé. Te nchòhó xini-ndó sá ñá túú cùuⁿ ndéhé yoho yâha stilé tnu ñnu, te ñi ñá túú xini-ndó cùuⁿ ngúxí ìⁿ tnu ñnu. ¹⁷⁻¹⁸ Te xini tucu-ndo sá nchaa yutnu vâha cùuⁿ sãvidí vâha, te nchaa yutnu vâha-áⁿ ñá túú cùuⁿ sãvidí sá ñá túú vâha. Te nchaa yutnu sá ñá túú vâha ñá túú cùuⁿ sãvidí vâha, chi mee-ni sãvidí sá ñá túú vâha cùuⁿ. ¹⁹ Te nchaa yutnu sá ñá túú cùuⁿ sãvidí vâha xèhndé-güedé, te cuãguee-xi núu ñuhú càyú-xi. Te ducaⁿ sãtnahá-xi yâha nchaa cue téé dándahú ñàhá càchí sá càháⁿ tnúhu Yá Ndióxi te ñá ndáá sá càháⁿ-güedé tnúhu-gã, chi quihíⁿ-güedé núu ñuhú núu càyú. ²⁰ Te nchòhó cutñuní iní-ndó ñá ñáyiú cùu cue téé-áⁿ cuendá nchaa sá quidé-güedé.

Ñá nchaa ñáyiú ngúndecu-yu núu ndécú
Yá Ndióxi táxi tñuní-gã

(Lc. 13:25-27)

²¹ Te na càchí tnúhu-í xii-ndo sá ío vai ñáyiú cachí-yu sá yúhú cùu-í Xí-tohó-yu, dico ñá nchaa-yu nduu táhú-yu cundecú-yu núu ndécú Tátá-í Dútú Ndióxi táxi tñuní-gã, chi mee-ni nchaa ñáyiú na càda nchaa nacuaá càháⁿ-gã ñáyiú-áⁿ nduu táhú-yu cundecú-yu núu ndécú-gã táxi tñuní-gã. ²² Te na sãá nduu càda ndáá Yá Ndióxi cuéchi nchaa ñáyiú, te vai-yu cùñàhá-yu xii-í: “Yòhó Xítohó Jesucristú nchúhú cúu-ndí ñáyiú ní càháⁿ tnúhu-n nacuaá ní cachí-n, te ñi-ni-n ñi

cacunehe-ndí te ní sándáá iní ñáhá nchaa espíritú cúndíhi yucu ñáváha xii-ndí ní quee-xi yiqui cùñú ñáyi, te ñu-ni yòhó ní chindee ñàha-n xii-ndí ní ndacu-ndí ní quide-ndé titni núú sá vǎ yòo tñàhí ndacu cada”, duha cùñàhá-yu xii-í dàvǎ-á. ²³Dico yúhú cùñaha-í xii-yu: “Ñǎ túú tñàhí xini ñàhà-í xii nchòhó núu ndèe ñáyi cùu-ndo, te chí xócuñí nchaa nchòhó ñáyi quide nchaa sá cuèhé sá dúhá núú ndécù-í-a”, duha cùñaha-í xii-yu.

Íñ vehe ndècu cimientú-xi ndíhi ìñ vehe ñǎ túú cimientú-xi
(Mr. 1:22; Lc. 6:47-49)

²⁴Te nchaa ñáyi sàcúndedóho tñúhu cǎhá-í te núu na tñí-yu, te ñáyi-á cùu-yu dàtnǎ ìñ tée ío váha cùtnuní iní-xi. Chí tée-á ní dǎcǎá-dè ìñ vehe, dico ñáha-gǎ ní xete-dé ndéé ní tñàhǎ-dé yúú cǎxí ní dàtnuní ní tava-dé cimientú-xi. ²⁵Te òré ní cuuⁿ dáú te ní ndee ndute ñuhu, te ní dǎndǎá-xí ndéé núú cǎá vèhe-á, dico ñǎ túú ní ndàcu-xi cuido-xi. Te ní quene tucu táchí ñíhi dico ñǎ túú ní ndàcu-xi cuido-xi vehe-á, te ducaⁿ chí tée ní dǎcǎá vèhe-á ní tava-dé cimientú-xi núú yúú cǎxí. Duha sǎtnahǎ-xi cùu nchaa ñáyi tñí tñúhu cǎhá-í. ²⁶Dico nchaa ñáyi sàcúndedóho tñúhu cǎhá-í te ñǎ túú cuini-yu tñí-yu, ñáyi-á cùu-yu dàtnǎ ìñ tée ñǎ túú tñàhí cùtnuní iní-xi. Chí tée-á ní dǎcǎá-dè ìñ vehe núú yícú mèe-ni ñuhu cùchí. ²⁷Te òré ní cuuⁿ dáú te ní ndee ndute ñuhu, te ní dǎndǎá-xí ndéé núú cǎá vèhe-á, te ní quene táchí ñíhi te í-í-ni ní xido-xi vehe-á cuendǎ sǎ núú ñuhu cùchí ní sǎá. Duha sǎtnahǎ-xi cùu nchaa ñáyi sàcúndedóho tñúhu cǎhá-í te ñǎ túú cuini-yu tñí-yu — duha ní dǎnèhé ñáhǎ Jesús xii cue tée xica cuu ndíhi-gǎ ndíhi nchaa ñáyi.

²⁸Te òré ní ndíhi Jesús sǎ dúcǎ ní cǎhá-gǎ, te nchaa ñáyi ní xíndedóho nchaa tñúhu ní cǎhá-gǎ ío ní cuñúhu-yu nàcuáa ní dǎnèhé ñáhǎ-gǎ xii-yu. ²⁹Chí ní cǎhá-gǎ dàtnǎ cǎhá te cue cùnuu, te cùnuu ndisa-gǎ, te ñǎ túú ní cǎhá-gǎ dàtnǎ cǎhá nchaa cue tée dàcuaha ñaha xii ñáyi nchaa tñúhu ní chídó tñuní ndíhi Moisés.

8

Jésus quidé tǎtna-gǎ ìñ tée tñàhǎ cuèhé sǎ dátèhyú nihnu-xi yiqui cùñú-ó
(Mr. 1:40-45; Lc. 5:12-16)

¹Te Jesús ní xica-gǎ cuánuu-gǎ ñí tǎndúú núú dúcǎ ní xíndecu-gǎ ní dǎnèhé-gǎ ñáyi-á, te cuèhé víhí ñáyi nchicúⁿ ñáhǎ xii-gǎ cuánuu. ²Te ní quexio ìñ tée tñàhǎ cuèhé sǎ dátèhyú nihnu-xi yiqui cùñú-ó núú Jesús, te ní nguñí xití-dè núú-gǎ, te xǎhaⁿ-dè xii-gǎ:

—Mèstrú, véxi-í cǎháⁿ ndàhú-í núu-n núu vá cùndèe iní-n cada tǎtna ñaha-n xii-í, chí cùtnuní iní-í sǎ ndácú-n —cǎchí-dè xǎhaⁿ-dè xii-gǎ.

³Te Jesús ní dǎcǎá-gǎ ndaha-gǎ ní tǎndaha ñaha-gǎ xii-dé, te xǎhaⁿ-gǎ:

—Cuu cada tǎtna ñaha-í xii-n, te vitna ndúha-n —cǎchí-gǎ xǎhaⁿ-gǎ xii-dé.

Te òré-ni-á ní xócuñí cuèhé tñàhǎ-dé. ⁴Te Jesús ní xǎhaⁿ tucu-gǎ xii-dé:

—Te vitna cuanùhú te vá yòo ìñ cùñaha-n sǎ yúhú ní quide tǎtna ñaha-í xii-n, núú dítú-ni cuáhǎⁿ cuendǎ sǎ ná quini ñáhǎ-dè xii-n sǎ ní ndúha-n, te cuáhaha-n sǎ ndúú tǎhú Yǎ Ndióxi dàtnǎ ní cachí ndí Moisés. Te ducaⁿ càda-n cuendǎ cutnuní iní ñáyi sǎ ní ndúha-n —cǎchí-gǎ xǎhaⁿ-gǎ xii tée ní quide tǎtna-gǎ-á.

Jésus quidé tǎtna-gǎ ìñ tée xinu cuechi núú ìñ tée cùu capitǎⁿ

(Lc. 7:1-10)

⁵Te Jesús ní xica-gǎ cuáhǎⁿ-gǎ ñuú Capèrnaúm. Te òré cuánguihu-gǎ ñuú-á te ní quexio ìñ tée cùu capitǎⁿ cǎháⁿ ndàhú-dé núú-gǎ, te xǎhaⁿ-dè xii-gǎ:

—Mèstrú, véxi-í cǎháⁿ ndàhú-í núu-n núu vá cùndèe iní-n cada tǎtna-n ìñ tée xinu cuechi núu-í, chí cùhú-dé te cǎhú víhí tñàhǎ-dé, te ío ndòho-dé te ní ñǎ cùndèe-gǎ-dé candǎ nihnu-dé —cǎchí-dè xǎhaⁿ-dè xii-gǎ.

⁷Te Jesús ní xǎhaⁿ-gǎ xii-dé:

—Te na quíhí-ó càda tǎtna-í-dé —cǎchí-gǎ xǎhaⁿ-gǎ xii-dé.

⁸Te tée cùu capitǎⁿ-á ní xǎhaⁿ-dè xii-gǎ:

—Mèstrú, ñǎ túú tǎu-í sǎ quíhu-n ndéé xití vehe-í, chí cùu-í ìñ tée cùtèxínu sǎ cùú-xí-n, te cǎháⁿ-ní sǎ ndúha tée xinu cuechi núu-í te ndúha-dé. ⁹Chí yúhú ndècu cue tée tàxi tñuní ñáhǎ xii-í, te ducaⁿ yúhú tucu ndècu cue sandadú tǎxí tñuní-í. Te òré xǎhaⁿ-í xii ìñ-dé quíhí-dé ìñ chiúⁿ te cuáhǎⁿ-dè, te òré xǎhaⁿ-í xii íngǎ-dé quixi-dé te véxi-dé, te òré xǎhaⁿ-í xii ìñ tée xinu cuechi núu-í cada-dé ìñ chiúⁿ te quide-dé. Núu xiǎⁿ yòhó cǎháⁿ-ni sǎ

ndúha tée xinu cuechi núú-í te ndúha-dé — cächí-dé xáhaⁿ-dë xii Jèsús.

¹⁰ Te Jèsús ío ní cuñúhu-gá sá dúcáⁿ ní cáháⁿ tée cùu capitáⁿ-án, te ní xáhaⁿ-gá xii nchaa ñáyiú nchicúⁿ ñáhá xii-gá:

—Na cächí tnúhu ndáá-í xii-ndo sã vätá quini-gá-í ní ñⁿ ñáyiú israhél, ñáyiú súúni ío váha sándáá iní ñáhá xii Yá Ndiöxí dàtná sándáá iní ñáhá tée-a xii-gá. ¹¹ Te na cächí tnúhu ndáá tucu-í xii-ndo sã ío cuéhé ñáyiú quixi ndaa xio nacuaá quène nchíanchii, te diu-ni ducaⁿ ío cuéhé tucú-yu quixi ndaa xio nacuaá quée tucu nchíanchii. Te nchaa ñáyiú-án naníhí tñáhá-yu ndíhi té Àbrahám, ndíhi té Isáác, ndíhi té Jàcób núú ndécú Yá Ndiöxí táxi tñuni-gá te yàcáⁿ cundecu ndíhi ñáhá-yu xii-güedé. ¹² Te nchaa ñáyiú tàú nduu táhú cundecu núú ndécú Yá Ndiöxí táxi tñuni-gá ní cùu, ñáyiú-án quee tíhú-yu, chí quíhíⁿ-yu ñⁿ xichi núú néé núú ío ndohó-yu cundecú-yu, te yàcáⁿ ío ndáhí-yu, te dicó rúhñú-ná cuu núhu-yu sá sätú iní-yu cuèndá sá ndóhó-yu —cächí-gá xáhaⁿ-gá xií-yu.

¹³ Te Jèsús ní xáhaⁿ tucu-gá xii tée cùu capitáⁿ-án:

—Yòhó tée ndècu ndíhi tée cùhú cuanùhú vehe-n vìtna chí ndúha-dé chí ní sándáá iní-n Yá Ndiöxí —cächí-gá xáhaⁿ-gá xii-dé.

Te diu-ni òré ducaⁿ ní xáhaⁿ Jèsús xii tée cùu capitáⁿ-án ní ndúha tée xinu cuechi núú-dé.

Jèsús quidé tãtna-gá nãná ñadihí té Pèlú
(Mr. 1:29-31; Lc. 4:38-39)

¹⁴ Te Jèsús ní xica-gá cuáháⁿ-gá vehe té Pèlú, te òré ní quexio-gá vehe-dé te ní xiní-gá cáá nãná ñadihí-dé cùhú-aⁿ ñúhu vihi-aⁿ cahni. ¹⁵ Te Jèsús ní tñii-gá ndaha ñaha cùhú-án, te òré-ni-án ní nchíco-aⁿ cahni te ní ndacóo-aⁿ ní xinu cuechi-aⁿ núú-güedé ndíhi-gá.

Jèsús quidé tãtna-gá vai ñáyiú cùhú
(Mr. 1:32-34; Lc. 4:40-41)

¹⁶ Te òré ní dáhu nchíanchii te ní quexio ñáyiú núú ndécú Jèsús, te ndècá-yu vai ñáyiú yíhi ñaha espíritú cündíhi yucu ñávãha ní sáá núú-gá te ndèca tucú-yu vai ñáyiú tñáhá dava-gá núú cuéhé. Te ñⁿ-ni tnúhu ní cáháⁿ Jèsús ní tenáá-gá nchaa espíritú cündíhi yucu ñávãha yíhi ñaha xii nchaa ñáyiú-án, te ní quee-xi yiqui

cùñú-yu cuáháⁿ-xi. Te tñáhá nchaa dava-gá ñáyiú cùhú-án ní quide tãtna-gá. ¹⁷ Te ducaⁿ ní cuu chí ní quee ndáá-xi nàcuáa ní cáháⁿ ndí Chàia tée ní xóo cáháⁿ tnúhu Yá Ndiöxí ndéé sanaha, te duha ní cachí ndíi: “Mee-gá cada tãtna ñaha-gá xii-o, chí diu-gá xocani-gá nchaa sá quidé ùhú yiqui cùñú-ó”, duha ní cachí ndíi.

Ñáyiú cuini tuha ñaha xii Jèsús
(Lc. 9:57-62)

¹⁸ Te òré ní xiní Jèsús sá ío cuéhé ñáyiú xíxúcu núú ndécú-gá, te ní xáhaⁿ-gá xii cue tée xica cuu ndíhi-gá sá quée-gá ndíhi-güedé bàrcú cuèndá téhndé-gá ndíhi-güedé ndaa ingá xio yuhu làgúná. ¹⁹ Te mei òré-án ní quexio ñⁿ tée dàcuaha ñaha xii cue ñáyiú nchaa tnúhu ní chídó tñuni ndí Moisés, te xáhaⁿ-dë xii-gá:

—Mèstrú, cuini-í canchicúⁿ ñáhà-í xii-n ndèni ní cuu na quíhíⁿ-n —cächí-dé xáhaⁿ-dë xii-gá.

²⁰ Te Jèsús ní xáhaⁿ-gá xii-dé:

—Nchaa núcuii chí ndècu yaú cúu vèhe-güedi saquíhí-güedi, te nchaa cue quiti ndava caa tacá-güedi diquí yutnu. Dico yúhú Tée cùu ñani tñáhá-ndo nchaa-ndo chí ñá túú ndèé cáá vèhe-í ñuyúú-a ndetatú-í —cächí-gá xáhaⁿ-gá xii-dé.

²¹ Te ñⁿ tée ní chitnahá ñáhá xii Jèsús ní xáhaⁿ-dë xii-gá:

—Jèsús, daña na nùhú-í cundetú-í cuú tãtà-í te chindúxi-í-dé dàtñuni quixi-í chitnahá ñáhá dùcaⁿ-ná-í xii-n —cächí-dé xáhaⁿ-dë xii-gá.

²² Te Jèsús ní xáhaⁿ-gá xii-dé:

—Daña ñáyiú ñá túú sándáá iní ñáhá xii-í ná chindúxi tñaha meé-yu, chí ñáyiú-án cúú-yu dàtná ñáyiú ní xíhí cuéi ndècu-ní-yu núú ñuyúú-a, te yòhó canchicúⁿ ñáhá-ní xii-í —cächí-gá xáhaⁿ-gá xii-dé.

Jèsús ngáni-gá táchi ndíhi ndute làgúná
(Mr. 4:35-41; Lc. 8:22-25)

²³ Te sáta dúcáⁿ te Jèsús cuánguee-gá bàrcú ndíhi cue tée xica cuu ndíhi-gá, te ní xica bàrcú-án cuáháⁿ-xi. ²⁴ Te nini ñúhu bàrcú-án ichi cuáháⁿ-xi núú ndute ní xidí Jèsús, te ní ngúíta-xi níhi vihi quene táchí, te ta nàdachitú-xi ndute xití bàrcú cuáháⁿ. ²⁵ Te cue tée xica cuu ndíhi-gá cuáháⁿ-güedé núú cáá-gá xidí-gá, te xáhaⁿ-güedé xii-gá:

—jMèstrú, ndiquíú ínì chi dàcácu ñaha-n xii-o chi quée naa-o cuíní-xi! —càchí-güedé xáha-n-güedé xii-gá.

²⁶ Te Jèsús ní xáha-n-gá xii-güedé:

—¿Ná cuendá ndéé ducaⁿ ÿo yùhú-ndó? ¿Náa ñá túú sàndáá ínì ñáhá ndisa-ndo xii-í-áⁿ? —càchí-gá xáha-n-gá xii-güedé.

Te Jèsús ní ndacóo-gá te ní tenàá-gá táchí-áⁿ ndihí ndute-áⁿ, te ní ngüíñí táchí-áⁿ te ní nucúndecu nahí-ñá ndute làgúná-áⁿ. ²⁷ Te nchaa cue téé ñuhu xití bàrcú-áⁿ ní cuñúhu-güedé sá dúcáⁿ ní quide-gá ní xiní-güedé, te ní xít-nàha-güedé:

—¿Te ná téé cùu téé-a núu duha ní cáháⁿ-ni-dé te ní ngüíñí táchí te ní nucúndecu nahí-ni ndùte làgúná-a-í? —càchí-güedé xít-nàha-güedé.

Cue téé ñuú Gàdará cue téé yíhi ñaha espíritú cúndìhi yucu ñávaha

(Mr. 5:1-20; Lc. 8:26-39)

²⁸ Te òré ní quèxio Jesús ndàa ingá xio yuhu làgúná yucu cue téé ñuú Gàdará, te úú tnàhá cue téé quide vehe núu yínduxi ndíyi ní quee-güedé cuáháⁿ-güedé núu ndécú Jèsús, te ndi ndúú-güedé yíhi ñaha espíritú cúndìhi yucu ñávaha xii-güedé, te ío màñá-güedé chí vá yóo tnàhí dàña-güedé yáha yatni núu ndécú-güedé. ²⁹ Te cue espíritú yíhi ñaha xii-güedé-áⁿ ní quide-xi níhi ní cáháⁿ-güedé, te xáha-n-güedé xii-gá:

—¿Ná cuendá véxi-ò Jèsús Déhe Dútú Ndiòxí chidácá ñáhá-n xii-ndí? ¿Áⁿ sàma véxi-n dàndoho ñaha-n xii-ndí? Te vátá sàá-gá nduu ducaⁿ cada-n —cachí-güedé xáha-n-güedé xii-gá.

³⁰ Te yatni xíaⁿ xixica cuu vai cuchí xix-exi-güedé. ³¹ Te cue espíritú cúndìhi yucu ñávaha yíhi ñaha xii cue téé-áⁿ ní cáháⁿ ndàhú-xi núu Jèsús, te xáha-n-xi:

—Te núu vá dàñá-gá-n quíhi-ndí yiqui cùnú cue téé-a, te cáháⁿ ndàhú-ndí núu-n sá dàña-n na quíhíⁿ-ndí quíhu-ndí yiqui cùnú nchaa cùchí-áⁿ —càchí cue espíritú-áⁿ xáha-n-xi xii-gá.

³² Te Jèsús ní xáha-n-gá xii cue espíritú cúndìhi yucu ñávaha-áⁿ:

—Chí táquèe yiqui cùnú cue téé-áⁿ te quíhíⁿ-ndó núu ndèé ichi quíhíⁿ-ndó —càchí-gá xáha-n-gá xii nchaa espíritú-áⁿ.

Te cue espíritú cúndìhi yucu ñávaha-áⁿ ní quee-xi yiqui cùnú cue téé-áⁿ, te cuáháⁿ-xi cuánguihu-xi nchaa cùchí-áⁿ. Te cue quiti-áⁿ ní xinu-güedé duha ní quee-güedé ndàa núu dèhvá yuhu làgúná-áⁿ, te ní ngaunihnu-güedé xití ndute, te ní ndihí-güedé ní cáhá.

³³ Te cue téé xito ñaha xii nchaa cuchí-áⁿ ní yùhú-güedé te ní xinu-güedé, te ní sáháⁿ-güedé ní cani-güedé cuèndú núu cue ñáyiu ndècu xití ñuú nchaa nàcuáa ní cuu cuendá cue téé ní xíhi ñaha nchaa espíritú cúndìhi yucu ñávaha-áⁿ. ³⁴ Te nchaa ñáyiu ñuú-áⁿ ní quee-yu cuáháⁿ-yu núu ndécú Jèsús. Te òré ní quexió-yu núu ndécú-gá te ní cáháⁿ ndàhú-yu núu-gá sá ná quèe-gá yucu ñuú-yu núhú-gá.

9

Jèsús quidé tātna-gá ñiⁿ téé cùhú ñá cùú-gá candá nihnu

(Mr. 2:1-12; Lc. 5:17-26)

¹ Te sátá dúcáⁿ ní cuu te Jèsús cuándee-gá bàrcú cuáháⁿ-gá ní natehndé-gá ndàa ingá xio yuhu làgúná. Te xíaⁿ ní ndexio-gá ñuú núu quidé ñuú-gá. ² Te xíaⁿ ndécú-gá ní quexio cue téé nchido-güedé ñiⁿ téé cùhú ñá cùú-gá candá nihnu ñuhu-dé xito, te Jèsús ní cutnùní ínì-gá sá sàndáá ndisa ínì ñáhá-güedé xii-gá núu ní xáha-n-gá xii téé cùhú-áⁿ:

—Yòhó téé cùhú vá ndìhú-gá ínì-n, chi sa ní quide càhnu ínì-í nchaa cuèchi-n —càchí-gá xáha-n-gá xii-dé.

³ Te sá dúcáⁿ ní cáháⁿ-gá núu xíaⁿ cue téé dàcuaha ñaha xii ñáyiu nchaa tnúhu ní chídó tnùnì ndíi Moisés ní sani ínì-güedé: “Téé-a cáháⁿ cuèhé-dé cuendá Yá Ndiòxí”, duha ní sani ínì-güedé. ⁴ Te Jèsús ní cutnùní ínì-gá nàcuáa sàni ínì-güedé núu ní xáha-n-gá xii-güedé:

—¿Ná cuendá ducaⁿ sàni cuehé sání dùha ínì-ndó? ⁵ Te sá dúhá ní xáha-n-í xii téé cùhú-a sá ní quide càhnu ínì-í nchaa yíca cuèchi-dé, te xíaⁿ nchòhó ñá túú cutnùnì ínì-ndó núu ndáá cáháⁿ-í àdi ñá ndáa. Dico núu cùu-í-dé sá ndácóo-dé te caca-dé, te cutnùní ndáá ínì-ndó núu ndáá cáháⁿ-í àdi ñá ndáa, chi cundehe núu-ndó nàcuáa

cada-í. ⁶ Te vitna na càda-í nàcuáa cut-núní iní-ndó nchaa-ndo sá yúhú Tée cùu ñaní tnáhá-ndó nchaa-ndo ndecu ndíhi-í tnúhu ndee iní ñuyúú-a sá cáda càhnu iní-í nchaa cuéchi ñáyiú —càchí-gá xáhaⁿ-gá xii-güedé.

Te sáta dúcáⁿ te ní xáhaⁿ-gá xii té cùhú-áⁿ:

—Ndacóo, te ndocani-n xito ñùhu-n véxi-áⁿ te nùhú-n vehe-n —cachí-gá xáhaⁿ-gá xii-dé.

⁷ Te òré-ni-áⁿ ní ndúha tée cùhú-áⁿ te ní ndacóo-dé te ní ndocani-dé xito ñùhu-dé ní quexio-áⁿ te ní xica-dé cuánuhú-dé vehe-dé. ⁸ Te nchaa ñáyiú xíndecu-áⁿ ïo ní cuñúhu-yu sá dúcáⁿ ní quide Jèsús ní xiní-yu, te ní cachí-yu sá ïo càhnu cuu Yá Ndióxi cuendá sá ní sánaha-gá xii Jèsús tnúhu ndee ïní cada-gá nchaa sá vǎ yǒo tnàhí ndàcu cada.

Jèsús càháⁿ-gá ïⁿ tée nàni Mateú chitnahá ñáhá-dé xii-gá

(Mr. 2:13-17; Lc. 5:27-32)

⁹ Te Jèsús ní nucúhuⁿ tucu-gá ichi cuáháⁿ-gá, te ichi ñùhu-gá ní xiní-gá núcóo ïⁿ tée nàni Mateú quidé còbrá-dé ñáyiú chi còbrádór impuèstú cúu-dé, te ní xáhaⁿ-gá xii-dé:

—Máteú, néhé chitnahá ñáhá-n xii-í —càchí-gá xáhaⁿ-gá xii-dé.

Te té Mátéu-áⁿ ní ndacuñí-dé ní chitnahá ñáhá-dé xii-gá.

¹⁰ Te ïⁿ xito ndècu Jesús ïⁿ vehe, te yíhi-gá mèsá ndíhi cue tée xica cuu ndíhi-gá xéxi ndíhi ñaha-gá xii-güedé. Te tnàhá cue tée cuihna ïní-xi quide còbrá ñáhá xii ñáyiú cuendá impuèstú yíhi ndíhi-gá mèsá, te tnàhá tucu dava-gá cue tée ndècu ichi cuehé ichi duha yíhi ndíhi-gá mèsá. ¹¹ Te sá ní xiní cue tée cùu fariséú xéxi Jèsús ndíhi nchaa cue tée-áⁿ, te ní xicáⁿ tnúhu-güedé núu cuè tée xica cuu ndíhi-gá, te xáhaⁿ-güedé:

—¿Ná cuendá ducaⁿ quide tée cùu mestrú-ndó xèxi-dé ndíhi cue tée cuihna ïní-xi quide còbrá ñáhá xii ñáyiú cuendá impuèstú, ndíhi nchaa dava-gá cue tée ndècu ichi cuehé ichi duha-í? —càchí-güedé xáhaⁿ-güedé.

¹²⁻¹³ Te Jèsús ní tecú dóho-gá nàcuáa ndùu tnúhu ní xáhaⁿ-güedé xii cue tée xica cuu ndíhi-gá, núu ní xáhaⁿ-gá xii-güedé:

—Nchaa ñáyiú ñá túu cùhú chi ñá túu xiní ñuhú-yu ñátátná, dico nchaa ñáyiú cùhú chi xiní ñuhú-yu ñátátná. Te yúhú véxi-í càháⁿ-í ñáyiú cutnuni iní-xi sá ndécú cuéchi-xi cuendá dàhá-yu nchaa sá cuèhé sá dúhá quidé-yu, te ñá túu véxi-í càháⁿ-í ñáyiú càchí sá ñá túu ndècu cuéchi-xi. Te chí cáda cuendá váha nàcuáa càháⁿ Yá Ndióxi núu tütú-gá núu càchí-xi: “Yúhú cuini-í sá cündàhú iní-ndó cuè tnaha ñáyiú-ndo, te ñá díú mèe-ní sá càhni-ndó quítì nduu táhú-í”, duha càchí-gá núu tütú-gá —càchí Jèsús xáhaⁿ-gá xii-güedé.

Cue tée ndècu tnúhu núu Jèsús cuendá ñáyiú ñá túu tnàhí ná xéxi áma càháⁿ ndíhi-yu Yá Ndióxi

(Mr. 2:18-22; Lc. 5:33-39)

¹⁴ Te cue tée xica cuu ndíhi té Juáá tée dàcuandute ñaha xii ñáyiú ní sáháⁿ-güedé núu ndécú Jèsús, te xicáⁿ tnúhú-güedé núu-gá, te xáhaⁿ-güedé:

—Cuini-ndí cachí tnúhu-n nǎ cuendá nchúhú, ndíhi cue tée cùu fariséú ñá túu tnàhí ná xéxi-ndí áma càháⁿ ndíhi-ndí Yá Ndióxi, te cue tée xica cuu ndíhi-n ñá túu dùcaⁿ quide-güedé —càchí-güedé xáhaⁿ-güedé xii-gá.

¹⁵ Te Jèsús ní xáhaⁿ-gá xii-güedé:

—Nchòhò xiní-ndó sǎ vǎ cúu cǔñaha-o xii ñáyiú ñùhu vico tnándaha sá vǎ cúu càxi-yu nini ndècu ndíhi ñaha tée tnándaha xií-yu, dico sáá nduu vǎ cündècu ndíhi ñaha-gá tée tnándaha-áⁿ xií-yu, te dàvá-áⁿ te cahni iní-yu vǎ cǎxi-yu cuendá sá ndíhi iní-yu.

¹⁶ Te ni vǎ yǒo dàndée luha dóo sáá ïⁿ dóo sa ní cuu tùhú víhi, chí dóo sáá-áⁿ nǎndiyi-xi te uuⁿ-gá ndata-xi dǒo sǎ ní cuu tùhú-áⁿ. ¹⁷ Te ni vǎ yǒo chíhi ndidí sáá xití ïⁿ lamba sa ní cuu tùhú víhi, chí núu yoo ducaⁿ na càda te ndava lamba sa ní cuu tùhú-áⁿ chí ío níhi yócó ndidí-áⁿ, te cuíta-ni ndidí-áⁿ te cuíta-ni lamba-áⁿ te núu ducaⁿ na càda-yu, núu xíáⁿ xíní ñùhu-xi quée ndidí sáá-áⁿ xití ïⁿ lamba saa cuendá ducaⁿ ñá túu nǎ cuu cováha-xi —càchí-gá xáhaⁿ-gá xii-güedé.

Cuendá dèhe yoco té Jàirú ndíhi cuendá ïⁿ ñaha ní tnándeé dóo Jèsús

(Mr. 5:21-43; Lc. 8:40-56)

¹⁸ Te càháⁿ dúcáⁿ-ní Jèsús ní quexio ïⁿ tée cùnuu núu ndécú-gá, ïⁿ tée tàxi tnuni

veñúhu, te ní ngüñí xítí-dě núú-gă cãháⁿ ndàhú-dé, te xãháⁿ-dě xii-gá:

—Véxi-í cãháⁿ ndàhú-í núú-n núu vá cundèe iní-n quíhíⁿ-ó vehe-í dandòto-n déhe yoco-í chí ní xíhí-xi tnàvíí, te yúhú cúnùnì iní-í sá çuu quíhíⁿ-n tëndaha-n yiqui cuñú-xi te ndoto-xi —càchí-dé xãháⁿ-dě xii-gá.

¹⁹ Te Jèsús ní xica-gá cuáháⁿ-gá ndíhi-dé ndíhi cue tée xica cuu ndíhi-gá. ²⁰ Te ichi ñùhu-gá cuáháⁿ-gá ní sáháⁿ ìn ñadìhí ní tnándeé-aⁿ yuhu dõg-gã ndàa sátá-gã, te ñaha-áⁿ sa ní çuu úxúú cuíá sã cùhú-aⁿ ngoyo ñaha níñi xii-aⁿ. ²¹ Te ducaⁿ ñi quide-aⁿ chí ní sani iní-aⁿ sá núu ndacu-aⁿ tnándeé-aⁿ cuèdicó luha yuhu dõó Jèsús te ndúha-aⁿ ní sani iní-aⁿ. ²² Te Jèsús ní nchócótó-gã ndàa sátá-gã te ní xiní-gá ñadìhí-áⁿ, te ní xáhaⁿ-gã:

—Yòhó ñaha cùhú, vá ndíhú-gá iní-n vitna chí sa ní ndúha-n, chí ní sándáá iní ñáhá-n xii-í —càchí-gá xãháⁿ-gã xii-aⁿ.

Te òrè-ni-áⁿ ñi ndúha ñaha cùhú-áⁿ.

²³ Te òrè ní quexio Jesús vehe tée cùnuu taxi tñuní veñúhu-áⁿ, te ní xiní-gá xindáhi víhí ñáyiú, te xindecu müsicú. ²⁴ Te ní xáhaⁿ-gã xii-yu:

—Chí táquèe xítí vehe-a, chí xíchí-a ñá túú ní xíhí-xi chí dicó xidí-xi —càchí-gá xãháⁿ-gã xii-yu.

Te ní sácú ndeé ñáhã-yu xii-gá sá dúcáⁿ ñi cãháⁿ-gá, chí sá cúú-xí mèe-yu te ní xíhí ndisa xíchí-áⁿ. ²⁵ Te ñáyiú-áⁿ ñi queé-yu te cuánguihu Jèsús núú cándòdo xíchí ñi xíhí-áⁿ, te ní tñi-gã ndaha-xi te òrè-ni-áⁿ ñi ndacóo-xi. ²⁶ Te nchaa ñuu cáá yàtni xíáⁿ ñi níhí ñáyiú tñúhu nàcuáa ní quide Jèsús.

Jèsús quidé tãtna-gá núú úú tnàhá cue tée cuáá

²⁷ Te sátá dúcáⁿ ñi cuu te ní xica Jèsús cuánuhú-gá, te ichi ñùhu-gá ní chinchícúⁿ ñáhã úú tnàhá cue tée cuáá xii-gá, te níhí cãháⁿ-güedé, te xãháⁿ-güedé xii-gá:

—Yòhó Jèsús, tée cùu ñani tnáhá ndíi Dàvíí, cundàhú iní ñáhã xii-ndí —càchí-güedé xãháⁿ-güedé xii-gá.

²⁸ Te òrè ní nasáá Jèsús núú quidé vehe-gá, te cue tée cuáá-áⁿ ñi quexio-güedé ndéé núú-gã, te ní xicáⁿ tñuhú-gã núú-güedé, te xãháⁿ-gã:

—¿Sándáá iní-ndó sã yúhú ndacu-í cada tátna-í núú-ndó-áⁿ? —càchí-gá xãháⁿ-gã xii-güedé.

Te ní xáhaⁿ-güedé xii-gá:

—Sándáá iní-ndí sá díú yòhó Jèsús ndacu-n càda tátna-n núú-ndí —càchí-güedé xãháⁿ-güedé xii-gá.

²⁹ Te Jèsús ní dácàá-gá ndaha-gá ní tendaha-gã núú-güedé, te ní xáhaⁿ-gã xii-güedé:

—Te vitna, ndúha núú-ndó chí ní sándáá iní-ndó sã díú yúhú ndacu-í cada tátna-í núú-ndó —càchí-gá xãháⁿ-gã xii-güedé.

³⁰ Te òrè-ni-áⁿ ñi ndúha núú-güedé, te Jèsús ní cãháⁿ víhí-gã dóho-güedé cuendá sã vã cãháⁿ-güedé nàcuáa ní cuu ní ndúha núú-güedé.

³¹ Te cue tée-áⁿ òrè ní ndee-güedé núú ndécú Jèsús, te ní ngüita-ni-güedé ní cani-güedé cuendú núú ñáyiú nàcuáa ní quide ñaha-gã xii-güedé. Te nchaa dava-gã ñuu cáá yàtni xíáⁿ ñi sáhãⁿ-güedé ní cani-güedé cuendú núú ñáyiú nàcuáa ní quide ñaha Jèsús xii-güedé.

Jèsús quidé tãtna-gá ñi tée ñihí

³² Te íhí ñi ndee cue tée ní ndúha núú-xi-áⁿ núú ndécú Jèsús, te ní quexio ñi úú ñáyiú ndecá-yu ñi tée ñihí yíhí ñaha espíritú cundíhi yucu ñávãha. ³³ Te Jèsús ní queñuhu-gá espíritú cundíhi yucu ñávãha yíhí ñaha xii tée-áⁿ, te òrè-ni-áⁿ ñi cuu ní nacáhãⁿ-dé. Te nchaa ñáyiú xindecu-áⁿ ño ní cuñúhu-yu, te ní xitnãhá-yu:

—Ñá túú tnàhí xiní-ó ñi tée duha cada ñuu nchoo cuè ñáyiú isràél ní cùu —cachí-yu xitnãhá-yu.

³⁴ Te cue tée cùu fariséú ní ngüita-güedé xitnãha-güedé:

—Tée-a chí sácuihnã chindèe ñaha-xi xii-dé queñùhu-dé nchaa espíritú yíhí ñaha xii ñáyiú te díu-ni sácuihnã-áⁿ táxi tñuní-xi nchaa espíritú-áⁿ —càchí-güedé xitnãha-güedé.

Jèsús cundàhú iní-gá ñáyiú

³⁵ Te Jèsús cuáhãⁿ-gá nchaa ñuu náhnú ndíhi nchaa ñuu líhli, te ndí tnáhá ñi ñi ñuu sãá-gã te ducaⁿ cuánguihu-gã ñi ñi veñúhu càa nchaa ñuu-áⁿ dánèhé-gã ñáyiú tñúhu váha, tñúhu sá sánú íchi ñaha xii-yu nàcuáa ndíhu ndaha ñaha Yá Ndiõxi xii-yu.

Te ducaⁿ-ni ta quide tátna-gá nchaa ñáyiú cùhú cuáháⁿ cuèi ndi dǎíⁿ ndi dǎíⁿ núú cuèhé tnàhá-yu ìíⁿ ìíⁿ-yu. ³⁶ Te sá ní xíní Jèsús sá ò vài ñáyiú nchicúⁿ ñáhá xii-gá, te ní cundàhú iní ñáhá-gǎ xii-yu chi ío ndíhú iní-yu, te vá yóo nèhe cuendá ñáhá xii-yu, te cùú-yu dàtná cue mbéé cue quití ñá túú tòli-xi. ³⁷ Te Jèsús ní xáhaⁿ-gǎ xii cue tée xica cuu ndíhi-gá:

—Nchòhò xíní-ndó sǎ òré ná sàà nduu cùu nchaa sá xítú ñáyiú te ío vài cuu. Te na càchí tnúhu ndáá-í xii-ndo sǎ dàtná ío vài sá xítú ñáyiú cùu, ducaⁿ ò vài ñáyiú cùmání cundedóho tnúhu-í, te ío sacú ñáyiú dàcuaha ñaha xii-yu. ³⁸ Núú xǎⁿ xíní ñúhu-xi cácaⁿ-ndó núú Yǎ Ndióxi Yáa cùú Xitohó-ndó ndíhi-yu cuendá sá ná dàcaháⁿ-gá iní-yu cáháⁿ-yu tnúhu-gá núú ncháa dava-gá ñàha ñáyiú-yu cùmání cundedóho tnúhu-gá —càchí-gá xáhaⁿ-gǎ xii-güedé.

10

Jèsús sǎñaha-gǎ tnúhu ndee iní xii ndi ùxúú cue tée xica cuu ndíhi-gá

(Mr. 3:13-19; Lc. 6:12-16)

¹ Te Jèsús ní cana-gá ndi ùxúú cue tée xica cuu ndíhi-gá, te ní sǎñaha-gǎ xii-güedé tnúhu ndee iní cundecu ndíhi-güedé cuendá queñuhu-güedé nchaa espíritú cundíhi yucu ñávàha yíhi ñaha xii ñáyiú, ndíhi cuendá sá cádá tátna-güedé nchaa dava-gá ñáyiú cùhú cuèi nándi núú cuèhé tnàhá-yu.

² Te duha xínani ndi ùxúú cue tée-áⁿ: tée cunuú-gá nání-dé Xímú, àdi Pelú chi úú ñú-dé, te ñaní-dé cùú tē Ndríxi, te tnàhá tē-áⁿ cùú-dé tée xica cuu ndíhi Jèsús, ndíhi tē Jàcobó ndíhi ñaní tē Jàcobó-áⁿ tēè nàni Juaá, te ndi ndúú cue tée-áⁿ cùú-güedé déhe tē Zebèdeú. ³ Te tnàhá tē Lìpé xicá cùu ndíhi-gá, ndíhi tē Bartolomé, ndíhi tē Mǎxi, ndíhi tē Mátéú tée cùu cobradór impuèstú ní cùu, ndíhi tē Jàcobó déhe tē Àlféú, ndíhi tē Lèbeú tée dànani-güedé Tàdeú, ⁴ ndíhi tē Xímú tée ní cundíhi cue tée cananístá, ndíhi tē Judás Iscarioté tée ní sáá nduu ní sáha cuendá ñáhá xii Jèsús núú cuè tée cùu úhú iní ñáhá xii-gá.

Jèsús tэндàha-gá ndi ùxúú cue tée xica cuu ndíhi-gá quíhíⁿ-güedé cáháⁿ-güedé tnúhu-gá núú ñáyiú

(Mr. 6:7-13; Lc. 9:1-6)

⁵⁻⁶ Te Jèsús ní xáhaⁿ-gǎ xii ndi ùxúú cue tée xica cuu ndíhi-gá sá quíhíⁿ-güedé cáháⁿ-güedé tnúhu-gá núú ñáyiú, te cùmání-gǎ caca-güedé quíhíⁿ-güedé, te ní xáhaⁿ-gǎ xii-güedé:

—Na càchí tnúhu-í xii-ndo sǎ méé-ní ñúú núú xindecu cue ñáyiú isràèl quíhíⁿ-ndó cáháⁿ-ndó tnúhu-í, te vá quíhíⁿ-ndó ni ìíⁿ ñúú yíndèhu distritú Sàmariá, te ni vǎ quíhíⁿ-ndó dàva-gá ñúú núú xindecu ñáyiú ñá túú cùu ñáyiú isràèl. Te cue ñáyiú isràèl-áⁿ cùú-yu dàtná cue mbéé cue quití ní xíta chi ta xíta nihnú-yu cuáháⁿ. ⁷ Te cúnaha-ndo xii-yu sá sà ní cuyatni nduu ndíhu ndaha ñaha Yá Ndióxi xii-yu. ⁸ Te cada tátna-ndo ncháa ñáyiú cùhú cuèi ñáyiú tnàhá cuèhé sǎ dátèhyú nihnu-xi yiquí cùñú-yu, te queñuhu-ndo ncháa espíritú cundíhi yucu ñávàha yíhi ñaha xii ñáyiú, te dandòto-ndo cue ñáyiú sa ní xíhí, te vá càcáⁿ-ndó yáhu-ndo núú ñáyiú òré cada-ndo ncháa chiuⁿ-áⁿ, chi sa ñaha-ndo sá dícò ducaⁿ ní taxi-í tnúhu ndee iní ndécú ndíhi-ndo.

⁹ Te vá cǎnèhe-ndo díhúⁿ cuu ichi-ndo, ¹⁰ te ni vǎ cǎnèhe-ndo ñunu cuhuⁿ ndachiuⁿ-ndo, te ni vǎ cǎnèhe-ndo ingá ichi dóó-ndó nàdáma-ndo, te ni vǎ cǎnèhe-ndo úú-gá chàú-ndó chi ñúu-ni chàú yíhí-ndó-áⁿ xǎⁿ-ni quíhi-ndo, te ni vǎ cǎnèhe-ndo tatnu, te ducaⁿ càda-ndo chi nchòhó sa ñaha-ndo sá ncháá ñáyiú quide chiuⁿ te ñúu-ni cuendá chiuⁿ quidé-yu ñíhí-yu sá xéxí-yu.

¹¹ Te ndi tnàhá ñúú ná quèxio-ndo te nducu-ndo ñáyiú cùtnuní iní-ndó sǎ cùú-yu ñáyiú vǎha, te vehe ñáyiú-áⁿ cundecu-ndo ndèè sáá nduu ndèe-ndo ñúú-áⁿ. ¹² Te òré quexio-ndo vehe-yu te cúnaha-ndo xii-yu: “Yá Ndióxi chindèe chitúú ñaha-gǎ xii-ndo ndècu-ndo”, duha cúnaha-ndo xii-yu. ¹³ Te núú ní cáháⁿ vǎha ndíhi ñáhá-yu xii-ndo, te cuu-xi sá vǎha sá cùú-xí-yu cuendá tnúhu ní xáhaⁿ-ndo-áⁿ, dico núú ñá túú ní càháⁿ vǎha ndíhi ñáhá-yu xii-ndo, te cúnaha-ndo xii-yu sá vǎ cùú-xí sǎ vǎha xii-yu tnúhu ní xáhaⁿ-ndo-áⁿ. ¹⁴ Te núú ní sáá-ndó ìíⁿ ñúú àdi ìíⁿ vehe, te núú ñá

tuu ní cǎháⁿ ndíhi ñaha vǎha-yu xii-ndo te ni ñà tuú ní cuiní-yu cundedóho-yu tnúhu cǎháⁿ-ndó te ndeɛ-ndo ñúú-án àdi vehe-án, te naquidi-ndo tícǎ chúhmá ní tníi sǎhá-ndó cuendá ná cùtnuní iní-yu sǎ ñà tuú quide váha-yu. ¹⁵ Te na cǎchí tnúhu ndáá-í xii-ndo sǎ sǎá nduu te ío-gǎ dandóho ñaha Yá Ndióxi xii ñáiyu ducaⁿ na cada ñaha xii-ndo-án dǎcúúxí ñáiyu ní xindecu ñúú Sodomá ndíhi ñúú Gómorrá.

Ndoho tnahá-ó cundecu-o ichi Xitohó Jesu-cristú

¹⁶ Te cada iní-ndó sǎ cúu-ndó dàtnǎ cue mbéé cue quití cuáháⁿ núú ío yíhi. Te ducaⁿ sǎtnahá-xi cùu-ndo chí yúhú tendaha ñaha-í xii-ndo quíhíⁿ-ndó núú xindecu cue ñáiyu cuihna íní-xi, te ío váha cuáha-ndo cuendá nǎcuáa cada-ndo dàtnǎ quidé cǒó, dico cunduu váha iní-ndó ñà tuú nǎ cada-ndo dàtnǎ quidé lómá.

¹⁷ Te quíhi iní-ndó chí cue ñáiyu na cùu úhú iní ñáhá xii-ndo, te cuáha cuendá ñáhá-yu xii-ndo núú cué téé cùchiuⁿ, te caniha-güedé xii-ndo xití veñúhu-güedé.

¹⁸ Te dava tucu ñáiyu cuu úhú iní ñáhá xii-ndo candeca ñáhá-yu xii-ndo quíhíⁿ núú cué téé cùnuu yindaha nacióⁿ, àdi núú dǎva-gǎ cue téé cùnuu sǎ cuendá-í. Te nchòhó níhí-ndó nǎcuáa cada-ndo cǎháⁿ váha-ndo cuendá-í núú-güedé ndíhi núú cué ñáiyu ñà tuú cùu ñáiyu isràél. ¹⁹⁻²⁰ Dico òré cuáha cuendá ñáhá-yu xii-ndo núú nchàa cue téé-án, te vá cání iní-ndó núú nása cunduu tnúhu cǎháⁿ-ndó núú-güedé, chí òré-ñǎ te níhí-ndó tnúhu cǎháⁿ-ndó. Te ñà díú mèe-ndo cahu iní-ndó tnúhu cǎháⁿ-ndó, chí mee Espíritú Yá Ndióxi Yáá cúú Tǎtá-ndó dǎcahú iní ñáhá-í xii-ndo nǎcuáa cunduu tnúhu cǎháⁿ-ndó.

²¹ Te dava cue téé cuáha cuendá-güedé ñaní-güedé núú cué téé cùchiuⁿ cuendá cahni ñaha-güedé, te dava cue téé cùu tǎtá díu-ni ducaⁿ cada-güedé déhe-güedé, te díu-ni ducaⁿ cada ñaha dava cue ñáiyu cuu déhe xii tǎtá-yu ndíhi nǎnǎ-yu, chí cuáha cuendá ñáhá-yu núú cué téé cùchiuⁿ cuendá cahni ñaha-güedé xii-yu. ²² Te nchòhó chí nchaa ñáiyu nguíta-yu cuu úhú iní ñáhá-yu xii-ndo sǎ cuendá-í. Te núu na cada ndee-ni iní-ndó cǎnchicúⁿ níhnu-ni-ndo íchi-í cuéi nǎndí sǎ ná cada ñáhá-yu xii-ndo ndeé ná sǎá nduu vǎ cundecu-gǎ-ndó ñuyúú-a ña, te nduu

táhú-ndó cundecu-ndo ni caa ni quíhíⁿ ndíhi Yá Ndióxi. ²³ Te núu ñúú ñúú cuiní-güedé tníi ñaha-güedé xii-ndo cada úhú ñáhá-güedé sǎ cuendá-í, te cunu-ndo núú-güedé quíhíⁿ-ndó íngǎ ñúú. Te na cǎchí tnúhu ndáá-í xii-ndo sǎ cùmání-gǎ quíhíⁿ-ndó nchàa dava-gǎ ñúú núú xindecu ñáiyu isràél cǎháⁿ-ndó tnúhu-í, te sa quixi tucu yúhú, Téé cùu ñaní tnáhá-ndó nchàa-ndo ñuyúú-a.

²⁴⁻²⁵ Te nchòhó xini-ndó sǎ ni ñúú téé dǎcuaha ñà tuú cùnuu-dé dǎcúúxí mèstrú-dé, te núú mèstrú téé-án nǎndí yǎha-dé ndécú-dé te tàú-dé nduu vétú iní-dé te núú tnáhá-dé yǎha-dé dàtnǎ yǎha mèstrú-dé-án. Te díu-ni ducaⁿ sǎtnahá tucu-xi cùu ñúú téé xinu cuechi, chí ñà tuú cùnuu-dé dǎcúúxí pàtróóⁿ-dé, te nchaa sǎ yǎha pàtróóⁿ-dé-án te tàú-dé nduu vétú iní-dé te núú tnáhá-dé yǎha-dé dàtnǎ yǎha pàtróóⁿ-dé-án. Te núu yúhú Yáá táxi tnuní ñáhá xii-ndo cǎchí-yu sǎ cúu-í sǎcuíhna, te uuⁿ-gǎ ducaⁿ cùñáhá-yu xii nchòhó cue téé cundíhi-í.

Vá yùhú-ó cuendá nchaa sǎ cáda ñaha ñáiyu xii-o

(Lc. 12:2-7)

²⁶ Te nchòhó vá yùhú-ndó núú ñáiyu. Chí nchaa tnúhu sǎ cúu yùhu ni cuu vá cúu yùhu-gǎ, chí nchaa dacuitíí sǎ queé tǔu-xi núú ñáiyu. ²⁷ Te nchaa tnúhu sǎ cǎchí tnúhu-í xii-ndo núú mée núú íí-ó, cùu-xi tnúhu sǎ ndúú yùhu ni cuu datúu-ndo núú cué ñáiyu cuéi núú chítú núú tàcá. ²⁸ Te xini ñuhu-xi sǎ vǎ yùhú-ndó cué ñáiyu cuéi na cahni ñáhá-yu xii-ndo, chí díu-ni yiqui cùñú-ndó ndàcú-yu cahni-yu, dico ñà tuú nǎgǎ ndacú-yu cada ñáhá-yu xii-ndo. Te tàú-ndó sǎ Yá Ndióxi yùhú-ndó chí Yáá-án ndacu-gǎ danàa-gǎ yiqui cùñú-ndó, te ndacu-gǎ daquíhíⁿ ñáhá-gǎ xii-ndo núú úhú núú ndáhú.

²⁹ Te nchòhó xini-ndó sǎ ndeé úú tnáhá tǐlaá cùyáhu-di núú íí-ní díhúⁿ, te ni íí-di ñà tuú xihí cùtèxínu-di chí ndeé núu mee Yá Ndióxi Yáá cúú Tǎtá-ndó ná cǎchí-gǎ te xihí-di. ³⁰ Dico nchòhó chí ío-gǎ nehé cuendá ñáhá Yá Ndióxi xii-ndo chí ndeé idi díqui-ndó yindehu. ³¹ Núu xiǎ cǎchí-í sǎ vǎ yùhú-ndó chí cùnuu-gǎ-ndó dǎcúúxí tǐlaá cuéi vǎi vihi-güedi.

Nchaa ñáyiú dàtúú núú tñaha ñáyiú-xi sá ndécú ndìhí-yu Xítohó Jesucristú

(Lc. 12:8-9)

³²Te na càchí tñúhu-í xii-ndo sã ncháá ñáyiú na dàtúú núú tñaha ñáyiú-xi sá ndécú ndìhí ñahá-yu xii-í, te ducaⁿ te tñahá yúhú dàtúú-í núú Tãtà-í Dútú Ndiòxí Yáá ndécú àndiú sá ndécú ndìhí-í-yu. ³³Dico nchaa ñáyiú na cũñaha xii tñaha ñáyiú-xi sá ñà túú ndécú ndìhí ñahá-yu xii-í, te ñiú-ni ducaⁿ càda yúhú tucu chi cũñaha-í xii Tãtà-í Dútú Ndiòxí Yáá ndécú àndiú sá ñà túú ndécú ndìhí-í-yu.

Ñà túú cùu ñⁿnuu ñáyiú

(Lc. 12:51-53; 14:26-27)

³⁴Te na càchí tñúhu-í xii-ndo sã vã caní iní-ndó sã yúhú véxi-í ñuyíú-a te cuu ñⁿnuu-gã ñáyiú cundecú-yu, chi da ngũíta-yu vã cúú ñⁿnuu-gã-yu cundecú-yu, te ducaⁿ chi nchaa ñáyiú vã quindáá iní ñahá xii-í ñáyiú-áⁿ ngóo-yu cuu úhú iní-yu nchaa ñáyiú quindáá iní ñahá xii-í. ³⁵Te dava cue tée xindecu tãtà-xi te ngóo-güedé cuu úhú iní-güedé tãtà-güedé, te ñiú-ni ducaⁿ càda cue ñáyiú ñìhí xindecu ñaná-xi, chi ngóo-yu cuu úhú iní-yu ñaná-yu, te ñiú-ni ducaⁿ càda tucu cue ñáyiú cùu sánu, chi ngóo-yu cuu úhú iní-yu ñaná yíi-yu. ³⁶Te ndí mèe-yu vehé-yu ngóo-yu vã cúú ñⁿnuu-gã-yu cundecú-yu.

³⁷Te na càchí tñúhu tucu-í xii-ndo sã ncháá ñáyiú ío-gá ná cùu iní tãtà-xi àdi ñaná-xi dàcúúxí yúhú, te ñáyiú-áⁿ ñà túú tàú-yu cundecu ndìhí ñahá-yu xii-í, te nchaa ñáyiú ío-gá ná cùu iní déhe ducuⁿ-xi, àdi déhe yoco-xi dàcúúxí yúhú, te ñiú-ni ducaⁿ ñà túú tàú-yu cundecu ndìhí ñahá-yu xii-í. ³⁸Te nchaa ñáyiú vã càncícuⁿ nihnu ñaha xii-í cuendá sá yúhú-yu ndohó-yu dàtná ndoho-í ñáyiú-áⁿ ñà túú tàú-yu cundecu ndìhí ñahá-yu xii-í. ³⁹Te cue ñáyiú na yúhú cuú sá cuendá-í te ñáyiú-áⁿ cũta nihnú-yu, dico nchaa ñáyiú vã yúhú cuú sá cuendá-í, te ñáyiú-áⁿ nduu táhú-yu cundecú-yu ni caa ni quíhíⁿ ndìhí Yá Ndiòxí.

Cuendá sá ndúú tãhú-ó

(Mr. 9:41)

⁴⁰Te nchaa ñáyiú na quèheⁿ cuendá ñahá xii-ndo te cada iní-yu sá tñahá yúhú ní queheⁿ cuendá-yu. Te nchaa ñáyiú na

quèheⁿ cuendá ñahá xii-í, te cada iní-yu sá tñahá Tãtà-í Dútú Ndiòxí Yáá ní tendaha ñaha xii-í véxi-í ñuyíú-a ní queheⁿ cuendá-yu. ⁴¹Te nchaa ñáyiú na quèheⁿ cuendá ñⁿ tée càháⁿ tñúhu Yá Ndiòxí cuendá sá quidé-dé chiúⁿ-gá, te dàtná-ni càa táhú cuñaha-gã nduu táhú tée ducaⁿ càháⁿ tñúhu-gá-áⁿ, ñiú-ni ducaⁿ cùnduu táhú cuñaha-gã nduu táhú ñáyiú ducaⁿ na quèheⁿ cuendá ñahá xii-dé. Te nchaa ñáyiú na quèheⁿ cuendá ñⁿ tée quide váha cuendá sá dúcáⁿ quide váha-dé, te dàtná-ni càa táhú nduu táhú tée-áⁿ ñiú-ni ducaⁿ cùnduu táhú nduu táhú ñáyiú na quèheⁿ cuendá ñahá xii-dé. ⁴²Te nchaa ñáyiú na cuñaha ñⁿ yaxiⁿ ndute coho ñⁿ ñáyiú cùu cuendá-í cuendá sá ní tuha ñahá-yu xii-í cuéí ñà túú cùnuu vihí-yu, te ñáyiú ducaⁿ na cuñaha ndüte-áⁿ ñíhí-yu sá ndúú táhú-yu núú Yá Ndiòxí —càchí Jèsús xãhaⁿ-gã xii-güedé.

11

Jèsús càháⁿ ndìhí-gá cue tée xica cuu ndìhí té Juàá

(Lc. 7:18-35)

¹Te sãtá ní yáha ducaⁿ ní xáhaⁿ Jèsús xii ndí ùxúú cue tée xica cuu ndìhí-gá, te ní xica-gá cuáháⁿ-gá nchaa ñiúu cáá yãtni xíáⁿ dánèhé-gá ñáyiú tñúhu-gá.

²Te té Juàá yíhí-dé vecaá te ní ñíhí-dé tñúhu nchaa ñacuáa quide Xítohó Jesucristú. Te sãtá dúcáⁿ te ní tendaha-dé ñⁿ úú cue tée xica cuu ndìhí-dé cuáháⁿ-güedé núú ndécú Jèsús. ³Te òrè ní quexio-güedé núú ndécú-gã, te xicáⁿ tñúhú-güedé núú-gã ñacuáa ní xáhaⁿ tẽ Juàá xii-güedé, te xãhaⁿ-güedé xii-gá:

—Véxi-ndí xicáⁿ tñúhú-ndí núú-n ñúu sá ñiú-n cùu-n Cristú Yáá ní tendaha Yá Ndiòxí véxi ñuyíú-a, àdi sá cùndètu nahi-ni-ndí mei Yáá-áⁿ —càchí-güedé xãhaⁿ-güedé xii-gá.

⁴Te Jèsús ní xáhaⁿ-gã xii-güedé:

—Chí cuánùhú te cani-ndo cuendú núú tẽ Juàá nchaa sá ní xiní-ndó quide-í, ndìhí nchaa ñacuáa ndùu tñúhu ní càháⁿ-í ní xíndedóho-ndo. ⁵Te cũñaha-ndo xii-dé sá quidé tãtna-í núú cuè ñáyiú cuàá, te quide tãtna-í cue ñáyiú yacua, ndìhí cue ñáyiú tñahá cuéhé sã dátèhyú nihnu-xi yiqui cùnú-yu, ndìhí cue ñáyiú doho, nchaa ñáyiú-áⁿ quidé tãtna-í, te ndúha-yu, te ndéé tñahá cue ñáyiú sa ní

xihí dándòto-í cúnaha-ndo. Te cúnaha tucu-ndo xii-dé sá ndèccu-í dánhèhé-í nchaa ñáyi ndàhú, tnúhu sá sánú ichi ñaha xii-yu nàcuáa naníhí tǎhú-yu. ⁶ Te cúnaha tucu-ndo xii-dé sá ío váha tǎhú nchaa ñáyi ñá túú quide sáá inf-xi nchaa tnúhu cǎháⁿ-í, duha cúnaha-ndo xii-dé —cǎchí-gǎ xǎhaⁿ-gǎ xii-güedé.

⁷ Te sáta ñí yáha-güedé cuánuhú-güedé te ní ngúita Jèsús ní cǎháⁿ-gǎ núú ñáyi cuendá té Juáá, te xǎhaⁿ-gǎ xii-yu:

—Nchòhó ní sǎháⁿ ndéhé-ndó ñⁿ tée ndècu xiti yucu, te tée-áⁿ ñá túú sání ñⁿ sani úú inf-dé, chí ñá túú quide-dé dàtná quidé nchaa ité nǎhnú cuǎháⁿ-xi duha cuǎháⁿ-xi dàcáⁿ òré quéné tǎchí. ⁸ Te ní ñá túú ní sǎháⁿ ndéhé-ndó ñⁿ tée ñihnu dóó váha dóó vii cǎa. Te nchòhó xini-ndó sǎ nchǎá ñáyi ñihnu dóó váha dóó vii cǎa xindecú-yu vehe cue tée cùnuu yindaha ñáyi. ⁹ Dico nchòhó chí ní sǎndéhé-ndó ñⁿ tée cǎháⁿ tnúhu Yá Ndióxi, te ndǎá sǎ díú ñⁿ tée cǎháⁿ tnúhu-gǎ cúú-dé, te cùnuu-gǎ-dé dàcúúxi dàva-gǎ cue tée cǎháⁿ tnúhu-gǎ. ¹⁰ Te díu cuendá té Juáá-áⁿ cǎháⁿ-xi núú tútú Yá Ndióxi nàcuáa ní xǎhaⁿ-gǎ xii Crístú, te duha ní xǎhaⁿ-gǎ:

Tendaha-í ñⁿ tée cǎháⁿ-dé tnúhu-í codonù-dé núú-n, cuendá dàtúha-dé ñáyi cuendá quíndǎá inf-yu tnúhu-n.

Duha ní xǎhaⁿ-gǎ, te ducaⁿ ñí ngódó tnúú núú tútú-gǎ. ¹¹ Te na cǎchí tnúhu ndǎá-í xii-ndo sǎ ñí ñⁿ cue tée ñuyú-a ñá túú cùnuu-güedé dàtná cùnùu té Juáá tée dàcuandute ñaha xii ñáyi. Te nchaa ñáyi sa ta ndíhu ndaha ñaha Yá Ndióxi vitna cuǎháⁿ cùnùu-gǎ-ni tucú-yu dàcúúxi té Juáá cuéi cúú-yu ñáyi ñá túú cùnuu dàcúúxi dàva-gǎ ñáyi yindaha-gǎ.

¹² Te ndéé cúnahá ní ngúita té Juáá tée dàcuandute ñaha xii ñáyi cǎháⁿ-dé tnúhu Yá Ndióxi ñuyú-a, ndéé dàvá-áⁿ ñí ngúita ñáyi cuíni-yu sá ndíhu ndaha ñaha Yá Ndióxi xii-yu te ndècu ndéé-yu quidé-yu nàcuáa ndíhu ndaha ñaha-gǎ xii-yu. ¹³ Te nchaa cue tée ní xóo cǎháⁿ tnúhu Yá Ndióxi ndéé sanaha ñí cǎháⁿ-güedé sǎ díú-gǎ ndíhu ndaha-gǎ cue ñáyi, te díu-ni ducaⁿ ñí cǎháⁿ tucu ndíi Moisés ní ngódó tnúú núú tútú ndíi. Te díu-ni ducaⁿ cùnuu nchaa tnúhu-áⁿ cǎháⁿ-xi nàcuáa ndíhu ndaha Yá

Ndióxi ñáyi ndéé ní sáá nduu ñí ngúita té Juáá cǎháⁿ-dé tnúhu-gǎ ñuyú-a. ¹⁴ Te na cǎchí tnúhu-í xii-ndo sǎ cǎdá cuendá-ndó, chí núú tútú Yá Ndióxi cǎchí-xi sǎ ndíxi té Éliás, te díu núú té Éliás-áⁿ ñí quide té Juáá. ¹⁵ Te nchaa nchòhó ñáyi ndédóho nchaa tnúhu cǎháⁿ-í-a te ío váha chí cuǎha cuendá.

¹⁶ Te na cǎchí tnúhu tucu-í xii-ndo nàcuáa sǎtnahá-xi cùu ñáyi ndècu vitna. Chí ñáyi-áⁿ cúú-yu dàtná cue landú sácóo núú yǎhu dàdiqui-güexi te ñíhi cǎháⁿ-güexi, te xítnaha-güexi ndi mee landú-güexi: ¹⁷ “Ní tíú-ndí yáa ndíhi vílu te ñá túú ní cuíni-ndó cǎta-ndo. Te ío yica inf ní xita yuhu-ndí te ñá túú ní ndǎhyú-ndó”, cǎchí-güexi xítnaha-güexi. Te ducaⁿ sǎtnahá-xi cùu ñáyi ndècu vitna, ¹⁸ chí té Juáá ío ndàhú ní xóo caxi-dé, te ní ñá túú ní xóo coho-dé ndudí ndéhé yoho yàha stilé sǎ ní nduu-xi ndidí, te sǎ dúcáⁿ ñí xóo cada-dé te ní cǎchí-yu sǎ ñí xindecu ndíhi-dé espíritú cúndíhi yucu ñávaha. ¹⁹ Te sáta ñí quexio yúhú Tée cùu ñani tnáhá-ndó nchaa-ndo, te xèxi-í xihí-í quidé-í, te cǎchí-yu sǎ yúhú cúú-í ñⁿ tée xèxi vihi te xihí vihi, te cǎchí tucú-yu sǎ cúú-í tée xica cuu ndíhi cue tée cuihna inf-xi quide cobrá ñáhá xii-yu cuendá impuestú ndíhi nchaa dava-gǎ cue tée ndècu ichi chehé ichi duha, duha cǎchí-yu. Te ñáyi ní tnahá tnúhu ndíhi Yá Ndióxi, ñáyi-áⁿ quidé-yu sǎ váha nàcuáa cutnúni sǎ meé-gǎ ío ndècu ndíhi-gǎ sǎ xini tnúni-gǎ —cǎchí-gǎ xǎhaⁿ-gǎ xii-yu.

Cuendá ñáyi dava ñuu ñá túú sǎndǎá inf tnúhu Xítóhó Jesucristú

(Lc. 10:13-15)

²⁰ Te Jèsús ní ngúita-gǎ cǎháⁿ-gǎ dóho nchaa ñáyi ñuu núú ío-gǎ vai núú sǎ vǎ yóo tnáhí ndacu cada ní quide-gǎ, chí nchaa ñáyi ñuu-áⁿ ñá túú cuíni-yu ndixi túu inf-yu sǎ ñá túú quide váha-yu ndècú-yu, te xǎhaⁿ-gǎ xii-yu:

²¹ —¡Ndàhú nchòhó cue ñáyi ñuu Corazín! ¡Te ndàhú nchòhó cue ñáyi ñuu Bètsaidá! Chí núú dícó ñuu Tírú ndíhi ñuu Sidón ní quide-í nchaa sǎ vǎ yóo tnáhí ndacu cada datná ní quide-í ñuu-ndó-á ñí xini-ndó ñá, te sǎ ndéé ama-gǎ cuihnú-yu dóo ndàhú te cunu cóo-yu núú yáa cuendá sǎ ndíxi cuéchi inf-yu sǎ ñá túú quide váha-yu ní cùu. ²² Dico sáá nduu te ío-gǎ

dandòho ñaha Yá Ndiöxí xii-ndo dàcüúxí ñáiyu ñúú Tirú ndihi ñáiyu ñúú Sidón. ²³ Te nchòhó cue ñáiyu ñúú Capèrnaúm ío quide cahnu-ndo mee-ndo, te quide iní-ndó sá sá cuánda-ná-ndó àndiú, dico ñáhá chi núú ùhú núú ndàhú nduu táhú-ndó cùndecu-ndo. Te núú dicó ñúú Sòdomá ní quide-í nchaa sá vǎ yòo tnàhí ndàcu cada datná ní quide-í ñúú-ndó ní xiní-ndó ñá, te ñáiyu-áⁿ vǎ náǎ-yu chi cundecu-ní-yu ndéé vitna ni cùu. ²⁴ Te na càchí tnúhu-í xii-ndo sá sáá nduu te ío-gá dandòho ñaha Yá Ndiöxí xii-ndo dàcüúxí ñáiyu ñúú Sòdomá —càchí-gá xáhaⁿ-gá xii nchaa ñáiyu ñúú-áⁿ.

*Jèsús cuiní-gá sá túhá ñaha ñáiyu xii-gá
(Lc. 10:21-22)*

²⁵ Te sáta xǎⁿ te Jèsús ní ngúíta-gá càháⁿ ndihi-gá Tǎtá-gǎ Dútú Ndiöxí, te xáhaⁿ-gǎ:

—Yòhó Tǎtá-í Dútú Ndiöxí, ío chìnuhu ñaha-í xii-n chi ñiú-n tàxi tnuní-n àndiú ndihi ñuyíú-a, te dànehé-n cuè ñáiyu nchaa tnúhu váha, te ñiú-ni ñáiyu-áⁿ cúú-yu ñáiyu ñá túú cùnuni iní-xi nchaa tnúhu càháⁿ cue téé càchí sá ío túha, te nchaa tnúhu váha-áⁿ ñà túú dàtúu-n núú ñáiyu càchí sá ío túha te ío váha sáá díquí-xi. ²⁶ Chi ducaⁿ cuiní-n cùnduu —càchí-gá xáhaⁿ-gǎ xii Tǎtá-gǎ.

²⁷ Te xáhaⁿ-gǎ xii nchaa ñáiyu xǎndecu-áⁿ:

—Mee Tǎtá-í Dútú Ndiöxí ní càchí-gá sá cùnùu-í núú nchàandí túhú sá ío. Te vǎ yòo ñⁿ-gá xiní nàcuáa sàni iní yúhú Déhe Dútú Ndiöxí, chi ñⁿdií díí-ni mee-gǎ xiní-gá nàcuáa sàni iní-í, te mee-í xiní-í nàcuáa sàni iní méé-gǎ. Te nchaa ñáiyu càchí iní-í sá quiní-yu nàcuáa sàni iní Tǎtá-í Dútú Ndiöxí te xǎtnúhu-í-yu, te vǎ yòo ñⁿ-gá xiní chi ñiú-ni ñáiyu ducaⁿ xǎtnúhu-í-áⁿ xiní-yu. ²⁸ Te nchaa nchòhó ñáiyu ñá túú ndècu váha, ñáiyu ñá túú nihí nàcuáa cada cundecu váha iní-xi quixi-ndo túha ñaha-ndo xii-í nàcuáa ducaⁿ cùndecu váha iní-ndó. ²⁹ Te cuu vii cuu váha iní-ndó tñi-ndo nchaa tnúhu càháⁿ-í, te ío dacuáha-ndo, te ducaⁿ càda-ndo chi yúhú ío càhnu iní-í, te ío ndàhú iní-í. Te núú ducaⁿ na càda-ndo te ío váha cuu iní-ndó cùndecu-ndo. ³⁰ Te tñi-ndo nchaa tnúhu càháⁿ-í chi ñá túú cùu-xi ñⁿ sá véé, chi cada iní-ndó sá cúu-xí dàtná ñⁿ chiuⁿ ñamá —càchí-gá xáhaⁿ-gǎ xií-yu.

12

Cue téé xica cuu ndihi Jèsús sàhnú-güedé yoco tríú nduu ndetátú ñáiyu

(Mr. 2:23-28; Lc. 6:1-5)

¹ Te ñⁿ nduu cùu-xi nduu ndetátú ñáiyu ñùhu Jèsús ichi ndihi cue téé xica cuu ndihi-gá, te ta yáha-gá ndihi-güedé ñⁿ xichi núú cáá tríú te xǎxǎhí-güedé docó núú xǎáⁿ ní ngúíta-güedé sàhnú-güedé yoco tríú-áⁿ, te ndihi ndaha-güedé quíⁿ-güedé quéé tríú-áⁿ tá xèxi-güedé cuáháⁿ. ² Te cue téé cùu fariséú ní xiní-güedé nàcuáa quide cue téé xica cuu ndihi Jèsús, núú ní xáhaⁿ-güedé xii-gá:

—¿Ná cuendá ducaⁿ quide cue téé xica cuu ndihi-n sàhnú-güedé yoco tríú, te vitna cùu-xi nduu ndetátú-í? Te ñá túú tàú-güedé ducaⁿ càda-güedé —càchí-güedé xáhaⁿ-güedé xii-gá.

³ Te Jèsús ní xáhaⁿ-gǎ xii-güedé:

—¿Náa ñá túú dàcuaha-ndo núú tùtú Yá Ndiöxí núú càháⁿ-xi nàcuáa ní quide ndíí Dávíí cùnàhá ní xǎhí ndíí docó ndihi cue téé ní xica cuu ndihi ndíí-áⁿ? ⁴ Chi ndíí-áⁿ ní quíhu ndíí vehe Yá Ndiöxí ní queheⁿ ndíí páá ní cuu íí ndécú-áⁿ ní xexi ndíí ndihi cue téé ní xica cuu ndihi ndíí, te ñá túú tàú ndíí sá dúcáⁿ càda ndíí ndihi cue téé-áⁿ ní cùu, chi mee-ni cuè dútú tàú-güedé caxi-güedé páá-áⁿ ní cùu. ⁵ ¿Te náa ñá túú xiní-ndó nàcuáa càháⁿ-xi núú tùtú ndíí Moisés sá ncháá cuè dútú vǎ ndetátú-güedé nduu cùu-xi nduu ndetátú-áⁿ? Te ñá díú ñⁿ cuéchi cùu-xi sá dúcáⁿ ñà túú ndetátú-güedé nduu cùu-xi nduu ndetátú. ⁶ Te na càchí tnúhu-í xii-ndo sá yúhú cùu-í téé ío-gá cùnùu ndecu ndihi-ndo dacúúxí vèñúhu sá ío cùnùu. ⁷ Dico nchòhó chi ñá tècu tnuní-ndó nàcuáa càháⁿ Yá Ndiöxí núú tùtú-gá núú càchí-xi: “Yúhú cuiní-í sá cùndàhú iní-ndó cuè tnaha ñáiyu-ndo te ñá díú mèe-ni sá càhni-ndó quíⁿ nduu táhú-í”, duha càchí-gá núú tùtú-gá. Te núú dicó nchòhó tècu tnuní-ndó ñá, te vǎ càháⁿ cuèhé-ndó cuendá nchaa ñáiyu ñá túú ndecu cuéchi-xi. ⁸ Te yúhú Téé cùu ñaní tnáhá-ndó nchaa-ndo, tnáhá-í ndécú ndihi-í tnúhu ndee iní sá cùu-í nchaa ñáiyu nàcuáa càda-yu nduu ndetátú-ó-á —càchí-gá xáhaⁿ-gǎ xii-güedé.

*Ñⁿ téé ní yíchí ñⁿ xio ndaha-xi
(Mr. 3:1-6; Lc. 6:6-11)*

⁹ Te Jèsús ní xica-gá cuáháⁿ-gá, te cuánguihu-gá xití ìⁿ veñúhu. ¹⁰ Te xíáⁿ ndécú ìⁿ téé ní yíchí ìⁿ xio ndaha-dé. Te dava cue téé xĩndecu-áⁿ ndúcú-güedé nàcuáa cada-güedé cacáⁿ cuéchi-güedé cuèndá-gá núú cuè téé cùnuu, te ní xícaⁿ tnúhú-güedé núú-gá, te xáhaⁿ-güedé:

—Cachí tnúhu xii-ndí núu cuu cada tátna-o ìⁿ téé cùhú nduu cùu-xi nduu ndetatú-ó áⁿ ñáhá —càchí-güedé xáhaⁿ-güedé xii-gá.

¹¹ Te Jèsús ní xáhaⁿ-gá xii-güedé:

—Te nchòhò òré ná ngàunihu ìⁿ mbéé-ndó ìⁿ déhvá cùnú te nàtava-ndo-di cuéi cùu-xi nduu ndetatú-ó. ¹² Te ìⁿ ñáyiú ío-gá cúnúú-yu dàcúxí ìⁿ mbéé, núu xíáⁿ tàù-ó sá cádá-ó sá vaha sá cúú-xí-yu cuéi cùu-xi nduu ndetatú-ó —càchí-gá xáhaⁿ-gá xii-güedé.

¹³ Te dàtnùnì ní xáhaⁿ-gá xii téé cùhú ndaha-xi-áⁿ:

—Ndacani ndaha-n —càchí-gá xáhaⁿ-gá xii-dé.

Te téé-áⁿ ní ndacani-dé ndaha-dé, te òré-ni ní ndúha ní nduu-xi dàtná cáá ìngá xio ndaha-dé. ¹⁴ Te cue téé cùu fariséú ní ndee-güedé xití veñúhu, te ní ngúíta-güedé ndátnúhu-güedé núu nása cada-güedé cahni-güedé Jèsús.

Nàcuáa sa ndèé tñuní cuèndá Jèsús

¹⁵ Te sátá ní cutnùnì iní Jèsús nàcuáa cuiní-güedé cada ñaha-güedé xii-gá te ní xica-gá cuáháⁿ-gá, te ío vài ñáyiú nchicúⁿ ñáhá xii-gá cuáháⁿ, te tnáhá cue ñáyiú cùhú nchicúⁿ ñáhá xii-gá cuáháⁿ, te ní quide tátna-gá cue ñáyiú-áⁿ. ¹⁶ Te ní xáhaⁿ-gá xii-yu sá vā cāháⁿ-yu yoo cùu-gá. ¹⁷ Te ducaⁿ ní cuu chí ní quee ndáá-xi nàcuáa ní xáhaⁿ Yá Ndiòxí xii ndí Chàíá téé ní xóo cáháⁿ tnúhu-gá ndéé sanaha ní chídó tñunì ndí núú tütú-gá, te duha nduu tnúhu ní xáhaⁿ-gá:

¹⁸ Téé-a cùu-dé téé ní sani iní-í sá cúnú cuéchi-dé núu-í,

te ío cùu iní-í-dé, te cùdí ìní-í-dé.

Te yúhú cuáñaha-í Espiritú-í cundecu ndíhi-dé,

te diu-dé cúnaha-dé xii nchaa ñáyiú ñuyú sá yúhú ío ndáá quidé-í.

¹⁹ Te vā dácàá-dé tnúhu cáháⁿ-dé ndíhi ñáyiú, te ní vā cáná sàa-dé òré cáháⁿ-dé,

te ní vā yóo níhí tnúhu nása cáháⁿ-dé cuhuⁿ-dé ichi.

²⁰ Te ní ñá túú ná cada-dé cue ñáyiú cùu datná ìⁿ tnu ndóó sá cuiní-xi tnáhnú, te diu-ni ñáyiú-áⁿ cúú tucú-yu dàtná ìⁿ mèchá càndíl sá ío quène ñúhmá te cuiní-xi ndahvá.

Te ducaⁿ sátnahá-xi cùu ñáyiú-áⁿ chí ñá túú níhí ndéé-yu cundecu-yu sá cúú-xi-í, te mee-ni sá vaha cada ñaha-dé xii-yu,

te diu-ni ducaⁿ càda-dé ndéé sáá nduu cutnùnì iní nchaa ñáyiú sá ío ndáá quidé-dé.

²¹ Te nchaa ñáyiú níhí ñuyú ío cundee cùu cahnu iní ñáhá-yu xii-dé.

Duha ní xáhaⁿ-gá xii ndí Chàíá ní chídó tñunì ndí núú tütú-gá.

Càchí-güedé sá ndécú ndíhi Jèsús espíritú cundíhi yucu ñávaha

(Mr. 3:20-30; Lc. 11:14-23; 12:10)

²² Te ní quexio ìⁿ úú cue téé núú ndécú Jèsús, te ndéca-güedé ìⁿ téé níhí te cuáá-dé, te yíhi ñaha espíritú cundíhi yucu ñávaha xii-dé, te Jèsús ní queñuhu-gá espíritú cundíhi yucu ñávaha yíhi ñaha xii-dé, te òré-ni-áⁿ ní cuu ní nacáháⁿ-dé te ní ndúha núú-dé. ²³ Te nchaa ñáyiú xĩndecu-áⁿ ío ní cuñúhu-yu sá dúcáⁿ ní quide-gá, te ní xítñahá-yu:

—Váa téé-a cùu-dé ñani tnáhá ndí Dávíí téé tendaha Yá Ndiòxí quixi ñuyú-a —càchí-yu xítñahá-yu.

²⁴ Te cue téé cùu fariséú ní tecú dóho-güedé nàcuáa nduu tnúhu xítñahá-yu, núu xíáⁿ ní xítñaha-güedé:

—Téé-a ndèñuhu-dé nchaa espíritú cundíhi sáculhná yíhi ñaha xii ñáyiú, chí diu-ni sáculhná-áⁿ chindéè ñaha-xi xii-dé te diu-ni-xi tàxi tñuní-xi nchaa espíritú-áⁿ —duha ní xítñaha-güedé.

²⁵ Te Jèsús ní cutnùnì iní-gá nàcuáa nduu tnúhu ní xítñaha-güedé, núu ní xáhaⁿ-gá xii-güedé:

—Te nchòhò xini-ndó sá núu ìⁿ téé yíndaha ìⁿ nacióⁿ vā cúú ìⁿnuu-dé ndíhi cue téé cundíhi-dé, te vā cùdí-dé cunuu-dé. Te diu-ni ducaⁿ sátnahá tucu-xi cùu tucu cue téé cùchiuⁿ ìⁿ núu, chí núu vā cúú ìⁿnuu-güedé cundecu-güedé, te vā cùdí-güedé cundecu-güedé taxi tñuní-güedé. Te diu-ni ducaⁿ sátnahá

tucu-xi cùu cue ñáyiú xĩndecu ìⁿ-ni vèhe, chi núu vá cúú ìⁿnuú-yu cundecú-yu te vá cúdĩi-yu cundecu càhnú-yu. ²⁶ Te núu sácuihná ducaⁿ quide-xi queñuhu-xi cue espíritú cúndĩhi-xi yihi ñaha xii ñáyiú ña, te ñá túú cùu ìⁿnuu-xi ndecu-xi te núu ducaⁿ, te vá cúdĩi sácuihná-ãⁿ cundecu-xi taxi tñuní-xi te núu ducaⁿ quide-xi. ²⁷ Te duha càháⁿ-í chi nchòhò càchí-ndó sã chĩndèe ñaha sácuihná xii-í queñuhu-í nchaa espíritú cúndĩhi-xi yihi ñaha xii ñáyiú. Te núu yúhú quidé cuendá-ndó sã sácuihná chĩndèe ñaha-xi xii-í, te xini ñuhu-xi cada cuendá-ndó yòo chĩndee ñaha xii cue tée xica cuu ndĩhi-ndo queñuhu-güedé nchaa espíritú cúndĩhi yucú ñávãha yihi ñaha xii ñáyiú. Te mee-güedé càchí-güedé sã nchòhò ñá túú càháⁿ ndáá-ndó sã dúcáⁿ càháⁿ-ndó. ²⁸ Dico yúhú chi Espíritú Yã Ndióxi chĩndèe ñaha-xi xii-í queñuhu-í nchaa espíritú cúndĩhi sácuihná yíhi ñaha xii ñáyiú, te sã dúcáⁿ chĩndee ñaha Espíritú-gá xii-í, xĩãⁿ cutnùní sã sã ní sáá nduu cuiñí-gá ndĩhu ndaha ñaha-gá xii-ndo.

²⁹ Te nchòhò xini-ndó sã cuè ñadúhú chi vá ndácú-güedé cuendá-ni quihu-güedé duhu-güedé vehe ìⁿ tée ío ndee, chi díhna-gá xini ñuhu-xi tñi-güedé tée-áⁿ dacùtu ñaha-güedé xii-dé dātñuní ducaⁿ te ndacu-güedé duhu-güedé nchaa sã ndécú ndĩhi-dé.

³⁰ Te nchaa ñáyiú ñá túú cúndĩhi ñaha xii-í, te cùu úhú iní ñáhã-yu. Te nchaa ñáyiú ñá túú chĩndee ñaha xii-í, te dàquee tĩhũ-yu chiú quide-í.

³¹ Te na càchí tñuhu-í xii-ndo sã ncháá ñáyiú quide nchaa sã cuèhé sã dúhá cuu cada càhnu iní ñáhá Yã Ndióxi xii-yu, te diu-ni ducaⁿ cùu cada càhnu iní-gá nchaa tñuhu cuèhé tñuhu duha càháⁿ-yu. Dico cue ñáyiú na càháⁿ úhú cuendá Espíritú-gá, te ñáyiú-án vã cáda càhnu iní ñáhá tñáhí-gá xii-yu. ³² Te nchaa ñáyiú na càháⁿ úhú cuendá yúhú Tée cùu ñaní tñáhã-yu nchaa-yu, te cuu cada càhnu iní ñáhá Yã Ndióxi xii-yu. Dico cue ñáyiú na càháⁿ úhú cuendá Espíritú-gá te vá cáda càhnu iní ñáhá tñáhí-gá xii-yu cuèi vitna ndècu vívũ-yu, te cuèi na cùu-yu.

Ndi díⁿ núu yutnu xini-ó nã yutnu cùu-xi cuendá sã sãvidí-xi (Lc. 6:43-45)

³³ Te nchòhò xini-ndó sã ndi díⁿ núu yutnu xini-ó nã yutnu cùu-xi cuendá sã sãvidí-xi, te xini-ó sã ncháá yutnu váha cùuⁿ mee-ni sãvidí váha, dico nchaa yutnu sã ñá túú váha te cùuⁿ mee-ni sãvidí sã ñá túú váha. Te duha càháⁿ-í cuendá cada cuendá váha-ndo nãcuáa nduu chiú quide-ndo ìⁿ ìⁿ-ndo cuendá ducaⁿ cutnùní ná ñáyiú cùu-ndo. ³⁴ Dico nchòhò cúu-ndó dātñá ìⁿ cóo dèéⁿ chi ío cuihna iní-ndó, te vá cáni iní-ndó sã ndácú-ndó càháⁿ-ndó ìⁿ tñuhu váha, chi ío cuihna ìn-ndó. Te nchòhò xini-ndó sã ncháá ñáyiú càháⁿ-yu nání véxi iní-yu. ³⁵ Te nchaa ñáyiú váha iní-xi càháⁿ-yu tñuhu váha, chi diu-ni tñuhu váha-án ñúhú iní-yu. Te nchaa ñáyiú cuihna iní-xi càháⁿ-yu tñuhu cuèhé tñuhu duha, chi diu-ni tñuhu cuèhé tñuhu duha-án ñúhú iní-yu. ³⁶ Te na càchí tñuhu-í xii-ndo sã ná sáá nduu cáda ndáá Yã Ndióxi cuèchi nchaa nchòhò ñáyiú ndècu ñuyú-á, te nchaa tñuhu cuèhé tñuhu duha càháⁿ-ndó càháⁿ-gá sã ñá túú ní quide váha-ndo sã dúcáⁿ ní càháⁿ-ndó tñuhu-án. ³⁷ Te nãcuáa nduu tñuhu ní càháⁿ-ndó ìⁿ ìⁿ-ndo, te ducaⁿ càháⁿ Yã Ndióxi te núu ndècu cuèchi-ndo ãdi ñá túú ndècu cuèchi-ndo. Te núu ñá túú cuèchi-ndo te cácu-ndo, dico núu ndècu cuèchi-ndo te vá cácu-ndo —càchí-gá xãhaⁿ-gã xii cue tée cùu fariséú-án.

Cue tée cuiñí sã cáda Jèsús ìⁿ sã vã yòo tñáhí ndàcu cada

(Mr. 8:12; Lc. 11:29-32)

³⁸ Te cue tée cùu fariséú, ndĩhi cue tée dàcuaha ñaha xii ñáyiú nchaa tñuhu ní chídó tñuní ndiú Moisés xãhaⁿ-güedé xii Jèsús:

—Mèstrú, cuiñí-ndí cada-n ìⁿ sã vá yòo tñáhí ndàcu cada cuendá ducaⁿ cutnùní iní-ndí sã Yã Ndióxi chĩndèe ñaha-gá xii-n —càchí-güedé xãhaⁿ-güedé xii-gá.

³⁹ Te Jèsús ní xãhaⁿ-gã xii-güedé:

—Ñáyiú ndècu ichi cuèhé ichi duha ñá túú cuiñí-yu tñi-yu tñuhu càháⁿ Yã Ndióxi, te ñáyiú-án cuiñí-yu cada-í ìⁿ sã vã yòo tñáhí ndàcu cada nãcuáa cutnùní iní-yu núu ndáá sã Yã Ndióxi chĩndèe ñaha-gá xii-í. Dico yúhú chi ñá túú nãgá cada-í quini-yu, chi sa ñihí-yu tñuhu nãcuáa ní

yáha ndíi Jònás téé ní xóo cáháⁿ tnúhu Yá Ndióxi ndéé sanaha, te diu-ni ducaⁿ yáha yúhú tucu. ⁴⁰ Chi ndíi Jònás-áⁿ ní xúhuⁿ ndíi úní nduu úní niú xití ìⁿ chácá cáhnú vihi nani ballená. Te diu-ni ducaⁿ yáha yúhú Téé cùu ñaní tnáhá-ndó ncháa-ndo, chi úní nduu úní niú cuhuⁿ-í xití ñuhu. ⁴¹ Te na sáá nduu càda ndáá Yá Ndióxi cuéchi ncháa ñáiyu ndècu ñuyúú-a, te dàvá-áⁿ cachí ncháa ñáiyu ñuu Nínivé sá ñà túú ní quide ndáá ncháa ñáiyu ndècu vitna, te ducaⁿ càháⁿ-yu chi mèe-yu ní dáñá-yu ichi cuéhé ichi duha cútñahá ní sáháⁿ ndíi Jònás ñuu-yu ní cáháⁿ ndíi tnúhu Yá Ndióxi núú-yu. Dico vitna iha ndècu ndíhi ñaha-ndo xii yúhú, te diu-í ío-gá cúnùu-í dàcúúxí ndíi Jònás. ⁴² Te nduu càda ndáá Yá Ndióxi cuéchi ncháa ñáiyu, te dàvá-áⁿ quini-ndó ìⁿ ñadihí ñaha ní xíndaha ìⁿ nacióⁿ cáá ndàa xio datni núú quéné nchí-canchii, te ñaha-áⁿ ío xica ní xíndecu-aⁿ te ní sáháⁿ-aⁿ ní xíndedóho-aⁿ ncháa tnúhu ní cáháⁿ ndíi Salomón, chi ndíi-áⁿ ío ní sáá sá xini tnùnì ndíi. Te tnáhá ñaha-áⁿ càháⁿ-aⁿ sá ñà túú ní quide ndáá ncháa ñáiyu ndècu vitna. Dico vitna iha ndècu ndíhi ñaha-ndo xii yúhú, te diu-í ío-gá cúnùu-í dàcúúxí ndíi Salomón.

Espiritú cúndíhi yucu ñávàha sá nánchòcáva xito cùu úú
(Lc. 11:24-26)

⁴³ Te òré ná queé ñaha ìⁿ espíritu cúndíhi yucu ñávàha xii ìⁿ ñáiyu, te cuáháⁿ-xi ndècu-xi ìⁿ xichi núú cúndècu-xi te ñá ñihí-xi te ní sani iní-xi: ⁴⁴ “Váha-gá núhú tucu-í núú ní xíndecu-í”, duha ní sani iní-xi. Te cuánuhú-xi, te òré ní nasáá-xi, te ní xini-xi sá cáá ñaní ñáiyu-áⁿ dàtná cáá-ñá ìⁿ vehe ní natíhú ní nduu víi-ná te vá yóo-gá ndécú. ⁴⁵ Te sátá dúcáⁿ te ní xica-xi cuáháⁿ-xi cuándúcú-xi úsá tnáhá espíritu cúndíhi-xi sá nèhé víhí-gá xíquide. Te òré ní ñihí-xi cue espíritu-áⁿ te ndèca ñaha-xi cuáháⁿ cuèndá ngúndecu ndíhi-xi ñáiyu-áⁿ. Te ñáiyu-áⁿ uuⁿ-gá nándi yáha-yu dàcúúxí ndéé díhna. Te diu-ni ducaⁿ sāt-nahá-xi yáha ncháa ñáiyu cuihna iní-xi ndècu ñuyúú-a vitna —cachí-gá xáhaⁿ-gá xii-güedé.

Cue ñaní Jèsús ndíhi náná-gá

(Mr. 3:31-35; Lc. 8:19-21)

⁴⁶ Te càháⁿ dúcáⁿ-ní Jèsús ní quexlo náná-gá ndíhi cue ñaní-gá cuini-yu cáháⁿ

ndíhi ñàhá-yu xii-gá, te ní ngúnu tníi-yu ndàa quehé vehe núú ndécú-gá. ⁴⁷ Te ìⁿ cue ñáiyu xíndecu-áⁿ ní xáháⁿ-yu xii-gá:

—Ní quexio náná-n ndíhi cue ñaní-n xínutnii-yu quehé, te cuini-yu cáháⁿ ndíhi ñàhá-yu xii-n —cachí ñáiyu-áⁿ xáháⁿ-yu xii-gá.

⁴⁸ Te ní xáhaⁿ-gá xii ñáiyu ducaⁿ xáhaⁿ xii-gá-áⁿ:

—Te cachí tnúhu yóndi-gá ñáiyu cùu datná náná-í ndíhi dàtná cue ñaní-í —cachí-gá xáhaⁿ-gá xii ñáiyu-áⁿ.

⁴⁹ Te ní dánèhé ñàhá-gá ncháa cue téé xica cuu ndíhi-gá, te ní xáhaⁿ-gá xii ñáiyu-áⁿ:

—Cue téé-a cùu-güedé dàtná náná-í, ndíhi dàtná cue ñaní-í. ⁵⁰ Te ncháa ñáiyu na càda ncháa nacúaa càháⁿ Tãtà-í Dútú Ndióxi Yáá ndécú àndiu, te ñáiyu-áⁿ cùu-yu dàtná náná-í, ndíhi dàtná cue ñaní-í, ndíhi dàtná cue cùha-í —cachí-gá xáhaⁿ-gá xii ñáiyu ducaⁿ ní dáyàha tnúhu núú-gá-áⁿ.

13

Nàcuáa quide téé cuángacáⁿ triú

(Mr. 4:1-9; Lc. 8:4-8)

¹ Te diu-ni nduu-áⁿ ní quee Jèsús vehe núú ndécú-gá, te ní xica-gá cuáháⁿ-gá ní ngóo-gá yuhu làgúná. ² Te ío cuéhé ñáiyu ní tacá núú ndécú-gá. Te sá dúcáⁿ ío cuéhé ñáiyu núu ní quee-gá xití ìⁿ bàrcú núní xití ndute làgúná-áⁿ, te núú xiáⁿ ní ngóo-gá, te ncháa ñáiyu-áⁿ xíxucu-yu yuhu làgúná-áⁿ. ³ Te Jèsús ní ngúíta-gá ní cani-gá titní cuèndú núú-yu nàcuáa tecú tnùnì-yu ncháa nàcuáa nduu tnúhu-gá, te xáhaⁿ-gá xii-yu:

—Ìⁿ téé cuángacáⁿ-dé triú, ⁴ te òré ní ngúíta-dé dāngoyo-dé triú-áⁿ, te dava ní quene ndava ní ngava ndéé ichi, te ní xini cue tílaá te ní nadatàcá-güedi. ⁵ Te dava ní ngava ñuhu yadi núú yíhí vihi yúú, te ndíhi-ni ní xínu-xi chi ñá túú cavihi ñuhu. ⁶ Dico òré ní nayahé te ñá túú ní cùndee iní-xi chi ní yíhí-xi, chi ñá túú ní ñihí quíhíⁿ cùnú yóho-xi. ⁷ Te dava ní ngava núú yúcu ndíquíⁿ tnu ñhu, te ìⁿ nuu-ni ní xínu-xi ndíhi tnu ñhu. Te tnu ñhu-áⁿ ní sahnú-xi te ní dánáá-xí ncháa triú sá ní xínu-áⁿ. ⁸ Dico dava-gá triú ní ngava núú ndécú ñuhu cocoⁿ te xiáⁿ ío váha ní cuu, chi

núú ìíⁿ-ní trùú-áⁿ te dava yoco-xi ní nguíhi ócó úxí trùú-xi, te dava yoco-xi ní nguíhi únídico trùú-xi, te dava yoco-xi ní nguíhi ìíⁿ ciendú trùú-xi. ⁹Te vitna nchaa nchòhó ñáyiú ní xíndedóho tnúhu ní cáháⁿ-í-a, te ío váha chí cuáha cuendá —càchí-gá xáhaⁿ-gá xíí-yu.

Cue téé xica cuu ndíhi Jesús ndúcu tnúhu-güedé núú-gá ná cuendá cání-gá cuendú núú ñáyiú

(Mr. 4:10-12; Lc. 8:9-10)

¹⁰Te cue téé xica cuu ndíhi Jesús ní sáháⁿ-güedé ndéé núú-gá, te xáhaⁿ-güedé xíí-gá:

—Ndúcu tnúhu-ndí núú-n núú ná cuendá ducaⁿ mée-ni cuendú cání-n núú ñáyiú —càchí-güedé xáhaⁿ-güedé xíí-gá.

¹¹Te ní xáhaⁿ-gá xíí-güedé:

—Nchòhó chí sa càchí tnúhu Yá Ndiòxí xii-ndo ìíⁿ sá vátá quíní-gá-ndó, chí càchí tnúhu-gá nàcuáa quide-gá ndíhu ndaha-gá ñáyiú, dico dava-gá ñáyiú chí ñá túú ná xáhaⁿ-gá xíí-yu. ¹²Te nchaa ñáyiú sa tècú tnùní te uuⁿ-gá cuita tecú tnùní-yu quíhíⁿ, te nchaa ñáyiú ñá túú tècú tnùní te uuⁿ-gá vá tècú tnùní-yu. ¹³Te xíáⁿ núu duha càni-í mee-ni cuendú núú-yu, chí cuéi na quíní-yu nchaa nàcuáa cuu dico ní vā cútùníní iní-yu ná cuendá ducaⁿ cùu, te cuéi na cùndedóho-yu dico ní vā tècú tnùní-yu. ¹⁴Te ñá cuendá ñáyiú-áⁿ ní xáhaⁿ Yá Ndiòxí xii ndíi Chàíá téé ní xóo cáháⁿ tnúhu-gá ndéé sanaha ní chídó tnùní ndíi núú tütú-gá núú càchí-xi:

Nchaa nchòhó cùndedóho-ndo tnúhu cáháⁿ-í, dico ní vā tècú tnùní-ndó, te cuéi na quíní-ndó nchaa nàcuáa cada-xi, dico ní vā cútùníní iní-ndó ná cuendá ducaⁿ quide-xi.

¹⁵Te ducaⁿ chí cùu-ndo ñáyiú ío sàà iní-xi, te cùu-ndo ñáyiú ñá túú tècú tnùní tnúhu cáháⁿ-í,

te cùu tucu-ndo datná cue ñáyiú cuàá chí ñá túú cuíní-ndó càda cuendá-ndó tnúhu-í,

te ní ñá túú cuíní-ndó cùndedóho-ndo,

te ní ñá túú cuíní-ndó tècú tnùní-ndó,

te ní ñá túú cuíní-ndó nàtuha ñaha-ndo xii-í cuendá cada càhnu iní-í nchaa yíca cuèchi-ndo nàcuáa ío váha cuu iní-ndó cùndecu-ndo.

Duha ní xáhaⁿ Yá Ndiòxí xii ndíi Chàíá ní chídó tnùní ndíi núú tütú-gá.

¹⁶Dico nchòhó chí ío váha táhú-ndó chí cùtnuní iní-ndó nchaa nàcuáa quide-í, te cùtnuní tucu iní-ndó nchaa nàcuáa ndúu tnúhu cáháⁿ-í. ¹⁷Te na càchí tnúhu ndáá-í xii-ndo sá ìo vāi cue téé ní xóo cáháⁿ tnúhu Yá Ndiòxí ndéé sanaha ndíhi nchaa dava-gá ñáyiú váha iní-xi ní cuíní-yu cundehé-yu nchaa sá ndéhé-ndó vitna quide-í dico ñá túú ní xini-yu, te ní cuíní tucú-yu cundedóho-yu nchaa tnúhu ndèdóho-ndo vitna cáháⁿ-í te ñá túú ní xíndedóho-yu.

Jesús cáháⁿ-gá nàcuáa quèe-xi cuendá tée cuángacáⁿ trùú

(Mr. 4:13-20; Lc. 8:11-15)

¹⁸Te vitna cùndedóho váha-ndo na càchí tnúhu-í xii-ndo nàcuáa quèe-xi cuendú tée cuángacáⁿ trùú ní caní-í núú-ndó. ¹⁹Te trùú sá ní quene ndava ní ngava ndéé ichi, xíáⁿ cúú-xí datná ñáyiú ní xíndedóho tnúhu sá cáháⁿ nàcuáa ndíhu ndaha ñaha Yá Ndiòxí xíí-yu, dico ñá túú ní cuíní-yu tníí-yu, chí sácúíhná cuáháⁿ-xi nàdatuhú-xi iní-yu cuendá sá vā cànchícúⁿ nihnú-yu nàcuáa cáháⁿ tnúhu-áⁿ. ²⁰Te trùú sá ní ngava ñuhu yadi núú yíhí vili yúú-áⁿ, xíáⁿ cúú-xí datná ñáyiú ní xíndedóho tnúhu Yá Ndiòxí te díí iní ní tníí-yu tnúhu-gá, ²¹dico òré ná nguíta ñáyiú cúcuèhé ñáhá-yu xíí-yu àdi nándi-gá sá yáha-yu sá cuendá tnúhu-gá, te ñá cùndèe iní-yu chí dàñá-yu tnúhu-gá cuendá sá ñá túú nihí ndéé-yu. ²²Te trùú sá ní ngava núú yúcu ndíquíⁿ tnu ñu-áⁿ, xíáⁿ cúú-xí datná ñáyiú ní tecú dóho-xi tnúhu Yá Ndiòxí dico cuèé cuèé ní nacua-naá-yu tnúhu-gá, chí cuendá mee-ni sá ìo ñuyíú-a ñuhu iní-yu, ndíhi cuendá sá ìo sàni iní-yu cuu cuicá-yu, te mee-ni nchaa xíáⁿ ñúhú iní-yu te ñá túú ñuhu iní-yu tnúhu sá ní xíndedóho-yu-áⁿ nàcuáa cada váha-yu cundecú-yu. ²³Dico trùú sá ní ngava núú ndécú ñuhu cocóⁿ-áⁿ, xíáⁿ cúú-xí datná ñáyiú ní xíndedóho tnúhu Yá Ndiòxí te quide-yu nàcuáa cáháⁿ tnúhu-gá. Te cada iní-ndó sá ñáyiú-áⁿ cúú-yu datná trùú sá ní nguíhi yoco-xi ócó úxí trùú-xi, ndíhi trùú sá ní nguíhi yoco-xi únídico trùú-xi, ndíhi trùú sá ní nguíhi yoco-xi ìíⁿ ciendú trùú-xi. Ducaⁿ sàtnahá-xi cùu-yu chí ío váha quide-yu —càchí-gá xáhaⁿ-gá xíí-güedé.

Cuendá nchaa cúhú sá ñá túú váha xinu xití trùú

²⁴ Te Jèsús ní cani-gá ñⁿ cuèndú núú ñáyiú nàcuáa tecú tnùnì-yu tnúhu-gá, te xáhaⁿ-gá xí-yu:

—Te vitna na càni-í ñⁿ cuèndú núú-ndó nàcuáa tecú tnùnì-ndó nàcuáa cada-xi òré ndíhu ndaha ñàha Yá Ndiòxí xii ñáyiú. ñⁿ tée ío váha triú ní sacáⁿ-dé núú ñúhú-dě.

²⁵ Dico xití níú ní sáháⁿ ñⁿ tée cùu úhú iní ñáhá xii-dé, te ní dǎngoyo-dé ndíquíⁿ yúccú sǎ ñà túú vǎha núú ní sacáⁿ-dé triú-áⁿ.

²⁶ Te òré vitna váha váha ní ngúíta-xi quène yoco nchaa triú-áⁿ, te ní xínu coyo nchaa yúccú sǎ ñà túú vǎha-áⁿ. ²⁷ Te cue tée xínu cuechi núú tée ní sacáⁿ triú-áⁿ ní xítnúhu ñàha-güedě xii-dé sá dúcáⁿ ní xínu cùhú sǎ ñà túú vǎha-áⁿ núú triú-dé, te xáhaⁿ-güedě: “Pátróón, ǎnása ní cuu núú ní xínu cùhú sǎ ñà túú vǎha núú triú-n, te ío váha càa triú ní sacáⁿ-n ní cùu?”, cǎchí-güedé xáhaⁿ-güedě.

²⁸ Te tée cùu patróón-güedě-áⁿ ní xáhaⁿ-dě xii-güedé: “ñⁿ tée cùu úhú iní ñáhá nàhi xii-í ducaⁿ ní quide-dé ní sáháⁿ-dé ní dǎngoyo-dé ndíquíⁿ cùhú sǎ ñà túú vǎha-áⁿ núú triú-í núu ducaⁿ ní xínu coyo-xi”, cǎchí-dé xáhaⁿ-dě xii-güedé. Te cue tée xínu cuechi núú-dě ní xáhaⁿ-güedě xii-dé: “Te núu cuini-n te quíhíⁿ-ndí tnuhu-ndí nchaa cùhú sǎ ñà túú vǎha ní xínu núú triú-n”, cǎchí-güedé xáhaⁿ-güedě xii-dé.

²⁹ Te tée cùu xítóhó triú-áⁿ ní xáhaⁿ-dě xii cue tée xínu cuechi núú-dě-áⁿ: “Ñáhá, vá quíhíⁿ-ndó tnúhu-ndo, chi òré tnuhu-ndo te tñahá-ni triú quene chi càa vihi cùhú-áⁿ.”

³⁰ Váha-gá chí dǎná ná cuíhnu nahi ndéé ná cùu triú, te dǎtnùnì nducu-ǎ cue tée quíhíⁿ-güedé tnuhu-güedé nchaa cùhú sǎ ñà túú vǎha-áⁿ, te dacùtu nuhní-güedé te cahmi-güedé, te dǎtnùnì nàquehndé-güedé tni nacani-güedé te nataxúha-güedé xití yacá-í”, cǎchí-dé xáhaⁿ-dě xii-güedé — duha ní cani Jèsús cuèndú núú-yu.

Cuèndá ndíquíⁿ yutnu nàni mostázá (Mr. 4:30-32; Lc. 13:18-19)

³¹ Te Jèsús ní cani tucu-gá ingá cuèndú núú ñáyiú nàcuáa tecú tnùnì-yu tnúhu-gá, te xáhaⁿ-gá xí-yu:

—Na càni-í ñⁿ cuèndú núú-ndó nàcuáa tecú tnùnì-ndó nàcuáa cada-xi òré ndíhu ndaha ñàha Yá Ndiòxí xii ñáyiú. ñⁿ tée ní queheⁿ-dé ndíquíⁿ yutnu nàni mostázá te nèhe-dé cuáháⁿ ní sacáⁿ-dé núú ñúhú-dě.

³² Te ndíquíⁿ yutnu-áⁿ ño chàhu, dico òré ná

xínu-xi te sàhnu-gá-xi dàcúúxí nchaa cùhú, te cue quití ndàva núú tàchí càdúha-güedi tacá-güedi núú dité-xi —cǎchí-gá xáhaⁿ-gá xí-yu.

Nàcuáa quide levadura

(Lc. 13:20-21)

³³ Te Jèsús ní xáhaⁿ tucu-gá xii ñáyiú:

—Te na cǎchí tnúhu tucu-í xii-ndo nàcuáa cada-xi òré ndíhu ndaha ñàha Yá Ndiòxí xii ñáyiú. ñⁿ ñadìhí ní chíhí-aⁿ levadurá úní arróbá yuchi triú, te levadurá-áⁿ ní quide-xi ní duca nihí yusaⁿ-áⁿ —cǎchí-gá xáhaⁿ-gá xí-yu.

Mee-ni cuèndú ní cani Jèsús núú ñáyiú

(Mr. 4:33-34)

³⁴ Te mee-ni cuèndú ní cani Jèsús núú ñáyiú ndi tñahá òré ní danèhé ñáhá-gá xí-yu tnúhu-gá. ³⁵ Te ducaⁿ ní quide-gá chí ní quee ndáá-xi nàcuáa ní chídó tnùnì ñⁿ tée ní xóo cáháⁿ tnúhu Yá Ndiòxí ndéé sanaha núú tütú-gá núú cǎchí-xi:

Mee-ni cuèndú cani-í núú ñáyiú òré danèhé-í-yu tnúhu-í cuèndá tecú tnùnì-yu,

te nchaa tnúhu sá vǎtá yóo-gá cundedóho danèhé-í-yu, te nchaa tnúhu-áⁿ ndúu ñyuhu-xi ndéé cútñahá ní ngáva ñuyíú.

Duha ní chídó tnùnì tée-áⁿ núú tütú-gá.

Jèsús càháⁿ-gá nàcuáa quèe-xi cuèndá cùhú sǎ ñà túú vǎha càa xití triú

³⁶ Te Jèsús ní dándácá-gǎ ñáyiú te cuánuhú-gá vehe, te cue tée xica cuu ndíhi-gá ní xáhaⁿ-güedě xii-gá:

—Cǎchí tnúhu xii-ndí nása quèe-xi cuèndá cùhú sǎ ñà túú vǎha càa xití triú —cǎchí-güedé xáhaⁿ-güedé xii-gá.

³⁷ Te Jèsús ní xáhaⁿ-gǎ xii-güedé:

—Tée cǎchí-í ní sacáⁿ triú cǎvǎha-áⁿ cùu yúhú Tée cùu ñani tñahá-ndó nchaa-ndo.

³⁸ Te nchaa núú ní sacáⁿ tée-áⁿ triú cùu-xí ñuyíú. Te tatá vǎha-áⁿ cùu-xí cuè ñáyiú yíndaha ñàha Yá Ndiòxí. Te nchaa cùhú sǎ ñà túú vǎha-áⁿ cùu-xí ñáyiú yíndaha ñàha sácúíhna.

³⁹ Te tée ní dǎngoyo ndíquíⁿ cùhú sǎ ñà túú vǎha núú triú-áⁿ cùu-dě mee sácúíhna. Te nduu nàtehndé-nǎ triú-áⁿ cùu-xí ndùu ndíhi nihnu-ná nchaa sǎ ño ñuyíú-a. Te nchaa ñáyiú nàquehndé triú-áⁿ cùu-yu mee-ni cuè espíritu xínu cuèchi núú Yá Ndiòxí. ⁴⁰ Te dǎtná cada cue tée quíhíⁿ tnuhu nchaa cùhú sǎ ñà túú vǎha-áⁿ

dacútu nuhní-güedé te cahmi-güedé, ducaⁿ sãtnahá-xi yáha nchaa ñáiyu cündihi yucu ñávaha na sáá nduu. ⁴¹ Te yúhú Tée cùu ñaní tnáhá-ndó nchaa-ndo tendaha-í nchaa espíritú xínú cuèchi núú-í quíhíⁿ-xi nadatácá-xi nchaa ñáiyu sànu ichi cue tnaha ñáiyu-xi ichi cuèhé ichi duha, ndíhi nchaa dava-gá ñáiyu ñá túú quíde váha, te nchaa ñáiyu-áⁿ xíndecú-yu nchaa núú ndécú cue ñáiyu yíndaha-í. ⁴² Te cue espíritú-áⁿ daquihíⁿ-xi cue ñáiyu-áⁿ núú ñúhú núú càyú, te yàcáⁿ ío ndáhyú-yu te dicó rúhñú-nã cuu núhu-yu sá sàtú iní-yu sá ndóhó-yu. ⁴³ Te nchaa ñáiyu quíde nchaa nacuaá cuiní Tãtã-yu Dútú Ndióxi, ñáiyu-áⁿ ò cumúú-yu cundecú-yu núú ndécú-gã táxi tnùní-gá, chi cuú-yu dàtná nchíanchii dayéhe-yu cundecú-yu núú ndécú-gã. Te nchaa nchóhó ñáiyu ndedóho nchaa tnúhu cãháⁿ-í-a, te ío váha chí cuãha cuendá — cãchí-gá xãhaⁿ-gã xii-güedé.

Cuendá ñⁿ sá ò ndèyáhu

⁴⁴ Te Jèsús xãhaⁿ tucu-gá xii-güedé:

—Na càni tucu-í ingá cuendú núú-ndó nàcuáa tecú tnùní-ndó nàcuáa cada-xi òré ndíhu ndaha ñaha Yá Ndióxi xii ñáiyu. ñⁿ tée ní naníhí-dé ñⁿ sá ò ndèyáhu yíndúxi ñⁿ xichi, te ní nachindúxi tucu-dé ñu-ni núú ní naníhí-dé-áⁿ, te ío ní cudíí iní-dé sá dúcáⁿ ní naníhí-dé xíáⁿ. Te ní xica-dé cuánuhú-dé te ní nadico-dé nchaa sá ndécú ndíhi-dé, te ní nacuaaⁿ-dé ñuhu núú dúcáⁿ ní naníhí-dé xíáⁿ.

Cuendá ñⁿ sá ò ndèyáhu nàni pérá

⁴⁵ Te na càni tucu-í ingá cuendú núú-ndó nàcuáa tecú tnùní-ndó nàcuáa cada-xi òré ndíhu ndaha ñaha Yá Ndióxi xii ñáiyu. ñⁿ tée quíde ndáhu ndúcú-dé sá nání pérá sá ò ndèyáhu. ⁴⁶ Te ní naníhí-dé ñáiyu ndècu ndíhi ñⁿ pérá sá ò-gá ndèyáhu, te ní xica-dé cuánuhú-dé te ní nadico-dé nchaa sá ndécú ndíhi-dé, te ní sãháⁿ-dé ní saaⁿ-dé pérá sá ò-gá ndèyáhu-áⁿ.

Cuendá ñunu tñi-güedé chácá

⁴⁷ Te na càni tucu-í ingá cuendú núú-ndó nàcuáa tecú tnùní-ndó nàcuáa cada-xi òré ndíhu ndaha ñaha Yá Ndióxi xii ñáiyu. Cue tée tñi chácá ní dáquèe-güedé ñunu-güedé xití ndute lámár tñi-güedé chácá, te dàcá nuu dàcá nihnu chácá cuãnguee-güedé xití ñunu-áⁿ. ⁴⁸ Te òré ní cutnùní iní-güedé sá

ní chítú ñunu-güedé, te ní natava-güedé ní nene yuhu lámár, te ní ngúíta-güedé nácãxi-güedé nchaa chácá-áⁿ. Te nchaa chácá váha dàquèe-güedé-di xití tídihi, te nchaa chácá nèhé dãngoyo-güedé-di. ⁴⁹ Te dàtná ní quíde cue tée-áⁿ ducaⁿ càda cue espíritú xínú cuèchi núú Yá Ndióxi ná sáá nduu vã cündècu-gá nchaa sá ò ñuyúú-a, chi cue espíritú-áⁿ daquèe diⁿ-xi nchaa ñáiyu ní quíde váha tnuú nchaa ñáiyu ñá túú ní quíde váha. ⁵⁰ Te nchaa ñáiyu ñá túú ní quíde váha-áⁿ daquihíⁿ ñáhá-xí xii-yu núú ñúhú núú càyú, te yàcáⁿ ío ndáhyú-yu, te dicó rúhñú-nã cuu núhu-yu sá sàtú iní-yu cuendá sá ndóhó-yu —cãchí-gá xãhaⁿ-gã xii cue tée xica cuu ndíhi-gá.

Cuendá cue tée ndècu ndíhi sá ní quee túu díhna ndíhi sá ní quee túu saa

⁵¹ Te Jèsús ní xícáⁿ tnúhú-gã núú-güedé, te xãhaⁿ-gã xii-güedé:

—¿Ní tecú tnùní-ndó nàcuáa ndúu nchaa tnúhu ní cãháⁿ-í-ãⁿ? —cãchí-gá xãhaⁿ-gã xii-güedé.

Te ní xãhaⁿ-güedé xii-gá:

—Ní tecú tnùní-ndí —cãchí-güedé xãhaⁿ-güedé xii-gá.

⁵² Te ní xãhaⁿ tucu Jèsús xii-güedé:

—Te núu ñⁿ tée dàcuaha ñaha xii ñáiyu nchaa tnúhu ní chídó tnùní ndíi Moisés ná cùtnuní iní-dé nàcuáa quíde Yá Ndióxi ndíhu ndaha-gã ñáiyu, te tée-áⁿ cúú-dé dàtná ñⁿ tée cùu xítóhó vehe. Te tée cùu xítóhó vehe-áⁿ ní queñuhu-dé nchaa sá ní quee túu díhna ndècu ndíhi-dé, ndíhi nchaa sá ní quee túu saa. Te ducaⁿ sãtnahá-xi cùu tée-áⁿ te núu nàcùtnuní iní-dé nàcuáa quíde Yá Ndióxi ndíhu ndaha-gã ñáiyu — cãchí-gá xãhaⁿ-gã xii-güedé.

Jèsús ndécú-gã ñuu núú ní sahnú-gá
(Mr. 6:1-6; Lc. 4:16-30)

⁵³ Te sáta ní yáha ducaⁿ ní cani Jèsús cuendú núú-güedé, te ní xica-gá cuánuhú-gã. ⁵⁴ Te ní ndexio-gá ñuu núú cúú ñúú-gã, te cuãnguihu-gá xití veñúhu cãa ñuu-áⁿ te ní ngúíta-gá dánèhé-gá ñáiyu. Te nchaa ñáiyu ndedóho nchaa tnúhu cãháⁿ-gã xicunúhu-yu, te xítnáhá-yu:

—¿Nása ní cuu núu ío váha cùtnuní iní tée-a nàcuáa cunduu tnúhu cãháⁿ-dé, te quíde-dé nchaa sá vã yóo tnáhí ndàcu

cada-i? ⁵⁵ Te dicó déhe tée cùu carpinterú ndihí tá Màriá cúú-dé, te ñaní-dé cúú tē Jacobó, ndihí tē Chèè, ndihí tē Xímú, ndihí tē Júdás. ⁵⁶ Te cue cúhá-dé ndécú ndihí ñahá-yu xii-o ñúú-a. ¿Te nása ní quide-dé ñúu ndéé dàcáⁿ ío váha cùtnuní iní-dé ñàcuáa cunduu tnúhu cáháⁿ-dé-i? — cächí-yu xitnàhá-yu.

⁵⁷ Te ñá túú ní cuiní-yu cáháⁿ ndihí váha-yu Jèsús, dico mee-gá ní xáhaⁿ-gá xíí-yu:

—Te núu ñⁿ tée càháⁿ tnúhu Yá Ndióxi ná násáa-dé ñúú-dé, te nchaa ñáyiú ñúú-dé-áⁿ ndihí nchaa ñáyiú cùu ndimee-dé ñá túú nehé-yu sá yíñùhu núú-dé, dico cue ñáyiú nchaa dava-gá ñúu chí nehé-yu sá yíñùhu núú-dé —cächí-gá xáhaⁿ-gá xíí-yu.

⁵⁸ Te ñá túú ní quide Jèsús titní núú sá vǎ yóo tnàhí ndàcu cada ñúú-áⁿ, chí ñá túú ní cuiní-yu quindáá iní ñáhá-yu xii-gá.

14

Ñàcuáa ní cuu ní xihí tē Juáá tēe dàcuandute ñaha xii ñáyiú

(Mr. 6:14-29; Lc. 9:7-9)

¹ Te diu-ni dàvǎ-áⁿ ní ñihí tē Hèrodés tnúhu nchaa ñàcuáa quide Jèsús, te tē Hèrodés-áⁿ cúú-dé tēe taxi tnumí distritú Galileá. ² Te ní xáhaⁿ-dē xii nchaa cue tēe ndècu ndihí-dé:

—Tée dii cuèndú-xi ñihí-ó-áⁿ cùu-dé tē Juáá tēe dàcuandute ñaha xii ñáyiú, tēe ní xihí ní cùu te ní ndoto-dé ñúu dàcáⁿ ndácú-dé quidé-dé nchaa sá vǎ yóo tnàhí ndàcu cada —cachí-dé xáhaⁿ-dē xii-güedé.

³ Te ducaⁿ ní cáháⁿ tē Hèrodés chí mee-dé ní táuchíúⁿ-dē ní tñi ñaha-güedē xii tē Juáá, te ní dácútú ñaha-güedē xii-dé, te ní chihí ñaha-güedē vecaá. Te ducaⁿ ní quide tē Hèrodés-áⁿ sǎ cuèndá ñaha nani Herodiás, ñaha ní cándeca ñaní-dé tē Lipé, te ní naqueheⁿ ñaha-dē xii-aⁿ ndèca ñaha-dé. ⁴ Te tē Juáá ní xáhaⁿ-dē xii tē Hèrodés:

—Ñá túú ní quide váha-n dùha ní naqueheⁿ-n ñaha ní cándeca ñaní-n —duha ní xáhaⁿ tē Juáá xii tē Hèrodés.

⁵ Te sá dúcáⁿ ní xáhaⁿ tē Juáá-áⁿ xii tē Hèrodés, te ní cuiní tē Hèrodés-áⁿ cahni-dé tē Juáá-áⁿ, dico ñá túú ní cùyí-dé chí ní yuhú-dé núú cuè ñáyiú, chí nchaa-yu ní cutnúní iní-yu sǎ tē Juáá cúú-dé ñⁿ tēe càháⁿ tnúhu Yá Ndióxi. ⁶ Te ñⁿ nduu ní quide tē Hèrodés vico vehe-dé ní quide

càhnu-dé nduu ní cacu-dé. Te ndècu ñⁿ déhe yoco ñaha nani Herodiás-áⁿ, te xíchí-áⁿ ní quíhu-xi xití vehe núú cúú víco-áⁿ ní xita saha-xi. Te nùcúo tē Hèrodés ndihí cue tēe ní cáháⁿ-dē ndéhé-güedē, te ío ní cudíí iní-dé ñàcuáa ní xita xíchí-áⁿ. ⁷ Te tē Hèrodés-áⁿ ní cacunehe-dé ndéé Yá Ndióxi ñàcuáa cutnúní iní xíchí-áⁿ sǎ ndáa cuáñaha-dē ñúu ná cúú sǎ ná càcáⁿ-xi núú-dé. ⁸ Te xíchí-áⁿ ní dácáhu iní ñáhá nǎná-xi xii-xi ná cúú sǎ càcáⁿ-xi núú tē Hèrodés, núu xíáⁿ ní xáhaⁿ-xi xii-dé:

—Cuiní-í quehndé-n díquí tē Juáá tēe dàcuandute ñaha xii ñáyiú te taxi-n, dico na cùhuⁿ ñⁿ xití cóhó taxi-n —cächí-xi xáhaⁿ-xi xii-dé.

⁹ Te sá dúcáⁿ ní xáhaⁿ-xi, te ní cundíyí tē Hèrodés, dico ñá túú ní ñihí-dē nása cada-dé, chí ndèdóho ñáyiú òré ní cacunehe-dé Yá Ndióxi sǎ ndáa cuáñaha-dē ñⁿ sǎ ná càcáⁿ-xi núú-dé. Te ní quide-dé ñàcuáa ní xáhaⁿ-xi. ¹⁰ Chí ní táuchíúⁿ-dē ní sáháⁿ cue tēe ní xehndé-güedé díquí tē Juáá òré yíhí-dē vecaá. ¹¹ Te ní chihí-güedé díquí-dē ñⁿ xití cóhó te nehé-güedé cuánuhú ní sáñaha-güedē xii xíchí-áⁿ, te xíchí-áⁿ ní nacuañaha-xi xii náná-xi.

¹² Te cue tēe xica cuu ndihí tē Juáá-áⁿ ní sáháⁿ-güedé ní naqueheⁿ-güedé yiqui cùñú-dé ní chindúxi-güedé, te dàtnúní ní sáháⁿ-güedé ní xáhaⁿ-güedé xii Jèsús ñàcuáa ní cuu.

Jèsús dácaxi-gá úhúⁿ mǐl cue tēe te ñáyiú ñáyiú díhí ndihí landú

(Mr. 6:30-44; Lc. 9:10-17; Jn. 6:1-14)

¹³ Te Jèsús ní ñihí-gǎ tnúhu ñàcuáa ní cuu ní xihí tē Juáá. Te sǎtá xíáⁿ te cuánguee-gǎ ñⁿ bàrcú cuáháⁿ-gǎ ñⁿ xichí núú ñá túú ñáyiú ndècu, dico nchaa ñáyiú xíndecu nchaa ñúu cáá yàtni xíáⁿ ní ñihí-yu tnúhu sǎ cuáháⁿ-gǎ, te ní queé-yu ñúu-yu xica sahá-yu cuáháⁿ núú quidé-yu cuèndá quexìo Jèsús. ¹⁴ Te òré ní quexìo Jèsús núú cuáháⁿ-gǎ, te ní quene-gǎ bàrcú, te ní xiní-gǎ cuéhé víhí ñáyiú xixúcu-yu xíáⁿ, te ní cundáhu iní ñáhá-gǎ xíí-yu, te ní quide tátna-gǎ nchaa ñáyiú cùhú ndihí-yu. ¹⁵ Te sǎtá ní cuaa te ní sáháⁿ cue tēe xica cuu ndihí Jèsús núú-gǎ, te xáhaⁿ-güedē xii-gǎ:

—Sa ní cuu dandaca-n nchaa ñáyiú-a chí sa ní cuaa, te na quíhíⁿ-yu nchaa ñúu cáá yàtni íha cuaáⁿ-yu sǎ cǎxí-yu, chí

núu ndécú-ó iha ñá túú tñahí ná ò —
càchí-güedé xáhaⁿ-güedé xii-gá.

¹⁶ Te Jèsús ní xáhaⁿ-gá xii-güedé:

—Ñáhá, vá dándàca-í-yu, váha-gá
mee-ndo chí cuáñaha sá ná càxí-yu —
càchí-gá xáhaⁿ-gá xii-güedé.

¹⁷ Te ní xáhaⁿ-güedé xii-gá:

—Ná túú nǎgá ndécú ndíhi-ndí, chí úhúⁿ
duha-ná pàá ndíhi úú-ná chácá ndécú
ndíhi-ndí —càchí-güedé xáhaⁿ-güedé
xii-gá.

¹⁸ Te Jèsús ní xáhaⁿ-gá xii-güedé:

—Chí cánèhe paá-áⁿ ndíhi chácá-áⁿ
táquixi iha —càchí-gá xáhaⁿ-gá xii-güedé.

¹⁹ Te Jèsús ní xáhaⁿ-gá xii nchaa ñáyiú sá
ná ngóo-yu nchaa-yu núú ìté cuí cãa xíaⁿ,
te ní queheⁿ-gá ndí ùhúⁿ pàá-áⁿ ndíhi ndí
ndúú chácá-áⁿ te ní ndacoto-gá andíu, te ní
ndacáⁿ táhú-gá núú Yá Ndióxi, te dǎtnùnì
ní táhú cuèchi-gá pàá-áⁿ te ní sáñaha-gá xii
cue tée xica cuu ndíhi-gá ní dácáñhu-güedé
cue ñáyiú ní xexí-yu. ²⁰ Te nchaa-yu ní
xexí-yu ní ndahá xití-yu. Te sátá ní túhú
còhó-yu te ní nadatácá-güedé nchaa sá ní
quendóo, te ní chítú ùxúú tñahá tídihi
mee-ni sá ní quendóo. ²¹ Te nchaa ñáyiú ní
xexi-áⁿ ní xínu úhúⁿ míj mee-ni cuè tée chí
mee-ni cuè tée-áⁿ ní quíundehú, te ñíⁿ cue
ñáyiú ñíhi ndíhi cue landú.

*Jèsús xicá-gá núú ndute
(Mr. 6:45-52; Jn. 6:16-21)*

²² Te òré-ni-áⁿ ní xáhaⁿ Jèsús xii cue tée
xica cuu ndíhi-gá sá queè-güedé bàrcú téh-
ndé-güedé ndàa ingá xio yuhu làgúná, te
mee-gá quendóo-gá cada ndee ìní tñahá-gá
ndíhi cue ñáyiú. ²³ Te sátá ní yáha ní
quide ndee ìní tñahá-gá ndíhi cue ñáyiú,
te medi-gá ní xica-gá cuásaá-gá ñí tìndúú
cáá yatni xíaⁿ cuendá cáháⁿ ndíhi-gá Yá
Ndióxi, te ñíu-ni medi-gá ndécú xíaⁿ ní
cundiquíⁿ. ²⁴ Te bàrcú sá ñúhú cuè tée xica
cuu ndíhi-gá-áⁿ sa cuáháⁿ-xi ndéé cuádava
xití làgúná-áⁿ, te ñíhi víhi quene táchí ndàa
ichi cuáháⁿ-xi, te dàcandau ndeé-xi ndute
nchaa ñíhi-xi. ²⁵ Te tàcuíhndá váhi-gá tá
xica Jesús núú ndute cuáháⁿ tá cùyatni-gá
bàrcú-áⁿ. ²⁶ Te cue tée xica cuu ndíhi-gá
ní xini ñáhá-güedé xii-gá tá xica-gá núú
ndute cuáháⁿ, te ní yùhú-güedé te ñíhi ní
cáháⁿ-güedé te xitnàha-güedé:

—jⁿ àlmá! —càchí-güedé xit-
nàha-güedé.

²⁷ Te Jèsús ní cáháⁿ-gá, te xáhaⁿ-gá
xii-güedé:

—Ñíi cunduu-ndo vá yùhú-ndó, chí yùhú
cúú-í —càchí-gá xáhaⁿ-gá xii-güedé.

²⁸ Te té Pèlú ní xáhaⁿ-dè xii-gá:

—Mèstrú, te núu ñíu-n te tauchiúⁿ sá
tñahá-í ná càca-í núú ndute quixi tñahá
ñáhà-í xii-n —càchí-dé xáhaⁿ-dè xii-gá.

²⁹ Te Jèsús ní xáhaⁿ-gá xii-dé:

—Taquixi —cachí-gá xáhaⁿ-gá xii-dé.

Te té Pèlú ní nuu-dé núú bàrcú, te ní
ngúíta-dé tá xica-dé núú ndute cuáháⁿ
cuátnahá ñáhá-dè xii-gá. ³⁰ Te ní cutnùnì
iní-dé sá ò níhi xico táchí, te ní ngúíta-dé
yùhú-dé. Te òré-ni-áⁿ tá queè naa-dé xití
ndute cuáháⁿ ní cùu, te ñíhi ní cáháⁿ-dè
xáhaⁿ-dè xii Jèsús:

—jMèstrú, vá dàñá-n queè naa-í xití
ndute! —càchí-dé xáhaⁿ-dè xii-gá.

³¹ Te òré-ni-áⁿ ní tñíi Jèsús ndaha-dé, te ní
xáhaⁿ-gá xii-dé:

—jNá cuendá ñá túú sàndáá ndisa ìní
ñáhá-n xii-í sàni ñí sàni úú ìní-n-í? —
càchí-gá xáhaⁿ-gá xii-dé.

³² Te òré cuánguee Jèsús ndíhi té Pèlú xití
bàrcú, te òré-ni-áⁿ ní ngúíñí táchí. ³³ Te cue
tée ñùhu xití bàrcú-áⁿ ní ngúíñí xití-güedé
núú-gá, te xáhaⁿ-güedé xii-gá:

—Sá ndàá sá cuítí sá díú yòhó cúú-n Dèhe
Dútú Ndióxi —càchí-güedé xáhaⁿ-güedé
xii-gá.

*Jèsús quidé tǎtna-gá ñáyiú cùhú ñí xichi
núú nání Gènesarét*

(Mr. 6:53-56)

³⁴ Te ní quexio Jesús ndíhi cue tée xica
cuu ndíhi-gá ndàa ingá xio yuhu làgúná,
te núú ní quexio-gá ndíhi-güedé-áⁿ nání-xí
Gènesarét. ³⁵ Te nchaa ñáyiú xindecu xíaⁿ
ní cutnùnì ìní-yu sá díú-gá ní quexio, te
ní dátècú tñuhu-yu nchaa dava-gá ñáyiú
xindecu yatni xíaⁿ sá ní quexio-gá. Te
ndècá-yu nchaa ñáyiú cùhú ndécú ndíhi-yu
cuáháⁿ núú ndécú Jèsús. ³⁶ Te nchaa ñáyiú
cùhú-áⁿ ní ngúíta-yu cáháⁿ ndáhú-yu núú
Jèsús sá ñá ñàha-gá tñàndeé-yu cuèdicó
luha yuhu dǎó-gá cuendá ndúha-yu, te cue
ñáyiú cùhú, ñáyiú ní tñàndeé yuhu dǎó-gá
ní ndúha-yu.

15

Cuèndá nchaa sá quidé-xí ngündecu cuéchi ñáiyiu

(Mr. 7:1-23)

¹Te sátá dúcáⁿ te ñⁿ úú cue tée cùu fariséú ní quee-güedé ñúú Jerusàlén, ndihi cue tée dàcuaha ñaha xii ñáiyiu nchaa tnúhu ní chídó tnùní ndíi Moisés ní quexio-güedé núú ndécú Jèsús, te xáhaⁿ-güedě xii-gá:

²—¿Ná cuèndá cue tée xica cuu ndihi-n ñá túú nàquete-güedé ndaha-güedé òrè caxi-güedé nàcuáa ní cachí cue ñani tnáhá-ó nǐ xíndecu ndéé sanaha-i? —cachí-güedé xáhaⁿ-güedě xii-gá.

³Te Jèsús ní xáhaⁿ-gǎ xii-güedé:

—Te nchòhò tucu, ¿ná cuèndá ñá túú quide-ndo nacuáa ní cachí Yǎ Ndiòxí cada-ndo, núu da nàcuáa ta quide cue tée ñuyíú-a quide-ndo-i? ⁴Te Yǎ Ndiòxí cǎchí-gǎ núú tütú-gǎ: “Canehe-ndo sǎ yíñúhu núú tǎtǎ-ndó ndíhi núú nǎná-ndó”, cǎchí-gǎ. Te cǎchí tucu-gǎ íngǎ xichi núú tütú-gǎ: “Nchaa ñáiyiu na cǎháⁿ úhu tǎtǎ-xi àdi nǎná-xi te cahni ñaha-güedě xii-yu”, duha cǎchí-gǎ núú tütú-gǎ. ⁵Dico nchòhó cǎchí-ndó sǎ cuè ñáiyiu chí cuu cúnàhá-yu xii tǎtǎ-yu àdi nǎná-yu: “Vǎ cúú chindee ñaha-ndí xii-n, chí sǎ táxí-ndí xii-n ni cùu, xǎⁿ ní nduu cuèndá Yǎ Ndiòxí”, cuu duha cúnàha ñáiyiu xii tǎtǎ-yu àdi nǎná-yu cǎchí-ndó. ⁶Te cǎchí-ndó sǎ cuè ñáiyiu ducaⁿ na cǎñaha xii tǎtǎ-xi àdi nǎná-xi te ñá túú-gǎ tǎu-yu chindéé-yu ni tǎtǎ-yu ni nǎná-yu. Te ducaⁿ quide-ndo chí ní dáquéé tǐhú-ndó nàcuáa ní cachí Yǎ Ndiòxí cada-ndo, te mee-ni nàcuáa ta quide cue tée ñuyíú-a véxi nchicúⁿ nihnu-ndo quide-ndo.

⁷¿Te nchòhó cúú-ndó ñáiyiu ío dǎndahú méé-xí, chí cǎchí-ndó sǎ quidé ndǎá-ndó te ñá ndǎá sǎ quidé ndǎá-ndó! Te ní quee ndǎá-xi nàcuáa ní chídó tnùní ndíi Chàia tée ní xóo cǎháⁿ tnúhu Yǎ Ndiòxí ndéé sanaha núú tütú-gǎ núú cǎháⁿ-xi nàcuáa ní cǎháⁿ-gǎ cuèndá-ndó, te duha ní cachí-gǎ:

⁸Ñáiyiu-a cǎchí-yu sǎ ío cǎhnu cuu-í dico dicó-ni yuhu cǎháⁿ-yu,

chí duuⁿ duuⁿ ñá túú ñúhu íni ñǎhá-yu xii-í.

⁹Te áúⁿ nǎ cuu chíñúhu ñahá-yu xii-í chí ñá túú vèdana ndéé nǎndíhi-xi,

chí cue ñáiyiu-a dàcuahá-yu cue tnàha ñáiyiu-yu nàcuáa cundecú-yu, dico mee-ni tnúhu sǎ nǐ cahu íni cue ñáiyiu ñuyíú-a cǎháⁿ-yu.

Duha ní chídó tnùní ndíi Chàia núú tütú Yǎ Ndiòxí nàcuáa ní cǎháⁿ-gǎ cuèndá-ndó —cǎchí-gǎ xáhaⁿ-gǎ xii-güedé.

¹⁰Te ní xáhaⁿ-gǎ xii cue ñáiyiu:

—Chí tǎquixi ndehe íha, te cundedóho váha-ndo tnúhu na cǎháⁿ-í, te ío váha cuáha-ndo cuèndá. ¹¹Nchaa sǎ xéxi-ndó chí ñá túú nǎ quidé-xí íni-ndó, dico nchaa sǎ cuèhé sǎ dúhá sàni íni-ndó cǎháⁿ-ndó nchaa xǎⁿ quidé-xí ndécú cuéchi-ndo —cǎchí-gǎ xáhaⁿ-gǎ xii-yu.

¹²Te cue tée xica cuu ndihi-gǎ ní sǎháⁿ-güedé ndéé núú-gǎ, te xáhaⁿ-güedě xii-gá:

—Véxi-ndí cǎchí tnúhu-ndí xii-n sǎ cuè tée cùu fariséú ñá túú cùu váha íni-güedé cuèndá tnúhu ní cǎháⁿ-n —cǎchí-güedé xáhaⁿ-güedě xii-gǎ.

¹³Te xáhaⁿ-gǎ xii-güedé:

—Nchaa ñáiyiu ñá túú cùu cuèndá Tǎtǎ-í Dútú Ndiòxí cuíta nihnú-yu, chí ñáiyiu-áⁿ cùu-yu dàtná nchaa cúhu sǎ ñá túú nǎndíhi te tnúhu ñáiyiu. ¹⁴Te vá cǎdá cuèndá-ndó nàcuáa cǎháⁿ cue tée-áⁿ, chí cùu-güedé dàtná cue ñáiyiu cuàá sǎcuíta nehe tnàha. Te nchòhó xini-ndó sǎ núu ñáiyiu cuàá ná cuíta nehe tucú-yu íngǎ ñáiyiu cuàá, te ndí ndúu-yu quée-yu déhvǎ —cǎchí-gǎ xáhaⁿ-gǎ xii-güedé.

¹⁵Te té Pèlú ní xáhaⁿ-dě xii-gǎ:

—Cachí tnúhu xii-ndí nàcuáa quèe-xi tnúhu ní cǎháⁿ-n-ǎⁿ —cǎchí-dé xáhaⁿ-dě xii-gǎ.

¹⁶Te Jèsús ní xáhaⁿ-gǎ:

—¿Náa tnàhá nchòhó ñá túú ní tècú tnùní-ndó nàcuáa ndúu tnúhu ní cǎháⁿ-í núú ñáiyiu-ǎⁿ ñǎ? ¹⁷Nchaa sǎ xéxi-yu cuánguee-xi xití-yu, te dàtnúní náyàha ñaha-xi xii-yu.

¹⁸Dico nchaa tnúhu cuèhé tnúhu duha cǎháⁿ-yu xǎⁿ véxi quene-xi íni-yu, te diu nchaa xǎⁿ quidé-xí ndécú cuéchi-yu. ¹⁹Te íni-yu-áⁿ cǎcú nihnu nchaa sǎ cuèhé sǎ dúhá, chí sàni cuèhé sání dùha íni-yu, te sǎhni-yu tnàha ñáiyiu-yu, te cue tée cǎháⁿ ndihi-güedé ñáiyiu díhi te ñá díú ñàdihí-güedé cúu-yu. Te diu-ni ducaⁿ quide cue ñáiyiu díhi cǎháⁿ ndihí-yu cue tée te ñá díú yí-yu cùu-güedé, te cuèi tée te cuèi ñàdihí mee-ni ichi díú íni cúdíí íni-yu cundecú-yu, te dùhu ndachiuⁿ tnahá-yu, te dàcuandehndé-yu, te cǎháⁿ cuèhé-yu cuèndá tnàha ñáiyiu-yu. ²⁰Te nchaa xǎⁿ

quidé-xí ndècu cuéchi-yu, dico ñá díú sã ñà túú ndàhá-yu dàtná ní cachí cue tée ndéé sanaha, chí xiãⁿ ñá túú quide-xi cuendá ngúndecu cuéchi-yu —càchí-gá xãhaⁿ-gã xii-güedé.

Ïⁿ ñadìhí ñaha cùu ñaní tnáhá ñáyiú cananéa ní sándáá iní-aⁿ Jèsús
(Mr. 7:24-30)

²¹ Te Jèsús ní xica-gá cuáháⁿ-gá ní sáá-gá yucu cue tée ñúú Tírú, ndìhi yucu cue tée ñúú Sidón. ²² Te Ïⁿ ñadìhí ñaha cùu ñaní tnáhá ñáyiú cananéa ndécú yàtní-aⁿ xiãⁿ, te níhi ta càháⁿ-aⁿ ní quexio núú ndécú Jèsús, te xãhaⁿ-aⁿ xii-gá:

—jMèstrú, ñaní tnáhá ndii Dàvii, cundàhú iní ñáhá xii-í cada tátna-n dèhe yoco-í Chi yíhi ñaha espíritú cundìhi yucu ñávãha xii-xi te ío dándoho ñaha-xi —cachí-aⁿ xãhaⁿ xii-gá.

²³ Dico Jèsús ñá túú tnàhí ni cãháⁿ-gá, te cue tée xica cuu ndìhi-gá ní sáháⁿ-güedé núú-gã, te xãhaⁿ-güedé xii-gá:

—Cúñaha xii ñaha-áⁿ ná ñùhú-aⁿ, chí ío níhi càháⁿ-aⁿ nchícúⁿ ñáhá-áⁿ xii-o —cachí-güedé xãhaⁿ-güedé xii-gá.

²⁴ Te Jèsús ní xãhaⁿ-gã xii-güedé:

—Yá Ndiòxí ní tendaha ñaha-gá xii-í véxi-í mee-ni ñúú núú xíndecu cue ñáyiú isráél, chí ñáyiú-áⁿ cùu-yu dàtná cue mbéé cue quiti ní xíta, chí ta xíta nihnú-yu cuáháⁿ —cachí-gá xãhaⁿ-gã xii-güedé.

²⁵ Te ñadìhí-áⁿ ní sáháⁿ-aⁿ ndéé núú Jèsús ní ngúñí xiti-áⁿ, te xãhaⁿ-aⁿ xii-gá:

—jMèstrú, chindee ñaha xii-í! —cachí-aⁿ xãhaⁿ-aⁿ xii-gá.

²⁶ Te Jèsús ní xãhaⁿ-gã xii-aⁿ:

—Vá cúú chindee-í cue ñáyiú ñá túú cùu ñáyiú isráél, chí Ïⁿ-ni cùu-xi núu na quèheⁿ-o paá cúú cuendá cue landú te cuáha-o iná caxi-dí —cachí-gá xãhaⁿ-gã xii-aⁿ.

²⁷ Dico ñaha-áⁿ ní xãhaⁿ-aⁿ xii-gá:

—Ndáá càháⁿ-n, dico cue iná chí nàdatacá-güedi sá ngóyó yùhu cóhó xitohó-güedi —cachí-aⁿ xãhaⁿ-aⁿ xii-gá.

²⁸ Te Jèsús ní xãhaⁿ-gã xii-aⁿ:

—jYòhó ñaha cùhú déhe-xi, ío váha sándáá iní ñáhá-n xii-í! Te na càda-í ñacuáa cùniⁿ-n —cachí-gá xãhaⁿ-gã xii-aⁿ.

Te òré-ni-áⁿ ní ndúha déhe-aⁿ.

Jèsús quidé tátna-gá vai ñáyiú cùhú

²⁹ Te sáta dúcáⁿ ní cuu te Jèsús ní xica-gá cuáháⁿ-gá ní yãha-gá yuhu làgúná distrítú Galileá, te cuásaá-gá Ïⁿ tìndúú te xiãⁿ ní ngóo-gá. ³⁰ Te xiãⁿ núcòo-gá ní quexio cuéhé víhi ñáyiú, te ndécá-yu ñáyiú yacua, ndìhi ñáyiú ní yíchí Ïⁿ xio ndaha-xi, ndìhi ñáyiú cuáá, ndìhi ñáyiú ñíhí, te vai dava-gá cue ñáyiú cùhú tnáhá dava-gá núú cuéhé ndécá-yu ní quexio núú ndécú-gã. Te ní taxi ndecu ñáhá-yu núú Jèsús te ní quide tátna ñaha-gã xii-yu te ní ndúha-yu. ³¹ Te nchaa ñáyiú xíndecu-áⁿ ío ní cuñúhu-yu sá dúcáⁿ ní xini-yu ní cuu ní nacáháⁿ nchaa ñáyiú ñíhí, ndìhi cuendá sá ní ndúha nchaa cue ñáyiú yacua, ndìhi cuendá sá ní ndúha cue ñáyiú ní yíchí Ïⁿ xio ndaha-xi, ndìhi cuendá sá ní ndúha núú cuè ñáyiú cuáá. Te nchaa-yu ní cachí-yu sá ío càhnu cuu Yá Ndiòxí Yáá cúú Ndiòxí cue ñáyiú isráél.

Jèsús dácaxi-gá cúmí mìl cue tée te ðiiⁿ
ñáyiú ðihí ndìhi landú

(Mr. 8:1-10)

³² Te Jèsús ní cana-gá cue tée xica cuu ndìhi-gá, te ní xãhaⁿ-gã xii-güedé:

—Yúhú cundàhú iní-í nchaa ñáyiú-a, chí sa ní cuu úní nduu ndècu ndìhi ñáhá-yu xii-o iha, te ñá túú tnàhí-gá sá caxí-yu, te ñá túú cuini-í natendaha-í-yu núhú tnámã-yu vehé-yu, chí ná ndéé cuáháⁿ cuneé-yu docó ichi —cachí-gá xãhaⁿ-gã xii-güedé.

³³ Te ní xãhaⁿ-güedé xii-gá:

—jTe ndéé níhi-ó sã cuñaha-o càxi nchaa ñáyiú-a, te ío cuéhé-yu te ñá túú ná lò iha chí cùu-xi xiti yucu-i? —cachí-güedé xãhaⁿ-güedé xii-gá.

³⁴ Te Jèsús ní xícáⁿ tnúhú-gã núú-güedé, te xãhaⁿ-gã:

—jNá daha-gá paá ndécú ndìhi-ndo-i? —cachí-gá xãhaⁿ-gã xii-güedé.

Te ní xãhaⁿ-güedé xii-gá:

—Ndècu ndìhi-ndí úsá-gá tnáhá paá ndìhi Ïⁿ úú-gá chácá —cachí-güedé xãhaⁿ-güedé xii-gá.

³⁵ Te Jèsús ní xãhaⁿ-gã xii nchaa ñáyiú sá ná ngóo-yu nchaa-yu, te ní ngóo-yu.

³⁶ Te ní queheⁿ-gá ndi úsá paá-áⁿ ndi Ïⁿ úú-gá chácá-áⁿ, te ní ndacáⁿ táhú-gã núú Yá Ndiòxí, te dàtnúni ní táhú cuèchi-gá paá-áⁿ ndìhi chácá-áⁿ te ní sánaha-gã xii cue tée xica cuu ndìhi-gá ní dácãhnu-güedé

nchaa ñáiyu-án. ³⁷ Te nchaa-yu ní xexí-yu ní ndahá xítí-yu. Te sáta ní túhú cóhō-yu te ní nadatácá-güedé nchaa sá ní quendóo, te ní chítú úsá tnàhá tídihi mee-ni sá ní quendóo-án. ³⁸ Te núú ncháá ñáiyu ní xexi te ní xínu cúmí mĩ mee-ni cuè téé chi diu-ni cue téé-án ní quiúndehu, te ñíiⁿ cue ñáiyu ñíhi ndíhi cue landú. ³⁹ Te sáta dúcáⁿ te Jèsús ní dándácá ñaha-gá xíi-yu, te cuánguee-gá bárcu cuáháⁿ-gá yucu cue téé ñúú Magdalá.

16

Cue téé cùu fariséu ndíhi cue téé cùu saducéu xáhaⁿ-güedé xii Jèsús cada-gá ñⁿ sá vā yōo tnàhí ndàcu cada

(Mr. 8:11-13; Lc. 12:54-56)

¹ Te cue téé cùu fariséu ndíhi cue téé cùu saducéu ní sáa-güedé núú ndécú Jèsús xító ndéé ñáhá-güedé xii-gá, te xáhaⁿ-güedé sá ná cáda-gá ñⁿ sá vā yōo tnàhí ndàcu cada cundehe-güedé nàcuáa cutnùní iní-güedé núú ndáá sá Yá Ndióxi ní tendaha ñaha-gá xii-gá véxi-gá ñuyú-a. ² Te Jèsús ní xáhaⁿ-gá xii-güedé:

—Nchòhó chi òré tá cuàa cuáháⁿ te ndàcoto-ndo andiu, te cächí-ndó: “Ío váha cada-xi tneé chi cāa vícō tícuehé andiu”, duha cächí-ndó. ³ Te òré dátneé ndácōto tucu-ndo andiu, te cächí-ndó: “Vā cáda váha-xi nduu vitna chi tícuehé andiu, te cāa vícō”, duha cächí-ndó. ¡Dico nchòhó cúú-ndó ñáiyu ío dāndahú meé-xí sá quidé ndáá te ñá ndáá sá quidé ndáá-ndó! Te cutnùní iní-ndó nàcuáa quide-xi andiu, dico ñá túú cutnùní iní-ndó nàcuáa quèe-xi nchaa sá quidé Yá Ndióxi vitna. ⁴ Dico nchaa nchòhó ñáiyu ndècu ñuyú vitna ío cuihna ñí-ndó, te ñá túú cuiñí-ndó càda ndáá-ndó núú Yá Ndióxi, te cuiñí-ndó càda-í ñⁿ sá vā yōo tnàhí ndàcu cada dico ñá túú nāgá cada-í, chi diu-ni nàcuáa ní quide Yá Ndióxi ndíi jónás diu-ni ducaⁿ càda tucu-gá vitna —cächí-gá xáhaⁿ-gá xii-güedé.

Te ducaⁿ te ní xica-gá cuáháⁿ-gá ndíhi cue téé xica cuu ndíhi-gá.

Cuendá cue téé cùu fariséu ndíhi cuendá cue téé cùu saducéu

(Mr. 8:14-21)

⁵ Te òré ní quexio ndíhi ñaha-gá xii-güedé ndàa íngá xio yuhu làgúná, te ní ndacu iní-güedé sá ní cunaa-güedé canehe-güedé pāá quíhíⁿ caxi-güedé. ⁶ Te Jèsús ní cāháⁿ-gá dōho-güedé, te xáhaⁿ-gá xii-güedé:

—Na cächí tnúhu-í xii-ndo sá ío quíhí iní-ndó cūndecu-ndo, te vā cáda cuendá tnàhí-ndo lèvadurá cue téé cùu fariséu ndíhi cue téé cùu saducéu —cächí-gá xáhaⁿ-gá xii-güedé.

⁷ Te ní nguíta-güedé xitnàha-güedé:

—Cuendá sá ñá túú ní cānehe-o pāá quixi xíáⁿ duha cāháⁿ-gá —cächí-güedé xitnàha-güedé.

⁸ Te Jèsús ní cutnùní iní-gá nàcuáa ndúu tnúhu xitnàha-güedé, núú ní xáhaⁿ-gá xii-güedé:

—Nchòhó chi ñá túú sàndáá iní ñáhá váha-ndo xii-í núu xíáⁿ da sá ñá túú ní cānehe-ndo pāá quixi cāháⁿ-ndó. ⁹ ¡Te náa ñá ndácú ñí-ndó sá núú ùhúⁿ-ni pāá, te ní taxi-í ní dācāhñu-ndo ní xexi úhúⁿ mĩ cue téé, chi diu-ni cue téé-án ní quiúndehu, te sáta ní túhú cóhō-güedé te ní chítú títí tídihi mee-ni sá ní quendóo-án? Te ñá tēcú tnùní-ndó nàcuáa quèe-xi nacuáa ní quide-í. ¹⁰ ¡Te náa ñá ndácú tucu iní-ndó sá núú úsá-ni pāá te ní taxi-í ní dācāhñu tucu-ndo ní xexi cúmí mĩ cue téé, chi diu-ni cue téé-án ní quiúndehu, te sáta ní túhú cóhō-güedé te ní nadatácá-ndó nchàa sá ní quendóo, te ní chítú títí tídihi mee-ni sá ní quendóo-án? ¹¹ Dico nchòhó chi ñá túú ní quide cuendá-ndó nàcuáa ndúu tnúhu cāháⁿ-í òré ní cächí-í sá vā quéheⁿ cuendá-ndó lèvadurá cue téé cùu fariséu ndíhi cue téé cùu saducéu, chi ñá díú cuendá pāá ní cāháⁿ-í —cächí-gá xáhaⁿ-gá xii-güedé.

¹² Te sáta dúcáⁿ ní xáhaⁿ Jèsús xii cue téé xica cuu ndíhi-gá, te ní tecú tnùní-güedé sá xáhaⁿ-gá xii-güedé sá vā tníi-güedé tnúhu cāháⁿ cue téé cùu fariséu ndíhi cue téé cùu saducéu, te ñá díú cuendá levadurá sá quíhu yuchi cuáha pāá ní cāháⁿ-gá.

Té Pèlú xáhaⁿ-dè xii Jèsús sá díú-gá cúu-gá Crístú

(Mr. 8:27-30; Lc. 9:18-21)

¹³ Te Jèsús ní quexio-gá yucu cue téé ñúú Cèsareá Filipú, te ní xícáⁿ tnúhú-gá núú cuè téé xica cuu ndíhi-gá, te xáhaⁿ-gá xii-güedé:

—¡Yoo cùu yúhú Téé cùu ñaní tnàhá-ndó nchàa-ndo cächí cue ñáiyu-va? —cächí-gá xáhaⁿ-gá xii-güedé.

¹⁴ Te ní xáhaⁿ-güedé xii-gá:

—Davá-yu cächí-yu sá cúu-n ndíi Juàá téé ní xóo dacuandute ñaha xii ñáiyu,

te davá-yu cächí-yu sá cúu-n tē Èliás, te davá-yu cächí-yu sá cúu-n ndii Jeremiás tée ní xóo cáháⁿ tnúhu Yá Ndiöxí ndéé sanaha, àdi cuu-n ingá tée ní xóo cáháⁿ tnúhu-gá ndéé sanaha, duha cächí-yu —cächí-güedé xáhaⁿ-güedé xii-gá.

¹⁵ Te Jèsús ní xícáⁿ tnúhú tùcu-gá núu-güedé, te xáhaⁿ-gá xii-güedé:

—Te nchòhó, ¿yoo sàni iní-ndó cùu-í-í? —cächí-gá xáhaⁿ-gá xii-güedé.

¹⁶ Te té Xímú, àdi Pelú chi úu òu-dé, ní xáhaⁿ-dē xii-gá:

—Yòhó cúu-n Crìstú Yáá ní tendaha Yá Ndiöxí véxi ñuyú-a, te diu Yá Ndiöxí cúu-gá Yáá ndécú nchaa nduu nchaa quiú, te yòhó cúu-n Dēhe-gá —cächí-dé xáhaⁿ-dē xii-gá.

¹⁷ Te Jèsús ní xáhaⁿ-gá xii-dé:

—Yòhó té Xímú déhe té Jónás, ío váha tǎhú-n chi mee Tǎtá-í Dútú Ndiöxí ní dácáhú iní ñáhá-gá xii-n nàcuáa cundu tnúhu cáháⁿ-n, te ñá ðúú ñⁿ ñáiyu ñuyú-a ducaⁿ ní dácahu iní ñáhá-yu xii-n tnúhu-áⁿ. ¹⁸ Te yúhú xáhaⁿ-í Pèlú xii-n, te tnúhu-áⁿ quée-xí yúú, chi quèe ndáá-xi nàcuáa nàni-n, chi cuu-n ñⁿ tée vá cání ñⁿ caní úu iní-xi canu ichi-n cuè ñáiyu nàcuáa cundecu ndihí ñáhá-yu xii-í. Te nchaa ñáiyu cùu cuendá-í vá ndácú yùcu ñávaha dacúta nihnu ñaha-xi xii-yu. ¹⁹ Te yúhú taxi-í tnúhu ndee iní cundecu ndihí-n cuendá cunuu-n núu cuè ñáiyu yindaha ñaha Yá Ndiöxí, te nchaa sá ná cáháⁿ-n sǎ cúu-xí sǎ váha, te diu-ni ducaⁿ cáháⁿ Yá Ndiöxí, te nchaa sá ná cáháⁿ-n sǎ ñá túú cùu-xi sǎ váha, te diu-ni ducaⁿ cáháⁿ tucu-gá, chi quide-n nacuáa cuiní-gá —cächí-gá xáhaⁿ-gá xii-dé.

²⁰ Te sátá dúcáⁿ te ní xáhaⁿ Jèsús xii cue tée xica cuu ndihí-gá sá vá yòo cúnaha-güedé sá ðúú-gá cúu-gá Crìstú Yáá ní tendaha Yá Ndiöxí véxi ñuyú-a.

Jèsús cáháⁿ-gá sá cáhni ñaha-güedé xii-gá

(Mr. 8:31-9:1; Lc. 9:22-27)

²¹ Te ndéé dàvā-áⁿ nǎ nguíta Jèsús xáhaⁿ-gá xii cue tée xica cuu ndihí-gá:

—Dacuití sǎ quihíⁿ-í ñúu Jerusalén, te yácáⁿ cue tée cùu sacuéhé núu ñáiyu isràél, ndihí cue dútú cúnúu, ndihí cue tée dácuaaha ñaha xii ñáiyu nchaa tnúhu ní chídó tnúní ndíi Moisés, nchaa cue tée-áⁿ

ío dandòho ñaha-güedé xii-í, te cahni ñaha-güedé, dico nduu úní sá cùu-í te ndoto-í —cächí-gá xáhaⁿ-gá xii-güedé.

²² Te té Pèlú ní cana-dé Jèsús ñⁿ xio, te ní nguíta-dé ténáá ñáhá-dé xii-gá, te xáhaⁿ-dē:

—¡Sá vǎ cächí Ndiöxí sá dúcáⁿ ndòho-n chi ñá túú tàu-n sǎ dúcáⁿ ndòho-n! —cächí-dé xáhaⁿ-dē xii-gá.

²³ Te ndàa sátá Jèsús nútní té Pèlú òré ducaⁿ xáhaⁿ-dē xii-gá núu ní nchócuñhu-gá, te xáhaⁿ-gá xii-dé:

—¡Xocuiní yòhó yucu ñávaha núu-í-a chi dicó quidé tneñu-n! Chi ñá túú sàni iní-ò dàtná sàni iní Yá Ndiöxí chi ñⁿ-ni sàni iní-ò ndihí dava-gá cue ñáiyu ndècu ñuyú-a —cächí-gá xáhaⁿ-gá xii-dé.

²⁴ Te sátá dúcáⁿ te ní xáhaⁿ-gá xii nchaa cue tée xica cuu ndihí-gá:

—Nchaa ñáiyu cuiní chitnahá ñáhá xii-í, te xini ñuhu-xi dañá-yu vá cádá-gá-yu sá sání iní meé-yu, te ío cada ndee iní-yu cundecu túha-yu ndohó-yu cuendá-í, te cuèi na ndòhó-yu dàtná ndoho-í. ²⁵ Te nchaa ñáiyu cuiní sá ñá túú tnáhí ná yáha cundecu ñuyú-a cuíta nihnú-yu, dico nchaa ñáiyu ñá túú tnáhí yùhú cuèi nándí sá ná yáha-yu cundecú-yu ñuyú-a sá cuendá-í, te ñáiyu-áⁿ naníhí tǎhú-yu. ²⁶ Te cuèi nchaandi túhú sá ò ñuyú-a na nihí ñáiyu cundecu ndihí-yu, dico núu diu nchaa xǎⁿ ná càda cuíta nihnú-yu te ñá túú vèdana nándihí-xi sá dúcáⁿ ndècu ndihí-yu nchaa xǎⁿ. Te ni ñⁿ sá ò ñuyú-a vá chíndèe ñaha-xi xii-yu cuendá naníhí tǎhú-yu. ²⁷ Te ndáá quée-xí tnúhu cáháⁿ-í, chi na quixi tucu yúhú Tée cùu ñaní tnáhá-yu nchaa-yu, te dàvā-áⁿ quini-yu sá ío cǎhnu cuu-í dàtná cǎhnu cuu Tátá-í Dútú Ndiöxí, te quixi-í ndihí cue espíritu xínú cuèchi núu-gá, te dàvā-áⁿ cuáha-í nchaa ñáiyu sá ndúú tǎhú-yu nacuáa ndùu sá ní quide-yu ñⁿ ííⁿ-yu. ²⁸ Te na cächí tnúhu ndáá-í xii-ndo sǎ ò dáva nchòhó ñáiyu ndècu iha vitna vá cùu-ni-ndo, chi cundecu-ni-ndo ndéé quini-ndó quixi tucu yúhú Tée cùu ñaní tnáhá-ndó nchaa-ndo taxi tnuní-í nchaa ñáiyu —cächí-gá xáhaⁿ-gá xii-güedé.

17

Ní nadáma dóo Jèsús ndihí núu-gá
(Mr. 9:2-13; Lc. 9:28-36)

¹Te núú ìnú nduu sá dúcáⁿ ní cáháⁿ Jèsús, te ní xica-gá cuásaá-gá ìⁿ yucu dúcúⁿ, te ndèca-gá té Pèlù, ndìhi té Jàcobó, ndìhi té Juàá ñanì té Jàcobó-áⁿ cuásaá. Te únì tnàhì-nì cue tée-áⁿ ndécá-gá cuásaá. ²Te yucu-áⁿ ndécú-gá ní nadáma núú-gá ndìhi dóó-gá, te núú-gá súúni dàtásaⁿ-xì dàtná quidé-xì núú nchìcanchìi, te dóó-gá súúni ní nduu cuixíⁿ dàtná cáá ñùhú cuixíⁿ. ³Te òré-ni-áⁿ ní xiní-güedé ndíi Moisés ndìhi té Èliás nútñi-güedé ndìhi-gá ndátñùhu ndìhi ñaha-güedé xii-gá. ⁴Te té Pèlù ní xáhaⁿ-dè xii Jèsús:

—Mèstrú, òvaha ní cuu sá ndécú-ó ìha vitna! Te núu cuìní-n, te na dàcaa-ndí únì tnàhá vehe tnuvixiⁿ, te ìⁿ cuu cuèndá-n, te ìⁿ cuu cuèndá té Moisés, te ìⁿ cuu cuèndá té Èliás —càchí-dé xáhaⁿ-dè xii-gá.

⁵Te nini dùcaⁿ cáháⁿ té Pèlù ní quexìo ìⁿ vícò núú ndécú-güedé ní dádáhu ñaha-xi xii-güedé te súúni chàhnchí. Te xití vícò-áⁿ ní tecú ní cáháⁿ Yá Ndiòxí, te xáhaⁿ-gá xii-güedé:

—Tée-a cùu-dé Déhe-í tée ío cùu iní-í, te ío cùdúí ìní-í-dé, te cundedóho-ndo nchàa tnúhu cáháⁿ-dè —duha ní xáhaⁿ-gá xii-güedé.

⁶Te sá dúcáⁿ ní cáháⁿ Yá Ndiòxí ní tecú dóho cue tée xica cuu ndìhi Jesús te ío ní yùhú-güedé, te ní nguñíí xítí-güedé te ní nuu núú-güedé ndàa núú ñùhú. ⁷Te Jèsús cuhááⁿ-gá núú xìndecu cue tée xica cuu ndìhi-gá, te ní tendaha ñaha-gá, te xáhaⁿ-gá xii-güedé:

—Chí ndacuñíí, vá yùhú-ndó —càchí-gá xáhaⁿ-gá xii-güedé.

⁸Te òré ní ndanehe núú-güedé, te ñá túú-gá ní xiní-güedé cue tée úú-áⁿ chí mee-ná Jèsús. ⁹Te òré cuánuu ndìhi ñaha Jèsús xii-güedé tìndúú-áⁿ, te ní xáhaⁿ-gá xii-güedé:

—Vá yóo cùñaha-ndo ní ìⁿ sá ní xiní-ndó núú ní sáa-ó-á, te cuu cáháⁿ-ndó dico ndéé ná yáha ndoto yùhú Tée cùu ñanì tnàhá-ndó nchàa-ndo sá cùú-í —càchí-gá xáhaⁿ-gá xii-güedé.

¹⁰Te cue tée xica cuu ndìhi-gá ní xáhaⁿ-güedé xii-gá:

—Cuìní-ndí cachí tnúhu-n ná cuèndá cue tée dàcuaha ñaha xii ñáyiú nchaa tnúhu ní chídó tnùnì ndíi Moisés càchí-güedé sá òhna-gá té Èliás quixi, te dàtnùnì quixi

Yá tendaha Yá Ndiòxí quixi ñuyúú-a —càchí-güedé xáhaⁿ-güedé xii-gá.

¹¹Te Jèsús ní xáhaⁿ-gá xii-güedé:

—Ndáá sá códó núu ìⁿ tée quixi-dé te cada-dé dàtná ní quide té Èliás te tée-áⁿ cada ndáá-dé nchaa nàcuáa cùu. ¹²Te na càchí tnúhu-í xii-ndo vitna sá sà ní quixi tée ní quide dàtná ní xóo cada té Èliás, te cue ñáyiú ñá túú ní cutnùnì iní-yu sá díú-dè, te ní quide ñahá-yu xii-dé nchaa nàcuáa ní quixi iní mée-yu, te òu-ni dùcaⁿ càda ñaha tucú-yu xii yùhú Tée cùu ñanì tnàhá-yu nchaa-yu, chí dandòho ñahá-yu xii-í —càchí-gá xáhaⁿ-gá xii-güedé.

¹³Te cue tée xica cuu ndìhi-gá ní cutnùnì iní-güedé sá cuèndá ndíi Juàá tée ní xóo dacuàndute ñaha xii ñáyiú ní cáháⁿ-gá.

Jèsús quidé tātna-gá ìⁿ tée cuechi tnàhá cuéhé xiyíhí

(Mr. 9:14-29; Lc. 9:37-43)

¹⁴Te Jèsús ní nasáa-gá ndìhi cue tée ní sáá ndìhi-gá tìndúú-áⁿ núú xìndecu vai ñáyiú, te ní quexìo ìⁿ tée núú-gá ní nguñíí xítí-dè, te xáhaⁿ-dè xii-gá:

¹⁵—Mèstrú, cundàhú iní déhe-í chí tnàhá-dé cuéhé xiyíhí, te ío dandòho ñaha-xi xii-dé, te ní cuu vai xito daquéé ñaha-xi núú ñùhú xii-dé, te ní cuu vai tucu xito dangauñihu ñaha-xi ndute xii-dé.

¹⁶Te sa ndèca-í-dé ní quixi núú cuè tée xica cuu ndìhi-n dico ñá túú ní ndàcu-güedé cada tātna ñaha-güedé xii-dé —càchí-dé xáhaⁿ-dè xii-gá.

¹⁷Te Jèsús ní xáhaⁿ-gá xii nchaa ñáyiú xìndecu-áⁿ:

—Nchaa nchòhò ñáyiú ndècu ñuyúú-a, ío sáá iní-ndó chí ñá túú cuìní-ndó quèndáá iní-ndó Yá Ndiòxí, te ní cuu vai nduu quide ndee iní-í nchaa sá quidé-ndó. ¿Te ná ndéé ama vá dúcáⁿ-gá cada-ndo-í? Te chí càndèca tée cùhú-áⁿ táquixi iha —cachí-gá xáhaⁿ-gá xii-yu.

¹⁸Te Jèsús ní tenàa-gá espíritú cùndìhì yucu ñávàha yìhì ñaha xii tée-áⁿ, te ní quee ñaha-xi xii-dé, te òré-ni-áⁿ ní ndúha-dé.

¹⁹Te sáta dúcáⁿ te òré ndécú mèe Jesús ndìhi cue tée xica cuu ndìhi-gá, te ní xicáⁿ tnúhú-güedé núú-gá, te xáhaⁿ-güedé xii-gá:

—Cachí tnúhu xii-ndí ná cuèndá ñá túú ní ndàcu-ndí queñuhu-ndí espíritú

cúndìhi yucu ñávàha yìhi ñaha xii téé-ǎn —
càchí-güedé xǎhaⁿ-güedé xii-gá.

²⁰ Te Jesús ní xǎhaⁿ-gá xii-güedé:

—Te ñá túú ní ndàcu-ndo, chi ñá túú sàndáá ndisa iní-ndó Yǎ Ndiǒxí. Te na càchí tnúhu ndáá-í xii-ndo sǎ núu nchòhó quíndáá ndisa iní-ndó Yǎ Ndiǒxí cuèdicó luha líf dàtná líhli ndíquíⁿ yutnu nàni mostázá, te ducaⁿ te cuu cúñaha-ndo xii ìⁿ tñdúú xocuíñí-xi núú ndécú-xí te xocuíñí-xi. Te nchaa núú sǎ vǎha ndacu-ndo càda-ndo te núu na quíndáá iní ndisa-ndo Yǎ Ndiǒxí. ²¹ Te xini ñuhu-xi sǎ ìo cáháⁿ ndìhi-ndo-gǎ te ñá túú tnàhí ná caxi-ndo cáháⁿ ndìhi-ndo-gǎ, te ducaⁿ te ndacu-ndo quèñuhu-ndo espíritú cuúndìhi yucu ñávàha yìhi ñaha xii ñáyiu, dàtná cúú espíritú sǎ yíhi ñaha xii téé-ǎn ní cùu —
cachí-gá xǎhaⁿ-gǎ xii-güedé.

Jesús càháⁿ tucu-gá sǎ cáhni ñaha-güedé xii-gá

(Mr. 9:30-32; Lc. 9:43-45)

²² Te nini xica cuu Jesús ndìhi cue téé xica cuu ndìhi-gá distrítú Galiléa, te ní xǎhaⁿ-gǎ xii-güedé:

—Yúhú Téé cùu ñaní tnáhá-ndó nchaa-ndo sǎá ìⁿ nduu te cuáha cuèndá ñáhá-güedé xii-í núú cuè téé cùu úhú iní ñáhá, ²³ te cahni ñaha-güedé xii-í dico nduu úní sǎ cúú-í te ndoto-í —càchí-gá xǎhaⁿ-gǎ xii-güedé.

Te sǎ dúcáⁿ ní xǎhaⁿ-gǎ xii-güedé, te ío ní ndíhu iní-güedé.

Díhúⁿ cuèndá veñúhu

²⁴ Te òré ní quexio Jesús ndìhi cue téé xica cuu ndìhi-gá ñuu Capèrnaúm, te cue téé quide cobrá díhúⁿ cuèndá veñúhu ní sǎháⁿ-güedé ní cáháⁿ ndìhi-güedé té Pèlú, te xǎhaⁿ-güedé:

—¿Chǎhu mèstrú-ndó úú díhúⁿ sǎ nání drǎcmá cuèndá veñúhu ǎn ñáhá? —
càchí-güedé xǎhaⁿ-güedé xii-dé.

²⁵ Te té Pèlú ní xǎhaⁿ-dé:

—Chǎhu-dé —càchí-dé xǎhaⁿ-dè xii-güedé.

Te té Pèlú cuánguihu-dé xití vehe núú ndécú Jesús, te díhna-gá ní cáháⁿ-gá, te xǎhaⁿ-gǎ xii-dé:

—Xímú, ¿nása sàni iní-n, ná cúú ñáyiu quide cobrá ñáhá cuè téé yìndaha ñáyiu ndècu ñuyúú-a cuèndá nchaa sǎ ndúú yǎhu ñuu-güedé ndìhi cuèndá nchaa díhúⁿ sǎ

ngáutnàha, cue ñáyiu ñuu-güedé ǎn cuè ñáyiu véxi xica quide cobrá-güedé? —
càchí-gá xǎhaⁿ-gǎ xii-dé.

²⁶ Te té Pèlú ní xǎhaⁿ-dè xii-gá:

—Cue ñáyiu véxi xica quide cobrá-güedé —
càchí-dé xǎhaⁿ-dè xii-gá.

Te Jesús ní xǎhaⁿ-gǎ xii-dé:

—Te núu ducaⁿ te cue ñáyiu ñuu-güedé ñá túú ná chǎhu-yu te núu ducaⁿ. ²⁷ Dico cuèndá sǎ vǎ yò dasátú-ó iní-xi, te cuáháⁿ làgúná te dàqueé-n sǎ tñí-n chǎcá xití ndute, te chǎcá díhnanuu na tàva-n te cun-dehe-n yùhu-dí, chi yíhi ìⁿ díhúⁿ cuixíⁿ. Te díhúⁿ-ǎn canehe-n quíhíⁿ chǎhu-n cuèndá-í ndìhi cuèndá-n, chi díhúⁿ-ǎn sa tnahá quéyǎhu cuèndá-ó ndí ndúú-ó —càchí-gá xǎhaⁿ-gǎ xii-dé.

18

Cue téé ndùcu tnúhu núú Jesús yoo ío-gá cúnùu

(Mr. 9:33-37; Lc. 9:46-48)

¹ Te sǎtá dúcáⁿ te cue téé xica cuu ndìhi Jesús ní sǎháⁿ-güedé núú-gǎ, te xǎhaⁿ-güedé xii-gá:

—Cachí tnúhu xii-ndí, yoo ío-gá cúnùu núú cuè ñáyiu yìndaha ñaha Yá Ndiǒxí —
càchí-güedé xǎhaⁿ-güedé xii-gá.

² Te Jesús ní cana-gá ìⁿ té líhli te ní sanutnii ñaha-gǎ xii-dé cuádava tnuú-güedé. ³ Te xǎhaⁿ-gǎ xii-güedé:

—Na càchí tnúhu ndáá-í xii-ndo sǎ núu vǎ dǎná-ndó nchaa sǎ ñà túú vǎha quide-ndo, te nduu ndáhú iní-ndó dàtná ndáhú iní té líhli-a, te vǎ ndúú tǎhú-ndó ndíhu ndaha ñaha Yá Ndiǒxí xii-ndo. ⁴ Te ñáyiu quide datná quidé té líhli-a ndáhú iní-yu, te ñá túú quide cahnú-yu mèé-yu, ñáyiu-ǎn ìo cunúu-yu núú ndécú Yǎ Ndiǒxí táxí tnùní-gá. ⁵ Te nchaa ñáyiu na quèheⁿ cuèndá ìⁿ landú dàtná té líhli-a cuèndá sǎ cúú iní ñáhá-yu xii-í ñá, te cada iní-yu sǎ yúhú ní queheⁿ cuèndá-yu —càchí-gá xǎhaⁿ-gǎ xii-güedé.

Quihí iní-ó vǎ cúndècu-o ichi cuehé ichi duha

(Mr. 9:42-48; Lc. 17:1-2)

⁶ Te Jesús xǎhaⁿ tucu-gá xii-güedé:

—Te núu ìⁿ téé na dàcáháⁿ-dè cue ñáyiu sàndáá iní ñáhá xii-í cadá-yu nándí sǎ cuehé sǎ dúhá, te vǎha-gá sǎ ná dà-cutu ndeé-güedé ìⁿ yúú yódó dúcúⁿ-dè, te

dàquee ñaha-güedě xii-dé xití ndute lāmár, te ñá díú sǎ cundecu-dé ducaⁿ cada-dé. ⁷Te ndàhú ní cuu nchaa ñáyiu xĩndecu ñuyúú-a, chi coo cue tée dacàháⁿ ñáhá xii-yu cadá-yu nándi sǎ cuèhé sǎ dúhá te dacuitíí sǎ dúcáⁿ cada-xi! ¡Dico ndàhú ní cuu cue tée ducaⁿ na dàcaháⁿ ñáhá xii-yu cadá-yu nándi sǎ cuèhé sǎ dúhá!

⁸Te núu ìⁿ xio ndaha-ndo àdi ìⁿ xio sǎhá-ndó quide-xi quide-ndo nándi sǎ cuèhé sǎ dúhá, te quehndé-ndó ná cuíta, chi váha-gǎ sǎ nánihí tǎhú-ndó cuéi na cuíta ìⁿ xio ndaha-ndo àdi ìⁿ xio sǎhá-ndó, te ñá díú sǎ quihíⁿ-ndó ñihíí ní ndúú-ndó núú ñùhú núú càyú. ⁹Te núu ìⁿ xio tinùu-ndo quide-xi quide-ndo nándi sǎ cuèhé sǎ dúhá, te tava-ndo na cuíta-xi, chi váha-gǎ sǎ nánihí tǎhú-ndó cuéi na cuíta ìⁿ xio tinùu-ndo, te ñá díú sǎ ndí ndúú xio núú-ndó quihíⁿ-ndó núú ñùhú núú càyú.

*Cuèndá ìⁿ mbéé quiti ní xíta
(Lc. 15:3-7)*

¹⁰Te vá dàquee tihú-ndó cué ñáyiu cùu cuendá-í cuéi cùú-yu ñáyiu ío ndàhú iní-xi. Te na cǎchí tnúhu-í xii-ndo sǎ cué es-pírítú xínú cuèchi núú Yǎ Ndiòxí, cue es-pírítú néhé cuèndá ñáhá xii-yu ñuyúú-a, nchaa-ni nduu nchaa-ni òré ndécú-xí núú Tǎtà-í Dútú Ndiòxí Yaá ndécú àndiu. ¹¹Te ducaⁿ chi yúhú Tée cuo ñani tnáhá-ndó nchàa-ndo véxi-í ñuyúú-a dàcácu nihnu-í ñáyiu núú ùhú núú ndàhú, ñáyiu ta xíta nihnu cuáháⁿ.

¹²Te nása sàni iní-ndó cuèndá ìⁿ tée ndècu ìⁿ ciendú mbéé-xi?, chi núu na cuíta ìⁿ-di te dàndóo-dé cùmídíco sǎhúⁿ cùmí-di cundecu-di ìⁿ yucu te quihíⁿ-dé cúnúndúcú-dě quiti ní xíta-áⁿ. ¹³Te núu na nánihí-dě-di, te nchòhó sa cùnuní iní-ndó sǎ ío-gǎ cudíí iní-dé cuèndá quiti ní xíta-áⁿ òré nánihí-dě-di dàcúxúí cùmídíco sǎhúⁿ cùmí quiti ñá túú ní xíta-áⁿ. ¹⁴Te ducaⁿ sǎtnáhá-xi quide Tǎtà-ó Dútú Ndiòxí Yaá ndécú àndiu, chi cuiní-gǎ sǎ vǎ cuíta ni ìⁿ cue ñáyiu cùu cuendá-gǎ.

Cada cǎhnu iní-ó sǎ quidé ñaha tnaha ñáyiu-o

(Lc. 17:3)

¹⁵Te núu ìⁿ ñáyiu ndècu ndihí-ndo ní quidé-yu ìⁿ sǎ ñà túú taú-yu cadá-yu sǎ cúú-xí-ndó, te cǎháⁿ-ndó dǒho-yu núú méé núú ìⁿ-ndó ndihí-yu cuèndá sǎ ná ndixi

cuèchi iní-yu sǎ ñà túú quide váha-yu. Te núu ní tníⁿ-yu tnúhu ní xáhaⁿ-ndo xii-yu, te ní ndacu-ndo ní nacanu ichi-ndó-yu.

¹⁶Te núu ñá túú ní cuiní-yu tníⁿ-yu tnúhu xáhaⁿ-ndo xii-yu, te nducu-ndo ìⁿ àdi úú tnàhá cue tée canehe núú-güedě cuèndá cundedóho-güedé nàcuáa nduu tnúhu ndàtnúhu-ndo ndihí-yu. ¹⁷Te tnàhá cue tée-áⁿ cǎháⁿ-güedé dóho-yu, dico núu ni tnúhu cǎháⁿ cue tée-áⁿ ñà túú ní cuiní-yu tníⁿ-yu, te dàtúu-ndo núú dàva-gǎ ñáyiu ndècu ndihí-ndo ichi Xítohó Jesucristú cuèndá cutnùní iní-yu nàcuáa quide ñáyiu-áⁿ. Te núu ñáyiu ndècuéchi-áⁿ ñà túú ní cuiní-yu tníⁿ-yu tnúhu sǎ ní xáhaⁿ dàva-gǎ cue ñáyiu ndècu ichi-gǎ, te cada-ná iní-ndó sǎ cúú-yu ñáyiu ñá túú ndècu ichi Yǎ Ndiòxí dàtná cue tée cuihna iní-xi quide cobrá ñáhá xii ñáyiu cuèndá impuestú.

¹⁸Te na cǎchí tnúhu ndáá-í xii-ndo sǎ núu nchòhó ná cǎchí-ndó sǎ ndécú cuèchi ñáyiu, te ñiu-ni ducaⁿ cǎháⁿ Yǎ Ndiòxí, àdi cǎchí-ndó sǎ ñà túú cuèchi-yu te ñiu-ni ducaⁿ cǎháⁿ tucu-gǎ, te ducaⁿ chi nchòhó quidé-ndó nàcuáa cǎháⁿ-gǎ.

¹⁹Te na cǎchí tnúhu-í xii-ndo sǎ núu úú tnàhá-ndó cùu ìⁿnuu-ndo cǎháⁿ ndihí-ndo Tǎtà-í Dútú Ndiòxí Yaá ndécú àndiu xicáⁿ-ndó núú-gǎ núu ná cúú sǎ cuiní-ndó, te taxi-gǎ núu ná cúú sǎ xicáⁿ-ndó núú-gǎ.

²⁰Te núu úú tnàhá-ndó àdi úní tnàhá-ndó ní natacá-ndó ìⁿ xichi cuendá sǎ ñùhú iní ñáhá-ndó xii-í, te xíáⁿ ndécú ndihí ñaha-í xii-ndo —cǎchí-gǎ xáhaⁿ-gǎ xii-güedé.

²¹Te té Pélú ní sǎháⁿ ndehe yatni-dé núú Jèsús, te xáhaⁿ-dě xii-gǎ:

—Mèstrú, cǎchí tnúhu xii-í ná daha xito cada cǎhnu iní-í tnàha ñáyiu-í te núu ìⁿ sǎ ná cada ñahá-yu xii-í. ¿Cuèdìcò úsá xito-áⁿ? —cǎchí-dé xáhaⁿ-dě xii-gǎ.

²²Te Jèsús ní xáhaⁿ-gǎ xii-dé:

—Yúhú cǎchí-í sǎ ñà díú-ní úsá xito cada cǎhnu iní-n-yu, chi únídico úxí xito ndihí úsá ndihí úsá xito cada cǎhnu iní-n-yu —cǎchí-gǎ xáhaⁿ-gǎ xii-dé.

Cuèndá tée ñá túú quide cǎhnu iní tnàha ñáyiu-xi

²³Te xáhaⁿ tucu-gǎ xii-güedé:

—Na cǎni-í ìⁿ cuèndú núú-ndó nàcuáa tecú tnùní-ndó nàcuáa cada-xi òré ndíhu ndaha ñaha Yǎ Ndiòxí xii ñáyiu. ìⁿ tée yíndaha ñaha xii ñáyiu ní sani iní-dé sǎ

cadá ndáá-dé ndihi cue tée xinu cuechi núú-dé cuendá nchaa sá tàú-güedé núú-dé.

²⁴ Te òré sa ní ngúndecu túha-dé te ní quexio ìn tée xinu cuechi núú-dé. Te tée-án tàú-dé cuéhé víhí díhún núú-dé, chi tàú-dé úxí míl díhún sá nání tàlentú.

²⁵ Te tée xinu cuechi-án ñà túú díhún ndécú ndihi-dé nacháhu-dé sá tàú-dé núú pàtróón-dé-án, núú xiá ní táúchíú tée cùu pàtróón-dé-án dico ñaha-güedé xii-dé ndihi ñadìhí-dé ndihi cue déhe-dé ndihi nchaa sá ndécú ndihi-dé cuendá nchaá-yu cuú-yu ñáyiu ñà túú tñahí dañá quee núú chíú pàtróón-xi, te ducaⁿ te ndéyáhu sá tàú-dé núú pàtróón-dé. ²⁶ Te tée xinu cuechi-án ní ngúíñí xítí-dé núú pàtróón-dé, te xáhaⁿ-dè:

“Pàtróón, càháⁿ ndàhú-í núú-n sá ò ndee ò càhnu cada iní-n sá dúhá tàú-í núú-n, te ñà túú ñà caní iní-n chí nacháhu-í nchaa sá tàú-í núú-n”, cächí-dé xáhaⁿ-dè xii pàtróón-dé. ²⁷ Te tée cùu pàtróón-dé-án ní cundáhú iní ñáhá-dé xii-dé, te ní quide càhnu iní ñáhá-dé, te ní dañá ñaha-dé cuánuhú-dé. ²⁸ Te tée xinu cuechi-án ní naníhí-dé ìn tée xinu cuechi ndihi-dé ichi cuánuhú-dé, te tée ní naníhí-dé-án tàú-dé sacú-ni díhún núú-dé chí ìn ciendú-ni díhún denáriú tàú-dé. Te ní tñii-dé tée tàú núú-dé-án dácüehné ñáhá-dé xii-dé, te xáhaⁿ-dè: “Nacháhu sá tàú-n núú-í”, cächí-dé xáhaⁿ-dè. ²⁹ Te tée tàú-án ní ngúíñí xítí-dé núú tée dii núú-xi tàú-dé-án, te xáhaⁿ-dè: “Càháⁿ ndàhú-í núú-n sá cáda càhnu iní ñáhá-n xii-í sá tàú-í núú-n, te nacháhu cuéé-í nchaa sá tàú-í núú-n”, cächí-dé xáhaⁿ-dè. ³⁰ Dico tée dii núú-xi tàú-dé-án ñà túú ní cuíní-dé cada ndee ìní-dé cundetu-dé nacháhu cuéé tée-án sá tàú-dé, chí ní chíhi ñaha-dé vecaá cuendá yacáⁿ quíhí-dé ndéé nacháhu-dé nchaa sá tàú-dé. ³¹ Te dava-gá cue tée xinu cuechi ní xini-güedé nàcuáa ní quide tée-án, te ní cudééⁿ-güedé núú-dé, te ní sáháⁿ-güedé ní xitñúhu-güedé tée cùu pàtróón-güedé sá dúcáⁿ ní quide-dé. ³² Te tée cùu pàtróón-güedé-án ní cana-dé tée ducaⁿ ní quide-án, te ní xáhaⁿ-dè: “Yòhó cúú-n ìn tée ío cuihna iní-xi xinu cuechi núú-í, chí yúhú ní quide càhnu iní ñáhá-í xii-n cuendá nchaa sá tàú-n núú-í òré ní cáháⁿ ndàhú-n. ³³ Te tñahá yòhó tàú-n dùcaⁿ cada-n cada cahnu iní-n tée xinu cuechi ndihi-n núú-í cuendá nchaa sá tàú-dé núú-n dàtná ní quide ñaha-í xii-n ní quide càhnu iní-í cuendá nchaa sá tàú-n”, cächí

tée cùu pàtróón-án xáhaⁿ-dè xii tée ducaⁿ ní quide-án. ³⁴ Te tée cùu pàtróón-án ní cudééⁿ víhí-dé sá dúcáⁿ ní quide tée-án, te ní táúchíúⁿ-dè dandòho ñaha-güedé xii-dé ndéé nacháhu-dé nchaa sá tàú-dé —duha ní caní Jèsús cuendú núú-güedé.

³⁵ Te xáhaⁿ tucu-gá xii-güedé:

—Dàtná ní quide tée cùu pàtróón-án ní dándóhó-dé tée tàú núú-dé-án ducaⁿ càda ñaha Tàtá-í Dútú Ndiöxí Yáa ndécú àndiu xii-ndo, te núú vá ní yúhu ní iní-ndó càda cahnu iní-ndó sá quidé ñaha tñaha ñáyiu-ndo xii-ndo —cächí-gá xáhaⁿ-gá xii-güedé.

19

Jèsús càháⁿ-gá cuendá cue ñáyiu dañá tñaha

(Mr. 10:1-12; Lc. 16:18)

¹ Te sáta ní yáha ducaⁿ ní cáháⁿ Jèsús, te ní ndee-gá distritú Galileá cuáháⁿ-gá ndàa ingá xio yúte Jòrdán yucu distritú Jùdeá.

² Te ío cuéhé ñáyiu nchicúⁿ ñáhá xii-gá cuáháⁿ, te yacáⁿ ní quide tátna-gá nchaa ñáyiu cùhu.

³ Te ní quexio ìn úú cue tée cùu fariséú núú ndécú Jèsús xító ndéé ñáhá-güedé xii-gá núu nása cunduu tñúhu cáháⁿ-gá, te xáhaⁿ-güedé xii-gá:

—Véxi-ndí xicáⁿ tñúhú-ndí núú-n, ¿cuu dañá ìn tée ñadìhí-dé núu ndédani càa ìn sá ñà túú cundáá-yu-án? —cächí-güedé xáhaⁿ-güedé xii-gá.

⁴ Te Jèsús ní xáhaⁿ-gá xii-güedé:

—Te nchòhó, ¿náa ñà túú dàcuaha-ndo núú tütú Yá Ndiöxí, te diu núú tütú-gá càháⁿ-xi sá cütñahá ní cadúha-gá ñáyiu, te tée ñadìhí ní cadúha-gá-án? ⁵ Te duha cächí tucu-xi núú tütú Yá Ndiöxí nàcuáa ní cáháⁿ-gá: “Cue tée na nihí ñadìhí-xi te díñ-ná cada-güedé tátá-güedé ndihi náná-güedé, chí ñadìhí-ná-güedé cuu cuu ndihi-güedé, te cada iní-ndó sá ìñ-ná yiquí cùñú cuú-yu cundecú-yu”, duha cächí Yá Ndiöxí núú tütú-gá. ⁶ Te xiáⁿ núu cada iní-ndó sá cué ñáyiu úú-án ìñ-ná yiquí cùñú cúú-yu, te ñà túú-gá ndí díñ ndí díñ yiquí cùñú cùñú. Núu xiáⁿ ñà túú nduu vaha-xi dañá cué tée ñadìhí-güedé, chí mee Yá Ndiöxí ní cächí-gá sá cúú úú-yu cundecú-yu —cächí Jèsús xáhaⁿ-gá xii-güedé.

⁷ Te ní xáhaⁿ-güedé xii Jèsús:

—Te núu ducaⁿ, ¿te ná cuendá ndíi Moisés ní cachí ndíi sá núu ìⁿ tée cuiní-dé daña-dě ñadihi-dé, te cuu cadúha-dé ìⁿ tutú núu càháⁿ-xi sá ní dáñá-dě ñadihi-dé, te ducaⁿ te cuu daña ñaha-dé ní cachí ndíi vǎ? —càchí-güedé xǎhaⁿ-güedé xii-gǎ.

⁸Te Jèsús ní xǎhaⁿ-gǎ xii-güedé:

—Te ducaⁿ ní cachí ndíi Moisés sá cúu dàna-ndo ñadihi-ndó, chi nchòhó ío sǎá iní-ndó, dico ndéé díhna chí ní tecú tnúhu nchaa cue tée sǎ vǎ dáñá-güedé ñadihi-güedé. ⁹Dico yúhú càchí tnúhu-í xii-ndo sǎ núu ìⁿ tée na dàña-dé ñadihi-dé te naqueheⁿ-dé ingá ñadihi te ío nèhé quidé-dě, te núu ñá díú cuendá sǎ càháⁿ ndíhi-aⁿ ingá tée ducaⁿ na dàña ñaha-dé. Te sǎ dúcáⁿ cuendá-ni na dàña ìⁿ tée ñadihi-dé, te ìⁿ-ni cuéchi cúu-xi ndíhi cuéchi quide tée ndèca ñadihi te càháⁿ ndíhi-dé ingá ñadihi —càchí-gǎ xǎhaⁿ-gǎ xii-güedé.

¹⁰Te cue tée xica cuu ndíhi-gǎ ní xǎhaⁿ-güedé xii-gǎ:

—Te núu ducaⁿ cúu cuendá cue tée ndíhi ñadihi-güedé, te váha-gǎ sǎ vǎ cǎndèca cue tée ñadihi —càchí-güedé xǎhaⁿ-güedé xii-gǎ.

¹¹Te Jèsús ní xǎhaⁿ-gǎ xii-güedé:

—Nǎ ncháá ñǎyiu ducaⁿ ndúu tǎhǔ-yu cundecú-yu, chí mee-ni ñǎyiu ní cachí Yǎ Ndióxi sǎ dúcáⁿ tnàhí ndúu tǎhú cundecu mee. ¹²Te ío cue tée ducaⁿ tnàhí ní ndúu tǎhú-güedé ndéé òré ní cacu-güedé sǎ vǎ cǎndèca-güedé ñadihi. Te ío cue tée ñá ndácú-güedé candeca-güedé ñadihi cuendá sǎ ní quide ñaha dàva-gǎ cue tnàha tée-güedé xii-güedé. Te dava-güedé ñá túú cǎndeca-güedé ñadihi chí cuiní-güedé sǎ vǎ dáñá ndéé-güedé cunu cuechi-güedé núu Yǎ Ndióxi. Te nchaa cue tée ducaⁿ ní ndúu tǎhú núu Yǎ Ndióxi cundecu mee, te váha-ni te núu na cundecu mee-güedé —càchí-gǎ xǎhaⁿ-gǎ xii-güedé.

Jèsús xicáⁿ tǎhú-gǎ núu Yǎ Ndióxi cuendá landú

(Mr. 10:13-16; Lc. 18:15-17)

¹³Te ìⁿ úú ñǎyiu ndècá-yu landú líhli cuáhǎⁿ núu Jèsús, chí cuiní-yu sǎ téndàha ñaha-gǎ xii-güexi, te cǎcáⁿ tǎhú-gǎ núu Yǎ Ndióxi cuendá-güexi. Te cue tée xica cuu ndíhi-gǎ ní ngúíta-güedé ténáá ñahá-güedé

xii-yu, te xǎhaⁿ-güedé sǎ vǎ dúcáⁿ cǎdá-yu.

¹⁴Te Jèsús ní xǎhaⁿ-gǎ xii-güedé:

—Chí dáñá ná quixi nahi cue landú líhli-áⁿ núu-í-a, te vá cǎdí-ndó ichi-güexi, chí dátǎná cúu váha iní cue landú líhli-áⁿ ducaⁿ cúu váha iní cue ñǎyiu yindaha ñaha Yǎ Ndióxi —càchí-gǎ xǎhaⁿ-gǎ xii-güedé.

¹⁵Te ní tendaha ñaha-gǎ xii-güexi, te ní xicáⁿ tǎhú-gǎ núu Yǎ Ndióxi cuendá-güexi, te sǎtá dúcáⁿ ní quide-gǎ te ní xica-gǎ cuáhǎⁿ-gǎ.

ìⁿ tée cuica càháⁿ ndíhi-dé Jèsús

(Mr. 10:17-31; Lc. 18:18-30)

¹⁶Te ìⁿ tée cuechi ní quexio-dé núu ndécú Jèsús, te xicáⁿ tnúhú-dě núu-gǎ, te xǎhaⁿ-dě xii-gǎ:

—Yòhó Mèstrú, cúu-n tée ío váha iní-xi, te cuiní-í núu vá cündéé iní-n càchí tnúhu-n ná cúú sǎ váha cada-í cuendá ndúu tǎhú-í cundecu-í ndíhi Yǎ Ndióxi ní caa ní quíhí —càchí-dé xǎhaⁿ-dě xii-gǎ.

¹⁷Te Jèsús ní xǎhaⁿ-gǎ xii-dé:

—¿Te cùtnuní iní-n nǎcuáa ndúu tnúhu càháⁿ-n sǎ yúhú váha iní-ǎ?, chí ìⁿndí díí-ni Yǎ Ndióxi ío váha iní-gǎ. Te núu cuiní-n nǎnǎhí tǎhú-n te tníi-n nchaa tnúhu càháⁿ Yǎ Ndióxi, tnúhu sǎ sǎnú íchi ñaha xii ñǎyiu nǎcuáa cadá-yu cundecú-yu —càchí-gǎ xǎhaⁿ-gǎ xii-dé.

¹⁸Te tée cuechi-ǎ ní xǎhaⁿ-dě xii-gǎ:

—¿Te ndëndida cǎa tnúhu càháⁿ Yǎ Ndióxi cada-í-í? —càchí-dé xǎhaⁿ-dě xii-gǎ.

Te Jèsús ní xǎhaⁿ-gǎ xii-dé:

—Te duha ní cachí Yǎ Ndióxi cada ñǎyiu: “Vǎ cǎhní-ndó tnàha ñǎyiu-ndo, vá càháⁿ ndíhi-ndo ñadihi te núu ñá díú ñadihi-ndó cúu-yu, te ducaⁿ-ni nchòhó cue ñǎyiu díhí tucu vá càháⁿ ndíhi-ndo tée te núu ñá díú yíi-ndo cuu-güedé, te vá dúhú-ndó sǎ ndécú ndíhi tnàha ñǎyiu-ndo, vá dǎcǎcu-ndo cuéchi neñúú sǎ cúu-í tnàha ñǎyiu-ndo. ¹⁹Te canehe-ndo sǎ yíñúhu núu tǎtá-ndó ndíhi núu nǎnǎ-ndó, te cundàhú iní-ndó tnàha ñǎyiu-ndo dátǎná cündàhú iní-ndó mèe-ndo”, duha ní cachí Yǎ Ndióxi cada ñǎyiu —càchí-gǎ xǎhaⁿ-gǎ xii-dé.

²⁰Te tée cuechi-ǎ ní xǎhaⁿ-dě xii-gǎ:

—Nchaa xíáⁿ ní ngúíta-í quidé-í ndéé cùtnàhá cúu landú-í, ¿te vitna nǎgǎ cùmǎní cada-í-í? —càchí-dé xǎhaⁿ-dě xii-gǎ.

²¹Te Jèsús ní xǎhaⁿ-gǎ xii-dé:

—Te núu cuiní-n cùu-n ìⁿ tée ío váha cada ndáá, te cuáháⁿ dico-n nchàa sá ndécú ndìhí-n, te díhúⁿ-n cuàha táhú-n cuè ñáyiú ndàhú, te ducaⁿ te nduu táhú-n ngündecu váha-n núú ndécú Yá Ndiòxí táxí tnùnì-gá. Te sáta ná yàha ducaⁿ càda-n te quixi-n chìtnahá ñáhá-n xii-í —càchí-gá xàhaⁿ-gá xii-dé.

²² Te sá dúcáⁿ ní xáhaⁿ Jèsús xii-dé te ío ní cundìyí-dé, chi ío cuica-dé, te ní xica-dé cuáháⁿ-dé.

²³ Te Jèsús ní xáhaⁿ-gá xii cue tée xica cuu ndìhí-gá:

—Na càchí tnúhu ndáá-í xii-ndo sá ò úhú quíndáá iní ñaha cuè ñáyiú cuica xii Yá Ndiòxí cuèndá ndíhu ndaha ñaha-gá xii-yu. ²⁴ Te na càchí tnúhu tucu-í xii-ndo sá yàchí-gá yáha ìⁿ càméyu yaú ìⁿ yiqui tìcú dácúxí sá quíndáá iní ìⁿ ñáyiú cuica Yá Ndiòxí cuèndá ndíhu ndaha ñaha-gá xii-yu —càchí-gá xàhaⁿ-gá xii-güedé.

²⁵ Te sá dúcáⁿ ní cáháⁿ Jèsús, xíáⁿ ío ní cuñúhu cue tée xica cuu ndìhí-gá, te ní ngüíta-güedé xìtnàha-güedé:

—¿Yoo naníhí táhú te núu ducaⁿ vàiⁿ? —càchí-güedé xìtnàha-güedé.

²⁶ Te Jèsús ní ndacoto-gá núú-güedé, te xàhaⁿ-gá xii-güedé:

—Nchaa ñáyiú ñuyú-a chi vá ndácú-yu ná cada-yu nàcuáa ndíhu ndaha ñaha Yá Ndiòxí xii-yu, dico mee-gá chi ndacu-gá ndíhu ndaha ñaha-gá xii-yu chi nchaandi túhú sá váha ndacu-gá quidé-gá —càchí-gá xàhaⁿ-gá xii-güedé.

²⁷ Te té Pèlú ní xáhaⁿ-dè xii-gá:

—Nchúhú ní dándòo-ndí nchaa sá ndécú ndìhí-ndí, te ní tuha ñaha-ndí xii-n, ¿te ná cùú sá ñihí-ndí nduu táhú-ndí sá dúcáⁿ ní quide-ndí-í? —càchí-dé xàhaⁿ-dè xii-gá.

²⁸ Te Jèsús ní xáhaⁿ-gá xii-güedé:

—Na càchí tnúhu ndáá-í xii-ndo sá ná sáá nduu, ndùu saa nchaa sá ío andíu ndìhí ñuyú-a, te dàvá-áⁿ cunucóo yúhú Tée cùu ñaní tnáhá-ndó nchàa-ndo ìⁿ núú xilé váha, te nchaa ñáyiú quini-yu sá ò càhnu cuu-í, te nchòhó cue tée ní tuha ñaha xii-í tnáhá-ndó cùnucóo-ndo núú ìⁿ caa xilé váha ndí ùxúú tnáhá-ndó, te xíáⁿ cunucóo-ndo càda ndáá-ndó cuèchi ndí ùxúú xichi cue ñáyiú isràèl. ²⁹ Te nchaa ñáyiú na dándóo vehe-xi, àdi ñaní-xi, àdi cúha-xi, àdi tátá-xi, àdi náná-xi, àdi

ñadihí-xi, àdi déhe-xi, àdi ñuhu-xi, te núu ducaⁿ na càdá-yu sá cuèndá-í te ío-gá cuéhé sá cuàhana Yá Ndiòxí cundecu ndìhí-yu, te ñá díú-ní xíáⁿ chi tnáhá nduu táhú-yu cundecu-yu ndìhí-gá ní caa ní quíhíⁿ. ³⁰ Te dava ñáyiú cùnuu ndecu ichi Yá Ndiòxí vitna, ñáyiú-áⁿ sáá nduu te vá ò-gá cunúu-yu dàtná cùnúu-yu vitna, te dava ñáyiú nchicúⁿ ñá túú cùnuu vitna, ñáyiú-áⁿ sáá nduu te ío cunúu-yu —càchí-gá xàhaⁿ-gá xii-güedé.

20

Cuèndá cue tée quide chiúⁿ

¹ Te xáhaⁿ tùcu Jèsús xii cue tée xica cuu ndìhí-gá:

—Na càni-í ìⁿ cuèndú núú-ndó cuèndá tecú tnùnì-ndó nàcuáa cada-xi òré ndíhu ndaha ñaha Yá Ndiòxí xii ñáyiú. ìⁿ tée ní xitu-dé yoho yàha stilé, te ìⁿ nduu ní quee-dé nehé-ni cuándúcú-dé cue tée cada chiúⁿ núú dúcáⁿ ní xitu-dé yoho yàha stilé-áⁿ. ² Te òré ní ñihí-dé cue tée cada chiúⁿ-áⁿ, te ní quide ndáá-dé ndìhí-güedé sá cháhu ñaha-dé xii-güedé ìⁿ díhúⁿ denàriú ìⁿ nduu. Te sáta dúcáⁿ te ní tendaha ñaha-dé xii-güedé cuáháⁿ-güedé cada chiúⁿ-güedé núú dúcáⁿ ní xitu-dé yoho yàha stilé-áⁿ. ³ Te dàtnúⁿ ñí xica tucu-dé cuáháⁿ-dé dàtná òré caá ìⁿ dàtnéé cuándúcú-gá-dé cue tée cada chiúⁿ núú ní xitu-dé yoho yàha stilé-áⁿ, te ní xiní-dé xìtnúⁿ ìⁿ úú cue tée núú yáhu te ñá túú nã chiúⁿ xiquide-güedé.

⁴ Te ní xáhaⁿ-dè xii-güedé: “Ñá túú cùdana cuyáchí-ndó càda-ndo chiúⁿ-í te cháhu ñaha-í xii-ndo nàcuáa tàù-xi cunduu-áⁿ”, càchí-dé xàhaⁿ-dè xii-güedé. Te cue tée-áⁿ ní sáha-güedé tnúhu cada chiúⁿ-güedé te ní xica-güedé cuáháⁿ-güedé. ⁵ Te tée ní xitu yoho yàha stilé-áⁿ ní xica tucu-dé dàtná òré caúxúú nduu cuándúcú-gá-dé cue tée cada chiúⁿ-dé, te ní ñihí tucu-dé cue tée cada chiúⁿ. Te ní quee tucu-dé dàtná òré caá úní sacuaa, te diu-ni ducaⁿ ní quide tucu-dé. ⁶ Te ní quee tucu-dé dàtná òré caá úhúⁿ sacuaa cuándúcú-gá-dé cue tée cada chiúⁿ-dé, te ní xiní-dé xìtnúⁿ ìⁿ úú cue tée diu-ni núú yáhu-áⁿ te ñá túú nã chiúⁿ quide-güedé, te ní xáhaⁿ-dè xii-güedé: “Sànnu sá nchòhó ní cuu nchàa vitna ñá túú ñihí-ndó chiúⁿ cada-ndo”, càchí-dé xàhaⁿ-dè xii-güedé. ⁷ Te cue tée-áⁿ

ní xáhaⁿ-güedë xii-dé: “Ñá túú nihí-ndí chiuⁿ cada-ndí chi vá yõ ndùcu ñaha xii-ndí”, cächí-güedë xáhaⁿ-güedë xii-dé. Te ní xáhaⁿ-dë xii-güedë: “Yúhú taxi-í chiuⁿ cada-ndo, te quíhíⁿ-ndó núú ní xitu-í yoho yàha stilé yàcáⁿ cada chiuⁿ-ndo, te cháhu ñaha-í xii-ndo nàcuáa tàú-xi cunduu”, cächí-dé xáhaⁿ-dë xii-güedë. ⁸ Te sáta ní dáhu nchíanchii, te téé dii chiuⁿ-xi-áⁿ ní xáhaⁿ-dë xii téé tàxi tnuní ñáhá xii cue téé quide chiuⁿ-áⁿ: “Cũñaha xii nchaa cue téé quide chiuⁿ-áⁿ ná quíxí-güedë te cháhu-n-güedë, te díhna-gá cue téé nchícúⁿ cuíí-nã cuánguihu núú chíúⁿ ngüíta-n cháhu-n, te ndéé núú ní ndíhi-ná cháhu-n cuè téé cuánguihu díhna nuu-gã núú chíúⁿ”, cächí-dé xáhaⁿ-dë xii téé tàxi tnuní ñáhá xii cue téé quide chiuⁿ-áⁿ. ⁹ Te díhna-gá cue téé cuánguihu caá úhúⁿ sacuaa ní quexio-güedë cuendá cháhu ñaha-dë, te ní cháhu ñaha-dë íⁿ caa díhúⁿ denariú xii íⁿ íⁿ-güedë. ¹⁰ Te sáta ní cháhu-dé dava-gá cue téé ní quide chiuⁿ. Te ndéé núú ní ndíhi-ná ní cháhu-dé cue téé cuánguihu díhna nuu-gã núú chíúⁿ. Te cue téé-áⁿ ní sani iní-güedë sá váí-gá cháhu ñaha-dë xii-güedë, dico ñáhá chi íⁿ caa-ni díhúⁿ denariú ní cháhu ñaha-dë xii íⁿ íⁿ-güedë. ¹¹ Te cue téé-áⁿ ní queheⁿ cuendá-güedë díhúⁿ-güedë dico ñá túú ní quide váha-xi iní-güedë. ¹² Te ní xáhaⁿ-güedë xii téé dii chiuⁿ-xi ní quide-güedë: “¿Ná cuendá cue téé nchícúⁿ cuíí-nã cuánguihu núú chíúⁿ íⁿ-ni ní cháhu ñaha-n xii-ndí ndíhi-güedë, te íⁿ-dii oré duha ní quide chiuⁿ-güedë? Te nchúhú nchàca nchaa ní sahní iní-ndí ní quide chiuⁿ-ndí, te ní ndoho-ndí cahni, te íⁿ-ni ní cháhu ñaha-n xii-ndí ndíhi-güedë”, cächí-güedë xáhaⁿ-güedë xii téé dii chiuⁿ-xi ní quide-güedë. ¹³ Te téé dii chiuⁿ-xi ní quide-güedë-áⁿ ní xáhaⁿ-dë xii íⁿ téé-áⁿ: “Yòhó, ñá túú quide-í íⁿ sá ñá túú tàú-í cada-í sá cúú-xí-n, chi ní quide ndáá-ó sá díú-ní íⁿ díhúⁿ denariú cháhu ñaha-í xii-n íⁿ nduu. ¹⁴ Te vitna queheⁿ díhúⁿ cuendá nduu-n te núhú-n, chi yúhú cuíní-í sá íⁿ-ní cháhu ñaha-í xii-n ndíhi cue téé nchícúⁿ cuíí-nã cuánguihu núú chíúⁿ. ¹⁵ Chi yúhú cuu-ni cada-í nání cuíní-í ndíhi díhúⁿ-í, ¿adi dico ñá túú quide váha-xi iní-n sã dúhá cundahú iní-í cue

téé-áⁿ ducaⁿ cháhu-í-güedë?”, cächí téé cùu patróóⁿ-áⁿ xáhaⁿ-dë xii téé-áⁿ. Duha nduu cuendú cáni-í núú-ndó. ¹⁶ Te duha càháⁿ-í chi dava ñáiyu cùnucu ndecu ichi Yá Ndiõxi vitna sáá nduu te vá cùnucu vihi-gá-yu dàtná cùnùú-yu vitna, te dava ñáiyu ñá túú cùnucu vitna sáá nduu ïo cùnùú-yu. Te ïo cuéhé ñáiyu càháⁿ ñáhá Yá Ndiõxi xií-yu dico sacú-ni-yu nduu táhú-yu cundecú-yu ndíhi-gá —cächí-gá xáhaⁿ-gã xii-güedë.

Jesús càháⁿ tucu-gá sá cáhni ñaha-güedë xii-gá

(Mr. 10:32-34; Lc. 18:31-34)

¹⁷ Te ñuhu Jesús ichi cuasaá-gá ñuu Jerusalén ndíhi cue téé xica cuu ndíhi-gá, te ní cana ñaha-gã xii-güedë ní naníhí tnáhá-güedë ndíhi-gá, te ta ndàtnúhu ndíhi ñaha-gã xii-güedë cuáháⁿ, te xáhaⁿ-gã xii-güedë:

¹⁸ —Vitna ñuhu-o ichi cuasaá-ó ñuu Jerusalén, te yacáⁿ cuáha cuendá ñáhá-güedë xii yúhú Téé cùu ñaní tnáhá-ndó nchaa-ndo núú cuè téé cùu dútú cùnùu, ndíhi núú cuè téé dàcuaha ñaha xii ñáiyu nchaa tnúhu ní chídó tnuní ndí Moisés. Te diu cue téé-áⁿ cũñaha-güedë xii dava-gá cue téé sá cáhni ñaha-güedë xii-í. ¹⁹ Te cuáha cuendá ñáhá-güedë xii-í núú cuè téé ñá túú cùu cue téé isràél, te cue téé-áⁿ cudíquí ndeé ñáhá-güedë xii-í, te caniha-güedë ndíhi ñii, te dàtnùnì cata caa ñaha-güedë xii-í núú cùrúxí te núú cùrúxí-áⁿ cuú-í, dico nduu únì sá cuú-í te ndoto-í —cächí-gá xáhaⁿ-gã xii-güedë.

Náná tã Jácobó ndíhi té Juáa cuíní-aⁿ sá cùnucu-güedë ndíhi Jèsús

(Mr. 10:35-45)

²⁰ Te cue déhe té Zebèdeú té Jácobó ndíhi té Juáa ndécá ñaha náná-güedë xii-güedë cuáháⁿ núú ndécú Jèsús, te òrè ní quexio-aⁿ ndíhi-güedë núú ndécú-gã te ní ngüíhí xítí-áⁿ núú-gã cuendá cuíní-aⁿ ndàtnúhu ndíhi ñaha-aⁿ xii-gá cuendá sá cúú-xí cuè déhe-aⁿ. ²¹ Te cùmání-gã cáháⁿ-aⁿ te ní xícáⁿ tnúhú Jèsús núú-aⁿ, te xáhaⁿ-gã:

—¿Ná cuíní-n? —cächí-gá xáhaⁿ-gã xii-aⁿ.

Te ní xáhaⁿ-aⁿ xii-gá:

—Véxi-í càháⁿ ndàhú-í núú-n núu vá cùndèe iní-n cùnucóo íⁿ déhe-í-a xio cùha-n, te ingá-dé cunucóo-dé xio dàtni-n

na saá nduu cùnucóo-n núú táxí tnùnì-n — cächí-áⁿ xáhaⁿ-aⁿ xii-gá.

²² Te Jèsús ní xáhaⁿ-gá xii úú cue tée-áⁿ:

—Nchòhò, ñá túú cùtnúní váha iní-ndó nàcuáa nduu sá xícáⁿ-ndó nùù-í. ¿Te náa cundee iní-ndó dàndoho ñaha ñáyiú xii-ndo dàtná dandòho ñahá-yu xii-í, te cundee tùcu iní-ndó càhni ñahá-yu xii-ndo dàtná cahni ñahá-yu xii-í-áⁿ? —cächí-gá xáhaⁿ-gá xii-güedé.

Te ní xáhaⁿ-güedé xii-gá:

—Cundee iní-ndí yáha-ndí nchaa nàcuáa càháⁿ-n-áⁿ —cächí-güedé xáhaⁿ-güedé xii-gá.

²³ Te Jèsús ní xáhaⁿ-gá xii-güedé:

—Ndáá sá cùndèe iní-ndó ndòho-ndo nchaa nàcuáa ndocho-í, dico sá dúcáⁿ cuiní-ndó sá ííⁿ-ndó cùnucóo-ndo xio cuha-í, te ííⁿ-ndo cùnucóo-ndo xio datni-í, te xíáⁿ chi ñá díú yúhú tàú-í cächí-í núú sá cúú cùnucóo-ndo àdi sá vǎ cúú cùnucóo-ndo, chi mee Tǎtà-í Dútú Ndìòxí cächí-gá te núú ná cúú ñáyiú nduu táhú cùnucóo díñí-í dàvǎ-áⁿ —cächí-gá xáhaⁿ-gá xii-güedé.

²⁴ Te òré ní níhí úxí-gá cue tée xica cuu ndíhi-gá tnúhu nàcuáa nduu sá cuiní cue tée úú-áⁿ, te ní cudééⁿ-güedé núú cuè tée úú-áⁿ. ²⁵ Te Jèsús ní cana-gá nchaa cue tée xica cuu ndíhi-gá, te ní xáhaⁿ-gá xii-güedé:

—Nchòhò xiní-ndó sǎ cuè tée yindaha nacióⁿ quidé-güedé sǎ ìo cùnucóo-güedé, te nchaa dava-gá cue tée cùnucóo-ndo ndíhi-güedé quidé-güedé tnàhá-güedé sǎ ìo cùnucóo-güedé. ²⁶ Dico nchòhò chi vá dúcáⁿ càda-ndo, chi núú dava-ndo cuiní-ndó cùnucóo-ndo, te xini ñuhu-xi cunu cuechi núú tnàhá-ndó te vá cáda-ndó sǎ cùnucóo-ndo. ²⁷ Te núú dava-ndo cuiní-ndó quène cáva-ndo, te cuu-ndo dàtná cue ñáyiú ñá túú tnàhí dàná quee núú chíúⁿ pàtróóⁿ-xi cunu cuechi núú tnàhá-ndó. ²⁸ Te cada-ndo dàtná quidé yúhú Tée cùu ñani tnàhá-ndó nchàa-ndo, chi yúhú véxi-í ñuyúú-a dico ñá díú sǎ cúnú cuèchi ñáyiú núú-í chi véxi-í sǎ cúnú cuèchi-í núú-yu. Te cuú-í ñuyúú-a cuèndá vǎi-yu cácu nihnú-yu núú ùhú núú ndàhú —cächí-gá xáhaⁿ-gá xii-güedé.

Jèsús quidé tǎtna-gá núú úú tnàhá cue tée cuáa

(Mr. 10:46-52; Lc. 18:35-43)

²⁹ Te òré ní quee Jèsús ñuú Jericó ndíhi cue tée xica cuu ndíhi-gá, te cuéhé víhí ñáyiú nchícúⁿ ñahá xii-gá cuaháⁿ. ³⁰ Te yuhu ìchi cuaháⁿ-gá xìnucóo úú tnàhá cue tée cuáa, te cue tée-áⁿ ní cutnúní iní-güedé sǎ Jèsús ñuhú-gǎ ichi-áⁿ te ní núúfta-güedé níhi càháⁿ-güedé, te xáhaⁿ-güedé xii-gá:

—¿Yòhò Mèstrú, ñani tnàhá ndí Dáví, cundàhú iní ñahá xii-ndí! —cächí-güedé xáhaⁿ-güedé xii-gá.

³¹ Te cue ñáyiú tènáá ñahǎ-yu xii-güedé, te xáhaⁿ-yu sǎ ná cadí-güedé yuhu-güedé, dico uuⁿ-gá níhi ní càháⁿ-güedé, te xáhaⁿ-güedé xii-gá:

—¿Yòhò Mèstrú, ñani tnàhá ndí Dáví, cundàhú iní ñahá xii-ndí! —cächí-güedé xáhaⁿ-güedé xii-gá.

³² Te ní núúfta Jèsús te ní cana ñaha-gǎ xii-güedé, te ní xícáⁿ tnúhú-gǎ núú-güedé, te xáhaⁿ-gǎ:

—¿Ná cuiní-ndó càda ñaha-í xii-ndo-í? —cächí-gá xáhaⁿ-gǎ xii-güedé.

³³ Te ní xáhaⁿ-güedé xii-gá:

—Mèstrú, cuiní-ndí sǎ cáda tǎtna-n núú-ndí cuèndá cundehe-ndí —cächí-güedé xáhaⁿ-güedé xii-gá.

³⁴ Te Jèsús ní cundàhú iní ñahá-gǎ xii-güedé, te ní tendaha-gǎ núú-güedé. Te òré-ní ní ndúha núú-güedé, te nchícúⁿ ñahá-güedé xii-gá cuaháⁿ.

21

Jèsús cuánguìhu-gá ñuú Jerusalén

(Mr. 11:1-11; Lc. 19:28-40; Jn. 12:12-19)

¹ Te òré sa ta cùyatni Jèsús ndíhi cue tée xica cuu ndíhi-gá ñuú Jerusalén, te ní quexio-gá ndíhi-güedé yatni víí-nǎ ñuú Bètfagé, te xíáⁿ cáá yucu nani Olivú. Te ní ndatnúhu-gá ndíhi úú cue tée xica cuu ndíhi-gá, ² te ní xáhaⁿ-gǎ xii-güedé:

—Chí cuaháⁿ ñuú cáá yatni yacáⁿ, te òré quexio-ndo yacáⁿ te nanihí-ndó ííⁿ búrru díhí ndètñí-dí ndíhi déhe-dí, te nandaxi-ndo-güedé te candeca-ndo-güedé quixi. ³ Te núú ìó ñáyiú dàdahaⁿ ñaha xii-güedé, te cúnaha-ndo xii-yu sǎ yúhú Yáá xícá cùu ndíhi-ndo xini ñuhu-í-güedé, te ndíhi-ni natendaha-í-güedé níhú-güedé cúnaha-ndo —cächí-gá xáhaⁿ-gǎ xii-güedé.

⁴ Te ducaⁿ ní cuu chi ní quee ndáá-xi nàcuáa ní chídó tnùnì ííⁿ tée ní xóo càháⁿ

tnúhu Yá Ndióxi ndéé sanaha núú tütú-gá núú cächí-xi:

⁵ Chí cūñaha cuè ñáyiú ñuú Sión ná cáda cuendá-yu, chí véxi téé yindaha ñaha xii-yu yodo-dé ñⁿ búrru líhli déhe ñⁿ búrru quiti sa xido, te cùu-dé ñⁿ téé ío ndàhú iní-xi.

Duha ní chídó tnùnì ñⁿ téé ní xóo cáháⁿ tnúhu Yá Ndióxi ndéé sanaha núú tütú-gá.

⁶ Te cue téé xica cuu ndíhi-gá ní xica-güedé cuáháⁿ-güedé, te ní quide-güedé nàcuáa ní xáhaⁿ-gá xii-güedé cada-güedé. ⁷ Te ní ndexio-güedé ndécá-güedé ñⁿ búrru dǐhí ndíhi déhe-di, te ní sacáⁿ ndodo-güedé dóo-güedé sátá-güedé, te dǎtnùnì cuásáa Jèsús sátá ñⁿ-dí ní ngódó ñaha-gá xii-dí. ⁸ Te ío cuéhé ñáyiú ta sacáⁿ-yu dóo-yu ichi cuáháⁿ-gá cuendá núú dóo-yu-áⁿ yáha-gá ndíhi quiti yodo-gá. Te davá-yu xèhndé-yu ndaha yùtnu núú tá sacáⁿ-yu cuáháⁿ.

⁹ Te nchaa ñáyiú yodonuu núú-gá ndíhi nchaa ñáyiú nchícúⁿ ndàa sátá-gá ní ngúíta-yu níhi cáháⁿ-yu, te cächí-yu: —Ío càhnu cuu Yáa cúú ñàní tnáhá ndí Dáví! ¡Te Yá Ndióxi ío na chindee ñaha-gá chí cùu-gá Yáa ní tendaha Yá Ndióxi véxi quide núú-gá! ¡Te ndéé nchaa sá ío andíu na cächí-xi sá ío càhnu cuu-gá! —duha cächí-yu.

¹⁰ Te òré cuánguñhu Jèsús ñuú Jerusalén, te nchaa ñáyiú ñuú-áⁿ ní ngúíta-yu xícuaá-yu, te davá-yu ní ngúíta-yu xitnàhá-yu: —¿Yoo cùu téé-áⁿ? —cächí-yu xitnàhá-yu.

¹¹ Te davá-yu xitnàhá-yu: —Téé-áⁿ cúú-dé Jèsús téé cáháⁿ tnúhu Yá Ndióxi, te cùu-dé téé ñuú Nazàrét ñuú yíndèhu distritú Galiléa —cächí-yu xitnàhá-yu.

Jèsús ñá túú tnàhá iní-gá nàcuáa xíquide ñáyiú xití veñúhu

(Mr. 11:15-19; Lc. 19:45-48; Jn. 2:13-22)

¹² Te Jèsús cuánguñhu-gá xití veñúhu càhnu sá ío cùnuu, te xití veñúhu-áⁿ xíndecu ñáyiú quide ndáhú nádíco-yu, ndíhi ñáyiú xísaaⁿ, te nchaa-yu ní queñuhu ñaha Jèsús xii-yu quehé, te ní dándúá-gá mèsá nchaa ñáyiú dàma díhúⁿ, ndíhi nchaa xilé

sácdo nchíhi ñáyiú dícó lómá xíndecu xití veñúhu-áⁿ. ¹³ Te ní xáhaⁿ-gá xii-yu:

—Núú tütú Yá Ndióxi cáháⁿ-xi nàcuáa ní cáháⁿ-gá, te ní cächí-gá: “Vehe-í cúú-xí núú cáháⁿ ndíhi ñaha ñáyiú xii-í”, duha ní cáháⁿ-gá cächí-xi núú tütú-gá. Dico nchòhó quidé-ndó vehe-gá vehe ñadúhú —cächí-gá xáhaⁿ-gá xii-yu.

¹⁴ Te xíaⁿ ndécú Jèsús ní quexio cue téé cuáa ndíhi cue téé yacua, te ní quide tátna ñaha-gá xii-güedé te ní ndúha-güedé. ¹⁵ Te cue dútú cùnuu ndíhi cue téé dàcuaha ñaha xii ñáyiú nchaa tnúhu ní chídó tnùnì ndíhi Moisés ní xini-güedé ní quide Jèsús sá vǎ yóo tnàhí ndàcu cada, te ndédóho tucu-güedé níhi xicáháⁿ cue landú xití veñúhu càhnu sá ío cùnuu-áⁿ, te cächí-güexi: “Ío càhnu cuu Yáa cúú ñàní tnáhá ndí Dáví”, cächí-güexi. Te ní cudééⁿ-güedé, ¹⁶ te ní xáhaⁿ-güedé xii Jèsús: —¿Ndédóho-n nàcuáa cáháⁿ cue landú-áⁿ ñá? —cächí-güedé xáhaⁿ-güedé xii-gá.

Te Jèsús ní xáhaⁿ-gá xii-güedé:

—Ndédóho-í, te nchòhó náa ñá túú dàcuaha-ndo núú tütú Yá Ndióxi núú cáháⁿ-xi cuendá cue landú-áⁿ, te duha cächí-xi:

Yòhó ní quide-n sá cuè landú vitna sàdi, ndíhi cue dava-gá landú,

chíñuhu ñaha-güexi xii-n nàcuáa tàú-xi cundu.

Duha cächí-xi núú tütú-gá —cächí-gá xáhaⁿ-gá xii-güedé.

¹⁷ Te xíaⁿ ní dándóo ñaha Jèsús xii-güedé, te ní xica-gá cuáháⁿ-gá ñuú Bètania, yàcáⁿ ní xíndecu-gá niú-áⁿ.

Jèsús xáhaⁿ-gá xii yutnu ngúxí sá vǎ cúúⁿ-gá sávídí-xi

(Mr. 11:12-14, 20-26)

¹⁸ Te nduu tnèé-áⁿ nehé-ni cuáháⁿ tucu Jèsús ñuú Jerusalén, te ichi ñuhu-gá ní xíhí-gá docó. ¹⁹ Te ní xini-gá ñⁿ yutnu ngúxí nùtní ñⁿ xio yuhu íchi, te ní xica-gá cuáháⁿ ndéhé-gá núu ndéé sávídí-xi, dícó ñá túú ná ndéé chí mee-ni ndàha-xi ndéé. Te ní xáhaⁿ-gá xii yutnu ngúxí-áⁿ:

—¡Vitna te vǎ ñⁿ nduu-gá cuu sávídí-n! —cächí-gá xáhaⁿ-gá xii-xi.

Te òré-ni-áⁿ ní yíhí yutnu ngúxí-áⁿ. ²⁰ Te sá dúcáⁿ ní cuu ní xini cue téé xica cuu ndíhi Jèsús, te ío ní cuñuhu-güedé, te ní xicáⁿ tnúhú-güedé núú-gá, te xáhaⁿ-güedé:

—¿Ná cuendá ndéé dácáⁿ ío ndíhi ní yíchí yutnu ngüxí-ǎⁿ-í? —cächí-güedé xáhaⁿ-güedé xii-gá.

²¹ Te Jèsús ní xáhaⁿ-gá xii-güedé:

—Na cächí tnúhu ndáá-í xii-ndo sá nüu nchòhó quíndáá ndisa iní-ndó Yá Ndiöxí, te vá cání ñⁿ cani úú iní-ndó, te ñá díú-ní sá ní quide-í-a ní xiní-ndó ndácu-ndo cada-ndo, chi ndéé tñdúú-a xocuñí-xi núu ndécú-xí te núu cúñaha-ndo sá xocuñí-xi te quíñí-xi quée-xi xití lámár. Te diu ducaⁿ cada-xi te núu na quíndáá iní-ndó. ²² Te nchaa sá ná cacaⁿ-ndó nüü Yá Ndiöxí òré cáháⁿ ndíhi-ndo-gá te taxi-gá te núu sàndáá ndisa iní-ndó sá táxí-gá sá xicáⁿ-ndó núú-gá —cächí-gá xáhaⁿ-gá xii-güedé.

Jèsús ndécú ndíhi-gá tnúhu ndee ìní (Mr. 11:27-33; Lc. 20:1-8)

²³ Te Jèsús cuánguihu-gá xití veñúhu càhnu sá ío cùnunu danehe-gá ñáyiú, te xíaⁿ ndécú-gá ní quexio cue dítú cùnunu ndíhi cue téé cùu sacuéhé nüü ñáyiú isràél, te xáhaⁿ-güedé xii-gá:

—Cuíní-ndí cachí tnúhu-n xii-ndí nása ndüu tnúhu ndee ìní ndécú ndíhi-n núu quide-n nándi sá quidé-n, ¿te yoo ducaⁿ ní taxi tnúhu ndee ìní-áⁿ xii-n-í? —cächí-güedé xáhaⁿ-güedé xii-gá.

²⁴ Te Jèsús ní xáhaⁿ-gá xii-güedé:

—Yúhú tñàh-í cuíní-í cacaⁿ tnúhu-í ñⁿ sá cacaⁿ tnúhu-í núú-ndó, te núu na cächí tnúhu-ndo te cachí tnúhu-í xii-ndo yòo ní taxi tnúhu ndee ìní duha quide-í. ²⁵ Te chí cächí tnúhu xii-í yoo ní táuchíúⁿ ní dácuanđüte ndí Juáá ñáyiú, ¿Yá Ndiöxí ǎⁿ cué téé ñuyúú-a ní táuchíúⁿ dùcaⁿ ní quide ndíí?, te chí cächí tnúhu —cächí-gá xáhaⁿ-gá xii-güedé.

Te ní ngúíta-güedé xitñaha-güedé:

—¿Nása cúñaha-o? Chi núu na cúñaha-o sá Yá Ndiöxí ní táuchíúⁿ dùcaⁿ ní quide ndí Juáá ñá, te quesaha-dé: “¿Ná cuendá ñá túú ní sàndáá iní-ndó tñúhu ní cáháⁿ ndíí váiⁿ?”, quesaha-dé. ²⁶ Te núu na cúñaha-o sá cué ñáyiú ñuyúú-a ní táuchíúⁿ dùcaⁿ ní quide ndíí ña, te cudéⁿ ñáyiú núú-ó, chi nchaa-yu cächí-yu sá Yá Ndiöxí ní xáhaⁿ-gá xii ndíí sá cáháⁿ ndíí tnúhu-gá núú ñáyiú —cächí-güedé xitñaha-güedé.

²⁷ Te ní xáhaⁿ-güedé xii Jèsús:

—Ñá túú xiní-ndí yoo ní táuchíúⁿ dùcaⁿ ní dácuanđüte ndí Juáá ñáyiú —cächí-güedé xáhaⁿ-güedé xii-gá.

Te ní xáhaⁿ-gá xii-güedé:

—Te núu ducaⁿ te ni yúhú vá cächí tnúhu-í xii-ndo yòo ní taxi tnúhu ndee ìní duha quide-í —cächí-gá xáhaⁿ-gá xii-güedé.

Cuendá ñⁿ téé ndíhi úú déhe-dé

²⁸ Te Jèsús ní xáhaⁿ tñucu-gá xii-güedé:

—Na cání-í ñⁿ cuéndú núú-ndó nàcuáa tecú tñúni-ndó tñúhu cáháⁿ-í. ñⁿ téé ndècu úú déhe-dé, te ní xáhaⁿ-dè xii déhe-dé téé sacuéhé-gá: “Yòhó déhe-í, véxi-í cáháⁿ ndàhú-í núú-n nüü vá cündèe iní-n cuánundaha ñaha-n xii-í cada chiúⁿ-o núú ní xitu-í yoho yàha stilé”, cächí-dé xáhaⁿ-dè. ²⁹ Te ní xáhaⁿ déhe-dé xii-dé: “Vá quíñíⁿ-í cada chiúⁿ-í núú chíúⁿ-n”, cächí-dé xáhaⁿ-dè xii tātá-dé. Dico cuéé ní nacani iní-dé te ní sáháⁿ-dè ní quide chiúⁿ-dè núú chíúⁿ tātá-dé. ³⁰ Te téé-áⁿ ní sáháⁿ tucu-dé ní xáhaⁿ-dè xii déhe-dé téé líhli-gá nüü vá cündèe iní-dé cuánundaha ñaha-dé, te ní xáhaⁿ déhe-dé-áⁿ xii-dé: “Cuu cuánundaha ñaha-í xii-n”, cächí-dé xáhaⁿ-dè. Dico ñá túú ní sáháⁿ-dè cada chiúⁿ-dè. ³¹ Te vitna chí cáháⁿ nüü ndèdacaà cue téé úú-áⁿ ní quide-güedé sá cuíní tātá-güedé —cächí-gá xáhaⁿ-gá xii-güedé.

Te ní xáhaⁿ-güedé xii-gá:

—Téé cùu sacuéhé-gá, téé ní cáháⁿ ndíhi-dé díhna —cächí-güedé xáhaⁿ-güedé xii-gá.

Te Jèsús ní xáhaⁿ-gá xii-güedé:

—Na cächí tnúhu ndáá-í xii-ndo sá ncháá cué téé cuihna ìní-xi quide cobrá ñáhá xii ñáyiú cuendá impuèstú, ndíhi cue ñáyiú díhí xñdecu ichi díí ìní yáchí-gá ndíhu ndaha ñaha Yá Ndiöxí xii cue téé-áⁿ ndíhi cue ñáyiú díhí-áⁿ dácúúxí nchòhó. ³² Chi ndíí Juáá téé ní xóo dácuanđüte ñaha xii ñáyiú ní cáháⁿ ndíí nàcuáa cada-yu cun-decú-yu, dico nchòhó chí ñá túú cuíní-ndó quíndáá iní-ndó nàcuáa ní cáháⁿ ndíí, dico cue téé cuihna ìní-xi quide cobrá ñáhá xii ñáyiú cuendá impuèstú, ndíhi cue ñáyiú díhí xñdecu ichi díí ìní, chí sàndáá iní-güedé ndíhi-yu tnúhu ní cáháⁿ ndíí. Te nchòhó cuéí ndèhe-ndo sá sàndáá ìní cue ñáyiú-áⁿ nchaa tnúhu ní cáháⁿ ndíí, dico ñá túú cuíní-ndó ndixi cuéchi iní-ndó cuendá nchaa sá cuéhé sá dúhá quide-ndo cuendá

tnii-ndo tnũhu ní cáháⁿ ndii —càchí-gá xáhaⁿ-gǎ xii-güedé.

Cuendá cue tée cuihna ìní-xi
(Mr. 12:1-12; Lc. 20:9-19)

³³Te xáhaⁿ tùcu Jesús xii-güedé:

—Cundedóho-ndo na càni tucu-í ìngá cuendú núú-ndó cuendá tecú tnùnì-ndó tnũhu càháⁿ-í. Hⁿ tée ní nacúxi-dé mee-ni yóho yaha stilé núú ñũhú-dě, te ní chidoco-dě cuendá sá vǎ cúú dàñú, te ní cadúha-dé núú quíhni-dě ndéhé yoho yàha stilé-án òré ná cùu, te ní cadúha-dé hⁿ xító dùcúⁿ núú cáúndòdo cue tée coto nchaa yoho yàha stilé-án.

“Te ní sáá hⁿ nduu quèe-dé quíngaca cuu xica-dě te ní dándòo ndaha-dě sá ní xítu-dé-án xii hⁿ ùú cue tée xini tnáhá ndíhi-dé cuendá cada chùuⁿ-güedé, te ní ndatnúhu-güedé sá òré ná cúú te cuu cuendá dava-güedé, te ducaⁿ te ní quee-dé cuáháⁿ-dé. ³⁴Te sáta ní sáá nduu ní cuu ndéhé nchaa yoho yàha stilé sá ní xítu-dé-án, te ní xáhaⁿ-dě xii hⁿ ùú cue tée xinu cuechi núú-dě: “Chí cuáháⁿ cácaⁿ-ndó sǎ cúú cuendá-í núú cuè tée ní dándòo ndàha-í nchaa yoho yàha stilé sá ní xítu-í”, càchí-dé xáhaⁿ-dě xii-güedé. ³⁵Te cue tée ní dándòo ndaha-dě nchaa yoho yàha stilé sá ní xítu-dé-án ní tñii-güedé cue tée xinu cuechi núú-dě-án, te hⁿ-dé ní canì-güedé, te hⁿ-dé ní sahni ñaha-güedé, te ìngá-dé ní sǎñaha-güedé yúú. ³⁶Te tée ní xítu yoho yàha stilé-án ní tendaha-dě títñi-gá tucu cue tée xinu cuechi núú-dě cuáháⁿ-güedé cuángacáⁿ-güedé sá cúú cuendá-dé núú cuè tée ní dándòo ndaha-dě sá ní xítu-dé-án, dico ñu-ni ducaⁿ ní quide ñaha cuè tée-án xii cue tée xinu cuechi núú-dě-án.”

³⁷“Te tée cùu xítóhó nchaa yoho yàha stilé-án ní sani ìní-dé: “Váha-gá ñuu tendaha-í déhe-í-a núhú-dé, chí òré quini ñáhá-güedé xii-dé te canehe-güedé sá yíñũhu núú-dě”, duha ní sani ìní-dé. Te ní tendaha-dě déhe-dé cuánuhú-dé. ³⁸Dico òré ní xini cue tée quide chiⁿ-án dèhe tée cùu xítóhó nchaa yoho yàha stilé-án, te ní xitnàha-güedé: “Tée-án tée véxi nduu táhú ñuhu-a ndíhi nchaa sá cáá núú-xi, dico cahni-o-dě te mee-o nduu táhú-ó sǎ ndúú táhú-dě”, càchí-güedé xitnàha-güedé. ³⁹Te ní tñii-güedé tée-án te ndéca ñaha-güedé cuáháⁿ hⁿ xio yuhu ñũhu-án, te ní sahni

ñaha-güedé xii-dé —duha cuáháⁿ cuendú ní canì Jèsús núú-güedé.

⁴⁰Te ní xáhaⁿ tùcu Jesús xii-güedé:

—¿Te nchòhó sa cùtnunì ìní-ndó ñasa cada ñaha xítóhó ñuhu-án xii cue tée-án ñǎ? —càchí-gá xáhaⁿ-gǎ xii-güedé.

⁴¹Te cue tée-án ní xáhaⁿ-güedé xii-gá:

—Tée cùu xítóhó ñuhu-án ñũhú-dé, te vǎ cùndáhú ìní-dé cue tée cuihna ìní-xi-án chí cahni ñaha-dě xii-güedé, te dándòo ndaha-dě ñuhu-dé xii cue tée cùtnunì ìní-dé cada ndáá cuendá ndi tnáhá cúúⁿ ndéhé nchaa yoho yàha stilé sá ní xítu-dé-án te cuáhaha-güedé xii-dé sá cúú cuendá-dé —càchí-güedé xáhaⁿ-güedé xii-gá.

⁴²Te Jèsús ní xáhaⁿ-gǎ xii-güedé:

—Te nchòhó, náa ñǎ túú dàcuaha-ndo núú tütú Yǎ Ndióxi núú càchí-xi: Yúú sǎ ní dàquéé tĩhú cue tée dáca vehe, ní cuu-xi yúú cúnũu vitna.

Chi mee Dütú Ndióxi ducaⁿ ní càchí-gá cunduu, te cùu-xi hⁿ sǎ ìo cùñũhu-o vitna.

Duha càchí-xi núú tütú-gá. ⁴³Te duha càháⁿ-í chí Yǎ Ndióxi cada-gá te vǎ ñihí-ndó tnũhu ndee ìní cundecu ndíhi-ndo cuendá ndíhu ndaha ñaha-gá xii-ndo, chí tnúhu ndee ìní-án cundecu ndíhi cue ñáyiⁿ cada ndáá cuendá ndíhu ndaha ñaha Yǎ Ndióxi xí-yu. ⁴⁴Te yúú sǎ cúnũu-án cúú-xí yũhú, te nchaa ñáyiⁿ ñǎ túú tñii tnúhu-í cùu-yu dàtná hⁿ ñáyiⁿ ndúá núú yúú-án te tnáhnú duúⁿ-yu, àdi núu na tàù ñáhá-xí xí-yu, te dacàchi duuⁿ ñaha-xi —càchí-gá xáhaⁿ-gǎ xii-güedé.

⁴⁵Te sá dúcáⁿ ndúu cuendú ní canì Jèsús te cue tée cùu dütú cúnũu-án, ndíhi cue tée cùu fariséú ní cutnùnì ìní-güedé sá cuendá-güedé ní cáháⁿ-gá.

⁴⁶Te ní cuiní-güedé tñii ñaha-güedé xii-gá òré-án dico ñǎ túú ní cùyi-güedé, chí ní yũhú-güedé cue ñáyiⁿ, chí ní cutnùnì ìní-yu sá cúú-gá hⁿ tée càháⁿ tnúhu Yǎ Ndióxi.

22

Cuendá hⁿ vico tnándaha

¹Te Jèsús ní ngúita tucu-gá caní-gǎ ìngá cuendú núú-güedé, te xáhaⁿ-gǎ:

²—Na càni tucu-í ìngá cuendú núú-ndó cuendá tecú tnùnì-ndó nàcuáa cada-xi òré ndíhu ndaha ñaha Yǎ Ndióxi xii ñáyiⁿ. Hⁿ

tée yǐndaha ñaha xii ñáiyu ní quide-dé ìḡ vico ní dátǎndaha-dé déhe ducuⁿ-dé. ³ Te ní tendaha-dé cue tée xǐnu cuechi núú-dé cuáháⁿ-güedé cuángana-güedé cue ñáiyu sa ní cáháⁿ-dé cuhuⁿ vico, dico ñáiyu-án ñà túú ní cuiní-yu quíhíⁿ-yu. ⁴ Te ní xáhaⁿ tùcu-dé xii dava-gá cue tée xǐnu cuechi núú-dé: “Quíhíⁿ-ndó cǔñaha-ndo xii cue ñáiyu sa ní cáháⁿ-í cuhuⁿ vico sá sà ní quide túha-í sá cáxí-yu, te sa ní sahni-í ndicutu ndíhi nchaa dava-gá quiti ní dánucuíhmu-í, te nchaa sa ní quide túha-í, te na quixí-yu cuhúⁿ-yu vico cǎchí-í cǔñaha-ndo”, cǎchí-dé xáhaⁿ-dè xii cue tée xǐnu cuechi núú-dé-án. ⁵ Dico ni ìḡ ñáiyu ní cáháⁿ-dé-án ñà túú ní cuiní-yu quíhíⁿ-yu cuhúⁿ-yu vico. Chi ìḡ-yu ní sáháⁿ-yu ní quide chiúⁿ-yu núú ñúhǔ-yu, te ingá-yu ní sáháⁿ-yu ní nadícó-yu núú nándi cùu ndáhú quídè-yu. ⁶ Te dava-gá-yu ní tñíⁿ-yu dava cue tée xǐnu cuechi núú tée quide vico-án, te ní canihá-yu ndéé ní sahni ñáhá-yu xii-güedé. ⁷ Te tée yǐndaha ñaha xii ñáiyu quide vico-án ní cudéⁿ vǐhí-dè sá dúcáⁿ ní quidè-yu, te ní tendaha-dé cue sandádú-dé ní sáháⁿ-güedé ní sahni-güedé cue ñáiyu ducaⁿ ní quide-án, te ní sahni-güedé nchaa vehe càa ñúú-yu. ⁸ Te sátá dúcáⁿ te ní xáhaⁿ-dè xii dava-gá cue tée xǐnu cuechi núú-dé: “Nchaa sa ndècu túha, te cue ñáiyu ní cáháⁿ-í cuhuⁿ vico-a ni cùu ñá túú-gǎ tàù-yu sá chúhíⁿ-yu. ⁹ Te chí cuáháⁿ ndèni ní cuu te cáháⁿ-ndó nchaa ñáiyu na naníhí-ndó ìchi na quixí-yu cuhúⁿ-yu vico-a”, cǎchí-dé xáhaⁿ-dè xii-güedé. ¹⁰ Te cue tée xǐnu cuechi-án ní quee-güedé cuáháⁿ-güedé, te ní cáháⁿ-güedé nchaa ñáiyu ní naníhí-güedé ìchi, te cuèi ñáiyu váha iní-xi, te cuèi ñáiyu cuihna iní-xi, te ní chítǔ-yu núú cúú vico-án.

¹¹ Te sátá dúcáⁿ te tée yǐndaha ñáiyu quide vico-án ní quíhu-dé xití vehe ní xindéhé-dé cue ñáiyu ñuhu vico-án, te ní xini-dé ìḡ tée ñùtnahá tnuú-yu te ñá túú càa dóó-dé dátǎná cáá dǒó níhnú cuè ñáiyu ñuhu vico-án. ¹² Te ní xáhaⁿ-dè xii tée-án: “¿Tǎta, nása ní cuu cuánguihu-ǒ iha, te ñá túú càa dóó-n dátǎná cáá dǒó níhnú cuè ñáiyu ñuhu vico tǎndaha-í?”, cǎchí-dé xáhaⁿ-dè xii tée-án. Dico tée-án ñà túú ní níhí-dé tñúhu cáháⁿ-dé. ¹³ Te tée

yǐndaha ñáiyu quide vico-án ní xáhaⁿ-dè xii cue ñáiyu xǐnu cuechi núú mèsá: “Chí tñíⁿ tée-án te dacùtu-ndo-dé, te queñuhu-ndo-dè ná quíhíⁿ-dé cundecu-dé ìḡ xichi núú néé núú ìo ndoho-dé, te yàcáⁿ ìo ndáhyú-dé te dicó rúhñú-ñà cuu núhu-dé sá sàtú iní-dé sá ndóhó-dè”, cǎchí-dé xáhaⁿ-dè xii cue ñáiyu xǐnu cuechi núú mèsá-án. ¹⁴ Te duha ndùu cuendú cáháⁿ-í chí ìo cuéhé ñáiyu cáháⁿ ñáhá Yǎ Ndiǒxí xií-yu, dico sacú-ni-yu nduu táhǔ-yu cundecú-yu ndíhi-gá —cǎchí-gá xáhaⁿ-gǎ xii-güedé.

Cuendá impuèstú

(Mr. 12:13-17; Lc. 20:20-26)

¹⁵ Te cue tée cùu fariséú ní sáháⁿ-güedé ìḡ xichi ní ndatnúhu-güedé nàcuáa cada-güedé datícánuu-güedé Jèsús núú tñúhu cáháⁿ-gá cuendá ducaⁿ níhí-güedé nàcuáa cada-güedé cacáⁿ cuéchi-güedé cuendá-gá. ¹⁶ Te ní tendaha-güedé ìḡ úú cue tée cùndíhi-güedé, ndíhi cue tée cùndíhi té Hèrodés cuáháⁿ-güedé núú ndécú Jèsús. Te òré ní quexio-güedé núú ndécú-gá, te ní xáhaⁿ-güedé xii-gá:

—Mèstrú, níhí-ndí tñúhu sá ìo ndáa cáháⁿ-n, te cáháⁿ ndáá-n nàcuáa cáháⁿ Yǎ Ndiǒxí cundecu-o ñùyú-a, te cuèi ndèda-ni càa ñáiyu ìḡ-ni cáháⁿ-n ndíhí-yu chí ñá túú quide cuendá-n cuèi ná ñáiyu cùú-yu. ¹⁷ Te cachí tñúhu xii-ndí, núu váha-ni quide-ndí sá chǎhu-ndí té Cèsár tée ìo cùnuu cuendá impuèstú án ñáhá —cǎchí-güedé xáhaⁿ-güedé xii-gá.

¹⁸ Dico Jèsús ní cutnùní iní-gá sá xító ndéé ñáhá-güedé xii-gá, núu ní xáhaⁿ-gǎ xii-güedé:

—Nchòhó cue tée dándahú méé-xí sǎ quidè ndáa te ñá ndáa sá quidè ndáa-ndó, ¿ná cuendá xító ndéé ñáhá-ndó xii-í? ¹⁹ Chí dánèhé ñáhá xii-í ìḡ díhúⁿ sǎ chǎhu-ndo cuendá impuèstú núu nása càa —cachí-gá xáhaⁿ-gǎ xii-güedé.

Te ní dánèhé ñáhá-güedé xii-gá ìḡ díhúⁿ sǎ nání dènariú. ²⁰ Te òré ní xini-gá díhúⁿ-án te ní xicáⁿ tñúhú-gá núú-güedé, te xáhaⁿ-gǎ:

—Chí cǎchí tñúhu yoo núú-xi ndéé ndíhi yoo dǐu-xi ndéé —cǎchí-gá xáhaⁿ-gǎ xii-güedé.

²¹ Te ní xáhaⁿ-güedé xii-gá:

—Núú tē Cèsár ndèè ndihí d̄i-u-dé — cächí-güedé x̄ahaⁿ-güedé xii-gá.

Te Jèsús ní x̄ahaⁿ-gá xii-güedé:

—Te núu ducaⁿ te chí nácuaáa té Cèsár sá cúu cuendá-dé, te sá cúu cuendá méé Yá Ndiöxí te xíáⁿ nacuaáa-ndo-gá —cächí-gá x̄ahaⁿ-gá xii-güedé.

²² Te cue tée-áⁿ ño ní cuñúhu-güedé sá dúcáⁿ ní cáháⁿ-gá, te ní natniü-güedé ichi cuanuhú-güedé.

Cuendá cue ñáyiü ndoto

(Mr. 12:18-27; Lc. 20:27-40)

²³ Te diu-ni nduu-áⁿ ní quexio ñⁿ úu cue tée cùu saducéú núú ndécú Jèsús. Te cue tée-áⁿ ñá túú sãndáá ini-güedé sá ndótó cue ñáyiü ní xíhí, te ní x̄ahaⁿ-güedé xii-gá:

²⁴ —Mèstrú, ndí Moisés ní cachí ndí sá núu ñⁿ tée ndècu ñadihí-xi cuú-dé te quendóo ñadihí-dé, te núu ñá túú dèhe-dé ní xõo ndihí-aⁿ te tée cùu ñani-dé naqueheⁿ-dé ñaha ní quendóo quèé-áⁿ cuendá coo dèhe-dé ndihí-aⁿ cuendá ñani-dé tée ní xíhí-áⁿ. ²⁵ Te ñuú-ndí-a ní x̄indecu úsá tnàhá cue tée mee-ni ndí ñani-güedé. Te tée díhna ní níhí ñadihí-dé te ñá túú ní cùdí-dé cundecu-dé chi ní xíhí-dé, te ni ñⁿ dèhe-dé ñá túú ní xõo ndihí ñadihí-dé-áⁿ. Te tée cùu uú ní nàqueheⁿ-dé ñaha ní quendóo quèé-áⁿ. ²⁶ Dico ní xíhí tucu-dé, te ni ñⁿ tucu dèhe-dé ñá túú ní xõo ndihí ñaha-áⁿ, te diu-ni ducaⁿ ní yaha tée cùu uní, te ní xínu ndí úsá-güedé ní cándeca ñaha-güedé xii ñaha-áⁿ dico diu-ni ducaⁿ ní xíhí-güedé. ²⁷ Te ndéé núú ní ndihí-ná te ní xíhí tnàhá ñadihí-áⁿ. ²⁸ Te na sáá nduu ndòto-güedé ndihí ñaha-áⁿ, ¿te ndèdacáa-güedé ñadihí-güedé cuu-aⁿ-i? Chi ndí úsá-güedé ní cándeca ñaha-güedé xii-aⁿ —cächí-güedé x̄ahaⁿ-güedé xii-gá.

²⁹ Te Jèsús ní x̄ahaⁿ-gá xii-güedé:

—Ní xíta nchòhó tnúhu cáháⁿ-ndó, chi ñá túú xini-ndó nàcuáa cáháⁿ Yá Ndiöxí núú tütú-gá, te ni ñá túú cùtnuní ini-ndó sã díú-gá ndácú-gá quidé-gá nchaandi túhú sá váha. ³⁰ Te na cächí tnúhu-í xii-ndo sã òré ná sáá nduu ndòto nchaa ñáyiü ní xíhí, te dàvá-áⁿ vã yõo-gá dasaⁿ dèhe yoco-xi chi vá yõo-gá cándeca tnàha, chi cuu-ná-yu dàtná cue espíritú xínu cuèchi núú Yá Ndiöxí. ³¹ ¿Te náa ñá túú quide cuendá-ndó nàcuáa cáháⁿ Yá Ndiöxí núú tütú-gá núú cáháⁿ-gá cuendá cue ñáyiü ní xíhí-áⁿ? Te duha cächí-gá: ³² “Yúhú

cùu-í Ndiöxí tē Àbrahám, ndihí té Isàác, ndihí té Jácób”, duha cächí-gá núú tütú-gá. Te cue tée-áⁿ chi cuèí ní xíhí-güedé núú ñúyíü-a, dico sá cúu-xí Yá Ndiöxí chi ndècu vívü-ni-güedé. Chi diu-gá cúu-gá Ndiöxí mee-ni cuè ñáyiü x̄indecu vívü, te ñá túú cùu-gá Ndiöxí cue ñáyiü ñá túú ndècu vívü —cächí-gá x̄ahaⁿ-gá xii-güedé.

³³ Te sá dúcáⁿ ní cáháⁿ-gá ní xii-gá cue tée-áⁿ, te ño ní cuñúhu nchaa ñáyiü cuendá sá ño váha nduu tnúhu ní cáháⁿ-gá.

Tnúhu sá ño-gá cúnúu

(Mr. 12:28-34)

³⁴ Te cue tée cùu fariséú ní xini-güedé ní sadí Jèsús yuhu cue tée cùu saducéú, chi ñá túú ní níhí-gá-güedé tnúhu cùñaha-güedé xii-gá, te cue tée cùu fariséú-áⁿ ní nat-acá-güedé te cuáháⁿ-güedé núú ndécú Jèsús. ³⁵ Te ñⁿ tée cùu fariséú-áⁿ ño váha cùtnuní ini-dé nàcuáa nduu nchaa tnúhu ní chidó tnúni ndí Moisés te xito ndeé-dé Jèsús, te x̄ahaⁿ-dè xii-gá:

³⁶ —Mèstrú, cachí tnúhu ndèdacáa tnúhu sá ní chidó tnúni ndí Moisés ño-gá cúnúu cada-o —cachí-dé x̄ahaⁿ-dè xii-gá.

³⁷ Te Jèsús ní x̄ahaⁿ-gá xii-dé:

—Duha cáháⁿ tnúhu sá ño-gá cúnúu: “Cuu ini-ndó Dütú Ndiöxí Yáa cúu Ndiöxí-ndó ní yuhu ní ini-ndó, te cani ini-ndó cada-ndo datná cuini méé-gá, te mee-ni tnúhu váha cani ini-ndó nàcuáa cuu víu cuu váha-ndo núú-gá”, ³⁸ duha cáháⁿ tnúhu sá ño-gá cúnúu. ³⁹ Te duha cáháⁿ tucu ingá tnúhu cùu uú sá ño cúnúu, te sa yatni ñⁿ-ni cùu-xi ndihí tnúhu díhna nuu, te cächí-xi: “Cuu ini-ndó tnàha ñáyiü-ndo dàtná cúu ini-ndó mèe-ndo”, duha cáháⁿ tnúhu cùu uú-áⁿ. ⁴⁰ Te cuendá úú tnúhu-a ní cáá nchaa tnúhu ní cáháⁿ ndí Moisés nàcuáa cada ñáyiü, te diu-ni cuendá úú tnúhu-a ní cáá tnúhu ní cáháⁿ nchaa cue tée ní xõo cáháⁿ tnúhu Yá Ndiöxí ndéé sanaha —cächí-gá x̄ahaⁿ-gá xii-güedé.

Yoo cùu Xitohó Jesucristú

(Mr. 12:35-37; Lc. 20:41-44)

⁴¹ Te ndècu ducaⁿ-ni cue tée cùu fariséú núú ndécú Jèsús. ⁴² Te ní xícáⁿ tnúhú-gá núú-güedé, te x̄ahaⁿ-gá:

—Cuini-í cachí tnúhu-ndo yòo dèhe-xi cùu Cristú Yáa tendaha Yá Ndiöxí quixi ñuyíü-a —cächí-gá x̄ahaⁿ-gá xii-güedé.

Te ní x̄ahaⁿ-güedé xii-gá:

—Déhe ndíi Dàvíí cùú Yàá-áⁿ — cächí-güedé xáhaⁿ-güedé xii-gá.

⁴³ Te Jèsús ní xáhaⁿ-gá xii-güedé:

—¿Te nása cächí-tu-ndo sã déhe ndíi Dàvíí cùú Crístú Yáá tendaha Yã Ndiöxí quixi ñuyú-a, te mee ndíi Dàvíí-áⁿ ní dácáhu iní ñáhá Espíritú Yã Ndiöxí xii ndíi, te ní cachí ndíi sá Crístú Yáá tendaha Yã Ndiöxí quixi ñuyú-a cùu-gá Xítóhó ndíi? Te duha ní cachí ndíi:

⁴⁴ Dútú Ndiöxí ní xáhaⁿ-gá xii Yáá cùú Xí-tohó-í:

“Ngóo xio cùha-í, te yúhu cada-í te nchaa sá cùú úhú iní ñáhá xii-n canehe-xi sá yíñùhu núu-n.”

Duha ní xáhaⁿ Dútú Ndiöxí xii Yáá cùú Xítóhó-í, cächí ndíi. ⁴⁵ ¿Te nása cùu Crístú déhe ndíi Dàvíí, te mee ndíi ní cachí ndíi sá cùú-gá Xítóhó ndíi? —cächí Jèsús xáhaⁿ-gá xii-güedé.

⁴⁶ Te ni ñⁿ-güedé ñá túú-gá ní ñíhí-güedé tnúhu cùñaha-güedé xii-gá. Te ndéé nduu-áⁿ ñá túú-gá ní cùyíi-güedé ná tnúhu cacáⁿ tnúhú-güedé núu-gá.

23

Jèsús cãháⁿ-gá cuendá cue tée cùu fariséú ndíhi cuendá cue tée dàcuaha ñaha xii ñáyíu

(Mr. 12:38-40; Lc. 11:37-54; 20:45-47)

¹ Te Jèsús ní cãháⁿ ndodo-gá núu nchaa ñáyíu, ndíhi núu cuè tée xica cuu ndíhi-gá, te xáhaⁿ-gá:

² —Cue tée dàcuaha ñaha xii ñáyíu nchaa tnúhu ní chídó tnúni ndíi Moisés, ndíhi cue tée cùu fariséú ndécú ndíhi-güedé tnúhu ndee iní cãháⁿ-güedé nchaa tnúhu sá ní chídó tnúni ndíi Moisés-áⁿ. ³ Te cada-ndo nàcuáa dānehé ñáhá-güedé xii-ndo, dico vá cádá-ndó dàtná xíquide-güedé, chi tucu ndúu tnúhu cãháⁿ-güedé, te tucu quide-güedé. ⁴ Te quide-güedé dàtná quidé ñáyíu dàcuido ñⁿ tnaha ñáyíu-xi ñⁿ sá ïo véé, te mèe-yu ni lùha ñá túú cuiní-yu cuidó-yu. Te ducaⁿ sãtnahá-xi cùu-güedé chi dānehé ñáhá-güedé xii-ndo nàcuáa cada-ndo, dico mee-güedé chi ni lùha ñá túú cuiní-güedé cada-güedé nàcuáa dānehé ñáhá-güedé xii-ndo. ⁵ Te mee-ni nducú-güedé nàcuáa quide-güedé cuendá quini ñáyíu sá ïo cùu cahnu-güedé. Te ndéé xindá sá ndéé ñⁿ úú tnúhu Yá Ndiöxí tneé-güedé ndíhi ndaha-güedé, te tnàhá

iní-güedé sá ïo-gá cunduu quèhéⁿ xindá-áⁿ dàcúúxí xindá dava-gá ñáyíu. Te tnàhá tucu iní-güedé sá ïo-gá cunduu nani núu dđó sácúñhu-güedé dàcúúxí dđó sácúñhu dava-gá-yu. ⁶ Te ndi tnahá òré sácđo vico, òré quíhu-güedé mèsá caxi-güedé te ïo-gá cúdñí iní-güedé cunucđo-güedé núu xilé núu sácđo cue tée cūnuu-gá, te ñiu-ni ducaⁿ quide tucu-güedé cuèi xití veñúhu. ⁷ Te nchaa núu xicá cùu-güedé cuiní-güedé sá ndíhi tnúhu yíñùhu cãháⁿ ndíhi ñaha ñáyíu xii-güedé, te cuini tucu-güedé sá cūñhá-yu xii-güedé mèstrú.

⁸ Dico nchòhó vá cūñaha-ndo xii ñáyíu sá cūñhá-yu mèstrú xii-ndo, chi nchòhó ñⁿ-ni cūu-ndo ndecu-ndo, chi ducaⁿ ñⁿdii-ni yúhú Yáá ní tendaha Yã Ndiöxí véxi ñuyú-a cùu-í Mèstrú ndécú ndíhi ñaha-í xii-ndo. ⁹ Te ñⁿdii-ni Dútú Ndiöxí Yáá ndécú àndiu cuu-gá Tãtá-ndó, núu xíãⁿ vá cãháⁿ-ndó sã dāva cue tée ñuyú-a cùu-güedé tãtá-ndó. ¹⁰ Te ni vá cání iní-ndó càda-ndo nacuáa cãháⁿ ñáyíu sá cúnúu-ndo, chi ñⁿdii-ni yúhú Crístú Yáá ní tendaha Yã Ndiöxí véxi ñuyú-a cūnuu-í. ¹¹ Te ñáyíu ïo-gá cúnúu ndecu ndíhi-ndo, ñáyíu-áⁿ cùú-yu ñáyíu xinu cuechi núu-ndó. ¹² Te nchaa ñáyíu quide cahnu mee-xi ñáyíu-áⁿ vá cùu-yu ñáyíu cūnuu, te nchaa ñáyíu ñá túú quide cahnu mee-xi ñáyíu-áⁿ cūnuú-yu.

¹³ Te nchòhó cue tée dàcuaha ñaha xii ñáyíu nchaa tnúhu ní chídó tnúni ndíi Moisés, ndíhi nchòhó cue tée cùu fariséú, cùu-ndo cue tée ïo dāndahú mée-xí sã quidé ndáá te ñá ndáá sá quidé ndáá-ndó, te ndáhú ní cuu-ndo chi sādí-ndó ïchi ñáyíu ñá dāñá-ndó ndíhu ndaha ñaha Yá Ndiöxí xí-yu, te ni mēe-ndo ñá túú quide-ndo nacuáa ndíhu ndaha ñaha-gá xii-ndo, te ni dāva-gá cue ñáyíu cuini sá ndíhu ndaha ñaha-gá xii-yu ñá dāñá-ndó.

¹⁴ Te nchòhó cue tée dàcuaha ñaha xii ñáyíu nchaa tnúhu ní chídó tnúni ndíi Moisés, ndíhi nchòhó cue tée cùu fariséú, cùu-ndó cuè tée ïo dāndahú mēe-xí sã quidé ndáá te ñá ndáá sá quidé ndáá-ndó, te ndáhú ní cuu-ndo chi quēndē-ndó vèhe cue ñáyíu quèé, te ïo naha cãháⁿ ndíhi-ndo Yã Ndiöxí cuendá cuiní-ndó sã vá yōo cut-núni iní-xi nàcuáa quide-ndo. Te sá dúcáⁿ

quide-ndo te ío-gá ndoho-ndo núú ùhú núú ndàhú dàcúúxí dàva-gá ñáiyu.

¹⁵ Te nchòhó cue tée dàcuaha ñaha xii ñáiyu nchaa tnúhu ní chídó tnùní ndíí Moisés, ndíhi nchòhó cue tée cùu fariséú, cúu-ndo cuè tée ío dándahú méé-xí sá quidé ndáá te ñá ndáá sá quidé ndáá-ndó, te ndàhú ní cuu-ndo chí sàhni iní-ndó cuáháⁿ-ndó ndèni ní cuu dàçaháⁿ-ndó ñáiyu cuendá cuiní-ndó tñí-yu ichi ndècu-ndo. Te òré ná xínu iní-yu tñí-yu ichi ndècu-ndo-án te uuⁿ-gá cuíta nihnú-yu dàcúúxí mèe-ndo.

¹⁶ Te nchòhó cúu-ndó dàtná cue ñáiyu cuáá, chí ñá cùtnùní iní-ndó nàcuáa canu ichi-ndo ñáiyu, te ndàhú ní cuu-ndo chí cächí-ndó: “Íⁿ ñáiyu na càcunehe veñúhu càhnu sá ïo cùnnu oré cuiní-yu cutnùní iní tñaha ñáiyú-yu sá ndáá cadá-yu íⁿ sá sání iní-yu cadá-yu, te vá cúú cuèchi xí-yu cuèi vá cadá-yu. Dico núu na càcu nehé-yu díhúⁿ cuááⁿ yíhi xítí veñúhu-án te cuu cuèchi xí-yu te núu vá cadá-yu sá ní cächí-yu cadá-yu”, duha cächí-ndó.

¹⁷ ¡Nchòhó cúu-ndó cuè tée ío ñí ñáiyú-xi, te cùu-ndo datná cue ñáiyu cuáá chí ñá tècú tnùní-ndó! Te vá cächí-ndó sá ïo-gá cùnnu díhúⁿ cuááⁿ dàcúúxí veñúhu, chí ñí cuendá veñúhu-án ní cuu íí díhúⁿ cuááⁿ-án. ¹⁸ Te cächí tucu-ndo: “Íⁿ ñáiyu na càcunehe xito núú sácòdó sá ndúú tãhú Yá Ndiòxí òré cuiní-yu cutnùní iní tñaha ñáiyú-yu sá ndáá cadá-yu íⁿ sá sání iní-yu cadá-yu, te vá cúú cuèchi xí-yu cuèi vá cadá-yu, dico núu na càcu nehé-yu sá ndúú tãhú Yá Ndiòxí yódó núú xito-án te cuu cuèchi xí-yu te núu vá cadá-yu sá ní sani iní-yu cadá-yu”, duha cächí-ndó. ¹⁹ ¡Te cùu-ndo cue tée ío ñí ñáiyú-xi, te cùu-ndo datná cue ñáiyu cuáá chí ñá tècú tnùní-ndó! Te vá cání iní-ndó sá ïo-gá nándíhi sá ndúú tãhú Yá Ndiòxí sácòdó núú xito núú sácòdó tñáhi sá ndúú tãhú-gá-án dàcúúxí mèe xito-án. ²⁰ Chí nchaa ñáiyu ducaⁿ càcunehe xito-án, te tñahá-ni sá yódó núú-xi càcu nehé-yu òré ducaⁿ càhánⁿ-yu. ²¹ Te nchaa ñáiyu ducaⁿ càcunehe veñúhu càhnu sá ïo cùnnu te ñá díú mèe-ni veñúhu càcu nehé-yu òré ducaⁿ càhánⁿ-yu, chí tñahá-ni Yá Ndiòxí Yáa cúú cuendá veñúhu-án cáci nehé-yu òré ducaⁿ càhánⁿ-yu. ²² Te nchaa ñáiyu càcunehe andíu cuendá cutnùní iní

tñaha ñáiyú-yu sá ndáá cadá-yu íⁿ sá sání iní-yu cadá-yu, te ñá díú mèe-ni andíu cacu nehé-yu chí tñahá-ni núú núcòo Yá Ndiòxí táxi tnùní-gá cáci nehé-yu òré ducaⁿ càhánⁿ-yu, te tñahá mèe-gá cáci nehé-yu òré ducaⁿ càhánⁿ-yu.

²³ Te nchòhó cue tée dàcuaha ñaha xii ñáiyu nchaa tnúhu ní chídó tnùní ndíí Moisés, ndíhi nchòhó cue tée cùu fariséú, cúu-ndo cuè tée ío dándahú méé-xí sá quidé ndáá te ñá ndáá sá quidé ndáá-ndó. Te cuèi núú ùxí xichi yúcu mèntá nihí-ndó, te sãñaha-ndo íⁿ xichi xii Yá Ndiòxí, te díu-ni ducaⁿ quide-ndo yúcu nání ánis, ndíhi yúcu nání còminú, dico ndàhú ní cuu-ndo chí ñá túú quide cuendá-ndó nàcuáa càhánⁿ nchaa tnúhu sá ïo-gá cùnnu sanu ichi ñaha xii-ndo, te tnúhu-án cächí-xi sá ïo xini ñuhu-xi cada ndáá-ndó cùn-decu-ndo, te cundàhú iní-ndó cuè tñaha ñáiyu-ndo, te quindáá iní-ndó Yá Ndiòxí, te cada-ndo nchaa nacuáa ndúu tnúhu càhánⁿ-ndó, te nchaa tnúhu-án cúu-xí tnúhu sá ïo cùnnu xini ñuhu-xi cada-ndo nacuáa càhánⁿ-xi, dico vá dáñá ndèe-ndó cada-ndo nchaa dava-gá nacuáa càhánⁿ tnúhu sá sánú ichi ñaha xii-ndo. ²⁴ ¡Te nchòhó cúu-ndó dàtná cue ñáiyu cuáá, chí ñá túú cùtnuní iní-ndó nàcuáa canu ichi-ndo ñáiyu, chí quide cuendá-ndó mèe-ni nchaa tnúhu sá ñá túú ïo cùnnu, dico nchaa tnúhu sá ïo-gá cùnnu xini ñuhu-xi cada cuendá-ndó ñá túú quide cuendá-ndó!

²⁵ Te nchòhó cue tée dàcuaha ñaha xii ñáiyu nchaa tnúhu ní chídó tnùní ndíí Moisés, ndíhi nchòhó cue tée cùu fariséú, cùu-ndo cue tée ío dándahú méé-xí sá quidé ndáá te ñá ndáá sá quidé ndáá-ndó. Te ndàhú ní cuu-ndo chí cùu-ndo datná cue ñáiyu nàquete sátá-ni tàsáⁿ ndíhi sátá-ni còhó te xítí-xi càndehe caduha-ni. Te ducaⁿ sãtñahá-xi cùu-ndo chí mee-ni sá ndécú ndíhi tñaha ñáiyu-ndo ñuhu iní-ndó, te nándi dándahú-ndó-yu te quèheⁿ-ndo sá ndécú ndíhi-yu. ²⁶ Te nchòhó cue tée cùu fariséú, cúu-ndó dàtná cue ñáiyu cuáá, chí ñá túú cùtnuní iní-ndó nàcuáa ndúu sá quidé-ndó. Te ío xini ñuhu-xi sá cadá-ndó nacuáa nduu ndoo nduu nine iní-ndó cuendá ndacu-ndo cada-ndo sá vãha, te xíáⁿ núu chí cadá dàtná xíquide ñáiyu nàquete ndaa xítí tàsáⁿ ndíhi ndaa xítí còhó.

²⁷ Te nchòhó cue tée dàcuaha ñaha xii ñáyi nchaa tnúhu ní chídó tnùnì ndíi Moisés, ndíhi nchòhó cue tée cùu fariséú, cùu-ndo cue tée ío dándahú méé-xí sá quidé ndáá te ñá ndáá sá quidé ndáá-ndó. Te ndàhú ní cùu-ndo chi cùu-ndo datná núu yindúxi ndíyi núu ní cuáha víi te ní nacáhyú sá cuixíⁿ, dico xití yaú-ánⁿ chi càndehe caduha chi mee-ni yiqui ndíyi ñuhu.

²⁸ Te ducaⁿ sátnahá-xi cùu-ndo chi sànuu sá cùu-ndo cuè tée váha dico iní-ndó chi mee-ni sá cuèhé sá dúhá ñuhu, te ío dándahú-ndó mèe-ndo sá quidé ndáá-ndó te ñá ndáá sá quidé ndáá-ndó.

²⁹ Te nchòhó cue tée dàcuaha ñaha xii ñáyi nchaa tnúhu ní chídó tnùnì ndíi Moisés, ndíhi nchòhó cue tée cùu fariséú, cùu-ndo cuè tée ío dándahú méé-xí sá quidé ndáá te ñá ndáá sá quidé ndáá-ndó. Te ndàhú ní cùu-ndo chi càdúha-ndo nchaa núu ní nguindúxi cue tée ní xóo cáháⁿ tnúhu Yá Ndióxi ndéé sanaha, te ío víi quide-ndo nchaa núu sá ní cuáha núu yindúxi cue ñáyi ní quide váha ní xindecu ñuyíu-a.

³⁰ Te cächí-ndó: “Te núu dicó nchoo ní xindecu-o cùtnáhá ní xindecu cue ñaní tnáhá-ó ndéé sanaha, te vá chít-náhá-ó-güedé cahni-o cuè tée ní xóo cáháⁿ tnúhu Yá Ndióxi dàvá-ánⁿ ní cùu”, duha cächí-ndó. ³¹ Te sá dúcáⁿ cáháⁿ-ndó, te xíáⁿ cùtnùnì sá ííⁿ-ní cùu-ndo ndíhi cue ñaní tnáhá-ndó cuè tée ní xindecu ndéé sanaha, cue tée ní sahni ñaha xii cue tée ní cáháⁿ tnúhu Yá Ndióxi dàvá-ánⁿ. ³² Te núu ducaⁿ te chí dáxíu cava chiúⁿ ní tausaha-güedé.

³³ Te nchòhó cùu-ndo cuè tée ío cuihna iní-xi, chi cùu-ndo datná cóó dééⁿ! Te nchòhó vá nihí-ndó nàcuáa cada-ndo cäcu nihnu-ndo núu úhú núu ndàhú. ³⁴ Te cuèndá xíáⁿ núu tendaha-í cue tée cáháⁿ tnúhu Yá Ndióxi quixi núu-ndó, ndíhi cue tée cùu mestrú danèhé ñáhá xii-ndo tnúhu-gá, ndíhi cue tée ío váha cùtnuní iní-xi cuèndá cáháⁿ-güedé tnúhu-gá núu-ndó. Dico nchòhó chi da cùu úhú iní-ndó-güedé, chi dava-güedé cahni-ndo-güedé, te dava-güedé cata caa-ndo-güedé núu cùrúxí, te dava-güedé cani-ndo-güedé xití veñúhu, te ndi tnahá ñuu ndi tnahá ñuu quíhíⁿ-ndó nanducu-ndo-güedé cuèndá cada úhú iní-ndó-güedé. ³⁵ Te sá dúcáⁿ ná càda-ndo, te ndadíquí-ndó cuè tée ní quide ndáá ní xindecu ní xíhí ní sahni ñaha cuè ñaní

tnáhá-ndó. Te ndéé ndíi Àbél tée ío váha ní quide ndáá ní xindecu ní sahni-güedé ndadíquí-ndó, ndíhi nchaa dava-gá cue tée ní sahni-güedé, ndíhi ndéé ndíi Zacariá déhe ndíi Berèquiás tée ní sahni-güedé ndéé núu ní ndíhi-ná ndadíquí-ndó, te ndíi-ánⁿ ní sahni-güedé mei tnúu veñúhu càhnu sá ío cùnuu ndíhi xito núu sácódo sá ndúu tãhú Yá Ndióxi, te nchaa cue tée-ánⁿ ndadíquí-ndó chi dàtná tnúhu mee-ndo ní sahni-ndo cuè tée-ánⁿ, chí diu-ni ñaní tnáhá mèe-ndo ducaⁿ ní sahni ñaha xii-güedé. ³⁶ Te na cächí tnúhu ndáá-í xii-ndo sá nchaa cue tée ní quide ndáá ní xindecu ní sahni-güedé, nchaa cue tée-ánⁿ ndadíquí nchaa ñáyi ndècu vitna —cachí-gá xáhaⁿ-gá xii-güedé.

Jèsús cáháⁿ-gá cuèndá ñáyi ñuu Jerusàlén

(Lc. 13:34-35)

³⁷ Te xáhaⁿ Jèsús xii ñáyi ñuu Jerusàlén:

—Nchòhó ñáyi ñuu Jerusàlén sàhni-ndo cue tée ní tendaha Yá Ndióxi véxi cáháⁿ tnúhu-gá núu-ndó, te mee-ni ndíhi yúu sàhni-ndó dava-güedé. Te yúhú titní xito ní cuini-í coto ñaha-í xii-ndo dàtná quidé nchúxi xito-güedi déhe-güedi sàquihí-güedi xití ndíxíⁿ-güedi, dico nchòhó ñá túu ní cuini-ndó, te diu-ni ducaⁿ sàni iní-í ndéé vitna! ³⁸ Te na cächí tnúhu ndáá-í xii-ndo sá sáá nduu te ío ndàhú yáha ñuu-ndó, te vá cùndècu-gá-ndó. ³⁹ Te na cächí tnúhu tucu-í xii-ndo sá vá quini ñáhá-gá-ndó xii-í, dico sáá nduu quini ñáhá tucu-ndo, te dàvá-ánⁿ cachí-ndó: “Ío càhnu cuu Yaá ní tendaha Dütü Ndióxi véxi”, duha cachí-ndó —cachí-gá xáhaⁿ-gá xii-yu.

24

Jèsús cächí-gá sá ngóyo veñúhu

(Mr. 13:1-2; Lc. 21:5-6)

¹ Te Jèsús ní quee-gá veñúhu càhnu sá ío cùnuu, te mei òrè ní queheⁿ-gá ichi quíhíⁿ-gá ííⁿ xichi, te ní sàndehe yatni cue tée xica cuu ndíhi-gá ñíhí-gá, te xáhaⁿ-güedé xii-gá:

—Cundehe veñúhu-a ná ío váha ní sáá —cächí-güedé xáhaⁿ-güedé xii-gá.

² Te Jèsús ní xáhaⁿ-gá xii-güedé:

—Na cächí tnúhu ndáá-í xii-ndo sá nchaa sá ndéhé-ndó-á vitna saá nduu te vá cùndùu-gá-xi dàtná caá-xí vitna, chí ní

ñⁿ-gá yúú vǎ códó nchìhi tñaha-xi chi ndìhi ngoyo —càchí-gá xǎhaⁿ-gǎ xii-güedé.

Nàcuáa cada-xi nduu ta cùyatni naa ñuyúú-a

(Mr. 13:3-23; Lc. 21:7-24; 17:22-24)

³Te Jèsús ní sǎá-gǎ ndìhi cue téé xica cuu ndìhi-gǎ yucu Òlívú, te xǎáⁿ ní ngóo-gǎ te núú núcòo-gǎ-áⁿ ní sǎháⁿ cue téé xica cuu ndìhi-gǎ, te dayuhu ní xǎhaⁿ-güedé xii-gǎ:

—Cuiñí-ndí cachí tñúhu-n nǎ nduu òucaⁿ cada-xi ngoyo veñúhu càhnu sǎ ïo cùnuu, ndìhi nándi cùu sǎ cáda-xí òré sa ta cùyatni nduu quixi tucu-n ñuyúú-a, ndìhi òré sa ta cùyatni naa-xi —cachí-güedé xǎhaⁿ-güedé xii-gǎ.

⁴Te Jèsús ní xǎhaⁿ-gǎ xii-güedé:

—Ïo quihí iní-ndó cundecu-ndo cuendá sǎ vǎ yóo dandáhú ñáhá xii-ndo. ⁵Chi ïo cuéhé cue téé coo ñuyúú, te danàni-güedé méé-güedé dàtná nánì-í, te cachí-güedé: “Yúhú cùu-í Cristú Yaá ní tendaha Yǎ Ndiòxí véxi ñuyúú-a”, duha cachí-güedé. Te sǎ dúcáⁿ cǎháⁿ-güedé te ïo vai ñáyiú dandáhú-güedé. ⁶Te níhí-ndó tñúhu nǎá-güedé ndèni ní cuu, dico vǎ yùhú-ndó chi dacuítí sǎ dúcáⁿ càda-xi, dico vátá sǎá-gǎ nduu nǎa ñuyúú òré ducaⁿ càda-xi. ⁷Chí cue téé ñⁿ nàcióⁿ nǎá-güedé ndìhi cue téé ingá nàcióⁿ, te titní ñuu ngúíta-güedé nǎá-güedé, te titní xichi ñuyúú coo tnamá, te titní tucu xichi ñuyúú quixi cuéhé, te titní tucu xichi ñuyúú ïo níhi tnaá. ⁸Te nchaa xǎáⁿ cuu-xi tñúndòho sǎ vítná vǎha vǎha quèsaha sǎ cúú-xí cué ñáyiú xñdecu ñuyúú.

⁹Te cue ñáyiú na cùu úhú iní ñáhá xii-ndo cuáha cuendá ñáhǎ-yu núú cué téé cùchiuⁿ cuendá caniha-güedé xii-ndo, te dava-ndo càhni ñaha-güedé, te nchaa ñáyiú cuu úhú iní ñáhǎ-yu xii-ndo sǎ cuendá-í.

¹⁰Te dàvá-áⁿ ïo vai ñáyiú dàñá-yu sǎ sandáá iní-yu Yǎ Ndiòxí, te ngóo-yu cuu úhú iní tñáhǎ-yu, te cuáha cuendá tñáhǎ-yu núú cué téé cùchiuⁿ. ¹¹Te ïo vai cue téé cachí-güedé sǎ cǎháⁿ-güedé tñúhu Yǎ Ndiòxí te ñá ndáa sǎ cǎháⁿ-güedé tñúhu-gǎ, te ducaⁿ ïo vai ñáyiú dandáhú-güedé. ¹²Te dàvá-áⁿ cunuú mèe-ni nchaa sǎ cuéhé sǎ dúhá càdá-yu, te vǎi-yu vǎ cúú ñí-gǎ-yu tñúha ñáyiú-yu. ¹³Dico nchaa ñáyiú na càda ndee-ni iní canchicúⁿ nihnu ñaha-ni xii-í, ñáyiú-áⁿ nanhí tǎhú-yu. ¹⁴Te nihí ñuyúú quíhíⁿ ñáyiú cǎháⁿ-yu tñúhu vǎha,

tñúhu sǎ cǎháⁿ nàcuáa ndìhu ndaha ñàha Yǎ Ndiòxí xii ñáyiú, te sǎtá ná nihí nchaa ñáyiú tñúhu-áⁿ te naa ñuyúú.

¹⁵Te ndíi Dániél téé ní xóo cǎháⁿ tñúhu Yǎ Ndiòxí ndéé sanaha ní chídó tñuní ndíi cuendá ñⁿ sǎ dáquèe tihú Yǎ Ndiòxí cundecu ñⁿ xichi núú ní cuu íí, te xǎáⁿ cada-xi sǎ vǎ cùndecu-gǎ ni ñⁿ ñáyiú xǎáⁿ. Te cada cuendá vǎha-ndo nàcuáa ní cǎháⁿ ndíi, chi nduu na quini-ndó xǎáⁿ cundecu-xi núú dúcáⁿ ní cuu íí, ¹⁶te dàvá-áⁿ nchaa ñáyiú xñdecu distritú Jùdeá xini ñúhu-xi cunú-yu quíhíⁿ-yu xití yucu. ¹⁷Te nchaa ñáyiú ndáa ndódó díquí véhé-xí vǎ ndìhu-gǎ-yu vehé-yu quehéⁿ-yu ñⁿ ndachiúⁿ-yu canehé-yu quíhíⁿ. ¹⁸Te nchaa ñáyiú cuáháⁿ yucu vǎ nùhú-gǎ-yu vehé-yu cúnúquehéⁿ-yu dóó-yu. ¹⁹¡Te ndáhú ní cuu nchaa ñáyiú ñíhí ñúhú òhe-xi, ndìhi cue ñáyiú ñíhí xñdeca òhe vitna sàdi na saá nduu òucaⁿ cada-xi! ²⁰Te nchòhó, chí càcáⁿ tǎhú núú Yǎ Ndiòxí cuendá sǎ vǎ dúcáⁿ ndòho-ndo yóo quídé víxiⁿ-xi, te ni vǎ dúcáⁿ ndòho-ndo nduu cuu-xi nduu ndetátú-ndó. ²¹Chi dàvá-áⁿ coo tñúndòho càhnu vihi ñuyúú, te vátá ñⁿ ndùu-gǎ coo tñúndòho càhnu vihi-áⁿ ndéé cùtnáhá ní ngáva ñuyúú, chí ñiú-ni dàvá-áⁿ coo tñúndòho càhnu vihi-áⁿ, te ni núú cuáháⁿ núú véxi vǎ cóo-gǎ tñúndòho-áⁿ. ²²Te Yǎ Ndiòxí càchí-gǎ sǎ vǎ ïo vai nduu coo tñúndòho càhnu vihi-áⁿ sǎ cuendá nchaa ñáyiú ní cǎháⁿ-gǎ cundecu ndìhi-gǎ. Chí núú vai nduu na coo tñúndòho-áⁿ te vǎ yóo cácu nihnu.

²³Te núú òó ñáyiú càchí-yu xii-ndo: “Chí cùndèhe iha, chí iha ní quexìo Cristú Yaá ní tendaha Yǎ Ndiòxí véxi ñuyúú-a”, àdi cachí-yu: “Chí cùndèhe yacáⁿ chí yacáⁿ ndécú-gǎ”, càchí-yu ña. Te vǎ quindáá iní-ndó tñúhu cǎháⁿ-yu. ²⁴Chí coo cue téé cachí-güedé sǎ cúú-güedé Yaá ní tendaha Yǎ Ndiòxí véxi ñuyúú-a, te dava-güedé cachí-güedé sǎ cúú-güedé cue téé cǎháⁿ tñúhu Yǎ Ndiòxí dico ñá ndáa sǎ cúú-güedé cue téé cǎháⁿ tñúhu-gǎ, te cada-güedé titní núú sǎ vǎ yóo tñáhí ndàcu cada cuendá dandáhú-güedé ñáyiú. Te cani iní-güedé dandáhú-güedé ndéé cue ñáyiú ní cǎháⁿ Yǎ Ndiòxí cundecu ndìhi-gǎ. ²⁵Te duha ndùu tñúhu cǎháⁿ-í dátúha ñaha-í xii-ndo. ²⁶Te núú càchí-yu xii-ndo: “Xití yucu-áⁿ

ní quexio Yáá ní tendaha Yá Ndióxi véxi ñuyúú-a”, cächí-yu. Te vá quíndáá iní-ndó quíhⁿ-ndó, àdi cachí-yu: “Vehe-ǎⁿ ndécú Yáá ní tendaha Yá Ndióxi véxi ñuyúú-a”, cächí-yu. Te vá quíndáá iní-ndó tnúhu càháⁿ-yu. ²⁷ Chi dàtná xíní nchaa ñáiyu quíde-xi oré sáá ndúté dáyehé-xi ní càa xico ñuyúú ducaⁿ càda-xi oré quixi tucu yúhú Tée cùu ñaní tnáhá-ndó nchàa-ndo chi nchaa-yu quíní ñáhá-yu xii-í. ²⁸ Te nchòhó xíní-ndó sá ncháá núú yúcu yiqui cuñú ní xihí te yacáⁿ tacá nchaa ndixí xéxi-güèdi.

Nàcuáa cada-xi òré quixi tucu Tée cùu ñaní tnáhá cuè ñáiyu

(Mr. 13:24-37; Lc. 21:25-33; 17:26-30, 34-36)

²⁹ Te na yáha-ni coo tnúndòho cahnu vihi-áⁿ, te vá dáyehé-gá nchíanchii, te ni vá dáyehé-gá yóó, te ngoyo nchaa chódíni ndéé andiü, te quídi-xi andiü ³⁰ nàcuáa cut-núní iní ñáiyu sá sá véxi yúhú Tée cùu ñaní tnáhá-yu nchaa-yu. Te cue ñáiyu nihí ñuyúú ndáhyú-yu sá ndíhú iní-yu òré ducaⁿ càda-xi, te nchaa-yu quíní ñáhá-yu xii-í quée-í andiü quixi-í ichi xití vícò, te quíní-yu sá ò cahnu cuu-í, te quíde-í nchaa sá vǎha. ³¹ Te tauchìuⁿ-í cue espíritú xínú cuèchi núú-í níhi tú-xi cútú nadatácá-xi nchaa ñáiyu ní cáháⁿ-í chitnahá ñáhá xii-í xíndecu ní càa xico ñuyúú.

³² Te nchòhó sa xíní-ndó nàcuáa quíde yutnu ngúxí, chi yutnu-áⁿ ndúú yùte núú dité-xi te nàtáhú ndaha-xi. Te òré ducaⁿ quíde-xi te cächí-ndó sá sá ní cuyatni nuu cahni. ³³ Te diu-ni ducaⁿ sǎtnahá-xi cada-xi ñuyúú-a òré ná quíní-ndó càda-xi nchaa nacuaá ní cáháⁿ-í, te cutnúní iní-ndó sá sá ní cuyatni víf-ná nduu nàa ñuyúú. ³⁴ Te na cächí tnúhu ndáá-í xii-ndo sá òré vátá cúú-gá nchaa ñáiyu xíndecu ñuyúú-a vitna, te cada-xi nchaa nàcuáa ní cáháⁿ-í. ³⁵ Te andiü ndíhi ñuyúú-a chi ndíhi nihnu-xi, dico tnúhu-í chi vá ndíhi nihnu-xi chi cùu-xi tnúhu ndáá cuiti.

³⁶ Dico ñá túú cùnnumí ná nduu quixi tucu-í, te ni ñá túú cùnnumí ná òré chi vá yòo xíní, te ni cuè espíritú xínú cuèchi núú Yá Ndióxi ñá túú xíní-xi ná nduu quixi-í, te ni mèe yúhú Tée cùu Déhe Dútú Ndióxi ñá túú xíní-í ná nduu quixi tucu-í, chi ñⁿdiü díf-ni mee-gǎ xíní-gǎ núu ná nduu quixi-í.

³⁷ Te nduu na quixi tucu yúhú Tée cùu ñaní tnáhá-ndó nchàa-ndo ñuyúú-a te

cada-xi dàtná ní quíde-xi cútñahá ní xín-decu ndí Nöé. ³⁸ Chi nchaa ñáiyu ní xín-decu dàvá-áⁿ òré vátá ndáá-gǎ ndute ñuyúú, te xèxi-yu xihí-yu quíde-yu, te davá-yu lò-yu vico tnándaha, te davá-yu dásáⁿ-yu déhe yòcò-yu candeca ñaha tée, te ducaⁿ-ni xíquidé-yu ndéé ní sáá nduu cuǎnguee té Nöé xití bàrcú. ³⁹ Te ñá túú ní cùnnumí iní-yu nàcuáa cada-xi ñuyúú ndéé ní sáá nduu ní ngúíta-xi ní cuuⁿ dáú ní ndaa ndute ñuyúú ní dánáá ñaha-xi xii-yu. Te diu-ni ducaⁿ sǎtnahá tucu-xi cada-xi nduu na quixi tucu yúhú Tée cùu ñaní tnáhá-yu nchaa-yu ñuyúú-a, chi nduu ñá túú ná yíhí iní-yu te quixi tucu-í. ⁴⁰ Te dàvá-áⁿ núu úú tnáhá cue tée yíhi-güedé xití yucu, te ñⁿ-dé ndanchita te ñⁿ-dé quendóo. ⁴¹ Àdi úú ñáiyu díhí nchíçò-yu ñⁿ-ni vèhe, te ñⁿ-yu ndanchita te ñⁿ-yu quendóo.

⁴² Te duha nduu tnúhu càháⁿ-í cuendá nchòhó cundecu túha-ndo, chi ñá túú xíní-ndó ná òré quixi tucu yúhú Yáá cúú Xitohó-ndó. ⁴³ Te nchòhó xíní-ndó sá núu ñⁿ tée cùu xitohó vehe xíní-dé ná òré cúú-xi níu quíhu ñadúhú vehe-dé duhu-güedé, te quíhi iní-dé cundecu-dé cuendá sá vá dáná-dé quíhu ñadúhú-ǎⁿ vehe-dé duhu-güedé, dico ñá túú xíní-dé. ⁴⁴ Te duha cáháⁿ-í chi nchòhó xíní ñùhu-xi cundecu túha-ndo, chi na cuáháⁿ òré ñá túú ná yíhí iní-ndó quèxio yúhú Tée cùu ñaní tnáhá-ndó nchàa-ndo.

Cuendá ñⁿ tée xínu cuechi
(Lc. 12:41-48)

⁴⁵ Te na caní-í ñⁿ cuendú núú-ndó. ñⁿ tée xínu cuechi núú ñⁿ patróóⁿ cúú-dé ñⁿ tée ío váha tècú tnúní, te quíde ndáá-dé ndécú-dé. Te ñⁿ xito ní dándòo ndaha ñaha patróóⁿ-dè xii-dé nchaa cue ñáiyu ndècu vehe-dé cuendá coto ñaha-dé xii-yu cuáñaha-dé sá cǎxi-yu òré tau-xi cǎxi-yu, te tée cùu patróóⁿ-áⁿ ní quée-dé cuáháⁿ-dè. ⁴⁶ Te váha táhú tée xínu cuechi-áⁿ te núu ndèccu-dé quíde-dé nchaa nàcuáa ní xáhaⁿ patróóⁿ-dè cada-dé mei òré ní nasáá patróóⁿ-dè-áⁿ. ⁴⁷ Te na cächí tnúhu ndáá-í xii-ndo sá tée cùu patróóⁿ-dè-áⁿ cùñaha-dé xii-dé sá quíndàha-dé nchaa sá ndécú ndíhi-dé. ⁴⁸ Dico núu tée xínu cuechi-áⁿ ní cùu-dé ñⁿ tée cuihna iní-xi, te ngóo-dé caní iní-dé sá cùyàa patróóⁿ-dè vá nasáá ndíhi-dé. ⁴⁹ Te ngúíta-dé caní-dé nchaa

dava-gá cue ñáyiú xínu cuechi ndíhi-dé, te ngóo-dé caxi-dé coho-dé cada-dé ndíhi nchaa cue téé quihu. ⁵⁰ Te ñá nduu òré ñá túú yíhi iní-dé nasáá patróón-dé, ⁵¹ te ío dandòho ñaha patróón-dé xii-dé, chi daquihí ñáhá-dé xii-dé núú xíndecu cue ñáyiú ní cachí sá ní quide ndáá te ñá ndáá sá ní quide ndáá-yu. Te ducaⁿ sãtnahá-xi dandòho ñaha Yá Ndiòxi xii ñáyiú, chi daquihí ñáhá-gã xii-yu ñá xichi núú ío ndohó-yu te yacáⁿ ío ndáhyú-yu, te dicó rúhñú-nã cuu núhu-yu sá sätú iní-yu sá ndóhó-yu —cächí-gá xãhaⁿ-gã xii-güedé.

25

Cuendá úxi ñáyiú dñíhí

¹ Te xãhaⁿ tucu Jesús xii-güedé:

—Na càni-í ñá cuendú núú-ndó nãcuáa tecú tnùní-ndó nãcuáa cada-xi òré ndíhu ndaha ñaha Yá Ndiòxi xii ñáyiú. Te úxi tnàhá ñáyiú dñíhí ñáyiú cuechi ní quehéⁿ-yu lintéernã-yu, te cuáháⁿ-yu ñá xichi núú cóo víco tnándaha cuendá cundetú-yu quexìo téé tnándaha. ² Te úhúⁿ ñáyiú cuechi-ãⁿ ío váha cùtnuní iní-yu, te úhúⁿ-yu ñáhá. ³ Te ndí ùhúⁿ ñáyiú cuechi dùcaⁿ ñá túú cùtnuní iní-xi-ãⁿ ñá túú ní cãnehé-yu sá ndéé lintéernã-yu. ⁴ Dico ndí ùhúⁿ ñáyiú cuechi cùtnuní iní-xi-ãⁿ néhé-yu sá ndéé lintéernã-yu. ⁵ Te téé tnándaha-ãⁿ cùyaa-dé quexìo-dé núú ndétú ñáhá-yu-ãⁿ, te nini dùcaⁿ cuyaa-dé ní tnii ñaha sání xii-yu ní xidí-yu. ⁶ Te cùu-xi datná dava niú níhi ní cáháⁿ dava-gá ñáyiú, te cächí-yu: “Sa véxi téé tnándaha, chí táquée quehé queheⁿ cuendá-ndó-dé”, cächí-yu. ⁷ Te ndí ùxi ñáyiú cuechi-ãⁿ ní ndacóo-yu quide túha-yu lintéernã-yu. ⁸ Te ndí ùhúⁿ ñáyiú cuechi ñá túú cùtnuní iní-xi-ãⁿ ní xáhãⁿ-yu xii cue ndí ùhúⁿ ñáyiú cùtnuní iní-xi-ãⁿ: “Chí táxi núu luhá sá ndéé lintéernã-ndó ná ndéé lintéernã-ndí chi ñá cùni-xi cáyú mee-ni ndáhvá”, cächí-yu xáhãⁿ-yu. ⁹ Te cue ñáyiú cuechi cùtnuní iní-xi-ãⁿ ní xáhãⁿ-yu: “Vá táxi núu-ndí chi vá tnàhá canehe chiúⁿ mee-ndí, te váha-gá chí cuáháⁿ cuaaⁿ-ndo núu cue ñáyiú xidíco cuendá sá vá cùmání xii-ndo, te vá cùmání xii nchúhú tucu”, cächí-yu xáhãⁿ-yu. ¹⁰ Te nini cuáháⁿ ndí ùhúⁿ ñáyiú ducaⁿ ñá túú cùtnuní iní-xi-ãⁿ cuãnguaáⁿ-yu sá ndéé

lintéernã-yu ní quexìo téé tnándaha. Te ndí ùhúⁿ ñáyiú cuechi cùtnuní iní-xi-ãⁿ ní queheⁿ cuendá ñáhã-yu xii-dé, te cuãnguihu ndíhi ñáhã-yu xii-dé núú cóo víco tnándaha, te sátá dúcáⁿ te ní nandedí yuyèhe. ¹¹ Te òré ní nasáá cue ñáyiú cuechi ñáyiú ní sãnguaaⁿ sá ndéé lintéernã-xi-ãⁿ, te ní nguíta-yu càháⁿ-yu xínutnii-yu ndaa sátá yuyèhe ndaa quehé, te xáhãⁿ-yu xii téé tnándaha-ãⁿ: “¡Tãta, nacaáⁿ yuyèhe na quihu-ndí!”, cächí-yu xáhãⁿ-yu xii-dé. ¹² Te téé tnándaha-ãⁿ ní xãhaⁿ-dè xii-yu: “Na cächí tnúhu ndáá-í xii-ndo sá nchòhó ñá túú tãu-ndo quihu-ndo víco-a, chí ñá túú tnàhá tnúhu ndíhi ñaha-ndo xii-í”, cächí-dé xãhaⁿ-dè xii-yu —cächí Jèsús xãhaⁿ-gã xii-güedé.

¹³ Te xãhaⁿ tucu Jesús xii-güedé:

—Ío quihi iní-ndó cùndecu-ndo, chí ñá túú xini-ndó nã nduu, te ní ñá túú xini-ndó nã òré quixi tucu yúhú Téé cùu ñaní tnàhá-ndó nchãa-ndo —cachí-gá xãhaⁿ-gã xii-güedé.

Cuendá cue téé ní ndóo ndaha dñíhúⁿ
(Lc. 19:11-27)

¹⁴ Te xãhaⁿ tucu Jesús xii-güedé:

—Na càni tucu-í ingá cuendú núú-ndó nãcuáa tecú tnùní-ndó nãcuáa cada-xi òré ndíhu ndaha ñaha Yá Ndiòxi xii ñáyiú. ñá téé sa ñihu ichi-ná-dé sá cacá-dé quingaca cuu xica-dé, te ní cana-dé cue téé xínu cuechi núú-dé cuendá dandóo ndaha ñaha-dé dñíhúⁿ-dè xii-güedé.

¹⁵ Te nãcuáa nduu chiúⁿ quide ñá ñá-güedé te ducaⁿ dñíhúⁿ ní sãñaha-dè xii-güedé, te ñá-dé ní sãñaha-dè ùhúⁿ tnàhá dñíhúⁿ sã ío yahu nani talentú, te ingá-dé ní sãñaha-dè úú tnàhá dñíhúⁿ-ãⁿ, te ingá-dé ní sãñaha-dè ñá dñíhúⁿ-ãⁿ, te dãtnuní ní quee-dé cuáhãⁿ-dè. ¹⁶ Te téé ní queheⁿ cuendá ùhúⁿ tnàhá dñíhúⁿ sã nani talentú ní quide-dé ndáhu ndíhi-xi te ní níhi tucu-dé ùhúⁿ-gã tucu tnàhá dñíhúⁿ-ãⁿ. ¹⁷ Te diu-ni ducaⁿ ní quide tucu téé ní níhi úú dñíhúⁿ sã nani talentú-ãⁿ, chí ní quide-dé ndáhu te ní níhi tucu-dé úú-gã tucu tnàhá. ¹⁸ Dico téé ní níhi ñá-ni dñíhúⁿ-ãⁿ chí da ní chivãha-dé dñíhúⁿ patróón-dé, chí ní xete-dé ñá yau te ní chindúxi-cu.

¹⁹ Te ní cuu quehé nduu sá ní quee patróón-güedé-ãⁿ ní sãngaca cuu-dé, te ní nasáá-dé te ní nguíta-dé quidé ndáá-dé ndíhi-güedé cuendá dñíhúⁿ sã ní dandóo

ndaha ñaha-dé xii-güedé. ²⁰ Te tée ní quendóo ndaha ùhúⁿ tñahá díhúⁿ-áⁿ ní xáhaⁿ-dè xii patróóⁿ-dè: “Patróóⁿ, náu ùhúⁿ tñahá díhúⁿ sá ní dándóo ndaha ñaha-n xii-í-a, te ní sáháⁿ-í ní quide-í ndihí-xi ndáhú te ní chídó-xí ùhúⁿ-gá tucu tñahá, te náu-a naqueheⁿ cuendá-n”, cächí-dé xáhaⁿ-dè xii patróóⁿ-dè. ²¹ Te tée cùu patróóⁿ-dè-áⁿ ní xáhaⁿ-dè xii-dé: “Ío váha ní quide-n, te vitna quide ñaha-í xii-n ìⁿ tée váha tée quide ndáá, te sá sàcú díhúⁿ ní dándóo ndaha ñaha-í xii-n te ní quide ndáá-n, te sá dúcáⁿ ní quide-n te vai-gá taxi cuendá ñaha-í xii-n. Te vitna cuu cundecu-n núú ndécú-í, te ío cudíí ìní-ó cùndecu ndihí tñaha-o”, cächí tée cùu patróóⁿ-dè-áⁿ xáhaⁿ-dè xii-dé. ²² Te sátá dúcáⁿ te tée ní quendóo ndaha ùú tñahá díhúⁿ sá nání tàlentú-áⁿ ní xáhaⁿ-dè xii patróóⁿ-güedé: “Patróóⁿ, náu úú tñahá díhú sá ní dándóo ndaha ñaha-n-a, te ní sáháⁿ-í ní quide-í ndihí-xi ndáhú, te ní chídó-xí ùú-gá tucu tñahá, te náu-a naqueheⁿ cuendá-n”, cächí-dé xáhaⁿ-dè xii patróóⁿ-güedé. ²³ Te ní xáhaⁿ tée cùu patróóⁿ-áⁿ xii-dé: “Ío váha ní quide-n, te vitna quide ñaha-í xii-n ìⁿ tée váha tée quide ndáá, te sá sàcú díhúⁿ ní dándóo ndaha ñaha-í xii-n te ní quide ndáá-n, te sá dúcáⁿ ní quide-n te vai-gá taxi cuendá-í. Te vitna cuu cundecu-n núú ndécú-í, te ío cudíí ìní-ó cùndecu ndihí tñaha-o”, cächí tée cùu patróóⁿ-áⁿ xáhaⁿ-dè xii-dé. ²⁴ Te tée ní ndóo ndaha ìⁿ-ní díhúⁿ-áⁿ ní xáhaⁿ-dè xii tée cùu patróóⁿ-dè-áⁿ: “Patróóⁿ, yúhú sa ñaha-í sá yòhó cúú-n ìⁿ tée ndùcu mee-ni sá cúú-xí mèe-xi te tàhu-n chiuⁿ cuáháⁿ nchúhú cue tée xínu cuechi núú-ñ sàcáⁿ-ndí tríu, te òré ná nàtaxi tñaha-ndí, te yòhó dicó-ná náqueheⁿ cuendá-n tàxúha-n. ²⁵ Te núú xiáⁿ ní yùhú-í cada-í ndáhú ndihí díhúⁿ-n, te ní sáháⁿ-í ní xete-í ìⁿ yaú te ní chindúxi-í, te náu díhúⁿ-n-áⁿ naqueheⁿ cuendá-n”, cächí-dé xáhaⁿ-dè xii tée cùu patróóⁿ-áⁿ. ²⁶ Te tée cùu patróóⁿ-áⁿ ní xáhaⁿ-dè: “Yòhó cúú-n ìⁿ tée cuihna ìní-xi xínu cuechi núú-í te cuhndu-n, te núú yòhó sání ìní-n sá cúú-í ìⁿ tée tàuchiuⁿ cuáháⁿ-ndó sàcáⁿ-ndó tríu te òré nàtaxi tñaha-ndo, te yúhú dicó-ná náqueheⁿ cuendá-í nàtàxúha-í. ²⁷ Te núú sání ìní-n sá dúcáⁿ quide-í, te dasaⁿ núu-n díhúⁿ-í te cúñaha-n chãhu-yu díquí-xi ní cùu, te òré ndexio-í te sa ngódó lùha-gá díquí-xi

naqueheⁿ-í ní cùu”, cächí-dé xáhaⁿ-dè xii tée xínu cuechi-áⁿ. ²⁸ Te tée cùu patróóⁿ-áⁿ ní xáhaⁿ-dè xii dava-gá cue tée ndècu ndihí-dé: “Chí quendèé ìⁿ díhúⁿ sá nání tàlentú nèhé tée-áⁿ, te cuáha-ndo tée nèhe úxí tñahá diu-ni díhúⁿ-áⁿ. ²⁹ Chi cue tée sa ndècu ndihí te níhí-gá-güedé cundecu ndihí-güedé, te ni vâ níhí-gá-güedé ndècú cundecu nchaa sá cùndecu ndihí-güedé. Te cue tée ñá túú ná ndécú ndihí vai, te nchaa sá ndécú ndihí-güedé vá cùndècu ndihí-gá-güedé. ³⁰ Te tée xínu cuechi ñá túú vèdana nàndihí-áⁿ, chí tñíí-dè te daquihíⁿ-ndó-dè ìⁿ xichí núú nèé núú ío ndoho-dé, te yàcáⁿ ndáhyú-dé, te dicó rúhñú-ná cuu núhu-dé sá sàtú ìní-dé sá ndóhó-dè”, cächí tée cùu patróóⁿ-áⁿ xáhaⁿ-dè xii-güedé. Duha sãtnahá-xi ndoho nchaa ñáiyu ñá túú quide váha — cächí-gá xáhaⁿ-gá xii-güedé.

Cuendá cue ñáiyu ní quide váha ndihí cuendá cue ñáiyu ñá túú ní quide váha

³¹ Te xáhaⁿ tucu Jesús xii-güedé:

—Te nduu na quixi tucu yúhú Tée cùu ñaní tñahá-ndó nchaa-ndo, te quixi-í ndihí nchaa cue espíritu xínu cuèchi núú-í, te nchaa ñáiyu quiní-yu sá ío cãhnu cuu-í, te dàvá-áⁿ cunucóo-í núú táxi tñuní-í, te ío cuñúhu ñáiyu sá ío cãhnu cuu-í.

³² Te dàvá-áⁿ nataká nchaa ñáiyu xñdecu ní cãa xico ñuyú cundecu-yu núú-í, te cada-í-yu dàtná quidé ìⁿ toli oré táú ðíⁿ-dé nchaa mbèé ndihí nchaa chivá chí ðíⁿ taxi ndecu-dé nchaa mbèé, te ðíⁿ taxi ndecu-dé nchaa chivá. ³³ Te ducaⁿ sãtnahá-xi cada-í chí nchaa ñáiyu ní quide ndáá núú-í ñáiyu-áⁿ taxi ndecu-í-yu xio cùha-í, te nchaa ñáiyu cuihna ìní-xi ñá túú ní cuini cada ndáá núú-í ñáiyu-áⁿ taxi ndecu-í-yu xio dàtní-í. ³⁴ Te ducaⁿ te yúhú tée ío cùnuu cúñaha-í xii ñáiyu na cùndecu xio cuha-í: “Nchaa nchòhó ñáiyu ní quide váha ñaha Tãtà-í Dútú Ndiòxí, chí nèhé chí vitna ní sáá nduu cùndecu-ndo núú ndécú-gá táxi tñuní-gá, chí ndéé cútñahá ní ngáva ñuyú sa ndècu túha tñahí núú ndécú-gá-áⁿ sã nchòhó nduu táhú-ndó cùndecu-ndo. ³⁵ Te ducaⁿ chí òré xihí-í docó te ní taxi-ndo sá ní xexi-í, te òré yichí-í ndute te ní taxi-ndo ndùte ní xihí-í, te òré ñúhú-í ichi te ní taxi-ndo vèhe ní ndetatu-í. ³⁶ Te òré xíní ñùhu-í dóó cuihnu-í te ní taxi-ndo, te òré ní cuhú-í te ní quixi coto

ñaha-ndo xii-í, te òré ní xíhí-í vecaá te ní quixi tucu-ndo ní quixi coto ñaha-ndo xii-í”, duha cúñaha-í xii nchaa ñáyi-á.³⁷ Te nchaa ñáyi ducaⁿ ní quide ndáá-áⁿ cúñahá-yu xii-í: “Yòhó Yaá cóú Xítohó-ndí, ní ñá xito ñá túú ní tàxi-ndí sá cáxi-n òré xihí-n dòcò, te ní ñá xito ñá túú ní tàxi-ndí ndute coho-n òré yichí-n. ³⁸ Te ní ñá túú ní tàxi-ndí vehe ndetatú-n òré ñúhu-n ìchi, te ní ñá túú ní tàxi-ndí dóo cuihu-n òré xini ñúhu-n. ³⁹ Te ní ñá túú ní quixi coto ñaha-ndo xii-n òré ní cuhú-n, te ní ñá túú ní quixi coto ñaha-ndí xii-n òré ní xíhí-n vècaá”, duha quesáhá-yu cúñahá-yu xii-í. ⁴⁰ Te yúhú téé cùnno cúñaha-í xii-yu: “Na càchí tñúhu ndáá-í xii-ndo sá ncháá sá vaha ní quide-ndo sá cóú-xí ncháa ñáyi xindecu ichi-í cuéi ío ndàhú xindáa-yu, te sá dúcáⁿ ní quide-ndo sá vaha sá cóú-xí-yu, te cada iní-ndó sá mèe-í ducaⁿ ní quide-ndo ní xito ñaha-ndo xii-í”, duha cúñaha-í xii-yu.

⁴¹ Te dàtnùnì cúñaha-í xii ñáyi na cùn-decu xio datni-í: “Nchaa nchòhò ñáyi ní xita nihnu chí xócuèñí núú ndécù-í-a, chí nchòhò ní nduu táhú-ndó cùn-decu-ndo núú ñúhú núú càyú, ñu-ni núú ní quide túha-í cùn-decu sácufhna ndihi nchaa es-piritú cundíhi-xi, te yacáⁿ cùn-decu-ndo ní caa ní quíhíⁿ. ⁴² Chí yúhú òré xihí-í docó te ñá túú ní tàxi-ndo sá cáxi-í, te ní òré yichí-í ndute te ñá túú ní tàxi-ndo ndute coho-í. ⁴³ Te ní òré ní xúhuⁿ-í ichi ñá túú ní tàxi-ndo vehe ndetatú-í, te ní òré xini ñúhu-í dóo cuihu-í te ñá túú ní tàxi-ndo, te ní òré ní cuhú-í te ñá túú ní quixi-ndo quixi coto ñaha-ndo xii-í, te ní òré ní xíhí-í vecaá te ñu-ni ducaⁿ ní quide-ndo ñá túú ní quixi-ndo quixi coto ñaha-ndo xii-í”, duha cúñaha-í xii-yu. ⁴⁴ Te ñáyi-áⁿ cúñahá-yu xii-í: “Yòhó Yaá cóú Xítohó-ndí ní ñá xito ñá túú ní xini-ndí òré xihí-n dòcò cuendá taxi-ndí sá cáxi-n, te ní ñá xito ñá túú ní xini-ndí òré yichí-n ndute cuendá taxi-ndí ndute coho-n, te ní ñá xito ñá túú ní xini-ndí òré xini-ndí cuhuⁿ-n ìchi cuendá taxi-ndí vehe ndetatú-n, te ní ñá xito ñá túú ní xini-ndí òré xini ñúhu-n dóo cuendá taxi-ndí dóo cuihu-n, te ní ñá xito ñá túú ní xini-ndí òré cùhú-n cuendá quixi coto ñaha-ndí xii-n, te ní ñá xito ñá túú ní xini-ndí quíhí-n vècaá cuendá quixi coto ñaha-ndí xii-n”, duha quesáhá-yu cúñahá-yu xii-í. ⁴⁵ Te yúhú

cúñaha-í xii-yu: “Na càchí tñúhu ndáá-í xii-ndo sá sá cuendá sá ñá túú ní quide-ndo ñá sá vaha sá cóú-xí cué ñáyi ndecu ichi-í cuéi ío ndàhú xindáa-yu, te sá dúcáⁿ ní quide-ndo ñá túú ní quide-ndo sá vaha sá cóú-xí-yu, te cada iní-ndó sá mèe-í ducaⁿ ní quide-ndo ñá túú ní quide-ndo sá vaha sá cóú-xí-í”, duha cúñaha-í xii-yu. ⁴⁶ Te nchaa ñáyi-áⁿ quíhíⁿ-yu núú ùhú núú ndàhú ní caa ní quíhíⁿ. Te nchaa ñáyi ní quide ndáá núú-í ní xindecu ñuyúú-a, ñáyi-áⁿ nduu táhú-yu ío vaha cundecú-yu ní caa ní quíhíⁿ —càchí-gá xahaⁿ-gá xii-güedé.

26

Cue téé cùu úhú iní ñáhá xii Jesús ndúcú-güedé nàcuáa cada-güedé tñii ñaha-güedé xii-gá

(Mr. 14:1-2; Lc. 22:1-2; Jn. 11:45-53)

¹ Te sáta ní yáha ducaⁿ ní cáháⁿ Jèsús, te ní xahaⁿ-gá xii cue téé xica cuu ndíhi-gá:

² —Nchòhò sa xini-ndó sá cùmání úú-gá nduu te coo vico pascuá, te càchí tñúhu-í xii-ndo sá yúhú Téé cùu ñani tñahá-ndó ncháa-ndo tñii ñaha-güedé xii-í, te cuáha cuendá ñahá-güedé núú cué téé cùu úhú iní ñáhá xii-í, te cata caa ñaha-güedé núú cùrúxí te núú cùrúxí-áⁿ cuú-í —càchí-gá xahaⁿ-gá xii-güedé.

³ Te ñu-ni òré cáháⁿ ndíhi Jèsús cue téé xica cuu ndíhi-gá ní natacá cue téé cùu dútú cùnno, ndíhi cue téé dàcuaha ñaha xii ñáyi nchaa tñúhu ní chídó tñuní ndí Moisés, ndíhi cue téé cùu sacuéhé núú ñáyi israhél. Te mei quèhé vehe núú cóú vèchiuⁿ te Caifás téé cùu dútú ío-gá cùnno ní natacá-güedé. ⁴ Te xíaⁿ ní ndatnúhu-güedé nàcuáa cada-güedé dandàhú-güedé Jèsús cuendá tñii ñaha-güedé xii-gá, te cahni ñaha-güedé. ⁵ Te ní xítnàha-güedé:

—Váha-gá sá vá tñii-ó Jèsús mei nduu vico, chí núú ducaⁿ na càda-o te ío dusaⁿ càda ñáyi —càchí-güedé xítnàha-güedé.

Ñá ñadíhí chíhí-áⁿ àcítí díquí Jèsús

(Mr. 14:3-9; Jn. 12:1-8)

⁶ Te ndecu Jesús ñu Bètania vehe ñá tñii Xímú, téé ní tñahá cuéhé sá dátèhyú nihnu-xi yiqui cùnno-ó. ⁷ Te xíaⁿ ndécú-gá ní quexio ñá ñadíhí néhé-áⁿ ñá sá ní cuáha yúú vaha ñani alabastrú, te xití xíaⁿ ñúhú

àcítí sàháⁿ tnámí sã ïo ndèyáhu. Te yìhi Jesús mèsá xéxí-gã, te ñaha-áⁿ nĩ sáháⁿ-aⁿ ní sódó-aⁿ àcítí ñúhú xítí xíãⁿ díquí-gã. ⁸Te òré ní xíní cue tée xica cuu ndìhi Jesús sá dúcáⁿ nĩ quide ñaha-áⁿ te ní cudééⁿ-güedë, te ní ngúíta-güedë xítñaha-güedë:

—Ñá túú quide váha ñaha-áⁿ dàcáⁿ quidé-áⁿ dacuíta-aⁿ acítí-áⁿ. ⁹Chi váha-gá ñúu cuyáhu acítí-áⁿ ní cùu chi ïo ndèyáhu, te díhúⁿ cuyáhu acítí-áⁿ cuu cuèndá cue ñáyiú ndàhú ní cùu —cachí-güedë xítñaha-güedë.

¹⁰Te Jesús ní cutnùní iní-gá nàcuáa ndùu tnúhu xítñaha-güedë, núu ní xáhaⁿ-gã xii-güedë:

—Vá dásátú-ndó ìní ñadìhí-a, chi sá ní quide ñaha-aⁿ xii-í cùú-xí ñⁿ sá vãha. ¹¹Chi cue ñáyiú ndàhú ducaⁿ-ni cùtnahá ñáyiú-áⁿ tnuú-ndó, dico yúhú chi vá ncháá ndùu cundecu ndìhi ñaha-í xii-ndo ñuyúú-a. ¹²Te sá dúhá nĩ quide ñaha ñadìhí-a xii-í ní sódó-aⁿ àcítí díquí-í, te xíãⁿ cada iní-ndó sã sã quide túha-aⁿ yiqui cùnú-í cuèndá nguíndúxi-xi. ¹³Te na cächí tnúhu ndáá-í xii-ndo sã ndèni ní cuu ñihí ñuyúú ná càháⁿ ñáyiú tnúhu-í, te càháⁿ-yu tnàhá cuèndá ñadìhí-a cuèndá quini nchaa ñáyiú nàcuáa ní quide-aⁿ te ducaⁿ vá nàcuánaa-yu —cächí-gá xáhaⁿ-gã xii-güedë.

Té Jùdás ndúcú-dë nàcuáa cada-dé cuáha cuèndá-dé Jesús núú cuè cùu úhú iní ñháá xii-gá

(Mr. 14:10-11; Lc. 22:3-6)

¹⁴Te sáta dúcáⁿ te té Jùdás Iscarioté ní sáháⁿ-dë ní ndatnúhu-dé ndìhi cue tée cùu dútú cúnùu. Te núú tnàhá té Jùdás-áⁿ cùú ùxúú cue tée xica cuu ndìhi Jesús. ¹⁵Te ní xáhaⁿ-dë xii cue tée cùu dútú cúnùu-áⁿ:

—¿Ndédau cháhu ñaha-ndo xii-í te taxi cuèndá-í Jesús xii-ndo-í? —cächí-dé xáhaⁿ-dë xii-güedë.

Te cue dútú-áⁿ nĩ xáhaⁿ-güedë xii-dé sá cuáñaha-güedë ócú úxí díhúⁿ cuixíⁿ, te diu-ni ducaⁿ nĩ sáñaha-güedë xii-dé. ¹⁶Te ndéé òré ní queheⁿ cuèndá té Jùdás-áⁿ díhúⁿ, te ní ngúíta-dé ndúcú-dë nàcuáa cada-dé cuáha cuèndá-dé Jesús núú-güedë.

Cùdini Jesús ndìhi cue tée xica cuu ndìhi-gá

(Mr. 14:12-25; Lc. 22:7-23; Jn. 13:21-30; 1 Co. 11:23-26)

¹⁷Te ní sáá nduu nĩ quesaha vico xexi ñáyiú pàá sã ñà túú yìhi levadurá diu-ni vico pàscuá, te cue tée xica cuu ndìhi Jesús ní sàndehe yatni-güedë ñihí-gá, te xáhaⁿ-güedë xii-gá:

—Mèstrú, véxi-ndí xicáⁿ tnúhú-ndí núú-n ñúu ndéé cuíní-n càda túha-ndí cuèndá cudini-o sacuaa nduu vico pascuá —cächí-güedë xáhaⁿ-güedë xii-gá.

¹⁸Te Jesús ní xáhaⁿ-gã xii-güedë:

—Chí cuáháⁿ xítí ñúú-áⁿ, te yàcáⁿ naníhí-ndó ñⁿ tée cùtnuní iní-ndó sã sã xini ñáhá-dë xii-o, te cùñaha-ndo xii-dé: “Yáá cùú Mèstrú cächí-gá sã sã ní cuyatni nduu vã cùndecu-gá ñuyúú-a, te vehe-n cuíní-gá cada-gá vico pàscuá ndìhi cue tée xica cuu ndìhi-gá”, duha cùñaha-ndo xii tée-áⁿ —cächí-gá xáhaⁿ-gã xii-güedë.

¹⁹Te cue tée xica cuu ndìhi-gá-áⁿ nĩ xica-güedë cuáháⁿ-güedë, te ní quide-güedë nàcuáa ní xáhaⁿ-gã xii-güedë, te ní quide túha-güedë sá cùdini-güedë ndìhi-gá sacuaa nduu vico pascuá-áⁿ. ²⁰Te òré sa ní cundiquíⁿ te cuánguihu Jesús ndìhi ndí ùxúú cue tée xica cuu ndìhi-gá mèsá cuèndá cudini-gá ndìhi-güedë. ²¹Te ñini xèxi-gá ndìhi-güedë ní xáhaⁿ-gã xii-güedë:

—Na cächí tnúhu ndáá-í xii-ndo sã díú ñⁿ nchohó cue tée xica cuu ndìhi-í cuáha cuèndá ñáhá-ndó xii-í núú cuè cùu úhú iní ñháá —cächí-gá xáhaⁿ-gã xii-güedë.

²²Te sá dúcáⁿ nĩ xáhaⁿ-gã xii-güedë te nchaa-güedë ní ngúíta-güedë cùndiyí-güedë, te da ñⁿ da ñⁿ-güedë ní ngúíta-güedë xáhaⁿ-güedë xii-gá:

—Mèstrú, ¿ñá díú yúhú ducaⁿ sàni iní-n càda-í-u? —cächí-güedë xáhaⁿ-güedë xii-gá.

²³Te ní xáhaⁿ-gã xii-güedë:

—Tée nacaxi ndìhi-í ñⁿ-ni cóhó caxi-ndí, tée-áⁿ cuáha cuèndá ñáhá-dë xii-í núú cuè cùu úhú iní ñháá. ²⁴Te yúhú Tée cùu ñani tnàhá-ndó nchaa-ndo ñuhu ichi-í cuáháⁿ-í yáha-í nàcuáa càháⁿ-xi núú tütú Yá Ndìoxí, dico ndàhú ní cuu tée ducaⁿ na cuáha cuèndá ñáhá xii-í núú cuè cùu úhú iní ñháá, chi váha-gá sã vã cacú tõe-áⁿ cundecu-dé ní cùu, te ñá díú sã ní cacu-dé te ducaⁿ càda-dé —cächí-gá xáhaⁿ-gã xii-güedë.

²⁵ Te sáta dúcáⁿ te ní cáháⁿ té Judás téé cuáha cuendá ñáhá xii-gá, te xáhaⁿ-dê:

—Mestnú, ¿te náa sàni iní-n sá yúhu cuáha cuendá ñáhá-í xii-n núu cuè téé cùu úhú iní ñáhá xii-n-áⁿ? —càchí-dé xáhaⁿ-dê xii-gá.

Te Jèsús ní xáhaⁿ-gá xii-dê:

—Diu-n —càchí-gá xáhaⁿ-gá xii-dê.

²⁶ Te ñini cùdini cue téé xica cuu ndihi Jesús ní queheⁿ-gá pàa, te ní ndacáⁿ táhú-gá núu Yá Ndióxi, te dàtnúni ní táhú cuèchí-gá te ní ngúíta-gá dácãñu-gá cue téé xica cuu ndihi-gá-áⁿ, te xáhaⁿ-gá xii-güedé:

—Chí quehéⁿ pàa-a caxi-ndo, te cada iní-ndó sá yiqui cuñú-í cúu-xí —càchí-gá xáhaⁿ-gá xii-güedé.

²⁷ Te ní queheⁿ-gá vàsú ñúhú ndúdí ndéhé yoho yàha stilé, te ní ndacáⁿ táhú-gá núu Yá Ndióxi, te dàtnúni ní ngúíta-gá sãñaha-gá xii-güedé cuendá coho-güedé luha luha sá ñúhú xití-xi, te xáhaⁿ-gá xii-güedé:

—Chí cóhó ncháa nchóhó ndudí ndéhé yoho yàha stilé ñúhú xití vàsú-a. ²⁸ Te cada iní-ndó sá cúu-xí dàtná ñíñí-í sá cáti òré cahni ñaha-güedé xii-í, te sá dúcáⁿ cáti ñíñí-í xíáⁿ cutnúní ndáá sá Yá Ndióxi cada-gá ingá núu sá váha sá cúu-xí vài ñáyiú dàtná ní cachí-gá cada-gá, te ío vài ñáyiú cada cahnu iní-gá cuéchi-yu. ²⁹ Te na càchí tnúhu-í xii-ndo sá vítná-nã duha xihí ndihi ñaha-í xii-ndo ndúdí ndéhé yoho yàha stilé-a, te vá cóhó ndihi ñaha-gá-í xii-ndo, dico na sàa nduu nanihí tnáhá-ó núu ndécú Tãtã-í Dútú Ndióxi táxi tnúní-gá te ðavá-áⁿ cada iní-ndó sá dàtná sá cóhó ndihi ñaha tucu-í xii-ndo chí ío cudíí ñni-ó —càchí-gá xáhaⁿ-gá xii-güedé.

Té Pèlú cúnaha-dê xii ñáyiú sá ña túú xini-dé Jèsús

(Mr. 14:26-31; Lc. 22:31-34; Jn. 13:36-38)

³⁰ Te Jèsús ní xita-gá ñni ndudú ndihi cue téé xica cuu ndihi-gá, te dàtnúní ní xica-gá cuáháⁿ-gá ndihi-güedé yucu Olívú. ³¹ Te yacáⁿ ní xáhaⁿ-gá xii-güedé:

—Na càchí tnúhu-í xii-ndo sá ncháá-ndó dándóo ñaha-ndo xii-í niú vitna, chí quee ndáá-xi nácuaa càháⁿ-xi núu tütú Yá Ndióxi núu càchí-xi: “Yúhú cuáha-í tnúhu cahni-güedé téé cùu toli, te nchaa mbéé-dê ndihi-güedé cuténuu”, duha càchí-xi núu tütú-gá. ³² Dico na ndòto-í te codonúu-í

núu-ndó quíhíⁿ distrítu Galiléa —càchí-gá xáhaⁿ-gá xii-güedé.

³³ Te té Pèlú ní xáhaⁿ-dê xii-gá:

—Te cuèi nchaa-güedé ná dándóo ñaha-güedé xii-n, dico yúhú chí vá dándóo ñaha-í xii-n —càchí-dé xáhaⁿ-dê xii-gá.

³⁴ Te Jèsús ní xáhaⁿ-gá xii-dê:

—Na càchí tnúhu ndáá-í xii-n sá niú vitna cùmání-gá cana ñni líhi, te úní xito cáháⁿ-n núu ñáyiú sá ña túú xini ñáhá-n xii-í —càchí-gá xáhaⁿ-gá xii-dê.

³⁵ Te té Pèlú ní xáhaⁿ-dê xii-gá:

—Cuèi na cùu ndihi ñaha-í xii-n dico vá càháⁿ-í núu ñáyiú sá ña túú xini ñáhá-í xii-n —càchí-dé xáhaⁿ-dê xii-gá.

Te nchaa dava-gá cue téé xica cuu ndihi-gá diu-ni ducaⁿ ní xáhaⁿ-güedé xii-gá.

Jèsús càháⁿ ndihi-gá Yá Ndióxi ñni xichi núu nání Gëtsemaní

(Mr. 14:32-42; Lc. 22:39-46)

³⁶ Te Jèsús ní quexìo-gá ndihi cue téé xica cuu ndihi-gá ñni xichi núu nání Gëtsemaní, te xíáⁿ ní xáhaⁿ-gá xii-güedé:

—Chí cúnúcòo iha cundetú-ndo na quíhíⁿ-í yacáⁿ cáháⁿ ndihi-í Yá Ndióxi —càchí-gá xáhaⁿ-gá xii-güedé.

³⁷ Te ndéca-gá té Pèlú, ndihi ndi ndúú déhe té Zebedéu cuáháⁿ, te ní ngúíta-xi sùúni ndihú iní-gá. ³⁸ Te ní xáhaⁿ-gá xii cue téé úní-áⁿ:

—Súúni ndihú iní-í dàtná sá cùu-í, te chí quéndóo nchóhó iha te vá cùdú-ndó chí yúhú vá cùdú-í —càchí-gá xáhaⁿ-gá xii-güedé.

³⁹ Te sa ñnunchíi luha ní xica ndehe Jèsús núu ndécú-güedé, te ní ngúíñí xití-gá te ní nuu núu-gá ndàa núu ñúhú, te ní ngúíta-gá càháⁿ ndihi-gá Tãtã-gá Dútú Ndióxi, te xáhaⁿ-gá:

—Yòhó Tãtã mée-í, càháⁿ ndàhú-í núu-n núu vá cùndèe iní-n tàunihmu ñaha-n xii-í cuendá sá vá ndòhò-í ná sàá òré, dico vá cadá-n nácuaa càchí iní mée-í, chí cada-n nácuaa càchí iní mée-n —càchí-gá xáhaⁿ-gá xii Tãtã-gá Dútú Ndióxi.

⁴⁰ Te sáta ñni yáha ní cáháⁿ ndihi-gá Tãtã-gá Dútú Ndióxi, te cuánuhú-gá núu ní dándóo-gá cue téé úní-áⁿ te xixídí-güedé òré ní nasáá-gá, te ní xáhaⁿ-gá xii té Pèlú:

—¿Náa ña cùndèe iní-ndó vá cùdú-ni-ndo cuèdicó ñni òré ñini càháⁿ ndihi-í Yá Ndióxi-áⁿ? ⁴¹ Te chí quéndóo

tucu te cuhuⁿ iní-ndó vǎ cùdú-ndó, te cǎháⁿ ndihí-ndo Yǎ Ndióxi cuendá sǎ vǎ dácáháⁿ ñáhá yùcu ñávǎha xii-ndo càda-ndo sǎ ñà túú túú-ndó càda-ndo. Te xini ndáá-í sǎ nchòhò cuini-ndó càda-ndo nchaa nacuaa cǎháⁿ-í dicó-ni sǎ ñà túú nihí ndéé-ndó — cǎchí-gǎ xǎhaⁿ-gǎ xii-güedé.

⁴² Te xito cùu uú cuáháⁿ tucu Jèsús cǎháⁿ ndihí-gǎ Tǎtǎ-gǎ Dútú Ndióxi, te xǎhaⁿ-gǎ:

—Yòhó Tǎtǎ mèe-í, te núu vǎ cündèe iní-n tàunihnu ñaha-n xii-í cuendá sǎ vǎ ndòhò-í, te cada nàcuáa cǎchí iní mèe-n — cǎchí-gǎ xǎhaⁿ-gǎ xii Tǎtǎ-gǎ Dútú Ndióxi.

⁴³ Te òrè ní yáha ní cǎháⁿ ndihí-gǎ Tǎtǎ-gǎ Dútú Ndióxi, te cuánuhú tucu-gǎ núu xǎn-decu cue tée úní xícá cùu ndihí-gǎ-án, te xidí-ni tucu-güedé òrè ní nasáá-gǎ, te ducaⁿ ní quide-güedé chi súúni ñuhu saní núu-güedé. ⁴⁴ Te ní dándò ñaha tucu Jesús xii-güedé xíáⁿ, te cuáháⁿ tucu-gǎ xito cùu úní cǎháⁿ ndihí tucu-gǎ Tǎtǎ-gǎ Dútú Ndióxi, te ñu-ni tnúhu sǎ sǎ ní xǎhaⁿ-gǎ xii Tǎtǎ-gǎ Dútú Ndióxi, ñu-ni tnúhu-án ní xǎhaⁿ tucu-gǎ. ⁴⁵ Te sǎtá ní yáha ní cǎháⁿ ndihí-gǎ Tǎtǎ-gǎ Dútú Ndióxi, te cuánuhú tucu-gǎ núu ndécú cuè tée xica cuu ndihí-gǎ-án, te òrè ní nasáá-gǎ, te ní xǎhaⁿ-gǎ xii-güedé:

—¿Te náa xidí-ni tucu-ndo? Te sa ní sǎá òrè cuáha cuendá ñáhá-güedé xii-í núu cuè tée ndécú ichi cuehé ichi duha. ⁴⁶ Dico vitna chí ndácòo na quihíⁿ-ó, chí sa véxi tée cuáha cuendá ñáhá xii-í núu cuè tée cùu úhú iní ñáhá — cǎchí-gǎ xǎhaⁿ-gǎ xii-güedé.

Ní tñii-güedé Jèsús ndécá ñaha-güedé xii-gǎ cuáháⁿ

(Mr. 14:43-50; Lc. 22:47-53; Jn. 18:2-11)

⁴⁷ Te cǎháⁿ dúcáⁿ-ní Jèsús ní quexio té Júdás. Te núu tñahá tée-ánⁿ cùu úxúu tñahá cue tée xica cuu ndihí-gǎ ní cùu te ducaⁿ ní quide-dé. Te ndihí-dé vai cue tée ní quexio te dava-güedé xñehe-güedé machití, te dava-güedé xñehe-güedé carrutí. Te cue tée-ánⁿ ní tendaha ñaha cue dútú cúnùu, ndihí cue tée cùu sacuéhé núu ñáyiú is-ràél. ⁴⁸ Te té Júdás tée cuáha cuendá ñáhá xii-gǎ-án sa ní xitnúhu-dé cue tée-ánⁿ nàcuáa cada-dé cuáha cuendá-dé Jèsús núu-güedé, te duha ní xǎhaⁿ-dè xii-güedé:

—Cundehe-ndo tée na tàyuhu-í te tée-ánⁿ tñii-ndo-dè chi tée-ánⁿ cùu-dè tée ndèe iní-ndó —duha ní xǎhaⁿ-dè xii-güedé.

⁴⁹ Te sǎtá dúcáⁿ ní xǎhaⁿ-dè xii-güedé, te ní sándehe yatni-dé núu Jèsús, te ní xǎhaⁿ-dè xii-gǎ:

—¿Ràción Mèstrú! —cǎchí-dé xǎhaⁿ-dè xii-gǎ.

Te ní tàyuhu ñaha-dé xii-gǎ. ⁵⁰ Te Jèsús ní xǎhaⁿ-gǎ xii-dé:

—Yòhó tée ní chitnahá ñáhá xii-í, ¿ná cuini-n núu véxi-n núu-í? —cǎchí-gǎ xǎhaⁿ-gǎ xii-dé.

Te òrè-ni-ánⁿ ní tñii ñaha cuè tée ndihí té Júdás-ánⁿ xii Jèsús, te ndèca ñaha-güedé xii-gǎ cuáháⁿ.

⁵¹ Te ñiiⁿ cue tée ndihí Jèsús ní tava-dé machití-dé, te ní xehndé-ni-dé ñiiⁿ xio lóho ñiiⁿ tée xinu cuechi núu dütú cúnùu te ní quendeé duuⁿ lóho-dé. ⁵² Te Jèsús ní xǎhaⁿ-gǎ xii tée ducaⁿ ní xehndé lóho tée-ánⁿ:

—Nachihí machití-n ñii-xi, chí nchaa cue tée na nǎa ndihí machití cahni-güedé tñaha ñáyiú-güedé te ñu-ni ndihí machití cuú mèe-güedé tucu. ⁵³ Te na cǎchí tnúhu-í xii-ndo sǎ núu yúhú cuini-í cǎcu-í te cǎháⁿ ndihí-í Tǎtǎ-í Dútú Ndióxi, te tendaha-gǎ cuehé víhí espíritu xínú cuechi núu-gǎ quixi-xi dácácu ñaha-xi xii-í. ⁵⁴ Dico núu ducaⁿ na càda-í te vǎ queé ndǎá-xi nàcuáa cǎháⁿ-xi núu tütú Tǎtǎ-í Dútú Ndióxi núu ndèe tñuni sǎ dácuitíi xini ñuhu-xi nándi ndoho-í —cǎchí-gǎ xǎhaⁿ-gǎ xii-dé.

⁵⁵ Te Jèsús ní xǎhaⁿ-gǎ xii cue tée ducaⁿ ní tñii ñaha xii-gǎ-án:

—Nchaa-ni nduu ní xini-ndó ní xóo cunucóo-í xití veñúhu cǎhnu sǎ ño cúnuu ní xóo danèhé-í ñáyiú, te ñá túú ní tñii ñaha-ndo xii-í, ¿te ná cuendá vitna quide ñaha-ná-ndó xii-í dàtná quidé-ndó ñiiⁿ ñadúhú, nèhe-ná-ndó machití nèhe-ná-ndó carrutí ní quexio ní tñii ñaha-ndo xii-í-í? ⁵⁶ Dico dacuitíi sǎ dúhá càda-xi nacuaa quee ndǎá-xi nàcuáa ní cǎháⁿ cue tée ní xóo cǎháⁿ tnúhu Yá Ndióxi ndéé sanaha ní ngódó tñuni núu tütú-gǎ —cǎchí-gǎ xǎhaⁿ-gǎ xii-güedé.

Te nchaa cue tée xica cuu ndihí-gǎ ní xinu-güedé ní dándò ñaha-güedé xii-gǎ.

Jèsús ndécú-gǎ jundá

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Te cue tée ní tñii ñaha xii Jesús ndécá ñaha-güedé xii-gǎ cuáháⁿ núu té Caifás tée cùu dütú cúnùu-gǎ. Te núu ndécú dütú

cúnùu-gá-án sa ní tacá cue tée dàcuaha ñaha xii ñáyiú nchaa tnúhu ní chídó tnùnì ndíi Moisés, ndíhi cue tée cùu sacuéhé nùú ñáyiú israhél cuendá cada-güedé jündá. ⁵⁸ Te té Pèlú xica xica-ni nchicúⁿ ñáhá-dě xii-gá cuáháⁿ ní sáá-dé ndéé quehé vehe núú ndécú tée cùu dútú cúnùu-gá-án, te xíáⁿ ní ngóo-dé ndíhi cue tée cùu poleciá cuendá cuiní-dé quiní-dé nása cada ñaha-güedé xii Jèsús.

⁵⁹ Te cue tée cùu dútú cúnùu, ndíhi cue tée cùu sacuéhé nùú ñáyiú israhél, ndíhi nchaa dava-gá cue tée xíndecu jündá ndúcú-güedé nàcuáa cada-güedé dacàa-güedé ìⁿ cuéchi díquí Jèsús cuèi cùu-xi ìⁿ sá ñá ndáa cuendá níhí-güedé nàcuáa cada-güedé cahni ñaha-güedé xii-gá. ⁶⁰ Te vâi cue tée ní ngúíta-güedé dacàa-güedé cuéchi díquí-gá, dico ñá túú ní cùndee tnúhu-güedé chi mee-ni tnúhu ndehnde cùu-xi. Te sátá dúcáⁿ te ní quexio tucu úú tnáhá cue tée dàcuandehnde-güedé, ⁶¹ te xáháⁿ-güedé xii nchaa cue tée xíndecu jündá:

—Véxi-ndí càchí tnúhu-ndí xii-ndo sá tée-a càchí-dé sá dányòyo-dé veñúhu càhnu sá ìo cùnuu núú chíñùhu-o Yá Ndiòxí, te dandàa-dé ingá veñúhu saa, diu-ni núú cáá tnáhí veñúhu-án, te xití úfí-ni nduu sa nadaxínu-dé, duha càchí-dé —càchí-güedé xáháⁿ-güedé.

⁶² Te tée cùu dútú cúnùu-gá-án ní ndacuíní-dé, te xáháⁿ-dě xii Jèsús:

—¿Ná cuendá duha ndùu tnúhu càháⁿ cue tée-a cuendá-n? Te càháⁿ nùu nása cunduu tnúhu càháⁿ-n —càchí-dé xáháⁿ-dě xii-gá.

⁶³ Dico Jèsús ñá túú tnáhí ní càháⁿ-gá. Te tée cùu dútú cúnùu-gá-án ní xáháⁿ tùcu-dé xii-gá:

—Yúhú, cácu nèhe-í Yá Ndiòxí chi cuiní-í sá càchí tnúhu ndáá-n xii-ndí nùu sá díú Cristú Déhe Yá Ndiòxí Yáá ní tendaha-gá véxi ñuyíú-a cùu-n —càchí-dé xáháⁿ-dě xii-gá.

⁶⁴ Te Jèsús ní xáháⁿ-gá xii-dé:

—Diu Yáá-án cùú-í dàtná càchí-n-án, te na càchí tnúhu-í xii-ndo sá sáá nduu te quiní-ndó yúhú Tée cùu ñaní tnáhá-ndó nchàa-ndo cunucóo-í xio cùha Dútú Ndiòxí Yáá ndácú quide nchaandi túhú sá vâha. Te dàvâ-án quiní ñáhá-ndó xii-í quee-í andiu

quixi-í ichi xití vícò —càchí-gá xáháⁿ-gá xii-dé.

⁶⁵ Te dútú cúnùu-gá-án ní ndátá-dě dóó níhnú-dě cuendá sá ñà túú ní tnáhá iní-dé nàcuáa ní càháⁿ Jèsús, te ní xáháⁿ-dě xii nchaa cue tée xíndecu jündá:

—Tée-a càháⁿ úhú-dé cuendá Yá Ndiòxí, te vitna ñá túú-gá xíní ñùhu-xi cue tée càháⁿ ndáá nùu ndáá sá ndècuéchi-dé àdi ñá túú ndècuéchi-dé, chi sa ní tecú dóho-o nàcuáa ndùu tnúhu ní càháⁿ-dé ní càháⁿ úhú-dé cuendá Yá Ndiòxí. ⁶⁶ Te nchaa-ndo chí càháⁿ vitna núu nása sàni iní-ndó cùnduu cuendá tée-a —càchí-dé xáháⁿ-dě xii nchaa cue tée-án.

Te cue tée-án ní xáháⁿ-güedé:

—Nchúhú càchí-ndí sá tàù-xi cuú-dé chi ndècuéchi-dé —càchí-güedé xáháⁿ-güedé.

⁶⁷ Te ní ngúíta-güedé ní tiú díí ñáhá-güedé xii-gá te ní caniha-güedé, te tnáhá núú-gá ní cani-güedé. ⁶⁸ Te ní cudíquí ndéé ñáhá-güedé xii-gá, te xáháⁿ-güedé:

—Yòhó Tée càchí sá cúú Cristú Yáá ní tendaha Yá Ndiòxí véxi ñuyíú-a, càháⁿ ná còto yoo ní caniha xii-n —càchí-güedé xáháⁿ-güedé xii-gá.

Té Pèlú xáháⁿ-dě xii ñáyiú sá ñà túú xíní-dé Jèsús
(Mr. 14:66-72; Lc. 22:56-62; Jn. 18:15-18, 25-27)

⁶⁹ Te nini nùcòo té Pèlú quehé, te ní sáháⁿ ìⁿ xíchí xínú cuéchi vehe-án nùú-dě, te xáháⁿ-xi xii-dé:

—Yòhó tnáhá-n cùu-n tée xica cuu ndíhi Jèsús tée distritú Galiléa —càchí-xi xáháⁿ-xi xii-dé.

⁷⁰ Te té Pèlú ñá túú ní nùnuu-dé, te ndèdóho nchaa ñáyiú xíndecu-án ní xáháⁿ-dě xii xíchí-án:

—Yúhú, ñá túú cùtnuní iní-í nása ndùu tnúhu càháⁿ-n —càchí-dé xáháⁿ-dě xii-xi.

⁷¹ Te ní xica té Pèlú cuáháⁿ-dé ndáa nàcuáa nchíi yuyèhe vehe-án, te ní xíní ñáhá tùcu ingá xíchí xínú cuéchi vehe-án, te xáháⁿ-xi xii nchaa ñáyiú xíndecu-án:

—Tée-a tnáhá-dé xicá cùu-dé ndíhi Jèsús tée ñuú Nazàrèt —càchí-xi xáháⁿ-xi xii-yu.

⁷² Te té Pèlú ní xáháⁿ-dě:

—Nchàcùiti Yá Ndiòxí sá ñà túú xíní-í tée càcuneha-ndo-án —càchí-dé xáháⁿ-dě xii-yu.

⁷³ Te tna tnaa-ni ní cuu, te dava ñáyiú xíndecu xián ní xáháⁿ tùcu-yu xii té Pèlú:

—Ndáá sá tñhá-n xica cuu-n ndíhi téé ndèca-güedé cuánguihu-án, chí ñáyúhú cáhá-n —cächí-yu xǎháⁿ-yu xii-dé.

⁷⁴Te té Pèlú ní xáhaⁿ-dè xii-yu:

—Nchàcuítí Yá Ndiöxí sá yǎhú cáháⁿ ndáá-í sá ñà túú xini-í téé càcunehe-ndo-án —cächí-dé xǎhaⁿ-dè xii-yu.

Te òré-ni-án ní cana ñⁿ líhi. ⁷⁵Te ní ndacu iní té Pèlú nàcuáa ní xáhaⁿ Jèsús xii-dé sá cùmání-gǎ cana ñⁿ líhi te úní xito cáháⁿ-dè sá ñà túú xini ñáhá-dè xii-gǎ. Te ní quee-dé tnuú ñáyui-án cuǎháⁿ-dè ñⁿ xio ní ndáhyú víhí-dè ní ndixi cuéchi iní-dé.

27

Ndèca-güedé Jèsús cuǎháⁿ núú tǎ Pilatú (Mr. 15:1; Lc. 23:1-2; Jn. 18:28-32)

¹Te sáta ní túndaá te nchaa cue téé cùu dútú cúnùu, ndíhi cue téé cùu sacuéhé núú ñáyui isràél ní ndatnúhu-güedé nàcuáa cada-güedé cahni-güedé Jèsús. ²Te ní dácútú ñaha-güedé xii-gǎ, te ndèca ñaha-güedé cuǎháⁿ núú tǎ Pilatú téé cùu gobiernú.

Ní xíhi té Jùdás

³Te té Jùdás téé ní sáha cuendá ñáhá xii Jesús ní cutnúni iní-dé sá cáhni ñaha-güedé xii-gǎ, te ní ndixi cuéchi iní-dé sá ñà túú ní quide váha-dé sá dúcáⁿ ní quide-dé ní sáha cuendá ñáhá-dè xii-gǎ núú cuè téé cùu úhú iní ñáhá, te ní xica-dé cuǎháⁿ-dè danchòcáva-dé ócú úxí dífúⁿ cuixíⁿ núú cuè dútú cúnùu-án, ndíhi núú cuè téé cùu sacuéhé núú ñáyui isràél, chí ñu cue téé-án ní sáñaha-güedé dífúⁿ xii-dé. ⁴Te òré ní quexìo té Jùdás-án núú ndécú-güedé, te xǎhaⁿ-dè xii-güedé:

—Yúhú, ñà túú ní quide váha-í sá dúcáⁿ ní quide-í ní taxi cuendá-í ñⁿ téé ñà túú tñàhi cuéchi-xi cahni-ndo-dè —cächí-dé xǎhaⁿ-dè xii-güedé.

Te cue téé-án ní xáhaⁿ-güedé xii-dé:

—Nchúhú, ñà túú nǎgǎ cuendú cuiní-ndí cáháⁿ ndíhi ñaha-ndí xii-n, te mee-n ñaha núu nása sàni iní-n càda-n —cächí-güedé xǎhaⁿ-güedé xii-dé.

⁵Te té Jùdás ní dǎngoyo-dé dífúⁿ-án xiti veñúhu càhnu sá ño cúnúu, te ní xica-dé cuǎháⁿ-dè ní dácuèhné-dé méé-dé.

⁶Te cue dútú cúnùu ní naqueheⁿ-güedé dífúⁿ-án, te ní xitnàha-güedé:

—Dífúⁿ-a ní quéyáhu cuendá sá cùu ñⁿ ñáyui, núu xiǎⁿ vá cùu nàchihí-o xiti càjǎ

núu ñúhú sǎ cùu cuendá Yǎ Ndiöxí —cächí-güedé xitnàha-güedé.

⁷Te ní ndatnúhu-güedé te ní cuu ñⁿnuu-güedé cuendá nacuaaⁿ-güedé ñⁿ xichi núu cáá ñúhu danani-güedé Núú Cuǎha Nchaa Sá Cuǎha Ñuhu, te xíaⁿ ní saaⁿ-güedé cuendá xíaⁿ nguindúxi nchaa ñáyui véxi xica. ⁸Te ní nadáma ñu ñuhu-án, te vitna ñanani-güedé Ñuhu Yáhu Níñí, duha ñanani-güedé. ⁹Te ducaⁿ ní cuu chí ní quee ndáá-xi nàcuáa ní cáháⁿ ndí Jeremías téé ní xóo cáháⁿ tñuhu Yá Ndiöxí ndéé sanaha, te duha ní cachí ndí: “Cue téé isràél ní cachí-güedé sá ócú úxí dífúⁿ cuixíⁿ cháhu-güedé cuendá ñⁿ téé queheⁿ cuendá-güedé. Te dífúⁿ-án nàqueheⁿ-güedé, ¹⁰te cuaaⁿ-güedé ñⁿ xichi núu nání Núú Cuǎha Nchaa Sá Cuǎha Ñuhu, te ducaⁿ càda-xi chí ducaⁿ ní cachí Yǎ Ndiöxí cunduu”, duha ní cachí ndí Jeremías-án.

Jèsús ndécú-gǎ núú tǎ Pilatú

(Mr. 15:2-5; Lc. 23:3-5; Jn. 18:33-38)

¹¹Te Jèsús ndécú-gǎ núú tǎ Pilatú téé cùu gobiernú, te téé-án ní xicáⁿ tñúhú-dè núu-gǎ, te xǎhaⁿ-dè xii-gǎ:

—¿Ndáá sá díu-n cùn-n téé yìndaha ñaha xii ñáyui isràél-án? —cächí-dé xǎhaⁿ-dè xii-gǎ.

Te Jèsús ní xáhaⁿ-gǎ xii-dé:

—Ñu-í yìndaha-í-yu —cächí-gǎ xǎhaⁿ-gǎ xii-dé.

¹²Te cue dútú cúnùu ndíhi cue téé cùu sacuéhé núú ñáyui isràél sàcáⁿ cuéchi-güedé núú tǎ Pilatú cuendá Jèsús, dico mee-gǎ ní ñⁿ tñuhu ñà túú ní cáháⁿ-gǎ.

¹³Te té Pilatú ní xáhaⁿ-dè xii-gǎ:

—Cáháⁿ, ná cuendá ñà túú cáháⁿ-n, te cundehe nǎ ndéé duha titní cuéchi dà-caa cue téé-a díquí-n —cächí-dé xǎhaⁿ-dè xii-gǎ.

¹⁴Dico Jèsús ñà túú tñàhi ní cáháⁿ-gǎ, te té Pilatú téé cùu gobiernú-án ño ní cuñúhu-dé sá dúcáⁿ ñà túú tñàhi ní cáháⁿ-gǎ.

Ní quide ndáá-güedé sá cáhni-güedé Jèsús (Mr. 15:6-20; Lc. 23:13-25; Jn. 18:38-19:16)

¹⁵Te ndí tñahá nduu vico pascuá dácacu té Pilatú téé cùu gobiernú-án ñⁿ téé yìhi vecaá chí ducaⁿ tñàhi quide-dé, te mee ñáyui cáháⁿ-yu te núu ndédacàa téé yìhi vecaá-án càcu-dé te téé-án dácacu-dé. ¹⁶Te

dává-án yíhí ìn tée nàni Barrabás vecaá, te tée-án ìo cuendú-dé sá ìo nèhé ní quide-dé.
¹⁷ Te ní natacá nchaa ñáyi, te té Pilatú ní xícáⁿ tñuhú-dě núu-yu, te xáhaⁿ-dě:

—¿Ndédacaa núu ùu cue tée-a cuiní-ndó dácácu-í-güedé-í? ¿Té Barrabás àn Jèsús tée nàni Cristú? —càchí-dé xáhaⁿ-dě xíí-yu.

¹⁸ Te ducaⁿ ní cáháⁿ té Pilatú, chí ní cutnùní ìní-dé sá dicó sá cuèdú ìní-güedé ducaⁿ ní quide-güedé ní sáha cuendá ñáha-güedé xii Jèsús núu-dě.

¹⁹ Te nini núcóo té Pilatú núu xèh-ndé-dé cuéchi ní tendaha ñàdihí-dé tñuhu cuáháⁿ núu-dě, te duha ndùu tñuhu ní tendaha-aⁿ: “Vá cání ìní-n nã cada-n tée ní taxi cuendá ñáha-güedé xii-n, tée ñá túú tñàhí cuéchi-xi, chí icuini ìo nèhé ní dácótó ñáha saní-í cuendá-dé”, duha ndùu tñuhu ní xáhaⁿ-aⁿ xii té Pilatú.

²⁰ Dico cue tée cùu dútú cúnùu, ndihí cue tée cùu sacuéhé núu ñáyi isràél ní xáhaⁿ-güedé xii ñáyi sá ná cūñhá-yu xii té Pilatú dácácu-dé té Barrabás te cahni-dé Jèsús, te ní quidé-yu nàcuáa ní xáhaⁿ-güedé. ²¹ Te té Pilatú-án ní xáhaⁿ tñucu-dé xíí-yu:

—¿Ndédacaa núu ùu cue tée-a cuiní-ndó dácácu-í? —càchí-dé xáhaⁿ-dě xíí-yu.

Te ní xáháⁿ-yu xii-dé:

—Té Barrabás dácácu-n —càchí-yu xáháⁿ-yu xii-dé.

²² Te té Pilatú ní xícáⁿ tñuhú-dě núu-yu, te xáhaⁿ-dě:

—¿Te ná cuiní-ndó càda-í Jèsús tée nàni Cristú tée càchí sá Yã Ndióxi ní tendaha ñáha xii-dé véxi-dé ñuyíú-a-í? —càchí-dé xáhaⁿ-dě xíí-yu.

Te nchaaⁿ-yu ní cáháⁿ-yu, te xáháⁿ-yu:

—Cata caa-dé núu cùrúxí —càchí-yu xáháⁿ-yu xii-dé.

²³ Te té Pilatú ní xáhaⁿ tñucu-dé xíí-yu:

—¿Te ná cúú cuéchi ní quide-dé núu ducaⁿ cuiní-ndó càda-í-dé-í? —càchí-dé xáhaⁿ-dě xíí-yu.

Dico nchaaⁿ-yu uuⁿ-gá ñhí ní cáháⁿ-yu, te xáháⁿ-yu xii-dé:

—¿Cata caa-dé núu cùrúxí! —càchí-yu xáháⁿ-yu xii-dé.

²⁴ Te té Pilatú ní cutnùní ìní-dé sá vã ñhí-dé nàcuáa cada-dé, chí uuⁿ-gá ní ngúíta ñáyi xícuáa-yu, te xíáⁿ ní xícáⁿ-dé ndute ní ndáhá-dě núu nchaa ñáyi, te ní xáhaⁿ-dě xíí-yu:

—Tée-a cùu-dé ìn tée ñá túú tñàhí cuéchi-xi, te nchòhó cuiní-ndó sã cùu-dé, dico diu-ni mee-ndo cuido yáhu-ndo-dě chí yúhu vá cuídó yáhu-í-dé —càchí-dé xáhaⁿ-dě xíí-yu.

²⁵ Te nchaaⁿ-yu ní xáháⁿ-yu xii-dé:

—¿Diu nchúhú ndihí cue déhe-ndí cuido yáhu-ndí-dé! —càchí-yu xáháⁿ-yu.

²⁶ Te sátá dúcáⁿ te té Pilatú ní dácácu-dé té Barrabás, te ní táuchíúⁿ-dě ní cani-güedé Jèsús. Te sátá dúcáⁿ ní quide ñaha-güedé xii-gá, te ní táuchíúⁿ-dě candeca ñaha-güedé xii-gá quíhíⁿ cata caa ñaha-güedé xii-gá núu cùrúxí.

²⁷ Te cue tée cùu sandadú té Pilatú ndécá-güedé Jèsús cuánguihu xití vehe càhnu cuu cuendá-dé, te cue tée cùu sandadú-án ní cana-güedé dava-gá cue sandadú núu dúcáⁿ ndèca-güedé Jèsús cuánguihu-án. ²⁸ Te xíáⁿ ní taunuu-güedé dóo-gá, te ní dácuihnú ñaha-güedé xii-gá ìn dóo tícuèhé víhí. ²⁹ Te ní cadúha-güedé ìn coróná ìnu ní chihí-güedé díquí-gá, te ní chitnii-güedé ìn carrútí ndaha cùha-gá, te ní ngúíni xití-güedé núu-gá cúdíquí ndeé ñáha-güedé xii-gá, te xáhaⁿ-güedé:

—¿Ío càhnu cuu yohó tée yíndaha ñaha xii ñáyi isràél! —càchí-güedé xáhaⁿ-güedé xii-gá.

³⁰ Te ní tíú díí ñáha-güedé xii-gá, te ní queheⁿ-güedé carrútí sá ní sáñaha-güedé xii-gá te ní ducuⁿ-güedé díquí-gá. ³¹ Te sátá ní yáha ní cudíquí ndeé ñáha-güedé xii-gá, te ní nataunuu ñaha-güedé xii-gá dóo tícuèhé víhí sã ní dácuihnú ñaha-güedé xii-gá, te ní dándiúnuu ñaha-güedé xii-gá dóo méé-gá, te dätñuní ndécá ñaha-güedé cuáháⁿ núu catá caa ñaha-güedé xii-gá núu cùrúxí.

Sàta caa-güedé Jèsús núu cùrúxí

(Mr. 15:21-32; Lc. 23:26-43; Jn. 19:17-27)

³² Te ñuhu-güedé ndihí-gá ichi, te ní naníhí-güedé ìn tée ñuu Cirené nání-dě Xímú, te tée-án ní quide yica-güedé ní xido-dé cùrúxí sá nchídó Jèsús.

³³ Te ní sáa-güedé ndihí-gá ìn xichi núu nání Gólgotá, te tñuhu-án quée-xí: Núu nání yíquí díquí ndíyi, duha quèe-xi tñuhu-án. ³⁴ Te xíáⁿ sáñaha-güedé ndudí úá

coho-gá ní cùu, te ñá túú ní xìhi-gá chi dico-ni ní xito ndéé-gá.

³⁵ Te ní sata caa ñaha-güedě xii-gá núú cùrúxí, te sá tá dúcáⁿ te cue tée cùu sandadú-áⁿ ní xito ndéé-güedě núu ndé-dacáa-güedé cuu cuendá-güedé dóó-gă. Te ducaⁿ ní cuu chi ní quee ndáá-xi nàcuáa ní cáháⁿ ìⁿ tée ní xóo cáháⁿ tnúhu Yá Ndiòxí ndéé sanaha yòdo tnuní núú tütú-gá, te duha cächí-xi: “Ní xito ndéé-güedé núu ndédacáa-güedé cuu cuendá-güedé dóó-gă”, duha ní cächí tée-áⁿ te ducaⁿ ní ngódo tnuní núú tütú-gá. ³⁶ Te sá tá dúcáⁿ ní quide-güedé, te ní ngóo-güedé ndèè ñáhá-güedé xii-gá. ³⁷ Te ní taxi ndecu-güedé ìⁿ sá ndèè lètrá ndáa díquí-gă. Te lètrá-áⁿ cáháⁿ-xi ná cuendá ducaⁿ ní quide ñaha-güedé xii-gá, te duha cáháⁿ lètrá-áⁿ: “Tée-a cùu-dé tée yíndaha ñaha xii ñáyiú isráél”, duha cächí-xi. ³⁸ Te tnàhá úú cue tée cùu ñadúhú ní sata caa-güedé diu-ni núú cùrúxí tucu, te ìⁿ-dé ní sata caa-güedé xio cùha-gá, te ingá-dé ní sata caa-güedé xio dátni-gá. ³⁹ Te nchaa ñáyiú yáha yatni núú tácáa-gá-áⁿ, te dàcuicó-yu díquí-yu ndèhe ñahá-yu xii-gá, te xícuehé ñáhă-yu. ⁴⁰ Te xáhăⁿ-yu xii-gá:

—Yòhó cächí-n să dàngoyo-n veñúhu cànno sá ìo cùnno, te dandaa-n ingá veñúhu saa, te xití úní-ni nduu sa nadaxinu-n, te vitna tanuu núú cùrúxí-áⁿ dàcácu-n mèe-n te núu ndisa sá Dèhe Yá Ndiòxí cùu-n —cächí-yu xáhăⁿ-yu xii-gá.

⁴¹ Te diu-ni ducaⁿ cùdíquí ndéé ñáhá cùè tée cùu dútú cùnno xii-gá, ndihi cue tée dàcuaha ñaha xii ñáyiú nchaa tnúhu ní chídó tnuní ndíi Moisés, ndihi cue tée cùu fariséú, ndihi cue tée cùu sacuéhé núú ñáyiú isráél, te xitnaha-güedé:

⁴² —Tée-a ní ndacu-dé ní dàcácu-dé dava ñáyiú, te mee-dě ñá ndácú-dě dàcácu ni-hnu-dé mée-dě. Te núu ndisa sá cùu-dě tée yíndaha ñaha xii ñáyiú isráél, te na cùndehe-o nuu-dé núú cùrúxí-a cuendá quíndáá iní-ó-dě. ⁴³ Te cächí-dé sá sándáá iní-dé Yá Ndiòxí, te mee-gá ná dàcácu ñaha-gă xii-dé te núu cùndahú iní ñáhá-gă, chi mee-dě cächí-dé sá Dèhe-gá cùu-dě —cächí-güedé xitnaha-güedé.

⁴⁴ Te ndéé tnàhá cue tée cùu ñadúhú tácáa xio xio ñiñi-gá xícuehé ñáhá-güedé xii-gá.

Ní xíhí Jèsús

(Mr. 15:33-41; Lc. 23:44-49; Jn. 19:28-30)

⁴⁵ Te òré ní cuu cuádava nduu te ní cunee nihí ñuyúú, te ducaⁿ-ni càa ní cuu caá úní sacuaa. ⁴⁶ Te òré sa ta cùyatni cuu caá úní sacuaa-áⁿ, te níhi ní cáháⁿ Jèsús, te cächí-gá:

—Èlí, Èlí, ¿láma sabactani? —cächí-gá.

Te tnúhu-áⁿ quée-xí: Ndiòxí mèè-í, Ndiòxí mèè-í, ¿ná cuendá ní dáñá ñaha-n xii-í?, duha quèe-xi tnúhu-áⁿ.

⁴⁷ Te dava cue tée xíndecu yatni núú tácáa-gá-áⁿ ní tecú dóho-güedé nàcuáa ní cáháⁿ-gá, te ní xitnaha-güedé:

—Tée-a càna-dé té Èlías —cächí-güedé xitnaha-güedé.

⁴⁸ Te òré-ni-áⁿ ní quene cunu ìⁿ cue tée xíndecu-áⁿ ní queheⁿ-dé luha cächí, te ní chindóyo-dé xití ndudí íá, te ní chinenu-dé díquí ìⁿ yutnu càni te ní ndocani-dé ní chihi-dé yuhu-gá. ⁴⁹ Te dava-güedé ní xáhaⁿ-güedé xii tée-áⁿ:

—Cundetú tnaa na cùndehe-o nacoto núú quixi té Èlías dàcácu ñaha-dě xii-dé —cächí-güedé xáhaⁿ-güedé xii tée-áⁿ.

⁵⁰ Te Jèsús níhi ní cana saa-gá, te ní xíhí-ni-gá. ⁵¹ Te sá tá dúcáⁿ te ní ndátá dóó cùú còrtiná xití veñúhu cànno sá ìo cùnno ní quée dava ndáá, te ndáa núú ñnu ní ngúita-xi ní ndátá, te ní tnáa, te dava cava nàhnu ní táhú. ⁵² Te dava yaú núú yíndúxi ñáyiú ní xíhí ní sándáá iní ñáhá xii Yá Ndiòxí ní nacaáⁿ te ní ndotó-yu. ⁵³ Te sá tá ní yáha ní ndoto Jèsús, te cue ñáyiú ní ndoto-áⁿ cuànguñhú-yu xití ñuu Jerusalén, te cue ñáyiú ñuu-áⁿ ìo vai-yu ní xiní-yu cue ñáyiú ducaⁿ ní ndoto-áⁿ.

⁵⁴ Te sá dúcáⁿ nándi ní quide-xi, ndihi sá dúcáⁿ ní tnáa xiáⁿ ío ní yùhú tée cùu capitáⁿ ndihi nchaa dava-gá cue tée ndècu ndihi-dé ndèe-güedé yiqui cùñú Jèsús, te ní xitnaha-güedé:

—Sá ndáá ndisa sá díú tée-a cùu-dé Dèhe Yá Ndiòxí ní cùu —cächí-güedé xitnaha-güedé.

⁵⁵ Te xica xínutnii vai ñáyiú dìhí ndéhě-yu nchaa nàcuáa ní quide ñaha-güedé xii Jèsús, te ñáyiú-áⁿ cùu-yu ñáyiú ní chindéé-yu Jèsús, te ndéé distritú Galiléa ní chinchícúⁿ ñáhă-yu xii-gá. ⁵⁶ Te tnuú ñáyiú-áⁿ tnàhá tá Màriá Magdalená, ndihi

tá Màriá nǎná tǎ Jàcobó ndihi té Chèè, ndihi nǎná cue déhe té Zebèdeu.

Chìndúxi-güedé Jèsús

(Mr. 15:42-47; Lc. 23:50-56; Jn. 19:38-42)

⁵⁷ Te ndècu ìn tée cuica nàni-dé Chèè te cùu-dé tée ñuú Arimateá, te tñahá-dé ní tñahá tñúhu-dé ndihi Jèsús. Te òré sa ní cuaa, ⁵⁸ te ní sáhá-dé núú tǎ Pilatú, te xáha-dě ñúu vá cùndèe iní-dé daña-dě chindúxi-dé yiqui cùnú Jèsús. Te té Pilatú-án ní sáha-dé tñúhu, te ní táuchíú-dě sá cuáha cuèndá-güedé té Chèè-án yiqui cùnú-gá. ⁵⁹ Te té Chèè-án ní queheⁿ cuèndá-dé yiqui cùnú-gá, te ní chidúcuⁿnuu-dé ìn dóo cuixíⁿ dóo cándò. ⁶⁰ Te sa nchíí ìnⁿ yaú sáá ní caáⁿ té Chèè-án ìnⁿ yiqui naha càva te xíáⁿ cúu cuèndá-dé, te yaú-án ní chihi-dé yiqui cùnú Jèsús, te dàtnùní ní sadí-dé ìnⁿ yúu cáhnú yúu quèhéⁿ yuhu yaú-án, te ní xica-dé cuánuhú-dé. ⁶¹ Te tñahá tá Màriá Magdalèná, ndihi ingá xichí nání Màriá ní quexió-yu ní ngóo-yu yatni núu nchìi yaú-án.

Cue tée ndèè yaú núu yíhí yìqui cùnú Jèsús

⁶² Te sáta ní yáha ní quide túha ñáyi u nchaa sá nándíhi-yu nduu tñéè nduu ndètatú-yu-án, te ñu-ni nduu ndètatú-yu-án ní sáháⁿ cue dútú cùnúu, ndihi cue tée cùu fariséú ní cáháⁿ ndihi-güedé té Pilatú. ⁶³ Te xáhaⁿ-güedé xii-dé:

—Yòhó tée cùnuu, véxi-ndí càchí tñúhu-ndí sá ní ndacu iní-ndí sá tǎe ndehnde ní xíhí-án càchí-dé òré ndécú-gá-dé sá nduu úní sá cùú-dé, te ndoto-dé. ⁶⁴ Te tendaha-n cuè tée na quíhíⁿ-güedé cundeé-güedé yuhu yaú núu ní chihi-güedé yiqui cùnú-dé, chi na cuáháⁿ quíhíⁿ cue tée ní xica cuu ndíhi-dé duhu-güedé yiqui cùnú-dé, te cùñaha-güedé xii ñáyi u sá ní ndoto-dé. Chi núu ducaⁿ na càda-güedé te ío-gá dandàhú-güedé cue ñáyi u dàcúúxí dàtná ní quide mee tǎe ní xíhí-án —càchí-güedé xáhaⁿ-güedé.

⁶⁵ Te té Pilatú ní xáhaⁿ-dě xii-güedé:

—Náu cue sandadú-a candeca-ndo-güedé quíhíⁿ, te cadí váha-ndo ndíhi-güedé yuhu yaú-án nàcuáa tàù-xi cunduu, te na cundeé-güedé nàcuáa sàni iní-ndó cunduu —cachí-dé xáhaⁿ-dě xii-güedé.

⁶⁶ Te cue tée-án ní xica-güedé cuáháⁿ-güedé, te ní tee-güedé ìnⁿ sèñá yúu ndèdí yèhe yaú-án, te ní dándòo-güedé cue sandadú-án ndèè-güedé yaú-án, te ducaⁿ ní quide-güedé cuèndá sá vǎ yòo quíhíⁿ nacaáⁿ yaú-án.

28

Ní ndoto Jèsús

(Mr. 16:1-8; Lc. 24:1-12; Jn. 20:1-10)

¹ Te sáta ní yáha nduu ndètatú ñáyi u, te ndumíngú nehé víhí-ní ní xica tá Màriá Magdalèná ndihi ingá xichí nání Màriá cuángotó-yu yaú núu ní chihi-güedé yiqui cùnú Jèsús. ² Te uuⁿi ñhi vihi ní tñáa, te òré ducaⁿ ní quide-xi chi ìnⁿ espíritú xínú cuèchi núu Yǎ Ndiòxí ní quexíò-xi núu dúcáⁿ nchíí yaú núu ní chihi-güedé yiqui cùnú Jèsús, te ní xócání espíritú-án yúu ndèdí yèhe yaú-án te ní ngóo-xi núu yúu-án. ³ Te dàtná dátásaⁿ-xi òré sáá ndúté ducaⁿ datásaⁿ-xi núu espíritú-án, te dóo ñhnú-xí cuixíⁿ quíyí. ⁴ Te òré ducaⁿ ní quide-xi te cue sandadú ndèè yaú-án ní quidi ñaha-xi xii-güedé sá ní yùhú-güedé, te ní nduá-güedé, te ní xíta sá xíní tñúní-güedé. ⁵ Te espíritú-án ní xáhaⁿ-xi xii cue ñáyi u dǐhí cuángoto yaú-án:

—Nchòhó ñáyi u dǐhí véxi coto yaú-a, vá yùhú-ndó chi yùhú cùtñúní iní-í sá nchòhó véxi-ndo nànducu-ndo yiqui cùnú Jèsús Yaá ní xíhí núu cùrúxí. ⁶ Dico Yaá-án chi ñá túú-gá ndécú yiqui cùnú-gá iha, chi sa ní ndoto-gá, te ñu ducaⁿ ní cachí-gá sá ndótó-gá cùtñahá vátá cùú-gá, te chí táquixi cundehe-ndo núu ní sacáⁿ-güedé yiqui cùnú-gá ní cùu te quini-ndó ñá ñá túú-gá. ⁷ Te vitna ío ndíhí chí cuáháⁿ núu xñdecu cue tée ní xica cuu ndíhi-gá, te duha cùñaha-ndo xii-güedé: “Ní ndoto Jèsús Yaá ní xíhí ní cùu, te codonùu-gá núu-ndó quíhíⁿ distritú Galiléa te yàcáⁿ quini-ndó-gá”, duha cùñaha-ndo xii-güedé. Duha nduu tñúhu ní cachí tñúhu-í xii-ndo —càchí espíritú-án xáhaⁿ-xi xii cue ñáyi u dǐhí-án.

⁸ Te cue ñáyi u dǐhí-án ní natníí-yu ichi, te súúní ndíhí cuánuhú-yu núu xñdecu cue tée ní xica cuu ndíhí Jèsús cuèndá nacani tñúhu-yu núu-güedé nàcuáa ní xáhaⁿ espíritú-án xii-yu, te cuèí ní yùhú-yu dico

súuní cùdíí ìní-yu. ⁹ Te ichi ñùhú-yu cuánuhú-yu, te na iní-yu ní quexìo Jesús núu-yu ní dándác̄o váha ñaha-gã xií-yu. Te ñáyiú-án nĩ ngúiní xití-yu núu-gã, te ní numi ñàhá-yu xii-gã, te ní chiñuhu ñàhá-yu. ¹⁰ Te ní xáhaⁿ-gã xií-yu:

—Vá yùhú-ndó, chí cuáháⁿ cúnaha-ndo xii cue téé ní xica cuu ndihi-í sá ná quihíⁿ-güedé distritú Galileá, te yacáⁿ quini ñàhá-güedé xii-í —càchí-gã xáhaⁿ-gã xií-yu.

Nàcuáa ndùu tnúhu ní nacani cue sandàdú
¹¹ Te nini ñuhu cue ñáyiú ðihí-án ichi cuánuhú-yu, te dava cue sandàdú cue téé ndéé yaú-án ní cùu ní xica-güedé cuánuhú-güedé ñúú cuendá nacani tnúhu-güedé núu cuè téé cùu dútú cúnúu nacúáa ní cuu. ¹² Te cue téé cùu dútú cúnúu-án nĩ quide-güedé jùndá ndihi cue téé cùu sacuéhé núu ñáyiú isràél, te ní ndatnúhu-güedé nàcuáa cada-güedé, te ní quide ndáá-güedé ndihi cue sandàdú-án sã cuáñaha-güedé vai díhúⁿ cuendá dacuàndehnde-güedé. ¹³ Te ní xáhaⁿ-güedé xii cue sandàdú-án:

—Cuiní-ndí sá vã càháⁿ ndáá-ndó núú ñáyiú nàcuáa ní cuu, chí cúnaha-ndo xii-yu sá òré xidí-ndó nĩ quixi cue téé ní xica cuu ndihi-dé ní dúhú-güedé yiqui cúnú-dé néhé-güedé cuáháⁿ, duha cúnaha-ndo xii-yu. ¹⁴ Te núu na nihí té Pilatú téé cùu gobiernú tnúhu nàcuáa cúnaha-ndo xii ñáyiú, te nchúhú cada ndáá-ndí ndihi-dé cuendá sá ñà túú nã cada ñaha-dé xii-ndo —càchí-güedé xáhaⁿ-güedé xii cue sandàdú-án.

¹⁵ Te cue sandàdú-án nĩ queheⁿ cuendá-güedé díhúⁿ, te ní xica-güedé cuáháⁿ-güedé te ní cáháⁿ-güedé nàcuáa ní xáhaⁿ cuè téé-án càháⁿ-güedé. Te nchaa ñáyiú isràél ní nñí-yu tnúhu ní cáháⁿ-güedé-án, te ðiu-ni tnúhu-án càháⁿ-yu ndéé vitna.

Jèsús xáhaⁿ-gã xii cue téé ní xica cuu ndihi-gã nàcuáa ndùu chiuⁿ cada-güedé

(Mr. 16:14-18; Lc. 24:36-49; Jn. 20:19-23)

¹⁶ Te ndí úxí ìíⁿ cue téé ní xica cuu ndihi Jèsús ní xica-güedé cuáháⁿ-güedé ìíⁿ yucu càa distritú Galileá núu nĩ xáhaⁿ-gã naníhí tnáhá-güedé ndihi-gã. ¹⁷ Te òré ní xiní-güedé Jèsús te ní chiñuhu ñaha-güedé xii-gã, dico dava-güedé sàni ìíⁿ sani úú

iní-güedé núu ðiu-gã àdi ñã díú-gã. ¹⁸ Te Jèsús ní sãndehe yatni-gã ndéé núu-güedé, te ní xáhaⁿ-gã xii-güedé:

—Yùhú ndécú ndihi-í tnúhu ndee ìní táxí tnùn-í cuèi andiu te cuèi ñuyíú-a.

¹⁹ Te vitna tàuchiuⁿ-í sá quihíⁿ-ndó nihíí ñuyíú càháⁿ-ndó tnúhu-í núu ñáyiú cuendá tuha ñàhá-yu xii-í, te dacuàndute-ndó-yu. Te òré ducaⁿ càda-ndo, te cacunehe-ndo tãtá-ó Dütú Ndiõxí ndihi yùhú Yaá cúú Dèhe-gã ndihi Espiritú-gã. ²⁰ Te cúnaha-ndo xii-yu sá ná càdá-yu nchaa nàcuáa sa ní dánèhé ñàhá-í xii-ndo càda-ndo. Te na càchí tnúhu-í sá cùndècu ndihi ñaha-ni-í xii-ndo ñuyíú-a ndéé ná sãà nduu nàa-xi —cachí-gã xáhaⁿ-gã xii-güedé. Te ducaⁿ na cùnduu.

TNÚHU NÍ CHÍDÓ TǸNÍ TẾ MÁCÚ

Tế Juàá tée dàcuandute ñaha xii ñáyiu cáhán-dé tnúhu Yá Ndiòxí xítí yucu

(Mt. 3:1-12; Lc. 3:1-9, 15-17; Jn. 1:19-28)

¹ Duha ní quesaha tnúhu sá cáhán nàcuáa naníhí tǎhú-ó tnúhu Xítóhó Jesucristú Déhe Yá Ndiòxí.

² Te ndí Chàíá tée ní xóo cáhán tnúhu Yá Ndiòxí ndéé sanaha ní chídó tǹnì ndí nàcuáa ní xáhaⁿ Yá Ndiòxí xii Déhe-gá, te duha ní xáhaⁿ-gá:

Tendaha-í ìnⁿ tée codonùu-dé núu-n, te dàtúha-dé ñáyiu cuendá tn̄i-yu tnúhu-n.

³ Te tée-ánⁿ quihí-dé xítí yucu te níhí cáhán-dé cúnaha-dé xii ñáyiu:

“Chí dǎná nchàa ichi cuehé ichi duha ndècu-ndo, te tn̄i-ndo ichi váha, te ducaⁿ càda-ndo cuendá cundecu túha-ndo, chí véxi Yáá ío cùnùu”, duha cúnaha-dé xii-yu.

Duha ndùu tnúhu ní chídó tǹnì ndí Chàíá nàcuáa ní xáhaⁿ Yá Ndiòxí xii Déhe-gá.

⁴ Te tée dii cuendá-xi ní ngódó tǹnì-ánⁿ naní-dé Juàá, te tée-ánⁿ ní xíhi-dé xítí yucu ní cáhán-dé tnúhu Yá Ndiòxí, te ní xóo dacuandute-dé ñáyiu, te duha ní xáhaⁿ-dé xii-yu:

—Chí dǎndìxi túu iní sá ñà túú quide váha-ndo ndècu-ndo, te daña-ndo nchàa ichi cuehé ichi duha te cuandute-ndo, te ducaⁿ te Yá Ndiòxí cada cǎhnu iní-gá nchaa yíca cuèchi-ndo —duha ní xáhaⁿ-dé xii-yu.

⁵ Te nchaa ñáyiu distrítú Jùdeá, ndíhi ñáyiu ñúú Jerusalén ní sáhán-yu ndéé yúte Jòrdán núu ndécú tē Juàá ní xínd-edóho-yu nchaa tnúhu ní cáhán-dé. Te cue ñáyiu ní náhmá nchaa yíca cuèchi-xi te ní dàcuandute ñaha-dé xii-yu.

⁶ Te té Juàá-ánⁿ ní xíhnu-dé dóó idi cǎméyu, te ìnⁿ ñi ní cuu pǎnú xítí-dé, te ní xóo caxi-dé tica làngóstá ndíhi ndudí ñúú cuéchi. ⁷ Te ní xáhaⁿ tùcu-dé xii ñáyiu:

—Nchícúⁿ ìnⁿ tée véxi, te tée-ánⁿ ìo-gá cúnùu-dé dàcúxí yúhú, chí yúhú cùu-í ìnⁿ tée duuⁿ duuⁿ ná túú tàú-í ngúnundeyi-í nandaxi cuèdicó ñi nihnu chàu-dé dico quide-í chiúⁿ-dé. ⁸ Te yúhú dàcuandute

ñaha-í xii-ndo, dico mee-dé taxi-dé Espiritú Yá Ndiòxí cundecu ndíhi-ndo —cǎchí-dé xáhaⁿ-dé xii-yu.

Sàndute Jesús

(Mt. 3:13-17; Lc. 3:21-22)

⁹ Te dàvá-ánⁿ ní quee Jèsús ñúú Nazàrèt ìnⁿ ñúú yíndèhu distrítú Galiléa cuáhán-gá yúte Jòrdán. Te yàcáⁿ ní dàcuandute ñaha té Juàá xii-gá. ¹⁰ Te òré ní nene-gá xítí ndute, te ní xini-gá nchí andíu, te ní quee Espiritú Yá Ndiòxí véxi cuuⁿ-xi ngúndecu ndíhi ñaha-xi xii-gá, te dàtná cáá ìnⁿ lómá cáá Espiritú-ánⁿ véxi cuuⁿ-xi. ¹¹ Te òré-ánⁿ ní tecú ní cáhánⁿ Yá Ndiòxí ndéé andíu, te xáhaⁿ-gá xii Jèsús:

—Yòhó cùu-n Déhe-í tée ío cùu iní-í te ío cùú ìnⁿ ñàhá-í xii-n —cǎchí-gá xáhaⁿ-gá.

Sácuíhna quidé yica-xi cada Jesús sá ñà túú tàú-gá cada-gá dico ñà túú ní quide-gá

(Mt. 4:1-11; Lc. 4:1-13)

¹² Te Espiritú Yá Ndiòxí ndécá-xí Jèsús cuáhánⁿ ìnⁿ xítí yucu. ¹³ Te xítí yucu-ánⁿ ío víhí quítì dééⁿ, te xíaⁿ ndécú Jèsús ní ngúfta sácuíhna quidé yica-xi cada-gá ìnⁿ sá ñà túú tàú-gá cada-gá dico ñà túú ní sàndáá iní-gá. Te cue espíritú xínú cuèchi núú Yá Ndiòxí ní xinu cuechi-xi núú-gá. Te ní xíndecu-gá údico nduu xítí yucu-ánⁿ.

Distrítú Galiléa ní chisaha Jèsús chiúⁿ ní tǎhú Tǎtá-gá Dútú Ndiòxí cada-gá

(Mt. 4:12-17; Lc. 4:14-15)

¹⁴ Te sátá ní ngava té Juàá vecaá, te Jèsús cuáhán-gá distrítú Galiléa dānehé-gá ñáyiu tnúhu váha, tnúhu sá cáhánⁿ nàcuáa ndíhu ndaha ñaha Yá Ndiòxí xii-yu. ¹⁵ Te xáhaⁿ-gá xii-yu:

—Vitna sa ní cuyatni nduu ndíhu ndaha ñaha Yá Ndiòxí xii-ndo, te chí dǎná nchàa ichi cuehé ichi duha ndècu-ndo, te quíndáá iní-ndó tnúhu váha, tnúhu sá cáhánⁿ nàcuáa naníhí tǎhú-ndó —cǎchí-gá xáhaⁿ-gá xii-yu.

Jèsús cáhán-gá cùmí tnàhá cue tée tn̄i chácá

(Mt. 4:18-22; Lc. 5:1-11)

¹⁶ Te Jèsús ñúhú-gá ichi cuáhán-gá tá yǎha-gá yuhu làgúná Galiléa, te ní xini-gá té Ximú ndíhi ñani-dé té Ndríxí xídáquèe-güedé ñunu-güedé xítí ndute tn̄i-güedé chácá, chí quítì tnàhí-ánⁿ cùú

chìuⁿ-güedé tñí-güedë-dí. ¹⁷ Te Jèsús ní xáhaⁿ-gá xii-güedé:

—Chí dáñá chiuⁿ quide-ndo-áⁿ, te quixi-ndo chitnahá ñáhá-ndó xii-í te taxi-í ingá núu chìuⁿ cada-ndo chi quíhíⁿ-ndó cáháⁿ-ndó ñáyiú cuendá dacuahá-yu tñúhu-í —càchí-gá xáhaⁿ-gá xii-güedé.

¹⁸ Te òré-ni-áⁿ ní dáñá cuè téé-áⁿ ñunu-güedé te ní tuha ñaha-güedë xii-gá.

¹⁹ Te cuáháⁿ-gá luha-gá, te ní xiní-gá té Jàcobó ndihi ñaní-dé té Juáá ñúhú-güedë xití bàrcú-güedé náticu-güedé ñunu-güedé, te ndí ndúú-güedé cuú-güedë déhe té Zebèdeú. ²⁰ Te ní cana ñaha-gá xii-güedé, te ní dándóo-güedé tátá-güedë ndihi cue téé xinu cuechi núu-güedë xití bàrcú, te ní tuha ñaha-güedë xii-gá.

Íⁿ téé yíhi ñaha espíritú cúndíhi yucu ñáváha

(Lc. 4:31-37)

²¹ Te ní quexio Jesús ndihi cue téé-áⁿ íⁿ ñúú nání Càpernaúm, te yàcáⁿ ndécú-gá ní tnahá nduu ndètatú ñáyiú, te cuánguihu-gá veñúhu ñáyiú isràél dānehé ñáhá-gá xii-yu. ²² Te xicuñúhu vihi-yu nchaa tñúhu cáháⁿ-gá, chi quide-gá sá cúú-gá íⁿ Yáá táxi tñúni víhi, te ñá túú dācuaha ñaha-gá xii-yu dàtná dācuaha ñaha cue téé dācuaha ñaha xii-yu nchaa tñúhu ní chidó tñúni ndíi Moisés. ²³ Te xití veñúhu-áⁿ ndécú tnahá íⁿ téé yíhi ñaha íⁿ espíritú cúndíhi yucu ñáváha, te espíritú-áⁿ ní quide-xi níhi ní cáháⁿ téé-áⁿ, te xáhaⁿ-dë xii Jèsús:

²⁴ —¿Te ná cuini yòhó Jèsús téé ñúú Nazàrét cada ñaha-n xii-ndí núu véxi-n núú ndécú-ndí-í? ¿Áⁿ véxi-n dānaa ñaha-n xii-ndí? Chi yúhú xiní ñáhà-í xii-n sá cúú-n íⁿ téé ñá túú tñahí cuéchi-xi, chi núú Yá Ndiòxí ní quee-n véxi-n ñuyú-a —càchí-dé xáhaⁿ-dë xii-gá.

²⁵ Dico Jesús ní tenàá-gá espíritú cúndíhi yucu ñáváha-áⁿ, te xáhaⁿ-gá:

—¡Cadí yuhu-n, te taquèe yiquí cuñú téé-áⁿ! —càchí-gá xáhaⁿ-gá xii espíritú-áⁿ.

²⁶ Te espíritú cúndíhi yucu ñáváha-áⁿ ní dácüyíhí ñáhá-xí xii téé-áⁿ, te ní dácáná sàa ñaha-xi, te ní quee-xi yiquí cùñú-dé cuáháⁿ-xi. ²⁷ Te nchaa ñáyiú xīndecu-áⁿ ìo ní cuñúhu-yu, te ní xitñahá-yu:

—¿Te nása ndùu-tu sá quidé téé-a? ¿Ndudú sáá cáháⁿ-tu-dé sánùu? Te quide-dé dàtná quidé íⁿ téé cūnuu vihi, chi cáháⁿ-ni-dé te sàndáá iní ñáhá nchaa espíritú cúndíhi yucu ñáváha —càchí-yu xitñahá-yu.

²⁸ Te ío ndíhi ní níhi nchaa ñáyiú dava-gá ñúú yíndèhu distritú Galilea tñúhu nchaa ñacuáa càháⁿ Jèsús ndihi nchaa sá quidé-gá.

Jèsús quidé tátna-gá nānā ñadíhi té Xímú (Mt. 8:14-15; Lc. 4:38-39)

²⁹ Te òré ní ndee Jèsús veñúhu cue ñáyiú isràél, te cuáháⁿ-gá ndihi té Jàcobó ndihi té Juáá vehe té Xímú ndihi té Ndríxi.

³⁰ Te nānā ñadíhi té Xímú cùhú-aⁿ ñúhu vihi-aⁿ cahni, te ndíhi-ni ní xáhaⁿ-güedë xii Jèsús sá cùhú-aⁿ. ³¹ Te ní sáháⁿ-gá núú cáá ñaha culú-áⁿ te ní tñii-gá ndaha-aⁿ ní ndocani ñaha-gá xii-aⁿ. Te òré-ni-áⁿ ní nchíco-aⁿ cahni, te ní ngúífta-aⁿ xinu cuechi-aⁿ núu-güedë ndíhi-gá.

Jèsús quidé tátna-gá vai ñáyiú cùhú (Mt. 8:16-17; Lc. 4:40-41)

³² Te òré sa cuini-xi cundiquíⁿ te ní quexio ñáyiú núú ndécú Jèsús, te nchaa ñáyiú cùhú ní dátacá-yu ndècá-yu ní sáá núú-gá, te tñahá cue ñáyiú yíhi ñaha espíritú cúndíhi yucu ñáváha ndècá-yu ní sáá núú-gá. ³³ Te nchaa ñáyiú ñúú-áⁿ ní chítú níhnú-yu yuyèhe vehe núú ní quexio Jesús. ³⁴ Te Jèsús ní quide tátna-gá nchaa ñáyiú cùhú cuéi ndí dííⁿ ndí dííⁿ núú cuèhé tñahá-yu íⁿ íⁿ-yu, te ní queñuhu-gá nchaa espíritú cúndíhi yucu ñáváha yíhi ñaha xii ñáyiú, te ñá túú ní dàña-gá cáháⁿ cue espíritú cúndíhi yucu ñáváha-áⁿ ni íⁿ tñúhu, te ducaⁿ ní quide-gá chi cue espíritú-áⁿ sa xiní-xi yoo cùu-gá.

Jèsús càháⁿ-gá tñúhu Yá Ndiòxí distritú Galilea

(Lc. 4:42-44)

³⁵ Te òré vátá tūndaá váha-gá ní ndacóo Jèsús cuáháⁿ-gá íⁿ xio yuhu ñúú núú ñà túú ñáyiú ndècu cuendá yàcáⁿ cáháⁿ ndíhi-gá Yá Ndiòxí. ³⁶ Te té Xímú ndihi cue téé cúndíhi-dé nándücu ñaha-güedë xii-gá. ³⁷ Te òré ní naníhí ñáhá-güedë xii-gá, te ní xáhaⁿ-güedë:

—Nchaa ñáyiú nānducu ñahá-yu xii-n —càchí-güedë xáhaⁿ-güedë xii-gá.

³⁸ Te ní xáhaⁿ-gá xii-güedë:

—Chí ná quíhíⁿ-ó nchàa ñúú xíndáa yatni-a, chi danèhé-í ñáiyu tnúhu Yá Ndióxi chi diu chiúⁿ-án vèxi-í —càchí-gá xáhaⁿ-gá xii-güedé.

³⁹Te Jèsús tá xica ndodo-gá cuáháⁿ nchaa ñúú yíndèhu distritú Galileá danèhé-gá ñáiyu, te ndí tnahá íⁿ ìⁿ ñúú sáá-gá te ducaⁿ cuànguihu-gá veñúhu-yu danèhé ñáhá-gá xií-yu tnúhu Yá Ndióxi, te cue ñáiyu yíhi ñaha espíritú cúndíhi yucu ñáváha ta queñuhu-gá nchaa espíritú-áⁿ yiqui cùñú-yu cuáháⁿ.

Jèsús quidé tātna-gá íⁿ tée tnahá cuéhé sá dátèhyú nihnu-xi yiqui cùñú-ó

(Mt. 8:1-4; Lc. 5:12-16)

⁴⁰Te ní quexio íⁿ tée tnahá cuéhé sá dátèhyú nihnu-xi yiqui cùñú-ó núú Jèsús, te ní ngúíni xítí-dé núú-gá cáháⁿ ndàhú-dé, te xáhaⁿ-dè xii-gá:

—Véxi-í cáháⁿ ndàhú-í núú-n núu vá cündèe íni-n càda tātna ñaha-n xii-í chi cùtnuní íni-í sá ndácú-n —càchí-dé xáhaⁿ-dè xii-gá.

⁴¹Te Jèsús ní cundáhú íni ñáhá-gá xii-dé te ní dácàa-gá ndaha-gá ní tendaha ñaha-gá xii-dé, te xáhaⁿ-gá:

—Cuu cada tātna ñaha-í xii-n, te vitna ndúha-n —càchí-gá xáhaⁿ-gá xii-dé.

⁴²Te òré-ni-áⁿ ní xócuíni cuéhé tnahá-dé. ⁴³⁻⁴⁴Te Jèsús ní cáháⁿ víhí-gá dóho-dé, te xáhaⁿ-gá xii-dé:

—Vitna cuanùhú-na, dico vá yóo íⁿ cùñaha-n sà ní quide tātna ñaha-í xii-n, te núú dütú-ni cuáháⁿ cuendá sá ná quíni ñáhá-dè xii-n sà ní ndúha-n te cuáha-n-dè sá ndúú táhú Yá Ndióxi dàtná ní cachí ndíi Moisés cuendá ná quíni ñáiyu sá ndàa ní ndúha-n —càchí-gá xáhaⁿ-gá xii-dé.

⁴⁵Te tée ní cuhú-áⁿ ní xica-dé cuáháⁿ-dè, te ní ngúíta-dé xáhaⁿ-dè xii nchaa ñáiyu ta nàníhí-dè nàcuáa ní quide Jèsús ní quide tātna ñaha-gá xii-dé. Te sá dúcáⁿ ní xíté nuu tée-áⁿ cuendú nàcuáa ní quide ñaha Jèsús xii-dé ní quide tātna ñaha-gá ní ndúha-dé, te xíáⁿ núu dayuhu ní xóo quíhu-gá dava ñúú núú ò vai ñáiyu ndèhe ñaha xii-gá, te ní xóo ndecucu-gá xítí yucu núú ñà túú ñáiyu ndècu. Te nchaa ñúú ní quee ñáiyu ní sáháⁿ-yu núú ndécú-gá ní cáháⁿ ndíhi ñáhá-yu xii-gá.

2

Jèsús quidé tātna-gá íⁿ tée cùhú ñá cúú-gá candá nihnu

(Mt. 9:1-8; Lc. 5:17-26)

¹Te sáta ní cuu íⁿ úú nduu sá ní quee Jèsús ñúú Capèrnaúm te ní nasáa tucu-gá, te cue ñáiyu ní níhí-yu tnúhu sá ní ndexio-gá núú quidé vehe-gá. ²Te ndíhi-ni ní tacá cuéhé víhí-yu, te ní chítú víhí-yu ndéé yuyèhe te ñá ní tnahá-gá-yu. Te ní ngúíta-gá ní danèhé ñáhá-gá xií-yu tnúhu Yá Ndióxi. ³Te òré-áⁿ ní quexio cúmi tnahá cue tée núú ndécú-gá nchídó-güedé íⁿ tée cùhú ñá cúú-gá candá nihnu-dé. ⁴Dico ñá túú ní ndàcu-güedé sáá-güedé ndéé núú-gá chi ío cuéhé ñáiyu ndècu. Te xíáⁿ núu ní sáá-güedé díquí véhé núú yíhí-gá-áⁿ ní caáⁿ-güedé, te ichi ndàa díquí véhé-áⁿ ní dáquèe-güedé tée cùhú-áⁿ, te ñuhu-dé íⁿ xító ní dáquèe ñaha-güedé ndéé núú-gá. ⁵Te Jèsús sa ní cutnùní íni-gá sá sàndáa íni ñáhá-güedé xii-gá núu ní xáhaⁿ-gá xii tée cùhú-áⁿ:

—Yòhó tée cùhú, sa ní quide càhnu íni-í nchaa cuéchi-n —càchí-gá xáhaⁿ-gá xii-dé.

⁶Te xíáⁿ xíncúo íⁿ úú cue tée dàcuaha ñaha xii ñáiyu nchaa tnúhu ní chídó tnùní ndíi Moisés, te sá dúcáⁿ ní cáháⁿ Jèsús núú cue tée-áⁿ ní sani íni-güedé: ⁷“Tée-a càháⁿ cuèhé-dé cuendá Yá Ndióxi duha càháⁿ-dè, chi vá yóo íⁿ ndàcu cada càhnu íni nchaa yíca cuéchi ñáiyu chi íⁿ díí-ni Yá Ndióxi quidé càhnu íni-gá”, duha ní sani íni-güedé. ⁸Dico òré-ni-áⁿ ní cutnùní íni Jèsús nàcuáa sàni íni-güedé, núu ní xáhaⁿ-gá xii-güedé:

—¿Te ná cuendá ducaⁿ sàni íni-ndó-í? ⁹Te sá dúhá ní xáhaⁿ-í xii tée cùhú-a sá ní quide càhnu íni-í nchaa yíca cuéchi-dé, te xíáⁿ nchòhó ñá túú cutnùní íni-ndó núu ndáa càháⁿ-í àdi ñá ndáa. Dico núu cúu-í-dé sá ndácóo-dé, te ndocani-dé xító ñuhu-dé véxi, te caca-dé, te cutnùní ndáa íni-ndó núu ndáa càháⁿ-í àdi ñá ndáa chi cundehe núú-ndó nàcuáa cada-í. ¹⁰Te vitna na càda-í nàcuáa cutnùní íni-ndó nchàa-ndo sá yúhú Tée cùu ñani tnahá-ndó nchàa-ndo ndecu ndíhi-í tnúhu ndee íni sá cadá càhnu íni-í nchaa cuéchi ñáiyu ñuyú-a —càchí-gá xáhaⁿ-gá xii-güedé.

Te sáta dúcáⁿ te ní xáhaⁿ-gá xii tée cùhú-áⁿ:

¹¹ —Ndacóo te ndocani-n xito ñuhu-n véxi-án, te núhú-n vehe-n —cachí-gá xáha-n-gá xii-dé.

¹² Te óré-ni-án ní ndacóo-dé, te ní ndocani-dé xito ñuhu-dé ní quexio-án, te ndèhe nchaa ñáyiú xíndecu-án ní ndee-dé tnuú-yu cuáhán-dé. Te sá dúcán ní quide Jèsús ní quide tátna-gá téé-án, xíán ío ní cuñúhu nchaa ñáyiú, te ní xítñahá-yu:

—Càhnu vihi cuu Yá Ndiöxí, chí ñá ííⁿ ndùu quini-ó dùha cuu datná ní cuu vitna —cachí-yu xítñahá-yu.

Jèsús càhán-gá ííⁿ téé nàni Levi

(Mt. 9:9-13; Lc. 5:27-32)

¹³ Te Jèsús cuáhán tucu-gá yuhu làgúná, te ío cuéhé ñáyiú ní sátnahá ñáhá xii-gá, te ní dánèhé ñáhá-gá xii-yu tñúhu Yá Ndiöxí.

¹⁴ Te óré ní yáha ní dánèhé ñáhá-gá xii-yu, te ní naqueheⁿ-gá ichi, te ní yáha yatni-gá ííⁿ xichi núú núcòo ííⁿ téé nàni Levi déhe ííⁿ téé nàni Alfeú quidé còbrá-dé ñáyiú cuèndá impuèstú chí còbrádór cúú-dé. Te óré ní xinií ñáhá-gá xii-dé, te ní xáha-n-gá:

—Néhé chitnahá ñáhá-n xii-í —cachí-gá xáha-n-gá xii-dé.

Te té Lèví-án ní ndacuíní-dé, te ní tuha ñaha-dé xii-gá.

¹⁵ Te té Lèví-án cuáhán-dé ndihi Jèsús vehe-dé. Te yíhi Jèsús mèsá xéxi-gá ndihi cue téé xica cuu ndihi-gá, te tñahá vai cue téé cuihna iní-xi quide còbrá ñáhá xii ñáyiú cuèndá impuèstú, ndihi dava-gá cue téé ndècu ichi cuéhé ichi duha núcòo ndihi ñaha-güedé xii-gá xéxi ndihi ñaha-güedé, te ducaⁿ chí ío vai ñáyiú nchicúⁿ ñáhá xii-gá. ¹⁶ Te sá ní xinií cue téé dàcuáha ñaha xii-yu nchaa tñúhu ní chídó tñuní ndíi Moisés, ndihi cue téé cùu fariséú xéxi Jèsús ndihi nchaa cue téé-án núu ní xicáⁿ tñúhú-güedé núu cuè téé xica cuu ndihi-gá, te xáha-n-güedé:

—¿Ná cuèndá ducaⁿ quide téé cùu mestrú-ndó xèxi-dé ndihi cue téé cuihna iní-xi quide còbrá ñáhá xii ñáyiú cuèndá impuèstú, ndihi nchaa dava-gá cue téé ndècu ichi cuéhé ichi duha-i? —cachí-güedé xáha-n-güedé.

¹⁷ Te Jèsús ní tecú dóho-gá nàcuáa ndùu tñúhu ní xáha-n-güedé xii cue téé xica cuu ndihi-gá, núu ní xáha-n-gá xii-güedé:

—Nchaa ñáyiú ñá túú cùhú chí ñá túú xini ñuhú-yu ñátátná, dico nchaa ñáyiú cùhú chí xini ñuhú-yu ñátátná. Te yúhú

véxi-í càhán-í ñáyiú cùtñuní iní-xi sá ndécú cuèchi-xi te ñá túú véxi-í càhán-í ñáyiú càchí sá ñá túú ndècu cuèchi-xi —cachí-gá xáha-n-gá xii-güedé.

Cuèndá cue ñáyiú ñá túú tñahí ná xéxi áma càhán ndihí-yu Yá Ndiöxí

(Mt. 9:14-17; Lc. 5:33-39)

¹⁸ Te cue téé xica cuu ndihi té Juáá, ndihi cue téé xica cuu ndihi cue téé cùu fariséú ñá túú tñahí ná xéxi-güedé áma càhán ndihi-güedé Yá Ndiöxí. Te ííⁿ nduu ducaⁿ xíquide-güedé, te ní sáhán ñáyiú ní xicáⁿ tñúhú-yu núú Jèsús, te xáháⁿ-yu xii-gá:

—Cuíní-ndí cachí tñúhu-n ná cuèndá cue téé xica cuu ndihi té Juáá, ndihi cue téé xica cuu ndihi cue téé cùu fariséú ñá túú tñahí ná xéxi-güedé áma càhán ndihi-güedé Yá Ndiöxí, te cue téé xica cuu ndihi-n ñá túú dùcán quide-güedé —cachí-yu xáháⁿ-yu xii-gá.

¹⁹ Te Jèsús ní xáha-n-gá xii-yu:

—Nchòhó xinií-ndó sá vā cúú cūñaha-o xii ñáyiú ñuhu vico tñandaha sá vā cúú caxí-yu ñini ndècu ndihi ñaha téé tñandaha xii-yu. ²⁰ Dico sáá nduu te vā cùndècu ndihi ñaha-gá téé tñandaha-án xii-yu, te dàvá-án te cahni iní-yu vā caxí-yu cuèndá sá ndihú iní-yu.

²¹ Te vā yòo ííⁿ dándée luha dóó sáá ííⁿ dóó sa ní cuu tñúhú vhií, chí dóó sáá-án nàndiyi-xi te uuⁿ-gá ndata-xi dóó sá ní cuu tñúhú-án. ²² Te ní vā yòo ííⁿ chihí ndidí sáá xití ííⁿ lamba sa ní cuu tñúhú vhií, chí núu yoo ducaⁿ na càda te ndava lamba sa ní cuu tñúhú-án, chí ío ñihi yócó ndidí-án, te cuíta-ni ndidí-án te cuíta-ni lamba-án te núu ducaⁿ na càdá-yu. Núu xíáⁿ xinií ñuhu-xi quée ndidí sáá-án xití ííⁿ lamba saa —cachí-gá xáha-n-gá xii-yu.

Cue téé xica cuu ndihi Jèsús sàhnú-güedé yoco tríú nduu ndetatuí ñáyiú

(Mt. 12:1-8; Lc. 6:1-5)

²³ Te ííⁿ nduu cùu-xi nduu ndetatuí ñáyiú ñuhu Jèsús ichi ndihi cue téé xica cuu ndihi-gá, te ta yáha-gá ndihi-güedé ííⁿ xichi núú cáá tríú, te ní ngúita-güedé sàhnú-güedé yoco tríú-án. ²⁴ Te cue téé cùu fariséú ní xáha-n-güedé xii-gá:

—¿Ná cuèndá ducaⁿ quide cue téé xica cuu ndihi-n sàhnú-güedé yoco tríú vitna cùu-xi nduu ndetatuí-i? Te ñá túú

tàu-güedé ducaⁿ cada-güedé —càchí-güedé xáhaⁿ-güedé xii-gá.

²⁵ Te ní xáhaⁿ-gá xii-güedé:

—¿Te náa vátá dácuàha tnahi-gá-ndó núu tütú Yá Ndiöxí núu càháⁿ-xi nácuáa ní quide ndíi Dávíí cúnàhá ní xíhí ndíi docó ndíhi cue téé ní xica cuu ndíhi ndíi-áⁿ?

²⁶ Te dàvá-áⁿ ní xíndecu ìⁿ téé ní xínani Abiátár ní cuu-dé dútú cúnúu, te ndíi Dávíí ní quíhu ndíi xití vehe Yá Ndiöxí ní queheⁿ ndíi pàá ní cuu íí ndécú-áⁿ ní dácáhiu ndíi cue téé ní xica cuu ndíhi ndíi ní xexi ndíi ndíhi-güedé, te mee-ni cuè dütú tàu-güedé caxi-güedé pàá-áⁿ ní cùu —càchí-gá xáhaⁿ-gá xii-güedé.

²⁷ Te ní xáhaⁿ tucu Jesús xii-güedé:

—Mee Yá Ndiöxí ní taxi ndecu-gá nduu ndetátú ñáyi, te ñá túú ní càchí-gá sá méé-yu nándí cani iní-yu cadá-yu canehe ñi-yu nduu ndetátú-yu-áⁿ. ²⁸ Te yúhú Téé cùu ñaní tnahá-ndó nchàa-ndo, tnahá-í ndécú ndíhi-í tnúhu ndee iní sá cùu-í nchaa ñáyi nácuáa cadá-yu nduu ndetátú-ó-áⁿ —càchí-gá xáhaⁿ-gá xii-güedé.

3

Ìⁿ téé ní yíhí ìⁿ xio ndaha-xi
(Mt. 12:9-14; Lc. 6:6-11)

¹ Te Jesús cuánguihu tucu-gá xití veñúhu, te xití veñúhu-áⁿ ndécú ìⁿ téé ní yíhí ìⁿ xio ndaha-dé. ² Te xíáⁿ ndécú cuè téé xito dayuhu ñaha xii-gá, te núu cada tátna-gá téé cùhú-áⁿ nduu cùu-xi nduu ndetátú-güedé ndíhi ñáyi, cuendá ducaⁿ te níhí-güedé nácuáa cada-güedé cacáⁿ cuéchi-güedé cuendá-gá. ³ Te ní xáhaⁿ-gá xii téé cùhú ndaha-xi-áⁿ:

—Ndacuñí te ngúnutnii-n cuádava iha —càchí-gá xáhaⁿ-gá xii-dé.

⁴ Te ní xíacáⁿ tñuhú-gá núu-güedé, te xáhaⁿ-gá:

—Chí càchí tñúhu ná cúú sá cúú cada-o nduu ndetátú-ó. ¿Sá vaha ñá sá cuéhé? ¿Sá cadá tátna-o ñáyi cùhú ñá sá cáhmi-ó-yu? —càchí-gá xáhaⁿ-gá xii-güedé.

Dico ni ìⁿ-güedé ñá túú tnahí ní càháⁿ-güedé. ⁵ Te Jesús ní xíndéhé vaha-gá núu nchàa-güedé te ní cudééⁿ-gá, te ní ndíhú iní-gá chí ío sàá iní-güedé, te ní xáhaⁿ-gá xii téé cùhú ndaha-xi-áⁿ:

—Ndocani ndaha-n —càchí-gá xáhaⁿ-gá xii-dé.

Te ní ndocani-dé ndaha-dé, te òré-ni-áⁿ ní ndúha. ⁶ Te cue téé cùu fariséú ní xica-güedé cuáháⁿ-güedé ìⁿ xichi núú ní naníhí tnahá-güedé ndíhi cue téé cùndíhi té Hérodés cuendá ndatnúhu-güedé nása cada-güedé cahni-güedé Jèsús.

Cuéhé víhí ñáyi ní quexio yuhu lagúná

⁷ Te Jèsús ní xica-gá cuáháⁿ-gá ndíhi cue téé xica cuu ndíhi-gá yuhu làgúná distritú Galileá, te ío cuéhé ñáyi distritú-áⁿ nchicúⁿ ñáhá-yu xii-gá cuáháⁿ. ⁸ Te núú ní quexio-gá-áⁿ ní sáháⁿ ñáyi distritú Jùdeá, ñáyi ñuú Jerusalén, ñáyi distritú Idúmeá, ñáyi xíndecu ndaa ingá xio yúte Jòrdán, ndíhi ñáyi xíndecu yatni ñuú Tírú ndíhi ñuú Sidón, te ducaⁿ ío váf-yu ní sáháⁿ núu ndécú-gá chí ní níhí-yu tñúhu nchaa nácuáa quide-gá. ⁹ Te Jèsús ní xáhaⁿ-gá xii cue téé xica cuu ndíhi-gá sá cadá tñha-güedé ìⁿ bàrcú cuendá caa-gá núu-xi cuendá sá vā dádèhnde ñáhá-yu xii-gá chí ío cuéhé-yu. ¹⁰ Te sá dúcáⁿ ní níhí-yu tñúhu sá quidé tátna-gá ñáyi cùhú, núu xíáⁿ nchaa dava-gá ñáyi cùhú súúni dicó ngónchíhi tnahá-yu cuáháⁿ-yú núu ndécú-gá cuíni-yu tñándeé ñáhá-yu xii-gá cuendá sá cuíni-yu ndúha-yu. ¹¹ Te cue ñáyi yíhi ñaha espíritu cùndíhi yucu ñávaha ní sanu xití ñaha-xi xii-yu núu Jèsús òré ní xini ñáhá-xí xii-gá, te xíáⁿ ní quide níhí ní càháⁿ-yú, te xáháⁿ-yú xii Jèsús:

—¿Yòhó cúu-n Dèhe Yá Ndiöxí! —càchí-yu xáháⁿ-yú xii-gá.

¹² Te Jèsús ní tenáá-gá nchaa espíritu cùndíhi yucu ñávaha-áⁿ, te ní xáhaⁿ-gá xii nchaa ñáyi ní xíhi-xi-áⁿ sá vā càháⁿ-yú núu ñáyi yoo cùu-gá.

Jèsús caxi-gá úxúu tnahá cue téé dacuàha ñaha xii ñáyi tñúhu-gá

(Mt. 10:1-4; Lc. 6:12-16)

¹³ Te sáta dúcáⁿ ní cuu te Jèsús ní sáá-gá ìⁿ yucu, te xíáⁿ ndécú-gá ní cana-gá nchaa cue téé càchí iní-gá. Te òré ní quexio nchaa cue téé-áⁿ núu-gá, ¹⁴ te ní caxi-gá úxúu tnahá cue téé caca cuu ndíhi-gá, te diu-ni cue téé-áⁿ tendaha-gá quíhíⁿ-güedé càháⁿ-güedé tñúhu-gá núu ñáyi. ¹⁵ Te ní sáñaha-gá xii-güedé tñúhu ndee iní cundecu ndíhi-güedé cuendá cada tátna-güedé ñáyi cùhú, ndíhi cuendá queñuhu-güedé nchaa espíritu cùndíhi yucu ñávaha yíhi

ñaha xii ñáiyu. ¹⁶ Te duha xñani ndi ùxúú cue tée-án: ñⁿ-dé nání-dě Xímú, te mee-gá ní taudiu ñaha-gá xii-dé sá cúnani-dé Pèlú. ¹⁷ Te ingá-dé nání-dě Jàcobó, te ingá-dé nání-dě Juáá, te ñani té Jàcobó-án cúú tē Juáá te ndi ndùú-güedé cúú-güedè déhe té Zebèdeú, te ndi ndùú cue tée-án ní dánani ñaha Jesús xii-güedé Boanergés, te tnúhu-án quée-xí: Cue tée ío yáchi cúdeéⁿ, duha quèe-xi tnúhu-án. ¹⁸ Te duha xñani dāva-gá-güedé: Té Ndríxi, té Lipé, té Bar-tolómé, té Mátéu, té Mǎxí, té Jàcobó déhe té Àlfeú, té Tàdeú, té Xímú tée ní cundihi cue tée cananistá ní cùu, ¹⁹ ndihi té Júdás Iscarioté tée ní sáá nduu ní sáha cuendá ñáhá xii Jesús núú cuè tée cùu úhú iní ñáhá xii-gá, duha xñani cuè tée ní caxi Jèsús ní xica cuu ndihi-gá.

Càchí-güedé sá ndécú ndihi Jesús yucu ñávaha dico ñá ndáá

(Mt. 12:22-32; Lc. 11:14-23; 12:10)

Te sáta dúcáⁿ te cuáháⁿ-gá ndihi-güedé núú quidé vehe-gá. ²⁰ Te ío vai ñáiyu ní tacá-ni tucú-yu xíáⁿ, te ni ñá ní ñíhí-gá nása cada-gá caxi-gá ndihi cue tée xica cuu ndihi-gá cuendá sá ío vai-yu. ²¹ Te cue ñáiyu cùu ndi mee Jesús ní ñíhí-yu tnúhu nchaa nàcuáa cùu, te nchaa ñáiyu ñá cùtnuní váha iní-xi ní cachí-yu sá ní nduu lùcú-gá núu xíáⁿ cuáháⁿ ñáiyu cùu ndi mee Jesús núú ndécú-gá cuendá candeca ñáhá-yu xii-gá núhú ní cùu.

²² Te cue tée dācuaha ñaha xii ñáiyu nchaa tnúhu ní chídó tnùní ndí Moisés véxi ndéé ñuú Jerusalén ní cáháⁿ cuèhé-güedé cuendá Jèsús, chi ní xít-ñaha-güedé:

—Tée-a ndècu ndihi-dé sácuíhná, te diu xíáⁿ chindèe ñaha-xi xii-dé queñuhu-dé nchaa espíritú cundíhi-xi yíhi ñaha xii ñáiyu, te diu-ni-xi táxi tnuní-xi nchaa espíritú-án —duha ní xítñaha-güedé.

²³ Te Jèsús ní cana ñaha-gá xii-güedé, te ní caní-gá ñⁿ cuendú núú-güedè nàcuáa tecú tnùní-güedé tnúhu-gá, te xáhaⁿ-gá xii-güedé:

—¿Te nása cada sácuíhná queñuhu-xi cue espíritú cundíhi-xi yíhi ñaha xii ñáiyu-í? ²⁴ Te nchòhó xini-ndó sá núu ñⁿ tée yindaha ñⁿ nacióⁿ vá cúú ñⁿnuu-dé ndihi cue tée cundíhi-dé, te vá cúdii-dé cunuú-dè. ²⁵ Te diu-ni ducaⁿ sátnahá-xi cùu

tucu ñáiyu xñdecu ñⁿ-ni vehe, chi núú vá cúú ñⁿnuu-yu, te vá cúdii-yu cundecu càhnú-yu. ²⁶ Te núú sácuíhná ñá túú cùu ñⁿnuu-xi ndihi cue espíritú cundíhi-xi, te vá cúdii-xi cundecu-xi taxi tnùní-xi te núú ducaⁿ quide-xi.

²⁷ Te nchòhó xini-ndó sá cuè ñadúhú chi vá ndácú-güedé cuendá-ni quíhu-güedé duhu-güedé vehe ñⁿ tée ío ndee, chi díhna-gá xini ñuhu-xi tnii-güedé tée-án dacùtu ñaha-güedé xii-dé dàtnuní ducaⁿ te ndacu-güedé duhu-güedé nchaa sá ndécú ndihi-dé.

²⁸ Te na càchí tnúhu ndáá-í xii-ndo sá ncháá sá cuèhé sá dúhá quide ñáiyu, ndihi nchaa tnúhu cuèhé tnúhu duha càháⁿ-yu cuendá Yá Ndióxi cuu cada càhnu iní-gá. ²⁹ Dico cue ñáiyu na càháⁿ cuèhé cuendá Espíritú Yá Ndióxi, ñáiyu-án vā cadá càhnu iní ñáhá tnáhi-gá xii-yu, chi cundecu-ni cuèchi-yu núú-gá ní caa ní quíhíⁿ —càchí-gá xáhaⁿ-gá xii-güedé.

³⁰ Te ducaⁿ ní cáháⁿ-gá chi càchí-güedé sá ndécú ndihi-gá espíritú cundíhi yucu ñávaha.

Náná Jèsús ndihi cue ñani-gá

(Mt. 12:46-50; Lc. 8:19-21)

³¹ Te ní quexìo náná Jèsús ndihi cue ñani-gá núú ndécú-gá xñnutnii-yu quehé, te ní xáháⁿ-yu xii ñⁿ ñáiyu xñdecu-án sá dáyáha-yu tnúhu núú-gá cuendá quee-gá ndatnúhu ndihi ñaha-gá xii-yu. ³² Te cue ñáiyu xñucóo ní càndéé ñíhí-gá ní xáháⁿ-yu xii-gá:

—Náná-n ndihi cue ñani-n ndécú-yu quehé nánducu ñahá-yu xii-n —càchí-yu xáháⁿ-yu xii-gá.

³³ Te Jèsús ní xáhaⁿ-gá xii-yu:

—Te cachí tnúhu-ndo yòndí-gá ñáiyu cùu datná náná-í ndihi datná cue ñani-í —càchí-gá xáhaⁿ-gá xii-yu.

³⁴ Te dàtnuní ní xindéhé vāha-gá núú nchaa ñáiyu xñucóo ní càndéé ñíhí-gá-án, te ní xáhaⁿ-gá xii-yu:

—Nchaa ñáiyu-a cùu-yu datná náná-í ndihi datná cue ñani-í. ³⁵ Chi nchaa ñáiyu quide nàcuáa càháⁿ Yá Ndióxi, ñáiyu-án cùu-yu datná cue ñani-í, ndihi datná cue cùha-í, ndihi datná náná-í —càchí-gá xáhaⁿ-gá xii-yu.

4

Nàcuáa quide tée cuángacáⁿ triú

(Mt. 13:1-9; Lc. 8:4-8)

¹ Te Jèsús ní ngúíta-gá dácuaàhà tucu-gá ñáiyu yuhu làgúná. Te cuéhé víhí-yu ní tacá xiáⁿ núu cuásaá-gá núu ìⁿ bàrcú nútní xítí ndute làgúná-áⁿ, te núu xiáⁿ ní ngóo-gá te ní ngúíta-gá dánèhè ñáhá-gă xíí-yu, te nchaá-yu xíxúcu-yu yuhu làgúná-áⁿ.

² Te ní ngúíta-gá ní caní-gá titní cuèndú núu-yu nàcuáa tecú tñuní-yu tñúhu-gá, te xáhaⁿ-gă xíí-yu:

³ —Chí cùndedóho váha ìⁿ cuèndú ná càni-í-a. ìⁿ tée cuángacáⁿ-dé triú. ⁴ Te òrè ní ngúíta-dé dāngoyo-dé triú-áⁿ, te dava ní quene ndava ní ngava ndéé ichi, te ní xiní cue tílaá te ní nadatàcà-güedi. ⁵ Te dava ní ngava ñuhu yadi núu yíhí víhi yúú, te ndíhi-ni ní xínu-xi cuèndá sá ñà túú càvìhi ñuhu. ⁶ Dico òrè ní nayehe ñà túú ní cùndee iní-xi chí ní yíhí-xi, chí ñà túú ní níhí quíhíⁿ cùnú yóho-xi. ⁷ Te dava ní ngava núu yúcu ndíquíⁿ tnu ñnu, te ìⁿ nuu-ni ní xínu-xi ndíhi tnu ñnu, te tnu ñnu-áⁿ ní sahnu-xi te ní dánáá-xí nchàa triú sá ní xínu-áⁿ. ⁸ Dico dava triú-áⁿ ní ngava-xi núu ndécú ñuhu cocoⁿ, te xiáⁿ ní xínu-xi te ní sahnu-xi te ío váha ní cuu, chí núu ìⁿ-ní triú-áⁿ te dava yoco-xi ní ngúíhi ócò úxí triú-xi, te dava yoco-xi ní ngúíhi únídico triú-xi, te dava yoco-xi ní ngúíhi ìⁿ cièndú triú-xi —càchí-gá xáhaⁿ-gă xíí-yu.

⁹ Te xáhaⁿ tucu-gá xíí-yu:

—Nchaa nchòhó ñáiyu ní xíndedóho nchaa tñúhu ní cáháⁿ-í-a, te ío váha chí cuáha cuèndá —càchí-gá xáhaⁿ-gă xíí-yu.

Jèsús càháⁿ-gá ná cuèndá ducaⁿ càni-gá cuèndú

(Mt. 13:10-17; Lc. 8:9-10)

¹⁰ Te sátá ní ndaca ñáiyu-áⁿ te ní quendóo mee-ná Jèsús ndíhi cue tée xica cuu ndíhi-gá, ndíhi ìⁿ úú-ná ñáiyu. Te ñáiyu-áⁿ ndíhi cue tée-áⁿ ní xícáⁿ tñúhú-yu ndíhi-güedé núu-gă, núu nása quèe-xi cuèndú ní caní-gá núu-yu ndíhi-güedé. ¹¹ Te ní xáhaⁿ-gă:

—Nchòhó chí sa càchí tñúhu Yá Ndiòxí xii-ndo ìⁿ sá vátá quíní-gá-ndó, chí càchí tñúhu-gá nàcuáa cada-gá ndíhu ndaha-gă ñáiyu, dico dava-gá ñáiyu càni-í mee-ni

cuèndú núu-yu. ¹² Chi cuéi na quíní-yu nchaa nàcuáa cuu dico ní vă cútñuní iní-yu ná cuèndá ducaⁿ cùu, àdi cuéi na cùndedóho-yu dico ní vă tècú tñuní-yu. Te ducaⁿ ndòhó-yu cuèndá sá vă quíndáá iní-yu Yá Ndiòxí, ndíhi cuèndá sá vă cádá càhnu iní-gá nchaa yícá cuèchi-yu —càchí-gá xáhaⁿ-gă xíí-yu ndíhi-güedé.

Jèsús càháⁿ-gá nàcuáa quèe-xi cuèndá tée cuángacáⁿ triú

(Mt. 13:18-23; Lc. 8:11-15)

¹³ Te ní xáhaⁿ tucu Jèsús xii cue tée xica cuu ndíhi-gá, ndíhi cue ñáiyu-áⁿ:

—Nchòhó, ñà túú ní tècú tñuní-ndó cuèndú ní caní-í núu-ndó, te núu ducaⁿ, ¿te nása tecú tñuní-ndó dāva-gá cuèndú caní-í núu-ndó-í? Te na càchí tñúhu-í xii-ndo nàcuáa quèe-xi cuèndú ní caní-í núu-ndó. ¹⁴ Te tée cuángacáⁿ triú-áⁿ cúú-dé dàtná ìⁿ tée cuáháⁿ càháⁿ tñúhu Yá Ndiòxí núu ñáiyu. ¹⁵ Te triú-áⁿ cúú-xí dàtná tñúhu Yá Ndiòxí, te triú sá ní quene ndava ní ngava ndéé ichi, xiáⁿ cúú-xí dàtná ñáiyu ní tnahá iní-xi tñúhu Yá Ndiòxí, dico sácúíhná cuáháⁿ-xi xòcāni-xi tñúhu-gá iní-yu cuèndá sá vă cānchícúⁿ ni-hnú-yu nàcuáa càháⁿ tñúhu-áⁿ. ¹⁶ Te triú sá ní ngava ñuhu yadi núu yíhí víhi yúú, xiáⁿ cúú-xí dàtná ñáiyu ní xíndedóho tñúhu Yá Ndiòxí te díí ñni ní tñií-yu tñúhu-gá. ¹⁷ Dico òrè ná ngúíta ñáiyu cúcuéhé ñáhă-yu xíí-yu àdi nándí-gá sá yáha-yu sá cuèndá tñúhu-gá, te ñà cùndee iní-yu chí dàñá-yu tñúhu-gá cuèndá sá ñà túú ñihí ndéé-yu.

¹⁸ Te triú sá ní ngava núu yúcu ndíquíⁿ tnu ñnu xiáⁿ cúú-xí dàtná ñáiyu ní tecú dóho-xi tñúhu Yá Ndiòxí, ¹⁹ dico cuèé cuèé ní nacua-naá-yu tñúhu-gá, chí cuèndá mee-ni sá cúú-xí mèe-yu ñuhu iní-yu, ndíhi cuèndá sá ýo sàni iní-yu cuu cuicá-yu, ndíhi cuèndá sá ýo cùdíí iní-yu nchaa sá ío ñuyúú-a, te ñà túú ñuhu iní-yu tñúhu sá ní xíndedóho-yu-áⁿ nàcuáa cada váha-yu cundecú-yu. ²⁰ Dico triú sá ní ngava núu ndécú ñuhu cocoⁿ, xiáⁿ cúú-xí dàtná ñáiyu ní xíndedóho tñúhu Yá Ndiòxí te quidé-yu nchaa nàcuáa càháⁿ tñúhu-áⁿ. Te cada iní-ndó sá ñáiyu-áⁿ cúú-yu dàtná triú sá ní ngúíhi yoco-xi ócò úxí triú-xi, ndíhi triú sá ní ngúíhi yoco-xi únídico triú-xi, ndíhi triú sá ní ngúíhi yoco-xi ìⁿ cièndú triú-xi. Te ducaⁿ

sãtnhá-xi cùu-yu chi ío váha quidé-yu —cächí-gá xáhaⁿ-gã xii cue téé xica cuu ndihí-gá ndihí cue ñáyiú-án.

*Cuèndá ití
(Lc. 8:16-18)*

²¹ Te xáhaⁿ-gã xii nchaa ñáyiú:

—Ná túú nì ìⁿ ñáyiú tènùhú ití te chiváha-yu ìⁿ xítí quídí, àdi chiváha-yu ìⁿ caha càamá, chi tàxi ndecú-yu ìⁿ núú dùcúⁿ cuèndá cutnùní núú nchaa ñáyiú. ²² Te nì ìⁿ tnúhu sá ñã təcú tnùní ñáyiú vitna cachí-ó sã vã təcú tnùní-yu chi dacuití sã təcú tnùní-yu, te nì ìⁿ tnúhu sá cächí-ó cùu yuhu vitna vá cúú yùhu chi dacuití sã quée tùu-xi núú ñáyiú. ²³ Te nchòhò cue ñáyiú ní xíndedóho nchaa tnúhu ní cáháⁿ-í-a, te ío váha chí ná cuáha cuèndá —cächí-gá xáhaⁿ-gã xii-yu.

²⁴ Te ní xáhaⁿ tucu-gá:

—Ío váha chí cùndedóho tnúhu na cáháⁿ-í-a. Te nàcuáa-ni quide-ndo danehé-ndó ñáyiú tnúhu Yá Ndióxi, te diu-ni ducaⁿ càda ñaha-gá xii-ndo, te uuⁿ-gá ducaⁿ càda-gá sá cúú-xí-ndó. ²⁵ Te nchaa nchòhò ñáyiú təcú tnùní tnúhu Yá Ndióxi, uuⁿ-gá cuita tecú tnùní-ndó tnúhu-gá quíhíⁿ. Te nchaa nchòhò ñáyiú ñã túú təcú tnùní tnúhu-gá, te uuⁿ-gá vá təcú tnùní-ndó —cächí-gá xáhaⁿ-gã xii-yu.

Nàcuáa sàhnu triú

²⁶ Te Jèsús xáhaⁿ tucu-gá:

—Na càni-í ìⁿ cuèndú núú-ndó cuèndá tecú tnùní-ndó nàcuáa cada-xi òré ndíhu ndaha ñaha Yá Ndióxi xii ñáyiú. ìⁿ téé cuángacáⁿ-dé triú. ²⁷⁻²⁸ Te sáta ñí yáha ní sacáⁿ-dé triú-án, te cuánuhú-dé vehe-dé ndétátú-dé. Te ducaⁿ-ni ta xica nduu cuáháⁿ te ní xínu triú-án, te nàcuáa ta sàhnu-xi cuáháⁿ te ta quée ndaha-xi, te ducaⁿ-ni cùu ní sáá nduu ní quene yoco-xi te ní nguíhi triú-xi, dico téé ní sacáⁿ triú-án ñã túú xini-dé nása ní sahnu-xi, chi mee ñùhu ní quide-xi ní sahnu triú-án. ²⁹ Te òré sa ní ndihí ní cuaaⁿ te ní nguíta téé ní sacáⁿ-án náquèhndé-dé nètáxi tñaha-dé —cächí-gá xáhaⁿ-gã xii-yu.

*Cuèndá ndíquíⁿ yutnu nàni mostázá
(Mt. 13:31-32; Lc. 13:18-19)*

³⁰ Te xáhaⁿ tucu Jèsús xii-yu:

—Na càni tucu-í ingá cuèndú núú-ndó cuèndá tecú tnùní-ndó nàcuáa cada-xi òré

ndíhu ndaha ñaha Yá Ndióxi xii ñáyiú.

³¹ ìⁿ yutnu nàni mostázá cúú-xí ìⁿ yutnu sá líhli vihi-gá ndíquíⁿ-xi dàcúúxí ndíquíⁿ nchaa cùhú, ³² dico òré ná càcáⁿ-güedé núú ñùhú-güedé, te na xínu-xi te sàhnu-gá-xi dàcúúxí nchaa cùhú, te nchaa dité-xi ío cùu cahnu-xi, te ndéé cue quiti ndava núú tàchí sácòo-güedi nchaa núú dité-xi xínu ndeti-güedi —cachí-gá xáhaⁿ-gã xii-yu.

*Ío títíni cuèndú ní cani Jèsús núú ñáyiú
(Mt. 13:34-35)*

³³ Te ío-gá vai cuèndú ní cani Jèsús núú ñáyiú cuèndá tecú tnùní-yu tnúhu Yá Ndióxi, dico dava cuèndú ñã túú ní càni-gá núú-yu, chi ní cutnùní iní-gá sá vã təcú tnùní-yu nchaa. ³⁴ Te mee-ni cuèndú ní cani Jèsús núú ñáyiú ndi tñahá òré ní dánèhé ñáhá-gã xii-yu tnúhu-gá. Te òré ndécú mèe Jèsús ndihí cue téé xica cuu ndihí-gá, te ní xáhaⁿ-gã xii-güedé nàcuáa quèe-xi ìⁿ cuèndú ní cani-gá núú ñáyiú.

*Jèsús ngáni-gã táchí ndihí ndute làgúná
(Mt. 8:23-27; Lc. 8:22-25)*

³⁵ Te diu-ni nduu-án òré sa ta cùndiquíⁿ cuáháⁿ ní xáhaⁿ Jèsús xii cue téé xica cuu ndihí-gá:

—Chí ná quíhíⁿ-ó ndaa ingá xio yuhu làgúná —cächí-gá xáhaⁿ-gã xii-güedé.

³⁶ Te ní quide ndee iní-gá nchaa ñáyiú xixúcu-án, te diu-ni bàrcú sá ñùhú-gã òré ní dánèhé-gã ñáyiú tnúhu-gá diu-ni xíãⁿ ní dácacá cuè téé xica cuu ndihí-gá ndécá ñaha-güedé xii-gá cuáháⁿ, te tñahá ìⁿ úú-gá bàrcú ní xica-xi nchicúⁿ-xi bàrcú ñùhú-gã-án cuáháⁿ. ³⁷ Te ñùhu bàrcú ñùhú-gã-án ichi cuáháⁿ-xi núú ndute, te ní quexio ìⁿ táchí ñíhi, te ta nàdachitú-xi ndute xití bàrcú-án cuáháⁿ, te sa cuiní-ná-xi quée naa bàrcú-án xití ndute ni cùu. ³⁸ Te Jèsús cáá-gã xidí-gá ìⁿ xichi ndaa sáta bàrcú-án, te yinchihí ìⁿ dóó díquí-gã. Te sá dúcáⁿ cuiní-xi quée naa bàrcú-án núu ní sáháⁿ-güedé ní ndocani ñaha-güedé xii-gá, te xáhaⁿ-güedé:

—¡Mèstru, ndiquíú iní! ¡Náa ñã túú ndíhú iní-n sã tá quée naa-o cuáháⁿ-án? —cächí-güedé xáhaⁿ-güedé xii-gá.

³⁹ Te Jèsús ní ndiquíú iní-gá te ní ndacóo-gá, te ní tenáá-gá táchí-án, te ní xáhaⁿ-gã xii ndute làgúná:

—jTnavíí-nă cuhuⁿ, chi ío dusaⁿ! —
càchí-gá xăhaⁿ-gă xii ndute-áⁿ.

Te òré-ni ní ngúííí táchí-ăⁿ te ní nucún-
decu nahi-nă ndute lăgúná-áⁿ. ⁴⁰Te Jèsús ní
xăhaⁿ-gă xii-güedé:

—jNá cuendá ndéé dúcáⁿ yùhú-ndó-í?
jNáa nă túú sàndáá íní năhá ndisa-ndo
xii-í-ăⁿ? —càchí-gá xăhaⁿ-gă xii-güedé.

⁴¹Dico mee-güedé chi ío ní yùhú-güedé
sá ducaⁿ ní quide-gá ní xiní-güedé, te ní
xítnàha-güedé:

—jTe ná tée cùu tée-a núu ní
cáháⁿ-ni-dé, te ní ngúííí táchí te ní
nucúndecu nahi ndute lăgúná-a-í? —
càchí-güedé xítnàha-güedé.

5

Hⁿ tée yìhi nàha espíritú cúndìhi yucu
ñávàha

(Mt. 8:28-34; Lc. 8:26-39)

¹Te ní sáá Jèsús ndìhi cue tée xica cuu
ndìhi-gá ndàa ìngá xio yuhu lăgúná yucu
cue tée ñuú Gàdará. ²Te òré ní quene-gá xítí
bàrcú te ìⁿ tée yìhi nàha espíritú cúndìhi
yucu ñávàha ní quee-dé núú yíndùxi ndíyi
cuáháⁿ-dé núú-gă. ³Te mee-ni núú yíndùxi
ndíyi-áⁿ quídé vèhe-dé, te cuèi dàcutu
ñaha-güedé cadená xii-dé dico nă túú
tnàhi ndàcu-güedé núú-dě. ⁴Te ío titní
xito ní dácútú-güedé cadená sáhá-dě ndìhi
ndàha-dé dico ní dándává-ni-dě, te ní xóo
dacàchi-gá-dé nchaa cadená-áⁿ, te nă túú
tnàhi ní ndàcu-güedé núú-dě. ⁵Te cuèi
nduu cuèi níú ní xóo cana saa-dé, te váha-ni
núu xítí yucu ndècu-dé àdi núú yíndùxi
ndíyi dico cana saa nahi-ni-dé, te ío ní xóo
dànicuèhé-dé mée-dě ndìhi yúú. ⁶Te òré
ní xiní-dé Jèsús te xinu-dé ní sáháⁿ núú-gă,
te ní ngúííí xítí-dě, ⁷te espíritú yíhi nàha
xii-dé-áⁿ ní quide-xi níhi ní cáháⁿ-dé, te
xăhaⁿ-dě xii-gă:

—jNá cuendá véxi yòhó Jèsús Déhe Dútú
Ndiòxí sàdí-n ìchi-í? Te càháⁿ ndàhú-í núú
Ndiòxí yuhu nñú-n să vă dándòho ñaha-n
xii-í —càchí-dé xăhaⁿ-dě xii-gă.

⁸Te ducaⁿ ní cáháⁿ-dé cuendá sá Jèsús ní
xăhaⁿ-gă xii espíritú cúndìhi yucu ñávàha
yìhi nàha xii-dé-áⁿ să queé nàha-xi xii-dé.

⁹Te Jèsús ní xícáⁿ tnùhú-gă núú-dě, te
xăhaⁿ-gă:

—jNása nàni-n-í? —càchí-gá xăhaⁿ-gă
xii-dé.

Te ní xăhaⁿ-dě:

—Vài Sandadú, duha nàni-í chi ío
cuèhé-ndí —càchí-dé xăhaⁿ-dě xii-gă.

¹⁰Te cue espíritú cúndìhi yucu ñávàha-áⁿ
ní cáháⁿ ndàhú-xi núú Jèsús sá vă téndàha
ñaha-gă xii-xi quíhíⁿ-xi ìngá xichi. ¹¹Te
điu-ni yatni yucu núú ndécú Jèsús-áⁿ yíhí
vài cuchí xixexi-güedi. ¹²Te nchaa cue
espíritú-áⁿ ní cáháⁿ ndàhú-xi núú-gă, te
xăhaⁿ-xi xii-gă:

—Càháⁿ ndàhú-ndí núú-n să dáníⁿ-n
quíhu-ndí yiquí cùñú nchaa cùchí-ăⁿ —
càchí-xi xăhaⁿ-xi xii-gă.

¹³Te Jèsús ní xăhaⁿ-gă sá cúú quíhu-xi
yiquí cùñú-güedi, te xínu dàtná úú
míl-güedi yìhi yucu-áⁿ. Te nchaa espíritú
cúndìhi yucu ñávàha yìhi nàha xii tée-áⁿ
ní quee nàha-xi xii-dé, te cuánguèhu-xi
yiquí cùñú nchaa cùchí-áⁿ, te nchaa-güedi
ní xinu-güedi duha ní quee-güedi ndàa
núú dèhvá yuhu lăgúná-áⁿ, te ní ngauni-
hnu-güedi xítí ndute te ní ndìhi-güedi ní
cáhá.

¹⁴Te òré ní xiní cue tée xito cuchí-áⁿ
nàcuáa ní cuu te ní xinu-güedé, te ní
sáháⁿ-güedé ní caní-güedé cuendú núú cuè
ñáyiu ndècu xítí ñuú, ndìhi núú cuè ñáyiu
ndècu xítí yucu. Te nchaa ñáyiu ní níhí
tnùhu ní xicá-yu cuáháⁿ ndèhé-yu nàcuáa
ní cuu. ¹⁵Te òré ní quexió-yu núú ndécú
Jèsús te ní xiní-yu tée ní xíhi nàha cuè
espíritú cúndìhi yucu ñávàha-áⁿ núcòo-dé
núú sàhá Jèsús, te nìhnu-ná-dé dóó-dě te
núcòo-ná-dé dàtná ìⁿ ñáyiu váha, te ní
yùhú-yu òré ní xiní ñáhă-yu xii-dé. ¹⁶Te
nchaa ñáyiu ní xiní nàcuáa ní cuu ní
ndúha tée yìhi nàha cue espíritú cúndìhi
yucu ñávàha-áⁿ ní cúu ní caní-yu cuendú
núú nchaa ñáyiu ní quexió-áⁿ nàcuáa ní
cuu ní ndúha tée-áⁿ ndìhi nàcuáa ní cuu
cuendá nchaa cùchí-áⁿ. ¹⁷Te sá dúcáⁿ ní
níhí ñáyiu-áⁿ tnùhu nàcuáa ní cuu núu
nchaa-yu ní ngúíta-yu càháⁿ ndàhú-yu núú
Jèsús sá ná queè-ga yucu ñuú-yu nùhú-gă.

¹⁸Te ní xica-gă cuáháⁿ-gă núú ndécú
bàrcú, te òré ndée-gă bàrcú-áⁿ nùhú-gă ní
ngúíta tée ní xíhi nàha cuè espíritú cúndìhi
yucu ñávàha-áⁿ càháⁿ ndàhú-dé núú-gă

nũu vá cundèe iní-gá quíhíⁿ ndihi ñaha-gã xii-dé. ¹⁹ Dico ñá túú ní sãha-gá tnúhu quíhíⁿ ndihi ñaha-gã xii-dé, te ní xáhaⁿ-gã xii-dé:

—Cuanùhú vehe-n, te cani-n cuèndú núú cuè ñáyiú sá Yã Ndiòxí ní cundàhú iní ñáhá-gã xii-n, te ío càhnu cuu nchaa sá vãha ní quide-gá sá cúú-xí-n —càchí-gá xãhaⁿ-gã xii-dé.

²⁰ Te tée-áⁿ ní xica-dé cuánuhú-dé, te ní sáháⁿ-dé ndi ùxí ñúú nání Dècàpólís, te ní cani-dé cuèndú núú nchaa ñáyiú sá ío càhnu cuu nchaa sá vãha ní quide ñaha Jèsús xii-dé, te nchaa-yu ío ní cuñúhu-yu.

Cuèndá dèhe yoco té Jàirú ndihi cuèndá ìⁿ ñadìhí ní tnándeé dóó Jèsús
(Mt. 9:18-26; Lc. 8:40-56)

²¹ Te Jèsús cuánde-gá bàrcú, te ní natehndé-gá ndaa ingá xio yuhu làgúná, te ío vãi ñáyiú ní tacá núú ní quexìo-gá-áⁿ, te xíáⁿ ndécú-gã ²² ní quexìo ìⁿ tée tàxi tnuní veñúhu núú-gã, te tée-áⁿ nání-dě Jàirú, te ní ngúñí xítí-dě núú-gã. ²³ Te ní ngúíta-dé càháⁿ ndàhú-dé núú-gã, te xãhaⁿ-dè xii-gã:

—Ío càhú tnàhá dèhe yoco-í cùhú-xi, te ndècu-ná-xi sá cùú-xi, te véxi-í càháⁿ ndàhú-í núú-n nũu vá cundèe iní-n quíhíⁿ-ó vèhe-í tendaha-n-xi cuèndá ndúha-xi, te cundecu-xi —càchí-dé xãhaⁿ-dè xii-gã.

²⁴ Te Jèsús ní xica-gá cuáháⁿ-gã ndihi tée-áⁿ, te ío vãi ñáyiú nchicúⁿ ñáhá xii-gã cuáháⁿ, te dàdehnde ñaha-ná-yu xii-gã ní cùu. ²⁵ Te tnuu nchaa ñáyiú-áⁿ ñútnàhá ìⁿ ñaha cùhú, te ñaha-áⁿ sa ní cuu úxúú cuíá sã cùhú-aⁿ ngòyo ñaha níñí xii-aⁿ. ²⁶ Te ío ta ndòho-aⁿ véxi, te ío cuéhé ñátátná ní cuu ta quide tátna ñaha xii-aⁿ, te sa ní ndihi nchaa sá ndécú ndihi-aⁿ ní nadico-aⁿ cuèndá ní níhí-aⁿ díhúⁿ ní queheⁿ nchaa ñáyiú ní quide tátna ñaha xii-aⁿ dico ní ìⁿ-yu ñá túú ní ndàcú-yu ndúha-aⁿ, chi da uuⁿ-gã tá cùu cahú-aⁿ cuáháⁿ. ²⁷ Te òré ní níhí-aⁿ tnúhu cuèndá Jèsús, te ní xica-aⁿ cuáháⁿ-aⁿ núú ndécú-gã. Te òré ní quexìo-aⁿ núú ndécú-gã te ní sáháⁿ ndehe yatni-aⁿ ndaa sátá-gã ní tnándeé-aⁿ dóó-gã. ²⁸ Te ducaⁿ ní quide-aⁿ chi ní sani iní-aⁿ sá núu ndacu-aⁿ tnándeé-aⁿ cuèdicó luha yuhu dóó Jèsús te ndúha-aⁿ ní sani iní-aⁿ. ²⁹ Te òré ducaⁿ ní quide-aⁿ te ñá túú-gã ní ngòyo ñaha-gã níñí xii-aⁿ, te òré-áⁿ ní cutnùní iní-aⁿ sá

ní ndúha-aⁿ cuéhé tnàhá-aⁿ. ³⁰ Te Jèsús ní cutnùní iní-gá sá ìⁿ ñáyiú ní ndúha sá cuèndá-gã, núú ní nchócótó-gã ndaa sátá-gã te ní xicáⁿ tnúhú-gã núú nchaa ñáyiú nchicúⁿ ñáhá xii-gã, te xãhaⁿ-gã xii-yu:

—¿Ndèdacàa-ndo ní tnándeé ñáhá xii-í? —càchí-gá xãhaⁿ-gã xii-yu.

³¹ Te cue tée xica cuu ndihi-gá ní xãhaⁿ-güedè xii-gã:

—Mèstrú, ndèhe-n sá vái ñáyiú nchicúⁿ ñáhá xii-n, te texio texio dàdehnde ñáhá-yu xii-n te xicáⁿ tnúhú-gã-n yòo ní tnán-deé ñáhá xii-n —càchí-güedè xãhaⁿ-güedè xii-gã.

³² Te Jèsús ní xíndéhé vãha-gã xio xio dìñi-gã nũu ndèdacàa ñáyiú ní tnándeé ñáhá xii-gã. ³³ Te sá dúcáⁿ ní cutnùní iní ñadìhí-áⁿ nàcuáa ní cuu, núu yùhú yùhú-aⁿ ní sáháⁿ-aⁿ ní ngúñí xítí-áⁿ nũú Jèsús, te ní xãhaⁿ ndáá-aⁿ xii-gã nàcuáa nduu cuèndá-aⁿ. ³⁴ Te Jèsús ní xãhaⁿ-gã xii-aⁿ:

—Yòhó ñaha cùhú ní cùu, ní sándáa iní ñáhá-n xii-í, núu ní ndúha-n, te vitna cuanùhú te vá ndiñú-gá iní-n, chi vá dúcáⁿ-gã ndoho-n —càchí-gã xãhaⁿ-gã xii-aⁿ.

³⁵ Te càháⁿ dúcáⁿ-ní Jèsús ní sáa cue tée xinu cuechi vehe té Jàirú tée tàxi tnuní veñúhu-áⁿ, te xãhaⁿ-güedè xii-dé:

—Sa ní xíhí dèhe-n, vá chíchiuⁿ-gã-n Mèstrú —càchí-güedè xãhaⁿ-güedè xii-dé.

³⁶ Dico Jèsús ñá túú ní quide cuèndá-gã nàcuáa nduu tnúhu ní càháⁿ cue tée-áⁿ, te ní xãhaⁿ-gã xii tée tàxi tnuní veñúhu-áⁿ:

—Ñá túú nã cani iní-n, quindáa iní ñáhá-ní-n xii-í —càchí-gã xãhaⁿ-gã xii-dé.

³⁷ Te Jèsús vá yòo-gã ní cuini-gã can-chicúⁿ ñáhá xii-gã quíhíⁿ, chi té Pèlú-ni, ndihi té Jàcobó-ni, ndihi ñani-ni-dé té Juáa cuáháⁿ ndihi ñaha-gã xii-güedè. ³⁸ Te òré ní quexìo-gã ndihi-güedè vehe tée tàxi tnuní veñúhu-áⁿ, te ní xiní-gã sá ío vãi ñáyiú xíndecu, te súúní dùsaⁿ quidè-yu te níhi xicáháⁿ-yu te xíndáhi-yu. ³⁹ Te òré cuánguihu-gã xítí vehe, te ní xãhaⁿ-gã xii-yu:

—¿Ná cuèndá ndéé dúcáⁿ ío dùsaⁿ quide-ndo, te ndàhyú-ndó? Te xíchí-a ñá túú ní xíhí-xi chi dicó xidí-xi —càchí-gã xãhaⁿ-gã xii-yu.

⁴⁰ Te ní sácú ndeé ñáhà-yu xii-gá sá dúcáⁿ ní cáháⁿ-gá, chí sá cúú-xí mèè-yu chí ní xíhí ndisa xíchí-áⁿ. Te òré-áⁿ ní queñuhu-gá nchaa-yu quehé, te cuánguihu-gá núú cándòdo yiqui cuñú xíchí ní xíhí-áⁿ. Te ndèca-gá tātá xíchí ní xíhí-áⁿ ndihí náná-xi cuánguihu, te tnháá cue téé úní ndihí-gá-áⁿ cuánguihu ndihí-gá. ⁴¹ Te ní tnií-gá ndaha xíchí ní xíhí-áⁿ, te ní xáhaⁿ-gá:

—Tálíta, cúmí —càchí-gá xáhaⁿ-gá.

Te tñúhu-áⁿ queé-xí: Yòhó xíchí cuéchi yúhú càchí-í sá ndácòo-n, duha queè-xi tñúhu-áⁿ.

⁴² Te òré-ni-áⁿ ní ndoto xíchí cuéchi-áⁿ ní ndacóo-xi ní nacaca cuu-xi, te ndècu-xi úxúú cuía-xi. Te ío ní cuñúhu nchaa ñáyíu sá dúcáⁿ ní dándótó ñaha Jesús xii-xi.

⁴³ Te Jèsús ní cáháⁿ víhí-gá dóho tātá-xi ndihí náná-xi sá vá yòo ìíⁿ cúñáhà-yu sá ní dándótó ñaha-gá xii-xi. Te sáta dúcáⁿ te ní xáhaⁿ-gá xii-yu sá cuñáhà-yu xii-xi sá cáxí-xi.

6

Jèsús ndécú-gá ñúú Nazàrét

(Mt. 13:53-58; Lc. 4:16-30)

¹ Te Jèsús ní ndee-gá ñúú núú ní dándótó-gá xíchí ní xíhí-áⁿ, te cuánuhú-gá núú cúú ñúú-gá, te tnháá cue téé xica cuu ndihí-gá cuánuhú ndihí-gá. ² Te ndècu Jesús ñúú-gá ní tnháá nduu ndètátú ñáyíu. Te nduu-áⁿ cuánguihu-gá xití veñúhu dàcuaha ñaha-gá xii-yu. Te vai ñáyíu ndédóho nchaa tñúhu cáháⁿ-gá, te xícucñúhu víhí-yu, te xitnháá-yu:

—¿Ndeé ní sáháⁿ dácúháá tēe-a núú ndéé duha váha cáháⁿ-dé, nása ní quide-dé núú ndéé duha ío váha cùtnuní inf-dé, te ndàcu-dé quidé-dé nchaa sá vá yòo tnháí ndàcu cada-í? ³ Te dicó carpintèrú cúú-dé, dicó déhe tá Màriá cúú-dé, te ñaní-dé cúú tē Jàcobó, ndihí tē Chèé, ndihí tē Jùdás, ndihí tē Xímú, te diu-ni cue cúha-dé cúú ñáyíu ndècu ndihí-o ñúú-a —càchí-yu xitnháá-yu.

Te ñá túú ní cuíní-gá-yu cáháⁿ ndihí váha ñáhà-yu xii-gá. ⁴ Te Jèsús ní xáhaⁿ-gá xii-yu:

—Te núú ìíⁿ téé cáháⁿ tñúhu Yá Ndiòxí ná nàsáá-dé ñúú-dé dacuàha-dé ñáyíu tñúhu-gá, te nchaa ñáyíu ñúú-dé-áⁿ, ndihí nchaa ñáyíu ndècu ndihí-dé vehe-dé, ndihí nchaa ñáyíu cùu ndi mee-dé ñá túú nèhé-yu sá yíñùhu núú-dé, dico cue ñáyíu

nchaa dava-gá ñúú chí nèhé-yu sá yíñùhu núú-dé —càchí-gá xáhaⁿ-gá xii-yu.

⁵ Te ñá túú ní quide tātna Jèsús vai ñáyíu cuendá sá ñà túú ní sàndáá iní ñáhà-yu xii-gá, dico ní quide tātna-gá ìíⁿ úú ñáyíu cùhú ní sàndáá iní ñáhà xii-gá. Te ní tendaha ñàha-ni-gá xii-yu te ní ndúha-yu. ⁶ Te ío ní cuñúhu-gá sá dúcáⁿ ñà túú ní cuíní-yu quindáá iní ñáhà-yu xii-gá. Te sáta dúcáⁿ te ní xica-gá cuáhàⁿ-gá nchaa dava-gá ñúú líhli càa yatni xíaⁿ cuendá dacuàha-gá ñáyíu tñúhu-gá.

Jèsús táuchiuⁿ-gá quíhíⁿ cue téé xica cuu ndihí-gá cáháⁿ-güedé tñúhu Yá Ndiòxí núú ñáyíu

(Mt. 10:5-15; Lc. 9:1-6)

⁷ Te Jèsús ní cana-gá ndi ùxúú cue téé xica cuu ndihí-gá, te ní sáñaha-gá xii-güedé tñúhu ndee iní cundecu ndihí-güedé cuendá queñuhu-güedé nchaa espíritú cündihí yucu ñávàha yíhí ñaha xii ñáyíu. Te ní xáhaⁿ-gá xii-güedé sá ndi ndúú ndi ndúú-güedé quíhíⁿ-güedé cáháⁿ-güedé tñúhu Yá Ndiòxí núú ñáyíu. ⁸⁻⁹ Te cùmání-gá caca-güedé quíhíⁿ-güedé, te ní xáhaⁿ-gá xii-güedé:

—Vá cánèhe-ndo ñunu cuhuⁿ ndachiuⁿ-ndo, te ní vá cánèhe-ndo sá cáxí-ndó, te ní vá cánèhe-ndo díhúⁿ, chí ìíⁿ caa-ni tātnu canehe-ndo, te chàú yíhí-ni-ndó-áⁿ xíaⁿ-ni quíhí-ndo, te vá cánèhe-gá-ndó ìngá ichi dóó-ndó chí diu-ni dóó ñíhí-ndó-áⁿ xíaⁿ tnháí-ni cuihnu-ndo te ñá túú tnháí-gá cáháⁿ ni canehe-ndo —càchí-gá xáhaⁿ-gá xii-güedé.

¹⁰ Te xáhaⁿ tucu-gá:

—Te òré ná sàá-ndó ìíⁿ ñúú, te ío ñáyíu cáháⁿ ñáhà-yu xii-ndo vèhé-yu, te xíaⁿ-ni cundecu-ndo ndéé ná sàá nduu ndèe-ndo ñúú-áⁿ. ¹¹ Te núú ío dava ñúú ñá túú cuíní-yu cáháⁿ ndihí ñaha váha-yu xii-ndo, te ní ñà túú cuíní-yu cundédóho-yu tñúhu cáháⁿ-ndó, te ndee-ni-ndo ñúú-áⁿ te naquidí-ndo ticáchúhmá ní tñí sáhà-ndó cuendá ná cùtnuní inf-yu sá ñà túú quide váha-yu. Te na càchí tñúhu ndáá-í xii-ndo sá ná sàá nduu càda ndáá Yá Ndiòxí cuéchi nchaa ñáyíu, te cue ñáyíu ducaⁿ na càda ñaha xii-ndo-áⁿ ío-gá ndohó-yu dàv-áⁿ dàcúxí dàtná ndoho

cue ñáiyu ñúú Sòdomá ndìhi cue ñáiyu ñúú Gòmorrá —càchí-gá xáhaⁿ-gã xii-güedé.

¹² Te cue téé-áⁿ ní xica-güedé cuáháⁿ-güedé te ní nguíta-güedé dácuaⁿ-güedé cue ñáiyu tñúhu Yá Ndiöxi, te xáhaⁿ-güedé xii-yu:

—Chí dándixi túu iní sá ñà túú quide váha-ndo ndècu-ndo, te daña-ndo nchàa ichi cuehé ichi duha ndècu-ndo. —càchí-güedé xáhaⁿ-güedé xii-yu.

¹³ Te vai espíritu cúndihi yucu ñávaha yíhi ñaha xii ñáiyu ta queñuhu-güedé yiqui cùñú-yu cuáháⁿ, te vai tucu ñáiyu cùhú tá quide tátna-güedé cuáháⁿ chíhi ñaha-güedé acití xii-yu te ndíha-yu.

Nàcuáa ní cuu ní xíhi té Juáa téé dácuan-dute ñaha xii ñáiyu

(Mt. 14:1-12; Lc. 9:7-9)

¹⁴ Te nchaa xichi ní níhi ñáiyu tñúhu nchaa nàcuáa quide Jesús, te tñahá té Hèrodés téé yindaha ñaha xii ñáiyu ní níhi-dé tñúhu nchaa nàcuáa quide-gá, te ní cachí-dé:

—Té Juáa téé ní xóo dácuan-dute ñaha xii ñáiyu ní ndoto núu dácáⁿ ndácú-dé quidé-dé nchaa sá vã yóo tñahí ndàcu cada —duha ní cachí-dé.

¹⁵ Te dava ñáiyu càchí-yu sá tã Èliás téé ní xóo cáháⁿ tñúhu Yá Ndiöxi ndéé sanaha ní nasáa-dé.

Te davá-yu càchí-yu sá cúu-gã dàtná ñⁿ téé ní xóo cáháⁿ tñúhu Yá Ndiöxi ndéé sanaha. ¹⁶ Te té Hèrodés ní níhi-dé tñúhu nchaa nàcuáa càháⁿ-yu, te ní cachí-dé:

—Diu té Juáa téé ní táuchíuⁿ-í ní xehndé-güedé díquí-xi ní ndoto —càchí-dé.

¹⁷⁻¹⁸ Te duha ní cuu cùtñahá ní sahni té Hèrodés té Juáa, chi davá-áⁿ ní naqueheⁿ té Hèrodés-áⁿ ñⁿ ñaha nàni Herodiás ndécá-dé, te ñaha-áⁿ sá ní cándeca ñaha ñani-dé té Lipé. Te té Juáa ní xáhaⁿ-dè xii té Hèrodés sá ñà túú ní quide váha-dé sá dúcáⁿ ní naqueheⁿ-dé ñaha ní cándeca ñani-dé, núu sá cuèndá ñaha-áⁿ ní táuchíuⁿ tã Hèrodés ní tñi-güedé té Juáa ní chíhi ñaha-güedé vecaa, te ní dácútu ñaha-güedé xii-dé, te ducaⁿ ní quide-dé cuèndá sá ndécá ñaha-dé xii-aⁿ.

¹⁹ Te ñaha nàni Herodiás ndécá tã Hèrodés-áⁿ io ní cuu úhu iní-aⁿ té Juáa, te ní cuini-aⁿ cahni-aⁿ-dé, dico ñà túú ní níhi-aⁿ nàcuáa cada-aⁿ. ²⁰ Te mee tã Hèrodés chi ní cutnùní ndáá iní-dé sá tã Juáa cúu-dé ñⁿ téé quide mee-ni sá váha, te quide ndáá-dé

núu Yá Ndiöxi, te ní xóo yùhu ñáhá-dé núu xíáⁿ ñà túú ní daña-dé ná cada ñaha ñaha ndeca-dé-áⁿ xii té Juáa. Te té Hèrodés-áⁿ io ní cudíí iní-dé ní xíndedóho-dé nchaa tñúhu ní xáhaⁿ tã Juáa xii-dé, dico ñà túú ní sàni iní-dé duuⁿ duuⁿ tñi-dé tñúhu-áⁿ.

²¹ Te ñⁿ nduu ní xóo vico vehe té Hèrodés ní quide càhnu-dé nduu ní cacu-dé. Te nduu-áⁿ ní níhi ñaha nàni Herodiás-áⁿ nàcuáa cada-aⁿ cuèndá cuú té Juáa. Te nduu-áⁿ ní cáháⁿ té Hèrodés nchaa cue téé cùchiuⁿ, ndíhi nchaa cue téé tàxi tñuní ñáhá xii cue sandadú, ndíhi nchaa cue téé cuica ndècu distritú Galilea cuèndá cudini ndíhi ñaha-dé xii-güedé nduu-áⁿ. ²² Te ndècu ñⁿ déhe yoco ñaha nani Herodiás-áⁿ, te xíchí-áⁿ ní quíhu-xi vehe núu cúu vico-áⁿ ní xita saha-xi mèi oré yíhi tã Hèrodés mèsa ndíhi nchaa cue téé ní cáháⁿ-dè, te io ní cudíí iní-dé ndíhi nchaa cue téé-áⁿ nàcuáa ní xita xíchí-áⁿ. Te té Hèrodés ní xáhaⁿ-dè xii-xi:

—Cácaⁿ núu-í núu ná cuini-n te taxi-í —càchí-dé xáhaⁿ-dè xii-xi.

²³ Te ní cacunehe-dé ndéé Yá Ndiöxi nàcuáa cutnùní iní xíchí-áⁿ sã ndáa cuáñaha-dè núu ná cúu sã ná càcáⁿ-xi núu-dé cuèi ndéé cuádava nchaa sá ndécú ndíhi-dé, te núu na càcáⁿ-xi. ²⁴ Te sá dúcáⁿ ní xáhaⁿ-dè xii-xi núu ní quee-xi quehé ní xáhaⁿ-xi xii náná-xi:

—Náá, ñà cúu sã càcáⁿ-í núu tã Hèrodés? —càchí-xi xáhaⁿ-xi xii-aⁿ.

Te náná-xi-áⁿ ní xáhaⁿ-aⁿ xii-xi:

—Cuáháⁿ càcáⁿ-n díquí tã Juáa téé dácuan-dute ñaha xii ñáiyu —càchí-aⁿ xáhaⁿ-aⁿ.

²⁵ Te ndíhi-ni cuándihu xíchí-áⁿ xití vehe núu yíhi tã Hèrodés-áⁿ, te xáhaⁿ-xi xii-dé:

—Cuini-í sá mèi nduu vitna quehndé-n díquí tã Juáa téé dácuan-dute ñaha xii ñáiyu te taxi-n, dico na cùhuⁿ ñⁿ xití cóhó taxi-n —càchí-xi xáhaⁿ-xi xii-dé.

²⁶ Te té Hèrodés ní nguíta-dé ndíhu víhi iní-dé sá dúcáⁿ ní xáhaⁿ-xi xii-dé, dico ñà túú ní cùyi-dé cùñaha-dé xii-xi sá vã cúu cuáñaha-dé sá xicáⁿ-xi, chi cuèndá sá núu nchaa ñáiyu ní xáhaⁿ-dè sá cúu cuáñaha-dé núu ná cúu sã ná càcáⁿ-xi, te ní cacunehe-dé ndéé Yá Ndiöxi nàcuáa cutnùní iní-xi sã ndáa cuáñaha-dé sá ná càcáⁿ-xi núu-dé. ²⁷ Te té Hèrodés-áⁿ ndíhi-ni ní xáhaⁿ-dè xii ñⁿ sandadú sá quíhiⁿ-dé quehndé-dé díquí tã Juáa. ²⁸ Te sandadú-áⁿ ní xica-dé cuáháⁿ-dè vecaa núu yíhi tã

Juàá-án, te ní quexìo-dé te ní xehndé-ni-dé dǎquí tǎ Juàá, te ní chihi-dé ìn xití cóhó te nèhe-dé cuánuhú ní sáha-dé xíchí xicá-án, te xíchí-án ní nacuáha-xi náná-xi. ²⁹ Te òrè ní níhí nchaa cue téé ní xica cuu ndihi ndí Juàá-án tnúhu sá dúcá-án ní sahni ñaha-güedé xii ndí, te ní sáhá-án-güedé ní ndocani-güedé yiqui cùñú ndí te ní chindúxi-güedé.

Jèsús dácaxi-gá úhú mǐl cue téé te ìn ñáyíu ñíhí ndihi landú

(Mt. 14:13-21; Lc. 9:10-17; Jn. 6:1-14)

³⁰ Te nchaa cue téé ní táuchíúⁿ Jèsús cuáháⁿ cáháⁿ tnúhu Yá Ndióxi núú ñáyíu ní ndexio-güedé núú-gá te ní ngúita-güedé nácàni tnúhu-güedé nchaa nàcuáa ní quide-güedé ndíhi nchaa nàcuáa ní dánèhé ñáhá-güedé xí-yu. ³¹ Te Jèsús ní xáha-án-gá xii-güedé:

—Chí nèhé ná quíhí-ó ìn xichi núú ñà túú ñáyíu ndetatú-ó —càchí-gá xáha-án-gá xii-güedé.

Te ducaⁿ ní xáha-án-gá xii-güedé, chi ío cuéhé ñáyíu cuáháⁿ véxi-yu cùu-yu núú ndécú-gá. Te ní ñà nihí-gá nása cada-gá caxi-gá ndíhi cue téé xica cuu ndíhi-gá. ³² Te Jèsús cuánguee-gá bàrcú ndíhi mee-ni cue téé ní táuchíúⁿ-gá cáháⁿ tnúhu-gá, te cuáháⁿ-gá ndíhi-güedé ìn xichi núú ñà túú ñáyíu ndècu. ³³ Dico vai ñáyíu ní cutnùní iní-yu sá díú-gá núhú bàrcú-án cuáháⁿ ndíhi cue téé xica cuu ndíhi-gá, te nchaa ñúú cáá yàtni xíáⁿ ní quee ñáyíu xíxinú-yu cuáháⁿ núú ní quidé-yu cuendá quexìo Jèsús, te sa ndécú-yu xíáⁿ ní quexìo-gá. ³⁴ Te òrè ní quene Jèsús xití bàrcú, te ní xini-gá cuéhé víhí ñáyíu xixúcu núú ní quexìo-gá-án, te ní cundáhú iní ñáhá-gá xí-yu chí ndécú-yu dàtná xindecu cue mbéé cue quiti ñà túú tòli-xi, te ío vai núú sá ní ngúita-gá ní dácúhá ñaha-gá xí-yu. ³⁵ Te sátná tá cuàa cuáháⁿ te ní sáháⁿ cue téé xica cuu ndíhi Jèsús núú-gá, te xáha-án-güedé xii-gá:

—Sa ní cuaa te ñà túú ñáyíu ndècu yatni iha. ³⁶ Váha-gá dandaca nchaa ñáyíu-a chi na quíhíⁿ-yu nchaa vehe càa xití yucu-a, ndíhi nchaa ñúú cáá ncháa yatni iha cuaáⁿ-yu sá caxí-yu —càchí-güedé xáha-án-güedé xii-gá.

³⁷ Te Jèsús ní xáha-án-gá:

—Mee-ndo chí cuáñaha sá ná caxí-yu —càchí-gá xáha-án-gá xii-güedé.

Te xáha-án-güedé xii-gá:

—¿Te nása cada-ndí, chi xini ñuhu-xi datná úú ciendú díhúⁿ denariú cuendá cuaaⁿ-ndí sá caxí-yu? —càchí-güedé xáha-án-güedé xii-gá.

³⁸ Te Jèsús ní xáha-án-gá xii-güedé:

—Chí cuáháⁿ cundehe-ndo núú ná daha pàá ndécú ndíhi-ndo te cachí tnúhu-ndo —càchí-gá xáha-án-gá xii-güedé.

Te ní sáháⁿ ndéhe-güedé núú ná daha pàá ndécú, te ní xáha-án-güedé xii-gá:

—Úhúⁿ duha-ná pàá ndíhi úú-ná chácá ndécú —càchí-güedé xáha-án-güedé xii-gá.

³⁹ Te Jèsús ní xáha-án-gá xii nchaa ñáyíu sá ná nihí tnáhá-yu cuu titní xichí-yu, te ngóo-yu nchaa núú cùhú cuí cãa xíáⁿ. ⁴⁰ Te ncháa-yu ní ngóo-yu, te dava xichí-yu ní ngóo ìn ciendú-yu, te dava xichí-yu ní ngóo údico úxí-yu. ⁴¹ Te sátná ní ndíhi-yu ní ngóo, te ní queheⁿ Jèsús ndí ùhúⁿ pàá ndí úú chácá-án, te ní ndacoto-gá andíu te ní ndacáⁿ táhú-gá núú Yá Ndióxi, te dàtnùní ní táhú cuèchi-gá pàá-án te ní sáñaha-gá xii cue téé xica cuu ndíhi-gá ní dácáhñu-güedé nchaa ñáyíu-án ní xexí-yu. Te ñu-ni ducaⁿ ní quide tucu-gá úú chácá-án. ⁴² Te ncháa-yu ní xexí-yu ní ndahá xití-yu. ⁴³ Te sátná ní túhú cóhó-yu te ní nadatácá-güedé nchaa sá ní quendóo, te ní chítú ùxúú tnáhá tídíhi mee-ni sá ní quendóo núú ùhúⁿ-ni pàá, ndíhi núú ùú-ni chácá. ⁴⁴ Te ncháa ñáyíu ní xexí-án chí xínu úhúⁿ mǐl mee-ni cue téé chí ñu-ni cue téé-án ní quíundehu, te ìn ñáyíu ñíhí ndíhi cue landú.

Jèsús xicá-gá núú ndute

(Mt. 14:22-27; Jn. 6:16-21)

⁴⁵ Te òrè-ni-án ní xáhaⁿ Jèsús xii cue téé xica cuu ndíhi-gá sá quèe-güedé bàrcú codonú-güedé quíhíⁿ-güedé ìn ñúú nání Bètsaidá cáá ndaa ingá xio yuhu làgúná núú ndécú-güedé-án, te mee-gá quendóo-gá cada ndee iní tnáhá-gá ndíhi cue ñáyíu. ⁴⁶ Te sátná ní yáha ní quide ndee iní tnáhá-gá ndíhi-yu, te ní xica-gá cuáháⁿ-gá ìn tìndúú cáá yàtni xíáⁿ cuendá cáháⁿ ndíhi-gá Yá Ndióxi. ⁴⁷ Te òrè sa ní cundiquíⁿ te bàrcú sá núhú cuè téé xica cuu ndíhi-gá sa cuáháⁿ-xi ndéé cuádava xití làgúná-án, te mee-gá ndécú-gá ìn núú tìndúú. ⁴⁸ Te túú ndèhe-gá sá sùúní ndòho-güedé tá dácaca-güedé bàrcú-án cuáháⁿ, chí cuendá

ndàa nacuáa cuáháⁿ-xi-áⁿ duha véxi táchí te nàtúndaha-xi. Te ingá nduu-áⁿ tàcuíhndá-gá sa ní cuyatni víi-nã Jèsús bàrcú ñùhú-güedë-áⁿ, dico núu ndute tá xica-gá cuáháⁿ te luha-ná te yáha ñaha-gã xii-güedé ní cùu. ⁴⁹⁻⁵⁰Te òré ní xiní ñáhá cuè téé ñùhu bàrcú-áⁿ xii-gá te ní yùhú-güedé ní cana saa-güedé, chi ní sani iní-güedé sá ìⁿ almá cúu-gã. Te ní xáhaⁿ-gã xii-güedé:

—ǀÑíi cunduu-ndo, vá yùhú-ndó, chi yùhú cúu-í! —càchí-gá xãhaⁿ-gã xii-güedé.

⁵¹Te Jèsús cuánguee-gá xití bàrcú ñùhú-güedë-áⁿ, te sáta cuánguee-gá te òré-ni ní ngúíñi táchí, te ní cuñúhu vihi-güedé. ⁵²Te ducaⁿ chi cue téé-áⁿ ñà túú ní cùtnuní iní-güedé nása quide-gá, chi ñà túú ní cùtnuní váha iní-güedé nàcuáa ndùu sá ní quide-gá òré ní nadacàyá-gá pàá, chi ío ñi ñíquí-güedé.

Jèsús quidé tátna-gá ñáyiú cùhú ñuu Genesàrét

(Mt. 14:34-36)

⁵³Te ní yáha-güedé ndihi-gá ndàa ingá xio yuhu làgúná, te ní sáá-güedé ndihi-gá yucu cue téé ñuu Genesàrét. Te yàcáⁿ ní dácútú ndèé-güedé bàrcú-güedé yuhu làgúná. ⁵⁴Te òré ní quene Jèsús ndihi cue téé xica cuu ndihi-gá xití bàrcú, te nchaa ñáyiú xíndecu-áⁿ ní cutnùní iní-yu sá díú-gã. ⁵⁵Te ñáyiú-áⁿ ndihi-ni ní sáháⁿ-yu nchaa núu xíndecu cue ñáyiú cùhú, te cue ñáyiú cùhú-áⁿ ní quee-yu xito nchido ñáhá-yu cuáháⁿ ndi tnahá ìⁿ ìⁿ xichi núu ñihí-yu tnúhu quèxio Jèsús. ⁵⁶Te nchaa ñuu náhnú ndihi nchaa ñuu líhli núu cuáháⁿ Jèsús, ducaⁿ xíndecá-yu nchaa ñáyiú cùhú cuáháⁿ xití ñuu sàcáⁿ ñáhã-yu núu-gã cuèndá cada tátna ñaha-gã xii-yu. Te ñuu-ni ducaⁿ xíquidé-yu nchaa dava-gá xichi núu cuáháⁿ-gá núu xíndecu cue ñáyiú, te càháⁿ ndàhú-yu núu-gã sá ná dáñá-gã tnándéé cue ñáyiú cùhú-áⁿ cuèdicó luha yuhu dǒó-gã cuèndá ndúha-yu. Te nchaa ñáyiú cùhú ní tnándéé yuhu dǒó-gã ní ndúha-yu.

7

Cuèndá nchaa sá quidé-xí ngúndecu cuéchi ñáyiú

(Mt. 15:1-20)

¹Te ñuu Jerusàlén ní quee cue téé dàcuaha ñaha xii ñáyiú nchaa tnúhu ní chídó tnùní ndíi Moisés, te ní quèxio-güedé núu ndécú Jèsús, te tnàhá cue téé cùu fariséú ní quèxio ndihi-güedé. ²Te cue téé-áⁿ ní xiní-güedé sá dàva cue téé xica cuu ndihi Jèsús ñà túú ndàha-güedé dàtná ndáhá mée cue téé cùu fariséú-áⁿ òré caxi-güedé. Te xíáⁿ ñuu cue téé ní quèxio-áⁿ ní cáháⁿ cuèhé-güedé cuèndá cue téé xica cuu ndihi-gá. ³Te ducaⁿ chi nchaa cue téé cùu fariséú-áⁿ ndihi nchaa ñáyiú isràél nchicúⁿ nihnú-yu quidé-yu dàtná ní xóo cada nchaa cue ñani tnáhã-yu ní xín-decu ndéé sanaha, chi nchaa ñáyiú-áⁿ vá caxí-yu te núu vá ndáhã-yu dàtná ní xóo ndaha nchaa cue ñani tnáhã-yu ní xíndecu ndéé sanaha-áⁿ. ⁴Te ñáyiú-áⁿ ndi tnahá òré cuáháⁿ-yu núu yáhu te nàsáá-yu, te ndáhã-yu nàcuáa sàni iní-yu ndùvétú iní Yá Ndióxi, te núu vá dúcáⁿ cadá-yu te vá caxí-yu. Te tnáhã náquète-yu vású sá sácúhuⁿ sá xihí-yu, ndihi lítu, ndihi cóhó cãá, ndihi camá. Te nchaa xéhe náquète-yu nàcuáa sàni iní-yu ndùvétú iní Yá Ndióxi. Te ío-gá titní sá ní xóo cada nchaa ñáyiú ní xíndecu ndéé sanaha-áⁿ nchicúⁿ nihnú-yu quidé-yu. ⁵Te cue téé cùu fariséú-áⁿ, ndihi cue téé dàcuaha ñaha xii ñáyiú nchaa tnúhu ní chídó tnùní ndíi Moisés-áⁿ ní xáhaⁿ-güedé xii Jèsús:

—ǀNá cuèndá cue téé xica cuu ndihi-n ñà túú nàquete-güedé ndaha-güedé òré caxi-güedé dàtná ní cachí nchaa cue téé ní xíndecu ndéé sanaha-í? —càchí-güedé xáhaⁿ-güedé xii-gá.

⁶Te Jèsús ní xáhaⁿ-gã xii-güedé:

—Nchòhó cúu-ndó cue téé ío dándahú mée-xí chi cãchí-ndó sã ío quide ndáá-ndó te ñà ndáá sá quidé ndáá-ndó. Te ní quee ndáá-xi nàcuáa ní chídó tnùní ndíi Chaiá téé ní xóo cáháⁿ tnúhu Yá Ndióxi ndéé sanaha núu tütú-gá núu càháⁿ-xi nàcuáa ní cáháⁿ-gã cuèndá-ndó, te duha ní cachí-gá: Ñáyiú-a cãchí-yu sá ío cãhnu cuu-í, dico dicó-ni yuhu càháⁿ-yu, chi ñà túú ñùhu iní ñáhã-yu xii-í.

⁷Te àúⁿ nã cuu chiñúhu ñáhã-yu xii-í, chi ñà túú vèdana ndéé nándihí-xi, chi cue ñáyiú-a dàcuahá-yu cue tnàha ñáyiú-yu nàcuáa cundecú-yu, dico mee-ni tnúhu sá ní cahu iní cue ñáyiú ñuyíú-a càháⁿ-yu.

Duha ní chídó tnùnì ndíi Chàíá núú tütú Yá Ndiòxí nàcuáa ní cáháⁿ-gá cuendá-ndó. ⁸ Te nchòhó ní dáñá-ndó nàcuáa ní cachí Yá Ndiòxí cada-ndo, te nchìcúⁿ nihnu-ndo quide-ndo nàcuáa ní cahú iní cue ñáyiú ñuyíú-a, chi nàquete-ni-ndo lítu, te nà-quete-ni-ndo vasú sácũhuⁿ sá xíhí-ndó nà-tava-ndo nàcuáa ní xóo cada ñáyiú-áⁿ ñí xóo naqueté-yu nchaa xiáⁿ, te nándi-gá nchaa núú sá quidé-ndó —cachí Jèsús xáhaⁿ-gá xii-güedé.

⁹ Te ní xáhaⁿ tũcu-gá xii-güedé:

—Te nchòhó, ñá túú cuiní-ndó càda-ndo nàcuáa cuiní Yá Ndiòxí, chi mee-ni nàcuáa ní cachí cue téé ní xíndecu ndéé sanaha nchìcúⁿ nihnu-ndo quide-ndo. ¹⁰ Te ndíi Moisés ní cachí ndíi sá ncháá ñáyiú canehé-yu sá yínũhu núú tātá-yu ndíhi núú nǎñá-yu. Te nchaa ñáyiú na cáháⁿ úhú cuendá tātá-yu àdi cuendá nǎñá-yu te cahni ñaha-güedé xii-yu ní cachí ndíi. ¹¹ Te nchòhó cachí-ndó sá ñũu ìⁿ téé na cũñaha-dé xii tātá-dé ndíhi nǎñá-dé sá sá ñí sani iní-dé cuañaha-dé xii-yu cùu-xi Corbán, te ñá túú-gá xíní ñũhu-xi sá cuañaha-dé xii-yu, te tnũhu Còrbán-áⁿ quée-xí: Sá cúú cuendá Yá Ndiòxí. ¹² Te sá dúcáⁿ ná cáháⁿ ìⁿ téé-áⁿ te nchòhó chíndèe tnũhu-ndo-dé cuendá sá vǎ chíndèe-gá-dé tātá-dé ndíhi nǎñá-dé. ¹³ Te ducaⁿ quide-ndo chi ní dáquée tĩhú-ndó nàcuáa ní cachí Yá Ndiòxí cada-ndo, te mee-ni nàcuáa ta quide cue téé ñuyíú-a véxi nchìcúⁿ nihnu-ndo quide-ndo, te ñũu-ducaⁿ ta sànu ichi tñaha-ndo véxi, te nándi-gá nchaa sá cáhú iní-ndó quide-ndo —cachí-gá xáhaⁿ-gá xii-güedé.

¹⁴ Te Jèsús ní xáhaⁿ tũcu-gá xii cue ñáyiú xíndecu-áⁿ:

—Chí táquixi ndehe iha, te cundedóho váha-ndo tnũhu na cáháⁿ-í-a te ío váha cuáha-ndo cuendá. ¹⁵ Nchaa sá xéxi-ndó chí ñá túú nǎ quidé-xí iní-ndó, dico nchaa sá cuèhé sá dúhá sàni iní-ndó quide-ndo, nchaa xiáⁿ quidé-xí ndècu cuéchi-ndo. ¹⁶ Te nchaa nchòhó ñáyiú ndédóho nchaa tnũhu cáháⁿ-í-a ío váha chí cuáha cuendá —cachí-gá xáhaⁿ-gá xii-yu.

¹⁷ Te Jèsús ní dándóo-gá nchaa ñáyiú núú xixũcu-yu-áⁿ te cuándihu-gá xití vehe. Te cue téé xica cuu ndíhi-gá ní xicáⁿ tnúhú-güedé núú-gá ñũu nása quèe-xi cuendú ní cani-gá núú ñáyiú-áⁿ. ¹⁸ Te ní xáhaⁿ-gá xii-güedé:

—¿Te náa tnàhá nchòhó ñá túú ní tècú tnùnì-ndó cuendú ní cani-í núú ñáyiú-áⁿ? Nchaa sá xéxi-yu cuánguee xití-yu ñá túú quide-xi iní-yu nàcuáa ngúndecu cuéchi-yu. ¹⁹ Chi ñá díú iní-yu cuánguee-xi chi cuánguee ndáá-xi xití-yu, te nàyáha ñaha-xi xii-yu —cachí-gá xáhaⁿ-gá xii-güedé.

Te sá dúcáⁿ ní cáháⁿ-gá te ní dátũu-gá sá cúú càxi-o nchaa núú sá cúú càxi-o. ²⁰ Te ní xáhaⁿ tũcu-gá xii-güedé:

—Nchaa sá cuèhé sá dúhá quide ñáyiú xiáⁿ cáciu nihnu-xi iní-yu, te nchaa xiáⁿ quidé-xí ndècu cuéchi-yu. ²¹ Te iní-yu-áⁿ cáciu nihnu nchaa sá cuèhé sá dúhá, chi sàni cuèhé sàni dùha iní-yu. Te cue téé cáháⁿ ndíhi-güedé ñadíhí te ñá díú ñadíhí-güedé cúu-yu, te ñũu-ducaⁿ quide cue ñáyiú díhí cáháⁿ ndíhi-yu téé te ñá díú yíi-yu cùu-güedé. Te sàhni-yu cue tnàha ñáyiú-yu, te mee-ni ichi díí iní cúdí iní-yu cundecú-yu. ²² Te dùhu ndachiuⁿ tñahá-yu, te xihó-yu cundecu ndíhi-yu sá ndécú ndíhi tñaha ñáyiú-yu, te ío quide úhú iní-yu sá cúú-xí tñaha ñáyiú-yu, te ío dándahú tñahá-yu, te mee-ni nchaa sá cuèhé sá dúhá cùdí iní-yu quide-yu, te ío cuédú iní-yu, te ío yití yùhú-yu, te ío quide cahnú-yu mèe-yu, te quide-yu nándi-gá sá ñá túú tǎu-yu cadá-yu. ²³ Te nchaa sá cuèhé sá dúhá-áⁿ cáciu nihnu-xi iní-yu, te nchaa xiáⁿ quidé-xí ndècu cuéchi-yu, te ñá túú cùu-xi sá váha sá cúú-xí iní-yu.

Èⁿ ñadíhí véxi ñũu xicá ñí sándáá iní-aⁿ Jèsús

(Mt. 15:21-28)

²⁴ Te ní xica Jèsús cuáháⁿ-gá ndéé yucu cue téé ñũu Tírú, ndíhi yucu cue téé ñũu Sidón. Te óré ní quexio-gá xiáⁿ te cuánguihu-gá ìⁿ vehe te xiáⁿ cundecu-gá, te cuiní-gá sá vǎ quini ñáyiú sá xiáⁿ ndécú-gá ní cùu, dico dai ní níhí-yu tnũhu. ²⁵ Te ìⁿ ñadíhí ndécú ìⁿ déhe yoco-aⁿ, te yíhi ñaha espíritu cùndíhi yucu ñávaha xii-xi, te ñaha-áⁿ ío ndíhi ní níhí-aⁿ tnũhu sá ní quexio Jesús xiáⁿ ñũu ní sáháⁿ-aⁿ núú ndécú-gá, te ní ngúíhí xití-áⁿ núú-gá. ²⁶ Te ní ngúíta-aⁿ cáháⁿ ndahú-aⁿ núú-gá, te xáhaⁿ-aⁿ sá ñũu vá cùndèe iní-gá queñuhu-gá espíritu cùndíhi yucu ñávaha

yìhi ñaha xii déhe-aⁿ. Dico ñá díú ñaha is-raél cúú-án chi ñaha ñuú Sirofeniciá cúú-án te tñuhu griégú cúú tñuhu-aⁿ. ²⁷Te xíáⁿ núu ní xáhaⁿ Jèsús xii-aⁿ:

—Daña na càxi tnaa nchaa landú chítú xítí-güexi, te dàtnùnì caxi cue iná, chi ñá túú nduu váha-xi queheⁿ-o sá xéxí landú te cuáha-o iná —càchí-gá xáhaⁿ-gá xii-aⁿ.

²⁸Te ní xáhaⁿ-aⁿ xii-gá:

—Mèstrú, ndáá-ni càháⁿ-n, dico iná chi nàdatacá-güedi sá ngóyó yùhu cóhó landú —càchí-aⁿ xáhaⁿ-aⁿ xii-gá.

²⁹Te Jèsús ní xáhaⁿ-gá xii-aⁿ:

—Ío váha ní càháⁿ-n, te cuanùhú te ñá túú-gá ná cani iní-n, chi sa ní quee espíritú cündìhi yucu ñávàha yìhi ñaha xii déhe-n —càchí-gá xáhaⁿ-gá xii-aⁿ.

³⁰Te ñaha-án ní nasáá-aⁿ vehe-aⁿ te càa déhe-aⁿ núu càamá, dico ñá túú-gá espíritú cündìhi yucu ñávàha yìhi ñaha xii-xi chi sa ní quee ñaha-xi.

Jèsús quidé tātna-gá ìiⁿ tée ñá cúú càháⁿ váha te doho-dě

³¹Te Jèsús ní ndee-gá yucu cue tée ñuú Tírú te ní yáha-gá yucu cue tée ñuú Sidón, ndìhi yucu ndí ùxí ñuú nání Dècápolis, te ní sáá-gá ndéé yuhu làgúná distritú Galileá. ³²Te xíáⁿ ndécú-gá ní quexìo ñáyiu ndéé núu-gá ndécá-yu ìiⁿ tée ñá cúú cǎháⁿ váha-dé te doho-dě. Te càháⁿ ndáhú-yu núu-gá sá ná tëndaha ñaha-gá xii-dé cuèndá ndúha-dé. ³³Te Jèsús ní queñuhu ñaha-gá xii-dé tñuú-yu, te ndèca ñaha-gá cuáháⁿ ìiⁿ xio, te ní dáquìhu-gá díquí ndáhá-gá yáú lóho-dé, te ní dácánùu-gá díí-gá díquí ndáhá-gá, te ní tendaha-gá yàa-dé. ³⁴Te ní ndacoto-gá andiú te ní sánuu iní-gá, te ní càháⁿ-gá tñuhu mee-gá, te xáhaⁿ-gá:

—Ĵéfata! —càchí-gá xáhaⁿ-gá xii-dé.

Te tñuhu-án quée-xí: Nacaáⁿ yòhó lóho.

³⁵Te órè-ni-án ní nacaáⁿ lóho-dé, te ní nduu váha yàa-dé, te ní cuu càháⁿ váha-dé. ³⁶Te Jèsús ní càháⁿ víhí-gá dóho ñáyiu ndìhi ñaha xii tée ní quide tātna-gá-án sá vǎ yóo ìiⁿ cündàhá-yu sá ní quide tātna ñaha-gá xii-dé, dico uuⁿ-gá ní quidé-yu ní càháⁿ-yu núu ñáyiu sá ní quide tātna-gá tée-án. ³⁷Te nchaa-yu ío ní cuñúhu-yu, te ní xitñàhá-yu:

—Váha vihi quide-dé, chi nchaa-ni ndacu-dé quidé-dě, chi quide tātna-ni-dé

ñáyiu doho, te quide tātna-ni-dé ñáyiu ñìhí —càchí-yu xitñàhá-yu.

8

Jèsús dácàxi-gá cúmí mìl ñáyiu
(Mt. 15:32-39)

¹Te ìiⁿ nduu tucu ío cuéhé ñáyiu ní tacá núu ndécú Jèsús, te ñá túú tñàhí sá cǎxí-yu. Te ní cana-gá cue tée xica cuu ndìhi-gá, te ní xáhaⁿ-gá xii-güedé:

²—Yúhú, cündahú iní-í nchaa ñáyiu-a chi sa ní cuu úní nduu ndècu ndìhi ñahá-yu xii-o ìha, te ñá túú tñàhí ná sá cǎxí-yu.

³Te núu na nàtendaha-í-yu núhú tñámǎ-yu vehé-yu, te cuneé-yu docó ichi, chi davá-yu ío xica ndécú-yu —càchí-gá xáhaⁿ-gá xii-güedé.

⁴Te ní xáhaⁿ-güedě xii-gá:

—ĴTe ndèe ñìhí-ó sá cuáñaha-o càxi nchaa ñáyiu-a, te iha ñá túú ná ío chi cùu-xi xití yucu-i? —càchí-güedě xáhaⁿ-güedě xii-gá.

⁵Te Jèsús ní xicáⁿ tñuhú-gá núu-güedě, te xáhaⁿ-gá:

—ĴNá daha-gá pàà ndécú ndìhi-ndo-i? —càchí-gá xáhaⁿ-gá xii-güedé.

Te ní xáhaⁿ-güedě xii-gá:

—Ndècu ndìhi-ndí úsá-gá tñàhá —càchí-güedě xáhaⁿ-güedě xii-gá.

⁶Te Jèsús ní xáhaⁿ-gá xii nchaa ñáyiu sá ngóo-yu nchaa-yu, te ní ngóo-yu, te ní queheⁿ-gá ndi úsá pàà-án, te ní ndacáⁿ táhú-gá núu Yǎ Ndióxi. Te dàtnùnì ní táhú cuèchi-gá te ní sǎñaha-gá xii cue tée xica cuu ndìhi-gá ní dácáhñu-güedé nchaa ñáyiu-án. ⁷Te ndècu ndìhi-güedě ìiⁿ úú chácá líhli, te diu-ni ducaⁿ ní quide-gá ní ndacáⁿ táhú-gá núu Yǎ Ndióxi. Te dàtnùnì ní táuchíúⁿ-gá ní dácáhñu ñaha-güedě xii-yu. ⁸Te nchaa-yu ní xexí-yu ní ndahá xití-yu. Te sátá ní túhú cóhó-yu te ní nadatácá-güedé nchaa sá ní quendóo, te ní chítú úsá tñàhá tídihi mee-ni sá ní quendóo-án. ⁹Te núu ncháá ñáyiu ní xexi-án xínu dàtná cúmí mìl-yu. Te sátá ní yáha ní dácáxí ñaha Jèsús xii-yu te ní dándácá ñaha-gá. ¹⁰Te dàtnùnì cuánguee-gá bàrcú ndìhi cue tée xica cuu ndìhi-gá cuáháⁿ-gá ndìhi-güedé yucu cue tée ñuú Dalmànutá.

Cue tée cùu fariséu xàhaⁿ-güedë xii Jèsús cada-gá ìⁿ sá vã yõo tnàhí ndàcu cada

(Mt. 16:1-4; Lc. 12:54-56)

¹¹ Te núú ní quexìo Jèsús xíáⁿ ní sáá cue tée cùu fariséu, te ní ngüíta-güedé nándi tnúhu xàhaⁿ-güedë xii-gá xító ndèè ñáhá-güedë. Te xàhaⁿ-güedé sá ná cádá-gã ìⁿ sá vã yõo tnàhí ndàcu cada cundehe-güedé nàcuáa cutnùni iní-güedé núu ndáá sá Yã Ndiõxí ní tendaha ñàha-gá xii-gá véxi-gá ñuyú-a. ¹² Te ní sánuu iní-gá te ní xàhaⁿ-gã xii-güedé:

—Nchaa nchòhò ñáyiú ndècu ñuyú-a cuini-ndó càda-í ìⁿ sá vã yõo tnàhí ndàcu cada nacuáa cutnùni iní-ndó núu ndáá sá Yã Ndiõxí chindèè ñàha-gá xii-í. Dico na càchí tnúhu ndáá-í xii-ndo sã vã cádá-í sá cuini-ndó —càchí-gá xàhaⁿ-gã xii-güedé.

¹³ Te ní dándõ-gá ñáyiú xindecu-áⁿ, te cuánde-gá bàrcú ndihí cue tée xìca cuu ndihí-gá te cuáháⁿ-gá ndihí-güedé ndàa ingá xio yuhu làgná.

Nàcuáa quide cue tée cùu fariséu
(Mt. 16:5-12)

¹⁴ Te ní cunaa-güedé canehe-güedé sá cáxí-güedé quíhíⁿ, te ìⁿ dli-ni paá ndécú xití bàrcú-áⁿ ní nanhí-güedé. ¹⁵ Te Jèsús ní cáháⁿ-gá dóho-güedé, te xàhaⁿ-gã xii-güedé:

—Na càchí tnúhu-í xii-ndo sã ìo quihí iní-ndó cùndecu-ndo te vã cádá cuèndá tnàhí-ndo lèvadurá cue tée cùu fariséu, ndihí levadurá cue tée cùndihí té Hèrodés —càchí-gá xàhaⁿ-gã xii-güedé.

¹⁶ Te ní ngüíta-güedé xitnàha-güedé:

—Cuèndá sá ñà túú ní cànehe-o paá quixi núu xiã duha càháⁿ-gá —càchí-güedé xitnàha-güedé.

¹⁷ Te Jèsús ní cutnùni iní-gá nàcuáa ndùu tnúhu xitnàha-güedé, núu ní xàhaⁿ-gã xii-güedé:

—¿Ná cuèndá da sá ñà túú ní cànehe-ndo paá quixi càháⁿ-ndó? Te ñá díú cuèndá paá-áⁿ ní càháⁿ-í, te dicò-ni sá mée-ndó ñà túú quide cuèndá váha-ndo nàcuáa ndùu tnúhu càháⁿ-í, te ni ñã tècú tnùni-ndó chi ìo ñi díquí-ndó. ¹⁸ Te cuèi ndèhe-ndo dico ñà túú cùtnuní iní-ndó nã cúú nchàa sá quidè-í, te cuèi ndèdòho-ndo nchàa tnúhu càháⁿ-í dico ñã cùtnuní iní-ndó nãsa ndùu-xi, te ni ñã ndácú iní-ndó nchàa sá tá quide-í véxi. ¹⁹ Te chí dándàcu iní cùtnàhá ní tãhú cuèchí-í úhúⁿ-ni paá te ní xexi

úhúⁿ míl mee-ni cuè tée chi diu-ni cue tée-áⁿ ní quiúndehu. Te chí càchí tnúhu ná daha tídihi ní chítú mee-ni sã ní quendóo òrè ní nadatàcá-ndó —càchí-gá xàhaⁿ-gã xii-güedé.

Te ní xàhaⁿ-güedé xii-gá:

—Úxúú tnàhá tídihi ní chítú mee-ni sã ní quendóo —càchí-güedé xàhaⁿ-güedé xii-gá.

Te xàhaⁿ tùcu-gá:

²⁰ —Te cùtnàhá ní tãhú cuèchi tucu-í úsá tnàhá paá ní xexi cúmí míl ñáyiú, te chí càchí tnúhu ná daha tucu tídihi ní chítú mee-ni sã ní quendóo —càchí-gá xàhaⁿ-gã xii-güedé.

Te ní xàhaⁿ-güedé xii-gá:

—Úsá tnàhá tídihi ní chítú mee-ni sã ní quendóo —càchí-güedé xàhaⁿ-güedé xii-gá.

²¹ Te Jèsús ní xàhaⁿ tùcu-gá xii-güedé:

—Vitna, ¿te sa ní tecú tnùni-ndó tnúhu ní cáháⁿ-í ìⁿ ñàhá? —càchí-gá xàhaⁿ-gã xii-güedé.

Jèsús quidé tãtna-gá ìⁿ tée cuáá ñúú Bètsaidá

²² Te Jèsús ní sáá-gá ndihí cue tée xìca cuu ndihí-gá ñúú Bètsaidá. Te ñúú-áⁿ ndécú-gã ní quexio ñáyiú núú-gã tánèhé-yu ìⁿ tée cuáá, te càháⁿ ndàhú-yu núú-gã núu vã cùndèe iní-gá tendaha ñàha-gá xii-dé cuèndá ndúha núú-dé. ²³ Te Jèsús ní tni-gã ndaha tée cuáá-áⁿ, te ní queñuhu ñàha-gã tnuú-yu, te ndèca ñàha-gá cuáháⁿ ìⁿ xio yuhu ñúú. Te yàcáⁿ ní dácànúu-gá díí-gã núú-dé te ní tendaha ñàha-gá xii-dé, te dátuní ní xicáⁿ tnúhú-gã núú-dé, te xàhaⁿ-gã:

—¿Cùtnuní núú-n-ãⁿ? —càchí-gá xàhaⁿ-gã xii-dé.

²⁴ Te tée cuáá-áⁿ ní ndonehe núú-dé, te xàhaⁿ-dè xii-gá:

—Cùtnuní núú-í ndèhè-í nchaa cue tée-ãⁿ, dico dà ndáa yutnu cuí ndáa-güedé te xìca-güedé —càchí-dé xàhaⁿ-dè xii-gá.

²⁵ Te Jèsús ní tendaha tùcu-gá núú-dé te ní cuu ní ndacoto váha-gá-dé, te òrè-áⁿ ní ndúha núú-dé. Te nchaandi túhú sá ndéhè-dé ní cutnùni váha núú-dé nándi cùu nchaa xiãⁿ. ²⁶ Te ní xàhaⁿ Jèsús xii-dé:

—Vitna te nùhú-n, dico ndáá ichi vehe-n nùhú-n te ñã díú dà xití ñúú quíhíⁿ-n, te vã yõo ìⁿ cúñaha-n sã yùhú ní quide tãtna-í núú-n ní ndúha —càchí-gá xàhaⁿ-gã xii-dé.

Té Pèlú xàhaⁿ-dë xii Jèsús sá díú-gă cuú-gă Cristú

(Mt. 16:13-20; Lc. 9:18-21)

²⁷ Te Jèsús ní xica-gă cuáháⁿ-gă ndihí cue téé xica cuu ndihí-gă nchaa ñúú líhli càa ñúú Cèsareá Fìlipú, te òré ñúhú-gă ndihí-güedé ichi te ní xícáⁿ tnúhú-gă núú-güedé, te xàhaⁿ-gă xii-güedé:

—Chí cächí tnúhu nása cáháⁿ ñáyiú cuëndá-í. ¿Yoo cùu-í cächí-yu-va? — cächí-gă xàhaⁿ-gă xii-güedé.

²⁸ Te ní xàhaⁿ-güedé xii-gă:

—Davá-yu cächí-yu sá cúu-n ndii Juàà téé ní xóo dacuàndute ñaha xii ñáyiú, te davá-yu cächí-yu sá cúu-n tē Èliás, te dava tucú-yu cächí-yu sá cúu-n ñⁿ téé ní xóo cáháⁿ tnúhu Yá Ndiòxí ndéé sanaha, duha cächí-yu —cächí-güedé xàhaⁿ-güedé xii-gă.

²⁹ Te ní xícáⁿ tnúhú tucu-gă núú-güedé, te xàhaⁿ-gă xii-güedé:

—Te nchòhó, ¿yoo sàni iní-ndó cùu-í-i? —cächí-gă xàhaⁿ-gă xii-güedé.

Te té Pèlú ní xàhaⁿ-dë xii-gă:

—Yòhó cúu-n Cristú Yaá ní tendaha Yá Ndiòxí véxi ñuyíú-a —cächí-dé xàhaⁿ-dë xii-gă.

³⁰ Te Jèsús ní cáháⁿ-gă dóho-güedé, te xàhaⁿ-gă:

—Vá yòo ñⁿ cúñaha-ndo yòo cuu-í —cächí-gă xàhaⁿ-gă xii-güedé.

Jèsús cáháⁿ-gă sá cáhni ñaha-güedé xii-gă

(Mt. 16:21-28; Lc. 9:22-27)

³¹ Te Jèsús ní nguíta-gă xitnùhu-gă cue téé xica cuu ndihí-gă nàcuáa yáha-gă, te xàhaⁿ-gă xii-güedé:

—Yúhú Téé cùu ñani tnáhá-ndó nchàa-ndo chi ío ndoho-í, chi daquèe tihú ñáhá nchàa cue téé cùu sacuéhé núú ñáyiú israhél, ndihí cue dúttú cúnùu, ndihí cue téé dācuaha ñaha xii ñáyiú nchaa tnúhu ní chídó tnùní ní chídó tnùní ndii Moisés, nchaa cue téé-áⁿ daquèe tihú ñáhá-güedé xii-í. Te sáá nduu te cahni ñaha-güedé xii-í, dico nduu úní sá cùu-í te ndoto-í —cächí-gă xàhaⁿ-gă xii-güedé.

³² Te ducaⁿ ní cáháⁿ Jèsús núú cuè téé xica cuu ndihí-gă nàcuáa tecú tnùní váha-güedé tnúhu cáháⁿ-gă. Te té Pèlú ní cana ñaha-dë xii-gă ñⁿ xio, te ní nguíta-dé ténàá ñáhá-dë xii-gă ní cùu. ³³ Dico Jèsús ndihí-ni ní nchócuñhu-gă ní ndàcoto-gă

núú nchàa-güedé chi ndàa sátá-gă xñ-decu-güedé, te ní nguíta-gă ténàá-gă té Pèlú, te xàhaⁿ-gă xii-dé:

—¿Xocuñí yòhó núu-í-a, chi dàtná cáháⁿ yucu ñávaha cáháⁿ-ni! Chi ñá túú sàni iní-ò dàtná sání iní Yá Ndiòxí, chi ñⁿ-ni sàni iní-ò ndihí dava-gă cue ñáyiú ndècu ñuyíú-a —cächí-gă xàhaⁿ-gă xii-dé.

³⁴ Te Jèsús ní cana-gă nchaa cue téé xica cuu ndihí-gă, ndihí nchaa ñáyiú xñ-decu-áⁿ, te ní xàhaⁿ-gă:

—Nchaa ñáyiú cuñí chitnahá ñáhá xii-í, te xini ñuhu-xi vá cáda-gă-yu sá sání iní méè-yu, te ío cada ndee iní-yu cundecu túha-yu ndohó-yu cuëndá-í, te cuèi na ndohó-yu dàtná ndoho-í. ³⁵ Te nchaa ñáyiú cuñí sá ñà túú tnàhí ná yáha cundecu ñuyíú-a cuíta nihnú-yu, dico nchaa ñáyiú ñá túú tnàhí yùhú cuèi nándi sá ná yáha-yu cundecú-yu ñuyíú-a sá cuëndá-í,

ndihí sá cuëndá tnúhu-í, te ñáyiú-áⁿ nanhí tàhú-yu. ³⁶ Te cuèi nchaandí túhú sá ío ñuyíú-a na nihí ñáyiú cundecu ndihí-yu, dico núu diu nchaa xíáⁿ ná càda cuíta nihnú-yu te ñá túú vèdana nàndihí-xi sá dúcáⁿ ndècu ndihí-yu nchaa xíáⁿ. ³⁷ Te ni ñⁿ sá ío ñuyíú-a vá chindèe-xi ñáyiú cuëndá nanhí tàhú-yu. ³⁸ Te nchaa ñáyiú na cùcahaⁿ núu-xi cáháⁿ váha cuëndá-í, ndihí cuëndá tnúhu-í núú nchàa ñáyiú dàquèe tihú ñáhá xii Yá Ndiòxí, ñáyiú xñdecu ichi cuèhé ichi duha, te tnàhí yùhú Téé cùu ñani tnáhá-yu nchaa-yu cucahaⁿ núu-í

núu-yu òré ná quixi tucu-í ndihí cue espíritu xínú cuèchi núú Tàtà-í Dútú Ndiòxí. Te mee-gă cada cutnùní iní nchaa ñáyiú sá yùhú ío cànhu cuu-í.

9

¹ Te na cächí tnúhu ndáá-í xii-ndo sá ío dava nchòhó ñáyiú xñdecu iha vitna vá cùu-ni-ndo, chi cundecu-ni-ndo ndéé quini-ndó sàá nduu ndíhu ndaha ñaha Yá Ndiòxí xii ñáyiú, te davá-áⁿ quini-ndó sá ndácú-gă quídé-gă nchaandi túhú sá váha —cächí-gă xàhaⁿ-gă xii cue téé xica cuu ndihí-gă ndihí cue ñáyiú-áⁿ.

Jèsús ní nadama dóó-gă ndihí núu-gă

(Mt. 17:1-13; Lc. 9:28-36)

² Te núú inú nduu sá dúcáⁿ ní cáháⁿ Jèsús te ní xica-gă cuásaá-gă ñⁿ yucu dùcúⁿ, te ndèca-gă té Pèlú, ndihí té Jacobó, ndihí

té Juàá cuásaá, te úní tnàhí-ni cue tée-án ndécá-gá cuásaá. Te yucu-án ndécú-gá ní nadama núú-gá, ³ te ní nadama dóó-gá. Te dóó-gá-án súúni ní nduu cuixíⁿ quiyí te tásaⁿ, te ni ìn ñáyiú ñuyíú-a ñá túú ndàcú-yu naqueté-yu ìn dóó nduu cuixíⁿ dàtná ní nduu dóó-gá. ⁴Te ní xiní-güedé té Moisés ndihi té Èliás nútñi-güedé ndihi-gá ndátnúhu ndihi ñaha-güedé xii-gá. ⁵Te té Pelú ní xáhaⁿ-dè xii Jèsús:

—Mèstrú, ¡váha ní cuu sá ndécú-ó ìha vitna! Te na dàcaa-ndí úní tnàhá vehe tnuxixíⁿ, te ìn cuu cuèndá-n te ìn cuu cuèndá té Moisés te ìn cuu cuèndá té Èliás —càchí-dé xáhaⁿ-dè xii-gá.

⁶ Te ducaⁿ ní cáháⁿ-dé chi ío ní yuhú-güedé, te cuèndá-ni ní cuu yáchi-dé ní cáháⁿ-dé, te ni mée-dé ñá túú ní cùtnuní iní-dé nása nduu tnúhu ní cáháⁿ-dé. ⁷Te òré-án ní quexio ìn vícò núú ndécú-güedé ndihi Jèsús ní dádáhu ñaha-xi xii-güedé ndihi-gá, te xití vícò-án ní cáháⁿ Yá Ndióxi ní tecú dóho-güedé, te xáhaⁿ-gá xii-güedé:

—Tée-a cùu-dé Déhe-í tée ío cùu iní-í, te cundedóho-ndo nchaa tnúhu càháⁿ-dé —càchí-gá xáhaⁿ-gá xii-güedé.

⁸ Te òré ní quide cuèndá-güedé, te ñá túú-gá ní xiní-güedé cue tée úú-án chi mee-ná Jèsús ndécú.

⁹ Te òré cuánuu ndihi ñaha-gá xii-güedé yucu-án, te ní cáháⁿ-gá dóho-güedé, te xáhaⁿ-gá:

—Vá yóo ìn cúnaha-ndo nchaa sá ní xiní-ndó núú ní sáá-ó-á, te cuu cáháⁿ-ndó dico ndéé ná yáha ndoto yuhú Tée cùu ñaní tnàhá-ndó nchaa-ndo sá cùú-í —càchí-gá xáhaⁿ-gá xii-güedé.

¹⁰ Núu xíáⁿ cue tée-án ní xúhuⁿ nahi-ni ìní-güedé nchaa sá ní xiní-güedé núú ní sáháⁿ-güedé ndihi Jèsús te ñá túú tnàhí ní cáháⁿ-güedé, dico ní ndúcú tnúhu núú tnàhá-güedé ná cuèndá ducaⁿ ní cáháⁿ-gá sá ndéé ná yáha ndoto-gá sá cùú-gá te dàtnuní cáháⁿ-güedé nàcuáa nduu nchaa sá ní xiní-güedé. ¹¹Te ní xicáⁿ tnúhú-güedé núú Jèsús, te xáhaⁿ-güedé xii-gá:

—¿Cuíní-ndí cachí tnúhu-n ná cuèndá càchí cue tée dàcuaha ñaha xii ñáyiú nchaa tnúhu ní chídó tnuní ndí Moisés sá dñha-gá té Èliás ndixí-dé te dàtnuní quixi Yá tendaha Yá Ndióxi quixi ñuyíú-a? —càchí-güedé xáhaⁿ-güedé xii-gá.

¹² Te Jèsús ní xáhaⁿ-gá:

—Ndáá sá códo núu ìn tée quixi-dé te cada-dé dàtná ní quide té Èliás, te tée-án cada ndáá-dé nchaa nàcuáa cùu. Dico núú tütú Yá Ndióxi càháⁿ-xi cuèndá yuhú Tée cùu ñaní tnàhá-ndó nchaa-ndo sá ò ndoho-í, te daquèe tihú ñáhá ñáyiú xii-í. ¹³Te na càchí tnúhu-í xii-ndo vitna sá sá ní quixi ìn tée ní quide dàtná ní xóo cada té Èliás, te cue ñáyiú ñá túú ní cànehé-yu sá yíñùhu núú-dé, te ní quide ñáhá-yu xii-dé nchaa nàcuáa ní quixi iní mée-yu. Te núú tütú Yá Ndióxi sa ndéé tnuní nchaa nàcuáa yáha-dé, te nchaa xíáⁿ sa ní quide ñaha ñáyiú xii-dé —càchí-gá xáhaⁿ-gá xii-güedé.

Jèsús quidé tātna-gá ìn tée cuechi yíhi ñaha espíritú cúndñi yucu ñáváha

(Mt. 17:14-21; Lc. 9:37-43)

¹⁴ Te Jèsús ní ndexio-gá ndihi cue tée úní-án núú xíndecu dava-gá cue tée xica cuu ndihi-gá, te vai vihi ñáyiú ndècu núú ndécú-güedé-án, te tnàhá te vai dàcuaha ñaha xii-yu nchaa tnúhu ní chídó tnuní ndí Moisés xíndecu, te cue tée-án nándi tnúhu xáhaⁿ-güedé xii cue tée xica cuu ndihi Jèsús. ¹⁵Te òré ní xiní-yu ní ndexio-gá, te nchaa-yu ío ní cuñúhu-yu, te xinú-yu ní sáháⁿ ní cáháⁿ ndihi ñàhá-yu xii-gá. ¹⁶Te ní xicáⁿ tnúhú-gá núú cuè tée xica cuu ndihi-gá núu ná tnúhu ndátnúhu-güedé ndihi cue tée-án. ¹⁷Te ìn ñáyiú xíndecu xíáⁿ ní xáháⁿ-yu xii-gá:

—Mèstrú, ndéca-í déhe-í véxi nànducu ñaha-í xii-n, chi yíhi ñaha espíritú cúndñi yucu ñáváha xii-dé, te diu xíáⁿ ní quide ní cuu ñihí-dé. ¹⁸ Te ío ndòho-dé chi súúni ndèni ní cuu ngótní ñaha-xi xii-dé, te òré ducaⁿ quide ñaha-xi xii-dé te dànduá ñáhá-xí, te quène tñú yuhu-dé, te cùrúhñú ñúhu-dé, te ndàda ruúⁿ ñáhá-xí xii-dé. Te sa ní xáhaⁿ-í xii cue tée xica cuu ndihi-n sá queñúhu-güedé espíritú cúndñi yucu ñáváha yíhi ñaha xii-dé dico ñá túú ní ndàcu-güedé queñúhu-güedé-xi —càchí ñáyiú-án xáháⁿ-yu xii-gá.

¹⁹ Te Jèsús ní xáhaⁿ-gá:

—¡Nchaa nchóhó ñáyiú ndècu ñuyíú-a ío sáá iní-ndó, chi ñá túú cuíní-ndó quíndáá iní-ndó Yá Ndióxi, te ní cuu vai nduu quide ndee iní-í nchaa sá quidé-ndó! ¿Te ná ndéé ama vá dúcáⁿ-gá cada-ndo-í? Te chí

cándèca tée cùhú-án táquixi iha —cachí-gá xáhaⁿ-gá xíí-yu.

²⁰ Te ñáiyu ndihi ñaha xii tée yíhi ñaha espíritú cúndíhi yucu ñáváha-án ndécá ñáhá-yu xii-dé cuáháⁿ ndéé núú Jèsús, te òré ní xiní ñáhá espíritú cúndíhi yucu ñáváha-án xii-gá, te ní ngúíta-ni-xi sàhni yíhi ñáhá tucu-xi xii-dé, te ní dándùá ñáhá-xí xii-dé, te ní ngúíta-dé xíchí ñùhu-dé, te quène tǎnú yuhu-dé. ²¹ Te Jèsús ní xícáⁿ tnúhú-gá núú tǎtá-dé, te xáhaⁿ-gá xii-dé:

—¿Ná ndéé ama ní ngúíta-xi duha ndòho déhe-n? —càchí-gá xáhaⁿ-gá xii-dé.

Te tée-án ní xáhaⁿ-dè xii-gá:

—Ndéé cútñàhá cùú lǐhli-dé ní ngúíta espíritú cúndíhi yucu ñáváha duha quide ñaha-xi xii-dé. ²² Te ní cùtǐtní xito dǎngaunihnu ñaha-xi xii-dé núú ñùhú, te ní cutǐtní tucu xito dǎngaunihnu ñaha-xi xii-dé ndute cùiní-xi cahni ñaha-xi xii-dé. Te ndèca-í-dé véxi núú-n te núú ndacu-n cada tǎtna-n-dé, te cundáhú iní ñáhá-n xii-ndí chindee ñàha-n —cachí-dé xáhaⁿ-dè xii-gá.

²³ Te Jèsús ní xáhaⁿ-gǎ:

—Te ná cuèndá càchí-n núú ndacu-í cada tǎtna-í déhe-n, chi nchaa ñáiyu na quindáá iní ñáhá xii-í te nihí-yu sá ná càcáⁿ-yu núú-í —càchí-gá xáhaⁿ-gá xii-dé.

²⁴ Te tǎtá tée cuechi-án ñíhi ní cáháⁿ-dè xáhaⁿ-dè xii-gá:

—Sàndáá iní ñáhà-í xii-n, dico chindee ñaha xii-í cuèndá ná quindáá iní ñáhá-gǎ-í xii-n —càchí-dé xáhaⁿ-dè xii-gá.

²⁵ Te Jèsús ndéhe-gǎ sá ò vǎi ñáiyu ta tàcá núú ndécú-gǎ-án. Te ní tenáá-gá espíritú cúndíhi yucu ñáváha-án, te xáhaⁿ-gá xii-xi:

—Yòhó espíritú cúndíhi yucu ñáváha, ní quide ñáhí-n ní quide doho-n tée-a, dico vitna yúhú càchí-í sá queé-n yiqui cuñú-dé te vǎ ndíhu-gá-n —càchí-gá xáhaⁿ-gá xii espíritú cúndíhi yucu ñáváha-án.

²⁶ Te espíritú cúndíhi yucu ñáváha-án ní dácáná sàa ñaha-xi xii tée-án, te ní sahni yíhi ñáhá tucu-xi xii-dé, te dǎtnùn ní quee ñaha-xi xii-dé cuáháⁿ-xi, dico tée-án chi dacàa-ni ndíyí càa-dé cǎtùu-dé. Te nchaa ñáiyu xindecu xíáⁿ càchí-yu sá ní xíhí-dé ní cùu. ²⁷ Te Jèsús ní tñii-gá ndaha-dé ní

ndocani ñaha-gǎ xii-dé, te ní ndacóo-dé ní nucúnutñii-dé.

²⁸ Te Jèsús cuándihu-gá xití vehe ndihi cue tée xica cuu ndihi-gá, te òré ndéhe-güedé ñá túú-gǎ ñáiyu, te ní xícáⁿ tnúhú-güedé núú-gǎ, te xáhaⁿ-güedé xii-gá:

—Cachí tnúhu xii-ndí ná cuèndá ñá túú ní ndacu-ndí queñuhu-ndí espíritú cúndíhi yucu ñáváha yíhi ñaha xii tée-án —càchí-güedé xáhaⁿ-güedé xii-gá.

²⁹ Te Jèsús ní xáhaⁿ-gǎ xii-güedé:

—Na càchí tnúhu-í xii-ndo sǎ núu òré cùiní-ndó queñuhu-ndo espíritú cúndíhi yucu ñáváha yíhi ñaha xii ñáiyu dǎtná cùú espíritú cúndíhi-xi yíhi ñaha xii tée-án ní cùu ña, te xiní ñuhu-xi sá ò cáháⁿ ndihi-ndo Yǎ Ndióxi te ñá túú tnáhí ná caxi-ndo cáháⁿ ndihi-ndo-gǎ, te ducaⁿ te ndacu-ndo queñuhu-ndo espíritú cúndíhi yucu ñáváha yíhi ñaha xii ñáiyu —càchí-gá xáhaⁿ-gǎ xii-güedé.

Jèsús cáháⁿ tucu-gá sá cáhni ñaha-güedé xii-gá

(Mt. 17:22-23; Lc. 9:43-45)

³⁰ Te Jèsús ní quee-gá núú ndécú-gǎ-án ndihi cue tée xica cuu ndihi-gá cuáháⁿ-gǎ ndihi-güedé dǐstrítú Galiléa, te cùiní-gá sá vǎ quini ñáiyu ndéé ichi cuáháⁿ-gá. ³¹ Te ducaⁿ ní sani iní-gá, chi mee-gǎ sa ñaha-gá sá ndáá cada-xi nàcuáa xáhaⁿ-gǎ xii cue tée xica cuu ndihi-gá, te duha xáhaⁿ-gǎ xii-güedé:

—Yúhú Tée cùu ñaní tnáhá-ndó nchaa-ndo sáá ñiiⁿ nduu te cuáha cuèndá ñáhá-güedé xii-í núú cuè tée cùu úhú iní ñáhá, te cahni ñaha-güedé xii-í, dico nduu úní sá cùú-í te ndoto-í —càchí-gá xáhaⁿ-gǎ xii-güedé.

³² Dico ñá túú tnáhí ní tècú tnùn-í-güedé nása nduu tnúhu ní cáháⁿ-gá, te ní ñá túú ní cùyii-güedé cǎcáⁿ tnúhú-güedé núú-gǎ.

Cue tée nducu tnúhu núú tnáhá núu ndé-dacàa-güedé ò-gá cùnùu

(Mt. 18:1-5; Lc. 9:46-48)

³³ Te Jèsús ní quexìo-gá ndihi cue tée xica cuu ndihi-gá núu Capernaúm, te òré sa ndècu-gá ñiiⁿ vehe te ní xícáⁿ tnúhú-gǎ núú-güedé, te xáhaⁿ-gǎ xii-güedé:

—¿Nándi cùu tnúhu ta xitñàha-ndo véxi? —càchí-gá xáhaⁿ-gǎ xii-güedé.

³⁴ Dico ñá túú tñàhí ní cǎháⁿ-güedé cǎñaha-güedé xii-gá nũu ná tñúhu xitñaha-güedé òrè ñúhú-güedé ichi. Te ducaⁿ ní quide-güedé chi cuendá tá ndàtñúhu-güedé nũu ndédacàa-güedé ío-gá cúnúu. ³⁵ Te Jèsús ní ngóo-gá, te ní xáhaⁿ-gǎ xii ndí ùxúú cue téé xica cuu ndihí-gá:

—Chí táquixi iha te cundedóho-ndo tñúhu na cǎháⁿ-í-a. Te núu ío dava-ndo cúní-ndó cúnúu-ndo, te cada-ndo sǎ cúu-ndó ñáiyu nchícúⁿ cuií-nǎ, te cunu cuechi-ndo nũú tñàha ñáiyu-ndo —cǎchí-gá xáhaⁿ-gǎ xii-güedé.

³⁶ Te Jèsús ní sanutñí-gá ìⁿ té líhli cuá-dava tnuú-güedé, te dàtnúni ní nguídèhè ñáhá-gǎ xii-dé, te xáhaⁿ-gǎ xii-güedé:

³⁷ —Nchaa ñáiyu na queheⁿ cuendá ìⁿ té líhli dàtná té líhli-a cuendá sǎ ñúhú íni ñáhá-yu xii-í ñá, te cada íni-yu sǎ yúhú ní queheⁿ cuendá-yu. Te nchaa ñáiyu na queheⁿ cuendá ñáhá xii-í te ñá díú-ní mèe-í ní queheⁿ cuendá-yu, chí tñáhá Tàtà-í Dútú Ndíòxí Yáá ní tendaha ñàha xii-í véxi-í ñuyúí-a ní queheⁿ cuendá-yu —cǎchí-gá xáhaⁿ-gǎ xii-güedé.

Nchaa ñáiyu ñá túú cùu úhú íni ñáhá xii-o te cùndihí ñáhá-yu

(Mt. 10:42; Lc. 9:49-50)

³⁸ Te té Juáá díu-ni ìⁿ téé xica cuu ndihí-gá ní xáhaⁿ-dè xii-gá:

—Mèstrú, ní xiní-ndí ìⁿ téé càcunehe ñàha-dé xii-n, te queñuhu-dé espíritú cùndihí yucu ñávàha yíhi ñàha xii ñáiyu, te nchúhú ñá túú ní dàña-gá-ndí ducaⁿ càda-dé, chí ñá túú xica cuu ndihí ñàha-dé xii-o —cǎchí-dé xáhaⁿ-dè xii-gá.

³⁹ Te Jèsús ní xáhaⁿ-gǎ xii-güedé:

—Daña-ndo na càda nahi-dé ní cùu, chí ñá túú ní ìⁿ ñáiyu ndíhi ndíhi-ni ndacu cǎháⁿ cuèhé cuendá-í te núu cà-cunehe ñáhá-yu xii-í, te quidé-yu sǎ vǎ yóo tñáhí ndàcu cada. ⁴⁰ Te nchaa ñáiyu ñá túú cùu úhú íni ñáhá xii-o te cùndihí ñáhá-yu. ⁴¹ Te na cǎchí tñúhu-í xii-ndo sǎ cuè ñáiyu na tàxi ìⁿ yaxiⁿ ndute coho-ndo cuendá sǎ cúu-ndó cue téé xica cuu ndihí-í, te ñáiyu-áⁿ sǎá nduu te dacuí sǎ nihí-yu sǎ ndúú tǎhũ-yu —cǎchí-gá xáhaⁿ-gǎ xii-güedé.

Cada cuendá-o vǎ cùndècu-o ichi cuehé ichi duha

(Mt. 18:6-9; Lc. 17:1-2)

⁴² Te xáhaⁿ tucu Jesús xii-güedé:

—Te núu ìⁿ téé na dàcǎháⁿ-dé cue ñáiyu sǎndáá íni ñáhá xii-í cada-yu nándi sǎ cuèhé sǎ dúhá, te váha-gá sǎ nũu na dà-cutu ndeé-güedé ìⁿ yúú yódó dǔcúⁿ-dè, te dàquée ñàha-güedé xii-dé xití ndute lámár, te ñá díú sǎ cùndècu-dé ducaⁿ càda-dé. ⁴³ Te núu ìⁿ xio ndaha-ndo quide-xi quide-ndo nándi sǎ cuèhé sǎ dúhá, te quehndé-ndó cuíta-xi, chí váha-gá sǎ nánihí tǎhú-ndó cuèi ña cuíta ìⁿ xio ndaha-ndo te ñá díú sǎ quíhíⁿ-ndó nihíí ní ndúú-ndó nũú ùhú núú ndàhú núú dicó sǎá ndáhá itá ñuhú ní caa ní quíhíⁿ. ⁴⁴ Chi yàcáⁿ cúu-xi núú ñá túú tñáhí ndàhvǎ ñuhú, te ío ndoho-ndo cùndècu-ndo xíáⁿ ní caa ní quíhíⁿ. ⁴⁵ Te núu ìⁿ xio sǎhá-ndó quide-xi quide-ndo nándi sǎ cuèhé sǎ dúhá, te quehndé-ndó cuíta-xi, chí váha-gá sǎ nánihí tǎhú-ndó cuèi na cuíta ìⁿ xio sǎhá-ndó, te ñá díú sǎ quíhíⁿ-ndó nihíí ní ndúú-ndó nũú ùhú núú ndàhú núú dicó sǎá ndáhá itá ñuhú ní caa ní quíhíⁿ. ⁴⁶ Chi yàcáⁿ ñá túú tñáhí ndàhvǎ ñuhú, te ío ndoho-ndo cùndècu-ndo xíáⁿ ní caa ní quíhíⁿ. ⁴⁷ Te núu ìⁿ xio tinúu-ndo quide-xi quide-ndo nándi sǎ cuèhé sǎ dúhá, te tava-ndo cuíta-xi, chí váha-gá sǎ cùndècu-ndo núú ndécú Yǎ Ndíòxí tàxi tñuní-gá cuèi na cuíta ìⁿ xio tinúu-ndo, te ñá díú sǎ ndí ndúú xio núú-ndó quíhíⁿ-ndó nũú ùhú núú ndàhú. ⁴⁸ Chi yàcáⁿ ñá túú tñáhí ndàhvǎ ñuhú, te ío ndoho-ndo cùndècu-ndo xíáⁿ ní caa ní quíhíⁿ.

⁴⁹ Te dàtná quidé-güedé quití sǎhni-güedé chíhi-güedé cuñú-dí ñíí te dàquée-güedé núú ñuhú, ducaⁿ sǎtnahá-xi ndoho cue ñáiyu chí ío ndohó-yu. ⁵⁰ Te ñíí chí ío váha nándihí-xi, dico núu na ndúu víxiⁿ-xi te ñá túú-gǎ nándihí-xi te ní ñá túú-gǎ nása cada-o ndúu úhá tucu-xi. Te ío váha cada cuendá-ndó nàcuáa cùndècu-ndo cuendá cuu-ndo ñáiyu váha, te ducaⁿ te cuu-ndo dàtná ñíí sǎ ñá túú ndúu víxiⁿ, te ío váha cùndècu ndihí tñàha-ndo —cǎchí-gá xáhaⁿ-gǎ xii-güedé.

10

Jèsús cǎháⁿ-gǎ cuendá cue ñáiyu dàña

tnaha

(Mt. 19:1-12; Lc. 16:18)

¹Te Jèsús ní xica-gá cuáhán-gá ní yáha-gá yucu distrítú Jùdeá ní téhndé-gá ndàa ingá xio yúte Jòrdán. Te yàcáⁿ ndécú-gá ní tacá tucu cuéhé v́hí ñáyiú, te ní ngúita-ni tucu-gá dánèhé ñáhá-gá xíí-yu tnúhu-gá chi ducaⁿ tnàhí quíde-gá. ²Te ní quèxio ìíⁿ úú cue tée cùu fariséú núú ndécú Jèsús xíto ndéé ñáhá-güedé xii-gá núu nása cunduú tnúhu cáháⁿ-gá, te xáhaⁿ-güedé xii-gá:

—Véxi-ndí xicáⁿ tnúhú-ndí núú-n núu cuu daña ìíⁿ tée ñadihí-dé áⁿ ñáhá — càchí-güedé xáhaⁿ-güedé xii-gá.

³Te Jèsús ní xáhaⁿ-gá xii-güedé:

—Te nchòhó, ìnása ní cachí ndíi Moisés cada-ndo-i? —càchí-gá xáhaⁿ-gá xii-güedé.

⁴Te ní xáhaⁿ-güedé xii-gá:

—Ndíi Moisés ní cachí ndíi sá cúú dàña ìíⁿ tée ñadihí-dé dicó-ni sá cadúha-dé ìíⁿ tutú cuáñaha-dé, te núú tütú-áⁿ codo tnùní sá ní dàñá ñaha-dé, te ducaⁿ te cuu daña-dé ñadihí-dé —càchí-güedé xáhaⁿ-güedé xii-gá.

⁵Te Jèsús ní xáhaⁿ-gá xii-güedé:

—Te ducaⁿ ní chídó tnùní ndíi Moisés cada-ndo cuèndá sá ìo sáa iní-ndó. ⁶Dico Yá Ndiòxí cútñàhá ní cadúha-gá ñuyíú ndíhi nchaa sá ìo, chi tée ñadihí ní cadúha-gá. ⁷Te xíáⁿ núu nchaa cue tée na nihí ñadihí-xi, te ìíⁿ-ná cada-güedé tátá-güedé ndíhi náná-güedé, chi mee-ná ñadihí-güedé cuu cuu ndíhi-güedé. ⁸Te cue ñáyiú úú-áⁿ ñà túú-gá ndí ìíⁿ ndí ìíⁿ yìqui cuñú cúú-yu, chi cada iní-ndó sá ìíⁿ-ná yìqui cùñú cúú-yu. ⁹Te xíáⁿ núu ñà túú ndúu váha-xi daña cuè tée ñadihí-güedé, chi mee Yá Ndiòxí ní cachí-gá sá cúú úú-yu cundécú-yu ndéé naa ndéé cuú-yu —càchí-gá xáhaⁿ-gá xii-güedé.

¹⁰Te òré yíhí Jèsús ndíhi cue tée xica cuu ndíhi-gá vehe, te ní xicáⁿ tnúhú-güedé núú-gá nása ndúu tnúhu ní cáháⁿ-gá cuèndá cue ñáyiú dàña tnaha. ¹¹Te Jèsús ní xáhaⁿ-gá xii-güedé:

—Te núú ìíⁿ tée na dàña-dé ñadihí-dé te naqueheⁿ-dé ingá ñadihí, te ío nèhé quíde-dé, te ìíⁿ-ni cuèchi cùu-xi ndíhi cuèchi quíde tée ndèca ñadihí te càháⁿ ndíhi-dé ingá ñadihí. ¹²Te ìiu-ni ducaⁿ sátnhá-xi cùu tucu ñáyiú ìhí te núu na

dàñá-yu yíí-yu te naquehéⁿ-yu ingá tée, chi ìíⁿ-ni cuèchi cùu-xi sá quíde-yu ndíhi sá quíde cuè ñáyiú ìhí ndécú yíí-xi, te càháⁿ ndíhi-yu ingá tée —càchí-gá xáhaⁿ-gá xíí-yu.

Jèsús xicáⁿ táhú-gá núú Yá Ndiòxí cuèndá landú

(Mt. 19:13-15; Lc. 18:15-17)

¹³Te ìíⁿ úú ñáyiú ndècá-yu landú ìhli cuáhán núú Jèsús, chi cuíní-yu sá téndàha ñaha-gá xii-güexi. Te cue tée xica cuu ndíhi-gá ní ngúita-güedé ténàa ñáhá-güedé xíí-yu, te xáhaⁿ-güedé sá v́a dúcáⁿ càdá-yu. ¹⁴Te òré ní xiní-gá sá dúcáⁿ quíde-güedé, te ní cudééⁿ-gá núú-güedé, te xáhaⁿ-gá xii-güedé:

—Chí dàñá ná quíxi nahi cue landú ìhli-áⁿ núú-í-a te v́a càdí-ndó ìchi-güexi, chi dàtná cúú váha iní cue landú ìhli-áⁿ ducaⁿ cùu váha iní cue ñáyiú yíndaha Yá Ndiòxí. ¹⁵Te na càchí tnúhu ndáá-í xii-ndo sá núu v́a quíndáa iní ñáhá-ndó dàtná quíde cuè landú ìhli sàndáa iní ñáhá xii-í, te v́a ndíhu ndaha ñaha Yá Ndiòxí xii-ndo —càchí-gá xáhaⁿ-gá xii-güedé.

¹⁶Te sáta dúcáⁿ ní xáhaⁿ-gá te ní nguídèhé-gá cue landú-áⁿ te ní tendaha ñaha-gá xii-güexi, te ní xicáⁿ táhú-gá núú Yá Ndiòxí cuèndá-güexi.

ìíⁿ tée cuica càháⁿ ndíhi-dé Jèsús

(Mt. 19:16-30; Lc. 18:18-30)

¹⁷Te òré sa ñúhu ichí Jesús caca-gá quíhíⁿ-gá ingá xichi ni cùu ní quèxio cunu ìíⁿ tée ní nguíni xítí-dé núú-gá, te xáhaⁿ-dè xii-gá:

—Yòhó Mèstrú, cùu-n tée ío váha iní-xi, te cuíní-í núu v́a cündèe iní-n càchí tnúhu-n ná cúú sá càdá-í cuèndá nduú táhú-í cundecu-í ndíhi Yá Ndiòxí ní caa ní quíhíⁿ —càchí-dé xáhaⁿ-dè xii-gá.

¹⁸Te Jèsús ní xáhaⁿ-gá xii-dé:

—¿Te cùtnuní iní-n nàcuáa ndúu tnúhu càháⁿ-n sá yúhú váha iní-áⁿ? Chi ìíⁿ ìíⁿ-ni Yá Ndiòxí ío váha iní-gá. ¹⁹Te yòhó xiní-n nàcuáa ní cachí Yá Ndiòxí cada ñáyiú, te duha ní cachí-gá: “Nchòhó cue tée v́a càháⁿ ndíhi-ndo ñadihí te núu ñá díú ñadihí-ndó cùu-yu, te ducaⁿ-ni nchòhó cue ñáyiú ìhí tucu v́a càháⁿ ndíhi-ndo tée te núu ñá díú yíí-ndo cuu-güedé, te v́a cáhni-ndó tnàha ñáyiú-ndo, te ní v́a

dúhú-ndó sã ndécú ndíhí-yu, te ni vã dácacu-ndo cuéchi neñúú sá cúú-xí tnàha ñáiyu-ndo, te ni vã dácuandehnde-ndo, te canehe-ndo sã yíñuhu núú tãtá-ndó ndíhi núú nãná-ndó”, duha ní cachí Yã Ndiõxí cada ñáiyu —càchí-gá xãhaⁿ-gã xii-dé.

²⁰ Te tée-án nĩ xãhaⁿ-dẽ xii-gá:

—Mèstrú, nchaa xĩãⁿ ní ngúíta-í quidè-í ndéé cútñahá cúú lãndú-í —càchí-dé xãhaⁿ-dẽ xii-gá.

²¹ Te Jèsús ní xíndéhé ñaha váha-gá xii-dé, te ní cuu váha iní ñáhá-gã, te ní xãhaⁿ-gã xii-dé:

—Dico cùmání ìngá núú sã cãdá-n. Vitna te quíhíⁿ-n te dico-n nchãa sã ndécú ndíhi-n, te díhúⁿ-n cuãha táhú-n cuè ñáiyu ndàhú. Te ducaⁿ, te nduu táhú-n núcúndecu váha-n nũú ndécú Yã Ndiõxí táxi tñuní-gá, te sátá ná yãha ducaⁿ càda-n, te quixi-n chìtnahá ñáhá-n xii-í cuéí na ndòho-n datná ndoho-í —càchí-gá xãhaⁿ-gã xii-dé.

²² Te sã dúcáⁿ nĩ xãhaⁿ Jèsús xii-dé te ío ní cundiý-í-dé chi ío cuica-dẽ, te ní xica-dé cuãnuhú-dé.

²³ Te ní ndacoto-gá ni cãndéé ñíhí-gá, te ní xãhaⁿ-gã xii cue tée xica cuu ndíhi-gá:

—Cue ñáiyu cuica chi ío úhú quíndáá iní-yu Yã Ndiõxí cuèndá ndíhu ndaha ñaha-gá xii-yu —càchí-gá xãhaⁿ-gã xii-güedé.

²⁴ Te cue tée xica cuu ndíhi-gá-án ío ní cuñúhu-güedé nãcuáa ní cáháⁿ-gá, te ní xãhaⁿ tucu-gá xii-güedé:

—Nchòhó cue tée xica cuu ndíhi-í càchí tñuhu tucu-í xii-ndo sã ío úhú quíndáá iní cue ñáiyu cuica Yã Ndiõxí cuèndá ndíhu ndaha ñaha-gá xii-yu, chi sãni iní-yu sã nchãá sã ndécú ndíhi-yu dácacu nihnu ñaha-xi xii-yu núú ùhú núú ndàhú. ²⁵ Te yáchí-gá yãha ìⁿ cãméyu yaú ìⁿ yiqui tìcú dácúúxí sã quíndáá iní ìⁿ ñáiyu cuica Yã Ndiõxí cuèndá ndíhu ndaha ñaha-gá xii-yu —càchí-gá xãhaⁿ-gã xii-güedé.

²⁶ Te cue tée xica cuu ndíhi-gá ní cuñúhu vihi-gá-güedé sã dúcáⁿ nĩ cáháⁿ-gá, te ní ngúíta-güedé xĩtnàha-güedé:

—¿Te yoo sa ndacu nanífi tàhú te núú ducaⁿ vãñ? —càchí-güedé xĩtnàha-güedé.

²⁷ Te Jèsús ní xíndéhé váha ñaha-gã xii-güedé, te ní xãhaⁿ-gã:

—Nchaa ñáiyu ñuyúú-a chi vá ndácú-yu ná cadá-yu nãcuáa ndíhu ndaha ñaha Yã Ndiõxí xii-yu, dico mee-gã chi ndacu-gá ndíhu ndaha ñaha-gá xii-yu, chi nchaandi túhú sã váha ndacu-gá quidè-gã —càchí-gá xãhaⁿ-gã xii-güedé.

²⁸ Te té Pèlú ní xãhaⁿ-dẽ xii-gá:

—Nchúhú ní dãndòo-ndí nchaandi túhú sã ndécú ndíhi-ndí te ní tuha ñaha-ndí xii-n —càchí-dé xãhaⁿ-dẽ xii-gá.

²⁹ Te Jèsús ní xãhaⁿ-gã xii-dé:

—Na càchí tñuhu ndáá-í xii-ndo sã nchãá ñáiyu na dãndóo vehe-xi, àdi ñaní-xi, cúha-xi, tãtá-xi, nãná-xi, déhe-xi, àdi ñuhu-xi, te núú ducaⁿ na cadá-yu sã cuèndá-í ndíhi sã cuèndá tñuhu-í, ³⁰ te ío-gá cuéhé sã cuãñaha Yã Ndiõxí cundecu ndíhi-yu, chi ñíhí-yu vehé-yu, ñuhú-yu, ñaní-yu, cúha-yu, nãná-yu, déhe-yu, te ñã díú-ní sã nchãa xĩãⁿ ñíhí-yu cundecu ndíhi-yu, chi tñahá nduu táhú-yu cundecu ndíhi ñahá-yu xii-í ní caa ni quíhíⁿ ná sãá nduu. Dico díhna-gá ndoho tñahá-yu núú ñuyúú-a sã cuèndá-í. ³¹ Te dava ñáiyu cùnuu ndecu ichi Yã Ndiõxí vitna, ñáiyu-án sãá nduu te vá ío-gá cùnùú-yu datná cùnùú-yu vitna, te dava ñáiyu nchicuⁿ ñã túú cùnuu vitna ñáiyu-án sãá nduu te ío cùnùú-yu —càchí-gá xãhaⁿ-gã xii-güedé.

Jèsús càháⁿ tucu-gá sã cáhni ñaha-güedé xii-gá

(Mt. 20:17-19; Lc. 18:31-34)

³² Te ñuhu Jesús ichi ndíhi cue tée xica cuu ndíhi-gá cuásaá ndíhi ñaha-gã xii-güedé ñuu Jerusalén, te yòdo nuu-gá núú-güedé cuásaá. Te cue tée-án xícunúhu-güedé sã dúcáⁿ cuãháⁿ-gá ñuu Jerusalén, te dava cue ñáiyu xinchícúⁿ xíyùhú-yu. Te ní taudíⁿ-gá ndí ùxúú cue tée xica cuu ndíhi-gá, te ní ngúíta-gá cání-gá cuèndú núú-güedé nchaa nãcuáa yãha-gã. ³³ Te xãhaⁿ-gã xii-güedé:

—Vitna ñuhu-o ichi cuásaá-ó ñuu Jerusalén, te yacáⁿ cuãha cuèndá ñahá-güedé xii yúhú Tée cùu ñaní tñahá-ndó nchãa-ndo núú cuè tée cùu dítú cùnùu, ndíhi núú cuè tée dácuaha ñaha xii ñáiyu nchaa tñuhu ní chídó tñuní ndíi Moisés. Te díu cue tée-án cũñaha-güedé xii dava-gá cue tée sã cáhni ñaha-güedé xii-í, te cuãha cuèndá ñahá-güedé xii-í

núu cuè téé ñá túú cùu cue téé israhél.
³⁴ Te cue téé-áⁿ cudíquí ndeé ñáhá-güedë xii-í, te caniha-güedë ndihi ñii, te tíú díí ñáhá-güedë, te cahni ñaha-güedë xii-í dico nduu úní sá cùú-í te ndoto-í —cächí-gá xáhaⁿ-gá xii-güedë.

Té Jàcobó ndihi té Juàá càháⁿ ndàhú-güedë núú Jèsús sá càdá-gá ñⁿ sá cuíní-güedë

(Mt. 20:20-28)

³⁵ Te cue déhe té Zebèdeú té Jàcobó ndihi té Juàá ní quexio-güedë núú Jèsús, te xáhaⁿ-güedë xii-gá:

—Mèstrú, véxi-ndí càháⁿ ndàhú-ndí núú-n núu vá cùndëe iní-n càda-n ñⁿ sá cuíní-ndí —cächí-güedë xáhaⁿ-güedë xii-gá.

³⁶ Te Jèsús ní xícáⁿ tnúhú-gá núú-güedë, te xáhaⁿ-gá:

—¿Ná cùú sá cuíní-ndó càda-í-í? — cächí-gá xáhaⁿ-gá xii-güedë.

³⁷ Te ní xáhaⁿ-güedë xii-gá:

—Cuíní-ndí sá òré ná sàá nduu cùndecu-n núú táxí tnùní-n, te ñⁿ-ndí cunucóo-ndí xio cùha-n te ñⁿ-ndí cunucóo-ndí xio dàtni-n —cächí-güedë xáhaⁿ-güedë xii-gá.

³⁸ Te Jèsús ní xáhaⁿ-gá xii-güedë:

—Nchòhó, ñá túú cùtnuní iní-ndó nàcuáa nduu sá xícáⁿ-ndó núú-í. ¿Te náa cundee iní-ndó dándoho ñaha ñáyiú xii-ndo dàtná dandòho ñahá-yu xii-í, te cundee tùcu iní-ndó càhni ñahá-yu xii-ndo dàtná cahni ñahá-yu xii-í-áⁿ? —cächí-gá xáhaⁿ-gá xii-güedë.

³⁹ Te ní xáhaⁿ-güedë xii-gá:

—Cundee iní-ndí yáha-ndí nchaa nàcuáa càháⁿ-n-áⁿ —cächí-güedë xáhaⁿ-güedë xii-gá.

Te Jèsús ní xáhaⁿ-gá xii-güedë:

—Ndáá sá cùndëe iní-ndó ndòho-ndo nchaa nàcuáa ndoho-í, te cundee tùcu iní-ndó càhni ñahá-yu xii-ndo, chi yúhú cahni ñahá-yu xii-í. ⁴⁰ Dico sá dúcáⁿ cuíní-ndó sá ñⁿ-ndó cunucóo-ndo xio cùha-í te ñⁿ-ndo cunucóo-ndo xio datni-í, te xíáⁿ chi ñá díú yúhú tàú-í cächí-í te núu sá cùú cunucóo-ndo àdi sá vã cùú cunucóo-ndo, chi mee Tàtà-í Dútú Ndiòxí cächí-gá te núu ná cùú ñáyiú nduu táhú cunucóo díñí-í dàvã-áⁿ —cächí-gá xáhaⁿ-gá xii-güedë.

⁴¹ Te òré ní níhí ùxí-gá cue téé xica cuu ndihi-gá tnúhu nàcuáa nduu sá cuíní té Jàcobó ndihi ñaní-dé té Juàá, te ní cudéáⁿ-güedë núú cuè téé úú-áⁿ. ⁴² Te Jèsús ní cana-gá nchaa cue téé xica cuu ndihi-gá-áⁿ, te ní xáhaⁿ-gá xii-güedë:

—Nchòhó xìní-ndó sã cuè téé yindaha ñⁿ nacióⁿ quide-güedë sá ò cùnuu-güedë, te nchaa dava-gá cue téé cùndihi-güedë tnáhá-güedë quidé-güedë sá ò cùnuu-güedë. ⁴³ Dico nchòhó chi vá dúcáⁿ càda-ndo. Chi núu dava-ndo cuíní-ndó cùnuu-ndo te xini ñuhu-xi cunu cuechi núú tnáhá-ndó te vá càdá-ndó sã cùnuu-ndo. ⁴⁴ Te núu dava-ndo cuíní-ndó quène càva-ndo, te cuu-ndo dàtná cue ñáyiú ñá túú tnàhí dàná quee núú chíúⁿ pàtróⁿ-xi cunu cuechi núú tnáhá-ndó. ⁴⁵ Te yúhú Téé cùu ñaní tnáhá-ndó nchaa-ndo, chi ñá túú véxi-í sá cùnú cuechi ñáyiú núú-í, chi véxi-í sá cùnú cuèchi-í núú-yu. Te cuú-í ñuyúú-a cuèndá vãi-yu cácu nihnu núú ùhú núú ndàhú —cächí-gá xáhaⁿ-gá xii-güedë.

Jèsús quidé tãtna-gá ñⁿ téé cuáá nání-dé Bartimeú

(Mt. 20:29-34; Lc. 18:35-43)

⁴⁶ Te Jèsús ní quexio-gá ñuu Jericó ndihi cue téé xica cuu ndihi-gá, te ní yáha-gá ndihi-güedë ichi xití ñuu-áⁿ, te ío cuéhé ñáyiú nchicúⁿ ñáhá xii-gá cuaháⁿ te ñⁿ xio yuhu ichi sá ní quee xití ñuu-áⁿ núcòo ñⁿ téé cuáá nání-dé Bartimeú, te tãtã-dé nání-dé Timeú, te téé-áⁿ núcòo-dé yuhu ìchi-áⁿ xicáⁿ ndàhú-dé. ⁴⁷ Te téé-áⁿ ní cùtnuní iní-dé sá Jèsús téé ñuu Nazàrét ñúhú-dé ichi, te ní ngúíta-dé níhí càháⁿ-dé, te xáhaⁿ-dë xii-gá:

—Jèsús, ñaní tnáhá ndíi Dàvíí, cundàhú iní ñáhá xii-í! —cächí-dé xáhaⁿ-dë xii-gá.

⁴⁸ Te vãi ñáyiú tènãá ñáhã-yu xii-dé, te xáhãⁿ-yu sá ná càdí-dé yuhu-dé dico uuⁿ-gá níhí ní càháⁿ-dé xáhaⁿ-dë xii-gá:

—Jèsús, ñaní tnáhá ndíi Dàvíí cundàhú iní ñáhá xii-í! —cächí-dé xáhaⁿ-dë xii-gá.

⁴⁹ Te Jèsús ní ngúíñí-gá te ní xáhaⁿ-gá xii cue téé ndihi-gá:

—Chí cuãnguaca téé cuáá-áⁿ can-deca-ndo-dé quixi iha —cächí-gá xáhaⁿ-gá.

Te cue téé-áⁿ ní xica-güedë cuãnguaca-güedë téé cuáá-áⁿ, te òré ní

quexìo-güedé núú-dě te ní xáhaⁿ-güedě xii-dé:

—Ndacuíñí te vá ndìhú-gá iní-n, na quíhíⁿ-ó chi càna ñaha Jesús xii-n —càchí-güedé xáhaⁿ-güedě xii-dé.

⁵⁰ Te téé-áⁿ ní xócání-dě dóó ndíxí-dě, te ndíhí-ni ní ndacuíñí-dé te ní xica-dé cuáháⁿ-dé núú Jesús. ⁵¹ Te òré ní quexìo-dé te ní xicáⁿ tnúhú-gá núú-dě, te xáhaⁿ-gá xii-dé:

—¿Ná cuiní-n càda ñaha-í xii-n-í? —càchí-gá xáhaⁿ-gá xii-dé.

Te téé cuáá-áⁿ ní xáhaⁿ-dě xii-gá:

—Mèstrú, cuiní-í cada tátna-n núù-í cuendá cundehe-í —càchí-dé xáhaⁿ-dě xii-gá.

⁵² Te Jesús ní xáhaⁿ-gá xii-dé:

—Cuanùhú vitna, chi sa ní ndúha núú-n chi ní sándáá iní-n Yá Ndiòxí —càchí-gá xáhaⁿ-gá xii-dé.

Te òré-ni-áⁿ ní ndúha núú-dě te nchicúⁿ-dé Jesús cuáháⁿ.

11

*Jèsús cuánguihu-gá ñuú Jerusalén
(Mt. 21:1-11; Lc. 19:28-40; Jn. 12:12-19)*

¹ Te Jesús ní cuyatni-gá ndíhi cue téé xica cuu ndíhí-gá ñuú Bètaniá, ndíhi ñuú Bètfagé, te xíaⁿ cáá yúcu nani Olivú, te yatni víí-ná xíaⁿ cáá ñuú Jerusalén. Te Jesús ní cana-gá úú-ni tnàhá cue téé xica cuu ndíhí-gá. ² Te ní xáhaⁿ-gá xii-güedé:

—Chí cuáháⁿ ñuú cáá yàtni yacáⁿ, te òré quexìo-ndo yacáⁿ te naníhí-ndó ñⁿ búrru ndètní-dí, te vátá yóo ñⁿ-gá codo ñaha xii-dí, te nandaxi-ndo-dí te candeca-ndo-dí quíxi. ³ Te núu yoo na càcáⁿ tnúhú núú-ndó nã cuendá nándaxi-ndo-dí, te cúñaha-ndo sã yúhú Yáá xicá cùu ndíhí-ndo xini ñuhu-í-dí, te na yáha canehe chiúⁿ-í-dí te ndíhí-ni natendaha-í-dí, duha cúñaha-ndo —càchí-gá xáhaⁿ-gá xii-güedé.

⁴ Te cue téé-áⁿ ní xica-güedé cuáháⁿ-güedé, te òré ní quexìo-güedé ñuú-áⁿ te ní naníhí-güedé ñⁿ búrru ndètní-dí ñⁿ yutnu ñihnu yatni ñⁿ yuyehe vehe caa yatni yuhu ichi, te ní ngúíta-güedé nándaxi-güedé-dí.

⁵ Te mei òré nándaxi-güedé-dí ní quexìo ñáyíu xáháⁿ-yu xii-güedé:

—¿Ná cuendá nándaxi-ndo búrru-áⁿ-í? —càchí-yu xáháⁿ-yu xii-güedé.

⁶ Te cue téé-áⁿ ní xáhaⁿ-güedé xii-yu nàcuáa ní xáhaⁿ Jèsús cúñaha-güedé. Te sátá dúcáⁿ te ní dánã-yu ndeca-güedé búrru-áⁿ cuáháⁿ núú ndécú Jèsús. ⁷ Te òré ní quexìo-güedé ndíhí-dí núú ndécú-gá, te ní sacáⁿ ndodo-güedé dóó-güedé sátá-dí, ní ngódó ñaha Jesús xii-dí. ⁸ Te ío cuéhé ñáyíu ta sàcáⁿ-yu dóo-yu ichi cuáháⁿ-gá cuendá núú dõo-yu-áⁿ yáha-gá ndíhi quíti yòdo-gá, te davá-yu xèhndé-yu ndaha yùtnu ta sacáⁿ-yu cuáháⁿ.

⁹ Te nchaa ñáyíu yòdo nuu núú-gá ndíhi nchaa ñáyíu nchicúⁿ ndaa sátá-gá ní ngúíta-yu níhi càháⁿ-yu, te càchí-yu:

—¿Ío càhnu cuu Yáa-a! ¿Te Yá Ndiòxí ná chindee ñaha-gá, chi diu-gá cúú-gá Yáa ní tendaha-gá véxi quide núú-gá! ¹⁰ ¿Te diu-ni Yáa-á cúú-gá Yáa véxi quindaha ñaha xii-o datná ní xóo cada ndíi Dàvíí! ¿Te ndéé nchaa sá ío andíu na càchí-xi sá ío càhnu cuu-gá! —duha càchí-yu.

¹¹ Te Jesús ní quexìo-gá ñuú Jerusalén, te cuánguihu-gá xití veñúhu càhnu sá ío cùnuu, te ní xíndéhé vaha-gá nchaa sá ndécú xití veñúhu-áⁿ. Te sátá dúcáⁿ te ní ndee-gá cuáháⁿ-gá ñuú Bètaniá ndíhi ndí ùxúú cue téé xica cuu ndíhí-gá chi sa ní cuaa.

Jèsús xáhaⁿ-gá xii yutnu ngúxí sá vã cúúⁿ-gá sávidí-xi

(Mt. 21:18-19)

¹² Te nduu tnéé-áⁿ ní quee Jèsús ñuú Bètaniá ndíhi cue téé xica cuu ndíhí-gá, te ichi ñuhu-gá ní xíhí-gá docó. ¹³ Te xica ní xini-gá nùtní ñⁿ yutnu ngúxí, te ní xica-gá cuándéhé-gá núu ndéé sávidí-xi te ñã túú nã ndéé, chi mee-ni ndaha-xi ndee chi ñã díú yóo sácundeé sávidí-xi. ¹⁴ Te Jesús ní xáhaⁿ-gá xii yutnu ngúxí-áⁿ:

—Vítna te vá yóo ñⁿ-gá caxi sávidí-n, chi vá cúúⁿ-gá —càchí-gá xáhaⁿ-gá xii yutnu ngúxí-áⁿ.

Te cue téé xica cuu ndíhí-gá ní tecú dóho-güedé nàcuáa ní xáhaⁿ-gá xii yutnu ngúxí-áⁿ.

Jèsús ñã túú tnàhá iní-gá nàcuáa quide ñáyíu xití veñúhu

(Mt. 21:12-17; Lc. 19:45-48; Jn. 2:13-22)

¹⁵ Te Jesús ní quexìo tucu-gá ndíhi cue téé xica cuu ndíhí-gá ñuú Jerusalén, te cuánguihu tucu-gá xití veñúhu càhnu sá ío

cùnunu, te xití veñúhu-án xĩndecu cue ñáyiú quide ndáhú nádícó-yu, ndihí cue ñáyiú xísaaⁿ. Te nchaá-yu ní queñuhu ñaha Jèsús xíi-yu quehé, te ní dándùá-gá mèsá cue ñáyiú dama díhúⁿ, ndihí nchaá xilé sácóo nchihí cue ñáyiú dico lómá xĩndecu xití veñúhu-án. ¹⁶Te ñá túú tñàhí-gá ní daña-gá yáha cue ñáyiú ndihí nchaá sá nchídó-yu ichi xití veñúhu-án. ¹⁷Te ní xáhaⁿ-gã xíi-yu:

—Núú tütú Yã Ndiöxí cãháⁿ-xi nãcuáa ní cãháⁿ-gá, te ní cachí-gá: “Vehe-í cúú-xí vehe núú tàcá ñáyiú nihíi ñuyúú cãháⁿ ndihí ñàhá-yu xii-í”, duha ní cãháⁿ-gã cãchí-xi núú tütú-gá. Dico nchòhó quidé-ndó vehe-gá vehe ñadúhú —cãchí-gá xãhaⁿ-gã xíi-yu.

¹⁸Te nchaá dútú cúnunu, ndihí nchaá cue téé dàcuaha ñaha xii-yu nchaá tñúhu ní chídó tñúní ndíi Moisés ní tecú dóho-güedé nãcuáa ní cãháⁿ-gá te ní ngúíta-güedé ndúcú-güedé nãcuáa cada-güedé cahni ñaha-güedé xii-gá, chi yùhú-güedé sá ïo cunuu-gã, te ducaⁿ chí nchaá ñáyiú ïo cùñúhu-yu nchaá tñúhu cãháⁿ-gã. ¹⁹Te òré sa ní cuaa cuií-nã, te ní quee tucu Jèsús ndihí cue téé xica cuu ndihí-gá ñúú Jerusalén cuáhãⁿ-gã ndihí-güedé ingá xichí.

Ní yíchí yutnu ngúxí

(Mt. 21:20-22)

²⁰Te nduu tñéé nehé-ni ní yáha tucu Jèsús ndihí cue téé xica cuu ndihí-gá núú níhnu yùtnu ngúxí, te ní xiní-güedé sa ní yíchí nihíi ndéé yóho-xi. ²¹Te té Pèlú ní ndacu iní-dé nãcuáa ní xáhaⁿ Jèsús xii yutnu ngúxí-án, te ní xáhaⁿ-dè xii-gá:

—Mèstrú, cundehe nã ní yíchí yutnu ngúxí sá ní xáhaⁿ-n sã vã cúúⁿ-gã sávidí-xi —cãchí-dé xãhaⁿ-dè xii-gá.

²²Te Jèsús ní xáhaⁿ-gã xii-güedé:

—Quindáa ndisa iní-ndó Yã Ndiöxí. ²³Te na cãchí tñúhu ndáá-í xii-ndo sã ñuu nchòhó cùñaha-ndo xii tĩndúú-a xocuíñí-xi núú ndécú-xí, te quihíⁿ-xi queé-xi xití lámár. Te ñiu ducaⁿ càda-xi te núu nchòhó vã cãní ñⁿ caní úú iní-ndó, te quindáa iní-ndó sã dúcãⁿ càda-xi. ²⁴Te xíãⁿ núu cãchí tñúhu-í xii-ndo sã nchãa sã ná cãcãⁿ-ndó núú Yã Ndiöxí òré cãháⁿ ndihí-ndo-gã, te taxi-gá te núu nchòhó sãndáa ndisa iní-ndó sã táxí-gã sã xicãⁿ-ndó núú-gã.

²⁵Te òré cãháⁿ ndihí-ndo Yã Ndiöxí te dandacu iní-ndó te núu ndecu ñáyiú ñá

túú cùu váha iní ñáhá xii-ndo, te cada cãhnu iní-ndó-yu cuendá ducaⁿ càda cahnu iní ñáhá Tãtã-ndó Dütú Ndiöxí Yáá ndécú àndiu xii-ndo cuendá nchaá sã ñà túú váha quide-ndo. ²⁶Dico núu nchòhó vã càdá cãhnu iní-ndó sã quidé ñàha tñaha ñáyiú-ndo xii-ndo, te ní Tãtã-ndó Dütú Ndiöxí vã càdá cãhnu iní ñáhá-gã xii-ndo cuendá nchaá sã ñà túú váha quide-ndo —cachí-gá xãhaⁿ-gã xii-güedé.

Jèsús ndécú ndihí-gá tñúhu ndee iní

(Mt. 21:23-27; Lc. 20:1-8)

²⁷Te Jèsús ní ndexio tucu-gá ñúú Jerusalén ndihí cue téé xica cuu ndihí-gá, te cuánguihu tucu-gá xití veñúhu cãhnu sã ïo cunuu ndihí-güedé. Te xití veñúhu-án yíhí-gã ní quexio cue dütú cúnunu ndihí cue téé dàcuaha ñaha xii ñáyiú nchaá tñúhu ní chídó tñúní ndíi Moisés, ndihí cue téé cùu sacuéhé núú ñáyiú isrãél. ²⁸Te xãhaⁿ-güedé xii-gá:

—Cuíní-ndí cachí tñúhu-n xii-ndí nása ndúu tñúhu ndee iní ndécú ndihí-n núu quide-n nándí sã quidé-n, ¿te yoo ducaⁿ ní taxi tñúhu ndee iní-án xii-n-i? —cãchí-güedé xãhaⁿ-güedé xii-gá.

²⁹Te Jèsús ní xáhaⁿ-gã xii-güedé:

—Yúhú tñàhá-í cuíní-í cãcãⁿ tñúhu-í ñⁿ sã cãcãⁿ tñúhu-í núú-ndó te núu na cãchí tñúhu-ndo, te cachí tñúhu-í xii-ndo yòo ní taxi tñúhu ndee iní xii-í duha quide-í. ³⁰Te chí cãchí tñúhu xii-í yoo ní táuchíúⁿ ní dácúándüte ndíi Juáa ñáyiú, ¿Yá Ndiöxí ãⁿ cuè téé ñuyúú-a ní táuchíúⁿ dùcaⁿ ní quide ndíi? Te chí cãchí tñúhu —cãchí-gã xãhaⁿ-gã xii-güedé.

³¹Te ní ngúíta-güedé xitñaha-güedé:

—¿Nása cùñaha-o? Chi núu na cùñaha-o sã Yã Ndiöxí ní táuchíúⁿ dùcaⁿ ní quide ndíi Juáa ñá, te quesaha-dè: “¿Ná cuendá ñá túú ní sãndáa iní-ndó tñúhu ní cãháⁿ ndíi vãi?”ⁿ, quesaha-dè. ³²Te ní vã cúú cùñaha-o sã cuè ñáyiú ñuyúú-a ní táuchíúⁿ dùcaⁿ ní quide ndíi Juáa —cãchí-güedé xitñaha-güedé.

Te ducaⁿ ní xitñaha-güedé chi ñá túú ní cùtnuní iní-güedé nása cùñaha-güedé xii-gá, chi xiyùhú-güedé cue ñáyiú chi nchaá ñáyiú-án ní cutnùní ndáa iní-yu sã Yã Ndiöxí ní táuchíúⁿ-gã ducaⁿ ní quide ndíi Juáa. ³³Te ní xáhaⁿ-güedé xii Jèsús:

—Ñá túú xini-ndí yoo ní táuchíúⁿ òucaⁿ ní dácuaándùte ndí Juáá ñáiyu — cächí-güedé xàhaⁿ-güedé xii-gá.

Te Jèsús ní xáhaⁿ-gá xii-güedé:

—Te núu ducaⁿ te ni yúhú vá cächí tnúhu-í xii-ndo yòo ní taxi tnúhu ndee ìní duha quìde-í —cächí-gá xàhaⁿ-gá xii-güedé.

12

Cuèndá cue tée cuihna iní-xi

(Mt. 21:33-46; Lc. 20:9-19)

¹Te Jèsús ní nguíta-gá cání-gá ìnⁿ cuèndú núú ñáiyu nàcuáa tecu tnùnì-yu tnúhu-gá, te xàhaⁿ-gá xii-yu:

—Ìnⁿ tée ní nacúxi-dé mee-ni yòho yaha stilé núú ñúhú-dé, te ní chidoco-dé cuèndá sá vá cúú dàñú, te ní cadúha-dé núú quíhí-dé ndéhé yoho yaha stilé-án òré ná cùu, te ní cadúha-dé ìnⁿ xító dùcúⁿ núú cáundódo cue tée coto yoho yaha stilé-án.

²Te ní sáá ìnⁿ nduu quèe-dé quíngaca cuu xica-dé vai nduu, te ní dándóo ndaha-dé sá ní xitu-dé-án xii ìnⁿ úú cue tée cáháⁿ ndíhi-dé cuèndá cada chiùn-güedé, te ní ndatnúhu-güedé sá òré ná cúú te cuu cuèndá dava-güedé te ducaⁿ te ní quee-dé cuáháⁿ-dé. ³Te sátá ñí sáá nduu ñí cuu ndéhé yoho yaha stilé sá ní xitu-dé-án, te ní xáhaⁿ-dè xii ìnⁿ tée xínu cuechi núú-dé: “Cuáháⁿ cacaⁿ-n sá cúú cuèndá-í núú cue tée ní dándóo ndaha-í nchaa yoho yaha stilé sá ní xitu-í-án”, cächí-dé xàhaⁿ-dè. Te tée xínu cuechi-án ñí xica-dé cuáháⁿ-dé. ⁴Te cue tée-án ñí tnií-güedé tée xínu cuechi-án, te ní caniha-güedé xii-dé, te dàtnùnì ní nacuícúⁿ ñáhá-güedé, te ñá túú tnàhí ná ní sàñaha-güedé. ⁵Te tée cùu xítóhó yoho yaha stilé-án ñí tendaha tùcu-dé ingá tée xínu cuechi núú-dé cuáháⁿ-dé. Te òré ní quexio tée xínu cuechi-án te cue tée-án ñí sàha ñaha-güedé yúú xii-dé, te ní táhú-güedé díquí-dé, te ní xícuehé ñáhá-güedé xii-dé. ⁶Te tée cùu xítóhó nchaa yoho yaha stilé-án ñí tendaha tùcu-dé ingá tée xínu cuechi núú-dé cuáháⁿ-dé núú cue tée-án, dico tée-án òré ní quexio-dé te ní sahni ñaha-güedé xii-dé. Te tée cùu xítóhó nchaa yoho yaha stilé-án ñí tendaha-dé vai-gá cue tée xínu cuechi núú-dé cuáháⁿ ngacáⁿ-güedé sá cúú cuèndá-dé ní cùu dico ñu-ni ducaⁿ ñí quide ñaha tùcu cue tée ndèe nchaa yoho

yaha stilé-án xii-güedé, chi dava-güedé ní caniha-güedé te dava-güedé ní sahni ñaha-güedé.

⁷Te tée cùu xítóhó nchaa yoho yaha stilé-án ndécú ìnⁿdii-ná tée tendaha-dé quíhíⁿ núú cue tée ní dándóo ndaha-dé sá ní xitu-dé-án, te tée tendaha-dé-án cúú-dé déhe ducuⁿ-dé, te ío cùu ìní ñáhá-dé. Te ní sani ìní-dé: “Váha-gá núu tendaha-í déhe-í-a núhú-dé, chi òré quini ñáhá-güedé xii-dé te cànehe-güedé sá yíñuhu núú-dé”, duha ní sani ìní-dé. Te ducaⁿ te ní xáhaⁿ-dè xii déhe-dé-án sá ñuhú-dé, te tée-án cuànuhú-dé cuáháⁿ ngacáⁿ-dé sá cúú cuèndá tātá-dé núú cue tée-án. ⁸Dico òré ní xini cue tée quide chiùn-án déhe tée cùu xítóhó nchaa yoho yaha stilé-án, te ní xítñaha-güedé: “Tée-án tée véxi nduu táhú ñuhu-a ndíhi sá cáá núú-xi, dico cahni-o-dé te mee-o nduu táhú-ó sá ndúú táhú-dé”, duha ní xítñaha-güedé. ⁹Te ní tnií-güedé tée-án, te ní sahni ñaha-güedé, te ní dáquéné-güedé yíqui cùñú-dé ìnⁿ xio yuhu ñuhu núú cáá yoho yaha stilé-án — duha cuáháⁿ cuèndú ní cani Jèsús núú-yu.

⁹Te Jèsús ní xáhaⁿ tùcu-gá xii-yu:

—¿Te nchòhó sa cùtnunì ìní-ndó nàcuáa cada xítóhó ñuhu-án ãn? Chi núhú-dé te cahni-dé cue tée-án te dándóo ndaha-dé ñuhu-dé xii cue tée cùtnunì ìní-dé cada ndáá —cächí-gá xàhaⁿ-gá xii-yu.

¹⁰Te xàhaⁿ tùcu-gá xii-yu:

—Te nchòhó, náa ñá túú dàcuaha-ndo núú tùtú Yá Ndiòxí núú cächí-xi: Yúú sá ní dàquée tìhú cue tée dàca vehe, ní cuu-xi yúú cùnnu vitna.

¹¹Chi mee Yá Ndiòxí ducaⁿ ñí cächí-gá cundu, te cùu-xi ìnⁿ sá ío cùñúhu-o vitna.

Duha cächí-xi núú tùtú-gá —cächí Jèsús xàhaⁿ-gá xii-yu.

¹²Te cue tée ní xíndedóho nàcuáa nduu tnúhu ní cáháⁿ-gá ní cuini-güedé tnií ñaha-güedé xii-gá ní cùu, chi ní cutnùnì ìní-güedé sá cuèndá-güedé ní cáháⁿ-gá, dico ní yùhú-güedé tnií ñaha-güedé xii-gá cuèndá sá ío vai ñáiyu, te ná ío ná cada ñáhá-yu xii-güedé ní sani ìní-güedé, te ní xica-güedé cuáháⁿ-güedé.

Cuèndá impuèstú

(Mt. 22:15-22; Lc. 20:20-26)

¹³Te sátá ñí xica-güedé cuáháⁿ-güedé, te ní tendaha-güedé ìnⁿ úú cue tée cùu

fariséu, ndihí ìn úú cue tée cùndihí té Hèrodés cuáháⁿ-güedé núú ndécú Jèsús ndúcú-güedě nàcuáa cada-güedé datìcánuu ñaha-güedě xii-gá núú tñhu càháⁿ-gá. ¹⁴ Te cue tée-án nì quexio-güedé núú Jèsús, te xáhaⁿ-güedě xii-gá:

—Mèstrú, cùtnuní iní-ndí sá ò ndáá càháⁿ-n, te ñá túú quide cuendá-n nàcuáa càháⁿ ñáiyu, te cuèi ndèdani cáá-yu ìn-ni càháⁿ-n ndihí-yu chi ñá túú quide cuendá-n cuèi ná ñáiyu cùu-yu, te càháⁿ ndáá-n nàcuáa càháⁿ Yá Ndiòxí cundecu-o ñyíyú-a. Te cachí tñhuu xii-ndí núu váha-ni quide-ndí sá cháhu-ndí té Cèsár tée ío cùnuu cuendá impuèstú áⁿ ñhá —càchí-güedé xáhaⁿ-güedě xii-gá.

¹⁵ Dico Jèsús nì cutnùnì iní-gá sá xító ndéè ñhá-güedě xii-gá, núu ní xáhaⁿ-gá xii-güedé:

—¿Ná cuendá ducaⁿ xito ndéè ñhá-ndó xii-í? Chí dánèhé ñhá xii-í ìn díhúⁿ sá cháhu-ndo cuendá impuèstú te núu nása cáa —cachí-gá xáhaⁿ-gá xii-güedé.

¹⁶ Te cue tée-án nì dánèhé ñhá-güedě xii-gá ìn díhúⁿ sá cháhu-güedé cuendá impuèstú. Te Jèsús ní xáhaⁿ-gá xii-güedé:

—Chí cachí tñhuu xii-í núu yoo núu-xi ndéè ndihí yoo diu-xi ndéè —cachí-gá xáhaⁿ-gá xii-güedé.

Te ní xáhaⁿ-güedě xii-gá:

—Núú tē Cèsár ndéè ndihí diu-dé —cachí-güedé xáhaⁿ-güedě xii-gá.

¹⁷ Te Jèsús ní xáhaⁿ-gá xii-güedé:

—Te núu ducaⁿ te chí nàcuáha té Cèsár sá cúu cuendá-dé, te sá cúu cuendá méé Yá Ndiòxí te xíáⁿ nàcuáha-ndo-gá —cachí-gá xáhaⁿ-gá xii-güedé.

Te cue tée-án ò ní cuñúhu-güedé sá dúcáⁿ nì cáháⁿ-gá.

Cuendá cue ñáiyu ndoto

(Mt. 22:23-33; Lc. 20:27-40)

¹⁸ Te sáta dúcáⁿ te ní quexio ìn úú cue tée cùu saducéú núú ndécú Jèsús, te cue tée-án ñá túú sandáá iní-güedé sá ndótó cuè ñáiyu ní xíhí, te ní xáhaⁿ-güedě xii-gá:

¹⁹ —Mèstrú, ndíi Moisés cachí ndíi núú tütú ndíi ndècu vitna sá núu ìn tée na cùu-dé te quendóo ñadihí-dé, te núu ñá túú ní xóo déhe-dé ndihí ñadihí-dé-án, te tée cùu ñaní-dé naqueheⁿ-dé ñaha ní quendóo quèé-án cuendá coo déhe-dé ndihí-aⁿ cuendá tée ní xíhí-án. ²⁰ Te ní xíndecu úsá tñhá cue tée mee-ni ndi

ñaní-güedé. Te tée díhna ní níhí ñadihí-dé, te ñá túú ní cùdí-dé cundecu-dé chi ní xíhí-dé, te ní ìn déhe-dé ñá túú ní xóo ndihí ñadihí-dé. ²¹ Te tée cùu úú ní naqueheⁿ-dé ñaha ní quendóo quèé-án, dico ní xíhí tucu-dé, te ní ìn tucu déhe-dé ñá túú ní xóo ndihí ñaha-án. Te diu-ni ducaⁿ ní xíhí tée cùu uní. ²² Te ní xínu ndi úsá-güedé ní cándeca ñaha-güedě xii ñaha-án, dico ní ìn-güedé ñá túú ní xóo déhe-güedé ndihí-aⁿ, te ní ndihí-güedé ní xíhí te ndéé núu ní ndihí-ná ní xíhí tñhá ñadihí-án. ²³ Te na sáa nduu ndòto-güedé ndihí ñaha-án, ¿te ndèdaca-güedé ñadihí-güedé cuu-aⁿ-í? Chi ndi úsá-güedé ní cándeca ñaha-güedě xii-aⁿ —cachí-güedé xáhaⁿ-güedě xii-gá.

²⁴ Te Jèsús ní xáhaⁿ-gá xii-güedé:

—Ní xíta nchòhó tñhuu càháⁿ-ndó, chi ñá túú xini-ndó nàcuáa càháⁿ Yá Ndiòxí núú tütú-gá, te ní ñá túú xini-ndó sá diú-gá ndácú-gá quidé-gá nchaandi tñhú sá váha.

²⁵ Te na cachí tñhu-í xii-ndo sá òré ná sáa nduu ndòto nchaa ñáiyu ní xíhí, te dàvá-án vā yóo-gá dasaⁿ dèhe yoco-xi chi vā yóo-gá candeca tñaha, chi na ndòtó-yu te cuu-ná-yu dàtna cue espíritú xínú cuèchi núú Yá Ndiòxí. ²⁶ Te núu nchòhó cuini-ndó càháⁿ-ndó cuendá nchaa ñáiyu ndoto, te díhna-gá dacuáha-ndo nàcuáa ní chídó tñuní ndíi Moisés núú tütú ndíi ní cùu.

Chi diu núú tütú ndíi càháⁿ-xi nàcuáa ní xáhaⁿ Yá Ndiòxí xii ndíi cútñhá ní cáháⁿ ndihí ñaha-gá ìn xichi núú níhnu tñtaú nchicúⁿ ñuhú. Te duha ní xáhaⁿ-gá xii ndíi: “Yúhú cùu-í Ndiòxí tē Àbrahám, ndihí tē Isàac, ndihí tē Jàcób”, duha ní xáhaⁿ Yá Ndiòxí xii ndíi cachí-xi núú tütú ndíi. ²⁷ Te Yá Ndiòxí ñá túú cùu-gá Ndiòxí cue ñáiyu ní xíhí, chi cùu-gá Ndiòxí cue ñáiyu xíndecu vívú, núu xíáⁿ nchòhó ío xita-ndo tñhuu càháⁿ-ndó. Te sá dúcáⁿ nì cáháⁿ-gá cuendá cue tée-án, te xíáⁿ cútñuní sá cuèi ní xíhí-güedé sá cúu-xí tñaha ñáiyu-güedé, dico ndècu vívú-güedě sá cúu-xí-gá —cachí-gá xáhaⁿ-gá xii-güedé.

Tñhuu sá ò-gá cúnúu

(Mt. 22:34-40)

²⁸ Te tñhá ìn tée dàcuaha ñaha xii ñáiyu nchaa tñhuu ní chídó tñuní ndíi Moisés ndèdóho-dé nchaa tñhuu càháⁿ Jèsús ndihí cue tée cùu saducéú-án, te ndèdóho-dé sá súuní váha níhí-gá tñhuu

ndanchocáva-gá. Te ní sándehe yatni-dé núú-gá, te xáhaⁿ-dë xii-gá:

—Cachí tnúhu xii-í ndëdacàa tnúhu sá ní cáháⁿ Yá Ndiöxí ío-gá cúnúu cuu díhna — cächí-dé xáhaⁿ-dë xii-gá.

²⁹ Te Jèsús ní xáhaⁿ-gá xii-dé:

—Duha cáháⁿ tnúhu sá ïo-gá cúnúu: “Nchòhó ñáyiú isràél ío váha chí cündedóho tnúhu-a. Hⁿdii díf-ni Yá Ndiöxí ndécú, te diu-ni-gá cúú-gá Ndiöxí-ó.

³⁰ Te cuu iní-ndó Dütú Ndiöxí Yáá cúú Ndiöxí-ndó ñi yuhu ñi iní-ndó, te cani iní-ndó càda-ndo datná cuini méé-gá, te mee-ni tnúhu váha cani iní-ndó cuendá cuu vii cuu váha-ndo núú-gá, te coo iní-ndó càda-ndo nacuaa cuu váha iní-gá”, duha cáháⁿ tnúhu sá ïo-gá cúnúu. ³¹ Te duha cáháⁿ tucu ingá tnúhu cùu uú sá ïo cúnúu: “Cuu iní-ndó tnàha ñáyiú-ndo datná cúú iní-ndó mèe-ndo”, duha cáháⁿ tnúhu cùu uú-áⁿ. Te úú duha-ni tnúhu-a cùu-xi tnúhu sá ïo-gá cúnúu —cachí-gá xáhaⁿ-gá xii-dé.

³² Te téé dàcuaha ñaha xii ñáyiú nchaa tnúhu ní chídó tnùnì ndíi Moisés ní xáhaⁿ-dë xii-gá:

—Mèstrú, váha-ni cáháⁿ-n chi ndáá sá ñⁿdii-ni Yá Ndiöxí ndécú, te ñá túú-gá ndèé ndécú ìngá ndiöxí. ³³ Te datná ní cachí-n sá ñi yuhu ñi iní-ó cùu iní-ó Yá Ndiöxí, te cani iní-ó càda-o nacuaa cuu vii cuu váha iní-gá te ío vii ío váha cuu iní-ó datná cuini méé-gá, te coo iní-ó càda-o nacuaa cuu váha iní-gá, te cuu iní-ó cuè tnaha ñáyiú-ndo datná cúú iní-ó mèe-o. Te nchaa xíáⁿ ío-gá xínì ñuhu-xi cada-o dacúúxí sá cuñaha-o quiti cahni-güedé te cáyú-di nduu táhú ñáhá Yá Ndiöxí, ndihi dacúúxí nchàa dava-gá sá sñaha-o nduu táhú-gá — cächí-dé xáhaⁿ-dë xii-gá.

³⁴ Te sá dúcáⁿ ïo váha nduu tnúhu ní cáháⁿ téé-áⁿ, núu ní xáhaⁿ Jèsús xii-dé:

—Luha-ná cúmăñi xii-n te ndíhu ndaha ñaha Yá Ndiöxí —cächí-gá xáhaⁿ-gá xii-dé.

Te sá dúcáⁿ ní xáhaⁿ-gá xii téé-áⁿ, núu vá yòo ñⁿ-gá ní cùyi ñágá tnúhu nducu tnúhu-yu núú-gá.

Yoo cùu Xítóhó Jesucristú

(Mt. 22:41-46; Lc. 20:41-44)

³⁵ Te Jèsús yíhí-gá xítí veñúhu càhnu sá ïo cúnúu danehé-gá ñáyiú, te xáhaⁿ-gá xii-yu:

—Cue téé dàcuaha ñaha xii ñáyiú nchaa tnúhu ní chídó tnùnì ndíi Moisés

cächí-güedé sá Crístú Yáá tendaha Yá Ndiöxí quixi ñuyúú-a cùu-gá déhe ndíi Dàvíí, te ndí-áⁿ ní cunaha víhi ní xíhí ndíi. ¿Te ná cuendá ducaⁿ cáháⁿ-güedé?

³⁶ Te mee ndíi Dàvíí-áⁿ ñi dácáhu iní ñáhá Espíritú Yá Ndiöxí xii ndíi nàcuáa cáháⁿ ndíi, te duha ní cachí ndíi:

Dütú Ndiöxí ní xáhaⁿ-gá xii Yáá cúú Xí-tohó-í:

“Ngóo xio cùha-í,

te yúhu cada-í te nchaa sá cúú ùhú iní ñáhá xii-n canehé-xi sá yíñuhu núú-n.”

Duha ní xáhaⁿ Dütú Ndiöxí xii Yáá cúú Xítóhó-í.

Duha ní cachí ndíi. ³⁷ ¿Te nása cùu Crístú déhe ndíi Dàvíí, te mee ndíi ní cachí ndíi sá cúú-gá Xítóhó ndíi? —cächí Jèsús xáhaⁿ-gá xii-yu.

Te ío cuéhé ñáyiú ní xíndedóho nchaa tnúhu ní cáháⁿ-gá, te ío ní cudíí ñi-yu ní xíndedóho ñáhá-yu xii-gá.

Jèsús cáháⁿ-gá cuendá cue téé dàcuaha ñaha xii ñáyiú nchaa tnúhu ní chídó tnùnì ndíi Moisés

(Mt. 23:1-36; Lc. 11:37-54; 20:45-47)

³⁸ Te òré dánèhé ñáhá Jèsús xii cue ñáyiú, te xáhaⁿ-gá xii-yu:

—Cada cuendá-ndó vǎ cáda-ndó datná quidé cuè téé dàcuaha ñaha xii ñáyiú nchaa tnúhu ní chídó tnùnì ndíi Moisés, chí cue téé-áⁿ tnàhá iní-güedé cuihnu-güedé dóó nánì sǎ sácúñhu cue téé cúnúu-gá te cuini-güedé sá méé-ní ndíhi tnúhu yíñuhu cáháⁿ ndíhi ñaha ñáyiú xii-güedé nchaa núú xíca cùu-güedé. ³⁹ Te nàcáxi-güedé xilé sácóo nchíhi cue téé cúnúu-gá xítí veñúhu sácóo nchíhi-güedé. Te ducaⁿ-ni quide-güedé cuèi òré quíhu-güedé mèsá caxi-güedé òré ndécú-güedé ñⁿ vico, chí mee-ni núú sácóo cue téé cúnúu cuini-güedé coo-güedé. ⁴⁰ Te quèndéé-güedé vehe nchaa ñáyiú quèé, te ío naha cáháⁿ ndíhi-güedé Yá Ndiöxí dándahú-güedé méé-güedé sá ïo quide ndáá-güedé cuendá sá cuini-güedé cáháⁿ váha ñáyiú cuendá-güedé. Te sá dúcáⁿ quide-güedé te ío-gá ndoho-güedé núú ùhú núú ndáhú dacúúxí dàva-gá ñáyiú — cächí-gá xáhaⁿ-gá xii-yu.

Díhúⁿ nduu táhú Yá Ndiöxí ní dàquèe ñⁿ ñaha ndáhú ñaha quèé

(Lc. 21:1-4)

⁴¹ Te nùcòo Jèsús xití veñúhu yatni núu ndécú àlcanciá te ndèhe-gá xidáquëe ñáyiú díhúⁿ xití alcanciá-áⁿ, te tnàhá cue ñáyiú cuica xidáquëe-yu vùi díhúⁿ. ⁴² Te ní quexìo ìⁿ ñaha ndahú ñaha quëé, te ndèhe-gá ní dáquëe-aⁿ úú tnàhá díhúⁿ còbrí xití alcanciá, te díhúⁿ-áⁿ ìo sacú yáhu-xi. ⁴³ Te Jèsús ní cana-gá cue tée xica cuu ndíhi-gá, te ní xáhaⁿ-gá xii-güedé:

—Na càchí tñúhu ndáá-í xii-ndo sã ñàha ndahú ñaha quëé-a ío-gá nándíhi díhúⁿ ní dáquëe-aⁿ xití alcanciá dácúxí díhúⁿ ní dáquëe dava-gá-yu. ⁴⁴ Chi nchaa ñáyiú-áⁿ ní dáquëe-yu mee-ná díhúⁿ sã ní quendóo-ná, dico ñaha quëé-a cuëi ndàhú-aⁿ dico ní dáquëe-aⁿ ñihí díhúⁿ sã cuááⁿ sã caxí-áⁿ ní cùu —cachí-gá xáhaⁿ-gá xii-güedé.

13

Jèsús càchí-gá sá ngóyo vèñúhu

(Mt. 24:1-2; Lc. 21:5-6)

¹ Te òré ní ndee Jèsús xití veñúhu càhnu sá ìo cùnno, te ìⁿ tée xica cuu ndíhi-gá ní xáhaⁿ-dè xii-gá:

—jMèstrú, cundehe nã ío víi ní sáá veñúhu-aⁿ ndíhi nchaa vehe ñèhe tñaha ndíhi-xi, te ío víi ndáa nchaa yúú yíhi! —càchí-dé xáhaⁿ-dè xii-gá.

² Te Jèsús ní xáhaⁿ-gá xii-dé:

—Nchaa nàcuáa càa nchaa vehe sá cùnñúhu-n-a vitna sáá nduu te vá cundúu-gá-xi dàtná cáá-xí vitna, chi ní ìⁿ-gá yúú vã códó nchíhi tñaha-xi, chi ndíhi ngoyo —cachí-gá xáhaⁿ-gá xii-dé.

Nàcuáa cada-xi nduu ta cùyatni naa ñuyúú

(Mt. 24:3-28; Lc. 21:7-24; 17:22-24)

³ Te Jèsús ní xica-gá ndíhi cue tée xica cuu ndíhi-gá cuáháⁿ ndíhi ñaha-gá xii-güedé yucu nàni Olívú, te yucu Òlívú-áⁿ tũu ndáá núu cáá veñúhu càhnu sá ìo cùnno. Te Jèsús ní quexìo-gá ndíhi-güedé yucu Òlívú-áⁿ, te xíáⁿ ní ngóo-gá te núu núcòo-gá-áⁿ ní sáháⁿ té Pèlú ndíhi té Jacobó ndíhi té Juáá ndíhi té Ndríxí, te dayuhu ní xáhaⁿ-güedé xii-gá:

⁴ —Cuíní-ndí cachí tñúhu-n nã nduu dùcaⁿ cada-xi ngoyo veñúhu càhnu sá ìo cùnno, àdi nándi cùu sá cádá-xí cuendá cutnùní iní-ndí sá sà ta cùyatni nduu ducaⁿ cada-xi —cachí-güedé xáhaⁿ-güedé xii-gá.

⁵ Te Jèsús ní xáhaⁿ-gá xii-güedé:

—Ío quíhi iní-ndó cùndecu-ndo cuendá sã vã yòo dandàhú ñáhá xii-ndo. ⁶ Chi ío

cuéhé cue tée coo ñuyúú te danàni-güedé méé-güedé dàtná nàni-í, te cachí-güedé: “Yúhú cùu-í Cristú Yaá ní tendaha Yã Ndiòxí véxi ñuyúú-a”, duha cachí-güedé. Te sá dúcáⁿ cáháⁿ-güedé te ío vùi ñáyiú dandàhú-güedé.

⁷ Te òré ná ñihí-ndó tñúhu sá nàá-güedé ndèni ní cuu, te vá yùhú-ndó chi dacuitíí sã dúcáⁿ càda-xi, dico vátá sàá-gá nduu nàa ñuyúú òré ducaⁿ càda-xi. ⁸ Chi cue tée ìⁿ nà-cióⁿ nàá-güedé ndíhi cue tée ingá nacióⁿ, te titní ñuu nguíta-güedé nàá-güedé, te titní xichi ñuyúú ñíhi víhi tnáa, te titní tucu xichi ñuyúú coo tnamá, te ío-gá cuéhé sã yáha ñáyiú. Te nchaa sá dúcáⁿ càda-xi-áⁿ cúu-xí tñúndòho sá vítná váha váha quèsaha-xi sácúú-xí cuè ñáyiú ndècu ñuyúú-a.

⁹ Dico nchòhó ío quíhi iní-ndó cùn-decu-ndo, chi nchaa ñáyiú na cùu úhú iní ñáhá xii-ndo cuaha cuendá ñáhá-yu xii dava-ndo núu cuè tée cùchiuⁿ, te candeca ñaha-güedé xii-ndo quíhíⁿ xití veñúhu-güedé, te yàcáⁿ caniha-güedé xii-ndo. Te quíhíⁿ-ndó núu cuè tée yíndaha nacióⁿ àdi núu dàva-gá cue tée cùnno sá cuendá-í, te nchòhó ñihí-ndó nàcuáa cada-ndo cáháⁿ váha-ndo cuendá-í núu-güedé. ¹⁰ Te cùmání-gá sáá nduu nàa ñuyúú-a te sa cuténu tñúhu-í ní càa xico ñuyúú-a, te tñúhu-áⁿ cáháⁿ-xi nàcuáa naníhí tãhú ñáyiú. ¹¹ Te òré ná candeca ñaha ñáyiú xii-ndo quíhíⁿ núu cuè tée cùchiuⁿ cuáha cuendá ñáhá-yu, te òré vátá sàá-gá-ndó núu-güedé te vá cání iní-ndó núu nása cunduu tñúhu cùñaha-ndo xii-güedé. Chi òré-nã te Yá Ndiòxí dacàhu iní ñáhá-gá xii-ndo nása cunduu tñúhu cùñaha-ndo xii-güedé, te diu-ni tñúhu sá dácàhu iní ñáhá-gá-áⁿ cùñaha-ndo xii-güedé. Te ñá díú mèe-ndo cáháⁿ-ndó chi Espíritú Yã Ndiòxí cáháⁿ-xi yuhu-ndo. ¹² Te dava cue tée cuáha cuendá-güedé ñaní-güedé núu cuè tée cùchiuⁿ cuendá cahni ñaha-güedé. Te dava cue tée cùu tátá diu-ni ducaⁿ càda-güedé cuáha cuendá-güedé déhe-güedé núu cuè tée cùchiuⁿ. Te dava cue tée cùu déhe cuu úhú iní-güedé tátá-güedé ndíhi nãná-güedé, te cuáha cuendá ñáhá-güedé xíi-yu núu cuè tée cùchiuⁿ cuendá cahni ñaha-güedé xíi-yu. ¹³ Te ío cuéhé ñáyiú cuu úhú iní

ñáhã-yu xii-ndo sã cuëndá-í, dico nchaa nchòhó ñáyiu na cada ndee-ni iní canchicúⁿ nihnu ñaha-ni xii-í te naníhí tãhú-ndó.

¹⁴Te ndíi Dániél téé ní xóo cáháⁿ tnúhu Yá Ndióxi ndéé sanaha ní chídó tnúni ndíi núú tütú ndíi cuëndá íiⁿ sá dáquèe tihú Yá Ndióxi cundecu íiⁿ xichi núú ñã tütú tãú-xi cundecu-xi, te xíáⁿ cada-xi sá vã cündecu-gá ni íiⁿ ñáyiu xíáⁿ. Te cada cuëndá váha-ndo nãcuáa ní cáháⁿ ndíi, chi nduu na quini-ndó xíãⁿ cundecu-xi íiⁿ xichi núú ñã tütú tãú-xi cundecu-xi, te dává-ánⁿ nchaa ñáyiu xindecu distritú Júdeá xini ñuhu-xi cumú-yu quíhíⁿ-yu xití yucu. ¹⁵Te nchaa ñáyiu ndáa ndódo ñiquí vehé-xí vã ndíhu-gá-yu vehé-yu quehéⁿ-yu íiⁿ ndachíúⁿ-yu canehé-yu quíhíⁿ. ¹⁶Te nchaa ñáyiu cuáháⁿ yucu ni vã ñuhú-gá-yu vehé-yu cúnúquehéⁿ-yu dóó-yu. ¹⁷Te ndáhú ní cuu nchaa ñáyiu ñíhí ñúhú dèhe-xi, ndíhi cue ñáyiu ñíhí xindeca déhe vitna sádi na saá nduu ñucaⁿ cada-xi! ¹⁸Te nchòhó ío chí cácaⁿ táhu núú Yá Ndióxi cuëndá sá vã dúcáⁿ ndòho-ndo yóo quidé víxiⁿ-xi. ¹⁹Chi dává-ánⁿ coo tnúndòho cahnu vihi ñuyúú, te vátá íiⁿ ndùu-gá coo tnúndòho cahnu vihi-ánⁿ ndéé cútñahá ní cadúha Yá Ndióxi ñuyúú, chi ñuu-ni dává-ánⁿ coo tnúndòho cahnu vihi-ánⁿ, te ni núú cuáháⁿ núú véxi vã cóó-gã tnúndòho-ánⁿ. ²⁰Te Yá Ndióxi càchí-gá sá vã ño vai nduu coo tnúndòho cahnu vihi-ánⁿ ñuyúú sã cuëndá nchaa ñáyiu ní cáháⁿ-gá cundecu ndíhi-gá. Te núu vai nduu na coo tnúndòho-ánⁿ, te vã yóo cácu nihnu.

²¹Te dává-ánⁿ cññaha ñáyiu xii-ndo: “Chí cündèhe iha, chi iha ní quexio Cristú Yaá ní tendaha Yá Ndióxi véxi ñuyúú-a”, duha cúnãhá-yu xii-ndo. Àdi quesahá-yu: “Chí cündèhe yacáⁿ chi yacáⁿ ndécú-gã”, quesahá-yu. Te vã quindáa iní-ndó tnúhu cáháⁿ-yu. ²²Te coo cue tée danani-güedé méé-güedé dàtná nani-í te cachí-güedé sá cúu-güedé Yaá ní tendaha Yá Ndióxi véxi ñuyúú-a. Te dava-güedé cachí-güedé sá cúu-güedé cue tée cáháⁿ tnúhu Yá Ndióxi dico ñã ndáa sá cúu-güedé cue tée cáháⁿ tnúhu-gá, te cada-güedé titní núú sã vã yóo tnãhí ndácu cada cuendá dandáhú-güedé ñáyiu, te cani iní-güedé dandáhú-güedé ndéé cue ñáyiu ní cáháⁿ Yá Ndióxi cundecu ndíhi-gá. ²³Te vitna ío váha cuáhã-ndo

cuëndá, te quíhi iní-ndó cündecu-ndo, chi nchaa sa ní dátúha ñaha-í xii-ndo.

Nãcuáa cada-xi òré quixi tucu Téé cùu ñani tnáhã nchaa ñáyiu

(Mt. 24:29-35, 42-44; Lc. 21:25-36)

²⁴Te nã yáha-ni coo tnúndòho cahnu vihi-ánⁿ, te vã dáyhé-gá nchícanhii te ni vã dáyhé-gá yóo. ²⁵Te ngoyo nchaa chódini ndéé andíu, te quidi-xi andíu. ²⁶Te dává-ánⁿ quini ñahá nchaa ñáyiu xii yúhu Téé cùu ñani tnáhã-yu ncháa-yu quee-í andíu quixi-í ichi xití vícò, te quini-yu sá ño cahnu cuu-í, te quide-í nchaa sá váha. ²⁷Te tendaha-í cue espíritú xínú cuèchi núu-í quíhíⁿ-xi nadatácã-xi nchaa ñáyiu ní cáháⁿ-í chitnahá ñahá xii-í xindecu ní cãa xico ñuyúú.

²⁸Te cundehe-ndo nãcuáa quide yutnu ngúxí, chi yutnu-ánⁿ ndúú yúte núú dité-xi te nãtahú ndaha-xi, te òré ducaⁿ quide-xi te càchí-ndó sã sã ní cuyatni nuu cahni. ²⁹Te ducaⁿ sãtnahá-xi cada-xi òré ná quini-ndó càda-xi nchaa nacuáa ní cáháⁿ-í, te cutnuni iní-ndó sã sã ní cuyatni vii-nã nduu nãa ñuyúú. ³⁰Te na càchí tnúhu ndáa-í xii-ndo sã òré vátá cùu-gá cue ñáyiu xindecu ñuyúú-a vitna, te cada-xi nchaa nãcuáa ní cáháⁿ-í. ³¹Te andíu ndíhi ñuyúú-a chi ndíhi nihnu-xi, dico tnúhu-í chi vã ndíhí nihnu-xi chi cùu-xi tnúhu ndáa.

³²Dico ñã tütú cùtnuni ná nduu quixi tucu-í, te ni ñã tütú cùtnuni ná òré chi vã yóo xini, te ni cue espíritú xínú cuèchi núú Yá Ndióxi ñã tütú xini-xi ná nduu quixi-í, te ni mée yúhu téé cùu Déhe Dútú Ndióxi ñã tütú xini-í ná nduu quixi tucu-í, chi íiⁿ ñi dí-í mee Tãtà-í Dútú Ndióxi xini-gá núu ná nduu quixi-í.

³³Te nchòhó xini ñuhu-xi sá ño quíhi iní-ndó cündecu-ndo, te cáháⁿ ndíhi-ndo Yá Ndióxi, chi ñã tütú xini-ndó nã nduu quixi tucu-í. ³⁴Te na càchí tnúhu-í xii-ndo cuëndá íiⁿ téé cùini quingaca cuu xica. Te tée-ánⁿ cùmání-gã quee-dé vehe-dé te ní xáhaⁿ-dè xii cue tée xinu cuechi núu-dè sá ná cáda cuëndá-güedé vehe-dé. Te ní sãñaha-dè xii-güedé ndí ñiⁿ núu-güedé chiuⁿ cada-güedé. Te ní xáhaⁿ-dè xii téé ndéé yuyèhe sá ná cündecu túha-ni-dé yuyèhe ndéé nãsãá-dé. ³⁵Te duha nduu tnúhu cáháⁿ-í cuëndá nchòhó cundecu túha-ndo, chi ñã tütú xini-ndó nã nduu te ni ñã tütú xini-ndó nã òré quixi tucu

yúhú Yaá cúú Xítóhó-ndó, núú òré sa ní cundiquíⁿ, àdi dava niú, àdi oré sa ní cana uuⁿ líhi, àdi oré sa ta cùditó cuáháⁿ, núú xiǎⁿ ío chí cùndècu túha. ³⁶ Te duhá çàháⁿ-í chi na cuáháⁿ òré ñá túú nǎ yíhi ìní-ndó quèxio-í, te ñá túú ndècu túha-ndo. ³⁷ Te dàtná-ni xǎhaⁿ-í xii nchòhó sá cùndècu túha-ndo, te òdu-ni ducaⁿ xǎhaⁿ-í xii nchaa dava-gá ñáyiú sá cùndècu túha-yu —càchí-gá xǎhaⁿ-gǎ xii-güedé.

14

Ndùcu-güedé nàcuáa cada-güedé cahni-güedé Jèsús

(Mt. 26:1-5; Lc. 22:1-2; Jn. 11:45-53)

¹ Te cumání úú-gá nduu te quesaha vico pascuá, vico xèxi ñáyiú pàa sá ñà túú yíhi levadurá. Te cue dútú cúnúu, ndihi cue téé dàcuaha ñaha xii ñáyiú nchaa tnúhu ní chídó tnùnì ndíi Moisés ndúcú-güedé nàcuáa cada-güedé dandáhú-güedé Jèsús cuendá tñii ñaha-güedé xii-gá te cahni ñaha-güedé. ² Te ní xítñaha-güedé:

—Váha-gá sá vǎ tñíí-ó Jèsús mei ndúu vico, chi núú ducaⁿ na càda-o te ío dusaⁿ càda ñáyiú —càchí-güedé xítñaha-güedé.

Íñ ñadìhí chíhí-án àcití díquí Jèsús

(Mt. 26:6-13; Jn. 12:1-8)

³ Te Jèsús ndécú-gǎ ñúu Bètaniá vehe ñⁿ téé nàni Xímú, téé ní tñahá cuéhé sǎ dátèhyú nihnu-xi yiqui cùnú-ó. Te yíhi Jèsús mesá xéxi-gǎ ní quexio ñⁿ ñadìhí nehé-án ñⁿ sá ní cuáha yúú vǎha yúú nání àlabastrú, te xití xiǎⁿ ñúhú àcití sáháⁿ tñámí sǎ nání nǎrdú sá ìo ndèyáhu, te ní táhú-án xiǎⁿ te acití ñúhú xití-xi-án ní sódó-aⁿ díquí Jèsús. ⁴ Te ñⁿ úú cue téé xindecu-án ní cudéén-güedé sá dúcáⁿ ní quide-aⁿ, te ní xítñaha-güedé:

—Ná túú quide váha ñaha-án dàcáⁿ quidé-án, chi íí ní dácuyta-aⁿ acití váha-án. ⁵ Chi váha-gá núu cuyáhu acití-án sá ùní cièndú díhúⁿ denáriú, te díhúⁿ sǎ cuyáhu acití-án cuu cuendá ñáyiú ndáhú ní cùu —càchí-güedé xítñaha-güedé.

Te ní tenáá-güedé ñaha-án sǎ dúcáⁿ ní quide-aⁿ.

⁶ Te Jèsús ní xǎhaⁿ-gǎ xii-güedé:

—Chí dǎná, vá dásatú-ndó ìní ñadìhí-a, chí sá ní quide ñaha-aⁿ xii-í cúú-xí ñⁿ sá

vǎha. ⁷ Chi cue ñáyiú ndáhú ducaⁿ-ni cùt-nahá ñáyiú-án tnuú-ndó, te nání òré càchí iní-ndó te chindee-ndó-yu. Dico yúhú chí vá ncháá ndúu cundeçu ndihi ñaha-í xii-ndo ñúyíú-a. ⁸ Te ñadìhí-a ní quide-aⁿ ñⁿ sǎ vǎha ndéé není ní ndacu-aⁿ, chí sá dúhá ní quide ñaha-aⁿ xii-í ní chíhi ñaha-aⁿ àcití, te xiǎⁿ cada iní-ndó sǎ sǎ quide túha-aⁿ yiqui cùnú-í cuendá quíndúxi-xi. ⁹ Te na càchí tnúhu ndáá-í xii-ndo sǎ ndèni ní cuu nihí ñuyíú ná càháⁿ ñáyiú tnúhu-í, te càháⁿ-yu tñahá cuendá ñadìhí-a cuendá quini nchaa ñáyiú nàcuáa ní quide-aⁿ, te ducaⁿ vǎ nàcuánaa-yu —càchí-gǎ xǎhaⁿ-gǎ xii-güedé.

Té Júdás ndúcú-dé nàcuáa cada-dé cuáha cuendá-dé Jèsús núú cué téé cùu úhú iní ñáhá xii-gá

(Mt. 26:14-16; Lc. 22:3-6)

¹⁰ Te té Júdás Iscarioté ní sáháⁿ-dé ní ndatnúhu-dé ndihi cue téé cùu dútú cúnúu sǎ cuáha cuendá-dé Jèsús núú-güedé, te núú tñahá té Júdás-án cúú úxúú tñahá cue téé xica cuu ndihi-gǎ ní cùu. ¹¹ Te òré ducaⁿ ní ndatnúhu-dé ndihi-güedé, te ío ní cudíí iní-güedé, te ní xǎhaⁿ-güedé xii-dé sǎ cuáñaha-güedé díhúⁿ xii-dé. Te té Júdás-án ní ngúíta-dé ndúcú-dé nàcuáa cada-dé cuáha cuendá-dé Jèsús núú-güedé.

Cùdini Jèsús ndihi cue téé xica cuu ndihi-gǎ

(Mt. 26:17-29; Lc. 22:7-23; Jn. 13:21-30; 1 Co. 11:23-26)

¹² Te ní sáá nduu ní quesaha vico pascuá, vico ñá túú xèxi ñáyiú pàa sǎ ñà túú yíhi levadurá, te òdu-ni nduu-án sáhni-güedé ñⁿ mbéé líhli xèxi-yu nduu vico pascuá-án. Te cue téé xica cuu ndihi Jèsús ní xicáⁿ tnúhú-güedé núú-gǎ, te xǎhaⁿ-güedé xii-gǎ:

—Mèstrú, véxi-ndí xicáⁿ tnúhú-ndí núú-n ñúu ndéé cáá vehe cuini-n càda túha-ndí sǎ cùdini-o sacuaa nduu vico pascuá —càchí-güedé xǎhaⁿ-güedé xii-gǎ.

¹³ Te Jèsús ní xǎhaⁿ-gǎ xii úú-ni tñahá cue téé xica cuu ndihi-gǎ:

—Chí cuáháⁿ xití ñúu-án, te yàcáⁿ naníhí-ndó ñⁿ téé tñehe yóo ndute, te téé-án càndèndaha-ndo-dé quíhíⁿ. ¹⁴ Te núu ndèdacàa vehe na ndíhu-dé te xiǎⁿ quíhu-ndo. Te cúñaha-ndo xii xítóhó vehe-án: “Yaá cúú Mèstrú càchí-gǎ sǎ

nũu ndëdacàa xichi xití vehe-n cuãñaha nũu-n xii-gá cudini-gá ndihi cue tée xica cuu ndihi-gá sacuaa nduu pascuá”, duha cuãñaha-ndo. ¹⁵ Te dàtnùnì danèhé ñáhá-dë xii-ndo ìn̄ cuartú cahnú càa nũu nĩnu, chi vehe yòdo tnaha cuu-xi, te sa ní quide túha-dé nchaa sá nándĩhi, te nchòhò dicó-nà comidá cada túha-ndo cùdini-o —cachí-gá xáhaⁿ-gã xii-güedé.

¹⁶ Te cue tée-án nĩ xica-güedé cuáhán-güedé xití nũu-án, te nchaa-ni nàcuáa ní xáhaⁿ Jèsús ní cuu. Te ní quide túha-güedé sá cùdini-güedé ndihi-gá sacuaa nduu vico pascuá-án.

¹⁷ Te sáta nĩ cundiquiⁿ te ní quexio Jèsús ndihi ndi úxúú cue tée xica cuu ndihi-gá.

¹⁸ Te cuánguihu-gá mèsá ndihi-güedé cuendá cudini ndihi ñaha-gá xii-güedé, te òré yíhí-gã mèsá ndihi-güedé, te xáhaⁿ-gã xii-güedé:

—Na cächí tnúhu ndáá-í xii-ndo sã ìn̄ nchohó cue tée xèxi ndihi ñaha xii-í cuáha cuendá ñáhá-ndó nũu cuè tée cùu úhú iní ñáhá xii-í —cachí-gá xáhaⁿ-gã xii-güedé.

¹⁹ Te sá dúcán nĩ xáhaⁿ-gã xii-güedé, te nchaa-güedé ní ngüíta-güedé cùndiyí-güedé. Te da ìn̄ da ìn̄-güedé ní ngüíta-güedé xicáⁿ tnúhú-güedé núú-gã, te xáhaⁿ-güedé xii-gá:

—¿Ñá díú yúhú ducaⁿ sàni iní-n càda-í-u? —cachí-güedé xáhaⁿ-güedé xii-gá.

²⁰ Te Jèsús ní xáhaⁿ-gã xii-güedé:

—Diu-ni ìn̄ nchòhò cue tée úxúú xicá cùu ndihi-í, tée na daquëndaha còhò òré daquëndaha-í, tée-án cuáha cuendá ñáhá-dë xii-í núú cuè tée cùu úhú iní ñáhá. ²¹ Te yúhú Tée cùu ñani tnáhá-ndó nchaa-ndo ñuhu ichi-í cuáhán-í ndoho-í nàcuáa càhán-xi núú tütú Yã Ndiòxí. Dico ndáhú ní cuu tée ducaⁿ na cuáha cuendá ñáhá xii-í núú cuè tée cùu úhú iní ñáhá, chi váha-gá sá vá cacú tée-án cundecu-dé ní cùu, te ñá díú sã ní cacu-dé te ducaⁿ càda-dé —cachí-gá xáhaⁿ-gã xii-güedé.

²² Te nini cùdini cue tée xica cuu ndihi Jèsús ní queheⁿ-gá pàá, te ní ndacáⁿ táhú-gã núú Yã Ndiòxí, te dàtnùnì ní táhú cuèchi-gá, te ní ngüíta-gá dácáhũu ñaha-gá xii-güedé, te xáhaⁿ-gã:

—Chí quèhéⁿ pàá-a caxi-ndo, te cada iní-ndó sã cúu-xí dàtná yiqui cùñú-í —cachí-gá xáhaⁿ-gã xii-güedé.

²³ Te ní queheⁿ-gá vàsú ñúhú ndudí ndéhé yoho yàha stilé, te ní ndacáⁿ táhú-gã núú Yã Ndiòxí, te dàtnùnì ní ngüíta-gá sãñaha-gã xii-güedé cuendá coho-güedé luha luha sã ñúhú xití-xi, te nchaa-güedé ní xihí. ²⁴ Te ní xáhaⁿ-gã xii-güedé:

—Ndudí ndéhé yoho yàha stilé-a cada iní-ndó sã cúu-xí dàtná ñíñi-í sá catí òré cahni ñaha-güedé xii-í. Te sá dúcán catí ñíñi-í xíã cutnùnì ndáá sá Yã Ndiòxí cada-gá ingá núú sã váha sá cúu-xí vãi ñáyiú dàtná ní cachí-gá cada-gá. ²⁵ Te na cächí tnúhu ndáá-í xii-ndo sã vítná-ñã duha xihí-í ndudí ndéhé yoho yàha stilé-a te vá cóhó-gã-í, dico na sãá nduu cùndecu-í núú ndécú Yã Ndiòxí táxi tnùnì-gá, te dàvã-án cada iní-í sã dàtná sá cóhó tùcu-í chi ío cudí iní-í —cachí-gá xáhaⁿ-gã xii-güedé.

Jèsús càhán-gá sá tẽ Pèlú cúnaha-dë xii ñáyiú sã ñã túú xini ñáhá-dë xii-gá

(Mt. 26:30-35; Lc. 22:31-34; Jn. 13:36-38)

²⁶ Te Jèsús ní xita-gá ìn̄ ndudú ndihi cue tée xica cuu ndihi-gá, te dàtnùnì ní xica-gá cuáhán-gá ndihi-güedé yucu òlívú. ²⁷ Te yàcáⁿ ní xáhaⁿ-gã xii-güedé:

—Na cächí tnúhu-í xii-ndo sã ncháá-ndó dàña nihnu ñaha-ndo xii-í niú vitna, chi quee ndáá-xi nàcuáa càhán-xi núú tütú Yã Ndiòxí núú cächí-xi: “Yúhú cuáha-í tnúhu cahni-güedé tée cùu toli, te nchaa mbéé-dë ndihi-güedé cuténuu”, duha cächí-xi núú tütú-gá. ²⁸ Dico na cùu-í te ndoto-í te codonuu-í núú-ndó quíhán distritú Galiléa —cachí-gá xáhaⁿ-gã xii-güedé.

²⁹ Te tẽ Pèlú ní xáhaⁿ-dë xii-gá:

—Te cuèi nchaa-güedé ná dàndóo ñaha-güedé xii-n, dico yúhú chi vá dàndóo ñaha-í xii-n —cachí-dé xáhaⁿ-dë xii-gá.

³⁰ Te Jèsús ní xáhaⁿ-gã xii-dé:

—Na cächí tnúhu ndáá-í xii-n sã nùú vitna cùmání-gá cana líhi úú xito, te únì xito càhán-n nũú ñáyiú sã ñã túú xini ñáhá-n xii-í —cachí-gá xáhaⁿ-gã xii-dé.

³¹ Dico tẽ Pèlú ní càhán ñí-dé, te xáhaⁿ-dë xii-gá:

—Cuèi na cùu ndihi ñaha-í xii-n dico vá càhán-í núú ñáyiú sã ñã túú xini ñáhá-í xii-n —cachí-dé xáhaⁿ-dë xii-gá.

Te nchaa dava-gá cue tée xica cuu ndihi-gá diu-ni ducaⁿ ní xáhaⁿ-güedé xii-gá.

Jèsús càháⁿ ndihi-gá Yá Ndiòxí ìⁿ xichi núú nání Gètsemaní

(Mt. 26:36-46; Lc. 22:39-46)

³² Te Jèsús cuáháⁿ-gá ndihi cue tée xica cuu ndihi-gá ìⁿ xichi núú nání Gètsemaní. Te òré ní quexìo-gá ndihi-güedé xiáⁿ, te ní xáhaⁿ-gá xii-güedé:

—Chí cúnú^cdo iha cundetun-ndo na quíhíⁿ-í yacáⁿ cáháⁿ ndihi-í Yá Ndiòxí — cächí-gá xáhaⁿ-gá xii-güedé.

³³ Te ndéca-gá té Pèlú, ndihi té Jàcobó, ndihi té Juàà cuáháⁿ, te ñá túú tñahí-gá cúú vaha iní-gá te ní ngúíta-xi súúni ndihú iní-gá. ³⁴ Te ní xáhaⁿ-gá xii cue tée úní-áⁿ:

—Súúni ndihú iní-í dàtná sá cùú-í, te chí quéndòo iha te vā cùdú-ndó —cächí-gá xáhaⁿ-gá xii-güedé.

³⁵ Te sa ñunchíí luha ní xica ndehe Jèsús núú ndécú-güedé, te ní ngáundeyí-gá ndéé ñuhu càháⁿ ndihi-gá Tátá-gá Dútú Ndiòxí sá núú vā cündèe iní-gá taunihnu ñaha-gá xii-gá cuendá nchaa nàcuáa yáha-gá. ³⁶ Te òré càháⁿ ndihi Jèsús Tátá-gá Dútú Ndiòxí, te xáhaⁿ-gá:

—Yòhó tātá mée-í, nchaandi túhú sá vaha ndàcu-n quide-n, te càháⁿ ndáhú-í núú-n núú vā cündèe iní-n taunihnu ñaha-n xii-í cuendá sá vā ndóhò-í ná sàà òré, dico vā cáda-n nàcuáa cächí iní mée-í chí cada-n nàcuáa cächí mee-n —cächí-gá xáhaⁿ-gá xii Tátá-gá Dútú Ndiòxí.

³⁷ Te sātá ñí yáha ní cáháⁿ ndihi-gá Tátá-gá Dútú Ndiòxí, te cuánuhú-gá núú ní dándòo-gá cue tée úní-áⁿ, te xixíí-í-güedé òré ní nasáá-gá, te ní xáhaⁿ-gá xii té Pèlú:

—Xímú, ¿náa sama xidí-n? ¿Náa ñá cündèe tñahi núú-n vā cùdú-ni-n cuèdicó ìⁿ òré-áⁿ? —cächí-gá xáhaⁿ-gá xii-dé.

Te ní xáhaⁿ tucu-gá xii-güedé:

³⁸ —Te chí quéndòo tucu, te cuhuⁿ iní-ndó vā cùdú-ndó, te cáháⁿ ndihi-ndo Yá Ndiòxí cuendá sá vā dácáháⁿ ñáhá yucu ñávaha xii-ndo càda-ndo sá ñá túú táu-ndó càda-ndo. Te na cächí tñuhu ndáá-í xii-ndo sá nchòhó cuiní-ndó càda-ndo nchaa nàcuáa càháⁿ-í dicó-ni sá ñá túú ñihí ndéé-ndó —cächí-gá xáhaⁿ-gá xii-güedé.

³⁹ Te Jèsús ní xica tucu-gá cuáháⁿ-gá cáháⁿ ndihi-gá Tátá-gá Dútú Ndiòxí, te díu-ni nàcuáa ní xáhaⁿ-gá díhna xáhaⁿ tucu-gá. ⁴⁰ Te òré ní yáha ní cáháⁿ ndihi-gá Tátá-gá Dútú Ndiòxí, te cuánuhú tucu-gá núú xindecu cue tée úní xicá cùu

ndihi-gá-áⁿ, te xidí-ni tucu-güedé òré ní nasáá-gá, te ducaⁿ ñí quide-güedé chí súúni ñuhu saní núú-güedé, te ñá ní ñihí-güedé tñuhu cúñaha-güedé xii-gá òré ní nasáá-gá. ⁴¹ Te ní sáháⁿ tucu-gá xito cùu úní ní cáháⁿ ndihi-gá Tátá-gá Dútú Ndiòxí, te òré ní nasáá tucu-gá núú xindecu-güedé, te xáhaⁿ-gá xii-güedé:

—¿Te náa xidí-ni tucu-ndo?, te vitna vā cùdú-gá-ndó chí sa ní sáá òré cuáha cuendá ñáhá-güedé xii yúhú Tée cùu ñaní tñáhá-ndó nchaa-ndo núú cùe tée ndècu ichi cùehé ichi duha. ⁴² Te vitna chí ndácòo na quíhíⁿ-ó chí sa véxi tée cuáha cuendá ñáhá xii-í núú cùe tée cùu úhú iní ñáhá — cächí-gá xáhaⁿ-gá xii-güedé.

Ní tñi-güedé Jèsús ndéca ñaha-güedé xii-gá cuáháⁿ

(Mt. 26:47-56; Lc. 22:47-53; Jn. 18:2-11)

⁴³ Te càháⁿ dúcáⁿ-ní Jèsús ní quexìo té Jùdás. Te núú tñahá tée-áⁿ cúú ùxúú tñahá cue tée xica cuu ndihi-gá. Te ndihi-dé vāi cue tée ní quexìo, te dava-güedé xinehe-güedé machití te dava-güedé xinehe-güedé carrutí. Te cue tée-áⁿ ñí tendaha ñaha cue dútú cúnúu ndihi cue tée dàcuaha ñaha xii ñáyíu nchaa tñuhu ní chídó tñuní ndíi Moisés, ndihi cue tée cùu sacuéhé núú ñáyíu isráél. ⁴⁴ Te té Jùdás tée cuáha cuendá ñáhá xii Jèsús sa ní xitñuhu-dé cue tée-áⁿ nàcuáa cada-dé cuáha cuendá ñáhá-dé xii Jèsús núú-güedé. Te duha ní xáhaⁿ-dè xii-güedé:

—Cundehe-ndo tée na tèyuhu-í, te tée-áⁿ tñi-ndo-dè chí tée-áⁿ cúú-dé tée ndéé iní-ndó, te ío quíhí iní-ndó càndeca-ndo-dé quíhíⁿ —duha ní xáhaⁿ-dè xii-güedé.

⁴⁵ Te òré ní quexìo té Jùdás ndihi cue tée-áⁿ núú ndécú Jèsús, te ní xáhaⁿ-dè xii-gá:

—Mèstrú —cächí-dé xáhaⁿ-dè xii-gá.

Te ní tèyuhu ñaha-dé. ⁴⁶ Te nchaa cue tée ndihi-dé-áⁿ ñí tñi-güedé Jèsús cuendá càndeca ñaha-güedé xii-gá quíhíⁿ. ⁴⁷ Te ìⁿ cue tée cündihí Jèsús ní tava-dé machití-dé, te ní xehndé-ni-dé ìⁿ xio lóho ìⁿ tée xinu cuechi núú dütú cúnúu, te ní quendeé duuⁿ lóho tée-áⁿ. ⁴⁸ Te Jèsús ní xáhaⁿ-gá xii cue tée ní tñi ñaha xii-gá-áⁿ:

—Nchòhó, nèhe-ná-ndó màchití, nèhe-ná-ndó càrrutí véxi ní tñi ñaha-ndo xii-í, dàtná quidé-ndó ìⁿ ñadúhú quidé ñaha-ndo xii-í. ⁴⁹ Te nchaa-ni nduu ní

xiní-ndó ní xíndecu-í xití veñúhu càhnu sá ïo cùnunu ní xóo danèhé-í ñáyi, te ñá túú ní tñii ñaha-ndo xii-í. Dico dàcuítí sá dúhá yáha-í cuèndá quee ndáá-xi nàcuáa càhá-xi núú tútú Yá Ndiöxí —càchí-gá xáhaⁿ-gá xii-güedé.

⁵⁰ Te nchaa cue tée xica cuu ndihi-gá ní xinu-güedé ní dándöo ñaha-güedé xii-gá.

Ïⁿ tée cuechi ní xinu-dé

⁵¹ Te Ïⁿ tée cuechi ndëndaha-dé Jèsús cuáháⁿ, te lavichi-dé, Ïⁿ-ni dóo yadí yídücüⁿ nuu-dé nihí-dé, te ní tñii ñaha-güedé xii-dé, ⁵² dico ní ndacu-dé ní quenuñi-dé te ní dándöo-dé dóo yídücüⁿ nuu-dé-áⁿ ní xinu-dé.

Jèsús ndécú-gá jündá

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Te cue tée ní tñii ñaha xii Jèsús ndécá ñaha-güedé xii-gá cuáháⁿ núú tée cùu dútú cùnùu-gá. Te xíáⁿ ní tacá nchaa dava-gá cue tée cùu dútú cùnùu, ndihi cue tée cùu sacuéhé núú ñáyi israhél, ndihi cue tée dàcuaha ñaha xii-yu nchaa tñúhu ní chídó tñúni ndíi Moisés cuèndá cada-güedé jündá. ⁵⁴ Te té Pèlú xica xica-ni nchicúⁿ ñáhá-dé xii-gá cuáháⁿ ní sáá-dé ndéé quehé vehe núú ndécú tée cùu dútú cùnùu-gá-áⁿ, te xíáⁿ ní ngóo teté-dé yuhu nùhú ndihi cue tée cùu poleciá.

⁵⁵ Te cue tée cùu dútú cùnùu ndihi nchaa dava-gá cue tée xíndecu jündá ndúcú-güedé ñáyi dacaá Ïⁿ cuéchi díquí Jèsús cuèndá ducaⁿ níhí-güedé nàcuáa cada-güedé cahni ñaha-güedé xii-gá, dico ñá túú ní ndacu-güedé. ⁵⁶ Te cuéi vai ñáyi dacaá-yu cuéchi díquí-gá dico mee-ni sá ní cahu iní méè-yu ní càháⁿ-yu, chi tucu càháⁿ Ïⁿ tucu càháⁿ Ïⁿ-yu. ⁵⁷ Te davá-yu ní ndacuñí-yu te ní ngüíta-yu dacaá-yu Ïⁿ cuéchi neñúú díquí-gá, te xáháⁿ-yu xii nchaa cue tée cùnunu:

⁵⁸ —Nchúhú ní tecú dóho-ndí càchí-dé sá dängöyo-dé veñúhu càhnu sá ïo cùnunu sá ní dácáá cuè tée ñuyú-a, te dandaa tucu-dé ingá veñúhu saa, diu-ni núú cáá tñàhí veñúhu-áⁿ te xití úní-ni nduu sa nadaxínu-dé, te vá cúú-gá-xi veñúhu sá ní dácáá cuè tée ñuyú-a, duha càchí-dé ní tecú dóho-ndí —càchí-yu xáháⁿ-yu xii-güedé.

⁵⁹ Dico ní dùcaⁿ ñá túú ní cùu Ïⁿnuú-yu nchaa tñúhu ní càháⁿ-yu.

⁶⁰ Te tée cùu dútú cùnùu-gá ní ndacuñí-dé tnuú nchaa ñáyi, te xáhaⁿ-dè xii Jèsús:

—¿Ná cuèndá duha ndùu tñúhu càháⁿ ñáyi-a cuèndá-n? Te càháⁿ núu nása ndùu tñúhu càháⁿ-n —càchí-dé xáhaⁿ-dè xii-gá.

⁶¹ Dico Jèsús ñá túú tñàhí ní càháⁿ-gá. Te tée cùu dútú cùnùu-gá-áⁿ ní xáhaⁿ tucu-dé xii-gá:

—Cuíni-í cachí tñúhu-n xii-ndí núu sá díú Cristú Déhe Yá Ndiöxí Yáá ní tendaha-gá véxi ñuyú-a cùu-n. Te diu Yá Ndiöxí cúú-gá Yáá quidé càhnu-ndí —càchí-dé xáhaⁿ-dè xii-gá.

⁶² Te Jèsús ní xáhaⁿ-gá xii-dé:

—Diu Yáá-áⁿ cùu-í, te na càchí tñúhu-í xii-ndo sá sáá nduu te quini-ndó yúhú Tée cùu ñani tñáhá-ndó nchaa-ndo cunucóo-í xio cùha Dútú Ndiöxí Yáá ndácú quide nchaandi túhú sá váha. Te davá-áⁿ quini ñáhá-ndó xii-í quee-í andü quixi-í ichi xití vícú —càchí-gá xáhaⁿ-gá xii-dé.

⁶³ Te dútú cùnùu-gá-áⁿ ní ndátá-dé dóo cáni nihnu-dé cuèndá sá ñá túú ní tñàhí iní-dé nàcuáa ní càháⁿ Jèsús, te ní xáhaⁿ-dè xii nchaa cue tée xíndecu jündá:

—Ñá túú-gá xini ñuhu-xi cue tée càháⁿ núu ndáá sá ndécuechi-dé àdi ñá túú ndécuechi-dé. ⁶⁴ Chi sa ní xíndedóho-o nàcuáa ndùu tñúhu ní càháⁿ-dè ní càháⁿ úhú-dé cuèndá Yá Ndiöxí, te nchaa-ndo chí càháⁿ vitna núu nása sàni iní-ndó cùnduu cuèndá tée-a —càchí-dé xáhaⁿ-dè xii-í-güedé.

Te nchaa-güedé ní cachí-güedé sá ná cùu-dé.

⁶⁵ Te dava-güedé ní ngüíta-güedé ní tíú díí ñáhá-güedé xii-gá, te ní dádähu-güedé núú-gá, te ní ngüíta-güedé caniha-güedé xii-gá, te xáhaⁿ-güedé:

—¿Càháⁿ ná cótó ná cùu tée ní caniha xii-n! —cachí-güedé xáhaⁿ-güedé xii-gá.

Te cue tée cùu poleciá ní cani-güedé núú-gá.

Té Pèlú càháⁿ-dé núú ñáyi sá ñá túú xini-dé Jèsús

(Mt. 26:69-75; Lc. 22:56-62; Jn. 18:15-18, 25-27)

⁶⁶ Te ndéé xití vehe càa núú ñnu quide-güedé jündá, chi vehe yòdo tñaha cuu-xi, te té Pèlú múcöo-dé quehé vehe-áⁿ.

Te ìⁿ xíchí xínú cuèchi núú dütú cúnú-áⁿ ní quexio-xi núú núcõo té Pèlú. ⁶⁷ Te òrè ní xíní ñáhá-xí xii-dé núcõo teté-dé yuhu núhú, te ní xíndéhé ñàha váha-xi xii-dé, te xáhaⁿ-xi:

—Yòhó tnháá-n cùu-n téé xica cuu ndihi Jèsús téé ñúú Nazàrèt —càchí-xi xáhaⁿ-xi xii-dé.

⁶⁸ Te té Pèlú ní xáhaⁿ-dë xii-xi:

—Yúhú ñá túú xíní-í téé-áⁿ, te ni ñà túú cùtnúní ìní-í nása ndùu tnhúhu càháⁿ-n —càchí-dé xáhaⁿ-dë xii-xi.

Te té Pèlú ní xica-dé cuáháⁿ-dé ndàa nacuaáa nchìi yuyèhe vehe-áⁿ, te ní cana ìⁿ líhi. ⁶⁹ Te xíchí xínú cuèchi-áⁿ ní xíní ñáhá tucu-xi xii-dé, te xáhaⁿ-xi xii nchaa ñáiyu xíndecu-áⁿ:

—Diu téé-áⁿ tnháá-dé xícá cùu-dé ndihi téé ndèca-güedé cuánguìhu-a —càchí-xi xáhaⁿ-xi xii-yu.

⁷⁰ Dico té Pèlú ñá túú ní ñnuu tucu-dé sá xícá cùu-dé ndihi Jèsús. Te tna tnaa-ni ní cuu sá dúcáⁿ ní xáhaⁿ xíchí-áⁿ xii-dé, te ní xáhaⁿ tucu dava cue ñáiyu xíndecu-áⁿ xii-dé:

—Ndáá sá tnháá-n cùu-n téé xica cuu ndihi téé ndèca-güedé cuánguìhu-áⁿ chi cùu-n téé distritú Galileá, te càháⁿ-n dàtná càháⁿ-güedé —càchí-yu xáháⁿ-yu xii-dé.

⁷¹ Te té Pèlú ní xáhaⁿ-dë xii-yu:

—Nchàcùití Yá Ndiõxí sá yúhú càháⁿ ndáá-í sá ñà túú xíní-í téé càcunehé-ndo-áⁿ —càchí-dé xáhaⁿ-dë xii-yu.

⁷² Te òrè-ni-áⁿ ní cana tucu líhi xito cùu uú, te òrè-áⁿ ní ndacu ìní té Pèlú nàcuáa ní xáhaⁿ Jèsús xii-dé sá cùmání-gã cana ìⁿ líhi úú xito te úní xito càháⁿ-dé núú ñáiyu sá ñà túú xíní ñáhá-dë xii-gá. Te òrè ducaⁿ ní ndacu ìní-dé nàcuáa ní xáhaⁿ Jèsús xii-dé, te ní ndáhyú-dé ní ndixi cuèchi ìní-dé.

15

Jèsús ndécú-gã núú tã Pilatú

(Mt. 27:1-2, 11-14; Lc. 23:1-5; Jn. 18:28-38)

¹ Te sáta ní túndaá te cue téé cùu dütú cúnú, ndihi cue téé cùu sacuéhé núú ñáiyu isràél, ndihi cue téé dàcuaha ñaha xii ñáiyu nchaa tnhúhu ní chídó tnhúní ndíi Moisés, ndihi nchaa dava-gá cue téé cúnúu ní xíndecu jundá ní natacá-güedé, te ní dácútú-güedé Jèsús te ndèca ñaha-güedé xii-gá cuáháⁿ núú tã Pilatú. ² Te té Pilatú ní xícáⁿ tnhúhú-dë núú Jèsús, te xáhaⁿ-dë xii-gá:

—¿Ndáá sá dütú-n cùu-n téé yíndaha ñaha xii ñáiyu isràél-áⁿ? —càchí-dé xáhaⁿ-dë xii-gá.

Te Jèsús ní xáhaⁿ-gã xii-dé:

—Diu-í yíndaha-í-yu —càchí-gá xáhaⁿ-gã xii-dé.

³ Te cue téé cùu dütú cúnúu daciaa-güedé vai cuèchi díquí-gã. ⁴ Te té Pilatú ní xícáⁿ tnhúhú tucu-dé núú-gã, te xáhaⁿ-dë xii-gá:

—Cáháⁿ, ná cuèndá ñá càháⁿ-n te cundehe ná ndéé duha titní cuèchi daciaa díquí ñáhá cuè téé-a xii-n —càchí-dé xáhaⁿ-dë xii-gá.

⁵ Dico Jèsús ñá túú tnháí ni càháⁿ-gá te té Pilatú ío ní cuñúhu-dé sá dúcáⁿ ñà túú tnháí ni càháⁿ-gá.

Cue ñáiyu xáháⁿ-yu xii té Pilatú sá cãhní-dë Jèsús

(Mt. 27:15-31; Lc. 23:13-25; Jn. 18:38-19:16)

⁶ Te ndí tnháá nduu yico pascua dácacu té Pilatú ìⁿ téé yìhi vecaá chi ducaⁿ tnháí quide-dé, te mee ñáiyu càháⁿ-yu te núu ndèdacaáa téé yìhi vecaá-áⁿ cãcu-dé, te téé-áⁿ dácacu-dé. ⁷ Te yìhi ìⁿ téé nàni Barrabás vecaá ndihi dava-gá cue téé cundíhi-dé. Te té Barrabás-áⁿ ní sanu ichi-dé ñáiyu ñúú ingá ichi, te ní ngúíta-yu ndihi-dé ní cuu úhú ìní-yu cue téé cùchiu, te ní sahni-dé ndíyi núu xíãⁿ ní chihí ñaha-güedé vecaá xii-dé. ⁸ Te nchaa ñáiyu ní sáháⁿ-yu núú tã Pilatú, te càháⁿ ndáhú-yu núú-dë sá ná cãdá nàhi-ni-dé dàtná quidé-dë. ⁹ Te té Pilatú ní xáhaⁿ-dë xii-yu:

—¿Cuiní-ndó sã dácacu-í téé yíndaha ñaha xii ñáiyu isràél-áⁿ? —càchí-dé xáhaⁿ-dë xii-yu.

¹⁰ Te ducaⁿ ní càháⁿ té Pilatú, chi ní cut-núní ìní-dé sã dicó sá cuèdú ìní cuè dütú cúnúu núu xíãⁿ ducaⁿ ní quide-güedé ní sáha cuèndá ñáhá-güedé xii Jèsús núú-dë.

¹¹ Te cue dütú cúnúu ní xáhaⁿ-güedé xii nchaa ñáiyu sá ná cùñáhá-yu xii té Pilatú dácacu-dé té Barrabás, te ní quidé-yu nàcuáa ní xáhaⁿ-güedé. ¹² Te té Pilatú ní xícáⁿ tnhúhú-dë núú-yu, te xáhaⁿ-dë xii-yu:

—¿Ná cuiní-ndó cãda-í téé càchí-ndó yíndaha ñaha xii ñáiyu isràél-í? —càchí-dé xáhaⁿ-dë xii-yu.

¹³ Te nchaa-yu níhi ní càháⁿ-yu, te xáháⁿ-yu xii-dé:

—¡Cata caa-dé núu cùrúxí! —càchí-yu xǎhǎn-yu xii-dé.

¹⁴ Te té Pilatú ní xáhaⁿ-dē xí-yu:

—¿Te ná cúu cuěchi ní quide-dé te núu ducaⁿ cuiñí-ndó càda-í-dé-i? —càchí-dé xǎhaⁿ-dē xí-yu.

Dico nchaá-yu uuⁿ-gá ñíhi ní cáháⁿ-yu, te xǎhǎn-yu xii-dé:

—¡Cata caa-dé núu cùrúxí! —càchí-yu xǎhǎn-yu xii-dé.

¹⁵ Te té Pilatú ní quide-dé nàcuáa ní xǎhǎn-yu xii-dé cuèndá sá cúdiu-dé núu-yu, te ní dácacu-dé té Barrábás, te ní táuchíuⁿ-dē ní caní-güedé Jèsús ndíhi ñii. Te sátá dúcáⁿ ní quide ñaha-güedé xii-gá, te ní táuchíuⁿ-dē candeca ñaha-güedé qíhíⁿ cata caa ñaha-güedé xii-gá núu cùrúxí.

¹⁶ Te cue tée cùu sandadú ndécá ñaha-güedé xii-gá cuáháⁿ vechíuⁿ, te ñu-ni xíaⁿ cúu vèhe tée cùu gobiernú. Te xíaⁿ ní tacá nchaa dava-gá cue tée cùu sandadú.

¹⁷ Te xíaⁿ ní dácuihnú ñaha-güedé xii-gá ñⁿ dóo tìcuèhé víhí, te ní cadúha-güedé ñⁿ coróná ñnu ní chihi-güedé díquí-gǎ. ¹⁸ Te ní ngúíta-güedé ñíhi cáháⁿ-güedé cúdíquí ndeé ñáhá-güedé xii-gá, te xǎhaⁿ-güedé:

—¡Ío càhnu cuu yohó tée yíndaha ñaha xii ñáyiú isràél! —càchí-güedé xǎhaⁿ-güedé xii-gá.

¹⁹ Te càni-güedé díquí-gǎ ndíhi ñⁿ carrutí, te tiú díí ñáhá-güedé xii-gá, te ngúíñí xítí-güedé núu-gǎ quídé-güedé sá nehé-güedé sá yíñúhu núu-gǎ dico ñá ndáa chi dicó cúdíquí ndeé ñáhá-güedé xii-gá. ²⁰ Te sátá dúcáⁿ ní cudíquí ndeé ñáhá-güedé xii-gá, te ní nataunuu ñaha-güedé xii-gá dóo tìcuèhé víhí sǎ ní dácuihnú ñaha-güedé, te ní dándñúnuu ñaha-güedé xii-gá dóo méé-gǎ. Te dǎtnúñí ndécá ñaha-güedé cuáháⁿ núu catá càa ñaha-güedé xii-gá núu cùrúxí.

Sàta caa-güedé Jèsús núu cùrúxí

(Mt. 27:32-44; Lc. 23:26-43; Jn. 19:17-27)

²¹ Te ichi cuáháⁿ-güedé ndíhi Jèsús ní naníhí-güedé ñⁿ téé ñuu Cirené nání-dē Xímú, te déhe-dé cúu ñⁿ téé nàni Lijandrú, ndíhi íngá téé nàni Rúfú. Te té Xímú-áⁿ ñúhú-dē ichi duha cuándixi-dé ní sáháⁿ-dé yucu, te ní quide yica-güedé ní xido-dé cùrúxí sá nchídó Jèsús.

²² Te ndéca-güedé Jèsús cuáháⁿ ñⁿ xichi núu nání Gólgotá, te tnúhu-áⁿ quée-xí: ñⁿ xichi núu nání yíqui díquí ndíyi, duha quée-xi tnúhu-áⁿ. ²³ Te ní sáñaha-güedé xii-gá ndudí sá ní quée yúcu nání mirrá coho-gá ní cùu dico ñá túu ní xíhi-gá. ²⁴ Te ní sata caa ñaha-güedé xii-gá núu cùrúxí. Te sátá dúcáⁿ te cue tée cùu sandadú-áⁿ ní xito ndeé-güedé núu ndédacàa-güedé cuu cuèndá-güedé dóo-gǎ.

²⁵ Te cùu-xi caá ñⁿ dátneé òré ní sata caa ñaha-güedé xii-gá núu cùrúxí. ²⁶ Te ní taxi ndecu-güedé ñⁿ sá ndeé lètrá núu táca-gá. Te lètrá-áⁿ cáháⁿ-xi ná cuèndá ducaⁿ ní quide ñaha-güedé xii-gá. Te duha cáháⁿ lètrá-áⁿ: “Tée yíndaha ñaha xii ñáyiú isràél”, duha càchí-xi. ²⁷ Te tnàhá úu cue tée cùu ñadúhú ní sata caa-güedé ñu-ni núu cùrúxí tucu. Te ñⁿ-dē ní sata caa-güedé xio cùha-gá, te íngá-dé ní sata caa-güedé xio dátñi-gá. ²⁸ Te ducaⁿ ní cuu chí ní quee ndáa-xi nàcuáa cáháⁿ-xi núu títú Yá Ndióxi núu càchí-xi: “Ñⁿ-ni ní quide ñaha-güedé xii-gá ndíhi cue tée ndecu cuéchi-xi”, duha càchí-xi núu títú-gá.

²⁹ Te nchaa ñáyiú yǎha yatni núu táca-gá dácucó-yu díquí-yu te xícuèhé ñáhá-yu xii-gá, te xǎhǎn-yu:

—Te ná cuèndá ducaⁿ càa-n tacaa-n xíaⁿ, te càchí-n sǎ dàngoyo-n veñúhu càhnu sá ño cùnuu te dandàa-n íngá veñúhu saa, te xítí úni-ni nduu sa nadaxínu-n càchí-n. ³⁰ Te vitna tanuu núu cùrúxí-áⁿ dácacu-n mèn-n —cachí-yu xǎhǎn-yu xii-gá.

³¹ Te ñu-ni ducaⁿ ní quide cue tée cùu dútú cùnuu, ndíhi cue tée dàcuaha ñaha xii ñáyiú nchaa tnúhu ní chídó tnúñí ndí Moisés, chí ní cudíquí ndeé ñáhá-güedé xii-gá, te ní xítñaha-güedé:

—Tée-a ní ndacu-dé ní dácacu ñihnu-dé ñáyiú, ¿te ná cuèndá ñá ndácú-dē dácacu ñihnu-dé méé-dē-i? ³² Te núu ndáa sá díu-dē cúu-dē Cristú Yáa ní tendaha Yá Ndióxi véxi ñuyíu-a quíndaha ñaha xii ñáyiú isràél, te na cundehe-o nuu-dé núu cùrúxí, cuèndá quíndáa íñí-ó-dē —càchí-güedé xítñaha-güedé.

Te ndeé tnàhá cue tée tàcaa xio xio díñi-gá xícuèhé ñáhá-güedé xii-gá.

Ní xíhí Jèsús

(Mt. 27:45-56; Lc. 23:44-49; Jn. 19:28-30)

³³ Te òrè ní cuu cuádava nduu, te ní cunee níhí ñuyíú, te ducaⁿ-ní càa ní cuu ndéé caá úní sacuaa. ³⁴ Te ñu-ni òrè caá úní sacuaa-án níhí ní cáháⁿ Jèsús, te xáhaⁿ-gá xii Tátá-gá Dítú Ndiòxí:

—Elòí, Elòí, láma sabàctaní —càchí-gá xáhaⁿ-gá.

Te tñúhu-án quée-xí: Ndiòxí mèè-í, Ndiòxí mèè-í, ná cuendá ní dáñá ñàha-n xii-í, duha quèe-xi tñúhu-án.

³⁵ Te dava cue tée xíndecu yatni núú tacaá-gá-án ní tecú dóho-güedé nàcuáa ní cáháⁿ-gá, te ní xítñàha-güedé:

—Chí cündèdóho chi càna-dé té Èliás —càchí-güedé xítñàha-güedé.

³⁶ Te ñⁿ cue tée xíndecu-án xínú-dé ní sáháⁿ ní chindóyo-dé luha cáchí xítí ndudí íá, te ní chinenu-dé díquí ñⁿ yutnu càni te ní ndocani-dé chíhí-dé yuhu-gá cuendá coho-gá. Te ní xáhaⁿ cuè tée xíndecu-án xii tée-án:

—Cundetú tnaa na cundehe-o nacoto núú quixí té Èliás nunehe ñàha-dé xii-dé núú cùrúxí —càchí-güedé xáhaⁿ-güedé xii-dé.

³⁷ Te Jèsús níhí ní canasaa-gá te ní xíhí-ni-gá. ³⁸ Te sáta dúcáⁿ te ní ndátá dóó cúú còrtiná xítí veñúhu càhnu sá ño cùnunu ní quée dava ndáá, te ndàa núú ñnu ní ngúíta-xi ní ndátá. ³⁹ Te tée cùu capitáⁿ nútñí-dé ndàa núú Jèsús, te ndèhe-dé nàcuáa ní quide-gá òrè ní xíhí-gá, te ní cachí-dé:

—Sá ndàa ndisa sá díú tée-a cùu-dé Déhe Yá Ndiòxí ní cùu —duhá ní cachí-dé.

⁴⁰ Te xica xínutñí ñⁿ úú ñáyíu ñhí ndéhé-yu nchaa nàcuáa ní quide ñàha-güedé xii Jèsús, te tñàhá tá Màriá Magdaléná, ndíhí tá Salómé, ndíhí tá Màriá náná té Chèè ndíhí té Jacobó tée cáchí-güedé cúú líhli-gá. ⁴¹ Te cue ñáyíu ñhí-án ní xica cuú-yu ndíhí Jèsús distritú Galiléa ní xinu cuèchí-yu núú-gá. Te cue ñáyíu ñhí-án nchicúⁿ ñáhà-yu xii-gá ní quexio ndéé ñuú Jerusàlén ndíhí dava-gá ñáyíu ñhí nchicúⁿ ñáhà xii-gá cuáháⁿ.

Chindúxi-güedé Jèsús

(Mt. 27:57-61; Lc. 23:50-56; Jn. 19:38-42)

⁴² Te cùu-xi nduu vispré nduu ndètátú ñáyíu. Te nduu-án xíquide túha-yu sá cúú ñngá nduu nduu ndètátú-yu-án, te ñu-ni nduu-á sa ní cuaa víhí, ⁴³ te ñⁿ tée nani Cheé tée ñuú Arimátea ní cuyí-dé ní

sáháⁿ-dé núú tē Pilatú, te ní xáhaⁿ-dē sá ñuu vá cündēe íní-dē ñàha-dē chindúxi-dé yíqui cùñú Jèsús. Te tñàhá té Chèè-án cúú-dē ñⁿ tée cùnunu cundihi-dé cue tée quide jundá, te tñàhá-dé ndétú-dé sáa nduu ndíhu ndaha ñàha Yá Ndiòxí xii-dé ndíhí cue ñáyíu. ⁴⁴ Te tē Pilatú ío ní cùñúhu-dé sá dúcáⁿ ío ndíhí ní xíhí Jèsús, te ní cana-dé tée cùu capitáⁿ ní xicáⁿ tñúhú-dé núú-dé ñuu ndisa sá sà ní xíhí-gá. ⁴⁵ Te tée cùu capitáⁿ-án ní xáhaⁿ-dē xii tē Pilatú sá ndáá ní xíhí Jèsús, núu xíáⁿ tē Pilatú-án ní sáha-dé tñúhu chindúxi té Chèè-án yíqui cùñú-gá. ⁴⁶ Te tē Chèè-án ní saaⁿ-dē ñⁿ dóó vāha, te ní sáháⁿ-dē ní nunehe-dé yíqui cùñú Jèsús núú cùrúxí, te ní chidúcúⁿ-nuu-dé yíqui cùñú-gá dóó vāha sá ní saaⁿ-dē-án, te dàtñuní nehé-dé yíqui cùñú-gá cuáháⁿ ní chíhí-dé ñⁿ yáú nchí yíqui naha càva, te ní sadí-dé yíqui yáú-án ndíhí ñⁿ yúú quèhéⁿ. ⁴⁷ Te tá Màriá Magdaléná, ndíhí tá Màriá náná tē Chèè ní xíní-yu núú ní chíhí-dé yíqui cùñú Jèsús.

16

Ní ndoto Jèsús

(Mt. 28:1-10; Lc. 24:1-12; Jn. 20:1-10)

¹ Te sáta ní cundiquíⁿ nduu ndètátú ñáyíu, te tá Màriá Magdaléná, ndíhí tá Salómé, ndíhí tá Màriá náná tē Jacobó ní saáⁿ-yu acítí sáháⁿ tñámí cuendá canehé-yu quíhíⁿ chíhí-yu yíqui cùñú Jèsús. ² Te ndumíngú nehé-ni òrè vitna vāha vāha ní xínu coto núú nchíanchíi ní quexió-yu núú nchí yáú yíhí yíqui cùñú Jèsús. ³ Te ní xítñàhá-yu:

—Yoo cúnàha-o xòcani yúú ndédí yuhu yáú-a, chí vá yóo tñàhí ndècu iha —cachí-yu xítñàhá-yu.

⁴ Te òrè ní xíndéhé vāha-yu te ní xíní-yu sá yúú cáhnú ndédí yuhu yáú-án ñⁿ xio-ná ndécú. ⁵ Te cuánguñú-yu xítí yáú-án, te ní xíní-yu núcóo ñⁿ espíritú xínú cuèchí núú Yá Ndiòxí ndàa xio cuhá-yu, te càa-xi datná cáá ñⁿ tée cuechi, te ñhnu-xi ñⁿ dóó cuixíⁿ dóó cání, te ní yuhú-yu òrè ní xíní-yu espíritú-án. ⁶ Te espíritú-án ní xáhaⁿ-xi xí-yu:

—Vá yuhú-ndó, chí yuhú sa cùtñuní íní-í sá nchòhó véxi-ndo nànducu-ndo yíqui cùñú Jèsús tée ñuú Nazàrèt tée ní sahani-güedé núú cùrúxí, dico ñá túú-gá yíqui cùñú-dé ndécú iha chí sa ní ndoto-dé,

te chí cùndèhe núú nǐ sacáⁿ-güedé yiqui cùnú-dé te quini-ndó nǎ ñá túú-gǎ-dé. ⁷Te chí cuáháⁿ núú ndécú tǎ Pèlú ndihí dava-gá cue téé ní xica cuu ndihí-dé, te duha cúñaha-ndo xii-güedé: “Jèsús codonúu-gá núú-ndó quíhíⁿ distrítú Galileá, te yàcáⁿ quini-ndó-gǎ dàtná ní cachí-gá xii-ndo”, duha cúñaha-ndo xii-güedé —càchí es-píritú-áⁿ xǎhaⁿ-xi xí-yu.

⁸Te cue ñáyiú ðihí-áⁿ ïo ní yùhú-yu, te ní quene cunú-yu cuánuhú-yu, te quíðí ñaha-ná-xi xí-yu sǎ ïo ní yùhú-yu, te ñá túú tnàhí ná tnúhu ní xǎhǎⁿ-yu xii cue ñáyiú ní nanhí-yu ichi cuendá sǎ ïo ní yùhú-yu.

*Tá Màriá Magdalená ní xini-xi Jèsús
(Jn. 20:11-18)*

⁹Te sáta dúcáⁿ nǐ ndoto Jèsús ndumìngú nehé-ni-áⁿ, te díhna nuu-gǎ tá Màriá Magdalená ní quee túu-gá núú-xi, te ðiu tá Màriá-áⁿ cúu-xí xíchí nǐ xíhí ñaha úsá espíritú cùndihí yucu ñávǎha ní cùu, te Jèsús ní queñuhu-gǎ nchaa espíritú-áⁿ yiqui cùnú-xi. ¹⁰Te xíchí-ǎⁿ nǐ sǎháⁿ-xi ní xítñuhu-xi cue téé ní xica cuu ndihí Jèsús nàcuáa ní cuu, te xindáhí-güedé sǎ ndihú iní-güedé òré ní quexìo-xi núú ndécú-güedé. ¹¹Te òré ní xǎhaⁿ tǎ Màriá xii-güedé sǎ nǐ ndoto Jèsús ndihí sǎ ní xini ñáhá-xí xii-gǎ, te ñá túú ní sàndáá iní-güedé.

Jèsús ní quee túu-gá núú úú cue téé ní xica cuu ndihí-gǎ

(Lc. 24:13-35)

¹²Te úú tnàhá cue téé ní xica cuu ndihí Jèsús ñúhú-güedé ichi cuáháⁿ-güedé yucu, te uuⁿni ní quee túu-gǎ núú-güedé, te ní dácótó ñaha-xi xii-güedé sǎ ñá túú-gǎ cáá-gǎ dàtná cáá-gǎ. ¹³Te cue téé úú-áⁿ ní xica-güedé cuáháⁿ-güedé ní xítñuhu-güedé nchaa dava-gá cue téé ní xica cuu ndihí-gǎ sǎ ní xini ñáhá-güedé xii-gǎ, dico ðiu-ni ducaⁿ ñá túú ní sàndáá iní cue téé-áⁿ tnúhu ní cáháⁿ-güedé.

Jèsús xǎhaⁿ-gǎ xii cue téé ní xica cuu ndihí-gǎ nàcuáa ndùu chiuⁿ cada-güedé

(Mt. 28:16-20; Lc. 24:36-49; Jn. 20:19-23)

¹⁴Te ndǐ ùxí ïⁿ cue téé ní xica cuu ndihí Jèsús yihí-güedé mèsá xéxí-güedé, te ní quee túu-gǎ núú-güedé te ní tenáá ñáhá-gǎ xii-güedé cuendá sǎ ïo sàá iní-güedé ñá túú sàndáá iní ñáhá vǎha-güedé xii-gǎ, chi

ñá túú ní cuini-güedé quíndáá iní-güedé nàcuáa ní xǎhaⁿ ñáyiú ní xini ñáhá xii-gǎ sáta ní yáha ní ndoto-gǎ. ¹⁵Te ní xǎhaⁿ-gǎ xii-güedé:

—Quíhíⁿ-ndó ñihí ñuyúú cáháⁿ-ndó núú nchaa ñáyiú tnúhu vǎha tnúhu sǎ cáháⁿ nàcuáa nanhí tǎhú-yu. ¹⁶Te nchaa ñáyiú na quíndáá iní tnúhu-áⁿ te cuanduté-yu, te nanhí tǎhú-yu, dico nchaa ñáyiú vǎ quíndáá iní tnúhu-áⁿ te cuíta nihnú-yu.

¹⁷Te nchaa ñáyiú na quíndáá iní ñáhá xii-í te cadá-yu sǎ vǎ yǒ tnàhí ndàcu cada, te cacunehe ñáhá-yu xii-í, te queñuhú-yu nchaa espíritú cùndihí yucu ñávǎha yihí ñaha xii ñáyiú. Te uuⁿni ndacú-yu cáháⁿ-yu ingá núú tnúhu sǎ vǎta dácuaha-gǎ-yu. ¹⁸Te cuéi na tnǐ-yu cóo ðéⁿ dico ñá túú nǎ cada ñaha-ðí xii-yu, te cuéi venénú ná cáxí-yu dico ñá túú nǎ tnahá-yu, te tendáhá-yu cue ñáyiú cùhú te ndúha-yu —càchí-gǎ xǎhaⁿ-gǎ xii-güedé.

Jèsús cuándaa-gǎ andíu

(Lc. 24:50-53)

¹⁹Te sáta ní yáha ducaⁿ ní xǎhaⁿ Jèsús xii cue téé ní xica cuu ndihí-gǎ, te ní ndanchita-gǎ cuándaa-gǎ andíu te ní ngóo-gǎ xio cùha Dútú Ndìoxí. ²⁰Te cue téé-áⁿ ní xica-güedé cuáháⁿ-güedé, te ní ngúíta-güedé cáháⁿ-güedé tnúhu Xítóhó Jesucristú nchaa xichi. Te mee-gǎ ní chindee ñaha-gǎ xii-güedé ní quide-güedé nchaa sǎ vǎ yǒ tnàhí ndàcu cada cuendá cutnùní iní ñáyiú sǎ ndàá cáháⁿ-güedé tnúhu-gǎ. Duha ní cuu dàvá-áⁿ.

TNÚHU NÍ CHÍDÓ TNÙNÍ TÉ LÛCÁ

Nàcuáa ní ngódó tnùnì tnúhu Yá Ndiòxí

¹ Te vâi ñáiyu chîdo tnuní-yu nchaa nàcuáa ndúu tnúhu ñihí-yu nàcuáa ní cuu, te nchoo tnàhá-ó sà naha-o nacuáa ní cuu. ² Te ñáiyu nchaa tnúhu chîdo tnuní-yu-áⁿ cúu-xí tnúhu ní cáháⁿ nchaa cue tée ní xini ndáá nàcuáa ní cuu ndéé ñhna, cue tée ní cáháⁿ tnúhu Yá Ndiòxí. ³ Te yúhú sa ní cuu nduu quide cuendá-í nchaa nàcuáa ní cuu, núu xíáⁿ ní sani iní-í tee váha-í nchaa tnúhu-a núu tütú sá cúu-xí yòhó té Tèofilú chi ío váha cùu iní-í sá cúu-xí-n, ⁴ te tèe-í cuendá cutnùnì iní-n sá sá ndáá cúu-xí nchaa sá ní dánèhé ñhá-güedé xii-n.

Ñⁿ espíritú xínú cuèchi núu Yá Ndiòxí cächí-xi sá cácu ñⁿ tée cunani Juáá

⁵ Te cúnàhá ní xindaha té Hèrodés ñáiyu distrítú Judeá ðává-áⁿ ní xindecu ñⁿ dútú ní xínani-dé Zacàriá, te ní cundíhi-dé cue dútú Ábiás. Te ñadìhí-dé ní xínani-aⁿ Èlisabét, te ñaha-áⁿ ní cuu-aⁿ ñani tnáhá ndíi Àrón. ⁶ Te ndí ndúu-yu ío ní quide ndáá-yu núu Dütú Ndiòxí, chi ní tñí-yu nchaa tnúhu ní cáháⁿ-gá. ⁷ Te ñá túu ní ñⁿ déhe-yu, chi ducaⁿ tãhú tã Elisabét sá vâ cóó ðehe-aⁿ, te ducaⁿ ndí nduu-yu ío ní sahnú-yu.

⁸ Te ñⁿ nduu xínu cuèchi tucu té Zacàriá ndíhi nchaa cue tée cundíhi-dé núu Yá Ndiòxí xití veñúhu. ⁹ Te ðává-áⁿ ní xito ndéé-güedé cuendá cutnùnì iní-güedé nũ ndèdaca-güedé quíhu núu nàa xití veñúhu-áⁿ cahmí-güedé sá sàháⁿ tnámí, te ní cutnùnì sá té Zacàriá quíhu-dé. Te ducaⁿ ní quide-güedé, chi ducaⁿ tnáhi ní xóo cada nchaa cue dútú ðává-áⁿ. ¹⁰ Te ñini sahní té Zacàriá sá sàháⁿ tnámí nũ nàa, te vâi vihi ñáiyu xindecu quehé veñúhu-áⁿ cáháⁿ ndíhí-yu Yá Ndiòxí. ¹¹ Te ní xini té Zacàriá ñⁿ espíritú xínú cuèchi núu Yá Ndiòxí nùtní-xi xio cùha núu nàa núu càyú sá sàháⁿ tnámí-áⁿ. ¹² Te òré ní xini té Zacàriá espíritú-áⁿ te ñá ní cutnùnì iní-dé nása cada-dé chi ío ní yùhú-dé. ¹³ Te espíritú-áⁿ ní xáhaⁿ-xi:

—Zacàriá, vá yùhú-n chi Yá Ndiòxí ní tedóho-gá tnúhu ní cáháⁿ-n, te vitna coo ñⁿ déhe ñadìhí-n tã Elisabét te danani-n-dé

Juáá. ¹⁴ Te ío cudíí iní-n, te ducaⁿ ño vâi ñáiyu cudíí iní-yu na càcu-dé. ¹⁵ Te ío cudíu-dé núu Yá Ndiòxí, te ní vâ cóhó-dé ndidí te ní vâ cóhó-dé ndudí sá ní natíu, te sa cundecu ndíhi-dé Espíritú Yá Ndiòxí òré cacu-dé. ¹⁶ Te ñáiyu cada te ío vâi ñáiyu israhèl natuhá-yu ichi Dütú Ndiòxí Yaá cúu Ndiòxí-ó. ¹⁷ Te té Juáá-áⁿ codonuu-dé núu-gá, te cundecu ndíhi-dé Espíritú-gá, te taxi tnùnì-dé ðàtná ní quide té Èliás. Te nacanu ichi-dé cue tée cùu sacuéhé cuendá cada-güedé sá váha sá cúu-xí cuè tée cuechi, te cuèi cue tée ío sàa iní-xi, te ñáiyu cada te tñí-güedé tnúhu váha, tnúhu cáháⁿ ñáiyu quide ndáá. Te ducaⁿ càda-dé cada túha-dé ñáiyu cuendá cunu cuèchí-yu núu Dütú Ndiòxí —cächí-xi xáhaⁿ-xi xii-dé.

¹⁸ Te té Zacàriá ní ndúcú tnúhu-dé núu espíritú-áⁿ, te xáhaⁿ-dé:

—¿Te nása cutnùnì ndáá iní-í tnúhu cáháⁿ-n-í? Chi yùhú ío ní sahnú-í ndíhi ñadìhí-í —cächí-dé xáhaⁿ-dè xii-xi.

¹⁹ Te espíritú-áⁿ ní xáhaⁿ-xi:

—Yúhú cúu-í espíritú nání Gàbriél, te xínu cuechi-í núu Yá Ndiòxí, te mee-gá ní táuchíuⁿ-gá náhá-í tnúhu-gá véxi cuendá cutnùnì iní-n nàcuáa cada ñaha-gá xii-ndo.

²⁰ Te vitna cuu ñihí-n te vá cáháⁿ-gá-n ndéé ná sàa nduu càcu ðehe ñadìhí-n, chi ñá túu ní sàndáá-ni iní-n tnúhu ní cáháⁿ-í. Te dacutíí sàa nduu càda-xi nacúaa ní cáháⁿ-í-a —cächí espíritú-áⁿ xáhaⁿ-xi xii-dé.

²¹ Te nchaa ñáiyu xindecu quehé ndétü-yu té Zacàriá, te xicuñúhu-yu sá ío cùyaa-dé xití veñúhu. ²² Te òré ní ndee té Zacàriá, te ñá ní cùu-gá cáháⁿ ndíhi ñaha-dé xii-yu, te òré-áⁿ ní cutnùnì iní-yu sá ní xini-dé ñⁿ espíritú xínú cuèchi núu Yá Ndiòxí xití veñúhu. Te mee-ná ndaha-dé ní quide-dé núu-yu chi ñá ní cùu-gá cáháⁿ-dé.

²³ Te ní xínu nduu ní xínu cuechi té Zacàriá núu Yá Ndiòxí xití veñúhu, te cuánuhú-dé vehe-dé. ²⁴ Te sátá dúcáⁿ ní cuu te ñadìhí-dé tá Elisabét ní ngúhuⁿ déhe-aⁿ, te úhúⁿ yóó ñá túu tnáhi-gá ní quèe-aⁿ caca cuu-aⁿ, te ní cachí-aⁿ: ²⁵ “Mee Dütú Ndiòxí duha ní cundáhú iní ñhá-gá sá cóó ñⁿ déhe-í cuendá sá vâ cúu yíchí iní ñhá ñáiyu xii-í”, duha ní cachí-aⁿ.

Ñⁿ espíritú xínú cuèchi núu Yá Ndiòxí cächí-xi sá cácu Jèsús

²⁶⁻²⁷ Te núú ìńú yóó sá nǐ ngúhuⁿ déhe tá Elisàbét, te ní tendaha tucu Yá Ndiòxí espíritú nání Gábriél cuáháⁿ-xi ìńú nání Nàzarét cuáháⁿ ngoto-xi ìńú xíchí cuéchí nání Mariá. Te ñúú-áⁿ yíndèhu-xi distritú Galiléa. Te xíchí-áⁿ sa ní cundáá tnúhu sá tñándaha-xi ndihi ìńú tée nání Cheé ñání tñáhá ndí Dàvíí. ²⁸ Te espíritú-áⁿ ní quíhu-xi ndéé xítí vehe núú ndécú tá Mária, te ní xáhaⁿ-xi:

—ǐCòvãha-n-a!¹ Dútú Ndiòxí ío cùu iní ñáhá-gã xii-n te ndècu ndihi ñaha-gá, te ío-gá xító ñaha-gá xii-n dàcúúxí dàva-gá ñáyíu dǐhí —càchí espíritú-áⁿ xáhaⁿ-xi.

²⁹ Dico òrè ní xíní tá Mária espíritú-áⁿ, te ní quíyùhú iní-xi sá dúcáⁿ nǐ cáháⁿ espíritú-áⁿ. Te ní sani iní-xi: “ǐNá cuendá duha càháⁿ-tu espíritú-a-i?”, duha ní sani iní-xi. ³⁰ Te espíritú-áⁿ nǐ xáhaⁿ-xi:

—Mária, vá yùhú-n chi ducaⁿ nǐ nduu tãhú-n núu Yá Ndiòxí. ³¹ Te vitna ngúhuⁿ déhe-n, te na càcu-dé te danàni-n-dé Jèsús. ³² Te ío cunuu-dè, chi Dútú Ndiòxí Yáá ío cùnuu cachí-gá sá Dèhe-gá cúú-dè, te diu-gá cada te cuu-dé ìńú tée cùnuu núú ñáyíu isràèl dàtná ní quide-gá ndí Dàvíí. ³³ Te taxi tñuní-dé ñáyíu isràèl, te ducaⁿ-ni cùnuu-dé ní caa ní quihíⁿ —càchí-xi xáhaⁿ-xi.

³⁴ Te tá Mária ní xáhaⁿ-xi xii espíritú-áⁿ:

—ǐTe nása cuu tnúhu càháⁿ-n te ñá túú yí-í-i? —càchí-xi xáhaⁿ-xi.

³⁵ Te ní xáhaⁿ espíritú-áⁿ:

—Espíritú Yá Ndiòxí quixi cundecu ndíhi-n, te ducaⁿ Yá Ndiòxí cada-gá ìńú sá vãha sá cúú-xí-n ná càcu déhe-n. Te Yá Ndiòxí càchí-gá sá ío cundecu yíñùhu-dé núú-gã, chi Dèhe-gá cúú-dè. ³⁶ Te tñáhá didí-n tá Elisàbét ñúhú dèhe-aⁿ cuèí ío ní sahnua-aⁿ, te diu-aⁿ cachí-yu sá vã cóó dèhe-aⁿ ní cùu, te vitna sa ní cuu ìńú yóó ñúhú dèhe-aⁿ. ³⁷ Chi Yá Ndiòxí ndácú-gã quidé-gã nchaa sá vã yóo tñáhí ndàcu cada —càchí-xi xáhaⁿ-xi.

³⁸ Te tá Mária ní xáhaⁿ-xi:

—Yúhú ná cúnú cuèchi-í núú Dútú Ndiòxí, te mee-gã ná cádá ñaha-gá xii-í nàcuáa ní cachí-n —càchí-xi xáhaⁿ-xi xii espíritú-áⁿ.

Te sáta dúcáⁿ te espíritú-áⁿ ní xica-xi cuáháⁿ-xi.

Tá Mária cuáháⁿ ngoto-xi tá Elisàbét

³⁹ Te tá Mária ío ndíhi cuáháⁿ-xi ìńú ñuu cáá xítí yucu distritú Júdeá. ⁴⁰ Te ní sáá-xi vehe té Zacàriá, te cuànguihu-xi ní dándáçóo váha-xi tá Elisàbét. ⁴¹ Te òrè ní tecú dóho tá Elisàbét ní cáháⁿ tá Mária, te ní candá déhe-aⁿ xítí-aⁿ, te òrè-áⁿ nǐ ngúndecu ndíhi-aⁿ Espíritú Yá Ndiòxí. ⁴² Te níhi ní cáháⁿ-aⁿ, te xáhaⁿ-aⁿ xii tá Mária:

—Yá Ndiòxí ío xito ñaha-gá xii-n dàcúúxí dàva-gá tñaha dǐhí-ó, te ducaⁿ-ni xitò-gá cuèí déhe-n. ⁴³ ǐTe ná cúú yúhú núu véxi coto ñaha yòhò nǎná Yáá cúú Xítóhó-í-i? ⁴⁴ Chi òrè-ni ní tecú dóho-í ní cáháⁿ-n te ní candá-ni déhe-í xítí-í sá cùdǐ iní-dé. ⁴⁵ Te váha tãhú yòhó sá ní sàndáá iní-n, chi dacuitíí sá cádá Dútú Ndiòxí nàcuáa ní cáháⁿ espíritú ní tendaha-gã ní quixi ní cachí tnúhu xii-n nàcuáa cada-gá —càchí-aⁿ xáhaⁿ-aⁿ xii tá Mária.

⁴⁶ Te ní xáhaⁿ tá Mária:

Ío cãhnu cuu Dútú Ndiòxí,

⁴⁷ ío cùdǐ iní-í chi diu-gá taunihu ñaha-gã xii-í núú ùhú núú ndàhú.

⁴⁸ Chi ní ndacu iní ñáhá-gã xii yúhú, te dícó ìńú xíchí xínú cuèchi núú-gã cúú-í, te vitna te nchaandi tũhú ñáyíu cachí-yu sá ío váha tãhú-í.

⁴⁹ Te Yá Ndiòxí cándòo caa nine iní-gá, te ío cãhnu ìńú sá vãha ní quide-gá sá cúú-xí-í.

⁵⁰ Te cundahú iní-gá nchaa ñáyíu nèhe sá yíñùhu núú-gã.

Te ducaⁿ-ni cuèí ñáyíu sa ndècu ñuyíú-a ndíhi ñáyíu vitna véxi.

⁵¹ Chi ta quide-gá nchaa sá vã yóo tñáhí ndàcu cada véxi, te ta dándóo canúú-gã cue ñáyíu quide cãhnu mee-xi.

⁵² Te cue ñáyíu tàxi tñuní ñá túú-gã dáñá-gã taxi tñuní-yu, te cue ñáyíu ndàhú ní quide nínu ñaha-gã xii-yu.

⁵³ Te cue ñáyíu ndècu ndíhi tñúndòho tnúhu ndàhú ní quide váha ñaha-gã xíí-yu, te cue ñáyíu cuica ñá túú nǎ ní níhí-gã-yu cundecu ndíhi-yu.

⁵⁴ Te chindee-gá ñáyíu isràèl, ñáyíu xínu cuechi núú-gã, te ñá túú dàña níhnu ñaha-gã xíí-yu, chi cundahú iní ñáhá-gã.

⁵⁵ Chi ducaⁿ ní xáhaⁿ-gã xii ndí Ìbrahám, ndíhi cue ñání tñáhá ndí. Duha ní xáhaⁿ tá Mária xii tá Elisàbét.

⁵⁶ Te ní xíndecu tá Màriá dàtná úní yóó ndìhi tá Elisàbét te dàtnùnì cuánuhú-xi vehe-xi.

Ní cacu té Juàá tée dacuàndute ñaha xii ñáyíu

⁵⁷ Te ní sáá nduu ní cacu ìíⁿ déhe téé tá Elisàbét. ⁵⁸ Te nchaa ñáyíu ndècu yatni ndìhi-aⁿ, ndìhi nchaa ñaní tnáhá-áⁿ ní níhí-yu tnúhu nàcuáa ní chindee ñaha Yá Ndiòxí xii-aⁿ. Te ío ní cudíí ìní-yu cuèndá-aⁿ. ⁵⁹ Te núú ùná nduu sá ní cacu déhe-aⁿ, te ní sáháⁿ ñáyíu núú ndécú-áⁿ cuèndá cuáhá-yu sèñá ñíi déhe-aⁿ. Te cuíní-yu cunani déhe-áⁿ Zacàriá dàtná nání tātá ní cùu. ⁶⁰ Te ní xáhaⁿ nǎná déhe-áⁿ:

—Ñáhá, chi Juàá cunani-dě —càchí-aⁿ xáhaⁿ-aⁿ xii-yu.

⁶¹ Te ní xáhǎⁿ-yu:

—¿Te ná cuèndá te ñá túú nì ìíⁿ ñaní tnáhá-ndó dùcaⁿ nani-i? —cachí-yu xáhǎⁿ-yu.

⁶² Te ní quidé-yu ndáhá-yu núú tātá déhe-áⁿ cuèndá cuíní-yu núú nása cuíní méé-dě cunani déhe-dé. ⁶³ Te ní xicáⁿ-dé ìíⁿ tutú ní chídó tnùnì-dé nàcuáa cunani déhe-dé, te duha ní chídó tnùnì-dé: “Juàá cunani-dě”, càchí-xi núú tūtú ní tee-dé-áⁿ. Te nchaa ñáyíu xíndecu-áⁿ ní cuñúhu-yu nàcuáa ní cuu. ⁶⁴ Te òrè-áⁿ ní nacáháⁿ té Zacàriá sá ní cuu ñíhí-dé ní cùu, te ní nguíta-dé ní cachí-dé sá ìo càhnu cuu Yá Ndiòxí. ⁶⁵ Te nchaa ñáyíu xíndecu yatni ndìhi-dé ní cuñúhu-yu, te nchaa ñáyíu xíndecu ñíhí xití yucu distritú Jùdeá ní ñíhí-yu tnúhu nàcuáa ní cuu. ⁶⁶ Te nchaa ñáyíu-áⁿ ìo vǎi ní sani ìní-yu, te ní xítñáhá-yu:

—¿Ná cúú sǎ cǎdá tǎe-áⁿ ndéé ìdá-gǎ ná cuèhnu-dé? —càchí-yu xítñáhá-yu.

Te ducaⁿ ní xítñáhá-yu chi Dútú Ndiòxí ndécú ndìhi ñaha-gǎ xii-dé.

Té Zacàriá càchí-dé sǎ ìo càhnu cuu Yá Ndiòxí

⁶⁷ Te té Zacàriá tātá tǎe ìhli-áⁿ ní ngúndecu ndìhi-dé Espiritú Yá Ndiòxí te ní cǎháⁿ-dé nchaa tnúhu sǎ ní dánèhè ñáhá-gǎ, te ní cachí-dé:

⁶⁸ Ío càhnu cuu Dútú Ndiòxí nchoo ñáyíu isràél,

chi ní quixi coto ñaha-gǎ xii-o, te cùu-o ñáyíu cùu cuèndá-gǎ, chi dàcácu ñíhnu ñaha-gǎ xii-o vitna.

⁶⁹ Chi ní tendaha-gǎ ìíⁿ téé véxi-dé dàcácu ñíhnu ñaha-dě xii-o núú ùhú núú ndáhú.

Te cùu-dé ñaní tnáhá ndí Davíi téé ní xinu cuechi núú-gǎ ndéé sanaha.

⁷⁰ Te ñíu-ni tnúhu ní cǎháⁿ Yá Ndiòxí ní cǎháⁿ cue téé ní quide ndáá ní xíndecu núú-gǎ ñuyíú-a ndéé sanaha.

⁷¹ Te ní cachí-güedé sǎ táúñihnu ñaha-gǎ xii-o núú nchaa ñáyíu cùu ùhú ìní ñáhá, ndìhi núú nchaa ñáyíu ñá túú cùu quíní ndee ñáhá.

⁷² Te ní xáhaⁿ-gǎ sǎ cúndàhú ìní ñáhá-gǎ xii-o, te ducaⁿ càda-gǎ chi vá nàcuànaa-gǎ tnúhu ní cǎháⁿ-gǎ ndìhi-güedé.

⁷³ Te ñíu ducaⁿ ndúu tnúhu ní xáhaⁿ-gǎ xii ndíi Àbrahám sǎ

⁷⁴ táúñihnu ñaha-gǎ xii-o núú nchaa ñáyíu cùu ùhú ìní ñáhá,

cuèndá sǎ vǎ yùhú-ó cùu cuechi-o núú-gǎ.

⁷⁵ Te cada ndáá-ó, te cundecu yíñúhu-o núú-gǎ ndí nchaa nduu cundecu-o ñuyíú-a.

Duha ní cachí té Zacàriá.

⁷⁶ Te xáhaⁿ-dě xii té ìhli-áⁿ:

Te yòhò té ìhli, cǎháⁿ ñáyíu cuèndá-n sǎ cúu-n ìíⁿ téé càháⁿ tnúhu Dútú Ndiòxí Yáá ío cùnnu,

chi quíhíⁿ-n còdonuu-n núú Yáá cúú Xí-tohó-ó dàtúha-n ñáyíu cuèndá cundecu túha-yu òrè quexìo-gǎ.

⁷⁷ Te cúñaha-n xii ñáyíu isràél sǎ cuíní-gǎ cada càhnu ìní-gǎ nchaa cuèchi-yu, te naníhí tǎhú-yu.

⁷⁸ Te ducaⁿ càda-gǎ chi ío cùu ìní ñáhá-gǎ xii-o, chi ndéé andíu ní tendaha-gǎ ìíⁿ téé véxi

cuuⁿ-dé dandixi túu-dé ìní-ó cuèndá cut-nùnì ìní-ó nàcuáa ndúu cuèndá Yá Ndiòxí.

⁷⁹ Te ducaⁿ dandixi túu-dé ìní nchaa ñáyíu ndècu ichi cuehé ichi duha ta xíta ñíhnu cuáháⁿ cuèndá nucúnu ichí-yu ìíⁿ ichi váha.

Duha ní xáhaⁿ tǎ Zacàriá xii déhe-dé.

⁸⁰ Te té ìhli-áⁿ tá sàhnu-dé, te ta chindee chitúu ñaha Yá Ndiòxí xii-dé cuáháⁿ, te ní xíndecu-dé xití yucu ndéé ní sáá nduu ní nguíta-dé ní cǎháⁿ-dé núú cuè ñáyíu isràél tnúhu Yá Ndiòxí.

2

Ní cacu Jèsús
(Mt. 1:18-25)

¹ Te dàv-án nǐ táuchíúⁿ tǎ Àugustú Cèsár nucódó tñuní nchaa ñáyiú nacióⁿ yíndàha-dé. ² Te xéhé sǎ díhnanuu nǐ nucódó tñuní ñáyiú, te ñu-ni dàv-án nǐ cunuú té Cireníú distritú Siríá. ³ Te nchaa ñáyiú ní nataká-yu ñúú núú ní cacú-yu cuendá nucódó tñuní-yu. ⁴ Núú xǎⁿ ní quee té Chèè ñúú Nazàrét ìⁿ ñúú yíndèhu distritú Galiléá, te cuáhán-dé ñúú Bèlén ìⁿ ñúú yíndèhu distritú Jùdeá, chi xǎⁿ nǐ cuu ñúú ndíí Dàvíí, te ñu-ni ñaní tñáhá tǎ Chèè-án nǐ cuu ndíí. ⁵ Núú xǎⁿ cuáhán-dé ndéé ñúú Bèlén nucódó tñuní-dé, te tñáhá tá Màriá xíchí nǐ cundáá tñúhu sá tñándaha ndíí-dé cuáhánⁿ ndíí ñaha-dé, te sa ñúhu déhe-xi. ⁶ Te ñini cùyaá-yu ñúú Bèlén-án nǐ sáá òré cacu déhe-xi. ⁷ Te ní cacu déhe díhna-xi, te ní chidúcúⁿ nuu-xi dóó, te ní sacánⁿ ñáhá-xí ìⁿ vehe núú cúú vehe quití, chi ñá túú ní ñíí-yu vehe coó-yu.

Cue espíritú xínú cuèchi núú Yá Ndióxi ndíí cue toli.

⁸ Te yatni ñúú-án xǎndecu ìⁿ úú toli ndéé-güedé mbéé-güedé ndécú-güèdi majadá niú-án. ⁹ Te uuⁿ ní quexìo ìⁿ espíritú xínú cuèchi núú Yá Ndióxi, te Yá Ndióxi ní quide-gá ní dáyhé-xi ní cándéé núú xǎndecu-güedé, te ní yùhú víhí-güedé. ¹⁰ Te ní xáhaⁿ espíritú-án:

—Vá yùhú-ndó, chi ñaha-í ìⁿ tñúhu váha véxi sá cúú-xí-ndó, te ío cudíí iní-ndó ndíí nchaa ñáyiú. ¹¹ Chi vitna ní cacu ìⁿ tée dàcácu ñihnu ñaha xii-ndo núú ùhú núú ndàhú ñúú ndíí Dàvíí, te tée-án cúú-dé Xítóhó Jesucristú. ¹² Te dàtná ìⁿ sèñá te naníhí-ndó tǎ líhli-án yídúcúⁿ nuu-dé dóó cáá-dé ìⁿ vehe quití —càchí-xi xáhaⁿ-xi xii-güedé.

¹³ Te òré-án nǐ quexìo cuéhé víhí espíritú véxi cuuⁿ andíu nǐ naníhí tñáhá-xí ndíí espíritú-án, te ní ngúíta-xi ní chíñuhu-xi Yá Ndióxi, te càchí-xi:

¹⁴ Ío càhnu cuu Yá Ndióxi Yáá ndécú andíu, te na cùndecu váha-ni nchaa ñáyiú cùu iní mée-gá!

Duha càchí cue espíritú-án.

¹⁵ Te òré cuándaa cue espíritú-án andíu, te ní ngúíta cue toli-án xǎnàha-güedé:

—Na quíhíⁿ-ó ñúú Bèlén quini-ó nàcuáa ní cuu, chí Dútú Ndióxi sá ní cachí tñúhu-gá —càchí-güedé xǎnàha-güedé.

¹⁶ Te ní tñii-güedé ichi súúni ndíí cuáhán-güedé, te ní naníhí-güedé tá Màriá ndíí té Chèè, ndíí té líhli-án cáá-dé xítí ìⁿ vehe quití. ¹⁷ Te òré ní xini ñáhá-güedé te ní xáhaⁿ-güedé xíí-yu nàcuáa ní xáhaⁿ espíritú-án xii-güedé cuendá té líhli-án. ¹⁸ Te nchaa ñáyiú ní tecú dóho-xi ní cuñúhu-yu nàcuáa ní cáhán-güedé. ¹⁹ Dico tá Màriá chi ñúhu nahi-ni iní-xi, te dicó-ni sàni iní-xi cuendá nchaa tñúhu-án. ²⁰ Te cue toli-án nǐ natñii-güedé ichi, te ta xǎnàha-güedé cuánuhú sá ío càhnu cuu Yá Ndióxi cuendá nchaa tñúhu ní xíndedóho-güedé, ndíí cuendá nchaa sá nǐ xini-güedé, chi cuendá sá ndáa ní cuu nchaa nàcuáa ní tecú tñúhu-güedé.

Ndècá-yu Jèsús cuáhán veñúhu

²¹ Te núú úná nduu sá nǐ cacu té líhli-án, te ní sáha-güedé sèñá ñii-dé, te ní dání ñaha-güedé Jèsús xii-dé, ñu-ni nàcuáa ní xáhaⁿ espíritú xínú cuèchi núú Yá Ndióxi xii tá Màriá ndéé cùtñáhá vátá ngúhuⁿ-gá-dé xítí-xi.

²² Te sáta nǐ tñáhá nduu, ndúu ñi-yu nàcuáa cáhánⁿ nchaa tñúhu ní chidó tñuní ndíí Moisés, te ndècá-yu té líhli-án cuáhánⁿ ñúú Jerusalén cuendá quee túú-dé núú Dútú Ndióxi. ²³ Te ducaⁿ ní quide-yu, chi ducaⁿ cáhánⁿ-xí núú tütú Yá Ndióxi sá ncháá làndú tée na càcu díhna quetúu-güexi núú-gǎ cuendá cundecu-ná-güexi cuendá-gá. ²⁴ Te ní quide-yu nàcuáa cáhánⁿ Yá Ndióxi núú tütú-gá núú càchí-xi: “Canehe-ndo úú lõmá àdi úú cùcu quíhíⁿ nduu táhú ñáhá Yá Ndióxi”, duha cáhánⁿ-gá núú tütú-gá.

²⁵ Te dàv-án ndécú ìⁿ tée nàni Mió ñúú Jerusalén. Te ío váha iní-dé, te chíñuhu-dé Yá Ndióxi, te ndètu-dé sáá nduu chindee ñaha Yá Ndióxi xii ñáyiú isràél. Te ndècu ndíí té Mió-án Espíritú Yá Ndióxi. ²⁶ Te sa ní xáhaⁿ-xi xii-dé sá vǎ cùu-ni-dé, chi dacutíí quini-dé Cristú Yáá tendaha Yá Ndióxi quixi ñuyúú-a. ²⁷ Te tée-án ndécá ñaha Espíritú Yá Ndióxi xii-dé cuáhánⁿ veñúhu càhnu sá ío cùnuu. Te cuáhánⁿ-yu ndíí Jèsús veñúhu-án cuendá cadá-yu ndíí-gá nàcuáa cáhánⁿ tñúhu ní chidó tñuní ndíí Moisés. ²⁸ Te òré ní sáá-yu, te té Mió-án

ní nguídèhé-dé Jèsús, te ní cáháⁿ-dé sá Ìo càhnu cuu Yá Ndiòxí, te ní xáhaⁿ-dè xii-gá:

²⁹ Yòhó Dútú Ndiòxí sa ní cuu daña-n cuú-í vitna,

chi sa ní quide-n nàcuáa ní cachí-n xii yúhú téé xinu cuechi núu-n.

³⁰ Chi sa ní xini núu-í Yáa dàcácu nihnu ñaha xii ñáyiú núu ùhú núu ndàhú vitna.

³¹ Te Yáa ní tendaha-n vèxi núu ndécú nchàa ñáyiú ñuyíú-a.

³² Te cùu-gá dàtná ìn ñuhú, chi dandixi túu-gá iní ñáyiú cuendá cutnùní iní-yu cuendá Yá Ndiòxí cuèí ñá díú ñáyiú isràèl cùu-yu.

Te diu-gá cada, te canehe ñáyiú dava-gá ñuu sá yínùhu núu ñáyiú isràèl chi diu ñáyiú isràèl cùu-yu ñáyiú cùu cuendá-n.

Duha ní xáhaⁿ tẽ Míó xii Yá Ndiòxí.

³³ Te tẽ Chèé ndìhi náná Jèsús ní cuñuhu-yu tñúhu ní cáháⁿ tẽ Míó cuendá-gá. ³⁴ Te dàtnùní tẽ Míó ní xicáⁿ táhú-dè núu Yá Ndiòxí cuendá-yu, te xáhaⁿ-dè xii tá Màriá náná Jèsús:

—Cundedóho tñúhu na càháⁿ-í-a, tẽ Ìlhi-a ní nduu táhú-dè nacanu ichi-dé dava ñáyiú isràèl ichi Yá Ndiòxí, te davá-yu vá tñí-yu tñúhu cáháⁿ-dé, te ñáyiú-án cuíta nihnú-yu, te cada-dé nàcuáa cutnùní iní ñáyiú sá Yá Ndiòxí ní tendaha ñaha-gá xii-dé, dico vá quindáa iní-yu, chi daquèe tñú ñáhà-yu xii-dé. ³⁵ Te ducaⁿ te cutnùní nàcuáa sàni iní ìn ñáyiú. Dico sá cùu-xí yòhó chi ío cada ndàhú-xi iní-n, chi súúní dàtná sá ní nìcuèhè iní-n càda-xi —cachí-dé xáhaⁿ-dè xii tá Màriá.

³⁶ Te xíáⁿ ndécú tñáhá ìn ñaha càháⁿ tñúhu Yá Ndiòxí nání-án Àná, te tãtá-aⁿ ní xínani-dè Fànuél ñani tñáhá ndíi Àsér. Te ñaha-án sa ní sahnu vihi-aⁿ, te cuechi-ni-aⁿ ní tñándaha-aⁿ te úsá-ni cuáá ní xíndecu-aⁿ ndìhi yií-aⁿ, ³⁷ te ní quendóo quèé-aⁿ, te sa ñùhu-aⁿ cùmídíco cùmí cuíá-aⁿ. Te ñá túú ní xóo quee-aⁿ veñúhu càhnu sá Ìo cùnnu, chi nduu núu ní xóo chiñuhu-aⁿ Dútú Ndiòxí, te áma ñá túú tñáhí ná ní xóo caxi-aⁿ ní xóo cáháⁿ ndìhi-aⁿ Yá Ndiòxí.

³⁸ Te diu-ni òré ndécú-yu ndìhi Jèsús ní quexìo-aⁿ núu-yu, te ní ndacáⁿ táhú-án núu Yá Ndiòxí cuendá sá ní xini-aⁿ Jèsús, te dàt-nùní ní nguíta-aⁿ càháⁿ váha-aⁿ cuendá-gá núu nchàa ñáyiú, ñáyiú ndètu quiní sáa nduu dàcácu Yá Ndiòxí ñáyiú Jerusalén núu tñúndòho tñúhu ndàhú.

Cuánuhú-yu ñuu Nazàrét

³⁹ Te sáta ní quidé-yu nchaa nàcuáa càháⁿ tñúhu Yá Ndiòxí, te cuánuhú-yu ñuu Nazàrét núu ndécú tñáhí-yu, te ñuu-án yíndèhu-xi distritú Galiléa. ⁴⁰ Te tẽ Ìlhi nàni Jèsús-án tá sàhnu-dé, te ta nihí ndéé-dè cuáháⁿ, te ducaⁿ Ìo váha ta sáa sá xini tñùní-dé cuáháⁿ, chi Yá Ndiòxí ndécú ndìhi ñaha-gá xii-dé.

Jèsús ndécú-gá veñúhu

⁴¹ Te ndi tñáhá cuía ní xóo quíhíⁿ tẽ Chèé ndìhi náná Jèsús vico pàscuá ñuu Jerusalén.

⁴² Te cútñáhá ní chítú Jèsús úxúú cuía-gá, te cuáháⁿ-yu ndìhi-gá ñuu Jerusalén vico pàscuá, chi ducaⁿ tñáhí quidé-yu.

⁴³ Te òré ní yáha vico, te ní natnì-yu ichi cuánuhú-yu, te ní quendóo-gá ñuu Jerusalén, te ni náná-gá, te ni tẽ Chèé ñá túú ní xini ní quendóo-gá. ⁴⁴ Chi ní sani iní-yu sá ñútnáhá-gá tñuu nchaa ñáyiú ní sáháⁿ vico cuánuhú. Te ní xúhuⁿ-yu ìn nduu ichi ta nducu tñúhu-yu-gá núu nchàa ñani tñáhà-yu, ndìhi núu nchàa ñáyiú xini tñáhá ndìhi-yu, ⁴⁵ te ñá túú ní náníhí ñáhà-yu xii-gá. Núu ní nacucó-yu cuánuhú tucú-yu ñuu Jerusalén cuendá yàcáⁿ nanducu ñáhà-yu xii-gá.

⁴⁶ Te núu ùní nduu sá ní dana núu ñáhà-yu xii-gá, te ní naníhí ñáhà-yu núcóo-gá xiti veñúhu càhnu sá Ìo cùnnu tñuu cue tée dàcuaha ñaha xii-yu nchaa tñúhu ní chídó tñùní ndíi Moisés, te ndédóho ñaha-gá xii-güedé, te nándi sá ndúcú tñúhu-gá núu-güedé. ⁴⁷ Te nchaa cue tée xíndedóho ñaha xii-gá xícuñúhu-güedé sá Ìo váha sáa sá xini tñùní-gá, te Ìo váha nihí-gá tñúhu nàdanchocáva-gá. ⁴⁸ Te òré ní xini ñáhá tẽ Chèé ndìhi náná-gá xii-gá, te Ìo ní cuñuhu-yu, te ní xáhaⁿ náná-gá xii-gá:

—Yòhó déhe-í, ¿ná cuendá ducaⁿ ní quide ñaha-n xii-ndí? Te tãtá-n ndìhi yúhú ndìhú iní-ndí xicá nanducu ñaha-ndí xii-n —càchí-xi xáhaⁿ-xi xii-gá.

⁴⁹ Te ní xáhaⁿ Jèsús xii-yu:

—¿Ná cuendá nánducu ñaha-ndo? ¿Náa ñá túú xini-ndó sá núu chíúⁿ Tãtá-í táú-í caca cuu-í-áⁿ? —càchí-gá xáhaⁿ-gá xii-yu.

⁵⁰ Dico meé-yu ñá túú ní təcú tñùní-yu nàcuáa ní xáhaⁿ-gá.

⁵¹ Te sáta dúcáⁿ te cuánuhú ndìhi ñáhà-yu xii-gá ñuu Nazàrét, te Ìo ní sándáa iní

ñáhá-gã xíi-yu. Te nchaa sá ní quide-gá-án ní xúhuⁿ nahi-ni ìní nǎná-gã. ⁵² Te Jèsús ducaⁿ-ni ta sàhnu-gá cuáháⁿ, te ta sàá-gá sá xíní tnùní-gá cuáháⁿ, te ducaⁿ cùdiu-gá núú Yá Ndiòxí, ndìhì núú nchàa ñáiyu.

3

Té Juáá tée dàcuandute ñaha xii ñáiyu càháⁿ-dé tnúhu Yá Ndiòxí xití yucu (Mt. 3:1-12; Mr. 1:1-8; Jn. 1:19-28)

¹ Te ní cuu sáhúⁿ cuía sǎ yíndàha té Tiberiú cuéhé nàcióⁿ, te dàvá-án ní cunuu té Pilatú distritú Jùdeá, te té Hèrodés ní cunuu-dě distritú Galileá, te ñaní-dé té Lipé ní cunuu-dě distritú Itùreá ndìhì ingá distritú nání Tràconité, te té Lisaniás ní cunuu-dě distritú Abiliniá. ² Te té Ànás ndìhì té Caifás ní cuu-güedé dútú cúnùu. Te dàvá-án ní cáháⁿ ndìhì ñaha Yá Ndiòxí xii té Juáá déhe té Zacaría xití yucu sá quihíⁿ-dé cáháⁿ-dé tnúhu-gá núú ñáiyu. ³ Te té Juáá ní yáha-dé nchaa ñúu cáá yàtni yúte Jòrdán, te xáhaⁿ-dě xii nchaa ñáiyu:

—Chí dándixi túu iní sá ñà túú quide váha-ndo, te dañá-ndo nchàa ichi cuéhé ichi duha ndècu-ndo, te cuandute-ndo, te ducaⁿ te cada càhnu iní Yá Ndiòxí nchaa yíca cuèchi-ndo —duha ní xáhaⁿ-dě xii-yu.

⁴ Te ducaⁿ ní quide-dé chi ní quee ndáá-xi nàcuáa ní chídó tnùní ndíi Chàíá téé ní xóo cáháⁿ tnúhu Yá Ndiòxí ndéé sanaha núú tütú ndíi núú càchí-xi:

Tècù càháⁿ níhì ìⁿ téé yìhì xití yucu, te xáhaⁿ-dě xii ñáiyu:

“Chí dǎná nchàa ichi cuéhé ichi duha ndècu-ndo, te tnìi-ndo ichi váha, te ducaⁿ càda-ndo cuendá cundecu túha-ndo, chi véxi Yáá fò cunuu.

⁵ Te nchaa núú cúnú nachítú, te nchaa tindúú ndìhì nchaa yucu ngoyo nihnu cuendá nduu ndáá, te nchaa ichi ñá túú cuáháⁿ ndáá nduu ndáá, te nchaa ichi ñá túú càváha nduu váha.

⁶ Te nchaa ñáiyu ñuyúú-a níhì-yu tnúhu sá Yá Ndiòxí véxi-gá dàcácu nihnu ñaha-gã xíi-yu núú ùhú núú ndàhú.”

Duha ní chídó tnùní ndíi Chàíá núú tütú ndíi.

⁷ Te óré ní xica ñáiyu cuáháⁿ-yu cuendá dacuandute ñaha té Juáá xii-yu, te ní xáhaⁿ-dě:

—jNchaa nchòhó cúú-ndó dàtná ìⁿ cóó dééⁿ chi fò cuihna ìní-ndó! ¿Te nása ní cuu núu tnáhá nchòhó ndúcu-ndó nàcuáa cácu nihnu-ndo núú tnùndòho càhnu vihi sá tá cùyatni ñaha xii-ndo véxi-i? ⁸ Te chí cádá váha vitna cuendá ducaⁿ cùt-nuní sá ní dǎná-ndó nchàa ichi cuéhé ichi duha ndècu-ndo. Te vá càchí-ndó sǎ òo càhnu cuu-ndo cuendá sá cúú-ndó ñání tnáhá ndíi Àbrahám, chi cuèi ndéé yúú te ndacu Yá Ndiòxí ndada-gá ñáiyu te cuú-yu ñání tnáhá ndíi Àbrahám. ⁹ Te caá chi ndècu túha-xi sá quèhndé-xi nchaa yutnu sá ñà túú càváha sávídí-xi, chi nchaa yutnu-án tènndé-xi te cuánguee-xi núú ñùhú càyú-xi. Te duha sǎtnahá-xi ndoho nchaa ñáiyu ñá túú quide váha, chi nchaa ñáiyu ducaⁿ ñà túú quide váha cùú-yu dàtná nchaa yutnu sá ñà túú càváha sávídí-xi. —càchí-dé xáhaⁿ-dě xii-yu.

¹⁰ Te ní xicáⁿ tnúhu-yu núú-dě, te xáhãⁿ-yu:

—¿Te nása cada-ndí váiⁿ? —càchí-yu xáhãⁿ-yu xii-dé.

¹¹ Te xáhaⁿ-dë:

—Te núu ndèdacàa-ndo ndècu ndìhì-ndo úú dóo te cuáñaha-ndo ìⁿ xii ñáiyu ñá túú ndècu ndìhì, àdi núu ndècu ndìhì-ndo sá nchító-ó te cuáha-ndò-yu na càxí-yu —càchí-dé xáhaⁿ-dë xii-yu.

¹² Te ní quexio ìⁿ úú cue téé cuihna iní-xi quide cobrá ñáhá xii ñáiyu cuendá impuèstú cuendá cuandute-güedé, te ní xicáⁿ tnúhu-güedé núú tē Juáá, te xáhaⁿ-güedé:

—Mèstrú, ¿te nása cada-ndí cuendá cuu váha iní Yá Ndiòxí-i? —càchí-güedé xáhaⁿ-güedé xii-dé.

¹³ Te té Juáá ní xáhaⁿ-dë:

—Vá cuídó-ndó càda cobrá-ndó ñáiyu —càchí-dé xáhaⁿ-dë xii-güedé.

¹⁴ Te tnáhá ìⁿ úú cue téé cuu sandadú xíndecu-án ní xicáⁿ tnúhú-güedé núú tē Juáá, te xáhaⁿ-güedé:

—Te nchúhú ¿nása cada-ndí cuendá cuu váha iní Yá Ndiòxí-i? —càchí-güedé xáhaⁿ-güedé xii-dé.

Te ní xáhaⁿ tē Juáá:

—Vá quèndéé-ndó sǎ néhé tnàha ñáiyu-ndo, te ni vá dácàa díquí-ndò-yu ìⁿ sá ñà túú nǎ quídé-yu, te nduu vétú iní-ndó nàcuáa ñùhu yáhu-ndo —càchí-dé xáhaⁿ-dë xii-güedé.

¹⁵ Te nchaa ñáiyu xíndetu sá quíxí Crístú sàni ìḡ sàni úú iní-yu núu sá díú Crístú Yaá tendaha Yá Ndiòxí quixi ñuyúú-a cùu te Juàá àdi ñàhá. ¹⁶ Dico té Juàá ní cáháⁿ ndodo-dé núú-yu nchaa-yu, te xáhaⁿ-dè:

—Na càchí tñúhu ndáá-í xii-ndo sá yúhú véxi-í sá cuèndá-ni dacuàndute ñaha-í xii-ndo dàtná ní cachí Yá Ndiòxí, dico nchicúⁿ ingá téé véxi, te téé-áⁿ taxi-dé Espiritú Yá Ndiòxí cundecu ndihí-ndo, te cùu-xi datná ìḡ ñuhú, chi ndada ndoo ndada nine-xi iní-ndó. Te téé-áⁿ ò-gá cúnùu-dé dàcúúxí yúhú, chi yúhú cùú-í ìḡ téé duuⁿ duuⁿ ñá túú tàú-í nandaxi-í cuèdicó ñii chàú-dé dico quide-í chiúⁿ-dè. ¹⁷ Te téé-áⁿ sa véxi túha-dé sá cádá ìḡ ñaha-dé xii-o dàtná quidé ñáiyu ndàda ndoo triú, chi ñáiyu-áⁿ sa nehe túha-ná-yu yaxíⁿ-yu òré nánàni cuèndá ndada ndoo-yu, te òré ndáda ndòo-yu triú-áⁿ te dàquee ìḡⁿ-yu mihi-xi, te tàxúha-yu mee-ná triú-áⁿ, te mihi-xi-áⁿ sáhmí-yu. Te dàtná quidé-yu mihi triú-áⁿ ducaⁿ sátnahá-xi cada ñaha téé-áⁿ xii nchaa ñáiyu ñá túú quide váha, chi daquihíⁿ ñáhá-dè xii-yu núu ñuhú núu càyú, te ñuhú-áⁿ ñá túú tñahí ndàhvá —càchí-dé xáhaⁿ-dè xii-yu.

¹⁸ Te titní víhí-gá tñúhu váha ní xáhaⁿ tē Juàá xii-yu òré ní dásàhú ñàhá-dè. ¹⁹ Te ní cáháⁿ-dé dóho té Hèrodés cuèndá sá ndéca-dè ìḡ ñaha nàni Herodiás ñaha ní cándeca ñani-dé té Lipé, te ní xáhaⁿ-dè cuèndá nchaa dava-gá sá cuèhé sá dúhá quide-dé. ²⁰ Dico té Hèrodés ñá túú ní quide cuèndá-dé tñúhu ní cáháⁿ té Juàá, chi nèhé-gá tucu ní quide-dé, chi da vecaá ní chihí-dé té Juàá.

Sàndute Jesús

(Mt. 3:13-17; Mr. 1:9-11)

²¹ Te òré dàcuàndute té Juàá nchaa ñáiyu, te tñàhá Jèsús ní dàcuàndute ñaha-dé xii-gá. Te ñini cáháⁿ ndihí-gá Dútú Ndiòxí ní nacaáⁿ andiú, ²² te ní queue Espiritú Yá Ndiòxí véxi cuuⁿ túu-xi, te càa-xi datná cáá ìḡ lómá, te òré-áⁿ ní tecú ní cáháⁿ Yá Ndiòxí ndéé andiú, te xáhaⁿ-gá xii Jèsús:

—Yòhó cùú-n Dèhe-í téé ío cùu iní-í, te ío cùú ñàhá-í xii-n —càchí-gá xáhaⁿ-gá xii Jèsús.

Cue téé ní xíndecu díhna-gá ñuyúú-a dàcúúxí Xitohó Jesucristú
(Mt. 1:1-17)

²³ Te ndècu Jèsús dàtná ócò úxí cuíá-gá cùtñàhá ní chisaha-gá chiúⁿ ní táhú Tàtá-gá Dútú Ndiòxí cada-gá. Te ní cuu-gá déhe té Chèé chi ducaⁿ sàni iní ñáiyu ñuyúú-a. Te té Chèé-áⁿ ní cuu-dé déhe té Elí, ²⁴ te téé-áⁿ ní cuu-dé déhe té Mátát. Te té Mátát-áⁿ ní cuu-dé déhe té Lèví, te téé-áⁿ ní cuu-dé déhe té Mèlquí. Te té Mèlquí-áⁿ ní cuu-dé déhe té Jàná, te téé-áⁿ ní cuu-dé déhe té Chèé. ²⁵ Te té Chèé-áⁿ ní cuu-dé déhe té Matàtiás, te téé-áⁿ ní cuu-dé déhe té Àmós. Te té Àmós-áⁿ ní cuu-dé déhe té Nàhúm, te téé-áⁿ ní cuu-dé déhe té Eslí. Te té Eslí-áⁿ ní cuu-dé déhe té Nagáí, ²⁶ te téé-áⁿ ní cuu-dé déhe té Màát. Te té Màát-áⁿ ní cuu-dé déhe té Matàtiás, te téé-áⁿ ní cuu-dé déhe té Semèí. Te té Semèí-áⁿ ní cuu-dé déhe té Chèé, te téé-áⁿ ní cuu-dé déhe té Jùdá. ²⁷ Te té Jùdá-áⁿ ní cuu-dé déhe té Jòaná, te téé-áⁿ ní cuu-dé déhe té Rèsá. Te té Rèsá-áⁿ ní cuu-dé déhe té Zorobàbél, te téé-áⁿ ní cuu-dé déhe té Salàtiél. Te té Salàtiél-áⁿ ní cuu-dé déhe té Nèrí, ²⁸ te téé-áⁿ ní cuu-dé déhe té Mèlquí. Te té Mèlquí-áⁿ ní cuu-dé déhe té Adí, te téé-áⁿ ní cuu-dé déhe té Còsám. Te té Còsám-áⁿ ní cuu-dé déhe té Elmòdám, te téé-áⁿ ní cuu-dé déhe té Èr. ²⁹ Te té Èr-áⁿ ní cuu-dé déhe té Jòsué, te téé-áⁿ ní cuu-dé déhe té Elièzér. Te té Elièzér-áⁿ ní cuu-dé déhe té Jòrim, te téé-áⁿ ní cuu-dé déhe té Mátát. ³⁰ Te té Mátát-áⁿ ní cuu-dé déhe té Lèví, te téé-áⁿ ní cuu-dé déhe té Mió. Te té Mió-áⁿ ní cuu-dé déhe té Jùdá, te téé-áⁿ ní cuu-dé déhe té Chèé. Te té Chèé-áⁿ ní cuu-dé déhe té Jònán, te téé-áⁿ ní cuu-dé déhe té Eliàquím. ³¹ Te té Eliàquím-áⁿ ní cuu-dé déhe té Meleá, te téé-áⁿ ní cuu-dé déhe té Mainán. Te té Mainán-áⁿ ní cuu-dé déhe té Mátatá, te téé-áⁿ ní cuu-dé déhe té Nàtán. ³² Te té Nàtán-áⁿ ní cuu-dé déhe té Davíí, te téé-áⁿ ní cuu-dé déhe té Isáí. Te té Isáí-áⁿ ní cuu-dé déhe té Òbéd, te téé-áⁿ ní cuu-dé déhe té Bòóz. Te té Bòóz-áⁿ ní cuu-dé déhe té Sàlmón, te téé-áⁿ ní cuu-dé déhe té Naàson. ³³ Te té Naàson-áⁿ ní cuu-dé déhe té Aminadáb, te téé-áⁿ ní cuu-dé déhe té Àràám. Te té Àràám-áⁿ ní cuu-dé déhe té Èsróm, te téé-áⁿ ní cuu-dé déhe té Fàrés. Te té Fàrés-áⁿ ní cuu-dé déhe té Jùdá, ³⁴ te téé-áⁿ ní cuu-dé déhe té Jàcób. Te té Jàcób-áⁿ ní cuu-dé déhe té Isàác, te téé-áⁿ ní cuu-dé déhe té Àbrahám. Te té Àbrahám-áⁿ ní cuu-dé déhe té Tàré, te téé-áⁿ ní cuu-dé déhe té Nàcór. ³⁵ Te té Nàcór-áⁿ ní cuu-dé déhe té Sèrúg, te téé-áⁿ

ní cuu-dé déhe té Ragàù. Te té Ragàù-án nǐ cuu-dé déhe té Pèlég, te téé-án nǐ cuu-dé déhe té Hèbér. Te té Hèbér-án nǐ cuu-dé déhe té Sàlá, ³⁶ te téé-án nǐ cuu-dé déhe té Cainán. Te té Cainán-án nǐ cuu-dé déhe té Arfaxád, te téé-án nǐ cuu-dé déhe té Sëm. Te té Sëm-án nǐ cuu-dé déhe té Nòé, te téé-án nǐ cuu-dé déhe té Láméc. ³⁷ Te té Láméc-án nǐ cuu-dé déhe té Matusalén, te téé-án nǐ cuu-dé déhe té Ènóc. Te té Ènóc-án nǐ cuu-dé déhe té Jàréd, te téé-án nǐ cuu-dé déhe té Mahalàleél. Te té Mahalàleél-án nǐ cuu-dé déhe té Cainán, ³⁸ te téé-án nǐ cuu-dé déhe té Ènós. Te té Ènós-án nǐ cuu-dé déhe té Sèt, te téé-án nǐ cuu-dé déhe té Adán. Te té Adán-án chi mee Yá Ndiöxí ní cadúha ndaha ñaha-gá xii-dé.

4

Sácuíhná quidé yica-xi cada Jesús sá ñà túú tátu-gá cada-gá ní cùu

(Mt. 4:1-11; Mr. 1:12-13)

¹ Te Jesús ní naqueheⁿ-gá ichi yuhu yúte Jòrdán cuánuhú-gá. Te sa ndècu ndíhi-gá Espiritú Yá Ndiöxí, te Espiritú-án ndécá ñaha-xi xii-gá cuáhánⁿ ìnⁿ xití yucu.

² Te yácáⁿ ní xindecu-gá údico nduu, te sácuíhná nǐ cuíni-xi coto ndéé ñáhá-xí xii-gá te núu ndisa sá vǎ cáda-gá ìnⁿ sá ñà túú tátu-gá cada-gá. Te ñà túú tnháí ná ní xèxi-gá ndí ùdico nduu-án, te sáta dúcáⁿ te ní xícáⁿ iní-gá caxi-gá. ³ Te sácuíhná-án nǐ xáhaⁿ-xi xii-gá:

—Te núu ndisa sá cùu-n Dèhe Yá Ndiöxí, te cùñaha xii yúu-a na nduu-xi paá — cächí-xi xáhaⁿ-xi xii-gá.

⁴ Te Jesús ní xáhaⁿ-gá xii-xi:

—Núú tütú Yá Ndiöxí cächí-xi: “Ñà díú mèe-ní paá candeca-xi iní ñáyiu, chi tnahá nchaa tñuhu cáhánⁿ Yá Ndiöxí candeca-xi iní-yu”, duha cächí-xi núú tütú-gá — cächí-gá xáhaⁿ-gá xii-xi.

⁵ Te dǎtnúní sácuíhná ndécá ñaha-xi xii-gá cuáhánⁿ ìnⁿ núú tñdúú dúcúⁿ, te uuⁿ ní ní dánèhé núú ñáhá-xí xii-gá nchaandi tñúhú nàcióⁿ cáá ñùyúú. ⁶ Te ní xáhaⁿ-xi xii-gá:

—Yúhú cada-í, te taxi tñuní-n nchaa-ndi tñúhú nàcióⁿ-a ndíhi nchaa sá vaha ò díu-ni nchaa nàcióⁿ-a, te cachí ñáyiu sá ò cùnuu-n, chí yúhú cúú cuèndá-í nchaa sá ò nchaa nàcióⁿ-a, te ndédani cǎa ñáyiu cùu iní-í te cùñaha-í xii-yu taxi tñuní-yu. ⁷ Te núu ní yùhu ní iní-n chiñuhu ñaha-n xii-í

ñá, te nchaa taxi-í cuu cuèndá-n — cächí-xi xáhaⁿ-xi xii-gá.

⁸ Te Jèsús ní xáhaⁿ-gá xii-xi:

—Xocuñí yòhó sácuíhná núú ndécú-í-a, chi vá cúú cáda-í nàcuáa cächí-n chi núú tütú Yá Ndiöxí cächí-xi: “Chiñuhu-ndo Dütú Ndiöxí Yá cúú Ndiöxí-ndó, te ìnⁿ díi díi-ni-gá cada-ndo nchaa nacuáa cáhánⁿ-gá”, duha cächí-xi núú tütú-gá — cächí-gá xáhaⁿ-gá xii-xi.

⁹ Te sácuíhná ndécá ñaha tucu-xi xii-gá cuáhánⁿ ñuu Jérusalén, te ní xáhaⁿ-xi xii-gá cuásaá-gá díquí veñúhu cǎhnu sá ò cùnuu, te ní xáhaⁿ tucu-xi:

—Te núu ndisa cùu-n Dèhe Yá Ndiöxí te cuandé ndava ndéé núú ñúhú ¹⁰ cuèndá quee ndáá-xi nàcuáa cáhánⁿ-xi núú tütú Yá Ndiöxí núú cächí-xi:

Yá Ndiöxí tendaha-gá cue espíritú xínú cuèchi núú-gá quixi-xi coto ñaha-xi xii-n.

¹¹ Te núú ndáhá-xí cǎundodo-n cuèndá sá vǎ dánícuèhé yúú sǎhá-n,

duha cächí-xi núú tütú-gá — cächí sácuíhná xáhaⁿ-xi xii-gá.

¹² Te Jesús ní xáhaⁿ-gá xii-xi:

—Te cächí tucu-xi núú tütú Yá Ndiöxí: “Vá cǎní ìnⁿ-n còto ndéé-n Dütú Ndiöxí Yá cúú Ndiöxí-n núu ndisa sá dácacu ni-hnu ñaha-gá xii-n cuèndá ìnⁿ sá sǎní ìnⁿ-n cáda-n sá cùú-xí mèe-n”, duha cächí-xi núú tütú-gá — cächí-gá xáhaⁿ-gá xii-xi.

¹³ Te sáta dúcáⁿ te sácuíhná ñà túú-gá ní cùtnuní iní-xi nása cada-xi Jèsús, núu xǎⁿ ní xica-xi cuáhánⁿ-xi ní sanaa tnaa-xi.

Distritú Galiléa ní chisaha Jèsús chiúⁿ ní tǎhú Tǎtá-gá Dütú Ndiöxí cada-gá

(Mt. 4:12-17; Mr. 1:14-15)

¹⁴ Te Jesús cuáhánⁿ tucu-gá distritú Galiléa, dico sa ndècu ndíhi-gá Espiritú Yá Ndiöxí, te ní cǎa xico xǎⁿ ní níhi-yu tñúhu nchaa nàcuáa quide-gá. ¹⁵ Te ndí tnahá ñuu cuáhánⁿ-gá ducaⁿ cuǎnguihu-gá veñúhu-yu dǎnehé ñáhá-gá xii-yu, te nchaa-yu cächí-yu sá ò cǎhnu cuu-gá.

Jèsús ndécú-gá ñuu Nazarét

(Mt. 13:53-58; Mr. 6:1-6)

¹⁶ Te Jesús ní sáhánⁿ-gá ñuu Nazarét ñuu núú ní sahnú-gá. Te nduu ndètatú ñáyiu ní quíhu-gá veñúhu, chí ducaⁿ tñahí quide-gá, te ní ngúnutñí-gá dǎcuàha-gá tütú ndéé tñúhu Yá Ndiöxí. ¹⁷ Te ní sǎñaha-güedé xii-gá tütú ndéé tñúhu ní cáhánⁿ ndí Chàíá

tée ní xóo cáháⁿ tnúhu Yá Ndióxi ndéé sanaha, te óré ní nandicá-gá núú tütú-án te ní naníhí-gá núú cächí-xi:

¹⁸ Espiritú Yá Ndióxi ndécú ndìhi ñaha-xi xii-í,

chi ní cachí-gá sá cãháⁿ-í tnúhu-gá sá cúú-xí ñáyiú ndàhú, ñáyiú vátá cùndèdóho tñàhí-gá.

Te véxi-í cuèndá vá ndìhú-gá iní ñáyiú ñá túú ndècu váha iní-xi,

te cue ñáyiú sa nèhe váha ñaha-nã yucu ñávãha dàcácu nihnu-í-yu.

Te cue ñáyiú cuáá nacaáⁿ-í núú-yu,

te ñáyiú ndòho dandoho ñaha tñaha ñáyiú-xi taunihnu-í-yu.

¹⁹ Te cúñaha-í xii ñáyiú sá sàá nduu càda Yá Ndióxi ìⁿ sá vãha sá cúú-xí-yu.

Duha cächí-xi núú tütú dácuaaha-gá.

²⁰ Te Jèsús ní nacadí-gá núú tütú-án, te ní nacuaaha-gá ìⁿ tée xinu cuechi veñúhu-án, te ní ngóo-gá. Te nchaa ñáyiú yìhi veñúhu ñá núú núú-yu ndèhe ñahá-yu xii-gá. ²¹ Te xãhaⁿ-gá xii-yu:

—Mei vitna ní quee ndáá-xi nãcuáa cáháⁿ-xi núú tütú Yá Ndióxi —cächí-gá xãhaⁿ-gá xii-yu.

²² Te nchaá-yu ní cáháⁿ váha-yu cuèndá-gá, te ní cuñúhu-yu tnúhu váha cáháⁿ-gá, te xitnãhá-yu:

—¿Te náa ñá díú tõe-a cùu-dé déhe té Chèè-ãⁿ? —cächí-yu xitnãhá-yu.

²³ Te Jèsús ní xãhaⁿ-gá:

—Na cächí tnúhu ndáá-í xii-ndo sã ñúhú ìní-ndó cũñaha-ndo xii-í ìⁿ tnúhu cùtexínú sá cáháⁿ meé-ndó, te quesaha-ndo: “Ñátátná cada tátna mee-n”, duha quesaha-ndo. Te cúñaha tucu-ndo xii-í: “Sa ní níhí-ndí tnúhu nãcuáa ní quide-n ñúú Capèrnaúm, te cada-n tñahá ñúú núú ní sahnu-n”, duha quesaha-ndo —cächí-gá xãhaⁿ-gá xii-yu.

²⁴ Te ní xãháⁿ tucu-gá:

—Na cächí tnúhu ndáá-í xii-ndo sã ñi ìⁿ tée cáháⁿ tnúhu Yá Ndióxi ñá túú tñahá iní ñahá ñáyiú ñúú-dé. ²⁵ Te na cächí tnúhu ndáá tucu-í xii-ndo sã ïo vãi ñáyiú ðìhí ñáyiú quèè ní xíndecu nacióⁿ Isràèl cút-nahá ní xíndecu té Èliás cút-nahá ñá túú ní cùuⁿ dáú ùní cuíá dava, te dàvá-án ïo ní ndoho ñáyiú docó nitùhú nacióⁿ. ²⁶ Dico Yá Ndióxi ñá túú ní tëndaha-gá té Èliás quíhíⁿ-dé vehe ndèdani càa ñáyiú ðìhí-án,

chi vehe ìⁿ ñaha ñúú Sàreptá ní xãháⁿ-gã ní sáháⁿ-dé, te ñúú-án cáá yàtni-xi ñúú Sidón.

²⁷ Te ní xíndecu tucu ingá tée ní xóo cáháⁿ tnúhu Yá Ndióxi ndéé sanaha, te tée-án ní xinani-dè Eliseú, te ðiu-ni dàvá-án ní xíndecu tucu vãi ñáyiú cùhú nacióⁿ Isràèl, ñáyiú ní tñahá cuehé sã dátèhyú nihnu-xi yiqui cùñú-yu dico ñá túú ní ndúha-yu, chi ìⁿ ðii-ni té Nàamán tée ðistrítú Sìriá ní ndúha-dé —cächí-gá xãháⁿ-gã xii-yu.

²⁸ Te sá ducáⁿ ní cáháⁿ-gá te xíãⁿ ní cudééⁿ víhí nchaa ñáyiú yìhi veñúhu-án núú-gã. ²⁹ Te ní queñuhú-yu Jèsús yuhu dèhvã tìndúú núú cáá ñúú-yu-án cuèndá yacáⁿ dàquée-yu-gá dèhvã ní cùu. ³⁰ Dico Jèsús vii-ni ní quee-gá tnuú-yu cuáhãⁿ-gã.

Èⁿ tée yìhi ñaha espíritú cùndìhi yucu ñávãha

(Mr. 1:21-28)

³¹ Te Jèsús cuáhãⁿ-gã ñúú Capèrnaúm, te ñúú-án yíndèhu-xi ðistrítú Galiléa. Te yacáⁿ ndécú-gã ní tñahá nduu ndètatú ñáyiú, te ní nguíta-gá dácuaaha-gá ñáyiú.

³² Te xicũñúhu-yu nchaa nãcuáa dànehé ñahá-gã xii-yu, chi cáháⁿ-gã dàtná cáháⁿ ìⁿ tée cùnuu, te cùnuu ndisa-gá.

³³ Te xití veñúhu yìhi ìⁿ tée yìhi ñaha ìⁿ espíritú cùndìhi yucu ñávãha, te espíritú-án ní quide-xi níhí ní cáháⁿ tée-án, te xãhaⁿ-dè xii Jèsús:

³⁴ —¿Te ná cuini yòhó Jèsús tée ñúú Nazàrét cada ñaha-n xii-ndí núú véxi-n núú ndécú-ndí-í? ¿Áⁿ véxi-n dànaa ñaha-n xii-ndí? Chi yúhú xiní ñahà-í xii-n sã cúú-n ìⁿ tée ñá túú tñahí cuechi-xi chi núú Yá Ndióxi ní quee-n véxi-n ñuyíú-a —cächí-dé xãhaⁿ-dè xii-gã.

³⁵ Te Jèsús ní tenàá-gá espíritú cùndìhi yucu ñávãha-án, te xãhaⁿ-gã:

—¿Cadí yuhu-n, te taquèe yiqui cuñú tée-án! —cächí-gá xãhaⁿ-gã.

Te espíritú cùndìhi yucu ñávãha-án ní dándúá-xi tée-án ndéè ñuhu tnuú ñáyiú xíndecu-án, te ñá túú-gã ná ní quide ñaha-xi, te ní quee ñaha-xi xii-dé. ³⁶ Te nchaa ñáyiú xíndecu-án ní cuñúhu-yu, te ní xitnãhá-yu:

—¿Te nása ndùu-tu tnúhu cáháⁿ tée-án ñá? ¿Te cáháⁿ-dé dàtná cáháⁿ ìⁿ tée tàxi tñuní víhí, chi cáháⁿ-ni-dé te nchaa

espíritú cúndíhi yucu ñávãha quèe-ni-xi yiquí cuñú-yul —càchí-yu xitnãhá-yu.

³⁷ Te nchaa xichi ní ñíhí-yu tnúhu nãcuáa quide Jesús.

Jèsús quidé tãtna-gá nãná ñadíhí té Xímú
(Mt. 8:14-15; Mr. 1:29-31)

³⁸ Te Jèsús ní ndee-gá xití veñúhu, te cuáhã-gá vehe té Xímú. Te nãná ñadíhí té Xímú-ãⁿ cùhú-aⁿ ñùhu vihi-aⁿ cahni, te ní cáháⁿ ndáhú-yu núú Jèsús cuendá-aⁿ. ³⁹ Te Jèsús ní sáhãⁿ-gá núú ndécú-ãⁿ, te ní ngú-nundeyi-gá te ní xãháⁿ-gã xii cahni-ãⁿ sã ná xòcuñí-xi, te ní xòcuñí-ni-xi, te òrè-ni-ãⁿ ní ndúha ñaha cùhú-ãⁿ te ní ndacóo-aⁿ ní xinu cuechi-aⁿ nũú-güedè ndíhi-gã.

Jèsús quidé tãtna-gá vai ñáyiu cùhú
(Mt. 8:16-17; Mr. 1:32-34)

⁴⁰ Te òrè ní ngódó tnúú nchíanchii, te nchaa ñáyiu xíndecu ndíhi ñáyiu cùhú vehe-xi ndèca ñahá-yu cuáhãⁿ núú Jèsús. Te Jèsús ní sacáⁿ ndodo-gá ndaha-gá díquí ñⁿ ñⁿ ñáyiu cùhú-ãⁿ, te ducaⁿ ñⁿ quide-gá te ní ndúha-yu. Te ndí díñⁿ nũú cuèhé tnãhá-yu ñⁿ ñⁿ-yu ní cùu. ⁴¹ Te tnãhá dava ñáyiu cùhú-ãⁿ yíhí ñaha espíritú cúndíhi yucu ñávãha xii-yu ní cùu, te òrè ní quee ñaha-xi xii-yu, te xíãⁿ ní quide-xi ñíhi ní cáháⁿ-yu, te xãháⁿ-yu xii Jèsús:

—Yòhó cùú-n Dèhe Dítú Ndiõxí —càchí-yu xãháⁿ-yu xii-gã.

Dico Jèsús ñíhi ní cáháⁿ-gá ní tenãã-gá nchaa espíritú cúndíhi yucu ñávãha-ãⁿ, te xãhaⁿ-gã sã vã dúcãⁿ-gã cada-xi, chi sa xini-xi sã díú-gã cùú-gã Cristú Yaa ní ten-daha Yã Ndiõxí véxi ñuyiú-a.

Jèsús dánèhé-gá ñáyiu distritú Galileá
(Mr. 1:35-39)

⁴² Te ñⁿ nduu ní túndaã-ni ní quee Jèsús ñúú núú ndécú-gã-ãⁿ cuáhãⁿ-gã ñⁿ xichi núú ñã túú ñáyiu ndècu. Te cue ñáyiu ní ngúita-yu nãnducu ñahá-yu xii-gã te ní naníhí ñahã-yu, te cuiní-yu ngani ñahã-yu xii-gã cuendá sã ñã túú-gã ndèé quíhíⁿ-gã ní cùu. ⁴³ Dico ní xãháⁿ-gã xii-yu:

—Dacuití quíhíⁿ-í cùnaaha-í xii nchaa ñáyiu dava-gã ñúú tnúhu sã cáháⁿ nãcuáa ndíhu ndaha ñaha Yã Ndiõxí xii-yu, chi chiúⁿ tnahí-ãⁿ vèxi-í —càchí-gã xãháⁿ-gã xii-yu.

⁴⁴ Te ní xica cuu Jèsús ní dánèhé-gã ñáyiu tnúhu-gã nchaa xití veñúhu ndãa distritú Galileá.

5

Jèsús ní quide-gá ní ñíhí-güedè chácá
(Mt. 4:18-22; Mr. 1:16-20)

¹ Te ñⁿ xito ndècu Jesús yuhu làgúná Genesàrét, te ío cuèhé ñáyiu ní sáá, te ta dàdehnde ñaha-ná-yu xii-gã cuáhãⁿ sã cuiní-yu cundedóho-yu nchaa tnúhu càháⁿ-gã. ² Te Jèsús ní xiní-gã úú bàrcú cue téé tñii chácá xínutnii-xi yatni yuhu làgúná-ãⁿ, te sa ní quene cue téé ñùhu xití-xi-ãⁿ xínaquete-güedé ñunu-güedé. ³ Te Jèsús cuasãã-gã núú ñⁿ bàrcú-ãⁿ, te bàrcú-ãⁿ cùú-xí bàrcú té Xímú, te ní xãháⁿ-gã xii té Xímú-ãⁿ sã dánundehe-dé-xi luha-gã xití ndute. Te dàtnúni ní ngóo-gã núú bàrcú-ãⁿ, te xíãⁿ núcõo-gã ní ngúita-gã dánèhé-gã ñáyiu. ⁴ Te òrè ní túhú ní dánèhé ñahã-gã xii-yu, te ní xãháⁿ-gã xii té Xímú:

—Daquihíⁿ bàrcú-a xití làgúná mei nũú cùnú-gã, te dàquée-ndo ñunu-ndo tñii-ndo chácá —càchí-gã xãháⁿ-gã xii-dé.

⁵ Te té Xímú ní xãháⁿ-dè:

—Mèstrú, ni núú ní quide chiúⁿ-ndí te ni ñⁿ chácá ñã túú ní ñíhí-ndí, dico vitna cuendá-ni sã yòhó táuchiuⁿ-n te na dàquée-ndí ñunu-ndí váⁿ —càchí-dé xãháⁿ-dè xii-gã.

⁶ Te òrè ní dàquée-güedé ñunu-güedé te súni vai chácá ní ñíhí-güedè, te ta ndátã-ñã ñunu-güedé cuáhãⁿ ní cùu. ⁷ Núú ní quide-güedé ndaha-güedé núú dàva-gã cue téé cùndíhi-güedé xixúhuⁿ ingã bàrcú cuendá quíhíⁿ-güedé chindee ñaha-güedé. Te cue téé-ãⁿ ní sáhãⁿ-güedé ní chindee tnãha-güedé ní dàchítú-güedé ndí ndúú bàrcú mee-ni chácá, te súni ní cuu véé núu cuiní-na-xi quée naa-güedé ndíhi bàrcú ní cùu. ⁸ Te sã dúcãⁿ cuiní-xi quée naa bàrcú ní cùu, núú té Xímú, àdi Pelú chi úú ñu-dé, ní ngúñí xití-dè núú Jèsús, te xãháⁿ-dè:

—Xocuñí yòhó Jèsús núú ndécú-í-a, chi yuhú cùú-í ñⁿ téé ío ndècu cuechi-xi —càchí-dé xãháⁿ-dè xii-gã.

⁹ Te ducaⁿ ñⁿ cáháⁿ-dé chi ní yuhú-dé, te ní cuñúhu-dé ndíhi nchaa cue téé ndíhi-dé-ãⁿ cuendá sã ño vai chácá ní

níhí-güedě. ¹⁰ Te tñàhá té Jàcobó ndíhi té Juàá cue déhe té Zebèdeú ío ní cuñúhu-güedé, te ðá-u-ni cue tée cùndíhi té Xímú-áⁿ cúu-güedé tñàhá-güedé. Te Jèsús ní xàháⁿ-gã xii té Xímú:

—Vá yùhú-n, chi není vitna quíhíⁿ-n dác-aháⁿ-n ñáiyu cuendá tuha ñàhá-yu xii-í —càchí-gá xàháⁿ-gã xii-dé.

¹¹ Te ní quene-güedé ndíhi bàrcú ndéé ñuhu yichí yuhu làgúná-áⁿ. Te òré-áⁿ ní dándò-güedé nchaandí tùhú sá ndécú ndíhi-güedé, te ní tuha-güedé Jèsús.

Jèsús quidé tãtña-gá ìn tée tñàhá cuéhé sã dátèhyú nihnu-xi yiqui cùñú-ó

(Mt. 8:1-4; Mr. 1:40-45)

¹² Te òré ní quexio Jèsús ìn ñuú, te ní quexio ìn tée cùhú tñàhá-dé cuéhé sã dátèhyú nihnu-xi yiqui cùñú-ó, te òré ní xiní-dé Jèsús te ní sáháⁿ-dé núu ndécú-gã, te ní ngúíñí xítí-dé núu-gã te ní nuu núu-dé ndàa núu ñúhú te càháⁿ ndàhú-dé, te xàháⁿ-dè xii-gá:

—Mèstrú, véxi-í càháⁿ ndàhú-í núu-n nùu vá cùndèe iní-n càda tãtña ñaha-n xii-í, chi cùtnuní iní-í sá ndácú-n —càchí-dé xàháⁿ-dè xii-gá.

¹³ Te Jèsús ní dácá-gá ndaha-gá ní tendaha ñaha-gá xii-dé, te xàháⁿ-gã:

—Cuu cada tãtña ñaha-í xii-n, te vitna te ndúha-n —càchí-gá xàháⁿ-gã xii-dé.

Te òré-ni ní xócúñí cuéhé tñàhá-dé. ¹⁴ Te dàtnuní ní xàháⁿ tùcu Jèsús xii-dé:

—Vá yò ìn cúnaha-n sã ní quide tãtña ñaha-í xii-n, núu dütú-ni cuáháⁿ cuendá sá ná quíní ñàhá-dè xii-n sã ní ndúha-n te cuáha-n-dè sá ndúú tãhú Yá Ndiòxí dàtná ní cachí ndí Moisés cuendá ná quíní ñáiyu sá ndàa ní ndúha-n —càchí-gá xàháⁿ-gã xii-dé.

¹⁵ Te ducaⁿ ta xítè nuu-gá tñúhu nchaa nàcuáa quide Jèsús, te ío cuéhé ñáiyu ní xóo tacá nchaa núu ní xíndecu-gá cuendá sá cuíní-yu cundedóho-yu tñúhu càháⁿ-gã, ndíhi cuendá sá cuíní-yu cada tãtña ñaha-gã xii-yu. ¹⁶ Dico Jèsús ní xóo quene nihni-gá tnuu-yu ní xóo quíhíⁿ-gá núu ñá túu ñáiyu ndècu ní xóo càháⁿ ndíhi-gá Yá Ndiòxí.

Jèsús quidé tãtña-gá ìn tée cùhú ñá cúu-gã candá nihnu

(Mt. 9:1-8; Mr. 2:1-12)

¹⁷ Te ìn nduu dànehé-gá ñáiyu, te xínucóo ìn tée cùu fariséú, ndíhi cue tée dàcuaha ñaha xii ñáiyu nchaa tñúhu ní chídó tñuní ndí Moisés. Te cue tée-áⁿ ní quene-güedé nchaa ñuú yindèhu distritú Galiléa, ndíhi distritú Júdeá, ndíhi ñuú Jerusalén, te nchaa ñuú-áⁿ ní quene-güedé cuáháⁿ-güedé núu ndécú-gã. Te Yá Ndiòxí chindèe ñaha-gá quidé tãtña-gá ñáiyu cùhú. ¹⁸ Te ìn tée cùu tée nchido-güedé ìn tée cùhú ñá cúu-gã candá nihnu ñúhu-dé xító ní quexio ndíhi ñaha-güedé, te cuíní-güedé quíhu ndíhi ñaha-güedé ndéé xítí vehe, sáa-güedé ndéé núu Jèsús ndíhi tée cùhú-áⁿ. ¹⁹ Dico ñá túu ní níhí-güedé ndéé ichi quíhu-güedé, chi cuendá ío cuéhé ñáiyu ndècu, núu xíáⁿ ní sáa-güedé díquí véhé-áⁿ ní caáⁿ-güedé te ndàa díquí véhé-áⁿ ní dáquèe-güedé tée cùhú-áⁿ, te ñúhu-ni-dé xító ní dáquèe ñaha-güedé tnuú ñáiyu ní sáa ndéé núu Jèsús. ²⁰ Te Jèsús ní cutnùní iní-gá sá ní yuhu ní iní-güedé sàndáá iní ñàhá-güedé xii-gá, núu ní xàháⁿ-gã xii tée cùhú-áⁿ:

—Yòhó tée cùhú, sa ní quide càhnu iní-í nchaa cuéchi-n —càchí-gá xàháⁿ-gã xii-dé.

²¹ Te cue tée dàcuaha ñaha xii-yu nchaa tñúhu ní chídó tñuní ndí Moisés ndíhi cue tée cùu fariséú ní sani iní-güedé: “¿Ná cúu tée-a núu càháⁿ cuéhé-dé cuendá Yá Ndiòxí-í? Te vá yò ìn ndàcu cada cahnu iní nchaa yíca cuéchi ñáiyu, chi ìn dñí dí-ñi Yá Ndiòxí quidé càhnu iní-gá”, duha ní sani iní-güedé.

²² Dico Jèsús sa ní cutnùní iní-gá nàcuáa sàni iní-güedé núu ní xàháⁿ-gã xii-güedé:

—¿Te ná cuendá ducaⁿ sàni iní-ndó-í?

²³ Te sá dúhá ní xàháⁿ-í xii tée cùhú-a sá cáda càhnu iní-í nchaa yíca cuéchi-dé, te xíáⁿ nchòhó ñá túu cùtnuní iní-ndó nùu ndáá càháⁿ-í àdi ñá ndàá. Dico núu cúu-í-dé sá ndácóo-dé, te caca-dé te cutnúní ndáá iní-ndó nùu ndáá càháⁿ-í àdi ñá ndàá, chi cundehe núu-ndó nàcuáa cada-í. ²⁴ Te vitna na càda-í nàcuáa cutnúní iní-ndó nchàa-ndo sá yùhú Tée cùu ñaní ñàhá-ndó nchàa-ndo ndecu ndíhi-í tñúhu ndee iní sá cáda càhnu iní-í nchaa cuéchi ñáiyu ñuyú-a —càchí-gá xàháⁿ-gã xii-güedé.

Te sáta dúcáⁿ te ní xàháⁿ-gã xii tée cùhú-áⁿ:

—Ndacóo, te ndocani-n xito ñuhu-n véxi-án, te núhú-n vehe-n —cachí-gá xáhaⁿ-gá xii-dé.

²⁵ Te òré-ni-án nĩ ndúha tée cùhú-án te ní ndacóo-dé, te ní ndocani-dé xito ñuhu-dé ní quexio-án, te ní natnii-dé ichi ta càháⁿ-dé cuánuhú sá ño càhnu cuu Yá Ndiòxí. ²⁶ Te nchaa ñáyiú xĩndecu-án nĩ cuñuhu-yu, te tnàhá-yu ní cachí-yu sá ño càhnu cuu Yá Ndiòxí, te ducaⁿ ño ní yúhú-yu, te ní xít-nàhá-yu:

—Vitna ní xiní-ó ñⁿ sá ñà túú tnàhí xiní-ó ní cùu —cachí-yu xít-nàhá-yu.

Jèsús cáná-gá té Lèví

(Mt. 9:9-13; Mr. 2:13-17)

²⁷ Te sáta dúcáⁿ nĩ cuu te ní quee Jèsús xián, te ní xiní-gá ñⁿ tée nàni Leví núcòo-dé ñⁿ xichi quide cobrá-dé ñáyiú cuèndá impuèstú, chi cobràdór cúú-dé, te ní xáhaⁿ-gá xii-dé:

—Néhé chitnahá ñáhá-n xii-í —cachí-gá xáhaⁿ-gá xii-dé.

²⁸ Te té Lèví-án nĩ ndacúñí-dé te ní dándòo-dé nchaa sá ndécú ndihí-dé núú núcòo-dé-án, te ní tuha-dé Jèsús.

²⁹ Te sáta dúcáⁿ te té Lèví-án nĩ quide-dé ñⁿ vico càhnu vehe-dé sá cúú-xí Jèsús, te ní tacá vài cue tée quide chiuⁿ quide-dé, te nchaa-güedé cuánguihu-güedé mèsá ní ngóo-güedé ndihí dava-gá ñáyiú ní quexìo cuèndá caxi-güedé ndihí-yu. ³⁰ Dico cue tée cùu fariséú ndihí cue tée dàcuaha ñaha xii-yu nchaa tnúhu ní chídó tnùní ndii Moisés ní ngúfta-güedé xícühé-güedé cue tée xica cuu ndihí-gá, te xáhaⁿ-güedé:

—¿Ná cuèndá xéxi-ndó xihí-ndo ndihí cue tée cuihna iní-xi quide cobrá ñáhá xii ñáyiú cuèndá impuèstú, ndihí nchaa dava-gá cue tée ndècu ichi cuéhé ichi duha-i? —cachí-güedé xáhaⁿ-güedé.

³¹ Te Jèsús ní xáhaⁿ-gá xii-güedé:

—Nchaa ñáyiú ñà túú cùhú chi ñà túú xiní ñuhú-yu ñátátná, dico nchaa ñáyiú cùhú chi xiní ñuhu ñahá-yu. ³² Te yúhú véxi-í càháⁿ-í ñáyiú cùtnuní iní-xi sá ndécú cuèchi-xi cuèndá dàñá-yu nchaa sá cuéhé sá dúhá quidé-yu, te ñà túú véxi-í càháⁿ-í ñáyiú cachí sá ñà túú ndècu cuèchi-xi —cachí-gá xáhaⁿ-gá xii-güedé.

Cue tée ndècu tnúhu núú Jèsús cuèndá ñáyiú ñà túú tnàhí ná xéxi áma càháⁿ ndihí-yu Yá Ndiòxí

(Mt. 9:14-17; Mr. 2:18-22)

³³ Te ní xáhaⁿ-güedé xii Jèsús:

—Te áma ñà túú tnàhí ná xéxi cuè tée xica cuu ndihí té Juáá càháⁿ ndihí-güedé Yá Ndiòxí, te ñu-ni ducaⁿ quide cue tée xica cuu ndihí nchúhú cue tée cùu fariséú. ³⁴ Te ná cuèndá cue tée xica cuu ndihí-n ñà túú dùcaⁿ quide-güedé núu nchaa-ni nduu xèxi-güedé xihí-güedé quidé-güedé-i? —cachí-güedé xáhaⁿ-güedé xii-gá.

³⁴ Te Jèsús ní xáhaⁿ-gá xii-güedé:

—Nchòhò xiní-ndó sá vǎ cúú cǎñaha-o xii cue ñáyiú ñuhu vico tnándaha sá vǎ cúú cǎxi-yu nini ndècu ndihí ñaha tée tnándaha-án xii-yu. ³⁵ Dico sáá nduu te vǎ cǎndècu ndihí ñaha-gá tée tnándaha-án xii-yu, te dàvǎ-án te cahni iní-yu vǎ cǎxi-yu sá ndihí iní-yu —cachí-gá xáhaⁿ-gá xii-güedé.

³⁶ Te ní cani-gá ñⁿ cuèndú núú ñáyiú nàcuáa tecú tnùní-yu tnúhu-gá, te xáhaⁿ-gá:

—Vǎ yǎo ñⁿ dǎndée luha dóo sáá ñⁿ dóo sa ní cuu tǎhú vǎhí, chi núu yoo ducaⁿ na càda, te dóo sáá-án nǎndiyi-xi te uuⁿ-gá ndata-xi dǎo sǎ nĩ cuu tǎhú-án, te luha dóo sáá-án ñà túú nǎtaú-xi ndée dóo sǎ ní cuu tǎhú-án. ³⁷ Te nì vǎ yǎo ñⁿ chihi ndidí sáá xití ñⁿ lamba sa ní cuu tǎhú vǎhí, chi núu yoo ducaⁿ na càda, te ndava lamba sa ní cuu tǎhú-án chi ío níhi yóco ndidí-án, te cuíta-ni ndidí-án te cuíta-ni lamba-án. ³⁸ Núu xǎá xini ñuhu-xi quée ndidí sáá-án xití ñⁿ lamba saa cuèndá ducaⁿ ñà túú nǎ cuu cováha-xi. ³⁹ Te nì ñⁿ ñáyiú ñà túú tnàhá iní-yu cohó-yu ndidí sáá, te núu díhna-gá ná cohó-yu ndidí sá nĩ quene díhna-gá, chi cachí-yu sá xihí vǎha-gá ndidí sá nĩ quene díhna-gá-án dǎcúxí ndidí sáá —cachí-gá xáhaⁿ-gá xii-yu.

6

Cue tée xica cuu ndihí Jèsús sǎhnú-güedé yoco triú nduu ndetátú ñáyiú

(Mt. 12:1-8; Mr. 2:23-28)

¹ Te ñⁿ nduu cùu-xi nduu ndetátú ñáyiú ñuhu Jèsús ichi ndihí cue tée xica cuu ndihí-gá, te ta yǎha-gá ndihí-güedé ñⁿ xichi núú cáá triú, te ní ngúfta-güedé

sàhnú-güedé yoco trù-án te ndihi ndaha-güedé quíhí-güedé quéé trù tá xèxi-güedé cuáhá. ²Te íhí úú cue tée cùu fariséú ní xáhaⁿ-güedé xii cue tée xica cuu ndihi-gá:

—¿Te ná cuendá ducaⁿ quide nchohó íhí sá ñá túú tàú-ó càda-o vitna cuu-xi nduu ndetatú-ó-í? —càchí-güedé xáhaⁿ-güedé.

³Te Jèsús ní xáhaⁿ-gá xii-güedé:

—¿Te náa ñá túú dàcuaha-ndo núú tùtú Yá Ndiòxí núú càháⁿ-xi nàcuáa ní quide ndí Dàvíí cùtnàhá ní xíhí ndí docó ndihi cue tée ní xica cuu ndihi ndí-án? ⁴Chi ní quíhu ndí vehe Yá Ndiòxí, te ní queheⁿ ndí pàá ní cuu í ndécú-án ní dácàhú ndí cue tée xica cuu ndihi ndí ní xexi ndí ndihi-güedé, te ñá túú tàú ndí sá dúcáⁿ càda ndí ni cùu, chi mee-ni cuè dútú tàú-güedé caxi-güedé pàá-án ní cùu —càchí-gá xáhaⁿ-gá xii-güedé.

⁵Te ní xáhaⁿ tùcu-gá:

—Te yúhú Tée cùu ñaní tnàhá-ndó nchaa-ndo, tnàhá-í ndécú ndíhí-í tnúhu nde íní sá cùu-í nchaa ñáyiú nàcuáa cadá-yu nduu ndetatú-ó-á —càchí-gá xáhaⁿ-gá xii-güedé.

Íhí tée ní yíchí íhí xio ndaha-xi

(Mt. 12:9-14; Mr. 3:1-6)

⁶Te íngá nduu diu-ni nduu ndetatú ñáyiú cuánguíhu Jèsús xití veñíhu dànehé-gá ñáyiú. Te xíaⁿ ndécú íhí tée cùhú ní yíchí nihnu íhí xio ndaha cùha-dé. ⁷Te cue tée dàcuaha ñaha xii ñáyiú nchaa tnúhu ní chidó tnùní ndí Moisés, ndihi cue tée cùu fariséú ndéhe-güedé ñuu cada tátna ñaha Jèsús xii tée cùhú-án nduu ndetatú-güedé-án cuendá níhí-güedé nàcuáa cada-güedé cacáⁿ cuéchi-güedé cuendá-gá. ⁸Dico Jèsús sa ní cutnùní íní-gá nàcuáa sàni íní-güedé, te ní xáhaⁿ-gá xii tée cùhú ndaha-xi-án:

—Ndacuíhí te ngúnutnì-n cuàdava tnuú-ndí-a —càchí-gá xáhaⁿ-gá xii-dé.

Te tée-án ní ndacuíhí-dé te ní ngúnutnì-dé cuàdava tnuú-güedé ndihi-gá. ⁹Te dàtnùní Jèsús ní xícáⁿ tnúhú-gá núú cue ñáyiú xíndecu-án, te xáhaⁿ-gá xii-yu:

—Cuíní-í cachí tnúhu-ndo nã cúú sã vãha cada-o nduu ndetatú-ó. ¿Íhí chiuⁿ vãha àdi íhí chiuⁿ cuehé, sá cadá tátna-o ñáyiú cùhú

àdi sá càhni-ó-yu? —càchí-gá xáhaⁿ-gá xii-yu.

¹⁰Te dàtnùní ní ndacoto-gá núú-yu nchaa-yu, te ní xáhaⁿ-gá xii tée cùhú ndaha-xi-án:

—Ndocani ndaha-n —càchí-gá xáhaⁿ-gá xii-dé.

Te ní ndocani-dé ndaha-dé, te òré-ni ní ndúha. ¹¹Te cue tée xíndecu-án sùúni ní cudééⁿ-güedé sá dúcáⁿ ní quide tátna Jèsús tée cùhú-án, te ní ngúta-güedé ndát-núhu-güedé ñuu nása cada ñaha-güedé xii-gá.

Jèsús cãxi-gá úxúú tnàhá cue tée dacuàha ñaha xii ñáyiú tnúhu-gá

(Mt. 10:1-4; Mr. 3:13-19)

¹²Te sáta dúcáⁿ ní cuu te ní xica Jèsús cuáháⁿ-gá xití yucu cuendá yacáⁿ càháⁿ ndihi-gá Tátá-gá Dútú Ndiòxí, te ní niú ní càháⁿ ndihi ñaha-gá. ¹³Te sáta ní túndaá, te ní cana-gá nchaa cue tée xica cuu ndihi-gá, te ní cãxi-gá úxúú tnàhá-güedé, te cue tée-án ní xáhaⁿ-gá sá díu-güedé cuu-güedé cue tée quíhíⁿ càháⁿ tnúhu-gá núú ñáyiú. ¹⁴Te duha xínani ndí úxúú cue tée-án. Té Xímú, àdi Pelú chi úú diu-dé, ndihi ñaní-dé té Ndríxí, ndihi té Jacobó, ndihi té Juáá, ndihi té Lipé, ndihi té Bartolómé, ¹⁵ndihi té Mátéu, ndihi té Mãxí, ndihi té Jacobó déhe té Àlfeú, ndihi íngá té Xímú tée ní cundíhi cue tée cananístá, ¹⁶ndihi té Jüdás ñaní té Jacobó, ndihi té Jüdás Iscarioté tée ní sáá nduu ní sáha cuendá ñáhá xii Jesús núú cue tée cùu úhú íní ñáhá xii-gá, duha xínani cue tée ní cãxi Jèsús ní xica cuu ndihi-gá.

Jèsús dánhéhe-gá cuehé víhi ñáyiú

(Mt. 4:23-25)

¹⁷Te Jèsús cuánuu-gá yucu núú ní sáá-gá-án, te ní ngava-gá íhí núú ndáá ndihi cue tée xica cuu ndihi-gá, te xíaⁿ ní ngúnutnì-gá. Te xíaⁿ ndécú dàva-gá cue tée xica cuu ndihi-gá ndihi vai ñáyiú ndetu ñahá-yu xii-gá, te ñáyiú-án vèxi-yu nchaa ñuu cáá distritú Jüdeá, ndihi ñuu Jerusalén, te ndecu ñáyiú véxi ndaa yuhu lamár yatni ñuu Tírú, ndihi ñuu Sidón. Te nchaa ñáyiú-án ní quexió-yu cuíní-yu cundedóho-yu nchaa tnúhu càháⁿ Jèsús, ndihi cuendá sá cuíní-yu ndúha-yu nchaa cuehé tnàhá-yu. ¹⁸Te tnàhá ñáyiú yíhi ñaha espíritú cundíhi yucu ñávãha. ¹⁹Te nchaa-yu cuíní-yu dacáa-yu ndahá-yu

tendàhá-yu Jèsús ní cùu cuendá sá nǐ nihí-yu tnúhu sá ndècu ndihi-gá tnúhu ndee ínì quidé tǎtna-gá nchaa ñáyiú cùhú.

Cuendá ñáyiú ío váha táhú-xi
(Mt. 5:1-12)

²⁰ Te Jèsús ní ndacoto-gá núú cuè téé xica cuu ndihi-gá, te ní xáhaⁿ-gǎ:

—Váha táhú nchaa nchòhó cue ñáyiú ndàhú, chi nduu táhú-ndó cùndecu-ndo núú táxí tnùnì Yá Ndiòxí.

²¹ Váha táhú nchaa nchòhó ñáyiú ío cuiní cundédóho tnúhu Yá Ndiòxí chi ío vii ío váha cuu ínì-ndó.

Váha táhú nchaa nchòhó ñáyiú ndàhyú sá ndìhú ínì-ndó, chi sáá nduu te cudíí ínì-ndó nì caa ni quíhíⁿ.

²² Váha táhú nchaa nchòhó ñáyiú na cùu úhú ínì ñáhá tnàha ñáyiú-xi, chi sáá nduu te vǎ dǎñá-gǎ-yu quíhu-ndo vènúhu, te cúcuèhé ñáhá-yu xii-ndo, te cachí-yu sá ñá díú ñáyiú váha cùu-ndo, te ducaⁿ càda ñáhá-yu xii-ndo sǎ cuendá yúhú Téé cùu ñaní tnáhá-ndó nchàa-ndo. ²³ Te òrè ducaⁿ na càda ñáhá-yu xii-ndo te cudíí víhí-ní ínì-ndó cùndecu-ndo, chi sáá nduu ndúu táhú-ndó sǎ ío váha càa ndecu andiú cundecu ndihi-ndo nduu na nasaá-ndó yàcáⁿ cundecu-ndo, chi ñá-ni ducaⁿ ní xóo cada ñaha cuè ñaní tnáhá-yu xii cue téé ní xóo cáháⁿ tnúhu Yá Ndiòxí ní xíndecu ndéé sanaha.

²⁴ Te ndàhú ní cuu nchaa ñáyiú cuica ñá túú sàndáá ínì ñáhá xii Yá Ndiòxí, chi vitna ío váha ndècú-yu, dico sáá nduu te nduu ndàhú-yu.

²⁵ Te ndàhú ní cuu tucu nchaa ñáyiú ñá túú tnàhí ná cúmǎní xii-xi vitna, chi sáá nduu quiní-yu tnúndóho tnúhu ndàhú.

Te ndàhú ní cuu nchaa ñáyiú cùdíí ínì-xi ndècu ichi cuehé ichi duha vitna, chi sáá nduu te ndáhyú-yu sá ndìhú ínì-yu.

²⁶ Te ndàhú ní cuu nchaa ñáyiú na càháⁿ váha dava-gá ñáyiú cuendá-xi, chi ducaⁿ ní xóo cáháⁿ váha-yu cuendá nchaa cue téé ní xóo dandàhú ñáhá xii ñáyiú ndéé sanaha, chi ní cachí-güedé sǎ càháⁿ-güedé tnúhu Yá Ndiòxí te ñá ndàá —càchí-gǎ xáhaⁿ-gǎ xii-güedé.

Cuu ínì-ó nchàa ñáyiú cùu úhú ínì ñáhá xii-o
(Mt. 5:38-48; 7:12)

²⁷ Te Jèsús ní xáhaⁿ-gǎ xii nchaa ñáyiú xíndecu-án:

—Nchaa nchòhó ñáyiú xíndedóho ñaha càchí tnúhu-í xii-ndo sǎ cúú ínì-ndó ñáyiú cùu úhú ínì ñáhá xii-ndo, te cada-ndo sǎ váha sǎ cúú-xí-yu cuèí nándí sǎ ná càdá ñáhá-yu xii-ndo. ²⁸ Te cácáⁿ táhú-ndó núú Yá Ndiòxí cuendá ñáyiú càháⁿ úhú ñáhá xii-ndo, ndihi cuendá ñáyiú tèe ñaha cuechi neñúú xii-ndo. ²⁹ Te núú ní canihá-yu xii-ndo ñáⁿ xito te cuiní tucú-yu canihá-yu, te daña-ndo na cànihá-yu, àdi núú na quèndeé-yu dóó ndíxí ndòdo-ndo, ndihi dúhnú-ndó, te daña-ndo na cànehé-yu quíhíⁿ. ³⁰ Te núú xicáⁿ-yu ñáⁿ sǎ nándíhi-yu núú-ndó te cuañaha-ndo, àdi quèndeé-yu ñáⁿ ndachiu-ndo, te vǎ nándácáⁿ-ndó núú-yu. ³¹ Te nchaa sǎ váha cuiní-ndó càda tnàha ñáyiú-ndo, te cada-ndo tnàhá-ndó ndìhí-yu.

³² Chi núú nchòhó ná cùu ínì-ndó mèe-ni ñáyiú cùu ínì ñáhá xii-ndo, te vǎ càchí-ndó sǎ ío váha quide-ndo, chi tnàhá nchaa ñáyiú ndècu ichi cuehé ichi duha ducaⁿ xíquidè-yu. ³³ Àdi mee-ni ñáyiú quide ñaha sǎ váha xii-ndo quide váha-ndó-yu, te vǎ càchí-ndó sǎ ío váha quide-ndo, chi tnàhá nchaa ñáyiú ndècu ichi cuehé ichi duha ducaⁿ xíquidè-yu. ³⁴ Àdi mee-ni ñáyiú sàni ínì-ndó nacoto ñaha xii-ndo cuañaha-ndo ñáⁿ sǎ xicáⁿ-yu núú-ndó, te vǎ cánì ínì-ndó sǎ ío quide váha-ndo, chi tnàhá ñáyiú ndècu ichi cuehé ichi duha dàsaⁿ nuú-yu ñáⁿ sǎ néhé váha-yu, te ndètu cahnu-ná-yu nacoto ñaha ñáyiú ní sáha nùú-yu-áⁿ. ³⁵ Dico nchòhó xínì nùhu-xi cuu ínì-ndó ñáyiú cùu úhú ínì ñáhá xii-ndo, te cada-ndo sǎ váha sǎ cúú-xí-yu, te cuañaha nùu-ndo ñáⁿ sǎ ná ndìhi-yu te núú xicáⁿ-yu núú-ndó, te vǎ cùndètu-ndo nacoto ñáhá-yu xii-ndo. Te ducaⁿ te ío-gǎ cuehé níhí-ndó cùndecu ndihi-ndo, te cuu ndisa-ndo dèhe Dítú Ndiòxí, chi ío càhnu ínì-gǎ sǎ cúú-xí nchàa ñáyiú ñá túú ndàcáⁿ táhú núú-gǎ cuendá nchaa sǎ váha quide-gǎ, ndihi sǎ cúú-xí nchàa ñáyiú ndècu ichi cuehé ichi duha. ³⁶ Te cunduu càhnu ínì nchòhó tucu dàtná càhnu ínì Tǎtá-ó Dítú Ndiòxí.

Vá càháⁿ cuèhé-ó cuendá tnàha ñáyiú-o
(Mt. 7:1-5)

³⁷ Te vǎ càháⁿ cuèhé-ndó cuendá sǎ quidé tnàha ñáyiú-ndo, te ducaⁿ te Yá

Ndióxi ná túu nà tñúhu cǔñaha-gǎ xii-ndo. Te vá cǔñaha-ndo xii ñáyiú sá quíhíⁿ-yu íiⁿ xichi núú ùhú núú ndàhú ndohó-yu cuèndá nchaa sá ñà túú vǎha quidé-yu, te ducaⁿ te Yá Ndióxi vá cǔñaha-gǎ xii-ndo sǎ tñàhá-ndó quíhíⁿ-ndó íiⁿ xichi núú ùhú núú ndàhú ndoho-ndo. Te chí cádá càhnu íni nchaa sá quidé-yu, te ducaⁿ te Yá Ndióxi cada càhnu íni ñàhá-gǎ xii-ndo tùcu. ³⁸ Te chí cuǎñaha xii ñáyiú núu ná cúú sǎ xíni ñùhú-yu, te dàtná chitu íiⁿ yicá súúni xidó coyo-ná, ducaⁿ tàxi Yá Ndióxi xii-ndo. Te nánicuáa na càda-ndo cada vǎha-ndo sǎ cúú-xí tñàha ñáyiú-ndo, te ñiú-ni ducaⁿ càda ñaha Yá Ndióxi xii-ndo —càchí Jèsús xǎhaⁿ-gǎ xii-yu.

³⁹ Te dàtnúni ní cani-gá íiⁿ cuèndú núú-yu ñacuáa tecú tñùni-yu tñúhu-gá, te xǎhaⁿ-gǎ:

—Íiⁿ téé cuáá chí ñà ndácú-dé cuita nehe-dé íngá téé cuáá, chí núu ducaⁿ na càda-güedé te ndí ndùú-güedé ngau-nihnu-güedé déhva. ⁴⁰ Te ní íiⁿ landú yíhi scuèlá ñà túú cùnuu-gá-güexi dàcúúxi mèstrú-güexi, te ndéé núu na cùtúha vǎha-güexi, te dàtnúni mútnahá-güexi téé dànehé ñàhá xii-güexi.

⁴¹ Te na càchí tñúhu-í xii-ndo sǎ nchaa cuéchi quide ñáyiú cùu-xi datná íiⁿ mihi líhli. ¿Te ná cuèndá ndéhé-ndó íiⁿ sá ñà túú vǎha quide tñaha ñáyiú-ndo, te mee-ndo vihi-gá quidé-ndó-í? Te sá dúcáⁿ quide-ndo te cada íni-ndó sǎ ndéhé-ndó dàtná íiⁿ mihi líhli ñùhu núú tñàha ñáyiú-ndo, te mee-ndo ñùhu íiⁿ mihi càhnu-gá núú-ndó. ⁴² Te núu na nàcanu ichi-ndo tñaha ñáyiú-ndo cuèndá sá ñà túú quide vǎha-yu ndécú-yu te mee-ndo vihi-gá quidé-ndó ñà, te cada íni-ndó sǎ xǎhaⁿ-ndo xii-yu sá nátava-ndo mihi líhli ñùhu núú-yu, te mihi càhnu ñùhu núú méé-ndó ñà túú quide cuèndá-ndó. ¿Te sá dúcáⁿ quide-ndo te ío dàndahú-ndó mée-ndo sá quidé ndáá-ndó te ñà ndáá sá quidé ndáá-ndó! Te xini ñùhu-xi díhna-gá dañà-ndo nchàa sá ñà túú vǎha quide-ndo, te dàtnúni ducaⁿ te cutnùni vǎha íni-ndó ñacuáa macanu ichi-ndo tñàha ñáyiú-ndo.

Ndi dííⁿ núú yutnu xini-ó nǎ yutnu cùu-xi cuèndá sá sǎvidí-xi
(Mt. 7:17-20; 12:34-35)

⁴³ Te ñà túú ní íiⁿ yutnu vǎha te quini-ó cùuⁿ sǎvidí sá ñà túú vǎha, te ní íiⁿ yutnu sá ñà túú vǎha, te quini-ó cùuⁿ sǎvidí vǎha, chí mee-ni sǎvidí sá ñà túú vǎha cùuⁿ. ⁴⁴ Te ndí dííⁿ núú yutnu xini-ó nǎ yutnu cùu-xi cuèndá sá sǎvidí-xi, chí ñà túú xini-ó cùuⁿ ngúxí íiⁿ tnu ñùu, te ní ñà túú xini-ó cùuⁿ ndéhé yoho yǎha stilé díquí íiⁿ yoho yǎha cutexínu. ⁴⁵ Te nchaa ñáyiú vǎha íni-xi càháⁿ-yu tñúhu vǎha, chí ñiú-ni tñúhu vǎha tñàhí-án ñùhú íni-yu, te nchaa ñáyiú ñà túú vǎha íni-xi càháⁿ cuèhé-yu, chí ñiú-ni tñúhu cuèhé tñàhí-án ñùhú íni-yu, chí nchaa sá ñùhú íni-yu te xǎⁿ càháⁿ-yu.

Íiⁿ vehe ndècu cimientú-xi ndíhi íiⁿ vehe ñà túú cimientú-xi

(Mt. 7:24-27)

⁴⁶ ¿Te ná cuèndá càchí-ndó sǎ yǔhú cùu-í Yáa cúú Xitohó-ndó te ñà túú quide-ndo nchaa nacuaá càháⁿ-í-í? ⁴⁷ Te na càchí tñúhu-í xii-ndo cuèndá ñáyiú tǔha ñaha xii-í, chí ñáyiú-án sácúndedóho-yu nchaa tñúhu càháⁿ-í te tñí-yu. ⁴⁸ Te ñáyiú-án cúú-yu dàtná íiⁿ téé ní dácáá íiⁿ vehe, chí téé-án díhna-gá ní xete-dé ndéé ní tñahá-dé yúú cáxíⁿ te dàtnúni ní tava-dé cimientú-xi, te òré ní cuuⁿ dáú, te ní ndee ndute ñùhu, te ní ndacáⁿ-xi ndéé núú cáá vehe-án, dico ñà túú ní ndàcu-xi cuidu-ó, te ducaⁿ chí téé ní dácáá vehe-án ní tava-dé cimientú-xi núú yǔú cáxíⁿ. Duha sǎtnahá-xi cùu nchaa ñáyiú sácúndedóho tñúhu càháⁿ-í te tñí-yu. ⁴⁹ Te ñáyiú sácúndedóho tñúhu càháⁿ-í te ñà túú tñí-yu, ñáyiú-án cúú-yu dàtná íiⁿ téé ní dácáá íiⁿ vehe, te ñà túú ní tava-dé cimientú-xi, te òré ní cuuⁿ dáú, te ní ndee ndute ñùhu, te ní ndacáⁿ-xi ndéé núú cáá vehe-án, te íi-ni ní xido-xi vehe-án cuèndá sá ñà túú ní quene cimientú-xi. Duha sǎtnahá-xi cùu nchaa ñáyiú sácúndedóho tñúhu-í te ñà túú cuini-yu tñí-yu —càchí-gá xǎhaⁿ-gǎ xii-yu.

7

Jèsús quidé tǎtna-gá íiⁿ téé xinu cuechi núú íiⁿ téé cùu capitáⁿ

(Mt. 8:5-13)

¹ Te sáta ní yáha ní càháⁿ Jèsús ndíhi ñáyiú, te cuáháⁿ-gá ñuú Capèrnaúm. ² Te yàcáⁿ ndécú íiⁿ téé cùu capitáⁿ, te cùhú íiⁿ téé xinu cuechi núú-dé téé ío-gá cúú

iní-dé, te sa ndècu-ná-dé sá cùu-dé. ³ Te òré ní nǎhí tée cùu capitáⁿ-áⁿ tñúhu cuendá Jèsús, te ní tendaha-dě ìⁿ úú cue tée cùu sacuéhé nùú ñáyiú isràél cuáháⁿ-güedé cáháⁿ ndàhú-güedé nùú-gá nùu vá cündèe iní-gá quíhíⁿ-gá cada tátna-gá tée xínu cuechi nùú-dě-áⁿ. ⁴ Te ní quexio-güedé nùú ndécú Jèsús, te ní nguíta-güedé cáháⁿ ndàhú víhí-güedé nùú-gá, te xáhaⁿ-güedé:

—Tée cùu capitáⁿ ní cachí-dé véxi-ndí nùu vá cündèe iní-n quíhíⁿ-n càda tátna-n ìⁿ tée xínu cuechi nùú-dě chi cùhú-dé, te tàù ndisa-n càda-n nacuaá cáháⁿ capitáⁿ-áⁿ, ⁵ chi tée-áⁿ ío cùu iní ñáhá-dě xii nchaa nchúhú ñáyiú isràél te diu-dé ní táuchíúⁿ-dě ní sáá veñúhu-ndí —cachí-güedé xáhaⁿ-güedé xii-gá.

⁶ Te sáta dúcáⁿ te Jèsús ní xica-gá cuáháⁿ-gá ndíhi-güedé, te òré tá cüyatni-gá vehe nùú ndécú tée cùhú-áⁿ cuáháⁿ, te tée cùu capitáⁿ-áⁿ ní xáhaⁿ-dě xii ìⁿ úú cue tée cáháⁿ ndíhi-dé:

—Quíhíⁿ-ndó cñaha-ndo xii Yaa cùú Mèstrú sá cachí-í sá ñà túú nà cani iní-gá, chi ñà túú tàù-í sá quíhu-gá ndéé xítí vehe-í, ⁷ chi nì sá cùnú ndécú mèe-í-gá ñà túú ní cüyí-í. Nùu xíáⁿ cñaha-ndo xii-gá sá ná cáháⁿ-ni-gá sá ndúha tée xínu cuechi nùú-í-a te ndúha-dé. ⁸ Chi yúhú ndécú cue tée tàxi tñuní ñáhá xii-í, te ducaⁿ yúhú tucu ndècu cue sandadú táxi tñuní-í. Te òré xáhaⁿ-í xii ìⁿ-dé quíhíⁿ-dé ìⁿ chiuⁿ te cuáháⁿ-dé, te òré xáhaⁿ-í xii íngá-dé quixi-dé te véxi-dé, te òré xáhaⁿ-í xii tée xínu cuechi nùú-í cada-dé ìⁿ chiuⁿ te quide-dé. Duha cachí-í cñaha-ndo xii-gá —cachí-dé xáhaⁿ-dě xii cue tée cáháⁿ ndíhi-dé-áⁿ.

⁹ Te sáta dúcáⁿ ní xáhaⁿ-güedé xii Jèsús, te ní cuñúhu-gá nchaa tñúhu ní cáháⁿ tée cùu capitáⁿ-áⁿ, te ní nchócótó-gá nùú nchaa ñáyiú nchícúⁿ ñáhá xii-gá cuáháⁿ, te ní xáhaⁿ-gá:

—Na cachí tñúhu ndáá-í xii-ndo sã vátá quíní-gá-í ní ìⁿ ñáyiú isràél, ñáyiú ío váha sàndáá iní-xi Yá Ndióxi dátna sàndáá iní ñáhá tée-áⁿ xii-gá —cachí-gá xáhaⁿ-gá xii-yu.

¹⁰ Te òré ní ndexio cue tée nèhe tñúhu-áⁿ ní sáháⁿ nùú Jèsús, te sa ní ndúha tée cùhú-áⁿ.

Jèsús dándòto-gá dèhe ìⁿ ñaha quèé

¹¹ Te sáta dúcáⁿ ní cuu te ní xica Jèsús cuáháⁿ-gá ìⁿ nùu nání Nàin, ndíhi cue tée xica cuu ndíhi-gá, ndíhi vài ñáyiú. ¹² Te òré ní sáá-gá yuhu nùú-áⁿ, te ní xiní-gá nchídó-güedé ìⁿ ndíyi cuáháⁿ chindúxi ñaha-güedé, te ndíyi-áⁿ cùú dèhe ìⁿ ñaha quèé, te ìⁿ dui ducaⁿ-ni dèhe-aⁿ ndècu ní cuu te ní xíhí-dé. Te ío cuéhé ñáyiú cuáháⁿ chindúxi ñaha. ¹³ Te òré ní xiní ñáhá Jèsús xii-aⁿ ndàhyú-aⁿ te ní cundàhú iní ñáhá-gá, te ní xáhaⁿ-gá:

—Vá ndàhyú-n —cachí-gá xáhaⁿ-gá xii-aⁿ.

¹⁴ Te ní dáyatni-gá cájá nùhú ndíyi-áⁿ te ní dácáá-gá ndaha-gá te ní tendaha-gá cájá-áⁿ, te ní nguíhí cue tée nchido ñaha-áⁿ. Te ní xáhaⁿ-gá xii ndíyi-áⁿ:

—Tée cuechi, yúhú cachí-í sá ndácóo-n —cachí-gá xáhaⁿ-gá xii ndíyi-áⁿ.

¹⁵ Te tée ní xíhí-áⁿ ní nucúnucóo-dé te ní nguíta-dé cáháⁿ-dè, te Jèsús ní nacuaá cuendá ñáhá-gá xii-dé ndaha ñáná-dè. ¹⁶ Te sá dúcáⁿ ní quide Jèsús ní xiní-yu te ío ní yúhú-yu, te ní xítñahá-yu:

—Ío cãhnu cuu Yá Ndióxi chi ìⁿ tée cáháⁿ tñúhu-gá ní quexio nùú ndécú-ó —cachí-yu xítñahá-yu.

Te ní xítñaha tucú-yu:

—Yá Ndióxi véxi-gá chindee ñaha-gá xii nchaa nchoo ñáyiú cùu cuendá-gá —cachí-yu xítñahá-yu.

¹⁷ Te nchaa nùú distrítú Jùdeá, ndíhi dava-gá nùú ní níhí-yu tñúhu nàcuáa ní quide Jèsús.

Cue tée ní tendaha té Juáa cuáháⁿ nùú ndécú Jèsús

(Mt. 11:2-19)

¹⁸ Te cue tée xica cuu ndíhi té Juáa ní xáhaⁿ-güedé xii-dé nchaa sá ní quide-gá, nùu ní cana-dé úú tñahá-güedé ¹⁹ cuendá cñaha-dé quíhíⁿ-güedé nducu tñúhu-güedé nùú Jèsús, te nùu sá díú-gá cùú-gá Crístú Yaa ní tendaha Yá Ndióxi véxi ñuyú-a àdi sá cündètu nahi-ni-güedé mei Yáá-áⁿ. ²⁰ Te òré ní quexio cue tée ní tendaha tã Juáa nùú ndécú Jèsús, te xáhaⁿ-güedé xii-gá:

—Té Juáa tée dàcuandute ñaha xii ñáyiú ní tendaha ñaha-dé xii-ndí, véxi-ndí cacaⁿ tñúhú-ndí múú-n, nùu sá díú-n cùu Crístú Yaa quixi ñuyú-a, àdi sá cündètu-ndí mei

Cristú cächí-dé —cächí-güedé xáhaⁿ-güedé xii-gá.

²¹ Te mei òré ní quexio-güedé-án nǐ quide tátna Jèsús vai ñáyiú cùhú, te davá-yu cáhú víhí tñàhá-yu, te ndi dííⁿ ndi dííⁿ núú cuèhé tñàhá-yu ííⁿ ííⁿ-yu, te cue ñáyiú yíhi ñaha espíritú cúndíhi yucu ñávaha ní queñuhu-gá espíritú-án yiqui cùñú-yu, te ío vai ñáyiú cuáá ní nacaáⁿ-gá núú-yu. ²² Te Jèsús ní xáhaⁿ-gá xii-güedé:

—Chí cuánuhú te cani-ndo cuèndú núú tǐ Juáá nchaa sá nǐ xiní-ndó quide-í, ndíhi nchaa nàcuáa ndúu tñúhu ní cáháⁿ-í ní xíndedóho-ndo. Te cúñaha-ndo xii-dé sá quidé tátna-í núú cuè ñáyiú cuáá, te quide tátna-í cue ñáyiú yacua, ndíhi cue ñáyiú tñàhá cuèhé sá dátèhyú nihnu-xi yiqui cùñú-yu, ndíhi cue ñáyiú doho, nchaa ñáyiú-án quide tátna-í te ndúha-yu, te ndéé cue ñáyiú sa ní xíhi dándòto-í cúñaha-ndo xii-dé, te cúñaha tìcu-ndo xii-dé sá ndècuu-í dánèhé-í nchaa ñáyiú ndàhú tñúhu sá sánú ìchi ñaha xii-yu nàcuáa naníhi tàhú-yu. ²³ Te cúñaha tìcu-ndo xii-dé sá ío váha táhú nchaa ñáyiú ñá túú quide sáá íni nchaa tñúhu cáháⁿ-í, duha cúñaha-ndo xii-dé —cächí-gá xáhaⁿ-gá xii-güedé.

²⁴ Te sáta nǐ yáha-güedé cuánuhú-güedé, te ní ngúita Jèsús ní cáháⁿ-gá núú ñáyiú cuèndá té Juáá, te xáhaⁿ-gá xii-yu:

—Nchòhó ní sándèhé-ndó ííⁿ tée ndècu xití yucu, te tée-án ñá túú sàni ííⁿ sàni úú íni-dé, chi ñá túú quide-dé dátna quidé nchaa ité náhnú cuáháⁿ-xi duha cuáháⁿ-xi dàcáⁿ òré quéné tächí. ²⁵ Te ní ñá túú ní sándèhé-ndó ííⁿ tée nihnu dóó váha dóó víi càa. Te nchòhó xiní-ndó sá ñáyiú sàcuíhnu dóó váha dóó víi càa ñá túú nǎ cùmǎni xii-yu, te nchaa ñáyiú-án ndècú-yu vehe cue tée cùnúu yíndaha ñaha xii ñáyiú.

²⁶ Dico nchòhó chí ní sándèhé-ndó ííⁿ tée cáháⁿ tñúhu Yá Ndióxi. Te ndáá sá díú tée cáháⁿ tñúhu-gá cúú-dé dico cùnúu-gá-dé dácúúxi dàva-gá cue tée cáháⁿ tñúhu-gá. ²⁷ Te díu cuèndá té Juáá-án cáháⁿ-xi núú tütú Yá Ndióxi nàcuáa ní xáhaⁿ-gá xii Cristú, te duha ní xáhaⁿ-gá:

Tendaha-í ííⁿ tée cáháⁿ tñúhu-í codonúu-dé núú-n cuèndá dátúha-dé ñáyiú cuèndá quíndáá íni-yu tñúhu-n.

Duha ní xáhaⁿ-gá, te ducaⁿ nǐ ngódó tñúní núú tütú-gá. ²⁸ Te na cächí tñúhu-í xii-ndo sá ní ííⁿ cue tée ñuyú-a ñá túú cùnúu-güedé dátna cùnúu té Juáá tée dàcuandute ñaha xii ñáyiú. Te nchaa ñáyiú sa ta ndíhu ndaha ñaha Yá Ndióxi vitna cuáháⁿ cùnúu-gá-ni tucú-yu dácúúxi tǐ Juáá cuèí cùú-yu ñáyiú ñá túú cùnúu dácúúxi dàva-gá ñáyiú yíndaha-gá —cächí Jèsús xáhaⁿ-gá xii-yu.

²⁹ Te sá dúcáⁿ ní cáháⁿ Jèsús, núu nchaa ñáyiú ní dácúandute té Juáá ní cachí-yu sá ío váha quide Yá Ndióxi, te díu-ni ducaⁿ ní cáháⁿ cue tée cuíhna íni-xi quide cobrá ñáhá xii ñáyiú cuèndá impuèstú, cue tée ní dácúandute-dé. ³⁰ Dico cue tée cùu fariséú, ndíhi cue tée dàcuaha ñaha xii ñáyiú nchaa tñúhu ní chídó tñúní ndíi Moisés, cue tée ñá túú ní dácúandute té Juáá ñá túú ní tñàhá íni-güedé cada-güedé nchaa sá váha cuíni Yá Ndióxi. ³¹ Te Xítoho Jesucristú ní xáhaⁿ-gá xii-yu:

—Na cächí tñúhu-í xii-ndo nàcuáa sǎt-nahá-xi cùu ñáyiú ndècu vitna. ³² Chí ñáyiú-án cúú-yu dátna cue landú sácõ núú yáhu dàdiqui-güexi te níhi cáháⁿ-güexi, te xítñaha-güexi: “Ní tíú-ndí yáa ndíhi vílu te ñá túú ní cuíni-ndó càta-ndo. Te ío yica íni ní xita yuhu-ndí te ñá túú ní ndáhyú-ndó”, cächí-güexi xítñaha-güexi. Te ducaⁿ sǎt-nahá-xi cùu ñáyiú ndècu vitna. ³³ Te té Juáá tée ní xóo dácúandute ñaha xii ñáyiú ío ndàhú ní xóo caxi-dé, te ní ñá túú ní xóo coho-dé ndudí ndéhé yoho yàha stilé sá sá ní nduu-xi ndidí, te ní cachí-ndó sá ní xíndecu ndíhi-dé espíritú cúndíhi yucu ñávaha. ³⁴ Te sáta nǐ quexio yúhú Tée cùu ñani tñàhá-ndó nchaa-ndo, te xèxi-í xíhi-í ndècú-í te cächí-ndó sá cúú-í tée xèxi víhi te xíhi víhi-í. Te cächí tucú-ndo sá cúú-í tée xica cuu ndíhi cue tée cuíhna íni-xi quide cobrá ñáhá xii ñáyiú cuèndá impuèstú, ndíhi nchaa dava-gá cue tée ndècu íchi cuehé íchi duha, duha cächí-ndó. ³⁵ Te ñáyiú ní tñahá tñúhu ndíhi Yá Ndióxi, ñáyiú-án quidé-yu nàcuáa cutñúní sá méé-gá ío ndècu ndíhi-gá sá xiní tñúní-gá —cächí-gá xáhaⁿ-gá xii-yu.

Jèsús ndècú-gá vehe ííⁿ tée cùu fariséú tée nàni Xímú

³⁶ Te ííⁿ tée cùu fariséú ní cáháⁿ-dé Jèsús vehe-dé caxi-gá, te òré ní quexio-gá te

cuánguihu-gá mèsá. ³⁷ Te xíáⁿ núcòo-gá ní sáá ìⁿ ñadìhí te diu-nj ñaha ñúú-áⁿ cúú-áⁿ, te ndècu-aⁿ ichi díí ìní, te sá ní ñihí-aⁿ tnúhu sá cuángaxi Jèsús vehe tée cùu fariséú-áⁿ, núu ñehe-aⁿ ìⁿ yoó chitu àcítí sàháⁿ tnámí. ³⁸ Te ní ngóo-aⁿ ìⁿ xio díñi Jèsús, te ní ngúíta-aⁿ ndàhyú-aⁿ te ndìhi ndute núú-aⁿ ní naquete-aⁿ sàhá-gă. Te dătnúⁿ ní nadayichí-aⁿ ndìhi idi díquí-aⁿ, te ní teyuhu-aⁿ sàhá-gă, te ní chíhi ñaha-aⁿ àcítí sàháⁿ tnámí-áⁿ. ³⁹ Te sá dúcáⁿ ní quide-aⁿ ní xini tée cùu fariséú tée ní cáháⁿ ñáhá xii-gá-áⁿ núu ní sani iní-dé: “Te núu dicó ndisa tée càháⁿ tnúhu Yá Ndiòxí cúú tée-a ña, te sa cutnúⁿ iní-dé yoo cùu ñaha tnándéé ñáhá xii-dé, àdi ná ñáiyu cùu-aⁿ, te dicó ìⁿ ñaha ndècu ichi díí ìní cúú-áⁿ”, duha ní sani iní-dé. ⁴⁰ Te Jèsús ní xáhaⁿ-gă xii-dé:

—Xímú, ndècu ìⁿ tnúhu cachí tnúhu-í xii-n —càchí-gá xáhaⁿ-gă xii-dé.

Te tée cùu fariséú-aⁿ xáhaⁿ-dë xii-gá:

—Cachí tnúhu, Mèstrú —càchí-dë xáhaⁿ-dë xii-gá.

⁴¹ Te Jèsús ní xáhaⁿ-gă:

—Ní xíndecu ìⁿ tée ní xóo dasaⁿ núu díhúⁿ, te ní xítaú úú tnàhá-güedé núú-dë. Te ìⁿ-dë ní sáha-dé úhúⁿ ciëndú díhúⁿ denáriú, te ingá-dé ní sáha-dé údico úxí. ⁴² Te ñá ní ñihí-güedé nacháhu-güedé núú-dë, te tée ní sánúu ñaha-áⁿ ní quide càhnu iní-dé ndi ndùú-güedé. Te vitna cachí-ò tucu te núu ndéda càa-güedé cúú ìní ñáhá-gă-güedé xii-dé —càchí-gá xáhaⁿ-gă xii-dé.

⁴³ Te ní xáhaⁿ tē Xímú-áⁿ:

—Sànuu sá tée tàú vâi-gá díhúⁿ ò-gá cúú ìní-dé tée ní sánúu ñaha díhúⁿ-áⁿ —càchí-dé xáhaⁿ-dë xii-gá.

Te ní xáhaⁿ Jèsús:

—Sá ndáá càháⁿ-n —càchí-gá xáhaⁿ-gă xii-dé.

⁴⁴⁻⁴⁶ Te Jèsús ní ndacoto-gá núú ñadìhí-áⁿ, te ní xáhaⁿ-gă xii tē Xímú-áⁿ:

—¿Ndèhe-n nacúáa quide ñadìhí-a ñă? Chí cuánguihu-í vehe-n, dico ñá túú ní tàxi-n ndute ndoo sàhá-í, te ní ñá túú ní tēyuhu ñaha-n, te ní ñá túú ní chíhi-n acítí díquí-í, dico ñadìhí-a ní naquete-aⁿ ndìhi ndute núú-aⁿ sàhá-í, te ní nadayichí-aⁿ ndìhi idi díquí-aⁿ, te nuu núu teyuhu-aⁿ sàhá-í, te ní chíhi-aⁿ acítí sàháⁿ tnámí sàhá-í. ⁴⁷ Te na càchí tnúhu-í xii-n sá

ò cùu iní ñáhá-áⁿ xii-í, te núu xíáⁿ cút-núⁿ iní-ó sá cuéi ío vâi sá cuèhé sá dúhá ní quide-aⁿ, dico Yá Ndiòxí sa ní quide càhnu iní ñáhá-gă xii-aⁿ. Chí Yá Ndiòxí quidé càhnu iní-gá ñáiyu cuéi vâi àdi sacú cuéchi-yu, te núu sacú cuéchi-yu te sacú cúú ìní ñáhá-yu xii-í —càchí-gá xáhaⁿ-gă xii-dé.

⁴⁸ Te ní xáhaⁿ-gă xii ñadìhí-áⁿ:

—Sa ní quide càhnu iní-í nchaa cuéchi-n —càchí-gá xáhaⁿ-gă xii-aⁿ.

⁴⁹ Te cue tée xínucóo ndìhi-gá xít-ñaha-güedé:

—¿Ná tée cùu tée-a núu nándi sá quidé-dë, te ndéé nchaa yíca cuéchi ñáiyu quide cahnu iní-dé-í? —càchí-güedé xítñaha-güedé.

⁵⁰ Te Jèsús ní xáhaⁿ tùcu-gá xii ñadìhí-áⁿ:

—Sa ní cácu nihnu-n núú ùhú núu ndàhú vitna chí ní sándáá iní ñáhá-n xii-í, te vitna cuanùhú te ñá túú-gă ná cani iní-n —càchí-gá xáhaⁿ-gă xii-aⁿ.

8

Ñáiyu díhí ní chindee ñaha xii Jèsús

¹ Te sáta dúcáⁿ ní cuu te Jèsús ní xica-gá cuáháⁿ-gá titní víhí ñúú náhnú, ndìhi ñúú líhli dānehé-gá ñáiyu nàcuáa ndihu ndaha ñaha Yá Ndiòxí xii-yu. Te cuáháⁿ ndìhi-gá ndi úxúú tnàhá cue tée xica cuu ndìhi-gá, ² ndìhi ìⁿ úú ñáiyu díhí ní quide tátna-gá ní xíhi ñaha espíritú cündìhi yucu ñávàha, ndìhi ñáiyu tnàhá dava-gá cuèhé ùhú ní cùu. Te xíáⁿ tnàhá tucu ìⁿ ñajha nàni Mariá Magdaléná, te ñaha-áⁿ ní xíhi ñaha úsá espíritú cündìhi yucu ñávàha xii-aⁿ ní cùu, te ní quee ñaha-xi. ³ Te tnàhá ìⁿ ñaha nàni Juáná ñadìhí ìⁿ tée nàni Chúza tée ní cunuu ní xinu cuechi vèhe té Hèrodés, ndìhi ingá ñaha nàni Susaná nchaa ñáiyu-áⁿ ní chindee ñáhá-yu xii-gá ndìhi nchaa sá ndécú ndìhi-yu, te diu-ni ducaⁿ ní quide vâi-gá tucu ñáiyu nchicúⁿ ñáhá xii-gá cuáháⁿ.

Nàcuáa quide tée cuángacáⁿ trùú
(Mt. 13:1-9; Mr. 4:1-9)

⁴ Te ío vâi ñáiyu ndaa ñúú ní tacá-yu núu ndécú Jèsús, te ní ngúíta-gá ní cani-gá ìⁿ cuèndú núú-yu cuèndá tecú tnùní-yu tnúhu-gá, te xáhaⁿ-gă xii-yu:

⁵ —Híⁿ téé cuángacáⁿ-dé tríú. Te òré ní ngúíta-dé dǎngoyo-dé tríú-án te dava ní quene ndava ní ngava ndéé ichi, te ní xénihu ñáyiú, te ní xiní tǐláá te ní nadatacá-güedi. ⁶ Te dava ní ngava ñuhu yadi núú yíhí vihi yúú, te ní xínu-xi dico núú sácú-ni nduu te ní yíchí-xi, chí ñá túú cǎhyo yíhi. ⁷ Te dava ní ngava núú yúú ndíquíⁿ tnu ñhu, te híⁿnuu-ní ní xínu-xi ndíhi tnu ñhu-án, te tnu ñhu-án ní dánáá-xí nchàa tríú sá ní xínu-án. ⁸ Dico dava tríú-án ní ngava-xi núú ndécú ñuhu cocoⁿ, te xǎⁿ ní xínu-xi te ní sahu-xi, te ío váha ní cuu, chí núú híⁿ-ní tríú te ní ngúíhi yoco-xi híⁿ cièndú tríú-xi —càchí-gá xáhaⁿ-gǎ xíí-yu.

Te níhi ní cáháⁿ-gá ní xáhaⁿ tùcu-gá xíí-yu:

—Nchaa nchòhó ñáyiú ní xíndedóho tnúhu ní cáháⁿ-í-a, te ío váha chí cuàha cuèndá —càchí-gá xáhaⁿ-gǎ xíí-yu.

Nàcuáa quèe-xi tnúhu ní cáháⁿ Jèsús
(Mt. 13:10-17; Mr. 4:10-12)

⁹ Te cue téé xica cuu ndíhi Jèsús ní xícáⁿ tnúhú-güedé núú-gǎ núu nása quèe-xi cuèndú ní caní-gá núú ñáyiú. ¹⁰ Te ní xáhaⁿ-gǎ xii-güedé:

—Nchòhó chí sa càchí tnúhu Yá Ndióxi xii-ndo híⁿ sá vǎtǎ quíni-gǎ-ndó, chí càchí tnúhu-gá nàcuáa cada-gǎ ndíhu ndaha-gǎ ñáyiú, dico dava-gǎ ñáyiú caní-í mee-ni cuèndú núú-yu, chí cuèi na quíni-yu nchaa nàcuáa cuu dico ní vá cútñuní iní-yu ná cuèndá ducaⁿ cùu, ádi cuèi na cündedóho-yu dico ní vá tècú tñuní-yu —càchí-gá xáhaⁿ-gǎ xii-güedé.

Jèsús cáháⁿ-gǎ nàcuáa quèe-xi tnúhu
cuèndá téé cuángacáⁿ tríú
(Mt. 13:18-23; Mr. 4:13-20)

¹¹ Te xáhaⁿ tùcu-gǎ xii-güedé:

—Duha quèe-xi cuèndú ní caní-í núú-ndó, chí tríú ní sacáⁿ téé-án cúú-xí dàtná tnúhu Yá Ndióxi. ¹² Te tríú sá ní quene ndava ní ngava ndéé ichi-án, xǎⁿ cúú-xí dàtná ñáyiú ní quée iní-xi tnúhu Yá Ndióxi, dico sácúíhna cuàháⁿ-xi xòcani-xi tnúhu-gǎ iní-yu cuèndá sá vá quíndáá iní-yu, te vá nánihí tǎhú-yu. ¹³ Te tríú sá ní ngava ñuhu yadi núú yíhí vihi yúú, xǎⁿ cúú-xí dàtná ñáyiú ní xíndedóho tnúhu Yá Ndióxi te díí iní ní tñí-yu tnúhu-gǎ, dico òré ná dàcáháⁿ ñáhá yícu ñáváha xíí-yu

nándi cadá-yu, te dàña nihnú-yu tnúhu-gǎ chí ñá níhi ndéé-yu canchicúⁿ nihnú-yu nàcuáa cáháⁿ tnúhu-gǎ. ¹⁴ Te tríú sá ní ngava núú yúú ndíquíⁿ tnu ñhu-án, xǎⁿ cúú-xí dàtná ñáyiú ní tecú dóho-xi tnúhu Yá Ndióxi, dico cuèé cuèé ní nacuaaá-yu tnúhu-gǎ, chí cuèndá mee-ni sǎ cúú-xí mèè-yu ñuhu iní-yu, ndíhi cuèndá sá ío sàni iní-yu cuu cuicá-yu, ndíhi cuèndá sá ío cùdíí iní-yu nchaa sá ío ñuyíú-a núú xǎⁿ áúⁿ ná cuu ní xíndedóho-yu tnúhu-gǎ. ¹⁵ Dico tríú sá ní ngava núú ndécú ñuhu cocoⁿ, xǎⁿ cúú-xí dàtná ñáyiú váha iní-xi ní xíndedóho tnúhu Yá Ndióxi chí ñá túú dàña nihnú-yu, te ní yùhu ní iní-yu quidé-yu nchaa nàcuáa cáháⁿ tnúhu-gǎ.

Nàcuáa quidé-yu iti
(Mr. 4:21-25)

¹⁶ Te ñá túú ní híⁿ ñáyiú tènñuhú-yu híⁿ iti te dàdáhu-yu, ádi chiváha-yu híⁿ caha cǎmá, chí tàxi ndecú-yu núú ñihu cuèndá cutñuní núú nchàa ñáyiú ndècu vehe. ¹⁷ Te ní híⁿ tnúhu sá ñá tècú tñuní ñáyiú vitna vá càchí-ó sǎ vá tècú tñuní-yu chí dacuèí sá tècú tñuní-yu, te ní híⁿ tnúhu sá càchí-ó cùu yuhu vitna vá cúú yùhu chí dacuítíí sǎ quée tùu-xi núú ñáyiú.

¹⁸ Te chí cündedóho váha tnúhu na cáháⁿ-í-a. Nchaa ñáyiú sàndáá iní ñáhá xii Yá Ndióxi ío-gǎ cuita quíndáá-gǎ iní ñáhá-yu xii-gǎ quíhíⁿ, te nchaa ñáyiú ñá túú sàndáá iní ñáhá xii-gǎ uuⁿ-gǎ cuita cuu sáa-gǎ iní-yu núú-gǎ quíhíⁿ —càchí-gǎ xáhaⁿ-gǎ xii-güedé.

Cue ñani Jèsús ndíhi náná-gǎ
(Mt. 12:46-50; Mr. 3:31-35)

¹⁹ Te ní quexio náná Jèsús ndíhi cue ñaní-gǎ vehe núú ndécú-gǎ, te ñá ndácú-yu cáháⁿ ndíhi ñáhá-yu xii-gǎ chí ío cuéhé ñáyiú ndècu núú ndécú-gǎ. ²⁰ Te híⁿ ñáyiú xíndecu-án ní dáýáha-yu tnúhu núú-gǎ, te xǎháⁿ-yu:

—Ní quexio náná-n ndíhi cue ñaní-n xínutñí-yu quehé, te cuíni-yu cáháⁿ ndíhi ñáhá-yu xii-n —càchí-yu xǎháⁿ-yu xii-gǎ.

²¹ Te ní xáhaⁿ-gǎ:

—Nchaa ñáyiú sácündedóho tnúhu Yá Ndióxi te quidé-yu nchaa nàcuáa cáháⁿ tnúhu-gǎ, ñáyiú-án cúú-yu dàtná náná-í

ndihi dàtná cue ñaní-í —càchí-gá xáhaⁿ-gã xii ñáiyu ní dáyáha tnúhu núu-gã-áⁿ.

Jèsús ngání-gã táchí ndihi ndute làgúná
(Mt. 8:23-27; Mr. 4:35-41)

²² Te iiⁿ nduu ní queé Jèsús bàrcú ndihi cue tée xica cuu ndihi-gá, te ní xáhaⁿ-gã:

—Chí ná quíhíⁿ-ó ndàa ingá xio yuhu làgúná —càchí-gá xáhaⁿ-gã xii-güedé.

Te cuáháⁿ-güedé ndihi-gá. ²³ Te nini ñùhu barcú ichi cuáháⁿ-xi núu ndute ní xidí Jèsús. Te ní ngúita-xi níhi vihi quene táchí te ta nàdachtíⁿ-xi ndute xití bàrcú-áⁿ cuáháⁿ, te sa cuini-nã-xi queé naa bàrcú-áⁿ xití ndute ni cùu. ²⁴ Te ní sáháⁿ-güedé núu cáá Jèsús xidí-gá, te ní xáhaⁿ-güedé xii-gá:

—¡Mèstrú, ndiquúú íni chi tà queé naa-o cuáháⁿ! —càchí-güedé xáhaⁿ-güedé xii-gá.

Te Jèsús ní ndiquúú íni-gá te ní ndacóo-gá te ní tenàá-gá táchí-áⁿ ndihi ndute làgúná-áⁿ, te ní ngúíni-ni táchí-áⁿ te ní nucúndecu nahi-nã ndute làgúná-áⁿ. ²⁵ Te ní xáhaⁿ-gã xii-güedé:

—¿Náa ñà túú sàndáá íni ñáhá ndisa-ndo xii-í áⁿ? —càchí-gá xáhaⁿ-gã xii-güedé.

Te ní cuñúhu-güedé sá dúcáⁿ ní quide-gá ní xiní-güedé, te ní yùhú-güedé, te ní xit-ñaha-güedé:

—¿Te ná tée cùu tée-a núu ní cáháⁿ-ni-dé te ní ngúíni táchí te ní nucúndecu nahi-ni ndute làgúná-a-í? —càchí-güedé xitnaha-güedé.

Tée yíhi ñaha cue espíritú cúndíhi yucu ñáváha

(Mt. 8:28-34; Mr. 5:1-20)

²⁶ Te ní sáá-gá ndihi-güedé yucu cue tée ñuu Gàdará, te yíhi ndáa-ni ndàa ingá xio làgúná-áⁿ cáá distritú Galileá. ²⁷ Te òré ní quene Jèsús xití bàrcú te ní dáyátní ñaha iiⁿ tée ñuu-áⁿ xii-gá, te yíhi ñaha titní espíritú cúndíhi yucu ñáváha xii-dé. Te ní cunaha ñà túú-gã sácúñhu-dé dóó-dé, te ni ñà túú-gã sácúndecu-dé vehe-dé, chi da nchaa núu yíndüxi ndíyi quide vehe-dé.

²⁸ Te òré ní xiní-dé Jèsús te ní ngúíni xití-dé núu-gã, te cue espíritú yíhi ñaha xii-dé-áⁿ ní quide-xi níhi ní cáháⁿ-dé, te xáhaⁿ-dé xii-gá:

—¿Ná cuendá véxi-ò Jèsús Déhe Dútú Ndíoxí sàdi-n ichi-í-í? Te cáháⁿ ndàhú-í

núu-n sã và dándòho ñaha-n xii-í —càchí-dé xáhaⁿ-dè xii-gá.

²⁹ Te ducaⁿ ní cáháⁿ-dé cuendá sá Jèsús ní xáhaⁿ-gã xii nchaa espíritú cúndíhi yucu ñáváha yíhi ñaha sá ná queé ñaha-xi xii-dé. Te nchaa xíáⁿ ní xóo dacáháⁿ-xi iní-dé nándi sá ní xóo cada-dé núu ní xóo dacùtu ñaha-güedé cadèná xii-dé cuendá sá ñà túú-gã ná cada-dé, te ní xóo cundeé ñáhá-güedé, dico cuéi ducaⁿ dico ní xóo dandáva-ni-dé cadèná, te cue espíritú cúndíhi yucu ñáváha-áⁿ ní xóo dacùnu ñaha-xi xii-dé ní xóo quíhíⁿ-dé xití yucu. ³⁰ Te Jèsús ní xicáⁿ tnúhú-gã núu-dé, te xáhaⁿ-gã:

—¿Nása nani-n-í? —càchí-gá xáhaⁿ-gã.

Te ní xáhaⁿ-dè:

—Vài Sandadú nani-í —càchí-dé xáhaⁿ-dè xii-gá.

Te ducaⁿ ní xáhaⁿ-dè xii-gá cuendá sá ò cuéhé espíritú cúndíhi yucu ñáváha yíhi ñaha xii-dé. ³¹ Te nchaa espíritú-áⁿ ní cáháⁿ ndàhú-xi núu Jèsús sá và téndàha ñaha-gá xii-xi quíhíⁿ-xi núu ùhú núu ndàhú. ³² Te diu-ni yatni yucu núu ndécú Jèsús-áⁿ yíhí vài cuchí xixexi-güedé, te nchaa espíritú-áⁿ ní cáháⁿ ndàhú-xi núu-gã sá ná dàña-gá quíhu-xi yiqui cùñú nchaa cùchí-áⁿ, te Jèsús ní xáhaⁿ-gã sá cúu quíhu-xi yiqui cùñú-güedé. ³³ Te ní quee ñaha nchàa espíritú-áⁿ xii tée-áⁿ, te ní quíhu-xi nchaa cùchí-áⁿ, te cùchí-áⁿ ní xinu-güedé duha ní quee-güedé ndàa núu dèhvá yuhu làgúná-áⁿ, te ní ngaunihnu-güedé xití ndute te ní ndihi-güedé ní cáhá.

³⁴ Te òré ní xiní cue tée xito cuchí-áⁿ nàcuáa ní cuu te ní yùhú-güedé ní xinu-güedé, te ní sáháⁿ-güedé ní cani-güedé cuendú núu cué ñáiyu ndècu xití ñuu, ndihi núu cué ñáiyu ndècu xití yucu. ³⁵ Te nchaa ñáiyu ní níhí tnúhu ní quee-yu cuáháⁿ ndèhè-yu nàcuáa ní cuu. Te òré ní quexió-yu núu ndécú Jèsús, te ní xiní-yu tée ní xíhi ñaha cué espíritú cúndíhi yucu ñáváha-áⁿ núcòo-dé núu sáhá Jèsús, te nihnu-ná-dé dóó-dé, te núcòo-dé dàtná iiⁿ ñáiyu váha, te ní yùhú-yu òré ní xiní ñáhá-yu xii-dé. ³⁶ Te nchaa ñáiyu ní xiní nàcuáa ní cuu ní ndúha tée yíhi ñaha cue espíritú cúndíhi yucu ñáváha-áⁿ ní

cùu ní caní-yu cuèndú núú nchàa ñáiyu ní quexio-áⁿ nàcuáa ní cuu ní ndúha téé-áⁿ ndíhi nàcuáa ní cuu cuèndá nchaa cùchí-áⁿ.³⁷ Te sá dúcáⁿ ní níhi-yu tnúhu nàcuáa ní cuu, núu nchaa ñáiyu ñuú Gàdará ío ní yùhú-yu te ní ngúíta-yu càháⁿ ndàhú-yu núú Jèsús sá ná nùhú-gá núu ndèé ichi véxi-gá. Te sá dúcáⁿ ní càháⁿ-yu núu cuáháⁿ-gá núu ndécú bàrcú. Te òré ndée-gá bàrcú-áⁿ nùhú-gá³⁸ ní ngúíta téé ní xíhi ñaha cuè espíritú cùndíhi yucu ñávàha càháⁿ ndàhú-dé núú-gá núu vā cùndèe iní-gá quíhíⁿ ndíhi ñaha-gá xii-dé, dico Jèsús ní quide ndee iní ñáhá-ni-gá xii-dé, te ní xáhaⁿ-gá:

³⁹—Cuanùhú vehe-n, te cani-n cuèndú núú nchàa ñáiyu sá ío càhnu cuu nchaa sá vāha ní quide ñaha Yá Ndióxi xii-n —càchí-gá xáhaⁿ-gá xii-dé.

Te téé-áⁿ ní xica-dé cuánuhú-dé te ní ngúíta-dé ní cani-dé cuèndú núú nchàa ñáiyu xíndecu níhi ñuú sá ío càhnu cuu nchaa sá vāha ní quide ñaha Jèsús xii-dé.

Cuèndá déhe yoco tē Jàirú, ndíhi cuèndá ìñ ñadìhí ní tnándeé dóó Jèsús
(Mt. 9:18-26; Mr. 5:21-43)

⁴⁰ Te òré ní ndexìo Jèsús ndàa ingá xio yuhu làgúná, te ñáiyu xíndecu xíáⁿ sa ndètu cahnu ñaha-ná-yu, te ío vāha ní càháⁿ ndíhi ñáhá-yu xii-gá òré ní nasáá-gá. ⁴¹ Te ìñ tée tàxi tnumí veñúhu ní quexio-dé núú ndécú Jèsús, te téé-áⁿ nání-dē Jàirú, te ní ngúíñí xítí-dē núú-gá càháⁿ ndàhú-dé, te xáhaⁿ-dē xii-gá:

—Véxi-í càháⁿ ndàhú-í núú-n núu vā cùndèe iní-n quíhíⁿ-ó vehe-í cada tátna-n déhe yoco-í —càchí-dé xáhaⁿ-dē xii-gá.

⁴² Te ducaⁿ ní xáhaⁿ-dē chi ndècu ìñⁿ dii-ni déhe yoco-dē, te ndècu-xi datná úxúú cuíá-xi, te càhú víhi tnàhà-xi cùhú-xi te cuíni-xi cuú-xi. Te Jèsús ní xica-gá cuáháⁿ-gá ndíhi téé-áⁿ, te ío vāi ñáiyu nchicúⁿ ñáhá xii-gá cuáháⁿ, te dàdehnde ñaha-ná-yu xii-gá ní cùu.

⁴³ Te tnuú nchaa ñáiyu-áⁿ ñútnàhá ìñⁿ ñaha cùhú, te ñaha-áⁿ sá ní cuu úxúú cuíá sá cùhú-aⁿ ngòyo ñaha níhi xii-aⁿ, te ío cuéche díhúⁿ ní cuu dàndòñu-u-aⁿ chi ní nàdicó-aⁿ nchàa sá ndécú ndíhi-aⁿ cuèndá ní níhi-aⁿ díhúⁿ ní queheⁿ nchaa ñáiyu ní quide tátna ñaha xii-aⁿ, dico ní ìñⁿ-yu ñá túú ní ndàcú-yu ndúha-aⁿ. ⁴⁴ Te ní sáháⁿ ndehe

yatni-aⁿ ndàa sáta Jèsús, te ní tnándeé-aⁿ luha yuhu dōó-gá te òré-ni-áⁿ ní ndúha-aⁿ.

⁴⁵ Te Jèsús ní xícáⁿ tnúhú-gá núú-yu, te xáhaⁿ-gá:

—¿Ndèdacàa-ndo ní tnándeé ñáhá xii-í? —càchí-gá xáhaⁿ-gá xii-yu.

Te nchaaⁿ-yu ní xáháⁿ-yu sá ní ìñⁿ-yu ñá túú ní tnándeé ñáhá xii-gá. Te té Pèlú ndíhi cue téé cùndíhi-dé ní xáhaⁿ-güedē xii-gá:

—Mèstrú, ndèhe-n sá vái ñáiyu nchicúⁿ ñáhá xii-n, te xio xio dàdehnde ñáhá-yu, te xícáⁿ tnúhú-gá-n yòo ní tnándeé ñáhá xii-n —càchí-güedē xáhaⁿ-güedē xii-gá.

⁴⁶ Dico Jèsús ní xáhaⁿ-gá xii-yu:

—Dico ñuú ìñⁿ-ndo ní tnándeé ñáhá xii-í, chi ní cutnùní iní-í sá ìñⁿ ñáiyu cùhú ní tnándeé ñáhá xii-í te ní ndúha-yu —càchí-gá xáhaⁿ-gá xii-yu.

⁴⁷ Te sáta ní xiní ñaha-áⁿ sá ní cutnùní iní Jèsús sá ní tnándeé ñáhá-áⁿ xii-gá, te yùhú yùhú-aⁿ ní sáhá-aⁿ ní ngúíñí xítí-áⁿ núú-gá, te ní náhmá-aⁿ núú-gá, ndíhi núu nchàa ñáiyu ná cuèndá ducaⁿ ní quide-aⁿ ní tnándeé-aⁿ-gá, ndíhi cuèndá sá òré-ni-áⁿ ní ndúha-aⁿ. ⁴⁸ Te Jèsús ní xáhaⁿ-gá xii-aⁿ:

—Yòhò ñaha cùhú, ní sándáá iní ñáhá-n xii-í núu ní ndúha-n, te cuanùhú vitna te ñá túú-gá ná cani iní-n —càchí-gá xáhaⁿ-gá xii-aⁿ.

⁴⁹ Te càháⁿ dúcáⁿ-ní Jèsús ní sáá ìñⁿ tée xinu cuechi vehe té Jàirú tée tàxi tnumí veñúhu, te xáhaⁿ tée xinu cuechi-áⁿ xii-dé:

—Sa ní xíhi déhe-n, vā chíchiuⁿ-gá-n Mèstrú —càchí-dé xáhaⁿ-dē.

⁵⁰ Te sá dúcáⁿ xáhaⁿ tée xinu cuechi-áⁿ xii té Jàirú ní tecú dóho Jèsús, núu ní xáhaⁿ-gá xii-dé:

—Vá ndíhú iní-n, quindáá iní ñáhá-ní-n xii-í te ndúha déhe-n —càchí-gá xáhaⁿ-gá xii-dé.

⁵¹ Te òré ní sáá-gá vehe té Jàirú te ñá ní dàña-gá quíhu ñáiyu cùtexínu, núu té Pèlú-ni ndíhi té Jàcobó-ni, ndíhi té Juáá-ni, ndíhi tātá ndíhi náná-ni xíchí ní xíhí-áⁿ cuànguihu ndíhi-gá xiti vehe. ⁵² Te nchaa ñáiyu sa xíndecu vehe-dé-áⁿ xíndáhyú-yu sá ndíhú iní-yu cuèndá sá ní xíhí-xi. Te Jèsús ní xáhaⁿ-gá xii-yu:

—Vá ndàhyú-ndó, chi dicó-ni xidí-xi ñá túú ní xíhí-xi —càchí-gá xáhaⁿ-gá xii-yu.

⁵³ Te ní sácú ndeé ñáhá-yu xii-gá, chi sá cúú-xí meé-yu chi ní xíhí ndisa xíchí-áⁿ.

⁵⁴ Te Jèsús ní tñii-gá ndaha xíhí ní xíhí-án, te níhí ní cáháⁿ-gá, te xáhaⁿ-gá:

—Xíhí cuéchí, ndacóo —càchí-gá xáhaⁿ-gá.

⁵⁵ Te xíhí-án ní ndoto-xi, te òré-ni ní ndacóo-xi, te Jèsús ní xáhaⁿ-gá sá ná cuññàhá-yu sá cáxí-xí. ⁵⁶ Te tǎtǎ-xi ndíhi nǎná-xi súúní ní cuñúhu-yu sá dúcáⁿ ní dándótó ñàha Jèsús xii-xi, te ní xáhaⁿ-gá xii-yu sá vǎ yǒo ìíⁿ cuññàhá-yu sá dúcáⁿ ní quide-gá.

9

Jèsús téndàha-gá ndi ùxúú cue téé xica cuu ndíhi-gá quíhíⁿ-güedé cáháⁿ-güedé tñúhu-gá

(Mt. 10:5-15; Mr. 6:7-13)

¹ Te Jèsús ní cana-gá ndi ùxúú cue téé xica cuu ndíhi-gá, te ní sǎñaha-gǎ xii-güedé tñúhu ndee ìní cundecu ndíhi-güedé cuèndá queñuhu-güedé nchaa espíritú cündíhi yucu ñávǎha yìhi ñaha xii ñáiyu, ndíhi cuèndá sá cádá tǎtǎ-güedé nchaa ñáiyu cùhú. ² Te ní xáhaⁿ-gá xii-güedé sá quíhíⁿ-güedé danèhè-güedé ñáiyu nàcuáa cada Yá Ndiǒxí ndíhu ndaha ñàha-gá xii-yu, te ducaⁿ càda tǎtǎ-güedé cue ñáiyu cùhú.

³ Te cùmání-gǎ caca-güedé quíhíⁿ-güedé, te ní xáhaⁿ-gá xii-güedé:

—Ná túú tñàhí ná canehè-ndo cùu ichi-ndo, ni tǎtnu, ni ñùnu, ni sǎ cáxí-ndó, ni dǐhúⁿ. Te ní vǎ canèhe-ndo ìngá ichi dóó-ndó, chi ñi-ni dóó ñíhí-ndó-án xíǎⁿ tñàhí-ni. ⁴ Te ndédani càa vehe na saá-ndó, te xíáⁿ cundecu-ndo ndéè ná sǎá nduu ndèe-ndo. ⁵ Te núú ñǎ túú cuíní-yu queheⁿ cuèndá ñáhǎ-yu xii-ndo, te ndee-ndo ñúú-án, te naquidi-ndo tìcá chùhmá ní tñii sǎhá-ndó cuèndá sá ná cùtnuní ìní-yu sá ñǎ túú quide váha-yu —càchí-gá xáhaⁿ-gá xii-güedé.

⁶ Te sǎtá dúcáⁿ ní xáhaⁿ Jèsús xii-güedé, te ní quee-güedé cuáháⁿ-güedé nchaa ñuu dácuaaha-güedé ñáiyu tñúhu Yá Ndiǒxí, tñúhu sá cáháⁿ nàcuáa naníhí tǎhú-yu, te ducaⁿ ta quide tǎtǎ-güedé nchaa ñáiyu cùhú cuáháⁿ.

Nàcuáa ní cuu ní xíhí té Juàá téé dàcuandute ñaha xii ñáiyu

(Mt. 14:1-12; Mr. 6:14-29)

⁷ Te té Hèrodés téé cùu gobiernú ní níhí-dé tñúhu nchaa nàcuáa quide Jèsús, te quíyuhú ìní-dé te sàni ìní-dé yoo cùu-gá. Te ducaⁿ ní sani ìní-dé chi dava ñáiyu càchí-yu sá tǎ Juàá téé ní xóo dacuandute ñaha xii ñáiyu ní ndoto cùu-gá. ⁸ Te davá-yu càchí-yu sá tǎ Èliás cúu-gǎ, te davá-yu càchí-yu sá ìíⁿ téé ní xóo cáháⁿ tñúhu Yá Ndiǒxí ndéé sanaha vìhi ní ndoto cùu-gá, càchí-yu. ⁹ Dico té Hèrodés ní càchí-dé:

—Yúhú ní táuchíⁿ-í ní xehndé-güedé díquí tǎ Juàá. ¿Te yoo cùu téé dii cuèndú-xi níhí-a sá súúní cuèhé nùú sǎ quidé-dé váíⁿ? —duha ní càchí-dé.

Te té Hèrodés ndúcú-dé nàcuáa cada-dé cuèndá quini-dé Jèsús.

Jèsús dácaxi-gá úhúⁿ mǐl cue téé te ñáiyu dǐhí ndíhi landú

(Mt. 14:13-21; Mr. 6:30-44; Jn. 6:1-14)

¹⁰ Te nchaa cue téé ní táuchíⁿ Jèsús cuáháⁿ cáháⁿ tñúhu Yá Ndiǒxí núú ñáiyu ní ndexio-güedé núú-gǎ te ní ngúíta-güedé nàcàni tñúhu-güedé nchaa nàcuáa ní quide-güedé. Te dàtnuní ní xica-gá medii-ni-gá ndécá ñàha-gá xii-güedé cuáháⁿ ìíⁿ xichi núú ñǎ túú ñáiyu ndecu, yatni núú cáá ñúú Betsaidá. ¹¹ Dico òré ní níhí ñáiyu tñúhu sá cuáháⁿ Jèsús, te nchìcúⁿ-yu-gá cuáháⁿ, te òré ní quexió-yu núú-gǎ, te ní queheⁿ cuèndá ñáhǎ-gǎ xii-yu, te ní danèhè ñáhǎ-gǎ xii-yu nàcuáa ndíhu ndaha ñàha Yá Ndiǒxí xii-yu, te ní quide tǎtǎ-gá nchaa ñáiyu cùhú.

¹² Te òré sa ní cuaa te ní natacá ndi ùxúú cue téé xica cuu ndíhi-gá núú-gǎ, te ní xáhaⁿ-güedé xii-gá:

—Sa ní cuu dandàca-n nchaa ñáiyu-a, chi sa ní cuaa, te na quíhíⁿ-yu nchaa vehe càa yatni iha, ndíhi nchaa xití ñuu cáá yatni iha cuaaⁿ-yu sá cáxí-yu, te ñi-ni yàcáⁿ nde-tatú-yu, chi núú ndécú-ó iha ñǎ túú tñàhí ná ló —càchí-güedé xáhaⁿ-güedé xii-gá.

¹³ Te Jèsús ní xáhaⁿ-gá xii-güedé:

—Mee-ndo chí cuññaha sǎ ná cáxí-yu —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Ná túú nǎgá ndécú ndíhi-ndí, chí úhúⁿ duha-ná páá, ndíhi úú-nǎ chácá ndécú ndíhi-ndí, te ñi-ni núú quíhíⁿ-ndí

cuaaⁿ-ndí sá caxĩ-yu —càchí-güedé xáhaⁿ-güedé xii-gá.

¹⁴Te xĩnu dàtná úhúⁿ mĩ mee-ni cuè téé, te ðĩĩⁿ ñáiyu ðĩhĩ ndĩhi landú. Te Jèsús ní xáhaⁿ-gá xii cue téé xica cuu ndĩhi-gá:

—Chí cũñaha na ngõo ndĩ údico úxí ndĩ údico úxí-yu ìĩⁿ xichi —càchí-gá xáhaⁿ-gá xii-güedé.

¹⁵Te ducaⁿ ní quide-güedé, te ní ngóo-yu nchaá-yu. ¹⁶Te dàtnùnĩ ní queheⁿ-gá ndĩ úhúⁿ pàá-án, ndĩhi ndĩ ndúú chácá-án. Te ní ndacoto-gá andiu, te ní ndacáⁿ táhú-gá núú Yá Ndiõxí, te dàtnùnĩ ní táhú cuèchi-gá pàá-án ndĩhi chácá-án, te ní sáha-gá nchaá cue téé xica cuu ndĩhi-gá ní dácãhũ ñaha-güedé xii-yu.

¹⁷Te nchaá-yu ní xexí-yu ní ndahá xití-yu. Te sátá ní túhú cõhõ-yu te ní nadatácá-güedé nchaá sá ní quendóo, te ní chítú úxúú tñáhá tídihi mee-ni sá ní quendóo.

Té Pèlú xáhaⁿ-dē xii Jèsús sá díú-gá cúú-gá Cristú

(Mt. 16:13-19; Mr. 8:27-29)

¹⁸Te ìĩⁿ nduu ndècu mee Jèsús ndĩhi cue téé xica cuu ndĩhi-gá, te càháⁿ ndĩhi-gá Yá Ndiõxí, te sátá ní yáha ní cáháⁿ ndĩhi-gá Yá Ndiõxí, te ní xicáⁿ tñúhú-gá núú-güedé, te xáhaⁿ-gá xii-güedé:

—¿Yoo cùu yúhú càchí ñáiyu-va? — càchí-gá xáhaⁿ-gá xii-güedé.

¹⁹Te ní xáhaⁿ-güedé xii-gá:

—Davá-yu càchí-yu sá cúú-n ndĩ Juáá téé ní xóo dacuãndute ñaha xii ñáiyu, te davá-yu càchí-yu sá cúú-n tē Èliás, te davá-yu càchí-yu sá ìĩⁿ téé ní xóo cáháⁿ tñúhu Yá Ndiõxí ndéé sanaha ní ndoto cùu-n, duha càchí-yu —càchí-güedé xáhaⁿ-güedé xii-gá.

²⁰Te ní xicáⁿ tñúhú tucu-gá núú-güedé, te xáhaⁿ-gá xii-güedé:

—Te nchòhó, ¿yoo sàni iní-ndó cùu-í-í? —càchí-gá xáhaⁿ-gá xii-güedé.

Te té Pèlú ní xáhaⁿ-dē xii-gá:

—Yòhó cúú-n Cristú Déhe Dútú Ndiõxí — càchí-dé xáhaⁿ-dē xii-gá.

Jèsús càháⁿ-gá sá cáhni ñaha-güedé xii-gá

(Mt. 16:20-28; Mr. 8:30-9:1)

²¹Te ní xáhaⁿ-gá xii-güedé sá vǎ yõo ìĩⁿ cũñaha-güedé yoo cùu-gá. ²²Te ní xáhaⁿ-gá xii-güedé:

—Yúhú Téé cùu ñanĩ tñáhá-ndó nchàa-ndo io cuéhé sǎ ndòhò-í, chí daquée tíhú ñáhá cuè téé cùu sacuéhé núú ñáiyu isràél, ndĩhi cue dútú cúnù, ndĩhi cue téé dàcuaha ñaha xii ñáiyu nchaá tñúhu ní chídó tñunĩ ndĩ Moisés, te sáá nduu te cahni ñaha-güedé xii-í, dico nduu únĩ sá cúú-í te ndoto-í —càchí-gá xáhaⁿ-gá xii-güedé.

²³Te dàtnùnĩ ní xáhaⁿ-gá xii nchaá ñáiyu:

—Nchaá ñáiyu cuinĩ chitnahá ñáhá xii-í, te xini ñuhu-xi vǎ cǎdá-gǎ-yu sǎ sání ìni mēē-yu, te ìĩⁿ nduu ìĩⁿ nduu cada ndee ìni-yu cundecu túha-yu ndohó-yu cuendá-í, te cuēi na ndòhò-yu dàtná ndoho-í. ²⁴Te nchaá ñáiyu cuinĩ sǎ ñà túú tñáhí ná yáha cundecu ñuyúú-a cuíta nihnú-yu. Dico nchaá ñáiyu ñà túú yúhú cuēi nándi sǎ ná yáha-yu cundecú-yu ñuyúú-a sǎ cuendá-í, te ñáiyu-án naníhĩ tǎhú-yu. ²⁵Te cuēi nchaandi túhú sǎ ío ñuyúú-a na nihi ñáiyu cundecu ndihí-yu, dico núu ðiu nchaá xiǎⁿ ná càða cuíta nihnú-yu te ñà túú vèdana nãndihĩ-xi sǎ dúcáⁿ ndècu ndihí-yu nchaá xiǎⁿ.

²⁶Te nchaá ñáiyu na cùcahaⁿ núu-xi cáháⁿ váha cuendá-í ndĩhi cuendá nchaá tñúhu-í, te tñáhá yúhú Téé cùu ñanĩ tñáhá-ndó nchàa-ndo cucahaⁿ núu-í núu-yu òré quixi tucu-í ndĩhi cue espíritú xínú cuèchi núú Tǎtà-í Dútú Ndiõxí, te mee-gǎ cada cutnùnĩ iní nchaá ñáiyu sǎ ío càhnu cuu-í. ²⁷Te na càchí tñúhu ndáá-í xii-ndo sǎ ío dava nchòhó ñáiyu ndècu iha vitna vǎ cúú-ni-ndo, chí cundecu-ni-ndo ndéé quini-ndó sáá nduu ndíhu ndaha ñaha Yá Ndiõxí xii ñáiyu —càchí-gá xáhaⁿ-gá xii-yu.

Ní nadáma dóó Jèsús ndĩhi núu-gá

(Mt. 17:1-8; Mr. 9:2-8)

²⁸Te ní cuu dàtná úná nduu sǎ dúcáⁿ ní cáháⁿ Jèsús, te cuásaá-gǎ ìĩⁿ yucu cáháⁿ ndĩhi-gá Yá Ndiõxí, te ndèca-gǎ té Pèlú, ndĩhi té Jàcobó, ndĩhi té Juáá cuásaá. ²⁹Te nini cáháⁿ ndĩhi-gá Yá Ndiõxí ní nadáma núu-gǎ ndĩhi dóó-gǎ, te dóó-gǎ-án sùúnĩ ní nduu cuixíⁿ víhĩ, te súúnĩ datásaⁿ-xi. ³⁰Te òré-ni-án ní xini-güedé úú tñáhá cue téé càháⁿ ndĩhi-gá, te ìĩⁿ-dé cúú-dē té Moisés, te ìngá-dé cúú-dē té Èliás, ³¹te súúnĩ datásaⁿ-xi ni cǎndéé núú ndécú cuè téé úú-án ndĩhi-gá, te xĩndatnúhu-güedé nàcuáa ndoho Jèsús

cuú-gá ñúú Jerusàlén dàtná ní cachí meé-gá. ³² Te té Pèlú ndihi úú-gá-güedé cuini vñí-güedé cúdú-güedé, dico ní sahni iní-güedé ñá túú ní xídí-güedé, te ní dánèhé núú ñáhá-xí xii-güedé sá súúni vaha càa núú ndécú Jèsús, ndihi úú cue tée càháⁿ ndihi-gá-áⁿ. ³³ Te òrè sa ndücu ndee cue tée úú-áⁿ caca-güedé núhú-güedé, te ní xáhaⁿ tée Pèlú xii-gá:

—Mèstrú, ñváha ní cuu sá ndécú-ó ìha vitna! Te na dàcaa-ndí úní tñàhá vehe tnuvixiⁿ, ìⁿ cuu cuendá-n, te ìⁿ cuu cuendá té Moisés, te ìⁿ cuu cuendá té Èliás —cachí-dé xáhaⁿ-dè xii-gá.

Dico té Pèlú chi ní mèe-dé ñá túú ní cùtnuní iní-dé nása ndüu tñúhu ní càháⁿ-dè. ³⁴ Te nini càháⁿ-dè ní quexìo ìⁿ vícò núú ndécú-güedé-áⁿ ní dádáhu ñaha-xi xii-güedé, te ní yùhú-güedé sá dúcáⁿ ní quexìo vícò-áⁿ ní dádáhu ñaha-xi. ³⁵ Te xití vícò-áⁿ ní tecú ní càháⁿ Yá Ndiòxí, te xáhaⁿ-gá xii-güedé:

—Tée-a cùu-dé Déhe-í, tée ío cùu iní-í, te tñii-ndo nchaa tñúhu càháⁿ-dè —duha ní xáhaⁿ-gá xii-güedé.

³⁶ Te sátá dúcáⁿ ní càháⁿ Yá Ndiòxí, te ní quide cuendá-güedé sá mèdii-ná Jèsús ndécú-gá xíaⁿ. Te vá yòo ìⁿ ní xáhaⁿ-güedé nàcuáa ndüu nchaa sá ní xiní-güedé-áⁿ.

Jèsús quidé tãtna-gá ìⁿ tée cuechi yìhi ñaha espíritú cündìhi yucu ñávãha
(Mt. 17:14-21; Mr. 9:14-29)

³⁷ Te ñngá nduu-áⁿ cuãnuu-gá yucu-áⁿ ndihi-güedé, te ío cuéhé ñáyüu cuáháⁿ tñahá ñáhá xii-gá. ³⁸ Te ìⁿ tée ñühu tñahá tnuú-yu-áⁿ ní càháⁿ níhi-dé, te xáhaⁿ-dè xii-gá:

—Mèstrú, ío càháⁿ ndàhú-í núú-n núu vá cündèe iní-n càda tãtna-n dèhe-í, chi ìⁿ dñi duha-dé ndécú, ³⁹ te yìhi ñaha espíritú cündìhi yucu ñávãha xii-dé, te òrè ná nàtnii ñaha-xi xii-dé, te dàcana saa ñaha-xi, te ndàda ruúⁿ ñáhá-xí xii-dé, te tàva-xi tñúu yuhu-dé. Te ío dándoho ñaha-xi xii-dé, chi ndéé núú ñà cúú-gá, te dàña ñaha tnaa-xi xii-dé. ⁴⁰ Te sa ní càháⁿ ndàhú-í núú cuè tée xica cuu ndihi-n queñuhu-güedé-xi, dico ñá túú ní ndàcu-güedé —cachí-dé xáhaⁿ-dè xii-gá.

⁴¹ Te Jèsús ní xáhaⁿ-gá xii nchaa ñáyüu:

—Ñchaa nchòhó ñáyüu ndècu ñuyúú-a ío sáá iní-ndó, chi ñá túú cuini-ndó quindáá

iní-ndó Yá Ndiòxí! Te ní cuu vai nduu quide ndee iní-í nchaa sá quidé-ndó, ¿te ná ndéé ama vá dúcáⁿ-gá cada-ndo-í? —cachí-gá xáhaⁿ-gá xii-yu.

Te ní xáhaⁿ-gá xii tée cùhú déhe-xi-áⁿ:

—Taxi déhe-n ìha —cachí-gá xáhaⁿ-gá xii-dé.

⁴² Te òrè cuáháⁿ tée cuechi-áⁿ núú-gá, te espíritú cündìhi yucu ñávãha-áⁿ ní dándüá ñáhá-xí xii-dé, te sahni yìhi ñáhá tucu-xi xii-dé ní cùu, dico Jèsús níhi ní càháⁿ-gá ní tenáa-gá espíritú-áⁿ, te ní quee ñaha-xi xii-dé, te ní nacuáha cuendá ñáhá-gá xii-dé tãtá-dé. ⁴³ Te nchaa-yu ní cuñühu-yu sá dúcáⁿ ní cuu, te ní cachí-yu sá ío càhnu cuu Yá Ndiòxí.

Jèsús càháⁿ tucu-gá sá cùu-gá
(Mt. 17:22-23; Mr. 9:30-32)

Te nini xícunühu-yu nàcuáa ní quide Jèsús, te ní xáhaⁿ-gá xii cue tée xica cuu ndihi-gá:

⁴⁴ —Nchòhó cundedóho váha-ndo tñúhu na càháⁿ-í-a, te vá ná cuànaa-ndo, chi yùhú Tée cùu ñaní tñahá-ndó nchaa-ndo sáá ìⁿ nduu te cuáha cuendá ñáhá-güedé xii-í núú cuè tée cùu úhú iní ñáhá —cachí-gá xáhaⁿ-gá xii-güedé.

⁴⁵ Dico cue tée-áⁿ ñà túú ní tècú tñuní-güedé nàcuáa ndüu tñúhu ní xáhaⁿ-gá xii-güedé, te ducaⁿ ní yáha-güedé, chi ducaⁿ tñahí ní cachí-gá sá vá tècú tñuní-güedé, te ní yùhú-güedé cácaⁿ tñúhú-güedé núú-gá nása ndüu tñúhu ní xáhaⁿ-gá xii-güedé.

Cue tée ndücu tñúhu núú tñahá núu ndè-dacàa-güedé ío-gá cúnüu

(Mt. 18:1-5; Mr. 9:33-37)

⁴⁶ Te cue tée xica cuu ndihi-gá ní ngüíta-güedé ndátñühu-güedé núu ndè-dacàa-güedé ío-gá cúnüu, ⁴⁷ dico Jèsús ní cutnüní iní-gá nàcuáa sàni iní-güedé núu ní cana-gá ìⁿ té ìhli, te ní sanu tñii ñaha-gá ìⁿ xio dñi-gá. ⁴⁸ Te ní xáhaⁿ-gá xii-güedé:

—Nchaa ñáyüu na quèheⁿ cuendá ìⁿ té ìhli dàtná té ìhli-a cuendá sá ñúhú iní ñáhá-yu xii-í ñá, te cada iní-yu sá yùhú ní queheⁿ cuendá-yu, te nchaa ñáyüu na quèheⁿ cuendá ñáhá xii yùhú, te cada iní-yu sá tñahá Tãtà-í Dútú Ndiòxí Yaa ní tendaha ñaha xii-í véxi-í ñuyúú-a ní queheⁿ cuendá-yu. Te nchaa ñáyüu ío ndàhú iní-xi

mee-ni xínu cuechí-yu, ñáyiú-áⁿ ÿo-gá cùnúú-yu —càchí-gá xáhaⁿ-gá xii-güedé.

Ñáyiú ñá túú cùu úhú ínì ñáhá cùndíhi ñáhá-yu xii-o

(Mr. 9:38-40)

⁴⁹ Te té Juàá ñu-ni ìⁿ tée xica cuu ndíhi-gá ní xáhaⁿ-dè xii-gá:

—Mèstrú, ní xiní-ndí ìⁿ tée càcunehe ñaha-dé xii-n, te ndèñuhu-dé espíritú cùndíhi yucu ñáváha yìhi ñaha xii ñáyiú, te nchúhú ñá túú ní ñáha-gá-ndí ducaⁿ càda-dé, chi ñá túú xica cuu ndíhi ñaha-dé xii-o —càchí-dé xáhaⁿ-dè xii-gá.

⁵⁰ Te Jèsús ní xáhaⁿ-gá xii-dé:

—Daña-ndo na càda nahi-dé ní cùu, chi ñáyiú ñá túú cùu úhú ínì ñáhá xii-o te cùndíhi ñáhá-yu —càchí-gá xáhaⁿ-gá xii-dé.

Jèsús càháⁿ-gá dóho té Jàcobó ndíhi té Juàá

⁵¹ Te òré sa ta cùyatni ndaa Jèsús andíu, te ní xica-gá cuáháⁿ-gá ñuú Jerusalén, chi duuⁿ duuⁿ ní sani ínì-gá sá quíhíⁿ-gá. ⁵² Te ní tendaha-gá cue tée yòdo nuu cuáháⁿ, te ní quexio-güedé ìⁿ ñuú, te ñuú-áⁿ yíndèhu-xi distritú Sàmariá, te ndùcu-güedé ìⁿ vehe cada túha-güedé òré quexio-gá. ⁵³ Dico ñáyiú Sàmariá ñá túú ní cuíní-yu cuáñaha nùú-yu vehe, chi cuèndá sá ní cutnùní ínì-yu sá ìchi yáha-ni-gá quíhíⁿ-gá ñuú Jerusalén. ⁵⁴ Te sá dúcáⁿ ní quidè-yu ñá túú ní cuíní-yu cuáñaha nùú-yu vehe ndetatú-gá, núu ní xáhaⁿ tē Jàcobó ndíhi té Juàá cue tée xica cuu ndíhi-gá xii-gá:

—Mèstrú, ¿cuíní-n càcáⁿ táhú-ó nùú Yá Ndiòxí cuèndá dangáva-gá ñuhú danàa-gá ñáyiú ñuú-a dàtná ní quide té Èliás tée ní xóo cáháⁿ tnúhu Yá Ndiòxí ndéé sanaha-áⁿ? —càchí-güedé xáhaⁿ-güedé xii-gá.

⁵⁵ Te Jèsús ní nchócótó-gá núu-güedé, te níhi ní cáháⁿ-gá dóho-güedé, te xáhaⁿ-gá:

—Nchòhó, chi ñá túú váha ínì-ndó te núu ducaⁿ càháⁿ-ndó. ⁵⁶ Chi yúhú Tée cùu ñaní tnáhá-ndó ncháa-ndo véxi-í sá dácácu nihnu-í ñáyiú, te ñá díú véxi-í sá dácúita nihnu-í-yu —càchí-gá xáhaⁿ-gá xii-güedé.

Te sáta dúcáⁿ ní xáhaⁿ-gá, te ní xica-gá cuáháⁿ-gá ndíhi-güedé ingá ñuú.

Ñáyiú cuíní chitnahá ñáhá xii Jèsús ní cùu (Mt. 8:19-22)

⁵⁷ Te ñuhu Jèsús ichi ndíhi-güedé, te ìⁿ tée ní xáhaⁿ-dè xii-gá:

—Mèstrú, cuíní-í canchicúⁿ ñáhá-í xii-n ndèni ní cuu na quíhíⁿ-n —càchí-dé xáhaⁿ-dè xii-gá.

⁵⁸ Te Jèsús ní xáhaⁿ-gá xii-dé:

—Nchaa ñucuii chi ndècu yaú cúu vèhe-güedi saquihí-güedi, te nchaa quiti ndava caa tacá-güedi díquí yutnu, dico yúhú Tée cùu ñaní tnáhá-ndó ncháa-ndo chi ñá túú ndèé cáá vèhe-í ñuyiú-a ndetatú-í —càchí-gá xáhaⁿ-gá xii-dé.

⁵⁹ Te dàtnùní ní xáhaⁿ tùcu-gá xii ingá-dé:

—Yòhó taquixi chitnahá ñáhá-n xii-í —càchí-gá xáhaⁿ-gá xii-dé.

Dico tée-áⁿ ní xáhaⁿ-dè xii-gá:

—Mèstrú, ñáha na nùhú-í cundetu-í cuú tãtà-í te chindúxi-í-dé, te dàtnùní quixi-í chitnahá ñáhá dùcaⁿ-ná-í xii-n —càchí-dé xáhaⁿ-dè xii-gá.

⁶⁰ Te Jèsús ní xáhaⁿ-gá xii-dé:

—Daña ñáyiú ñá túú sándáá ínì ñáhá xii-í ná chindúxi tnàha meé-yu, chi ñáyiú-áⁿ cúu-yu dàtná ñáyiú ní xíhí cuèi ndècu-ní-yu núu ñuyiú-a. Te yòhó taquixi, chi quíhíⁿ-n ñànehé-n ñáyiú nàcuáa cada Yá Ndiòxí ndíhu ndaha ñàha-gá xii-yu —càchí-gá xáhaⁿ-gá xii-dé.

⁶¹ Te ní xáhaⁿ tùcu ingá-dé xii-gá:

—Mèstrú, cuíní-í chitnahá ñáhá-í xii-n, dico díhna-gá ñáha na nùhú-í cada ndee ínì-í nchaa ñáyiú ndècu vehe-í, te dàtnùní quixi-í —càchí-dé xáhaⁿ-dè xii-gá.

⁶² Te Jèsús ní xáhaⁿ-gá:

—Nchaa ñáyiú ní sándáá ínì ñáhá xii-í, te núu vá canchicúⁿ nihnu ñáhá-yu ní yùhu ní ínì-yu, te cùu-yu dàtná ìⁿ tée ní tñii ndaha látú cutu-dé, chi tée-áⁿ nùu na ndàcoto-dé ndàa sáta-dè òré xítú-dè, te vá quíhíⁿ ndáa látú-dé ducaⁿ sàtnahá-xi cúu-yu. Te cue ñáyiú chi vá cúu ndáa-yu nàcuáa ndíhu ndaha-gá dava-gá ñáyiú —càchí-gá xáhaⁿ-gá xii-dé.

10

Jèsús téndàha-gá únídico úxí cue tée quíhíⁿ cáháⁿ tnúhu-gá núu ñáyiú

¹ Te sáta dúcáⁿ ní cuu, te ní cáxi tucu Xítóhó Jesucrístú únídico úxí cue tée codonùu-güedé quíhíⁿ-güedé cáháⁿ-güedé tnúhu-gá nchaa ñuú, ndíhi nchaa dava-gá xichi núu quíhíⁿ-gá, te ndí ndúú ndí

ndúu-güedë tendaha ñaha-gá xii-güedë quíhíⁿ-güedë. ² Te cùmání-gá caca-güedë, te ní xáhaⁿ-gá xii-güedë:

—Nchòhò xini-ndó sá òrè ná sáá yóó cuu nchaa sá xítú ñáyiú, te ío vài cuu. Te na càchí tñúhu ndáá-í xii-ndo sá dàtná vài sá xítú ñáyiú cùu, ducaⁿ ío vài ñáyiú cùmání cundedóho tñúhu Yá Ndióxi te ío sacú ñáyiú dàcuaha ñaha xii-yu tñúhu-gá, núu xiáⁿ xini ñúhu-xi cáciⁿ-ndó núú Yá Ndióxi cuendá sá ná dàcáháⁿ-gá iní ñáyiú cáháⁿ-yu tñúhu-gá núú ñáyiú cùmání cundedóho tñúhu-gá. ³ Te nchòhó cúú-ndó dàtná cue mbéé cue quiti cuáháⁿ núú yíhí cuè quiti dééⁿ. Chi tendaha ñaha-í xii-ndo quíhíⁿ-ndó núú xíndecu nchaa ñáyiú cui-lhá iní-xi. ⁴ Te vá cànèhe-ndo ñunu cuhuⁿ ndachiuⁿ-ndo, ni núú cúhúⁿ díhúⁿ-ndó, te ní vá cádá túha-gá-ndó cháú-ndó chi díu-ni cháú yíhí-ndó-áⁿ xiáⁿ-ni quíhi-ndo, te vá ío cuyaa-ndo cáháⁿ ndíhi-ndo ñáyiú ñúhu ichi. ⁵ Te òrè ná quèxio-ndo ñíⁿ vehe, te duha cúñaha-ndo xii ñáyiú dii vèhe-xi-áⁿ: “Yá Ndióxi chindee ñaha-gá xii-ndo ío váha cuu iní-ndó cùndecu-ndo”, duha cúñaha-ndo xii-yu. ⁶ Te núú ñáyiú-áⁿ ní nduu táhú-yu sá cùndècu váha iní-yu núú Yá Ndióxi, te cuu-xi sá váha sá cúú-xí-yu tñúhu cúñaha-ndo-áⁿ, dico núú ñá túú ní càháⁿ váha ndíhi ñáhá-yu xii-ndo, te cúñaha-ndo sá vá cúú-xí sá váha sá cúú-xí-yu. Dico núú ní cáháⁿ váha ndíhi ñáhá-yu xii-ndo, ⁷ te díu-ni vehe-áⁿ cada vehe tnaa-ndo, te ñá túú-gá ndèé nducu-ndo vèhe cundecu-ndo, te caxi-ndo nchaa sá ná tàxi-yu, chi nchaa cue téé quide chiuⁿ dacuitíⁿ táu-güedé sá nihí-güedé sá cáxi-güedé cuendá nchaa chiúⁿ quide-güedé. ⁸ Te núu ní sáá-ndó ñíⁿ ñúu núú ní queheⁿ cuendá ñáhá-yu xii-ndo, te caxi-ndo nchaa sá ná tàxi-yu. ⁹ Te cada tátna-ndo cuè ñáyiú cùhú xíndecu ñúú-áⁿ, te cúñaha-ndo xii-yu sá sá ní sáá nduu ndíhu ndaha ñàhà Yá Ndióxi xii-yu. ¹⁰ Dico núú ní sáá-ndó ñíⁿ ñúu núú ñá túú ní quèheⁿ cuendá ñáhá-yu xii-ndo, te tñii-ndo ichi cuita cáháⁿ-ndó cuáháⁿ, te cúñaha-ndo xii-yu: ¹¹ “Ndéé tícá chúhmá ní tñíⁿ sáhá-ndíⁿ ñúu-ndó nàquidi-ndí, te duha quide-ndí cuendá cutnùnì iní-ndó sá ñá túú quide váha-ndo ndècu-ndo. Dico cunaha-ndo sá sá ní sáá nduu ndíhu ndaha

ñàhà Yá Ndióxi xii-ndo ni cùu”, duha cúñaha-ndo xii-yu. ¹² Te na càchí tñúhu-í xii-ndo sá ná sáá nduu càda ndáá Yá Ndióxi cuéchi nchaa ñáyiú, te ñáyiú ñúu-áⁿ ío-gá ndohó-yu dàvá-áⁿ dàcúúxi ñáyiú ñúu Sò-domá —càchí-gá xáhaⁿ-gá xii-güedé.

Cuendá ñáyiú dava ñúu ñá túú sàndáá iní tñúhu Xitohó Jesucristú
(Mt. 11:20-24)

¹³ Te Jèsús xáhaⁿ-gá xii ñáyiú dava ñúu ñá túú sàndáá iní tñúhu-gá:

—ÍNdáhú nchòhò cue ñáyiú ñúu Corázín! ¡Te ndáhú nchòhò cue ñáyiú ñúu Bètsaidá! Chi núu díco ñúu Tírú, ndíhi ñúu Sidón ní quide-í nchaa sá vá yóo tñahí ndacu cada datná ní quide-í ñúu-ndó-áⁿ ní xini-ndó ñá, te sá ndéé ama-gá cuihnú-yu dóo ndáhú, te cunucóo-yu núú yáá cuendá sá ndíxi cuéchi iní-yu sá ñá túú quide váha-yu ní cùu. ¹⁴ Dico sáá nduu te ío-gá dandòho ñaha Yá Ndióxi xii-ndo dàcúúxi ñáyiú ñúu Tírú, ndíhi ñáyiú ñúu Sidón. ¹⁵ Te nchòhò ñáyiú ñúu Capèrnaúm quide iní-ndó sá sá cunádaa-ndo àndiu, dico ñáhá chi núú ùhú núú ndáhú cundecu-ndo —duha ní xáhaⁿ-gá xii nchaa ñáyiú ñúu-áⁿ.

¹⁶ Te xáhaⁿ tñucu-gá xii cue téé tendaha-gá quíhíⁿ cáháⁿ tñúhu-gá-áⁿ:

—Nchaa ñáyiú na cùndedóho nchaa tñúhu cáháⁿ-ndó, te cada iní-yu sá yúhú càháⁿ-í ndèdóho-yu, te nchaa ñáyiú na dàquee tìhú ñáhá xii-ndo, te tñahá yúhú daquèe tìhú-yu, te nchaa ñáyiú ducaⁿ na dàquee tìhú ñáhá xii-í, te tñahá Tàtà-í Dútú Ndióxi Yáá ní tendaha ñaha xii-í véxi-í ñuyúú-a dàquee tìhú-yu —càchí-gá xáhaⁿ-gá xii-güedé.

Te ducaⁿ te ní xica-güedé cuáháⁿ-güedé.

Ní nasáá cue téé únidico úxi ní tendaha Jèsús ní sáháⁿ ní cáháⁿ tñúhu-gá núú ñáyiú
¹⁷ Te cue téé únidico úxi-áⁿ ní nasáá-güedé te súnì cùdí iní-güedé, te xáhaⁿ-güedé xii Jèsús:

—Mèstrú, ndéé espíritú cùndíhi yucu ñávàhà sàndáá iní ñáhá-xí xii-ndí òrè cáci nèhe ñaha-ndí xii-n —càchí-güedé xáhaⁿ-güedé xii-gá.

¹⁸ Te Jèsús ní xáhaⁿ-gá:

—Ndáá cáháⁿ-ndó chi yúhú ní xini-í cút-ñáhá ní xita nihnu yucu ñávàhà, chi dàtná ní ngava ñíⁿ tasaⁿ ní ngava-xi ñuyúú-a. ¹⁹ Te dàtná quide-ndó òrè xènihnu-ndo ñíⁿ cóó,

àdi ìᵾ nchacua ducaⁿ cada-ndo daquee tìhú-ndó yucu ñávàha, te ñá túú nă cada ñaha-xi xii-ndo, chi ní taxi-í tñúhu ndee ìní ndécú ndìhi-ndo. ²⁰ Dico vá cudíí ìní-ndó cuèndá sá sàndáá ìní ñáhá cuè espíritú cùndìhi yucu ñávàha xii-ndo, chi cudíí ìní-ndó cuèndá sá sà yodo tñuní-ndó núú tütú Yá Ndiòxí Yáa ndécú àndiū —cachí-gá xáhaⁿ-gá xii-güedé.

Jèsús cudíí ìní-gá

(Mt. 11:25-27; 13:16-17)

²¹ Te òré-áⁿ sùuní ní quide díí ìní ñáhá Espíritú Yá Ndiòxí xii Jèsús, te ní xáhaⁿ-gá xii Yá Ndiòxí:

—Yòhó Tàtá-í Dútú Ndiòxí, ío chìñuhu ñaha-í xii-n chi ñiū-n tàxi tñuní-n àndiū ndìhi ñuyú-a, te dànehé-n cuè ñáyiū nchaa tñúhu váha, te ñiū-ni ñáyiū-áⁿ cùū-yu ñáyiū ñá túú cùtñuní ìní-xi nchaa tñúhu càháⁿ cue tée túha, te nchaa tñúhu càháⁿ-n-áⁿ ñà túú ní dàtúū-n núú ñáyiū càchí sá ío túha, te ío váha sàá díquí-xi. Te ducaⁿ quide-n, chi ducaⁿ cuiní-n cùnduū —cachí-gá xáhaⁿ-gá xii Yá Ndiòxí.

²² Te xáhaⁿ tucu-gá xii cue tée ní nasáá-áⁿ:

—Mee Tàtá-í Dútú Ndiòxí ní cachí-gá sá cùnūū-í núú nchàa-ndi túhú sá ío. Te vá yóo ìᵾ xìní nàcuáa sàni ìní yúhú Déhe Dútú Ndiòxí, chi ìᵾdii díí-ni mee-gá xìní-gá nàcuáa sàni ìní-í. Te ducaⁿ ìᵾdii-ni yúhú xìní-í nàcuáa sàni ìní mée-gá, te nchaa ñáyiū càchí ìní-í sá quiní-yu nàcuáa sàni ìní Tàtá-í Dútú Ndiòxí te xitñúhu-í-yu, te vá yóo ìᵾ-gá xìní nàcuáa sàni ìní-gá chi ñiū-ni ñáyiū ducaⁿ xitñúhu-í-áⁿ xìní-yu —cachí-gá xáhaⁿ-gá xii-güedé.

²³ Te ní nchócótó-gá núú xĩndecu mee-ni cue tée xica cuu ndìhi-gá, te ní xáhaⁿ-gá xii-güedé:

—Váha táhú nchòhó ndìhi nchaa ñáyiū ndèhe nchaa nàcuáa quide-í vitna. ²⁴ Chi ío cuéhé cue tée ní xóo càháⁿ tñúhu Yá Ndiòxí ndéé sanaha, ndìhi cue tée ní xĩndaha ñaha xii ñáyiū ní cuiní-güedé cundehe-güedé nchaa sá ndéhé-ndó quide-í vitna, te ñá túú ní xìní-güedé, te ní cuiní-güedé cundedóho-güedé nchaa tñúhu càháⁿ-í ndèdóho-ndo vitna, te ñá túú ní xĩndèdóho-güedé —cachí-gá xáhaⁿ-gá xii-güedé.

Nàcuáa ní quide ìᵾ tée distritú Sàmariá

²⁵ Te ìᵾ tée dàcuaha ñaha xii ñáyiū nchaa tñúhu ní chídó tñuní ndíi Moisés ní ndacuñí-dé xitó ndèé-dé Jèsús núu nasa cunduu tñúhu càháⁿ-gá, te xáhaⁿ-dè xii-gá:

—Mèstrú, ¿ná cúú sá càdà-í cuèndá nduu táhú-í cundecu-í ndìhi Yá Ndiòxí ní caa ní quihíⁿ-í? —càchí-dé xáhaⁿ-dè xii-gá.

²⁶ Te Jèsús ní xáhaⁿ-gá xii-dé:

—Cuiní-í cachí tñúhu-n nasa càháⁿ-xi núú tütú ndíi Moisés —cachí-gá xáhaⁿ-gá xii-dé.

²⁷ Te xáhaⁿ-dè xii-gá:

—Ndíi Moisés càchí ndíi núú tütú ndíi: “Cuu ìní-ndó Dütú Ndiòxí Yáa cúú Ndiòxí-ndó ní yuhu ní ìní-ndó, te cani ìní-ndó càda-ndo datná cuiní mée-gá, te mee-ni tñúhu váha cani ìní-ndó nàcuáa cuu vii cuu váha-ndo núú-gá, te coo ìní-ndó cùu ìní-ndó-gá. Te cuu ìní-ndó tñaha ñáyiū-ndo dàtná cúú ìní-ndó mée-ndo”, duha càchí ndíi núú tütú ndíi —càchí-dé xáhaⁿ-dè xii-gá.

²⁸ Te Jèsús ní xáhaⁿ-gá:

—Váha-ni càháⁿ-n, te núu cada-n nàcuáa càháⁿ-n áⁿ, te nduu táhú-n cundecu-n ndìhi Yá Ndiòxí ní caa ní quihíⁿ —cachí-gá xáhaⁿ-gá xii-dé.

²⁹ Te sá dúcáⁿ ní xáhaⁿ Jèsús xii-dé núu ndücu-dé nàcuáa cada-dé cácu nihnu-dé núú tñúhu ní càháⁿ-dè, te ní xícáⁿ tñúhú-dè núú-gá, te xáhaⁿ-dè:

—¿Yoo cùu tñaha ñáyiū-í-i? —càchí-dé xáhaⁿ-dè xii-gá.

³⁰ Te Jèsús ní cani-gá ìᵾ cuèndú núú-dè nàcuáa tecú tñuní-dé tñúhu-gá, te xáhaⁿ-gá:

—Ìᵾ tée ní ndee-dé ñuū Jerusalén ñúhú-dè ichi cuánuu-dé cuáháⁿ-dè ñuū Jericó, te ní quee ñadúhú ichi-dé ní dúhú-güedé dóo ñihnú-dè, ndìhi nchaa sá nehé-dè, te ní caniha vihi-güedé, te nchitò diū-ná-dé ní dání ñaha-güedé te cuáháⁿ-güedé. ³¹ Te mei òré cátüu-dé-áⁿ ñúhú ìᵾ dútú ichi-áⁿ, te òré ní xìní ñáhá dütú-áⁿ xii-dé, te ìᵾ xio-ni ní xócóo ndee-dé ní yáha-dé. ³² Te ñúhu tucu ìᵾ tée cùu levitá ichi-áⁿ, te òré ní xìní-dé tée-áⁿ cátüu-dé, te ñiū-ni ducaⁿ ní quide-dé ìᵾ xio-ni ní xócóo ndee-dé ní yáha-dé.

³³ Dico ìᵾ tée distritú Sàmariá ñúhú tucu-dé ichi-áⁿ te òré ní xìní-dé tée-áⁿ cátüu-dé, te ní cundahú ìní ñáhá-dè. ³⁴ Te ní sáháⁿ-dè núú cátüu tée-áⁿ, te ní quide tátña-dé nchaa núú ní nícuèhé xii tée-áⁿ

ní chihí-dé yúcu, te ní dácútú-dě. Te dātñuní ní dácáá ñàha-dé sáta quití-dé, te ndéca ñàha-dé cuáháⁿ ìnⁿ vehe núú sácóo cue ñáyiú sácúhuⁿ ichi, te yacáⁿ ní xito ñàha-dě. ³⁵ Te ìngá nduu òrè ní nucúhuⁿ téé Samaritànú-áⁿ ichi, te ní tava-dé úú díhúⁿ denàriú, te ní sáha-dé téé cùu xitohó vehe-án, te ní xáhaⁿ-dě: “Coto saú-n tée-a, te núú ñá ní tñàhá díhúⁿ sá ní taxi-í, te cuèi na dàndoñuhu-gá-n díhúⁿ-n cuèndá-dé, te òrè ná quixi tucu-í te nacháhu-íⁿ, duha ní xáhaⁿ téé Samaritànú-áⁿ xii téé dii vèhe xíáⁿ. ³⁶ Te vitna cáháⁿ, te núú ndédacàa cue téé úní-áⁿ cúu-gtièdè téé vaha cùu iní-güedé tñàha ñáyiú-güedé —càchí-gá xáhaⁿ-gá xii téé dàcuaha ñàha xii-í ñáyiú-áⁿ nchaa tñuhu ní chídó tñuní ndí Moisés.

³⁷ Te téé-áⁿ ní xáhaⁿ-dě xii-gá:

—Tée ní cundàhú iní ñàhá xii téé ní dánícuèhé ñàhá cuè ñadúhú-áⁿ, téé-áⁿ cúu-dě téé cùu iní tñàha ñáyiú-xi —càchí-dé xáhaⁿ-dě xii-gá.

Te Jèsús ní xáhaⁿ-gá:

—Cuáháⁿ te ñu-ni ducaⁿ càda-n tñàhá-n —càchí-gá xáhaⁿ-gá xii-dě.

Jèsús ndécú-gá vehe tá Màrta ndihí tá Màriá

³⁸ Te Jèsús ñúhú-ni-gá ichi cuáháⁿ-gá ndihí cue téé xica cuu ndihí-gá, te ní sáá-gá ìnⁿ ñúú líhli, te xíáⁿ ní quee ìnⁿ xíchí nání Màrta ní cáháⁿ ñàhá-xí xii-gá vehe-xi. ³⁹ Te tá Màrta ndécú ìnⁿ cùhú-xi nàni-xi Màriá, te xíchí-áⁿ ní ngóo-xi núú Jèsús ndèdóho-xi nchaa tñuhu càháⁿ-gá. ⁴⁰ Te tá Màrta-áⁿ ndihí vihi-ni iní-xi quide-xi chiuⁿ-xi, te ní sáháⁿ-xi núú Jèsús, te ní xáhaⁿ-xi:

—Mèstrú, ñnàá ñá túú tñàhí sàni iní-n sá ní dándóo ndaha ñàha cùhú-í nchaa chiuⁿ-áⁿ? Cúñaha sàú ná quixi-xi chindee ñàha-xi —càchí-xi xáhaⁿ-xi xii-gá.

⁴¹ Dico Jèsús ní xáhaⁿ-gá:

—Yòhó Màrta, ñuhu tneñu vihi-n, te ndihú iní-n sá ìo vài chiuⁿ-n ñuhu, ⁴² dico xini ñuhu vihi-gá-xi cundedóho-n tñuhu càháⁿ-í, chi tá Màriá-a sa ndèdóho-xi tñuhu-í, te vá yóo ìnⁿ ndacu xocàni tñuhu-í sá ní ngündecu ndihí-xi —càchí-gá xáhaⁿ-gá xii-xi.

11

Jèsús dánèhé-gá cue téé xica cuu ndihí-gá nàcuáa cáháⁿ ndihí-güedé Yá Ndiöxí (Mt. 6:9-15, 7:7-11)

¹ Te ìnⁿ nduu càháⁿ ndihí Jèsús Yá Ndiöxí ìnⁿ xichi, te sáta ní yáha ní cáháⁿ ndihí-gá Yá Ndiöxí, te ní xáhaⁿ ìnⁿ téé xica cuu ndihí-gá xii-gá:

—Mèstrú, danèhé ñàhá xii-ndí nása cáháⁿ ndihí-ndí Yá Ndiöxí dātñá ní quide ndí Juáá ní dánèhé ndí cue téé ní xica cuu ndihí ndí —càchí-dé xáhaⁿ-dě xii-gá.

² Te Jèsús ní xáhaⁿ-gá:

—Òrè cáháⁿ ndihí-ndo Yá Ndiöxí, te cachi-ndo:

Yòhó tātá-ndí Dútú Ndiöxí Yaá ndécú àndiu, nchaa ñáyiú na càháⁿ-yu sá cúu-n Yáá ío yíñuhu.

Te xicáⁿ táhú-ndí núú-n sá ná sàá nduu ndihu ndàhá-n-yu.

Te cada-n dātñá càchí iní-n ñuyúú-a dātñá quidé-n àndiu.

³ Te xicáⁿ táhú-ndí núú-n sá táxi-n sá cándéca iní-ndí ìnⁿ nduu ìnⁿ nduu.

⁴ Te cada càhnu iní-n nchaa yíca cuèchi-ndí, chi tñàhá nchúhú quidé càhnu iní-ndí nchaa sá quidé ñàha tñaha ñáyiú-ndí.

Te vá dāñá-n dàcàháⁿ ñàhá yucu ñávàha xii-ndí cada-ndí sá ñà túú vaha, chi coto ñàha-n xii-ndí cuèndá sá vā dúcáⁿ càda ñàha-xi,

duha cáháⁿ-ndó

—càchí-gá xáhaⁿ-gá xii-güedé.

⁵ Te Jèsús ní xáhaⁿ tucu-gá:

—Te núú ndédacàa nchohó ndécú ìnⁿ téé tñàha tñuhu ndihí-ndo, te dava niú cuáháⁿ-ndó vèhe-dé, te òrè ní quexio-ndo, te xáhaⁿ-ndo xii-dé: “Véxi-í nùu vā cündèe iní-n tàxi nuu-n úní tñàhá pàá,

⁶ chi ìnⁿ téé xini tñàhá ndihí-í ñúhú-dě ichi ní quexio-dé vehe-í, te ñá túú tñàhí ná cuàñaha-í caxi-dé”, quesaha-ndo cùñaha-ndo. ⁷ Te téé-áⁿ càháⁿ-dè ndéé xití vehe-dé, te cúñaha-dě xii-ndo: “Vá dāsàtú nihá-n chi ndèdì yuyèhe-í, te cāa-í ndihí cue landú-í, te vá cúú ndácóo-í taxi-í sá cuiní-n”, quesaha-dě cúñaha-dě xii-ndo. ⁸ Te na càchí tñuhu-í xii-ndo sá cuèi cùu-dé téé tñàha tñuhu ndihí-ndo, dico

ducaⁿ cúñaha-dě xii-ndo, dico dacuitíí sá ndácóo-dé taxi-dé sá cuiní-ndó cuèndá sá vā dāsàtú-gá-ndó iní-dé. ⁹ Te yúhú càchí-í xii-ndo sá cācáⁿ-ndó nùu ná cuiní-ndó nùú Yá Ndiöxí te taxi-gá. Te vá dāñá ndèè-ndó cācáⁿ-ndó núú-gá nùu ná cuiní-ndó, te

ducaⁿ te níhí-ndó. Te cada iní-ndó sá ní quexio-ndo vehe ìⁿ tnaha ñáyi-ndo te ní cáháⁿ-ndó, te ñáyi-áⁿ ní tedóho ñáhá-yu xii-ndo te ní nacaáⁿ-yu yuyèhe. Te ducaⁿ càda iní-ndó chi Yá Ndióxi tedóho ñaha-gá xii-ndo, te taxi-gá sá ná càcáⁿ-ndó núú-gá. ¹⁰ Chi nchaa ñáyi ducaⁿ xíquide te Yá Ndióxi tedóho ñaha-gá xií-yu níhí-yu sá cuiní-yu. Te ñu-ni ducaⁿ tucu nchaa ñáyi na càcáⁿ núú-gá ìⁿ sá cuiní-yu, chi sáñaha-gá sá xicáⁿ-yu núú-gá. Te ñu-ni ducaⁿ tucu níhí nchaa ñáyi ná túú dàña ndeé xicáⁿ núú Yá Ndióxi sá cuiní-yu, chi níhí-yu.

¹¹ Te nchòhó cue tée cùu tátá ñá túú cùndee iní-ndó cuáha-ndo cuè déhe-ndo ìⁿ yúú caxi-güexi òré xicáⁿ-güexi ìⁿ pàa núú-ndó càxi-güexi, te ni ñá túú cùndee iní-ndó cuáñaha-ndo ìⁿ cóo caxi-güexi òré xicáⁿ-güexi ìⁿ chácá núú-ndó càxi-güexi. ¹² Te ni ñá túú cùndee iní-ndó cuáñaha-ndo ìⁿ nchacua caxi-güexi òré xicáⁿ-güexi ìⁿ ndíú núú-ndó càxi-güexi. ¹³ Te nchòhó cuè ndeé dau sàá iní-ndó, dico sáha-ndo cuè déhe-ndo sá vâha xèxi-güexi òré xicáⁿ-güexi núú-ndó. Te núu nchòhó ducaⁿ quide-ndo, jte uuⁿ-gá ducaⁿ quide Tátá-ndó Dütú Ndióxi Yá ndécú àndíu, chi taxi-gá Espiritú-gá cundecu ndíhi-ndo te núu na càcáⁿ-ndó núú-gá! —càchí-gá xáhaⁿ-gá xii-güedé.

Càchí-güedé sá ndécú ndíhi Jesús yucu ñávâha

(Mt. 12:22-30; Mr. 3:20-27)

¹⁴ Te Jèsus ndèñuhu-gá espíritú cùndíhi yucu ñávâha yíhi ñaha xii ìⁿ tée ní quide ñíhí-xi, te òré ní ndee ñaha espíritú-áⁿ xii tée-áⁿ, te ní nacáháⁿ-dé. Te ío ní cuñuhu ñáyi sá dúcáⁿ ní quide-gá. ¹⁵ Te davá-yu ní xitnâhá-yu:

—Tée-a ndèñuhu-dé nchaa espíritú cùndíhi sácúfná yíhi ñaha xii ñáyi, chi ñu-ni sácúfná-áⁿ chindèe ñaha-xi xii-dé, te ñu-ni-xi tàxi tñuní-xi nchaa espíritú-áⁿ —càchí-yu xitnâhá-yu.

¹⁶ Te davá-yu xito ndeé ñáhá-yu xii-gá, te xáháⁿ-yu sá ná cádá-gá ìⁿ sá vâ yò tñahí ndàcu cada ñuyúú-a cundèhé-yu nàcuáa cutnùní iní-yu núu ndáá sá Yá Ndióxi ní tendaha ñaha-gá xii-gá véxi-gá ñuyúú-a.

¹⁷ Dico mee-gá sa ní cutnùní iní-gá nchaa nàcuáa sàni iní-yu, núu ní xáhaⁿ-gá xií-yu:

—Te nchòhó xini-ndó sá ñuú ìⁿ tée yíndaha ìⁿ nacióⁿ vá cúú ìⁿnuu-dé ndíhi cue tée cùndíhi-dé, te vá cùdú-dé cunuu-dé. Te ñu-ni ducaⁿ sátnahá tucu-xi cùu cue ñáyi xíndecu ìⁿ-ni vèhe, chi núu vá cúú ìⁿnuú-yu cundecú-yu, te vá cùdú-yu cundecu càhnú-yu. ¹⁸ Te ducaⁿ sátnahá-xi cùu sácúfná, chi núu vá cúú ìⁿnuu-xi ndíhi nchaa espíritú cùndíhi-xi te vá cùdú-xi cundecu-xi taxi tñuní-xi. Te duha càháⁿ-í chi nchòhó càchí-ndó sá sácúfná chindèe ñaha-xi xii-í queññuhu-í nchaa espíritú cùndíhi-xi yíhi ñaha xii ñáyi. ¹⁹ Te núu yúú quidé cuendá-ndó sá sácúfná chindèe ñaha-xi xii-í, te xini ñuhu-xi cada cuendá-ndó yòo chindee ñaha xii cue tée xica cuu ndíhi-ndo queññuhu-güedé nchaa espíritú cùndíhi-xi yíhi ñaha xii ñáyi. Te mee-güedé càchí-güedé sá nchòhó ñá túú càháⁿ ndáá-ndó sá dúcáⁿ càháⁿ-ndó. ²⁰ Te ndáá sá Yá Ndióxi chindèe ñaha-gá xii-í queññuhu-í nchaa espíritú cùndíhi sácúfná yíhi ñaha xii ñáyi, te xíáⁿ cutnùní iní-ndó sá sá ní sáá nduu ndíhu ndaha ñaha Yá Ndióxi xii-ndo.

²¹ Te núu ìⁿ tée ío ndee, te súuní ñí cáá-dé, te ndeé-dé vehe-dé cuendá sá vâ cuíta, te ní quide túha-dé titní sá dèéⁿ, te ío vâha nèhe vâha-dé nchaa ndachíuⁿ-dé. ²² Dico núu quexio ingá tée ío-gá ñí cáá te ndee-gá-dé, te ngúita-dé náá-dé ndíhi tée ndeé vehe-xi-áⁿ, te cada cànarí ñáhá tée-áⁿ xii tée ndeé vehe-xi-áⁿ, te quen-deé-dé nchaa sá dèéⁿ cùndèe iní-dé, te taxi tñuní-na-dé nchaa xíáⁿ, ndíhi nchaa sá ndécú ndíhi-dé, te dàcáñu-dé nchaa cue tée cùndíhi-dé nchaa sá ná níhí-dé.

²³ Te nchaa ñáyi ná túú cùndíhi ñaha xii-í, te cùu úhú iní ñáhá-yu, te nchaa ñáyi ná túú chindee ñaha xii-í, te dàquee tíhü-yu chíuⁿ quide-í.

Espíritú cùndíhi yucu ñávâha sá nánchòcáva xito cùu uu

(Mt. 12:43-45)

²⁴ Te òré ná queè ñaha ìⁿ espíritú cùndíhi yucu ñávâha xii ìⁿ ñáyi, te cuáháⁿ-xi nducu-xi ìⁿ xichi núú cùndecu-xi te ñá níhí-xi, te ní sani iní-xi: “Vâha-gá nùhú tucu-í núú ní xíndecu-í”, duha ní sani iní-xi. ²⁵ Te cuánuhú-xi, te òré ní nasáá-xi,

te ní xini-xi sá cáá íní ñáiyu-áⁿ dàtná cáá-nǎ ìⁿⁿ vehe ní natíhú, chí ní nduu vii-ná, vá yoo-gá ndécú. ²⁶ Te sá tá dúcáⁿ te ní xica-xi cuáháⁿ-xi cuándúcú-xí úsá tñhá espíritú cùndíhí-xi sá nèhè víhí-gǎ xíquide, te òrè ní níhí-xi cue espíritú-áⁿ te ndèca ñaha-xi cuáháⁿ cuèndá ngúndecu ndíhí-xi ñáiyu-áⁿ, te ñáiyu-áⁿ uuⁿ-gá nándi yáha-yu dàcúúxí ndèè díhna —càchí-gá xáhaⁿ-gǎ xíi-yu.

Cuèndá ñáiyu cùu váha ndisa iní-xi

²⁷ Te nini càháⁿ Jèsús tñúhu-áⁿ núú ñáiyu ní càháⁿ níhí ìⁿⁿ ñadíhí tnuú-yu, te xáhaⁿ-aⁿ xii Jesús:

—jSá vǎha táhú ñadíhí ní dàcácu ñaha xii-n, te ní dàcúehnú ñaha-aⁿ! —cachí-aⁿ xáhaⁿ-aⁿ xii-gǎ.

²⁸ Te Jèsús ní xáhaⁿ-gǎ:

—jVáha-gǎ táhú nchaa ñáiyu sàcúnd-odóho nchaa tñúhu càháⁿ Yá Ndiòxí te sàndáá iní-yu! —càchí-gǎ xáhaⁿ-gǎ xii-aⁿ.

Ñáiyu ñá túú sàndáá iní ñhá xii Jesús cuini-yu cada-gá ìⁿⁿ sá vǎ yoo tñáhi ndàcu cada

(Mt. 12:38-42; Mr. 8:12)

²⁹ Te ta tàca vǎi ñáiyu te dàdehnde tñaha-ná-yu, te ní ngúita Jèsús xáhaⁿ-gǎ xii-yu:

—Nchòhò ñáiyu ndècu ñuyú vitna, chí ío sáá iní-ndó, te cuini-ndó càda-í ìⁿⁿ sá vǎ yoo tñáhi ndàcu cada cuèndá cuini-ndó cùtnuní iní-ndó núu ndisa sá Yá Ndiòxí ní tendaha ñaha-gǎ xii-í véxi-í. Dico ñá túú nǎgǎ cada-í quini-ndó, chí sa níhí-ndó tñúhu nàcuáa ní yáha ndí Jónás téé ní xoo càháⁿ tñúhu Yá Ndiòxí ndéé sanaha, te diu-ni ducaⁿ yáha yúhú tucu. ³⁰ Chi nchaa ñáiyu ñuú Nínivé ní cutnùní iní-yu sá Yá Ndiòxí ní tendaha ñaha-gǎ xii ndí Jónás ní sáháⁿ ndí ñuú-yu. Te ducaⁿ sǎtnahá-xi cùu yúhú Téé cùu ñani tñhá-ndó nchaa-ndo, chí sáá nduu te cutnùní iní-ndó sá Yá Ndiòxí ní tendaha ñaha-gǎ xii-í véxi-í ñuyú-a. ³¹ Te na sáá nduu càda ndáá Yá Ndiòxí cuéchi nchaa nchòhò ñáiyu ndècu ñuyú-a, te dàvá-áⁿ quini-ndó ìⁿⁿ ñadíhí ñaha ní xindaha ìⁿⁿ nacióⁿ cáá ndaa xio cuha núú quéné nchí-canchii. Te ñaha-áⁿ ío xica ní xindecu-aⁿ, te ní sáháⁿ-aⁿ ní xindedóho-aⁿ nchaa tñúhu ní càháⁿ ndí Salomón, chí ndí-áⁿ ío ní sáá sá xini tñuní ndí. Te ñaha-áⁿ càháⁿ-aⁿ dàvá-áⁿ sá nchòhò ñáiyu ndècu vitna ñá túú ní quide ndáá-ndó. Dico vitna iha ndècu

ndíhí ñaha-ndo xii yúhú, te diu-í ío-gá cúnú-í dàcúúxí ndí Salomón. ³² Te diu-ni nduu càda ndáá Yá Ndiòxí cuéchi nchaa nchòhò ñáiyu ndècu ñuyú-a vitna, dàvá-áⁿ tñáhá cue ñáiyu ní xindecu ñuú Nínivé cundecú-yu núú Yá Ndiòxí, te tñáhá-yu cachí-yu sá ñá túú ní quide ndáá-ndó. Chí ñáiyu ñuú Nínivé-áⁿ ní ndixi túu iní-yu sá ñá túú quide váha-yu ndècu-yu te ní natuhá-yu ichi Yá Ndiòxí cùtnáhá ní càháⁿ ndíhí ñaha ndí Jónás tñúhu-gǎ xii-yu. Dico vitna iha ndècu ndíhí ñaha-ndo xii yúhú téé càháⁿ tucu tñúhu Yá Ndiòxí, te diu-í ío-gá cúnú-í dàcúúxí ndí Jónás.

Núú-ó cùu-xi datná ìⁿⁿ ñuú

(Mt. 5:15; 6:22-23)

³³ Te ñá túú ní ìⁿⁿ ñáiyu tēñuhú ìⁿⁿ lín-térná, te taxi ndecú-yu ìⁿⁿ núú yídǎhu, àdi chiváha-yu xití ìⁿⁿ tídihi, chí tàxi ndecú-yu ìⁿⁿ núú ñnu cuèndá nchaa ñáiyu quíhu vehe cutnùní núú-yu. ³⁴ Te núú-ndó cùu-xi datná ìⁿⁿ ñuhú, chí ìⁿⁿ sá ná quini-ndó te ndíxi túu iní-ndó nǎ cùú xǎⁿ, te núú càváha núú-ndó, te ducaⁿ cùtnuní iní-ndó nǎ cùú sá ndécú núú-ndó, áⁿ te núú cùhú, te vá cùtnuní iní-ndó nǎ cùú sá ndécú núú-ndó. Te sá dúcáⁿ cùhú núú-ndó te cada iní-ndó sá ndécú-ndó dàtná ìⁿⁿ núú néé. ³⁵ Te ío cada cuèndá-ndó vá càni cuèhé iní-ndó cuèndá tñúhu Yá Ndiòxí cuèndá cutnùní iní-ndó nàcuáa cundecu-ndo, chí núu na càni cuèhé iní-ndó cuèndá tñúhu-gǎ, te cùu-ndo datná ìⁿⁿ ñáiyu ñá túú cùtnuní núú-xí. ³⁶ Te núú càndoo canine iní-ndó, te mee-ni sá vǎha ñuú iní-ndó, te cùtnuní váha iní-ndó tñúhu ndáá dàtná cùtnuní váha núú-ndó òrè càyú ñuhú, ducaⁿ cùtnuní iní-ndó —càchí-gǎ xáhaⁿ-gǎ xii-yu.

Jèsús càháⁿ-gǎ cuèndá cue téé cùu fariséú ndíhí cue téé dàcuaha ñaha xii-í ñáiyu

(Mt. 23:1-36; Mr. 12:38-40; Lc. 20:45-47)

³⁷ Te òrè ní ndíhí tñúhu ní càháⁿ Jèsús, te ìⁿⁿ téé cùu fariséú ní càháⁿ ñáhá-dé xii-gǎ vehe-dé caxi-gǎ, te cuánguihu-gǎ vehe-dé, te ní ngóo-gǎ mèsá. ³⁸ Te téé cùu fariséú-áⁿ ío ní cuñúhu-dé, chí Jèsús ñá túú ní ndàha-gǎ nàcuáa sàni iní-güedé nduu vétú iní Yá Ndiòxí òrè ní ngóo-gǎ caxi-gǎ dàtná quidé mée-güedé. ³⁹ Te Jèsús ní xáhaⁿ-gǎ xii-dé:

—Nchòhò cue téé cùu fariséú xini-ndó sá ío ñáiyu nàquete sáta-ni tàsáⁿ ndíhí

sátá-ni cõhó, te xití-xi cãdehe caduha-ni. Te ducaⁿ sãtnahá-xi cùu nchohó, chi ndaha-ni-ndo nãquete-ndo, te iní-ndó ñà túú nduu ndoo, te nãndi dãndahú-ndó tnàha ñáyiu-ndo, te quèheⁿ-ndo sá ndécú ndihí-yu, te nãndi-gá nchaa sá cuèhé sá dúhá ñuhu iní-ndó quide-ndo. ⁴⁰ ¡Te nchòhó cùú-ndó cuè téé ío ñíí iní-xi! ¿Te náa ñá túú cùtnuní iní-ndó sã Yá Ndiõxí Yáá ní cadúha yiqui cùñú-ó diu-ni-gá ní chihí-gá iní-ó-ãⁿ? ⁴¹ Te nchaa sá vãha ndècu ndihí-ndo cuáha-ndo nchaa ñáyiu xìni ñuhu na cundecu ndihí-yu, te núu ducaⁿ na càda-ndo, te cuu-ndo ñáyiu sa ní nduu ndoo ní nduu nine iní-xi.

⁴² ¡Te ndàhú ní cuu nchaa nchòhó cue téé cùu fariséú! Chi sãha-ndo Yá Ndiõxí núú ùxí xichi yúcu nání mèn tá, ndihí yúcu rùdá, ndihí nchaa dava-gá núú yúcu quèe comidá, dico ñá túú quide ndáá-ndó, te ni ñà túú ñuhu iní-ndó Yá Ndiõxí. Dico tnúhu cáháⁿ-í-a tàù-ndó càda-ndo, te ni yá dãná ndèé-ndó càda-ndo nchaa dava-gá sá vãha.

⁴³ ¡Te ndàhú ní cuu nchòhó cue téé cùu fariséú! Chi cuiní-ndó cùnucóo-ndo núú sácõo cue téé ío cùnuu xití veñúhu, te cuiní-ndó mée-ni ndihí tnúhu yinúhu cáháⁿ ndihí ñaha ñáyiu xii-ndo nchaa núú xicá cùu-ndo.

⁴⁴ ¡Te ndàhú ní cuu nchòhó cue téé dàcuaha ñaha xii ñáyiu nchaa tnúhu ní chídó tnùní ndíi Moisés, ndihí nchòhó cue téé cùu fariséú chi ío dãndahú-ndó mée-ndo sá quidé ndáá-ndó te ñá ndáá sá quidé ndáá-ndó! Chi cùu-ndo datná ìⁿ ñáyiu ní xihí te ní nguindúxi, te ñá túú cùtnuní-gá ndéé yindúxi-yu, te cuèi nà yáha ñáyiu dico ñá túú cùtnuní sá yindúxi ndíyi. Te ducaⁿ sãtnahá-xi cùu nchohó, chi nchaa ñáyiu ndèhe ñaha xii-ndo ñá túú cùtnuní iní-yu nchaa sá cuèhé sá dúhá sàni iní-ndó —càchí-gá xáhaⁿ-gã xii-güedé.

⁴⁵ Te ní xáhaⁿ ìⁿ téé dàcuaha ñaha xii-yu nchaa tnúhu ní chídó tnùní ndíi Moisés xii-gá:

—Mèstrú, te sá dúcáⁿ càháⁿ-n te tnàhá nchúhú xicuehé-n ãⁿ —càchí-dé xáhaⁿ-dè xii-gá.

⁴⁶ Te Jèsús ní xáhaⁿ-gã:

—¡Ndàhú ní cuu tnàhá nchaa nchòhó cue téé dàcuaha ñaha xii ñáyiu nchaa tnúhu ní chídó tnùní ndíi Moisés! Chi quide-ndo datná quidé ñáyiu dàcuído ìⁿ

tnaha ñáyiu-xi ìⁿ sá ïo vée, te mée-yu ni lùha ñá túú cuiní-yu cuidó-yu. Te ducaⁿ sãtnahá-xi quide nchohó chi dãnehé-ndó ñáyiu nãcuáa cadá-yu, dico mee-ndo chi ni lùha ñá túú cuiní-ndó càda-ndo nacuáa dãnehé-ndó-yu.

⁴⁷ ¡Te ndàhú ní cuu tucu-ndo! Chi càdúha-ndo núú ní nguindúxi cue téé ní xóo cáháⁿ tnúhu Yá Ndiõxí ndéé sanaha cuendá sá cùnàha-ndo núú yindúxi cue ndíi, te diu-ni cue ñani tnàhá-ndó ní sahni-güedé cue ndíi. ⁴⁸ Te nchòhó sa ñaha-ndo nacuáa ní quide cue ñani tnàhá-ndó, te càchí-ndó sã ní quide vãha-güedé sá dúcáⁿ ní sahni-güedé cue ndíi-áⁿ, te vitna càdúha-ndo núú ní nguindúxi cue ndíi.

⁴⁹ Te Yá Ndiõxí ío sàá nchaa sá xìni tnùní-gá, te ní cachí-gá sá dácáháⁿ-gá iní cue téé cuendá cáháⁿ-güedé tnúhu-gá núú ñáyiu, te cada-güedé nchaa nãcuáa cuiní-gá, te dava-güedé cahni ñahá-yu xii-güedé, te dava-güedé ío dandòho ñahá-yu xii-güedé duha ní cachí-gá.

⁵⁰ Te nchaa ñáyiu ñuyú vitna tnàhá-yu nacháhu-yu núú Yá Ndiõxí cuendá sá ní sahni-güedé cue téé ní cáháⁿ tnúhu-gá ndéé cùtnàhá ní ngáva ñuyú. ⁵¹ Te ndéé ndíi Ábél téé ní sahni-güedé ndéé díhna nuu, ndihí ndéé ndíi Zacàriá téé ní sahni-güedé ndéé núú ní ndihí-ná ndácáⁿ cuendá ñahá Yá Ndiõxí núú ñáyiu ndècu ñuyú vitna, te diu ndíi-áⁿ ní sahni-güedé mei tnúú veñúhu càhnu sá ío cùnuu, ndihí xito núú sácõdó sã ndúú tãhú Yá Ndiõxí.

⁵² ¡Te ndàhú ní cuu tucu nchaa nchòhó cue téé dàcuaha ñaha xii ñáyiu nchaa tnúhu ní chídó tnùní ndíi Moisés! Chi quide-ndo datná quidé ìⁿ téé tàxi tnuní ìⁿ vehe, chi nacadí-dé te ñá dãná-dè quíhu ñáyiu te ni mée-dé ñá túú quíhu-dé. Te ducaⁿ sãtnahá-xi quide-ndo, chi dàcuaha-ndo tnúhu Yá Ndiõxí te ñá túú cuiní-ndó quindáá iní-ndó te ni ñà túú dãnehé-ndó ñáyiu cuiní tnií tnúhu-gá nãcuáa tàù-xi cunduu cuendá naníhí tãhú-yu —càchí-gá xáhaⁿ-gã xii-dé.

⁵³ Te òré ní ndee Jèsús vehe téé cùu fariséú-áⁿ, te cue téé dàcuaha ñaha xii ñáyiu nchaa tnúhu ní chídó tnùní ndíi Moisés, ndihí cue téé cùu fariséú ní cudééⁿ-güedé núú-gã, te ní nguíta-güedé nãndi sá xicáⁿ tnúhú-güedé núú-gã cuendá

cuini-güedé nũu vá cuĩta-gá ññu tñúhu cãháⁿ-gá⁵⁴ cuendá ducaⁿ ññí-güedé ñacuáa cada-güedé cacáⁿ cuéchi-güedé cuendá-gá.

12

Jèsús cãháⁿ-gá cuendá cue tée dãndahú méé-xí

¹ Te óré-áⁿ ññí tacá titní mĩ ñáyiu núu ndécú Jèsús, te súúni dicó ngõnchihí tñaha-ná-yu. Te ndedóho-yu ní xáhaⁿ Jèsús xii cue tée xica cuu ndíhi-gá:

—Cada cuendá-ndó vã cáncñícúⁿ nihnu-ndo ñacuáa quide cue tée cùu fariséú, chi cue tée-áⁿ ío dãndahú-güedé méé-güedé sá quidé ndáá-güedé dico ñá ndáá sá quidé ndáá-güedé. ² Te nchaa tñúhu sá cúu yúhu ni cuu vá cúu yúhu-gá, chi nchaa dacuítíí sã quée tũu-xi núu ñáyiu. ³ Chi nchaa tñúhu cãháⁿ dayuhu-ndo quée tũu-xi núu chítú núu tàcá, te nchaa tñúhu cãháⁿ méé-ndó vèhe-ndo dacuítíí sã ññí ñáyiu tñúhu.

Yá Ndiõxí xini ññu-xi yuhú-ó-gã

(Mt. 10:26-31)

⁴ Te nchòhó cue tée ío váha tñahá tñúhu ndíhi-í ná cãchí tñúhu-í xii-ndo sã vã yúhú-ndó cuè ñáyiu cuèi na cãhni ñahá-yu xii-ndo, chi ññu-ni yiquí cùñú-ndó ndacú-yu cahní-yu, te ñá túú nãgá ndacú-yu cada ñahá-yu xii-ndo. ⁵ Te na cãchí tñúhu-í xii-ndo sã Yá Ndiõxí tãú-ndó yúhú-ndó-gã, chi mee-gã ío cùnuu-gá, te ññu-gá quidé-gã sã vã cùndecu-gá ñáyiu ñuyúí, te daquihíⁿ ñahá-gã xii-yu núu ùhú núu ndahú, núu xíãⁿ cãchí tñúhu-í xii-ndo sã Yá-áⁿ tãú-ndó yúhú-ndó-gã.

⁶ Te nchòhó xini-ndó sã ndéé úhúⁿ tñahá tñáá cùyãhu-di núu ùú díhúⁿ, dico Yá Ndiõxí ñá túú cùnaa-gá ni ññ-güedé, chi ññe cuendá ñahá-gã xii-güedé. ⁷ Te nchòhó ndéé ññ ññ idi díquí-ndó yñdehu, núu xíãⁿ cãchí-í sã vã yúhú-ndó, chi cùnuu-gá-ndó dacúúxí tñáá cuèi vai vihi-güedé.

Ñáyiu na dátúu núu ñáva-gá ñáyiu sã ndécú ndíhi-yu Xitohó Jesucristú

(Mt. 10:32-33; 12:32; 10:19-20)

⁸ Te na cãchí tñúhu-í xii-ndo sã núu na dátúu-ndo núu ñáva-gá ñáyiu sã ndécú ndíhi ñaha-í xii-ndo. Te ducaⁿ te tñahá yúhú Tée cùu ñani tñahá-ndó nchaa-ndo dátúu-í núu nchaa cue espíritu xínú cuèchi

núu Yá Ndiõxí sã nchòhó ndécú ndíhi ñaha-ndo xii-í. ⁹ Dico núu na cùñaha-ndo xii ñáyiu sã ñá túú ndecu ndíhi ñaha-ndo xii-í, te ññu-ni ducaⁿ càda yúhú Tée cùu ñani tñahá-ndó nchaa-ndo, chi cùñaha-í xii cue espíritu xínú cuèchi núu Yá Ndiõxí sã ñá túú ndecu ndíhi ñaha-í xii-ndo.

¹⁰ Te ndédani càa ñáyiu na cãháⁿ cuèhé cuendá yúhú Tée cùu ñani tñahá-ndó nchaa-ndo, te cada cãhnu ñani ñahá Yá Ndiõxí xii-yu. Dico ñáyiu na cãháⁿ cuèhé cuendá Espíritu Yá Ndiõxí, te ñáyiu-áⁿ vã càdá cãhnu ñani ñahá-gã xii-yu.

¹¹ Te óré ná càndeca ñaha-güedé xii-ndo quíhíⁿ venúhu, àdi núu cuè tée cùchiuⁿ, te ni vã cãní ñni-ndó núu ñasa cunduu tñúhu cùñaha-ndo xii-güedé, te ni vã cãní ñni-ndó núu ná tñúhu nadanchocáva-ndo núu ná tñúhu na cùñaha-güedé xii-ndo, ¹² chi óré-ñá te mee Espíritu Yá Ndiõxí dacãhu ñani ñahá-xí xii-ndo tñúhu cùñaha-ndo xii-güedé —cãchí-gã xáhaⁿ-gã xii-güedé.

Cuendá ññ tée cuica

¹³ Te ññ tée ññu tñahá tñuu ñáyiu-áⁿ ní xáhaⁿ-dè xii Jèsús:

—Mèstrú, cùñaha xii ñani-í sã ná chidava-dé sã ní dãndõ tãtã-ndí cuu cuendá-ndí —cãchí-dé xáhaⁿ-dè xii-gã.

¹⁴ Te Jèsús ní xáhaⁿ-gã xii-dé:

—¿Te ná cuendá ducaⁿ cãháⁿ-n? Te ñá díú chiuⁿ-áⁿ vèxi-í cada-í, chi ñá díú tée cùchiuⁿ cuu-í —cãchí-gã xáhaⁿ-gã xii-dé.

¹⁵ Te xáhaⁿ-gã xii nchaa ñáyiu xíndecu-áⁿ:

—Nchaa nchòhó ñáyiu ndedóho nchaa tñúhu cãháⁿ-í ío váha cada cuendá-ndó, te vã cãní ñni-ndó ñandi nducu-ndo cùndecu ndíhi-ndo, chi cuèi vai vihi na ññi-ndó cùndecu ndíhi-ndo, dico vã chíndèe ñaha-xi cudíi-ndo cùndecu-ndo ñuyúí-a —cãchí-gã xáhaⁿ-gã xii-yu.

¹⁶ Te dátñuni ní ngúita-gã cãní-gã ññ cuendú núu-yu cuendá tecú tñini-yu tñúhu-gã, te xáhaⁿ-gã:

—Ññ tée cuica súúni ññ cuu nchaa tatá ní xitu-dé núu ññú-dé. ¹⁷ Te ní ngúita-dé sãní ñni-dé: “¿Te ñasa cada-í? Te ñá túú ndéé naxáhu-í nchaa sã ní xitu-í”, duha ní sani ñni-dé. ¹⁸ Te dátñuni ní sãha váha tucu-dé cuendá ñacuáa cada-dé, te ní cãchí-dé: “Duha na cùnduu, dangõyo-í yacá-í, te ndada cãhnu-gã-í, te xití-xi naxáhu-í nchaandi tũhú sã ní xitu-í, ndíhi nchaa ñáva-gã sã ndécú ndíhi-í. ¹⁹ Te sátá

ducán, te cachí-í. Ío vai sá ndécú ndíhi-í, te cudí-í-xi cuéhé cuíá, te vitna ndetatú-í, te coho-í te caxi-í cada-í, te nándi-gá cada-í cuendá cudíí iní-í cundecu-í, duha quesaha-í, cächí-dé. ²⁰ Dico Yá Ndiöxí ní xáhaⁿ-gá xii-dé: “Yòhó, ñá túú nándíhi sá sání iní-n, chi yúhú cächí-í sá niú vitna cuú-n, te nchaa sá ndécú ndíhi-n ζyoo cuu sá váha xii-aⁿ-í?”, cächí-gá xáhaⁿ-gá xii-dé. ²¹ Duha yáha nchaa ñáyiu nándi sání iní-xi cundecu ndíhi-xi ñuyú-a, dico ñáyiu-án ò ndàhú-yu chi ñá túú ná nduu táhú-yu núú Yá Ndiöxí cundecu ndíhi-yu —cächí Jèsús xáhaⁿ-gá xii-yu.

Yá Ndiöxí xító-gá nchaa ñáyiu sàndáá íf ñáhá xii-gá

(Mt. 6:25-34)

²² Te ní xáhaⁿ Jèsús xii cue téé xica cuu ndíhi-gá:

—Te na cächí tnúhu-í xii-ndo sá vâ ò cani iní-ndó niú nása cundecu-ndo, àdi nása níhi-ndó sá caxí-ndó, àdi nása níhi-ndó dóo cuihnu-ndo. ²³ Chi cúnuu-gá méé-ndó dàcúúxí sá nchító-ndó, te ducaⁿ yiqui cuñú-ndó cúnuu-gá-xi dàcúúxí dóo sácuihnu-ndo. ²⁴ Te chí cuàha cuendá nàcuáa quide cue ticácá, chi ni ñá túú chíhi-güedi tatá cuu itú natahu-güedi te ni ñá túú ndèè núníhi yacá-güedi, te níhi-güedi xèxi-güedi, chí Yá Ndiöxí xító ñàha-gá xii-güedi. jTe nchòhó cúnú-gá-ndó dàcúúxí nchaa cue quiti ndava! ²⁵ Te cuéi nándi sá sání vìhi iní-ndó ndècu-ndo, dico ñá ndácú-ndó càda-ndo nacuéa cuehnu-ndo cuèdicó ìⁿ yiqui-gá. ²⁶ Te núu ni sá lúhá xíáⁿ ñá ndácú-ndó càda-ndo, ζte ná cuendá ío sání iní-ndó cuendá nchaa sá cuiní-ndó níhi-ndó cundecu ndíhi-ndo?

²⁷ Te chí cadá cuendá nàcuáa sàhnu ìⁿ tnu itá, chí ni ñá túú quide chiuⁿ-xi, te ni ñá túú quèheⁿ-xi idi. Te na cächí tnúhu-í xii-ndo sá ndíi Salòmón ío vii ní cãa nchaa sá ní xindecu ndíhi ndíi, dico vií-gá tucu cãa nchaa itá dàcúúxí nchaa sá ní xindecu ndíhi ndíi. ²⁸ Te chúhú sá ío vitna tnaa-ni cudí-í-xi te sàhmí-yu, te cuéi ducaⁿ dico ío vii càdúha Yá Ndiöxí nchaa chúhú-ãⁿ. jTe nchòhó ío cúnuu-ndo dacúúxí nchaa chúhú-ãⁿ, núu xíáⁿ ío xito ñàha-gá xii-ndo, te dicó yica cùu iní-ndó sàndáá iní-ndó-gá! ²⁹ Te vâ ò canchicúⁿ nihnu-ndo sá cóhó sá caxí-ndó, te ni vâ dándíhú-ndó iní-ndó niú nása cada-ndo

níhi-ndó. ³⁰ Chi nchaa ñáyiu ñá túú sàndáá iní ñáhá xii Yá Ndiöxí ducaⁿ mèe-ni sá cóhó sá caxí-yu xica nchicúⁿ nihnú-yu. Dico mee Tãtá-ó Dùtú Ndiöxí sá ñàha-gá nándi cùu sá xini ñuhu-ndo, te taxi-gá. ³¹ Te cada-ndo nchaa nacuéa càháⁿ Yá Ndiöxí Yáá yíndàha ñàha xii-ndo, te ducaⁿ te taxi-gá nchaa sá xini ñuhu-ndo.

Cuendá sá váha nduu táhú-ó núú Yá Ndiöxí (Mt. 6:19-21)

³² Te vâ yùhú nchòhó cue téé ndècu ndíhi-í cuéi ío sacú-ndó, chí Tãtá-ó Dùtú Ndiöxí ní cachí-gá sá ndúú táhú-ndó cundecu-ndo núú ndécú-gá taxi tnúni-ndó tnàhá-ndó. ³³ Te chí dicó nchaa sá ndécú ndíhi-ndo, te chí cuàha nchaa ñáyiu ndàhú díhúⁿ-ndó ñáyiu xini ñuhu, te cada váha-ndo cundecu-ndo, te ducaⁿ te nduu táhú-ndó sá ío-gá váha núú Yá Ndiöxí cundecu ndíhi-ndo, te xíáⁿ vâ cúú túhú tnàhí-gá-xi, te ni vâ ndíhi nihnu-gá-xi, te ni ñadúhú vâ ndácú-güedè duhu-güedè, te ni tñquidi vâ quéé-dí. ³⁴ Te núu xíáⁿ cúú cuendá-ndó ñá, te diu-ni xíáⁿ ñúhú iní-ndó, áⁿ te núu mee-ni sá ndécú ñuyú-a ndècu ndíhi-ndo, te diu-ni nchaa xíáⁿ ñúhú iní-ndó.

Xini ñuhu-xi quíhi iní-ó cundecu-ó

³⁵⁻³⁶ Te ío quíhi iní-ndó cundecu-ndo, te cada-ndo dàtná quidé dàva cue téé xinu cuechi sacúndecu túha-güedè cuéi nani òré-áⁿ ndétú-güedè patróóⁿ-güedè ná òré nasáá-dé sá cuàháⁿ-dé vico tnàndaha. Te núu niú te sa cúu cáyú-ni ñuhú-güedè sá cündètu ñàha-güedè, chí òré ná nasáá-dé dacàsaⁿ-dé yuyèhe, te ndíhi-ni nacaáⁿ-güedè ndíhu-dé. ³⁷ Te váha táhú nchaa cue téé xinu cuechi-áⁿ, chí ndècu túha-ni-güedè ndétú-güedè ndéé òré ní nasáá patróóⁿ-güedè, te na cächí tnúhu ndáá-í xii-ndo sá òré ná nasáá patróóⁿ-güedè-áⁿ te chíhi ñàha-dé mèsá xii-güedè, te ndacaⁿ ndee-dé dóo níhú-dé núú yíquí-dè, te ngúíta-dé cani-dé cóhó-güedè cuendá caxi-güedè. ³⁸ Te diu-ni ducaⁿ càda-dé cuéi dàva niú, àdi tacuíhndá-gá, te núu ñá túú xidí-güedè òré nasáá-dé, te cue téé xinu cuechi-áⁿ ío váha tnàhá-güedè. ³⁹ Te núu dicó ìⁿ téé cùu xítóhó ìⁿ vehe xini-dé ná òré quíhu ñadúhú vehe-dé ñá, te quíhi iní-dé te vâ cudú-dé, te vâ dánhú-dé nacaáⁿ-güedè yuyèhe-dé

quíhu-güedé duhu-güedë. ⁴⁰ Te nchòhó tucu nchaa-ni nduu quihí iní-ndó cùndecu túha-ndo, chi na cuáháⁿ nduu ñá túú yìhí iní-ndó, te quixi tucu yúhú Téé cùu ñaní tnáhá-ndó nchàa-ndo —cachí-gá xáhaⁿ-gã xii-güedé.

Cue téé quide ndáá ndihi cue téé ñá túú quide ndáá

(Mt. 24:45-51)

⁴¹ Te te Pèlú ní xícáⁿ tnúhu-dë núú Jèsús, te xáhaⁿ-dë:

—Mèstrú, ¿te tnúhu ní cáháⁿ-n-áⁿ cùu-xi mee-ni cuendá nchúhú áⁿ cuendá nchaa ñáyiú? —cachí-dé xáhaⁿ-dë xii-gá.

⁴² Te Jèsús ní xáhaⁿ-gã:

—Cáháⁿ-í cuendá ñáyiú quide váha dàtná quidé ìⁿ téé tàxi tnuní ñáhá xii cue ñáyiú xinu cuechi ndecu vehe patróóⁿ-xi, chi téé-áⁿ ìo váha tècú tnùn-dé, te quide-dé nchaa nàcuáa cáháⁿ patróóⁿ-dë, te dà-caxi-dé cue ñáyiú xinu cuechi oré tàú-xi caxí-yu. ⁴³ Te núu ducaⁿ quide váha téé tàxi tnuní ñáhá xii cue ñáyiú xinu cuechi-áⁿ ñá, te ìo váha tnàhá-dé òré násáá patróóⁿ-dë núu ndéé cuáháⁿ-dë. ⁴⁴ Te na cachí tnúhu ndáá-í xii-ndo sã tèé quide ndáá táxi tnùn ñáhá xii cue ñáyiú xinu cuechi-áⁿ cùñaha-nã patróóⁿ-dë xii-dé sã ncháándì túhú-nã sã ndécú ndihi-dé quindaha-dë. ⁴⁵ Dico núu téé tàxi tnuní ñáhá xii cue ñáyiú xinu cuechi-áⁿ ná càni iní-dé sã cùyàa patróóⁿ-dë vá násáá ndihi-ni-dé ñá, te nguíta-dé cani-dé nchaa ñáyiú xinu cuechi, cuèi téé cuèi ñadìhí, te nguíta-dé caxi-dé coho-dé, te dàxíni-dé mée-dë, ⁴⁶ te nduu ñá túú yìhí iní-dé te nasáá patróóⁿ-dë, te dandòho ñaha patróóⁿ-dë-áⁿ xii-dé, te daquihíⁿ ñáhá-dë xii-dé núú ndécú ñáyiú ñá túú ní quide ndáá.

⁴⁷ Te dava cue téé xinu cuechi xiní-güedé nàcuáa cuiní patróóⁿ-güedë cada-güedé te ñá túú quide-güedé, te ni ñá túú cuiní-güedé cundecu túha-güedé cundetu-güedé patróóⁿ-güedë, te nchaa cue téé ducaⁿ xiquide dandòho ñaha patróóⁿ-güedë, chi ñaní vihi-güedé. ⁴⁸ Te dava cue téé xinu cuechi ñá túú xiní-güedé nàcuáa cuiní patróóⁿ-güedë cada-güedé, te ní quide-güedé sã nëñúu-güedé ìⁿ sã ñá túú tàú-güedé cada-güedé ñá, te cue téé-áⁿ sacú-gá dandòho ñaha patróóⁿ-güedë, chi sacú-gá ñáni-güedé. Te ñáyiú cùtnuní

iní-xi nàcuáa cuiní Yá Ndiòxí cadá-yu, te diu-ni ducaⁿ tàú-yu cadá-yu nàcuáa cuiní-gá. Te ñáyiú vai-gá tècú tnùn ñàcuáa cáháⁿ-gá, te diu-ni ducaⁿ vai nchaa sã cáháⁿ-gá tàú-yu cadá-yu.

Ñá túú cùu ìⁿnuu ñáyiú

(Mt. 10:34-36)

⁴⁹ Te yúhú véxi-í ñuyúú-a cuendá cutnùn ìn ñáyiú nàcuáa cada ñaha Yá Ndiòxí xíí-yu, ¿te cuiní-í sã ndihi-ni cada-gá nàcuáa sàni iní-gá! ⁵⁰ Te yúhú ìo vai tnúhu sàni iní-í, ¿chi sáá nduu te ìo ndoho-í, te diu-ni xíáⁿ cuhuⁿ iní-í ndéé ná sáá nduu dùcaⁿ yáha-í! ⁵¹ Te nchòhó vá càni ìn ñáyiú sã yúhú véxi-í ñuyúú-a te cundecu ndihi tnàha váha-ni ñáyiú, te ñáhá chi da nguíta-yu vá cúú ìⁿnuú-yu cundecú-yu. ⁵² Te ndéé není vitna nguíta ñáyiú vá cúú ìⁿnuú-yu cundecú-yu, te na càda-o cuendá te núu úhúⁿ ñáyiú xindecu ìⁿ-ni vèhe, te vá cúú ìⁿnuu-gá-yu, chi úní-yu ndatnúhu-yu te nàá-yu ndihi úú-gá-yu, àdi ñáyiú úú-áⁿ ndatnúhu-yu te nàá-yu ndihi ñáyiú úní-áⁿ. ⁵³ Te dava cue téé cùu tátá vá cúú ìⁿnuu-gá-güedé ndihi déhe ducuⁿ-güedé, te ni dàva cue ñáyiú cùu náná vá cúú ìⁿnuu-gá-yu ndihi déhe yòcò-yu, te ni sãnu-yu vá cúú ìⁿnuu ndihi-gá-yu. Te ducaⁿ cadá-yu chi davá-yu quindáá ìn ñáhá-yu xii-í, te davá-yu vá quindáá ìn ñáhá-yu —cachí-gá xáhaⁿ-gã xii-güedé.

Ñáyiú cùtnuní iní-xi nàcuáa quide-xi ñuyúú ndihi andiú

(Mt. 16:1-4; Mr. 8:11-13)

⁵⁴ Te Jèsús ní xáhaⁿ-gã xii nchaa ñáyiú xindecu-áⁿ:

—Te nchòhó òré ndéhé-ndó ndànchita vícò ndàa xio quée nchícanchii, te cachí-ndó sã cúúⁿ dàú, te diu ducaⁿ ndisa quide-xi. ⁵⁵ Te òré ná quène táchí ndàa xio datni nàcuáa quène nchícanchii, te cachí-ndó sã ìo cada ihni-xi, te diu ducaⁿ ndisa quide-xi. ⁵⁶ Te nchòhó ìo váha cùtnuní iní-ndó nàcuáa quide-xi andiú ndihi ñuyúú, ¿te ná cuendá quidé-ní-ndó sã ñá tècú tnùn-ndó nàcuáa quide Yá Ndiòxí vitna? Te sã dúcáⁿ quide-ndo-áⁿ ìo dandahú-ndó mèe-ndo sã ìo váha cùtnuní iní-ndó, chi ñá ndáá sã cùtnuní iní-ndó.

Nducu-o nàcuáa nucúndecu ndíhi váha-o ñáyiú cùu úhú iní ñáhá

(Mt. 5:25-26)

⁵⁷ Te nchòhó, ¿ná cuèndá ñá túú dàndixi túu-ndo iní-ndó càda-ndo mee-ni sá váha sá tàú-ndó càda-ndo-i? ⁵⁸ Te núu lò ìn-ndo ní sacáⁿ cuèchi ñáyiú cuèndá-ndó cuèndá ìnⁿ sá ní quide-ndo, te cuáháⁿ-ndó ndíhi-yu núu tée cùchiuⁿ, te nini ñuhu-ndo ndíhi-yu ichi, te nducu-ndo nàcuáa cada-ndo nàcáháⁿ cáhnú iní tnáhá-ndó ndíhi-yu cuèndá sá vâ cándeca ñaha-gá-yu qíhíⁿ núu tée cùchiuⁿ, chi núu ducaⁿ na càdá-yu te tée cùchiuⁿ-án nachihi ñaha-dě ndaha cue tée cùu poleciá, te cue tée-án chihí ñaha-güedě vecaá xii-ndo. ⁵⁹ Te na càchí tnúhu-í xii-ndo sá núu na ngáva-ndo vecaá, te vâ cácu-ndo te núu vâ nácháhu-ndo nchàa sá tàú-ndó —càchí-gá xáhaⁿ-gá xií-yu.

13

Xini ñuhu-xi natuha-o ichi Yá Ndiòxí

¹ Te ñu-ni òré-án ní ngúnutnî ìnⁿ úú ñáyiú núu Jèsús caní-yu cuèndú núu-gá nàcuáa ní quide ñaha té Pilatú xii cue tée distritú Galileá cue tée ní sahní quiti nduu táhu Yá Ndiòxí, te mei òré ní sahní-güedé cue quiti-án ní táuchíúⁿ tē Pilatú cue sandadú-dé ní sahní-güedé cue tée Galileá-án, te ní xica níñí-güedé núu ñúhú ndíhi níñí cue quiti-án, te ní nadacánuu-xi. ² Te Jèsús ní xáhaⁿ-gá xií-yu:

—Te núu nchòhó sání iní-ndó sá sà dúcáⁿ ní yáha cue tée distritú Galileá-án te cùu-güedé cue tée ndècu vihi-gá cuèchi-xi dàcúúxí cuè tée ñuu-güedé ñá. ³ Te na càchí tnúhu-í xii-ndo sá ñáhá. Te núu nchòhó vâ ndíxí cuèchi iní-ndó cuèndá nchaa sá cuèhé sá dúhá quide-ndo ndecu-ndo ña, te tnáhá nchaa nchòhó cuíta nihnu-ndo te núu vâ nátnî-ndo ichi Yá Ndiòxí. ⁴ Te núu nchòhó sání iní-ndó sá ñáyiú sáhnúⁿ úní ní xihí ní táú ñáhá vèhe ducúⁿ Silòé ío-gá ndécú cuèchi-yu dàcúúxí nchàa ñáyiú xín-decu ñuu Jerusálén ñá, ⁵ te na càchí tnúhu tucu-í xii-ndo sá ñáhá. Te núu nchòhó vâ ndíxí cuèchi iní-ndó cuèndá nchaa sá cuèhé sá dúhá quide-ndo ndecu-ndo ña, te tnáhá nchaa nchòhó cuíta nihnu-ndo te núu vâ nátnî-ndo ichi Yá Ndiòxí —càchí-gá xáhaⁿ-gá xií-yu.

Yutnu ngúxí ñá túú cùuⁿ sávidí-xi

⁶ Te Jèsús ní caní tucu-gá ìnⁿ cuèndú núu-yu nàcuáa tecú tnùní-yu tnúhu-gá, te xáhaⁿ-gá:

—Ìnⁿ tée nùtnî ìnⁿ yutnu ngúxí núu ñúhú-dě, te cuáháⁿ ndéhé-dě núu ní cuuⁿ sávidí-xi ní cùu, te ní ìnⁿ ñá túú ní cùuⁿ. ⁷ Te ní xáhaⁿ tée-án xii tée ndèé ñuhu-dé: “Nàha-n sá vitna ní cuu úní cuíá quixí còto-í yutnu ngúxí-a te ñá túú xini-í ní ìnⁿ sávidí-xi. Te quehndé-n vitna, chi àúⁿ nã cuu nùtnî-xi quide tneñu-xi núu ñuhu-ánⁿ, càchí-dé xáhaⁿ-dě xii tée ndèé ñuhu-dé-án. ⁸ Te tée ndèé ñuhu-ánⁿ ní xáhaⁿ-dé: “Pàtróón, daña na cuñhu-xi cuíá vitna-ná, te na nàdatayá-í ñuhu núu sàhá-xi, te chihí-í saháⁿ. ⁹ Te ducaⁿ te cudana cuuⁿ sávidí-xi, àdi núu ñá túú ní cùuⁿ sávidí-xi ña te téhndé-nã-xi”, càchí-dé xáhaⁿ-dě xii pàtróón-dé —càchí-gá xáhaⁿ-gá xií-yu.

Jèsús quidé tãtna-gá ìnⁿ ñadìhí ní nduu cueyi sãtã-xi nduu ndetátú ñáyiú

¹⁰ Te ìnⁿ xito cùu-xi nduu ndetátú ñáyiú, te yìhí Jèsús ìnⁿ veñúhu dànehé-gá ñáyiú. ¹¹ Te xián ndécú ìnⁿ ñađhí ní cuu sáhnúⁿ úní cuíá sá cùhú-aⁿ yìhí ñaha espirítú cundìhí yucu ñávãha xii-aⁿ, te xián ní ndada cueyi-xi sãtã-aⁿ, te ñá dáñá-gã-xi nucúnutnî ndáá-aⁿ. ¹² Te òré ní xini ñáhá Jèsús xii-aⁿ te ní cana ñaha-gá, te xáhaⁿ-gá: —Yòhò ñaha cùhú, ndúha-n cuèhé tnáhá-n —càchí-gá xáhaⁿ-gá xii-aⁿ.

¹³ Te ní dácaá-gá ndaha-gá ní tendaha ñaha-gá xii-aⁿ, te òré-ni-án ní ndúha-aⁿ te ní nucúnutnî ndáá-aⁿ, te ní ngúíta-aⁿ ní cachí-aⁿ sá ío càhnu cuu Yá Ndiòxí. ¹⁴ Dico tée tàxi tnuní veñúhu ní cudééⁿ-dè sá dúcáⁿ ní quide Jèsús ní quide tãtna-gá ñaha cùhú-ánⁿ nduu ndetátú-yu, te ní xáhaⁿ-dè xií-yu:

—Ío ínú nduu tàú-ó càda chiuⁿ-o, te ndè-dani càa nduu-ánⁿ quixi-ndo cùtãtna-ndo, dico ñá díú nduu cuu-xi nduu ndetátú-ó —càchí-dé xáhaⁿ-dè xií-yu.

¹⁵ Te ní xáhaⁿ Jèsús:

—Nchòhó chí ío dandahú-ndó mèe-ndo sá quidé ndáá-ndó dico ñá ndáá sá quidé ndáá-ndó, ¿náa ñá túú nã-daxi-ndo ndicutu-ndo àdi búrru-ndo dàcoho-ndo-güedi ndute nduu ndetátú-ó ãⁿ? ¹⁶ Te ñadìhí-a cùu-aⁿ ñaní tnáhá ndíi Àbrahám, te dicó-ni sá yucu ñávãha quide

duha cuhú-aⁿ ní cuu sáhúⁿ úní cufá, ¿te náa ñá túú xini ñuhu-xi cutátna-aⁿ cuéi cùu-xi nduu ndetatú-ó ãⁿ? —càchí-gá xáhaⁿ-gã xii-dé.

¹⁷ Te sá dúcáⁿ ní cáháⁿ Jèsús, núu nchaa cue téé cùu úhú iní ñáhá xii-gá ní cucahaⁿ núú-güedë, dico nchaa dava-gá ñáyiú chi xicudí iní-yu xĩndéhë-yu nchaa sá vã yõo tñàhí ndàcu cada quide-gá.

Cuendá ndíquiⁿ yutnu nàni mostázá
(Mt. 13:31-32; Mr. 4:30-32)

¹⁸ Te ní xáhaⁿ-gã xií-yu:

—Na càni-í ìⁿ cuèndú núú-ndó nàcuáa tecú tñuní-ndó nàcuáa cada-xi òré ndíhu ndaha ñàha Yá Ndiòxí xii-ndo. ¹⁹ Ìⁿ téé ní queheⁿ-dé ndíquiⁿ yutnu nàni mostázá te nèhe-dé cuáháⁿ ní sacáⁿ-dé núú ñúhú-dë te ní xínu-xi, te ní sahnú-xi ní cuu dùcúⁿ-xi, te cue quití ndàva núú tàchí cádùha-güedi tacá-güedi núú dité-xi —càchí-gá xáhaⁿ-gã xií-yu.

Nàcuáa quide levadurá
(Mt. 13:33)

²⁰ Te ní xáhaⁿ tucu Jesús xií-yu:

—Te na càchí tñúhu tucu-í xii-ndo nàcuáa cada tucu Yá Ndiòxí òré ndíhu ndaha ñàha-gá xii-ndo. ²¹ Ìⁿ ñadihí ní queheⁿ-aⁿ levadurá ní chihi-aⁿ úní arròbá yuchi tríú, te levadurá-án ní quide-xi ní ndaa nihí yusaⁿ-án —càchí-gá xáhaⁿ-gã xií-yu.

Yuyèhe cuiñí
(Mt. 7:13-14, 21-23)

²² Te ichi ñùhu Jesús cuáháⁿ-gã ñuú Jerusálén, te nchaa ñuú náhnú, ndíhí nchaa ñuú líhli ta yáha-gá ducaⁿ ta dànehé-gá ñáyiú tñúhu-gá cuáháⁿ. ²³ Te ìⁿ ñuú-án ní xáhaⁿ ìⁿ téé xii-gá:

—Mèstrú, cuini-í cácáⁿ tñúhu-í ìⁿ tñúhu núú-n, ¿ndáá sá ïo sacú ñáyiú nàníhí tàhú-ãⁿ? —càchí-dé xáhaⁿ-dë xii-gá.

Te Jèsús ní xáhaⁿ-gã xii-dé ndíhí nchaa ñáyiú:

²⁴ —Cada-ndo sã nánihí tàhú-ndó, te tñi-ndo ìchi Yá Ndiòxí, te ichi-gá-án cúú-xí dàtná ìⁿ yuyèhe cuiñí, te càchí tñúhu-í xii-ndo sã ïo cuéhé ñáyiú cachí iní-yu quíhu-yu yuyèhe cuiñí-án dico vã ndácü-yu. ²⁵ Te na càni tucu-í ingá cuèndú núú-ndó nàcuáa tecú tñuní-ndó tñúhu càháⁿ-í. Te òré nã ndàcuíñí téé cùu xítóhó vehe, te nacadí-dé yuyèhe, te

nchaa nchòhó ñáyiú na quèndóo quehé dacàsaⁿ-ndo yuyèhe, te quesaha-ndo cùñaha-ndo xii-dé: “Tátá, nacaáⁿ yuyèhe na quíhu-ndí”, quesaha-ndo cùñaha-ndo xii-dé. Dico téé cùu xítóhó vehe-án cùñaha-dë xii-ndo: “Ñá túú xini-í nchòhó ndèé ñáyiú cùu-ndo”, duha cùñaha-dë xii-ndo. ²⁶ Te dàtnuní ngüita nchòhó cùñaha-ndo xii-dé: “Nchúhú ní xexj ndíhí ñaha-ndí, te ní xihí ndíhí ñaha-ndí xii-n, te nchaa ichi ní xóo dacuàha ñaha-n xii-ndí”, quesaha-ndo cùñaha-ndo xii-dé. ²⁷ Dico cachí tucu téé cùu xítóhó vehe-án cùñaha-dë xii-ndo: “Sa ní cachí-í sã ñà túú xini-í ndèé ñáyiú cùu-ndo. Te chí xócuíñí nchòhó ñáyiú ndècu ichi cuehé ichi duha núú ndècu-í”, quesaha-dë cùñaha-dë xii-ndo. ²⁸ Te na sãa nduu dùcaⁿ cada-xi te quini-ndó tã Abraham, ndíhí té Isaac, ndíhí té Jàcób, ndíhí nchaa cue téé ní xóo cáháⁿ tñúhu Yá Ndiòxí, te nchaa cue téé-áⁿ ndécú-güedë núú ndécú-gã táxí tñuní-gá, te nchòhó quee tíhú-ndó núú-gã sá tñúhu ñá túú ní cuini cada ndáá, te dàvá-án ndàhyú-ndó te cuu rúhñú-nã núhu-ndo sã sàtú iní-ndó cuèndá sá ndóhó-ndó. ²⁹ Te dàvá-án quíhu nchaa ñáyiú ndí cùmí xio ñuyúú núú ndécú Yá Ndiòxí táxí tñuní-gá caxí-yu ndíhí-gá, te cundecú-yu ndíhí-gá. ³⁰ Te dava ñáyiú nchicúⁿ ñá túú cùnunu ndecu ichi Yá Ndiòxí vitna, ñáyiú-án sãá nduu te ïo cunúú-yu. Te dava ñáyiú cùnunu ndecu ichi-gá vitna, ñáyiú-án sãá nduu te vã ïo-gá cunúú-yu —càchí-gá xáhaⁿ-gã xií-yu.

Jèsús ndàhyú-gá cuèndá ñáyiú ñuú Jerusálén
(Mt. 23:37-39)

³¹ Te diu-ni nduu-ãⁿ ní quexìo ìⁿ úú cue téé cùu fariséú núú ndécú-gã, te xáhaⁿ-güedë xii-gá:

—Quee-n ìha quíhíⁿ-n núú ndèé quíhíⁿ-n, chi téé cùu Herodés cuini-dé cahni ñaha-dë xii-n —càchí-güedé xáhaⁿ-güedé xii-gá.

³² Te Jèsús ní xáhaⁿ-gã:

—Chí cuáháⁿ te cùñaha-ndo xii téé nèhe mañá-án sã càchí-í sã ná cùndedóho váha-dé ìⁿ tñúhu càháⁿ-í, chí cùmání ìⁿ úú-gá nduu cundecu-í xocani-í nchaa espíritú cùndíhí yucu ñávàha yíhí ñaha xii ñáyiú, te cada tátna-í nchaa dava-gá ñáyiú cùhú, te ducaⁿ te ndíhí chùuⁿ-í, duha cùñaha-ndo xii-dé. ³³ Dico dacuítí sã cùhúⁿ-í ichi ìⁿ úú-gá nduu, te ducaⁿ te

sáá-í núú quíhí-í, chi vá cúú tñáhi cuú ìíⁿ tée càháⁿ tnúhu Yá Ndiöxi ingá ñúú, chi mei ñúú Jerusálén cuú-güedé —cächí-gá xáhaⁿ-gá xii-güedé.

³⁴ Te ní xáhaⁿ-gá xii ñáyiú ñúú Jerusálén:

—Nchòhó chí sàhni-ndo nchaa cue tée càháⁿ tnúhu Yá Ndiöxi, cue tée ní tendaha-gá véxi, te mee-ni ndíhi yúú sáhni-ndó-güedé. ¡Te títní xito ní cuini-í nadatáca ñáhá-í xii-ndo dàtná nádàtácá ìíⁿ nchuxi cuè déhe-di sàquihí-güedi xiti ndíxiⁿ-di, dico ñá ní cuini-ndó, te ducaⁿ-ni sàni iní-í ndéé vitna! ³⁵ Te chí cündédóho tucu ingá tnúhu na càháⁿ-í-a: Yá Ndiöxi daña ñáha-gá xii-ndo. Te na cächí tnúhu tucu-í xii-ndo sá vǎ quini ñáhá-gá-ndó xii-í, dico sáá nduu te quini ñáhá tucu-ndo, te nduu-áⁿ cachí-ndó sá ño càhnu cuu yúhú Yaá ní tendaha Dütú Ndiöxi véxi ñuyú-a —cächí-gá xáhaⁿ-gá xii-yu.

14

Jèsús quidé tátna-gá ìíⁿ tée ñúhu cuiñu

¹ Te duha ní cuu ìíⁿ nduu, nduu ndè-tatú ñáyiú chí ìíⁿ tée cùu fariséú cùnùu ní càháⁿ-dé Jèsús vehe-dé caxi-gá, te cue tée ndècu vehe-dé ndéhe-güedé ñúu nása cada-gá. ² Te xiáⁿ ndécú tñáhá ìíⁿ tée cùhú ñúhú-dé cuiñu. ³ Te Jèsús ní xicáⁿ tnúhú-gá núú cuè tée dàcuaha ñaha xii ñáyiú nchaa tnúhu ní chídó tñúni ndí Moisés, ndíhi núú cuè tée cùu fariséú, te xáhaⁿ-gá:

—¿Cuu cada tátna-o ìíⁿ ñáyiú cùhú nduu ndètatú-ó áⁿ ñáhá? —cächí-gá xáhaⁿ-gá xii-güedé.

⁴ Dico cue tée-áⁿ ñà túú tñáhi ní càháⁿ-güedé. Te ní dácàá-gá ndaha-gá ní tendaha-gá tée cùhú-áⁿ ní quide tátna ñaha-gá xii-dé, te ní xáhaⁿ-gá sá ná ñúhú-dé vehe-dé. ⁵ Te ní xicáⁿ tnúhú-gá núú nchaa cue tée-áⁿ, te xáhaⁿ-gá:

—¿Te núú nchòhó ná ngáunilnu ìíⁿ búrru-ndo àdi ìíⁿ ndicutu-ndo déhvá, te vá ná tàva ndíhi-ni-ndo-di cuèi cùu-xi nduu ndètatú-ndó-áⁿ? —cächí-gá xáhaⁿ-gá xii-güedé.

⁶ Te ñá túú ní ñíhí-güedé tnúhu na dàn-chocáva-güedé.

Ñáyiú càháⁿ-yu quíhíⁿ vico tñándaha

⁷ Te ndèhe Jèsús nàcuáa xiquide nchaa ñáyiú ndècu vico sá súñi ní nacáxi-yu xilé sácóo nchíhi cue tée cùnùu-gá conchíhi-yu

òré cuánguñhú-yu mèsá caxí-yu, núú ní xáhaⁿ-gá xii-yu:

⁸ —Òré ná càháⁿ ñáhá ìíⁿ ñáyiú xii-ndo ìíⁿ vico tñándaha, te vá cóo-ndó núú xilé sácóo cue tée cùnùu-gá, chí núú ducaⁿ na càda-ndo, te cudana quexio dava-gá ñáyiú cùnùu-gá dàcúúxí nchòhó. ⁹ Te ñáyiú ní càháⁿ ñáhá xii-ndo-áⁿ quixí-yu te cùñáhá-yu xii-ndo: “Chí cuñáha xilé núcóo nchíhi-ndo-áⁿ ná còncihíhi ñáyiú ní quexio-a”, quesáhá-yu cùñáhá-yu xii-ndo. Te cuñí-ndó ñáhá cuèi cùcahaⁿ núú-ndó ndàcuñí-ndó quíhíⁿ-ndó ngóo-ndo núú xilé xínutnì ndéé núú ní ndíhi-ná ndàa sáta-xi. ¹⁰ Te yúhú cächí-í sá òré ná càháⁿ ñáhá-yu xii-ndo, te ngóo-ndo núú xilé xínutnì ndéé núú ní ndíhi-ná ndàa sáta-xi chí cuèndá òré ná quexio ñáyiú ní càháⁿ ñáhá xii-ndo, te cùñáhá-yu xii-ndo: “Nchòhó cue ñáyiú càháⁿ ndíhi-í, chí yáha núú xilé sácóo cue tée cùnùu-gá coo-ndo”, duha cùñáhá-yu xii-ndo. Te ducaⁿ te cada nínu ñaha nchaa ñáyiú yíhi ndíhi-ndo mesá. ¹¹ Te nchaa ñáyiú na càda nínu mee-xi, te ñáyiú-áⁿ ñà túú cùu nínu-yu, te nchaa ñáyiú ñá túú quide nínu mee-xi, ñáyiú-áⁿ cúú nínu-yu —cächí-gá xáhaⁿ-gá xii-yu.

¹² Te dàtnùni ní xáhaⁿ-gá xii tée ní càháⁿ ñáhá xii-gá:

—Te yòhó òré cuini-n càda-n ìíⁿ vico, te vá càháⁿ-n mèe-ni cue tée càháⁿ ndíhi-n, ní cuè ñaní-n, ní cuè ñáyiú cùu ñaní tñáhá-n, ní cuè ñáyiú cuica ndècu yatni ndíhi-n, chí ñáyiú-áⁿ ducaⁿ càda-yu ìíⁿ nduu càháⁿ ñáhá-yu xii-n te ndéyáhu-ni sá ní quidé-n-yu. ¹³ Te ñáhá chí òré ná càda-n ìíⁿ vico, te càháⁿ-n ñáyiú ndàhú, ndíhi ñáyiú ñá cúú càca, ndíhi ñáyiú yacua, ndíhi ñáyiú cuáá. ¹⁴ Te núú ducaⁿ na càda-n, te cuu-xi ìíⁿ sá vǎha xii-n, chí ñáyiú-áⁿ vǎ ñíhí-yu nacoto ñáhá-yu xii-n, dico na cùú-n te sáá nduu ndòto-n ndíhi nchaa ñáyiú ní quide ndáá ní xíndecu ichi Yá Ndiöxi, te dàvá-áⁿ taxi-gá sá ndúú tǎhú-n —cächí-gá xáhaⁿ-gá xii-dé.

Nàcuáa xiquide ñáyiú òré càháⁿ ñáhá ìíⁿ tée cada vico

(Mt. 22:1-10)

¹⁵ Te sa dúcáⁿ ní cáháⁿ Jèsús ní tecú dóho cue tée yíhi mesá-áⁿ, núu ní xáhaⁿ ìiⁿ-dè xii-gá:

—Ío váha táhu nchaa ñáyi na càxi nchaa sá cuáha ñaha Yá Ndiõxí nduu na sáá-yu cundecú-yu núu ndécú-gá táxí tnùní-gá — cächí-dé xáhaⁿ-dè xii-gá.

¹⁶ Te Jèsús ní xáhaⁿ-gá xii-dé:

—Ìiⁿ tée quide-dé vico, te ní dátècú tnúhu-dé cuéhé víhí ñáyi quíhíⁿ-yu caxí-yu. ¹⁷ Te òré sa ní cuu-ná sá caxí-yu, te ní xáhaⁿ-dè xii tée xínu cuechi núú-dé sá quíhíⁿ-dé cùñaha-dè quíhíⁿ-yu caxí-yu, chí sa ndècu túha nchaa sá caxí-yu. ¹⁸ Dico nchaá-yu ní xáháⁿ-yu xii-dé sá ná cáda càhnu iní tée càháⁿ ñáhá-áⁿ, chí ñá túú cùyáchí-yu quíhíⁿ-yu vico-áⁿ. Te tée ní cáháⁿ ndíhi tée xínu cuechi-áⁿ díhna ní xáhaⁿ-dè: “Íchí ní saaⁿ-í ìiⁿ pedàsú ñuhu, te quíhíⁿ ndéhè-í tnavíí, núu xíáⁿ càháⁿ ndàhú-í núú-n sá cùñaha-n xii tée càháⁿ ñáhá-áⁿ xii-í sá ná cáda càhnu iní-dé chí ñá túú cùyáchí-í”, cächí-dé xáhaⁿ-dè. ¹⁹ Te ingá-dé ní xáhaⁿ-dè: “Ní saaⁿ-í úhúⁿ yùndá ndicutu sa xítu, te cue quiti-áⁿ quíhíⁿ-í coto ndeé-í-güedi vitna, núu xíáⁿ càháⁿ ndàhú-í núú-n sá cùñaha-n xii tée càháⁿ ñáhá-áⁿ xii-í sá ná cáda càhnu iní-dé chí ñá túú cùyáchí-í”, cächí-dé xáhaⁿ-dè.

²⁰ Te ingá tucu-dé ní xáhaⁿ-dè: “Íchí ní tnándaha-í nùu xíáⁿ vá cùyáchí-í quíhíⁿ-í”, cächí-dé xáhaⁿ-dè. ²¹ Te òré ní nasáá tée xínu cuechi-áⁿ, te ní nacani tnúhu-dé núú patróóⁿ-dè nchaa nacuáa ní xáháⁿ-yu. Te ní cudééⁿ tée cùu patróóⁿ-áⁿ, te ní xáhaⁿ-dè xii tée xínu cuechi núú-dé-áⁿ: “Yáchí cuáháⁿ nanducu-n nchaa ñáyi ndàhú, ndíhi nchaa ñáyi ñá cùú càca, ndíhi nchaa ñáyi yacua, ndíhi nchaa ñáyi cuáá, te ndèni ní cuu na nànhíⁿ-nyu te candecá-n-yu quixí”, cächí-dé xáhaⁿ-dè.

²² Te sáta ní nasáá tée xínu cuechi-áⁿ, te ní xáhaⁿ-dè xii patróóⁿ-dè: “Patróóⁿ, sa ní quide-í chiùⁿ ní táhú-n, dico ndècu-gá núú còo-yu”, cächí-dé xáhaⁿ-dè. ²³ Te tée cùu patróóⁿ-dè-áⁿ ní xáhaⁿ-dè: “Cuáháⁿ tucu ndèni ní cuu te cada yica-n na quixí-yu quíhu-yu cuendá ná chítú vehe-í. ²⁴ Te na cächí tnúhu-í xii-n sá ñi ìiⁿ ñáyi ní cáháⁿ-í díhna vá cùú-gá caxí-yu sá sà ní quide túha-í caxí-yu ní cùú”, cächí tée-áⁿ xáhaⁿ-dè xii tée xínu cuechi núú-dè — cächí-gá xáhaⁿ-gá xii tée-áⁿ.

Ndoho-o cùndecu-o ichi Xítohó Jesucrístú (Mt. 10:37-38)

²⁵ Te ío cuéhé ñáyi nchicúⁿ-yu Jèsús, te ní xáhaⁿ-gá xii-yu:

²⁶ —Te núu dava nchòhò cuiniⁿ-dó chitnahá ñáhá-ndó xii-í, te cuu iní ñáhá ndisa-ndo. Te cuéi na dandóo-ndo tátá-ndó, ndíhi náná-ndó, ndíhi ñadihíⁿ-ndó, ndíhi déhe-ndo, ndíhi ñaniⁿ-ndó, ndíhi cúha-ndo, te cani iní-ndó sá cuéi na cùú-ndó sá cuendá-í, te ducaⁿ te cuu ndisa-ndo cué ñáyi tnàhá tnúhu ndíhi-í. ²⁷ Te nchaa ñáyi vá cànchicúⁿ nihnu ñaha xii-í cuendá sá yùhú-yu ndohó-yu dátna ndoho-í, ñáyi-áⁿ vá cùú-yu ñáyi tnàhá tnúhu ndíhi-í. ²⁸ Te núu ìiⁿ nchòhò ná càni iní-ndó dàcaa-ndo ìiⁿ vehe ducúⁿ, ¿te náa ñá díú díhna-gá cada cuendá-ndó núu ndédau díhúⁿ cuu, ducaⁿ te cutnùní iní-ndó nùu tnàhá díhúⁿ-ndó càa vehe-áⁿ àdi ñáhá? ²⁹ Chi núu vá dúcáⁿ càda-ndo, te na ngüíta-ndo tàusaha-ndo te vá xínu cada-ndo, te nchaa ñáyi na cùndehe ñaha xii-ndo, te cáháⁿ cuéhé-yu cuendá-ndó. ³⁰ Te cächí-yu: “Tée-áⁿ ní ngüíta-dé dàcàa-dé ìiⁿ vehe te ñá ní ndàcu-dé xínu”, cächí-yu. ³¹ Àdi te núu ìiⁿ tée yìndaha ñaha xii ñáyi cuiniⁿ-dé nàa-dé ndíhi ingá tucu tée yìndaha ñaha xii ñáyi, ¿te náa ñá díú díhna-gá cada cuendá-dé te núu ndacu-dé ndíhi úxí mìl cue sandàdú-dé nàa-güedé, ndíhi ócò mìl cue sandàdú ingá tucu tée yìndaha ñaha xii ñáyi cùu úhú iní tnàhá ndíhi-dé-áⁿ? ³² Àdi te núu xito-dé sá vá ndácú-dé ñá, te òré vátá cùyàtni ñaha-gá tée cùu úhú iní tnàhá ndíhi-dé-áⁿ, te tendaha-dé ìiⁿ tée quíhíⁿ-dé quíhu-dé tnúhu ndàhú núú tée-áⁿ cuendá sá vá nàa-güedé. ³³ Te duha càháⁿ-í chí núu nchòhò vá cáda ndèe iní-ndó dàna-ndo nchaa sá ndécú ndíhi-ndo cuendá chitnahá ñáhá-ndó xii-í, te vá cùú-ndó cué ñáyi tnàhá tnúhu ndíhi-í.

Ñíí ní nduu víxíⁿ (Mt. 5:13; Mr. 9:50)

³⁴ Te ñíí chí ío váha, dico núu na ndùu víxíⁿ-xi, ¿te nása-gá cada-o nàndíhi-o te núu ducaⁿ-í? ³⁵ Chi ñá túú-gá nàndíhi-xi ñi sá dàcá ñuhu, te ñi sá dàcá saháⁿ, chí cuendá-nà dāngoyo-o. Te nchaa nchòhò ñáyi ní xindédòho tnúhu ní cáháⁿ-í-a

xini ñuhu-xi ío váha cuáha-ndo cuendá — cächí-gá xáhaⁿ-gá xii-yu.

15

*Cuendá ñⁿ mbèé quiti ní xíta
(Mt. 18:10-14)*

¹ Te cue tée cuihna ìní-xi quide cobrá ñáhá xii ñáyiú cuendá impuèstú ndihi cue dava-gá ñáyiú ndècu ichi cuehé ichi duha ní quexió-yu núú ndécú Jèsús cuendá cund-edóho-yu tnúhu càháⁿ-gá. ² Te ní nguíta cue tée cùu fariséú, ndihi cue tée dàcuaha ñaha xii ñáyiú nchaa tnúhu ní chídó tnùnì ndíi Moisés xícáháⁿ cuèhé-güedé cuendá-gá, te cächí-güedé:

—Tée-a quèhèⁿ cuendá-dé ñáyiú ndècu ichi cuehé ichi duha, te xèxi ndihi ñaha-dé xii-yu —cächí-güedé xitnàha-güedé.

³ Te Jèsús ní cani-gá ñⁿ cuendú nàcuáa tecú tnùnì-güedé tnúhu-gá, te xáhaⁿ-gá xii-güedé:

⁴ —Ñⁿ tée ndècu ñⁿ ciendú mbèé-dé, te ní xíta ñⁿ-di, te nchòhó sa cùtnunì iní-ndó nàcuáa cada tée-áⁿ, chi dándóo-dé cùmídícó sáhúⁿ cùmí-di ñⁿ yucu, te cúnúndúcú-dé quiti ní xíta xíáⁿ ndéé ndéé naníhí-dé-di. ⁵ Te òré ní naníhí-dé-di te ní dácáá-dé-di chíó-dé ní docó-dé-di sá cùdíi ìní-dé. ⁶ Te òré ní nasáá-dé vehe-dé, te ní dátácá-dé nchaa cue tée càháⁿ ndihi-dé, ndihi nchaa ñáyiú ndècu yatni ndihi-dé, te ní xáhaⁿ-dè: “Chí ná cùdíi ìní-ó vitna, chi ní naníhí-í mbèé-í quiti ní xíta ní cùu”, cächí-dé xáhaⁿ-dè xii-yu. ⁷ Te yúhú cächí-í sá ío-gá cùdíi ìní Yá Ndiòxí ndihi cue espíritú xínú cuèchi núú-gá ñúu ñⁿ ñáyiú ndècu ichi cuehé ichi duha na ndixi cuèchi iní-yu cuendá nchaa sá ñà túú váha quidé-yu ndécú-yu te tñii-yu ichi-gá, dácúxí cùmídícó sáhúⁿ cùmí ñáyiú sa ní tuha ichi-gá, chi ñà túú-gá xini ñuhu-xi ndixi cuèchi iní-yu chi sa ndécú-yu ichi-gá —cächí-gá xáhaⁿ-gá xii-güedé.

Cuendá díhúⁿ ní xíta

⁸ Te ní cani Jèsús ingá cuendú núú-güedé, te xáhaⁿ-gá:

—Ñⁿ ñadìhí ndécú ndihi-aⁿ úxí díhúⁿ cuixíⁿ, te ní dácúita-aⁿ ñⁿ te ní teñuhú-aⁿ iti, te ní nguíta-aⁿ nàtíhu-aⁿ vehe, te súní váha váha ní nanducu-aⁿ ndéé ní naníhí-aⁿ. ⁹ Te òré ní naníhí-aⁿ, te ní dátácá-aⁿ nchaa ñáyiú díhí càháⁿ ndihi-aⁿ ndihi nchaa ñáyiú ndècu yatni ndihi-aⁿ, te ní xáhaⁿ-aⁿ: “Chí

na cùdíi ìní-ó vitna chi ní naníhí-í díhúⁿ-í sá ní xíta ní cùu”, cächí-aⁿ xáhaⁿ-aⁿ xii-yu.

¹⁰ Te yúhú cächí-í sá dúcáⁿ ío cùdíi ìní nchaa espíritú xínú cuèchi núú Yá Ndiòxí, núú ñⁿ ñáyiú ndècu ichi cuehé ichi duha na ndixi cuèchi iní-yu cuendá nchaa sá ñà túú váha quidé-yu, te tñii-yu ichi-gá —cächí-gá xáhaⁿ-gá xii-güedé.

Cuendá ñⁿ tée ñà túú ní quide váha

¹¹ Te ní cani tucu Jèsús ingá cuendú núú-güedé, te xáhaⁿ-gá:

—Ñⁿ tée ndècu úú déhe ducuⁿ-dé, ¹² te tée líhli-gá ní xáhaⁿ-dè xii tātá-dé: “Táu, taxi-n táhú sá cúu cuendá-í”, cächí-dé xáhaⁿ-dè. Te tātá-dé-áⁿ ní sáñaha-dé ndí díiⁿ núú-güedé sá cúu cuendá-güedé. ¹³ Te núú sàcú-ni nduu, te déhe-dé tée líhli-gá-áⁿ ní nadico-dé nchaa sá ní sáñaha tātá-dé, te ní xica-dé cuáháⁿ-dè ñⁿ ñúu xicá, te yácáⁿ ní tñii-dé ñⁿ ichi cuehé ichi duha, te ní ndihi díhúⁿ-dè ní dándóñuhu-dé ndihi cue tée càháⁿ ndihi-dé, ndihi nchaa ñáyiú díhí xindecu ichi díi ìní. ¹⁴ Te ní ndihi ndoo díhúⁿ-dè ní dándóñuhu-dé, te núú sàcú-ni nduu ní sáá tnamá ñúu núú ndécú-dé-áⁿ, te ñà níhí-gá-dé sá caxí-dé, te xihí-dé docó. ¹⁵ Núú ní xica-dé cuáháⁿ ndúcú chiúⁿ-dé núú ñⁿ tée diu-ni ñúu xíaⁿ, te tée-áⁿ ní sáha chiúⁿ ñaha-dé ñⁿ xichi núú ñúhú-dé coto-dé cùchí. ¹⁶ Te súní xihí-dé docó te cuíní-dé caxi-dé nchaa sá sáha-yu cùchí-áⁿ ní cùu, dico ñà túú ní sáñahá-yu xii-dé. ¹⁷ Te uuⁿni ní sani váha iní-dé, te ní cächí-dé: “Ío cuehé cue tée xínu cuèchi vehe tātá-í te ío cuehé sá xéxí-güedé ndécú, te yúhú duha ndòho-í docó iha! ¹⁸ Te ndacuñí-í te núhú-í vehe tātá-í, te cúñaha-í xii-dé: Táu, ñà túú ní quide váha-í núú Yá Ndiòxí te ní ñà túú ní quide váha-í núú-n, ¹⁹ te ñà túú-gá táu-í sá cùu-í déhe-n vitna, te cada ñaha-ñá-n xii-í dátñá ñⁿ tée xínu cuèchi núú-n”, duha ní sani iní-dé cúñaha-dé xii tātá-dé. ²⁰ Te sáta dúcáⁿ ní sani iní-dé, te ní natñii-dé ichi cuánuhú-dé vehe tātá-dé, te xica-gá cuánuhú-dé ní xini ñáhá tātá-dé xii-dé te ní cundáhú iní ñáhá-dé. Te xínu tātá-dé-áⁿ ní sáháⁿ nútñahá ñáhá-dé, te ní numi ñaha-dé, te ío váha ní càháⁿ ndihi ñaha-dé. ²¹ Te ní xáhaⁿ déhe-dé-áⁿ xii-dé: “Táu, ñà túú ní quide váha-í núú Yá Ndiòxí te ní ñà túú ní quide váha-í núú-n, te ñà túú-gá táu-í sá cùu-í déhe-n vitna”, cächí-dé xáhaⁿ-dè.

²² "Dico tātá-dě-án nǐ xáhaⁿ-dě xii cue tée xinu cuechi núú-dě: "Chí queñùhu ndíhi-ni dóó váha-gá cuáha-ndo dēhe-í-a na cuñhu-dé, ndíhi ìn dehé ná quíhi díquí ndáhá-dě, ndíhi chàu váha na quíhi-dé. ²³ Te quíhíⁿ ngueheⁿ-ndo ìn ndicutu numa quiti caváha-gá, te cahni-ndo-dí, te na càda-o vico, te na càxi-o-dí. ²⁴ Chi déhe-í-a ní sani iní-í sá nǐ xíhí-dé ní cùu, te ñáhá chi ndècu vívú-dě, te ní sani tucu iní-í sá nǐ xíta-dé ní cùu te ní nasáá méé-dě", cächí-dé xáhaⁿ-dě xii cue tée xinu cuechi núú-dě-án. Te ní ngúíta-güedé ní quide-güedé vico.

²⁵ "Te déhe-dé tée sàcuéhé-gá cuáhaⁿ-dé yucu, te òré cuándixi-dé tá ndùu yatni-dé vehe, te ní tecú dóho-dé ío yaá cúu vico. ²⁶ Te ní cana-dé ìn tée xinu cuechi, te ní xicáⁿ tnúhú-dě núú-dě ná cuendá ducaⁿ ío yaá. ²⁷ Te tée xinu cuechi-án nǐ xáhaⁿ-dě: "Ñaní-n tée cuáhaⁿ ní cùu ní nasáá-dé, te tātá-n nǐ táuchíuⁿ-dě ní xíhí ìn ndicutu numa quiti caváha-gá cuendá sá nǐ nasáá váha-dé", cächí-dé xáhaⁿ-dě.

²⁸ "Dico ñaní-dé tée sàcuéhé-án nǐ cudéⁿ-dě, te ní cächí-dé sá vǎ ndíhu-dé vehe cundecu-dé vico-án ní cùu, dico ní quee tātá-güedé ní cáhaⁿ ndáhú-dé núú-dě cuendá ndíhu-dé. ²⁹ Te ní xáhaⁿ-dě xii tātá-dě: "Táu, cundedóho váha saú-n tnúhu na cáháⁿ-í-a, yúhu ío cuéhé cuíá ní cuu xinu cuechi-í núú-n, te ní ìn xito ñá túú quide sáa iní-í núú-n, te ní ìn chivá líhli ñá túú tàxi-n-dí caxi díí iní-í-dí ndíhi cue tée cáháⁿ ndíhi-í. ³⁰ Te vitna ní nasáá déhe-n tée ní sáháⁿ ní dándòñùhu díhúⁿ-n ndíhi nchaa ñáyiú xíndecu ichi díí iní. Te ní sahní-n ìn ndicutu numa quiti caváha-gá sá cuendá-dé", cächí-dé xáhaⁿ-dě xii tātá-dě. ³¹ Te ní xáhaⁿ tātá-dě xii-dé: "Yòhó déhe-í ducaⁿ-ni ndècu ndíhi ñaha-n xii-í, te nchaa sá ndécú ndíhi-í cúu-xí cuendá-n. ³² Te vitna dacuití táu-xi sá cáda-ó vico, te cudíí iní-ó, chi ñaní-n-án nǐ quide-í cuendá sá ní xíhí-dé ní cùu, te ñáhá chi ndècu vívú-dě, te sa ní xíta-dé ní cùu, te ní nasáá méé-dě", cächí-dé xáhaⁿ-dě xii déhe-dé tée sàcuéhé-gá-án —duha cuáhaⁿ cuendú ní cani Jèsús núú-güedé.

16

Nàcuáa ní quide ìn tée tàxi tnuní ñáhá xii cue tée xinu cuechi

¹ Te Jèsús xáhaⁿ-gǎ xii cue tée xica cuu ndíhi-gá:

—Ní xíndecu ìn tée cuica, te ducaⁿ ní xíndecu ìn tée ní taxi tnuní ñáhá xii cue tée ní xinu cuechi núú-dě. Te tée-án ní xini ñáhá ñáyiú dùhu-dé díhúⁿ tée cùu patróóⁿ-dě, te cuáhaⁿ-dé dándòñuhu-dé, te ní xáháⁿ-yu xii tée cùu patróóⁿ-dě sá dúcáⁿ quide-dé. ² Te tée cùu patróóⁿ-dě-án ní cana ñaha-dě xii-dé, te ní xáhaⁿ-dě: "¿Ná cuendá duha cáháⁿ ñáyiú cuendá-n? Yáchí chi na tàxi cuendá-n nchaa chiuⁿ ní quide-n, chi vitna te vá táxi tnuní-gá-n cuè tée xinu cuechi núú-í", cächí-dé xáhaⁿ-dě. ³ Te tée tàxi tnuní ñáhá xii cue tée xinu cuechi-án ní sani iní-dé: "¿Te nása cada-í vitna na quèhndé patróóⁿ-í chiuⁿ-í? Chi ñá cündèe-gá-í cada-í chiuⁿ vée, te cùcahaⁿ núú-í cácaⁿ ndáhú-í. ⁴ Dico duha cada-í cuendá queheⁿ cuendá ñáhá ñáyiú vehé-yu òré ná quèhndé duuⁿ-ná patróóⁿ-í chiuⁿ-í", duha ní sani iní-dé. ⁵ Te sátá dúcáⁿ te ní cana-dé ìn ìn cue tée tau núú patróóⁿ-güedé. Te tée díhna ní xicáⁿ tnúhú-dé núú-dě, te xáhaⁿ-dě: "¿Ndèe dau tau-n núú patróóⁿ-í?", cächí-dé xáhaⁿ-dě. ⁶ Te tée-án nǐ xáhaⁿ-dě: "Táu-í ìn ciendú ngohnci triú tau-í", cächí-dé xáhaⁿ-dě. Te tée tàxi tnuní ñáhá xii cue tée xinu cuechi-án nǐ xáhaⁿ-dě: "Iha náu reciú-n-á, te ndadúha ingá sá ùdico úxí taxi-n", cächí-dé xáhaⁿ-dě. ⁷ Te dǎtnúni ní xicáⁿ tnúhú tucu-dé núú ingá-dé, te xáhaⁿ-dě: "Te yòhó, ¿ndèe dau tau-n-í?", cächí-dé xáhaⁿ-dě. Te tée tau-án nǐ xáhaⁿ-dě: "Ín ciendú ngohnci triú tau-í", cächí-dé xáhaⁿ-dě. Te tée tàxi tnuní ñáhá xii cue tée xinu cuechi-án nǐ xáhaⁿ-dě: "Iha náu reciú-n-á, te cadúha ingá sá cùmídícó-nǎ taxi-n", cächí-dé xáhaⁿ-dě. ⁸ Te tée cùu patróóⁿ-án nǐ cächí-dé sá ío váha ñùhu díquí tée dùhu-án nàcuáa cada-dé cundecu váha-dé. Te nchaa ñáyiú xíndecu ichi cuéhé ichi duha, ío-gá váha ñùhu díquí-yu nàcuáa cada-yu cundecu váha-yu ndíhi nchaa ñáyiú cündihí-yu dácúxí ñáyiú ndècu ichi Yá Ndiöxí.

⁹ Te yúhu cächí-í sá cáda-ndó sǎ váha ndíhi nchaa sá ndécú ndíhi-ndo ní cuáha ñuyú yicá cuéchi-a, te ducaⁿ te coo cue tée ío váha tnahá tnúhu ndíhi-ndo, te òré ná ndíhi nchaa sá ío ñuyú-a, te Yá Ndiöxí queheⁿ cuendá ñáhá-gǎ xii-ndo, te cundecu-ndo ndíhi-gá ní caa ní quíhíⁿ.

¹⁰ Te núu ìn tée quide ndáá cuèi ìn chiuⁿ líhli na càda-dé, te òu-ni ducaⁿ quide ndáá-dé cuèi ìn chiuⁿ cahnu na cada-dé. Dico tée ñá túú quide ndáá, chi cuèi chiuⁿ líhli àdi chiuⁿ cahnu na cada-dé dico ìn-ni quide-dé. ¹¹ Te núu nchòhó vá cáda-ndó sá vâha ndîhi nchaa sá ní cuâha ñuyúú yíca cuèchi-a ña, te Yá Ndiòxí vá táxí-gá sá vâha ndècu ndîhi-gá xii-ndo. ¹² Te núu vá cáda ndáá-ndó còto-ndo nchaa sá táxí núu tñaha ñáiyu-ndo, te vá yò taxi sá ndúú tãhú-ndó.

¹³ Te ni ìn tée xinu cuechi vá ndácú-dé cunu cuechi-dé núú úú patróóⁿ, chi tée-ánⁿ cuu váha iní-dé núú ìn patróóⁿ-dè te tñí-dé nchaa tñúhu cáhán patróóⁿ tée cùu váha iní-dé núú-xi-án. Te núú ìngá tucu patróóⁿ-dè vá cúú váha iní-dé, te ni vá tñí-dé tñúhu cáhán patróóⁿ-dè-án. Te ducaⁿ sãtnahá-xi cùu nchòhó chi vá ndácú-ndó cunu cuechi-ndo núú Yá Ndiòxí te cuhuⁿ iní-ndó nchaa sá ò ñuyúú-a — cãchí-gá xáhaⁿ-gã xii-güedé.

¹⁴ Te nchaa cue tée cùu fariséú ío ñùhu iní-güedé nchaa sá ò ñuyúú-a, te xínd-édóho-güedé nchaa tñúhu cáhán Jèsús, te ní cáhán yíchí-güedé cuendá-gá. ¹⁵ Te Jèsús ní xáhaⁿ-gã xii-güedé:

—Nchòhó cúú-ndó cuè tée ío váha cáhán núú ñáiyu cuendá-ni sá cuini-ndó cáhán váha-yu cuendá-ndó, dico Yá Ndiòxí xini ndáá-gá nãcuáa càa iní-ndó ìn ìn-ndo, te nchaa sá cãchí cue ñáiyu ñuyúú-a sá ò nãndîhi, Yá Ndiòxí dáquèe tìhú-gã.

Cuendá nchaa tñúhu ní chídó tñuní ndí Moisés

¹⁶ Te nchaa tñúhu ní chídó tñuní ndí Moisés cùnùu-xi ni cuu, ndîhi nchaa tñúhu ní chídó tñuní cue tée ní xóo cáhán tñúhu Yá Ndiòxí ndéé sanaha. Dico cùtnhá ní ngúíta té Juáá tée ní xóo dacuàndute ñaha xii ñáiyu ní cáhán-dé tñúhu-í, ndéé dàvã-án ñá túú-gã ní cùnunu nchaa tñúhu ní chídó tñuní ndí Moisés ndîhi nchaa tñúhu ní chídó tñuní cue tée ní xóo cáhán tñúhu Yá Ndiòxí ndéé sanaha. Te òu-ni ndéé dàvã-án ní quesaha ta tècú tñuní ñáiyu nãcuáa ndîhu ndaha ñaha Yá Ndiòxí xíí-yu, te vai ñáiyu ío sãni iní-yu vitna nãcuáa cáda-yu ndîhu ndaha ñaha Yá Ndiòxí xíí-yu. ¹⁷ Te nchaa tñúhu ní chídó tñuní ndí Moisés ío ndáá cáhán-xi, te ndîhi-gá naa andîu ndîhi ñuyúú dàcúúxí sá ndîhi ìn ìn tñúhu-án cada-xi nãcuáa cáhán-xi.

Jèsús cáhán-gá cuendá ñáiyu dàña tñaha (Mt. 19:1-12; Mr. 10:1-12)

¹⁸ Te núu ìn tée na dàña tñaha-dé, ndîhi ñãdîhi-dé, te tñãndaha tucu-dé ndîhi ìngá-yu, te nèhè víhí quide-dé te núu ducaⁿ na càda-dé, te tée na tñãndaha ndîhi ñaha ní dáñá yí-xi, te òu-ni ducaⁿ ñá túú cùu-xi sá vâha te núu ducaⁿ na càda-yu —cãchí-gá xáhaⁿ-gã xii-güedé.

Cuendá ìn tée nãni Lázaru ndîhi cuendá ìn tée cuica

¹⁹ Te xáhaⁿ tucu-gá xii-güedé:

—Ní xíndecu ìn tée cuica, te ní xóo cui-hnu-dé mee-ni dõó vâha dóó víi càa, te nchaa nduu súúni vâha ní xóo cada-dé vico vehe-dé. ²⁰ Te ní xíndecu tucu ìn tée ndâhú ní xínani-dé Lázaru, te tée-án ní cuhú-dé ní xíndeé-dé nitùhú-dé ndîhi, te ìn nduu ìn nduu ní xóo taxinucóo ñaha-güedé xii-dé yuyèhe tée cuica-án. ²¹ Te tée ndâhú-án ní xóo cuú-dé docó, te ní xóo cuini-dé caxi-dé nchaa sá ñá túú-gã ní xóo yáha caxi tée cuica-án, te ñá túú ní xóo níhí-dé. Te cuèi iná ní xóo quíhí-ni ní xóo nayuu-ni nchaa núú ndîhi ndèé-dé-án. ²² Te ní sáá ìn nduu te ní xíhí tée ndâhú-án, te cue espíritú xínú cuèchi núú Yá Ndiòxí ndéca ñaha-xi xii-dé cuãndaa núú ndécú tã Àbrahám cundecu-dé. Te ní sáá nduu ní xíhí tée cuica-án tñãhá-dé, te ní chindúxi ñaha-güedé xii-dé. ²³ Te ní sáá-dé núú xíndecu nchaa ñáiyu ní xíhí ñá túú ní quide ndáá núú Yá Ndiòxí te xíá ío ndòho-dé ndécú-dé, te ní ndonehe núú-dé te xica ní xini-dé té Àbrahám ndîhi té Lázaru-án xíndecu-güedé. ²⁴ Te níhi ní cáhán-dé, te xáhaⁿ-dè: “Yòhó tãtã Àbrahám, cundâhú iní ñãhá xii-í, te cùñaha xii té Lázaru ná dãndaxiⁿ-dé díqui ndãhá-dé, te na quixi-dé dãndaxiⁿ-dé yãa-í, chi ío ndòho-í ñùhù-í núú ñùhú núú càyú-a”, cãchí-dé xáhaⁿ-dè xii té Àbrahám. ²⁵ Dico té Àbrahám ní xáhaⁿ-dè: “Ndâhú yòhó ñãni tñãhá-í, dãndacu iní sá ío váha ní xíndecu-n ñuyúú, te té Lázaru ío ndâhú ní ndòho-dé ní xíndecu-dé. Te vitna ní nucúndecu váha-dé iha, te yòhó ndòhó-n vitna. ²⁶ Te ñá díú-ní sá xíáⁿ tucu, chi cuãdava ndècu ìn déhvã cùnú ñùhú nèhu-xi núú ndécú-ó, te cuèi nchaa ñáiyu xíndecu iha na cãchí iní-yu quixí-yu núú ndécú-ndó dico vá ndácú-yu, te ni nchòhó vá ndácú-ndó quixi-ndo núú ndécú-ndé”, cãchí-dé xáhaⁿ-dè. ²⁷ Te ní xáhaⁿ tée

cuica-ǎn: “Te núu duca” te cǎháⁿ ndǎhú-í núú yòhò tǎtá Àbráhám vitna sǎ téndǎha-n té Lázará ná quíhíⁿ-dé vehe tǎtá-í, ²⁸ chi ndècu úhúⁿ-gǎ ñaní-í, te na cǔñaha-dé xii-güedé sǎ vǎ cǎdá-güedé dǎtná ní quide-í cuèndá sǎ vǎ quixi-güedé tnǎhá-güedé núú ndécù-í ndóhò-í-a”, cǎchí-dé xǎhaⁿ-dè. ²⁹ Te té Àbráhám ní xǎhaⁿ-dè: “Mee-güedé ndécú ndíhi-güedé nchaa tnúhu ní chídó tnùní ndíi Moisés, ndíhi nchaa tnúhu ní chídó tnùní cue téé ní xóo cǎháⁿ tnúhu Yá Ndiòxí ndéé sanaha, te nchaa tnúhu-ǎn ná tníi-güedé nǎcuáa cǎháⁿ-xi”, cǎchí-dé xǎhaⁿ-dè xii-dé. ³⁰ Te ní xǎhaⁿ tùcu téé cuica-ǎn: “Tǎtá Àbráhám, dico vǎ cǎdá cuèndá-güedé nchaa tnúhu-ǎn, dico núu ñn ñáyiu ñá túú-gǎ ndécú ñùyú ñn ñáyiu ndècu ndíhi-n quíhíⁿ-yu cǎháⁿ ndíhi ñǎhá-yu xii-güedé nǎcuáa ndùu tnúhu vǎha, te ndixi cuéchi iní-güedé nchaa sǎ ñá túú quide váha-güedé ndécú-güedé, te cada váha-güedé”, cǎchí-dé xǎhaⁿ-dè xii-dé. ³¹ Dico té Àbráhám ní xǎhaⁿ-dè: “Te núu ñá túú cuíní-güedé tníi-güedé tnúhu ní cǎháⁿ ndíi Moisés, ndíhi tnúhu ní cǎháⁿ cue téé ní xóo cǎháⁿ tnúhu Yá Ndiòxí ndéé sanaha ña, te ñu-ni duca” cǎda-güedé cuéi ñn ñáyiu ní xíhí ná ndòtó-yu cǔñǎhá-yu nǎcuáa ndùu tnúhu vǎha, chi vǎ quíndáa iní-güedé”, cǎchí té Àbráhám xǎhaⁿ-dè xii téé cuica-ǎn —cǎchí Jèsús xǎhaⁿ-gǎ xii cue téé cùu fariséú.

17

Quihi iní-ó vǎ cùndècu-o ichi cuehé ichi duha

(Mt. 18:6-7, 21-22; Mr. 9:42)

¹ Te Jèsús ní xǎhaⁿ-gǎ xii cue téé xica cuu ndíhi-gǎ:

—Dacuitíi sǎ cóo cuè téé dacǎháⁿ-güedé ñáyiu cadá-yu nándi sǎ cuèhé sǎ dúhá, jdcò ndǎhú ní cuu cue téé duca” na dǎc-aháⁿ ñǎhá xii-yu cadá-yu nándi sǎ cuèhé sǎ dúhá! ² Chi váha-gǎ sǎ ñuu na dǎcutu ndéé ñáyiu ñn yúú yòdó dícúⁿ-güedé te dǎquée ñǎhá-yu xii-güedé xití ndute lámár, te ñá díú sǎ cùndècu-güedé dacǎháⁿ-güedé ñáyiu cadá-yu nándi sǎ cuèhé sǎ dúhá, cuéi ñáyiu ndǎhú iní-xi dandǎhú-güedé. ³ Te ío quíhi iní-ndó cùndècu-ndo.

⁴ Te núu ñn ñaní tnǎhá-ndó quide-dé ñn sǎ ñá túú tǎú-dé cada-dé sǎ cúu-xí-ndó te

cǎháⁿ-ndó dǎho-dé, te núu ní ndixi cuéchi iní-dé sǎ ñá túú ní quide váha-dé, te cada cǎhnu iní-ndó sǎ ní quide-dé. ⁴ Te cuéi úsá xito na cǎda-dé nǎndi sǎ ñá túú tǎú-dé cada-dé sǎ cúu-xí-ndó ñn nduu, te núu na quixi-dé úsá xito núu-ndó, te cǎchí-dé sǎ vǎ dúcǎⁿ-gǎ cada-dé, te xini ñuhu-xi cada cǎhnu iní-ndó-dé —cǎchí-gǎ xǎhaⁿ-gǎ xii-güedé.

Ñáyiu sǎndáa ndisa iní-xi

⁵ Te ní xǎhaⁿ cuè téé xica cuu ndíhi Jèsús xii-gǎ:

—Chindee ñaha xii-ndí cuèndá duca” te quíndáa-gǎ iní-ndí sǎ Yá Ndiòxí ndácú-gǎ quide-gǎ nchaa sǎ vǎha —cǎchí-güedé xǎhaⁿ-güedé xii-gǎ.

⁶ Te ní xǎhaⁿ Jèsús:

—Te núu nchòhò quíndáa ndisa iní-ndó sǔúní cuédicò luha lí dǎtná cuíní-ndó cǎa ñn ndíquín yutnu nǎni mostázá, te duca” te cuu cǔñaha-ndo xii ñn yutnu: “Quene-n ñha te quíhíⁿ-n cuihnu-n xití lámár”, duha cǔñaha-ndo. Te duca” cǎda-xi te núu na quíndáa ndisa iní ñǎhá-ndó xii-í —cǎchí-gǎ xǎhaⁿ-gǎ xii-güedé.

Nǎcuáa tǎú ñn téé xinu cuechi cada-dé

⁷ Te xǎhaⁿ tùcu-gǎ xii-güedé:

—Te núu ñn nchòhò ndécú ñn téé xinu cuechi núu-ndó, te cuǎháⁿ-dé yucu cuǎn-gada chiuⁿ-dé, àdi cuǎháⁿ-dé yucu coto-dé quití, te òré ní nasáa-dé vehe sǎ ní sǎháⁿ-dé yucu, te vǎ cǔñaha nchòhò cue téé cùu patróⁿ-dè xii-dé: “Yáchí nehé caxi-n dítá”, vǎ dúhá cǔñaha-ndo. ⁸ Chi nchòhò cue téé cùu patróⁿ-dè cǔñaha-ndo xii-dé: “Cundíhí iní cada túha sǎ cúdini-í, te díhna-gǎ-í caxi-í dítá te dǎtnúní caxi-n”, duha cǔñaha nchòhò cue téé cùu patróⁿ xii-dé. ⁹ Te òré ná ndíhí chiuⁿ ní tǎhú nchòhò cue téé cùu patróⁿ cada téé xinu cuechi núu-ndó, te ñá túú tǎú-ndó ndácáⁿ tǎhú-ndó núú téé xinu cuechi núu-ndó. ¹⁰ Te duha cǎháⁿ-í chi núu òré ná ndíhi nchaa chiuⁿ ní tǎhú Yá Ndiòxí cada-ndo, te cǎchí-ndó: “Nchúhú cúu-ndí cue téé xinu cuechi núu Yá Ndiòxí, dico ñá túú tǎú-gǎ ndacáⁿ tǎhú-gǎ núu-ndí, chi mee-ni chiúⁿ ní tǎhú-gǎ ní quide-ndí”, duha cǎchí-ndó —cǎchí-gǎ xǎhaⁿ-gǎ xii-güedé.

Jèsús quide tǎtna-gǎ úxí cue téé tnǎhá cuehé sǎ dátèhyú ñihnu-xi yiqui cùnu ñáyiu

¹¹ Te ñuhu Jesús ichi cuáháⁿ-gá ñuu Jerusálén, te ní yáha-gá núu ràyá distrítú Sàmariá ndíhi distrítú Galiléa. ¹² Te ta cùyatni-gá ñⁿ ñuu líhli cuáháⁿ, te ní sátnahá ñáhá úxí tnáhá cue tée cùhú xii-gá, te tnáhá-güedé cuéhé sá dátèhyú nihnu-xi yiqui cùñú-ó dico xica lùha ní ngúnu tníh-güedé, ¹³ te níhi ní cáháⁿ-güedé, te xáhaⁿ-güedé xii Jèsús:

— ¡Mèstrú, cundàhú iní ñáhá xii-ndí! —
càchí-güedé xáhaⁿ-güedé xii-gá.

¹⁴ Te òré ní xiní ñáhá Jèsús xii-güedé, te ní xáhaⁿ-gá:

—Chí cuáháⁿ núu dütú ná cùndehe ñaha-dé xii-ndo —càchí-gá xáhaⁿ-gá xii-güedé.

Te ní xica-güedé cuáháⁿ-güedé, te ichi-ni ñuhu-güedé cuáháⁿ-güedé ní ndúha-güedé cuéhé tnáhá-güedé. ¹⁵ Te nchaa-güedé ní cutnùní iní-güedé sá ní ndúha-güedé, dico ñⁿ-ni-dé ní nacuico-dé, te ní ngúita-dé níhi ní cáháⁿ-dé, te ní cachí-dé sá ño càhnu cuu Yá Ndióxi. ¹⁶ Te ní ngúíni xítí-dé núu Jesús, te ní nuu núu-dé ndàa núu ñuhu ndacáⁿ táhú-dé núu-gá. Te tée-áⁿ cùu-dé tée distrítú Sàmariá. ¹⁷ Te Jèsús ní cachí-gá:

—Úxí tnáhá-güedé ní ndúha cuéhé tnáhá-güedé. ¿Te ndèé ndécú dàva-gá-güedé-i? ¹⁸ ¿Te náa ñⁿdii-ni tée ingá ñuu-a ní nacuico-dé ndacáⁿ táhú-dé núu Yá Ndióxi, te cachí-dé sá ño càhnu cuu-gá ñá? —càchí-gá.

¹⁹ Te ní xáhaⁿ-gá xii tée-áⁿ:

—Ndacuñí te núhú-n, chí sa ní ndúha-n cuéhé tnáhá-n, chí ní sándáá iní-n Yá Ndióxi —càchí-gá xáhaⁿ-gá xii-dé.

Nacuáa yìndaha ñaha Yá Ndióxi

(Mt. 24:23-28, 36-41)

²⁰ Te cue tée cùu fariséu ní xicáⁿ tnúhú-güedé núu Jèsús nuu ná ama ngúita Yá Ndióxi ndíhu ndaha-gá ñáiyu. Te ní xáhaⁿ-gá:

—Ná túu nă cada-xi ñuyúu quiní-ndó cuendá cutnùní iní-ndó sá ndíhu ndaha ñàha Yá Ndióxi xii-ndo. ²¹ Te ni vā yōo cachí: “Iha ndècu-gá táxi tnùní-gá, àdi yacáⁿ ndécú-gá táxi tnùní-gá”, chí tnuú-ndó sà ndècu-gá ndíhi nchaa ñáiyu yìndaha-gá —càchí-gá xáhaⁿ-gá xii-güedé.

²² Te ní xáhaⁿ-gá xii cue tée xica cuu ndíhi-gá:

—Te nchòhó chí sáá nduu, te cachí iní-ndó sá sùuní cuèdicó ñⁿ nduu quiní ñáhá-ndó xii yúhú Tée cùu ñaní tnáhá-ndó nchàa-ndo, dico vá quiní ñáhá-gá-ndó xii-í.

²³ Te coo ñáiyu cùñàhá-yu xii-ndo: “Iha ndècu-gá, áⁿ yacáⁿ ndécú-gá”, quesàhá-yu cùñàhá-yu xii-ndo. Dico vá quèndáá iní-ndó quíhíⁿ-ndó ndíhi-yu núu càchí-yu, te ni vā cání iní-ndó quíhíⁿ mée-ndó. ²⁴ Chí dàtná cuiní-ndó quide-xi oré sáá ndúté àndiu, chí uuⁿni dāyehé-xi nihíi ñuyúu, ducaⁿ cada-xi nduu na quixi tucu yúhú Tée cùu ñaní tnáhá-ndó nchàa-ndo, te dāvā-áⁿ quiní ñáhá nchàa-ndi túhú ñáiyu xii-í. ²⁵ Dico díhna-gá ndoho vñhi-í, te daquèe tñhú ñáhá ñáiyu ñuyúu-a xii-í. ²⁶ Te cadá-yu dàtná ní quide ñáiyu ní xindecu cùtnàhá ní xindecu té Nōé, te xii-ni ducaⁿ sátnahá-xi cada nchaa ñáiyu ndècu vitna ndéé sáá nduu quixi tucu yúhú Tée cùu ñaní tnáhá-ndó nchàa-ndo. ²⁷ Chí caxi-ní-yu, coho-ní-yu, te caca cuu-ni cue tée xica ndáhú, te tnàndaha-ní-yu, chí ducaⁿ ní quide-yu dāvā-áⁿ ndéé ní sáá nduu cuānguee té Nōé xití bàrcú, te ní ngúita-xi ní cuuⁿ dáu ní ndaa ndute ñuyúu, te nchaa-yu ní xihí ní cáhá-yu dāvā-áⁿ. ²⁸ Te diu-ni ducaⁿ ní quide tucu ñáiyu cùtnàhá ní xindecu té Lót, chí xèxi-yu xihí-yu, te sááⁿ-yu te ndàdicó-yu, te xixitú-yu nāndi sá xixitú-yu, te nchaa cue tée xidácáá-güedé vehé. ²⁹ Te òré ní quee té Lót ñuu Sodomá, te ní ngoyo ñuhú andiu, te dācā yúu sùuní dicó ní nduu ñuhú-nā-xi, te ní xihí nchaandi túhú ñáiyu ñuu-áⁿ. ³⁰ Te diu-ni ducaⁿ sátnahá-xi cada ñáiyu na sáá nduu quixi tucu yúhú Tée cùu ñaní tnáhá-ndó nchàa-ndo ñuyúu-a.

³¹ Te núu ñⁿ ñáiyu càndodó-yu díquí vèhè-yu nduu-áⁿ, te ni vā ndíhu-gá-yu quehéⁿ-yu ñⁿ ndachúⁿ-yu canehé-yu quíhíⁿ, te ñáiyu cuáháⁿ yucu, te ni vā ñuhú-gá-yu vehé-yu. ³² Te chí dāndacu iní nacuáa ní yáha ñādhí té Lót. ³³ Te nchaa ñáiyu cuiní dācācu nihnu mee-xi ñuyúu-a ña, te cuíta nihnu-yu, te nchaa ñáiyu na cùu sá cuendá-í, te naníhí táhú-yu.

³⁴ Te na càchí tnúhu tucu-í xii-ndo sá nduu-áⁿ, te núu úu-yu cāa ñⁿ núu xito, te ñⁿ-yu ndanchitá-yu ndāá-yu andiu, te ñⁿ-yu quendóo. ³⁵ Te núu úu ñáiyu dhíhí

nchíçö-yu ìⁿ-ni vèhe, te ìⁿ-yu ndanchitá-yu ndaá-yu andiu, te ìⁿ-yu quendóo.

³⁶ Te núu úú cue tée yìhì-güedé yucu, te ìⁿ-dé ndanchita-dé ndaa-dé andiu, te ìⁿ-dé quendóo —cächí-gá xáhaⁿ-gá xii-güedé.

³⁷ Te sá dúcáⁿ ní cáháⁿ-gá núu ní xícáⁿ tnúhú-güedé núú-gá, te xáhaⁿ-güedé xii-gá:

—Mèstrú, ¿te ndèé ducaⁿ càda-xi-i? — cächí-güedé xáhaⁿ-güedé xii-gá.

Te ní xáhaⁿ-gá:

—Te nchòhó xìní-ndó sá ncháá núú yúcu yìqui cuñú ní xíhí, te yàcáⁿ tàcá cue ndíxíí xéxí-güedé —cächí-gá xáhaⁿ-gá xii-güedé.

18

Jèsús càháⁿ-gá cuendá ìⁿ juéxí ndihi cuendá ìⁿ ñaha quèé

¹ Te Jèsús ní caní-gá ìⁿ cuendú núú-güedé cuendá sá vā ná tnúhú iní-güedé cáháⁿ ndihi-güedé Yá Ndiöxí nchaa-ni òré. ² Te xáhaⁿ-gá:

—Ìⁿ ñuú ndécú ìⁿ juéxí, te ni ñà túú sàndáá iní-dé Yá Ndiöxí, te ni ìⁿ tnúhu xáhaⁿ ñáiyu ñá túú cuiní-dé cada cuendá-dé. ³ Te ñuú-áⁿ ndécú túcu ìⁿ ñadìhí ñaha quèé, te ní sáháⁿ-aⁿ càháⁿ ndàhú-aⁿ núú juéxí-áⁿ cuendá cada ndáá-dé ìⁿ cuéchi. ⁴ Te titní xito ní cuu sáháⁿ-aⁿ càháⁿ ndàhú-aⁿ núú-dé te ñá túú cuiní-dé cada cuendá-dé tnúhu càháⁿ-aⁿ ni cuu, te ndéé núú ñá cùú-gá te ní sani iní-dé: “Te cuèi ñá túú sàndáá iní-í Yá Ndiöxí, te ni ñá túú quide cuendá-í nchaa tnúhu càháⁿ ñáiyu cada-í, ⁵ dico na càda ndáá-í cuendá ñaha quèé-a ndihi ñáiyu cùu úhú iní tnáhá ndihi-aⁿ, chi vá cündèe-gá iní-í nuu núu quixi-aⁿ dasàtú iní ñáhá xii-í”, duha ní sani iní tée cùu juéxí-áⁿ —cächí-gá xáhaⁿ-gá xii-güedé.

⁶ Te ní xáhaⁿ túcu-gá xii-güedé:

—Cada cuendá-ndó nàcuáa ní sani iní juéxí tée cuìhna iní-xi-áⁿ. ⁷ Te Yá Ndiöxí ío chindee-gá nchaa ñáiyu ní cáháⁿ-gá cundecu ndihi-gá, chi cuèi nduu cuèi niú càháⁿ ndihi ñáhá-yu xii-gá, te vá cùyáa-gá nachinaa-gá nchaa sá quidé ñaha nchaa ñáiyu cùu úhú iní ñáhá xii-yu. ⁸ Te ío ndihi ducaⁿ càda-gá. Te òré ná quixi yúhú Tée cùu ñaní tnáhá-ndó ncháa-ndo, ¿te náa naníhí-gá-í ñáiyu sàndáá ndisa iní Yá Ndiöxí-áⁿ? — cächí-gá xáhaⁿ-gá xii-güedé.

Nàcuáa quide ìⁿ tée cùu fariséú ndihi ìⁿ tée cùu cobradó

⁹ Te Jèsús ní cáháⁿ-gá núú ñáiyu nàcuáa quide ñáiyu sàni iní sá ío quide ndáá te dàquee tìhú-yu tnàha ñáiyú-yu, te xáhaⁿ-gá xii-yu:

¹⁰ —Úú cue tée cuáháⁿ-güedé veñúhu càhnu sá ío cùnno cáháⁿ ndihi-güedé Yá Ndiöxí, te ìⁿ-dé cùú-dé tée cùu fariséú, te ingá-dé cùú-dé tée cuìhna iní-xi quide cobrá ñáhá xii ñáiyu cuendá impuèstú. ¹¹ Te tée cùu fariséú-áⁿ nùtní-dé cáháⁿ ndihi-dé Yá Ndiöxí, te xáhaⁿ-dè xii-gá: “Yòhó Dútú Ndiöxí ndàcáⁿ táhú-í núú-n, chi ñá túú quide-í dàtná quidé dàva-gá-güedé, chi dùhu-güedé, càháⁿ ndihi-güedé ñadìhí te ñá díú ñadìhí-güedé cùú-yu, te nándi-gá nchaa sá cuèhé sá dúhá quide-güedé, te ni ñá túú quide-í dàtná quidé tée cuìhna iní-xi quide cobrá ñáhá xii ñáiyu cuendá impuèstú ndécú ìha. ¹² Chi yúhú ñá túú tnàhí ná xéxi-í úú nduu xití samàná cuendá sá càháⁿ ndihi ñaha-í xii-n, te nchaa sá nihí-í te càhu-í úxí xichi, te ìⁿ xichi tàxi-í xii-n”, cächí-dé xáhaⁿ-dè xii Yá Ndiöxí. ¹³ Dico tée cuìhna iní-xi quide cobrá ñáhá xii ñáiyu cuendá impuèstú-áⁿ chi xica lùha nutnì-dé, te ni lùha ñá túú cùyí-dé ndonehe núú-dé andiu cuendá sá ndíxí cuèchi iní-dé nchaa sá ñá túú vāha quide-dé, te ndèdì ndaha-dé pèchú-dé sá ndìhú iní-dé, te xáhaⁿ-dè xii Yá Ndiöxí: “Yòhó Dútú Ndiöxí cundàhú iní ñáhá xii-í, chi ío cuèhé sá ñá túú vāha quide-í núú-n!”, cächí-dé xáhaⁿ-dè xii Yá Ndiöxí. ¹⁴ Te na cächí tnúhu-í xii-ndo sá tée cuìhna iní-xi quide cobrá ñáhá xii ñáiyu-áⁿ ní tedóho Yá Ndiöxí nchaa tnúhu ní cáháⁿ-dè, te ní quide càhnu iní-gá nchaa sá ñá túú vāha ní quide-dé, te cuànuhú-dé vehe-dé. Te tée cùu fariséú-áⁿ ñá túú ní tedóho ñaha Yá Ndiöxí xii-dé. Chi nchaa ñáiyu na càda cahnu mee-xi ñuyú-a te vá cùú-yu ñáiyu cùnno, te nchaa ñáiyu ñá túú quide cahnu mee-xi, ñáiyu-áⁿ cunúú-yu —cächí Jèsús xáhaⁿ-gá xii-yu.

Jèsús quidé ÿ-gá landú

(Mt. 19:13-15; Mr. 10:13-16)

¹⁵ Te ìⁿ úú ñáiyu ndècá-yu landú lìhli cuáháⁿ núú Jèsús chi cuiní-yu sá téndàha ñaha-gá xii-güexi, te òré ní xini cue tée xica cuu ndihi-gá sá ndécá-yu landú-áⁿ

cuǎháⁿ núú-gǎ, te ní ngúíta-güedé ténáá ñáhá-güedě xií-yu, te xáhaⁿ-güedě sá vǎ dúcáⁿ càdá-yu. ¹⁶Dico Jèsús ní cana ñaha-gǎ xii-güedé, te ní xáhaⁿ-gǎ:

—Chí dáñá ná quíxi nahi landú líhli-áⁿ nùú-í-a, te vǎ cadí-ndó ichi-güexi, chi dàtná cúú vǎha iní cue landú líhli-áⁿ ducaⁿ cùu vǎha iní cue ñáyiú yindaha ñaha Yá Ndióxi. ¹⁷Te ña cǎchí tnúhu ndáá-í xii-ndo sǎ nùu vǎ quíndáá iní ñáhá-ndó dàtná quidé dǎva landú líhli sàndáá iní ñáhá xii-í, te vǎ ndíhu ndaha ñaha Yá Ndióxi xii-ndo, te vǎ ndúú táhú-ndó cùndecu-ndo ndíhi-gǎ ní caa ní quíhíⁿ —cǎchí-gǎ xáhaⁿ-gǎ xii-güedé.

Híⁿ tée cuica cǎháⁿ ndíhi-dé Jèsús
(Mt. 19:16-30; Mr. 10:17-31)

¹⁸Te híⁿ tée cùnuu ní xicáⁿ tnúhú-dě núú Jèsús, te xáhaⁿ-dě xii-gǎ:

—Yòhó Mèstrú, cùu-n tée ío vǎha iní-xi, te cuini-í nùu vǎ cùndèe iní-n cǎchí tnúhu-n nǎ cúú sǎ vǎha cada-í cuendá nduu táhú-í cundecu-í ndíhi Yá Ndióxi ní caa ní quíhíⁿ —cǎchí-dé xáhaⁿ-dě xii-gǎ.

¹⁹Te Jèsús ní xáhaⁿ-gǎ xii-dé:

—¿Te cùtnuní iní-n nǎcuáa ndúu tnúhu cǎháⁿ-n sǎ yǐhú vǎha iní-áⁿ? Chi híⁿdii díí-ni Yá Ndióxi vǎha iní-gǎ. ²⁰Te yòhó xini-n nǎcuáa ní cachí Yá Ndióxi cada ñáyiú, te duha ní cachí-gǎ: “Nchòhó cue tée vǎ cǎháⁿ ndíhi-ndo ñàdihí te núu ñá díú ñàdihí-ndó cùú-yu, te ducaⁿ-ni nchòhó cue ñáyiú díhí tucu vǎ cǎháⁿ ndíhi-ndo tée te núu ñá díú yíi-ndo cuu-güedé, te vǎ cǎhní-ndó tñaha ñáyiú-ndo, te ní vǎ dúhú-ndó sǎ ndécú ndíhi-yu, te ní vǎ dǎcǎcu-ndo cuéchi neñúú sǎ cúú-xí tñaha ñáyiú-ndo, te canehe-ndo sǎ yíñuhu núú tǎtá-ndó ndíhi núú ñáná-ndó”, duha ní cachí Yá Ndióxi cada ñáyiú —cǎchí Jèsús xáhaⁿ-gǎ xii-dé.

²¹Te tée-áⁿ ní xáhaⁿ-dě xii-gǎ:

—Nchaa xiáⁿ ní ngúíta-í quidé-í ndéé cùtnàhá cúú landú-í —cǎchí-dé xáhaⁿ-dě xii-gǎ.

²²Te Jèsús ní xáhaⁿ-gǎ xii-dé:

—Dico cùmání ñgǎ núú sǎ cadá-n, vitna te quíhíⁿ-n te dico-n nchàa sǎ ndécú ndíhi-n, te díhúⁿ-n cuǎha táhú-n cuè ñáyiú ndàhú, te ducaⁿ te nduu táhú-n cùndecu vǎha-n nùú ndécú Yá Ndióxi táxi tñuní-gǎ,

te na yǎha ducaⁿ càda-n te quixi-n chìtnahá ñáhá-n xii-í —cǎchí-gǎ xáhaⁿ-gǎ xii-dé.

²³Te sǎ dúcáⁿ ní xáhaⁿ Jèsús xii-dé, te ío ní cundíyí-dé, chi ío cuica-dě. ²⁴Te sǎ ní xini ñáhá Jèsús xii-dé cùndíyí-dé, núu ní cachí-gǎ:

—Ío úhú quíndáá iní ñáyiú cuica Yá Ndióxi cuendá ndíhu ndaha ñaha-gǎ xií-yul ²⁵Te yáchí-gǎ yáha híⁿ cǎméyu yaú híⁿ yiqui tícú dǎcúxí sǎ quíndáá iní híⁿ ñáyiú cuica Yá Ndióxi cuendá ndíhu ndaha ñaha-gǎ xií-yu —duha ní cachí-gǎ.

²⁶Te nchaa ñáyiú ní tecú dóho-xi tnúhu ní cǎháⁿ-gǎ ní xáhǎⁿ-yu xii-gǎ:

—¿Te yoo naníhí táhú te núu ducaⁿ vǎiⁿ? —cǎchí-yu xáhǎⁿ-yu xii-gǎ.

²⁷Te Jèsús ní xáhaⁿ-gǎ xií-yu:

—Cue ñáyiú ñuyíú-a chi vǎ ndácü-yu ná cadá-yu nǎcuáa ndíhu ndaha ñaha Yá Ndióxi xií-yu, dico mee-gǎ chi ndacu-gǎ ndíhu ndaha ñaha-gǎ xií-yu chi nchaa sǎ vǎha ndacu-gǎ quidé-gǎ —cǎchí-gǎ xáhaⁿ-gǎ xií-yu.

²⁸Te té Pèlú ní xáhaⁿ-dě xii-gǎ:

—Nchúhú ní dándòo-ndí nchaa sǎ ndécú ndíhi-ndí, te ní tuha ñaha-ndí xii-n —cǎchí-dé xáhaⁿ-dě xii-gǎ.

²⁹Te ní xáhaⁿ-gǎ xii ñáyiú:

—Na cǎchí tnúhu ndáá-í xii-ndo sǎ nchǎá ñáyiú na dándóo vehe-xi, àdi tǎtá-xi, ñáná-xi, ñaní-xi, cúha-xi, ñàdihí-xi, déhe-xi cuendá sǎ cuini-yu ndíhu ndaha ñaha Yá Ndióxi xií-yu, ³⁰te ío-gǎ cuéhé sǎ cuǎnaha-gǎ xií-yu cundecu ndíhí-yu, te ñá díú-ní xiáⁿ, chi tñáhá nduu táhú-yu cundecu ndíhi ñáhá-yu xii-í ní caa ní quíhíⁿ ná sǎá nduu —cǎchí-gǎ xáhaⁿ-gǎ xií-yu.

Jèsús cǎháⁿ tucu-gǎ sǎ cǎhní ñaha-güedé xii-gǎ

(Mt. 20:17-19; Mr. 10:32-34)

³¹Te Jèsús ní taudíhíⁿ-gǎ ndí ùxúú cue tée xica cuu ndíhi-gǎ tnuú ñáyiú, te ní xáhaⁿ-gǎ xii-güedé:

—Vitna te quíhíⁿ-ó nùú Jerusálén, chi yácáⁿ cada-xi nchaa nǎcuáa sa ní chidó tñuní cue tée ní xóo cǎháⁿ tnúhu Yá Ndióxi ndéé sanaha nǎcuáa yáha yúhú Tée cùu ñaní tñáhá-ndó nchàa-ndo. ³²Chi cuáha cuendá ñáhá-güedě xii-í núú cuè tée ñá túú cùu cue tée isráel, te

cutíquí ndeé ñáhá-güedë xii-í, te cúcuèhé ñáhá-güedë, te tiú díí ñáhá-güedë xii-í. ³³Te caniha-güedë ndíhi ñíí, te dätñuní cahni ñaha-güedë xii-í, dico nduu úní sá cùú-í te ndoto-í —càchí-gá xáháⁿ-gá xii-güedé.

³⁴Dico ní ñíⁿ tnúhu ní cáháⁿ-gá ñá túú ní tècú tnùní-güedé, chi ío yídáhu tnúhu ní cáháⁿ-gá núu xíáⁿ ní ñíⁿ ñá túú ní tècú tnùní-güedé.

Jèsús quidé tátna-gá núú ñíⁿ tée cuàá ñúú Jericó

(Mt. 20:29-34; Mr. 10:46-52)

³⁵Te òré tá cùyatni Jesús ñúú Jericó cuáháⁿ, te yuhu ichi cuáháⁿ-gá-áⁿ núcõo ñíⁿ tée cuàá xicáⁿ ndáhú-dé. ³⁶Te òré ní tecú dóho-dé xicáháⁿ vâi ñáyiú xiyáha-yu, te ní xicáⁿ tnúhú-dé núú ñáyiú ndècu ndíhi-dé ná cuendá ducaⁿ vâi-yu yáha. ³⁷Te ní xáhãⁿ-yu sá Jèsús tée ñúú Nazàrét ñúhú-dé ichi. ³⁸Te níhi ní cáháⁿ-dé, te xáhaⁿ-dë xii-gá:

—Jèsús ñaní tnáhá ndíí Dàvíí, cundàhu iní ñáhá xii-í! —càchí-dé xáhaⁿ-dë xii-gá.

³⁹Te ñáyiú xixódó núú núú Jèsús ní tenáá ñáhãⁿ-yu xii-dé, te xáhãⁿ-yu sá ná càdí-dé yuhu-dé dico uuⁿ-gá níhi ní cáháⁿ-dë xáhaⁿ-dë xii-gá:

—Yòhó tée cùn ñaní tnáhá ndíí Dàvíí, cundàhu iní ñáhá xii-í! —càchí-dé xáhaⁿ-dë xii-gá.

⁴⁰Te Jèsús ní ngúíñí-gá, te ní táuchíúⁿ-gá ní sángueheⁿ ñaha cuè tée ndíhi-gá. Te òré ní quexio-dé núú-gá, te ní xicáⁿ tnúhú-gá núú-dë, te xáhaⁿ-gá:

⁴¹—¿Ná cuíní-n càda ñaha-í xii-n-í? —càchí-gá xáhaⁿ-gá xii-dé.

Te tée cuàá-áⁿ ñí xáhaⁿ-dë:

—Mèstrú, cuíní-í cada tátna-n núú-í cuendá cundehe-í —càchí-dé xáhaⁿ-dë xii-gá.

⁴²Te Jèsús ní xáhaⁿ-gá:

—Sa ní ndúha núú-n chi ní sándáá iní-n Yá Ndiõxí —càchí-gá xáhaⁿ-gá xii-dé.

⁴³Te òré-ni-áⁿ ñí ndúha núú-dë, te ní chinchícúⁿ-dë Jèsús, te ní cachí-dé sá ío càhnu cuu Yá Ndiõxí. Te nchaa ñáyiú ní xiní nàcuáa ní cuu ní ndúha núú-dë tnàhá-yu ní cachí-yu sá ío càhnu cuu Yá Ndiõxí.

19

Jèsús ndíhi ñíⁿ tée nàni Zaqueú

¹Te Jèsús ní sáá-gá ñúú Jericó, te ta yáha-gá xití ñúú-áⁿ cuáháⁿ. ²Te ñúú-áⁿ ndécú ñíⁿ tée cuica nàni-dé Zàqueú, te cùnnu-dé táxi tnùní-dé cue tée cundíhi-dé, cue tée cuihna iní-xi quide cobrá ñáhá xii ñáyiú cuendá impuèstú. ³Te tée-áⁿ cuíní-dé quíní-dé Jèsús òré-áⁿ ní cùu te ñá ní ndàcu-dé, chi ío cuéhé ñáyiú, te ñá túú dùcúⁿ-dë. ⁴Te xinu-dé ní ngódó núú-dë te ní sáá-dé díquí ñíⁿ yutnu sicómorú nùtníí yatni yuhu ichi núú yáha Jèsús cuendá cuíní-dé quíní ñáhá-dë xii-gá. ⁵Te òré tá yáha Jèsús xíáⁿ, te ní ndonehe núú-gá díquí yutnu núú cándòdo-dé-áⁿ, te ní xáhaⁿ-gá xii-dé:

—Zàqueú, tanùu ndíhi díquí yutnu-áⁿ, chi tnavíí quexio-í vehe-n ndetàtú-í —càchí-gá xáhaⁿ-gá xii-dé.

⁶Te té Zàqueú-áⁿ ñí nuu ndíhi-dé díquí yutnu-áⁿ, te ío ní cudíí iní-dé ní queheⁿ cuendá-dé Jèsús vehe-dé. ⁷Te sá ñí xiní ñáyiú ní quexio Jesús vehe-dé, te nchaa-yu ní ngúíta-yu càháⁿ cuéhé-yu cuendá-gá, te xitnàhá-yu:

—Tée-a cuánguihu-dé vehe ñíⁿ tée ndècu ichi cuehé ichi duha —càchí-yu xitnàhá-yu.

⁸Te té Zàqueú-áⁿ ñí ndacuíní-dé tnuú-yu, te xáhaⁿ-dë xii Jèsús:

—Yòhó Mèstrú, na cuáha-í ñáyiú ndàhú cuádava nchaa sá ndécú ndíhi-í. Te núu yoo ní dándáhú-í ní dùhú-í, te codo úní-gá tnàhá sá ní dùhú-í-yu nàcuáaha-í xii-yu —càchí-dé xáhaⁿ-dë xii-gá.

⁹Te Jèsús ní xáhaⁿ-gá xii té Zàqueú:

—Vitna ní naníhí tàhú-n ndíhi nchaa ñáyiú xindecu vehe-n, chi tnàhá-n cùu-n ñaní tnáhá ndíí Àbrahám. ¹⁰Te yíhú Tée cùu ñaní tnàhá-ndo nchaa-ndo véxi-í nándùcu-í ñáyiú ní xíta nihnu cuendá dàcácu nihnu-í-yu núú ùhú núú ndàhú —càchí-gá xáhaⁿ-gá xii-dé.

Nàcuáa ní quide-güedé ndíhi díhúⁿ cuàáⁿ
(Mt. 25:14-30)

¹¹Te nchaa ñáyiú-áⁿ ñí sani iní-yu sá ndíhi-ni ndíhu ndaha ñàha Yá Ndiõxí xii-yu cuendá sá ñí cuyatni Jesús ñúú Jerusalén, te xíáⁿ núu ní ngúíta Jèsús ní caní-gá ñíⁿ cuendú núu-yu cuendá tecú tnúní váha-yu tnúhu-gá. ¹²Te xáhaⁿ-gá xii-yu:

—Ní xindecu ñíⁿ tée cùu ñaní tnáhá ñáyiú cùnnu, te cuáháⁿ-dë íngá ñúú xicá cuendá

yacáⁿ cuáha ñaha-güedë chiúⁿ coo-dé, te dätñuní ndixi-dé quindaha-dë titní ñuú.

¹³ Te cùmání-gã quee-dé quíhíⁿ-dé, te ní cana-dé úxí cue tée xínu cuechi núú-dë, te ní sáñaha-dë ndí dííⁿ núú-güedë ííⁿ caa ííⁿ caa díhúⁿ cuàáⁿ, te ní xáhaⁿ-dë: “Chí cáda ndáhú ndíhí díhúⁿ-ãⁿ ndéé ná sáá nduu násáá-í”, cächí-dé xáhaⁿ-dë xii-güedë.

¹⁴ Dico nchaa ñáyiú ñuú quindaha-dë-áⁿ ñà túú tñhá íní-yu sá quindaha ñaha-dé, núu ní tendahá-yu cue tée ñehe tñúhu cuáháⁿ núú cue tée cuáñaha chiúⁿ coo-dé-áⁿ, te ní xáhãⁿ-yu sá cññaha-güedë sá ñà túú tñhá íní-yu sá tée-áⁿ quindaha ñaha-dé xii-yu.

¹⁵ Dico dacuítí sá ní sáha-güedé tée-áⁿ chiúⁿ coo-dé sá díú-dë quindaha-dë ñáyiú nchaa ñuú-áⁿ, te ní nacuico-dë cuánuhú-dé ñuú-dé. Te òré ní nasáá-dé vehe-dé, te ní tendaha-dë ííⁿ tée ní sánúcana ñaha xii cue tée xínu cuechi núú-dë, cue tée ní dándö ndaha-dë díhúⁿ cuendá cácaⁿ tñúhú-dë núú-güedë ííⁿ ííⁿ-güedé núu ndéé dau ní chídó-xí díquí díhúⁿ sá ní dándö ndaha ñaha-dé-áⁿ.

¹⁶ Te tée ní ndèxio díhna xáhaⁿ-dë: “Pàtróóⁿ, ní quide-í ndáhú ndíhí díhúⁿ-n şã ní dándö ndaha ñaha-n xii-í, te sá ííⁿ ní taxi-n te ní chídó-xí úxí-gá tñhá te ná-a naqueheⁿ cuendá-n”, cächí-dé xáhaⁿ-dë. ¹⁷ Te tée cùu patróóⁿ-dë-áⁿ ní xáhaⁿ-dë: “Ío váha tée xínu cuechi cuu-n chí ío váha ní quide-n, te sá ní quide váha-n ndíhí sacú díhúⁿ sá ní dándö ndaha ñaha-í xii-n, te xíãⁿ núu yúhú cächí-í sá táxí tñuní-n úxí núu vitna”, cächí-dé xáhaⁿ-dë. ¹⁸ Te ní ndexio ingá-dé, te ní xáhaⁿ-dë: “Pàtróóⁿ, ní quide-í ndáhú ndíhí díhúⁿ-n sá ní dándö ndaha ñaha-n xii-í, te sá ííⁿ ní taxi-n te ní chídó-xí úhúⁿ-gá tñhá te ná-a naqueheⁿ cuendá-n”, cächí-dé xáhaⁿ-dë.

¹⁹ Te ní xáhaⁿ tée cùu patróóⁿ-dë-áⁿ xii-dé: “Te yòhó taxi tñuní-n úhúⁿ ñuú”, cächí-dé xáhaⁿ-dë xii tée xínu cuechi-áⁿ.

²⁰ Te dätñuní ní ndexio tucu ingá-dé, te xáhaⁿ-dë: “Pàtróóⁿ, náu díhúⁿ-n-á, te naqueheⁿ cuendá-n chí ní taxúha-í ní chidúcuⁿ-nuu-í ííⁿ pãnú te ñà túú ní quide-í ndáhú ndíhí díhúⁿ-n,

²¹ chí ní yúhú ñáhà-í xii-n, chí cùu-n ííⁿ tée díí, te nàqueheⁿ-n ííⁿ sá ñà túú ní táxi ndecu-n, te nàtahu-n ííⁿ xichi núú ñà túú ní chíhí-n tatá”, cächí-dé xáhaⁿ-dë xii patróóⁿ-dë. ²² Te ní xáhaⁿ patróóⁿ-dë xii-dé: “Yòhó cúu-n ííⁿ tée cuihna íní-xi xínu cuechi núú-í, te díu-ni nchaa tñúhu

cáhãⁿ-n-ãⁿ cächí tñuní-xi nàcuáa cuu ndáá cuéchi-n. Te núu sãní íní-n sá cùú-í ííⁿ tée díí, te nàqueheⁿ-í ííⁿ sá ñà túú ní táxi ndecu-í, te nàtahu-í ííⁿ xichi núú ñà túú ní chíhí-í tatá, ²³ te núu ducaⁿ ña, şte ná cuendá ñà túú ní càhu íní-n dàsaⁿ nuu-n díhúⁿ ní taxi-í, te cññaha-n chàhu-yu díquí-xi, te òré ná násáá-í vehe-í, te sa ngódó lùha-gá díquí-xi naqueheⁿ cuendá-í ní cùu-í?”, cächí-dé xáhaⁿ-dë xii tée xínu cuechi-áⁿ.

²⁴ Te ní xáhaⁿ tée cùu patróóⁿ-áⁿ xii cue tée xíndecu xíaⁿ: “Chí quèndéé díhúⁿ cuàáⁿ ñehé tée-a, te cuáha-ndo tée ñehe úxí tucu díhúⁿ cuàáⁿ-áⁿ”, cächí-dé xáhaⁿ-dë xii-güedë. ²⁵ Te ní xáhaⁿ-güedë: “Pàtróóⁿ, dico sa ñehe-dé úxí díhúⁿ cuàáⁿ”, cächí-güedé xáhaⁿ-güedë. ²⁶ Te ní xáhaⁿ tée cùu patróóⁿ-áⁿ: “Na cächí tñúhu-í xii-ndo sá cue ñáyiú ío xii-xi te níhí-gá-yu cundecu ndíhí-yu, te cue ñáyiú sacú ndécú ndíhí cuita ndíhí nihnu nchaa sá ndécú ndíhí-yu”, cächí tée cùu patróóⁿ-áⁿ xáhaⁿ-dë xii-güedë. ²⁷ Te xáhaⁿ tucu-dé xii-güedë: “Nchaa ñáyiú cùu úhú íní ñáhã xii-í ñà tñhá íní-yu quindaha-í-yu, te chí cándèca-yu taquixi íha, te cahni-ndö-yu núu-í-a”, cächí tée cùu patróóⁿ-áⁿ xáhaⁿ-dë xii-güedë —duha cuáhãⁿ cuendú ní cani Jesús núú ñáyiú.

Jesús cuánguñhu-gá ñuú Jerusalén

(Mt. 21:1-11; Mr. 11:1-11; Jn. 12:12-19)

²⁸ Te sáta dúcãⁿ ní cáhãⁿ-gã, te ní nucúhuⁿ ichi-gá cuáhãⁿ-gã ñuú Jerusalén. ²⁹ Te òré sa ní cuyatni-gã ñuú Bèttagé, ndíhí ñuú Bètanía te xíaⁿ cáá yùcu nani Olivú, te ní xáhaⁿ-gã xii úú cue tée xica cuu ndíhí-gá:

³⁰ —Chí cuáhãⁿ ñuú cáá yàtni yacáⁿ, te òré quexio-ndo yacáⁿ, te naníhí-ndó ííⁿ búrru ndètní-dí, te vátá yòo ííⁿ-gã codo ñaha xii-dí, te nandaxi-ndo-dí te candeca-ndo-dí quixi. ³¹ Te núu yoo na cácaⁿ tñúhu núú-ndó ñà cuendá nándaxi-ndo-dí, te cññaha-ndo xii-yu sá yúhú Yáá xícã cùu ndíhí-ndo xini ñuhu-í-dí —cächí-gá xáhaⁿ-gã xii-güedë.

³² Te cue tée-áⁿ ní xica-güedé cuáhãⁿ-güedé, te nchaa-ni nàcuáa ní xáhaⁿ Jesús ducaⁿ ní cuu, ³³ chí mei òré nándaxi-güedé búrru-áⁿ ní quexio cue ñáyiú cùu xitohó-dí xicãⁿ tñúhu-yu núú-güedé, te xáhãⁿ-yu:

—¿Ná cuendá nándaxi-ndo búrru-ndí-i? —cächí-yu xáhãⁿ-yu.

³⁴ Te ní xáhaⁿ-güedë xií-yu:

—Nà ndaxi-ndí-dí chi Yaá xíca cùu ndíhi-ndí xíní ñùhu ñaha-gá xii-dí — cächí-güedé xáhaⁿ-güedë xií-yu.

³⁵ Te ndëca-güedé-dí cuáháⁿ núú ndécú Jèsús, te óré ní quexio-güedé ndíhi-dí núú ndécú-gá te ní sacáⁿ ndogo-güedé dóo-güedë sátá-dí, te ní ngódó ñáhá-gá xii-dí. ³⁶ Te ío cuehé ñáyiú ta sàcáⁿ-yu dóo-yu ichi cuáháⁿ-gá cuendá núú dóo-yu-áⁿ yáha-gá ndíhi quiti yodo-gá. ³⁷ Te ní nucuíta nuu-gá ichi tindúú yucu Ólívú tá cuyatni-gá ñúú Jerusalén cuáháⁿ, te nchaa ñáyiú sàndáá íní ñáhá xii-gá nchicúⁿ ñáhá-yu te ní nguíta-yu níhi càháⁿ-yu sá cùdí íní-yu, te cächí-yu sá ío càhnu cuu Yá Ndióxi cuendá sá ní xíní-yu nchaa sá vǎ yǎo tnàhí ndàcu cada ní quide-gá. ³⁸ Te cächí-yu:

—í-o càhnu cuu Yaá véxi quindaha ñaha xii-o, te diu-gá cùú-gá Yaá ní tendaha Yá Ndióxi véxi quide núú-gá! ¡Te ío càhnu cuu mee-gá! ¡Te andiu ñà túú tnàhí ná cùú! — duha cächí-yu.

³⁹ Te ñⁿ úú cue tée cùu fariséú ñúhú tnàhá tnúú ñáyiú-áⁿ ní xáhaⁿ-güedë xii Jèsús:

—Mèstrú, cùñaha nchaa ñáyiú ndíhi-n na càdí-yu yuhú-yu —cächí-güedé xáhaⁿ-güedë xii-gá.

⁴⁰ Dico Jèsús ní xáhaⁿ-gá xii-güedé:

—Te na cächí tnúhu-í xii-ndo sǎ ñúú ñáyiú-a na càdí-yu yuhú-yu ña, te nchaa yúú càháⁿ níhi-xi dàtná ñⁿ ñáyiú —cächí-gá xáhaⁿ-gá xii-güedé.

⁴¹ Te óré ní cuyatni-gá ñúú Jerusalén te ní xíní-gá, te ní ndáhyú-gá cuendá nchaa ñáyiú dii ñúú-xi-áⁿ sǎ ndíhú íní-gá. ⁴² Te ní xáhaⁿ-gá xii cue ñáyiú-áⁿ:

—Ío cuu váha íní-í te núú dícó nchòhó tecú tnùní-ndó vǐtna ñⁿ tnúhu sá cáda váha ñaha xii-ndo, chi ñá túú-gá ná cuu cun-decu-ndo, te núu na təcú tnùní-ndó. Dico ñá təcú tnùní-ndó, chi ío yídáhu tnúhu-a.

⁴³ Te sáá nduu tnúndòho tnúhu ndàhú sá cùú-xí-ndó, te nchaa cue tée dava-gá ñúú cùú ùhú íní tnàhá ndíhi-ndo quixi-güedé chidoco ñaha-güedé xii-ndo, te ní càndéé núú ndécú-ndó-áⁿ dacàa-güedé ndóho cuendá xíáⁿ quíhi váha-güedé nàá ndíhi ñaha-güedé xii-ndo, te vá dàhá-güedé cunu-ndo. ⁴⁴ Te cahni ñaha-güedé xii-ndo,

te ndíhi nchaa vehe-ndo dàngoyo-güedé ndéé cimientú-xi, chi ñá túú ní cuiní-ndó nàcuáha-ndo cuendá óré ní quixi coto ñaha Yá Ndióxi xii-ndo —duha ní xáhaⁿ-gá xii ñáyiú ñúú-áⁿ.

Jèsús ñá túú tnàhá íní-gá nàcuáa quidé-yu veñúhu

(Mt. 21:12-17; Mr. 11:15-19; Jn. 2:13-22)

⁴⁵ Te Jèsús cuánguñu-gá xití veñúhu càhnu sá ío cùnmu, te xití veñúhu-áⁿ xǐn-decu cue ñáyiú quide ndáhú ndíhi cue ñáyiú xísaaⁿ. Te ní queñuhu ñaha Jèsús xií-yu quehé. ⁴⁶ Te ní xáhaⁿ-gá xií-yu:

—Núú tútú Yá Ndióxi càháⁿ-xi nàcuáa ní càháⁿ-gá, te duha ní cachí-gá: “Vehe-í cùú-xí núú càháⁿ ndíhi ñaha ñáyiú xii-í”, duha ní càháⁿ-gá cächí-xi núú tútú-gá. Dico nchòhó quidé-ndó vehe-gá vehe ñadúhú —cächí-gá xáhaⁿ-gá xií-yu.

⁴⁷ Te Jèsús nchaa nduu danehé-gá ñáyiú xití veñúhu, dico cue tée cùu dútú cùnùu, ndíhi cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndíhi cue tée cùnmu ñúú-áⁿ ndúcú-güedé nàcuáa cada-güedé cahni ñaha-güedé xii-gá. ⁴⁸ Dico ñá níhi-güedé nàcuáa cada-güedé, chi cuendá nchaa ñáyiú ío cùdí íní-yu ndedóho-yu nchaa tnúhu càháⁿ-gá.

20

Jèsús ndécú ndíhi-gá tnúhu ndee íní

(Mt. 21:23-27; Mr. 11:27-33)

¹ Te ñⁿ nduu yíhi Jèsús xití veñúhu càhnu sá ío cùnmu danehé-gá ñáyiú tnúhu sá càháⁿ nàcuáa naníhí tǎhú-yu. Te ní quexio cue tée cùu dútú cùnùu ndíhi cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndíhi cue tée cùu sacuéhé núú ñáyiú isráél, ² te ní xáhaⁿ-güedé xii-gá:

—Cuiní-ndí cachí tnúhu-n xii-ndí nása ndúu tnúhu ndee íní ndécú ndíhi-n núu quide-n nándi sá quidé-n. ¿Te yoo ducaⁿ ní taxi tnúhu ndee íní-áⁿ xii-n? —cächí-güedé xáhaⁿ-güedé xii-gá.

³ Te Jèsús ní xáhaⁿ-gá:

—Yúhu tnàhá-í cuiní-í cacáⁿ tnúhu-í ñⁿ sá cacáⁿ tnúhu-í núú-ndó, te cachí tnúhu-ndo. ⁴ Te chí cächí tnúhu xii-í yoo ní táuchíúⁿ ní dácuañdute ndíi Juáá ñáyiú. ¿Yá Ndióxi áⁿ cuè tée ñuyúú-a ní táuchíúⁿ

dùcaⁿ ní quide ndíí? —càchí-gá xáhaⁿ-gã xii-güedé.

⁵ Te ní ngüíta-güedé xitnáha-güedé:

—¿Nása cúñaha-o? Chi núu ná cúñaha-o sá Yá Ndiöxí ní táuchíúⁿ dùcaⁿ ní quide ndíí Juáá ñá, te quesaha-dé: “¿Ná cuendá ñá túú ní sàndáá iní-ndó tñuhu ní cáháⁿ ndíí vàíⁿ?”, quesaha-dé. ⁶ Àdi te núu ná cúñaha-o sá cuè ñáyiú ñuyúú-a ní táuchíúⁿ dùcaⁿ ní quide ndíí ña, te nchaá ñáyiú cuáha ñáhá-yu yúú xii-o, te cahni ñáhá-yu, chi càchí-yu sá ndáá sá Yá Ndiöxí ní táuchíúⁿ-gã ní cáháⁿ ndíí Juáá tñuhu-gá núú ñáyiú —càchí-güedé xitnáha-güedé.

⁷ Te ní xáhaⁿ-güedé xii-gá sá ña túú xiní-güedé yoo ní táuchíúⁿ dùcaⁿ ní dàcuándute ndíí Juáá ñáyiú. ⁸ Te ní xáhaⁿ Jèsús xii-güedé:

—Te núu ducaⁿ te ni yùhú vá càchí tñuhu-í xii-ndo yòo ní taxi tñuhu ndee ìní duha quide-í —càchí-gá xáhaⁿ-gã xii-güedé.

*Cuendá cue tée cuihna iní-xi
(Mt. 21:33-44; Mr. 12:1-11)*

⁹ Te sáta dúcáⁿ te ní ngüíta Jèsús ní cani-gá ìⁿ cuèndú núú ñáyiú nàcuáa tecú tñuní-yu tñuhu-gá, te xáhaⁿ-gã xii-yu:

—Ìⁿ tée ní xitu-dé mee-ni yòho yaha stilé núú ñúhú-dé. Te ní sáá ìⁿ nduu quingaca cuu xica-dé vàí nduu te ní dándóo ndaha-dé sá ní xitu-dé-án xii ìⁿ úú cue tée cáháⁿ ndíhi-dé cuendá cada chiun-güedé, te ní ndatnúhu-güedé sá òré ná cùu te cuu cuendá dava-güedé te ducaⁿ te ní quee-dé cuáháⁿ-dé. ¹⁰ Te sáta ní sáá nduu ní cuu nchaá ndéhé yoho yàha stilé sá ní xitu-dé-án, te ní xáhaⁿ-dè xii ìⁿ tée xinu cuechi núú-dé: “Cuáháⁿ cácaⁿ-n sá cúú cuendá-í núú cuè tée ní dándóo ndaha-í nchaá yoho yàha stilé sá ní xitu-í”, càchí-dé xáhaⁿ-dè. Te tée xinu cuechi-án ní xica-dé cuáháⁿ-dé, dico cue tée ndéé nchaá yoho yàha stilé-án ní tñii-güedé tée xinu cuechi-án te ní caniha-güedé, te ní nacuícúⁿ ñáhá-güedé xii-dé, te ña túú tñàhí ná ní sáñaha-güedé. ¹¹ Te dàtnùní tée cùu xitohó nchaá yoho yàha stilé-án ní tendaha tùcu-dé ingá tée xinu cuechi núú-dé cuáháⁿ-dé, dico diu-ni ducaⁿ ní quide ñaha-güedé xii-dé, chi ní xicuèhé ñáhá-güedé, te ní caniha-güedé te ní nacuícúⁿ ñáhá-güedé, te ña túú tñàhí ná ní sáñaha-güedé. ¹² Te tée cùu xitohó nchaá

yoho yàha stilé-án ní tendaha tùcu-dé ingá-dé cuáháⁿ-dé, te diu-ni ducaⁿ ní quide ñaha tùcu-güedé, chi ní dancuèhé ñáhá-güedé, te ní nacuícúⁿ ñáhá-güedé.

¹³ Te tée cùu xitohó nchaá yoho yàha stilé-án ní sani iní-dé: “¿Nása cada-í vitna? Váha-gá tendaha-í déhe-í tée ío cùu iní-a nùhú-dé, chi cudana te òré quini ñáhá-güedé xii-dé, te canehe-güedé sá yíñuhu núú-dé”, duha ní sani iní-dé. ¹⁴ Dico òré ní xiní cue tée quide chiun-án dèhe xitohó nchaá yoho yàha stilé-án, te ní xitnáha-güedé: “Tée-án tée véxi nduu tãhú ñuhu-a ndíhi nchaá sá cáá núú-xi, dico cahni-o-dé te mee-o nduu tahú-ó sá ndúú tãhú-dé”, càchí-güedé xitnáha-güedé.

¹⁵ Te ní queñuhu ñaha-güedé ìⁿ xio yuhu ñuhu-án, te ní sahani ñaha-güedé xii-dé —duha cuáháⁿ cuèndú ní cani Jèsús núú-yu.

Te dàtnùní ní xáhaⁿ tùcu-gá xii-yu:

—¿Te nchòhó sa cùtnuní iní-ndó nàcuáa cada ñaha xitohó ñuhu-án xii cue tée-án ñá? ¹⁶ Chi nùhú-dé te cahni-dé cue tée-án, te dándóo ndaha-dé ñuhu-dé xii cue tée cùtnuní iní-dé cada ndáá —càchí-gá xáhaⁿ-gã xii-yu.

Te sá dúcáⁿ ní cáháⁿ-gá, núu ní cachí-yu:

—¿Sá và càchí Ndiöxí sá dúcáⁿ yàha-o! —càchí-yu.

¹⁷ Te Jèsús ní ndacoto-gá núú-yu, te ní xáhaⁿ-gã:

—Chí càchí tñuhu nása quèe-xi nàcuáa cáháⁿ-xi núú tütú Yá Ndiöxí, núú càchí-xi: Yúú sá ní dáquéé tñhu cue tée dàca vehe ní saa-xi cùu-xi yúú cùnùu vitna.

Duha càchí-xi núú tütú-gá. ¹⁸ Te nchaá ñáyiú ñá túú cuiní tñii tñuhu-í, te ndohó-yu dàtná ìⁿ ñáyiú tñàhnú duuⁿ òré ndúá-yu núú yúú, àdi núu na tàù ñáhá-xí te dàcachi duuⁿ ñaha-xi —cachí-gá xáhaⁿ-gã xii-yu.

Cuendá impuèstú

(Mt. 21:45-46; 22:15-22; Mr. 12:12-17)

¹⁹ Te cue tée cùu dütú cùnùu, ndíhi cue tée dàcuaha ñaha xii ñáyiú nchaá tñuhu ní chídó tñuní ndíí Moisés ní cuiní-güedé tñii-güedé Jèsús òré-ni-á ní cùu, chi ní cutnùní iní-güedé sá cuendá-güedé ní cáháⁿ-gá, dico ní yùhú-güedé cuendá sá ìo vài ñáyiú. ²⁰ Te ní ndúcú-güedé nàcuáa cada-güedé tñii ñaha-güedé xii-gá, te ní tendaha-güedé cue tée cuáháⁿ ngoto dayuhu ñaha xii-gá, te cuáháⁿ-güedé dàtná

cue tée váha iní-xi, te ndùcu-güedé nàcuáa cada-güedé nũu cáháⁿ-gá ìⁿ tnúhu sá ñà túú tàù-gá cáháⁿ-gá cuendá ducaⁿ te candeca ñaha-güedë xii-gá quíhíⁿ cuáha cuendá ñáhá-güedë núu tée cùnuu. ²¹ Te ní xáhaⁿ-güedë xii Jèsús:

—Mèstrú, ñhí-ndí tnúhu sá dánèhé-n ñáyiú mee-ni tnúhu váha, te cuëi ndëdani càa ñáyiú ìⁿ-ni càháⁿ-n ndíhí-yu, te càháⁿ ndáá-n nàcuáa càháⁿ Yá Ndiòxí cundecu-o ñuyúú-a. ²² Te cachí tnúhu xii-ndí nũu váha-ni cháhu-ndí té Cèsár tée ío cùnuu cuendá impuèstú àⁿ ñáhá —càchí-güedé xáhaⁿ-güedë xii-gá.

²³ Dico Jèsús ní cutnùnì inf-gá sá xító ndëé ñáhá-güedë xii-gá, núu ní xáhaⁿ-gá xii-güedé:

²⁴ —Chí dánèhé ñáhá xii-í ìⁿ díhúⁿ cuixíⁿ te cachí tnúhu-ndo núu yoo núu-xi ndëé, ndíhi yoo ñiú-xi ndëé —càchí-gá xáhaⁿ-gá xii-güedé.

Te ní xáhaⁿ-güedë xii-gá:

—Núú tã Cèsár ndëé ndíhi ñiú-dé —càchí-güedé xáhaⁿ-güedë xii-gá.

²⁵ Te ní xáhaⁿ tùcu-gá xii-güedé:

—Te núu ducaⁿ te chí nàcuáha té Cèsár sá cúu cuendá-dé, te sá cúu cuendá méé Yá Ndiòxí, te xíáⁿ nàcuáha-ndo-gá —càchí-gá xáhaⁿ-gá xii-güedé.

²⁶ Te ñá ní ndàcu tnahí-güedé datìcánuu ñaha-güedë xii-gá núu tnúhu càháⁿ-gá, chí òré ní cáháⁿ-gá, te da ní cuñúhu-güedé nchaa tnúhu ní cáháⁿ-gá, te váha-gá ní sadí-güedé yuhu-güedé.

Cuendá nchaa ñáyiú ndoto

(Mt. 22:23-33; Mr. 12:18-27)

²⁷ Te sáta dúcáⁿ te ní sáá ìⁿ úú cue tée cùu saducéú núu ndécú Jèsús. Te cue tée-áⁿ ñà túú sàndáá inf-güedé sá ndótó cuè ñáyiú ní xihí, te ní xáhaⁿ-güedë xii-gá:

²⁸ —Mèstrú, ndíhi Moisés càchí ndíhi núu tútú ndëcu vitna sá nũu ìⁿ tée na cùú, te quendóo ñadìhí-dé te ñà túú dëhe-dé ní xóo ndíhi-aⁿ, te tée cùu ñanì-dé naqueheⁿ-dé ñaha ní quendóo quèé-áⁿ cuendá coo dëhe-dé ndíhi-aⁿ cuendá ñanì-dé tée ní xihí-áⁿ. ²⁹ Te ní xíndecu úsá tnahá cue tée mee-ni ndí ñanì-güedé. Te tée díhna ní níhí ñadìhí-dé, dico ñà túú ní cùdí-dé cundecu-dé chí ní xihí-dé, te ní ìⁿ dëhe-dé ñà túú ní xóo ndíhi ñadìhí-dé-áⁿ. ³⁰ Te tée cùu uú ní naqueheⁿ-dé ñaha ní quendóo

quèé-áⁿ dico ní xihí tucu-dé, te ní ìⁿ tucu dëhe-dé ñà túú ní xóo ndíhi ñaha-áⁿ. ³¹ Te tée cùu uní ní naqueheⁿ tucu-dé ñaha ní quendóo quèé-áⁿ, te ñiú-ni ducaⁿ ní xihí-dé, te ní xínu ndí úsá-güedé ní cándeca ñaha-güedë xii ñaha-áⁿ, dico ní ìⁿ-güedé ñà túú ní xóo dëhe-güedé ndíhi-aⁿ, te ní ndíhi-güedé ní xihí. ³² Te ndéé núú ní ndíhi-ná ní xihí tnahá ñadìhí-áⁿ. ³³ Te na sáa nduu ndòto-güedé ndíhi ñaha-áⁿ ¿Te ndë-dacàa-güedé ñadìhí-güedé cuu-aⁿ-í? Chí ndí úsá-güedé ní cándeca ñaha-güedë xii-aⁿ —càchí-güedé xáhaⁿ-güedë xii-gá.

³⁴ Te Jèsús ní xáhaⁿ-gá xii-güedé:

—Nchaa ñáyiú ñuyúú-a tñandahá-yu.

³⁵ Dico nchaa ñáyiú ní nduu táhu ndoto díhna nuu ñáyiú-áⁿ cundecu-yu ndíhi Yá Ndiòxí ní caa ní quíhíⁿ, te yàcáⁿ ñà túú-gá sá cándeca tnahá-yu. ³⁶ Te ní ñà túú-gá tnúhu xihí, chí cuu-ná-yu dàtná cue espíritú xínu cuèchi núú Yá Ndiòxí cuendá sá ní ndotó-yu, chí cùu-yu dëhe-gá. ³⁷ Te ndéé ndíhi Moisés ní chídó tñunì ndíhi núu tútú ndíhi sá ncháá ñáyiú ní xihí ndotó-yu, te ñiú-ni xíáⁿ càháⁿ-xi cuendá tnutàù nchìcúⁿ ñuhú, te ñiú-ni xíáⁿ càchí tucu-xi sá Yá Ndiòxí cúu-gá Ndiòxí ndíhi Àbrahám, ndíhi Isàác, ndíhi ndíhi Jàcób. ³⁸ Te cue tée-áⁿ chí cuëi ní xihí-güedé sá cúu-xí nchòhò, dico sá cúu-xí Yá Ndiòxí chí ndëcu vívú-ni-güedé. Chí cutnùnì inf-ó sá Yá Ndiòxí cúu-gá Ndiòxí mee-ni cuè ñáyiú xíndecu vívú, te ñà túú cùu-gá Ndiòxí cue ñáyiú ñà túú ndëcu vívú. Te sá cúu-xí mée-gá chí nchaa ñáyiú ndëcu ndíhi-gá ndécú vívú-yu cuëi sa ní xihí-yu núu ñuyúú-a —càchí-gá xáhaⁿ-gá xii-güedé.

³⁹ Te ìⁿ tée dàcuaha ñaha xii ñáyiú nchaa tnúhu ní chídó tñunì ndíhi Moisés ní xáhaⁿ-dë xii Jèsús:

—Mèstrú, váha-ni càháⁿ-n —càchí-dé xáhaⁿ-dë xii-gá. ⁴⁰ Te ñà túú-gá ní cùyii-güedé cacaⁿ tnúhú-güedë ní ìⁿ tnúhu núu-gá.

Yoo dëhe-xi cùu Cristú

(Mt. 22:41-46; Mr. 12:35-37)

⁴¹ Te Jèsús ní xáhaⁿ-gá xii-güedé:

—¿Te nása càchí-tu-yu sá Cristú Yáa tñandaha Yá Ndiòxí quixi ñuyúú-a cùu-gá dëhe ndíhi Dàvíí? ⁴² Te mee ndíhi Dàvíí-áⁿ ní cachí ndíhi núu líbrú Sálmu:

Dútú Ndiòxí ní xáhaⁿ-gá xii Yáa cúu Xí-tohó-í:

“Ngóo xio cùha-í,
⁴³ te yúhú cada-í te nchaa sá cúú ùhú
 iní ñháá xii-n canehe-xi sá yíñùhu
 núú-n.”

Duha ní xáhaⁿ Dütú Ndióxi xii Yáá cúú Xítóhó-í cächí ndíí núú librú Sǎlmú. ⁴⁴ ζTe nása cùu Cristú déhe ndíí Dàvíí, te mee ndíí ní cachí ndíí sá cúú-gǎ Xítóhó ndíí-í? —cachí Jèsús xáhaⁿ-gǎ xii-güedé.

Jèsús cǎháⁿ-gǎ cuendá cue téé dàcuaha ñaha xii ñáyiú nchaa tnúhu ní chídó tnùní ndíí Moisés

(Mt. 23:1-36; Mr. 12:38-40; Lc. 11:37-54)

⁴⁵ Te òré ndátnùhu Jèsús ndíhi cue téé xica cuu ndíhi-gǎ xíndedóho ñaha ñáyiú, te xáhaⁿ-gǎ xii-güedé:

⁴⁶ —Cada cuendá-ndó vǎ cadá-ndó nàcuáa quide cue téé dàcuaha ñaha xii ñáyiú nchaa tnúhu ní chídó tnùní ndíí Moisés, chí tnàhá iní-güedé cuihnu-güedé dóó nání sǎ sácúihnu cue téé cùnuu. Te nchaa núú tàcá ñáyiú cuiní-güedé sá ndíhi tnúhu yíñùhu cǎháⁿ ndíhi ñháá-yu xii-güedé, te nàcáxi-güedé xilé sácóo nchíhi cue téé cùnuu-gǎ xití veñúhu conchíhi-güedé, te ducaⁿ-ni quide-güedé cuéi òré quíhu-güedé mèsá caxi-güedé òré ndécú-güedé ìñⁿ vico, chí mee-ni núú sácóo cue téé cùnuu-gǎ cuiní-güedé coo-güedé. ⁴⁷ Te quèndeé-güedé vehe nchaa ñáyiú díhí ñáyiú quèé, te ío naha cǎháⁿ ndíhi-güedé Yǎ Ndióxi cuendá cuiní-güedé cǎháⁿ váha-yu cuendá-güedé. Te sá dúcáⁿ quide-güedé te sáá nduu te ío-gǎ ndoho-güedé núú ùhú núú ndàhú dàcúúxí dǎva-gǎ ñáyiú —cächí-gǎ xáhaⁿ-gǎ xii-güedé.

21

Díhúⁿ nduu táhú Yǎ Ndióxi ní dáquèe ìñⁿ ñaha ndàhú ñaha quèé

(Mr. 12:41-44)

¹ Te Jèsús ní xiní-gǎ xití veñúhu xídáquèe cue téé cuica díhúⁿ nduu táhú Yǎ Ndióxi xití alcanciá. ² Te ní xiní-gǎ tnàhá ìñⁿ ñaha ndàhú ñaha quèé ní dáquèe-aⁿ úú díhúⁿ còbrí, ³ te ní xáhaⁿ Jèsús xii cue ñáyiú xíndecu-án:

—Na cächí tnúhu ndáá-í xii-ndo sǎ ñaha ndahú ñaha quèé-a ío-gǎ nándíhi díhúⁿ ní dáquèe-aⁿ xití alcanciá nduu táhú Yǎ Ndióxi dàcúúxí díhúⁿ ní dáquèe

dava-gǎ-yu. ⁴ Chi nchaa ñáyiú-án ní dáquèe-yu mee-nǎ sá ní ndóo-ná, dico ñaha quèé-a cuéi ndàhú-aⁿ dico ní dáquèe-aⁿ nihíí díhúⁿ sǎ cuááⁿ-án sǎ cǎxí-án ní cùu —cachí-gǎ xáhaⁿ-gǎ xii-yu.

Jèsús cächí-gǎ sá ngóyo vèñúhu

(Mt. 24:1-2; Mr. 13:1-2)

⁵ Te ìñⁿ úú ñáyiú xícáháⁿ-yu cuendá veñúhu cǎhñu, sǎ ío cùnuu sǎ ío vii cǎa nchaa yúú yíhí, ndíhi cuendá nchaa sǎ ní sáñaha táhú ñáyiú yíhí xití-xi. Te Jèsús ní xáhaⁿ-gǎ xii-yu:

⁶ —Sáá nduu te nchaa sá cúñùhu-ndo-a vǎ cùnduu-gǎ-xi dátá ná cǎá-xí vitna, chí ní ìñⁿ-gǎ yúú vǎ códó nchíhi tnaha-gǎ-xi chí ndíhi ngoyo —cachí-gǎ xáhaⁿ-gǎ xii-yu.

Nàcuáa cada-xi nduu ta cùyatni naa ñuyúú

(Mt. 24:3-28; Mr. 13:3-23)

⁷ Te cue téé xíndecu-án ní xícáⁿ tnúhú-güedé núú Jèsús, te xáhaⁿ-güedé xii-gǎ:

—Mèstrú, ζte ná nduu dùcaⁿ cada-xi ngoyo veñúhu, àdi nándi cùu sǎ cadá-xí cuendá cutnùní iní-ndí sǎ sǎ ta cuyatni nduu ducaⁿ cada-xi-í? —cachí-güedé xáhaⁿ-güedé xii-gǎ.

⁸ Te Jèsús ní xáhaⁿ-gǎ xii-güedé:

—Ío quíhi iní-ndó cùndecu-ndo, te vǎ dǎná-ndó mée-ndo dandahú ñháá ñáyiú xii-ndo. Chí ío cuéhé cue téé coo ñuyúú-a, te danàni-güedé mée-güedé dátá ná ní-í te cachí-güedé: “Yúhú cúú-í Cristú Yáá ní tendaha Yǎ Ndióxi véxi ñuyúú-a”, duha cachí-güedé. Te cachí tucu-güedé: “Vitna sa ní sáá nduu cǎda-xi nchaa nacúáa ní cǎháⁿ-í”, duha cachí-güedé. Dico vǎ quíndáá iní-ndó, te ní vǎ túhá-ndó-güedé.

⁹ Te òré ná nihí-ndó tnúhu sǎ titní nacióⁿ xínáá-güedé te dava ñuu xínáá-güedé ndí mée-güedé, te vǎ yùhú-ndó chí dacuítí sǎ dúcáⁿ cǎda-xi, dico vátá sáá-gǎ nduu nàa ñuyúú òré ducaⁿ cǎda-xi —cachí-gǎ xáhaⁿ-gǎ xii-güedé.

¹⁰ Te xáhaⁿ tucu-gǎ xii-güedé:

—Nchaa cue téé ìñⁿ nacióⁿ nàá-güedé ndíhi cue téé ingá nacióⁿ, te titní ñuu ngúíta-güedé nàá-güedé. ¹¹ Te titní xichí ñuyúú níhi víhi tnáa, te titní tucu xichí ñuyúú coo tnamá, te titní tucu xichí ñuyúú quixi cuéhé, te titní núú sǎ cadá-xí àndíu, te yùhú ñáyiú.

¹² Te òré cúmǎní-gǎ cada-xi nchaa nàcuáa càháⁿ-í-a, te cue tée cùu úhú iní ñáhá xii-ndo tñii ñaha-güedé, te candeca ñaha-güedé xii-ndo quíhíⁿ xití veñúhu-güedé cada ndáá-güedé cuéchi-ndo, te chihí ñaha-güedé vecaá xii-ndo, te candeca ñaha-güedé quíhíⁿ núu cuè tée cùnno yindaha nacióⁿ àdi núu dàva-gá cue tée cùnno sá cuendá-í.

¹³ Te òré ducaⁿ na càda ñaha-güedé xii-ndo, te òré-áⁿ tàù-xi càháⁿ váha-ndo cuendá-í núu-güedé. ¹⁴ Te vá cání iní-ndó núu nása cunduu tñúhu cùñaha-ndo xii-güedé cuendá cácu nihnu-ndo. ¹⁵ Chi yúhú dacàhu iní ñáhà-í xii-ndo tñúhu cùñaha-ndo xii-güedé, te taxi-í sá vátá quini tñuní-gá-ndó, te ni ñⁿ ñáyiu cùu úhú iní ñáhá xii-ndo vá nihí-gá-yu tñúhu cùñahá-yu xii-ndo. ¹⁶ Te ndéé tātá-ndó, ndíhi ñaní-ndó, ndíhi cue ñáyiu cùu ñaní tñáhá-ndó, ndíhi cue ñáyiu càháⁿ ndíhi váha-ndo cuáha cuendá ñáhà-yu xii-ndo núu cuè tée cùchiuⁿ, te dava-ndo càhni ñaha-güedé xii-ndo. ¹⁷ Te ío cuéhé ñáyiu cuu úhú iní ñáhà-yu xii-ndo sá cuendá-í. ¹⁸ Dico Yá Ndióxi ío coto ñaha-gǎ xii-ndo chi ndéé idi díquí-ndó còto-gá. ¹⁹ Te núu na càda ndee iní-ndó càncicúⁿ nihnu ñaha-ndo xii-í, te nduu táhú-ndó cùndecu-ndo ndíhi Yá Ndióxi ní caa ní quíhíⁿ.

²⁰ Te nduu na quini-ndó ñúhu doco sandadú ní càndéé yuhu ñúu Jerusálén, te sa cutnùní iní-ndó sá ní cuyatni nduu dànaa-güedé ñúu-áⁿ. ²¹ Te dàvá-áⁿ nchaa ñáyiu xindecu distritú Júdeá xíní ñúhu-xi cunú-yu quíhíⁿ-yu xití yucu, te nchaa ñáyiu xindecu ñúu Jerusálén quee-yu xití ñúu-áⁿ, te ñáyiu ñá túu xindecu ñúu-áⁿ vǎ ndíhu-gá-yu. ²² Chi dàvá-áⁿ cuu-xi nduu tñúndòho tñúhu ndáhú, te ducaⁿ càda-xi chi ducaⁿ ndéé tñuní núu tütú Yá Ndióxi nàcuáa dandòho ñaha-gǎ xii-yu. ²³ Te ndáhú ní cuu nchaa ñáyiu ñíhí ñúhú dèhe-xi, ndíhi nchaa ñáyiu ndéca déhe vitna sádi na sáá nduu ñucaⁿ cada-xi! Chi ío cuéhé tñúndòho tñúhu ndáhú coo núu ndécú-yu dàvá-áⁿ, te xíáⁿ cuu-xi ñⁿ tñúndòho tendaha Yá Ndióxi quixi sá cúu-xí-yu. ²⁴ Te dava cue tée cuú-güedé cahni ñaha-güedé, te dava-güedé tñii

ñaha-güedé candeca ñaha-güedé quíhíⁿ nchaa ñúu xícá, te cue tée dava-gá ñúu cunuu-güedé ñúu Jerusálén, te mee Yá Ndióxi cachí-gá te núu ná daha nduu cunuu-güedé ñúu-áⁿ.

Nàcuáa cada-xi òré quixi tucu Tée cùu ñaní tñáhá cuè ñáyiu

(Mt. 24:29-35, 42-44; Mr. 13:24-37)

²⁵ Te cada-xi ñⁿ sá vátá quini-gá ñáyiu núu nchicanchii, ndíhi núu yóó, ndíhi núu nchaa chódini, te ñuyú-a coo tñúhu ndíhu iní-xi te vá cutnùní iní-yu nása cadá-yu cuendá sá ío dusaⁿ càda ndute lamár òré candaundéé tñáhá-xí. ²⁶ Te nchaa ñáyiu cuneé-yu sá yùhú-yu, ndíhi sá ndíhú iní-yu cuendá nchaa sá cadá-xí ñuyú-a, te quidi-xi andíu. ²⁷ Te sátá dúcáⁿ te quini-ndó yúhú Tée cùu ñaní tñáhá-ndó nchaa-ndo quee-í andíu quixi-í ichi xití vícò, te dàvá-áⁿ quini ñáhá nchaa ñáyiu sá ío cùnno-í te ndacu-í quide-í nchaa sá vǎha. ²⁸ Te òré ná ngüita-xí ducaⁿ càda-xi, te cuita cundee-gǎ iní-ndó quíhíⁿ, te quíhi iní-ndó chi sa ní cuyatni víf-ñá nduu cácu nihnu-ndo vá cùndecu-gá-ndó núu ñuyú yícá cuéchi-a — càchí-gá xáhaⁿ-gǎ xii-güedé.

²⁹ Te ní cani-gá ñⁿ cuendú núu-güedé nàcuáa tecú tñuní váha-güedé tñúhu-gá, te xáhaⁿ-gǎ xii-güedé:

— Chi cùndèhe yutnu ngúxi ndíhi nchaa dava-gá yutnu. ³⁰ Chi nàtahú ndaha-xi, te òré ducaⁿ quide-xi te càchí-ndó sá sá ní cuyatni nuu cahni. ³¹ Te ñúu-ni ducaⁿ sǎtnahá-xi cùu òré ná quini-ndó càda-xi nchaa nàcuáa càháⁿ-í, te sá dúcáⁿ te cutnùní iní-ndó sá sá ní cuyatni nduu ndíhu ndaha ñaha Yá Ndióxi xii-ndo.

³² Te na càchí tñúhu ndáá-í xii-ndo sá òré vátá cúu-gá cue ñáyiu xindecu ñuyú-a vitna, te cada-xi nchaa nàcuáa ní càháⁿ-í. ³³ Te andíu ndíhi ñuyú-a chi ndíhi nihnu-xi, dico tñúhu-í chi vá ndíhí nihnu-xi, chi cùu-xi tñúhu ndáá.

³⁴ Te quíhi iní-ndó vǎ cùndecu-ndo ichi cuehé ichi duha, te vá cúu-ndó ñáyiu quíhu, te vá dáhúⁿ iní-ndó mèe-ni nchaa sá ío ñuyú-a, chi núu ducaⁿ na càda-ndo te nacuaana-ndo sá sáá nduu càda-xi nàcuáa ní càháⁿ-í. Te uuⁿi sáá nduu-áⁿ, ³⁵ te cada-xi dáhúⁿ iní-ndó quide ñⁿ trampá chi uuⁿi ngáva-xi, te ducaⁿ càda-xi nchaa ñáyiu xindecu ñuyú-a, chi uuⁿi sáá nduu-áⁿ. ³⁶ Te nchòhó cundecu túha-ndo

te ío cáháⁿ ndíhi-ndo Yá Ndióxi cuendá ndacu-ndo yáha-ndo ncháa tnúndòho quixi ñuyú-a, te ducaⁿ te nasáá-ndó cündecu-ndo núu ndécú yúhú Tée cùu ñaní tnáhá-ndo ncháa-ndo —cachí-gá xáhaⁿ-gá xii-güedé.

³⁷ Te nduu nduu ní xóo danèhé Jèsús ñáyiú tnúhu-gá xití veñúhu càhnu sá ìo cùnuu, te niú niú ní xóo quíhíⁿ ngúdú-gá xití yucu Òlívú. ³⁸ Te nehé nehé ní xóo quíhíⁿ nchaa ñáyiú veñúhu-áⁿ ní xóo cundèdóho-yu nchaa tnúhu cáháⁿ-gá.

22

Ndúcu-güedé nàcuáa cada-güedé cahni-güedé Jèsús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Te sa ní cuyatni nduu tnáhá vico páscaú, te vico-áⁿ xéxi ñáyiú pàá sá ñà túú yíhi levadurá. ² Te cue tée cùu dútú cùnùu, ndíhi cue tée dùu dàcuaha ñaha xii ñáyiú nchaa tnúhu ní chídó tnùnì ndíi Moisés ndúcú-güedé nàcuáa cada-güedé cahni-güedé Jèsús, te dicó-ni sá xiyúhú-güedé ñáyiú.

³ Te yucu ñáváha ní dácáhu ìni ñáhá-xí xii té Jüdás déhe té Iscarioté, te núu tnáhá tée-áⁿ cùú ùxúú tnáhá cue tée xica cuu ndíhi-gá ní cùu. ⁴ Te té Jüdás-áⁿ ní sáháⁿ-dé ní ndatnúhu-dé ndíhi cue tée cùu dútú cùnùu, ndíhi cue tée tàxi tnùnì ñáhá xii cue tée quide cuendá veñúhu nàcuáa cada-dé cuáha cuendá-dé Jèsús núu-güedé. ⁵ Te ío ní cudíi ìni-güedé, te ní xáhaⁿ-güedé xii-dé sá cuñaha-güedé díhúⁿ, ⁶ te ní xáhaⁿ-dè sá cùú queheⁿ-dé díhúⁿ-áⁿ, te ní nguíta-dé ndúcú-dé nàcuáa cada-dé cuáha cuendá-dé Jèsús núu-güedé òré ñà túú ñáyiú.

Cúdini Jesús ndíhi cue tée xica cuu ndíhi-gá

(Mt. 26:17-29; Mr. 14:12-25; Jn. 13:21-30; 1 Co. 11:23-26)

⁷ Te ní sáá nduu ní quesaha vico xexí-yu pàá sá ñà túú yíhi levadurá, te diu-ni nduu-áⁿ sáhní-güedé ìiⁿ mbéé líhli xèxi-yu. ⁸ Te Jèsús ní xáhaⁿ-gá xii té Pèlú ndíhi té Juáa:

—Chí cuáháⁿ chi cada túha-ndo núu cúdini-o sacuaa nduu vico páscaú —cachí-gá xáhaⁿ-gá xii-güedé.

⁹ Te ní xícáⁿ tnúhú-güedé núu-gá, te xáhaⁿ-güedé xii-gá:

—¿Te ndéé cáá vehe cuiní-n cada túha-ndí-i? —cachí-güedé xáhaⁿ-güedé xii-gá.

¹⁰ Te ní xáhaⁿ Jèsús xii-güedé:

—Chí cündèdóho na càchí tnúhu-í xii-ndo nàcuáa cada-ndo. Òré quihu-ndo xití ñuu núu quíhíⁿ-ndó, te nanlíhí-ndó ìiⁿ tée tànehe ìiⁿ yoó ndute, te tée-áⁿ candèdaha-ndo-dé quíhíⁿ, te núu ndèdacáa vehe na ndíhu-dé te xíáⁿ quíhu-ndo. ¹¹ Te cùñaha-ndo xii xitohó vehe-áⁿ: “Yáá cùú Mèstrú càchí-gá núu ndèdacáa xichi xití vehe-n cuñaha nùu-n xii-gá cudini-gá ndíhi cue tée xica cuu ndíhi-gá sacuaa nduu vico páscaú”, duha cùñaha-ndo. ¹² Te dàtnùnì danèhé ñáhá-dé xii-ndo ìiⁿ cuartú cáhnú cáa núu ñinu, chi vehe yódo tnaha cuu-xi, te sa ní quide túha-dé nchaa sá ná ndíhi, te nchòhó dicó-ná sá cúdini-o cada túha-ndo —cachí-gá xáhaⁿ-gá xii-güedé.

¹³ Te ní xica-güedé cuáháⁿ-güedé, te nchaa-ni nàcuáa ní xáhaⁿ Jèsús xii-güedé ní cuu, chi nchaa sa ndècu túha, te ní quide túha-güedé sá cúdini-güedé ndíhi-gá sacuaa nduu vico páscaú-áⁿ.

¹⁴ Te sáta ní tnáhá òré cudini Jesús ndíhi cue tée ní taúchíúⁿ-gá cáháⁿ tnúhu-gá núu ñáyiú, te cuánguihu ndíhi ñaha-gá xii-güedé mèsá. ¹⁵ Te xáhaⁿ-gá xii-güedé:

—¿Ducaⁿ-ni ío sàni ìni-í sá cúdini ndíhi ñaha-í xii-ndo sàcuua nduu vico páscaú òré cùmáni-gá sáá nduu ndòho-í te cuú-í! ¹⁶ Te na càchí tnúhu-í xii-ndo sá vā dúhá-gá caxi ndíhi ñaha-í xii-ndo nduu vico páscaú, chi ndéé òré ná sáá nduu nàsáá-ndó núu táxi tnùnì Yá Ndióxi cündecu-o, te dàv-áⁿ cada ìni-ndó sá dàtná sá cáxi tucu-o chi ío yáha cuu ìni-ó cündecu-o —cachí-gá xáhaⁿ-gá xii-güedé.

¹⁷ Te ní queheⁿ-gá ìiⁿ vàsú ñúhú ndùdí ndéhé yoho yáha stilé, te ní ndacáⁿ táhú-gá núu Yá Ndióxi, te dàtnùnì ní xáhaⁿ-gá xii-güedé:

—Chí quéhéⁿ vàsú ñúhú ndùdí ndéhé yoho yáha stilé-a, te coho-ndo lùha luha nchaa-ndo. ¹⁸ Te na càchí tnúhu tucu-í xii-ndo sá vítná-ná duha xíhi ndíhi ñaha-í xii-ndo ndùdí ndéhé yoho yáha stilé-a te vā cóhó ndíhi ñaha-gá-í, dico na sáá nduu nanlíhí tnáhá-ó núu ndécú Tàtá-í Dútú Ndióxi táxi tnùnì-gá, te dàv-áⁿ

cada iní-ó sã dàtná sá cóhó ndìhi ñaha tucu-í xii-ndo, chi ío cudíi iní-ó —càchí-gá xáhaⁿ-gã xii-güedé.

¹⁹ Te sátá nĩ túhú cóhó-güedé ní cud-íni-güedé, te ní queheⁿ-gá paá te ní ndacáⁿ táhú tucu-gá núú Yã Ndióxi, te dàtnúni ní táhú cuèchi-gá, te ní dácãhũ ñaha-gã xii-güedé, te xáhaⁿ-gã:

—Paá-a cùu-xi datná yiqui cùnú-í, chi cahni ñaha-güedé xii-í sá cuendá-ndó, te ducaⁿ-ni cãxi-ndo paá-a cuendá ndacu iní ñáhá-ndó xii-í —càchí-gá xáhaⁿ-gã xii-güedé.

²⁰ Te diu-ni ducaⁿ nĩ quide-gá ndìhi vãsú ñúhú ndúdí ndéhé yoho yàha stilé, chi ní queheⁿ-gá te òré sãñaha-gã xii-güedé coho-güedé, te ní xáhaⁿ-gã:

—Ndudí ñúhú vãsú-a cada iní-ndó sã cúu-xí dàtná níni-í sá cãtí òré çãñi ñaha-güedé xii-í. Te sá dúcáⁿ cãtí níni-í xíãⁿ cutnùni ndáá sá Yã Ndióxi cada-gá ingá núú sã vãha sá cúu-xí-ndó.

²¹ Dico vitna chi iha tnáhá tée cuáha cuendá ñáhá xii-í núú cuè tée cùu úhú iní ñáhá yihi-dé mésá. ²² Te yúhú Tée cùu ñani tnáhá-ndó nchàa-ndo ñuhu ichi-í cuáháⁿ-í cuú-í dàtná ní cachí Yã Ndióxi. Dico ndàhú ní cuu tée ducaⁿ na cuáha cuendá ñáhá xii-í núú cuè tée cùu úhú iní ñáhá! —càchí-gá xáhaⁿ-gã xii-güedé.

²³ Te ní ngüíta-güedé ndúcú tnúhu núú tnáhá-güedé nũ ndèda càa-güedé ducaⁿ càda cuáha cuendá ñáhá xii-gá núú cuè tée cùu úhú iní ñáhá.

Xíndatnúhu-güedé ndèdacàa-güedé cunuu-gã

²⁴ Te sátá dúcáⁿ te ní ngüíta-güedé xíndatnúhu-güedé nũ ndèdacàa-güedé tàù-güedé cunuu-güedé. ²⁵ Dico Jèsús ní xáhaⁿ-gã xii-güedé:

—Nchaa cue tée yìndaha ñaha xii ñáyiu ío tàxi tnuni-güedé, te mee-güedé cùnini-güedé sá càháⁿ váha ñáyiu cuendá-güedé. ²⁶ Dico nchòhó vá dúcáⁿ càda-ndo, chi núú ñⁿ-ndo cùnuu te cada-ni-ndo sã ñà túú cùnuu-ndo, àdi cuu-ndo ñⁿ tée tàxi tnuni ñáhá xii cue tée xinu cuechi, te cada-ni-ndo sã cúu-ndó ñⁿ tée xinu cuechi-á. ²⁷ Te vá càchí-ó sã tée xinu cuechi cunuu-gá-dé, chi tée quíhu mésá cúnùu-gá-dé. Dico yúhú ndécú ndìhi ñaha-í xii-ndo dàtná ñⁿ tée xinu cuechi.

²⁸ Te nchòhó ducaⁿ-ni ndècu ndìhi ñaha-ndo xii-í, te tàyáha ndìhi ñaha-ndo xii-í nchaa sá tàyáha-í véxi. ²⁹ Te Tãtà-í Dútú Ndióxi ní cachí-gá sá táxi tnuni-í, te yúhú càchí-í xii-ndo sã sãá nduu te tnáhá-ndó tàxi tnuni-ndó. ³⁰ Te dàvá-án caxi-o coho-o càda-o núú táxi tnuni-í, te yacáⁿ ngüíta-ndo càda ndáá-ndó cuèchi ndí ùxúú xichi ñáyiu israèl —càchí-gá xáhaⁿ-gã xii-güedé.

Jèsús càháⁿ-gá sá tẽ Pèlú cúñaha-dẽ xii ñáyiu sã ñà túú xini ñáhá-dẽ xii-gá

(Mt. 26:31-35; Mr. 14:27-31; Jn. 13:36-38)

³¹ Te Xítóhó Jesucristú ní xáhaⁿ-gã xii tẽ Xímú:

—Yòhó Xímú, cundedóho váha ñⁿ tnúhu na càháⁿ-í-a, chi dàtná cùnini-ndo quide táchí tríú sácáⁿ-xi duha sácáⁿ-xi dácáⁿ, ducaⁿ quèsaha yucu ñáváha cada ñaha-xi xii-ndo. Chi coto ndéé ñáhá-xí xii-ndo te núu ndisa sàndáá iní ñáhá-ndó xii-í. ³² Dico yúhú xicáⁿ táhú-í núú Yã Ndióxi cuendá-n, cuendá sá vã dãná ndèè-n quindáá iní ñáhá-n xii-í. Te òré ndixi tũu iní-n sã ñà túú ní quide váha-n, te quíhíⁿ-n cuáha-n cuè tée cundíhi-n tnúhu ndee iní cuendá canchicúⁿ nihnu-ni-güedé ichi Yá Ndióxi —càchí-gá xáhaⁿ-gã xii-dé.

³³ Te ní xáhaⁿ-dẽ xii-gá:

—Mèstrú, sa ndècu túha-í sá quíhíⁿ ndìhi ñaha-í xii-n vècaá, àdi cuéi na cùu ndìhi ñaha-í xii-n —càchí-dé xáhaⁿ-dẽ xii-gá.

³⁴ Te Jèsús ní xáhaⁿ-gã:

—Pèlú, na càchí tnúhu-í xii-n sã cùmání-gã cana ñⁿ líhi te úní xito càháⁿ-n nũ ñáyiu sã ñà túú xini ñáhá-n xii-í —càchí-gá xáhaⁿ-gã xii-dé.

Sa ní cuyatni ndoho Jèsús

³⁵ Te Jèsús ní xáhaⁿ-gã xii-güedé:

—Te cúnáhá ní tendaha ñaha-í xii-ndo ní sáháⁿ-ndó chiúⁿ-í, chi ñà túú ní cãnehe-ndo ni ñⁿ sá cúhúⁿ díhúⁿ-ndó, te ni ñⁿ sá cúhúⁿ ndàchiuⁿ-ndo ñà túú ní cãnehe-ndo. Te chí càchí tnúhu núu ío ñⁿ sá ní cùmání xii-ndo —càchí-gá xáhaⁿ-gã xii-güedé.

Te ní xáhaⁿ-güedé:

—Ñáhá, chi ni ñⁿ sá ñà túú ní cùmání xii-ndí —càchí-güedé xáhaⁿ-güedé xii-gá.

³⁶ Te ní xáhaⁿ-gã:

—Te vitna núu ndècu ndìhi-ndo sá sácũhuⁿ díhúⁿ-ndó, àdi sá sácũhuⁿ ndachiuⁿ-ndo te canehe-ndo. Te núu

ñá túú ndècu ndihi-ndo machití, te nadico-ndo dǒǒ tǐcachi nihnu-ndo te cuaaⁿ-ndo. ³⁷Te na cǎchí tñúhu-í xii-ndo sǎ dǎcutíí sǎ yáha-í nǎcuáa cǎháⁿ-xi núú tǔtú Yǎ Ndiǒxí núú cǎchí-xi: “Hⁿ-ni ní quide ñaha-güedě xii-gǎ, ndihi cue tée ndècu cuéchi-xi”, duha cǎchí-xi núú tǔtú-gǎ. Te ñá díú-ní xǎáⁿ yáha-í chi nchaandi tǔhú nǎcuáa cǎháⁿ-xi núú tǔtú-gǎ yáha-í — cǎchí-gǎ xáhaⁿ-gǎ xii-güedé.

³⁸Te xáhaⁿ-güedé:

—Mèstrú, iha ndècu úú machití — cǎchí-güedé xáhaⁿ-güedé xii-gǎ.

Te ní xáhaⁿ-gǎ:

—Chí nǎvíí-nǎ yuhu-ndo, vá cǎháⁿ-gǎ-ndó —cǎchí-gǎ xáhaⁿ-gǎ xii-güedé.

Jèsús cǎháⁿ ndihi-gǎ Yǎ Ndiǒxí yucu òlívú

(Mt. 26:36-46; Mr. 14:32-42)

³⁹Te Jèsús ní quee-gǎ cuáháⁿ-gǎ yucu òlívú, chi ducaⁿ tñàhí quide-gǎ. Te cue tée xica cuu ndihi-gǎ nchìcúⁿ ñáhá-güedě xii-gǎ cuáháⁿ. ⁴⁰Te òrè ní quexio-gǎ xǎáⁿ, te ní xáhaⁿ-gǎ xii-güedé:

—Chí cǎháⁿ ndihi Yǎ Ndiǒxí cuendá sǎ vá dǎcǎháⁿ ñáhá yùcu ñávǎha xii-ndo cǎda-ndo sǎ ñà túú tǎu-ndó cǎda-ndo — cǎchí-gǎ xáhaⁿ-gǎ xii-güedé.

⁴¹Te sǎtá dúcáⁿ te ní quee ñíⁿ-gǎ tnuú-güedé cuáháⁿ-gǎ ñíⁿ xio, te sa ñùnchií luha ní xica ndehe-gǎ núú ndécú-güedě, te xǎáⁿ ñí ngüíñí xítí-gǎ cǎháⁿ ndihi-gǎ Tǎtá-gǎ Dútú Ndiǒxí. ⁴²Te xáhaⁿ-gǎ:

—Táu, te núú ñíco cǎchí-n te tauni-hnu ñaha-n xii-í cuendá sǎ vá ndòhò-í ná sǎá òrè, dico vá cǎdá-n nǎcuáa cǎchí iní mée-í, chi cada-n nǎcuáa cǎchí iní mée-n — cǎchí-gǎ xáhaⁿ-gǎ xii Tǎtá-gǎ Dútú Ndiǒxí.

⁴³Te sǎtá dúcáⁿ te ní quexio ñíⁿ espíritú xínú cuéchi núú Yǎ Ndiǒxí ní sǎñaha-gǎ-xi tñúhu ndee iní xii-gǎ. ⁴⁴Te òrè súúní ndíhú iní-gǎ, te uuⁿ-gǎ súúní ñí yuhu ní iní-gǎ cǎháⁿ ndihi-gǎ Dútú Ndiǒxí, te tñéé-gǎ cǎá dǎtná cǎá ñíñí te ngóyó núú ñúhú.

⁴⁵Te sǎtá ñí yáha ní cǎháⁿ ndihi-gǎ Tǎtá-gǎ Dútú Ndiǒxí, te ní ndacúñí-gǎ cuánuhú-gǎ núú ní dándòo-gǎ cue tée-áⁿ, te òrè ní nasǎá-gǎ te xǎxídí-güedé cuendá sǎ ño cuéhé tñúhu sǎni iní-güedé cuendá-gǎ.

⁴⁶Te xáhaⁿ-gǎ xii-güedé:

—¿Ná cuendá xidí-ndó? Chí ndácǒo, te cǎháⁿ ndihi-ndo Yǎ Ndiǒxí cuendá sǎ vá dǎcǎháⁿ ñáhá yùcu ñávǎha xii-ndo cǎda-ndo sǎ ñà túú tǎu-ndó cǎda-ndo — cǎchí-gǎ xáhaⁿ-gǎ xii-güedé.

Ní tñíi-güedé Jèsús ndécá ñaha-güedé cuáháⁿ

(Mt. 26:47-56; Mr. 14:43-50; Jn. 18:2-11)

⁴⁷Te cǎháⁿ dúcáⁿ-ní Jèsús ní quexio vai cue tée, te ñíⁿ tée xica cuu ndihi-gǎ nání Júdás cúnú-dé yódó nùu-dé núú-güedě ní quexio ndéé núú-gǎ, te ní teyuhu ñaha-dé xii-gǎ, te núú tñáhá tée-áⁿ cúú ùxúú cue tée xica cuu ndihi-gǎ. ⁴⁸Te ní xáhaⁿ Jèsús xii-dé:

—Júdás, ¿te yòhó cuáha cuendá ñáhá-n xii yúhú Tée cúu ñaní tñáhá-ndó nchàa-ndo núú cué tée cúu úhú iní ñáhá xii-í cǎháⁿ-n nùu duha teyuhu ñaha-n-áⁿ? —cǎchí-gǎ xáhaⁿ-gǎ xii-dé.

⁴⁹Te sǎtá ñí xíní nchaa cue tée cùndíhí Jèsús nǎcuáa cúu cue tée ní quexio-áⁿ, núú ní xícáⁿ tñúhú-güedě núú-gǎ, te xáhaⁿ-güedě xii-gǎ:

—Mèstrú, ¿cúu nǎá-ndí ndihi-güedé ndihi machití-a ñǎ? —cǎchí-güedé xáhaⁿ-güedě xii-gǎ.

⁵⁰Te ñíⁿ-dé ní xehndé-ni-dé lóho xio cùha ñíⁿ cue tée ní quexio-áⁿ, te tée-áⁿ xínú cuéchi-dé núú dítú cúnú-gǎ, te ní quen-deé duuⁿ lóho-dé. ⁵¹Te Jèsús ní xáhaⁿ-gǎ xii-güedé:

—Chí dǎñá-güedě, vá dúcáⁿ cǎda-ndo — cǎchí-gǎ xáhaⁿ-gǎ xii-güedé.

Te ní dǎcǎá-gǎ ndaha-gǎ ní tendaha-gǎ núú ñí xín-deé lóho tée-áⁿ, te ní nduu váha dǎtná-ní cǎa. ⁵²Te nchaa cue tée cúu dítú cúnú, ndihi cue tée tǎxi tñuní nchaa cue tée quide cuendá veñúhu sǎ ño cúnú, ndihi cue tée cúu sacuéhé núú ñáyiú isràél, nchaa cue tée-áⁿ véxi tñíi ñaha-güedě xii-gǎ, te ní xáhaⁿ-gǎ xii-güedé:

—Nchòhó, nèhe-ná-ndó màchití, nèhe-ná-ndó cǎrrutí véxi-ndo núú ndécú-í, dǎtná quidé-ndó ñíⁿ ñadúhú quidé ñaha-ndo xii-í. ⁵³Te ducaⁿ-ni ñí xíní-ndó ñí xín-decú-í xití veñúhu cǎhnu sǎ ño cúnú ní xóo danéhé-í ñáyiú, te ni lùha ñá túú ní cúu tñándeé ñáhá-ndó xii-í òrè-áⁿ, te vitna ní sǎá òrè ducaⁿ cǎda-ndo, te cada sácúíhna nǎcuáa cúu iní-xi —cǎchí-gǎ xáhaⁿ-gǎ xii-güedé.

Té Pèlú càháⁿ-dé núú ñàyiú sá ñà túú xini-dé Jèsús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Te ní tñii-güedé Jèsús, te ndèca ñaha-güedé xii-gá cuáháⁿ vehe tée cùu dútú cùnùu-gá, te té Pèlú xica xica-ni nchicúⁿ ñáhá-dé xii-gá cuáháⁿ. ⁵⁵ Te òré ní quexio-güedé xíáⁿ te ní dátñàhá-güedé ñuhú quehé vehe-áⁿ, te ní càndéé yuhu ñuhú-áⁿ ní ngóo teté-güedé, chi quide víxiⁿ-xi, te tñàhá té Pèlú ní ngóo teté ndíhi ñaha-dé xii-güedé. ⁵⁶ Te xíáⁿ ndécú ìⁿ xíchí xínú cuèchi vehe-áⁿ, te òré ní xini-xi nùcòo teté tñàhá té Pèlú, te ní ndacoto-xi núú-dé, te ní xáhaⁿ-xi xii-güedé:

—Tñàhá tée-a xica cuu ndíhi-dé tée ndèca-güedé cuánguihu-áⁿ —càchí-xi xáhaⁿ-xi xii-güedé.

⁵⁷ Dico té Pèlú ñá túú ní nñuuu-dé, te xáhaⁿ-dè xii-xi:

—Yúhú ñá túú xini-í tée-áⁿ —càchí-dé xáhaⁿ-dè xii-xi.

⁵⁸ Te tna tnaa-ni ní cuu, te ní xini ñáhá tucu ìⁿ-dé, te xáhaⁿ-dè:

—Yòhó tñàhá-n xica cuu ndíhi-n tée ndèca-güedé cuánguihu-áⁿ —càchí-dé xáhaⁿ-dè xii-dé.

Dico té Pèlú ní xáhaⁿ-dè:

—Ñáhá, ñá díú yúhú xíca cùu ndíhi-í-dé —càchí-dé xáhaⁿ-dè.

⁵⁹ Te sa ní cuu dàtná ìⁿ òré te càchí tucu ingá-dé:

—Ndáá sá tée-a xica cuu ndíhi-dé tée ndèca-güedé cuánguihu-áⁿ, chi tñàhá-dé cúú-dé tée distritú Galileá —càchí-dé xáhaⁿ-dè xii-güedé.

⁶⁰ Te té Pèlú ní xáhaⁿ-dè xii tée-áⁿ:

—Yúhú ñá túú cùtnuní iní-í nása ndùu tñúhu càháⁿ-n —càchí-dé xáhaⁿ-dè.

Te ní vátá xínu ducaⁿ-gá tñúhu càháⁿ-dé ní cana-ni ìⁿ líhi. ⁶¹ Te Xítóhó Jesucristú ní nchóótó-gá núú-dé, te òré-ni-áⁿ ní ndacu iní-dé tñúhu ní xáhaⁿ-gá xii-dé sá cùmání-gá cana ìⁿ líhi, te úní xito càháⁿ-dé sá ñà túú xini ñáhá-dè xii-gá. ⁶² Te té Pèlú ní quee-dé tnuú-güedé cuáháⁿ-dé ìⁿ xio, te ní ndáhyú víhi-dè ní ndixi cuèchi iní-dé.

Cùdiquí ndeé-güedé Jèsús

(Mt. 26:67-68; Mr. 14:65)

⁶³⁻⁶⁴ Te cue tée ndèé ñáhá xii Jèsús ní cudíquí ndeé ñáhá-güedé xii-gá, te ní

dádáhu-güedé núú-gá, te ní caniha-güedé xii-gá, te xáhaⁿ-güedé:

—¡Cáháⁿ ná còtó yòo ní caniha xii-n! —cachí-güedé xáhaⁿ-güedé xii-gá.

⁶⁵ Te cuèhé víhi-gá tñúhu cuèhé ní xáhaⁿ-güedé xii-gá.

Jèsús ndécú-gá jùndá

(Mt. 26:59-66; Mr. 14:55-64; Jn. 18:19-24)

⁶⁶ Te sátá ní túndaá, te ní tacá cue tée cùu sacuéhé núú ñàyiú israél, ndíhi cue tée cùu dútú cùnùu, ndíhi cue tée dàcuaha ñaha xii-yu nchaa tñúhu ní chidó tñuní ndí Moisés, te ndèca-güedé Jèsús cuáháⁿ núú cádá-güedé jùndá, te òré ní quexio-güedé ndíhi-gá núú cádá-güedé jùndá-áⁿ, te ní xáhaⁿ-güedé xii-gá:

⁶⁷ —Cuini-ndí cachí tñúhu-n xii-ndí nñu diu-n cùu-n Cristú Yáá ní tendaha Yá Ndióxi véxi ñuyú-a —càchí-güedé xáhaⁿ-güedé xii-gá.

Te ní xáhaⁿ-gá xii-güedé:

—Te núu ña càchí-í sá díú-í cúú Cristú ñá, te ní vá quindáá iní-ndó, ⁶⁸ àdi te núu ìⁿ sá ná càcáⁿ tñúhu-í núú-ndó, te ní vá càchí tñúhu-ndo, te ní vá dáñá ñaha-ndo. ⁶⁹ Dico vitna ní cuyatni nduu ngóo yúhú Tée cùu ñaní tñàhá-ndó nchàa-ndo xio cuha Dítú Ndióxi Yáá ío cùnuu —cachí-gá xáhaⁿ-gá xii-güedé.

⁷⁰ Te dàtnuní nchaa-güedé ní xicáⁿ tñúhú-güedé núú-gá, te xáhaⁿ-güedé xii-gá:

—¿Te yòhó cúú-n Dèhe Yá Ndióxi te núu ducaⁿ vání? —càchí-güedé xáhaⁿ-güedé xii-gá.

Te ní xáhaⁿ Jèsús:

—Ndáá sá díú Dèhe-gá cúú-í dàtná càchí meé-ndó-áⁿ —càchí-gá xáhaⁿ-gá xii-güedé.

⁷¹ Te ní xítñàha-güedé:

—Ñá túú-gá xini ñùhu-xi cue tée càháⁿ nñu ndáá sá ndècuéchi-dé àdi ñá túú ndècuéchi-dé chi yuhu mee-dè ní càháⁿ-dé vitna ní xindedóho-o —càchí-güedé xit-ñàha-güedé.

23

Jèsús ndécú-gá núú tē Pilatú

(Mt. 27:1-2, 11-14; Mr. 15:1-5; Jn. 18:28-38)

¹ Te nchaa-güedé ní ndacuíní-güedé, te ndèca-güedé Jèsús cuáháⁿ núú tē Pilatú, ² te núú tē-áⁿ ní ngúita-güedé sàcáⁿ cuèchi-güedé cuèndá-gá, te xáhaⁿ-güedé:

—Ní naníhí-ndí tée-a dándahú-dé ñáiyu ñuú-ó, chí xáhaⁿ-dè xíí-yu sá vǎ chǎhu-gá-yu impuèstú xii té Cèsár tée ío cúnúu, te cǎchí-dé sá díú-dè cúú-dè Crístú Yáá ní tendaha Yǎ Ndiǒxí véxi ñuyúú-a te yíndaha-dé ñáiyu cǎchí-dé —cǎchí-güedé xáhaⁿ-güedé xii-dé.

³Te té Pilatú ní xícáⁿ tnúhu-dé núú-gǎ, te xáhaⁿ-dè xii-gá:

—¿Ndáá sá díú-n cún-u n tée yíndaha ñaha xii ñáiyu isràèl-ǎn? —cǎchí-dé xáhaⁿ-dè xii-gá.

Te Jèsús ní xáhaⁿ-gǎ xii-dé:

—Diu-í yíndaha-í-yu —cǎchí-gá xáhaⁿ-gǎ xii-dé.

⁴Te té Pilatú ní xáhaⁿ-dè xii nchaa ñáiyu, ndíhi cue tée cùu dítú cúnúu:

—Yúhú cútñuní iní-í sá ñà túú nì ìⁿ cuèchi tée-a —cǎchí-dé xáhaⁿ-dè xíí-yu.

⁵Dico níhi-gá ní cáháⁿ-güedé, te xáhaⁿ-güedé:

—Cǎchí-ndí sá ío dusaⁿ xíquide ñáiyu cuèndá nchaa sá dánèhé ñáhá-dè xíí-yu, te ní quesaha-dè ndéé distrítú Galiléa, te ní yáha-dé nihí distrítú Júdeá dánèhé-dé ñáiyu, te vitna ní sáá-ni-tu-dé ndéé ndíha dānehé-dé-yu —cǎchí-güedé xáhaⁿ-güedé xii té Pilatú.

Jèsús ndécú-gǎ núú tē Hèrodés

⁶Te sá dúcáⁿ ní tecú dóho té Pilatú ní cacu nehé-yu distrítú Galiléa, núu xíáⁿ ní xícáⁿ tnúhú-dè núú-yu núu tée Galiléa cúú-gǎ.

⁷Te ní xáhǎⁿ-yu sá díú tée yàcáⁿ cúú-gǎ, núu xíáⁿ ní na dáyáha ñaha-dè xii-gá ndaha té Hèrodés tée cùu gobiernú distrítú Galiléa chí nduu-ǎn ndécú-dé tnàhá-dé ñuú Jerusálén-ǎn. ⁸Te òré ní xiní té Hèrodés-ǎn

Jèsús te ío ní cudíí iní-dé, chí ní cunaha dúcaⁿ-ni cuiní-dé quini ñáhá-dè xii-gá te ñà túú tnàhí xiní ñáhá-dè xii-gá ní cùu, chí cuèndá-ni tnúhu nihí-dé cuèndá-gá, te ndètu-dé sáá ìⁿ nduu quini ñáhá-dè xii-gá, te cada-gá ìⁿ sá vǎ yóo tnàhí ndacu cada cundehe-dé ní sani iní-dé. ⁹Te yài sá ní xícáⁿ tnúhú-dè núú Jèsús, dico ní ìⁿ tnúhu ñà túú ní cáháⁿ-gá. ¹⁰Te xíáⁿ xíndecu tnàhá cue tée cùu dítú cúnúu, ndíhi cue tée dàcuaha ñaha xii ñáiyu nchaa tnúhu ní chídó tnùní ndí Moisés, te cue tée-ǎn sùúni ío iní-güedé sàcáⁿ cuèchi-güedé cuèndá-gá.

¹¹Te té Hèrodés ndíhi cue tée cùu sandadú-dé ñà túú ní cùu váha iní-güedé núu

Jèsús, te ní cudíquí ndéé ñáhá-güedé xii-gá, te ní dácuihnú ñaha-güedé dóó váha xii-gá dātá cáá dóó sácuihnú cue tée sàquíndaha ñaha xii ñáiyu. Te dātñuní té Hèrodés ní dánùhú ñáhá tucu-dé xii-gá ndaha té Pilatú. ¹²Te nduu-ǎn ní tnàhá tnúhu té Pilatú ndíhi té Hèrodés, chí cùu úhú iní tnàhá-güedé ní cùu.

Cǎchí-güedé sá cáhí-güedé Jèsús

(Mt. 27:15-26; Mr. 15:6-15; Jn. 18:39-19:16)

¹³Te té Pilatú ní nadatácá-dé nchaa cue tée cùu dítú cúnúu ndíhi dava-gá cue tée cúnúu, ndíhi nchaa ñáiyu ñuú-ǎn, ¹⁴te ní xáhaⁿ-dè:

—Nchòhó ndécá-ndó tée-a véxi ní taxi cuèndá-ndó-dè iha, te cǎchí-ndó sǎ ío dusaⁿ quide ñáiyu cuèndá nchaa sá dánèhé ñáhá-dè xíí-yu, te núú-ndó nducu tnúhu-í núú-dè núu ná ní quide-dé. Dico yúhú cútñuní iní-í sá ñà túú nì ìⁿ cuèchi-dé dātá cáháⁿ-ndó-ǎn. ¹⁵Te cuèí té Hèrodés diu-ni ducaⁿ cáháⁿ-dè sá ñà túú cuèchi-dé núu ní techiúⁿ ñaha tucu-dé cuándixi-dé iha. Te vitna sa ní cutñuní iní-ó sǎ ñà túú tàú-xi cahni-o-dè chí ñà túú cuèchi ní quide-dé. ¹⁶Te na dāndoho-ni-í-dé te dácácu-í-dé —cǎchí-dé xáhaⁿ-dè xíí-yu.

¹⁷Te ndí tnàhá nduu vío pascuá te dácuití sǎ dácácu té Pilatú-ǎn ìⁿ cue tée yíhi vecaá, chí ducaⁿ tnàhí quide-dé. ¹⁸Dico nchaa-yu ní cuáá-yu, te xáhǎⁿ-yu xii-dé:

—¡Queñuhu tée nàni Jesús-ǎn, te cahni-n-dé! ¡Te dácácu-n té Barrábás! —cǎchí-yu xáhǎⁿ-yu xii-dé.

¹⁹Te té Barrábás-ǎn ní sanu ichi-dé ñáiyu ñuú íngá ichi, te ní ngúíta-yu ndíhi-dé ní cuu úhú iní-yu cue tée cuchiúⁿ, te ní sahni-dé ndíyi núu xíáⁿ ní chíhi ñaha-güedé vecaá xii-dé. ²⁰Te té Pilatú cuiní-dé dácácu-dé Jèsús núu xíáⁿ cáháⁿ ndíhi ñaha tucu-dé xii-yu ní cùu, ²¹dico uuⁿ-gá níhi ní cuáá-yu, te ní xáhǎⁿ-yu xii-dé úú xito:

—¡Cata caá-dé núu cùrúxí! ¡Cata caá-dé núu cùrúxí! —cǎchí-yu xáhǎⁿ-yu xii-dé.

²²Te xito cuu úní ní xáhaⁿ tē Pilatú:

—¿Te ná cúú cuèchi ní quide-dé te núu ducaⁿ cuiní-ndó cada-í-dé-í? Te yúhú cútñuní iní-í sá ñà túú cuèchi ní quide-dé núu xíáⁿ ñà túú tàú-xi cahni-o-dé, te na dāndoho-ni-í-dé te dácácu-í-dé —cǎchí-dé xáhaⁿ-dè xíí-yu.

²³ Dico níhi-ni càháⁿ-yu xǎhǎⁿ-yu sá ná càta caa ñaha-dé xii-gá núú cùrúxí, te ñáiyu-áⁿ ndìhi nchaa cue tée cùu dútú cùnùu xícáháⁿ níhi-güedé ndìhí-yu ndéé ní xínu iní té Pilatú cada-dé nàcuáa càchí iní-yu. ²⁴ Te ní xáhaⁿ-dè xii-yu sá cùú càda-dé nàcuáa xǎhǎⁿ-yu. ²⁵ Te ducaⁿ te ní dácäcu-dé té Barrabás tée ní sanu ichi ñáiyu ñuú ingá ichi, te ñu-ni-dé ní sahni-dé ndíyi núu xǎⁿ ní xǎhi-dé vecaá, te dàtnùní ní táuchíuⁿ-dè cada-güedé Jèsús nàcuáa xǎhǎⁿ-yu.

Sàta caa-güedé Jèsús núú cùrúxí
(Mt. 27:32-44; Mr. 15:21-32; Jn. 19:17-27)

²⁶ Te ndèca-güedé Jèsús cuáháⁿ núú càtá càa ñaha-güedé xii-gá, te ichi cuáháⁿ-güedé ndìhi-gá ní tñii-güedé ñⁿ tée ñuú Cirené nání-dè Ximú ñúhú-dè ichi duha cuándixi-dé ní saháⁿ-dé yucu, te ní dácüídó ñaha-güedé xii-dé cùrúxí nchídó Jèsús, te ní ngúíta nchicúⁿ-dé sátá-gǎ.

²⁷ Te ío cuéhé ñáiyu nchicúⁿ ñáhá xii-gá cuáháⁿ, te vai ñáiyu ñíhí ío níhi ndàhí-yu sá ndìhú iní-yu cuendá Jèsús. ²⁸ Te Jèsús ní nchóótó-gǎ núu-yu, te ní xáhaⁿ-gǎ:

—Nchòhó ñáiyu ñíhí ñuú Jerusalén, vá ndàhyú-ndó cuendá-í chí ndàhyú cuendá méé-ndó ndìhi cuendá déhe-ndo. ²⁹ Chi sáá nduu quèsaha ñáiyu: “Sá vǎha táhú nchaa ñáiyu ñá túú càcu déhe-xi, ndìhi nchaa ñáiyu vátá quíní-gá cuhuⁿ déhe-xi, chi ní ñá túú xíní-yu dacádí-yu”, duha quesáhá-yu. ³⁰ Te dàvá-áⁿ cùñaha ñáiyu xii nchaa tindúú ndìhi nchaa núú xìquí: “Chí tácuuⁿ ngónchihí ñaha-ndo xii-ndí”, duha cùñahá-yu. ³¹ Te núu yúhú tée quide ndáá duha quide ñaha-güedé xii-í vitna, te ndéé-gá cada-güedé nchaa ñáiyu ndècu ichi cuehé ichi duha —càchí-gá xáhaⁿ-gǎ xii-yu.

³² Te ndèca tucu-güedé úú tñàhá cue tée ndècu ndisa cuéchi-xi cuáháⁿ cuendá cahni ñaha-güedé xii-güedé ndìhi Jèsús. ³³ Te òré ní quexio-güedé ndìhi-gá ñⁿ xichi núú nání Yíquí Díquí Ndíyi, te xǎáⁿ ní sata caa ñaha-güedé xii-gá núú cùrúxí, ndìhi úú cue tée ndècu ndisa cuéchi-xi-áⁿ, te ñⁿ-dé ní sata caa-güedé xio cùha-gá te ingá-dé ní sata caa-güedé xio dàtni-gá ñu-ni núú cùrúxí tucu. ³⁴ Te ní xáhaⁿ-gǎ xii Tǎtá-gǎ Dútú Ndiòxí:

—Táu, cada càhnu iní sá quidé-güedé, chi ñá túú cùtnuní iní-güedé ná cùú sǎ quidé-güedé —càchí-gá xáhaⁿ-gǎ.

Te cue tée cùu sandadú ní xito ndéé-güedé ñuú ndédacàa-güedé cuu cuendá-güedé dóó-gǎ. ³⁵ Te nchaa ñáiyu xíndecu-áⁿ ndéhé-yu nàcuáa quide-güedé Jèsús, te nchaa cue tée cùnùu ní cudíquí ndéé ñáhá-güedé xii-gá, te ní xitnàha-güedé:

—Te dava ñáiyu ní ndacu-dé ní dácäcu nihnu-dé, te vitna na dácäcu nihnu-dé méé-dé, te núu ndisa sá Cristú Yáá ní tendaha Yǎ Ndiòxí véxi ñuyúú-a cùu-dé —càchí-güedé xitnàha-güedé.

³⁶ Te tñàhá cue tée cùu sandadú ní cudíquí ndéé ñáhá-güedé xii-gá, chi ní sàndehe yatni-güedé núú táca-gá sǎñaha-güedé ndudí íá còho-gá ní cùu, ³⁷ te ní xáhaⁿ-güedé xii-gá:

—Te núu yòhó cùú-n tée yìndaha ñaha xii ñáiyu isràél, te dácäcu nihnu mee-n —càchí-güedé xáhaⁿ-güedé xii-gá.

³⁸ Te ní taxi ndècu-güedé ñⁿ sá ndéé lètrá ndàa díquí-gǎ te ndéé úní núú tñuhu, tñuhu griégú, ndìhi tñuhu látín, ndìhi tñuhu hèbreú, te duha quèe-xi ndi nuní núú tñuhu-áⁿ “Tée-a cùu-dé tée yìndaha ñaha xii ñáiyu isràél”, duha quèe-xi.

³⁹ Te ñⁿ tée ndècu ndisa cuéchi-xi, tée ní sata caa-güedé ñíni-gá xìcuéhé ñáhá-dé xii-gá, te xáhaⁿ-dè:

—Te núu yòhó cùú-n Cristú Yáá ní tendaha Yǎ Ndiòxí véxi ñuyúú-a, te dácäcu nihnu mee-n, te dácäcu nihnu ñaha xii nchúhú tñàhá-ndí tucu —càchí-dé xáhaⁿ-dè xii-gá.

⁴⁰ Dico ingá tée cùndihí-dé tée tàcaa ingá xio ñíni-gá ní tenáá ñáhá-dé xii-dé, te xáhaⁿ-dè:

—¿Te náá ñá túú ndàcu iní-n Yǎ Ndiòxí vitna duha cà-o ndoho-o ndìhi tée nàni Jesús-a ñǎ? ⁴¹ Chi nchoo tǎu ndisa-o sǎ dúhá ndòho-o nacháhu-o cuéchi-o, dico Jèsús-a chi ñá túú cuéchi-dé —càchí-dé xáhaⁿ-dè xii tée tàcaa ndìhi-dé-áⁿ.

⁴² Te dàtnùní ní xáhaⁿ-dè xii-gá:

—Jèsús, ndacu iní ñáhá-n xii-í òré ná quixi-n taxi tñuní-n ñuyúú-a —càchí-dé xáhaⁿ-dè xii-gá.

⁴³ Te Jèsús ní xáhaⁿ-gǎ:

—Na càchí tnúhu ndáá-í xii-n sã méi ndúu vitna cundecu ndíhi ñaha-í xii-n núú ní nduu tãhú-í cundecu-í —càchí-gã xáhaⁿ-gã xii-dé.

Ní xihí Jèsús

(Mt. 27:45-56; Mr. 15:33-41; Jn. 19:28-30)

⁴⁴Te òré ní cuu cuádava nduu. Te ní cunee nihí ñuyú, te ducaⁿ-ni càa ní cuu ndéé caá úní sacuaa. ⁴⁵Chi ñá túú-gã ní ðàyehe nchícanhii te ní ndátá dóó cúú còrtiná veñúhu càhnu sá ío cùnunu ní quee dava ndáá. ⁴⁶Te níhi ní cáháⁿ Jèsús, te xáhaⁿ-gã xii Tátá-gã Dútú Ndiòxí:

—Táu, naqueheⁿ cuendá-n espíritú-í —càchí-gã xáhaⁿ-gã xii Tátá-gã.

Te tnúhu-ná-áⁿ ní cáháⁿ-gã te ní xihí-ni-gã.

⁴⁷Te òré ní xiní tée cùu capitáⁿ sá dúcáⁿ ní cuu, te ní ndacu iní-dé Yã Ndiòxí, te ní cachí-dé:

—Sá ndàá ndisa sá tãe-a cùu-dé ìⁿ tée ío quide ndáá ndécú ñuyú-a ni cùu —duha ní cachí-dé.

⁴⁸Te chitu ñáyíu ní tacá xíaⁿ chi cuiní-yu cundehé-yu nása cada-güedé Jèsús. Te sátá ní yáha ní xiní-yu nàcuáa ní quide ñaha-güedé xii-gã, te ní ndíhi-yu ní ndaca ta caní-yu pèchú-yu cuánuhú sã ndíhu iní-yu. ⁴⁹Dico ndècu tnahá cue ñáyíu xiní tnahá ndíhi Jèsús, ndíhi ñáyíu ðíhí ní chinchícúⁿ ñáhá xii-gã ndéé distritú Gallleá, te ñáyíu-áⁿ xica-ni xixínutnii-yu xindéhè-yu nchaa nàcuáa ní quide ñaha-güedé xii-gã.

Chindúxi-güedé Jèsús

(Mt. 27:57-61; Mr. 15:42-47; Jn. 19:38-42)

⁵⁰Te ndècu ìⁿ tée ñuu Arimàtea nání-dé Chéé, te ñuu-áⁿ yindèhu-xi distritú Jüdeá, te ío váha iní-dé te quide ndáá-dé núú Yã Ndiòxí, te tnahá-dé cúú-dé chiúⁿ te ní xindècu-dé jündá cue tée isràél.

⁵¹Te ñá ní tnahá tnahí iní-dé nàcuáa ní cáháⁿ-güedé núú jündá nàcuáa cada-güedé Jèsús. Te tée-áⁿ ndétú-dé sáa nduu ndíhu ndaha ñaha Yã Ndiòxí xii-dé ndíhi ñáyíu.

⁵²Te tée-áⁿ ní sáháⁿ-dé núú tã Pilatú te ní xáhaⁿ-dè sá núu vá cündèe iní-dé dañá-dé chindúxi-dé yiqui cùñú Jèsús. Te tã Pilatú-áⁿ ní sáha-dé tnúhu. ⁵³Te ní nunehe-dé yiqui cùñú-gã núú cùrúxí, te ní chidúcúⁿ-nuu-dé ìⁿ dóó cuixíⁿ, te ní chíhi-dé ìⁿ yaú nchii yiqui naha càva, te

vátá yóo ìⁿ-gã nguindúxi yaú-áⁿ. ⁵⁴Te cùu-xi nduu vispré nduu ndètátú ñáyíu, núu xiquide túha-ná-yu sá cúú ìngá nduu.

⁵⁵Te nchaa ñáyíu ðíhí ní chinchícúⁿ ñáhá xii Jèsús ndéé distritú Gallleá ndèndàhá-yu tã Chéé ní sáháⁿ núú nchii yaú-áⁿ, núu ní xiní-yu nàcuáa ní sacáⁿ-dé yiqui cùñú-gã xití yaú-áⁿ. ⁵⁶Te ducaⁿ te cuánuhú-yu vehé-yu, te ní quide túha-yu acití sáháⁿ tnámí, ndíhi pomàdá, te ní ndetátú-yu ìngá nduu-áⁿ ní quidè-yu nàcuáa càháⁿ tnúhu Yã Ndiòxí.

24

Ní ndoto Jèsús

(Mt. 28:1-10; Mr. 16:1-8; Jn. 20:1-10)

¹Te ndumìngú nehé víhí-ni cuáháⁿ tucu ñáyíu ðíhí núú nchii yaú ní chíhi-güedé yiqui cùñú Jèsús, te nèhé-yu nchaa sá sáháⁿ tnámí ní quide túha-yu-áⁿ cuáháⁿ, te tnahá tucu ìⁿ úú-gã tnahá ðíhí-yu nchícúⁿ ñáhá xii-yu cuáháⁿ. ²Te òré ní quexió-yu yuhu yaú-áⁿ te ní xiní-yu sá yúu ndèdè ìⁿ xio-ná ndécú, ³te ní quíhu-yu xití yaú-áⁿ, dico ñá túú-gã yiqui cùñú Jèsús yíhí. ⁴Te ñá ní cùnuní tnahí iní-yu ndèe ichi cuáháⁿ yiqui cùñú-gã, te ní xiní-yu úú espíritú xínú cuèchi núú Yã Ndiòxí xínutnii-xi ðíñí-yu te xixíhnu-xi dóó chàhnhí. ⁵Te ní yuhú-yu te ñá túú ní cùyíi-yu cundehé-yu cue espíritú-áⁿ, te cue espíritú-áⁿ ní xáhaⁿ-xi xii-yu:

—¿Ná cuendá nándùcu-ndo Jèsús Yáa ndécú vívú núú yíndúxi ñáyíu ní xihí-í?

⁶Te ñá túú-gã yiqui cùñú-gã ndécú ìha chi sa ní ndoto-gã, te chí dándàcu iní nàcuáa ní cáháⁿ-gã cùtnáhá ní xindècu-ndo ndíhi-gã distritú Gallleá, ⁷chi ní cachí-gã sá mée-gã cúú-gã ñaní tnahá-ndó nchàa-ndo, te dacuití cuáha cuendá ñáhá-güedé xii-gã núú cuè tée ndècu ichi cuehé ichi duha, te cata caa ñaha-güedé xii-gã núú cùrúxí, te núú cùrúxí-áⁿ cuú-gã dico nduu úní sá cùú-gã te ndoto-gã, duha ní cachí-gã xii-ndo.

⁸Te òré-áⁿ ní ndacu iní-yu tnúhu ní cáháⁿ Jèsús. ⁹Te sátá dúcáⁿ te ní naquehéⁿ-yu ichi cuánuhú-yu, te ní caní-yu cuendú núú ndí úxí ìⁿ cue tée ní táuchíúⁿ Jèsús cáháⁿ tnúhu-gã, ndíhi núú ðàva-gã ñáyíu.

¹⁰ Te ñáyiú ducaⁿ ñaha tñúhu cuánuhú núú-güedé-áⁿ cúú tá Màriá Magdalèna, ndihí tá Juáná, ndihí tá Màriá ñaná tẽ Jà-cobó, ndihí dava-gá ñáyiú ñíhí. ¹¹ Dico cue tée-áⁿ ní sani iní-güedé sá dícó cáhú iní-yu tñúhu xáháⁿ-yu xii-güedé núú ñá túú ní sàndáá iní-güedé nàcuáa ní xáháⁿ-yu.

¹² Dico té Pèlú ní quee-dé xínú-dé cuáháⁿ cuándéhé-dé yaú núú ní chihí-güedé yiqui cùñú Jèsús, te ní sáá-dé te ní ngáundeiyi-dé xító nihni-dé xití yaú-áⁿ te ní xiní-dé sá mée-ná dóó ní xiducúⁿ nuu-gá yúcu ñⁿ xio, te ío ní cuñúhu-dé sá dúcáⁿ ní cuu, te ní natnií-dé ichi cuánuhú-dé vehe núú xindecu-güedé.

Ichi ñúú Emàús
(Mr. 16:12-13)

¹³ Te ñúu-ni nduu-áⁿ ñúhú úú cue tée ní xica cuu ndihí Jèsús ichi cuáháⁿ-güedé ñⁿ ñúú nání Emàús, te sàcúhuⁿ-güedé dàtná úú òré ichi ndéé ñúú Jerusàlén, te ndéé ñúú Emàús. ¹⁴ Te ta ndàtnúhu-güedé cuáháⁿ nchaa nàcuáa ní cuu, ¹⁵ te ñini ñucaⁿ xicáháⁿ-güedé, te Jèsús ní natnahá ñáhá-gá xii-güedé te ndèca tnaha-gá ndihí-güedé cuáháⁿ. ¹⁶ Te cuèi ndèhe ñaha-güedé xii-gá dico dàtná ñⁿ sá ndèdí núú-güedé, chi ñá ná quini ñáhá-güedé xii-gá ní cuu. ¹⁷ Te Jèsús ní xicáⁿ tñuhú-gá núú-güedé, te xáhaⁿ-gá:

—¿Ná tñúhu xicáháⁿ-ndó ñúhu-ndo ichi núu ducaⁿ ño cùu ndiyí-ndó-í? —càchí-gá xáhaⁿ-gá xii-güedé.

¹⁸ Te ñⁿ tée nani Cleofás ní xáhaⁿ-dè xii-gá:

—¿Te ná cuèndá nchaa ñáyiú íchí ní sáá ñúú Jerusàlén xiní-yu nchaa nàcuáa ní cuu, te ñⁿ ñii-ná yòhó ñá túú xiní-n-í? —càchí-dé xáhaⁿ-dè xii-gá.

¹⁹ Te ní xáhaⁿ-gá xii-güedé:

—¿Te ná ní cuu-í? —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Cuèndá Jèsús tée ñúú Nazàret càháⁿ-ndí, chi tée-áⁿ cúú-dé ñⁿ tée càháⁿ tñúhu Yá Ndiòxí, te ío váha ndúu tñúhu càháⁿ-dè ní cuu, te quide-dé sá vã yòo tñàhí ndàcu cada nacúaa cudíí iní Yá Ndiòxí ndihí ñáyiú ní cuu. ²⁰ Te cue tée cuu dútú cùñú, ndihí cue tée cùnuu taxi tñuní ñáhá xii-ndí ní sáha cuèndá ñáhá-güedé xii-dé núú tẽ Pilatú te ní sata caa ñaha-güedé te núú cùrúxí-áⁿ ní xihí-dé. ²¹ Dico vitna sa

ní cuu úní nduu sá ní xihí-dé, te nchúhú ní sani iní-ndí sá tée-áⁿ dàcácu nihnu ñaha-dè xii nchúhú ñáyiú isràél núú nchaa tñúndòho tñúhu ndàhú ndécú-ndí. ²² Dico ío cùñúhu-ndí cúú, chi ñⁿ úú ñáyiú ñíhí ní tuha ñaha xii-dé ndécú ndihí-ndí ní sáháⁿ ngotó-yu ndéxuehe tàcuíhndá-gá yaú núú ní chihí-güedé yiqui cùñú-dé, ²³ te ní nasáá-yu càchí-yu xii-ndí sá ñà túú-gá yiqui cùñú-dé yihí xití yaú-áⁿ. Te ní xiní-yu espíritú xínú cuèchi núú Yá Ndiòxí, te ní xáhaⁿ-xi xii-yu sá ndécú vívú-dé. ²⁴ Te sátá dúcáⁿ te ñⁿ úú cue tée cùndihí-ndí ní sáháⁿ ndéhé-güedé yaú-áⁿ, te ní xiní-güedé sá ndáá cúú-xí nchaa tñúhu ní càháⁿ ñáyiú ñíhí-áⁿ, dico ñá túú ní xiní-güedé tée-áⁿ —càchí-güedé xáhaⁿ-güedé xii-gá.

²⁵ Te Jèsús ní xáhaⁿ-gá xii-güedé:

—Ío cùmání sá xiní tñuní-ndó, chi ío cuèé sàndáá iní-ndó tñúhu ní càháⁿ cue tée ní xóo càháⁿ tñúhu Yá Ndiòxí ndéé sanaha! ²⁶ ¿Te ná ñá túú tàù-xi sá ndóhó Cristú òré cùmání-gá sáá nduu ndàa-gá andiú núú ndécú Dítú Ndiòxí cundecu-gá-áⁿ? —càchí-gá xáhaⁿ-gá xii-güedé.

²⁷ Te ní ngúita-gá xáhaⁿ-gá nàcuáa quèe-xi nchaa tñúhu càháⁿ-xi núú tütú Yá Ndiòxí cuèndá-gá, te ñíhna-gá ní càháⁿ-gá nàcuáa ndúu nchaa tñúhu yòdo tñuní núú tütú ndí Moisés, te dàtnúni ní càháⁿ-gá nàcuáa ndúu nchaa tñúhu yòdo tñuní núú tütú nchaa cue tée ní xóo càháⁿ tñúhu Yá Ndiòxí ndéé sanaha.

²⁸ Te òré ní quexio-güedé yuhu ñúú núú cuáháⁿ-güedé-áⁿ, te Jèsús ní quide-ni-gá sá yáha-gá quihíⁿ-gá ingá xichi ní cuu. ²⁹ Dico ní càháⁿ ndàhú-güedé núú-gá sá quèndò-gá xíaⁿ ndetatú-gá ndihí-güedé, te xáhaⁿ-güedé xii-gá:

—Quèndó ndihí ñaha xii-ndí iha ndetatú-n chi sa ní cuua, te tñaví cundiquíⁿ —càchí-güedé xáhaⁿ-güedé xii-gá.

Te xíaⁿ cáá ñⁿ vehe cuánguihu-güedé ndetatú-güedé ndihí-gá. ³⁰ Te òré sa yihí-güedé mèsá ndihí-gá cùdini ndihí ñaha-güedé, te ní queheⁿ-gá pàá te ní ndacáⁿ táhú-gá núú Yá Ndiòxí, te ní táhú cuèchi-gá te dàtnúni ní dàcáñhu ñaha-gá xii-güedé. ³¹ Te òré-áⁿ ní naquiní ñáhá-güedé xii-gá ní cuu, dico uuⁿ ní ndóñúhú-gá. ³² Te ní xitñaha-güedé:

—Te ndáá sá súúni cùdíí ìní-ó òré tá ndát-núhu-o ndíhi Jesús véxi ichi, te ta dānehé ñáhá-gǎ xii-o nchaa nacuaá quèe-xi tñúhu cǎháⁿ-xi núú tütú Yǎ Ndiǒxí —cǎchí-güedé xitnàha-güedé.

³³ Te ñá túú-gǎ ní xīndetu-güedé chi ndíhi-ni ní natni-güedé ichi cuánuhú-güedé ñúú Jerusálén, te ní nasáá-güedé núú xīndecu ndi ùxi ñⁿ cue téé ní táúchíúⁿ Jèsús cǎháⁿ tñúhu-gǎ, ndíhi dava-gǎ ñáyiú. ³⁴ Te cue téé xīndecu-áⁿ xáhaⁿ-güedé:

—Ndáá sá ñí ndoto Yaá cúú Mèstrú, chi ní xini ñáhá tǎ Xímú —cǎchí-güedé xáhaⁿ-güedé.

³⁵ Te cue téé ní nasáá-áⁿ ñí cani-güedé cuendú nacuaá ní cuu ichi, ndíhi nacuaá ní cuu ní naquini-güedé Jèsús òré ní táhú-gǎ pǎá ní dácǎhñu ñaha-gǎ xii-güedé.

Jèsús ní quexio-gǎ núú xīndecu cue téé ní xica cuu ndíhi-gǎ

(Mt. 28:16-20; Mr. 16:14-18; Jn. 20:19-23)

³⁶ Te cǎháⁿ dúcáⁿ-ní-güedé nacuaá ní cuu ní quexio Jesús ní ngúnutñí-gǎ ndéé tnuú-güedé, te xáhaⁿ-gǎ xii-güedé:

—Yá Ndiǒxí chindèe ñaha-gǎ xii-ndo ìo váha cùu ñí-ndó ndècu-ndo —cǎchí-gǎ xáhaⁿ-gǎ xii-güedé.

³⁷ Te da ní yùhú-güedé, te ní sani ñí-güedé sá dícó ñⁿ espíritú cúú sǎ ndéhe-güedé ní cùu. ³⁸ Dico Jèsús ní xáhaⁿ-gǎ xii-güedé:

—¿Ná cuendá yùhú-ndó, te sàni ñⁿ sani úú ñí-ndó-í? ³⁹ Chí cundèhe ndaha-í ndíhi sáhà-í te quini-ndó ñá ñiú-ni-í. Te chí téndàha ñaha xii-í te cundehe-ndo, te núú ñⁿ espíritú ndécú yìqui cuñú-xi dàtná ndécú ndíhi yùhú —cǎchí-gǎ xáhaⁿ-gǎ xii-güedé.

⁴⁰ Te sáta dúcáⁿ ñí xáhaⁿ-gǎ te ní dānehé ñáhá-gǎ xii-güedé ndaha-gǎ ndíhi sáhá-gǎ.

⁴¹ Te ñó ní cuñúhu-güedé, te ní cudíí ñí-güedé sá ndécú-gǎ tnuú-güedé dico sàni ñⁿ sani úú ñí-güedé, te ní xáhaⁿ Jèsús xii-güedé:

—¿Ndècu ndíhi-ndo luha sá cǎxí-ó ìha ñá? —cǎchí-gǎ xáhaⁿ-gǎ xii-güedé.

⁴² Te ní sǎñaha-güedé xii-gǎ luha chácá ní chíhó, ndíhi díta ñúñú ñúhú ndudí, ⁴³ te ní queheⁿ-gǎ te ndèhe-güedé ní xexi-gǎ. ⁴⁴ Te dàtnúni ní xáhaⁿ-gǎ:

—Nchaa sá ñí yáha-í-a cùu-xi sá ñí cachí tñúhu-í xii-ndo cütñahá ndécú ndíhi ñaha-gǎ-í xii-ndo, chi ní cachí-í sá dàcuítí cǎda-xi nchaa nacuaá cǎháⁿ-xi núú tütú ndíi Moisés, ndíhi núú tütú ndéé tñúhu ní cǎháⁿ cue téé ní xóo cǎháⁿ tñúhu Yá Ndiǒxí ndéé sanaha, ndíhi núú ñbrú Sǎlmú —cǎchí-gǎ xáhaⁿ-gǎ xii-güedé.

⁴⁵ Te òré-áⁿ ñí sǎñaha-gǎ sá xini tñúni-güedé, te ní tecú tñúni-güedé nchaa tñúhu cǎháⁿ-xi núú tütú Yǎ Ndiǒxí. ⁴⁶ Te ní xáhaⁿ-gǎ xii-güedé:

—Ducaⁿ ndéé tñúni núú tütú Yǎ Ndiǒxí sá dàcuítí sá yùhú Crístú cuú-í, te nduu ùni ndoto-í. ⁴⁷ Te ñihí ñuyú cütènuu tñúhu ní cǎháⁿ-í, dico díhna nuu-gǎ ñúú Jerusálén ngúita-yu cacumehe ñáhá-yu xii-í, te cǎháⁿ-yu nacuaá ní dānehé-í-yu, te cúnàhá-yu xii cue ñáyiú sá ná dāndixi túu-yu ñí-yu sá ñá tütú quide váha-yu, te dàñá-yu nchaa ichi cuèhé ichi duha ndécú-yu, te natñí-yu ichi Yá Ndiǒxí, te ducaⁿ te cada cǎhnu ñí-gǎ nchaa yíca cuèchi-yu. ⁴⁸ Te vitna nchòhó cuu-ndo cuè téé cǎháⁿ ndáá nchaa nacuaá ní cuu chi ní xini núú-ndó. ⁴⁹ Te yùhú tendaha-í Espíritú Yǎ Ndiǒxí quixi cundecu ndíhi-ndo, chi ducaⁿ ñí cachí-gǎ. Dico chí cundècu-ni ñúú Jerusálén-áⁿ ndéé ná quèxio Espíritú Yǎ Ndiǒxí ngúndecu ndíhi-ndo cuendá chindee ñaha-xi xii-ndo cada-ndo nchaa nacuaá ní cǎháⁿ-í —cǎchí-gǎ xáhaⁿ-gǎ xii-güedé.

Jèsús cuándaa-gǎ andíu

(Mr. 16:19-20)

⁵⁰ Te Jèsús ní queñuhu ñaha-gǎ xii-güedé ñúú Jerusálén ndécá ñaha-gǎ cuáháⁿ ñúú Bètaniá, te xíaⁿ ñí ndonehe-gǎ ndaha-gǎ núú ñnu, te ní xícaⁿ táhú ñaha-gǎ xii-güedé núú Yǎ Ndiǒxí. ⁵¹ Te sáta ñí xícaⁿ táhú ñaha-gǎ xii-güedé núú Yǎ Ndiǒxí, te ní quee-gǎ tnuú-güedé cuándaa-gǎ andíu. ⁵² Te ní ngúita-güedé ní cachí-güedé sá ñó cǎhnu cuu Jesús, te ní natñí-güedé ichi cuánuhú-güedé ñúú Jerusálén, te súúni cùdíí ñí-güedé ñúhú-güedé ichi. ⁵³ Te nchaa nduu ní xīndecu-güedé veñúhu cǎhnu sá ñó cūnuu ní ndacáⁿ táhú-güedé núú Yǎ Ndiǒxí, te ní cachí-güedé sá ñó cǎhnu cuu-gǎ. Duha ní cuu dàvá-áⁿ.

TNÚHU NÍ CHÍDÓ TNÛNÍ TÉ JUÁÁ

Déhe Yá Ndiöxí ní cuu-gá ñⁿ ñáiyu

¹ Cùmání-gã ngáva ñuyú, te sa ndècu ndíhi Yá Ndiöxí Déhe-gá. Te ñⁿ-ni xĩcuu-gá. Te Déhe-gá-áⁿ ñⁿ cuu-gá dàtná ñⁿ tnúhu, chí ní cachí tnúhu-gá nàcuáa càa Tátá-gã Dútú Ndiöxí. ² Te sa ndècu-gá ndíhi Dútú Ndiöxí te ní ngáva ñuyú. ³ Te ñⁿ-ni tnúhu mee Dútú Ndiöxí ní cuu ní cadúha Déhe-gá nchaa sá ò ñuyú. Te núu ñá túú Dèhe-gá ñá, te ñá túú nã coo ñuyú-a ní cùu. ⁴ Te ñⁿ-ni Déhe-gá quidé-gã ndécú-ó, te ní dáyehé-gá iní-ó nàcuáa cundecu-o. ⁵ Te tnúhu-gá ní xíté nuu-xi núú ndécú nchaa ñáiyu ñuhu ichi cuehé ichi duha. Te ñáiyu-áⁿ cúu-yu dàtná cue ñáiyu ndècu ñⁿ núú néé, te ñⁿ-ni-yu cachí iní-yu xocání-yu tnúhu-gá dico vá ndácũ-yu.

⁶⁻⁷ Te ní xĩndecu ñⁿ téé ní xínani-dé Juáá, te téé-áⁿ ñⁿ táuchíⁿ Yá Ndiöxí sá cáháⁿ-dé tnúhu-gá núú ñáiyu. Te ní xáhaⁿ-dè xí-yu sá vèxi Déhe-gá ñuyú-a, te dandixi túu-gá iní-yu cuendá cutnùní iní-yu nàcuáa ndùu cuendá Yá Ndiöxí cuendá quíndáá iní-yu tnúhu-gá. ⁸ Te ñá díú mee té Juáá ní dandixi túu-dé iní-yu cuendá cutnùní iní-yu nàcuáa ndùu cuendá Yá Ndiöxí, chí cuendá-ni ní xica cuu-dé ní cáháⁿ-dé sá Dèhe Yá Ndiöxí véxi-gá dandixi túu-gá iní-yu. ⁹ Te ndáá ndisa sá méé-gã dandixi túu-gá iní ñáiyu ñuyú-a cuendá cutnùní iní-yu nàcuáa ndùu cuendá Yá Ndiöxí.

¹⁰ Te ní xĩndecu-gá ñuyú-a, te ñáiyu ñuyú-a ñá ní cutnùní iní-yu yoo cùu-gá, te ñⁿ-ni mee-gã ní cadúha-gá ñuyú-a ní quide-gá chiúⁿ ní táhú Dútú Ndiöxí. ¹¹ Te ní quixi-gá ñuyú ñⁿ cadúha mee-gã, dico cue ñáiyu ñuyú-a ñá ní cùu váha iní-yu núú-gã. ¹² Dico davá-yu ní sándáá iní ñáhá-yu xii-gá, te ní nduu táhũ-yu ní nduu déhe ñaha Yá Ndiöxí xí-yu. ¹³ Te ñá túú ní ndùu déhe ñaha-gã xí-yu sá cúu-yu déhe ñáiyu ñuyú-a, àdi sá ndécú tãtã-yu, nãñá-yu chí mee Yá Ndiöxí ducaⁿ ñⁿ cuiní-gá cunduu sá ndúú dèhe ñaha-gã xí-yu.

¹⁴ Te Déhe-gá ní quixi túu-gá ñuyú-a, te ní cuu-gá ñⁿ yiqui cùñú ní xĩndecu ndíhi ñaha-gã xii nchoo cuè ñáiyu ní xica cuu túu

ndíhi-gá. Te ní xini-ó sã ò càhnu cuu-gá cuendá sã ñⁿ dìi díi-ni-gã cúu-gã Déhe Yá Ndiöxí, te ío cùndahú iní ñáhá-gã chíndèè ñaha-gã xii nchoo ñáiyu ndècu ñuyú-a, te ío ndáá cáháⁿ-gá. ¹⁵ Te duha ní cáháⁿ té Juáá cuendá Déhe Yá Ndiöxí ní xáhaⁿ-dè xii ñáiyu:

—Cuendá téé iha ní cáháⁿ-í ndéé cãni-gá ní cachí-í sá quixí ñⁿ téé quixi. Te téé-áⁿ cùnùu-gá-dé, chí díhna-gá-dé sa ndècu-dé dàcúúxí yùhú —duha ní xáhaⁿ-dè xii-yu.

¹⁶ Te ío váha iní Yá-áⁿ chí xito ñaha-gã xii-o nchaa-o ñⁿ nduu ñⁿ nduu. ¹⁷ Te ndíi Moisés ní cachí tnúhu ndíi tnúhu Yá Ndiöxí tnúhu sá sánú ichi ñaha xii-o nàcuáa cundecu-o, dico Déhe-gá Xítohó Jesucristú ní cachí-gá sá ò cùu iní ñáhá Yá Ndiöxí xii-o. Te ní cáháⁿ-gá nchaa dava-gã tnúhu ndáá. ¹⁸ Te ñá ñⁿ ñáiyu xini túu-yu Yá Ndiöxí. Dico ñⁿ dìi díi-ni Déhe-gá Yá ndécú ndíhi-gá cachí tnúhu-gá nàcuáa càa-gá.

Té Juáá téé dàcuandute ñaha xii ñáiyu cáháⁿ váha-dé cuendá Xítohó Jesucristú (Mt. 3:11-12; Mr. 1:7-8; Lc. 3:15-17)

¹⁹ Te cue téé israhél ndécú ñùú Jerusalén ní tendaha-güedé cue dútú ndíhi cue téé cùu levítá cuáháⁿ-güedé núú ndécú tã Juáá ndúcú tnúhu-güedé núú-dè ñuu ná téé cùu-dé. ²⁰ Te ní cáháⁿ ndáá-dé ní xáhaⁿ-dè xii-güedé:

—Yúhú, ñá díú Cristú Yá ní tendaha Yá Ndiöxí véxi ñuyú-a cùu-í —cachí-dé xáhaⁿ-dè.

²¹ Te ní xáhaⁿ tùcu-güedé:

—¿Te yoo cùu yohó váíⁿ? ¿Á yohó cúu-n tã Èliás? —cachí-güedé xáhaⁿ-güedé xii-dé.

Te ní xáhaⁿ tã Juáá:

—Yúhú, ñá díú tã Èliás cùu-í —cachí-dé xáhaⁿ-dè.

Te xáhaⁿ tùcu-güedé:

—¿Te yohó cúu-n tã ní cachí cue téé ndéé sanaha quixi cáháⁿ tnúhu Yá Ndiöxí-áⁿ? —cachí-güedé xáhaⁿ-güedé xii-dé.

Te ní xáhaⁿ-dè:

—Ni ñá díú tã-áⁿ cùu-í —cachí-dé xáhaⁿ-dè xii-güedé.

²² Te ní xáhaⁿ tùcu-güedé:

—¿Te ná téé cùu yohó váíⁿ?, cuendá ducaⁿ nàcani tnúhu-ndí núú cuè téé ní tendaha ñaha xii-ndí véxi-ndí, te cáháⁿ

duuⁿ-n nõu ná tée cùu-n —cachí-güedé xáhaⁿ-güedé xii-dé.

²³ Te ní xáhaⁿ tẽ Juàá:

—Yúhú cùu-í tée xica cáháⁿ xití yucu nácuaá ní cáháⁿ ndíi Chàia, chi ndíi-áⁿ ní cachí ndíi: “Chí dǎná ichi cuehé ichi duha ndècu-ndo te tñiⁿ-ndo ìchi váha, chi véxi Yaá ío cùnuu”, duha ní cachí ndíi —càchí té Juàá xáhaⁿ-dẽ xii-güedé.

²⁴ Te cue tée ndùcu tñúhu núú tẽ Juàá nõu ná tée cùu-dé, cue tée-áⁿ ní tendaha ñàha cue tée cùu fariséú xii-güedé. ²⁵ Te ní xáhaⁿ tùcu-güedé xii té Juàá:

—¿Ná cuèndá dácuaⁿndute-n ñáyiu te núu ñá díú Crístú cùu-n, te ní ñá díú tẽ Èliás, te ní ñá díú tõe véxi cáháⁿ tñúhu Yá Ndiòxí cùu-n vǎi? —càchí-güedé xáhaⁿ-güedé xii-dé.

²⁶⁻²⁷ Te ní xáhaⁿ tẽ Juàá:

—Yúhú ní ngódó núu-í dácuaⁿndute-í ñáyiu. Dico nchícúⁿ ìⁿ tée véxi, te tée-áⁿ cùnùu-gá-dé dácúúxí yúhú, chi yúhú cùu-í ìⁿ tée duuⁿ duuⁿ ñá túú tàú nandaxi cuèdicó ñii chàú-dé dico quide-í chiúⁿ-dé. Te tée-áⁿ sa ñùhu tnahá-dé tnuú-ndó dicó-ni sá ñá túú xiní-ndó-dẽ —càchí-dé xáhaⁿ-dẽ.

²⁸ Duha ní cuu ñuú Bètábará ñuú cáá ndàa ingá xio yúte Jòrdán, yàcáⁿ ní xíndecu té Juàá ní dácuaⁿndute-dé ñáyiu.

Jèsús quidé càhnu iní-gá nchaa yíca cuèchi ñáyiu

²⁹ Te nduu tñéé ní xiní té Juàá Jèsús véxi yatni-gá núú ndécú-dẽ ndíhi ñáyiu. Te ní xáhaⁿ-dẽ xii-yu:

—Chí cündèhe tée-áⁿ, chi tée-áⁿ cùu-dẽ Crístú Yaá ní tendaha Yá Ndiòxí véxi ñuyúú-a, te véxi-dé cada càhnu iní-dé nchaa yíca cuèchi ñáyiu ñuyúú. Te cùu-dé dàtná ìⁿ mbéé quiti ío váha iní-xi. ³⁰ Te diu tée-áⁿ ní cachí-í sá cǎnchícúⁿ-dé quixi. Te cùnùu-gá-dé dácúúxí yúhú, chi díhna-gá-dé sa ndècu ní cachí-í xii-ndo.

³¹ Te ní yúhú ñá túú xiní-í-dé ní cùu, dico xica cuu-í dácuaⁿndute-í ñáyiu cuèndá nchaa ñáyiu isràel quini ñàhá-yu xii-dé —càchí-dé xáhaⁿ-dẽ xii-yu.

³² Te ní xáhaⁿ tùcu-dé:

—Ní xiní-í Espíritú Yá Ndiòxí ní quee-xi andiu véxi cuuⁿ-xi ngúndecu ndíhi ñàha-xi xii-dé, te dàtná cáá lómá cáá Espíritú-áⁿ véxi cuuⁿ-xi. ³³ Te yúhú ñá túú xiní-í-dé ní cùu, dico Yá Ndiòxí Yaá ní tendaha ñàha xii-í xíca cùu-í dácuaⁿndute-í ñáyiu,

Yaá-áⁿ ní cachí tñúhu-gá sá tõe na quini-í ngúndecu ndíhi Espíritú-gá sá véxi cuuⁿ andiu, te tée-áⁿ taxi-dé Espíritú-gá cundecu ndíhi-o. ³⁴ Te yúhú ní xiní-í-dé te xiní ndáá-í sá Dèhe Dítú Ndiòxí cùu-dẽ. Te xíáⁿ cǎchí tñúhu-í xii-ndo —càchí té Juàá xáhaⁿ-dẽ xii-yu.

Cue tée díhna nuu xica cuu ndíhi Jèsús

³⁵ Te nduu tñéé-áⁿ diu-ni xíáⁿ ndécú tẽ Juàá ndíhi úú cue tée xica cuu ndíhi-dé. ³⁶ Te ní xiní-dé Jèsús ñùhú-gá ichi, te ní xáhaⁿ-dẽ xii cue tée xica cuu ndíhi-dé-áⁿ:

—Chí cündèhe tée-áⁿ, chi tée-áⁿ cùu-dẽ Crístú Yaá ní tendaha Yá Ndiòxí véxi ñuyúú-a. Te cùu-dé dàtná ìⁿ mbéé quiti ío váha iní-xi —càchí-dé xáhaⁿ-dẽ.

³⁷ Te sá dúcáⁿ ní cáháⁿ té Juàá núú cue tée úú ndíhi-dé-áⁿ nõu ní chinchícúⁿ-güedé Jèsús. ³⁸ Te ní nchócótó-gǎ ndàa sátá-gǎ, te ní xiní-gá sá nchícúⁿ ñàhá-güedé xii-gá. Te ní xáhaⁿ-gǎ xii-güedé:

—¿Ná nánducu-ndo? —cachí-gá xáhaⁿ-gǎ xii-güedé.

Te ní xáhaⁿ-güedé:

—¿Ndéé ndécú-n, Ràbií? —càchí-güedé xáhaⁿ-güedé xii-gá.

Te Ràbií-áⁿ queé-xí Mèstrú tñúhu mee-güedé. ³⁹ Te ní xáhaⁿ Jèsús xii-güedé:

—Chí nèhé te quini-ndó —càchí-gá xáhaⁿ-gǎ.

Te ní xica-güedé cuáháⁿ-güedé, te ní quexio-güedé núú quidé vèhe-gá. Te ndècu-ni-güedé ndíhi-gá ní cuua, chi dàtná òré caa cùmi sacuaa ní sáá-güedé.

⁴⁰ Te úú cue tée-áⁿ ní tñiⁿ-güedé tñúhu ní cáháⁿ té Juàá, te ní chinchícúⁿ-güedé Jèsús. Te núú úú cue tée-áⁿ, ìⁿ-dé nání-dẽ Ndríxí, te ñaní-dé cùú tẽ Xímú, àdi Pelú chi úú diu-dé. ⁴¹ Te tẽ Ndríxí-áⁿ ní nanducu-ni-dẽ ñaní-dé te ní xáhaⁿ-dẽ:

—Ní naníhí-ndí tée cùu Mesías —càchí-dé xáhaⁿ-dẽ.

Te Mèsiás-áⁿ queé-xí Crístú tñúhu mee-güedé, Yaá ní tendaha Yá Ndiòxí véxi ñuyúú-a. ⁴² Te ndèca té Ndríxí ñaní-dé cuáháⁿ núú ndécú Jèsús. Te òré ní xiní ñàhá Jèsús xii tẽ Xímú, te ní xáhaⁿ-gǎ:

—Yòhò cùu-n tẽ Xímú déhe té Jònás, te vitna danani ñàha-í Céfás xii-n —càchí-gá xáhaⁿ-gǎ.

Te Céfás-áⁿ queé-xí Pèlú tñúhu mee-güedé.

Jèsús ní cáháⁿ-gá té Lipé ndíhi té Natanàél

⁴³ Te nduu tněé ní sani iní-gá quíhíⁿ-gá distritú Galiléa. Te ní naníhí-gá ìⁿ tée nàni Lipé, te ní xáhaⁿ-gá xii-dé:

—Néhé ná quíhíⁿ-ó núú quíhíⁿ-í-a — cächí-gá xáhaⁿ-gă.

⁴⁴ Te té Lipé-án cúú-dě tée ñúú Betsaidá. Te ñiu-ni ñúú yàcáⁿ cúú ñúú té Ndríxí ndíhi té Pèlú. ⁴⁵ Te té Lipé ní naníhí tnáhá-dě ndíhi té Natanàél, te ní xáhaⁿ-dě:

—Ní naníhí-ndí tée dii cuendú-xi ní chídó tnùnì ndíi Moisés ndíhi dava-gá cue tée ní xóo cáháⁿ tnúhu Yá Ndiòxí ndéé sanaha. Te tée-án nání-dě Jèsús déhe té Chéé, tée ñúú Nazàrét —cächí-dé xáhaⁿ-dě.

⁴⁶ Te ní xáhaⁿ tē Natanàél xii té Lipé:

—¿Te náa ío váha càa ñúú Nazàrét núu da yàcáⁿ quee tée cáháⁿ tnúhu Yá Ndiòxí? —cächí-dé xáhaⁿ-dě.

Te ní xáhaⁿ tē Lipé:

—Néhé ná quíhíⁿ-ó te quini-n —cächí-dé xáhaⁿ-dě.

⁴⁷ Te òré ní xiní Jèsús té Natanàél tá cùy-atni-dé cuáháⁿ, te ní cáháⁿ-gá cuendá-dé te ní cachí-gá:

—Tée véxi-ãⁿ cúú-dě mei tēe isràél, te ñá ìⁿ nduu dandahú-dé ñáyiú —cächí-gá xáhaⁿ-gă.

⁴⁸ Te ní xáhaⁿ tē Natanàél xii Jèsús:

—¿Te nása náquini ñáhá-n? —cächí-dé xáhaⁿ-dě.

Te ní xáhaⁿ Jèsús:

—Yúhú sa ní xiní ñáhá-í xii-n òré ndécú-gă-n càha yutnu ngúxí-ãⁿ te ni tē Lipé vátá cáná ñaha-gá-dé xii-n òré-án —cächí-gá xáhaⁿ-gă xii-dé.

⁴⁹ Te sá dúcáⁿ ní cáháⁿ-gá, núu ní xáhaⁿ tē Natanàél xii-gá:

—Mèstrú, yòhó cúú-n Dēhe Dútú Ndiòxí yíndàha-n ñáyiú isràél —cächí-dé xáhaⁿ-dě xii-gá.

⁵⁰ Te Jèsús ní xáhaⁿ-gă:

—Cuendá sá ní xiní ñáhá-í xii-n càha yutnu ngúxí xiãⁿ iní ñáhá-n, dico cuéhé-gă núú sã quini-n —cächí-gá xáhaⁿ-gă xii-dé.

⁵¹ Te ní xáhaⁿ tùcu-gá:

—Na cächí tnúhu ndáá-í sá sàà nduu, te quini-ndó nàcaáⁿ andíu. Te quini-ndó cuè espíritú xinú cuechi núú Yá Ndiòxí sá ndàa nuu-xi quide-xi núú cündècu yúhú Tée cùu ñani tnáhá-ndó nchàa-ndo —cachí-gá xáhaⁿ-gă xii-güedé.

2

Vico tnândaha ío ñúú Cànaá

¹ Te nduu úní sá dúcáⁿ ní cuu te ní xóo ìⁿ vico tnândaha ñúú Cànaá, ìⁿ ñúú yíndèhu distritú Galiléa. Te yàcáⁿ ní xín-decu náná Jèsús. ² Te tnáhá Jèsús ndíhi cue tée xica cuu ndíhi-gá ní cáháⁿ-yu cuáháⁿ-gá ndíhi-güedé vico-án. ³ Te òré ní ndíhi vinú, te ní xáhaⁿ náná Jèsús xii-gá:

—Ná túú-gă vinú ndécú ndíhí-yu —cächí-aⁿ xáhaⁿ-aⁿ.

⁴ Te ní xáhaⁿ Jèsús xii-aⁿ:

—Náá, ñá túú xini ñuhu-xi da yúhú cúnaha-n cuendá vinú-án, chí vátá tnáhá-gá òré quini-yu yoo cùu yúhú —cächí-gá xáhaⁿ-gă xii-aⁿ.

⁵ Te ní xáhaⁿ-aⁿ xii ñáyiú xinú cuechi:

—Cada-ndo nchàa nacúaa na cáháⁿ Jèsús —cächí-aⁿ xáhaⁿ-aⁿ.

⁶ Te yàcáⁿ nútñí ìⁿú quídi yúú te quee dàtná ìⁿ ciendú lítrú ndute ìⁿ ìⁿ quídi-án. Te ndute-án nándíhi ñáyiú isràél ndáh-yu te nàqueté-yu cóhō-yu chí ducaⁿ tnàhí quidé-yu nàcúaa sàndáá iní-yu Yá Ndiòxí. ⁷ Te ní xáhaⁿ Jèsús xii nchaa cue tée xinú cuechi:

—Nadachítú-ndó ndùte ndí nchaa quídi-án —cächí-gá xáhaⁿ-gă xii-güedé.

Te ní nadachítú-güedé. ⁸ Te ní xáhaⁿ-gă:

—Vitna te tava-ndo lùha, te canehe-ndo quíhíⁿ cuáhá-ndo tēe quide vico —cachí-gá xáhaⁿ-gă xii-güedé.

Te ducaⁿ ní quide-güedé ní tava-güedé lùha nèhe-güedé cuáháⁿ ní sáha-güedé tēe quide vico. ⁹ Te ní xito ndéé tēe quide vico-án, te sa ní nduu-xi vinú, te ñá túú ní xiní-dé ndéé véxi-xi, dico mee cuè tēe xinú cuechi sa naha-güedé núú ní tava-güedé. Ducaⁿ te tēe quide vico-án ní cana-dé tēe tnândaha. ¹⁰ Te ní xáhaⁿ-dě:

—Nchaa ñáyiú quide vico queñuhú-yu díhna-gá vinú váha. Te sa vài vinú váha xihí-yu, te dàtnùnì queñuhú-yu vinú ndáhú. Te yòhó díhna-gá vinú ndáhú ní queñuhu-n, te ndéé núú ní ndíhi-ná ní queñuhu-n vinú váha —cächí tēe quide vico-án xáhaⁿ-dě xii tēe tnândaha-án.

¹¹ Te sá ní nadatiú Jesús ndute-án ní nduu-xi vinú cúú-xí ìⁿ chiuⁿ díhna nuu sã vã yòo tnàhí ndàcu cada ní quide-gá ñúú Cànaá, ìⁿ ñúú yíndèhu distritú Galiléa, te chiuⁿ ní quide-gá-án cúú-xí ìⁿ chiuⁿ cahnu vihi, núu xiãⁿ ní cutnùnì iní-yu sá ío cahnu

cuu-gá, te ní sándáá iní ñáhá nchàa cue tée xica cuu ndihi-gá.

¹² Te sáta ní yáha vico, te ní xica Jèsús ndihi nǎná-gǎ, ndihi cue ñaní-gá, ndihi nchaa cue tée xica cuu ndihi-gá cuáháⁿ-yu ñúú Capèrnaúm. Te yàcáⁿ ní xíndecú-yu ñúú ùú nduu ndihi-gá.

Jèsús ñá túú tñàhá iní-gá nàcuáa quide ñáyiu xití veñúhu

(Mt. 21:12-13; Mr. 11:15-18; Lc. 19:45-46)

¹³ Te ta cùyatni cada ñáyiu isràèl vico pàscuá, te ní xica Jèsús cuáháⁿ-gá ñúú Jerusalén. ¹⁴ Te sáta ní sáá-gá yàcáⁿ, te ní xica-gá cuáháⁿ-gá veñúhu càhnu sá ò cùnuu, te xití veñúhu-áⁿ ní xiní-gá ndécú ñáyiu dicó-yu ndicutu, mbéé ndihi lõmá, te tñàhá ñáyiu dàma díhúⁿ núcòo-yu ní xiní-gá. ¹⁵ Te ní queheⁿ-gá ñúú yoho, te ní cáunuu tñàhá-gá, te ní dáyùhu-gá ñáyiu ní queé-yu quehé veñúhu, ndihi ndicutú-yu ndihi mbéé-yu. Te cue ñáyiu dàma díhúⁿ-áⁿ ní dǎngòyo-gá díhúⁿ-yu, te ní dánduá-gá mèsá-yu. ¹⁶ Te ní xáhaⁿ-gá xii cue ñáyiu dico lõmá:

— ¡Queñuhu-ndo nchàa quití-a xití veñúhu-a! ¡Vá cáda-ndó vèhe núú yáhu núú cúú vèhe Tàtá-í Dútú Ndiòxí! — càchí-gá xáhaⁿ-gá xii-yu.

¹⁷ Te xíáⁿ ní ndacu iní cue tée xica cuu ndihi-gá sá dúcáⁿ yòdo tñuní núú tútú-gá, te càchí-xi: “Ío cùyica iní-í chi ñá cuiní-yu canehe ñi-yu vèhe Tàtá-í”, duha càchí-xi núú tútú-gá.

¹⁸ Te ní xáhaⁿ cuè tée isràèl xii-gá:

— ¿Ná cúú sǎ vǎ yòo tñàhí ndàcu cada, cada-n cuendá cutnùní iní-ndí sá cúú dùha taxi tñuní ñáhá-n xii-ndí-í? — càchí-güedé xáhaⁿ-güedé xii-gá.

¹⁹ Te ní xáhaⁿ Jèsús:

— Chí dǎngòyo veñúhu-a, te není xití úní nduu te sa nadaxínu-í — càchí-gá xáhaⁿ-gá xii-güedé.

²⁰ Te ní xáhaⁿ tucu cue tée isràèl:

— Údico ñúú cuíá ní xíndecu-güedé ní sáá veñúhu-a, te yòhó cuiní-n nàdaxínu-n xití úní-ni nduu — càchí-güedé xáhaⁿ-güedé xii-gá.

²¹ Dico sá ní cáháⁿ-gá chi ñá díú cuendá veñúhu ní cáháⁿ-gá chi cuendá yiqui cùnú-gá ní cáháⁿ-gá. ²² Núú sáta ní xíhí-gá, te ní ndoto-gá, te òré-áⁿ ní ndacu iní cue tée

ní xica cuu ndihi-gá nàcuáa ní cáháⁿ-gá, núú xíáⁿ ní sándáá iní-güedé tñúhu yòdo tñuní núú tútú-gá. Te ducaⁿ te ní sándáá iní-güedé tñúhu ní cáháⁿ-gá.

Jèsús xiní-gá nàcuáa càa iní nchaa ñáyiu

²³ Te òré ndécú Jèsús vico pàscuá, te ío vǎ ñáyiu ní sándáá iní ñáhá xii-gá cuendá ío títñí sǎ vǎ yòo tñàhí ndàcu cada ní quide-gá ní xiní-yu. ²⁴ Dico Jèsús ñá ní cáháⁿ-gá nchaa tñúhu ñúhu iní-gá, chi sa ní cutnùní iní-gá sǎ ñá túú cùu váha iní-yu. ²⁵ Te ñá túú xiní ñuhu-gá ñúú ñáyiu cúñaha nàcuáa càa iní nchaa tñàhá ñáyíu-yu, chi mee-gǎ sa nàha ndáá-gá nàcuáa càa iní-yu nchaa-yu.

3

Jèsús ndihi té Nicòdemú

¹ Ní xíndecu ñúú tée cùu fariséu ní xí-nani-dé Nicòdemú, te ní cuu-dé ñúú tée cùnuu núú ñáyiu isràèl. ² Te tée-áⁿ ní sáháⁿ-dé niú ní cáháⁿ ndihi-dé Jèsús, te ní xáhaⁿ-dé:

— Mèstrú, yúhú ndihi dava-gá-güedé sa nàha-ndí sǎ Yǎ Ndiòxí ní tendaha ñàha-gá xii-n vèxi-n dānehé ñáhá-n xii-ndí, chi núú ñá túú Yǎ Ndiòxí ndécú ndihi-n, te vǎ ndácú-n càda-n nchaa sǎ vǎ yòo tñàhí ndàcu cada quide-n — càchí-dé xáhaⁿ-dé.

³ Te ní xáhaⁿ Jèsús:

— Na càchí tñúhu ndáá-í xii-n sǎ nchaa ñáyiu vǎ ná càcu saa tucu, te vǎ ndíhu ndaha ñàha Yǎ Ndiòxí xii-yu — càchí-gá xáhaⁿ-gá xii-dé.

⁴ Te ní xáhaⁿ té Nicòdemú:

— ¿Te nása cada ñúú ñáyiu sa ní yíi te cacu-ni tucú-yu? ¿Náa ndíhu tucú-yu xití nǎná-yu te cacu tucú-yu xito cùu uú-áⁿ? — càchí-dé xáhaⁿ-dé xii-gá.

⁵ Te ní xáhaⁿ Jèsús:

— Na càchí tñúhu ndáá-í xii-n sǎ nchaa ñáyiu na nduu ndoo nduu nine iní-xi cuú-yu ñáyiu ní na càcu saa ndihi ndute ndihi Espiritú Yǎ Ndiòxí, ñáyiu-áⁿ ndíhu ndaha ñàha-gá xii-yu. ⁶ Te nchaa ñáyiu càcu ñuyíu-a, chi déhe ñáyiu ñuyíu-a cùu-yu. Te ñáyiu ní nduu ndoo ní nduu nine iní-xi, ñáyiu-áⁿ ní nduu táhú-yu Espiritú Yǎ Ndiòxí te tàxi tñuní ñáhá-nǎ Espiritú-gá xii-yu. ⁷ Te vǎ cùnùhu-n tñúhu ní cáháⁿ-í-a, chi nchaa ñáyiu ní sándáá iní ñáhá xii-í ní nduu ndoo ní nduu nine iní-yu, te ñáyiu-áⁿ cùu-yu dàtná ñáyiu ní nacacu saa. ⁸ Táchí

ndëni xíáⁿ tècú dóho-o xico-xi, dico ñá túú xini-ó ndéè ichi véxi-xi, te ni ñá túú xini-ó ndéè ichi cuáháⁿ-xi. Ducaⁿ sãtnahá-xi cùu Espiritú-gá ndécú ndihí ñáyiú ní nduu ndoo ní nduu nine iní-xi —càchí-gá xáhaⁿ-gã xii-dé.

⁹ Te dàtnùnì ní xícáⁿ tnúhú tùcu té Nicòdemú núú-gã, te xáhaⁿ-dë xii-gá:

—¿Te nása nduu tnúhu càháⁿ-n dùcaⁿ caháⁿ-n? —càchí-dé xáhaⁿ-dë xii-gá.

¹⁰ Te ní xáhaⁿ Jèsús:

—Yòhó cúu-n ìⁿ tée cùtnunì iní-xi, chi dàcuaha-n ñáyiú isràél, ¿te ñá tècú tnùnì-n tnúhu càháⁿ-í-u? ¹¹ Te na càchí tnúhu ndáá-í xii-n sã nchúhú càháⁿ-ndí ìⁿ sá ní tecú tnùnì-ndí, te càháⁿ ndáá-ndí cuendá ìⁿ sá ní xini-ndí. Dico ñchòhó ñá tècú tnùnì-ndó tnúhu càháⁿ-ndí. ¹² Te ñá sàndáá iní-ndó tnúhu càháⁿ-í cuendá nchaa nàcuáa cùu ñuyúú-a, te uuⁿ-gá cada-ndo nùu càháⁿ-í cuendá nchaa nàcuáa cùu andiú.

¹³ Vá yòo ìⁿ sáa andiú, te cani-xi cuendú nàcuáa cãa. Chi ìⁿ dîí-ni yúhú véxi cuuⁿ-í andiú, te cùu-í ñani tnáhá-ndó nchaa-ndo. Te ñu-ni yàcáⁿ ndaa-í cundecu-í. ¹⁴ Te dàtná ní ndanehe ndí Moisés cóó ní sata caa ndí-dí xití yucu, ducaⁿ càda ñaha-güedé cata caa ñaha-güedé núú cùrúxí xii yúhú Tée cùu ñani tnáhá-ndó nchaa-ndo ìⁿ nduu, ¹⁵ te ducaⁿ yáha-í cuendá nchaa ñáyiú na quindáá iní ñáhá xii-í te nduu táhú-yu cundecu-yu ndihí Yá Ndiòxí ní caa ní quíhⁿ —càchí-gá xáhaⁿ-gã xii-dé.

Yá Ndiòxí ío cùu iní-gá ñáyiú ñuyúú-a

¹⁶ Te Yá Ndiòxí ío cùu iní-gá ñáyiú ñuyúú-a. Te ìⁿ dîí-ni Déhe-gá ndécú, te ní tendaha ñaha-gá ní quixi-gá ñuyúú-a, te núu na quindáá iní ñáhá ñáyiú, te vá cuíta nihnú-yu, chi nduu táhú-yu cundecu-yu ndihí-gá ní caa ní quíhⁿ. ¹⁷ Te Yá Ndiòxí ñá túú ní tendaha-gá Déhe-gá quixi-gá ñuyúú-a dacuíta nihnu-gá ñáyiú, chi ní tendaha-gá Déhe-gá ní quixi-gá sá dácacu nihnu-gá ñáyiú ñuyúú-a núú ùhú núú ndàhú.

¹⁸ Nchaa ñáyiú sàndáá iní ñáhá xii Déhe-gá, te vá cuíta nihnú-yu. Te nchaa ñáyiú ñá túú sàndáá iní ñáhá xii Déhe-gá ñùhú-yu ichi cuáháⁿ-yu núú ùhú núú ndàhú, chi ñá túú sàndáá iní-yu Déhe Dútú

Ndiòxí. ¹⁹ Chi ní quixi Déhe-gá ñuyúú-a ní dándíxí túu-gá iní-yu cuendá cutnùnì iní-yu nàcuáa nduu cuendá Yá Ndiòxí te tníⁿ-yu ìⁿ ichi váha ni cùu, te ñá ní tnáhá iní-yu, chi ní cudíí-gã iní-yu nchaa sá cuèhé sá dúhá dàcúúxí sã váha, núu xiáⁿ tá xita nihnú-yu cuáháⁿ. ²⁰ Te nchaa ñáyiú quide nchaa sá cuèhé sá dúhá ñá tnáhá iní-yu cutnùnì iní-yu nàcuáa nduu cuendá Yá Ndiòxí, te ñá tníⁿ-yu tnúhu-gá cuendá yùhú-yu nduu tnùnì nchaa sá quidë-yu. ²¹ Te nchaa ñáyiú ñùhu ichi ndáá cuiní-yu cutnùnì iní-yu nàcuáa nduu cuendá Yá Ndiòxí, te cùtnunì sá chindée ñaha-gá xii-yu, chi quide váha-yu.

Té Juáá tée dàcuandute ñaha xii ñáyiú càháⁿ váha tucu-dé cuendá Jèsús

²² Te sáta dúcáⁿ ní cuu, te ní quee Jèsús cuáháⁿ-gá ndihí cue tée xica cuu ndihí-gá dístítrú Júdeá. Te yàcáⁿ ní xín-decu tnaa-gá ndihí-güedé ní xóo dacuandute-güedé ñáyiú. ²³ Te ndëcu té Juáá ìⁿ xichi núú nání Ènón yatni ñuu Sàlém dàcuandute-dé ñáyiú, chi yàcáⁿ ío váha ñùhu ndute, núu xiáⁿ ní xóo quíhⁿ ñáyiú yàcáⁿ ní xóo cuanduté-yu. ²⁴ Duha ní cuu cùtnáhá vátá ngává-gã té Juáá vecaá.

²⁵ Te ní cacu ìⁿ cuendú ní càháⁿ cue tée xica cuu ndihí té Juáá ndihí ìⁿ úú cue tée isràél, núu ndëdacàa sá váha-gá cada ñáyiú cuendá nduu ñi-yu. ²⁶ Te ní sáháⁿ-güedé núú ndécú té Juáá ní xáhaⁿ-güedé:

—Mèstrú, tée ní quixi núú ní xíndecu-n ndaa ingá xio yúte Jòrdán, tée dîi cuendú-xi ní càháⁿ-n, tée-ãⁿ dácuaandute-dé tnáhá-dé ñáyiú. Te ío vai ñáyiú ní chinchícúⁿ ñáhá xii-dé —càchí-güedé xáhaⁿ-güedé xii-dé.

²⁷ Te ní xáhaⁿ té Juáá:

—Te vá yòo ìⁿ ndacu cada ìⁿ chiuⁿ nacuáa cuu váha iní Yá Ndiòxí, te núu ñá túú mèe-gá chindée ñaha-gá xii-yu.

²⁸ Te nchòhó sa ñaha-ndo sá yúhú ní càháⁿ ndáá-í sá ñá díú Cristú cùu-í, dico mee Yá Ndiòxí ní tendaha ñaha-gá yódó nùu-í véxi núú Yáá-áⁿ. ²⁹ Te nchòhó xini-ndó sã ìⁿ tée tnándaha te xíchí tnándaha ndihí-ná-dé cùndihí-dé. Te tée ní xica ndáhu ío cudíí iní-dé ndedóho-dé nchaa tnúhu càháⁿ tée tnándaha-áⁿ. Te ducaⁿ sãtnahá-xi cùu yúhú, chi ío cudíí iní-í sá vai ñáyiú ta chinchícúⁿ ñáhá xii Jesús cuáháⁿ. ³⁰ Te uuⁿ-gá cuita cuu vai ñáyiú cutnùnì iní-xi

sá ïo cùnuu-gá, te yúhú cuita ndóo ndee-í quíhín —càchí-dé xáhaⁿ-dë xii-güedé.

Cristú véxi cuuⁿ-gá andiu

³¹ Te ìndii díi-ni Cristú Yaá véxi cuuⁿ andiu cùnuu-gá núú ñuyúú-a. Te nchaa ñáyiú ndècu ñuyúú-a cùú-yu ñáyiú ñuyúú iha, te càháⁿ-yu sá cúú-xí ñuyúú-a. Dico Cristú Yaá véxi cuuⁿ andiu ³² càháⁿ-gá ìn sá ní tecú dóho-gá. Te ñá túú cuíní-yu quindáá iní-yu tnúhu càháⁿ-gá. ³³ Te nchaa ñáyiú tñii tnúhu càháⁿ Yaá véxi cuuⁿ andiu-áⁿ càháⁿ-yu sá tnúhu Yá Ndióxi cúú-xí ìn sá ndáá. ³⁴ Te Déhe-gá Yaá véxi cuuⁿ andiu càháⁿ-gá mee-ni tnúhu-gá. Te ñá ùhú iní-gá ní sáñaha-gá Espiritú-gá ndécú ndíhi Déhe-gá. ³⁵ Te Dútú Ndióxi ío cùu iní-gá Déhe-gá, núú ní xáhaⁿ-gá sá meé-gá taxi tnùnì-gá nchaandi túhú sá ío. ³⁶ Te nchaa ñáyiú na quindáá iní ñáhá xii Déhe-gá, ñáyiú-áⁿ cundecú-yu ndíhi-gá ni caa ni quíhín. Te nchaa ñáyiú vá quindáá iní ñáhá xii Déhe Yá Ndióxi ío dandòho ñaha-gá xii-yu.

4

Jèsús ndíhi ìn ñaha Sámariá

¹ Te ní níhi cue téé cùu fariséú tnúhu sá vai-gá ñáyiú ta chinchícúⁿ ñáhá xii Jèsús. Te ducaⁿ vai-gá-yu ta dàcuandute-gá cuáháⁿ dàcúúxí tē Juáá. ² Te cuéi ñá díú mèe-gá dácuaⁿndute ñaha-gá xii-yu, dico cue téé xica cuu ndíhi-gá dácuaⁿndute ñaha-güedé xii-yu. ³ Te ní níhi Jèsús tnúhu nàcuáa càháⁿ cue téé cùu fariséú, núú ní ndee-gá distritú Júdeá cuánuhú tucu-gá distritú Galiléa.

⁴ Te ichi ñuhu-gá ní nayáha-gá distritú Sámariá. ⁵ Te ní sáa-gá ìnⁿ ñuú nánì Sicár te ñuú-áⁿ yíndèhu-xi distritú Sámariá. Te xíaⁿ cáá yátni ñuhu núú ní sáha táhú ndíi Jàcób déhe ndíi ndíi Chèé. ⁶ Te yàcáⁿ cáá dòco ní cuu cuendá ndíi Jàcób. Te cùu-xi datná cuádava nduu ñuhu Jèsús ichi, te ío ní xàú-gá ñuu ní sáá-gá yuhu dòco-áⁿ ní ngóo-gá ndétátú-gá. ⁷⁻⁸ Te ní xica cue téé xica cuu ndíhi-gá cuáháⁿ-güedé xití ñuú Sicár cuánguaaⁿ-güedé sá caxí-güedé. Te yuhu dòco-áⁿ núcóo-gá ní sáá ìnⁿ ñadíhí ñaha distritú Sámariá véxi quèhmu-aⁿ ndute, te ní xáhaⁿ Jèsús:

—Taxi táhú luha ndute na còho-í —càchí-gá xáhaⁿ-gá.

⁹ Te ní xáhaⁿ ñadíhí-áⁿ:

—¿Ná cuendá da núú-í xicáⁿ-n ndùte coho-n? Te yòhó cúú-n tēe isràél, te yúhú cúú-í ñaha Sámariá —càchí-aⁿ xáhaⁿ-aⁿ xii-gá.

Te ducaⁿ ní xáhaⁿ-aⁿ, chi ñá túú ndècu váha ñáyiú isràél ndíhi ñáyiú distritú Sámariá. ¹⁰ Te ní xáhaⁿ Jèsús xii-aⁿ:

—Ná cútñuní iní-n ná taxi Yá Ndióxi xii-n, te ni ñá cútñuní iní-n yòo xicáⁿ ndute núú-n. Te núú dicó xiní-n yòo cuu yúhú á, te da mee-n cãcáⁿ-n ndùte núú-í coho-n, te yúhú taxi-í ndute cundecu ndíhi-n ñúú cuáháⁿ núú véxi —càchí-gá xáhaⁿ-gá.

¹¹ Te ní xáhaⁿ tùcu ñadíhí-áⁿ:

—Tátá, ní sá quèhmu-n ndùte ñá túú nèhe-n, te doco-a cùnú víhí, te ñá túú ndéé quíngueheⁿ-n ndùte taxi-n coho-í.

¹² Ndíi Jàcób ñanì tnáhá-ndí ní xíndecu ndéé sanaha ní cadúha ndíi doco-a ní tóo ndute ní xíhi ndíi, ndíhi nchaa déhe ndíi, ndíhi nchaa quití ndíi, te ní ndóo cùu cuendá-ndí. ¹³ Te násai, te yòhó cùnùu-gá-n dàcúúxí ndíi-áⁿ? —càchí-aⁿ xáhaⁿ-aⁿ xii-gá.

¹³ Te ní xáhaⁿ Jèsús:

—Nchaa ñáyiú xíhi ndute doco-a, te vá cúú vétú dúcáⁿ iní-yu chi dayíchí ñáhá-ní tùcu-xi ndute-a. ¹⁴ Dico nchaa ñáyiú na còho ndute na cuáñaha-í, te vá ìnⁿ ndùu-gá dayíchí ñáhá-xí ndùte-áⁿ xii-yu, chi ndute cuáñaha-í cúú-xí ndùte váha-gá. Te dàtná quée ñihni ndute xití doco-a, nchaa-ni nduu ñuhu ñá túú yíchí, ducaⁿ sãtnahá-xi cada-xi chi candeca-xi iní-yu ní caa ni quíhín, te núu na còhó-yu ndute cuáñaha yúhú —càchí-gá xáhaⁿ-gá xii-aⁿ.

¹⁵ Te ní xáhaⁿ-aⁿ:

—Tátá, taxi ndute-áⁿ ná còho-í cuendá sá vá dayíchí ñáhá tnàhí-gá-xi ndute. Te vá quíxí-gá-í quixi quèhmu-í ndute doco-a —càchí-aⁿ xáhaⁿ-aⁿ xii-gá.

¹⁶ Te ní xáhaⁿ Jèsús:

—Cuáháⁿ cuángana yii-n, te quixi-ndo ìha —cachí-gá xáhaⁿ-gá xii-aⁿ.

¹⁷ Te ní xáhaⁿ-aⁿ:

—Ná túú yii-í —càchí-aⁿ xáhaⁿ-aⁿ xii-gá.

Te ní xáhaⁿ tùcu Jèsús:

—Ndáá càháⁿ-n sã ñà túú yii-n. ¹⁸ Dico ní cuu úhúⁿ téé cãndeca-n, te téé ndeca-n vitna chi ñá díú yii-n cuu-dé, te ndáá

càháⁿ-n sá ñà túú yíi-n —cachí-gá xáhaⁿ-gã xii-aⁿ.

¹⁹ Te sá dúcáⁿ ní xáhaⁿ-gã ñúu ní xáhaⁿ tucu-aⁿ:

—Tátá, yúhú sání iní-í sá yòhó cúu-n ìiⁿ tée càháⁿ tñúhu Yá Ndiòxí. ²⁰ Te cue ñaní tñáhá-ndí ní xíndecu ndéé sanaha ní xóo cada càhnú-yu Yá Ndiòxí tindúú-a, dico nchòhó ñáyiú israhèl càchí-ndó sá ndéé ñúú Jerusalén cada càhnu-o-gá —càchí-aⁿ xáhaⁿ-aⁿ xii-gá.

²¹ Te ní xáhaⁿ Jèsús xii-aⁿ:

—Ìiⁿ tñúhu na càháⁿ-í-a, te quindáá iní-n. Sa ta cùyatni sáá nduu sá ñà díú-gã mee-ni tìndúú-a, te ni ñà díú-gã mee-ni ñúú Jerusalén cada càhnu-ndo Tátá-ó Dütú Ndiòxí, chi ndèni ní cuu cada càhnu-ndo-gá. ²² Te nchòhó cue ñáyiú Sámariá chi ñá cútñuní iní-ndó ñà cúú sá quidé càhnu-ndo, dico nchúhú ñáyiú israhèl, chi cútñuní iní-ndí ná cúú sá quidé càhnu-ndí. Chi ìiⁿ tée israhèl véxi-dé dàcácu nihnu-dé ñáyiú cuèndá vá quíhíⁿ-yu núú ùhú núú ndàhú. ²³ Te není vitna nguíta-yu cada càhnu ndisá-yu Tátá-ó Dütú Ndiòxí, te cadá-yu ni yùhu ni iní-yu sá cúú-xí-gã, chi mee-gã ducaⁿ cuiniⁿ-gã cadá-yu cada càhnú-yu-gá. ²⁴ Te Yá Ndiòxí chi ìiⁿ espíritú cúú-gã. Te nchaa ñáyiú na càda cahnu ñaha, te cadá-yu ni yùhu ni iní-yu sá cúú-xí-gã te cadá-yu dàtná càháⁿ tñúhu-gá —càchí-gá xáhaⁿ-gã xii-aⁿ.

²⁵ Te ní xáhaⁿ ñàdihí-áⁿ:

—Xiní-í sá quíxí tée cùu Mesías, tée càchí-güedé nání Cristú. Te tée-áⁿ ná sàá-dé, te cachí tñúhu ndáá-dé nàcuáa cuu —càchí-aⁿ xáhaⁿ-aⁿ xii-gá.

²⁶ Te ní xáhaⁿ Jèsús:

—Diu tée-áⁿ cúú yùhú tée ndàtnúhu ndihí-n —càchí-gá xáhaⁿ-gã xii-aⁿ.

²⁷ Te òré-áⁿ ní ndexio cue tée xica cuu ndihí-gá, te ní cuñúhu-güedé sá ndátñúhu-gá ndihí ñàdihí-áⁿ. Dico ni ìiⁿ-güedé ñá ní xicáⁿ tñúhú-güedé núú-gã ñúu ná cuèndú ndátñúhu-gá ndihí ñàdihí-áⁿ. ²⁸ Ducaⁿ te ní dàcáⁿ ñàdihí-áⁿ yóo ndute-aⁿ xíáⁿ, te ní xica-aⁿ cuánuhú-aⁿ ñúú cútñúhu-aⁿ ñáyiú cuèndá Jèsús. ²⁹ Te ní xáhaⁿ-aⁿ:

—Chí nèhé ná quíhíⁿ-ó, chi quiniⁿ-ndó ñà cúú ìiⁿ tée núcóo yuhu dòco-áⁿ ñúu ñà díú Cristú Yáá ní tendaha Yá Ndiòxí

véxi ñuyúú-a cùu-dé ñúu ní càháⁿ ndáá-dé nàcuáa cùu ndecu-í —càchí-aⁿ xáhaⁿ-aⁿ xii-yu.

³⁰ Te sá ní níhí ñáyiú ñúú-áⁿ tñúhu, xíáⁿ ní xicá-yu cuáháⁿ-yu. ³¹ Te òré vátá sáá-gá-yu xíáⁿ ní xáhaⁿ cuè tée xica cuu ndihí-gá xii-gá:

—Mèstrú, cudèhñu na cudèhñu-o —cachí-güedé xáhaⁿ-güedé xii-gá.

³² Te ní xáhaⁿ-gã:

—Ndècu ìiⁿ sá caxì-í, ìiⁿ sá ñà túú xiní nchòhó —càchí-gá xáhaⁿ-gã xii-güedé.

³³ Te cue tée xica cuu ndihí-gá xit-nàha-güedé:

—Váa ìó ñáyiú ní quixi nehe sá ní xexi-gá ñúu duha càháⁿ-gá —càchí-güedé xitnàha-güedé.

³⁴ Te ní xáhaⁿ-gã:

—Dàtná cuiniⁿ-ndó cùu vétú iní-ó òré xéxi-ó, ducaⁿ cùu vétú iní-í quidè-í nchaa nàcuáa ní càháⁿ Yá Ndiòxí Yáá ní tendaha ñaha xii-í véxi-í ñuyúú-a, te chiúⁿ-gá ío cùdíí iní-í dandihí-í. ³⁵ Te nchòhó càchí-ndó sá cùmání cùmí-gã yóó te cuu itú. Dico yúhú càchí-í sá cundehe-ndo ñáyiú-áⁿ, chi sa ndècu túha-yu, dàtná cúú-ná itú sá sá ní cuu-ná natahu-o cùú-yu, chi sa ndècu túha-ná-yu cundèdóho-yu tñúhu-í. ³⁶ Te dàtná cúú ñáyiú nàtahu itú chi sa cúhuⁿ yáhu-yu, ducaⁿ sàtnahá-xi cùu ñáyiú na càháⁿ tñúhu-í, chi cuñaha-í sá ndúú tãhú-yu na sáá nduu. Te nchaa ñáyiú na tñiⁿ tñúhu-í te nduu tãhú-yu cundecu-í ndihí-yu ni caa ni quíhíⁿ. Te dàtná cúú ñáyiú ní chihí tatá-xi, ndihí ñáyiú ní nàtahu itú-xi cùdíí-ná iní-yu. Ducaⁿ sàtnahá-xi cùu ñáyiú na càháⁿ tñúhu-í. ³⁷ Chi ndáá quée-xí nàcuáa cuáháⁿ ìiⁿ cuèndú sá càchí-xi: “Tucu tée ní chihí tatá, te tucu tée ní nàtahu”, duha cuáháⁿ cuèndú-áⁿ. ³⁸ Te yúhú tendaha ñaha-í xii-ndo quíhíⁿ-ndó càháⁿ-ndó tñúhu-í núú sá ní yáha-güedé ní càháⁿ-güedé tñúhu-í. Te nchòhó quíhíⁿ-ndó dicó-ná nduu cuèndá-ndó chiúⁿ-áⁿ —càchí-gá xáhaⁿ-gã xii-güedé.

³⁹ Te ío cuéhé ñáyiú ñúú-áⁿ ní xíndèdóho-yu cuèndú ní cani ñàdihí-áⁿ ñúú-yu sá Jèsús ní xáhaⁿ-gã nchaa nàcuáa quide-aⁿ, te xíáⁿ ío vâi-yu ní sándáá iní-yu Jèsús. ⁴⁰ Te ní quexió-yu núú ndécú-gã, te ní càháⁿ ndàhú-yu núú-gã sá quèndóo-gá ñúú-yu, núú xíáⁿ ní xíndecu-gá ndihí-yu úú

nduu. ⁴¹Te ío cuéhé-gă-yu ní sándáá iní-yu tnúhu ní cáháⁿ méé-gă. ⁴²Te ní xáháⁿ-yu xii ñadhí-áⁿ:

—Vitna te ñá díú mèe-ni tnúhu ní cáháⁿ-n ní sándáá iní-ndí-gá, chi ní cáháⁿ méé-gă ní xíndedóho-ndí vitna núu ní sándáá ndisa iní-ndí sá díú-gă cúú-gă Cristú Yáá ní tendaha Yá Ndiöxí véxi ñuyúú-a dácácu nihnu-gă ñáyiú núu ùhú núu ndàhú —càchí-yu xáhăⁿ-yu xii-aⁿ.

Jèsús quidé tătna-gă déhe ìⁿ tée ndèè chiúⁿ nũu gobièrnú

⁴³Te nduu úní ní nucúhuⁿ Jèsús ichi cuáhăⁿ-gă distritú Galiléa. ⁴⁴Te cuáhăⁿ-gă yàcáⁿ, chi mee-gă ní cachí-gă sá nũu ìⁿ tée na cáháⁿ-dé tnúhu Yá Ndiöxí ñuú núú ní cacu-dé, te ñá túú nèhè-yu sá yíñùhu núú-dé. ⁴⁵Te òrè ní sáá-gă distritú Galiléa, te ío váha ní cuu iní ñáhă-yu xii-gă, chi cuèndá tnhá-yu ní xíndecu ndíhí-gă vico pascuá ñuú Jerusalén. Te yàcáⁿ ní xini-yu nchaa sá ní quide-gă.

⁴⁶Te ní sáhăⁿ tucu-gă ñuú Cànaa ìⁿ ñuú yíndèhu distritú Galiléa, núu ní nadatiú-gă ndute ní nduu-xi vínú. Te ñuú Capèrnaum ndécú ìⁿ tée ndèè chiúⁿ nũu tée cuu gobièrnú, te tée-án cùhú ìⁿ déhe-dé. ⁴⁷Te ní ñihí-dé tnúhu sá ní ndee Jèsús distritú Jùdeá ní ndexio-gă distritú Galiléa, núu ní sáhăⁿ-dé núu ndécú-gă, te ní cáháⁿ ndàhú-dé núú-gă sá quíhíⁿ-gă cada tătna-gă déhe-dé, chi sa ndècu-na-dé sá cúú-dé. ⁴⁸Te ní xáháⁿ Jèsús xii-dé:

—Nchòhó, chi vá quíndáá iní ñáhă-ndó xii-í te núu vá cáda-í ìⁿ sá vâ yòo tnháí ndàcu cada quini-ndó —càchí-gă xáháⁿ-gă xii-dé.

⁴⁹Te ní xáháⁿ tucu tée cùhú déhe-xi-án xii-gă:

—Tătá, cundee iní-n ná quíhíⁿ-ni-o càda tătna-n dèhe-í ná cuu-dé, chi càhú víhí tnhá-há-dé —càchí-dé xáháⁿ-dè xii-gă.

⁵⁰Te ní xáháⁿ Jèsús:

—Cuanùhú te quini-n nă ní ndúha déhe-n —càchí-gă xáháⁿ-gă xii-dé.

Te ní sándáá iní-dé tnúhu ní cáháⁿ Jèsús, te cuánuhú-dé. ⁵¹Te ñùhu-dé ichi cuánuhú-dé ní sánú tnháí ñáhă cuè tée xinu cuechi núú-dé. Te ní xáháⁿ-güedè sá sá ta ndúha déhe-dé cuáhăⁿ.

⁵²Te ní xícáⁿ tnúhú-dé núú-güedè ná òrè cúú-xí ní ngúíta-xi ta quètau cuéhé-dé. Te ní xáháⁿ-güedè:

—Icu dàtná òrè caá ìⁿ sacuaa ní nchíco-dé cahni —càchí-güedè xáháⁿ-güedè xii-dé.

⁵³Te tătá tée cùhú-án ní ndacu iní-dé sá díú òrè ní quètau cuéhé-dé ní cáháⁿ ndíhí-dé Jèsús ní xáháⁿ-gă sá ndúha déhe-dé. Te xíáⁿ nũu ndí nchàa tée-án vehe-dé ní sándáá iní-yu Jèsús.

⁵⁴Te sá ní quide-gă-án cúú ùú xito quide-gă sá vâ yòo tnháí ndacu cada. Te sá ní quide-gă xito cùu uú-án cúú-xí sá ní quide-gă cúnàhá ní ndee-gă distritú Jùdeá cuánuhú-gă distritú Galiléa.

5

Jèsús quidé tătna-gă ìⁿ tée cùhú ìⁿ xichi núu nání Bètesdá

¹Te sátá dúcáⁿ ní cuu, te ní tnahá nduu ní quide ñáyiú israhél ìⁿ vico. Te ní sáhăⁿ Jèsús ñuú Jerusalén. ²Te ní càa xico yuhu ñuú-án ñúhú dòco, te titní yèhe-xi ndecu. Te ìⁿ yèhe-xi-án nání Yùyehe Mbéé, te yatni xíáⁿ caá ìⁿ tanquí ndute dàna-ní-yu Bètesdá tnúhu mée-yu tnúhu hèbreú, te yuhu tànquí-án caá ùhúⁿ corrèdór. ³Te xití corrèdór-án xíndecu cuéhé ñáyiú cùhú, ñáyiú cuáá, ñáyiú yacua, ñáyiú ñá cúú-gă candá nihnu, ndètú-yu candá ndute-án. ⁴Chi ñihí-yu tnúhu sá àma nihnu cùuⁿ ìⁿ espíritú xínú cuèchi núú Yá Ndiöxí, te dà-candá-xi ndute ñùhu tànquí-án. Te ñáyiú díhna nuu ná quée xití ndute-án, te òrè-ni ndúha-yu. ⁵Te yàcáⁿ ñútnàhá ìⁿ tée ní cuu ócò sáhúⁿ úní cuía sá cùhú-dé. ⁶Te ní xini Jèsús caá-dé, te ní cutnùní iní-gă sá ní cuu cuéhé cuía cùhú-dé, te ní xáháⁿ-gă:

—¿Cuini-n ndúha-n-án? —càchí-gă xáháⁿ-gă xii-dé.

⁷Te ní xáháⁿ tée cùhú-án:

—Tătá, vá yòo ñihí-í dàquée ñaha xii-í xití tànquí-a òrè càndá ndute, chi òrè cuini-í quée-í, te ingá-ni tucú-yu quènduú-yu núú-í cuángueé-yu —càchí-dé xáháⁿ-dè xii-gă.

⁸Te ní xáháⁿ Jèsús:

—Ndacuíñí, te ndaca-ni-n yùu-n, te caca-n —càchí-gă xáháⁿ-gă xii-dé.

⁹Te òrè-ni-án ní ndúha tée cùhú-án, te ní ndaca-ni-dé yuu-dé, te ní xica-dé

cuáháⁿ-dé. Te nduu-ǎn cúu-xí ndùu nde-tatú ñáyiú, ¹⁰núu ní xáhaⁿ cuè téé isràél xii téé ní cuhu-ǎn:

—Vitna cùu-xi nduu ndetatú-ó núu vá cúu cuido-n yuu-n —cachí-güedé xǎhaⁿ-güedé xii-dé.

¹¹Te ní xáhaⁿ-dê:

—Mee téé ní quide tátna ñaha xii-í ní cachí-dé sá ndácàni-í yuu-í, te caca-í —cachí-dé xǎhaⁿ-dê xii-güedé.

¹²Te ní xáhaⁿ-güedé:

—¿Te ná cúu téé ducaⁿ nǐ cachí sá ndácàni-n yuu-n te caca-n-í? —cachí-güedé xǎhaⁿ-güedé xii-dé.

¹³Dico téé ní cuhú-ǎn ñá túú ní cùtnuní iní-dé ná cúu téé ní quide tátna ñaha xii-dé, chi Jèsús òré-ní ní xica-gá cuáháⁿ-gá tnuú nchaa ñáyiú chitu xǎndecu xíaⁿ. ¹⁴Te sátá dúcáⁿ te ní naníhí tnáhá Jèsús ndíhi téé ní quide tátna-gá-ǎn xití veñúhu càhnu sá ïo cunuú, te ní xáhaⁿ-gǎ xii-dé:

—Ní xiní-n ná ní ndúha-n-va. Te vitna vá cáda-gǎ-n nǎndí sá cuèhé sá dúhá, chi núu na cáda-ni-n ña, te quixi íngá cuèhé, te vihi-gá ndoho-n —cachí-gá xáhaⁿ-gǎ xii-dé.

¹⁵Ducaⁿ te ní xica téé ní cuhú-ǎn cuǎngúñaha-dê xii cue téé isràél sá Jèsús ní quide tátna ñaha-gǎ xii-dé. ¹⁶Núu sátá nǐ níhí cue téé isràél tnúhu, te ní cuu úhú iní-güedé Jèsús. Te ní cuini-güedé cahni ñaha-güedé xii-gá cuendá sá dúcáⁿ ní quide tátna-gá nduu ndetatú-güedé. ¹⁷Te ní xáhaⁿ Jèsús xii-güedé:

—Tǎtà-í Dútú Ndióxi quidé chiúⁿ-ni-gǎ núu xǎⁿ quidé chiúⁿ-í tnàhá-í —cachí-gá xáhaⁿ-gǎ xii-güedé.

¹⁸Te ní cudééⁿ-güedé sá ñá ní cǎnehe íf-gǎ nduu ndetatú-güedé, te ní cuini-güedé cahni ñaha-güedé, te uuⁿ-gǎ ní cuini-güedé cahni ñaha-güedé xii-gá sá ní cachí-gá sá Tǎtà-gǎ cúu Dútú Ndióxi, chi ní sani iní-güedé sá cuini-gá núnahá-gǎ Yǎ Ndióxi núu xǎⁿ ío ní cudééⁿ-güedé.

Jèsús Déhe Yá Ndióxi táxi tnùn-í-gǎ

¹⁹Te ní xáhaⁿ tucu Jèsús xii-güedé:

—Na cachí tnúhu ndáá-í xii-ndo sǎ yúhu chi ní ñá sá ñá ndácù-í cada mee-í núu ñá túú mée Tǎtà-í dánèhé ñáhá-gǎ xii-í nàcuáa cada-í, chi nchaa sá quidé Tǎtà-í quidé-í tnàhá-í. ²⁰Te Tǎtà-í ío cùu iní ñáhá-gǎ xii-í núu dànèhé ñáhá-gǎ nchaa nàcuáa quide-gǎ. Te vitna ndècu vai-gǎ chiúⁿ

tahu-gǎ cada-í, chiúⁿ sá vátá quini-gǎ-ndó cáda-í nàcuáa cuñúhu vihi-ndo. ²¹Chi Tǎtà-í dandòto-gǎ ñáyiú ní xíhí. Te yúhu cada-í te nduu táhu nchaa ñáyiú cachí iní-í cundecu ndíhi ñáhá-yu xii-í ní caa ní quíhíⁿ. ²²Te na sáa nduu te ñá díú Tǎtà-í cada ndáá-gǎ cuéchi ñáyiú, chi ní cachí-gǎ sá yúhu cada ndáá-í ²³cuendá nchaa ñáyiú canehé-yu sá yíñúhu núu-í dàtná néhé-yu sá yíñúhu núu Tǎtà-í Yáa ní tendaha ñaha xii-í véxi-í ñuyú-a. Te nchaa ñáyiú ñá túú nèhe sá yíñúhu núu yúhu, te ni núu Tǎtà-í ñá túú nèhé-yu sá yíñúhu.

²⁴Te na cachí tnúhu ndáá-í xii-ndo sǎ nchaa ñáyiú na cùndedóho tnúhu na càháⁿ-í, te núu na quíndáá iní-yu Dútú Ndióxi Yáa ní tendaha ñaha xii-í véxi-í ñuyú-a ña, te vá cuíta niñnú-yu chi nduu táhú-yu cundecu-yu ndíhi-gǎ ní caa ní quíhíⁿ. ²⁵Te vitna na cachí tnúhu ndáá-í xii-ndo sǎ nchaa ñáyiú ndècu ichi cuèhé ichi duha cùu-yu dàtná ñá ñáyiú ní xíhí, te vitna ní sáa nduu cùndedóho-yu tnúhu càháⁿ yúhu Déhe Dútú Ndióxi, te nchaa ñáyiú na quíndáá iní-xi, te naníhí tàhú-yu. ²⁶Te dàtná quidé mée Tǎtà-í dácacu niñnú-gǎ ñáyiú, ducaⁿ ní cachí-gǎ cada-í dácacu niñnú-í-yu. ²⁷Te ní cachí tucu-gǎ sá sáa ñá nduu, te cada ndáá-í cuéchi nchaa ñáyiú ñá túú quide ndáá, chi yúhu táxi tnùn-í-í, te cùu-í ñaní tnáhá-ndó nchaa-ndo. ²⁸Te ni vá cùñúhu-ndo tnúhu càháⁿ-í, chi sáa nduu te nchaa ñáyiú ní xíhí tecú dóho-yu tnúhu càháⁿ-í. ²⁹Te ndoto nchaa ñáyiú ní quide váha cundecu ndíhi-í-yu ní caa ní quíhíⁿ, te ndoto tnàhá nchaa ñáyiú ní quide cuèhé ní quide duha, te ñáyiú-ǎn quíhíⁿ-yu núu úhú núu ndahú.

Yá Ndióxi chíndèe tnúhu-gǎ Jèsús

³⁰Te yúhu, chi ní ñá sá ñá ndácù-í cada mee-í núu ñá díú mée Yá Ndióxi táuchíuⁿ-gǎ nàcuáa cada-í. Te quide ndáá-í cuéchi ñáyiú nàcuáa tàxi tnuní-gǎ cada-í, te yúhu ñá túú quide-í sá cúu ñni mée-í chi Tǎtà-í ní táuchíuⁿ-gǎ nàcuáa cada-í. ³¹Te núu na càháⁿ-í sá mée-í táxi tnùn-í-í, te vá quíndáá iní-ndó. ³²Chi Yá Ndióxi chíndèe tnúhu ñaha-gǎ xii-í, te yúhu xiní-í sá tnúhu càháⁿ-gǎ cuendá-í cúu-xí ñá sá ndáa. ³³Te nchóhó ní téchíuⁿ-ndó cuè téé ní sáháⁿ ní ndúcú tnúhu-güedé núu

tě Juàá nũu ná tnũhu cáháⁿ-dé cuendá-í, te tée-ãⁿ ní cáháⁿ ndáá-dé nàcuáa ndũu cuendá-í. ³⁴ Dico yũhú, chi ñá túú xini ñuhu-í ìⁿ ñáyiũ ñuyíú-a chindee tnũhu ñàhá-yu xii-í, dico tě Juàá ní cáháⁿ váha-dé cuendá-í, te xíãⁿ càchí tnũhu tucu-í cuendá quíndáá iní-ndó, te naníhí tãhú-ndó. ³⁵ Te ãàtná cuini-ndó cùu ìⁿ ití ndéñuhú te ãàyehé-xi, ducaⁿ sãtnahá-xi ní cuu té Juàá, chi sacú-ni nduu ío ní cudíí ìn-ndó tnũhu ní cáháⁿ-dé. ³⁶ Te váha-ni ní cáháⁿ té Juàá, dico yũhú chi ndècu nchaa sá tá quide-í véxi nàcuáa ní táuchíúⁿ Yã Ndiõxí cada-í, te nchaa xíãⁿ cúú-xí ìⁿ sá cútñuni iní-ndó sã méé Yã Ndiõxí ní tendaha ñàha-gá xii-í véxi-í ñuyíú-a. ³⁷ Te ãiu-ni-gá chindèe tnũhu ñàha-gã xii-í, dicó-ni sã méé-ndó ñá túú cuini-ndó càda cuendá-ndó tnũhu càháⁿ-gá, te ni ñá túú xini-ndó nàcuáa càa-gá. ³⁸ Te ñá túú quèe iní nchòhó tnũhu càháⁿ-gá, chi ñá túú sãndáá iní ñàhá-ndó xii yũhú Déhe-gá. ³⁹ Te ãàcuaha vihi-ndo tutú ndèe tnũhu-gá, chi sãni iní-ndó sã xíãⁿ-ni ãàcuàha-ndo te naníhí tãhú-ndó. Te váha-ni quide-ndo, chi ãiu tutú-ãⁿ càháⁿ-xi cuendá-í. ⁴⁰ Te nchòhó ñá túú cuini-ndó quíndáá iní ñàhá-ndó xii-í cuendá naníhí tãhú-ndó.

⁴¹ Te yũhú, ñá túú xini ñuhu-í sá cádá càhnu ñàha-ndo xii-í. ⁴² Dico sa xini-í nàcuáa sãni iní-ndó chi ñá túú cùu iní-ndó Yã Ndiõxí. ⁴³ Te yũhú véxi-í ñuyíú-a chi Tãtà-í ní tendaha ñàha-gá, te nchòhó ñá túú cuini-ndó tnũh-ndo tnũhu càháⁿ-í, dico núu quixi ìⁿ tée cáháⁿ cuendá méé-xí, chi quíndáá iní-ndó. ⁴⁴ Te ná váha nchòhó ná tnũh-ndó tnũhu càháⁿ-í, te xio xio-ni quide cahnu tñaha-ndo, te ñá túú quide cuendá-ndó sã tnũhu váha càháⁿ Yã Ndiõxí cuu xii-ndo. ⁴⁵ Te vá cãní ìn-ndó sã yũhú ndacãⁿ cuèchi-í núu Tãtà-í nàcuáa quide-ndo, chi ndí Moisés ní chídó tnũni ndíí núu tutú Yã Ndiõxí nàcuáa quide-ndo sã ñá túú quide váha-ndo, te mee-ndo sãni iní-ndó sã naníhí tãhú-ndó cuendá tnũhu ní cáháⁿ ndíí. ⁴⁶ Chi núu nchòhó sãndáá ndíca iní-ndó tnũhu ní cáháⁿ ndíí Moisés ñá, te ducaⁿ te quíndáá iní-ndó yũhú ní cùu, chi ndí-ãⁿ ní chídó tnũni ndíí nàcuáa cada-í ñuyíú-a vitna. ⁴⁷ Te núu ñá túú sãndáá iní-ndó tnũhu ní chídó tnũni ndíí, te ãiu-ni ducaⁿ càda ñàha-ndo xii-í vá quíndáá iní-ndó tnũhu càháⁿ-í —càchí-gá xãhaⁿ-gã xii-güedé.

6

Jèsús ãàcãxi-gá úhúⁿ mĩl ñáyiũ

(Mt. 14:13-21; Mr. 6:30-44; Lc. 9:10-17)

¹ Te sãtã dúcãⁿ ní cuu, te ní quee Jèsús cuáhãⁿ-gã ìngã xio yuhu lãgúnã Galileá, àdi Tiberiás chi úú ãiu-xi. ² Te ío cuéhé ñáyiũ nchícúⁿ ñãhá xii-gã cuáhãⁿ cuendá sã ní xini-yu nchaa sã vá yõo tñãhí ndàcu cada ní quide-gã, chi ní quide tátna-gã nchaa ñáyiũ cùhú. ³ Te ní sãá Jèsús ndíhí cue tée xica cuu ndíhí-gã ìⁿ núú tìndúú, te xíãⁿ ní ngóo-gã ndíhí-güedé. ⁴ Te ta cùyatni coo vico pascua, vico quide ñáyiũ isrãél. ⁵ Te ní xini-gã sã ío vái ñáyiũ nchícúⁿ ñãhá xii-gã cuáhãⁿ, te ní xãhaⁿ-gã xii té Lìpé:

—¿Ndèe quíhíⁿ-ó quínguaaⁿ-o sã cáxí nchãa ñáyiũ-a? —càchí-gã xãhaⁿ-gã xii-dé.

⁶ Te ducaⁿ ñí xãhaⁿ-gã xii-dé cuendá sã cuini-gã quini-gã nása cunduu tnũhu càháⁿ-dé, dico mee-gã sa xini-gã nàcuáa cada-gã. ⁷ Te ní xãhaⁿ té Lìpé xii-gã:

—Te cuéi úú ciendú ãíhúⁿ denàriú ná ãàndõñuhu-o cuaaⁿ-o paá, te ni vá tñãhá caxí-yu luha luha —càchí-dé xãhaⁿ-dẽ xii-gã.

⁸ Te tě Ndríxi ìngã tée xica cuu ndíhí-gã, ñãní té Xímú, àdi Pelú chi úú ãiu-dé, ní xãhaⁿ-dẽ:

⁹ —Iha ndècu ìⁿ té lĩhli nèhe-dé úhúⁿ paá cebàdá te úú chácã, dico ndèe tñãhá xèhé, te cuéhé víhí ñáyiũ —càchí-dé xãhaⁿ-dẽ xii-gã.

¹⁰ Te ní xãhaⁿ Jèsús xii-güedé:

—Chí cũñaha ná ngóo-yu nchaa-yu —càchí-gã xãhaⁿ-gã.

Te ñáyiũ-ãⁿ ní ngóo-yu, te càa vihi ité núú ñí ngóo-yu-ãⁿ, te xínu ãàtná úhúⁿ mĩl mee-ni cuè tée, te ãiⁿ ñáyiũ ãiⁿ ndíhí landú. ¹¹ Te ní queheⁿ Jèsús paá, te ní ndacãⁿ tãhú-gã núú Yã Ndiõxí, te ní sãñaha-gã paá-ãⁿ xii cue tée xica cuu ndíhí-gã, te cue tée-ãⁿ ñí ãàcãñu-güedé ní xexi nchaa ñáyiũ xixúcu-ãⁿ. Te ãiu-ni ducaⁿ ñí quide-gã chácã, te ní ãàcãñu tucu-güedé-ãⁿ ní xexi ñáyiũ ní ndahá xití-yu. ¹² Te òrè ní túhú còhõ-yu, te ní xãhaⁿ Jèsús xii cue tée xica cuu ndíhí-gã sã ná ñaqueheⁿ-güedé nchaa sã ní quendóo cuendá sã vá quíhíⁿ-xi núú mĩhí.

¹³ Te cue tée-ãⁿ ní ñaqueheⁿ-güedé nchaa sã ñí quendóo, te ní chítú ùxúú tídihi núú ùhúⁿ-ni paá cebàdá. ¹⁴ Te sã ní xini-yu ní

nadacàya-gá sá ní xexí-yu, xíáⁿ ní nguíta-yu ní xítñhá-yu:

—Ndáá sá tée-a sa ló cuendú sá quíxí-dé ñuyúú-a cáháⁿ-dé tñúhu Yá Ndióxi — cächí-yu xítñhá-yu.

¹⁵ Te ní cutnùní iní Jèsús sá cáda yicá-yu candeca ñhá-yu xii-gá quíhíⁿ cuendá cundecu-gá quindaha ñaha-gá xii-yu ni cùu, núu xíáⁿ ní xica tucu-gá cuáháⁿ-gá xití yucu mee dii chícuú-gá.

Jèsús xicá-gă núu ndute
(Mt. 14:22-27; Mr. 6:45-52)

¹⁶ Te òré ní cuu ndiquíⁿ, te cuáháⁿ cue tée xica cuu ndihi-gá yuhu làgúná. ¹⁷ Te ní queé-güedé bàrcú cuáháⁿ-güedé ñuu Capèrnaúm cáá ndàa ingá xio yuhu làgúná, te sa ní cuu ndiquíⁿ, te ñá túú Jèsús quéxìo queé-gá bàrcú ñúhú-güedé-áⁿ. ¹⁸ Te ní nguíta-xi quène táchí ñihi, te ñihi dàcandau ndéé tñhá ndüte lagúná-áⁿ. ¹⁹ Te sa ní cuu dàtná úhúⁿ kilómetrú cuáháⁿ-güedé, te ní xiní-güedé Jèsús tá cùyatni-gá bàrcú ñúhú-güedé véxi-gá núu nduté, te ní yuhú-güedé. ²⁰ Te ní xáhaⁿ Jèsús xii-güedé:

—Yuhú véxi-í, vá yuhú-ndó —cächí-gá xáhaⁿ-gá xii-güedé.

²¹ Te ío ní cudíí iní-güedé sá ní quexìo-gá cuànguee-gá bàrcú, te òré-ni ní quexìo-güedé ndihi-gá ndéé ingá xio yuhu làgúná núu cuáháⁿ-güedé.

Ñáyiú nànducu ñaha xii Jèsús

²² Te ingá nduu-áⁿ xíndecu-ni nchaa ñáyiú ní quendóo yuhu làgúná. Te ní quide cuendá-yu sá ííⁿ dii-ná bàrcú nútñí-áⁿ ní cùu ñá túú-gá, chi cue tée xica cuu ndihi Jèsús ní queé-güedé bàrcú-áⁿ cuáháⁿ-güedé. Te ní ñíhí-yu tñúhu sá ñá túú ní queé tñhá Jèsús. ²³ Te diu-ni nduu-áⁿ ní quee ííⁿ úú bàrcú ñuu Tiberiás ní sáá-xi yatni núu ní xexí-yu pàá sá ní ndacáⁿ táhú Jèsús núu Yá Ndióxi. ²⁴ Te ní xiní-yu sá ñá túú Jèsús ndihi cue tée xica cuu ndihi-gá, núu ní quee-yu bàrcú-áⁿ cuáháⁿ-yu ñuu Capèrnaúm cuánúndúcu ñhá-yu xii-gá.

Jèsús cúú-gă dàtná ííⁿ sá nchító-ó

²⁵ Te ní sáá-yu ingá xio yuhu làgúná, xíáⁿ ní naníhí-yu Jèsús, te ní xáháⁿ-yu xii-gá:

—Mèstrú, ¿ná òré ní sáá-n ìha? — cächí-yu xáháⁿ-yu xii-gá.

²⁶ Te ní xáhaⁿ Jèsús:

—Na cächí tñúhu ndáá-í sá nchòhó nànducu ñaha-ndo xii-í cuendá-ni sá ní xexi-ndo ní ndahá xití-ndó, dico ñá diú cuendá sá ní quide-í sá vá yòo tñáhi ndàcu cada nanducu ñaha-ndo. ²⁷ Te vá cáda cuendá-ndó sá méé-ní sá caxí-ndó càda chiuⁿ-ndo chi xíáⁿ vá cùdii-xi. Chi ío-gá xíní ñúhu-xi cada cuendá-ndó tñúhu Yá Ndióxi te tñii-ndo, te naníhí táhú-ndó. Te tñúhu-áⁿ cächí tñúhu yuhú Tée cùu ñaní tñhá-ndó nchàa-ndo, te xíáⁿ candeca-xi iní-ndó ñé caa ní quíhíⁿ, chi mee Dùtú Ndióxi ní cächí-gá sá dúcáⁿ càda-í — cächí-gá xáhaⁿ-gá xii-yu.

²⁸ Te ní xáháⁿ-yu:

—¿Nása cada-ndí cuendá ngúnu ichi-ndí nàcuáa cuíní Yá Ndióxi cunduu-i? — cächí-yu xáháⁿ-yu xii-gá.

²⁹ Te ní xáhaⁿ Jèsús xii-yu:

—Yá Ndióxi cuíní-gá sá quíndáá iní ñáhá-ndó xii yuhú, tée ní tendaha-gá véxi ñuyúú-a —cächí-gá xáhaⁿ-gá xii-yu.

³⁰ Te ní xáhaⁿ tucú-yu xii-gá:

—¿Ná cúú sá vá yòo tñáhi ndàcu cada, cada-n cùndehe-ndí cuendá quíndáá iní ñáhá-ndí xii-n-i? ¿Adi nágá cúú sá cáda-n cuendá cutnùní iní-ndí sá ndàá càháⁿ-n-i? ³¹ Chi cue ñaní tñhá-ó ní xíndecu ndéé sanaha ní xexí-yu pàá nání mànáá xití yucu dàtná yódó tñuní núu tütú Yá Ndióxi núu cächí-xi: “Yá Ndióxi ní sáñaha-gá sá ní xexí-yu, te ní cuuⁿ túu-xi andíu”, duha cächí-xi núu tütú-gá —cächí-yu xáháⁿ-yu xii-gá.

³² Te ní xáhaⁿ Jèsús:

—Na cächí tñúhu ndáá-í xii-ndo sá ñá diú ndíi Moisés ní sáñaha ndíi pàá ní cuuⁿ andíu ní xexí-yu, chi mee Tàtá-í ní sáñaha-gá sá ní xexí-yu. Te sá táxi-gá vitna cùu-xi ³³ dàtná pàá véxi cuuⁿ andíu càndeca-xi iní-ndó ñé caa ní quíhíⁿ —cächí-gá xáhaⁿ-gá xii-yu.

³⁴ Te ní xáháⁿ-yu xii-gá:

—Tàtá, mee-ni pàá-áⁿ taxi-n caxi-ndí — cächí-yu xáháⁿ-yu xii-gá.

³⁵ Te ní xáhaⁿ Jèsús:

—Yuhú cúú-í dàtná ííⁿ sá xéxi-ndó càndeca-xi iní-ndó. Te duha ndúu tñúhu càháⁿ-í, chi nchaa ñáyiú na quíndáá iní ñáhá xii-í, te vá ndóhó-gá-yu docó te vá ndóhó-gá-yu ndute. ³⁶ Dìcò-ni sá nchòhó ñá túú sàndáá iní ñáhá-ndó cuéi xiní ñáhá-ndó xii-í. ³⁷ Te nchaa ñáyiú na cächí Tàtá-í

nduu cuendá-í nasaá-yu núu-í, te ñáyi-áⁿ vǎ dáquèe tǐhù-í-yu. ³⁸ Te ñá díú yǐhú sǎ véxi cuuⁿ-í andiu te quide-í nchaa sǎ cúu íní mèe-í, chi véxi cuuⁿ-í sǎ càdà-í nchaa nàcuáa ní táuchíúⁿ mèe Tátà-í Dútú Ndióxi Yáa ní tendaha ñaha xii-í véxi-í ñuyíú-a. ³⁹ Te cuini-gá sǎ ncháá ñáyi ní cachí-gá nduu cuendá-í vǎ dǎñá-í-yu cuíta nihnú-yu, te na sǎá nduu te ñu-ni-í dandòto-í-yu. ⁴⁰ Chi ducaⁿ ní cachí Dútú Ndióxi cunduu sǎ ncháá ñáyi na tñi tñúhu càháⁿ-í, te quindáá ndisa íní ñáhǎ-yu xii yúhú Déhe-gá, te nduu tǎhǔ-yu cundecú-yu ndihi Yá Ndióxi ní caa ní quíhíⁿ, te yúhú dandòto-í-yu na sǎá nduu —càchí-gá xáhaⁿ-gǎ xií-yu.

⁴¹ Te ñá ní tñahá íní ñáyi israél tñúhu ní cáháⁿ Jèsús núu ní nguíta-yu ní cáháⁿ cuèhé-yu cuendá-gá cuendá sǎ ní xáhaⁿ-gǎ sǎ mèe-gǎ cúu-gǎ dàtná sǎ xéxi-ó véxi cuuⁿ andiu. ⁴² Te ní xítñahá-yu:

—¿Náa ñá díú tǔe-a cùu-dé Jèsús déhe té Chèé? Nchoo xini-ó tǎtǎ-dě, te xini-ó nǎnǎ-dě, ñá cachí-tu tǔe-a sǎ andiu véxi cuuⁿ-dél —càchí-yu xítñahá-yu.

⁴³ Te ní xáhaⁿ Jèsús xií-yu:

—Vǎ càháⁿ cuèhé-gá-ndó cuendá-í, chí dǎñá. ⁴⁴ Vǎ yǒ quindáá íní ñáhǎ xii yúhú núu ñá túú mèe Tátà-í táxi cuendá ñáhǎ-gǎ xií-yu. Te ñu-gá ní tendaha ñaha-gá xii-í véxi-í, te yúhú dandòto-í-yu na sǎá nduu. ⁴⁵ Te núu tútú cue tǔe ní xóo cáháⁿ tñúhu Yá Ndióxi ndéé sanaha càchí-xi: “Yá Ndióxi danéhé ñáhǎ-gǎ xií-yu tñúhu-gá”, duha càchí-xi. Te nchaa ñáyi na cundedóho nchaa tñúhu càháⁿ Dútú Ndióxi, te cutúha-yu nàcuáa càháⁿ-gǎ, te ñáyi-áⁿ quindáá íní ñáhǎ-yu xii yúhú.

⁴⁶ Te vǎ yǒ xini ñáhǎ xii Dútú Ndióxi chí ñⁿ ñi-ni yúhú xini-í-gǎ, chí núu ndécú-gǎ ní quee-í véxi cuuⁿ-í —càchí-gá xáhaⁿ-gǎ xií-yu.

⁴⁷ Te xáhaⁿ tǔcu-gá:

—Na càchí tñúhu ndáá-í xii-ndo sǎ nchaa ñáyi na quindáá íní ñáhǎ xii-í, te naníhí tǎhú-yu. ⁴⁸ Te yúhú cùu-í dàtná ñⁿ sǎ xéxi-ndó cǎndeca-xi íní-ndó, te ducaⁿ sǎtnahá-xi cùu-í chí yúhú cada-í te nduu tǎhú-ndó cundecu-ndo ndihi Yá Ndióxi ní caa ní quíhíⁿ. ⁴⁹ Te cue ñaní tñahá-ó ní xíndecu ndéé sanaha ní xexí-yu pǎá nání mǎnǎá xití yucu, dico ní sǎá nduu te dacuítí

ní xíhí-yu. ⁵⁰⁻⁵¹ Te yúhú càháⁿ-í cuendá mèe-í, chí véxi cuuⁿ-í andiu. Te cùu-í dàtná ñⁿ sǎ nchító-ndó, te nchaa ñáyi na càxi te candeca-xi íni-yu ní caa ní quíhíⁿ te vǎ cuíta nihnu-gá-yu. Te sǎ táxi-í xii-ndo xǎáⁿ cúu-xí yiqui cuñú-í, te cùu-xi cuendá nchaa ñáyi nihí ñuyíú cuendá nduu tǎhǔ-yu cundecú-yu ndihi Yá Ndióxi ní caa ní quíhíⁿ —càchí-gá xáhaⁿ-gǎ xií-yu.

⁵² Te ní nguíta ñáyi israél xítñahá-yu:

—¿Náa cada-tu tǔe-a núu càchí-tu-dé sǎ yiqui cuñú-dé taxi-dé caxi-o-í? —càchí-yu xítñahá-yu.

⁵³ Te ní xáhaⁿ Jèsús:

—Na càchí tñúhu ndáá-í xii-ndo sǎ núu ñá càda íní-ndó sǎ dàtná sǎ cǎxi-ndó yiqui cuñú yúhú Tǔe cùu ñaní tñahá-ndó nchaa-ndo, te cada tucu íní-ndó sǎ dàtná sǎ cohó-ndó níñi-í ñá, te xǎáⁿ quée-xí sǎ quindáá íní ñáhǎ-ndó ní yuhu ní íní-ndó te naníhí tǎhú-ndó, te núu ñáhǎ te cuíta nihnu-ndo. ⁵⁴ Nchaa ñáyi na càda íni-xi sǎ dàtná sǎ cǎxi-yu yiqui cùu-í te cohó-yu níñi-í, ñáyi-áⁿ naníhí tǎhú-yu te yúhú dandòto-í-yu na sǎá nduu. ⁵⁵ Chi yiqui cùu-í ndihi níñi-í cúu-xí mèe-í. ⁵⁶ Te nchaa ñáyi na càda íni-xi sǎ dàtná sǎ cǎxi-yu yiqui cùu-í te cohó-yu níñi-í, te ñáyi-áⁿ ñⁿ cuu-í ndihi-yu chí cundecu ndihi-í-yu. ⁵⁷ Te yúhú nchito-í chí ducaⁿ nchito Tátà-í Yáa ní tendaha ñaha xii-í véxi-í ñuyíú-a. Te ñu-ni ducaⁿ nchaa ñáyi na quindáá íní ñáhǎ xii-í te cundecu ndihi-í-yu ní caa ní quíhíⁿ. ⁵⁸ Te yúhú cùu-í dàtná ñⁿ sǎ nchító-ndó véxi cuuⁿ andiu, dico ñá díú pǎá sǎ nání mǎnǎá ní xéxi cue ñaní tñahá-ó ní xíndecu ndéé sanaha, chí ní xexí-yu pǎá te dacuél ní xíhí-yu. Te nchaa ñáyi na quindáá íní ñáhǎ xii yúhú Yáa véxi cuuⁿ andiu, te cundecu ndihi-í-yu ní caa ní quíhíⁿ —càchí-gá xáhaⁿ-gǎ xií-yu.

⁵⁹ Nchaa tñúhu-a ní cáháⁿ-gǎ xití veñúhu ñáyi núu Capernaúm.

Jèsús càchí tñúhu-gá nàcuáa naníhí tǎhú-ó

⁶⁰ Te sǎ dúcǎⁿ ní cáháⁿ-gǎ núu vai ñáyi nchícúⁿ ñáhǎ xii-gǎ ní xítñahá-yu:

—Vǎ tñí cuítí-o tñúhu càháⁿ-dé chí ñá díú tñúhu sǎ cúu vǎha íní-ó càháⁿ-dé —càchí-yu xítñahá-yu.

⁶¹ Te ní cutnùnì iní Jèsús sá ñà túú càháⁿ vâha-yu cuendá tnúhu ní cáháⁿ-gá, núu ní xáhaⁿ-gá xíi-yu:

—¿Náa ñá tnàhá iní-ndó nàcuáa càháⁿ-í-a? ⁶² Te uuⁿ-gá cada nchòhó núu quini-ndó yùhú Téé cùu ñaní tnàhá-ndó nchàa-ndo ndaa-í núu nì xindecu-í díhna. ⁶³ Te espíritú ndécú ndíhi yiqui cuñú-ó, xíáⁿ ndécá ñaha-xi xii-o, te núu ñá túú xíáⁿ, te yiqui cuñú-ó ñà túú nàndíhi-xi. Dico núu nchaa tnúhu càháⁿ-í-a quée-xi iní-ndó ñá, te quini-ndó ñá xéhé candeca ñaha-xi xii-ndo núu cuaháⁿ núú vèxi. ⁶⁴ Te dava nchòhó chi ñá túú sàndáá iní-ndó —càchí-gá xáhaⁿ-gá xíi-yu.

Te ducaⁿ nì xáhaⁿ-gá chi sa nàha-gá nándi cùu ñáyíu vâ quindáá iní ñáhá xii-gá. Te ducaⁿ sà naha-gá ndèdacaá téé cuáha cuendá ñáhá xii-gá núú cuè téé cùu úhú iní ñáhá. ⁶⁵ Te ní xáhaⁿ tucu Jesús xii-yu:

—Te duha càháⁿ-í chi sa ní cachí tnúhu-í xii-ndo sá vâ yòo ìⁿ cuiní tnií tnúhu-í te núu ñá túú Tàtá-í Dútú Ndiòxí sánú ichi ñaha-gá xíi-yu —càchí-gá xáhaⁿ-gá xíi-yu.

⁶⁶ Te òré-áⁿ Ìo vâi ñáyíu nchicúⁿ ñáhá xii-gá ní xócòo-yu ñá ní xica cuu-gá-yu ndíhi-gá. ⁶⁷ Te xíáⁿ ní xáhaⁿ Jèsús xii ndi ùxúú cue téé xica cuu ndíhi-gá:

—¿Cuini-ndó dàndóo ñaha-ndo tnàhá-ndó-áⁿ? —càchí-gá xáhaⁿ-gá xii-güedé.

⁶⁸ Te ní xáhaⁿ tē Xímú, àdi Pelú chi úú díu-dé:

—Mèstrú, ñá túú-gá ndèé quíhíⁿ-ndí, chi nchúhú náhá-ndí sá tnúhu mee-n cùu-xi sá vâha candeca-xi iní-ndí ni caa ni quíhíⁿ.

⁶⁹ Chi nchúhú sa ní sàndáá iní ñáhá-ndí xii-n chi nàha-ndí sá yòhó cúú-n Crístú Déhe Dútú Ndiòxí yaá ndécú àndiu —cachí-dé xáhaⁿ-dè xii-gá.

⁷⁰ Te ní xáhaⁿ Jèsús:

—Nàha-ndo sá yùhú ní cáháⁿ ñáhà-í xii ndi ùxúú-ndó xica cuu ndíhi ñaha-í xii-ndo, dico ìⁿ-ndo quíhu ñaha yùcu ñávâha xii-ndo —càchí-gá xáhaⁿ-gá xii-güedé.

⁷¹ Duha ní cáháⁿ Jèsús cuendá té Júdás déhe té Xímú Iscarioté ìⁿ téé ñùtnahá núú ùxí ìⁿ cue téé xica cuu ndíhi-gá, chi sa nàha-gá sá tē-áⁿ cuáha cuendá ñáhá-dè xii-gá ìⁿ nduu núú cuè téé cùu úhú iní ñáhá.

7

Cue ñaní Jèsús ñá túú sàndáá iní-güedé nàcuáa nduu tnúhu càháⁿ-gá

¹ Te sáta dúcáⁿ nì cuu, te ní xica cuu Jèsús distritú Galiléa, te ñá ní sàháⁿ-gá distritú Júdeá, chi yàcáⁿ cuini cue téé isràél cahni ñaha-güedé xii-gá ní cùu. ² Te ní cuyatni nduu càdá-yu vico, vico sá dánani-yu Vico Vehe Tnuvixiⁿ. ³ Te ní xáhaⁿ cuè ñaní Jèsús xii-gá:

—Vâha-gá quíhíⁿ-n distritú Júdeá te vâ cündecu-n iha, chi yàcáⁿ cada-n nchàa sá quidé-n iha cuendá quini nchaa ñáyíu cündíhi ñaha xii-n ndecu yacáⁿ. ⁴ Chi núu cuini-ó quini nchaa ñáyíu ná chiúⁿ cada-o te vâ càdá dáyuhu-o. Te yòhó cuéhé núú sá quidé-n, te cada-n na quini nchaa ñáyíu —càchí-güedé xáhaⁿ-güedé xii-gá.

⁵ Ducaⁿ nì cáháⁿ cue ñaní-gá, chi ni mèe-güedé ñá túú sàndáá iní-güedé nàcuáa nduu tnúhu càháⁿ-gá. ⁶ Te ní xáhaⁿ Jèsús xii-güedé:

—Vátá tnàhá-gá òré quíhíⁿ-í dico nchòhó ndèdani càa oré cuu quíhíⁿ-ndó. ⁷ Chi nchaa ñáyíu ñùhu ichi cuehé ichi duha chi ñá túú cùu úhú iní ñáhá-yu xii nchòhó. Dico yùhú chi cùu úhú iní ñáhá-yu xii-í cuendá sá càháⁿ-í sá quidè-yu nchaa sá cuéhé sá dúhá. ⁸ Te chí cuaháⁿ nchòhó vico chi yùhú vâ quíhíⁿ-ni-í chi vátá tnàhá-gá òré quíhíⁿ-í —càchí-gá xáhaⁿ-gá xii-güedé.

⁹ Te ducaⁿ nì xáhaⁿ-gá te ní ndóo-gá Galiléa, te cue téé-áⁿ cuaháⁿ-güedé.

Jèsús ndécú-gá ìⁿ vico chìñuhú-yu Yá Ndiòxí

¹⁰ Dico sáta cuaháⁿ cue ñaní-gá, te ní xica-gá cuaháⁿ-gá tnàhá-gá dicó-ni sá dáyuhu cuaháⁿ-gá. ¹¹ Te ñáyíu isràél ñáyíu xindecu vico nànducú-yu Jèsús, te xitnàhá-yu:

—¿Ndèé ndécú Jèsús? —càchí-yu xitnàhá-yu.

¹² Te nchaa ñáyíu xindecu vico xíndatnúhu-yu cuendá-gá. Te davá-yu xitnàhá-yu sá Ìo vâha iní-gá, te davá-yu xitnàhá-yu sá ñá díú tē vâha cùu-gá, chi dàndahú-gá ñáyíu.

¹³ Dico mee-ni xicáháⁿ náhí-yu, chi xíyùhú-yu cue téé cùnuu núú-yu.

¹⁴ Te ta ngúhuⁿ dava vico, te cuánguihu Jèsús veñúhu càhnu sá Ìo cùnuu, te ní

ngúíta-gá dácuaaha-gá ñáiyu. ¹⁵ Te ñáiyu is-ràél ní cuñúhu vihi-yu sá ïo váha càháⁿ-gá, te ní xítñàhá-yu:

—¿Ná cuèndá ïo váha ñuhu-tu díquí tée-a tnúhu càháⁿ-dé te ñá túu ní dácuaaha-dé-í? —càchí-yu xítñàhá-yu.

¹⁶ Te ní xáhaⁿ Jèsús:

—Ná díu cuèndá mèe-í cúu-xí sá dánèhé ñàhá-í xii-ndo, chi cuèndá Dútú Ndiòxí Yaá ní tendaha ñàha xii-í véxi-í cúu-xí. ¹⁷ Te núu ïo dava-ndo ní yuhu ní iní-ndó cuini-ndó càda-ndo nacuaa cuini Yá Ndiòxí cunduu, te cutnùni ndáá iní-ndó sá tnúhu dácuaaha ñàha-í xii-ndo, cùu-xi cuèndá méé Dútú Ndiòxí, te ñá díu cuèndá mèe-í cúu-xí. ¹⁸ Te tée cuini sá cáda càhnu ñàha ñáiyu xii-dé, tée-án càháⁿ-dé nacuaa véxi iní méé-dé. Dico yúhu cuini-í sá cáda càhnu-yu Dútú Ndiòxí Yaá ní tendaha ñàha xii-í véxi-í ñuyúú-a, te càháⁿ ndáá-í te ñá túu dácuan-dehnde-í.

¹⁹ Te ndí Moisés ní taxi ndí tnúhu sá sánú ichi ñàha xii-ndo nacuaa cundecu-ndo, te ni dùcaⁿ ñá túu sàndáá iní-ndó nacuaa càháⁿ tnúhu-án. ¿Te ná cuèndá cuini-ndó càhni ñàha-ndo xii-í? —càchí-gá xáhaⁿ-gá xii-yu.

²⁰ Te ní xáháⁿ-yu xii-gá:

—Yucu ñávàha dàcoto ñàha xii-ó, chi vá yoo ìⁿ cuini càhni ñàha xii-n —càchí-yu xáháⁿ-yu xii-gá.

²¹ Te ní xáhaⁿ Jèsús xii-yu:

—Sá ní quide-í ìⁿ sá vǎ yoo tnàhí ndàcu cada nduu cuu-xi nduu ndetatú-ó, xiáⁿ ïo ní cuñúhu ñàha-ndo xii-í. ²² Te ndí Moisés ní càchí ndí sá cuàha-yu sèñá ñii cue landú tée, dico ñá díu mèe ndí ni càhu iní ndí chi ducaⁿ tnàhí ní xoo cada cue ñani tnàhá-ó dàvá-án, núu xiáⁿ nchòhó sàha-ndo sèñá ñii landú tée cuèi cùu-xi nduu ndetatú-ó. ²³ Te ducaⁿ quide-ndo cuèndá sá ñá túu nǎ cumání-ndó núu tnúhu sá sánú ichi ñàha xii-ndo ní dándoo ndí Moisés. ¿Te ná cuèndá cúdèéⁿ-ndó núu-í sá ní quide tátña-í tée cùhú nduu ndetatú-ó-í? ²⁴ Te váha váha cada cuèndá-ndó, te vá cuèndá-ni càháⁿ-ndó sá yúhú ndècuéchi-í chi ñá túu xini-ndó —càchí-gá xáhaⁿ-gá xii-yu.

Jèsús xáhaⁿ-gá xii-yu núu véxi-gá

²⁵ Te dava ñáiyu ñuu Jerusálén ní ngúíta-yu xítñàhá-yu:

—¿Ná ñá díu tée-án nánducu-güedé càhni-güedé?, ²⁶ núu ná-dé núnñi núu chítú núu tàcá-án càháⁿ-dé, te vá yoo cùyii cùñaha xii-dé ìⁿ tnúhu. Cudana te cue tée cùchiuⁿ sandáá iní-güedé sá díu-dé cúu-dé Cristú Yaá ní tendaha Yá Ndiòxí véxi ñuyúú-a. ²⁷ Dico nchoo xini-ó ndèè ichi véxi tée-án, dico Cristú ná quixi-gá chi vá yoo ìⁿ quini ndèè ichi quixi Yaá-án —càchí-yu xítñàhá-yu.

²⁸ Te yíhi Jesús xití veñúhu càhnu sá ïo cùnuu danehe-gá ñáiyu, te ní tecú dóho-gá tnúhu càháⁿ-yu. Te níhi ní càháⁿ-gá, te xáhaⁿ-gá xii-yu:

—¿Ná quini-tu nchòhó ndèè ichi véxi yúhú! Yúhú véxi-í dico ñá díu sá cúu ìni mèe-í, chi Yá Ndiòxí Yaá quidé nchàa-ndí túhú sá váha ní tendaha ñàha-gá xii-í véxi-í, te nchòhó ñá túu xini-ndó-gá. ²⁹ Te yúhú xini-í-gá chi núu ndécú-gá ní quee-í véxi-í, te diu mee-gá ní tendaha ñàha-gá véxi-í —càchí-gá xáhaⁿ-gá xii-yu.

³⁰ Te sá dúcáⁿ ní càháⁿ-gá, núu cuini-güedé tñii ñàha-güedé xii-gá quíhíⁿ-gá vecaá ní cùu, dico vá yoo ìⁿ ni cùyii tñii ñàha xii-gá chi vátá sàá-gá òrè tñii ñàha-güedé. ³¹ Dico vǎ-yu ní sàndáá iní ñàháⁿ-yu xii-gá, te ní xítñàhá-yu:

—¿Nágá cúu sá cáda Cristú ná quixi-gá-í?, te tée-a ïo cuéhé núu sá tá quide-dé véxi. Váa diu tée-a cùu-dé Cristú Yaá ní tendaha Yá Ndiòxí véxi ñuyúú-a —càchí-yu xítñàhá-yu.

Cue tée cùu fariséu cuini-güedé quíhíⁿ Jèsús vecaá

³² Te ní níhi cue tée cùu fariséu tnúhu nacuaa càháⁿ ñáiyu cuèndá Jèsús, núu ní ndatnúhu-güedé ndíhi cue dítú cùnùu, te ní techiuⁿ-güedé cue tée quide cuèndá veñúhu cuáháⁿ-güedé cuátnii ñàha-güedé xii-gá ní cùu. ³³ Te ní xáhaⁿ-gá xii-güedé:

—Sacú duha nduu cundecu ndíhi ñàha-í xii-ndo, te núhú tucu-í núu ndécú tǎta-í Yaá ní tendaha ñàha xii-í véxi-í ñuyúú-a. ³⁴ Te cuèi na nànducu ñàha-ndo dico vá ná níhi ñàhá-ndó chi vá sàá-ndó núu cùndecu-í —càchí-gá xáhaⁿ-gá xii-güedé.

³⁵ Te ní ngúíta ñáiyu isràél xítñàhá-yu:

—¿Ndèè quíhíⁿ-tu tée-a te vá ná níhi-ó-dé-í? ¿Adi quíhíⁿ-dé na chitnahá-dé ñáiyu isràél ñáiyu nchitènuu nchaa ñuu

xicá cuendá danèhé-dé ñáiyu grègú? ³⁶ ¿Nása càháⁿ-tu-dé duha càháⁿ-dé: “Nanducu ñaha-ndo te vá námihí ñáhá-ndó chi vá sáá-ndó núú cùndècu-í”, càchí-tu-dé? —càchí-yu xítñàhá-yu.

Nàcuáa cada Espíritú Yá Ndióxi iní-ó

³⁷ Te nduu nǐ yáha-ná vico cùu-xi nduu cahnu vihi, te nduu-áⁿ nǐ ngúnu tñí Jèsús tnuú ñáiyu, te nihi ní cáháⁿ-gá, te xáhaⁿ-gá xii-yu:

—Núu íó dava-ndo yichí-ndó ndùte, te quixi-ndo núu-í, te coho-ndo. ³⁸ Duha càháⁿ-í chi nchaa ñáiyu na quíndáá iní ñáhá xii-í, te cada-xi iní-yu dàtná ñⁿ núú xicá ndùte, nchaa-ni nduu xica ñá túú yichí, ducaⁿ càda-xi iní-yu núú cuaháⁿ núú véxi dàtná càháⁿ-xi núú tütú Yá Ndióxi —càchí-gá xáhaⁿ-gá xii-yu.

³⁹ Te ducaⁿ nǐ cáháⁿ-gá cuendá sá quíxi Espíritú Yá Ndióxi ngúndecu ndihi nchaa ñáiyu na quíndáá iní ñáhá xii-gá, chi sáá nduu ndaa-gá andiu càda cahnu ñaha Tátá-gá xii-gá, te dàvá-áⁿ te quixi Espíritú Yá Ndióxi cundecu ndihí-yu.

Ñá ní cùu ñⁿnuú-yu cuendá tnúhu ní cáháⁿ Jèsús

⁴⁰ Te dava ñáiyu ní xíndedóho tnúhu ní cáháⁿ Jèsús ní xítñàhá-yu:

—Ndáá sá tée-a cùu-dé tée càchí-yu quixi cáháⁿ tnúhu Yá Ndióxi —càchí-yu xítñàhá-yu.

⁴¹ Te dava tucú-yu xítñàhá-yu:

—Tée-a cùu-dé Cristú Yaá ní tendaha Yá Ndióxi véxi ñuyú-a —càchí-yu xítñàhá-yu.

Te dava-gá tucú-yu xítñàhá-yu:

—¿Náa ndaa distritú Galiléa quixi Cristú Yaá tendaha Yá Ndióxi quixi ñuyú-a? ⁴² Chi núú tütú Yá Ndióxi càchí-xi sá Cristú Yaá tendaha Yá Ndióxi quixi ñuyú-a cuu-gá ñⁿ ñani tnáhá ndí Dàví, te quee-gá ñuu Belén ñuu méé ndí Dàví, duha càháⁿ-xi núú tütú Yá Ndióxi —càchí-yu xítñàhá-yu.

⁴³ Te xíáⁿ núu ñá ní cùu ñⁿnuú-yu cuendá Jèsús. ⁴⁴ Te davá-yu cuini-yu tñí-yu Jèsús quíhíⁿ-gá vecaá ní cùu, dico ní ñⁿ-yu ñá túú ní cùyíⁿ-yu tñí ñáhá-yu xii-gá.

Cue tée cùchiuⁿ ñá túú sàndáá iní-güedé Jèsús

⁴⁵ Te cue tée cuaháⁿ tñí ñaha xii Jèsús ní cùu ní ndexio-güedé núú cuè tée cùu

fariséu ndihi núú cuè dútú cúnuu. Te xáhaⁿ cuè tée cúnuu-áⁿ:

—¿Ná cuendá ñá ní càndeca-ndo tée-áⁿ quixi? —càchí-güedé xáhaⁿ-güedé.

⁴⁶ Te cue tée ní sáháⁿ chiúⁿ ní xáhaⁿ-güedé:

—Ni ñⁿ tée ñá túú xini-ndí cáháⁿ dàtná cáháⁿ tée-áⁿ —càchí-güedé xáhaⁿ-güedé.

⁴⁷ Te ní xáhaⁿ cuè tée cùu fariséu:

—¿Náa tnáhá nchòhó ní sàndáá iní-ndó tnúhu ndehnde càháⁿ tée-áⁿ? ⁴⁸ ¿Náa ñá túú xini-ndó sá ní ñⁿ cue tée tàxi tnuni nchúhú, te ní ñⁿ nchúhú cue tée cùu fariséu ñá túú sàndáá iní-ndí tée-áⁿ ñá? ⁴⁹ Nchaa ñáiyu tùha ñaha xii tée-áⁿ ñá túú sàndáá iní-yu nàcuáa càháⁿ tnúhu sá sánú ìchi ñaha xii-o, dico cuíta nihnú-yu sá dúcáⁿ quidé-yu —càchí-güedé xáhaⁿ-güedé xii cue tée-áⁿ.

⁵⁰ Te té Nicòdemú tée ní sáháⁿ niú ní ndatnúhu-dé ndihi Jèsús cúu-dé tnáhá-dé ñⁿ tée fariséu, te ní xáhaⁿ-dè xii-güedé:

⁵¹ —Tnúhu sá sánú ìchi ñaha xii-o nacuaa cundecu-o càchí-xi sá ndéé cundedóho-o nása càháⁿ tée tàú cuéchi cuendá cut-núni iní-ó ñá ní quide-dé, te dàtnúni cáháⁿ-ó núu ndisa ndècuéchi-dé àdi ñá túú ndècuéchi-dé —càchí-dé xáhaⁿ-dè.

⁵² Te ní xáhaⁿ-güedé:

—Cùu ní cachí sá tnáhá-ó cúu-n tée distritú Galiléa núu ducaⁿ càháⁿ-n. Dacuàha tutú yódó tnúni tnúhu Yá Ndióxi te quini-n nàcuáa càháⁿ-xi sá ní ñⁿ tée véxi distritú Galiléa ñá túú càháⁿ-dé tnúhu Yá Ndióxi —càchí-güedé xáhaⁿ-güedé.

⁵³ Ducaⁿ te ndí dííⁿ cuànuhú-güedé vehe-güedé.

8

Ñⁿ ñadìhí ndécú vihi cuéchi-xi

¹ Te Jèsús cuaháⁿ-gá yucu Òlvú. ² Te sátá ní túndaá nduu tnéé, te cuaháⁿ tucu-gá veñúhu cahnu sá ío cúnuu. Te ío cuéhé ñáiyu ní chítú nìhnú-yu núu-gá, te ní ngóo-gá ní dánèhé ñáhá-gá xii-yu. ³ Te ní quexio cue tée dàcuaha ñaha xii-yu nchaa tnúhu ní chidó tnúni ndí Moisés, ndihi cue tée cùu fariséu, te ndèca-güedé ñⁿ ñadìhí ní sáá, te ñaha-áⁿ ní xini ñáhá-yu càháⁿ ndihi-aⁿ ñⁿ tée dico ñá díú yíⁿ-aⁿ cuu-dé, te ní sanutñí ñaha-güedé xii-aⁿ tnuú nchaa ñáiyu xíndecu núú Jèsús. ⁴ Te ní xáhaⁿ-güedé xii Jèsús:

—Mèstrú, ñadìhí-a ní xíní ñáhá ñáyyiu xii-aⁿ cáháⁿ ndihi-aⁿ ìⁿ tée dico ñá díú yí-aⁿ cuu-dé. ⁵Te tnúhu ní chídó tnùnì ndíí Moisés càchí-xi sá yúu cahni-o nchàa ñáyyiu ðíhí duha quíde. Te yòhó, ¿nása càchí-n cùnduu-i? —càchí-güedé xáhaⁿ-güedé xii-gá.

⁶Duha ní cáháⁿ-güedé chi cuendá sá cuiní-güedé coto ndeé ñáhá-güedé xii-gá núu nása cáháⁿ-gá cuendá núcóo nchihi ñaha-güedé xii-gá ní cáháⁿ-güedé. Te ní ngúnu ndeyí-gá te ní nguíta-gá téé-gá ndíhi díquí ndáhá-gá lètrá núu ñúhú. ⁷Te xicáⁿ tnúhú-ní tucu-güedé núu-gá núu ní ndonehe núu-gá, te ní xáhaⁿ-gá:

—Ndédani cãa nchóhó te núu ñá túú nã cuéchi quíde-ndo te díhna nuu-gã-ndó chí cuáha-aⁿ yúú —càchí-gá xáhaⁿ-gá xii-güedé.

⁸Te ní ngúnu ndeyí tucu-gá téé tucu-gá lètrá núu ñúhú. ⁹Te sá dúcáⁿ ní xáhaⁿ-gá xii-güedé te ní ndixi túu inf-güedé sá ñá túú quíde váha mee-güedé tnàhá-güedé, núu da ìⁿ da ìⁿ-güedé ní ndee, te díhna-gá cue tée cùu sacuéhé ñí ndee te ní nguíta nchicúⁿ dava-gá-güedé. Te sátá ñí ndíhi-güedé ní ndee, te ní quendóo mee-nã Jèsús ndíhi ñadìhí-áⁿ. ¹⁰Te ní ndonehe núu Jèsús te ní xíní-gá sá ñí ndíhi-güedé cuáháⁿ te mee-nã ñadìhí-áⁿ ñí ndóo-aⁿ, te ní xáhaⁿ-gá xii-aⁿ:

—¿Ndèndi cuáháⁿ cue tée càchí sá ñí quíde-n cuéchi? ¿Ni ìⁿ-güedé ñá ní cùndee tnúhu-güedé quíhíⁿ-n castíu-va? —càchí-gá xáhaⁿ-gá xii-aⁿ.

¹¹Te ní xáhaⁿ-aⁿ xii Jèsús:

—Ñáhá, chí ní ìⁿ-güedé ñá ní ndàcu-güedé —càchí-aⁿ xáhaⁿ-aⁿ.

Te ní xáhaⁿ Jèsús:

—Te ní yúhú vá dáquíhíⁿ ñàhá-í castíu xii-n. Te vitna te núhú-n te vá cáda-gã-n nãndi sá cuéhé sá díhú —càchí-gá xáhaⁿ-gá xii-aⁿ.

Jèsús dándixi túu-gá iní-ó

¹²Te ní cáháⁿ tucu Jèsús núu ñáyyiu, te xáhaⁿ-gá xii-yu:

—Yúhú cùu-í dàtná ìⁿ ñuhú dáyehe-í ñuyúú-a, te nchaa ñáyyiu na chitnahá ñáhá xii-í, te vá cùndècu-gá-yu ichi cuéhé ichi duha, chí yúhú dándixi túu-í inf-yu cuendá cutnùnì inf-yu nàcuáa ndúu cuendá Yá

Ndióxi, te cundecu-í ndíhí-yu ní caa ní quíhíⁿ —càchí-gá xáhaⁿ-gá xii-yu.

¹³Te ní xáhaⁿ cué tée cùu fariséú xii-gá:

—Medíi-n caháⁿ-n sã cùu-n tée váha, te vá yòo ìⁿ-gá chíndee tnúhu ñaha xii-n núu ná tée cùu-n, dico xiãⁿ ñá túú nãndíhí-xi —càchí-güedé xáhaⁿ-güedé xii-gá.

¹⁴Te ní xáhaⁿ Jèsús:

—Cuéi cãháⁿ-í cuendá mèe-í dico nãndíhí tnúhu cãháⁿ-í. Chí yúhú ñaha-í ndéé ichi véxi-í, te xíní-í ndéé ichi núhú-í, dico nchóhó chí ñá túú xíní-ndó ndéé ichi véxi-í, te ní ñá túú xíní-ndó ndéé ichi quíhíⁿ-í. ¹⁵Te nchóhó chí cuendá-ni cãháⁿ-ndó cuendá ñáyyiu núu quíde váha-yu àdi ñá túú quíde váha-yu. Te yúhú ñá túú cãháⁿ-í cuendá ñáyyiu núu quíde váha-yu àdi ñá túú quíde váha-yu. ¹⁶Àdi núu cãháⁿ-í dico ìⁿ tnúhu ndáá cãháⁿ-í chí ñá díú-ní mèe-í cãháⁿ, chí tnàhá Tãtà-í Yáá ní tendaha ñaha xii-í véxi-í ñuyúú-a cãháⁿ-gá chíndee tnúhu ñaha-gá xii-í. ¹⁷Te tnúhu sá sánú ichi ñaha xii-ndo càchí-xi sá núu na cundecu úu cue tée cáháⁿ ndáá-güedé nàcuáa cùu ìⁿ sá cùndáá, te núu ìⁿ-ni tnúhu na cãháⁿ-güedé ndi ndúu-güedé te xiãⁿ nãndíhí-xi, duha càchí tnúhu-áⁿ. ¹⁸Te ðiu-ni ducaⁿ cùu-xi yúhú chí cãháⁿ-í ìⁿ tnúhu ndáá sá cùu-xi mèe-í, te ðiu-ni dàtná cãháⁿ-í cãháⁿ Tãtà-í Yáá ní tendaha ñaha xii-í véxi-í ñuyúú-a —càchí-gá xáhaⁿ-gá xii-güedé.

¹⁹Te ní xáhaⁿ-güedé xii-gá:

—¿Te ndéé ndécú Tãtà-n-í? —càchí-güedé xáhaⁿ-güedé.

Te ní xáhaⁿ Jèsús:

—Te núu dicó xíní-ndó yòo cuu yúhú-á te ducaⁿ te quiní-ndó Tãtà-í. Te ní yúhú ñá túú xíní-ndó yòo cuu-í núu xiãⁿ ñá túú xíní-ndó Tãtà-í —càchí-gá xáhaⁿ-gá xii-güedé.

²⁰Duha ní cáháⁿ Jèsús nini dàcuaha-gá ñáyyiu xití veñúhu núu ndécú àlcanciá díhúⁿ. Te vá yòo ìⁿ ní cùyíhí tnií ñaha xii-gá chí vátá sáa-gá òrè tnií ñaha-güedé.

Ñáyyiu ñá túú sãndáá iní ñáhá xii Jèsús vá ndácú-yu quíhíⁿ-yu núu núhú-gá cundecu-gá

²¹Te ní xáhaⁿ tucu Jèsús xii-güedé:

—Yúhú núhú-í te nanducu ñaha-ndo te vá nãníhí ñáhá-ndó, te cuú-ndó núu yíca cuéchi-ndo, chí vá ndácú-ndó sãá-ndó núu núhú-í cundecu-í —càchí-gá xáhaⁿ-gá xii-güedé.

²² Te ní xítñàha cue tée isràél:

—¿Te náa cahni-dé meé-dě nõu cächí-dé sá vǎ ndácú-ó sǎá-ó nõú quíhí-dé-ǎn? — cächí-güedé xítñàha-güedé.

²³ Te ní xáhaⁿ Jèsús xii-güedé:

—Nchòhó chi cue tée ñuyú-a cùu-ndo, núu ío ñuhu iní-ndó sǎ ìò ñuyú-a. Te yúhú chi tée núu ñnu cùu-í nõu xíǎⁿ ñá túú sǎ ìò ñuyú-a ñuhu iní-í. ²⁴ Te xíǎⁿ nõu cächí-í sá cùú-ndó nõú yíca cuèchi-ndo, chi ñá cuini-ndó quíndáá iní-ndó sǎ yúhú véxi cuuⁿ-í andiu, te núu xíǎⁿ ñu-í nõú yíca cuèchi-ndo cùú-ndó —cächí-gá xáhaⁿ-gǎ xii-güedé.

²⁵ Te ní xícaⁿ tnúhú-güedé núu-gǎ, te xáhaⁿ-güedé:

—¿Te ná cùú yòhó nõu ducaⁿ cǎháⁿ-n-í? —cächí-güedé xáhaⁿ-güedé xii-gǎ.

Te ní xáhaⁿ-gǎ:

—Sa ní cächí tnúhu-í xii-ndo ndéé díhna —cächí-gá xáhaⁿ-gǎ xii-güedé.

²⁶ Te xáhaⁿ tucu-gǎ:

—Ndècu cuéhé tnúhu cǎháⁿ-í cada ndáá-í cuèndá nchòhó. Te Tǎtà-í Yáá ní tendaha ñaha xii-í véxi-í ñuyú-a cǎháⁿ-gǎ tnúhu ndáá, te tnúhu cǎháⁿ yúhú ñuyú-a cùu-xi tnúhu ní cǎháⁿ-gǎ ní xíndedóho-í —cächí-gá xáhaⁿ-gǎ xii-güedé.

²⁷ Te mee-güedé ñá túú ní tècú tnúni-güedé sá cuèndá Dútú Ndiòxí ní cǎháⁿ Jèsús. ²⁸ Te ní xáhaⁿ-gǎ xii-güedé:

—Òré ná cǎtá cǎa ñaha-ndo xii yúhú Tée cùu ñani tnáhá-ndó nchǎa-ndo núú cùrúxí cahni ñaha-ndo, te òré-ǎⁿ cutnúni iní-ndó yòo cuu-í, te ñá túú quide-í sá cùú ñi meé-í, chi yúhú cǎháⁿ-í nàcuáa ní dánèhé ñáhá Tǎtà-í ²⁹ Yáá ní tendaha ñaha xii-í véxi-í. Te ñu-gǎ ndécú ndíhi ñaha-gǎ xii-í, te ñá túú dàna nihnu ñaha-gǎ chi quide-í nchǎa nàcuáa cùu iní-gǎ —cächí-gǎ xáhaⁿ-gǎ xii-güedé.

³⁰ Te sá dúcáⁿ ní cǎháⁿ-gǎ nõu ío vǎi ñáiyu ní sándáá iní ñáhá xii-gǎ.

Ñáiyu sándáá iní ñáhá xii Yá Ndiòxí ndíhi ñáiyu ndècu ichi cuéhé ichi duha

³¹ Te ní xáhaⁿ Jèsús xii ñáiyu isràél ñáiyu ní sándáá iní ñáhá xii-gǎ:

—Te núu vá dáña ndéè-ndó cǎda-ndo nchǎa nàcuáa cǎháⁿ-í, te cuu ndisa-ndo cué tée tnáhá tnúhu ndíhi-í, ³² te tecú tnúni-gǎ-ndó tnúhu ndáá, te ducaⁿ te cǎcu nihnu-ndo —cächí-gǎ xáhaⁿ-gǎ xii-yu.

³³ Te ní xáhǎⁿ-yu:

—Nchúhú cùú-ndí cue ñani tnáhá ndíi Àbrahám, te ní ñiⁿ nduu ñá túú ndéé sácúndedí nihnu-ndí ndoho tnáhá-ndí nõu cächí-ò sá dàcácu nihnu ñaha-n xii-ndí —cächí-yu xáhǎⁿ-yu xii-gǎ.

³⁴ Te ní xáhaⁿ Jèsús xii-yu:

—Na cächí tnúhu ndáá-í xii-ndo sǎ nchǎa ñáiyu quide nchǎa sá cuéhé sá dúhá tàxi tnúni ñáhá-ñǎ-xi xii-yu. ³⁵ Te cue ñáiyu xinu cuechi te vá cùú ñiⁿ-ná cùú-yu ndíhi ñáiyu dii vèhe-xi xinu cuechi-yu, dico cue déhe ñáiyu dii vèhe-xi-ǎⁿ chi ñiⁿ-ni cùu ndíhi ñaha-güexi xii-yu. ³⁶ Te núu yúhú Yáá cùú Dèhe Yá Ndiòxí dàcácu nihnu ñaha-í xii-ndo nõu nchǎa yíca cuèchi-ndo, te ndáá sá nchòhó cǎcu nihnu ndisa-ndo. ³⁷ Te yúhú sa xini-í sá nchòhó cùú-ndó ñani tnáhá ndíi Àbrahám, te dícó-ni sá ñá tnáhá iní-ndó tnúhu cǎháⁿ-í nõu xíǎⁿ cuini-ndó cahni ñaha-ndo. ³⁸ Te yúhú cǎháⁿ-í nàcuáa ní dánèhé ñáhá Tǎtà-í, te nchòhó quidé-ndó nàcuáa cǎháⁿ tǎtà-ndó —cächí-gǎ xáhaⁿ-gǎ xii-yu.

³⁹ Te ní xáhǎⁿ-yu:

—Ndíi Àbrahám cùú tǎtà-ndí —cächí-yu xáhǎⁿ-yu xii-gǎ.

Te ní xáhaⁿ Jèsús:

—Núu ndisa ñani tnáhá ndíi Àbrahám cùú-ndó, te cada-ndo nàcuáa ní xóo cada ndíi ni cùu. ⁴⁰ Te yúhú cuéi cǎháⁿ-í ñiⁿ tnúhu ndáá nàcuáa cǎháⁿ Yá Ndiòxí cächí tnúhu-gǎ xii-í, te cuini-ndó cahni ñaha-ndo. ¡Dico ndíi Àbrahám chi ñá túú dùcaⁿ ni quide ndíi! ⁴¹ Te nchòhó quidé-ndó nàcuáa quide tǎtà-ndó —cächí-gǎ xáhaⁿ-gǎ xii-yu.

Te ní xáhǎⁿ-yu:

—Nchúhú, ñá túú yàyacáⁿ ndécú tǎtà-ndí, chi ñiⁿndíi Yá Ndiòxí cùú tǎtà-ndí —cächí-yu xáhǎⁿ-yu xii-gǎ.

⁴² Te ní xáhaⁿ Jèsús:

—Núu dícó Yá Ndiòxí ndisa cùu Tǎtà-ndó te cuu iní ñáhá-ndó xii-í ní cùu chi yúhú ní quee-í núu ndécú-gǎ véxi-í ñuyú-a. Te ñá túú véxi-í sá cùú ñi meé-í, chi mee-gǎ ní tendaha ñaha-gǎ véxi-í. ⁴³ Te ñá túú tècú tnúni-ndó tnúhu cǎháⁿ-í chi ñá túú tnáhá iní-ndó. ⁴⁴ Te nchòhó chi tǎtà-ndó cùu yucu ñávaha núu cùdíi iní-ndó quide-ndo nchǎa nàcuáa cùu iní-xi, chi ndéé òré ní ngáva ñuyú ducaⁿ-ni ndècu-xi dacǎháⁿ-xi iní-ndó sǎhni tnaha-ndo. Te ñá ñiⁿ ndúu cǎháⁿ-xi

ɪ̃nⁿ tnúhu ndáá chi ñá túú xica-xi ichi ndáá, chi mee-ni ichi tnúhu ndehnde xica-xi chi ducaⁿ ñní-xi. Te ðiu-xi ðacahu-xi ñní-ndó ðacuandehnde-ndo. ⁴⁵ Te yúhú cãháⁿ-í tnúhu ndáá te ñá túú cuini-ndó quindáá ñí ñáhá-ndó. ⁴⁶ ¿Te ndëdacã nchóhó xini-ndó sã quidë-í ñíⁿ sã cuèhé sã dúhá-í?, te yúhú ñá túú ná quidë-í chi cãháⁿ ndáá-í, ¿te ná cuëndá ñá túú cuini-ndó quindáá ñí-ndó tnúhu cãháⁿ-í? ⁴⁷ Te nchaa ñáyiú ndëcu ichi Yá Ndióxi, ñáyiú-ãⁿ sãcúndedóho-yu nchaa tnúhu cãháⁿ-gá. Te nchòhó chi ñá díú ichi Yá Ndióxi ndécú-ndó núu ñá túú sãcúndedóho-ndo tnúhu cãháⁿ-gá — cãchí-gá xáhaⁿ-gã xii-yu.

Díha-gá Cristú sa ndëcu ðacúúxi ndí Æbrahám

⁴⁸ Te ní xáhaⁿ ñáyiú isràèl:

—Váha-ni cãháⁿ-ndí sã tée samaritánú cúu-n, te yucu ñávãha ndëcu ndíhi-n — cãchí-yu xãháⁿ-yu xii-gá.

⁴⁹ Te ní xáhaⁿ Jèsús:

—Yúhú, ñá túú yucu ñávãha ndëcu ndíhi-í, chi Tãtà-í quidë cãhnu-í, te nchòhó da cuu úhú ñí ñáhá-ndó xii-í — cãchí-gá xáhaⁿ-gã xii-yu.

⁵⁰ Te xáhaⁿ tùcu-gá:

—Yúhú, ñá túú cãchí-í sã cáda cãhnu ñaha-ndo, dico Dútú Ndióxi cuini-gá sã cáda cãhnu ñaha-ndo xii-í. Te mee-gã cãháⁿ-gá núu ndëdacãa-ndo quide váha, te ndëdacãa-ndo ñá túú quide váha. ⁵¹ Te na cãchí tnúhu ndáá-í xii-ndo sã nchaa ñáyiú na tñi tnúhu cãháⁿ-í te vá cuíta nihnú-yu — cãchí-gá xáhaⁿ-gã xii-yu.

⁵² Te ní xáhaⁿ tùcu ñáyiú isràèl:

—Vitna te ní xini ndáá-ndí sã yùcu ñávãha ndëcu ndíhi-n, chi ndí Æbrahám ndíhi nchaa cue tée ní xóo cãháⁿ tnúhu Yá Ndióxi ndéé sanaha ní xihí-güedé, te yòhó cãchí-tu-n sã ncháá ñáyiú na tñi tnúhu cãháⁿ-n te vá cúu-gá-yu. ⁵³ ¿Náa ío-gá cãhnu cuu-ó ðacúúxi ñaní tñáhá-ndí ndí Æbrahám-ãⁿ? Tée-ãⁿ dai ní xihí-dé ndíhi cue tée ní xóo cãháⁿ tnúhu Yá Ndióxi ndéé sanaha. ¿Te yòhó nágá-tu cuu-n te vá cúu-n cãháⁿ-n-í? — cãchí-yu xãháⁿ-yu.

⁵⁴ Te ní xáhaⁿ Jèsús:

—Te núu ðicó mée-í quidë cãhnu-í mée-í ñá, te ñá túú nãndíhi sã quidë-í núu ducaⁿ. Dico Tãtà-í quidë cãhnu ñaha-gá xii-í, te ðiu-ni Yaá-ãⁿ cãchí-ndó cuu Ndióxi-ndó.

⁵⁵ Te nchòhó chi ñá túú xini-ndó-gã. Te yúhú chi xini-í-gá. Te núu na cãchí-í sã ñá túú xini-í-gá te ðacuandehnde-í ðàtná ndehnde mée-ndo. Te yúhú chi xini ndisa-í-gá te tñi-í nchaa tnúhu cãháⁿ-gá. ⁵⁶ Te ndí Æbrahám ñaní tñáhá-ndó ñí xini-ndécu ndéé sanaha ío ní cudí ñí ndí sã quini ñáhá ndí xii-í, te ní sáa nduu ñí xini ñáhá ndí xii-í núu ío ní cudí ñí ndí — cãchí-gá xáhaⁿ-gã xii-yu.

⁵⁷ Te ní xáhaⁿ ñáyiú isràèl xii Jèsús:

—Ni vãtà cãhúⁿ-gã-n ùdico úxí cuáⁿ-n te cãchí-n sã ñí xini-n ndí Æbrahám, te ní cunaha vihi ní xihí ndí-ãⁿ — cãchí-yu xãháⁿ-yu xii-gá.

⁵⁸ Te ní xáhaⁿ Jèsús:

—Te na cãchí tnúhu ndáá-í xii-ndo sã cãmáni-gã cundecu ndí-ãⁿ ñuyú-a te yúhú sa ndëcu-gá-í — cãchí-gá xáhaⁿ-gã xii-yu.

⁵⁹ Te sã dúcãⁿ ñí cãháⁿ-gá núu xíãⁿ ní quehéⁿ-yu yúu cuãha ñáhá-yu xii-gá ní cuu, te ní nguívãha-gá núu-yu te ní quee-gá xití veñúhu cuãháⁿ-gá.

9

Jèsús quidë tãtna-gá ñíⁿ tée cuáá

¹ Te núu xíca cuu Jesús ní naníhí-gã ñíⁿ tée cuáá, te sa ducaⁿ tñáhí cãa núu-dé ní cacu-dé. ² Te ní xáhaⁿ cuè tée xica cuu ndíhi-gá xii-gá:

—Mestrú, ¿ná cuëndá ðacãⁿ cuáá tée-ãⁿ ní cacu-dé? ¿Sã cuëndá nchaa yíca cuèchi tãtà-dé, ãⁿ sã cuëndá nchaa yíca cuèchi nãná-dé, ãⁿ sã cuëndá nchaa yíca cuèchi mee-dé ðacãⁿ cáá-dé ní cacu-dé? — cãchí-güedé xáhaⁿ-güedé xii-gá.

³ Te ní xáhaⁿ Jèsús:

—Ni ñá díú sã cuëndá nchaa yíca cuèchi mee-dé, te ni ñá díú sã cuëndá nchaa yíca cuèchi tãtà-dé, te ni ñá díú sã cuëndá nchaa yíca cuèchi nãná-dé, chi mee Yá Ndióxi ní cuini-gá sã dúcãⁿ cundecu-dé sáá-dé ñuyú-a cuëndá sã ñuyú-a quini ñáyiú nása cada ñaha Yá Ndióxi xii-dé ndúha núu-dé. ⁴ Te vitna ío-gá nduu cùyica sã cáda-í nchaa chiúⁿ ní táhú Yáá ní tendaha ñaha xii-í véxi-í ñuyú-a, chi sáa nduu te vá ndácú-gã-í cada-í chiúⁿ-gá. ⁵ Te nini ndëcu-gá-í ñuyú-a te ðãndixi túu-í ñí nchaa ñáyiú cuëndá cutnùni ñí-yu nãcuáa nduu cuëndá Yá Ndióxi — cãchí-gá xáhaⁿ-gã xii-güedé.

⁶ Te sáta dúcáⁿ ní cáháⁿ-gá, te ní sati-gá díí-gá núú ñúhú te ní dácá-gá luha ñuhu ní cuáha ndéhyú, te ndéhyú-áⁿ ní dácánùu-gá ndúú xio núú tée cuàá-áⁿ. ⁷ Te ní xáhaⁿ-gá xii-dé:

—Quíhíⁿ-n nàquete-n núú-n ndùte tanquí Silòé —càchí-gá xáhaⁿ-gá xii-dé. Te Silòé-áⁿ quée-xí tñúhu mèè-yu: Tée xica chiuⁿ.

Te ní sáháⁿ tée cuàá-áⁿ ní naquete-dé núú-dé, te òré ní ndexio-dé te sa ndèhe-dé. ⁸ Te nchaa ñáyiú ndècu yatni núú ndécú-dé ndíhi nchaa ñáyiú ximí ñáhá xii-dé núú xicáⁿ ndáhú-dé ní xitnàhá-yu:

—¿Náa ñá díú tée-áⁿ ní xóo cácaⁿ ndáhú-dé? —càchí-yu xitnàhá-yu.

⁹ Te davá-yu càchí-yu sá díú-dé, te davá-yu càchí-yu sá ñá díú-dé, dico ducaⁿ càa-dé, càchí-yu xitnàhá-yu.

Dico mee-dé ní xáhaⁿ-dè xii-yu sá díú-dé.

¹⁰ Te ní xicáⁿ tñúhú-yu núú-dé, te xáháⁿ-yu:

—¿Náa ní cuu núú ní ndúha núú-n ndèhe-n vitna? —càchí-yu xáháⁿ-yu xii-dé.

¹¹ Te ní xáhaⁿ-dè:

—Tée nàni Jesús-áⁿ ní cadúha-dé luha ndéhyú te ní dácánùu-dé núú-í, te ní táuchíúⁿ-dè ní sáháⁿ-í tanquí Silòé ní naquete-í núú-í, te òré-áⁿ ní cuu cundehe-í —càchí-dé xáhaⁿ-dè xii-yu.

¹² Te ní xicáⁿ tñúhú tucú-yu núú-dé, te xáháⁿ-yu:

—¿Te ndèé ndécú tée-áⁿ? —càchí-yu xáháⁿ-yu xii-dé.

Te ní xáhaⁿ-dè:

—Náa túú xini-í —càchí-dé xáhaⁿ-dè xii-yu.

Cue tée cùu fariséú ndátñúhu-güedé ndíhi tée ní ndúha núú-xi

¹³ Te ndèca-güedé tée ní ndúha núú-xi-áⁿ cuáháⁿ núú cuè tée cùu fariséú. ¹⁴ Te cuendá sá ndúu ndetatú-yu ní cadúha Jesús ndéhyú ní dácánùu-gá núú tée-áⁿ te ní ndúha, ¹⁵ xíáⁿ núú ní xicáⁿ tñúhú cuè tée cùu fariséú núú-dé, te xáhaⁿ-güedé:

—¿Náa ní cuu ní ndúha núú-n? —càchí-güedé xáhaⁿ-güedé xii-dé.

Te ní xáhaⁿ-dè xii-güedé:

—Íⁿ tée ní dácánùu-dé ndéhyú núú-í te ní sáháⁿ-í ní naquete-í, te ní cuu ndèhe-í vitna —càchí-dé xáhaⁿ-dè xii-güedé.

¹⁶ Te dava cue tée cùu fariséú ní xitnàha-güedé:

—Náa díú Yá Ndióxi ní tèndaha ñaha-gá xii tée-áⁿ véxi-dé núu duha quide-dé nchaa sá vǎ yóo tñàhi ndacu cada, te ñáa túú sàndáá iní-dé canehé íf-dé nduu ndetatú-ó —càchí-güedé xitnàha-güedé.

Te dava-güedé ní xitnàha-güedé:

—¿Náa ndacu-dé cada-dé sá vǎ yóo tñàhi ndacu cada te núu cùu-dé tée yicá cuèchi? —càchí-güedé xitnàha-güedé.

Te ñáa túú ní cuu íⁿnuu-güedé tñúhu ní cáháⁿ-güedé. ¹⁷ Te ní xicáⁿ tñúhú tucu-güedé núú tée ní ndúha núú-xi-áⁿ, te xáhaⁿ-güedé:

—Te yóhó, ¿náa càchí-n cuendá tée ní quide tátna núú-n te ní ndúha? —càchí-güedé xáhaⁿ-güedé xii-dé.

Te ní xáhaⁿ-dè:

—Yúhú càchí-í sá íⁿ tée cáháⁿ tñúhu Yá Ndióxi cúú-dé —càchí-dé xáhaⁿ-dè xii-güedé.

¹⁸ Dico cue tée israhél ñáa ní sàndáá iní-güedé sá cuàá-dé ní cùu, chi cuendá sa ní ndúha núú-dé ní xini ñáhá-güedé, te xíáⁿ núu ní cana-güedé tátá-dé ndíhi náná-dé, ¹⁹ te ní xicáⁿ tñúhú-güedé núú-yu, te xáhaⁿ-güedé:

—¿Diu tée-a déhe-ndo tée càchí-ndo cuàá-dé ní cacu-dé-áⁿ? ¿Te náa ní cuu ní ndúha núú-dé? —càchí-güedé xáhaⁿ-güedé xii-yu.

²⁰ Te ní xáhaⁿ tátá-dé ndíhi náná-dé:

—Diu déhe-ndí cúú-dé te sa cuáá ndisa-dé ní cacu-dé, ²¹ dico ñáa túú xini-ndí náa ní cuu ní ndúha núú-dé, te ni ñáa túú xini-ndí yoo ní quide tátna. Chí càcáⁿ tñúhú núú mée-dé xíáⁿ núu sa sàcuéhé-dé, te na cáháⁿ-dé núu náa ní cuu ní ndúha núú-dé —càchí-yu xáháⁿ-yu xii-güedé.

²² Duha ní cáháⁿ tátá-dé ndíhi náná-dé ní xáháⁿ-yu xii-güedé cuendá sá yuhú-yu cue tée cùnno núú ñáyiú israhél, chi cue tée-áⁿ sa ní ndatnúhu-güedé ní cuu íⁿnuu-güedé sá núu ndèdacàa ñáyiú na cáháⁿ sá Jesús cúú-gǎ Cristú Yáa ní tendaha Yá Ndióxi véxi ñuyú-a, te vǎ dáña-gǎ-güedé quíhu-yu veñúhu. ²³ Núu xíáⁿ ní xáhaⁿ tátá-dé ndíhi náná-dé sá ná càcáⁿ tñúhú-güedé núú mée-dé chi sa sacuéhé-dé.

²⁴ Te xíáⁿ núu ní cana tucu-güedé tée ní ndúha núú-xi-áⁿ, te ní xáhaⁿ-güedé:

—Cáháⁿ-n ìⁿ tnúhu ndáá chi Yá Ndiòxí ndéhé ndíi-gá nàcuáa ní cuu ní ndúha núu-n, chi nchúhú xìní-ndí sá dicó ìⁿ tée ndècu yíca cuèchi-xi cùu tée càchí-n ní quide tátna núu-n —càchí-güedé xáhaⁿ-güedé xii-dé.

²⁵ Te ní xáhaⁿ-dè:

—Yúhú, ñá túú xìní-í te núu tée ndècu yíca cuèchi-xi cùu-dé àdi ñáhá. Dicó-ni sá xìní-í sá cuàá-í ní cùu te vitna ní cuu cundehe-í —càchí-dé xáhaⁿ-dè xii-güedé.

²⁶ Te ní xícáⁿ tnúhú tucu-güedé núu-dé, te xáhaⁿ-güedé:

—¿Nása ní quide ñaha-dè xii-n te ní ndúha núu-n-í? —càchí-güedé xáhaⁿ-güedé xii-dé.

²⁷ Te ní xáhaⁿ-dè:

—Yúhú sa ní cáháⁿ-í te ñá túú quide cuendá-ndó. ¿Te ná cuendá cuiní-ndó càchí tnúhu-ni tucu-í? ¿Á tnàhá-ndó cuiní-ndó quindáá iní-ndó tnúhu cáháⁿ-dè? —càchí-dé xáhaⁿ-dè xii-güedé.

²⁸ Te ní cudééⁿ-güedé núu-dé, te ní xáhaⁿ-güedé xii-dé:

—Te núu yòhó cuiní-n chinchícúⁿ-n tée-án te cuàháⁿ, dico nchúhú chi canchícúⁿ nihnu nahi-ni-ndí nàcuáa ní cáháⁿ ndíi Moisés. ²⁹ Te nchúhú chi ñaha-ndí sá Yá Ndiòxí ní cáháⁿ ndíi-gá ndíi Moisés, dico tée càchí-n-án chí ni ñá túú xìní-ndí ndéé tée cùu-dé —càchí-güedé xáhaⁿ-güedé xii-dé.

³⁰ Te ní xáhaⁿ tée ní ndúha núu-xi-áⁿ:

—¿Te náa ñá díú nchòhó càchí-ndó sá ïo túha-ndo? Te núu ducaⁿ cáháⁿ-ndó sá ñá túú xìní-ndó ndéé tée cùu-dé, te díu-dé ní quide tátna-dé núu-í ní ndúha —càchí-dé xáhaⁿ-dè xii-güedé.

Te xáhaⁿ tucu-dé:

³¹ —Xiní-ó sá Yá Ndiòxí ñá túú tédóho-gá tnúhu cáháⁿ ñáiyu quide nchaa sá cuèhé sá dúhá, chi nchaa ñáiyu quide cahnu ñaha xii-gá te quidé-yu nchaa nàcuáa cùu iní-gá, te ñáiyu-án tédóho-gá tnúhu cáháⁿ-yu. ³² Te ñá ìⁿ ndùu cáháⁿ ñáiyu cuendá ìⁿ tée cada tátna núu ìⁿ ñáiyu cuàá ndéé ní cacu-xi te ndúha. ³³ Te núu ñá díú mèe Yá Ndiòxí ní tëndaha ñaha-gá xii tée-án véxi-dé ñá, te vá ndácú-dé cada tátna-dé núu-í ní cùu —càchí-dé xáhaⁿ-dè xii-güedé.

³⁴ Te ní xáhaⁿ-güedé:

—Dico yòhó ndéé yatni vai cuèchi sa ta quide-n véxi, ¿te vitna nacanú ichi

ñaha-n xii-ndí cáháⁿ-n-án? —càchí-güedé xáhaⁿ-güedé xii-dé.

Te ní queñuhu ñaha-güedé xii-dé tnuú-güedé ñá túú ní dàña-gá-güedé níhí tnàhá ndíhi ñaha-dé xii-güedé.

Ñáiyu ñá túú ndíxi túu iní cuendá nchaa sá cuèhé sá dúhá quidé-yu

³⁵ Te ní níhí Jèsús tnúhu sá ní queñuhu-güedé tée ní cuhú núu-xi-áⁿ tnuú-güedé cuendá sá vã tnàhá tnúhu ndíhi ñaha-gá-dé xii-güedé, te ní nanihí ñáhá-gá xii-dé te ní xáhaⁿ-gá:

—¿Sàndáá iní-n Dèhe Yá Ndiòxí-án? —càchí-gá xáhaⁿ-gá.

³⁶ Te ní xáhaⁿ tée ní cuhú núu-xi-áⁿ:

—Mèstrú, cachí tnúhu núu ndéé ndécú tée-án cuendá quindáá iní-í-dé —càchí-dé xáhaⁿ-dè xii-gá.

³⁷ Te ní xáhaⁿ Jèsús:

—Sa xìní-n-dé chi díu-dé cúu yúhú tée ndàtnúhu ndíhi-n —càchí-gá xáhaⁿ-gá xii-dé.

³⁸ Te ní nguíñí xítí-dé núu-gá, te ní xáhaⁿ-dè:

—Xítóhó Jesucristú, sàndáá iní ñáhá-í xii-n —càchí-dé xáhaⁿ-dè xii-gá.

³⁹ Te ní xáhaⁿ tucu Jèsús:

—Yúhú véxi-í ñuyúú-a cada ndáá-í cuèchi ñáiyu. Te nchaa ñáiyu ñá túú quide váha cùu-yu dàtná ìⁿ ñáiyu cuàá, dico nchaa ñáiyu cùtnuní iní-xi sá ñá túú quide váha, te núu na quindáá iní-yu tnúhu cáháⁿ-í, te cada iní-ndó sá dàtná sá ní nacaáⁿ núu-yu chí tní-yu tnúhu cáháⁿ-í. Te ñáiyu càchí sá quidé váha vá núu núu-yu cuèchi-yu chí quesáhá-yu sá ïo ndáá quidé-yu, ñáiyu-án cúu-yu dàtná ìⁿ ñáiyu cuàá, chí vá ndíxí túu iní-yu sá ñá túú quide váha-yu ndécú-yu, te vá tní-yu tnúhu cáháⁿ-í —càchí-gá xáhaⁿ-gá xii-dé.

⁴⁰ Te sá dúcáⁿ ní cáháⁿ-gá, núu ní cáháⁿ ìⁿ úú cue tée cùu fariséú, te xáhaⁿ-güedé:

—¿Te náa tnàhá nchúhú cuàá-ndí cáháⁿ-n-án? —càchí-güedé xáhaⁿ-güedé xii-gá.

⁴¹ Te ní xáhaⁿ Jèsús:

—Te núu dicó nchòhó cuàá-ndó ñá, te vá cùndècu cuèchi-ndo ní cùu, dico càchí-ndó sá ndéhé-ndó ìⁿ sá quidé-ndó te ñá ndáá, núu xíáⁿ ïo ndècu cuèchi-ndo.

10

Jèsús càháⁿ-gá cuèndá cùrrálí mbéé

¹ Te na càchí tnúhu ndáá-í xii-ndo sá ìⁿ téé ñá túú quíhu ndáa yuyehe ìⁿ cùrrálí mbéé, te cùtexínu-ni na cuìdó-dé, téé-áⁿ cúú-dé ñádúhú. ² Dico téé quíhu ichi yèhe cùrrálí-güedi, téé-áⁿ cúú-dé xitohó-güedi. ³ Te téé ndèé yèhe cùrrálí-güedi ñacaáⁿ-dé te cuánguihu xitohó-güedi te ní cáháⁿ-dé, te ní nucúhuⁿ ndudú ñáhá-güedi xii-dé. Te ní cáháⁿ díú-dé-güedi te ní queñuhu-dé-güedi cùrrálí. ⁴ Te sátá ní quee-güedi cùrrálí, te ní ngódó núú-dé núú-güedi, te ní nguíta nchicúⁿ ñáhá-güedi xii-dé chi ní nucúhuⁿ ndudú ñáhá-güedi. ⁵ Te ñá túú chinchicúⁿ-güedi ìⁿ téé tàtú, chi nucúhuⁿ ndudú-güedi sá ñá díú xitohó-güedi cùu-dé, núu xíáⁿ xínú-güedi núú-dé — càchí-gá xáhaⁿ-gá xii-güedé.

⁶ Duha ní cáháⁿ Jèsús cuèndá sá cuìní-gá dacuahá-yu tnúhu-gá ní núu, dico ñá ní təcú tñuní-yu nása ndùu tnúhu ní cáháⁿ-gá.

Jèsús cúú-gá dàtná ìⁿ toli

⁷ Te ní xáhaⁿ tucu Jèsús xii-güedé:

—Na càchí tnúhu ndáá-í xii-ndo sá yúhu cùu-í dàtná ìⁿ yèhe cùrrálí núu ndíhu cue mbéé. ⁸ Te ncha cue téé sa yòdo nuu-gá ní quixi ní dándáhú-güedé ñáiyu cùu-güedé dàtná ñádúhú dùhu-güedé cue mbéé ní cùu, dico ñá ní quide cuèndá ñáhá-güedi xii-güedé, chi ní cutnùní iní-güedi sá ñá díú xitohó-güedi cùu-güedé. ⁹ Te yúhú cùu-í dàtná yuyèhe cùrrálí cue mbéé. Te ducaⁿ sàtnahá-xi cùu-í chi ncha ñáiyu na tùha ñaha xii-í te naníhí tàhú-yu. Te cùu-yu dàtná cue mbéé quiti xiquee cùrrálí-xi cuáháⁿ-güedi núu cáá ité caxi-güedi, te dàtnùní cuándihu-ná-güedi cùrrálí, ducaⁿ sàtnahá-xi cùu-yu.

¹⁰ Ñádúhú òré véxi-dé chi dùhu-dé, sàhni-dé te dànaa-dé mbéé, dico yúhú chi véxi-í cuèndá sá naníhí tàhú-ndó te ío cudíí iní-ndó cunu cùechi-ndo núú Dítú Ndióxi ní caa ní quíhíⁿ. ¹¹ Te yúhú cùu-í dàtná ìⁿ toli téé ío nèhe cuèndá mbéé-xi, chi téé-áⁿ cuèí na cùu-dé sá cúu-xí mbéé-dé cuèndá-ñá sá ná càcu-güedi. ¹² Te núu ìⁿ téé na còto ñaha xii-güedi, te téé-áⁿ cuèndá-ni sá ñúhú yáhu-dé xító-dé-güedi. Te núu na quíní-dé sáá ìⁿ quiti dééⁿ te

dàña-dé-güedi xínu-dé, te ndíhi-güedi xité nuu ñaha quiti dééⁿ-áⁿ, chi ñá díú mèi xitohó-güedi cùu-dé. ¹³ Chi cuèndá-ni sá ñúhú yáhu-dé xító-dé-güedi núu ñá túú ñá ndíhú iní-dé cuèí na dándíhi ñaha quiti cuihna. ¹⁴ Te yúhú cùu-í dàtná ìⁿ téé ío váha xito mbéé-xi, chi téé-áⁿ da ìⁿ da ìⁿ-dí xíní-í-dé nacuáa ndáa-dí, te ducaⁿ xini ñáhá-güedi xii-dé. Te ducaⁿ sàtnahá-xi cùu yúhú ndíhi ncha ñáiyu sàndáá iní ñáhá xii-í, chi yúhú xíní-í-yu te ducaⁿ mèe-yu xini ñáhá-yu xii-í.

¹⁵ Te ñu-ni ducaⁿ cùu-í ndíhi Tàtá-í, chi xini ñáhá-gá xii-í te xini-í-gá. Te sáá nduu cùu-í cuèndá ncha ñáiyu sàndáá iní ñáhá xii-í. ¹⁶ Te ndècu-gá ñáiyu vátá quíndáá iní ñáhá-gá xii-í. Te xini ñuhu-xi cund-edóho-yu tnúhu-í te quíndáá iní ñáhá-yu cuèndá ìⁿ-ñá ichi cuú-yu, te ducaⁿ cùndecu ìⁿ-ná téé coto ñaha xii-yu cuu-dé dàtná ìⁿ tólí-yu, te téé coto ñaha xii-yu-áⁿ cúu yúhú.

¹⁷ Te Tàtá-í ío cudíí iní ñáhá-gá xii-í cuèndá sá sáá ìⁿ nduu te cuú-í, te cuú-í chi ducaⁿ càchí iní-í, te ñá díú sá cúu iní ñáiyu ñuyúí-a cuú-í, te cuú-í dico ndoto-í. ¹⁸ Te vá yóo ìⁿ te ndacu cahni ñaha xii-í, te núu ñá díú sá cúu iní mèe-í cuú-í. Te dàtná-ni cùu iní-í sá cùu-í te ñu-ni ducaⁿ ndòto-í chi ducaⁿ ní cachi Tàtá-í Dítú Ndióxi cunduu — càchí-gá xáhaⁿ-gá xii-güedé.

¹⁹ Te sá dúcáⁿ ní cáháⁿ-gá te ñá ní cùu ìⁿ-nuu tucu ñáiyu isràél. ²⁰ Te davá-yu ní xitnahá-yu:

—¿Ná cuèndá sàndáá-tu iní-ndó tñuhu càháⁿ téé-áⁿ, te yucu ñávàha ndècu ndíhi-dé, lùcú téé-áⁿ? —càchí-yu xitnahá-yu.

²¹ Te davá-yu ní xitnahá-yu:

—¿Náa xini-ndó ìⁿ téé ndècu ndíhi yucu ñávàha duha váha càháⁿ-dé? ¿Náa xini-ndó núu ndacu yucu ñávàha cada tátna-xi núu ìⁿ téé cuàá te ndúha? —càchí-yu xitnahá-yu.

Ñáiyu isràél dáquèe tíhü-yu Jèsús

²² Te ndí tnahá cuía ndádá càhnú-yu vico veñuhu càhnu sá ío cùnuu ñuu Jerusalén, te mei yóo quíde vixiⁿ-xi quíde-yu vico-áⁿ. ²³ Te corrèdór veñúhu-áⁿ nání-xi Sàlomón, te xíáⁿ xíca cùu Jèsús. ²⁴ Te ní chítú nínhu ñáiyu isràél núu-gá, te ní xáháⁿ-yu:

—¿Ná ndéé òrè cachí tñúhu ndáá-n, te núu sá Cristú Yáá ní tendaha Yá Ndióxi véxi ñuyú-a cùu-n, ádi ná tée cùu-n?, cáháⁿ-ni-n —cachí-yu xáháⁿ-yu xii-gá.

²⁵Te ní xáhaⁿ Jèsús:

—Sa ní cachí tñúhu-í te ñá sàndáá iní-ndó, te ndèhe-ndo sá vái núú sá quidé-í sá ní táuchíúⁿ Tàtà-í cada-í, te cùu-xi ñⁿ sá cútñuní iní-ndó ná tée cùu-í. ²⁶Dico nchòhò ñá sàndáá iní-ndó, chi ñá tóú cùu-ndo ñáyiú ní chitnahá ñáhá xii-í.

²⁷Chi nchaa ñáyiú ní chitnahá ñáhá xii-í cùu-yu dàtná cue mbéé quiti xñdecu ndíhi xítóhó-xi chi núcúhuⁿ ndudú-güedi xí-tohó-güedi, te ducaⁿ nàquiní ñáhá-ní xí-tohó-güedi xii-güedi. Ducaⁿ sãtnahá-xi cùu nchaa ñáyiú ní chitnahá ñáhá xii-í.

²⁸Te yúhú cada-í te nduu táhú-yu cundecu ndíhi ñáhá-yu xii-í ni caa ni quíhíⁿ te vá ñⁿ nduu-gá cuíta nihnú-yu, te ni vã yóo ñⁿ ndacu naquendeé ñáhá xii-yu ndaha-í.

²⁹Chi Tàtà-í ní taxi cuèndá ñáhá-gã xii-yu. Te ío cùnuu-gá núu xíáⁿ vá yóo ñⁿ ndacu naquendeé ñáhá xii-yu ndaha-gã. ³⁰Yúhú ndíhi Tàtà-í Dútú Ndióxi ñⁿ-ni cùu-ndí —cachí-gã xáhaⁿ-gã xii-yu.

³¹Te ní queheⁿ tucu ñáyiú isràél yúú cuáha ñáhá-yu xii-gá ní cùu.

³²Te ní xáhaⁿ-gã xii-yu:

—Ío cuéhé sã vãha ní quide-í núú-ndó ní chindee ñaha Tàtà-í Dútú Ndióxi. ¿Te ndè-dacàa sá ñá tnahá iní-ndó núu cuini-ndó cuáha ñaha-ndo yúú xii-í-í? —cachí-gã xáhaⁿ-gã xii-yu.

³³Te ní xáhaⁿ ñáyiú isràél:

—Ñá díú cuèndá nchaa sã vãha ni quide-n cuini-ndí cuáha ñaha-ndí yúú xii-n, chi ñⁿ ñi-ni sá ío cãháⁿ úhú-n cuèndá Yá Ndióxi. Te dicó ñⁿ tée ñuyú-a cùu-n te cãchí-n sã cùu-n Ndióxi —cachí-yu xáháⁿ-yu xii-gá.

³⁴Te ní xáhaⁿ Jèsús:

—Núú tütú Yá Ndióxi sá ndécú ndíhi-ndo cáháⁿ-xi nàcuáa ní cáháⁿ-gã, te duha ní cachí-gã: “Nchòhò quidé-ndó núu-í”, duha ní cachí-gã. ³⁵Te ñaha-o sá vã cùú quèhndé nihnu-o tñúhu yódo tñuní núú tütú Yá Ndióxi, chi mee-gã ní cachí-gã sá cádá-yu núú-gã, te vá cãchí-ó sã ñá ndáá. ³⁶Te núu ducaⁿ ní cáháⁿ-gã sã núú-gã quidé nchaa ñáyiú ní sàndáá iní ñáhá xii-gã ñá, ¿te ná cuèndá cúdèéⁿ-ndó núú yúhú sá cachí-í sá cùu-í Déhe-gã? Te mee Yá Ndióxi

ní tendaha ñaha-gã xii-í véxi-í ñuyú-a sá cádá-í chiúⁿ-gã. ³⁷Te núu ñá tóú quide-í nàcuáa ní táuchíúⁿ Tàtà-í cada-í ñá, te vá quèndáá iní ñáhá-ndó. ³⁸Te núu quide-í ñá, te cuéi vá quèndáá iní ñáhá-ndó xii mee-í dico quèndáá iní-ndó nchaa chiúⁿ quide-í. Ducaⁿ te cutñuní ndáá iní-ndó sã Yá Ndióxi ndécú ndíhi-í te ñⁿ-ni cùu-ndí —cachí-gã xáhaⁿ-gã xii-yu.

³⁹Te ní cuini-güedé tñí ñaha tucu-güedé xii-gã quíhíⁿ-gã vècaá ní cùu, dico ní xinu núú ñáhá-gã xii-güedé.

⁴⁰Te ní xica-gã cuáháⁿ-gã ndaa ingá xio yúte Jòrdán núú ní xóo dacuandute ndí Juáá ñáyiú ndéé díhna, yácáⁿ ní xñdecu-gã. ⁴¹Te yácáⁿ ío vãi ñáyiú ní sáháⁿ ní cáháⁿ ndíhi ñaha xii-gã, te ní xítñahá-yu:

—Ndí Juáá, cuéi ñá tóú ní quide ndí sá vã yóo tñahí ndacu cada dico ndáá ní cáháⁿ ndí, chi dàtná-ni ní cáháⁿ ndí quide tée-a —cachí-yu xítñahá-yu.

⁴²Te yácáⁿ ío vãi-yu ní sàndáá iní ñáhá-yu xii-gã.

11

Ní xíhí té Lázaru

¹Núú Bètaniá ní xñdecu ñⁿ tée ní xí-nani-dè Lázaru. Te càhú víhí ní tnahá-dé ní cuhú-dé, te ní xñdecu ndíhi-dé cue cùha-dé tá Màriá ndíhi tá Màrta chi xíáⁿ ñúu-yu. ²Te tá Màriá-áⁿ cùu-xí xíchí ní sódo àcítí sáháⁿ tñámí sáhá Jèsús, te ní nadayíchí-xi sáhá-gã ndíhi idi díquí-xi. Te cuèndá sá cùhú cùha-yu té Lázaru, ³núú ní tendàhá-yu ñáyiú ñaha tñúhu cuáháⁿ núú Jèsús, te xáháⁿ-yu xii-gã:

—Mèstrú, tée ío cùu iní-n ío càhú tñahá-dé cùhú-dé —cachí-yu xáháⁿ-yu xii-gã.

⁴Te sá dúcáⁿ cãa tñúhu ní sáá, núú ní xáhaⁿ Jèsús xii-yu:

—Dico cuéhé-ãⁿ chi vá cùu-dé sá cùú dúcáⁿ-dè, chi Yá Ndióxi cuini-gã sá quini-yu nchaa sá cádá-gã cuèndá chiñuhu ñáhá-yu xii-gã, te diu-ni ducaⁿ chiñuhu ñáhá-yu xii yúhú Déhe-gã —cachí-gã xáhaⁿ-gã xii-yu.

⁵Te cuéi ío cùu iní ñáhá Jèsús xii té Lázaru ndíhi cue cùha-dé ⁶dico òrè ní nihí-gã tñúhu, te ní cuyaa-gã úú-gã nduu núú ndécú-gã. ⁷Te ní xáhaⁿ-gã xii cue tée xica cuu ndíhi-gã:

—Na quihíⁿ tucu-o distritú Júdeá — cächí-gá xáhaⁿ-gã xii-güedé.

⁸Te ní xáhaⁿ cuè téé xica cuu ndihi-gá xii-gá:

—Mèstrú, vitna-ni cuiní cue téé isràél xindecu yacáⁿ cuáha ñaha-güedé xii-n yúú ní cùu, ¿te cuiní-ni tucu-n quihíⁿ-n-ú? — cächí-güedé xáhaⁿ-güedé xii-gá.

⁹Te ní xáhaⁿ Jèsús:

—Úxúú òré cúú ìⁿ nduu, te núu nduu na càca cuu-o, te ñá túú ñã candaundeé-ó chí cùtnuní núú-ó chí ditó. ¹⁰Dico núu niú ná càca cuu-o, te ió ná candaundeé-ó chí vá cùtnuní núú-ó —cächí-gá xáhaⁿ-gã xii-güedé.

¹¹Te ní xáhaⁿ Jèsús:

—Té Lázaruⁿ téé ío váha tñahá tñuhu ndihi-o ní xidí-dé dico quihíⁿ-ó chí ndocani-o-dé —cächí-gá xáhaⁿ-gã xii-güedé.

¹²Te ní xáhaⁿ-güedé xii-gá:

—Mèstrú, te núu xidí-dé te váa sa ta ndúha-dé cuáháⁿ —cächí-güedé xáhaⁿ-güedé xii-gá.

¹³Duha ní cáháⁿ Jèsús, chí té Lázaruⁿ sa ní xihí-dé te cue téé xica cuu ndihi-gá ní sani iní-güedé sá ní xidí ndisa-dé. ¹⁴Te Jèsús ní xáhaⁿ ndáá-gá xii-güedé:

—Sa ní xihí té Lázaru. ¹⁵Váha-gá sá ñã ní sáháⁿ-í quíngoto-í-dé, chí ndècu ingá chiúⁿ cada-í quiní-ndó, te quíndáá iní ñáhá-gã-ndó xii-í, te vitna na quihíⁿ-ó núú ndécú yìqui cuñú ndí —cächí-gá xáhaⁿ-gã xii-güedé.

¹⁶Te té Mäxi téé xáhaⁿ-güedé cuächí ní xáhaⁿ-dè xii dava-gá-güedé:

—Na quihíⁿ-ó nchàa-o chí yacáⁿ cuú-ó ndihi-dé —cächí-dé xáhaⁿ-dè xii-güedé.

Jèsús càháⁿ-gá sá cuèi na cùú ñáiyu dico ndotó-yu cundecú-yu ndihi-gá

¹⁷Te òré ní sáá Jèsús ñuú Bètaniá, te ní xáhãⁿ-yu sá sà ní cuu cúmí nduu ní xihí té Lázaru. ¹⁸Te ñuú-án cáá yàtni-ni-gá ñuú Jerusalén, dàtná cuádava-ná òré cuhuⁿ-o ichi te saá-ó. ¹⁹Núu xíⁿ vai ñáiyu isràél ní sáháⁿ-yu ní cáháⁿ ndihí-yu tá Märra ndihi cùhú-xi tá Màriá, te ní sáñahá-yu tñuhu ndee iní sá dúcáⁿ ní xihí cùha-yu. ²⁰Te ní níhí tá Märra tñuhu sá ñúú Jèsús ichi cuáhãⁿ-gá núú ndécú-yu núu ní sáhãⁿ-xi ní sátnahá-xi-gá, te cùhú-xi tá Màriá ní ndóo-xi vehe. ²¹Te òré ní nanihí tá Märra Jèsús, te ní xáhaⁿ-xi xii-gá:

—Mèstrú, te núu dícó ní xindecu-n ìha te vá cùú cùha-ndí ní cùu. ²²Te cuèi vitna te núu ná sá ná càcãⁿ-n núú Yá Ndiòxí te taxi-gá xii-n —cächí-xi xáhaⁿ-xi xii-gá.

²³Te ní xáhaⁿ Jèsús:

—Vá ndihú iní-n chí ndoto cùha-n —cächí-gá xáhaⁿ-gã xii-xi.

²⁴Te ní xáhaⁿ tá Märra:

—Ndáá chí sa xini-í sá ndótó-dé ná quítnahá nduu ndòto nchaa ñáiyu ní xihí —cächí-xi xáhaⁿ-xi xii-gá.

²⁵Te ní xáhaⁿ Jèsús:

—Yúhu dandòto-í-yu cuendá cundecú-yu ní caa ní quihíⁿ ná sáá nduu. Te nchaa ñáiyu na quíndáá iní ñáhá xii-í, te cuèi na cùú-yu dico ndotó-yu cundecú-í ndihi-yu ní caa ní quihíⁿ. ²⁶Te nchaa ñáiyu ndècu vívú ñuyúú-a te núu na quíndáá iní ñáhá-yu xii-í, te cundecú ndihi-í-yu ní caa ní quihíⁿ. ¿Sàndáá iní-n tñuhu-a ñã? —cächí-gá xáhaⁿ-gã xii tá Märra.

²⁷Te xáhaⁿ-xi:

—Mèstrú, sàndáá iní-í, te sàndáá tucu iní-í sá díú-n cùu-n Cristú Déhe Yá Ndiòxí, Yáá ní tendaha-gã véxi ñuyúú-a —cächí-xi xáhaⁿ-xi xii-gá.

Jèsús ndàhí-gá núú ñã nguíndüxi té Lázaru

²⁸Sátá dúcãⁿ ní cáháⁿ-xi te ní sáhãⁿ ngana-xi cùhú-xi tá Màriá, te dayuhu ní xáhaⁿ-xi:

—Yacáⁿ ní quexio Mèstrú, te càna ñaha-dé xii-n —cächí-xi xáhaⁿ-xi.

²⁹Te sá dúcãⁿ xáhaⁿ cùhú-tã Màriá sá cáná ñaha Jèsús xii-xi, núu ndihi-ni ní xica-xi cuáhãⁿ-xi núú ndécú-gã. ³⁰Te Jèsús vátá quíhu-gá xití ñuú, chí ndècu-ni-gá núú ñã sáhãⁿ tñahá ñáhá tá Märra. ³¹Te ñáiyu isràél ndécú sáñaha tñuhu ndee iní xii tá Màriá ndihi cùhú-xi ní sani iní-yu sá cuáhãⁿ-xi núú yíndüxi cùha-xi ndáhyú-xi ní cáháⁿ-yu, núu nchicúⁿ-yu-xi cuáhãⁿ.

³²Te ní sáá tá Màriá núú ndécú Jèsús te ní nguíñí xití-xi núú-gã, te xáhaⁿ-xi xii-gá:

—Mèstrú, te núu dícó ní xindecu-n ìha te vá cùú cùha-ndí ní cùu —cachí-xi xáhaⁿ-xi xii-gá.

³³Te sá ní xini Jèsús ndáhyú tá Màriá ndihi ñáiyu isràél nchicúⁿ ñáhá cuáhãⁿ, xíãⁿ fo ní cuyica iní-gá. ³⁴Te ní xáhaⁿ-gã xii-yu:

—¿Ndèé ní taxi ndecu-ndo yìqui cuñú-dé-i? —càchí-gá xáhaⁿ-gǎ xií-yu.

Te ní xáhǎⁿ-yu:

—Mèstrú, néhé ná quíhíⁿ-ó te quíní-n —càchí-yu xáhǎⁿ-yu xii-gá.

³⁵ Te ní ndáhyú-gá tñahá-gá. ³⁶ Te ní xítñàha ñáyíu isràél:

—Súuní cùu iní-dé ndí ni cùu —cachí-yu xítñàhá-yu.

³⁷ Te davá-yu xítñàhá-yu:

—Tée-a ní quide tátna-dé núu tée cuáa te ní ndúha. ¿Te nása ní cuu núu ñá túú ní quide tátna-dé té Lázaru cuendá sá vǎ cuú-dé ní cùu-i? —cachí-yu xítñàhá-yu.

Jèsús dándòto-gá té Lázaru

³⁸ Te ío ní cuyica tucu iní Jèsús òré ní quexìo-gá yuhu yàù núu ní chihi-güedé yiqui cùñú té Lázaru. Te yuhu yàù-án ndèdí ìⁿ yúú. ³⁹ Te ní xáhaⁿ Jèsús xií-yu:

—Chí xócàni yúú-ǎⁿ —càchí-gá xáhaⁿ-gǎ xií-yu.

Te ní xáhaⁿ tǎ Márta cúha tée ní xíhí-áⁿ:

—Mèstrú, sa tucu sàháⁿ-dé chi sa ní cuu cúmí nduu sá ní xíhí-dé —càchí-xi xáhaⁿ-xi xii-gá.

⁴⁰ Te ní xáhaⁿ Jèsús:

—¿Náa ñá díú ní cachí-í sá núu na quíndáa iní-n, te quíní-n sǎ ío càhnu cuu Yá Ndiòxí? —càchí-gá xáhaⁿ-gǎ xii-xi.

⁴¹ Te ní xócání-yu yúú ndèdí yuhu yàù-áⁿ. Te ní ndacoto-gá andíu, te ní xáhaⁿ-gǎ xii Tǎtá-gǎ Dútú Ndiòxí:

—Táu, ndàcáⁿ tǎhù-í núu-n sǎ ní tè-doho-n tñúhu ní cáháⁿ-í. ⁴² Te yúhú sa náha-í sá ncháa-ni òré ndèdóho ñaha-n xii-í, dico ñaha cáháⁿ-í cuendá sá ná təcú dóho nchaa ñáyíu ndècu iha cuendá quíndáa iní-yu sá díú-n ní tendaha ñaha-n xii-í véxi-í ñuyúú-a —càchí-gá xáhaⁿ-gǎ xii Dútú Ndiòxí.

⁴³ Te sátá dúcáⁿ ní cáháⁿ-gá ndihi Yá Ndiòxí, te níhí ní cáháⁿ-gá xáhaⁿ-gǎ xii tée ní xíhí-áⁿ:

—¿Lázaru, tandèe xíaⁿ! —càchí-gá xáhaⁿ-gǎ xii-dé.

⁴⁴ Te ní ndee tée ní xíhí-áⁿ yaú-áⁿ, te ndùtu dóo cuíⁿ ndàha-dé ndihi sáhá-dé, te dàhu tucu ìⁿ dóo núú-dé. Te ní xáhaⁿ Jèsús xií-yu:

—Chí nándaxi-dé te dañà-ndo-dé ná cacá-dé —càchí-gá xáhaⁿ-gǎ xií-yu.

Ndùcu-güedé nàcuáa cada-güedé cahni-güedé Jèsús

(Mt. 26:1-5; Mr. 14:1-2; Lc. 22:1-2)

⁴⁵ Te nchaa ñáyíu nchicúⁿ ñáhá xii tá Màriá cuáháⁿ ío vǎi-yu ní sándáa iní-yu Jèsús sá ní xini-yu nàcuáa ní quide-gá. ⁴⁶ Dico davá-yu ní sáháⁿ-yu núu cuè tée cùu fariséú, te ní caní-yu cuendú núu-güedé nàcuáa ní quide Jèsús. ⁴⁷ Te cue tée cùu fariséú ndihi cue dítú cùnùu ní nat-acá-güedé ní xóo-güedé jùndá, te ní xít-ñàha-güedé:

—¿Nása cada-o?, chi tée-ǎⁿ ío vǎi sá vǎ yóo tñahí ndàcu cada quide-dé. ⁴⁸ Te núu na dañà ío te nchaa ñáyíu quíndáa iní ñáhá-yu xii-dé, te quixi cue tée núu Rómá dangòyo-güedé veñúhu-o te danàa-güedé nchaa ñúú-ó —càchí-güedé xítñàha-güedé.

⁴⁹ Te ìⁿ cue tée-áⁿ nání-dé Caifás, te cùnnu-gá-dé núu ñava-gá cue dítú cuá-ǎⁿ, te ní xáhaⁿ-dè xii-güedé:

—Nchòhó ní lùha ñá túú cùtnuní iní-ndó. ⁵⁰ Te ní ñá sǎha-ndo cuendá sá vǎha-gá tñahá-ó, te núu na cùu ìⁿ-ni tée cuendá nchaa ñáyíu isràél, te ñá díú sǎ dánàa ñaha-güedé xií-yu —càchí-dé xáhaⁿ-dè xii-güedé.

⁵¹ Dico té Caifás chi ñá díú sǎ cùu iní mée-dé ní cáháⁿ-dé, chi cuendá sá cuá-ǎⁿ ní cùnnu-dé núu cuè dítú, núu xíaⁿ Yá Ndiòxí ní dácáhu iní ñáhá-gǎ nàcuáa cáháⁿ-dé sá Jèsús cuu-gá sá cùu-xí nchaa ñáyíu isràél. ⁵² Te ñá díú cuendá mee-ni ñáyíu-áⁿ cuu-gá, chi cuu-gá tñahá cuendá nchaa ñáyíu ní sándáa iní ñáhá xii-gá, ñáyíu nchítenuu nihí ñuyúú, te ìⁿ-ná cuu-yu ndihi-gá. ⁵³ Núu ndéé nduu-ǎⁿ ní ndatnúhu cue tée cùnnu núu ñáyíu isràél nàcuáa cada-güedé cahni-güedé Jèsús.

⁵⁴ Te xíaⁿ núu ñá ní xica cuu-gá Jèsús quíní ñáhá ñáyíu isràél, te ní quee-gá cuáháⁿ-gǎ ñúú Efráin, ìⁿ núu cáa yàtni yucu, yàcáⁿ ní ngúíⁿ-gá ndihi cue tée xica cuu ndihi-gá.

⁵⁵ Te ta ciyatni nduu cadá-yu vico pás-cuá. Te cuéhé ñáyíu ní quee-yu ñúu-yu cuáháⁿ-yu ñúu Jerusalén cuendá sá sà ndihí-yu ncháa-yu nduu íí, te tñahá nduu vico pás-cuá. ⁵⁶ Te yàcáⁿ nándúcú-yu Jèsús ní cùu te ñá túú-gǎ òré-áⁿ, te ní naníhí tñahá-yu xití veñúhu, te xítñàhá-yu:

—¿Nása sàni iní-ndó-í? ¿Quixi Jèsús vico ǎⁿ ñáhá? —càchí-yu xítñàhá-yu.

⁵⁷ Te cue tée cùu fariséu ndihí cue dútú cúnúu sa ní xáhaⁿ-güedě xii ñáyiú sá nùu nděda-ni cáa-yu xini-yu núú ndécú Jèsús te na cáháⁿ-ni-yu cuendá tñi ñaha-güedě xii-gá.

12

ñi ñadihí chíhí-áⁿ Jèsús acití
(Mt. 26:6-13; Mr. 14:3-9)

¹ ñú-gá nduu cùmání tnahá vico pascua, te ní sáháⁿ Jèsús ñúu Bètaniá, ñúu té Lázaru tée ní dándótó-gá. ² Te xíaⁿ ní cadúha-yu sá ní cudini Jesús. Te tá Mäta ní sani-xi cóhó, te té Lázaru yíhí-dě mèsá ndihí Jèsús, ndihí dava-gá-güedě xéxi-güedě. ³ Te tá Mariá nehé-xi cuádava litru acití sáháⁿ tnamí sá ño ndeyáhu, te acití-áⁿ ní cuáha mee-ni yúcu ñárdú, te ní sódó-xi sáhá Jèsús, te ní nadayichí-xi ndihí idi díquí-xi sáhá-gá. Te nihí xití vehe ní xité nuu dicó acití-áⁿ. ⁴ Te té Judás déhe té Ximú Iscarioté ñu-ni ñiⁿ tée xica cuu ndihí-gá, tée cuáha cuendá ñáhá xii-gá núú cuè tée cùu úhú iní ñáhá ní xáhaⁿ-dě xii-gá:

⁵ —¿Ná cuendá ñá ní cuyáhu acití-a sá ùní ciendú díhúⁿ denáriu cuu cuendá ñáyiú ndáhú? —cächí-dé xáhaⁿ-dě xii-gá.

⁶ Dico sá dúcáⁿ ní cáháⁿ té Judás chi ñá díú sá ndísá ñuhu iní-dé ñáyiú ndáhú chi dicó-ni ñiⁿ ñádúhú cúu-dě, chi ñu-dé nehé cuendá-dé díhúⁿ-güedě nchaa-güedě te ní xóo duhu ñaha-dé xii-güedě. ⁷ Te ní xáhaⁿ Jèsús:

—Daña, vá dásátú-n iní xíchí-a na tàxúha nahi-xi acití-a, chi nándihí ndéé òré ná nguñdúxi-í. ⁸ Chi nchòhó chi cuhuⁿ tnahá-ni ñáyiú ndáhú tnuú-ndó, dico yúhú chi vá ncháá nduu cundecu ndihí ñaha-í xii-ndo —cächí-gá xáhaⁿ-gá xii-dé.

Tnahá té Lázaru cuini-güedě cahni ñaha-güedě xii-dé

⁹ Te vai ñáyiú israhél ní níhí-yu tnúhu sá ndécú Jèsús ñúu Bètaniá. Te ní sáháⁿ-yu cuendá quiní-yu-gá, te quiní-yu tnahá té Lázaru tée ní dándótó-gá. ¹⁰ Te cue dútú cúnúu ní ndatnúhu-güedě ní cuu ñiⁿnuu-güedě cuendá sá cáhni-güedě tnahá té Lázaru ní cùu, ¹¹ chi ñu cuendá tée-áⁿ ní cuu cuéhé ñáyiú israhél tá ña ña ni-hnú-yu-güedě cuáháⁿ cuendá sá ní sándáá iní-yu Jèsús.

Jèsús cuanguihu-gá ñúu Jerusálén
(Mt. 21:1-11; Mr. 11:1-11; Lc. 19:28-40)

¹² Te nduu tñé-áⁿ vai ñáyiú ní quexio ñúu Jerusálén cuendá cundecu-yu vico, te ní níhí-yu tnúhu sá Jèsús sáa-gá tnahá-gá cundecu-gá vico-áⁿ, ¹³ núu ní xehndé-yu ndaha yùtnu ñúu, te nehé-yu ní sáháⁿ ní sátnahá ñáhá-yu xii-gá. Te níhí ní cáháⁿ-yu, te cächí-yu:

—Ílo cahnú cuu Yá Ndióxi! Te ducaⁿ-ni Yo cahnú cuu Yaa ní tendaha-gá véxi quindaha ñaha xii-o —duha ní cächí-yu.

¹⁴ Te Jèsús ní níhí-gá ñiⁿ búrru, te yòdo-gá-dí cuáháⁿ. Te ducaⁿ ní cuu chí ní quee ndáa-xi nàcuáa cáháⁿ-xi núú tütú Yá Ndióxi núú cächí-xi:

¹⁵ Vá yùhú nchòhó cue ñáyiú ndècu ñúu Sión,
chi iha véxi tée yìndaha ñaha xii-ndo yodo-dé ñiⁿ búrru.

Duha cächí-xi núú tütú-gá. ¹⁶ Dico cue tée xica cuu ndihí Jesús ñá ní ndacu iní-güedě nàcuáa cáháⁿ-xi núú tütú Yá Ndióxi nàcuáa cada Jèsús. Dico sátá cuándaa-gá andiu càda cahnu ñaha Tátá-gá xii-gá, te ní ndacu iní-güedě sá dúcáⁿ yòdo tnuí nàcuáa cada-gá, te ducaⁿ ní cuu.

¹⁷ Nchaa ñáyiú ní xindecu ndihí Jèsús òré ní dándótó-gá té Lázaru, ya yacáⁿ ní caní-yu cuendú núú ñáyiú nàcuáa ní quide ñaha-gá xii-dé. ¹⁸ Te vai-yu ní sáháⁿ-yu núú ndécú Jèsús cuendá sá ní níhí-yu tnúhu ní quide-gá sá vá yòdo tnahá ndacu cada. ¹⁹ Te cue tée cùu fariséu ní xitñaha-güedě:

—Ní xito-ndo ñá tñúu nándihí sá quidé-ó-vá, chi nchaa ñáyiú ní chinchícúⁿ ñáhá-yu xii-dé —cächí-güedě xitñaha-güedé.

Ñáyiú ñá tñúu cùu ñáyiú israhél nánducú-yu Jèsús

²⁰ Te tnahá ñáyiú ñá tñúu cùu ñáyiú israhél ní sáháⁿ-yu vico ñúu Jerusálén ní quide cahnú-yu Yá Ndióxi. ²¹ Te ñáyiú-áⁿ ní sáháⁿ-yu núú té Lipé tée ñúu Betsaidá, te ñúu-áⁿ yìndèhu-xi distritú Galilea. Te ní xáháⁿ-yu xii-dé:

—Tátá, vá cundèe iní-n cächí tñuhu-n nùu ndéé ndécú Jèsús, chi cuini-ndí cáháⁿ ndihí-ndí-gá —cächí-yu xáháⁿ-yu xii-dé.

²² Te té Lipé ní naníhí-dé té Ndríxi te ní xáhaⁿ-dè nàcuáa cáháⁿ-yu, te ndi ndúu-güedé ní sáháⁿ-güedé ní xáhaⁿ-güedé

xii Jèsús nàcuáa càháⁿ-yu. ²³ Te ní xáhaⁿ Jèsús xii-güedé:

—Vitna ní cuyatni òré cada càhnu ñaha Tàtá-í xii-í, te quini-yu sá ïo càhnu cuu yúhú Tée cuu ñani tñahá-yu nchaá-yu. ²⁴ Te na càhí tñuhu ndáá-í xii-ndo sá núu ñⁿ tatá vá ngává-xí núú ñúhú tēhyú-xi ña, te ñiu-ni ducaⁿ cundu-xi cundecu-xi. Dico ñⁿ tatá ná ngává núú ñúhú xĩnu déhe-xi, te xíáⁿ nádacayá tñahá-xí, te mee-xi tēhyú-xi. ²⁵ Te nchaa ñáyiú ïo ñuhu iní-xi cundecu ñuyúú-a ñá túú ñuhu iní-yu Yá Ndiòxí, te ñáyiú-áⁿ cuíta nihnú-yu. Te nchaa ñáyiú ïo ñuhu iní ñáhá xii Yá Ndiòxí, ñáyiú-áⁿ cundecú-yu ndihí-gá ni caa ni quíhíⁿ. ²⁶ Te nchaa ñáyiú cuini cunu cuechi núú-í xini ñuhu-xi natuha ñahá-yu xii-í, te nduu táhú-yu cundecú-yu núú ñúhú-í cundecu-í. Te nchaa ñáyiú na cunu cuechi núú-í, te cada càhnu ñaha Tàtá-í xii-yu —càhí-gá xáhaⁿ-gá xii-güedé.

Jèsús càháⁿ-gá sá cáhni ñaha-güedé xii-gá

²⁷ Te ní xáhaⁿ tucu-gá:

—Ïo ndihú iní-í. Te cúñaha-í xii Tàtá-í taunihnu ñaha-gá núu dicó sá cúú, dico vá cúú chi cuendá tñahí-a véxi-í —càhí-gá xáhaⁿ-gá xii-güedé.

²⁸ Te ní xáhaⁿ-gá xii Tàtá-gá Dútú Ndiòxí:

—Táu, cada nàcuáa ní sani iní-n cundu cuendá sá ná cadá càhnu ñaha ñáyiú xii-n —càhí-gá xáhaⁿ-gá.

Te ducaⁿ te ní tecú ní cáháⁿ Yá Ndiòxí ndéé andiú, te càhí-gá:

—Sa ní quide-í nàcuáa cachí ñáyiú sá ïo càhnu cuu-í. Te cada tucu-í cuendá cada càhnu ñaha-gá-yu xii-í —càhí Yá Ndiòxí xáhaⁿ-gá xii Déhe-gá.

²⁹ Te nchaa ñáyiú xĩndecu ní tecú dóho-yu ní cáháⁿ-gá, dico ñá túú ní sàni iní-yu sá méé-gá ní cáháⁿ, chi davá-yu ní xitñahá-yu sá ñúhú ní cáháⁿ, te davá-yu ní xitñahá-yu sá ñⁿ espíritú xínú cuèchi núú Yá Ndiòxí ní cáháⁿ. ³⁰ Te ní xáhaⁿ Jèsús xii-yu:

—Ná díú cuendá yúhú ní cáháⁿ Yá Ndiòxí, chi ní cáháⁿ-gá cuendá sá nchòhó cundedòho-ndo. ³¹ Te vitna ní sáá nduu cada ndáá Yá Ndiòxí cuèchi nchaa ñáyiú ñuyúú-a, te ducaⁿ te vá cúmù-gá yucu ñávaha. ³² Te na càta caa ñaha-güedé xii-í núú cùrúxí, te xíáⁿ cuú-í te ñihí-yu tñuhu

ni càa xico ñuyúú, te quindáá iní-yu tñuhu-í —càhí-gá xáhaⁿ-gá xii-yu.

³³ Duha ní cáháⁿ-gá cuendá cutnùni iní-yu nàcuáa ndoho-gá òré cuú-gá. ³⁴ Te ní xáháⁿ-yu xii-gá:

—Nihí-ndí tñuhu sá núú tütú yódó tñuni tñuhu Yá Ndiòxí càháⁿ-xi sá Crístú Yáa tendaha-gá quixi ñuyúú-a cundecu-gá ni caa ni quíhíⁿ. ¿Te yòhó nása càháⁿ-tu-n sá ñⁿ tée cuu ñani tñahá nchaa ñáyiú ñuyúú-a cahni ñaha-güedé núú cùrúxí? Te cachí tñuhu-n ná cúú tēe-áⁿ —càhí-yu xáháⁿ-yu xii-gá.

³⁵ Te ní xáhaⁿ Jèsús:

—Yúhú cuú-í dàtná ñⁿ ñuhú dáyehe ñuyúú-a, dico sacú-ni nduu ndècu ndihí ñaha-í xii-ndo. Te caca-ndo ichi ndáá vitna dàyehe-gá-í núú-ndó chi na cùnee te vá cùtñuni-gá núú-ndó ndéé ichi quíhíⁿ-ndó.

³⁶ Quindáá iní ñáhá-ndó xii-í vitna ndècu ndihí ñaha-gá-í xii-ndo dàndixi túu-í iní-ndó, cuendá cutnùni iní-ndó nàcuáa nduu cuendá Yá Ndiòxí, te cuu-ndo déhe-í —càhí-gá xáhaⁿ-gá xii-yu.

Te sáta dúcáⁿ ní cáháⁿ Jèsús, te ní quee-gá cuaháⁿ-gá ñⁿ núú vá ná ñihí ñahá-yu xii-gá.

Ñáyiú isràel ñá cuini-yu quindáá iní-yu Jèsús

³⁷ Te cuéi ïo vai sá vá yòo tñahí ndàcu cada ní quide Jèsús ní xini-yu, dico ni dùcaⁿ ñá túú ní sàndáá iní-yu-gá. ³⁸ Te ducaⁿ ní quide-yu chi dacuítí ní quee ndáá-xi nàcuáa ní chídó tñuni ndii Chàia ndii ní cáháⁿ tñuhu Yá Ndiòxí ndéé sanaha núú tütú-gá núú càhí-xi:

Yòhó Yáa cúú Xitohó-í, vá yòo ñⁿ sàndáá iní tñuhu càháⁿ-ndí.

Te vá yòo ñⁿ cùtñuni iní-xi sá ïo càhnu cuu-n.

Duha ní chídó tñuni ndii Chàia núú tütú-gá.

³⁹ Te ñá ní sàndáá iní-yu chi ní quee ndáá-xi nàcuáa ní chídó tñuni tucu ndii Chàia núú tütú Yá Ndiòxí nàcuáa cáháⁿ Jèsús:

⁴⁰ Mee Yá Ndiòxí ní quide-gá sá vá tècú tñuni-yu,

chi ní dádàhu ndodo iní ñáhá-gá xii-yu,

chi ïo sáá iní-yu núú ñá ní cuini-gá-yu quindáá iní ñahá-yu xii-gá.

Te ni vá túhá ñahá-yu xii yúhú cuendá dacúcu nihnu-í-yu.

⁴¹ Duha ní chídó tñuni ndii Chàia nàcuáa cáháⁿ Jèsús chi ní xini ndii sá ïo càhnu cuu-gá.

⁴² Te cuèi ducaⁿ nǐ cuu dico titnǐ cue tée cùnūu núú ñáyiū isràèl ní sándáá iní ñáhá-güedè xii-gá. Dico ñá túú ní xóo cáháⁿ ndáá-güedé chi ní xóo yúhú-güedé sá vǎ dáñá-gǎ cue tée cùu fariséú quihu-güedé veñúhu. ⁴³ Chi ní xóo cudíí-gǎ iní-güedé sá cáháⁿ ñáyiū dàcúúxí tñúhu cáháⁿ Yǎ Ndiòxí.

Ñáyiū ñá túú sándáá iní tñúhu Jèsús cuíta nihnú-yu

⁴⁴ Jèsús níhi ní cáháⁿ-gá, te càchí-gá:

—Nchaa ñáyiū na quíndáá iní ñáhá xii-í, te ñá díú-ní mèe-í quíndáá iní-yu, chi tñàhá Tǎtà-í Yáa ní tendaha ñàha xii-í véxi-í ñuyúú-a quíndáá iní-yu. ⁴⁵ Te ñáyiū xini ñáhá xii yúhú xini-yu tñàhá Tǎtà-í. ⁴⁶ Te yúhú véxi-í dandixi túu-í iní ñáyiū ñuyúú-a cuèndá cutnùní iní-yu nàcuáa nduu cuendá Yǎ Ndiòxí, te nchaa ñáyiū na quíndáá iní ñáhá xii-í te vǎ cùndècu-gá-yu ichi cuèhé ichi duha. ⁴⁷ Te núú ió davá-yu ndèdóho-yu nàcuáa cáháⁿ-í te ñá túú tñí-yu tñúhu-í, te ñá díú yúhú dàcuíta nihnú-í-yu, chi ñá túú véxi-í ñuyúú-a sá dàcuíta nihnú-í-yu, chi véxi-í sá dácäcu nihnú-í-yu. ⁴⁸ Te nchaa ñáyiū na cùyíchí iní ñáhá xii-í te ñá túú quide cuendá-yu nàcuáa cáháⁿ-í, te ñáyiū-áⁿ ná sàa nduu te cuíta nihnú-yu chi ñá ní tñí-yu tñúhu ní cáháⁿ-í. ⁴⁹ Te yúhú ñá túú cáháⁿ-í tñúhu véxi iní mèe-í, chi mee Tǎtà-í Yáa ní tendaha ñàha xii-í véxi-í ñuyúú-a ní cachí tñúhu-gá nàcuáa cunduu tñúhu cáháⁿ-í danèhé-í ñáyiū. ⁵⁰ Te yúhú xini-í sá tñúhu ní táuchíúⁿ Tǎtà-í cáháⁿ-í cúú-xí ñíⁿ sá vǎha sá cúú xii-ndo chi nduu táhú-ndó cùndècu-ndo ndíhi-gá nǐ caa nǐ quihⁿ, núú xiǎⁿ cáháⁿ-í nchaa nàcuáa ní táuchíúⁿ-gǎ —càchí-gá xáhaⁿ-gǎ xii-yu.

13

Jèsús náquète-gá sáhá cuè tée xica cuu ndíhi-gá

¹ Te cùmání-gǎ tñahá vico pàscuá, te Jèsús sa ñàha-gá sá sà ní cuyatni òré dándóo-gá ñuyúú-a, te ndaa-gá núú ndécú Tǎtà-gǎ. Te ío ní cuu iní-gá nchaa ñáyiū ní sándáá iní ñáhá xii-gǎ, te ní quide ndisa-gá sá ní cuu iní ñáhá-gǎ xii-yu.

²⁻⁴ Te ní quihu yucu ñvǎha díquí tǎ Jùdás déhe té Xímú Iscarioté, te ní sani iní-dé nàcuáa cada-dé cuáha cuèndá-dé Jèsús núú

cuè tée cùu úhú iní ñáhá xii-gá. Te Jèsús sa ñàha-gá sá méé Yǎ Ndiòxí Yáa cúú Tǎtà-gǎ ní sánaha-gǎ tñúhu ndee iní xii-gá sá cáda-gǎ núú-gǎ, te ñàha-gá sá díú núú Tǎtà-gǎ ní quee-gá véxi-gá ñuyúú-a. Te sáa nduu nàsáa tucu-gá núú Tǎtà-gǎ. Te cùdini Jèsús ndíhi cue tée xica cuu ndíhi-gá ní cùu, te ní ndacuíní-gá yuhu mèsá, te ní taunuu-gá ñíⁿ dóo níhnu-gǎ, te ní queheⁿ-gá ñíⁿ dóo ní dácútú-gá núú yíquí-gǎ. ⁵ Te ní chihi-gá ndute ñíⁿ tiná, te xiáⁿ ní naquete-gá sáhá cuè tée xica cuu ndíhi-gá, te ndíhi dóo ndútú núú yíquí-gǎ-áⁿ ní nadayichí-gá sáhá-güedé.

⁶ Te òré naquete-gá sáhá tǎ Xímú, àdi Pelú, ní cùu ní xáhaⁿ-dǎ xii-gá:

—Mèstrú, ¿te yòhò naquete-n sáhá-í-u? —càchí-dé xáhaⁿ-dǎ xii-gá.

⁷ Te ní xáhaⁿ Jèsús:

—Vitna ñá cùtnùní iní-n sǎ quidè-í-a dico sáa nduu te cutnùní iní-n —càchí-gá xáhaⁿ-gǎ xii-dé.

⁸ Te ní xáhaⁿ tǎ Pèlú:

—Yúhú chi vǎ ñíⁿ nduu te naquete-n sáhá-í —càchí-dé xáhaⁿ-dǎ xii-gá.

Te ní xáhaⁿ Jèsús:

—Te núú vǎ náquète-í sáhá-n áⁿ, te vǎ cáda-gǎ-n cuèndá sá ndécú ndíhi ñàha-í xii-n —càchí-gá xáhaⁿ-gǎ xii-dé.

⁹ Te ní xáhaⁿ tǎ Pèlú:

—Te núú ducaⁿ te vǎ méé-ní sáhá-í naquete-n, chi naquete-n tñàhá ndaha-í ndíhi díquí-í —càchí-dé xáhaⁿ-dǎ xii-gá.

¹⁰ Te ní xáhaⁿ Jèsús xii-dé:

—Tée íchí nǐ xichi chi xini ñuhu-xi sá sáhá-na-dǎ ndoo, te ducaⁿ te nduu ndoo-dé nihí-dé. Te nchòhò sa càndoo-ndo cuéi ñá ncháa-ndó càndoo —càchí-gá xáhaⁿ-gǎ xii-dé.

¹¹ Te ducaⁿ ní cáháⁿ Jèsús chi sa ñàha-gá sá ñíⁿ cuè tée-áⁿ cuáha cuèndá ñáhá-güedé xii-gá núú cuè tée cùu úhú iní ñáhá, xiǎⁿ núú ní xáhaⁿ-gǎ sá ñà túú càndoo-güedé nchaa-güedé.

¹² Te sáta ní naquete-gá sáhá-güedé, te ní ndécúihnu-gá dóo-gǎ, te ní nucóo-gá yuhu mèsá, te ní xáhaⁿ-gǎ xii-güedé:

—¿Te ní cutnùní iní-ndó sǎ ní quide ñàha-í xii-ndo-áⁿ? ¹³ Te nchòhò váha-ni cáháⁿ-ndó sǎ cùnūu-í, te ðanani ñàha tucu-ndo Mèstrú xii-í, te ndáá cáháⁿ-ndó.

¹⁴ Te núú yúhú cúú-í Mèstrú, te cùu tucu-í

tée cùnunu te nàquete-í sáhá-ndó, te diu-ni ducaⁿ càda nchòhó tucu naquete sáhá tnáhá-ndó. ¹⁵ Yúhú sànu ichi ñaha-í xii-ndo nàcuáa cada-ndo. ¹⁶ Te na càchí tnúhu ndáá-í xii-ndo sã ni ñiⁿ tée xinu cuechi ñá túú cùnunu-dé dácúúxí pàtróoⁿ-dè, te ni ñiⁿ tée xica chiuhⁿ ñá túú cùnunu-dé dácúúxí tée tendaha ñaha xii-dé cuáháⁿ-dé chiuhⁿ. Te ducaⁿ sãtnahá-xi cùu yúhú ndihi nchòhó. ¹⁷ Te núu ní cutnùní iní-ndó nàcuáa ní quide ñaha-í xii-ndo ña, te ducaⁿ càda tnaha-ndo te cuu váha iní ñáhá Yá Ndióxi xii-ndo.

¹⁸ Yúhú, ñá túú càháⁿ-í cuendá-ndó nchàa-ndo, chi yúhú sa ñaha-í nàcuáa sãni iní ñiⁿ ñiⁿ nchòhó cue tée ní nanducu ñihu-í tnuú nchaa ñáyiuhⁿ ñuhu ichi cuehé ichi duha ní cachí-í chitnahá ñáhá-ndó xii-í. Chi dacuitíí sã quée ndáa-xi nàcuáa càháⁿ-xi núú tütú Yá Ndióxi núú càchí-xi: “Tée xèxi ndihi ñaha xii-í ngóo-dé cuu úhú iní ñáhá-dè”, duha càchí-xi núú tütú-gá. ¹⁹ Te cùmání-gá sáá nduu càda ñaha-dé sã sání iní-dé, núu xíáⁿ càchí tnúhu-í xii-ndo nàcuáa cada-dé, chi na sáá nduu-áⁿ te cutnùní iní-ndó sã yúhú cùu-í Crístú Yáá ní tendaha Yá Ndióxi véxi ñuyúú-a. ²⁰ Te na càchí tnúhu ndáá-í xii-ndo sã nchaa ñáyiuhⁿ na quèheⁿ cuendá ñáhá xii cue tée tendaha-í càháⁿ tnúhu-í, te cada iní-yu sã tnáhá yúhú ní queheⁿ cuendá-yu. Te nchaa ñáyiuhⁿ na quèheⁿ cuendá ñáhá xii-í, te cada iní-yu sã tnáhá Tãtà-í Dútú Ndióxi Yáá ní tendaha ñaha xii-í véxi-í ñuyúú-a ní queheⁿ cuendá-yu —càchí-gá xáháⁿ-gã xii-güedé.

Jèsús càchí-gá sã tã Jüdás cuáha cuendá ñáhá-dè xii-gá núú cuè tée cùu úhú iní ñáhá
(Mt. 26:20-25; Mr. 14:17-21; Lc. 22:21-23)

²¹ Te sáta dúcáⁿ ní càháⁿ Jèsús te ío ní ndíhú iní-gá, te ní xáháⁿ-gã xii-güedé:

—Na càchí tnúhu ndáá-í xii-ndo sã díú-ní ñiⁿ nchòhó cuáhá cuendá ñáhá-ndó xii-í núú cuè tée cùu úhú iní ñáhá —càchí-gá xáháⁿ-gã xii-güedé.

²² Te ní ngúíta cue tée xica cuu ndihi-gá ndéhe ñiⁿ ndehe ñiⁿ núú tnáhá-güedé, chi ñá ní cutnùní iní-güedé ndédacàa-güedé cuendá-güedé ní càháⁿ-gá. ²³ Te ñiⁿ tée-áⁿ ño cùdíí iní ñáhá Jèsús, te ndècu yatni-dé díñi-gá cùdini-dé ndihi-gá. ²⁴ Te té Xímú, àdi Pelú chi úú díu-dé, ní quide-dé señá núú tée ndècu yatni díñi-gá-áⁿ sã càcáⁿ tnúhú-dè núú-gã nùu ndédacàa-güedé cuendá-güedé ní càháⁿ-gá. ²⁵ Te tée-áⁿ ní

sáháⁿ ndehe yatni-gá-dé díñi Jèsús, te ní xáháⁿ-dè xii-gá:

—Mèstrú, ¿ndédacàa-ndí cuendá-ndí ní càháⁿ-n-í? —càchí-dé xáháⁿ-dè xii-gá.

²⁶ Te ní xáháⁿ Jèsús:

—Na chindóyo-í luha pàá, te tée na cuáhá-í te tée-áⁿ cùu-dè —càchí-gá xáháⁿ-gã xii-dé.

Te ní chindóyo-gá luha pàá, te ní sáha-gá té Jüdás déhe té Xímú Iscarioté. ²⁷ Te òré ní queheⁿ-dé pàá, te ní ngúndecu ndihi ñaha dùu-ná yucu ñávaha xii-dé. Te ní xáháⁿ Jèsús:

—Sá ní sãni iní-n càda-n te cada ndihi-ni-n —càchí-gá xáháⁿ-gã xii-dé.

²⁸ Te ni ñiⁿ cue tée cùdini ndihi-gá ñá ní təcú tnùní-güedé nása nduu tnúhu ní xáháⁿ-gã xii té Jüdás. ²⁹ Te dava-güedé ní sãni iní-güedé sã sã cuendá sã ndécú ndihi-dé sã ñúhú díhúⁿ, te vaa ío ñiⁿ sã cuááⁿ-dè nandíhi-güedé vico, àdi díhúⁿ cuáhá-dé ñáyiuhⁿ ndáhú xáháⁿ-gã ní càháⁿ-güedé. ³⁰ Te sa ní cundiquiⁿ ní queheⁿ cuendá té Jüdás pàá caxi-dé, te òré ní níhi-dè pàá-áⁿ te ní quee-dé cuáháⁿ-dè.

Jèsús càchí tnúhu-gá nàcuáa cada-o

³¹ Te sáta ní quee té Jüdás cuáháⁿ-dè, te ní xáháⁿ Jèsús xii dava-gá-güedé:

—Vitna te quiní-ndó ndihi nchaa ñáyiuhⁿ sã ío càhnu cuu yúhú Tée cùu ñaní tnáhá-ndó nchàa-ndo, te òré-áⁿ cutnùní iní-ndó sã ío càhnu cuu tucu mee Yá Ndióxi. ³² Te núu yúhú quidé càhnu-í Yá Ndióxi, te diu-ni ducaⁿ càda cahnu ñaha-gá xii yúhú, te ñá túú-gã titni nduu te ducaⁿ càda-gá. ³³ Te nchòhó cue déhe-í na càchí tnúhu-í sã sacú duha-ná nduu ndècu ndihi ñaha-í xii-ndo. Te nchòhó nanducu ñaha-ndo xii-í dico vá ná níhi ñáhá-ndó dàtná ní xáháⁿ-í xii ñáyiuhⁿ israhél, te diu-ni ducaⁿ càháⁿ-í núú-ndó sã vã ndácú-ndó quíhíⁿ-ndó núú quíhíⁿ-í. ³⁴ Te duha sãnu ichi ñaha tucu-í xii-ndo nàcuáa cada-ndo sã cùú iní tnáhá-ndó ñiⁿ ñiⁿ-ndo datná yúhú cùú iní ñáhá-í xii-ndo. ³⁵ Te núu na cùu iní tnáhá-ndó ñiⁿ ñiⁿ-ndo ña, te ducaⁿ te cutnùní iní nchaa ñáyiuhⁿ sã cùú-ndó cuè tée ní chitnahá ñáhá xii-í —càchí-gá xáháⁿ-gã xii-güedé.

Jèsús càháⁿ-gá sã tã Pelú vá nñunu-dé sã xicá cùu ndihi ñaha-dé xii-gá

(Mt. 26:31-35; Mr. 14:27-31; Lc. 22:31-34)

³⁶ Te ní xáhaⁿ tẽ Xĩmú, àdi Pelú chi úú òú-dé, xii Jèsús:

—Mèstrú, ¿ndèé quíhíⁿ-n-í? —càchí-dé xáhaⁿ-dè xii-gá.

Te ní xáhaⁿ Jèsús:

—Yítta te vá ndácú-n cànchicúⁿ ñáhá-n quíhíⁿ núú quíhíⁿ-í, dico na sáá nduu te dai sáá-n núú cúndècu-í —càchí-gá xáhaⁿ-gá xii-dé.

³⁷ Te ní xáhaⁿ tẽ Pelú xii-gá:

—Mèstrú, ¿te ná cuèndá núú vá ndácú-í canchicúⁿ ñáhá-í xii-n quíhíⁿ vitna-í? Chi yúhú ñá túú tñàhí yúhú-í cuèí na cùú-í sá cuèndá-n —càchí-dé xáhaⁿ-dè xii-gá.

³⁸ Te ní xáhaⁿ Jèsús:

—¿Te ndáá sá xèhndé iní-n sá cuèí na cùú-n cuèndá-í-u? Te na càchí tñúhu ndáá-í xii-n sá cùmání-gã cana lihi, te úní xito cáháⁿ-n sá ñá túú xini ñáhá-n xii-í —càchí-gá xáhaⁿ-gá xii-dé.

14

Jèsús dánèhé ñáhá-gã nàcuáa cada-o nàsáá-ó núú ndécú Yá Ndiöxí

¹ Te ní xáhaⁿ-gá xii-güedé:

—Te ñá túú ñá caní iní-ndó. Quèndáá iní-ndó Yá Ndiöxí, te quèndáá iní-ndó yúhú. ² Chi núú ndécú Tàtà-í ío nùne núú cúndècu-o, chi núú ñáhá ñá te sa cachi tñúhu-í xii-ndo ni cùu. Te vitna na nùhú-í te cada túha-í núú cúndècu-ndo. ³ Te dät-nùní quixi tucu-í te candeca ñaha-í xii-ndo quíhíⁿ cuèndá ìⁿ-ni xichi cundecu-o. ⁴ Te sa ñaha-ndo ndéé quíhíⁿ-í te sa xini-ndó ichi —càchí-gá xáhaⁿ-gá xii-güedé.

⁵ Te ní xáhaⁿ tẽ Mǎxí xii-gá:

—Mèstrú, ñá túú xini-ndí ndèé quíhíⁿ-n te da ichi-ná quini-ndí —càchí-dé xáhaⁿ-dè xii-gá.

⁶ Te ní xáhaⁿ Jèsús:

—Yúhú cùú-í dàtná ìⁿ ichi te cáháⁿ-í tñúhu ndáá, te yúhú cada-í te naníhí tǎhú-ndó. Te ìⁿ ði dí-í yúhú cada-í te sáá-ndó núú Yá Ndiöxí cundecu-ndo te núú na quèndáá iní ñáhá-ndó xii-í. ⁷ Te núú ðicó cutnùní ndisa iní-ndó yòo cuu-í-áⁿ, ducaⁿ te cutnùní iní-ndó yòo cuu Tàtà-í ní cùu. Dico vitna dàtná sá ñí xini núú-ndó Dútú Ndiöxí Yáá cùú Tàtà-í cada iní-ndó, chi ní xini-ndó yúhú —càchí-gá xáhaⁿ-gá xii-dé.

⁸ Te ní xáhaⁿ tẽ Lipé xii-gá:

—Mèstrú, danèhé ñáhá xii-ndí Dútú Ndiöxí chi na cùu váha iní-ndí —càchí-dé xáhaⁿ-dè xii-gá.

⁹ Te ní xáhaⁿ Jèsús xii-dé:

—Lipé, ¿te náá ñá túú xini ñáhá-n xii-í?

Te sa ní cuu vái nduu ndecu ndíhi ñaha-í xii-ndo, chi ñáyíu xini ñáhá xii-í te xini-yu tñàhá Tàtà-í. ¿Te ná cuèndá yòhó càchí-n sá dánèhé ñáhá-í xii-ndo Tàtà-í? ¹⁰ ¿Náá ñá túú sàndáá iní-ndó sá yúhú ndécú-í ndíhi Tàtà-í? Te mee-gã ndécú ndíhi ñaha-gá xii-í. Te nchaa tñúhu cáháⁿ-í núú-ndó ñá túú cáháⁿ-í sá véxi iní mée-í, chi Tàtà-í Yáá ndécú ndíhi ñaha xii-í chindèe ñaha-gá quidè-í chiúⁿ-gá. ¹¹ Te quèndáá iní-ndó sá yúhú ndécú-í ndíhi Tàtà-í, te ducaⁿ mée-gá ndécú ndíhi ñaha-gá xii-í. Te núú ñá túú sàndáá iní-ndó tñúhu cáháⁿ-í-a, te dandacu iní-ndó nchàa chiúⁿ ta quide-í véxi, te quèndáá iní ñáhá-ndó. ¹² Te na càchí tñúhu ndáá-í xii-ndo sá nchàa ñáyíu na quèndáá iní ñáhá xii-í, te cadá-yu chiúⁿ quide-í te cǎhnu-gá chiúⁿ cadá-yu chi yúhú nùhú-í núú ndécú Tàtà-í cundecu-í nàcuáa ñíhí ndéé-gá-yu cundecu-yu. ¹³ Te nchaa sá ná cǎcáⁿ-ndó te taxi-í te núu na quèndáá iní ñáhá-ndó xii-í, te nchaa cada-í cuèndá cut-nùní iní ñáyíu sá ío cǎhnu cuu Tàtà-í Dútú Ndiöxí. ¹⁴ Te yúhú cada-í nchaa sá cuini-ndó cǎcáⁿ tǎhú-ndó núú-í, te núu na quèndáá iní ñáhá ndisa-ndo xii-í.

Jèsús càchí-gá sá téndàha-gá Espíritú Yá Ndiöxí quixi cundecu ndíhi-o

¹⁵ Te núu nchòhó cùú ìⁿ ñáhá-ndó xii-í te tñú-ndo nchàa tñúhu cáháⁿ-í. ¹⁶ Te yúhú cǎcáⁿ tǎhú-í núú Tàtà-í sá téndàha-gá Espíritú-gá quixi cundecu ndíhi-ndo cǎnu ichi ñaha-xi xii-ndo nàcuáa cundecu-ndo, te chindee ñaha-xi xii-ndo ni caa ni quíhíⁿ. ¹⁷ Te nchaa ñáyíu ndecu ichi cuehé ichi duha ñá túú xini-yu Espíritú Yá Ndiöxí te ni vǎ cùú cundecu ndíhi-yu. Dico nchòhó sa xini-ndó Espíritú-gá te ndècu ndíhi ñaha-xi xii-ndo. Te sáá ìⁿ nduu te cunuu Espíritú-gá iní-ndó. ¹⁸ Te yúhú vá dáñá ñihnu ñaha-í xii-ndo, chi quixi tucu-í cundecu ndíhi ñaha-í xii-ndo. ¹⁹ Te sácú duha-ná nduu ndécú-í te vá quini ñáhá-gá ñáyíu xii-í, dico nchòhó chi quini ñáhá-í-ndó xii-í. Te ducaⁿ-ni cundecu-ndo ichi váha chi cundecu ndíhi ñaha-í xii-ndo ñí caa ñí quíhíⁿ. ²⁰ Te dàvǎ-áⁿ cutnùní iní-ndó

sá ndécù-í ndihi Tàtá-í, te ducaⁿ nchòhó cundecu ndihi ñaha-ni-ndo xii-í. ²¹Te nchaa ñáyiú dàcuaha tnúhu-í te tnú-yu, ñáyiú-áⁿ quidé ndísá-yu sá cúú íní ñáhà-yu xii-í. Te ducaⁿ Tàtá-í cúú íní ñáhà-gá xii-yu, te ducaⁿ-ni yúhú cúú íní-í-yu tucu, te ducaⁿ te cùtnuní íní-yu sá ndécú ndihi-í-yu — càchí-gá xáhaⁿ-gá xii-dé.

²²Te ní cáháⁿ ìⁿ tée nàni Judás dico ñá díú tẽ Judás dèhe té Ximú Iscarioté ní cáháⁿ, chi ingá té Judás ní xáhaⁿ-dẽ xii-gá:

—Mèstrú, ¿nása cada-n cuèndá cutnùnì íní-ndí sá cùndècu ndihi ñaha-n xii-ndí, te ñáyiú ñuhu ichi cuehé ichi duha vá cùndècu ndihí-n-yu-í? —càchí-dé xáhaⁿ-dẽ xii-gá.

²³Te ní xáhaⁿ Jèsús xii-güedé:

—Nchaa ñáyiú cùu íní ñáhà xii-í te tnú-yu tnúhu càháⁿ-í, te ñáyiú-áⁿ cúú íní ñáhà Tàtá-í xii-yu, te yúhú ndihi Tàtá-í ndécú-ndí ndihí-yu. ²⁴Te nchaa ñáyiú ñá túú cùu íní ñáhà xii-í te ñá túú tnú-yu tnúhu càháⁿ-í. Te nchaa tnúhu ní cáháⁿ-í ní xindédóho-ndo chi Tàtá-í Yáá ní tendaha ñaha xii-í véxi-í ñuyúú-a ní dácáhu íní ñáhà-gá xii-í, te ñá díú mèe-í ní càhu íní-í tnúhu càháⁿ-í.

²⁵Duha ndùu tnúhu càháⁿ-í núú-ndó vitna ndecu ndihi ñaha-gá-í xii-ndo. ²⁶Dico Yá Ndiõxí tendaha-gá Espiritú-gá quixi-xi cada-xi núú-í taxi-xi tnúhu ndee íní xii-ndo, te diu-xi chindee ñaha-xi xii-ndo te danèhé ñáhà-xí xii-ndo nchaa sá cúmání quini-ndó, te diu-ni-xi dandacu íní ñáhà-xí xii-ndo nchaa nacuaá ní cáháⁿ-í.

²⁷Te yúhú chindee chituu ñaha-í xii-ndo ño váha cuu íní-ndó cùndecu-ndo datná yúhú ío váha cùu íní-í ndécù-í, chi sa ta cùyatni nduu núhú-í. Te yúhú càchí tnúhu ndáá-í sá chindèe ñaha-í xii-ndo, te vá càdà-í dàtná quidé ñáyiú ñuhu ichi cuehé ichi duha. Te ni vã ndihú íní-ndó, te ni vã yúhú-ndó. ²⁸Te sa ní xindédóho-ndo ní cáháⁿ-í sá núhú-í, te quixi tucu-í cundecu ndihi ñaha-í xii-ndo. Te núu ndisa cùu íní ñáhà-ndó xii-í ñá, te òrè ní níhí-ndó tnúhu sá núhú-í núu ndécú Tàtá-í, te cudáí íní-ndó ní cùu, chi ío càhnu cuu-gá dàcúúxí yúhú.

²⁹Te sa ní cáchí tnúhu-í sá núhú-í, te na sáá òrè núhú-í núu ndécú Tàtá-í, te quindáá íní ñáhà-ndó xii-í.

³⁰Te ñá túú-gá vãi tnúhu ndatnúhu ndihi ñaha-í xii-ndo chi sa véxi yucu ñávaha sá táxí tnùnì ñuyúú-a, dico vá táxí tnùnì

ñáhà-xí xii yúhú. ³¹Te cada-í nchaa nàcuáa ní táúchíúⁿ Tàtá-í cuèndá cutnùnì íní nchaa ñáyiú ñuyúú-a sá yúhú ío cùu íní-í-gá. Te vitna chí ndacúñí ná quihíⁿ-ó —càchí-gá xáhaⁿ-gá xii-güedé.

15

Cuèndá yoho yàha stilé ndihi nchaa dité-xi

¹Te ní xáhaⁿ tucu-gá xii-güedé:

—Yúhú cùu-í dàtná yoho yàha stilé, te Tàtá-í cúú-gá dàtná ìⁿ tée xito yoho yaha stilé-áⁿ. ²Te nchaa ñáyiú ní sándáá íní ñáhà xii-í cúú-yu dàtná dité nchaa yoho yàha stilé-áⁿ. Te tée xito yoho yaha stilé-áⁿ xèhndé-dé nchaa dité-xi sá ñá cuíni-gá-xi cuuⁿ ndéhé-xi, te ndàda ndoo-dé nchaa dité-xi sá cúúⁿ cuèndá cuuⁿ-gá. ³Te ducaⁿ sãtnahá-xi cùu nchóhó, chi sa ní xócúñí nchaa sá cuehé sá dúhá ndècu ndihí-ndo, chi ní sándáá íní-ndó tnúhu ní cáháⁿ-í. ⁴Te cuu ìⁿnuu-ndo cùndecu ndihi ñaha-ndo xii-í, te núu ducaⁿ na càda-ndo, te cundecu ndihi ñaha-í xii-ndo. Chi núu ìⁿ yutnu vídí ná quèndèè dité-xi, te dité-xi sá ní quèndèè-áⁿ vã cúúⁿ-gá sávidí-xi chí duuⁿ duuⁿ ní xíta-xi. Ducaⁿ sãtnahá-xi cùu nchóhó chí vá ndácú-ndó càda-ndo chiuⁿ-í, te núu vá cùndecu ndihi ñaha-í xii-ndo.

⁵Chi yúhú cùu-í dàtná yutnu vídí-áⁿ, te nchòhó cúú-ndó dàtná nchaa dité-xi. Te nchaa ñáyiú cùu ìⁿnuu ndihi ñaha xii-í, te ndècu ndihí-í-yu, te ndàcú-yu quidé-yu chiúⁿ-í. Te núu vá cúú ìⁿnuu ndihi ñáhà-yu xii-í, te vá ndácú-yu càdà-yu chiúⁿ-í. ⁶Te nchaa ñáyiú vá cúú ìⁿnuu ndihi ñaha xii-í, te yàha-yu dàtná yàha ìⁿ dité yutnu vídí sá ñá túú cùuⁿ sávidí-xi, chí xèhndé-güedé yíchí-xi, te sàhmi-güedé.

⁷Cuu ìⁿnuu ndihi ñaha-ndo xii-í, te vá nàcuánaa-ndo nacuaá ní cáháⁿ-í. Te núu ducaⁿ na càda-ndo, te nání cuíni-ndó cãcãⁿ-ndó núu-í te taxi-í. ⁸Te núu nchòhó ná càdà váha-ndo cùndecu-ndo, te ío cada càhnu-ndo Tàtá-í, te ducaⁿ cùtnuní sá ndísá cùu-ndo cue tée ní chitnahá ñáhà xii-í. ⁹Te yúhú ío cùu íní ñáhà-í xii-ndo dàtná cúú íní ñáhà Yá Ndiõxí xii-í. Te cada-ni-ndo mèe-ni sá váha cuèndá cudáí íní ñáhà-gá-í xii-ndo. ¹⁰Te núu na quindáá íní-ndó càda-ndo nchaa nacuaá ní cáháⁿ-í, te ío cuu íní ñáhà-í xii-ndo, chí yúhú ducaⁿ ío sándáá íní-í Tàtá-í quidé-í nchaa nàcuáa ní

càháⁿ-gá, te xíⁿ nũu ío cùu iní ñáhá-gǎ xii-í.

¹¹ Duha càháⁿ-í núú-ndó cuendá cudú ndisa iní-ndó dàtná cudú iní mèe-í. ¹² Te duha ndũu tnũhu càháⁿ-í cuendá sá cúu iní tnáhá-ndó ìⁿ ìⁿ-ndo datná cúu iní ñáhà-í xii-ndo. ¹³ Te núu ní xíhó sá cúu-xí ìⁿ tée ío váha tnàhá tnũhu ndihí-o, te xíⁿ cutnùní iní ñáiyu sá ío cùu iní-ó-dě. ¹⁴ Te nchòhó cuu-ndo cuè tée ío váha tnàhá tnũhu ndihí-í te núu na càda-ndo nchaa nacuaá càháⁿ-í. ¹⁵ Te vǎ cũñaha-gǎ-í xii-ndo sá cúu-ndó cuè tée xĩnu cuechi núu-í, chi ní ìⁿ tée xĩnu cuechi ñá túu xĩní-dé ná quidé pàtróon-dě. Te yúhú càchí-í xii-ndo sá cúu-ndó cuè tée ío váha tnàhá tnũhu ndihí-í, chi ní cachí tnũhu-í nchaa nàcuáa ní cáháⁿ Tǎtà-í. ¹⁶ Te ñá díú nchòhó ní cáháⁿ ñáhá-ndó xii yúhú, chi yúhú ní cáháⁿ ñáhà-í xii-ndo. Te yúhú tauchiùⁿ-í quíhíⁿ-ndó càda-ndo nchaa nacuaá ní cáháⁿ-í, chi tnũhu-áⁿ vǎ ndihí nihnu-xi. Te ducaⁿ nchaa sá ná càcáⁿ-ndó núu Tǎtà-í Yǎ Ndiòxí te taxi-gǎ, te núu na quindáa iní ñáhá-ndó xii-í. ¹⁷ Te yúhú càháⁿ-í dóho-ndo sá cúu iní tnáhá-ndó ìⁿ ìⁿ-ndo.

Ñáiyu ndècu ichi cuehé ichi duha cùu úhú iní-yu Jèsús ndihí nchaa ñáiyu sàndáa iní tnũhu-gǎ

¹⁸ Te nchaa ñáiyu ndècu ichi cuehé ichi duha ñá cúu quíní ñáhà-yu xii-ndo, te sa ñaha-ndo sá díhna-gǎ yúhú ní ngúíta-yu ducaⁿ ñá cúu quíní ñáhà-yu xii-í. ¹⁹ Te núu dicó tnàhá nchòhó ndécú-ndó ichi cuehé ichi duha ña, te cuu iní ñáhà-yu xii-ndo dàtná cúu iní tnáhà-yu ndi mèe-yu ní cùu. Te yúhú ní nanducu nihnu ñaha-í xii-ndo tnũu ñáiyu ndècu ichi cuehé ichi duha, núu xíⁿ ío cùu úhú iní ñáhà-yu xii-ndo cuendá sá ñá túu-gǎ chíttnáhá-ndó-yu. ²⁰ Te dandàcu iní-ndó nàcuáa ní cáháⁿ-í sá ní ìⁿ tée xĩnu cuechi ñá túu cùnũu-dé dàcúuxí pàtróon-dě. Te yúhú cúu úhú iní ñáhà-yu, te diu-ni ducaⁿ càda ñahá-yu xii nchòhó. Te núu dicó ní tnĩⁿ-yu tnũhu ní cáháⁿ-í ñá, te diu-ni ducaⁿ tnĩⁿ-yu tnũhu cáháⁿ-ndó nũu-yu ní cùu. ²¹ Te ducaⁿ càda ñahá-yu xii-ndo sá cuendá-í, chi ñá xĩn-yu Tǎtà-í Yáa ní tendaha ñaha xii-í véxi-í ñuyúú-a.

²² Te vǎa vǎ cùndècu cuèchi-yu ní cùu, te núu ñá túu yúhú ní cáháⁿ-í núu-yu, te vitna vǎ cúu tnàhí cachí-yu sá ñá túu cuèchi-yu.

²³ Chi nchaa ñáiyu cùu úhú iní ñáhà xii-í, te cùu úhú iní-yu tnàhá Tǎtà-í. ²⁴ Te vǎa ní ìⁿ cuèchi-yu vǎ cùndècu ní cuu, te núu dicó ñá túu ní xĩn-yu nchaa sá ní quide-í sá vǎ yǒo tnàhí ndàcu cada. Te cuèi ní xĩn-yu dico dai cùu úhú iní ñáhà-yu xii-í ndihí Tǎtà-í. ²⁵ Te duha quide-yu chi dacuítí quèe ndáa-xi nàcuáa yòdo tnumí núu tütú Yǎ Ndiòxí sá dácuahá-yu, chi càchí-xi sá ñá túu nǎ cuèchí-í te cuu úhú iní ñáhà-yu xii-í.

²⁶ Te Espiritú Tǎtà-í Dútú Ndiòxí sá ndécú nũu-gǎ tendaha-í quixi chindee ñaha-xi xii-ndo, te canu ichi ñaha-xi nàcuáa cundecu-ndo, te Espiritú-áⁿ cáháⁿ ndáa-xi cuendá cutnùní iní nchaa ñáiyu yoo cùu-í.

²⁷ Te nchòhó tnàhá-ndó cáháⁿ váha-ndo cuendá-í cuendá cutnùní iní-yu yoo cùu-í, chi ñaha-ndo sá ndèe òrè ní ngúíta-í quide-í chiùⁿ Tǎtà-í ní chitnahá ñáhá-ndó xii-í — càchí-gǎ xáhaⁿ-gǎ xii-güedé.

16

¹ Te ní xáhaⁿ tucu-gǎ xii-güedé:

—Duha càháⁿ-í cuendá ná nanchòcáva iní-ndó nũhú-ndó ichi cuehé ichi duha. ² Chi vǎ dàña-gǎ-güedé quíhu-ndo vèñúhu, te ní vǎ cúu-gǎ quíní ndéè ñáhà-güedé xii-ndo. Te sáa ìⁿ nduu te cahni ñaha-güedé xii-ndo, te xíⁿ cuu cahaⁿ-güedé sá quidé-güedé chiùⁿ Yá Ndiòxí. ³ Te ducaⁿ càda-güedé chi ñá túu xĩn-güedé Tǎtà-í, te ní ñá túu xĩn ñáhà-güedé xii yúhú. ⁴ Te duha ndũu tnũhu càháⁿ-í núu-ndó, chi na sáa òrè te ndacu iní-ndó nchaa tnũhu sá sá ní cachí tnũhu-í xii-ndo nàcuáa cada ñaha-güedé xii-í.

Nchaa chiùⁿ quide Espiritú Yǎ Ndiòxí

⁵ Te ñá túu ní càchí tnũhu-í xii-ndo ndèe díhna chi ndècu ndihí ñaha-í xii-ndo. ⁶ Dico vitna sa ta cùyatni nduu nũhú-í núu ndécú Tǎtà-í Yáa ní tendaha ñaha xii-í véxi-í ñuyúú-a. Te ní ìⁿ nchòhó ñá túu xicáⁿ tnũhú-ndó nũu-í nũu ndèe quíhíⁿ-í.

⁷ Chi mee-ni sǎ ndihú iní-ndó sǎ dúcáⁿ ní cáháⁿ-í. ⁸ Te na càchí tnũhu ndáa-í xii-ndo sǎ váha-gǎ sá cúu-xí-ndó nũu nũhú-í, chi tendaha-í Espiritú Yǎ Ndiòxí quixi cundecu ndihí-ndo chindee ñaha-xi, chi núu vǎ nũhú-í te vǎ quíxí Espiritú-gǎ cundecu ndihí-ndo chindee ñaha-xi xii-ndo. ⁹ Te na quíxí Espiritú-gǎ te dandixi túu-xi iní nchaa ñáiyu ndècu ichi cuehé ichi duha sá ñá túu quide váha-yu. Te dacàhu

iní ñáhá-xí sá ndécú ñⁿ ichi váha ichi ndáá. Te Espíritú-gá-áⁿ cada-xi nàcuáa cutnùnì iní-yu sá Yá Ndiòxí cada ndáá-gá cuéchi-yu. ⁹ Te ducaⁿ te cutnùnì iní-yu sá ndécú cuéchi-yu, chi ñá túú sàndáá iní ñáhá-yu xii-í. ¹⁰ Te ducaⁿ te cutnùnì iní-yu nàcuáa nduu cuendá ichi váha ichi ndáá, chi yúhú núhú-í núú ndécú Tàtà-í, te nchòhó vá quínì ñáhá-gã-ndó. ¹¹ Te ducaⁿ te cutnùnì iní-yu sá Yá Ndiòxí cada ndáá-gá cuéchi-yu, chi sa ní cáháⁿ-gá sá yúcu ñávàha sá táxi tnùnì ñuyúú-a quíhíⁿ-xi núú ùhú núú ndàhú.

¹² Te vai-gá tnúhu ndècu cachí tnúhu-í xii-ndo, dico nchòhó chi vá cundèe iní-ndó cundèdòho-ndo nchàa vitna. ¹³ Te na quixi Espiritú Yá Ndiòxí, Espiritú cáháⁿ ndáá cuítì, te Espiritú-áⁿ danèhé ñáhá-xí nchàa tnúhu váha tnúhu ndáá. Te vá dácàhu iní ñáhá-xí xii-ndo sá véxi iní mée-xí chi dacàhu iní ñáhá-xí nchàa sá cáháⁿ Yá Ndiòxí, te cachí tnúhu-xi nchaa nàcuáa cada-xi ndéé núú cuàháⁿ núú véxi-gá. ¹⁴ Te Espiritú-gá-áⁿ cada càhnu ñaha-xi xii yúhú chi ndècu ndíhi-xi tnúhu-í, te danèhé ñáhá-xí xii-ndo. ¹⁵ Te nchaa sá ndécú ndíhi Tàtà-í ndécú ndíhi-í tnàhá-í, núú xíáⁿ càchí-í sá Espiritú-gá danèhé ñáhá-xí nchàa tnúhu-í xii-ndo.

Nchaa ñáyiu ndéhu iní-xi nduu díí iní-yu na quixi tucu Jesús

¹⁶ Te ñⁿ úú-nà nduu ndècu-í te vá quínì ñáhá-gã-ndó xii-í, dico núú sàcú-ni nduu te quínì ñáhá tucu-ndo xii-í, te ducaⁿ chi núhú-í núú ndécú Tàtà-í —càchí-gá xáhaⁿ-gã xii-güedé.

¹⁷ Te sá dúcáⁿ ní cáháⁿ-gá núu ní ngúíta ñⁿ úú cue téé xica cuu ndíhi-gá xitnàha-güedé:

—¿Nása nduu-tu tnúhu cáháⁿ-gá sá càchí-gá sá ñⁿ úú-nà nduu ndècu-gá te vá quínì-gá-ó-gã, dico núú sàcú-ni nduu te quínì tucu-ó-gá-i?, chi núhú-gá núú ndécú Tàtà-gã —càchí-güedé xitnàha-güedé.

¹⁸ Te xitnàha tucu-güedé:

—¿Nása cuáháⁿ-tu tnúhu-áⁿ sá sàcú-ni nduu? Te ñá tècú tnùnì-ó nása nduu tnúhu cáháⁿ-gá —càchí-güedé xitnàha-güedé.

¹⁹ Te Jèsús ní cutnùnì iní-gá sá cuínì-güedé cácáⁿ tnúhú-güedé núú-gã nása nduu tnúhu ní cáháⁿ-gá, núú ní xáhaⁿ-gã:

—Cuendá sá ní cachí-í sá ñⁿ úú-nà nduu ndècu-í te vá quínì ñáhá-gã-ndó

xii-í, dico núú sàcú-ni nduu te quínì ñáhá tucu-ndo xii-í ní cachí-í, ¿xíáⁿ ndécú tnúhu núú tnàhá-ndó-áⁿ? —càchí-gá xáhaⁿ-gã xii-güedé.

²⁰ Te ní xáhaⁿ tucu-gá:

—Te na càchí tnúhu ndáá-í xii-ndo sá nchòhó ndéhu víhí iní-ndó te ndáhyú-ndó, dico nchaa ñáyiu ndècu ichi cuhé ichi duha chi da cudíí iní-yu. Dico nchòhó ñáyiu ndáhyú chi sáá nduu te nduu díí iní-ndó.

²¹ Chi dàtná cuínì-ndó cùu ñⁿ ñadíhí ñaha ní tnàhá nduu cacu déhe-xi vài sani iní-aⁿ sá quidé úhú ñáhá-xí. Dico na yàha cacu déhe-aⁿ, te ñá túú-gã ndácú iní-aⁿ sá ní quide úhú ñáhá-xí xii-aⁿ chi mee-nà sá cudíí iní-aⁿ déhe-aⁿ. ²² Ducaⁿ sàtnahá-xi cùu nchòhó vitna chi ndéhu iní-ndó sá nùhú-í, dico quixi tucu-í quixi coto ñaha-í xii-ndo, te òré-áⁿ te cudíí ndisa iní-ndó, te vá yòo ñⁿ-gá dandéhu iní ñáhá xii-ndo davá-áⁿ.

²³ Te dàvá-áⁿ ñá túú-gã ná nducu tnúhu-ndo nùú-í. Te na càchí tnúhu ndáá-í xii-ndo sá Tàtà-í taxi-gá nchaa sá ná càcáⁿ-ndó núú-gã núu na quíndáá iní ñáhá-ndó xii-í. ²⁴ Te ndéé vitna vátá dúcáⁿ-gã cada-ndo càcáⁿ-ndó. Dico càcáⁿ-ndó núú-gã núu ná cuínì-ndó te taxi-gá cuendá cudíí ndisa iní-ndó —càchí-gá xáhaⁿ-gã xii-güedé.

Xítòhó Jesucristú ní cuunuu tnúhu-gá núú yucu ñávàha

²⁵ Te xáhaⁿ tucu-gá xii-güedé:

—Mee-ni ní chidáhu ndodo-í tnúhu ní cáháⁿ-í núú-ndó, dico sáá nduu te vá chidáhu-gá-í tnúhu cáháⁿ-í, chi cáháⁿ ndáá-na-í cuendá Tàtà-í. ²⁶ Te dàvá-áⁿ càcáⁿ-ndó núú Tàtà-í núu ná cuínì-ndó te taxi-gá, te núu na quíndáá iní ñáhá-ndó xii yúhú Déhe-gá. Te ñá túú-gã xínì ñúhu-xi sá yúhú càcáⁿ-í núú-gã cuendá-ndó chi càcáⁿ mée-nà-ndó. ²⁷ Chi mee Tàtà-í ío cùu iní ñáhá-gã xii-ndo cuendá cùu iní ñáhá-ndó xii-í, te sàndáá iní-ndó sá núú-gã ní quee-í véxi-í. ²⁸ Te yúhú ní quee-í núú Tàtà-í véxi-í ñuyúú-a, te vitna dándóo-í ñuyúú-a te núhú-í núú ndécú-gã —càchí-gá xáhaⁿ-gã xii-güedé.

²⁹ Te ní xáhaⁿ cuè téé xica cuu ndíhi-gá:

—Vitna chi cáháⁿ ndáá-nà-n, ñá túú-gã chidáhu-n tnúhu cáhá-n. ³⁰ Te vitna ní xínì-ndí sá ío váha cùtnunì iní-n nchàa nacuáa cùu, te cùtnunì iní-n nchàa nacuáa

sàni iní nchaa ñáyi. Te ñá túú xini ñuhu-xi nágá nducu tn̄hu-yu núu-n chi nchaa sa ní dátúu-n n̄ú-yu. Te xiáⁿ n̄úu sàndáá iní-ndí sá n̄úú Yá Ndiòxi ní quee-n v̄xi-n —càchí-güedé xáhaⁿ-güedé xii-gá.

³¹ Te ní xáhaⁿ Jèsús:

—¿Te vitna sàndáá iní-ndó-ãⁿ? ³² Vitna ní sáá nduu ní sáá òré sá ncháá nchòhó cuténuu-ndo càa ìⁿ caa úú cuu-ndo, te dàndó mee ñàha-ndo xii-í. Dico ñá díú mee dii-í quendóo chi ndècu ndihí-í Tàtá-í. ³³ Duha càháⁿ-í cuendá cuu váha iní-ndó cundecu-ndo, chi ñuyúú-a cuu úhú iní ñáhã-yu xii-ndo, dico ni v̄á yùhú-ndó chi yùhú sa ní dáqueé t̄hù-í nchaa sá cuèhé sá dúhá ló ñuyúú-a —càchí-gá xáhaⁿ-gã xii-güedé.

17

Jèsús xicáⁿ táhú-gã núú Tàtá-gã Dútú Ndiòxi cuendá cue téé xica cuu ndihí-gá

¹ Te sáta dúcáⁿ ní cáháⁿ Jèsús te ní ndacoto-gá andiu, te ní xáhaⁿ-gã xii Tàtá-gã Dútú Ndiòxi:

—Táu, vitna ní sáá nduu càda cahnu ñàha-n xii-í cuendá ducaⁿ càda cahnu ñàha-í xii-n. ² Chi mee-n ní cachí-n sã táxi t̄nùn-í nchaa ñáyi ñuyúú-a, te dàcacu nihnu-í nchaa ñáyi ní cachí-n n̄n̄hí t̄hú.

³ Te cundecu ndihí-ð-yu ní caa ni quíhíⁿ, chi sàndáá iní ñáhã-yu sá ìⁿ dìí-ni yòhó cúú-n Ndiòxi ndisa, te ducaⁿ xini ñáhã-yu xii yùhú Jesucristú téé ní tendaha-n v̄xi ñuyúú-a.

⁴ Te yùhú ní chiñuhu ñàha-í xii-n ñuyúú-a, te ní xínu chiúⁿ ní cachí-n càda-í.

⁵ Táu, vitna na nàsáá-í núu-n te cada càhnu ñàha-n xii-í dàtná ní xóo cada càhnu ñàha-n xii-í ndéé cútnhá vátá ngáva-gã ñuyúú.

⁶ Te nchaa ñáyi ní nanducu nihnu-n tnuú nchaa ñáyi ndècu ichi cuehé ichi duha, ní taxi cuendá-n-yu, te ní xáhaⁿ-í xii-yu yoo cùu-n. Te cuendá-n cùu-yu, te ní taxi cuendá-n-yu, te ní sàndáá iní-yu t̄núhu-n. ⁷ Te vitna ní cutnùn-í iní-yu sá ncháá t̄núhu ndècu ndihí-í ðu-ni mee-n ní taxi-n. ⁸ Te ní dánèhé-í-yu nchaa t̄núhu sá ní dánèhé ñáhã-n xii-í, te ní sàndáá iní-yu. Te ní cutnùn-í iní-yu sá n̄úu-n ní quee-í v̄xi-í, te ní sàndáá iní-yu sá yòhó ní tendaha ñàha-n xii-í v̄xi-í ñuyúú-a.

⁹ Te yùhú càháⁿ ndàhú-í núu-n cuendá nchaa ñáyi ní taxi cuendá-n. Te ñá túú càháⁿ ndàhú-í núu-n cuendá ñáyi ndècu ichi cuehé ichi duha, chi cuendá nchaa ñáyi ní taxi cuendá-n càháⁿ-í, chi cuendá-n cùu-yu. ¹⁰ Te nchaa sá cúú cuendá-í cúú-xí cuendá-n, te nchaa sá cúú cuendá-n cùu-xi cuendá-í t̄nàhá-í. Te xiquide càhnu ñàhá-yu xii-í.

¹¹ Te yùhú vá cundecu-gá-í ñuyúú-a, dico mèe-yu chi cundecu-ní-yu, te yùhú ndixi-í núu ndécú-n. Táu, yòhó ío yìñuhu ndecu-n, te yùhú càháⁿ ndàhú-í núu-n sã ní yùhu ní iní-n còto-n nchaa ñáyi ní taxi cuendá-n, ñáyi ní sàndáá iní t̄núhu-í cuendá sá ìⁿ-ní ìchi cuú-yu cundecú-yu dàtná ìⁿ-ni cùu nchoo. ¹² Chi òré ndécú-í ndihí-yu ñuyúú-a ní xito-í-yu nàcuáa cùu iní-n, te ni ìⁿ-yu ñá túú ní xita nihnu, chi ìⁿ-dii-ni té Jùdás ní xita nihnu t̄nàhí-dé, te ducaⁿ ní cuu cuendá sá ní quee ndáá-xi nàcuáa yòdo t̄nùn-í núu t̄tùt-ú.

¹³ Te vitna sa ndixi-í núu ndécú-n, dico nini ndècu-gá-í ñuyúú-a duha càháⁿ-í cuendá sá cúú ìⁿ-yú dàtná cúú ìⁿ-mèe-í.

¹⁴ Te yùhú ní dánèhé-í-yu t̄núhu-n, dico nchaa ñáyi ndècu ichi cuehé ichi duha cùu úhú iní ñáhã-yu xii-yu cuendá sá ñà túú-gã ndécú-yu ichi cuehé ichi duha-áⁿ dàtná yùhú ñá túú ndècu-í ichi-áⁿ. ¹⁵ Te ñá túú càchí-í sá xócàn-í-n-yu ñuyúú-a, dico càháⁿ ndàhú-í núu-n sã dácacu nihnú-n-yu núu yucu ñávàha. ¹⁶ Te yùhú ñá túú ndècu-í ichi cuehé ichi duha, te ducaⁿ mèe-yu ñá túú-gã ndécú-yu ichi cuehé ichi duha.

¹⁷ Te ío na cundecu yihí ñuhu-gá-yu núu-n dàcuahá-yu t̄núhu-n, chi cùu-xi ìⁿ t̄núhu ndáá. ¹⁸ Te dàtná ní tendaha ñàha-n xii yùhú v̄xi-í t̄nuú nchaa ñáyi ndècu ichi cuehé ichi duha, ducaⁿ càda-í tendaha-í-yu quíhíⁿ-yu cáháⁿ-yú t̄núhu-í t̄nuú nchaa ñáyi ndècu ichi cuehé ichi duha. ¹⁹ Te yùhú ndécú yìñuhu-í núu-n, te cada ñàha-n xii-í nàcuáa cùu iní-n sã cuendá-yu, te ducaⁿ te cundecu yìñuhú-yu núu-n dàcuahá-yu t̄núhu-n.

²⁰ Te ñá díú cuendá mee-ni ñáyi sa ní sàndáá iní-xi càháⁿ ndàhú-í núu-n, chi t̄nàhá cuendá nchaa ñáyi na quindáá iní ñáhã xi-í ndéé idá-gã n̄u na cùnd-èdòho-yu t̄núhu càháⁿ ñáyi na tendaha-í.

²¹ Te xicáⁿ táhú-í núu-n sã ncháá-yu ìⁿ-nã

ichi na cùu-yu, te ìn-nǎ cani iní ndìhi ñàhá-yu xii-o dàtná cúu nchò ìn-ní cuu-o. Te ducaⁿ ìn-ná cuu-o ndìhi-yu cuendá sá ná quindáá iní nchaa ñáiyu ndècu ichi cuehé ichi duha sá díú-n ní tendaha ñàha-n xii-í véxi-í ñuyúú-a. ²² Te nchaa sá vǎha ní taxi-n ndècu ndìhi-í ní dánèhé-í-yu cuendá sá ìn-nǎ cuú-yu cundecú-yu dàtná ndécú nchò. ²³ Te yúhú cundecu ndìhi-í-yu, te yòhò cundecu ndìhi ñàha-n xii yúhú cuendá ìn-nǎ cuu ndisá-yu cundecú-yu. Te ducaⁿ te cutnùní iní nchaa ñáiyu ndècu ichi cuehé ichi duha sá díú mèe-n ní tendaha ñàha-n xii-í véxi-í ñuyúú-a, te cùu iní-n-yu dàtná cúu iní ñàhá-n xii yúhú.

²⁴ Táu, mee-n ní taxi cuendá-n-yu, te cuiní-í sá cundècu-yu núu cundècu-í cuendá quiní-yu sá quidé càhnu ñàha-n xii-í chi ducaⁿ-ni cùu iní ñàhá-n xii yúhú ndéé cútnàhá vátá ngáva-gá ñuyúú. ²⁵ Táu, yòhò ío yìñùhu ndecu-n. Te ñáiyu ndècu ichi cuehé ichi duha ñá túu xini ñàhá-yu xii-n, dico yúhú chi xini ñàhá-í xii-n, dico ñáiyu ní sándáá iní ñàhá xii-í sa xini-yu sá díú-n ní tendaha ñàha-n xii-í véxi-í ñuyúú-a. ²⁶ Te sa xáhaⁿ-í xii-yu yoo cùu-n, te diu-ni ducaⁿ càda-í cuendá cuu iní tnàhá-yu dàtná cúu iní ñàhá-n xii-í, te ducaⁿ cundecu-í ndìhi-yu —càchí-gá xáhaⁿ-gá xii Tǎtá-gá Dútú Ndiòxi.

18

Ní tñi-güedé Jèsús ndécá ñàha-güedé cuáháⁿ

(Mt. 26:47-56; Mr. 14:43-50; Lc. 22:47-53)

¹ Te sáta dúcáⁿ ní cáháⁿ Jèsús, te ní quee-gá ndìhi cue téé xica cuu ndìhi-gá cuáháⁿ-güedé ndàa ingá xio yuhu yùu Cè-drón. Te yàcáⁿ cáá ìnⁿ lahuertá, te xití lahuertá-áⁿ cuǎnguihu Jèsús ndìhi cue téé xica cuu ndìhi-gá. ² Te té Jüdás déhe té Xímú Iscarioté téé ní sáha cuendá ñàhá xii-gá núu cué téé cuu ihú iní ñàhá sa xini-dé lahuertá-áⁿ chi titní xito ní sáháⁿ Jèsús ndìhi-güedé xíaⁿ. ³ Núu ndáá ichi xíaⁿ ní sáá té Jüdás ndìhi vai sandadú, ndìhi cue téé quide cuendá veñúhu ní techiⁿ ñàha cue dútú cúnùu, ndìhi cue téé cùu fariséú. Te xínehe-güedé machití ndìhi ìnⁿ úú-gá sá dééⁿ, te yòtnuú-güedé lintèrná ndìhi iti ní sáá. ⁴ Te Jèsús sa ñàha-gá nchaa nàcuáa

cada ñàha-güedé xii-gá núu ní sáháⁿ tuha ñàha-gá xii-güedé, te ní xáhaⁿ-gá:

—¿Yoo nànducu-ndo? —cachí-gá xáhaⁿ-gá xii-güedé.

⁵ Te ní xáhaⁿ-güedé:

—Jèsús téé ñuú Nazàrét nànducu-ndí —càchí-güedé xáhaⁿ-güedé xii-gá.

Te ní xáhaⁿ Jèsús:

—Yúhú ducaⁿ nàni-í, te náu-í ndécú-á te núu yúhú nànducu-ndo —cachí-gá xáhaⁿ-gá xii-güedé.

Te tnàhá té Jüdás téé ní sáha cuendá ñàhá xii-gá ndìhi-güedé. ⁶ Te òré ní xáhaⁿ Jèsús sá díú-gá cúu téé nànducu-güedé, te ní nacaca dùma-güedé te ní nduá-güedé ndéé ñuhu. ⁷ Te ní xicáⁿ tnúhú tùcu Jesús núu-güedé yoo nànducu-güedé. Te ní xáhaⁿ tùcu-güedé sá Jèsús téé ñuú Nazàrét nànducu-güedé, ⁸ núu ní xáhaⁿ-ná Jèsús:

—Sa ní cáháⁿ-í sá díú yúhú ducaⁿ nàni-í, te núu yúhú nànducu-ndo, te dañà-ndo nchàa cue téé iha na nùhú-güedé —càchí-gá xáhaⁿ-gá xii-güedé.

⁹ Duha ní cuu chi ní quee ndáá-xi nàcuáa ní cáháⁿ méé Jèsús chi ní cachí-gá sá ncháá ñáiyu ní sáha cuendá ñàhá Yá Ndiòxi cundecu ndìhi-gá vá cuíta nihnú-yu. ¹⁰ Te té Xímú, àdi Pelú chi úú diu-dé, néhé-dé ìnⁿ machití, te ní tava-dé machití-áⁿ ñi-xi te ní xehndé-dé lóho xio cùha ìnⁿ téé nàni Malcú ní quéndé duuⁿ. Te téé-áⁿ xinuú cuèchi-dé núu dútú cúnùu-gá. ¹¹ Te ní xáhaⁿ Jèsús xii té Pelú:

—Nataxúha machití-áⁿ núu ñúhú-xí, chi dacuití sá ndòhò-í nàcuáa ní cachí Tǎtá-í cunduu —càchí-gá xáhaⁿ-gá xii-dé.

Jèsús ndécú-gá núu dútú cúnùu-gá

(Mt. 26:57-58; Mr. 14:53-54; Lc. 22:54)

¹² Te cue sandadú ndìhi cue téé cúnuu-gá núu-güedé, ndìhi cue téé quide cuendá veñúhu ní tñi-güedé Jèsús, te ní dácútú ñàha-güedé. ¹³ Te ndèca ñàha-güedé xii-gá cuáháⁿ núu ndécú téé Anás, te té Anás-áⁿ cúu-dé tǎtá ñadìhí té Caifás. Te té Caifás-áⁿ ní cuu-dé dútú cúnùu-gá cuíá-áⁿ. ¹⁴ Te diu-ni téé-áⁿ ní xáhaⁿ-dè xii ñáiyu isràél sá vǎha-gá sá ìnⁿ-ní téé na cùu-dé sá cuendá-yu nchaá-yu.

Té Pelú càháⁿ-dé núu ñáiyu sá ñà túu xini-dé Jèsús

(Mt. 26:69-70; Mr. 14:66-68; Lc. 22:55-57)

¹⁵ Te té Pèlú, àdi Xímú chi úú díu-dé, ndíhi íngá tucu-dé nàcuáa xica cuu ndíhi-güedé Jèsús nchicúⁿ ñáhá-güedé xii-gá cuáháⁿ. Te ìⁿ tée-áⁿ xini tñáhá-dé ndíhi dútú cúnúu-áⁿ núu nchicúⁿ-dé tñáhá-dé Jèsús cuánguihu ndéé núu cáá vèhe tée cúnúu-áⁿ. ¹⁶ Dico té Pèlú ní ndóo-dé yuyèhe ndaa quehé, núu ní ndee tée ndíhi té Pèlú-áⁿ ní cáháⁿ ndíhi-dé ñaha ndéè yuyèhe, te ndèca-dé té Pèlú cuánguihu. ¹⁷ Te ní xáhaⁿ ñaha ndéè yuyèhe-áⁿ xii té Pèlú:

—¿Náa ñá díú yòhó tñáhá-n xica cuu ndíhi-n tée ndèca-güedé cuánguihu-a? —càchí-aⁿ xáhaⁿ-aⁿ xii-dé.

Te ní xáhaⁿ tē Pèlú:

—Ñáhá, ñá túú tē-áⁿ xícá cùu ndíhi-ú —càchí-dé xáhaⁿ-dē xii-güedé.

¹⁸ Te ío víxiⁿ quide-xi núu cue tée xinu cuechi, ndíhi cue tée quide cuendá veñúhu ní dátñáhá-güedé ñuhú, te xínutñí teté-güedé ndíhi té Pèlú.

Dútú cúnúu nducu tñúhu-dé núu Jèsús
(Mt. 26:59-66; Mr. 14:55-64; Lc. 22:66-71)

¹⁹ Te dútú cúnúu ní xícáⁿ tñúhú-dé núu Jèsús núu nándi cùu cue tée xica cuu ndíhi-gá, te nándi sá dánèhé ñáhá-gá xii-güedé. ²⁰ Te ní xáhaⁿ-gá:

—Yúhú càháⁿ ndodo-í núu nchaa ñáiyu cuéi xití veñúhu càhnu sá ìo cúnúu, te cuéi xití nchaa daga-gá veñúhu núu tàcá nchaa ñáiyu isràèl ducaⁿ-ni dànèhé-í-yu, te ñá túú dàyuhu cáháⁿ-í. ²¹ Núu vá càcáⁿ tñúhú-n núu-í. Càcáⁿ tñúhú núu nchaa ñáiyu sàcúndedóho tñúhu càháⁿ-í, te na càháⁿ-yu núu nása ndúu tñúhu càháⁿ-í chi xini-yu —càchí-gá xáhaⁿ-gá xii-dé.

²² Te sá dúcáⁿ ní cáháⁿ Jèsús núu ìⁿ tée quide cuendá veñúhu nùtñí-dé tñáhá-dé te ní cani-dé ìⁿ déhndé núu-gá. Te ní xáhaⁿ-dē:

—¿Ná cuendá ducaⁿ càháⁿ-n núu dútú cúnúu-í? —càchí-dé xáhaⁿ-dē xii-gá.

²³ Te ní xáhaⁿ Jèsús xii-dé:

—Te núu nèhé ní cáháⁿ-í te cáháⁿ-n nása ndúu tñúhu ní cáháⁿ-í, te yúhú càháⁿ váha-í te ducaⁿ càniha-n —càchí-gá xáhaⁿ-gá xii-dé.

²⁴ Te ndùtu yoho-ni Jèsús ní dánùhú ñáhá tē Ànás xii-gá ndaha té Caifás dútú cúnúu-gá.

Té Pèlú càháⁿ tucu-dé núu ñáiyu sá ñá túú xini-dé Jèsús

(Mt. 26:71-75; Mr. 14:69-72; Lc. 22:58-62)

²⁵ Te té Pèlú nùtñí teté-ni-dé, te ní xáhaⁿ-güedé xii-dé:

—¿Náa ñá díú tñáhá yòhó xícá cùu ndíhi tée ndèca-ndí véxi-áⁿ? —càchí-güedé xáhaⁿ-güedé xii-dé.

Te ní xáhaⁿ tē Pèlú:

—Ñáhá, ñá túú tē-áⁿ xícá cùu ndíhi-ú —càchí-dé xáhaⁿ-dē xii-güedé.

²⁶ Te ìⁿ ñaní tñáhá tē ní xehndé té Pèlú lóho-xi-áⁿ xínú cuèchi-dé tñáhá-dé núu dútú cúnúu. Te tée-áⁿ ní xáhaⁿ-dē xii té Pèlú:

—¿Náa ñá díú tñáhá-n ndíhi-n-dé ní xini ñáhá-í òrè ní tñí-ndí-dé xití lahuertá? —càchí-dé xáhaⁿ-dē xii-dé.

²⁷ Te té Pèlú ní xáhaⁿ tucu-dé sá ñá díú-dé, te òrè-áⁿ ní cana ìⁿ líhi.

Jèsús ndécú-gá núu tē Pilatú

(Mt. 27:1-2, 11-14; Mr. 15:1-5; Lc. 23:1-5)

²⁸ Te ní ndeñuhu-güedé Jèsús vehe té Caifás, te ndèca ñaha-güedé xii-gá cuáháⁿ vechiúⁿ tée cùu gobiernú. Te sa ta cùditó-ni-gá cuáháⁿ núu ñá ní cuini cue tée isràèl quíhu-güedé xití vechiúⁿ tée cùu gobiernú-áⁿ. Te núu ní quíhu-güedé vechiúⁿ-áⁿ ñá, te vá cúú-gá quíhu-güedé cudini-güedé vico pàscuá ní cùu chi ducaⁿ tñáhí quide-güedé. ²⁹ Núu té Pilatú tée cùu gobiernú ní quee-dé vechiúⁿ-dé ní cáháⁿ ndíhi ñaha-dē xii-güedé, te ní xáhaⁿ-dē:

—¿Ná cuèchi ní quide tée-a núu ndèca-ndo-dé véxi? —càchí-dé xáhaⁿ-dē xii-güedé.

³⁰ Te ní xáhaⁿ-güedé:

—Te núu diçó ñá túú cuèchi-dé-áⁿ te vá càndèca-ndí-dé quixi núu-n ní cùu —càchí-güedé xáhaⁿ-güedé xii-dé.

³¹ Te ní xáhaⁿ tucu té Pilatú xii-güedé:

—Chí càndèca-dé cuánùhú, te cada ndáá-ndó cuèchi-dé nàcuáa càa leí méé-ndó —càchí-dé xáhaⁿ-dē xii-güedé.

Te ní xáhaⁿ-güedé:

—Dico nchúhú ñáiyu isràèl chi ñá túú ducaⁿ taxi tñuni lèi sá càhni-ndí —càchí-güedé xáhaⁿ-güedé xii-dé.

³² Te ducaⁿ ní cuu chi dacuítí ní quee ndáá-xi nàcuáa ní cáháⁿ méé Jèsús cada-xi cuú-gá. ³³ Te cuándihu té Pilatú vechiúⁿ-dē,

te ní cana-dé Jèsús ní xicáⁿ tnúhú-dě núú-gă, te xăhaⁿ-dě:

—¿Yòhó yíndàha-n ñáyiú isràél-ăⁿ? — cächí-dé xăhaⁿ-dě xii-gă.

³⁴Te ní xăhaⁿ Jèsús:

—¿Te xiăⁿ cãháⁿ-n sã vëxi iní mée-n, àdi ió ìⁿ ñáyiú ní cachí tnúhu xii-n cuendá-í? —cächí-gă xăhaⁿ-gă xii-dé.

³⁵Te ní xăhaⁿ tẽ Pilatú xii-gă:

—Ñá díú tẽe isràél cùu-í nũu ducaⁿ cãháⁿ-n, chi cue ñani tnáhá-n cue tẽe isràél ndihí cue dútú cúnũu ní taxi cuendá ñáhá-güedě xii-n iha. ¿Te ná ní quide-n? — cächí-dé xăhaⁿ-dě xii-gă.

³⁶Te ní xăhaⁿ Jèsús:

—Ñá díú tẽe ñuyú-a cùu-í te ni ña túú vëxi-í taxi tnuní-í ñuyú-a, chi núu dicó iha tãxi tnuní-í áⁿ te cue tẽe xica cuu ndihí-í nãá-güedé ndihí cue tẽe isràél cuendá sá vã tñí ñaha-güedé xii-í ní cùu, dico ñá túú vëxi-í sá táxi tnuní-í ñuyú-a —cächí-gă xăhaⁿ-gă xii-dé.

³⁷Te ní xăhaⁿ tẽ Pilatú:

—¿Te tẽe yindaha ñáyiú cùu-ó vání? — cächí-dé xăhaⁿ-dě xii-gă.

Te ní xăhaⁿ Jèsús:

—Te dàtná cächí-n-ăⁿ yíndaha ndisa-í ñáyiú, chi yúhú vëxi-í ñuyú-a te iha ní cacu-í te cãháⁿ-í mee-ni tnúhu ndáá. Te nchaa ñáyiú na cùdí ìní-xi tnúhu ndáá, te tedóho-yu nchaa tnúhu cãháⁿ-í —cächí-gă xăhaⁿ-gă xii-dé.

³⁸Te ní xăhaⁿ tẽ Pilatú:

—¿Te ná cùú-tu tnúhu ndáá-áiⁿ? — cächí-dé xăhaⁿ-dě xii-gă.

Cächí-güedé sá cãhni-güedé Jèsús

(Mt. 27:15-31; Mr. 15:6-20; Lc. 23:13-25)

Te sátá nĩ yáha ní xicáⁿ tnúhú tẽ Pilatú núú Jèsús, te ní quee tucu-dé quehé, te xăhaⁿ-dě xii cue tẽe isràél:

—Ñá túú nã cuéchi tẽe-a. ³⁹Te váha-ni chi ducaⁿ tnáhí quide nchohó sá ndi tnáhá nduu víco pascuá cuiní-ndó sã dácăcu-í ìⁿ tẽe yíhi vecaá. Te núu cuiní-ndó te na dácăcu-í tẽe yíndaha ñaha xii-ndo — cächí-dé xăhaⁿ-dě xii-güedé.

⁴⁰Te sá dúcáⁿ nĩ cãháⁿ-dé, núu nchaa-güedé níhi ní cãháⁿ-güedé, te xăhaⁿ-güedé:

—¿Vã dácăcu-n tẽe-án, té Barrábás dácăcu-n! —cächí-güedé xăhaⁿ-güedé xii-dé.

Te té Barrábás-án nĩ cuu-dé ìⁿ ñadúhú.

19

¹Te tẽ Pilatú ní táuchíuⁿ-dě ní tñi ñaha cuè sandadú xii Jèsús, te ní caniha-güedě xii-gă ndihí ñi. ²Te diu-ni cue tẽe-án ní cadúha-güedé ìⁿ coroná iñu ní chihí-güedé díquí-gă, te ní dáquũ nuu ñaha-güedě xii-gă ìⁿ dóó tícuèhé víhí. ³Te ní sáháⁿ ndehe yatni-gă-güedé núú-gă, te ní xăhaⁿ-güedé:

—¿Ío cãhnu cuu yohó tẽe yíndaha ñaha xii ñáyiú isràél! —cächí-güedé xăhaⁿ-güedé cùdíquí ndeé ñáhá-güedé xii-gă.

Te ní cani-güedé dẽhndé núú-gă.

⁴Te ní quee tucu tẽ Pilatú quehé te ní xăhaⁿ-dě xii nchaa ñáyiú xíndecu quehé:

—Te cundehe-ndo-dě ná ndeé ñuhu-í-dé iha, chi yúhú sãha-í cuendá sá ña túú cuéchi-dé —cächí-dé xăhaⁿ-dě xii-yu.

⁵Te ní ndeñuhu ñaha té Pilatú xii Jèsús xití vechiuⁿ-dé te ñuhu ìⁿ coroná iñu díquí-gă, te nihnu-gă dóó tícuèhé víhí-án. Te ní xăhaⁿ tẽ Pilatú xii-yu:

—¿Nái-dé-a! —cächí-dé xăhaⁿ-dě xii-yu.

⁶Te ní xini ñáhá cuè dútú cúnũu ndihí cue tẽe quide cuendá veñúhu. Te ní cuáá-güedé, te xăhaⁿ-güedé:

—¿Cata caa-dé! ¡Cata caa-dé núú cùrúxí! —cächí-güedé xăhaⁿ-güedé xii-dé.

Te ní xăhaⁿ tẽ Pilatú:

—Váha-gă núu candeca mee-ndo-dě quíhíⁿ cata caa-ndo-dě núú cùrúxí, chi yúhú cùtnuní iní-í sá ña túú na cuéchi-dé —cächí-dé xăhaⁿ-dě xii-güedé.

⁷Te ní xăhaⁿ cuè tẽe isràél:

—Lèí ndécú ndihí nchúhú cächí-xi sá dàí cuú-dé, chi cächí-dé sá Dẽhe Yá Ndiõxi cùú-dé —cächí-güedé xăhaⁿ-güedé xii-dé.

⁸Te sá dúcáⁿ nĩ xăhaⁿ-güedé xii té Pilatú, te vaa-gă ní yúhú-dé. ⁹Núu cuándihu tucu-dé vechiuⁿ-dé, te ní xăhaⁿ tucu-dé xii Jèsús:

—¿Te yohó ndeé tẽe cùu-n-i? —cächí-dé xăhaⁿ-dě xii-gă.

Dico Jèsús ñá túú ní cãháⁿ-gă.

¹⁰Núu ní xăhaⁿ tẽ Pilatú xii-gă:

—¿Te vá cächí tnúhu-n núu ndeé tẽe cùu-n-u? ¿Náa ña túú xini-n sã yúhú táxi tnuní-í, te cuu-ni tauchiuⁿ-í cata caa ñaha-güedé xii-n núú cùrúxí cuú-n, te cuu-ni dácăcu ñaha-í xii-n-ăⁿ? —cächí-dé xăhaⁿ-dě xii-gă.

¹¹ Te ní xáhaⁿ Jèsús:

—Yòhó ñá túú sá táxí tñúní ñáhá-n xii yúhú ní cùu núu ñá túú Yá Ndiòxí ní cuini-gá sá dúcáⁿ cùnduu, te tée ní taxi cuèndá ñáhá xii-í núu-n tõe-án ìo-gá ndècuèchi-dé dácúxí yòhó —càchí-gá xáhaⁿ-gá xii-dé.

¹² Te òré-án ní ngúíta té Pilatú ndúcú-dé nàcuáa cada-dé dácácu-dé Jèsús ní cùu, dico cue tée isràèl ní ngúíta-güedé ní cuáá-güedé, te xáhaⁿ-güedé:

—Te núu na dácácu-n tõe-án, te ñá díú tõe tñhá tñúhu ndihi té Cèsár cúu-n. Chi ndèda-ni cãa tée na càchí sá cúú-dé tée yíndaha ñaha xii ñáyiú cùu úhú iní-dé té Cèsár. Te té Jèsús-án càchí-dé sá táxí tñúní-dé —càchí-güedé xáhaⁿ-güedé xii-dé.

¹³ Te sá dúcáⁿ ní xáhaⁿ-güedé xii té Pilatú núu ní quee-dé ndihi Jèsús cuáháⁿ ndihi ñaha-dé corrèdór núu ní quee mee-ni yúú váha núu ñúhú, te xíaⁿ nání-xí Gãbatá tñúhu hèbreú. Te xíaⁿ ndécú xilé sácóo nchihí té Pilatú xèhndé-dé cuéchi ñáyiú, núu ní nucóo-dé núu xilé-dé òré ní quexìo-dé ndihi Jèsús. ¹⁴ Te cùu-xi datná cuádava nduu, nduu vispré vico pásuá. Te ní xáhaⁿ té Pilatú xii ñáyiú isràèl:

—¡Nái tée yíndaha ñaha xii-ndo-a! —cachí-dé xáhaⁿ-dè xii-yu.

¹⁵ Te ní cuáá-yu, te xáháⁿ-yu:

—¡Cahni-dé! ¡Cahni-dé! ¡Cata caa-dé núu cùrúxí! —càchí-yu xáháⁿ-yu.

Te ní xáhaⁿ té Pilatú:

—¿Te yúhú cata caa-í tée yíndaha ñaha xii-ndo-u? —cachí-dé xáhaⁿ-dè xii-yu.

Te cue dútú cúnúu ní xáhaⁿ-güedé:

—Nchúhú ñá túú-gá tée yíndaha ñaha xii-ndí, chi ìndii-ni té Cèsár yíndaha ñaha-dé xii-ndí —càchí-güedé xáhaⁿ-güedé xii-dé.

¹⁶ Te té Pilatú ní xáhaⁿ-dè ní queheⁿ cuèndá-güedé Jèsús ndécá ñaha-güedé cuáháⁿ cata caa ñaha-güedé núu cùrúxí.

Sàta caa-güedé Jèsús núu cùrúxí

(Mt. 27:32-44; Mr. 15:21-32; Lc. 23:26-43)

¹⁷ Te ní quee Jèsús nchídó-gá cùrúxí cuáháⁿ ìn xichi núu nání Yìqui Díquí Ndíyi. Te tñúhu hèbreú queé-xí Gólgotá. ¹⁸ Te yácaⁿ ní sata caa ñaha-güedé xii-gá núu cùrúxí-án. Te xio xio ñáni-gá ní sata caa-güedé úu cue tée ndècu ndisa cuéchi-xi

díu-ni núu cùrúxí tucu. ¹⁹ Te ní táuchíúⁿ té Pilatú ní taxi ndecu-güedé ìn sá ndèè lètrá núu cùrúxí tá caa-gá, te duha càchí lètrá-án:

“Jèsús tée ñúú Nazàrét, tée yíndaha ñaha xii ñáyiú isràèl”, duha càchí-xi. ²⁰ Te vai ñáyiú isràèl ní xiní-yu nàcuáa càháⁿ lètrá-án, chi yatni-ni yuhu ñúú ní sata caa ñaha-güedé xii-gá núu cùrúxí. Te lètrá-án càháⁿ-xi tñúhu hèbreú, te càháⁿ-xi tñúhu grìégú, te càháⁿ-xi tñúhu látin. ²¹ Te ní xáhaⁿ cuè dútú cúnúu xii té Pilatú:

—Vá táuchíuⁿ-n tee-güedé lètrá càháⁿ-xi “Tée yíndaha ñaha xii ñáyiú isràèl” ní cùu, váha-gá tauchíuⁿ-n tee-güedé lètrá càháⁿ-xi “Tée càchí yíndaha ñaha xii ñáyiú isràèl ní cùu” —cachí-güedé xáhaⁿ-güedé xii-dé.

²² Te ní xáhaⁿ té Pilatú:

—Nàcuáa ní táuchíuⁿ-í ní tee-güedé te ducaⁿ quèndóo-xi —càchí-dé xáhaⁿ-dè xii-güedé.

²³ Te sátá ní sata caa ñaha cuè sandadú xii Jèsús núu cùrúxí, te cúmí xichi ní quide-güedé dóo-gá, te ìn ìn xichi dóo-gá ní cáhñu cue sandadú-án. Te ndècu ìn dóo-gá dóo cáni ñá túú ní tucu. ²⁴ Te cuèndá dóo-án ní xítñaha cue sandadú-án:

—Vá ndátá-ó dóo-a, váha-gá núu na còto ndéé-ó cuèndá quini-ó ndèdacaa-o cuu cuèndá-ó —càchí-güedé xítñaha-güedé.

Te ducaⁿ ní quide-güedé chi ní quee ndáá-xi nàcuáa càháⁿ-xi núu tütú Yá Ndiòxí núu càchí-xi: “Títñí xichi ní cáhñu-güedé dóo-í. Te ní xito ndéé-güedé cuèndá cut-núní iní-güedé ndèdacaa-güedé níhí-güedé dóo-í”, duha càchí-xi núu tütú-gá. Te sá dúcáⁿ càháⁿ-xi núu tütú Yá Ndiòxí núu xíaⁿ ducaⁿ ní quide cue sandadú-án.

²⁵ Te yatni ñáni curúxí núu tácaà Jesús núnñí náná-gá, ndihi cùhú-xi, ndihi tá Màriá ñadihí té Clèofás, ndihi tá Màriá Magdaléná. ²⁶ Te ní xiní Jèsús náná-gá núnñí-án ñáni ìn tée ní xica cuu ndihi-gá, tée ío cùu iní-gá, te ní xáhaⁿ-gá xii náná-gá:

—Náá, tée núnñí-án nduu-dé datná déhe mee-n —càchí-gá xáhaⁿ-gá xii-aⁿ.

²⁷ Te ní xáhaⁿ-gá xii tée ní xica cuu ndihi-gá-án:

—Naha-án nduu-aⁿ datná náná méé-n —càchí-gá xáhaⁿ-gá xii-dé.

Núu ndéé dàvá-án ní nduu náná ñáhá tõe-án xii náná-gá.

Ní xihí Jèsús

(Mt. 27:45-56; Mr. 15:33-41; Lc. 23:44-49)

²⁸ Te ní cutnùní iní Jèsús sá ní ndíhi chiùⁿ ní tǎhu Tǎtá-gǎ Dútú Ndiòxí ní quide-gǎ nùu ní cǎchí-gǎ:

—Yìchí-í ndute —cǎchí-gǎ.

Te duha ní cǎháⁿ-gǎ chí ní quee ndáá-xi nǎcuáa cǎháⁿ-xi núu tǔtú Yǎ Ndiòxí.

²⁹ Te ndècu ìⁿ lítu ñùhu ndudí íá. Te sá dúcáⁿ ní cǎháⁿ-gǎ sá yìchí-gǎ ndute, núu xíáⁿ ní queheⁿ-güedé cǎchí te ní chindóyo-güedé xítí ndudí íá-ǎⁿ, te ní chinenu-güedé díquí ìⁿ díte yutnu nàni hisópó, te ní ndocani-güedé ní chihi-güedé yuhu-gǎ. ³⁰ Te sǎtá ní xihí-gǎ ndudí íá-ǎⁿ, te cǎchí-gǎ:

—Vitna ní dǎxínu cava-í nchaa chiùⁿ ní cǎchí Tǎtá-í cada-í —duha ní cǎchí-gǎ.

Te ní xócuíta dúcúⁿ-gǎ ndàa núú-gǎ, te ní xihí-ni-gǎ.

ìⁿ sandàdú ní caáⁿ-dé yiqui naha Jèsús ndíhi ìⁿ pùýá yíhí caá núú-xi

³¹ Te cuèndá sá ndùu vispré vico pǎscuá cúu-xí nùu ñá ní cuiní cue téé isràél cundecu-ní yiqui cùñú-gǎ núu cùrúxí ndíhi yiqui cùñú cue téé ní sata caa-güedé díñi-gǎ, chí cuèndá nduu tnèé-ǎⁿ cúu-xí ndùu ndetatú ñáyíu, te ío quide cahnú-yu nduu-ǎⁿ, núu ní xáhaⁿ-güedé xii té Pilatú sá táuchìuⁿ-dé quíhíⁿ cue téé cǎhnú-güedé díhiⁿ Jèsús ndíhi díhiⁿ cue téé tàcaa ndíhi-gǎ, te xocàni-güedé yiqui cùñú-gǎ ndíhi yiqui cùñú-güedé yàcáⁿ.

³² Te sǎtá dúcáⁿ te ní sǎháⁿ cue sandàdú ní sǎhnú-güedé díhiⁿ cue téé tàcaa xio xio díñi Jèsús. ³³ Te òré ní cuyatni-güedé núú-gǎ, te ní xiní-güedé sá sà ní xihí-gǎ nùu ñá ní sǎhnú-güedé díhiⁿ-gǎ.

³⁴ Dico ìⁿ sandàdú-ǎⁿ ní cúxi-dé pùýá néhé-dé ìⁿ xio yiqui naha-gǎ, te yíhí caá núú-xi núu ní caáⁿ-xi yiqui naha-gǎ ní quee níñí ndíhi ndute cuí. ³⁵ Te yúhú té Juàá téé ní cadúha tutú-a ní xiní-í nǎcuáa ní cuu ní xihí Jèsús, te xíáⁿ nùu cǎháⁿ ndáá-í cuèndá quíndáá iní-ndó. ³⁶ Te ducaⁿ ní cuu ñá ní sǎhnú-güedé díhiⁿ Jèsús, chí ní quee ndáá-xi nǎcuáa cǎháⁿ-xi núu tǔtú Yǎ Ndiòxí núu cǎchí-xi: “Vá cǎhnú-güedé ní ìⁿ yiqui-gǎ”, duha cǎchí-xi. ³⁷ Te ducaⁿ ní quide-güedé Jèsús ní caáⁿ-güedé yiqui naha-gǎ, chí ingá xichi núu tǔtú Yǎ Ndiòxí

cǎchí-xi: “Sáá nduu te quiní-güedé ìⁿ téé ní dánicuehè-güedé”, duha cǎchí-xi.

Chindúxi-güedé Jèsús

(Mt. 27:57-61; Mr. 15:42-47; Lc. 23:50-56)

³⁸ Te sǎtá dúcáⁿ ní cuu, te té Chèé téé ñùu Arimàteá tnàhá-dé ní sándáá iní-dé tnúhu Jèsús dico dayuhu, chí ní xóo yùhú-dé cue téé cùnūu núu ñáyíu isràél. Te téé-ǎⁿ ní xáhaⁿ-dè xii té Pilatú nùu vá dáñá-dè canehe-dé yiqui cùñú Jèsús quíhíⁿ chindúxi-dé, te té Pilatú ní xáhaⁿ-dè xii-dé sá cúu cǎnehe-dé yiqui cùñú Jèsús quíhíⁿ, núu ní sǎháⁿ-dé ní nuu nehe-dé yiqui cùñú-gǎ núu cùrúxí nchídó-dé cuáháⁿ. ³⁹ Te té Nicòdemú téé ní sǎháⁿ niú ní cǎháⁿ ndíhi-dé Jèsús ndéé díhna, téé-ǎⁿ néhé-dé ócò úxí kílu yuchi ní cuáha mee-ni yúcu sǎ nání mìrrá ndíhi yúcu sǎ nání àloés. Te ío váha tnàmi saháⁿ. ⁴⁰ Te ní naníhí tnàhá-dé ndíhi té Chèé, te ní chidúcúⁿ nuu-güedé yiqui cùñú Jèsús mee-ni dǒó váha, te nǎcuáa ta dùcuⁿ nuu-güedé yiqui cùñú-gǎ dǒó-ǎⁿ, te ducaⁿ ta chido-güedé yuchi sàháⁿ tnámí-ǎⁿ núu dǒó-ǎⁿ chí ducaⁿ tnàhí quide ñáyíu isràél òré chindúxi tnàhá-yu. ⁴¹ Te yatni núu ní sata caa-güedé Jèsús caá ìⁿ lahuertá. Te xítí lahuertá-ǎⁿ nchí ìⁿ yaú cava duha cuáháⁿ ndáá-xi, te vátá yǒ ìⁿ-gǎ nguíndúxi xíáⁿ. ⁴² Te cuèndá sá ní cuyatni tnàhá nduu ndetatú ñáyíu isràél nùu xíáⁿ yaú cava nchí yatni-ni xíáⁿ ní chihi-güedé yiqui cùñú Jèsús.

20

Jèsús ní ndoto-gǎ

(Mt. 28:1-10; Mr. 16:1-8; Lc. 24:1-12)

¹ Te ndumíngú tacuíhndá-gǎ cuáháⁿ tá Màriá Magdalená cuáháⁿ ngoto-xi yaú núu ní chihi-güedé yiqui cùñú Jèsús, te ní sáá-xi ní xiní-xi sá ñà túú-gǎ ndedí yúu yèhe yaú-ǎⁿ. ² Núu xinu-xi cuánuhú núu ndécú tǎ Xímú, àdi Pelú chí úú díu-dé, ndíhi ingá téé ní xica cuu ndíhi-gǎ téé ío cùu iní-gǎ, te ní xáhaⁿ-xi xii-güedé:

—Nèhe-güedé yiqui cùñú Jèsús cuáháⁿ, te ñá xiní-ó ndéé ní taxi ndecu-güedé —cǎchí-xi xáhaⁿ-xi xii-güedé.

³ Te ní quee té Pèlú ndíhi ingá téé-ǎⁿ cuáháⁿ ndéhé-güedé yaú núu ní chihi-güedé yiqui cùñú-gǎ. ⁴ Te ndùú-güedé xínú-güedé cuáháⁿ ní cùu, dico ingá téé-ǎⁿ ní cuu níhi-gǎ sǎhá-dé cuáháⁿ-dé nùu

díhna-gá-dé ní sáá-dé yuhu yàù núú ní chihí-güedé yiqui cùñú Jèsús ní cùu. ⁵ Te ní ngáundeyi-dé xító nihni-dé xití yáú-án, te ní xiní-dé mee-ná dóó vâha sá ní xiducúⁿ nuu-gá yúcu, dico ñá ní quíhu-dé. ⁶ Te sáta ní sáá té Pèlú te cuànguihu-dé xití yáú-án, núu tñahá-dé ní xiní-dé nchaa dóó ní xiducúⁿ nuu-gá yúcu-án. ⁷ Te ní xiní-dé sá dóó ní xindútú díqui-gá ñá túú càtuu jundú-xi ndíhi dóó ní xiducúⁿ nuu-gá chi ní naducúⁿ nuu-ná càtùu ìⁿ xio. ⁸ Te nchicúⁿ tucu téé ní sáá díhna-gá-án cuànguihu xití yáú-án, te ní xiní-dé sá dóó-ná yúcu, te ñá túú-gá yiqui cùñú Jèsús núu ní sándáá iní-dé sá ñí ndoto-gá. ⁹ Chi vátá təcú tñuní-gá-güedé nàcuáa càháⁿ-xi núu tütú Yá Ndióxi núu càchí-xi sá Jèsús ndoto-gá. ¹⁰ Te ní xícó ndí ndúú cue téé ní sángoto yáú núú ní chihí-güedé yiqui cùñú Jèsús ní cùu cuánuhú-güedé vehe-güedé.

Jèsús ní naníhi tñahá-gá ndíhi tá Màriá Magdalèná

(Mr. 16:9-11)

¹¹ Te ní sáá tucu tá Màriá yuhu yàù núú ní chihí-güedé yiqui cùñú Jèsús te ní ngúíta-xi ndàhyú-xi, te ní ngáundeyi-xi xitò nihni-xi xití yáú-án. ¹² Te xití yáú-án ní xiní-xi úú espíritu xínú cuèchi núú Yá Ndióxi xixíhnu-xi mee-ní dóó cuixíⁿ xindecu-xi núú ní cáa yiqui cùñú-gá. Te ìⁿ-xi núcóo núú ní cáa sáhá-gá. ¹³ Te espíritu-án ní xáhaⁿ-xi xití tá Màriá: —¿Ná cuèndá ndàhyú-n? —càchí-xi xáhaⁿ-xi.

Te ní xáhaⁿ tá Màriá:

—Ndàhyú-í chi nèhe-güedé yiqui cùñú Yáá cúú Xítohó-í cuáháⁿ, te ñá túú xiní-í ndéé ní taxi ndecu-güedé —càchí-xi xáhaⁿ-xi xití cue espíritu-án.

¹⁴ Te tñuhu-ni-án ní cáháⁿ-xi te ní nchócótó-xí ìⁿ xio, te ní xiní-xi Jèsús nutñí-gá dico ñá túú ní cùtnuní iní-xi sá díú mèe-gá. ¹⁵ Te ní xáhaⁿ Jèsús xii-xi:

—¿Ná cuèndá ndàhyú-n? ¿Yoo nàndu-ducu-n? —càchí-gá xáhaⁿ-gá xii-xi.

Te mee-xi ní saní iní-xi sá tée xitò lahuertá-án cúú tée-án, núu ní xáhaⁿ-xi:

—Táta, te núu yòhò néhé-n yiqui cùñú Jèsús cuáháⁿ, te cáháⁿ-n ndéé ní taxi ndecu-n chi cuèndá naqueheⁿ-í canehe-í nùhú —càchí-xi xáhaⁿ-xi.

¹⁶ Te ní cáháⁿ díú ñàha-gá xii-xi, te xáhaⁿ-gá:

—¿Màriá! —càchí-gá xáhaⁿ-gá xii-xi.

Te ní ndacoto-xi núú-gá, te ní cáháⁿ-xi tñuhu hebreyú, te xáhaⁿ-xi:

—¿Rabóní! —càchí-xi xáhaⁿ-xi. Te tñuhu-án quée-xi Mèstrú.

¹⁷ Te ní xáhaⁿ Jèsús:

—Daña vá ngání ñàha-n chi vátá ndáa-gá-í núú ndécú Tàtà-í. Te nùhú-n cùñaha-n xii cue téé ío váha ní tñahá tñuhu ndíhi-í sá ndáa-í núú ndécú Tàtà-í Dútú Ndióxi, te diu-gá cúú Tàtà-ndó nchàa-ndo, te diu-ni-gá cúú Ndióxi-ndó —càchí-gá xáhaⁿ-gá xii-xi.

¹⁸ Te ní natñí tá Màriá Magdalèná ichi cuánuhú-xi cùñaha-xi xití cue téé ní xica cuu ndíhi-gá sá ní xiní-xi Jèsús, te ní xáhaⁿ-xi xití-güedé nchaa nàcuáa ní xáhaⁿ-gá xii-xi.

Ní quexio Jèsús núú xindecu cue téé ní xica cuu ndíhi-gá

(Mt. 28:16-20; Mr. 16:14-18; Lc. 24:36-49)

¹⁹ Te diu-ni ndumíngú sandiquíⁿ ní natacá cue téé ní xica cuu ndíhi-gá, te xindedí nihnu-güedé vehe sá xiyùhú-güedé cue téé cùnno núú ñáyiú isràél. Te ní quíhu Jèsús ndéé tnuú-güedé ní ngúnutñí-gá, te ní xáhaⁿ-gá:

—Yá Ndióxi chíndèe ñàha-gá xii-ndo ío váha cùu iní-ndó ndècu-ndo —càchí-gá xáhaⁿ-gá xii-güedé.

²⁰ Te ní dánèhé ñáhá-gá ndaha-gá ndíhi yiqui naha-gá xii-güedé. Te ío ní cudíí iní-güedé sá díú ndisa-gá ní xiní ñáhá-güedé. ²¹ Te ní xáhaⁿ tucu Jèsús xii-güedé:

—Yá Ndióxi chíndèe ñàha-gá xii-ndo ío váha cùu iní-ndó ndècu-ndo. Te dàtná ní tendaha ñàha Tàtà-í Dútú Ndióxi xii-í véxi-í ñuyíú-a, te ducaⁿ tendaha ñàha-í xii-ndo quíhíⁿ-ndó cáháⁿ-ndó tñuhu-í núú ñáyiú —càchí-gá xáhaⁿ-gá xii-güedé.

²² Te ní chiyóco-gá núú-güedé, te ní xáhaⁿ-gá:

—Chí ndúú tàhú Espíritu Yá Ndióxi cundecu ndíhi-ndo. ²³ Te nchaa ñáyiú

na quíndáá iní-xi tñuhu-í te cùñaha-ndo xí-yu sá ní quide càhnu iní Yá Ndióxi nchaa cuèchi-yu. Te nchaa ñáyiú vá quíndáá iní tñuhu-í te cùñaha-ndo xí-yu sá vâ cádá

càhnu iní-gá cuéchi-yu —càchí-gá xáhaⁿ-gã xii-güedé.

Té Măxí càháⁿ ndihi-dé Jèsús

²⁴ Te núú ùxúú cue téé ní xica cuu ndihi-gá, te ìⁿ-dé nání-dě Măxí téé ní xóo danàni-güedé Cuăchí, te téé-áⁿ ñà túú-dě ndécú ndihi-güedé òré ní sáháⁿ Jèsús. ²⁵ Te dava-gá cue téé ní xica cuu ndihi-gá ní xáhaⁿ-güedé xii-dé:

—Ní xiní-ndí Jèsús —càchí-güedé xáhaⁿ-güedé.

Te ní xáhaⁿ tĕ Măxí:

—Te vá quindáá iní-í, chi ndéé quini-í ndaha-gá núú ní queé nduyú, te dàquíhu-í díquí ndáhà-í núú ní caáⁿ nduyú-áⁿ, te dàquíhu ndàha-í yiqui naha-gã núú ní caáⁿ, ducaⁿ te quindáá iní-í —càchí-dé xáhaⁿ-dĕ xii-güedé.

²⁶ Te núú ùná tucu nduu ní natacá tucu cue téé ní xica cuu ndihi Jèsús ìⁿ vehe, te nduu-áⁿ tnàhá té Măxí ndécú ndihi-güedé. Te cuéi ndèdì nihnu-güedé vehe-áⁿ, te ní quíhu Jèsús ndéé tnuú-güedé, te ní xáhaⁿ-gã:

—Yá Ndiöxí chindèe ñaha-gá xii-ndo ÿo váha cùu iní-ndó ndècu-ndo —cachí-gá xáhaⁿ-gã xii-güedé.

²⁷ Te ní xáhaⁿ-gã xii té Măxí:

—Cundehe ndàha-í te dàquíhu-n díquí ndáhà-n núú ní queé nduyú, te dàquíhu-n ndàha-n yiqui naha-í-a cuèndá quindáá iní-n te vá cání ìⁿ cani úú iní-n —càchí-gá xáhaⁿ-gã xii-dé.

²⁸ Te ní xáhaⁿ tĕ Măxí xii-gá:

—jYòhó cúu-n Xitohó-í! jYòhó cúu-n Ndiöxí-í! —càchí-dé xáhaⁿ-dĕ xii-gá.

²⁹ Te ní xáhaⁿ Jèsús:

—Măxí, ndéé vitna ní sándáá iní-n chi ndéé ní xiní ñáhà-n xii-í te ní sándáá iní-n, dico cùdíí-gã iní nchaa ñayiu ñá túú ní xiní núú ñáhà xii-í, te ní sándáá iní-yu —càchí-gá xáhaⁿ-gã xii-dé.

Quindáá iní-ó tnúhu yòdo tnuú núú tütú-a

³⁰ Te vai-gá sá vã yòo tnàhí ndàcu cada ñá túú yòdo tnuú núú tütú-a ní quide Jèsús núú cuè téé ní xica cuu ndihi-gá. ³¹ Dico dava-gá ní ngódó tnuú núú tütú-a cuèndá sá quindáá iní-ndó sã Jèsús cúu-gã Crístú

Déhe Dútú Ndiöxí, te naníhí tàhú-ndó te núu na quindáá iní-ndó-gã.

21

Úsá cue téé ní xica cuu ndihi Jèsús ní xiní ñáhà-güedé xii-gá

¹ Te ingá nduu tucu xñdecu cue téé ní xica cuu ndihi Jèsús yuhu làgúná ñuú Tìberias, te ní sáháⁿ-gá núú xñdecu-güedé-áⁿ. Te duha ní cuu ní xiní ñáhà-güedé xii-gá.

² Te ndècu té Xímú, àdi Pelú chi úú ñuú-dé, ndihi té Măxí téé ní xóo cúnaha-güedé Cuăchí, ndihi té Natanàel téé ñuú Cànaá, te ñuú-áⁿ yíndèhu-xi distritú Galileá, te tnàhá ndí ndúú déhe té Zebèdeú, ndihi úú-gá tucu cue téé ní xica cuu ndihi-gá. ³ Te ní xáhaⁿ tĕ Pèlú xii-güedé:

—Quíhíⁿ-í quítnii-í chácá —càchí-dé xáhaⁿ-dĕ xii-güedé.

Te ní xáhaⁿ-güedé:

—Tnàhá nçhúhú canchicúⁿ ñáhà-ndĕ xii-n quíhíⁿ tucu —càchí-güedé xáhaⁿ-güedé xii-dé.

Te ní xica-güedé cuáhàⁿ-güedé ní sáá-güedé núú ndécú bàrcú, te ní queé-güedé xití bàrcú-áⁿ cuáhàⁿ-güedé. Te niú-áⁿ ñá ní níhí tnàhí-güedé chácá. ⁴ Te sa ta cùditó-ñã cuáhàⁿ ní xiní-güedé Jèsús yuhu làgúná, dico ñá ní cùtnuní iní-güedé sá díú-gã. ⁵ Te ní xáhaⁿ-gã xii-güedé:

—Cue téé cuechi, ¿ní níhí-ndó chácá caxi-o ñã? —càchí-gá xáhaⁿ-gã xii-güedé.

Te ní xáhaⁿ-güedé:

—Vèdana chácá ñà túú ní níhí-ndĕ —càchí-güedé xáhaⁿ-güedé xii-gã.

⁶ Te ní xáhaⁿ Jèsús:

—Chí dáquëe ñunu-ndo ndàa xio cuha bàrcú chi níhí-ndó-dí —càchí-gá xáhaⁿ-gã xii-güedé.

Te ducaⁿ ní quide-güedé, te òré nátava-güedé ñunu xití ndute, te ñá cùndèe-gá-güedé natava-güedé cuèndá sá ní chítú chácá xití-xi. ⁷ Te téé ní xica cuu ndihi-gá téé ío cùu iní-gá ní xáhaⁿ-dĕ xii té Pèlú:

—jDiú Xitohó Jesucristú! —càchí-dé xáhaⁿ-dĕ xii-dé.

Te sá ní tecú dóho té Pèlú sá dúcáⁿ càháⁿ-dĕ ñuu ní ndiúnuu-dé dóó-dĕ, chi dóó sã yímàa-ni-dé níhí-ndĕ ní cùu. Ducaⁿ

te ní nuu ndava-dé bàrcú ní ngauni-hnu-dé ndute, te cuáháⁿ-dé núú ndute-áⁿ ní quene-dé ndéé ñuhu yìchí. ⁸ Te dava-gá cue tée ndìhì té Pèlú òu-ni cue tée ní xica cuu ndìhì Jèsús ní quendóo-güedé dàtná ìⁿ ciendú-gá mètrú te quene-güedé yuhu ndüte. Te tàñuhu-ni-güedé ñunu-güedé chitu chácá ní quene-güedé ndéé yuhu ndüte. ⁹ Te òrè ní quene-güedé ñuhu yìchí, te ní xini-güedé càyú ñuhú, te núú ñuhú-áⁿ ñuhú ìⁿ chácá ndìhì ìⁿ pàá. ¹⁰ Te ní xáhaⁿ Jèsús xii-güedé:

—Quihíⁿ ngueheⁿ-ndo ìⁿ úú chácá quitì íchí ní tñiⁿ-ndo —càchí-gá xáhaⁿ-gá xii-güedé.

¹¹ Núú té Pèlú ní sáháⁿ-dé núú ndécú bàrcú, te ní quée-dé xiti-xi ní cándéé-dé ñunu ñuhu chácá tàñuhu-dé ní quene ndéé ñuhu yìchí, te chitu chácá náhmú, te ñuhu ìⁿ ciendú údico úxí úní-dì xití ñunu-áⁿ, te cuèi ducaⁿ vai-dì ñuhu dico ñá ní ndátá ñunu-áⁿ. ¹² Te ní xáhaⁿ Jèsús:

—Chí nèhé cadí iní-ndó —càchí-gá xáhaⁿ-gá xii-güedé.

Dico ni ìⁿ cue tée ní xica cuu ndìhì-gá-áⁿ ñá ní xicáⁿ tñuhú-güedé núú-gá ñuu yoo cùu-gá, chi sa ní cutnùnì iní-güedé sá díú Jèsús cúu-gá. ¹³ Te Jèsús ní sáháⁿ-gá ní queheⁿ-gá pàá ní sáñaha-gá xii-güedé caxi-güedé, te dàtnùnì ní queheⁿ tucu-gá chácá ní sáñaha-gá xii-güedé.

¹⁴ Vitna cùu únì xito sá xini ñáhá cue tée ní xica cuu ndìhì-gá sátá ní ndoto-gá.

Jèsús càháⁿ ndìhì-gá té Pèlú

¹⁵ Te sátá ní túhú cóhó-güedé ní sadí iní-güedé te ní xicáⁿ tñuhú Jèsús núú té Xímú, àdi Pelú chi úú díu-dé, te xáhaⁿ-gá:

—Xímú, déhe té Jónás, ¿cùu iní-gá-n yùhú dàcúúxí dàva-gá cue tée-a ñá? —càchí-gá xáhaⁿ-gá xii-dé.

Te ní xáhaⁿ té Pèlú:

—Mèstrú, cùu iní ñáhà-í, yòhó sa nàha-n —càchí-dé xáhaⁿ-dè xii-gá.

Te ní xáhaⁿ Jèsús:

—Te núú ducaⁿ, te dacàxi-n cue mbéé líhli-í —càchí-gá xáhaⁿ-gá xii-dé.

Te cue mbéé-áⁿ cúu-güedé ñáyiu cùu cuendá-gá.

¹⁶ Te ní xáhaⁿ tucu-gá xii té Pèlú:

—Xímú, déhe té Jónás, ¿cùu iní ñáhà-n xii-í-u? —càchí-gá xáhaⁿ-gá xii-dé.

Te ní xáhaⁿ tucu té Pèlú:

—Mèstrú, cùu iní ñáhà-í, yòhó sa nàha-n —càchí-dé xáhaⁿ-dè xii-gá.

Te ní xáhaⁿ-gá:

—Te núú ducaⁿ, te coto-n cue mbéé-í —càchí-gá xáhaⁿ-gá xii-dé.

¹⁷ Te xito cùu únì ní xáhaⁿ tucu-gá xii té Pèlú:

—Xímú, déhe té Jónás, ¿cùu iní ñáhà-n-áⁿ? —càchí-gá xáhaⁿ-gá xii-dé.

Te té Pèlú ío ní cundiýí-dé sá dúcáⁿ ní cuu únì xito xicáⁿ tñuhú-gá núú-dé ñuu ndisa sá cúu iní ñáhà-dè xii-gá, te ní xáhaⁿ-dè:

—Mèstrú, yòhó nchaa sa xiniⁿ, te sa cùtnùnì iní-n sá cúu iní ñáhà-í xii-n —càchí-dé xáhaⁿ-dè xii-gá.

Te ní xáhaⁿ Jèsús:

—Te núú ducaⁿ, te dacàxi-n cue mbéé-í.

¹⁸ Te na càchí tñuhu ndáá-í xii-n sá cùt-nàhá cuechi-gá-n ní xóo ndécuihnu mee-n dóo-n, te ní xóo quihíⁿ-n ndèni ní xóo càchí iní-n, dico na yì-n te dacáá-n ndàha-n, te ìngá tée dacuihnu ñaha xii-n dóo-n te cada yica-dè candeca ñaha-dè xii-n quihíⁿ ìⁿ núú ñá túu tñahá iní-n —càchí-gá xáhaⁿ-gá xii-dé.

¹⁹ Te sá dúcáⁿ ní càháⁿ Jèsús cúu-xí sá ní dátécú tñuhu ñaha-gá xii té Pèlú nàcuáa cada-xi cuú-dé, te ducaⁿ càda cahnu-dé Yá Ndiòxi, te ní xáhaⁿ-gá xii-dé:

—¡Canchicúⁿ ñáhà-n xii-í! —càchí-gá xáhaⁿ-gá xii-dé.

Tée ío cùu iní-gá

²⁰ Te ní nchócótó tē Pèlú ndàa sátá-dé, te ní xini-dé sá nchicúⁿ ñáhá ìngá tée xica cuu ndìhì-gá cuáháⁿ, tée ío cùu iní-gá tée ní xínucóo ñiñi-gá òrè ní cudini ndìhì ñaha-gá xii-güedé, te díu-ni tée-áⁿ ní xicáⁿ tñuhú-dé núú-gá dàvā-áⁿ ñuu ndèda càa tée cuáha cuèndá ñáhá xii-gá núú cue tée cùu úhú iní ñáhá. ²¹ Te òrè ní xini té Pèlú sá nchicúⁿ ñáhá tée-áⁿ, te ní xicáⁿ tñuhú-dé núú Jèsús, te xáhaⁿ-dè:

—Mèstrú, te tée-áⁿ, ¿ná cúu sá yàha-dé-í? —càchí-dé xáhaⁿ-dè xii-gá.

²² Te ní xáhaⁿ Jèsús:

—Te núú yúhú cuiniⁿ-í sá cùndècu-ni-dé ndéé ná quixi tucu-í ñuyíú-a, ¿te yòhó ná cuèndá-n ñuu xicáⁿ tñuhú-n? Yòhó canchicúⁿ ñáhá-ni xii-í —càchí-gá xáhaⁿ-gá xii-dé.

²³ Te ní xinu tñuhu núú nchàa ñáyiu sàndáá iní tñuhu-gá sá tée-áⁿ vā cùu-dé.

Dico Jèsús ñá túú dùcaⁿ ní xáhaⁿ-gǎ sá vǎ cùú-dé, chi ní xáhaⁿ-gǎ: “Núu yúhú cuíní-í sá tǎe-ǎⁿ cundecu-ni-dé ndéé ná quixi tucu-í ñuyúú-a, ¿te yòhó ná cuendá-n?”, duha ní xáhaⁿ-gǎ xii té Pèlú.

²⁴Te ñiu-ni yúhú té Juáá tée ní sani iní-yu sá vǎ cùú càháⁿ ndáá-í nchaa nàcuáa ní cuu, te ducaⁿ ní tee-í núú tütú-a, te cùtnuní iní-ndó sǎ tnǎhu ndáá cúú-xí.

²⁵Te ndècu vai-gǎ núú sǎ ní quide Jèsús. Te núu ñicó ní ngǎndee nchaandi túhú ñá, te vǎa ni te ñihí ñuyúú te vǎ tnàhá núú-xi cundecu ñibrú, te núu ñicó ní ngǎndee nchaa. Te ducaⁿ na cùnduu. Te ío chí cádá ndèe iní-nǎ vitna.

NCHAA NÀCUÁÁ NÍ QUIDE CUE TÉE NÍ TÁÚCHÍÚⁿ JÈSÚS DACUÁHA ÑAHA XII ÑÁYIU TNÚHU-GÁ

Jèsús ní cachí tnúhu ndáá-gá sá quixí Espiritú Yá Ndióxi cundecu ndihi ñáyiu

¹ Te duha ní cáháⁿ té Lùcá ní xii-dé té Tëofilú: Yúhú sa ní chídó tnúni-í núu librú ndéé díhna nchaa sá ní quide Jèsús, ndihi nchaa sá ní dácúáhá-gá ñáyiu. Te ní chídó tnúni-í nchaa sá ní quide-gá ndéé nduu ní quesaha-gá quidé chiúⁿ-gá, ² ndihi nchaa sá ní quide-gá ndéé òré cuándaa-gá andiu. Te sa ta cùyatni nduu ndaa-gá andiu, te ní ndatnúhu-gá ndihi cue tée ní cáháⁿ-gá dacuáha ñaha xii ñáyiu tnúhu-gá, te mee Espiritú Yá Ndióxi ní chindee ñaha-xi xii-gá ní xáhaⁿ-gá nàcuáa cada-güedé. ³ Te sáta ní xíhí-gá te ní ndoto-gá, te ní xíndecu-gá údico nduu. Te titní xito ní sáháⁿ-gá núu ní xíndecu-güedé, te ducaⁿ ní quide-gá cuèndá quini-güedé sá ndáá ní ndoto-gá, te ní xáhaⁿ-gá nàcuáa quide Yá Ndióxi ndíhu ndaha-gá ñáyiu.

⁴ Te ñⁿ nduu ndècu ndihi ñaha-gá xii-güedé, te ní xáhaⁿ-gá:

—Vá quée-ní-ndó ñúu Jerusàlén, chi cundetú-ndó quixí Espiritú Yá Ndióxi cundecu ndihi-ndo, chi sa ní cachí tnúhu-í sá dúcáⁿ ní cáháⁿ Tàtá-ó Dütú Ndióxi Yáa ndécú àndiu nacúaa cunduu. ⁵ Te ndáá sá ndii Juáa ní dácúándüte ñaha ndii xii-ndo, dico vitna ñá túú-gá cuéhé nduu, te quexio Espiritú Yá Ndióxi cundecu ndihi-ndo —cachí-gá xáhaⁿ-gá xii-güedé.

Jèsús cuándaa-gá andiu

⁶ Te òré ní xíndecu-güedé ndihi Jèsús, te ní xáhaⁿ-güedé xii-gá:

—Mèstrú, cuini-ndí cachí tnúhu-n ñúu sa ta cùyatni nduu chindee-n ñáyiu ñúu Isràél cuèndá taxi tnúni tucú-yu ñúu-yu —cachí-güedé xáhaⁿ-güedé xii-gá.

⁷ Te ní xáhaⁿ Jèsús xii-güedé:

—Ñá túú xini ñuhu-xi cumaha nchóhó xiáⁿ, chi Tàtá-ó Dütú Ndióxi náhá-gá ná nduu càda-gá nchaa sá ní cáháⁿ-gá. ⁸ Te òré quexio Espiritú Yá Ndióxi cundecu ndihi-ndo, te cuyi-ndo ní yuhu ní ini-ndó quíhíⁿ-ndó cáháⁿ-ndó tnúhu-í núu ñáyiu

ñúu Jerusàlén ndihi núu ñáyiu distrítú Júdeá ndihi núu ñáyiu distrítú Sàmariá. Te ducaⁿ-ni cáháⁿ-ndó quíhíⁿ-ndó ní cacixo ñuyú —cachí-gá xáhaⁿ-gá xii-güedé.

⁹ Te sáta dúcáⁿ ní cáháⁿ-gá, te ndèhe-güedé ní ndanchita-gá cuándaa-gá andiu cuándihu-gá xiti vícò, te ñá túú-gá ní xini ñáhá-güedé xii-gá. ¹⁰ Te ndèhe vihi-güedé andiu núu ndéé quini ñáhá-güedé xii-gá yòtnúhu, te ní quexio cunu úu cue tée ñihnu dóo cuixíⁿ núu ndécú-güedé. ¹¹ Te xáhaⁿ-güedé:

—Nchòhó cue tée Galileá, ¿ná cuèndá ndéhé-ndó àndiu? Te dàtná-ni càa Jèsús cuándaa-gá andiu vitna, te ducaⁿ-ni cùnduu-gá quixi tucu-gá —cachí cue tée ñihnu dóo cuixíⁿ-án xáhaⁿ-güedé.

Cuèndá sá ñá túú-gá ndii Júdás ñúu ní nanducu-güedé té Màtiá ní nucúnutni-dé núu ndii

¹² Te ní ndee-güedé yucu Òlívú cuánuhú-güedé ñúu Jerusàlén, te ní xúhuⁿ-güedé cuèdicò cuádava òré ichi.

¹³ Te òré ní ndexio-güedé ñúu-án, te cuándaa-güedé cuártú ndéé núu ñinu, chi vehe yòdo tñaha ndecu-güedé. Te ní naníhí tnáhá-güedé nchaa-güedé té Pèlú, té Jàcobó, té Juáa, té Ndríxi, té Lipé, té Mǎxi, té Bartolómé, té Màteú, té Jàcobó déhe té Àlfeú, ndihi té Xímú tée ní cundíhi cue tée cananístá, ndihi té Júdás ñani té Jàcobó. ¹⁴ Te ní naníhí tnáhá-güedé nchaa-güedé yàcáⁿ ndihi tá Màriá náná Jèsús, ndihi cue ñani-gá ndihi dava-gá cue ñáyiu díhí. Te ñⁿ-ni ní cuú-yu ní cáháⁿ ndihí-yu Yá Ndióxi.

¹⁵ Te ñⁿ nduu ní xíndecu dàtná ñⁿ cièndú ócò mee-ni ñáyiu sàndáá ini tnúhu Jèsús, te ní ngúnutni té Pèlú núu-yu, te ní xáhaⁿ-dè xii-yu:

¹⁶⁻¹⁷ —Nchòhó cue ñáyiu ndècu ndihi-í ichi Xitohó Jesucristú, na càni-í cuèndú núu-ndó nàcuáa ní chídó tnúni ndii Dàvíí tée ní xíndecu ndéé sanaha nàcuáa ní cáháⁿ Espiritú Yá Ndióxi cuèndá té Júdás. Te daciití dùcaⁿ ní cuu, chi tnàhá té Júdás ní xíndecu ndihi-o, te ní xinu cuechi-o ndihi-dé núu-gá sá díhna, te ducaⁿ ní quide-dé ní sáha cuèndá-dé Jèsús núu cue tée cùu úhú ini ñáhá xii-gá. ¹⁸ Te ní cháhu ñaha-güedé xii-dé cuèndá sá ní sáha cuèndá ñáhá-dè xii-gá. Te ní sáháⁿ-dè ñⁿ xichi ní sata caa-dé meé-dè, te ní

ngava-dé, te ní cahndí duuⁿ xití-dé te xíáⁿ ní xíhí-dé. Te ní naqueheⁿ-güedé díhúⁿ sá ní cháhu-güedé ndí, te ní nacuaaⁿ-güedé ñuhu núú ní ngava ndí-án.¹⁹ Te nchaa ñáyiú Jerusalén ní níhí-yu tnúhu, te ní dánání-yu ñuhu-ánⁿ Acældamá. Te tnúhu mée-yu quèe-xi: Ñuhu núú ní sati níhí.²⁰ Te duha ní cáháⁿ ndí Dàvíí ní chídó tnùní ndí núú líbrú Sálmú ní dándóo ndí: “Nà ndóo nahi vèhe-dé, vá yóo ñⁿ quíhíⁿ cundecu”, duha ní cáháⁿ ndí. Te ingá tucu tnúhu ní cachí ndí: “Na nànducu-güedé ingá tée nucúnutní núú ndí”, duha ní cáháⁿ ndí Dàvíí —cachí té Pèlú xáhaⁿ-dè xí-yu.

²¹⁻²² Te ní xáhaⁿ tucu-dé:

—Te ducaⁿ ní cáháⁿ ndí Dàvíí, te vitna xini ñuhu-xi nanducu-o ñⁿ tée nucúnutní-dé núú ndí Júdás, te xini ñuhu-xi ñu-ni ñⁿ tée ní xica cuu ndíhí Xitohó Jesucristú cúnahá ní xica cuu-o ndíhí-gá, ñⁿ tée ní xini ndéé òré ní dácúandute ñaha ndí Juáá xii-gá, te ndéé òré cuánda-gá andíu. Te tée nanducu-o cundecu-dé cáháⁿ-dé nàcuáa ní cuu ní ndoto-gá —cachí té Pèlú xáhaⁿ-dè xí-yu.

²³ Te ní cacunehe-güedé úú tnàhá-güedé núú ndédacáa-güedé nduu táhu-güedé nucúnutní-güedé núú ndí. Te ñⁿ-dé nání-dè Chèé Barsábás, àdi Justú chi úú ñu-dé, te ingá-dé nání-dè Mátía.²⁴ Te ní cáháⁿ ndíhí-güedé Yá Ndióxi, te xáhaⁿ-güedé xii-gá:

—Yòhó Dútú Ndióxi xini-n ñí nchaa ñáyiú, te mee-n nàha-n núú ndéda càa núú úú cue tée-a tnàhá ñí-n²⁵ cáháⁿ-güedé tnúhu-n núú ñáyiú, te tée-án nucúnutní-dé núú ndí Júdás, chí cuáháⁿ ndí núú ùhú núú ndàhú núú tàù-xi quíhíⁿ ndí —cachí-güedé xáhaⁿ-güedé xii-gá.

²⁶ Te ní xito ndéé-güedé, te ní cutnùní sá tée nani Matía quendóo-dé ndíhí úxí ñⁿ cue tée ní táuchíúⁿ-gá dacuàha ñaha xii ñáyiú tnúhu-gá.

2

Ní quexio Espíritú Yá Ndióxi cundecu ndíhí ñáyiú

¹ Te ní sáa nduu còo vico Pentecostés te xíndecu nchaa ñáyiú ñⁿ-ni xíchi. ² Te ní tecú dóho-yu uuⁿ ní níhí andíu, dàtná quidé ñⁿ táchí níhí víhí ní quide-xi, te ducaⁿ ní cuu ndéé xití vehe núú ndécú-yu nchaa-yu.

³ Te ní xini-yu dàtná cáá itá ñuhu cáá sá ndécú xití vehe, te ní xité nuu-xi ní ngoyo ndodo-xi díquí-yu nchaa-yu. ⁴ Te ducaⁿ ní quide-xi òré ní quexio Espíritú Yá Ndióxi ní ngúndecu ndíhí-yu nchaa-yu. Te ní ngúíta-yu ní cáháⁿ-yu tnúhu cue ñáyiú ñá túú cùu ñáyiú isràél, te nchaa xíáⁿ ní quide Espíritú Yá Ndióxi.

⁵ Te vai ñáyiú isràél xíndecu nchaa dava-gá ñuú ní tacá-yu ñuú Jerusalén, te ñáyiú-ánⁿ òo nducu ndéé-yu dacuahá-yu nchaa ndudú sá dacuàha tnahí-yu. ⁶ Te òré ní tecú dóho-yu níhí, te ní sáháⁿ-yu ní xíndedóho-yu tnúhu cáháⁿ mée-yu ñⁿ ñuú-yu, chí ndí dííⁿ ndí dííⁿ tnúhu cáháⁿ ñáyiú ndécú-án. ⁷ Te xíáⁿ òo ní cuúúhu ñáyiú véxi dava-gá ñuú, te ní xitnàhá-yu:

—Ñáyiú ducaⁿ xí cáháⁿ cúú-yu ñáyiú distritú Galileá. ⁸ ¿Te nása ní quidé-yu ní cutúha-yu nàcuáa cáháⁿ-ó ñⁿ ñⁿ-o ndéé líhli-o? ⁹ Te iha véxi ñáyiú dava nàción, chí véxi ñáyiú Pàrtiá, véxi ñáyiú Mediá, véxi ñáyiú Elám, véxi ñáyiú Mesopòtamiá, véxi ñáyiú Júdeá, véxi ñáyiú Capadociá, véxi ñáyiú Pòntó, véxi ñáyiú Asíá, ¹⁰ véxi ñáyiú Frigiá, véxi ñáyiú Pánfilia, véxi ñáyiú Ègíptú, véxi ñáyiú Áfricá ñáyiú ndécú ndéé núú-gá-xi ñuú Cirené. Te tnàhá ñáyiú ñuú Rómá véxi, te ñáyiú-án chí ñá díú mée-ni ñáyiú isràél cúú-yu nchaa-yu, dico ñⁿ-ni cùu sá dacuàhá-yu. ¹¹ Te véxi ñáyiú Crètá, véxi ñáyiú Àrabiá. Te nchaa-o sa ndédóho-o cáháⁿ-yu nàcuáa cuáháⁿ tnúhu mee-o ñⁿ ñⁿ-o. Te nchaa ñáyiú xí cáháⁿ tnúhu-o cáháⁿ-yu cuéndá nchaa sá vá yóo tnàhí ndàcu cada ní quide Yá Ndióxi —cachí-yu xitnàhá-yu.

¹² Te ní cuúúhu víhí-yu, te ñá ná sáa ñí-yu nása ní cuu, te xitnàhá-yu:

—¿Nása ní cuu duha cáháⁿ-yu tnúhu-o? —cachí-yu xitnàhá-yu.

¹³ Te dáva-yu ní sácú ndéé yíchí ñáhá-yu, te xitnàhá-yu:

—Xíxini ñáyiú-án núú ñá nàhá-yu tnúhu cáháⁿ-yu —cachí-yu xitnàhá-yu.

Tnúhu ní xáhaⁿ tē Pèlú xii cue ñáyiú

¹⁴ Te ní ngúnutní té Pèlú ndíhí úxí ñⁿ cue tée ní táuchíúⁿ Jèsús dacuàha ñaha xii ñáyiú tnúhu-gá, te níhí ní cáháⁿ-dé, te xáhaⁿ-dè xí-yu:

—Nchaa nchòhó ñáyiú distrìtù Jùdeá ndìhi nchòhó ñáyiú ñuú Jerusalén, cund-edóho váha-ndo tnúhu na càháⁿ-í-a. ¹⁵ Ñá ndáá tnúhu càháⁿ-ndó, chi ñá túú xìni-ndí te ducaⁿ càháⁿ-ndó, chi davitna cùu-xi caá ñíⁿ dátneé, vátá tnàhá-gá òré coho ñáyiú ndidí. ¹⁶ Te yúhú ná càchí tnúhu-í xii-ndo vitna nacuaá ní xáhaⁿ Yá Ndiöxí xii ndí Jòél téé ní xóo cáháⁿ tnúhu-gá ndéé sanaha nàcuáa cada ñaha-gá xii ñáyiú, te ndí-ánⁿ ní chídó tnùnì ndí nàcuáa ní cáháⁿ-gá. ¹⁷ Te duha ní xáhaⁿ-gá xii ndí:

Cùmání-gá sáá nduu nàa ñuyú, te cuañaha-í Espiritú-í cundecu ndíhi nchaa ñáyiú na quíndáá iní ñáhá xii-í.

Te cue déhe-yu cáháⁿ-yu tnúhu-í, te cue téé cuechi dacòto núú ñáhá-xí xii-güedé,

te ducaⁿ-ní cuè téé ni sàhnu cáháⁿ saní-güedé,

te diu-ni cuèndá nchaa sá quídè-í ducaⁿ dacoto núú ñáhá-xí xii-güedé.

¹⁸ Te nchaa ñáyiú xinu cuechi nùu-í cáháⁿ-yu tnúhu-í, te cuañaha-í Espiritú-í cundecu ndíhi-yu.

¹⁹ Te ndéé andiú, yàcáⁿ vài sá cadà-í nàcuáa cuñúhu vihí-yu,

te núú ñuyú-a cada-í ñíⁿ sá vátá quini tnàhí-gá-yu,

te ngoyo ñíⁿ te ngoyo ñuhú te quene vihí ñúhmá.

²⁰ Te vá dáyèhé-gá nchíanchii, cuu nee ñuyú te cuu ticuèhé núú yóó dàtná ticuèhé ñíⁿ.

Te dàvá-ánⁿ sáá nduu quixi Yaá cúú Xí-tohó-yu,

te nduu-ánⁿ cuu-xi ñíⁿ nduu càhnu vihí, chi cada-gá nchaa sá ñà túú xini-yu, te cuñúhu vihí-yu.

²¹ Te òré xíaⁿ te nchaa ñáyiú càháⁿ ndíhi ñaha xii Yaá cúú Xítohó-yu-ánⁿ nanhí tãhú-yu.

Duha ní xáhaⁿ Yá Ndiöxí xii ndí Jòél ní chídó tnùnì ndí.

²² Te nchòhó ñáyiú isràél, cundedóho váha-ndo tnúhu na càháⁿ-í-a cuèndá Jèsús téé ñuú Nazàrét. Te Jèsús ní quide-gá chiúⁿ Yá Ndiöxí, chi mee Yá Ndiöxí ní chindee ñaha-gá ní quide Jèsús ná dahanú chiúⁿ, núú xíaⁿ ní ndacu-gá ní quide-gá nchaa sá vá yóo tnàhí ndàcu cada, te xíaⁿ ní cuñúhu vihí-ndo. Te sa ñaha-ndo nacuaá

ní quide-gá cútnàhá ní xica cuu-gá ñuyú.

²³ Te ndí Jùdás ní taxi cuèndá ñáhá ndí Jèsús xii nchòhó cue téé ní cuu úhú iní ñáhá xii-gá, te ní ndúcú-ndó cue téé úhú iní-xi ní tñii ñaha-güedé xii-gá te ní sata caa ñaha-güedé núú cùrúxí, te núú cùrúxí-ánⁿ ní xihí-gá. Dico sa ní cutnùnì iní Yá Ndiöxí sá dúcáⁿ càda-ndo Jèsús, te mee Yá Ndiöxí ní cachí-gá sá dúcáⁿ ndòho Jèsús. ²⁴ Te diu-ni mee Yá Ndiöxí ní dándótó-gá Jèsús, chi sa ní cáháⁿ-gá sá òré cuu-gá te vá cùú dúcáⁿ-gá.

²⁵ Te ndí Dàvíí téé ní xindaha ñaha xii cue ñaní tnàhá-ó ní xindecu ndéé sanaha ní chídó tnùnì ndí nàcuáa ní cáháⁿ Jèsús, te duha ní cáháⁿ-gá:

Cùtnunì iní-í sá ncháá nduu ndecu ndíhi-í Yá Ndiöxí, te ío chindee ñaha-gá xii-í,

te ñá túú tnàhí sá yùhú-í.

²⁶ Te ío ndácáⁿ tãhù-í núú Yá Ndiöxí chi cùdii iní-í, chi sa ñaha-í sá cùú-í dico ndoto-í,

²⁷ chi vá dàñá-gá quihíⁿ dúcáⁿ àlmá-í núú ndécú ñáyiú ní xihí,

te vá dàñá-gá téhyú yiqui cùú-í chi cùu-í Déhe-gá, te yúhú sa ñaha-í sá cúú iní ñáhá-gá xii-í.

²⁸ Te sa ní cachí tnúhu-gá nàcuáa cada-í cundecu-í ichi váha, te cuèndá sá ndécú ndíhi ñaha-gá xii-í núu ío cùdii iní-í.

Duha ní cáháⁿ Jèsús, te ducaⁿ ní chídó tnùnì ndí Dàvíí.

²⁹ Te nchòhó cue ñaní tnàhá-í, na càchí tnúhu ndáá-í xii-ndo cuèndá ndí Dàvíí téé ní xindecu ndéé sanaha vihí, chi ní xihí-dé, te ní chindúxi ñaha-güedé, te ñaha-o tnaví núú ní chindúxi ñaha-güedé. ³⁰ Te ndí Dàvíí ní xóo cáháⁿ ndí tnúhu Yá Ndiöxí, te sa ñaha ndí sá Yá Ndiöxí ní cáháⁿ ndáá cuiti-gá sá diú-ní ñíⁿ tnaha ndí taxi tnùnì-dé ñáyiú isràél ndéé cuèé-gá dàtná ní xóo taxi tnùnì mée ndí cútnàhá ní xindecu ndí, te téé taxi tnùnì-ánⁿ cúú Cristú chi cùu-gá ñíⁿ tnaha ndí. ³¹ Te sa ní cutnùnì iní ndí sá ndótó Cristú, núú xíaⁿ ní chídó tnùnì ndí sá vá dàñá Yá Ndiöxí sá quihíⁿ dúcáⁿ àlmá-gá cundecu-xi núú ndécú ñáyiú ní xihí, te vá dàñá-gá téhyú yiqui cùú-gá.

³² Te ndáá chi Yá Ndiöxí ní dándótó-gá Jèsús, te nchúhú ní xini-ndí sá ní ndoto-gá.

³³ Te ní xáhaⁿ Yá Ndiöxí xii Jèsús sá cundecu ndíhi ñaha-gá, te taxi tnùnì Jèsús ní

caa ni quíhíⁿ. Te Yá Ndiöxí ní sáñaha-gă Espiritú-gá ní ngúndecu ndihí-gá nàcuáa ní xáhaⁿ-gă, te diu Jèsús ní quide-gá nchaa sá ní xini-ndó vitna ndihí nchaa sá ní xíndedóho-ndo. ³⁴ Te ndíi Dávii ñá túú ní ndàa túu ndíi andíu ndihí yiqui cuñú ndíi, te òrè ndécú-gă ndíi ñuyíú-a ní cachí ndíi:

Dítú Ndiöxí ní xáhaⁿ-gă xii Yáa cúú Xí-tohó-í:

“Ngóo xio cùha-í,

³⁵ te yúhú cada-í te nchaa sá cúú ùhú iní ñhá xii-n canehe-xi sá yíñùhu núú-n.”

Duha ní xáhaⁿ Dítú Ndiöxí xii Yáa cúú Xítohó-í cächí ndíi.

³⁶ Te nchòhó ñáyiú isràèl cùu-ndo ndí mee-í, te cuiní-í cundedóho váha-ndo ñⁿ tnúhu na càháⁿ-í-a. Jèsús ní sata caa-ndo-gă núú cùrúxí, dico Yá Ndiöxí ní cachí-gă sá Jèsús dacăcu nihnu-gă ñáyiú, te vá cání ñⁿ cani úú iní-ndó, chi diu-gă cùnùu-gă núú nchàa ñáyiú —cächí té Pèlú xáhaⁿ-dè xii-yu.

³⁷ Te ñáyiú ní xíndedóho tnúhu ní cáháⁿ té Pèlú ní ndixi túu iní-yu nàcuáa quidé-yu ndécú-yu, te ní xáhăⁿ-yu xii-dé ndihí dava-gă cue téé ní táúchíúⁿ Jèsús dacuàha ñaha xii-yu tnúhu-gă:

—Nchaa nchòhó cue ñani tnáhă-ndí, ñása cachí-ndó cùnduu, nása cada-ndí vitna? —cächí-yu xáhăⁿ-yu xii-güedé.

³⁸ Te ní xáhaⁿ tē Pèlú xii-yu:

—Daña-ndo nchàa sá cuèhé sá dúhá quide-ndo, te cada càhnu iní Yá Ndiöxí nchaa yíca cuèchi-ndo. Te cuandute-ndo cuèndá quiní-yu sá ní natuha-ndo ìchi Jesús, te ducaⁿ te taxi Yá Ndiöxí Espiritú-gă cundecu ndihí-ndo, ³⁹ chi cuiní-gă taxi-gă Espiritú-gă xii mee-ndo ndihí déhe-ndo, te cuáñaha-gă Espiritú-gă xii nchaa ñáyiú ní càa xico ñuyíú, ñáyiú cáháⁿ-gă cundecu ichi-gă ndéé ídá-gă —cächí té Pèlú xáhaⁿ-dè xii-yu.

⁴⁰ Te titní-gă tnúhu ní xáhaⁿ-dè nàcuáa cada-yu, te xáhaⁿ tùcu-dé:

—Daña-ndo nchàa sá cuèhé sá dúhá quide-ndo, vá cádá-ndó sá quidé dáva-gă-yu —cächí-dé xáhaⁿ-dè.

⁴¹ Te nchaa ñáyiú ní sándáá iní-xi tnúhu ní cáháⁿ té Pèlú ní sanduté-yu, te diu-ni nduu-àⁿ ní cuu dàtná úní míl ñáyiú ní sándáá iní-xi ní xíndecu ndihí ñáyiú

xídacuahá tnúhu Yá Ndiöxí. ⁴² Te ío ní xíndedóho-yu tnúhu ní cáháⁿ cue téé ní táúchíúⁿ Jèsús dacuàha ñaha xii-yu tnúhu-gă, te ío váha ní xíndecu-yu ní xóo ndatnúhu váha-yu. Te ní xóo caxi càhnu-yu cuèndá náhă-yu sá dúcáⁿ ní quide Jèsús cùtnáhă vátá cáhni ñaha-gă-güedé xii-gă, te ní xóo cáháⁿ ndihí-yu Yá Ndiöxí.

Nàcuáa ní quide nchaa ñáyiú ní sándáá iní tnúhu Jèsús ndéé ðhna nuu

⁴³ Te ncháa-yu ní cuñúhu vñhí-yu, chi cue téé ní táúchíúⁿ-gă dacuàha ñaha xii-yu tnúhu-gă ní quide-güedé titní núú sá vñ yóo tnáhí ndacu cada, te xiáⁿ ní cutnúni iní-yu sá méé Yá Ndiöxí chíndèe ñaha-gă xii-güedé. ⁴⁴ Te nchaa ñáyiú sándáá iní tnúhu Jèsús càháⁿ ndihí tnàha váha-yu, te cuèi-ni nchaa ndachiuⁿ nandíhi-yu ndècu cahnu. ⁴⁵ Te ní dícô-yu nchaa ndachiuⁿ sá ñà túú xini ñuhú-yu, te ní ñíhí-yu díhúⁿ te ní sáñáhă-yu xii nchaa ñáyiú ñá ñíhí. ⁴⁶ Te ñⁿ nduu ñⁿ nduu ní xóo quíhíⁿ ndihí tnáhă-yu veñúhu càhnu sá ño cùnuu. Te ní xexi ndihí tnáhă-yu vehé-yu. Te ío ní cudí iní-yu chí ñⁿ-ni ní cuú-yu ncháa-yu. ⁴⁷ Te ío ní ndacáⁿ táhü-yu núú Yá Ndiöxí, te nchaa dava-gă ñáyiú ní cáháⁿ váha-yu cuèndá ñáyiú-áⁿ. Te mee Yá Ndiöxí ní quide-gă ní sándáá iní vài-gă ñáyiú, te ní xíndecu-yu ndihí dava-gă ñáyiú xídacuahá tnúhu-gă.

3

Quide tátna-güedé ñⁿ téé yacua

¹ Te ñⁿ nduu òrè caá úní sacuaa, òrè xícáhăⁿ-yu ndihí Yá Ndiöxí cuáhăⁿ té Pèlú ndihí té Juáa veñúhu càhnu sá ño cùnuu sácúú-xí ñáyiú isràèl. ² Te ndècu ñⁿ téé yacua, te ducaⁿ-ni càa-dé ní cacu-dé. Te sàháⁿ ndihí ñáhă-yu veñúhu càhnu sá ño cùnuu, te sàcôo-dé ñⁿ xio yuyèhe veñúhu sá nání Yèhe Vii Caa, chi ducaⁿ nàni-xi, te xicáⁿ ndáhú-dé núú nchàa ñáyiú sàháⁿ veñúhu. ³ Te ní xini-dé té Pèlú ndihí té Juáa cánguñhu-güedé veñúhu, te xicáⁿ ndáhú-dé núú-güedé. ⁴ Te ní ndacoto-güedé núú-dé, te ní xáhaⁿ tē Pèlú xii téé yacua-àⁿ:

—Cundehe ñaha xii-ndí —cächí té Pèlú xáhaⁿ-dè xii-dé.

⁵ Te ní xíndehé ñaha-dé xii-güedé, chi ní cáháⁿ-dè sá ño ñⁿ sá cuáñaha-güedé. ⁶ Te ní xáhaⁿ tē Pèlú:

—Ñá túú ñàhí díhúⁿ nêhè-í dico chindee ñàha-í xii-n, te Xítóhó Jesucristú Yá ní xíndecu ñuú Nazàrét, ndacu-gá cada tátna ñaha-gã xii-n, ndacuíñí te caca-n —cachí-dé xáhaⁿ-dê.

⁷ Te té Pèlú ní tñii-dé ndaha cùha tée yacua-ãⁿ, te ní nguíta-dé ndácàni ñaha-dé, te òrè xiáⁿ ní naníhí ndéé-dê, te ní ndúha sáhá-dê. ⁸ Te ní ndacuíñí cunu mee-dê te ní xica-dé, te ní cachí-dé sá ìo càhnu cuu Yá Ndiòxí cuèndá sá ñí ndúha-dé, te ta sàndava-dé cuànguihu ndihí ñaha-güedê veñúhu. ⁹ Te nchaa ñáyíu xíndecu-áⁿ ní xiní-yu sá ñí nduu váha-dé, te ndèhé-yu ndácáⁿ táhú-dê núú Yá Ndiòxí. ¹⁰ Te ní naquiní ñáhã-yu xii-dé sá díú tée xicáⁿ ndàhú tée ní xóo cunucóo yuyèhe veñúhu sá nání Yèhe Vii Caa cuu-dé, te ní cuñúhu vihi-yu sá ñí ndúha-dé.

Té Pèlú ní cáháⁿ-dé corredór sá nêhé diu ndíi Salòmón

¹¹ Te sátá veñúhu càa corredór sá nêhé diu ndíi Salòmón. Yácáⁿ ndécú tê Pèlú ndihí té Juàá ndihí tée ní ndúha sáhá-xi, te ñá cuiní tée ní ndúha sáhá-xi-áⁿ daña-dê quihíⁿ-güedê dandóo ñaha-güedê xii-dê. Te chitú-yu ní quexio coyó-yu núú ndécú-güedê, te ní cuñúhu vihi-yu sá ñí ndúha sáhá tée cùhú-áⁿ. ¹² Te té Pèlú ní xiní-dé ní quexio coyó-yu, te ní xáhaⁿ-dê xií-yu:

—Nchòhò ñáyíu isràèl, ¿ná cuèndá ndéé dúcáⁿ ndèhe ñaha-ndo xii-ndí te cùñúhu-ndo sá ñí ndúha tée yacua-áiⁿ? Nchòhò cáháⁿ-ndó sá mée-ndí ní quide tátna-ndí-dé sá ìo váha iní-ndí, dico ñáhá chi ñá díú mèe-ndí ní quide tátna-ndí-dé. ¹³ Chi Yá Ndiòxí ní ndadúha ñaha-gã xii-dé, chi diu-gá cúú Ndiòxí ndíi Àbrahám ndihí ndíi Isàác ndihí ndíi Jácób, te diu-ni cue tée-áⁿ cúú ñàní tnáhá-ó ní xíndecu ndéé sanaha vihi. Te diu-ni Ndiòxí-áⁿ ní xáhaⁿ-gã xii Déhe-gá Jèsús sá táxí tnùnì-gá nchaa sá ìo andíu ndihí nchaa ñáyíu ndècu ñuyíú-a, dico mee-ndo ñí sáha cuèndá-ndó Jèsús núú tée cùchiuⁿ. Te té Pilatú ní cuiní-dé dacäcu-dé Jèsús ní cuu, te mee-ndo ñá ní cuiní-ndó. ¹⁴ Te Yá Ndiòxí ní cachí-gá sá ìo váha iní Jèsús te ñá túú ñàhí cuéchi-gá. Te mee-ndo ñá túú ní cuiní-ndó càcu-gá núu ní xáhaⁿ-ndo xii té Pilatú sá váha-gá dacäcu-dé ñí tée ndècu vihi cuéchi-xi, te vá dacäcu-dé Jèsús.

¹⁵ Te ní xáhaⁿ-ndo sá cáhni-güedê Jèsús Yá quidé nchìto-o ndecu-o, dico Yá Ndiòxí ní dándótó ñaha-gá, te ní xiní-ndí sá ndàá ní ndoto-gá. ¹⁶ Te nchúhú sa ñaha-ndí sá díú Xítóhó Jesucristú ní ndadúha-gá tée yacua, te náí-dé nútñi-a. Te ducaⁿ ñí quide-gá chi ní sándáá iní ñáhá-dê xii-gá, te vitna ní xiní-ndó sá ndàá ní ndúha-dé.

¹⁷ Te nchòhò ndihí cue tée cùnunu ní sahani-ndo Xítóhó Jesucristú, chi ñá ní cùtnuní iní-ndó sá ñí quide-ndo. ¹⁸ Te cue tée ní xóo cáháⁿ tnúhu Yá Ndiòxí ndéé sanaha ní chídó tnùnì-güedê nàcuáa ní xáhaⁿ Yá Ndiòxí xii-güedê sá Cristú quixi-gá ñuyíú-a, te ndoho vihi-gá, te xiáⁿ núu ducaⁿ ní cuu ìo ní ndoho-gá. ¹⁹ Te vitna te daña-ndo nchàa sá cuèhé sá dúhá quide-ndo. Te quindáá iní-ndó Yá Ndiòxí, te ducaⁿ te cada càhnu iní-gá nchaa sá ñá túú váha ní quide-ndo ñuyíú-a, te canu ichi ñaha-gã xii-ndo ñí ichi váha. ²⁰ Te ní tendaha-gã Cristú ní quixi-gá ñuyíú-a, chi mee Yá Ndiòxí ní cachí-gá sá díú Cristú taunihnu ñaha-gã xii-ndo. ²¹ Te dacuíñí cùndecu-gá andíu ndéé ná sáa nduu nàtaxi ndecu-gá nchaa sá ndécú ñuyíú nàcuáa sàni iní mée-gã. Te diu ducaⁿ ñí cáháⁿ Yá Ndiòxí núu ducaⁿ ñí chídó tnùnì cue tée ní xóo cáháⁿ tnúhu-gá ndéé sanaha. ²² Te ndíi Moisés ní xáhaⁿ ndíi xii cue ñàní tnáhá-ó ní xíndecu ndéé sanaha: “Yá Ndiòxí tendaha-gã ñí tée quixi-dé cáháⁿ-dé tnúhu-gá dàtná cuiní-ndó ní quide ñaha-gã xii yíhú, te tée-áⁿ cuu-dé ñí ñàní tnáhá-ndó. Te cundedóho váha-ndo nchàa tnúhu cáháⁿ-dé. ²³ Te nchaa ñáyíu vá quindáá iní tnúhu cáháⁿ-dé, te cuíta nihnú-yu chi vá quihíⁿ-yu núú quihíⁿ ñáyíu sàndáá iní tnúhu Yá Ndiòxí”, duha ní xáhaⁿ ndíi Moisés xií-yu —cächí té Pèlú xáhaⁿ-dê xií-yu.

²⁴ Te ní xáhaⁿ tùcu té Pèlú xií-yu:

—Ndíi Sàmuel ndihí nchaa cue tée nchìcúⁿ-gá ní xóo cáháⁿ tnúhu Yá Ndiòxí ndéé sanaha ñí cáháⁿ-güedê nàcuáa cada-xi vitna. ²⁵ Te Yá Ndiòxí ní cáháⁿ-gá ndihí cue tée ní cáháⁿ tnúhu-gá ndéé sanaha. Te ní quide ndáá-gá ndihí nchaa ñàní tnáhá-ó ní xíndecu ndéé sanaha nàcuáa cada-gá naníhí táhú-ó. Te duha ní xáhaⁿ-gã xii ndíi Àbrahám: “Ìó nduu cacu ñí tnàha-n, te tée-áⁿ cada-dé te naníhí táhú

ñáiyu ñuyíu-a”, duha ní xáhaⁿ-gã xii ndíi Àbrahám. ²⁶Núu xíãⁿ ní tendaha-gã Déhe-gá ní quixi-gá núu ndécú-ndó cuendá daña-ndo ncháa sá cuèhé sá dúhá quide-ndo, te naníhí tàhú-ndó —càchí té Pèlú xáhaⁿ-dè xii-yu.

4

Té Pèlú ndíhi té Juàá ndécú-güedé ndaha tée cùchiuⁿ

¹ Te té Pèlú ndíhi té Juàá càháⁿ dúcáⁿ-ni-güedé ndíhi ñáiyu, ní quexìo cue dútú ndíhi tée tàxi tñuní ñáhá xii cue tée quide cuendá veñúhu càhnu sá ìo cùnuu, ndíhi cue tée cùu saducéú. ² Te ní cudééⁿ-güedé nchaa-güedé núu tã Pèlú ndíhi té Juàá sá xáhaⁿ-güedé xii ñáiyu sá ndótó ñáiyu ní xíhí dàtná ní ndoto Jèsús. ³ Te ní tñíi ñaha-güedé ní chíhi ñaha-güedé vecaá xii-güedé, te ñá ní quide ndáá tée cùchiuⁿ cuéchi-güedé nduu-án chi sa ní cuaa. ⁴ Te ío vài ñáiyu ní sándáá iní-yu tñúhu ní cáháⁿ-güedé, te ñáiyu-án ndíhi ñáiyu sa ní sándáá iní-xi ndéé càni-gá ní xínu dàtná úhúⁿ míl mee-ni cuè tée, te ñíiⁿ ñáiyu ñíhí ndíhi landú.

⁵ Te nduu tñé-án diu-ni ñúu Jerusàlén-án ní tacá cue tée yíndaha veñúhu, ndíhi cue tée cùu sacuéhé núu ñáiyu isràél ndíhi cue tée dàcuaha ñaha xii-yu nchaa tñúhu ní chídó tñuní ndíi Moisés. ⁶ Te tñàhá dútú cùnùu-gá tée nàni Anás ndécú ndíhi té Calfás, ndíhi té Juàá, ndíhi té Lijandrú ndíhi dava-gá ñani tñàhá dútú cùnùu-gá-án ndécú. ⁷ Te ní xáhaⁿ-güedé xii cue tée xínu cuéchi núu-güedé:

—Chí cuàháⁿ queñuhu-ndo tã Pèlú ndíhi té Juàá vecaá, te na quixi-güedé iha —càchí-güedé xáhaⁿ-güedé.

Te ní quexìo té Pèlú ndíhi té Juàá núu cuè tée cùnuu, te cue tée cùnuu-án ní xícáⁿ tñúhú-güedé núu-güedé, te xáhaⁿ-güedé:

—¿Nása ní quide-ndo cuendá té yacua-án? ¿Yoo ní táuchíuⁿ ñucaⁿ cada-ndo? —cachí-güedé xáhaⁿ-güedé.

⁸ Te ndécú ndíhi té Pèlú Espíritú Yá Ndiöxí, núu xíãⁿ ní xáhaⁿ-dè xii-güedé:

—Nchòhó cue tée cùchiuⁿ ndíhi nchòhó cue tée cùu sacuéhé núu ñáiyu isràél, ⁹ te núu cuiní-ndó quini-ndó nása ní quide-ndí ní ndúha té yacua-án, ¹⁰ te cundedóho-ndo ñíiⁿ tñúhu na càháⁿ-f-a. Xini ñuhu-xi cundedóho nchaa ñáiyu isràél cuendá quini-yu

nàcuáa ní cuu ní ndúha té-án. Xítohó Jesucristú Yáá ní xíndecu ñúu Nazàrét ní quide tátna-gá sáhá té yacua ní ndúha, te diu-ni-gá ní sata caa-ndo núu cùruxí te núu cùruxí-án ní xíhí-gá, te ní dándótó ñàha Yá Ndiöxí xii-gá. ¹¹ Te núu tütú Yá Ndiöxí càchí-xi: “Cristú cúu-gá dàtná ñíⁿ yúu ndécú xiquí ñíⁿ vehe. Te yúu càchí-yu sá ñà túu nàndíhi, te diu xíãⁿ ní nàndíhi-xi ní ngúnutñí-xi xiquí véhé”, duha càchí-xi núu tütú-gá. Te ducaⁿ sàtnahá-xi cùu Jèsús, chí càchí-ndó sã ñà túu nàndíhi-gá, ¹² dico Yá Ndiöxí ñá túu ndéé ní tàxi ndecu-gá ñngá té dácacu nihnu ñaha xii-o núu ùhú núu ndàhú, chí ñíⁿ dií ní Déhe-gá Xítohó Jesucristú dacacu nihnu ñaha-gã xii-o —càchí té Pèlú xáhaⁿ-dè xii-güedé.

¹³ Te té Pèlú ndíhi té Juàá ñá túu tñúha-güedé, te cùnúhu cue té cùchiuⁿ sá ìo ñíi xíndáa-güedé. Te ní cutnùní iní cue té cùchiuⁿ-án sã Jèsús ní xica cuu ndíhi-güedé, núu xíãⁿ ñá túu tñàhí yùhú-güedé càháⁿ-güedé. ¹⁴ Te cuendá ndécú ndíhi té Pèlú ndíhi té Juàá tée ní ndúha sáhá-xi, núu xíãⁿ ñá ní ñíhí cue té cùchiuⁿ tñúhu càháⁿ-güedé. ¹⁵ Te ní xáhaⁿ-güedé xii té Pèlú ndíhi té Juàá sá queé-güedé quehé cuendá ndóo mee-güedé ndatnúhu-güedé. ¹⁶ Te ní xitnàha-güedé:

—¿Nása cada-o ùu cue té-án?, chí nchaa ñáiyu ñúu Jerusàlén nàhá-yu sá ní quide tátna-güedé ñíⁿ té yacua, te xíãⁿ xicuñúhu vihi ñáiyu. Te vá cúu càchí-ó sã ñà ndáá, chí vài ñáiyu ní xiní nàcuáa ní cuu. ¹⁷ Te dayùhú-ó-güedé te cùñaha-o sã vã càháⁿ-gá-güedé tñúhu Jèsús, chí núu ñàhá te quindáa-gá iní-yu —càchí-güedé xitnàha-güedé.

¹⁸ Te ní cana tucu-güedé té Pèlú ndíhi té Juàá, te xáhaⁿ-güedé sá vã dàcuaha-gá-güedé ñáiyu tñúhu Jèsús. ¹⁹ Te té Pèlú ndíhi té Juàá ní xáhaⁿ-güedé:

—Chí cuàháⁿ cuendá, te núu sá càchí nchòhó cada-ndí àdi sá càháⁿ Yá Ndiöxí cada-ndí. Te cada càhnu iní-ndó chí vá cúu cada-ndí sá càchí-ndó, chí cada nahi-ni-ndí sá càchí Yá Ndiöxí. ²⁰ Chí dacuitíi càháⁿ-ndí nàcuáa ní càháⁿ Jèsús, te càháⁿ-ndí nchaa sá ní xiní-ndí ní quide-gá —càchí-güedé xáhaⁿ-güedé.

²¹ Te cue té cùchiuⁿ ñíhi-gá ní càháⁿ-güedé xáhaⁿ-güedé sá cáda càstiú

ñáhá-güedë nõu vá dáñá-güedë sá dácuaaha-güedë ñáyiú. Te ducaⁿ te ní dáñá ñàha-güedë cuánuhú-güedë, chi ñá ní ñíhí-güedë nása cada-güedë cada castiú ñáhá-güedë, chi nchaá-yu ndacáⁿ táhũ-yu núú Yá Ndiõxí sá ní ndúha tée yacua.
²² Te tée ní quide tátna-güedé-áⁿ ndécú-dë vihi-gá údico cuá-dë, te ío ní cuñúhu-yu sá ní ndúha-dë.

Ñáyiú sándáá iní tñúhu Jèsús xicáⁿ táhũ-yu núú-gá sá vá yùhú-yu cáháⁿ-yu tñúhu-gá

²³ Te ní ndee té Pèlú ndíhi té Juàá cuánuhú-güedë núú ndécú cuè tée cündíhi-güedë, te ní nacani tñúhu-güedë nàcuáa ní xáhaⁿ cuè dútú cúnúu ndíhi cue tée cùu sacuéhé nõu ñáyiú isràél. ²⁴ Te sáta ní xíndedóho-yu tñúhu ní cáháⁿ-güedë, te ñⁿ-ni tñúhu ní cáháⁿ-yu nchaá-yu ndíhi Yá Ndiõxí, te ní xáháⁿ-yu xii-gá:

—Yòhó Dútú Ndiõxí, ní cadúha-n àndiú, ní cadúha-n ñuyiú, ní cadúha-n lámár, ní cadúha-n nchàandi túhú sá ío ñuyiú.

²⁵ Te ndí Dàvíí ní sándáá iní ndí tñúhu ní cáháⁿ-n, te ní chídó tñúni ndí nàcuáa ní xáhaⁿ-n cáháⁿ ndí, te ñiú-ni Espíritú-n ní chindee ñàha-xi xii ndí ní chídó tñúni ndí, te duha ní chídó tñúni ndí:

Ñáyiú ñá túú cùu ñáyiú isràél ío cùdèèⁿ-yu núú Yá Ndiõxí,
 te cuiñí-yu nàa-yu ndíhi-gá, dico vá ndácũ-yu chi mee-gá cúnúu-gá.

²⁶ Te cue tée yíndaha nacióⁿ ndíhi cue tée cùchiuⁿ tacá-güedé nàa-güedé ndíhi Dútú Ndiõxí ndíhi Cristú Yaá ní quixi ñuyiú-a.

Duha ní chídó tñúni ndí Dàvíí nàcuáa ndùu tñúhu ní cáháⁿ-n —càchí-yu xáháⁿ-yu xii Yá Ndiõxí.

²⁷ Te xáhaⁿ tucú-yu xii-gá:

—Ndáá ní cáháⁿ ndí Dàvíí chi ñiú-ni ñuú iha ní tacá té Hèrodés ndíhi té Pòn-ciú Pilatú ndíhi ñáyiú ñá túú cùu ñáyiú isràél ndíhi ñáyiú isràél ní cáháⁿ cuèhé-yu cuèndá Jèsús. Te Yòhó Dútú Ndiõxí, Déhe-n cùu Jèsús nõu ío váha iní-gá, te ní sáha chiúⁿ-n-gá, te ío úhú ní cuu iní ñáhá ñáyiú xii-gá. ²⁸ Te ní quidè-yu nàcuáa ní sani iní-n cada-yu ndéè sanaa, ndéè cùtnàhá ní ngáva ñuyiú. ²⁹ Te Yòhó Dútú Ndiõxí sa ñàha-n nása càháⁿ cue tée cuiñí cada úhú ñáhá xii-ndí. Te quide-ndí chiúⁿ tahu-n, te vitna chindee ñàha-n xii-ndí

cuèndá sá vá yùhú-ndí cáháⁿ-ndí tñúhu-n.

³⁰ Te cada tátna-n ñáyiú cùhú, te chindee ñàha-n xii-ndí, te cada-ndí nchaa sá vá yóo tñáhi ndàcu cada nacuáa cuñúhu vihi-yu. Te xini-ndí sá meé Jèsús chindee ñàha-gá xii-ndí, chi quide-gá chiúⁿ tahu-n —cachí-yu xáháⁿ-yu xii Yá Ndiõxí.

³¹ Te sáta ní yáha ní cáháⁿ-yu ndíhi Yá Ndiõxí, te ní quidí-xi vehe núú xíndecú-yu, te òrè-áⁿ ní cutáhú tucú-yu nchaá-yu Espíritú-gá. Te ní cáháⁿ-yu tñúhu Yá Ndiõxí, te ñá túú tñáhi ní yùhú-yu.

Cuèndá nchaa ndachiuⁿ cánehe chiúⁿ-yu

³² Te nchaa ñáyiú ní sándáá iní tñúhu Yá Ndiõxí ñⁿ-ni tñúhu ní cáháⁿ-yu nchaá-yu. ñⁿ-ni tñúhu ní sani iní-yu, te ní xóo chindee tñáha-yu chi ní xóo cuáha táhú tñáhá-yu nchaa sá xini ñùhú-yu, te ní ñⁿ-yu ñá túú ní cáháⁿ-yu sá ndàchiúⁿ-yu ñⁿ-ni-ní-yu cùu nchaa sá ndécú ndíhi-yu.

³³ Te cue tée ní táuchíuⁿ Jèsús dácuaaha ñàha xii-yu tñúhu-gá ío váha ní cáháⁿ-güedé nàcuáa ní cuu ní ndoho Xítohó Jesu-cristú. Te ío ní chindee ñàha Yá Ndiõxí ní cáháⁿ-yu tñúhu-gá, te ñá túú ní cáháⁿ cuèhé dava-gá-yu cuèndá ñáyiú dácuaaha tñúhu-gá. ³⁴ Te ñá túú tñáhi ní cùndahú-yu díhúⁿ, chi nchaa ñáyiú ndècu ndíhi ñuhu-xi, ndíhi nchaa ñáyiú cãa vehe-xi ní nadicó-yu, te da ñⁿ da ñⁿ ndachíuⁿ-yu ní nadicó-yu òrè xini ñùhú-yu díhúⁿ.

³⁵ Te ní sãñàhá-yu xii cue tée ní táuchíuⁿ Jèsús dácuaaha ñàha xii-yu tñúhu-gá, te cue té-áⁿ ní dácãhũ-güedé nchaa ñáyiú xini ñuhu. ³⁶ Te distritú Chìpré ndécú ñⁿ téè nani-dé Chèè ñani tñáhá ndí Lèví, te ní xóo cunu cuechi-dë veñúhu ñáyiú isràél. Te cuèndá sá sãñaha-dë tñúhu ndee iní xii-yu, xíãⁿ nõu ní dánání ñàha-güedé Vèé xii-dé. ³⁷ Te té-áⁿ ní nadico-dë luha ñuhu-dé, te nèhe-dé díhúⁿ cuáháⁿ núú cuè tée ní táuchíuⁿ-gã dácuaaha ñàha xii-yu tñúhu-gá.

5

Té Ananiás ndíhi tá Sàfirá ñá túú ní quide ndáa-yu

¹ Te ndècu ñⁿ téè nani Ananiás, te ñadíhí-dé nání-áⁿ Sàfirá, te ñáyiú-áⁿ ní nadicó-yu luha ñuhu-yu. ² Te ní taxúha-dé sacú díhúⁿ, te sacú-gá néhé-dë cuáháⁿ ní

sáñaha-dě xii cue tée ní táuchíúⁿ Jèsús dacuàha ñaha xii ñáiyu tnúhu-gá, te ní dándahú ñáhá-dě xii-güedé, chí ní xáhaⁿ-dě sá ñíhí ní sáñaha-dě, te ñaha ñadihí-dé sá dúcáⁿ ní quide-dé. ³Te ní xáhaⁿ tǝ Pèlú xii-dé:

—Ananiás, ¿ná cuendá ducaⁿ ní quide-n ní dáñá-n ní quíhu sácuíhná ìní-n? Te ní dácuanđèhnde-n núú Espíritú Yá Ndiòxí, te ní taxúha-n sácú díhúⁿ ní níhí-n cuendá ñuhu-n. ⁴¿Te ñuhu-áⁿ cuendá sá ñúhú mée-n, ádi díhúⁿ-áⁿ cuendá sá díhúⁿ mée-n cùu-xi, te cuu-ni cada-n ñacuáa càchí ìní-n càhaⁿ-n ñá? ¿Ná cuendá ducaⁿ ní quide-n? ¿Ná ní quide-xi ìní-n ñú ní dácuanđèhnde-n núú Yá Ndiòxí? Chí ñá díú-ní mée-ni ñáiyu ní dándahú-n —càchí tǝ Pèlú xáhaⁿ-dě xii-dé.

⁵Te òré ní ndíhi tnúhu ní xáhaⁿ tǝ Pèlú, te uuⁿ ní nduá-dé te ní xíhí-ni-dé. Te nchaa ñáiyu ní níhí tnúhu sá ní xíhí-dé, te ní yùhú víhí-yu. ⁶Te ní quixi ìñ ùú cue tée cuechi, te ní ndanehe ñaha-güedé ní sacáⁿ ñáhá-güedé núú yuu, te ní ducuⁿ nuu ñaha-güedé yuu-áⁿ, te ní xido ñaha-güedé néhé ñaha-güedé cuáháⁿ chindúxi ñaha-güedé xii-dé.

⁷Te ní cuu úú uní òré, te ní quexio ñadihí tée ní xíhí-áⁿ, te vátá quini-gá-aⁿ sá ní xíhí yii-aⁿ. ⁸Te ní xáhaⁿ tǝ Pèlú xii-aⁿ:

—Cuini-í cachí tnúhu ndáá-n. ¿Ndédau ní dícò-ndó ñúhu, ní dícò-ndó ñacuáa ní cachí yii-n áⁿ? —càchí tǝ Pèlú xáhaⁿ-dě xii-aⁿ.

Te ní xáhaⁿ-aⁿ:

—Ndáá sá díú-ní dùcaⁿ —cachí-aⁿ xáhaⁿ-aⁿ.

⁹Te ní xáhaⁿ tǝ Pèlú:

—¿Ná cuendá ducaⁿ ní chitnàha tnúhu-ndo ducaⁿ ní quide-ndo ní cuini-ndó dándahú-ndó Espíritú Yá Ndiòxí? Quini-n, chí sa cuándixi cue tée ní sáháⁿ ní chindúxi yii-n, te yòhò tnàhá-n càndeca ñaha tucu-güedé xii-n quíhíⁿ vitna —càchí-dé xáhaⁿ-dě xii-aⁿ.

¹⁰Te òré-áⁿ ní nduá-aⁿ núú tǝ Pèlú, te ní xíhí-ni-aⁿ. Te cuándihu cue tée cuechi-áⁿ xití vehe, te ní xiní-güedé sá sá ní xíhí-aⁿ, núú ní xido ñaha tucu-güedé cuáháⁿ chindúxi-güedé-aⁿ díñi yii-aⁿ. ¹¹Te ní yùhú víhí ñáiyu ní sándáá ìní tnúhu Yá Ndiòxí, ndíhi dava-gá ñáiyu ní níhí tnúhu ñacuáa ní cuu.

Ní quide-güedé titní núú sá vǝ yòo tnàhí ndàcu cada te ío ní cuñúhu ñáiyu

¹²Te cue tée ní táuchíúⁿ Jèsús dacuàha ñaha xií-yu tnúhu-gá titní víhí sá vǝ yòo tnàhí ndàcu cada ní quide-güedé, te ní cuñúhu víhí-yu. Te nchaa ñáiyu ní sándáá ìní-xi tnúhu Jèsús ní xóo tacá-yu corrèdór néhé ñú ndí Salòmón. ¹³Te nchaa ñáiyu ñá túú dácuaaha tnúhu-gá ñá ní cùyíⁿ-yu chitnàhá-yu ñáiyu ní sándáá ìní-xi tnúhu-gá, dico nchaaⁿ-yu ní cáháⁿ váha-yu cuendá ñáiyu ní sándáá ìní-xi tnúhu-gá. ¹⁴Te vai tée, vai ñadihí ní sándáá ìní-yu tnúhu-gá. ¹⁵Te cuendá sá ní níhí-yu tnúhu sá quidé tǝtǝna cue tée ní xica cuu ndíhi Jèsús, núú xíáⁿ ní queñuhu-yu nchaa ñáiyu cùhú ichi, te davá-yu ní quide túha-yu camá te davá-yu ní quide túha-yu yuu, núú núú nchaa xíáⁿ tá sácáⁿ-yu cue ñáiyu cùhú-áⁿ cuáháⁿ, te xíáⁿ cáa-yu ndétú-yu, chí ní sani ìní-yu sá òré yáha tǝ Pèlú te cuèdicó cuándahú-dě yáha ndodo ñaha-xi xií-yu te ndúha-yu. ¹⁶Te ní quixi ñáiyu ñúú yatni Jerusalén ndécáⁿ-yu ñáiyu cùhú, ndíhi ñáiyu yíhi ñaha espíritú cundíhi yucu ñáváha ní quixi, te nchaaⁿ-yu ní ndúha.

Ío ní quide úhú-güedé tǝ Pèlú ndíhi tǝ Juáá

¹⁷⁻¹⁸Te dútú cúnú-gá ndíhi cue tée cùu saducéu cue tée cundíhi-dé ní cudééⁿ-güedé sá ìo chítú-yu dácuaaha tnúhu Jèsús, núú xíáⁿ ní tñii-güedé cue tée ní táuchíúⁿ Jèsús dacuàha ñaha xií-yu tnúhu-gá ní chíhi ñaha-güedé vecaá. ¹⁹Te xití niú-áⁿ ní quexio ìñ espíritú xínú cuèchi núú Yá Ndiòxí ní nacaáⁿ-xi yèhe vecaá ní quee-güedé, te ní xáhaⁿ-xi xii-güedé:

²⁰—Quíhíⁿ-ndó veñúhu càhnu sá ìo cúnúu te cúnaha-ndo xii ñáiyu ñacuáa cadá-yu nanfíhí tǝhú-yu —càchí espíritú-áⁿ xáhaⁿ-xi xii-güedé.

²¹Te sá dúcáⁿ ní xáhaⁿ-xi ñú sátá ní túndaá, te ní sáháⁿ-güedé veñúhu càhnu sá ìo cúnúu sá cúu-xí ñáiyu isràel ní dácuaáha ñaha-güedé xií-yu.

Te dútú cúnú-gá ndíhi cue tée cundíhi-dé ní nadatácá tnàhá-güedé ndíhi nchaa cue tée cùu sacuéh núú ñáiyu isràel ndíhi cue tée cùchiuⁿ, te ní tendaha-güedé sandadú cuáháⁿ queñuhu-güedé cue tée yíhi vecaá ní cùu. ²²Te ní quexio-güedé yèhe vecaá, te ní xiní-güedé sá ní ìñ-gá

cue tée dácuaaha ñaha xii ñáyiú tnúhu Jèsús ñá túú-gǎ-güedé yíhí. Te cuánuhú-güedé²³ ní xitnúhu-güedé cue tée cùchiuⁿ, te xǎhaⁿ-güedé:

—Ní sáháⁿ-ndí ní sándéhé-ndí vecaá, te ndèé chóó-ni, te xíndecu-ni sandádú cue téé xíndeé yèhe vecaá. Te ní nacaáⁿ-ndí vecaá, te vá yóo ìⁿ-gá yíhí —càchí-güedé xǎhaⁿ-güedé.

²⁴ Te sá dúcáⁿ ñ xǎhaⁿ-güedé, te cuáháⁿ iní cue dútú cúnúu ndíhi téé tàxi tnuní cue téé xíndeé veñúhu càhnu sá ìo cúnúu, te ní xitnáha-güedé:

—¿Nása cada-xi vitna duha càa ní cuu ní xinu cue téé yíhi vecaá-i? —càchí-güedé xitnáha-güedé.

²⁵ Te ní quexio ìⁿ téé ní xǎhaⁿ-dè:

—Cundedóho-ndo na cǎchí tnúhu-í ìⁿ tnúhu. Cue téé ní chíhi-ndo vecaá ndécú-güedé veñúhu càhnu sá ìo cúnúu dacuaaha-güedé ñáyiú —càchí-dé xǎhaⁿ-dè.

²⁶ Te cue téé ndèé veñúhu ndíhi téé tàxi tnuní ñáhá xii-güedé cuánguaca ñaha-güedé, te ñá túú ní quide úhú ñáhá-güedé, chí ní yùhú-güedé cuáha yúú ñáhá ñáyiú dii ñùú-xi-áⁿ.²⁷ Te ní ndexio ndíhi ñaha-güedé núú cuè téé cùu sacuéhé ndíhi núú cuè téé cùchiuⁿ. Te dútú cúnúu-gá ní ngúíta-dé ténàà ñáhá-dé xii-güedé, te xǎhaⁿ-dè:

²⁸ —Te náa ñá díú ní cǎchí-ndí sá vá dácuaaha-gá-ndó ñáyiú tnúhu Jèsús te dácuaaha-ni-ndó-yu, te vitna nchaa ñáyiú ñúú Jerusalén ní níhí-yu tnúhu nàcuáa càháⁿ-ndó. ¿Te ná cuèndá ducaⁿ quide-ndo, te cǎchí-ndó sǎ nchúhú ndécuechi-ndí ní sahni-ndí Jèsús-i? —càchí dútú cúnúu-gá xǎhaⁿ-dè xii-güedé.

²⁹ Te té Pèlú ndíhi dava-gá cue téé ní táuchíúⁿ Jèsús dacuaaha ñaha xii-yu ní xǎhaⁿ-güedé xii cue téé cùchiuⁿ:

—Nchúhú, Yá Ndióxi cúnúu-gá sándáá iní-ndí tnúhu càháⁿ-gá dácúúxi tnúhu càháⁿ ñáyiú.³⁰ Te nchóhó ní sata caa-ndo Jèsús núú cùrúxi te núú cùrúxi-áⁿ ñí xíhí-gá, dico ní dándótó ñaha Yá Ndióxi xii-gá. Te Yá Ndióxi ní sándáá iní cue ñaní tnáhá-ndí ní xíndecu ndéé sanaha.³¹ Te Yá Ndióxi ní xǎhaⁿ-gá sá cùndecu Jesús xio cùha-gá cuèndá taxi tnuní-gá te dacácu nihnu-gá ñáyiú isràél núú úhú núú ndàhú. Te ducaⁿ-ni dacácu nihnu-gá

nchaa ñáyiú na dàña nchaa sá cuèhé sá dúhá, te cada càhnu iní-gá nchaa yíca cuèchi-yu.³² Te ní xini-ndí nàcuáa ní quide-gá, núú xíáⁿ cání-ndí cuèndú núú nchaa ñáyiú, te Espiritú Yá Ndióxi chíndèe ñaha-xi xii-ndí càháⁿ-ndí tnúhu-gá. Te diu-ni Espiritú-gá ní sánaha-gá xii nchaa ñáyiú ní sándáá iní-xi tnúhu-gá —càchí té Pèlú ndíhi dava-gá-güedé xǎhaⁿ-güedé xii cue téé cùchiuⁿ.

³³ Te sátá dúcáⁿ ñí xǎhaⁿ-güedé xii cue téé cùchiuⁿ, te ní cudééⁿ-güedé, te ní ndatnúhu-güedé sá cǎhni ñaha-güedé.³⁴ Te ìⁿ téé cùu fariséú tnàha-dé cúú-dè chiúⁿ, te nàni-dé Gamaliél, te cùu-dé mèstrú dácuaaha-dé ñáyiú nàcuáa ní chído tnuní ndíi Moisés, te ìo yíñúhu càháⁿ ndíhi ñáhá-yu xii-dé. Te ní ngúnutñí-dé, te ní xǎhaⁿ-dè sá ná quèe tnaa té Pèlú ndíhi dava-gá-güedé quèhé.³⁵ Te ní xǎhaⁿ-dè xii cue téé cùchiuⁿ:

—Nchóhó cue téé isràél, xini ñuhu-xi sá cání vǎha iní-ndó nása cada-ndo ndíhi cue téé-áⁿ.³⁶ Chí ní cunaha ní xíndecu ìⁿ téé ní xínani Tèudás, te ní cǎchí-dé sá cúnúu-dé, te ní cundíhi-dé dàtná cùmí cièndú cue téé, te ñá ní cuini-güedé cuu ìⁿnuu-güedé ndíhi cue téé cùchiuⁿ. Te ní sahni ñaha cuè téé cùchiuⁿ-áⁿ xii téé Tèudás, te ní ndíhi cue téé ní xica cuu ndíhi-dé ní xíté nuu-güedé, te ñá túú-gǎ ní quide-güedé nàcuáa ní sání iní-güedé cada-güedé.³⁷ Te sátá ñí xíhí téé-áⁿ, te ní tnáhá nduu nùcódó tnuní ñáyiú. Te dàvá-áⁿ ñí xíndecu ìⁿ téé distritú Galileá ní xínani-dè Júdás. Te titñí-güedé ní chitnahá ñáhá-güedé xii-dé. Te tnáhá-dé ní sahni ñaha tucu cue téé cùchiuⁿ, te nchaa cue téé ní xica cuu ndíhi-dé ní xíté nuu-güedé.³⁸ Te na cǎchí tnúhu-í sá dàñá-ndó cuè téé-áⁿ, te ní ñá túú nǎgá tnúhu cùñaha-ndo xii-güedé, chí núú chiúⁿ mee-güedé quidé-güedé te cuíta-güedé,³⁹ dico núú chiúⁿ Yá Ndióxi quidé-güedé, te vá ndíhnu chiúⁿ quide-güedé. Te núú quide-güedé chiúⁿ Yá Ndióxi, te vá nàá-ndó ndíhi-güedé, chí Yá Ndióxi nàa ndíhi-ndo sǎ dúcáⁿ xiquide-ndo —càchí té Gamaliél xǎhaⁿ-dè xii cue téé cùchiuⁿ.

⁴⁰ Te nchaa-güedé ní càháⁿ sá tnúhu ndáá càháⁿ-dè. Te dàtnuní ní nacana tucu-güedé té Pèlú ndíhi dava-gá-güedé te ní caníha-güedé, te ní càháⁿ níhi-güedé, te

xáhaⁿ-güedë sá vâ cãháⁿ-gã-güedé tñúhu Jèsús, te dàtnùnì ní dãná ñàha-güedé cuánuhú-güedé. ⁴¹ Te ío ní cudíí ìní-güedé, chi mee Yã Ndiòxí ní cachí-gã sá dúcáⁿ ndòho-güedé dacuàha-güedé ñáyíu tñúhu Jèsús. ⁴² Te ìⁿ nduu ìⁿ nduu ní dácuahá-güedë ñáyíu xití veñúhu càhnu sá ìo cùnno ndihí nchaa vehé-yu. Te ní xáhaⁿ-güedé xí-yu sá Jèsús cúú-gã Cristú Yáá ní quixi ñuyíu-a.

6

Ní ndúcú-güedë úsá cue tée cundecu dacãhñu sá cãxí ñáyíu

¹ Te diu-ni dává-áⁿ ní sándáá ìní vâi ñáyíu tñúhu Jèsús. Te cue ñáyíu gríégú ní cãháⁿ cuèhé-yu cuèndá ñáyíu isràél, sá ñáyíu ìihí ñáyíu quèé ñáyíu cãháⁿ tñúhu gríégú ñá túú tñàhá sá cãxí-yu, chi ñá túú sãñaha ìⁿnuu-güedé. ² Te cue tée úxúú ní táúchíúⁿ Jèsús dacuàha ñaha xí-yu tñúhu-gã, cue tée-ãⁿ ní cana-güedé nchaa ñáyíu sándáá ìní tñúhu Jèsús. Te ní xáhaⁿ-güedë xí-yu:

—Nchúhú chi vâ cúú dacãhñu-ndí sá cãxí-yu, chi mee-ni tñúhu Yá Ndiòxí cãháⁿ-ndí. ³ Te nchòhò cue tée ndècu ndihí-ndí ichi Xítòhó Jesucristú cãháⁿ ndihí-ndo úsá cue tée xíndecu iha, cue tée cãháⁿ ndihí ñàhá-yu mee-ni tñúhu yíñúhu, cue tée ndècu ndihí Espíritú Yá Ndiòxí, mee-ni cuè tée cùtnuní váha ìní-xi. Te cue tée-áⁿ cuàha-ndí-güedé chiⁿ cada-güedé dacãhñu-güedé sá cãxí-yu. ⁴ Te nchúhú mee-ni Yã Ndiòxí cãháⁿ ndihí-ndí, te mee-ni tñúhu-gã dacuàha-ndí-yu —cächí-güedé xáhaⁿ-güedë xí-yu.

⁵ Te nchaá-yu ní tñíⁿ-yu tñúhu ní cãháⁿ-güedé, núu ní ndúcú-yu cue tée cada chiⁿ-áⁿ. Te ìⁿ-dé nání-dë Tëvá, te ío váha sándáá ìní-dé Yã Ndiòxí, te ndècu ndihí-dé Espíritú-gã. Te duha ní xínani dáva-gã-güedé: té Lipé, té Pròcoró, té Nicànór, té Tìmón, té Pàrmenás, té Lãxí tée ñúú Antiòquiá tée ní sándáá ìní-xi sá dácuaàha ñáyíu isràél te vitna ní sándáá ìní-dé tñúhu Jèsús. ⁶ Te úsá cue tée-áⁿ ní sáháⁿ-güedé núu cuè tée úxúú ní táúchíúⁿ Jèsús dacuàha ñaha xí-yu tñúhu-gã, te cue tée úxúú-áⁿ ní cãháⁿ ndihí-güedé Yã Ndiòxí, te ní sacáⁿ ndodo-güedé ndaha-güedé díquí cuè tée úsá-áⁿ.

⁷ Te ñáyíu ní sándáá ìní tñúhu Jèsús cuáháⁿ-yu titní xichi cãháⁿ-yu tñúhu-gã. Te vâi-gã ñáyíu ta sándáá ìní-yu tñúhu-gã cuáháⁿ, te ní xíndecu-yu ndihí dava-gã ñáyíu dácuaaha tñúhu-gã ñúu Jerusalén. Te titní dútú ní sándáá ìní-güedé tñúhu-gã.

Ní tñíⁿ-güedé té Tëvá

⁸ Te té Tëvá ní quide-dé titní núú sã vâ yò tñàhí ndacu cada, te ní cuñúhu vihi-yu sá dúcáⁿ ní quide-dé, te ducaⁿ ní quide-dé chi ndècu ndihí-dé Yã Ndiòxí chíndée ñaha-gã. ⁹ Te ní xíndecu cue tée ní xòo cunu cuechi núú ìⁿ tée tàxi tñuní, te tée tàxi tñuní-áⁿ ñã ní xòo ñaha tñàhí-dé quee-güedé núú chíúⁿ-dë, te ní xinu-ná-güedé. Te sátá xãⁿ, te ní dácáá-güedé veñúhu-güedé, te veñúhu-áⁿ sáháⁿ ñáyíu ñúú Cirené, ñáyíu ñúú Alejandriá, ñáyíu ñúú Ciliciá, ndihí ñáyíu distritú Àsiá. Te nchaa ñáyíu-áⁿ ní nã ndihí-yu té Tëvá. ¹⁰ Te ñá ní ñíhí-yu tñúhu cãháⁿ-yu, chi ío váha ní sáá díquí-dë nàcuáa ní xáhaⁿ-dë xí-yu, chi Espíritú Yã Ndiòxí ní chindee ñaha-xi xii-dé. ¹¹ Te ní cháhu-yu cue tée ní dácuaándèhnde tñúhu ní cãháⁿ té Tëvá núu-yu. Te ní xáhaⁿ-güedé sá cãháⁿ cuèhé-dé cuèndá ndí Moisés ndihí cuèndá Yã Ndiòxí. ¹² Te cuèndá sá dúcáⁿ ní dácuaándèhnde-güedé núu ní sándáá ìní-yu, te ní cudéⁿ-yu núú tã Tëvá. ¹³ Te ní cudéⁿ cue tée cùu sacuéhé, te tñàhá cue tée dácuaaha ñaha xí-yu nchaa tñúhu ní chídó tñuní ndí Moisés ní cudéⁿ-güedé. Te ní sáháⁿ-güedé ní tñíⁿ-güedé té Tëvá ndécá ñàha-güedé cuáháⁿ núu quidé cue tée cùchiuⁿ jundá, ndihí cue tée cùu sacuéhé. ¹³ Te ndécá-yu cue tée dácuaandehnde cuáháⁿ núu quidé-güedé jundá, te ní quesaha-ni tucu-güedé cãháⁿ cuèhé-güedé, te xáhaⁿ-güedé:

—Tée-a mee-ni cãháⁿ cuèhé-dé cuèndá veñúhu sá ìo cùnno, veñúhu ní cuu íí, te cãháⁿ cuèhé-dé cuèndá nchaa sá ní chídó tñuní ndí Moisés. ¹⁴ Te ní tecú dóho-ndí cächí-dé sá Jèsús tée ñúú Nazarét dangòyo-dé veñúhu càhnu sá ìo cùnno te vâ dãná-gã-dé cada-ndí nàcuáa ní cachí ndí Moisés cada-ndí —cächí-güedé xáhaⁿ-güedé.

¹⁵ Te nchaa cue tée ndècu jundá ní ndacoto váha-güedé núú tã Tëvá. Te ní

dàyèhé-xi núú-dě dàtná quidé-xí núú es-
píritú xínú cuèchi núú Yá Ndiòxi.

7

Té Těvá xáhaⁿ-dě sá ñà túú cuèchi-dé

¹Te ní xáhaⁿ dùtú cúnúu-gá xii-dé:

—¿Ndáá tnúhu càháⁿ-güedé cuèndá-n-ǎ?
—càchí-dé xáhaⁿ-dě.

²Te té Těvá ní xáhaⁿ-dě xii-güedé:

—Nchòhò cue ñaní tnáhà-í ndíhi nchòhò
cue tée cùu sacuéhé, cundedóho-ndo ìⁿ
tnúhu na càháⁿ-í-a. Yá Ndiòxi ío cúnúu-gá,
te ní cáháⁿ ndíhi-gá ndíi Àbrahám nàcióⁿ
Mesopotamiá cúnàhá vátá quíhíⁿ-gá ndíi
cundecu ndíi ñúú Hàrán. ³Te ní xáhaⁿ-gá
xii ndíi: “Daña-n nchàa ñaní tnáhà-n, te
daña-n ñuhu-n, te quíhíⁿ-n ìⁿ xichi núú
dànèhé ñàhá-í cundecu-n”, duha ní xáhaⁿ
Yá Ndiòxi xii ndíi Àbrahám. ⁴Te sáta dúcáⁿ
ní xáhaⁿ Yá Ndiòxi xii ndíi Àbrahám, te
ní ndee ndíi ñúú Cáldeá, te cuáháⁿ ndíi
cundecu ndíi ñúú Hàrán. Te sáta ní xíhí
tátá ndíi, te ní xáhaⁿ Yá Ndiòxi quixi ndíi
cundecu ndíi núú ndécú-ó vitna. ⁵Te
Yá Ndiòxi ñá túú ní sáñaha-gá ní lùha
ñuhu cuu cuèndá ndíi núú ní xíndecu ndíi.
Te ní xáhaⁿ ndáá Yá Ndiòxi xii ndíi sá
cuáñaha-gá ñuhu cuu cuèndá ndíi, te na
cùú ndíi, te ndóo ndíhi nchaa ñaní tnáhá
ndíi cacú tucu ndéé cuèé-gá. Te ducaⁿ
ní xáhaⁿ-gá cuèí vátá cùndècu-gá ní ìⁿ
déhe ndíi. ⁶Te ní xáhaⁿ tucu Yá Ndiòxi
xii ndíi Àbrahám sá díú-ní ñaní tnáhá
ndíi quíhíⁿ-yu núú xíca cùndecú-yu cúmí
cièndú cuíá, te vá dàñá-yu queé-yu núú
chíúⁿ-yu, te ío dandòho ñaha-güedé núú
cùndècu-yu. Duha ní xáhaⁿ Yá Ndiòxi xii
ndíi, te ndáá ducaⁿ ní cuu. ⁷Te ní xáhaⁿ
tucu Yá Ndiòxi xii ndíi Àbrahám: “Yúhú
dandòho-í nchaa ñáiyu na dandòho ñaha
xii cue ñaní tnáhà-n. Te dàvá-áⁿ te ndee cue
ñaní tnáhà-n núú cùndècu-yu, te quixí-yu
chiñuhu ñàhá-yu xii-í iha”, duha ní xáhaⁿ
Yá Ndiòxi xii ndíi Àbrahám, te ndáá ducaⁿ
ní cuu. ⁸Te Yá Ndiòxi ní quide ndáá-gá
ndíhi ndíi Àbrahám, te ní xáhaⁿ-gá xii ndíi
sá cuáha-güedé seña ñii nchaa landú tée
cuèndá cunàhá-yu nàcuáa ndùu sá ní quide
ndáá-gá ndíhi ndíi Àbrahám. Núu xíáⁿ
núú uná nduu sá ní cacú té Isàác déhe
ndíi Àbrahám, te ní sáha ndíi seña ñii-dé.
Te díu-ní ducaⁿ ní quide tucu té Isàác
déhe-dé té Jàcób, te díu-ni ducaⁿ ní quide
té Jàcób, chi úxúú déhe-dé ní xíndecu, te

nchaa-güedé ducaⁿ ní quide-dé. Te ndí
ùxúú cue tée-áⁿ ní cuu-güedé ñaní tnáhá-ó.

⁹Te ìⁿ déhe té Jàcób ní xínani-dé Chèè.
Te ñá ní cùu váha iní cue ñaní-dé núú-dé,
núú ní dícò ñàha-güedé ní queheⁿ ñaha cue
tee cuáháⁿ nàcióⁿ Ègiptú, te Yá Ndiòxi ñá ní
dàña ñaha-gá xii-dé cuíta nihnu-dé. ¹⁰Te ní
chindee ñàha-gá xii-dé ní cacú-dé cúnàhá
ní ndoho vihi-dé. Te tée yìndaha Egiptú ío
ní cudíí iní-dé té Chèè, te ní cutnùnì iní-dé
sá ío váha túha té Chèè, te ducaⁿ ní cutnùnì
iní-dé, chi Yá Ndiòxi ní chindee ñàha-gá xii
té Chèè. Te ní xáhaⁿ tée yìndaha Egiptú
xii té Chèè sá díú tē Chèè coo-dé gobièrnú
Ègiptú, te taxi tnùnì-dé nchaa ñáiyu xínu
cuechi núú tē yìndaha Egiptú-áⁿ.

¹¹Te ní quíhu tnamá ñíhí nàcióⁿ Ègiptú
ndíhi nàcióⁿ Cànáá, te ío ní ndohó-yu.
Te nchaa ñaní tnáhá-ó ní xíndecu ndéé
sanaha ñá ní xòo ñíhí-gá-yu sá cáxí-yu.
¹²Te ní ñíhí tē Jàcób tnúhu sá ío tríú
Ègiptú, núú ní tendaha-dé cue déhe-dé
ní sáháⁿ-güedé ní sànguáaⁿ-güedé tríú-áⁿ,
te dàvá-áⁿ ní sáháⁿ cue ñaní tnáhá-ó xìto
díhna nuu nàcióⁿ Ègiptú. ¹³Te xito cùu
uú cuáháⁿ-güedé, te ní xáhaⁿ tē Chèè sá
ñaní-dé cúú-güedé. Te tée yìndaha Egiptú
ní cutnùnì iní-dé sá díú-ní ñànì té Chèè
cúú-güedé. ¹⁴⁻¹⁵Te ní cana té Chèè tátá-dé
té Jàcób ndíhi nchaa ñaní tnáhá-dé. Te
cùu-xi datná únídico sáhúⁿ-yu ndéca té
Jàcób cuáháⁿ nàcióⁿ Ègiptú núú ndécú
té Chèè, te xíáⁿ ní quexíú-yu ní ngóo-yu. Te
yàcáⁿ ní xíhí té Jàcób ndíhi nchaa déhe-dé
cue ñaní tnáhá-ó. ¹⁶Te sáta ní cuu titní
cuíá, te ní natava-güedé yiqui ndíi Jàcób
ndíhi nchaa déhe ndíi nchido-güedé cuáháⁿ
ñúú Siquém. Te ndíi Àbrahám sa ní cuu
titní-gá cuíá sá ní nacuaaⁿ ndíi ñuhu núú
cuè déhe ndíi Hámór. Te xíáⁿ nchíi yaú ní
nachindúxi-güedé yiqui-áⁿ.

¹⁷Te cúnàhá vátá natáva-gá-güedé yiqui
cue ndíi, te sa ta tnàhá yatni cada Yá
Ndiòxi nàcuáa ní xáhaⁿ-gá xii ndíi Àbrahám
cada-gá sá cúú-xí ñáiyu isráél ndécú Ègiptú,
te ta cǎyá víhí-yu cuáháⁿ. ¹⁸Te dàvá-áⁿ chí
ingá tē yìndaha nàcióⁿ Ègiptú, te ñá túú-gá
ní xìnì-dé nása ní xóo cada ndíi Chèè. ¹⁹Te
tē yìndaha Egiptú ñá ní quide ndáá-dé, chí
íó ní dándòhó-dé ñaní tnáhá-ó ní xíndecu
dàvá-áⁿ. Te ní táuchúⁿ-dē sá xócuñí-yu

dándoo-yu déhe yiquiⁿ cuendá ndihi-güexi cuú. ²⁰ Te dává-án nĩ cacu té Moisés, te ío ní cudíí Iní ñáhá Yá Ndióxi xii-dé. Te ní xindecu ndihi ñaha nãná-dé ndihi tãtã-dé únĩ-ni yóo. ²¹ Te ndèca ñahá-yu cuáháⁿ ingá xichi, te yàcáⁿ ní dándoo ñahá-yu xii-dé, te ní naníhí ñáhá dèhe yoco tée yindaha Egiptú, te ní xito-xi-dé dàtná xító-xí ìⁿ déhe mee-xi nĩ xito-xi-dé ndéé nĩsahnu-dé. ²² Te ní cutúha-dé nchaa sá xipĩ cue tée ègiptú, te ío váha ní sáá diqui-dé tñúhu cáháⁿ-dé ndihi nchaa sá cáda-dé.

²³ Te cútñahá ndécú-dé údico cuía-dé, te ní cachí-dé sá quihíⁿ-dé cáháⁿ ndihi-dé cue ñanĩ tnáhá-dé ñáyiú isràel. ²⁴ Te ní xiní-dé ní caniha ìⁿ tée ègiptú xii ìⁿ tée isràel, te ñá ní cùndee iní-dé cundehe-dé núu ní sáháⁿ-dé ní chindee-dé tée isràel, te ní sahi-dé tée ègiptú, ²⁵ chi ní cachí Yá Ndióxi sá díú-dé dacäcu-dé ñanĩ tnáhá-dé ñáyiú isràel núu cuè tée ègiptú. Te ní sani iní-dé sá cútñuní iní-yu ñacuáa ní xáhaⁿ Yá Ndióxi xii-dé, dico ñá túú ní cútñuní iní-yu. ²⁶ Te nduu tnèé ní xiní-dé nàà úú cue tée isràel, te ñá túú ní tnáhá iní-dé nàà-güedé núu ní xáhaⁿ-dé xii-güedé: “¿Ná cuendá ducaⁿ xĩnàá-ndó? ¿Náa ñá díú ndímee-ndo núu ducaⁿ xĩnàá-ndó?” Duha ní xáhaⁿ tẽ Moisés xii-güedé. ²⁷ Te tée ndècuèchi ní sáháⁿ-dé ní chindaha nihnu-dé té Moisés ìⁿ xio, te ní xáhaⁿ-dè: “¿Ná cúú yòhò núu véxi-n tàxi tñuní ñáhá-n? ²⁸ Te tnáhá-ni tucu yúhu cahni-n dàtná ní sahi-n tée ègiptú icu cáhaⁿ-n á”, duha ní xáhaⁿ-dè xii té Moisés. ²⁹ Te sá dúcáⁿ nĩ cáháⁿ tée isràel núu ní yúhú té Moisés ní xinu-dé cuáháⁿ-dé ní sáá-dé nacióⁿ Mèdián. Yàcáⁿ ní ngóo-dé, te yàcáⁿ ní tnándaha-dé, te ní cacu úú déhe tée-dé.

³⁰ Te sáta nĩ xinú údico cuía, te ní sáháⁿ té Moisés ìⁿ xio yucu Sinái. Te yàcáⁿ ní xiní-dé ìⁿ tñutàu nchicúⁿ ñuhú, te xití itá ñuhú-án nĩ xiní-dé yíhí ìⁿ espíritú xinú cuèchi núú Yá Ndióxi. ³¹ Te òré ní xiní-dé sá yíhí-xí xití itá ñuhú-án, te ní cuñúhu vihi-dé sá nĩ xiní-dé espíritú-án xití itá ñuhú-án, te ní sàndehe-gá-dé, te ní xindéhé vaha-dé. Te ní tecú dóho-dé ní cáháⁿ Yá Ndióxi, te xáhaⁿ-gá xii-dé: ³² “Yúhú cúú-í Ndióxi ní cáháⁿ ndihi cue ñanĩ tnáhá-n ndéé sanaha, ndíi Ábrahám ndihi ndíi Isaac ndihi ndíi Jácób, ndihi dava-gá cue ñanĩ tnáhá-n. Nchaa cue ndíi-án nĩ xóo cáháⁿ ndihi-í.”

Duha ní xáhaⁿ-gá xii té Moisés. Te ní quidí ñaha-xi xii té Moisés sá nĩ yúhú-dé, te ñá ní cùyíi-gá-dé cundehe-dé tñutàu nchicúⁿ ñuhú-án. ³³ Te Yá Ndióxi ní xáhaⁿ-gá xii-dé: “Queñuhu chàu-n, chi núú ñuhú nĩ cuu íi nútñi-n. ³⁴ Te yúhú ndèhè-í sá ío ndòho nchaa ñáyiú cùu cuendá-í, ñáyiú ndècu nacióⁿ Ègiptú. Te ní tecú dóho-í sá ío ndàhú xícáháⁿ-yu, núu xíáⁿ véxi-í càchí tñúhu-í sá nùhú-n nacióⁿ Ègiptú cuendá ndeñùhú-n-yu yàcáⁿ.” Duha ní xáhaⁿ Yá Ndióxi xii té Moisés.

³⁵ Te ñá ní sàndáá iní-yu té Moisés ndéé díhna, chi ní xáháⁿ-yu: “¿Ná cuendá véxi-n tàxi tñuní ñáhá-n xii-ndí?” Duha ní xáháⁿ-yu xii té Moisés. Te diu-ni té Moisés ní tendaha ñaha Yá Ndióxi ní sáháⁿ-dé dacäcu-dé ñáyiú isràel nacióⁿ Ègiptú cuèi ñá ní sàndáá iní ñáhá-yu xii-dé. Dico ní taxi tñuní-dé-yu, chi ducaⁿ nĩ xáhaⁿ-gá òré ní xiní-dé espíritú xinú cuèchi núú-gá xití tñutàu nchicúⁿ ñuhú. ³⁶ Te té Moisés ní ngúita-dé ní quide-dé sá vã yòo tnáhí ndäcu cada, te ní cuñúhu vihi-yu sá dúcáⁿ nĩ quide-dé, te ducaⁿ nĩ quide-dé Ègiptú ndihi Lámár Tícuehé. Te ní ngóó núú-dé núú-yu ní queé-yu Ègiptú cuáháⁿ-yu ìⁿ ichi xití yucu núú vã yòo tnáhí ndècu, te ní xíhi-yu údico cuía xití yucu-án, te xíáⁿ nĩ xóo cada-dé sá vã yòo tnáhí ndäcu cada. ³⁷ Te diu-ni té Moisés ní xáhaⁿ-dè xii cue ñanĩ tnáhá-dé dává-án: “Yá Ndióxi cada-gá te coo ìⁿ ñanĩ tnáhá-ndó ndéé cuèé-gá, te téé-án cáháⁿ-dé tñúhu-gá núú-ndó dàtná cuiní-ndó nĩ cachí-gá quidé yúhú, te ío xini ñuhu-xi cundedóho-ndo tñúhu cáháⁿ-dé”, duha ní xáhaⁿ tẽ Moisés xii-yu dává-án. ³⁸ Te diu-ni té Moisés ní xindecu ndihi-dé ñáyiú isràel xití yucu, te ní sáá-dé yucu Sinái, te xíáⁿ nĩ quixi ìⁿ espíritú xinú cuèchi núú Yá Ndióxi ní cáháⁿ ndihi ñaha-xi xii-dé, te yàcáⁿ ní dácúahá ñaha-xi tñúhu-gá, te diu-ni tñúhu-án nĩ ndóo dàcuaha-o.

³⁹ Te cue ñanĩ tnáhá-ó ní xindecu ndéé sanaha ñã ní sàndáá iní-yu té Moisés, te ñá ní ndèe iní ñáhá-yu xii-dé, chi ní cuiní-yu nuhú tucú-yu nuú Ègiptú cundecú-yu. ⁴⁰ Te òré ndécú tẽ Moisés yucu ní xáháⁿ-yu xii ñaní-dé té Àron: “Cadúha-n ìⁿ úú ndiòxi díhúⁿ cuááⁿ codomú núú-ó cùhum-o ichi, chi ñá túú cútñuní iní-ó ndèe ichi cuáháⁿ té Moisés, tée yòdo nuu núú-ó ndúu ní

quee-o Ègíptú”, duha ní xíf-yu té Àrón.

⁴¹ Te dàvá-án nǐ cadúha-güedé ìn chěhlu mee-ni dǐhún cuáán, te ní sahn-güedé ìn ùu quiti nchìto ní quide càhnu-güedé chěhlu-án. Te ío ní cudǐí ìní-yu quiti-án, chi ní cachí-yu sá díú-ní ndiöxí cúú-dí.

⁴² Te sá dúcán nǐ quidé-yu, xíán ní dáñá ñaha Yá Ndiöxí xíf-yu. Te ní dáñá-gǎ ní xóo cada càhnú-yu nchíanchii, ndǐhi yóó, ndǐhi nchaa chódíní. Te duha ní chídó tnùní ìn téé ní xóo cáháⁿ tnúhu Yá Ndiöxí ndéé sanaha nàcuáa ní xáhaⁿ-gǎ xii ñáyiú dàvá-án:

Nchòhó ñáyiú isràèl, ní cuu údico cuía yíhí-ndó yucu,

te ní sahn-ndo quiti-ndo ní quide càhnu ñaha-ndo xii-í cáháⁿ-ndó, dico ñháá chi ní sahn-ndo-güedé ní quide càhnu-ndo sá nǐ cadúha mee-ndo.

⁴³ Te ní cadúha-ndo ìn veñúhu líhli,

te ní sanutñí-ndo Mòlóc sá cachí-ndó cùu ndiöxí-ndó xica nchido-ndo xití yucu,

te ní cadúha-ndo ìn chódíní, te quiti-án càchí-ndó sá cúú-dí ndiöxí Rénfán, te ndi ndùu sá nǐ cadúha-ndo-án nǐ quide càhnu-ndo.

Te cuendá sá dúcán nǐ quide-ndo te yúhú queñuhu ñaha-í xii-ndo quíhíⁿ-ndó cùndecu-ndo ìngá xio nàcióⁿ Babiloniá.

Duha ní xáhaⁿ Yá Ndiöxí xíf-yu, te ducaⁿ nǐ chídó tnùní téé ní xóo cáháⁿ tnúhu-gǎ.

⁴⁴ Te xití yucu-án nǐ dácáá-güedé ìn veñúhu vehe dóó. Te vehe-án nǐ cuu-xi ìn sá cútùní ìní-yu sá Yá Ndiöxí ndécú ndǐhi ñaha-gǎ xíf-yu. Te vehe-án nǐ dácáá-güedé nàcuáa ní xáhaⁿ Yá Ndiöxí xii té Moisés, chi ní dánèhé ñháá-gǎ xii-dé nàcuáa dacàa-güedé. ⁴⁵ Te sáta ní xíhí nchaa cue téé-án, te ní ndóo ndǐhi nchaa déhe-güedé veñúhu-án. Te ní xido tucu-güedé veñúhu-güedé cuáhán-güedé, te cuáhán ndǐhi-güedé té Jòsué núú cùndécú-yu. Te sáta ní quexió-yu, te ní dácúnú-yu ñáyiú dii ñùú-xi-án chi mee Yá Ndiöxí ní chindee ñaha-gǎ xíf-yu. Te sáta ní ndǐhi nchaa ñáyiú ní xica nchido veñúhu dóó-án nǐ xíhí, te ní ndóo ndǐhi dava-gǎ-yu. Te ducaⁿ-ni ndécú-xi ní cacu té Davíí, téé ní xándaha ñaha xíf-yu. ⁴⁶ Te Yá Ndiöxí ní cudǐí víhí ìní-gǎ té Davíí. Te ní xicáⁿ

tnúhú-dé núú-gǎ ñuu cuu dacàa-dé veñúhu cuu cuendá-gǎ, chi ìn-ni Yá Ndiöxí ní xóo cada càhnu té Davíí ndǐhi té Jàcób, ñaní tnáhá-ó nǐ xíndecu ndéé sanaha víhi-gǎ.

⁴⁷ Te Yá Ndiöxí ñá ní dàña-gǎ dacàa té Davíí veñúhu-gǎ dico déhe-dé té Salómón, chi ní dáñá-gǎ ní dácáá-dé veñúhu cuu cuendá-gǎ

⁴⁸ cuéi ñá túú sàcùndecu-gǎ veñúhu dacaa cue téé ñuyú-a, chi ndèni xíán ndécú-gǎ chi espíritú cúú-gǎ. Te duha ní chídó tnùní téé ní xóo cáháⁿ tnúhu Yá Ndiöxí ndéé sanaha nàcuáa ní cáháⁿ-gǎ:

⁴⁹ Yúhú táxí tnùní-í andiu ndǐhi ñuyúí, te xíán ñuu nchòhó vá ndácú-ndó chihí ñaha-ndo xití veñúhu dátaná quidé-yu sá cachí-yu cùu ndiöxí-yu ní cadúha-yu.

Te ñá túú xini ñuhu-í núú ndétátú-í,

⁵⁰ chi yúhú ní cadúha-í nchaa sá lò ñuyúí-a. Duha ní cáháⁿ Yá Ndiöxí, te diu-ni ducaⁿ nǐ chídó tnùní téé ní xóo cáháⁿ tnúhu-gǎ — duha nduu nchaa tnúhu ní xáhaⁿ té Těvá xii-güedé.

⁵¹ Te ní xáhaⁿ tùcu-dé:

—Nchòhó, ío sàà ìní-ndó chi quide-ndo datná quidé ñáyiú ñá túú cùu ñáyiú isràèl chi ñá túú tédóho-ndo tnǐhu càháⁿ Yá Ndiöxí, chi ñá cuíni-ndó quíndáá ìní-ndó tnǐhu-gǎ, mee-ni cùu úhú ìní-ndó Espíritú-gǎ dátaná ní xóo cada cue ñaní tnáhá-ndó nǐ xíndecu ndéé sanaha. ⁵² Chi cue téé-án ío ní xóo dandóho-güedé nchaa cue téé ní xóo cáháⁿ tnúhu Yá Ndiöxí ndéé sanaha. Te ní sahn-güedé nchaa cue téé ní cáháⁿ sá quíxí Crístú ñuyúí-a, te Yáá-án ñá túú cuéchi-gǎ. Te diu-ni ducaⁿ nǐ quide-ndo Crístú cútñháá ní quixi-gǎ ñuyúí-a, chi ní sáha cuendá-ndó-gǎ núú cué téé ní cuu úhú ìní ñháá xii-gǎ ní sahní ñaha-güedé. ⁵³ Te ndécú ndǐhi-ndo tnúhu ní chídó tnùní ndí Moisés nàcuáa ní xáhaⁿ espíritú xínú cuéchi núú Yá Ndiöxí xii ndí, te ni dúcán ñá túú sàndáá ìní-ndó tnǐhu-án ñuu ní sahní-ndo Jèsús. Te diu-ni tnúhu-án ndécú ndǐhi-ndo ndéé vitna —cachí té Těvá xáhaⁿ-dè xii-güedé.

Ní sahn-güedé té Těvá

⁵⁴ Te sá dúcán nǐ xáhaⁿ té Těvá xii-güedé, te ní cudééⁿ víhí-güedé núú-dé, núú ní quide rúhú-güedé ñuhu-güedé sá sàtú ìní-güedé. ⁵⁵ Te té Těvá ndécú ndǐhi-dé Espíritú Yá Ndiöxí, te ní ndacoto váha-dé andiu, te ní xini-dé súúni dátásaⁿ-xi núú

ndécú Yá Ndiöxí, te ní xini-dé Xítoho Jesucristú núní-gá xio cùha Yá Ndiöxí. ⁵⁶ Te ní xáhaⁿ tē Těvá xii-güedé:

—Chí cündèhe andiu chi yúhú ndèhè-í Xítoho Jesucristú núní-gá xio cùha Yá Ndiöxí, te diu-gá cúú-gá ñani tnáhá-ndo nchaa-ndo —cachí-dé xáhaⁿ-dè.

⁵⁷ Te ní sadi-güedé dóho-güedé cuendá sá ñá ní tnáhá iní-güedé cundedóho-güedé tnúhu cáháⁿ-dé, te uuⁿ ní cuáá-güedé, te ní taxi ndaha ñaha-güedé xii-dé ⁵⁸ ndécá ñaha-güedé cuáháⁿ ndéé ìⁿ xio yuhu ñúú, te yàcáⁿ ní sánaha-güedé yúú xii-dé. Te ndècu ìⁿ tée cuechi nani-dé Sàulú, te tée-áⁿ ní quide cuendá-dé dóó-güedé cuendá ní nune ndaha-güedé ní sánaha-güedé yúú xii té Těvá. ⁵⁹ Te òré sánaha-güedé yúú, te ní cáháⁿ ndihí-dé Xítoho Jesucristú te xáhaⁿ-dè:

—Yòhó Xítoho Jesucristú, naqueheⁿ-n iní-í —cachí-dé xáhaⁿ-dè xii-gá.

⁶⁰ Te ní ngúíí xítí-dè, te níhi ní cáháⁿ-dé, te xáhaⁿ-dè:

—Yòhó Xítoho Jesucristú, vá técuèchi-n cuè tée-a sá dúhá quide ñaha-güedé xii-í —cachí-dé xáhaⁿ-dè xii-gá.

Te xiáⁿ-ná ní cáháⁿ-dé, te ní xihí-dé.

8

Té Sàulú chíhí-dè ñáyíu sàndáá iní-xi tnúhu Jèsús vecaá

¹ Te té Sàulú ní nduu vétú iní-dé sá ní sahní-güedé té Těvá.

Te diu-ni nduu-áⁿ ní cuu níhi cuendá nchaa ñáyíu sàndáá iní-xi tnúhu Jèsús ñúú Jerusalén. Te ní ndihí-yu ní xíté nuu cuáháⁿ-yu distrítú Jùdeá ndihí distrítú Sàmariá. Te cue tée ní táúchíúⁿ Jèsús dácuaⁿha ñaha xií-yu tnúhu-gá ní ndóo-güedé ñúú Jerusalén. ² Te nchaa cue tée cáháⁿ ndihí Yá Ndiöxí ní chindúxi-güedé ndíi Těvá. Te ío ní ndáhyú ñáyíu ní sàndáá iní tnúhu Jèsús sá ní xihí ndí. ³ Te té Sàulú ío dándoho-dé-yu, chí ndí vehe ndí vehe cuáháⁿ-dé cuátní-dé cuèi tée cuèi ñadihí ndécá-dé cuáháⁿ vecaá.

Cáháⁿ-yu tnúhu Yá Ndiöxí distrítú Sàmariá

⁴ Te nchaa ñáyíu ní xíté nuu cuáháⁿ-yu cáháⁿ-yu tnúhu Jèsús nchaa nuu quexíó-yu.

⁵ Te té Lipé cuáháⁿ-dé distrítú Sàmariá cáháⁿ-dé tnúhu Xítoho Jesucristú Yaá ní tendaha Yá Ndiöxí ní quixi ñuyúú-a. ⁶ Te

íó vai núú sá vǎ yǒ tnáhí ndàcu cada ní quide-dé, te ní cuñúhu vǐhí-yu, te ní xínd-edóho váha-yu nchaa tnúhu ní cáháⁿ-dè.

⁷ Te vai ñáyíu yǐhi ñaha espíritú cündihí yucu ñáváha ní queñuhu-dé nchaa espíritú-áⁿ yiqui cùñú-yu, te ní cana saa-xi òré ní ndee-xi yiqui cùñú-yu cuáháⁿ-xi, te ní ndúha-yu. Te vai ñáyíu cùhú ñá cúú-gá candá nihnú-yu ndihí ñáyíu yacua ní quide tátna-dé, te ní ndúha-yu. ⁸ Te sá dúcáⁿ ní cáháⁿ-dé tnúhu Jèsús te ní quide tátna-dé-yu, xiáⁿ ío ní cudáí iní ñáyíu ñúú-áⁿ.

⁹ Te diu-ni ñúú-áⁿ ndécú ìⁿ tée nani Xímú, te tée-áⁿ xini-dé cada ndúu-dé, te ní cuu naha dúcaⁿ quide-dé, te ní xóo cuñúhu ñáyíu distrítú Sàmariá sá dúcáⁿ quide-dé, te ní cachí-dé sá díú-ní-dè cúnúu. ¹⁰ Te nchaa ñáyíu cuèi ñáyíu cuica te cuèi ñáyíu ndáhú ío nèhè-yu sá yǐnhú núú-dè, te xítnáhá-yu:

—Tée-áⁿ ío chindee ñaha Yá Ndiöxí xii-dé núu vai núú sá quidé-dè —cachí-yu xítnáhá-yu.

¹¹ Te ní sàndáá iní-yu nàcuáa ní xóo cada ndúu-dé, te ní xóo cuñúhu vǐhí-yu, te ní cuu naha dúcaⁿ-ni dandahú ñáhá-dè xií-yu. ¹² Te té Lipé ní cáháⁿ-dé tnúhu Xítoho Jesucristú, te ní xáhaⁿ-dè xií-yu sá Yá Ndiöxí cuini-gá ndíhu ndaha ñaha-gá xií-yu. Te cuèi tée cuèi ñadihí ní sàndáá iní-yu tnúhu-gá, te ní sanduté-yu. ¹³ Te tnáhá té Xímú ní sàndáá iní-dé tnúhu-gá, te ní sandute-dé, te ní xica cuu-dé ndihí té Lipé, te ní cuñúhu-dé chí titní núú sá vǎ yǒ tnáhí ndàcu cada ní quide té Lipé, te ní cuñúhu vǐhi nchaa ñáyíu.

¹⁴ Te dava-gá cue tée ní táúchíúⁿ Jèsús dácuaⁿha ñaha xii ñáyíu tnúhu-gá ní níhí-güedé tnúhu sá ñáyíu distrítú Sàmariá ní sàndáá iní-yu tnúhu Yá Ndiöxí. Te ní tendaha-güedé té Pèlú ndihí té Juáa cuáháⁿ-güedé distrítú Sàmariá. ¹⁵ Te ní quexio-güedé, te ní cáháⁿ ndihí-güedé Yá Ndiöxí ní xícáⁿ-güedé Espíritú-gá quixi cundecu ndihí-yu. ¹⁶ Chí ní ìⁿ-yu vátá sàá-gá Espíritú-gá cundecu ndihí-yu, chí òré ní sanduté-yu, te mee-ni Jèsús ní cacunehe-güedé. ¹⁷ Te òré ní sacáⁿ ndodo-güedé ndaha-güedé díquí-yu, te ní quexio Espíritú-gá ní ngúndecu ndihí-yu.

¹⁸ Te ní xiní té Xímú nàcuáa ní quide-güedé ní quexio Espíritú-gá ní ngúndecu ndíhi-yu, te cuíní-dé cuañaha-dě díhúⁿ xii té Pèlú ndíhi té Juàa ní cùu. ¹⁹ Te ní xáhaⁿ-dě:

—Chindee ñaha-ndo cuendá nděɗa-ni cää-yu cacáⁿ ndodo-í ndaha-í díquí-yu, te níhi-yu Espíritú Yá Ndiòxí cundecu ndíhi-yu —cächí-dé xáhaⁿ-dě xii-güedé.

²⁰ Te té Pèlú ní xáhaⁿ-dě xii-dé:

—Yòhó cuíta nihnu-n ndíhi díhúⁿ-n, chi cuíní-n cuàaⁿ-n sá váha quide Yá Ndiòxí.

²¹ Yòhó vá cúú cãda-n chiuⁿ quide-ndí, chi ñá túú ndècu váha iní-n núú Yá Ndiòxí.

²² Te vá dúcáⁿ cãháⁿ-n, chi ío nèhé cãháⁿ-n sã dúcáⁿ cãháⁿ-n. Te cãháⁿ ndàhú-n núú Yá Ndiòxí sá ná cáda cãhnu iní-gá tnúhu ní cãháⁿ-n. ²³ Te yúhú sa xiní-í sá ïo úhú iní-n, chi mee-ni sã cuèhé sá dúhá chido nuu-n quide-n —cachí té Pèlú xáhaⁿ-dě xii té Xímú.

²⁴ Te ní xáhaⁿ tẽ Xímú xii-güedé:

—Cãháⁿ ndàhú-ndó núú Yá Ndiòxí sá ñà túú ñã tnahá-í sá dúcáⁿ ñí cãháⁿ-í —cächí-dé xáhaⁿ-dě.

²⁵ Te té Pèlú ndíhi té Juàa ní cãháⁿ-güedé tnúhu Yá Ndiòxí núú ñáyíu ñúú-án. Te ní xáhaⁿ-güedé nchaa nàcuáa ní quide Jèsús ní xiní-güedé òrè ní xica cuu-gá ñuyíú-a. Te ní tñi-güedé ichi cuánuhú-güedé ñúú Jerusálén, te ní yáha-güedé titní ñúú yíndèhu distritú Sãmariá, te ní cãháⁿ-güedé tnúhu-gá.

Té Lipé ndíhi ñí tée ñúú Etiópía

²⁶ Te ñíⁿ espíritú xínú cuèchi núú Yá Ndiòxí ní quexio-xi ñúú Jerusálén ní xáhaⁿ-xi xii té Lipé:

—Cada túha-n chi quée nuu-n ñúú Gãzá, dico mee-ni xití yucu cuáháⁿ ichi —cächí-xi xáhaⁿ-xi xii-dé.

²⁷ Te ní xica-dé cuáháⁿ-dé, te ní nahá-dé ñíⁿ tée nacióⁿ Etiópía ñúhú-dé ichi. Te cuṽ-dé tesorèrú xínú cuèchi-dé núú ñíⁿ ñadihi ñaha yíndaha nacióⁿ Etiópía, te ñaha-án nání-án Cãdacé. ²⁸ Te tée etiópía-án ñíⁿ sáháⁿ-dé ñúú Jerusálén ní cãháⁿ ndíhi-dé Yá Ndiòxí, te ñúhu-dé ichi cuánuhú-dé ñúú-dé ñúhú-dé carrètá, te dàcuaha-dé tnúhu ní chídó tnùní ndíi Chàíá tée ní xóo cãháⁿ tnúhu Yá Ndiòxí ndéé sanaha. ²⁹ Te ní xáhaⁿ Espíritú Yá Ndiòxí xii té Lipé:

—Quíhíⁿ tuha-n càrrètá-án —cächí Es-
píritú-gá xáhaⁿ-xi xii-dé.

³⁰ Te té Lipé ní sátuha-dé carrètá-án, te ní tecú dóho-dé nàcuáa cãháⁿ tée etiópía-án, tée ñúhu carrètá-án dàcuàha-dé nàcuáa ní chídó tnùní ndíi Chàíá. Te ní xáhaⁿ tẽ Lipé xii tée etiópía-án:

—¿Tècú tnùní-n nchàa tnúhu dàcuaha-n-án? —cächí té Lipé xáhaⁿ-dẽ xii-dé.

³¹ Te ní xáhaⁿ tée etiópía:

—¿Nása tecú tnùní-í te vá yòo dànehé ñáhá xii-í? Ta quène iha coo-n chi danèhé ñáhá-n —cächí-dé xáhaⁿ-dẽ xii té Lipé.

Te cuásaa té Lipé núú carrètá ní ngóo-dé.

³² Te ndédóho-dé nàcuáa dàcuaha tée etiópía-án nàcuáa ní chídó tnùní ndíi Chàíá núú tütú Yá Ndiòxí núú cächí-xi:

Dàtná quide ñíⁿ mbéé cada-dé òrè can-
deca ñaha-güedé xii-dé quíhíⁿ cahni ñaha-güedé chi ñá túú ñã cada-dé,

dàtná cuíní-ndó quide mbéé òrè dètè-dí ñá túú ndàhí-dí ducaⁿ càda-dé òrè cahni ñaha-güedé chi ni vá cãháⁿ-dé.

³³ Te mee-ni cudiquí ndeé ñáhá-güedé xii-dé, te ni vá ndúcu tnúhu-güedé núú-dẽ ñúu ndáá ndècuèchi-dé.

Te ío cuu nduu cuihna iní cue ñaní tnahá-dẽ, chi cahni ñaha-güedé xii-dé ñuyíú-a.

Duha cãháⁿ tutú ní dàcuáhá tée etiópía ní xíndedóho té Lipé.

³⁴ Te ní xáhaⁿ tucu tée Etiópía xii té Lipé:

—Cundee iní-n cächí tnúhu-n yòo ca-
cunehe tée ní cãháⁿ tnúhu Yá Ndiòxí ndéé sanaha, núu cãháⁿ-dé cuendá mée-dẽ àdi cãháⁿ-dé cuendá ingá ñáyíu —cächí tée etiópía-án xáhaⁿ-dẽ xii té Lipé.

³⁵ Te té Lipé ní cani-dé cuèndú núú tée etiópía nàcuáa ní cãháⁿ ndíi Chàíá nàcuáa cada Jèsús òrè quixi-gá ñuyíú-a. Te ní xáhaⁿ-dẽ nàcuáa nduu tnúhu Jèsús ndíhi nàcuáa ní quide-gá. ³⁶ Te ñúhu-güedé ichi cuáháⁿ-güedé ní naníhí-güedé ñíⁿ xichi núú ñúhú ndute, te ní xáhaⁿ tée etiópía:

—Iha ñúhu ndute, ¿te vá cúú cuàndute-í iha-án? —cächí-dé xáhaⁿ-dẽ xii té Lipé.

³⁷ Te xáhaⁿ tẽ Lipé:

—Te núu sàndáá ndisa iní-n Jèsús, te cuu cuandute-n —cächí-dé xáhaⁿ-dẽ.

Te ní xáhaⁿ tée etiópía:

—Sàndáá ndisa iní-í sá Dèhe Yá Ndiòxí cúú Xíthó Jesucristú —cächí-dé xáhaⁿ-dẽ.

³⁸Te ní ngani-dé carrètá, te ní nuu-güedé ndi ndüü-güedé, te cuánguee-güedé xití ndute, te ní dácuandüte ñaha té Lipé xii-dé.

³⁹Te órè ní nene-güedé xití ndute, te ndèca ñaha Espiritú Yá Ndiöxí xii té Lipé cuáháⁿ. Te ñá túú ní xiní téé ní sandute-áⁿ ndèé ichi cuáháⁿ té Lipé. Te ío ní cudii ini-dé sá ní natuha-dé ichi Yá Ndiöxí, te cuán-daa-dé núú carrètá-dé cuánuhú-dé. ⁴⁰Te ní quexió té Lipé ñuú Ázotó, te ndi tnahá ñuú ndi tnahá ñuú cuáháⁿ-dé cáháⁿ-dé tnúhu Yá Ndiöxí, te ní yáha-dé cuáháⁿ-dé ní quexio-dé ndéé ñuú Cèsareá.

9

Té Sàulú ní tuha-dé ichi Xítóhó Jesucristú (Hch. 22:6-16; 26:12-18)

¹Te té Sàulú mee-ni cáháⁿ cuèhé-dé cuèndá ñáyiú ní sándáá ini tnúhu Jèsús, te cuiní-dé cahni ñaha-dé xii-yu. Te ní sáháⁿ-dé núú dütú cúnúu-gá, ²te ní xáhaⁿ-dè sá cádúha dütú-áⁿ ñiⁿ tutú canehe-dé quíhíⁿ cuáha-dé cue téé xindeé nchito veñúhu ñuú Dàmascú, chi cuiní-dé tñii-dé nchaa ñáyiú dàcuaha tnúhu Xítóhó Jesucristú candeca ñaha-dé quíhíⁿ ñuú Jerusálén. ³Te ní xica-dé cuáháⁿ-dé tá cüyatni-dé ñuú Dàmascú, te uuⁿ ní quee ñuhú andü, te ní dáyèhé-xi ndéé núú nütñii-dé. ⁴Te ní ndua-dé ndéé ñuhu, te ní tecú dóho-dé cáháⁿ ñiⁿ sá cáháⁿ núú ninu, te xáhaⁿ-xi xii-dé:

—Yòhó Sàulú, ¿ná cuèndá cúú ùhú ini ñáhá-n xii-í te dándoho ñaha-n? —cachí sá cáháⁿ-áⁿ xáhaⁿ-xi xii-dé.

⁵Te ní xáhaⁿ-dè:

—¿Ná cúú yòhó sá cáháⁿ-áⁿ-í? —cachí-dé xáhaⁿ-dè.

Te ní xáhaⁿ sá cáháⁿ xii-dé:

—Yúhú cùú-í Jèsús téé cùu úhú ini-n. Te ío dándoho-n mee-n, chi dàtná quidé ndicutu quide-n, chi quití-áⁿ núu na cúxi-güedé-di pùya te sáha-di patadá núú-xi, te quide úhú-di mee-di. Te ducaⁿ sãtnahá-xi cùu yohó chi ñá túú sándáá ini ñáhá-n xii-í —cachí sá cáháⁿ-áⁿ xáhaⁿ-xi xii-dé.

⁶Te té Sàulú ní quidi ñaha-xi xii-dé sá ní yúhú-dé, te ní xáhaⁿ-dè:

—Xítóhó Jesucristú, ¿te ná cuiní-n cada-í-í? —cachí-dé xáhaⁿ-dè.

Te Jèsús ní xáhaⁿ-gã xii-dé:

—Ndacóo, te quíhíⁿ-n ñuú-áⁿ, te yacáⁿ tecú tnúhu-n ná cúú sá cadá-n —cachí-gá xáhaⁿ-gã xii-dé.

⁷Te cue téé cuáháⁿ ndihi té Sàulú ní tecú dóho-güedé cáháⁿ ñiⁿ sá cáháⁿ, dico vá yò tnahí ni xiní-güedé, te ní yúhú víhí-güedé, te ñá túú tnahí ni cáháⁿ-güedé.

⁸Te ní ndacóo té Sàulú, te ñá ní cùu-gá cundehe-dé, chi ní cuaa-dé, te ní tñii-güedé ndaha-dé ndéca ñaha-güedé cuáháⁿ ñuú Dàmascú. ⁹Te yacáⁿ ní xindecu-dé úní nduu, te ñá ní cùu tnahí cundehe-dé, te ñá túú ná ní xèxi-dé, te ñá túú ní xihí-dé ndute.

¹⁰Te ndècu téé sándáá ini tnúhu Jèsús ñuú Dàmascú, nání-dé Ananiás, te ní sáháⁿ Jèsús núú sání-dé, te ní xáhaⁿ-gã xii-dé:

—¡Ananiás! —cachí-gá xáhaⁿ-gã.

Te ní xáhaⁿ-dè:

—¿Yúhú cáháⁿ ndihi-n-áⁿ? —cachí-dé xáhaⁿ-dè.

¹¹Te ní xáhaⁿ-gã:

—Ndacúñí, te quíhíⁿ-n ñiⁿ chiúⁿ ichi núú dánani-güedé Ichi Ndáá, te yacáⁿ nanducu-n vehe té Jüdás, chi vehe téé-áⁿ ndécú ñiⁿ téé ñuú Tàrsú nání-dé Sàulú, te téé-áⁿ sa cáháⁿ ndihi ñaha-dé xii-í. ¹²Te téé-áⁿ ní dácótó ñaha-xi sá ní xiní ñáhá-dé xii-n ní quexio-n núú ndécú-dé, te ní sacáⁿ ndodo-n ndàha-n díqui-dé, te ducaⁿ te ní nacaáⁿ núú-dé ní dácótó ñaha-xi xii-dé —cachí-gá xáhaⁿ-gã.

¹³Te té Ananiás ní xáhaⁿ-dè:

—Yòhó Xítóhó Jesucristú, cachí tnúhu-í xii-n sá ní níhi-í tnúhu nàcuáa quide-dé sá ño quide úhú-dé ñáyiú cáháⁿ ndihi-n ñuú Jerusálén. ¹⁴Chi nèhe-dé tutú ní sáñaha cuè dütú cúnúu cuèndá níhi-dé nàcuáa cada-dé tñii-dé nchaa ñáyiú sándáá ini ñáhá xii-n —cachí-dé xáhaⁿ-dè xii-gá.

¹⁵Te Jèsús ní xáhaⁿ-gã xii-dé:

—Quíhíⁿ-n ndàtnúhu-n ndihi-dé, chi cuiní-í cada-dé chiúⁿ-í, quíhíⁿ-dè cáháⁿ-dè tnúhu-í núú cuè ñáyiú isràél, ndihi núú cuè ñáyiú ñá túú cùu ñáyiú isràél, ndihi núú cuè téé yindaha ñaha xii-yu. ¹⁶Te yúhú cúnaha-í xii-dé sá ndóhó vihi-dé cuèndá-í —cachí-gá xáhaⁿ-gã xii té Ananiás.

¹⁷Te cuáháⁿ té Ananiás vehe núú ndécú tē Sàulú te ní sacáⁿ ndodo-dé ndaha-dé díqui tē Sàulú, te ní xáhaⁿ-dè:

—Yòhó té Sàulú téé ndècu ndihi-í ichi Xítóhó Jesucristú, diu-ni Xítóhó Jesucristú Yáá ní cáháⁿ ndihi ñaha xii-n ichi ní tendaha ñaha-gá véxi-í cuèndá cacáⁿ tnhú-í

núu-gã cuendá-n te ndúha núu-n, te dät-nùnì quixi Espiritú-gá cundecu ndíhi-n — cáchi-dé xáhaⁿ-dë.

¹⁸ Te dätná sá nǐ xócání-ó ìnⁿ sá ndèdí núu-dë ní quide ñaha-xi xii-dé, te ní nacaáⁿ núu-dë, te ní sandute-dé. ¹⁹ Te ní nexi-dé, te ní naníhí ndéé-dë, te titní nduu ní xindecu ndíhi-dé ñáyiú ní sándáá iní tnúhu-gá ñuu Dámascú.

Té Sàulú dácuaⁿha-dé ñáyiú tnúhu Yá Ndiöxí ñuu Dámascú

²⁰ Te sátá nǐ ndúha núu-dë, te ní sáháⁿ-dé veñúhu cue ñáyiú isràél ní xáhaⁿ-dë sá Jèsús cúu-gã Déhe Yá Ndiöxí. ²¹ Te nchaa ñáyiú ní xindedóho tnúhu ní cáháⁿ-dé, te ní cuñúhu vihí-yu, te ní xítñahá-yu:

—Diu téé-ãⁿ nǐ sahní-dé ñáyiú ní xóo chiñúhu ñaha xii Jesús ñuu Jerusalén. Te ní quixi-dé iha ní cuiní-dé tñii ñaha-dë xii-yu candeca ñaha-dë quíhíⁿ núu cuè dútú cùnui ní cuu —cachí-yu xítñahá-yu.

²² Te ío iní-gá té Sàulú xáhaⁿ-dë xii-yu sá díú Jèsús cúu-gã Cristú Yáá ní tendaha Yá Ndiöxí ní quixi ñuyú-a, te xíãⁿ ñá ní níhí ñáyiú isràél ndécú ñuu Dámascú tnúhu cáháⁿ-yu, te ní cuñúhu vihí-yu.

Té Sàulú ní dáxió-dë núu ñáyiú isràél

²³ Te sátá nǐ cuu titní nduu, te ní ndat-núhu cue téé isràél sá cáhní-güedë té Sàulú.

²⁴ Te té Sàulú ní níhí-dë tnúhu nácuaá cáháⁿ-güedé cada ñaha-güedë xii-dé, te cuèi nduu cuèi níú ndéé cuendá-güedé yuyèhe núu ñúðòco ndóho yuhu ñuu cuendá cuiní-güedé tñii ñaha-güedë xii-dé te cahni ñaha-güedë. ²⁵ Te ìnⁿ níú ndéca ñaha cue téé ní sándáá iní-xi tnúhu Jèsús cuáháⁿ ndéé núu ñúðòco ndóho yuhu ñuu. Te ní sáá-güedé núu ndóho, te ní chihi ñaha-güedë xii-dé xití tídihi te ní dándëe ñaha-güedë núu ñúhú, te ní quene-dé cuáháⁿ-dë.

Te Sàulú ndécú-dë ñuu Jerusalén

²⁶ Te té Sàulú ní nasáá-dé ñuu Jerusalén, te cuiní-dé chitnahá-dé ñáyiú sándáá iní tnúhu Jèsús, te ní yùhú-yu chi ní cáháⁿ-yu sá dándàhú ñáhá-dë sá sándáá iní-dé Jèsús. ²⁷ Te té Bèé ndéca-dë té Sàulú cuáháⁿ núu ndécú cuè téé ní táuchíúⁿ Jèsús dacuaⁿha ñaha xii-yu tnúhu-gá. Te ní caní té Bèé cuendú núu-güedë nácuaá ní cuu ní naníhí tnáhá tã Sàulú ndíhi Jèsús ichi, te ní cáháⁿ ndíhi ñaha-gã xii-dé. Te ní xáhaⁿ tùcu té

Bèé nácuaá ní cáháⁿ té Sàulú tnúhu Jèsús núu ñáyiú Dámascú, te ñá túú tnáhí ní yùhú-dé ní cáháⁿ-dë, cáchi té Bèé xáhaⁿ-dë xii-güedé. ²⁸ Te ní xindecu té Sàulú ndíhi ñáyiú xidácuahá tnúhu-gá ñuu Jerusalén. Te ní ndicuu ndicuu-dé ní cáháⁿ-dé tnúhu Jèsús, te ñá túú tnáhí ní yùhú-dé ²⁹ ní cáháⁿ ndíhi-dé ñáyiú isràél ñáyiú cáháⁿ tnúhu griégú. Te ñáyiú-áⁿ nǐ ngüíta-yu ndät-núhu-yu sá cáhní ñáhá-yu xii-dé. ³⁰ Te ñáyiú sándáá iní tnúhu-gá ní níhí-yu tnúhu nácuaá cuiní ñáyiú cáháⁿ tnúhu griégú cada ñáhá-yu xii té Sàulú, núu ní sándecca ñáhá-yu xii-dé ñuu Césareá, te yàcáⁿ ní tendaha ñáhá-yu cuánuhú-dë ñuu Tarsús.

³¹ Te sátá xíãⁿ te ní sanaá-yu ñá túú-gã ní xóo cada úhú-yu nchaa ñáyiú sándáá iní tnúhu Jèsús níhí distritú Júdeá, ndíhi distritú Galilea, ndíhi distritú Sàmaría. Te ní níhí ndéé-yu ní quidé-yu nácuaá ní xáhaⁿ Yá Ndiöxí cada-yu, te ío ní xindecu yíñúhú-yu núu-gã, te Espiritú-gá ní chindee ñaha-xi xii-yu, te vai-gá ñáyiú ní sándáá iní-yu tnúhu-gá.

Té Pèlú ní quide tátna-dé té Èneás

³² Titní xichi ní sáháⁿ té Pèlú ní cáháⁿ-dé tnúhu Yá Ndiöxí. Te ìnⁿ nduu ní sáháⁿ-dé ñuu Lidá ní cáháⁿ ndíhi-dé ñáyiú sándáá iní ñáhá xii Jesús. ³³ Te yàcáⁿ ní naníhí-dë ìnⁿ téé nàni Eneás, te ní cuu úná cuíá cùhú-dé, te ní lúha ñá cúu-gã candá nihnu-dé. ³⁴ Te ní xáhaⁿ tã Pèlú xii-dé:

—Èneás, Xítoho Jesucristú cada tátna ñaha-gã xii-n tnáví. Ndacóo te ndocani-n yüu-n —cachí-dé xáhaⁿ-dë.

Te òré-ni ní ndacóo-dé. ³⁵ Te nchaa ñáyiú ñuu Lidá ndíhi ñáyiú ñuu Sàron ní xini-yu sá nǐ ndúha-dé, te ní sándáá víhí iní-yu Xítoho Jesucristú.

Ní ndoto tá Dòrcás

³⁶ Te ñuu Jòpé ndécú ìnⁿ ñadíhí sándáá iní-aⁿ tnúhu Jèsús, te nàni-aⁿ Tabitá, te tnúhu griégú xáhãⁿ-yu Dòrcás, te ío váha ní xóo cada-aⁿ chi ío váha iní-aⁿ, te ní xóo chindee-aⁿ ñáyiú ndàhú. ³⁷ Te váha-ni ndècu-aⁿ ni cuu, te ní tñii ñaha cuèhé ní xihí-aⁿ, te ní nadacùchi ñáhá-yu, te ní chihi ñáhá-yu ìnⁿ cuártú ndécú ndéé núu ñnu. ³⁸ Te ñáyiú ní sándáá iní tnúhu Jèsús ñuu Jòpé ní níhí-yu tnúhu sá ndécú tã Pèlú ñuu Lidá. Te yatni-ni càa ñuu-áⁿ, te ní tendàhá-yu úu cue téé cuáháⁿ-güedé núu

ndécú-dě cuendá cúnaha-güedě candeca ñaha-güedě xii-dé quíhíⁿ núú ndécü-yu. Te ní xáhaⁿ-güedě xii té Pèlú:

—Yáchí ná quíhíⁿ-ó ñuú-ndí, chi yàcáⁿ cáná ñahá-yu quíhíⁿ-n tnáví —càchí-güedě xáhaⁿ-güedě xii té Pèlú.

³⁹ Te té Pèlú ní xica-dé cuáhán-dé ndíhi cue téé-ánⁿ ñuú Jòpé, te òré ní quexio-güedé ndíhi-dé, te cuasaá ndíhi ñaha-güedé cuartú ndéé núú ñnu. Te nchaa ñáyiu ðíhí ñáyiu queé ní tacá ndéé ñahá xii ndíyi-án xindáhyú-yu, te ní dánèhé ñahá-yu nchaa dóó ní cadúha ñaha ní xíhí-án. Chi ní xóo cadúha-aⁿ dícúⁿ, te ní xóo cadúha-aⁿ díó òré ní xíndecu-aⁿ ñuyúí-a, te nchaa xíáⁿ ní dánèhé ñahá-yu xii té Pèlú. ⁴⁰ Te té Pèlú ní xáhaⁿ-dě sá queé-yu nchaá-yu quehé, te ní queé-yu. Te ní ngúíhí xítí-dé te ní cáháⁿ ndíhi-dé Yá Ndióxi, te dàtnúni ní ndacoto-dé núú cándòdo ndíyi-án, te ní xáhaⁿ-dè:

—Tàbitá, ndacóo —càchí-dé xáhaⁿ-dè.

Te ní ndacoto-aⁿ núú tē Pèlú te ní ndacóo-aⁿ. ⁴¹ Te ní tñii-dé ndaha-aⁿ ní nacanutñij ñaha-dè. Te ní cana-dé nchaa ñáyiu ðíhí ñáyiu ndéé ndíhi nchaa ñáyiu sàndáá iní tnúhu Jèsús cuendá quiní-yu sá ñí ndoto-aⁿ. ⁴² Te nchaa ñáyiu ñuú Jòpé ní ñhí-yu tnúhu nàcuáa ní quide té Pèlú ní ndoto ñaha ní xíhí-án, te vái-yu ní sàndáá iní-yu Xitohó Jesucristú. ⁴³ Te titñí nduu ní xíndecu té Pèlú vehe té Xímú tée dàcuítá ñii.

10

Té Pèlú ndíhi té Còrneliú

¹ Te ndècu ñii tée nàni-dé Còrneliú ñuú Cèsareá te cùu-dé capitán, te ndècu ndíhi-dé ñii cièndú sandàdú. Te cue téé-án nání-güedé Sandàdú Itàlianú. ² Te tée cùu capitán ío váha iní-dé, te mee-dé ndíhi ñadíhí-dé ndíhi nchaa landú-dé ío nèhé-yu sá yíñúhu núú Yá Ndióxi, te sáha-dé ñáyiu ndàhú ñáyiu israhé ðíhíⁿ, te ío cáháⁿ ndíhi-dé Yá Ndióxi. ³ Te ñii nduu dàtná òré caá úní sacuaa ní dácótó núú ñahá-xí xii-dé sá ní sáháⁿ ñii espíritu xínú cuèchi núú Yá Ndióxi núú-dé, te ní xáhaⁿ-xi:

—Còrneliú —càchí-xi xáhaⁿ-xi xii-dé.

⁴ Te ní xini-dé ndi nduú xio núú-dé espíritu-án. Te ío ní yùhú-dé. Te ní xáhaⁿ-dè:

—¿Ná chíúⁿ vèxi-n? —càchí-dé xáhaⁿ-dè.

Te xáhaⁿ-xi:

—Ío cáháⁿ ndíhi-n Yá Ndióxi, te ñáyiu ndàhú sáñaha-n ðíhíⁿ-n, te nchaa xíáⁿ sa ñaha-gá. ⁵ Te vitna tendaha-n cue téé na quíhíⁿ-güedé ñuú Jòpé quíngana-güedé ñii tée nàni Xímú, ádi Pelú chi úú ðiu-dé, te candeca ñaha-güedé quixi. ⁶ Te òré quexio-dé te cachí tnúhu-dé nchaa dava-gá sá cuíni Yá Ndióxi cada-n. Te ndècu-dé vehe íngá tucu tée nàni Xímú tée dàcuítá ñii, te vehe téé-án caá ñii xio yuhu lamár —càchí-xi xáhaⁿ-xi xii-dé.

⁷ Te sáta cuáhán espíritu-án, te té Còrneliú ní cana-dé úú tnáhá cue téé xínu cuèchi núú-dé ndíhi ñii sandàdú xínú cuèchi tucu núú-dé, te tnáhá sandàdú-án ío cáháⁿ ndíhi-dé Yá Ndióxi. ⁸ Te té Còrneliú ní cani-dé cuèndú núú-güedé nàcuáa ní cáháⁿ espíritu xínú cuèchi núú Yá Ndióxi. Te ní tendaha ñaha-dé xii-güedé cuáhán-güedé ñuú Jòpé.

⁹ Te nduu tnèé-án ñúhú-ní-güedé ichi cuáhán-güedé, te cùu-xi datná òré caixúú nduu ta cùyatni-güedé ñuú-án, te òré-án ñí sáá té Pèlú díquí vèhé cáháⁿ ndíhi-dé Yá Ndióxi. ¹⁰ Te òré-án sa xihí-dé docó cuíni-dé caxi-dé, te ñini cadúha-yu sá cáxi-dé ní dácótó núú ñahá-xí ¹¹ sá ñí xini-dé ñii sá ndécú andiu, te caa datná caá ñii dóó cáhnú nchicúⁿ yoho ndi cùmi xiquí-xi vèxi cuuⁿ núú ñúhú. ¹² Te núú döó-án yódó còó ndíhi quiti ndava ndíhi nchaa núú quiti ndéé cùmi sáhá-xi. ¹³ Te ní tecú dóho-dé cáháⁿ ñii sá cáháⁿ, te xáhaⁿ sá cáháⁿ-án xii-dé:

—Pèlú, ndacuíní cahni-n ndèda-ni caa quiti-a caxi-n-di —cachí sá cáháⁿ-án xáhaⁿ-xi xii-dé.

¹⁴ Te té Pèlú ní xáhaⁿ-dè:

—Vá cáhni-í-di chi càchí tnúhu sá sanú ichi ñaha xii nchúhú ñáyiu israhé sá vā cùú caxi-ndí nchaa quiti-a chi cuu cuèchi, te vátá cáxi-gá-í-di ñii ñii xito —cachí-dé xáhaⁿ-dè.

¹⁵ Te ní cáháⁿ tucu sá ñí cáháⁿ-án, te xáhaⁿ-xi:

—Vá cùú cächí-n sá vā cùú caxi-n-di, chi mee Yá Ndióxi ní cachí-gá sá ðúú nchaa quiti-a cuu caxi-o vitna —cachí sá ñí cáháⁿ-án xáhaⁿ-xi xii-dé.

¹⁶ Te ducaⁿ ñí cáháⁿ sá ñí cáháⁿ-án ñni xito, te dàtnúni cuándaa tucu dóó-án andiu.

¹⁷ Te té Pèlú ñá ní cùtnuúni iní-dé ná cuendá ducaⁿ ñí dácótó núú ñahá-xí xii-dé, núú xíáⁿ ío cuéhé ñí sani iní-dé. Te òré-án

ní quexìo cue tée ní tendaha té Còrneliú ndéé yuyèhe, chi ndi vehe ndi vehe cuáháⁿ-güedé ndúcú tnùhu-güedé ndéé cáá vehe té Xímú tée dii vèhe-xi ndecu té Pèlú.
¹⁸Te ní cáháⁿ níhi-güedé, te xáhaⁿ-güedé:

—Ná túú cùdana iha ndecu ìⁿ tée nànducu-ndí nání-dě Xímú, àdi Pelú chi úú òu-dé —càchí-güedé xáhaⁿ-güedé.

¹⁹Te té Pèlú vai sani iní-dé sá ní dácótó núú ñáhá-xí xii-dé. Te òré-áⁿ ní xáhaⁿ Espiritú Yá Ndiòxí xii-dé:

—Cundedóho-n ìⁿ tnúhu na càháⁿ-í-a. Ní quexìo úní cue tée nànducu ñaha xii-n.

²⁰Yáchí, cuandèe chi quíhíⁿ-n ndíhi-güedé, te vá yùhú-n chi yùhú ní xáhaⁿ-í véxi cuaca ñaha-güedé xii-n —càchí Espiritú-gá xáhaⁿ-xi xii té Pèlú.

²¹Te ní xica-dé cuánde-dé núú ndécú cuè tée xica nanducu ñaha xii-dé, te xáhaⁿ-dè xii-güedé:

—Yùhú cúú tée nànducu-ndo-áⁿ. Náu-í-a núú ná chíúⁿ cuini ñáhá-ndó —càchí-dé xáhaⁿ-dè xii-güedé.

²²Te xáhaⁿ-güedé:

—Tée cùu capitáⁿ tée nàni Corneliú ní tendaha ñaha-dé véxi-ndí, te tée-áⁿ ò váha iní-dé, chi ò sàndáá iní-dé Yá Ndiòxí, te nchaa ñáyiú isràél ò váha càháⁿ-yu cuendá-dé. Te ìⁿ espíritú xínú cuèchi núú Yá Ndiòxí ní xáhaⁿ-xi xii-dé sá cáná ñaha-dé xii-n quíhíⁿ-n vèhe-dé dacuàha-n-dé tnúhu Yá Ndiòxí —càchí cue tée ní tendaha té Còrneliú xáhaⁿ-güedé xii té Pèlú.

²³Te ní xáhaⁿ tẽ Pèlú sá quíhu-güedé vehe-dé, te candeca tnàha-güedé ndíhi-dé quíhíⁿ ndéé nduu tnéé. Te nduu tnéé-áⁿ ní xica-güedé ndécá tnàha-güedé ndíhi té Pèlú cuáháⁿ, te tnàhá ìⁿ úú cue tée sàndáá iní tnúhu Jèsús ñuu Jòpé cuáháⁿ ndíhi ñaha-güedé xii-dé.

²⁴Te ndéé ingá nduu ní quexìo-güedé ñuu Cèsareá. Te té Còrneliú ndétú ñaha-dé xii-güedé vehe-dé te sa ndècu túha-dé ndíhi ñadhí-dé ndíhi nchaa landú-dé ndíhi cue tée ò váha tnàhá tnúhu ndíhi-dé, chi ní cana ñaha-dè ní nítnáhà-yu ndíhi-dé cundetú-yu té Pèlú. ²⁵Te sátá ní quèxio té Pèlú vehe té Còrneliú, te ní quee-dé quehé, te ní ngúíhí xítí-dé núú tẽ Pèlú chíñuhu ñaha-dé ní cùu. ²⁶Te té Pèlú ní xáhaⁿ-dè:

—Nducuíhí vá ngúíhí xítí-n nùú-í chi ñá díú Ndiòxí cùu-í, dicó ìⁿ tée ñuyúú-a cùu-í —càchí té Pèlú xáhaⁿ-dè xii-dé.

²⁷Te ta càháⁿ té Pèlú ndíhi té Còrneliú cuánguihu-güedé xítí vehe, te chitu ñáyiú xixíhi xítí vehe. ²⁸Te ní xáhaⁿ tẽ Pèlú xii-yu:

—Sa ñaha-ndo sá càchí tnúhu sá sánú ìchi ñaha xii nchúhú ñáyiú isràél sá vá cùú quixi-ndí vehe ní ìⁿ nchóhó ñáyiú ñá túú cùu ñáyiú isràél te ní vá cùú tnàhá tnúhu ndíhi ñaha-ndí xii-ndo. Dico Yá Ndiòxí ní cachí-gá sá vá cùú càháⁿ-í sá vá cùú càháⁿ ndíhi-í ñáyiú ñá túú cùu ñáyiú isràél, chi cuu cuèchi. ²⁹Núu xíáⁿ ndíhi-ni véxi-í òré ní quexìo tnúhu sá cáná ñaha-ndo. Te cachí tnúhu-ndo ná cuendá cáná ñaha-ndo —cachí té Pèlú xáhaⁿ-dè xii-yu.

³⁰Te té Còrneliú ní xáhaⁿ-dè:

—Ní cuu cúmí nduu, te díu-ni dàtná òré iha cùu-xi, te yùhú ndècu-í díu-ni vehe-í, te ñá túú tnàhí ná xéxi-í cáháⁿ ndíhi-í Yá Ndiòxí, te òré-áⁿ ní quexìo ìⁿ espíritú xínú cuèchi núú-gá níhnu-xí dóo cuixíⁿ dóo chàhnchí. ³¹Te càchí-xi: “Còrneliú, ní xíndedóho Yá Ndiòxí tnúhu ní cáháⁿ-n ndíhi-gá, te xini-gá sá sãñaha-n díhúⁿ xii ñáyiú ndàhú. ³²Te ñuu Jòpé ndécú ìⁿ tée nàni Xímú, àdi Pelú chi úú òu-dé, te ndècu-dé vehe ìⁿ tée nàni tucu Xímú tée dacuitá ñi, te càa vehe-dé ìⁿ xio yuhu làmár, te cana-n-dè ná quixi-dé ndatnúhu-n ndíhi-dé”, duha ní cáháⁿ espíritú xínú cuèchi núú Yá Ndiòxí. ³³Núu xíáⁿ ndíhi-ni ní cana ñaha-í xii-n. Te táxáhu xii-n sá véxi-n chi iha ndècu-ndí nchaa-ndí ndétú ñaha-ndí xii-n cùndedóho-ndí tnúhu Yá Ndiòxí, te cuini-ndí cachí tnúhu-n nchaa tnúhu ní cachí Yá Ndiòxí cáháⁿ-n —càchí té Còrneliú xáhaⁿ-dè.

Té Pèlú ní ndatnúhu-dé ndíhi ñáyiú ní tacá vehe té Còrneliú

³⁴Te té Pèlú xáhaⁿ-dè xii-yu:

—Vitna ní xini-í sá Yá Ndiòxí càháⁿ ndíhi-gá ñáyiú cuèi ndéda-ni càa ñuu, te ìⁿ-ni quide-gá ndíhi ncháa-yu. ³⁵Te nchaa ñáyiú nèhe sá yíñuhu núú Yá Ndiòxí, te xíquide váha-yu, te ncháa-yu cùu váha iní ñáhá-gá xii-yu. Te ñá túú quide cuendá-gá cuèi ná ñáyiú ñuu cùu-yu. ³⁶Te Yá Ndiòxí ní tendaha-gá Xítóhó Jesucristú ní sáháⁿ-gá ní xíndecu-gá nacióⁿ Isràél, te ní xáhaⁿ-gá xii-yu ìⁿ tnúhu váha nàcuáa

cuu váha iní-yu. Te diu-ni mee Jèsús cúnúu-gá núú ñáyiú ni càa xico ñuyíú. ³⁷ Te ñaha-ndo sá díhna-gá ndíi Juáá ní cáháⁿ ndíi tnúhu Yá Ndióxi núú ñáyiú, te ní dácúandute ñaha ndíi xií-yu. Te dātñuní ní ngúíta Jèsús ní cáháⁿ-gá tnúhu-gá distritú Galileá, te dātñuní ní sáháⁿ-gá nihíi nacióⁿ Isràél ní cáháⁿ-gá tnúhu-gá núú ñáyiú. ³⁸ Te sa ñaha-ndo sá Yá Ndióxi ní sáñaha-gã Espíritú-gá xii Jèsús tée ñuú Nazaréet ndécú ndíhi-dé chindée ñaha-xi xii-dé. Te ñaha-ndo sá ní xica cuu Jèsús ní quide tátna-gá nchaa ñáyiú yíhi ñaha espíritú cúnđíhi yucu ñávãha. Te ío vai-gá sá váha ní quide ñaha-gã xií-yu, te ducaⁿ ní quide-gá, chi Yá Ndióxi ní chindee ñaha-gá.

³⁹ Te mee-ndí ní xiní-ndí nacuáa ní quide Jèsús ñuú Jerusalén ndíhi nihíi nacióⁿ Isràél. Te ní sata caa ñaha-güedé xii-gá núú cùrúxí te yacáⁿ ní xihí-gá. ⁴⁰ Te núú ùní nduu ní dándótó ñaha Yá Ndióxi xii-gá. Te ní cuiní-gá sá cúnđecu Xítoho Jesucristú titní nduu sátá ní ndoto-gá cuendá cáháⁿ ndíhi ñaha-gã xii-ndí nchaa-ndí nacuáa ní xica cuu-ndí ndíhi-gá. ⁴¹ Te ñá ncháá ñáyiú ní xiní ñáhá xii-gá, chi mee-ni nchúhú cue tée ní cachí-gá sá cáháⁿ ndáá-ndí sá ní ndoto-gá, chi ní xindecu ndíhi-ndí-gá, te ní xihí ní xexi-ndí ndíhi-gá, núú cáháⁿ ndáá-ndí sá ní ndoto-gá. ⁴² Te ní cachí-gá sá nchúhú quíhíⁿ-ndí cúnãaha-ndí xii ñáyiú sá méé Yá Ndióxi ní táuchíúⁿ-gá sá Jèsús cada ndáá-gá cuéchi nchaa ñáyiú ndècu vívú ndíhi cuéchi nchaa ñáyiú ní xihí. Te ducaⁿ ní xáhaⁿ Yá Ndióxi xii Jèsús, te diu-ni ducaⁿ ní cachí Jèsús cáháⁿ-ndí. ⁴³ Te cue tée ní cáháⁿ tnúhu Yá Ndióxi ndéé sanaha ní cáháⁿ-güedé sá quíxí Jèsús, te ní cachí-güedé sá ncháá ñáyiú na quíndáá iní ñáhá xii Jesús, te cada cãhnu iní-gá nchaa cuéchi-yu —càchí té Pèlú xáhaⁿ-dè xií-yu.

Ní quexio Espíritú Yá Ndióxi ní ngúndecu ndíhi cue ñáyiú ñá túú cùu ñáyiú isràél

⁴⁴ Te mei òré cáháⁿ-dé ndèdóho-yu ní quexio Espíritú Yá Ndióxi ní ngúndecu ndíhi nchaa ñáyiú-áⁿ. ⁴⁵ Te cue tée isràél cuáháⁿ ndíhi té Pèlú, cue tée ní sándáá iní tnúhu Jèsús ní cuñúhu víhi-güedé sá ní quexio Espíritú Yá Ndióxi ní ngúndecu ndíhi-yu, chi cuendá sá ñà díú ñáyiú isràél

cúu-yu núú xíáⁿ ní cuñúhu-güedé. ⁴⁶ Te ní cutnùní sá ní quexio Espíritú Yá Ndióxi ní ngúndecu ndíhi-yu, chi ní ngúíta-yu cáháⁿ-yu tnúhu sá dácãhu iní ñáhá Espíritú-gá, tnúhu sá ñà túú xiní-yu cáháⁿ-yu. Te ní ndacáⁿ táhú-yu núú Yá Ndióxi cuendá nchaa sá ní quide-gá. ⁴⁷ Te dātñuní ní xáhaⁿ tē Pèlú:

—Vitna te cuandute ñáyiú ní natuha ichi Xítoho Jesucristú chi sa ndècu ndíhi-yu Espíritú Yá Ndióxi dātñá cuiní-ndó ndècu ndíhi nchoo, núú xíáⁿ vá cúú cãchí dava-gá ñáyiú sá vá cúú cuanduté-yu —cãchí-dé xáhaⁿ-dè xií-yu.

⁴⁸ Te dātñuní ní xáhaⁿ-dè xii ñáyiú:

—Vitna te cuandute-ndo, te òré-áⁿ te cacunehe-ndo Xítoho Jesucristú —cãchí-dé xáhaⁿ-dè xií-yu.

Te dātñuní ní cáháⁿ ndáhú-yu núú tē Pèlú cundecu ndíhi ñaha-dè xií-yu ñú ùú nduu.

11

Té Pèlú ní cani-dé cuendú núú ñáyiú sándáá iní tnúhu Jèsús ñuú Jerusalén

¹ Te cue tée ní táuchíúⁿ Jèsús dacuãha ñaha xii ñáyiú tnúhu-gá, ndíhi cue ñáyiú ní sándáá iní tnúhu-gá, ñáyiú ndècu distritú Júdeá ní nihí-yu tnúhu sá ñáyiú ñá túú cùu ñáyiú isràél ní sándáá iní-yu tnúhu Yá Ndióxi. ² Te òré ní ndexio té Pèlú ñuú Jerusalén, te ñáyiú isràél ñáyiú ní cachí sá cáda ncháa nacuáa ní cáháⁿ ndíi Moisés ní satnuhu ñáhá-yu xii-dé. ³ Te ní xáháⁿ-yu xii té Pèlú:

—¿Ná cuendá ní sáháⁿ-n ndéé ndíácãⁿ ní cáháⁿ ndíhi-n ñáyiú-ãⁿ, te ñá túú quidè-yu dātñá quidé nchòo-i? Te ní sáháⁿ-n yacáⁿ ní xexi-n ndíhi-yu —cãchí-yu xáháⁿ-yu xii-dé.

⁴ Te té Pèlú ní cani-dé cuendú nacuáa ní cuu núú ní sáháⁿ-dé, te xáhaⁿ-dè:

⁵ —Ní xindecu-í ñuú Jòpé. Te òré cáháⁿ ndíhi-í Yá Ndióxi, te ní dácótó ñaha-xi xii-í sá vèxi cuuⁿ ñú dóó cãhnú àndiu, te ndùtu ndi cumí xíquí-xi, te ní ngava-xi núú ndécù-í. ⁶ Te ní xíndéhé váha-í, te ní xiní-í nchaa quiti yòdo núú-xi. Te ñú xichi yòdo quiti cúmí sáhá-xi, te ñú xichi yòdo quiti dééⁿ, te ñú xichi yòdo cóo, te ñú xichi yòdo quiti ndava. ⁷ Te ní tecú dóho-í cáháⁿ ñú sá cáháⁿ, te cãchí-xi: “Pèlú, ndacuíní cahni-n ndéda-ni càa quiti-a caxi-n-dí”, cachí sá ní cáháⁿ-áⁿ. ⁸ Te ní xáháⁿ-í: “Vá

càhni-í-dí chi càchí tnúhu sá sánú ìchi ñaha xii nchúhú ñáyiú isràél sá vǎ cúú cǎxi-ndí nchaa quítí-a”, xǎhaⁿ-í. ⁹Te ní tecú dóho-í cǎháⁿ-ní tucu núú ñinu, te càchí sá cǎháⁿ-áⁿ: “Vǎ cúú càchí-n sǎ vǎ cúú cǎxi-n-dí, chi mee Yǎ Ndióxi ní cachí-gǎ sá díú nchǎa quítí-áⁿ cuu caxi-o”, càchí sá cǎháⁿ-áⁿ. ¹⁰Te ducaⁿ ní cǎháⁿ sá ní cǎháⁿ-áⁿ úní xito, te dàtnúni cuándaa dóó-áⁿ ndíhi nchaa quítí-áⁿ andíu. ¹¹Te òré-ní ní quexio úní cue téee vehe núú ndécù-í. Te cue téee-áⁿ ní tendaha ñaha ìⁿ tée ñuú Cèsareá nánducu ñaha-güedé xii-í. ¹²Te mee Espiritú Yǎ Ndióxi ní cachí-xi sá quíhíⁿ-í ndíhi-güedé, te ní cachí-xi sá ñá túú ná caní iní-í. Te tnàhá ìñú cue téee ndècu iha ní sǎháⁿ ndíhi ñaha-güedé xii-í, te nchaa-ndí ní sǎháⁿ-ndí vehe té Còrneliú ñuú Cèsareá. ¹³Te ní caní-dé cuèndú nàcuáa ní cuu ní sǎháⁿ ìⁿ espíritú xínú cuèchí núú Yǎ Ndióxi vehe-dé, te ní quíhu-xi ndéé xítí vehe-dé, te ní xǎháⁿ-xi xii-dé: “Tendaha-n cuè téee na quíhíⁿ-güedé ñuú Jòpé quingana-güedé ìⁿ tée nàni Xímú, àdi Pelú chí úú díu-dé. Te candeca ñaha-güedé quixi. ¹⁴Te téee-áⁿ cachí tnúhu-dé nása cada-n nánhí tǎhú-n ndíhi ñadíhí-n, ndíhi landú-n, ndíhi nchaa ñáyiú xinu cuèchí vehe-n”, duha ní xǎháⁿ espíritú-áⁿ xii té Còrneliú. ¹⁵Te òré ní ngúíta-í cǎháⁿ ndíhi-í-yu ní quexio Espíritú Yǎ Ndióxi ní ngúndecu ndíhi-yu dàtná ní quide-xi cútnàhá ní taxi Yǎ Ndióxi Espiritú-gǎ ndéé díhna ní ngúndecu ndíhi nchoo. ¹⁶Te ní ndacu iní-í nàcuáa ní cǎháⁿ Xítóhó Jesucristú, te duha ní cachí-gǎ: “Té Juáá ní xóo dacuàndute-dé ñáyiú, dico yúhú sǎñaha-í Espíritú Yǎ Ndióxi cundecu ndíhi-yu”, duha ní cachí-gǎ. ¹⁷Te Yǎ Ndióxi ní sǎñaha-gǎ Espiritú-gǎ cundecu ndíhi ñáyiú ñá túú cùu ñáyiú isràél dàtná ní quide-gǎ cútnàhá ní sándáá iní-ó tnúhu Jèsús, núú xǎháⁿ vǎ càchí-í sǎ vǎ cúú càda-í ìⁿ sǎ cuíni Yǎ Ndióxi cada-í —càchí té Pèlú xǎháⁿ-dè xii-yu.

¹⁸Te sǎtá dúcáⁿ ní xǎháⁿ tǎ Pèlú, te ñá túú-gǎ ná tnúhu ní cǎháⁿ-yu, te ío ní cudúú ìni-yu nchaa nàcuáa ní quide Yǎ Ndióxi, te ní xíttnàhá-yu:

—Tnàhá nchaa ñáyiú ñá túú cùu ñáyiú isràél nánhí tǎhú-yu núu na dàñá-yu nchaa sǎ cuèhé sǎ dúhá quidè-yu, chí ducaⁿ cuíni Yǎ Ndióxi cunduu —càchí-yu xíttnàhá-yu.

Ñáyiú sándáá iní tnúhu Jèsús ñuú Antiòquiá

¹⁹Te sǎtá ní sahní-güedé té Tèvá, te ní cuíni-güedé cada úhú-güedé nchaa ñáyiú ní sándáá iní-xi tnúhu Jèsús, te ní xíté nuú-yu ndí tnàhá ìⁿ ñuú. Te davá-yu cuáháⁿ-yu ndéé distrítú Fèniciá ndíhi distrítú Chìpré ndíhi ñuú Antiòquiá. Te ní cǎháⁿ-yu tnúhu Jèsús núu mee-ni ñáyiú isràél, te ñá ní xíttnúhu-yu dava-gǎ-yu. ²⁰Te dava-gǎ ñáyiú distrítú Chìpré ndíhi ñáyiú ñuú Cirené ní sǎháⁿ-yu ñuú Antiòquiá. Te ñá díú mèe-ni ñáyiú isràél ní cǎháⁿ ndíhi-yu, chí tnàhá ñáyiú ñá túú cùu ñáyiú isràél ní xǎháⁿ-yu tnúhu Jèsús. ²¹Te ní chindee ñaha-gǎ xii ñáyiú cǎháⁿ tnúhu-gǎ, te vǎi-gǎ-yu ní sándáá iní-yu-gǎ chí ní tuhá-yu ichi-gǎ.

²²Te ñáyiú ndècu núú Jerusalén ñáyiú ní sándáá iní tnúhu Jèsús ní níhí-yu tnúhu nàcuáa ní cuu, núu xǎháⁿ ní tendàhá-yu té Bèé cuáháⁿ-dè ñuú Antiòquiá. ²³Te òré ní quexio té Bèé, te ní xini-dé nàcuáa ní quide ñaha-gǎ xii-yu sǎ ní nánhí tǎhú-yu, núu xǎháⁿ ío ní cudúú ìni-dé. Te ní dácáhu ìni ñáhá-dè, te ní xǎháⁿ-dè:

—Ío nducu ndèe-ndo cada-ndo nchaa sǎ càchí Yǎ Ndióxi cada-ndo —càchí-dé xǎháⁿ-dè xii-yu.

²⁴Te té Bèé cúú-dè ìⁿ tée váha iní-xi, te ndècu ndíhi-dé Espiritú Yǎ Ndióxi, te ío sándáá iní-dé tnúhu Jèsús. Te vǎi víhi ñáyiú ní tuhá-yu ichi-gǎ.

²⁵Te dàtnúni cuáháⁿ té Bèé ñuú Tàrsú cuánúndúcú-dè té Sàulú. ²⁶Te òré ní nánhí ñáhá-dè, te ndéca ñaha-dé cuáháⁿ ñuú Antiòquiá, te yàcáⁿ ní xíndecu-güedé ìⁿ cuíá ndíhi ñáyiú ní sándáá iní tnúhu Jèsús, te vǎi-yu ní dácúáhá ñaha-güedé tnúhu-gǎ. Te díu-ni ñuú Antiòquiá ní dánáni ñáhá-yu Cristiànú xii nchaa ñáyiú sándáá iní tnúhu Jèsús.

²⁷Te ndéé davá-áⁿ ní quee ìⁿ úú cue téee cǎháⁿ tnúhu Yǎ Ndióxi ñuú Jerusalén cuáháⁿ-güedé ñuú Antiòquiá. ²⁸Te ìⁿ-dè nání-dè Ágabú, te ní chindee ñaha Espiritú Yǎ Ndióxi xii-dé, te ní sǎháⁿ-dè núú nchǎa ñáyiú sándáá iní tnúhu-gǎ, te ní xǎháⁿ-dè xii-yu sǎ quíxí ìⁿ tnamá níhí ñuyú. Te ducaⁿ ní cuu sǎtá ní ngúnútní té Claudiú téee yándaha cuèhé nàcióⁿ. ²⁹Núu xǎháⁿ nchaa ñáyiú sándáá iní tnúhu Jèsús ñuú Antiòquiá ní ndatnúhu-yu sǎ chíndèe-yu nchaa ñáyiú sándáá iní tnúhu-gǎ ndécú distrítú Júdeá

cuèndá vá ndóhó vihí-yu docó. Te nàcuáa ní níhí-yu, te ducaⁿ ní sacáⁿ tnáhã-yu. ³⁰Te ní tacá dîhúⁿ-ãⁿ, te ñehé té Bèè ndîhi té Sàulú cuáhãⁿ, cuáhã-güedé cue tée yîndaha ñáiyu sândáá iní tnúhu-gã.

12

Sátá nî xîhí té Jâcobó, te ní ngava té Pèlú vecaá

¹Te ndéé dàvá-ãⁿ nî ngúíta té Hèrodés tée yîndaha ñaha xii ñáiyu isrâél ní quide úhú-dé ñⁿ úú ñáiyu sândáá iní tnúhu Yá Ndiôxí. ²Te ní táuchíúⁿ-dè ní tñî-güedé té Jâcobó ñaní té Juáá, te ní sahni ñaha-güedè ndîhi machítí. ³Te ío ní cudíí iní dava ñáiyu isrâél cuèndá sá nî sahni ñaha-güedè xii té Jâcobó, múu xíãⁿ ní tendaha tùcu té Hèrodés sandádú-dé ní sáhãⁿ tñî tucu-güedé té Pèlú. Te ducaⁿ nî quide-dé cútñahá ní xóo vico ní xexí-yu paa sá ñà túú yîhi levadurá. ⁴Te ní naníhí-güedè té Pèlú, te ní tñî ñaha-güedè ndécá ñaha-güedé cuáhãⁿ vecaá. Te té Hèrodés ní táuchíúⁿ-dè cuáhãⁿ sáhúⁿ ñⁿ sandádú cundeé-güedé té Pèlú. Te ní xáhaⁿ-dè:

—Cundeé-ndó ndí cùmí ndí cùmí-ndó tée-ãⁿ —câchí-dé xáhaⁿ-dè xii-güedé.

Te té Hèrodés ní sani iní-dé queñuhu-dé té Pèlú vecaá òré ná yáha vico cuèndá cahni ñaha-güedè cáhãⁿ-dè ní cùu. ⁵Te ní xíhi-ni té Pèlú vecaá, te ní xindeé cuaa ñaha sândadú xii-dé. Te cue ñáiyu sândáá iní tnúhu Yá Ndiôxí ío ní xicáⁿ táhú-yu núu-gã cuèndá sá ñà túú nã cada ñaha-güedè xii-dé.

Yá Ndiôxí ní dácãcu-gã té Pèlú vecaá

⁶Ñⁿ niú-gã quihí té Pèlú vecaá ní cùu, te nduu tnéé tauchiúⁿ té Hèrodés quihíⁿ sandádú queñuhu ñaha-güedè xii-dé vecaá cuèndá quini nchaa ñáiyu nása cada ñaha-güedè ní cùu. Te té Pèlú cáá-dè xidí-dé xití vecaá, te ndi ndúú dúcúⁿ ndáhã-dè ndútú cadená, te xio xio dîñi-dé ndécú sandádú, te dava-gã sandádú xîndéé-güedé yêhe vecaá. ⁷Te ní quexio ñⁿ espíritú xínú cuèchi núú Yá Ndiôxí xití vecaá núú cáá té Pèlú xidí-dé, te uuⁿni ní dáyêhé-xi xití vecaá, te ní dangúihí ñaha-xi xii-dé, te xáhaⁿ-xi xii-dé:

—Yáchí, ndácóo —câchí-xi xáhaⁿ-xi xii-dé.

Te ní ndacóo-dé, te nchaa cadená ndútú dúcúⁿ ndáhã-dè ní nandáxí. ⁸Te ní xáhaⁿ tùcu espíritú-ãⁿ xii-dé:

—Yáchí, nucuñhu dóo-n, te ndíhu-n chàú-n —câchí-xi xáhaⁿ-xi xii-dé.

Te ní ndíhu nuu-dé dóo-dé, te ní xáhaⁿ tùcu espíritú-ãⁿ:

—Candixi dóo-n, te na quihíⁿ-ó —câchí-xi xáhaⁿ-xi xii-dé.

⁹Te té Pèlú ní chinchícúⁿ-dé espíritú-ãⁿ, te ñã ní cútñuní iní-dé núu ndáá ñⁿ espíritú xínú cuèchi núú Yá Ndiôxí ducaⁿ quide àdi ñáhã, te dàcoto ñaha-xi xii-dé ní sani iní-dé. ¹⁰Te ndèndaha-ni-dè espíritú-ãⁿ cuáhãⁿ ní yáha-dé nàcuáa xînutñî sandádú, te ta yáha-gã-dé núú ndécú dàva-gã-güedé. Te ní sáá-dé ndéé yuyêhe núú ndèdî caá nàcuáa ní yáha ichi sá cuáhãⁿ ndéé xití ñúú, te ní nacaáⁿ mée yêhe-ãⁿ, te ní quee-dé cuáhãⁿ-dé ndîhi espíritú-ãⁿ. Te ní tnáhã-dé ñⁿ tnuú, te yàcãⁿ ní dándóo ñaha espíritú-ãⁿ xii-dé. ¹¹Te dàtñuní ní nene váha saní núú-dé, te ní cutñuní iní-dé, te ní cachí-dé:

—Ndáá sá Yá Ndiôxí ní tendaha-gã espíritú-ãⁿ ní quixi-xi ní dácãcu ñaha-xi xii-í cuèndá sá vá cáhni ñaha tē Hèrodés. Te dava ñáiyu isrâél ío ní cudíí iní-yu cuèndá sá ní cuini té Hèrodés cahni ñaha-dè xii-í —duha ní cachí-dé sátá ní cutñuní iní-dé.

¹²Te sátá ní cutñuní iní-dé sá ní cácu-dé, te cuáhãⁿ-dé vehe ñⁿ ñaha ñani Mariá ñaná tē Juáá, àdi Mácú chi úú ñu-dé, te xíãⁿ ndécú vâi-yu cáhãⁿ ndihí-yu Yá Ndiôxí. ¹³Te té Pèlú ní quexio-dé ndéé yuyêhe ní dácásãⁿ-dè, te ní quixi ñⁿ xíchí nání Ròdé ní quixi ndehe-xi nã cùú ñáiyu dàcasaⁿ. ¹⁴Te ní nucuñhuⁿ ndudú-xi sá díú tē Pèlú, te ní cudíí víhí iní-xi, dico ñã ní nacaáⁿ-xi yuyêhe. Te ní quene cunu-xi cuáhãⁿ ngúñaha-xi xii-yu sá nútñî tē Pèlú yuyêhe ndaa quehé. ¹⁵Te ñã ní sândáá iní-yu tnúhu ní cáhãⁿ-xi, te xáhãⁿ-yu xii-xi:

—¡Ná tnúhu vihí cáhãⁿ-ðⁿ xíchí lúcú! —câchí-yu xáhãⁿ-yu.

Te xáhaⁿ-xi sã ndáá nútñî-dé, te xáhãⁿ-yu:

—Ná díú tē Pèlú chi espíritú sá xitó ñaha xii-dé cùú sã cáhãⁿ —câchí-yu xáhãⁿ-yu xii-xi.

¹⁶Te òré ducaⁿ xîtnáhã-yu, te té Pèlú ní dácásãⁿ tùcu-dé yuyêhe. Te ní sáhãⁿ-yu ní nacaáⁿ-yu yuyêhe, te ní xini-yu sá díú tē

Pèlú, te ní cuñúhu vihi-yu. ¹⁷Te ní quide-dé ndaha-dé núu-yu cuèndá cadí-yu yuhú-yu. Te ní ngúíta-dé ní cani-dé cuèndú nàcuáa ní quide ñaha Yá Ndiòxí xii-dé sá ní dácácu ñaha ñiⁿ espíritú xínú cuèchi núu-gã xii-dé veacaá, te ní xáhaⁿ-dè xii-yu:

—Cúu-ndo tẽ Jàcobó ndihi dava-gá ñáiyu sàndáá iní tnúhu Jèsús nàcuáa ní quide ñaha Yá Ndiòxí xii-í —càchí-dé xáhaⁿ-dè xii-yu.

Te sáta dúcáⁿ ní xáhaⁿ-dè, te ní quee-dé cuáháⁿ-dè ingá xichi.

¹⁸Te sáta ní túndaá, te ní ngúíta nchaa sandádú càháⁿ ñiⁿ càháⁿ ñiⁿ-güedé, te xit-nàha-güedé:

—Ná túu-gã té Pèlú yíhí vècaá, ¿te nása cada-o-í? —càchí-güedé xitnàha-güedé.

¹⁹Te té Hèrodés ní tendaha-dè titní sandádú cuáháⁿ-güedé cuánúndúcú ñaha-güedé, te ñá ní naníhí ñáhá-güedé xii-dé. Te dätñuní ní cana-dé sandádú cue té ní xindeé ñáhá xii té Pèlú, te ní tenáá ñáhá-dè xii-güedé, te ní xáhaⁿ-dè xii dava-gá cue sandádú-dé:

—Cahni-ndo cue téé-ãⁿ —càchí té Hèrodés xáhaⁿ-dè.

Te dätñuní ní quee té Hèrodés distritú Júdeá cuáháⁿ-dè ñuú Cèsareá, yacáⁿ ní ngúndecu-dé.

Ní xihí té Hèrodés

²⁰Té Hèrodés ní cudéaⁿ-dè núu ñáiyu ñuú Tírú ndihi núu ñáiyu ñuú Sidón. Te xíãⁿ ní ndatnúhu-yu ní cuu ñiⁿnuu tnúhu-yu, te ní xicá-yu cuáháⁿ-yu cuáháⁿ ndatnúhu ndihi ñáhá-yu xii-dé, te ní ndatnúhu ndihi-yu té Blástú. Te téé-áⁿ cúu-dè chiúⁿ quide-dé núu tẽ Hèrodés, te ní chindee tnúhu ñaha-dè xii-yu, chi ní cáháⁿ ndáhú-yu núu té Hèrodés sá vã cadá úhú ñáhá-dè xii-yu. Te ducaⁿ ní quide-yu cuèndá ñuú té Hèrodés-áⁿ queé sã xéxí-yu. ²¹Te ní xáhaⁿ tẽ Hèrodés ná nduu quiñiⁿ-yu ndatnúhu ndihi ñaha-dè xii-yu, te nduu-ãⁿ ní quiñuⁿ-dè ñiⁿ dóó vãha, ñiⁿ sá sácuiñu téé taxi tnuní. Te ní ngóo-dé núu xilé vãha, xilé sá sácóo nchihí téé taxi tnuní, te ní ngúíta-dé ní cáháⁿ sáhú-dé dóho-yu. ²²Te uuⁿni ní cuáá-yu te càchí-yu:

—¡Téé-a càháⁿ-dè dico ñá díú tẽe ñuyú-a cúu-dé chi ndiòxí cúu-dè! —càchí-yu xit-nàhá-yu.

²³Te diu-ni òrè-áⁿ ní yáha ñiⁿ espíritú xínú cuèchi núu Yá Ndiòxí, te ní sáñaha-xi cuèhé xii té Hèrodés. Te ducaⁿ ní tnahá-dé chi mee-dè ñá ní xáhaⁿ-dè sá ñáiyu cúu-dé, te ní cáháⁿ-yu sá ndiòxí cúu-dè. Te nchìto-gá-dé ní sanú ñáhá tìndácú xii-dé, te dätñuní ní xihí-dé.

²⁴Te ío titní xichi ní sáháⁿ ñáiyu sàndáá iní tnúhu Yá Ndiòxí ní cáháⁿ-yu tnúhu-gá, te ío chitú-yu ní sàndáá iní-yu tnúhu-gá.

²⁵Te té Bèé ndihi té Sàulú ní ndihi chiúⁿ-güedé, te ní ndee-güedé ñuú Jerusalén cuáháⁿ-güedé ndihi té Juáá, àdi Macú chi úú diu-dé.

13

Té Bèé ndihi té Sàulú cuáháⁿ-güedé dácuaaha-güedé ñáiyu tnúhu Yá Ndiòxí nchaa ñuú xicá

¹Te ñuú Antiòquia ndécú ñiⁿ úú cue téé càháⁿ tnúhu Yá Ndiòxí núu ncháa ñáiyu ní sàndáá iní-xi tnúhu-gá. Te ndècu tucu ñiⁿ úú cue téé cùu mestrú dácuaaha ñaha-güedé xii-yu tnúhu-gá. ñiⁿ-dè nání-dè Bèé, te ñiⁿ-dè nání-dè Xímú, te té Xímú-áⁿ xáhaⁿ-güedé Nègrú chi tnúu-dè. Te ingá-dé nání-dè Lùciú, te téé-áⁿ cúu-dè téé ñuú Cirené. Te ingá-dé nání-dè Sàulú, te ingá tucu-dé nání-dè Manàén. Te té Manàén-áⁿ ndihi té Hèrodés téé cùu gobiernú Galileá ío vãha ní xóo cáháⁿ ndihi tñaha-güedé cútñahá ní cuu líhli-güedé. ²Te ñiⁿ nduu ñá túu ná ní xèxi ñáiyu ní sàndáá iní tnúhu Yá Ndiòxí cuèndá mee-ni-gã ní cáháⁿ ndihí-yu, te ní xáhaⁿ Espíritú Yá Ndiòxí xii-yu:

—Tendaha-ndo tẽ Bèé ndihi té Sàulú quiñiⁿ-güedé dava-gá ñuú cada-güedé chiúⁿ tahu-í, chi ducaⁿ cuiñí-í cunduu —càchí Espíritú-gá xáhaⁿ-xi xii-yu.

³Te ní cáháⁿ ndihi tucú-yu Yá Ndiòxí, te ñá túu tñahí ná ní xèxi tucú-yu, te ní sacáⁿ ndodo-güedé ndaha-güedé díquí tẽ Bèé ndihi té Sàulú. Te sáta dúcáⁿ ní quide-güedé, te ní quide ndee iní ñáhá-yu xii-güedé.

Té Bèé ndihi té Sàulú cuáháⁿ-güedé distritú Chìpré cáháⁿ-güedé tnúhu Yá Ndiòxí

⁴Te té Bèé ndihi té Sàulú ní quee-güedé cuáháⁿ-güedé cuèndá ducaⁿ cuiñí Espíritú Yá Ndiòxí cunduu sá cacá cùu-güedé dava-gá ñuú, te ní quexìo-güedé ñuú Selèuciá, te yacáⁿ ní quee-güedé bàrcú

cuáháⁿ-güedé distritú Chìpré. Te ñuú-áⁿ cáá xítí lámár chi ndècu ñuhu yichí xítí ndute. ⁵ Te ní quexio-güedé mei ñuú Saláminá, te ní quene-güedé bàrcú, te ní xica-güedé cuáháⁿ-güedé nchaa veñúhu ñáyiú isráél càháⁿ-güedé tñúhu Yá Ndiöxí. Te cuáháⁿ ndihí-güedé té Juàá cuèndá chindee ñaha-dé xii-güedé. ⁶ Te ní tñii-güedé ichi cuáháⁿ-güedé ñuú Páfós cáá ndaa ingá xio Chìpré, te yacáⁿ ní nanlí tñahá-güedé ndihí iiⁿ téé isráél nání-dé Barjésús, te téé-áⁿ xiní-dé cada nduu-dé, te cächí-dé sá càháⁿ-dé tñúhu Yá Ndiöxí dico ñá ndaa. ⁷ Te téé-áⁿ quidé chiúⁿ-dé ndihí té Sèrgiú, àdi Páblú chi úú diú-dé, te cùu-dé gobièrnú Chìpré, te ío túha-dé. Te ní cana-dé té Bèè ndihí té Sàulú, chi cuiní-dé cundedóho-dé tñúhu Yá Ndiöxí. ⁸ Te téé quide nduu-áⁿ ñá ní dàña-dé càháⁿ-güedé tñúhu-gá, chi ñá ní cuiní-dé sá tée cùu gobièrnú-áⁿ tuha-dé ichi Yá Ndiöxí. Te ducaⁿ ní quide té Barjésús, téé xáhaⁿ-güedé Èlimás. ⁹ Te tñahá tucu té Sàulú ndécú úú diu-dé chi xáhaⁿ tñucu-güedé Páblú, te ndècu ndihí-dé Espíritú Yá Ndiöxí. Te ní xíndéhé ñí ñahá-dé xii téé quide nduu-áⁿ. ¹⁰ Te ní xáhaⁿ-dè:

—Yòhó, chi dàtná quidé yucu ñávaha quide-n chi mee-ni dándahú-n ñáyiú. Yòhó cúu-n dèhe sácúihná, chi nchaa tñúhu váha cuiní Yá Ndiöxí càháⁿ-yu, te yòhó ñá dáñá-n. ¹¹ Te vitna quiní-n nacuáa cunduu, chi taxi Yá Ndiöxí iiⁿ castiú xii-n chi vá cùtñuní-gá núu-n càca cuu-n iiⁿ úú nduu — cächí-dé xáhaⁿ-dè xii téé quide nduu-áⁿ.

Te òré ducaⁿ ní xáhaⁿ tē Páblú xii-dé, te òré-ni ní cuaa-dé, te ñá túú ní cùtñuní tñahí-gá núu-dé, te ní xóo nducu-ñá-dé ñáyiú ní xóo cuita nehe ñaha xii-dé. ¹² Te téé cùu gobièrnú ní xiní-dé nacuáa ní quide té Páblú, te ío ní cuñúhu-dé. Te ní tñahá iní-dé tñúhu Jèsús, núu xíáⁿ ní sándáa iní-dé.

Té Páblú ndihí té Bèè ndécú-güedé ñuú Antiòquia Pìsidiá

¹³ Te té Páblú ndihí dava-gá cue téé xica cuu ndihí-dé ní quée-güedé bàrcú, te ní quée-güedé ñuú Páfós cuáháⁿ-güedé ñuú Pèrgé, te ñuú-áⁿ yíndèhu-xi distritú Pánfilia. Te té Juàá ní nacuíco-dé ní dándóo ñaha-dé xii-güedé cuánuhú-dé ñuú Jerusálén. ¹⁴ Te dava-gá-güedé ní

quee-güedé ñuú Pèrgé cuáháⁿ-güedé ñuú Antiòquia, te Pìsidiá yíndaha-xi ñuú-áⁿ. Te nduu xíndetatú-yu, te ní sáháⁿ-güedé veñúhu ñáyiú isráél, te ní ngóo-güedé xítí veñúhu. ¹⁵ Te cue téé ndècu veñúhu ní queheⁿ-güedé tutú yódó tñuní nchaa tñúhu sá ní chídó tñuní ndii Moisés ndihí tutú yódó tñuní nchaa tñúhu sá ní chídó tñuní dava-gá cue téé ní xóo càháⁿ tñúhu Yá Ndiöxí ndéé sanaha, te ní dácuaáhá-güedé ní xíndedóho cue ñáyiú, te dàtnuní cue téé yíndaha veñúhu-áⁿ ní xáhaⁿ-güedé xii té Páblú ndihí dava-gá-güedé:

—Nchòhó cue téé cùu ñaní tñahá-ndé, te núu cuiní-ndó càháⁿ-ndó tñúhu Yá Ndiöxí, te cuu càháⁿ-ndó tñaví cuèndá cutúha-yu — cächí-güedé xáhaⁿ-güedé.

¹⁶ Te té Páblú ní ndacuñíⁿ-dé, te ní ndacani-dé ndaha-dé cuèndá cadí-yu yuhú-yu te cundedóho-yu tñúhu càháⁿ-dé, te ní xáhaⁿ-dè:

—Te nchòhó ñáyiú quide nchaa nacuaa càháⁿ Yá Ndiöxí ndihí nchaa nchòhó ñáyiú isráél, cundedóho-ndo nchaa-ndo iiⁿ tñúhu na càháⁿ-í-a. ¹⁷ Te cuéi ndéé sanduu te cuéi vitna chindee ñaha-ni Yá Ndiöxí xii nchaa ñáyiú isráél, te ní nacáxi ñaha-gá xii-yu te ní chindee ñaha-gá cuèndá cáyá-yu, chi cuiní-gá sá cúu vai-yu, te ducaⁿ ní quide-gá cùtñahá ní xíndecú-yu nacióⁿ Ègíptú. Te dàtnuní ní dácácu ñaha-gá xii-yu ñuú-áⁿ, chi mee-gá nchaa ndacu-gá quidé-gá. ¹⁸ Te ní xíndecú-yu iiⁿ xichi núu ñá túú tñahí sácúndecu ñáyiú údico cuía, te xítí údico cuía-áⁿ ní cundee ñí-gá nchaa sá ní quidé-yu. ¹⁹ Te Yá Ndiöxí ní chindee ñaha-gá xii ñáyiú isráél, te ní dánáa-yu úsá nacióⁿ, chi cuèndá ní cuiní-gá cuu cuèndá-yu ñuhú-áⁿ. ²⁰ Te dàtnuní ní cachí Yá Ndiöxí sá díú-ní cué téé cùchiuⁿ taxi tñuní-güedé nchaa ñáyiú, te ducaⁿ ní quide-güedé dàtná cúmí cièndú dava cuía. Te sátá xíáⁿ, te ní xíndecu té Sàmuel téé ní càháⁿ tñúhu Yá Ndiöxí. ²¹ Te dàvá-áⁿ ní cuiní ñáyiú isráél sá cùndècu iiⁿ téé quíndaha ñaha-dé xii-yu, te Yá Ndiöxí ní cachí-gá sá té Sàul quíndaha-dé-yu, te téé-áⁿ ní cuu-dé dèhe té Cís, te té Benjamín téé ní xíndecu ndéé sanaha-gá ní cuu ñaní tñahá-dé. Te té Sàul ní xíndaha-dé ñáyiú údico cuía. ²² Te Yá Ndiöxí ñá ní cuiní-gá cundecu-ni-dé quíndaha-dé ñáyiú,

chi ní cuini-gá sá tē Dàvíí ndíhu ndaha-dě cue ñáyiú isràél, te ní cachí-gá: “Ío váha ní tnahá iní-í ñacuáa quide té Dàvíí déhe tée Isàí, te cada-dé nchaa ñacuáa cùñaha-í xii-dé”, duha ní cachí Yá Ndiòxí —cachí té Páblú xáhaⁿ-dě xii-yu.

²³ Te ní xáhaⁿ tucu té Páblú:

—Diu-ni ñani tnahá tē Dàvíí cúú Jèsús. Te Yá Ndiòxí ní tendaha-gá Jèsús ní quixi-gá ñuyíú-a cuendá nchaa ñáyiú isràél ná quindáá iní ñáhá xii Jèsús naníhí tãhú-yu, chi ducaⁿ ní cachí Yá Ndiòxí cunduu. ²⁴ Te cùnàhá vátá ngüita-gá Jèsús cáháⁿ-gá tñúhu Yá Ndiòxí, te ní cáháⁿ té Juáá núú ñáyiú isràél sá xíní ñuhu-xi dañá-yu nchaa sá cuèhé sá dúhá, te cuanduté-yu. ²⁵ Te sa ta cùyatni-ni-gá cuú-dé, te ní xáhaⁿ-dě xii-yu: “Nchòhó cachí-ndó sá yùhú cùú-í Cristú Yaá ndétú-ndó dico ñáhá, chi ñá díú yùhú cùú-í Cristú, chi davitna quixi Cristú Yaá tendaha Yá Ndiòxí quixi ñuyíú-a. Te yùhú cùú-í ñⁿ tée duuⁿ duuⁿ ñá túú tàú nandaxi cuèdicó chàú-gá dico quide-í chiuⁿ-gá”, duha ní cáháⁿ te Juáá —cachí té Páblú xáhaⁿ-dě xii-yu.

²⁶ Te ní xáhaⁿ tucu té Páblú:

—Cundedóho tucu-ndo ñngá tñúhu na cáháⁿ-í. Nchòhó tñàhá-ndó cùu-ndo ñani tnahá ndí Ìbrahám, te xini-ndó sá Yá Ndiòxí cùnù-gá. Te diu-ni-gá cuini-gá sá ncháá-ndó cundedóho-ndo tñúhu-gá, chi cùu-xi tñúhu sá cáháⁿ ñacuáa naníhí tãhú-ndó. ²⁷ Te nchaa ñáyiú ndècu ñúú Jerusalén ndihi nchaa cue tée cùnùu ñá ní cùtnuní iní-yu ndihí-güedé sá Yá Ndiòxí ní tendaha-gá Jèsús ní quixi-gá ñuyíú-a. Te ñá ní sáha-yu cuendá sá díú Jèsús ní cacunehe cue tée ní cáháⁿ tñúhu Yá Ndiòxí ndéé sanaha cuèí ní dácúáhá-yu tñúhu-gá veñúhu-yu ndi tnahá úná nduu, nduu ndè-tatú-yu. Te ní cachí-yu sá ndècuéchi Jèsús, te ní xáháⁿ-yu sá cáhí ñaha-güedé xii-gá. Te xiáⁿ sa ñaha cue tée ní xóo cáháⁿ tñúhu-gá ndéé sanaha sá dúcáⁿ cáháⁿ-yu. ²⁸ Te cuèí ñá túú ná ní quide-gá te ní xáháⁿ-yu xii té Pilatú tée cùu gobiernú sá táuchiuⁿ-dè cahni ñaha-güedé xii-gá. ²⁹ Te xiáⁿ núú ní sata caa ñaha-güedé xii-gá núú cùrúxí. Te ní quide-güedé nchaa ñacuáa ní chídó tñuní cue tée ní cáháⁿ tñúhu Yá Ndiòxí ndéé sanaha. Te sátá nì xíhí-gá, te ní nunehe ñaha-güedé xii-gá núú cùrúxí, te ní chihó ñaha-güedé cuáháⁿ, te ní chihí

ñaha-güedé ñⁿ xití yaú. ³⁰ Te Yá Ndiòxí ní dándótó-gá Jèsús. ³¹ Te titní xito ní sáháⁿ Jèsús núú ndécú ñáyiú ní xica cuu ndihí-gá, ñáyiú ní quee distrítú Galiléa ní sáháⁿ-yu ndihí-gá ñúú Jerusalén. Te vitna nchaa ñáyiú-áⁿ xáháⁿ-yu xii dava-gá ñáyiú isràél ñacuáa ní cuu ní ndoto-gá.

³² Te nchúhú cáháⁿ-ndí ñacuáa cada-ndo naníhí tãhú-ndó, chi Yá Ndiòxí ní xáhaⁿ-gá xii cue ñani tñàhá-ó ñí xíndecu ndéé sanaha sá tэндàha-gá Déhe-gá Jèsús quixi-gá ñuyíú-a. ³³ Te ní quixi-gá ní xíhí-gá, te ní dándótó ñaha Yá Ndiòxí xii-gá, te múu xiáⁿ naníhí tãhú-ó núu na quindáá iní-ó-gá. Te ñⁿ tée ní cáháⁿ tñúhu Yá Ndiòxí ndéé sanaha ní chídó tñuní-dé núú sàlmú cúú úú ñacuáa ní cáháⁿ Yá Ndiòxí ní xáhaⁿ-gá xii Déhe-gá, te duha ní xáhaⁿ-gá: “Yòhò cúú-n Déhe-í, te vitna cutnùní iní ñáyiú sá yùhú cùú-í Tãtá-n”, duha ní xáhaⁿ-gá xii Jèsús. Te diu-ni ducaⁿ ní chídó tñuní tée ní cáháⁿ tñúhu-gá ndéé sanaha. ³⁴ Te ñngá xichi tucu núú tütú-gá ní chídó tñuní ñⁿ tée ní xíndecu ndéé sanaha ñacuáa ní xáhaⁿ-gá xii Déhe-gá, te duha ní xáhaⁿ-gá: “Mee-ni sá váha cada ñaha-í dátñá ní xii-í té Dàvíí”, duha ní xáhaⁿ-gá. Te ducaⁿ ní chídó tñuní tée ní xíndecu ndéé sanaha ñacuáa ní cáháⁿ Yá Ndiòxí, chi òré ní xíhí Jèsús te ní dándótó ñaha-gá cuendá sá vã tíú yìqui cuñú-gá. ³⁵ Te núu xiáⁿ duha ní chídó tñuní ñⁿ tée ní xíndecu ndéé sanaha núú lìbrú Sàlmú ñacuáa ní xáhaⁿ-dě xii-gá: “Vá dñá-n sá tíú yìqui cuñú Déhe-n chi ío váha quide-gá”, duha ní chídó tñuní tée ní xíndecu ndéé sanaha —cachí té Páblú xáhaⁿ-dě xii-yu.

³⁶ Te xáhaⁿ tucu-dé:

—Te té Dàvíí ní quide-dé nchaa chiuⁿ ní tãhú Yá Ndiòxí cada-dé, te dátñuní ní xíhí-dé. Te ní chindúxi ñaha-güedé xii-dé yatni ñacuáa yíndúxi cue ñani tñàhá-dě ndéé sanaha-gá, te xiáⁿ ní téhyú yìqui cùñú-dé. ³⁷ Te Jèsús chi ñá ní téhyú yìqui cùñú-gá, chi ní dándótó ñaha Yá Ndiòxí xii-gá. ³⁸ Te cuini-í cachí tñúhu-í xii-ndo cuendá cutnùní iní-ndó ncháa-ndo sá cáda cáhnu iní Yá Ndiòxí nchaa cuéchi-o, chí ní xíhí Jèsús cuendá naníhí tãhú-ó. ³⁹ Te nchaa ñáyiú na quindáá iní ñáhá xii Jèsús te cada cáhnu iní-gá nchaa sá ñá túú váha ní quide-yu, chi múu mee-ni tñúhu ní chídó

tnùní ndíi Moisés ná quíndáá iní-yu te vá nánihí tǎhú-yu. ⁴⁰⁻⁴¹Te ío coto-ndo mée-ndo cuendá sá vǎ yǎha-ndo dàtná ní cachí Yǎ Ndiǒxí yǎha cue ñáiyu ñá túú ní quide váha ní xíndecu ndéé sanaha. Te nàcuáa ní cáháⁿ-gá ní chídó tnùní ñⁿ téé ní cáháⁿ tnúhu-gá ndéé sanaha, te duha ní xáhaⁿ-gǎ xií-yu dǎvá-áⁿ:

Cundedóho nchaa nchòhó ñáiyu cuèhé yuhu-xi na càháⁿ-í ñⁿ tnúhu te quini-ndó nǎ cuñúhu-ndo, yúhú quídè-í vai núú sǎ ìo váha vitna ndècu-ndo ñuyú-a,

te cuèi na còo ñáiyu cachí tnúhu xii-ndo nàcuáa ndùu nchaa sá váha-áⁿ, dico nchòhó vá quíndáá iní-ndó,

te sá dúcáⁿ càda-ndo vá quíndáá iní-ndó, te dàcuíta nihnu-ndo mée-ndo.

Duha ní xáhaⁿ-gǎ xií-yu te ducaⁿ ní chídó tnùní téé ní cáháⁿ tnúhu-gá ndéé sanaha — cachí té Pǎblú xáhaⁿ-dè xií-yu.

⁴²Te òré ní ndee té Pǎblú veñúhu ñáiyu isràél ndihi cue téé xica cuu ndihi-dé, te ní cáháⁿ ndáhú ñáiyu yìhi veñúhu núú-dè sá quíhíⁿ-dé núú ùná nduu, te ñi-ni tnúhu ní cáháⁿ-dè cáháⁿ tuca-dé òré quexìo-dé. ⁴³Te sátá ní túhú veñúhu-yu, te vai ñáiyu isràél ndihi ñáiyu ní chitnahá ñáhá xií-yu nchìcúⁿ nihnu quide nacuáa quidè-yu càháⁿ ndihíⁿ-yu Yá Ndiǒxí cuáháⁿ ndihíⁿ-yu té Pǎblú ndihi té Bèé. Te ní xáhaⁿ-güedè xií-yu sá vǎ dǎná ndèè-yu canchicúⁿ nihnú-yu tnúhu sá càháⁿ nàcuáa quide Yá Ndiǒxí sá cúú-xí-yu.

⁴⁴Te núú ùná nduu, nduu ndètatú-yu ní quexio vai vihi ñáiyu, chí nihíi ñuu ní quexio ndedóho-yu tnúhu Yá Ndiǒxí. ⁴⁵Te cuendá sá ìo vai ñáiyu ní quexio, núu xíǎⁿ ní cuu cuédú iní ñáhá ñáiyu isràél xii té Pǎblú, te ní xícuehé ñáhá-yu xii-dé. Te ní xáhǎⁿ-yu xii-dé sá dándáhú ñáhá-dè xií-yu ndihi tnúhu càháⁿ-dé. ⁴⁶Te té Pǎblú ndihi té Bèé ñá túú ní yúhú ñáhá-güedè xií-yu. Te ní xáhaⁿ-güedè:

—Xini ñuhu-xi díhna-gá nchòhó ñáiyu isràél cáháⁿ ndihi-ndí tnúhu Yá Ndiǒxí, te mee-ndo ñǎ cuini-ndó cundedóho-ndo. Te sá dúcáⁿ quide-ndo, te vá nánihí tǎhú-ndó, te ní vǎ càháⁿ-gá-ndí tnúhu Yá Ndiǒxí núú-ndó, dico cáháⁿ-ndí núú dǎva-gá ñáiyu cuèi ñá díú ñáiyu isràél cúú-yu, ⁴⁷chi ducaⁿ

ní táuchíúⁿ Yǎ Ndiǒxí cada-ndí. Te ní cachí-gá:

Cuini-í cundecu-ndo dàtná ñⁿ téé yòtnuú ñuhu cundecu-ndo

cáháⁿ-ndó tnúhu-í núu nchaa ñáiyu ñá túú cundihí-ndo ñáiyu ndècu nihíi ñuyú, te naníhí tǎhú-yu,

duha ní cáháⁿ-gá —cachí té Pǎblú ndihi té Bèé xáhaⁿ-güedè xií-yu.

⁴⁸Te ñáiyu ñá túú cùu ñáiyu isràél ío ní cudíí iní-yu sá dúcáⁿ ní cáháⁿ-güedè, te ní xítnahá-yu sá ìo váha cuáháⁿ tnúhu Yá Ndiǒxí. Te mee Yǎ Ndiǒxí sa nàha-gá nándi cùu ñáiyu naníhí tǎhú, te ñi-ni ñáiyu-áⁿ ní sándáá iní-yu. ⁴⁹Te nchaa xichí xíáⁿ ní sáháⁿ-yu ní cáháⁿ-yu tnúhu-gá. ⁵⁰Te cue téé isràél ní ndatnúhu-güedè ndihi cue téé cùnau, ndihi cue ñáiyu ñíhí cúnau, te ñáiyu ñíhí-áⁿ ñá túú tnàhí cùmání-yu veñúhu. Te ní xáhaⁿ-güedè sá cáda ùhú-yu té Pǎblú ndihi té Bèé, te dàtnúni cuícúⁿ ñáhá-yu xii-güedè, te ducaⁿ ní quide-yu. ⁵¹Te ní casaⁿ ñuhu té Pǎblú ndihi té Bèé sáhá-güedè ní naquidi-güedè tícá chúhmá ní tñíi sáhá-güedè. Te ducaⁿ ní quide-güedè cuendá cutnúni iní-yu sá ñá túú ní quide váha-yu. Te dàtnúni ní quee-güedè cuáháⁿ-güedè ñuu Ìconiú. ⁵²Te ñáiyu ní sándáá iní-xi tnúhu Jèsús ío váha ní cuu iní-yu cuendá sá ní naníhí tǎhú-yu, te nchaa-yu sa ndècu ndihí-yu Espíritú Yá Ndiǒxí.

14

Té Pǎblú ndihi té Bèé ndécú-güedè ñuu Ìconiú

¹Te ní quexio té Pǎblú ndihi té Bèé ñuu Ìconiú. Te ní sáháⁿ-güedè veñúhu ñáiyu isràél, te ío váha ní cáháⁿ-güedè tnúhu Yá Ndiǒxí, te vai ñáiyu isràél ndihi ñáiyu ñá túú cùu ñáiyu isràél ní sándáá iní-yu tnúhu-gá. ²Te dava ñáiyu isràél ñá ní sándáá iní-yu, te ní cáháⁿ cuèhé-yu cuendá té Pǎblú ndihi té Bèé cuendá sá vǎ quíndáá iní ñáiyu ñá túú cùu ñáiyu isràél. ³Te ní xíndecu-güedè titní nduu, te ñá túú tnàhí ní yúhú-güedè ní dácuahá-güedè ñáiyu tnúhu Yá Ndiǒxí. Te mee-gá ní chindee ñàha-gá ní quide-güedè titní núú sǎ vǎ yòo tnàhí ndàcu cada, te ío ní cuñúhu-yu. Te ducaⁿ ní quide-gá cuendá cutnúni iní-yu

sá ndáá càháⁿ-güedé sá mée-gã ío cùu iní ñáhá-gã xíⁿ-yu, te naníhí tãhúⁿ-yu núu na quíndáá iníⁿ-yu tnúhu-gá. ⁴ Te ní quee dava ñáyíu ñúu Ìconiú, daváⁿ-yu cùndihíⁿ-yu ñáyíu isrâél ñáyíu ñá túú sàndáá iní tnúhu Jèsús. Te daváⁿ-yu cùndihíⁿ-yu cue tée ní táuchíúⁿ Jèsús càháⁿ tnúhu-gá. ⁵ Te ñáyíu isrâél ndihí dava-gã ñáyíu ñá túú sàndáá iní-xi ní cuu ìⁿñúuⁿ-yu ndihí cue tée cùnúu sá cãmⁿ-yu-güedé, te cuáha yúú ñáhãⁿ-yu xii-güedé. ⁶ Te té Pãblú ndihí té Bèé ní ñíhí-güedé tnúhu sá cuíníⁿ-yu caniháⁿ-yu, núu xíãⁿ dayuhu ní quee-güedé cuáhãⁿ-güedé ñúu Lìstrá ndihí ñúu Dèrbé. Te ndí ndúú ñúú-áⁿ yíndèhu-xi Licaoniá. Te ní sáhãⁿ-güedé dava-gã ñúú líhli càa yatni xíãⁿ. ⁷ Te nchaa ñúú-áⁿ ní càháⁿ-güedé tnúhu Jèsús.

Ñúu Lìstrá ní sáha yúú ñáhãⁿ-yu xii té Pãblú

⁸ Te ñúu Lìstrá ndécú ìⁿ tée yacua, mee-ni núcòo-dé chi ducaⁿ tnàhí càa-dé ní cacu-dé. ⁹ Te ndèdòho-dé tnúhu càháⁿ té Pãblú, te ní cutnùní iní té Pãblú sá ío sàndáá iní tée yacua-ãⁿ sá Yã Ndiòxí cada tátna ñaha-gã xii-dé, núu xíãⁿ ní xíndéhé ñaha váha té Pãblú xii-dé. ¹⁰ Te té Pãblú ní càháⁿ ñíhí-dé, te ní xáhaⁿ-dè:

—Ndacuíñí cunutnìí váha-n —càchí-dé xáhaⁿ-dè.

Te ní ndacuíñí cunu-dé te ní xica-ni-dé. ¹¹ Te òré ní xíníⁿ-yu sá tã Pãblú ní quide tátna-dé tée yacua-ãⁿ, te nchaaⁿ-yu ní càháⁿ-yu tnúhu méeⁿ-yu tnúhu Licàoniá. Te ní càháⁿ ñíhíⁿ-yu, te xitnãháⁿ-yu:

—Cue tée-ãⁿ sànuu sá ñáyíu cùu-güedé dico ñáhã, chi ndiòxí cúú-güedé te ní quexio-güedé ñuyíú-a —càchíⁿ-yu xitnãháⁿ-yu.

¹² Te ní cachíⁿ-yu sá tã Bèé cúú-dè ndiòxí dánàníⁿ-yu Jüpitér, te té Pãblú cúú-dè ndiòxí dánàníⁿ-yu Mèrcuriú, chi cuendá tée-ãⁿ cúú-dè tée càháⁿ. ¹³ Te càa ìⁿ veñúhu yuhu ñúú-áⁿ núu quídé càhnúⁿ-yu ndiòxí sá dánàníⁿ-yu Jüpitér. Te dútú yíndàha veñúhu-áⁿ ndécá-dè ìⁿ úú ndicutu cuáhãⁿ quehé veñúhu, te ñúhu itá dúcúⁿ-güedé. Te cue quití-áⁿ cahni-dé cada càhnúⁿ-de ndihíⁿ-yu té Bèé ndihí té Pãblú ní cùu, chi ducaⁿ quidéⁿ-yu quide cahnúⁿ-yu ndiòxíⁿ-yu. ¹⁴ Te té Bèé ndihí té Pãblú ní ñíhí-güedé tnúhu nàcuáa sàni iníⁿ-yu cadáⁿ-yu, te ní ndátá-güedé dóo-güedé cuendá cutnùní

iníⁿ-yu sá ñã tnàhá iní-güedé nàcuáa sàni iníⁿ-yu cadáⁿ-yu. Te xinú-güedé cuánguihu-güedé tnuúⁿ-yu, te ñíhí ní càháⁿ-güedé, te xáhaⁿ-güedé:

¹⁵ —¿Ná cuendá ducaⁿ cuíní-ndó càda-ndo? Te diu-ni tnàha ñáyíu-ndo cùu-ndí, dico-ni tnúhu Yá Ndiòxí véxi-ndí dacuàha ñaha-ndí xii-ndo cuendá sá vã cadá-gã-ndó nàcuáa quide-ndo, te quíndáá iní-ndó Yã Ndiòxí, chi ìⁿdii-ni Yá Ndiòxí ndécú. Te diu-gá ní cadúha-gá andíu ndihí ñuyíú-a ndihí lámár ndihí nchaandi túhu sá ío ñuyíú-a. ¹⁶ Te ndéé sanaha ní dãná Yã Ndiòxí ní quidéⁿ-yu nàcuáa cuáhãⁿ iní méeⁿ-yu. ¹⁷ Te ní xóo cada-gá sá vãha cuendá cutnùní iníⁿ-yu sá ío váha iní-gá. Te diu-gá dácùuⁿ-gá dáú, te tàxi-gá sá nchító-ó chi xito-gá nchaa tatá xítú-ó, te xíãⁿ cúúⁿ iní-ó ndècu-o ñuyíú-a —càchí té Pãblú ndihí té Bèé xáhaⁿ-güedé xíⁿ-yu.

¹⁸ Te cuéi ducaⁿ ní xáhaⁿ-güedé nchaa tnúhu-áⁿ, dico ío úhú ní sàndáá iníⁿ-yu ñá ní sàhníⁿ-yu ndicutu-áⁿ chi cuendá ducaⁿ tnàhí quidéⁿ-yu sàhníⁿ-yu ndicutu òré quidé càhnúⁿ-yu ndiòxíⁿ-yu.

¹⁹ Te ñúu Antiòquiá ndihí ñúu Ìconiú xíndecu dava ñáyíu isrâél, te ní queeⁿ-yu cuáhãⁿ-yu ñúu Lìstrá núu ndécú té Pãblú. Te xíãⁿ ní quexióⁿ-yu te ní xáháⁿ-yu xii ñáyíu dii ñúu xíãⁿ sá càhníⁿ-yu té Pãblú. Te ní sáha yúú ñáhãⁿ-yu xii-dé, te ní càháⁿ-yu sá ní xíhí-dé, te ní tnií ñaha-güedé xii-dé, te tãnuhu ñaha-güedé xii-dé cuáhãⁿ ìⁿ xio yuhu ñúu ní sá dáquené ñaha-güedé. ²⁰ Te ní quexio cue ñáyíu sàndáá iní tnúhu Jèsús núu càtùu-dé-áⁿ, te ní nadúcúⁿ ndéé ñáhãⁿ-yu xii-dé, te nini xínutnìíⁿ-yu-áⁿ ní ndacóo-dé cuánuhú ndihí ñaha tucu-dé xíⁿ-yu xiti ñúu. Te nduu tnéé-áⁿ ní ndee-dé ndihí té Bèé cuáhãⁿ-güedé ñúu Dèrbé.

²¹ Te ní càháⁿ-güedé tnúhu Yá Ndiòxí ñúú-áⁿ, te ío vai ñáyíu ní sàndáá iníⁿ-yu tnúhu-gá. Te dàtnùní ní quee-güedé cuáhãⁿ tucu-güedé ñúu Lìstrá, ndihí ñúu Ìconiú, ndihí ñúu Antiòquiá. ²² Te ní xáhaⁿ-güedé xíⁿ-yu sá vã dãná nihnúⁿ-yu tnúhu Jèsús. Te sá dúcáⁿ ní càháⁿ-güedé, te vñi-gá ní cudíⁿ iníⁿ-yu cadáⁿ-yu nàcuáa cuíní Yã Ndiòxí cadáⁿ-yu, te ní xáhaⁿ-güedé:

—Dacuití cùndecu-o ñuyíú-a ndoho-o, te dàtnùní ducaⁿ te nacuaca ñaha Yã Ndiòxí

xii-o —càhí-güedé xáhaⁿ-güedé xíi-yu.

²³ Te ní sáháⁿ-güedé ndi tnahá íiⁿ íiⁿ xichi núú ndécú ñáyiú dácuaa tnúhu Yá Ndiòxí, te ní taxi ndecu-güedé cue téé quindaha ñaha xíi-yu, te ní cáháⁿ ndihi-güedé Yá Ndiòxí, te ñá túú tñahí ná ní xèxi-güedé cuèndá sá ní cáháⁿ ndihi-güedé-gá. Te ní xáhaⁿ-güedé sá Yá Ndiòxí coto ñaha-gá xíi-yu chi diu-ni-gá ní sándáá íni-yu.

Té Páblú ndihi té Bèè cuáháⁿ tucu-güedé ñuú Antiòquiá Siríá

²⁴⁻²⁵ Te dàtnùní ní quee té Páblú ndihi té Bèè cuáháⁿ-güedé, ní yáha-güedé distritú Pisiadí. Te ní quexio-güedé ñuú Pèrgé, xíáⁿ ní cáháⁿ-güedé tnúhu Jèsús. Te ñuú-áⁿ yíndèhu-xi Panfiliá. Te dàtnùní cuáháⁿ-güedé ñuú Àtaliá. ²⁶ Te yàcáⁿ ní quee-güedé bàrcú cuánuhú tucu-güedé ñuú Antiòquiá. Te ñuú-áⁿ cúú-xí ñuú núú ní xícáⁿ táhü-yu núú Yá Ndiòxí cuèndá sá chindee ñaha-gá xii-güedé chiúⁿ quide-güedé. Te cuèndá sá ní ndihi chiúⁿ-güedé nchaá ñuú núú ní sáháⁿ-güedé, núú xiáⁿ cuánuhú-na-güedé. ²⁷ Te ní ndexio-güedé ñuú-áⁿ, te ní cana-güedé nchaá ñáyiú sándáá íni tnúhu-gá, te ní cani-güedé cuèndú núú-yu nchaá nàcuáa ní cuu núú ní sáháⁿ-güedé, te xáhaⁿ-güedé: “Yá Ndiòxí ío ní chindee ñaha-gá xii-ndí ní cáháⁿ-ndí tnúhu-gá núú ní sáháⁿ-ndí, te mee-gá ní quide sá tñahá ñáyiú ñá túú cùu ñáyiú isràèl ní xíndedóho-yu tnúhu-gá cuèndá quíndáá íni-yu”, càhí-güedé xáhaⁿ-güedé xíi-yu. ²⁸ Te vai nduu ní xíndecu-güedé ñuú Antiòquiá ndihi nchaá ñáyiú ní sándáá íni tnúhu Jèsús.

15

Ní natacá ñáyiú sándáá íni tnúhu Jèsús ñuú Jerusálén

¹ Te ní quee íiⁿ úú cue téé distritú Jùdeá cuáháⁿ-güedé ñuú Antiòquiá, te ní sáa-güedé, te ní xáhaⁿ-güedé xii ñáyiú sándáá íni tnúhu Jèsús sá núu vá cuáha-güedé sèñá ñii nchaá cue téé dàtná ní cachí ndíi Moisés, te vá náníhí táhü-güedé. ² Te sá dúcáⁿ ní cáháⁿ cue téé-áⁿ, te ní nguíta té Páblú ndihi té Bèè ní tenàa-güedé cue téé-áⁿ, chi dandàhú ñáhá-güedé cuíni-güedé ní cùu. Te nchaá ñáyiú sándáá íni tnúhu-gá ní cachí-yu

sá quíhíⁿ té Páblú ndihi té Bèè ndihi íiⁿ úú-gá-güedé ñuú Jerusálén. Te yàcáⁿ cada-güedé íiⁿ jùndá ndihi mee-ni cuè téé ní táuchíúⁿ Jèsús cáháⁿ tnúhu-gá, ndihi cue téé yíndaha ñáyiú sándáá íni tnúhu-gá ñuú-áⁿ, te jùndá-áⁿ cada ndáa-güedé tnúhu ní cáháⁿ cue téé ní sáa ñuú Antiòquiá.

³ Te nchaá ñáyiú sándáá íni tnúhu-gá ní quide ndee íni ñáhá-yu xii-güedé, te ní tñii-güedé ichi cuáháⁿ-güedé. Te ní yáha-güedé distritú Fènicia ndihi distritú Sámariá, te yàcáⁿ ní cani-güedé cuèndú nása ní cuu ní tuha ñáyiú ñá túú cùu ñáyiú isràèl ichi Yá Ndiòxí, te ní cudíí víhí íni nchaá ñáyiú ní xíndedóho-áⁿ.

⁴ Te té Páblú ndihi té Bèè ní ndexio-güedé ñuú Jerusálén, te ío ní cudíí íni-yu sá ní ndexio váha-güedé. Te ndecu dava-gá cue téé ní táuchíúⁿ Jèsús dácuaa ñaha xíi-yu tnúhu-gá, ndihi cue téé yíndaha ñaha xíi-yu, ndihi dava-gá ñáyiú sándáá íni tnúhu-gá, te ní cani-güedé cuèndú núu-yu nàcuáa ní quide Yá Ndiòxí ní chindee ñaha-gá xii-güedé ní quide-güedé chiúⁿ-gá. ⁵ Te ndecu íiⁿ úú cue téé ní tuha ichi Yá Ndiòxí, te cue téé-áⁿ cúú-güedé cue téé fariséú, te ní ndacuíní-güedé, te ní xáhaⁿ-güedé:

—Dacuíní xini ñuhu-xi sá cuáha-güedé sèñá ñii cue téé cumání cue téé ñá túú cùu ñáyiú isràèl, te cúñaha-ndo sá ná cáda-güedé nchaá nàcuáa ní chídó tñuní ndíi Moisés —càhí cue téé cùu fariséú-áⁿ xáhaⁿ-güedé xii-güedé.

⁶ Te cue téé ní táuchíúⁿ Jèsús dacuàha ñaha xii ñáyiú tnúhu-gá, ndihi cue téé yíndaha ñáyiú sándáá íni tnúhu-gá ní quide-güedé jùndá cuèndá ní ndat-núhu-güedé nása cunduu. ⁷ Te vai vihi tnúhu ní cáháⁿ-güedé. Te té Pèlú ní ndacuíní-dé, te ní xáhaⁿ-dè xii-güedé:

—Nchòhò cue téé ndecu ndihi-í ichi Xí-tohó Jesucristú, chí cùndedóho íiⁿ tnúhu na cáháⁿ-í-a. Sa ñaha-ndo sá ní cachí Yá Ndiòxí sá diù-í cáháⁿ-í tnúhu Jèsús núú ñáyiú ñá túú cùu ñáyiú isràèl cuèndá sá quíndáá íni-yu, te naníhí táhü-yu. ⁸ Dico Yá Ndiòxí sá ñaha-gá nása càa íni íiⁿ ñáyiú. Te cùtnuní íni-ó sá cúú íni ñáhá-gá xii cue ñáyiú ñá túú cùu ñáyiú isràèl, chí ní sáñaha-gá Espíritú-gá ndécú ndíhí-yu dàtná cuíni-ndó ní taxi-gá ndécú

ndihi nchoo. ⁹ Chi Yá Ndiöxí ñⁿnuu-ni cùu iní ñáhá-gá xii-o nchaa-o ndihi cue ñáyiu ñá túú cùu ñáyiu isràèl, chi tnàhá-yu ní xócání-gá nchaa sá cuèhé sá dúhá ní xóo cadá-yu ndéé óré ní sándáá iní-yu Jèsús. ¹⁰ ¿Te ná cuèndá nchòhó cuiní-ndó càda ñáyiu ní sándáá iní tnúhu-gá ñⁿ sá ñá tnàhá iní-gá sá cadá-yu? Te cuiní-ndó dándoho-ndó-yu. Te ní nchòo te ni cue ñani tnàhá-ó ní xíndecu ndéé sanaha ñá ní ndàcú-yu cadá-yu nchaa xiá. ¹¹ Te vá dúcáⁿ cáháⁿ-ndó, chi sa nàha-ndo sá Yá Ndiöxí ní cundàhú iní ñáhá-gá xii-o, te díó ducaⁿ ní quide-gá sá nánihí tànhú-ó nchaa-o. Te diu-ni ducaⁿ ní quide-gá ñáyiu ñá túú cùu ñáyiu isràèl, te ní naníhí tànhú-yu —càchí té Pèlú xàhaⁿ-dè xii-güedé.

¹² Te dätñuní té Bèé ndihi té Pàblú ní ngüfta-güedé ní cáháⁿ-güedé, te ní xíndedóho-yu nchaa tnúhu ní cáháⁿ-güedé. Te ní xàhaⁿ-güedé xií-yu nàcuáa ní chindee ñaha Yá Ndiöxí xii-güedé, te ní quide-güedé vai núú sá vá yòo tnàhí ndàcu cada, te ducaⁿ te ní cutñuní iní ñáyiu ñá túú cùu ñáyiu isràèl sá ndáá cáháⁿ-güedé. ¹³ Te óré ní ndihi cuèndú ní cáháⁿ-güedé, te té Jacobó ní xàhaⁿ-dè:

—Nchòhó cue téé ndècu ndihi-í ichi Xí-tohó Jesucristú, chí cündedóho ñⁿ tnúhu na cáháⁿ-í-a. ¹⁴ Té Xímú, àdi Pelú chí úú diu-dé, ní cani-dé cuèndú nàcuáa ní quide Yá Ndiöxí ndéé díhna ní dáquée díhⁿ-gá ñáyiu ñá túú cùu ñáyiu isràèl tnuú nchaa ñáyiu ñá túú ndècu ichi-gá, cuèndá cuiní-gá chiñuhu ñáhá-yu xii-gá. ¹⁵ Te dätñuní ní cáháⁿ-dé nàcuáa ní cáháⁿ Yá Ndiöxí ndéé sanaha. Te duha ní chídó tnùní cue téé ní xóo cáháⁿ tnúhu-gá ndéé sanaha nàcuáa ní cáháⁿ-gá, te duha ní cachí-gá:

¹⁶ Dàtná cuiní-ndó cùu ñⁿ vehe ní sáa te ní ngoyo te dándaa-güedé xito cùu uú, ducaⁿ sätñahá-xi cada-xi ñⁿ nduu, chi ñani tnàhá ndíi Dávíí ní xóo cáháⁿ ndihi ñáhá-yu xii-í ní cùu, te ní dáñá ndèé-yu ichi-í, te na quixi-í te natuha ñaha tùcú-yu.

¹⁷ Te ducaⁿ te vai ñáyiu ñá túú cùu ñáyiu isràèl nandúcú-yu ichi-í te cáháⁿ ndihi ñáhá-yu.

¹⁸ Duha ní cáháⁿ Yá Ndiöxí, te ducaⁿ ní chídó tnùní cue téé ní xóo cáháⁿ tnúhu-gá ndéé sanaha —càchí té Jàcobó xàhaⁿ-dè xii-güedé.

¹⁹ Te xàhaⁿ tùcu-dé:

—Yúhú càchí iní-í sá vá cùú dàsatú-ó iní nchaa ñáyiu ta sándáá iní-xi tnúhu Yá Ndiöxí, ñáyiu ñá túú cùu ñáyiu isràèl, te ñⁿ úú-ni tnúhu cùñaha-o nàcuáa cadá-yu. ²⁰ Dico xini ñuhu-xi daquiñíⁿ-ó tùtú cùñaha-o sá vá caxí-gá-yu nchaa sá nchító-ó ndùu tànhú nchaa sá càchí-yu cùu ndiöxí-yu. Te cùñaha-o sá vá cáháⁿ ndihi cue téé ñadihí te núu ñá díú ñadihí-güedé cùu-yu, te ni cue ñáyiu díhí vá cáháⁿ ndihi-yu téé te núu ñá díú yíí-yu cùu-güedé, te vá caxí-yu cuñú quiti cuèhné, te vá caxí-yu níñí. ²¹ Te ducaⁿ cùñaha-o, chi ndi tnàhá ñuu núú ndécú-yu, te xíndecu ñáyiu isràèl dácuahá-yu tnúhu ní chídó tnùní ndíi Moisés, te ndi tnàhá nduu ndètatu-yu dàcuahá-yu tnúhu ndíi veñuhu-yu —càchí té Jàcobó xàhaⁿ-dè xii-güedé.

²² Te dätñuní cue téé ní táuchíúⁿ Jèsús dacuaà ñaha xií-yu tnúhu-gá, ndihi cue téé yíndaha ñáyiu sándáá iní tnúhu-gá ní cachí-güedé sá ndúcú-güedé ñⁿ úú-gá cue téé quíhíⁿ ndihi té Pàblú ndihi té Bèé ñuu Antiòquiá, te diu-ni ducaⁿ ní cáháⁿ dava-gá ñáyiu ndècu ichi-gá. Te úú cue téé ní ndúcú-güedé, ñⁿ-dé nání-dè Silás, te ñⁿ-dé nání-dè Jùdás, àdi Barsabás chí úú diu-dé, te cùnuu-güedé ndi ndùu-güedé. ²³ Te ní cadúha nchaa cue téé cùnuu tutú canehe-güedé quíhíⁿ, te duha cáháⁿ-xi:

“Cóvãha díí-ndó nchaa-ndo. Nchúhú cue téé ní táuchíúⁿ Jèsús cáháⁿ-ndí tnúhu-gá, ndihi cue téé yíndaha cue ñáyiu sándáá iní tnúhu-gá quide ndee iní ñáhá-ndí xii nchòhó cue ñáyiu ndècu ndihi-ndí ichi-gá cuéí ñá díú ñáyiu isràèl cùu-ndó. Te nchòhó ñáyiu xíndecu ñuu Antiòquiá, ndihi nchòhó ñáyiu ndècu distritú Siriá, ndihi nchòhó ñáyiu ndècu distritú Ciliciá, càchí tnúhu-ndí xii-ndo sá ²⁴ ní níhí-ndí tnúhu sá ñⁿ úú cue téé ndècu iha ní quixi-güedé núú ndécú-ndó, te ñá túú chiuⁿ ni tahu-ndí quixi-güedé. Te sá ñⁿ tnúhu ní cáháⁿ-güedé ní xàhaⁿ-güedé xii-ndo sá ngündecu sèñá ñií-ndo, te canchicúⁿ nihnu-ndo nchaa nàcuáa ní chídó tnùní ndíi Moisés, te xiáⁿ ní sani ñⁿ ní sani úú iní-ndó, chí ñá túú xini-ndó núu ndáá tnúhu cáháⁿ-güedé àdi ñá ndáá.

²⁵ Te ní ndaṭnúhu-ndí nàcuáa cunduu sá tendàha-ndí úú cue tée quixi-güedé ndihi té Bèè ndihi té Pàblú, cue tée ío cùu iní-ndí, te cue tée-án cǎháⁿ-güedé nàcuáa cǎháⁿ-ndí-a. ²⁶ Te diu-ni té Bèè ndihi té Pàblú ní sǎháⁿ-güedé ní cǎháⁿ-güedé tnúhu Xítóhó Jesucristú nchaa xichi. Te ndi tnahá cuáháⁿ-güedé cuíní-yu cahni ñahá-yu xii-güedé. ²⁷ Te tendaha-ndí té Júdás ndihi té Silás quixi-güedé tnahá-güedé cachí tnúhu váha-güedé nàcuáa cuáháⁿ tnúhu cǎháⁿ-ndí. ²⁸ Te diu-ni ducaⁿ cǎháⁿ-ndí cachí tnúhu-ndí nàcuáa cǎháⁿ Espiritú Yá Ndióxi cada-ndo, chi nchúhú vá cǎháⁿ-ndí sá cadá-ndó nchaa sá ní cǎháⁿ ndí Moisés cada ñáyi, chi ío úhú, te vá yó ndacu cada. Te vitna na cǎháⁿ-ndí ñíⁿ úú-ni tnúhu nàcuáa cada-ndo. ²⁹ Vá cǎxí-ndó sǎ nchító-ó ndùu táhú nchaa sá cǎchí ñáyi cùu ndióxi-yu, te vá cǎxí-ndó ñíñí, te vá cǎxí-ndó cùñú quití cuèhné, te vá cǎháⁿ ndihi cue tée ñadihi té núu ñá díú ñadihi-güedé cùú-yu, te ni cuè ñáyi dihi vá cǎháⁿ ndihi-yu tée té núu ñá díú yíi-yu cùu-güedé. Te núu na cada-ndo nchaa nacuáa cǎháⁿ-ndí-a, te cada váha-ndo. Te vitna ío cada ndee iní-ndó nchaa-ndo-na.” Duha ní chídó tnúni-güedé núu tütú ní tendaha-güedé cuáháⁿ.

³⁰ Te ní quide ndee iní-yu cue tée quíhíⁿ ñúu Antióquia, te ducaⁿ te ní xica-güedé cuáháⁿ-güedé. Te òrè ní quexio-güedé ñúu-án, te ní cana-güedé nchaa ñáyi sándáá iní tnúhu Jèsús, te ní sǎñaha-güedé tütú xii-yu. ³¹ Te ní dácuáhá-yu tütú ní sǎñaha-güedé-án, te ní cudíí víhí iní-yu chi ío váha cǎháⁿ tütú-án. ³² Te té Júdás ndihi té Silás tnahá-güedé ní nduu táhú-güedé cǎháⁿ-güedé tnúhu sá dácàhu iní ñahá Yá Ndióxi. Te ní xáhaⁿ-güedé vai tnúhu nàcuáa cada-yu, te vihi-gá ní cudíí iní-yu cada-yu nàcuáa cǎháⁿ Yá Ndióxi cada-yu. ³³ Te ní xíndecu-güedé ñíⁿ úú nduu ndihi-yu, te dǎtnúni ní quide ndee iní ñáhá-yu xii-güedé cuèndá sá nùhú-güedé núu vèxi-güedé, te mee-ni té Júdás cuánuhú-dé. ³⁴ Te té Silás ní xáhaⁿ-dè sá vǎ nùhú-ni-dé. ³⁵ Te té Pàblú ndihi té Bèè ní ndóo-güedé ní cǎháⁿ-güedé tnúhu Yá Ndióxi ñúu Antióquia, te vai-gá tucu ñáyi Antióquia ní cǎháⁿ-yu tnúhu-gá.

Xito cùu úú cuáháⁿ té Pàblú cǎháⁿ-dè tnúhu Yá Ndióxi núu ñáyi

³⁶ Te sáta ní cuu cuèhé nduu, te ní xáhaⁿ té Pàblú xii té Bèè:

—Na quíhíⁿ-ó nchaa ñúu núu ní sǎháⁿ-ó ní cǎháⁿ-ó tnúhu Yá Ndióxi cǎháⁿ ndihi-o nchaa ñáyi ní tuha ichi-gá cuèndá quini-ó núu ndècu váha-yu —cǎchí-dé xáhaⁿ-dè.

³⁷ Te té Bèè ní xáhaⁿ-dè sá quíhíⁿ ndihi-güedé té Juáá, àdi Mácú chi úú diu-dé.

³⁸ Dico té Pàblú ñá ní dǎña-gá-dé quíhíⁿ té Juáá, chi ní dándóo ñaha-dè xii-güedé cùtnhá ní xíndecu-güedé Pànfiliá, te ní nacuico-dé cuánuhú-dé, te ñá túú-gǎ ní sǎháⁿ ndihi ñaha-dè xii-güedé. ³⁹ Xíáⁿ ní cuu ní tenáa tnahá té Bèè ndihi té Pàblú, te ichi cǎa ichi caa ní cuu-güedé. Te té Bèè ndihi té Mácú ní quee-güedé bàrcú cuáháⁿ-güedé Chìpré. ⁴⁰ Te té Pàblú ní xáhaⁿ-dè xii té Silás sá quíhíⁿ ndihi ñaha-dè, te ñáyi sándáá iní-xi tnúhu Jèsús ní cǎháⁿ ndihi-yu Yá Ndióxi sá chíndèe ñaha-gá xii-güedé.

⁴¹ Te ní xica-güedé cuáháⁿ-güedé te ní váha-güedé ñihí distritú Siriá ndihi distritú Ciliciá. Te ní cǎháⁿ-güedé tnúhu Jèsús núu nchaa ñáyi ní sándáá iní tnúhu-gá, núu xíáⁿ ío-gá ní cudíí iní-yu cada-yu nàcuáa cǎháⁿ Yá Ndióxi.

16

Tnahá té Timùteú cuáháⁿ ndihi-dé té Pàblú ndihi té Silás

¹ Te té Pàblú ndihi té Silás cuáháⁿ-güedé ñúu Dèrbé ndihi ñúu Lìstrá, te ñúu Lìstrá yàcáⁿ ndécú ñíⁿ tée nani Timuteú. Te tée-án sándáá iní-dé tnúhu Jèsús, te tnahá nǎnǎ-dè sándáá iní-aⁿ tnúhu-gá, te ñaha isràèl cùú-án, te tée grìégú cùú tǎtǎ-dé.

² Te nchaa ñáyi ní sándáá iní tnúhu-gá ñáyi ndècu ñúu Lìstrá, ndihi ñáyi ñúu lconiu, nchaa ñáyi-án cudíí iní-yu nàcuáa quide-dé. ³ Te ní cuini té Pàblú sá tnahá té Timùteú quíhíⁿ ndihi-dé dava-gá ñúu, núu xíáⁿ díhna-gá sèñá ní sáha té Pàblú ñíi té Timùteú, chi ñá ní tnahá iní té Pàblú sá cǎháⁿ cuèhé ñáyi isràèl cuèndá té Timùteú. Te nchaa ñáyi isràèl ndécú ñúu-án xini-yu sá tée grìégú cùú tǎtǎ-dé, te ñá díú tée isràèl cùú-dé, te xíáⁿ ní sáha té Pàblú sèñá ñíi té Timùteú. ⁴ Te ndi tnahá ñúu ndi tnahá ñúu cuáháⁿ-güedé

cáháⁿ ndihí-güedé nchaa ñáiyu ní sándáá iní tnúhu Jèsús. Te ní xáhaⁿ-güedé nàcuáa cáháⁿ tutú ní cadúha cue téé ní táuchíúⁿ Jèsús dacuàha ñaha xíi-yu tnúhu-gá, ndihí cue téé yindaha ñáiyu sándáá iní tnúhu-gá ñuú Jerusálén. ⁵ Te cuèndá ducaⁿ ní sáháⁿ-güedé nchaa ñuú núú ndécú ñáiyu sándáá iní tnúhu-gá ní dacuáhá ñaha-güedé xíi-yu, núu xíáⁿ tá cùu túha-gá-yu tnúhu Yá Ndiòxí, te vài-gá-yu ní tuhá-yu ichi-gá.

Ní dácótó ñaha-xi xii té Páblú sá ní xiní-dé ìⁿ téé distrítú Macèdoniá

⁶ Te ñá ní ñaⁿ Espiritú Yá Ndiòxí quíhíⁿ-güedé cáháⁿ-güedé tnúhu-gá distrítú Àsiá, núu ní sáháⁿ-güedé distrítú Frìgiá ndihí distrítú Gàlaciá cáháⁿ-güedé tnúhu-gá. ⁷ Te ní sáá-güedé yuhu distrítú Misiá. Te quíhíⁿ-güedé distrítú Bìtiniá ní cùu, dico ñá ní ñaⁿ Espiritú Yá Ndiòxí quíhíⁿ-güedé yacáⁿ. ⁸ Te ní yáha-güedé quíhíⁿ-n Macèdoniá chi dacuàha ñaha-n nchaa sá xiní-n”, cächí-dé xáhaⁿ-dë, ní dácótó ñaha-xi xii té Páblú. ¹⁰ Te cuèndá sá dúcáⁿ ní dácótó ñaha-xi xii té Páblú núu ní ndatnúhu-ndí quíhíⁿ-ndí Macèdoniá, chi ní çutnúni iní-ndí sá caná ñaha Yá Ndiòxí quíhíⁿ-ndí cáháⁿ-ndí tnúhu-gá núu ñáiyu yacáⁿ.

Té Páblú ndihí té Silás ndécú-güedé ñuú Filipú

¹¹ Te ní queé-ndí bàrcú ñuú Tròás, te cuáháⁿ ndáá-ndí ñuú Samòtraciá, te yacáⁿ ní quexio-ndí, te ní yáha-ni-ndí cuáháⁿ-ndí. Te nduu tñéé ní quexio-ndí ñuú Nèápolis. ¹² Te yacáⁿ ní quene-ndí bàrcú, te xica-na-ndí cuáháⁿ-ndí ñuú Filipú te ñuú-áⁿ yíndèhu-xi distrítú Macèdoniá. Te yacáⁿ ní cudí-ndí ní xindecu tnaa-ndí. Te ñuú Filipú-áⁿ ño cùnuu-xi, chi ño chitu ñáiyu ròmá ní ngóo-yu. ¹³ Te nduu ndètátú-yu ní quee-ndí ñuú cuáháⁿ-ndí ìⁿ xio yuhu yùte, chi yacáⁿ sáháⁿ-yu cáháⁿ ndihí-yu Yá Ndiòxí. Te òré ní quexio-ndí, te ní nanhí tñáhá-ndí ndihí mee-ni ñáiyu

dìhí, te ní cáháⁿ-ndí tnúhu Yá Ndiòxí ní xíndedóho-yu. ¹⁴ Te ndécú ìⁿ ñaha nani Lidiá ní xíndedóho-aⁿ nàcuáa ní cáháⁿ-ndí, te ñaha ñuú Tiàtirá cúu-áⁿ, te dico-aⁿ dóó murádú, te ño cáháⁿ ndihí-aⁿ Yá Ndiòxí. Te ñu-ni mee Yá Ndiòxí ní chindee ñaha-gá ní sándáá iní-aⁿ tnúhu ní cáháⁿ té Páblú. ¹⁵ Te ní sandute-aⁿ ndihí landú-aⁿ, ndihí nchaa ñáiyu xinu cuechi núu-aⁿ, te ní cachí-aⁿ xii-ndí:

—Te núu ní cutnúni iní-ndó sá ní sándáá ndisa iní-í tnúhu Jèsús, te cundecu tnaa-ndo vèhe-í —cächí-aⁿ xii-ndí.

Te ní quide yica-aⁿ ní xindecu-ndí vehe-aⁿ.

¹⁶ Te ìⁿ nduu ñuhu-ndí ichi cuáháⁿ-ndí núu cáháⁿ ndihí-yu Yá Ndiòxí, te ní nanhí-ndí ìⁿ xíchí ñuhú ichi, te yíhi ñaha espíritú cündihí yucu ñávaha xii-xi. Te xíáⁿ ní quide ní cáháⁿ-xi nchaa sá vã yõ tñáhí cùtnuni iní-xi núu nchaa ñáiyu ní sángándihí ñaha xii-xi. Te ñáiyu dii vèhe-xi xinu cuechi-xi ño vài díhúⁿ ní nihí-yu chi ní cháhu nchaa ñáiyu ní sángándihí ñaha xii-xi. ¹⁷ Te xíchí-áⁿ ní chinchícuⁿ ñáhá-xí xii-ndí ndihí té Páblú ndëndaha ñaha-xi cuáháⁿ, te ní cáháⁿ ñhí-xi xáhaⁿ-xi xii dava-gá ñáiyu:

—Cue téé-a xinu cuechi-güedé núu Yá Ndiòxí, chi ño cànnu cuu-gá, te cächí tnúhu-güedé nása cada-ndo nanhí tãhu-ndó —cächí-xi xáhaⁿ-xi xii-yu.

¹⁸ Te titní xito ní yáha-ndí ducaⁿ-ni ní cáháⁿ-xi. Te ñá ní cundee-gá iní té Páblú sá dúcáⁿ cáháⁿ-xi, núu ní nanchocuíhnu-dé núu nùtní-xi, te ní xáhaⁿ-dë xii espíritú cündihí yucu ñávaha yíhi ñaha xii-xi:

—Ño cànnu cuu Xítoho Jesucristú, núu xíáⁿ cächí-í sá xocuíhí-n vã quíhí-gá-n yiqui cuñú xíchí-a —cächí-dé xáhaⁿ-dë.

Te òré-ni ní quee espíritú cündihí yucu ñávaha-áⁿ yiqui cuñú-xi.

¹⁹⁻²⁰ Te ñáiyu dii vèhe-xi xinu cuechi-xi-áⁿ ní cutnúni iní-yu sá vã nihí-gá-yu díhúⁿ cuèndá tnúhu cáháⁿ-xi, núu ní tñí-yu té Páblú ndihí té Silás ndécá ñáhá-yu cuáháⁿ núu cuè téé cùchiuⁿ Romá, te xáháⁿ-yu xii-güedé:

—Cue téé-a cùu-güedé cue téé isràèl, te ño dusaⁿ xíquide-güedé ñuú-ó. ²¹ Te cuíni-güedé cada-o nàcuáa quide-güedé, te vã cúu ñucaⁿ cada-o chi ñáiyu nacióⁿ

Ròmá cúu-ó —càchí-yu xǎhǎⁿ-yu xii cue tée cùchiuⁿ.

²² Te uuⁿni ní cáháⁿ nchaá-yu, te xǎhǎⁿ-yu sá ñà túu quide váha té Pǎblú ndíhi té Silás. Te cue tée cùchiuⁿ ní cándeé-güedé dóo tē Pǎblú ndíhi dóo tē Silás ní ndátá-güedé, te ní táuchíuⁿ-güedé caniha-güedé ndíhi tnudii xii-güedé. ²³ Te ní caniha-güedé, te dǎtnúní ní chihí ñaha-güedé vecaá. Te ní xáhaⁿ-güedé xii tée ndénchito vecaá sá cáda cuèdadú víhí-dé cuendá ná canú-güedé vecaá. ²⁴ Te cuendá sá dúcáⁿ ní cáháⁿ-güedé, núu tée ndénchito vecaá ní dáyáha ñaha-dé ingá cuartú ndécú xítí vecaá, te ní chihí-dé sáhá-güedé yaú nduhu, te ní quide tii-dé.

²⁵ Te dava niú ní cáháⁿ ndíhi té Pǎblú ndíhi té Silás Yá Ndióxi, te ní xita-güedé ndudú ní quide càhnu ñaha-güedé xii-gá. Te dava-gá cue tée yíhi vecaá ní xínd-edóho-güedé nàcuáa ní xita-güedé. ²⁶ Te uuⁿni níhi víhi ní tnáa ní quidi-xi ndéé cimiéntú vecaá, te ní nacaáⁿ nchaa yèhe vecaá, te ní ndíhi cadená ndútú cuè tée yíhi vecaá ní nandáxi. ²⁷ Te ní ndíquíu cúnú íni tée ndénchito vecaá, te ní quide cuendá-dé nchíi nchaa yèhe vecaá. Te ní tava-dé machití-dé cahni-dé méé-dé ní cùu, chi ní cáháⁿ-dē sá ní ndíhi cue tée yíhi vecaá ní xinu ní cùu. ²⁸ Te té Pǎblú ní cáháⁿ níhi-dé, te xáhaⁿ-dē xii tée ndénchito vecaá:

—Vá dúcáⁿ cáda-n cahni-n mee-n, chi nchaa-ni-ndí yíhi —càchí-dé xáhaⁿ-dē xii tée ndénchito vecaá.

²⁹ Te dǎtnúní ní xicáⁿ tée ndénchito vecaá ñuhú, te xínu-dé cuánguihu xítí vecaá núu yíhi tē Pǎblú ndíhi té Silás, te quidi ñaha-ná-xi xii-dé ní quexio-dé ní ngúíni xítí-dé núu-güedé. ³⁰ Te dǎtnúní ndécá ñaha-dé xii-güedé ní ndee vecaá, te ní xicáⁿ tnúhu-dé núu-güedé, te xáhaⁿ-dē:

—Nchóhó cachí tnúhu-ndo ñasa cada-í naníhi tǎhú-í —càchí-dé xáhaⁿ-dē.

³¹ Te ní xáhaⁿ-güedé:

—Quíndáa íni-n ndíhi ñadíhi-n, ndíhi landú-n, ndíhi nchaa ñáyui xínu cuechi núu-n tnúhu càháⁿ Xítóhó Jesucristú, te naníhi tǎhú-ndó —càchí-güedé xáhaⁿ-güedé.

³² Te ní dácúhá ñaha-güedé xii tée ndénchito vecaá ndíhi nchaa ñáyui ndécu vehe-dé tnúhu Yá Ndióxi. ³³ Te diu-ni órē-áⁿ

ní naquete-dé sátá-güedé núu ní ñáni, te dǎtnúní ní sandute-dé ndíhi-yu. ³⁴ Te ndéca ñaha-dé cuáháⁿ vehe-dé ní sáñaha-dē sá ní xexi-güedé, te ní cudíi víhi íni tée ndénchito vecaá ndíhi nchaa-dé vehe-dé sá ní tuhá-yu ichi Yá Ndióxi. Te cuándihu tucu té Pǎblú ndíhi té Silás vecaá.

³⁵ Te nduu tnéé ní xáhaⁿ cuè tée cùchiuⁿ xii poleciá cuáháⁿ-güedé cúu-güedé tée ndénchito vecaá queñuhu-dé úu cue tée cuánguihu ndedí nduu ícu núhu-güedé. ³⁶ Te tée ndénchito vecaá ní xáhaⁿ-dē xii té Pǎblú ndíhi té Silás:

—Cue tée cùchiuⁿ ní cachí-güedé sá queé-ndó ñuhú-ndó, chi ñá túu-gǎ ná cada-güedé, chi sa ní yáha cuendá-ndó —càchí tée ndénchito vecaá xáhaⁿ-dē xii-güedé.

³⁷ Te té Pǎblú ní xáhaⁿ-dē xii cue tée cùu poleciá:

—Tée rómá cúu-ndí, te vá cúu dùcaⁿ-ni cunduu, chi ní caniha-güedé tnudii xii-ndí, te ní xini-yu nchaá-yu. Te ñá túu tnàhi ní xicáⁿ tnúhu-güedé núu ndáa ndécuéchi-ndí àdi ñahá, chi cuendá-ni ní chihí ñaha-güedé vecaá xii-ndí. Te vitna cuini-güedé dacácu ñaha-güedé núhu-ndí cuendá sá vǎ yóo quini ñahá ñuhú-ndí cáháⁿ-güedé, dico vá cúu dùcaⁿ cada ñaha-güedé xii-ndí. Chí cuáháⁿ cúñaha-ndo na quixi mee-güedé queñuhu ñaha-güedé —càchí té Pǎblú xii-dé cue poleciá.

³⁸ Te cue tée cùu poleciá cuánuhú-güedé núu ndécú cuè tée cùchiuⁿ, te ní xáhaⁿ-güedé nàcuáa ní cáháⁿ té Pǎblú. Te sá dúcáⁿ ní xáhaⁿ pòleciá sá tée rómá cúu-güedé, xíáⁿ ní yúhu-güedé. ³⁹ Te ní sáháⁿ cue tée cùchiuⁿ yehe vecaá, te ní xáhaⁿ-güedé sá cáda càhnu íni-güedé sá ní chihí ñaha-güedé vecaá, te ní ndeñuhu ñaha-güedé vecaá. Te ní cáháⁿ ndáhú-güedé núu cuè tée ní xíhi vecaá sá ndéé-güedé ñuu-áⁿ ñuhú-güedé. ⁴⁰ Te ní ndee-güedé vecaá, te cuáháⁿ-güedé vehe tá Lidiá, te ní ndatnúhu-güedé ndíhi nchaa ñáyui ní sándáa íni-xi tnúhu Jèsús, te ní xáhaⁿ-güedé xii-yu nàcuáa cada-yu, te ío ní cudíi íni-yu, te ducaⁿ te ní xica-güedé cuáháⁿ-güedé.

17

Ío dusaⁿ quide ñáyiú ñúú Tesalónica

¹ Te ní yáha-güedé ñúú Anfípólís ndihí ñúú Apolóniá, te ní quexio-güedé ñúú Tesalónica, te yacáⁿ cáá ñⁿ veñúhu ñáyiú isráel. ² Te ní sáháⁿ té Páblú veñúhu-áⁿ, chí ducaⁿ tnáhi quide-dé, te ndi tnahá nduu ndetátú-yu ní sáháⁿ-dé veñúhu-áⁿ ñní xito. Te ní ndatnúhu ndihí ñaha-dé xí-yu nacuáa ní chídó tnúni cue téé ní xóo cáháⁿ tnúhu Yá Ndióxi ndéé sanaha. ³ Te ní xít-núhu ñaha-dé nacuáa ní cáháⁿ cue téé-áⁿ sá Crístú Yáá tendaha Yá Ndióxi quixi ñuyúú-a ndoho vihi-gá, te cuú-gá, te ndoto-gá, te xáhaⁿ-dè:

—Te diu Jèsús cúú Crístú Yáá ní tendaha Yá Ndióxi ní quixi ñuyúú-a, núu xíáⁿ càchí tnúhu-í vitna —càchí té Páblú xáhaⁿ-dè xí-yu.

⁴ Te dava ñáyiú isráel ní sándáa iní-yu tnúhu ní cáháⁿ té Páblú, te ní níhi tnáhá-yu ndihí-dé, ndihí té Silás. Te vai ñáyiú griégú ñáyiú càháⁿ ndihí Yá Ndióxi ní sándáa iní-yu tnúhu Jèsús. Te ndècu titní ñáyiú dñí ñáyiú cùnunu, te ñáyiú-áⁿ tnahá-yu ní sándáa iní-yu tnúhu-gá. ⁵ Te dava ñáyiú isráel ñá túú ní cùu váha iní-yu núú tē Páblú núu ní ndúcú-yu cue téé cui-hna iní-xi tuhío-güedé cada chiúⁿ-güedé, chí ndi cuíhnu ndi cuíhnu-ni-güedé, te ncháa-yu ndihí cue téé-áⁿ ndi coyo ndi coyó-yu xicuáa-yu. Te sáta ñí tecú dóho dava-gá-yu, te ní sáháⁿ tuhá-yu, te ío ní quide dúsáⁿ-yu. Te nísáháⁿ-yu vehe té Jàsón, te ní quide yicá-yu ní quíhu-yu vehe-dé nándúcú-yu té Páblú ndihí té Silás cuendá queñuhu ñahá-yu núú ncháa ñáyiú. ⁶ Te ñá ní náníhi ñáhá-yu xii-güedé, núu xíáⁿ ní tñí-yu té Jàsón ndihí ñⁿ úú-gá cue téé sándáa iní tnúhu Jèsús, te tñíhu ñahá-yu xii-güedé cuáháⁿ núú cuè téé cùchiuⁿ. Te òré ní quexió-yu núú ndécú cuè téé cùchiuⁿ, te ní ngúfta-yu ní cuáa-yu, te xáhaⁿ-yu xii-güedé:

—Ní quexio cue téé-áⁿ ñúú-ó, te ío dusaⁿ quide-güedé, te ducaⁿ-ni quide-güedé ncháa núu núu xicá cùu-güedé. ⁷ Te té Jàsón-áⁿ ní xáhaⁿ-dè sá cúú cùndecu-güedé vehe-dé, te ñá túú sándáa iní-güedé nacuáa càháⁿ té Cèsár téé yíndaha cuéhé nacióⁿ, te càchí-güedé sá ndécú ñngá téé cùnunu-gá

tuca nani-dé Jèsús —càchí-yu xáhaⁿ-yu xii cue téé cùchiuⁿ.

⁸ Te sáta dúcáⁿ ní cáháⁿ-yu, te ní cudééⁿ víhi cuè téé cùchiuⁿ ndihí dava-gá ñáyiú ndédóho. ⁹ Te vai díhúⁿ ní xicáⁿ cue téé cùchiuⁿ núú tē Jàsón ndihí dava-gá cue téé cuáháⁿ ndihí-dé cuendá té Páblú ndihí té Silás, te núu na ndèe-güedé núhú-güedé, te nacuañaha cuè téé cùchiuⁿ díhúⁿ-güedé.

Té Páblú ndihí té Silás ndécú-güedé ñúú Bèréa

¹⁰ Te òré ní cundiquíⁿ, te ní quide ndee ñní ñahá ñáyiú sándáa iní tnúhu Jèsús xii té Páblú ndihí té Silás, te ní xica-güedé cuáháⁿ-güedé ñúú Bèréa. Te diu-ni nduu ñí sáa-güedé yacáⁿ ní sáháⁿ-güedé veñúhu ñáyiú isráel. ¹¹ Te váha-gá iní ñáyiú ñúú Bèréa dácúúxi ñáyiú ñúú Tesalónica, chí ío ní cudíí iní-yu ní xíndedóho-yu tnúhu Jèsús, te ñⁿ nduu ñⁿ nduu ní dácuañá-yu tnúhu ní chídó tnúni cue téé ní xóo cáháⁿ tnúhu Yá Ndióxi ndéé sanaha cuendá cuíni-yu quini-yu núu ndáa càháⁿ té Páblú ndihí té Silás. ¹² Te titní ñáyiú isráel ní sándáa iní-yu tnúhu-gá ndihí titní cue téé griégú ndihí ñáyiú dñí ñáyiú cùnunu ní sándáa iní-yu. ¹³ Te dava ñáyiú isráel ndécú-yu ñúú Tesalónica, te ñáyiú-áⁿ ñí níhi-yu tnúhu sá ndécú té Páblú ndihí té Silás ñúú Bèréa càháⁿ-güedé tnúhu Yá Ndióxi, núu xíáⁿ ní sáháⁿ-yu ñúú Bèréa ní dácuañdèhndé-yu núú ncháa ñáyiú vátá dácuañha-gá. Te ñáyiú-áⁿ ñí sándáa iní-yu tnúhu ndehnde te ní cudééⁿ víhi-yu núú-güedé. ¹⁴ Te òré-áⁿ ñí xáhaⁿ ñáyiú sándáa iní tnúhu-gá xii té Páblú sá quíhiⁿ-dé yuhu lámár, te ní xica-dé cuáháⁿ-dè, te té Silás ndihí té Timùteú ní quendóo-güedé ñúú Bèréa. ¹⁵ Te ñⁿ úú-güedé cuáháⁿ ndihí-güedé té Páblú, te ndèca ñaha-güedé cuáháⁿ ndéé ñúú Atenás, te ní xáhaⁿ tē Páblú xii-güedé:

—Núu na nùhú-ndó, te cúu-ndo tē Silás ndihí té Timùteú ná quíxi ndñi-ni-güedé nanítnáhá-ndí iha —càchí-dé xáhaⁿ-dè.

Te ní xica-güedé cuánuhú-güedé.

Té Páblú ndécú-dè ñúú Atenás

¹⁶ Te ñúú Atenás ndétú tē Páblú quíhiⁿ té Silás ndihí té Timùteú. Te yacáⁿ ní xini-dé sá ío cuéhé sá càchí-yu cùu ndiúxi-yu ndècu te ñá ndáa sá díú ndiúxi cúu-xí, te xíáⁿ ñá

tuu ní cùu váha iní-dé, chi ñá tnàhá iní-dé nàcuáa quidé-yu. ¹⁷ Te ní sáháⁿ-dé veñúhu ní cáháⁿ ndihi-dé ñáiyu israhél ndihi dava-gá ñáiyu càháⁿ ndihi Yá Ndiòxí. Te ìⁿ nduu ìⁿ nduu sàháⁿ-dé xití ñúú càháⁿ-dé tnúhu-gá ndihi nchaa ñáiyu xica cuu yacáⁿ. ¹⁸ Te cue tée cùu epicureú ndihi cue tée cùu esto-icú, cue tée-áⁿ ní ndatnúhu-güedé ndihi té Páblú, te dava-güedé xitnàha-güedé:

— ¡Ná tnúhu vihi cáháⁿ tée lúcú-áⁿ! —
càchí-güedé xitnàha-güedé.

Te dava-güedé xitnàha-güedé:

— Sàni iní-ndí sá càháⁿ-dé cuendá ndiòxí sá vátá quini-gá-ó —càchí-güedé xitnàha-güedé.

Te ducaⁿ xitnàha-güedé, chi càháⁿ té Páblú tnúhu Jèsús, te ní cáháⁿ-dé nàcuáa ní dándótó ñaha Yá Ndiòxí xii-gá, xíáⁿ nùu ducaⁿ xitnàha-güedé. ¹⁹ Te ndèca ñaha-güedé xii té Páblú cuáháⁿ ìⁿ xichi núu nání Àreópagú, te ní xáhaⁿ-güedé xii-dé:

—Cachí tnúhu ndáá-n nàsa cuáháⁿ tnúhu càháⁿ-n, chi na cùtnuní ndáá iní-ndí, ²⁰ chi ducaⁿ-ni càháⁿ-n tnúhu sá ñá tuú sàcúndèdóho-ndí, te cuini-ndí cachí tnúhu ndáá-n nàsa ndúu tnúhu-áⁿ cuendá cutnùní váha iní-ndí —càchí-güedé xáhaⁿ-güedé xii-dé.

²¹ Te nchaa ñáiyu ñúú Àtenás ndihi ñáiyu dava-gá ñúú, mee-ni tnúhu saa cuini-yu càháⁿ-yu, nchaa sá vátá cùndèdóho-gá-yu cuini-yu cundedóho-yu.

²² Te té Páblú ní ngúnutnii-dé núu xixúcu-yu nchaá-yu, te xáhaⁿ-dè:

—Nchòhò cue ñáiyu ñúú Àtenás, cundèdóho-ndo nchaa tnúhu na càháⁿ-í-a. Ío quide cahnu nchóhó sá càchí-ndó cùu ndiòxí-ndó. ²³ Te vitna ní quexio-í ñúú-ndó, te ní xini-í sá yàyacáⁿ ndécú nchaa sá càchí-ndó cùu ndiòxí-ndó càháⁿ ndihi-ndo. Te ní xini-í ìⁿ xichi núu ndèe tnuní quidé cahnu-ndo Yá Ndiòxí Yá ñá tuú xini-ndó, te diu-ni ducaⁿ càháⁿ lètrá ndèe tnuní xíáⁿ, te càchí-xi: “Iha quide cahnu-ndí Ndiòxí sá ñá tuú xini-ndí”, duha càháⁿ lètrá-áⁿ. Te quide cahnu-ndo Yá Ndiòxí càháⁿ-ndó, dico ná tuú xini-ndó nàsa càa-gá, te yúhu xini ndáá-í nàcuáa càa Yá Ndiòxí, chi diu-ni Yá Ndiòxí càháⁿ ndihi-í, te diu tnúhu-gá càháⁿ-í vitna.

²⁴ Te diu Yá Ndiòxí ní cadúha-gá ñuyúú-a ndihi nchaa sá ío, núu diu-gá cúú Xí-tohó ñuyúú-a ndihi andiu. Te ñá tuú xini ñuhu-gá vehe dàcaa ñáiyu ñuyúú-a cundecu-gá. ²⁵ Te ñá tuú xini ñuhu-gá ñáiyu chindee ñàhá-yu xii-gá, chi mee-gá quidé-gá nchító-ó ndècu-o te tàxi-gá yócó tächí-ó ndihi nchaa sá xini ñuhu-o.

²⁶ Te ndée sanaha ní cadúha-gá ìⁿ dii-ni tée, te diu-ni níñí-dè cúú ñáiyu ndècu nicaxico ñuyúú. Te diu-ni mee Yá Ndiòxí ní xáhaⁿ-gá nchaa núu cùndècu-yu, te mee-gá ní cáháⁿ-gá ná daha cuía cudíi nchaa nacióⁿ ndihi mèe-yu. ²⁷ Te cuini-gá sá ncháá ñáiyu nanducu ñàhá-yu càháⁿ ndihi ñàhá-yu xii-gá, te mee-gá ndécú tũha-gá sá càháⁿ ndihi ñaha-gá xii-yu ìⁿ ìⁿ-yu. ²⁸ Te diu-ni Yá Ndiòxí xitó ñaha-gá xii-yu núu cudíi-yu ndècu-yu te càndá-yu. Te duha ní cáháⁿ ìⁿ ñaní tnáhá-ndó, tée ní cutnùní iní-xi ní xindecu ndée sanaha, te ní xáhaⁿ-dè xii-yu: “Nchaa-o cùu-o déhe Yá Ndiòxí”, duha ní xáhaⁿ-dè xii-yu. ²⁹ Te núu déhe Yá Ndiòxí cúú-yu nchaá-yu, te vá cúú càháⁿ-yu sá Yá Ndiòxí cúú sá ní cadúha-yu ndahá-yu. Te sá ní cadúha-yu cùu ndiòxí-yu-áⁿ, dava cùu-xi díhúⁿ cuááⁿ, dava cùu-xi díhúⁿ cuixíⁿ, dava cùu-xi yúú. Te mèe-yu ní cahu iní-yu nàcuáa cunduu sá cúú ndiòxí-yu. ³⁰ Te cùtnàhá ñá tuú ní cùtnuní iní-yu sá nehé ní quidé-yu ní cadúha-yu nchaa xíáⁿ, te ñá tuú ní quide cuendá Yá Ndiòxí sá dúcáⁿ ní quidé-yu. Te vitna càchí Yá Ndiòxí sá ñáñá nchaa ndí túhú-yu nchaa sá cuéhé sá dúhá quidé-yu. ³¹ Te Yá Ndiòxí nàhá-gá ná nduu cùndecu nchaa ñáiyu núu-gá, te mee-gá sa nàha-gá ndèndida càa ñáiyu ní quide váha, te ndèndida càa ñáiyu ñá tuú ní quide váha. Te mee-gá ní xáhaⁿ-gá xii Déhe-gá Yá ñaní Jèsús cúnaha-gá xii-yu núu ndèndida càa-yu ní quide váha te ndèndida càa-yu ñá tuú ní quide váha. Te mee Jèsús càháⁿ ndáá cuiti-gá, te sa nàha-o sá ncháá xíáⁿ cada Jèsús, chi diu cuendá-áⁿ ní dándótó ñaha Yá Ndiòxí xii-gá —càchí té Páblú xáhaⁿ-dè xii-yu.

³² Te òré ní cáháⁿ té Páblú sá ní ndoto Jèsús, te dava ñáiyu ñá ní tnàhá iní-xi tnúhu ní cáháⁿ-dé ní cáháⁿ yíchi-yu. Te davá-yu ní xáháⁿ-yu xii-dé:

—Te ingá xito quixi-n, te cáháⁿ tucu-n tnúhu ní cáháⁿ-n vitna —cachí-yu xáháⁿ-yu

xii-dé.

³³Te ní xica-dé cuáháⁿ-dé. ³⁴Te dava ñáyiú ní xíndedóho tnúhu ní cáháⁿ té Páblú ní sándáá iní-yu Jèsús, te ní chindee tnúhu ñáhá-yu xii-dé. Te ñⁿ té cùchiuⁿ Areópagú nání-dé Nixú ndihi ñⁿ ñadihi nání-áⁿ Dámarís, tnàhá-yu ní sándáá iní-yu tnúhu-gá ndihi dava-gá-yu.

18

Té Páblú ndécú-dé ñuú Còrintú

¹Te té Páblú ní quee-dé ñuú Àtenás cuáháⁿ-dé ñuú Còrintú. ²Te yàcáⁿ ní naníhi tnàhá-dé ndihi ñⁿ té isràél nání-dé Àquilú, te té-áⁿ cúú-dé té distritú Pòntó, te ní xíndecu-dé ndihi ñadihi-dé tá Priscilá ñuú Rómá. Te té Césár té yindaha cuéhé nà-ción, té nani Claudiú ní xáhaⁿ-dè sá vā cúú-gā cundecu ñáyiú isràél ñuú Rómá, te xíáⁿ núú ní ndee té Àquilú ndihi ñadihi-dé cuáháⁿ-yu ñuú Còrintú. Te sácú-ni nduu ní cuu sá ní quexió-yu ñuú-áⁿ, te ní sáháⁿ té Páblú ní ndatnúhu ndihi ñaha-dé xíí-yu vehé-yu. ³Te ní xáhãⁿ-yu sá cundecu-dé cada chiúⁿ ndihi ñáhá-yu, chi ñⁿ-ni chiúⁿ quide-dé ndihí-yu, te ní xóo dacáá-yu vehe dóó. Te núú xíáⁿ ní xíndecu ndihi ñaha té Páblú ní quide chiúⁿ ndihi ñaha-dé xíí-yu. ⁴Te núú ùná núú ùná nduu, nduu ndè-tatú-yu, ní xóo quíhíⁿ-dé veñúhu ñáyiú isràél. Te ní ndatnúhu-dé ndihi ñáyiú isràél ndihi ñáyiú ñá túú cùu ñáyiú isràél, te ní xáhaⁿ-dè sá quíndáá iní-yu tnúhu Jèsús.

⁵Te té Silás ndihi té Timùteú ní quee-güedé distritú Macèdoniá cuáháⁿ-güedé núú ndécú té Páblú. Te òré ní quexio-güedé, te ní cáháⁿ-ni té Páblú tnúhu Yá Ndióxi núú ñáyiú isràél, te xáhaⁿ-dè xíí-yu sá Jèsús cúú-gā Cristú Yaa ní tendaha Yá Ndióxi ní quixi ñuyúú-a. ⁶Te sá dúcáⁿ ní cáháⁿ-dè núu ní nàa ndihi ñáhá-yu xii-dé, te ní cáháⁿ cuéhé-yu cuèndá-dé, núú xíáⁿ ní naquidi-dé dóó-dè. Te ducaⁿ ní quide-dé cuèndá sá cútñuní iní-yu sá ñã ní tnàhá iní-dé nàcuáa ní cáháⁿ-yu, te ní xáhaⁿ-dè xíí-yu:

—Yúhú ñá túú cuéchi-í, te núú ní xíta nihnu-ndo, xíáⁿ quèndóo cuéchi mee-nã-ndó. Te vitna quíhíⁿ-í cáháⁿ ndihí-í ñáyiú ñá túú cùu ñáyiú isràél, te vā nánducu-gá-í nchòhò ñáyiú isràél cáháⁿ

ndihi ñaha-í xii-ndo —càchí-dé xáhaⁿ-dè xíí-yu.

⁷Te ní xica-dé cuáháⁿ-dé vehe ñⁿ té nani Justú, te té-áⁿ ndécú yàtni-dé núú cáá veñúhu, te tnàhá-dé cáháⁿ ndihi-dé Yá Ndióxi. ⁸Te té Crispú té yindaha veñúhu-áⁿ ní sándáá iní-dé Jèsús ndihi ñadihi-dé ndihi landú-dé. Te vāi ñáyiú ñuú Còrintú ní sáháⁿ-yu ní xíndedóho-yu tnúhu-gá, te ní sándáá iní ñáhá-yu xii-gá, te ní sanduté-yu. ⁹Te ñⁿ níu ní cáháⁿ saní té Páblú sá ní xáhaⁿ Yá Ndióxi xii-dé:

—Cáháⁿ-ni-n tnúhu-í, te vā yùhú-n nchàa tnúhu cuéhé tnúhu duha càháⁿ ñáyiú, ¹⁰chi yúhú chindee ñaha-í xii-n, te vā yóo ñⁿ cada úhú ñáhá xii-n, te vāi-gá ñáyiú ñuú-áⁿ quíndáá iní-yu tnúhu-í —càchí-gá xáhaⁿ-gá núú sàni-dé.

¹¹Te ñuú Còrintú ní xíndecu té Páblú ñⁿ cuía dava, te mee-ni tnúhu Yá Ndióxi ní xóo dacuáha-dé ñáyiú.

¹²Te ndècu-gá-dé ñuú-áⁿ ní ngóo té Gàlìon chiúⁿ taxi tnuní-dé distritú Acáyá. Te dàvã-áⁿ ní cudééⁿ ñáyiú isràél núú té Páblú, te ní tñi ñáhá-yu xii-dé ndécá ñáhá-yu cuáháⁿ núú cuè té cùchiuⁿ. ¹³Te ní xáhãⁿ-yu xii té Gàlìon té cùu gobiernú:

—Té-a ní quexio-dé ñuú-ó xica cuu-dé te cuini-dé dandàhú ñáhá-dé chitnahá-ndí-dé cada-ndí nàcuáa quide-dé quidé càhnu-dé Ndióxi-dé, te daña-ndí vā cádá-gã-ndí nàcuáa càháⁿ tnúhu sá sánú ichi ñaha xii-o nàcuáa cundecu-o cuini-dé —càchí-yu xáhãⁿ-yu xii té cùu gobiernú.

¹⁴Te té Páblú cuini-dé cani-dé cuèndú ní cùu, te ní ngúita té Gàlìon cáháⁿ-dé, te xáhaⁿ-dè xíí-yu:

—Nchòhò ñáyiú isràél, cundedóho-ndo tnúhu na càháⁿ-í-a. Te núú ndècu núú ñⁿ cuéchi ní quide-dé àdi ní sahi-dé ñⁿ ndíyi, te cuu cundáá-xi iha, te cáháⁿ-ndó núu nándi cùu sá ní quide-dé, ¹⁵àdi dico-ni sá ñⁿ tnúhu ní cáháⁿ-dé, te yáchi-gá chí cuáháⁿ yàcáⁿ ndatnúhu-ndo núú méé-ndó, chi mee-ni sã ñà túú quide-dé nàcuáa càháⁿ tnúhu sá sánú ichi ñaha xii-ndo cáháⁿ-ndó, te yúhú ñá túú tnàhá iní-í cada ndáá-í nchaa xíáⁿ —càchí-dé xáhaⁿ-dè.

¹⁶Te ní cudééⁿ-dè, te ní ndeñuhu ñaha-dè xíí-yu vechiúⁿ. ¹⁷Te ñáyiú ñá túú cùu ñáyiú isràél ní tñi-yu té Sòstenés té yindaha veñúhu ñáyiú isràél, te ndèhe té Gàlìon

tée cùu gobiernú ní canihá-yu xii-dé, dico ñá túú tñahí ná tñúhu ní cáháⁿ-dé tauni-hnu-dé tée ní caní-yu-áⁿ.

Té Páblú cuáháⁿ tucu-dé ñúu Antiòquia, te yacáⁿ ní xica tucu-dé cuáháⁿ-dé dava-gá ñúu cáháⁿ-dé tñúhu Yá Ndiòxí

¹⁸ Te titní-gá nduu ní xindecu té Páblú ñúu Còrintú, te ní quide ndee iní-dé nchaa ñáyíu ní sándáá iní-xi tñúhu Jèsús, te ní tñii-dé ichi cuáháⁿ-dé distritú Siríá ndihi té Àquilú ndihi ñadhí té Àquilú-án tá Priscilá, te ní quexió-yu ñúu Cèncreá. Te cùmání-gá tñii-yu ichi quíhíⁿ-yu ñúu Éfesú, te ní dètè díquí té Páblú, chi ducaⁿ ní xáhaⁿ-dè xii Yá Ndiòxí sá ndéé xínu ìⁿ chiúⁿ ní sani iní-dé cada-dé cuendá-gá, te dätñuní dètè-dé. Te ní quée-yu bàrcú cuáháⁿ-yu. ¹⁹ Te ní quexió-yu ñúu Éfesú, te yacáⁿ ní xáhaⁿ té Páblú sá cündècu té Àquilú ndihi ñadhí-dé, te mee-dè quíhíⁿ-dé dava-gá ñúu. Te cùmání-gá caca-dé quíhíⁿ-dé, te ní sáháⁿ-dé veñúhu ñáyíu isràél ní ndatnúhu ndihi ñaha-dè xii-yu. ²⁰ Te ní xáhãⁿ-yu sá cündècu-dé titní nduu, te ñá ní cuiní-dé cundecu-dé. ²¹ Te ní xáhaⁿ-dè:

—Núhú-í chi dacuítí xini ñuhu-xi cundecu-í vico coo ñúu Jerusalén, te quixi tucu-í te núu Ndiòxí ná cächí-gá, te vitna chí cáda ndèe iní —cächí-dé xáhaⁿ-dè xii-yu.

Te ní quée-dé bàrcú cuáháⁿ-dé. ²² Te ní quexió-dé ñúu Cèsareá, te ní quene-dé bàrcú, te ní xica-dé cuánuhú-dé ñúu Jerusalén, te ní ndexió-dé, te ní dándácóo váha-dé ñáyíu ndècu ichi Yá Ndiòxí, te dätñuní ní xica-dé cuáháⁿ-dé ñúu Antiòquia. ²³ Te yacáⁿ ní xindecu-dé titní nduu, te dätñuní ní tñii-dé ichi cuáháⁿ-dé. Te ní sáháⁿ-dé ñihí distritú Gàlaciá ndihi distritú Frigiá. Te ndi tñahá ñúu ní sáháⁿ-dé ní cáháⁿ-dé ndihi ñáyíu sándáá iní tñúhu Yá Ndiòxí, te ní ndúcú ndéé-gã-yu ní quidé-yu nchaa nàcuáa ní xáhaⁿ-dè cáda-yu.

Té Àpolós cáháⁿ-dé tñúhu Yá Ndiòxí ñúu Éfesú

²⁴ Te dàvãⁿ ní quexio ìⁿ tée isràél ñúu Éfesú, te nani-dé Àpolós, te cùu-dé tée ñúu Alejandriá, te ío váha túha-dé tñúhu Yá Ndiòxí, te ío váha ñuhu díquí-dè nàcuáa cáháⁿ-dé, ²⁵ chi sa xini-dé nàcuáa ní xóo cáháⁿ ndí Juáa cúnahá ní xóo dacuandute

ndí ñáyíu. Te ío ní cudíí iní-dé ní cáháⁿ-dé nchaa nàcuáa ní cuu cuendá Jèsús, dico vátã dácuaãha-gã-dé nchaa tñúhu ní cáháⁿ mée Jèsús. ²⁶ Te ní sáháⁿ-dé veñúhu ñáyíu isràél, te yacáⁿ ní cáháⁿ-dé ní yùhu ní iní-dé. Te ndècu té Àquilú ndihi ñadhí-dé tá Priscilá ndèdóho-yu tñúhu ní cáháⁿ-dé, te ní xáhãⁿ-yu sá quíhíⁿ-dé vehé-yu, te ní sáháⁿ-dé, te ní xftñúhu ñahá-yu xii-dé dava-gá tñúhu Yá Ndiòxí sá ñã túú xini-dé. ²⁷ Te ní cächí té Àpolós sá quíhíⁿ-dé distritú Acáyã, núu xiãⁿ ní cadúha ñáyíu ñúu Éfesú ìⁿ tutú canehe-dé quíhíⁿ ndaha ñáyíu sándáá iní tñúhu-gã xindecu Acáyã. Te xáhãⁿ-yu núu tütú-yu: “Cáháⁿ váha-ndo ndihi té Àpolós núu ní quexio-dé”, cächí-yu xáhãⁿ-yu núu tütú-yu. Te ní xica-dé cuáháⁿ-dé, te ní quexio-dé Acáyã. Te nchaa ñáyíu sándáá iní tñúhu-gã yacáⁿ, diu-ni mee Yá Ndiòxí ní chindee ñaha-gã ní sándáá iní ñahã-yu xii-gã. Te té Àpolós ío váha ní cáháⁿ-dé tñúhu Yá Ndiòxí núu-yu, te xiãⁿ ío ní ndúcú ndéé-gã-yu ní quidé-yu chiúⁿ-gã. ²⁸ Te té Àpolós ní ndatnúhu-dé ndihi ñáyíu isràél, te ní xindecódho dava-gã-yu. Te ío váha ní caní-dé cuendú nchaa nàcuáa ní xóo cáháⁿ cue tée ndéé sanaha sã quíxí Crístú ñuyíú-a. Te ní cáháⁿ ndáá-dé ní xáhaⁿ-dè sá diú-ní Jèsús cúu-gã Crístú Yaá ní tendaha Yá Ndiòxí ní quixi ñuyíú-a. Te ñáyíu isràél xindatnúhu-yu sá ñã ndáã nàcuáa cáháⁿ-dé, dico ñã ní ñihí-yu tñúhu cúnahá-yu xii-dé, chi ío váha ñuhu díquí-dè tñúhu cáháⁿ-dé.

19

Té Páblú ndécú-dè ñúu Éfesú

¹ Te cúnahá ndécú-gã té Àpolós ñúu Còrintú, te ní xica té Páblú cuáháⁿ-dé tá yáha-dé mee-ni xití yucu cuáháⁿ, te ní sáá-dé ndéé ñúu Éfesú. Te ñúu-án ní naníhí tñahá-dè ndihi cue tée sándáá iní tñúhu Jèsús. ² Te ní xicáⁿ tñuhú-dè núu-güedè, te xáhaⁿ-dè:

—¿Sa ní quexio Espíritú Yá Ndiòxí ní ngündecu ndihi-ndo ndéé òrè ní sándáá iní-ndó Jèsús-ã? —cächí-dé xáhaⁿ-dè xii-güedè.

Te ní xáhaⁿ-güedè:

—Ñã túú xini-ndí sá ío Espíritú Yá Ndiòxí —cächí-güedè xáhaⁿ-güedè xii-dé.

³ Te ní xáhaⁿ tùcu-dé:

—¿Nása ní cáháⁿ téé ní dácúándùte ñaha xii-ndo-í? —cächí-dé xáhaⁿ-dë xii-güedé.

Te ní xáhaⁿ-güedé:

—Ní cáháⁿ-dé nàcuáa ní xóo cáháⁿ ndíi Juàá —cächí-güedé xáhaⁿ-güedé xii-dé.

⁴ Te ní xáhaⁿ tã Pãblú:

—Ndíi Juàá ní dácúándùte ñaha ndíi xii ñáiyi, chi ní cuini-yu sá dáñã-yu nchaa sá cuèhé sá dúhá quidé-yu. Te ní xáhaⁿ ndíi xii-yu: “Quindáá iní-ndó tñuhu Jèsús chi dacutíi quixi-gá ñⁿ nduu”, duha ní xáhaⁿ ndíi Juàá xii-yu —cächí té Pãblú xáhaⁿ-dë xii-güedé.

⁵ Te sá dúcáⁿ ní cáháⁿ té Pãblú xáhaⁿ-dë xii-güedé, núu xiãⁿ ní sandute-güedé nàcuáa ní dándõo tñuhu Jèsús. ⁶ Te ní sacáⁿ ndodo té Pãblú ndahá-dé díquí-güedé, te òrè-ní ní quexio Espiritú Yá Ndiõxí ní ngündecu ndíhi-güedé, te ní ngúita-güedé ní cáháⁿ-güedé tñuhu sá dácàhu iní ñáhá Espiritú-gá, tñuhu sá ñà túu xini-güedé cáháⁿ-güedé, te ní cáháⁿ-güedé tñuhu Yá Ndiõxí nàcuáa ní dácáhu iní ñáhá Espiritú-gá xii-güedé. ⁷ Te cùu datná úxúú tñahá-güedé.

⁸ Te té Pãblú ní sáháⁿ-dé veñuhu ñáiyi isràél ní cáháⁿ ndíhi-dé-yu, te úní yóó ní xínu ní xica cuu-dé veñuhu-yu. Te ío váha ñuhu díquí-dë tñuhu cáháⁿ-dé, núu xiãⁿ ní cuyii-dë ní cáháⁿ-dé, te ní xáhaⁿ-dë sá quindáá iní-yu tñuhu Jèsús, te ducaⁿ te ndíhu ndaha ñaha Yá Ndiõxí xii-yu. ⁹ Te davá-yu ío sàà iní-yu ñá ní cuini-yu quindáá iní-yu, te ío ní cáháⁿ cuèhé-yu cuendá Jèsús xití veñuhu núu dàva-gá-yu. Te té Pãblú ní ndee-dé veñuhu cuáháⁿ-dé ndíhi ñáiyi sàndáá iní tñuhu Jèsús. Te ñⁿ nduu ñⁿ nduu ní sáháⁿ-dé scuèlá té Tiranú ní dácúáhá ñaha-dé xii-yu. ¹⁰ Te úu cuíá ducaⁿ ní sáháⁿ-dé scuèlá ní dácúáhá-dë ñáiyi. Te nchaa ñáiyi isràél ñáiyi ndècu nihíi distrítú Àsiá ndíhi nchaa ñáiyi ñá túu cùu ñáiyi isràél ní xíndedõho-yu tñuhu Jèsús. ¹¹ Te té Pãblú ío ní chindee ñaha Yá Ndiõxí xii-dé ní quide-dé vèi núu sã vã yõo tñahí ndàcu cada. ¹² Te pãnú díquí-dë ndíhi dóó cándèè núu yíquí-dë ní xicáⁿ-yu nèhé-yu ní sáháⁿ núu ndécú ñáiyi cùhú, te xiãⁿ ní tñii ñáiyi cùhú ndíhi ñáiyi yíhi ñaha espíritú cùndíhi yucu ñávãha, te ní ndúha-yu.

¹³ Te ñuú Isràél véxi cue tée tatna xica cuu-güedé quidé tãtna-güedé ñáiyi yíhi ñaha espíritú cùndíhi yucu ñávãha. Te ní ngúita-güedé ní cacu nèhe-güedé Jèsús cuendá quee espíritú-án yiqui cùnú-yu, te ní xáhaⁿ-güedé:

—Xocuñí-n, chi cächí Jèsús sá vã cùndècu ndíhi-gá-n tée-a. Te ñu-ni Jèsús cacú nèhe té Pãblú òrè cáháⁿ-dé tñuhu-gá —cächí-güedé xáhaⁿ-güedé xii espíritú-án.

¹⁴ Te úsá tñahá-güedé ducaⁿ ní xóo cada-güedé. Te tãtà-güedé ní xínani-dë Èsevá, te tée-án ní cuu-dé dütú cùnú. ¹⁵ Te sá dúcáⁿ ní cáháⁿ-güedé, te ní xáhaⁿ espíritú cùndíhi yucu ñávãha-án xii-güedé:

—¿Te ná cúu nchòhó ñu dayùhú ñáhá-ndó? Te xini-í Jèsús, te xini-í yoo cùu té Pãblú, te nchòhó ñá túu xini ñáhà-í xii-ndo —cächí espíritú-án xáhaⁿ-xi xii-güedé.

¹⁶ Te tée yíhi ñaha espíritú cùndíhi yucu ñávãha-án ní ndanchita-dé ní tñii-dé cue tée quide tãtna-án, te ní ndíhi dóó-güedé ní ndátá-dë, te ní dánycuèhé ñáhá-dë xii-güedé, te ní xinu-güedé cuáháⁿ-güedé.

¹⁷ Te nchaa ñáiyi isràél ndécú ñuú Èfesú ndíhi dava-gá ñáiyi ndècu ñu-ni ñuú-án ní níhi-yu tñuhu nàcuáa ní cuu, te ío ní yùhú-yu, te vèi-yu ní cachí sá ño càhnu cuu Xítohó Jesucristú.

¹⁸ Te dava ñáiyi ní sàndáá iní-xi tñuhu Jèsús ní sáháⁿ-yu núu ndécú té Pãblú, ndíhi núu ndécú nchaa ñáiyi ní sàndáá iní tñuhu-gá ní náhmá-yu nàcuáa ní xóo cada-yu. ¹⁹ Te titní ñáiyi ní xóo cada ndúu nehé-yu tutú-yu ní sáháⁿ núu ndécú nchaa ñáiyi sàndáá iní-xi tñuhu-gá, te yacáⁿ ní ndada cuendá-yu sá ño yahu ní sáha-yu tutú-yu, chi ndéé údico úxí míl díhúⁿ cuixíⁿ ní sáha-yu núu nchaa. Te nchaa-yu ní sahmí-yu tutú-yu. ²⁰ Te sátá ní cáyú nchaa tutú-án, te vèi-gá ñáiyi ní tuhá-yu ichí Yá Ndiõxí, te ní sáha-yu cuendá sá ño xini ñuhu tñuhu Yá Ndiõxí.

²¹ Te ní cachí té Pãblú sá quíhíⁿ-dé distrítú Macèdoniá ndíhi distrítú Acáyá, te dàtnùní núhú-dé ñuú Jerusálén, te ducaⁿ te dàtnùní quíhíⁿ-dé ñuú Rómá. ²² Te ndècu ndíhi-dé té Timùteú ndíhi té Èrastú cue tée chindee ñaha xii-dé. Te té Pãblú ní xáhaⁿ-dë

xii-güedé sá códo nùu-güedé quíhíⁿ Macèdoniá, te ní xica-güedé cuáháⁿ-güedé, te mee-dé ní quendóo-dé.

Náiyu Éfesú ío dusaⁿ quidé-yu ñuú-yu

²³ Te davá-áⁿ ío ní cudéⁿ-yu núú nchàa ñáiyu ní tuha ichi Yá Ndiòxí. ²⁴ Te ñⁿ téé ñuú Éfesú nání-dé Demètriú. Te téé-áⁿ ní xóo canehe chiuⁿ-dé mee-ni díhúⁿ cuixíⁿ ní xóo cadúha-dé veñúhu líhli, dàtná cuiní-ndó cãa veñúhu Diáná sá cúú ndiòxí-yu. Te vai díhúⁿ ní xóo níhí-dé ndihi cue téé ní xóo cada chiuⁿ ndihi-dé. ²⁵ Te ní cana-dé cue téé quide chiuⁿ ndihi-dé, ndihi nchaa cue téé quide chiuⁿ ndihi díhúⁿ cuixíⁿ, te ní xáhaⁿ-dè xii-güedé:

—Nàha-ndo sá ío váha níhí-ó díhúⁿ cuendá chiuⁿ quide-o. ²⁶ Te nàha-ndo sá cãchí té Pãblú sá ñà díú ndiòxí cúú sã ní cadúha ñáiyu ñuyú-a. Te ducaⁿ cãháⁿ-dé ñuú-ó, te ducaⁿ-ní cãháⁿ-dé níhí distritú Àsiá, te ío-gá vai ñáiyu sãndáá iní tñúhu cãháⁿ-dé. ²⁷ Te ío úhú núu na cuíta chiuⁿ quide-o, vá yóo-gá cuaaⁿ sá cadúha-o. Te nguíta-yu cãháⁿ-yu sá veñúhu Diáná ñá túú cãváha, te vá cadá cãhnu-gá-yu sãndú-ó. Te nàha-ndo sá ío cãhnu cuu Dianá, chi nchaa ñáiyu distritú Àsiá quidé cãhnu ñahá-yu ndihi ñáiyu xindecu ní cãa xico ñuyú —cãchí té Demètriú xãhaⁿ-dè xii-güedé.

²⁸ Te sá dúcáⁿ ní cãháⁿ té Demètriú, xíãⁿ ní cudéⁿ-güedé núú tã Pãblú, te uuⁿ ní ní cuáá-güedé te cãchí-güedé:

—Ío cãhnu cuu Dianá sãndú ñáiyu Éfesú! —cãchí-güedé.

²⁹ Te nchaa ñáiyu ñuú Éfesú ndí coyo ndi coyo-yu xicãháⁿ-yu. Te tñháá úú cue téé distritú Macèdoniá xicá cùu-güedé ndihi té Pãblú, ñⁿ-dé nání-dé Gãyú, te ñⁿ-dé nání-dé Aristarcú. Te ní tñii-güedé úú cue téé-áⁿ, te cuãnguihu coyo ndihi ñaha-güedé vehe núú quidé-güedé jundá. ³⁰ Te té Pãblú cuiní-dé quíhu-dé tñháá-dé vehe-áⁿ cãháⁿ ndihi ñaha-dè ní cùu, te ñá ní dàña cue téé ní sãndáá iní tñúhu-gá. ³¹ Te ñⁿ úú cue téé cùnuu distritú Àsiá ní cãháⁿ váha-güedé cuendá té Pãblú, te ní xáhaⁿ-güedé xii ñⁿ téé xinu cuechi núú-güedé ní sãháⁿ-dé ní xáhaⁿ-dè xii té Pãblú sá vã quíhu-dé vehe núú quidé-güedé jundá. ³² Te uuⁿ ní ní cuáá-yu nchaa-yu, te ñá ñⁿ-ní tñúhu ní cãháⁿ-yu, chi ndí dííⁿ tñúhu ní cãháⁿ-yu ñⁿ ñⁿ-yu. Te chitu-gã ñáiyu ñá ní cùtnuní

iní-yu ná cuendá ní dátacã ñáhá-güedé xití vehe-áⁿ, chi ñá ñⁿ-ní tñúhu ní cãháⁿ-yu.

³³ Te davá-yu ní cãháⁿ-yu sá cuèchi té Lì-jandrí cúú-xí, chi ní xáhaⁿ ñáiyu isràel xii-dé sá cãháⁿ-dé yuhú-yu chindee tñúhu ñaha-dè xii-yu. Te ní quide-dé ndaha-dé núu-yu sá cùndedóho-yu tñúhu cãháⁿ-dé chindee tñúhu ñaha-dè xii-yu yòtñúhu.

³⁴ Te ní cutnùní iní-yu sá téé isràel cúú-dé, te uuⁿ ní ní cuáá tucú-yu, ñá ní dàñá-yu cãháⁿ-dé, te cãchí-yu:

—Ío cùnuu Dianá sãndú ñuú Éfesú! —cãchí-yu. Te dàtná úú òré ñⁿ-ni tñúhu ní cãháⁿ-yu.

³⁵ Te téé cùu secretariú-ni-gá ní cãháⁿ-dé, te dàtnùní cuèé cuèé ní sadí-yu yuhú-yu. Te ní xáhaⁿ-dè xii-yu:

—Nchaa-ndo cùndedóho-ndo ñⁿ tñúhu na cãháⁿ-i-a. Ío cùnuu Dianá, te nchaandi túhú ñáiyu sa nãhá-yu sã nchãá-ó ío nèhe cuendá-ó veñúhu-áⁿ. Te nãhá-yu sá néhé cuendá-ó sãndú-áⁿ, chi véxi cuuⁿ-gá andiu. ³⁶ Te vá yóo ñⁿ cãchí sá ñã ndãá. Te coto-ndo mée-ndo, te vá cuidó-ndó cãda-ndo, te vá cuidó-ndó cãháⁿ-ndó. ³⁷ Te ná cuendá ndécã-ndó cuè téé-áⁿ véxi, te ñá túú nã ní quide-güedé, te ñá túú nã ní dùhu-güedé veñúhu, te ñá túú cãháⁿ cuèhé-güedé cuendá Diáná. ³⁸ Te núu ío yoo nãá ndihi ñaha xii té Demètriú ndihi cue téé quide chiuⁿ ndihi-dé, te quíhíⁿ-güedé cacáⁿ cuèchi-güedé núú cuè téé cùchiuⁿ. Te cue téé cùchiuⁿ na cundoho-güedé núu quehndé-güedé cuèchi-yu àdi ñãhá. ³⁹ Àdi ío-gá ná cuendú ñúhú ñni-ndó, te cãháⁿ-ndó òré ná cóo jundá. ⁴⁰ Te ío úhú núu na níhí téé tàxi tñuní ñãhá xii-o tñúhu sá dúhá ío quide dusaⁿ-o, te cachí-dé sá ndècuèchi-o chi ñá túú sãndáá iní-ó-dè quesaha-dè. Te ñá túú tñàhí ndùu váha-xi sá dúhá cãda-o ni cuu, te vitna duha ní quide-o, te ñá cùtnùní iní-ó nãsa cùñaha-o xii téé tàxi tñuní ñãhá xii-o núu na cãna ñaha-dé —cãchí téé cùu secretariú xãhaⁿ-dè xii-yu.

⁴¹ Te ní xáhaⁿ-dè sá nùhú-yu te ní ndihí-yu cuãnuhú.

20

Té Pãblú cuáháⁿ-dé distritú Macèdoniá ndihi distritú Grèciá

¹ Te òré ñá túú-gã ní quide dusáⁿ-yu, te ní cana ñaha té Pãblú xii nchaa ñáiyu

sàndáá iní tnúhu Jèsús ní cáháⁿ-dé dóho-yu nàcuáa cadá-yu. Te ní quide ndee iní ñàhá-dě xii-yu, te ní tñii-dé ichi cuáháⁿ-dé distritú Macèdoniá. ²Te tayàha-dé cuáháⁿ ìⁿ ìⁿ ñuú yìndèhu Macedoniá. Te càháⁿ-dé dóho nchaa ñáyiú sàndáá iní tnúhu Jèsús nàcuáa cadá-yu, te ní cudíí iní-yu cadá-yu nàcuáa càháⁿ Yá Ndiòxí cadá-yu sá dúcáⁿ ní cáháⁿ-dé dóho-yu. Té ní quexio-dé distritú Grèciá. ³Te xíáⁿ ní xíndecu-dé úní yóó. Te xíáⁿ quèe-dé bàrcú quíhíⁿ-dé distritú Siriá ní cùu, te ní níhí-dě tnúhu sá ndétú ñàha ìⁿ úú cue tée isràél cahni ñàha-güedě xii-dé ní cùu, núu xíáⁿ ní tñii-dé ichi cuáháⁿ-dé ní yàha-dé ichi distritú Macèdoniá. ⁴Te cuáháⁿ ndihi-dé té Sopàtér tée ñuú Bèrea, ndihi té Aristarcú, ndihi ìⁿ tée nàni Segundú. Te ndi ndúú cue tée-áⁿ cúu-güedě cue tée ñuú Tesalónicá. Te tnàhá té Gàyú tée ñuú Dèrbé, ndihi té Timùteú cuáháⁿ ndihi-dé, te tnàhá té Tìquicú ndihi té Trò-fimú cuáháⁿ ndihi-dé, te úú cue tée-áⁿ cúu-güedě cue tée distritú Àsiá. Te nchaa cue tée-áⁿ cuáháⁿ ndihi-güedé té Pàblú. ⁵⁻⁶Te ní quexio-güedé ñuú Filipú, te yàcáⁿ ní naníhí ñàhá-güedě xii-ndí. Te té Pàblú ní tendaha-dě cue tée ndihi-dé cuáháⁿ-güedé ñuú Tròás, te ní xàhaⁿ-dě sá díú-ní yàcáⁿ cundetu ñàha-güedě xii-ndí. Te ní ndóo-í ndihi-dé, te ní xíndecu-ndí vico xèxi-yu pàá sá ñà túú yìhí levadurá. Te sáta ní yàha vico, te ní quée-ndí bàrcú cuáháⁿ-ndí, te ní xúhuⁿ-ndí ichi úhúⁿ nduu, te ní quexio-ndí ñuú-áⁿ. Te yàcáⁿ ní naníhí tnàhá-ndí ndihi cue tée yòdo nuu cuáháⁿ ní xíndecu-ndí úsá nduu.

Té Pàblú cuáháⁿ ngándihi-dé ñáyiú ñuú Tròás

⁷ Te ìⁿ nduu ndumìngú ní naníhí tnàhá-ndí ndihi nchaa ñáyiú ní sàndáá iní-xi tnúhu Jèsús ní xexi-ndí pàá ndihí-yu. Te ducaⁿ ní quide-ndí, chi ní cachí Jèsús sá dúcáⁿ càda-o cuendá sá vā nàcuànaa-o sá ní xíhí-gá cuendá naníhí tàhú-ó. Te té Pàblú ní ngüíta-dé càháⁿ-dé tnúhu-gá, te càháⁿ-dé ní cuu dava niú, chi cuendá ná tñndaá ingá nduu-áⁿ, te caca-dé quíhíⁿ-dé ingá xichí. ⁸Te ndécú-yu vehe yòdo tnaha, te yìhí-yu ndéé cuàrtú cúú ùní núu ñinu, te càyú víhí ñùhú xití cuàrtú-áⁿ. ⁹ Te

ìⁿ tée sa ta cùu sacuéhé luha nàni-dé Eùticú núcòo-dé yèhe ventaná, cuiní-dé cúdú-dé, chi ní cunaha vihi caháⁿ té Pàblú, te ní tñii ñàha sàni xii-dé ní xidí-dé, te ní ngava-dé ndéé ñuhu. Te ní nuú-yu núú ñùhú cuendá ndacani ñàhá-yu, te sa ní xíhí-dé, chi ío dúcúⁿ ní ngava-dé. ¹⁰ Te tnàhá té Pàblú nchicúⁿ-dé ní nuu. Te ní quexio cunu-dé núú càtúu tée ní xíhí-áⁿ, te ní numi ñàha-ni-dě, te ní xàhaⁿ-dě xii-yu:

—Vá ndíhú iní-ndó, chi ní ndoto-dé — cächí-dé xàhaⁿ-dě xii-yu.

¹¹ Te dàtnùnì cuànḡaa ndihi ñàha tùcu-dé xii-yu cuàrtú núú yìhí-yu ní cùu, te yàcáⁿ ní xexi ndihi ñàha-dě xii-yu, dàtnùnì ní ngüíta-dé vāi-gá tnúhu ní cáháⁿ-dé, te càháⁿ-ni-dé ní tñndaá, te dàtnùnì ní xica-dé cuáháⁿ-dé. ¹² Te tée ní ngava-áⁿ ní sánún-deca ñàhá-yu xii-dé ndéé vehe-dé, te ío ní cudíí iní-yu sá ní ndoto-dé.

Ní quée-güedé ñuú Tròás cuáháⁿ-güedé ñuú Miletú

¹³ Te té Pàblú ní cachí-dé sá quíhíⁿ-ndí ndihi bàrcú ndéé ñuú Àsón, te mee-dě caca saha-dě, te yàcáⁿ naníhí tnàhá-ndí ndihi-dé te quée-dé bàrcú, te ní quée-ndí bàrcú cuáháⁿ-ndí. ¹⁴ Te ní naníhí tnàhá-ndí ndihi-dé ñuú Àsón, te yàcáⁿ ní quée-dé bàrcú tnàhá-dé cuáháⁿ-ndí ñuú Mitilené. ¹⁵ Te ní quexio-ndí ndéé ingá nduu yatni ñuú Quíú, te ndéé nduu tñéé ní quexio-ndí ñuú Sámú te yàcáⁿ ní yàha-ndí, te ní quexio-ndí ñuú Trògìliú. Te ndéé nduu ìdá ní quexio-ndí ñuú Miletú. ¹⁶ Te té Pàblú ñà ní cuiní-dé yàha-ndí ñuú Éfesú, chi ñà túú ní tnàhá iní-dé cuyaa-dé ichi, chi ío ndíhí iní-dé cuendá cuiní-dé quini-dé ñuú vá ndácú-dě ndexio-dé ñuú Jerusalén cundecu-dé vico Pentecòstés.

Té Pàblú càháⁿ ndihi-dé cue tée yìndaha ñàha xii ñáyiú sàndáá iní tnúhu Jèsús ñuú Éfesú

¹⁷ Te òré ndécú tè Pàblú ñuú Miletú, te ní cana-dé cue tée yìndaha ñàha xii ñáyiú sàndáá iní tnúhu Jèsús ñuú Éfesú sá quíhíⁿ-güedé núú ndécú-dě. ¹⁸ Te sáta ní quexio-güedé, te ní xàhaⁿ-dě xii-güedé:

—Nàha-ndo nacuáa ní quide-í ndéé cút-ñàhá ní quexio-í distritú Àsiá. ¹⁹ Chi ní quide-í nàcuáa ní cáháⁿ Yá Ndiòxí cadá-í,

ñá túú ní tùhío-í, te ñá túú ní quide cahnu-í mée-í, te ío ní ndáhyú-í sá quidé dává-yu, chi ío sàá iní-yu. Te sa nàha-ndo sá títñi xito ní cuini ñáiyu isràél cahni ñàhá-yu xii-í ní cùu, te ío ní ndoho-í ní cácu-í.
²⁰ Te sa nàha-ndo sá ncháándi túhú sa ní cachí tnúhu-í nàcuáa cada-ndo cuendá sá chíndèe ñaha Yá Ndiòxí xii-ndo. Te ní cáháⁿ-í tnúhu-gá núú-ndó ncháa-ndo, te ñu-í ducaⁿ ní quixi-í ndi tnáhá vehe-ndo ní cáháⁿ-í tnúhu-gá núú-ndó. ²¹ Te ní xáhaⁿ-í xii ñáiyu isràél ndihi ñáiyu ñá túú cùu ñáiyu isràél sá dáñá-yu ncha sá cuèhé sá dúhá quidé-yu te quindáá iní-yu tnúhu Xítohó Jesucristú. ²² Te dacuítí quíhíⁿ-í ñuú Jerusalén, chi Espiritú Yá Ndiòxí ní cachí-xi sá dáí quíhíⁿ-í, te ñá túú xini-í nándi cada ñaha-güedé xii-í yacáⁿ te núu na quèxio-í.
²³ Te ñⁿ ñⁿ ñuú núú sàháⁿ-í càchí tnúhu Espiritú-gá sá chíhí ñaha-güedé vecaá, te cada úhú ñàhá-güedé. ²⁴ Dico ñá túú tnàhí ná cuu cuèí na cahni ñaha-güedé xii-í, dico cuini-í sá ñí ñí dandíhí-í ncha sá ní cachí Xítohó Jesucristú cada-í. Te ní cachí Yá Ndiòxí sá cáháⁿ-í núú ñáiyu sá ío cùu iní ñàhá-gá xii-yu, te naníhí tàhú-yu núu na quindáá iní-yu tnúhu-gá.

²⁵ Te sa ní cachí tnúhu-í xii-ndo ncháa-ndo sá núu na quindáá iní-ndó Yá Ndiòxí, te ndíhu ndaha ñaha-gá xii-ndo. Te na càchí tnúhu-í sá ní ñⁿ nduu-gá vá quini ñàhá-ndó xii-í ñuyú-a. ²⁶⁻²⁷ Te yúhú ñá túú cuèchi-í núu ío ñáiyu vá naníhí tàhú, chi sa ní cachí tnúhu-í ncha sá ní cáháⁿ mée Yá Ndiòxí cada-ndo. ²⁸ Te coto-ndo mée-ndo, te coto-ndo tnàhá ñáiyu sàndáá iní tnúhu-gá, chi Espiritú-gá ní cachí-xi sá cùnù-ndo núu-yu dacuàha-ndó-yu tnúhu-gá. Te cada-ndo cuendá sá dàtná mbéé-ndó cùu-yu, te mee-ndo cùu-ndo datná toli xito-ndó-yu ducaⁿ cada-ndo cuendá, chi nàha-ndo sá Jesús ní sati níhí-gá, te ní xihí-gá cuendá naníhí tàhú-ó ndíhí-yu. ²⁹ Te yúhú sa cùnuni iní-í sá òré ñá túú-gá-í ndécú, te quixi ñáiyu dandàhú ñàhá xii-ndo cuendá ñàha-ndo tnúhu Yá Ndiòxí, te cada ñàhá-yu xii-ndo dàtná quidé ñàhá òré tní-í mbéé. ³⁰ Te ñu-í ñⁿ uú cue tée ndècu ndíhí-ndo, cue tée-áⁿ dacuàndehnde-güedé, te cudana dáva-yu quindáá iní-yu chítnàhá ñàhá-yu xii-güedé.

³¹ Te xiáⁿ núu càchí tnúhu-í sá ío quíhí

iní-ndó cùndecu-ndo ndíhí ncha ñáiyu sàndáá iní tnúhu-gá. Te nàha-ndo sá yúhú ní xíndecu-í úní cuíá ní cáháⁿ-í tnúhu Jesús núú ñáiyu cuèí nduu cuèí níu. Te áma ní xóo ndáhyú-í, chi ñá ní cuini-yu quindáá iní-yu nchaá-yu tnúhu ní cáháⁿ-í —càchí té Páblú xáhaⁿ-dè xii-güedé.

³² Te xáhaⁿ tùcu-dé:

—Nchòhò cue tée ndècu ndíhí-í ichi Xítohó Jesucristú, ío cuini-í sá mée Yá Ndiòxí chindee ñaha-gá xii-ndo. Te mee-gá ní cáháⁿ-gá sá ío cùdí ñí ñàhá-gá xii-ndo. Te naníhí tàhú-ndó ndíhí ncha ñáiyu cùu cuendá-gá, te chindee ñaha-gá xii-ndo cuendá cada-ndo ncháa sá cáháⁿ-gá. ³³ Te òré ní xíndecu ndíhí ñaha-í xii-ndo, te ní díhúⁿ ní dóo ñá túú ní cùdí ñí-í. ³⁴ Te mee-ndo sá naha-ndo sá yúhú ní quide chiúⁿ-í, te ní níhí-í ncha sá ní nandíhí-í ndíhí cue tée xica cuu ndíhí-í. ³⁵ Te sa ní xini-ndó nàcuáa ní quide-í ní quide chiúⁿ-í, te ñu-í ducaⁿ cada chiúⁿ-ndo cuendá chindee-ndo ncháa ñáiyu ndàhú, chi sa nàha-ndo nacuáa ní cachí Xítohó Jesucristú, te duha ní cachí-gá: “Cùdí-gá iní-ó cuàha-ò ñáiyu ndàhú sá xini ñhú-yu dàcúxí sá táxí-yu xii mee-o”, duha ní cachí-gá —càchí té Páblú xáhaⁿ-dè xii-güedé.

³⁶ Te sáta dúcáⁿ ní cáháⁿ-dè, te ní ngúñí xítí-dè ndíhí dava-gá-güedé, te ní cáháⁿ ndíhí-dè Yá Ndiòxí. ³⁷ Te sáta ní túhú tnúhu ní cáháⁿ-dè ndíhí Yá Ndiòxí, te ní ndáhyú víhí-güedé sá quíhíⁿ-dè, te ní numi ñaha-güedé, te ní teyuhu ñaha-güedé. ³⁸ Te ní ndíhú víhí ñí-güedé, chi ní xáhaⁿ té Páblú sá ní ñⁿ nduu-gá vá naníhí tnàhá-güedé cáháⁿ ndíhí tnàha-güedé. Te cuáháⁿ ndíhí ñaha-güedé xii-dé núu ndécú bàrcú.

21

Té Páblú cuáháⁿ-dè ñuú Jerusalén

¹ Te ní quide ndee iní-ndí ncha cue tée cùnùu. Te ní quée-ndí bàrcú cuáháⁿ ndáá ichi-ndí ñuú Còs. Te nduu tnèé ní sàháⁿ-ndí ñuú Ròdás, te ní yáha-ndí cuáháⁿ-ndí ñuú Pàtará. ² Te yacáⁿ ní naníhí-ndí ñⁿ bàrcú ñhúhú ichi-xi quíhíⁿ-xi distritú Fèniciá, xiáⁿ ní quée-ndí cuáháⁿ-ndí. ³ Te ichi cuáháⁿ-ndí ní xini-ndí distritú Chìpré cáá cuàdava xítí

lámár, te ní yáha-ndí, te ní quendóo ñúú-án xio dàtni-ndí. Te cuáháⁿ-ndí ñúú Tìrú ñúú ñúú yìndèhu distritú Siríá cuèndá yàcáⁿ tava-güedé nchaa sá nchídó bàrcú. ⁴Te yàcáⁿ ní naníhí tnáhá-ndí ndíhi ñáyíu ní sándáá iní tnúhu Jèsús, te ní xíndecu-ndí úsá nduu ndíhi-yu. Te ní xáháⁿ-yu sá vǎ quíhíⁿ té Pǎblú ñúú Jerusálén, chi Espíritú Yá Ndióxi ní xáhaⁿ-xi xii-yu sá ndóhó vihi-dé ñúu na quíhíⁿ-dé. ⁵Te sáta ní yáha nduu úsá, te ní quee-ndí cuáháⁿ-ndí yuhu lámár. Te ní quee nchaa ñáyíu ní sándáá iní tnúhu-gá, té, ñadíhí, nchaa landú, nchaá-yu ní sándeca ñáhá-yu yuhu lámár, te òré ní quexio-ndí, te ní ngúíni xítí-ndí ní cáháⁿ ndíhi-ndí Yá Ndióxi. ⁶Te ní quide ndee iní tnáhá-ndí ndíhi-yu, te dàtnúni ní quee-ndí bàrcú, te ní naquehéⁿ-yu ichi cuánuhú-yu vehé-yu.

⁷Te ní xica bàrcú ñúhú-ndí ní quee-xi ñúú Tìrú cuáháⁿ-ndí ndíhi-xi ñúú Tolè-maidá. Te xíaⁿ ní sáá-xi te ní quee-ndí, te ní sáháⁿ-ndí ní cáháⁿ ndíhi-ndí nchaa ñáyíu sándáá iní-xi tnúhu Jèsús, te ní xíndecu-ndí ndíhi-yu ñúu nduu. ⁸Te nduu tnéé ní ndee tucu-ndí bàrcú cuáháⁿ-ndí ñúú Cèsareá, te yàcáⁿ ní quee tucu-ndí bàrcú, te cuáháⁿ-ndí vehe té Lipé cundecu-ndí ndíhi-dé. Te téé-án ní xóo cada chiúⁿ ndíhi-dé ñúú-gá cue té ní chindee ñàha xii ñáyíu sándáá iní tnúhu-gá ñúú Jerusálén ní xóo cuáñaha-güedé sá ní xóo caxi-yu. Te dàtnúni mee-nǎ tnúhu Yá Ndióxi cáháⁿ-dé xíca cùu-dé. ⁹Te té Lipé-án ndècu cùmí dèhe díhí-dé, te ní ñúu-yu vátá ndúcú ñàha-gá téé xii-yu, te nchaá-yu càháⁿ-yu tnúhu Yá Ndióxi tnúhu sá dácàhu iní ñáhá mèe-gá. ¹⁰Te xíaⁿ ní cuu titní nduu ndècu-ndí, te ní quexio ñúu téé nani Agabú ñúú-án, véxi-dé distritú Jùdeá, te téé-án tnáhá-dé càháⁿ-dé tnúhu Yá Ndióxi. ¹¹Te ní ñíhí-dé tnúhu núu ndécú-ndí ñúu ní quixi-dé ní cáháⁿ ndíhi ñàha-dé xii-ndí. Te ní xícaⁿ-dé cínchú té Pǎblú, te ní ngóo-dé, te ní ngúfta-dé ní dácútú-dé sáhá-dé ndíhi ndaha-dé, te ní cachí-dé xii-ndí:

—Espíritú Yá Ndióxi ní cachí-xi sá téé dii cínchú-xi-a tnií ñàha cuè téé isràél ñúú Jerusálén, te duha dacùtu ñàha-güedé xii-dé, te cuáha cuèndá ñáhá-güedé xii-dé

núu cuè téé ñúú Ròmá. Duha ní cáháⁿ Espíritú-gá —cachí té Àgabú.

¹²Te sá dúcáⁿ ní cáháⁿ-dé, te ní xáhaⁿ-ndí nchaa-ndí sá vǎ quíhíⁿ té Pǎblú ñúú Jerusálén. ¹³Te té Pǎblú ní cachí-dé:

—¿Ná cuèndá ndéé dúcáⁿ ndàhyú-ndó dándíhú iní ñáhá-ndó xii-í-í? Te ñá túú nǎ cuu cuèi na dàcutu ñàha-güedé, àdi cuèi na càhni ñàha-güedé xii-í cuèndá sá càháⁿ ndíhi-í Jèsús, chi sa ndècu túha-í sá cùu-í —cachí-dé.

¹⁴Te ñá túú ní sándáá iní-dé sá dúcáⁿ xáhaⁿ-ndí, núu xiáⁿ ñá túú-gǎ ná ní xáhaⁿ-ndí xii-dé sá vǎ quíhíⁿ-dé, te ní xitnàha-ndí:

—Mee-ni-gǎ Yá Ndióxi ná cùnaha-gá nása sàni iní-gá cada-gá —xitnàha-na-ndí.

¹⁵Te ní queheⁿ-ndí ndàchiuⁿ-ndí, te ní xica-ndí cuáháⁿ-ndí ñúu Jerusálén. ¹⁶Te cuáháⁿ ndíhi-ndí ñúu úu cue téé Cèsareá, cue téé ní sándáá iní tnúhu Jèsús. Te ndèca ñàha-güedé xii-ndí cuáháⁿ vehe té Mnàsón, te téé-án cùu-dé téé distritú Chìpré, te ndècu-dé ñúu Jerusálén, te sa ní cuu vai nduu ní sándáá iní-dé tnúhu-gá, te vehe téé-án ní xíndecu-ndí.

Té Pǎblú ndátñuhu-dé ndíhi té Jàcobó

¹⁷Te òré ní quexio-ndí ñúu Jerusálén, te nchaa ñáyíu ní sándáá iní tnúhu Jèsús ní quixi-yu ní dándácóo váha ñàhá-yu, chi ní cuáí vihi iní-yu sá ní quexio-ndí.

¹⁸Te nduu tnéé cuáháⁿ ndíhi-ndí té Pǎblú cuèndá cáháⁿ ndíhi-ndí té Jàcobó, te òré ní quexio-ndí núu ndécú-dé, te ndècu ndíhi-dé nchaa cue téé yìndaha ñàha xii ñáyíu sándáá iní tnúhu Jèsús. ¹⁹Te té Pǎblú ní dándácóo váha ñàha-dé xii-güedé, te ní xáhaⁿ-dè nàcuáa ní quide Yá Ndióxi ní chindee ñàha-gá xii-dé ní cáháⁿ-dé tnúhu-gá núu ñáyíu ñá túú cùu ñáyíu isràél.

²⁰Te sáta ní yáha ní cáháⁿ-dé, te ní ndácáⁿ táhú-yu núu Yá Ndióxi cuèndá nchaa sá ní quide-gá. Te dàtnúni ní xáhaⁿ-güedé xii té Pǎblú:

—Yòhó sa ñàha-n sá ní cuu titní mǐl ñáyíu isràél ní sándáá iní-yu tnúhu Jèsús, te càchí-yu sá ño xini ñuhu-xi cadá-yu nchaa nàcuáa cáháⁿ tnúhu sá ní chídó tñúni ndíi Moisés. ²¹Te ní ñíhí-yu tnúhu sá dácùaha-n ñáyíu isràél ñáyíu ndècu ñúu xíca cuèndá sá vǎ cadá-gǎ-yu nàcuáa ní cachí ndíi

Moisés cada-yu. Te xáhaⁿ-n xíi-yu sá vǎ cuáha-gá-yu sēñá ñi landú-yu, te vǎ cáda-gǎ-yu dàtná ní xóo cada ñáyi ndéé sanaha, duha dàcuaha-n ñáyi ní ñihí-yu tnúhu. ²² Te na ñihí-yu tnúhu sá ndécú-n iha, te tnáví nguíta-yu cáháⁿ cuèhé-yu cuèndá-n. ²³ Te na càchí tnúhu-ndí nàcuáa cada-n. Ndècu cùmí cue tée vátá cáda-gǎ-güedé nàcuáa ní cáháⁿ méé-güedé sá cáda-güedé cuèndá nduu vétú iní Yǎ Ndiöxí. ²⁴ Te quíhíⁿ-n ndiñi-güedé te cada-n nchaa nacuáa ní xóo cada ñáyi ndéé sanaha cuèndá nduu vétú iní Yǎ Ndiöxí. Te tava-n dǐhúⁿ cuu núu-güedé cháhu-güedé veñúhu, te ducaⁿ te dàtnúni ndacu dèté díquí-güedé. Nchaa xǎⁿ cada-n, te quini ñáyi sá ñǎ ndáa tnúhu cáháⁿ nchaa ñáyi cáháⁿ cuèhé cuèndá-n. Te na cùtnuní iní-yu sá tnàhá-n quide-n nchaa nacuáa ní chídó tnúni ndí Moisés cada-yu. ²⁵ Te sa ní quide ndáá-ndí cuèndá nchaa ñáyi ñuu xícá, nchaa ñáyi ní tuha ichi Jèsús. Te sa ní cadúha-ndí tutú ní tendaha-ndí cuáháⁿ ndaha nchaa ñáyi-áⁿ sǎ vǎ cáxi-yu nchaa sǎ nchító-ó nduu táhu nchaa sǎ càchí-yu cùu ndióxí ní cadúha cue ñáyi ñuyú-a. Te ní xáhaⁿ-ndí sǎ vǎ cáxi-yu ñiñí, te vǎ cáxi-yu cuñú nchaa quiti cuèhné. Te vǎ cáháⁿ ndiñi cue tée ñadiñi te núu ñá díú ñadiñi-güedé cúu-yu, te ni cuè ñáyi díhí vǎ cáháⁿ ndihí-yu tée te núu ñá díú yíi-yu cùu-güedé. Duha ní tee-ndí núu tütú cuáháⁿ —càchí-güedé xáhaⁿ-güedé xii té Pǎblú.

Ní tñi-güedé té Pǎblú xití veñúhu ñáyi isràel

²⁶ Te nduu tnéé cuáháⁿ té Pǎblú ndihí cùmí cue tée veñúhu càhnu sǎ ño cùnuu núu ñáyi isràel cada-güedé nàcuáa ní xóo cada ñáyi ndéé sanaha cuèndá nduu vétú iní Yǎ Ndiöxí. Te ní quíhu-dé veñúhu càhnu sǎ ño cùnuu-áⁿ ní xáhaⁿ-dē ná daha-gǎ nduu cùmání dandihí-güedé nàcuáa ní xóo cada ñáyi ndéé sanaha, te dàtnúni cànehe-güedé sá ndúú táhu Yǎ Ndiöxí quíhíⁿ veñúhu.

²⁷ Te cùmání-gǎ cuu úsá nduu sǎ ní sáháⁿ-güedé veñúhu càhnu sǎ ño cùnuu, te sa ndècu tucu té Pǎblú veñúhu. Te cue tée isràel véxi distritú Àsiá ní xiní-güedé té Pǎblú yíhi-dē veñúhu, te

ní tñi ñaha-güedé xii-dé, te ño ní cáháⁿ cuèhé-güedé cuèndá-dé núu dàva-gǎ ñáyi yíhi veñúhu cuèndá sǎ cúdēⁿ-yu núu tē Pǎblú. ²⁸ Te ñiñi ní cáháⁿ-güedé, te xáhaⁿ-güedé xii-yu:

—jNchòhò ñáyi isràel, yáchí-ndó chi cuánundaha ñaha-ndo! Chi tée-a yayacáⁿ cuáháⁿ-dé cáháⁿ-dé sǎ ñá túu nàndihí-o, te cáháⁿ-dē sǎ vǎ cáda-ó nchaa nacuáa cáháⁿ tnúhu sǎ ní chídó tnúni ndí Moisés, te càchí-dé sǎ ñá túu nàndihí veñúhu-a. Te ñá díú-ní xǎⁿ chi sa ní quíhu-dé veñúhu-a ndihí cue tée ñá túu cùu ñáyi isràel, te sǎ dúcáⁿ ní quide-dé, te ñá túu-gǎ ní cànehe íi-dē xití veñúhu. Te veñúhu-a cùu-xi vehe Yǎ Ndiöxí —càchí-güedé xáhaⁿ-güedé xii-yu.

²⁹ Te ducaⁿ ní cáháⁿ-güedé chi ní sani iní-güedé sǎ ní quíhu ndihí-dé té Tròfimú veñúhu-güedé, chi ní xiní-güedé xícá cùu ndihí ñaha-dé xití ñuu. Te tée-áⁿ cúu-dē tē ñuu Efesú, te ñá díú tē isràel cúu-dē.

³⁰ Te chitu ñáyi ñuu-áⁿ ní tacá-yu ní tñi-yu té Pǎblú táñuhu ñahá-yu ní ndee veñúhu càhnu sǎ ño cùnuu, te òré-ni ní nacadi-güedé yèhe veñúhu-áⁿ. ³¹ Te sa cahni-yu té Pǎblú ní cùu, te ní sáháⁿ ñⁿ úu-güedé núu ndécú tē cùu capitáⁿ cùnùu-gǎ, te ní xáhaⁿ-güedé xii-dé sǎ ncháa ñáyi ñuu Jerusalén xináa-yu. ³² Te òré-áⁿ cuáháⁿ tē cùu capitáⁿ cùnùu-gǎ ndihí dava-gǎ cue tē nchicúⁿ-gǎ ndihí sandádú-dé. Te òré ní xiní-yu ní quexio coyo-güedé núu xixúcu-yu, te ní yuhú-yu ñá túu-gǎ ní càni-yu té Pǎblú. ³³ Te tē cùu capitáⁿ ní sátuha-dé té Pǎblú, te ní xáhaⁿ-dē xii cue sandádú-dé sǎ tñi ñaha-güedé dacùtu ñaha-güedé úu cadèna. Te dàtnúni ní xícáⁿ tnúhu-dē núu-yu, te xáhaⁿ-dē:

—¿Ná cúu tē-a? ¿Ná ní quide-dé? —
càchí-dé xáhaⁿ-dē xii-yu.

³⁴ Te tē cùu capitáⁿ-áⁿ ñǎ ní cùtnuní iní-dé ñuu ná cúu sǎ ní quide té Pǎblú, chi uuⁿ ní cuáa-yu. Te tucu cáháⁿ ñⁿ, tucu cáháⁿ ñⁿ-yu, núu xǎⁿ ní xáhaⁿ-dē cue sandádú-dé sǎ càndēca ñaha-güedé xii-dé quíhíⁿ cuàrtél núu ndécú-güedé. ³⁵⁻³⁶ Te nchicúⁿ ñáhǎ-yu cuáháⁿ ní quexio ndéé nàcuáa càa nchío cuini-yu cahni ñahá-yu xii-dé ni cùu. Te ñiñi ní cáháⁿ-yu xáháⁿ-yu

sá cáhni ñaha-güedé, te xiã ní nda-cani ñaha-güedé ndécá ñaha-güedé cuásaá nchío-ã.

Té Páblú xãhaⁿ-dê xii-güedé sá ña túú cuêchi-dé

³⁷ Te cuánguihu-güedé cuártél ndihi té Páblú ní cùu, te ní xãhaⁿ-dê xii té cùu capitáⁿ cùnùu-gá:

—Càháⁿ ndàhú-í núu-n cùndetu-n na cùñaha-í ìⁿ úú tnúhu xií-yu —càchí-dé xãhaⁿ-dê.

Te té tãxi tnuní-áⁿ ní xãhaⁿ-dê:

—¿Náa tnàhá yòhó càháⁿ-n tnúhu grìégú? ³⁸ Te ní càháⁿ-í sá tée ègiptú cùu-n, chi diu-n ní ndúcú-n cuè tée ní nàa ndihi tée cùchiuⁿ Cesár ní càháⁿ-í, chi diu ìⁿ tée yacáⁿ ní ndúcú-dé cùmí mìl cue tée ní sahní ndíyi. Te ndèca tnaha-güedé ní sáháⁿ xití yucu ní xíhi váha-güedé —càchí-dé xãhaⁿ-dê xii té Páblú.

³⁹ Te té Páblú ní xãhaⁿ-dê:

—Ná díú tée ègiptú cùu-í, chi tée isràél cùu-í, chi diu-n ní tée isràél cùú tãtà-í, te dicó-ni sá ní cacu-í ñuú Tàrsú ñuú cáhni, te ñuú-áⁿ yíndèhu-xi distritú Ciliciá. Te cuini-í cada ndee ñi-n dàña-n na caháⁿ ndihi-í-yu —càchí-dé xãhaⁿ-dê.

⁴⁰ Te ní xãhaⁿ tée cùu capitáⁿ cùnùu-gá sá cùú càháⁿ té Páblú, núu ní ngúnutnii-dé núu nchío, te ní quide-dé ndaha-dé sá cùndèdóho-yu. Te ní sadí-yu yuhú-yu, te ní càháⁿ-dé tnúhu ñáyi isràél, te xãhaⁿ-dê xií-yu:

22

¹ —Chí cáda càhnu ñi nchòhó cue tée sa cuéhé ndihi nchòhó cue tée cuechi, na càháⁿ-í ìⁿ tnúhu cùndedóho-ndo sá ña túú cuêchi-í, chi ña túú nã ní quide-í, te ni ña túú nã tnúhu càháⁿ-í —càchí-dé xãhaⁿ-dê xii-güedé.

² Te cuendá sá dúcáⁿ ní càháⁿ-dé tnúhu mèe-yu núu tnávíí-nã ní sadí-yu yuhú-yu ní xíndedóho-yu ní càháⁿ-dé, te xãhaⁿ-dê:

³ —Yúhú cùu-í tée isràél, te ní cacu-í ñuú Tàrsú, te ñuú-áⁿ yíndèhu-xi Ciliciá. Te davitna líhli-í cùtnàhá ní quexio-í ñuú Jerusalén ní dácuaá ñaha té Gamaliél. Te ní dácuaá-í nchaá tnúhu ní chídó tnuní nchaá cue tée ndéé sanaha nacuáa cada ñáyi. Te yúhú ní cahu ñi-í ní quide-í titni núu chiúⁿ nacuaá cuu váha ñi Yá Ndióxi ní càháⁿ-í, te diu-ni ducaⁿ quide nchóhó tucu.

⁴ Te ní sánú ndúcú-í nchaá ñáyi sàndáá

ñi-xi tnúhu Jèsús, cuèi tée, cuèi ñáyi dñí ní dácútu-í-yu, te ní chihi-í-yu vecaá, te ní ñhi-í tnúhu ndee ñi sá cáhni-ndí-yu.

⁵ Te dútú cùnùu-gá ndihi cue tée cùnùu núu-ndo ñaha-güedé sá ndáa càháⁿ-í chi mee-güedé ní taxi-güedé tutú cuáñaha-í xii ñáyi isràél ñáyi ndècu ñuú Dàmascú cuendá cutnùní ñi-yu ná chíúⁿ cuáháⁿ-í ní cùu. Te ñùhu-í ichi cuáháⁿ-í ñuú-áⁿ cuánúndúcú-í ñáyi ní sàndáá ñi-xi tnúhu Jèsús cuendá dacútu-í-yu te candeca-í-yu ndixi, te iha cada úhú ñáhá-güedé xií-yu ní cùu.

Té Páblú xãhaⁿ-dê xii ñáyi nacuaá ní cuu ní tuha-dé ichi Jèsús

(Hch. 9:1-19; 26:12-18)

⁶ Te ta cùyatni-í ñuú Dàmascú cuáháⁿ-í, te cùu-xi datná òré cauxúu nduu, te uuⁿ ní quee ñuhú andiu, te ní dáyèhé-xi ndéé núu núnñ-í. ⁷ Te ní quide nee-xi núu-í, xiã ní nduá-í ndéé ñuhu. Te ní tecú dóho-í càháⁿ ìⁿ sá càháⁿ andiu, te càchí-xi: “Yòhó té Sàulú, ¿ná cuendá cùú úhú ñi ñáhá-n dándoho ñaha-n xii-í?”, càchí sá càháⁿ-áⁿ. ⁸ Te ní xãhaⁿ-í: “¿Ná cùú yòhó sá càháⁿ-áⁿ?”, xãhaⁿ-í. Te ní càháⁿ tucu ingá xito te càchí-xi: “Yúhú cùu-í Jèsús tée ní xíndecu ñuú Nazaréet, te ducaⁿ io dándoho ñaha-n xii-í”, càchí sá càháⁿ-áⁿ. Te xiã ní cutnùní ñi-í sá díú Jèsús càháⁿ.

⁹ Te nchaá cue tée ndihi-í ní xini-güedé ní dáyèhé ñuhú, te ní yúhú-güedé, dico ña túú ní təcú dóho-güedé òré ní càháⁿ-gá.

¹⁰ Te ní xãhaⁿ-í xii-gá: “Yòhó Xítoho Jesucristú, ¿ná cuini-n càda-í?”, xãhaⁿ-í xii-gá. Te ní càchí-gá: “Ndacóo, te quíhñ-n ñuú Dàmascú, yacáⁿ tecú tnúhu-n nchàa nacuaá cuini Yá Ndióxi cada-n”, càchí-gá —càchí té Páblú xãhaⁿ-dê xií-yu.

¹¹ Te ní xãhaⁿ tucu té Páblú:

—Te cuendá sá ní dácuaá ñaha ñuhú xii-í núu ní tñi cue tée ndihi-í ndaha-í ndécá ñaha-güedé cuáháⁿ ndéé ñuú Dàmascú.

¹² Te yacáⁿ ndécú ìⁿ tée nani Ananiás, te ío vai sá ní chídó tnuní ndí Moisés cada-yu quide-dé. Te nchaá ñáyi ñuú Dàmascú ío váha càháⁿ ndihi ñáhá-yu xii-dé. ¹³ Te ní quexio-dé núu ndécú-í, te ní càchí-dé: “Yòhó té Sàulú, tée ndècu ndihi-í ichi Xítoho Jesucristú, ndúha núu-n”, càchí-dé. Te òré-ni ní nacaáⁿ núu-í te ní xini-í-dé. ¹⁴ Te dätñuní ní càchí-dé: “Yá Ndióxi ní càháⁿ ndihi-gá ñani tnáhá-ó ní xíndecu

ndéé sanaha. Te ðiu-gá ní caxi ñaha-gã xii-n cuèndá quini-n nchàa sá vâha cuini-gá cada-n. Te quini-n Jèsús Yaá ñá túú cuèchi-xi, te ðiu-ni mee-gã cáháⁿ ndihi ñaha-gã xii-n. ¹⁵ Te cáháⁿ-n tnúhu Jèsús núú nchàa ñáiyu, te cáháⁿ-n nchàa sá ní xiní-n ndihi nchaa sá ní xíndedóho-n. ¹⁶ Tnáví, te quíhíⁿ-n cuàndute-n, te cáháⁿ ndihi-n Yá Ndióxi cuèndá cada càhnu iní-gá nchaa sá cuèhé sá dúhá ní quide-n”, duha ní cachí té Ananiás xii-í —cachí té Páblú xáhaⁿ-dë xii-yu.

Té Páblú ní cani-dé cuèndú nàcuáa ní xáhaⁿ Jèsús cada-dé quíhíⁿ-dë ñúú núú xíndecu ñáiyu ñá túú cùu ñáiyu isràèl

¹⁷ Te ní xáhaⁿ tùcu té Páblú:

—Te ní ndee-í cuándixi-í ñúú Jerusalén. Te ní sáháⁿ-í veñúhu càhnu sá ïo cùnunu ní cáháⁿ ndihi-í Yá Ndióxi, te ní dácótó núú ñáhá-xí sá meé Jèsús ní xiní-í xití veñúhu, ¹⁸ te ní cachí-gá: “Yáchí, quee-n ñúú Jerusalén, chi ñáiyu-a vá quíndáá iní-yu nàcuáa ní cachí-í cùñaha-n xii-yu cuèndá-í”, duha ní cachí-gá xii-í. ¹⁹ Te ní xáhaⁿ-í xii-gá: “Yòhó Xítohó Jesucristú, sa xiní-n sá ncháá ñáiyu nahá-yu sá ní sáháⁿ-í ndi tnahá ïiⁿ ndi tnahá ïiⁿ veñúhu nànducu-í ñáiyu sàndáá iní tnúhu-n, te ní tñii-í-yu, ní chihi-í-yu vecaá, te ní táuchíⁿ-í ní caniha-güedë xii-yu. ²⁰ Te cútñahá ní sahani-güedé ndii Tëvá téé ní xóo cáháⁿ tnúhu-n, te tñahá-í ndécú òrë-áⁿ te ní xíndeé-í dóó cue téé ní sahani ñaha xii ndii. Te yúhú ní cáháⁿ-í sá ní quide vâha-güedé sá dúcáⁿ ní quide-güedé”, duha ní xáhaⁿ-í xii-gá. ²¹ Te ní cachí tnúhu-gá xii-í: “Cuáháⁿ chí cuini-í quíhíⁿ-n nchàa ñúú xicá núú xíndecu cue ñáiyu ñá túú cùu ñáiyu isràèl cáháⁿ-n tnúhu-í”, cachí-gá —cachí té Páblú xáhaⁿ-dë xii-yu.

Té Páblú ndihi téé tàxi tñuní ñáhá xii cue sandadú

²² Te sá dúcáⁿ ní cáháⁿ-dë, te ñá ní tñahá-gá iní-yu cundedóho-yu tnúhu cáháⁿ-dë. Te ïiⁿ-ni ní cuú-yu ncháa-yu, te ní cuáa-yu, te xáháⁿ-yu:

—¡Chí cáhni-dë! ¡Ñá díú sá cùndecu-dé ñuyú-a! —cachí-yu xáháⁿ-yu.

²³ Te mei òrë ducaⁿ ní cáháⁿ-yu, te ní ndátá-yu dóó-yu, te ní dáquenë-yu núú ñinu sá sàtú iní-yu. Te ní quéhnu-yu ñuhu, te ní dácácòyó-yu núú ñinu sá ïo sàtú

iní-yu. ²⁴ Te téé cùu capitáⁿ cùnunu-gá ní xáhaⁿ-dë xii cue sandadú-dë:

—Chí díta-dë ná quíhu-dé ndéé xití vehe, te cani-ndo-dë ñii, chi na quène yuhu-dé ná tnúhu ní cáháⁿ-dë núú ndéé dúcáⁿ cùdèéⁿ-yu núú-dë —cachí-dé xáhaⁿ-dë xii-güedé.

²⁵ Te sáta ní dácútú ñaha-güedé xii té Páblú sá cáni ñaha-güedé ní cùu, te ní xáhaⁿ-dë xii téé cùu capitáⁿ ndécú-áⁿ:

—Te na cachí tnúhu-í sá vâ cùú càniha-güedé ñii, chi téé ròma cùu-í, te vátá quini ndáa-gá-ndó núú ndécuechi-í àdi ñáhá —cachí-dé xáhaⁿ-dë xii téé cùu capitáⁿ.

²⁶ Te sá dúcáⁿ ní cáháⁿ-dë, te ní sáháⁿ téé cùu capitáⁿ núú téé cùnunu-gá, te ní xáhaⁿ-dë:

—Vá cùú càni-o téé-áⁿ, chi téé ròma cùú-dë —cachí-dé xáhaⁿ-dë.

²⁷ Te ní sáháⁿ téé cùu capitáⁿ cùnunu-gá ndéé núú tē Páblú, te ní xáhaⁿ-dë:

—Cáháⁿ ndáa-n núú ndisa téé ròma cùu-n —cachí-dé xáhaⁿ-dë.

Te ní xáhaⁿ tē Páblú:

—Ndáa sá téé ròma cùu-í —cachí té Páblú xáhaⁿ-dë xii téé cùnunu-áⁿ.

²⁸ Te ní xáhaⁿ téé cùnunu-áⁿ:

—Yúhú tñahá-í cùu-í téé ròma, chi vai díhúⁿ ní cháhu-í —cachí-dé xáhaⁿ-dë.

Te té Páblú ní xáhaⁿ-dë:

—Tñahá-í cùu-í téé yacáⁿ tucu, chi tātá-í cùu-dë téé ròma —cachí té Páblú xáhaⁿ-dë xii téé cùu capitáⁿ cùnunu-gá.

²⁹ Te uuⁿ ní nacaca sata cuè téé cuáháⁿ caniha xii-dé ní cùu. Te ní yúhú téé tàxi tñuní sá dúcáⁿ ní xáhaⁿ tē Páblú sá tēe ròma cùu-dë, chí ní xáhaⁿ-dë ní dácútú ñaha-güedé xii-dé, múu xíáⁿ ní yúhu-dé.

Té Páblú ní cáháⁿ ndihi-dé cue téé cùnunu oré ní quide-güedé jundá

³⁰ Te téé tàxi tñuní sandadú ñá ní xiní-dé ná cuéchi ní dácáa ñáiyu isràèl díquí té Páblú, múu xíáⁿ nduu tñèé ní cana-dé cue dútú cùnunu, ndihi cue téé cùchiuⁿ, ndihi cue téé cùu sacuéhé, te ní xáhaⁿ-dë sá cáda-güedé jundá cuèndá nducu tnúhu-güedé núú tē Páblú ná cuéchi ní dácáa-yu díquí-dë. Te ní xáhaⁿ-dë xii cue sandadú sá nándaxi ñaha-güedé cadèna ndútú-dë, te candeca ñaha-güedé quíhíⁿ núú cáda-güedé jundá. Te ní sáháⁿ-güedé ní nandaxi ñaha-güedé xii-dé ndéca ñaha-güedé cuáháⁿ jundá, te ní

quexlo-güedé, te ní ngúnutnî-dé núu cuè tée cùchiuⁿ.

23

¹ Te yacáⁿ ní xíndéhé vâha té Pâblú núu nchâa-güedé, te ní xâhaⁿ-dê:

—Cada càhnu iní nchòhó cue tée cùchiuⁿ, te ducaⁿ nchòhó cue tée cùu sacuéhé, véxi-í càchí tnúhu-í sá ñà túú cuèchi-í, chi mee Yá Ndiòxí nâhá-gã nása ndécú-í ñuyúú-a, te ñá túú cùcahaⁿ núu-í núu-gã —càchí té Pâblú xâhaⁿ-dê xii-güedé.

² Te té Ananiás tée cùu dútú cúnúu-gá ní xâhaⁿ-dê xii cue tée nùtnî yatni dîñi té Pâblú sá cání-güedé déhndé yuhu-dé. ³ Te té Pâblú ní xâhaⁿ-dê xii dútú-ãⁿ:

—Yòhó, chi úhú tnâhí iní-n, chi ní ndúcú-n tée ní caniha xii-í, te ñá túú cuèchi-í, dico quiní-n ná cada ñaha Yá Ndiòxí xii-n. Te yòhó ní cana ñaha-n ndúcu tnúhu-n núu quide-í nchaa nâcuáa càháⁿ tnúhu sá ní chídó tnùnî ndíí Moisés cada-o. Te mee-n ní ndúcú-n tée ní caniha, te ñá túú dùcaⁿ ní càháⁿ ndíí cada-o —càchí té Pâblú xâhaⁿ-dê xii dútú cúnúu-gá-ãⁿ.

⁴ Te cue tée xínutnî dîñi té Pâblú ní xâhaⁿ-güedé xii-dé:

—Nèhé ní quide-n chi ní xícuèhé-n dütú cúnúu-gá tée xínu cuechi núu Yá Ndiòxí —càchí-güedé xâhaⁿ-güedé xii té Pâblú.

⁵ Te té Pâblú ní xâhaⁿ-dê xii-güedé:

—Cada càhnu iní-ndó chi ñá túú xini-í sá dütú cúnúu-gá cúu-dé, chi núu tütú Yá Ndiòxí càchí-xi sá vâ cúú càháⁿ cuèhé-ó cuèndá ñⁿ tée cúnúu ñúú-ó yòtnúhu. Te yúhú ñá túú xini-í sá tée cúnúu cuu-dé núu ní sácóo-í ní càháⁿ-í —càchí té Pâblú xâhaⁿ-dê xii-güedé.

⁶ Te òré-ãⁿ ní cutnùnî iní té Pâblú sá dáva-güedé cúndîhi-güedé cue tée cùu saducéú, te dava-güedé cúndîhi-güedé cue tée cùu fariséú, te níhi ní càháⁿ-dé ní xâhaⁿ-dê xii-güedé:

—Yúhú cúu-í tée fariséú, te tnâhá tàtà-í ndîhi xî-í cúu-güedé cue tée fariséú tucu. Te tnâhá yúhú sândáa iní-í sá ndótó nchâa ñáyiú ní xíhí, te núu xíãⁿ cuiní-ndó ndúcu tnúhu-ndo núu-í cáná ñaha-ndo —càchí-dé xâhaⁿ-dê xii-güedé.

⁷ Te sá dúcáⁿ ní càháⁿ-dé xíãⁿ ní nâa ndîhi tnâha cue tée cùu fariséú ndîhi cue tée cùu saducéú, chi ñá ñⁿ-ní tnúhu ní càháⁿ-güedé, chi ní ndí queheⁿ ndí queheⁿ-güedé sá ní càháⁿ-güedé. ⁸ Te cue

tée cùu saducéú càchí-güedé sá vâ ndótó cuè ñáyiú ní xíhí, te cue tée cùu fariséú càchí-güedé sá ndótó-yu. Te cue tée cùu saducéú càchí-güedé sá ñà túú espíritú xínú cuèchi núu Yá Ndiòxí, te cue tée cùu fariséú càchí-güedé sá ió espíritú xínú cuèchi núu-gã. ⁹ Te ta cudééⁿ-güedé cuáhãⁿ, te níhi-gá cúú iní-güedé càháⁿ-güedé, te ñⁿ úú cue tée cùu fariséú cue tée dàcuaha ñaha xii ñáyiú nchaa tnúhu ní chídó tnùnî ndíí Moisés ní càháⁿ níhi-güedé, te xâhaⁿ-güedé:

—Ná túú cuèchi-dé, te cudana te ní càháⁿ ndîhi-dé ñⁿ espíritú xínú cuèchi núu Yá Ndiòxí te vâ ngõo vâ cúú vâha iní-ó núu-gã —càchí cue tée cùu fariséú xâhaⁿ-güedé xii-güedé.

¹⁰ Te cuèndá sá ño xînáa-güedé, xíãⁿ ní yúhú tée cùu capitãⁿ cúnúu-gá sá càhni-güedé té Pâblú, núu xíãⁿ ní xâhaⁿ-dê sá quíhîⁿ-güedé cúnúcuaca ñaha-güedé candeca ñaha-güedé nûhú cuartél.

¹¹ Te ndéé niú cúú úú ní quexio Xítóhó Jesucristú núu ndécú té Pâblú, te ní xâhaⁿ-gã:

—Ñí cunduu-n, vâ yúhú-n, chi nâcuáa ní càháⁿ-n ní cacunehe ñaha-n xii-í iha, te dîy-ñi ducaⁿ càháⁿ-n cacunehe ñaha-n xii-í quíhîⁿ-n ñúú Romá —càchí-gã xâhaⁿ-gã xii-dé.

Cahni-güedé té Pâblú ní cúu

¹²⁻¹³ Te nduu tnéé ní natacá vîhi-gã údico cue tée isrâel ní ndatnúhu-güedé sá càhni-güedé té Pâblú, te ní xítñaha-güedé:

—Ni dítã vâ cãxí-ó te ni ndùte vâ cóhó-ó ndéé ndacu-o càhni-o té Pâblú, te dàtnùnî caxi-o dítã, te coho-o ndùte, chi sa ní sani iní-ó sá cãdá-ó, te cuu cuèchi xii-o núu vâ cãdá-ó —càchí-güedé xítñaha-güedé.

¹⁴ Te ní sãháⁿ-güedé núu ndécú nchâa dütú cúnúu ndîhi nchaa cue tée cùu sacuéhé, te ní xâhaⁿ-güedé:

—Ní càchí-ndí sá ni dítã vâ cãxí-ndí ndéé núu ní ndacu-ndí ní sahni-ndí té Pâblú, chi sa ní sani iní-ndí sá cãdá-ndí, te cuu cuèchi núu vâ cãdá-ndí. ¹⁵ Te duha cada-ndo ndîhi dava-gã cue tée cúnúu, chi cúnaha-ndo xii tée cùu capitãⁿ cúnúu-gã: “Quixi ndîhi-n té Pâblú núu ndécú-ndí cuèndá ndatnúhu ndîhi-ndí-dé, chi cuiní-ndí nducu tnúhu vâha-gã-ndí ná cúú sá ní quide-dé”, duha cúnaha-ndo xii tée tàxi tnùnî sandádú. Te ducaⁿ-ni cúnaha-ndo dândahú-ndó-güedé cuèndá

quixi ndihi-güedé té Páblú, te nchúhu sa cundetu-ndí-güedé ichi, chi quiní té Páblú ná cahni-ndí-dé —càchí-güedé xáhaⁿ-güedé xii cue tée cùchiuⁿ.

¹⁶ Te déhe cúha té Páblú ní níhí-dé tnúhu nàcuáa cada-güedé ditó-dé. Te ní sáháⁿ-dé cuártel, te ní xáhaⁿ-dé xii ditó-dé nàcuáa càháⁿ-güedé cada ñaha-güedé. ¹⁷ Te ní cana té Páblú ñⁿ tée cùu capitáⁿ, te ní xáhaⁿ-dé:

—Vá cündèe iní-n, quíhíⁿ ndihi-n tée-a na càháⁿ ndihi-dé tée cùnuu-gá, chi ndècu ñⁿ cuendú cúnaha-dé cuiní-í —càchí té Páblú xáhaⁿ-dé xii tée cùu capitáⁿ.

¹⁸ Te dātñuní ní xica tée cùu capitáⁿ ndécá-dé dáxíⁿ tē Páblú cuáháⁿ núu ndécú tē cùnuu-gá, te òré ní quexio-güedé núu-dé, te ní xáhaⁿ tē cùu capitáⁿ xii-dé:

—Té Páblú tée yíhi vecaá ní cana ñaha-dé xii-í, te ní cachí-dé véxi-í ndihi tée-a cuendá cachí tnúhu-dé ñⁿ cuendú cuiní-dé —càchí-dé xáhaⁿ-dé xii tée cùnuu-gá.

¹⁹ Te tée cùnuu-áⁿ ní tñií-dé ndaha dáxíⁿ tē Páblú, te ònehe ñaha-dé cuáháⁿ ñⁿ xio, te ní xicáⁿ tnúhú-dé núu-dé, te xáhaⁿ-dé:

—¿Ná cuendú cuiní-n càháⁿ-n? —càchí-dé xáhaⁿ-dé xii dáxíⁿ tē Páblú.

²⁰ Te ní xáhaⁿ-dé xii tée cùnuu-áⁿ:

—Cue tée israél ní ndatnúhu ndáá-güedé sá quíxí-güedé tneé cáháⁿ ndáhú-güedé núu-n càndeca-n té Páblú quíhíⁿ jundá, te yacáⁿ cacáⁿ tnúhú ndáá-güedé núu-dé ná cúu sá ní quide-dé, càchí-güedé xitnaha-güedé. ²¹ Te vá quíndáá iní-n chi dicó dandàhú ñáhá-güedé, chi vihi-gá údico-güedé ndátnúhu-güedé cundedí-güedé ichi cahni ñaha-güedé. Te xitnaha-güedé sá ni dítá vā caxí-güedé, te ni ndüte vá cóhó-güedé ndéé núu ní ndacu-güedé ní sahni ñaha-güedé, te dātñuní caxi-güedé dítá, te coho-güedé ndute, chi sa ní sani iní-güedé sá cadá-güedé, te cuu cuéchi núu vá cadá-güedé, càchí-güedé xitnaha-güedé. Te cundecu túha-ná-güedé cundetu ñaha-güedé tneé, te núu na quíndáá iní-n càndeca-n-dé quíhíⁿ jundá —càchí-dé xáhaⁿ-dé xii tée cùnuu-áⁿ.

²² Te tée cùnuu-áⁿ ní xáhaⁿ-dé:

—Cuanuhú, te vá yōo tñahí cúnaha-n sá ní quixi-n ní cachí tnúhu-n nàcuáa càháⁿ-güedé cada-güedé té Páblú —càchí-dé xáhaⁿ-dé.

Ndèca-güedé té Páblú cuáháⁿ núu tē Juéllí tée cùu gobiernú

²³ Te tée cùnuu-gá ní cana-dé úu cue tée cùu capitáⁿ, te xáhaⁿ-dé:

—Tava-ndo úu ciendú sandadú cue tée xica saha, ndihi únídico úxí sandadú cue tée yòdo cuayú, ndihi úu ciendú sandadú mee-ni cuè tée xínehe lànzá. Te cada túha-ndo chi caca-ndo òré caá ñⁿ níu quíhíⁿ-ndó núu Cèsareá ndihi té Páblú. ²⁴ Te nducu-ndo cuèdicó ñⁿ úu cuayú codo-dé ndihi cue tée ndèé ñáhá xii-dé. Te cada cuedadú-ndó-dé ichi, te candeca-ndo-dé quíhíⁿ quíndeca-ndo-dé núu tē cùu gobiernú —càchí tē cùnuu-áⁿ xáhaⁿ-dé xii cue tē cùu capitáⁿ.

²⁵ Te tē cùnuu-áⁿ ní cadúha-dé tutú cuendá quíhíⁿ ndaha té Juéllí tē cùu gobiernú. Te duha ní chídó tñuní-dé núu tutú cuáháⁿ:

²⁶ “Còvaha díf-n, tātá gobernàdór. Ío cada càhnu iní, yúhú nání-í Clàudiú Lìsiás. Yúhú ní tendaha-í ñⁿ tutú véxi ndaha-n cuendá quiní tñuní-n nàcuáa ní cuu iha. ²⁷ Cue tē israél ní tñií-güedé ñⁿ tēe nani Páblú cuiní-güedé cahni ñaha-güedé ní cùu, te ní níhí-í tnúhu sá tēe ròrá cúu-dé núu ní sáháⁿ-í ndihi sandadú-í ní dácacu-ndí-dé. ²⁸ Te ní cuiní-í quiní-í ná cuendá tēe ñaha-güedé cuéchi xii-dé, núu xíáⁿ ndécà-í-dé ní sáháⁿ núu ní quide cue tē cùchiuⁿ israél jundá. ²⁹ Te yacáⁿ ní níhí-í tnúhu sá ñà túu nã cuéchi ní quide-dé, chi cuendá-ni sá ní níhí-güedé tnúhu sá ñà túu sandáá iní-dé cada-dé ncha sá ní xóo cada ñáyiú ní xíndecu ndéé sanaha nchicúⁿ nihnu-güedé quide-güedé, xíáⁿ ní cudééⁿ-güedé núu-dé. Te ná túu cuéchi càhnu ní quide-dé núu quíhíⁿ-dé vecaá àdi cahni-í-dé. ³⁰ Te ní níhí-í tnúhu sá cuè tēe israél ndúcú-güedé nàcuáa cada-güedé cahni ñaha-güedé xii-dé, xíáⁿ ní xáhaⁿ-í xii sandadú-í sá càndeca ñaha-güedé quixi xíáⁿ. Te ní xáhaⁿ-í xii cue tēe tēe ñaha cuéchi sá quíxí-güedé ndéé xíáⁿ càháⁿ-güedé núu ná cuéchi ní quide-dé. Te cada càhnu iní-n chi duha-ni ndúu tnúhu càháⁿ-í, te cundee iní-n quèhⁿ cuendá-n-dé”, duha ní chídó tñuní tēe ní cadúha tutú cuáháⁿ ndaha té Juéllí.

³¹ Te cue sandadú ní quide-güedé nàcuáa ní xáhaⁿ tēe tàxi tñuní ñáhá xii-güedé chi ní xica-güedé ndihi té Páblú òré caá ñⁿ níu, te díu-ni níu-áⁿ ní quexio-güedé ñúu

Antipatrís. ³²Te sátá nǐ túndaá, te ní nacuico cuè téé xǐnehe lánzá ndihi dava-gá sandàdú xícá sàha cuánuhú-güedé cuàrtél, te mee-nà sandàdú cue téé yòdo cuayu cuáháⁿ ndihi té Pàblú. ³³Te òré ní quexio-güedé ñúú Cèsareá, te ní sàha-güedé téé cùu gobiernú tutú néhé-güedé cuáháⁿ. Te ní queheⁿ cuèndá-dé té Pàblú. ³⁴Te sátá ní dácuháá téé cùu gobiernú-áⁿ tutú-áⁿ te ní xícáⁿ tnúhú-dé núú té Pàblú, te xàhaⁿ-dè: —¿Ndèè téé cùu-n? —cachí-dé xàhaⁿ-dè.

Te ní xàhaⁿ té Pàblú:

—Tée Ciliciá cùu-í —cachí-dé xàhaⁿ-dè.

³⁵Te ní xàhaⁿ téé cùu gobiernú-áⁿ:

—Òré quexio cue téé téé ñaha cuéchi xii-n, te cáháⁿ-n nása ní cuu, chi níhi-í nàcuáa cada ndáá-í cuèndá-n —cachí-dé xàhaⁿ-dè xii té Pàblú.

Te ní xàhaⁿ-dè xii sandàdú sá cùndèè-güedé té Pàblú vehe càhnu té Herodés.

24

Té Pàblú xàhaⁿ-dè xii té Juélí sá ñà túú cuéchi-dé

¹Te sátá nǐ cuu úhúⁿ nduu, te té Ananiás dútú cúnú-gá cuáháⁿ-dé ñúú Cèsareá ndihi cue téé cùu sacuéhé ndihi ñⁿ téé nàni Tértulú téé cáháⁿ yuhu-güedé. Te cuáháⁿ-güedé núú téé cùu gobiernú cuáháⁿ dácuanèhnde-güedé núú-dé sá ndècuéchi té Pàblú. ²Te ní ságuaca-güedé té Pàblú. Te òré ní quexio-dé núú-güedé, te ní nguíta té Tértulú xàhaⁿ-dè xii té Juélí nàcuáa cà cuéchi téè-güedé té Pàblú:

—Ío càhnu cada iní tātá gobernàdór.

Duha ndúu chiuⁿ ndéé iní ñáhá-ndǐ xii-n vèxi-ndǐ, núu nása cachí-n cùnduu. Tàxàhu xii-n, chi ío váha ndècu nchaa ñáyiú, te ñá túú nàá-yu chi ío váha quide-n. ³Te ío cùdíí iní-yu chi nchaa-ni nduu xĩndecu váha-yu nchaa-yu, te ío táxàhu Ndiòxí xii-n sǎ dúcáⁿ quide-n. ⁴Te cada càhnu iní, cuiní-í ndatnúhu-o ñⁿ úú-ni cuèndú cuèndá sá vǎ cùyàa-o dacuíta-í chiuⁿ-n.

⁵Te ñⁿ téé iha ío dásatú iní ñáhá-dè, chi ndèni ní cuu cuáháⁿ-dé veñúhu càhnu-dé ndihi ñáyiú isràél dánàá-dé-yu. Te néhé quidè-dé chi cuáháⁿ-dé dácáháⁿ-dé nchaa ñáyiú cuèndá quíndáá iní-yu tnúhu téé ní xĩndecu ñúú Nazàrét. ⁶Chi ducaⁿ cáháⁿ cue téé iha sá nǐ sáháⁿ-dé veñúhu càhnu sá ío cúnúu, te cuiní-dé daquèe tíhú-dé veñúhu cuèndá cuiní-dé xocàni-dé sá íí ndécú, núu

xíǎⁿ ní tnǐ ñaha-güedé ndécá ñaha-güedé cuáháⁿ núú cuè téé cùchiuⁿ cuèndá cácaⁿ tnúhú-güedé núú-dé núu ná cuèndá ducaⁿ cuiní-dé cada-dé, chi ducaⁿ càa leí ndécú ndihi-güedé sá cáda ndáá-güedé núu ná ñⁿ sá cùú. ⁷Te té Lisiú téé cùu capitáⁿ cúnúu-gá ní quexio-dé ndihi sandàdú, te ní dácúnú-güedé nchaa cue téé nùnñi ndihi té Pàblú, te dātñuní ní tnǐ ñaha-güedé xii-dé ndécá ñaha-güedé cuáháⁿ. ⁸Te sátá xíǎⁿ, te ní xàhaⁿ-dè sá quixí-güedé ndéé ndíha cundáá cuéchi-dé. Te yòho cundee iní-n càcáⁿ tnúhú-n nùú-dè, te núu ndáá ducaⁿ ní quide-dé àdi ñáhá —càchí té Tértulú xàhaⁿ-dè xii té Juélí téé cùu gobiernú.

⁹Te dava-gá cue téé isràél xĩnutñí xíǎⁿ ní cáháⁿ-güedé sá ndáá cáháⁿ té Tértulú.

¹⁰Te téé cùu gobiernú ní quide-dé ndaha-dé núú té Pàblú cuèndá cáháⁿ-dé, te té Pàblú ní xàhaⁿ-dè:

—Yòho sá ní cuu titní cuía ndécú-n ìha xehndé-n cuéchi nchaa ñáyiú xĩnàá, núu

xíǎⁿ ío cùdíí iní-í sá ndíha téhndé cuéchi téé ñaha-güedé xii-í. Te cundee iní-n cùnd-èdóho-n na càni-í cuèndú nàcuáa ní cuu.

¹¹Te nducu tnúhu-n te quini-n nǎ cáháⁿ ndáá-í, chi sa ní cuu úxúu nduu sá nǐ sáháⁿ-í veñúhu càhnu sá ío cúnúu ñúú Jerusalén ní cáháⁿ ndihi-í Yǎ Ndiòxí. ¹²Te ní ñà túú ní nàá-í ndihi ñáyiú xiti veñúhu, te ñá túú ní xàhaⁿ-í nàá-yu ní ñⁿ xichi, te ní ñⁿ veñúhu líhli ní sáháⁿ-í ñá túú nǎ ní xàhaⁿ-í cada-yu. ¹³Te ní ñà túú quèñuhu-güedé cue téé cáháⁿ ndáá te núu ndáá ducaⁿ ní quide-í.

¹⁴Te yúhú cáháⁿ ndáá-í sá cáháⁿ ndihi-í Yǎ Ndiòxí, chi diu-ni Yá Ndiòxí ní xóo cáháⁿ ndihi ñáyiú ndéé sanaha, núu xíǎⁿ ní tuha-í ichi-gá. Te cue téé-a cachí-güedé sá ñà díú ñⁿ ichi váha ní tuha-í. Te yúhú sàndáá iní-í nchaa sá nǐ chídó tnùní ndíi Moisés ndihi dava-gá cue téé ní xóo cáháⁿ tnúhu Yá Ndiòxí ndéé sanaha. ¹⁵Te sàndáá tucu iní-í sá ndótó nchaa ñáyiú ní xihí, cuèi ñáyiú váha iní-xi, te cuèi ñáyiú úhú iní-xi, dico ndotó-yu. Te ducaⁿ nǐ xóo quíndáá iní nchaa ñáyiú ní xĩndecu ndéé sanaha. ¹⁶Te yúhú ío ndùcu ndee-í quidè-í nchaa sá cáháⁿ Yǎ Ndiòxí cuèndá sá vǎ cùú càhaⁿ núu-í núú-gá ndihi núú ñáyiú ñuyúú-a.

¹⁷Te sa ní cuu titní cuía sá ñà túú-gá sáháⁿ-í ñúú Jerusalén, te ní sáháⁿ tucu-í néhè-í díhúⁿ ní taxi ñáyiú ñúú xícá cuèndá cuáñaha-í xii ñáyiú ñúú Jerusalén. Te ní

ndúcu-í sá cuáha táhù-í Yă Ndiöxí. ¹⁸ Te ní xíndecu-í veñúhu cǎhnu sá ïo cùnunu ní quide-í nchaa nàcuáa ní xóo cada ñáyüu ní xíndecu ndéé sanaha cuèndá nduu vétú iní Yă Ndiöxí. Te ñá túú chítú-yu ni sáháⁿ, te ni ñà túú nǎ ní cùu, te ní naníhí ñáhá ñⁿ úú cue tée isráèl xii-í, cue tée véxi distritú Àsiá. ¹⁹ Te quixi mee-güedé iha cáháⁿ-güedé, te núu sá ndáá ní xini-güedé sá yùhú ndècuéchi-í ní cùu, ²⁰ ãdi ñáhá. Dico cachí tnúhu cue tée-áⁿ nǎsa ní cuu òré ní xíndecu-í jùndá-güedé núu ndècuéchi-í ãdi ñá túú ndècuéchi-í. ²¹ Dico ñá túú cuéchi-í chí ñⁿ dii-ni tnúhu ní cáháⁿ-í ní xáhaⁿ-í xii-güedé sá sàndáá iní-í sá ndótó nchaa ñáyüu ní xíhí, te ñⁿ ni núu xiǎⁿ cǎchí-güedé sá ndècuéchi-í —cǎchí té Pǎblú xáhaⁿ-dè xii té Juélí.

²² Te té Juélí sa xini váha-dé nàcuáa cuáháⁿ tnúhu Jësús, núu xiǎⁿ ñá ní cuiní-gá-dé ndatnúhu-dé ndihi té Pǎblú, te ní xáhaⁿ-dè:

—Sa ní cuu, cundetu-n na quèxio té Lìsiú tée cùu capitáⁿ cùnunu-gá, te òré-áⁿ cundáá cuèndá-n —cǎchí té Juélí xáhaⁿ-dè.

²³ Te ní xáhaⁿ-dè xii tée cùu capitáⁿ:

—Cundéé-n tē Pǎblú-ǎⁿ, te núu nása cǎchí-dé cada-n, te ñáha-n na cáháⁿ ndihi-dé cue tée xini tnáhá ndihi-dé núu cuáñaha-güedé nchaa sá xini ñùhu-dé ãdi nása cada-güedé —cǎchí té Juélí xáhaⁿ-dè xii tée cùu capitáⁿ.

²⁴ Te ní cuu titní nduu, te ní sáháⁿ té Juélí vechiúⁿ ndihi ñadihí-dé, te ñaha-áⁿ nání-áⁿ Drúsilá, te ñaha isráèl cúú-áⁿ. Te ní xáhaⁿ-dè sá quíngueñuhu-güedé té Pǎblú, te òré ní quexio-dé vechiúⁿ, te ní cáháⁿ-dè núu-yu nchaa-yu sá quíndáá iní-yu tnúhu Xítóhó Jesucristú. ²⁵ Te ní xáhaⁿ-dè:

—Mee-ni sá váha cada-ndo. Te coto-ndo mée-ndo, te vá cáda-ndó ni ñⁿ sá cuèhé sá dúhá, chí ñⁿ nduu cáháⁿ Yă Ndiöxí ndè-dacáa ñáyüu váha iní-xi, te ndèdacáa ñáyüu úhú iní-xi —cǎchí té Pǎblú xáhaⁿ-dè.

Te sá dúcáⁿ ní xáhaⁿ-dè, te ní yùhú té Juélí, te ní xáhaⁿ-dè:

—Vá cáháⁿ-gá-ó tnàvíí, cuáháⁿ, te òré cùyǎchí-í, te cana ñaha-í xii-n —cǎchí-dé xáhaⁿ-dè.

²⁶ Te té Juélí ní quide-dé cuèndá sá cuáñaha té Pǎblú díhúⁿ te vá ndíhu-gá-dé vecaá ní cùu, núu xiǎⁿ titní xito ní cana-dé té Pǎblú vechiúⁿ ní ndatnúhu ndihi tnàha-güedé, dico ñá túú ní chǎhu-dé.

²⁷ Te úú cuía ducaⁿ ní quide-güedé, te dǎtnúni ní xínu té Juélí chiúⁿ-dé, te ní ngúnutnii té Pòrsiú Fèstú. Te òré ní xínu té Juélí chiúⁿ-dé, te ní dándò-dé té Pǎblú yíhí-ni-dè vecaá. Te ducaⁿ ní quide-dé cuèndá ní cuiní-dé cuñú-dé núu cuè tée isráèl.

25

Té Pǎblú cáháⁿ ndihi-dé té Fèstú

¹ Te ní cuu úní nduu sá ní quexio té Fèstú ñúu Cèsareá ní quehe-dé chiúⁿ, te ní quee-dé cuáháⁿ-dé ñúu Jerusalén.

² Te yàcáⁿ ní naníhí tnáhá-dè ndihi nchaa dútu cùnunu ndihi nchaa cue tée tàxi tnuní ñáhá xii ñáyüu isráèl, te xáhaⁿ-güedé xii té Fèstú sá ndáá ndècuéchi té Pǎblú.

³ Te ní cáháⁿ ndáhú-güedé núu-dè sá téndàha-dé sandádú-dé quíngueñuhu ñaha-güedé vecaá xii-dé ndéé ñúu Cèsareá te candeca ñaha-güedé quíhíⁿ. Te ducaⁿ ní cáháⁿ-güedé, chí ní ndatnúhu-güedé sá cáhni ñaha-güedé xii té Pǎblú ichi ni cùu. ⁴ Te té Fèstú ní xáhaⁿ-dè:

—Vá cúu quixi-dé ndéé ndíha. Na cùndetu-dé ñúu Cèsareá chí sacú-ni nduu cuyaa-í iha te dǎtnúni núhú-í yàcáⁿ. ⁵ Te yáchí-gá quíhíⁿ ndihi-í cue tée cùnunu-gá, te yàcáⁿ cuu cáháⁿ-ndó núu ndáá ndècuéchi-dé ãdi cáháⁿ mée-dè núu ndáá ndècuéchi-dé ãdi ñáhá, te cutnúni iní-ndó —cǎchí-dé xáhaⁿ-dè.

⁶ Te ní xíndecu té Fèstú úná úxí nduu ñúu Jerusalén, te dǎtnúni cuánuhú-dé ñúu Cèsareá. Te nduu tnéé cuáháⁿ-dé vechiúⁿ, te òré ní quexio-dé, te ní xáhaⁿ-dè xii cue sandádú xínu cuéchi sá quíhíⁿ-güedé queñuhu-güedé té Pǎblú vecaá te candeca ñaha-güedé quíhíⁿ vechiúⁿ. ⁷ Te òré ní quexio té Pǎblú vechiúⁿ, te sa ndècu cue tée isráèl cue tée ní quee ñúu Jerusalén, te cuánguihu-güedé ndéé dñi té Pǎblú ní ngúnutnii-güedé, te xáhaⁿ-güedé xii cue tée cùchiuⁿ sá ndècuéchi vihi-dé, dico ñá túú ní cùndee tnúhu-güedé. ⁸ Te té Pǎblú ní xáhaⁿ-dè xii té Fèstú:

—Ná túú ndècuéchi-í, ñá túú nǎ ní quide-í, chí ñá túú tnáhá iní-í cada-í ñⁿ sá cǎchí lèi sá vǎ cúu cáda-o. Te ni xití veñúhu cǎhnu sá ïo cùnunu ñá túú nǎ quide-í, te ni té Cèsár tée yíndaha cuéhé nacióⁿ ñá túú

càháⁿ cuèhé-í cuèndá-dé —càchí té Páblú xáhaⁿ-dè xii-dé.

⁹ Te té Fèstú ní cuiní-dé cada-dé nàcuáa cudíu-dé núu cuè téé isráél ní cùu, núu xíáⁿ ní xáhaⁿ-dè xii té Páblú:

—¿Cundee ìní-n quíhíⁿ-n ñúú Jerusálén-àⁿ? Te yàcáⁿ cundáá cuéchi sá sàá díquí-n —càchí té Fèstú xáhaⁿ-dè xii té Páblú.

¹⁰ Te xáhaⁿ tē Páblú:

—Díu-ni ìnⁿ vechiùⁿ téé cùchiuⁿ Cesár ndécù-í iha, te díu-ni iha cada ndáá-n núu cuiní-n ní cùu. ¿Te ná cuèndá candeca ñaha-n quíhíⁿ ingá xichi? Yòhó tñahá-n xini-n sá ñà túú nã quidè-í ñáyiú isráél.

¹¹ Chi núu dícò yúhú ní quide-í ìnⁿ cuéchi càhnu, te ñá túú nã cada-xi cuéi na càhni ñaha-ndo xii-í ní cùu. Te sa ní cut-nùnì ìní-n sá ñã ndáá, chi mee-ni tñuhu ndehnde xicáháⁿ-güedé, te ñá túú ndúu váha-xi ducaⁿ càda-n cúñaha-n sá quíhíⁿ-í ndíhi-güedé ingá xichi. Te xíáⁿ cuiní-í quíhíⁿ-í núu tē Cesár téé yìndaha cuéhé nacióⁿ, te yàcáⁿ cáháⁿ méé-dé núu ndáá ndècuéchi-í —càchí té Páblú xáhaⁿ-dè xii té Fèstú.

¹² Te ní ndatnúhu té Fèstú ndíhi cue téé chindee tñuhu ñaha xii-dé, te dàtnùnì ní xáhaⁿ-dè xii té Páblú:

—Te sa ní cáháⁿ-n sá quíhíⁿ-n quítnahá-n tē Cesár te díu-ni quíhíⁿ-n, te quini-n nãsa cáháⁿ téé-àⁿ yàcáⁿ —càchí-dé xáhaⁿ-dè xii té Páblú.

Té Páblú cáháⁿ ndíhi-dé té Àgripá téé yìndaha nacióⁿ Isráél

¹³ Te sáta ñí cuu cuéhé nduu, te ní quee té Àgripá téé yìndaha nacióⁿ Isráél cuáháⁿ-dé ñúú Cèsareá ndíhi ñadíhí-dé, te ñaha-áⁿ nání-áⁿ Berenicé te òré ní quexió-yu, te ní cáháⁿ ndíhí-yu té Fèstú. ¹⁴ Te sáta ñí cuu titní nduu, te ní cáháⁿ té Fèstú cuèndá té Páblú ní xii-dé té Àgripá:

—Ndècu ìnⁿ téé ní dándòo té Juéllí vecaá nání-dè Páblú. ¹⁵ Te cútnahá ní sáháⁿ-í ñúú Jerusálén ní nanítnahá-í ndíhi cue dítú cùnúu ndíhi cue téé cùu şacuéhé núú ñáyiú isráél. Te ní dácáá díquí-güedé té Páblú cuéchi, te ní cachí-güedé sá táúchìuⁿ-í cahni ñaha-güedé xii-dé ní cùu. ¹⁶ Te ní xáhaⁿ-í xii-güedé sá vã cúú, chi ñá túú dùcaⁿ quide nchúhú cue téé rómá cùtexínu cada castiú-ndí ñáyiú, chi

díhna-gá ndúcu tñuhu-ndí núu ñáyiú sàá cuéchi díquí-xi cuèndá quini-ndí núu nása cáháⁿ méé-yu ndíhi ñáyiú sàcáⁿ cuéchi cuèndá-yu, te òré-áⁿ cútnùnì ìní-ndí núu ndáá ndècuéchi-yu àdi ñáhá, te ducaⁿ te ñihí-ndí nàcuáa quide ndáá-ndí cuèndá-yu, duha ní xáhaⁿ-í xii-güedé —càchí té Fèstú xáhaⁿ-dè xii té Àgripá.

¹⁷ Te ní xáhaⁿ tē Fèstú:

—Te sáta ñí quexio-güedé ndéé ndíha, te nduu tñéé ní sáháⁿ-ni-ndí vechiùⁿ. Te ní xáhaⁿ-í sá quíngueñuhu-güedé té Páblú candeca ñaha-güedé quixi, te òré ní quexio-dé, ¹⁸ te ní ngúita-güedé xáhaⁿ-güedé sá ndècuéchi-dé. Te ní sani ìní-í sá ìnⁿ cuéchi càhnu tee ñaha-güedé dico ñáhá, chi dícò-ni sá ìnⁿ tñuhu ní cáháⁿ-dé, xíáⁿ ducaⁿ ñí quide-güedé.

¹⁹ Te ní tenáá ñáhá-güedé xii-dé, chi càchí-güedé sá ñà túú cáháⁿ váha-dé cuèndá ndiòxi-güedé. Te tñahá-ni cuèndá ìnⁿ téé nani Jesús cáháⁿ-dé, chi càchí-dé sá ñí xihí téé-áⁿ te ní ndoto-dé càchí-dé xáhaⁿ-dè xii-güedé, càchí-güedé. ²⁰ Te ñá ní cùtnùnì ìní-í nása cúñaha-í xii-güedé cuèndá tñéhdé cuéchi-dé. Te xíáⁿ ní xicáⁿ tñúhu-í núu té Páblú núu cundee ìní-dé quíhíⁿ-dé ñúú Jerusálén, te ndéé ndíácáⁿ cada ndáá-ndí cuèndá-dé, te núu ndáá ndècuéchi-dé nàcuáa cáháⁿ-güedé àdi ñáhá ní cùu. ²¹ Te dàtnùnì té Páblú ní cachí-dé sá cùndecu tnaa-dé vecaá te dàtnùnì quíhíⁿ-dé núu tē Cesár, te téé-áⁿ cada ndáá-dé cuèndá-dé. Te cuèndá sá dúcáⁿ ñí cáháⁿ té Páblú, xíáⁿ núu ní xáhaⁿ-í sá cùndéé ñáhá cuè sandadú xii-dé, ñini na còto-í nása cada-í quíhíⁿ-dé núu tē Cesár, duha ní xáhaⁿ-í xii-güedé —càchí té Fèstú xáhaⁿ-dè xii té Àgripá.

²² Te té Àgripá ní xáhaⁿ-dè xii té Fèstú:

—Te tñahá yúhú ío cudíí ìní-í cundèdóho-í tñuhu cáháⁿ-dé —càchí-dé xáhaⁿ-dè.

Te ní xáhaⁿ tē Fèstú:

—Tneé cana-í-dé te cundèdóho-n nása cáháⁿ-dé —càchí-dé xáhaⁿ-dè.

²³ Te nduu tñéé ní quexio té Àgripá ndíhi ñadíhí-dé tá Berenicé vechiùⁿ, te ío ní quide càhnu ñaha-güedé xii-yu. Te cuánguñíhu-yu vechiùⁿ ndíhi cue téé cùu capitáⁿ cùnúu-gá ndíhi cue téé cùnúu ñúú Cèsareá. Te té Fèstú ní xáhaⁿ-dè sá quíngueñuhu-güedé

té Páblu vecaá, te òrè ní quexio-dé, ²⁴te ní xáhaⁿ tē Fèstú xii té Àgripá ndíhi nchaa ñáyiú xindecu-áⁿ:

—Chí cundèhe tée iha chi tée-a càchi cue tée isràél sá ndècuéchi-dé, te cútñahá ní xindecu-í ñuú Jerusálén ní cachí-güedé sá ndàá ndècuéchi-dé, te diu-ni ducaⁿ cáháⁿ-güedé iha. Te nchaa-güedé ní cuáá-güedé te càchí-güedé sá táuchiuⁿ-í cahni ñaha-güedé xii-dé ní cùu. ²⁵Te sáta ní ndíhi cuèndú ní cáháⁿ-güedé, te ní cutnùnì iní-í sá ñà túú nì ìⁿ cuéchi càhnu ní quide-dé, núu ñá túú ní táuchiuⁿ-í cahni ñaha-güedé xii-dé. Te mee-dé ní cachí-dé sá quíhíⁿ-dé núú tē Cèsár tée yíndaha cuéhé nacióⁿ, te ní xáhaⁿ-í sá cúú quíhíⁿ-dé. ²⁶Te ñá túú ní xini váha-í nása ní quide-dé, núu xíáⁿ ñá ní ñíhi-í nàcuáa cadúha-í tutú quíhíⁿ ndaha té Cèsár, te xíáⁿ ní cana-í-dé véxi-dé iha cuèndá nchaa-ndo cáháⁿ ndíhi-ndo-dé. Te ducaⁿ canuu cadíhna-gá yòhó tātá Àgripá cácaⁿ tnúhú-n núú-dé núú nása cáháⁿ-dé, te òrè-áⁿ çutnùnì iní-í nása cada-í cadúha-í tutú quíhíⁿ ndaha té Cèsár. ²⁷Chi sàni iní-í sá ñà túú nduu váha-xi sá quíhíⁿ ìⁿ tée tàú cuéchi te núu vá còdò tnùnì núú ìⁿ tutú nàcuáa càa cuéchi tàú-dé —càchí tē Fèstú xáhaⁿ-dè xii-güedé.

26

Te Páblu cáháⁿ ndíhi-dé té Àgripá

¹Te dàtnùnì ní xáhaⁿ tē Àgripá tée yíndaha nacióⁿ Isràél xii té Páblu:

—Te vitna cáháⁿ-n núu nása ní cuu cuèndá-n —càchí-dé xáhaⁿ-dè.

Te tē Páblu ní ndacani-dé ndaha-dé sá cündedòho-güedé, te ní xáhaⁿ-dè xii té Àgripá tée yíndaha nacióⁿ Isràél:

²⁻³—Tātá Àgripá, ío cùdèí iní-í sá ní naníhí tnàhá-ó vitna, chí yòhó ío váha xini-n nchaa nacuáa quide ñáyiú isràél quidé càhnú-yu Yá Ndiòxí, te ío váha xini-n nchaa tnúhu xitnàhá-yu. Te vitna cundee iní-n cündedòho-n ìⁿ úú tnúhu na cáháⁿ-í. Na càchí tnúhu-í sá ñà ndàá ní quide-í nchaa sá cáháⁿ cue tée isràél.

Té Páblu cáháⁿ-dé nàcuáa ní quide-dé cútñahá vátá túhá-gá-dé ichi Yá Ndiòxí

⁴Te sa náha nchaa cue tée cùnunu núú ñáyiú isràél nàcuáa ní quide-í ñuú-í ndíhi ñuú Jerusálén cútñahá ní cuu landú-í. ⁵Te

mee-güedé náhá-güedé sá ndèé ìhli-í ní chitnahá-í cue tée cùu fariséú. Te núu cuini-güedé cáháⁿ-güedé sá tée fariséú cùu-í àdi ñáhá dico nchaa-güedé sa náha-güedé sá cuè tée-áⁿ ní chitnahá-í. Te cue tée cùu fariséú-áⁿ ío cuini-güedé cada-güedé nchaa nàcuáa nchicúⁿ nihnu ñáyiú quidè-yu. Te yúhú nchaa sá nchicúⁿ nihnú-yu quidè-yu-áⁿ ní quide-í. ⁶Te vitna ndècu-í iha, te cáháⁿ-n núu váha-ni quide-í àdi ñáhá, chí cue tée-áⁿ tée ñaha-güedé cuéchi xii-í cuèndá sá sàndáá iní-í sá ndótó nchaa ñáyiú ní xíhí. Te diu-ni ducaⁿ ní xáhaⁿ Yá Ndiòxí xii nchaa ñani tnàhá-ó ní xindecu ndéé sanaha. ⁷Te nchaa ñáyiú-áⁿ xindetú-yu nduu ndòto ñáyiú ní xíhí ní cùu. Te diu-ni ducaⁿ ndètu nchaa ñani tnàhá-ó ndècu ñuyúú-a ndéé vitna, te xíáⁿ núu cuèi nduu cuèi níú cáháⁿ ndíhí-yu Yá Ndiòxí. Te sá sàndáá iní-í núu xíáⁿ ní cáháⁿ-í, te tée ñaha cue tée isràél cuéchi xii-í. ⁸Te ná cuèndá nchòhò cue tée isràél ñá túú cuini-ndo quindáá iní-ndo sá dándòto Yá Ndiòxí nchaa ñáyiú ní xíhí? —càchí tē Páblu xáhaⁿ-dè.

Té Páblu caní-dé cuèndú sá ní xóo chihi-dé ñáyiú sàndáá iní tnúhu Jèsús vecaá

⁹Te ní xáhaⁿ tucu tē Páblu:

—Ndéé dàv-áⁿ ní quide úhú-í ñáyiú sàndáá iní-xi tnúhu Jèsús Yaá ní quee ñuú Nazàrét, te ní cáháⁿ-í sá váha-ni ní quide-í sá dúcáⁿ ní quide-í. ¹⁰Te diu-ni ducaⁿ ní quide-í ñuú Jerusálén. Te cue dútú cùnunu ní taxi-güedé ìⁿ tutú cuèndá tñi-í ñáyiú ní sàndáá iní tnúhu Jèsús, te v-í-yu ní chihi-í vecaá. Te òrè ní cáháⁿ-güedé sá cahní-güedé ñáyiú-áⁿ, te tnàhá-í ní cáháⁿ-í sá cúú càhni ñaha-güedé xí-yu. ¹¹Te titní xito ní sáháⁿ-í nchaa veñúhu ñáyiú isràél, te ní caní-í-yu te ní xáhaⁿ-í sá dàñ-à-yu ichi Jèsús. Te cuèndá ío ní cudèèⁿ-í núú-yu, xíáⁿ ní sáháⁿ-í nchaa ñuú xíca ní sánúnducú-í dava-gá ñáyiú sàndáá iní tnúhu-gá cuèndá dandòho ñaha-güedé xí-yu.

Té Páblu cáháⁿ tucu-dé nása ní cuu ní tuha-dé ichi Yá Ndiòxí

(Hch. 9:1-19; 22:6-16)

¹²Te cuèndá xíáⁿ ní xica tucu-í cuáháⁿ-í ñuú Dàmascú, nèhè-í tutú ní taxi cue dútú cùnunu cuáháⁿ, cuèndá sá ndácú-í tñi-í nchaa ñáyiú sàndáá iní tnúhu Jèsús ní cùu. ¹³Te òrè cauxúú nduu ñúhu-í ichi cuáháⁿ-í, te uuⁿ ní ní quee ñúhu

andiu nĩ dáyèhé-xi ndéé núú núnñ-í ndihi cue téé ndèca tnaha ndihi-í, te níhi-gá ní dáyèhé-xi dàcúúxí nchicanchii. ¹⁴ Te nchaa-ndí ní nduá-ndí ndéé ñuhu, te ní tecú dóho-í cáháⁿ ñⁿ sá cáháⁿ tnúhu ñáyiú isràél, te cächí-xi: “Yòhó Sàulú, ¿Ná cuèndá cúú ùhú iní ñáhá-n xii-í dándòho ñaha-n? Te ío dándòho-n mee-n, chi dàtná cuini-n quide ndicutu quide-n chí quití-áⁿ òré cùxi-güedé-di pùyá te sàha-di patadá núú-xi, te sá dúcáⁿ quide-di te quide úhú-di mee-di. Te ducaⁿ sàtnahá-xi cùu yohó chí ñá túú sàndáá iní ñáhá-n xii-í”, cächí sá ní cáháⁿ-áⁿ. ¹⁵ Te ní xáhaⁿ-y: “¿Ná cúú yòhó sá ní cáháⁿ-ái?”, xáhaⁿ-y. Te cächí sá cáháⁿ-áⁿ: “Yúhú cúú-í Jèsús Yaá cúú ùhú iní-n”, duha ní cachí sá cáháⁿ-áⁿ. Te xiáⁿ ní cutnùní iní-í sá Jèsús cáháⁿ. ¹⁶ Te ní cachí-gá: “Ndacuñí-n chí yúhú cáháⁿ-í chí cuini-í quíhíⁿ-n càda-n chiuⁿ-í, chí quíhíⁿ-n cáháⁿ-n núú ñáyiú nàcuáa ní cuu ní xiní ñáhá-n xii-í vitna, te quixi tucu-í cáháⁿ ndihi ñaha-í xii-n, te cùñaha-n xii-yu nàcuáa cáháⁿ-í. ¹⁷ Chí cuini-í quíhíⁿ-n cáháⁿ-n tnúhu-í núú ñáyiú isràél ndihi núú ñáyiú ñá túú cùu ñáyiú isràél, te coto ñaha-í xii-n cuèndá vá cáhní ñáhá-yu xii-n. ¹⁸ Te cuini-í quíhíⁿ-n cùñaha-n xii-yu sá dāñá-yu nchaa ichi cuèhé ichi duha ndècú-yu, te tuhá-yu ichi váha cuèndá vá quindáá iní-yu cadá-yu sá cáháⁿ yucu ñávaha, te quindáá iní-yu cadá-yu nchaa nàcuáa cáháⁿ Yá Ndiòxí. Te núu na quindáá iní-yu tnúhu cáháⁿ-í, te cada càhnu iní-í nchaa cuèchi-yu, te naníhí tànhú-yu ndihi dava-gá ñáyiú sa ní xócuñí nchaa sá cuèhé sá dúhá ní xindecu iní-yu”, duha ní cachí-gá xii-í —cächí té Páblú xáhaⁿ-dè xii té Àgripá té yindaha nacióⁿ Isràél.

Té Páblú quidè-dè nchaa nàcuáa ní xáhaⁿ Jèsús cada-dé

¹⁹ Te ní xáhaⁿ tùcu té Páblú xii té Àgripá:

—Ñá túú dàña ndéé-í quidè-í nchaa nàcuáa ní cáháⁿ Jèsús òré ní cáháⁿ-gá andiu. ²⁰ Te díhna-gá ñáyiú ñuú Dàmascú ní cáháⁿ-í tnúhu-gá núú-yu, te ní xáhaⁿ-í xii-yu sá dāñá-yu nchaa sá cuèhé sá dúhá quidè-yu, te cáháⁿ ndihi-yu Yá Ndiòxí, te cadá-yu mee-ni sá váha cuèndá cutnùní iní dava-gá-yu sá ní dāñá-yu nchaa sá ñá túú váha ní xóo cadá-yu. Te ducaⁿ-ni ní

xáhaⁿ-y xii ñáyiú ñuú Jerusàlén ndihi ñáyiú nihí nacióⁿ Isràél ndihi nchaa ñáyiú ñá túú cùu ñáyiú isràél. ²¹ Te cuèndá sá dúcáⁿ ní cáháⁿ-í núu ní tñí ñaha cuè téé isràél xii-í cùtnàhá ní sáháⁿ-í veñúhu càhnu sá ío cùnnu cahni ñaha-güedé ní cùu. ²² Te diu-ni mee Yá Ndiòxí ní chindee ñaha-gá xii-í núu ndècu-í iha tnáví cáháⁿ-í tnúhu-gá, te mee-ni tnúhu-gá cáháⁿ ndihi-í nchaa-yu, cuèí ñáyiú cuica, te cuèí ñáyiú ndàhú. Te ndí Moisés ndihi dava-gá cue téé ní xóo cáháⁿ tnúhu Yá Ndiòxí ndéé sanaha ní cáháⁿ-güedé nàcuáa cada-xi vitna, te diu-ni ducaⁿ cáháⁿ-í nchaa-ni nduu. ²³ Te cue téé-áⁿ ní cachí-güedé sá Cristú Yaá tendaha Yá Ndiòxí quixi ñuyíú-a ndoho tnahá-gá, te cuú-gá, te dàtnùní ndoto-gá. Te ducaⁿ càda-xi nchaa ñáyiú ní xíhí ndotó-yu núu na sàá nduu chí ducaⁿ càda-xi ní cachí mée Yá Ndiòxí. Te cuèndá sá dúcáⁿ ní ndoto-gá, xiáⁿ cùtnùní sá cúú naníhí tànhú ñáyiú, cuèí ñáyiú isràél, te cuèí ñáyiú ñá túú cùu ñáyiú isràél. Te dàtná-ni nduu tnúhu ní cáháⁿ cue téé ní xóo cáháⁿ tnúhu-gá ndéé sanaha-áⁿ, te diu-ni ducaⁿ cáháⁿ yúhú tucu —cächí té Páblú xáhaⁿ-dè.

Té Páblú xáhaⁿ-dè xii té Àgripá sá quindáá iní-dé tnúhu Jèsús

²⁴ Te sá dúcáⁿ ní cáháⁿ té Páblú, te ní cáháⁿ níhi té Fèstú, te xáhaⁿ-dè:

—Páblú, jóo lùcú cáháⁿ-n! Cuèndá ío vai ní dácúahá-n, núu xiáⁿ ndadá lùcú ñáhá-xí xii-n —cachí-dé xáhaⁿ-dè.

²⁵ Te ní xáhaⁿ té Páblú:

—Ñáhá, vá dúcáⁿ cáháⁿ-n chí ñá díú sá lùcú-í duha cáháⁿ-í, chí tnúhu ndáá cáháⁿ-í. ²⁶ Te té Àgripá-a sa ñaha-dé ndihi nchaa ñáyiú isràél nàcuáa ní cuu, chí sa ní níhí-dè tnúhu ndihi dava-gá-yu nàcuáa ní cáháⁿ-í, núu xiáⁿ cùyí-í cáháⁿ ndihi-í-dé —cächí-dé xáhaⁿ-dè xii té Fèstú.

²⁷ Te ní xáhaⁿ-dè xii té Àgripá:

—Yúhú sa xiní-í sá sàndáá iní-n tnúhu ní chídó tñnì cue téé ní xóo cáháⁿ tnúhu Yá Ndiòxí ndéé sanaha —cächí-dé xáhaⁿ-dè.

²⁸ Te ní xáhaⁿ té Àgripá:

—¿Quide-n cuèndá sá ñⁿ úú tnúhu ní cáháⁿ-n te quindáá iní-í tnúhu Jèsús cáháⁿ-n-áⁿ? —cächí-dé xáhaⁿ-dè.

²⁹ Te ní xáhaⁿ tùcu té Páblú:

—Cuèí vitna te cuèí ndéé cuèé-gá dico cuini-í sá dacuñí sá quindáá iní-n tnúhu Jèsús. Te diu-ni ducaⁿ xicáⁿ tànhú-í núú Yá

Ndiòxí sá ncháá ñáyi ndècu ndihi-o ilha quindáá iní-yu tnúhu-gá dàtná cuiní-n ní quide yúhú, ducaⁿ càdá-yu. Dìcò-ni sá ñúu vá quíhíⁿ-ni-yu vecaá dàtná cuiní-n ndòho yúhú —càchí-dé xáhaⁿ-dè xii té Àgripá.

³⁰ Te sáta dúcáⁿ ní cáháⁿ-dé, te ní ngúnutnúi té Àgripá tée yíndaha nacióⁿ Isráel, ndihi té Fèstú tée cùu gobiernú, ndihi tá Berènicé ndihi dava-gá ñáyi xínucóo yatni. ³¹ Te ní tnahá-yu ndèca tnahá-yu cuáháⁿ ìⁿ xio. Te ní xítnhá-yu:

—Tée-áⁿ ñá túu nã cuèchi ni quide-dé ñúu chihi ñaha-güedè vecaá àdi cahni ñaha-güedè —càchí-yu xítnhá-yu.

³² Te té Àgripá ní xáhaⁿ-dè xii té Fèstú:

—Cuèchi mee-dè chi ní cachí-dé sá quítnhá-dé té Cèsár, xíáⁿ ñúu ndíhu tucu-dé vecaá, te núu ñá túu dùcaⁿ ni cáháⁿ-dé, te cácu-dé ní cùu —cachí-dé xáhaⁿ-dè xii té Fèstú.

27

Té Páblú cuáháⁿ-dé ñúu Ròmá

¹² Te ní ndatnúhu-güedè sá quíhíⁿ té Páblú ndihi bàrcú nacióⁿ Italiá, te tnahá yúhú quíhíⁿ-í ndihi-dé. Te tnahá ìⁿ tée nani Aristarcú cuiní-dé quíhíⁿ ndihi-ndí-dé, te cùu-dé tée ñúu Tesalónica, te ñúu-áⁿ yíndèhu-xi distritú Macèdoniá. Te ní sáha cuèndá-güedè té Páblú ndihi ìⁿ úú-gá cue tée xixíhi vecaá ní queheⁿ cuèndá ñáhá té Jülüú tée cùu capitáⁿ, tée yíndaha nchaa sandadú nání Àugustú, te ní queé-ndí nchaa-ndí bàrcú ñúu Adramitiú. Te ní xica bàrcú-áⁿ cuáháⁿ-ndí ndihi-xi te cuíta yáha-ndí ìⁿ úú ñúu yíndèhu distritú Àsiá quíhíⁿ. ³ Te nduu tneé ní quexìo-ndí ñúu Sídón. Te ío váha ní quide té Jülüú, chi ní dàñá-dè ní quene té Páblú ní sáháⁿ-dé ní cáháⁿ ndihi-dé cue tée ío váha tnahá tnúhu ndihi-dé ñúu cudana cundahú iní ñáhá-güedè cuáñaha-güedè nchaa sá xíní ñúhu-dé. ⁴ Te dàtnúni ní ndéé tucu-dé bàrcú cuáháⁿ-ndí. Te ío ñíhi táchí te ñá ní dàña-xi caca ndáá bàrcú, te ní sáháⁿ bàrcú ndéé yatni yuhu distritú Chìpré, te distritú-áⁿ cáá cuádava xití lámár, te xíáⁿ ñá túu cuèhé táchí ni yáha-ndí. ⁵ Te ta yáha-ndí cuáháⁿ, te ní yáha-ndí ìⁿ xio yuhu distritú Ciliciá ndihi yuhu distritú Pánfilíá,

te ní sáá-ndí ndéé ñúu Mírá ìⁿ ñúu yíndèhu distritú Liciá.

⁶ Te ní quene tée cùu capitáⁿ cuándúcú-dè ingá bàrcú, te ní ñíhí-dè ìⁿ bàrcú tée ñúu Alejandriá, ñúhú ichi-xi quíhíⁿ-xi nacióⁿ Italiá. Te ní ndicuaca ñaha-dè xii-ndí cuáháⁿ-ndí ní queé-ndí bàrcú-áⁿ, te ní xica-xi cuáháⁿ-xi. ⁷ Te ío cuèé cuáháⁿ bàrcú-áⁿ, cuèhé nduu ní xúhuⁿ-xi ichi, te yica-ni ní quexìo-ndí yuhu ñúu Nidú, te ñá ní dàña-gá táchí quíhíⁿ ndáá bàrcú ñúu ní xícó ndúu-xi. Te ní yáha-ndí ìⁿ xio yuhu distritú Crètá núu ñá túu quene vihi táchí, te ñúu-ni cuádava tucu lámár cáá distritú-áⁿ. Te ní yáha-ndí yuhu ñúu Salmón, te ñúu-ni Crètá yíndaha-xi ñúu-áⁿ.

⁸ Te ní yáha-ndí cuáháⁿ-ndí mee-nã núu ràyá distritú Crètá, te ío ní ndoho-ndí ní sáá-ndí ìⁿ xichi núu nání Puèrtú Váha, yatni víi-ni-gá ñúu Làséá.

⁹ Te ní cuyaa vihi-ndí ichi, ducaⁿ-ni cùu-ndí ní tnahá yóó cúuⁿ dàú táchí, te ío úhú yáha bàrcú ñúu na quíhíⁿ-ni-xi. ¹⁰ Te ní xáhaⁿ té Páblú xii-güedè:

—Nchaa-ndo cündedóho-ndo tnúhu na càháⁿ-í-a. Ío úhú núu na càda yica-o quíhíⁿ-ó ndíhi bàrcú chi cuíta càrgá te cuíta bàrcú, te cuu-ni iní-xi tnahá-ni mee-o cùu-ó chi cáhá-ó ñúu na ngàunihu-o xití ndute —càchí-dé xáhaⁿ-dè xii-güedè.

¹¹ Te tée cùu capitáⁿ ñá ní sándáá iní-dé tnúhu ní cáháⁿ té Páblú. Dico tnúhu ní cáháⁿ tée dàcaca barcú ndíhi xitohó-xi chí ní sándáá iní-dé. ¹² Te ñá ní tnahá iní-güedè Puèrtú Váha cuèndá sá ní tnahá yóó cúuⁿ dàú táchí, te ñá túu dàhu váha táchí xíáⁿ, núu vai-güedè ní cuiní-güedè yáha-güedè quíhíⁿ-güedè sáá-güedè ndéé ñúu Fènicé ní cùu. Te yacáⁿ cundecu-güedè yóó cúuⁿ dàú táchí cuèí ñá túu caváha vihi, chi nchí nàcuáa yáha bàrcú, te yacáⁿ quíhu táchí, dico dàhu-gá. Núu xíáⁿ ndéé ndíácáⁿ nàtácá bàrcú yóó cúuⁿ dàú táchí, te ñúu-ni Crètá yíndaha-xi ñúu-áⁿ.

Nitúhú lámár cúuⁿ dàú táchí

¹³ Te duha ní quene nuu luha táchí, xíáⁿ ní sani iní-güedè sá ndácú-güedè quíhíⁿ-güedè, núu ní natava-güedè caá ndètní ndéé bàrcú, te ní xica-xi cuáháⁿ-xi ní yáha-ndí yatni víi yuhu distritú Crètá.

¹⁴ Te tnaa-ni ní cuu sá nǐ xica bàrcú, te duha ní cunuú dǎú táchí ìⁿ xio yuhu ñúú-áⁿ ¹⁵ te nchita ichí cuáháⁿ bàrcú. Te ñá ní ndacu-gá-xi quíhíⁿ ndáá-xi nàcuáa cuáháⁿ-xi ní cùu, núu ní dáñá-ndí cuáháⁿ meé-nǎ bàrcú. ¹⁶ Te ní yáha-ndí ìⁿ ñúú nání Claudá, te ñúú-áⁿ cáá cuádava xítí lámár. Te ìⁿ xio yuhu ñúú núú ñá túú quène vihi táchí nǐ yáha-ndí, te bàrcú líhli sá nchicúⁿ sáta bàrcú cáhnú, chi ní ndacu-ndí ní taxúha-ndí xítí bàrcú cáhnú. ¹⁷ Te sáta ní ndacu-ndí ní taxúha-ndí bàrcú líhli, te ní ducúⁿ nuu-güedé yoho bàrcú cáhnú. Te ío ní yùhú-güedé sá yáha bàrcú ndéé núú ñúhú cùchí yuhu ñúú Sirté, núu xǎⁿ ní ndíhi dóó nchítá díquí bàrcú ní nuu nehe-güedé, chi dóó-ǎⁿ ÿo níhi chindaha táchí, núu xǎⁿ cuáháⁿ bàrcú ìⁿ xio. Te ní dáñá-güedé ñá túú-gǎ ní dácaca-güedé, núu cuáháⁿ meé-nǎ-xi ta chindaha táchí cuáháⁿ. ¹⁸ Te ío níhi dǎú táchí, te ñá ní cuiní tnàhí-xi yáha. Te nduu úú sá dúcáⁿ ñá túú-gǎ ní dácaca-güedé bàrcú te ní ngüíta-güedé ní dǎngöyö-güedé sá nchídó-xí cuèndá cuiní-güedé nduu ñamá-xi. ¹⁹ Te nduu úní ní dǎngoyö-güedé nchaa ndachiuⁿ cánehe chiúⁿ-güedé xítí bàrcú. ²⁰ Te cuéhé nduu ñá túú ní xiní-ndí ní chòdíní ní nchíanchii, chi ío níhi ní cuuⁿ dǎú táchí, núu ní cáháⁿ-ndí sǎ vǎ cǎcu-ndí, chi ndíhi-ndí cáháⁿ ní cáháⁿ-ndí.

²¹ Te ní cuu títní nduu ñá túú-gǎ xéxí-ndí, núu xǎⁿ ní ngúnutní té Pǎblú núú-güedé, te xáhaⁿ-dè:

—Quíndáá iní-ndó tnúhu ní cáháⁿ-í, te cundeçu nahi-o Crétá ní cùu. Te núu ní tníi-ndo tnúhu-í, te vǎ dácúita-o càrgá ndíhi dava-gǎ ndàchiuⁿ ni cuu. ²² Te vǎ yùhú-ndó chi vǎ cùú ní ìⁿ-ndo dico bàrcú chí cuíta. ²³ Te nàha-ndo sá yùhú cáháⁿ ndíhi-í Yǎ Ndióxi te quide-í nàcuáa cáháⁿ-gǎ. Te diu-ní mee-gǎ ní techiuⁿ-gǎ ìⁿ espíritú xínú cuèchi núú-gǎ ní quixí, ²⁴ te ní cachí-xi xii-í: “Vǎ yùhú-n chi vǎ cùú-n, dico dacuití quíhíⁿ-n cáháⁿ ndíhi-n té Cèsár. Te ní ìⁿ téé ndíhi-n vǎ cùú, chi ío cùdíí iní ñáhá Yǎ Ndióxi xii-n”, duha ní cáháⁿ espíritú xínú cuèchi núú-gǎ ní cachí tnúhu-xi xii-í. ²⁵ Núu xǎⁿ cáchí tnúhu-í sǎ vǎ yùhú-ndó, chi sa cùtnuní iní-í sǎ cádá Yǎ Ndióxi nàcuáa ní cáháⁿ espíritú xínú cuèchi núú-gǎ. ²⁶ Te mee táchí chindaha-xi bàrcú daquíhíⁿ-xi

ndéé yuhu ndüte —cachí té Pǎblú xáhaⁿ-dè xii-güedé.

²⁷ Te sa ní cuu sáhúⁿ nduu sáhúⁿ níú sǎ ní ngüíta-xi cùuⁿ dǎú táchí, te ñá túú-gǎ dácaca-güedé bàrcú, chi mee-ñá táchí tá chindaha-xi barcú cuáháⁿ núú ndute lámár Àdriá. Te sáta ní cuu dava níú, te ní quide cuèndá cue téé dácaca bàrcú sǎ tá cùyatni-güedé ñuhu yìchí.

²⁸ Te ní chicuáhá-güedé ná daha-gǎ mètrú néhé-xí sǎ cùnú xítí ndute cuèndá cutnùní iní-güedé sǎ tá cùyatni-xi ndéé yuhu lámár, te nèhe-xi ócò sáhúⁿ ìⁿ-ni-gǎ mètrú. Te ní xica tucu bàrcú luha-gǎ, te dǎtnùní ní chicuáhá tucu-güedé, te xǎⁿ néhé-xí ócò úsá-ni-gǎ mètrú. ²⁹ Te ní yùhú-güedé sǎ candaundeé-xi cava, te ní queheⁿ-güedé cùmí caá náhnú sǎ nchicúⁿ yoho, te ní dáquèe-güedé xítí ndute ndàa sáta bàrcú, te dǎtnùní ní ngüíhí-xi ñá ní xica-gǎ-xi, te ní cuiní-güedé sǎ bré-ni tũndaá ní cùu.

³⁰ Te cue téé dácaca bàrcú ní natava-güedé bàrcú líhli dǎndée-güedé núú ndute ní cùu, te ní cachí-güedé sǎ quíhíⁿ-güedé ndàa núú bàrcú dàquèe-güedé úú-gǎ caá cuèndá cuita candeé-xi bàrcú cáhnú cuèndá sǎ vǎ cǎcá-xí. Te cuiní-güedé dandáhú-güedé dava-gǎ nchúhú cue téé ñuhu ndíhi-güedé bàrcú, chi ní ndatnúhu-güedé sǎ cùnú-güedé ní cùu.

³¹ Te té Pǎblú ní xáhaⁿ-dè xii téé cùu capitáⁿ ndíhi dava-gǎ sandàdú:

—Te núu na dǎndóo ñaha cuè téé dácaca bàrcú cunu-güedé, te vǎ cǎcu-o —cachí-dé xáhaⁿ-dè.

³² Te sǎ dúcáⁿ nǐ xáhaⁿ-dè núu ní sáháⁿ sandàdú ní xehndé-güedé yoho nchicúⁿ bàrcú líhli dǎngáuníhnu-güedé xítí ndute cuáháⁿ-xi.

³³ Te váha váha-ni ta tũndaá cuáháⁿ, te ní xáhaⁿ té Pǎblú:

—Sa ní cuu sáhúⁿ nduu ñá túú tnàhí xèxi-ndo sǎ ndíhú iní-ndó. ³⁴ Te vitna yáchí-ndó, chi caxi-ndo cuèndá naníhí ndéé-ndó, te vǎ yùhú-ndó chi ñá túú nǎ tnahá ní ìⁿ-ndo —cachí-dé xáhaⁿ-dè xii-güedé.

³⁵ Te sáta dúcáⁿ nǐ cáháⁿ-dé, te ní queheⁿ-dé ìⁿ pǎá, te ní ndacáⁿ táhú-dè núú Yǎ Ndióxi, te núú-güedé nchaa-güedé ducaⁿ ní quide-dé, te dǎtnùní ní táhú-dè luha ní xexi-dé. ³⁶ Te ducaⁿ te dǎtnùní ní cuyíi-güedé ní xexi-güedé nchaa-güedé.

³⁷ Te úu ciendú únídico sáhúⁿ ñⁿ-ndí ñúhú bàrcú núú tñàhá té Pàblú, te nchaa-ndí ní xexi ñdihí-ndí-dé. ³⁸ Te ní xexi-ndí ní ndahá xití-ndí. Te dátñuní ní ngüíta-güedé ní tava-güedé nchaa ngohmchi triú ní dāngoyo-güedé xití ndute cuendá nduu ñamá-gá bàrcú.

Ní dáhu bàrcú xití lámár

³⁹ Te sáta ní túndaá, te ná ní cùtnuní-gá iní-güedé ndèé cúu-xí núú ní sáá-güedé, te ní xini-güedé ñⁿ xichi núú ní xícó ndúú luha yuhu lámár, te vai vihi cúchí dāndáá-xí yùhu ndute, te xíáⁿ ñà túú dàcandá víhí tǎchí ndute. Te ní ndatnúhu-güedé sá ndácú-güedé dacaca-güedé bàrcú quíhíⁿ-xi ndéé núú ñúhú cúchí. ⁴⁰ Te xíáⁿ núú ní sáháⁿ-güedé ní xehndé-güedé nchaa yoho nchicúⁿ caá tǎcandéé bàrcú ní ndóo xití lámár, te ní nadatáyá-güedé vítú sá dácuico-xi bàrcú, te ní nacata caa-güedé ñⁿ dóo díquí bàrcú, te ta chindaha táchí cuáháⁿ yuhu lámár tá cüyatni-xi ñuhu yichí cuáháⁿ. ⁴¹ Te ndècu ñⁿ xichi ní ñatacá víhí cúchí xití ndute, te xíáⁿ ní nguindúxi nihnu bàrcú-güedé, te ní cutíi-xi xití cúchí, te ñá ní ñihí-gá-güedé ñacuáa cada-güedé nene-xi. Te ío ñihí ní dácandá táchí ndute, te ní chúcú ndèé-xi ndáa sáta bàrcú, te ní ñdihí ní táhú-xí. ⁴² Te cue sandádú ní xitñaha-güedé sá cáhni-güedé nchaa cue téé ní xíhí vecaá cuendá sá vǎ quíhíⁿ-güedé núú ndute te cunu-güedé. ⁴³ Te téé cùu capitáⁿ ñá ní ñāna-dé cahni-güedé cue téé ní xíhí vecaá, chi ñá ní cùndee iní-dé cahni-güedé tñàhá té Pàblú. Te ní xáhaⁿ-dè xii-güedé sá cuè téé xícuu cada quíhíⁿ núú ndute te na yáha-güedé ndute quene-güedé yuhu lámár. ⁴⁴ Te dava cue téé ñá cúú càda, ní xáhaⁿ-dè nanducu-güedé vítú ñí àdi vítú ní táhú sǎ ní xíhí bàrcú, te núú xíáⁿ caundodo-güedé yáha-güedé ndute quene-güedé ndéé yuhu lámár. Núu duha ní cuu ní cácu-ndí nchaa-ndí.

28

Té Pàblú ndécú-dè ñúu Máltá caá cuádava lámár

¹ Te sáta ní cácu-ndí ní nene-ndí ñuhu yichí, te ní ñihí-ndí tñúhu ñacuáa ñani ñúú núú ní sáá-ndí, te ñúu-áⁿ nání-xí Máltá, te caa-xi cuádava lámár. ² Te ío quide víxíⁿ-xi

cuendá ío cùuⁿ dáú. Te ñáyíu ñúu-áⁿ ní cundàhú iní ñáhǎ-yu xii-ndí, ní dátñahá-yu ñuhú te ní cana ñáhǎ-yu ní sáháⁿ-ndí ní nacuidí-ndí. ³ Te té Pàblú dátacá-dé nducú, te tñàhá-ni ñⁿ cóo dééⁿ ní tñii nihnu-dé-di, te òré cuáháⁿ ndaha-dé chucu-dé núú ñúhú, te ní ñāni-di cahni, te ní ndee-di xití nducú ní sánduu-di ndaha-dé, te ní xexihaⁿ-di xii-dé. ⁴ Te nchaa ñáyíu ndèhé-yu sá tǎcandéé-di ndaha-dé, te ní ngüíta-yu ní xitñahá-yu:

—Váa ndíyí ní sahni téé-a, te ñá ní xíhí-dé lámár, te dacuitíi sǎ cùu-dé vitna, chi sa ñaha Yá Ndióxi ná ní quide-dé ñuyú-a —cǎchí-yu xitñahá-yu.

⁵ Te té Pàblú ní quidi-dé ndaha-dé ní ngaunihnu-di núú ñúhú, te ñá túú tñàhí ná ní cùu núú ní xexi-di. ⁶ Te ñáyíu ñúu-áⁿ xíndéhé-yu núu daquíhíⁿ-xi chúlúⁿ àdi nduá-dé cuú-dé. Te naha ní xíndéhé ñáhǎ-yu núu nása cada ñaha-xi xii-dé, te ñá túú tñàhí ná ní quide ñaha-xi, te ní xitñahá-yu:

—Váa ndióxi cúú téé-a núu dàcáⁿ ñá túú tñàhí ná ní quide-xi ndaha-dé núú ní xexi cóo —cǎchí-yu xitñahá-yu.

⁷ Te yatni núú dúcáⁿ ní xexihaⁿ cóo-áⁿ caá ñuhu xitu téé ñani Publiú, te téé-áⁿ táxi tñuní-dé ñihí ñúu caá cuádava xití lámár núú ndécú-ndí nduu-áⁿ. Te ío vǎha iní-dé chi ní cana ñaha-dè ní sáháⁿ-ndí ní xíndecu-ndí úní nduu vehe-dé. ⁸ Te tǎtá tǎ Pùbliú-áⁿ caá-dé cùhú-dé ñúhú-dé cahni, te tñàhá-dé daxi. Te té Pàblú ní sáháⁿ-dè núú caá-dé, te ní cáháⁿ ndihí-dé Yá Ndióxi, te ní sacáⁿ ndodo-dé ndaha-dé díquí téé cùhú-áⁿ, te ducaⁿ-ni ní quide-dé, te ní ndúha téé cùhú-áⁿ. ⁹ Te sáta dúcáⁿ ní quide té Pàblú, te ní quixi nchaa ñáyíu cùhú núú ndécú-ndí, te ní quide tátña ñaha tǎ Pàblú xí-yu te ní ndúha-yu. ¹⁰ Te òré ndécú-ndí xíáⁿ, te vai sá ní taxi táhú-güedé, te òré ní xica-ndí ní taxi tucu-güedé nchaa sá xíní ñuhu-ndí ichi.

Té Pàblú ní quexio-dé ñúu Rómá

¹¹ Te yacáⁿ ní xíndecu-ndí úní yóo, te sa ndècu ñⁿ bàrcú téé ñúu Alejandriá òré ní quexio-ndí, te ní xíndecu-xi ñihí yóo cúúⁿ dàú táchí. Te núu-xi càndodo sandú sá dānāni-güedé Cástór ndihí sandú sá dānāni-güedé Pólux, te xití bàrcú-áⁿ ní

quée-ndí cuáháⁿ-ndí. ¹² Te ní quexio-ndí ñúú Siracusá, te yàcáⁿ ní xíndecu-ndí úní nduu. ¹³ Te ní xica tucu bàrcú cuáháⁿ-xi, te ní quexio-ndí ñúú Règiú. Te nduu tnéé duha ní quene nuu táchí. Te ní xica bàrcú cuáháⁿ-xi, te ndéé nduu úú ní quexio-ndí ñúú Pùteolí. ¹⁴ Te yàcáⁿ ní naníhí tñáhá-ndí ndihí ñáyiú sàndáá iní tñúhu Jèsús, te ní cachí-yu sá cùndècu-ndí úná nduu, núu xíáⁿ ní xíndecu-ndí úná nduu ndihí-yu. Te ní xica tucu bàrcú cuáháⁿ-xi, te ní quexio-ndí ñúú Rómá. ¹⁵ Te ñáyiú rómá ñáyiú sàndáá iní tñúhu Jèsús, ní níhí-yu tñúhu sá cuáháⁿ-ndí, te ní quixí-yu ní quixi tñahá ñáhá-yu ichi. Te davá-yu ní naníhí-ndí ñúú Fòrú Àpiú, te davá-yu ní naníhí-ndí ñúú Úní Tàbernás. Te òré ní xiní té Pàblú nchaa ñáyiú véxi tñahá ñáhá xii-ndí, te ndee ndèé ní cuu iní-dé, te ní ndacáⁿ táhú-dé núú Yá Ndiòxí sá dúcáⁿ ní quidé-yu. ¹⁶ Te sáta ní quexio-ndí ñúú Rómá, te cue tée cùchiuⁿ ní xáhaⁿ-güedé xii té Pàblú sá cùndècu diiⁿ-dé, te ní xindeé ñáhá cuàa sandadú xii-dé.

Té Pàblú càháⁿ-dé tñúhu Yá Ndiòxí ñúú Rómá

¹⁷ Nduu úní sá ní quexio té Pàblú, te ní cana-dé cue tée cùnuu núú ñáyiú isràél ndécú ñúú Rómá, te ní sáháⁿ-güedé núú ndécú-dé, te ní xáhaⁿ-dè:

—Nchòhò cue tée isràél, càchí tñúhu-í sá ñá túú nã ní quide-í ni ñⁿ ñáyiú cùtnàhá ní xíndecu-í ñúú Jerusalén. Te ñá túú ní càháⁿ cuèhé-í sá quidè-yu nchaa nàcuáa ní xóo cada cue ñani tñáhá-ó ní xíndecu ndéé sanaha, te ñá túú nã ní quide-í te ní tñi ñaha-güedé ní sáha cuendá ñáhá-güedé xii-í núú cue tée rómá, cue tée ndècu yacáⁿ. ¹⁸ Te cue tée-áⁿ ní ndúcú tñúhu-güedé núu ndáá ndècúechi-í, te ní cutnùní iní-güedé sá ñá túú nã ní quide-í, te xíáⁿ cuini-güedé queñuhu ñaha-güedé xii-í vecaá ní cùu. ¹⁹ Te diu-ni cue tée isràél ñá ní dàna-güedé cácu-í, chi cuini-güedé sá cáhni ñaha cue tée rómá, cue tée xíndecu yàcáⁿ xii-í ní cùu, te xíáⁿ núu ní xáhaⁿ-í sá quixí-í càháⁿ ndihí-í té Cèsár cuendá iha cada ndáá mée-dé cuendá-í, te vã yõo ñⁿ tee-í cuéchi. ²⁰ Núu xíáⁿ ní cana ñaha-í xii-ndo cuendá cunaha-ndo nàcuáa ní cuu. Te ní xáhaⁿ-í sá sàndáá iní-í sá ndótó ñáyiú ní xíhí, te

diu-ni ducaⁿ càháⁿ dava-gá ñáyiú isràél, te sá dúcáⁿ ní càháⁿ-í, te ní chihi ñaha-güedé vecaá, te xindeé ñáhá-güedé ndéé vitna — càchí té Pàblú xáhaⁿ-dè xii-güedé.

²¹ Te ní xáhaⁿ-güedé xii-dé:

—Ñá túú tñahí tutú ní tëndaha cue tée distritú Jùdeá quixi cuendá-n. Te ní cuè tée isràél ñá túú ní quixi-güedé càháⁿ cuèhé-güedé cuendá-n. ²² Te cuini-ndí cundedóho-ndí nása cunduu tñúhu càháⁿ-n, chi sa ní níhí-ndí tñúhu sá ncháá xíchi ío xicáháⁿ cuèhé-yu cuendá nchaa ñáyiú sàndáá iní tñúhu Jèsús — càchí-güedé xáhaⁿ-güedé xii té Pàblú.

²³ Te ní xáhaⁿ-güedé nduu cùyáchí-güedé te quixi-güedé cundedóho-güedé dava-gá cuendú càháⁿ té Pàblú. Te ní tñahá nduu ní ndatnùhu-güedé quihíⁿ-güedé núú quidé vèhe-dé, te vã-yu ní sáháⁿ-yu ní xínd-edóho-yu tñúhu ní càháⁿ-dé, te ncháa nchaa ní càháⁿ ndihí-dé-yu. Te ní xáhaⁿ-dè xii-yu sá ndii Moisés ndihí dava-gá cue tée ní xóo càháⁿ tñúhu Yá Ndiòxí ndéé sanaha ní chídó tñuni-güedé núú tütú-güedé sá díú-gã tendaha-gã Cristú quixi-gá ñuyúú-a. Te ní chídó tñuni-güedé nchaa nàcuáa cada-gá, te diu-ni nàcuáa càháⁿ tutú-güedé cada Cristú, te ducaⁿ ní quide-gá cùtnàhá ní xica cuu-gá ñuyúú-a, núu xíáⁿ ní cutnùní sá díú Jèsús cúú-gã Cristú Yáa ní tendaha Yá Ndiòxí ní quixi ñuyúú-a. Te núu quindáá iní-yu, te ndíhu ndaha ñaha Yá Ndiòxí xii-yu. ²⁴ Te davá-yu ní sàndáá iní-yu tñúhu ní càháⁿ-dé, te davá-yu ñá túú ní sàndáá iní-yu. ²⁵ Te cuendá sá ñá ñⁿ-ní tñúhu ní càháⁿ-yu, núu xíáⁿ cuini-yu nùhú-yu ní cùu. Te ní xáhaⁿ té Pàblú sá cùndètu tñahá-yu càháⁿ-dé ingá tñúhu, te xáhaⁿ-dè:

—Ní xáhaⁿ Espiritú Yá Ndiòxí xii ndii Chàia nàcuáa càháⁿ ndii núu ncháa ñani tñáhá-ó ní xíndecu ndéé sanaha. Te ní càháⁿ Espiritú-gá ñⁿ sá ndáá ní xáhaⁿ-xi xii ndii, te duha ní xáhaⁿ-xi:

²⁶ Quihíⁿ-n te cùñaha-n xii ñáyiú:

Nchòhò mee-ni cundedóho-ndo tñúhu càháⁿ Yá Ndiòxí, dico ní vã tècu tñuni-ndó.

Te cada-gá titni núú sã vã yõo tñahí ndàcu cada, dico ní vã cùtnùní iní-ndo nàcuáa nduu sá cadá-gã,

²⁷ chi cuendá sá ío sàá iní-ndó, xíáⁿ ducaⁿ ñá túú sáha-ndo cuendá nása cuáháⁿ tñúhu càháⁿ-gã,

chi ñá cuìní-ndó cùndedóho-ndo, te ni ñã
sàndáá iní-ndó.

Te ni ñã cuìní-ndó dàña-ndo nchaa sá cuèhé
sá dúhá quide-ndo

cuendá xocàni-gá nchaa xiãⁿ iní-ndó,
duha cúñaha-n xíi-yu.

Càchí Espiritú-gá xãhaⁿ-xi xii ndíi. ²⁸ Te na
càchí tnúhu-í sá quíhíⁿ cue téé càháⁿ tnúhu
Yá Ndiõxí cáháⁿ-güedé tnúhu-gá núú ñáyi
ñá túú cùu ñáyi isràél, chi ñáyi isràél
ñá túú cuìní-yu cundedóho-yu. Dico ñáyi
ñá túú cùu ñáyi isràél chi cùdí iní-yu
cundedóho-yu, núu xiãⁿ naníhí tãhú-yu —
càchí té Pãblú xãhaⁿ-dẽ xii-yu.

²⁹ Te sátá ñí ndíhi cuèndú ní xãhaⁿ-dẽ,
te ní ndeé-yu cuánuhú-yu ta ndàtnúhu-yu
cuáháⁿ.

³⁰ Te úú cuáá ñí xínu ní xíndecu té Pãblú
iiⁿ vehe ní cháhu-dé. Te ní xóo cáhãⁿ
váha-dé ndíhi nchaa ñáyi ní xóo quíhíⁿ
vehe-dé. ³¹ Te ní xãhaⁿ-dẽ sá ndíhu ndaha
ñàha Yá Ndiõxí xii-yu núu quíndáá iní-yu
tnúhu-gá, te vá yõo iiⁿ ni sàdí yuhu-dé. Te
mee-ni tnúhu Xítóhó Jesucristú ní cáháⁿ-dé
núú-yu.

TUTÚ NÍ CADÚHA TÉ PĀBLÚ QUÍHÍⁿ NDAHA NĀYIU NŪÚ RŌMÁ

Té Pāblú *cadúha-dé* tutú *quíhíⁿ* ndaha nāyiu xīndecu ichi Xítóhó Jesucristú ndécú nŭú Rŏmá

¹ Yúhú té Pāblú xínú cuèchi-í nŭú Xítóhó Jesucristú, chi mee Yá Ndiŏxí ní cachí-gá sá cùú-í ìⁿ téé cāháⁿ tnúhu-gá nŭú nāyiu, te tnúhu-gá cùú-xí tnúhu sá cāháⁿ nācuáa naníhí tǎhú-ó, nŭú diu-gá ní tendaha nāha-gá xii-í xícá cùú-í cāháⁿ-í tnúhu-gá.

² Te ndéé sanaha nǐ cachí Yá Ndiŏxí sá dācutíí sáa nduu ngūndecu ndihí nāyiu tnúhu-gá. Te ducaⁿ nǐ xáhaⁿ-gǎ xii cue téé ní cāháⁿ tnúhu-gá dāvá-áⁿ nǐ chídó tnùn-í-giédé nŭú tŭtú-gá. ³ Te tnúhu-gá sá cāháⁿ-í-a cāháⁿ-xí diu-ni cuèndá Xítóhó Jesucristú Yáá cùú Dēhe-gá. Te Dēhe-gá-áⁿ cùú-gǎ ìⁿ nāyiu, te cùú-gá nāní tnáhá ndíí Dāvíí. ⁴ Te cùú-gá Yáá nǎ tŭú tnáhí cuèchi-xi. Te ní xíhí-gá te ní ndoto-gá, te xǎⁿ cŭtnŭn-í iní-ó sá cùú-gǎ Dēhe Yá Ndiŏxí, te ío cǎhnu cuu-gá.

⁵ Te diu-ni Xítóhó Jesucristú ní quide-gá ní nduu tǎhú-í nŭú Yá Ndiŏxí sá cāháⁿ-í tnúhu-gá nŭú cuè nāyiu nŭyúú-a cuèndá quíndáá iní-yu tnúhu-gá te canchicúⁿ ni-nhŭú-yu cadá-yu nchaa nācuáa cāháⁿ-xi, te ducaⁿ ío cuu cǎhnu-gá. ⁶ Te tnáhá nchòhó cùú-ndó nāyiu sa nchìcúⁿ nihnu quide-ndo nchaa nācuáa cāháⁿ tnúhu-áⁿ, chi ní cachí Yá Ndiŏxí sá nchòhó tnáhá tnúhu-ndo ndihí Xítóhó Jesucristú. ⁷ Te nchòhó nāyiu xīndecu nŭú Rŏmá, nāyiu ío cùú iní nāhá Yá Ndiŏxí, cadúha-í tutú-a daquxi-í ndaha-ndo. Te diu-ni nchòhó cùú-ndó cuè nāyiu ní cachí Yá Ndiŏxí cada ndáá cundecu-ndo nŭú-gǎ. Te xícáⁿ tǎhú-í nŭú Tǎtá-ó Dŭtú Ndiŏxí ndihí nŭú Xítóhó Jesucristú sá ío na chindee chitúu nāha-gǎ xii-ndo, te ducaⁿ ndí nduú-gá ná càda te ío váha cuu iní-ndó cūndecu-ndo.

Té Pāblú *cuiní-dé* *quíhíⁿ* ngoto-dé cue nāyiu xīndecu ichi Xítóhó Jesucristú ndécú nŭú Rŏmá

⁸ Te díhna nuu-gǎ cǎchí tnúhu-í xii-ndo sǎ ío ndácáⁿ tǎhú-í nŭú Yá Ndiŏxí cuèndá sá ío sǎndáá iní-ndó-gǎ, te nchaa nāyiu

nihí-yu tnúhu sá dúcáⁿ quide-ndo. Te Xítóhó Jesucristú dáyāha-gá nchaa tnúhu cāháⁿ-í nŭú Yá Ndiŏxí. ⁹ Te ndi tnáhá òré cāháⁿ ndihí-í Yá Ndiŏxí ducaⁿ-ni xícáⁿ tǎhú-í nŭú-gǎ cuèndá-ndó, te mee-gǎ nāhá-gǎ sá cāháⁿ ndáá-í, te diu-ni nŭú-gǎ xínú cuèchi-í ní yúhu ní iní-í, chi cāháⁿ-í nācuáa ní quide Dēhe-gá Xítóhó Jesucristú cuèndá naníhí tǎhú-ó. ¹⁰ Te xícáⁿ tǎhú-í nŭú Yá Ndiŏxí sá nŭú mee-gǎ ná cǎchí te sáá ìⁿ nduu quixi coto nāha-í xii-ndo. ¹¹ Chi ío cuiní-í cundecu ndihí nāha-í xii-ndo dānehé nāhá-í ìⁿ ũú tnúhu nācuáa ío-gá chindee nāha Espiritú Yá Ndiŏxí xii-ndo, te ducaⁿ ío-gá cuita nducu ndèe-ndo cada-ndo nchaa nācuáa cuiní-gá. ¹² Te ío chí ná cuǎha tnàha-o tnúhu ndee iní cundecu-o ìchi-gá, chi nchòhó ndihí yúhú ío sǎndáá iní-ó-gǎ.

¹³ Te nchòhó nāyiu ndècu ndihí-í ichi Xítóhó Jesucristú na cǎchí tnúhu-í xii-ndo sǎ dúcáⁿ-ní ío sǎni iní-í quixi coto nāha-í xii-ndo. Te cuiní-í sá òré quixi coto nāha-í xii-ndo, te vá cuíta chiúⁿ quixi-í dǎtná quide-í òré sǎngoto-í nchaa nāyiu dāva-gá nŭú nǎ tŭú xita chiúⁿ-í chi ío váha sǎhúuⁿ-yu tnúhu cāháⁿ-í, dico nǎ ndácú-í quixi-í quixi coto nāha-í xii-ndo. ¹⁴ Te yúhú yídiquí-í cāháⁿ-í tnúhu Xítóhó Jesucristú nŭú nchaa nāyiu cāháⁿ tnúhu griégú, ndihí nŭú nchaa nāyiu cāháⁿ dāva-gá nŭú tnŭhu, ndihí nŭú nchaa nāyiu tŭha, ndihí nŭú nchaa nāyiu nǎ tŭú tŭha. ¹⁵ Te cuèndá sá dúhá yídiquí-í cāháⁿ-í tnúhu-gá, xǎⁿ ío cuiní-í dānehé nāhá-í xii nchaa nchòhó nāyiu nŭú Rŏmá nācuáa nduu tnúhu sá cāháⁿ nācuáa naníhí tǎhú-ó.

Ío cūnuu tnúhu Xítóhó Jesucristú

¹⁶ Te yúhú nǎ tŭú tnáhí cūcahaⁿ nŭú-í cāháⁿ-í tnúhu Xítóhó Jesucristú, chi cùú-xi tnúhu ío cūnuu, chi Yá Ndiŏxí ní cachí-gá sá nchaa nāyiu na quíndáá iní-xi tnúhu-áⁿ te naníhí tǎhú-yu. Te ní cachí-gá sá díhnanuu-gǎ nāyiu isráél ngūndecu ndihí-yu tnúhu-áⁿ te dǎtnŭn-í ngūndecu ndihí nāyiu nǎ tŭú cùú nāyiu isráél. ¹⁷ Te tnúhu-áⁿ dānehé nāhá-xí xii-o sá cŭdíu-o nŭú Yá Ndiŏxí te nŭú mee-ni sǎ quíndáá iní-ó-gǎ dǎtná cāháⁿ-xi nŭú tŭtú-gá nŭú cǎchí-xi: “Nchaa nāyiu sǎndáá iní nāhá xii Yá Ndiŏxí cŭdíu-yu nŭú-gǎ, te ndècu ndihí nāhá-yu xii-gǎ”, duha cǎchí-xi nŭú tŭtú-gá.

Nchaa nāyiu ndècu nŭyúú ndècuèchi-yu

¹⁸Te ndéé andiü tëndaha Yá Ndiöxi sá ùhú quixi sá cúú-xí nchàa ñáyiü ñá túú quide ndáá núú-gá, ñáyiü quide nchaa sá cuèhé sá dúhá. Te cuèndá nchaa sá quidè-yu-áⁿ xiáⁿ ñá túú cuini-yu tñí-yu tnúhu ndáá tnúhu Yá Ndiöxi cuèndá cuu-xi ìⁿ sá vâha sá cúú-xí-yu. ¹⁹Te cuèi ducaⁿ quidè-yu dico cùtnuní ndáá iní-yu nàcuáa nduu sá sání iní Yá Ndiöxi ndihi nàcuáa nduu sá quidè-gá dàtná cùtnuní iní nchaa dava-gá-yu, chi diu-gá dánhé ñáhá-gá xií-yu. ²⁰Te ni vâ ndácú-ó quini núú-ó nâsa càa-gá, te ni vâ ndácú-ó quini-ó nâsa càa iní-gá, te ni vâ ndácú-ó quini-ó nâsa quide-gá táxi tnuní-gá nchaa nduu nchaa quíú. Te cuèi ducaⁿ dico ndéé cùtnhá ní ngáva ñuyúú ní ngúita nchaa ñáyiü tècú tnuní vâha-yu nàcuáa nduu sá sání iní-gá ndihi nàcuáa nduu sá quidè-gá te ducaⁿ tècú tnuní-yu cuèndá nchaa sá ní cadúha-gá ndéhè-yu ò ñuyúú-a, núu xiáⁿ vâ cachi-yu sá ñá túú cuèchi-yu. ²¹Te cuèi ducaⁿ ní cùtnuní iní-yu cuèndá Yá Ndiöxi dico ñá túú cuini-yu canehé-yu sá yíñuhu núú-gá nàcuáa tàú-xi cunduu. Te ni ñá túú cuini-yu ndacáⁿ táhú-yu núú-gá cuèndá nchaa sá vâha quide ñaha-gá xií-yu, chi mee-ni nchàa sá ñá túú vèdana nândíhi ñuhu iní-yu. Te quidè-yu dàtná quidè ìⁿ ñáyiü ñá túú ndècu ndihi nchaa sá xini tnuní-xi. Te uuⁿ-gá uuⁿ-gá tá quidè-yu cuaháⁿ. ²²Te cachi-yu sá cúú-yu ñáyiü ío vâha sâá sá xini tnuní-xi dico ñá ndáá, chi cúú-yu ñáyiü ío ñí dîquí-xi. ²³Te ñá túú cuini-yu cáháⁿ-yu sá ío cahnú cuu Yá Ndiöxi Yaá ndécú nchàa nduu nchaa quíú, chi da nchaa sá ní cadúha mèè-yu quide cahnú-yu. Te ní cadúha-yu nchaa sá nàhá ñáyiü ñá túú cùdí ndècu ñuyúú-a. Te ní cadúha-yu sá nàhá quiti ndàva, ndihi sá nàhá quiti sàcuíta ñuhu mee-xi, ndihi sá nàhá nchaa dava-gá quiti, nchaa xiáⁿ quidè cahnú-yu.

²⁴Te xiáⁿ núu ní dâná Yá Ndiöxi quidè-yu nchaa sá cuèhé sá dúhá sání iní-yu. Te xiáⁿ ío quide ndihi tnahá-yu sá cuèhé sá dúhá sàcúú-xí yìqui cuñú-yu. ²⁵Te ducaⁿ quidè-yu chi ñá túú sândáá iní-yu tnúhu ndáá tnúhu Yá Ndiöxi. Te mee-ni tnúhu ndehnde sândáá iní-yu, te nehé-yu sá yíñuhu núú dâva sá ní cadúha-gá ò ñuyúú-a ndihi dava sá ndéé andiü te quide

cahnú-yu, te ñá túú cachi-yu sá mèé-gá ío cahnú cuu-gá, dico mee-gá xini ñuhu-xi cáháⁿ-yu sá ío cahnú cuu-gá ni caa ni quíhiⁿ. Te ndáá ndisa sá ío cahnú cuu-gá.

²⁶Te sá dúcáⁿ ñá túú quide vâha-yu núu xiáⁿ ní dâná-nâ Yá Ndiöxi quidè-yu nchaa sá cuèhé sá dúhá sání iní mèé-yu. Te dava ñáyiü ñíhi cáháⁿ ndihi tnahá-yu ndi mèe dihi-yu te ñá túú quidè-yu nàcuáa ní nduu táhú-yu cadá-yu. ²⁷Te diu-ni ducaⁿ xiquide dava cue tée chi sání cuèhé sání dùha iní-güedé sá cúú-xí yìqui cuñú-güedé ndi mèe tnahá tée-güedé, chi cáháⁿ ndihi tnahá ndi mee-güedé te ñá túú quide-güedé nàcuáa ní nduu táhú-güedé cada-güedé, te sá dúcáⁿ quide-güedé te ñá túú tnahí cùu vâha iní-güedé ndécú-güedé, te ducaⁿ tnahí tàú-xi ndoho-güedé cundecu-güedé.

²⁸Te ñá túú tnahí ñuhu iní-yu Yá Ndiöxi núu xiáⁿ duuⁿ duuⁿ ní dâná ñihnu ñaha-gá xií-yu sání cuèhé sání dùha iní-yu, te quidè-yu nchaa sá ñá túú tàú-yu cadá-yu. ²⁹Te nchaa núú sá cuèhé sá dúhá cunuu quidè-yu. Te cue tée cáháⁿ ndihi-güedé ñáyiü ñíhi te ñá dúú ñàdihí-güedé cúú-yu. Te diu-ni ducaⁿ xiquide cue ñáyiü ñíhi chi cáháⁿ ndihi-yu cue tée te ñá dúú yíi-yu cùu-güedé. Te mee-ni sá ñá túú vâha quidè-yu sá cúú-xí tnahá ñáyiü-yu, te xihó-yu cundecu ndihí-yu sá ndécú ndihi dava-gá tnahá ñáyiü-yu, te ío sání cuèhé sání dùha iní-yu sá cúú-xí tnahá ñáyiü-yu, te ío cuèdú iní-yu, te sàhni tnahá-yu, te ío plètú-yu, te dândahú tnahá-yu, te cùu úhú iní-yu cue tnahá ñáyiü-yu, te ío yiti yùhú-yu. ³⁰Te cáháⁿ cuèhé-yu cuèndá nchaa dava-gá tnahá ñáyiü-yu, te cùu úhú iní-yu Yá Ndiöxi, te xio xio cuini-yu cumuu tnúhu-yu, te mee-ni sání iní-yu sá ío vâha cunduu-yu, te ío quide cahnú-yu mèè-yu, te ío sání iní-yu sá cadá úhú-yu tnahá ñáyiü-yu, te ñá túú sândáá iní-yu ní tâtá-yu ni nâná-yu. ³¹Te ñá túú tècú tnuní-yu sá vâha, te ñá túú quidè-yu ìⁿ sá cáháⁿ-yu, te ñá túú cùu iní-yu ni ñáyiü cùu ndi mèé-yu, te ni dâva-gá tnahá ñáyiü-yu, te ñá túú quide cahnú iní-yu ìⁿ sá cùmâni núú tnahá-yu, te ni ñá túú cùndahú iní-yu tnahá ñáyiü-yu. ³²Te Yá Ndiöxi ní cachí-gá sá ncháá ñáyiü ducaⁿ xiquide quíhiⁿ-yu núú úhú núú ndáhú. Te xini-yu sá Yá

Ndiöxí daquihíⁿ ñáhá-gá xíí-yu núú ùhú núú ndáhú sá dúcáⁿ quidé-yu, dico uuⁿ-gá quidé-yu chi váha-gá cúú iní-yu cue ñáiyu quide datná quidé mée-yu.

2

Yá Ndiöxí cada ndáá-gá cuéchi nchaa ñáiyu ndècu ñuyúú

¹ Te nchòhó ñáiyu cächí sá ïo ndècu cuéchi dava-gá ñáiyu tnàhá-ndó ïo ndècu cuéchi-ndo cuéi nágá ñáiyu cùu-ndo, chi tnàhá-ndó quide-ní-ndo nchaa nacuaá quide dava-gá ñáiyu cächí-ndó ndècu cuéchi-xi, te sá dúcáⁿ càháⁿ-ndó sã ndécú cuéchi ñáiyu-ánⁿ te dàcaa-ndo cuéchi díquí-ndó chi tnàhá-ndó quide-ndo datná quidé-yu. ² Te nchoo xíní-ó sá Yá Ndiöxí ïo váha cùtnuní iní-gá nacuaá cada ndáá-gá cuéchi ìⁿ ìⁿ nchoo ñáiyu ndècu ñuyúú-a, chi daquihíⁿ-gá nchaa ñáiyu quide nacuaá ní càháⁿ-í núú ùhú núú ndáhú. ³ Te nchòhó ñáiyu ìⁿ-ni quide ndíhi ñáiyu cächí mée-ndó sã ndécú cuéchi-xi dacuití sã ná chãhu-ndo núú Yá Ndiöxí sá dúcáⁿ quide-ndo. ⁴ Te ñá túú cùu váha iní-ndó sã Yá Ndiöxí cùndáhú iní ñáhá-gá xii-ndo, te ni ñá túú cùu váha iní-ndó sã ïo cuiní-gá cada càhnu iní-gá nchaa sã ñá túú váha quide-ndo, te ni ñá túú quide cuendá-ndó sã Yá Ndiöxí quidé váha ñaha-gá xii-ndo cuendá cuiní-gá sã nchòhó ndixi túu iní-ndó sã ñá túú quide váha-ndo ndècu-ndo. ⁵ Te nchòhó cúú-ndó ñáiyu ïo sáá iní-xi, chi ñá túú cuiní-ndó ndixi túu iní-ndó sã ñá túú quide váha-ndo ndècu-ndo, te xíãⁿ núu ïo-gá tá cùu vai tnúndòho sá cúú-xí-ndó. Te na sáá nduu tnúhu ndòho tnúhu ndáhú te ïo ndoho-ndo, chi Yá Ndiöxí cada ndáá-gá nacuaá ndùu cuéchi-ndo. ⁶ Te dàvã-án cada ndáá Yá Ndiöxí nchaa nacuaá ndùu nchaa sã ñá quide ìⁿ ìⁿ ñáiyu ndècu ñuyúú-a. ⁷ Te nchaa ñáiyu nchicúⁿ nihnu-ni quide mee-ni sá váha, ñáiyu-án nduu táhú-yu cundecú-yu ndíhi Yá Ndiöxí ní caa ní quíhíⁿ, te ducaⁿ quide váha-yu chi cuiní-yu sá Yá Ndiöxí cuu váha iní ñáhá-gá xíí-yu, te cuiní tucú-yu nduu táhú-yu núú ïo váha caa ndecu Yá Ndiöxí cundecú-yu ní caa ní quíhíⁿ. ⁸ Te ïo cùdèéⁿ-gá núú nchaa ñáiyu ñuhu iní mee-ni sã cúú-xí mée-xi, te ñá túú sãndáá iní-yu tnúhu ndáá chi mee-ni sã cuèhé sá dúhá quidé-yu. ⁹ Te nchaa ñáiyu

ducaⁿ xíquide ïo ndíhú iní-yu. Te díhna-gá ñáiyu isràél nguíta-xi ndohó-yu, te dättnuní nguíta-xi ndoho nchaa ñáiyu ñá túú cùu ñáiyu isràél. ¹⁰ Te nchaa ñáiyu ní quide váha, te Yá Ndiöxí cada-gá te ngündecú-yu núú ïo váha caa ndecu-gá, te cachi-gá sá ñá quide váha-yu, te ïo váha cuu iní-yu cundecú-yu. Te díhna-gá ñáiyu isràél ñáiyu ní quide váha ducaⁿ càda ñaha-gá xíí-yu, te dättnuní ducaⁿ càda ñaha-gá xii ñáiyu ñá túú cùu ñáiyu isràél ñáiyu ní quide váha.

¹¹ Te ñá túú quide cuendá-gá cuéi ná ñáiyu cúu-yu. ¹² Te nchaa ñáiyu ndècu ndíhi nchaa tnúhu ní chídó tnuní ndíi Moisés, Yá Ndiöxí cada ndáá-gá cuéchi-yu nacuaá càháⁿ nchaa tnúhu-ánⁿ. Te nchaa ñáiyu ñá túú ndècu ndíhi tnúhu ní chídó tnuní ndíi-ánⁿ, Yá Ndiöxí vá càdá ndáá-gá cuéchi-yu nacuaá càháⁿ nchaa tnúhu-ánⁿ. Dico nchaa ñáiyu quide nãndi sá cuèhé sá dúhá dàcuítí cùta nihnú-yu cuéi ndècu ndíhi-yu tnúhu ní chídó tnuní ndíi Moisés àdi ñá túú ndècu ndíhi-yu. ¹³ Te nchaa ñáiyu dicó-ni sãcúndedòho nchaa tnúhu ní càháⁿ ndíi Moisés te ñá túú tníⁿ-yu, ñáiyu-ánⁿ ñá túú cùdú-yu núú Yá Ndiöxí, dico nchaa ñáiyu tníⁿ nchaa tnúhu ní càháⁿ ndíi, ñáiyu-ánⁿ cächí Yá Ndiöxí sá cúdíu-yu núú-gá, chi ñá túú-gá cuéchi-yu ndècu núú-gá. ¹⁴ Te nchaa ñáiyu ñá túú ndècu ndíhi tnúhu ní chídó tnuní ndíi Moisés, te núu quidé-yu nchaa nacuaá ní càháⁿ ndíi te cùu-xi ìⁿ sá sání tnàhí iní mée-yu cadá-yu, te sá sání iní-yu-ánⁿ cúú-xí ìⁿ tnúhu váha sá sánú ìchi ñaha xíí-yu nacuaá cada váha-yu cundecú-yu. ¹⁵ Te sá dúcáⁿ quidé-yu xíãⁿ cùtnuní sá sání iní-yu datná càháⁿ tnúhu ní chídó tnuní ndíi Moisés cada ñáiyu isràél, te ïo váha cùtnuní iní-yu nchaa nacuaá quidé-yu chi ndixi túu iní-yu òré ñá túú quide váha-yu. ¹⁶ Te sáá nduu te Yá Ndiöxí cùñaha-gá xii Xítohó Jesucristú cada ndáá-gá nchaa cuéchi ñáiyu, nchaa sá sání iní mée-yu ndùu yuhu, te cada-gá dätná càháⁿ tnúhu sá sánú ìchi ñaha xii-o nacuaá naníhí tàhú-ó, tnúhu sá dánèhé ñáhá-í xii-ndo.

Cuendá ñáiyu isràél ndíhi cuendá nchaa tnúhu ní chídó tnuní ndíi Moisés

¹⁷ Te nchòhó ñáiyu isràél nchaa-ndo cùu-ndo ndi mee-í, te cächí-ndó sã nchicúⁿ

nihnu-ndo quide-ndo nchaa tnúhu ní cáháⁿ ndíi Moisés núu xǎⁿ ndécú vâha-ndo, te cächí-ndó sǎ ïo càhnu cuu-ndo sá ndécú ndíhi-ndo Yá Ndióxi. ¹⁸ Te cùtnuní iní-ndó nchâa nacuaáa cuiⁿí Yá Ndióxi cada-ndo, te sá dúcáⁿ nchicúⁿ nihnu-ndo quide-ndo nacuaáa cãháⁿ tnúhu-án xǎⁿ cùtnuní iní-ndó nchâa sá ïo-gá vâha xini ñuhu-xi cada-ndo. ¹⁹ Te cächí-ndó sǎ ïo vâha xini-ndó cànuichi-ndo nchaa ñáyiú ñá túú cùtnuní iní-xi, te cächí tucu-ndo sá ïo vâha xini-ndó ná canu ichi-ndo nchaa ñáyiú ndècu ichi cuehè ichi duha. ²⁰ Te sànu ichi-ndo nchaa ñáyiú ío ñi dǐquí-xi, ndíhi nchaa ñáyiú vitna ta tècú tnùní nchaa sá vâha, te ducaⁿ quide-ndo chi ndècu ndíhi-ndo nchaa tnúhu ní chídó tnùní ndíi Moisés, te tnúhu-án cúú-xí tnúhu ndáá, chi sànu ichi ñaha-xi xii-ndo nacuaáa cada-ndo. ²¹ Te nchòhó dàcuaha-ndo ñáyiú nàcuáa cadá-yu, te mee-ndo ñá túú dàcuaha-ndo cada-ndo nchaa nacuaáa tàù-xi cunduu, te xâha-ndo xíi-yu sá vǎ cúú dùhú-yu te mee-ndo dùhu-ndo. ²² Te dàcuaha-ndó-yu sá cuè téé vá cúú cãháⁿ ndíhi-güedé ñáyiú dǐhí te núu ñá díú ñàdǐhí-güedé cúú-yu, te ducaⁿ-ni cuè ñáyiú dǐhí, vá cúú cãháⁿ ndíhi-yu téé te núu ñá díú yǐi-yu cùu-güedé. Te nchaa sá xâhaⁿ-ndo vǎ cúú càda ñáyiú te mee-ndo quide-ni-ndo, te xâhaⁿ-ndo xii-yu sá vǎ cãnehé-yu sá yǐñùhu núu nchâa sá cächí-yu cúu ndióxi-yu, te mee-ndo nèhé-gá quidé-ndó, chi dùhu-ndo nchaa sá ndécú vèñúhu. ²³ Te cächí-ndó sǎ ïo cùnunu nchaa tnúhu ní chídó tnùní ndíi Moisés, te ñá túú quide-ndo nchaa nacuaáa ní cáháⁿ ndíi, te sá dúcáⁿ quide-ndo-án te dàquee tíhú-ndó Yá Ndióxi. ²⁴ Te quèe ndáá-xi nàcuáa cãháⁿ-xi núú tütú Yá Ndióxi nàcuáa quide-ndo-án núú cächí-xi sá nchâá ñáyiú ñá túú cùu ñáyiú isràél cãháⁿ cuèhè-yu cuèndá Yá Ndióxi sá cuèndá-ndó.

²⁵ Te nchòhó ñáyiú isràél nchaa-ndo cùu-ndo ndí mee-í, te tnàhá-ndó ndècu ndíhi-ndo seña ñii-ndo, te vâha-ni sá dúcáⁿ te núu quide-ndo nchaa nacuaáa ní cáháⁿ ndíi Moisés. Dico núu ñá túú quide-ndo nchaa nacuaáa ní cáháⁿ ndíi ña, te ñá túú nàndíhi-xi sá cúú-ndó ñáyiú isràél cuèi ndècu seña ñii-ndo. ²⁶ Te nchaa ñáyiú ñá túú ndècu ndíhi seña ñii-xi, te núu quidé-yu nchaa nàcuáa ní cáháⁿ ndíi Moisés, te cúú-yu dàtná cue ñáyiú ndècu ndíhi seña

ñii-xi, chi quidé-yu nchaa nàcuáa ní cáháⁿ ndíi. ²⁷ Te ñáyiú ñá túú ndècu ndíhi seña ñii-xi, te núu na càda-yu nchaa nàcuáa ní cáháⁿ ndíi Moisés, te ñáyiú-án cächí-yu sá ña túú quide ndáá nchaa nchòhó ñáyiú ndècu ndíhi seña ñii-xi, chi ndècu ndíhi-ndo nchaa tnúhu ní chídó tnùní ndíi te ñá túú quide-ndo nacuaáa cãháⁿ tnúhu-án. ²⁸ Te nchòhó ñáyiú isràél, ñáyiú nchicúⁿ nihnu-ni quide nchaa nacuaáa ta quide tnahi-ndo véxi, ñá túú quide-ndo sá cúú-ndó ñáyiú isràél, te mee-ndo ndècu seña ñii-ndo dico ñá túú quide-ndo nacuaáa tàù-xi cada nchaa ñáyiú ndècu seña ñii-xi, te mee-ni seña-án sãha-ndo ñii-ndo te ñá túú quide-ndo nacuaáa cuiⁿí Yá Ndióxi cada-ndo. ²⁹ Te nchaa ñáyiú sàndáá ndisa iní-xi Yá Ndióxi, ñáyiú-án cúú ndísá-yu ñáyiú isràél, te sa ní nduu ndoo ní nduu nine iní-yu chi Espíritú Yá Ndióxi ducaⁿ ní quide-xi, dico ñá díú sá sãha-yu seña ñii-yu dàtná ní cächí ndíi Moisés. Te ñáyiú-án cúú vâha iní ñáhá Yá Ndióxi xíi-yu cuèi ñá túú cãháⁿ vâha tnàha ñáyiú-yu cuèndá-yu.

3

¹ Te sá dúhá cãháⁿ-í te ío dava ñáyiú quesàhá-yu sá ñiiⁿ-ní cùu ñáyiú ñá túú cùu ñáyiú isràél ndíhi nchoo ñáyiú isràél, te quesaha túcú-yu sá ñiiⁿ-ní quide tucu-xi cuèi na cuãha àdi vá cuãha seña ñii-yu. ² Dico yúhu cächí-í sá nchâá ñáyiú isràél ío-gá cùnùu-yu, chi ío titní núú sá vâha ní quide ñaha Yá Ndióxi xíi-yu, chi ní sãñaha-gã tnúhu-gá ndécú ndíhi-yu. ³ Te davá-yu ñá túú cuiⁿí-yu cada ndáá-yu, dico ñá díú sá xǎⁿ te cùyica iní Yá Ndióxi ñá túú quide ndáá-gá. ⁴ Dico ñáhá chi xini ñuhu-xi sá nchâá ñáyiú cada cuèndá-yu sá Yá Ndióxi cúú-gá Yá quidé ndáá cuiti, te cuèi nchâá-yu na cächí-yu sá ña túú quide ndáá-gá, dico mee-gã chi quide ndáá-ni-gá. Te núú tütú-gá cãháⁿ-xi nàcuáa ní xáhaⁿ ñiiⁿ téé ní xíndecu ndéé sanaha xii-gá, te duha ní xáhaⁿ-dè:

Yòhó Dútú Ndióxi, cùtnuní iní ñáyiú sá ïo ndáá cãháⁿ-n,
 te cùnunu nahi-ni tnúhu-n cuèi òré cächí ñáyiú sá ña túú cãháⁿ ndáá-n.
 Duha ní xáhaⁿ tée ndéé sanaha-ãⁿ xii-gá cächí-xi núú tütú-gá.

⁵ Te cuendá nchaa sá cuèhé sá dúhá quide ñáiyu, xíáⁿ cútnuní iní-yu sá Yá Ndiöxí cúú-gá Yáa ío váha quide ndáá, chi mee-gá ñá túú ducaⁿ quide-gá. Te cuéi ducaⁿ dico vá caní iní-yu sá Yá Ndiöxí ñá túú quide ndáá-gá sá dándòho ñaha-gá xíí-yu na sàa nduu, te núu ducaⁿ na caní iní-yu, te sàni iní-yu dàtná sání iní cue ñáiyu ñá túú ndècu ichi-gá. ⁶ Te vá dúcáⁿ caní iní-yu, chi núu Yá Ndiöxí ñá túú quide ndáá-gá ñá, te vá cúú càda ndáá-gá nchaa cuéchi cue ñáiyu ñuyúú-a te núu ducaⁿ.

⁷ Te núu yúhú ná caní iní-í cáháⁿ-í ìⁿ tnúhu ndehnde, te sá tnúhu-án te caní tucu iní-í sá quidé càhnu-gá-í tnúhu ndáá tnúhu Yá Ndiöxí, te sá dúcáⁿ ná càháⁿ-í te caní tucu iní-í sá vá cúú càháⁿ Yá Ndiöxí sá ndécú cuéchi-í. ⁸ Te núu na caní tucu iní-í sá váha-gá cada-í nchaa sá cuèhé sá dúhá cuendá Yá Ndiöxí cada-gá sá váha, dico ñá ndáá. Te ío ñáiyu cáháⁿ cuèhé cuendá-í te càchí-yu sá díú-ní ducaⁿ dacuaha-í ñáiyu dico ñá ndáá sá dúcáⁿ dānehé-í-yu, te ñáiyu-án nacháhu-yu tnúhu càháⁿ-yu, chi ducaⁿ tàú-xi cunduu.

Nchaa ñáiyu ñuyúú-a ndècuéchi-yu

⁹ Te vitna càchí dava ñáiyu sá ío-gá cùnnu nchoo cue ñáiyu isràél dàcúuxí dàva-gá ñáiyu, dico yúhú càchí-í sá ñhá, te sa ní càchí tnúhu ndáá-í xii-ndo sá nchaa ñáiyu ndècuéchi-yu cuéi ñáiyu isràél te cuéi ñáiyu ñá túú cùu ñáiyu isràél. ¹⁰ Te núu tùtú Yá Ndiöxí càchí-xi:

Vá yóo ìⁿ quide ndáá,

¹¹ te ni vá yóo ìⁿ tècú tnuní tnúhu váha, te ni vá yóo ìⁿ nānducu nihnu Yá Ndiöxí.

¹² Chi nchaá-yu ñá túú nchícúⁿ nihnú-yu ichi váha, te nchaá-yu cùu-yu ñáiyu xīndecu neñúú sá cúú-xí Yá Ndiöxí. Te ni ìⁿ-yu ñá túú quidé-yu ìⁿ sá váha.

¹³ Te cada iní-ndó sá yúhú-yu cùu-xi datná cúú ìⁿ yaú núu yīndúxi ndíyi núú ío ndehe sàháⁿ,

te ducaⁿ sāt nahá-xi cùu yuhú-yu, chi ío càháⁿ cuèhé-yu, te mee-ni dāndahú-yu nchaa tnàha ñáiyú-yu.

Te cada iní-ndó sá vēnenú cóó yíhí yuhú-yu chi mee-ni cáháⁿ úhú-yu cuendá tnàha ñáiyú-yu.

¹⁴ Te ío iní-yu cáháⁿ úhú tnàhá-yu.

¹⁵ Te àúⁿ nā cuu àúⁿ nā xíáⁿ xī sahni tnàhá-yu.

¹⁶ Te nchaa núú xíca cùu-yu quide úhú iní-yu nchaa tnàha ñáiyú-yu nācuáa ndíhú iní ñáiyu-án.

¹⁷ Te ñá túú cuiní-yu cundecu ndíhi tnàha váha-yu.

¹⁸ Te ñá túú sàni iní-yu canehé-yu sá yíñúhu núú Yá Ndiöxí.

Duha quidé-yu càchí-xi núú tùtú-gá.

¹⁹ Te cùtnuní iní-ó sá nchaa tnúhu ní chídó tnuní ndíi Moisés cúú-xí cuendá nchaa ñáiyu nchícúⁿ nihnu nchaa tnúhu-án. Te tnúhu-án cúú-xí cuendá sá vá yóo tnàhí càchí sá ñá túú cuéchi-xi, te ducaⁿ te nchaandí túhú ñáiyu cutnūnī iní-yu sá ná chāhu-yu nchaa sá quidé-yu núú Yá Ndiöxí. ²⁰ Te ducaⁿ càda-xi chi ni ìⁿ ñáiyu vá càchí-ó sá vá cūndècu cuéchi-yu núú Yá Ndiöxí cuendá-ni sá nchícúⁿ nihnú-yu nchaa tnúhu sá ní chídó tnuní ndíi Moisés, te tnúhu-án càchí tnúhu-xi cuendá-ni sá cútnuní iní-ó sá ndécú-ó ichi cuehé ichi duha.

Te núu na quindáá iní-ó Xítoho Jesucristú te naníhí tàhú-ó

²¹ Te vitna ní cutnūnī iní-ó sá ñá díú sá cādá-ó nchaa nacuáa ní cáháⁿ ndíi Moisés cūdiu-o núú Yá Ndiöxí, chi mee-gá quidé cūdiu-o núú-gá. Te núú tùtú ndíi Moisés ndíhi núú tùtú cue téé ní xóo cáháⁿ tnúhu Yá Ndiöxí ndéé sanaha càháⁿ-xi nācuáa cada ñaha-gá xii-o vitna. ²² Te ducaⁿ cūdiu-o núú Yá Ndiöxí te núu na quindáá iní-ó Xítoho Jesucristú. Te díu-ní ducaⁿ cūdiu nchaa ñáiyu ñuyúú te núu na quindáá iní ñáhā-yu xii-gá, chi ìⁿ-ni cùu-o nchaa-o sá cúú-xí Yá Ndiöxí. ²³ Chi nchaá-yu ndècu cuéchi-yu, chi ñá ìⁿ-yu quidé-yu nācuáa cáháⁿ Yá Ndiöxí sá cúú-yu ñáiyu quide váha. ²⁴ Dico Yá Ndiöxí ío váha iní-gá chi ní quide ñaha-gá xii-o ìⁿ sá váha, chi díc-o ní ducaⁿ ní quide-gá nācuáa vá cūndècu-gá cuéchi-o núú-gá, chi Xítoho Jesucristú ní sati níñí-gá te ní xíhí-gá, te ducaⁿ ní yáha-gá cuendá sá vá cūndècu-gá cuéchi-o. ²⁵ Te Yá Ndiöxí ní taxi ndecu-gá Xítoho Jesucristú núú ñáiyu ñuyúú-a, te ní xíhí-gá sá cuendá nchaa yíca cuéchi-yu, te ducaⁿ ní cuu cuendá sá ncháá ñáiyu na quindáá iní ñáhā xii-gá te vá nāchāhu-yu cuéchi-yu núú Yá Ndiöxí. Te Yá Ndiöxí ní quide ndee iní-gá nchaa sá cuèhé sá

duhá nǐ quide cue ñáyiú ní xíndecu ndéé sanaha. Te xíáⁿ ní xíhí Xítohó Jesucristú cuèndá cutnùnì iní-ó sǎ Yá Ndiòxí cúú-gǎ Yáá ío váha quide ndáá cuèi ducaⁿ nǐ quide ndee iní-gǎ nchaa sǎ nǐ quide cue ñáyiú-áⁿ.²⁶ Núú xíáⁿ vitna ní cutnùnì ndisa iní-ó sǎ quidé ndáá-gǎ, te quide-gǎ sǎ cuè ñáyiú vá cùndècu-gǎ cuèchi-yu núú-gǎ, te núú na quèndáá iní-yu Xítohó Jesucristú.

²⁷ Te vitna vá càchí-ó sǎ ìo càhnu cuu-o cuendá sǎ ñà túú-gǎ cuèchi-o ndècu núú Yá Ndiòxí, te ducaⁿ ñà túú-gǎ cuèchi-o ndècu núú-gǎ cuèndá sǎ sàndáá iní-ó Xítohó Jesucristú, te ñà díú sǎ cuèndá nchaa tnúhu ní cáháⁿ ndíi Moisés. ²⁸ Te cùtnuní iní-ó sǎ ndèda-ni càa ñáyiú vá cùndècu-gǎ cuèchi-yu núú Yá Ndiòxí te núú na quèndáá iní-yu Xítohó Jesucristú cuèi ní quidé-yu nchaa nàcuáa ní cáháⁿ ndíi Moisés àdi ñà túú ní quidé-yu.

²⁹ Te cùtnuní iní-ó sǎ Yá Ndiòxí cúú-gǎ Ndiòxí nchaandi túhú ñáyiú, te ñà díú mée-ni Ndiòxí ñáyiú isràél cúú-gǎ. ³⁰ Te ñà díú díf-gǎ cúú-gǎ Ndiòxí, te nchaa ñáyiú sàndáá iní ñáhá xii Xítohó Jesucristú te vá cùndècu-gǎ cuèchi-yu núú Yá Ndiòxí cuèi cùú-yu ñáyiú isràèl àdi ñà túú cùú-yu. ³¹ Te ñà díú sǎ sàndáá iní-ó Xítohó Jesucristú te càchí-ó sǎ ñà túú nàndíhí nchaa tnúhu sǎ sánú ichi ñaha xii-o nacuáa cada-o, te ñáhá chi sǎ dúhá sàndáá iní-ó-gǎ te xíáⁿ nchicúⁿ nihnu-o quide-o nacuáa càháⁿ tnúhu-áⁿ.

4

Cuèndá ndíi Àbrahám

¹ Te vitna na càchí tnúhu-í xii-ndo cuèndá ndíi Àbrahám téé ní cuu ñani tnáhá-ó nǐ xíndecu ndéé sanaha. ² Te ndíi-áⁿ ñà túú ní xíndecu cuèchi ndíi núú Yá Ndiòxí, dico ñà díú cuèndá ñà chiuⁿ ní quide ndíi ducaⁿ ñà túú ní xíndecu cuèchi ndíi núú-gǎ. Chi núú cuèndá ñà chiuⁿ ní quide ndíi ducaⁿ ñà túú ní xíndecu cuèchi ndíi núú Yá Ndiòxí ñà, te cada càhnu ndíi mee ndíi ni cùu, dico ñà díú núú Yá Ndiòxí cada càhnu ndíi mee ndíi te núú ducaⁿ nǐ quide ndíi. ³ Te chí dándacu iní nàcuáa càháⁿ-xi núú tütú Yá Ndiòxí núú càchí-xi: “Té Àbrahám ní sàndáá iní-dé Yá Ndiòxí, te xíáⁿ ní càchí-gǎ sǎ cùdíu-dé núú-gǎ”, duha càchí-xi núú tütú-gǎ. ⁴ Te sǎ cùhúⁿ yáhu ñà téé quide chiuⁿ, te vá càchí-ó sǎ xíáⁿ cúú-xí ñà táhú sǎ cúú-xí-dé chi yáhu

tnáhí-dé cúú-xí. ⁵ Te vá yóo ñà ndàcu cada ñà chiuⁿ nacuáa cudúu-xi núú Yá Ndiòxí. Te ñà túú ná chiuⁿ xini ñuhu-xi cada ñáyiú te cudúu-yu núú-gǎ, chi xini ñuhu-ni-xi sǎ quèndáá-ni iní-yu-gǎ. Te diu-gǎ càchí-gǎ sǎ ñáyiú ndècu ichi cuèhé ichi duha vá cùndècu-gǎ cuèchi-yu núú-gǎ, te núú na quèndáá iní ñáhá-yu xii-gǎ. ⁶ Te diu-ni ducaⁿ ní cáháⁿ ndíi Dàvíí, chí ní càchí ndíi sǎ ìo váha táhú nchaa ñáyiú ní càchí Yá Ndiòxí cudúu núú-gǎ, dico ñà díú cuèndá ñà chiuⁿ quidé-yu cudúu-yu núú-gǎ. ⁷ Te duha ní càchí ndíi:

Váha táhú nchaa ñáyiú quide cahnu iní Yá Ndiòxí nchaa cuèchi-xi,
te ñà túú-gǎ quidé cuèndá-gǎ nchaa sǎ cuèhé sǎ dúhá nǐ quidé-yu.

⁸ Váha táhú-yu chí Yá Ndiòxí càchí-gǎ sǎ ñà túú-gǎ cuèchi-yu.

Duha ní càchí ndíi Dàvíí.

⁹ Te ñà díú mée-ni ñáyiú ngúndecu sèñá ñà-xi ducaⁿ váha táhú-yu, chí tnàhá ñáyiú ñà túú ngúndecu sèñá ñà-xi ducaⁿ váha táhú-yu. Te sa ñaha-o sǎ Yá Ndiòxí ní càchí-gǎ sǎ cùdíu ndíi Àbrahám núú-gǎ cuèndá sǎ ni sàndáá iní ñáhá ndíi xii-gǎ. ¹⁰ Te cunaha-ndo sǎ díhna-gǎ ní càchí Yá Ndiòxí sǎ cùdíu ndíi Àbrahám núú-gǎ te dàtnuní ngúndecu sèñá ñà ndíi. ¹¹ Te ní ngúndecu sèñá ñà ndíi cuèndá xíáⁿ cuu-xi ñà sèñá sǎ cùdíu ndíi núú Yá Ndiòxí. Te ndéé cùtnàhá vátá ngúndecu-gǎ sèñá ñà ndíi, te sa cùdíu ndíi núú-gǎ chí ní sàndáá iní ñáhá ndíi xii-gǎ. Te sǎ dúcáⁿ ñà túú ndècu sèñá ñà ndíi cùtnàhá ní sàndáá iní ndíi Yá Ndiòxí xíáⁿ ní cuu ndíi dàtná ñà díhí dütú nchaa ñáyiú sàndáá iní ñáhá xii-gǎ, ñáyiú ñà túú ní ngúndecu sèñá ñà-xi, te cùdíu-yu núú-gǎ. ¹² Te ndíi Àbrahám ní cuu tucu ndíi dàtná ñà díhí dütú nchaa ñáyiú ní ngúndecu sèñá ñà-xi, dico ñà díú cuèndá-ni sǎ ní ngúndecu sèñá ñà-xi cùu ndíi díhí dütú-yu, chí cuèndá sǎ sàndáá iní-yu Yá Ndiòxí nchicúⁿ nihnú-yu nàcuáa ní quide ndíi ní sàndáá iní ñáhá ndíi xii-gǎ ndéé cùtnàhá vátá ngúndecu-gǎ sèñá ñà ndíi.

Yá Ndiòxí cada-gǎ nchaa nàcuáa ní càchí-gǎ te núú na quèndáá iní-ó-gǎ

¹³ Te Yá Ndiòxí ní xáhaⁿ-gǎ xii ndíi Àbrahám sǎ ndúú táhú ndíi cunuu ndíi

ñuyú, ndíhi cue déhe ndí, ndíhi nchaa dava-gá cue ñaní tnáhá ndí vitna cacu túu. Te ducaⁿ ní xáhaⁿ Yá Ndióxi xii ndí ndíhi cue ñaní tnáhá ndí, chi ní sándáá iní ñáhá ndí xii-gá núu xiáⁿ ní cudú ndí núu-gá. Te ducaⁿ ní xáhaⁿ-gá xii ndí dico ñá díú cuendá sá ní quide ndí nàcuáa ní xáhaⁿ Yá Ndióxi xii ndí Moisés cada ñáyi ndéé cuéé-gá. ¹⁴ Te núu mee-ni ñáyi nchicúⁿ nihnu quide nacuaá ní cáháⁿ ndí Moisés ní ndúu táhú-yu cunúu-yu ñuyú-a ni cùu ña, te ñá túu xini ñuhu-xi quindáá iní-ó Yá Ndióxi, te ñá túu nandíhi tnúhu ní xáhaⁿ Yá Ndióxi xii ndí Àbrahám ní cùu te núu ducaⁿ. ¹⁵ Te núu ñá ñáyi ñá túu quide nacuaá cáháⁿ tnúhu sá sánú ìchi ñaha xii-o nacuaá cada-o te nacháhu-yu sá dúcáⁿ quidé-yu. Te núu ñá túu tnúhu sá sánú ìchi ñaha-xi xii-o nacuaá cada-o ni cùu ña, te ñá túu cuéchi-o ni cùu.

¹⁶ Te ducaⁿ ní xáhaⁿ Yá Ndióxi xii ndí Àbrahám nacuaá cada-gá, chi cuendá sá ní sándáá iní ñáhá ndí xii-gá. Te ducaⁿ ní quide-gá chi ío váha iní-gá, dico ñá díú sá ñáⁿ chiuⁿ ni quide ndí ducaⁿ ní xáhaⁿ-gá. Te sá dúcáⁿ ní cuu te cùu-xi ñáⁿ tnúhu ndáá sá cúu-xí ncháa ñaní tnáhá ndí, ñáyi sándáá iní ñáhá xii-gá dàtná ní sándáá iní ñáhá mée ndí xii-gá, te ñá díú mée-ni cuendá nchaa ñaní tnáhá ndí nchicúⁿ nihnu nchaa nacuaá ní cáháⁿ ndí Moisés, chi ndí Àbrahám-áⁿ ní cuu ndí dàtná ñáⁿ díhi dütú cue ñáyi sándáá iní ñáhá xii Yá Ndióxi. ¹⁷ Te núu tütú Yá Ndióxi cáháⁿ-xi nacuaá ní xáhaⁿ-gá xii ndí, te duha ní xáhaⁿ-gá: “Yòhó té Àbrahám ní quide ñaha-í xii-n dàtná ñáⁿ díhi dütú cue ñáyi xindecu nihí ñuyú.” Duha ní xáhaⁿ Yá Ndióxi xii ndí, cächí-xi núu tütú-gá. Te Yá Ndióxi náhá ndáá-gá sá cádá-xí nacuaá ní xáhaⁿ-gá xii ndí Àbrahám, te diu-ni-gá cúu Yáa ní sándáá iní ndí, te diu-ni-gá dándòto-gá ñáyi ní xihí, te diu-ni-gá quidé tá ngündecu nchaa sá vátá cündecu-gá ñuyú-a.

¹⁸ Te Yá Ndióxi ní xáhaⁿ-gá xii ndí Àbrahám sá ío cuéhé déhe ndí coo, te ío ní sándáá iní ndí nacuaá ní xáhaⁿ-gá dico ñá túu ní cùtnuní iní ndí nása cada-gá, chi ío ní sahnú ndí. Te cuendá sá dúcáⁿ ío ní sándáá iní ndí tnúhu ní xáhaⁿ-gá núu xiáⁿ ní cuu ndí díhi dütú vai ñáyi xindecu

nihí ñuyú. ¹⁹ Te ndí Àbrahám ñuhu ndí ñáⁿ ciendú cuá cùtnáhá ducaⁿ ní xáhaⁿ Yá Ndióxi xii ndí, te ní cutnúní iní ndí sá ña túu táhú ndí sá cóó déhe ndí ndíhi ñadíhi ndí ndí Sárá, chi ndí ndúu-yu sa ní sahnú vihí-yu, te cuéi ducaⁿ dico ní sándáá-ni iní ndí nacuaá ní xáhaⁿ Yá Ndióxi. ²⁰ Te ñá túu ní sàni ñáⁿ sani úu iní ndí nacuaá ní xáhaⁿ Yá Ndióxi cada-gá sá cúu-xí ndí, chi da uuⁿ-gá váha ní sándáá iní ndí nacuaá ní xáhaⁿ-gá, te ní cachí ndí sá ío càhnú cuu-gá. ²¹ Te ní cutnúní ndáá iní ndí sá Yá Ndióxi ndácú-gá quidé-gá nchaa sá cáháⁿ-gá. ²² Te sá ní sándáá iní ndí nacuaá ní cáháⁿ Yá Ndióxi, núu xiáⁿ ní cachí-gá sá cúu ndí ñáⁿ tée ñá túu cuéchi-xi núu-gá.

²³ Te ní ngódó tnúní núu tütú Yá Ndióxi cuendá ndí Àbrahám sá ní cachí-gá sá ña túu cuéchi ndí núu-gá, te ñá díú-ní cuendá mée ndí ni ngódó tnúní núu tütú-gá. ²⁴ Chi tnáhá cuendá-ó ncháa-o ní ngódó tnúní núu tütú-gá. Te cachí-gá sá ña túu cuéchi-o núu-gá chi sándáá iní-ó-gá, te diu-gá cúu-gá Yáa ní dándótó ñaha xii Xitohó Jesucristú Yáa cúu Xitohó-ó. ²⁵ Te Yá Ndióxi ní cachí-gá sá díú Xitohó Jesucristú cuú-gá cuendá nacháhu-gá nchaa cuéchi-o. Te ní xihí-gá te ní ndoto-gá cuendá nchaa-o vá cündecu-gá cuéchi-o núu Yá Ndióxi te núu na quindáá iní-ó-gá.

5

Ío váha tnáhá ñáyi cächí Yá Ndióxi sá ña tütú cuéchi-xi

¹ Te vitna, ñá túu-gá cuéchi-o ndècu núu Yá Ndióxi chi sándáá iní-ó Xitohó Jesucristú, te ío váha ndècu ndíhi-o Yá Ndióxi vitna sá cuendá Xitohó Jesucristú. ² Te cuendá sá ní sándáá iní-ó Xitohó Jesucristú xiáⁿ diu-gá ní quide ní ngündecu váha-o núu Yá Ndióxi, te ducaⁿ-ni cündecu-o, te ío cùdí iní-ó chi ndècu ndíhi-o tnúhu ndee ñáⁿ sá sáa nduu ngündecu-o núu ío váha càa ndecu Yá Ndióxi. ³ Te ñá díú-ní sá cuendá sá ngúú táhú-ó cündecu-o núu ndécú-gá cùdí iní-ó, chi cùdí iní-ó ndòho-o cuendá-gá, chi cùtnuní iní-ó sá núu na ndòho-o cuendá-gá te cunduu càhnú-gá iní-ó, ⁴ te núu cùu-o ñáyi ta quide cahnu-gá iní-xi te cùtnuní sá cúu-ó ñáyi quide váha, te núu cùu-o ñáyi quide váha te uuⁿ-gá tá ngündecu ndíhi-o tnúhu ndee ñáⁿ cuáháⁿ sá cádá váha ñaha Yá

Ndiöxí xii-o. ⁵ Te núu ducaⁿ te vá ññ nduu ndixi cuéchi iní-ó sá ndécú ndíhi-o tnúhu ndee iní ngúndecu váha-o. Te Espíritú sá ní taxi Yá Ndiöxí ndécú ndíhi-o xíãⁿ quidé-xí cútunni iní-ó sá ïo cùu iní ñáhá Yá Ndiöxí xii-o.

⁶ Te nchoo ñà túú vèdana ná ní ndàcu-o cada-o cuendá dàcàcu nihnu-o mèe-o, dico Xítohó Jesucristú ní xíhí-gá cuendá-ó, ndíhi cuendá nchaa dava-gá ñáyiu ñà túú tnàhá tnúhu ndíhi Yá Ndiöxí, te ní xíhí-gá mei nduu taú-xi cuú-gá. ⁷ Te cudana-ni núu xihí ññ ñáyiu sá cuendá ññ ñáyiu quide ndáá, te áma xihí tucu ññ-yu sá cuendá ñáyiu quide váha tnàhá ñáyiu-xi. ⁸ Te Yá Ndiöxí ní quide-gá sá nchóó cútunni iní-ó sá ïo cùu iní ñáhá-gá xii-o, chi cútunni ndécú-ó ichi cuhé ichi duha te ní tendaha-gá Xítohó Jesucristú ní quixi-gá ñuyúú-a ní xihí-gá cuendá-ó. ⁹ Te sá cuendá sá ní xihí Xítohó Jesucristú xíãⁿ ñà túú-gá cuéchi-o ndècu núu Yá Ndiöxí, te vitna ní cutnùn ndáá iní-ó sá vǎ dáquihíⁿ ñáhá-gá Yá Ndiöxí xii-o núú ùhú núú ndáhú sá cuendá Xítohó Jesucristú. ¹⁰ Te cútunni ñà túú tnàhá tnúhu-o ndíhi Yá Ndiöxí ní cùu ní xihí Xítohó Jesucristú Yaá cúú Dèhe-gá cuendá cuu váha iní ñáhá-gá xii-o, te ducaⁿ te nduu táhú-ó cùndecu-o ndíhi-gá ní caa ní quíhíⁿ cuendá sá ní ndoto Xítohó Jesucristú. ¹¹ Te ndètu-o sáá nduu ngúndecu-o ndíhi-gá ní caa ní quíhíⁿ, te ñà díú-ní xíãⁿ quidé-ó chi tnàhá cùdíⁿ iní-ó Yá Ndiöxí, chi Xítohó Jesucristú ní quide-gá ducaⁿ cùdíⁿ iní-ó-gǎ, te ñu-ni Xítohó Jesucristú ní quide-gá ní nucúndecu váha-o ndíhi Yá Ndiöxí.

Nàcuáa ní quide ndíi Àdán ndíhi nàcuáa ní quide Xítohó Jesucristú

¹² Te ndíi Àdán ñà túú ní quide ndáá ndíi núú Yá Ndiöxí núu xíãⁿ ní ngúndecu nchaa sá cuhé sá dúhá ñuyúú-a, te sá cuendá nchaa sá cuhé sá dúhá quide ñáyiu xíãⁿ xihí-yu, te nchaa-yu xihí-yu chi nchaa-yu quidé-yu nchaa sá cuhé sá dúhá. ¹³ Te sa quide-gá-yu nchaa sá cuhé sá dúhá te dàtnùn ní ngúndecu nchaa tnúhu sá ní chídó tnùn ndíi Moisés nàcuáa ní xáhaⁿ Yá Ndiöxí cada ñáyiu, te nchoo cútunni iní-ó sá núu ñà túú tnúhu sá sánú ichi ñaha xii-o nacuaá cada-o, te ñà túú cuéchi-o sanuu.

¹⁴ Te ndéé cútunni ní xíndecu ndíi Àdán ní

quesaha-xi xihí ñáyiu, te ducaⁿ-ni xihí-yu ndéé ní sáá nduu ní xíndecu ndíi Moisés. Te ducaⁿ ní xihí-yu chi ní quidé-yu nchaa sá cuhé sá dúhá cuéi ñà túú ní quidé-yu nàcuáa ní quide ndíi Àdán, chi ndíi-án ñà túú ní sàndáá iní ndíi nàcuáa ní xáhaⁿ Yá Ndiöxí cada ndíi. Te ndíi Àdán ní cuu ndíi ññ téé cùu cahnu ní xíndecu ñuyúú-a, te sáta dúcáⁿ te ní quixi Xítohó Jesucristú te Yaá-án ïo-gá càhnu cuu-gá.

¹⁵ Te sá ní quide ndíi Àdán te vá càchí-ó sá ññ-ní cùu-xi ndíhi sá ní cachí Yá Ndiöxí nduu táhú-ó vitna. Te sá ñà túú ní quide ndáá ndíi xíãⁿ nchaa ñáyiu xihí-yu, dico Yá Ndiöxí ío váha iní-gá chi ío váha ní quide-gá sá cúú-xí nchàa nchoo ñáyiu ndècu ñuyúú-a, chi dicó ducaⁿ ní cachí-gá sá nánihí táhú-ó, te ññ-díi-ní téé tnàhá-dé ío váha ní quide-dé sá cúú-xí-ó, te téé-án cúú-dé Xítohó Jesucristú. ¹⁶ Te sá ní quide ññ-díi-ni ndíi Àdán ñà túú ññ-ni cuu-xi ndíhi sá ní quide Yá Ndiöxí sá cúú-xí-ó, chi ndíi-án ñà túú ní quide ndáá ndíi núú-gá. Te sá dúcáⁿ ní quide ndíi te xíãⁿ ní cuu-xi cuéchi díhna nuu ní quide ndíi, núu xíãⁿ ní cachí Yá Ndiöxí sá cué ñáyiu quíhíⁿ-yu núú ùhú núú ndáhú nacháhu-yu nchaa sá cuhé sá dúhá quidé-yu. Dico mee-gá ní quide sá cué ñáyiu naníhí táhú-yu dicó-ni ducaⁿ, te ducaⁿ te vá cùndècu-gá cuéchi-yu núú-gá cuéi ío vǎi cuéchi-yu. ¹⁷ Te sá dúcáⁿ ñà túú ní quide ndáá ññ-díi-ni ndíi Àdán-án núú Yá Ndiöxí, xíãⁿ ní quide-xi xihí nchaa ñáyiu. Te sá cuendá sá ní quide ññ-díi-ni Xítohó Jesucristú xíãⁿ ío váha ní quide ñaha Yá Ndiöxí xii ñáyiu, chi dicó-ni ducaⁿ ní nduu táhú-yu cùdíu-yu núú-gá. Te nchaa ñáyiu ducaⁿ cùdíu núú-gá nduu táhú-yu cunúu-yu ndíhi Xítohó Jesucristú cuendá sá ní quide-gá sá váha sá cúú-xí-yu.

¹⁸ Te sá dúcáⁿ ní quide ndíi Àdán ñà túú ní quide ndíi nàcuáa ní xáhaⁿ Yá Ndiöxí xii ndíi ññ xito, núu xíãⁿ ní cachí-gá sá ncháá ñáyiu tàú-yu nacháhu-yu nchaa cuéchi-yu, dico Xítohó Jesucristú ní quide-gá ññ sá váha cuendá nchaa ñáyiu vá cùndècu-gá cuéchi-yu núú Yá Ndiöxí te núu na quíndáá iní ñáhá-yu xii-gá, te ducaⁿ te cùndecu-yu ndíhi-gá ní caa ní quíhíⁿ. ¹⁹ Te sá ñà túú ní sàndáá iní ññ-díi-ni ndíi Àdán nàcuáa ní xáhaⁿ Yá Ndiöxí xii ndíi, xíãⁿ ní nguínchicúⁿ nihnu nchaa ñáyiu quidé-yu

nchaa sá cuèhé sá dúhá. Te ducaⁿ ìíⁿdii-ni Xítóhó Jesucristú ní quide-gá nàcuáa ní xáhaⁿ Yá Ndiòxí cuèndá sá Yá Ndiòxí cachí-gá sá cúdiú-yu núú-gá.

²⁰Te Yá Ndiòxí ní xáhaⁿ-gá xii ndíi Moisés nàcuáa cada ñáyiú, te sá cuèndá tnúhu-áⁿ uuⁿ-gá ní ngúíta nchaa ñáyiú quidé-yu nchaa sá cuèhé sá dúhá, te Yá Ndiòxí uuⁿ-gá cundàhú iní ñáhá-gá xií-yu tucu. ²¹Te sá cuèndá nchaa cuéchi ñáyiú xiáⁿ xihí-yu, dico Yá Ndiòxí ío váha ínf-gá chi diu-gá ní cachí-gá sá ncháá ñáyiú na tnàhá tnúhu ndíhi ñaha xii-gá cudúú-yu núú-gá, te cundecú-yu ndíhi-gá ní caa ní quíhíⁿ, te ducaⁿ chí Xítóhó Jesucristú ní quide-gá sá vâha sá cúú-xí-yu.

6

Ñáyiú ñá túú-gá ndécú ichi cuehé ichi duha ndécú-yu cuèndá Xítóhó Jesucristú

¹Te sá dúcáⁿ quide Yá Ndiòxí, te vá cání íní-ó cànchicúⁿ nihnu-ni-o ìchi cuehé ichi duha, chí ñá díú sá cànchicúⁿ nihnu-o ìchi-áⁿ te ngóo càni íní-ó sá ío-gá cundàhú iní ñáhá-gá xii-o. ²Te vá cúú cànchicúⁿ nihnu-o ìchi cuehé ichi duha, chí nchoo cùu-o datná cue ñáyiú sa ní xihí, núu xiáⁿ vá cúú-gá canchicúⁿ nihnu-o ìchi-áⁿ. ³Te sa nàha-o sá cuèndá sá ní sandute-o quèe-xi sá tnàhá tnúhu-o ndíhi Xítóhó Jesucristú. Te sá ní sandute-o quèe tucu-xi sá cúú-ó dàtná ñáyiú ní xihí ndíhi-gá. ⁴Te ñá díú-ní sá ní xihí-ó ndíhi-gá chí quèe tucu-xi sá ní nguíndúxi-o ndíhi-gá te ní ndoto-o dàtná ní ndoto mee-gá ní dándótó ñàha Dútú Ndiòxí Yáá ío càhnu cuu, te ducaⁿ ní cuu cuèndá sá vá cundècu-gá-ó dàtná ní xíndecu-o.

⁵Te núu ìíⁿ-ni cùu-o ndíhi Xítóhó Jesucristú cuèndá sá cúú-ó dàtná ñáyiú ní xihí ndíhi-gá, te ndáá sá cúú-ó dàtná ñáyiú ní ndoto ní ngúndecu váha dàtná ní ndoto mee-gá ní nucúndecu váha-gá. ⁶Te nchoo nàha-o sá cúú-ó ñáyiú ío ndècu cuéchi-xi ní cùu, dico sátá ní cuu-o dàtná ñáyiú ní xihí dàtná ní xihí Xítóhó Jesucristú núú cùrúxí, te ndéé dàvâ-áⁿ ní dàñá-ó ncháa ichi cuehé ichi duha ndècu-o ní cuu, te ñá túú-gá cúnúu sá cuèhé sá dúhá ínf-ó. ⁷Chí nchaa ñáyiú ní xihí ñá túú-gá ndécú-yu ichi cuèhé ichi duha. ⁸Te núu cùu-o datná ñáyiú ní xihí dàtná ní xihí Xítóhó Jesucristú ñá, te cùtnuní ndáá íní-ó sá cundècu-o ndíhi-gá

ní caa ní quíhíⁿ. ⁹Te sa nàha-o sá Xítóhó Jesucristú ní xihí-gá te ní ndoto-gá te vá ìíⁿ ndúu ìíⁿ quíú-gá te cuú-gá, chí ñá túú ñágá sá cádá cúú-gá. ¹⁰Te Xítóhó Jesucristú ní xihí-gá ìíⁿ xito-ni sá cuèndá nchaa cuéchi nchoo ñáyiú ñuyíú, te vá ìíⁿ ndúu-gá cuú-gá, te ndècu-ni-gá sá cúú-xí Yá Ndiòxí. ¹¹Núu xiáⁿ nchòhó cada iní-ndó sá dàtná sá ní xihí-ndó vá cundècu-gá-ndó sá cúú-xí ìchi cuehé ichi duha, chí ndècu-ná-ndó sá cúú-xí Yá Ndiòxí, chí ní tnahá tnúhu-ndo ndíhi Xítóhó Jesucristú Yá cúú Xítóhó-ó.

¹²Te núu xiáⁿ vá dàñá-gá-ndó cúnúu ní ìíⁿ sá cuèhé sá dúhá íní-ndó cuèndá sá vá cádá-gá-ndó ní ìíⁿ sá cuèhé sá dúhá sàni iní-ndó. ¹³Te vá dàñá-ndó tàxi tnuní ñáhá ní ìíⁿ sá cuèhé sá dúhá-áⁿ xii-ndo cuèndá sá vá cádá-gá-ndó, te chí dàñá ná tàxi tnuní ñáhá Yá Ndiòxí xii-ndo, te chí dàñá ná chindee ñaha-gá cada-ndo mèe-ni sá váha, te ducaⁿ te cada iní-ndó sá cúú-ndó dàtná ñáyiú ní xihí te ní ndoto ndècu. ¹⁴Te ducaⁿ càda-ndo chí vá ndácú-gá ní ìíⁿ sá cuèhé sá dúhá tàxi tnuní ñáhá-xí xii-ndo, chí Yá Ndiòxí cundàhú iní ñáhá-gá chindee ñaha-gá xii-ndo. Te ducaⁿ chí ñá túú-gá cúnúu nchaa tnúhu sá ní chídó tnùní ndíi Moisés cada ñáyiú.

Ñáyiú nchicúⁿ nihnu sá váha

¹⁵Te ñá díú sá cundàhú iní ñáhá Yá Ndiòxí xii-o chindee ñaha-gá ndíhi sá ñà túú-gá cúnúu nchaa tnúhu ní chídó tnùní ndíi Moisés, te cachí-ó sá cúú-ní cundècu-o ìchi cuehé ichi duha. ¹⁶Te nchoo xiní-ó sá nùu na cuáha-o tnúhu cunu cuechi-o núú ìíⁿ ñáyiú cuimí cunu cuechi-o núú-xi, te cùu-ná-ó ñáyiú xinu cuechi núú-yu te quide-o nchaa chiuⁿ tahú-yu. Te ducaⁿ sátnahá-xi cùu nchaa ñáyiú quide nchaa sá cuèhé sá dúhá chí tàxi tnuní ñáhá-ñá-xi xií-yu, te diu nchaa xiáⁿ dácúíta nihnu ñaha-xi xií-yu, te diu-ni ducaⁿ sátnahá-xi cùu nchaa ñáyiú sàndáá iní ñáhá xii Yá Ndiòxí chí tàxi tnuní ñáhá-gá xií-yu, te quidé-yu nchaa sá váha nàcuáa cuimí mée-gá cáda-yu. ¹⁷Te nchòhó ducaⁿ ní xóo cada-ndo ncháa sá cuèhé sá dúhá ní cùu, dico táxáhu xii Yá Ndiòxí chí vitna ní yùhu ní iní-ndó quide-ndo nchaa nàcuáa càháⁿ tnúhu-gá sá ní ngúndecu ndíhi-ndo. ¹⁸Te vitna ñá túú-gá tàxi tnùní ñáhá ní ìíⁿ sá cuèhé sá dúhá xii-ndo, te quide-ná-ndó ncháa sá váha tàuchiuⁿ Yá Ndiòxí cada-ndo.

¹⁹ Te duha càháⁿ-í cuendá cue ñáyi u xinu cuechi cuendá sá nchòhó tecú tñuní-ndó nàcuáa ndùu tñuhu càháⁿ-í. Te nchòhó ní dāñá-ndó ní taxi tñuní ñáhá nchàa sá cuehé sá dúhá xii-ndo, te ñá túú ní quide-ndo nacuaá ní cáháⁿ Yá Ndiòxí cada-ndo chi da vihi-gá ní quide-ndo, te ñá túú ní ducaⁿ chí dāñá ná tǎxi tñuní ñáhá Yá Ndiòxí xii-ndo vitna cuendá cada-ndo mēe-ni sá vāha nàcuáa cuiní mēé-gǎ cada-ndo, te ducaⁿ te cuu-ndo ñáyi quide ndáá cundecu núú-gǎ.

²⁰ Te nchoo cūtnàhá ní xóo cada-o nchàa sá cuehé sá dúhá ñá túú ní xóo cada-o ñi ñⁿ sá vāha cuiní Yá Ndiòxí cada-o. ²¹ Te dicó sácáⁿ nūú sǎñaha nchàa sá cuehé sá dúhá-ǎⁿ te núu na càda-o, te ni ñⁿ sá vāha vá nihí-ó te núu na càda-o nchaa xiǎⁿ, te ñá túú nchaa xiǎⁿ dācuíta nihnu ñaha-xi xii-o. ²² Te vitna ñá túú-gǎ cúú-ó ñáyi ndècu ichi cuehé ichi duha, chi cūu-ná-ó ñáyi quide nchaa nacuaá càháⁿ Yá Ndiòxí. Te sá dúhá quide-o cuu ndisa-xi ñⁿ sá vāha sá cúú-xí-ó, te cūu-o ñáyi quide ndáá ndécú-ó nūú-gǎ vitna, te sáá nduu cūndecu-o ndihí-gǎ ní caa ní quihíⁿ. ²³ Te nchaa sá cuehé sá dúhá dicó dācuíta nihnu ñaha-xi xii-o, dico Yá Ndiòxí ní quide-gǎ sá dicó-ni ducaⁿ ndùu tǎhú-ó cūndecu-o ndihí-gǎ ní caa ní quihíⁿ, chi ní tñahá tñuhu-o ndihí Xitohó Jesucristú Yáa cúú Xitohó-ó.

7

Cuendá ñáyi tñandaha

¹ Te nchaa nchòhó ñáyi ndècu ndihí-í ichi Xitohó Jesucristú sa ñaha-ndo nacuaá càháⁿ tñuhu sá dānèhé ñáhá xii-o nacuaá cada-o cūndecu-o, chi tñuhu-ǎⁿ càháⁿ-xi dóho nchaa ñáyi xindecu vívú ñuyúú-a.

² Te nchaa ñáyi ñihí sa ndècu yii-xi, te ñá túú tñuhu-ǎⁿ dānèhé ñáhá-xí xii-yu sá vǎ dāñá-yu yii-yu, dico núu na cúú yii-yu te ñá túú-gǎ ná cáháⁿ tñuhu-ǎⁿ cuendá-yu.

³ Dico núu vátá cúú-gǎ yii-yu te ñá túú ndùu váha-xi naquehéⁿ-yu ingá téé, dico núu na cúú yii-yu te quendóo mēé-yu, te ñá túú nǎgá càháⁿ tñuhu sá dānèhé ñáhá xii-yu nàcuáa cadá-yu te ducaⁿ te cuu naquehéⁿ-yu ingá téé, te ñá túú cūu-xi ñⁿ cuéchi.

⁴ Te nchòhó cue ñáyi ndècu ndihí-í ichi Xitohó Jesucristú cúú-ndó dātná ñáyi ní xihí dātná ní xihí-gǎ. Te xiǎⁿ ñá túú-gǎ tǎxi tñuní ñáhá nchàa tñuhu ní chidó tñuní ndíi

Moisés xii-ndo. Te ducaⁿ ní cuu cuendá nchòhó ngūndecu-ndo ndihí Xitohó Jesucristú Yáa ní xihí ní cūu te ní ndoto-gǎ. Te ducaⁿ ní cuu cuendá nchaa nchoo ñáyi ndècu ichi-gǎ cada-o nchàa nacuaá càháⁿ Yá Ndiòxí. ⁵ Te nchoo ní xindecu-o ichi cuehé ichi duha, te tñuhu sá sánú ichi ñaha xii-o nacuaá cada-o cūndecu-o cachí-xi sá ñá túú vāha cundecu-o ìchi-ǎⁿ, te nchoo dà uuⁿ-gǎ ní quide-o nchàa sá cuehé sá dúhá sá dúcáⁿ càháⁿ tñuhu-ǎⁿ, te sá dúcáⁿ ní quide-o te ta xíta nihnu-o cuaháⁿ ní cūu. ⁶ Te vitna cada iní-ó sá cúú-ó dātná ñáyi ní xihí sá cúú-xí tñuhu sá dānèhé ñáhá xii-o nacuaá cada-o cūndecu-o, chi ñá túú-gǎ cūnūu-xi, te vitna mee-nǎ Espiritú Yá Ndiòxí chíndèe ñaha-xi xii-o xinu cuechi-o núú-gǎ, te ñá dúú cuendá nchaa tñuhu sá ní ngūndéé ndéé díhna cada ñáyi xinu cuechi-o núú-gǎ vitna.

Nchaa sá cuehé sá dúhá ñuhu iní-í

⁷ Te cuéi duha càháⁿ-í dico vá cúú tñahí càháⁿ-ó sá tñuhu sá sánú ichi ñaha xii-o nacuaá cada-o cūndecu-o ñá dúú tñuhu váha cūu-xi. Te yúhú ñá túú cūtnuní iní-í ná cúú nchàa sá cuehé sá dúhá ní cūu te núu ñá túú tñuhu-ǎⁿ ní cǎchí tñuhu-xi xii-í, te ní ñá túú cūtnuní tucu iní-í nūu váha ñá túú tñuhu sá nchidó ñá-í sá ndécú ndihí tñaha ñáyi-o ní cūu te núu ñá túú tñuhu-ǎⁿ ní cǎchí-xi sá vǎ cúú cūu iní-í sá ndécú ndihí-yu. ⁸ Te tñuhu-ǎⁿ ní dānèhé ñáhá-xí xii-í sá vǎ cúú càda-í ní ñⁿ sá cuehé sá dúhá, dico sá cuendá tñuhu-ǎⁿ uuⁿ-gǎ ducaⁿ ní sani iní-í ní quide-í. Te núu ñá túú tñuhu sá sánú ichi ñaha xii-o nacuaá cada-o cūndecu-o ña, te ñá túú cūtnuní iní-í sá quidè-í nāndí sá cuehé sá dúhá ní cūu. ⁹ Te cūtnàhá vátá nihí-gǎ-í tñuhu-ǎⁿ te ñá túú tñahí ná sání iní-í ndécú-í ní cūu, dico sá tá ní nihí-í tñuhu-ǎⁿ te ní cutnūní iní-í sá ndécú cuéchi-í, te ta xíta nihnu-í cuaháⁿ ní cūu. ¹⁰ Te núu ní quide-í nchaa nàcuáa càháⁿ tñuhu-ǎⁿ te sa ndéé ama-gǎ naníhí tǎhú-í ní cūu, dico ñá túú ní quide-í nūu ní cutnūní iní-í sá tá xíta nihnu-í cuaháⁿ ní cūu. ¹¹ Te sá xii tñuhu-ǎⁿ xiǎⁿ uuⁿ-gǎ ní cūnuu nchàa sá cuehé sá dúhá ní dāndàhú ñáhá-xí xii-í te ní quide-í, te ta dācuíta nihnu ñaha-xi xii-í cuaháⁿ ní cūu.

¹² Te tñuhu sá sánú ichi ñaha xii-o nacuaá cada-o cūndecu-o cuu-xi tñuhu ío yinūhu ní taxi Yá Ndiòxí, te ñⁿ tñuhu-ǎⁿ cúú-xi mēe-ni tñuhu váha, te ni ñⁿ tñuhu cuehé tñuhu duha ñá túú ñuhu tñahá. ¹³ Te vá cúú

càchi-í sá tnúhu váha-áⁿ nǐ quide-xi ta xíta nihnu-í cuáháⁿ ní cùu, chi nchaa sá cuèhé sá dúhá nǐ quide-í, xiáⁿ tá dàcuíta nihnu ñaha-xi xii-í cuáháⁿ ní cùu, te sá cuèdá tnúhu váha-áⁿ nǐ cutnùnǐ iní-í sá quidè-í nchaa sá cuèhé sá dúhá, te xiáⁿ tá xíta nihnu-í cuáháⁿ ní cùu. Te sá cuèdá nchaa nàcuáa càháⁿ tnúhu sá sánú ìchi ñaha xii-o nàcuáa cada-o cùndecu-o ní cutnùnǐ iní-í sá xidó ndécú cuèchi-í ní cùu.

¹⁴ Te tnúhu-áⁿ nǐ taxi Espíritú Yá Ndiòxí ndécú ndíhi-o cachí tnúhu-xi nàcuáa cada váha-o. Te nchoo cùu-o mee-ni ñáiyu yíca cuèchi, te tàxi tnuní ñáhá nchaa sá cuèhé sá dúhá xii-o ni cuu. ¹⁵ Dico nchoo tnàhá iní-ó càda-o nchaa sá váha dico ñá túú quide-o, te da nchaa sá ñá túú tnàhá iní-ó càda-o quide-o, te ñá túú cùtnuní iní-ó nǎ cuèdá ducaⁿ quide-o. ¹⁶ Te sá dúcáⁿ quide-o nchaa sá ñá túú tnàhá iní-ó, te xiáⁿ ndíxi tũu iní-ó sá tnúhu sá dúcáⁿ sànu ìchi ñaha xii-o nàcuáa cada-o cùndecu-o cuu-xi tnúhu ío váha. ¹⁷ Te cùtnuní iní-ó sá nchaa sá cuèhé sá dúhá ñuhu iní-ó, xiáⁿ quidè-xí dùcaⁿ quide-o sá ñá túú váha, te ñá dúú sá cǎhú ñí mée-ó dùcaⁿ quide-o. ¹⁸ Te cùu-o cue ñáiyu sàni duèhé sání dùha iní-xi, te cuíní-ó càda-o nchaa sá váha dico ñá túú ñíhí ndéé-ó càda-o. ¹⁹ Te cuíní-ó càda-o nchaa sá váha dico ñá ndácú-ó, te ñá túú cuíní-ó càda-o datná quidè nchaa ñáiyu ndècu ìchi cuèhé ìchi duha, chi ñáiyu-áⁿ mee-ni nchaa sá cuèhé sá dúhá quidè-yu, dico ñu-ni nchaa xiáⁿ quidè-ó tnàhá-ó. ²⁰ Te sá dúcáⁿ quide-o nchaa sá ñá túú tnàhá iní-ó càda-o te ñá dúú mée-o ducaⁿ cahu iní-ó quide-o, chi nchaa sá cuèhé sá dúhá ñuhu iní-ó xiáⁿ quidè-xí dùcaⁿ quide-o.

²¹ Te ducaⁿ tnàhí yáha-o òrè cuíní-ó càda-o sá váha, chi da mee-ni nchaa sá cuèhé sá dúhá quide-o. ²² Te ío cùdí iní-ó càda-o nchaa nàcuáa càháⁿ Yá Ndiòxí, ²³ te dicó-ni sá ncháá sá cuèhé sá dúhá ñuhu iní-ó, xiáⁿ quidè-xí ngani ñaha-xi xii-o ñá túú quide-o sá váha sàni iní-ó càda-o, te ducaⁿ yáha-o chi nchaa sá cuèhé sá dúhá-áⁿ cùnùu-xi taxi tnuní ñáhá-xí xii-o.

²⁴ ¡Te ndàhú ní cuu nchoo! Chi vá yòo ñí ni ndàcu cada nàcuáa vá táxi tnùnǐ ñáhá-gǎ nchaa sá cuèhé sá dúhá xii-o sá tá dàcuíta nihnu ñaha xii-o cuáháⁿ ní cùu. ²⁵ Te táxáhu xii Yá Ndiòxí sá Xítóhó Jesucristú ní quide-gǎ cuèdá sá vǎ táxi tnùnǐ ñáhá-gǎ ni ñí sá cuèhé sá dúhá xii-o, sá tá dàcuíta nihnu ñaha xii-o cuáháⁿ ní cùu. Te mee-o

sàni iní-ó càda-o nchaa nàcuáa càháⁿ Yá Ndiòxí, dico núu nchaa sá cuèhé sá dúhá ná cùnùu-xi taxi tnuní ñáhá-xí xii-o, te ñu-ni nchaa xiáⁿ cada-o.

8

Ñáiyu quide nchaa nàcuáa càháⁿ Espíritú Yá Ndiòxí

¹ Te vitna nchaa nchoo ñáiyu tnàhá tnúhu ndíhi Xítóhó Jesucristú vá cuíta nihnu-gǎ-ó, chi ñá túú-gǎ ndécú-ó ìchi cuèhé ìchi duha, chi mee-nǎ nchaa nàcuáa càháⁿ Espíritú Yá Ndiòxí quidè-ó. ² Te Espíritú Yá Ndiòxí-áⁿ táxi tnùnǐ ñáhá-xí xii-o, te ducaⁿ chi ndècu ndíhi-o Xítóhó Jesucristú, te sá dúcáⁿ tàxi tnuní ñáhá Espíritú-gǎ xii-o núu xiáⁿ ñá túú-gǎ táxi tnùnǐ ñáhá ni ñí-gǎ sá cuèhé sá dúhá xii-o, te ducaⁿ quide Espíritú-gǎ cuèdá sá vǎ cuíta nihnu-o, te ñu-ni Espíritú-gǎ quidè-xí cuèdá sá nchóo ndùu táhú-ó cùndecu-o ndíhi-gǎ ni caa ni quíhíⁿ. ³ Te nchoo ñá ní ndàcu-o cada-o nchaa nàcuáa càháⁿ tnúhu sá sánú ìchi ñaha xii-o nàcuáa cada-o cùndecu-o, núu xiáⁿ tnúhu-áⁿ ñá túú ní ñíhí ndéé-xí càda-xi cuèdá sá nchóo vǎ cuíta nihnu-o. Dico Yá Ndiòxí ní tendaha-gǎ Déhe mee-gǎ ní quixi ñuyíú-a, te Yaa-áⁿ cúu-gǎ ñí ñáiyu, te cǎa-gǎ datná cǎa ñáiyu ndècu cuèchi-xi xíndecu ñuyíú-a, te sá cuèdá nchaa cuèchi nchaa nchoo ñáiyu xíndecu ñuyíú-a ní quixi-gǎ, te ndéé dàvá-áⁿ nǐ quide-gǎ cuèdá sá vǎ táxi tnùnǐ ñáhá-gǎ ni ñí sá cuèhé sá dúhá xii-o. ⁴ Te ducaⁿ nǐ quide-gǎ cuèdá nchoo nchicúnⁿ nihnu-o quide-o nàcuáa càháⁿ tnúhu sá sánú ìchi ñaha xii-o nàcuáa cada-o, chi ñá túú-gǎ cùnùu ni ñí sá cuèhé sá dúhá iní-ó, chi Espíritú Yá Ndiòxí-nǎ táxi tnùnǐ ñáhá-xí xii-o.

⁵ Te nchaa ñáiyu cùnùu nchaa sá cuèhé sá dúhá iní-xi mee-ni xiáⁿ ñúhú iní-yu te quidè-yu. Dico nchoo ñáiyu quide nchaa nàcuáa cuíní Espíritú Yá Ndiòxí ñúhú iní-ó mée-ni nàcuáa càháⁿ Espíritú-gǎ-áⁿ te quide-o. ⁶ Te núu mee-ni nchaa sá cuèhé sá dúhá cùnùu iní-ó, te cuíta nihnu-o, dico núu mee-ni nchaa tnúhu càháⁿ Espíritú Yá Ndiòxí cùnùu iní-ó, te ío váha cuu iní-ó cùndecu-o ndíhi-gǎ ni caa ni quíhíⁿ. ⁷ Te nchaa ñáiyu ñuhu iní mee-ni sá cuèhé sá dúhá cùu úhú iní-yu Yá Ndiòxí, te ñá túú cuíní-yu cadá-yu nàcuáa càháⁿ-gǎ, te ni ñá ndácú-yu cadá-yu. ⁸ Te nchaa ñáiyu ducaⁿ

cùnunu nchaa sá cuèhé sá dúhá ìní-xi-áⁿ ñà túú cùdiú-yu núú Yá Ndiòxí.

⁹ Te nchòhó chi ñà túú-gá cùnunu sá cuèhé sá dúhá ìní-ndó, chi mee-ñà nàcuáa càháⁿ Espiritú Yá Ndiòxí quidé-ndó, te ducaⁿ quide-ndo chi ndècu ndihi-ndo Espiritú-gá, te diu-ni Espiritú-gá-áⁿ ní tendaha Xítohó Jesucristú véxi ndècu ndihi-o, te nchaa ñáyiú ñà túú ndècu ndihi Espiritú sá ní tendaha Xítohó Jesucristú véxi ndècu ndihi-o ñà túú ndècu ndihi ñahá-yu xii-gá. ¹⁰ Te núu ndècu ndihi-ndo Xítohó Jesucristú, te cuèi na cùú yiqui cùnú-ndó sá cuèndá nchaa sá cuèhé sá dúhá ìò ñuyúú-a, dico ìní-ndó chi cundecu ndihi-xi Yá Ndiòxí chi ñà túú-gá cuèchi-ndo ndècu núú-gá. ¹¹ Te núu ndècu ndihi-ndo Espiritú Yá Ndiòxí Yáá ní dándótó ñaha xii Xítohó Jesucristú, te diu-ni-gá cada te ndoto yiqui cùnú-ndó sá tá xíta nihnu cuáháⁿ núu na cùú-xi, te ducaⁿ chi ndècu ndihi-ndo Espiritú-gá.

¹² Te nchòhó ñáyiú ndècu ndihi-í ichi Xítohó Jesucristú, ñà túú-gá tǎú-ndó cùnunu ni ìíⁿ sá cuèhé sá dúhá ìní-ndó nàcuáa vá cundècu-gá-ndó ichi cuèhé ichi duha. ¹³ Chi núu na cùnunu sá cuèhé sá dúhá ìní-ndó te cuíta nihnu-ndo, chi quihíⁿ-ndó núú ùhú núu ndàhú. Dico núu daña-ndo mée-ndo chindee ñaha Espiritú Yá Ndiòxí xii-ndo cuèndá sá vá cùnunu-gá sá cuèhé sá dúhá ìní-ndó ñà, te nduu táhú-ndó cundecu-ndo ndihi-gá ní caa ní quihíⁿ te núu ducaⁿ na cada-ndo.

¹⁴ Chi nchaa ñáyiú quide nchaa nacúaa sànu ichi ñaha Espiritú Yá Ndiòxí cùú-yu déhe-gá. ¹⁵ Te Espiritú sá ní taxi Yá Ndiòxí ndécú ndihi-o ñà túú quide-xi sá nchóó yùhú-ó cùnu cuechi-o núú-gá, chi Espiritú-áⁿ quidé-xi sá nchóó cùu-o déhe-gá, te diu-ni Espiritú-áⁿ quidé xàhaⁿ-o xii Yá Ndiòxí: “jYòhó Dútú Ndiòxí cùú-n Tǎtá mée-ndí!” duha xàhaⁿ-o xii-gá. ¹⁶ Te diu-ni Espiritú-gá-áⁿ tñahá tñùhu-xi ndihi ìní-ó, te càháⁿ ndáá-xi sá nchóó cùu-o déhe-gá. ¹⁷ Te sá dúcáⁿ cùu-o déhe Yá Ndiòxí xíáⁿ ní cachí-gá sá tñahá-ó nduu táhú-ó sá ní nduu táhú Xítohó Jesucristú, te ducaⁿ nduu táhú-ó te núu na cada ndee ìní-ó ndòho-o datná ní ndoho Xítohó Jesucristú, te núu ducaⁿ te ío cuu càhnu-o ndihi-gá ní caa ní quihíⁿ.

¹⁸ Te yúhú cachí-í sá ñà túú nǎ cada-xi cuèi ndòho-o cuèndá-gá ndécú-ó ñuyúú-a, chi ío váha càa núú ndúú táhú-ó cundecu-o

na sáá nduu. ¹⁹ Te nchaandi túhú sá ní cadúha Yá Ndiòxí ní taxi ndecu-gá ñuyúú-a ndètu cahnu-ná-xi sáá nduu càchí-gá sá ìo càhnu cuu nchaa déhe-gá. ²⁰ Te nchaa sá ní cadúha Yá Ndiòxí ní taxi ndecu-gá ñuyúú-a ní sáá nduu ñà túú-gá cùú-xi sá váha sá cùú-xi-gá. Te ñà díú mée sá ní taxi ndecu Yá Ndiòxí ñuyúú-a ducaⁿ ni sàni ìní-xi cunduu, chi mee-gá ducaⁿ tñahí ní cachí-gá cunduu sá sáá nduu vá cùú-xi sá váha sá cùú-xi-gá, dico sáá tucu nduu te nchaa xíáⁿ cuu tucu-xi sá váha sá cùú-xi-gá.

²¹ Te nchaa sá ní taxi ndecu-gá ñuyúú-a vá cundècu-gá-xi datná cáá-xi vitna te ní vá dánàa-gá, chi nduu saa-xi te ngúndecu váha-xi datná ngúndecu váha nchaa cue déhe-gá. ²² Te nàha-o sá ncháándí túhú sá nchító ní cadúha Yá Ndiòxí ndécú ñuyúú-a ndòho-xi vitna datná ndóhó ìíⁿ ñadihí sá ní tñahá òré cacu déhe-xi. ²³ Te ñà díú-ní nchàa sá dúcáⁿ ní cadúha-gá-áⁿ ducaⁿ ndòho-xi, chi tñahá nchoo dúcáⁿ ndòho-o ndecu-o ñuyúú-a tucu, te nchoo sá ní nduu táhú-ó Espiritú Yá Ndiòxí Espiritú sá ní cachí mée-gá nduu táhú-ó díhmanuu. Te ío ndòho tñahá-ó ndècu-o ñuyúú-a te ndètu cahnu-ná-ó sáá nduu ndàda saa-gá yiqui cùnú-ó, te càháⁿ-gá sá cùú-ó déhe-gá. ²⁴ Te Yá Ndiòxí ní quide-gá ní naníhí táhú-ó núu xíáⁿ ní ngúndecu ndihi-o tñùhu ndee ìní ndétú-ó sáá nduu càda-gá nàcuáa ní cachí-gá, te núu sa ndècu ndihi-o sá ndúú táhú-ó te vá cùú càháⁿ-ó sá cundètu-o sá ndúú táhú-ó chi sa ndècu ndihi-o. ²⁵ Dico sá ndétú-ó nduu táhú-ó cùu-xi sá vǎtá cundècu ndihi-gá-ó, te xini ñuhu-ni-xi cada ndee-ni ìní-ó cundetu-o ndéé sáá nduu nduu táhú-ó sá dúcáⁿ ní cachí Yá Ndiòxí nduu táhú-ó.

²⁶ Te Espiritú-gá chindee ñaha-xi xii-o nacúaa níhí ndéé-ó cundecu-o, te nchoo ñà túú xini-ó càháⁿ ndihi-o Yá Ndiòxí nàcuáa tǎú-xi cunduu dico Espiritú-gá càháⁿ ndàhú-xi núú-gá cuèndá-ó cuèi òré ñà nihí-ó tñùhu càháⁿ-ó cuèndá nchaa sá ìo cuíni-ó càcáⁿ-ó núú-gá. ²⁷ Te Yá Ndiòxí sa nàha ndáá-gá nchaa nàcuáa sàni ìní-ó, te ducaⁿ sá naha ndáá-gá nchaa nàcuáa sàni ìní Espiritú-gá. Te Espiritú-gá càháⁿ ndàhú-xi núú-gá cuèndá nchoo ñáyiú yíndaha-gá, te càháⁿ ndàhú-xi núú-gá nàcuáa cuíni mée-gá cunduu.

Nchaa sá ná càda ñaha ñáiyu te vá ndácú-yu nadatùhú-yu iní-ó chí ndacu nahi-ni-o yáha-o nchaa sá ná cáda ñahá-yu

²⁸ Te sa ñaha-o sá Yá Ndiöxí quidé-gã sá ncháá sã yáha-o ndècu-o ñuyíú-a cùu-xí sá vâha sá cúú-xí nchòe cue ñáiyu cùu iní ñáhá xii-gá, chí cùu-o ñáiyu ní cáháⁿ-gá cundecu ndihi-gá dàtná ní cachí iní mée-gã. ²⁹ Te ndéé cútñahá vátá ngáva-gã ñuyíú, te Yá Ndiöxí sa ñaha-gá nándi cùu ñáiyu cundecu ndihi-gá, te diu-ni ndéé dàvâ-áⁿ ní cachí-gá sá ñáiyu-áⁿ cunduu váha iní-yu dàtná váha iní Déhe mee-gã, te ducaⁿ ní cachí-gá cuendá sá Déhe mee-gã-áⁿ cunuu-gã núú ncháa ñáiyu cundecu ndihi-gá. ³⁰ Te nchaa ñáiyu ducaⁿ ní cachí-gá cundecu ndihi-gá ndéé cútñahá vátá ngáva-gã ñuyíú càháⁿ ñahá-gã xii-yu vitna, te nchaa ñáiyu ducaⁿ càháⁿ-gã càchí-gá sá ñà túú-gã cuéchi-yu ndècu núú-gã, te diu-ni ñáiyu-áⁿ cachí-gá sá ïo càhnu cuú-yu.

³¹ Te vitna ní cutnùni iní-ó, te ñà túú nãgá cani iní-ó, chí Yá Ndiöxí ndécú ndihi ñaha-gã xii-o, te vá yõ ìⁿ-gã ndacu quehndé nihnu cuendá sá vã chindèe ñaha-gã xii-o. ³² Te Yá Ndiöxí ñà túú ní cùdí iní-gá Déhe-gá sá cùú-gá cuendá nchaa nchoo ñáiyu xñdecu ñuyíú-a, te sá dúcáⁿ ndéé Déhe-gá ñà túú ní cùdí iní-gá xíãⁿ cútñuní iní-ó sã táxí-gã nchaandé túhú sá xíní ñùhu-o. ³³ Te vá yõ ìⁿ ndacu cacáⁿ cuéchi núú Yá Ndiöxí cuendá nchaa ñáiyu ní cachí-gá cundecu ndihi-gá te núu ná cúú cuéchi-yu ndècu. Chí mee-gã càchí-gá sá ñà túú ndècu cuéchi-yu núú-gã. ³⁴ Te vá yõ ìⁿ ndacu daquihíⁿ ñáhá xii-o núú ùhú núú ndàhú, chí Xítóhó Jesucristú ní xihí-gá te ní ndoto-gá, te cuándaa-gá núú ndécú Dütú Ndiöxí núcõo-gá xio cùha-gá, te ducaⁿ ïo cùnuu-gá, te yacáⁿ càháⁿ ndàhú-gá núú Dütú Ndiöxí cuendá-ó. ³⁵ Te vá yõ ìⁿ ndacu cada ñaha xii-o ìⁿ sá ñà túú váha cuendá sá vã cúú iní ñáhá-gã Xítóhó Jesucristú xii-o, te ni tnúndòho tnúhu ndàhú, te ni sá ndihú iní-ó ñã cútñuní iní-ó ñasa cada-o càcu nihnu-o ìⁿ sá ná yáha-o, te ni ncháa sá cáda ñaha ñáiyu sá cuendá-gá, te cuèi-ni sá vã nihí-ó sá cóhó sá caxí-ó, te cuèi-ni sá vã nihí-ó dóo cuihnu-o, te cuèi ndècu-ná-ó sã yáha-o ìⁿ sá yáha-o, te cuèi sa ndècu-ná-ó sã cáhni ñahá-yu, dico Xítóhó Jesucristú

vá dáñá ndéè-gá sá cúú iní ñáhá-gã xii-o. ³⁶ Te quee ndáá-xi ñacuáa ní cáháⁿ ìⁿ téé ní xóo cáháⁿ tnúhu Yá Ndiöxí ndéé sanaha ní ngódó tnùnì núú tütú-gá núú càchí-xi:

Yòhó Dütú Ndiöxí nchaa-ni nduu nchaa-ni òré cuiní ñáiyu cahni ñahá-yu xii-ndí sá cuendá-n,

te càchí-yu sá cúú-ndí dàtná cue mbéé cue quiti sa ndècu túha-ná cahni-yu.

Duha ní cachí téé ní xóo cáháⁿ tnúhu-gã-áⁿ, te ducaⁿ ní ngódó tnùnì núú tütú-gá. ³⁷ Te cuèi ducaⁿ nándi sá ná càda ñaha-yu xii-o, dico vá ndácú-yu nadatùhú-yu iní-ó chí ndacu nahi-ni-o yáha-o ncháa sá dúcáⁿ ná càda ñahá-yu xii-o, te ducaⁿ chí Xítóhó Jesucristú Yáa ïo cùu iní ñáhá xii-o ndecu ndihi ñaha-gã chindèe ñaha-gã. ³⁸⁻³⁹ Te yuhú cútñuní ndáá iní-í sá ni ìⁿ sá ïó ñuyíú-a vá ndácú-xí càda-xi cuendá sá vã cúú iní ñáhá-gã Yá Ndiöxí xii-o, te ni sá cùú-ó, te ni sá cùndècu-o ñuyíú-a, te ni ìⁿ espíritú sá ïo cùnuu cundihí yucu ñávâha te ni ìⁿ dava-gá cue espíritú cùndihí-xi vá ndácú-xí càda-xi cuendá sá vã cúú iní ñáhá Yá Ndiöxí xii-o. Te ni sá cúú ñuyíú-a vitna, te ni sá cúú ndéé cuèé-gá, te ni ìⁿ sá ndécú àndiu, te ni ìⁿ sá ndécú ñuyíú-a, te ni ìⁿ sá ní cadúha mee Yá Ndiöxí, ni ìⁿ xíãⁿ vá ndácú-xí càda-xi cuendá sá vã cúú iní ñáhá-gã xii-o chí ndècu ndihi-o Xítóhó Jesucristú Yáa cúú Xítóhó-ó.

9

Yá Ndiöxí ní cachí-gá sá ñáiyu isràèl cuú-yu ñáiyu canchicúⁿ nihnu ñaha xii-gá

¹ Te yuhú càháⁿ ndáá-í chí cùu-í ìⁿ téé ndècu ndihi Xítóhó Jesucristú, te ndècu ndihi-í Espíritú Yá Ndiöxí núu xíãⁿ cútñuní iní-í sá càháⁿ ndáá-í. ² Te nchaa-ni nduu nchaa-ni òré ïo ndihú iní-í, te ducaⁿ-ni ïo quide úhú-xi iní-í ³ sá cuendá nchaa ñáiyu cùu ndi mee-í. Te núu dicó cúú-xí ìⁿ sá chindèe ñaha xii-yu nucúndecu váha-yu núú Yá Ndiöxí ñà, te dàña-í mée-í dàcuíta nihnu ñaha Xítóhó Jesucristú núu dicó sá cúú. ⁴ Te nchaa ñáiyu cùu ndi mee-í-áⁿ cúú-yu ñáiyu isràèl, te Yá Ndiöxí ní cachí-gá sá cúú-yu déhe-gá, te ní quide-gá ñacuáa ní cutnùnì iní-yu sá ïo càhnu cuu-gá, te ní cáháⁿ ndáá-gá núú-yu ñacuáa cada ñaha-gã xii-yu, te ní xáhaⁿ-gã xii ndí Moisés ní chidó tnùnì

ndíi nàcuáa cadá-yu cundecú-yu. Te ní xáhaⁿ-gá xíi-yu nàcuáa cadá-yu cada càhnu ñáhá-yu xii-gá, te ní xáhaⁿ tùcu-gá xíi-yu nchaa nàcuáa cada-gá ndéé cuèè-gá. ⁵ Te nchaa ñáiyu-áⁿ cúu-yu ñani tnáhá nchaa cue téé ní cunuú ní xíndecu ndéé sanaha, te ñi-ni ñani tnáhá-yu cùu Xítóhó Jesu-crístú Yaá ní tendaha Dütú Ndióxi ní quixi ñuyúú-a, te tnáhá-gá cúu-gá Ndióxi te ío cunuú-gá, te nchaa nduu nchaa quíú ío càhnu cuu-gá. Te ducaⁿ na cunduú.

⁶ Te vâ cächí-ó sã Yã Ndióxi ñã túú ní quide-gá nchaa nàcuáa ní cachí-gá cada-gá cuendá sã ñã túú sãndáá iní ñáhá ðava ñáiyu isràél xii-gá. Te sã dúcáⁿ xíquide davá-yu te ñã túú quidé-yu nàcuáa tàu-xi cadá-yu sã cúu-yu ñáiyu isràél. Te ñáiyu ducaⁿ xíquide-áⁿ cúu-yu ñáiyu ñã túú cùu cuendá ñáhá Yã Ndióxi. ⁷ Te cuèi nchaa-yu cúu-yu ñani tnáhá ndíi Àbrahám dico ñã túú quidé-yu nchaa nàcuáa tàu-xi cunduú cadá-yu sã cúu-yu ñani tnáhá ndíi. Te Yã Ndióxi ní xáhaⁿ-gá xii ndíi Àbrahám: “Nchaa cue ñani tnáhá tã Isàác téé cùu déhe ducuⁿ-n, mee-ni cuè ñáiyu-áⁿ cuu ñani tnáhá-n”, duha ní xáhaⁿ-gá xii ndíi Àbrahám. ⁸ Te xíãⁿ cútñuní iní-ó sã ñã ncháá ñáiyu cùu ñani tnáhá ndíi Àbrahám cúu-yu ñáiyu cùu cuendá Yã Ndióxi, chi mee-ni ñáiyu sãndáá iní nàcuáa ní cáhãⁿ-gá cada-gá, ñáiyu-áⁿ cúu cuendá-gá. ⁹ Te duha ndùu tnúhu ní xáhaⁿ Yã Ndióxi xii ndíi Àbrahám: “Sáá nduu te yúhú cada-í te coo ñiⁿ déhe-n ndíhi ñadihí-n tã Sãrá”, duha ní xáhaⁿ-gá xii ndíi.

¹⁰ Te ñã díú-ní xíãⁿ ní quide Yã Ndióxi, chi tnáhá ní ndatnúhu-gá ndíhi ndíi Rèbecá cútñahá vitna ñuhu úú déhe ndíi ndíhi ndíi Isàác téé ní cuu ñani tnáhá-ó ní xíndecu ndéé sanaha. ¹¹⁻¹³ Te cútñahá vitna ñuhu-gá déhe ndíi Rèbecá, cútñahá vátá cadá-gá-güexi ní ñiⁿ sã cuèhé sã dúhá, te ní ñiⁿ sã vãha, ní xáhaⁿ Yã Ndióxi xii ndíi: “Déhe-n tãe díhna na càcu te tãe-áⁿ tñi-dé nchaa tnúhu cáhãⁿ déhe-n tãe cùu uú ná càcu”, duha ní xáhaⁿ-gá xii ndíi Rèbecá. Te ní quee ndáá-xi nàcuáa ní cáhãⁿ Yã Ndióxi núú tütú-gá núú cächí-xi: “Té Jacób ní cuu vãha iní-í núú-dé, te té Esàú ñã túú ní cùu vãha iní-í núú-dé”, duha cächí-gá núú tütú-gá. Te ducaⁿ ní cuu chi ducaⁿ ní cachí méé-gá cunduú sã cáhãⁿ-gá nchaa ñáiyu

cùini méé-gá, te ñã díú cuendá ñiⁿ chiúⁿ quidé-yu cáhãⁿ ñáhá-gá xíi-yu.

¹⁴ Te vâ cúu tnáhí cáhãⁿ-ó sã Yã Ndióxi ñã túú quide vãha-gá sã dúcáⁿ quide-gá chi mee-gá ío ndáá quidé-gá! ¹⁵ Te mee-gá ní xáhaⁿ-gá xii ndíi Moisés: “Cundáhú iní-í chindee-í mee-ni cuè ñáiyu cächí iní-í”, duha ní xáhaⁿ-gá xii ndíi. ¹⁶ Te xíãⁿ cútñuní iní-ó sã cundáhú iní-gá ñáiyu chi ducaⁿ cùini méé-gá cunduú, dico ñã túú cundáhú iní ñáhá-gá xíi-yu cuendá sã dúcáⁿ cùini-yu cada-gá, te ní ñã túú cundáhú iní ñáhá-gá xíi-yu cuendá sã ío nducu ndéé-yu quidé-yu ñiⁿ sã quidé-yu. ¹⁷ Te núú tütú Yã Ndióxi cáhãⁿ-xi nàcuáa ní xáhaⁿ-gá xii téé ní cuu Faráon téé ní xíndaha nacióⁿ Egíptú, te duha ní xáhaⁿ-gá: “Yúhú ní quide-í yíndaha-n ñáiyu cuendá cada-í titní núú sã cadá-í núú-n cuendá cutñuní iní-n sã ío càhnu cuu-í, te ducaⁿ nchaa ñáiyu ñuyúú cutñuní iní-yu sã yúhú cúu-í Ndióxi”, duha ní xáhaⁿ-gá xii téé ní cuu Faráon. ¹⁸ Te xíãⁿ cútñuní iní-ó sã Yã Ndióxi cundáhú iní-gá mee-ni cuè ñáiyu cächí iní méé-gá, te ducaⁿ ndáda díi-gá iní nchaa ñáiyu cächí iní méé-gá ducaⁿ càda-gá.

¹⁹ Te sã dúhá cáhãⁿ-í te dava-ndo quèsaha-ndo: “Ná cuendá Yã Ndióxi dáca-gá cuéchi díquí ñáiyu núu ní ñiⁿ-yu ñã ndácú-yu quehndé nihnú-yu cuendá sã vã cadá Yã Ndióxi nàcuáa cuèni-gá”, quèsaha-ndo. ²⁰ Te chí cuãha cuendá sã díco ñáiyu ñuyúú-a cùu-ndo te ñã túú ndùu vãha-xi sã nchòhó cáhãⁿ-ndó ñiⁿ tnúhu sã ñã túú ndùu vãha sã cúu-xí Yã Ndióxi. Te duha na cáhãⁿ-í núú-ndó nàcuáa tecú tñuní-gá-ndó nàcuáa ndùu tnúhu cáhãⁿ-í. Te ñã túú xini-ó sã ñiⁿ quídi ñuhu cúñaha-xi xii ñáiyu ní cadúha ñaha xii-xi: “Ná cuendá duha ní cadúha ñaha-n xii-í”, cúñaha-xi. ²¹ Chi ñáiyu cadúha nchaa quídi-áⁿ cuu-ni cadúha-yu ndíhi ñuhu cuèi nása na cunduú quídi cadúha-yu canehe chiúⁿ-yu, chi ñiⁿ-ni ñuhu cadúha-yu quídi canehe chiúⁿ-yu ndíi tnáhá nduu sácóo-yu vico ndíhi quídi sã canehe chiúⁿ-yu nduu cütexíni.

²² Te ñi-ni ducaⁿ quide Yã Ndióxi, chi cùini-gá dandòho-gá ñáiyu ñã túú quide nchaa nàcuáa nduu vétú iní-gá, te cada-gá nàcuáa cutñuní iní-yu sã ío càhnu cuu-gá. Te sa ndècu túha-ná-yu sã quíhíⁿ-yu núú

ùhú núú ndàhú, te cuèi ducaⁿ dico ío ta quide cahnu iní-gá cuáháⁿ. ²³ Te ducaⁿ quide-gá cuendá cutnùní iní nchaa ñáyiú ñuyúú sá ïo váha quide-gá sá cúú-xí nchaa nchoo ñáyiú cùndahú iní-gá, chí ní cachí-gá sá nchóó cuè ñáyiú cùndahú iní-gá nduu táhú-ó cùndecu-o ndíhi-gá núú ïo váha càa ndecu-gá. ²⁴ Te dava nchoo ñáyiú ní cáháⁿ Yá Ndiòxí cúú-ó ñáyiú isràél, te dava-o cùu-o ñáyiú ñá túú cùu ñáyiú isràél. ²⁵ Te ní quee ndáá-xi nàcuáa ní xáháⁿ Yá Ndiòxí xii ndíí Òseás téé ní xóo cáháⁿ tnúhu-gá ndéé sanaha ní chídó tnùní ndíí núú tütú-gá núú càchí-xi:

Ñáyiú ñá túú cùu cuendá-í ní cùu te nduu cuendá-í-yu,
te ñu-ni ñáyiú-áⁿ ñá túú cùu váha iní-í núú-yu ní cùu, dico vitna cùu váha iní-í núú-yu.

²⁶ Te ñu-ni ñuú núú dúcáⁿ ní cachí-í sá ñá túú ñáyiú cùu cuendá-í ñu-ni ñuú-áⁿ coo ñáyiú cuu déhe yúhú Dútú Ndiòxí Yáa ndécú tũu andũ.

Duha ní xáháⁿ Yá Ndiòxí xii ndíí Òseás ní chídó tnùní ndíí núú tütú-gá. ²⁷ Te ndíí Chàíá téé ní xóo cáháⁿ tucu tnúhu Yá Ndiòxí ndéé sanaha ní cáháⁿ ndíí cuendá ñáyiú isràél, te duha ní cachí ndíí: “Cuèi cuéhé vñí ñáyiú isràél dàtná cuéhé ñuhu cùchí làmár dico sacú-ni-yu vá quini-yu tnúndòho tnúhu ndàhú. ²⁸ Te Yá Ndiòxí ío ndíhi cada-gá nchaa nàcuáa càháⁿ-gá ñuyúú”, duha ní cachí ndíí. ²⁹ Te ní cáháⁿ tucu ndíí nàcuáa cada-xi ndéé cuèè-gá, te ní cachí ndíí:

Yá Ndiòxí Yáa táxí tnùní nchaandi tùhú sá ío andũ ndíhi ñuyúú ñá túú ní dànaa-gá nchaa ñáyiú isràél, chí núu ní ndíhi-yu danàa ñaha-gá,
te nchoo cùu-o dàtná ní cuu nchaa ñáyiú ní xíndecu ñuú Sòdomá ndíhi nchaa ñáyiú ní xíndecu ñuú Gòmorrá, te ndíhi-o nàa dàtná ní naa nchaa ñáyiú-áⁿ ní cùu.

Duha ní cachí ndíí.

Ñáyiú isràél ñá túú sàndáá iní-yu tnúhu Xítóhó Jesucristú

³⁰ Te sá cuendá xíáⁿ ñuú vitna càchí tnúhu-í xii-ndo sá cuè ñáyiú ñá túú cùu ñáyiú isràél ñá túú ní nànducu nihnú-yu nàcuáa cadá-yu cudíú-yu núú Yá Ndiòxí, dico vitna cudíú-yu núú-gá chí ní sàndáá iní-yu Xítóhó Jesucristú. ³¹ Te ñáyiú isràél

nchícúⁿ nihnú-yu tnúhu sá dánèhé ñáhá xí-yu nàcuáa cadá-yu cudíú-yu núú Yá Ndiòxí dico ñá túú cudíú-yu núú-gá chí ñá ndácú-yu cadá-yu nchaa nàcuáa càháⁿ-xi.

³² Te ducaⁿ ñá túú cudíú-yu núú Yá Ndiòxí chí ñá túú sàndáá iní-yu Xítóhó Jesucristú, te sàni iní-yu sá sá cuendá mee-ni nchaa sá quidé mèè-yu cudíú-yu núú-gá, te sá dúcáⁿ quidé-yu te cùú-yu dàtná ñⁿ ñáyiú nguñenu ñⁿ yúú te ndúá-yu. Te ducaⁿ sàtnahá-xi cùú-yu chí ñá túú cùu váha iní-yu núú Xítóhó Jesucristú. ³³ Te quee ndáá-xi nàcuáa ní cáháⁿ Yá Ndiòxí ñⁿ xichi núú tütú-gá núú càchí-xi:

Yúhú táxí ndecu-í ñⁿ téé ñuú Sìon, te cuu-dé dàtná ñⁿ yúú, te yúú-áⁿ nguñenu ñáyiú te ndúá-yu,

te nchaa ñáyiú na quindáá iní ñáhá xii-dé, te vá ndíxí cuèchi iní-yu sá dúcáⁿ ní sàndáá iní ñáhá-yu xii-dé.

Duha càchí-gá núú tütú-gá.

10

¹ Te nchòhó ñáyiú ndècu ndíhi-í ichi Xítóhó Jesucristú càchí tnúhu-í xii-ndo sá càháⁿ ndíhi-í Yá Ndiòxí cuendá ñáyiú isràél, chí ío cuini-í sá nánihí tàhú-yu. ² Te na càháⁿ ndáá-í cuendá-yu sá ïo ndùcu ndéè-yu xínu cuechí-yu núú Yá Ndiòxí, te dicó-ni sá ñá túú quidé-yu nàcuáa cuini méè-gá cadá-yu. ³ Chí ñá túú quide cuendá-yu nàcuáa cuini Yá Ndiòxí cada ñaha-gá xii-yu nàcuáa cudíú-yu núú-gá, te quide-ní-yu nàcuáa sàni iní mèè-yu cudíú-yu núú-gá te ñá túú cuini-yu tñí-yu tnúhu càháⁿ-gá nàcuáa cudíú-yu núú-gá. ⁴ Te Xítóhó Jesucristú ní quide-gá cuendá sá vñ cùnùu-gá nchaa tnúhu ní chídó tnùní ndíí Moisés, te nchaa ñáyiú na quindáá iní ñáhá xii-gá te ñuú-gá cada te cudíú-yu núú Yá Ndiòxí.

⁵ Te ndíí Moisés càháⁿ ndíí núú tütú ndíí cuendá ñáyiú cuini cudíú núú Yá Ndiòxí cuendá sá nchícúⁿ nihnú-yu nchaa nàcuáa ní cáháⁿ ndíí. Te ní cachí ndíí sá ncháá ñáyiú na càda nchaa nàcuáa ní xáháⁿ Yá Ndiòxí xii ndíí ní chídó tnùní ndíí te nánihí tàhú-yu, te núu dicó ndacú-yu cadá-yu nchaa nàcuáa ní cáháⁿ ndíí. ⁶ Dico vitna núu na quindáá iní-ó Xítóhó Jesucristú, te cudíú-o núú Yá Ndiòxí. Te duha càchí

tnúhu ní chídó tnùnì ndíí núú tütú-gá: “Vá cání iní-ndó sá xíní ñuhu-xi cada-ndo ìⁿ sá vǎ yǒo tnàhì ndàcu cada sá cáá tūu-ndo àndiū te cúñaha-ndo xii Cristú cuuⁿ-ndo ndìhi-gá núú ñuyíú-a. ⁷ Te ni vǎ cání tūcu iní-ndó sá quíhíⁿ tūu-ndo núú xín-decu nchaa ñáyíu ní xíhí te cada-ndo sá Cristú ndoto-gá”, duha càchí tñúhu-án sá vǎ dúcán cání iní-ó. ⁸ Te càchí tucu tñúhu-án: “Tñúhu Yá Ndiǒxí sá ndécú ndìhi ñaha-xi xii-ndo chi sàni iní-ndó cuendá tñúhu-án te càháⁿ-ndó”, duha càchí tñúhu-án. Te tñúhu sá ndécú ndìhi-ndo-án cúu-xí tñúhu càháⁿ-ndí núú ñáyíu, te xini ñuhu-xi sá quíndáá iní-yu tñúhu-án. ⁹ Te núu na nūnuu-ndo càháⁿ-ndó sá Xítóhó Jesucristú cúu-gǎ Xítóhó-ndó, te quíndáá iní-ndó ñi yuhu ni iní-ndó sá Yá Ndiǒxí ní dándótó-gǎ Xítóhó Jesucristú, te naníhí tǎhú-ndó te núu ducaⁿ na càda-ndo. ¹⁰ Te nchaa ñáyíu ducaⁿ sàndáá iní te càháⁿ-yu sá Xítóhó Jesucristú cúu-gǎ Xítóhó-yu, ñáyíu-án cúdíu-yu núú Yá Ndiǒxí te naníhí tǎhú-yu.

¹¹ Te núú tütú Yá Ndiǒxí càchí-xi sá ñi ìⁿ ñáyíu sàndáá iní ñáhá xii Xítóhó Jesucristú vá ndíxí cuèchi iní-yu sá dúcán sàndáá iní ñáhá-yu xii-gá. ¹² Te sá cúu-xí Xítóhó Jesucristú chi ìⁿ-ni cùu ñáyíu isràél ndìhi ñáyíu ñá tūú cùu ñáyíu isràél, chi ñiū-gá cúu-gǎ Yaá cúnūu taxi tñuní-gá nchaa ñáyíu, te ío váha quide-gá sá cúu-xí nchaa ñáyíu càháⁿ ndìhi ñaha xii-gá. ¹³ Te quèe ndáá-xi nàcuáa càháⁿ-xi núú tütú Yá Ndiǒxí núú càchí-xi: “Nchaa ñáyíu na càháⁿ ndàhú núú Xítóhó Jesucristú sá dácacu nihnu ñaha-gǎ xii-yu, te ñáyíu-án naníhí tǎhú-yu”, duha càchí-xi núú tütú-gá. ¹⁴ Te ñáyíu-án vǎ nihí-yu nàcuáa càháⁿ ndàhú-yu núu-gǎ te núu ñá tūú sàndáá iní ñáhá-yu xii-gá, te ni vǎ nihí-yu nàcuáa cadá-yu quíndáá iní ñáhá-yu xii-gá te núu vátá cúndedóho-gá-yu tñúhu-gá, te ni vǎ nihí-yu tñúhu-gá te núu vá yǒo quíhíⁿ cútñuhu ñaha xii-yu. ¹⁵ Te ni vǎ yǒo quíhíⁿ ducaⁿ cútñuhu ñaha xii-yu tñúhu-gá te núu Yá Ndiǒxí vá tэндàha-gǎ ñáyíu quíhíⁿ cútñuhu ñaha xii-yu. Te núú tütú Yá Ndiǒxí càchí-xi: “Ío vii ío váha cùu iní-ó vèxi ñáyíu dānehé ñáhá xii-o nàcuáa ndūu tñúhu sá càháⁿ nàcuáa naníhí tǎhú-ó”, duha càháⁿ-xi núú tütú-gá.

¹⁶ Te ñá ncháá-yu cuíní-yu quíndáá iní-yu

tñúhu-án. Te ní quee ndáá-xi nàcuáa ní xáhaⁿ ndíi Chàíá xii Yá Ndiǒxí te duha ní xáhaⁿ ndíi xii-gá: “Yǒhó Dútú Ndiǒxí na nàcani tñúhu-í núu-n sǎ ío sacú-ni ñáyíu sàndáá iní-yu tñúhu càháⁿ-ndí”, duha ní xáhaⁿ ndíi xii-gá. ¹⁷ Te xini ñuhu-xi sá dǐhna-gá cundedóho-yu tñúhu-án cuendá ducaⁿ te quíndáá iní-yu, te tñúhu-án cúu-xí tñúhu Xítóhó Jesucristú.

¹⁸ Te vá cúu càháⁿ-ó sǎ ñá tūú ní nihí ñáyíu isràél tñúhu-gǎ, chi nchaa-yu ní nihí-yu tñúhu-gǎ, chi núú tütú Yá Ndiǒxí càchí-xi: Cue tée ní càháⁿ tñúhu Yá Ndiǒxí ní càháⁿ-güedé tñúhu-gá núú ñáyíu, te tñúhu-án ní xité nuu-xi nihí ñuyú.

Duha càchí-xi núú tütú-gá. ¹⁹ Te ni vǎ càháⁿ-ó sǎ ñáyíu isràél ñá tūú ní cùu tñuní iní-yu nàcuáa ndūu tñúhu-gá chi ní tecú tñuní-yu. Te ndéé sanaha ní chídó tnùnì ndíi Moisés nàcuáa ní xáhaⁿ Yá Ndiǒxí xii ñáyíu isràél, te duha ní xáhaⁿ-gǎ xii-yu:

Yúhú cada váha-í nchaa ñáyíu ñá tūú cùu ñáyíu isràél, ñáyíu ñá tūú cútñuní iní-xi nàcuáa cada váha cundecu núu-í, te nchǒhó cudééⁿ-ndó núu-yu te cuu cuédú iní-ndó-yu.

Duha ní xáhaⁿ Yá Ndiǒxí xii-yu te ducaⁿ ní chídó tnùnì ndíi Moisés. ²⁰ Te ndíi Chàíá ñá tūú tnàhí ni yúhú ndíi ní quide ndíi núú Yá Ndiǒxí ní càháⁿ ndíi tñúhu-gá, te ní cachí ndíi:

Ñáyíu ñá tūú nànducu ñaha xii-í ní cùu ní naníhí ñáhá-yu xii-í, te ni ñá tūú ndūcu tñúhu ñáhá-yu xii-í ní cùu te ní xini ñáhá-yu.

Duha ní cachí ndíi Chàíá ní càháⁿ ndíi tñúhu Yá Ndiǒxí. ²¹ Te ní quide tucu ndíi núú Yá Ndiǒxí ní càháⁿ ndíi tñúhu-gá cuendá ñáyíu isràél, te ní cachí ndíi: “Nchaa-ni nduu yìhí-í càháⁿ-í ñáyíu isràél te ñá tūú cuíní-yu quíndáá iní-yu chi ío sàá iní-yu”, duha ní cachí ndíi Chàíá ní càháⁿ ndíi tñúhu Yá Ndiǒxí.

11

Cuendá ñáyíu isràél ñáyíu naníhí tǎhú

¹ Te cuéi ducaⁿ dico vá càháⁿ-ó sǎ Yá Ndiǒxí dáquèe tǐhú-gǎ ñáyíu isràél chi ñiū-ni ñáyíu-án cúu cuendá-gǎ, chi yúhú tnàh-í cùu-í mei tēe isràél, te ñani tnàhà-í ní cuu ndíi Àbrahám tée ní xindecu ndéé sanaha vihi-gá, te ñiū-ni ñani tnàhà-í ní

cuu tucu ndíi Benjámin. ² Te ndée sanaha dūcaⁿ ní cachí Yá Ndióxi sá nchúhú ñáiyu isráèl cúú-ndí ñáiyu cùu cuendá-gá, te ná túú dàquee tihú ñhá-gá xii-ndí, te nchòhó sa xini-ndó nàcuáa càháⁿ-xi núú tütú Yá Ndióxi núú càchí-xi nàcuáa ní quide té Èliás ní ndacáⁿ cuéchi-dé núú-gá cuendá ñáiyu isráèl. ³ Te duha ní xáhaⁿ-dè xii-gá: “Yòhó Dútú Ndióxi, ná nàcani tnúhu-í núú-n sá ní sahní-yu cue tée càháⁿ tnúhu-n, te ní dàtnánú-yu núú xihí quiti ndúu táhú-n, te yúhú-nà ní cácu-í ndécù-í dico nànducu ñhá-yu chi tnàhá-í cuini-yu cahni ñhá-yu xii-í”, duha ní xáhaⁿ-dè xii Yá Ndióxi. ⁴ Te Yá Ndióxi ní xáhaⁿ-gá xii-dé: “Sa ní dàqueé dèíⁿ-í úsá mìl cue tée cùu cuendá-í, te ñá túú nèhe-güedé sá yíñùhu núú Bàal sá càchí-yu cùu ndiòxi-yu te ñá ndáá sá ndiòxi cúú-xí”, duha ní xáhaⁿ-gá xii té Èliás. ⁵ Te ducaⁿ sàtnahá-xi cùu vitna chi xindecu ñáiyu ní càháⁿ-gá ní chitnahá ñhá xii-gá, te ducaⁿ ní quide-gá chi ní cundàhú iní ñhá-gá xii-yu. ⁶ Te ducaⁿ ní càháⁿ ñhá-gá xii-yu sá cundàhú iní ñhá-gá, te ñá díú cuendá ñⁿ chiúⁿ quidé-yu ducaⁿ ní càháⁿ ñhá-gá xii-yu, chi núú dicó cuendá ñⁿ chiúⁿ quidé-yu ducaⁿ ní càháⁿ ñhá-gá xii-yu ña, te ñá díú-gá sá cúú iní mée-gá ducaⁿ ní càháⁿ ñhá-gá xii-yu te núú ducaⁿ.

⁷ Te na càchí tnúhu-í xii-ndo nàcuáa cùu vitna sá ñáiyu isráèl cuini-yu cudíú-yu núú Yá Ndióxi dico ñá ndácú-yu, dico dava ñáiyu ní càháⁿ-gá ñáiyu-áⁿ cudíú-yu núú-gá, te ñáiyu ducaⁿ ñá túú cùdiu núú-gá-áⁿ ño ní cuu sáa iní-yu núú-gá. ⁸ Te ní quee ndáá-xi nàcuáa càháⁿ-xi núú tütú Yá Ndióxi núú càchí-xi: “Yá Ndióxi ní cachí-gá sá cúú-yu ñáiyu ño ñi díquí-xi, chi cuéi ndèhé-yu nàcuáa càháⁿ tnúhu-gá dico ñá cútñuní iní-yu nàcuáa càháⁿ-xi, te cuéi ndèdóho-yu dico ñá túú quée díquí-yu, te ducaⁿ-ni quidé-yu ndée vitna”, duha càchí-xi núú tütú-gá. ⁹ Te ndíi Dàvíi ní cachí ndíi:

Ñáiyu ño váha ndècu te cudíí iní-yu quidé-yu vico,
dico yáha-yu dàtná yáha ñⁿ quiti ngáva
trampá àdi ñⁿ quiti ñá cútñuní iní-xi
quee xití ñunu,
chi cuíta nihnú-yu te nacháhu-yu nchaa sá
quidé-yu.

¹⁰ Te cúú-yu ñáiyu ñá túú vèdana tècú tnùnì,
te cùu tucú-yu dàtná ñⁿ ñáiyu ño
ndòho nchido ñⁿ sá vèe.
Duha ní cachí ndíi Dàvíi.

Ñáiyu ñá túú cùu ñáiyu isráèl naníhí
táhu-yu

¹¹ Te cuéi ducaⁿ dico vá càchí-ó sá sá dúcáⁿ ñá túú ní quide ndáá ñáiyu isráèl te ní xíta nihnu duúⁿ-yu, te ñhá chi sá dúcáⁿ ní quidé-yu te ní ngúndecu ndihí dava-gá ñáiyu tnúhu sá càháⁿ nàcuáa naníhí táhu-yu, te ñáiyu isráèl quini-yu nàcuáa naníhí táhu ñáiyu ñá túú cùu ñáiyu isráèl, te tnàhá-yu cudíí iní-yu naníhí táhu-yu. ¹² Te sá dúcáⁿ ní quide sáa inf-yu ñá túú ní quide ndáá-yu núú Yá Ndióxi, te xíáⁿ ní cuu-xi ñⁿ sá váha sá cúú-xí ñáiyu nihí ñuyú, dico sáa nduu te cada ñáiyu isráèl nchaa nàcuáa càháⁿ Yá Ndióxi, te dàvá-áⁿ ño-gá váha cuu xii nchaa ñáiyu nihí ñuyú.

¹³ Te nchòhó ñáiyu ñá túú cùu ñáiyu isráèl càchí tnúhu-í xii-ndo sá Yá Ndióxi ní cachí-gá sá càháⁿ-í tnúhu-gá núú-ndó, te yúhú càchí-í sá ño càhnu cuu chiúⁿ quidé-í. ¹⁴ Te duha càháⁿ-í cuendá sá núu cudana ño dava ñáiyu cùu ndi mee-í cudíí iní-yu cada váha ñaha Yá Ndióxi xii-yu dàtná quidé váha ñaha-gá xii-ndo, te naníhí táhu-yu. ¹⁵ Te sá cuendá sá ní quee tihú ñáiyu isráèl ní cacáháⁿ cáhnu iní tnáhá ñáiyu nihí ñuyú ndihí Yá Ndióxi, dico na sáa nduu núcúndecu váha ñáiyu isráèl ndihí Yá Ndióxi, te ño-gá váha tnáhá ñáiyu nihí ñuyú, te ñáiyu-áⁿ cada inf-ó sá cúú-yu dàtná ñáiyu ní xihí, dico dàvá-áⁿ cada tucu iní-ó sá cúú-yu dàtná ñáiyu ní ndoto chi núcúndecu váha-yu ndihí-gá. ¹⁶ Te núú sá lúhá-ní ñⁿ tilúlú yusaⁿ càváha te diu-ni ducaⁿ càváha nihí. Te núú càváha yóho ñⁿ yutnu te diu-ni ducaⁿ càváha-xi nihí-xi. Te diu-ni ducaⁿ sàtnahá-xi cùu ñáiyu isráèl, chi ñaní tnáhá-yu ní xindecu ndée sanaha ní cuú-yu ñáiyu ní cuu cuendá ñhá Yá Ndióxi, te diu-ni ducaⁿ cùu cuendá ñhá-gá xii mée-yu ndée vitna.

¹⁷ Te ño ñⁿ yutnu váha nàni olvú, te dava dité yutnu-áⁿ ní téhndé te ní nucódó dité yutnu òlvú cùtèxínu, te mee-ná yutnu òlvú váha-áⁿ ño váha quide-xi nchito dité yutnu òlvú cùtèxínu-áⁿ. Te dité nchaa yutnu òlvú váha-áⁿ cúú-xí dàtná ñáiyu isráèl, te nchaa dité-xi sá ní téhndé-áⁿ

cúu-xí ðiù-ni ñáyiù isràél ñáyiù ñá túú tñàhá tñúhu ndìhi Yá Ndiòxí. Te dité yutnu òlívú cùtexínu sá ní nucódó tñàhá-áⁿ cúu-xí ðàtná ñáyiù ñá túú cùu ñáyiù isràél tñàhá tñúhu ndìhi Yá Ndiòxí. ¹⁸ Te vâ cání iní-ndó sã sà dúcáⁿ ndècu váha-ndo ndìhi Yá Ndiòxí te ío cùn-ndo dacúúxí ñáyiù isràél, te vâ dúcáⁿ càni iní-ndó chi sá cuèndá nchaa ñani tñàhá ñáyiù isràél ní xíndecu ndéé sanaha ducaⁿ ndècu váha-ndo ndìhi Yá Ndiòxí vitna, te ñá díú sã cuèndá nchòhó ndécú ndìhi váha ñáyiù-áⁿ Yá Ndiòxí vitna.

¹⁹ Te cudana sàni iní-ndó te cächí-ndó sã ñáyiù isràél ní quee tìhù-yu cuèndá sã nchòhó nucuíñí-ndó nùu-yu nucúndecu váha-ndo ndìhi Yá Ndiòxí. ²⁰ Te ndáá sá ní quee tìhù-yu chi ñá túú ní sàndáá iní ñàhá-yu xii-gá, te nchòhó ío váha cùu ndecu-ndo ndìhi-gá chi ní sàndáá iní-ndó-gã, dico vâ cächí-ndó sã ío càhnu cuu-ndo, te ío váha chi cuàha cuèndá nàcuáa cundecu-ndo. ²¹ Te cue ñáyiù isràél cúu-yu ñáyiù cùu cuèndá-gá ní cùu te ní dáquée tìhù ñàhá-gã xii-yu cuèndá sá ñà túú ní sàndáá iní ñàhá-yu xii-gá, te tñàhá nchòhó daquée tìhù ñàhá-gã xii-ndo te núu na càda-ndo ðàtná ní quide ñáyiù-áⁿ. ²² Te chí cádá cuèndá sá Yá Ndiòxí ío váha iní-gã, dico cùdèéⁿ-gã nùu nchaa ñáyiù ñá túú sàndáá iní ñàhá xii-gã, dico sá cúu-xí nchòhó cue ñáyiù sàndáá iní ñàhá xii-gã chi ío váha iní-gã. Te ducaⁿ-ni cùn-duu váha iní-gã sá cúu-xí-ndó te núu vâ dáñá ndèé-ndó càda-ndo nàcuáa càháⁿ-gã cuèndá sá ío váha iní-gã, te núu ñàhá te tñàhá nchòhó quee tìhù-ndó ðàtná ní quee tìhù ñáyiù isràél, ñáyiù ñá túú ní sàndáá iní ñàhá xii-gã. ²³ Dico núu ñáyiù isràél ñáyiù ní dáquée tìhù ñàhá Yá Ndiòxí quíndáá iní ñàhá-yu xii-gã te nduu cuèndá ñàhá tùcu-gã xii-yu, te ñáyiù-áⁿ cúu-yu ðàtná ðava dité yutnu òlívú sá ní tēhndé te ní nucódó tñàhá tùcu. Te ducaⁿ sãtnahá-xi cúu-yu te núu na quíndáá iní ñàhá-yu xii-gã. ²⁴ Te nchòhó cúu-ndó ðàtná nchaa dité yutnu òlívú cùtexínu, chi ñá díú ñáyiù isràél cúu-ndó, te dité nchaa yutnu òlívú cùtexínu-áⁿ ní nucódó-xi núu dité yutnu òlívú váha-áⁿ. Te yáchí-gã nucúndecu váha ñáyiù isràél ndìhi Yá Ndiòxí, chi cúu-yu ðàtná nchaa dité yutnu òlívú váha sá ní

tēhndé te ní nucódó tñàhá tùcu. Te ducaⁿ sãtnahá-xi cúu-yu te núu na quíndáá iní ñàhá-yu xii-gã.

Sáa nduu te naníhí tãhú ñáyiù isràél

²⁵ Te nchòhó ñáyiù ndècu ndìhi-í ichi Xí-tohó Jesucristú, na cächí tñúhu-í xii-ndo ñⁿ tñúhu nduu yuhu ni cuu, cuèndá sá vâ cání iní-ndó sã ío-gã váha sáá díquí-ndó dacúúxí ñáyiù isràél, chi ðava ñáyiù isràél cúu sáa iní-yu núu Yá Ndiòxí nini na ndìhi ñáyiù ní cachí Yá Ndiòxí ngúndecu váha ndìhi ñàhá-yu xii-gã, ñáyiù ñá túú cùu ñáyiù isràél. ²⁶ Te nduu na ndìhi ñáyiù-áⁿ ngúndecu váha-yu ndìhi Yá Ndiòxí, te ðává-áⁿ naníhí tãhú ñáyiù isràél chi quee ndáá-xi nàcuáa càháⁿ Yá Ndiòxí núu tütú-gã núu cächí-xi: Ndàa ñuu Sìon quixi Yáa cada naníhí tãhú nchaa ñáyiù, te diu-ni Yáa-áⁿ cada-gã cuèndá sá dáñá nchaa ñáyiù isràél ichi cuèhé ichi duha.

²⁷ Te yúhú cada càhnu iní-í nchaa cuéchi ñáyiù isràél, chi cada-í ðàtná ní cachí-í ndéé sanaha. Duha cächí Yá Ndiòxí núu tütú-gã.

²⁸ Te sá cuèndá tñúhu sá càháⁿ nàcuáa naníhí tãhú-ó xíãⁿ cúu ùhú iní ñáyiù isràél Yá Ndiòxí, te sá dúcáⁿ quide-yu xíãⁿ nchòhó ní níhí-ndó tñúhu sá càháⁿ nàcuáa naníhí tãhú-ndó. Te ní cachí Yá Ndiòxí sá ñáyiù isràél cuu cuèndá-gã, te cùu iní ñàhá-ní-gã xii-yu, te ducaⁿ quide-gã chi ducaⁿ ní xáhaⁿ-gã xii cue ñani tñàhá-yu ní xíndecu ndéé sanaha. ²⁹ Te Yá Ndiòxí ñá túú nduu ùhú iní-gã ñⁿ sá táxí-gã, te ni ñà túú ndìxi cuéchi iní-gã sá càháⁿ ñàhá-gã xii-o. ³⁰ Te nchòhó chi ñá túú sàndáá iní-ndó Yá Ndiòxí ní cùu, dico vitna nini ñà túú sàndáá iní ñàhá ñáyiù isràél xii-gã, te ní cundàhú iní ñàhá-gã ní ðácácu nihnu ñaha-gã xii-ndo nùu ùhú núu ndàhú. ³¹ Te vitna quide-yu ðàtná ní xóo cada nchòhó cùtnàhá ñá túú ní xóo quíndáá iní-ndó-gã. Dico sáa nduu te natuha ñàhá-yu xii-gã te ðácácu nihnu ñaha-gã xii-yu sá cundàhú iní ñàhá-gã ðàtná ní quide ñaha-gã xii nchòhó.

³² Te Yá Ndiòxí ní dáñá-gã sá dúcáⁿ cùn-duu saá iní nchaa ñáyiù cuèndá cuini-gã cundàhú iní ñàhá-gã xii-yu. ³³ Te súuní váha quide ñaha Yá Ndiòxí xii-o, te ío váha xini-gã nchaa cuéi sá ío andiú te cuéi sá ío ñuyú-a, te ducaⁿ ío váha

sáa nchaa sá xíní tnùní-gá. Te ñá ndácú-ó cùtnuní iní-ó nã cúú nchàa sá sání iní-gá cada-gá, te ni ñá ndácú-ó cùtnuní iní-ó nàcuáa ndùu cuendá nchaa sá quíde-gá. ³⁴Te núú tütú-gá càchí-xi: “Vá yõ ìⁿ cùtnuní iní-xi nàcuáa sàni iní Yá Ndiõxí, te ni vã yõ ìⁿ ndàcu dachu iní ñáhá xii-gá nàcuáa cáháⁿ-gá. ³⁵Te Yá Ndiõxí ñá túú quide yica iní-gá cada-gá sá vãha sá cúú-xí ñáyiu cuendá ìⁿ sá sãñàhá-yu xii-gá chí ñá túú dùcaⁿ quide-gá”, duha càchí-xi núú tütú-gá. ³⁶Te ducaⁿ chí mee Yá Ndiõxí ní taxi ndecu-gá nchaandi túhú sá ìó ñuyíú, te diu-ni mee-gá táxí tnùní-gá nchaa sá ní taxi ndecu-gá, te nchaa cùu-xi cuendá-gá. Te vitna chí ná càchí-ó sã ìo càhnu cuu-gá ni caa ni quíhíⁿ. Te ducaⁿ na cùnduu.

12

Cada-o nàcuáa nduu vétú iní Yá Ndiõxí

¹Te vitna nchòhó ñáyiu ndècu ndíhi-í ichi Xítohó Jesucristú càchí tnúhu-í xii-ndo sã Yá Ndiõxí cùndàhú iní ñáhá-gã xii-o chindee ñaha-gá, núú xíáⁿ càháⁿ ndàhú-í núú-ndó sã dãñá-ndó mèe-ndo núú ndáhá-gã, te cada iní-ndó sã cúú-ndó dàtná ìⁿ táhú sã nchító-ó ní nduu táhú-gã. Te cuu-ndo ñáyiu vãha ñáyiu cada nchaa nàcuáa nduu vétú iní Yá Ndiõxí chí ducaⁿ tàú-ndó càda-ndo sá cúú-xí-gã. ²Te vá cãchicúⁿ nihnu-gá-ndó càda-ndo datná xiquide nchaa ñáyiu ndècu ichi cuehé ichi duha ndècu ñuyíú-a, te vá cùhúⁿ-gã iní-ndó ìchi cuehé ichi duha-áⁿ, chí mee-ñã sá vãha cuhuⁿ iní-ndó, te ducaⁿ te cutnùní iní-ndó nchàa nàcuáa cuìní Yá Ndiõxí cada-ndo, te nchaa sá cuìní-gá cada-ndo cùu-xi mee-ni sá vãha, sã ìo vãha ndùu vétú iní-gá, te cùu-xi nchaa sá xíní ñùhu-xi cada-ndo núú-gã.

³Te sá cuendá chiúⁿ ní cundàhú iní ñáhá Yá Ndiõxí ní taxi-gá xii-í xíáⁿ núu na càháⁿ-í dóho-ndo vitna: Vá cání iní-ndó ìⁿ sã ñá túú tàú-ndó càni iní-ndó te cucahaⁿ-ndo sã ìo càhnu cuu-ndo. Te nchòhó ní sãndáá iní-ndó Yá Ndiõxí núu chindee ñaha-gá xii-ndo, te vitna chí cuãha cuendá núu ná daha núú chiúⁿ-gá ndacu-ndo càda-ndo.

⁴Te nchoo titní xichi cùu yiquí cuñú-ó, te ndí dííⁿ ndí dííⁿ chiúⁿ quide-xi ìⁿ ìⁿ-xi.

⁵Te ducaⁿ sãtnahá tucu-xi cùu nchoo ñáyiu ndècu ndíhi Xítohó Jesucristú chí cuèi ná

daha tnáhá-ó dico ìⁿ-ni cùu-o ndíhi-gá, te ducaⁿ mèe-o tucu ìⁿ-ni cùu-o.

⁶Te mee Yá Ndiõxí ní cundàhú iní ñáhá-gã xii-o ní taxi-gá chiúⁿ tàú-ó càda-o ìⁿ ìⁿ-o te chindee ñaha-gá xii-o, te xini ñuhu-xi cada-o nàcuáa ndùu chiúⁿ ní taxi-gá cada-o. Te núu ní nduu táhú-ó núú-gã sá càháⁿ-ó tnúhu sá dácàhu iní ñáhá mèe-gá xii-o te càháⁿ-ó nàcuáa sãndáá iní-ó chindee ñaha-gá xii-o, ⁷àdi ní nduu táhú-ó núú-gã sã ìo vãha chindee-o tnàha ñáyiu-o te diu-ni ducaⁿ càda-o, àdi ní nduu táhú-ó dãnèhé-ó ñáyiu tnúhu-gá te diu-ni ducaⁿ càda-o, ⁸àdi ní nduu táhú-ó núú-gã sã dácàháⁿ-ó ñáyiu canchicúⁿ nihnú-yu ichi-gá te diu-ni ducaⁿ càda-o, àdi ní nduu táhú-ó núú-gã sã cuãñaha-o xii tnaha ñáyiu-o sã nihí-ó ndècu ndíhi-o te diu-ni ducaⁿ càda-o, dico ní yùhu ní iní-ó cuãñaha-o xí-yu, àdi ní nduu táhú-ó núú-gã taxi tnùní-ó te diu-ni ducaⁿ càda-o, te ni yùhu ní iní-ó càda-o, àdi ní nduu táhú-ó núú-gã chindee-o cuè ñáyiu ndècu ndíhi tnúndòho tnúhu ndàhú te diu-ni ducaⁿ càda-o, te ìo cudíí iní-ó càda-o chiúⁿ-áⁿ.

Nchaa nàcuáa tàú-xi cada nchaa ñáyiu ndècu ichi Xítohó Jesucristú

⁹Te cuu iní tnáhá ndisa-ndo ìⁿ ìⁿ-ndo, te dañá-ndo nchàa sá cuèhé sá dúhá te cada-ndo mèe-ni sá vãha. ¹⁰Te ìo cuu iní tnáhá-ndó, te cada-ndo cuendá sã ìⁿ-ní ñáyiu cùu-ndo, te ìⁿ ìⁿ-ndo càni-gá iní-ndó cànehe yiñuhu núú tnáhá-ndó.

¹¹Te nducu ndèe-ndo cada-ndo nchaa chiúⁿ tahu Xítohó Jesucristú vá tùhío-ndo, te cada-ndo nì yuhu ni iní-ndó sã cúú-xí-gã.

¹²Te ìo cudíí iní-ndó cùndecu-ndo chí ní ngúndecu ndíhi-ndo tnúhu ndee iní sá cùndècu ndíhi-ndo Xítohó Jesucristú, te cada càhnu iní-ndó cuèi nándi na càda ñaha ñáyiu xii-ndo sã cuendá-gá, te vá dãñá ndèe-ndó càháⁿ ndíhi-ndo Yá Ndiõxí.

¹³Te chindee tnàha-ndo te núu ìó dava nchòhó ñáyiu ndècu ichi-gá ìó ìⁿ sá cùmãní xii-ndo, te ìo vãha cuu iní-ndó còto-ndo ñáyiu véxi vehe-ndo.

¹⁴Te cácáⁿ táhú-ndó núú Yá Ndiõxí cuendá nchaa ñáyiu nándi quide ñaha xii-ndo, te cácáⁿ táhú-ndó núú-gã sá ná chindee ñaha-gá xii-yu te ñá díú dà cácáⁿ táhú-ndó núú-gã sá ná dàcuíta nihnu ñaha-gá xii-yu.

¹⁵ Te núu íò ñáyiú cùdíí ìní-xi te cudíí ìní-ndó ndíhí-yu, te núu íò ñáyiú ndíhú ìní-xi te ndíhú ìní-ndó ndíhí-yu.

¹⁶ Te cuu ìⁿnuu-ndo cùndecu-ndo, te vá cádá càhnu-ndo mee-ndo, te tnahá tnúhu-ndo ndíhí nchaa ñáyiú ndàhú ìní-xi, te vá cání ìní-ndó sá ïo-gá túha-ndo.

¹⁷ Te vá nánchòcáva-ndo nàchinaa-ndo ìⁿ sá quidé ñàha ñáyiú xii-ndo, te ío nducu ndèe-ndo cada-ndo mee-ni sá vâha nàcuáa cuu váha ìní ñáyiú. ¹⁸ Te ío nducu ndèe-ndo cada-ndo sá ndácú-ndó cùndecu váha-ndo ndíhí nchaa ñáyiú. ¹⁹ Te nchòhó ñáyiú ío cùu ìní-í, vá cání ìní-ndó nàchinaa-ndo ìⁿ sá cádá ñàha ñáyiú xii-ndo, chi cundet-ndo sá méé Yá Ndiòxí ná nàchinaa-gá sá quidé ñàhá-yu xii-ndo, chi quee ndáá-xi nàcuáa càháⁿ Yá Ndiòxí núú tütú-gá núú càchí-xi: “Yúhú dandòho-í-yu chi nachinaa-í nchaa sá quidé-yu”, duha càchí-gá núú tütú-gá. ²⁰ Te xini ñuhu tucu-xi cada-ndo nacuaá càháⁿ tucu-xi ingá xichi núú tütú-gá núú càchí-xi: “Te núu ñáyiú cùu úhú ìní ñàhá xii-ndo ñá túú sá cóhó sá cáxí-yu te cuañaha-ndo xii-yu, te núu ducaⁿ na càda-ndo te ío cucahaⁿ núú-yu”, duha càchí-xi núú tütú-gá. ²¹ Te núu íò ìⁿ sá quidé ñàha tnahá ñáyiú-ndo xii-ndo te vá nánchòcáva-ndo nàchinaa-ndo sá quidé ñàhá-yu xii-ndo, chi cada-ndo sá vâha sá cùú-xí-yu, te ducaⁿ te vá cádá-ndó sá ñà túú tàú-ndó càda-ndo núú Yá Ndiòxí dàtná quidé-yu.

13

¹ Te nchaa ñáyiú tàú-yu quindáá ìní-yu nchaa cue téé cùchiuⁿ, chi Yá Ndiòxí ní cachí-gá sá cùndecu téé cùchiuⁿ ñuyúf-a, núu xíáⁿ xíndecu-güedé vitna. ² Te nchaa ñáyiú ñá túú sàndáá ìní ñàhá xii cue téé cùchiuⁿ ñá túú tnahá ìní Yá Ndiòxí sá dúcáⁿ quidé-yu, chi mee-gá ní cachí-gá sá cùndecu-güedé. Te nchaa ñáyiú ducaⁿ ñà túú sàndáá ìní ñàhá xii cue téé cùchiuⁿ nacháhu-yu sá dúcáⁿ quidé-yu. ³ Te nchaa ñáyiú quide váha ñá túú yùhú-yu cue téé cùchiuⁿ chi quide váha-yu, dico nchaa ñáyiú ñá túú quide váha chi xiyùhú-yu cue téé cùchiuⁿ. Te vitna núu nchòhó cuiní-ndó sá vâ yùhú-ndó cuè téé cùchiuⁿ te chí cádá vâha, te ducaⁿ te cáháⁿ váha-güedé cuendá-ndó. ⁴ Te Yá Ndiòxí ducaⁿ ní cachí-gá cundecu-güedé cuendá

cada-güedé sá ñà túú nâ cuu cundecu-ndo, te núu ñá túú quide váha-ndo ndècu-ndo te quiyùhú ìní-ndó núú-güedé, chi ñà túú àúⁿ nâ cuu ndècu ndíhí-güedé tnúhu ndee ìní dandòho-güedé nchaa ñáyiú ñá túú quide váha, chi Yá Ndiòxí ducaⁿ ní cachí-gá cundecu-güedé sá dúcáⁿ càda-güedé dandòho-güedé nchaa ñáyiú ñá túú quide váha. ⁵ Núu xíáⁿ ío xini ñuhu-xi sá quindáá ìní-ndó nchaa cue téé cùchiuⁿ, te ñá díú sá yùhú-ndó dandòho ñàha-güedé xii-ndo, chi cada-ndo sá cùtníni ìní-ndó sá cùú-xí ìⁿ sá vâha. ⁶ Chi diu cuendá xíáⁿ sàcáⁿ-ndó díhúⁿ núú cuè téé cùchiuⁿ, te ducaⁿ chi Yá Ndiòxí ducaⁿ ní cachí-gá cundecu-güedé te diu-ná chiuⁿ ndeé-güedé ñúhú ìní-güedé.

⁷ Te nacháhu-ndo nchaa sá tàú-ndó núú nchaa ñáyiú tàú-ndó núú-xi, te cuè díhúⁿ tàú-ndó cuendá ñuhu-ndo núú cuè téé cùchiuⁿ àdi nágá díhúⁿ tàú-ndó núú-güedé te nacháhu-ndo núú-güedé. Te ío-gá canehe-ndo sá yíñùhu núú nchaa ñáyiú cùnuu, te cáháⁿ váha-ndo ndíhí-yu. ⁸ Te vá dácüidó-ndó ndùu nacháhu-ndo sá tàú-ndó núú tnahá ñáyiú-ndo, te cuu ìní tnahá-ndó ìⁿ ìⁿ-ndo. Te núu ducaⁿ quide-ndo ndecu-ndo ña, te quide-ndo nchaa nacuaá càháⁿ tnúhu sá sánú ìchi ñàha xii-o nacuaá cada-o cùndecu-o. ⁹ Te duha ndùu tnúhu càháⁿ Yá Ndiòxí cuendá nchaa sá vâ cùú càda-o: “Nchaa nchòhó cue téé vá càháⁿ ndíhí-ndo ñáyiú díhí te núu ñá díú ñàdíhí-ndó cùú-yu, te ducaⁿ-ni nchaa nchòhó cue ñáyiú díhí tycu vá càháⁿ ndíhí-ndo tée te núu ñá díú yíi-ndo cuu-güedé, te vá càhni-ndó tnahá ñáyiú-ndo, te vá díhú-ndó sá ndécú ndíhí-yu, te vá dácàcu-ndo cuéchi neñúú, te vá xíhó-ndó sá ndécú ndíhí tnahá ñáyiú-ndo”, nchaa xéhé càchí Yá Ndiòxí sá vâ cùú càda-o. Te tnúhu-a quide-o ndíhí nchaa dava-gá tnúhu sá sánú ìchi ñàha xii-o nacuaá cada-o cùndecu-o, te núu quide-o ingá tnúhu sá càchí-xi: “Cuu ìní-ndó nchaa tnahá ñáyiú-ndo dàtná cùú ìní-ndó mèe-ndo”, duha càháⁿ tnúhu-áⁿ. Te nchaa dava-gá quidé-ó te núu quide-o nacuaá càháⁿ tnúhu-a. ¹⁰ Te nchaa ñáyiú cùu ìní tnahá ñáyiú-xi te ñá túú quide úhú ìní-yu tnahá ñáyiú-yu, te núu ducaⁿ cùu ìní-yu tnahá ñáyiú-yu te quidé-yu nàcuáa càháⁿ tnúhu sá sánú ìchi ñàha xii-o nacuaá

cada-o cùndecu-o.

¹¹ Te ducaⁿ xini ñuhu-xi cada-ndo chi sa ní cutnuni iní-ndó nàcuáa ta xica nduu cuháⁿ ñuyú-a, te ní sáa nduu sá ño xini ñuhu-xi ndixi túu iní-ó càda-o nchaa nacuaá càháⁿ Yá Ndióxi, chi vitna sa ní cuyatni-gá nduu nàcuaca ñaha Xítoho Jesucristú xii-o dàcuúxi ndèe cùtnàhá ní sándáa iní-ó tnúhu-gá. ¹² Te cada iní-ndó sá dàtná ñⁿ níú sá sá ta cuyatni túndaá, ducaⁿ sàtnahá-xi cùu ñuyúú yíca cuèchi-a chi sa ta cuyatni nduu quixi tucu Xítoho Jesucristú, te núu xíⁿ xíní ñuhu-xi dañ-a-o nchaa sá cuèhé sá dúhá te cada-o mée-ni sá vâha, te ducaⁿ te ni ñⁿ sá cuèhé sá dúhá vâ cùnùu-xi taxi tnuni ñáhá-xí xii-o, te ducaⁿ te vâ cúú-gá-ó dàtná ñáyiu ndècu núú néé chi cuu-ná-ó dàtná ñáyiu ndècu núú òtó. ¹³ Te cada-o nchaa nacuaá tàú-xi cunduu cundecu-o dàtná tàú-xi cada ñáyiu ndècu ichi Xítoho Jesucristú, te vâ quíⁿ ñ-ó vico cuehé vico duha, te vâ cúú-ó ñáyiu quíhu, te ni vâ càháⁿ ndíhi-o ñáyiu òhí te núú ñá díú ñàdíhí-ó cúú-yu, te ducaⁿ-ni cuè ñáyiu òhí tucu vâ càháⁿ ndíhi-yu téé te núú ñá díú yíⁿ-yu cùu-güedé, te ni vâ cùndecu-o ichi díⁿ iní, te ni vâ nàá-ó ndíhi tnaha ñáyiu-o, te ni vâ cúú-ó ñáyiu cuédú iní. ¹⁴ Te vitna nchòhó dañ-a-ndo mée-ndo sá Xítoho Jesucristú ná chindee ñaha-gá xii-ndo càda váha-ndo cùndecu-ndo datná quidé mée-gá ndécú-gá, te vâ cání-gá iní-ndó càda-ndo datná ní xóo cada-ndo cùtnàhá ní cunuu nchaa sá cuèhé sá dúhá iní-ndó.

14

Vá cuátnùhu tnaha-o nacuaá ndècu-o ichi Xítoho Jesucristú

¹ Te núu ñⁿ ñáyiu ndècu ichi Xítoho Jesucristú ñá túú tècu tnuni váha-yu nàcuáa cuníni Yá Ndióxi cadá-yu, te queheⁿ cuèndá-ni-ndò-yu te vâ ténáa tnáhá-ndó ndíhi-yu. ² Chi íó ñáyiu sàni iní sá cúú vâha iní Yá Ndióxi sá cúú càxi-yu nání ñíhi-yu, te dava ñáyiu ñá túú cùtnuni váha iní-yu nàcuáa càháⁿ Yá Ndióxi te mee-ni yúcu xéxi-yu. ³ Te ñáyiu xèxi nchaa núú sá ñíhi-yu te vâ dàquèe tíhù-yu ñáyiu ñá túú xèxi, te ducaⁿ-ni ñáyiu ducaⁿ ñá túú xèxi-áⁿ vâ cuátnùhú-yu nchaa ñáyiu ducaⁿ xèxi nchaa núú sá ñíhi-xi-áⁿ, chi tnàhá ñáyiu ducaⁿ xèxi nchaa núú sá ñíhi-xi-áⁿ quéhéⁿ

cuèndá ñáhá Yá Ndióxi xií-yu. ⁴ Te ñá túú ndècu ndíhi-o tnúhu ndee iní cuatnúhu-o ñáyiu xinu cuechi, chi mee ñáyiu cùu patròⁿ-yu tàú-yu càháⁿ-yu te núu cùndáa ñáyiu xinu cuechi núú-yu ádi ñá túú cùndáa-yu. Te ducaⁿ sàtnahá-xi cùu ñáyiu xinu cuechi núú Yá Ndióxi, chi mee-gá càháⁿ-gá te núu nása quidé-yu, te òu-ni mee-gá cada te cundáa-yu cundécú-yu núú-gá.

⁵ Te na càchi tnúhu tucu-í xii-ndo sá íó ñáyiu càchí sá íó dava nduu ío càhnu cuu-xi, te íó tucu dava ñáyiu càchí-yu sá ñⁿ-ni cuu-xi nchaa-ni nduu, te xini ñuhu-xi sá cùtnuni ndáa iní-yu sá ndáa cúú-xí nàcuáa càháⁿ-yu ñⁿ ñⁿ-yu. ⁶ Te ñáyiu cànehe íí dava nduu quidé-yu sá néhè-yu sá yíⁿùhu núú Yá Ndióxi, te ñáyiu càchí sá ñⁿ-ní cùu-xi nchaa-ni nduu quidé-yu sá néhè-yu sá yíⁿùhu núú Yá Ndióxi tnàhá-yu. Te òu-ni ducaⁿ sàtnahá-xi cùu nchaa ñáyiu xèxi nchaa nání ñíhi-yu, chi quidé-yu sá néhè-yu sá yíⁿùhu núú Yá Ndióxi, chí ndacáⁿ táhù-yu núú-gá cuèndá nchaa sá ñíhi-yu. Te òu-ni ducaⁿ sàtnahá-xi cùu nchaa ñáyiu ñá túú xèxi nchaa núú sá nchító-ó chi quidé-yu sá néhè-yu sá yíⁿùhu núú Yá Ndióxi, te ndacáⁿ táhù-yu núú-gá cuèndá nchaa sá ñíhi-yu.

⁷ Te nchoo cuèi vitna ndècu vívú-ó ádi cuèi na cúú-ó dico ñá díú cuèndá mée-ó cúú-ó. ⁸ Chi vitna ndècu vívú-ó te ndècu-o sá cúú-xí Xítoho Jesucristú ádi cuèi na cúú-ó dico cúú-ó òu-ni sá cúú-xí-gá, núu xíⁿ cuèi vitna ndècu vívú-ó ádi cuèi na cúú-ó dico òu-ni Xítoho Jesucristú cúú cuèndá ñáhá-gá xii-o. ⁹ Chi Xítoho Jesucristú ní xíhi-gá te ní ndoto-gá, te vitna cùu-gá Xítoho nchaa ñáyiu, cuèi ñáyiu xñ-decu vívú te cuèi ñáyiu ní xíhi.

¹⁰ Te nchòhó, ñá túú ndùu váha-xi cutnùhu tnàha-ndo nacuaá ndècu-ndo ichi Xítoho Jesucristú, te ni ñá túú ndùu váha-xi daquèe tíhù tnáhá-ndó, chi nchaa-o sáa nduu cùndecu-o núú Xítoho Jesucristú, te mee-gá cachí-gá te núu ní quide ndáá-ó ádi ñá túú ní quide ndáá-ó. ¹¹ Te Yá Ndióxi càchí-gá núú tútú-gá:

Yúhú Yá Ndióxi ndécú-í càchí tnúhu ndáá-í xii-ndo sá nchaa ñáyiu ngúⁿí xítí-yu núú-í,

te ncháa-yu càháⁿ-yu sá yíhú cùu-í Ndióxi.

Duha càchí Yă Ndiôxí núú tûtú-gá. ¹² Núú xǎⁿ nchaa-o ndí dǎⁿ nàcani tnúhu-o núú Yă Ndiôxí nchaa sá ní quide-o.

Vá dácúita nihnu tnàha-o

¹³ Núú xǎⁿ vá cuátnúhu tnaha-gá-ndó, te cada yica-ndo càda-ndo mee-ni sá vǎha, te vá cǎdá-ndó ìⁿ sá ñà túú tàú-ndó càda-ndo cuendá sá vá cuíta nihnu dava ñáyiu ndècu ndìhi-ndo ichi Xítóhó Jesucristú. ¹⁴ Te yúhú ndécú ndìhi-í Xítóhó Jesucristú te cùtnuní ndáá iní-í sá ncháá núú sá cúú cǎxi-o cuu-ni caxi-o te vá cúú cuéchi. Te ñáyiu sàni iní sá vá cúú cǎxi-yu te núu na cǎxi-yu te cuu cuéchi xí-yu. ¹⁵ Te nchòhó, te núu cuendá sá xéxí-ndó ncháa núú sá cúú cǎxi-ndo, cuendá xǎⁿ ñá túú-gǎ cúú vǎha iní nchaa ñáyiu ndècu ndìhi-ndo ichi Xítóhó Jesucristú, te ñá túú-gǎ quidé-ndó sá cúú iní ndisa-ndó-yu te núu ducaⁿ na càda-ndo, te núu ìⁿ sá sání iní-ndó cǎxi-ndo te cùtnuní iní-ndó sá xǎⁿ cada-xi cuíta nihnu ñáyiu ndècu ndìhi-ndo ichi Xítóhó Jesucristú te vá cǎxi-ndó xǎⁿ te núu ducaⁿ, chi Xítóhó Jesucristú ní xíhí-gǎ cuendá-yu. ¹⁶ Te núu ìⁿ sá quidé-ndó sàni iní-ndó sá cúú-xí ìⁿ sá vǎha, te ñáyiu càchí-yu sá ñà túú vǎha te vá cǎdá-ndó cuendá sá vǎ cǎháⁿ cuèhé-yu cuendá-ndó. ¹⁷ Te sá yindàha ñaha Yă Ndiôxí xii-o xǎⁿ ío xini ñuhu-xi cada ndáá-ó cùndecu-o, te cundecu váha ndìhi tnàha-o, te cudíí iní-ó cùndecu-o chi Espiritú-gǎ ndécú ndìhi ñaha-xi xii-o, te nchaa xéhé ío-gǎ cúnúu dacúúxí sá cóhó sá cǎxí-ó. ¹⁸ Te nchaa ñáyiu ducaⁿ quide nchaa sá ío-gǎ xini ñuhu-xi, xinu cuéchi-yu núú Xítóhó Jesucristú, te sá dúcáⁿ quidé-yu te ndúu vétú iní Yă Ndiôxí, te cùdiú-yu núú ñáyiu.

¹⁹ Te nchoo chǐ ná ndùcu-o nacúaa cada-o cùndecu ndìhi vǎha tnàha-o, te nducu tùcu-o nacúaa cada-o chindee tnúhu tnàha-o nacúaa cuíta cundáá-gǎ-ó núú Xítóhó Jesucristú quíhíⁿ. ²⁰ Te ñá díú sá cuendá ìⁿ núú sá xéxí-ó, te dàquee tǎhú-ó sá vǎha ní quide ñaha Yă Ndiôxí xii tnàha ñáyiu-o. Te na càchí tnúhu ndáá-í xii-ndo sá ncháá-ní núú sá cúú cǎxi-o, te dicó-ni sá ñà túú ndúu vǎha-xi núú sá cuendá-ni sá cǎxí-ó ìⁿ núú sá cúú cǎxi-o cuíta nihnu ìⁿ tnàha ñáyiu-o. ²¹ Te vǎha-gǎ sá vá cǎxí-ó cùnúu te vá cóhó ndídí, te ní ñà túú nǎgǎ cada-o te núu xito-o sá xǎⁿ cada te ngúíta tnàha ñáyiu-o cǎdá-yu sá ñà túú vǎha,

àdi xito-o sá xǎⁿ cada te ngúíta-yu cani ìⁿ cani úú iní-yu cundecú-yu ichi Xítóhó Jesucristú, te vá cundáá-gǎ-yu núú-gǎ te núu ducaⁿ na càda-o. ²² Te núu ìⁿ sá vǎha sàni iní-ó càda-o, te vá dátúu-o núú ñáyiu chi mee-ni núú Yă Ndiôxí dátúu-o. Te nchoo cùu-o ñáyiu ío vǎha tǎhú-xi te núu cùtnuní ndáá iní-ó sá quidé ndáá-ó núu nándi cùu sá quidé-ó, te cùtnuní iní-ó sá ñà díú ìⁿ cuéchi cùu-xi sá quidé-ó. ²³ Te núu nchoo sàni iní-ó sá quidé vǎha-o àdi ñá túú quide vǎha-o òrè xéxí-ó ìⁿ núú sá xéxí-ó, te cuu cuéchi xii-o te núu ducaⁿ na càda-o. Te ducaⁿ cùu cuéchi xii-o chi ñá túú ìⁿ-ni sá sání iní-ó, chi nchaa núú sá quidé-ó sàni ìⁿ sàni úú iní-ó núu vǎha-ní àdi ñá túú vǎha-ni, te cuu cuéchi xii-o sá dúcáⁿ quide-o.

15

Cada-o sá vǎha sá cúú-xí tnàha ñáyiu-o

¹ Te nchoo ñáyiu ío vǎha sàndáá iní ñáhá xii Xítóhó Jesucristú, xini ñuhu-xi cuánaha-o tnúhu ndee iní xii ñáyiu ñá túú nihí ndéé cùndecu ichi-gǎ, te vá cǎdá-ó mèe-ni sá cúú-xí mèe-o. ² Te cada-o sá vǎha nàcuáa cuu vǎha iní tnàha ñáyiu-o cuendá cuu-xi sá vǎha sá cúú-xí-yu, te ducaⁿ cuíta nihí ndéé-gǎ-yu quindáá iní-yu Xítóhó Jesucristú. ³ Te Xítóhó Jesucristú ñá túú ní quide-gǎ mee-ni sá cúú vǎha iní mèe-gǎ, te ní quee ndáá-xi nàcuáa cǎháⁿ-xi núú tûtú Yă Ndiôxí nàcuáa ní xáhaⁿ Xítóhó Jesucristú xii-gǎ, te càchí-xi: “Nchaa ñáyiu cùu úhú iní ñáhá xii-n ní xícuèhé ní xíduha ñáhá-yu xii-í”, duha cǎháⁿ-xi núú tûtú Yă Ndiôxí nàcuáa ní xáhaⁿ Xítóhó Jesucristú xii-gǎ. ⁴ Te ndéé sanaha ní ngúndeé nchaa tnúhu Yă Ndiôxí núú tûtú-gǎ, te ducaⁿ ní ngúndeé cuendá dacúaha-o, te tnúhu-án dánèhé ñáhá-xí cùnducu cahnu iní-ó cuéi nándi nà vǎha-o cùndecu-o ichi-gǎ, te sá xíí tnúhu-án te vá ndìhú-gǎ iní-ó cùndecu-o, te ñu-ni sá xíí tnúhu-án cundecu ndìhi-o tnúhu ndee iní. ⁵ Te Yă Ndiôxí quidé-gǎ ndécú ndìhi-o tnúhu cǎhnu iní, te ñu-ni-gǎ quidé-gǎ ñá túú ndìhú iní-ó ndècu-o. Te xicáⁿ tǎhú-í núú-gǎ sá díú-gǎ ná cǎdá te cuu ìⁿnuu-ndo cùndecu-ndo datná ní quide mee Xítóhó Jesucristú cùtnàhá ní xíndecu-gǎ ñuyúú-a. ⁶ Te ducaⁿ ncháa-ndo cuu ìⁿnuu-ndo, te daníhí tnáhá-ndó yòcó

táchí-ndó te cachí-ndó sá ò cànhu cuu Yá Ndiòxí Yáá cúú Tǎtá Xítóhó Jesucristú.

Nǎyiu nǎ túú cùu nǎyiu isràèl ní nhí-yu tnúhu Xítóhó Jesucristú

⁷ Te núu xiáⁿ chí quéhéⁿ cuèndá tnáhá dàtná ní quide Xítóhó Jesucristú ní queheⁿ cuèndá ñáhá-gǎ xii-o, te núu ducaⁿ na càda-ndo te ío cuu cànhu Yá Ndiòxí. ⁸ Te na cǎchí tnúhu-í xii-ndo sǎ Xítóhó Jesucristú ní quixi-gǎ ní quide-gǎ sǎ vǎha sǎ cúu-xí nǎyiu isràèl, te sǎ dúcáⁿ ní quide-gǎ xiáⁿ cútnùnì ndáá iní-ó sǎ Yá Ndiòxí quidé-gǎ ìⁿ sǎ cǎháⁿ-gǎ, chí Xítóhó Jesucristú ní quide-gǎ nchaa nàcuáa ní xáhaⁿ Yá Ndiòxí xii cue ñaní tnáhá-ó ní xíndecu ndéé sanaha. ⁹ Te ducaⁿ ní quide Xítóhó Jesucristú sǎ vǎha sǎ cúu-xí nǎyiu isràèl cuèndá nchaa nǎyiu nǎ túú cùu nǎyiu isràèl cachí-yu sǎ ò cànhu cuu Yá Ndiòxí, te ducaⁿ quèsháhá-yu chí ío cùndahú iní ñáhá-gǎ chíndèe ñaha-gǎ xií-yu, te quee ndáá-xi nàcuáa cǎháⁿ-xi núú tütú Yá Ndiòxí núú cǎchí-xi:

Yúhú cachí-í sǎ ò cànhu cuu-n núú nchaa nǎyiu nǎ túú cùu nǎyiu isràèl,

te cata-í ndudú chíñuhu ñaha-í xii-n.

Duha cǎchí-xi núú tütú-gǎ ¹⁰ Te cǎchí tucu-xi núú tütú-gǎ:

Te nchòhó nǎyiu nǎ túú cùu nǎyiu isràèl ío chí cúdí ìnì ndìhi nǎyiu isràèl nǎyiu ndècu ndìhi-í.

Duha cǎchí-xi núú tütú-gǎ. ¹¹ Te cǎchí tucu-xi ingá xichi núú tütú-gǎ:

Nchaa nchòhó nǎyiu nǎ túú cùu nǎyiu isràèl chí cǎháⁿ sǎ ò cànhu cuu Yá Ndiòxí, te nchaa nǎyiu na cǎháⁿ-yu sǎ ò cànhu cuu-gǎ.

Duha cǎchí-xi núú tütú-gǎ. ¹² Te ndí Chàia cǎchí tucu ndí núú tütú Yá Ndiòxí:

Coo ìⁿ ñaní tnáhá ndí Isáí téé ní xíndecu ndéé sanaha,

te téé-áⁿ taxi tnùnì-dé cue nǎyiu nǎ túú cùu nǎyiu isràèl,

te nǎyiu-áⁿ cundee cùu cànhu iní ñáhá-yu xii-dé.

Duha ní cǎháⁿ ndí Chàia cǎchí-xi núú tütú-gǎ.

¹³ Te xicáⁿ tǎhú-í núú Yá Ndiòxí Yáá ní taxi tnúhu ndee ìnì ndécú ndìhi-o sǎ méé-gǎ ná càda ío cudí ìnì-ndó cùndecu-ndo, te ducaⁿ ò vǎha cundecu iní-ndó núú-gǎ chí sàndáá iní-ndó-gǎ, te ducaⁿ Espiritú-gǎ ná càda te uuⁿ-gǎ uuⁿ-gǎ cuita

ngúndecu ndìhi-ndo tnúhu ndee ìnì quíhíⁿ sǎ cáda vǎha ñaha-gǎ xii-ndo.

¹⁴ Te nchòhó nǎyiu ndècu ndìhi-í ichi Xítóhó Jesucristú cùtnuní ndáá iní-í sǎ nchòhó ío vǎha iní-ndó, te ducaⁿ ò vǎha cùtnuní iní-ndó nchaa tnúhu vǎha, te ducaⁿ ò dàsahú tnáhá-ndó nàcuáa cundecu-ndo. ¹⁵ Te dava tnúhu ní chídó tnùnì-í núú tütú-a cùu-xi tnúhu sǎ ò cǎháⁿ-í dóho-ndo, te ducaⁿ ní tee-í cuèndá sǎ nchòhó dandàcu iní-ndó tnúhu-áⁿ, te ní tee-í chí Yá Ndiòxí ní cundahú iní ñáhá-gǎ xii-í ní taxi-gǎ chíuⁿ quide-í ¹⁶ xínú cuèchi-í núú Xítóhó Jesucristú cǎháⁿ-í tnúhu-gǎ núú nǎyiu nǎ túú cùu nǎyiu isràèl. Te tnúhu-áⁿ cúu-xí tnúhu sǎ sánú ìchi ñaha xii-o nàcuáa naníhí tǎhú-ó, te ducaⁿ dǎnehé-í nǎyiu nǎ túú cùu nǎyiu isràèl tnúhu Yá Ndiòxí cuèndá cuú-yu dàtná ìⁿ sǎ ndúú tǎhú-gǎ, te Espiritú-gǎ quidé-xí cúu-yu nǎyiu cùdiu núú-gǎ, te cùu vǎha iní ñáhá-gǎ xií-yu.

¹⁷ Te ío vǎha cùu iní-í cuèndá nchaa chíuⁿ quide-í sǎ cúu-xí Yá Ndiòxí, chí Xítóhó Jesucristú ndécú ndìhi ñaha-gǎ xii-í.

¹⁸ Te mee-ni nàcuáa quide Xítóhó Jesucristú chíndèe ñaha-gǎ xii-í xiáⁿ-ni cǎháⁿ-í, te sǎ dúcáⁿ quide-gǎ xiáⁿ ní sàndáá iní cue nǎyiu nǎ túú cùu nǎyiu isràèl tnúhu-gǎ. Te ducaⁿ chí ní chindee ñaha-gǎ xii-í ní cǎháⁿ-í tnúhu-gǎ te ducaⁿ-ni ní chindee ñaha-gǎ xii-í ní quide-í titní núú sǎ ní quide-í núú-yu ní xini-yu. ¹⁹ Te Espiritú Yá Ndiòxí ní quide-xi ní quide-í titní núú sǎ vǎ yóo tnáhi ndàcu cada ní xini-yu te ío ní cuñuhu-yu. Te nchaa ñuú ní sáháⁿ-í ní cǎháⁿ-í tnúhu Xítóhó Jesucristú núú nǎyiu cuèi ndéé ñuú Jerusalén, te cuèi ndéé dis-tritú Ìlírícú, núu nchaa ñuú-áⁿ ní sáháⁿ-í ní cǎháⁿ-í núú-yu tnúhu sǎ cǎháⁿ nàcuáa naníhí tǎhú-ó. ²⁰ Te ducaⁿ ò ndècu ndee-í cǎháⁿ-í tnúhu sǎ cǎháⁿ nàcuáa naníhí tǎhú-ó núú vǎtá nhí-gǎ-yu tnúhu cuèndá Xítóhó Jesucristú, te ducaⁿ quide-í chí nǎ túú cuini-í quíhíⁿ-í cǎháⁿ-í tnúhu-gǎ núú sǎ xíndecu nǎyiu cǎháⁿ tnúhu-gǎ. ²¹ Te quide-í nàcuáa cǎháⁿ-xi núú tütú Yá Ndiòxí núú cǎchí-xi:

Nǎyiu vǎtá nhí-gǎ tnúhu cuèndá Yáá quixi ñuyú te nhí-yu,

te ducaⁿ təcú tnùnì-yu tnúhu-gǎ.

Duha cǎchí-xi núú tütú-gǎ.

Té Páblú cuini-dé quíhíⁿ-dé ñuú Rómá

²² Te sá dúcáⁿ cáháⁿ-í tnúhu-gá nũu xíáⁿ ñá túú ní ndàcu-í quixi-í quixi coto ñaha-í xii-ndo cuéi ducaⁿ-ní sàni iní-í quixi coto ñaha-í. ²³ Te ní cuu titní cuíá ducaⁿ-ní sàni iní-í quixi coto ñaha-í xii-ndo, te vitna ní ndihí-í nchaa iha ní cáháⁿ-í tnúhu Xítóhó Jesucristú núú nchàa ñáyiú. ²⁴ Núú xíáⁿ sàni iní-í sá ndũu na quihíⁿ-í nàcióⁿ Èspaná te yáha cáháⁿ-í quini-í nása ndècu-ndo, te dává-ánⁿ ño cudíí iní-ó cundecu tnaa-o, te ducaⁿ te óré nucúhuⁿ tucu-í ichi te cada ndee iní-ndó chindee ñaha-ndo xii-í. ²⁵ Te vitna quihíⁿ-í ñũu Jerusalén quinehe-í sá ndúú tãhú ñáyiú ndècu ichi Xítóhó Jesucristú xĩndecu yacáⁿ. ²⁶ Te ñáyiú xĩndecu ichi Xítóhó Jesucristú ndécú distritú Macèdoniá, ndihí distritú Acáyá ní cuu ñⁿnúú-yu ní sacáⁿ tnàhá-yu sá ndúú tãhú ñáyiú ndàhú xĩndecu ichi-gá ndécú ñũú Jerusalén. ²⁷ Te ducaⁿ tnàhí ní cudíí iní-yu cadá-yu, te ducaⁿ tnàhí tãu-yu cadá-yu chindee-yu ñáyiú xĩndecu ñũu Jerusalén. Te ñáyiú Macèdoniá ndihí ñáyiú Acáyá-ánⁿ ñá túú cúu-yu ñáyiú isràél. Te ñáyiú xĩndecu ñũu Jerusalén cúu-yu mee-ni ñáyiú isràél, te ducaⁿ tãu-yu cadá-yu chi sá cuendá ñáyiú isràél-ánⁿ ní níhí-yu tnúhu sá cáháⁿ nàcuáa naníhí tãhú-yu, núú xíáⁿ tãu-yu chindee ñàhá-yu ndihí nchaa sá nihí-yu. ²⁸ Te sátá ná yãha quĩnguáha cuendá-í-yu sá ndúú tãhú-yu, te ducaⁿ te dàtnuní quee-í quihíⁿ-í nàcióⁿ Èspaná, te ichi yáha-í yáha cáháⁿ-í núú ndécú-ndó. ²⁹ Te cùtnuní ndáá iní-í sá óré ná quèxio-í núú ndécú-ndó, te Xítóhó Jesucristú ño chindee ñaha-gá xii-í cáháⁿ-í tnúhu-gá núú-ndó nàcuáa ño váha cundecu-ndo ìchi-gá.

³⁰ Te nchòhó ñáyiú ndècu ndihí-í ichi Xítóhó Jesucristú cáháⁿ ndàhú-í núú-ndó sá ño chindee ñaha-ndo xii-í cáháⁿ ndihí-o Yá Ndióxi cuendá-í, te ducaⁿ càda-ndo chi ndècu ndihí-ndo Xítóhó Jesucristú. Te Espíritú Yá Ndióxi quidé-xí cùu iní tnàhá-ó ñⁿ ñⁿ-o. ³¹ Te ño chí cãcáⁿ tãhú núú Yá Ndióxi sá ná còto ñaha-gá xii-í, te ñá túú nã cada ñaha nchàa ñáyiú ñá túú sãndáá iní ñáhá xii-gá xĩndecu distritú Jùdeá. Te cãcáⁿ tãhú tũcu-ndo núú-gã sá ncháá sã cãnehe-í quihíⁿ nduu tãhú ñáyiú ndècu ichi-gá ndécú ñũu Jerusalén ño váha cuu iní-yu queheⁿ cuendá-yu. ³² Te ducaⁿ càda-ndo cuendá sá nũu Yá Ndióxi ná cãhí-gá te ño cudíí iní-í óré quèxio-í núú

ndécú-ndó, te ño váha cuu iní-í cundecu ndihí ñaha tnàhí xii-ndo. ³³ Te vitna xicáⁿ tãhú-í núú Yá Ndióxi Yáá quidé ño váha cùu iní-ó ndècu-o sá ná chindee chitúu ñaha-gá xii-ndo nchàa-ndo. Te ducaⁿ na cùnduu.

16

Té Pãblú quidé ndèe iní-dé ñáyiú ndècu ñũú Rómá

¹ Te yúhú tendaha-í tá Fèbé quixi-xi núú ndécú-ndó, te tnàhá-xi ndècu-xi ichi Xítóhó Jesucristú, te quide-xi chiuⁿ Yá Ndióxi sá cúu-xí ñáyiú ndècu ichi Xítóhó Jesucristú xĩndecu ñũu Cèncreá. ² Te cuini-í sá ño váha cuu iní-ndó quèheⁿ cuendá-ndó-xí, chi ndècu ndihí-xi Xítóhó Jesucristú, te cada-ndo nàcuáa tãu-xi cunduu dàtná tãu-xi cada ñáyiú ndècu ichi-gá, te ño chindee-ndo-xi te núu ná cúu sá xini ñũhu-xi, chi tnàhá-xi ño chindee-xi cue ñáyiú ndècu ichi Xítóhó Jesucristú, te tnàhá yúhú ducaⁿ ño chindee-xi.

³ Te cúñaha-ndo ño, na càda ndee iní té Àquilú ndihí ñadihí-dé tá Priscilá, chi ñáyiú-ánⁿ ní quide chiuⁿ-í ndihí-yu ní quide-ndí chiuⁿ Xítóhó Jesucristú. ⁴ Chi mèe-yu ní cãcu cuú-yu sá cuendá sá ní dácãcu ñàhá-yu xii-í sá ñy yáha-í, núú xíáⁿ ño ndacáⁿ tãhú-í núú-yu, te ñá díú-ní yúhú ducaⁿ ño ndacáⁿ tãhú-í núú-yu chi tnàhá nchaa ñáyiú ñá túú cùu ñáyiú isràél xĩndecu ichi-gá xĩndecu nchaa xichi ducaⁿ ño ndacáⁿ tãhú-yu núú tẽ Àquilú ndihí núú ñadihí-dé tá Priscilá. ⁵ Te cúñaha tũcu-ndo sá ño na càda ndee iní nchaa ñáyiú xĩndecu ichi Xítóhó Jesucristú tàcã vehe té Àquilú ndihí tá Priscilá dãcuahá-yu tnúhu-gá, te cúñaha tũcu-ndo sá ño na càda ndee iní té Epènetú chi tnàhá-dé ño ñũhu iní-í-dé, chi tẽe-ánⁿ cúu-dé tẽe díhna núu ní sãndáá iní tnúhu Xítóhó Jesucristú distritú Acáyá. ⁶ Te cúñaha tũcu-ndo sá ño na càda ndee iní tá Màriá xíchí ndécú ndihí-ndo, xíchí ño nducu ndee xinu cuechí núú Xítóhó Jesucristú. ⁷ Te cúñaha tũcu-ndo sá ño na càda ndee iní cue tẽe cùu ndi mee-í té Àndrónicú ndihí té Jùniás, chi tnàhá-güedé ní xíhí ndihí ñaha-güedé xii-í veccá, te ño cùdiu-güedé núú nchàa cue tẽe ní táuchíúⁿ Jèsús cáháⁿ tnúhu-gá. Te díhna-gã-güedé ní sãndáá iní-güedé tnúhu Xítóhó Jesucristú dácúxí yúhú.

⁸ Te cúñaha-ndo sá ná càda ndee iní té Àmpliás chi tnàhá-dé ño ñũhu iní-í-dé, te

ndècu-dé tnàhá-dé ichi Xítóhó Jesucristú. ⁹Te cúnaha tùcu-ndo xii té Bánú téé cùndihí ñaha xii-o quide-o chiuⁿ Xítóhó Jesucristú sá ná cada ndee iní-dé, te cúnaha tùcu-ndo xii té Èstaquis sá ná cada ndee iní-dé chi tnàhá-dé ío ñùhu iní-í-dé. ¹⁰Te cúnaha tùcu-ndo xii té Àpelés sá ño na cada ndee iní-dé, chi téé-áⁿ ío váha cùndáá-dé núú Xítóhó Jesucristú, te cúnaha tùcu-ndo xii ñáyiú xíndecu vehe té Aristóbúlú sá ño na cada ndee iní-yu. ¹¹Te cúnaha-ndo xii té Herodión téé cùu ndi mee-í sá ño na cada ndee iní-dé, te cúnaha-ndo xii ñáyiú ndècu ichi Xítóhó Jesucristú xíndecu vehe té Nàrcisú sá ño na cada ndee iní-yu. ¹²Te cúnaha-ndo xii tnahá tá Trifená ndíhi tá Trifosá sá ño na cada ndee iní-yu, chi tnàhá-yu quidé-yu chiuⁿ Xítóhó Jesucristú. Te tnàhá tá Pèrsidá xíchí ndécú ndíhi-o ichi Xítóhó Jesucristú cúnaha-ndo xii-xi sá ño na cada ndee iní-xi, chi tnàhá-xi ío ndúcu ndee-xi quide-xi chiuⁿ Xítóhó Jesucristú. ¹³Te cúnaha-ndo tnàhá té Rúfú téé ío váha sàndáá iní tnúhu Xítóhó Jesucristú sá ño na cada ndee iní-dé ndíhi nàná-dé, chi ñaha-áⁿ quidé iní-í sá cúú-áⁿ dàtná nàná-í. ¹⁴Te cúnaha-ndo sá ño na cada ndee iní té Àsín-critú, ndíhi té Flègonté, ndíhi té Hèrmás, ndíhi té Pàtrobás, ndíhi té Hèrmés, ndíhi nchaa dava-gá cue ñáyiú ndècu ndíhi-o ichi Xítóhó Jesucristú xíndecu ndíhi-güedé. ¹⁵Te cúnaha tùcu-ndo sá ño na cada ndee iní té Filólogó, ndíhi tá Jülüá, ndíhi té Nèréú, ndíhi cúha té Nèréú, ndíhi tá Òлимпás, ndíhi nchaa dava-gá ñáyiú sàndáá iní tnúhu Xítóhó Jesucristú xíndecu ndíhi-yu.

¹⁶Te ío yíñùhu cada ndee iní tnàhá-ndó ñⁿ ñⁿ-ndo. Te nchaa ñáyiú tàcá nchaa iha dàcuaha tnúhu Xítóhó Jesucristú quidé ndèe iní ñáhá-yu xii-ndo.

¹⁷Te nchòhó ñáyiú ndècu ndíhi-í ichi Xítóhó Jesucristú càháⁿ-í dóho-ndo sá cádá cuèndá-ndó núu ío ñáyiú quide nacuaá vá cúú ñⁿmuu-ndo cundecu-ndo, chi ñáyiú-áⁿ sánú ichi ñáhá-yu ñⁿ ichi ñá túú váha, chi ñá túú ñⁿ-ni cuu-xi tnúhu càháⁿ-yu ndíhi tnúhu sá ñí ñíhí-ndó ndècu ndíhi-ndo, te ñáyiú ducaⁿ xíquide vá ñíhí tnàhá-gá-ndó ndíhi-yu. ¹⁸Chi ñáyiú-áⁿ ñà túú quidé-yu chiuⁿ sá cúú-xí Xítóhó Jesucristú, chi mee-ni sá cúú-xí mée-yu quidé-yu, te mee-ni nchàa tnúhu sá ño víi ío váha cuáháⁿ càháⁿ-yu òré cuáháⁿ-yu dándahú-yu nchaa ñáyiú ío yáchí sàndáá iní-xi ñⁿ tnúhu.

¹⁹Te nchaa ñáyiú ñíhí-yu tnúhu sá nchòhó sàndáá iní-ndó tnúhu Xítóhó Jesucristú, núu xíáⁿ ío cùdíí iní-í. Te cùiní-í sá nchòhó ío váha cutnùní iní-ndó nàcuáa cada-ndo mée-ni sá váha, te vá cání iní-ndó cada-ndo datná xíquide nchaa ñáyiú ndècu ichi cuehé ichi duha. ²⁰Te Yá Ndiòxí Yáá quidé ío váha cùu iní-ó ndècu-o ío ndíhi cada-gá cuèndá sá sàcúíhná ñà túú-gá ná cada ñaha-xi xii-ndo, te xicáⁿ táhù-í núú Xítóhó Jesucristú sá ño na chindee chitúu ñaha-gá xii-ndo.

²¹Te té Timùtéú téé quide ndíhi-í chiuⁿ Xítóhó Jesucristú iha quide ndee iní ñáhá-dé xii-ndo, te tnàhá té Lùciú, ndíhi té Jàsón, ndíhi té Sosipàtér cue téé cùu ndi mee-í quidé ndèe iní ñáhá-güedé xii-ndo.

²²Te tnàhá yúhú té Tèrciú téé càdúha tutú-a cuèndá té Pàblú quidé ndèe iní ñáhá-í xii-ndo, chi ñⁿ-ni cùu-o ndíhi Xítóhó Jesucristú.

²³Te tnàhá té Gáyú téé dii vèhe-xi ndecu-í quidé ndèe iní ñáhá-dé xii-ndo, te diu-dé ní taxi nùu-dé vehe tàcá ñáyiú dàcuahá-yu tnúhu Xítóhó Jesucristú. Te tnàhá té Èrastú téé yíndaha díhúⁿ nùú quidé ndèe iní ñáhá-dé xii-ndo, te tnàhá té Cuártú téé ndècu ndíhi-o ichi Xítóhó Jesucristú quidé ndèe iní ñáhá-dé xii-ndo.

²⁴Te xicáⁿ táhù-í núú Xítóhó Jesucristú sá ño na chindee chitúu ñaha-gá xii-ndo nchàa-ndo. Te ducaⁿ na cùnduu.

Cáháⁿ-ó sá ño càhnu cuu Yá Ndiòxí

²⁵Te vitna chí ná càchí-ó sá ño càhnu cuu Yá Ndiòxí, chi mee-gá cada te ío-gá cuita ñíhí ndéé-gá-ndó cundecu-ndo ichi Xítóhó Jesucristú dàtná càchí tnúhu sá càháⁿ nàcuáa naníhí tàhú-ó, tnúhu sá dánhé-í ñáyiú cuèndá Xítóhó Jesucristú, te nchaa tnúhu-a ñⁿ-ni cùu-xi ndíhi nchaa tnúhu sá ñí cachí Yá Ndiòxí cuu yuhu ndèe cùtnàhá ní ngáva ñuyúú, te vitna ní quee túu-xi, ²⁶chi mee Yá Ndiòxí ní dátúu-gá núú-ó vitna, te càháⁿ-ndí nàcuáa ní chídó tnúní cue téé ní xóo càháⁿ tnúhu Yá Ndiòxí ndéé sanaha. Te ducaⁿ tnúhu sá ndúú yùhu ni cuu ta xíté nuu-xi ñíhí ñuyúú cuáháⁿ, chi ducaⁿ ñí cachí Yá Ndiòxí Yáá ndécú nchàa nduu nchaa quíu cunduu cuèndá sá quíndáá iní ñáhá ñáyiú xii-gá, te tní-yu nchaa tnúhu càháⁿ-gá.

²⁷Te ñⁿdií-ni Yá Ndiòxí cúú-gá Yáá ío sáá sá xíní tnúní-xi! ¡Te nchaa-o chí ná càchí-ó

să ȳo c hnu cuu-g , chi nd cu ndihi-o X -
toh  Jesucrist , te ducaⁿ-ni c da-o ni caa ni
quihiⁿ! Te ducaⁿ na c nduu. Te  o ch  c d 
nd e in -n  vitna.

TUTÚ DÍHNA NUU NĪ CADÚHA TÉ PÁBLÚ QUÍHĪⁿ NDAHA NĀYIU NŪÚ CÒRINTÚ

Té Páblú *cadúha-dé* tutú *quíhĪⁿ* ndaha nāyiu xĩndecu ichi Xítoho Jesucristú ndécú ñúú Còrintú

¹Yúhú té Páblú ní cáháⁿ ñáhá Yă Ndiöxí xii-í cuendá sá cáháⁿ-í tnúhu Xítoho Jesucristú núú nāyiu, chi ducaⁿ ní cachí Yă Ndiöxí cunduu. Te càdúha-í tutú-a ndihí té Sòstenés tée ndècu ndihĭ-o ichi Xítoho Jesucristú ²cuendá daquixí-í ndaha nchòhó nāyiu xĩndecu ichi Yă Ndiöxí ndécú ñúú Còrintú, chi nchòhó cúu-ndó nāyiu cùu cuendá Yă Ndiöxí cuendá sá ndécú ndihĭ-ndo Xítoho Jesucristú. Te diu-ni-ndo cùu-ndo nāyiu ní cáháⁿ ñáhá Yă Ndiöxí cuendá cundecu yĩñũhu-ndo núú-gă, ndihĭ nchaa dava-gă nāyiu ndècu nchaa xichi, nāyiu cachí sá ño cãhnu cuu Xítoho Jesucristú. Te Yaá-án cúu-gă Xítoho-yu, te diu-ni-gă cúu-gă Xítoho nchoo tucu. ³Te xicáⁿ tãhù-í núú Tãtá-ó Dũtũ Ndiöxí ndihĭ núú Xítoho Jesucristú sá ndi nduú-gă ño na chĩndee chitúu ñaha-gă xii-ndo, te ño váha cuu iní-ndó cundecu-ndo.

Yă Ndiöxí ño chĩndee ñaha-gă xii-o cuendá sá ndécú-ó ndihĭ Xítoho Jesucristú

⁴Te ducaⁿ-ni ño ndacáⁿ tãhù-í núú Yă Ndiöxí cuendá-ndó, chi mee-gă ño chĩndee chitúu ñaha-gă xii-ndo sá cuendá Xítoho Jesucristú. ⁵Te cuendá sá ndécú-ndó ndihĭ Xítoho Jesucristú, núú xĩãⁿ Yă Ndiöxí ño chĩndee ñaha-gă xii-ndo saá díquí-ndó nãcuáa cáháⁿ-ndó, ndihĭ nãcuáa cùtnuní iní-ndó, ⁶chi tnúhu sá ni nihí-ndó cuendá Xítoho Jesucristú ní quée-xi iní-ndó. ⁷Te xĩãⁿ núu nchaa sá váha ñá túú tnàhí cùmání xii-ndo chi Yă Ndiöxí ño chĩndee ñaha-gă. Te ducaⁿ quide-gă ñini nchòhó ni yũhu ní iní-ndó ndètu-ndo saá nduu quixí tucu Xítoho Jesucristú. ⁸Te Yă Ndiöxí ducaⁿ-ni ño chĩndee ñaha-gă xii-ndo cuendá sá vã yõ teñaha cuẽchi nduu na quixi tucu Xítoho Jesucristú. ⁹Te nchaa sá cáháⁿ Yă Ndiöxí dacuifí quide-gă, te diu-gă cúu-gă Yaá ní cáháⁿ ñáhá xii-ndo cuendá cuu ñĩⁿnuu-ndo ndihĭ Déhe-gă Xítoho Jesucristú Yaá cúu Xítoho-ó.

Ñá túú cùu ñĩⁿnuu nāyiu ndècu ichi Xítoho Jesucristú

¹⁰Te nchòhó nāyiu ndècu ndihĭ-í ichi Xítoho Jesucristú cáháⁿ-í dóho-ndo sã vã ndi díĩⁿ cãni iní-ndó, te ño cuu ñĩⁿnuu-ndo cundecu-ndo, te ñĩⁿ-ni cãni iní-ndó, te ñĩⁿ-ni càda-ndo chi ducaⁿ cuiní-gă cunduu.

¹¹Te duha cáháⁿ-í dóho nchòhó nāyiu ndècu ndihĭ-í ichi Xítoho Jesucristú, chi cue nāyiu vehe té Clòe ní cachí tnúhu-yu xii-í sá ñá túú cùu ñĩⁿnuu-ndo ndecu-ndo.

¹²Te duha nduu tnúhu ní nihĭ-í nãcuáa cùu ndecu-ndo, chi dava-ndo càchĭ-ndó: “Yúhú cùu-í cuendá té Páblú.” Te dava-ndo càchĭ-ndó: “Yúhú cùu-í cuendá té Apolós.” Te dava-ndo càchĭ-ndó: “Yúhú cùu-í cuendá té Pèlú.”

Te dava tucu-ndo càchĭ-ndó: “Yúhú cùu-í cuendá Xítoho Jesucristú”, duha càchĭ-ndó. ¹³Te vã dúcáⁿ cáháⁿ-ndó chi ñá túú nã daha Xítoho Jesucristú ndécú chi ñĩⁿdi-í-gă. Te ñá díú yũhú té Páblú ní xĩhĭ-í núú cùrúxí sá cuendá-ndó, te ni ñá túú ní sandute-ndo cuendá sá yũhú cuu cuendá ñáhá-í xii-ndo.

¹⁴Te táxãhu xii Yă Ndiöxí chi ñá díú nchaa-ndo ni dacuandute-í, chi té Crispú-ni ndihĭ té Gãyú-ni ní dacuandute-í-guedé.

¹⁵Te xĩãⁿ núu vã cúu tnàhí cáháⁿ-ndó sã ñĩ sandute-ndo sá cúu cuendá ñáhá-í xii-ndo.

¹⁶Te ní ndacu tucu iní-í sá tnàhá tucu nāyiu cùu ndi mee té Estéfanás ní dacuandute-í, te diu-ná nāyiu-án te sãnuu sá ñá túú-gă nágá nāyiu ni dacuandute-í. ¹⁷Te Xítoho Jesucristú ñá túú ní tendaha ñaha-gă xii-í sá dacuandute-í nāyiu, chi ní tendaha ñaha-gă xii-í sá cáháⁿ-í tnúhu-gă núu-yu, tnúhu sá cáháⁿ nãcuáa naníhĭ tãhù-ó. Te ñá túú cáháⁿ-í dàtná cáháⁿ nāyiu túha. Te ducaⁿ quide-í cuendá sá nchòhó quĩndáá váha iní-ndó tnúhu sá cáháⁿ nãcuáa ní xĩhĭ Xítoho Jesucristú núú cùrúxí. Chi núu na cáháⁿ-í dàtná cáháⁿ nāyiu túha te nchòhó vã quĩndáá iní-ndó tnúhu-án nãcuáa tàu-xi cunduu.

Sá cuendá Xítoho Jesucristú cùtnuní iní-ó sã ño cãhnu cuu Yă Ndiöxí

¹⁸Te nchaa nāyiu ta xĩta nihnu cuáhán càchĭ-yu sá ñá túú nãndĩhĭ tnúhu sá cáháⁿ nãcuáa ní xĩhĭ Xítoho Jesucristú núú cùrúxí, dico sá cúu-xí nchòe nāyiu sá ní naníhĭ tãhù, chi tnúhu-án cúu-xí ñĩⁿ tnúhu sá ñĩ taxi Yă Ndiöxí ndécú ndihĭ-o cuendá ndacu-gă cada-gă nchaa nãcuáa cuiní-gă

iní-ó, ¹⁹ te quèe ndáá-xi nàcuáa càháⁿ-gá núú tütú-gá núú càchí-xi:

Yúhú cada-í te nchaa ñáyiú túha vá nándíhi-gá nchaa sá xini tñuní-yu, te nchaa ñáyiú ío váha sáa díquí-xi vá nándíhi-gá nchaa nàcuáa sàni inf-yu.

Duha càchí Yá Ndióxi núú tütú-gá.

²⁰ Te xíáⁿ cútnuní iní-ó sá ncháá ñáyiú sàni iní-xi sá ío túha ndècu ñuyú-a, ndíhi nchaa cue tée dàcuaha ñaha xii-yu nchaa tñuhu ní chidó tñuní ndíi Moisés, ndíhi nchaa ñáyiú ío váha sáa díquí-xi càháⁿ cuèndá nchaa sá ío ñuyú-a, te nchaa ñáyiú-áⁿ càchí Yá Ndióxi sá ñà túú nándíhi nchaa sá xini tñuní-yu sá cúú-xi-gá. ²¹ Te Yá Ndióxi ío váha cùtnuní inf-gá nàcuáa quide-gá, chi ñà túú dàña-gá cundecu ndíhi ñáhá-yu xii-gá sá cuèndá nchaa sá ní sáa díquí mée-yu, te ducaⁿ quide-gá chi cuini-gá sá cundédóho-yu tñuhu sá sání iní-yu ñà túú nándíhi. Te sá cuèndá tñuhu-áⁿ te naníhi tàhú-yu te núu na quèndáa iní ñáhá-yu xii-gá.

²² Te cue ñáyiú isráel cuini-yu quiní-yu sá vâ yóo tñahí ndàcu cada, te cue ñáyiú gríegú nchicúⁿ nihnú-yu nchaa sá dácuaá ñáyiú ío túha. ²³ Dico nchoo yíhi-o càháⁿ-ó núú ñáyiú sá Xítoho Jesucristú ní xíhi-gá núú cùrúxi. Te cue ñáyiú isráel ñà túú tñahí tñahá iní-yu cundédóho-yu tñuhu-áⁿ. Te cue ñáyiú ñà túú cùu ñáyiú isráel càchí-yu sá ñà túú vèdana nándíhi tñuhu-áⁿ. ²⁴ Dico sá cúú-xi ncháa ñáyiú ní càháⁿ ñáhá Yá Ndióxi chi cuèi cúú-yu ñáyiú isráel àdi ñà túú cúú-yu, dico ñáyiú-áⁿ càchí-yu sá sá cuèndá Xítoho Jesucristú cútnuní iní-yu sá ío càhnu cuu Yá Ndióxi te ndècu ndíhi-gá nchaa sá xini tñuní-gá. ²⁵ Te sá quidé Yá Ndióxi càchí ñáyiú ñuyú-a sá ñà túú nándíhi, dico xíáⁿ ío-gá nándíhi dácúuxí sá sání iní mée-yu. Te sá ní xíhi Xítoho Jesucristú núú cùrúxi, xíáⁿ càchí ñáyiú sá ñà túú ní nihí ndéé Yá Ndióxi cada-gá sá ní sani iní-gá cada-gá. Dico sá dúcáⁿ ní quide Yá Ndióxi, xíáⁿ cúú-xi sá ío-gá ní nihí ndéé-gá ní quide-gá ñⁿ sá ní sani iní-gá dácúuxí sá sání iní mée ñáyiú ñuyú-a. ²⁶ Te nchòhó ñáyiú ndècu ndíhi-í ichi Xítoho Jesucristú, chí dándacu iní nàcuáa ndècu-ndo cútnáhá ní càháⁿ ñáhá Yá Ndióxi xii-ndo,

chi sacú-ni-ndo túha dácúuxí ñáyiú ñà túú ndècu ichi-gá. Te ducaⁿ sàcú-ni-ndo tàxi tñuní-ndó, te diu-ni ducaⁿ sàcú-ndó nèhe ñáyiú sá yíñuhu núú-ndó. ²⁷ Te ñáyiú ñà túú ndècu ichi Yá Ndióxi càchí-yu sá ñà túú tñahí túha dava-gá tñaha ñáyiú-yu, dico dava ñáyiú ñà túú túha-áⁿ càháⁿ ñáhá Yá Ndióxi xii-yu cundecú-yu ichi-gá, te cundecu ndíhi ñaha-gá xii-yu, te ducaⁿ dándóo canúú-yu nchaa ñáyiú càchí sá ío túha. Te càháⁿ tucu-gá ñáyiú càchí dava-gá ñáyiú sá ñà túú tñahí tàu cunuu cundecú-yu ichi-gá, te ducaⁿ cundecu ndíhi ñaha-gá xii-yu, te dándóo canúú-yu nchaa ñáyiú càchí sá táxi tñuní. ²⁸ Te ducaⁿ Yá Ndióxi càháⁿ-gá ñáyiú ñà túú tñahí cunuu cundecu ndíhi-gá, ndíhi ñáyiú quèe tñú nùu dàva-gá tñaha ñáyiú-xi, ndíhi ñáyiú càchí-yu sá ñà túú vèdana nándíhi, nchaa ñáyiú-áⁿ càháⁿ-gá cundecu ndíhi-gá, te ducaⁿ quide-gá cuèndá dándóo canúú-yu nchaa ñáyiú càchí sá ío cunuu. ²⁹ Te núu xíáⁿ ní ñⁿ ñáyiú vá cúú càchí-yu sá ío càhnu cuú-yu núú Yá Ndióxi. ³⁰ Dico nchòhó chi mee Yá Ndióxi ní quide-gá ndécú-ndó ndíhi Xítoho Jesucristú, te Xítoho Jesucristú ní quide-gá ní cútnuní iní-ó sá Yá Ndióxi cúú-gá Yaá ndécú ndíhi nchaa sá xini tñuní-gá. Te diu-ni Xítoho Jesucristú ní quide-gá cuèndá sá nchóo vá cundècu-gá cuèchi-o nùu Yá Ndióxi, te ducaⁿ cundecu yíñuhu-o núú-gá, te nduu tàhú-ó cundecu-o ndíhi-gá ní caa ní quíhí. ³¹ Te sá dúcáⁿ quide-gá núu xíáⁿ xini ñuhu-xi cada-o nàcuáa càháⁿ-xi núú tütú Yá Ndióxi núú càchí-xi: “Vá càchí-ndó sá mée-ndó ío càhnu cuu-ndo, chi cachí-ndó sá Yaá cúú Xítoho-ndó ío càhnu cuu-gá”, duha càchí-xi núú tütú-gá.

2

Tñuhu sá càháⁿ nàcuáa ní cuu ní xíhi Xítoho Jesucristú núú cùrúxi

¹ Te nchòhó ñáyiú ndècu ndíhi-í ichi Xítoho Jesucristú sa nàha-ndo sá cùtnáhá ní quixí-í ní càháⁿ-í tñuhu Yá Ndióxi núú-ndó, te ñà túú ní càháⁿ-í dàtná càháⁿ ñⁿ ñáyiú ío váha sáa díquí-xi, àdi datná càháⁿ ñⁿ ñáyiú ío túha. ² Chi cútnáhá ní xíndecu ndíhi ñaha-í xii-ndo chi ní sani iní-í sá mée-ní cuèndá Xítoho Jesucristú càháⁿ-í núú-ndó ndíhi nàcuáa ní cuu ní xíhi-gá,

te ñi ducaⁿ ñi quide-í. ³ Te cùtnàhá ní quexìo-í núú ndécú-ndó te ní ñà cùtnùnì iní-í nása cada-í ní cùu, te ío ní quiyùhù iní-í ní càháⁿ-í tnúhu-gá núú-ndó. ⁴ Te cùtnàhá ní càháⁿ-í nàcuáa ndùu tnúhu Xítohó Jesucristú núú-ndó, te nàha-ndo sá Espiritú Yá Ndiòxí ní chindee ñàha-xi xii-í ní càháⁿ-í tnúhu-gá núú-ndó, te tnúhu-áⁿ ñi quée-xi iní-ndó. Te ñà túú ní càháⁿ-í ñi tnúhu càhnu núú-ndó tnúhu sá càháⁿ cue ñáyiú ío váha sàá díquí-xi. ⁵ Te ducaⁿ ñi cuu cuendá sá nchòhó quíndáá iní-ndó tnúhu Yá Ndiòxí chi ní quide-gá sá váha sá cúu-xí iní-ndó, te ñà díú sá cuendá tnúhu sá càháⁿ ñáyiú cächí sá ío túha ducaⁿ ñi sándáá iní-ndó tnúhu-gá.

Espiritú Yá Ndiòxí quidé-xí cùtnunì iní-ó nàcuáa sàni iní-gá

⁶ Te nchoo càháⁿ-ó tnúhu càhnu núú ñáyiú sa ní níhí ndéé ndècu ichi Xítohó Jesucristú. Te tnúhu-áⁿ ñà túú càháⁿ ñáyiú ñà túú ndècu ichi-gá, te ní cue téé yíndaha ñaha xii-yu ñà túú càháⁿ-güedé tnúhu-áⁿ chi cue téé-áⁿ naa-güedé. ⁷ Te tnúhu càhnu-áⁿ cúu-xí tnúhu Yá Ndiòxí, te mee-gá ní cachí-gá ndéé cùtnàhá vátá ngáva-gá ñuyúú sá ncháá ñáyiú na quíndáá iní tnúhu-áⁿ te nduu táhù-yu cundecú-yu ndíhi-gá núú ío váha càa ndecu-gá ní caa ní quíhíⁿ. Te tnúhu-áⁿ ndúú yùhu-xi ní cuu. ⁸ Te ní ñiⁿ cue téé yíndaha cue ñáyiú ñuyúú-a ñà túú tècú tnùnì-güedé tnúhu-áⁿ, chi núú dícó tècú tnùnì-güedé tnúhu-áⁿ te vá catá càa-güedé Xítohó Jesucristú núú cùrúxí cahni ñaha-güedé xii-gá ní cùu. Te ñi-ni Yaá-áⁿ ío càhnu cuu-gá. ⁹ Dico ducaⁿ ñi cuu chi ní quee ndáá-xi nàcuáa càháⁿ-xi núú tütú Yá Ndiòxí núú cächí-xi:

Yá Ndiòxí sa ní sani iní-gá nchaa nàcuáa cada-gá sá cúu-xí cuendá nchaa ñáyiú cùu iní ñàhá xii-gá.

Te sá ñi sani iní-gá cada-gá cúu-xí sá vátá quíni-gá ñáyiú te ní vátá cùndedóho-gá-yu,

te ní ñà túú tnàhí cùtnunì iní-yu nása cada-gá.

Duha cächí-xi núú tütú-gá. ¹⁰ Te mee Yá Ndiòxí ní cachí-gá sá Espiritú-gá cada-xi te nchoo cùtnunì iní-ó nchaa nàcuáa sàni iní-gá cada-gá, ñu xíáⁿ ducaⁿ tècú tnùnì-ó vitna, chi Espiritú-gá xini-xi nchaandi túhú nàcuáa sàni iní-gá cada-gá.

¹¹ Te ñà ñiⁿ ñáyiú xini ndáá-yu nàcuáa sàni iní ingá ñáyiú, chi mee ñáyiú-áⁿ xini ndáá-yu nchaa nàcuáa sàni iní-yu. Te ducaⁿ sàtnahá-xi xii Yá Ndiòxí chi medii-ni Espiritú-gá cùu-xi nchaa nàcuáa sàni iní-gá. ¹² Te nchoo chi Yá Ndiòxí ní taxi-gá Espiritú-gá ndécú ndíhi-o, te ñà díú ñuyúú-a ducaⁿ ní quée espíritú ní ngúndecu ndíhi-o. Te ducaⁿ ní taxi-gá Espiritú-gá ndécú ndíhi-o cuendá ducaⁿ cùtnunì iní-ó nàcuáa ndùu nchaa sá váha sá dícó ducaⁿ ní taxi-gá ndécú ndíhi-o. ¹³ Te cuendá nchaa sá váha-áⁿ càháⁿ-ndí, te càháⁿ-ndí nàcuáa dàcahu iní ñàhá Espiritú Yá Ndiòxí xii-ndí, te ñà túú càháⁿ-ndí nàcuáa càhu iní ñáyiú ñuyúú-a càháⁿ-yu, te ñi-ni nchaa tnúhu dàcahu iní ñàhá Espiritú-gá xii-ndí càháⁿ-ndí, ñi-ni nchaa xíáⁿ dánèhé-ndí nchaa ñáyiú ndècu ndíhi tucu Espiritú-gá.

¹⁴ Te ñáyiú ñà túú ndècu ndíhi Espiritú Yá Ndiòxí ñà túú tnàhá iní-yu nàcuáa ndùu tnúhu dàtecú tnúhu ñaha Espiritú-gá xii-yu, te ní ñà túú tècú tnùnì-yu, te cächí-yu sá ñà túú nàndíhi-xi. Te ducaⁿ chi mee-ni nchaa ñáyiú ndècu ndíhi Espiritú-gá tècú tnùnì-yu nàcuáa ndùu tnúhu-áⁿ. ¹⁵ Te cue ñáyiú ducaⁿ ndècu ndíhi Espiritú Yá Ndiòxí cùtnunì ndáá iní-yu ná cúu nchaa sá váha, te vá yóo ñiⁿ xini nchaa nàcuáa sàni iní-yu. ¹⁶ Te núú tütú Yá Ndiòxí cächí-xi: “Vá yóo ñiⁿ xini nàcuáa sàni iní Yá Ndiòxí, núú xíáⁿ vá yóo ñiⁿ ndacuáa ná danèhé ñàhá xii-gá”, duha cächí-xi núú tütú-gá. Te nchoo chi ñiⁿ-ni sàni iní-ó ndíhi Xítohó Jesucristú.

3

Cue téé xiquide chiúⁿ Yá Ndiòxí

¹ Te nchòhó ñáyiú ndècu ndíhi-í ichi Xítohó Jesucristú cächí tnúhu-í xii-ndo sá ñà ní níhí-í nàcuáa cada-í càháⁿ-í tnúhu-gá núú-ndó dàtná càháⁿ-í núú nchaa ñáyiú quide nchaa nàcuáa càháⁿ Espiritú Yá Ndiòxí, chi ní càháⁿ-í núú-ndó dàtná càháⁿ-í núú nchaa ñáyiú cùnuu nchaa sá cuèhé sá dúhá iní-xi, te ní quide ñaha-í xii-ndo dàtná cue ñáyiú íchí ní sándáá iní tnúhu Xítohó Jesucristú, núú xíáⁿ ducaⁿ ní càháⁿ-í núú-ndó. ² Te ní quide ñaha-í xii-ndo dàtná ñiⁿ déhe yiquiⁿ vitna sadi camá, te ñà túú ní quide ñaha-í xii-ndo dàtná cue landú sa xèxi díta, chi ní dánèhé

ñàhà-í xii-ndo ìḡ sá ñà túú ñàhí úhú tecú ñùnì-ndó, te ñà túú ní òhèhé ñàhà-í xii-ndo ìḡ sá xítò-í sá yá tecú ñùnì-ndó. Te quide cuendá-í sá díú-ní òhàcá vâ tecú ñùnì-ndó ndéé vitna te núu na òhèhé ñàhà-í xii-ndo nchâa dava-gá ñúhu. ³ Te ducaⁿ chi quide-ni-ndo nacuaá sâni iní mée-ndó, chi ndècu-ni-ndo ichi cuédú iní, te nâá ndihi ñàhà-ni-ndo, te ñà túú ñàhí cùu ìḡnuu-ndo ndècu-ndo. Te xíḡ cútñuní sá mée-ní nchâa nacuaá sâni iní mée-ndó quide-ndo, te xíquide-ndo òhàcá quidé nchâa ñâyü ñà túú ndècu ichi Xítòhó Jesucristú. ⁴ Te dava-ndo càchí-ndó: “Yúhú cùu-í cuendá té Pâblú.” Te dava-ndo càchí-ndó: “Yúhú cùu-í cuendá té Àpolós”, duha càchí-ndó. Te sá dúcáⁿ càhâⁿ-ndó xíḡ cútñuní sá quidé-ní-ndó mée-ni nchâa nacuaá sâni iní mée-ndó.

⁵ Te yúhú té Pâblú càchí ñúhu-í xii-ndo sâ ñà túú cùnûu-í, te ni té Àpolós ñà túú cùnûu-dé chi dícò cue tée xínu cuehí núú Yá Ndiòxí cùu-ndé, te ní càhâⁿ-ndí ñúhu-gá núu-ndó, núu xíḡ ní sândáá iní-ndó. Te ndí ðḡⁿ ndí ðḡⁿ ndúu chiúⁿ ní táhú Yá Ndiòxí cada-ndí. ⁶ Te yúhú cùu-í òhàcá ìḡ tée chihí tatá chi òhàcáⁿ ñàhà-í xii-ndo túha-ndo ichi Yá Ndiòxí. Te té Àpolós cùu-dé òhàcá ìḡ tée nâcuhñu chi tée-áⁿ ndécú-dé òhàcá ñàhà-dé xii-ndo ñúhu-gá. Te Yá Ndiòxí cùu-gá Yáá quidé sânu tatá ní chihí-í-áⁿ, te duha càhâⁿ-í chi díu-gá quidé-gá tá nihí ndéé-ndó ndècu-ndo ichi-gá. ⁷ Te núu xíḡ ní tée chihí tatá te ní tée nâcuhñu ñà túú cùnûu-güedé, dico Yá Ndiòxí ío cùnûu-gá chi díu-gá quidé-gá xínu tatá-áⁿ te sânu-xi. ⁸ Te ìḡ-ni cùu tée chihí tatá ndihi tée nâcuhñu. Te ducaⁿ sâtnahá-xi cùu nchúhú cue tée xíquide chiúⁿ Yá Ndiòxí, te nacuaá ndúu chiúⁿ ní quide-ndí te ducaⁿ cunduu táhú taxi Yá Ndiòxí nduu táhú-ndí. ⁹ Te nchòhó cùu-ndó òhàcá ìḡ xichi núú ní quée tatá, te nchúhú cùu ìḡnuu-ndí quidé chiúⁿ-ndí xíḡ. Te ducaⁿ sâtnahá-xi cùu-ndo chi cùu cuendá ñàhà Yá Ndiòxí xii-ndo, te nchúhú cùu ìḡnuu-ndí quidé-ndí chiúⁿ-gá.

Te cùu tucu-ndo òhàcá ìḡ vehe sá vitná sáá, te ducaⁿ sâtnahá-xi cùu-ndo chi Yá Ndiòxí quidé-gá tá sânu nihnu-ndo ichi-gá cuáhâⁿ. ¹⁰ Te yúhú cùu-í òhàcá ìḡ tée cùnûu dacaa vehe te ní tava-í cimièntú-xi, te ðḡⁿ cue tée véxi òhàcá-güedé ndóho, te ìḡ ìḡⁿ cue tée-áⁿ ío xini ñuhu-xi cada

cuendá-güedé nacuaá dacaa-güedé. Núu ducaⁿ sâtnahá-xi cùu yúhú chi Yá Ndiòxí ní taxi-gá chiúⁿ quide-í te chindee ñàhà-gá, chi díhna-gá-í ní quixi-í ní càhâⁿ-í ñúhu Xítòhó Jesucristú núu-ndó, te ðḡⁿ cue tée véxi òhàcá ñàhà-ná xii-ndo ñúhu-gá, te ìḡ ìḡⁿ cue tée-áⁿ ío xini ñuhu-xi cada cuendá-güedé nacuaá dacuaá ñàhà-güedé xii-ndo ñúhu-gá. ¹¹ Te cimièntú vehe-áⁿ cada iní-ó sâ cùu-xí mée Xítòhó Jesucristú, te ducaⁿ chi yúhú ní òhàcá ñàhà-í xii-ndo ní ngúndecu ndihi-ndo Xítòhó Jesucristú, te vâ yòo-gá cundecu ndihi-ndo chi ìḡⁿ dí-í-ndí-ndé. ¹² Te dava cue tée òhàcá-güedé vehe váha te chihí-güedé díhúⁿ cuáhâⁿ, ndihi díhúⁿ cuixíⁿ, ndihi yúú sâ ío vii càa. Te dava-güedé òhàcá-güedé vehe vitú, te dava-güedé òhàcá-güedé vehe ité, te dava-güedé òhàcá-güedé vehe ñuvixiⁿ. ¹³ Te sáá nduu te nchâa vehe-áⁿ càyü-xi, te vehe vitú-áⁿ ndihi vehe ité-áⁿ ndihi vehe ñuvixiⁿ-áⁿ ndoo ndoo càyü, te nchâa vehe váha-áⁿ vâ càyü-xi cuéi na yâha ñuhú. Te nchâa cue tée ní òhàcá vehe váha-áⁿ cada iní-ó sâ cùu-güedé ñâyü ío váha quide chiúⁿ Yá Ndiòxí. Te nchâa cue tée ní òhàcá vehe vitú, ndihi cue tée ní òhàcá vehe ité, ndihi cue tée ní òhàcá vehe ñuvixiⁿ cada iní-ó sâ cùu-güedé ñâyü ñà túú cùnîí cada chiúⁿ Yá Ndiòxí nacuaá tàù-xi cunduu. Te sáá nduu te cútñuní nacuaá ndúu chiúⁿ ní quide ìḡ ìḡⁿ ñâyü, chi Yá Ndiòxí càhâⁿ-gá nacuaá ndúu chiúⁿ ní quide ìḡ ìḡⁿ ñâyü ní quide chiúⁿ-gá. ¹⁴ Te cue ñâyü ío váha xíquide chiúⁿ Yá Ndiòxí te cùdí chiúⁿ quidé-yu, te ñâyü-áⁿ ñihí-yu sá ndúú táhú-yu. ¹⁵ Te cue ñâyü ñà túú quide chiúⁿ Yá Ndiòxí nacuaá tàù-xi cunduu, te vâ cùdí chiúⁿ ní quidé-yu chi cuíta te ndóo-ná-yu duha, dico mée-yu chi ñàhí táhú-yu.

¹⁶ Te yúhú càhâⁿ-í òhòho-ndo òhàcá ìḡ iní-ndó sâ cùu-ndó òhàcá vehe Yá Ndiòxí, chi Espiritú-gá ndécú ndihi ñàhà-xi xii-ndo. ¹⁷ Te núu yoo na òhàcá ñàhà xii nchòhó ñâyü cùu veñúhu-gá, te Yá Ndiòxí òhàcá ñàhà-gá xii ñâyü-áⁿ, te ducaⁿ òhàcá-gá chi nchòhó cùu-ndó ñâyü cùu cuendá-gá.

¹⁸ Te vâ òhàcá-ndó mée-ndo sâ ío túha-ndo. Te núu ío òhàcá-ndo sâni iní-ndó sâ túha-ndo òhàcá ñàhà iní cue ñâyü ñà túú ndècu ichi Yá Ndiòxí, te cada-ndo sâ cùu-ndó òhàcá ñâyü ñà túú ñàhí túha,

te ducaⁿ te cuu ndisa-ndo ñáyiú túha sá cúu-xí Yá Ndiöxí. ¹⁹ Te nchaa sá xini tnuni nchaa ñáyiú cächí sá ío túha ñá túú ndècu ichi Yá Ndiöxí ñá túú nandíhi-xi sá cúu-xí-gã. Te cächí-xi núú tütú-gá: “Nchaa ñáyiú cächí sá ío túha te Yá Ndiöxí dandö canúú ñáhá-gã xii-yu núú nchaa sá quidé-yu”, duha cächí-xi núú tütú-gá. ²⁰ Te cächí tucu-xi ingá xichi: “Yá Ndiöxí cútnúni iní-gá nchaa nàcuáa sàni iní ñáyiú cächí sá ío túha. Te nchaa nàcuáa sàni iní-yu-án cächí-gá sá ñá túú vèdana nandíhi-xi”, duha cächí-xi núú tütú-gá. ²¹ Núú xíáⁿ cãháⁿ-í dóho-ndo sá vã cächí-ndó sã nchũhú cue tée ðanehé ñáhá xii-ndo tnũhu-gá ío cãhnu cuu-ndí. Te nchaa sá ío ñuyíú-a cùu-xi sá vãha sá cúu-xí-ndó. ²² Te cuéi yúhú ndíhi té Àpolós ndíhi té Pèlú ndécú-ndí sá cúu-xí-ndó, te cuéi nchaa sá ío ñuyíú-a te cuéi nchaa nduu ndècu-ndo te cuéi sá cùu-ndó dico nchaa cùu-xi sá vãha sá cúu-xí-ndó. Te cuéi nchaa sá ndécú tnáví, te cuéi nchaa sá cóo ndèé cuéé-gá nchaa cùu-xi sá vãha sá cúu-xí-ndó. ²³ Te mee-ndo ndècu-ndo sá cúu-xí Xitohó Jesucristú, te mee Xitohó Jesucristú ndécú-gá sá cúu-xí Yá Ndiöxí.

4

Nàcuáa nduu chiúⁿ quide cue tée ní táuchíúⁿ Xitohó Jesucristú cãháⁿ tnũhu-gá ¹ Te cada cuendá-ndó sã nchũhú dicó-ni cue tée xinu cuéchi núú Xitohó Jesucristú cúu-ndí, te chiúⁿ-án ní taxi Yá Ndiöxí quidé-ndí cãháⁿ-ndí tnũhu sá ní cachí-gá yíyũhu ni cuu. ² Te xini ñuhu-xi sá ncháá ñáyiú ducaⁿ ní sãñaha Yá Ndiöxí chiúⁿ quidé-yu cada ndáá-yu cadá-yu chiúⁿ-án. ³ Te yúhú ñá túú quide cuendá-í nõu nása nduu tnũhu cãháⁿ-ndó cuendá-í nõu cùu-í tée vãha àdi ñá túú cùu-í. Te ðiu-ni ducaⁿ ñá túú quide cuendá-í nõu nása-gá cãháⁿ nchaa dava-gá ñáyiú cuendá-í. Te ní mée-í ñá túú cãháⁿ-í nõu cùu-í tée vãha àdi ñá túú cùu-í. ⁴ Te sãnuu iní-í sá ñá túú ñá cãmãni-í núú Yá Ndiöxí, dico ñá ðíú sã xíáⁿ te cachí-í sá ñá túú cuéchi-í ndécú nõu-gã, chi mee-gã náhá ndáá-gá te núu nása quide-í ndécú-í. ⁵ Te nchòhó vá cãháⁿ-gá-ndó sã ñá túú cundáá ñáyiú núú Yá Ndiöxí, chi vátá sãá-gá nduu cundáá cuéchi-yu. Te na sãá nduu quixi tucu Xitohó Jesucristú te ðává-án ðátúu-gá nchaa sá quidé-yu, nchaa

sá ñá túú xini-ó quidé-yu vitna, te ducaⁿ ðátúu-gá nchaa nàcuáa sàni iní-yu. Te Yá Ndiöxí cãháⁿ vãha-gá cuendá nchaa ñáyiú ní quide vãha.

⁶ Te nchòhó ñáyiú ndècu ndíhi-í ichi Xitohó Jesucristú, cãcunehe-í té Àpolós ndíhi yúhú núu-ndó ðanehé ñáhá-í xii-ndo nàcuáa cada-ndo cuendá ducaⁿ cùu-xi ñⁿ sá vãha sá cúu-xí-ndó, ndíhi cuendá sá nchòhó canchicúⁿ niñnu-ndo cada-ndo mee-ni nchaa nacuáa yòdo tnuni núú tütú Yá Ndiöxí. Te ducaⁿ te vá cächí-ndó sã ñⁿ tée cãháⁿ tnũhu Yá Ndiöxí ío-gá cãhnu cuu-dé ðacúúxí ingá-dé. ⁷ Te nchòhó vá cächí-ndó sã ío-gá cùnũu-ndo ðacúúxí ðava-gá ñáyiú chi Yá Ndiöxí ní quide-gá ní ngúndecu ndíhi-ndo nchaa sá xini tnuni-ndó. Te mee-gá ducaⁿ ní quide-gá ¿Te ná cuendá nchòhó ducaⁿ quide cãhnu-ndo mee-ndo? Te quide-ndo ðatná tnũhu sá mée-ndó ní quide-ndo ðucaⁿ ní ngúndecu ndíhi-ndo nchaa sá xini tnuni-ndó.

⁸ Te nchòhó quidé-ndó sã ñá túú tnãhí-gá ná cãmãni-ndó nõu Yá Ndiöxí, te quide-ndo sá ní ñíhí-ndó nchaa sá cuini-ndó nõu-gã ndécú ndíhi-ndo, te sãnuu sá cúu-ñá-ndó ðatná cue tée yindaha ñáyiú, te nchũhú ñá túú cùu ñⁿnuu ndíhi ñaha-ndí xii-ndo quindaha ndíhi ñaha-ndí xii-ndo ñáyiú, jte vãha-ni te núu dicó ndisa sá yindaha-ndo ñáyiú chi tnãhá nchũhú ní tnãhá ndíhi ñaha-ndí xii-ndo quindaha-ó-yu te núu dicó cúu-xí ñⁿ sá ndáá dico ñáhá! ⁹ Te yúhú quidé cuendá-í sá nchũhú cue tée ní táuchíúⁿ Xitohó Jesucristú cãháⁿ tnũhu-gá núú ñáyiú ní cachí Yá Ndiöxí sá cúu-ndí cue tée ñá túú nandíhi sá cúu-xí ðava-gá ñáyiú. Te ní cachí tucu-gá sá cúu-ndí ðatná cue ñáyiú sa ní tnãhá òré cuu-xi quíhíⁿ nacháhu cuéchi-xi, te nchaa ñáyiú cuñũhu ñáhá-yu xii-ndí sá ðucáⁿ ndòho-ndí, te tnãhá nchaa espíritú cùnũhu ñaha-xi xii-ndí. ¹⁰ Te cuendá sá xínú cuéchi-ndí núú Xitohó Jesucristú, xíáⁿ cúu-ndí ðatná cue tée ñá túú vèdana nandíhi sá cúu-xí ñáyiú. Te nchòhó quidé-ndó sã cúu-ndó ñáyiú ío túha ndècu ndíhi Xitohó Jesucristú. Te ñáyiú cächí-yu sá nchũhú cúu-ndí cue tée ñá túú ndacu cada ñⁿ sá cadá sã cúu-xí Yá Ndiöxí.

Te nchòhó quidé-ndó sã cúú-ndó ñáyiú ío vâha ndàcu quide ìⁿ sá sání ìní-ndó sã cúú-xí-gã. Te cue ñáyiú dàquee tíhú ñáhã-yu xii-ndí, te nchòhó nehẽ-yu sá yíñùhu núú-ndó. ¹¹Te nchúhú chi nchaa-ni nduu ío ndòho-ndí, chi xihí-ndí docó, yichí-ndí ndute, te ñá túú dđó-ndí, te nchaa ñáyiú quide úhú ñáhã-yu xii-ndí, te ni vèhe-ndí ñá túú ndéé cáá cùndecu-ndí. ¹²Te ío ndòho-ndí quidé chiúⁿ-ndí ñihí-ndí sá xéxí-ndí. Te cue ñáyiú xícuehé ñáhã-yu xii-ndí dico xicáⁿ táhú-ndí núú Yã Ndiòxí cuèndá-yu, te ñá cúú tnàhí quini ndeé ñáhã-yu xii-ndí dico quide cahnu iní-ndí nchaa sá quidé ñáhã-yu. ¹³Te mee-ni tnùhu cuèhé tnùhu duha càháⁿ-yu cuèndá-ndí dico sàcahnu iní-ndí te dàsahú-ndí-yu mee-ni tnùhu vâha. Te càchí-yu sã cúú-ndí dàtná ìⁿ sá ñà túú-gã védana nàndihi, te nchaa-ni nduu ducaⁿ càháⁿ-yu xãhãⁿ-yu xii-ndí.

¹⁴Te yúhú duha càháⁿ-í núú tütú-a dàsahú ñáhã-í xii-ndo, dico ñá díú tnùhu sá cúú càháⁿ núú-ndó càháⁿ-í. Te duha càháⁿ-í dóho-ndo chi quide iní-í sá súñí dàtná déhe mee-í cúú-ndó chí ío cùu iní ñáhã-í xii-ndo. ¹⁵Te nchaa-o ndècu-o ichi Xítóhó Jesucristú vitna, dico yúhú cùú-í téé díhna nuu ní dánèhé ñáhã xii-ndo nacuaá ndùu tnùhu sã càháⁿ nacuaá naníhí tàhú-ó, núú xiãⁿ cùú-í dàtná tãtã-ndó. Te cuèi vâi vihi cue téé na quixi-güedé danèhé ñáhã-güedé xii-ndo tnùhu-gã dico ìⁿ dii-ni yúhú cùú-í téé díhna nuu-gã ní dánèhé ñáhã xii-ndo tnùhu-gã. ¹⁶Núú xiãⁿ càháⁿ-í dóho-ndo sã cãchícúⁿ nihnu-ndo càda-ndo nchaa nacuaá quide-í.

¹⁷Te xiãⁿ núu sa ní tendaha-í té Timùteú véxi coto ñaha-dé xii-ndo, te téé-ãⁿ ío cùu iní-í-dé te quide ndáá-dé, te cùu-dé dàtná déhe-í chi yúhú ní sanu ichi-í-dé ichi Xítóhó Jesucristú, te téé-ãⁿ cãchí tnùhu-dé xii-ndo nchãa nacuaá quide-í ndécú-í ichi-gã. Te diu-ni nacuaá na cãchí tnùhu-dé-ãⁿ diu-ni ducaⁿ quide-í nchaa xichí núú tàcã ñáyiú dàcuaha tnùhu Xítóhó Jesucristú. ¹⁸Te dava nchòhó ío quide cahnu-ndo mee-ndo chí sãni iní-ndó sã vã quixí-gã-í quixi coto ñaha-í xii-ndo. ¹⁹Dico núu mee Yã Ndiòxí ná cãchí-gã te ío ndíhi quixi coto ñaha-í xii-ndo, te dàvã-ãⁿ quini-í te núu nása quide nchaa ñáyiú ducaⁿ ío

xíquide càhnu mee-xi-ãⁿ ndécú-yu ichi Xítóhó Jesucristú. Te vã cáda cuèndá-í tnùhu càháⁿ-yu chí chiúⁿ quidé-yu cada cuèndá-í.

²⁰Te vitna yíndaha ñaha Yã Ndiòxí xii-o, te chindee ñaha-gã xii-o quide-o nchaa sá vâha sãni iní-ó quide-o te ñá díú mèe-ni sã càháⁿ-ó. ²¹Te ío chí cãní ìní núu ndè-dacãa sã vâha-gã cada-í òré ná quèxi-ó-í núú ndécú-ndó, núu sã ténãá ñáhã-í xii-ndo àdi sã càháⁿ ndíhi ñaha-í xii-ndo ndíhi tnùhu vii tnùhu vâha nacuaá cutnúní iní-ndó sã cúú iní ñáhã-í xii-ndo.

5

Èⁿ cuèchi càhnu vihi

¹Te yúhú sa ní ñihí ndáá-í tnùhu nacuaá cùu ndecu-ndo, chí ìⁿ téé ndècu ndíhi-ndo ndeca-dé ñáná chàhá-dé. Te xiãⁿ cúú-xí ìⁿ cuèchi càhnu vihi, chí ndéé nchaa ñáyiú ñá túú ndècu ichi Yã Ndiòxí cãchí-yu sã vã cúú tnàhí ducaⁿ càda-o. ²Te nchòhó ío quide cahnu-ni-ndo mee-ndo xíndecu-ndo! Te tàú-ndó sã cùndiyí-ndó ndixi cuèchi iní-ndó sã dúcãⁿ cùu ndecu-ndo ni cuu! Te téé ducaⁿ quide-ãⁿ xíni ñuhu-xi sã vã dáñã-gã-ndó ñihí tnàhá ndíhi ñaha-dé xii-ndo ní cùu dico ñá túú dùcaⁿ quide-ndo. ³Te yúhú ñá túú ndècu ndíhi ñaha-í xii-ndo dico dàtná tnùhu sã ndécú ndíhi ñaha-í xii-ndo chí ducaⁿ-ni ío ñuhu iní ñáhã-í xii-ndo. Te yúhú cãchí-í sã nãchãhu téé-ãⁿ cuèchi-dé sã dúcãⁿ quide-dé, te diu-ni ducaⁿ càháⁿ-í núú-ndó te núu dicó ndécú ndíhi ñaha-í xii-ndo. ⁴Te òré nãtácã-ndó càháⁿ ndíhi-ndo Yã Ndiòxí te diu-ni Xítóhó Jesucristú ñá túú dàña ndéé-gã chíndèe ñaha-gã xii-ndo, te òré-ãⁿ cada-ndo nacuaá cuini Xítóhó Jesucristú cada-ndo, te cada iní-ndó sã tnàhá-í ndécú ndíhi ñaha-í xii-ndo. ⁵Chí tàú-xi sã téé ducaⁿ quide-ãⁿ daquèe tíhú-ndó-dé, te ducaⁿ te sãcúíhã dandòho ñaha-xi xii-dé cuèi na cùú-dé, dico na sãá nduu te nduu táhú-dé cundecu-dé ndíhi Xítóhó Jesucristú.

⁶Te nchòhó ñá túú ndùu vâha-xi sã cãchí-ndó sã ío càhnu cuu-ndo. Te xini-ndó sã cuèi luha-ni levadürá ná quíhu yuchi cuáha pãá dándãa-xi cuèi luha-ni ná quíhu te ñihí-ni yuchi sãháⁿ ndoho-xi. Te ducaⁿ sãtnahã-xi cùu nchohó chí núu ndècu ndíhi-ndo ìⁿ ñáyiú quide sã ñà túú vâha te nchaa-ndo ñà túú-gã cúú vâha iní-ndó ndècu-ndo. ⁷Te xini ñuhu-xi sã cáda-ndó

dàtná quidé cuè ñáiyu quide vico pascuá, chi ñá túú chíhí-yu levadurá yuchi cuáha paa xéxi-yu nduu quidé-yu vico-áⁿ. Te sá quíhu paa-áⁿ cada iní-ó sã cúú-xí nchaa sá cuèhé sá dúhá ní xóo cada-ndo. Te vá cáda-gã-ndó ñi ñⁿ sá cuèhé sá dúhá, te ducaⁿ te cuu-ndo ñáiyu váha chi sa ní nduu ndoo ní nduu nine iní-ndó. Te cue mbéé cue quiti ní xóo cahni-güedé nduu pascuá cue quiti-áⁿ cada iní-ó sã cúú-güedé datná Xítoho Jesucristú nàcuáa ní xíhí-gá núú cùrúxí. ⁸Te núu xíãⁿ xíní ñùhu-xi sá vá cáda-gã-ndó ñi ñⁿ sá cuèhé sá dúhá sã ní xóo cada-ndo, te ní vá cúhúⁿ-gã iní-ndó te ní vá cáda-gã-ndó, te ní yùhu ní iní-ná-ndó cáda-ndo mee-ni sá váha.

⁹Te tutú sá sà ní dáquixí-í ndaha-ndo ní cachí-í sá vá ñihí tnáhá-ndó ndíhi cue ñáiyu ndècu ichi díí íní. ¹⁰Te sá dúcáⁿ cãháⁿ-í núú tütú ní dáquixí-í ndaha-ndo te vá cání iní-ndó sã yùhú cachí-í sá vá cúú-gã tnáhá tnúhu-ndo ndíhi cue ñáiyu ndècu ichi cuèhé ichi duha, ndíhi ñáiyu ndècu ichi díí íní, ndíhi ñáiyu xihò nchaa sá ìò ñuyú, ndíhi ñáiyu dùhu sá ndécú ndíhi tnaha ñáiyu-xi, ndíhi ñáiyu quide cahnu sá cachí-yu cùu ndióxí te ñá ndáá sá ndióxí cúú-xí chi dicó cue téé ñuyú-a ní cadúha nchaa xíãⁿ, chi núu ducaⁿ na cáda-ndo vá tnáhá tnúhu-gã-ndó ndíhi-yu te xini ñuhu-xi sá vá cùndècu-gã-ndó núú ndécú-yu. ¹¹Te ñá túú dùcaⁿ quee-xi nacuaá cãháⁿ-í núú tütú-í, chí yùhú cachí-í sá vá cúú tnáhá tnúhu-ndo ndíhi ñáiyu càchí sá ndécú ichi Xítoho Jesucristú te ñá ndáá sá ndécú-yu ichi-gá. Te núu cùu-yu ñáiyu ndècu ichi díí íní, àdi cuú-yu ñáiyu xihò nchaa sá ìò ñuyú-a, àdi cuú-yu ñáiyu quide cahnu nchaa sá cachí-yu cùu ndióxí te ñá ndáá chi dicó cue téé ñuyú-a ní cadúha nchaa xíãⁿ, àdi cuú-yu ñáiyu yiti yùhu-xi, àdi cuú-yu ñáiyu quíhu, àdi cuú-yu ñáiyu dùhu sá ndécú ndíhi tnaha ñáiyu-xi, te nchaa ñáiyu ducaⁿ càchí sá ndécú ichi-gá te ñá ndáá te ducaⁿ xiquidé-yu, te ní vá cúú ñihí tnáhá-ndó ndíhi-yu caxi-ndo ndíhi-yu. ¹²⁻¹³Te ñá díú yùhú cùu-í téé cáháⁿ cuendá nchaa ñáiyu ñá túú ndècu ichi Xítoho Jesucristú núu quide ndáá-yu àdi ñá túú quide ndáá-yu ndécú-yu, chi mee Yá Ndióxí cãháⁿ-gá te núu nása quidé-yu ndécú-yu.

Dico nchòhó chi tàu-ndó cáda cuendá-ndó núu nása quide cue ñáiyu ndècu ndíhi-ndo ichi Xítoho Jesucristú. Núu xíãⁿ xíní ñùhu-xi daquee tíhu-ndó téé ducaⁿ ñá túú quide váha ndècu ndíhi-ndo-áⁿ, te vá dáña-gã-ndó ñihí tnáhá ndíhi ñaha-dé xii-ndo.

6

Nàcuáa tàu-xi cada ñáiyu ndècu ichi Xítoho Jesucristú te núu ñá túú ndècu ndíhi váha tnáhá-yu

¹Te dava nchòhó òrè ñá túú ndècu ndíhi váha tnáha-ndo te cùyí-ndo cuáháⁿ-ndó núú cuè téé cùchiuⁿ ñá túú ndècu ichi Xítoho Jesucristú sácáⁿ cuèchi-ndo, te ñá túú dùcaⁿ taú-xi cada-ndo chi núú cuè téé ndècu ichi-gá ducaⁿ tàu-ndó quíhíⁿ-ndó càcáⁿ cuèchi-ndo. ²Te nchòhó sa nàha-ndo sá ncháá ñáiyu cùu cuendá Yá Ndióxí sáá nduu cãháⁿ-yu te núu ní quide ndáá nchaa dava-gá ñáiyu àdi ñá túú ní quide ndáá-yu, te nchòhó tnáhá-ndó cùu-ndo ñáiyu ducaⁿ cãháⁿ, te núu ducaⁿ te cutnùní iní-ndó sã ndácú-ndó cáda ndáá-ndó nchaa cuèchi sá ñá túú ùhú cundáá vitna ndècu-ndo ñuyú-a. ³Te nchòhó sa nàha-ndo sá ncháá ndéé cue espíritú xínú cuèchi núú Yá Ndióxí sáá nduu cãháⁿ-ó te núu nása quide-xi ndècu-xi. ¡Núu xíãⁿ cùtnùní iní-ó sã úuⁿ-gã ndacu-ò cáda ndáá-ò nchaa cuèchi sá ìò ñuyú-a! ⁴Te núu ìò dava-ndo ìò nása cùu ndècu-ndo te xínáa-ndó, te vá quíhíⁿ-ndó càcáⁿ cuèchi-ndo núú cuè téé ndèhe-ndo sá ñá túú ndècu-güedé ichi Yá Ndióxí, dico nchòhó chí da núú cuè téé-áⁿ cuáháⁿ-ndó sácáⁿ cuèchi-ndo. ⁵Te duha cãháⁿ-í cuendá cucahaⁿ quíhíⁿ-ndó chí ñá túú quide váha-ndo sã dúcáⁿ quide-ndo. ⁶Te náa dicó-ná ñá túú tnáhi ñⁿ téé cùtnuní iní-xi nàcuáa cada ndáá cuèchi-ndo ndècu ndíhi-ndo ichi Xítoho Jesucristú-ãⁿ? ⁷Te nchòhó, ñá túú quide váha-ndo, chí dava-ndo cuáháⁿ-ndó núú cuè téé ñá túú ndècu ichi Xítoho Jesucristú sácáⁿ cuèchi-ndo cuendá dava-gá cue ñáiyu ndècu ndíhi-ndo ichi-gá.

⁷Te ñá túú quide váha-ndo sã dúcáⁿ náa ndíhi tnáha-ndo te cuáháⁿ-ndó sácáⁿ cuèchi-ndo, te váha-gá sá cáda cahnu iní-ndó cuéí nándi na cáda ñaha tnaha ñáiyu-ndo xii-ndo cuéí dùhú-yu sá ndécú ndíhi-ndo dico cada cahnu-ni iní-ndó. ⁸Dico nchòhó chí ñá túú quide cahnu

iní-ndó chi da uuⁿ-gá ñá túú quide váha-ndo sàcúú-xí tñaha ñáyi-ndo, chi cùu úhú iní-ndó-yu, te dùhu-ndó-yu, te ndéé méé-ndó nàcuáa ndècu-ndo ichi Xítóhó Jesucristú ducaⁿ quide tñaha-ndo.

⁹ Te nchòhó sa nàha-ndo sá ncháá ñáyi-ndo ichi cuehé ichi duha vá ndúú tǎhǔ-yu cundecú-yu núú ndécú Yá Ndióxi táxi tñuní-gá, núú xǎⁿ vá cání iní-ndó sá ñáyi-áⁿ nduu tǎhǔ-yu cundecú-yu ndihí-gá. Te ni cuè ñáyi-ndo ichi díí iní, te ni cuè ñáyi-ndo quide cahnu nchaa sá cǎchí-yu cùu ndióxi te ñá ndáá chi dicó cue tée ñuyúú-a ní cadúha nchaa xǎⁿ, te ni cuè tée cǎháⁿ ndihí ñadíhí te ñá díú ñadíhí-güedé cùú-yu, te ni cuè ñáyi-ndó cǎháⁿ ndihí tée te ñá díú yǎⁿ-yu cùu-güedé, te ni cuè tée cǎháⁿ ndihí tñaha tée-xi, ¹⁰ te ni cuè ñáyi-ndó dùhu, te ni cuè ñáyi-ndó sá ndécú ndíhí tñaha ñáyi-xi, te ni cuè ñáyi-ndó quíhu, te ni cuè ñáyi-ndó cǎháⁿ úhú, te ni cuè ñáyi-ndó dǎnícuehé tñaha ñáyi-xi te dùhu ñahá-yu, te ni ñáⁿ cue ñáyi-ndó duha xǐquide vá ndúú tǎhǔ-yu cundecú-yu núú ndécú Yá Ndióxi táxi tñuní-gá. ¹¹ Te dava nchòhó ducaⁿ ní xóo cada-ndo ni cùu, te vitna ní cuu-ndo ñáyi-ndó sa ní nduu ndoo ní nduu nine iní-xi, te ní cuu-ndo ñáyi-ndó cùu cuendá Yá Ndióxi, te ní cuu tucu-ndo ñáyi-ndó ñá túú-gǎ cuéchi-xi ndècu núú-gǎ. Te ducaⁿ ní quide ñaha Yá Ndióxi xii-ndo sá váha sá cuendá Xítóhó Jesucristú, te ní ngúndecu ndíhí-ndo Espíritú Yá Ndióxi.

Nàcuáa nduu cuendá yiqui cùú-ó

¹² Te cǎchí ñáyi-ndó sá ncháá sá sání iní-ó cuu cada-o, te ndáá cǎháⁿ-yu dicó-ni sá ñá ncháá cùu-xi sá váha sá cùú-xí-ó. Te núú cuíní nchaa sá sání iní-ó-áⁿ taxi tñuní ñahá-xí te vá cadá-ó. ¹³ Te nchòhó sa xíní-ndó sá ncháá sá xéxi-ó cuǎnguee-xi xití-ó, te xití-ó ní cuáha tñahí-xi sá cùhúⁿ nchaa sá cǎxí-ó, dico xití-ó ndíhí nchaa sá xéxi-ó chi naa-xi. Te Xítóhó Jesucristú néhé cuendá-gǎ yiqui cùú-ó, te ducaⁿ yiqui cùú-ó cùu-xi cuendá-gǎ, te ñá túú ní cuáha yiqui cùú-ó sá cùndècu-xi ichi díí iní. ¹⁴ Te dátñá ní quide Yá Ndióxi ní dándótó-gǎ Xítóhó Jesucristú ducaⁿ cada ñaha-gǎ xii nchoo tucu chi dandòto ñaha-gǎ xii-o núu na cùú-ó, chi ndàcu-gǎ quidé-gǎ nchaa sá váha.

¹⁵ Te nchòhó sa nàha-ndo sá yiqui cùú-ó cùu-xi cuendá Xítóhó Jesucristú chi ñáⁿ-ni cùu-ó ndihí-gǎ, núú xǎⁿ ñá túú tñahí nduu váha-xi cǎháⁿ ndihí-o ñáyi-ndó ichi díí iní, chi yiqui cùú-ó cùu-xi cuendá Xítóhó Jesucristú, te núu ducaⁿ na cada-o te cada iní-ó sá cuendá-ñá ñáyi-áⁿ cùú yiqui cùú-ó, núu xǎⁿ ñá túú tñahí nduu váha-xi ducaⁿ cada-o. ¹⁶ Te sa xíní-ndó sá núu ñáⁿ tée na cǎháⁿ ndihí-dé ñáⁿ ñadíhí ndécú ichi díí iní te cada iní-ó sá ñáⁿ-ñá yiqui cùú-ó. Te ducaⁿ cǎháⁿ-xi núú tütú Yá Ndióxi núú cǎchí-xi: “Ñáⁿ tée na cǎháⁿ ndihí-dé ñáⁿ ñadíhí te ñáⁿ-ñá yiqui cùú-ó”, duha cǎchí-xi. ¹⁷ Te ducaⁿ sǎtnahá-xi cùu nchaa ñáyi-ndó tñaha ndíhí Xítóhó Jesucristú, chi ñáⁿ-ñá cùú-ó ndihí-gǎ.

¹⁸ Te núu xǎⁿ cǎháⁿ-í dóho-ndo sá vá cùndècu-ndo ichi díí iní, chi núu ducaⁿ na cada-ndo te ñá túú tñahí sá váha cùu-xi sá cùú-xi yiqui cùú-ndó chi ío dǎcuíta nihnu-xi yiqui cùú-ndó. Te nchaa dava-gǎ sá cuéhé sá dúhá ñá túú quide-xi yiqui cùú-ndó dátñá quidé xǎⁿ. ¹⁹ Te nchòhó sa cùtñuní iní-ndó sá yiqui cùú-ndó cùu-xi dátñá ñáⁿ vehe núú ndécú Espíritú Yá Ndióxi. Te ducaⁿ sǎtnahá-xi cùu yiqui cùú-ndó chi ndècu-ndo ndíhí Espíritú-gǎ. Te mee-gǎ ní taxi-gǎ Espíritú-gǎ ndécú ndíhí-ndo, te ñá díú mée-ndo cuu cuendá-ndó mée-ndo chi Yá Ndióxi cùú cuendá ñahá-gǎ xii-ndo. ²⁰ Te ducaⁿ cùu-ndo ñáyi-ndó cuu cuendá Yá Ndióxi chi Xítóhó Jesucristú ní nacháhu-gǎ nchaa yíca cuéchi-ndo. Te núu xǎⁿ xíní ñáhu-xi sá ñáⁿ ní ndúú-ndó cada-ndo nacúáa cuu cǎhnu Yá Ndióxi, te ducaⁿ táu-xi cada-ndo chi espíritú-ndó ndíhí yiqui cùú-ndó cùu-xi cuendá-gǎ.

7

Sáhu sá cùú-xi ñáyi-ndó ní nándaha

¹ Te ní quexío tutú sá ní dáquixí-ndó ndáha-í, te vitna na cǎchí tñúhu-í xii-ndo cuendá tñúhu cǎháⁿ-ndó núú tütú-ndó. Te váha cada-xi te núu vá cándèca tée ñadíhí, te ducaⁿ-ni váha cada-xi te núu ñáyi-ndó díhí vá cándècá-yu tée. ² Te dicó-ni sá núu ducaⁿ na cada-ndo te dava-ndo càní iní-ndó cùndècu-ndo ichi díí iní. Núu xǎⁿ xíní ñáhu-xi sá ncháá cuè tée ndí dííⁿ cùndècu ñadíhí-güedé, te ducaⁿ-ni

tùcu nchaa cue ñáyiú ðíhí ndí ðíí cùn-decu yíi-yu. ³ Te cächí tnúhu-í xii-ndo sã ncháá cuè téé vá cúú cächí-güedé sã vá cúú cãháⁿ ndíhi-güedé ñadíhí-güedé, te ðiu-ni ducaⁿ cuè ñáyiú ðíhí tucu, vá cúú cächí-yu sã vá cúú cãháⁿ ndíhí-yu yíi-yu. ⁴ Te nchaa cue ñáyiú ðíhí chi ñá ðíú mèe-ní-yu cùu cuendá-yu yiqui cùnú-yu chi tnàhá cúú cuendá yíi-yu, te ducaⁿ-ni nchaa cue téé tucu chi ñá ðíú-ní mèe-güedé cúú cuendá-güedé yiqui cùnú-güedé chi tnàhá cúú cuendá cue ñadíhí-güedé. ⁵ Te cue téé vá cúú cächí-güedé sã vá cúú cãháⁿ ndíhi-güedé ñadíhí-güedé. Te ni cuè ñáyiú ðíhí vá cúú cächí-yu sã vá cúú cãháⁿ ndíhí-yu yíi-yu. Àdi te núu ní ndatnúhu-yu sã vá dúcáⁿ càdá-yu ìíⁿ úú nduu cuendá sã cuíní-yu ío cãháⁿ ndíhí-yu Yá Ndiòxí, dico nã yáha núu ná daha nduu ducaⁿ ní ndatnúhu-yu sã vá dúcáⁿ càdá-yu te naníhí tnàhá tucú-yu, chi núu ñáhá te cudana te vá cuacàhnu iní-yu te sácuihná dacàháⁿ ñáhá-xí xii-yu cadá-yu sã ñá túú tàú-yu cadá-yu.

⁶ Te tnúhu cãháⁿ-í-a quèe-xi sã téé ndíhi ñadíhí cuu candeca tnàhá-yu dico ñá túú quide yica-í sã dúcáⁿ càdá-yu. ⁷ Te yúhú sání iní-í sã núu ðicó sã cúú te nchaa-ndo cùn-decu-ndo datná ndécú-í, dico ñáhá chi mee Yá Ndiòxí ní cächí-gã nàcuáa nduu táhú-ó ìíⁿ ìíⁿ-o cundecu-o, chi dava-o ní cutáhú-ó núú-gã sã cundècu ñadíhí-ó te dava-o ñáhá. ⁸ Te cächí tnúhu-í xii nchòhó cue téé vátá ñíhí-gã ñadíhí-xi sã váha-gã sã núu vá cundècu ñadíhí-ndó ðatná yúhú. Te ducaⁿ-ni nchòhó cue ñáyiú ðíhí ñáyiú vátá ñíhí-gã yíi-xi sã váha-gã sã núu vá cundècu yíi-ndo. Te ðiu-ni duha cãháⁿ-í sã cúú-xí nchàa nchòhó ñáyiú ðíhí ní quendó quèé sã váha-gã sã núu vá cándèca-gã-ndó téé. ⁹ Te cächí tnúhu-í xii nchaa-ndo sã núu xito-ndo sã vá cundèe iní-ndó cundecu mee-ndo te váha-gã sã núu tnándaha-ndo, te ñá ðíú sã mèe-ní càni cuehé cani duha iní-ndó cundecu-ndo.

¹⁰ Te nchaa nchòhó ñáyiú sa ní tnándaha cãháⁿ-í dóho-ndo, te ñá ðíú mèe-í duha càhu iní-í cãháⁿ-í dóho-ndo chi Xítohó Jesucristú ducaⁿ dàcahu iní ñáhá-gã xii-í, chi mee-gã cuíní-gã cada-ndo nàcuáa na

cãháⁿ-í-a. Te nchaa nchòhó cue ñáyiú ðíhí cãháⁿ-í dóho-ndo sã vá dáñá-ndó yíi-ndo. ¹¹ Te núu ío dava-ndo sã ní dáñá-ndó yíi-ndo, te xini ñuhu-xi sã vá cándèca-gã-ndó téé, chi cundecu mee-nã-ndó àdi núu ñáhá te naqueheⁿ tucu-ndo téé ní cuu yíi-ndo. Te nchaa nchòhó cue téé ndècu ñadíhí-xi cãháⁿ-í dóho-ndo sã vá dáñá-ndó ñáyiú cùu ñadíhí-ndó.

¹² Te tnúhu na cãháⁿ-í-a cùu-xi sã ní sani iní mèe-í te ñá ðíú tnúhu sã ní cächí Xítohó Jesucristú cãháⁿ-í cúú-xí. Te núu dava nchòhó cue téé ndècu ichi Xítohó Jesucristú ndécá-ndó ñáyiú ðíhí ñáyiú ñá túú ndècu ichi-gã, te vá dáñá-ndó-yu te núu cùu váha iní-yu ndèca ñáhá-yu xii-ndo. ¹³ Te núu dava nchòhó cue ñáyiú ðíhí ñáyiú ndècu ichi Xítohó Jesucristú ndécá-ndó cuè téé ñá túú ndècu ichi-gã te vá dáñá-ndó-güedé te núu cùu váha iní-güedé ndécá ñàha-güedé xii-ndo. ¹⁴ Te núu ìíⁿ téé ñá túú sàndáá iní-í Xítohó Jesucristú te ñadíhí-dé sàndáá iní ñáhá-án xii-gã, te téé-án ní cuu-dé ìíⁿ téé sa ní cuyatni tnàhá tnúhu ndíhi ñàha xii-gã sã cuendá ñadíhí-dé. Te ducaⁿ sãtnahá-xi cùu tucu ñadíhí ñá túú sàndáá iní ñáhá xii Xítohó Jesucristú te yíi-aⁿ sàndáá iní ñáhá-dé xii-gã, te ñàha-ánⁿ sa ní cuyatni tnàhá tnúhu-aⁿ ndíhi-gã sã cuendá yíi-aⁿ, te ðiu-ni ducaⁿ sãtnahá-xi cùu cue landú-yu chi sa ní cuyatni tnàhá tnúhu-güexi ndíhi-gã. Te núu vá dúcáⁿ cùu te cue landú-yu-ánⁿ ío xica cundecu-güexi núú-gã. ¹⁵ Te núu ìíⁿ téé ñá túú sàndáá iní ñáhá xii Xítohó Jesucristú cuíní-dé ðaña tnàha-dé ndíhi ñadíhí-dé ñàha sàndáá iní ñáhá xii Xítohó Jesucristú, te ðiu-ni na càda-dé nàcuáa sàni iní-dé. Te ðiu-ni ducaⁿ tucu te núu ñadíhí ñàha ñá túú sàndáá iní ñáhá xii Xítohó Jesucristú cuíní-aⁿ ðaña-aⁿ téé sàndáá iní ñáhá xii-gã, téé cùu yíi-aⁿ te ðiu-ni na càda-aⁿ nàcuáa sàni iní-aⁿ. Chi téé sàndáá iní ñáhá xii Xítohó Jesucristú ñá túú tàú-dé cada yica-dé ñadíhí-dé cundecu ndíhi ñàha-aⁿ xii-dé te núu ñá túú cuíní-aⁿ. Te ðiu-ni ducaⁿ ñadíhí ñàha sàndáá iní ñáhá xii-gã ñá túú tàú-aⁿ cada yica-aⁿ cùn-decu ndíhi ñàha yíi-aⁿ xii-aⁿ te núu ñá túú cuíní-dé cundecu ndíhi ñàha-dé xii-aⁿ, chi Yá Ndiòxí cuíní-gã sã ncháá nchòhó ñáyiú ndècu ichi-gã cundecu váha-o vá nãá-ó.

¹⁶ Chi cue tée sàndáá iní tnúhu Xítoho Jesucristú ñá túú cùtnuní iní-güedé te núu ndacu-güedé canu ichi-güedé ñadìhí-güedé ichi-gá àdi ñáhá te núu ñá túú sàndáá iní ñáhá-yu xii-gá, te ducaⁿ-ni cué ñáiyu dìhí sàndáá iní tnúhu Xítoho Jesucristú ñá túú cùtnuní iní-yu te núu ndacú-yu canu ichí-yu yí-yu ichi-gá àdi ñáhá te núu ñá túú sàndáá iní ñáhá-güedé xii-gá.

¹⁷ Te duha na càchí tnúhu-í xii-ndo, nchaa chiúⁿ ní nduu táhú-ndó núú Yá Ndióxi quidé-ndó ndéé cùtnàhá ní cáháⁿ ñáhá-gá xii-ndo ní natuha-ndo ichi-gá te ñu-ni chiúⁿ-áⁿ cada-ndo cùndecu-ndo. Te nchaa xichi núú tàcá ñáiyu dàcuaha tnúhu-gá ñu-ni duha càháⁿ-í dóho-yu. ¹⁸ Te nchaa cue tée ndècu seña ñii-xi datná ní cachi ndí Moisés, cue tée ní cáháⁿ Yá Ndióxi ndécú ichi-gá, te ñu-ni ducaⁿ cùnduu-güedé cundecu-güedé, te nchaa cue tée ñá túú ndècu seña ñii-xi ní cáháⁿ-gá cundecu ichi-gá, ñu-ni ducaⁿ cùnduu-güedé cundecu-güedé vá cuáha-güedé seña ñii-güedé. ¹⁹ Te ñiⁿ-ni cùu-xi cuéi na cuáha-o seña ñii-o àdi vá cuáha-o. Te sá ño-gá xíní ñuhu-xi cada-o xiáⁿ cúu-xí sá cáda-ó ncháa nacuaá cuiní Yá Ndióxi. ²⁰ Chi xini ñuhu-xi sá cùndecu-ni-o datná ndécú-ó cùtnàhá ní cáháⁿ ñáhá Yá Ndióxi xii-o ní ngùndecu-o ichi-gá. ²¹ Te núu cùu-ndo ñáiyu ñá túú tnàhí dàná quee núú chíúⁿ patróoⁿ-xi cùtnàhá ní cáháⁿ ñáhá Yá Ndióxi xii-ndo, te ñá túú ñá cani iní-ndó, dico núu dàña ñaha patróoⁿ-ndó quee-ndo núú chíúⁿ-ndó te váha-ni quee-ndo núú chíúⁿ-ndó. ²² Te sáta ní cáháⁿ ñáhá Xítoho Jesucristú xii nchòhó ñáiyu ducaⁿ ñà túú tnàhí dàná quee núú chíúⁿ patróoⁿ-xi-áⁿ, te ní cuu-ndo datná ñáiyu dàná queé núú chíúⁿ patróoⁿ-xi sá cúu-xí-gá, te ducaⁿ chi ñá túú-gá ndécú-ndó ichi cuehé ichi duha. Te nchòhó ñáiyu dàná queé núú chíúⁿ patróoⁿ-xi cùu-ndo datná ñáiyu ñá túú tnàhí dàná quee núú chíúⁿ patróoⁿ-xi sá cúu-xí Xítoho Jesucristú, te ducaⁿ chi xinu cuechi-ná-ndó núú-gá. ²³ Te Yá Ndióxi ní nduu cuendá ñáhá-gá xii-o chi Xítoho Jesucristú ní nacháhu-gá nchaa yíca cuechi-o sá ndécú núú Yá Ndióxi ní cùu, te vá dàná-ndó sá tnàha ñáiyu-ndo nàdatuhú iní ñáhá-yu xii-ndo vá cúnú cuechi-ndo núú Xítoho Jesucristú nacuaá tàxi-xi cunduu. ²⁴ Te núu xiáⁿ càchí tnúhu-í xii nchaa nchòhó ñáiyu ndècu ndìhí-í ichi Xítoho Jesucristú sá cùndecu-ni-ndo datná-ni ndècu-ndo ndéé

cùtnàhá ní cáháⁿ ñáhá-gá xii-ndo, te diu-ni ducaⁿ cùndecu-ndo ichi-gá.

²⁵ Te càchí tnúhu tucu-í xii-ndo sá Xítoho Jesucristú ñá túú càchí tnúhu-gá xii-í núu nása cáháⁿ-í cuendá nchaa ñáiyu vátá tnàndaha-gá. Te duha sàni iní-í cáháⁿ-í cuendá-yu, te nchòhó cuu quíndáá iní-ndó tnúhu càháⁿ-í chi Xítoho Jesucristú chíndèe chitúu ñaha-gá xii-í. ²⁶ Te yúhú càchí-í sá sá cuendá nchaa tnúndòho tnúhu ndáhú ío ñuyú-a vitna, te váha-gá sá ncháá ñáiyu te núu nása xíndecu-yu te ducaⁿ-ni na cùndecú-yu. ²⁷ Te nchaa cue tée ndècu ñadìhí-xi te ducaⁿ-ni na cùndecu-güedé ndìhí-yu, te nchaa cue tée ñá túú ñadìhí-xi te ducaⁿ-ni na cùnduu-güedé vá ndúcú-güedé ñadìhí-güedé. ²⁸ Dico nchaa cue tée na ndùcu ñadìhí-xi te ñá dúú ñiⁿ cuechi cùu-xi sá dúcáⁿ ná ndùcu-güedé ñadìhí-güedé, te ñu-ni ducaⁿ cùu tucu cue ñáiyu dìhí te núu na ñihí-yu yí-yu chi ñá dúú ñiⁿ cuechi cùu-xi sá dúcáⁿ ñihí-yu yí-yu. Te núu cue tée na ñihí-güedé ñadìhí-güedé te nándi ndohó-yu cundecú-yu ñuyú-a, te núu xiáⁿ duhá càháⁿ-í cuendá sá vá ndúcú-güedé ñadìhí-güedé cuendá sá vá ndóhó-yu.

²⁹ Te nchaa nchòhó ñáiyu ndècu ndìhí-í ichi Xítoho Jesucristú na càchí tnúhu-í xii-ndo sá ñá túú-gá vai nduu cumání te quixi tucu Xítoho Jesucristú, núu xiáⁿ xíní ñuhu-xi sá ndéé vitna ngúita nchaa cue tée ndècu ñadìhí-xi cada-güedé chiúⁿ Xítoho Jesucristú, te cada-güedé datná sá ñá túú ñadìhí-güedé. ³⁰ Te nchaa ñáiyu ndìhú iní-xi te na cáda-ní-yu sá ñá túú ndìhú iní-yu cada-yu chiúⁿ Yá Ndióxi. Te nchaa ñáiyu cùdíí iní-xi te na cáda-ní-yu sá ñá túú cùdíí iní-yu cada-yu chiúⁿ-gá, te nchaa ñáiyu ndècu ndìhí nándi sá ndécú ndìhí te na cáda-ní-yu sá ñá túú ñá ndécú ndìhí-yu cada-yu chiúⁿ-gá. ³¹ Te nchaa ñáiyu nèhe chiúⁿ nchaa sá ío ñuyú-a te na cáda-ní-yu cuendá sá ñá túú ñá nèhé chiúⁿ-yu cada-yu chiúⁿ Yá Ndióxi, chi nchaa sá ío ñuyú-a sa ñuhu-xi ichi cuáháⁿ-xi núú ndìhí ñihu-xi.

³² Te cuiní-í sá vá chúhúⁿ iní-ndó nándi sá ío ñuyú-a, te ni ñá túú tnàhí ná cani iní-ndó cùndecu-ndo, chi nchaa cue tée ndècu ichi Xítoho Jesucristú xíndecu mee ío ñuhu iní-güedé cada-güedé chiúⁿ-gá

nàcuáa cudü-güedé núu-gã. ³³ Te nchaa cue tée sa ndècu ñadìhí-xi cue tée ndècu ichi-gã ñuhu iní-güedé nàcuáa cada-güedé cundecu-güedé ñuyú-a cuendá ducaⁿ cudü-güedé núu ñadìhí-güedé. ³⁴ Te diu-ni ducaⁿ cùu tucu cue ñáyiu ñíhí chi ñá túú ñíⁿ-ni cuu ñáyiu sa ndècu yíi-xi ndíhí ñáyiu vátá cündècu-gã yíi-xi, chi ñáyiu ndècu ichi Xítohó Jesucristú ñá túú ndèca tée ío ñuhu iní-yu cadá-yu chiúⁿ-gã nàcuáa ñíhí ní ndúú-yu cundecu yíñùhú-yu núu Yá Ndióxi, dico cue ñáyiu ñíhí ndécá tée ndècu ichi-gã ío ñuhu iní-yu nàcuáa cundecú-yu ñuyú-a cuendá cudü-yu núu yí-yu.

³⁵ Te duha càháⁿ-í cuendá cúu-xí ñíⁿ sá vaha xii-ndo, te cudü núu tñáhá-ndó, te cuu-ndo ñáyiu cada ndáá núu Xítohó Jesucristú, te mee-ni-gã cuhuⁿ iní-ndó. Te ñá díú sã dúhá càháⁿ-í te quide yica-í sá cadá-ndó nàcuáa càháⁿ-í.

³⁶ Te núu ío dava-ndo sàni iní-ndó sã ñá túú ndüu vaha-xí sá ío cuu sacuéhé ðhe yoco-ndo cundecú-yu ña, te núu sàni iní-ndó sã vaha-gã candecá-yu tée te cada-ndo nàcuáa sàni iní-ndó, chi ñá díú ñíⁿ cuéchi cùu-xi. ³⁷ Te núu dava-ndo ndècu ðhe yoco-ndo, te vá yóo ñíⁿ cada yica ñaha xii-ndo sá candecá-yu tée. Te núu mee-ndo sàni vaha iní-ndó nàcuáa cada-ndo, te núu vá dásáⁿ-ndó ðhe yoco-ndo càndeca ñaha tée te quide vaha-ndo sã dúcáⁿ quide-ndo. ³⁸ Te nchaa ñáyiu dàsaⁿ ðhe yoco-xi càndeca ñaha tée te vaha-ni quidé-yu, te nchaa ñáyiu ñá túú dàsaⁿ ðhe yoco-xi càndeca ñaha tée te vaha-gã tucu quidé-yu sá dúcáⁿ quidé-yu.

³⁹ Te nchaa ñáyiu ñíhí ndécú yíi-xi xini ñuhu-xi sá cündècu-ní-yu ndíhí yíi-yu nini ndècu vívü-güedé chi ducaⁿ càháⁿ tñuhu sá dánèhé ñáhá xii-o nacúáa cada-o cündècu-o, dico núu na cùu-güedé te cuu naquehéⁿ-yu ingá tée candecá-yu dicó-ni sá diu-ni tée ndècu ichi Xítohó Jesucristú. ⁴⁰ Te yúhú sání iní-í sá ío-gã vaha cundecú-yu te núu vá nándúcú-yu ingá tée candecá-yu, te duha càháⁿ-í chi Espiritú Yá Ndióxi ducaⁿ dàcahu iní ñáhá-xí xì-í càháⁿ-í.

8

Cuendá nchaa sá nchító-ó sãñaha ñáyiu

ndüu táhú nchaa sá càchí-yu cùu ndióxi

¹ Te vitna na càháⁿ-í cuendá nchaa sá nchító-ó sãñaha ñáyiu ndüu táhú nchaa sá càchí-yu cùu ndióxi te ñá ndáá chi dicó ndaha cue tee ñuyú-a ní cuáha nchaa xíáⁿ. Te nchoo sa cùtnuní vaha iní-ó cuendá nchaa xíáⁿ, dicó-ni sá cuendá nchaa sá cùtnuní vaha iní-ó xíáⁿ quidé càhnu-o mee-o, dico núu cùu iní-ó tñaha ñáyiu-o te canu ichi-ò-yu ichi vaha. ² Te núu dava-ndo sàni iní-ndó sã tñaha-ndo dico cùu-ndo ñáyiu vátá cütñuha-gã nàcuáa tàú-xi cunduu. ³ Te núu nchòhó cúu iní-ndó Yá Ndióxi te mee-gã càháⁿ-gã sá cúu-ndó ñáyiu cùu cuendá-gã.

⁴ Te vitna na càchí tñuhu-í xii-ndo nàcuáa ndüu cuendá nchaa sá nchító-ó sãñaha ñáyiu ndüu táhú nchaa sá càchí-yu cùu ndióxi te ñá ndáá chi dicó ndaha cue tee ñuyú-a ní cuáha nchaa xíáⁿ. Te nchoo cùtnuní iní-ó sã ncháá sã càchí ñáyiu cùu ndióxi cadüha-yu ñuyú-a ñá túú cùu-xi ndióxi, chi ñíⁿ díí-ni Yá Ndióxi ndécú. ⁵ Te cue ñáyiu ñuyú-a càchí-yu sá cuéi andü te cuéi ñuyú-a ndècu titní ndióxi. Te ndáá sã ndèni ní cuu ndècu espiritú sá càchí ñáyiu cùu ndióxi te ñá ndáá sã ndióxi cúu-xí, te nchaa xíáⁿ táxi tñuní ñáhá-xí xíi-yu. ⁶ Te nchoo cùtnuní ndáá iní-ó sã ñíⁿ díí-ni Yá Ndióxi ndécú te diu-gã cúu-gã Tátá-ó, te nchoo cùu-ò ñáyiu cùu cuendá-gã. Te diu-ni mee-gã ní táuchúⁿ-gã ní cuáha nchaa sá ío ñuyú-a, te cùtnuní tucu iní-ó sã ñíⁿ díí-ni Xítohó Jesucristú ndécú, te Yaá-áⁿ ní quide-gã nchaa chiúⁿ ní táhú Dütü Ndióxi ní cadüha-gã nchanda tñuhu sá ío ñuyú. Te diu-ni mee Xítohó Jesucristú quidé ndècu-o ichi-gã vitna.

⁷ Te ñá ncháá nchòhó ñáyiu ndècu ichi Xítohó Jesucristú cùtnuní iní-ndó nàcuáa ndüu tñuhu càháⁿ-í. Chi sa ní cáaⁿ-ndo quide cahnu-ndo nchaa sá càchí-yu cùu ndióxi ní cùu. Te cuendá xíáⁿ núu naquehéⁿ-ni-ndo nchaa sá nchító-ó ndüu táhú nchaa sá càchí-yu cùu ndióxi-áⁿ xéxi-ndó, te sàni-ni iní-ndó sã quidé càhnu-ndo nchaa sá càchí-yu cùu ndióxi-áⁿ te ñá ndáá sã ndióxi cúu-xí. Te núu sàni iní-ndó sã ñá túú vaha caxi-ndo sã dúcáⁿ ndüu táhú-xi-áⁿ te xéxi-ndo te xíáⁿ ñá túú cùu vaha iní-ndó cuendá sá dúcáⁿ quide-ndo. ⁸ Te ñá díú ncháa sá xéxi-ó quide-xi cudü-o núu Yá Ndióxi, chi ñíⁿ-ni quide-xi cuéi na càxi-ò àdi vá caxí-ó chi ni

ìn sá caxí-ó vǎ chindèe ñaha-xi cudü-o núú Yǎ Ndióxi. Te cuèi vǎ caxí-ó dico ñá díú xiǎ cada sá vǎ cudü-o núú-gǎ. ⁹ Te cuu-ni caxi-ndo nchaa nání ñihí-ndó. Te dicó-ni sá cada cuendá-ndó sǎ ñá díú cuendá sá xéxi-ndó-ǎ cuíta nihnu dava ñáyiú ndècu ndihí-ndo ichi Xítohó Jesucristú cadá-yu nándi sá cadǎ-yu nàcuáa vǎ cúú vǎha iní Yǎ Ndióxi chi ñáyiú-ǎ ñá túú cùtnuní iní-yu. ¹⁰ Te nchòhó ñáyiú xini vǎha cuendá nchaa sá cǎchí-yu cùu ndióxi, te núu na quèhí-ndó núú ndécú nchaa xiǎ te ngóo-ndo cǎxi-ndo nchaa sá ní cutáhú-xi, te quini ñáyiú ndècu ndihí-ndo ichi Xítohó Jesucristú, ñáyiú vátá cùtnuní-gǎ iní-xi nàcuáa ndùu cuendá nchaa sá dúcá cǎchí-yu cùu ndióxi-ǎ, te cuèi sání iní-yu sá ñá túú quide vǎha-ndo sǎ dúcá quide-ndo te cudana te cada yicá-yu caxi-yu tñahá-yu nchaa sá dúcá ní nduu táhú nchaa sá cǎchí-yu cùu ndióxi-ǎ te ñá ndàá sá ndiόxi cúú-xí. ¹¹ Te núu duca cùtnuní iní-ndó nàcuáa ndùu cuendá nchaa xiǎ te duca quide-ndo, te sá dúcá quide-ndo-ǎ te dacuíta nihnu-ndo dǎva-gǎ ñáyiú ndècu ndihí-ndo ichi Xítohó Jesucristú, ñáyiú vátá cùtnuní-gǎ iní-xi nàcuáa ndùu cuendá nchaa xiǎ, te ñá cuendá tñahá ñáyiú-ǎ ní xihí Xítohó Jesucristú. ¹² Te sá dúcá quide-ndo-ǎ cúú-xí ìn cuèchi núú Xítohó Jesucristú, chi quide-ndo nacuáa xínu iní-yu cadá-yu ìn sá sání iní-yu ñá túú vǎha, núu xiǎ ñá túú quide vǎha-ndo sǎ cúú-xí-yu. ¹³ Te núu yúhú cùtnuní iní-í sá sǎ cuendá ìn sá caxí-í te ngóo ìn ñáyiú ndècu ndihí-í ichi Xítohó Jesucristú cadá-yu ìn sá vǎ cúú vǎha iní Yǎ Ndióxi, te vǎha-gǎ sá vǎ caxí-gǎ-í xiǎ cuendá sá vǎ cadǎ-yu ìn sá vǎ cúú vǎha iní-gǎ.

9

Nchaa sá cúú cada cue téé ní táuchúú
 Xítohó Jesucristú cǎhá tñúhu-gǎ

¹ Te yúhú chi cuu cada-í nchaa sá sání iní-í, chi tñahá-í ní táuchúú Xítohó Jesucristú cǎhá-í tñúhu-gǎ núú ñáyiú. Te yúhú ní xini núú-í Xítohó Jesucristú Yáa cúú Xítohó-ó te nchòhó cúú-ndó ñáyiú ní sándáa iní tñúhu-gǎ sá cǎhá-í te duca chi ndècu ndihí-í-gǎ. ² Te ló dava ñáyiú ñá túú sándáa iní-yu sá Xítohó Jesucristú ní táuchúú-gǎ cǎhá-í tñúhu-gǎ, dico nchòhó chi cùtnuní

ndáa iní-ndó sǎ díú-gǎ ní tendaha ñaha-gǎ xii-í xicá cùu-í cǎhá-í tñúhu-gǎ, te duca chi yúhú ní cǎhá-í tñúhu-gǎ núú-ndó te ní sándáa iní-ndó-gǎ te xiǎ cùtnuní sá díú-gǎ ní tendaha ñaha-gǎ xii-í xicá cùu-í cǎhá-í tñúhu-gǎ núú ñáyiú.

³ Te duha ndùu tñúhu cǎhá-í cuendá cundedóho nchaa ñáyiú sàtnuhu ñaha xii-í. ⁴ Chi yúhú cuu-ni caxi-í nchaa núú sá cúú cǎxi-o na taxi ñáyiú. ⁵ Te cuu-ni cundecu ñadìhí-í te caca ndeca-í-yu nchaa núú xicá cùu-í cǎhá-í tñúhu Yá Ndióxi dàtná quidé dǎva-gǎ cue téé cǎhá tñúhu-gǎ, ndihí cue téé cùu ñání Xítohó Jesucristú, ndihí té Pèlú. ⁶ Te tñahá yúhú ndihí té Bèé cuu dǎna-ndí chùu quide-ndí te cada-ndí dàtná xiquide dǎva-gǎ-güedé cǎhá-güedé tñúhu Xítohó Jesucristú. ⁷ Te nchoo xini-ó sǎ ncháa cuè sandadú dacuitíi sǎ núhú yǎhu-güedé xínu cuèchi-güedé, te ñá túú dicó duca xínu cuèchi-güedé. Te duca sǎtnahá-xi cùu tucu ñáyiú xitu ìn sá xítú chi dacuitíi ñihí-yu ìn sá xítú-yu xèxi-yu, te ñá díú dicó duca xítú-yu. Te duca cùu tucu cue téé cùu toli chi quèhni-güedé dícu quiti xito-güedé xihí-güedé te ñá túú dicó duca xito-güedé-di. ⁸ Te vǎ cání iní-ndó sǎ sǎ dúhá cǎhá-í te càhu iní mèè-í duha cǎhá-í, chi tñúhu cǎhá-í-a ìn-ni quèe-xi ndihí tñúhu ní cǎhá ndii Moisés. ⁹ Chi ndii-ǎ ní chídó tñuní ndii núú tütü ndii nàcuáa ní xáha Yǎ Ndióxi xii ndí, te cǎchí-xi: “Vǎ chíhí-ndó ñunu yuhu ndicutu oré dǎnchihí-di trùu”, duha cǎchí-xi núú tütü ndii. Te ñá díú sǎ dúcá ní cǎhá Yǎ Ndióxi te cǎhá-gǎ mee-ni cuendá ndicutu-ǎ. ¹⁰ Chi ní cǎhá-gǎ cuendá nchoo cuè ñáyiú ndècu ichi-gǎ, te ndáa sá díú cuendá-ó duca ní cǎhá-gǎ. Te nchaa cue téé xitu chíhí tatá sání iní-güedé sá díú tátá chíhí-güedé-ǎ cuu sá caxí-güedé, te ñá-ni duca cùu tucu cue téé xicani trùu chi cǎni-güedé cuendá quee caxi-güedé. ¹¹ Te duca sǎtnahá-xi cùu nchúhú cue téé cǎhá tñúhu Xítohó Jesucristú, chi dǎnehé ñahá-ndí xii-ndo cuendá nchaa sá vǎha quide ñaha Yá Ndióxi xii-o, núu xiǎ dai táu-xi sá nchòhó chindee ñaha-ndo xii-ndí núu ná cúú sǎ xini ñúhu-ndí. ¹² Te núu dava cue téé cǎhá tñúhu Yá Ndióxi chindèe-ndo-güedé, te uu-gǎ duca táu-ndó chindee-ndo nchúhú

cue tée ní sanu ichi ñaha xii-ndo ichi-gá.

Te cuèi tàú ndisa-ndo sã chindèe ñaha-ndo xii-ndí dico ñá túú ducaⁿ caháⁿ-ndí núú-ndó cada-ndo, te quide cahnu iní-ndí cuèi nándi sá tá yãha-ndí véxi. Te ducaⁿ quide-ndí cuendá sá ñà túú nã cani iní ñáyiu cuendá-ndí te ducaⁿ cuíta cuténuu-gá tnúhu sá cãháⁿ nãcuáa naníhí tãhú-ó quíhíⁿ. ¹³ Te nchòhó xini-ndó sã ncháá cuè tée xinu cuechi veñúhu ñiu-ni xiáⁿ nihi-güedé xéxi-güedé, te ñiu-ni cue tée-án xínú cuèchi-güedé núú xihí quiti ndúu tãhú Yã Ndiòxí, te ñiu-ni xiáⁿ nihi tucu-güedé sá xéxi-güedé. ¹⁴ Te ñiu-ni ducaⁿ sãtnhá-xi cùu nchúhú cue tée cãháⁿ tnúhu sá cãháⁿ nãcuáa naníhí tãhú-ó, chi Xítóhó Jesucristú ní cachí-gá sá díú-ní cuendá chiⁿ quide-ndí níhí-ndí caxi-ndí. ¹⁵ Te ñá ñⁿ ndúu cãháⁿ-í núú-ndó cada-ndo nacuaáa tãu-xi cunduu sá cúu-xi-í, te vá cãni iní-ndó sã sá dúhá cãháⁿ-í te ñⁿ sá xicãⁿ-í núú-ndó. jChi cuèi na cúu-í sá ndòhò-í te ñá díú sã cãháⁿ ñáyiu sá sã cuendá sã cãháⁿ-í tnúhu Xítóhó Jesucristú nihi-í xéxi-í!

¹⁶ Te yúhú ñá túú quide cahnú-í mée-í sá cãháⁿ-í tnúhu sá cãháⁿ nãcuáa naníhí tãhú-ó, chi tãu tnàhá-í sá càdà-í chi ducaⁿ ní cachí Yã Ndiòxí cada-í. jTe ndàhú ní cuu yúhú te núu vá cãháⁿ-í tnúhu-án!
¹⁷ Te ñá túú cãháⁿ-í tnúhu-gá sá cúu iní mée-í chi mee-gã ní táuchíúⁿ-gã cãháⁿ-í tnúhu-gá. Te núu cãháⁿ-í tnúhu-gá sá cúu iní mée-í te tãu-í níhí-í sá ndúú tãhú-í ní cuu. ¹⁸ Dico sá sã ní nduu tãhú-í cúu-xí sã ío cudíí iní-í sá dicó ducaⁿ cãháⁿ-í tnúhu sá cãháⁿ nãcuáa naníhí tãhú-ó. Te cuèi tãu-í queheⁿ-í sá táxi-ndó ndúu tãhú-í sá cuendá sã cãháⁿ-í tnúhu Xítóhó Jesucristú, dico ñá túú ducaⁿ quide-í. ¹⁹ Te sá dúcãⁿ dicó ducaⁿ cãháⁿ-í tnúhu sá cãháⁿ nãcuáa naníhí tãhú-ó, xiáⁿ ni ñⁿ ñáyiu ñuyú-a vá cúu càchi-yu sá táxi tnùní ñãhá-yu xii-í, te cuèi ducaⁿ dico mee-í ní sani iní-í sá cúu-í dàtná ñⁿ tée xinu cuechi núu ncháa ñáyiu cuendá ducaⁿ cuíta cuu vaí-yu tuhá-yu ichi Xítóhó Jesucristú quíhíⁿ. ²⁰ Te òré ñúhú tnàhí tnuú cue ñáyiu israèl te quide-í sá ñⁿ-ní cùu-í ndihí-yu cuèi ñá túú nchicúⁿ niñnu-í tnúhu ní cãháⁿ ndúu Moisés, te ducaⁿ quide-í cuendá sã ñáyiu-án quindáá iní-yu tnúhu cãháⁿ-í te tuhá-yu ichi Xítóhó Jesucristú. ²¹ Te òré ñúhú tnàhí tnuú ncháa ñáyiu ñá túú nchicúⁿ niñnu tnúhu ní

cãháⁿ ndúu Moisés, te quide-ni-í sá quidè-í dàtná quidè mée-yu cuendá quindáá iní-yu tnúhu cãháⁿ-í, te tuhá-yu ichi Xítóhó Jesucristú. Te cuèi ducaⁿ quide-í dico ñá túú dàña nde-í quidè-í ncháa nãcuáa cuiní Yã Ndiòxí cada-o, te ducaⁿ chi nchicúⁿ niñnu-í quidè-í ncháa nãcuáa cãháⁿ Xítóhó Jesucristú. ²² Te òré ndécú-í ndihí ncháa ñáyiu ñá túú cùtnuní váha iní-xi nãcuáa cundecu ichi Xítóhó Jesucristú, te tnàhá-í quidè-í dàtná quidè-yu cuendá sá ná tédòhò-yu ncháa tnúhu cãháⁿ-í te ducaⁿ cùtnuní-gá iní-yu nãcuáa cundecú-yu ichi-gá. Te nchaandi tũhú ñáyiu quide-í sá ñⁿ-ni cuu-í ndihí-yu cuendá ducaⁿ níhí-í nãcuáa cada-í te cundedòhò-yu tnúhu cãháⁿ-í te tní-yu ichi Xítóhó Jesucristú te naníhí tãhú-yu. ²³ Te duha quide-í cuendá sá cuíta quindáá iní-yu tnúhu sã cãháⁿ nãcuáa naníhí tãhú-ó quíhíⁿ, te ducaⁿ te tnàhá yúhú ío váha cundecu-í dàtná cãháⁿ tnúhu-án.

²⁴ Te nchòhó sa xini-ndó sã ncháá cuè tée xinu quíhu màrcúhyú ncháa-güedé xínú-güedé, dico ñⁿ-ni-dé cúú tée ndàcu ngodó núu te tée-án cúú tée níhí sá ndúú tãhú-xi, te ducaⁿ xini ñúhu-xi cada nchòhó tucu chi cada-ndo ncháa nacuaáa cuiní Yã Ndiòxí cada-ndo cuendá ducaⁿ níhí-ndó sã ndúú tãhú-ndó. ²⁵ Te ncháa cue tée xini dadiqui te váha váha quide cuendá-güedé núu ná cúú sá càdã tñèu te xòcani-güedé cuendá sã ñá díú xiãⁿ cada te cuíta-güedé òré dadiqui-güedé. Te ducaⁿ quide-güedé cuendá cuiní-güedé níhí-güedé sá ndúú tãhú-güedé, te sá ndúú tãhú-güedé-án cúu-xí ñⁿ sá ndihí niñnu ñuyú-a. Dico nchoo nducu ndee-o quide-o nacuaáa níhí-ó sã ndúú tãhú-ó, te xiãⁿ cudí-xi cundecu ndihí-o ñi caa ní quíhíⁿ. ²⁶ Te yúhú quidè-í dàtná quidè cuè tée xinu, chi cue tée-án xini-güedé núu quéxio-güedé, te quide tucu-í dàtná xíquide cue tée sa ní cutúha nãá, te ñá túú quide-í dàtná quidè cuè tée vitna dàcuaha naá. Te ducaⁿ chi yúhú quidè-í ncháa nãcuáa cuiní Yã Ndiòxí cunduu. ²⁷ Te yúhú ñá túú dàña-í taxi tnùní ñãhá ñi ñⁿ sá cuèhè sá dúhá xii-í chi yòtní-í mée-í. Te ducaⁿ quide-í chi yúhú cãháⁿ-í tnúhu Xítóhó Jesucristú núu ñáyiu, te cuiní-í sá vá cuíta sá ní cachí Yã Ndiòxí nduu tãhú-í.

10

Cuendá nchaa sá ní cadúha cue tée ñuyúú-a quide cahnu ñáiyu

¹Te nchòhò ñáiyu ndècu ndihi-í ichi Xítohó Jesucristú na càchí tnúhu-í xii-ndo cuendá nchaa ñaní tnáhá-ndí ñáiyu isràél ní xindecu ndéé sanaha, chi vitna tnáhá nchòhò cúú-ndó dàtná cue ñaní tnáhá nchàa ñáiyu-án chi ndècu-ndo ichi-gá. Te nchaa ñáiyu-án ní taxi ndecu Yá Ndiòxí ìíⁿ vícò ní dánhé ñáhá-xí xíí-yu ichi quíhíⁿ-yu, te ní quée dava ndute làmár nání Mār Tícuèhé te nchaa-yu ní yáha-yu. ²Te sá dúcáⁿ ní cuu te nchaa-yu ìíⁿ-ná ní cuú-yu ndihi ndíí Moisés, te ní xíhí ndaha ñaha ndíí xíí-yu. ³Te nchaa-yu ní xexí-yu sá ní sáñaha Yá Ndiòxí xíí-yu. ⁴Te ducaⁿ nchaa tucú-yu ní xihí-yu ndute sá ní sáñaha-gá xíí-yu, ndute sá ní quee yíqui ñaha cava. Te cava-án cada iní-ó sá cúú-xí dàtná Xítohó Jesucristú te ducaⁿ chi ndihi ñaha-gá xíí-yu ichi cuáháⁿ-yu dàvá-án. ⁵Dico ío vai-yu ñá túú ní quidé-yu nàcuáa càháⁿ Yá Ndiòxí, te xíáⁿ ñá túú ní cùu váha iní ñáhá-gá xíí-yu. Te sá dúcáⁿ ní quidé-yu núu xíáⁿ òré ñúhú-yu ichi cuáháⁿ-yu xití yucu ío vai-yu ní xíhí.

⁶Te ducaⁿ ní cuu cuendá nchoo vā cānchícúⁿ nihnu-o càda-o nacúáa ní quidé-yu, chi ñáiyu-án mee-ni nchaa sá cuèhé sá dúhá ní sani iní-yu ní quidé-yu. Te nchoo xini ñuhu-xi sá vā dúcáⁿ càda-o. ⁷Te yúhú càháⁿ-í dóho-ndo sá vā quindáá iní-ndó te ni vā cādá càhnu-ndo ni ìíⁿ sá càchí-yu cùu ndiòxí ní cadúha cue tée ñuyúú-a dàtná ní quide cue ñaní tnáhá-ndí ní xindecu ndéé sanaha. Chi ñáiyu-án ní quidé-yu dàtná càháⁿ-xi núu tütú Yá Ndiòxí núu càchí-xi: “Nchaa ñáiyu ní xexí-yu ní xihí-yu ní quidé-yu vico, ní quide càhnú-yu sá càchí-yu cùu ndiòxí ní cadúha-yu te ñá ndáá sá ndiòxí cúú-xí”, duha càchí-xi núu tütú-gá. ⁸Te ni vā cündècu-ndo ichi díí iní dàtná ní quide dava ñáiyu-án, chi sá dúcáⁿ ní quidé-yu te ní xíhí ócò úní ml-yu ìíⁿ-ni ndúu. ⁹Te vā cání iní-ndó sá sá càhnú iní Yá Ndiòxí te nándi sá cuèhé sá dúhá càda-ndo cuendá cuiní-ndó quini-ndó núu nása cada ñaha-gá xii-ndo, chi ñáiyu ní xindecu ndéé sanaha-án ducaⁿ ní xóo cadá-yu, te ní xíhí-yu ní xexihaⁿ còó. ¹⁰Te ni vā càháⁿ cuèhé-ndó cuendá Yá Ndiòxí, chi dava

ñáiyu ní xindecu ndéé sanaha-án ducaⁿ ní quidé-yu ní càháⁿ cuèhé-yu cuendá-gá te ní quixi espíritú xínú cuèchi núú-gá ní sahni ñaha-xi xíí-yu.

¹¹Te ducaⁿ ní cuu te ducaⁿ ní ngúndéé núu tütú Yá Ndiòxí cuendá dacuàha-o vitna ta cuyatni nduu naa ñuyúú-a. Te nchaa tnúhu sá ní ngódó tnùní-án càháⁿ dóho ñaha-xi xii-o cuendá sá vā cādá-ó dàtná ní quide ñáiyu-án. ¹²Te xíáⁿ núu nchaa nchòhò ñáiyu sani iní sá ío váha cündáá ndécú ichi Xítohó Jesucristú cada cuendá-ndó sá dúcáⁿ-ní cündáá-ndó núú-gá, te vā dáná cuendá-ndó càda-ndo sá ñá túú cùu váha iní Yá Ndiòxí. ¹³Te diu-ni dàtná quidé sàcuíhñá dácàháⁿ-xi iní nchaa dava-gá ñáiyu nándi quidé-yu, te diu-ni ducaⁿ quide ñaha-xi xii-ndo. Dico mee Yá Ndiòxí cúú-gá Yáá quidé ndáá chi quide-gá nchaa sá càháⁿ-gá, te ñá dàñá-gá sá súuni cuído sàcuíhñá coto ndéé ñáhá-xí xii-ndo, chi není-ni nàcuáa cùndee iní-ndó dàña-gá ducaⁿ quide ñaha-xi xii-ndo. Te diu-ni-gá chindee ñaha-gá xii-ndo cùndee iní-ndó vā cādá-ndó cuèí nándi sá ná dàcahu iní ñáhá-xí xii-ndo.

¹⁴Te xíáⁿ núu càháⁿ-í dóho nchòhò ñáiyu ío cùu iní-í sá vā quindáá iní-ndó ni ìíⁿ sá càchí-yu cùu ndiòxí te ñá ndáá chi dícó ndaha cue tée ñuyúú-a ní cuáha nchaa xíáⁿ, te ni vā cādá càhnu-ndo. ¹⁵Te duha càháⁿ-í chi cùu-ndo ñáiyu təcú tnùní, te mee-ndo ío váha cuáha-ndo cuendá te núu váha-ni càháⁿ-í àdi ñá túú váha-ni. ¹⁶Te nchoo ndacáⁿ tǎhú-ó núú Yá Ndiòxí cuendá ndudí ndéhé yoho yàha stilé sá xíhí-ó, te sá dúcáⁿ xihí-ó ndudí ndéhé yoho yàha stilé-án, te xíáⁿ ndácú iní-ó sá ìíⁿ-ní cùu-o ndihi Xítohó Jesucristú cuendá sá ní sati ñíhí-gá ní xíhí-gá núu cùrúxí, te diu-ni ducaⁿ sǎtnahá tucu-xi cùu paá sá xéxí-ó òré xíhí-ó ndudí ndéhé yoho yàha stilé-án, chi sá dúcáⁿ xexi-o paá-án xíáⁿ ndácú iní-ó sá ìíⁿ-ní cùu-o ndihi Xítohó Jesucristú sá cuendá yíqui cùñú-gá. ¹⁷Te cuèí vai vihi-o dico ìíⁿ-ni paá xéxí-ó, te sá dúcáⁿ ìíⁿ-ni paá xéxí-ó xíáⁿ ndácú iní-ó sá ìíⁿ-ní cùu-o ndihi Xítohó Jesucristú.

¹⁸Te cada cuendá-ndó nàcuáa quide ñáiyu isràél, chi ñáiyu-án xéxí-yu sá ndúú tǎhú Yá Ndiòxí. Te sá dúcáⁿ quidé-yu-án cùtnùní iní-ó sá tnáhá tnúhu-yu ndihi-gá. ¹⁹Te vā cání iní-ndó sá sá dúhá càháⁿ-í te

cachí-ndó sã cùnunu nchaa sã cachí-yu cùu ndiòxí ní cadúha cue tée ñuyúú-a chi ñá túú nã cúú ní ìⁿ nchaa xíãⁿ. Te ñá túú ducaⁿ cùu tucu nchaa sã sãñaha ñáyyiu ndùu tãhú-xi chi ñá túú cùnunu-xi, chi ìⁿ-ni cùu-xi ndìhi nchaa dava-gã sã xéxí-ó. ²⁰ Te yúhú cãchí-í sã sã dúcãⁿ quide nchaa ñáyyiu ñá túú tñahá tñúhu ndìhi Yá Ndiòxí, te dicó nchaa es-
píritú cúndìhi yucu ñávãha sãñahá-yu sã ndúú tãhú-xi sã dúcãⁿ quidé-yu. Te ñá díú Yá Ndiòxí sãñahá-yu sã ndúú tãhú-gã. Te yúhú cuiní-í sã vã tñahá tñúhu-ndo ndìhi cue espíritú cúndìhi yucu ñávãha. ²¹ Te ducaⁿ chi vã cúú tñahá tñúhu-o ndìhi cue espíritú cúndìhi yucu ñávãha te tñahá tñúhu-o ndìhi Xítóhó Jesucristú, te ñá túú ndúu váha-xi ngóo cãxi-o coho-o sã ndúú tãhú cue espíritú cúndìhi yucu ñávãha-áⁿ, te ngóo cãda-o nacuaá ní dándóo tñúhu Xítóhó Jesucristú coho-o ndúdí ndéhé yoho yãha stilé, te caxi-o pãá cada-o sã ndácú ìní-ó sã ñí xíhí-gã núú cùrúxí. ²² Te vã cãní ìní-ó ducaⁿ cada-o cuendá sã vã cúdèéⁿ Yá Ndiòxí, chi ñá túú nã cãhnu cuu-o núu cada-o ñãni véxi ìní mée-ó, chi mee-gã ío cãhnu cuu-gã.

Cada-o nchaa nacuaá cuu cãhnu Yá Ndiòxí

²³ Te ndáá sã ncháá sã cuiní-ó cãda-o te cuu cada-o dico ñá ncháá cùu-xi sã váha sã cúú-xí-ó, te ni ñá ncháá-xí chindee ñaha-xi nacuaá ñíhi ndéé-gã-ó cùndecu-o ichi Xítóhó Jesucristú. ²⁴ Te xini ñuhu-xi sã cãdá-ó sã váha sã cúú-xí tñaha ñáyyiu-o te ñá díú mée-ni sã cúú-xí mée-o cada-o.

²⁵ Te nchòhó cuu caxi-ndo nchaa cuñú sã cùyãhu cuñú sã xini caxi-ndo, te vã ndúcú tñúhu-ndo te núu cùu-xi cuñú sã ñí nduu tãhú sã cachí-yu cùu ndiòxí. Te ñá túú nã caní ìní-ndo cãxi-ndo, ²⁶ chi ñuyúú-a ndìhi nchaa sã ío cúú-xí cuendá Yá Ndiòxí.

²⁷ Te núu ìⁿ ñáyyiu ñá túú ndècu ichi Xítóhó Jesucristú cãháⁿ ñãhã-yu xii-ndo quíhíⁿ-ndó cãxi-ndo díttã vehé-yu, te núu sãni ìní-ndo sã quíhíⁿ-ndó te cuu quíhíⁿ-ndó te caxi-ndo cuéi náí cùu sã táxi-yu dico vã cãcãⁿ tñúhú-ndó núú-yu núu ndèé ní ñíhí-yu, te ducaⁿ te cuu váha ìní-ndo cãxi-ndo. ²⁸ Te núu ìⁿ ñáyyiu cãchí-yu sã xíãⁿ cúú-xí sã ñí nduu tãhú sã cãchí-yu cùu ndiòxí te vã cãxí-ndó cuendá sã ñáyyiu ducaⁿ cãháⁿ-áⁿ cuu váha ìní-yu te ñá túú tñahí ná caní ìní-yu. ²⁹ Te yúhú

cãháⁿ-í cuendá nãcuáa sãni ìní mée ñáyyiu ducaⁿ cãháⁿ-áⁿ te ñá díú sã nãcuáa sãni ìní mée-ndó quide-ndo.

Te dava-ndo cãchí-ndó: “Cuu-ni cada-o nchaa nacuaá sãni ìní mée-ó cuéi dava-gã ñáyyiu sãni ìní-yu sã ñá túú ndúu váha-xi sã dúcãⁿ cãda-o”, duha cãchí-ndó. ³⁰ Te cãchí tucu-ndo: “Ñá túú tãu-xi cãháⁿ cuéhé ñáyyiu cuendá-ó sã cuendá nchaa sã xéxí-ó chi ndácãⁿ tãhú-ó núú Yá Ndiòxí òré xéxí-ó”, duha cãchí-ndó. ³¹ Te cuéi nãndí sã xini caxi-ndo ñíhí-ndó xéxi-ndo àdi quide-ndo, te cada-ndo nãcuáa cãháⁿ váha ñáyyiu cuendá Yá Ndiòxí. ³² Te vã cãdá-ndó sã ñá túú tãu-ndó cãda-ndo cuendá sã vã cãdá ñáyyiu ìⁿ sã ñá túú cùu váha ìní Yá Ndiòxí. Te ni sã cúú-xí cué ñáyyiu isrãél, te ni sã cúú-xí cué ñáyyiu ñá túú cùu ñáyyiu isrãél, te ni sã cúú-xí cué ñáyyiu ndècu ichi-gã vã dúcãⁿ cãda-ndo sã cúú-xí-yu. ³³ Te yúhú ío ndùcu ndee-í quidé-í nãcuáa cudúu-í núú nchaa ñáyyiu, te quide-í sã váha sã cúú-xí-yu, te ñá túú quide-í mee-ni sã cúú-xí mée-í. Te ducaⁿ quide-í cuendá quíndáá ìní-yu tñúhu Xítóhó Jesucristú te naníhí tãhú-yu.

11

¹ Te chí cãnchicúⁿ ñihnu cada-ndo nchaa nacuaá quide-í nchicúⁿ ñihnu-í nchaa nãcuáa quide Xítóhó Jesucristú.

Nãcuáa tãu-xi cada nchaa ñáyyiu ñíhí núú tãcã-yu dãcuahá-yu tñúhu Yá Ndiòxí

² Te nchòhó ñáyyiu ndècu ndìhi-í ichi Xítóhó Jesucristú cãchí tñúhu-í xii-ndo sã ío cùdíí ìní-í, chi ndàcu ìní ñãhá-ndó xii-í, te quide-ndo nchaa nacuaá ní dãnèhé ñãhá-í xii-ndo. ³ Te cuiní-í sã nchòhó cutnúní ìní-ndó sã ìⁿdií-ni Yá Ndiòxí cúú-gã Yãá cùnunu taxi tñuní ñãhá xii Xítóhó Jesucristú, te ducaⁿ Xítóhó Jesucristú ìⁿdií-ni-gã cùnunu taxi tñuní-gã nchaa cue tée, te nchaa cue tée ñá túú mee-güedé cùnunu-güedé táxi tñuní-güedé ñãdìhí-güedé. ⁴ Te núu nchoo cué tée na dãdáhu-o díquí-ó òré cãháⁿ-ó núú ñáyyiu tñúhu sã dãcãhu ìní ñãhá Yá Ndiòxí xii-o àdi òré cãháⁿ ndìhi-o-gã, te ìⁿ sãcãⁿ-núú cúú-xí te núu ducaⁿ na cãða-o dadãhu-o díquí-ó. ⁵ Dico núu ñáyyiu ñíhí vã dãdáhu-yu díquí-yu òré cãháⁿ ndìhí-yu Yá Ndiòxí, àdi òré cãháⁿ-yu tñúhu sã dãcãhu ìní ñãhá-gã xii-yu núú tñahá ñáyyiu-yu, te sãcãⁿ-núú

cúu-xí te núu vá dádáhu-yu díquí-yu, chi ñⁿ-ni cùu-xi te núu na detè ndíí-yu díquí-yu. ⁶ Te núu ñá túú cuení cue ñáiyu díhí dádáhu-yu díquí-yu te váha-gá sá ná detè ndíí-yu díquí-yu. Te núu cùcahaⁿ núu-yu sá detè díquí-yu te váha-gá sá ná dádáhu-yu díquí-yu. ⁷ Te nchoo cuè téé vá cúú dádáhu-o díquí-ó òrè càháⁿ ndihí-o Yá Ndióxi ní òrè càháⁿ-ó tñúhu sá dácàhu iní ñáhá-gá xii-o núú ñáiyu chi díhna-gá-ó ní cadúha ñaha Yá Ndióxi xii-o, te ní taxi ndecu-gá nchaa sá xini tñuní-ó dàtná ndécú nchaa sá xini tñuní méé-gá. Te ducaⁿ ní quide-gá chi cuení-gá sá nchóó càda-o nacuaá càháⁿ nchaa dava-gá ñáiyu sá ò càhnu cuu-gá, te cue ñáiyu díhí quidè-yu nacuaá cunuu nchòo cue téé. ⁸ Te, Yá Ndióxi ní cadúha-gá téé, dico ñá díú yiqui naha ñadìhí ní quenehe-gá ní cadúha-gá téé chi yiqui naha téé ní quenehe-gá ní cadúha-gá ñadìhí. ⁹ Te sá cuendá téé ducaⁿ ní cadúha-gá ñadìhí-áⁿ te ñá díú sá cuendá ñadìhí ní cadúha-gá téé. ¹⁰ Núu xiáⁿ tàu-xi sá ncháá ñáiyu díhí dádáhu-yu díquí-yu cuendá ducaⁿ cùtnuú sá ñà túú cunuú-yu dàtná cunuú nchoo cue téé. Te ducaⁿ xini ñuhu-xi cadá-yu sá cuendá nchaa espíritu xínú cuèchí núú Yá Ndióxi. ¹¹ Te vitna nchoo ñáiyu ndècu ichi Xítoho Jesucristú, vá càchí-ó sá cuè téé ñá túú xini ñuhu-güedé cue ñáiyu díhí chindee ñáhá-yu, te ni vá càchí-ó sá cuè ñáiyu díhí ñá túú xini ñuhú-yu cue téé chindee ñaha-güedé xií-yu. ¹² Te ñⁿ yiqui naha téé ní queñuhu Yá Ndióxi ní cadúha-gá ñadìhí, dico vitna chi ñáiyu díhí dácàcù-yu téé. Te téé, ñadìhí ní cadúha Yá Ndióxi, te ñu-ni ducaⁿ ní cadúha-gá nchaa dava-gá sá ò.

¹³ Te mee-ndo càda cuendá-ndó te núu nduu váha-xi sá vá dádáhu cue ñáiyu díhí díquí-yu òrè càháⁿ ndihí-yu Yá Ndióxi àdi ñáhá. ¹⁴ Te nchaa ñáiyu càháⁿ-yu sá ñà túú ndùu váha-xi sá cuè téé cunduu nàni idi díquí-güedé, chi ñⁿ sácáⁿ-núú cúu-xí càchí-yu. ¹⁵ Te nchaa ñáiyu díhí ñáiyu nàni idi díquí-xi càchí ñáiyu sá ñⁿ sá váha cùu-xi sá cúu-xí-yu sá dúcáⁿ nàni idi díquí-yu. Te ducaⁿ chi Yá Ndióxi ní càchí-gá sá dúcáⁿ cunduú-yu cuendá quidáhu-xi díquí-yu.

¹⁶ Te núu ò ñáiyu cuení dacàa cuendú cuendá sá ní càháⁿ-í-a, te na cùnahá-yu sá ncháá nchùhú cue téé càháⁿ tñúhu Xítoho Jesucristú ñu-ni ducaⁿ sàni iní-ndí cada nchaa ñáiyu díhí. Te ñu-ni ducaⁿ sàni iní nchaa ñáiyu ndècu ichi-ndo.

Cuendá ñáiyu ñá túú quide datná ní quide Xítoho Jesucristú cùtnàhá ní cudini-gá ndihí cue téé ní xica cuu ndihí-gá

¹⁷ Te nchòho ñá túú quide váha-ndo ndècu-ndo núu xiáⁿ duha na càháⁿ-í dóho-ndo, chi nchòho òrè tàcá-ndó ñá túú quide váha-ndo chi ñá túú chindee tñaha-ndo cada-ndo sá váha, chi da ñadatuhí iní tñáhá-ndó nàcuáa ndècu-ndo. ¹⁸ Te díhna-gá na càchí tñúhu-í xii-ndo sá ñihí-í tñúhu sá òrè tàcá-ndó quide-ndo nacuaá ní càháⁿ Xítoho Jesucristú, te ñá túú cùu ñⁿ-nuu-ndo òrè ducaⁿ quide-ndo nacuaá ní càháⁿ-gá. Te dava sá càháⁿ ñáiyu sàndáa iní-í te dava ñáhá. ¹⁹ ;Te ndáa sá dúcáⁿ tñahí cada-xi vá cúú ñⁿ-nuu-ndo cuendá ducaⁿ cùtnuní núu ndèdacàa-ndo sàndáa ndisa iní-ndó tñúhu Xítoho Jesucristú te ndèdacàa-ndo ñáhá! ²⁰ Te ndí tñahá òrè tàcá-ndó quide-ndo datná ní quide Xítoho Jesucristú cùtnàhá ní cudini-gá ndihí cue téé ní xica cuu ndihí-gá, te ñá túú quide-ndo nacuaá tàu-xi cunduu chi cùtexinu-ni quide-ndo. ²¹ Chi òrè tàcá-ndó quide-ndo nacuaá ní càchí Xítoho Jesucristú, te dava-ndo ngódó núu-ndó díhna-gá-ndó xèxi-ndo sá néhé-ndó te ñá túú sá cùndètu tñaha-ndo, te ñá túú càháⁿ tñáhá-ndó núu xiáⁿ dava-ndo ñá túú xèxi-ndo ndahá xiti-ndó, te dava-ndo xidó-ndó quide-ndo chi xini-ndo. ²² Te vá dúcáⁿ cada-ndo chi càa vehe-ndo núu dúcáⁿ càxi-ndo coho-ndo cada-ndo ndéé ndahá xiti-ndó, chi sá dúcáⁿ quide-ndo te dàquee tñú-ndó nchaa dava-gá ñáiyu ndècu ndihí-ndo ichi Yá Ndióxi, te dàndóo canúú-ndó nchaa ñáiyu ndáhú sá dúcáⁿ quide-ndo. ;Núu xiáⁿ vá cúú càchí-í sá cúu-ndó ñáiyu quide váha chi ñá túú quide váha-ndo sá dúcáⁿ quide-ndo ndecu-ndo!

Xítoho Jesucristú ní dàndóo tñúhu-gá sá còhó-ó ndúdi ndéhé yoho yàha stilé te caxi-o pàa cuendá ndacu iní-ó sá ní xihí-gá

(Mt. 26:26-29; Mr. 14:22-25; Lc. 22:14-20)

²³ Te dàtná-ni ní dánhèhé ñáhá Xítoho Jesucristú xii-í te ñu-ni ducaⁿ ní dánhèhé ñáhá-í xii-ndo, chi ñu-ni níú cùtnàhá ní sàha cuendá ñáhá ndíi Jùdás Iscariote

xii-gá núu cuè téé cùu úhú iní ñáhá n̄ queheⁿ-gá pàá, ²⁴ te ní ndacáⁿ táhú-gá núu Yá Ndióxi, te ní táhú cuèchi-gá, te ní xáhaⁿ-gá xii cue téé xica cuu ndiíhí-gá: “Chí quéhéⁿ pàá-a caxi-ndo te cada iní-ndó sá cúu-xí dátá ná yiqui cùñú-í, chí yúhú cuú-í sácuendá-ndó. Te ducaⁿ-ni càda-ndo cundecu-ndo cuendá ndacu iní ñáhá-ndó xii-í”, cächí-gá xáhaⁿ-gá xii-güedé. ²⁵ Te sátá n̄ yáha ní xexi-güedé pàá sá n̄ sánaha-gá, te ní queheⁿ-gá tásáⁿ ñúhú ndúdí ndéhé yoho yáha stilé, te ní ndacáⁿ táhú tucu-gá núu Yá Ndióxi. Te ní xáhaⁿ-gá xii cue téé xica cuu ndiíhí-gá: “Chí cóhó ndúdí ndéhé yoho yáha stilé-a, te cada iní-ndó sá cúu-xí dátá ná ñíñí-í, te cuendá ñíñí-í sá cáti òré cuú-í cutnùnì ndáá sá Yá Ndióxi cada-gá ingá núu sá vâha sá cúu-xí ñâyü. Te ndi tnahá òré coho-ndo ndúdí ndéhé yoho yáha stilé-áⁿ te ndacu iní ñáhá-ndó xii-í, te ducaⁿ-ni càda-ndo cundecu-ndo”, cachí-gá xáhaⁿ-gá xii-güedé. ²⁶ Te ndi tnahá òré xéxi-ndó pàá te xihí-ndo ndúdí ndéhé yoho yáha stilé, te xiáⁿ dátüu-ndo núú ñâyü sá Xítohó Jesucristú ní xihí-gá cuendá-yu, te ducaⁿ-ni càda-ndo cundecu-ndo ndéé ná sàá nduu quixi tucu Xítohó Jesucristú.

Nàcuáa cada-o òré caxi-o pàá ndiíhí òré coho-ndo ndúdí ndéhé yoho yáha stilé dátá ná ní cachí Xítohó Jesucristú

²⁷ Te dava-ndo ñà túú quide-ndo nacúáa cuiní Yá Ndióxi cada-ndo òré xéxi-ndó pàá ndiíhí òré xihí-ndó ndúdí ndéhé yoho yáha stilé, te sá dúcáⁿ quide-ndo-áⁿ te cucuèchi xii-ndo chí ñà túú nèhe-ndo sá yíñùhu sá cúu-xí yiqui cùñú Xítohó Jesucristú, te ní ñà túú nèhe-ndo sá yíñùhu sá cúu-xí ñíñí-gá. ²⁸ Te ío váha cada cuendá-ndó te núu ndècu váha iní-ndó núú Xítohó Jesucristú òré cúmáñí-gá caxi-ndo pàá ndiíhí òré cúmáñí-gá coho-ndo ndúdí ndéhé yoho yáha stilé. Te núu ndècu váha iní-ndó núú-gá te caxi-ndo te coho-ndo. ²⁹ Te dava nchòhó ñà túú sàni váha iní-ndó cuendá yiqui cùñú Xítohó Jesucristú te xèxi-ndo paá te xihí-ndo ndúdí ndéhé yoho yáha stilé, te nacháhu-ndo sá dúcáⁿ ñà túú sàni váha iní-ndó. ³⁰ Te diu sá dúcáⁿ quide-ndo núu xiáⁿ vai-ndo cuhú, te ío ndáhú ndécú-ndó, te dava ñâyü ndècu ndiíhí-ndo sa ní xihí-yu. ³¹ Dico núu ío váha sáha-o cuendá nàcuáa ndècu-ndo núú

Yá Ndióxi, te vá dúcáⁿ dándoho ñaha-gá xii-o. ³² Te òré ndéhé Yá Ndióxi sá ñà túú quide ndáá-ó ndècu-o te dándoho ñaha-gá xii-o. Te ducaⁿ quide-gá cuendá sá vâ cuíta nihnu-o, chí núu ñáhá te cuíta nihnu-o ndiíhí nchaa ñâyü ndècu ichi cuehé ichi duha.

³³ Te núu xiáⁿ càháⁿ-í dóho nchaa nchòhó ñâyü ndècu ndiíhí-í ichi Xítohó Jesucristú sá òré tacá-ndó càda-ndo nacúáa ní quide Xítohó Jesucristú cutnàhà ní cudini-gá ndiíhí cue téé ní xica cuu ndiíhí-gá, te cundetü tñaha-ndo nduu nchaa-ndo te dát-nùnì ducaⁿ càda-ndo. ³⁴ Te núu dava-ndo xihí-ndó dòcò te caxi duuⁿ-ndo vèhe-ndo te dát-nùnì nataká-ndó, cuendá òré nataká-ndó te vá cáda-ndó ñⁿ sá ñà túú tàù-ndó càda-ndo cuendá sá vâ dándoho ñaha Yá Ndióxi xii-ndo. Te òré quixi coto ñaha-í xii-ndo te dáva-áⁿ cachí tñuhu-í xii-ndo nchaa dava-gá sá cúmáñí.

12

Nàcuáa chindee ñaha Espiritú Yá Ndióxi cada-o ñⁿ ñⁿ-o

¹ Te nchòhó ñâyü ndècu ndiíhí-í ichi Xítohó Jesucristú cuiní-í cachí tñuhu-í xii-ndo nàcuáa chindee ñaha Espiritú Yá Ndióxi xii-o ñⁿ ñⁿ-o cuendá cutnùnì iní-ndó.

² Te nchòhó sa ñaha-ndo sá cutnàhà vátá cündècu-gá-ndó ichi Xítohó Jesucristú ní xóo dandáhú ñáhá yùcu ñávâha xii-ndo, te ní xóo quíndáá iní-ndó nchaa sá ní cadúha cue ñâyü ñuyúú-a nchaa sá cächí-yu cùu ndiíhí te ñà ndáá sá ndiíhí cúu-xí, te nchaa xiáⁿ ñà túú càháⁿ-xi. ³ Te cuiní-í sá nchòhó cutnùnì iní-ndó sá Espiritú Yá Ndióxi ñà túú chindee-xi ní ñⁿ ñâyü cuendá sá càháⁿ úhú-yu Xítohó Jesucristú. Te ní ñⁿ ñâyü ñà túú càhu iní-yu càháⁿ-yu sá Xítohó Jesucristú cúu-gá Xítohó-yu te núu ñà túú Espiritú Yá Ndióxi dácàhu iní ñáhá-xí xii-yu.

⁴ Te ndi ñⁿ ndi ñⁿ nduu chiuⁿ ní cachí Espiritú Yá Ndióxi cada-o, te diu-ni ñⁿdii-ni Espiritú-gá ndécú. ⁵ Te ndi ñⁿ nduu chiuⁿ quide-o xinu cuechi-o núú ñⁿdii-ni Xítohó Jesucristú. ⁶ Te ndi ñⁿ ndi ñⁿ chindee ñaha Yá Ndióxi xii-o nàcuáa cada-o chiuⁿ-gá, te diu-ni ñⁿ dii-gá ndécú chindee-gá nchaa ñâyü. ⁷ Te Espiritú Yá Ndióxi quidé-xí sá nchòó càda-o sá vâha, te ducaⁿ chindee-o cue ñâyü ndècu ndiíhí-o

ichi Xítoho Jesucrístú. ⁸ Te dava-o ní nduu táhú-ó núú Yá Ndiöxí sá Espíritú-gá cada te ndacu-o cǎháⁿ-ó tnúhu sá ïo cǎhnu cuu ðiu-ni tnúhu mee Yá Ndiöxí, te dava tucu-o ní nduu táhú-ó cùtnuní iní-ó nǎcuáa cǎháⁿ tnúhu-gá te cǎháⁿ-ó nǎcuáa cuiní Espíritú-gá. ⁹ Te dava tucu-o ní nduu táhú-ó sá ïo quíndáá iní-ó Xítoho Jesucrístú cuendá cada-gá ìⁿ sá cuiní-ó, te ducaⁿ chi Espíritú Yá Ndiöxí chíndee ñaha-xi xii-o. Te dava tucu-o ní nduu táhú-ó sá cǎcǎⁿ táhú-ní-ó núú Xítoho Jesucrístú cuendá ñáyiu cùhú te ndúha-yu. ¹⁰ Te dava tucu-o ní nduu táhú-ó sá ndácú-ó cǎda-o nchaa sá vǎ yǒo tnàhí ndacu cada, te dava tucu-o ní nduu táhú-ó núú Yá Ndiöxí sá cǎháⁿ-ó tnúhu sá dǎcǎhu iní ñáhá-gá xii-o, te dava tucu-o ní nduu táhú-ó sá cùtnuní iní-ó núu ðiu Espíritú Yá Ndiöxí chíndee ñaha-xi xii ñáyiu òré cǎháⁿ-yu tnúhu-gá àdi cue espíritú cùndíhi yucu ñávǎha. Te dava tucu-o ní nduu táhú-ó cǎháⁿ-ó tnúhu sá dǎcǎhu iní ñáhá Espíritú Yá Ndiöxí xii-o tnúhu sá ñà túú xini-ó, te dava tucu-o ní nduu táhú-ó cǎháⁿ-ó nǎcuáa quèe-xi nchaa tnúhu-áⁿ. ¹¹ Te ìⁿ ðii dí-ni Espíritú Yá Ndiöxí ducaⁿ chíndee ñaha-xi, te ðiu-ni Espíritú-gá dǎcǎhñu ñaha-xi xii-o ndi ðiiⁿ núú chiúⁿ sá cuiní meé-xí cǎda-o.

Nchaa-o ìⁿ-ni cuu-o ndíhi Xítoho Jesucrístú

¹² Te nchoo ñáyiu ndècu ñuyú-a titní xichi cùu yiqui cuñú-ó dico ìⁿ-ni cùu-xi, te ðiu-ni ducaⁿ sǎtnahá-xi cùu-o vitna ndecu-o ichi Xítoho Jesucrístú chi ìⁿ-ni cùu-o ndíhi-gá. ¹³ Te dava-o cùu-o ñáyiu isrǎél, te dava-o ñà túú cùu-o ñáyiu isrǎél, te dava-o cùu-o ñáyiu ñà túú tnàhí dǎná quee núú chíúⁿ pǎtróóⁿ-xi, te dava-o cùu-o ñáyiu dǎná quée núú chíúⁿ pǎtróóⁿ-xi. Te mee Espíritú Yá Ndiöxí ní quide-xi sá nchǎá-ó ìⁿ-ná cùú-ó ndècu-o ndíhi Xítoho Jesucrístú. Te Yá Ndiöxí ní cachí-gá sá nchǎá-ó cùndecu ndíhi-o Espíritú-gá.

¹⁴ Te nchòhó xini-ndó sá titní xichi cùu yiqui cuñú-ó te ñà díú ìⁿ-ni xichi cuu-xi.

¹⁵ Te cuèi sǎhá-ó ndíhi ndaha-o ñà túú ìⁿ-ni cuu-xi dico vǎ cùú cǎchí-ó sǎ sǎhá-ó ñà túú cùu-xi yiqui cuñú-ó. ¹⁶ Te cuèi lóho-o ndíhi tinuu-o ñà túú ìⁿ-ni cuu-xi dico vǎ cǎchí-ó sǎ lóho-o ñà túú cùu-xi yiqui cuñú-ó. ¹⁷ Te núu nihí ní ndúú yiqui cuñú-ó ní xindeé mee-ni tinuu-o, te ñà túú ndèé cundee

lóho-o cùndedóho ni cùu te núu ducaⁿ, àdi núu nihí yiqui cuñú-ó ní xindeé mee-ni lóho-o te ñà túú ndèé cundee dítní-ó ní cùu te núu ducaⁿ. ¹⁸ Dico mee Yá Ndiöxí ní taxi ndecu-gá ìⁿ ìⁿ xichi yiqui cuñú-ó nǎcuáa ní cachí iní meé-gǎ. ¹⁹ Te núu ìⁿ-ni sǎ ní xindecu nihí yiqui cuñú-ó, te vǎ cùnduu-xi nǎcuáa tàú-xi cunduu ni cùu te núu ducaⁿ. ²⁰ Dico titní xichi cùu yiqui cuñú-ó, te ìⁿ-ni cùu-xi nihí-xi.

²¹ Te sa ñaha-o sá vǎ cùú cǎchí-ó sǎ tinuu-o ñà túú xini ñuhu-xi ndaha-o, àdi díquí-ó ñà túú xini ñuhu-xi sǎhá-ó. ²² Te nchoo sǎ naha-o sá dává xichi yiqui cuñú-ó sǎ cǎchí-ó sǎ ñà túú cùnuu ïo-gá xini ñuhu-xi. ²³ Te dava xichi yiqui cuñú-ó sǎ ñà túú quide cuendá cǎvíhi-ó nchaa xǎáⁿ sá quídáhu dóó sǎcuíhnu-o, te dava xichi yiqui cuñú-ó ñà cùú cùtúu chi dacuítí sǎ quídáhu. ²⁴ Te nchaa xichi yiqui cuñú-ó sǎ cùú cùtúu ñà túú xini ñuhu-xi quídáhu. Te Yá Ndiöxí ní taxi ndecu-gá nchaa xichi yiqui cuñú-ó nǎcuáa tàú-xi cunduu. Te ní cachí-gá sǎ dává-gá xichi yiqui cuñú-ó núú vǎ cùú cùtúu quídáhu. ²⁵ Te ducaⁿ ní quide-gá cuendá sá ìⁿ-ní cùu yiqui cuñú-ó. Te ducaⁿ ndí tnahá ìⁿ ìⁿ xichi yiqui cuñú-ó chíndee tnaha-xi. Te ducaⁿ sǎtnahá-xi cùu nchoo vitna ndecu-o ichi Xítoho Jesucrístú chi chíndee tnaha-o. ²⁶ Te núu ìⁿ xichi yiqui cuñú-ó ñà tnàhúhú te nihí-ó quide úhú-xi, te núu ìⁿ xichi yiqui cuñú-ó ïo váha ndècu-xi te ducaⁿ nihí yiqui cuñú-ó cùú váha-xi. Te ducaⁿ sǎtnahá-xi cùu-o vitna ndecu-o ichi Xítoho Jesucrístú.

²⁷ Te nchoo ndècu ndíhi-o Xítoho Jesucrístú, te cùu-o datná yiqui cuñú-gá te ìⁿ ìⁿ-o cùu-o datná ìⁿ ìⁿ xichi yiqui cuñú-gá.

²⁸ Te ducaⁿ sǎtnahá-xi cùu-o chi Yá Ndiöxí ní taxi-gá ndí ðiiⁿ ndí ðiiⁿ chiúⁿ quide-o sá cùú-xí nchǎa ñáyiu ndècu ichi-gá. Te díhna-gá cue téé caca cuu cǎháⁿ tnúhu-gá núú ñáyiu ní taxi ndecu-gá, te dǎtnuní ní taxi ndecu-gá cue téé cǎháⁿ tnúhu-gá nǎcuáa dǎcǎhu iní ñáhá mée-gá, te dǎtnuní ní taxi ndecu-gá cue téé dǎnehé ñáhá xii ñáyiu tnúhu-gá núú tàcǎ-yu, te dǎtnuní ní taxi ndecu tucu-gá cue téé ndacu quide sá vǎ yǒo tnàhí ndacu cada. Te ní taxi ndecu tucu-gá cue téé xicǎⁿ táhú-ní núú Xítoho Jesucrístú cuendá ñáyiu cùhú te ndúha-yu. Te ní taxi ndecu tucu-gá cue téé chíndee

cue ñáiyu ndècu ichi-gá. Te ní taxi ndecu tucu-gá cue tée yìndaha ñaha xii ñáiyu ndècu ichi-gá, te ní taxi ndecu tucu-gá cue tée càháⁿ tnúhu sá dácàhu iní ñáhá Espíritú-gá tnúhu sá ñà túú xìní-güedé. ²⁹Te ñá ncháá-ó cùu-o cue tée ní táuchíúⁿ Xí-tohó Jesucrístú càháⁿ tnúhu-gá núú ñáiyu, te ñá ncháá-ó cùu-o cue tée càháⁿ tnúhu sá dácàhu iní ñáhá Yá Ndiòxí xii-o. Te ñá ncháá-ó cùu-o cue tée dàcuaha ñaha xii-yu. Te ñá ncháá-ó cùu-o cue tée quide sá vǎ yǒ tñáhí ndàcu cada. ³⁰Te ñá ncháá-ó cùu-o cue tée dicó-ni cǎcǎⁿ táhú núú Xítohó Jesucrístú cuendá ñáiyu cùhú te ndúha-yu. Te ñá ncháá-ó cùu-o cue tée càháⁿ tnúhu sá dácàhu iní ñaha Espíritú Yá Ndiòxí tnúhu sá ñà túú xìní-ó, te ñá ncháá-ó cùu-o cue tée cùtnuní iní-xi càháⁿ nàcuáa ndùu tnúhu-áⁿ. ³¹Te ío nducu ndèe-ndo cada-ndo nacúaa nduu táhú-ndó núú Yá Ndiòxí nchaa sá ìo-gá cúnùu cada-ndo. Te vitna na dànehé ñáhá tùcu-í xii-ndo nàcuáa cada-ndo, dico sá dǎnehé ñáhá-í-a ío-gá cúnùu-xi.

13

Cuu iní-ó tñaha ñáiyu-o

¹Te núu nchoo xìní-ó cǎháⁿ-ó tnúhu sá ìo vii ío váha cuáháⁿ càháⁿ ñáiyu ñuyúú-a, àdi xìní-ó cǎháⁿ-ó tnúhu sá ìo vii ío váha cuáháⁿ càháⁿ cue espíritú xínú cuèchi núú Yá Ndiòxí, te núu xìní-ó cǎháⁿ-ó ncháa tnúhu-áⁿ te ñá túú cùu iní-ó cuè tñaha ñáiyu-o ña, te ñá túú nàndíhi-xi sá xìní-ó cǎháⁿ-ó tnúhu-áⁿ te cùu-o datná dava caá sá ìo dusaⁿ quide. ²Te núu cùu-o ñáiyu càháⁿ tnúhu sá dácàhu iní ñáhá Yá Ndiòxí, àdi cuu-o ñáiyu cùtnuní iní-xi nàcuáa cuáháⁿ nchaa tnúhu ndùu yuhu ni cuu, àdi cuu-o ñáiyu ío váha cùtnuní iní-xi nchaa nàcuáa quide Yá Ndiòxí, àdi cuu-o ñáiyu ío váha sàndáá iní ñáhá xii Yá Ndiòxí nàcuáa ndacu-o cùu-o ìⁿ yucu xocuiñí-xi núú ndécú-xí, te núu nchaa xǎáⁿ xìní-ó cada-o te ñá túú cùu iní-ó cuè tñaha ñáiyu-o ña, te ñá túú vèdana nàndíhi-xi te núu vǎ cùú iní-ó tñaha ñáiyu-o cuèi na càda-o nchaa xǎáⁿ. ³Te cuèi nchaa sá ndécú ndíhi-o na dacáhñu-o, te cuèi na cuáha cuendá-ó mée-o cǎyú-ó sá cùú-xí Yá Ndiòxí, dico ñá túú vèdana chindee ñaha-xi xii-o sá dúcáⁿ càda-o te núu ñá túú cùu iní-ó cuè tñaha ñáiyu-o.

⁴Dico núu cùu iní-ó cuè tñaha ñáiyu-o, te càhnu iní-ó, te quide váha-o, te ñá túú

cùu-o ñáiyu cuédú iní, te ni ñà túú càháⁿ-ó núu cùu cahnu-o, te ni ñà túú sàni iní-ó càda cahnu-o mee-o, ⁵te ni ñà túú ñuhu cuehé iní-ó, te ni ñà túú nducu-o mee-ni sá cùú-xí mée-o, te ni ñà túú-gǎ cúdeéⁿ-ó cuendá ìⁿ sá cùú, te ni ñà túú-gǎ sácùhuⁿ iní-ó sá quidé ñaha tñaha ñáiyu-o xii-o. ⁶Te ni ñà túú-gǎ cúdǎ ìn-í-ó ncháa sá ñà túú vǎha quide ñáiyu, chi mee-nǎ cuendá nchaa sá vǎha cùdǎ iní-ó. ⁷Te nchaa sá yǎha-o sàcàhu iní-ó, te sàni váha iní-ó cuendá nchaa ñáiyu, te sàni iní-ó sá díú-ní ncháa sá vǎha cuu xii nchaa tñaha ñáiyu-o ndèe cuèe-gá, te ío quide cahnu iní-ó cuèi nàndí sá yǎha-o, te nchaa xǎáⁿ quidé-ó te núu cùu iní-ó cuè tñaha ñáiyu-o.

⁸Te ni caa ni quíhíⁿ duha-ni cuu iní-ó cuè tñaha ñáiyu-o. Dico sáá nduu te vǎ cóo-gǎ ñáiyu càháⁿ tnúhu sá dácàhu iní ñáhá Yá Ndiòxí, te ni vǎ cóo-gǎ ñáiyu càháⁿ tnúhu sá dácàhu iní ñáhá Espíritú Yá Ndiòxí tnúhu sá ñà túú xìní-yu, te ni vǎ cóo-gǎ ñáiyu túha dàtná túha ñáiyu vitna. ⁹Te vitna ñá túú cùtnuní iní-ó ncháa nàcuáa sàni iní Yá Ndiòxí chi sacú-ni cùtnuní iní-ó, te ducaⁿ sacú-ni càháⁿ-ó nàcuáa ndùu tnúhu-gǎ, dico càháⁿ-ó tnúhu-gǎ nàcuáa dácàhu iní ñáhá-gǎ xii-o. ¹⁰Te na sáá nduu càda Yá Ndiòxí nchaa nàcuáa tàú-xi cunduu, te dàvǎ-áⁿ te nchaa sá cǎchí-gǎ ñá túú ndècu-xi nàcuáa tàú-xi cunduu vǎ dúcáⁿ-gǎ cundecu-xi.

¹¹Te yúhu cùtnáhá ní cuu landú-í ní cóo cada-í sá cùú-í landú, ní cóo càháⁿ-í, ní cóo caní iní-í, te ní cóo tecu tnùn-í dàtná quidé cuè landú xǎndecu vitna, dico sá tá ní cuu-í ìⁿ tée cùu sacuéhé te ñá túú-gǎ quidé-í dàtná ní cóo cada-í cùtnáhá ní cuu landú-í. ¹²Te ducaⁿ sǎtnahá-xi cùu-o vitna ndecu-o ichi Xítohó Jesucrístú, chi ñá túú cùtnuní váha iní-ó nàcuáa cùu cuendá Yá Ndiòxí, te cùu-o datná ñáiyu ndèhe ìⁿ núú yùtátá sǎ ñà túú túú váha núu-xi, te ducaⁿ sǎtnahá-xi cùu-o chi ñá túú cùtnuní váha iní-ó nǎsa cùu cuendá-gǎ, dico sáá nduu quíni núú-ó-gǎ. Te nchoo sacú-ni cùtnuní iní-ó nàcuáa ndùu-gǎ vitna dico na sáá nduu te quíni ndáá-ó nàcuáa càa nàcuáa ndùu-gǎ dàtná xìní ñáhá mée-gǎ xii-o. ¹³Te ni caa ni quíhíⁿ ducaⁿ-ni quíndáá iní-ó Yá Ndiòxí, te ducaⁿ-ni cùndecu ndíhi-o tnúhu ndee ìni cundecu-o ndíhi-gǎ, te ducaⁿ-ni ìo cuu iní-ó-gǎ ndíhi tñaha ñáiyu-o. Te

sá cúú ìní-ó Yá Ndiòxí ndìhì sá cúú ìní-ó tñàhà ñáyiú-o xíáⁿ ío-gá cúnùu-xi dácúúxi dàva-gá.

14

Ñáyiú càháⁿ tñúhu sá dácàhu ìní ñáhá Espíritú Yá Ndiòxí

¹ Te vá dáñá ndèe-ndó cùu ìní-ndó tñàhà ñáyiú-ndo, te cuhuⁿ ìní-ndó sá ndùu táhú-ndó núú Yá Ndiòxí titní núú chiúⁿ cada-ndo nacuaá chindee ñàhà Espíritú-gá xii-ndo, te ío cuhuⁿ ìní-ndó sá ndúú táhú-ndó càháⁿ-ndó tñúhu sá dácàhu ìní ñáhá Yá Ndiòxí xii-ndo. ² Te cue ñáyiú càháⁿ tñúhu sá dácàhu ìní ñáhá Espíritú Yá Ndiòxí tñúhu sá ñà túú xini-yu, te tñúhu càháⁿ-yu-áⁿ cúú-xí sá cúú-xí Yá Ndiòxí te ñà díú sá cúú-xí ñáyiú chi ñà túú təcú tñuní-yu, te mee Espíritú Yá Ndiòxí quidé-xí dùcaⁿ caháⁿ-yu tñúhu yiyuhu. ³ Te cue ñáyiú ní nduu táhú núú Yá Ndiòxí càháⁿ tñúhu sá dácàhu ìní ñáhá-gá xii-yu, te ñáyiú-áⁿ dácàháⁿ-yu ñáyiú nàcuáa cuíta níhí ndéé-gá-yu cundecú-yu ichi-gá, te ducaⁿ cuáñahá-yu tñúhu ndee ìní xii-yu òré ndìhú ìní-yu. ⁴ Te ñáyiú càháⁿ tñúhu sá dácàhu ìní ñáhá Espíritú Yá Ndiòxí xii-yu tñúhu sá ñà túú xini-yu-áⁿ, ñáyiú-áⁿ mee-ní-yu níhí ndéé-yu ndécú-yu ichi-gá. Dico ñáyiú càháⁿ tñúhu sá dácàhu ìní ñáhá-gá xii-yu, càháⁿ-yu tñúhu-áⁿ nàcuáa níhí ndéé dàva-gá ñáyiú nchìcúⁿ nihnu ichi-gá.

⁵ Te yúhú ío cudíí ìní-í te núu nchaa-ndo càháⁿ-ndó tñúhu sá dácàhu ìní ñáhá Espíritú Yá Ndiòxí xii-ndo tñúhu sá ñà túú xini-ndó. Dico ío-gá cudíí ìní-í te núu nchaa-ndo càháⁿ-ndó tñúhu sá dácàhu ìní ñáhá-gá, chi ío-gá xini ñùhu-xi sá càháⁿ-ndó tñúhu-áⁿ dácúúxi sá càháⁿ-ndó tñúhu sá dácàhu ìní ñáhá Espíritú-gá càháⁿ-ndó tñúhu sá ñà túú xini-ndó. Dico ìíⁿ-ni nùtnahá-xi quide-ndo te núu nchòhó ñáyiú càháⁿ tñúhu sá dácàhu ìní ñáhá Espíritú-gá càháⁿ-ndó nàcuáa quèe-xi tñúhu-áⁿ. Te ducaⁿ te nchaa ñáyiú ndècu ichi Yá Ndiòxí cuíta níhí ndéé-gá-yu quíhíⁿ cundecú-yu ichi-gá. ⁶ Te núu yúhú quexìo-í núu ndécú nchòhó ñáyiú ndècu ndìhì-í ichi Xitohó Jhesucristú, te ngúíta-í càháⁿ-í mee-ni tñúhu sá dácàhu ìní ñáhá Espíritú Yá Ndiòxí xii-í tñúhu sá ñà túú xini-í, te ñà

túú nã sá vãha cuu-xi sá cúú-xi-ndó. Dico cuu-xi sá vãha xii-ndo te núu na càháⁿ-í núú-ndó nchaa tñúhu sá dánèhé ñáhá Yá Ndiòxí xii-í tñúhu sá vãtá dácuaàh-gá-í, ndìhì nchaa tñúhu sá sà xini-í, ndìhì nchaa tñúhu sá dácàhu ìní ñáhá-gá xii-í càháⁿ-í, ndìhì nchaa dava-gá tñúhu-gá.

⁷ Te na càda-o cuendá sá núu ìíⁿ tée tiú-dé vilu àdi cani-dé àrpá te núu ñà túú sàhnú-dé ndìhì-xi ìíⁿ yaá, te ñà cùtnùní ìní-ó nã yaá caní-dé àdi ná yaá tiú-dé te núu ducaⁿ na càda-dé. ⁸ Te ñà-ni ducaⁿ sãtnahá-xi cùu tçucu tée cùu sandadú tiú cútú, chi núu vá tiú váha-dé nàcuáa tàù-xi cunduu òré quíhíⁿ-güedé nàa-güedé, te vá ngündecu túha dava-gá cue sandadú te núu ducaⁿ na càda-dé vá tiú váha-dé. ⁹ Te ducaⁿ sãtnahá-xi cùu nchòhó te núu vá càháⁿ-ndó ìíⁿ tñúhu nàcuáa tàù-xi cunduu núú ñáyiú te vá təcú tñuní-yu tñúhu càháⁿ-ndó. ¡Chi áúⁿ nã cuu càháⁿ-ndó te núu ducaⁿ na càda-ndo! ¹⁰ Te ío titní núú tñúhu ío ñuyíú, te ìíⁿ ìíⁿ núú tñúhu-áⁿ cùtnùní ìní ñáyiú nàcuáa quèe-xi. ¹¹ Te núu nchoo ñà təcú tñuní-ó ìíⁿ tñúhu càháⁿ ìíⁿ ñáyiú, te quide-ó-yu ñáyiú ñuu xicá chi ñà túú càháⁿ-yu tñúhu càháⁿ-ó, te ñà-ni ducaⁿ quide ñahá-yu xii nchoo tucu. ¹² Te xíáⁿ núu càhí tñúhu-í xii nchaa nchòhó ñáyiú ío cuini nduu táhú núú Yá Ndiòxí sá Espíritú-gá chindee ñàhà-xi xii-ndo cada-ndo ná daha núú chiúⁿ, te ío nducu ndèe-ndo cada-ndo chiúⁿ sá ní nduu táhú-ndó nàcuáa cuíta níhí ndéé-gá ñáyiú ndècu ichi-gá quíhíⁿ.

¹³ Te núu càháⁿ-ndó tñúhu sá ñà túú xini-ndó, tñúhu sá dácàhu ìní ñáhá Espíritú Yá Ndiòxí xii-ndo, te xini ñuhu-xi sá càcáⁿ táhú-ndó núú Yá Ndiòxí cuendá sá ná chindee ñàhà-gá xii-ndo càháⁿ-ndó núú ñáyiú núu nása quèe-xi tñúhu-áⁿ. ¹⁴ Chi núu nchoo na càháⁿ ndìhì-o Yá Ndiòxí ndìhì tñúhu sá ñà túú xini-ó, te ni yùhu ni ìní-ó càháⁿ ndìhì-o-gá dicó-ni sá ñà təcú tñuní-ó nàcuáa nduu tñúhu càháⁿ-ó. ¹⁵ Te xíáⁿ núu xini ñuhu-xi càháⁿ ndìhì-o Yá Ndiòxí ni yùhu ni ìní-ó nàcuáa chindee ñàhà Espíritú-gá xii-o te càháⁿ-ó nàcuáa tecú tñuní-ó, te ñà-ni ducaⁿ càda-o òré xitá yùhu-o chiñuhu-o Yá Ndiòxí, chi ni yùhu ni ìní-ó dùcaⁿ cada-o nàcuáa chindee ñàhà Espíritú-gá xii-o, te cùtnuní ìní-ó nàcuáa cuáháⁿ nchaa tñúhu càháⁿ-ó xita-o. ¹⁶ Chi núu nchoo na ndàcáⁿ táhú-ó núú

Yá Ndiöxí ndihi mee-ni tnúhu sá ñà túú xini-ó tnúhu sá dácàhu iní ñáhá Espíritú-gá xii-o, te ñáiyu ñà túú ní ndùu táhú cáháⁿ tnúhu cáháⁿ-ó ndèdóho ñáhá-yu xii-o, te ñáiyu-áⁿ vâ ndácú-yu cáháⁿ-yü tnúhu cáháⁿ-ó ndàcáⁿ táhú-ó ndihí-yu núú Yá Ndiöxí chi ñà túú tècú tnùnì-yü tnúhu cáháⁿ-ó. ¹⁷ Te váha-ni quide-o sá dúcáⁿ cáháⁿ-ó ndàcáⁿ táhú-ó núú Yá Ndiöxí, te dicó-ni sá tnúhu-áⁿ ñà túú chindee-xi ñáiyu nàcuáa cuita níhí ndéé-gá-yu cundecú-yu ichi-gá. ¹⁸ Te yúhú ío ndàcáⁿ táhú-í núú Yá Ndiöxí chi cáháⁿ-í tnúhu sá ñà túú xini-í tnúhu sá dácàhu iní ñáhá Espíritú-gá xii-í, te cáháⁿ-gá-í dácúúxí ncháa nchohó. ¹⁹ Te òré tàcá ñáiyu ndècu ichi Yá Ndiöxí dácuhá-yü tnúhu-gá, te cáháⁿ-í tnúhu-gá núú-yü sá sà ní cutnùnì iní mée-í nàcuáa ducaⁿ cutnùnì iní-yü nàcuáa ndùu tnúhu cáháⁿ-í. Te tnáhá-gá iní-í cáháⁿ-í úhúⁿ-ni tnúhu-áⁿ núú-yü dácúúxí sá cáháⁿ-í úxí mîl tnúhu sá ñà túú xini-í, tnúhu sá dácàhu iní ñáhá Espíritú Yá Ndiöxí xii-í cáháⁿ-í.

²⁰ Te nchòhó ñáiyu ndècu ndihi-í ichi Xítohó Jesucristú, vâ caní iní-ndó dàtná sání iní cue landú, chi caní iní-ndó dàtná tàù-xi cunduu chi sa sacuéhé-ndó. Dico cuu-ndo dàtná cue landú líhli vâ cundècu-ndo ichi cuèhé ichi duha, chi cue landú-áⁿ ñà túú ndècu-güexi ichi-áⁿ. ²¹ Te núú tùtú Yá Ndiöxí cáháⁿ-xi nàcuáa ní cáháⁿ-gá, te cächí-xi: “Cue téé ñúu xicá cáháⁿ ndi ñáiyu núú tnúhu quihíⁿ-güedé cáháⁿ-güedé tnúhu-í núú ñáiyu israhèl cada-güedé núu-í, te cuèi ducaⁿ dico vâ quindáá iní-yü tnúhu-í”, duha ní cachí Yá Ndiöxí te ducaⁿ ní ngúndéé núú tùtú-gá. ²² Te tnúhu sá dácàhu iní ñáhá Espíritú Yá Ndiöxí xii-o tnúhu sá ñà túú xini-ó, xíáⁿ cúú-xí cuèndá sá cút-nùnì iní cue ñáiyu ñà túú sàndáá iní tnúhu Yá Ndiöxí sá ñà túú cùu váha iní ñáhá-gá xii-yü. Dico sá cúú-xí cuè ñáiyu sàndáá iní tnúhu-gá ñà túú nâ quidè-xí sá cúú-xí-yü. Te tnúhu sá dácàhu iní ñáhá Yá Ndiöxí xii-o, xíáⁿ cúú-xí cuèndá sá cút-nùnì iní cue ñáiyu sàndáá iní tnúhu-gá sá ndécú ndihi ñaha-gá xii-yü, dico ñà túú dùcaⁿ sani iní cue ñáiyu ñà túú sàndáá iní tnúhu-gá. ²³ Te núú ní tacá nchaa nchòhó ñáiyu ndècu ichi Yá Ndiöxí, te nchaa-ndo ní ngúíta-ndo cáháⁿ-ndó tnúhu sá dácàhu iní ñáhá Espíritú Yá Ndiöxí xii-ndo tnúhu sá ñà túú xini-ndó, te mei òré-áⁿ quexio

cue ñáiyu ñà túú sàndáá iní tnúhu-gá, ndihi cue ñáiyu vátá quini dana-gá tnúhu-gá núú ndécú-ndó, te ñáiyu-áⁿ quesàhá-yü sá lúcú-ndó te núu ducaⁿ cáháⁿ-ndó tnúhu sá dácàhu iní ñáhá Espíritú-gá xii-ndo òré quexio-yü. ²⁴ Dico núu nchaa-ndo cáháⁿ-ndó tnúhu sá dácàhu iní ñáhá Yá Ndiöxí xii-ndo, te mei òré-áⁿ quexio cue ñáiyu ducaⁿ ñà túú sàndáá iní-xi tnúhu-gá, ndihi cue ñáiyu ducaⁿ ñà túú xini dána tnúhu-gá-áⁿ, te ñáiyu-áⁿ cutnùnì iní-yü sá ndécú cuèchi-yü núú-gá, te ngúíta-yü cuáha-yü cuèndá sá ñà túú quide váha-yü ndècu-yü cuèndá sá cáháⁿ-ndó tnúhu-gá ndèdóho-yü. ²⁵ Te nchaa sá cuèhé sá dúhá ní quidè-yü sàni iní-yü yiyuhu ndacu iní-yü, te ngúíta-yü nálhmá-yü nchaa sá ñà túú váha ní quidè-yü núú Yá Ndiöxí, te cachí-yü sá ño càhnu cuu-gá, te cachí tucú-yü sá ndáá ndécú ndihi-ndo-gá.

Cada-o nàcuáa tàù-xi cunduu

²⁶ Te vitna nchòhó ñáiyu ndècu ndihi-í ichi Xítohó Jesucristú xini ñuhu-xi duha cada-ndo. Òré tàcá-ndó te dava-ndo càta yuhu-ndo chiñuhu-ndo Yá Ndiöxí, te dava-ndo dàsahú-ndó ñáiyu tnúhu-gá, te dava-ndo cáháⁿ-ndó nàcuáa dàquixi túu Yá Ndiöxí iní-ndó, te dava-ndo cáháⁿ-ndó tnúhu sá dácàhu iní ñáhá Espíritú Yá Ndiöxí xii-ndo tnúhu sá ñà túú xini-ndó, te dava-ndo cáháⁿ-ndó nàcuáa quèe-xi tnúhu-áⁿ. Te nchaa sá quidè-ndó ná cùu-xi nàcuáa chindee-xi ñáiyu nàcuáa cuita níhí ndéé-gá-yü cundecú-yü ichi-gá. ²⁷ Te òré cáháⁿ-ndó tnúhu sá dácàhu iní ñáhá Espíritú Yá Ndiöxí xii-ndo tnúhu sá ñà túú xini-ndó, te úu-ni-ndo àdi únì-ni tnáhá-ndó cáháⁿ-ndó tnúhu-áⁿ te vâ úuⁿ-ni cáháⁿ-ndó chi ndéé ndihi ñáiyu-ndo te dàtnùnì ngúíta ingá-ndó cáháⁿ-ndó. Te xini ñuhu-xi sá ñáiyu cáháⁿ-yü nàcuáa quèe-xi tnúhu cáháⁿ-ndó-áⁿ. ²⁸ Te núu ñà túú ñáiyu tècú tnùnì nàcuáa quèe-xi tnúhu cáháⁿ-ndó-áⁿ, te núú mée núú ñáiyu-ndó cáháⁿ-ndó tnúhu-áⁿ cáháⁿ ndihi-ndo Yá Ndiöxí te vâ cáháⁿ-ndó núú ñáiyu. ²⁹ Te òré cáháⁿ-ndó tnúhu sá dácàhu iní ñáhá Yá Ndiöxí xii-ndo te úu-ni-ndo àdi únì-ni tucu-ndo cáháⁿ, te dava-gá-ndó cundèdóho-ndo tnúhu-áⁿ te cáháⁿ-ndó núu váha-ni cáháⁿ-güedé àdi ñà túú váha-ni. ³⁰ Te núu ñáiyu-ndo ní dácáhu iní ñáhá Yá Ndiöxí xii-ndo ñáiyu

cáháⁿ-ndó, te núu ìⁿ-ndo sà caháⁿ-ndó te ngúúⁿ-ndó te quíhu tucu ingá-ndó cáháⁿ-ndó nàcuáa ní dácáhu íní ñáhá Yá Ndióxi xii-ndo. ³¹ Te nchaa nchòhò ñáiyu ní nduu táhu cáháⁿ tnúhu sá dácáhu íní ñáhá Yá Ndióxi, te vá úúⁿ-ní cáháⁿ-ndó chi díhna-gá ìⁿ-ndo cáháⁿ te dátñuní cáháⁿ tucu ingá-ndó. Te ducaⁿ càda-ndo cuendá nchaa-ndo tècú tnùní-ndó nàcuáa ndùu tnúhu cáháⁿ ìⁿ ìⁿ-ndo, te ducaⁿ te cudíⁿ-gá íní-ndó cànchicúⁿ nihnu-ndo ìchi-gá. ³² Te nchaa ñáiyu cáháⁿ tnúhu Yá Ndióxi sa ñaha-ná mèe-yu nàcuáa quidé-yu cáháⁿ-yu tnúhu-gá nàcuáa ñá túú quide cutexínu-yu. ³³ Te Yá Ndióxi cúú-gá Yaá quidé ò váha cùu ìⁿ-nuu-ndo ndecu-ndo, te ñá túú dátícaⁿ nuu ñaha-gá xii-ndo.

Te na cächí tnúhu-í xii-ndo nàcuáa cáháⁿ-í nchaa núú tàcá cue ñáiyu ndècu ndíhi-o ichi Xítohó Jesucristú. ³⁴ Te yúhú cächí-í sá vá cúu cáháⁿ cue ñáiyu díhí òré tàcá-ndó dàcuaha-ndo tnúhu-gá, chi ñá túú dùcaⁿ cuini-gá cadá-yu, te quindáá-ni íní-yu cadá-yu nàcuáa tàú-xi cunduu. ³⁵ Te núu ìⁿ sá cuini-yu nducu tnúhu-yu te ndéé òré nasáá-yu vehé-yu te nducu tnúhu-yu núú yíⁿ-yu, chi ñá túú ndùu váha-xi sá cáháⁿ-yu núú tàcá nchaa ñáiyu dàcuáha ndíhí-yu tnúhu-gá.

³⁶ Te chí dándacu íní sá ñà díú nchòhò cúú-ndó ñáiyu ní ngúndecu ndíhi tnúhu Yá Ndióxi díhna nuu nàcuáa datècú tnúhu-ndo dàva-gá ñáiyu, te ní ñà díú mèe-ni nchòhò sa ní ngúndecu ndíhi-ndo tnúhu Yá Ndióxi vitna, núu xíⁿ vá cächí-ndó sá ò cùnuu-ndo. ³⁷ Te núu dava nchòhò sání íní-ndó sá cáháⁿ-ndó nàcuáa dàcahu íní ñáhá Yá Ndióxi xii-ndo àdi sani íní-ndó sá quidé-ndó nàcuáa chindee ñaha Espiritú-gá xii-ndo, te cuáha váha-ndo cuendá sá ncháá tnúhu cáháⁿ-í-a cùu-xi tnúhu sá ní cachí tnúhu mee Xítohó Jesucristú cada-o. ³⁸ Te ndéda-ni cää ñáiyu ndècu ndíhi-ndo te núu ñá túú sándáá íní-yu tnúhu cáháⁿ-í, te vá cadá cuendá-ndó tnúhu cáháⁿ-yu.

³⁹ Te vitna nchòhò ñáiyu ndècu ndíhi-í ichi Xítohó Jesucristú, ò caní íní-ndó cáháⁿ-ndó tnúhu sá dácáhu íní ñáhá Yá Ndióxi núú ñáiyu, te ñaha-ndo na cáháⁿ cue ñáiyu ní nduu táhu núú Yá Ndióxi sá cáháⁿ-yu tnúhu sá dácáhu íní ñáhá Espiritú-gá xíⁿ-yu tnúhu sá ñà túú xini-yu.

⁴⁰ Te cada-ndo nchaa nàcuáa tàú-xi cunduu nàcuáa ñá túú ñà cuu cundecu-ndo.

15

Ní ndoto Xítohó Jesucristú

¹ Te vitna nchòhò ñáiyu ndècu ndíhi-í ichi Xítohó Jesucristú cuini-í sá dándacu íní-ndó nàcuáa ní dánèhé ñáhá-í xii-ndo tnúhu sá cáháⁿ nàcuáa naníhí tàhú-ó, chi ñu tnúhu-áⁿ ní sándáá íní-ndó te nchicúⁿ nihnu-ndo. ² Te sá xíí tnúhu-áⁿ níhnu-ndó ìchi cuáháⁿ-ndó núú ndúú táhú-ndó cùndecu-ndo ndíhi Yá Ndióxi ní caa ní quíhíⁿ, te ducaⁿ ndùu táhú-ndó núú cùndecu-ndo ní caa ní quíhíⁿ ndíhi Yá Ndióxi te núu nchicúⁿ nihnu-ndo nàcuáa ní dánèhé ñáhá-í xii-ndo, te núu ñá túú nchicúⁿ nihnu-ndo te ñá túú ní sándáá íní-ndó nàcuáa tàú-xi cunduu.

³ Te yúhú sa ní cachí tnúhu-í xii-ndo ìⁿ tnúhu sá ò cùnuu ní níhí-í, chi ní cachí tnúhu-í xii-ndo sá Xítohó Jesucristú ní xíhí-gá cuendá nchaa yíca cuèchi-o, te ducaⁿ ní cuu chi ducaⁿ cáháⁿ-xi núú tùtú Yá Ndióxi sá dúcáⁿ yáha-gá. ⁴ Te ní chindúxi ñaha-güedé xii-gá te nduu úní ní dándótó ñaha Yá Ndióxi xii-gá, te ducaⁿ ní cuu chi ducaⁿ cáháⁿ-xi núú tùtú Yá Ndióxi. ⁵ Te sátá ní ndoto-gá te ní quee túu-gá núú tē Pèlú, te dátñuní ní quee túu-gá núú dàva-gá cue tée ní táuchíúⁿ-gá cáháⁿ tnúhu-gá. ⁶ Te sátá dúcáⁿ te dátñuní ní quee túu-gá núú ùhúⁿ cièndú cue ñáiyu ndècu ichi-gá, te vèi-yu xíndecu-ní-yu vitna chi sacú-ni-yu ní xíhí. ⁷ Te dátñuní ní quee túu-gá núú tē Jàcobó, te sátá dúcáⁿ te dátñuní ní quee túu-gá núú nchaa cue tée ní táuchíúⁿ-gá cáháⁿ tnúhu-gá.

⁸ Te ndéé núú ní ndíhi-ná te ní quee túu-gá núú mèe-í, te òré ní quee túu-gá núú-í te cùu-í dátñá ìⁿ déhe yiquíⁿ vátá sàá-gá nduu càcu chi cùu-í ìⁿ tée ñá túú sání váha íní-xi cuendá-gá ní cùu. ⁹ Te yúhú ñá túú cùnuu-í dátñá cùnùu cue tée ní táuchíúⁿ Xítohó Jesucristú cáháⁿ tnúhu-gá. Te cùu-í ìⁿ tée ní táuchíúⁿ-gá cáháⁿ tnúhu-gá, cuèi ñá túú tàú-í sá cáháⁿ-í tnúhu-gá, chí ní xóo cuu ùhú íní-í cue ñáiyu ndècu ichi Yá Ndióxi. ¹⁰ Dico Yá Ndióxi ò váha íní-gá chí ní quide ñaha-gá xii-í ìⁿ tée váha, chí ñá túú-gá quidé-í dátñá ní xóo cada-í. Te ò cùndahú íní ñáhá-gá chindèe ñaha-gá xii-í dico ñá túú àúⁿ ñà cuu chindèe ñaha-gá, chí ò-gá vèi chiuⁿ-gá ní

cuu sa ta quide-í cuáháⁿ dàcuúxí dáva-gá cue téé ní táúchíúⁿ-gá cáháⁿ tnúhu-gá te ñá dǔú mèe-í ducaⁿ quide-í chi mee Yá Ndiöxí ío cùndahú iní ñáhá-gá chíndèe ñaha-gá xii-í quidè-í chiùⁿ-gá. ¹¹ Te ñá túú nǎ cada-xi cuèi dáva-gá-güedè sa ní cuu vǎi-gá chiùⁿ-gá quidé-güedè àdi yúhú, chi ìⁿ-ni tnúhu càháⁿ-ndí te tnúhu-áⁿ cúú tnúhu ní sándáá iní-ndó.

Cue ñáyiú ní xíhí ndotó-yu

¹² Te nchúhú cue téé càháⁿ tnúhu Xítoho Jesucristú càháⁿ-ndí sá ní xíhí-gá te ní ndoto-gá, ¿te ná cuèndá dáva nchòhó cächí-ndó sǎ vǎ ndótó cuè ñáyiú ní xíhí? ¹³ Te núu ducaⁿ sàni iní-ndó sǎ vǎ ndótó cuè ñáyiú ní xíhí te ní Xítoho Jesucristú ñá túú ní ndòto-gá te núu ducaⁿ. ¹⁴ Te núu dicó Xítoho Jesucristú ñá túú ní ndòto-gá ñá, te nchaá tnúhu sá dánèhé ñáhá-ndí xii-ndo ñá túú nàndíhi-xi te núu ducaⁿ, te àúⁿ nǎ cuu sándáá iní-ndó-gǎ te núu ducaⁿ. ¹⁵ Te núu dicó cúú-xí ìⁿ sǎ ndáá tnúhu sàni iní dáva-ndo ña, te dácuandehnde-ndí sá càháⁿ-ndí tnúhu Yá Ndiöxí núú-ndó te núu ducaⁿ, te ñá túú càháⁿ ndáá-ndí núú-ndó sǎ Yá Ndiöxí ní dándótó-gǎ Xítoho Jesucristú, te núu ndáá nàcuáa sàni iní dáva-ndo sǎ vǎ ndótó cuè ñáyiú ní xíhí, dico ñá ndáa nàcuáa sàni iní-ndó. ¹⁶ Te núu vǎ ndótó cuè ñáyiú ní xíhí te ní Xítoho Jesucristú ñá túú ní ndòto-gá. ¹⁷ Te núu Xítoho Jesucristú ñá túú ní ndòto-gá ñá, te àúⁿ nǎ cuu sándáá iní-ndó-gǎ te núu ducaⁿ, te ndècu-ni cuèchi-ndo núu Yá Ndiöxí te núu ducaⁿ. ¹⁸ Te núu ndáá nàcuáa sàni iní-ndó ñá te cue ñáyiú ní sándáá iní ñáhá xii Xítoho Jesucristú ñáyiú ní xíhí ní xíta nihnú-yu te núu ducaⁿ. ¹⁹ Te núu nchoo ndècu ndíhi-o tnúhu ndee iní núu Xítoho Jesucristú cuèndá-ni sá cùndècu-o ñuyúú-a ña, te cùu-o ñáyiú ío-gá duuⁿ duuⁿ ndàhú sá cúú-xí dáva-gá ñáyiú te núu ducaⁿ.

²⁰ Dico ndáá sá Xítoho Jesucristú ní xíhí-gá te ní ndoto-gá núu xíáⁿ cùtnùni iní dáva-o sǎ ndótó cuè ñáyiú ní xíhí ñáyiú ní sándáá iní tnúhu-gá. ²¹ Te sá cuèchi ìⁿ-ni téé ní xíndecu ñuyúú-a xíáⁿ xíhí ñáyiú, te sá cuèndá ìⁿ-ni tucu ingá téé te ndoto cuè ñáyiú ní xíhí. ²² Te nchaá ñáyiú xíhí-yu sá cuèchi ìⁿ téé, te téé-áⁿ cúú-dè ndíi Àdán téé díhna nuu ní cuu ñaní tnáhá cuè ñáyiú ñuyúú. Te ñu-ni ducaⁿ sǎ cuèndá ìⁿ-ni

tée te ndoto cuè ñáyiú ní xíhí, te téé-áⁿ cúú-dè Xítoho Jesucristú chi nchaá ñáyiú ndècu ndíhi-gá ndotó-yu. ²³ Te díhna-gá Xítoho Jesucristú ní ndoto-gá xíáⁿ cùtnùni iní dáva-o sǎ ndúu na quixi tucu-gá ñuyúú-a te dává-áⁿ ndoto nchaá ñáyiú ní xíhí ñáyiú ní sándáá iní tnúhu-gá. ²⁴ Te dǎtnùni ducaⁿ te sáá nduu nàa nchaá sá ío ñuyúú, te Xítoho Jesucristú danàa-gá nchaá ndi túhú sá cúnúu ío ñuyúú-a, chi danàa-gá nchaá ñáyiú ío cúnúu, ndíhi yucu ñávàha, ndíhi nchaá espíritú xínú cuèchi núu-xi. Te ducaⁿ te cúnaha-gǎ xii Tǎtá-ó Dǔtú Ndiöxí taxi tnùni-gá. ²⁵ Chi Xítoho Jesucristú dacuítí taxi tnùn-gá ndéé ná sáá nduu dànaa-gá nchaá sá cúú úhú iní ñáhá xii-gá. ²⁶ Te ndéé núu ní ndíhi-ná te danàa-gá sá quidé xíhí ñáyiú. ²⁷ Te ducaⁿ chi càháⁿ-xi núú tútú Yá Ndiöxí sá mée-gǎ ní nachíhi-gá nchaá sá ío ndaha Xítoho Jesucristú cuèndá sá mée Xítoho Jesucristú taxi tnùn-gá, te vǎ yòo ìⁿ taxi tnùn ñáhá xii Yá Ndiöxí, chi mee Yá Ndiöxí cúú-gǎ Yaá ní nachíhi-gá nchaá sá ío ndaha Xítoho Jesucristú. ²⁸ Te díhna-gá ní xáhaⁿ Yá Ndiöxí xii Xítoho Jesucristú Yaá cúú Dèhe-gá sá quíndaha-gá nchaá sá ío, te òrè ná quíndaha Xítoho Jesucristú nchaá sá ío, te cúnaha-gǎ xii Yá Ndiöxí taxi tnùn ñáhá-gǎ xii-gá, te ducaⁿ te mee-nǎ Yá Ndiöxí taxi tnùn-gá nchaandí túu sá ío.

²⁹ Te núu ñá túú ndáá càháⁿ-í, ¿te ná cuèndá dáva ñáyiú sànduté-yu cuèndá ñáyiú ní xíhí núu ñá túú ndáá sá ndótó ñáyiú ní xíhí?

³⁰ Te nchúhú ducaⁿ-ni sàni iní ñáyiú cahni ñáhá-yu xii-ndí, te núu vǎ ndótó ñáyiú ní xíhí te àúⁿ nǎ cuu ducaⁿ quide cahnu iní-ndí ducaⁿ cuíní-yu cahni ñáhá-yu xii-ndí te núu ducaⁿ. ³¹ Te nchòhó ñáyiú ndècu ndíhi-í ichi Xítoho Jesucristú ío váha sàni iní-í cuèndá-ndó, chi ndècu-o ichi-gá. Te na cächí tnúhu ndáá-í xii-ndo sǎ ìⁿ nduu ìⁿ nduu ndee iní ñáhá ñáyiú cahni ñáhá-yu xii-í. ³² Te núu dicó ndáá sǎ vǎ ndótó ñáyiú ní xíhí dǎtná cächí dáva ñáyiú, te àúⁿ nǎ cuu ní xíndecu-í ñuú Èfesú ní cuu úhú iní ñáhá ñáyiú xii-í te núu ducaⁿ, chi ñáyiú-áⁿ ní quidé-yu dǎtná quidé ìⁿ quítí dééⁿ sǎ cúú-xí-í. Te núu ndáá sǎ vǎ ndótó ñáyiú ní xíhí ñá, te váha-gá núu cächí-ó dǎtná cächí ñáyiú: “Vítna na còho-o te na càxi-o chi

tnée ìdá cuú-ó”, duha càchí-yu.

³³ Te vǎ dáńǎ-ndó mée-ndo dandahú ñáhǎ ñáyiú ndècu ichi cuehé ichi duha xii-ndo, te nguíta-ndo càni iní-ndó dàtnǎ sání iní-yu. Chi quèe ndáá-xi nàcuáa càháⁿ tucu dava-gǎ ñáyiú, chi càchí-yu sǎ nũ ñáyiú quide váha na nihí tnáhǎ-yu ndihí ñáyiú ndècu ichi cuehé ichi duha, te nguíta ñáyiú quide váha-án cadá-yu tnáhǎ-yu nchaa sǎ cuehé sǎ dúhá dàtnǎ quidé ñáyiú-án. ³⁴ Te ío váha cuáha-ndo quidé nàcuáa cundecu-ndo, te vǎ cadá-gǎ-ndó dàtnǎ quidé cuè ñáyiú ndècu ichi cuehé ichi duha. Te dava-ndo quide-ndo datnǎ quidé cuè ñáyiú ndècu ichi cuehé ichi duha chi ñǎ túú sàndáá iní-ndó Yǎ Ndióxi. Te duha càháⁿ-í cuendǎ sǎ cúcuáⁿ nuú-ndó cuendǎ nchaa sǎ ñǎ túú váha quide-ndo.

Nàcuáa ndoto ñáyiú ní xihí

³⁵ Te cudana dava-ndo ndècu tnúhu-ndo nũ nása ndoto ñáyiú ní xihí, te nása cunduu yiqui cuńú-yu òré ndotó-yu. ³⁶ Te nchòhò ñáyiú ducaⁿ càháⁿ cuú-ndó ñáyiú ñǎ túú tnáhí cùnuni iní-xi, te duha na càháⁿ-í nàcuáa tecu tnùní-ndó. Te nuú ìⁿ tatǎ ná chihí-ó te tèhyú mée-xí te xínu déhe-xi. ³⁷ Dico ñǎ díú sǎ sǎ ní xínu ta sǎhnu cuáhǎⁿ ní cǔxi-o, te diu-ni ducaⁿ quide-o cueí trù ndihí nchaa dava-gǎ tatǎ xítú-ó. ³⁸ Te Yǎ Ndióxi quidé-gǎ sácunduú tatǎ xínu-án dàtnǎ cuini mée-gǎ cunduu. Te ndèda-ni càa tatǎ te diu-ni-gǎ quidé-gǎ sácunduú-xi nàcuáa tǎú-xi cunduu. ³⁹ Te ndí díⁿ ndǎa nchaa yiqui cuńú, chi tucu càa yiqui cuńú nchoo cuè ñáyiú, te tucu càa yiqui cuńú nchaa quiti xica nuú ñúhú, te tucu càa yiqui cuńú nchaa quiti ndàva, te tucu càa yiqui cuńú nchaa chácá. ⁴⁰ Te ducaⁿ ñǎ túú ìⁿ-ni caa nchaa yiqui cuńú sǎ ío andiu ndihí nchaa yiqui cuńú ñáyiú ío ñuyúú-a, te ducaⁿ ñǎ túú ìⁿ-ni ndǎa vii nchaa sǎ ío andiu ndihí ñuyúú-a. ⁴¹ Te ducaⁿ cùu tucu-xi nchíanchii chi tucu dàyehé-xi, te tucu dàyehé yóó, te tucu dàyehé nchaa chódiní, te ducaⁿ ñǎ túú ìⁿ-ni dayehé nchaa chódiní. ⁴² Te ducaⁿ sǎtnahǎ-xi cùu ñáyiú ní xihí te ndoto, chi tucu càa yiqui cuńú-yu sǎ nguńdǔxi te tucu cunduu yiqui cuńú-yu òré ndotó-yu, te yiqui cuńú sǎ ndótó ndihí-yu-án vǎ ndihí nihnu-gǎ-xi. ⁴³ Te yiqui cuńú ñáyiú xihí ñǎ túú nándihí-xi, dico

yiqui cuńú sǎ ndótó ndihí-yu te ío váha cunduu. Te nchaa yiqui cuńú ñáyiú xihí ñǎ túú tnáhí-gǎ ndee-xi, dico yiqui cuńú ndoto ndihí-yu xǎⁿ ío cunduu ndee-xi. ⁴⁴ Te yiqui cuńú nchaa ñáyiú xihí cuú-xí cuendǎ ñuyúú-a, dico yiqui cuńú sǎ ndótó ndihí-yu xǎⁿ cundecu-ná-xi cuendǎ Espíritú Yǎ Ndióxi. Te dàtnǎ ío yiqui cuńú sǎ cuú-xí cuendǎ ñuyúú-a, te ducaⁿ ío yiqui cuńú sǎ cuú-xí cuendǎ mee-nǎ Espíritú Yǎ Ndióxi.

⁴⁵ Te nuú tǔtú Yǎ Ndióxi càchí-xi: “Ndíi Adán ndíi ní xíndecu ndéé díhna ní chihí Yǎ Ndióxi iní ndíi”, duha càchí-xi nuú tǔtú-gǎ. Te ingǎ tucu tée cùu-dé dàtnǎ ndíi Adán te tée-án cuú-dé Xítóhò Jesucristú, te Yaá-án quidé-gǎ sǎ mée-ná Espíritú Yǎ Ndióxi quidé-xí ndècu-o ichi-gǎ vitna. ⁴⁶ Te díhna-gǎ yiqui cuńú cuendǎ ñuyúú-a ní ngúndecu, te dàtnúní ngúndecu yiqui cuńú cundecu ndihí mee-nǎ Espíritú Yǎ Ndióxi. ⁴⁷ Te tée díhna nuu ní xíndecu ñuyúú-a chi ñuhu ní cadúha ñaha Yǎ Ndióxi xii-dé, te tée-án cuú-dé ndíi Adán, te ingǎ tucu tée ní cuuⁿ-dé andiu te tée-án cuú-dé Xítóhò Jesucristú. ⁴⁸ Te nchaa ñáyiú càa yiqui cuńú-yu dàtnǎ cáa yiqui cuńú té Adán tée ducaⁿ ní cuáha ñuhu-án, te nchaa ñáyiú ní nduu táhú cundecu ndihí tée ducaⁿ vèxi cuuⁿ andiu-án, ñáyiú-án nduu yiqui cuńú-yu dàtnǎ cáa yiqui cuńú ní nduu táhú-dé ndécú ndihí-dé vitna, te tée-án cuú-dé Xítóhò Jesucristú. ⁴⁹ Te nchaa ñáyiú ñuyúú-a càa-yu dàtnǎ-ni càa datnǎ-ni nduu tée ducaⁿ ní cuáha ñuhu-án. Te nchaa nchoo ñáyiú ní nduu táhú cundecu ndihí tée ducaⁿ vèxi cuuⁿ andiu-án nduu-o dàtnǎ-ni càa datnǎ-ni nduu tée-án tucu.

⁵⁰ Te nchòhò ñáyiú ndècu ndihí-í ichi Xítóhò Jesucristú càchí tnúhu-í xii-ndo sǎ ncháá nàcuáa càa yiqui cuńú ñáyiú xíndecu vitna vǎ sǎa-xi cundecu-xi nuú ndécú Yǎ Ndióxi tǎxi tnùní-gǎ, chi ñuyúú-a ndihí nihnu-xi. Dico sǎ tǎú-xi sǎá nuú ndécú-gǎ tǎxi tnùní-gǎ xini ñuhu-xi cuu-xi sǎ cúdíi cundecu. ⁵¹ Te na càchí tnúhu-í xii-ndo ìⁿ tnúhu sǎ yíyùhu ní cuu: Dava-o cùu-ó te dava-o cundecu-ni-o, dico nchaa-o nǎdǎma yiqui cuńú-ó. ⁵² Te uuⁿni ducaⁿ nǎdǎma yiqui cuńú-ó òré càháⁿ ìⁿ cútú, te cútú-ǎⁿ cǎháⁿ-xi òré sa ta cùyatni naa ñuyúú. Te òré càháⁿ cútú-ǎⁿ te ndoto nchaa ñáyiú ní xihí

ñáyiú ní xíndecu ichi Xítohó Jesucristú, te ducaⁿ te vá ííⁿ ndúu ííⁿ quíú-gă cuú-yu. Te nchaa ñáyiú ndècu vívú te nàdáma yiqui cuñú-yu tnàhá-yu. ⁵³Te nchaa yiqui cuñú ndécú ndíhi nchaa ñáyiú ndècu ñuyúú-a vitna ñá túú cùdíí-xi chí xihí-xi, dico yiqui cuñú nduu táhú nchoo ñáyiú ndècu ichi Xítohó Jesucristú chi cudíí-xi ní caa ní quíhíⁿ chí vá cùú-gă-xi. ⁵⁴Te òré ná ndúu táhú-ó yiqui cuñú sá dúcáⁿ cùdíí ní caa ní quíhíⁿ-án, te vá cùndècu ndíhi-gă-ó yiqui cuñú sá ñà túú cùdíí. Te dàvá-áⁿ te quee ndáá-xi nàcuáa càháⁿ-xi núú tútú Yá Ndióxi núú càhí-xi: “Vitna ñá túú-gă xihí ñáyiú chí mee-ñá Yá Ndióxi cúnú-gă táxi tnùnì ñáhá-gă xii-yu. ⁵⁵Te ñá túú tnàhí-gă ná ndoho ñáyiú sá cuendá tnúhu xihí, chí vá cóó-gă tnúhu xihí”, duha càhí-xi núú tútú Yá Ndióxi. ⁵⁶Te cue ñáyiú ndècu ndíhi-yu tnúhu sá sánú ichi ñaha xii-yu nàcuáa cadá-yu cundecú-yu dico uuⁿ-gă quidè-yu nchaa sá cuèhé sá dúhá. Te sá cuendá nchaa sá cuèhé sá dúhá quidè-yu-án, te xíáⁿ ní ngúndecu tnúhu xihí dándòho ñaha-xi xii-yu. ⁵⁷Dico táxáhu xii Yá Ndióxi chí ní taxi-gă tnúhu ndee íní ndécú ndíhi-o sá sàà nduu te vá quini-gă-ó tnúhu xihí, te ducaⁿ chí ndècu ndíhi-o Xítohó Jesucristú.

⁵⁸Te xíáⁿ núu càháⁿ-í dóho nchòhó cue ñáyiú ndècu ndíhi-í ichi Xítohó Jesucristú chí ío cùu íní ñàhá-í xii-ndo, te càháⁿ-í dóho-ndo sá cànchícúⁿ nihnu-ni-ndo ichi Xítohó Jesucristú cuèi nándi ná càda ñaha ñáyiú xii-ndo sá cuendá-gă, te ío nducu ndèe-ni-ndo cada-ndo chiunⁿ-gă, chí sa nàha-ndo sá ncháá chiunⁿ quide-o cuendá-gă ñá túú áúⁿ ná cuu quide-o.

16

Nàcuáa sàcáⁿ tnàhá ñáyiú díhúⁿ

¹Te na càhí tnúhu-í xii-ndo cuendá díhúⁿ sá sàcáⁿ tnàhá-ndó sá cuú-xí ñáyiú ñúú Jerusalén, chí díu-ni duha ní dánèhé-í cue ñáyiú xíndecu ichi Xítohó Jesucristú ndécú ííⁿ ííⁿ xichí distritú Gàlaciá. ²Te duha cada-ndo ndí tnàhá nduu ndumìngú, te ííⁿ ííⁿ-ndo dàquee dííⁿ-ndo sacú díhúⁿ nàcuáa chindee ñaha Yá Ndióxi xii-ndo nihí-ndó cuendá òré quexio-í te sa cundecu túha díhúⁿ-án. ³Te òré quexio-í te mee-ndo cãxi-ndó-yu núu ndédacaa-yu sàni íní-ndó càda ndáá canehé díhúⁿ-án

quíhíⁿ ndaha ñáyiú xíndecu ichi Xítohó Jesucristú ndécú ñúú Jerusalén. Te cadúha-í ííⁿ úú tutú canehé-yu quíhíⁿ cuendá cut-nùnì íní ñáyiú ñúú Jerusalén nàcuáa ndúu chiunⁿ cuáháⁿ-yu. ⁴Te núu xini ñuhu-xi sá quíhíⁿ-í te candeca-í-yu quíhíⁿ.

Té Pàblú sání íní-dé quíngoto-dé cue ñáyiú ndècu ichi Xítohó Jesucristú

⁵Te yúhú sání íní-í yáha-í ííⁿ úú ñúú cáá distritú Macèdoniá, te dàtnùnì ducaⁿ te sáá-í núú ndécú-ndó. ⁶Te òré quexio-í te cudana cundecu ndíhi ñaha-í xii-ndo vài nduu, àdi cudana te cundecu ndíhi ñaha-í xii-ndo ndèé yáha nchaa yóó quidé víxiⁿ-xi. Te sáta dúcáⁿ te cada ndee íní-ndó chindee ñaha-ndo xii-í òré nucúhuⁿ ichi-í te núu ndèé ichi na quíhíⁿ-í. ⁷Te duha càháⁿ-í chí núu Yá Ndióxi ná càhí-gă te cundecu ndíhi ñaha tnàa-í xii-ndo òré quexio-í te ñá dáu dicó-ni ichi yáha-í. ⁸Te cundecu-ni-í ñúú Éfesú-a ndéé tnàhá vico Pentecòstés. ⁹Te ducaⁿ chí iha ío tédòho ñáyiú tnúhu Xítohó Jesucristú sá càháⁿ-í núú-yu. Núu xíáⁿ ío váha quèe cuendá cada-í chiunⁿ-gă cuèi ío vài ñáyiú ñá túú tnàhá íní-yu sá càháⁿ-í tnúhu-gă.

¹⁰Te núu na quixi coto ñaha té Timùteú xii-ndo, te ío váha cuu íní-ndó càháⁿ ndíhi-ndo-dè cuendá ducaⁿ ñà túú ná caní íní-dé cundecu ndíhi ñaha-dè xii-ndo, chí tnàhá-dé cùú-dé téé quide chiunⁿ Xítohó Jesucristú dàtná quidè-í. ¹¹Te cuini-í sá ní ííⁿ-ndo vá caní cuèhé íní-ndó cuendá-dé, te chindee-ndo-dè nàcuáa cuu váha íní-dé òré quixi-dé quixi coto ñaha-dè xii-í, chí yúhú ndíhi dava-gă ñáyiú ndècu ichi Xítohó Jesucristú ndétú-ndí-dé quexio-dé.

¹²Te ío ní càháⁿ ndàhú-í núú tē Àpolós téé ndècu ndíhi-o ichi Xítohó Jesucristú cuendá quixi-dé ndíhi dava-gă cue téé ndècu ndíhi-o ichi-gă quixi coto ñaha-güedè xii-ndo dico ñá túú ní cuini-dé quixi-dé vitna, dico quixi-dé ndéé cuèé-gă.

Tnúhu ndéé núú ní ndíhi-ná

¹³Te ío quíhi íní-ndó cundecu-ndo ichi Xítohó Jesucristú, te vá dàná ndéé-ndó quíndáá íní-ndó-gă, te ío yii cunduu íní-ndó cundecu-ndo ichi-gă, te ío nducu ndèe-ndo cànchícúⁿ nihnu-ndo ichi-gă. ¹⁴Te ío váha cuu íní tnàhá-ndó, te ducaⁿ ío váha cada tnàha-ndo te núu nándi cùu sá váha sàni íní-ndó càda-ndo.

¹⁵ Te nchòhò ñáiyu ndècu ndìhì-í ichi Xítóhó Jesucristú sa nàha-ndo sá díhnanuu cue ñáiyu cùu ndì mee té Èstéfanás ndécú distritú Acáyá ní sándáá iní-yu tnúhu Xítóhó Jesucristú. Te vitna ñá túú dàña ndeé-yu quidé-yu sá vâha sá cúú-xí dâva-gá ñáiyu sândáá iní tnúhu-gá. ¹⁶ Te càháⁿ ndàhù-í núú-ndó sã quindáá iní-ndó nchàa ñáiyu ducaⁿ xiquide, ndìhì nchaa dava-gá ñáiyu ío ndècu ndee quide chiuⁿ ndìhì-ndo cuendá Xítóhó Jesucristú. ¹⁷ Te ío cùdí^í iní-í sá ñí quexìo té Èstéfanás, ndìhì té Fortunátú, ndìhì té Acàicú, chí cue téé-áⁿ ñí quide-güedé núú-ndó ñí quide-güedé nchaa sá ñà túú ndàcu-ndo cada-ndo cuendá-í ní cùu. ¹⁸ Te ío tàxi-güedé tnúhu ndee iní xii-í, te diu-ni ducaⁿ tàxi-güedé tnúhu ndee iní xii nchòhò tucu, te núu xíãⁿ xíní ñùhu-xi sá cánèhe-ndo sá yíñùhu núú nchàa cue téé duha xiquide vâha.

¹⁹ Te nchaa ñáiyu xíndecu ichi Xítóhó Jesucristú ndécú distritú Àsiá quide ndee iní ñáhà-yu xii-ndo, te ío cada ndee iní-ndó càchí té Àquilú ndìhì ñadìhì-dé tá Priscilá, te ducaⁿ quide ndee iní ñáhá tucu nchaa ñáiyu tàcá dâcuàha tnúhu Yá Ndiõxí vehé-yu xii nchaa nchòhò ñáiyu ndècu ichi-gá. ²⁰ Te cada ndee iní tucu-ndo càchí cue dava-gá ñáiyu ndècu ndìhì-o ichi Xítóhó Jesucristú. Te ñí yùhu ñí iní-ndó càda ndee iní tnáhá-ndó ñíⁿ ñíⁿ-ndo.

²¹ Te vitna ndaha mee yùhú té Pãblú tée-í tnúhu-a quide ndee iní ñáhà-í xii-ndo.

²² Te ñáiyu ñá túú cùu vâha iní-xi núú Xítóhó Jesucristú te na cuíta nihnú-yu. Te vitna nchaa-o chí ná càchí-ó sã Xítóhó Jesucristú quixi tucu-gá.

²³ Te xicáⁿ táhù-í núú Xítóhó Jesucristú sá ná chindee chítúu ñaha-gá xii-ndo. ²⁴ Te ío cùu iní ñáhà-í xii-ndo nâcuáa ndècu-o ichi Xítóhó Jesucristú, te ducaⁿ na cùnduu, te ío chí cáda ndèe iní-ñá vitna.

TUTÚ CÚÚ ÒÚ NÍ CADÚHA TÉ PÄBLÚ QUÍHÍⁿ NDAHA ÑÁYIU ÑUÚ CÒRINTÚ

Té Páblú cádúha-dé tutú quíhíⁿ ndaha ñáyiú xĩndecu ichi Xítóhó Jesucristú ndécú ñúú Còrintú

¹ Yúhu té Páblú càháⁿ-í tnúhu Xítóhó Jesucristú chi ducaⁿ ñí cachí Yá Ndiòxí cunduu. Te cádúha-í tutú-a ndihí té Timùteú té ndècu ndihí-o ichi-gá cuendá daquixi-í ndaha nchòhó ñáyiú xĩndecu ichi Yá Ndiòxí ndécú ñúú Còrintú, te tutú-a cuu-xi tñàhá cuendá nchaa ñáyiú cùu cuendá Yá Ndiòxí xĩndecu nchaa ñúú yindèhu distritú Acáyá. ² Te xicáⁿ táhù-í núú Tàtá-ó Dútú Ndiòxí ndihí núú Xítóhó Jesucristú sá ìo na chĩndee chitúu ñaha-gá xii-ndo, te diu-ni ndè ndúú-gá ná càda te ìo váha cuu iní-ndó cùndecu-ndo.

Té Páblú càháⁿ-dé nchaa nàcuáa ndòho-dé

³ Te chí ná càchí-ó sá ìo váha iní Dútú Ndiòxí Yáá cúú Tàtá Xítóhó Jesucristú, te diu-ni Dútú Ndiòxí cúú-gá Yáá ìo cùndahú iní ñàhá xii-o, te diu-ni-gá cúú-gá Yáá táxi tñúhu ndee iní. ⁴ Te cuéi nándi ndòho-o ndecu-o dico diu-ni Dútú Ndiòxí táxi-gá tñúhu ndee iní xii-o, te ducaⁿ quide-gá cuendá sá nchóó cuañaha-o tñúhu ndee ñí xii nchaa ñáyiú nándi ndòho ndecu, te diu-ni nchaa tñúhu ndee iní táxi-gá xii-o diu-ni nchaa tñúhu ndee iní-áⁿ cuañaha-o xí-yu. ⁵ Te Xítóhó Jesucristú ìo ní ndoho-gá, te ducaⁿ nchòo tucu ìo ndòho-o, te ducaⁿ ìo vài tñúhu ndee ñí ñihí-ó ndècu ndihí-o chi ndècu-o ndihí Xítóhó Jesucristú. ⁶ Te nchúhú nándi ndòho-ndé ndécú-ndé cuendá sá nchòhó ñihí-ndó tñúhu ndee iní cundecu ndihí-ndo te naníhí táhú-ndó. Te Yá Ndiòxí táxi-gá tñúhu ndee iní xii-ndé, te ducaⁿ quide-gá cuendá sá nchòhó tñàhá-ndó ñihí-ndó tñúhu ndee iní-áⁿ te naníhí táhú-ndó, te ducaⁿ càda ndee cada cahnu iní-ndó ndòho-ndo datná ndóhó nchúhú. ⁷ Te nchúhú ìo váha sàni ndáá iní-ndé cuendá-ndó chi ndòho-ndo datná ndóhó-ndé, te ducaⁿ tàxi Yá Ndiòxí tñúhu ndee iní xii-ndo datná táxi-gá xii-ndé.

⁸ Te nchòhó ñáyiú ndècu ndihí-ndé ichi Xítóhó Jesucristú cuini-ndé cachí tñúhu-ndé xii-ndo nàcuáa ní yáha-ndé cútnàhá ní xĩndecu-ndé distritú Àsiá chi dàvá-áⁿ ìo ní ndoho-ndé, te luha-ná te vá cùndèe iní-ndé yáha-ndé nchaa tñúndòho-áⁿ ní cùu chi ní xehndé iní-ndé sá vá càcu-ndé. ⁹ Chi ní sani iní-ndé sá ndíyi-ná cuu-ndé ní cùu, te ducaⁿ ñí yáha-ndé cuendá sá ìo-gá quíndáá iní-ndé Yá Ndiòxí sá díú-gá taunihnu ñaha-gá xii-ndé, te ñá díú mèe-ndé taunihnu-ndé méé-ndé, te diu-gá cúú-gá Yáá dándòto cuéi ñáyiú sa ní xíhí. ¹⁰ Te diu-ni-gá ní taunihnu ñaha-gá ñá túú ní sàhni ñaha ñáyiú xii-ndé, te diu-ni-gá táunihnu ñaha-gá xii-ndé cuéi vitna, te cùtnuní ndáá iní-ndé sá díú-ñí-gá taunihnu ñaha-gá xii-ndé núú cuaháⁿ núú vèxi te vá càhni ñàha ñáyiú. ¹¹ Te nchòhó tñàhá-ndó chĩndee ñaha-ndo xii-ndé chi càháⁿ ndihí-ndo Yá Ndiòxí cuendá-ndé, te ìo vài ñáyiú càháⁿ ndihí ñàhá-yu xii-gá cuendá-ndé, te ducaⁿ ìo vài ñáyiú ndàcáⁿ táhù-yu núú-gá cuendá nchaa sá vaha quide ñaha-gá xii-ndé.

Té Páblú càháⁿ-dé ná cuendá ñá túú ní nàyáha-dé ñúú Còrintú

¹² Te ìo váha cùu iní-ndé chi cùtnuní iní-ndé sá cúú-ndé cu tée cùu ndáá datná cuini Yá Ndiòxí cunduu ndècu-ndé ñuyúú-a, te diu-ni ducaⁿ quide-ndé sá cúú-xí-ndó chi mee-gá cùndahú iní ñàhá-gá xii-ndé chĩndèe ñaha-gá, te ñá túú quide-ndé datná sání ñí cue ñáyiú ñuyúú-a. ¹³⁻¹⁴ Nchaa nàcuáa ndúu tñúhu chido tñuní-ndé dáquixi-ndé ndaha-ndo cùu-xi mee-ní tñúhu sá ñá túú ìhú tecú tñuní-ndó. Te nchòhó sá cùtnuní luha iní-ndó nàcuáa quide-ndé ndécú-ndé, te cuini-ndé sá ìo-gá váha tecú tñuní-ndó cuendá sá òré ná quixi tucu Xítóhó Jesucristú, te dàvá-áⁿ ìo cada ñinu ñaha-ndo xii-ndé datná cada ñinu ñaha-ndé xii-ndo. ¹⁵ Te cuendá xíáⁿ núu ní sani iní-í yáha càháⁿ-í úú xito núú ndécú-ndó cuendá ìo cudúú iní-ndó. ¹⁶ Chi ní sani iní-í sá òré quíhíⁿ-í distritú Macèdoniá te yáha càháⁿ-í núú ndécú-ndó, te òré ndixi tucu-í te nayáha càháⁿ tucu-í, te òré nayáha càháⁿ-í te taxi-ndo sá cúú ichi-í cuendá quíhíⁿ-í distritú Jùdeá, duha ní sani iní-í

ní cùu. ¹⁷ Te sá dúcáⁿ ñá túú ní quìxi coto ñaha-í xii-ndo te cudana sàni iní-ndó sá yúhú ñá túú ní sàha váha-í cuèndá nàcuáa ní sani iní-í cada-í, ãdi cudana ñáyiú ndècu ichi cuehé ichi duha, chi cue ñáyiú-áⁿ tnaa càchí-yu sá cúú càdà-yu ìⁿ sá sání iní-yu cadà-yu te tnaa càchí-yu sá ñáhá. ¹⁸ Dico Yá Ndiòxí Yáá ío váha quide ndáá ñaha ndáá ñáhá càxi-gá sá nchúhú ñá túú dàma-ndí sá càháⁿ-ndí. ¹⁹ Te yúhú ndíhi té Silvanú ndíhi té Timùteú dánèhé ñáhá-ndí xii-ndo cuèndá Xítohó Jesucristú Yáá cúú Dèhe Yá Ndiòxí, te Xítohó Jesucristú cúú-gá Yáá ñá túú dàma-gá tnúhu càháⁿ-gá, chi cùu-gá Yáá càháⁿ mee-ni tnúhu ndáá tnúhu cuíti. ²⁰ Te ãiu-ni Xítohó Jesucristú cúú-gá Yáá quidé nchàa nacuáa ní cachí Yá Ndiòxí. Te sá cuèndá sá dúcáⁿ quide Xítohó Jesucristú xiáⁿ càchí-ó sá ío càhnu çuú Yá Ndiòxí. Te nchaa-o na càchí-ó sá díú-ní dúcáⁿ na cada-gá. ²¹ Te mee Yá Ndiòxí quidé-gá ndécú-ní-ó ichi Xítohó Jesucristú. Te ãiu-ni mee-gá ní càháⁿ ñáhá-gá xii-o cuèndá cunu cuechi-o núú-gá. ²² Te Yá Ndiòxí ní quide-gá sá nchóo cùu-o ñáyiú cùu cuèndá-gá, te ní taxi-gá Espiritú-gá ní ngúndecu ndíhi-o cuèndá cutnúni iní-ó sá ndáá cada ñaha-gá xii-o nàcuáa ní cachí-gá cada-gá.

²³ Te Yá Ndiòxí ñáhá-gá sá yúhú càháⁿ ndáá-í ná cuèndá vátá quíxi-gá-í quixi coto ñaha-í xii-ndo, te vátá quixi-gá-í chi ñá túú cuini-í dandíhú-í iní-ndó. ²⁴ Te nchúhú ñá túú tau-ndí cada yica ñaha-ndí xii-ndo nàcuáa quíndáá iní-ndó Yá Ndiòxí, chi sa sàndáá váha iní-ndó-gá, chi nchúhú cuini-ndí chindeç tnúhu ñaha-ndí xii-ndo nàcuáa ío-gá cudíⁿ iní-ndó cùndecu-ndo.

2

¹ Te ní sani ndáá iní-í sá vã quíxi ndíhi-ni-í quixi coto ñaha-í xii-ndo cuèndá sá vã dándíhú-í iní-ndó. ² Te nchòhó cúú-ndó ñáyiú tàxi tnúhu ndee iní xii-í cudíⁿ iní-í ndécú-í, te xiáⁿ núu ñá túú cuini-í dandíhú-í iní-ndó, chi núu ducaⁿ na càda-í te vã cùndècu váha-gá iní-ndó nàcuáa taxi-ndo tnúhu ndee iní xii-í. ³ Te xiáⁿ núu ní tendaha-í tutú véxi ndaha-ndo cuèndá sá òré quixi coto ñaha-í xii-ndo, te dàvã-áⁿ quini-í sá quidé-ndó nàcuáa cudíⁿ iní-í te ñá díú dà dandíhú-ndó iní-í òré quexio-í, chi nchòhó tau-ndó càda-ndo sá

yúhú cudíⁿ iní-í. Te cùtnuní ndáá iní-í sá núu yúhú cudíⁿ iní-í te tnáhá nchòhó cudíⁿ iní-ndó cuèndá sá dúcáⁿ cudíⁿ iní-í. ⁴ Te ndàhyú-í sá ndíhú iní-í òré ní cadúha-í tutú ní dáquixi-í ndaha-ndo, chi ío cuehé sá sání iní-í, te ñá túú ní dáquixi-í tutú-áⁿ ndaha-ndo cuèndá sá dándíhú iní ñáhá-í xii-ndo, chi ní dáquixi-í cuèndá sá nchòhó cutnúni iní-ndó sá ío cùu iní ñáhá-í xii-ndo.

Nàcuáa tau ñáyiú núu Còrintú cadà-yu cuèndá ìⁿ ñáyiú ñá túú quide ndáá

⁵ Te na càchí tnúhu-í xii-ndo cuèndá ìⁿ tée ní quide ìⁿ sá ñá túú tau-dé cada-dé ndécú ndíhi-ndo, te ní quide ndàhú-xi luha iní-í cuèndá sá ní quide-dé-áⁿ dico nchòhó tnáhá-ndó ní dándíhú-dé luha iní-ndó, te duha càchí-í sá lúhá-ní ní dándíhú-dé iní-ndó cuèndá sá vã cuídó-gá-í ná tnúhu càháⁿ-í. ⁶ Te nàcuáa ní ndatnúhu-ndo ní quide ndáá-ndó cuèchi tée-áⁿ te sa ndói-gá cuu nàcuáa ní quide-ndo-dé. ⁷ Te vitna tau-ndó càda cahnu iní-ndó sá ní quide-dé, te cuáñaha-ndo tnúhu ndee iní xii-dé chi núu ñáhá te vã níhí ndéé-gá-dé cada-dé sá váha cuèndá sá ndíhú iní-dé. ⁸ Te xiáⁿ núu càháⁿ ndàhú-í núú-ndó sá càdá tùcu-ndo sá cúú iní-ndó-dé. ⁹ Te ãiu-ni cuèndá ilha càháⁿ-í ìⁿ núú tütú sá sá ní dáquixi-í ndaha-ndo, te ducaⁿ ní quide-í xító ndèé ñáhá-í xii-ndo núu ndisa cuini-ndó càda-ndo nchaa nacuáa càháⁿ-í. ¹⁰ Te ndéda-ni càa ñáyiú na càda cahnu iní-ndó ìⁿ sá quidé-yu, te tnáhá yúhú cada càhnu iní-í sá quidé-yu tucu. Te núu lò ìⁿ sá xíni ñúhu-xi cada cahnu iní-í te quide cahnu iní-í, te mee Xítohó Jesucristú ñáhá-gá sá dúcáⁿ quide-í, te ducaⁿ quide-í cuèndá sá nchòhó cuu-xi sá váha xii-ndo. ¹¹ Te ducaⁿ te sácúíhná vã níhí-xi ná cada ñaha-xi xii-o, chi nchoo sá xini-ó nàcuáa quide-xi.

Té Páblú ndíhú iní-dé ndécú-dé núu Tròás

¹² Te ní xica-í cuáháⁿ-í núu Tròás cuèndá yàcáⁿ càháⁿ-í tnúhu sá càháⁿ nàcuáa naníhí tàhú-ó tnúhu Xítohó Jesucristú, te òré ní quexio-í te ní níhí-í ìⁿ ichi càhnu càháⁿ-í tnúhu-gá. ¹³ Dico ñá túú ní cùu váha iní-í chi ñá túú ní nàníhí-í té Títú tée ndècu ndíhi-o ichi Xítohó Jesucristú, núu xiáⁿ ní quide ndee iní tnáhá-í ndíhi cue ñáyiú núu-áⁿ, te ní xica-í cuáháⁿ-í distritú Macèdoniá.

Dàquetíhú-ó yùcu ñávàha chi ndècu ndìhi-o Xítohó Jesucristú

¹⁴ Te táxàhu xii Yá Ndiòxí chi ducaⁿ-ní sànu ichi ñaha-gá xii-ndí nàcuáa cunuu-ndí núu yucu ñávàha chi ndècu ndìhi-ndí Xítohó Jesucristú, te mee Yá Ndiòxí sáchiuⁿ ñaha-gá xii-ndí càháⁿ-ndí tnúhu-gá. Te cada iní-ó sá tnúhu-gá-áⁿ cúu-xí dàtná ìⁿ yúcu sá ìo váha sàháⁿ te ta xítènuu dicó-xi ndèni ní cuu cuáháⁿ. Te ducaⁿ sàtnahá-xi cùu tnúhu-gá chi nchúhú quidé-ndí nàcuáa ta xítènuu ndèni ní cuu cuáháⁿ. ¹⁵ Te cùu-ndí dàtná dicó ìⁿ yúcu sá ìo váha sàháⁿ, te nàcani cuendá Xítohó Jesucristú núu Yá Ndiòxí, te dicó yúcu-áⁿ nchítá cuèi núu xìndecu cue ñáyiu sa ní naníhí tàhú, te cuèi núu xìndecu cue ñáyiu ta xíta nihnu cuáháⁿ. ¹⁶ Te sá cúu-xí cuè ñáyiu ta xíta nihnu cuáháⁿ-áⁿ, dicó yúcu-áⁿ cúu-xí dàtná ìⁿ sá sáhní ñaha xii-yu, dico sá cúu-xí cuè ñáyiu sa ní naníhí tàhú, dicó yúcu-áⁿ cúu-xí dàtná ìⁿ sá ndécá ìní-yu, ducaⁿ sàtnahá-xi cùu nchúhú. Te vitna chí cuáha cuendá núu ná cúu ñáyiu sàni iní-ndó ndàcu cada nacuáa ndùu tnúhu càháⁿ-í-a. ¹⁷ Chi nchúhú càháⁿ-ndí tnúhu Yá Ndiòxí dico ñá túu ndàhú quidé-ndí ndìhi tnúhu-gá dàtná xíquide dava-gá-güedé, chi quide ndáá-ndí càháⁿ-ndí tnúhu-gá, te mee-gá ní cachí-gá sá dúcáⁿ càda-ndí te ndèhe-gá sá nchúhú quidé-ndí nàcuáa ní cachí-gá, chi ndècu ndìhi-ndí Xítohó Jesucristú.

3

Cuendá ingá núu sá vaha ní cachí Yá Ndiòxí cada-gá ñáyiu

¹ Te cuèi duha càháⁿ-ndí núu-ndó dico ñá túu xinj ñuhu-xi sá cùñaha-ndí xii-ndo sá cúu-ndí cue téé quide váha, te ni ñá túu xini ñuhu-xi caçanehe-ndí ìⁿ tutú núu càháⁿ-xi sá cúu-ndí cue téé váha danèhé ñáhá xii-ndo datná xíquide dava-gá-güedé, te ni ñá túu xini ñuhu-xi sá nchòhó taxi-ndo ìⁿ tutú núu càháⁿ-ndó sá nchúhú cúu-ndí cue téé quide váha. ² Te ñá túu xini ñuhu-xi ducaⁿ cada-ndí. Te cùtnuní ndáá iní-ndí sá nchòhó cúu-ndó dàtná ìⁿ tutú sá ìo váha càháⁿ cuendá-ndí. Te ducaⁿ sàtnahá-xi cùu-ndo chi nchaa ñáyiu nihí-yu tnúhu nàcuáa quide-ndo ndecu-ndo, te xiáⁿ cùtnuní iní-yu sá nchúhú cúu-ndí cue téé quide váha. ³ Te nchòhó cúu-ndó

cuendá Xítohó Jesucristú, te cùu-ndo datná tutú-gá te tutú-áⁿ ní táuchúuⁿ-gá xii-ndí ní cadúha-ndí, te mee-ni ndìhi Espiritú Yá Ndiòxí ní ngúndeé tnúhu-áⁿ te ñá díu ndìhi tindá ní ngúndeé. Te ñá díu ìⁿ núu yúu ní ngúndeé chi iní-ndó cùu-xi núu dúcáⁿ ní ngúndeé tnúhu-áⁿ te ducaⁿ sàtnahá-xi cùu-ndo.

⁴ Te duha càháⁿ-ndí chi cùtnuní ndáá iní-ndí sá Yá Ndiòxí quidé vaha ñaha-gá xii-ndí, chi ndècu ndìhi-ndí Xítohó Jesucristú. ⁵ Te nchúhú chi ndàcu-ndí quidé-ndí sá vaha dico ñá díu mèe-ndí ducaⁿ ndàcu-ndí quidé-ndí, chi mee Yá Ndiòxí chíndèe ñaha-gá xii-ndí núu ndàcu-ndí quidé-ndí sá vaha. ⁶ Te mee Yá Ndiòxí ní quide-gá sá nchúhú ndacu-ndí cunu cuechi-ndí núu-gá càháⁿ-ndí núu ñáyiu cuendá ingá núu sá vaha ní cachí-gá cada ñaha-gá xii-yu. Te sá vaha ní cachí-gá cada ñaha-gá xii-yu-áⁿ ñá túu ìⁿ ni cuu-xi ndìhi nchaa tnúhu sá ní xáhaⁿ-gá xii ndíi Moisés ní chídó tnùní ndíi, te ducaⁿ chi espíritú Yá Ndiòxí nèhé chiuⁿ-xi nchaa tnúhu sá càháⁿ cuendá nchaa sá vaha-áⁿ. Te nchaa tnúhu ní chídó tnùní ndíi Moisés, dándixi túu-xi iní nchaa ñáyiu ndècu ndìhi tnúhu-áⁿ sá cuíta nihnú-yu cuendá nchaa cuèchi-yu, dico cue ñáyiu ndècu ndìhi Espiritú Yá Ndiòxí ñáyiu-áⁿ ndécú ndìhi-yu tnúhu ndee ìní sá càcu nihnú-yu.

⁷ Te tnúhu sá ní càháⁿ Yá Ndiòxí ndéé díhna nàcuáa cada ñáyiu ní ngúndeé-xi ìⁿ núu yúu quèhéⁿ. Te òré ní dátüu ndíi Moisés nàcuáa càháⁿ tnúhu sá ní càháⁿ Yá Ndiòxí ndèe núu yúu-áⁿ núu cuè ñáyiu isràél, te súmí ní tásáⁿ núu ndíi te ñá túu-gá ní cùu cundehé-yu núu ndíi, te ducaⁿ-gá ducaⁿ-gá quidé-xí dàtásáⁿ-xi núu ndíi ni cùu ñá túu-gá ducaⁿ ni quide-xi. Te tnúhu ndèe núu yúu-áⁿ dándixi túu-xi iní cue ñáyiu sá cuíta nihnú-yu sá cuendá nchaa cuèchi-yu, te ìo váha ní quide-xi cùtnàhá ní ngúndecu ndìhi cue ñáyiu isràél tnúhu-áⁿ. ⁸ Te sá dúcáⁿ ní quide-xi xíáⁿ cùtnuní sá tnúhu càháⁿ Espiritú Yá Ndiòxí vitna uuⁿ-gá ducaⁿ ìo-gá váha quide-xi. ⁹ Te núu ducaⁿ ìo váha ní quide-xi cùtnàhá ní ngúndecu ndìhi cue ñáyiu isràél tnúhu sá dándixi túu iní-yu sá cuíta nihnú-yu sá cuendá nchaa cuèchi-yu, te uuⁿ-gá ducaⁿ

váha quide-xi vitna ní ngúndecu ndíhi-o tñúhu sá cãháⁿ nãcuáa quide Yá Ndiöxí cuendá sá vã cundëcu-gã cuéchi ñáyiú núú-gã. ¹⁰ Te vã cãchí-ó sã cútñahá ní ngúndecu ndíhi cue ñáyiú isràél tñúhu ndéé núú yúú-ãⁿ ïo-gã váha ní quide-xi, te ñáhá chi uuⁿ-gã váha quide-xi vitna cuendá tñúhu sá cãháⁿ nãcuáa quide Yá Ndiöxí. ¹¹ Te núú ducaⁿ ïo váha ní quide-xi cútñahá ní ngúndecu ndíhi ñáyiú isràél tñúhu sá ñã túú ní cùdíí, te uuⁿ-gã ducaⁿ ïo váha quide-xi vitna ní ngúndecu ndíhi-o tñúhu sá vã ndíhí nihnu tnahí-gã.

¹² Te cútñuní iní-ndí sá vã ndíhí nihnu sá dúcãⁿ ïo váha quide-xi, núú xíãⁿ ïo vii ïo váha cùu iní-ndí cãháⁿ-ndí tñúhu sá ñí ngúndecu ndíhi-o. ¹³ Te ñã túú quide-ndí dàtná ní xóo cada ndíí Moisés, chi ndíí-ãⁿ ní xóo dàdáhu ndíí núú ndíí òré dátãsaⁿ-xi núú ndíí cuendá sá vã quiniⁿ cue ñáyiú isràél òré ñã túú-gã dátãsaⁿ-xi núú ndíí. ¹⁴ Te cue ñáyiú isràél ñã túú ní tècú tñuní váha-yu nãcuáa ní xóo danèhé ñáhá ndíí Moisés xíí-yu, te cuéí ndéé vitna ñã túú tècú tñuní-yu òré dácuahá-yu tñúhu sá ñí cãháⁿ Yá Ndiöxí ndéé díhna nãcuáa cada-gã, te cada iní-ó sã dàtná sá ñí xídáhu núú ndíí Moisés yídáhu núú-yu cuendá sá vã cútñuní núú-yu cundèhé-yu te tecú tñuní-yu, dico núú tnahá tñúhu-yu ndíhi Xítóhó Jesucristú te tecú tñuní-yu. ¹⁵ Te cuéí ndéé vitna òré dácuahá-yu nchaa tñúhu sá ñí chídó tñuní ndíí Moisés nchaa núú tütú ndíí, te çada iní-ó sã dàtná sá ñí xídáhu núú ndíí yídáhu núú-yu chi ñã túú tècú tñuní-yu. ¹⁶ Dico cue ñáyiú na tũha ñaha xii Xítóhó Jesucristú te tècú tñuní-yu tñúhu-gã. ¹⁷ Te Xítóhó Jesucristú ñí-ni cùu-gã ndíhi Espiritú Yá Ndiöxí, te nchaa ñáyiú ndëcu ndíhi Espiritú-gã ñã túú-gã táxi tñuní ñáhá ñí ñíⁿ sá ñã túú váha xíí-yu. ¹⁸ Te dàtná cúú ñíⁿ yutátá sã dánèhé núú ñáhá-xí xii ñáyiú ñíⁿ sá váha, ducaⁿ sãtnahá-xi cùu-o chi quide-o nacuáa cãháⁿ ñáyiú sá ïo cãhnu cuu Xítóhó Jesucristú, te ducaⁿ ùuⁿ-gã uuⁿ-gã tá cundáá-ó ndëcu-o ichi-gã dàtná quidé mèe-gã quidé ndáá-gã. Te Espiritú-gã quidé-xí dũcaⁿ ta cundáá-ó nũ-gã cuáhãⁿ.

4

¹ Te mee Yá Ndiöxí ní cundàhú iní ñáhá-gã xii-ndí ní taxi-gã chiúⁿ quide-ndí

cãháⁿ-ndí tñúhu-gã, núú xíãⁿ ñã túú tñàhí nàtúhú iní-ndí cãháⁿ-ndí tñúhu-gã. ² Te nchúhú dàquee tĩhú-ndí nchaandi tũhú sá ñã túú váha quide dayuhu ñáyiú, chi nchaa xíãⁿ cúú-xí ñíⁿ sácãⁿ-núú sã cúú-xí-yu, te nchúhú ñã túú sãni iní-ndí dandàhú-ndí ñáyiú te ñí ñã túú sãni iní-ndí dama-ndí nãcuáa cãháⁿ tñúhu Yá Ndiöxí, chi cãháⁿ ndáá-ndí nãcuáa tàú-xi cãháⁿ-ndí, te mee Yá Ndiöxí ñáhá-gã nãcuáa ndùu tñúhu cãháⁿ-ndí núú ñáyiú, te ñáyiú-ãⁿ cútñuní iní-yu sá nchũhú cãháⁿ váha-ndí. ³ Te cue ñáyiú ñã túú tècú tñuní nãcuáa ndùu tñúhu sã cãháⁿ nãcuáa naníhí tàhú-ó cãháⁿ-ndí núú-yu, ñáyiú-ãⁿ cúú-yu ñáyiú ta xíta nihnu cuáhãⁿ. ⁴ Te cue ñáyiú-ãⁿ cúú-yu ñáyiú ïo sàà iní-xi chi ñã túú cuiniⁿ-yu quindáá iní-yu tñúhu Xítóhó Jesucristú, te xíãⁿ núu sácufhná cùnùu-xi núú-yu te ñihí-xi nãcuáa quide-xi dadáhu ndodo iní ñáhá-xí xíí-yu cuendá sá vã tècú tñuní-yu tñúhu sã cãháⁿ nãcuáa naníhí tàhú-yu, te tñúhu-ãⁿ cúú-xí tñúhu sá ïo váha chi cãháⁿ-xi sá ïo cãhnu cuu Xítóhó Jesucristú, te cùu-gã dàtná mèé Tátá-gã Dútú Ndiöxí. ⁵ Te nchúhú ñã túú cãháⁿ-ndí cuendá sã cúú-xí mèe-ndí núú-ndó chi cãháⁿ-ndí cuendá Xítóhó Jesucristú, te cãchí-ndí xii-ndo sã díú-gã cúú-gã Yáá ïo cùnùu, te cãchí-ndí xii-ndo sã mèé-ndí cúú-ndí dicó-ni cue tée xinu cuechi sã cúú-xí-ndó, te ducaⁿ quide-ndí nãcuáa cuu vii cuu váha iní Xítóhó Jesucristú. ⁶ Te Yá Ndiöxí Yáá ní dáyèhé ndéé cútñahá nee ñuyúí ní cùu, Yáá-ãⁿ ñí cachí-gã sã Xítóhó Jesucristú cada-gã nãcuáa tecú tñuní-ó sã ïo cãhnu cuu mee Yá Ndiöxí. Te sã dúcãⁿ ñí quide-gã te cada iní-ó sã dàtná tñúhu sã ñí dáyèhé-gã iní-ó.

Ío quindáá iní-ó Yá Ndiöxí

⁷ Te nchúhú ndécú ndíhi-ndí tñúhu Xítóhó Jesucristú, te tñúhu-gã cúú-xí dàtná ñíⁿ sã ïo váha ñũhu ñíⁿ xití quídí ñuhu, te nchúhú cúú-ndí dàtná quídí-ãⁿ. Te ducaⁿ sãtnahá-xi cùu-ndí chi tñúhu-gã ïo cãhnu cuu-xi te mee-ndí ñáhá, te ducaⁿ cùu nacuáa cútñuní sã mèé Yá Ndiöxí quidé-gã nchaa sã váha te ñã díú mèe-ndí. ⁸ Te cuéí ïo ndòho-ndí ndécú-ndí dico ñihí-ndí nãcuáa quide-ndí tá yãha-ndí nchaa tñúndòho-ãⁿ

cuáháⁿ, cuéi áma sa ndètu vii-nà quehndé iní-ndí sá vǎ ndácú-ndí yáha-ndí nchaa tnúndòho-áⁿ, dico ndàcu-ndí yáha-ndí. ⁹Te cuéi nànducu ñaha ñáyíu cuiní-yu ná cada ñahá-yu xii-ndí dico ñá túú dàña ñaha Yá Ndiòxí xii-ndí, te cuéi cànihá-yu xii-ndí dico cǎcu-ndí ñá túú sàhni ñahá-yu. ¹⁰Te ndèni ní cuu cuáháⁿ-ndí xicá cùu-ndí, te cǎcu cǎcu cahni ñahá-yu xii-ndí dàtná ní quidé-yu Xítoho Jesucristú, te ducaⁿ yáha-ndí cuèndá cutnuni sá ndécú túu Xítoho Jesucristú andíu te chindee ñaha-gá xii-ndí. ¹¹Te nchúhú ñini ndècu-ndí ñuyíú-a te nchaa-ni nduu cǎcu cǎcu cahni ñaha ñáyíu xii-ndí sá cuèndá Xítoho Jesucristú, te ducaⁿ yáha-ndí ndécú-ndí cuèndá cutnuni sá Xítoho Jesucristú ndécú ndíhi ñaha-gá xii-ndí cuéi vǎ cudíi yiqui cùñú-ndí cundecu-xi. ¹²Te sá dúcáⁿ cǎcu cǎcu cahni ñaha ñáyíu xii-ndí xiáⁿ nchòhó uuⁿ-gá tá nihí ndéé-ndó cuáháⁿ ndécú-ndó ìchi Xítoho Jesucristú.

¹³Te ñⁿ tée ní xindecu ndéé sanaha ní chídó tnúni-dé núú tútú Yá Ndiòxí núú cǎchí-xi: “Yúhú ní sàndáá iní-í Yá Ndiòxí núú xiáⁿ ní cǎháⁿ-í”, duha ní cachí tée-áⁿ. Te dàtná-ni ní sani iní tée-áⁿ ní cǎháⁿ-dé te diu-ni ducaⁿ sàni iní nchúhú tucu núú xiáⁿ cǎchí-ndí: “Sàndáá iní-ndí Yá Ndiòxí núú xiáⁿ cǎháⁿ-ndí”, duha cǎchí-ndí. ¹⁴Te cùtnuni iní-ndí sá núú na cùú-ndí te Yá Ndiòxí dandòto ñaha-gá xii-ndí dàtná ní dándótó-gǎ Xítoho Jesucristú, te tnahá nchòhó ducaⁿ càda ñaha-gá xii-ndo, te dàvá-áⁿ candeca ñaha-gá xii-o quíhíⁿ nucúndecu-o núú-gǎ. ¹⁵Te nchúhú nándi cùu sá tá yáha-ndí véxi cuèndá nchòhó ngúndecu váha-ndo, te ducaⁿ cùita cǎyá-gá ñáyíu ngúndecu váha sá xí Yá Ndiòxí, te diu-ni ducaⁿ cùita cuu vai-gá ñáyíu ndacáⁿ táhú-yu núú-gǎ te cǎchí-yu sá ìo cǎhnu cuu-gǎ.

¹⁶Te xiáⁿ núú nchúhú ñá túú tnahí nàtúhú iní-ndí ndécú-ndí ìchi Xítoho Jesucristú, te cuéi yiqui cùñú-ndí tá xaù-xi cuáháⁿ dico iní-ndí chi uuⁿ-gá uuⁿ-gá tá nihí ndéé-xí cuáháⁿ. ¹⁷Te nchaa sá ndòhó-ndí ñuyíú-a ñá túú cǎchí-ndí sá cúu-xí ñⁿ tnúndòho cahnu vihi, chi tnaa-ni duha ndòho-ndí, te sá dúhá ndòho-ndí nándi ndòho-ndí ndécú-ndí ñuyíú-a te

Yá Ndiòxí ìo váha cada ñaha-gǎ xii-ndí nduu na sàá-ndí núú ndécú-gǎ, te diu-ni ducaⁿ càda ñaha-gá xii-ndí ni caa ni quíhíⁿ.

¹⁸Te nchúhú ñá túú nchìcúⁿ nihnu-ndí sá túu ndèhe-ndí ìo ñuyíú-a, chi nchìcúⁿ nihnu-ndí sá vǎtá quini-gá-ndí ndécú àndíu, te ducaⁿ quide-ndí chi nchaa sá túu ndèhe-ndí ìo ñuyíú-a vǎ cudíi-xi cundecu-xi, te nchaa sá ñá túú túu ndècu andíu xiáⁿ cudíi-xi cundecu-xi ni caa ni quíhíⁿ.

5

¹Te yiqui cùñú-ó cùu-xi datná ñⁿ vehe, te vehe-áⁿ ñá túú cudíi-xi, te ducaⁿ sǎt-nahá-xi cùu yiqui cuñú-ó chi vǎ cudíi-xi, te na sàá nduu vǎ cùndecu-gá-ó ndíhi yiqui cuñú-ó, te Yá Ndiòxí taxi-gá ñⁿ yiqui cùñú sáá sǎ cúu-xí-ó, te xiáⁿ cúu-xí datná ñⁿ vehe sá ñá túú ní cadúha cue ñáyíu ñuyíú-a, chi mee Yá Ndiòxí ní cadúha-gá vehe-áⁿ tǎ vehe-áⁿ cudíi-xi cundecu-xi ni caa ni quíhíⁿ andíu. Te ducaⁿ sǎtnahá-xi cùu yiqui cuñú sá táxi Yá Ndiòxí xii-o chi cudíi-xi cundecu-xi ni caa ni quíhíⁿ. ²Te nchúhú ndècu ndíhi-gá-ndí yiqui cùñú-ndí sá ndécú ndíhi-ndí vitna te sama cuiní-ndí sá ìo ndíhi taxi Yá Ndiòxí yiqui cùñú sáá cùndecu ndíhi-ndí. ³Chi mee-gǎ vǎ dàñá-gǎ sá dúcáⁿ-ní cùnduu-ndí cundecu-ndí, chi dai taxi-gá yiqui cùñú sáá-áⁿ xii-ndí. ⁴Te ñini ndècu-ndí ndíhi yiqui cùñú-ndí vitna ìo sàni iní-ndí te ndíhú iní-ndí, dico ñá díú sǎ dúhá quide-ndí te ñá túú-gǎ tnahá iní-ndí cundecu-ndí ndíhi yiqui cùñú-ndí, chi cuiní-ndí sá Yá Ndiòxí ìo ndíhi taxi-gá yiqui cùñú sáá nduu táhú-ndí, chi xiáⁿ cudíi-xi ni caa ni quíhíⁿ te yiqui cùñú-ndí sá tá ndíhi nihnu cuáháⁿ-a vǎ cudíi-xi cundecu-xi. ⁵Te ducaⁿ tnahí ní cachí Yá Ndiòxí cunduu sá dúcáⁿ nduu táhú-ó yiqui cuñú sáá-áⁿ, te ní taxi-gá Espiritú-gá ní ngúndecu ndíhi-o cuèndá cutnuni iní-ó sǎ ndáá taxi-gá yiqui cùñú sáá-áⁿ nduu táhú-ó.

⁶Te xiáⁿ núú nchúhú nihí ndéé-ndí ndécú-ndí, te cùtnuni iní-ndí sá ñini ndècu-ndí ndíhi yiqui cùñú-ndí sá ndécú ndíhi-ndí vitna te vǎtá sáá-gá-ndí cundecu-ndí mei núú ndécú Xítoho Jesucristú. ⁷Te ducaⁿ cùtnuni iní-ndí chi sàndáá te

iní-ndí Yá Ndiöxí ndécú-ndí ñuyíu-a cuèi ñá túú xini-ndí-gá. ⁸Te ío váha cùu iní-ndí ndécú-ndí, te sàni iní-ndí sá váha-gá sá núu vá cùndècu-gá-ndí ndìhi yiqui cùnú-ndí sá ndécú ndìhi-ndí vitna. Te ducaⁿ sàni iní-ndí chi váha-gá cundecu-ndí mei núu ndécú Xítohó Jesucristú. ⁹Te ío ndùcu ndee-ndí quidé-ndí nàcuáa cuu víi cuu váha iní Xítohó Jesucristú vitna ndècu-ndí ñuyíu-a, te diu-ni ducaⁿ càda-ndí cuèi òré vá cùndècu-gá-ndí. ¹⁰Te dacuítíi sá ncháá-ó cùndecu-o núú Xítohó Jesucristú ìⁿ nduu, te dàvá-áⁿ mee-gá cáháⁿ-gá te núu nása ndùu chiuⁿ ní quide-o ìⁿ ìⁿ-o, núu ní quide váha-o àdi ñá túú ní quide váha-o, te nàcuáa ndùu chiuⁿ ní quide-o ìⁿ ìⁿ-o te ducaⁿ ndùu sá táxí-gá nduu táhú-ó.

Nàcuáa ní cuu ní ngúndecu váha-o ndìhi Yá Ndiöxí

¹¹Te nchúhú quíyùhú iní-ndí nàcuáa cada Xítohó Jesucristú, núu xiáⁿ càháⁿ-ndí tnúhu-gá núú ñáyiú cuèndá xínu iní-yu tuha ñàhá-yu xii-gá. Te mee Yá Ndiöxí sa náha-gá nàcuáa quide-ndí ndécú-ndí, te sàni iní-ndí sá nchòhó cutnùnì iní-ndó nàcuáa quide-ndí ndécú-ndí. ¹²Te sá dúhá càháⁿ-ndí te vá cánì iní-ndó sá nchúhú càháⁿ váha-ndí cuèndá-ndí nàcuáa nchòhó cuu váha iní ñàhá-gá-ndó xii-ndí te ñàhá, chi duha càháⁿ-ndí cuèndá sá nchòhó nìhí-ndó tnúhu cáháⁿ váha-gá-ndó cuèndá-ndí núú ñáyiú. Te ducaⁿ nìhí-ndó tnúhu cùñaha-ndo xii cue ñáyiú quide nínu mee-xi, chi cue ñáyiú-áⁿ ñá túú quide cuèndá-yu nása ndècu iní-yu. ¹³Te núu nchòhó sání iní-ndó sá lùcú-ndí cuèndá nàcuáa quide-ndí ndécú-ndí te cùu-xi cuèndá Yá Ndiöxí, àdi núu sàni iní-ndó sá ñá túú lùcú-ndí cuèndá nàcuáa quide-ndí ndécú-ndí te cùu-xi sá váha sá cùú-xí-ndó. ¹⁴Te quide-ndí nàcuáa cuiní Xítohó Jesucristú chi cùnuni iní-ndí sá ío cùu iní-gá nchaa ñáyiú, te ducaⁿ xini ndáá-ndí sá ñí xihí-gá cuèndá ncháá-yu, te xiáⁿ núu cada iní-ó sá dàtná tnúhu sá ncháá ñáyiú ní xihí-yu ndìhi-gá. ¹⁵Te ducaⁿ ñí xihí Xítohó Jesucristú cuèndá nchaa ñáyiú chi cuiní-gá sá ncháá-yu cundecu-yu cadá-yu nàcuáa cuiní mée-gá te vá cadá-yu nàcuáa cuiní mée-yu, chi mee-gá ñí xihí-gá

te ní ndoto-gá cuèndá cuu-xi sá váha sá cùú-xí-yu. ¹⁶Te xiáⁿ núu nchúhú ñá túú-gá ná sání iní-ndí cuèndá tnàha ñáyiú-ndí núu nàndìhi-yu àdi ñá túú nàndìhi-yu dàtná ní xóo cani iní-ndí cùtnàhá ní xindecu-ndí ichi cuèhé ichi duha, te dàvá-áⁿ ñí xóo cani iní-ndí cuèndá Xítohó Jesucristú dàtná sání iní cue ñáyiú ndècu ichi cuèhé ichi duha vitna. ¹⁷Te nchaa nchoo ñáyiú ní tnàhá tnúhu ndìhi Xítohó Jesucristú ní nduu-o dàtná ìⁿ ñáyiú saa, te ducaⁿ chi ñá túú-gá quidé-ó dàtná ní xóo cada-o cùtnàhá ní xindecu-o ichi cuèhé ichi duha, chi ní ngúita-o quide-o mee-ná sá váha te nchaa xiáⁿ cùú-xí sá sáá sá cùú-xí-ó chi vátá quini-gá-ó càda-o.

¹⁸Te ducaⁿ quide-o ndecu-o chi mee Yá Ndiöxí quidé-gá sá dúcáⁿ càda-o cundecu-o. Te Xítohó Jesucristú ní quide-gá ní ngúndecu váha-o ndìhi Yá Ndiöxí vitna, te ducaⁿ chi mee Yá Ndiöxí ducaⁿ tnàhì ní cachí-gá cunduu, te diu-ni mee Yá Ndiöxí ní taxi-gá chiuⁿ quide-ndí càháⁿ-ndí tnúhu-gá nàcuáa ngúndecu váha cue ñáyiú ndìhi-gá. ¹⁹Te ducaⁿ chi mee-gá ní cachí-gá sá Xítohó Jesucristú cada-gá nàcuáa nucúndecu váha nchaa nchoo cuè ñáyiú ndècu ñuyíu-a ndìhi Yá Ndiöxí. Te nchaa ñáyiú ní tuha ñaha xii-gá ñá túú-gá sání iní-gá sá ñáyiú-áⁿ nacháhu-yu cuéchi-yu núú-gá. Te mee Yá Ndiöxí ní taxi-gá chiuⁿ quide-ndí càháⁿ-ndí tnúhu-gá núú ñáyiú nàcuáa ngúndecu ndìhi ñaha váha-yu xii-gá. ²⁰Te Xítohó Jesucristú ní cachí-gá sá nchúhú càháⁿ-ndí tnúhu-gá núú nchàa ñáyiú, te sá dúhá quide-ndí càháⁿ-ndí tnúhu-gá te quide-ndí núú Yá Ndiöxí càháⁿ-ndí yuhu-gá, te xiáⁿ núu càháⁿ ndàhú-ndí núú-ndó sá tnàhá tnúhu-ndo ndìhi Yá Ndiöxí cuèndá cundecu váha-ndo ndìhi-gá, te duha càháⁿ-ndí chi ducaⁿ cachí Xítohó Jesucristú cada-ndí. ²¹Te Xítohó Jesucristú cùú-gá Yáá ñá túú tnàhì cuéchi-xi, dico Yá Ndiöxí ní quide ñaha-gá xii-gá dàtná ìⁿ ñáyiú ndècu cuéchi-xi, te ducaⁿ chi Xítohó Jesucristú ní xido-gá cuéchi nchaa nchoo ñáyiú ñuyíu-a, te ducaⁿ ñí xido Xítohó Jesucristú nchaa cuéchi-o cuèndá sá núu na tnàhá tnúhu-o ndìhi-gá te cudú-o núú Yá Ndiöxí, te ducaⁿ ñí cuu chi mee Yá Ndiöxí

ducaⁿ nǐ cachí-gá cunduu.

6

¹ Te nchoo ìⁿ-ni cùu-o quide chi^u-o cuendá Yá Ndiòxí nùu xiáⁿ càháⁿ ndàhú-ndí nùú-ndó sǎ vǎ òcò-ni ducaⁿ cùndedóho-ndo tnùhu Yá Ndiòxí, chi cada-ndo nàcuáa na chindee ñaha-ni-gá.

² Chi mee-gǎ cǎchí-gá ìⁿ xichi nùú tùtú-gá nùú cǎchí-xi:

Sáá nduu te cundàhú iní ñàhà-í xii-ndo chindee ñaha-í cuendá naníhí tǎhú-ndó,

te ní sáá nduu tàù-xi sǎ cùndàhú iní ñàhà-í xii-ndo chindee ñaha-í cuendá naníhí tǎhú-ndó, nùu xiáⁿ ní xíndedóho-í tnùhu ní càháⁿ-ndó te ní chindee ñàhà-í xii-ndo nàcuáa naníhí tǎhú-ndó.

Duha cǎchí-gá nùú tùtú-gá. Te vitna cùu-xi nduu cundahú iní ñàhá Yá Ndiòxí chindee ñaha-gá, te cùu-xi nduu naníhí tǎhú-ó.

³ Te nchúhú ñá túú quide-ndí ìⁿ sǎ ñà túú tàù-ndí cada-ndí sǎ cúu-xí ñáyi^u, chi cuíní-ndí sǎ vǎ càháⁿ cuèhé-yu cuendá chi^u quide-ndí. ⁴ Te nchaa sǎ quidé-ndí cúu-xí nàcuáa cutnùní iní cue ñáyi^u sǎ nchúhú xínú cuèchi-ndí nùú Yá Ndiòxí, te ío quide cahnu iní-ndí cuendá nchaa sǎ ndóhó-ndí, chi nándi quide ñaha ñáyi^u xii-ndí, te ducaⁿ-ni ta quide cahnu iní-ndí cuèi nándi-gǎ nchaa sǎ tá yǎha-ndí véxi.

⁵ Te duha ta yǎha-ndí véxi, nùú cǎniha ñáyi^u xii-ndí, nùú chíhí ñàhá-yu vecaá, nùú cuáa ndee ñàhá ñáyi^u xii-ndí xicuehé ñàhá-yu, te ío ndòho-ndí quidé-ndí chi^u Yá Ndiòxí, te áma xidí-ndí te áma ñá túú xidí-ndí, te áma nihí-ndí sǎ xéxi-ndí te áma ñá túú nihí-ndí. ⁶ Te quide ndáá-ndí ndécú-ndí, te cutnùní vǎha iní-ndí nàcuáa càháⁿ tnùhu Yá Ndiòxí, te quide cahnu iní-ndí cuèi nándi quide ñaha ñáyi^u xii-ndí, te cundahú iní-ndí tnàha ñáyi^u-ndí, te quide-ndí nchaa sǎ vǎha nàcuáa chindee ñaha Espíritú Yá Ndiòxí xii-ndí, te ío ndisa iní-ndí cúu iní-ndí cue tnàha ñáyi^u-ndí. ⁷ Te ònehé-ndí ñáyi^u mee-ni tnùhu ndáá, te nchaa chi^u quide-ndí te quide-ndí nàcuáa chindee ñaha Yá Ndiòxí xii-ndí, te cuendá sǎ quidé ndáá-ndí ndécú-ndí nùu xiáⁿ nihí

ndéé-ndí dáquèe tǎhú-ndí nchaa sǎ cuèhé sǎ dúhá. ⁸ Te dava ñáyi^u quide nínú ñàhá-yu xii-ndí, te davá-yu tnùhu cuèhé tnùhu duha càháⁿ-yu xǎháⁿ-yu xii-ndí, te davá-yu xícáháⁿ vǎha-yu cuendá-ndí te davá-yu xícáháⁿ cuèhé-yu, te davá-yu cǎchí-yu sǎ dándàhú-ndí ñáyi^u dico ñá ndáá chi càháⁿ ndáá-ndí. ⁹ Te davá-yu cǎchí-yu sǎ ñà túú xíní-yu ná ñáyi^u cùu-ndí, te davá-yu cǎchí-yu sǎ xíní-yu yoo cùu-ndí, te davá-yu cuíní-yu cahni ñàhá-yu xii-ndí dico vátá cǎhni ñàha-gá-yu chi ndècu-ni-ndí. Te ío ndòho-ndí ndécú-ndí ichi Yá Ndiòxí, te cuèi ndòho-ndí òcò ñá túú cùu-xi sǎ cùu-ndí. ¹⁰ Te cuèi ndihú iní-ndí òcò ñá túú òcò ndee-ndí sǎ cúu iní-ndí, te cùu-ndí cue téé ndàhú dico sànu ichi-ndí vǎi ñáyi^u ichi Yá Ndiòxí cuendá ngúndecu vǎha-yu sǎ cuendá-gǎ, te cuèi ñá túú ná ndécú ndíhi-ndí dico ñá túú ná cúmǎni xii-ndí.

¹¹ Te nchòhó ñáyi^u ndècu ndíhi-í ichi Xítóhó Jesucristú ndécú ñùú Còrintú ío cùu iní ñàhá-ndí xii-ndo, te ní yùhu ní iní-ndí càháⁿ-ndí nchaa tnùhu càháⁿ-ndí sǎ cúu-xí-ndó. ¹² Te nchúhú chi ní yùhu ní iní-ndí cúu iní ñàhá-ndí xii-ndo, dico nchòhó chi ñá túú òcò quide-ndo sǎ cúu-xí-ndí. ¹³ Te yúhú càháⁿ ndàhú-í nùú-ndó òcò quidé ìⁿ téé cùu tátá òré càháⁿ ndíhi-dé cue déhe-dé sǎ ní yuhu ní iní-ndó cùu iní ñàhá-ndó xii-ndí òcò quidé mèe-ndí cúu iní ñàhá-ndí xii-ndo.

Nchoo cùu-o datná ìⁿ vehe Yá Ndiòxí

¹⁴ Te cue ñáyi^u ñá túú sàndáá iní tnùhu Xítóhó Jesucristú, te vǎ cúu ìⁿ-nuu-ndo ndíhi-yu cada-ndo òcò xiquidé-yu, chi òcò cuu nchaa sǎ vǎha te òcò cuu nchaa sǎ cuèhé sǎ dúhá, te òcò nchicanchi ndíhi niú chi ñá túú ìⁿ-ni cuu-xi. Te ducaⁿ sǎtnahá-xi cùu nchaa sǎ vǎha ndíhi nchaa sǎ cuèhé sǎ dúhá chi ñá túú ìⁿ-ni cuu-xi. ¹⁵ Te òcò-ni ducaⁿ ñá túú ìⁿ-ni cuu Xítóhó Jesucristú ndíhi sǎcuíhna, te òcò-ni ducaⁿ ñá túú ìⁿ-ni cuu ñáyi^u sàndáá iní ñàhá xii Xítóhó Jesucristú ndíhi ñáyi^u ñá túú sàndáá iní ñàhá xii-gǎ. ¹⁶ Te òcò-ni ducaⁿ sǎtnahá tucu-xi cùu vehe Yá Ndiòxí ndíhi nchaa sǎ cǎchí ñáyi^u cùu ndíoxí ní cadúha cue téé ñuyú-a, chi vǎ cúu quíhi ní ìⁿ xiáⁿ xití

vehe-gá. Te nchoo cùu-o datná vehe Yá Ndiöxí Yaá ndécú tüu andiu, chi mee-gã cächí-gá núú tütú-gá núú cächí-xi:

Yúhú vá cúmání cundecu-í ndihí-yu ndëni ní cuu na cundecú-yu,

te diu-ni yúhú cuu-í Ndiöxí-yu,

te mée-yu cuú-yu ñáyiú cùu cuendá-í.

Duha cächí-gá núú tütú-gá. ¹⁷Te xiãⁿ núú cächí tucu-gá ingá xichi núú tütú-gá núú cächí-xi:

Chí tá quèe tnuú nchaa ñáyiú ñá túú sàndáá iní ñáhá xi-í,

te vá cání iní-ndó càda-ndo ni ñⁿ sá cuèhé sá dúhá,

te ducaⁿ te queheⁿ cuendá ñáhà-í xii-ndo,

¹⁸te yúhú cuu-í Tátá-ndó,

te nchòhó cuu-ndo cuè déhe ducuⁿ-í, ndihí cue déhe yoco-í,

duha càháⁿ yúhú Yaá ío càhnu cuu.

Duha cächí-gá núú tütú-gá.

7

¹Te sá dúcáⁿ ío váha càháⁿ Yá Ndiöxí sá cúu-xí-ó núú xiãⁿ càháⁿ-í dóho nchòhó ñáyiú ío cùu iní-í sá dùuⁿ duuⁿ daña-o nchaa sá cuèhé sá dúhá, chi nchaa xiãⁿ ñá túú cùu-xi sá váha sá cúu-xí iní-ó ndihí yiqui cuñú-ó, te cada-o nàcuáa tàù-xi cundu nàcuáa cundáá-ó núú Yá Ndiöxí, te cada-o sá néhé-ó sá yíñhú núú-gã.

Cue ñáyiú ñuu Còrintú quidé váha-yu

²Te ni yùhu ni iní-ndó chì cúu iní ñáhá xii-ndí, chi nchúhú vá yõ ñⁿ quide úhú iní-ndí, te ni vá yõ ñⁿ dàcuíta nihnu-ndí, te ni vá yõ ñⁿ dándahú-ndí. ³Te sá dúhá càháⁿ-í te vá cání iní-ndó sã ñⁿ cuéchi dàcaa-í díquí-ndó, chi datná sa ní cächí-í xii-ndo sã yùhú ío cùu iní ñáhà-í xii-ndo, te cuèi vitna ndècu-gá-ó ñùyú-a àdi cuéi na cùú-ó dico diu-ni ducaⁿ cùu iní ñáhà-í xii-ndo. ⁴Te yúhú ío váha sàni iní-í cuendá-ndó, te ducaⁿ ío váha càháⁿ-í cuendá-ndó, te ío ndècu ndihí-í tnúhu ndee iní cuendá-ndó, te ío cudíí iní-í sá cuendá-ndó cuèi nánđí ndòho-í ndihí dava-gá-güedé ndécú-ndí.

⁵Te nchúhú cútñhá ní sáháⁿ-ndí dis-trítú Macèdoniá, te ñá túú tñahí ni ndè-tatú-ndí cuendá nchaa sá ní yáhandí chi ío ní ndoho-ndí cuendá nchaa sá ní quidé-yu, chi ío ní cuándeé ñáhá-yu xii-ndí, te ío ní sani iní-ndí núú nása-gá yáha-ndí ní

cùu. ⁶Dico Yá Ndiöxí ní taxi-gá tnúhu ndee iní xii-ndí òré ní quexio té Títú núú ndécú-ndí, te diu-ni Yaá-áⁿ cúu-gã Yaá sãñaha-gã tnúhu ndee iní xii cue ñáyiú ndihú iní-xi. ⁷Te ducaⁿ ní taxi Yá Ndiöxí tnúhu ndee iní xii-ndí cuendá sá ní quexio té Títú núú ndécú-ndí, te ñá díú-ní sã cuendá ní quexio-dé chi ní níhí tucu-ndí tnúhu ndee iní cuendá ní cani-dé cuendú núú-ndí sã nchòhó ní sãñaha-ndo tnúhu ndee iní xii-dé, te ní cächí tnúhu-dé xii-ndí sã nchòhó ío cuní-ndó càháⁿ ndihí ñaha-ndo xii-ndí, te ní cächí tnúhu tucu-dé xii-ndí sã nchòhó ío ndihú iní-ndó cuendá nàcuáa cùu ndecu-ndo ni cuu, ndihí cuendá sá ío sàni iní-ndó cuendá-í, te sá dúcáⁿ ndùu cuendú ní cani-dé núú-ndí núu xiãⁿ ío ní cudíí iní-í.

⁸Te nchòhó ní ndihú iní-ndó cuendá tnúhu càháⁿ-í núú tütú sá ní dáquixí-í ndaha-ndo, te òré ní níhí-í tnúhu sá ndihú iní-ndó te tnaa-ni ní ndixi cuéchi iní-í sá dúcáⁿ ní quide-í te dátñnì ñá túú-gã ní ndixi cuéchi iní-í. ⁹Te vitna ní ndihú iní-ndó, te xiãⁿ ní quide-xi ní ndixi cuéchi iní-ndó sã ñá túú quide váha-ndo ndècu-ndo ni cuu, te ní cudíí iní-í dico ñá díú cuendá sá ní ndihú iní-ndó ní cudíí iní-í chi cuendá sá ní ndixi cuéchi iní-ndó, te ní ndihú iní-ndó nàcuáa ní cuu váha iní Yá Ndiöxí, te xiãⁿ núu ní cuu-xi ñⁿ sá váha sá cúu-xí-ndó cuendá tnúhu ní càháⁿ-í te ñá túú ní cùu-xi ñⁿ sá cuèhé sá cúu-xí-ndó. ¹⁰Te nchoo núu na ndihú iní-ó nàcuáa cuu váha iní Yá Ndiöxí, te ndixi cuéchi iní-ó te núu ñá túú quide váha-o ndècu-o, te sá dúcáⁿ quide-o te nánhí tãhú-ó, te vá ndihú iní-ó sã dúcáⁿ ní quide-o, te dava ñáyiú xindecu ichi cuèhé ichi duha ndihú iní-yu dico ñá túú ndixi cuéchi iní-yu cuendá nchaa sã ñá túú váha quidé-yu, te sá dúcáⁿ quidé-yu te cuíta nihnú-yu. ¹¹Te sá dúcáⁿ ní ndihú iní-ndó nàcuáa ní cuu váha iní Yá Ndiöxí, te xiãⁿ núu ndùcu ndee-ndo quide-ndo nchaa nàcuáa tàù-xi cundu, te vitna ni yùhu ni iní-ndó càháⁿ-ndó sã quidé váha-ndo, te ío cùdèéⁿ-ndó núú mée-ndó sã ñá túú quide váha-ndo ndècu-ndo ni cuu, te yùhú-ndó ndècu-ndo cuendá sã ñá túú quide váha-ndo ni cùu, te ío ní xúhuⁿ iní ñáhá-ndó xi-í, te ní ndúcu ndéé-ndó ní quide ndáá-ndó cuendá téé ndècuéchi ndècu ndihí-ndo, te sá dúcáⁿ ní

quide-ndo te xiǎⁿ ní cutnùnì sá mée-ndó ñà túú cuèchi-ndo. ¹² Te ní cadúha-í tutú ní dáquixì-í ndaha-ndo, te ní quide-ndo nàcuáa ní cáháⁿ-í, te sá dúcáⁿ ní quide-ndo xiǎⁿ ní cutnùnì iní-ndó sǎ ïo cùu iní ñáhá-ndó xii-í. Te Yá Ndiöxí ñáhá-gǎ sá diú cuendá xiǎⁿ ní dáquixì-í tutú ndaha-ndo, te ñá diú-ní cuendá sá sání iní-í cuendá téé ndècuéchi ndècu ndihi-ndo, te ni ñá diú-ní cuendá ñáyiú ní dándihú téé ndècuéchi-áⁿ iní-xi ní cadúha-í tutú ní dáquixì-í ndaha-ndo. ¹³ Te cuendá sá quidé váha-ndo ndècu-ndo xiǎⁿ cúú-xí tñuhu ndee iní ndécú ndihi-ndí.

Dico ñá diú-ní xiǎⁿ chi tñahá ío cùdíí iní-ndí cuendá sá ïo cùdíí iní té Títú, te ducaⁿ cùdíí iní-dé chi nchòhó ní sǎñaha-ndo tñuhu ndee iní xii-dé. ¹⁴ Te yúhú ñá túú cùcahaⁿ núú-í sá ní cáháⁿ váha-í cuendá-ndó núú tǎ Títú cùtñahá vátá quixí-gǎ-dé núú ndécú-ndó, chi ní cutnùnì iní-dé sá ndáá cáháⁿ váha-í nàcuáa quide-ndo datná cúú-xí sǎ ndáá nchaa tñuhu dàcuaha ñaha-í xii-ndo. ¹⁵ Te vitna ío-gǎ váha cùu iní té Títú cuendá-ndó, chi ndàcu iní-dé sá ncháá-ndó ïo váha ní tñi-ndo nchaa tñuhu ní cáháⁿ-dé núú-ndó, te ndàcu tucu iní-dé sá ní queheⁿ cuendá váha-ndo-dě, te ní dátúu-ndo núú-dě sá ïo ní quiyuhú iní-ndó sǎ vǎ ndácú-ndó càda-ndo nchaa nacuáa tàù-xi cunduu. ¹⁶ Te ío cùdíí iní-í cuendá-ndó chi cùtñuní ndáá iní-í sá ñà túú dàña ndeé-ndó quide-ndo nchaa nacuáa tàù-xi cunduu.

8

Ío váha cuu iní-ó chindee tñaha-o

¹ Te nchòhó ñáyiú ndècu ndihi-ndí ichi Xítóhó Jesucristú cǎchí tñuhu-ndí xii-ndo nàcuáa quide ñaha Yá Ndiöxí xii cue ñáyiú xindecu ichi-gǎ ndécú distritú Macèdoniá, chí ío chindee ñaha-gǎ xií-yu cuendá sá quidé váha-yu ndécú-yu. ² Te cuèi ndòho vihi-yu ndécú-yu dico ío-ni cùdíí iní-yu, te cuendá xiǎⁿ núú ni yúhu ni iní-yu ní sacáⁿ tñáhá-yu díhúⁿ sǎ cúú-xí tñaha ñáyiú-yu, te ñá túú tñahí ni xĩnduu díi-yu cuèi ío ndáhú-yu. ³ Te ñá diú-ní nàcuáa ní sani iní-yu ndacú-yu cacáⁿ tñáhá-yu, chí ní quide yica iní-yu ní sacáⁿ tñáhá-gǎ-yu, te yúhú cǎchí tñuhu ndáá-í xii-ndo sǎ ní yuhu ni iní-yu ducaⁿ ní quidé-yu. ⁴ Te ío ní cáháⁿ ndáhú-yu núú-ndí cuendá sá cuǎha-ndí tñuhu sá tñáhá-yu chindèé-yu dava-gǎ cue

ñáyiú cùu cuendá Yǎ Ndiöxí. ⁵ Te ñá diú-ní nàcuáa ní sani iní-ndí ní quidé-yu, chí ní xídó-gǎ-yu ní quide váha-yu, te ducaⁿ chí mèe-yu ní sani iní-yu sá càdǎ-yu nchaa nàcuáa cuiní Yǎ Ndiöxí, te dátñuní ducaⁿ te ní cachí-yu sá cúú càdǎ-yu nchaa nàcuáa na cǔñaha-ndí xií-yu. Te ducaⁿ ní quidé-yu chí ducaⁿ ní cuiní mèe Yǎ Ndiöxí cunduu. ⁶ Te sá dúcáⁿ ní quide ñáyiú-áⁿ núú xiǎⁿ cáháⁿ ndáhú-ndí núú tǎ Títú sá quixí tucu-dé núú ndécú-ndó cuendá dàxínu cava-dé chiúⁿ sá sá ní ngúíta-dé quidé-dě dátacá-dé díhúⁿ sǎ sá ní ngúíta-ndo sàcáⁿ tñáhá-ndó, te ducaⁿ quide-ndo chí cùndahú iní-ndó tñaha ñáyiú-ndo. ⁷ Te nchòhó cúú-ndó ñáyiú ío ngòdónúú quide nchaa sá váha, te ío váha sàndáá iní-ndó Xítóhó Jesucristú, te ío váha cùtñuní iní-ndó nàcuáa cáháⁿ tñuhu-gǎ, te ío váha dàcuaha-ndo ñáyiú tñuhu-gǎ, te ío ndècu ndee-ndo quide-ndo mee-ni sá váha, te ducaⁿ ío cùu iní ñáhá-ndó xii-ndí, te sá dúcáⁿ quide-ndo núú xiǎⁿ cáháⁿ ndáhú-í núú-ndó sǎ ngòdó núú-gǎ-ndó càda-ndo sá cúú-xí tñaha ñáyiú-ndo.

⁸ Dico yúhú ñá túú tàuchiúⁿ-í sá dúcáⁿ càda-ndo, chí cuendá-ni sá cǎchí tñuhu-í xii-ndo nàcuáa quide dava-gǎ cue ñáyiú ndècu ichi Xítóhó Jesucristú, chí cue ñáyiú-áⁿ ní yúhu ni iní-yu quidé-yu sá váha sá cúú-xí tñaha ñáyiú-yu, te cǎchí tñuhu-í xii-ndo nàcuáa quidé-yu cuendá cutnùnì núú nása càda-ndo núu ndisa sá cúú iní-ndó cuè tñaha ñáyiú-ndo. ⁹ Te nchòhó sa xini-ndó sǎ Xítóhó Jesucristú ío cùndahú iní ñáhá-gǎ xii-o, te ío váha ndècu-gǎ ní cùu te ní quixi-gǎ ñuyúú-a ní quide váha ñaha-gǎ xii-o, te ñuyúú-a ñá túú ní xĩndecu váha-gǎ, te ducaⁿ ní quixi-gǎ ñuyúú-a cuèi ñá túú ní xĩndecu váha-gǎ cuendá sá nchóó ngũndecu váha-o núú ndécú-gǎ.

¹⁰ Te na cǎchí tñuhu-í xii-ndo nàcuáa sání iní-í. Chiúⁿ sá ní yuhu ni iní-ndó ní ngúíta-ndo quide-ndo cuía ní yáha chí cùu-xi sá váha sá cúú-xí-ndó núu na dàxínu cava-ndo. ¹¹ Te dátñá-ni ní yúhu ni iní-ndó ní tausaha-ndo chiúⁿ-áⁿ te ducaⁿ-ni ní yuhu ni iní-ndó dàxínu cava-ndo, te cacáⁿ tñáhá-ndó sǎ ndécú ndihi-ndo nacuáa xito mee-ndo ndacu-ndo. ¹² Te núu nchòhó ní yúhu ni iní-ndó càcáⁿ tñáhá-ndó sǎ xító mèe-ndo ndacu-ndo ña, te cùu váha iní Yǎ

Ndiöxí, chi mee-gã sa ñaha-gá nása ndècu-o te ndùu vétú-ni iní-gá.

¹³ Te sá dúhá ndùu tnúhu cãháⁿ-í te vâ cáni iní-ndó sã yúhú cuiní-í sá nchòhó ndoho-ndo cùndecu-ndo te dava-gá-yu ngúndecu váha-yu sá cuendá-ndó.

¹⁴ Te vitna ndècu ndee iní-ndó nàcuáa ndacu-ndo chindee-ndo cue ñáiyu xini ñuhu, te nduu ñã túu ndècu ndee iní-ndó te cue ñáiyu-áⁿ chindee ñàhá-yu xii-ndo te núu ndècu ndee iní-yu, te ducaⁿ te ni nchòhó ñã túu ñã cumání xii-ndo te ni cuè ñáiyu-ãⁿ ñã túu ñã cumání xií-yu. ¹⁵ Te ducaⁿ te quee ndáá-xi nàcuáa cãháⁿ-xi núu tütú Yã Ndiöxí núu cãchí-xi: "Cue ñáiyu ío vâi sá ni ñihí ñã túu ní cùu sobrã xií-yu, te cue ñáiyu sacú ní ñihí ñã túu ní cùmání xií-yu", duha cãchí-xi núu tütú-gá.

Té Titú ndíhi cue téé cùndíhi-dé

¹⁶ Te ndácáⁿ táhù-í núu Yã Ndiöxí chi mee-gã ní quide sã té Titú ío ñuhu iní ñàhá-dé xii-ndo dàtná ñúhú iní ñàhá-í xii-ndo. ¹⁷ Te yúhú ní xáhaⁿ-í xii-dé sá quíxí còto ñaha-dé xii-ndo te ní sáha-dé tnúhu, te ñã díú mèe-ni sá dúcáⁿ ní xáhaⁿ-í xii-dé quixi coto ñaha-dé xii-ndo, chi mee-dé cúdíí tñáhí iní-dé quixi coto ñaha-dé xii-ndo.

¹⁸ Te tendaha-ndí ìⁿ téé ndècu ndíhi-o ichi Xítóhó Jesucristú quixi-dé ndíhi té Títú, te téé quixi ndíhi té Títú-áⁿ cúu-dé ìⁿ téé ío váha cãháⁿ cue ñáiyu xíndecu ichi Xítóhó Jesucristú cuendá-dé cuendá sá ío váha quide-dé chiúⁿ Xítóhó Jesucristú cãháⁿ-dé tnúhu-gá tnúhu sá cãháⁿ nàcuáa naníhí tãhú-ó. ¹⁹ Te cue ñáiyu xíndecu ichi Xítóhó Jesucristú ñã díú-ní sã cãháⁿ váha-yu cuendá-dé, chi tñàhá ní cãxi ñàhá-yu xii-dé cuendá sã cáca cùu ndíhi ñaha-dé xii-ndí chindee ñaha-dé tacá sá cúu-xí ñáiyu ndàhú, te quide-ndí chiúⁿ-a cuendá ío cuu cãhnu Yã Ndiöxí, te cue ñáiyu cutnùní iní-yu sá nchòhó ní yúhu ní iní-ndó quide-ndo nchaa sã váha sá cúu-xí cuè tñaha ñáiyu-ndo. ²⁰ Te cuiní-ndí sá vã cãháⁿ cuèhé ñáiyu cuendá nàcuáa quide-ndí ndíhi sá ngãutnàha sá cúu-xí cuè tñaha ñáiyu-o, te ío vâi cuu-xi.

²¹ Chi ndùcu ndee-ndí quidé-ndí nàcuáa cãháⁿ váha Xítóhó Jesucristú cuendá-ndí, te quide tucu-ndí nàcuáa cãháⁿ váha ñáiyu sá quidé váha-ndí.

²² Te tendaha tucu-ndí ingá tucu téé ndècu ndíhi-o ichi Xítóhó Jesucristú quixi-dé ndíhi cue téé úú quixi coto ñaha xii-ndo, te téé quixi ndíhi-güedé-áⁿ ní cuu vâi xito quide-dé nàcuáa cutnùní iní-ndí sá ío ndùcu ndee-dé quidé-dé sã váha, te vitna ío-gá cuiní-dé cada-dé sã váha vitna quixi-dé núu ndécú-ndó, chi cùtnuní ndáá iní-dé sá cúu-ndó cuè ñáiyu quide váha. ²³ Te cãchí tnúhu-í xii-ndo sã tẽ Títú cúu-dé ìⁿ téé cùndíhi-í quidé-ndí chiúⁿ Xítóhó Jesucristú, te tñàhá-dé cúu-dé ìⁿ téé xinu cuechi núu-ndó cãháⁿ-dé tnúhu-gá. Te cãchí tnúhu tucu-í xii-ndo cuendá cue téé úú quixi ndíhi-dé, chi cue téé-áⁿ cúu-güedé cue téé tendaha cuè ñáiyu xíndecu ichi Xítóhó Jesucristú quixi coto ñaha xii-ndo. Te cue téé-áⁿ quidé-güedé nàcuáa cãchí ñáiyu sá ío cãhnu cuu Xítóhó Jesucristú. ²⁴ Te chí cádá sã cúu iní ndisa-ndo-güedé cuendá ducaⁿ na cùtnuní iní nchaa dava-gá ñáiyu xíndecu ichi Xítóhó Jesucristú sã ndáá ndisa ducaⁿ quide-ndo, te ducaⁿ cùtnuní iní-yu sã ndáá ndisa quide váha-ndo dàtná cãháⁿ-ndí cuendá-ndó sã quidé váha-ndo.

9

Cuendá sá ngãutnàha sá cúu-xí cuè ñáiyu xíndecu ichi Xítóhó Jesucristú

¹ Te cuendá sá ngãutnàha sá cúu-xí cuè ñáiyu ndècu ichi Xítóhó Jesucristú ñã túu-gã xini ñuhu-xi cãchí tnúhu-í xii-ndo núu tütú-a nàcuáa cada-ndo, ² chi sa cùtnuní iní-í sá ío cuiní-ndó chindee-ndó-yu. Te ducaⁿ-ni ío váha cãháⁿ-í cuendá-ndó núu ñáiyu xíndecu ichi Xítóhó Jesucristú ndécú distritú Macèdoniá, te xáhaⁿ-í xií-yu sá nchòhó ñáiyu xíndecu ichi Xítóhó Jesucristú ndécú distritú Acãya sa ní cuu ìⁿ cuíá ducaⁿ cuiní-ndó cãcáⁿ tñàhá-ndó sã cúu-xí cuè ñáiyu ndàhú ndécú ichi-gá. Te vâi cue ñáiyu distritú Macèdoniá cuiní-yu cacáⁿ tñàhá-yu sá cúu-xí cuè ñáiyu ndàhú ndécú ichi Xítóhó Jesucristú cuendá sá ní ñihí-yu tnúhu sá nchòhó ío cuiní-ndó dúcaⁿ cada-ndo. ³ Te cuendá sá sání iní-ndó càda-ndo xíãⁿ tendaha-í cue téé ndècu ndíhi-o ichi Xítóhó Jesucristú quixi-güedé núu ndécú-ndó cuendá dàtúha ñaha-güedé xii-ndo, cuendá sã vã queé ndèhnde-í núu ñáiyu sá ní cãháⁿ váha-í cuendá-ndó, te ducaⁿ cùndecu túha ndisa-ndo dàtná sa ní cãháⁿ-í núu-yu. ⁴ Chi na cuháⁿ ndéé

quixi-í ndihi ìⁿ úú cue ñáiyu distritú Macèdoniá núú ndécú-ndó te quini-yu sá ñà túú ndècu túha-ndo, te cucahaⁿ núú-í núú-yu sá ñi cáháⁿ váha-í cuendá-ndó te núú ñá túú ndècu túha-ndo, te tnáhá-ndó cùcahaⁿ núú-ndó. ⁵ Te xíáⁿ núu ñi sani iní-í sá váha-gá codonuu cue tée ndècu ndihi-o ichi Xítoho Jesucristú quixi coto ñaha-güedé xii-ndo cuendá chindee ñaha-güedé tacá sá ñi sani iní-ndó càcáⁿ tnáhá-ndó cuendá sá cùndècu túha-xi, te cuu-xi dàtná ìⁿ táhú sá ñi quene cuu iní méé-ndó càcáⁿ tnáhá-ndó sá cúú-xí cuè tnaha ñáiyu-ndo. Te ducaⁿ te vá yòo cani iní-xi quesàhá-yu sá nchùhú ñi quide yica-ndí ducaⁿ ñi sacáⁿ tnáhá-ndó.

⁶ Te nchòhó sa xini-ndó sá ñáiyu na chihí vai tatá te vai ñiñí-yu cùu, te cue ñáiyu na chihí sacú tatá te sacú ñiñí-yu cùu. Ducaⁿ sátnahá-xi cùu ñáiyu sacáⁿ tnáhá sá cúú-xí tnàha ñáiyú-yu. ⁷ Te ìⁿ ìⁿ-ndo càcáⁿ tnáhá-ndó nàcuáa quène cuu iní méé-ndó, te ío váha cuu iní-ndó dùcaⁿ cada-ndo te vá cádá-ndó cuendá-ñi sá quidé yica ñaha ñáiyu xii-ndo, chi Yá Ndiòxí cúú váha iní-gá núú nchàa ñáiyu cùdúú ñi sacáⁿ tnáhá sá cúú-xí cuè tnaha ñáiyu-xi. ⁸ Te Yá Ndiòxí ndacu-gá chindee ñaha-gá xii-ndo nàcuáa cundecu váha-ndo, chi diu-gá cada te ñihí-ndó nchàa núú sá xini ñúhu-ndo cundecu ndihi-ndo, te ñá túú tnàhí-gá ná cumání xii-ndo, te mee-gá chindee ñaha-gá xii-ndo ñihí-ndó ío vai cundecu ndihi-ndo cuendá ducaⁿ chindee-ndo cue tnaha ñáiyu-ndo. ⁹ Te núú tùtú Yá Ndiòxí càchí-xi ìⁿ xichi:

Ìⁿ ñáiyu ío vai sá ñi sáñàhá-yu xii ñáiyu ndàhú,
te sá ñi quide ñáiyu-ánⁿ ñi cuu-xi sá váha sá vá yòo cùnaa.

Duha càchí-xi núú tùtú-gá. ¹⁰ Te mee Yá Ndiòxí táxi-gá nchaa sá cúú tàtá nchaa nchòhó ñáiyu xitu nándi sá xítú cuendá cuu sá cúú nchito-ndo, te diu-gá cada te ío vai sá ñihí-ndó cundecu ndihi-ndo te ducaⁿ ío-gá vai sá váha cada-ndo sá cúú-xí cuè tnaha ñáiyu-ndo. ¹¹ Te Yá Ndiòxí taxi-gá vai núú sá cùndècu ndihi-ndo cuendá ducaⁿ ñi yuhu ñi iní-ndó vai cuáñaha-ndo sá cúú-xí tnàha ñáiyu-ndo. Te cuendá nchaa sá sacáⁿ tnáhá-ndó quèheⁿ cuendá-ndí cuu xii tnàha ñáiyu-ndo, te cue ñáiyu-ánⁿ ío ndacáⁿ táhú-yu núú Yá Ndiòxí cuendá sá dúcáⁿ sacáⁿ tnáhá-ndó sá cúú-xí-yu. ¹² Te

sá dúcáⁿ quide-ndo sacáⁿ tnáhá-ndó sá cúú-xí cuè ñáiyu cùu cuendá Yá Ndiòxí, te ñáiyu-ánⁿ ñá túú-gá ná cumání xii-yu, te ío ndacáⁿ táhú-yu núú Yá Ndiòxí sá dúcáⁿ quide-ndo. ¹³ Te ñáiyu-ánⁿ cutnùní iní-yu sá nchòhó quidé-ndó sá sàndáa ndisa iní-ndó tnúhu Xítoho Jesucristú, te cuendá xíáⁿ te ñáiyu-ánⁿ chiñúhú-yu Yá Ndiòxí, te cuendá sá dúcáⁿ ñi yuhu ñi iní-ndó sacáⁿ tnáhá-ndó sá cúú-xí-yu ndihi sá cúú-xí nchàa dava-gá ñáiyu, te cachí-yu sá ío càhnu cuu Yá Ndiòxí. ¹⁴ Te ñáiyu-ánⁿ càháⁿ ndihí-yu Yá Ndiòxí cuendá-ndó, te ío cuu váha iní ñàhá-yu xii-ndo cuendá sá Yá Ndiòxí chindèe ñaha-gá xii-ndo quide-ndo sá váha sá cúú-xí-yu ndihi dava-gá ñáiyu. ¹⁵ Te ío ndacáⁿ táhú-ó núú Yá Ndiòxí cuendá sá ñi taxi-gá sá ío váha ndècu ndihi-o, te ñi ñá cutnùní iní-ó nàsa cunduu tnúhu càháⁿ-ó cuendá sá váha ñi taxi-gá.

10

Té Páblú ndécú ndihi-dé tnúhu ndee ñi sá càháⁿ-dé tnúhu Xítoho Jesucristú

¹ Te Xítoho Jesucristú ío càhnu iní-gá, te cùndahú iní ñáhá-gá xii-o chindee ñaha-gá, núú xíáⁿ yúhú té Páblú ducaⁿ quide-í càháⁿ ndàhú-í núú-ndó nàcuáa cada-ndo. Te dava-ndo càchí-ndó sá yúhú ío ndàhú iní-í òré ndécú ndihi ñaha-í xii-ndo, te òré ñá túú ndècu ndihi ñaha-í xii-ndo te ío ñi càá-í. ² Te càháⁿ ndàhú-í núú-ndó sá cádá-ndó nàcuáa vá càháⁿ ñi-í núú-ndó òré quixi-í quixi coto ñaha-í xii-ndo. Te cuñí-í sá ndihi tnúhu ñi iní-xi càháⁿ ndihi-í cue ñáiyu càchí sá ìⁿ-ni cuu-í ndihi cue ñáiyu ñá túú sàndáa iní tnúhu Xítoho Jesucristú. ³ Te nchúhú cùu-ndí cue tée ñuyú-a, dico ndècu ndee-ndí quidé-ndí nàcuáa ndacu-ndí dáquèe tíhú-ndí nchaa sá cuèhé sá dúhá, dico ñá díú mèe-ndí ducaⁿ ndacu-ndí quidé-ndí, ⁴ te ñi ìⁿ sá ío ñuyú-a ñá túú chindee ñaha-xi, chi mee Yá Ndiòxí chindèe ñaha-gá xii-ndí dáquèe tíhú duuⁿ-ndí nchaa núú sá cuèhé sá dúhá, ⁵ Te xíáⁿ núu ñihí-ndí tnúhu càháⁿ-ndí sàdì-ndí yuhu cue ñáiyu càháⁿ tnúhu sá ñá túú cùu váha iní Yá Ndiòxí, ñáiyu xiquide nínu mee-xi càchí sá ñá túú nàndíhi tnúhu-gá. Te quide-ndí sá ñáiyu-ánⁿ quindáa iní-yu tnúhu Xítoho Jesucristú. ⁶ Te nchúhú sa

ndècu túha-ndí sá dáquètíhú-ndí cue ñáyiú ñá túú cuiní cada nàcuáa cuiní Xítohó Jesucristú, dico díhna-gá xini ñùhu-xi sá ncháa nchòhó ñáyiú cuiní cada nàcuáa cuiní-gá cundáá-ndó.

⁷ Te nchòhó nàcuáa ndùu sá ndéhé-ndó te ducaⁿ sàni iní-ndó, dico vá dúcáⁿ càni iní-ndó cuèndá-ndí. Chi núu cùtnuní ndáá iní-ndó sá cúú-ndó cuèndá Xítohó Jesucristú, te ñiú-ni ducaⁿ tàù-ndó càni iní-ndó cuèndá-ndí tucu. ⁸ Te Xítohó Jesucristú ní taxi-gá tnúhu ndee iní ndécú ndíhi-ndí sá dánèhé ñáhá-ndí xii-ndo nàcuáa cuita cuehnu nihnu-ndo ìchi-gá quíhíⁿ, te ñá díú sá dánèhé ñáhá-ndí xii-ndo nàcuáa cuíta nihnu-ndo, te cuèi na chido-gá-í cáháⁿ-í cada nínu-í mée-í cuèndá tnúhu ndee iní ní taxi Xítohó Jesucristú ndécú ndíhi-ndí, dico vá cúcàhaⁿ núu-í chi cáháⁿ ndáá-í. ⁹ Te ñá túú cuiní-í sá nchòhó càni iní-ndó sá yùhú dáyùhú ñáhà-í xii-ndo nàcuáa ndùu tnúhu cáháⁿ-í núú tùtú-í. ¹⁰ Te dava-ndo cächí-ndó sá ténáá ñáhà-í xii-ndo núú tùtú-í, te mee-ni tnúhu càhnu sá ïo cùnuu cuu-xi, te cächí tucu-ndo sá òré ndécú ndíhi ñaha-í xii-ndo te ñá túú càa-í sá cúú-í ìⁿ tée cùu váha cùu dico iní-ndó, te cächí tucu-ndo sá ñá túú tnàhá iní-ndó nàcuáa quide-í òré dácùaha ñaha-í xii-ndo. ¹¹ Te nchòhó ñáyiú ducaⁿ cáháⁿ cada cuèndá váha-ndo sá dàtná-ni cáháⁿ-ndí núú tùtú-ndí ñiú-ni ducaⁿ quide-ndí òré ndécú ndíhi ñaha-ndí xii-ndo.

¹² Te nchúhú, vá cúú tnàhí cáháⁿ-ndí sá ìⁿ-ni cuu-ndí ndíhi cue ñáyiú cáháⁿ váha cuèndá mée-xí, chi ñáyiú-áⁿ sání iní-yu ná cúú sá váha te quide-yu te xíáⁿ cächí-yu sá ïo váha quide-yu, te cächí-yu sá quidé váha-gá-yu dácúxí tnàha ñáyiú-yu, te sá dúcáⁿ cáháⁿ-yu te quide-yu dàtná quidé cuè ñáyiú ñá túú tnàhí cùtnuní iní-xi.

¹³ Te dico nchúhú ñá túú xidó-ndí cáháⁿ váha-ndí cuèndá-ndí, chi cáháⁿ váha-ndí cuèndá-ndí dico nàcuáa ndùu chiúⁿ ní taxi Yá Ndiòxí cáháⁿ-ndí, chi mee-gá ní cächí-gá ndéé neni sáá-ndí cáháⁿ-ndí tnúhu-gá, te ní sáá-ndí ndéé ñúu-ndó cáháⁿ-ndí tnúhu-gá. ¹⁴ Te vitna ndècu ndíhi-ndí tnúhu ndee iní sá tnàhá nchòhó cuu cáháⁿ ndíhi ñaha-ndí xii-ndo, chi díhna-gá nchúhú ní quixi-ndí ní cáháⁿ-ndí

tnúhu Xítohó Jesucristú ñúu-ndó, tnúhu sá cáháⁿ nàcuáa naníhí tàhú-ó. ¹⁵ Te nchúhú ñá túú quide cahnu-ndí mée-ndí cuèndá chiúⁿ quide dava-gá-güedé quesaha-ndí sá chíuⁿ mée-ndí cúú-xí. Te cuiní-ndí sá nchòhó cuita quindáá-gá iní-ndó Xítohó Jesucristú, te ducaⁿ te níhí-gá-ndí nàcuáa cada-ndí chiúⁿ-gá nchaa dava-gá xichi núú ní cächí-gá cada-ndí chiúⁿ-gá. ¹⁶ Chi cáháⁿ-ndí tnúhu-gá tnúhu sá cáháⁿ nàcuáa naníhí tàhú-ó, te yáha-gá-ndí ñúu-ndó quíhíⁿ-ndí nchaa dava-gá xichi cáháⁿ-ndí, te vá cáda càhnu-ndí mée-ndí cuèndá chiúⁿ sá sá ní quide dava-gá-güedé.

¹⁷ Te cue ñáyiú cuiní cada càhnu mee-xi te vá dúcáⁿ càdá-yu, chi mee Xítohó Jesucristú ná càda cahnu-yu-gá. ¹⁸ Te nchaa ñáyiú na cáháⁿ váha Xítohó Jesucristú cuèndá-yu, ñáyiú-áⁿ cúdíú-yu núú-gá, te ñá túú cùdíú-yu núú-gá cuèndá sá cáháⁿ váha-yu cuèndá mée-yu.

11

Cuèndá té Pàblú ndíhi cuèndá cue tée cächí sá cáháⁿ tnúhu Yá Ndiòxí te ñá ndáá

¹ Te cuiní-í sá nchòhó cada ndee iní-ndó cùndedóho-ndo tnúhu na cáháⁿ-í, chi cáháⁿ-í dàtná cáháⁿ cue ñáyiú ñá túú cùtnuní iní-xi, te cuèi nása-gá ná cùnduu tnúhu cáháⁿ-í dico chí cáda ndee iní cùndedóho-ndo. ² Chi yùhú ïo ñùhu iní ñáhà-í xii-ndo dàtná ñùhú iní ñáhá mée Yá Ndiòxí xii-o, te ní cáháⁿ-í tnúhu Xítohó Jesucristú núú-ndó ñùu xíáⁿ ní tnàhá tnúhu-ndo ndíhi-gá vitna, te sá dúcáⁿ ní quide-í te cada iní-ndó sá yùhú cúú-í dàtná ìⁿ tée xica ndáhu te nchòhó cúú-ndó dàtná ìⁿ xíchí cuéchi, te Xítohó Jesucristú cúú-gá dàtná ìⁿ tée tnándaha ndíhi xíchí cuéchi-áⁿ. Te ducaⁿ càda iní-ndó chi na sáá nduu te yùhú na càni cuèndá ñáhà-í xii-ndo núú Xítohó Jesucristú, te cuu-ndo ñáyiú vá cùndècu tnàhí-gá cuéchi-xi. ³ Te yùhú-í sá sácufhná dandáhu ñáhá-xí xii-ndo vá cání-gá iní-ndó cànchicúⁿ nihnu-ndo ní yuhu ní iní-ndó ìchi Xítohó Jesucristú dàtná nchicúⁿ nihnu-ndo vitna. Te yùhú-í ná yáha-ndo dàtná ní yáha tá Èvá, chi sácufhná ní nduu-xi cóó ní dándàhu ñáhá-xí xii-xi, chi sácufhná-áⁿ ïo váha ní xito-xi nàcuáa ní quide-xi ní dándàhú-xi tá Èvá-áⁿ. ⁴ Te nchòhó, quidé ndee iní-ndó

sàcúndedóho-ndo nchaa tnúhu cãháⁿ cue tée cãháⁿ ingá núú tnúhu cuendá Jèsús tnúhu sã ñã túú dãnehé ñãhá-ndí xii-ndo, te quide ndee tucu iní-ndo ndedóho-ndo dãnehé ñãhá-güedé xii-ndo cuendá ingá espíritú, te ñã díú cuendá Espíritú Yã Ndióxi sã ní ngúndecu ndíhi-ndo dãnehé ñãhá-güedé xii-ndo, te quide ndee tucu iní-ndo ndedóho-ndo dãnehé ñãhá-güedé xii-ndo ñngá núú tnúhu sã cãchí-güedé cãháⁿ nãcuáa naníhí tãhú-ndó, te ñã díú nãcuáa ndúu tnúhu sã ní sãndáá iní-ndo cuendá naníhí tãhú-ndó cãháⁿ-güedé. ⁵ Te cue tée ducaⁿ cãháⁿ-ãⁿ cãchí-güedé sã Yã Ndióxi ní tendaha ñãhá-gã xii-güedé xicã cùu-güedé cãháⁿ-güedé tnúhu-gã te ío cùnuu-güedé, dico ñã ndáá sã cãháⁿ-güedé tnúhu-gã. Te yúhú cùtnuní iní-í sã cuè tée-ãⁿ ñã túú cùnuu-güedé dàtnã cùnùu yúhú. ⁶ Te cuèi ñã túú cãháⁿ-í dàtnã cãháⁿ cue tée ío váha sãá díquí-xi dico ío váha cùtnuní iní-í cuendá nchaa sã dácúaha-í, te yúhú sa quide-í nãcuáa cùtnuní iní-ndó sã ío váha cùtnuní iní-í nãcuáa ndúu nchaa tnúhu cãháⁿ-í.

⁷ Te cudana te sãni iní-ndó sã yúhú ñã túú ní quide váha-í sã ní quide-í mée-í dàtnã ñⁿ tée ío ndàhú iní-xi, chi ñã túú ní xicãⁿ-í yãhu-í núú-ndó cuendá sã ní cãháⁿ-í tnúhu Yã Ndióxi tnúhu sã cãháⁿ nãcuáa naníhí tãhú-ó núú-ndó. ⁸ Te ní queheⁿ-í díhúⁿ ní taxi dava-gã cue ñãyiu ndècu ichi Xítoho Jesucristú, te díhúⁿ-ãⁿ ní dándõñùhu-í ní saaⁿ-í nchaa sã ní xini ñùhu-í cùtnãhá ní cãháⁿ-í tnúhu Xítoho Jesucristú núú-ndó. ⁹ Te cùtnãhá ní xíndecu ndíhi ñãhá-í xii-ndo te áma ní xóo cumání sã xíní ñùhu-í, te ñã túú ñã ní xicãⁿ-í núú ní ñⁿ-ndo. Chi cue ñãyiu xíndecu ichi Xítoho Jesucristú ndécú distritú Macèdonia ní quixí-yu ní taxi-yu sã cumání xii-í, te ñã túú tnãhí ní dásatú iní ñãhá-í xii-ndo cãcãⁿ-í núú-ndó ñu ná cúú sã xíní ñùhu-í, te ñu-ni ducaⁿ càda-í. ¹⁰ Te ñu-ni duha cãháⁿ váha-í cuendá-í te ní ñⁿ cue ñãyiu distritú Acãyã vá ñihí-yu tnúhu cùñãhá-yu xii-í cuendá cadí-yu yuhu-í. Te mee Xítoho Jesucristú nãhá-gã sã ndáá cãháⁿ-í dàtnã cãháⁿ ndáá mée-gã. ¹¹ Te cudana te sãni iní-ndó sã sã dúhá cãháⁿ-í te ñã túú cùu iní ñãhá-í xii-ndo, dico ñãhá chi mee Yã Ndióxi nãhá-gã sã yúhú ío cùu iní ñãhá-í xii-ndo.

¹² Te nãcuáa-ni ta quide-í véxi te ñu-ni

ducaⁿ càda-í cuendá sã cuè tée cuini cada nínu mee-xi cãchí sã ñⁿ-ni cuu ndíhi ñãhá-güedé xii-í vá ñihí-güedé tnúhu cãháⁿ-güedé cãchí-güedé sã ñⁿ-ni chiuⁿ quide ndíhi ñãhá-güedé xii-í. ¹³ Te cue tée-ãⁿ cãchí-güedé sã Yã Ndióxi ní tendaha ñãhá-gã xii-güedé xicã cùu-güedé cãháⁿ-güedé tnúhu-gã dico ñã ndáá, chi mee-ni dãndahú-güedé ñãyiu ndíhi tnúhu cãháⁿ-güedé, te quide-güedé dàtnã quidé cuè tée cãháⁿ tnúhu Xítoho Jesucristú dico ñã ndáá sã cúú-güedé cue tée cãháⁿ tnúhu-gã. ¹⁴ Te vá cùñùhu-o sã dúcãⁿ quide cue tée-ãⁿ, chi mee sãcúfnã quidé-xí sã cúú-xí dàtnã ñⁿ espíritú xínú cuèchi núú ío váha càa ndecu Yã Ndióxi dico ñã ndáá sã xínú cuèchi-xi xíãⁿ. ¹⁵ Te xíãⁿ vá cùñùhu-o sã cuè tée xinu cuechi núú-xi quide-güedé sã cúú-güedé cue tée quide váha chi ñã ndáá sã quidé váha-güedé chi dãndahú-güedé ñãyiu. Te nãcuáa ndúu nchaa sã quidé-güedé te ducaⁿ nãchãhu-güedé núú Yã Ndióxi.

Té Pãblú ío ndòho-dé cuendá sã cúú-dé tée cãháⁿ tnúhu Xítoho Jesucristú

¹⁶ Te yúhú cãháⁿ tucu-í dóho-ndo sã vá cãní iní-ndó sã yúhú cúu-í ñⁿ tée cãháⁿ lùcú cãháⁿ duha, te núu dava-ndo dùcãⁿ sani iní-ndó dico chí càdã ndèe iní cundedóho-ndo tnúhu na cãháⁿ-í cuendã ducaⁿ tnãhá-í cada nínu-í mée-í. ¹⁷ Te vitna na cãháⁿ-í dàtnã cãháⁿ ñⁿ tée ñã túú cùtnuní iní-xi, chi tnúhu cãháⁿ-í ñã túú ñⁿ-ni cuu-xi ndíhi tnúhu Xítoho Jesucristú, chi vitna cãháⁿ-í nãcuáa cada nínu-í mée-í. ¹⁸ Te ío cuéhé ñãyiu quide nínu mee-xi cuendã nchaa sã ío ñuyíú-a te xíãⁿ núu tnãhá-í cuini-í cada nínu-í mée-í. ¹⁹ Chi cùtnuní sã nchòhó quidé ndèe iní-ndó sãcúndedóho-ndo nchaa tnúhu cãháⁿ cue tée cãháⁿ lùcú cãháⁿ duha, te ducaⁿ quide ndee iní-ndó sãcúndedóho-ndo tnúhu cãháⁿ-güedé chi cãchí-ndó sã ío túha-ndo. ²⁰ Te nchòhó, quide ndee iní-ndó tnãhí-ndo nchaa tnúhu cãháⁿ cue tée quide yica ñãhá xii-ndo sã cùnú cuèchi-ndo núú-güedé, te xicãⁿ-güedé nãndí sã xicãⁿ-güedé núú-ndó, te taxi tnuní ñãhá-güedé xii-ndo, te quide-güedé sã ío cùnuu-güedé ndécú ndíhi ñãhá-güedé xii-ndo, te càniha-güedé xii-ndo, te cuèi nchaa xíãⁿ quidé ñãhá-güedé xii-ndo dico quide ndee-ni iní-ndó. ²¹ Te nchòhó

càchi-ndó sá cúu-ndí cue téé nã túú ní cùyii cada nãndi sá cáda, te ndáa chi nã túú ìnⁿ-ni cuu-ndí ndihi cue téé ducaⁿ xíquide.

Dico núu cue téé-án cùyii-güedé quidé n̄nu-güedé méé-güedé, te tnàhá-í cùyii-í ducaⁿ càda-í. Te sá dúhá càháⁿ-í te càháⁿ-í dàtná ìnⁿ téé nã túú cùtnuní iní-xi. ²² Te núu quide cahnu-güedé méé-güedé cuendá sá càháⁿ-güedé tnúhu hèbreú, te yúhú tucu diu-ni téé càháⁿ tnúhu hèbreú cùu-í, àdi quide cahnu-güedé méé-güedé cuendá sá cúu-güedé cue téé israhél, te yúhú tucu tnàhá-í cùu-í téé israhél, àdi quide cahnu-güedé méé-güedé cuendá sá cúu-güedé n̄nani tnáhá ndii Àbrahám, te tnàhá yúhú cùu-í n̄nani tnáhá ndii Àbrahám tucu. ²³ Àdi quide cahnu-güedé méé-güedé cuendá sá sání iní-güedé sá díú n̄ú Xitohó Jesucristú xínú cuèchi-güedé, dico yúhú ío-gá xínú cuèchi ndisa-í núú-gã. Te sá dúhá quide cahnu-í mèe-í te càháⁿ-í dàtná ìnⁿ téé nã túú cùtnuní iní-xi, te yúhú cùu-í ìnⁿ téé ío-gá quidé chùuⁿ-gá dàcúúxí cuè téé-án, te vai xito ní cuu càniha n̄áyiu xii-í, te vai xito ní cuu chihí n̄ahá-yu vecaá xii-í, te vai xito ní cuu cãcu cãcu cahni n̄aha n̄áyiu xii-í. ²⁴ Te cue n̄áyiu israhél ní canihá-yu xii-í úhúⁿ xito, te ndi tnahá ìnⁿ ìnⁿ xito ní canihá-yu ní dáquëe-yu ócó sáhúⁿ cümü ñii sãtã-í. ²⁵ Te úní xito ní caniha tucu n̄áyiu xii-í ndihi carrútí, te ìnⁿ xito ní sáha yúú n̄ahã-yu xii-í, te ní cuu úní xito quëe naa b̄arcú xití ndute òré sácúhuⁿ-í, te ìnⁿ xito ío ní ndoho-í ní xíndecu-í ìnⁿ nduu ìnⁿ niú núú ndute lámár. ²⁶ Te ío titní xichi ní cuu xica cuu-í, te dava xichi ní cácu cuido n̄aha ndute ñuhu xii-í, te dava xichi ní cácu duhu n̄adúhú ncha ndachùuⁿ-í, te dava xichi ní cácu cada n̄aha cuè n̄áyiu cùu ndi mee-í ìnⁿ sá cáda n̄ahá-yu xii-í, te diu-ni ducaⁿ ní cácu cada n̄aha tucu cue n̄áyiu nã túú cùu ndi mee-í ìnⁿ sá cáda n̄ahá-yu xii-í ní cùu, te cuèi xití ñúu te cuèi xití yucu cãcu cãcu cada n̄aha n̄áyiu xii-í ìnⁿ sá cáda n̄ahá-yu, te diu-ni ducaⁿ cãcu cãcu quiní-í tnúndòho oré ñúhù-í b̄arcú cuáháⁿ núú ndute lámár. Te cue n̄áyiu càchí sá ndécú ichi Xitohó Jesucristú te nã ndáa cãcu cãcu cada n̄ahá-yu xii-í ìnⁿ sá cáda n̄ahá-yu. ²⁷ Te ío ndòho-í cuendá chiuⁿ quide-í chí ío xaú-í, te ní cuu vai xito nã túú xidí-í, te titní xito ní cuu xihí vhi-í docó, te titní xito ní cuu

yichí-í ndute, te titní xito ní cuu nã túú tnàhí ná xéxi-í cuendá chùuⁿ quide-í, te titní xito ní cuu ndòho-í sá v̄ixiⁿ, te titní xito ní cuu nã túú n̄ihí-í dóó cuíhu-í.

²⁸ Te nã díú-ní x̄ãⁿ chí ìnⁿ nduu ìnⁿ nduu ío sání iní-í cuendá ncha n̄áyiu ndècu ichi Xitohó Jesucristú xíndecu ncha xichi. ²⁹ Te ndèda-ni cà n̄áyiu nã túú n̄ihí ndéé cùndecu ichi Xitohó Jesucristú, te ío cùndahú iní-í chí sanuu sá tnàhá-í nã túú n̄ihí ndéé-í cundecu-í ichi-gá sá dúcáⁿ quidé-yu. Te núu ìnⁿ n̄áyiu quidé-yu sá ìnⁿ nchohó n̄áyiu ndècu ichi Xitohó Jesucristú quidé-ndó ìnⁿ sá nã túú tàú-ndó càda-ndo te vá cúu vaha iní-í chí cudèèⁿ-í. ³⁰ Te núu xini ñuhu-xi sá cáda cahnu-í mèe-í, te cuu ducaⁿ càda-í te càháⁿ-í mee-ni cuendá ncha sá quidé n̄acuáa nã túú n̄ihí ndéé yiqui cuñú-í. ³¹ Te Dútú Ndiòxi Yáa cúú Tãtã Xitohó Jesucristú n̄ahá-gã sá yúhú càháⁿ ndáa-í núú-ndó, te diu-gá tàú-gá cachí-ó sã ío cahnu cuu-gá ni caa ni quíhíⁿ. ³² Te cùtnhá ní xíndecu-í ñúú Dãscú te téé cuu gobiernú téé cùndihi téé yindaha n̄áyiu nani Aretás ní taxi ndecu-dé cue téé ní xíndedí yuyèhe sá ñúhú dòco ñúu cuendá òré quee-í te tñii n̄aha-güedé xii-í ní cùu. ³³ Dico yúhú ní quèè-í ìnⁿ xití tidihí, te cue n̄áyiu cùndihi n̄aha xii-í ní queñuhu n̄ahá-yu ndaa ventanã nchí yiqui naha sã ñúhú dòco ñúu-án, te ducaⁿ te ní cácu-í nã túú ní ndacu-güedé tñii n̄aha-güedé xii-í.

12

Té Pãblú càháⁿ-dé sá ío vii càa sá ní dánèhé núú n̄ahá Xitohó Jesucristú xii-dé

¹ Te nã túú ndéè nãndihí-xi sá càháⁿ vaha-o cuendá méé-ó, dico vitna xini ñuhu-xi ducaⁿ cada-í chí càháⁿ-í n̄acuáa ní quide n̄aha Xitohó Jesucristú xii-í, chí ní quide-gá sá ní cutnùní iní-í n̄acuáa nduu tnúhu-gá, te vai núú sã ní dánèhé núú n̄ahá-gã xii-í. ² Te yúhú xini-í ìnⁿ téé sãndáa iní n̄ahá xii Xitohó Jesucristú, te sa ní cuu úxícümü cuíá sã t̄ee-án ní sãá-dé ndéé andiu cùu úní, te nã túú xini-í te núu ndihi yiqui cùñú-dé ní sãá-dé àdi n̄ahá, chí ìnⁿ dii díí-ní Yá Ndiòxi n̄ahá-gã te núu nãsa càa-dé ní sãá-dé. ³ Te yúhú càháⁿ ndáa-í cuendá téé-án, dico dàtná ní cachí-í sá nã túú xini-í te núu ndihi yiqui cùñú-dé ní sãá-dé andiu àdi n̄ahá, chí mee Yã Ndiòxi n̄ahá-gã te

núu nása càa-dé ní sáá-dé. ⁴ Te téé-án ní sáá-dé ìíⁿ xichi núú ío váha càa andíu, te yá cáⁿ ní nínedóhó-dé tñúhu mee-ni sá cúu-xí cuendá méé-dé, te tñúhu-án vǎ cúu tñàhí cáháⁿ-dé núú nì ìíⁿ ñáyíu. ⁵ Te yúhú quidé ñínu-í téé-án, dico mee-í ñá túú càháⁿ váha-í cuendá-í cuendá cada ñínu-í méé-í, chi càháⁿ-ni mee-ni cuendá nchaa sá quidé nàcuáa ñá túú ñihí ndéé yìqui cuñú-í. ⁶ Te núu dicó yúhú cuñí-í te cuu cáháⁿ váha-í cuendá-í cuendá cada ñínu-í méé-í, te núu ducaⁿ na càháⁿ-í te ñá túú cùu-xi ìíⁿ tñúhu neñúu cáháⁿ-í, chi cùu-xi ìíⁿ sá càháⁿ ndáá-í te núu na càháⁿ-í. Dico vǎ dúcáⁿ càda-í chi cuñí-í sá nchòhó cada cuendá-ndó nàcuáa ndúu tñúhu càháⁿ-í ndìhì nàcuáa quide-í, te ducaⁿ mèe-ndo cáháⁿ-ndó te núu ná téé cuu-í, te ñá díú sá yúhú cáháⁿ váha-í cuendá méé-í cuendá nchòhó cachí-ndó sǎ ío cùnuu-í.

⁷ Te sá ní dánèhé núu ñàhá Xítóhó Jesucristú xii-í cúu-xí sǎ xidó ío váha, te cuendá sǎ vǎ cáda càhnu-í méé-í núu xǎⁿ Xítóhó Jesucristú ní quide-gǎ duha ndòhó yìqui cuñú-í vitna. Te sá dúcáⁿ quide ñaha-gǎ xii-í te xǎⁿ sácufíhná ní ñhí-xi ichi càhnu dandohò ñaha-xi xii-í. ⁸ Te ní cuu úní xito cáháⁿ ndáhú-í núu Xítóhó Jesucristú sá ná cáda-gǎ nàcuáa vǎ ndóhó-gǎ yìqui cuñú-í. ⁹ Dico mee-gǎ càchí-gǎ xii-í: “Yúhú ío cùndahú iní ñàhá-í xii-n chindee ñaha-í, te ñá túú ná cùmání xii-n, te cùtnuní sǎ ío-gǎ chindèe-í cue ñáyíu ñá túú ñihí ndéé cùndecu”, duha ní cachí-gǎ xii-í. Te xǎⁿ núu yúhú ío cùdíí iní-í sǎ ñá túú ñihí ndéè-í ndécú-í, chi díu cuendá xǎⁿ Xítóhó Jesucristú ñá túú dàña ñihnu ñaha-gǎ xii-í chindèe ñaha-gǎ. ¹⁰ Te xǎⁿ núu cùdíí iní-í sǎ dúhá ñá túú ñihí ndéè-í ndécú-í, te cùdíí tucu iní-í cuendá nchaa tñúhu cuèhé tñúhu duha càháⁿ ñáyíu cuendá-í, te cùdíí iní-í cuendá nchaa sǎ ndóhò-í, te cùdíí tucu iní-í cuendá sǎ quidé ñaha ñáyíu xii-í, te cùdíí tucu iní-í cuendá nchaa dava-gǎ sǎ ndóhò-í cuendá Xítóhó Jesucristú. Te òré ñá túú ñihí ndéè-í te Xítóhó Jesucristú chindèe ñaha-gǎ xii-í ñihí ndéè-í.

Té Páblú ío sàni iní-dé cuendá cue ñáyíu xindecu ichi Xítóhó Jesucristú ndécú ñúu Còrintú

¹¹ Te cùu-í dàtná ìíⁿ téé ñá túú cùtnuní iní-xi sǎ dúhá cáháⁿ váha-í cuendá-í, te ducaⁿ quide-í chi mee-ndo quide-ndo sǎ dúcáⁿ cáháⁿ-í, dico mee-ndo táu-ndó

cáháⁿ váha-ndo cuendá-í ní cùu. Te dava cue téé ío quide cahnu-güedé méé-güedé, te càchí-güedé sǎ Xítóhó Jesucristú ní táuchúíⁿ-gǎ sǎ cáháⁿ-güedé tñúhu-gǎ, dico yúhú cùnuu-gǎ-í dàcúxí cuè téé-ánⁿ cuèí ñá túú vèdana ná cùu-í ndécú-í ñuyú-a. ¹² Te cùtnàhá ní xindecu ndìhì ñaha-í xii-ndo ío ní quide càhnu iní-í nándí sǎ ní yáha-í ní quide-í chiⁿ Xítóhó Jesucristú sǎ cúu-xí-ndó. Te ní chindee ñaha-gǎ xii-í ní quide-í titní núú sǎ vǎ yò tñàhí ndàcu cada te ní cuñúhu-ndo, te sǎ dúcáⁿ ní chindee ñaha-gǎ xii-í ní cùtnuní iní-ndó sǎ yúhú cúu ndisa-í ìíⁿ téé ní cachí Xítóhó Jesucristú sǎ càháⁿ-í tñúhu-gǎ. ¹³ Te yúhú ìíⁿ-ni quide ndìhì ñaha-í xii-ndo ndìhì nchaa dava-gǎ cue ñáyíu ndècu ichi Xítóhó Jesucristú, te dicó-ni sǎ yúhú ñá túú ní cuñí-í taxi-ndo sǎ xíní ñúhu-í dàtná ní quide-í dava-gǎ-yu. Te núu ñá túú ní quide váha-í sǎ dúcáⁿ ní quide-í ñá túú ní cuñí-í chindee ñaha-ndo te chí cáda càhnu iní ñàhá xii-í.

¹⁴ Te vitna sa ndècu túha-í sǎ quixi-í núu ndécú-ndó, te sǎ quixí còto ñaha tucu-í xii-ndo cùu-xi xito cuu úní sǎ quixi-í, te cuñí-í sǎ vǎ dándìhú-ndó ñihí-ndó ndècu-ndo sǎ táxi-ndó cùu xii-í, chi ñá díú xǎⁿ ndéé iní-í chi mee-ndo ndéé iní-í quixi-í. Te duha cáháⁿ-í chi nchòhó xini-ndó sǎ cuè téé cuu tǎtá sǎñaha-güedé sǎ cúu-xí cuè déhe-güedé te ñá díú cuè déhe-güedé sǎñaha-güedé sǎ cúu-xí mèe-güedé. ¹⁵ Te yúhú ío váha cùu iní-í dandòñuhu-í sǎ ndécú ndìhì-í nàcuáa ndacu-í chindee ñaha-í xii-ndo cùndecu váha-ndo sǎ cúu-xí Yǎ Ndióxi chi ío cùdíí iní-í, te cuèí na cùu-í sǎ cuendá-ndó, chi ío cùu iní ñàhá-í xii-ndo, te sǎ dúcáⁿ cùu iní ñàhá-í xii-ndo, te sǎnuu sǎ nchòhó ñá túú cùu iní ñàhá cavihi-ndo xii-í.

¹⁶ Te ñaha-ndo sǎ ñá túú ní dándìhú-í iní-ndó nǎ taxi-ndo cùu xii-í, dico dava-ndo càchí-ndó sǎ ío váha ní xito-í nàcuáa ní quide-í nàcuáa ní dándàhú ñàhá-í xii-ndo. ¹⁷ Te chí cáháⁿ te núu yúhú ní dándàhú ñàhá-í xii-ndo ndìhì cue téé ní tendaha-í ní quixi coto ñaha xii-ndo. ¹⁸ Te ní cáháⁿ ndáhú-í núu tǎ Titú ndìhì núu ñngá tucu téé ndècu ndìhì-o ichi Xítóhó Jesucristú ní quixi coto ñaha-güedé xii-ndo. Te nchòhó cùtnuní iní-ndó sǎ tǎ Titú ñá túú ní dándàhú ñàhá-dé xii-ndo, te ducaⁿ chi ìíⁿ-ni sàni iní-ndí te ìíⁿ-ni quide-ndí.

¹⁹ Te cudana te sàni iní-ndó sǎ sǎ dúhá

cáháⁿ-ndí te tàunihnu-ndí méé-ndí, dico ñá díú dùcaⁿ quee-xi tnúhu cáháⁿ-ndí, chi cáháⁿ-ndí nàcuáa tàú-xi cáháⁿ-ndí chi ndècu ndihi-ndí Xítohó Jesucristú, te mee Yá Ndiòxí náhá ndáá-gá nàcuáa ndùu tnúhu cáháⁿ-ndí, te nchaa sá cáháⁿ-ndí cúú-xí cuèndá nchòhó cue ñáiyu ío cùu iní-ndí, te cáháⁿ-ndí nàcuáa cundecu váha-ndo ìchi Xítohó Jesucristú. ²⁰Te ío sàni iní-í cuèndá-ndó chi na cuáháⁿ te òré quixi-í quixi coto ñaha-í xii-ndo, te ñá túú quide-ndo nacuáa cuu váha iní-í, te sá dúcáⁿ te yúhú cáháⁿ-í nàcuáa vá cúú váha iní-ndó, te ducaⁿ ò sàni iní-í cuèndá-ndó chi na cuáháⁿ òré quexio-í te nàa-ndó, àdi ndecu-ndo ichi cuèdú iní, àdi cuééⁿ núú tnáhá-ndó, àdi ñá túú cùu ìⁿnuu-ndo ndecu-ndo, àdi cáháⁿ cuèhé-ndó cuèndá tnàha ñáiyu-ndo núú chítú núú tàcá, àdi satnuhu tnaha-ndo, àdi quide dusaⁿ dóho tnàha-ndo. ²¹Te ío sàni iní-í cuèndá-ndó chi na cuáháⁿ òré quixi-í, te Yá Ndiòxí cada-gá te cucahaⁿ núú-í sá cuèndá-ndó, te ío ndíhú iní-í cuèndá-ndó te núu vátá dáñá-gá-ndó nchaa sá cuèhé sá dúhá ní ngúíta-ndo quide-ndo ndéé sanduu, te vai-ndo ní ngúíta-ndo dùcaⁿ quide-ndo, chi ndècu-ndo ichi díú ìní te nándi-gá nchaa sá cuèhé sá dúhá quide-ndo, te ducaⁿ ò ndíhú iní-í te núu vátá dáñá-gá-ndó nchaa xiáⁿ.

13

Tnúhu ndéé núú ní ndihi-ná

¹Te sá quixi-í vitna núú ndécú-ndó cùu-xi xito cuu úní sá quixí còto ñaha-í xii-ndo. Te càhí tnúhu-í xii-ndo sá òré cundáa cuéchi-ndo te canehe núú úú àdi úní ñáiyu cáháⁿ ndáa nàcuáa ndùu cuéchi-ndo. ²Te yúhú sa ní cáháⁿ-í dóho-ndo cùtnàhá ní quixi-í ní quixi coto ñaha-í xii-ndo xito cuu úú, te díu-ni ducaⁿ cáháⁿ tucu-í dóho-ndo vitna vátá quixí tucu-gá-í quixi coto ñaha-í xii-ndo. Te nchòhó ñáiyu ní cunduu ní ngúíta quide nchaa sá cuèhé sá dúhá, tenáa ñàhá-í xii-ndo òré quexio-í te núu vátá dáñá-gá-ndó nchaa sá cuèhé sá dúhá quide-ndo te tnàhá nchaa dava-gá-ndó tènáa ñàhá-í xii-ndo. ³Te nchòhó cuiní-ndó quini-ndó núu ndáa sá quidé-í yúhú Xítohó Jesucristú cáháⁿ-í yuhu-gá, dico dává-áⁿ cutnùnì ndáa iní-ndó. Te Xítohó Jesucristú quidé-gá nàcuáa cutnùnì iní-ndó sá ío càhnu cuu-gá te ñá túú quide-gá dàtná

quidé ìⁿ ñáiyu ñá túú níhí ndéé cundecu. ⁴Te Xítohó Jesucristú ní ndoho-gá dàtná ìⁿ ñáiyu ñá túú níhí ndéé cundecu, chi ní sahní ñaha-güedé xii-gá núú cùrúxí dico mee Yá Ndiòxí ní quide-gá ní níhí ndéé Xítohó Jesucristú ní ndoto-gá ndécú-gá vitna, te tnàhá nchúhú tucu ducaⁿ yàha-ndí ñá túú níhí ndéé-ndí cundecu-ndí, dico mee Yá Ndiòxí chindèe ñaha-gá xii-ndí níhí ndéé-ndí ndécú-ndí cuèndá sá ndécú ndihi-ndí Xítohó Jesucristú, te xiáⁿ núu ndacu-ndí quidé-ndí nàcuáa tàú-xi cunduu sá cúú-xí-ndó.

⁵Te chí cáda cuèndá váha te núu ndisa sá sàndáa iní-ndó tnúhu Xítohó Jesucristú, te núu ndáa sá ndécú-ndó ìchi-gá te cùtnùnì iní-ndó sá ndécú-ndó ndihi-gá. ⁶Te cuiní-ndí sá nchòhó cutnùnì ndáa iní-ndó sá nchúhú ndécú ndihi ndisa-ndí Xítohó Jesucristú. ⁷Te nchúhú cáháⁿ ndihi-ndí Yá Ndiòxí cuèndá-ndó cuèndá sá vá cáda-ndó ní ìⁿ sá cuèhé sá dúhá, te vá cánì iní-ndó sá sá dúcáⁿ cáháⁿ ndihi-ndí-gá cuèndá-ndó, te cuiní-ndí sá nchòhó cutnùnì iní-ndó sá nchúhú ío ndècu yíñuhu-ndí núú-gá, te ñàhá chi cáháⁿ ndihi-ndí-gá cuèndá-ndó chi cuiní-ndí sá nchòhó cada váha-ndo cundecu-ndo cuéi sàni iní-ndó sá nchúhú cúú-ndí cue téé ñá túú ndècu yíñuhu núú-gá. ⁸Te nchúhú mee-ni cáháⁿ váha-ndí cuèndá tnúhu ndáa tnúhu Yá Ndiòxí, te ñá túú cáháⁿ-ndí ìⁿ tnúhu sá ñá túú tàú-xí cáháⁿ-ndí cuèndá tnúhu-áⁿ. ⁹Te cùdíí ìní-ndí sá ñá túú-gá xínì ñùhu-xi cada-ndí nàcuáa níhí ndéé-ndí tenáa ñàhá-ndí xii-ndo cáháⁿ-ndí dóho-ndo, chi nchòhó sa ní níhí ndéé-ndó ndècu-ndo ichi-gá. Te nchúhú cáháⁿ ndihi-ndí Yá Ndiòxí cuèndá-ndó cuèndá sá nchòhó cundáa-ndó cundecu-ndo ñá túú-gá ná cumání-ndó núú-gá. ¹⁰Te xiáⁿ núu duha ndùu nchaa tnúhu tèe-í núú tütú-a daquixi-í ndaha-ndo vitna ñá túú ndècu ndíhí ñaha-í xii-ndo, cuèndá sá òré ná cundecu ndíhí ñaha-í xii-ndo te vá ío níhí cáháⁿ-í dóho-ndo nàcuáa ndùu tnúhu ndee ìní ní taxi Xítohó Jesucristú ndécú ndíhí-í, chi ní taxi-gá tnúhu ndee ìní xii-í nàcuáa canu ichi ñaha-í xii-ndo cuíta cuehnu nihnu-ndo ichi-gá quíhíⁿ, te ñá díú cuèndá sá cánúichi ñaha-í xii-ndo cuíta nihnu-ndo.

¹¹Te vitna nchaa nchòhó ñáiyu ndècu

ndihi-ndí ichi Xítohó Jesucrístú ío quíde ndee iní ñáhá-ndí xii-ndo, te ío chí ndúcú nàcuáa cada-ndo cùndáá-ndó núú Yă Ndiöxí cuendá sá ñà túú tnàhí-gá ná cùmání-ndó nŭú-gă, te ndee ndèe cada iní-ndó cùndecu-ndo, te chí cúú ìⁿnuu cundecu ndihi tnaha, te ducaⁿ te Yá Ndiöxí cundecu ndihi ñaha-gă xii-ndo chí ío cùu iní ñáhá-gă xii-o, te ðiu-gá quídé-gă ío váha cùu iní-ó ndècu-o. ¹²Te ndihi tnúhu yĩñùhu chí cádá ndèe iní tnáhá. ¹³Te nchaa ñáyiu cùu cuendá Yă Ndiöxí ndécú ìha quide ndee iní ñáhă-yu xii-ndo.

¹⁴Te xicáⁿ táhú-ndí núú Xítohó Jesucrístú sá ío na chĩndee chitúu ñaha-gă xii-ndo. Te mee Yă Ndiöxí ná cádá-gă nàcuáa cutnùní iní-ndó sá ío cùu iní ñáhá-gă xii-ndo, te Espíritú-gá cundee cùu cahnu iní-ndó cùndecu-ndo. Te ducaⁿ na cùnduu. Te ío chí cádá ndèe iní-nă vítna.

TUTÚ NÍ CADÚHA TÉ PÄBLÚ QUÍHÍⁿ NDAHA ÑAYIU DISTRITÚ GÀLACIÁ

Té Páblú cadúha-dé tutú quíhíⁿ ndaha nchaa ñáyiú sàndáá iní ñáhá xii Xítohó Jesucristú ndécú distritú Gàlaciá

¹ Te yúhú té Páblú ní tendaha ñaha Xítohó Jesucristú, ndíhi Dútú Ndiöxí véxi-í cáháⁿ-í tnúhu-gá. Te diu Yá Ndiöxí ní dándótó-gá Xítohó Jesucristú Yáá ní xíhí ní cùu. Te cächí tnúhu-í xii-ndo sã ñã díú ñáyiú ñuyúú-a ni tendaha ñaha xii-í véxi-í, te ni Yá Ndiöxí te ni Xítohó Jesucristú ñá túú ní xáhaⁿ-gã xii ìⁿ ñáyiú quixí-yu cachí tnúhu-yu nàcuáa cada-í. ² Te yúhú té Páblú cadúha-í tutú-a ndíhi nchaa dava-gá ñáyiú ndècu ichi Yá Ndiöxí ndécú ndíhi-í iha cuená daquixi-í ndaha nchòhó ñáyiú sàndáá iní ñáhá xii Xítohó Jesucristú ndécú distritú Gàlaciá. ³ Te xicáⁿ tãhú-í núú Dütú Ndiöxí, ndíhi núú Xítohó Jesucristú sá ìo na chindee chitúu ñaha-gá xii-ndo, te ducaⁿ ndí nduú-gá ná cáda te ío váha cuu iní-ndó cùndecu-ndo. ⁴ Te Xítohó Jesucristú ní xíhí-gá sá cuená nchaa cuéchi nchoo cuè ñáyiú ndècu ñuyúú-a. Te ducaⁿ ní quide-gá, chi cuiní-gá sá vã cùndecu-o ichi cuéhé ichi duha. Te ducaⁿ ní cuu, chi Dútú Ndiöxí ducaⁿ ní cuiní-gá cunduu. ⁵ Te ío chí ná ndacáⁿ tãhú-ó núú Yá Ndiöxí cuená sá ìo càhnu cuu-gá, te diu-ni ducaⁿ càda-o ni caa ni quíhíⁿ! Te ducaⁿ na cùnduu.

Mee-ni tnúhu Xítohó Jesucristú cúú-xi tnúhu sá cáháⁿ nàcuáa naníhí tãhú-ó

⁶ Te ío cùñúhu-í cúú chí ío ndíhi ní dáñá-ndó ichi Yá Ndiöxí. Te Yáá-ánⁿ ní cáháⁿ ñáhá-gã xii-ndo, chí Xítohó Jesucristú ío ní cundàhú iní ñáhá-gã ní quide váha ñaha-gã xii-ndo, te vitna dàcuaha tucu-ndo ìngá tnúhu, te cächí-ndó sã xiãⁿ dàcácu nihnu ñaha-xi xii-ndo núú ùhú núú ndàhú. ⁷ Dico ñáhá, chí ñã túú-gã tnúhu sá dàcácu nihnu ñaha xii-o núú ùhú núú ndàhú. Te dicó-ni sá ío ñáyiú véxi dàticá nuu ñáhá-yu xii-ndo dànehé ñáhá-yu tnúhu sá dácúta nihnu ñaha xii-ndo, chí tnúhu-ánⁿ ñã túú cùu-xi tnúhu Xítohó Jesucristú. ⁸ Te yúhú cáháⁿ-í tnúhu Xítohó Jesucristú, dico núú ío ñáyiú véxi dànehé ñáhá xii-ndo ìngá

tnúhu sá ñã túú ní dànehé ñáhá-í xii-ndo, te nchòhó cachí-ndó sã ñáyiú-ánⁿ nacháhu-yu núú Yá Ndiöxí sá dúcáⁿ quidé-yu. Te cuéi yúhú, te núu na dàma-í tnúhu danèhé ñáhá-í xii-ndo, te diu-ni ducaⁿ cáháⁿ-ndó sã nácháhu-í núú-gã te núu ducaⁿ na càda-í. Àdi te núu ìⁿ espíritú xínú cuéchi núú-gã véxi-xi cáháⁿ-xi ìngá tnúhu sá ñã túú ní dànehé ñáhá-í xii-ndo nàcuáa naníhí tãhú-ndó ñã, te diu-ni ducaⁿ cáháⁿ-ndó sã nácháhu-xi núú Yá Ndiöxí te núu ducaⁿ na càda-xi. ⁹ Te diu-ni duha sa ní dànehé ñáhá-í xii-ndo sã núu véxi ñáyiú dànehé ñáhá ìngá tnúhu sá ñã túú ní dànehé ñáhá-í xii-ndo nàcuáa naníhí tãhú-ndó ñã, te cachí-ndó sã ñáyiú-ánⁿ nacháhu-yu núú Yá Ndiöxí sá dúcáⁿ quidé-yu, duha ní cachí-í xii-ndo.

¹⁰ Te duha ndùu tnúhu cáháⁿ-í chí nchòhó sa xini-ndó sã yúhú cuiní-í sá Yá Ndiöxí cáháⁿ-gã sá quidé váha-í ndécú-í, te ñã díú sã ñáyiú ñuyúú-a cachí-yu sá quidé váha-í, àdi sá ìo cùdíⁿ iní-yu nchaa nàcuáa quide-í ndécú-í. Te núu na càni iní-í cudú-í núú ñáyiú ñuyúú-a, te ñã túú cùu-í téé xínu cuéchi núú Xítohó Jesucristú te núu ducaⁿ na càda-í.

Nàcuáa ní cuu ní ngúita té Páblú cáháⁿ-dé tnúhu Yá Ndiöxí

¹¹⁻¹² Te nchòhó ñáyiú ndècu ndíhi-í ichi Xítohó Jesucristú cächí tnúhu-í xii-ndo sã tnúhu sá dànehé ñáhá-í xii-ndo nàcuáa naníhí tãhú-ndó cùu-xi tnúhu sá ní cachí tnúhu mee Xítohó Jesucristú xii-í, te ñã díú ìⁿ ñáyiú ñuyúú-a ni càhu iní-yu tnúhu-ánⁿ, àdi danehé ñáhá-yu xii-í, chí mee Xítohó Jesucristú ní dànehé ñáhá-gã.

¹³ Te nchòhó sa nihí-ndó tnúhu nàcuáa ní xóo cada-í cùtnàhá nchicúⁿ nihnu-í nchaa nàcuáa dàcuaha ñáyiú cùu ndí mee-í ñáyiú isràél ní cùu. Te dàvã-ánⁿ ìo ní xóo cuu úhú iní-í nchaa ñáyiú ndècu ichi Yá Ndiöxí, te nándi sá ní xóo cada-í-yu, te ní cuiní-í danàa-í-yu ni cùu. ¹⁴ Te yúhú ío-gá ní xóo quene cáva-í ní xóo dàcuàha-í nchaa sá dàcuàha ñáyiú cùu ndí mee-í dàcúúxí ñáyiú ìⁿ-ni cuá-í ndíhí-yu ni cùu, te ío-gá ní xóo cuiní-í cada ndáá-í canchicúⁿ nihnu-í nchaa nàcuáa ní dànehé ñáhá cuè ñaní tnàhá-í ní xíndecu ndéé sanaha ni cùu. ¹⁵ Te ndéé cùtnàhá vátá cáciu-gã-í Yá Ndiöxí sa mèhe váha ñaha-gã xii-í cuená sá cáháⁿ-í tnúhu-gá, núu xiãⁿ ní cáháⁿ ñáhá-gã xii-í quidé-í

chìuⁿ-gá vitna, te sá dúcáⁿ nǐ quide-gá te ío váha ní quide ñaha-gá xii-í. ¹⁶ Te òré ní cáháⁿ ñáhá Yá Ndiòxí xii-í te ní cachí tnúhu-gá cuendá Déhe-gá Xítohó Jesucristú. Te ducaⁿ nǐ quide Yá Ndiòxí cuendá sá cuiní-gá sá cǔñaha-í xii ñáiyu ñá túú cùu ñáiyu isràél cuendá Yaa cúú Déhe-gá. Te cǔtnàhá ní cáháⁿ ñáhá Yá Ndiòxí xii-í, te vá yòo ìⁿ òⁿ ní nùú-xi ní nducu tnúhu-í nàcuáa cada-í. ¹⁷ Te ní ñá túú ní sáháⁿ-í ñúú Jerusàlén nducu tnúhu-í nùú cuè téé dǐhna nuu nǐ tendaha Xítohó Jesucristú cáháⁿ tnúhu-gá nǔu nása cada-í, chí ndǐhi-ni ní sáháⁿ-í distritú Àrabíá ní xǐndecu tnaa-í te dàtnùnǐ cuánuhú tucu-í ñúú Dàmascú.

¹⁸ Te nùú ùnǐ cuáá sǎ nǐ cáháⁿ ñáhá Yá Ndiòxí xii-í, te ní sáháⁿ tucu-í ñúú Jerusàlén ní cáháⁿ ndǐhi-í té Pèlú, te ní xǐndecu-í ndǐhi-dé sáhúⁿ nduu. ¹⁹ Te tnàhá té Jacobó ñaní Xítohó Jesucristú ní cáháⁿ ndǐhi-í. Te ñá túú ní xini-í dava-gá cue téé ní tendaha Xítohó Jesucristú cáháⁿ tnúhu-gá. ²⁰ Te Yá Ndiòxí ndéhe ndǐi ndehe caxi-gá sá ncháá tnúhu tée-í nùú tǔtú-a sá cúú-xi-ndó cùu-xi ìⁿ sá ndáa.

²¹ Te sátá nǐ sáháⁿ-í ñúú Jerusàlén, te dàtnùnǐ ní sáháⁿ-í distritú Sìriá, ndǐhi distritú Ciliciá. ²² Te nchaa ñáiyu xǐndecu ichi Xítohó Jesucristú ndécú distritú Jùdeá ñá túú xini ñáhã-yu xii-í ní cùu. ²³ Dico ní xóo ñihí-yu tnúhu nchaa nàcuáa ní xóo cada-í, te ní cachí-yu: “Tée cùu úhú iní ñáhã xii nchaa nchoo ñáiyu ndècu ichi Xítohó Jesucristú cáháⁿ-dé tnúhu-gá nùú ñáiyu cuendá quíndáá iní ñáhã-yu xii-gá, te diu-dé nándí sá quidé ñaha-dé, te cuiní-dé danàa ñaha-dé cuendá sá vǎ cóo-gǎ ñáiyu quíndáá iní ñáhã xii-gá ní cùu”, duha ní cachí-yu cuendá-í. ²⁴ Te ní ngúita-yu ní cachí-yu sá ío càhnu cuu Yá Ndiòxí cuendá sá ñá túú-gǎ quidé-í dàtná ní xóo cada-í.

2

Té Páblú ní ñihí tnáhã-dé ndǐhi dava-gá cue téé cáháⁿ tnúhu Yá Ndiòxí

¹ Te ní nǔtnahá úxícúmǐ cuáá sǎ nǐ sáháⁿ-í ñúú Jerusàlén ní cáháⁿ ndǐhi-í té Pèlú, te dàtnùnǐ ndécá-í té Bèè ní sáháⁿ, te tnàhá té Titú ní sáháⁿ ndǐhi-ndí-dé. ² Te ní sáháⁿ-í chí mee Yá Ndiòxí ní cachí-gá sá quíhⁿ-í. Te yàcáⁿ ní tacá mee-ni cuè téé cùnuu. Te ní xáhaⁿ-í xii-güedé nàcuáa

nduu tnúhu dànehé-í ñáiyu ñá túú cùu ñáiyu isràél cuendá naníhí tǎhú-yu. Te ducaⁿ nǐ quide-í cuendá cuiní-í quini-güedé nàcuáa nduu chiⁿ quide-í, chí nacuááhⁿ cachí-güedé sá ñá túú nàndǐhi-xi. ³ Te té Titú téé ndècu ndǐhi-í chí ñá díú tée isràél cúú-dé, dico ñá túú ní quide yica-güedé cuáha-güedé sèñá ñii-dé. ⁴ Te ñáiyu càchí sá ndécú ichi Xítohó Jesucristú te ñá ndáá sá ndécú-yu ichi-gá, ñáiyu-áⁿ ní chitnahá ñáhã-yu xii-ndí cuendá cuiní-yu quini-yu nása quide-ndí ndécú-ndí ichi Xítohó Jesucristú. Te ducaⁿ nǐ quide-yu cuendá sá nchǔhú sa ní cácu ñihnu-ndí ñá túú-gǎ quidé-ndí nchaa nàcuáa ní cáháⁿ ndíi Moisés. Te cuiní-yu sá núcuíta saa tucu-ndí cada-ndí nchaa nàcuáa ní cáháⁿ ndíi nucún-decu-ndí dàtná ní xǐndecu-ndí cǔtnàhá vǎtá cácu ñihnu-gá-ndí nùú tnúhu-áⁿ ní cùu. ⁵ Te nchúhú ñá túú tnàhí ní dàña-ndí méé-ndí dandahú ñáhã-yu xii-ndí. Te ducaⁿ nǐ quide-ndí, chí cuiní-ndí sá ñá túú nǎgá tnúhu dácánuu ndǐhi tnúhu sá cáháⁿ nàcuáa naníhí tǎhú-ó ndècu ndǐhi-ndo.

⁶ Te ní ìⁿ tnúhu sá vǎtá quini-gá-í ñá túú ní càchí tnúhu cue téé cùnuu nùú ñáiyu cada-í. Dico yúhu chí ñá túú ní quide cuendá-í nǔu cùnuu-güedé àdi ñá túú cùnuu-güedé, chí nùú Yá Ndiòxí ìⁿ-ni cùu-o nchaa-o. ⁷ Te ní cutnùnǐ iní-güedé sá Yá Ndiòxí ní cachí-gá xii-í sá cáháⁿ-í tnúhu-gá nùú ñáiyu ñá túú cùu ñáiyu isràél dàtná ní quide-gá té Pèlú ní xáhaⁿ-gǎ cáháⁿ-dé tnúhu-gá nùú ñáiyu isràél. ⁸ Te ducaⁿ nǐ cutnùnǐ iní-güedé, chí diu-ni Yá Ndiòxí Yaa chǐndèe ñaha xii té Pèlú cáháⁿ-dé tnúhu-gá nùú ñáiyu isràél, diu-ni Yaa-áⁿ chǐndèe ñaha-gá xii-í cáháⁿ-í tnúhu-gá nùú ñáiyu ñá túú cùu ñáiyu isràél.

⁹ Te té Jacobó, ndǐhi té Pèlú, ndǐhi té Juáá, cue téé ío cùnuu-gá ní cutnùnǐ iní-güedé sá Yá Ndiòxí ío chǐndèe ñaha-gá xii-í quidé-í chìuⁿ-gá. Te ío váha ní cáháⁿ ndǐhi ñaha-güedé xii-í, ndǐhi té Bèè, te ní cuu ìⁿ-nuu-ndí sá nchǔhú quíhⁿ-ndí cáháⁿ-ndí tnúhu Yá Ndiòxí nùú nchaa ñáiyu ñá túú cùu ñáiyu isràél, te mee-güedé cáháⁿ-güedé tnúhu-gá nùú ñáiyu isràél. ¹⁰ Te ìⁿ-ni tnúhu ní cáháⁿ-güedé dóho-ndí te ní cachí-güedé xii-ndí sá chǐndèe-ndí cue ñáiyu ndàhú, te sa ducaⁿ tnàhí sàni iní-ndí cada-ndí.

Té Páblú cáháⁿ-dé dóho té Pèlú ñúu Antiòquiá

¹¹ Te cútñhá ní sáháⁿ té Pèlú ñúu Antiòquiá yàcáⁿ ní cáháⁿ-í dóho-dé, chi quide-dé ñⁿ sá ñà túú tàù-dé cada-dé ní cùu. ¹² Te quide váha-dé ní cùu chi xèxi-dé ndíhi ñáyiú ñá túú cùu ñáyiú isràél, dico òré ní sáá ñⁿ úú ñáyiú cùndíhi té Jàcobó, te òré-áⁿ ñà túú-gá ní cuíní-dé caxi-dé ndíhi ñáyiú-áⁿ. Te ducaⁿ ní quide-dé chi ní yùhú-dé cue ñáyiú nchícúⁿ nihnu quide nchaa nacuaá ní cáháⁿ ndíi Moisés sá vǎ cáháⁿ váha-yu cuendá-dé. ¹³ Te tñhá dáva-gá ñáyiú isràél xĩndecu ichi Yá Ndiòxí ñá túú quide váha-yu, chi quide-yu dàtná quidé tǎ Pèlú ní cùu, te ndéé tñhá té Bèè ní ngúíta-dé ducaⁿ quide-dé ní cùu. ¹⁴ Te òré ní xíní-í sá ñà túú quide-güedé ndíhi-yu nàcuáa cáháⁿ tñúhu Yá Ndiòxí, te núu nchaa ñáyiú ndècu ichi Yá Ndiòxí ní xáhaⁿ-í xii té Pèlú: “Yòhó cùú-n tǎe isràél, te ñá túú quide-n nchaa nacuaá quide ñáyiú isràél, chi quide-ni-n datná quidé nchaa ñáyiú ñá túú cùu ñáyiú isràél. Te núu ducaⁿ quide-n, ¿te ná cuendá dánèhé-n ñáyiú ñá túú cùu ñáyiú isràél sá cǎdá-yu nchaa nàcuáa quide ñáyiú isràél?” , duha ní xáhaⁿ-í xii té Pèlú.

Ñⁿ-ni nàníhí tǎhù-ó ndíhi ñáyiú isràél nũu na quĩndáá iní-ó Xítóhó Jesucristú ndíhi-yu

¹⁵ Te yúhú ndíhi té Pèlú cùú-ndí ñani tñhá ñáyiú isràél, te ñá túú ndècu-ndí ichi cuèhé ichi duha dàtná ndécú nchaa ñáyiú ñá túú cùu ñáyiú isràél. ¹⁶ Te xíní-ó sǎ vǎ cùndècu-gá cuéchi-o nũú Yá Ndiòxí te núu na quĩndáá iní-ó Xítóhó Jesucristú, te ñá díú sǎ cǎnchícúⁿ nihnu-o cǎda-o nchaa nacuaá ní cáháⁿ ndíi Moisés. Te tñhá dáva nchúhú ñáyiú isràél sǎndáá iní-ndí Xítóhó Jesucristú, te xǎⁿ cútñnì iní-ndí sǎ ñà túú-gǎ cuéchi-ndí ndécú nũú-gǎ, dico ñá díú sǎ ñí cǎnchícúⁿ nihnu-ndí ní quide-ndí nàcuáa ní cáháⁿ ndíi Moisés, chi cuendá sǎ sǎndáá iní-ndí Xítóhó Jesucristú. Te vǎ yóo ñⁿ cǎchí-ó sǎ ñà túú ndècu cuéchi-xi núú Yá Ndiòxí cuendá sǎ nchícúⁿ nihnú-yu nchaa nacuaá ní cáháⁿ ndíi Moisés.

¹⁷ Te núu cuíní-ó sǎ vǎ cùndècu cuéchi-o nũú Yá Ndiòxí cuendá sǎ sǎndáá iní-ó Xítóhó Jesucristú, te xǎⁿ cútñnì iní-ó sǎ ñà túú quide váha-o. ¿Te vǎ cùú tñáhi cani

iní-ó sǎ Xítóhó Jesucristú dánèhé ñáhá-gǎ xii-o sǎ vǎ cǎdá váha-o cùndecu-ol! ¹⁸ Te yúhú cǎchí-í sǎ vǎ cǎnchícúⁿ nihnu-gǎ-ó nchaa nacuaá ní cáháⁿ ndíi Moisés, dico núu vitna cǎchí-í sǎ xíní ñũhu-xi cada-o nchaa nacuaá ní cáháⁿ ndíi ña, te ñá túú quide váha-í núú Yá Ndiòxí te núu ducaⁿ na cǎda-í. ¹⁹ Te yúhú duuⁿ duuⁿ ní cutñnì iní-í sǎ vǎ ndácú-í cada-í nchaa nàcuáa ní cáháⁿ ndíi Moisés nũu xǎⁿ ní dáñà-í ñá túú-gǎ nchícúⁿ nihnu-í nchaa nàcuáa ní cáháⁿ ndíi cuendá sǎ cuíní-í cùndecu-í sǎ cùú-xí Yá Ndiòxí. ²⁰ Te Xítóhó Jesucristú ní xǎhí-gǎ cuendá-í, dico dàtná tñúhu sǎ tñhá-í ní xǎhí ndíhi-gǎ, chi ñá cùú-gǎ cada-í nchaa nàcuáa sǎni iní mǎe-í, chi Xítóhó Jesucristú-nǎ ndécú ndíhi ñaha-gǎ xii-í táxi tñnì ñáhá-gǎ. Te vitna ndècu-í ñuyíu-a, te ío sǎndáá iní-í Xítóhó Jesucristú Déhe Yá Ndiòxí, te chindee ñaha-gǎ xii-í. Te díu-ni Xítóhó Jesucristú ío cùu iní ñáhá-gǎ xii-í núu ní xǎhí-gǎ núú cùrlixí sǎ cuendá-í. ²¹ Te vitna ñá túú dàquee tǎhù-í sǎ váha ní quide ñaha Yá Ndiòxí xii-í, chi núu ni ndacu-o vǎ cùndècu cuéchi-o nũú Yá Ndiòxí cuendá sǎ nchícúⁿ nihnu-o quide-o nchaa nacuaá ní cáháⁿ ndíi Moisés ní cùu ña, te áúⁿ nǎ cuu ní xǎhí Xítóhó Jesucristú ní cùu te núu ducaⁿ.

3

Vǎ dáñá ndèé-ó quĩndáá iní-ó tñúhu Xítóhó Jesucristú

¹ Te nchòhó ñáyiú distritú Gálaciá, ñáyiú sa xĩndecu ichi Xítóhó Jesucristú, ¿ná cuendá ío ñí iní-ndó ñá cuíní-ndó tñnì-ndo nchaa tñúhu cáháⁿ-gǎ?, ¿te yoo ní dádáhu ndodo iní ñáhá xii-ndo núu ducaⁿ quide-ndo? Te ñaha-ndo sǎ ío váha ní dánèhé ñáhá-ndí xii-ndo nàcuáa ní cuu ní xǎhí Xítóhó Jesucristú. ² Te vitna cáháⁿ-ndó nũu sǎ nchícúⁿ nihnu-ndo nchaa nacuaá ní cáháⁿ ndíi Moisés ní ñíhí-ndó Espiritú Yá Ndiòxí ndécú ndíhi-ndo, àdi sǎ ní sǎndáá iní-ndó tñúhu Xítóhó Jesucristú sǎ ní dánèhé ñáhá-ndí xii-ndo ní ñíhí-ndó Espiritú-gǎ ndécú ndíhi-ndo. ³ Te nchòhó ío ñí díquí-ndó chi Espiritú Yá Ndiòxí tá quide váha ñaha-xi xii-ndo cuáháⁿ ní cùu. ¿Te nǎa vitna mee-nǎ-ndó cuíní-ndó cǎda-ndo nacuaá ta quide ñaha Espiritú-gǎ cuáháⁿ xii-ndo ni cùu-á? ⁴ Te sǎni ñⁿ sǎni úú iní-í cuendá-ndó sǎ áúⁿ nǎ cuu nǎndí yáha-ndo ndècu-ndo ichi Yá Ndiòxí. ⁵ Te xíní-ndó sǎ Yá Ndiòxí ní taxi-gǎ Espiritú-gǎ

ní ngúndecu ndihi-ndo, te ní quide-gá sá vǎ yǎo tñahí ndacu cada núú-ndó ní xini-ndó. Te ducaⁿ ní quide-gá, chi ní sándáá iní-ndó-gǎ, dico nǎ díú cuendá nchaa nàcuáa ní cachí ndii Moisés cada ñáyiú ducaⁿ ní quide-gá.

⁶ Te ndii Àbrahám ducaⁿ ño ní sándáá iní ndii Yá Ndiǒxí, núú xǎⁿ ní cachí-gá sá ní cudùu ndii núú-gǎ sá dúcáⁿ ní quide ndii.

⁷ Te cǎchí tñúhu ndáá-í xii-ndo sǎ ncháá ñáyiú sándáá iní ñáhá xii Yá Ndiǒxí dàtná ní sándáá iní ñáhá ndii Àbrahám xii-gá, ñáyiú-áⁿ ñⁿ-ni cùú-yu ndihi ndii núú-gǎ.

⁸ Te núú tütú Yá Ndiǒxí ní ngódó tñuní tñúhu váha, tñúhu sá ní xáhaⁿ Yá Ndiǒxí xii ndii Àbrahám, te duha ní xáhaⁿ-gǎ xii ndii: “Nchaa ñáyiú nihí ñuyú cada váha-í-yu sá cuendá-n”, duha ní xáhaⁿ-gǎ xii ndii. Te sá dúcáⁿ ní ngódó tñuní núú tütú Yá Ndiǒxí ndéé dàvá-áⁿ, te xǎⁿ cútñuní sá sǎa nduu, te cue ñáyiú ñá túú cùu ñáyiú isràél vá cùndècu-gá cuéchi-yu núú-gǎ te nuu na quindáá iní ñáhǎ-yu xii-gǎ. ⁹ Te xǎⁿ núu nchaa ñáyiú sándáá iní ñáhá xii Yá Ndiǒxí cada váha ñaha-gǎ xii-yu ndii ní quide váha-gá ndii Àbrahám, chi ndii-áⁿ ducaⁿ ní sándáá iní ñáhá ndii xii-gǎ.

¹⁰ Te nchaa ñáyiú cuiní cada nchaa nàcuáa ní cáháⁿ ndii Moisés cuendá sá cuiní-yu sá vǎ cùndècu-gá cuéchi-yu núú Yá Ndiǒxí, ñáyiú-áⁿ daña nihnu ñaha-gá xii-yu, chi vá ndácú-yu cadá-yu nàcuáa sàni iní-yu, te ducaⁿ càda-gǎ chí quee ndáá-xi nàcuáa càháⁿ-xi núú tütú-gǎ núú cǎchí-xi sá ncháá ñáyiú ñá túú quide nchaandi tñúhu nàcuáa ní cáháⁿ ndii Moisés te daña nihnu ñaha-gá xii-yu. ¹¹ Te núu na cànchicúⁿ nihnu-ni-o càda-o nàcuáa ní cáháⁿ ndii Moisés, te ñá túú vèdana chindee ñaha-xi xii-o nàcuáa vá cùndècu-gá cuéchi-o núú Yá Ndiǒxí. Te ndáá chí núú tütú-gǎ cǎchí-xi sá ncháá ñáyiú sándáá iní ñáhá xii-gǎ, ñáyiú ñá túú-gǎ cuéchi-xi ndècu ño váha ndècú-yu núú-gǎ. ¹² Te núu dicó ño ñáyiú quide nchaandi tñúhu nàcuáa ní cáháⁿ ndii Moisés ñá, te ñá túú xini ñuhu-xi quindáá iní-yu tñúhu Xítóhó Jesucristú, chí núú tütú Yá Ndiǒxí cǎchí-xi sá núu dicó ño ñáyiú ndacu cada nchaa nàcuáa ní cáháⁿ ndii Moisés ñá, te cundecu váha-yu núú Yá Ndiǒxí.

¹³ Te tñúhu ní chídó tñuní ndii Moisés cǎchí-xi sá ño ndècu cuéchi-o núú Yá Ndiǒxí

cuendá sá ñá ndácú-ó càda-o nchaa nàcuáa ní cáháⁿ ndii, te cuendá xǎⁿ tá daña nihnu ñaha-gá xii-o cuáháⁿ. Dico Xítóhó Jesucristú ní xido-gá nchaa cuéchi-o cuendá sá vǎ daña nihnu ñaha-gá Yá Ndiǒxí xii-o. Te cǎchí-xi núú tütú Yá Ndiǒxí: “Ñⁿ téé na càta caa-güedé ñⁿ yutnu, te téé-áⁿ cùú-dé téé daña nihnu ñaha Yá Ndiǒxí”, duha cǎchí-xi núú tütú-gǎ. ¹⁴ Te ducaⁿ ní yáha Xítóhó Jesucristú, chí cuiní Yá Ndiǒxí sá nduu táhú nchaa ñáyiú ñá túú cùu ñáyiú isràél cundecu váha-yu dàtná ní nduu táhú ndii Àbrahám ndécú váha ndii. Te ducaⁿ ní yáha-gá cuendá nchaa nchoo ñáyiú sándáá iní ñáhá xii-gá ngúndecu ndihi-o Espiritú Yá Ndiǒxí sá ní cachí méé-gǎ taxi-gá.

Nàcuáa ní cachí Yá Ndiǒxí cada-gá

¹⁵ Te nchòhó cue ñáyiú ndècu ndihi-í ichi Yá Ndiǒxí na cǎchí tñúhu-í xii-ndo nàcuáa quide cue ñáyiú ñuyú-a cuendá tecú tñuní-gá-ndó nàcuáa quide Yá Ndiǒxí. Chí ñáyiú-áⁿ òré cuiní-yu cadá-yu ñⁿ sá càdǎ-yu, te díhna-gá ndátnùhu-yu te òré cùú ñⁿ-nuú-yu, te sáha firmá-yu ñⁿ tutú te tutú-áⁿ vǎ yǎo ñⁿ ndacu cáháⁿ sá vǎ nándíhi-gǎ-xi, te ni vǎ yǎo-gǎ ndacu nágá tñúhu chido tñuní núú-xí. ¹⁶ Te ducaⁿ ní quide Yá Ndiǒxí ndihi ndii Àbrahám, chí ní xáhaⁿ-gǎ xii ndii nàcuáa cada-gǎ, te tñúhu-áⁿ cùú-xí cuendá méé ndii ndihi cuendá ñⁿ ñaní tñáhá ndii cundecu ñuyú-a ndéé cuéé-gǎ. Te núú tütú-gǎ cǎchí-xi sá tñúhu-áⁿ cùú-xí cuendá ñⁿ-ni ñaní tñáhá ndii te ñá díú cuendá ncháá-yu. Te ñaní tñáhá ndii téé cùu cuendá tñúhu-áⁿ cùú Xítóhó Jesucristú. ¹⁷ Te na cǎchí tñúhu-í xii-ndo sǎ Yá Ndiǒxí ní quide ndáá duuⁿ-gǎ ndihi ndii Àbrahám nàcuáa cada-gǎ. Te sa ní cuu cùmí cièndú ócò úxí cuá sá dúcáⁿ ní xáhaⁿ Yá Ndiǒxí xii ndii Àbrahám, te dàt-nùní ní xáhaⁿ-gǎ xii ndii Moisés chido tñuní ndii nàcuáa cada ñáyiú, te nchaa tñúhu ní chídó tñuní ndii Moisés ñá túú dàquee tñúhu-xi tñúhu sá ní xáhaⁿ Yá Ndiǒxí xii ndii Àbrahám nàcuáa cada-gǎ. ¹⁸ Te núu dicó cuendá nchaa tñúhu sá ní chídó tñuní ndii Moisés ní náníhí tǎhú-ó ñá, te ñá túú-gǎ xini ñuhu-xi cada cuendá-ó tñúhu ní xáhaⁿ Yá Ndiǒxí xii ndii Àbrahám cada-gǎ ní cùu te núu ducaⁿ. Te ndii-áⁿ ní naníhí tǎhú ndii chí ducaⁿ ní cachí Yá Ndiǒxí cada ñaha-gǎ xii ndii.

¹⁹ Te nchaa tnúhu ní cáháⁿ ndíi Moisés ní ngódó núú-xí nchícúⁿ nihnu ñáyiú cuèndá ducaⁿ cùtnuní iní-yu sá ndécú cuèchi-yu, te nchícúⁿ nihnu-ní-yu ndéé ní sáá nduu ní quexio Yá cùú ñàni tnàhá ndíi Àbrahám, chi Yá-áⁿ ducaⁿ ní xáhaⁿ Yá Ndiòxí quixi-gá cada váha-gá nchaa ñáyiú. Te nchaa tnúhu ní chídó tnùní ndíi Moisés, chi Yá Ndiòxí ní tendaha-gá cue espíritú xínú cuèchi núú-gá ní sáháⁿ-xi ní xítnúhu ñaha-xi xii ndíi nàcuáa danèhé ndíi ñáyiú. ²⁰ Te Yá Ndiòxí ñá túú ní cáháⁿ-gá núú méé ñáyiú, chi ndíi Moisés ní cáháⁿ ndíi yuhu-gá núú-yu, dico cùtnàhá ní cáháⁿ ndíi-gá ndíi Àbrahám chi núú méé núú ííⁿ ndíi ndíi-gá ní xáhaⁿ-gá xii ndíi nàcuáa cada-gá.

Nàcuáa nduu nchaa tnúhu ní chídó tnùní ndíi Moisés

²¹ Te nchaa nàcuáa ní chídó tnùní ndíi Moisés, ndíi nchaa nàcuáa ní xáhaⁿ Yá Ndiòxí xii ndíi Àbrahám cada-gá, ñá túú dàquee tíhú tnàhá-xí. Te núú dicó nánihí tǎhú ñáyiú nchícúⁿ nihnu nchaa nàcuáa ní cáháⁿ ndíi Moisés ñá te cudíu-yu núú-gá cuèndá-ni sá nchícúⁿ nihnú-yu nchaa nàcuáa ní cáháⁿ ndíi ni cùu. ²² Te núú tütú Yá Ndiòxí cǎchí-xi: “Nchaa nchòhó ñáyiú ndècu ñuyíú ndécú cuèchi-ndo”, duha cǎchí-xi. Te ducaⁿ cǎháⁿ-xi cuèndá quíndáá iní-ó Xítóhó Jesucristú, te naníhí tǎhú-ó chi ducaⁿ ní cǎchí Yá Ndiòxí cada-gá.

²³ Te cùtnàhá vátá cùndècu ndíi-gá-ó tnúhu Xítóhó Jesucristú, te nchícúⁿ nihnu-o nchaa nàcuáa ní cáháⁿ ndíi Moisés, te ní cutnùní iní-ó sǎ ïo ndècu cuèchi-o ni cùu. Te ducaⁿ-ni nchícúⁿ nihnu-o ndéé ní sáá nduu ní quexio Xítóhó Jesucristú ñuyíú-a, te ní sándáá iní-ó-gá. ²⁴ Te nchaa tnúhu sá ní chídó tnùní ndíi Moisés ní sanu ichi ñaha-xi xii-o nàcuáa cada-o cùndècu-o, te ducaⁿ-ni sanu ichi ñaha-xi xii-o ndéé ní sáá nduu ní quexio Xítóhó Jesucristú ñuyíú-a. Te ducaⁿ ní cuu cuèndá quíndáá iní-ó-gá, te vǎ cùndècu-gá cuèchi-o núú Yá Ndiòxí. ²⁵ Te vitna ní ngúndècu ndíi-o tnúhu Xítóhó Jesucristú, te ñá túú-gá xíní ñihu-xi canu ichi ñaha nchaa tnúhu ní chídó tnùní ndíi Moisés.

²⁶ Te vitna tnàhá nchaa nchòhó cùú-ndo dèhe Yá Ndiòxí, chi ní sándáá iní-ndo Xítóhó Jesucristú. ²⁷ Te nchòhó ní sandute-ndo dàtná cǎchí-gá, te ndècu-ndo ndíi-gá, te quide-ndo nchaa nàcuáa

ní cáháⁿ-gá ndécú-ndo, te ïo ndècu yíñuhu-ndo núú Yá Ndiòxí dàtná ndécú yíñuhu mee Xítóhó Jesucristú. ²⁸ Te vitna ííⁿ-ni cùu-o nchaa-o ndècu-o ndíi Xítóhó Jesucristú cuèi cùu-o ñáyiú isràèl àdi ñá túú cùu-o, te cuèi cùu-o ñáyiú ñá túú tnàhí dàñá quee núú chíúⁿ pàtróóⁿ-xi àdi cuu-o ñáyiú dàñá queé núú chíúⁿ pàtróóⁿ-xi, te cuèi téé te cuèi ñadihí ííⁿ-ni cùu-o nchaa-o ndècu-o ndíi Xítóhó Jesucristú. ²⁹ Te nchòhó ndécú ndíi-ndo Xítóhó Jesucristú, te cùu-ndo dàtná cue ñani tnàhá ndíi Àbrahám, chi ní nduu tǎhú-ndo cùndècu váha-ndo núú Yá Ndiòxí dàtná ní nduu tǎhú ndíi-áⁿ ndécú váha ndíi núú-gá, te ducaⁿ chi mee-gá ducaⁿ ní cǎchí-gá cunduu.

4

¹ Te nchòhó xíní-ndo sǎ ííⁿ té líhli chi vátá nǎgǎ cuǎñaha tǎtá-dè cuu cuèndá-dé chi líhli-dé, te ííⁿ-ni cùu-dé ndíi téé xínu cuechi, dico na sáá nduu cuèhnu-dé, te nduu tǎhú-dé nchaa sá ndécú ndíi tǎtá-dé.

² Te xitò-yu té líhli-áⁿ sǎhnú-dé ndéé sáá nduu ní cǎchí tǎtá-dé sá cuǎñaha-dé sá ndúú tǎhú-dé. ³ Te ducaⁿ sǎtnahá-xi cùu nchoo, chi nchícúⁿ nihnu-o nchaa nàcuáa ní cáháⁿ cue téé ní xíndècu ndéé sanaha ni cùu. ⁴ Te ní sáá nduu ní quide Yá Ndiòxí dàtná ní cǎchí-gá, te ní tendaha-gá Déhe-gá Xítóhó Jesucristú ní quixi-gá ñuyíú-a, ní dácácú ñaha ííⁿ ñadihí te ní cuu-gá ñáyiú, te ní quide-gá nchaa nàcuáa ní cáháⁿ ndíi Moisés. ⁵ Te ducaⁿ ní tendaha Yá Ndiòxí Déhe-gá cuèndá sá vǎ cǎnchícúⁿ nihnu-gá-ó nchaa nàcuáa ní chídó tnùní ndíi Moisés cuèndá ducaⁿ te cuu-o dèhe Yá Ndiòxí.

⁶ Te Yá Ndiòxí ní taxi-gá Espíritú Déhe-gá Xítóhó Jesucristú ndécú ndíi-ndo chi cùu-ndo déhe-gá, te Espíritú-áⁿ chíndèe ñaha-xi xii-ndo te cǎchí-ndo: “Yòhó Dútú Ndiòxí cùú-n Tǎtá méé-ndí”, duha cǎchí-ndo. ⁷ Te xiǎⁿ cùtnùní iní-ndo sǎ cùú-ndo dèhe Yá Ndiòxí vitna, te ñá túú-gá cùú-ndo dàtná cue ñáyiú ñá túú tnàhí dàñá quee núú chíúⁿ pàtróóⁿ-xi. Te sá dúcáⁿ cùu-ndo déhe-gá, te Xítóhó Jesucristú taxi-gá nchaa sá váha ní cǎchí Yá Ndiòxí nduu tǎhú-ndo.

Té Pǎblú ïo sàni iní-dé cuèndá nchaa ñáyiú ndècu ichi Xítóhó Jesucristú

⁸ Te cútnhá vátá quíndáá-gá iní-ndó tnúhu Yá Ndióxi ní xinu cuechi-ndo núú ncháa sá cachí-yu cùu ndióxi te ñá ndáá sá ndiòxi cúu-xí. ⁹ Te vitna nchòhó cáháⁿ ndihí-ndo Yá Ndióxi, te mee-gá xini ñáhá-gá xii-ndo, te ñá túú ndùu váha-xi nanchòcáva iní-ndó càda tucu-ndo nacuaá ní xóo cada-ndo díhna, chí ncháa xiáⁿ ñá túú vèdana nàndíhi-xi. ¹⁰ Te nchòhó cànehe í-ni-ndo ndùu cachí-ndó íí, te ñi-u-ni ducaⁿ quide-ndo dava yoó ndihí dava cuíá, te ndí tnahá nduu sácóo vico ñi-u-ni ducaⁿ quide-ndo cànehe í-ndó ndùu-án. ¹¹ Te ío sàni iní-í cuèndá-ndó, chí na cuáháⁿ àúⁿ nà cuu ní dánèhé ñáhá-í xii-ndo tnúhu Yá Ndióxi.

¹² Te càháⁿ ndàhú-í núú nchòhó ñáiyu ndècu ndihí-í ichi Xítohó Jesucristú sá cáda-ndó dàtná quide-í ñá túú nchicúⁿ ni-hnu-í ncháa tnúhu ní cáháⁿ ndíi Moisés, chí yúhú quide-í vitna dàtná ní quide nchòhó ñá túú ní cànchicúⁿ ni-hnu-ndo nàcuáa ní cáháⁿ ndíi. Te cútnhá ní xíndecu ndihí ñaha-í xii-ndo ní quide váha ñaha-ndo xii-í. ¹³ Te sa ñaha-ndo sá cútnhá ní cáháⁿ-í tnúhu Xítohó Jesucristú núú-ndó ndéè díhna ní cuhú-í, núu xiáⁿ ní xíndecu ndihí ñaha-í xii-ndo ní cáháⁿ-í tnúhu-gá núú-ndó. ¹⁴ Te cuèhé sá ní tnahá-í-án cúu-xí ñiⁿ cuèhé sá vā yoó tnahí cundee iní-xi cundecu ndihí ñaha xii-í ní cùu, dico nchòhó chí ío váha ní cáháⁿ ndihí ñaha-ndo xii-í, te ñá túú ní sàni cuèhé ní sàni duha iní-ndó cuèndá-í, te ní cáháⁿ ndihí ñaha-ndo xii-í dàtná tnúhu sá yúhú cùu-í ñiⁿ espíritú xínú cuèchi núú Yá Ndióxi àdi datná méé Xítohó Jesucristú. ¹⁵ ¿Te ná ní tnahá-ndó núu ñá túú-gá sání váha iní-ndó cuèndá-í dàtná ní xóo cada-ndo ndéè díhna ío váha ní xóo caní iní-ndó cuèndá-í? Te na cachí tnúhu ndáá-í xii-ndo sá ío ní cuu iní ñáhá-ndó xii-í cútnhá ní xíndecu ndihí ñaha-í xii-ndo, te nándí sá ndécú ndihí-ndo taxi-ndo xii-í ní cùu, te núu dicó sá cúu te ndéè tinuu-ndo tava-ndo te taxi-ndo xii-í ní cùu. ¹⁶ ¿Te náa cùu úhú iní ñáhá-ndó xii-í vitna cuèndá sá cáháⁿ-í tnúhu ndáá tnúhu Yá Ndióxi núú-ndó-án?

¹⁷ Te ío ñáiyu ío váha càháⁿ ndihí ñaha xii-ndo, dico ñáiyu-án ñúhú cuèhé iní-yu, chí cuiní-yu sá vā cúu-gá cáháⁿ ndihí tnàha-o, chí mee-nā-yu cundecu ndihí-ndo cuiní-yu. ¹⁸ Te váha quide ñáiyu càháⁿ ndihí ñaha xii-ndo ndihí tnúhu yíñúhu, te núu cuiní-yu cadá-yu ñiⁿ sá váha sá cúu-xí-ndó.

Te ducaⁿ-ni na cadá-yu cuéi òré ñá túú ndècu ndihí ñaha-í xii-ndo. ¹⁹ Te nchòhó ñáiyu ní sanu ichi-í ichi Xítohó Jesucristú cachí tnúhu-í xii-ndo sá quide-xí iní-í dàtná quide-xí iní ñiⁿ ñadíhi ñaha sa ní tnahá òré cacu dèhe-xi, te ducaⁿ quide-xi iní-í, chí ío vāi sani iní-í cuèndá-ndó dàtná ní xóo cada-í ndéè díhna, te ducaⁿ-ni càda-í ndéè ná sáa nduu càda-ndo ncháa nacuaá càháⁿ Xítohó Jesucristú. ²⁰ ¿Te ío váha cada-xi te núu dicó tnavíi sa ndècu ndihí ñaha-í xii-ndo cuèndá cáháⁿ-í núú-ndó nàcuáa cada-ndo, te ñá cútníni iní-í nása cada-í cuèndá-ndó!

Cuèndá ndíi Àgár ndihí ndíi Sàrá

²¹ Te nchòhó ñáiyu cuiní canchicúⁿ ni-hnu ncháa tnúhu ní cáháⁿ ndíi Moisés, ¿náa ñá túú tècú tnúni-ndó nàcuáa càháⁿ-xi tnúhu ní chídó tnúni ndíi? ²² Chí cachí tnúhu ní chídó tnúni ndíi-án sá ndíi Àbrahám ní xíndecu úú dèhe ducuⁿ ndíi, te ñiⁿ-dé ní cuu dèhe ndíi ndihí ñadíhi méé ndíi ndíi Sàrá, te íngá-dé ní cuu-dé dèhe ndíi ndihí ñiⁿ ndíi ní xinu cuechi núú-yu ní xínani Àgár. ²³ Te sá dúcáⁿ ní cacu dèhe ndíi Sàrá, chí mee Yá Ndióxi ní cundàhú iní ñáhá-gá xii-aⁿ, chí ducaⁿ ní cachí-gá cada-gá. Dico ndíi ní xinu cuechi-án chí ducaⁿ tnahí ní nduu táhú ndíi-án sá cóo dèhe ndíi. ²⁴ Te na cachí tnúhu-í xii-ndo ná cúu sá nánèhé ndí ndúu cue ndíi díhí-án. Te úú xito ní cáháⁿ Yá Ndióxi nàcuáa cada-gá, te ñiⁿ ndíi-án nánèhé ndíi nàcuáa ní cáháⁿ Yá Ndióxi xito díhna nuu, te íngá tucu ndíi-án nánèhé ndíi nàcuáa ní cáháⁿ tucu-gá xito cùu uú. Te ndíi Àgár-án nánèhé ndíi nàcuáa ní xáhaⁿ Yá Ndióxi xii ndíi Moisés yucu Sinàí cada ñáiyu, te ncháa ñáiyu nchicúⁿ ni-hnu ncháa tnúhu-án cúu-yu dàtná dèhe ndíi Àgár téé ní xinu cuechi, chí téé-án ñá túú tnahí ní dàná-dé quee-dé núú chíúⁿ pàtróoⁿ-dè, te ducaⁿ sàtnahá-xi cúu-yu chí nchicúⁿ ni-hnú-yu ncháa nàcuáa ní xáhaⁿ Yá Ndióxi xii ndíi Moisés. ²⁵ Te tnúhu Àgár quée-xi: Yucu Sinàí, te yucu-án yíndèhu-xi nacióⁿ Àrabiá. Te ndíi Àgár-án nánèhé tucu ndíi cue ñáiyu ndècu ñúú Jerusalén, chí ñáiyu-án ndécú-ni-yu dàtná ní xíndecu ndíi Àgár ndihí dèhe ndíi, chí cue ndíi-án ní cuu cue ndíi ñáiyu ñá túú tnahí ní dàná quee núú chíúⁿ pàtróoⁿ-xi, te ducaⁿ sàtnahá-xi cùu ñáiyu-án chí nchicúⁿ ni-hnú-ni-yu ncháa nàcuáa ní cáháⁿ ndíi Moisés. ²⁶ Dico nchoo

ní nduu táhú-ó cùndecu-o ñúú Jerusálén sáá núú ndécú Yá Ndiòxí, te vitna chi ñá túú-gã nchicúⁿ nihnu-o nchaa nacuaá ní cáháⁿ ndíi Moisés. ²⁷ Te ducaⁿ càháⁿ-í, chi núú tütú Yá Ndiòxí cächí-xi:

Yòhò ñaha ní nduu táhú vã cóó dèhe-xi ní cùu, vitna cana saa-n sã cùdíí ìní-n cuèí vátá quíní-gá-n ñasa càcu ìⁿ landú.

Te cuèí ní cuu táhú-n sã vã cóó dèhe-n ní cùu dico ío-gã titní dèhe-n còo dacúxí xíchí ní cuu táhú tñahí sã cóó dèhe-xi.

Duha cächí-xi núú tütú-gã. ²⁸ Te nchoo cuè ñáyiú ndècu ichi Xítohó Jesucristú vitna cùu-o datná ndíi Isàác, chi ndíi-áⁿ ní cacu ndíi, chi mee Yá Ndiòxí ní cächí-gá sã cáci ndíi. Te ducaⁿ sãtnahá-xi cùu nchoo chi ní nduu-o dèhe-gã vitna chi ducaⁿ ní cächí tucu-gã cunduu. ²⁹ Te dèhe ndíi Àgár ní nduu táhú tñahí ndíi sã cáci ndíi ñuyúú-a, te ndíi-áⁿ ní cuu úhú ìní ndíi ndíi Isàác, te ndíi Isàác-áⁿ chi Espiritú Yá Ndiòxí ní quide ní cacu ndíi. Te ducaⁿ sãtnahá-xi cùu vitna, chi nchaa nchoo ñáyiú ndècu ndíi Espiritú Yá Ndiòxí cúú úhú ìní ñahá ñáyiú xii-o. ³⁰ Te núú tütú Yá Ndiòxí cächí-xi: “Chí nácúúⁿ xíchí xínú cuèchi ndíi dèhe-xi na ñuhú-yu, chi dèhe xíchí xínú cuèchi-áⁿ ñá túú ñã ñíhí-dè nduu táhú-dè, chi mee-ni dèhe ñaha ndècu vehe-xi nduu táhú-dè sã cuãñaha tãtá-dè”, duha cächí-xi núú tütú-gã. ³¹ Te nchoo cuè ñáyiú ndècu ichi Xítohó Jesucristú ñá túú-gã cúú-ó datná cúú dèhe ndíi ní xinu cuechi-áⁿ, chi ní cuu-o vitna datná cúú ndíi ní nduu táhú nchaa sã ní sãñaha tãtá-xi-áⁿ. Te ducaⁿ ní cuu, chi Yá Ndiòxí ní dácãcu ñaha-gã xii-o cuèndá sã vã cãnhicúⁿ nihnu-gá-ó nchaa nacuaá ní cáháⁿ ndíi Moisés.

5

Canchicúⁿ nihnu-ni-o ìchi Xítohó Jesucristú

¹ Te Xítohó Jesucristú ní quide-gã nacuaá vã cání ìní-ó sã ñáníhí táhú-ó te núu na cãnhicúⁿ nihnu-o nacuaá ní cáháⁿ ndíi Moisés, te ñu-ni ducaⁿ cãni ìní-ó cùndecu-o te vã ngòo cãni ìní-ó sã ñáníhí táhú-ó te núu na cãnhicúⁿ nihnu-o cada-o nacuaá ní cáháⁿ ndíi, chi núu ducaⁿ na cada-o te ío dandòho-o mee-o datná ní xóo ndoho-o cùtnahá vátá cùndecu-gá-ó ìchi-a.

² Te yúhú té Pãblú cuíní-í sã cùndedóho-ndo ìⁿ tñuhu na càháⁿ-í-a. Te núu

nchòhó cuáha-ndo sèñá ñii-ndo cuèndá sã sãndáá ìní-ndó nacuaá ní cächí ndíi Moisés cada-ndo, te núu ducaⁿ na càda-ndo ña, te áúⁿ ñá cuu ndècu-ndo ichi Xítohó Jesucristú te núu ducaⁿ. ³ Te datná ní cächí-í xii-ndo, te ñu-ni ducaⁿ càháⁿ tucu-í vitna sã núu ndèda-ni càa ìⁿ téé na cuáha-dé sèñá ñii-dé, te xini ñuhu-xi sã dàcutíí tãú-dé cada-dé nchaa nacuaá ní cáháⁿ ndíi Moisés. ⁴ Te nchaa nchòhó ñáyiú sãni ìní sã ñá túú-gã cuèchi-xi ndècu núú Yá Ndiòxí cuèndá sã nchicúⁿ nihnu-ndo nchaa nacuaá ní cáháⁿ ndíi Moisés, ñá túú-gã ndécú-ndó ndíi Xítohó Jesucristú, te ni Yá Ndiòxí ñá túú-gã cùndáhú ìní ñahá-gã xii-ndo càda váha ñaha-gã. ⁵ Dico nchaa nchoo ñáyiú sãndáá ìní ñahá xii-gã cùñu-o núú-gã, chi chindee ñaha Espiritú-gã xii-o, te ndètu cahnu-ñá-ó sãá nduu cùñaha núú Yá Ndiòxí xii-o sã cùñu-o núú-gã. ⁶ Te nchoo cuè ñáyiú ndècu ndíi Xítohó Jesucristú ìⁿ-ni quide-xi cuèí na cuáha-o sèñá ñii-o àdi vá cuáha-o, chi ñá túú chindee ñaha-xi xii-o nacuaá cundecu váha-o ndíi-gã. Te ìⁿ díi ní sã xini ñuhu-xi quindáá ìní-ó Xítohó Jesucristú, te núu ducaⁿ na càda-o te cuu ìní-ó cuè tñaha ñáyiú-o.

⁷ Te nchòhó ío váha quide-ndo ndècu-ndo ichi Yá Ndiòxí ní cùu, te vitna cùñuhu-í sã ñá túú-gã sãndáá váha ìní-ndó tñuhu-gã, te ducaⁿ quide-ndo chi ndècu ñáyiú sãnu ichi ñaha xii-ndo ìngá ichi.

⁸ Te ñá díú Yá Ndiòxí Yaá ní cáháⁿ ñahá xii-ndo ducaⁿ ní cächí-gã cada-ndo sã vã quindáá-gã ìní-ndó tñuhu-gã. ⁹ Te nchòhó xini-ndó sã núu luha levadùrà ná quíhu yuchi te dãndaa-xi. Ducaⁿ sãtnahá-xi cùu ñáyiú dãndahú ñahá xii-ndo, chi cuíní-yu dàcutá nihnu ñahá-yu xii-ndo nchaa-ndo.

¹⁰ Te yúhú cùtnùní ndáá ìní-í sã Xítohó Jesucristú chindee ñaha-gã xii-ndo cuèndá sã ñá túú ñãgá tñuhu quindáá ìní-ndó, dico nchaa ñáyiú ducaⁿ dãndahú ñahá xii-ndo nacháhu-yu núú Yá Ndiòxí nchaa sã quidè-yu cuèí ñái-gã ñáyiú cùu-yu.

¹¹ Te cächí tñuhu-í xii nchòhó ñáyiú ndècu ndíi-í ichi Yá Ndiòxí sã núu ñicó dãnehé-ni-í ñáyiú sã cuáha-yu sèñá ñii-yu datná ní cächí ndíi Moisés ñá, te vã yòo cuu úhú ìní ñahá xii-í ní cùu, te ni vã tñu úhú ìní-yu cuèndá sã ní xíhí Xítohó Jesucristú núú cùrúxí ní cùu. ¹² Te nchaa ñáyiú dãsatú ìní ñahá xii-ndo sã cuáha-ndo sèñá

ñii-ndo, te váha-gá sá ná cáda-yu mée-yu ñⁿ tnúndòho, te ñá díú sá dúcáⁿ cànuichi ñàhá-yu xii-ndo cùndecu-ndo.

¹³ Te nchòhò ñáiyu ndècu ndií-í ichi Xítohó Jesucristú díu-gá ní taunihnu ñaha-gá xii-ndo cuendá sá vǎ cǎnchicúⁿ nihnu-gá-ndó nchàa nacuaá ní cáháⁿ ndíi Moisés, dico vá cání iní-ndó sǎ sǎ dúcáⁿ ní taunihnu ñaha-gá xii-ndo, te cuu-ni cada-ndo nǎndi sá cuèhé sá dúhá véxi iní-ndó, dico cuu iní tnáhá-ndó ñⁿ ñⁿ-ndo te chindee tnàha-ndo. ¹⁴ Chi ducaⁿ càháⁿ Yǎ Ndiòxí sá cúú iní-ó cuè tnaha ñáiyu dàtná cúú iní-ó mée-o. Te núu ducaⁿ na càda-o, te quide-o nchaa nacuaá tàú-xi cada-o dàtná càháⁿ nchaa tnúhu ní chídó tnùnì ndíi Moisés. ¹⁵ Te núu nchòhò cúú ùhú iní tnáhá-ndó ndècu-ndo, te ñá túú quide váha-ndo te núu ducaⁿ quide-ndo, dico yúhú cǎchí-í sá vǎ dúcáⁿ-gǎ cada-ndo cùndecu-ndo cuendá sá vǎ dácuíta nihnu tnàha-ndo.

Nàcuáa sàni iní ñáiyu ndècu ichi cuèhé ichi duha ndiíhì nàcuáa sàni iní ñáiyu ndècu ndiíhì Espíritú Yǎ Ndiòxí

¹⁶ Te na cǎchí tnúhu-í xii-ndo sǎ cáda-ndó nchàa nacuaá cuiní mée Espíritú Yǎ Ndiòxí cada-ndo, te ducaⁿ te vá cání-gǎ iní-ndó càda-ndo nǎndi nchaa sá cuèhé sá dúhá sàni iní mée-ndó. ¹⁷ Chi nchaa xiǎⁿ ñá túú tnàhá tnúhu-xi ndiíhì Espíritú Yǎ Ndiòxí. Te díu-ni ducaⁿ quide Espíritú Yǎ Ndiòxí, chi ñá túú tnàhá iní-xi nchaa sá cuèhé sá dúhá sàni iní-ndó. Te sǎ dúcáⁿ ñá túú tnàhá tnúhu tnàha-xi xiǎⁿ ñá túú ñihí ndéé-ndó càda-ndo ñⁿ sá váha sàni iní-ndó càda-ndo.

¹⁸ Te núu quide-ndo nchaa nacuaá sànu ichi ñaha Espíritú Yǎ Ndiòxí, te ñá túú-gǎ táxí tnùnì ñàhá nchàa tnúhu ní chídó tnùnì ndíi Moisés xii-ndo.

¹⁹ Te nchaa ñáiyu xiní-yu nchaa nàcuáa quide ñáiyu quide cuèhé quidé dúha. Te duha quidé-yu: Cue téé càháⁿ ndiíhì-güedé ñáiyu dǎhí te ñá díú ñàdihí-güedé cúú-yu, te díu-ni ducaⁿ xiquide cue ñáiyu dǎhí, te nǎndi-gǎ nchaa sá cuèhé sá dúhá cuǎháⁿ véxi-yu quidé-yu. ²⁰ Te quide cahnú-yu nchaa sá cǎchí-yu cùu ndiòxí te ñá ndǎá sá ndiòxí cúú-xí, te quide nduu tnahá-yu, te cùu ùhú iní tnáhá-yu, te nǎa-yu, te cùu cuinú tnáhá-yu, te ío yáchí cùdèèⁿ-yu, te nducú-yu mee-ni sǎ cúú-xí mée-yu, te ñá túú cùu ñⁿnuú-yu cundecú-yu, te quide díⁿ tnahá-yu. ²¹ Te cùu cuedú iní-yu

nchaa sá ndécú ndiíhì dava-gá-yu, te sàhni tnahá-yu, te ío quihú-yu, te ndí cuu ndí cuú-yu quidé-yu nchaa sá cuèhé sá dúhá, te nǎndi-gǎ nchaa sá cuèhé sá dúhá quidé-yu. Te sa cǎchí tnúhu-í xii-ndo sǎ nchǎá ñáiyu ducaⁿ xiquide vá ndúú tǎhú-yu cundecú-yu núu ndécú Yǎ Ndiòxí táxí tnùnì-gǎ.

²² Dico Espíritú Yǎ Ndiòxí chindèe ñaha-xi xii-o cuu iní tnáhá-ó, te cùdǎhí iní-ó ndècu-o, te ío váha cùu iní-ó, te cǎhnu iní-ó, te váha iní-ó, te cùndahú iní tnáhá-ó, te quide ndǎá-ó ndècu-o. ²³ Te ndàhú iní-ó, te quide-o nchaa nacuaá tàú-ó càda-o, te nchaa xiǎⁿ chindèe ñaha Espíritú Yǎ Ndiòxí quidé-ó, te núu ducaⁿ quide-o, te vá yòo ñⁿ-gǎ cáháⁿ sǎ ñá túú quide váha-o ndècu-o. ²⁴ Te nchoo cuè ñáiyu ndècu ndiíhì Xítohó Jesucristú, sa nàha-o sá ní xǎhí-gǎ núu cùrúxí sá cuendá-ó, núu xiǎⁿ duuⁿ duuⁿ ní dáñá-ó nchǎa ichi cuèhé ichi duha, te ñá túú-gǎ táxí tnùnì ñàhá ní ñⁿ sá cuèhé sá dúhá sǎ ní xóo cani iní-ó ní cùu. ²⁵ Te vitna ní ngündecu ndiíhì-o Espíritú Yǎ Ndiòxí chindèe ñaha-xi, te xinì ñuhu-xi sǎ cáda-ó nàcuáa sànu ichi ñaha Espíritú-gǎ cada-o.

²⁶ Te vá cáda cǎhnu-o mee-o, te vá nducú-ó plètú, te ni vǎ cúú cuedú iní-ó sǎ ndécú ndiíhì tnaha ñáiyu-o.

6

Chindee tnàha-o ñⁿ ñⁿ-o

¹ Te nchòhò ñáiyu ndècu ndiíhì-í ichi Xítohó Jesucristú cǎchí tnúhu-í xii-ndo sǎ ñuu ñⁿ ñáiyu ndècu ndiíhì-ndo ichi-gǎ ní quidé-yu ñⁿ sǎ ñá túú tàú-yu cadá-yu núu-gǎ, te nchòhò ñáiyu quide váha ndècu ndiíhì Espíritú Yǎ Ndiòxí cáháⁿ-ndó dǎho cue ñáiyu ducaⁿ xiquide-áⁿ cuendá nucúnu ichí-yu, te vii vii cáháⁿ ndiíhì-ndó-yu, te ío coto-ndo mée-ndo cuendá sá vǎ cáda-ndó ñⁿ sǎ ñá túú tàú-ndó càda-ndo núu-gǎ. ² Te ío chindee tnàha-ndo, te cuáha tnàha-ndo tnúhu ndee iní cundecu-ndo cuendá nchaa sǎ yǎha-ndo. Te núu ducaⁿ na càda-ndo, te quide-ndo nchaa nacuaá ní cáháⁿ Xítohó Jesucristú cada-o.

³ Te núu ío ñⁿ-ndo cǎchí-ndó sǎ ío váha quide-ndo ndecu-ndo ichi Yǎ Ndiòxí te ñá ndǎá ñá, te dicó dàndàhú-ndó mée-ndo sǎ dúcáⁿ quide-ndo. ⁴ Te ndí díⁿ ndí díⁿ càda cuendá-ndó ñuu quide váha-ndo ndècu-ndo àdi ñá túú quide váha-ndo. Te núu quide váha-ndo ndècu-ndo ña, te

cudíí iní-ndó sá cúu-xí mèe-ndo, te vá cání iní-ndó sá quidé vâha-gá-ndó dàcúúxí dâva-gá-yu. ⁵ Chi tàù-ó sá ndí dííⁿ ndí dííⁿ càda cuendá-ó nàcuáa ndècu-o.

⁶ Te nchaa nchòhò ñáyiù dâcuaha tnúhu Yá Ndiòxí chindee-ndo cuè téè dâcuaha ñaha xii-ndo tnúhu-gá cuáñaha-ndo nãndí sá xíní ñùhu-güedé.

⁷ Te vá dándàhú-ndó mèe-ndo cundecu-ndo, chi vá cúu cùdiquí ndeé-ó Yá Ndiòxí, chi nchòhò xíní-ndó sá núu na càda vâha-o cundecu-o, te cùu-xi ñíⁿ sá vâha sá cúu-xí-ó, dico núu vá cadá vâha-o ña, te ío ndoho-o te núu ducaⁿ na càda-o. ⁸ Te núu quide-o nchaa sá cuèhé sá dúhá sáni iní-ó, te ñiu-ni xíãⁿ dàcuíta nihnu ñaha-xi xii-o, dico núu quide-o nchaa nacuéa sànu ichi ñaha Espiritú Yá Ndiòxí xii-o, te cundecu ndíhi-o Yá Ndiòxí ní caa ní quíhíⁿ. ⁹ Te xini ñuhu-xi vá dáñá ndeé-ó càda vâha-o cundecu-o, te ducaⁿ te sáá nduu càda vâha ñaha Yá Ndiòxí xii-o, te núu vá ná tñhú iní-ó càda vâha-o cundecu-o. ¹⁰ Te cada-o sá vâha sá cúu-xí nchaa tnaha ñáyiù-o vitna ndecu-o ñuyíú-a, te ío-gá tàù-ó chindee-o cue ñáyiù ndècu ndíhi-o ichi Xítóhó Jesucristú.

Tnúhu ndéé núu ní ndíhi-ná

¹¹ Te cundehe-ndo sá ndãa ndãa lètrá tée-í núu tütú-a sá cúu-xí-ndó. ¹² Te nchaa ñáyiù quide yicá sá cuãha-ndo sèñá ñí-ndo dàtná ní cachí ndíí Moisés, ñáyiù-áⁿ cúu-yu ñáyiù cuini cudíu núu tnaha ñáyiù-xi. Te ducaⁿ quidé-yu cuendá sá vá ndóhò-yu cuendá nchaa tnúhu sá dánèhé ñáhá sá ní xíhí Xítóhó Jesucristú núu cùrúxí. ¹³ Te ní ñáyiù sa ní ngúndecu ndíhi sèñá ñí-xi ñá túú quidé-yu nchaa nàcuáa ní cáháⁿ ndíí Moisés, dico mée-yu cuini-yu sá cuãha-ndo sèñá ñí-ndo. Te ducaⁿ quidé-yu chi quide cahnú-yu mée-yu núu nchaa dâva-gá ñáyiù. ¹⁴ Te yúhú chi ñá túú quide cahnu-í mée-í cuendá nchaa sá quidé-í, chi mee-ni sá ío cùu vâha iní-í sá Xítóhó Jesucristú ní xíhí-gá núu cùrúxí cuendá-ó. Te ñiu cuendá sá ní xíhí-gá ñá túú-gã ndécù-í ichi cuèhé ichi duha, te ní ñà túú-gã táxí tnùní ñáhá ní ñíⁿ sá cuèhé sá dúhá xii-í. ¹⁵ Te ñá túú nã chíndèe ñaha-xi xii-o cuéi na cuãha-o sèñá ñí-ó àdi vá cuãha-o, chi ndècu ndíhi-o Xítóhó Jesucristú, te ní nduu-o dàtná ñíⁿ ñáyiù saa, te xíãⁿ cúu-xí sá ío-gá xíní ñùhu-xi. ¹⁶ Te xicáⁿ táhù-í núu Yá Ndiòxí sá ncháá nchòhò

ñáyiù quide nchaa nacuéa càháⁿ-í-a cundecu nahi-ndo, nchòhò ñáyiù cùu cuendá Yá Ndiòxí dàtná ñáyiù isràél chi ñáyiù-áⁿ ní cachí-gá sá cúu cuendá-gá. Te mee-gã ío cundàhú iní ñáhá-gã xii-ndo chindee ñaha-gã.

¹⁷ Te není vitna cuini-í sá vá yóo ñíⁿ-gã chidácá nihnu ñaha xii-í cuendá chiùⁿ quide-í, chi yayacáⁿ sa ní nduu tñhòhò ñí-í cuendá sá ndóhò-í cuendá Xítóhó Jesucristú.

¹⁸ Te nchòhò ñáyiù ndècu ndíhi-í ichi Xítóhó Jesucristú xicáⁿ táhù-í núu-gã sá ío na chindee ñaha-gã xii-ndo nchaa-ndo. Te ducaⁿ na cùnduu. Te ío chí cadá ndèe iní-ná vitna.

TUTÚ NÍ CADÚHA TÉ PÄBLÚ QUÍHÍⁿ NDAHA NÁYIU NÚÚ ÉFESÚ

Té Páblú cádúha-dé tutú quíhíⁿ ndaha náyiu xĩndecu ichi Xítohó Jesucristú ndécú nùú Éfesú

¹ Yúhú té Páblú ní tendaha ñaha Yá Ndiöxí cáháⁿ-í tnúhu Xítohó Jesucristú núú náyiu, chi ducaⁿ ní cachí Yá Ndiöxí cunduu, te vitna cádúha-í tutú-a cuendá daquixi-í ndaha nchaa nchòhó náyiu cùu cuendá Yá Ndiöxí xĩndecu nùú Éfesú, te diu-ni nchòhó cúu-ndó náyiu sàndáá iní ñháá xii Xítohó Jesucristú.

² Te xicáⁿ tãhú-í núú Dütú Ndiöxí Yaá cúú Tãtã-ó, ndihí núú Xítohó Jesucristú sá ná chĩndee chitúu ñaha-gá xii-ndo, te ducaⁿ ndĩ nduú-gá ná cádá te ío váha cuu iní-ndó cùndecu-ndo.

Espiritú Yá Ndiöxí chĩndee ñaha-xi xii-o chi ndècu ndihí-o Xítohó Jesucristú

³ Te cachí-ó sã ïo càhnu cuu Yá Ndiöxí Yaá cúú Tãtã Xítohó Jesucristú, te ndéé andiu quide Yá Ndiöxí nchaa sá váha sá cúu-xí-ó cuendá sá ndécú ndihí-o Espiritú-gá, te ducaⁿ quide-gá chi ndècu ndihí-o Xítohó Jesucristú. ⁴ Te ndéé cùtnàhá vátá ngáva-gá ñuyúú ní cachí Yá Ndiöxí sá nchóó cùu-o náyiu cùu cuendá-gá, te ducaⁿ ní cachí-gá sá cuendá Xítohó Jesucristú cuendá sá nchóó cùu-o náyiu ñá túú tnàhí ná cumání cundecu núú-gá, te ducaⁿ te vá cùndècu cuéchi-o. ⁵ Te Yá Ndiöxí ío cùu iní ñháá-gá xii-o nùu xiãⁿ ducaⁿ ní cachí-gá ndéé cùtnàhá vátá ngáva-gá ñuyúú sã nchóó ndùu-o déhe-gá. Te sã cuendá nchaa sá cádá Xítohó Jesucristú sá cúu-xí-ó, xiãⁿ ducaⁿ ní cachí Yá Ndiöxí, te ducaⁿ ní cachí-gá chi ducaⁿ tnàhí ní sani iní-gá cunduu. ⁶ Te xiãⁿ nùu xini ñuhu-xi sá nchóó cãchí-ó sã ïo càhnu cuu Yá Ndiöxí, chi ío cùndahú iní ñháá-gá chĩndee ñaha-gá xii-o. Te ducaⁿ quide-gá chi ndècu ndihí-o Xítohó Jesucristú Yaá ío cùu iní-gá. ⁷ Te Yá Ndiöxí ío cùu iní ñháá-gá xii-o nùu xiãⁿ Xítohó Jesucristú ní sati ñhí-gá te ní xihí-gá cuendá dacacu nihnu ñaha-gá xii-o nùú úhú núú ndahú, te ducaⁿ càda cahnu iní-gá nchaa yícá cuéchi-o. ⁸ Te Yá Ndiöxí ío cùndahú iní ñháá-gá chĩndee ñaha-gá xii-o, nàcuáa ngùndecu ndihí-o

nchàa sá xini tnùnì-ó te ducaⁿ te cuu-o náyiu tècú tnùnì. ⁹ Te Yá Ndiöxí ní dánèhé ñháá-gá xii-o nchàa sá ndúú yùhu, nchaa sá ní sani iní-gá cada-gá. Te ducaⁿ ní quide-gá chi ducaⁿ ní sani iní-gá cunduu. ¹⁰ Te sã ní sani iní-gá cada-gá te dacuití sã cádá-gá ná sàá nduu, te na sàá nduu-án te mee-gá cada sá Xítohó Jesucristú quindaha-gá nchaa sá ío andiu, ndihí nchaa sá ïo ñuyúú-a.

¹¹ Te nchoo ní nduu tãhú-ó ní nduu-o náyiu cùu cuendá Yá Ndiöxí chi ndècu ndihí-o Xítohó Jesucristú. Te ducaⁿ ní cuu chi ducaⁿ tnàhí ní sani iní Yá Ndiöxí cunduu. Te nchaandi túhú sá quidé-gá, quide-gá nàcuáa sàni iní mée-gá cunduu. ¹² Te ducaⁿ ní cuu cuendá sá nchúhú náyiu díhna nuu ní sàndáá iní tnúhu Xítohó Jesucristú cáháⁿ-ndí sá ïo càhnu cuu mee Yá Ndiöxí cuendá nchaa sá váha quide-gá. ¹³ Te nchòhó tucu cùtnàhá ní xĩndedóho-ndo tnúhu ndáá tnúhu sá cáháⁿ nàcuáa naníhí tãhú-ó ní cuu ñnùu-ndo ndihí Xítohó Jesucristú chi ní sàndáá iní-ndó-gá. Te xiãⁿ cùtnùnì sá nchòhó ní nduu-ndo náyiu cùu cuendá Yá Ndiöxí, chi ní ngùndecu ndihí-ndo Espiritú-gá sá ní cachí-gá taxi-gá. ¹⁴ Te sã ndécú ndihí-o Espiritú Yá Ndiöxí xiãⁿ cùtnùnì sá ndáá nduu tãhú-ó cùndecu-o ndihí-gá ná sàá nduu nàcuaca ñaha-gá xii nchaa nchoo náyiu cùu cuendá-gá, te sá dúcáⁿ càda-gá nùu xiãⁿ tàú-ó cãchí-ó sã ïo càhnu cuu-gá.

Té Páblú xicáⁿ tãhú-dè núú Yá Ndiöxí cuendá cue náyiu ndècu ichi-gá

¹⁵ Te yúhú ñihí-í tnúhu sá nchòhó ío váha sàndáá iní-ndó Xítohó Jesucristú, te nchaa náyiu cùu cuendá Yá Ndiöxí ío cùu iní-ndó-yu. ¹⁶ Te xiãⁿ nùu ñá túú dàña ndéé-í ndacáⁿ tãhú-í núú-gá cuendá-ndó, te ío xicáⁿ tãhú-í ¹⁷ núú Yá Ndiöxí Yaá cúú Tãtã Xítohó Jesucristú cuendá-ndó. Te diu-ni Yá Ndiöxí cúu-gá Yaá ío càhnu cuu. Te xicáⁿ tãhú-í núú Yá Ndiöxí sá mée-gá ná cádá sã Espiritú-gá chĩndee ñaha-xi xii-ndo cuendá cuu-ndo náyiu tècú tnùnì, te na càda-xi sá cùtnùnì iní-ndó nàcuáa sàni iní Yá Ndiöxí. ¹⁸ Te ducaⁿ xicáⁿ tãhú-í núú Yá Ndiöxí cuendá-ndó, cuendá sá nchòhó tecú tnùnì-ndó nàcuáa ndùu tnúhu ndee iní ní taxi-gá ní ngùndecu ndihí-ndo cùtnàhá ní cáháⁿ ñháá-gá xii-ndo. Te ducaⁿ cùtnùnì tucu iní-ndó sã ncháá sã ní cachí-gá taxi-gá nduu tãhú nchoo cuè náyiu cùu cuendá-gá

cúu-xí mèe cuii-ni sá ïo-gá váha. ¹⁹ Te cùtnuní tucu iní-ndó sá Yá Ndiöxí ío càhnu cuu-gá quidé-gá nchaa núú sá váha sá cúu-xí nchò ñáyiú sándáá iní ñáhá xii-gá, chí quide-gá sá vǎ yòo tñàhí ndàcu cada sá cúu-xí-ó dàtná ní quide-gá ²⁰ ní dándótó-gǎ Xítóhó Jesucristú cùtnàhá ní xihí-gá. Te ní taxinucóo-gá Xítóhó Jesucristú xio cùha-gá táxí tñuní-gá. ²¹ Te Xítóhó Jesucristú ío-gá cùnùu-gá dácúuxí nchàa núú cuè espíritú, ndihí dácúuxí nchàa cue tée yindaha ñáyiú, ndihí dácúuxí nchàa dava-gá cue tée cùnùu. Te cuèi vitna te cuèi ndéé núú cuaháⁿ núú vèxi ducaⁿ-ni ïo cùnùu-gǎ taxi tñuní-gá. ²² Te mee Yá Ndiöxí ní quide-gá sá Xítóhó Jesucristú taxi tñuní-gá nchaandi túhú sá ìó, te ñu-ni mee Yá Ndiöxí ní cachí-gá sá ncháá ñáyiú cùu cuendá-gá quindaha ñaha Xítóhó Jesucristú. ²³ Te cada iní-ó sá ncháá ñáyiú cùu cuendá Yá Ndiöxí cúu-yu yiqui cùñú Xítóhó Jesucristú, chí ñⁿ-ni cùu-yu ndihí-gá, te mee-gǎ táxí tñuní-gá nchaandi túhú sá ìó.

2

Yá Ndiöxí ío cùndahú iní ñáhá-gǎ xii-o núu xiǎⁿ ní dácácu nihnu ñaha-gǎ

¹ Te nchòhó cúu-ndó dàtná ñáyiú ní xihí cuendá nchaa sá cuèhé sá dúhá quide-ndo ní cuu, dico vitna cada iní-ndó sá dàtná ní ndoto-ndo chí ní nduu tǎhú-ndó cùn-decu-ndo ndihí Yá Ndiöxí ní caa ní quíhíⁿ. ² Te ducaⁿ ní xindecu-ndo ichi cuèhé ichi duha, chí ní cáncicúⁿ nihnu-ndo nchàa sá cuèhé sá dúhá ìó ñuyúí-a, te ní xóo cada-ndo nchàa nacúáa càháⁿ sácúíhna, te ñu-ni sácúíhna-áⁿ táxí tñuní-xi nchaa dava-gá espíritú cùndihí-xi, te ñu-ni-xi ndècu ndihí-xi nchaa ñáyiú ñá túú cuini tñú tñúhu càháⁿ Yá Ndiöxí, te dàcaháⁿ ñáhá-xí xii-yu cuendá cundecu-ní-yu ichi cuèhé ichi duha. ³ Te nchaa-o ñuⁿ ní xóo cada-o dàtná quidé cuè ñáyiú-áⁿ, chí ní xóo cada-o nchàa sá cuèhé sá dúhá ní xóo cani iní-ó, te nándi-gá nchaa sá cuèhé sá dúhá ní xóo cahu iní-ó ní xóo cada-o, núu xiǎⁿ tǎu-ó sá dándòho ñaha Yá Ndiöxí xii-o ní cùu datná tǎu-xi dándòho-gá nchaa ñáyiú ducaⁿ ndècu ichi cuèhé ichi duha-áⁿ. ⁴ Te Yá Ndiöxí ío cùu iní ñáhá-gǎ xii-o núu xiǎⁿ ní cundàhú iní ñáhá-gǎ xii-o ⁵ cuèi cùu-o datná ñáyiú ní xihí sá cuendá nchaa sá cuèhé sá dúhá quide-o ní cuu. Te ducaⁿ ní quide-gá ní cundàhú iní ñáhá-gǎ xii-o

cuendá cundecu-o ndihí Xítóhó Jesucristú vitna, te cuu ñⁿnuu-o ndihí-gá. Te sá cuendá-ni sá cùndàhú iní ñáhá Yá Ndiöxí xii-o xiǎⁿ ní quide-gá nàcuáa nchoo naníhí tǎhú-ó. ⁶ Te cada iní-ó sá dàtná ní quide Yá Ndiöxí cùtnàhá ní dándótó-gǎ Xítóhó Jesucristú cùtnàhá ní xihí-gá ducaⁿ ní quide ñaha-gǎ xii-o chí ndècu-o ndihí-gá vitna. Te Xítóhó Jesucristú sa ndècu-gá andiu núú ndécú Yá Ndiöxí. Te cada iní-ó sá Yá Ndiöxí sa ní quide-gá sá nchòhó ní ngùndecu túu-o ndihí Xítóhó Jesucristú, chí ïo váha ndècu-o vitna. ⁷ Te Yá Ndiöxí quidé váha ñaha-gǎ xii-o vitna cuendá sá ná sáá nduu, te ñu-ni mee-gǎ cada te cutnùní iní nchaa ñáyiú sá ìó cùu iní ñáhá-gǎ xii-o, te ducaⁿ ïo chindee chítuu ñaha-gǎ xii-o cuendá sá ndécú ndihí-o Xítóhó Jesucristú. ⁸ Te Yá Ndiöxí ío cùndahú iní ñáhá-gǎ xii-ndo núu xiǎⁿ ní quide-gá sá nchòhó naníhí tǎhú-ndó. Te ducaⁿ ní quide-gá chí ní sándáá iní-ndó-gǎ. Te ñá díú sá cuendá ñⁿ chiúⁿ ní quide-ndo ducaⁿ ní naníhí tǎhú-ndó, chí mee Yá Ndiöxí ní cuini-gá sá dicó-ni ducaⁿ naníhí tǎhú-ndó. ⁹ Te mee Yá Ndiöxí ní cachí-gá sá ñá díú cuendá ñⁿ chiúⁿ quide-o naníhí tǎhú-ó, te ducaⁿ ní cachí-gá cuendá sá vǎ cádá càhnu-o mee-o. ¹⁰ Te Yá Ndiöxí ní quide ñaha-gǎ xii-o dàtná ñⁿ ñáyiú saa cuendá sá ní tñahá tñúhu-o ndihí Xítóhó Jesucristú, te ducaⁿ ní quide-gá cuendá sá cádá-ó mèe-ni sá váha. Te Yá Ndiöxí ducaⁿ tñahí ní sani iní-gá cunduu sá nchòhó cùu-o ñáyiú cada mee-ni sá váha.

Xítóhó Jesucristú quidé-gǎ ío váha cùu iní-ó ndècu-o

¹¹ Te nchòhó chí dándàcu iní nàcuáa ní xindecu-ndo ní cùu, chí ñá túú cùu-ndo ñáyiú isràél, te ni ñá túú quide-ndo datná quidé ñáyiú-áⁿ, chí ñáyiú-áⁿ sàha-yu señá ñí-yu, te dàquee tǎhú-yu nchaa ñáyiú ñá túú ndècu señá ñí-xi. ¹² Te chí dándàcu iní nàcuáa ní xindecu-ndo, chí dàvá-áⁿ ñá túú ní xindecu-ndo ndihí Xítóhó Jesucristú, te ni ñá túú ní xóo cuu tñahá tñúhu-ndo ndihí ñáyiú isràél, te ni ñá túú ní xini tñuní-ndó nàcuáa ndùu tñúhu sá ní càháⁿ ndáá Yá Ndiöxí nàcuáa cada váha-gǎ ñáyiú, te ni ñá túú ní cùu-ndo ñáyiú quindaha-gǎ, te ni ñá túú ní xóo ñihí-ndó tñúhu ndee iní sá cùndècu-ndo ndihí-gá. ¹³ Te cuèi ní cuu-ndo ñáyiú ñá túú tñahá tñúhu ndihí Yá Ndiöxí

ní cùu, dico vitna ní tnahá tnúhu-ndo ndìhi-gá chi cùu ìnⁿnuu-ndo ndìhi Xítohó Jesucristú, cuèndá sá nǐ satí nǐnǐ-gǎ te ní xǐhí-gá te xǐǎⁿ ducaⁿ tnahá tnúhu-ndo ndìhi Yá Ndiòxí vitna. ¹⁴ Te Xítohó Jesucristú ní quide-gá sá nchóó ìo váha cuu iní-ó cùndecu-o, te ðiu-ni-gá ní quide cuèndá sá vǎ dáquèe tǐhú ñáhá ñáyiú isràél xii ñáyiú ñá túú cùu ñáyiú isràél, te ducaⁿ ìnⁿ-ná cuú-yu cundecú-yu. ¹⁵ Te sá ní xǐhí Xítohó Jesucristú, xǐǎⁿ ñá túú-gǎ cúnúu nchaa tnúhu sá sánú ichi ñaha xii ñáyiú nàcuáa cadá-yu cundecú-yu ni cùu. Te ducaⁿ nǐ xǐhí Xítohó Jesucristú cuèndá sá cuè ñáyiú isràél ndìhi cue ñáyiú ñá túú cùu ñáyiú isràél ìnⁿ-ná cuú-yu cundecú-yu ichi-gá, te ducaⁿ te vǎ dáquèe tǐhú tnahá-gǎ-yu, te ìo váha cundecu ndìhi tnahá-yu. ¹⁶ Te ducaⁿ nǐ quide Xítohó Jesucristú ní xǐhí-gá núú cùrúxí cuèndá sá cuè ñáyiú cùu ñáyiú isràél ndìhi cue ñáyiú ñá túú cùu ñáyiú isràél vǎ dáquèe tǐhú tnahá-gǎ-yu. Te ducaⁿ nǐ xǐhí-gá cuèndá ìnⁿ-ná cuú-yu tnahá tnúhu-yu ndìhi Yá Ndiòxí nàcuáa cuu váha iní ñáhá-gǎ xǐí-yu.

¹⁷ Te cuèi cùu-ndo ñáyiú ñá túú tnahí xini ndáá cuèndá Yá Ndiòxí ní cùu, dico Xítohó Jesucristú ní quixi-gá ñuyúí-a ní cǎháⁿ-gá tnúhu váha nàcuáa ìo váha cuu iní-ndo cùndecu-ndo ndìhi Yá Ndiòxí. Te ðiu-ni ducaⁿ nǐ quide-gá sá cùú-xí nchaa ñáyiú sa xini cuèndá Yá Ndiòxí, ðiu-ni ñáyiú isràél. ¹⁸ Te cuèi cùu-o ñáyiú isràél àdi ñá túú cùu-o dico ðiu-ni mee Xítohó Jesucristú ní quide-gá sá ncháá-ó tnahá tnúhu-o ndìhi Dútú Ndiòxí Yáa cùú Tǎtá-ó. Te ducaⁿ nǐ tnahá tnúhu-o ndìhi Yá Ndiòxí chi ní ngúndecu ndìhi-o Espíritú-gá. ¹⁹ Te nchòhó ñáyiú ñá túú cùu ñáyiú isràél ní cuu-ndo ñáyiú ñá túú tnahá tnúhu ndìhi Yá Ndiòxí ní cùu, dico vitna chi ìnⁿ-ná ní cuu-ndo ndìhi nchaa dava-gá ñáyiú cùu cuèndá-gá chi cùu-ndo déhe-gá. ²⁰ Te cada iní-ó sǎ cuè tée ní táuchíúⁿ Xítohó Jesucristú cǎháⁿ tnúhu-gá, ndìhi cue tée ní xóo cǎháⁿ tnúhu Yá Ndiòxí ndéé sanaha cùu-güedé dàtná cimièntú ìnⁿ vehe, te nchòhó cùú-ndó dàtná ndóho sá sǎa vehe-áⁿ, te cada tucu iní-ó sǎ Xítohó Jesucristú cùú-gǎ ìnⁿ yúú cúnúu cuu cimientú vehe-áⁿ. ²¹ Te ducaⁿ ìo váha cùu ìnⁿnuu nchaa ndóho-áⁿ ndìhi yúú cúnúu-áⁿ, te ducaⁿ tucu ìo váha ta

quèe tnahá nchaa ndóho-áⁿ cuáaá. Te xǐǎⁿ cada iní-ó sǎ cùú-xí vehe Yá Ndiòxí, vehe sǎ ìo ní cuu íí. Te ducaⁿ sǎtnahá-xi cùu nchaa ñáyiú ndècu ichi Xítohó Jesucristú chi ní tnahá tnúhu-yu ndìhi-gá, te ìnⁿ nduu ìnⁿ nduu ta cùu vii cuu váha-gá-yu núú Yá Ndiòxí cuáháⁿ. ²² Te tnahá nchòhó ducaⁿ sǎtnahá-xi cùu-ndo chi ní ngúndecu ndìhi-ndo Xítohó Jesucristú, te ducaⁿ ta cùu vii cuu váha tucu-ndo núú Yá Ndiòxí cuáháⁿ, te cùu-ndo datná vehe Yá Ndiòxí chi ndècu ndìhi-ndo Espíritú-gá.

3

Té Pǎblú yǐhí ðiquí-dě cǎháⁿ-dé tnúhu Xítohó Jesucristú núú ñáyiú ñá túú cùu ñáyiú isràél

¹ Te yúhú té Pǎblú yǐhí-í vecaá sá cuèndá sá cǎháⁿ-í tnúhu Xítohó Jesucristú núú nchòhó ñáyiú ñá túú cùu ñáyiú isràél, núu xǐǎⁿ ðiu cuèndá-gá duha yǐhí-í vecaá vitna. ² Te nchòhó sa ñaha-ndo sǎ Yá Ndiòxí ní cundáhú iní ñáhá-gǎ xii-í, te ní cachí-gá sá yúhú quíhi ðiquí-í cǎháⁿ-í tnúhu Xítohó Jesucristú núú-ndó, te cuèndá sá cǎháⁿ-í tnúhu-gá núú-ndó te cuu-xi sǎ vǎha sá cùú-xí-ndó. ³ Te yúhú sa ní cachí tnúhu-í xii-ndo lùha nacuáa ndúu tnúhu ndúu yuhu ni cuu, sá nǐ cachí tnúhu Yá Ndiòxí xii-í. ⁴ Te òrè dàcuaha-ndo tnúhu ndúu yuhu-áⁿ ní cùu te quini-ndó sǎ yúhú tècu tnúni-í nàcuáa ndúu tnúhu-áⁿ, te tnúhu-áⁿ cǎháⁿ-xi cuèndá Xítohó Jesucristú. ⁵ Te tnúhu-áⁿ cùú-xí tnúhu sá vǎ yóo tnahí xini ní cùu, dico cue tée ní táuchíúⁿ Xítohó Jesucristú cǎháⁿ tnúhu-gá, ndìhi cue tée cǎháⁿ nàcuáa dàcahu iní ñáhá Yá Ndiòxí ní nǐhí-güedé tnúhu ndúu yuhu-áⁿ, chí Espíritú Yá Ndiòxí ní xǎháⁿ-xi xii-güedé. ⁶ Te duha cǎháⁿ tnúhu ndúu yuhu-áⁿ ní cùu: “Cuèi ñáyiú ñá túú cùu ñáyiú isràél te cuèi ñáyiú cùu ñáyiú isràél dico ìnⁿ-ni ndúu tǎhú-yu sá vǎha núú Yá Ndiòxí, te núu na quèndáá iní-yu tnúhu sá cǎháⁿ nàcuáa naníhí tǎhú-yu, te ìnⁿ-ná cùú-yu cundecú-yu, te ducaⁿ ìnⁿ-ni cada váha ñaha Yá Ndiòxí xǐí-yu te núu na cùndecu ndìhi-yu Xítohó Jesucristú”, duha ndúu tnúhu ndúu yuhu-áⁿ ní cùu. ⁷ Te Yá Ndiòxí ní cundáhú iní ñáhá-gǎ xii-í ní taxi-gá chùⁿ quide-í cǎháⁿ-í tnúhu-gá, te mee-gǎ quidé-gǎ sá yúhú ndacu-í cǎháⁿ-í tnúhu-gá. ⁸ Te nchaa ñáyiú

cùu cuendá Yá Ndiòxí cùu-yu ñáyiú ío-gá cùnùu cada-yu chiùn-gá dàcúúxí yùhú, te cuèi ducaⁿ dico Yá Ndiòxí ní cundàhú iní ñáhá-gá xii-í ní taxi-gá chiùn quide-í càháⁿ-í tnúhu-gá núu cuè ñáyiú ñá túú cùu ñáyiú isràél. Te tnúhu-gá-án càháⁿ-xi sá sùúni ío váha cada ñaha Xítohó Jesucristú xii-o. ⁹ Te ducaⁿ ní cachí Yá Ndiòxí sá càháⁿ-í tnúhu-gá cuendá danèhé-í nchaa ñáyiú. Te sá danèhé-í-yu-án cúu-xí tnúhu ndùu yuhu sá ní sani iní-gá ndéé sanaha nàcuáa cada váha-gá cue ñáyiú. Te ndéé dàvá-án ní quesaha ndùu yuhu tnúhu-án ní cùu. Te diu-ni-gá cúu-gá Yá ní cadúha nchaandi túhú sá ío. ¹⁰ Te ducaⁿ ndùu yuhu tnúhu-án ní cùu cuendá sá ncháá espíritú cùnùu ndecu andíu quini-xi vitna nàcuáa quide nchaa ñáyiú ní tuha ñaha xii Yá Ndiòxí cuendá ducaⁿ cùtnuní iní-xi sá ío váha cùtnuní iní-gá nàcuáa cada-gá. ¹¹ Te Yá Ndiòxí ní sani iní-gá ndéé sanaha nàcuáa ní cuini-gá cada Xítohó Jesucristú, te ní sáá nduu ní quide Xítohó Jesucristú nàcuáa ní cuini Yá Ndiòxí cada-gá. ¹² Te vitna cùyii-o càháⁿ ndihi-o Yá Ndiòxí cuendá sá ndécú ndihi-o Xítohó Jesucristú, te sandáá iní-ó-gá. ¹³ Te núu xián càháⁿ-í dóho-ndo sá cuèi duha ndòho-í vitna dico vá ná túhú iní-ndó cànchicúⁿ nihnu-ndo ichi Xítohó Jesucristú. Te sá dúhá ndòho-í te cùu-xi sá váha sá cúu-xí-ndó, chi cuu-ndo ñáyiú cùu cahnu núu Yá Ndiòxí.

Xítohó Jesucristú ío cùu iní ñáhá-gá xii-o

¹⁴ Te sá cuendá nchaa sá ní sani iní Dútú Ndiòxí quidé-gá xián yúhú nguñí xiti-í núu-gá càháⁿ ndihi-í-gá, te diu-ni-gá cúu Yáá cúu Tátá Xítohó Jesucristú. ¹⁵ Te mee Yá Ndiòxí ní cachí-gá sá ncháá espíritú ndécú andíu cunduu-xi datná ní cachí mée-gá cunduu-xi. Te ní cachí tucu-gá sá nchóo cùu-o ñáyiú, te cunduu-o datná cuini mée-gá cunduu-o. ¹⁶ Te xicáⁿ táhú-í núu Dútú Ndiòxí sá Espíritú-gá ná cáda nàcuáa cuita níhí ndéé-gá-ndó quíhíⁿ ndecu-ndo ichi-gá, te ducaⁿ xicáⁿ táhú-í núu-gá cada Espíritú-gá chi ío cahnu cuu-gá. ¹⁷ Te xicáⁿ táhú tucu-í núu Yá Ndiòxí sá Xítohó Jesucristú ná cundecu ndihi ñaha-ni-gá xii-ndo chi sandáa iní-ndó-gá, te ducaⁿ te vá dáhá ndéé-ndó ío cuu iní tnáhá-ndó. ¹⁸ Te xicáⁿ táhú tucu-í núu Yá Ndiòxí cuendá-ndó ndihi cuendá dava-gá ñáyiú cùu cuendá-gá, cuendá sá cùtnuní iní-ndó sá súúni cùu iní

ñáhá Xítohó Jesucristú xii-o. ¹⁹ Te duha xicáⁿ táhú-í núu Yá Ndiòxí chi cuini-í sá ncháá-ndó təcú tnúni-ndó sá ío cùu iní ñáhá Xítohó Jesucristú xii-o cuèi vá ndácú càva-o quini-ó nàcuáa cùu iní ñáhá-gá xii-o. Te xicáⁿ táhú tucu-í núu Yá Ndiòxí sá ío na cundecu ndihi ñaha-gá xii-ndo, te ducaⁿ cànchicúⁿ nihnu-ndo cada-ndo nchaa nàcuáa quide mee-gá.

²⁰ Te Yá Ndiòxí ío-gá vai sá ndácú-gá taxi-gá dàcúúxí sá xicáⁿ-ó núu-gá, te cuèi ndéé nchaa sá ñá túú sani iní-ó níhí-ó te taxi-gá, te ducaⁿ chi mee-gá ndécú ndihi ñaha-gá xii-o, te ndácú-gá quidé-gá nándi sá váha sá cúu-xí-ó. ²¹ Te vitna nchaa nchoo ñáyiú ndecu ichi Xítohó Jesucristú chí ná cächí-ó sá ío cahnu cuu Yá Ndiòxí, te ducaⁿ-ni càháⁿ-ó sá ío cahnu cuu-gá ní caa ní quíhíⁿ chi ndecu ndihi-o Xítohó Jesucristú. Te ducaⁿ na cunduu.

4

Espíritú Yá Ndiòxí quidé-xí cùu ñnuu-o ndecu-o

¹ Te yúhú té Páblú yíhí-í vecáá sá cuendá Xítohó Jesucristú, te càháⁿ ndáhú-í núu-ndó sá cáda váha-ndo cundecu-ndo datná táu-xi cada cue ñáyiú ní càháⁿ Yá Ndiòxí cundecu ndihi-gá. Te nchòhò tnáhá-ndó cùu-ndo ñáyiú ní càháⁿ ñáhá Yá Ndiòxí cundecu ndihi-gá. ² Te vá cáda cahnu-ndo mee-ndo, cunduu váha iní-ndó, cunduu cahnu iní-ndó, te cuu iní tnáhá-ndó nàcuáa ducaⁿ cundee iní-ndó núu ná cúu sá cùmáni núu tnáhá-ndó. ³ Te ío nducu ndèe-ndo cuu ñnuu-ndo cundecu-ndo, chi Espíritú Yá Ndiòxí chindee ñaha-xi xii-ndo, te ducaⁿ ío váha cuu iní-ndó cundecu-ndo chi cùu ñnuu-ndo. ⁴ Te nchoo ñáyiú ndecu ichi Xítohó Jesucristú ñni-ndó cùu-o, te ducaⁿ ñni-ndó Espíritú Yá Ndiòxí ndécú, te diu-ni ducaⁿ ñni-ndó tnúhu ndee iní ní ngúndecu ndihi-o cùtnáhá ní càháⁿ ñáhá Yá Ndiòxí xii-o. ⁵ Te ñni-ndó Xítohó Jesucristú ndécú táxi tnuní ñáhá-gá xii-o, te ñni-ndó cùu-o sandáa iní-ó tnúhu-gá, te ñni-ndó ní sandute-o. ⁶ Te ñni-ndó Dútú Ndiòxí cúu Yáá cúu Tátá-ó ncháa-o, te diu-gá cùnùu-gá yíndàha ñaha-gá xii-o ncháa-o. Te Yá Ndiòxí dácàháⁿ-gá iní-ó quide-o chiuⁿ-gá, te ducaⁿ ndecu ndihi ñaha-gá xii-o ncháa-o.

⁷ Te nchoo ndé dííⁿ ndé dííⁿ chindee ñaha Yá Ndiòxí xii-o quide-o nàcuáa ndùu chiuⁿ ní cachí Xítohó Jesucristú cada-o. ⁸ Te quèe

ndáá-xi nàcuáa càháⁿ-xi núu tùtù Yă Ndiôxi núu cächí-xi:

Xítohó Jesucristú cuánda-gá andiu te ío cùnuu-gá,

chi nchaa cue espíritú cúu ùhú iní ñáhá xii-gá ñá túu ní ndàcu-xi naá ndíhi ñaha-xi xii-gá,

te mee-gá ní cachí-gá nàcuáa ndùu chiuⁿ nduu táhú ìⁿ ìⁿ ñáyiú cada-yu.

Duha cächí-xi núu tùtù-gá.

⁹ Te sá dúcáⁿ càháⁿ-xi sá cuánda-gá andiu xíáⁿ cútnùní iní-ó sá ní cuuⁿ-gá ñuyúí-a. ¹⁰ Te Xítohó Jesucristú ní cuuⁿ-gá ñuyúí-a, te diu-ni-gá cuánda-gá andiu cuèndá ío cunuú-gá taxi tñuní-gá nchaandi túhú sá ío. ¹¹ Te ní dácãhñu-gá cue tée xinu cuechi núu-gá ìⁿ ìⁿ núu chiúⁿ cada-güedé. Te ní cachí-gá sá dáva-güedé càháⁿ-güedé tñúhu-gá, te dava-güedé ní cachí-gá sá càháⁿ-güedé nàcuáa dachahu iní ñáhá Yă Ndiôxi xii-güedé. Te dava-güedé ní cachí-gá sá cúu-güedé cue tée datécú tñúhu cue ñáyiú nàcuáa cada-yu nanfí tàhú-yu. Te dava-güedé ní cachí-gá sá cúu-güedé cue tée quindaha ñaha xii ñáyiú dacuaha ñaha-güedé xii-yu tñúhu-gá. ¹² Te ducaⁿ ní cachí-gá cada cue tée-áⁿ cuèndá canu ichi-güedé cue ñáyiú cùu cuèndá Yă Ndiôxi cuèndá ducaⁿ ñáyiú-áⁿ níhi-yu nàcuáa cada-yu chiúⁿ-gá, te ducaⁿ cuita níhi ndéé-gá-yu cundecú-yu ichi Xítohó Jesucristú. ¹³ Te ducaⁿ ní cachí Xítohó Jesucristú cunduu ndéé sáá nduu cùu ìⁿ nuu-o quindáá iní-ó tñúhu-gá, te ducaⁿ cùu ìⁿ nuu-o tecú tñuní-ó nàcuáa ndùu cuèndá-gá chi diu-gá cúu-gá Déhe Yă Ndiôxi, te cuu-o ñáyiú ío quide ndáá dàtná quidé mèe Xítohó Jesucristú. Te ducaⁿ te ñá túu tñàhí-gá ná cùmání-ó núú Yă Ndiôxi. ¹⁴ Te ducaⁿ te vá cúu-gá-ó dàtná cue landú vátá cútnùní váha-gá iní-xi, te ní vá cáda-gá-ó dàtná quidé ndüte lamár, chi ndute-áⁿ òré quené tächí te cuáháⁿ-xi duha cuáháⁿ-xi dácáⁿ, te ducaⁿ chi vá quindáá-gá iní-ó tñúhu càháⁿ nchaa ñáyiú dandahú ñáhá xii-o, chi ñáyiú-áⁿ ío váha xitó-yu nàcuáa dandahú ñáhá-yu xii-o chi cächí-yu sá càháⁿ-yu tñúhu Yă Ndiôxi dico ñá ndáá. ¹⁵ Te nchoo ío cuu iní tñáhá-ó, te vá dándahú tñáhá-ó, chi càháⁿ-ó mèe-ni sá ndáá. Te xini ñuhu-xi sá ìⁿ nduu ìⁿ nduu cuita cada ndáá-gá-ó quíhíⁿ dàtná quidé ndáá méé-gá, te diu-ni-gá cúu-gá Yá

cúnùu cuu díhna tàxi tñuní ñáhá-gá xii-o.

¹⁶ Te diu-ni Xítohó Jesucristú quidé ñaha-gá xii nchaa nchoo ñáyiú ndècu ichi-gá dàtná yiqui cùñú méé-gá, chi ìⁿ yiqui cùñú ío váha ní queé tñaha ìⁿ ìⁿ xichi, te ducaⁿ yíhi túchi yiqui cùñú-áⁿ yótnií-xi nchaa nacuáa ní queé tñaha. Te ducaⁿ sãtnahá-xi cùu nchoo chi ìⁿ-ni cùu-o ndecu-o ichi Xítohó Jesucristú táxi tñuní ñáhá-gá xii-o. Te núu nchoo quide-o nchaa nacuáa tàxi-xi cunduu te cùu iní tñáhá-ó, te ducaⁿ ta níhi ndéé-gá-ó cuáháⁿ ndécú-ó ichi-gá.

Vá cáda-gá-ó dàtná ní xóo cada-o cùtnàhá ní xindecu-o ichi cuehé ichi duha

¹⁷ Te vitna yúhú càháⁿ-í dóho-ndo quide-í núu Xítohó Jesucristú sá vá cùndècu-gá-ndó dàtná xindecu ñáyiú ñá túu sàndáá iní ñáhá xii Yă Ndiôxi, chi nchaa ñáyiú-áⁿ ñá túu vèdana nàndíhi nchaa sá sání iní-yu. ¹⁸ Te ní ñá túu vèdana cùtnuní iní-yu nàcuáa ndùu tñúhu ndáá tñúhu Yă Ndiôxi. Te ñáyiú-áⁿ ñá túu ndùu táhú-yu cundecú-yu nàcuáa cuimí Yă Ndiôxi, chi ñá túu vèdana tècú tñuní-yu te ducaⁿ chi ío sàá iní-yu. ¹⁹ Te ñá túu tñàhí-gá ná sání iní-yu ndécú-yu ichi cuehé ichi duha, te ío cùdíí iní-yu ndécú-yu ichi díí iní, te ñá díú-ní xíáⁿ chi nándi-gá nchaa sá cuehé sá dúhá quidé-yu ndécú-yu. ²⁰ Dico tñúhu Xítohó Jesucristú sá ní sàndáá iní-ndó chi ñá túu dùcáⁿ sanu ichi ñaha-xi xii-ndo cada-ndo. ²¹ Te nchòhó ní cutnùní iní-ndó nàcuáa ndùu cuèndá Xítohó Jesucristú, te dàcuaha-ndo tñúhu ndáá diu-ni tñúhu-gá nàcuáa ndècu-ndo ichi-gá. ²² Te vitna vá cáni-gá iní-ndó càda-ndo datná ní xóo cada-ndo cùtnàhá ní xindecu-ndo ichi cuehé ichi duha, chi núu nchaa-ni sá cuehé sá dúhá-áⁿ ná cùhuⁿ-ni iní-ndó càda-ndo, te uuⁿ-gá uuⁿ-gá cuita dacuítu nihnu ñaha-xi xii-ndo quíhíⁿ, chi núu nchaa-ni sá cuehé sá dúhá-áⁿ ná cùhuⁿ-ni iní-ndó te dàticá muu ñaha-xi xii-ndo. ²³ Te nchòhó, xini ñuhu-xi sá vá dúcáⁿ-gá cani iní-ndó càda-ndo te tàú-ndó ndècu-ndo datná ìⁿ ñáyiú ní cacu túu saa. ²⁴ Te nduu iní-ndó dàtná cuimí méé Yă Ndiôxi cunduu, chi nduu-xi nàcuáa càa iní méé-gá, te ducaⁿ te cuu-ndo ñáyiú ío váha cada ndáá, te cuu ndisa-ndo ñáyiú ñá túu tñàhí ná cumání cundecu núu-gá.

²⁵ Te cuèndá xíáⁿ núu càháⁿ-í dóho-ndo sá nchòhó vá dácuañdehnde-gá-ndó dàtná ní xóo cada-ndo, te mee-ná sá ndáá càháⁿ

ndihí tnàha-ndo, chi ìn-ni cùu-o ndecu-o ichi Xítóhó Jesucristú.

²⁶ Te núu cùdédén-ndó te cada cuendá-ndó sã vã cádá-ndó ìn cuéchi sã dúcán cùdédén-ndó, te vã dúcán-ní cùhuⁿ iní-ndó tnùhu sàtú iní-án. ²⁷ Te vã dãná-ndó mée-ndo dandahú ñáhá sàcuífná xii-ndo.

²⁸ Te núu dava-ndo cùu-ndo ñadúhú te vã dúcán-gã cada-ndo, chi nducu-nã-ndó ìnⁿ chiuⁿ váha cada-ndo nàcuáa ducaⁿ ñihí-ndó sã chindèe-ndo cue ñáyiú ndàhú ñáyiú ñá túú nã ndécú ndihí.

²⁹ Te vã càháⁿ-gá-ndó nì ìnⁿ tnúhu cuèhé, chi mee-nã tnúhu vii tnúhu váha càháⁿ-ndó nàcuáa ducaⁿ ngũnu ichi cue ñáyiú ndèdóho ñaha xii-ndo, te núu ducaⁿ na càda-ndo te cuu-xi sã vãha sã cúu-xí ñáyiú ducaⁿ ndèdóho ñaha xii-ndo-án. ³⁰ Te vã cádá-gã-ndó nì ìnⁿ sã ñà túú tàu-ndó càda-ndo cuendá sã vã dándihú-ndó iní Espíritú Yã Ndióxi, chi diu Espíritú-gá ndécú ndihí-ndo, te xiãⁿ cútunì iní-ndó sã sãa nduu nàcuaca ñaha-gá xii-ndo cùndecu-ndo ndihí-gá ni caa ni quíhíⁿ.

³¹ Te vã dásatú-gá-ndó iní tnàha ñáyiú-ndo, te ni vã cùhúⁿ iní-ndó tnúhu sàtú iní, te ni vã cùdédén-gã-ndó, te cuèi núu chítú nũu tàcá vã càháⁿ cana-ndo cùcuèhé-ndó tnàha ñáyiú-ndo, te ni vã cuátnùhu-ndo tnaha ñáyiú-ndo, te ni vã cáni cuèhé cani duha iní-ndó cuendá tnàha ñáyiú-ndo. ³² Te cundàhú iní tnáhá-ndó, te cada tnàha-ndo sã vãha, te cada càhnu iní tnáhá-ndó nũu ná cúú sã cúmànì nũu tnáhá-ndó dàtná ní quide Yã Ndióxi ní quide càhnu iní-gá nchaa yícá cuéchi-ndo sã cuendá Xítóhó Jesucristú.

5

Nàcuáa tàu-xi cundecu nchaa ñáyiú cùu déhe Yã Ndióxi

¹ Te nchòhó cúu-ndó ñáyiú ío cùu iní ñáhá Yã Ndióxi, te diu déhe-gá cúu-ndó nũu xiãⁿ xínì ñũhu-xi canchicítⁿ nihnu-ndo càda-ndo dàtná quidé mée-gá. ² Te ío cuu iní tnáhá-ndó cùndecu-ndo dàtná cúu iní ñáhá Xítóhó Jesucristú xii-ndo, chi diu-gá ní cachí-gá sã cùu-gá cuendá nchaa cuéchi-o te ní xíhí-gá, te sã dúcánⁿ ní xíhí-gá te ní cuu-gá dàtná ìnⁿ táhú sã cúu-xí Yã Ndióxi, te ío váha ní cuu iní Yã Ndióxi sã dúcánⁿ ní quide-gá.

³ Te sã cuendá sã nchòhó cúu-ndó ñáyiú cùu cuendá Yã Ndióxi nũu xiãⁿ nchaa

nchòhó cue téé vã càháⁿ ndihí-ndo ñáyiú dñí te núu ñá díú ñàdihí-ndó cùu-yu, te ducaⁿ-ni nchaa nchòhó cue ñáyiú dñí tucu vã càháⁿ ndihí-ndo cuè téé te núu ñá díú yíi-ndo cuu-güedé, te ni vã cáni tnàhí iní-ndó cùndecu-ndo ichi díí iní, te ni vã xíhó-ndó nì ìnⁿ sã ndécú ndihí tnaha ñáyiú-ndo, te ni ìnⁿ nchaa xiãⁿ vã cáni iní-ndó càda-ndo, te ni vã cácu nèhe-ndo.

⁴ Te ni vã càháⁿ-ndó ìnⁿ tnúhu sã ní vã cúú cùndedóho ñáyiú, te ni vã càháⁿ-ndó ìnⁿ tnúhu cùtexínu, te ni dàva-gá nchaa tnúhu sã ñà túú vèdana nàndihí vã càháⁿ-ndó, chi nchaa tnúhu-án ñà túú tàu-xi càháⁿ-ndó, te xini ñũhu-xi sã vãha-gá sã ndácáⁿ táhú-ndó nũu Yã Ndióxi cuendá nchaa sã vãha quide-gá. ⁵ Te nchòhó sa xínì ndáá-ndó sã ncháá cuè téé càháⁿ ndihí ñáyiú dñí te ñá díú ñàdihí-güedé cúu-yu, ndihí cue ñáyiú dñí càháⁿ ndihí cue téé te ñá díú yíi-yu cùu-güedé, nchaa ñáyiú-án vã ndúú tãhũ-yu cundecú-yu núu ndécú Yã Ndióxi ndihí Xítóhó Jesucristú táxi tnùnì-gá. Te ni cuè ñáyiú xíndecu ichi díí iní, te ni cuè ñáyiú xihò nchaa sã ndécú ndihí tnaha ñáyiú-xi vã ndúú tãhũ-yu cundecú-yu ndihí-gá núu ndécú-gá táxi tnùnì-gá. Te tnúhu sã càchí-ó xihò-o nchaa sã ndécú ndihí tnaha ñáyiú-o, ìnⁿ-ni cùu-xi ndihí tnúhu sã càchí ñáyiú quide cahnú-yu nchaa sã càchí-yu cùu ndióxí te ñà ndáa sã ndióxí cúu-xí. ⁶ Te vã quíndáa iní-ndó nì ìnⁿ tnúhu sã ñà túú nàndihí càháⁿ ñáyiú, chi ñáyiú-án ío dandòho ñaha Yã Ndióxi xi-yu cuendá nchaa sã cuèhé sã dúhá quidé-yu chi ñà túú sàndáa iní ñáhã-yu xii-gá. ⁷ Núu xiãⁿ càháⁿ-í dóho-ndo sã vã ñihí tnáhá-ndó ndihí cue ñáyiú-án.

⁸ Te nchòhó ní cuu-ndo dàtná cue ñáyiú ní xíndecu núu nées chi ní xíndecu-ndo ichi cuèhé ichi duha, dico vitna ní ngúndecu-ndo ichi Xítóhó Jesucristú, te ñá túú-gá ndécú-ndó nũu nées dàtná ní xíndecu-ndo ní cùu. Te vitna cada-ndo nchaa nàcuáa tàu-xi cunduu chi ndècu-ndo ichi-gá. ⁹ Te sã cuendá sã ndécú-ndó ichi-gá nũu xiãⁿ cúu-ndó ñáyiú váha, te quide ndáá-ndó ndècu-ndo, te ñá túú dàcuandehnde-ndo chi càháⁿ-ndó mée-ni sã ndáa. ¹⁰ Te ío váha cada cuendá-ndó nchaa sã cúu váha iní Xítóhó Jesucristú, te xiãⁿ cada-ndo. ¹¹ Te vã cànchícúⁿ nihnu-ndo

tnàháⁿ-ndó càda-ndo datná quidé cuè ñáiyu ndècu ichi cuehé ichi duha, chi nchòhó tàù-ndó càháⁿ-ndó dòho nchaa ñáiyu ducaⁿ ndècu ichi cuehé ichi duha-ánⁿ cuèndá nchaa sá quidé-yu. ¹² Te cucahaⁿ núú-ndó vǎ càháⁿ-ndó cuèndá ni ìⁿ sá cuehé sá dúhá quide dayuhu nchaa ñáiyu-án. ¹³ Dico òré dándixi túu tnúhu Yá Ndiòxí iní-yu nàcuáa quidé-yu te cùtnuní iní-yu sá ñǎ túú quide váha-yu, te ducaⁿ ndìxi cuèchi iní-yu cuèndá nchaa sá cuehé sá dúhá quidé-yu.

¹⁴ Te núú tùtú Yá Ndiòxí càchí-xi:

Nchòhó cúú-ndó dàtná ñáiyu xidí, te vitna ndiquíú iní-ndó,

te cùu tucu-ndo datná ñáiyu ní xihí, te vitna ndoto-ndo,

te Xítóhó Jesucristú chindee ñaha-gǎ xii-ndo ndò nàcuáa vǎ cùndècu-gǎ-ndó ìchi cuehé ichi duha.

Duha càháⁿ-xi núú tùtú-gǎ.

¹⁵ Te ío váha cada cuèndá-ndó nàcuáa cada-ndo cùndecu-ndo, te vǎ cadá-ndó dàtná xiquide cue ñáiyu ñǎ túú təcú tnuní, chi cada-ndo dàtná xiquide ñáiyu ío váha sǎá díquí-xi. ¹⁶ Te ìⁿ nduu ìⁿ nduu cani iní-ndó càda-ndo nchaa nàcuáa tàù-xi cundu, chi vitna ío cùnuu nchaa sá cuehé sá dúhá. ¹⁷ Te cuu-ndo ñáiyu təcú tnuní cuèndá ducaⁿ cùtnuní iní-ndó nàcuáa cuení Yá Ndiòxí cada-ndo, te vǎ cadá-ndó dàtná xiquide cue ñáiyu ñǎ túú tnàhí cùtnuní iní-xi nàcuáa cuení Yá Ndiòxí cadá-yu.

¹⁸ Te vǎ cúú-ndó ñáiyu qihhu chi núu ducaⁿ na càda-ndo te dàcuíta nihnu-ndo mèe-ndo, te dañà-ndo mèe-ndo sá Espiritú Yá Ndiòxí ná tàxi tnuní ñáhá-xí xii-ndo, ¹⁹ Te càháⁿ-ndó nàcuáa-ni cuáháⁿ ndudú sá ní xóo cata nchaa cue ñáiyu ndéé sanaha ní xóo chiñuhú-yu Yá Ndiòxí. Te càháⁿ-ndó nàcuáa cuáháⁿ ndudú sá chíñùhu-ndo Yá Ndiòxí, te cata-ndo. Te cuèi nchaa dava-gǎ ndudú diu-ni ducaⁿ càháⁿ-ndó te cata-ndo. Te ní yùhu ní iní-ndó càta-ndo nchaa ndudú-ánⁿ chiñuhu-ndo Yá Ndiòxí. ²⁰ Te vǎ dàná ndéè-ndó ndàcáⁿ tǎhú-ndó núú Tǎtá-ó Dütú Ndiòxí cuèi ndècu váha-ndo àdi ñǎ túú ndècu váha-ndo. Te ducaⁿ càda-ndo chi ndècu ndihi-ndo Xítóhó Jesucristú.

Tàù-xi sá quìndáá iní tnáhá cuè ñáiyu ndècu ichi Xítóhó Jesucristú

²¹ Te nchòhó ñáiyu ndècu ichi Xítóhó Jesucristú tàù-xi sá quìndáá iní tnáhá-ndó,

te ducaⁿ càda-ndo chi nèhe-ndo sá yíñùhu núú Yá Ndiòxí.

²² Te nchaa nchòhó ñáiyu òhí ndécú yì-xi, xini ñuhu-xi sá quìndáá iní-ndó yì-ndo datná sàndáá iní-ndó Xítóhó Jesucristú. ²³ Chi yii-ndo tàxi tnuní ñáhá-güedé xii-ndo dàtná quidé Xítóhó Jesucristú tàxi tnuní ñáhá-gǎ xii nchoo cuè ñáiyu ndècu ichi-gǎ. Te diu-gǎ cúú-gǎ Yaá ní dácacu nihnu ñaha xii-o núú ùhú núú ndàhú, te cùu-o datná yiqui cùñú-gǎ. ²⁴ Te dàtná quidé nchòhó ñáiyu ndècu ichi Xítóhó Jesucristú sàndáá iní-ó tnèi-o nchaa tnúhu càháⁿ-gǎ, ducaⁿ tàù-xi cada nchaa nchòhó ñáiyu òhí quìndáá iní-ndó tnèi-ndo nchaa tnúhu càháⁿ yì-ndo.

²⁵ Te tnáhá nchaa nchòhó cue tée tucu tàù-xi sá ío cuu iní-ndó ñàdihí-ndó dàtná quidé Xítóhó Jesucristú cúú iní ñáhá-gǎ xii nchaa nchoo ñáiyu ndècu ichi-gǎ, chi mee-gǎ ní xihí-gǎ sá cuèndá-ó sǎ cúú iní ñáhá-gǎ xii-o. ²⁶ Te ducaⁿ ní quide-gǎ cuèndá sá ncháá ñáiyu vitna ngùndecu ichi-gǎ cuu yíñùhú-yu núú Yá Ndiòxí, te ducaⁿ ndàda ndoo ndada nine-gǎ iní-yu sá cuèndá sá quìndáá iní-yu tnúhu Yá Ndiòxí, te cuanduté-yu. ²⁷ Te ducaⁿ ní quide-gǎ cuèndá sá ncháá ñáiyu na ngùndecu ichi-gǎ ío váha cundecu-yu núú-gǎ, te ducaⁿ vǎ cùndècu-gǎ ni ìⁿ cuèchi-yu núú-gǎ, te ni ìⁿ-gǎ sá ñǎ túú-gǎ ná cumáni-yu núú-gǎ chi ío cundecu yíñùhú-yu. ²⁸ Te sá dúcǎ quide Xítóhó Jesucristú sá cúú-xí cuè ñáiyu ndècu ichi-gǎ, xǎⁿ tàù-xi sá nchòhó cue tée xíndecu ñàdihí-xi cuu iní-ndó ñàdihí-ndó, te coto-ndó-yu dàtná xító-ndó yiqui cuñú méé-ndó, te cada iní-ndó sǎ ncháá cuè tée ío cùu iní ñàdihí-xi cùu iní-güedé méé-güedé chi ìⁿ-ná cúú-yu. ²⁹ Te nchoo sǎ naha-o sǎ ni ìⁿ ñáiyu ñǎ túú dàque tìhú-yu yiqui cùñú-yu, chi da uuⁿ-gǎ chíndéè-yu te xító-yu. Te diu-ni ducaⁿ quide Xítóhó Jesucristú ndihi nchaa ñáiyu ndècu ichi-gǎ, ³⁰ chi cùu-o datná yiqui cùñú méé-gǎ, te ducaⁿ chi ìⁿ-ni cùu-o ndihi-gǎ. ³¹ Te tnúhu Yá Ndiòxí càchí-xi: “Sá cuèndá xǎⁿ núu nchaa cue tée na nihí ñàdihí-xi te òhí-ná cada-güedé tǎtá-güedé ndihi náná-güedé, te ñàdihí-nǎ-güedé cuu cuu ndihi-güedé, te ducaⁿ ìⁿ-ná cuu-güedé ndihí-yu”, duha càchí-xi. ³² Te tnúhu-a cùu-xi ìⁿ tnúhu

càhnu vihi, te ducaⁿ sã tnahá-xi cùu Xítóhó Jesucristú ndíhi cue ñáyiú ndècu ichi-gá. ³³ Te cãháⁿ-ni tucu-í dóho nchaa nchòhó cue tée xĩndecu ñadĩhí-xi sá ïo cuu iní-ndó ñadĩhí-ndó te coto-ndó-yu dàtná xító-ndó mée-ndo, te ducaⁿ-ni nchaa nchòhó ñáyiú dĩhí tucu canehe-ndo sã yĩñũhu núú yĩ-ndo.

6

¹ Te nchaa nchòhó cue landú, quindáá iní-ndó tãtã-ndó ndĩhi náná-ndó chi ducaⁿ cuiní Yã Ndiõxí cunduu, te diu ducaⁿ tnahí tãú-xi cada-ndo. ² Te Yã Ndiõxí ní cachí-gá sá cãnehè-ndo sá yĩñũhu núú tãtã-ndó ndĩhi núú nãná-ndó. Te tñúhu-án cúu-xí tñũhu cùnũu ní cãháⁿ-gá cada cue ñáyiú cuendá cada váha ñaha-gã xí-yu. ³ Te ní cachí-gá sá nõu ducaⁿ na càda-ndo te ío váha cundecu-ndo, te ducaⁿ ïo naha cudíí-ndo cundecu-ndo ñuyíú-a.

⁴ Te nchaa nchòhó cue tée cùu tãtã, vá dásãtú-ndó iní cue déhe-ndo chi canu ichi-ndo-güèxi nacuáa tãú-xi cunduu, te dacuàha-ndo-güèxi nchaa tñúhu váha nacuáa cuiní Yã Ndiõxí cunduu.

⁵ Te nchaa nchòhó cue ñáyiú xĩnu cuechi, quindáá iní-ndó cuè ñáyiú dii chiuⁿ-xi quide-ndo, te canehe-ndo sã yĩñũhu núú-yu, te ío váha cuu iní-ndó càda-ndo chiúⁿ-yu, te ducaⁿ nì yuhu nì iní-ndó càda-ndo. Te cada iní-ndó sã dàtná tñúhu sá chiúⁿ Xítóhó Jesucristú quidé-ndó. ⁶ Te dava ñáyiú xĩnu cuechi, mee-ni òré ndéhé ñáyiú dii chiuⁿ-xi quidé-yu ío ndùcu ndéé-yu quide chiuⁿ váha-yu cuendá cuiní-yu cudíú-yu. Dico nchòhó vá dúcãⁿ càda-ndo, chi cuèi ndècu ñáyiú dii chiuⁿ-xi quide-ndo àdi ñã túú-yu dico cada chiuⁿ váha-ni-ndo, te cada iní-ndó sã dàtná tñúhu sá chiúⁿ Xítóhó Jesucristú quidé-ndó, te cada-ndo nì yuhu nì iní-ndó nacuáa cuiní Yã Ndiõxí cunduu. ⁷ Te ío váha cuu iní-ndó càda-ndo chiuⁿ-án, chi cada iní-ndó sã dàtná tñúhu sá chiúⁿ Xítóhó Jesucristú quidé-ndó te ñã díú chiuⁿ cue ñáyiú ñuyíú-a. ⁸ Te nchòhó sa cùnũni iní-ndó sã nacuáa ndũu chiuⁿ váha ní quide-ndo ñã ñã-ndo, te ducaⁿ cunduu sá táxí Xítóhó Jesucristú nduu táhú-ndó cuèi cùu-ndo ñáyiú dàñá queé nõú chíúⁿ patrónⁿ-xi àdi cuu-ndo ñáyiú ñã túú tnahí dàñá quee núú chíúⁿ patrónⁿ-xi.

⁹ Te nchaa nchòhó ñáyiú xĩndecu ndĩhi ñáyiú xĩnu cuechi, tnahá-ndó tãú-ndó càda váha-ndo sã cúu-xí cuè ñáyiú xĩnu cuechi núú-ndó, te vá cundũu nĩnu iní-ndó nõú-yu, te chí cuàha cuendá sã díú-ní Xítóhó Jesucristú Yã ndécú àndũu taxi tñuní ñãhá-gã xii-ndo ndĩhí-yu, te sá cúu-xí mée-gá chi ñã-ni cùu-ndo núú-gã, te ñã-ni càda ñaha-gã xii-ndo.

Yã Ndiõxí chĩndèe-gã cue ñáyiú ndècu ichi-gã cuendá sã vã ndácú sàcũhñá nàà ndĩhi ñaha-xi xí-yu

¹⁰ Te vitna nchaa nchòhó ñáyiú ndècu ndĩhí-í ichi Xítóhó Jesucristú càchí tñúhu-í xii-ndo sã ïo nducu-ndo nacuáa cada-ndo nĩhí ndéé-ndó cùu ñã-nu-ndo ndĩhi Xítóhó Jesucristú, chi mee-gã ío càhnu cuu-gá, te chindee ñaha-gã xii-ndo. ¹¹ Te diu-ni nchaa sã nì nduu táhú-ndó nõú Yã Ndiõxí diu-ni nchaa xĩãⁿ cuhuⁿ iní-ndó, chí xĩãⁿ chindee ñaha-xi xii-ndo nĩhí ndéé-ndó cundecu-ndo cuendá sã vã dándahú ñãhá sàcũhñá xii-ndo. ¹² Chí nchoo ñã díú cuè ñáyiú ñuyíú-a nàà ndĩhí-o, chí ndĩhi cue espíritú cundĩhi yucu ñávãha, te diu-ni nchaa espíritú-án cùnũu-xi cuèi núú nĩnu quide-xi nchaa sã cuèhé sã dúhá, te diu-ni-xi cùnũu-xi ñuyíú-a sãnu ichi-xi cue ñáyiú quidé-yu nchaa sã cuèhé sã dúhá. ¹³ Te ío cuhuⁿ iní-ndó nchaa sã nì nduu táhú-ndó nõú Yã Ndiõxí cuendá ducaⁿ nĩhí ndéé-ndó cundecu-ndo, te vá ndácú yùcu ñávãha ná cada ñaha-xi xii-ndo oré cuiní-xi coto ndéé ñãhá-xí. Te sãtã ná dàquee tĩhú-ndó yùcu ñávãha te ñã-ni cunduu-ndo cundecu-ndo ichi Yã Ndiõxí. ¹⁴ Te ducaⁿ cundecu-ni-ndo ichi Yã Ndiõxí cada-ndo dàtná xĩquide cue sandadú, chí cue tée-án ïo ñã xĩndáa-güedé. Te cãháⁿ-ndó mée-ni tñúhu ndáá tñúhu Yã Ndiõxí, te cuu-ndo dàtná cue sandadú cue tée ndàda tĩi xití-xi òré quĩhĩ-güedé nàa-güedé. Te ducaⁿ sãtnahá-xi cuu-ndo te núu na cãháⁿ-ndó mée-ni tñúhu ndáá tñúhu Yã Ndiõxí. Te cada ndáá-ndó cundecu-ndo ichi-gá, te cuu-ndo dàtná cue sandadú cue tée xĩxĩhnu sã yidãhu ñaha xii-güedé òré nàa-güedé cuendá sã vã nĩcuèhé-güedé. Te ducaⁿ sãtnahá-xi cuu-ndo te núu na càda ndáá-ndó cundecu-ndo ichi-gá. ¹⁵ Te cundecu tãha-ndo cãháⁿ-ndó tñúhu Xítóhó Jesucristú, tñúhu sã cãháⁿ nacuáa cuu váha iní ñáyiú cundecú-yu, te

cuu-ndo dàtná cue sandàdú cue tée ndíhu zapàtú-xi quihíⁿ-güedé nàa-güedé. Te ducaⁿ sàtnahá-xi cuu-ndo te núu na cùndecu túha-ndo cǎháⁿ-ndó tnúhu Xítohó Jesucristú núu ñáyiú. ¹⁶ Te cǎchí tnúhu tucu-í xii-ndo sǎ ïo quindáá iní-ndó Yǎ Ndiöxí cuendá sǎ vǎ ndácú sàcuihná nǎ cada ñaha-xi xii-ndo, te ducaⁿ te cuu-ndo dàtná cue sandàdú cue tée xínehe vítú chínèe-güedé sáquidáhu ñaha-xi xii-güedé cuendá sǎ vǎ cuicúⁿ-güedé sǎ nchicúⁿ ñuhú tée ñaha cue tée nàa ndihi-güedé. Te ducaⁿ sàtnahá-xi cuu-ndo te núu na quindáá iní-ndó Yǎ Ndiöxí. ¹⁷ Te ïo cuhuⁿ iní-ndó sǎ ñí nanihí tǎhú-ndó, te cuu-ndo dàtná cue sandàdú cue tée ñuhu mbelú cǎxíⁿ. Te ducaⁿ sàtnahá-xi cuu-ndo te núu na cùhuⁿ iní-ndó sǎ ñí nanihí tǎhú-ndó. Te ïo cuhuⁿ iní-ndó tnúhu Yǎ Ndiöxí, chi tnúhu-áⁿ ñí taxi Espíritú-gǎ ndécú ndíhi-ndo chindee ñaha-xi xii-ndo, te cuu-ndo dàtná cue sandàdú cue tée xínehe machití cuáháⁿ-güedé nàa-güedé. Te ducaⁿ sàtnahá-xi cuu-ndo te núu na cùhuⁿ iní-ndó tnúhu Yǎ Ndiöxí. ¹⁸ Te vǎ dáñá ndèe-ndó cǎháⁿ ndihi-ndo Yǎ Ndiöxí nàcuáa chindee ñaha Espíritú-gǎ xii-ndo, te cǎcǎⁿ tǎhú-ndó nǔú-gǎ nǔú ná cuiní-ndó, te ïo cundecu túha-ndo cǎháⁿ ndíhi-ndo-gǎ, te vǎ nǎtùhú iní-ndó cǎcǎⁿ tǎhú-ndó nǔú-gǎ cuendá nchaa dava-gǎ cue ñáyiú cùu cuendá-gǎ. ¹⁹ Te tnàhá cuendá-í cǎcǎⁿ tǎhú-ndó núu Yǎ Ndiöxí cuendá sǎ ná chindee ñaha-gǎ xii-í ñihí-í tnúhu cǎháⁿ-í òrè cǎháⁿ-í tnúhu-gǎ, te ducaⁿ vǎ yùhú-í cǎháⁿ-í nàcuáa ndùu tnúhu sǎ cǎháⁿ nàcuáa nanihí tǎhú-ó nǔú ñáyiú tnúhu sǎ vǎtá cùndèdóho-gǎ-yu. ²⁰ Te Yǎ Ndiöxí ñí cǎchí-gǎ sǎ yùhú cuu-í ñⁿ tée cada-í núu-gǎ cǎháⁿ-í tnúhu-gǎ núu ñáyiú, te ñiú cuendá tnúhu-áⁿ yíhí-í vecá vitna. Te ïo cǎcǎⁿ tǎhú-ndó nǔú Yǎ Ndiöxí cuendá-í cuendá sǎ yùhú cuyii-í ñí yùhu ñí iní-í cǎháⁿ-í tnúhu-gǎ núu ñáyiú nàcuáa tǎu-xi cunduu.

Tnúhu ndéé núu ñí ndíhi-ná

²¹ Te té Tìquicú tée ïo cùu iní-í ndécú ndíhi-o ichi Xítohó Jesucristú cúu-dě ñⁿ tée ïo váha quide ndáá xínú cuèchi-dé núu Xítohó Jesucristú, tée-áⁿ cǎchí tnúhu-dé xii-ndo nàcuáa cùu ndecu-í ndíhi nchaa nàcuáa quide-í cuendá ducaⁿ cùtnuní iní-ndó. ²² Te cuendá xiǎⁿ nùu cuiní-í tendaha-í-dé quixi-dé núu ndécú-ndó cuendá cǎchí tnúhu-dé xii-ndo nchaa nàcuáa cùu

ndecu-ndí iha, te ducaⁿ tàxi-gǎ-dé tnúhu ndee ñí cundecu ndíhi-ndo.

²³ Te xicǎⁿ tǎhú-í núu Tǎtá-ó Dütú Ndiöxí ndíhi núu Xítohó Jesucristú sǎ nchǎá nchòhó ñáyiú ndecu ndíhi-í ichi-gǎ sǎ ñiú-gǎ ná cǎdá te ïo váha cuu iní-ndó cùndecu-ndo, te ducaⁿ ïo cuu iní tnáhá-ndó, te ïo quindáá iní-ndó-gǎ. ²⁴ Te nchòhó ïo cùu iní-ndó Xítohó Jesucristú, te ñá túú dàña ndee-ndó cùu iní-ndó-gǎ. Te mee Yǎ Ndiöxí ïo na chindee chitúu ñaha-gǎ xii-ndo. Te ducaⁿ na cùnduu. Te ïo chí cǎdá ndèe iní-nǎ vitna.

TUTÚ NÍ CADÚHA TÉ PÄBLÚ QUÍHÍⁿ NDAHA ÑÄYIU ÑUÚ FİLIPÚ

Té Páblú *cádúha-dé* *tutú* *quíhíⁿ* ndaha ñáyiú quide ndáá xĩndecu ichi Xítóhó Jesucristú ndécú ñúú Filípú

¹Yúhú té Páblú ndíhí té Timùtéú cúú-ndí cue téé xinu cuechi núú Xítóhó Jesucristú, te tëndaha-ndí tutú-a véxi ndaha nchòhó cue téé yĩndaha nchaa ñáyiú ndècu ichi Xítóhó Jesucristú, ndíhí cue téé chĩndee ñaha xii-ndo, ndíhí nchaa dava-gá ñáyiú xĩquide ndáá ndécú ìchi-gá ñúú Filípú. ²Te xicáⁿ táhù-í núú Tátá-ó Dütú Ndiòxí ndíhí núú Xítóhó Jesucristú sá ná chĩndee chitúú ñaha-gá xii-ndo, te ducaⁿ ndí nduú-gá ná cádá te ío váha cuu iní-ndó cùndecu-ndo.

Té Páblú *càháⁿ* ndíhí-dé Yá Ndiòxí cuendá nchaa ñáyiú ndècu ichi-gá

³Te ndí tnahá òré ndácú iní ñàhá-í xii-ndo, te ndácáⁿ táhù-í núú Tátá-ó Dütú Ndiòxí sá ndécú-ndó ìchi-gá. ⁴Te ndí tnahá òré ducaⁿ quide-í te ío cùdíí iní-í càháⁿ ndíhí-í-gá cuendá-ndó. ⁵Chi ndéé cùtnàhá ní sándáá iní-ndó-gá ní ngúfta-ndo tnahá-ndó quide váha-ndo ndècu-ndo cuendá sá quĩndáá iní ñáyiú tnúhu Xítóhó Jesucristú. ⁶Te yúhú sàni ndáá iní-í sá Yá Ndiòxí Yáá ní quesaha chĩndee ñaha xii-ndo quide váha-ndo ndècu-ndo, te ñu-ni-gá chĩndee ñàhá-gá xii-ndo càda váha-ndo cùndecu-ndo ndéé ná sáá nduu quixi tucu Xítóhó Jesucristú. ⁷Te ducaⁿ tnahí tàú-xi caní iní-í sá cúú-xí-ndó, chí ío cùu iní ñàhá-í xii-ndo. Te tnahá-ndó ío chĩndee chitúú ñaha Yá Ndiòxí xii-ndo ndècu-ndo, te ñu-ni ducaⁿ chĩndee ñaha-gá xii-ndo tnahá-ndó cuèi vitna yìhí-í vecaá, te ñu-ni ducaⁿ chĩndee ñaha-gá xii-í cuèi òré cuáháⁿ-í núú cuè ñáyiú ñá túú tnahá iní tnúhu-gá, chí ñíhí-í tnúhu ñàdanchocáva-í nùu ná tnúhu càháⁿ-yu cuendá-gá, te nchaa ñáyiú xàháⁿ-í xii-yu sá tnúhu-gá cúú-xí tnúhu ndáá cuítí. ⁸Te mee Yá Ndiòxí nàhá ndáá-gá sá yúhú ío cùu iní ñàhá-í xii-ndo dàtná cúú iní ñàhá mèe Xítóhó Jesucristú xii-o, ⁹Te xicáⁿ táhù-í núú Yá Ndiòxí sá díú-gá ná chĩndee ñaha-gá xii-ndo te uuⁿ-gá cuita cuu iní tnahá-gá-ndó quíhíⁿ, te ducaⁿ ío váha cuita cutnùní iní-ndó nchaa

nacuáa sàni iní-gá cada-ndo, te ducaⁿ ío váha cuita cutnùní tucu iní-ndó nacuáa cundecu-ndo. ¹⁰Te ducaⁿ cutnùní tucu iní-ndó nchaa sá ío-gá váha xini ñuhu-xi cada-ndo, te ducaⁿ te cuu-ndo ñáyiú cada mee-ni sá váha, te ducaⁿ ñá túú tnahí ná cùmání-ndó núú Yá Ndiòxí ndéé ná sáá nduu quixi tucu Xítóhó Jesucristú. ¹¹Te ñu-ni Xítóhó Jesucristú chĩndee ñaha-gá xii-ndo càda-ni-ndo nchaa núú sá váha nacuáa cuíní Yá Ndiòxí. Te sá dúcáⁿ ná càda-ndo te ío cada càhu-ndo-gá, te nchaa dava-gá ñáyiú càháⁿ váha-yu cuendá-gá.

Xítóhó Jesucristú ío cùnuu-gá ndécú ndíhí-gá té Páblú

¹²Te nchaa nchòhó ñáyiú ndècu ndíhí-í ichi Xítóhó Jesucristú na càchí tnúhu-í xii-ndo sá úúⁿ-gá tá xité nuu tnúhu-gá vitna yìhí-í vecaá. ¹³Te nchaa cue téé cùu sandadú xĩndecu vechiⁿ núú ndécú tèe cùnuu xini-güedé sá sá cuendá sá càháⁿ-í tnúhu Xítóhó Jesucristú duha yìhí-í vecaá, te ñu-ni ducaⁿ sá xini nchaa dava-gá ñáyiú sá sá càháⁿ-í tnúhu-gá duha yìhí-í vecaá. ¹⁴Te cuendá sá dúhá yìhí-í vecaá xíáⁿ ío-gá vèi ñáyiú ndècu ichi Yá Ndiòxí ta cùtnuní-gá iní-yu sá cúú-gá ñⁿ Yáá ío quide ndáá, te uuⁿ-gá tá cùyí-yu càháⁿ-yu tnúhu-gá, te ñá túú tnahí-gá yúhú-yu càháⁿ-yu.

¹⁵Te na càchí-í tnúhu ndáá-í xii-ndo sá dàva ñáyiú càháⁿ-yu tnúhu Xítóhó Jesucristú cuendá-ni sá cúú cuèdú iní ñàhá-yu xii-í sá ío chĩndee ñaha-gá xii-í càháⁿ-í tnúhu-gá. Te ducaⁿ quidè-yu chí cuíní-yu nàá ndíhí ñàhá-yu xii-í, dico davá-yu chí ío váha sàni iní-yu càháⁿ-yu tnúhu-gá. ¹⁶⁻¹⁷Te ñáyiú-áⁿ càháⁿ-yu tnúhu-gá chí cùu iní ñàhá-yu xii-í, te sa nàhá-yu sá sá cuendá sá càháⁿ váha-í cuendá tnúhu-gá núú ñáyiú ñá túú tnahá iní tnúhu-gá, cuendá xíáⁿ yìhí-í vecaá. Te dava-gá-yu càháⁿ-yu tnúhu Xítóhó Jesucristú cuendá-ni sá cuíní-yu cuu sá váha xii mèe-yu, te ñá díú sá càháⁿ-yu cuendá sá sání váha iní-yu. Te ducaⁿ quidè-yu chí cuendá cuíní-yu sá nàndi-gá cada ñaha-güedé xii-í. ¹⁸Dico ío cùdíí iní-í sá càháⁿ-yu tnúhu Xítóhó Jesucristú cuèi cùu váha iní-yu àdi ñá túú cùu váha iní-yu càháⁿ-yu.

Te ðiu-ni ducaⁿ cudíí ìní-í núú cuàháⁿ núú véxi. ¹⁹ Te cùtnuní ìní-í sá sá cuèndá nchaa sá quidé ñàha-güedé xii-í, cuèndá xiáⁿ cada váha ñaha Yá Ndióxi xii-í, chi nchòhó ío càháⁿ ndìhi-ndo-gá cuèndá-í, te Espiritú ní taxi Xítoho Jesucristú ndécú ndìhi-o ío chindee ñaha-xi xii-í. ²⁰ Te cuíní-í sá ñà túú tnàhí ná cumáni-í núú Yá Ndióxi cuèndá sá vǎ cúú càhaⁿ núú-í, te cùtnuní ìní-í sá ðíú-gǎ chindee ñaha-gá xii-í. Te cuíní tucu-í sá ío cuyí-í càháⁿ-í tnúhu-gǎ vitna dàtná tá quidé-í véxi, te ducaⁿ ío cada ñnu-í Xítoho Jesucristú cuéí vitna nini ndècu-í ñuyúú-a te cuéí na cúú-í ducaⁿ-ni cada ñnu-í-gǎ. ²¹ Te nini ndècu-í ñuyúú-a te Xítoho Jesucristú ío cùnuu-gǎ ndécú ndìhi ñaha-gǎ xii-í, te na sǎá nduu cùú-í te ío-gǎ váha tnahá-í chi nucúndecu-í ndìhi-gǎ. ²² Te núu na cundecu-gǎ-í ñuyúú-a te cada-gǎ-í chiuⁿ sá cúú-xí Yá Ndióxi, te ñá cùtnuní ìní-í nása cada-í núú sá cundecu-í àdi sá cùú-í. ²³ Te ío vǎi sani ìní-í te cuíní-í cuú-í chi ío-gǎ váha cundecu-í núú ndécú Xítoho Jesucristú. ²⁴ Dico sá cúú-xí nchòhó chi ío xini ñuhu-xi cundecu-í. ²⁵ Te cùtnuní ndǎá ìní-í sá ñⁿ tnúhu ndǎá càháⁿ-í, te cùtnuní tucu ìní-í sá cundecu-ni-í cundecu ndìhi ñaha-í xii-ndo nchaa-ndo cuèndá chindee ñaha-í xii-ndo cuíta quindǎá-gǎ ìní-ndó Xítoho Jesucristú quíhíⁿ, te ducaⁿ ío cudíí ìní-ndó cundecu-ndo. ²⁶ Te ducaⁿ te uuⁿ-gǎ cachí-ndó sǎ ío càhnu cuu Xítoho Jesucristú cuèndá sá ní dǎcǎcu ñaha-gǎ xii-í ndécú ndìhi ñaha-í xii-ndo.

²⁷ Te xini ñuhu-xi cada-ndo nchaa nacuaá càháⁿ tnúhu Xítoho Jesucristú. Te núu ní ndacu-í véxi coto ñaha-í xii-ndo, te dàvǎ-áⁿ quini ndǎá-í sá ndécú-ní-ndó ichi Xítoho Jesucristú. Dico núu ñá túú ní ndacu-í quixi coto ñaha-í xii-ndo ña, te ðiu-ni ñíhi-í tnúhu sá ndécú-ní-ndó ichi-gǎ, te ñíhí tucu-í tnúhu sá ñⁿ-ní cùu-ndo ndecu-ndo, te ñíhí tucu-í tnúhu sá ñⁿnuu nducu ndee-ndo caháⁿ-ndó tnúhu Yá Ndióxi núú ñáyiú, tnúhu sá sǎndǎá ìní-ndó. ²⁸ Te ñá túú yùhú-ndó nchaa sá quidé ñaha ñáyiú cùu úhú ìní ñáhá xii-ndo, te sá dúcǎⁿ quide-ndo ñá túú yùhú-ndó nchaa sá quidé ñahá-yu xii-ndo, te ndixi túu ìní-yu sá nchòhó ndécú-ndó ñⁿ ichi núú nánihí tǎhú-ndó, te ñáyiú-áⁿ cuíta nihnú-yu, chi ducaⁿ ní cachí Yá Ndióxi cunduu. ²⁹ Te mee Yá Ndióxi ní taxi-gǎ tnúhu ndee ìní sá quindǎá ìní-ó Xítoho Jesucristú, te ñá ðíú-ní sǎ quindǎá

ìní-ó-gǎ chi tnáhá ndoho-o cuèndá-gǎ. ³⁰ Te tnáhá nchòhó ndóhó-ndó cuèndá-gǎ vitna, te nchòhó ní xini núú-ndó nacuaá ní ndoho-í, te vitna ñíhi-ndó tnúhu nchaa nacuaá ndòho tucu-í.

2

Xítoho Jesucristú ñá túú ní quide ñnu-gǎ mée-gǎ dico Yá Ndióxi ní quide ñnu ñaha xii-gǎ

¹ Te Xítoho Jesucristú dǎcǎhu ìní ñáhá-gǎ xii-ndo nacuaá cundecu-ndo, te cùu ìní ñáhá-gǎ xii-ndo nacuaá cuu váha ìní-ndó cundecu-ndo, te ndècu ndìhi-ndo Espiritú Yá Ndióxi, te ío cundahú ìní tnáhá-ndó. ² Te xiáⁿ núu càháⁿ-í dóho-ndo sǎ ío cuu ñⁿnuu-ni-ndo cundecu-ndo nacuaá ío-gǎ cudíí ìní-í, te ñⁿ-ni cùu ìní tnáhá-ndó, te ñⁿ-ni cǎni ìní-ndó, te ñⁿ-ni cada-ndo. ³ Te vǎ cǎdá ñnu-ndo mée-ndo nducu-ndo mee-ni sá cúú-xí mée-ndo, chi cunduu ndàhú ìní-ndó, te cǎni ìní-ndó sǎ tnàha ñáyiú-ndo ío-gǎ cùnúú-yu dàcúuxi mée-ndo. ⁴ Te ní vǎ cǎni ìní-ndó nducu-ndo mee-ni sá váha sá cúú-xí mée-ndo, chi nducu-ndo sǎ cúú-xí tnáhá cuèndá tnàha ñáyiú-ndo.

⁵ Te ío váha cǎni ìní-ndó nacuaá cundecu-ndo dàtná quidé mée Xítoho Jesucristú. ⁶ Te ñⁿ-ni cùu Xítoho Jesucristú ndìhi Yá Ndióxi. Te cuéí ducaⁿ dico mee Xítoho Jesucristú ní sani ìní-gǎ sá ñá túú cuyica cundecu-gǎ taxi tnùn-í-gǎ ndìhi Yá Ndióxi. ⁷ Te ní dǎná-gǎ sǎ cùnúu-gǎ andiu te ní quixi-gǎ ñuyúú-a ní cuu-gǎ ñⁿ ñáyiú, te ní quide-gǎ dàtná quidé ñⁿ téé xinu cuechi. ⁸ Te ní cuu-gǎ ñⁿ téé dàtná ndǎa cue téé xindecu ñuyúú-a, te ní cuu-gǎ ñⁿ téé ío ndàhú ìní-xi chi ñá túú ní quide ñnu-gǎ mée-gǎ, te ní sǎndǎá ìní-gǎ ní quide-gǎ nchaa nacuaá ní xáhaⁿ Yá Ndióxi xii-gǎ cùtnáhá ní quixi-gǎ ñuyúú-a. Te sá dúcǎⁿ ní sǎndǎá ìní-gǎ xiáⁿ ní xíhí-gǎ núú cùrúxí. ⁹ Te xiáⁿ ío ní quide ñnu ñaha Yá Ndióxi xii Xítoho Jesucristú cuèndá ío cunuu-gǎ. Te ní xáhaⁿ Yá Ndióxi xii Xítoho Jesucristú sá cúú-gǎ Xítoho nchaa ñáyiú ndècu ñuyúú-a. ¹⁰ Te ducaⁿ ní quide Yá Ndióxi cuèndá nchaa Espiritú ndécú àndiu, ndìhi nchaa ñáyiú ndècu ñuyúú-a, ndìhi nchaa ñáyiú ní xíhí ngúííni xítí-yu ndìhi nchaa espíritú-áⁿ te cachí-yu ndìhi-xi sǎ ío càhnu cuu Xítoho Jesucristú. ¹¹ Te nchaa-yu cachí-yu sǎ Xítoho Jesucristú cúú-gǎ Yaá táxi tnùn-í. Te sá dúcǎⁿ cǎdá-yu, te quide cahnú-yu Dútú Ndióxi.

Náyiu ndècu ichi Xítóhó Jesucristú cúu-yu dàtná ìíⁿ ñuhú

¹² Te xiáⁿ nũu nchaa nchòhó ñáyiu ío cùu iní-í cuiní-í sá quindáá iní ñáhá-ndó xii-í dàtná ní quide-ndo cùtnháá ní xín-decu ndíhi ñaha-í xii-ndo, chí dává-áⁿ ñà túú tñahí ní dàña ndeé-ndó nì sándáá iní ñáhá-ndó xii-í. Te cuiní-í sá úúⁿ-gá quindáá iní ñáhá-ndó xii-í vitna ñá túú ndècu ndíhi ñaha-í xii-ndo. Te ío nducu ndèe-ndo cada-ndo nchaa nacuaá tàù-xi cunduu ndeé ná sáá nduu ndúu táhú-ndó cùndecu-ndo ndíhi Xítóhó Jesucristú, te ío canehe-ndo sá yíñũhu núú-gá. ¹³ Te Yá Ndiòxí ío váha dàcahu iní ñáhá-gá xii-ndo càda-ndo nchaa nacuaá cuiní mée-gá, te ñiu-ni mee-gá chíndèe ñaha-gá xii-ndo dùcaⁿ quide-ndo.

¹⁴ Te vá caní iní-ndó ñà tñúhu cáháⁿ-ndó cuendá ñáyiu, te ní ñà túú nãndí tñúhu cùtnháa-ndo ndíhi-yu, ¹⁵ te ducaⁿ te cuu-ndo ñáyiu ñá túú cuèchi-xi núú Yá Ndiòxí. Te nchòhó ñáyiu cùu déhe Yá Ndiòxí, ñà túú tñahí-gá ná cumání-ndó núú-gá nini ndècu-ndo tnuú nchaa ñáyiu ndècu ichi cuehé ichi duha ñuyúú-a, ñáyiu cuilhna iní-xi. Te cuu-ndo dàtná chódíní sá dáyèhé niú nee, ¹⁶ te ducaⁿ chí dàcuaha-ndo ñáyiu tñúhu Yá Ndiòxí tñúhu sá cáháⁿ nàcuáa naníhí tàhú-yu. Te núu ducaⁿ-ni na càda-ndo te òré ná sáá nduu càda ndáá Xítóhó Jesucristú nchaa yíca cuèchi ñáyiu, te dává-áⁿ vá cúú cáhaⁿ núú-í, chí ñà túú díó ducaⁿ ní sàhni iní-í cada-í nchaa chiúⁿ ní táhú-gá. ¹⁷ Te nchòhó ío váha quide-ndo ndecu-ndo ichi Yá Ndiòxí chí sàndáá iní-ndó-gá, te yúhú cahni ñaha-güedé xii-í cuendá nchaa sá váha quide-ó. Te xiáⁿ ío cùdíí iní-í te cùdíí tucu iní-í dàtná cùdíí iní-ndó cuendá nchaa sá váha quide-ndo. ¹⁸ Te ñiu-ni ducaⁿ ío chí cùdíí iní dàtná cùdíí iní mée-í cuendá nchaa sá váha-í ndècù-í.

Té Timùteú ndíhi té Epafròditú

¹⁹ Te núu Xítóhó Jesucristú ná càchí-gá te ndíhi-ni tendaha-í té Timùteú quixi-dé quixi coto ñaha-dé xii-ndo nàcuáa cudíí iní-ndó. Te òré ndixi-dé canaha-dé tñúhu ndixi núu nása cùu ndecu-ndo, te tñahá yúhú ío cudíí iní-í tucu. ²⁰ Te núu ncháá cuè téé ndècu ndíhi-í te ìíⁿ-ni té Timùteú-a cùu-dé téé ío váha sàni iní-xi dàtná sání iní-í, chí ñiu tñahí-ni-dé ío sàni iní-dé nũu nása ndècu-ndo. ²¹ Chí dává-gá-güedé mee-ni sá cúú-xí mée-güedé

ío sàni iní-güedé, te ñà túú sàni iní-güedé cada-güedé chiúⁿ tahu Xítóhó Jesucristú.

²² Te nchòhó sa xini-ndó sá tẽ Timùteú-a cùu-dé ìíⁿ téé quide váha chí nãndí sá tá yáha-dé véxi te quide ndee iní-dé.

Te cùu-dé dàtná ìíⁿ déhe-í ndécú ndíhi ñaha-dé xii-í xínú cuèchi-ndí núú Xítóhó Jesucristú cáháⁿ-ndí tñúhu-gá núú ñáyiu.

²³ Te òré ná cùtnuní nũu nása cada ñaha-güedé xii-í te ndíhi-ni tendaha-í-dé quixi coto ñaha-dé xii-ndo. ²⁴ Te sàni iní-í sá Xítóhó Jesucristú cada-gá te tñahá mée-í ío ndíhi quixi coto ñaha-í xii-ndo.

²⁵ Te tñahá sání iní-í sá ío xini ñũhu-xi tendaha-í té Epafròditú téé ndècu ndíhi-o ichi Xítóhó Jesucristú ndixi coto ñaha-dé xii-ndo, chí tñahá-dé quidé-dé chiúⁿ-gá te quide ndee iní-dé tñahá-dé nãndí yáha-dé sá cuendá-gá, te ñiu mee-ndo ní tendaha-ndo-dé véxi-dé cuendá coto ñaha-dé xii-í. ²⁶ Te ducaⁿ cuiní-í tendaha-í-dé ndixi-dé chí mee-dé ío sàni iní-dé ndixi cáháⁿ ndíhi ñaha-dé xii-ndo, te ío ndíhú iní-dé sá níhí-ndó tñúhu sá cùhú-dé ní cùu. ²⁷ Te ndáá sá ní cuhú-dé chí luha ndiquiⁿ-ná cuú-dé ní cùu, dico Yá Ndiòxí ní cundáhú iní ñáhá-gá xii-dé ní quide

tátna ñaha-gá te ní ndúha-dé. Te ñà díú-ní mée-dé ducaⁿ ní cundáhú iní ñáhá-gá xii-dé chí tñahá yúhú ío ní cundáhú iní ñáhá-gá xii-í, chí núu ní xíhí-dé te ío-gá ndíhú iní-í ní cùu. ²⁸ Te xiáⁿ ío ndíhi cuiní-í tendaha-í-dé ndixi-dé cuendá òré nasáá-dé núú-ndó te ío cudíí iní-ndó, te ducaⁿ yúhú ñà túú-gá ná caní iní-í. ²⁹ Te òré nasáá-dé te ío cudíí iní-ndó nàqueheⁿ cuendá-ndó-dé, te ducaⁿ ío ndacáⁿ táhú-ndó núú Xítóhó Jesucristú cuendá-dé. Te ío canehe-ndo sá yíñũhu núu nchaa cue téé quide dàtná quidé-dé. ³⁰ Chí téé-a sa luha ndiquiⁿ-ná cuú-dé ní cùu sá xínú cuèchi-dé núú Xítóhó Jesucristú, te ní sàni iní-dé sá ñà túú ná cada-xi cuèi na cuú-dé ní quide-dé nchaa chiúⁿ sá cùmãni cada-ndo cuendá-í ní cùu.

3

Náyiu cundáá núú Yá Ndiòxí

¹ Te vitna nchaa nchòhó ñáyiu ndècu ndíhi-í ichi Xítóhó Jesucristú cáháⁿ ndáhú-í núú-ndó sá ío cudíí iní-ndó sá yíndàha ñaha-gá xii-ndo. Te yúhú ñà túú cùu dusaⁿ-í tee tucu-í nchaa tñúhu sá sá ní dánèhé ñahá-í xii-ndo, chí cùu-xi tñúhu sá ío chíndee ñaha-xi xii-ndo. ² Te ío

quihí iní-ndó vǎ cáda cuendá-ndó ñi ñiⁿ tnúhu cáháⁿ cue tée ío cuihna iní-xi ñá túú tnàhí cuini cada sá vǎha, chi cue tée-áⁿ néhé-güedé iní iná chí cǎchí-güedé sá ncháá cué tée xini ñuhu-xi cuáha-güedé sēñá ñii-güedé cuendá ducaⁿ cùdiu-güedé núú Yǎ Ndióxi. ³ Dico nchoo chi cùdiu-o núú Yǎ Ndióxi cuéi dava-o sà ní ngún-decu sēñá ñii-o te dava-o ñǎhá, chí Espírítu-gá chindée ñaha-xi xii-o quide-o nchaa nacuaá tàù-xi cunduu cuendá cuu cǎhnu-gá. Te ío cùdii iní-ó cǎchí-ó sá ío cǎhnu cuu Xítoho Jesucristú, te ñá túú sàni iní-ó sá sá cuendá nchaa sá vǎha quide-o cùdiu-o núú Yǎ Ndióxi. ⁴ Te núú dicó cuendá nchaa sá vǎha quide-o cùdiu-o núú Yǎ Ndióxi, te yúhú sa ama-gá cùdiu-í núú-gǎ cuendá nchaa sá ñi quide-í ní cuu te núú dicó ducaⁿ. Te ío cue tée cǎchí-güedé sá cùdiu-güedé núú Yǎ Ndióxi cuendá nchaa sá vǎha quide-güedé. Te yúhú uuⁿ-gá ducaⁿ cǎháⁿ-í núú dicó sá cúú chí yúhú ní xídó-gǎ-í ní quide-í dàcúúxí dǎva-gǎ-güedé. ⁵ Te núú úná-ni nduu sá ní cacu-í te ní sǎha-güedé sēñá ñii-í, te yúhú cúú-í tée isráel, te mei ñani tnáhá ndii Benjamín tée ní xindecu ndéé sanaha cúu-í. Te cǎháⁿ-í tnúhu hebreaú tnúhu cáháⁿ tǎtà-í ndihi ñàná-í, te ní cundihi-í nchaa cue tée cúu fariséu, te ní cǎnchiúⁿ nihnu-í nchaa nacuaá ní cáháⁿ ndii Moisés dàtná xiquide mee-güedé. ⁶ Te yúhú ní sani iní-í sá ñiⁿ ichi ndáá ndécù-í ní cuu, te ío ní cuini-í cuu cuechi-í núú Yǎ Ndióxi, núú xiǎⁿ nándi sá ñi quide-í nchaa ñáiyu ndècu ichi Xítoho Jesucristú, te vǎ yóo ñiⁿ ni xóo cúñaha ñiⁿ tnúhu xii-í cǎchí-yu sá ña túú quide-í nacuaá ní cáháⁿ ndii Moisés ní cuu. ⁷ Te nchaa sá sání iní-í sá ío nándihi nchicúⁿ nihnu-í ní cuu, ní cutnùni iní-í sá ña túú tnàhí chindee ñaha-xi nacuaá cundáá-í núú Yǎ Ndióxi, núú xiǎⁿ duuⁿ duuⁿ ní xehndé iní-í sá vǎ chindée ñaha-xi cuendá sá ñi cuini-í cundecu ndihi-í Xítoho Jesucristú. ⁸ Te nchaa sá cǎchí ñáiyu chindee ñaha cundáá-ó núú Yǎ Ndióxi ní cutnùni iní-í sá ña túú chindee ñaha-xi. Te yúhú ní cutnùni iní-í sá ío-gá vǎha tnáhá tnúhu-o ndihi Xítoho Jesucristú. Te nchaa sá sání iní-í chindée ñaha xii-í ní cuu, ñá túú-gǎ sàndáá iní-í sá chindée ñaha-xi vitna chí ní cutnùni iní-í sá ña túú nándihi-xi. Te ducaⁿ quide-í ñá túú-gǎ sàndáá iní-í nchaa xiǎⁿ sá chindée ñaha-xi, chí cuini-í sá úúⁿ-gǎ cuita tnáhá

tnúhu-í ndihi Xítoho Jesucristú quihíⁿ, ⁹ te cuu ñiⁿnuu-í ndihi-gá, te ducaⁿ-ni cundáá-í núú Yǎ Ndióxi dàtná cundáá-í vitna, dico ñá túú cuendá sá nchicúⁿ nihnu-í nacuaá ní cáháⁿ ndii Moisés ní cuu, chí cuendá sá sàndáá iní-í Xítoho Jesucristú. Te Yǎ Ndióxi ní quide-gá cundáá-í núú-gǎ, te ducaⁿ chí ní sàndáá iní-í Xítoho Jesucristú. ¹⁰ Te cuini-í cutnùni iní-í nchaa nacuaá sání iní Xítoho Jesucristú, te cuini-í sá ío chindee ñaha-gá, te diu-ni-gá cúú-gǎ Yáa ní xíhí te ní ndoto-gá, te ducaⁿ cuini-í cada-gá cuendá cada-í nchaa nacuaá cuini-gá. Te cuini-í tnáhá-í ndoho-í dàtná ní ndoho-gá. Te yúhú cuini-í sá vǎ cáda-í ní ñiⁿ sá ña túú tnáhá iní Yǎ Ndióxi, chí diu cuendá-áⁿ ní xíhí Xítoho Jesucristú. ¹¹ Te cuini-í sá Yǎ Ndióxi cǎchí-gǎ te tnáhá-í ndoto na sáa nduu ndòto nchaa ñáiyu sa ní xíhí ní xindecu ichi-gá.

Cada-o nchaa nacuaá tàù-xi cunduu cuendá nihi-ó sá ndúú tǎhù-ó

¹² Te cumáni-gǎ cada-í nchaa nacuaá cǎháⁿ-í-a, te cumáni-gǎ cada-í nchaa nacuaá cǎháⁿ Yǎ Ndióxi cuendá sá ña túú-gǎ ná cumáni-í núú-gǎ. Te ío ndècu ndee-í nchicúⁿ nihnu-í quide-í nacuaá ducaⁿ ña túú-gǎ ná cumáni-í núú-gǎ, chí diu cuendá-áⁿ ní cáháⁿ ñáhá Xítoho Jesucristú xii-í. ¹³ Te nchaa nchòhó ñáiyu ndècu ndihi-í ichi Xítoho Jesucristú cǎchí tnúhu-í xii-ndo sá cutnùni ndáá iní-í sá vitná cumáni-gǎ cada-í nchaa nacuaá ñá túú-gǎ ná cumáni-í núú-gǎ. Te ní nihi-í ñiⁿ sá ío xini ñuhu-xi cada-í te xiǎⁿ quide-í, te ña túú-gǎ quide cuendá-í nchaa sá ñi xóo cada-í, te ío ndècu ndee-í quide-í nchaa nacuaá cǎháⁿ Yǎ Ndióxi. ¹⁴ Te ndècu ndee vilhi-í nchicúⁿ nihnu-í quide-í nchaa nacuaá cǎháⁿ-gǎ, te diu-ni ducaⁿ càda-í ndéé ná sáa nduu sǎá-í núú ndécú-gǎ taxi-gǎ sá ndúú tǎhù-í. Te ducaⁿ tnáhí sa ní cáháⁿ ñáhá-gǎ xii-o cundecu-o ndihi-gá, te ducaⁿ ní cáháⁿ ñáhá-gǎ xii-o sá cuendá Xítoho Jesucristú chí tnáhá tnúhu-o ndihi-gá.

¹⁵ Te nchaa nchòhó ñáiyu quide vǎha ndècu ichi Yǎ Ndióxi xini ñuhu-xi cani iní-ndó dàtná sání iní-í-a, àdi núú dava-ndo ña túú sání iní-ndó dàtná sání iní-í-a, dico mee Yǎ Ndióxi dandixi túú-gá iní-ndó te cutnùni iní-ndó nacuaá cada-ndo. ¹⁶ Te xini ñuhu-ni-xi cada-o nchaa nacuaá ta quide-o véxi.

¹⁷ Te nchaa nchòhò ñáyiú ndècu ndìhi-í ichi Xítóhó Jesucristú càháⁿ-í dóho-ndo sá cànchícúⁿ nihnu-ndo càda-ndo datná quidè-í. Te cundehe-ndo nàcuáa quide nchaa ñáyiú sa nchicúⁿ nihnu nchaa nàcuáa dānehé ñáhà-í xii-ndo cuendá ducaⁿ càda-ndo tnahá-ndó. ¹⁸ Te sa ní cuu vai xito cachí tñúhu-í xii-ndo sá íó ñáyiú ñá túú tñáhi cùu váha iní-xi sá ní xihí Xítóhó Jesucristú núú cùrúxi cuendá sá nānihí tǎhú-ó. Te ndihí ndute núú-í dāndàcu iní ñáhà-í xii-ndo cuendá-yu. ¹⁹ Te sáá nduu te nchaa ñáyiú ducaⁿ xíquide-áⁿ cuíta nihnú-yu, chi mee-ni nchāa sá cuèhé sá dúhá ñùhu iní-yu te diu-ni nchaa xíáⁿ cúnúu quidé-yu, te cucahaⁿ núú-yu cuendá nchaa sá quidè-yu núú dicó sá cúú, dico ñáhá chi da quide cahnú-yu mēe-yu cuendá nchaa xíáⁿ. Te mee-ni nchāa sá íó ñuyú-a ñùhu iní-yu. ²⁰ Dico nchoo chi andiú ndècu núú cúú ñùú-ó, te ndètu cahnu-o sáá nduu quixi tucu Xítóhó Jesucristú nacuaca ñaha-gǎ xii-o. Te diu-ni-gǎ cúú-gǎ Yáá ní dácācu nihnu ñaha xii-o núú ùhú núú ndáhú. ²¹ Te yiqui cùñú-ó chi vá cùdí-xi cundecu-xi dátá cáá-xí vitna, dico mee Xítóhó Jesucristú nadama-gǎ yiqui cùñú-ó te ndada-gǎ dátá ní nduu yiqui cùñú-ó mēe-gǎ cùtñàhá ní ndoto-gǎ. Te ducaⁿ càda-gǎ chi ndacu-gǎ quidè-gǎ nchaa sá váha càchí iní-gǎ, te ducaⁿ tàxi tñuní-gǎ nchaandi túhú sá íó.

4

Ío cudíí iní-ó sá ndécú-ó ichi Xítóhó Jesucristú

¹ Te nchaa nchòhò ñáyiú ío cùu iní-í ndécú ndihí-í ichi Xítóhó Jesucristú ío cuñí-í cáháⁿ ndihí ñaha-í xii-ndo. Te ío cudíí iní-í cuendá nchaa sá váha quide-ndo chi ñá túú ní xita chiúⁿ Yá Ndióxi ní quide-í sá cúú-xí-ndó, te diu-ni nchòhò ñáyiú ío cùu iní-í càháⁿ-í dóho-ndo sá cànchícúⁿ nihnu-ni-ndo ichi Xítóhó Jesucristú.

² Te yohó tá Vòdiá ndihí yohó tá Síntiqué càháⁿ ndáhú-í núú-ndó sá cúú ñⁿnuu-ndo cundecu-ndo ichi Xítóhó Jesucristú. ³ Te yohó té cùndihí-í quide ndáá quidé nchāa chiúⁿ quide-í, càháⁿ ndáhú-í núú-n sá chindèe tñúhu-n úú ñáyiú ñàh-áⁿ cuendá sá ná cùu ñⁿnuú-yu cundecú-yu, chi cùt-ñàhá ní xíndecu ndihí ñàhá-yu xii-í ío ní chindee ñàhá-yu xii-í, ndihí té Clémenté, ndihí nchaa dava-gǎ-yu ní quide-ndí chiúⁿ

Xítóhó Jesucristú, te nchaa ñáyiú-áⁿ sa yòdo tñuní-yu núú tütú Yá Ndióxi sá ndúú tǎhú-yu cundecú-yu ndihí-gǎ ní caa ní quíhíⁿ.

⁴ Te nchaa-ni nduu ío cudíí iní-ndó sá ndécú-ndó ichi Xítóhó Jesucristú. ⁵ Te càháⁿ-ni tucu-í dóho-ndo sá cudíí ndisa iní-ndó! ⁶ Te ío váha cuu iní-ndó càháⁿ ndihí-ndo ñáyiú cuendá ná cùtñuní iní-yu sá cúú-ndó ñáyiú váha iní-xi, chi sa ta cùyatni nduu quixi tucu Xítóhó Jesucristú.

⁷ Te ñá túú tñáhi ná cani iní-ndó te núú nása cùu ndecu-ndo, chi càháⁿ ndihí-ndo Yá Ndióxi cuendá sá ná chindee ñaha-gǎ xii-ndo. Te ío ndacáⁿ tǎhú-ndó núú-gǎ. ⁸ Te núú ducaⁿ na càda-ndo te Yá Ndióxi cada-gǎ te ío váha cuu iní-ndó cundecu-ndo. Te nchoo ñáyiú ñá túú cùtñuní iní-ó nása quide-gǎ ndéé ducaⁿ ío váha cùu iní-ó, te ducaⁿ ío váha cùu iní-ó chi cùu ñⁿnuu-o ndihí Xítóhó Jesucristú.

Mee-ni sá váha cuhuⁿ iní-ó

⁹ Te càháⁿ ndáhú tucu-í núú nchāa nchohó ñáyiú ndècu ndihí-í ichi Xítóhó Jesucristú sá mēe-ní sá váha cuhuⁿ iní-ndó. Te xini ñuhu-xi cuhuⁿ iní-ndó mēe-ni nchaa tñúhu ndáá, ndihí nchaa tñúhu yíñùhu, ndihí nchaa tñúhu sá ío cudíí iní-ó, ndihí nchaa tñúhu sá ío vii ío váha cuaháⁿ, ndihí nchaa tñúhu sá ñá túú ñùhu tnahá tñúhu cuèhé, ndihí nchaa tñúhu sá càchí ñáyiú váha, ndihí nchaa dava-gǎ tñúhu sá sání iní mēe-ndó sá ío váha te diu-ni nchaa xíáⁿ cuhuⁿ iní-ndó.

¹⁰ Te cùtñàhá ní xíndecu ndihí ñaha-í xii-ndo ní dānehé ñáhà-í nàcuáa cada-ndo te ní sándáá iní-ndó. Te xíáⁿ càháⁿ-í dóho-ndo sá vá dāñá ndèe-ndó càda-ndo, te diu-ni ducaⁿ vá dāñá ndèe-ndó càda-ndo nchaa nacuáa ní quide-í ní xiní-ndó. Te núú ducaⁿ na càda-ndo te Yá Ndióxi Yáá quidé ío váha cùu iní-ó ndècu-o cundecu ndihí ñaha-gǎ xii-ndo.

Ñáyiú ñuu Filipú ndécú ichi Xítóhó Jesucristú sǎñàhá-yu sá ndúú tǎhú tē Páblú

¹¹ Te cudíí víhi iní-í ndacáⁿ tǎhú-í núú Xítóhó Jesucristú sá ní ndacu iní ñáhà-ndó xii-í, dico ñá díú sá ñá túú ñùhu iní ñáhà-ndó xii-í chi dicó sá ñá nihí-ndó nàcuáa cada-ndo chindee ñaha-ndo xii-í ní cùu. ¹² Te ñá díú sá dúhá càháⁿ-í te cani iní-ndó sá càchí tñúhu-í xii-ndo sá íó ñⁿ sá cùmání xii-í, chi yihú cùu váha-ni iní-í ñùu

lò xii-í àdi ñá túú lò. ¹² Te xini-í cunduu ndàhù-í, te xini-í cunduu cuica-í, te xini-í caxi-í ndahá xití-í, te xini-í cuú-í docó, te xini-í nàcuáa quide-xi oré ñá túú vèdana ná ndécú ndìhi-o, te xini-í nàcuáa quide-xi oré xidó ndécú ndìhi-o. Te ducaⁿ nì cutúha-í quidè-í cuendá nchaa nàcuáa ta yàha-í véxi. ¹³ Te nchaa ndàcu-í quidè-í chi Xí-tohó Jesucristú chindèe ñaha-gá xii-í. ¹⁴ Te nchòhó ío váha ní quide-ndo nì cundàhú iní ñáhà-ndó xii-í ní chindee ñaha-ndo vitna ndecu ndìhi-í tnúndòho.

¹⁵ Te nchòhó cue ñáyiú ñuú Filipú sa ñaha-ndo nacuaa ní cuu cútñahá ní ngúfta-í càháⁿ-í tnúhu Xítohó Jesucristú distritú Macèdoniá, te cútñahá ní ndee-í distritú-áⁿ te ñuú tnàhí-ni nchòhó ní taxi-ndo sà ndúú tãhù-í, te nchaa ñáyiú ndècu ichi Xítohó Jesucristú dava-gá xichi ñá túú tnàhí ni chindee ñahá-yu xii-í. ¹⁶ Te cuèi cútñahá ní xindecu-í ñuú Tesalónica titní xito ní tendaha-ndo sà ndúú tãhù-í sá nì cutnùni iní mée-ndó nì xini ñùhu-í. ¹⁷ Te vá cání iní-ndó sà sà dúhá càháⁿ-í te cuini-í nàndi-gá taxi tãhù-ndó, te duha càháⁿ-í chi Yá Ndiòxí ío-gá vèi sá váha cada ñaha-gá xii-ndo sà dúcáⁿ quide-ndo. ¹⁸ Te ní xidó vèi nchaa sá xini ñùhu-í ndécú ndìhi-í vitna, te ducaⁿ ío vèi sá ndécú ndìhi-í ní cuu chi ní tendaha tucu-ndo sá ndúú tãhù-í véxi ndìhi té Epafròditú. Te tãhù-a cùu-xi datná ìⁿ tãhù sà nì sàha-ndo mée Yá Ndiòxí, te cùu vii cuu váha iní-gá sá dúcáⁿ nì quide-ndo. ¹⁹ Te núu ná cúú sà xini ñùhu-ndo, te mee Yá Ndiòxí ío vèi taxi-gá chi ío vèi sá ndécú ndìhi-gá, te ducaⁿ càda-gá chi ndècu ndìhi-o Xítohó Jesucristú. ²⁰ Te vitna nchaa-o chí ná càchí-ó sà ío càhnu cuu Tátá-ó Dütú Ndiòxí ní caa ni quihíⁿ. Te ducaⁿ na cunduu.

ducaⁿ na cunduu. Te ío chí cádá ndèe iní-ñá vitna.

Tnúhu ndée núú nì ndìhi-ná

²¹ Te cùñaha-ndo sà ío na càda ndee iní nchaa ñáyiú ndècu ichi Xítohó Jesucristú, ñáyiú cùu cuendá Yá Ndiòxí. Te tnàhá nchaa ñáyiú xindecu ichi Xítohó Jesucristú ndécú ndìhi-í quidé ndèe iní ñáhà-yu xii-ndo. ²² Te nchaa ñáyiú cùu cuendá Yá Ndiòxí xínú cuèchi vehe té Cèsár téé yindaha cuéhé nàcióⁿ quidé ndèe iní ñáhà-yu xii-ndo, ndìhi nchaa dava-gá ñáyiú cùu cuendá-gá.

²³ Te Xítohó Jesucristú ío na chindee chitúu ñaha-gá xii-ndo nchàa-ndo. Te

TUTÚ NÍ CADÚHA TÉ PĀBLÚ QUÍHÍⁿ NDAHA ÑÁYIU ÑUÚ CÒLOSÁ

Té Pāblú cadúha-dé tutú quíhíⁿ ndaha ñáyiú x̄ndecu ichi Xítóhó Jesucristú ndécú ñúú Còlosá

¹ Yúhú té Pāblú ní tendaha ñaha Yá Ndióxi càháⁿ-í tnúhu Xítóhó Jesucristú núú ñáyiú chi ducaⁿ cuiní mée Yá Ndióxi cundu, te cadúha-í tutú-a ndíhi té Timúteú ²cuendá daquixi-í ndaha nchòhó ñáyiú ñúú Còlosá, ñáyiú cùu cuendá Yá Ndióxi, ñáyiú quide ndáá ndécú ichi Xítóhó Jesucristú, te xicáⁿ táhu-í núú Tātá-ó Dütú Ndióxi sá io na chindee chitúu ñaha-gá xii-ndo, te ducaⁿ ní nduú-gá ná cádá te ío váha cuu inf-ndó cūndecu-ndo.

Té Pāblú càháⁿ ndíhi-dé Yá Ndióxi cuendá ñáyiú sàndáá iní ñáhá xii Xítóhó Jesucristú

³ Te ducaⁿ-ni càháⁿ ndíhi-ndí Yá Ndióxi Yáá cúú Tātá Xítóhó Jesucristú ndacáⁿ táhú-ndí núú-gá cuendá nchaa nacuáa quide-ndo ndecu-ndo, ⁴chi nihí-ndí tnúhu sá io sàndáá inf-ndó Xítóhó Jesucristú, te ducaⁿ io cùu inf-ndó nchaa ñáyiú cùu cuendá Yá Ndióxi. ⁵ Te ducaⁿ quide-ndo chi sàndáá inf-ndó sá ndúú táhú-ndó cūndecu-ndo núú ndécú Xítóhó Jesucristú, te tnúhu-áⁿ ní nihí-ndó cūtnàhá ní x̄ndedóho-ndo tnúhu ndáá tnúhu Xítóhó Jesucristú. ⁶ Te tnúhu Xítóhó Jesucristú tá x̄ité nuu-xi nihí ñuyú cuáháⁿ. Te vai ñáyiú ta sàndáá inf-yu cuáháⁿ, te ta quidé-yu mee-ni sá váha cuáháⁿ ndécú-yu ichi-gá. Te nchòhó chi ndée cūtnàhá ní tecú dóho-ndo tnúhu-gá ní quesaha-xi ta cùu vai ñáyiú ñuú-ndó tá quide ndáá-yu núú-gá cuáháⁿ. Te dàvá-áⁿ ní cutnùní ndáá ndisa inf-ndó sá Yá Ndióxi ío chindee chitúu ñaha-gá xii-ndo. ⁷ Te ducaⁿ ní dānehé ñáhá tē Ēpafrás tēe ío cùu inf-ndí, chi tnàhá-dé ío quide ndáá-dé x̄inú cuèchi-dé núú Xítóhó Jesucristú quidé-dē núú-ndí dācuàha ñaha-dé xii-ndo tnúhu-gá. ⁸ Te càchí tnúhu-dé xii-ndí sá io cùu iní ñáhá-ndó xii-ndí, te ducaⁿ quide-ndo chi Espiritú Yá Ndióxi chindēe ñaha-xi xii-ndo.

⁹ Te ndée cūtnàhá ní nihí-ndí tnúhu nacuáa quide-ndo ndecu-ndo ndée dàvá-áⁿ ní ngúita-ndí ñá túú dàna ndee-ndí xicáⁿ

táhu-ndí núú Yá Ndióxi cuendá-ndó sá Espiritú-gá ná tàxi-xi nchaa-gá sá cūmāní quini tnùní-ndó, te ducaⁿ te cutnùní váha-gá inf-ndó nacuáa cuiní Yá Ndióxi cada-ndo. ¹⁰ Te sá dúcáⁿ te ndacu-ndo càda-ndo mee-ni sá váha dàtná cuiní Xítóhó Jesucristú cada nchaa ñáyiú ndécú ichi-gá. Te ducaⁿ io nduu vétú inf-gá te núu na càda-ndo nchaa núú sá váha. Te ducaⁿ io-gá cuita cutnùní inf-ndó nchaa nacuáa cuiní Yá Ndióxi cada-ndo. ¹¹ Te mee-gá cúú-gá Yáá ío cūnuu, te diu-gá ío chindee ñaha-gá xii-ndo, te cudíí inf-ndó cuèi nāndi na càda ñaha ñáyiú xii-ndo sá cuendá-gá, te ducaⁿ io cundu cāhnu inf-ndó. ¹² Te ndacáⁿ táhú-ó núú Dütú Ndióxi chi ní quide túha ñaha-gá xii-o cuendá nduu táhú-ó cūndecu-o ndíhi nchaa dava-gá ñáyiú ȳndaha-gá x̄ndecu núú cāndò canine ñá túú tnàhí-gá ní ñíⁿ cuèchi ío. ¹³ Te diu-gá ní quide ní dāná-ó nchaa ichi cuehē ichi duha núú táxi tnùní yucu ñāvāha, te ní nachihí ñaha-gá xii-o ndāha Déhe-gá Yáá ío cùu inf-gá. ¹⁴ Te Déhe-gá ní x̄ihí-gá cuendá sá nchóó cācu nihnu-o núú ùhú núú ndàhú, te ní quide cāhnu inf-gá nchaa sá cuèhē sá dúhá ní quide-o.

Ñáyiú cùu ñⁿnuu ndíhi Yá Ndióxi cuendá sá ní x̄ihí Xítóhó Jesucristú

¹⁵ Te Yá Ndióxi cúú-gá Yáá vá cúú quini-ó dico Xítóhó Jesucristú chi ní quixi túu-gá ñuyú-a, te ní quide-gá nchaa nacuáa sàni inf-gá. Te dàtná-ni sàni inf-gá te ducaⁿ sàni iní Yá Ndióxi, te Yáá-áⁿ ducaⁿ-ni ndecu-gá ndée cūtnàhá vátā ngāva-gá ñuyú. ¹⁶ Te Xítóhó Jesucristú ní quide-gá núú Yá Ndióxi ní cadúha-gá nchaa sá ío andiú ndíhi nchaa sá ío ñuyú-a, te ní cadúha-gá nchaa sá cúú quini núú-ó cūndehe-o, ndíhi nchaa sá vá quini tnàhí-o, ndíhi nchaa espíritú cūnūu vilhi xinu cuechi núú Yá Ndióxi, ndíhi nchaa dava-gá espíritú x̄inú cuèchi. Te nchaa ní cadúha Xítóhó Jesucristú chi ducaⁿ ní cacíhí Yá Ndióxi cundu. Te ducaⁿ ní cacíhí Yá Ndióxi cundu cuendá nchaa cuu-xi mee-ni sá váha sá cúú-xí Xítóhó Jesucristú. ¹⁷ Te Xítóhó Jesucristú ducaⁿ-ni ndecu-gá ndée cūtnàhá vátā ngāva-gá ñuyú-a, te diu núú ndáhá-gá cāndòdo ñuyú-a, ndíhi andiú, ndíhi nchaandi túhú sá ío. ¹⁸ Te diu Xítóhó Jesucristú cūnūu-gá ȳndaha ñaha-gá xii nchaa nchoo ñáyiú ndecu ichi-gá, te diu-gá quidé-gá ndécú váha-o núú-gá. Te

núu ncháá ñáyi ndoto diu-gá cúu-gá Yáá ío càhnu cuu sa ní ndoto, te sá dúcáⁿ ní ndoto-gá te xíáⁿ cúu-gá Yáá ío tàxi tñuní nchaandi túhú sá ío ñuyú-a ndihi andi. ¹⁹ Te ducaⁿ ío cùnnu-gá táxi tñuní-gá chi ndáá sá ñⁿ-ni cuu-gá ndihi Yá Ndiöxí. ²⁰ Te Xítoho Jesucristú ní xíhí-gá núu cùrúxí, chi ducaⁿ ní cuiní Yá Ndiöxí cunduu cuendá sá vâ yôo ñⁿ-gá cuu úhú iní ñáhá xii-gá cuéi ñáyi xíndecu ñuyú-a, te cuéi cue espíritu ndécú andi.

²¹ Te nchòhó cùnàhá vátá cùndècu-gá-ndó ìchi Xítoho Jesucristú ñá túu tñàhí ní xôo cáháⁿ ndihi-ndo-gá, chi mee-ni ní xóo cuu úhú iní-ndó-gá, te mee-ni ncháa sá cuèhé sá dúhá ní xóo cunuu ní xóo cada-ndo ni cuu, dico Xítoho Jesucristú ní quide-gá ní tnahá tñuhu-ndo ndihi Yá Ndiöxí vitna. ²² Chi diu cuendá-án ní xíhí Xítoho Jesucristú núu cùrúxí cuendá sá nchóhó nduu ndoo nduu nine iní-ó ngündecu-o núu Yá Ndiöxí, te ducaⁿ te ñá túu tñàhí-gá ná cumání-ó núu-gá, te vâ yôo ñⁿ-gá cachí sá nchóhó ndècu cuéchi-o. ²³ Te núu vâ dáñá ndèe-ndó quindáá iní-ndó Xítoho Jesucristú, te cundecu-ni-ndo ìchi-gá, te vâ cání iní-ndó ñàña-ndo tñuhu ndee ìní ní taxi-gá ndécú ndihi-o. Te ncháa tñuhu-gá-án tá xítè nuu-xi nihí ñuyú cuáháⁿ, te diu-ni tñuhu-án càháⁿ yúhú té Páblú dánèhé-í ñáyi.

Té Páblú yíhí díquí-dé cáháⁿ-dé tñuhu Xítoho Jesucristú núu ñáyi ndècu ichi-gá

²⁴ Te vitna ío cùdíí iní-í ndòhò-í cuendá-ndó, chi Xítoho Jesucristú ío ní ndoho-gá cuendá-ó, te tnahá yúhú ndòhò-í cuendá ncháa ñáyi ndècu ichi-gá, dico vitna cùmání-gá ndoho-í cuendá-yu. ²⁵ Te Yá Ndiöxí ní cachí-gá sá yúhú quíhi díquí ñáhà-í xii ncháa nchòhó ñáyi ndècu ichi-gá cuendá danèhé ñáhá vâha-í xii-ndo tñuhu-gá cuendá cuu-xi sá vâha sá cúu-xí-ndó. ²⁶ Te ncháa tñuhu sá dánèhé ñáhà-í xii-ndo ñá túu ní təcú dóho ncháa ñáyi ní xíndecu ndéé sanaha, te mee-gá ní cuiní-gá sá ncháá nchòo ñáyi yíndaha-gá vitna cundecu ndihi-o tñuhu-án. ²⁷ Te mee-gá ní cachí-gá sá dátüu-gá ncháa tñuhu sá ío vii ío vâha cuáháⁿ núu ncháa ñáyi yíndaha-gá. Te tñuhu-án cúu-xí cuendá tnahá ncháa nchòhó ñáyi ñá túu cùu ñáyi israhél. Te tñuhu-án dánèhé

ñáhà-xí xii-ndo sá Xítoho Jesucristú ndécú ndihi ñaha-gá xii-ndo. Te cuendá xíáⁿ ní ngündecu ndihi-ndo tñuhu ndee ìní cundecu-ndo ndihi-gá ní caa ní quíhíⁿ.

²⁸ Te nchúhú mee-ni cuendá Xítoho Jesucristú cáháⁿ vâha-ndí, te dàsahú-ndí ñáyi nàcuáa cadá-yu. Te vâha víhi danèhé-ndí ncháa ñáyi nàcuáa tecú tñuní-yu tñuhu-gá, te ducaⁿ danèhé-ndí-yu nàcuáa cundáá-yu núu Yá Ndiöxí, te ducaⁿ chi tnahá tñuhu-yu ndihi Xítoho Jesucristú. ²⁹ Te cuendá xíáⁿ ío ndùcu ndee-í quidè-í chiuⁿ Xítoho Jesucristú, te mee-gá ío chindee ñaha-gá xii-í núu xíáⁿ ndácú-í quidè-í chiuⁿ-gá.

2

¹ Te cuiní-í sá nchòhó cutnùní iní-ndó sá ío sàni iní-í cuendá-ndó, ndihi cuendá ncháa ñáyi ndècu ñuu Laodiceá, ñáyi xíndecu ichi Xítoho Jesucristú. Te ducaⁿ-ni ío sàni iní-í cuendá ncháa ñáyi vátá quiní ñáhà-gá xii-í. ² Te cuiní-í sá nchòhó ndihi ncháa ñáyi-án ío nducu ndèe-ndo canchicúⁿ nihnu-ndo ìchi Xítoho Jesucristú, te ío cuu iní tñáhà-ndó, te ducaⁿ cùu ñⁿ-nuu-ndo cundecu-ndo. Te cuiní-í sá nchòhó ndihi dava-gá ñáyi-án ío vâha sáá sá xini tñuní-ndó cuendá tecú tñuní-ndó ncháa nacuaá nduu cuendá Xítoho Jesucristú chi ío nduu yuhu ni cuu, dico vitna ní dátüu-gá núu-ó. ³ Te Xítoho Jesucristú nehé vâha-gá ncháa tñuhu sá ío xini ñuhu-xi tecú tñuní-ó. ⁴ Te duha càháⁿ-í chi cuiní-í sá vâ quindáá iní-ndó ní ñⁿ tñuhu càháⁿ ncháa ñáyi cuiní dandáhú ñáhá xii-ndo cuéi ío vâha càháⁿ-yu. ⁵ Te cuéi ñá túu ndècu ndihi ñaha-í xii-ndo díco ducaⁿ-ni ío ñuhu iní ñáhà-í, te ío cùdíí iní-í chi nihí-í tñuhu sá ío cùu ñⁿ-nuu-ndo ndecu-ndo, te ñá túu dáña ndèe-ndó sándáá iní-ndó Xítoho Jesucristú.

⁶ Te dátña-ni ní sándáá iní-ndó Xítoho Jesucristú, te ducaⁿ-ni quindáá iní-ndó-gá canchicúⁿ nihnu-ndo ìchi-gá. ⁷ Te ní yuhu ní iní-ndó canchicúⁿ nihnu-ndo ìchi-gá, te ducaⁿ cùita cutnùní-gá iní-ndó ncháa nacuaá càháⁿ-gá quíhíⁿ. Te vâ dáñá ndéé tñàhí-ndo quindáá iní-ndó ncháa tñuhu sá ní dánèhé ñáhá cuè téé cáháⁿ tñuhu-gá xii-ndo. Te xini ñuhu-xi ndacáⁿ táhú víhi-ndo núu Yá Ndiöxí cuendá ncháa tñuhu-án.

Ñáiyu ío váha tnahá tnúhu ndihi Xítohó Jesucristú

⁸Te ío quíhi iní-ndó cùndecu-ndo chi xica cuu ñáiyu cuiñí dandáh ñáhá xii-ndo, te ñáiyu-án cãháⁿ-yu mee-ni nchãa tnúhu ní cahu iní nchaa cue téé ñuyú-a, te nchaa tnúhu-án ñã túú vëdana nãndíhi-xi. Te ducaⁿ quidé-yu chi nchicúⁿ nihnu-ní-yu nchaa nãcuáa ní xóo cada ñáiyu ní xíndecu ndéé sanaha. Te cãháⁿ-yu nãcuáa sãni iní yu cuu ñãvãha, te ñã túú cãháⁿ-yu nãcuáa cuiñí meé Xítohó Jesucristú.

⁹Te Xítohó Jesucristú cúu-gã ìⁿ ñáiyu dico ìⁿ-ni cùu-gã ndihi Dútú Ndióxi. ¹⁰Te nchòhó chi ñã túú tnahí-gã ná cùmãní-ndó nũú-gã chi ndècu ndihi-ndo Xítohó Jesucristú. Te ío cùnuu-gã te tàxi tñuní-gã nchaa núu cuè espíritú cùnuu. ¹¹Te mee-gã ní ndada ndoo ní ndada nine-gã iní-ndó chi ní ngúndecu ndihi-ndo-gã te ducaⁿ ñã túú-gã ndécú-ndó ìchi cuehé ichi duha, te cada iní-ndó sã ní ngúndecu ndihi-ndo ìⁿ seña, chi ní ndada ndoo ní ndada nine-gã iní-ndó, dico ñã díú ìⁿ-ni cuu-xi ndihi seña sã sãha cue téé isráel ñii-güedé. ¹²Te nchòhó sa ní sandute-ndo te cada iní-ndó sã datná tnúhu sã ní xíhí-ndó ndihi Xítohó Jesucristú, te ní nguindüxi-ndo ndihi-gã, te ní ndoto-ndo ndihi-gã, te ducaⁿ cada iní-ndó chi ñã túú-gã ndécú-ndó ìchi cuehé ichi duha. Te ducaⁿ chi sãndáa iní-ndó nchãa nacuaa quide Yá Ndióxi, te diu-gã ní dãndótó-gã Xítohó Jesucristú. ¹³Te nchòhó cútñahã ndécú-ndó ìchi cuehé ichi duha cùu-ndo datná ñáiyu ní xíhí, chi ñã túú tnahã tnúhu-ndo ndihi Yá Ndióxi ní cùu, te ni ñã díú ñáiyu isráel cúu-ndó. Te Yá Ndióxi ní cachí-gã sã nchóó ío váha tnahã tnúhu-ndo ndihi Xítohó Jesucristú vitna. Te ducaⁿ ní quide-gã chi sa ní quide cãhnu iní-gã nchaa sã cuehé sã dúhá ní xóo cada-o. ¹⁴Te vitna duuⁿ duuⁿ ñã túú-gã cuechi-ndo ndècu núu-gã. Te nchoo ñã túú cuiñí-ó cada-o nacuaa cãháⁿ-gã, te cuendã xiãⁿ ío ndècuéchi-o, te vai nachãhu-o núu-gã ní cùu. Te vitna ñã túú-gã ni ìⁿ cuechi-ndo ndècu núu-gã, chi diu cuendã-án ní xíhí Xítohó Jesucristú núu cùrúxi. ¹⁵Te sã dúcãⁿ ní xíhí Xítohó Jesucristú núu cùrúxi, te duuⁿ duuⁿ ní dáquéé tñú-gã sãcuíhnã ndihi nchaa espíritú cùndíhi-xi, te ní quendóo canúú-xi, te mee-gã ío cùnuu-gã táxi

tñuní-gã.

Nanducu nihnu-o mee-ni sã váha cãchi Xítohó Jesucristú

¹⁶Te núu dava ñáiyu xícuèhé ñãhá-yu xii-ndo cuendã sã ñã túú xèxi-ndo xíhi-ndo datná quidé meè-yu te vá cáda cuendã-ndó, te ni vá cáda cuendã-ndó te núu xícuèhé ñãhá-yu xii-ndo cuendã sã ñã túú cãnehe íí-ndó vico quide meè-yu núu cuiã núu cuiã, ndihi vico quidé-yu ndi tnahã yóo, ndihi cuendã sã ñã túú cãnehe íí-ndó nduu ndetatú-yu. ¹⁷Te nãcuáa quidé-yu ndi tnahã òré quidé-yu nchaa vico-án, ndihi nãcuáa quidé-yu ndi tnahã nchaa nduu cãnehe íí-yu-án, te cada iní-ó sã sã quidé-yu-án dãnèhé núu ñãhá-xí nãcuáa cada Xítohó Jesucristú núu cuãháⁿ núu vëxi. ¹⁸Te vá quindáa iní-ndó ni ìⁿ tnúhu cãháⁿ ñáiyu cãchí sã cuita nihnu-ndo cuendã sã ñã túú tñii-ndo tnúhu cãháⁿ-yu, chi cãchí-yu sã ío xini ñuhu-xi cada cãhnu-o nchaa cue espíritú xínú cuèchi núu Yá Ndióxi, te ni yuhu ni iní-ó cãnehe-o sã yíñùhu núu-xi. Te ñáiyu-án cãchí-yu sã ndãã cãháⁿ-yu chi dàcoto ñaha saní-yu nãcuáa cãháⁿ-yu, te ío quide cãhnu-yu meè-yu cuendã nchaa sã sãni iní meè-yu quidé-yu, te ñã túú vëdana nãndíhi nchaa sã quidé-yu. ¹⁹Te nchaa ñáiyu ducaⁿ xíquide-án ñã túú tnahã tnúhu-yu ndihi Xítohó Jesucristú. Te mee-gã cúu-gã Yá cùnùu taxi tñuní ñãhá-gã xii nchaa nchoo ñáiyu ndècu ichi-gã, te chindee ñaha-gã xii-o ndècu-o ichi-gã, te mee-gã quidé-gã cúu ìⁿnuu-o ndecu-o, te ta quide-o nchaa nacuaa cuiñí Yá Ndióxi cuãháⁿ.

²⁰Te nchòhó cúu-ndó datná ñáiyu ní xíhí ndihi Xítohó Jesucristú cuendã sã vá cãnchicúⁿ nihnu-gã-ndó nãcuáa cãháⁿ ñáiyu ñã túú ndècu ichi-gã. Te núu ducaⁿ ñã, ¿te ná cuendã tñii-ní-ndó tnúhu cãháⁿ ñáiyu-án te quide-ní-ndo datná quidé-yu? ²¹Chi ñáiyu-án cãchí-yu sã ío sã ni vá cúu tèe ndaha-o, te dava ni vá cúu cãxi-o, te dava ni vá cúu tñii-o. ²²Te nchaa xiãⁿ, núu néhé chiúⁿ-ni-ndo ndihi nihnu-xi. Te nchaa sã dúcãⁿ cãháⁿ-yu-án cúu-xí meè-ni sã ní cahu iní meé nchã ñáiyu ñuyú-a nãcuáa cada-yu cundecú-yu. ²³Te nchaa tnúhu cãháⁿ-yu-án sãnúu sã cúu-xí ìⁿ tnúhu cãháⁿ ìⁿ téé ío váha sãã díquí-xi, chi cãchí-yu sã cáda cãhnu-o Yá Ndióxi nãcuáa véxi iní

mée-ó, te cunduu ndàhú iní-ó dico ñá túú dānehé ñāhā-yu nācuāa tǎu-xi cunduu. Te cāchí tucú-yu sá cādá ūhú-ó mēe-o, chi ducaⁿ cuiní Yǎ Ndiǒxí cada-o cāchí-yu. Te nchaa xiǎⁿ ñá túú vēdana chindee ñaha-xi xii-o cuendá sá và táxí tñuní ñāhá nì ìⁿ sá cuèhé sá dúhá sàni iní-ó.

3

¹ Te nchòhó cada iní-ndó sǎ nǐ xihí-ndó ndìhi Xítóhó Jesucristú te ní ndoto-ndo ndìhi-gá, núu xiǎⁿ tǎu-ndó càda-ndo nchaa sá vǎha dàtná cuiní mēe-gǎ chi mee-gǎ núcōo-gǎ xio cùha Dútú Ndiǒxí chi tñahá-gá ío cùnūu-gǎ. ² Te ío cuhuⁿ iní-ndó nchàa sá vǎha cāchí Xítóhó Jesucristú nduu tǎhú-ndó cūndecu ndìhi-ndo, te và cúhúⁿ iní-ndó mēe-ni nchaa sá ló ñuyúyú-a. ³ Te ducaⁿ càda-ndo chi cùu-ndo datná ñáyiú ní xihí ndìhi Xítóhó Jesucristú, chi ñá túú-gǎ ndécú-ndó ìchi cuèhé ichi duha. Te Yá Ndiǒxí nēhé cuendá ñāhá-gǎ xii-ndo chi tñahá tñúhu-ndo ndìhi Xítóhó Jesucristú. ⁴ Te Xítóhó Jesucristú cúu-gǎ Yaá ndécú ndìhi ñaha xii-o vitna, te sáá nduu quèe túu ndìhi ñaha-gǎ xii-o àndiú, te tñahá-ó ío cunūu-o ndìhi-gá.

Duuⁿ duuⁿ daña-o nchàa sá cuèhé sá dúhá ñūhu iní-ó te cada-o mēe-ni sá vǎha

⁵ Te duuⁿ duuⁿ daña-ndo nchàa sá cuèhé sá dúhá ñūhu iní-ndó. Te nchaa nchòhó cue tée và cāháⁿ ndìhi-ndo ñáyiú dīhí te núu ñá díú ñādihí-ndó cùu-yu, te ducaⁿ-ni nchàa nchòhó cue ñáyiú dīhí tucu và cāháⁿ ndìhi-ndo cuè tée te núu ñá díú yīi-ndo cuu-güedé, te nchaa-ndo và cání-gǎ iní-ndó càda-ndo ni ìⁿ sá cuèhé sá dúhá ndìhi tñaha ñáyiú-ndo. Te và cání cuèhé cani duha-gǎ iní-ndó sǎ cúu-xí-ndó ndìhí-yu, te và cání-gǎ iní-ndó nì ìⁿ sá cuèhé sá dúhá, te nì và xihó-ndó ìⁿ sá ndécú ndìhi tñaha ñáyiú-ndo, chi núu ducaⁿ na càda-ndo xihó-ndó sá ndécú ndìhí-yu te ìⁿ-ni cùu-ndo ndìhi ñáyiú chihūhu nchaa sá cāchí-yu cùu ndiǒxí te ñá ndàá sá ndiǒxí cúu nchàa xiǎⁿ. ⁶ Te nchaa ñáyiú ducaⁿ xiquide ío dandòho ñaha Yá Ndiǒxí xif-yu na sáá nduu tñúndòho tñúhu ndàhú, chi ñá túú sàndáá iní ñāhá-yu xii-gǎ. ⁷ Te nchòhó cùtnàhá ní xīndecu-ndo ìchi cuèhé ichi duha, te tñahá-ndó nǐ xóo cada-ndo dàtná quidé nchàa ñáyiú-án. ⁸ Te vitna duuⁿ

duuⁿ daña-ndo nchàa sá ná cāchí tñúhu-í-a: Vǎ cúdēéⁿ-gǎ-ndó, te nì và cūnduu líhli-gǎ iní-ndó, te nì và cúu ūhú-gǎ iní-ndó tñaha ñáyiú-ndo, te nì và cūcuèhé-gǎ-ndó-yu, te nì ìⁿ-gǎ tñúhu cuèhé và cāháⁿ-ndó. ⁹ Te nì và dācuàndehnde-gǎ-ndó, chi nchòhó sa ní dāñá-ndó nchàa ichi cuèhé ichi duha, te ñá túú-gǎ sání cuèhé sání dùha iní-ndó nǎ cada-ndo vitna datná ní xóo cada-ndo. ¹⁰ Te vitna nchòhó ní nduu-ndo ñáyiú vǎha, te uuⁿ-gǎ tá cùtnuní iní-ndó nchàa nacuāa cuiní Yǎ Ndiǒxí cada-ndo, te ducaⁿ ta ndūcu ndee-ndo quide-ndo mee-ni sá vǎha dàtná quidé mēe-gǎ. ¹¹ Te vitna ní ngūndecu ndìhi-ndo Xítóhó Jesucristú, te và cādá cuendá-gǎ-ndó ñūu cùu-ndo ñáyiú israhēl àdi ñá túú cùu-ndo, te nì và cādá cuendá-ndó ñūu cùu-ndo ñáyiú ní ngūndecu sēñá ñī-xi àdi ñāhá, te nì và cādá cuendá-ndó ñūu cùu-ndo ñáyiú véxi ñūu xicǎ, te nì và cādá cuendá-ndó ñūu cùu-ndo ñáyiú cùu neñūú, te nì và cādá cuendá-ndó ñūu cùu-ndo ñáyiú ñá túú tñahí dañá quee núu chíúⁿ pàtróoⁿ-xi, te nì và cādá cuendá-ndó ñūu cùu-ndo ñáyiú dañá queé núu chíúⁿ pàtróoⁿ-xi, chi Xítóhó Jesucristú cùnūu-gǎ ndécú ndìhi ñaha-gǎ xii-o nchàa-o.

¹² Te Yá Ndiǒxí ní dáquée dīⁿ ñaha-gǎ xii-ndo cuendá cundecu-ndo ndìhi-gǎ, te vitna cùu-ndo ñáyiú quide ndáá ndécú ìchi-gǎ. Te mee-gǎ ío cùu iní ñāhá-gǎ xii-ndo ñūu xiǎⁿ tǎu-ndó cūndahú iní tñahá-ndó, te ío vǎha cuu iní-ndó chindee tñaha-ndo, te cuu-ndo ñáyiú ndàhú iní-xi, te ío vii ío vǎha cuu iní-ndó cūndecu ndìhi tñaha-ndo, te ío càhnu cunduu iní-ndó cuendá nchaa sá quidé ñaha ñáyiú xii-ndo. ¹³ Te ducaⁿ cānehe-ndo tñúhu càhnu iní núu ndì mēe-ndo nacuāa ndècu-ndo ichi-gǎ, te cada càhnu tucu iní-ndó ñūu ná cúu sǎ cūmǎni núu tñahá-ndó. Te dàtná ní quide càhnu iní Xítóhó Jesucristú nchaa sá ñà túú vǎha ní xóo cada-ndo ducaⁿ càda-ndo cada càhnu iní-ndó nchàa sá cūmǎni núu tñahá-ndó ndècu-ndo. ¹⁴ Te xini ñūhu vihi-xi sá ío cuu iní tñahá-ndó cūndecu-ndo, chi núu ducaⁿ na càda-ndo, te quide-ndo nchaa dava-gǎ sá cāháⁿ-í, te ñá túú tñahí-gǎ ná cūmǎni-ndó. ¹⁵ Te daña-ndo sǎ Yǎ Ndiǒxí ná chindee ñaha-gǎ nacuāa ío vǎha cuu iní-ndó cūndecu-ndo, chi diu cuendá-án nǐ cāháⁿ ñāhá Yǎ Ndiǒxí xii-ndo cuendá cuu ìⁿ-nuu-ndo ndìhi nchaa

dava-gá ñáiyu ndècu ichi-gá, te ducaⁿ-ni Ìo ndacáⁿ táhú-ndó núú-gá.

¹⁶ Te ío cuhuⁿ iní-ndó tnúhu Xítohó Jesucristú, te ío váha cuáha-ndo cuèndá nàcuáa cǎháⁿ tnúhu-gá te ducaⁿ ðànehé tnáhá-ndó. Te ío cǎháⁿ dóho tnàha-ndo nacuáa cada-ndo cànchicúⁿ nihnu-ndo càda-ndo nchaa nacuáa cǎháⁿ tnúhu-gá, te cata-ndo ndùdú ndèe núú tùtú Yǎ Ndiòxí, ndíhi nchaa dava-gá ndudú sǎ xini méé-ndó xita-ndo te nchaa xíǎⁿ cata-ndo chíñuhu-ndo Yǎ Ndiòxí. Te òrè xítá-ndó te ní yùhu ní iní-ndó ndacáⁿ táhú-ndó núú-gá.

¹⁷ Te cuhuⁿ iní-ndó Xítohó Jesucristú òrè sání iní-ndó càda-ndo ìíⁿ chiuⁿ àdi ná tnúhu cuini-ndó cǎháⁿ-ndó, te ðiu-ni-gá cuhuⁿ iní-ndó. Te xini ñuhu-xi ndacáⁿ táhú-ndó núú Yǎ Ndiòxí, te ðiu-ni Xítohó Jesucristú chíndee ñàha-gá xii-ndo ndacáⁿ táhú-ndó núú Tǎtá-ó Dütú Ndiòxí.

Nàcuáa tàù ñáiyu ndècu ichi Xítohó Jesucristú cadá-yu sá cúú-xí ndí meé-yu

¹⁸ Te nchaa nchòhó ñáiyu ðíhí ñáiyu ndècu yíi-xi quindáá iní-ndó yíi-ndo, chí ducaⁿ tàù-xi cada nchaa ñáiyu ðíhí ndécú ìchi Xítohó Jesucristú. ¹⁹ Te nchaa nchòhó cue tée ndècu ñadihí-xi cuu iní-ndó ñadihí-ndó, te vá cūcuèhé-ndó-yu. ²⁰ Te nchaa nchòhó ñáiyu ndècu tǎtá-xi ndíhi nǎná-xi quindáá iní-ndó-yu, chí núu ducaⁿ na càda-ndo te ndùu vétú iní Yǎ Ndiòxí. ²¹ Te nchaa nchòhó ñáiyu cūu tǎtá ndíhi nǎná vá dásátú-ndó ìní cue déhe-ndo, chí núu ducaⁿ na càda-ndo te ní vá quíxí-gǎ iní-güexi cada-güexi sá váha. ²² Te nchaa nchòhó ñáiyu xinu cuechi quindáá iní-ndó nchàa ñáiyu cūu patróóⁿ-ndó, te ní yùhu ní iní-ndó càda-ndo nchaa chiuⁿ tahú-yu cuèi òrè ndécū-yu àdi oré ñá túù-yu, te ñá ðíú òrè-ni ndèhé-yu cada-ndo cuèndá-ni sá cuini-ndó cūdiu-ndo núú-yu, chí cada-ndo sǎ néhé-ndó sǎ yíñuhu núú Xítohó Jesucristú. ²³ Te nchaa chiuⁿ sani iní-ndó càda-ndo te cada-ndo ní yuhu ní iní-ndó, te sá dúcǎⁿ càda-ndo-ǎⁿ te cada-ndo cuèndá sá xínú cūèchi-ndo núú Xítohó Jesucristú te ñá ðíú núú ñáiyu ñuyúú-a xinu cuechi-ndo. ²⁴ Te nchòhó sa nàha-ndo sá Xítohó Jesucristú taxi-gá sá ndúú táhú-ndó te núu ducaⁿ na càda-ndo, chí cūu-ndo ñáiyu xinu cuechi núú-gǎ. ²⁵ Te nchaa ñáiyu quide nchaa sá cuèhé sá dúhá

nàcháhu-yu núú Yǎ Ndiòxí cuèndá nchaa sá quidè-yu, te mee-gǎ vá cadá cuèndá-gǎ cuèi náí ñáiyu cūu-yu, chí nchaa-yu nacháhu-yu nchaa sá ñà túú váha quidè-yu núú-gǎ.

4

¹ Te nchaa nchòhó ñáiyu cūu patróóⁿ cuu-ndo ñáiyu váha, te cada-ndo nchàa nacuáa tàù-xi cunduu ndíhi nchaa ñáiyu xinu cuechi núú-ndó, te cunaha-ndo sǎ àndiu ndecu Yaá cúú Xítohó-ndó tàxi tnuní ñáhá-gǎ xii-ndo.

² Te nchaa nchòhó ñáiyu ndècu ichi Xítohó Jesucristú, vá ðáná ndèe-ndó cǎháⁿ ndíhi-ndo Yǎ Ndiòxí, te ío cuhuⁿ iní-ndó-gǎ òrè cǎháⁿ ndíhi-ndo-gǎ, te òrè-ǎⁿ Ìo ndacáⁿ táhú-ndó núú-gǎ. ³ Te cǎcǎⁿ táhú-ndó tnáhá cuèndá-ndí núú-gǎ cuèndá sá ðíú-gǎ ná cadá te ndacu-ndí cǎháⁿ-ndí tnúhu-gá núú nchàa dava-gá ñáiyu, te ducaⁿ cǎháⁿ-ndí tnúhu Xítohó Jesucristú sá ñà túú ní xíndecu ndíhi nchaa ñáiyu ní xíndecu ndéé sanaha, te ðiu cuèndá tnúhu-ǎⁿ yíhí-í ve-caá vitna. ⁴ Te cǎháⁿ ndíhi-ndo Yǎ Ndiòxí cuèndá cǎháⁿ-í nàcuáa tàù-xi cunduu te tecú tnuní-yu.

⁵ Te cada-ndo nchàa nacuáa tàù-xi cunduu sá cúú-xí nchàa ñáiyu ñá túú ndècu ichi-gǎ, te ducaⁿ-ni Ìo nducu ndèe-ndo cada-ndo nchaa nacuáa tàù-xi cunduu. ⁶ Te cada cuèndá-ndó sǎ Ìo víi ío váha cunduu tnúhu cǎháⁿ ndíhi-ndó-yu, te cǎháⁿ-ndó ìíⁿ tnúhu nàcuáa cuu váha iní-yu, te ío váha cundehe-ndo nàcuáa cunduu tnúhu cūnaha-ndo xii ìíⁿ ìíⁿ-yu.

Tnúhu ndéé núú ní ndíhi-ná

⁷ Te té Tìquicú tée ío cūu iní-ó ndècu ndíhi-o ichi Xítohó Jesucristú, tée-ǎⁿ cachí tnúhu-dé nchaa nàcuáa cūu ndecu-í. Te tnáhá-dé xínú cuèchi-dé núú Xítohó Jesucristú te ío váha quide ndáá-dé. ⁸ Te tendaha-í-dé quixi-dé cachí tnúhu-dé nchaa nàcuáa cūu ndecu-ndí iha, te taxi-dé tnúhu ndee iní cundecu ndíhi-ndo. ⁹ Te tnáhá tucu té Onésimú tée ío cūu iní-ó ndècu ndíhi-o ichi Xítohó Jesucristú quixi ndíhi-dé, te ðiu-ni tée ñuu-ndó cūu-dé te tnáhá-dé ío váha quide ndáá-dé. Te ndí ndúú-güedé cachí tnúhu-güedé nchaa nàcuáa cūu iha.

¹⁰ Te té Aristarcú tée yíhi ndíhi-í ve-caá quidè ndèe iní ñáhá-dé xii-ndo ndíhi té Mǎcú ñaní pǐmú tē Bèé. Te sa nàha-ndo nchaa nacuáa ní cǎháⁿ-í cada-ndo quèheⁿ

cuendá-ndó tĕ Măcú, te núu na quixi-dé quixi coto ñaha-dĕ xii-ndo, te ío váha cuu iní-ndó quèheⁿ cuendá-ndó-dĕ. ¹¹ Te tñahá tée nàni Jesús, àdi Bustú chi úú ðiù-dé, quidé ndèe iní ñahá-dĕ xii-ndo. Te cue tée-a cùu-güedé cue tée isràél ní chitnahá ñahá-güedĕ xii-í càháⁿ-ndí núú ñáyiù nàcuáa ndíhu ndaha ñaha Yá Ndiöxí xií-yu, te ni ìⁿ-gá ñáyiù isràél ñá túú quide datná quidé-güedĕ. Te ío váha tàxi-güedé tñúhu ndee iní xii-í. ¹² Te tñahá tée ñúú-ndó tĕ Ēpafrás quidé ndèe iní ñahá-dĕ xii-ndo, te cùu-dĕ tñahá-dĕ tée xinu cuechi núú Xítóhó Jesucristú. Te ducaⁿ-ni ñi yuhu ni iní-dé xicáⁿ táhú-dĕ núú Yá Ndiöxí cuendá-ndó cuendá sá cànchícúⁿ nihnu-ni-ndo ìchi-gá, te ducaⁿ te ío váha tecú tñúní-ndó nchàa nacuáa cuiní Yá Ndiöxí cada-ndo, te ðiù-ni ducaⁿ cànchícúⁿ nihnu-ndo càda-ndo. ¹³ Te yúhú càchí tñúhu ndáá-í xii-ndo sã sũúní sàni iní-dé sá méé-ní sã váha cuu xii-ndo cùndecu-ndo ndíhi nchaa ñáyiù xĩndecu ichi Xítóhó Jesucristú ndécú ñúú Laodiceá, ndíhi nchaa ñáyiù xĩndecu tucu ichi-gá ndécú ñúú Hièrápólís. ¹⁴ Te tñahá té Lùcá tée xini nchaa núú yücú sã quidé tãtna quide ndee iní ñahá-dĕ xii-ndo tée ío cùu iní-ó, te tñahá tucu té Dĕmás quidé ndèe iní ñahá-dĕ xii-ndo.

¹⁵ Te cúñaha-ndo na càda ndee iní nchaa ñáyiù ndĕcu ndíhi-o ichi Xítóhó Jesucristú ndécú ñúú Laodiceá, ndíhi tá Mĩnfás, ndíhi nchaa ñáyiù ndĕcu ichi-gá tàcá vehe-xi dàcuahá-yu tñúhu-gá. ¹⁶ Te tutú cádũha-í-a tendaha-ĩ quixi ndaha-ndo, te òré ná ndíhí dàcuaha-ndo te tendaha-ndo quĩhíⁿ ndaha ñáyiù xĩndecu ichi-gá ndécú ñúú Laodiceá cuendá dacuàhà-yu tñahá-yu. Te ðiù-ñi ducaⁿ dàcuaha-ndo tutú tendaha-ĩ quĩhíⁿ ndaha ñáyiù ñúú Laodiceá òré ná ðàndixí-yu ndaha-ndo. ¹⁷ Te na càchí tñúhu-í xii-ndo nàcuáa cúñaha-ndo xii té Àrquipú, te duha cúñaha-ndo xii-dé: “Yá Ndiöxí ní taxi-gá chiùⁿ quide-n, te ío váha cada cuendá-n càda-n nchaa nacuáa ní cachí-gá”, duha cúñaha-ndo xii-dé.

¹⁸ Te yúhú té Păblú ndíhi ndaha mee-ĩ tĕé-í ìⁿ úú tñúhu-a quide ndee iní ñahá-í xii-ndo, te cunaha-ndo sã yũhú yĩhí-í vecaá. Te Yá Ndiöxí ío na chĩndee chitúu ñaha-gã xii-ndo. Te ducaⁿ na cùnduu. Te ío chí cádá ndèe iní-ñá vitna.

TUTÚ DÍHNA NUU NÍ CADÚHA TÉ PĀBLÚ QUÍHÍⁿ NDAHA NĀYIU ŃUÚ TESĀLÓNICÁ

Té Pāblú ndihi cue tée cùndihi-dé cādúha-güedé tutú quíhíⁿ ndaha nāyiu xīndecu ichi Xítohó Jesucristú ndécú ñúú Tesalónicá

¹Yúhú té Pāblú cādúha-í tutú-a ndihi té Silvanú, ndihi té Timùteú cuendá daquixi-í ndaha nchòhó nāyiu ndècu ndihi-ndí ichi Xítohó Jesucristú ndécú ñúú Tesalónicá, chi cùu ìⁿnuu-ndo ndihi Tátá-ó Dütú Ndiòxí, ndihi Xítohó Jesucristú. Te xicáⁿ tǎhù-í núú Dütú Ndiòxí, ndihi núú Xítohó Jesucristú sá ò na chindee chitúu ñaha-gǎ xii-ndo, te ducaⁿ ndí nduú-gǎ ná càda te ò vǎha cuu iní-ndó cùndecu-ndo.

Nāyiu ñuú Tesalónicá ò vǎha sàndáá iní-yu Yá Ndiòxí

²Te ndí tnahá óré cǎháⁿ ndihi-ndí Yá Ndiòxí ndácáⁿ tǎhú-ndí núú-gǎ sá ò quide vǎha-ndo ndècu-ndo, te ducaⁿ xicáⁿ tǎhú-ndí núú-gǎ sá ná còto ñaha-gǎ xii-ndo. ³Te ò ndácáⁿ tǎhú-ndí núú Tátá-ó Dütú Ndiòxí sá ñi yuhu ñi iní-ndó sàndáá iní-ndó-gǎ, te xinu cuechi-ndo núú-gǎ, te cùu iní tñahá-ndó nàcuáa ndècu-ndo ichi-gǎ ñuú xǎⁿ ò xito tñaha-ndo. Te cùtnuní ndáá iní-ndó sǎ quíxí tucu Xítohó Jesucristú ñuú xǎⁿ ñá túú dàña ndeé-ndó ndètu-ndo-gǎ. ⁴Te nchòhó nāyiu ndècu ndihi-ndí ichi Xítohó Jesucristú sa ñaha-ndí sá Yá Ndiòxí ò cùu iní ñáhá-gǎ xii-ndo, te ñuú-gǎ ní cǎháⁿ ñáhá-gǎ xii-ndo cuendá cundecu-ndo ìchi-gǎ. ⁵Te cùtnàhá ní dǎnèhé ñáhá-ndí xii-ndo tñuhu-gǎ, chi ñá díú sǎ cúú iní mée-ndí ducaⁿ ñi dǎnèhé ñáhá-ndí xii-ndo, chi mee Espíritú Yá Ndiòxí ní chindee ñaha-xi ní cǎháⁿ-ndí ñi yuhu ñi iní-ndí tñuhu-gǎ núú-ndó. Te ñaha-ndo sá cùtnàhá ní xīndecu ndihi ñaha-ndí xii-ndo ñi quide-ndí nàcuáa cǎháⁿ Yá Ndiòxí cuendá sá cúú-xí sǎ vǎha sá cúú-xí-ndó.

⁶Te nchòhó nchícúⁿ ñihñu-ndo quide-ndo vitna datná quidé-ndí, chi quide vǎha-ndo datná quidé mée Xítohó Jesucristú, te díí iní ní tñii-ndo ìchi-gǎ cuèi ní ndoho ní tnahá-ndó, chi mee Espíritú-gǎ

ní chindee ñaha-xi xii-ndo. ⁷Te sá dúcáⁿ quide vǎha-ndo ñúú Yá Ndiòxí, xǎⁿ yínchícúⁿ ñihnu ñāyiu distrítú Macèdoniá, ndihi nāyiu distrítú Acǎyá xīquide vǎha-yu tñahá-yu, nāyiu xīndecu ichi-gǎ. ⁸Te ñuú-ndo ñi sanu ichi-ndo nāyiu distrítú Macèdoniá, ndihi nāyiu distrítú Acǎyá, te ñá díú-ñi ñāyiu nchaa ñuú-áⁿ chi nchaa nāyiu dava-gǎ ñuú ñihí-yu tñuhu sá ò sàndáá iní-ndó Yá Ndiòxí. Te ñá túú-gǎ ná tñuhu cǎháⁿ-ndí cuendá-ndó, chi nchaa-yu sa ñihí-yu tñuhu sá ò vǎha quide-ndo ndècu-ndo. ⁹Te mée-yu xicǎháⁿ vǎha-yu cuendá-ndó sǎ ò vǎha ní queheⁿ cuendá ñáhá-ndó xii-ndí cùtnàhá ní quixi-ndí díhna nuu. Te ní dáñá-ndó ñchǎa sá cǎchí-ndó cùu ndiòxí-ndó chi ñá díú ndiòxí cúú-xí, te ní tñii-ndo ìchi Yá Ndiòxí Yáá ndécú túu andiu chi díú-gǎ cúú-gǎ Ndiòxí ndisa, te xinu cuechi-ndo núú-gǎ vitna, ¹⁰te ndètu-ndo quixi tucu Xítohó Jesucristú Déhe Yá Ndiòxí Yáá ndécú àndiu, chi ñuú-ñi-gǎ ní quixi-gǎ ñuyúú-a ní xíhí-gǎ, te ní ndoto-gǎ ní dǎndótó ñaha Yá Ndiòxí xii-gǎ. Te ñuú-ñi Xítohó Jesucristú dácacu ñihnu ñaha-gǎ xii-o ñúú ùhú núú ndàhú, chi sàndáá iní-ò-gǎ.

2

Nàcuáa nduu chiuⁿ ní quide té Pāblú ñuú Tesalónicá

¹Te nchòhó nāyiu ndècu ndihi-ndí ichi Xítohó Jesucristú ñaha-ndo sá ñá díú àúⁿ ñá cuu ñi quixi coto ñaha-ndí xii-ndo, chi ní sàndáá iní-ndó tñuhu Yá Ndiòxí. ²Te ñaha-ndo sá cùtnàhá ní xīndecu-ndí ñuú Filipú ò ní xúhuⁿ tñuhu cuèhé tñuhu duha núú-ndí, te ní caniha-güedé xii-ndí. Te ní ndee-ndí ní quixi-ndí ñuú-ndó, te ñá túú ní yùhú-ndí ní cǎháⁿ-ndí tñuhu Yá Ndiòxí núú-ndó, chi mee-gǎ ní chindee ñaha-gǎ xii-ndí cuèi ò chitu nāyiu ní cuu ùhú iní ñáhá xii-ndí. ³Te ñá túú ní dǎndahú ñáhá-ndí xii-ndo chi mee-ñi tñuhu ndáá ní cǎháⁿ-ndí núú-ndó, te ñi ñá túú ñi ñiⁿ tñuhu cuèhé ñuhú iní-ndí ní cǎháⁿ-ndí tñuhu-gǎ núú-ndó chi sa ní nduu ndoo ní nduu nine iní-ndí. ⁴Te mee Yá Ndiòxí ní cǎchí-gǎ sá cǎháⁿ-ndí tñuhu-gǎ, te cǎháⁿ-ndí nàcuáa cùu iní mée-gǎ, chi sa ñaha-gǎ nàcuáa cǎa iní-ndí, te ñá túú cǎháⁿ-ndí nàcuáa cùu iní

ñáiyu. ⁵ Te nàha-ndo sá ñà díú ìíⁿ tnúhu cudíí ìní-ndó cùndecu-ndo ichi ñuyíú ní cáháⁿ-ndí núú-ndó cuèndá taxi-ndo díhúⁿ; Te Yá Ndiòxí sa nàha-gá sá cáháⁿ ndáá-ndí. ⁶ Te ñá ìíⁿ nduu ni quide-ndí ìíⁿ sá cádá-ndí cuèndá-ni sá cádá càhnu ñaha-ndo xii-ndí, àdi cada cahnu ñaha dava-gá ñáiyu, te cuèi tàú ndisa-ndí sá cádá càhnu ñaha-ndo xii-ndí ní cùu, chí chiuⁿ Xítóhó Jesucristú quidé-ndí, te dicó-ni sá nchúhú ñá túú ní cuíni-ndí sá dúcáⁿ càda-ndo. ⁷ Te ío víi ío váha ní cáháⁿ-ndí núú-ndó, dàtná quidé ìíⁿ ñaha cuu náná víi víi cáháⁿ ndíhi cue déhe-aⁿ dàcuehnu ñaha-aⁿ xii-güexi. ⁸ Te ducaⁿ ío cùu ìní ñáhá-ndí xii-ndo, dico ñá díú-ní sá ní cáháⁿ-ndí tnúhu Yá Ndiòxí núú-ndó, chí ndéé ìní-ndí taxi-ndí ní dácótó ñaha-xi, te núu dicó ní cùu-xi sá cùú, cuèndá sá ío cùu ìní ñáhá-ndí xii-ndo. ⁹ Te nchòhó ñáiyu ndècu ndíhi-ndí ichi Xítóhó Jesucristú nàha-ndo sá ío ní quide chiuⁿ-ndí cuèndá ní ñíhí-ndí sá ní xexi-ndí. Te cuèi nduu cuèi níú ní quide chiuⁿ-ndí ní ñíhí-ndí sá ní xexi-ndí ní cáháⁿ-ndí tnúhu Yá Ndiòxí núú-ndó cuèndá sá ñá túú ní cuíni-ndí chichiuⁿ ñaha-ndí xii-ndo.

¹⁰ Te nchòhó ñáiyu sàndáá ìní tnúhu Yá Ndiòxí xini ndáá-ndó sá cùú-ndí cue téé váha te ducaⁿ sà naha Yá Ndiòxí tucu, te ní xica-ndí ichi ndáá òré ní cáháⁿ-ndí tnúhu-gá núú-ndó te ñu-ni ducaⁿ quide-ndí vitna. Te vá yóo ìíⁿ cáháⁿ sá ñá túú quide ndáá-ndí ndécú-ndí. ¹¹ Te nàha tucu-ndo sá ní dácáháⁿ ñáhá-ndí xii-ndo, te ní taxi-ndí tnúhu ndee ìní xii-ndo nchàa-ndo, te dàtná quidé ìíⁿ tátá ndíhi cue déhe-dé ní quide-ndí. ¹² Te ní cachí-ndí xii-ndo sá cádá ndáá-ndó cùndecu-ndo nacuaá táú-xi cada nchaa ñáiyu tnàhá tnúhu ndíhi Yá Ndiòxí, chí mee-gá ní cáháⁿ ñáhá-gá xii-o cuèndá nduu táhú-ó cùndecu-o ndíhi-gá núú ío váha càa ndecu-gá táxí tnùn-gá.

¹³ Te xíáⁿ ío ndacáⁿ táhú-ndí núú Yá Ndiòxí sá nchòhó òré ní tedóho-ndo tnúhu-gá ní cáháⁿ-ndí, te ní sàndáá ìní-ndó chí ní cutnùnì ìní-ndó sá díú tnúhu Yá Ndiòxí cùú-xí, te ñá díú tnúhu ñáiyu ñuyíú-a cùu-xi. Te ndáá sá cùú-xí ìíⁿ sá ío váha sá cùú-xí nchòo cue ñáiyu ní

sàndáá ìní tnúhu-gá. ¹⁴ Te nchòhó ñáiyu ndècu ndíhi-í ichi Xítóhó Jesucristú, ío ní ndoho ní tnàhá-ndó sá ní quide ñaha ñáiyu ñuú-ndó. Te nchòhó ní ndoho-ndo dàtná ní ndoho nchaa ñáiyu tàcá dàcuaha tnúhu Xítóhó Jesucristú ndécú dístritú Jùdeá, chí tnàhá-yu ío ní dándóhó ñaha ñáiyu ñuú-yu. ¹⁵ Te ñu-ni ñáiyu dístritú Jùdeá-áⁿ ní sahní-yu cue téé ní xóo cáháⁿ tnúhu Yá Ndiòxí ndéé sanaha. Te ñu-ni ñaní tnàhá-yu cùu cue ñáiyu ní sahní ñaha xii Xítóhó Jesucristú, te sáta xíáⁿ te ní ngúíta-yu ní cuu úhú ìní ñáhá-yu xii-ndí, núu xíáⁿ ñá túú tnàhá ìní Yá Ndiòxí nchaa sá quidé-yu, te ndéé nchaa dava-gá ñaní tnàhá-yu cùu úhú ìní-yu. ¹⁶ Te ío chidácá nihnu ñáhá-yu xii-ndí òré cáháⁿ-ndí tnúhu Yá Ndiòxí núú ñáiyu ñá túú cùu ñáiyu isràél, te ducaⁿ quide ñáiyu-áⁿ cuèndá cuíni-yu sá vâ cáháⁿ-ndí tnúhu-gá, sá cádá cuèndá naníhí tàhú ñáiyu ñá túú cùu ñáiyu isràél-áⁿ, te sá dúcáⁿ quidé-yu te ío ta cùu vai-gá cuéchi-yu cuaháⁿ. Te Yá Ndiòxí ío cùdééⁿ-gá núú-yu, te tendaha-gá ìíⁿ tnúndòho quixi sá cùú-xí-yu te ío ndohó-yu.

Té Páblú cuíni-dé quíngoto-dé ñáiyu xñ-decu ichi Xítóhó Jesucristú ndécú ñuu Tesalónica

¹⁷ Te nchòhó ñáiyu ndècu ndíhi-ndí ichi Xítóhó Jesucristú ní quee-ndí núú-ndó, te cuèi ní cuxica-ndí dico ducaⁿ-ni ñùhu ìní ñáhá-ndí xii-ndo, te ío ñùhu ìní-ndí sá quíxí còto ñaha tucu-ndí xii-ndo. ¹⁸ Te yúhú té Páblú ducaⁿ-ni ñùhu ìní-í sá cuèdìcò mée-í quixi-í, quixi coto ñaha-í xii-ndo, dico yucu ñávàha chidácá nihnu ñaha-xi xii-í. ¹⁹ Te nchoo ñáiyu ndècu ichi Xítóhó Jesucristú ndètu-ni-gá-ó quèxio-gá candeca ñaha-gá xii-o ndàa andíu cùndecu-o ndíhi-gá. Te cùdíí víhí ìní-ndí sá cuèndá-gá chí ní chindee ñaha-gá ní sanu ichi ñaha-ndí xii-ndo ichi-gá, te ío vai ñáiyu cáháⁿ váha-yu cuèndá-ndí ná sáá nduu quixi tucu-gá. ²⁰ Te ducaⁿ ío vai ñáiyu cáháⁿ váha-yu cuèndá-ndí cuèndá sá ní sanu ichi ñaha-ndí xii-ndo ìchi-gá, te quide váha-ndo. Te xíáⁿ ío cùdíí ìní-ndí.

3

¹⁻² Te sa ní cunduu ñá túú-gá cáháⁿ ndíhi

tnàha-o, núu xíãⁿ ñá ní cùndee-gá iní-ndí ní tendaha-ndí té Timùteú ní quixi coto ñaha-dě xii-ndo, te nchúhú ní quendóo-ndí ñuu Átenás, chi tnàhá-dé xínú cuèchi-dé núu Yá Ndiöxí, ndíhi núu Xítoho Jesucristú cãháⁿ-dé tnúhu-gá núu ñáyi. Te ní quixi-dé ní taxi-dé tnúhu ndee iní xii-ndo cuendá sá ïo quindáá-ni iní-ndó Xítoho Jesucristú, te canchicúⁿ nihnu-ni-ndo ñi yuhu ni iní-ndó ìchi-gá. ³ Te vá nátúhú iní-ndó cànchicúⁿ nihnu-ndo ìchi-gá sá dúhá cùu úhú iní ñáhá ñáyi xii-o, te nchòhó sa ñaha-ndo sá dàcuiúí sã ndóhó vihi-o cuendá-gá. ⁴ Te ndéé cútñahá ndécú ndíhi ñaha-gá-ndí xii-ndo ñi cachí tnúhu ndáá-ndí sá ïo ndoho-o, te ducaⁿ ndisa quide-xi. ⁵ Te xíãⁿ núu ñá ní cùu váha-gá iní-í chi cuendá ñá túú-gã ní ñíhí-í tnúhu nàcuáa cùu ndecu-ndo núu ní tendaha-í té Timùteú ní quixi-dé ní ndúcú tnúhu-dé núu-ndó ñuu ndecu-ni-ndo ìchi Xítoho Jesucristú, chi ní sani ìⁿ ní sani úú iní-í sá cùu-xí-ndó, chi ná ndéé chidacá nihnu ñaha yècu ñávàha xii-ndo te cuíta chiúⁿ ní quide-ndí sá cùu-xí-ndó ñi cãháⁿ-í.

⁶ Te ñáhá, chi ní ndexio té Timùteú sá ñi quixi-dé ñuu-ndó, te ñaha-dé tnúhu ní nasáá sá ñi yuhu ni iní-ni-ndo sàndáá iní-ndó Yá Ndiöxí, te cùu iní-ndó cuè tnaha ñáyi-ndo. Te cãchi-dé sá ïo ñuhu iní ñáhá-ndó xii-ndí, te ïo cuini-ndó cãháⁿ ndíhi ñaha-ndo, te diu-ni ducaⁿ ïo cuini nchúhú cãháⁿ ndíhi ñaha-ndí xii-ndo tucu. ⁷ Te ïo ndòhò-ndí chi ïo cùu úhú iní ñáhá ñáyi xii-ndí, dico sá ñi ñíhí-ndí tnúhu sá nchòhó ñáyi ndecu ndíhi-ndí ìchi Xítoho Jesucristú ñá túú dàña ndéé-ndó sàndáá iní-ndó Yá Ndiöxí, te xíãⁿ cùu-xí ìⁿ tnúhu cãhnu iní ní ñíhí-ndí chi ní ñaníhí ndéé-ndí. ⁸ Te ní nduu vétú iní-ndí sá ñi ñíhí-ndí tnúhu ndecu-ni-ndo ìchi-gá. ⁹ Te òré cãháⁿ ndíhi-ndí Yá Ndiöxí, te ïo ndacáⁿ táhú-ndí núu-gã cuendá sá ñá túú dàña nihnu-ndo ìchi-gá, núu xíãⁿ ïo cùdãí iní-ndí. ¹⁰ Te cuèi nduu cuèi niú xicãⁿ táhú-ndí núu Yá Ndiöxí sá mée-gã ná càda te sáá ìⁿ nduu ñaníhí tnáhá-ó cuendá danèhé ñáhá váha-gá-ndí tnúhu-gá sá cùmãní-gã xii-ndo.

¹¹ Te mee Tãtá-ó Dütú Ndiöxí, ndíhi Xítoho Jesucristú chindee ñaha-gá xii-ndí te quixi-ndí quixi coto ñaha-ndí xii-ndo.

¹² Te mee Xítoho Jesucristú ná chindee ñaha-gá xii-ndo, te ïo-gã cuita cuu iní tnáhá-gã-ndó nàcuáa ndecu-ndo ìchi-gã ndíhi nchaa dava-gã ñáyi dàtná cùu iní ñáhá-ndí xii-ndo. ¹³ Te xicãⁿ táhú tucu-ndí núu Tãtá-ó Dütú Ndiöxí sá ñi yuhu ni iní-ndó cànchicúⁿ nihnu-ni-ndo ìchi-gã, te ducaⁿ te cundáá-ndó ñúú-gã, te ñá túú-gã ná cumáni-ndó òré ná sáá nduu quixi tucu Xítoho Jesucristú ndíhi nchaa ñáyi sa ndecu ndíhi-gã.

4

Nàcuáa cuini Yá Ndiöxí cada-o

¹ Te nchòhó ñáyi ndecu ndíhi-í ìchi Xítoho Jesucristú cãháⁿ ndàhú-í núu-ndó sã cùndèdòho-ndo na cãháⁿ-í nàcuáa nduu tnúhu cãháⁿ Xítoho Jesucristú, chi mee-gã cuini-gã sá càdá-ndó nàcuáa ní dãnèhé ñáhá-ndí xii-ndo cuendá cuu váha iní Yá Ndiöxí núu-ndó, te ducaⁿ-ni càda-ndo ndéé núu cuahãⁿ núu vèxi.

² Te nchòhó sa ñaha-ndo nàcuáa ní cãháⁿ-ndí núu-ndó, chi ní cãháⁿ-ndí nàcuáa ní táuchíúⁿ Xítoho Jesucristú te ní cachí-gã sá ³ Yá Ndiöxí cuini-gã sá càdá ndáá-ó cùndecu-ò ìchi-gã. Te nchoo cuè téé vá cãháⁿ ndíhi-ò ñáyi díhí te núu ñá díú ñàdihí-ó cùu-yu, te ni cuè ñáyi díhí vá cãháⁿ ndíhi-yu téé núu ñá díú yí-yu cùu-güedé. ⁴ Te núu xíãⁿ nchaa nchòhó tnàha téé-í ndí díⁿ cùndecu ñadihí-ndó, te diu-ni ducaⁿ nchòhó cue ñáyi díhí tucu ndí díⁿ cùndecu yí-ndo, te mee-ni tnúhu yíñùhu cãháⁿ ndíhi tnàha-ndo. ⁵ Te vá cání cuèhé cani duha iní-ndó dàtná quidé cuè ñáyi ñá túú sàndáá iní tnúhu Yá Ndiöxí. ⁶ Te ni ìⁿ-ndo vá cání iní-ndó dandahú-ndó tnàha téé-ndo cãháⁿ ndíhi-ndo ñadihí-güedé. Te ducaⁿ-ni nchòhó cue ñáyi díhí tucu vá cání iní-ndó dandahú-ndó tnàha díhí-ndó cãháⁿ ndíhi-ndo yí-yu. Chi núu ducaⁿ na càda-ndo, te Yá Ndiöxí ïo dandòho ñaha-gá xii-ndo dàtná ní cachí-ndí ndéé díhna. ⁷ Chi Yá Ndiöxí ní cãháⁿ ñáhá-gã xii-ò cuendá sá càdá-ó mée-ni sá váha, te ñá díú sã cuèhé sá dúhá. ⁸ Te nchaa ñáyi na càda sáá iní-xi tnúhu cãháⁿ-ndí, te quide sáá iní-yu núu Yá Ndiöxí, chi ñá díú tnúhu téé ñuyúú-a cùu-xi, chi tnúhu Yá Ndiöxí, Yáá ní taxi Espiritú-gã ndécú ndíhi-ò cuu-xi.

⁹ Te nchòhò ñáyiú ndècu ndìhì-í ichi Xítóhó Jesucristú, ñá túú-gǎ xíní ñùhu-xi cachí tnúhu-í xii-ndo sǎ cúú ìní tnáhá-ndó, chí Yá Ndiòxi sa ní dánèhé ñáhá-gǎ xii-ndo nàcuáa cuu ìní tnáhá-ndó, ndìhì nàcuáa cuu ìní-ndó òvǎ-gǎ tnàha ñáyiú-ndo.

¹⁰ Te ducaⁿ xiquide-ndo ndìhì nchaa ñáyiú ndècu ndìhì-ndo ichi Xítóhó Jesucristú ndécú dístrítú Macèdoniá. Te càháⁿ ndàhú-ndí núú-ndó sǎ cádá ndáá-gǎ-ndó, te cuita cuu ìní-gǎ-ndó cuè tnaha ñáyiú-ndo quíhìⁿ. ¹¹ Te cada ndee ìní-ndó cùndecu ñucaxi ìní-ndó, te cuhuⁿ ìní-ndó chiúⁿ mee-ndo, te xiǎⁿ cada-ndo dàtná ní dánèhé ñáhá-ndí xii-ndo. ¹² Te ducaⁿ te tnàhá nchaa ñáyiú ñá túú sàndáá ìní tnúhu Yá Ndiòxi càháⁿ váha-yu cuèndá-ndó, te ducaⁿ te ñá túú tnàhí-gǎ ná cùmání xii-ndo.

Nàcuáa cada-xi òré quixi tucu Xítóhó Jesucristú

¹³ Te vitna na càchí tnúhu-ndí xii nchòhò ñáyiú ndècu ndìhì-ndí ichi Xítóhó Jesucristú cuèndá nchaa ñáyiú sa ní xíhí, ñáyiú ní sàndáá ìní tnúhu Yá Ndiòxi cuèndá sǎ vǎ ndìhú ìní-ndó cuèndá-yu dàtná xiquide nchaa ñáyiú ñá túú yìhì ìní-xi sǎ quíxí tucu Xítóhó Jesucristú ñuyúí-a. ¹⁴ Te nchoo sàndáá ìní-ó sǎ ní xíhí Xítóhó Jesucristú te ní ndoto-gǎ ní dándótó ñaha Yá Ndiòxi, te sàndáá tucu ìní-ó sǎ dàtná ní dándótó Yá Ndiòxi Xítóhó Jesucristú, ducaⁿ dándoto-gǎ nchaa ñáyiú ní xíhí ñáyiú ní sàndáá ìní ñáhá xii-gǎ.

¹⁵ Te na càchí tnúhu tucu-ndí ìngǎ tnúhu nàcuáa ní càháⁿ Xítóhó Jesucristú, chí ní cachí-gǎ sǎ ná sàà nduu quixi tucu-gǎ te nchaa ñáyiú sàndáá ìní tnúhu-gǎ ndécú vívú ñuyúí-a vǎ códó núú-yu núú ñáyiú ní xíhí ndaa andiu, chí jùndú candeca ñaha-gǎ xii-yu ndaa. ¹⁶ Chí Xítóhó Jesucristú quee túu-gǎ andiu, te cana-gǎ nchaa ñáyiú ní sàndáá ìní tnúhu-gǎ, te òré-ánⁿ Yá Ndiòxi cada-gǎ te òré-ánⁿ, càháⁿ ìⁿ cútú te òré-ni-ánⁿ ndoto nchaa ñáyiú ní xíhí, ñáyiú ní sàndáá ìní tnúhu-gǎ. ¹⁷ Te dàtnùnì nchaa nchoo ñáyiú xíndecu vívú ñuyúí-a naníhí tnáhá-ó ndìhì-yu, te ndanchita-o ndìhu-o xítí vícò naníhí tnáhá-ó ndìhì Xítóhó Jesucristú, te candeca ñaha-gǎ xii-o ndaa andiu cundecu ndìhì-o-gǎ ní caa ní quíhìⁿ. ¹⁸ Núú xiǎⁿ chí cuàha tnàha tnúhu ndee ìní, te vǎ ndìhú ìní-ndó chí naníhí tǎhú-ndó núú-gǎ.

5

¹ Te nchòhò ñáyiú ndècu ndìhì-í ichi Xítóhó Jesucristú ñá túú-gǎ xíní ñùhu-xi sǎ càchí tnúhu-í xii-ndo sǎ quíxí tucu-gǎ, te ní ñá túú-gǎ xíní ñùhu-xi sǎ càchí tnúhu-í xii-ndo nàsa cada-xi òré quixi-gǎ. ² Chí nchòhò sa nàha ndáá-ndó sǎ Xítóhó Jesucristú quixi-gǎ nduu ñá túú yìhì ìní-ó, chí dàtná quidé ìⁿ ñadúhú cada-gǎ òré quixi-gǎ, chí nduu ñá túú nǎ yíhì ìní-ó, chí quixi tucu-gǎ. ³ Te sǎà nduu te cachí nchaa ñáyiú ndècu ichi cuehé ichi duha: “Vítna ío váha cùu ìní-ó ndècu-o, te ñá túú-gǎ ná cùmání xii-o”, duha quesàhá-yu. Te ñáyiú-ánⁿ òré ñá túú nǎ yíhì ìní-yu, te quèxio tnúndòhò tnúhu ndàhú sǎ cúú-xí-yu. Chí cada-xi dàtná quidé-xí ìⁿ ñáyiú dèhí ní tnahá òré cacu dehe-xi, chí na ìní-yu ní dàtnùhú ñáhá-xí te vǎ càcu-yu núú tnúndòhò-yu, te ducaⁿ sǎ tnàhá-xi yáha nchaa ñáyiú ñá túú ndècu ichi-gǎ, chí na ìní-yu quexio tnúndòhò sǎ cúú-xí-yu te vǎ càcu-yu núú tnúndòhò-ánⁿ. ⁴ Te nchòhò ñáyiú ndècu ndìhì-í ichi Xítóhó Jesucristú, ñá túú-gǎ ndécú-ndó ichi cuehé ichi duha, núú xiǎⁿ sa yìhì-ná ìní-ndó ndúu quixi-gǎ te vǎ yáha-ndo dàtná yáha nchaa ñáyiú ñá túú ndècu ichi-gǎ, chí ñáyiú-ánⁿ ñá túú nǎ yíhì ìní-yu sǎ quíxí-gǎ. Te na ìní-yu quexio-gǎ dàtná quidé ñadúhú na ìní-ó quíhu-güedé vehe-o dùhu-güedé ducaⁿ càda-gǎ òré quixi-gǎ. ⁵ Te nchoo ñá túú-gǎ ndécú-ó ichi cuehé ichi duha, te ichi-ánⁿ cúú-xí dàtná ìⁿ ichi nee ndècu-o ní cuu, te vitna sa ní ngúndecu-o ìchí váha, te ducaⁿ chí Yá Ndiòxi ní dándíxí túu-gǎ ìní-ó cuèndá cutnùnì ìní-ó nàcuáa ndúu cuèndá-gǎ. ⁶ Te xini ñuhu-xi dandixi túu-o ìní-ó, te cada váha-o cùndecu-o ichi-gǎ, te vǎ cádá-ó dàtná quidé nchaa ñáyiú ñá túú sàndáá ìní ñáhá xii-gǎ, chí ñáyiú-ánⁿ ñá túú-gǎ quidé cuèndá-yu te núu quide váha-yu àdi ñá túú quide váha-yu ndècu-yu. ⁷ Te nchaa ñáyiú quide cuehé quidé dùha cuú-yu dàtná ìⁿ ñáyiú xidí àdi xini, chí ñá túú quide cuèndá-yu nàcuáa cada-yu ìⁿ sǎ váha dàtná cuíni Yá Ndiòxi. ⁸ Te nchòhò ñáyiú sa ní cutnùnì ìní-xi nàcuáa ndúu ichi váha, dandixi túu-ndo ìní-ndó cùndecu-ndo, te quèndáá ndisa ìní-ndó Yá Ndiòxi, te cuu ìní-ndó cuè tnaha

ñáyi-ndo te ducaⁿ te vá táxi tñuní ñáhá nì ìíⁿ sá cuèhé sá dúhá xii-ndo. Te ío cuhuⁿ iní-ndó sã cùndecu-ndo ndìhi-gá ni caa ni quíhíⁿ. ⁹ Chi Yá Ndiòxí ní cachí-gá sá vã quíhíⁿ-ó nùú ùhú núú ndàhú, chi mee-gã nacuaca ñaha-gã xii-o cùndecu-o ndìhi-gá, chi ní sándáá iní-ó Xítóhó Jesucristú. ¹⁰ Te mee Xítóhó Jesucristú ní xíhí-gá sá cuèndá nchaa yíca cuèchi-o, te ní ndoto-gá cuèndá nduu táhú-ó cùndecu-o ndìhi-gá andiu na sãá nduu cuèi sa ní xíhí-ó, àdi vátá cùú-gá-ó. ¹¹ Núú xiãⁿ chí cuáha tñaha tñúhu ndee ìní, te chindee tñaha-ndo cundecu-ndo ichi-gá dàtná tá quide-ndo véxi.

Té Páblú dáquini sàhú-dé ñáyi-ndo ndècu ichi Xítóhó Jesucristú

¹² Te nchòhó ñáyi-ndo ndècu ndìhi-ndí ichi Xítóhó Jesucristú, càháⁿ ndàhú-ndí núú-ndó sã cànehè-ndo sá yíñhu núú cuè téé cùnno xinu cuechi núú Yá Ndiòxí, cue téé dànehé ñáhá xii-ndo nacuaa cundecu-ndo ichi-gá. ¹³ Te càháⁿ váha-ndo ndìhi-güedé, te cuu iní-ndó-güedé, chi ñaha-ndo sá chíúⁿ Yá Ndiòxí quidé-güedé. Te cundecu ndìhi váha tñaha-ndo nchaa-ndo.

¹⁴ Te càháⁿ ndàhú tucu-ndí núú-ndó sã càháⁿ-ndó dõho nchaa ñáyi-ndo ná túú cuini cada chiúⁿ, te ducaⁿ cuãñaha-ndo tñúhu ndee ìní xii nchaa ñáyi-ndo quíyuhu iní-xi canchicúⁿ nihnu ichi-gá, te chindee tucu-ndo nchaa ñáyi-ndo vátá ngũnu ichi váha-gá, te cunduu càhnu iní-ndó nùú-yu nchaa-yu.

¹⁵ Te cada ndee ìní-ndó te núú ndècu tñaha ñáyi-ndo cùú úhú iní ñáhã-yu xii-ndo, te vá tñahã-ni-ndo cùú úhú iní-ndó-yu. Te mee-ni sã váha cada-ndo sã cùú-xí nchaa tñaha ñáyi-ndo.

¹⁶ Te nchaa nduu ío cudíí ìní-ndó cùndecu-ndo. ¹⁷ Te ìíⁿ nduu ìíⁿ nduu càháⁿ ndìhi-ndo Yá Ndiòxí. ¹⁸ Te ndacáⁿ táhú-ndó nùú-gã te núú nándi cùú sã yãha-ndo ndècu-ndo, chi ducaⁿ cuini-gá cada-o, te diu ducaⁿ nduu tñúhu càháⁿ Xítóhó Jesucristú.

¹⁹ Te vá quèhndé nihnu-ndo chiúⁿ quide Espiritú Yá Ndiòxí iní-ndó. ²⁰ Te vá cáda sãá iní-ndó nùú cuè téé càháⁿ tñúhu Yá Ndiòxí nàcuáa dàcahu iní ñáhã-gã xii-güedé. ²¹ Te cada cuèndá váha-ndo nàcuáa càháⁿ-güedé, te tñii-ndo nchaa

tñúhu váha càháⁿ-güedé. ²² Te daña-ndo nchaa ichi cuehé ichi duha.

²³ Te mee Yá Ndiòxí quidé-gã ío váha cùú iní-ó ndècu-o ichi-gá. Te xicáⁿ táhú-í núú-gã sá ná càda íí ñáhã-gã xii-ndo, te na còto ñaha-gã xii-ndo ndìhi iní-ndó cuèndá sá vã cáda-gã-ndó ni ìíⁿ sá cuèhé sá dúhá, te diu-ni ducaⁿ na càda-gá sá cùú-xí-ndó ndéé ná sãá nduu quixi tucu Xítóhó Jesucristú ñuyú-a. ²⁴ Chi Yá Ndiòxí Yaá ní càháⁿ ñáhã xii-o cada-gã nàcuáa ní càháⁿ-gá, te chindee ñaha-gã xii-ndo.

Té Páblú quidé ndèe iní-dé ñáyi-ndo xindecu ichi Xítóhó Jesucristú ndècu ñùú Tesalónica

²⁵ Te nchòhó ñáyi-ndo ndècu ndìhi-í ichi Xítóhó Jesucristú, cácaⁿ táhú-ndó nùú Yá Ndiòxí sá ná chindee ñaha-gã xii-ndí.

²⁶ Te cùñaha-ndo xii nchaa ñáyi-ndo ndècu ndìhi-o ichi Xítóhó Jesucristú sá ñé yuhu ni iní-ndí quidé ndèe iní ñáhã-ndí xii-ndo ndìhi-yu.

²⁷ Te vitna mee Yá Ndiòxí ndéhé-gã sã càháⁿ ndàhú-í núú-ndó sã dácuaa-ndo tutú-a núú nchaa ñáyi-ndo ndècu ndìhi-o ichi-gá.

²⁸ Te Xítóhó Jesucristú ío na chindee chitúu ñaha-gã xii-ndo nùú cuahãⁿ núú véxi. Te ducaⁿ na cùnduu. Te ío chí cáda ndèe iní-nã vitna.

TUTÚ CÚÚ ÛÚ NÍ CADÚHA TÉ PÄBLÚ QUIHÍⁿ NDAHA ÑÁYIU NUÚ TESÄLÓNICÁ

Té Páblú ndihi cue tée cùndihi-dé cádúha-güedé tutú quihíⁿ ndaha ñáyiú xíndecu ichi Xítóhó Jesucristú ndécú ñúú Tesälónicá

¹Yúhú té Páblú cádúha-í tutú-a ndihi té Silvanú, ndihi té Timùteú cuendá daquixi-í ndaha nchòhó ñáyiú ndècu ndihi-ndí ichi Xítóhó Jesucristú ndécú ñúú Tesälónicá, chi tnàhá tnúhu-ndo ndihi Tátá-ó Dütú Ndiòxí, ndihi Xítóhó Jesucristú. ²Te xicáⁿ táhú-ndí núú Dütú Ndiòxí, ndihi núú Xítóhó Jesucristú sá ná chindee chítúú ñaha-gá xii-ndo, te ducaⁿ ndí nduú-gá ná cádá te ío váha cuu iní-ndó cùndecu-ndo.

Yá Ndiòxí cada ndáá-gá cuéchi nchaa ñáyiú ndècu ichi cuehé ichi duha na sáa nduu quixi tucu Xítóhó Jesucristú

³Te nchòhó ñáyiú ndècu ndihi-ndí ichi Xítóhó Jesucristú, càchí tnúhu-í xii-ndo sá cúnaha-ndo sá ñá túú dàña ndee-ndí ndacáⁿ táhú-ndí núú Yá Ndiòxí cuendá-ndó, chi dacuití dùcaⁿ taú-xi cunduu chi ío-gá tá sàndáá iní-ndó-gá cuáháⁿ, te ducaⁿ ùuⁿ-gá tá cùu iní tnàhá-ndó nàcuáa ndècu-ndo ichi Yá Ndiòxí. ⁴Núú xíáⁿ nchúhú ío váha cáháⁿ-ndí cuendá-ndó núú nchaa ñáyiú sàndáá iní tnúhu Yá Ndiòxí nchaa núú tàcá-yu dàcuahá-yu tnúhu-gá, chi ío sàndáá iní-ndó-gá, te ñá túú dàña ndeé-ndó nchicúⁿ nihnu-ndo ichi-gá, te quide cahnu-ni iní-ndó cuéi nándí sá yáha-ndo ndècu-ndo ichi-gá. ⁵Te sá dúcáⁿ quide váha-ndo ndècu-ndo xíáⁿ cútñuní nàcuáa cada ñaha Yá Ndiòxí xii-ndo na sáa nduu, chi nduu táhú-ndó cùndecu-ndo núú táxí tnùní-gá, te ducaⁿ càda-gá chi cùu-gá Yá quidé ndáá cuítí. Te vitna ndòho-ndo nacuáa ndihu ndaha-gá dava-gá ñáyiú.

⁶Te Yá Ndiòxí ío váha ndáá quidé-gá, chi mee-gá nachinaa-gá nchaa sá quidé ñaha ñáyiú cùu úhú iní ñáhá xii-ndo, ⁷te nchoo ñáyiú ndòho cuendá Xítóhó Jesucristú núcúndecu váha-o na sáa nduu núu túu-gá andiu, te tnàhá cue espíritú xínú cuéchi núú Yá Ndiòxí cuuⁿ ndihi-gá, te

cue espíritú-áⁿ quidé-xí nchaa núú chiúⁿ tahu-gá. Te òré nuu túu-gá andiu ndihi cue espíritú-áⁿ, te ío dátásaⁿ-xi andiu. ⁸Te dandòho-gá nchaa ñáyiú ñá túú tnàhá tnúhu ndihi Yá Ndiòxí, ñáyiú ñá túú sàndáá iní tnúhu Xítóhó Jesucristú tnúhu sá cáháⁿ nàcuáa nanhí tãhú-yu. ⁹Te nchaa ñáyiú-áⁿ ò dandòho ñaha-gá xii-yu, chi ndohó-yu ni caa ni quihíⁿ, te vá cùndècu-yu núú ò váha càa ndecu-gá táxí tnùní-gá. ¹⁰Te ducaⁿ càda ñaha-gá xii-yu na sáa nduu, te dàvá-áⁿ ò cada càhnu ñaha nchaa ñáyiú sàndáá iní ñáhá xii-gá. Te tnàhá nchaa nchòhó ñáyiú ní sàndáá iní tnúhu ní cáháⁿ-ndí ducaⁿ càda-ndo, te nchaa-o ò cuñúhu-o-gá dàvá-áⁿ.

¹¹Te cuendá xíáⁿ núu ío xicáⁿ táhú-ndí núú Dütú Ndiòxí sá ná chindee ñaha-gá xii-ndo cùndecu váha-ndo ichi-gá dàtná cuíní mée-gá cundecu nchaa ñáyiú ní cáháⁿ-gá cundecu ndihi-gá. Te xicáⁿ táhú tucu-ndí núú-gá sá ò na chindee ñaha-gá xii-ndo càda-ndo nchaa sá váha sàni iní-ndó, ndihi cuendá chiúⁿ quide-ndo cuendá-gá, te ducaⁿ chi sàndáá iní-ndó-gá. ¹²Te núu ducaⁿ na càda-ndo, te cáháⁿ váha ñáyiú cuendá Xítóhó Jesucristú, te tnàhá-ni nchòhó cáháⁿ váha-yu cuendá-ndó, chi mee Yá Ndiòxí ndihi Xítóhó Jesucristú cùndàhú iní ñáhá-gá chíndee ñaha-gá xii-ndo.

2

Tée quixi dandàhú ñáyiú

¹Te nchòhó ñáyiú ndècu ndihi-ndí ichi Xítóhó Jesucristú càchí tnúhu-ndí xii-ndo nàcuáa cada-xi nduu na quixi tucu-gá, chi quixi-gá nacuaca ñaha-gá xii-o, núu xíáⁿ cáháⁿ-ndí dóho-ndo. ²Te ñá díú sá ñíⁿ tnúhu tecú dóho-ndo te nguíta-ndo caní ñíⁿ caní úú iní-ndó, te ni vã yùhú-ndó te núu véxi ñíⁿ téé càchí-dé sá cáháⁿ-dé tnúhu Yá Ndiòxí, te càchí-dé sá sá véxi Xítóhó Jesucristú, te vá quíndáá iní-ndó tnúhu cáháⁿ-dé chi ñá ndáá, àdi véxi ñíⁿ téé nèhe ñíⁿ tutú núú-ndó te càchí-dé sá yùhú ní tendaha-í véxi, te núu tütú-áⁿ cáháⁿ-xi sá sá véxi Xítóhó Jesucristú, te diu-ni vá quíndáá iní-ndó nàcuáa cáháⁿ-xi, te ndéda-ni càa ñáyiú cáháⁿ-yu dàvá-áⁿ sá sá véxi-gá dico vá quíndáá tnàhí iní-ndó. ³Núu xíáⁿ dátúha ñaha-í xii-ndo

cuèndá sá vǎ dáńá tńáhí-ndo mée-ndo dan-
dahú nǎhá ñáyiú. Chi cùmání-gǎ sáá nduu
quixi tucu Xítóhó Jesucristú, te nguíta
nchaa ñáyiú cuu úhú iní-yu Yá Ndiòxí, te
dává-án quini-yu ìíⁿ tee xidó quidé nchàa
sá cuèhé sá dúhá, te téé-án quihíⁿ-dé núú
ùhú núú ndàhú ní caa ní quihíⁿ. ⁴Te ñuu-ni
téé-án vǎ ndèe iní-dé nchaa sá càchí ñáyiú
cùu ndiòxí-yu ndihí nchaa dava-gǎ sá quidé
càhnú-yu, te cachí-dé sǎ ío cùnuu-dé, te
quihú-dé ndéé xití veñúhu núú ndécú cuè
ñáyiú chihúhu ñaha xii Yá Ndiòxí coo-dé,
te cùñaha-dé xii-yu sá cùú-dé Yá Ndiòxí.

⁵Te dandàcu iní-ndó chi nchaa tńúhu-a
sa ní cachí tńúhu-í xii-ndo cùtnàhá ní xín-
decu ndihí ñaha-í. ⁶Te nchòhó sa cùtnuní
iní-ndó nǎ cùú sǎ ngáńí ñaha xii téé-án núú
ńǎ túú-dé vitna, dico na sǎá nduu tàu-xi
quee-dé caca cuu-dé te dǎvǎ-án quini ñáhá
nchàa ñáyiú. ⁷Te ío titní núú sǎ cuèhé sǎ
dúhá quide yucu ñávǎha dicó-ni sǎ vǎtá
quini-gǎ ñáyiú, dico ndècu ìíⁿ sǎ ñǎ dáńá
càda-xi nchaandi túhú nǎcuáa càchí iní-xi,
dico sǎá nduu xócuńí sǎ ñǎ dáńá-án te
dávǎ-án cada-xi nchaa nǎcuáa càchí iní-xi.
⁸Te sǎá nduu quini-yu téé quide nchaa
sǎ cuèhé sǎ dúhá-án ñuyúú-a. Te òré ná
quixi túu Xítóhó Jesucristú, te mee-ni sǎ
dátasaⁿ-xi, ndihí yócu yuhu-gǎ cuú téé-án.
⁹Te sácuíhnǎ tendaha-xi téé-án quixi-dé,
te caúñaha-xi tńúhu ndee iní cada-dé
nándi sǎ cadá-dé. Te cada-dé sǎ ñǎ túú
tńáhí ndàcu ni ìíⁿ ñáyiú ñuyúú-a cada-yu,
dico mee-ni dandahú ñáhá-dé xii-yu caca
cuu-dé. ¹⁰Te nchaa núú sǎ cuèhé sǎ dúhá
càda-dé dandàhú-dé nchaa ñáyiú sa ñúhu
ichi cuáháⁿ núú ùhú núú ndàhú, chi ñǎ
túú ní cuini-yu quindáá iní-yu tńúhu ndáá
tńúhu Yá Ndiòxí cuèndá naníhí tǎhú-yu.
¹¹Te sǎ dúcǎⁿ ñǎ túú ní cuini-yu quindáá
iní-yu tńúhu ndáá, núú xǎⁿ dańa Yá Ndiòxí
dacáháⁿ yucu ñávǎha iní-yu quindáá iní-yu
nchaa tńúhu ndehnde ¹²cuèndá cuíta ni-
hnú-yu, te ducaⁿ yǎha-yu chi ñǎ túú sàndáá
iní-yu tńúhu ndáá càháⁿ Yá Ndiòxí, chi
mee-ni nchàa sǎ cuèhé sǎ dúhá cùdíí iní-yu
quidé-yu, te cuíta nihnú-yu chi ducaⁿ ní
cachí Yá Ndiòxí cunduu.

Ñáyiú ní cachí Yá Ndiòxí naníhí tǎhú

¹³Te nchòhó ñáyiú ndècu ndihí-ndí ichi
Xítóhó Jesucristú, ñáyiú ío cùu iní-gǎ
càchí tńúhu-ndí xii-ndo sǎ ñǎ túú dańa

ndee-ndí ndacǎⁿ tǎhú-ndí núú Yá Ndiòxí
cuèndá-ndó, chi ducaⁿ tàu-xi cunduu, chi
Yá Ndiòxí ní cachí-gǎ ndéé cùtnàhá vǎtá
ngáva-gǎ ñuyúú sǎ naníhí tǎhú-ndó, te
diu Espiritú-gǎ dácàháⁿ-xi iní-ndó ndècu
yihúhu-ndo núú-gǎ, te sàndáá iní-ndó
tńúhu ndáá càháⁿ-gǎ núu xǎⁿ ní naníhí
tǎhú-ndó. ¹⁴Chi cuèndá tńáhí-a ní càháⁿ
ñáhá Yá Ndiòxí xii-ndo, te ducaⁿ ní naníhí
tǎhú-ndó chi ní sàndáá iní-ndó tńúhu Xí-
tóhó Jesucristú ní càháⁿ-ndí núú-ndó, te
sǎá nduu te cundecu-ndo tńáhá-ndó núú
íò váha càa ní nduu tǎhú Xítóhó Jesucristú
ndécú-gǎ.

¹⁵Núu xǎⁿ nchòhó ñáyiú ndècu ndihí-ndí
ichi Xítóhó Jesucristú ío càháⁿ-ndí
dóho-ndo sǎ vǎ dáńá nihnu-ndo ichi-gǎ,
te ní vǎ nǎcuánaa-ndo nchaa tńúhu ní
càháⁿ-ndí núú-ndó cùtnàhá ní xindecu
ndihí ñaha-ndí xii-ndo, te ñuu-ni ducaⁿ
càda-ndo nchaa tńúhu tǎndaha-ndí
véxi. ¹⁶⁻¹⁷Te xicǎⁿ tǎhú-ndí núú-gǎ sǎ
ná dacáháⁿ-gǎ iní-ndó cùndecu-ni-ndo
ichi-gǎ, te ducaⁿ ío na chindee ñaha-gǎ
xii-ndo càháⁿ-ndó mée-ni tńúhu váha, te
cada váha-ndo cùndecu-ndo nacuáa cuu
váha iní-gǎ, chi mee Dütú Ndiòxí ío cùu iní
ñáhá-gǎ xii-o, te ñuu-gǎ ní taxi-gǎ tńúhu
ndee iní cundecu ndihí-o ní caa ní quihíⁿ,
te ní cachí tńúhu tucu-gǎ ingǎ tńúhu váha
sǎ cùndètu-o Xítóhó Jesucristú.

3

Cáháⁿ ndihí-ndo Yá Ndiòxí cuèndá-ndí
¹Te nchòhó ñáyiú ndècu ndihí-ndí ichi
Xítóhó Jesucristú, ndéé núú ndihí-nǎ càchí
tńúhu-í xii-ndo sǎ càháⁿ ndihí-ndo Yá
Ndiòxí cuèndá-ndí cuèndá sǎ ná chindee
ñaha-gǎ xii-ndí, te ducaⁿ ndihí-ni cuténuu
tńúhu Xítóhó Jesucristú nchaa xichi, te
cudíí iní-yu tńúhu-gǎ dátńá quidé nchòhó.
²Te càháⁿ ndihí tucu-ndo Yá Ndiòxí cuèndá
sǎ ná còto ñaha-gǎ xii-ndí, te ñǎ túú nǎ
cada ñaha ñáyiú cuihna iní-xi ndècu ichi
cuehé ichi duha xii-ndí, chi ñǎ nchǎá-yu
sàndáá iní-yu tńúhu-gǎ. ³Dico Xítóhó Jesu-
cristú quidé-gǎ nchaa sǎ càháⁿ-gǎ, te ñuu-gǎ
cada te nchòhó cundecu-ni-ndo ichi-gǎ, te
coto ñaha-gǎ xii-ndo cuèndá sǎ ñǎ túú
nǎ cada ñaha yùcu ñávǎha. ⁴Te Xí-
tóhó Jesucristú quidé-gǎ cùtnuní iní-ndí sǎ
nchòhó quidé-ndó nchàa nacuáa ní dǎnehé
ñáhá-ndí xii-ndo, te ñuu-ni ducaⁿ càda-ndo

cundecu-ndo. ⁵ Te xicáⁿ táhú-ndí núú Yă Ndiõxí sá ná chindee ñaha-gá xii-ndo cùu iní-ndó-gă, te diu-ni-gá ná chindee ñaha-gá xii-ndo cundu ucahnu iní-ndó, chí Xítóhó Jesucristú ducaⁿ ño cãhnu iní-gá.

Tàú-ó cada chiuⁿ-o

⁶ Te nchòhó ñáyi u ndècu ndihí-í ichi Xítóhó Jesucristú, càháⁿ-í dóho-ndo sã méé-gă cuiní-gá sá vã nihí tnáhá-gă-ndó ndihí ndéda-ni càa ñáyi u cãchí sã sandáá iní tnúhu-gá, ñáyi u ñá túú cuiní cada chiuⁿ, chí ñáyi u ducaⁿ xĩquide ñá túú cuiní-yu tñí-yu tnúhu sá ñí dánèhé ñáhá-ndí xii-ndo. ⁷ Te nchòhó sa xini-ndó nãcuáa cada-ndo cundecu-ndo canchicúⁿ nihnu-ndo nãcuáa quide-ndí. Te cútnáhá ní xindecu ndihí ñaha-ndí xii-ndo chí ni ñíⁿ nduu ñá túú ní tũhó-ndí. ⁸ Te ni ñá túú dico ducaⁿ ni quèheⁿ-ndí sá ndécú ndihí ñáyi u caxi-ndí àdi canehe-ndí, chí cuèi nduu cuèi niú ío ní quide chiuⁿ-ndí ní nihí-ndí díhúⁿ ñí saaⁿ-ndí nchaa sá ñí nãndíhi-ndí cuendá sá ñá túú ní cuiní-ndí chichiuⁿ ñaha-ndí xii-ndo. ⁹ Te cuèi tàú ndisa-ndí cachí tnúhu-ndí xii-ndo sã chindèe ñaha-ndo xii-ndí ní cùu, dico ní quide chiuⁿ-ndí cuendá ní cuiní-ndí danèhé ñáhá-ndí xii-ndo nãcuáa cada-ndo cundecu-ndo. ¹⁰ Te cútnáhá ní xindecu ndihí ñaha-ndí xii-ndo ñí cachí-ndí sá ncháá ñáyi u ñá túú cuiní cada chiuⁿ te vá cuãha-ndõ-yu sá cãxí-yu. ¹¹ Te vitna nihí-ndí tnúhu sá ño dava nchòhó ñá túú tnáhí quide chiuⁿ-ndo, chí àúⁿ nã cuu ndí cuu ndí cuu-ni-ndo núú ndécú dàva-gá tnàha ñáyi u-ndo. ¹² Te yúhú càháⁿ-í dóho nchaa nchòhó ñáyi u ducaⁿ ñá túú cuiní cada chiuⁿ sá cáda chiuⁿ-ndo cuendá nihí-ndó nchaa sá cóhó sã cãxí-ndó, te duha càháⁿ-í dóho-ndo, chí ducaⁿ cuiní Xítóhó Jesucristú Yáá táxí tñuní ñáhá xì-o cada-ndo, te òré cada chiuⁿ-ndo te vá ío cada dusaⁿ-ndo.

¹³ Te nchòhó ñáyi u ndècu ndihí-í ichi Xítóhó Jesucristú, vá dáñá ndéé-ndó càda-ndo mee-ni sá vãha. ¹⁴ Te núú ñíⁿ ñáyi u ndècu ndihí-ndo ñá túú cuiní-yu tñí-yu tnúhu càháⁿ-ndí núú tũtũ-a, te cundehe-ni-ndo ñũ ndèda càa-yu, te vá nihí tnáhá-gă-ndó ndihí-yu cuendá sá ná cùcahaⁿ nũ-yu, ¹⁵ dico vá cúú ùhú iní-ndõ-yu, chí càháⁿ-ndó dóho-yu

cada-ndo sã ndécú-ndó ìchi Xítóhó Jesucristú ndihí-yu.

Tnúhu ndéé núú ñí ndihí-ná

¹⁶ Te mee Xítóhó Jesucristú ío váha cùu iní-gá ndécú-gă, te xicáⁿ táhú-í núú-gă sá méé-gă ná cáda te ío váha cuu iní-ndó tnáhá-ndó cundecu-ndo cuèi nása-gá ná cundecu-ndo. Te mee-gă ná cundecu ndihí ñaha-gá xii-ndo nchaa-ndo.

¹⁷ Te vitna yúhú té Pãblú tée-í tnúhu-a quide ndee iní ñáhá-í xii-ndo, te diu-ni duha càa nchaa letrá-í nchaa núú tũtũ cáduha-í. ¹⁸ Te xicáⁿ táhú-í núú Xítóhó Jesucristú sá ío na chindee chitúu ñaha-gă xii-ndo nchaa-ndo. Te ducaⁿ na cundu u. Te ío chí cáda ndèe iní-nã vitna.

TUTÚ DÍHNA NUU NĪ CADÚHA TÉ PĀBLÚ QUÍHĪⁿ NDAHA TÉ TIMŪTEÚ

Té Pāblú cādūha-dé tutú quíhĪⁿ ndaha té Timūteú

¹ Yúhú té Pāblú ní tendaha ñàha Yá Ndiòxí cāháⁿ-í tñúhu Xítohó Jesucristú núú ñáyiú chi ducaⁿ ní cachí Yá Ndiòxí cunduu, te diu-gá cúú-gá Yá ní dácàcu nihnu ñàha xii-o núú ùhú núú ndàhú. Te tñàhà Xítohó Jesucristú ducaⁿ ní cachí-gá sá cāháⁿ-í tñúhu-gá, te diu-gá ní taxi-gá tñúhu ndee ìní xii-o sã cùndècu-o ndihĭ-gá ní caa ní quíhĪⁿ. ² Te yòhó té Timūteú cúú-n ĩⁿ tée ní sanu ichi ndisa-í ichi Xítohó Jesucristú chi ío váha ní sándáá ìní-n-gã. Te cādúha-í ĩⁿ tutú daquixi-í ndaha-n. Te xicáⁿ táhù-í núú Tātá-ó Dütú Ndiòxí ndihĭ núú Xítohó Jesucristú sá ío na chindee chitúu ñàha-gã xii-n, te ducaⁿ ndè nduú-gá ná cādá te ío váha cuu ìní-n cùndècu-n.

Cuèndá nchaa ñáyiú dāndahú tñàha ñáyiú-xi

³ Te ñàha-n nacuáa ní cāháⁿ-í cùtnàhá ní quee-í ñúú Èfesú véxi-í distritú Macèdoniá, chí ní cachí-í sá quèndò-o-n ñúú-áⁿ cāháⁿ-n dòho nchaa ñáyiú dāndahú ñàhá càchí sá cāháⁿ tñúhu Yá Ndiòxí te ñà ndàá sá cāháⁿ-yu tñúhu-gá, te diu-ni ducaⁿ cāháⁿ-í vitna cada-n cùndècu-n. ⁴ Te cūñaha-n xii-yu sá vã cādá cuèndá-yu nchaa cuèndú nihĭ-yu nacuáa ní xóo cada ñáyiú ní xín-decu ndéé sanaha, te nchaa cuèndú-áⁿ dicó chináa ñàhá-xí chí ñà túú vèdana nāndihĭ-xi, te ní ñà túú chindee ñàha-xi cada-o nacuáa cuiní Yá Ndiòxí, chí mee-ni sã quèndáá ìní-ó-gã quidè-xí quide-o nchaa nacuáa cuiní-gá.

⁵ Te duha cāháⁿ-í cūñaha-n xii-yu cuèndá sá ná cùu ìní-yu tñàha ñáyiú-yu, te xini ñuhu-xi nduu ndoo nduu nine ìní-yu, te cunduu váha ìní-yu, te quèndáá ìní-yu Yá Ndiòxí, te vá cání ĩⁿ caní úú ìní-yu, te núú ducaⁿ na cādá-yu te cuu ìní ndisá-yu nchaa tñàha ñáyiú-yu. ⁶ Chi dava ñáyiú ñà túú-gã quidè-yu nchaa nacuáa cāháⁿ-í-a, chí mee-nã nchaa cuèndá sá ñà túú vèdana nāndihĭ xicāháⁿ-yu. ⁷ Te cuiní-yu cāháⁿ-yu nchaa tñúhu ní cāháⁿ ndii Moisés dico ñà ndácū-yu, chí cuèi ní yùhu ní ìní-yu

cāháⁿ-yu dico ñà tècú tñuní-yu nacuáa ní cāháⁿ ndii, te ní tñúhu cāháⁿ mée-yu ñà cùtnuní ìní-yu nacuáa nduu-xi.

⁸ Te sa ñàha-o sá ncháá tñúhu ní cāháⁿ ndii Moisés váha, te núu na tècú tñuní-ó ñà cuèndá ducaⁿ ní ngúndècu nchaa tñúhu-áⁿ.

⁹ Te cùtnuní ìní-ó sã ñà díú sã cúú-xí nchaa ñáyiú quide váha ndècu ñuyúú-a ní ngúndècu nchaa tñúhu-áⁿ, chí ní ngúndècu-xi sá cúú-xí nchaa ñáyiú ñà túú quide váha, ndihĭ cuèndá nchaa ñáyiú ío sáa ìní-xi, ndihĭ cuèndá nchaa ñáyiú quide cuèhé quidè dùha, ndihĭ cuèndá nchaa ñáyiú ío ndècu cuèchi-xi, ndihĭ cuèndá nchaa ñáyiú ñà túú nèhe vèdana sá yĩñuhu núú Yá Ndiòxí, ndihĭ cuèndá nchaa ñáyiú ñà túú cāháⁿ váha cuèndá ichi Yá Ndiòxí, ndihĭ cuèndá nchaa ñáyiú sàhni tātá-xi ndihĭ nāná-xi, ndihĭ cuèndá nchaa dava-gá ñáyiú sàhni tñaha, ¹⁰ ndihĭ cuèndá nchaa cue tée cāháⁿ ndihĭ ñáyiú dihĭ te ñà díú ñāndihĭ-güedé cúú-yu, ndihĭ cuèndá tucu nchaa ñáyiú dihĭ cāháⁿ ndihĭ cue tée te ñà díú yĩñ-yu cùu-güedé, ndihĭ cuèndá nchaa cue tée cāháⁿ ndihĭ tñàha ndi mee tée-xi, ndihĭ cuèndá nchaa ñáyiú chiváha tñàha ñáyiú-xi cuèndá sá cuiní-yu ñihĭ-yu díhúⁿ, ndihĭ cuèndá nchaa ñáyiú ndehnde, ndihĭ cuèndá nchaa ñáyiú càcunehe ndéé Yá Ndiòxí cuèndá cuiní-yu cutnùnĭ ìní tñàha ñáyiú-yu sã cāháⁿ ndáá-yu, te ñà ndàá sá cāháⁿ ndáá-yu, ndihĭ cuèndá nchaa ñáyiú quide nchaa dava-gá sá ñà túú tàuchiuⁿ Yá Ndiòxí cadá-yu. Cuèndá nchaa ñáyiú ducaⁿ xiquide ní ngúndècu nchaa tñúhu-áⁿ. ¹¹ Te nchaa tñúhu-áⁿ ĩⁿ-ni cùu-xi ndihĭ nchaa tñúhu sá ní cachí Yá Ndiòxí cāháⁿ-í, te tñúhu-áⁿ cúú-xí tñúhu váha vĭhi, chí mee-gã ío váha ìní-gá.

Té Pāblú ndàcáⁿ táhù-dè núú Yá Ndiòxí sá ní cundahú ìní ñàhá-gã xii-dè

¹² Te Xítohó Jesucristú ní cutnùnĭ ìní-gá sá cādá ndáá-í cada-í nchaa chiúⁿ tahu-gá. Te ndàcáⁿ táhù-í núú-gã sá ní taxi-gá chiúⁿ-gá quidè-í, te ío chindee ñàha-gã xii-í. ¹³ Te ní taxi-gá chiúⁿ-gá quidè-í cuèi ní xóo cāháⁿ cuèhé-í cuèndá-gá, te cuèi ní xóo cúú cuèhé cúú duha-í nchaa ñáyiú ndècu ichi-gá, te cuèi nāndi-gá sá ní xóo cada-í-yu dico ní cundahú ìní ñàhá Yá Ndiòxí xii-í, chí vátá quèndáá-gá ìní-í Xítohó Jesucristú

cútnhá ducaⁿ ní xóo cada-í, te ni ñã cút-nùnì iní-í nchaa sá quidè-í ní cùu, te cuèi ducaⁿ ní xóo cada-í, ¹⁴ dico Yá Ndiòxí ío ní cundàhú iní ñáhá-gá xii-í te chindee ñaha-gá. Te mee Xítoho Jesucristú chindèe ñaha-gá xii-í sàndáá iní-í-gá, te cùu iní-í nchaa tnàha ñáyiu-í.

¹⁵ Te ñihí-ó tnúhu sá Xítoho Jesucristú ní quixi-gá ñuyúú-a cuendá sá dácácu ni-hnu-gá nchaa ñáyiu ndècu ichi cuehé ichi duha. Te tnúhu-án cúu-xí ìnⁿ tnúhu ndáá, te xini ñuhu-xi quindáá iní nchaa nchoo ñáyiu ndècu ñuyúú-a. Te yúhú cùu-í téé ío-gá ndécú cuèchi-xi ní nùú Yá Ndiòxí ní cùu.

¹⁶ Te Yá Ndiòxí ní cundàhú iní ñáhá-gá ní dácácu nihnu ñaha-gá xii yúhú téé xidó ndécú cuèchi-xi ní cùu, cuendá cutnùnì iní nchaa ñáyiu sá Xítoho Jesucristú ío càhnu iní-gá. Te sá dúcáⁿ ní quide ñaha-gá xii-í, te xíãⁿ cutnùnì iní-yu sá nùu na quindáá iní ñáhá-yu xii-gá te cundecú-yu ndihi-gá ní caa ní quíhíⁿ. ¹⁷ Te nchaa-o chí ná cächí-ó sá ío càhnu cuu Yá Ndiòxí, te canehe-o sá yíñùhu nùú-gá ní caa ní quíhíⁿ, chi mee-gá cúu-gá Yáá táxí tnùnì nchaa nduu nchaa quíú. Te cùu-gá ìnⁿ Yáá ñá túú xini nùú-ó, te ìnⁿ dii díí-ni-gá ío ndècu ndihi-gá nchaa sá xini tnùnì-gá.

¹⁸ Te yohó té Timùtéú téé cùu datná ìnⁿ déhe mee-í sa nàha-n nacuaá ní cáháⁿ dava-gá cue téé cáháⁿ tnúhu Yá Ndiòxí cuendá-n, te diu-ni ducaⁿ càháⁿ-ú tucu, te cada-n nchaa nacuaá cáháⁿ tnúhu-án chí diu nchaa tnúhu-án canu ichi ñaha-xi xii-n cada-n nchaa nacuaá cuiní Yá Ndiòxí. ¹⁹ Te ío quindáá iní-n Xítoho Jesucristú, te cada váha-n cundecu-n nacuaá cundecu váha iní-n, chí dava ñáyiu ñá túú-gá ducaⁿ quidè-yu nùu xíãⁿ ñá túú-gá sàndáá iní-yu nàcuáa cáháⁿ tnúhu-gá. ²⁰ Te diu-ni ducaⁿ ní quide té Himènéú ndihí té Lijandrú ní dáñá ndèe-güedé ñá túú-gá sàndáá iní-güedé nàcuáa cáháⁿ tnúhu Xítoho Jesucristú, te ní xáha-ñ yí xii-güedé sá ná cùndoho-ná-güedé nùu nása cada ñaha sàcuíhñá xii-güedé, te ducaⁿ ní xáha-ñ cuendá sá vã cáháⁿ cuèhé-gá-güedé cuendá Yá Ndiòxí.

2

Nàcuáa cáháⁿ ndihi-o Yá Ndiòxí

¹ Te na cächí tnúhu-í xii-n nchaa nacuaá cada-n. Te díhna-gá cächí tnúhu-í sá cáháⁿ ndihi-n Yá Ndiòxí cuendá nchaa

ñáyiu te nùu nása cùu xíndecú-yu, te cácáⁿ táhú-n nùú-gá cuendá-yu, te ducaⁿ ío ndacáⁿ táhú-n nùú-gá cuendá nchaa sá váha quide ñaha-gá xii-yu. ² Te ducaⁿ cáháⁿ ndihi-n Yá Ndiòxí cuendá nchaa cue téé cùnuu ndihi cuendá nchaa dava-gá cue téé cùchiuⁿ cuendá cada váha-güedé, te ducaⁿ nchò ñá túú ñá cuu cundecu-o, te ñá túú tnàhí ná cani iní-ó cundecu-o, te ío cundecu yíñùhu-o nùú Yá Ndiòxí, te cada-o nchaa nacuaá tàu-xi cunduu. ³ Te nùu ducaⁿ na càda-o cáháⁿ ndihi-o Yá Ndiòxí cuendá nchaa ñáyiu te quide váha-o, te nduu vétú iní Yá Ndiòxí Yáá ní dácácu nihnu ñaha xii-o nùú ùhú nùú ndàhú. ⁴ Te mee-gá cuiní-gá sá ncháá ñáyiu tecú tnùnì-yu nchaa tnúhu càháⁿ-gá, chí cuiní-gá sá nánihí táhú-yu. ⁵ Te ìnⁿ-ni Dútú Ndiòxí ndécú, te ìnⁿ-ni Xítoho Jesucristú, te medi-ni Xítoho Jesucristú quidè-gá tnàhá tnúhu-o ndihi Yá Ndiòxí. ⁶ Te Xítoho Jesucristú ní dáñá-gá méé-gá ní sahani ñaha-güedé xii-gá cuendá sá cuiní-gá sá cãcu nihnu nchaa ñáyiu ndècu ñuyúú nùú ùhú nùú ndàhú. Te Yá Ndiòxí cuiní-gá sá ncháá ñáyiu ñuyúú ndécú vitna ñhí-yu tnúhu nàcuáa ní cuu ní xíhí Xítoho Jesucristú. ⁷ Te Yá Ndiòxí ní cächí-gá sá càháⁿ-í tnúhu-án ndèni ní cuu nùú xíndecu ñáyiu ñá túú cùu ñáyiu isràél, te mee-ni tnúhu ndáá dánèhé-í-yu nàcuáa quindáá iní ñáhá-yu xii-gá, te yúhú càháⁿ ndáá-í sá Yá Ndiòxí ní cächí-gá sá càháⁿ-í tnúhu-gá chí ndècu ndihi-í Xítoho Jesucristú, te ñá túú dandahú ñáhà-í xii-n.

⁸ Te yúhú cuiní-í sá ncháá xichi cáháⁿ ndihi cue téé Yá Ndiòxí, te na cùnduu ndoo cunduu nine iní-güedé òré ndonehe-güedé ndaha-güedé cáháⁿ ndihi ñaha-güedé xii-gá, chí vá cúu cùdèéⁿ-güedé cuendá nchaa sá quidè ñaha ñáyiu xii-güedé, te ni vã cánì iní-güedé cùcuèhé tnàhá-güedé ndihí-yu. ⁹ Te cächí tnúhu-í xii-n sá ncháá ñáyiu díhí ná cùnduu dío-yu nàcuáa tàu-xi cunduu, te vá cùnduu cuehé cunduu duha dàtná cáá dío nchaa ñáyiu ndècu ichi cuehé ichi duha, te na ndàdá-yu díquí-yu nàcuáa tàu-xi cunduu, te vá ndáá cuèhé ndada duhá-yu, te vá cánì iní-yu cunduu víi-yu ndihi sá ío ndèyáhu, te ni vã cánì iní-yu cuihnú-yu dóó sá ío ndèyáhu. ¹⁰ Te mee-ni sá váha cadá-yu, chí ducaⁿ tàu-xi cada nchaa ñáyiu díhí ndécú ichi Yá Ndiòxí.

¹¹ Te òrè tàcá-yu núú dácuahá-yu tnúhu Yá Ndiòxí, te cue ñáyiú ðíhí-án na nàhi dacuahá-yu tnúhu-gá, te cadá-yu nchaa nàcuáa càháⁿ cue tée dàcuaha ñaha xií-yu tnúhu-gá. ¹² Te yúhú càchí-í sá vǎ cúú dàcuaha ñáyiú ðíhí cue tée, te ni vǎ cúú tàxi tnuní ñáhá-yu xii-güedé chi cunduu tnàvíí-ni yuhú-yu cundedóho-yu. ¹³ Te ducaⁿ xini ñuhu-xi cadá-yu, chi Yá Ndiòxí ní cadúha-gá díhna-gá té Àdán te dàtnuní ní cadúha-gá tá Évá. ¹⁴ Te ñá díú mèe té Àdán ní dàndahú ñáhá sácúfhná xii-dé, chi tá Évá ní dàndahú-xi, te ñá túú ní quide váha-xi núú Yá Ndiòxí sá dúcáⁿ ní sándáá iní-xi tnúhu ní cáháⁿ sácúfhná-ǎⁿ. ¹⁵ Dico ñáyiú ðíhí ní nduu táhú-yu sá cóó ðehe-yu, te naníhí táhú-yu te núú vǎ dáñá ndèe-yu canchicúⁿ nihnú-yu ichi Yá Ndiòxí, te cundecu yíñùhú-yu núú-gǎ, te cuu iní-yu nchaa tnàha ñáyiú-yu, te cadá-yu nchaa nàcuáa tàú-xi cunduu cundecú-yu.

3

Nàcuáa tàú cue tée yíndaha ñaha xii ñáyiú ndècu ichi Yá Ndiòxí cada-güedé

¹ Te ío ìⁿ tnúhu càháⁿ ñáyiú sá núú ìⁿ tée cuiní quíndaha ñaha xii ñáyiú ndècu ichi Yá Ndiòxí, te ìⁿ sá vǎha cuiní-dé cada-dé càchí-yu, te ndáá quée-xí tnúhu càháⁿ-yu. ² Te yúhú càchí-í sá cuè tée ducaⁿ na quíndaha ñaha xii ñáyiú te xini ñuhu-xi cuu-güedé cue tée quide ndáá cuendá sá vǎ càháⁿ ñáyiú cuendá-güedé sá ñà túú quide ndáá-güedé. Te na cùu-güedé cue tée ndèca ìⁿ caa-ni ñadihí, te na cùu-güedé cue tée ñá túú quide cutexínu ndècu, te na cùu-güedé cue tée quide nchaa nacuaá tàú-xi cunduu, te na cùu-güedé cue tée sǎñaha núu vehe ndetatú nchaa ñáyiú ñuhu ichi, te na cùu-güedé cue tée dànehé ñáhá vǎha xii ñáyiú tnúhu Yá Ndiòxí. ³ Te vǎ cúú-güedé cue tée quihu, te ni vǎ cúú-güedé cue tée ndùcu pletú, te ni vǎ cúú-güedé cue tée dicó-ni ducaⁿ nihí díhúⁿ, te ni vǎ cúú-güedé cue tée sàni iní nàá, te ni vǎ cúú-güedé cue tée ñuhu iní mee-ni díhúⁿ. Chi na cùu-güedé cue tée váha iní-xi te cunduu càhnu iní-güedé. ⁴ Te na cùu-güedé cue tée ío váha sànu ichi ñadihí-xi ndíhí landú-xi, te na cùu-güedé cue tée quide nacuaá sándáá iní ñáhá landú-xi cuendá canehé-güexi sá yíñùhu núú-güedé. ⁵ Chi

núu cùu-güedé cue tée ñá ndácú cànuichi ñadihí-xi ndíhí landú-xi, te vǎ ndácú-güedé quíndaha-güedé cue ñáyiú ndècu ichi Yá Ndiòxí. ⁶ Te vǎ cúú-güedé cue tée íchí ni sándáá iní-xi tnúhu Yá Ndiòxí, chi na cuáháⁿ te cada nínu-güedé mée-güedé te cuíta nihnu-güedé dáttná ní xíta nihnu sácúfhná. ⁷ Te xini ñuhu-xi cuu-güedé cue tée càháⁿ váha ñáyiú cuendá-xi, cuèi ñá díú ñáyiú ndècu ichi Yá Ndiòxí cuendá sá vǎ cuáttnùha ñaha ñáyiú xii-güedé, chi núu ñáhá te cudana te sácúfhná quesaha-xi tàxi tnuní ñáhá-xi xii-güedé.

Cue tée chindee ñaha xii cue tée yíndaha ñaha xii ñáyiú ndècu ichi Yá Ndiòxí

⁸ Te tnàhá cue tée chindee ñaha xii cue tée yíndaha ñaha xii ñáyiú ndècu ichi Yá Ndiòxí xini ñuhu-xi cuu-güedé cue tée quide nchaa nacuaá tàú-xi cunduu, te vǎ cúú-güedé cue tée càchí sá càháⁿ ndáá te ñá ndáá, te ni vǎ cúú-güedé cue tée quihu, te ni vǎ cúú-güedé cue tée sàni iní-xi dicó-ni ducaⁿ nihí díhúⁿ. ⁹ Te xini ñuhu-xi cuu-güedé cue tée ñá túú dàña ndeé sándáá iní tnúhu Yá Ndiòxí, te na cùu-güedé cue tée ío váha cùu iní-xi cuendá nchaa sá vǎha quide-güedé. ¹⁰ Te xini ñuhu-xi coto ndeé ñáhá xii-güedé te núu cùu-güedé cue tée quide váha, te núu cùu-güedé cue tée quide váha ña te cuu chindee-güedé cue tée yíndaha ñaha xii ñáyiú ndècu ichi Yá Ndiòxí. ¹¹ Te tnàhá tucu nchaa ñáyiú ðíhí ná cadá-yu nchaa nàcuáa tàú-xi cunduu, te vǎ cúnùu yiti yuhú-yu, te ni vǎ cúú-yu ñáyiú quide cutexínu ndècu, te na cúú-yu ñáyiú ío váha quide ndáá. ¹² Te nchaa cue tée chindee ñaha xii cue tée yíndaha ñaha xii ñáyiú ndècu ichi Yá Ndiòxí, xini ñuhu-xi cuu-güedé cue tée ndècu ìⁿ caa-ni ñadihí-xi, te na cùu-güedé cue tée sànu ichi váha ñadihí-xi ndíhí landú-xi. ¹³ Te núu na càda ndáá-güedé chindee-güedé cue tée yíndaha ñaha xii ñáyiú ndècu ichi Yá Ndiòxí, te canehé-yu sá yíñùhu núú-güedé, te ducaⁿ te vǎ cúú càháⁿ núú-güedé càháⁿ-güedé núú ñáyiú tnúhu Xítóhó Jesucristú sá sándáá iní-güedé.

Ío càhnu cuu tnúhu càháⁿ Yá Ndiòxí

¹⁴ Te cuiní-í ndíhí-ni quixi coto ñaha-í xii-n dico díhna-gá cadúha-í tutú-a daquixi-í ndaha-n ¹⁵ chi na cuáháⁿ cuyaa-í.

Te xíaⁿ nõu càdúha-í tutú-a daquixi-í ndaha-n cuendá cutnùnì iní-n nõsa cada-n cùndecu-n ndìhi nchaa ñáyi ndècu ichi Yá Ndiõxí. Te ñáyi-áⁿ cúu-yu dàtná ìⁿ vehe cùu cuendá Yá Ndiõxí Yáá ndécú nchàa nduu nchaa quiú, chi ndècu ndìhi ñaha-gá xii-yu, te cúu-yu ñáyi cuháⁿ váha cuendá tnúhu-gá. ¹⁶ Te cùtnunì ndáá iní-ó sã ìo càhnu cuu tnúhu càháⁿ Xítohó Jesucristú, tnúhu sã càháⁿ nõcuáa nduu ichi ndecu-o, te duha càháⁿ tnúhu-áⁿ:

Te ní quixi Yá cúu Ndiõxí ñuyíú-a ní cuu-gá ìⁿ ñáyi,

te Espiritú Yá Ndiõxí ní cáháⁿ ndáá-xi sã cúu-gá ìⁿ Yáá ío váha quide ndáá,

te cue espíritú xínú cuèchi núú Yá Ndiõxí ní xíní ndáá-xi nchaa nõcuáa ní quide Yáá ní quixi ñuyíú-a.

Te ní xité nuu tnúhu-gá ñihí ñuyíú-a,

te ndèni ní cuu ní ngúfta-yu sàndáá iní ñáhã-yu xii-gá,

te mee-gá cuánda-gá andiu.

Duha càchí tnúhu-áⁿ.

4

Ñáyi daña ñihnu vá quíndáá-gá iní-yu Yá Ndiõxí

¹ Te Espiritú Yá Ndiõxí càháⁿ ndáá-xi sã sáá nduu dàña ñihnu dava ñáyi ndècu ichi-gá vá quíndáá iní ñáhã-gá-yu xii-gá, te ducaⁿ chi cue espíritú cùndìhi yucu ñávãha dandàhú ñáhã-xí xii-yu, te mee-nã nchaa tnúhu càháⁿ nchaa ñáyi cùndìhi nchaa espíritú-áⁿ cuhuⁿ iní-yu. ² Te nchaa ñáyi ducaⁿ cùndìhi cue espíritú cùndìhi yucu ñávãha-áⁿ cúu-yu ñáyi ío dandàhú mée-xí chi càchí-yu sã càháⁿ ndáá-yu te ñá ndáá, te ñá túú tnáhí-gá ná quidé-xí iní-yu cuendá nchaa sã cuèhé sã dúhá quidé-yu. ³ Te ñáyi-áⁿ quesàhá-yu sã vã cúu càndeca tnahã ñáyi, te ní vã cúu càxí-yu dava núú sã xini-yu caxí-yu, dico Yá Ndiõxí ní cadúha-gá nchaa sã nchító-ó cuendá caxi-o, te cuiní-gá sã ncháá nchò ñáyi sàndáá iní tnúhu-gá ndacáⁿ táhú-ó nõú-gã òré caxi-o. ⁴ Te nchaa sã ní cadúha Yá Ndiõxí cúu-xí sã váha te vá dàquèe tihú-ó, te xini ñihu-xi ndacáⁿ táhú-ó nõú-gã cuendá nchaa xíáⁿ. ⁵ Te Yá Ndiõxí càchí-gá sã mée-gã quidé-gã cúu-xí sã váha sã cúu-xí-ó te núu na ndacáⁿ táhú-ó nõú-gã.

Tée quide ndáá xínú cuèchi núú Xítohó Jesucristú

⁶ Te núu na dàcuaha-n ñáyi ndècu ndìhi-o ichi Xítohó Jesucristú nchaa nõcuáa càháⁿ-í-a ña, te cuu-n ìⁿ tée quide ndáá xínú cuèchi núú-gã, te nducu ndèe-ni-n dacuaha-n tnúhu Yá Ndiõxí sã sàndáá iní-n, te canchicúⁿ ñihnu-ni-n càda-n nchaa nacuáa càháⁿ-gã, te núu ducaⁿ ná cada-n, te níhí ndéé-n cùndecu-n ichi-gá. ⁷ Te vá cáda cuendá-n nchàa cuendú cuèhé cuendú duha càháⁿ ñáyi, ndìhi nchaa dava-gã cuendú sã ñá túú nandìhi cuendá sã ñá túú nõ cumání-n cùndecu-n núú Yá Ndiõxí. ⁸ Te núu ìⁿ chiuⁿ cada-o te nõcaá luha yiqui-o te nandìhi-xi luha, dico ío-gã nandìhi-xi te núu cada-o sã cùndecu yihnu-o núú Yá Ndiõxí. Te núu ducaⁿ na càda-o te cùu-xi ìⁿ sã váha sã cúu-xí-ó vitna, te ní caa ní quíhíⁿ ducaⁿ cùu-xi ìⁿ sã váha sã cúu-xí-ó.

⁹ Te xini ñihu-xi sã ncháá-ndó quíndáá iní-ndó nchàa tnúhu càháⁿ-í-a chí cùu-xi tnúhu ndáá. ¹⁰ Te vitna ío nducu ndee-o quide-o chiuⁿ Yá Ndiõxí Yáá ndécú nchàa nduu nchaa quiú te quide ndee iní-ó cuendá nchaa sã quidé ñaha ñáyi xii-o, chi sàndáá iní-ó sã díú-gã chíndèe ñaha-gá xii-o. Te nchaa ñáyi cùndahú iní ñáhã-gã te chíndee ñaha-gá xii-yu, dico ñáyi sàndáá iní ñáhã xii-gã ío-gã cùnúu-yu chíndee ñaha-gã xii-yu, chi dàcacu ñihnu ñaha-gã núú ùhú núú ndàhú.

¹¹ Te nchaa tnúhu-áⁿ cùñaha-n xii-yu, te cáháⁿ-n dõho-yu sã ná càdã-yu nchaa nõcuáa càháⁿ-xi. ¹² Te ío cada váha-n cùndecu-n cuendá sã vã yõo daquèe tihú ñáhã xi-n cuendá sã cúu-n tée cuechi, te ío váha cada-n nchàa sã tàú-n càda-n cuendá ducaⁿ canchicúⁿ ñihnu nchaa ñáyi ndècu ichi Yá Ndiõxí, te vii vii cáháⁿ ndìhí-n-yu, te cuu iní-n-yu, te ío quíndáá iní-n Yá Ndiõxí, te mee-ni sã váha cani iní-n, te ducaⁿ càda-n cuendá canchicúⁿ ñihnuⁿ. ¹³ Te nini cùyaa-í quixi-í, te ío nducu ndèe-n cáháⁿ ndodo-n tnúhu Yá Ndiõxí nõú-yu, te dacuáhã-n-yu nõcuáa càháⁿ tnúhu-gã, te cáháⁿ-n dõho-yu nõcuáa cuu vii cuu váha iní-yu cùndecú-yu ichi Yá Ndiõxí. ¹⁴ Te vá dáñá ndéé-n càda-n nacuáa nduu táhú ní taxi Yá Ndiõxí ní ngúndecu ndìhi-n cùt-nàhá ní sacáⁿ ndodo cue tée yíndaha ñaha xii ñáyi ndècu ichi Yá Ndiõxí ndaha-güedé díquí-n, te ní caxí tnúhu-güedé sã dúcáⁿ ní cuiní Yá Ndiõxí cunduu.

¹⁵ Te ni yùhu ni iní-n càda-n nchaa nacuaá càháⁿ-í-a cuèndá sá ná quíni ñáyiú sá ìo-gá váha ta quide-n cuáháⁿ. ¹⁶ Te ío váha cundehe-n nchaa nacuaá quide-n, ndíhi nchaa nacuaá dānehé-n-yu, te vá dáñá ndéè-n dùcaⁿ cada-n. Te núu ducaⁿ na càda-n te nduu táhú-n cùndecu váha-n núú Yá Ndiòxí ni caa ni quíhíⁿ ndíhi nchaa ñáyiú na tédóho nchaa tnúhu càháⁿ-n.

5

Nàcuáa tàú-xi cada-o cùndecu-o ndíhi ñáyiú sàndáá iní tnúhu Yá Ndiòxí

¹ Te vá ténàá-n nchaa cue tée cùu sacuéhé chi víi víi càháⁿ-n dōho-güedé, te cada iní-n sá dàtná tátá-n cùu-güedé, te diu-ni ducaⁿ víi víi càháⁿ-n dōho nchaa cue tée cuechi, te cada iní-n sá dàtná cue ñaní-n cùu-güedé. ² Te diu-ni ducaⁿ yíi víi càháⁿ tucu-n dōho nchaa ñáyiú ñíhi ñáyiú cùu sacuéhé, te cada iní-n sá dàtná nānā-n cùu-yu, te diu-ni ducaⁿ víi víi càháⁿ tucu-n dōho nchaa ñáyiú ñíhi ñáyiú cuechi, te cada iní-n sá dàtná cue cúha-n cùu-yu, te ío cuu váha iní-n òré ducaⁿ càháⁿ-n dōho nchaa ñáyiú cuechi-āⁿ.

³ Te canehe-n sá yíñùhu núú ñáyiú ñíhi ní quendóo quèé, te chindèè-n-yu núu ndáhú-yu. ⁴ Te núu ñíhi ñaha quèé ndécú cuè déhe-aⁿ àdi cue déhe ñani-aⁿ, te ío xini ñuhu-xi cada-güexi nchaa nacuaá tàú-xi cunduu núu-aⁿ chi ducaⁿ cuíni Yá Ndiòxí cada-güexi. Te núu ducaⁿ na càda-güexi te nānchocáva-güexi quide-güexi sá váha sá cùú-xí ñáyiú ní dācuéhnú ñaha xii-güexi. Te núu ducaⁿ na càda-güexi te quide váha-güexi te ío nduu vétú iní Yá Ndiòxí.

⁵ Te ñáyiú quèé ñáyiú ndáhú ndécú ichi Yá Ndiòxí sàndáá iní-yu sá díú-gā chindèè ñaha-gā xii-yu, te cuéi nduu cuéi níú ñá túú dāña ndeé-yu càháⁿ ndíhi ñahá-yu xii-gā. ⁶ Te nchaa ñáyiú quèé cúdǎ iní quidé nchaa sá cuèhé sá dúhá cùu-yu dàtná ñáyiú ní xíhí cuéi ndècu vívù-yu. ⁷ Te cúñaha-n xii nchaa ñáyiú sá ná càdā-yu nchaa tnúhu càháⁿ-í-a cuèndá sá ñá túú nā cumání-yu cundecú-yu, te ducaⁿ vā yōo càháⁿ cuèhé cuèndá-yu. ⁸ Te ío xini ñuhu-xi chindee-yu cue tnàha ñáyiú-yu, cuè ío-gā xini ñuhu-xi chindee-yu cue ñáyiú cùu ndi meé-yu ndècu ndíhi-yu, te núu vá dúcáⁿ càdā-yu te ñá túú-gā sàndáá iní-yu cadā-yu nacuaá càháⁿ Yá Ndiòxí. Te sá dúcáⁿ ná

càdā-yu te víhi-gā quidé-yu dàcúxí ñáyiú ndècu ichi cuehé ichi duha.

⁹ Te chido tnùní-n mēè-ni ñáyiú quèé ñáyiú sa ndècu únídico cuíá-xi àdi víhi-gā cuèndá ñáyiú-āⁿ cadā-yu nchaa nācuáa cuíni Yá Ndiòxí núu nchaa ñáyiú ndècu ichi-gā, te ñáyiú-āⁿ xini ñuhu-xi cuú-yu mee-ni ñáyiú ní quide ndáá ní xindecu ndíhi yíi-xi. ¹⁰ Te na cùu-yu ñáyiú quèé quidé váha cùdiu núu nchaa ñáyiú, te na cùu-yu ñáyiú quèé xini canu ichi váha cue landú-xi, te na cùu-yu ñáyiú sñaha núu vehe ndetátú cue ñáyiú ñuhu ichi, te na cùu-yu ñáyiú ndècu túha quide nāni chiúⁿ cuèndá cue ñáyiú ndècu ichi Yá Ndiòxí, te na cùu-yu ñáyiú chindee nchaa ñáyiú ndècu ndíhi tnúndòho tnúhu ndáhú, te na cùu-yu ñáyiú ñá túú dāña ndeé quidé nchaa núú sá váha.

¹¹ Te vá chídó tnùní-n ñáyiú quèé ñáyiú ñá túú ndècu únídico cuíá-xi cada chiúⁿ Yá Ndiòxí, chi núu cuechi-gā-yu ña, te vá cùndáá-yu cadā-yu chiúⁿ-gā, chi quesáhá-yu natnāndaha tucú-yu. ¹² Te sá cuèndá xíǎⁿ te nacháhu-yu núu Yá Ndiòxí, chi vá càdā-gā-yu nacuaá ní cuu tnúhu cadā-yu ni cùu. ¹³ Te ngúíta-yu cani iní-yu quíhíⁿ-yu ndi vehe ndi vehe caca ñíhíⁿ-yu, te nchaa ñáyiú ducaⁿ quide ío cùu cuhndú-yu, te cùyiti yuhú-yu, te ndèni ní cuu cuáháⁿ-yu chinee díquíⁿ-yu vehe tnàha ñáyiú-yu ndèhé-yu núu nāsa ndècu-yu, te ñá túú tàú-yu ducaⁿ cadā-yu, te càháⁿ-yu mee-ni tnúhu sá ñá túú nāndíhi. ¹⁴ Núu xíǎⁿ cuíni-í sá nchaa ñáyiú quèé ñáyiú cuechi na nātnāndaha tucú-yu cuèndá cuú-yu nānā, te ducaⁿ cadā-yu nchaa sá xini ñuhu-xi cadā-yu vehé-yu, te núu ducaⁿ na càdā-yu, te nchaa ñáyiú cùu úhú iní ñahá xii-o vá ñíhí-gā-yu tnúhu càháⁿ cuèhé-yu cuèndá tnúhu Yá Ndiòxí. ¹⁵ Te dava ñáyiú quèé ndécú ichi Yá Ndiòxí ní cùu ní dāñá-yu te ní tníí-yu tnúhu càháⁿ sácúíhná.

¹⁶ Te núu dava ñáyiú ndècu ichi Yá Ndiòxí ndécú ndíhi-yu ñíhi ñaha quèé cúú ndi meé-yu ña, te tàú-yu chindee ñahá-yu xii-aⁿ cuèndá sá vā ío chi chiúⁿ-aⁿ nchaa ñáyiú ndècu ichi Yá Ndiòxí, te ducaⁿ te nchaa ñáyiú ndècu ichi-gā-āⁿ ñíhí ndéé-gā-yu chindèè-yu dava-gā ñáyiú quèé ñá túú vèdana ndècu ndíhi.

¹⁷ Te nchaa cue tée ío váha quíde yindaha ñaha xii ñáiyu ndècu ichi Yá Ndiòxí ío xini ñuhu-xi canehé sá yíhí ñuhu núu-güedë, te chindee ñaha xii-güedé. Te uuⁿ-gá táu ñáiyu ducaⁿ càdá-yu sá cúu-xí nchaa cue tée ni yùhu ni iní càháⁿ tnúhu-gá. ¹⁸ Te núu tùtú Yá Ndiòxí càchí-xi: “Vá chíhí-ndó ñunu yuhu ndicutu oré dánchezí-dí tríú”, duha càchí-xi. Te càchí tucu-xi ingá xichi: “Íⁿ tée quíde chiuⁿ dacuitíí tàu-xi sá cúhúⁿ yáhu-dé”, duha càchí-xi núu tùtú-gá.

¹⁹ Te núu ío ñáiyu véxi sàcáⁿ cuéchi núu-n cuendá ííⁿ tée yíndaha ñaha xii ñáiyu ndècu ichi Yá Ndiòxí ñá, te cada cuendá-n tnúhu càháⁿ-yu te núu véxi-yu ndíhí úú àdí úní ñáiyu càháⁿ ndáá nàcuáa ní cuu, áⁿ ñuu ñáhá te vá cádá cuendá-n tnúhu càháⁿ-yu. ²⁰ Te núu cue tée yíndaha ñaha xii ñáiyu-áⁿ ndécú cuéchi-güedé, te càháⁿ-n dóho-güedé núu nchaa ñáiyu ndècu ichi-gá cuendá sá dává-gá-yu vá cùyíí-yu ducaⁿ càdá-yu. ²¹ Te Yá Ndiòxí ndíhí Xítohó Jesucristú náhá-gá ndíhí cue espíritú xínú cuéchi núu-gá sá yùhú càháⁿ-í dóho-n sá cádá-n nchaa nàcuáa càháⁿ-í-a, te ííⁿ-ni càháⁿ ndíhí-n cuè tée xini tnáhá ndíhí-n, ndíhí cue tée ñá túú xini tnáhá ndíhí-n. ²² Te vá ío cundíhí iní-n tàxi ndecu-n ííⁿ tée quíndaha ñaha xii ñáiyu, chi díhna-gá cada cuendá-n te núu cùu-dé ííⁿ tée quíde ndáá, chi núu cuendá-ni na tàxi ndecu-n-dé te vá cádá ndáá-dé, te yòhó ndaa díquí-n cuendá nchaa sá cuèhé sá dúhá càda-dé, te ío coto-n mèe-n vá cádá-n ni ííⁿ sá cuèhé sá dúhá.

²³ Te ducaⁿ ío mee-ni cùhú xití-n te vá cóhó-n mèe-ni ndute, chi tnáhá luha vínú ndéhé yoho yàha stilé coho-n cuendá cada tátna-xi.

²⁴ Te dava ñáiyu cùtnuní nchaa sá cuèhé sá dúhá quíde-yu, te cùtnuní tucu sá nácháhu-yu na sàá nduu, te dava tucú-yu chi ñá túú cùtnuní nchaa sá cuèhé sá dúhá quíde-yu, dico na sàá nduu cùndáá cuéchi-yu te dàvá-áⁿ cùtnuní. ²⁵ Te ducaⁿ sátnahá-xi cùu nchaa sá váha quíde dáva-yu chi cùtnuní, te cuéí ñá túú cùtnuní òré-ni dico dacuitíí sá sàá nduu cùtnuní.

6

¹ Te nchaa ñáiyu ndècu tnuú quíde chiúⁿ ndíhí ííⁿ patróóⁿ xini ñuhu-xi ío canehé-yu sá yíñuhu núu-dë cuendá sá vá càháⁿ

cuèhé ñáiyu cuendá Yá Ndiòxí, te ni vá càháⁿ cuèhé-yu cuendá tnúhu-gá. ² Te núu patróóⁿ cue ñáiyu xinu cuechi-áⁿ sàndáá iní-dé Yá Ndiòxí, te ñá díú sá dúcáⁿ sàndáá iní-dé Yá Ndiòxí te vá cànèhé-yu sá yíñuhu núu-dë, chi uuⁿ-gá tàu-yu cada váha-yu cunu cuéchi-yu núu-dë, te ducaⁿ na càdá-yu chi xinu cuechi-yu núu tée sàndáá iní ndíhí-yu tnúhu Yá Ndiòxí. Te vá dáñá ndèe-n dànehé-n-yu nchaa nàcuáa càháⁿ-í-a, te cùñaha-n xii-yu sá ná càdá-yu.

Nduu vétú iní-ó cùndecu-o

³ Te ío cue tée ñá túú tnèi-güedé nàcuáa càháⁿ tnúhu Xítohó Jesucristú, te cue tée-áⁿ càchí-güedé sá càháⁿ ndáá-güedé dico ñá ndáá, chi ñá túú càháⁿ-güedé nàcuáa cuáháⁿ tnúhu-gá. Te nchaa tnúhu Xítohó Jesucristú cúu-xí mèe-ni tnúhu ndáá, te chindee ñaha-xi cada ndáá-ó cùndecu-o ichi-gá. ⁴ Te nchaa cue tée ducaⁿ xíquide quíde cahnu-güedé mée-güedé dico ñá túú vèdana xini-güedé, te cue tée-áⁿ ñá túú ndècu váha iní-güedé chi nándi tnúhu sá ñá túú nándíhí cuini-güedé cùtnaha-güedé. Te nguíta-güedé cúu cuèdú iní tnáhá-güedé, te nàá ndíhí tnáhá-güedé, te xícuehé tnáhá-güedé, te ñá túú-gá cúu váha iní núu tnáhá-güedé. ⁵ Te cue tée-áⁿ mee-ni nàá-güedé chi ñá túú sàni váha iní-güedé, te ni ñá túú xini-güedé nàcuáa cuáháⁿ tnúhu ndáá tnúhu Yá Ndiòxí, te càchí-güedé sá ío váha cundecu-güedé ichi-gá chi sàni iní-güedé sá ío vài díhúⁿ ñíhí-güedé cundecu ndíhí-güedé. Te yúhú càháⁿ-í dóho-n sá vá ñíhí tnáhá-n ndíhí nchaa cue tée ducaⁿ xíquide. ⁶ Te ndáá sá ichi Yá Ndiòxí cúu-xí ííⁿ ichi sá ío váha cundecu-o, dico xini ñuhu-xi nduu vétú iní-ó nàcuáa ndècu-o ñuyúí-a. ⁷ Te nchoo cuè ñáiyu chi ñá túú vèdana nèhe-o ní quexio ñuyúí-a, te díu-ni ducaⁿ ñá túú vèdana canehé-o quíhíⁿ òré ná cúu-ó. ⁸ Te ío xini ñuhu-xi nduu vétú iní-ó te núu ndècu-ni sá cùnchito-o ndíhí dóó cuihu-o. ⁹ Te ío ñáiyu ío cuini-yu cuu cuicá-yu, te ñáiyu-áⁿ dácàhu iní ñáhá yucu ñávàha xí-yu cadá-yu nándi sá cuèhé sá dúhá, te nándi-gá nchaa sá cuèhé sá dúhá càhu iní-yu quíde-yu, te nchaa sá quíde-yu-áⁿ ñá túú vèdana nándíhí-xi chi uuⁿ-gá ndáá ndáhú ñáhá-xí xii-yu, te

dàcuíta nihnu ñaha-xi. ¹⁰ Chi nchaa ñáyiú ñùhu iní mee-ni díhúⁿ, te xiáⁿ quidé-xí ngúíta-yu sàni iní-yu cadá-yu nándi sá cuèhé sá dúhá. Te ío ñáyiú ndècu ichi Yá Ndióxi te sá tñùhu ducaⁿ ñùhu iní mee-ni díhúⁿ ní dǎñǎ-yu ñá túú-gǎ sàndáá iní ñáhǎ-yu xii-gǎ, te vitna ñá túú tñahí-gǎ ndécú váha iní-yu.

Cahni iní-ó càda-o nchaa nacuáa càháⁿ Yá Ndióxi chi sàndáá iní-ó-gǎ

¹¹ Te yòhó téé quide chiuⁿ Yá Ndióxi xini ñùhu-xi vá cadá-n dàtná quidé nchaa ñáyiú ní cachí-í sá ñà túú quide ndáá, te vá dǎñǎ ndèe-n càda ndáá-n cùndecu-n, te cada-n nàcuáa nduu vétú iní Yá Ndióxi, te ío quindáá iní-n-gǎ, te cuu iní-n nchaa tñaha ñáyiú-n, te cada càhnu iní-n nchaa sá ná yǎha-n cùndecu-n ichi-gǎ, te cundu ndáhú iní-n. ¹² Te cahni iní-n càda-n nchaa nacuáa cuiniⁿ Yá Ndióxi chi sàndáá iní-n-gǎ, te ío cuhuⁿ iní-n sǎ cùndecu-n ndíhi Yá Ndióxi ní caa ní quíhíⁿ, chi diu cuendá tñahí-áⁿ ní cáháⁿ ñáhǎ-gǎ xii-n, te ní cáháⁿ ndáá-n núú vai ñáyiú sá ío váha sàndáá iní-n-gǎ. ¹³ Te Yá Ndióxi Yaá quidé nchito nchaandi túhú sá ío ñuyúú naha-gǎ sá càháⁿ-í dóho-n vitna, te diu-ni ducaⁿ naha tucu Xítohó Jesucristú Yaá ní cáháⁿ tñùhu ndáá núú tǎ Pilatú ¹⁴ sá quindáá iní-n càda-n nchaa nacuáa càháⁿ Yá Ndióxi, te nchaa tñùhu càháⁿ-gǎ cada-n nàcuáa vá dáquèe tǐhú ñáhǎ ñáyiú xii-n, te ducaⁿ-ni càda-n ndéé ná sàá nduu quixi tucu Xítohó Jesucristú. ¹⁵ Te quixi tucu-gǎ chi ducaⁿ ní cachí Yá Ndióxi cunduu, te mee Yá Ndióxi náhǎ-gǎ ná nduu quixi tucu Xítohó Jesucristú. Te Yá Ndióxi ío váha cùu iní-gǎ te ìⁿ dǐi díf-ni-gǎ ío-gǎ cùnùu-gǎ dàcúúxí cuè téé tàxi tñuní ìⁿ ìⁿ nàcióⁿ ndíhi nchaa dava-gǎ cue téé cùnùu, chi tàxi tñuní ñáhǎ-gǎ xii-güedé, te nchaa ñáyiú ndècu ñuyúú-a tàxi tñuní-gǎ. ¹⁶ Te diu-gǎ cúú-gǎ Yaá ndécú nchaa nduu nchaa quíú, te ío càhnu cuu-gǎ chi dàtná dáyèhé nchí-canchii dáyehé-xi núú ndécú-gǎ, te vá yòo ìⁿ cùyíi dayatni núú ndécú-gǎ, te ní ñá túú ìⁿ ìⁿ ñáyiú xini ñáhǎ xii-gǎ te ní vá ndácú-yu quini ñáhǎ-yu xii-gǎ. Te ío na cànehe nchaa ñáyiú sá yíñùhu núú-gǎ ní caa ní quíhíⁿ, te ducaⁿ ío na tàxi tñuní-gǎ ní caa ní quíhíⁿ. Te ducaⁿ na cùnduu.

¹⁷ Te cáháⁿ-n dǎho nchaa ñáyiú cuica ndècu ndíhi nchaa sá ío ñuyúú-a cuendá sá vá cadá càhnu-yu mèe-yu, te duuⁿ duuⁿ vá cùndèe iní-yu ní ìⁿ sá ndécú ndíhí-yu chi vá cúdíi-xi, te cáháⁿ-n dǎho-yu sá ná cùndèe iní-yu Yá Ndióxi chi diu-gǎ cúú-gǎ Yaá ndécú nchaa nduu nchaa quíú, te chitu núú ndáhǎ tàxi-gǎ nchaa sá xini ñùhu-o, chi cuini-gǎ sá ío cuu váha iní-ó cùndecu-o. ¹⁸ Te cáháⁿ tucu-n dǎho-yu sá ná cadá-yu mee-ni sǎ váha, te cuendá nchaa sá váha cadá-yu-áⁿ te cúú-yu ìⁿ ñáyiú cuica sǎ cúú-xí Yá Ndióxi, te na cùndecu túha-yu chindèe-yu cue ñáyiú ndáhú cuañáhǎ-yu sá xini ñùhú-yu. ¹⁹ Te núu ducaⁿ na cadá-yu te Yá Ndióxi cuañaha-gǎ sá ndúú tǎhú-yu na sàá nduu, te ngùndecu váha-yu ndíhi-gǎ ní caa ní quíhíⁿ.

Tnúhu ndéé núú ní ndíhi-ná

²⁰ Te yòhó té Timùtéú càháⁿ-í dóho-n sǎ ío cada cuendá-n vá dǎma tñùhu ní taxi Yá Ndióxi danèhé-n ñáyiú, te vá cadá cuendá-n nchaa cuendú cuèhé cuendú duha ío ñuyúú-a chi ñá túú nàndíhi-xi, te ní vá cadá cuendá-n nchaa tñùhu xitnaha ñáyiú càchí sá xicá naha tñùhu cue téé túha chi ñá díú ìⁿ tñùhu ndáá cúú-xí. ²¹ Te ío ñáyiú ñá túú-gǎ sàndáá iní-yu tñùhu Yá Ndióxi, chi ní quide cuendá-yu nchaa tñùhu xica naha ñáyiú-áⁿ.

Te Yá Ndióxi ná chindee chitúú ñaha-gǎ xii-n. Te ducaⁿ na cùnduu. Te ío cada ndee iní-nǎ vitna.

TUTÚ CÚÚ ÒÚ NÍ CADÚHA
TÉ PÄBLÚ QUÍHÍⁿ NDAHA TÉ
TIMÛTEÚ

Té PÄblú cádüha-dé tutú quíhíⁿ ndaha té Timùteú

¹ Yúhú té PÄblú ní tendaha ñaha Yá Ndiòxí càháⁿ-í tnúhu Xítohó Jesucrístú núú ñäyiu, chi ducaⁿ ní cachí Yá Ndiòxí cunduu. Te càháⁿ-í dàtná ní cachí Yá Ndiòxí sá ncháá nchò ñäyiu ndècu ndihí Xítohó Jesucrístú naníhí tàhú-ó. ² Te yúhú té PÄblú cádüha-í tutú-a daquixi-í ndaha yòhó té Timùteú chi ío cùu iní ñáhà-í xii-n, te diu-í ní sanu ichi ñaha-í xii-n ichi Xítohó Jesucrístú, te xicáⁿ táhù-í núú Dütú Ndiòxí ndihí núú Xítohó Jesucrístú sá ío na chindee chitúu ñaha-gá xii-n, te cundàhú iní ñáhà-gá, te ducaⁿ ndí nduú-gá ná cádá te ío váha cuu iní-n cùndecu-n.

Cáháⁿ váha-o cuèndá Xítohó Jesucrístú

³ Te cuèi nduu cuèi níu ducaⁿ-ni càháⁿ ndihí-í Yá Ndiòxí cuèndá-n, te ndácáⁿ táhù-í núú-gá, te xínu cuechi-í núú-gá dàtná ní quide cue ñaní tnáhà-í ní xín-decu ndéé sanduu, te cùtnuní iní-í sá quidé ndáá-í núú-gá dàtná ní xóo cada-güedé. ⁴ Te ío sàni iní-í naníhí tnáhà-ó cuèndá ío cùúhí iní-í, chi ndàcu iní-í sá ío ní ndàhyú-n sá ndihú iní-n cùtnáhà ní quide ndee iní-í tnáhà-ó. ⁵ Te ñaha-í sá sàndáá ndisa iní-n Yá Ndiòxí dàtná ní ngúita díhna-gá xítná-n tã Lòidá ndihí náná-n tã Eùnicé quidé-yu, te cùtnuní ndáá iní-í sá díú tnáhà-n ío váha sàndáá iní-n-gá.

⁶ Te xíãⁿ dándàcu iní ñáhà-í xii-n cuèndá sá ío-gá nducu ndèe-n cada-n chiuⁿ ní nduu táhù-n núú Yá Ndiòxí cada-n, chi ní taxi-gá tnúhu ndee iní ní ngúndecu ndihí-n cùtnáhà ní sacáⁿ ndodo-í ndaha-í díquí-n sá díú chiuⁿ-gá cada-n. ⁷ Te Espíritú sá ní taxi Yá Ndiòxí ndécú ndihí-o ñá túú cùu-xi ìⁿ Espíritú sá cádá nàcuáa yùhú-ó, chi cùu-xi ìⁿ Espíritú sá táxí tnúhu ndee iní cada-o chiuⁿ-gá, te diu-xi quide cuu iní tnáhà-ó ìⁿ ìⁿ-o, te diu-ni tucu-xi quide cùtnuní iní-ó nàcuáa cada-o cùndecu-o. ⁸ Te xíãⁿ núu vá cùcàhaⁿ núú-n càháⁿ váha-n cuèndá Xítohó Jesucrístú, te ni vã cùcàhaⁿ núú-n sá dúhá yíhí-í vecaá sá cuèndá-gá,

te xini ñuhu-xi sá tnáhà-n ndòho-n sá cuèndá tnúhu-gá, te cundee iní-n ndòho-n, chi Yá Ndiòxí chindee ñaha-gá xii-n. ⁹ Te Yá Ndiòxí ní dácäcu nihnu ñaha-gá xii-o núú ùhú núú ndàhú, te ní cachí-gá sá cádá-ó ncháa nacuáa cùiní méé-gá cunduu, te ducaⁿ ní quide-gá chi ducaⁿ ní sani iní méé-gá cunduu sá cádá váha ñaha-gá xii-o, te ñá díú sá ío váha quide-o ndecu-o ducaⁿ ní quide-gá. Te ndéé cùtnáhà vátá ngáva-gá ñuyúú ní cachí-gá sá cádá váha ñaha-gá xii nchaa nchoo ñäyiu ní ngúndecu ndihí Xítohó Jesucrístú vitna. ¹⁰ Te vitna cùtnuní iní-ó sá ío váha quide ñaha-gá xii-o, chi ní quixi Xítohó Jesucrístú ñuyúú-a ní dácäcu nihnu ñaha-gá xii-o núú ùhú núú ndàhú, te Yaá-áⁿ ní quide-gá cuèndá sá vã cùú-gá-ó cùú dúcáⁿ-ó, chi ní cachí-gá sá cùndecu-o ní caa ní quíhíⁿ te núu na quíndáá iní-ó tnúhu-gá.

¹¹ Te ní cachí-gá sá càháⁿ-í tnúhu-gá núú ñäyiu ñá túú cùu ñäyiu isràèl te dacuàha váha-í-yu tnúhu-gá, te cuèi ndèni ní cuu ndècu-yu te quíhíⁿ-í càháⁿ-í tnúhu-gá núu-yu chi ducaⁿ ní cachí-gá cunduu. ¹² Te cuèndá xíãⁿ nándi sá ndòhò-í vitna cuèndá-gá, dico ñá túú cùcahaⁿ núú-í chi cùtnuní váha iní-í nàcuáa sàni iní Xítohó Jesucrístú Yaá sàndáá iní-í, te yúhú ní dáñà-í méé-í núú ndáhà-gá, te cùtnuní ndáá iní-í sá cótó ñaha-gá xii-í ndéé ná sàá nduu nàcuaca ñaha-gá.

¹³ Te vá dáñá ndèe-n càda-n nchaa nacuáa càháⁿ tnúhu váha ní dánèhè ñáhà-í xii-n, te ío quíndáá iní-n Yá Ndiòxí, te nchaa-o nàcuáa ndècu-o ndihí Xítohó Jesucrístú ío cuu iní tnáhà-ó ìⁿ ìⁿ-o. ¹⁴ Te cada cuèndá váha-n sá vã dãmã tnúhu Yá Ndiòxí sá ní taxi-gá ndécú ndihí-n, te Espíritú-gá sá ní taxi-gá ndécú ndihí-o chindee ñaha-xi xii-n.

¹⁵ Te yòhó sa xini-n sá ncháa ñäyiu ndècu distritú Asiá, ñäyiu ní sàndáá iní tnúhu Xítohó Jesucrístú ní dáñá ñáhà-yu xii-í, te tnáhà té Figeló ndihí té Hèrmógenés ní dáñá ñaha-güedé xii-í. ¹⁶ Te xicáⁿ táhù-í núú Xítohó Jesucrístú sá ná chindee-gá cue ñäyiu cùu ndi mee té Onèsíforó, chi diu-dé ío vãi xito ní quixi-dé ní quide cuèndá ñáhà-dè xii-í, te ní taxi-dé tnúhu ndee iní, te ñá túú ní cùcahaⁿ núú-dè sá yíhí-í vecaá. ¹⁷ Te cùtnáhà ní xín-decu-dé ñuú Ròmá

ducaⁿ-ni ní xóo nanducu ñàha-dé xii-í ndèé ndéé naníhí ñàhá-dè. ¹⁸Te xicáⁿ táhú tùcu-í núú Xítohó Jesucristú sá ná cundahú iní ñàhá-gá xii-dé nduu na sáa cundáa cuèchi nchaa ñáyi. Te yòhó sa xini ndáá-n sá ïo ní chindee ñàha-dé xii-o cùtnàhá ní xín-decu-o ñùú Èfésú.

2

Tée quide ndáá xínú cuèchi núú Xítohó Jesucristú

¹ Te yòhó tée cùu datná ìⁿ déhe mee-í ío nducu ndèe-n cada-n nacuaa níhí ndéé-gá-n cundecu-n ichi Xítohó Jesucristú chi diu-gá chindee ñàha-gá xii-n. ² Te nchaa tnúhu sá ní dánèhé ñàhá-í xii-n ndíhi nchaa dava-gá ñáyi, xiáⁿ danèhé-n dàva-gá cue tée quide ndáá cuendá danèhé-güedé dava-gá ñáyi.

³ Te cahni iní-n ndòho-n cunu cuechi-n núú Xítohó Jesucristú datná cuiní-n ndòho ìⁿ sandadú sàhni iní-dé xínú cuèchi-dé. ⁴ Chi ni ìⁿ sandadú ñá túú nǎgá sání iní-dé cada-dé òrè xínú cuèchi-dé cuendá cudíu-dé núú tée tàxi tnuní ñàhá. ⁵ Te diu-ni ducaⁿ sàtnahá-xi cùu tucu ìⁿ tée dàdiqui, chi núu vá dádiqú-dé nàcuáa tàú-xi cunduu te vá níhí-dé sá ndúú táhú-dè. ⁶ Te núú ìⁿ tée xinu cuechi ío nducu ndee-dé quidé chi^u-dé chíhí-dè tatá, te diu-dé tàú-dé díhna-gá-dé níhí-dè sá cùhúⁿ yáhu-dé. ⁷ Te cani iní-n nchaa tnúhu càháⁿ-í-a, te Xítohó Jesucristú chindee ñàha-gá xii-n te tecú tnuní-n nchaa.

⁸ Te ndacu iní-n sá Xítohó Jesucristú ní cuu-gá ñani tnáhá ndíi Dàvií, te ní xíhí-gá te ní ndoto-gá, te diu ducaⁿ nduu tnúhu dànehé-í ñáyi. ⁹ Te ío dandoho ñaha ñáyi xii-í cuendá sá càháⁿ-í tnúhu-gá, te quide ñàhá-yu xii-í datná quidé-yu ìⁿ tée ní quide ìⁿ cuèchi càhnu, chi ní chíhi ñàhá-yu vecaá xii-í, dico tnúhu Yá Ndiòxí chi vá ndácú-yu nganí-yu. ¹⁰ Te xiáⁿ núu cuèi nándi cùu nchaa sá quidé ñàhá-yu xii-í, dico quide cahnu iní-í cuendá sá nánihí táhú tnàhá nchaa dava-gá ñáyi cuiní Yá Ndiòxí cundecu ndíhi-gá, chi nchaa ñáyi na tnàhá tnúhu ndíhi Xítohó Jesucristú nduu táhú-yu cundecú-yu ndíhi-gá núú ïo váha càa ndecu-gá ní caa ní quíhíⁿ.

¹¹ Te xéhe cúú-xí ìⁿ tnúhu ndáá cuiti:

Nchoo cùu-o datná ñáyi ní xíhí ndíhi Xítohó Jesucristú chi ñá túú-gá ndécú-ó ichi cuèhé ichi duha, te xiáⁿ núu cuèi na sáa nduu cùú-ó ñùyú-a, dico diu-ni cundecu-o ndíhi-gá.

¹² Te núu na cundee iní-ó ndòho-o nándi sá ndóhó-ó sá cuendá-gá, te sáa nduu te cunuu-o ndíhi-gá.

Te núu na càháⁿ-ó sá ñá túú xini-ó-gá, te diu-ni ducaⁿ cùñaha-gá xii-o sá ñá túú xini ñàhá-gá ná sáa nduu càa ndáá-gá cuèchi nchaa ñáyi.

¹³ Te núu nchoo ñá túú quide ndáá-ó ndècu-o núú-gá ñá, dico mee-gá chi ío ndáá quidé-gá,

chi Yá Ndiòxí nchaa sá sání iní-gá quidé-gá.

Tée quide nacuaa nduu vétú iní Yá Ndiòxí

¹⁴ Te dandacu iní-n nchaa ñáyi ndècu ndíhi-o ichi Xítohó Jesucristú nchaa tnúhu càháⁿ-í-a, te cùñaha-n xii-yu sá Xítohó Jesucristú cuiní-gá sá ñá túú-gá nándi tnúhu cùtnàhá-yu, chi nchaa tnúhu càháⁿ-yu-áⁿ dácúita nihnu-xi ñáyi ndèdóho ñaha xii-yu, chi ñá túú védana nándíhi nchaa tnúhu-áⁿ. ¹⁵ Te ío nducu ndèe-n cada ndáá-n cundecu-n núú Yá Ndiòxí, te cada-n chi^u-gá nàcuáa nduu vétú iní-gá, te càháⁿ ndáá-n tnúhu-gá, cuendá sá vá cùcàhaⁿ núú-n núú-gá. ¹⁶ Te vá càdá cuendá-n nchaa tnúhu sá ñá túú védana nándíhi càháⁿ ñáyi cuendá Yá Ndiòxí, chi nchaa ñáyi càháⁿ tnúhu-áⁿ ndíhi nchaa ñáyi sàcundèdóho ñaha xii-yu uuⁿ-gá quidé-yu nchaa sá cuèhé sá dúhá. ¹⁷ Te nchaa tnúhu-áⁿ cùténuu-xi datná quidé ìⁿ cuèhé sá ñáni ñaha xii ñáyi xité nuu-xi níhí yiqui cùñú-yu. Te tnàhá té Himènéu ndíhi té Filetú càháⁿ-güedé tnúhu-áⁿ quidé-güedé datná quidé ñáyi-áⁿ. ¹⁸ Te cue tée-áⁿ ñá túú-gá càháⁿ ndáá-güedé datná càháⁿ tnúhu Yá Ndiòxí, chi càhí-güedé sá nchaa ndòho ñáyi ndècu ichi Yá Ndiòxí cúú-ó datná cue ñáyi sa ní ndoto, dico na cùú ndisa-o te vá ndótó-gá-ó càhí-güedé. Te dava ñáyi ní dáñá-yu sá sandáá iní-yu tnúhu Yá Ndiòxí sá dúcáⁿ càháⁿ-güedé. ¹⁹ Te cuèi ducaⁿ quide davá-yu, dico Yá Ndiòxí ní taxi ndecu-gá cue ñáyi ní yùhu ní iní ndécú ichi-gá, te cùtnuní sá ndécú ndíhi ñaha-gá xii-yu, chi ìⁿ xichi núú tùtú-gá càhí-xi sá méé-gá xini-gá cue ñáyi cùu

cuendá-gá. Te ingá tucu xichi núú tütú-gá cächí-xi sá ncháá ñáyiú sàndáá iní ñáhá xii Xítóhó Jesucristú xini ñùhu-xi sá vâ cundècu-gá-yu ichi cuèhé ichi duha.

²⁰ Te ñáyiú cuica chi ndècu ndihí-yu vehé-yu cóhó sã ní cuáha mee-ni ðíhúⁿ cuááⁿ, ndihí cóhó sã ní cuáha mee-ni ðíhúⁿ cuixíⁿ, te nchaa cóhó-ãⁿ cúú-xí dàtná cue ñáyiú ñá túú ná cúmání núú Yá Ndiöxí. Te ndècu ndihí tucú-yu cóhó sã ní cuáha mee-ni ñùhu, ndihí cóhó sã ní cuáha mee-ni yùtnu, te nchaa cóhó-ãⁿ cúú-xí dàtná cue ñáyiú ñá túú quide ndáá núú Yá Ndiöxí. ²¹ Te nchaa ñáyiú ío ndècu yíñuhu núú Yá Ndiöxí cúú-yu ñáyiú ñá túú nihí tnáhá ndihí cue ñáyiú ñá túú quide ndáá núú-gã, te cue ñáyiú ndècu yíñuhu núú-gã-áⁿ ñá túú tnáhí quée cáva-yu quidé-yu nchaa chiúⁿ tahu-gá.

²² Te ío cada cuendá-n vâ cádá-n nàcuáa quide cue tée cuechi ndècu ichi cuehé ichi duha, te cada-n nàcuáa cundáá-n cundècu-n ichi Yá Ndiöxí, te quindáá iní-n-gã, te cuu iní-n ncháa tnaha ñáyiú-n, te cundècu nahi-n, chi ducaⁿ tau-xi cada-n ndihí nchaa dava-gá ñáyiú sa ní nduu ndoo ní nduu nine iní-xi ñáyiú cãháⁿ ndihí ñaha xii Yá Ndiöxí. ²³ Te vâ cádá cuendá-n ni ñⁿ tnúhu xitnaha ñáyiú chi ñá túú vèdana nandíhi-xi, chi núu na càda cuendá-ó te dicó dánáá ñáhá-xí. ²⁴ Chi nchaa cue tée xinu cuechi núú Yá Ndiöxí xini ñùhu-xi cãháⁿ váha-güedé ndihí nchaa ñáyiú, te danèhé ñáhá váha-güedé tnúhu-gá, te cunduu càhnu iní-güedé te vâ nàá-güedé. ²⁵ Te vii vii cãháⁿ-güedé dóho nchaa ñáyiú sáá iní-xi, ñáyiú ñá túú tnáhá iní tnúhu ndáá tnúhu Yá Ndiöxí, te ducaⁿ te cudana Yá Ndiöxí cada-gá te ndixi túu iní-yu sá ñá túú quide váha-yu ndècú-yu te quindáá iní-yu tnúhu-gá. ²⁶ Te ducaⁿ te cutnùní iní-yu sá sàcuífná cùnùu-xi taxi tnuní ñáhá-xí xii-yu, chi dàcahu iní ñáhá-xí xii-yu quidé-yu nchaa nàcuáa cùu iní-xi ni cùu.

3

Nàcuáa cada ñáyiú òré sa ta cùyatni sáa nduu quixi tucu Xítóhó Jesucristú

¹ Te cächí tnúhu-í xii-n cuendá cunaha-n nàcuáa cada-xi òré sa ta cùyatni sáa nduu quixi tucu Xítóhó Jesucristú, chi dàvá-áⁿ ío cada úhú-xi. ² Chi ngúita ñáyiú cuhuⁿ iní-yu

mee-ni sã cúú-xí mèè-yu, te cuhuⁿ iní-yu mee-ni ðíhúⁿ, te ío cada càhnu-yu mèè-yu, te cunduu yíchí iní-yu, te cáháⁿ cuèhé-yu cuendá Yá Ndiöxí, te vâ quindáá-gá iní-yu ni tãtä-yu ni nãñá-yu, te ni vâ ndacáⁿ táhú núú tnáhá-yu cuendá nchaa sá váha cada tnáhá-yu, te cada-yu mee-ni sã ñá túú tnáhá iní Yá Ndiöxí. ³ Te vâ cúú iní tnáhá ndi meé-yu, te nàá-yu te vâ cuanáá-yu, te tee tnáhá-yu cuéchi neñúú, te vâ cuanáá-yu cada-yu nchaa sá cuèhé sá dúhá sàni iní-yu, te ío cunduu cuihna iní-yu, te vâ tnáhá iní-yu nchaa sá váha. ⁴ Te dayuhu cuáha cuendá tnáhá-yu núú cuè téé cùchiuⁿ, te ío cunduu yii iní-yu cada-yu nándi sá ñá túú váha, te ío cada nínu-yu mèè-yu, te mee-ni ncháa sá cúúⁿ iní-yu cada-yu, te vâ cúúⁿ iní-yu nanducu nihnú-yu Yá Ndiöxí. ⁵ Te quesáhá-yu sá tnáhá-yu ndècú-yu ichi Yá Ndiöxí dico vâ cádá-yu nchaa nàcuáa cãháⁿ-gá.

Te yúhú cächí tnúhu-í xii-n sã vâ nihí tnáhá-n ndihí nchaa ñáyiú ducaⁿ quide. ⁶ Te dava ñáyiú-áⁿ quihíⁿ-yu dava vehé núú xindecu ñáyiú, te ngúita-yu dandáhú-yu ñáyiú ðihí ñá túú xini dana cuendá Yá Ndiöxí, te ñáyiú ðihí-áⁿ cúú-yu ñáyiú ndècu vihi cuechi-xi, chi ío cùdíⁿ iní-yu quidé-yu nchaa nání sá cuèhé sá dúhá sàni iní-yu. ⁷ Te cuéi ío dàcuahá-yu, dico ñá túú cùtnuní iní-yu nása cuáháⁿ tnúhu ndáá tnúhu Yá Ndiöxí. ⁸ Te ñáyiú ducaⁿ dandahú ñáhá xii cue ñáyiú ðihí-áⁿ ñá túú cãháⁿ váha-yu cuendá tnúhu Yá Ndiöxí, chi quidé-yu dàtná ní quide ndíi Jánés ndihí ndíi Jámbrés chi cue ndíi-áⁿ ñá túú ní cùu váha iní cue ndíi núú ndíi Moisés cuendá tnúhu ní cãháⁿ ndíi. Te ñáyiú-áⁿ cúú-yu ñáyiú sàni iní mee ñine-ni nchaa sá cuèhé sá dúhá, te cuéi cächí-yu sá sàndáá iní-yu Yá Ndiöxí dico ñá ndáá sá sàndáá iní ñáhá-yu xii-gá. ⁹ Dico vâ ndácú-gã-yu dandáhú-yu vâi ñáyiú, chi nchaa ñáyiú cutnùní iní-yu sá ío nii ðiquíⁿ-yu, te ñá túú cãháⁿ ndáá-yu dàtná ní quide cue téé úú ñá túú ní tnáhá iní tnúhu ní cãháⁿ ndíi Moisés.

Té Páblú dásahú-dé té Timùteú

¹⁰ Te yòhó quidé-n ncháa nàcuáa ní danèhé ñáhá-í xii-n, te ní xini-n ncháa nàcuáa quide-í ndècú-í, te cùtnuní iní-n nàcuáa sàni iní-í ndècú-í ñuyúⁿ-a, te xini-n

sã ïo sândáá iní-í Yã Ndiõxí, te ïo cahnu iní-í, te cùu iní-í nchaa ñáyiù, te xini tucu-n sã ïo quide cahnu iní-í cuèi nándi sã yãha-í ndécù-í dico ñá túú ðaña ndeé-í ichi-gá. ¹¹Te ïo vai sã quidé ñaha ñáyiù xii-í dándòho ñahá-yu sã ndécù-í ichi Xítoho Jesucristú, te sa ñaha tucu-n datná ní quide ñahá-yu xii-í cùtnhá ní xindecu-í ñúu Antiòquiá, ndihi ñúu Ìconiú, ndihi ñúu Listrá, chi ïo ní dándóho ñahá-yu xii-í sã cuendá-gá. Dico Xítoho Jesucristú ïo ní xito ñaha-gá xii-í te ní chindee ñaha-gá cuèi nándi cùu sã ñí yãha-í. ¹²Te na cächí tnúhu ndáá-í xii-n sã ïo vai sã ñà túú vãha cada ñaha ñáyiù xii nchaa ñáyiù cuini sã ñà túú ñà cumání ñúu Yã Ndiõxí cuendá sã ndécú ndihi-yu Xítoho Jesucristú. ¹³Dico dava ñáyiù cächí-yu sã cãháⁿ-yu tnúhu Yá Ndiõxí te ñà ndáá sã cãháⁿ-yu tnúhu-gá, ñáyiù-áⁿ uuⁿ-gá cuita cada-gá-yu nchaa sã cuèhé sã dúhá quíhíⁿ, te ducaⁿ-ni ïo dandáhú tnáhá-yu.

¹⁴Te yòhó chi ïo vãha ní sândáá iní-n tnúhu Yá Ndiõxí sã dácuaⁿ-n, te vitna cãháⁿ-í dóho-n sã vã ðaná ndeé-n quindáá iní-n tnúhu-áⁿ, te yòhó sa ñaha-n ná cúú ñáyiù ní dánèhé ñahá xii-n tnúhu-gá. ¹⁵Te yòhó chi ndéé cùtnhá cúú lándú-n ní nguíta-n dácuaⁿ-n tnúhu ndeé núu tütú Yá Ndiõxí, te ðiu-ni nchaa tnúhu-gá canu ichi ñaha-xi xii-n te naníhí tãhú-n, chi sândáá iní-n Xítoho Jesucristú. ¹⁶Te nchaa cue téé ní tee tnúhu Yá Ndiõxí, chi ðiu-ni mee-gã ní dácáhú iní ñahá-gá xii-güedé ñacuáa tee-güedé, te tnúhu-gá ïo vãha dácuaⁿ-o nchaa dava-gá ñáyiù, te cãháⁿ-xi dóho-o sã vã cündecu-gá-ó ìchi cuehé ichi duha, te núu ñá túú quide ndáá-ó ndècu-o te ñàcanu ichi ñaha-xi, te ðanehé ñahá-xi ñacuáa cada-o cündáá-ó núu Yá Ndiõxí. ¹⁷Te ðiu-ni tnúhu-gá dátúha ñaha vãha-xi xii nchoo cuè ñáyiù ndècu ndihi-gá cuendá cada-o nchaa núu sã vãha.

4

¹Te Xítoho Jesucristú quixi-gá taxi tnùn-í-gá ñuyú-a, te cada ndáá-gá cuèchi nchaa ñáyiù sa ní xihí, ndihi cuèchi nchaa ñáyiù xindecu vívü. Te mee-gã ndihi Yá Ndiõxí ñahá-gá sã ïo cãháⁿ-í dóho-n vitna ²sã ïo dácuaⁿ-n ñáyiù tnúhu-gá, te vã ðaná ndeé-n dácuaⁿ-n-yu ndèda-ni cãa oré cuèi ñá túú cuini-yu cundedóho-yu, te nchaa ñáyiù ñá túú cuini cada ndáá cúnaha

ndáá-n nchaa nacuaá quidé-yu. Te cúnaha tucu-n xi-yu sã vã dúcáⁿ-gã cadá-yu, te cãháⁿ-n dóho-yu cuendá cada ndáá-yu cundecú-yu. Te ïo cunduu cahnu iní-n òré cãháⁿ-n dóho-yu, te ïo dácuaⁿ-n-yu tnúhu-gá. ³Chi sáá nduu te vã cächí-gá-yu cundedóho-yu nchaa tnúhu sã sánú ìchi ñaha cundecu vãha-o núu Yã Ndiõxí, chi mee-ñà nchaa sã cúhí iní meè-yu cundedóho-yu, te nducú-yu cue téé danèhé ñahá xii-yu nchaa tnúhu cùu iní-yu-áⁿ. ⁴Te vã cadá cuendá tnáhí-gá-yu tnúhu ndáá tnúhu Yá Ndiõxí, chi mee-ñà tnúhu sã ñà túú nándíhi cada cuendá-yu. ⁵Dico yòhó ïo quíhi iní-n cundecu-n, te cahni iní-n cuèi nándi na ndòho-n, te dácuaⁿ-ni-n ñáyiù tnúhu Yá Ndiõxí, ñáyiù vátá quindáá iní ñahá-gá xii-gá, te cada-ni-n nchaa chiuⁿ ní táhú-gá cada-n.

⁶Te yúhú sa ñúhu ichi-ná-í quíhíⁿ-í núu ndécú Yá Ndiõxí cundecu-í, chi sa ní cuy-atni cahni ñaha-güedé xii-í cuendá sã xínú cuèchi-í núu-gá. ⁷Te ní quide-í nchaa chiuⁿ ní táhú Yá Ndiõxí cada-í te vitna ní xínu cava nchaa chiuⁿ ní táhú-gá-áⁿ ní quide-í, te ñá túú ní ðaña ndeé-í ní sândáá iní-í-gá, te ducaⁿ-ni sândáá iní-í-gá ndeé vitna. ⁸Te vitna sa ndècu túha-ná sã ndúú tãhú-í cuendá sã quidé ndáá-í núu Yá Ndiõxí, te Xítoho Jesucristú taxi-gá tãhú-áⁿ nduu tãhú-í ná sáá nduu, chi cùu-gá ñⁿ Yaá quidé ndáá cuiti, te ñá ðíú-ní yúhú taxi-gá tãhú-áⁿ cuu cuendá-í, chi tnáhá nchaa ñáyiù ndètu cahnu-ná sáá nduu quixi tucu-gá ñuyú-a cuánaha-gá tãhú-áⁿ nduu tãhú-yu.

Chiuⁿ tahu té Pãblú cada té Timùteú

⁹Te cuini-í sã ïo ndíhi quixi-n quixi coto ñaha-n xii-í. ¹⁰Chi té Dèmas ñá túú-gá quidé cuendá ñahá-dè xii-í, chi mee-ñà nchaa sã ïo ñuyú-a ïo cùdí iní-dé. Te ní dándòho ñaha-dè cuáháⁿ-dé ñúu Tesalónica, te té Crèscènté cuáháⁿ-dé cundecu-dé distritú Gàlaciá, te té Titú cuáháⁿ-dé cundecu-dé distritú Dãlmaciá. ¹¹Te ñⁿdi-ná té Lùcá ndécú ndíhi ñaha-dé xii-í, te cúnaha-n xii té Mãcú quixi-n ndíhi-dé, chi téé-áⁿ ndacu-dé cada-dé ñⁿ chiuⁿ-í. ¹²Te té Tiquicú ní tendaha-í-dé cuáháⁿ-dé ñúu Èfesú. ¹³Te òré quixi-n te yãha-n vehe té Cãrpú cáá núu Tròás caneⁿ-n ñⁿ dóó tìcachi ní dándò-í vehe-dé quixi, ndíhi nchaa librí-í, te tnáhá nchaa dava-gá tutú-í ndécú vehe-dé

canehe-n quixi chi xíáⁿ ío-gá xíní ñùhu-í.

¹⁴ Te té Ljandrú tée cùu rerú ío vai sá ñà túú vâha ní cuu quide ñaha-dé xii-í, dico mee Yă Ndiôxí náhá-gă nása cada ñaha-gă xii-dé cuendá sá dúcáⁿ quide-dé. ¹⁵ Te vá nihí tnáhá-n ndihi-dé chi ío cãháⁿ cuèhé-dé cuendá nchaa tnúhu cãháⁿ-ó.

¹⁶ Te cútnáhá ndécá ñaha-güedé xii-í ní sáháⁿ núú cuè tée cùchiuⁿ xito díhna nuu, chi mee ðii ní sáháⁿ te ñá túú ní sáháⁿ ni ñⁿ cue tée cùndihi-í, chi nchaa-güedé ní dándöo ñaha-güedé xii-í, te yúhú xicáⁿ táhù-í núú Yă Ndiôxí sá vâ cadá cuendá-gá sá dúcáⁿ ñí quide-güedé. ¹⁷ Dico Xítohó Jesucristú ní chindee ñaha-gá xii-í, chi ní taxi-gá tnúhu ndee iní ní cãháⁿ-í tnúhu-gá nàcuáa tàú-xi cunduu núú cuè tée-áⁿ ndihi núú nchaa ñáyiú, dico ñá díú ñáyiú isráel cúu-yu, te ðiu-gá ní dácäcu nihnu ñaha-gă xii-í ñá túú ní sãhni ñaha-güedé. ¹⁸ Te mee Xítohó Jesucristú coto ñaha-gá xii-í te ñá túú nă cuu cuèi nándi sá ná cadá ñaha ñáyiú xii-í te ðiu-ni-gá coto ñaha-gă xii-í ndéé ná sáá nduu sáá-í andiu núú ndécú-gă táxi tnúni-gá. Te nchaa-o chí ná cãchí-ó sã ïo cãhnu cuu-gá ni caa ni quíhíⁿ. Te ducaⁿ na cùnduu.

Tnúhu ndéé núú ní ndihi-ná

¹⁹ Te ío cúñaha-n na cada ndee iní tá Priscá, ndihi té Àquilú, ndihi cue ñáyiú cùu ndi mee té Onèsíforó. ²⁰ Te té Èrastú ní quendöo-dé ñuu Còrintú, te té Tröfímú ní dándöo-í-dé ñuu Miletú chi cùhú-dé. ²¹ Te ío cundihí iní-n quixi-n oré vátá sáá-gá yóó quidé vïxiⁿ-xi. Te ío cada ndee iní-n cãchí té Èubulú, ndihi té Pùdenté, ndihi té Línú, ndihi tá Claudiá, ndihi nchaa dava-gá ñáyiú sãndáá iní tnúhu Xítohó Jesucristú.

²² Te xicáⁿ táhù-í núú Xítohó Jesucristú sá ná cùndecu ndihi ñaha-gá xii-n ndihi nchaa dava-gá-yu. Te ducaⁿ ïo na chindee chitúu ñaha-gá xii-ndo nchaa-ndo. Te ducaⁿ na cùnduu. Te ío chí cadá ndèe iní-nă vitna.

TUTÚ NÍ CADÚHA TÉ PÄBLÚ QUÍHÍⁿ NDAHA TÉ TÌTÚ

Té Pàblú cádùha-dé tutú quíhíⁿ ndaha té Títú

¹ Yúhú té Pàblú xínú cuèchi-í núú Yá Ndióxi, te diu-gá ní tendaha ñaha-gá xii-í cáháⁿ-í tnúhu Xítohó Jesucristú núú ñáyiú cuèndá quindáá iní nchaa ñáyiú ní cachí Yá Ndióxi naníhí tǎhú, ndihí cuèndá sá tècú tnùní váha-yu tnúhu-gá, te ñáyiú na quindáá iní tnúhu-gá cada ndáá-yu cundécú-yu ichi-gá. ² Te yúhú dácùaha-í-yu tnúhu-gá cuèndá cundecu ndihí-yu tnúhu ndee iní sá cundècu ndihí-yu Yá Ndióxi ní caa ní quíhíⁿ, chi ndéé cúnáhá vátá ngáva-gá ñuyíú-a ní cachí-gá sá cundècu ndihí ñaha-gá xii-yu, te ñá túú dándahú ñáhá-gǎ, chi quide-gá ìⁿ sá cáháⁿ-gá. ³ Te ní sáá nduu ní cachí-gá sá nihí-yu tnúhu nàcuáa cuáháⁿ tnúhu-gá, te diu-ni tnúhu-áⁿ ní cachí Yá Ndióxi Yáá dácácu nihnu ñaha xii-o núú ùhú núú ndáhú sá dácùaha-í ñáyiú. ⁴ Te tutú-a cádùha-í cuèndá daquixi-í ndaha yòhó té Títú, téé ní sanu ichi ndisa-í ichi Xítohó Jesucristú, chi ìⁿ-ni tnúhu sàndáá iní-ó. Te xicáⁿ tǎhú-í núú Tǎtá-ó Dütú Ndióxi sá ío na chindee chítúú ñaha-gá xii-n, te diu-ní-gá ná cada te ío váha cuu iní-n cundecu-n. Te xicáⁿ tǎhú tucu-í núú Xítohó Jesucristú Yáá dácácu njhnu ñaha xii-o núú ùhú núú ndáhú sá díú-ní dùcaⁿ na cada ñaha-gá xii-n.

Chiuⁿ quide té Títú distritú Crétá

⁵ Te yúhú ní dándö ñaha-í xii-n distritú Crétá, chi cuíní-í cada-n nchaa chiuⁿ cumání, te cuíní-í taxi ndecu-n cuè téé quindaha ñaha xii cue ñáyiú sàndáá iní tnúhu Yá Ndióxi xíndecu ìⁿ ìⁿ nuú yíndèhu distritú-áⁿ, te cada-n nàcuáa ní cachí-í cada-n. ⁶ Te cue téé cada chiúⁿ-áⁿ xíní ñuhu-xi cuu-güedé mee-ni cuè téé ío váha quide ndáá nàcuáa vá yòo cáháⁿ dóho-güedé, te na cùu-güedé cue téé ndècu ìⁿ dii-ni ñadihí-xi. Te ducaⁿ nchaa landú-güedé ná cùu-güexi landú sàndáá iní ñáhá xii Yá Ndióxi cuèndá sá vǎ yòo cuatnuñàha xii-güexi quesahá-yu sá ío sáá iní-güexi te quide-güexi nándi sá ñá túú tǎú-güexi cada-güexi. ⁷ Chi xini ñuhu-xi

sá ncháá cuè téé quindaha ñàha xii ñáyiú sàndáá iní tnúhu Yá Ndióxi ío cundecu yíñuhu-güedé, chi ducaⁿ tǎú-xi cada nchaa cue téé quide chiuⁿ Yá Ndióxi, te xini ñuhu tucu-xi sá vǎ cùu-güedé cue téé ñíí iní-xi, te ni vǎ cùu-güedé cue téé lihli iní-xi, te ni vǎ cùu-güedé cue téé quihu, te ni vǎ cùu-güedé cue téé plètú, te ni vǎ cùu-güedé cue téé dicó-ni ducaⁿ níhí díhúⁿ. ⁸ Te xini ñuhu-xi cuu-güedé cue téé sǎnaha núu vehe ndetátú cue ñáyiú ñuhu ichi, cue téé quide váha sá cùu-xí tnàha ñáyiú-xi, cue téé ío váha cùnuni iní-xi nàcuáa cada cundecu ñuyíú-a, cue téé quide ndáá xíndecu, cue téé quide nchaa nacuáa nduu vétú iní Yá Ndióxi, cue téé áⁿ ndacu-güedé cáháⁿ-güedé dóho ñáyiú cuèndá cadǎ-yu nchaa nàcuáa cáháⁿ Yá Ndióxi, te níhí-güedé tnúhu cáháⁿ váha-güedé núú nchaa ñáyiú dàquee tǎhú tnúhu Yá Ndióxi, te mee-ni cuè téé ducaⁿ quide váha taxi ndecu-n quindaha-güedé ñáyiú sàndáá iní tnúhu-gá.

¹⁰ Te na cachí tnúhu-í xii-n sǎ váí ñáyiú sáá iní-xi ío, te cáháⁿ-yu mee-ni tnúhu sá ñá túú nándihí, te dándahú-yu tnàhá ñáyiú-yu, te ñáyiú isràél ío-gá vǎi-yu ducaⁿ xíquide. ¹¹ Te nchaa ñáyiú ducaⁿ xíquide xini ñuhu-xi nducu-o tnúhu cúñaha-o xii-yu cuèndá caí-yu yuhú-yu, chi dānehé-yu dava-gá ñáyiú ìⁿ sá ñá túú tǎú-yu dacuáhá-yu, te ducaⁿ quidé-yu cuèndá-ni sá nihí-yu díhúⁿ, te ío titní xichi ní cuu dándahú-yu nchaa ñáyiú xíndecu ìⁿ-ni vèhe.

¹² Te ní cachí ìⁿ téé ío váha sáá díquí-xi ndècu mei nuú distritú Crétá sá ncháá ñáyiú nuú-dé-áⁿ ío ndèhndé-yu, te ío cui-hna iní-yu, te ío vǎi xexí-yu, te cùhndú-yu.

¹³ Te ndáá ní cáháⁿ-dé chi ducaⁿ quidé-yu, te xǎⁿ ío cáháⁿ-n dóho-yu cuèndá sá ná quindáá váha iní-yu tnúhu Yá Ndióxi. ¹⁴ Te cúñaha-n xii-yu sá vǎ cadá cuèndá-yu nchaa tnúhu ndehnde cáháⁿ ñáyiú isràél, te ni vǎ cadá cuèndá-yu nchaa tnúhu cáháⁿ ñáyiú ñá túú cuíní quindáá iní tnúhu Yá Ndióxi.

¹⁵ Te nchaa sá ní cadúha Yá Ndióxi ío

ñuyú-a cùu-xi mee nine-ni sá vâha sá cúu-xí nchâa ñáyiú sa ní nduu ndoo ní nduu nine iní-xi ndècu ichi Yá Ndióxi. Dico nchaa sá ní cadúha-gá ñá túú cùu-xi sá vâha sá cúu-xí nchâa ñáyiú ndècu ichi cuehé ichi duha, chi ñá túú sàndáá iní-yu tnúhu-gá, chi mee-ni sá cuehé sá dúhá ñùhu iní-yu, te ñá túú quide cuendá-yu núu quide váha-yu àdi ñá túú quide váha-yu ndècú-yu. ¹⁰ Te cächí-yu sá sàndáá iní-yu Yá Ndióxi, dico nchaa sá quidé-yu-áⁿ cächí tnúní-xi sá ñá ndáá. Te Yá Ndióxi chi duuⁿ duuⁿ ñá túú tnàhá iní-gá nchaa nàcuáa quidé-yu, chi ío sáá iní-yu, te ñá túú quidé-yu ni ìⁿ sá vâha.

2

Tnúhu váha tnúhu Yá Ndióxi

¹ Te yohó òré danèhé-n ñáyiú, te danèhé-n-yu mee-ni nàcuáa cáháⁿ tnúhu váha tnúhu Yá Ndióxi. ² Te nchaa cue téé cùu sacuéhé ná cada cuendá-güedé vá cáda cùtexínu-güedé cundecu-güedé, te na cùndecu yíñuhu-güedé, te na cuâha váha-güedé cuendá nàcuáa cada-güedé cundecu-güedé, te na quindáá váha iní-güedé Yá Ndióxi, te na cùu iní-güedé tnàha ñáyiú-güedé, te na cùnduu cahnu iní-güedé cuéi nándi sá ná yâha-güedé. ³ Te vitna cáháⁿ tucu-í sá cúu-xí nchâa ñáyiú ñáyiú ñáyiú cùu sacuéhé sá ná cùndecu yíñuhú-yu, te vá cúú-yu ñáyiú yiti yùhu-xi, te ni vá cúú-yu ñáyiú quíhu, te na danèhé-yu nchaa dava-gá ñáyiú cada váha-yu. ⁴ Te na dàsahú-yu nchaa ñáyiú ñáyiú ñáyiú cuechi cuendá ná cùu iní-yu yí-yu, ndíhi cue landú-yu, ⁵ ndíhi cuendá sá ná càni váha iní-yu nàcuáa cundecú-yu, ndíhi cuendá sá vâ cáni iní-yu cadá-yu ni ìⁿ sá cuehé sá dúhá, ndíhi cuendá sá ná cadá-yu nchaa chiúⁿ ñuhu vehé-yu, ndíhi cuendá sá cáda váha-yu nchaa tnàha ñáyiú-yu, ndíhi cuendá sá ná cadá-yu nchaa nàcuáa cáháⁿ yí-yu, te ducaⁿ xini ñuhu-xi cadá-yu cuendá sá vâ yôo cáháⁿ cuehé cuendá tnúhu Yá Ndióxi. Duha cúñaha-n xii cue ñáyiú ñáyiú cùu sacuéhé cuendá ducaⁿ dàsahú-yu nchaa ñáyiú ñáyiú cuechi.

⁶ Te yohó cáháⁿ-n dôho nchaa cue téé cuechi cuendá sá ná càni váha iní-güedé nàcuáa cundecu-güedé, ⁷ te

cada-n mèe-ni sá vâha cuendá ducaⁿ cànchicúⁿ nihnu-güedé cada-güedé, te òré danèhé-n-güedé te ío váha cuu iní-n danèhé-n-güedé, te ndíhi tnúhu yíñuhu cáháⁿ ndíhi-n-güedé. ⁸ Te cáháⁿ-n mèe-ni tnúhu váha, te ducaⁿ te vá yôo ìⁿ cáháⁿ cuehé cuendá tnúhu cáháⁿ-n, te nchaa ñáyiú cùu ùhú iní ñáhá xii-o cucahaⁿ núú-yu, te vá ñihí-yu tnúhu cáháⁿ cuehé-yu cuendá-ó.

⁹ Te ío cáháⁿ-n dôho nchaa cue téé xinu cuechi sá ná quindáá iní-güedé cada-güedé nchaa chiúⁿ tahu patróoⁿ-güedé nàcuáa cudíu-güedé núú cué téé-áⁿ, te vá càhⁿ sáá iní-güedé. ¹⁰ Te vá cáni iní-güedé duhu-güedé, te cada ndáá-güedé cuendá sá ñá túú ná cani iní ñáhá cué patróoⁿ-güedé, te ducaⁿ te cutnúní iní ñáyiú sá tnúhu Yá Ndióxi ío váha danèhé ñáhá-xí nàcuáa cada-o cùndecu-o, te ñu-gá cúú-gá Yaá dácäcu nihnu ñaha xii-o núú ùhú núú ndáhú.

¹¹ Te nchoo ní cutnúní iní-ó sá Yá Ndióxi ío cùndahú iní-gá nchaa nchoo ñáyiú ndècu ñuyú-a, te ní taxi-gá tnúhu ndee iní sá nánihí tãhú nchaandi túhú ñáyiú te núu na quindáá iní ñáhá-yu xii-gá. ¹² Te ní cachí-gá sá dáñá-ó nchaa ichi cuehé ichi duha chi ñá tnàhá iní-gá cundecu-o ìchi-áⁿ, te vá ío cuhuⁿ iní-ó nchâa sá ío ñuyú-a, te ní cachí tucu-gá sá ío cani iní-ó nàcuáa cundecu-o vitna ndecu-o ñuyú-a te cada ndáá-ó cùndecu-o cuendá nduu vétú iní-gá. ¹³ Te cundetú-o sáá nduu càhnu vihi, nduu quixi tucu Xítoho Jesucristú Yaá cúu Ndióxi-ó, te ñu-gá ní dácäcu nihnu ñaha-gá xii-o núú ùhú núú ndáhú. Te nduu-áⁿ ío cudíí iní-ó. ¹⁴ Te mee-gá ní xihí-gá chi ducaⁿ ní cuiní-gá cunduu, te ducaⁿ ní quide-gá cuendá nchoo vâ cùndecu-gá-ó ìchi cuehé ichi duha, te nduu ndoo nduu nine iní-ó, te ducaⁿ te cuu-o cué ñáyiú quindaha-gá, te ni yùhu ni iní-ó cada-o mee-ni sá vâha.

¹⁵ Te nchaa tnúhu-áⁿ danèhé-n-yu te cúñaha-n xii-yu nàcuáa cadá-yu, te cáháⁿ-n dôho-yu te núu ñá túú quide ndáá-yu. Te cada-n sá cúu-n ìⁿ téé xinu cuechi núú Yá Ndióxi, te vá dáñá-n mèe-n daquee tíhú ñáhá ñáyiú xii-n.

3

Nchaa sá túú ñáyiú ndècu ichi Yá Ndióxi cadá-yu

¹ Te cúñaha-n xii-yu sá ná quíndáá iní-yu cadá-yu nchaa nàcuáa càháⁿ nchaa cue tée cùchiuⁿ, te tàù-yu chindee ñàhá-yu xii-güedé nchaa chiùⁿ váha quide-güedé. ² Te vá càháⁿ cuèhé-yu cuendá ñáiyu, te vá cùndu pletú-yu, te na cùu-yu ñáiyu ndàhú iní-xi, te na cùndahú iní-yu nchaa tnàha ñáiyú-yu.

³ Te tnàhá-ó ní xóo cada-o dàtná quidé ñáiyu-áⁿ vitna, chi ío ñi ñíquí-ó chi ñá təcú tnùn-í-ó nàcuáa càháⁿ tnúhu Yá Ndiòxí ní cùu, te ío ní xínduu sáá iní-ó núú-gá, te ní xíndecu-o ñiⁿ ichi sá ñá túú tàù-ó cùndecu-o ni cuu, te nándi sá cuèhé sá dúhá lò ñuyúú-a ní xóo cudúú iní-ó ní xóo cada-o chi ní xóo taxi tnùn-í ñàhá-xí xii-o, te ní xóo cada cuèhé ní xóo cada duha-o ni cùu, te ní xíndecu-o ichi cuedú iní, te cuendá nchaa sá ní xóo cada-o-áⁿ xíáⁿ ío ní xóo cuu úhú iní ñàhá ñáiyu xii-o, te ducaⁿ-ni nchòo tucu ní xóo cuu úhú iní-ó-yu. ⁴ Te Yá Ndiòxí Yaá ní dácácu nihnu ñaha xii-o núú úhú núú ndàhú ní dándíxí tũu-gá iní-ó nàcuáa cutnùn-í iní-ó sá ío váha iní-gá, te cùu iní ñàhá-gá xii nchaa nchoo ñáiyu ndècu ñuyúú-a. ⁵ Te Yá Ndiòxí ní dácácu nihnu ñaha-gá xii-o núú úhú núú ndàhú, dico ñá díú cuendá ñiⁿ sá váha quide-o ndecu-o ñuyúú-a ducaⁿ ní quide-gá, chi mee-gá ducaⁿ tnàhí ní cundahú iní ñàhá-gá xii-o. Te ní nduu ndoo ní nduu nine iní-ó, te ní cuu-o dàtná ñiⁿ ñáiyu saa, chi Espíritú Yá Ndiòxí ducaⁿ ní quide ñaha-xi xii-o. ⁶ Te Espíritú-gá ní taxi-gá ni yùhu ni iní-gá ndécú ndíhi-o, te ducaⁿ ní quide-gá chi ní sándáá iní-ó Xítohó Jesucristú Yaá ní dácácu nihnu ñaha xii-o núú úhú núú ndàhú. ⁷ Te ío cùndahú iní ñàhá-gá xii-o núu sa ní quide ndáá-gá cuéchi-o te ní cuu-o dèhe-gá, núu xíáⁿ vitna ndètu-ná-ó sáá nduu nduu táhú-ó cùndecu-o ndíhi-gá ni caa ni quíhíⁿ.

⁸ Te tnúhu ní càháⁿ-í-á cùu-xi tnúhu ndáá cuiti, te cuiní-í sá ni yuhu ni iní-n càháⁿ-n tnúhu-gá núu-yu cuendá sá ncháá ñáiyu sàndáá iní ñàhá xii Yá Ndiòxí nducu ndèé-yu cadá-yu mee-ni sá váha, te tnúhu-áⁿ cúu-xí mèe-ni tnúhu váha, te ío váha sá cúu-xí-yu. ⁹ Te vá cadá cuendá-n nchaa tnúhu sá ñá túú nàndíhi xitnàha ñáiyu, te vá cadá cuendá-n ñáiyu nándi càháⁿ cuendá nchaa sá ní xóo cada cue ñáiyu ní xíndecu ndéé sanaha, te vá

cadá cuendá-n nchaa tnúhu xitnàha ñáiyu xicuehé tnàhá cuendá tnúhu ní chídó tnùn-í ndí Moisés, chi nchaa tnúhu xitnàhá-yu-áⁿ ñá túú tnàhí nandíhi-xi, te dàcuíta ñaha-xi xii-o.

¹⁰ Te núu lò ñáiyu ní ngúífta-yu nándi tnúhu càháⁿ-yu cuendá sá vǎ cúu ñiⁿ nuu cue ñáiyu ndècu ichi Yá Ndiòxí ñá, te ñáiyu-áⁿ càháⁿ sàhú-n dõho-yu ñiⁿ úú xito, te núu vá tnúú-yu tnúhu càháⁿ-n ñá, te vá ñihí tnàhá-gá-n ndíhi-yu. ¹¹ Te ducaⁿ càda-n, chi ñáiyu-áⁿ duuⁿ duuⁿ ñá túú-gá cuiní-yu cadá-yu sá váha, chi mee-ná sá cuèhé sá dúhá tnàhá iní-yu cadá-yu, te cutnùn-í iní méé-yu sá ñá túú quide ndáá-yu, te sáá nduu te nacháhu-yu nchaa sá quidé-yu.

Nàcuáa cada té Titú

¹² Te cuiní-í tendaha-í té Àrtemás quixi-dé núu ndécú-n àdi té Tiquicú, te òré ná quèxio ndéda-ni caa ñiⁿ cue tée-a núú ndécú-n, te ío nducu ndèe-n quíhíⁿ-n ñúú Nìcòpòlìs núú quíhíⁿ-í cundecu-í, chi yàcáⁿ cuiní-í quíhíⁿ-í cundecu-í yóo quidé víxiⁿ-xi. ¹³ Te ío cuañaha-n nchaa sá xíní ñùhu té Zènás tée ío váha xíní nchaa nàcuáa càháⁿ lèí, ndíhi té Àpolós cuendá sá ñá túú nǎ cumání xii-güedé ichi. ¹⁴ Te cuiní-í sá ncháá ñáiyu ndècu ndíhi-o ichi Yá Ndiòxí cada váha-yu, te cuañàhá-yu ñiⁿ sá xíní ñùhu ñáiyu, te ío váha chiùⁿ cadá-yu te núu ducaⁿ na càdá-yu.

Tnúhu ndéé núu ní ndíhi-ná

¹⁵ Te vitna ío cada ndee iní-n càchí nchaa ñáiyu ndècu ndíhi-í iha, te cúñaha-n sǎ ío na càda ndee iní nchaa ñáiyu cùu iní ñàhá xii-o, ñáiyu sàndáá iní ñàhá xii Yá Ndiòxí. Te Yá Ndiòxí ío na chíndee chitúu ñaha-gá xii-ndo nchaa-ndo. Te ducaⁿ na cùnduu. Te ío chí cadá ndèe iní-ná vitna.

TUTÚ NÍ CADÚHA TÉ PÄBLÚ QUÍHÍⁿ NDAHA TÉ FILEMÓN

Té Páblú cadúha-dé tutú quíhíⁿ ndaha té Filemón

¹ Te yúhu té Páblú téé yíhi vecaá sá cuendá Xítoho Jesucristú cadúha-í ìⁿ tutú ndíhi té Timùteú cuendá daquixi-í ndaha yòhó té Filemón, te ío cùu iní ñàhà-í xii-n chi tñàhà-n quide-n chiⁿ Yá Ndiòxí. Te tutú-a tëndaha-í quixi ndaha-n ² ndíhi ndaha ñàha nàni Apiá ñàha ndècu ndíhi-o ichi Xítoho Jesucristú, ndíhi ndaha té Àrquipú, chi tñàhà-dé quidé-dè chiⁿ Yá Ndiòxí, ndíhi ndaha nchaa ñáiyu tàcà vehe-n dàcuahá-yu tñúhu-gá. ³ Te xicáⁿ táhù-í núú Tátá-ó Dútú Ndiòxí ndíhi núú Xítoho Jesucristú sá ìo na chindee chitúu ñaha-gá xii-ndo, te ducaⁿ ndí nduú-gá ná cádá te ío váha cuu iní-ndó cùndecu-ndo.

Té Filemón ío sàndáá iní-dé Xítoho Jesucristú te cùu iní-dé tñaha ñáiyu-dé

⁴ Te ndí tñahá òré càháⁿ ndíhi-í Yá Ndiòxí cuendá-n ndàcáⁿ táhù-í núú-gá. ⁵ Chi níhi-í tñúhu sá ìo sàndáá iní-n Xítoho Jesucristú, te cùu iní-n cuè ñáiyu ndècu ichi-gá. ⁶ Te xicáⁿ táhù-í núú Yá Ndiòxí sá dàtná-ni sàndáá iní-n-gá ducaⁿ-ni dànehé-n ñáiyu cuendá ducaⁿ ngúnu ichi-yu tñàhà-yu, te cùtnúní iní-yu nàcuáa ndúu nchaa sá váha tàxi Xítoho Jesucristú xii-o, te tñàhà-yu nduu táhù-yu nchaa sá váha-áⁿ. ⁷ Te yòhó té Filemón cúu-n tée ndècu ndíhi-í ichi Xítoho Jesucristú càchí tñúhu-í xii-n sá ìo cùdúú iní-í cuendá sá ìo váha quide-n ndecu-n, chi cùu iní-n nchàa ñáiyu ndècu ichi Yá Ndiòxí, te uuⁿ-gá níhi ndèé-í sá dúcáⁿ quide-n, te diu-n ìo sáhà-n-yu tñúhu ndee ìní ndécú ndíhi-yu.

Té Páblú chindèe tñúhu-dé té Ònésimú

⁸ Te yúhu té Páblú ní taxi Xítoho Jesucristú tñúhu ndee ìní ndécú ndíhi-í sá táxi tñúní ñàhà-í xii-n te tahu-í chiⁿ cada-n, dico vá táxi tñúní ñàhà-í xii-n, ⁹ chi váha-gá sá càháⁿ ndàhù-í núú-n sá cádá-n nchàa nacuaá càháⁿ-í chi ío cùu iní ñàhà-í xii-n. Chi yúhu sa ta yíi-í cuaháⁿ, te yíhi-í vecaá cuendá sá càháⁿ-í tñúhu Xítoho Jesucristú. ¹⁰ Te càháⁿ ndàhù-í núú-n sá ñà túú nà cani iní-n cuendá té Ònésimú, chi ní cuu-dé

vitna dàtná ìⁿ déhe-í, chi ní sàndáá iní-dé tñúhu Yá Ndiòxí ní xáhaⁿ-í xii-dé vitna yíhi-í vecaá.

¹¹ Te ñaha-n sá cùtñàhà ní xindecu ndíhi-n-dè ñà túú ní quide ndáá-dé, dico vitna ío váha quide-dé ndécú ndíhi-í-dé, te diu-ni ducaⁿ càda-dé òré cundecu ndíhi tucu-n-dè. ¹² Te vitna tendaha-í-dé ndixi-dé cundecu tucu-n ndíhi-dé, te òré queheⁿ cuendá-n-dè, te cada iní-n sá yúhú ní queheⁿ cuendá-n. ¹³ Te vitna yíhi-í vecaá sá cuendá tñúhu Xítoho Jesucristú, te cuiní-í ngani-í-dé cunu cuechi-dè núú-í cuendá cada-dé núú-n ní cùu. ¹⁴ Dico ñà túú ní ngani-í-dé, chi vátá ndátnúhu ndíhi ñaha-gá-í xii-n núu nása cachí-n cùnduu. Te ñà cùndèe iní-í cada yica-í cada-n ìⁿ sá váha sá cúu-xì-í, chi cuiní-í sá mée-n càni iní-n núu cuu àdi sá vā cúu. ¹⁵ Te ní cunduu ní quee té Ònésimú vehe-n, te cudana te mee Yá Ndiòxí ducaⁿ ní cachí-gá cunduu cuendá dacuahà-dé cada váha-dé. Te ndixi tucu-dé cundecu ndíhi ducaⁿ-nà-n-dè. ¹⁶ Te vá cúu-gá-dé dàtná ìⁿ téé xínu cuechi chi ní cuu-dé dàtná ìⁿ ñani-ó chi ní sàndáá iní-dé Yá Ndiòxí, te yúhú ío cùu iní-í-dé, dico yòhó uuⁿ-gá cuu iní-n-dè, chi cùu-dé ìⁿ tñaha ñáiyu-o, te ndècu-dé ichi Yá Ndiòxí.

¹⁷ Te ìⁿ-ni cùu-o ndecu-o ichi Yá Ndiòxí núu xiáⁿ càháⁿ ndàhù-í núú-n sá quéhéⁿ cuendá-n-dè dàtná quéhéⁿ cuendá-n yúhú òré quéxi-o-í vehe-n. ¹⁸ Te núu ìó ìⁿ sá ní cumání-dè núú-n ñà túú ní quide ndáá-dé cùtñàhà ní xindecu-n ndíhi-dé, àdi ío ìⁿ sá tàú-dé te vá ndàcáⁿ cuendá-n núú-dè, chi yúhú ndacáⁿ cuendá-n núú-í. ¹⁹ Te ndaha mee yúhú té Páblú cadúha-í tutú-a càchí tñúhu-í xii-n sá ná chàhu-í nchaa sá ní quide-dé. Dico dandàcu saú iní-n sá yúhú ní sanu ichi ñaha-í xii-n ichi Xítoho Jesucristú. ²⁰ Dico yòhó té ndècu ndíhi-í ichi Xítoho Jesucristú cada ndee ìní-n càda-n tñúhu ndàhù càháⁿ-í núú-n chi ndècu-o ichi-gá. Te ducaⁿ càda-n nacuaá cuu-xi dàtná ìⁿ tñúhu ndee ìní sá cúu-xì-í, chi ndí ndúú-ó ndècu-o ichi-gá.

²¹ Te cùtnúní iní-í sá cádá-n nchàa nacuaá càháⁿ-í, te cùtnúní tucu iní-í sá ìo-gá vāi sá váha cada-n dàcúúxí tñúhu ndàhù càháⁿ-í núú-n, núu xiáⁿ tëndaha-í tutú-a véxi ndaha-n. ²² Te vitna cuiní-í cada túha-n ìⁿ vehe cundecu-í, chi sàni iní-í sá quíxí còto ñaha-í xii-ndo, te ndètu-í sáá nduu-áⁿ

chi nchòhó xìcáⁿ táhú-ndó nǔú Yă Ndiǒxí
cuèndá-í.

Tnúhu ndéé núú nǐ ndihi-ná

²³ Te ío cada ndee ìní-n cǎchí té Ěpafrás
tée yǐhi ndihi-í vecaá sá cuèndá tnúhu Xí-
tohó Jesucristú. ²⁴ Te ío cada ndee ìní tucu-n
cǎchí té Mǎcú, ndihi té Aristarcú, ndihi té
Děmás, ndihi té Lùcá, chi tnàhá cue tée-ǎⁿ
quide-güedé chiúⁿ Xítóhó Jesucristú.

²⁵ Te Xítóhó Jesucristú ío na chindee
chitúu ñaha-gǎ xii-ndo nchàa-ndo. Te
ducaⁿ na cùnduu. Te ío chí cǎdá ndèe ìní-nǎ
vitna.

TUTÚ QUÍHÍⁿ NDAHA CUE ÑÁYIU HÈBRËU

Dútú Ndiòxí ní cachí-gá sá Dèhe-gá cada núú-gă

¹ Te ndéé sanaha, Yá Ndiòxí ní xáhaⁿ-gă xii cue tée ní cachí iní méé-gă cada núú-gă cáháⁿ-güedé tnúhu-gă núú nchàa ñani tnáhá-ó ní xíndecu ndéé dàvâ-án te diu ducaⁿ ní quide-güedé. Te titni xito ducaⁿ ní xáhaⁿ-gă xii-güedé ní cáháⁿ-güedé tnúhu-gă. Te ndi dííⁿ ndi dííⁿ ní xítñúhu ñaha-gă xii-güedé nàcuáa cáháⁿ-güedé tnúhu-gă núú-yu. ² Te sátá ní cuu vai nduu ta yáha cuáhán, te ní sáá nduu ní cachí Yá Ndiòxí sá Dèhe-gá cada núú-gă cáháⁿ tnúhu-gă núú-ó. Te diu-ni mee-gă ní táuchíúⁿ ní cadúha Déhe-gă ñuyú ndihi nchaa sá ío, te ní cachí-gá sá ncháá cùu-xi cuendá Déhe-gá. ³ Te Déhe Yá Ndiòxí ío cànhu cuu-gă dàtná cànhu cuu mee-gă, te dàtná-ni sàni iní méé-gă diu-ni ducaⁿ sàni iní Déhe-gá chi tnáhá-gă cúu-gă Ndiòxí, te sá cuendá tnúhu cáháⁿ Déhe-gá xíáⁿ ndécú-ní nchàa sá ío ñuyú, te ducaⁿ chi ío cànhu cuu Déhe-gă, te diu-ni Déhe-gá ní quide nàcuáa vá cündecu-gă cuèchi-o. Te sátá dúcáⁿ te ní ngóo-gă xio cùha Tátá-gă Dútú Ndiòxí Yáá ío cùnnu ndecu andiu.

Déhe Dútú Ndiòxí ío-gă cùnnu-gă dàcúúxí cuè espíritú xínú cuèchi núú-gă

⁴ Te Déhe Yá Ndiòxí ío-gă cùnnu-gă dàcúúxí cuè espíritú xínú cuèchi núú-gă, te ducaⁿ chi ní nduu táhu-gă núú Tátá-gă Dútú Ndiòxí sá ío-gă cunuu-gă dàcúúxí cuè espíritú-án. ⁵ Chi Yá Ndiòxí ñá túú ní xáhaⁿ-gă xii ní ñⁿ cue espíritú xínú cuèchi núú-gă dàtná ní xáhaⁿ-gă xii Déhe-gă, te duha ní xáhaⁿ-gă: Yòhó cúu-n Dèhe mee-í, te ducaⁿ-ni cündecu-n núú ndécù-í. Duha ní xáhaⁿ-gă. Te ní cachí tucu Yá Ndiòxí: Yúhú cúu-í Tátá Yáá-áⁿ, te mee-gă cúu-gă Déhe-í. Duha ní cachí-gă. ⁶ Te cútñahá ní tendaha-gă Déhe-gă Yáá ío cùnnu ní quixí-gă ñuyú-a, te ní cachí-gă: Tàú-xi sá ncháá cuè espíritú xínú cuèchi núú-í chiñuhu-xi Déhe-í.

Duha ní cachí-gă. ⁷ Te Yá Ndiòxí ní cáháⁿ-gă cuendá cue espíritú xínú cuèchi núú-gă, te ní cachí-gă:

Yúhú quidé-í sá ncháá cuè espíritú xínú cuèchi núú-í cúu-xí dàtná táchi, te diu-ni cue espíritú-án quidé-í sá cúu-xí dàtná itá ñuhú.

Duha cächí-gă. ⁸ Dico Déhe-gă chi ñá túú dùcaⁿ ní xáhaⁿ-gă, chi duha ní xáhaⁿ-gă:

Yòhó tnáhá-n cùu-n Ndiòxí dàtná cúu yúhú Yáá cúu Tátá-n,

te ducaⁿ-ni tàxi tnuní-n ní caa ní quíhíⁿ, te ío váha ndáá quidé-n tàxi tnuní-n.

⁹ Te dàquee tihú-n nchàa sá cuèhé sá dúhá, te cúu iní-n nchàa sá váha, núu xíáⁿ yúhú Yáá cúu Tátá-n ní quide-í sá ío-gă vii ío-gă váha cuu iní-n,

dàcúúxí nchàa dava-gă ñáyiú ndecu ndihi-n.

Duha ní xáhaⁿ-gă xii Déhe-gă. ¹⁰ Te ní xáhaⁿ tucu Yá Ndiòxí xii Déhe-gă:

Yòhó cúu-n Yáá ío cùnnu, chi ndéé cútñahá ñá túú vèdana ná ío te ní cadúha-n ñuyú ndihi andiu.

¹¹ Te andiu ndihi ñuyú chi naa-xi, dico yòhó chi cundecu-ni-n ní caa ní quíhíⁿ.

Te andiu ndihi ñuyú chi ndihi-xi dàtná ndihí ñⁿ dóó,

¹² te dàtná cuiní-n quide ñáyiú ndihi ñⁿ dóó òré ndàcáⁿ tnáhnú-yu tàxi ndécú-yu ñⁿ xio, ducaⁿ càda-n ñuyú ndihi andiu,

te dàtná nádama dóó ñáyiú ducaⁿ càda tucu-n ñuyú ndihi andiu.

Te yòhó dàtná-ni càa-n ndecu-n vitna ducaⁿ-ni cünduu-n cündecu-n ní caa ní quíhíⁿ, chi vá yíí tnáhí-n.

Duha ní xáhaⁿ Yá Ndiòxí xii Déhe-gă. ¹³ Te Yá Ndiòxí ñá túú ní xáhaⁿ-gă xii ní ñⁿ cue espíritú xínú cuèchi núú-gă dàtná ní xáhaⁿ-gă xii Déhe-gă, te duha ní xáhaⁿ tucu-gă:

Ngóo xio cùha-í taxi tnuní-n, te yúhú cada-í te nchaa sá cúu úhú iní ñáhá xii-n canehexi sá yíñuhu núú-n.

Duha ní xáhaⁿ-gă xii Déhe-gă. ¹⁴ Te nchaa espíritú xínú cuèchi núú Yá Ndiòxí mee-ni chiúⁿ-gă quidé-xí, chi tëndaha-gă cue espíritú-án cuáháⁿ-xi nchaa núú ndécú cuè ñáyiú ní nduu táhu cundecu ndihi-gă chindee ñaha-xi xí-yu.

2

Vá dǎná ndèé-ó tñuhu sá càháⁿ nàcuáa naníhí tǎhú-ó

¹ Te sá cuendá sá ïo cùnuu Xítóhó Jesucristú, núu xiǎⁿ ío xini ñuhu-xi cada cuendá-ó nchaa tñuhu càháⁿ-gá sá sà ní xíndedóho-o cuendá sá vǎ dǎná nihnu-o. ² Te cue espíritú xínú cuèchi núu Yǎ Ndiǒxí ní càháⁿ-xi tñuhu-gá ndéé sanaha, te tñuhu ní càháⁿ cue espíritú-án cúu-xí sǎ ndǎá cuiti. Te nchaa ñáyiú ñǎ túú ní cuini tñi nchaa tñuhu ní càháⁿ cue espíritú-án, te ní ñǎ túú ní cuini-yu cundedóho-yu, nchaa ñáyiú-án ní nacháhu-yu nàcuáa ndùu nchaa cuèchi ní quidé-yu ñⁿ ñⁿ-yu. ³ Te sá dúcáⁿ ní yáha cue ñáyiú-án, xiǎⁿ cútnùní ndǎá iní-ó sǎ vǎ càcu nihnu-o te núu na dǎña nihnu-o tñuhu sá càháⁿ nàcuáa naníhí tǎhú-ó, tñuhu sá ïo cùnuu, chi nacháhu-o te núu ducaⁿ na càda-o. Te díhna-gá Xítóhó Jesucristú ní càháⁿ-gá tñuhu-án te nchaa ñáyiú ní xíndedóho nchaa nàcuáa ndùu tñuhu-án ní càháⁿ ndǎá-yu tñuhu-án núu-ó. ⁴ Te tñhá Yǎ Ndiǒxí cúndíhi-gá nchaa ñáyiú-án quidé-gǎ nàcuáa cutnùní iní-ó sǎ tñuhu-án cúu-xí tñuhu ndǎá, chi quidé-gá titní núu sǎ vǎ yǒo tñáhi ndàcu cada te ío cùnùhu-o. Te Espíritú Yǎ Ndiǒxí quidé-xí nàcuáa nduu tǎhú-ó ndí ñíⁿ núu chiúⁿ cada-o nàcuáa cuini méé-gǎ. Te sá dúcáⁿ quide Yǎ Ndiǒxí nchaa xiǎⁿ, xiǎⁿ cútnùní iní-ó sǎ tñhá-gá càháⁿ-gá sá tñuhu-án cúu-xí tñuhu ndǎá.

Xítóhó Jesucristú ní xínduu yiqui cuñú-gá dàtnǎ cáá yiqui cuñú nchoo cuè ñáyiú ñuyiú-a

⁵ Te Yǎ Ndiǒxí vá táxí ndècu-gá cue espíritú xínú cuèchi núu-gǎ taxi tñùní-xi ñuyiú sáá sǎ vǎtǎ quini-gá-ó, te diu cuendá xiǎⁿ càháⁿ-í. ⁶ Te núu tǔtú Yǎ Ndiǒxí càchí-xi:

Yòhó Dútú Ndiǒxí ñǎ túú ñǎ cúu cuè ñáyiú ñuyiú núu ndacu iní-n-yu, àdi chin-deé-n-yu.

⁷ Te yòhó ní cachí-n sǎ nchaa ñáyiú ñuyiú-a vá cùnùu-yu dàtnǎ cùnùu cue espíritú xínú cuèchi núu-n, dico ní cachí-n sǎ sǎá nduu te ío cùnùu-yu tñhá-yu, te mee-n càháⁿ-n sǎ ïo càhnu cuú-yu, te ní cachí tucu-n sǎ táxí tñùní-yu nchaa sǎ ní cadúha-n.

⁸ Te ducaⁿ nchàandi tǔhú sá ïo quindàhá-yu. Duha càchí-xi núu tǔtú-gǎ. Te sá dúcáⁿ ní cachí Yǎ Ndiǒxí sá quindàha ñáyiú ñuyiú nchaa sá ïo, xiǎⁿ cútnùní sá nchàandi tǔhú sá ïo taxi tñùní-yu, dico vǎtǎ sǎá-gá nduu dùcaⁿ quini-ó càda-xi. ⁹ Te nchoo sa nàha-o sǎ tñáá-ní ní quide Yǎ Ndiǒxí cuendá sá vǎ cùnùu Xítóhó Jesucristú dàtnǎ cùnùu cue espíritú xínú cuèchi núu-gǎ. Te ducaⁿ ní quide Yǎ Ndiǒxí chi ní cundáhú iní-gá nchaa ñáyiú ñuyiú-a, chi ní cachí-gá sá Dèhe-gá cuú cuendá nchaa-yu, te Xítóhó Jesucristú ío ní ndoho-gá dré ní xíhí-gá, núu xiǎⁿ ní nduu tǎhú-gǎ cùnùu vihi-gá vitna. Te mee Yǎ Ndiǒxí càchí-gá sá ïo càhnu cuu Dèhe-gá.

¹⁰ Te Yǎ Ndiǒxí ní cadúha-gá nchàandi tǔhú sá ïo nàcuáa ní cachí iní méé-gǎ, te sá dúcáⁿ ní quide-gá núu xiǎⁿ váha-ni sá ní cachí-gá sá Xítóhó Jesucristú nándi ndoho-gá te cuú-gá cuendá ducaⁿ ñǎ túú tñáhi-gá ná cùmání-gǎ núu Yǎ Ndiǒxí. Te sá dúcáⁿ ní cuu núu xiǎⁿ ní níhí Yǎ Ndiǒxí nàcuáa cada-gá càndeca-gá nchaa ñáyiú cuu dèhe-gá quíhíⁿ núu ïo váha càa cundecú-yu ndíhi-gá ní caa ní quíhíⁿ. Te Xítóhó Jesucristú cúu-gǎ Yáá ní quide nàcuáa nduu tǎhú cue ñáyiú cundecú-yu ndíhi Yǎ Ndiǒxí. ¹¹ Te Xítóhó Jesucristú cúu-gǎ Yáá quidé ndècu yíñuhu ñáyiú núu Yǎ Ndiǒxí ñáyiú sàndǎá iní ñáhá xii-gǎ, te Xítóhó Jesucristú ndíhi cue ñáyiú-án ñⁿ-ni Yáá cúu Tǎtǎ-yu ndíhi-gá, núu xiǎⁿ Xítóhó Jesucristú Yáá cúu Dèhe Dútú Ndiǒxí ñǎ túú cùcahaⁿ núu-gǎ càháⁿ-gá sá ñàní-gá ndíhi cùha-gá cúu nchaa ñáyiú-án. ¹² Te quèe ndǎá-xi nàcuáa càháⁿ-xi núu tǔtú Yǎ Ndiǒxí núu càchí-xi nàcuáa ní xáhaⁿ Xítóhó Jesucristú xii Tǎtǎ-gǎ Dútú Ndiǒxí, te duha ní xáhaⁿ-gǎ:

Càháⁿ váha-í cuendá-n núu nchaa cue tée cuu dàtnǎ ñaní-í ndíhi núu nchaa cue ñáyiú díhí cúu dàtnǎ cùha-í,

te cata-í ndudú chiñuhu ñaha-í xii-n núu tàcá-yu.

Duha yòdo tñuní núu tǔtú-gǎ nàcuáa ní xáhaⁿ Dèhe-gá xii-gǎ. ¹³ Te ñngá tucu xichi núu tǔtú Yǎ Ndiǒxí càháⁿ-xi nàcuáa ní càháⁿ Xítóhó Jesucristú cuendá-gǎ, te duha ní cachí-gá:

Yúhú nchaa-ni nduu quindǎá iní-í Tǎtǎ-í Dútú Ndiǒxí.

Duha cächí-xi núu tütú Yá Ndiöxí nàcuáa ní cáháⁿ Xítóhó Jesucristú. Te íngá tucu xichi núu tütú Yá Ndiöxí cáháⁿ-xi nàcuáa ní cáháⁿ tucu Xítóhó Jesucristú, te duha ní cachí-gá:

Iha ndècu ndìhi-í nchaa ñáyiú cùu déhe Tàtá-í Dútú Ndiöxí, te diu-ni ñáyiú-áⁿ ní taxi cuendá Tàtá-í cuu cuendá-í.

Duha cächí-xi núu tütú-gá nàcuáa ní cáháⁿ Xítóhó Jesucristú.

¹⁴ Te sá cuendá nchaa ñáyiú cùu déhe Yá Ndiöxí cúu-yu yiqui cùñú, núu xíáⁿ ducaⁿ tnáhá Xítóhó Jesucristú ní cuu-gá yiqui cùñú, te ducaⁿ ní cuu-gá yiqui cùñú cuendá cuú-gá, te sá dúcáⁿ cùu-gá te ndacu-gá daquèe tìhú-gá sácuihná, te diu sácuihná-áⁿ quidé-xí xihí ñáyiú. ¹⁵ Te ducaⁿ ní quide-gá cuendá sá cuè ñáyiú ñuyúú-a vá yùhú-gá-yu sá cùu-yu, chi nchaa-ni nduu yùhú-yu sá cùu-yu. ¹⁶ Te na cächí tnúhu ndáá-í sá Xítóhó Jesucristú ní quixi-gá cuendá chindee-gá cue ñáyiú cùu ñani tnáhá ndíi Àbrahám, te ñá díú cuendá sá chindèe-gá cue espíritú xínú cuèchi núu Yá Ndiöxí. ¹⁷ Te cuendá xíáⁿ núu dai ní xini ñuhu-xi sá cúu-gá ñáyiú cuendá yáha-gá nándi sá yáha-gá dàtná yáha cue ñáyiú cùu ndí mee-gá cuendá ducaⁿ cùu-gá dútú ïo cùnuu te cuu ndáá-gá núu Yá Ndiöxí, te cundáhú iní-gá nchaa ñáyiú te cuú-gá cuendá sá vá cùndècu-gá cuèchi-yu núu Yá Ndiöxí. ¹⁸ Te mei òrè ndóhó Xítóhó Jesucristú ní xito ndéé ñáhá sácuihná xii-gá te núu ndisa sá vá cáda-gá ni ìⁿ sá ñà túú tàú-gá cada-gá, te sá dúcáⁿ ní ndoho-gá xíáⁿ núu ndácú-gá chindèe-gá nchaa ñáyiú ducaⁿ yáha.

3

Xítóhó Jesucristú ío-gá cùnùu-gá dàcúúxí ndíi Moisés

¹ Te nchòhó cúu-ndó ñáyiú ndècu ndìhi-í ichi Xítóhó Jesucristú ñáyiú cùu cuendá Yá Ndiöxí, te tnáhá-ndó cùu-ndo ñáyiú ní cáháⁿ ñáhá-gá cuendá cundecu-ndo ndìhi-gá. Te yùhú cächí tnúhu-í xii-ndo sã ïo váha cada cuendá-ndó nàcuáa nduu cuendá Xítóhó Jesucristú, chi diu-gá cúu-gá Yaá ní tendaha ñaha Dútú Ndiöxí ní quixi-gá ñuyúú-a, te diu-gá cúu-gá Dútú ïo cùnuu chí quide-gá núu Yá Ndiöxí. Te

diu-ni cuendá Xítóhó Jesucristú cáháⁿ tnúhu sá ní sàndáá iní-ó. ² Te mee Yá Ndiöxí ní sáha chiúⁿ-gá Xítóhó Jesucristú, te ío ndáá quidé-gá chiúⁿ-áⁿ sá cúu-xí Yá Ndiöxí, te diu-ni ducaⁿ ní quide ndíi Moisés ní quide ndíi chiúⁿ ní táhú Yá Ndiöxí, te ío ndáá ní quide ndíi chiúⁿ-gá sá cúu-xí nchàa ñáyiú cùu cuendá-gá, te cue ñáyiú-áⁿ cúu-yu dàtná vehe mee-gá. ³ Te ìⁿ tée dàcaa ìⁿ vehe váha ío càhnu-gá cúu-dé dàcúúxí vehe dacao-dé. Te ducaⁿ sãtnahá-xi cùu Xítóhó Jesucristú chí ío-gá càhnu cuu-gá dàcúúxí ndíi Moisés. ⁴ Te nchoo sà naha-o sá ncháá vehe dacuití ndècu cue tée ní dácáá, dico sa naha tucu-o sá Yá Ndiöxí quidé-gá ndécú nchàa sá ìo ñuyúú-a. ⁵ Te ndíi Moisés-áⁿ ío ndáá ní quide ndíi chiúⁿ ní táhú Yá Ndiöxí ní quide ndíi sá cúu-xí nchàa ñáyiú cùu cuendá-gá. Te sá dúcáⁿ ní quide ndíi xíáⁿ ní cuu ndíi ìⁿ tée ní xinu cuechi núu Yá Ndiöxí. Te ní xáhaⁿ ndíi xii nchaa ñáyiú cùu cuendá-gá nàcuáa cáháⁿ-gá ndéé cuèè-gá. ⁶ Dico Xítóhó Jesucristú cúu-gá Déhe mee Yá Ndiöxí, te cùu-gá Yaá ío quide ndáá yíndàha-gá nchaa ñáyiú cùu cuendá Yá Ndiöxí. Te tnáhá-ó cùu-o ñáyiú cùu cuendá-gá, te diu-ni ducaⁿ cùu cuendá ñáhá-gá xii-o te núu na cànchicúⁿ nihnu-ni-o càni ndáá iní-ó cuendá-gá ndéé ná sàà nduu ngùndecu-o ndìhi-gá.

Cue ñáyiú cùu cuendá Yá Ndiöxí ío váha cùu iní-yu ndécú-yu ndìhi-gá

⁷ Te núu tütú Yá Ndiöxí yódó tnùnì nàcuáa ní cáháⁿ Espíritú-gá, te duha ní cachí-xi:

Te núu nchòhó ndèdóho-ndo nchàa tnúhu cáháⁿ Yá Ndiöxí vitna,

⁸ te vá cùndùu sáá iní-ndó dàtná ní xínduu sáá iní ñáyiú ní dáquèé tìhú tnúhu Yá Ndiöxí, ñáyiú ní xíndecu xití yucu,

chi ñáyiú-áⁿ ní xito ndéé-yu Yá Ndiöxí núu nása cada ñaha-gá xí-yu.

Duha ní cachí Espíritú-gá. ⁹ Te cächí tucu Espíritú Yá Ndiöxí nàcuáa ní cáháⁿ méé-gá, te duha ní cachí-gá:

Xití yucu ní xito ndéé ñáhá cuè ñani tnáhá-ndó ní xíndecu ndéé sanaha xii-í,

te ducaⁿ ní quide ñáhá-yu cuè ní xini-yu nchaa sá ní quide-í ndí ùdico cuíá ní xíndecu-yu xití yucu-áⁿ.

¹⁰ Te sá dúcáⁿ nǐ quidé-yu núu xǎⁿ ní cudèèⁿ-í núu-yu, núu xǎⁿ ní cáháⁿ-í cuendá-yu, te ní cachí-í: “Ñáyi-u-a quide-ní-yu nchaa sá ñà túú tàù-yu cadá-yu te ni ñà túú cuiní-yu cadá-yu nchaa nàcuáa sàni iní-í, te ni ñà túú cuiní-yu cadá-yu nàcuáa càháⁿ-í”, duha ní cáháⁿ-í cuendá-yu.

¹¹ Te xǎⁿ núu ní cudèèⁿ-í núu-yu te ní xáhaⁿ ndáá-í xíi-yu sá vǎ ndúú tǎhǔ-yu cundecu váha-yu núu ndécú-í.

Duha ní cachí Yǎ Ndióxi càchí Espiritú-gá.

¹² Te nchòhò ñáyi-u ndècu ndíhi-í ichi Xítóhó Jesucristú, càháⁿ-í dóho-ndo sǎ ìo cada cuendá-ndó vǎ cáni cuèhé iní-ndó te ngóo-ndo vǎ quindáá-gá iní-ndó Yǎ Ndióxi te daña-ndo ichi-gá, te ñu-gá cúu-gá Yáa ndécú nchaa nduu nchaa quíú. ¹³ Te ìiⁿ nduu ìiⁿ nduu ío chí cuǎha tñaha tñúhu ndee iní cundecu-ndo ñini ndecu-ndo ñuyíú-a cuendá sá vǎ xǐnu iní-ndó càda-ndo nándi sá cuèhé sá dúhá, te ducaⁿ te vǎ cúú sǎá iní-ndó núú Yǎ Ndióxi. ¹⁴ Te vǎ dáñá ndèé-ó càni ndáá iní-ó nàcuáa cada ñaha Yǎ Ndióxi xii-o, te dàtná-ni ní sani iní-ó ndèé cútnàhá ní tuha-o íchi Yǎ Ndióxi, te ñu-ni ducaⁿ càni iní-ó ndèé ná sǎá nduu vǎ cundecu-gá-ó ñuyíú-a, te núu ducaⁿ na càda-o te cúu ìiⁿnuu-o ndíhi Xítóhó Jesucristú.

¹⁵ Te duha càháⁿ-xi ìiⁿ xichi núu tütú Yǎ Ndióxi:

Te núu nchòhò ndédóho-ndo nàcuáa càháⁿ Yǎ Ndióxi vitna,

te vǎ cunduu sǎá iní-ndó dàtná ní xǐnduu sǎá iní cue ñáyi-u ní dáquée tǐhú tñúhu-gá ndéé sanaha.

Duha càchí-xi núu tütú-gá. ¹⁶ Te cue ñáyi-u ducaⁿ ní xǐnduu sǎá iní-xi cúu-yu ñáyi-u ní ndeñuhu ndíi Moisés nàcióⁿ Ègíptú, te ñáyi-u-áⁿ ní xǐndedóho-yu tñúhu ní cáháⁿ Yǎ Ndióxi te ní quide sǎá iní-yu ní dáquée tǐhǔ-yu tñúhu-gá. ¹⁷ Te ndí ùdico cuíá ní xǐhuⁿ-yu ichi ío ní cudéèⁿ Yǎ Ndióxi núu-yu cuendá sá ní quidé-yu nándi nchaa sá cuèhé sá dúhá, te ñáyi-u-áⁿ ní xǐhí-yu xití yucu. ¹⁸ Te nchaa ñáyi-u-áⁿ ñà túú ní cuiní-yu tñí-yu tñúhu ní cáháⁿ Yǎ Ndióxi núu xǎⁿ ní cáháⁿ ndáá-gá sá vǎ ndúú tǎhǔ-yu cundecú-yu núu ìo váha càa ndecu-gá. ¹⁹ Te xǎⁿ núu nchoo cùtnuní iní-ó sǎ nchaa ñáyi-u-áⁿ ñà túú ní nduu tǎhǔ-yu

cundecu váha-yu núu ndécú-gǎ, chi ñà túú ní sàndáá iní-yu tñúhu ní cáháⁿ-gá.

4

¹ Te vitna ndècu ndíhi-gá-ó tñúhu Yǎ Ndióxi tñúhu sá dánèhé ñáhá xii-o sá cúú cundecu váha-o núu ndécú-gǎ, te tàù-xi quiyùhú iní-ó chi na cuáháⁿ te vǎ ndúú tǎhǔ-ó cundecu váha-o núu ndécú-gǎ. ² Te tñàhá nchoo ní ngúndecu ndíhi-o tñúhu sá càháⁿ nàcuáa naníhí tǎhú-ó dàtná ní xǐndecu ndíhi cue ñáyi-u ndéé sanaha, dico ñáyi-u-áⁿ chí ñà túú vèdana ní nándíhi-xi cuèi ní xǐndedóho-yu tñúhu-áⁿ chí ñà túú ní sàndáá iní ñáhá-yu xii-gá. ³ Dico nchoo cùu-o ñáyi-u ní sàndáá iní tñúhu Yǎ Ndióxi, núu xǎⁿ nduu tǎhǔ-ó cundecu váha-o núu ndécú-gǎ, te ní quee ndáá-xi nàcuáa càháⁿ-gá núu tütú-gá núu càchí-xi:

Yúhú ní cudèèⁿ-í núu-yu, te ní cáháⁿ ndáá-í sá vǎ ndúú tǎhǔ-yu cundecu váha-yu núu ndécú-í.

Duha ní cachí-gá. Te cuu nduu tǎhǔ-yu cundecu váha-yu núu ndécú Yǎ Ndióxi ní cùu, chí sa ní xǐnu cava nchaa chiúⁿ ní quide-gá sá ní cadúha-gá ñuyíú. ⁴ Te núu tütú Yǎ Ndióxi càháⁿ-xi nàcuáa ní quide-gá nduu úsá, te duha càchí-xi:

Yǎ Ndióxi ní quide chiúⁿ-gá íñú nduu ní quide-gá nchaa chiúⁿ-gá te ní nde-tatú-gá nduu úsá.

Duha càchí-xi núu tütú-gá. ⁵ Te càchí tucu-xi núu tütú Yǎ Ndióxi nàcuáa ní cáháⁿ-gá cuendá cue ñáyi-u ndéé sanaha, te duha ní cachí-gá:

Cue ñáyi-u-a vǎ ndúú tǎhǔ-yu cundecu váha-yu núu ndécú-í ndétátú-í.

Duha ní cachí-gá. ⁶ Te ñáyi-u ní xǐndedóho tñúhu sá càháⁿ nàcuáa naníhí tǎhú-ó ndéé sanaha, ñà túú ní nduu tǎhǔ-yu cundecu váha-yu núu ndécú Yǎ Ndióxi ndétátú-gá, te ducaⁿ chí ñà túú ní sàndáá iní ñáhá-yu xii-gá, dico ìo-gá ñáyi-u nduu tǎhǔ cundecu váha núu ndécú-gá ndétátú-gá. ⁷ Te ní xica cuèhé nduu sá dúcáⁿ ñà túú ní sàndáá iní ñáhá ñáyi-u-áⁿ xii-gá, te dàtnuní ní cáháⁿ ndíi Dávíi yuhu-gá nàcuáa cada-gá vitna, te ñu-ni nàcuáa sa yòdo tñuní ñu-ni ducaⁿ chido tñuní tucu-í nàcuáa ní cáháⁿ ndíi yuhu-gá, te duha ní cachí-gá:

Te núu nchòhò ndédóho-ndo tñúhu càháⁿ-í te vǎ càdá sǎá iní-ndó.

Duha ní cachí-gá. ⁸ Te ndíi Jòsué ní sanu ichi ndíi ñáiyu núú quíhíⁿ-yu cundecu váha-yu, dico ñá díú cuendá xíáⁿ ní cáháⁿ Yá Ndiòxí, chi cuendá nàcuáa cada-gá vitna ní cáháⁿ-gá. ⁹ Núú xíáⁿ sáá nduu ndúu táhú nchaa ñáiyu cùu cuendá Yá Ndiòxí ngúndecu váha-yu núú ndécú-gá ndétátú-gá. ¹⁰ Te nchaa ñáiyu ducaⁿ na ndúu táhú cundecu váha núú ndécú Yá Ndiòxí ndétátú-gá, te tñhá-yu ndetatú-yu cuendá nchaa sá váha ní quidé-yu dàtná ndétátú-mée-gá. ¹¹ Te xini ñuhu-xi sá nchóó ìo nducu ndèe-o nducu-o nacúaa cada-o cuendá nduu táhú-ó ngúndecu váha-o núú ndécú Yá Ndiòxí ndétátú-gá, chi na cuáháⁿ dava-ndo càda-ndo datná ní quide cue ñáiyu ñá túú ní sàndáá iní ñáhá xii-gá, te vá ndúú táhú-ndó cundecu váha-ndo núú ndécú-gá te núu ducaⁿ na càda-ndo.

¹² Te tnúhu Yá Ndiòxí cúu-xí dàtná ìpⁿ sá nchító-ó chi quide-xi nándi sá quidé-xí, te cùu-xi datná ìpⁿ sá dèéⁿ víhí-gá dàcúúxí ìpⁿ yuchí sá ndèé úú xio núú-xi. Te ducaⁿ sàtnahá-xi cùu tnúhu-gá chi quée-xi iní-ó, te dàndixi túu-xi nchaandi túhú sá sání iní-ó te núu quide váha-o àdi ñá túú quide váha-o ndècu-o. ¹³ Te ni ìpⁿ sá ní cadúha Yá Ndiòxí vá cáni iní-ó sá ndácú-xí nguiváha-xi núú-gá, chi nchaandi túhú sá sání iní-ó ndècu túu-xi núú-gá, te diu núú Yáá-áⁿ na càni cuendá-ó nchaa sá quidé-ó.

Xítóhó Jesucristú cúu-gá Dútú ìo cùnnu

¹⁴ Te Xítóhó Jesucristú cúu-gá Dútú ìo cùnnu ndecu ndíhi-o, te diu-gá cúu-gá Déhe Dútú Ndiòxí, te Yáá-áⁿ cuàndaa-gá andiu ní nucúndecu-gá núú Yá Ndiòxí, núú xíáⁿ tàú-xi sá cànchicúⁿ nihnu-ni-o quíndáá iní-ó-gá. ¹⁵ Te mee Yáá-áⁿ ìo cùnnu-gá cúu-gá dútú-ó ndècu ndíhi-o, te ìo na cùndahú iní ñáhá-gá xii-o cuendá sá ñá níhí ndéé-ó cùndecu-o. Te ducaⁿ càda-gá chi ní yáha-gá dàtná yáha mee-o, chi nchaa sá ní yáha-gá-áⁿ ní cuu-xi sá cádá-gá nándi nchaa sá cuèhé sá dúhá ní cùu dico ni ìpⁿ ñá túú ní quide-gá. ¹⁶ Núú xíáⁿ tàú-ó sá nchóó ní yuhu ni iní-ó cáháⁿ ndíhi-o Yá Ndiòxí Yáá ìo cùndahú iní ñáhá xii-o chindee ñaha-gá, te ducaⁿ càda-o te cundàhú iní ñáhá-gá chindee ñaha-gá xii-o ndéda-ni càa oré xíni ñuhu-o-gá.

5

¹ Te nchaa cue dútú cùnnu núú ñáiyu isràel diu-ni ñáiyu cùu-güedé, te ducaⁿ ní ngúndecu-güedé cuendá cada-güedé chiúⁿ sá cúu-xí Yá Ndiòxí cuendá-yu, chi diu cue téé-áⁿ ní xóo nacani cuendá-güedé núú-gá quiti ní xóo cahni-güedé ní xóo nduu táhú-gá, te ducaⁿ ní xóo cada-güedé cuendá sá cádá càhnu iní Yá Ndiòxí cuéchi-yu, te ducaⁿ ní xóo nacani cuendá tucu-güedé núú-gá nchaa dava-gá sá ní xóo níhí-güedé ní xóo nduu táhú-gá. ² Te nchaa cue dútú-áⁿ ní xóo cundee ìni-güedé nchaa sá ní xóo cada nchaa ñáiyu ñá túú ní quide ndáá ñáiyu ñá túú cùtnuní iní-xi, te ducaⁿ ní xóo cada cue dútú-áⁿ chi tñhá-güedé ñá túú ní xóo níhí ndéé-güedé cundecu-güedé cuendá nchaa sá ní xóo yáha-güedé. ³ Te sá cuendá sá dúcáⁿ ñá túú ní xóo níhí ndéé-güedé núu xíáⁿ dai ní xini ñuhu-xi sá tñhá-güedé cuáha-güedé Yá Ndiòxí sá ndúú táhú-gá cuendá mée-güedé dàtná quidé-güedé cuendá ñáiyu.

⁴ Te ni ìpⁿ téé vá ndácú-dè cuu-dé dútú cùnnu cuendá-ni sá càchí iní mée-dè te núu ñá díú mée Yá Ndiòxí ducaⁿ cuini-gá sá cúu-dè dútú cùnnu datná ní quide-gá ndíi Àron. ⁵ Te cuéi Xítóhó Jesucristú chi ñá díú mée-gá ní quide-gá mée-gá ìpⁿ dútú cùnnu nacúaa cada ninu-gá mée-gá, chi mee Tàtá-gá Dútú Ndiòxí ducaⁿ ní cachí-gá sá cúu-gá Dútú cùnnu, te ducaⁿ chi Yá Ndiòxí ní xáhaⁿ-gá:

Yòhó cúu-n Dèhe-í,

te cuini-í sá dúhá-ní cùndecu-n núú ndécú-í.

Duha ní xáhaⁿ-gá xii Xítóhó Jesucristú. ⁶ Te núú tùtú Yá Ndiòxí yódó tnùnì nàcuáa ní xáhaⁿ tucu-gá xii Xítóhó Jesucristú, te duha ní xáhaⁿ-gá:

Yòhó cúu-n dútú cundecu ni caa ni quíhíⁿ, te cùu-n datná ní cuu ndíi Melquisédéc.

Duha ní xáhaⁿ-gá xii Xítóhó Jesucristú.

⁷ Te cùtnàhá ní xíndecu Xítóhó Jesucristú ñuyú-a te níhi ní xóo cáháⁿ ndíhi-gá Yá Ndiòxí te ní xóo cáháⁿ ndàhú-gá núú-gá, te ní xóo ndáhyú-gá òré ducaⁿ ní xóo cáháⁿ ndíhi-gá Yá Ndiòxí, te ducaⁿ ní quide-gá chi ñaha-gá sá Yá Ndiòxí cúu-gá Yáá ndacu dàcácu nihnu ñaha xii-gá cuendá sá vá cùú dúcáⁿ-gá. Te Yá Ndiòxí ní xíndedóho-gá nchaa tnúhu ní cáháⁿ Xítóhó Jesucristú

cuendá sá nǐ quide-gá nchaa nàcuáa ní xáhaⁿ Yá Ndiòxí cada-gá. ⁸ Te sá cuendá nchaa sá nǐ ndoho Xítoho Jesucristú xíáⁿ ní cutnùnǐ iní-gá cada-gá nchaa dava-gá sá vâha nàcuáa cuiní mee Yá Ndiòxí cada-gá. Te ducaⁿ nǐ cuu cuèí cùu-gá Déhe Yá Ndiòxí. ⁹ Te sá dúcáⁿ nǐ quide-gá nchaa nàcuáa cuiní mee Yá Ndiòxí, xíáⁿ nùu vitna cùu-gá Yaá dácâcu nihnu nchaa ñâyíu sàndáá iní ñáhá xii-gá núu ùhú núu ndàhú. ¹⁰ Te mee Yá Ndiòxí ní cachí-gá sá Xítoho Jesucristú cúu-gá dútú cùnùu datná ní cunuu ndí Melquisèdec cùnàhá ní cuu ndí dútú ñuyú-a.

Cuendá ñâyíu cuiní daña nihnu ichi Yá Ndiòxí

¹¹ Te vai-gá tnúhu ndècu cáháⁿ-í nàcuáa ndùu cuendá Xítoho Jesucristú, ndíhi ndí Melquisèdec, te dicó-ni sá nchòhó ío cuèé tècú tnùnǐ-ndó, te yúhú ío úhú nihí-í nàcuáa cáháⁿ-í nàcuáa tecú tnùnǐ-ndó.

¹² Te nchòhó sa ní cuu cuèhé nduu ndècu-ndo ichi Xítoho Jesucristú, te tàú-ndó dânehé-ndó cuè ñâyíu ndècu ichi-gá tnúhu-gá nùu dicó sá cúu, dico xini ñuhu-ni-xi sá cùndècu ñâyíu danéhé ñáhá tnúhu-gá xii-ndo, tnúhu sá ní dâcuáhá-ndó ndéé díhna sá ñà túú ùhú tecú tnùnǐ-ndó. Te sá dúcáⁿ quide-ndo núu xíáⁿ cúu-ndó datná cue landú vitna sàdi camá, landú vátá cúu-gá caxi ditá. ¹³ Chi nchaa ñâyíu cùu datná landú vitna sàdi, ñâyíu-áⁿ cúu nèñuú-yu ñá túú cùtnuní iní-yu nàcuáa cáháⁿ tnúhu sá cáháⁿ nàcuáa cada ndáá-yu cundecú-yu. ¹⁴ Te nchaa sá vátá cúu-gá caxi cue landú yíquiⁿ xíáⁿ cúu-xí cuendá cue ñâyíu sacuéhé, te xíáⁿ cúu-xí datná tnúhu sá dâcuàha ñâyíu sa ní nihí ndéé ndècu ichi-gá, ñâyíu sa ní cutnùnǐ váha iní-xi nándi cùu nchaa sá cuèhé sá dúhá, ndíhi nándi cùu nchaa sá váha.

6

¹ Te xíáⁿ nùu vitna xini ñuhu-xi dacuaha-o dava-gá tnúhu Yá Ndiòxí cuendá ducaⁿ te cuu-o ñâyíu tècú tnùnǐ nchaa tnúhu-gá. Te xini ñuhu-xi sá ncháá tnúhu Xítoho Jesucristú sá ní dâcuáhá-ó ndéé díhna vá dâcuàha-gá-ó datná ní dâcuáhá-ó chi sa tècú tnùnǐ-ó. Te ñá túú-gá xini ñuhu-xi dacuaha-o datná ní dâcuáhá-ó ndéé díhna nàcuáa cada-o ndíxi cuèchi iní-ó cuendá nchaa sá cuèhé sá dúhá quide-o, sá tá dâcuíta nihnu

ñaha xii-o cuáháⁿ ní cùu. Te ducaⁿ vá dâcuàha-gá tucu-o datná ní dâcuáhá-ó ndéé díhna nàcuáa cada-o quindáá iní-ó Yá Ndiòxí, ² ndíhi cuendá nàcuáa ní dâcuáhá-ó nàcuáa cuandute-o, ndíhi cuendá nàcuáa cada-o cacáⁿ ndodo-o ndàha-o díqui ñâyíu ní sândáá iní ñáhá xii-gá. Te ducaⁿ ñà túú-gá xini ñuhu tucu-xi dacuaha-o datná ní dâcuáhá-ó ndéé díhna cuendá nàcuáa ndoto cue ñâyíu ní xihí, ndíhi cuendá nàcuáa ní dâcuáhá-ó sá Yá Ndiòxí daquihiⁿ-gá ñâyíu núu ùhú núu ndàhú ni caa ni quihiⁿ. ³ Te núu Yá Ndiòxí ná cachí-gá, te cuita dacuàha-gá-ó nchaa dava-gá tnúhu sá cùmáni quihiⁿ.

⁴ Te cue ñâyíu sa tècú tnùnǐ tnúhu Yá Ndiòxí, ñâyíu sa xini nchaa nàcuáa ndùu nchaa sá váha quide ñaha Yá Ndiòxí xii-o ndíhi-yu, ñâyíu sa chindee ñaha Espiritú Yá Ndiòxí, ⁵ ñâyíu sa cùtnuní iní-xi sá ío váha tnúhu Yá Ndiòxí, ñâyíu sa xini nàcuáa ta quide Yá Ndiòxí véxi nchaa sá vâ yò tnàhí ndàcu cada, ⁶ te núu ñâyíu-áⁿ ná ngúita tucú-yu daquèe tíhú duúⁿ-yu tnúhu Yá Ndiòxí, te vá ndácú-gá-ó nà canu ichi-ó-yu nàcuáa ndíxi cuèchi iní-yu te núu ducaⁿ na càdá-yu, te sá dúcáⁿ ná càdá-yu te tnàhá-yu cùu-yu datná cue téé ní sahi ñaha xii Xítoho Jesucristú Déhe Yá Ndiòxí núu cùrúxi. Te sá dúcáⁿ ná càdá-yu te ngóo dava-gá ñâyíu cáháⁿ cuèhé-yu cuendá Xítoho Jesucristú. ⁷ Te nchaa ñâyíu cùu-yu datná ñuhu, chi ñuhu-áⁿ ndí tnahá òré cúuⁿ dâú te xihí-xi ndute, te dava ñuhu váha cùu sá xítú ñâyíu, te sá cúu núu ñuhu-áⁿ ío nándíhi-xi, te mee Yá Ndiòxí quidé-gá cúu sá váha núu ñuhú-áⁿ. ⁸ Dico núu da íñu ña ndàa núu ñuhu-áⁿ te ñá túú vèdana nándíhi-xi te núu ducaⁿ, te Yá Ndiòxí vá cúu váha iní-gá cuendá ñuhu-áⁿ sá dúcáⁿ dà íñu ndaa núu-xi, te íñu-áⁿ ndíhi-xi cáyú. Te ducaⁿ sãtnahá-xi cùu ñâyíu dàquèe tíhú tnúhu Yá Ndiòxí chi ñá túú cùu váha iní-gá núu-yu.

Nihí-ó sã ndétú-ó nduu táhú-ó

⁹ Te cuèí duha cáháⁿ-í dico nchòhó cue ñâyíu ío cùu iní-í, chi cùtnuní ndáá iní-í sá vâ càdá-ndó datná xíquide dava-gá ñâyíu, te mee-ni sá váha cuu xii-ndo chi cùu-ndo ñâyíu sa ní naníhí tàhú. ¹⁰ Te ducaⁿ chí Yá Ndiòxí cúu-gá Yaá ío váha quide ndáá, te vá dáná ndòdo

iní-gá nchaa sá vǎha quide-ndo, te ni vǎ dáná ndòdo iní-gá nàcuáa quide-ndo cuu iní-ndó-gǎ, te sá dúcáⁿ quide-ndo cuu iní-ndó-gǎ xǎⁿ chíndèe-ndo cue ñáiyu ndècu ndihí-ndo ichi Xítóhó Jesucristú, te ducaⁿ-ni ta quide-ndo véxi ndéé vitna.

¹¹ Te cuini-í sá ñⁿ ñⁿ-ndo nducu ndee-ndo cada-ndo nacuáa cuini Yǎ Ndiòxí dàtná tá quide-ndo véxi, te ñiu-ni ducaⁿ càda-ndo ndéé ná sǎá nduu nduu táhú-ndó cùndecu-ndo ndihí-gǎ núú ndécú-gǎ, te ducaⁿ te níhí-ndó nchàandi túhú sá ndétú-ndó nduu táhú-ndó cùndecu ndihí-ndo ni caa ni quíhíⁿ. ¹² Te yúhú cuini-í sá nchòhó vǎ túhó-ndo càda-ndo nchaa nacuáa cuini Yǎ Ndiòxí, te cada-ndo dàtná quidé ñáiyu sàndáá iní tnúhu-gǎ, ñáiyu càhnu iní-xi. Te sá dúcáⁿ quidé-yu xǎⁿ níhí-yu nchaa sá ní cachí Yǎ Ndiòxí nduu táhú-yu.

¹³ Te cútñahá ní xáhaⁿ Yǎ Ndiòxí xii ndíi Àbrahám nàcuáa cada-gǎ, te ní cacunehe-gǎ méé-gǎ nàcuáa cutnùnì iní ndíi sá ndáá cada-gǎ nàcuáa ní xáhaⁿ-gǎ xii ndíi, te vǎ yòò ñⁿ ni càcunehe-gǎ cuendá sá quíndáá iní ndíi tnúhu ní cáháⁿ-gǎ. Te ducaⁿ ní quide-gǎ chí ñⁿdíi díi-ní mee-gǎ ío cùnno-gǎ. ¹⁴ Te duha ní xáhaⁿ-gǎ xii ndíi Àbrahám: “Yòhò té Àbrahám na càchí tnúhu ndáá-í xii-n sǎ ío chindee ñàha-í xii-n, te cáyá cuéhé víhí ñàní tnáhá-n”, duha ní xáhaⁿ-gǎ xii ndíi. ¹⁵ Te ndíi Àbrahám ío ní quide ndee iní ndíi ní xíndetu ndíi, te ducaⁿ te Yǎ Ndiòxí ní quide-gǎ nàcuáa ní xáhaⁿ-gǎ cada-gǎ sá cúú-xí ndíi. ¹⁶ Te núú ñⁿ ñáiyu càháⁿ ñⁿ tnúhu ndáá cuiti te càcu nehé-yu Yǎ Ndiòxí cuendá quíndáá iní tnàha ñáiyú-yu tnúhu càháⁿ-yu, te òré ducaⁿ na càháⁿ-yu te ñá túú-gǎ sá dácáá ñáiyu càháⁿ ndihí-yu cuendú. ¹⁷ Te ducaⁿ ní quide Yǎ Ndiòxí ní cáháⁿ ndáá-gǎ sá cádá-gǎ nàcuáa ní cachí-gǎ, te ducaⁿ ní cáháⁿ-gǎ cuendá nchaa ñáiyu ní cachí-gǎ nduu táhú sǎ cádá-gǎ nàcuáa cutnùnì iní-yu sá quidé-gǎ ñⁿ sá càháⁿ-gǎ, te ni ñà túú nàdama-gǎ ñⁿ sá càháⁿ-gǎ. ¹⁸ Te nchoo ní natuha-o Yǎ Ndiòxí cuendá dácácu ni-hnu ñàha-gǎ xii-o núú ùhú núú ndáhú, te ní níhí-ó tnúhu ndee iní ndécú ndihí-o cuendá sá vǎ dàñá ndèé-ó cùndetu-o sáá nduu nduu táhú-ó cùndecu-o ndihí-gǎ. Te ducaⁿ ní níhí-ó tnúhu ndee iní chí Yǎ Ndiòxí ní cáháⁿ ndáá-gǎ sá cádá-gǎ nàcuáa ní cachí-gǎ, te ñá túú dándahú ñàhá-gǎ, te ni ñà túú

nàdama-gǎ ñⁿ sá ní cachí-gǎ cada-gǎ. ¹⁹ Te tnúhu ndee iní ndécú ndihí-o xǎⁿ quidé-xí cùtnunì ndáá iní-ó sá ndúú táhú-ó cùndecu-o ndihí Yǎ Ndiòxí núú ndécú-gǎ, te ducaⁿ cùtnunì ndáá ndisa iní-ó sá cuendá Xítóhó Jesucristú Yáá ndécú núú Yǎ Ndiòxí. ²⁰ Te ducaⁿ ní nucùndecu Xítóhó Jesucristú núú Yǎ Ndiòxí cuendá ducaⁿ càncichicⁿ ni-hnu-o càda-o, te ducaⁿ ní nucùndecu-gǎ núú Yǎ Ndiòxí chí cùu-gǎ dútú cùnno datná ní cunuu ndíi Melquisèdèc ñuyúú-a, te ducaⁿ-ni cùu-gǎ dútú cùnno ni caa ni quíhíⁿ.

7

Xítóhó Jesucristú cúu-gǎ dútú dàtná ní cuu ndíi Melquisèdèc

¹ Te ndíi Melquisèdèc ní xíndaha ndíi cue ñáiyu ñuú Sàlém, te ní cuu ndíi dútú ní xinu cuechi ndíi núú Dútú Ndiòxí Yáá ío cùnno. Te ndíi Melquisèdèc-áⁿ ní xicáⁿ táhú ndíi núú Yǎ Ndiòxí cuendá ndíi Àbrahám cút-ñàhá ní sáháⁿ ndíi Àbrahám-áⁿ ní nàá ndíi ndihí cue dava-gǎ cue téé yíndaha ñáiyu. Te cue téé-áⁿ ñà túú ní ndàcu-güedé nàá-güedé ndihí ndíi Àbrahám-áⁿ chí ní xíta-güedé. ² Te nchaa sá ní níhí ndíi Àbrahám-áⁿ núú ní nàá ndíi, te ní quide ndíi úxí xichi te ñⁿ xichi núú ùxí-áⁿ ní sáñaha ndíi xii ndíi Melquisèdèc. Te ñiu ndíi Melquisèdèc-áⁿ quée-xí: Téé ío vǎha quide ndáá yíndaha ñàha xii ñáiyu, duha quèe-xi. Te ní xóo danàni ñàhá-yu xii ndíi Téé yíndaha ñuú Sàlém, duha ní xóo danàni ñàhá-yu. Te tnúhu Sàlém-áⁿ quée-xí: Ñuú ndécú ñàhi, duha quèe-xi tnúhu-áⁿ. Núú xǎⁿ quée túcu-xi nacuáa nàni ndíi Téé yíndaha ñuú ndécú ñàhi, duha quèe tucu-xi ñiu ndíi. ³ Te ñá túú tnúhu núu yoo cùu tátá ndíi ndihí nǎná ndíi, te ni ñà túú tnúhu núu yoo cùu xí ndíi ndihí xítñá ndíi, te ni ñà túú tnúhu núu nándí cùu ñáiyu ní cuu ñàní tnáhá ndíi ní xíndecu ndéé sanaha-gǎ, te ni ñà túú tnúhu núu ná ama ní cacu ndíi, te ni ñà túú tnúhu núu ná ama ní xíhí ndíi. Te ndíi-áⁿ ducaⁿ-ni ní cuu ndíi dútú ní xíndecu ndíi, te ducaⁿ sǎtnahá-xi cùu Xítóhó Jesucristú déhe Yǎ Ndiòxí chí cuu-gǎ dútú ní caa ni quíhíⁿ.

⁴ Te vitna chí cuàha vǎha cuendá sá ndíi Melquisèdèc ní cuu ndíi ñⁿ téé ío ní cuu càhnu ní xíndecu ñuyúú-a, chí ndíi

Àbrahám tée ní cuu ñaní tnáhá-ó nǐ xín-decu ndéé sanaha nǐ quide ndíí úxí xichi nchaa sá nǐ nǐhí ndíí núú nǐ nàá ndíí. Te ìíⁿ xichi núú úxí-áⁿ nǐ sáñaha ndíí xii ndíí Melquisèdèc. ⁵ Te ndíí Moisés ní chídó tnùní ndíí nàcuáa cada nchaa dútú, cue tée ní cuu ñaní tnáhá ndíí Lèví sá cuè tée-áⁿ queheⁿ-güedé ìíⁿ xichi núú úxí xichi sá nǐhí cue ñáyíu isràèl ñáyíu cùu ñaní tnáhá-güedé cuu cuendá-güedé. Te ducaⁿ quide-güedé cuèi ñaní tnáhá-güedé ndíhí-yu ní cuu ndíí Àbrahám. ⁶ Te cuèi ñá dǔú ñaní tnáhá ndíí Melquisèdèc cùú ndíí Àbrahám dico ní queheⁿ ndíí Melquisèdèc-áⁿ ìíⁿ xichi núú úxí xichi nchaa sá nǐ nǐhí ndíí Àbrahám. Te ndíí Melquisèdèc-áⁿ nǐ xícáⁿ táhú ndíí núú Yá Ndiòxí cuendá ndíí Àbrahám. Te òu-ni ndíí Àbrahám-áⁿ nǐ xáhaⁿ Yá Ndiòxí xii ndíí sá cádá vâha ñaha-gâ xii ndíí. ⁷ Te sa cùtnuní iní-ó sá núú ìíⁿ tée na cacáⁿ táhú-dé núú Yá Ndiòxí cuendá ìíⁿ ñáyíu, te tée-áⁿ cùnù-gá-dé. ⁸ Te cue dútú ñáyíu isràèl quéhéⁿ-güedé ìíⁿ xichi núú úxí xichi nchaa sá nǐhí-yu cùu cuendá-güedé, te cue tée-áⁿ cùú-güedé. Te núú tütú Yá Ndiòxí càchí-xi sá ndíí Melquisèdèc ndécú-ní ndíí, te ducaⁿ càháⁿ-xi chi ñá túú tnùhu sá nǐ xíhí ndíí. ⁹⁻¹⁰ Te sá dúcáⁿ nǐ sáñaha ndíí Àbrahám sá nǐ nduu táhú ndíí Melquisèdèc, te xíáⁿ cada iní-ó sá sá ndecu ndíhí ndíí Àbrahám cue ñaní tnáhá ndíí Lèví cue tée cùu dútú, cue tée queheⁿ ìíⁿ xichi núú úxí xichi nchaa sá nǐhí ñáyíu isràèl cuèi vátá cacú-gâ-güedé. Te cada iní-ó sá tnáhá-güedé nǐ sâha-güedé ndíí Melquisèdèc ìíⁿ xichi núú úxí xichi nchaa sá nǐ nǐhí ndíí Àbrahám núú nǐ nàá ndíí. Te ducaⁿ cada iní-ó chi cue tée-áⁿ cùú-güedé ñaní tnáhá ndíí Àbrahám cuèi vátá cacú-gâ-güedé dàvá-áⁿ.

¹¹ Te sá cuendá cue dútú cue tée cùu ñaní tnáhá ndíí Lèví ní ngúndecu ndíhí cue ñáyíu isràèl tnùhu sá sánú ìchi ñaha xii-yu nàcuáa cada-yu cundecú-yu. Te ñaní tnáhá ndíí Àrón cùú cuè dútú-áⁿ. Te núú dicó cue dútú-áⁿ ní ndàcu-güedé cada-güedé nàcuáa cudíu ñáyíu isràèl núú Yá Ndiòxí, te ñá túú-gâ xíní ñùhu-xi ngúndecu ìngá dútú dàtná ndíí Melquisèdèc ní cùu. Te dútú-áⁿ ñá túú ní cùu-dé dàtná ní cuu cue ñaní tnáhá ndíí Àrón. ¹² Te núú cuè dútú cue tée cùu ñaní tnáhá ndíí Lèví-áⁿ nǐ ngúndecu ìngá dútú. Te sá dúcáⁿ nǐ ngúndecu ìngá

dútú xíáⁿ dacuítí nǐ xini ñuhu-xi sá dàma nàcuáa nduu tnùhu sá sánú ìchi ñaha xii-yu nàcuáa cada-yu cundecú-yu. ¹³⁻¹⁴ Te òu-ni cùendá dútú-áⁿ sa nǐhí-ó tnùhu, te dútú-áⁿ cùú Xítohó Jesucristú, te ñá dǔú ñaní tnáhá ndíí Àrón cùú-gâ chi ñaní tnáhá ndíí Judá cùú-gâ. Te nchaa-o tà xini ndáá-ó sá ñaní tnáhá ndíí Judá cùú-gâ, te ndíí Moisés ñá túú tnáhí ná ní càchí ndíí cuendá cue ñaní tnáhá ndíí Judá sá cùú-güedé dútú, chi ni ìíⁿ-güedé ñá túú ní cùu-güedé dútú ní cùu.

¹⁵ Te vitna cùtnuní ndáá iní-ó nàcuáa ní cuu, chi Xítohó Jesucristú cùú-gâ ìngá dútú dàtná ní cuu ndíí Melquisèdèc. ¹⁶ Te ñá dǔú cuendá tnùhu sá sánú ìchi ñaha xii ñáyíu nàcuáa cada-yu cundecú-yu ducaⁿ ní cùu-gâ dútú, chi ní cuu-gâ dútú cuendá sá cùú-gâ Yáa cundecu ní caa ní quíhíⁿ chi vá ìíⁿ nduu te ndíhí nihnu-gâ. ¹⁷ Te duha ní xáhaⁿ Yá Ndiòxí xii-gâ:

Yòhó cùú-n dütú dàtná ní cuu ndíí Melquisèdèc,

te cundecu-n nchaa nduu nchaa quíú.

Duha ní xáhaⁿ Yá Ndiòxí xii-gâ. ¹⁸ Te xíáⁿ núu nchaa tnùhu ndéé díhna, tnùhu sá nǐ xíndecu ndíhí cue dútú ñá túú-gâ cùnùu-xi vitna chi ñá túú-gâ xíní ñùhu-xi te ní ñá túú ná chindèe ñaha-xi. ¹⁹ Te òu-ni tnùhu-áⁿ cùú-xí tnùhu sá ní chídó tnùní ndíí Moisés canu ìchi ñaha xii ñáyíu nàcuáa cada-yu cundecú-yu. Te tnùhu-áⁿ ñá túú vè-dana ní quide-xi nàcuáa chindee-xi ñáyíu cudíu-yu núú Yá Ndiòxí. Dico vitna ní ngúndecu ndíhí-o tnùhu ndee ìní sá ìo-gâ vâha dàcúúxí tnùhu ndéé díhna, chi ndècu ndíhí-o Xítohó Jesucristú Yáa cùú dütú-ó. Te Yáa-áⁿ quidè-gâ tnáhá tnùhu-o ndíhí Yá Ndiòxí vitna.

²⁰ Te Yá Ndiòxí ní càháⁿ ndáá cuítí-gâ sá Xítohó Jesucristú cuu-gâ dútú. ²¹ Dico ñá túú ducaⁿ ní càháⁿ-gâ cuendá cue ñaní tnáhá ndíí Lèví cue tée ní cuu dútú, cuèi mei òré ní chisaha-güedé ní cuu-güedé dütú. Te cùtnáhá ní chisaha Xítohó Jesucristú cùú-gâ dütú, te Yá Ndiòxí ní xáhaⁿ ndáá cuítí-gâ xii-gâ, te duha ní xáhaⁿ-gâ:

Yúhú Dütú Ndiòxí càháⁿ ndáá cuítí-í te vá dàtà-í tnùhu càháⁿ-í:

“Yòhó cùú-n dütú dàtná ndíí Melquisèdèc,

te cundecu-n ní caa ní quíhíⁿ.”

Duha ní xáhaⁿ Yá Ndiòxí xii Xítohó Jesucristú. ²² Te Xítohó Jesucristú quidè-gâ

nàcuáa cutnùnì ndáá iní-ó sã Yã Ndiõxí cada-gá ingá núú sã váha sá cúú-xí-ó dàtná ní cachí-gá, te xíãⁿ cúú-xí sã ïo-gá váha dàcúúxí tñuhu ní cáháⁿ-gá ndéé díhna. ²³ Te ïo cuéhé cue ñani tñáhá ndí Lèví ní cuu-güedé dútú, te ducaⁿ cuendá sã ñà túú ní cùdí-güedé cundecu-güedé chi ní ndíhi-güedé ní xíhí. ²⁴ Dico Xítohó Jesucristú chi vá cùú-gá, chi cundecu-gá ni caa ni quíhíⁿ núu xíãⁿ diu-ni-gá cuu-gá dútú, te vá yõo ìiⁿ-gá cuu dútú cada núú-gã. ²⁵ Te núu xíãⁿ Xítohó Jesucristú dácäcu ni hnu ñaha-gã xii nchoo ñäyiu núú ùhú núú ndàhú, nchoo ñäyiu sàndáá iní ñáhá xii-gã, te diu-ni nchoo cùu-o ñäyiu tñáhá tñuhu ndíhi Yá Ndiõxí, te vá ìiⁿ ndùu-gá te cuíta ni hnu-o. Te ducaⁿ chi Xítohó Jesucristú ñà túú xòcuíñí-gá núú Yã Ndiõxí cáháⁿ ndàhú-gá cuendá-ó.

²⁶ Te Xítohó Jesucristú cúú-gã Yáá cúú dútú cúnùu xini ñuhu-o cundecu ndíhi-o, te diu-gá cúú-gã Yáá chíndèe chitúu ñaha xii-o, te cùu-gá Yáá ïo quide ndáá núú Yã Ndiõxí, te cùu-gá Yáá cándòo canine chi ñà túú tñáhí cuéchi-gá. Te ñà túú tñáhí quide-gá dàtná quidé nchaa cue ñäyiu ndècu ichi cuéhé ichi duha, te cùu-gá Yáá ní nucúndecu andíu núú ndécú Yã Ndiõxí te yáçáⁿ táxí tñùnì-gá. ²⁷ Te ñà túú quide-gá dàtná ní quide cue dútú ní cunuu ní xíndecu, chi cue dútú-ãⁿ ìiⁿ nduu ìiⁿ nduu ní xóo cahni-güedé quítì ní xóo nduu táhú Yã Ndiõxí, te díhna-gá cuendá nchaa cuéchi mee-güedé ducaⁿ ní xóo cada-güedé te dàt-nùnì ducaⁿ ní xóo cada tucu-güedé cuendá nchaa cuéchi ñäyiu. Dico Xítohó Jesucristú chi ìiⁿ xito-ni ní xíhí-gá sá cúú-xí nchaa ñäyiu chi ducaⁿ ní sani iní-gá, te vá ìiⁿ ndùu-gá ducaⁿ càda tucu-gá. ²⁸ Te sá cuendá nchaa tñuhu ní chídó tñùnì ndíi Moisés xíãⁿ ní xíndecu cue téé ní cuu dútú cúnùu, te cue téé-ãⁿ ní cuu-güedé cue téé yíçá cuéchi-xi. Te sátá dúcáⁿ ní chídó tñùnì ndíi Moisés nàcuáa cada ñäyiu, te ní xica cuéhé víhí ndùu te dàt-nùnì ní cáháⁿ ndáá cuití Yá Ndiõxí sá Dèhe-gá cuu-gá dútú cúnùu. Te Yáá cúú Dèhe-gá-ãⁿ ní quide-gá nchaa nàcuáa tàù-xi cunduu, te diu-ni ducaⁿ càda-gá ni caa ni quíhíⁿ.

8

Xítohó Jesucristú cúú-gã dútú cúnùu

¹ Te Xítohó Jesucristú Yáá cúú dútú cúnùu ndecu ndíhi-o cuándaa-gá andíu, te ní ngóo-gá xio cùha Dútú Ndiõxí Yáá ïo cúnùu, te tñáhá-gá cúnùu-gá. Te diu cuendá-a cùu-xi sá ïo-gá cúnùu ta cáháⁿ-ndí véxi. ² Te núú ndécú Yã Ndiõxí cúú-xí núú ìí víhí. Te cada iní-ó sã cúú-xí ìiⁿ vehe te xíãⁿ ndécú Xítohó Jesucristú cúú-gã dútú, te vehe-ãⁿ ní dácáá mèe Yá Ndiõxí te ñà díú cue téé ñuyíu-a. ³ Te sá cuendá nchaa tñuhu ní chídó tñùnì ndíi Moisés xíãⁿ ní xíndecu cue dútú cúnùu cuendá sá cáhni-güedé quítì nduu táhú Yã Ndiõxí, te nacani cuendá-güedé núú-gã nchaa dava-gá sá nihí-güedé nduu táhú-gã. Te xíãⁿ núu dai ní xini ñuhu-xi sá tñáhá Xítohó Jesucristú cuáñaha-gã ìiⁿ sá ndúú táhú Yã Ndiõxí, te táhú-ãⁿ cúú-xí mèe-gá chi ní xíhí-gá ní cuu-gá dàtná ìiⁿ táhú sá cúú-xí Yã Ndiõxí. ⁴ Te núu ni xíndecu-ni Xítohó Jesucristú ñuyíu-a te vá cúú-gã dútú ní cùu, chi sa ndècu cue dútú sãñaha nchaa sá ndúú táhú Yã Ndiõxí dàtná cáháⁿ nchaa tñuhu ní chídó tñùnì ndíi Moisés. ⁵ Te nchaa sá quidé cue dútú ñäyiu isràél nùtñahá-xi luha nchaa sá quidé Xítohó Jesucristú Yáá cúú dútú cúnùu ndecu andíu. Te quèe ndáá-xi nàcuáa ní xáhaⁿ Yã Ndiõxí xii ndíi Moisés cútñahá tá cùyatni nguíta ndíi dacàa ndíi vehe-gá, te duha ní xáhaⁿ-gã: “ïo váha cada cuendá-n nàcuáa dacàa-n vehe-í dàtná cáá sã ní dánèhè ñáhà-í xii-n xití yucu”, duha ní xáhaⁿ-gã xii ndíi. ⁶ Dico vitna chi Xítohó Jesucristú cúú-gã dútú cúnùu, te ïo-gá càhnu nduu chiuⁿ quide-gá dàcúúxí cue dútú cue ñäyiu isràél. Te diu Xítohó Jesucristú cúú-gã Yáá quidé tñáhá tñuhu-o ndíhi Yá Ndiõxí, te ducaⁿ chi Yá Ndiõxí ïo-gá váha ndùu tñuhu ní cáháⁿ-gá xito cùu uú dàcúúxí tñuhu ní cáháⁿ-gá ndéé díhna, te ducaⁿ ïo váha ndùu tñuhu ní cáháⁿ-gá xito cùu uú chi ní cachí-gá sá ingá núú sã ïo-gá váha cada ñaha-gã xii-o vitna.

⁷ Te núu nàcuáa ní cachí Yã Ndiõxí cada ñaha-gã xii-o ndéé díhna ni quide-xi nchaa nàcuáa tàù-xi cunduu nàcuáa nduu táhú-ó cundecu váha-o núú-gã ñà, te ñà túú xini ñuhu-xi cáháⁿ tucu-gá sá cadá-gã ingá núú sã váha sá cúú-xí-ó vitna ni cuu. ⁸ Te Yá Ndiõxí ñà túú ní cùu váha iní-gá núú ñäyiu isràél núu xíãⁿ ní cáháⁿ-gá cuendá-yu, te duha ní cachí-gá:

Yúhú cùu-í Dútú Ndiõxí, te duha ndùu

tnúhu na càháⁿ-í: Sáá nduu te cada-í ingá núú sá vâha sá cúú-xí cuè ñaní tnáhá ñâyiu isrâél, ndihi cue ñaní tnáhá ndii Jùdá diu-ni ñâyiu isrâél.

⁹Te tnúhu sá càháⁿ-í-a ñá túú ñⁿ-ni cuu-xi ndihi tnúhu sá ní xáhaⁿ-í xii cue ñâyiu ní cuu ñaní tnáhá-yu ní xín-decu ndéé sanaha càda-í-yu, te diu-ni dàvá-áⁿ ní quide yica-í ní ndeñuhu-í-yu nacióⁿ Ègíptú, te ñá túú ní cuini-yu tñí-yu tnúhu ní xáhaⁿ-í xii-yu cuèndá ducaⁿ càda vâha-í-yu, te xíáⁿ núu ní dáñá nihnu-í-yu ñá túú-gã ní quide cuendá-í-yu.

¹⁰Te na sàá nduu te duha nduu tucu ingá núú sá vâha cada-í cue ñâyiu isrâél. Te yúhu cada-í nàcuáa cutnúni vâha iní-yu nàcuáa cuini-í cadá-yu, te ducaⁿ nì yuhu ní iní-yu cadá-yu. Te yúhu Yá Ndióxi quindaha-í-yu, te mèe-yu cuú-yu ñâyiu cùu cuendá-í.

¹¹Te dàvá-áⁿ chi ní ñâyiu cùu ndi meé-yu, te ní cuè dava-gá ñâyiu vá cùtnúhu tnáhá-yu sá nátùha ñahá-yu xii-í, chi dàvá-áⁿ nchaa ñâyiu cundecu ndihi ñahá-yu xii-í, cuèi ñâyiu cùnunu te cuèi ñâyiu ñá túú cùnunu.

¹²Te dàvá-áⁿ cada càhnu iní-í nchaa sá cuèhé sá dúhá quidé-yu, te vá ñⁿ ndùu-gá ndacu iní-í nchaa sá quidé-yu.

Duha ní cachí Yá Ndióxi cuendá ñâyiu isrâél. ¹³Te sá dúcáⁿ ní càháⁿ Yá Ndióxi sá cadá-gã ingá núú sá vâha sá cúú-xí ñâyiu xíáⁿ cùtnúni sá tnúhu sá ní càháⁿ-gã díhna ñá túú-gã xíni ñùhu-xi. Te cada iní-ó sá tnúhu-án cúú-xí ñⁿ sá ní cunaha ndècu te ñá túú-gã nándihí-xi te cuíta-ná-xi, ducaⁿ sãtnahá-xi cùu tnúhu sá ní càháⁿ-gã ndéé díhna.

9

Cuendá vehe Yá Ndióxi

¹Te tnúhu sá ní càháⁿ Yá Ndióxi ndéé díhna cùu-xi cuendá nàcuáa cada ñâyiu isrâél chiñuhu ñahá-yu xii-gã, ndihi cuendá vehe-gá caa ñuyú-a. ²Te ñâyiu isrâél ní dácáã-yu vehe Yá Ndióxi, te vehe-án ní cuu-xi vehe dóó te ní xúhuⁿ nehu xití-xi. Te cuártú díhna ní xínani-xi cuártú ní cuu

íí, te xíáⁿ ní xíndecu ñⁿ sá ndéé ditè-xi sá ní cándodó ñⁿ caa candíl núú ditè-xi, te ní xínutnii ñⁿ mèsá ní xóo códó pàá ní xóo nduu táhú Yá Ndióxi. ³Te cuártú cúú úú ní xínani-xi cuártú ní cuu íí víhí-gã. ⁴Te xití cuártú-án ní xínutnii ñⁿ sá ní cuáha mee-ni díhúⁿ cuááⁿ te núú xíáⁿ ní xóo cahmi-güedé dúsa sá sàháⁿ tnámí. Te diu-ni xíáⁿ ní xíndecu tucu ñⁿ cájá ní cuu mee-ni díhúⁿ cuááⁿ te xití cájá-án ní xúhuⁿ ñⁿ lítu ní cuáha mee-ni díhúⁿ cuááⁿ, te xití lítu-án ní xúhuⁿ mánáá sá ní xóo cací-yu dàvá-áⁿ. Te diu-ni xití cájá-án ní xúhuⁿ tnuudí ndí Àron sá ní saa itá-xi, ndihi yúú sá ní xíndecé tnúhu ní càháⁿ Yá Ndióxi nàcuáa cada ñâyiu. Te duha ní xínani cájá-áⁿ: Cájá sá ñùhú tnúhu ní càháⁿ Yá Ndióxi sá cúú-xí ñâyiu, duha ní xínani-xi. ⁵Te núú cájá-án ní cándodó úú tnáhá sá ní cadúha-yu, te xíáⁿ cáá-xí dàtná cáá espíritú xínú cuèchi núú Yá Ndióxi. Te cuèndá úú xíáⁿ ní cutnúni iní-yu sá fo càhnu cuu Yá Ndióxi, te sá ní cadúha-yu-án ndéé ndíxíⁿ-xi, te ndíxíⁿ-xi-án dàhu-xi xio xio núú quidé càhnu iní Yá Ndióxi nchaa yíca cuèchi ñâyiu, dico vá cúú-gã càháⁿ-í cuèndá nchaa dava-gá xíáⁿ vitna.

⁶Te nchaa xíáⁿ ní xíndecu xití vehe Yá Ndióxi, te cue dútú ní xóo quíhu-güedé ñⁿ nduu ñⁿ nduu xití cuártú díhna ní xóo cada-güedé nàcuáa tàù-güedé cada-güedé sá cúú-xí Yá Ndióxi. ⁷Te cuártú cúú úú-án chi mee-ni dútú cùnunu ní xóo quíhu-dé ñⁿ xito-ni ndí tnahá quíu. Te ndí tnahá óre ducaⁿ ní xóo quíhu dútú cùnunu-án te ní xóo canehe-dé ñíñí ní xóo quíhu ní xóo nduu táhú Yá Ndióxi. Te ducaⁿ ní xóo cada dútú-án cuèndá sá Yá Ndióxi cada càhnu iní-gá nchaa yíca cuèchi mee-dé, ndihi nchaa yíca cuèchi ñâyiu. ⁸Te sá dúcáⁿ mèe-ni dútú cùnunu ní xóo quíhu-dé xití cuártú ní cuu íí-gã-án, xíáⁿ Espíritú Yá Ndióxi quidé-xí cùtnuní iní-ó sá ñíni ducaⁿ ní xíndecu vehe-án ní xóo cadá-yu nàcuáa ní xóo cúnaha Yá Ndióxi cadá-yu. Te xíáⁿ cùtnuní sá vátá sàá-gã nduu càháⁿ ndihí-yu Yá Ndióxi nàcuáa tàù-xi cundu. ⁹Te sá dúcáⁿ ní xíndecu vehe-án, ndihi sá dúcáⁿ ní xóo cada nchaa cue dútú-án, xíáⁿ cùtnuní iní-ó nàcuáa quide Yá Ndióxi vitna, chi nchaa quiti ní xóo cahni cue dútú-án ní xóo nduu táhú Yá Ndióxi, ndihi nchaa dava-gá sá ní xóo nduu táhú-gã ñá túú

ní quide-xi nacuaá nduu ndoo nduu nine iní cue ñáyiú nacuaá cutnùn iní-yu sá ñà túú-gã cuéchi-yu ndècu núú Yá Ndiöxí. ¹⁰Te sá dúcáⁿ ní xóo cada nchaa dútú-áⁿ ní ñíhí tnáhá-xí ndíhi nchaa tnúhu sá dánché ñáhá xii ñáyiú ná cúú sá cáxi-yu ndíhi ná cúú sá cúú còhò-yu ndíhi nacuaá ndáhá-yu. Te tnúhu-áⁿ ní cuu-xi mee-ni sá ní sanu ichi ñaha xii-yu nacuaá cundecú-yu ñuyíú-a. Te tnúhu-áⁿ ní nándíhi-xi ndéé ní sáá nduu ní nadama Yá Ndiöxí tnúhu-áⁿ cuendá sá vã dúcáⁿ-gã cadá-yu cundecú-yu.

¹¹Te Xítohó Jesucristú ní quixi-gã ñuyíú-a, te ñu-gã cúú-gã Yaá cúú dútú cúnúu, te xíáⁿ núu quide-gã nchaa sá vaha sá cúú-xí-ó. Te vitna ní nucúndecu-gã núú òo vii ío vaha càa, te núú ndécú-gã-áⁿ ñà túú cùu-xi ìⁿ vehe sá ní dácáá cuè téé ñuyíú-a. ¹²Te cada iní-ó sá Xítohó Jesucristú cuánguihu-gã xití cuartú núú ní cuu íí víhí dàtná ní xóo cada dútú cúnúu ní xíndecu ndéé sanaha, chi ní nucúndecu-gã núú ndécú Yá Ndiöxí. Dico ñà túú ní quide-gã dàtná ní xóo cada dútú cúnúu ní xíndecu ndéé sanaha, chi dútú-áⁿ òré ní xóo quíhu-dé xití cuartú ní cuu íí-gã-áⁿ, te ní xóo canehe-dé ñíhí chivá ndíhi ñíhí chëhlu ní xóo quíhu. Dico Xítohó Jesucristú chi ñíhí mée-gã ní sati ní xihí-gã núú cùrúxí, te xíáⁿ duuⁿ duuⁿ cuáháⁿ-gã ní nucúndecu-gã núú ndécú Yá Ndiöxí. Te sá dúcáⁿ ní quide-gã xíáⁿ ní naníhí tàhù-ó. ¹³Te nchaa ñáyiú ní xóo cada nacuaá vã cúú-gã-yu ñáyiú ní cuu íí, ñáyiú-áⁿ ní xóo còdó ñáhá cuè dútú ñíhí ndicutu, ndíhi ñíhí chivá, ndíhi yáá cùnù chëhlu quití sahni-güedé cuendá nduu íí tucú-yu. ¹⁴Dico ñíhí Xítohó Jesucristú chi ío-gã nándíhi-xi sá cúú-xí nchò ñáyiú xíndecu vitna! Te cuendá ñíhí-gã-áⁿ, chi Espíritú Yá Ndiöxí sá ndécú nchàa nduu nchaa quíú ní cuu ìⁿnuu-xi ndíhi Xítohó Jesucristú sá cúú cùu-gã cuendá cuu-gã dàtná ìⁿ tàhù sá cúú-xí Yá Ndiöxí cuéi cùu-gã Yaá ñà túú tnàhí cuéchi-xi, te ní sati ñíhí-gã te ní xihí-gã. Te cuendá xíáⁿ ní cutnùn iní-ó sá Yá Ndiöxí ní quide càhnu iní-gã nchaa sá ñà túú vaha ní quide-o, te ní nduu ndoo ní nduu nine iní-ó. Te ducaⁿ ní nduu ndoo ní nduu nine iní-ó cuendá sá ndácú-ó cùnù cuechi-o núú Yá Ndiöxí Yaá ndécú nchàa nduu nchaa quíú.

¹⁵Te Xítohó Jesucristú ní quide ndáá-gã

núú Yá Ndiöxí cuendá cue ñáyiú ndècu ñuyíú-a. Te cuendá xíáⁿ Yá Ndiöxí cada-gã ingá núú sá vaha sá cúú-xí-yu dàtná ní cachí-gã, te ducaⁿ càda-gã sá cuendá nchaa ñáyiú ní cáhãⁿ-gã cundecu ndíhi-gã, chi ñáyiú-áⁿ nduu tàhù-yu cundecu ndíhi vaha ñáhá-yu xii-gã ní caa ní quíhíⁿ chi ducaⁿ ní cachí-gã, te ducaⁿ chi Xítohó Jesucristú ní xihí-gã núú cùrúxí cuendá sá Yá Ndiöxí cada càhnu iní-gã nchaa yícá cuéchi-yu, nchaa cuéchi sá ní quide-yu cutnàhá ní cùnùu tnúhu sá ní cáhãⁿ-gã dítna. ¹⁶Te nchoo xini-ó sá núu ìⁿ téé na càdúha ìⁿ tutú nacuaá cada ñáyiú dàcàhnu-yu nchaa sá ndécú ndíhi-dé, te tutú-áⁿ xini ñùhu-xi ndéé ná yaha nduu cúú-dé. ¹⁷Te ñà túú tàu-xi cada ñáyiú nacuaá càhãⁿ-xi núú tütú-áⁿ ñini ndècu téé ní cadúha, dico sátá ná yaha cuú-dé te cadá-yu nacuaá càhãⁿ-xi. ¹⁸Te cuéi tnúhu ní cáhãⁿ Yá Ndiöxí ndéé díhna nacuaá cada vaha-gã ñáyiú, te ñu-ni ndíhi ñíhí ní cundáá-xi chi ní sahni-güedé quití te ní sati ñíhí-güedi. ¹⁹Te ndíi Moisés ní cáhãⁿ ndodo ndíi núú nchàa ñáyiú nacuaá ní cachí Yá Ndiöxí cadá-yu, te nacuaá-ni ndùu tnúhu ní chídó tnùnì ndíi núú tütú ndíi ní cáhãⁿ ndíi, te ní dácá ndíi ndute ñíhí chëhlu ndíhi ñíhí chivá líhli, te ní queheⁿ ndíi ìⁿ dité yutnu nàni hisópó ndíhi luha idí ticuèhé, te ní chindóyo ndíi ñíhí-áⁿ. Te ní sódó ndíi núú tütú ndéé tnúhu Yá Ndiöxí sá ní chídó tnùnì ndíi-áⁿ, te tnàhá cue ñáyiú xíndecu-áⁿ ní chúcú ndíi. ²⁰Te ní xáhaⁿ ndíi Moisés xii-yu: “Cuendá ñíhí-a ní cundáá sá Yá Ndiöxí cada ñaha-gã xii-ndo sá vaha chi ducaⁿ ní cachí-gã cada-gã sá cúú-xí-ndó”, duha ní xáhaⁿ ndíi xii-yu. ²¹Te ñu-ni ducaⁿ ní quide tucu ndíi ní chúcú ndíi ñíhí vehe-gã ndíhi nchaa sá nándíhi-güedé òré chíñùhu-güedé Yá Ndiöxí ndécú xití vehe-gã-áⁿ. ²²Te tnúhu ní chídó tnùnì ndíi Moisés càchi-xi sá mée-ní ñíhí chucu-güedé nchaa sá cànehe chiu-güedé òré chíñùhu-güedé Yá Ndiöxí, te sacú-nã te ndíhi ndoo nchaa xíáⁿ chucu-güedé ñíhí ni cùu. Te dacuítí ní xini ñùhu-xi sá cáti ñíhí cuendá ducaⁿ càda cahnu iní Yá Ndiöxí nchaa yícá cuéchi ñáyiú.

Xítohó Jesucristú ní xihí-gã núú cùrúxí cuendá sá vã cùndecu-gã cuéchi-o núú Yá

Ndiöxi

²³ Te sá cuendá sá nǐ xíhí Xítóhó Jesucristú núú cùrúxí, xiǎⁿ ñá túú-gǎ cuéchi-o ndècu núú Yǎ Ndiöxí. Te cuendá nchaa sá nǐ xíhí xití vehe-gǎ sá nǐ dácáá ñáyiú isràèl xiǎⁿ cútñuní iní-ó nàcuáa quide-xi núú ndécú-gǎ. Te dacuítí nǐ xini ñuhu-xi sǎ cáhni-güedé cue quití ní cachí Yǎ Ndiöxí cuendá nduu íí nchaa sá nǐ xíhí xití vehe-gǎ-án. Te cuéi ducaⁿ nǐ sahni-güedé cue quití-án dico ñá túú ní quide-xi nacuaá ngündecu váha-o núú Yǎ Ndiöxí. Dico Xítóhó Jesucristú ní xíhí-gǎ, te sá nǐ xíhí-gǎ xiǎⁿ ní quide-gǎ nàcuáa ngündecu váha-o núú Yǎ Ndiöxí. ²⁴ Te Xítóhó Jesucristú cuándaa-gǎ andiú núú ndécú Yǎ Ndiöxí càháⁿ ndáhu-gǎ cuendá-ó, te Xítóhó Jesucristú chi ñá díú ìⁿ vehe ní dácáá cué tée ñuyú-a cuánguihu-gǎ. Te vehe Yǎ Ndiöxí sá nǐ dácáá cué ñáyiú isràèl ñuyú-a ndéé sanaha, ndíhi nchaa nàcuáa ní xóo cada-güedé xití vehe-gǎ-án xiǎⁿ cútñuní iní-ó nàcuáa quide-xi núú ndécú-gǎ. ²⁵ Te dútú cúnúu núú ñáyiú isràèl ní xóo quíhu-dé núú cuiá núú cuiá xití cuàrtú ní cuu íí vǐhí-gǎ-án, te ní xóo canehe-dé níñí nǐ xóo quíhu xití cuàrtú-án dico ñá díú níñí méé-dé. Dico Xítóhó Jesucristú chi ñá túú òucaⁿ ní quide-gǎ chi ìⁿ xito-ni ní satí níñí-gǎ te ní xíhí-gǎ. ²⁶ Chi núú ní xíhí-gǎ nuu núú te ndéé cútñahá ní ngáva ñuyú ducaⁿ ngüita-gǎ cada-gǎ ní cùu, te vitna ta ndíhi nduu cuaháⁿ ní quixi-gǎ ñuyú-a ní xíhí-gǎ ìⁿ xito-ni cuendá cuu-gǎ dàtná ìⁿ táhú sǎ cúu-xí Yǎ Ndiöxí, te ducaⁿ nǐ quide-gǎ cuendá sá vǎ cündècu-gǎ cuéchi ñáyiú núú Yǎ Ndiöxí. ²⁷ Te nchoo cué ñáyiú ñuyú-a chi ìⁿ xito-ni cuú-ó te dàtnuní ducaⁿ te cada ndáá Yǎ Ndiöxí cuéchi-o. ²⁸ Te ducaⁿ sǎtnahá-xi cùu Xítóhó Jesucristú chi ìⁿ xito-ni ní xíhí-gǎ cuendá sá vǎ cündècu-gǎ cuéchi ñáyiú núú Yǎ Ndiöxí, te ducaⁿ ní cuu ní xíhí-gǎ chi mee-gǎ ducaⁿ nǐ cachí-gǎ conduu. Te quixi tucu Xítóhó Jesucristú ñuyú-a dico ñá díú-gǎ sá cáhdá-gǎ cuendá sá vǎ cündècu-gǎ cuéchi ñáyiú núú Yǎ Ndiöxí, chi quixi-gǎ nacuaca-gǎ nchaa ñáyiú ndètu ñaha xii-gǎ cuendá cundecú-yu ndíhi-gǎ ní caa ní quíhíⁿ.

10

¹ Te nchaa tnúhu ní xáhaⁿ ndíi Moisés xii ñáyiú isràèl cada-yu, nchaa tnúhu-án ní quide-xi ní cutñuní luha iní-yu nàcuáa cada Yǎ Ndiöxí cada váha ñaha-gǎ xii-o vitna. Dico ñá díú mèi nacuaá ní xáhaⁿ ndíi Moisés xii ñáyiú quide Yǎ Ndiöxí vitna chi dáma quide-gǎ. Te nchaa tnúhu ní cáháⁿ ndíi Moisés ñá túú ní ndacu-xi cada-xi nacuaá cundáá nchaa ñáyiú tùha ñaha xii Yǎ Ndiöxí cuéi ní xóo cahni-güedé quití ní xóo nduu táhú-gǎ núú cuiá núú cuiá. ² Te núú dicó sá nǐ xóo cahni-güedé quití ní xóo nduu táhú Yǎ Ndiöxí ní quide-xi nacuaá nduu ndoo nduu nine iní cue ñáyiú, te vǎ cáhni-gǎ-güedé cue quití-án nduu táhú-gǎ ní cùu, te ducaⁿ te cutñuní iní-yu sá ñà túú-gǎ cuéchi-yu ndècu núú Yǎ Ndiöxí ní cùu. ³ Te sá dúcáⁿ ní xóo cahni-güedé quití ní xóo nduu táhú Yǎ Ndiöxí núú cuiá núú cuiá, xiǎⁿ ní xóo ndacu iní cue ñáyiú nchaa sá cuèhé sá dúhá ní xóo cada-yu. ⁴ Te ducaⁿ chi níñí ndicutu-án ndíhi níñí chivá-án ñà túú ní xóo ndacu-xi cada-xi nàcuáa vǎ cündècu cuéchi-yu núú Yǎ Ndiöxí.

⁵ Te xiǎⁿ núu cútñahá ní quexio Xítóhó Jesucristú ñuyú-a ní xáhaⁿ-gǎ xii Yǎ Ndiöxí: Yòhó Tǎtà-í, ñá túú nduu vétú váha iní-n sǎ sahni-güedé quití nduu táhú-n, te ni ñá túú nduu vétú váha tucu iní-n cuendá nchaa dava-gǎ sá táxi-güedé ndúú táhú-n,

núu xiǎⁿ ní quide túha-n yìquí cuñú-í cuendá yúhú cuú-í te nduu táhú ñáhá-n xii-í.

⁶ Te ni ñà túú nduu vétú váha iní-n cuendá quití sǎhmi-güedé ndúú táhú-n te ni ñà túú nduu vétú váha iní-n cuendá nchaa dava-gǎ sá táxi-güedé ndúú táhú-n cuendá sá vǎ cündècu-gǎ cuéchi ñáyiú núú-n.

⁷ Núu xiǎⁿ yúhú ní cachí-í xii yòhó Tǎtà-í Dútú Ndiöxí sá yúhú véxi-í ñuyú-a cada-í nchaa sá cuini-n cada-í dàtná yódó tnúni cuendá-í núú tütú-n.

Duha ní xáhaⁿ Xítóhó Jesucristú xii Tǎtà-gǎ Dútú Ndiöxí. ⁸ Te Xítóhó Jesucristú díhna-gǎ ní xii-gǎ Yǎ Ndiöxí Yaá cúú Tǎtà-gǎ: “Yòhó Tǎtà-í ñá túú nduu vétú váha iní-n cuendá quití sǎhmi-güedé ndúú táhú-n, ndíhi cuendá quití sǎhmi-güedé ndúú táhú tucu-n cuendá sá vǎ cündècu-gǎ cuéchi ñáyiú núú-n, ndíhi cuendá nchaa

dava-gá táhú sã táxí-güedé xii-n ñã túú nduu vétú váha iní-n cuendá nchaa xíãⁿ, duha ní xáhaⁿ Xítohó Jesucristú xii Tãtã-gã Dútú Ndiöxí. Te ducaⁿ ñí xáhaⁿ-gã cuèí núú tütú ndíí Moisés yódó tnùní sá dúcáⁿ càda-güedé. ⁹ Te sáta dúcáⁿ te ní xáhaⁿ tùcu-gá xii Tãtã-gã Dútú Ndiöxí: “Yòhó Tãtã-í Dútú Ndiöxí, mee-í véxi-í ñuyúú-a cuendá cada-í nchaa nàcuáa cuiní-n”, duha ní xáhaⁿ-gã xii Tãtã-gã. Te sá dúcáⁿ ñí cãháⁿ Xítohó Jesucristú xíãⁿ ní cutnùní sá ñã túú-gã xíní ñuhu-xi ducaⁿ cada-güedé cahni-güedé nchaa quiti-ãⁿ, te ducaⁿ chi mee Xítohó Jesucristú ní xíhí-gá ní cuu-gá dàtná ñⁿ táhú sã cúú-xí Yã Ndiöxí, te ducaⁿ ní cuu chi ducaⁿ tnáhi ní cachí Yã Ndiöxí cunduu. ¹⁰ Te Xítohó Jesucristú ní quide-gá nàcuáa ní cuiní Yã Ndiöxí cada-gá, chi ní xíhí-gá núú cùrúxí chi ducaⁿ ní cuiní mée-gã cunduu, te ñⁿ xito-ni ní xíhí-gá sá cuendá nchaa ñáyiú, te cuendá xíãⁿ núú ndècu yiñuhu-o núú-gã vitna.

¹¹ Te cue dútú ñáyiú isràél chi ñⁿ nduu ñⁿ nduu ní xóo cahni-güedé quiti ní xóo nduu táhú-gã, te ñã túú ní dàma-güedé nàcuáa ní xóo cada-güedé. Te nchaa sá ñí xóo cada-güedé-ãⁿ ñã túú ní quide-xi nacuaá vá cùndècu-gá cuèchi ñáyiú núú Yã Ndiöxí. ¹² Dico Xítohó Jesucristú ní cachí-gá sá cúú cùú-gá, te ní xíhí-gá núú cùrúxí cuendá nchaa yíca cuèchi nchaa nchoo ñáyiú ndècu ñuyúú-a. Te sáta dúcáⁿ te dàtnùní ní ngóo-gá xio cùha Dútú Ndiöxí táxí tnùní-gá, te vá ñⁿ nduu ñⁿ quiú-gã te cúú-gá. ¹³ Te ñⁿ xíãⁿ cundècu-gá cundetú-gá ndéé sáa nduu cànehe nchaa sá cúú úhú iní ñáhá xii-gá sá yíñuhu núú-gã. ¹⁴ Te cuendá sá ñí xíhí Xítohó Jesucristú ñⁿ xito-ni xíãⁿ ní cuu-gá dàtná ñⁿ táhú sã cúú-xí Yã Ndiöxí, xíãⁿ ní quide-xi sá nchãá ñáyiú cùu cuendá-gã ñã túú-gã ná cumání-yu núú-gã ñí caa ní quihíⁿ. ¹⁵ Te mee Espíritú Yã Ndiöxí càháⁿ ndáá-xi nàcuáa ní cãháⁿ-gã cuendá-ó, te duha ní cãháⁿ-gã:

¹⁶ Sáa nduu te cada-í nchaa ñáyiú nàcuáa na càháⁿ-í-a,
te cada-í nàcuáa cutnùní iní-yu tnúhu sá dãnèhé-í-yu tnúhu sá cãntúchi ñaha xíí-yu nàcuáa cada-yu cundecú-yu,
te cada tucu-í sá tnñⁿ-yu nchaa tnúhu-ãⁿ.
Duha ní cachí-gã. ¹⁷ Te ní cachí tucu-gã:

Te vá ñⁿ nduu ñⁿ quiú-gã ndacu iní-í sá quidé sãa iní-yu tnúhu-í,
te ní vá ñⁿ nduu ñⁿ quiú-gã te ndacu iní-í nchaa sá cuèhé sá dúhá quidé-yu.
Duha ní cãháⁿ Yã Ndiöxí càchí Espíritú-gã.
¹⁸ Te sá dúcáⁿ quide cahnu iní Yã Ndiöxí nchaa cuèchi-o, núú xíãⁿ ñã túú-gã xíní ñuhu-xi cuú quiti nduu táhú-gã cuendá nchaa sá cuèhé sá dúhá quide-o.

Tàú-ó sã tnáhá tnúhu-o ndíhi Yã Ndiöxí
¹⁹ Te cue dútú ñí xóo cumuu núú ñáyiú isràél cue tée-ãⁿ ní xóo quihu-güedé xití cuartú ní cuu íí víhí-gã. Dico nchoo cuè ñáyiú ndècu ichi Xítohó Jesucristú vitna tàú-ó sã ñí yuhu ni iní-ó tnáhá tnúhu-o ndíhi Yã Ndiöxí. Te cuu tnáhá tnúhu-o ndíhi-gã chi Xítohó Jesucristú ní satí ñíhí-gã te ní xíhí-gá núú cùrúxí. ²⁰ Te cada iní-ó sã dõó sã ñí xíndedí nàcuáa ní xóo quihu-güedé xití cuartú ní cuu íí víhí-gã-ãⁿ ñí xócuñí, te ducaⁿ càda iní-ó chi Xítohó Jesucristú ní xíhí-gá cuendá nchoo ñíhí-ó nàcuáa cada-o ngündècu váha-o sã cúú-xí-gã. ²¹ Te ñⁿ diu-gá cúú-gã Yaá cúú dütú-ó, te ñⁿ diu-gá cúú-gã Dútú cúnúu ndècu-gá núú ndécú Yã Ndiöxí. ²² Núú xíãⁿ xíní ñuhu-xi sá ño tnáhá tnúhu-o ndíhi Yã Ndiöxí, te vá cãní ñⁿ caní úú iní-ó, te ño váha quindáa iní-ó-gã chi ñⁿ diu-gá ní ndada ndoo ní ndada nine-gá iní-ó cuendá nchoo cùtnùní iní-ó sã ñã túú-gã cuèchi-o ndècu núú-gã. Te ní sandute-o cuendá sá dúcáⁿ ñí nduu ndoo ní nduu nine iní-ó. ²³ Te nchoo càháⁿ ndáá-ó sã ndécú ndíhi-o tnúhu ndee ñí sá ndúú táhú-ó cùndècu ndíhi-o Yã Ndiöxí, te xini ñuhu-xi sá vá dàná ndéé-ó cãchicúⁿ nihnu-o tnúhu ndee ñí-ãⁿ chi Yã Ndiöxí cada-gá nàcuáa ní cachí-gá sá cúú-xí-ó. ²⁴ Te xini ñuhu-xi cuhuⁿ iní tnáhá-ó te chindee tnàha-o nacuaá ducaⁿ cùu iní tnáhá-gã-ó, te cada-o mée-ni sá váha. ²⁵ Te nchoo vá dàná ndéé-ó nàtacá-ó núú dácuaàha-o tnúhu Yã Ndiöxí, te vá càdá-ó dàtná xiquide davá-yu ñã túú-gã cuiní-yu quixí-yu núú dácuaàha-o tnúhu-gã. Chi xini ñuhu-xi sá cuàha tnàha-o tnúhu ndee ñí cãchicúⁿ nihnu-o ichi-gã, te uuⁿ-gã ducaⁿ tàú-xi cada-o vitna ta cuyatni nduu quixi tucu Xítohó Jesucristú ñuyúú-a.
²⁶ Te cue ñáyiú sa ní tecú tnùní nàcuáa càháⁿ tnúhu Yã Ndiöxí te núu na ngüíta-yu ñucúuⁿ cada-yu nãndí sá cuèhé sá dúhá,

te àuⁿ nã cuu ní xíhí Xítóhó Jesucristú cuendá-yu, te ni vã yõ ìⁿ-gá cuú cuendá sã vã cundècu-gá cuèchi-yu núú Yã Ndiõxí.²⁷ Te núu ducaⁿ na càdã-yu nãndí sã cuèhé sã dùhá, te ío quiyùhú iní-yu nacuáa cada ñaha Yã Ndiõxí xii-yu. Chi nchaa ñáiyu cùu úhú iní ñáhã xì-gã daquìhíⁿ ñáhã-gã xii-yu núú ñùhú núú càyú núú ìo ndohó-yu.

²⁸ Te nchaa ñáiyu ní xóo daquèe tìhú tnùhu ní cãháⁿ ndíi Moisés, te núu ndècu úú àdi úní ñáiyu càháⁿ ndáá sã dúcãⁿ ní dáquée tìhú-yu tnùhu ní cãháⁿ ndíi, te vã yõ ní xóo cundáhú iní ñáhã xii nchaa ñáiyu ducaⁿ ní xóo cada chi ní xóo cahni ñaha-güedë.

²⁹ Te núu ducaⁿ ní ndoho cue ñáiyu ducaⁿ ní dáquée tìhú tnùhu ní cãháⁿ ndíi Moisés-ãⁿ, te uuⁿ-gã ndoho cue ñáiyu dàquee tìhú ñáhã xii Xítóhó Jesucristú Yáá cùú Dèhe Yã Ndiõxí diu-ni ñáiyu cãchí sã ñã túú nãndíhi níñí-gã. Te níñí-gã-ãⁿ ní sati, te ní xíhí-gã, te ducaⁿ ní cuu cuendá cada Yã Ndiõxí ingá núú sã vãha sã cúu-xí nchòo ñáiyu ndècu ñuyíú-a dàtnã ní cachí-gã cada-gã.

Te diu-ni cuendá níñí-gã-ãⁿ ní nduu ndoo ní nduu nine iní cue ñáiyu-ãⁿ ní cùu, te diu-ni ñáiyu-ãⁿ càháⁿ úhú-yu Espíritú Yã Ndiõxí sã chindèe chitúu ñaha xii-o.³⁰ Te nchoo sã naha-o sã Yã Ndiõxí cãchí-gã ìⁿ xichi núú tùtú-gã: “Yúhú cada-í te nacháhu ñáiyu nchaa sã quidè-yu, te duha càháⁿ-í chi nachinaa-í cuendá nchaa sã quidè-yu-ãⁿ”, duha cãchí-gã. Te sa ñaha tucu-o nacuáa càháⁿ-xi núú tùtú-gã núú cãchí-xi: “Yã Ndiõxí cada ndáá-gã cuendá nchaa sã quidé ñáiyu cùu cuendá-gã”, duha cãchí-xi núú tùtú-gã.³¹ Te ío ndáhú ndoho cue ñáiyu na dàndoho ñaha Yã Ndiõxí, te diu-gã cúu-gã Yáá cúnúu nchaa nduu nchaa quíú!

³² Te chí dándacu iní nacuáa ní quide-ndo cùtnáhã vitna cuu saa ní tecú tnùn-ndó tnùhu Yã Ndiõxí, chí dàvã-ãⁿ ní quide càhnu iní-ndó cuèi nãndí sã ní yáha-ndo cuendá-gã.³³ Te dava-ndo ní quide úhú ñáhã ñáiyu xii-ndo núú chítú núú tàcã, te nãndí tnùhu cuèhé tnùhu duha ní xáhãⁿ-yu xii-ndo. Te dava-ndo ní cuyíi-ni-ndo ní xín-decu ndíhi tnàha-ndo cuèi nãndí ní ndoho dava-gã-ndó.³⁴ Te ní cundáhú iní-ndó cuè ñáiyu yìhi vecaá, te cuèi ní quendeé ñáiyu sã ndécú ndíhi-ndo dico ñã túú ní ndíhú iní-ndó chí ní cudíi-ni iní-ndó. Te

ducaⁿ ní quide-ndo chí sa ñaha-ndo sã ndúú tãhú-ndó sã ìo-gã vãha, te xíãⁿ cundecu ndíhi-ndo ní caa ní quíhíⁿ.³⁵ Te xíãⁿ vã dàñã ndèe-ndó quindáá iní-ndó nacuáa ní cachí Yã Ndiõxí cada ñaha-gã xii-ndo, chí sáá nduu te ío vãha cada ñaha-gã xii-ndo.³⁶ Te nchòhó xíní ñùhu-xi ío cada ndee iní-ndó càda-ndo nchaa nacuáa càháⁿ Yã Ndiõxí, te ducaⁿ te nduu tãhú-ndó sã ní cachí-gã nduu tãhú-ndó cundecu ndíhi-ndo ní caa ní quíhíⁿ.³⁷ Te Yã Ndiõxí cãchí-gã núú tùtú-gã: Ta cùyatni yíi-nã nduu quixi Yáá quixi ñuyíú-a, te vã cùyãa-gã.

³⁸ Te nchaa ñáiyu cundáá núú-í ñã túú dàña ndee-yu sãndáá iní ñáhã-yu xii-í, te cuendá xíãⁿ cundecu-ní-yu ichi-í, dico núu na dàñã-yu ichi-í te vã cúu vãha iní-í núú-yu.

Duha cãchí Yã Ndiõxí núú tùtú-gã.

³⁹ Dico nchoo chí ñã túú cùu-o ñáiyu ducaⁿ xiquide dàñã-ó ìchi Yã Ndiõxí, chí cùu-o ñáiyu nchícúⁿ nihnu-ni sãndáá iní-ó-gã, te sã dúcãⁿ te nduu tãhú-ó cundecu-o ndíhi-gã ní caa ní quíhíⁿ, te ñã túú cùu-o ñáiyu dàña nihnu ichi-gã te xíta nihnú-yu.

11

Ñáiyu sãndáá iní ñáhã xii Yã Ndiõxí

¹ Te núu sãndáá ndisa iní-ó Yã Ndiõxí te ducaⁿ cùtnuní ndáá iní-ó sã ñihí-ó sã cùnín-ó núú-gã. Te núu sãndáá iní-ó-gã te ducaⁿ cùtnuní ndáá tucu iní-ó sã càháⁿ ndáá-gã cuendá nchaa sã ñã túú xíní-ó.

² Te ducaⁿ ní quide ñáiyu ní xín-decu ndéé sanaha ío ní sãndáá iní-yu Yã Ndiõxí te xíãⁿ núu ío vãha ní cuu iní ñáhã-gã xii-yu.

³ Te núu nchoo sãndáá ndisa iní-ó Yã Ndiõxí te cùtnuní ndáá iní-ó sã sã cuendá tnùhu ní cãháⁿ-gã ní cuáha andíu ndíhi ñuyíú-a. Te cùtnuní iní-ó sã ñã diú sã cuendá ìⁿ sã túú ndèhe-o ío ñuyíú-a ní cuáha andíu ndíhi ñuyíú-a.

⁴ Te ndíi Àbél ío ní sãndáá iní ndíi Yã Ndiõxí núu xíãⁿ ío-gã ní cuu iní-gã sã ní sãñaha ndíi ní nduu tãhú-gã dàcúúxí sã ní sãñaha ndíi Cãin xii-gã ní nduu tãhú-gã. Te ndíi Àbél-ãⁿ ní cùtnuní iní ndíi sã ní cudíu ndíi núú Yã Ndiõxí cuendá sã ní queheⁿ cuendá-gã sã ní sãñaha ndíi ní nduu tãhú-gã. Te cuèi ñã túú-gã ndíi ndècu ñuyíú-a dico yòdo tnuní sã ní sãndáá iní

ndíi Yá Ndiöxi cuèndá ducaⁿ càda-o canchicúⁿ nihnu-o.

⁵ Te té Ènoc téé ní xíndecu ndéé sanaha ñà túú ní xihí-dé chi ní nacuaca ñaha túu Yá Ndiöxi xii-dé cuèndá sá ñí sándáá iní ñáhá-dé xii-gá. Te vá yòo ni nànihí ñáhá xii-dé chi mee-gã ní nacuaca ñaha-gã xii-dé. Te núú tùtù Yá Ndiöxi càchí-xi sá cùtnháá vátá nàcuàca ñaha-gá xii té Ènoc, te ní quide-dé mee-ni nàcuáa ní cuu váha iní ñáhá-gã xii-dé. ⁶ Te nchaa ñáyiu ñá túú sándáá iní ñáhá xii Yá Ndiöxi ñá ndácü-yu cada-yu nàcuáa cudíu-yu núú-gã, chi nchaa ñáyiu cuini tuha ñaha xii-gá xini ñuhu-xi sá quíndáá iní-yu sá ndécú-gã, te quíndáá iní-yu sá núu na nànducu nihnu ñáhá-yu xii-gá te cuñaha-gã xii-yu sá ndúú táhü-yu.

⁷ Te Yá Ndiöxi ní dátüha-gá ndíi Nöé nchaa nàcuáa cada-gá. Te ní quide ndíi nchaa nàcuáa ní xáhaⁿ Yá Ndiöxi cada ndíi, te ní cadúha ndíi ñí bàrcú cuèndá xití bàrcú-áⁿ queé ndíi ndíi nchaa ñáyiu vehe ndíi cuèndá cácu nihnú-yu. Te ducaⁿ ní quide ndíi chi ní sándáá iní ndíi Yá Ndiöxi. Te sá dúcáⁿ ñí sándáá iní ndíi-áⁿ Yá Ndiöxi xiáⁿ ní cutnùní sá ncháá ñáyiu ío ndècu cuèchi-yu, chi ñá túú ní cànchicúⁿ nihnú-yu cada-yu nàcuáa ní quide ndíi. Te sá dúcáⁿ ñí quide ndíi ní sándáá iní ndíi Yá Ndiöxi xiáⁿ ío ní cundáá ndíi núú-gã.

⁸ Te Yá Ndiöxi ní xáhaⁿ-gã xii ndíi Àbrahám sá queé ndíi ñúú núú ndécú ndíi quíhíⁿ ndíi ñngá xichi cundecu ndíi. Te ní quide ndíi nàcuáa ní xáhaⁿ Yá Ndiöxi chi ní quee ndíi cuáháⁿ ndíi núú cuñaha Yá Ndiöxi cundecu ndíi. Te òré ní quee ndíi núú ndécú ndíi te ñá túú ní cutnùní iní ndíi ndéé cúú núú cuáháⁿ ndíi cundecu ndíi. Te ducaⁿ ní quide ndíi chi ní sándáá iní ndíi Yá Ndiöxi. ⁹ Te sá dúcáⁿ ñí sándáá iní ndíi Yá Ndiöxi núu xiáⁿ ní xíndecu ndíi núú ní sáñaha-gã cundecu ndíi, te cuèi ducaⁿ dico ñá túú ní quide ñúú ndíi xiáⁿ. Te ní xóo cundecu ndíi vehe cùtexínu vehe dóó. Te ñiu-ni ducaⁿ ní quide ndíi Isàac ndíi ndíi Jàcób chi tnáhá cue ndíi-áⁿ ní cachí Yá Ndiöxi sá ndúú táhü cue ndíi xiáⁿ cundecu cue ndíi. ¹⁰ Te ducaⁿ ní quide ndíi Àbrahám chi ní xíndecu ndíi ndéé ní sáá nduu ndúú táhü ndíi cundecu ndíi núú ndécú Yá Ndiöxi. Te núú ndécú-gã-áⁿ cúú-xí ñúú ní cadúha mee-gã, te ñúú-áⁿ cudíi-xi ní caa ní quíhíⁿ.

¹¹ Te ndíi Sárá, sa ní xidó cuíá ndíi sá cóó déhe ndíi chi sa ní sahnu víhi ndíi, dico Yá Ndiöxi ní quide-gá te ní xóo ñí déhe ndíi. Te ducaⁿ chi ní sándáá iní ndíi Yá Ndiöxi te ní cutnùní ndáá iní ndíi sá cada-gã nàcuáa ní xáhaⁿ-gã xii ndíi. ¹² Te cuèi ío ní sahnu ndíi Àbrahám ndíi ñadíhí ndíi, ndíi Sárá dico dacuitíí ní nduu táhü-yu ní xóo ñí déhe-yu. Te xiáⁿ núu ío cuéhé ndíi quíⁿ yá vá ndíi Àbrahám ní cáya dàtná cuéhé chòdíní ndéé andíu, ndíi dàtná cuéhé ñuhu cúchí lámár, chi ní vá yòo ñí ndacu cahu ñaha xii-yu sá cuèhë-yu.

¹³ Te cue ndíi-áⁿ ducaⁿ-ni ní sándáá iní cue ndíi Yá Ndiöxi ndéé ní sáá nduu ní xihí cue ndíi. Te cue ndíi-áⁿ ñá túú ní ndúú táhü cue ndíi quini cue ndíi nchaa nàcuáa ní cachí Yá Ndiöxi cada-gã, dico ní cutnùní ndáá iní cue ndíi-áⁿ nàcuáa cada-gá núú cuáháⁿ núú vëxi. Te ío ní cudíí iní cue ndíi, te ní cachí cue ndíi sá dicó-ni ichi yáha cue ndíi ñuyú-a, chi ñá díú ñuyú-a cundecu ducaⁿ cuè ndíi. ¹⁴ Te sá dúcáⁿ ndúu tnúhu ní cáháⁿ cue ndíi-áⁿ, xiáⁿ ní cutnùní sá cuini cue ndíi ñngá xichi núú cundècu cue ndíi. ¹⁵ Te ní ñá díú ñúú núú ní quee cue ndíi ní cuini cue ndíi núhú cue ndíi. Chi núu ducaⁿ ní sàni iní cue ndíi te núhú cue ndíi ní cùu. ¹⁶ Dico ñáhá chi cuini cue ndíi quíhíⁿ cue ndíi ñí xichi núú váha-gá cáá cundecu cue ndíi. Te núú dúcáⁿ ío-gá váha càa-áⁿ cúú-xí ñúú núú ndécú Yá Ndiöxi, te sá dúcáⁿ ní sàni iní cue ndíi xiáⁿ núu ío váha cùu iní Yá Ndiöxi càchí-gá sá ñá túú cùcahaⁿ núú-gá cúú-gã Ndiöxi cue ndíi-áⁿ, te cutnùní iní-ó sá ndáá sá dúcáⁿ càháⁿ-gá chi ní quide túha-gá ñí xichi núú cundècu cue ndíi-áⁿ.

¹⁷ Te ndíi Àbrahám ní xíndecu ñí dñi-ni déhe ndíi ndíi ñadíhí ndíi, te cùtnháá ní xito ndéé ñáhá Yá Ndiöxi xii ndíi ní xicáⁿ-gã déhe ndíi, ndíi Isàac cuèndá nduu táhü ñáhá-gã xii ndíi. Te ní xáhaⁿ ndíi sá cúú ndúú táhü-gã déhe ndíi, te ducaⁿ ní quide ndíi chi ní sándáá iní ñáhá ndíi xii-gá. Te sa ndècu túha ndíi sá cuñaha ndíi déhe ndíi xii-gá cuèi mee Yá Ndiöxi ní xáhaⁿ ndáá-gã xii ndíi ¹⁸ sá sá cuèndá ndíi Isàac te ngúndecu cue ñani tnáhá ndíi. ¹⁹ Te ducaⁿ ní quide ndíi Àbrahám, chi ní cutnùní ndáá iní ndíi sá Yá Ndiöxi ndácú-gã dándòto-gã cuèi ñáyiu sa ní xihí. Te sá dúcáⁿ ní xáhaⁿ ndíi xii Yá Ndiöxi sá cúú ndúú táhü-gã déhe ndíi, te xiáⁿ cada iní-ó sá ní xihí ndíi Isàac te

ni ndoto tucu ndii ní nucúndecu ndii ndihi tātá ndii, ndii Abrahám.

²⁰ Te ndii Isàác ní xícáⁿ táhú ndii núú Yá Ndiöxí cuendá sá cáda váha-gá cue déhe ndii, ndii Jácób ndihi ndii Esàú núú cuaháⁿ núú vëxi. Te ducaⁿ ní quide ndii chi ní sándáá iní ndii Yá Ndiöxí. ²¹ Te sa ta cùy-atni-ná nduu cùú ndii Jácób, te ní xícáⁿ táhú ndii núú Yá Ndiöxí cuendá cue déhe ñani ndii déhe ndii Chèé. Te yituu-ná ndii tatnu ndii ní chiñuhu ndii Yá Ndiöxí. Te ducaⁿ ní quide ndii chi ní sándáá iní ñáhá ndii xii-gá. ²² Te cútñahá sa ta cùyatni vii-nã nduu cùú ndii Chèé, te ní cachí ndii sá cuè ñáyiú isràél sáá nduu quèé-yu núú xíndecú-yu-áⁿ. Te ní cáháⁿ tucu ndii nàcuáa cadá-yu yiqui cùñú ndii na sáá nduu quèé-yu núú ndécú-yu-áⁿ. Te ducaⁿ ní quide ndii chi ní sándáá iní ndii Yá Ndiöxí.

²³ Te cútñahá ní cacu ndii Moisés te ní chiváha ñaha ñaná ndii ndihi tātá ndii úní yóó. Te ducaⁿ ní quide cue ndii-áⁿ chi ní sándáá iní cue ndii Yá Ndiöxí. Te ní quide cuendá cue ndii-áⁿ sã ïo váha càa ndii Moisés déhe cue ndii, te ñá túú ní yuhú cue ndii nàcuáa ní cáháⁿ téé cùu Faraón sá cáhni-dë cue landú. ²⁴ Te sátá ní sañnu ndii Moisés te duuⁿ duuⁿ ní cachí ndii sá vã cáháⁿ ñáyiú sá dëhe yoco téé cùu Faraón cúú ñaná ndii. Te ducaⁿ ní quide ndii chi ní sándáá iní ndii Yá Ndiöxí. ²⁵ Te ducaⁿ ní quide tucu ndii chi ní tñahá-gá iní ndii ndoho ndii ndihi nchaa ñáyiú cùu cuendá Yá Ndiöxí dàcúúxí sã cùdñí iní ndii cundecu tnaa ndii ichi cuèhé ichi duha. ²⁶ Chi ní sani iní ndii sá váha-gá ndoho ndii cúcuèhé ñáhá cuè ñáyiú xii ndii sá cuendá Yaá quixi ñuyúú-a dàcúúxí sã cùndècu ndihi ndii nchaa sá ïo Ègiptú. Te ducaⁿ ní quide ndii chi ní xúhuⁿ iní ndii sá Yá Ndiöxí cuañaha-gã sá ndúú táhú ndii. ²⁷ Te ndii Moisés ní quee ndii nacióⁿ Ègiptú te ñá túú ní quide cuendá ndii sá ïo cùdèéⁿ tée cùu Faraón núú ndii. Te ducaⁿ ní quide ndii chi ní sándáá iní ndii Yá Ndiöxí. Te ní quide càhnu iní ndii cuendá nchaa sá ní yáha ndii, te ní quide iní ndii sá Yá Ndiöxí ndécú ndihi ñaha túu-gá xii ndii cuèí ñá túú ní xini núú ñáhá ndii xii-gá. Te ducaⁿ ní sani iní ndii chi Yá Ndiöxí ndécú ndihi ñaha-gá xii ndii.

²⁸ Te ndii Moisés cúú ndii téé ní tausaha ní quide vico pascuá ndihi cue ñáyiú isràél, te dàvá-áⁿ ní táuchíúⁿ ndii ní sañni-yu mbéé te níñi quiti-áⁿ ní dácánùú-yu yuyèhé-yu.

Te ducaⁿ ní quide ndii chi ní sándáá iní ndii Yá Ndiöxí. Te ducaⁿ ní quide tucu ndii cuendá sá espíritú sá ní tendaha Yá Ndiöxí cahni-xi mee-ni dëhe téé déhe díhna cue ñáyiú Ègiptú, te vá cáhni-xí nì ñⁿ déhe cue ñáyiú isràél. ²⁹ Te ndute lámár sá nání Mār Tícuèhé ní queé dava-xi ní natúu ñuhu yìchí ní níhí ní yáha cue ñáyiú isràél. Te ducaⁿ ní cuu chi ní sándáá iní-yu Yá Ndiöxí. Te cue téé Ègiptú tñahá-güedé nchicúⁿ-güedé cuaháⁿ dico ñá túú ní ndàcu-güedé yáha-güedé chi ní ndihi-güedé ní cáhá.

³⁰ Te cue ñáyiú isràél ní dúcúⁿ ndèé-yu úsá nduu ñuu Jericó te ní ngoyo nchaa sá ñúdòco. Te ducaⁿ ní cuu chi ní sándáá iní-yu Yá Ndiöxí. ³¹ Te ñⁿ ñaha ní xíndecu ichi díí iní ní xínani-aⁿ Ràháb, ñaha-áⁿ ñà túú ní xíhí-aⁿ dàtná ní xíhí nchaa ñáyiú ïo ní cuu sáá iní-xi núú Yá Ndiöxí, chi ní cuu váha iní-aⁿ núú cuè téé ní tendaha cuè ñáyiú isràél ní sângoto dayuhu ñuu-aⁿ. Te ducaⁿ ní quide-aⁿ chi ní sándáá iní-aⁿ Yá Ndiöxí.

³² Te núú dicó sá cúú te cáháⁿ-í cuendá ndii Gedèón, ndihi cuendá ndii Bàrác, ndihi cuendá ndii Sànsón, ndihi cuendá ndii Jèfté, ndihi cuendá ndii Dàvií, ndihi cuendá ndii Sàmuel, ndihi cuendá nchaa cue téé ní xóo cáháⁿ tñúhu Yá Ndiöxí ndéé sanaha, te nchaa cuendá cue téé-áⁿ cáháⁿ-í te núú dicó cùyáchí-í dico ñá túú cùyáchí-í. ³³ Te nchaa cue ndii-áⁿ ní sándáá iní cue ndii Yá Ndiöxí ñuu xíáⁿ ní xóo ndacu cue ndii ní xóo nàá cue ndii ndihi nchaa ñáyiú dava-gá ñuu. Te nchaa ñáyiú-áⁿ ñà túú ní xóo ndacú-yu nàá-yu ndihi cue ndii, te ní xóo cada cue ndii nchaa nàcuáa tàú-xi cunduu, te ní quide váha ñaha Yá Ndiöxí xii cue ndii dàtná ní cachí-gá cada ñaha-gã xii cue ndii. Te cuèí nchaa cue quiti dééⁿ ñà túú ní ndacu-güedí ná cada ñaha-güedí xii cue ndii. ³⁴ Te ní xóo ndacu cue ndii ní xóo ndahvá cue ndii ñuhú sá vã yóo tñahí ndacu ndahvá, te ní cácu cue ndii vá yóo ní ndacu cahni ñaha xii cue ndii. Te cue ndii-áⁿ ñà túú níhí ndéé cuè ndii ní cùu, dico ní níhí ndéé cuè ndii chi Yá Ndiöxí ní chindee ñaha-gá xii cue ndii, te nchaa ndii-áⁿ ïo ní níhí ndéé cuè ndii ní nàa cue ndii ndihi nchaa ñáyiú ní cuu úhú iní ñáhá xii cue ndii, te nchaa ñáyiú ducaⁿ ní xóo nàá ndihi cue ndii-áⁿ ñà túú ní xóo ndacú-yu nàá ndihi ñahá-yu xii cue ndii chi ní xóo

cunú-yu. Te ducaⁿ ní cuu chi ní sándáá iní cue ndíi Yá Ndióxi. ³⁵ Te dava ñáiyu ñáhi ní nduu táhü-yu ní ndoto cue ñáiyu ní xíndecu ndíhi-yu ní nucúndecu ndíhi ñaha túcú-yu.

Te dava ñáiyu ío ní dándóhó ñaha tnaha ñáiyú-yu te ní xíhí-yu, dico ñá túú ní dàñá-yu ichi váha nàcuáa cácu ni-hnú-yu núú tnaha ñáiyú-yu, te ducaⁿ chi ní cuini-yu sá ndótö-yu ndéé cuèé-gá nàcuáa ngúndecu váha-yu núú ndécú Yá Ndióxi. ³⁶ Te dava cué ndíi ío ní ndoho cue ndíi chi ío ní cudíqui ndéé ñáhá ñáiyu xii cue ndíi, te ní canihá-yu xii cue ndíi, te dava cue ndíi ní dácútú ñáhá-yu, te ní chihi ñáhá-yu xii cue ndíi vecaá. ³⁷ Te dava cue ndíi ní sahni ñáhá-yu ndíhi yúú. Te dava cue ndíi ní chidava ndáá ñáhá-yu ní sehndé ñáhá-yu ndíhi sierrá. Te dava cue ndíi ní xito ndéé ñáhá-yu te núu ndisa sá sándáá iní cue ndíi Yá Ndióxi, te dava cue ndíi ní sahni ñáhá-yu ndíhi machítí. Te mee-ni ññ mbéé ndíhi ññi chivá, ní xóo cuu dóo cue ndíi. Te mee-ni ññi cue quiti-áⁿ ní xóo cuu dóo cue ndíi cuèi ndéni ní cuu ní xóo caca cuu cue ndíi. Te mee-ni cuè téé ndàhú ní cuu cue ndíi. Te ío ní xóo dandíhú-yu iní cue ndíi, te nándi sá ní xóo cada ñáhá-yu xii cue ndíi ní xóo dandóho ñáhá-yu. ³⁸ Te cue ndíi-áⁿ ío-gá ní xínduu váha iní cue ndíi dàcúúxí nchaa dava-gá ñáiyu. Te nchaa cue ndíi-áⁿ ní xica cuu cue ndíi cuèi nchaa núú ñá túú vā yóo tnàhi ndècu, te cuèi xití yucu ní xica cuu cue ndíi. Te ní xóo cada vehe cue ndíi nchaa yaú cava. Te ndéni ní cuu nchíi yaú ní xóo cundecu cue ndíi. ³⁹ Te ío ní cudíu cue ndíi núú Yá Ndióxi cuèndá sá ní sándáá iní ñáhá cuè ndíi xii-gá. Te cuèi ducaⁿ ní quide cue ndíi dico ñá túú ní xini cue ndíi nchaa sá ní cachí Yá Ndióxi cada-gá. ⁴⁰ Te ducaⁿ ní cuu chi íoⁿ sá ío-gá váha ní cachí Yá Ndióxi cada-gá. Te sá dúcáⁿ ío-gá váha ní cachí-gá cada-gá cúu-xí cuèndá nchoo ndíhi cuèndá cue ndíi-áⁿ cuèndá sá ñá díú mèe-ni cue ndíi-áⁿ cundáá cue ndíi núu-gá, chi tnàhà nchoo cundáá-ó núú-gá.

12

Ío cuhuⁿ iní-ó Xítohó Jesucristú

¹ Te cue ñáiyu ní xíndecu ndéé sanaha ní quidé-yu nàcuáa ní cutnùnì sá ní sándáá iní-yu Yá Ndióxi. Te cada iní-ó sá ncháá

ñáiyu-áⁿ xíndéhé ñáhá-yu xii-ó vitna. Núu xíáⁿ xini ññu-xi sá vā cada-ó ní íoⁿ sá cuèhé sá dúhá chi díu nchaa xíáⁿ quidé-xí ñá túú cundáá-ó núú Yá Ndióxi. Te vā cada cuèndá-ó nchaa sá quidé tñèu iní-ó nàcuáa ndacu-o càda-o nchaa nacuáa càháⁿ-gá. Te ío càhnu cunduu iní-ó cànhicúⁿ nihnu-o càda-o nchaa nacuáa ní cachí-gá cada-o cundecu-o ñuyíú-a. ² Te ío cuhuⁿ iní-ó Xítohó Jesucristú, chi díu-gá ní quide ní sándáá iní-ó Yá Ndióxi, te díu-ni ducaⁿ quide-gá cuèi vitna te cuèi ndéé núú cuaháⁿ núú vèxi díu-ni ducaⁿ càda-gá sá quíndáá iní-ó Yá Ndióxi. Te Xítohó Jesucristú ío ní quide ndee iní-gá ní ndoho-gá te ní xíhí-gá núú cùrúxí, te ñá túú ní quide cuèndá-gá cuèi íoⁿ sácáⁿ núú cúu-xí sá dúcáⁿ ní ndoho-gá. Te ducaⁿ ní quide-gá chi sa ñaha-gá sá ná yáha sá dúcáⁿ ndòho-gá te ío cudíi iní-gá. Te vitna núcóo-gá xio cùha núú núcóo Yá Ndióxi te tàxi tnuxí-gá.

³ Te xini ññu-xi sá ío cada cuèndá-ndó nàcuáa ní quide Xítohó Jesucristú chi Yáá-áⁿ ío ní quide càhnu iní-gá nchaa sá ní ndoho-gá ní quide ñaha nchaa ñáiyu ndècu ichi cuèhé ichi duha xii-gá. Te ducaⁿ càda cuèndá-ndó nàcuáa ní quide-gá cuèndá sá vā túu dusaⁿ-ndo, te ni vā nátúhú iní-ndó càda-ndo nchaa nacuáa càháⁿ-gá. ⁴ Te nchòhó dáquèe tihú-ndó nchaa sá cuèhé sá dúhá dico vátá càhni ñaha-gá-yu xii-ndé sá dúcáⁿ quide-ndo. ⁵ Te ndacu iní-ndó nàcuáa càháⁿ Tátá-ó Dútú Ndióxi dásàhú ñáhá-gá xii nchoo cuè ñáiyu cùu dèhe-gá. Te duha càhí-gá núú tütú-gá:

Nchòhó cue dèhe mee-í, vā cání iní-ndó sá àúⁿ ná cuu dándoho ñaha-í xii-ndo, te ni vā nátúhú iní-ndó òré càháⁿ-í dòho-ndo nàcuáa cada-ndo cùndecu-ndo.

“Chi mee-í dándòho-í nchaa ñáiyu cùu iní-í cuèndá sá cùndáá-yu núu-í, te quide úhú-í-yu, te díu-ní-yu cùu-yu ñáiyu càhí-í cúu dèhe-í.

Duha càhí-gá núú tütú-gá. ⁷ Te ío cada ndee iní-ndó sá dúcáⁿ dándoho ñaha Yá Ndióxi xii-ndo, chi quide-gá sá cúu-gá Tátá-ó. Te ñá túú ní íoⁿ téé cùu tátá te cachí-ó sá ñá túú sanu ichi-dé cue dèhe-dé nàcuáa tãú-xi cunduu. ⁸ Te núu Yá Ndióxi ñá túú dándoho ñaha-gá xii-ndo dàtná dándòho-gá cue ñáiyu càhí-gá cúu dèhe-gá, te ñá díú dèhe mee-gá cúu-ndó te núu ducaⁿ, chi cùu-ndo datná cue

ñáiyu ñá túú cùtnuní yoo cùu tátá-xi.
⁹ Te nchoo sà naha-o sá cùtnàhá ní cuu landú-ó ní sanu ichi ñaha tátá-ó nàcuáa tãù-xi cunduu, te ducaⁿ ní xóo canehe-o sá yíñùhu núu-güedë te ñiu-ni ducaⁿ nèhe-o sá yíñùhu núu-güedë vitna. Te núu ducaⁿ ní sándáá iní-ó tátá-ó, te ío-gá xíní ñùhu-xi quíndáá iní-ó Tãtá-ó Dütú Ndiöxí cuendá ducaⁿ ndùu tãhú-ó cùndecu-o ndìhi-gá ní caa ní quíhíⁿ, chi ñiu-gá cúu-gã Yaá ní chihí iní-ó.
¹⁰ Te cùtnàhá ní cuu landú-ó, ñá túú titní nduu ní càniha tátá-ó ní sanu ichi ñaha-güedë xii-o nàcuáa ní cuu iní mée-güedë. Te Yá Ndiöxí ducaⁿ dándoho ñaha-gá xii-o sànu ichi ñaha-gá cuendá cúu-xí sá vãha sá cúu-xí-ó, te ducaⁿ quide-gá cuendá nchoo càda ndáá-ó dàtná quidé mée-gá.
¹¹ Te òrè véxi ìⁿ tnúndòho sá cúu-xí-ó te ñá túú cùdíí iní-ó chi dándihú iní ñáhá-xí xii-o. Te nchaa ñáiyu ngúnu ichi sá cuendá nchaa tnúndòho-áⁿ te ngüíta-yu quide ndáá-yu, te ío váha cùu iní-yu ndécú-yu.

Vá dáquèe tihú-ó tnùhu Yá Ndiöxí

¹² Te núu xiãⁿ ío chí ndúcú ndèe-gá canchicúⁿ niñhu-ndo ichi Xítohó Jesucristú, te vá dicó yica cùu iní-ndó cànchicúⁿ niñhu-ndo ichi-gá.
¹³ Te cada váha-ndo cùndecu-ndo ichi-gá cuendá nchaa ñáiyu sàni ìⁿ sani úu iní-xí níhí ndéë-yu cundecú-yu ichi-gá te vá ná tùhú iní-yu canchicúⁿ niñmú-yu.

¹⁴ Te nducu-ndo nàcuáa cada-ndo cùndecu váha-ndo ndìhi cue tñaha ñáiyu-ndo, te ío cada váha-ndo cùndecu-ndo nàcuáa cundáá-ndó núu Yá Ndiöxí chi núu vá dúcáⁿ càda-ndo te vá ndúú tãhú-ndó cùndecu-ndo ndìhi-gá.
¹⁵ Te ío váha cada cuendá-ndó nàcuáa cada-ndo cùndecu-ndo, chi núu ñáhá te vá chíndèe ñaha-gá Yá Ndiöxí xii-ndo. Te ío váha cada cuendá tucu-ndo nàcuáa cundecu-ndo vá cání cuèhé iní-ndó cuendá Yá Ndiöxí, chi núu ducaⁿ na càda-ndo te dava-gá ñáiyu ndècu ndìhi-ndo ichi-gá tñahá-yu ngüíta-yu ducaⁿ càdá-yu, te vá cùndecu váha-gá-ndó ndìhi-yu ichi-gá.
¹⁶ Te cada cuendá tucu-ndo sá vá cùndecu-ndo ichi díí iní, te ní vá dáquèe tihú-ndó ní ìⁿ sá cúu cuendá Yá Ndiöxí dàtná ní quide ndíi Esàú, chí sá cuãñaha tátá ndíi-áⁿ nduu tãhú ndíi ní cùu ní dama ndíi ìⁿ cóhó comidá.
¹⁷ Te nchòhó sa naha-ndo sá cùtnàhá ní cuini

ndíi Esàú cãcáⁿ tãhú tátá ndíi núu Yá Ndiöxí cuendá nchaa sá ndúú tãhú ndíi ní cùu, te ñá túú ní xicáⁿ tãhú tátá ndíi núu Yá Ndiöxí nàcuáa cuini mée ndíi ní cùu. Te ní ndáhíyú víhí ndíi, te cuèi ducaⁿ ní quide ndíi dico ñá túú ní ndàcu-gá ndíi nàníhí ndíi tãhú sá ní dama ndíi comidá.

¹⁸ Te cue ñáiyu isràel ní sátuhá-yu ìⁿ yucu núu càyú ñuhú, te nchòhó ñá túú ndéè ducaⁿ sàháⁿ tuha-ndo ìⁿ yucu núu càyú ñuhú dàtná ní quide cue ñáiyu-áⁿ. Te cùtnàhá ducaⁿ ní sátuhá-yu yucu-áⁿ te ní cunee víhi níhí yucu-áⁿ, te ní quene táchí níhi.
¹⁹ Te ní tecú dóho-yu ní cáháⁿ ìⁿ cútú, te ní tecú tucu dóho-yu ní cáháⁿ Yá Ndiöxí ní cáháⁿ ndíhi ñaha-gã xií-yu. Te nchaa ñáiyu ní tecú dóho-xí ní cáháⁿ-gá te ní cuini-yu sá vá càháⁿ-gá.
²⁰ Te ducaⁿ ní quidé-yu chí ñá túú ní cùndee iní-yu nàcuáa ní cáháⁿ-gá, te duha ní cachí-gá: “Te cuèi ìⁿ quiti nà yáha xití yucu-a, te cahni-ndo-di ndíhi yúú àdi ndíhi ìⁿ yutnu puyá”, duha ní cachí-gá.
²¹ Te sá dúcáⁿ ní quide-xi ní xini-yu xiãⁿ ío ní dáyhúhú ñáhá-xí xii-yu. Te tñahá té Moisés ní yùhú-dé, te ní cachí-dé: “Quídi ñaha-xi xii-í sá yùhú-í”, duha ní cachí-dé.

²² Te nchòhó, ñá túú quide-ndo datná ní quide cue ñáiyu-áⁿ ní sáháⁿ tuhá-yu yucu-áⁿ, dico cada iní-ndó sá sá ní tuha-ndo yùcu Sión sá ndécú núu ndécú Yá Ndiöxí, ndíhi ñuu-gá ñuu Jerusalem sá caá àndiu te ñiu-gá cúu-gã Yaá ndécú nchaa nduu nchaa quíú. Te ñiu-ni xiãⁿ xíndecu cuèhé víhí cuè espíritú xínú cuèchi núu-gã
²³ chíñùhu ñaha-xi xii-gá. Te nchòhó cúu-ndó cuè ñáiyu cùu cuendá Yá Ndiöxí, te ní tñahá tnùhu-ndo ndíhi nchaa dava-gá ñáiyu cùu cuendá-gá, ñáiyu yòdo tnuní núu tütú-gá ndécú àndiu, te ñiu-ni ñáiyu-áⁿ cuãñaha-gã xií-yu sá ndúú tãhú-yu. Te nchòhó ní tuha-ndo Yá Ndiöxí Yaá cada ndáá yícá cuèchi nchaa ñáiyu. Te cada iní-ndó sá ní tñahá tnùhu-ndo ndíhi cue ñáiyu ní quide ndáá ní xíndecu ichi Yá Ndiöxí ñuyú-a. Te ñáiyu-áⁿ ñá túú tñahí-gá ná cúmãñ-yu vitna ndécú-yu núu-gã.
²⁴ Te ní tñahá tnùhu-ndo ndíhi Xítohó Jesucristú Yaá ní quide nàcuáa cada Yá Ndiöxí íngá núu sá váha sá cúu-xí nchaa nchoo ñáiyu ndècu ñuyú-a, chí ní sati níñí-gã te ní xíhí-gá

núú cùrúxí. Te níñí Xítóhó Jesucristú ñá túú ñⁿ-ni cuu-xi ndihí níñí ndíi Àbél, chi diu cuendá níñí-gá-áⁿ ní quide càhnu iní Yá Ndiöxí nchaa cuèchi-o.

²⁵ Núu xiáⁿ ío cada cuendá-ndó vǎ dáquèe tihú-ndó tnúhu càháⁿ Yá Ndiöxí, chi nchaa ñáyiú ní xíndecu ndéé sanaha dùcaⁿ ní quidé-yu ní dáquée tihú-yu tnúhu ní càháⁿ-gá ñuyúú-a sá cúú-xí-yu. Te ñá túú ní cǎcu-yu chi ní nacháhu-yu sá dúcáⁿ ní quidé-yu. Te uuⁿ-gá tucu nchoo chi vǎ cǎcu-o te núu ducaⁿ na dàquee tihú-ó tnúhu càháⁿ Yá Ndiöxí ndéé andiu sǎ cúú-xí-ó. ²⁶ Te cútñàhá ní càháⁿ Yá Ndiöxí ndéé sanaha te ní quidi-xi ñuyúú. Te vitna cǎchí-gá: “Yúhú quidi tucu-í ìngá xito ñuyúú, te ñá díú mèe-ni ñuyúú ducaⁿ quidi-í chi tnàhá andiu quidi-í”, cǎchí-gá. ²⁷ Te sá dúcáⁿ càháⁿ-gá sá ìngá xito tucu ducaⁿ càda-gá xiáⁿ cútñuní sá ncháandí túhú sá túu ndèhe-o danaa-gá. Te nchaa sá ñá túú ndéé túu quini-ó ñuyúú-a xiáⁿ vǎ quidi-xí te ni vǎ náá-xí. ²⁸ Te núú ní cǎchí Yá Ndiöxí nduu táhú-ó cùndecu-o chi mee-gǎ táxí tnùnì-gá xiáⁿ, te ni vǎ quidi-xí te ni vǎ náá-xí. Te xiáⁿ ío xini ñuhu-xi ndacáⁿ táhú-ó núú-gǎ, te yiñuhu yiñuhu cunu cuechi-o núú-gǎ nàcuáa cuu váha iní-gá, te ducaⁿ cùhuⁿ iní-ó sǎ ío càhnu cuu-gá. ²⁹ Te Tǎtá-ó Dútú Ndiöxí cúú-gǎ dàtná ñⁿ ñuhú chi danàa-gá nchaa sá ñá túú quide nacuáa cuu váha iní-gá.

13

Nàcuáa tàù-xi cada-o cuendá cuu váha iní Yá Ndiöxí

¹ Te nchaa nchòhó ñáyiú ndècu ichi Xítóhó Jesucristú, vǎ dàñá ndéé-ndó cùu iní tnàhá-ndó nàcuáa ndècu-ndó ichi-gá. ² Te cunaha-ndo sǎ núu ío ñáyiú ñuhu ichi ní quexìo-yu vehe-ndo te cuañaha-ndo vehe ndetatú-yu, te cuañaha-ndo sǎ cǎxí-yu. Chi davá-yu ndéé espíritú xínú cuèchi núú Yá Ndiöxí ní sáháⁿ vehé-yu ní queheⁿ cuendá-yu te ñá túú ní cútñuní iní-yu sá díú espíritú xínú cuèchi núú-gǎ cúú-xí.

³ Te ndacu tucu iní-ndó cuè ñáyiú xixíhi vecaá, te cada iní-ndó sǎ tnàhá-ndó yíhi-ndo vecaá ndihí-yu. Te ndacu tucu iní-ndó nchaa ñáyiú ío ndòho, te cada iní-ndó sǎ tnàhá-ndó ndòho-ndo ndihí-yu.

⁴ Te nchaa ñáyiú na cǎchí-yu sá ñⁿ sá vǎha cùu-xi sá ñⁿ téé ndihí ñⁿ ñadìhí ná ñihí tnàhá-yu candeca tnàhá-yu. Te nchòhó cue tée vǎ cání iní-ndó cǎháⁿ ndihí-ndo ñadìhí te núu ñá díú ñadìhí-ndó cùu-yu. Te ducaⁿ-ni nchòhó cue ñáyiú ñihí tucu vǎ cání iní-ndó cǎháⁿ ndihí-ndo tée te núu ñá díú yíi-ndo cuu-güedé, chi Yá Ndiöxí dandòho-gá nchaa ñáyiú ndècu ichi díú iní.

⁵ Te vǎ cùhúⁿ iní-ndó mèe-ni ñhúⁿ. Te núu nándi cùu nchaa sǎ ndécú ndihí-ndo te diu-ni nchaa xiáⁿ sa nduu vétú iní-ndó, chi Yá Ndiöxí ní cǎchí-gá: “Ni ñⁿ nduu vǎ dàñá ñihnu ñaha-í xii-ndo, chi nchaa-ni nduu chindee ñaha-í”, duha ní cǎchí-gá. ⁶ Te xiáⁿ núu nchoo ñi yuhu ní iní-ó cǎháⁿ-ó ñⁿ ñⁿ-o, te cǎchí-ó:

Yá Ndiöxí cúú-gǎ Yaa chíndèe ñaha xii-í, núu xiáⁿ ñá túú yùhú-í cuèi nándi càháⁿ ñáyiú cada ñàhá-yu xii-í. Duha cǎchí-ó.

⁷ Chí ndácú iní cue tée ní sanu ichi ñaha xii-ndo ichi Xítóhó Jesucristú cue tée ní càháⁿ tnúhu Yá Ndiöxí núú-ndó, te ío váha chí nàcuáha cuendá nàcuáa ní quide nchaa cue tée-áⁿ ní xíndecu-güedé ndéé ní sáá nduu ní xihí-güedé. Te ío quindáa iní-ndó Yá Ndiöxí dàtná ní xóo cada cue tée-áⁿ.

⁸ Te dàtná-ni ní quide Xítóhó Jesucristú ndéé sanaha diu-ni ducaⁿ quide-gá vitna, te diu-ni ducaⁿ càda-gá ndéé núú cuaháⁿ núú vèxi. ⁹ Te vǎ dàñá-ndó mèe-ndo dandahú ñàhá ñáyiú dacaháⁿ ñàhá xii-ndo natuha-ndo ìngá ichi, ñáyiú ñanehé tnàha ñáyiú-xi nándi sá ní cutúha-yu, te nchaa xiáⁿ ñá túú ñⁿ-ni caháⁿ-xi ndihí tnúhu sá ndécú ndihí-ndo. Te Yá Ndiöxí chíndèe ñaha-gá xii-o nàcuáa ñihí ndéé-ó cùndecu-o ichi-gá, te ducaⁿ te cuu-xi sá vǎha sá cúú-xí-ó, te ñá díú cuendá ñⁿ sá xéxí-ó ñihí ndéé-ó ndècu-o ichi-gá. Te dava ñáyiú cǎchí-yu sá davá núú comidá cuu caxi-o te dava ñàhá nàcuáa ñihí ndéé-ó cùndecu-o ichi-gá, dico ñá ndàá sá sǎ dúcáⁿ vǎ cǎxí-ó nchaa núú comidá ñihí ndéé-ó cùndecu-o ichi-gá.

¹⁰ Chi Xítóhó Jesucristú ní xihí-gá cuendá-ó núú cùrúxí, te nchaa ñáyiú nchìcúⁿ ñihnu-ni quide nchaa nacuáa ní quide nchaa dútú ní xinu cuechi núú Yá Ndiöxí ndéé sanaha, ñáyiú-áⁿ vǎ cúú tnàhá tnúhu-yu ndihí Xítóhó Jesucristú Yaa ní xihí núú cùrúxí sá dúcáⁿ quidé-yu. ¹¹ Chi

dútú cúnùu-gá ní xíndecu ndihi cue ñáyiú isráèl, téé-áⁿ nǐ xóo canehe-dé níñí nchaa quiiti ní xóo cahni-dé ní xóo quihu ndéé xiti cuártú ní cuu íí-gǎ. Te ducaⁿ nǐ xóo cada dútú-áⁿ cuèndá cada càhnu iní Yá Ndiòxí nchaa yíca cuèchi ñáyiú, te cuñú nchaa quiiti-áⁿ nǐ xóo cahmi-güedé ìⁿ xio yuhu ñúú. ¹² Te ducaⁿ nǐ yáha Xítohó Jesucristú chi ndéé ìⁿ xio yuhu ñúú ní sahani ñaha-güedé xii-gǎ. Te cuèndá níñí-gǎ sá nǐ sati núú cùrúxí núú nǐ xíhí-gǎ, ní nduu ndoo ní nduu nine iní cue ñáyiú sàndáá iní ñahá xii-gǎ. ¹³ Te vitna chí ná tùha-o Xítohó Jesucristú te cada ndee iní-ó ndòho-o datná ní ndoho-gǎ. ¹⁴ Te ñuyúú-a ni ìⁿ xichi ñá túú ndèé cáá ìⁿ ñúú cudíi ni caa ni quihíⁿ cuèndá cundecu-o, dico ducaⁿ-ni ñùhu iní-ó ìⁿ xichi núú ndúú táhú-ó cùndecu-o ni caa ni quihíⁿ.

¹⁵ Te núu xíáⁿ xíní ñùhu-xi sá vǎ dáñá ndéé-ó chiñuhu-o Dútú Ndiòxí chi Xítohó Jesucristú ní quide-gǎ nàcuáa ndacu-o tñahá tñùhu-o ndihi Yá Ndiòxí, te òré càháⁿ ndihi-o-gǎ te nuu núu ndacáⁿ táhú-ó nǐú-gǎ. Te nchaa tñùhu càháⁿ-ó òré càháⁿ ndihi-o-gǎ cúú-xi datná ìⁿ táhú sǎ cúú-xí-gǎ. ¹⁶ Te vǎ dáñá ndéé-ndó càda-ndo mee-ni sá vǎha cundecu-ndo, te ducaⁿ chindee tñaha-ndo ìⁿ ìⁿ-ndo ndihi sá ndécú ndihi-ndo. Te núu ducaⁿ na càda-ndo te cani iní-ndó sǎ cúú-xí datná ìⁿ táhú sǎ ìo vǎha cùu iní Yá Ndiòxí.

¹⁷ Te quindáá iní-ndó càda-ndo nchaa nacuaá càháⁿ cue téé yíndaha ñaha xii-ndo nacuaá ndècu-ndo ichi Xítohó Jesucristú, chi diu cue téé-áⁿ quidé cuèndá ñahá-güedé xii-ndo nacuaá cundecu vǎha-ndo núú-gǎ. Te sáá nduu nàcani tñùhu-güedé núú-gǎ núu ní quide vǎha-güedé àdi ñá túú ní quide vǎha-güedé ní xíndecu ndihi ñaha-güedé xii-ndo. Te núu ducaⁿ na càda-ndo quindáá iní-ndó-güedé te cudíi iní-güedé cundecu ndihi ñaha-güedé xii-ndo, te vǎ ndihú iní-güedé. Te núu vǎ dúcáⁿ càda-ndo te vǎ cúú-xí sǎ vǎha xii-ndo nchaa sá quidé-güedé sá cúú-xí-ndó.

¹⁸ Te càháⁿ ndàhú-í núú-ndó sǎ càháⁿ ndihi-ndo Yá Ndiòxí cuèndá-ndí. Te nchúhú cútñuní ndáá iní-ndí sá ñà túú nǎ cùmǎní-ndí núú Yá Ndiòxí, te ducaⁿ chi ndùcu-ndí nàcuáa quide-ndí cundáá-ndí núú-gǎ. ¹⁹ Te càháⁿ ndàhú tucu-í núú-ndó sǎ

ìo cǎcáⁿ táhú-ndó núú Yá Ndiòxí cuèndá sá mée-gǎ ná cǎdá te ìo ndihi quixi coto ñaha tùcu-í xii-ndo.

Tñùhu ndéé núú ní ndihi-ná

²⁰ Te Yá Ndiòxí Yáá quidé cùu vǎha iní-ó ndècu-o, Yáá-áⁿ nǐ dándótó-gǎ Xítohó Jesucristú. Te Xítohó Jesucristú-áⁿ cúú-gǎ datná ìⁿ toli ìo-gǎ quéné cǎva xito mbéé. Te ducaⁿ sǎtnahá-xi cùu-gǎ cuèndá sá nǐ sati níñí-gǎ te ní xíhí-gǎ, te ducaⁿ nǐ cuu cuèndá sá nǐ quide ndáá-gǎ ndihi Yá Ndiòxí sá cǎdá-gǎ ingá núú sǎ vǎha sá cúú-xí nchòo cue ñáyiú ndècu ñuyúú-a. Te nàcuáa ní quide ndáá-gǎ ndihi Yá Ndiòxí te diu-ni ducaⁿ càda-xi núú cuàháⁿ núú vèxi. ²¹ Te xicáⁿ táhú-í núú Yá Ndiòxí sá mée-gǎ ná chindee ñaha-gǎ xii-ndo cuèndá cada-ndo mée-ni sá vǎha nàcuáa cuiní mée-gǎ, te mee-gǎ ná cǎdá ñaha-gǎ xii-o nchaa sá vǎha sá sání iní-gǎ. Te diu-ni ducaⁿ na tàuchiuⁿ-gǎ cada Xítohó Jesucristú sá cúú-xí-ó, duha xicáⁿ táhú-í núú-gǎ. Te vitna nchaa-o chí ná càchí-ó sǎ ìo çahnu cuu Xítohó Jesucristú ní caa ni quihíⁿ. Te ducaⁿ na cùnduu.

²² Te càháⁿ ndàhú-í núú nchòhò ñáyiú ndècu ndihi-í ichi Xítohó Jesucristú sá cǎdá càhnu iní-ndó nàcuáa nduu nchaa tñùhu càháⁿ-í dásahú ñahà-í xii-ndo, chi ñá túú vǎi tñùhu chido tñuní-í núú tütú-a sá cúú-xí-ndó.

²³ Te càchí tñùhu-í xii-ndo sǎ tē Timùteú téé ndècu ndihi-o ichi Xítohó Jesucristú ní cǎcu-dé ñá túú-gǎ yíhí-dé vecaá. Te núu na quèxio ndihi-dé núú ndécú-í te quixi-í ndihi-dé núú ndécú-ndó quixi coto ñaha-ndí.

²⁴ Te cùñaha-ndo sǎ ìo na càda ndee iní nchaa cue téé yíndaha ñaha xii-ndo nacuaá ndècu-ndo ichi Yá Ndiòxí. Te ducaⁿ cùñaha tùcu-ndo xii nchaa dava-gǎ ñáyiú cùu cuèndá-gǎ sǎ ìo na càda ndee iní-yu. Te cue ñáyiú nàcióⁿ Itàliá ñáyiú ndècu ndihi-o ichi-gǎ càchí-yu sǎ ìo cada ndee iní-ndó.

²⁵ Te Yá Ndiòxí ìo na chindee chitúu ñaha-gǎ xii-ndo nchaa-ndo. Te ducaⁿ na cùnduu. Te ìo chí cǎdá ndèe iní-nǎ vitna.

TUTÚ NÍ CADÚHA TÊ SÂNTIAÚ

Tê Sântiaú cadúha-dé tutú quíhíⁿ ndaha ñáiyu isráel nchíté nuu nihíí ñuyúú

¹ Yúhú té Sântiaú xínú cuèchi-í núú Yá Ndióxi ndihi núú Xítoho Jesucristú, te tée-í tnúhu-a quide ndee iní ñáhà-í xii nchòhò ñáiyu isráel nchíté nuu nihíí ñuyúú-a.

Yá Ndióxi táxi-gá sá xini tnúni-ó

² Te nchòhò ñáiyu ndècu ndihi-í ichi Xítoho Jesucristú, ío cudíí iní-ndó cùndecu-ndo cuéi náí cùu sá úhú véxi cuèndá-ndó, ³ chi ducaⁿ te cutnùni iní-ndó sá sàndáá ndisa iní-ndó-gá, te cunduu càhnu iní-ndó cuéi náí ná yáha-ndo. ⁴ Te cunduu càhnu-ni iní-ndó te ducaⁿ te cuu-ndo ñáiyu váha, te cundáá-ndó núú Yá Ndióxi, te ducaⁿ te ñá túú-gá ná cumání-ndó núú-gá.

⁵ Te núu cùmání sá xini tnúni-ó, te cãcãⁿ-ó núú Yá Ndióxi te mee-gã taxi-gá, chi ío váha iní-gá, te ñá túú cùnini iní-gá núú-ó. ⁶ Te ni yùhu ni iní-ó cãcãⁿ-ó núú-gá, te quindáá ndisa iní-ó sá táxi-gá sá cùmání quini tnúni-ó, te vá cáni ñⁿ cani úú iní-ó. Chi nchaa ñáiyu sàni ñⁿ sani úú iní-xi cùú-yu dàtná ndute lámár cuáháⁿ-xi duha cuáháⁿ-xi dàcãⁿ nãá-xi òré quéné tãchi. ⁷ Te nchaa ñáiyu ducaⁿ sàni iní-xi, te vá cáni iní-yu sá nihí-yu sá xicãⁿ-yu núú-gá. ⁸ Chi nchaa ñáiyu sàni ñⁿ sani úú iní-xi ñá cútñúni iní-yu ndedacã sá sání iní-yu cadá-yu.

⁹ Te nchaa ñáiyu ndàhú ñáiyu ndècu ichi-gá, xini ñuhu-xi ñá túú-gá ná cani iní-yu, mee-nã cudíí iní-yu, chi Yá Ndióxi chindèe ñaha-gá xii-yu. ¹⁰ Te nchaa ñáiyu cuica xini ñuhu-xi cundecu váha iní-yu núú Yá Ndióxi cuéi náí ná yáha-yu. Chi ñáiyu-áⁿ cùú-yu dàtná itá nchaa cùhú sá ñà túú cùdíi naha. ¹¹ Chi òré ní cuu níhi cahni nchícanhii, te ní dádíí-ni-xi nchaa cùhú cuíí-ãⁿ te ní cóyo-ni nchaa itá-xi, te ñá túú-gá cáá vii. Te ducaⁿ sãtnahá-xi cùu ñáiyu cuica chi núú chíúⁿ-ní-yu xihí-yu.

Nchaa ñáiyu quide cahnu iní-xi nchaa sá yáha-yu

¹² Te váha táhú nchaa ñáiyu quide cahnu-ni iní-xi cuéi nãndi sá yáha-yu

ndècú-yu ichi Yá Ndióxi, chi òré ná ndíhí nchaa xiãⁿ yáha-yu, te cuãñaha Yá Ndióxi ñⁿ coróná váha vihi cundecu ndíhí-yu, te ndáá chi ducaⁿ càháⁿ Yá Ndióxi sá táxi-gá xii nchaa nchoo ñáiyu ñuhu iní ñáhà xii-gá.

¹³ Te nchaa ñáiyu sàni iní-xi cada nãndi sá cuèhé sá dúhá, te vá cáni iní-yu sá Yá Ndióxi táuchìuⁿ-gá ducaⁿ cadá-yu, chi Yá Ndióxi ñá quíú te cani iní-gá cada-gá ñⁿ sá cuèhé sá dúhá, te ni ñà túú tàuchiuⁿ-gá sá dúcãⁿ cadá-yu. ¹⁴ Te cuiniⁿ-yu cadá-yu nchaa sá cuèhé sá dúhá chi ducaⁿ véxi iní-yu. ¹⁵ Te nchaa ñáiyu ío ñuhu iní nchaa sá cuèhé sá dúhá te quide-yu, te núu na càda-ni-yu te cuíta nihnú-yu.

¹⁶ Te nchòhò ñáiyu ío cùu iní-í ndécú ndíhí-í ichi Xítoho Jesucristú, vá dàñá-ndó mée-ndo dandahú ñáhá ñáiyu xii-ndo. ¹⁷ Chi nchaa sá váha véxi-xi núú Yá Ndióxi Yáá ndécú àndiu, chi diu mee-gã ní cadúha-gá andiu ndíhi nchaa chódíni, ndíhi yóó, ndíhi nchícanhii. Te Yá Ndióxi ñá túú ndi queheⁿ ndi queheⁿ-gá sá cáni iní-gá, te ni ñà túú cùu-gá dàtná ñⁿ cuándahú cuáháⁿ-xi duha cuáháⁿ-xi dàcãⁿ, chi ñⁿ-ni sá sání iní-gá. ¹⁸ Te Yá Ndióxi ní cuini-gá sá cùú-ó dèhe-gá, te ndáá sá cùú-ó dèhe-gá chi sàndáá iní-ó tnúhu-gá. Te nchoo ñáiyu sàndáá iní-xi tnúhu-gá cùnùu-gá-ó chi ní nduu-o dèhe-gá.

Ichi ndáá cuiti

¹⁹ Te nchòhò ñáiyu ío cùu iní-í ndécú ndíhí-í ichi Xítoho Jesucristú, cundedóho-ndo ñⁿ tnúhu na càháⁿ-í-a. Te cuini-í sá cundecu túha-ndo cùndedóho-ndo tnúhu Yá Ndióxi, te cani váha iní-ndó nãcuãa càháⁿ-ndó, te cunduu càhnu iní-ndó te vá cùdèéⁿ-ndó. ²⁰ Chi núu na cùdèéⁿ-ó te ñá túú quide váha-o núú Yá Ndióxi. ²¹ Te daña-ndo nchaa sá cuèhé sá dúhá ío ñuyúú-a. Te quindáá iní-ndó tnúhu Yá Ndióxi ndécú ndíhí-ndo, te vá cùnduu sáá iní-ndó, te ducaⁿ te naníhí tàhú-ndó.

²² Te quindáá iní-ndó tnúhu-gá te vá cuèndá-ni cundedóho-ndo, chi núu na cùndedóho-ndo te vá tníí-ndó ñá, te dicó-ni dandahú-ndó mée-ndo te vá naníhí tàhú-ndó. ²³ Chi nchaa ñáiyu dicó-ni sácùndedóho tnúhu-gá te ñá túú sàndáá iní-yu, ñáiyu-áⁿ cùú-yu dàtná ñⁿ ñáiyu sácùndéhé-ni núú-xi núú yùtátá. ²⁴ Chi nini ndèhé-yu ní xini-yu núú-yu, te ní

xócání-yu te ní nacuanaa-ní-yu nàcuáa càa núú-yu. Te ducaⁿ sàtnahá-xi cùu ñáiyu sàcúndedóho tnúhu Yá Ndióxi, te ñá túú tñíí-yu. ²⁵Te nchaa ñáiyu dàcuaha ndisa tnúhu ní dándóo Yá Ndióxi nihnu-ní-yu ichi-gá, chi ñá díú ñíⁿ sá vée cùu-xi. Te ñáiyu-áⁿ ñà túú dicó-ni sàcúndedóho-yu chi quide ndáá-yu núú-gá, te cùdíí iní-yu xíndecú-yu.

²⁶Te nchaa ñáiyu càchí sá ndécú ichi ndáá te cùtexínu-ni càháⁿ-yu, te xíáⁿ dicó-ni dándahú-yu mée-yu sá ndécú-yu ichi ndáá. ²⁷Te núu ndècu-o ichi ndáá cuití ichi Dítú Ndióxi, te chindee-o nchaa ñáiyu ní ndóo ndàhú, ndihi ñáiyu quèe ndécú ndíhi tnúndòho tnúhu ndàhú, te vá cádá-ó nándi sá cuèhé sá dúhá íó ñuyúú-a.

2

Ñínuu-ni cùu iní-ó nchaa tnaha ñáiyu-o

¹Te nchòhó ñáiyu ndècu ndíhi-í ichi Xítohó Jesucristú Yaá cúnúu, ñínuu-ni càháⁿ ndíhi váha-ndo nchaa tnaha ñáiyu-ndo. ²Te núu núu nátàcá-ndó chíñuhu-ndo Yá Ndióxi ní sáá ñíⁿ tée ío váha càa dóo nihnú-dě, te ní sáá tucu ñíⁿ tée nihnu dóo ndàhú, ³te núu tée nihnu dóo váha-ni-áⁿ néhé-ndó sá yíñuhu núú-dě, te taxinucóo-ndo-dě ñíⁿ núú xilé váha, te tée ndàhú-áⁿ daxòcáo-ndo-dě ñíⁿ xio àdi canucóo-ndo-dě núú ñúhú, ⁴te núu ducaⁿ na càda-ndo te ñá túú quide váha-ndo. Chi ñíⁿ-ní-dé cùú ìní-ndó, te ñíⁿ-dé ñá túú cùu iní-ndó.

⁵Te nchòhó ñáiyu ío cùu iní-í ndécú ndíhi-í ichi Xítohó Jesucristú, chí cùndedóho tucu tnúhu na càháⁿ-í-a. Yá Ndióxi càháⁿ-gá vai ñáiyu ndàhú cuendá tnahá tnúhu ndíhi ñàhá-yu xii-gá, te ndècu váha-gá-yu dàcúxí ñáiyu cuica ñáiyu ñá túú sàndáá iní tnúhu-gá, chi ní cachí-gá sá ncháá ñáiyu na cùu iní ñàhá xii-gá nduu táhú-yu cundecú-yu ndíhi-gá ni caa ni quíñíⁿ. ⁶Te nchòhó, ñá túú nèhe-ndo sá yíñuhu núú ñáiyu ndàhú, chi núú ñáiyu cuica-ni nèhe-ndo sá yíñuhu. ⁷Te náa ñá cùtnùní iní-ndó sá ñáiyu cuica dándoho ñaha-gá-yu xii-ndo, te cãndeca ñàhá-yu sàháⁿ núú cuè tée cùchiuⁿ-áⁿ? ⁷Te diu-ní-yu ío càháⁿ cuèhé-yu cuendá Xítohó

Jesucristú, te nchòhó sa ní nduu-ndo dèhe-gá.

⁸Te ñíⁿ ndudú cúnúu-gá ní càháⁿ Yá Ndióxi ní ngódó tnùni núú tütú-gá càchí-xi sá cùú ìní-ó tnaha ñáiyu-o dàtná cùú ìní-ó mée-o. Te núu ducaⁿ na càda-o te quide váha-o. ⁹Dico núu ñá túú cùu iní ñíⁿnuu-o cuè tnaha ñáiyu-o, te cuu cuèchi xii-o chí ñá túú quide-o nacúaa càháⁿ Yá Ndióxi. ¹⁰Te núu ñíⁿ ñáiyu ndàunihnu ñíⁿ sá càháⁿ Yá Ndióxi, te dava-ni quidé-yu ña, te ñáiyu-áⁿ ñà túú quidé-yu nàcuáa càháⁿ ndudú Yá Ndióxi. ¹¹Te Yá Ndióxi ní cachí-gá sá tée ndècu ñadíhi-xi vá càháⁿ ndíhi-dé ingá ñadíhi. Te diu-ni-gá ní cachí-gá sá vá càhni-ó tnaha ñáiyu-o. Te cuèi ñá túú càháⁿ ndíhi-o ingá ñadíhi, te núu sàhni-o tnaha ñáiyu-o te ñá túú quide-o nacúaa càháⁿ ndudú Yá Ndióxi. ¹²Te nchoo xini ñuhu-xi càháⁿ-ó tnúhu váha te cada ndáá-ó, chí ñá díú ñíⁿ sá vée cùu-xi sá ní cachí Yá Ndióxi cada-o. Te mee-gá ní cachí-gá sá cádá ndáá-gá cuèchi-o na sáá nduu. ¹³Te nchaa ñáiyu ñá túú cundahú iní tnaha ñáiyu-xi, te vá cundahú iní ñàhá-gá xii-yu na sáá nduu càda ndáá-gá cuèchi-yu. Te nchaa ñáiyu cundahú iní tnaha ñáiyu-xi te Yá Ndióxi cundahú iní ñàhá-gá xii-yu na sáá nduu-áⁿ.

Quindáá iní-ó Yá Ndióxi te cada váha-o

¹⁴Te nchòhó ñáiyu ndècu ndíhi-í ichi Xítohó Jesucristú, te núu càchí-ó sá sàndáá iní-ó Yá Ndióxi te ñá túú quide-o sá váha, te ñá túú ndèe nándíhi-xi, chí vá náníhi tãhú-ó te núu ducaⁿ na càda-o. ¹⁵Te núu ndèhe-o ñíⁿ tnaha ñáiyu-o ñà túú dõo-yu àdi ñá túú sá cúnchitó-yu, ¹⁶te xãhaⁿ-o: “Núhú-n te nducu-n dóo cuihnu-n te nducu-n sá cáxí-n”, xãhaⁿ-o, te ñá túú ñá sãñaha-o, te sá dúcáⁿ quide-o te ñá túú quide váha-o. ¹⁷Te núu càchí-ó sá sàndáá iní-ó Yá Ndióxi te ñá túú quide váha-o ndècu-o, te vèdana nándíhi-xi.

¹⁸Te ío ñáiyu càchí-yu sá sàndáá iní-yu Yá Ndióxi, te ío ñáiyu càchí-yu sá mée-ní sá váha quidé-yu. Te yúhú càchí-í sá ñuu ñá túú quide-o sá váha, te ñá túú sàndáá iní-ó Yá Ndióxi. Te nchoo quide-o sá váha núu xíáⁿ cùtnùní iní-ó sá sàndáá iní-ó-gá. ¹⁹Te ío ñáiyu càchí sá ñíⁿdii-ni Yá Ndióxi ndécú, te váha-ni càháⁿ-yu. Te tnàhá yucu ñávãha ndíhi nchaa espíritu cùndíhi-xi xini-xi sá ndécú ñíⁿdii-ni Yá Ndióxi, te yúhú-xi dico

ñá túú tñi-xi tñúhu-gá. ²⁰ Te ío ñi ñáquí-ó te núu na càchí-ó sã sãndáá iní-ó Yã Ndiõxí, te vá cáda-ó sã váha. ²¹ Te ñani tñhá-ó ndíi Àbrahám téé ní xíndecu ndéé sanaha ní ngúndecu váha ndíi núú Yã Ndiõxí, chi ní xito ndéé ñáhá-gã xii ndíi núu ndisa sá cáhni ndíi déhe ndíi té Isàac nduu táhú-gã ní cùu, te dàvá-án ní cutnùní iní-gá sã ño sãndáá iní ñáhá ndíi xii-gá, núu ñá ní dàña-gá cahni ndíi déhe ndíi. ²² Te ñaha-o sá ndíi Àbrahám ñá díú-ní sã mée-ní sã ní sãndáá iní ñáhá ndíi xii-gá, chi ní tñi ndíi tñúhu-gá. ²³ Te ducaⁿ ní quee ndáá-xi nàcuáa càháⁿ-xi núú tütú Yã Ndiõxí núú càchí-xi: “Ndíi Àbrahám ní sãndáá iní ndíi ní quide ndíi nchaa nàcuáa ní xáhaⁿ Yã Ndiõxí, te ní ngúndecu váha ndíi núú-gã, te ní cachí-gá sá cúú ndíi ñiⁿ téé ío váha tñáhá tñúhu ndíi-gá”, duha càchí-xi núú tütú-gá.

²⁴ Te xíáⁿ cútñuní iní-ó sã ñá díú mée-ni sá quíndáá iní-ó Yã Ndiõxí, chi núu na càda-o nacúaa cuu váha iní-gá te ngúndecu váha-o núú-gã ²⁵ dàtná ní quide-gá tá Ràháb ñiⁿ ñadíhí ní xíndecu ndéé sanaha, chi xíchí-ãⁿ ní xíndecu-xi ichi díí iní, dico ní tuha-xi ichi Yã Ndiõxí te ní ngúndecu váha-xi núú-gã, chi ní chindee-xi cuè téé israél cue téé ní xica chiúⁿ-gá, te ní sanu ichi ñaha-xi xii-güedé ñiⁿ ichi núú vã nánihí ñáhá cuè téé cùu úhú iní ñáhá xii-güedé. ²⁶ Te nchaa ñáiyu càchí sá sãndáá iní Yã Ndiõxí, te ñá túú quidé-yu nàcuáa càháⁿ-gá ñáiyu-án cúú-yu dàtná ñiⁿ ñáiyu ní xíhí. Chi ñá túú-gã ndíxí tñu iní-yu nchaa sá cuèhé sá dúhá quidé-yu. Duha sãtnahá-xi cùu nchaa ñáiyu ñá túú cuíni tñi tñúhu càháⁿ Yã Ndiõxí.

3

Nàcuáa quide yaa-o

¹ Te nchòhó ñáiyu ndècu ndíhí-í ichi Xítohó Jesucristú, vá ncháá-ndó càni iní-ndó cùu-ndo mestru dacuàha-ndo ñáiyu tñúhu Yã Ndiõxí chi íí cáá-xí. Chi na quítnahá nduu nàcuáha-o cuèndá núú-gã, te núu ñá túú ní quide ndáá-ó ñá, te vá cúú váha iní-gá núú-ó. ² Te nchaa-o ío cuèhé sã ñá túú váha quide-o. Te nchaa ñáiyu ñá túú càháⁿ tñúhu cuèhé tñúhu duha cúú-yu ñáiyu ñá túú ñá cùmáni chi ío ndáá quidé-yu. Te xini-yu cotñiⁿ-yu mée-yu, te quide váha-yu núú Yã Ndiõxí. ³ Te dàtná cuíni-ndó cùu ñiⁿ quiti te núu na chíhí-o

frenú yuhu-dí, te cotñiⁿ-o-dí te ngúnu ichi-dí, te ducaⁿ sãtnahá-xi cùu ñáiyu sàcótñi mee-xi, chi ñá túú càháⁿ-yu tñúhu cuèhé tñúhu duha. ⁴ Te dàtná cuíni-ndó cùu barcú cuèi ñàhnu vihi-xi, dico òré quéné níhi táchí te tündaha-xi ñiⁿ xio, dico téé dàcaca ndacu-dé dáquihíⁿ-dé-xi ndíhí ñiⁿ yutnu sá dánani-güedé tímú ndàa núú càchí iní-dé quíhíⁿ-xi. ⁵ Te ducaⁿ cùu tucu yaa-o chi ío líhli-xi dico ío cuèhé tñúhu càháⁿ-ó ndíhí-xi. Te ducaⁿ-ni sãtnahá-xi cùu tucu sá lúhá ñúhú chi sãhmi-xi ñiⁿ yucu. ⁶ Te diu-ni ducaⁿ sãtnahá-xi cùu yaa-o chi ío cuèhé tñúhu cuèhé tñúhu duha càháⁿ-ó ndíhí-xi, te dàcufta nihnu ñaha-xi xii-o. Te ío cuèhé cuèchi quide-o ndíhí-xi cuendá sá ñuyú-a ñúhu tñáhá ñúhú tñiⁿ yucu ñávaha dàticá ñàhnu ñaha-xi. ⁷ Te ndacu-o càda masú-ó nchàa núú quiti ío ñuyú cuèi quiti dééⁿ quiti xica núú ñúhú, te cuèi quiti ndàva, te cuèi cóo, te cuèi quiti ñúhu xiti ndute làmár, chi ducaⁿ quide dava cue téé ñuyú-a. ⁸ Dico yaa-o chi vá yóo ñiⁿ ndacu cada masú ñáhá xii-xi nacúaa càháⁿ-ó mée-ni tñúhu váha ndíhí-xi, chi mee-ni tñúhu cuèhé tñúhu duha cùnuu-gá càháⁿ-ó ndíhí-xi. Te cùu-xi datná ñiⁿ venènú chi dàti-xi iní-ó. ⁹ Te diu-ni ndíhí yaa-o quide cahnu-o Dútú Ndiõxí Yáa cúú Tãtá-ó, te diu-ni ndíhí yaa-o caháⁿ úhú-ó cuè tñaha ñáiyu-o. Te xini ñúhu-xi vá dúcáⁿ càda-o, chi mee-gá ní chíhí-gá sá xini tñuní-ó ndíhí iní-ó, dàtná cáá mee-gá ñúhú iní-gá. ¹⁰ Te diu-ni yuhu-o quèe tñúhu váha càháⁿ-ó, te diu-ni yuhu-o quèe tñúhu cuèhé tñúhu duha. Te nchòhó ñáiyu ndècu ndíhí-í ichi Xítohó Jesucristú cunaha-ndo sã ñá túú nduu váha-xi ducaⁿ càda-o. ¹¹ Te ñá túú xini-ndó sã ñiⁿ núú quèe ñihni ndute, te quèe ndute váha te quèe ndute úá-ãⁿ. ¹² Te nchòhó ñáiyu ndècu ndíhí-í ichi Xítohó Jesucristú, te ñá túú xini-ndó sã ñiⁿ yutnu ngúxí, te cùuⁿ acéitúná, àdi xini-ndó sã ñiⁿ yoho yaha stilé te cùuⁿ ngúxí. Te ducaⁿ cuèi ñiⁿ núú quèe ñihni ndute, vá cúú quèe ndute váha te quèe ndute úhá. Te ducaⁿ sãtnahá-xi cùu yuhu-o chi vá cúú càháⁿ-ó tñúhu váha te càháⁿ-ó tñúhu cuèhé tñúhu duha.

Nchaa sá váha xini tñuní-ó tàxi Yã Ndiõxí

¹³ Te núu ndècu ñáiyu túha tnuú-ndó ñáiyu cùtñuní iní-xi, te xini ñúhu-xi mee-ni

sá váha cadá-yu, ducaⁿ te cutnùnì iní-ó sá túha ndisá-yu, te vá cadá cahnú-yu mèè-yu. ¹⁴ Te núu nchoo cuèdú iní-ó te cuiní-ó cunu-u-o núu tnàha ñáiyu-o, te vá cächí-ó sá túha-o, chi ñá túu quide ndáá-ó te núu ducaⁿ na càda-o. ¹⁵ Chi ñá dúú xǎⁿ ní dānehé ñáhá Yá Ndiòxí, chi ñuyú iha ní cacu nihnu-xi cuèndá sá yucu ñávàha dàcahu iní ñáhá-xí. ¹⁶ Te núu ndécú ñáiyu cuèdú iní ñáiyu cuiní cunu-u, te yacáⁿ mee-ni ndáhú nàá xīndécú-yu, te ñá túu quide váha-yu, chi mee-ni nchàa sá cuèhé sá dúhá quidé-yu. ¹⁷ Te núu ní taxi Yá Ndiòxí sá xini tnùnì-ó, te cada váha-o, te cǎháⁿ ndihí váha-o nchàa tnaha ñáiyu-o, te tñi-o tnùhu váha cǎháⁿ-yu, te cundáhú iní-ó-güè-yu te chindee-ó-yu, te vá cání ìⁿ caní úú iní-ó, te ío cunduu ndáá iní-ó. ¹⁸ Te núu cuiní-ó ñá túu nǎ cuu cundecu-o ñuyúí-a, te cada váha-o sá cúú-xí tnàha ñáiyu-o cuèndá sá ñá túu nǎ cuu cundecu-o ndihí-yu. Te ducaⁿ te nguínchicúⁿ dava-gá tnàha ñáiyu-o càda váha-yu.

4

Vá cúú cundecu-o ichi Yá Ndiòxí te cada-o nǎndí sá cuèhé sá dúhá

¹ ¿Te xini-ndó nǎ cuèndá nàá ñáiyu te xisahni tnàhá-yu-ǎ? Te nǎa-yu sá tnùhu cuèdú iní, chi ñi-u-ni xǎⁿ ñúhú iní-yu, te ñá túu ndècu váha iní-yu. ² Chi cuiní-yu cundecu ndihí-yu ìⁿ sá ñá túu ndècu ndihí-yu, te ñá túu nihí-yu núu xǎⁿ xīcuu cuèdú iní tnáhǎ-yu, te xīcuèhé tnáhǎ-yu, te cǎni tnahǎ-yu, te xisahni tnàhá-yu. Te ñá túu nihí-yu sá cuiní-yu chi ñá túu xicǎⁿ-yu núu Yá Ndiòxí. ³ Te cuèi xicǎⁿ-yu ìⁿ sá cuiní-yu núu-gǎ te ñá túu sǎñaha-gǎ, chi ñá túu xicǎⁿ-yu ìⁿ sá cúú xǎⁿ-yu sá váha, chi ìⁿ sá ná ndihí-yu núu cadǎ-yu nchaa sá cuèhé sá dúhá xicǎⁿ-yu, núu xǎⁿ ñá nihí-yu. ⁴ Te nchaa ñáiyu ducaⁿ xǎquide ío cùu sáá iní-yu núu Yá Ndiòxí. Te ñaha-ndo sá nchǎá ñáiyu cudúú iní-xi cundecu ichi cuèhé ichi duha cùu úhú iní-yu Yá Ndiòxí, chi vá cúú cundecu-o ichi cuèhé ichi duha, te cundecu-o ichi-gǎ. ⁵ Te ñá túu dió ducaⁿ cǎháⁿ-xi núu tütú Yá Ndiòxí núu cächí-xi: “Yá Ndiòxí ní taxi-gǎ Espiritú-gǎ ndécú ndihí-o. Te Espiritú-gǎ-án cuiní-xi sá mée-ní-gǎ cuhuⁿ iní-ó”, duha cächí-xi núu tütú-gǎ. ⁶ Te Yá Ndiòxí ío chindee ñaha-gǎ cuèndá cada

ndáá-ó núu-gǎ dàtná cächí tucu-xi núu tütú-gǎ núu cächí-xi: “Yá Ndiòxí ñá túu cùu váha iní-gǎ núu nchàa ñáiyu quide cahnu mee-xi, dico chindee-gǎ cue ñáiyu ndáhú iní-xi”, duha cǎháⁿ-xi núu tütú-gǎ. ⁷ Te cada-ndo nàcuáa cǎháⁿ Yá Ndiòxí. Te vá cadá-ndó nàcuáa cuiní yucu ñávàha, ducaⁿ te xóo cóo ndéé ñáhá-xí xii-ndo. ⁸ Te tñi-ndo tnùhu cǎháⁿ Yá Ndiòxí te cundecu ndihí ñaha-gǎ xii-ndo. Te nchaa nchòhó ñáiyu ndècu ichi cuèhé ichi duha ñaño-ndo ichi-án te cada váha-ndo. Te nchaa nchòhó ñáiyu sàni iní cunu cuechi núu Yá Ndiòxí te quide-ni-ndo nchaa sá cuèhé sá dúhá, te ñá túu quide váha-ndo núu ducaⁿ, chi xini ñuhu-xi sá cǎcǎⁿ-ndó núu Yá Ndiòxí sá ná ndádá ndòo ndada nine-gǎ iní-ndó. ⁹ Te ndixi cuèchi iní-ndó nchàa sá quidé-ndó ndéé ndáhyu ndisa-ndo sá ndihú iní-ndó, te ñá dúú dà cudúú iní-ndó. ¹⁰ Te nǎhmá-ndó núu Yá Ndiòxí nchaa sá ní quide-ndo, te ngúndecu váha-ndo núu-gǎ.

Vá cǎháⁿ-ó nchàa sá quidé tnàha ñáiyu-o

¹¹ Te nchòhó ñáiyu ndècu ndihí-í ichi Xitohó Jesucristú, vá cuátnùhu tnaha-ndo, chi nchaa ñáiyu sàtnuhu tnaha dicó-ni ndàa nuú-yu ndèhe tnahǎ-yu, te ñá túu cǎháⁿ váha-yu cuèndá tnùhu Yá Ndiòxí sá sánú ichi ñaha xii-yu nàcuáa cundecú-yu, chi dàquee tǎhù-yu tnùhu-án. Te núu cächí-ndó sǎ ñá túu cǎháⁿ váha tnùhu Yá Ndiòxí, te xǎⁿ quée-xí sǎ ñá túu sàndáá iní-ndó tnùhu cǎháⁿ-gǎ, te cuiní-ndó cunu-u tnùhu-ndo núu tnùhu-gǎ. ¹² Te mee Yá Ndiòxí ní cächí-gǎ nàcuáa cada-o, te ñi-u-ni mee-gǎ cǎháⁿ-gǎ te núu ní quide váha-o, àdi ñá túu ní quide váha-o. Te ñi-u-ni mee-gǎ dàcǎcu nihnu ñaha-gǎ xii-o núu úhú núu ndáhú, te ñi-u-ni-gǎ daquìhíⁿ ñáhá-gǎ xii-o núu úhú núu ndáhú-án te núu vá cadǎ váha-o. Te nchoo ñá túu ná cúú-ó, te núu mee-ni nchàa sá quidé tnàha ñáiyu-o cundehe-o.

Ñá túu cutnuni iní-ó nǎsa túndaá-ó ìngǎ nduu

¹³ Te dava nchòhó cächí-ndó sǎ vitná àdi tneé quìhíⁿ-ndó ìⁿ ñuu, te yacáⁿ cundecu-ndo ìⁿ culá cada-ndo ìⁿ ndáhú te nihí-ndó ñi-húⁿ. ¹⁴ Te ní ñá xini-ndó nǎ cúú sǎ yǎha-ndo vitna àdi tneé. Te nchoo cùu-o datná ìⁿ vícò nùhú, chi vícò-ǎⁿ tnávíí

ndéhé-ó te tna tnaa-gá sa ní ndónúhú-xí. Ducaⁿ sátnahá-xi cùu nchoo chi ìⁿ úú nduu duha vèxi-o ñuyíú-a te ndoñuhu-o. ¹⁵ Te núu sàndáá iní-ó Yá Ndióxi te duha cáháⁿ-ó: “Te núu Ndióxi ná cächí-gá sá cùndècu tnaa-o ñuyíú-a te cada chùⁿ-o”, duha cachí-ó. ¹⁶ Dico mee-ndo chi ío ñíí iní-ndó cuíní-ndó cùnuu tnúhu-ndo núú Yá Ndióxi, te ñá túú ndúu váha-xi sá dúcáⁿ quide-ndo. ¹⁷ Te núu xini-ó càda-o sá váha te ñá túú quide-o, te cùu-xi ìⁿ cuéchi núú-gá.

5

Tnúhu sá dátúha ñaha xii nchaa ñáyiú cuica ñà túú sàndáá iní tnúhu Yá Ndióxi

¹ Te nchòhó ñáyiú cuica ñáyiú cuihna iní-xi cundedóho-ndo tnúhu na cáháⁿ-í-a. Vitna nguíta-ndo ndíhú iní-ndó, te ndáhyú vihí-ndó, chi quixi ìⁿ tnúndòho cuendá-ndó te ndòho vihí-ndo. ² Te nchaa sá ndécú ndíhí-ndo ndíhí cuita tiu quíhíⁿ, te quee tíquidi dóó-ndó, ³ te díhúⁿ-ndó caxi cudi ñuhu. Te xíaⁿ cuita naquini ndé-ndó tnúndòho sá ñà túú quide váha-ndo. Te ndíhí-ndo ndíhí díhúⁿ-ndó sá ní taxúha-ndo, chi vitna sa ta cùyatni sáá nduu ndíhí ñuyíú-a. ⁴ Te nchaa cue téé ní quide chùⁿ núú chíúⁿ-ndó ní ndatnúhu-ndo ndíhí-güedé nàcuáa cháhu-ndo-güedé ní cùu, te ñá túú ní cháhu-ndo-güedé nàcuáa ní xáhaⁿ-ndo xii-güedé, núu xíáⁿ ío ndècuéchi-ndo. Te Yá Ndióxi Yaá ndécú àndiu ní tecú dóho-gá nàcuáa cáháⁿ-güedé sá ní dándàhú-ndó-güedé. ⁵ Te nchòhó ñáyiú cuica, sá ndécú váha-ni-ndo cùndee iní-ndó, núu quide-ni-ndo nchaa sá vèxi iní-ndó. Te cùu-ndo datná ìⁿ quiti nùcuíhnu mee-ni xèxi-dí, te sáá nduu sàhni-güedé-dí. Te ducaⁿ sátnahá-xi cùu nchòhó chi ndècu váha-ndo vitna, te sáá ìⁿ nduu nàcháhu-ndo nchaa sá quidé-ndó núú Yá Ndióxi te núu vá quíndáá iní-ndó-gá. ⁶ Te quide úhú iní-ndó sàhni-ndo cue ñáyiú quide ndáá núú Yá Ndióxi, te ñá túú ná quidé-yu.

Cunduu càhnu iní-ó te cáháⁿ ndíhí-o Yá Ndióxi

⁷ Te nchòhó ñáyiú ndècu ndíhí-í ichi Xítoho Jesucristú, cada ndee-ni iní-ndó cùndetu-ndo ndéé ná quixi tucu-gá ñuyíú-a, te cada-ndo dàtná quidé nchaa ñáyiú chíhí

tatá chi sàcùndetú-yu ndéé cúúⁿ dáú te chíhí-yu. Te cùndee-ni iní-yu sàcùndetú-yu ndéé cúúⁿ-gá dáú te cùu itú-yu, te ndùdú iní-yu. ⁸ Te ducaⁿ càda nchòhó tucu cada ndee iní-ndó cùndetu-ndo, chi sa ta cùyatni nduu quixi tucu Xítoho Jesucristú. ⁹ Te duha ndúu tnúhu cáháⁿ-í núú nchòhó ñáyiú ndècu ndíhí-í ichi Xítoho Jesucristú, vá ndacáⁿ cuéchi núú tnáhá-ndó te núu nása cùu ndecu-ndo, chi ñá cuèhé-gá nduu cùmání te quixi Cristú nacuaca ñaha-gá xii-o cùndecu-o núú Yá Ndióxi, te mee-gá cada ndáá-gá cuéchi-o. ¹⁰ Te nchòhó ñáyiú ndècu ndíhí-í ichi Xítoho Jesucristú, ndacu iní-ndó nàcuáa ní quide nchaa cue téé ní xóo cáháⁿ tnúhu Yá Ndióxi ndéé sanaha sá ìo càhnu ní xínduu iní-güedé cuéi nándi ní ndòho-güedé. ¹¹ Te cùtnuní iní-ó sá cúú-ó ñáyiú ío váha táhú-xi te núu na càda cahnu iní-ó nchaa sá ná yáha-o cuendá Yá Ndióxi. Te ñaha-ndo sá ndíi Jòb ducaⁿ ní quide ndíi, chi nándi sá ní yáha ndíi te ní quide càhnu iní ndíi. Te sátá ní yáha ní ndòho ndíi, te ío cuéhé sá ní sáñaha Yá Ndióxi xii ndíi. Chi ío váha iní-gá te ío cùndahú iní-gá nchaa ñáyiú ío càhnu iní-xi.

¹² Te nchòhó ñáyiú ndècu ndíhí-í ichi Xítoho Jesucristú, chí cùndédóho tucu tnúhu na cáháⁿ-í-a, chí ío xini ñuhu-xi. Vá cacú nèhe-ndo Yá Ndióxi órè cuíní-ndó sá cùtnuní iní ñáyiú sá ndáá cada-ndo ìⁿ sá cáháⁿ-ndó. Te ní vá cacú nèhe-ndo sá cachí-yu cùu ndiósí cádúha cue téé ñuyíú-a. Te núu ìⁿ sá xicáⁿ tnàha ñáyiú-ndo núú-ndó te cùñaha-ni-ndo te núu cuu àdi sá vè cùú. Te vá cacú nèhe-ndo Yá Ndióxi, ducaⁿ te vá dándòho ñaha-gá xii-ndo.

¹³ Te núu ndòho-ndo te cáháⁿ ndíhí-ndo Yá Ndióxi, àdi te núu ndècu váha-ndo te cudíí iní-ndó te chíñuhu-ndo-gá, ¹⁴ àdi núu cùhú-ndó te cana-ndo cuè téé yíndaha ñaha xii-ndo nacuáa ndècu-ndo ichi Yá Ndióxi cuendá tee-güedé acití díquí-ndó, te cacáⁿ táhú-güedé núú-gá cuendá-ndó dàtná ní cachí mée-gá cunduu. ¹⁵ Te núu quíndáá ndisa iní-ndó sá ndúha-ndo, te ndúha-ndo chí Yá Ndióxi cada tátña ñaha-gá xii-ndo, àdi núu ní quide-ndo ìⁿ sá ñà túú táu-ndó càda-ndo núú-gá te cada càhnu iní-gá cuéchi-ndo. ¹⁶ Te xini ñuhu-xi cùtnúhu tnàha-ndo órè ñá túú cùndáá-ndó núú Yá Ndióxi cuendá chindee

tnũhu tnàha-ndo cáháⁿ ndihi-ndo-gã te xocàni-gá cuéhé-ndó, te cada càhnu iní-gá nchaa sá ñà túú vãha ní quide-ndo te núu cundecu váha iní-ndó. Te nchaa ñáyiu ndècu váha iní-xi núú Yã Ndiõxí na càcáⁿ-yu ìⁿ sá cuìní-yu núú-gã te ñihí-yu, chi sàá tnúhu-yu núú-gã. ¹⁷Te té Èliás, téé ní xíndecu ndéé sanaha ñí cáa-dé dàtná cáá nchòo. Te ní cáháⁿ ndihi-dé Yã Ndiõxí ñí yùhu ñí iní-dé ní xáhaⁿ-dë xii-gá sá vã dácùuⁿ-gá dáú, te ní tniì-gá tnúhu ní cáháⁿ-dé, te ñá ní dàcuuⁿ-gá dáú ùní cuíá dava. ¹⁸Te dàtnùní ducaⁿ te ní cáháⁿ ndihi tucu té Èliás-áⁿ Yã Ndiõxí sá dácùuⁿ-gá dáú te ní cuuⁿ, te ní cuu tucu nchaa sá ñí xitu-güedé.

¹⁹Te nchòhó ñáyiu ndècu ndihi-í ichi Xítohó Jesucristú, te núu dava-ndo sà ndecu-ndo ichi Yá Ndiõxí ní cùu te ní dáñá-ndó, te ndècu tucu dava-ndo nadaxínu iní tnáhá-ndó nùcúndecu tucu-ndo ìchi-gá, ²⁰te núu ducaⁿ na càda-ndo te dàcácu nihnu tnàha-ndo núú ùhú núú ndàhú, te mee Yã Ndiõxí cada càhnu iní ñáhá-gã xii-ndo cuèi ío cuéhé cuèchi ní quide-ndo.

TUTÚ DÍHNA NUU NÏ CADÚHA TÉ PÈLÚ

Té Pèlú cadúha-dé tutú sá cúu-xí cuè ñáyiú sàndáá iní ñáhá xii Yá Ndióxi

¹ Yúhu té Pèlú ní tendaha ñaha Xítoho Jesucristú xíca cùu-í càháⁿ-í tñúhu-gá, te cadúha-í tutú-a sá cúu-xí nchòhò ñáyiú xínchítè nuu ndècu distritú Pòntò, ndìhi distritú Gàlaciá, ndìhi distritú Capadociá, ndìhi distritú Àsiá, ndìhi distritú Bitiniá. ² Chi Dútú Ndióxi ní cachí-gá sá cúu-ndó dèhe-gá ndéé cùtnàhá vátá ngáva-gá ñuyúí, te Espiritú-gá ní quide-xi ndècu yíñuhu-ndo núu-gá vitna. Te ní cachí-gá sá cúu-ndó dèhe-gá cuendá tñii-ndo nchàa tñúhu càháⁿ Xítoho Jesucristú, ndìhi cuendá nduu ndoo nduu nine iní-ndó, chi diu cuendá-án ní xíhí Xítoho Jesucristú. Te xícaⁿ tànhú-í núú Yá Ndióxi sá ïo na chindee chítúu ñaha-gã xii-ndo cuèi vitna te cuèi núú cuaháⁿ núú vèxi, te diu-ni-gá ná cádá te ío váha cuu iní-ndó cùndecu-ndo.

Tñúhu ndee iní sá ndécú ndìhi ñáyiú sàndáá iní ñáhá xii Yá Ndióxi

³ Te vitna chí ná càchí-ó sã ïo càhnu cuu Yá Ndióxi Yaa cúu Tãtã Xítoho Jesucristú, chi diu-gá ío ní cundàhú iní ñáhá-gã xii-o núu xíãⁿ ní quide-gá sá nchóó ní nduu-o dàtná ìⁿ ñáyiú saa vitna. Te ducaⁿ ñí quide ñaha-gã xii-o cuendá sá Xítoho Jesucristú ní xíhí-gá te ní ndoto-gá. Te cuendá sá ñí nduu-o dàtná ìⁿ ñáyiú saa, xíãⁿ ní ngúndecu ndìhi-o tñúhu ndee ñíⁿ sá cùndecu ndìhi-o-gá ñí caa ñí quíhíⁿ, chi ducaⁿ ñí cachí-gá cunduu. Te yacáⁿ vá quini-gá-ó ñí ìⁿ sá cuèhé sá dúhá, te ío cùdúí iní-ó cùndecu-o ndìhi-gá ñí caa ñí quíhíⁿ. ⁵ Te sá sàndáá iní-ó Yá Ndióxi, núu xíãⁿ coto ñaha-gã xii-o ndèé ná sáá nduu nàqueheⁿ cuendá ñáhá-gã chi ío càhnu cuu-gá.

⁶ Te xíãⁿ ío cùdúí iní-ndó ndècu-ndo, te cuèi nándi ndòho-ndo ndecu-ndo dico sacú-ni nduu ducaⁿ ndòho-ndo. ⁷ Te òrè ná cádá càhnu iní-ndó yáha-ndo nchàa sá ná cáda ñaha ñáyiú xii-ndo, te ducaⁿ te cut-nùní sàndáá ndisa iní-ndó Yá Ndióxi, te sá dúcáⁿ sàndáá iní-ndó Yá Ndióxi ío-gá váha dàcúúxí díhúⁿ cuàáⁿ chi xíãⁿ ñá túú cùdúí-xi. Te cuèi ducaⁿ dico xito ndéé nàhí-ñí-güedé núu ndisa cùu-xi díhúⁿ cuàáⁿ. Te ducaⁿ

sãtnahá-xi cùu nchòhò cuendá nchaa sá ndòhò-ndó, te na sáá nduu quixi tucu Xítoho Jesucristú te cùñaha-gã xii-ndo: “Ío váha ní quide-ndo, te vitna ío càhnu cuu-ndo, te tãu-ndó nùcùndecu váha-ndo”, duha cùñaha-gã xii-ndo.

⁸ Te vitna ío cùu iní-ndó Xítoho Jesucristú cuèi vátá quini-gá-ndó-gã, te ducaⁿ ïo sàndáá iní-ndó-gã, te ío cùdúí iní-ndó te súúní ñí ñá cùtnùní iní-ndó ñasa cundú tñúhu càháⁿ-ndó sã dúcáⁿ ío cùdúí iní-ndó ⁹ cuendá sá ñí naníhí tànhú-ndó, chi ní sàndáá iní-ndó-gã.

¹⁰ Te cue téé ní xóo càháⁿ tñúhu Yá Ndióxi ndéé sanaha ñí cachí-güedé nàcuáa cada-gá cundàhú iní ñáhá-gã xii-o vitna. Te cue téé-áⁿ ïo váha ní dàcuahá-güedé nàcuáa cada Yá Ndióxi dàcácu ñihnu ñaha-gã xii-o vitna. ¹¹ Te Espiritú Xítoho Jesucristú ní ngúndecu ndìhi cue téé-áⁿ ñí xáhaⁿ-xi xii-güedé nàcuáa ndoho-gá, te ní xáhaⁿ tucu-xi xii-güedé sá sãtá ná yáha ndoho-gá te ío cunuu-gã ndìhi Yá Ndióxi. Te ío ní sani iní-güedé núu ná nduu sáá ducaⁿ cáda-xi, ndìhi nchaa nándi-gá cúú sã cádá-xí. ¹² Te Yá Ndióxi ní xáhaⁿ-gã xii-güedé sá nchàá tñúhu váha càháⁿ-güedé vá cúu-xí cuendá mée-güedé, chi cuendá nchoo cuè ñáyiú ndècu ñuyúí-a vitna cùu-xi. Te diu-ni tñúhu-áⁿ cúú tñúhu càháⁿ nchúhú cue téé càháⁿ tñúhu Yá Ndióxi núu-ndó. Te Espiritú sá ñí taxi Yá Ndióxi ndécú ndìhi-o chindee ñaha-xi xii-ndí càháⁿ-ndí tñúhu-gá. Te cue espíritú xínú cuèchí núú Yá Ndióxi ío cuini-xi quini ndáá-xi nchaa nàcuáa cuaháⁿ tñúhu-áⁿ.

Yá Ndióxi càchí-gá sá cádá-ó mée-ni sá váha

¹³ Te sá dúcáⁿ ïo váha ní quide ñaha Yá Ndióxi xii-ndo xíãⁿ xíni ñuhu-xi ío váha cuáha-ndo cuendá nàcuáa cundecu-ndo te vá cání iní-ndó cáda-ndo ñí ìⁿ sá cuèhé sá dúhá, te ío quindáá iní-ndó sã Yá Ndióxi cada váha ñaha-gã nduu na quixi tucu Xítoho Jesucristú. ¹⁴ Te ío tñii-ndo nchàa tñúhu càháⁿ Yá Ndióxi, te vá cùhúⁿ-gã iní-ndó nándi sá cuèhé sá dúhá sã ñí xúhuⁿ iní-ndó cùtnàhá vátá cùndecu-gá-ndó ìchi-gá te ñí vá cádá-ndó. ¹⁵ Te cada-ndo mée-ni sá váha cundecu-ndo dàtná quidé mée Yá Ndióxi Yaa ñí càháⁿ ñáhá xii-o cundecu-o ndìhi-gá. ¹⁶ Te càchí-gá núú tütú-gá: “Cada-ndo mée-ni sá

váha cundecu-ndo, chi ducaⁿ quide yúhú”, duha càchí-gá núú tütú-gá.

¹⁷ Te Yá Ndiöxí cada ndáá-gá cuéchi nchaa ñáyiú, te vá cáda cuendá-gá cuéi náí ñáyiú cùu-yu, te nchòhò càchí-ndó sá díú Tátá-ndó cùu-gá te ndáá, núu xíáⁿ xíní ñùhu-xi canehe-ndo sá yíñùhu núú-gá ndi nchaa nduu cundecu-ndo ñuyúú-a. ¹⁸ Te díu-gá ní dácäcu nihnu ñaha-gá xii-ndo ñⁿ ichi sá ñà túú nàndíhi ní sanu ichi ñaha cuè ñaní tnáhá-ndó ní xíndecu ndéé sanaha ni cùu, te nchòhò sa ñaha-ndo sá sá dúcáⁿ ní quide ñaha Yá Ndiöxí ní dácäcu nihnu ñaha-gá xii-ndo ìchi-áⁿ ñà túú ní chähu-gá ni ñⁿ díhúⁿ cuaáⁿ, te ni ñⁿ díhúⁿ cuixíⁿ sá ndíhi nihnu ñuyúú-a cuendá-ndó. ¹⁹ Chi Xítohó Jesucristú ní quixi-gá ní sati níñí-gá, te ní xíhí-gá núú cùrúxí cuendá sá nchóhò nàñíhí tãhú-ó, te cùu-gá dàtná ñⁿ mbéé quiti ío váha iní-xi, quiti càndoo canine. ²⁰ Te ducaⁿ ní ndoho Xítohó Jesucristú, chi ducaⁿ tnàhí ndéé tnuñí ndoho-gá ndéé cútñahá vátá ngáva-gá ñuyúú. Te ducaⁿ ní yáha-gá cút-ñahá ní quixi-gá òré vitna cùmání sáá nduu nàa ñuyúú-a cuendá nchoo cùu-xi sá váha xii-o vitna. ²¹ Te nchòhò sa nihí-ndó tnùhu nàcuáa ní yáha Xítohó Jesucristú cútñahá ní quixi-gá ñuyúú-a, núu xíáⁿ sàndáá iní-ndó Yá Ndiöxí. Te Yá Ndiöxí ní dándótó-gá Xítohó Jesucristú, te sáta ní dándótó ñaha-gá te ní cachí-gá sá ïo càhnu cuu Xítohó Jesucristú. Te sá dúcáⁿ ní cuu, xíáⁿ ío sàndáá iní-ndó Yá Ndiöxí, te ní taxi-gá tnùhu ndee iní ndécú ndíhi-ndo sá sáá nduu cundecu-ndo ndíhi-gá ni caa ni quíhíⁿ.

²² Te Espiritú Yá Ndiöxí ní quide-xi te ní sàndáá iní-ndó tnùhu-gá, te xíáⁿ ní nduu ndoo ní nduu nine iní-ndó, te cùu iní tnáhá ndisa-ndo nacuaa ndècu-ndo ichi Yá Ndiöxí, te xini ñuhu ndisa-xi sá ïo ní yùhu ni iní-ndó cùu iní tnáhá-ndó ñⁿ ñⁿ-ndo. ²³ Te nchòhò ní nduu-ndo dàtná ñⁿ ñáyiú saa sá cuendá tnùhu Yá Ndiöxí, te tnùhu-áⁿ candeca-xi iní-ndó ñà caa ni quíhíⁿ, te vá ñⁿ nduu ndíhi nihnu-xi, te ñá díú cuendá ñáyiú ñuyúú-a ni nduu-ndo ñⁿ ñáyiú saa chi cuendá tnùhu-gá. ²⁴ Chi núú tütú Yá Ndiöxí càchí-xi:

Nchaa ñáyiú ndècu ñuyúú-a cùu-yu dàtná cùhú, chí cùhú-áⁿ tnaa-ni cùdí-xi te

xíhí-xi, ducaⁿ sãtnahá-xi cùu-yu.

Te nchaa sá ndécú ndíhi-yu cùu-xi datná ñⁿ itá cùhú-áⁿ, chí itá-áⁿ tnaa-ni tucu cùdí-xi te ndàhvá-xi, ducaⁿ sãtnahá-xi cùu nchaa sá ndécú ndíhi-yu.

²⁵ Dico tnùhu Yá Ndiöxí chí vá náá tnàhí-xi, chí duha-ni ndècu-xi, te díu-ni duha cundecu-xi ni caa ni quíhíⁿ.

Duha càchí-xi núú tütú-gá. Te díu tnùhu-áⁿ ní dánèhé ñáhá nchùhú cue téé càháⁿ tnùhu Yá Ndiöxí xii-ndo.

2

¹ Te xíáⁿ xíní ñùhu-xi dañà-ndo nchaa núú sá cuèhé sá dúhá, te dañà-ndo ìchi tnùhu ndehnde, te dañà-ndo vá dándàhú-gá-ndó mèe-ndo sá quidé váha-ndo, te dañà-ndo ìchi cuedú íní, te dañà-ndo nchaa tnùhu yiti. ² Te cada-ndo cuendá sá cùu-ndó dàtná cue landú yíquíⁿ vitna sadi camá, chí landú-áⁿ mee-ni sàdi-güexi te sãhnu-güexi. Te cada iní-ndó sá dúcáⁿ càda-ndo chí xini ñuhu-xi sá ïo cuhuⁿ iní-ndó dàcuaha-ndo tnùhu Yá Ndiöxí, chí xíáⁿ cùu-xí mèe-ni tnùhu váha, te ducaⁿ te cuita cuehnu nihnu-ndo ìchi-gá quíhíⁿ ndéé ná sáá nduu cundecu-ndo núú ndécú-gá. ³ Te ducaⁿ xini ñuhu-xi cada-ndo, chí nchòhò sa ní cutnùni ndisa iní-ndó sá Yá Ndiöxí ío váha iní-gá.

Xítohó Jesucristú cùu-gá dàtná ñⁿ yúú

⁴ Te ío nanducu nihnu-ni-ndo Xítohó Jesucristú Yáá quidé nàcuáa naníhí tãhú-ó. Te díu-gá ní cuu-gá dàtná ñⁿ yúú sá ñà túú nàndíhi sá cùu-xí ñáyiú ñuyúú-a, chí ní dáquéé tíhú ñáhã-yu xii-gá. Dico Yá Ndiöxí ní cachí-gá sá Xítohó Jesucristú cùu-gá dàtná ñⁿ yúú sá ïo-gá váha, chí ío cùnuu-gá.

⁵ Te nchòhò sa ní naníhí tãhú-ndó, te ío-gá chí nándücu nihnu Yá Ndiöxí cuendá cuu ñⁿnuu-ndo cundecu-ndo ndíhi Espiritú-gá. Te núu ducaⁿ na càda-ndo te cuu-ndo dàtná yúú váha dàcaa-güedé dava vehe, te cuu tucu-ndo dàtná cue dütú ní xinu cuechí núú Yá Ndiöxí ndéé sanaha, nàcuáa ñá túú nã cumání-ndó núú-gá, chí nchaa cue téé-áⁿ ní xóo cuáha ñaha-güedé sá ní xóo nduu tãhú-gá. Te nchòhò vitna tàú-ndó càda-ndo nchaa nacuaa càháⁿ-gá, te nduu vétú iní-gá. Te ducaⁿ càda-ndo chí ndècu-ndo ndíhi Xítohó Jesucristú. ⁶ Te Yá Ndiöxí càchí-gá núú tütú-gá:

Yúhú taxi ndecu-í ñⁿ Yáá ñuu Sìón,

te cuu-gá dàtná ìⁿ yúú vâha sá sánútnî-güedé xíquí cimientú ìⁿ vehe, chi yúhu ní cachí-í sá Yàá-áⁿ ïo cunu-gá.

Te nchaa ñáyiú quindáá iní ñáhá xii-gá vâ ìⁿ ndùu ndixi cuéchi iní-yu sá dúcáⁿ sàndáá iní ñáhâ-yu xii-gá.

Duha cächí-gá núú tütú-gá. ⁷ Te nchòhó ñáyiú sàndáá iní ñáhá xii Xítóhó Jesucristú ío cùu iní-ndó-gá, te nchaa ñáyiú ñá túú sàndáá iní ñáhá xii-gá quidè-yu dàtná càháⁿ-xi núú tütú Yá Ndiòxí núú cächí-xi: Yúú sá ñí dáquéé tîhu cue tée dàcaa vehe, xiáⁿ cúú-xí yúú sá ïo-gá nándîhi vitna.

Duha cächí-xi núú tütú-gá. Te yúú-áⁿ cada iní-ó sá cúú-xí Xítóhó Jesucristú, chi ní dáquéé tîhu ñáhâ-güedé xii-gá. ⁸ Te cächí tucu-xi ingá xichi núú tütú Yá Ndiòxí:

Yúú-áⁿ nguînenú ñáyiú te ndùá-yu.

Duha cächí-xi núú tütú-gá. Te tnúhu-áⁿ queé-xí sá ïo quide sáá iní ñáyiú núú-gá, chi ñá túú cuiní-yu tñî-yu tnúhu càháⁿ-gá, te ducaⁿ tnáhi ndèè tnuní sá ncháá ñáyiú ñá túú cuiní tñî tnúhu càháⁿ-gá, te ío cùu sáá iní-yu núú-gá.

Ñáyiú ndècu ndîhi Yá Ndiòxí

⁹ Te nchoo cùu-o ñáyiú sa ní dáquéé dîⁿ ñaha Yá Ndiòxí xii-o cuendá cundecu-o ndîhi-gá, te cùu-o dútú xínú cuéchi-o núú-gá, te mee-gá cúú-gá Yáá ío cunuú, te cùu-o ñáyiú quide ndáá xîndecu ichi-gá te cùu tucu-o ñáyiú yîndaha-gá. Te ducaⁿ ní quide ñaha-gá xii-o cuendá sá cûñaha-o xii nchaa ñáyiú sá ïo càhnu cuu-gá, te ío vai núú sá vâha quide-gá, te diu-gá ní quide ní dáñá-ó nchâa ichi cuehé ichi duha ndècu-o ní cuu, te ní sanu ichi ñaha-gá xii-o ìⁿ ichi vâha, te vitna cùtnuní iní-ó sá ïo càhnu cuu-gá. ¹⁰ Te nchoo cùu-o ñáyiú ñá túú ndècu ndîhi Yá Ndiòxí ní cùu, dico vitna ní nguîndecu ndîhi-o-gá, te dàvâ-áⁿ vâta sâá-gá nduu càda vâha ñaha-gá xii-o, dico vitna sa ní sáá nduu quide vâha ñaha-gá xii-o, chi ío cùndahú iní ñáhâ-gá.

Cada vâha-o cùndecu-o cunu cuechi-o núú Yá Ndiòxí

¹¹ Te nchòhó ío cùu iní ñáhâ-í xii-ndo, te cächí tnúhu-í xii-ndo sá nchóó cùu-o datná cue ñáyiú ndècu tñaduha ìⁿ ñúú, te ducaⁿ sâtnahâ-xi cùu-o chi tnaa-ni

ndècu-o ñuyúú-a, te sáá nduu ndùu táhú-ó cùndecu-o núú ndécú Yá Ndiòxí táxi tnuní-gá, te xiáⁿ càháⁿ ndáhú-í núú-ndó sá vâ càdá-ndó ñí ìⁿ sá cuehé sá dúhá sàni iní-ndó, chi nchaa xiáⁿ ñá túú cùu-xi sá vâha sá cúú-xi-ndó. ¹² Te cada vâha-ndo cùndecu-ndo núú nchâa ñáyiú ñá túú ndècu ichi Yá Ndiòxí, te cuèi na càháⁿ ñáyiú sá nchòhó nchîcúⁿ nihnu-ndo ichi cuehé ichi duha, dico quini-yu nchaa sá vâha quide-ndo, dico na sáá nduu dândixi túú Yá Ndiòxí iní-yu sá ñá túú quide vâha-yu ndècu-yu, te dàvâ-áⁿ cachí-yu sá quidé vâha-ndo ndècu-ndo, te cada càhnú-yu Yá Ndiòxí.

¹³ Te Xítóhó Jesucristú cuiní-gá sá nchòhó ío quindáá iní-ndó nchâa cue tée cùchiuⁿ taxi tnuní ñáhâ xii-ndo, te ducaⁿ-ni quindáá iní-ndó cuèi mee tée cunuú vihi-gá yîndaha ñaha xii ñáyiú. ¹⁴ Te ducaⁿ-ni quindáá iní-ndó nchâa duca-gá cue tée cunuú, chi Yá Ndiòxí ducaⁿ ní cachí-gá cunduu sá cuè tée-áⁿ cada ndáá-güedé nchaa cuéchi ñáyiú quide cuehé quidé duha ndecu, te càháⁿ vâha-güedé cuendá nchaa ñáyiú xiquide vâha ndècu. ¹⁵ Te Yá Ndiòxí cuiní-gá sá càdá vâha-ndo cùndecu-ndo cuendá nchaa ñáyiú ío ñí díquí-xi càháⁿ cuehé cuendá-ndó sá ndécú-ndó ichi Yá Ndiòxí vâ níhi-gá-yu tnúhu càháⁿ-yu.

¹⁶ Te nchòhó, Yá Ndiòxí ní quide-gá sá cúú-ndó ñáyiú cuu cada nâcuáa véxi iní mee-xí, dico ñá díú sá dúcáⁿ ní quide ñaha-gá xii-ndo, te ngóo-ndo càni iní-ndó càda-ndo nándi sá cuehé sá dúhá, chi cada-ndo sá cúú-ndó ñáyiú xînu cuechi núú Yá Ndiòxí. ¹⁷ Te canehe-ndo sá yîñùhu núú nchâa ñáyiú, ndîhi núú tée cunuú vihi yîndaha ñaha xii-yu, te cuu iní tnáhâ ndî mee-ndo nâcuáa ndècu-ndo ichi Yá Ndiòxí, te ío canehe-ndo sá yîñùhu núú-gá.

Nchaa nâcuáa ndoho-o cùndecu-o ichi Xítóhó Jesucristú

¹⁸ Te nchaa nchòhó ñáyiú xînu cuechi canehe-ndo sá yîñùhu núú cuè patróóⁿ-ndó, te quindáá iní-ndó càda-ndo nchaa chiuⁿ tahu-güedé. Te ìⁿ-ni càda-ndo núú cuè tée vâha iní-xi, ndîhi núú cuè tée ío cuihna iní-xi. ¹⁹ Te núu nchòhó ná càda ndee iní-ndó ndòho-ndo nchaa sá ñá túú tauú-ndó ndòho-ndo cuendá sá cuiní-ndó cùndáá-ndó núú Yá Ndiòxí ñá,

te ío nduu vétú íní-gá. ²⁰ Te núu nchòhó ní quide-ndo ìíⁿ cuéchi, te sàhni íní-ndó dándoho ñaha ñáiyu xii-ndo, ¿te ná sá vâha cùu xiãⁿ-i? Dico núu nchòhó ná cádá ndèe íní-ndó ndòho-ndo nchaa sá cádá ñaha ñáiyu xii-ndo sá cuendá sá quidé-ndó sá vâha ña, te núu ducaⁿ na càda-ndo te cùu-xi ìíⁿ sá vâha núú Yá Ndiòxí. ²¹ Te Yá Ndiòxí ní cachí-gá sá cádá ndèe íní-ó ndòho-o nándi ndoho-o sá cuendá sá quidé-ó sá vâha, chi ío ní ndoho Xítohó Jesucristú cuendá-ó, te ducaⁿ tàú-ó càncicúⁿ nihnu-o càda ndee íní-ó ndòho-o nándi ndoho-o, chi ducaⁿ ní quide-gá. ²² Te mee-gá ñá túú quide-gá ní ìíⁿ sá cuèhé sá dúhá, te ní ìíⁿ tnúhu ndehnde ñà túú càháⁿ-gá. ²³ Te òré ní xóo cùcùehé ñáhá-güedé xii-gá, te ñá túú ní xóo danchòcáva-gá tnúhu cuèhé, te òré ní xóo dandòho ñaha-güedé xii-gá, te ñá túú ní xâhaⁿ-gá xii-güedé sá ío ná cada ñaha-gá, chi núú ndáhá Yá Ndiòxí ní xóo nachihí-gá mée-gá, ndihí nchaa sá sání íní-güedé cada ñaha-güedé xii-gá. Te Yá Ndiòxí cúú-gá Yáá ío vâha cada ndáá cuéchi nchaa ñáiyu na sáa nduu. ²⁴ Te Xítohó Jesucristú cúú-gá Yáá ní xhí ní núú cùrúxí cuendá nchaa cuéchi nchoo ñáiyu ndècú ñuyúú-a. Te ducaⁿ ní xhí-gá cuendá nchoo dùuⁿ duuⁿ daña-o nchaa ichi cuèhé ichi duha, te cada ndáá-ó cundecu-o ichi-gá. Te ní dânicuèhé ñáhá-güedé xii-gá, te sá dúcáⁿ ní ndoho-gá xiãⁿ ní ngúndecu vâha nchoo vitna. ²⁵ Te nchoo cùu-o datná cue mbéé cue quiti ní xita ní cùu, dico vitna ní tuha-o Xítohó Jesucristú, te Yáá-áⁿ cúú-gá datná ìíⁿ toli xito ñaha-gá xii-o vitna cuendá sá vâ cuíta nihnu-o.

3

Nàcuáa tàú ñáiyu tnândaha cadá-yu cundecú-yu

¹ Te nchaa nchòhó ñáiyu dîhí ní tnandaha ío quindáá íní-ndó yîi-ndo cuendá sá núu ñá túú sândáá íní-güedé tnúhu Yá Ndiòxí te quindáá íní-güedé cuendá sá ndéhé-güedé quidé ndáá-ndó ndècú-ndo, te ní ñà túú xini ñuhu-xi cáháⁿ-ndó tnúhu-gá núú-güedé. ² Chi ndèhe mee-güedé sá nchòhó quidé ndáá-ndó ndècú-ndo, te nèhe-ndo sá yîñùhu núú Yá Ndiòxí. ³ Te vâ cáni íní-ndó mèe-ni cunduu vii-ndo, te ndada-ndo díquí-ndó nàcuáa tàú-xi cunduu, te vâ cáni íní-ndó nándi canehe-ndo,

te ní vâ cáni íní-ndó cuñhu-ndo mee-ni dóó vâha sá ío vii ndáa. ⁴ Chi íní-ndó xini ñuhu-xi cunduu vii cunduu vâha-xi núú Yá Ndiòxí cuéi vitna te cuéi núú cuáháⁿ núú vèxi, te cuu-ndo ñáiyu ío càhnu íní-xi, te núu ducaⁿ na càda-ndo te ío cuu vâha íní Yá Ndiòxí. ⁵ Te ducaⁿ ío vii ío vâha ní xínduu íní nchaa ñáiyu dîhí ní xíndecu ndéé sanaha, te ñáiyu-áⁿ ío ní sândáá íní-yu Yá Ndiòxí te ní cudíú-yu núú-gá, te ní tñíí-yu nchaa tnúhu ní cáháⁿ yîi-yu. ⁶ Te ducaⁿ ní xóo cada ndíi Sárá ní xóo quindáá íní ndíi yîi ndíi, ndíi Àbrahám, te ní cánehe ndíi dîhí-áⁿ sá yîñùhu núú yîi ndíi. Te núu nchòhó quidé vâha-ndo ndècú-ndo te ñá túú yùhú-ndó ñà cada ñaha tnàha ñáiyu-ndo xii-ndo, te núu ducaⁿ quide vâha-ndo ndècú-ndo te quide-ndo datná ní quide ndíi Sárá.

⁷ Te nchòhó cue tée ndècú ñadihí-xi ío vâha cuáha-ndo cuendá nàcuáa cundecu vâha-ndo ndíhí-yu, te ío vii cáháⁿ ndíhí-ndó-yu, chi ñáiyu-áⁿ yî-gá-yu dàcúúxí nchòo cue tée, te ducaⁿ càda-ndo chi ndí ndúú-ndó ndúu táhú-ndó cundecu-ndo ndíhí Yá Ndiòxí, te núu ducaⁿ na càda-ndo te òré cáháⁿ ndíhí-ndo Yá Ndiòxí te tedóho ñaha-gá xii-ndo.

Ñáiyu quide sá vâha ndòhó-yu

⁸ Te cachí tnúhu tucu-í xii-ndo sá ío cuu ìíⁿ nuu-ndo cundecu-ndo, te cundàhú íní tnáhá-ndó ìíⁿ ìíⁿ-ndo, te cuu íní tnáhá tucu-ndo nàcuáa ndècú-ndo ichi Yá Ndiòxí, te cuu-ndo ñáiyu ndáhú íní-xi. ⁹ Te núu ìíⁿ sá ñà túú vâha quide ñaha ñáiyu xii-ndo, te ñá díú-ní dùcaⁿ nanchocáva-ndo càda-ndó-yu, àdi xícuèhé ñáhã-yu xii-ndo, te vâ ná danchocáva-ndo díu-ni tnúhu cuèhé, chi cácáⁿ táhú-ndó núú Yá Ndiòxí cuendá sá ná cádá vâha ñaha-gá xií-yu, te ducaⁿ càda-ndo chi Yá Ndiòxí ní cáháⁿ ñáhá-gá xii-ndo cuendá sá cádá vâha ñaha-gá xii-ndo tnáhá-ndó. ¹⁰ Te núú tütú Yá Ndiòxí cachí-xi: Nchaa ñáiyu cuíni cundecu vâha ndi nchãa nduu nini cundecú-yu ñuyúú-a, xini ñuhu-xi sá vâ càháⁿ-yu tnúhu cù-texínu, te ní vâ dâcuandehndé-yu. ¹¹ Te xini ñuhu-xi duuⁿ duuⁿ dañá-yu nchaa ichi cuèhé ichi duha, te cadá-yu mee-ni sá vâha, te ío ndúcú-yu nàcuáa cadá-yu cundecu vâha-yu ndíhí tnàha ñáiyú-yu te

dïu-ni ducaⁿ càncicúⁿ nihnú-yu cada-yu.

¹² Te Yá Ndióxi kíto-gã nchaa ñáiyu quide ndáá núu-gã

te tedóho-gá nchaa tnúhu cãháⁿ-yu, dico nchaa ñáiyu ñá túu cuini cada ndáá, ñáiyu-áⁿ ñá túu cùu váha iní-gá núu-yu.

Duha cãchí-xi núu tütú-gá.

¹³ Te vá yõo níhí ndéé càda ñaha xii-o ñⁿ sá ñá túu váha te núu mee-ni sã váha na càda-o cundecu-o. ¹⁴ Àdi núu ná cúu sã ná cáda ñaha ñáiyu xii-o sã cuendá sá quidé váha-o ndècu-o ña, te sá dúcáⁿ ná cáda ñahá-yu xii-o cùu-xi ñⁿ sá váha sá cúu-xí-ó núu Yá Ndióxi. Te na cãchí tnúhu-í xii-ndo sã vã yùhú-ndõ-yu, te ni vã cündiyí-ndó cuendá nchaa sá ná càda ñahá-yu xii-ndo. ¹⁵ Te nèhe-ndo sá yíñùhu núu Xítoho Jesucristú. Te ío cundecu túha-ndo dànehé-ndó ñáiyu véxi ndècu tnúhu núu-ndó nàcuáa ndùu tnúhu ndee ñi ní taxi Xítoho Jesucristú ndécú ndíhi-ndo, te cuu vii cuu váha iní-ndó cãháⁿ ndíhi-ndõ-yu, te cãháⁿ-ndó núu-yu mee-ni tnúhu yíñùhu nacuáa cùu váha iní Yá Ndióxi.

¹⁶ Te ío cada váha-ndo cündecu-ndo cuendá sá vã cündiyí-ndó, te núu ducaⁿ na càda-ndo, te nchaa ñáiyu xicuehé ñahá xii-ndo cuendá sá quidé váha-ndo ndècu-ndo ichi Xítoho Jesucristú quendóo canúu-yu ndíhi nchaa tnúhu cãháⁿ-yu, chi nchòhó quidé váha-ndo ndècu-ndo. ¹⁷ Te váha-gá sá ndóhó-ó cuendá sá quidé-ó sã váha te núu mee Yá Ndióxi ducaⁿ cuini-gá cundeu, te ñá díú sã ndóhó-ó cuendá sá ñá túu quide-o sá váha.

¹⁸ Te Xítoho Jesucristú ní xíhí-gá sá cuendá nchaa cuéchi nchaa nchoo ñáiyu ndècu ñuyú-a, te ñⁿ xito-ni ducaⁿ ní xíhí-gá te ducaⁿ te vá cùu tnáhí-gá, te mee-gã cúu-gã Yaá ñá túu tnáhí cuéchi-xi, te ducaⁿ ní ndoho-gá cuendá nchaa cuéchi ñáiyu ndècu ñuyú-a ñáiyu ñá túu cuini cada ndáá núu Yá Ndióxi, te ducaⁿ ní cuu cuendá sá núcundecu váha-yu núu Yá Ndióxi te núu na quindáá iní ñáhã-yu xii-gá. Te mee-gã ní xíhí-gá dico Espiritú-gá chi ní xíndecu-ni-xi, ¹⁹ te Espiritú-gá ní sáhã-xi ní cãháⁿ-xi tnúhu Yá Ndióxi núu nchaa espíritu ñáiyu ndècu núu ùhú núu ndàhú. ²⁰ Te ñáiyu-áⁿ cúu ñáiyu ní xíndecu ndéé sanaha cütñahá ní xíndecu

ndí Nõé, chi ñáiyu-áⁿ ño ní quide sãá iní-yu núu Yá Ndióxi. Te Yá Ndióxi ío váha iní-gá, chi ní dácacá-gã nduu ní xíndecu ndí Nõé ní cadúha ndí bàrcú cuendá ndétú-gã ndixi cuéchi iní-yu sá ñá túu quide váha-yu ndècu-yu ni cùu. Te dàvã-áⁿ ní ndaa ndute ñuyú te ní cácu úná duha ná tnáhã ñáiyu, chi ní quée-yu xití bàrcú-áⁿ, te ñá túu ní cãhá-yu. ²¹ Te sá dúcáⁿ ní cácu ñáiyu únã-áⁿ ñá túu ní cãhá-yu ndute ní ndaa ñuyú dàvã-áⁿ. Te xíãⁿ quée-xí sã cuándute ñáiyu vitna, te naníhí tàhú-yu te núu na quindáá iní-yu tnúhu ndáá tnúhu Yá Ndióxi. Te ñá díú sã cuándute-o te nduu ndoo nduu nine yiqui cùñú-ó te naníhí tàhú-ó, chi xini ñuhu-xi nãhmã-ó núu Yá Ndióxi nchaa yíca cuéchi-o, te nduu ndoo nduu nine iní-ó, te ducaⁿ te naníhí tàhú-ó, chi Xítoho Jesucristú ní xíhí-gá cuendá-ó te ní ndoto-gã. ²² Te Yaá-áⁿ cuandaa-gã andïu, te ní ngóo-gã xio cùha Yá Ndióxi, te tàxi tnuni-gã nchaa espíritu cünüu ndíhi nchaa dava-gã cue espíritu xínu cuéchi.

4

Cada-o nàcuáa cuini mée Yá Ndióxi

¹ Te Xítoho Jesucristú ní ndoho-gá cütñahá ní xíndecu-gã ñuyú-a, te vitna nchòhó cundecu túha-ndo ndòho-ndo cuendá-gã, chi nchaa ñáiyu ndòho nándi sá ndóhó cuendá-gã ñahã-yu nchaa sá cuéhé sá dúhá. ² Te ducaⁿ ñá túu-gã ndècu-yu ichi cuéhé ichi duha, chi mee-ñã nàcuáa cãháⁿ Yá Ndióxi quidé-yu ndècu-yu ñuyú-a. ³ Te nchòhó sa ñaha-ndo sá ño cuéhé núu sã cuéhé sá dúhá ní xóo cada-o cütñahá vátã cündecu-gã-ó ichi Yá Ndióxi, chi ní xóo cada-o nchaa sá cuéhé sá dúhá cùdí iní nchaa ñáiyu ñá túu sãndáá iní tnúhu-gã, te dàvã-áⁿ ní xóo cada-o nchaa núu sã cuéhé sá dúhá, te ní xóo cani cuéhé ní xóo cani duha iní-ó, te ní cuu-o cué ñáiyu quihu, te ní xóo cundecu-o víco núu ní xóo cada-o nchaa sá ñá túu váha, te ní xóo níhí tnáhã-ó ndíhi nchaa tnaha quihu-o, te ní xóo chiñuhu-o nchaa sã cãchí-yu cùu ndióxi te ñá ndáá sá ndióxi cúu nchaa xíãⁿ, te nándi-gã nchaa sã cuéhé sá dúhá ní xóo cada-o dàvã-áⁿ. ⁴ Te ñáiyu-áⁿ cünühu-yu vitna sá ñá túu-gã níhí tnáhã-ó ndíhi-yu cada-o nchaa sã cuéhé sá dúhá quidé-yu, te xíãⁿ cãháⁿ cuéhé-yu cuendá-ó vitna. ⁵ Dico

sáá nduu te ñáyi-u-áⁿ nǎhmá-yu nchaa sá quidé-yu núú Xítoho Jesucristú, chi diu-gá sa ndècu túha-gá sá cáda ndáá-gá cuéchi nchaa ñáyi-u sa ní xíhí, ndihi cuéchi nchaa ñáyi-u xíndecu vívú. ⁶ Te cue ñáyi-u sa ní xíhí ní xíndedóho tnúhu Xítoho Jesucristú, te cuéi ní xíhí-yu dátá ná xíhí dava-gá ñáyi-u, dico espíritú-yu chi ní nduu táhú-xi ndècu váha-xi dátá ná ndécú Yá Ndióxi.

⁷ Te vitna ta cùyatni danaa Yá Ndióxi ñuyíú-a núu xíáⁿ ío váha cuáha-ndo cuèndá nàcuáa cundecu-ndo, te cáháⁿ ndihi-ndo-gá. ⁸ Te xini ñuhu-xi sá ío cuu iní tnáhá-ndó ñⁿ ñⁿ-ndo, chi núu ducaⁿ na cùu iní tnáhá-ndó ñⁿ ñⁿ-ndo, te vá cání-gá iní-ndó cáda cuendá-ndó nchaa sá ñá túú váha quide ñaha ñáyi-u xii-ndo, ⁹ te nchòhó ñáyi-u xíndecu vehe-xi cuáha nùu-ndo vehe xii cue ñáyi-u ñuhu ichi na ndetatú-yu, te ío váha cuu iní-ndó òucaⁿ cada-ndo. ¹⁰ Te Yá Ndióxi ní taxi-gá ndí dííⁿ núú táhú ndécú ndihi-ndo ñⁿ ñⁿ-ndo, te nàcuáa ndùu táhú ní nduu táhú-ndó ñⁿ ñⁿ-ndo te ducaⁿ chindee tnahá-ndo, te vá dáñá ndèé-ndó cáda-ndo nchaa nacúáa tàuchiⁿ Yá Ndióxi cada-ndo, te chindee ñaha-gá xii-ndo. ¹¹ Te dava nchòhó ñáyi-u cáháⁿ tnúhu Yá Ndióxi núú ñáyi-u, xini ñuhu-xi cáháⁿ-ndó nàcuáa ndùu tnúhu-gá núú-yu, te dava nchòhó ñáyi-u quide nchaa núú chiⁿ chindee tnahá ñáyi-u-xi, xini ñuhu-xi cada-ndo sá Yá Ndióxi chindèe ñaha-gá xii-ndo, te ducaⁿ cáda-ndo nchaa núú sá váha, chi Xítoho Jesucristú tnáhá-gá chindèe ñaha-gá xii-ndo, te ducaⁿ ío cuu càhnu Yá Ndióxi. Te vitna tàú-ó càháⁿ-ó sá ío càhnu cuu Xítoho Jesucristú, chi diu-gá cúnùu-gá nchaa nduu nchaa quíú, te ducaⁿ na cùnduu.

Ndoho tnáhá-ó cùndecu-o ichi Xítoho Jesucristú

¹² Te nchòhó ñáyi-u ío cùu iní-í, vá cúnùhu-ndo sá ío ndòho-ndo ndecu-ndo ichi Xítoho Jesucristú, chi sá dúcáⁿ ndòho-ndo-áⁿ cúnùní ndisa sá sàndáá iní-ndó-gá, te vá cání iní-ndó nǎ cuèndá ducaⁿ ndòho-ndo. ¹³ Chi da cudíí iní-ndó te núu ndòho-ndo dátá ní ndòho Xítoho Jesucristú, te ducaⁿ sùúní cùdíí iní-ndó òré ná quixi tucu-gá ñuyíú-a te dàvá-áⁿ quini-ndó sá ío càhnu cuu-gá. ¹⁴ Te núu xícuèhé ñáhá ñáyi-u ndècu ichi cuehé ichi duha xii-ndo cuèndá sá ndécú-ndó ichi

Xítoho Jesucristú, te xíáⁿ cúu-xi ñⁿ sá váha sá cúu-xi-ndó núú-gá, te ducaⁿ chi Espíritú Yá Ndióxi sá ío cùnùu ndecu ndihi ñaha-xi xii-ndo, te nchaa ñáyi-u ndècu ichi cuehé ichi duha-áⁿ cáháⁿ cuèhé-yu cuèndá Xítoho Jesucristú, dico nchòhó càchí-ndó sá ío càhnu cuu-gá. ¹⁵⁻¹⁶ Te núu nchòhó dándòho ñaha ñáyi-u xii-ndo sá cuèndá sá ndécú-ndó ichi Xítoho Jesucristú ñá, te vá cúu cáháⁿ núú-ndó, chi ndacáⁿ táhú-ndó núú Yá Ndióxi cuèndá sá ndécú-ndó ichi-gá. Te cuéi ndòho-ndo ndecu-ndo, dico ñá túú cùu-ndo ñáyi-u sàhni ndíyi te ni ñá túú cùu-ndo ñáyi-u dùhu, te ni ñá túú cùu-ndo ñáyi-u quide cuehé quidé dùha, te ni ñá túú cùu-ndo ñáyi-u chindee tnúhu tnaha ñáyi-u-xi ñⁿ sá ñá túú tàú-ndó cáda-ndo.

¹⁷ Te vitna sa quèsaha Yá Ndióxi cada ndáá-gá nchaa sá quidé nchòhó ñáyi-u ndècu ndihi-gá, te núu ducaⁿ te ndèé-gá cada-gá nchaa ñáyi-u ñá túú sàndáá iní ñáhá xii-gá òré ná sáá nduu òucaⁿ cada ñaha-gá xii-yu. ¹⁸ Te nchòhó xini-ndó sá ñáyi-u quide váha ndècu ichi Xítoho Jesucristú ndòho tnáhá-yu ndécú-yu, dico sáá nduu te nduu táhú-yu cundecú-yu ndihi-gá. Te núu ducaⁿ ndòho nchaa ñáyi-u quide váha ñá, te nása-gá yáha nchaa ñáyi-u ndècu ichi cuehé ichi duha na sáá nduu càda ndáá Yá Ndióxi cuéchi-yu-í? ¹⁹ Te nchaa nchòhó ñáyi-u ndòho nacúáa cuini Yá Ndióxi xini ñuhu-xi sá vá dáñá ndèé-ndó cáda váha-ndo cùndecu-ndo, te ío quindáá iní-ndó sá xító ñaha-gá xii-ndo. Te diu-gá cúu-gá Yá ní cadúha ñaha xii-o, te quide-gá ñⁿ sá cáháⁿ-gá.

5

Nàcuáa tàú-xi cada ñáyi-u ndècu ichi Xítoho Jesucristú

¹ Te yúhú cáháⁿ-í dòho nchaa nchòhó cue téé yíndaha nchaa dava-gá ñáyi-u ndècu ichi Xítoho Jesucristú, chi tnáhá yúhú yíndaha-í ñáyi-u ndècu ichi-gá, te sàndáá iní-í tnúhu-gá, te ní xini-í nchaa nacúáa ní ndòho-gá, te sáá nduu te tnáhá-í cunuu-í ndihi-gá. ² Te ío canehe cuèndá-ndó nchaa ñáyi-u ndècu ichi Yá Ndióxi yíndaha-ndo te cada-ndo dátá quidé cueé toli, chi cue téé-áⁿ ío váha xito-güedé mbéé-güedé. Te canehe cuèndá-ndó-yu sá cúu ñí méé-ndó te ñá díú sá ío ñⁿ ñáyi-u cada yica

ñaha xii-ndo, te ni ña díú sã cuini-ndó cùhuⁿ yáhu-ndo, chi ni yùhu ni iní-ndó còto-ndó-yu, chi ducaⁿ cuini Yã Ndiõxí cunduu. ³Te vá cáda-ndó sã ïo cùnuu-ndo núu-yu, chi cada-ndo mée-ni sã váha cuèndá ducaⁿ cànchicúⁿ nihnú-yu cadá-yu tñahá-yu. ⁴Te òré ná quíxí tùcu Xítóhó Jesucristú Yáá néhé cuèndá ñáhá xii-o nchaa-o ñuyúú-a, te taxi-gá sã ïo váha nduu tãhú-ó, te cunu-u-ndo ndihi-gá ni caa ni quíhíⁿ.

⁵Te nchòhó ñáyi ndècu ichi Xítóhó Jesucristú càháⁿ-í dóho-ndo sã ïo quindáá iní-ndó cuè téé yìndaha ñaha xii-ndo nacuaá ndècu-ndo ichi-gá, te nchaa-ndo tàú-ndó quindáá iní tñáhá-ndó ìⁿ ìⁿ-ndo, chi núú tütú Yã Ndiõxí cãchi-xi ìⁿ xichi: Nchaa ñáyi quide cahnu mee-xi ñá túú cùu váha iní Yã Ndiõxí níhú-yu, dico nchaa ñáyi ndàhú iní-xi te chindee ñaha-gá xií-yu.

Duha cãchí-xi núú tütú-gá. ⁶Te ña-ndo mée-ndo núú ndáhá Yã Ndiõxí, chi mee-gã ïo cùnuu-gá. Te núu ducaⁿ na càda-ndo, te sáá nduu te cada nínu ñaha-gã xii-ndo. ⁷Te nchaa sã yãha-ndo ndècu-ndo te nachihi-ndo ndàha Yã Ndiõxí, chi mee-gã xító ñaha-gã xii-ndo.

⁸Te ïo váha cuáha-ndo cuèndá cundecu-ndo, te quíhí iní-ndó chi sácúíhná xicá cùu-xi cuini-xi dacuíta nihnu ñaha-xi xii-o, chi ïo cùu úhú iní ñáhá-xí, te cùu-xi datná ìⁿ quiti dééⁿ xicá ndùcu sã cáxí-xí. ⁹Te ïo quindáá iní-ndó Xítóhó Jesucristú, te vá ñáhá-ndó mée-ndo dandahú ñáhá sácúíhná xii-ndo càda-ndo nacuaá cuini-xi, chi ñaha-ndo sã ncháá ñáyi ndècu ichi Xítóhó Jesucristú xñ-decu níhí ñuyúú ndóhò-yu dàtná ndóhó nchò ndècu-ndo ichi-gá. ¹⁰Dico sacú-ni nduu duha cundoho-o te dàtnúni ñá túú-gã ná cumání-ó cùndecu-ndo núú Yã Ndiõxí, te dàvá-áⁿ vã cáni ìⁿ cani úú iní-ó cùndecu-ndo ichi-gá. Te ïo-gá ngùndecu ndihi-o tñùhu ndee iní cada-o nchaa nacuaá càháⁿ-gá, te ducaⁿ càda-o chi mee Yã Ndiõxí ïo chindee ñaha-gã xii-o, te ñu-ni Yáá-áⁿ ïo cùu iní ñáhá-gã xii-o, chi ní cáháⁿ ñáhá-gã xii-o cùndecu-ndo núú ïo váha càa ndecu-gã cundecu-ndo ni caa ni quíhíⁿ, te ducaⁿ ní quide-gá chi ní sándáá iní-ó Xítóhó Jesucristú. ¹¹Te ïo ndacáⁿ tãhú-ó núú Yã Ndiõxí chi ïo cãhnu cuu-gá, te cùnuu-gã nchaa nduu nchaa quíú. Te ducaⁿ na cùnduu.

Tnúhu ndéé núú ní ndihi-ná

¹²Te té Silvanú xini-í sã cúu-dé ìⁿ téé quide ndáá ndécú ichi Xítóhó Jesucristú, te ñu-dé ní cáháⁿ ndàhú-í núú-dé ní tee-dé ìⁿ úú tñúhu sã ní xáhaⁿ-í xii-dé núú tütú-a cuèndá daquixi-í ndaha-ndo, te núú tütú-a cãchí tñúhu ndáá-í xii-ndo sã Yã Ndiõxí ïo cùu iní ñáhá-gã, te chindee ñaha-gã xii-ndo ndècu-ndo, te cãchí tñúhu tucu-í xii-ndo sã ïo quindáá iní-ndó sã ndáa ducaⁿ quide ñaha-gã xii-ndo.

¹³Te cue ñáyi ndècu ñuú Babilonía, ñáyi ndècu ichi Yã Ndiõxí, ñu-ni ñáyi ni cãchí Yã Ndiõxí sã nanihí tãhú dàtná cúu nchòhó, ïo quide ndee iní ñáhá-yu xii-ndo, te tñáhá té Mácú téé cùu datná ìⁿ déhe-í quidé ndee iní ñáhá-dé xii-ndo. ¹⁴Te ndihi tñúhu yñùhu cada ndee iní tñáhá-ndó ìⁿ ìⁿ-ndo, te xicáⁿ tãhú-í núú Yã Ndiõxí sã ïo na cùndecu nahi nchaa nchòhó ñáyi ndècu ndihi Xítóhó Jesucristú. Te ducaⁿ na cùnduu. Te ïo chí cáda ndèe iní-ñá vitna.

TUTÚ CÚÚ ÛÚ NÍ CADÚHA TÉ PÈLÚ

Té Pèlú *cádúha-dé tutú quíhíⁿ* ndaha ñáyiú sàndáá iní tñúhu Yá Ndiòxí

¹Yúhú té Xímú, àdi Pelú chi úú òú-í, xínú cuèchi núú Xítohó Jesucristú, chi mee-gá ní tendaha ñaha-gá xii-í xícá cùu-í càháⁿ-í tñúhu-gá. Te càdúha-í tutú-a sá cúú-xí nchàa nchóhó ñáyiú sàndáá iní ñháá xii-gá dàtná sàndáá iní-ndí-gá, te ducaⁿ chi Tàtá-ó Dütú Ndiòxí ní dácàháⁿ-gá iní-ó ní sàndáá iní-ó-gá, chi cùu-gá Yáá ío váha quide ndáá ndíhi Xítohó Jesucristú Yáá dácácu nihnu ñaha xii-o núú ùhú núú ndàhú. ²Te xicáⁿ táhù-í núú Yá Ndiòxí sá ùuⁿ-gá uuⁿ-gá ná cuita chindee chitúu ñaha-gá xii-ndo quíhíⁿ, te ducaⁿ ío váha cuu iní-ndó cùndecu-ndo, te ducaⁿ càda-gá chi ta cùtnuní-gá iní-ndó nàcuáa ndùu cuendá-gá, te ducaⁿ ta cùtnuní tucu iní-ndó nchàa nacuáa ndùu cuendá Xítohó Jesucristú Yáá cúú Xítohó-ó.

Nàcuáa quide ñáyiú ndècu ichi Xítohó Jesucristú

³Te Yá Ndiòxí ío càhnu cuu-gá chi chindee ñaha-gá xii-o quide ndáá-ó ndècu-o datná cuiní mée-gá, te ducaⁿ chi cùtnuní iní-ó nàcuáa sàni iní Xítohó Jesucristú Yáá ní càháⁿ ñháá xii-o. Te òré ní càháⁿ ñháá-gá xii-o te ní cutnùní iní-ó sá ío càhnu cuu-gá te ío váha quide-gá. ⁴Te ducaⁿ ní cutnùní tucu iní-ó nàcuáa ní càháⁿ-gá cada ñaha-gá xii-o, te tñúhu ní càháⁿ-gá-áⁿ ío càhnu cuu-xi te ío váha, te nchoo ní sàndáá iní-ó tñúhu-áⁿ núu xíáⁿ ñá túú-gá ndécú-ó ichi cuèhé ichi duha te ní ñá túú-gá sání iní-ó càda-o nándi sá cuèhé sá dúhá, te ní cuu vii ní cuu váha iní-ó vitna. ⁵Te sá dúcáⁿ quide-gá te xíáⁿ ío nducu ndèe-ndo cada-ndo nchaa nacuáa càháⁿ-í-a, te nchòhó sàndáá iní-ndó-gá dico ñá díú mée-ni xíáⁿ chi tñàhá xíní ñúhu-xi cada ndáá-ndó cùndecu-ndo. Te núu quide ndáá-ndó ndècu-ndo te xini ñuhu-xi tecú tñuní-ndó tñúhu-gá. ⁶Te núu tècú tñuní-ndó te cùu-ndo ñáyiú xini cotnii mee-xi, te núu cùu-ndo ñáyiú sàcòo tnií mee-xi te xini ñuhu-xi cunduu cahnu iní-ndó cuéi nándi sá ná yáha-ndo

cùndecu-ndo, te núu càhnu iní-ndó te xini ñuhu-xi cada ndáá-ndó cùndecu-ndo datná cuiní mée Yá Ndiòxí cada-ndo. ⁷Te núu quide ndáá-ndó ndècu-ndo, te xini ñuhu-xi ío cuu iní tñàhá ndè mee-ndo nacuáa ndècu-ndo ichi-gá, te núu cùu iní tñàhá ndè mee-ndo te xini ñuhu-xi cuu iní-ndó nchàa dava-gá tñaha ñáyiú-ndo.

⁸Te núu sa ducaⁿ quide-ndo ndècu-ndo te uuⁿ-gá cuita ducaⁿ càda-ndo quíhíⁿ núú cuàháⁿ núú vèxi, te núu ducaⁿ quide-ndo te cùu-ndo cue ñáyiú ñá túú dàna iní-xi xindecu, te cuita cutnùní-gá iní-ndó nchàa nacuáa sàni iní Xítohó Jesucristú quíhíⁿ. ⁹Te nchaa ñáyiú ñá túú cuiní ducaⁿ càda cuú-yu ñáyiú ñá túú tñàhí ndìxi túu iní-xi sá Yá Ndiòxí sa ní ndada ndoo ní ndada nine-gá iní-yu cuendá nchaa sá cuèhé sá dúhá ní xóo cada-yu, te ñáyiú-áⁿ cúú-yu dàtná íiⁿ ñáyiú cuáá àdi datná íiⁿ ñáyiú ñá túú cùtnuní váha núú-xi, te ducaⁿ sàtnahá-xi cúú-yu cuendá sá dúcáⁿ quidé-yu. ¹⁰Te xíáⁿ núu yúhú càháⁿ-í dóho nchaa nchòhó ñáyiú ndècu ichi Xítohó Jesucristú, te ío nducu ndèe-ndo cada váha-ndo cùndecu-ndo cuendá cutnùní ndáá iní-ndó sá Yá Ndiòxí ní càháⁿ ñháá-gá xii-ndo, te ducaⁿ ní quide-gá chi ducaⁿ ní cachí-gá cada-gá. Te vá íiⁿ ndùu cani iní-ndó dàña-ndo ichi-gá, te núu vá dàña ndèe-ndó càda-ndo nchaa nacuáa càháⁿ-í-a. ¹¹Te núu ducaⁿ na càda-ndo cùndecu-ndo, te ío vii ío váha cada Yá Ndiòxí queheⁿ cuendá ñháá-gá xii-ndo òré ná sàa-ndó núú ndécú Xítohó Jesucristú táxi tñuní-gá nchaa nduu nchaa quíú, te diu-ni Yáá-áⁿ cúú Xítohó-ó te ní dácácu nihnu ñaha-gá xii-o núú ùhú núú ndàhú.

¹²Te ducaⁿ-ni quíhi-í dandàcu iní ñháá-í xii-ndo nchàa tñúhu càháⁿ-í-a cuéi sa xini-ndó tñúhu-áⁿ, te cuéi sàndáá váha iní-ndó nchàa tñúhu ndáá dácúaha-ndo. ¹³Te yúhú quidé cuendá-í sá ío táu-xi càháⁿ-í dóho-ndo nini ndecu-í ñuyíú-a cuendá sá vā nàcuànaa-ndo nacuáa cada-ndo cùndecu-ndo. ¹⁴Chi Xítohó Jesucristú ní cachí-gá sá ñá túú-gá vai nduu cundecu-í ñuyíú-a te cuú-í. ¹⁵Te ío nducu ndèe-í nducu-í nàcuáa cada-í cuendá quendóo ndíhi-ndo nchàa tñúhu càháⁿ-í-a, te cuéi na yáha cuú-í dico vā nàcuànaa-ndo cada-ndo nchaa nacuáa càháⁿ tñúhu sá dānhé ñháá-í xii-ndo vitna.

Cue tée ní xini núú sã ïo cãhnu cuu Xítohó Jesucristú

¹⁶ Te sa ní dánèhé ñáhá-ndí xii-ndo sã ïo cãhnu cuu Xítohó Jesucristú. Te ní cachí tnúhu tucu-ndí nãcuáa cada-gá òré quixi tucu-gá, te tnúhu-án cúú-xí tnúhu ndáa cuiti te ñá díú tnúhu sá ní sani iní cue ñáyiú ñuyúú-a cùu-xi, chi nchúhú ní xini núú-ndí nãcuáa ní quide-xi cútñahá ní cut-nùní iní-ndí sã ïo cãhnu cuu Xítohó Jesucristú. ¹⁷ Chi ðává-án ïo váha ní quide Tãtã-ó Dütú Ndióxi ní quide cãhnu-gã Xítohó Jesucristú, te ðiu-ni ðává-án ní cáháⁿ Dütú Ndióxi ndéé andiú ní xáhaⁿ-gã xii Xítohó Jesucristú: “Yòhó cúú-n Dèhe-í téé ïo cùu iní-í, te ïo cùdíí iní ñáhá-í xii-n”, duha ní xáhaⁿ Yã Ndióxi xii Xítohó Jesucristú. ¹⁸ Te nchúhú ní tecú dóho-ndí ní cáháⁿ Yã Ndióxi ndéé andiú cútñahá ducaⁿ ní xáhaⁿ-gã xii Xítohó Jesucristú, chi tnàhá-ndí ndécú-ndí ndíhí-gá yucu núú dúcáⁿ ní quide cãhnu ñaha Yã Ndióxi xii-gá.

¹⁹ Te ndècu ndíhí-o nchaa tnúhu ní cáháⁿ cue tée ní xóo cáháⁿ tnúhu Yã Ndióxi ndéé sanaha te nchaa tnúhu-án cáháⁿ-xi nchaa nãcuáa cada-xi vitna, te cùtnuní iní-ó sã tnúhu ndáa cúú-xí, te xini ñuhu-xi cada cuendá váha-ndo nchaa nãcuáa cáháⁿ tnúhu-án, chi tnúhu-án cúú-xí ðãtná ìíⁿ ñuhú ðáyèhé-xi ndéé òré véxi túndaá quéné chòdíni cáhnu ðáyèhé-ði. Te ducaⁿ sãtnahá-xi cùu tnúhu-án chi quide-xi nãcuáa cutnùní iní-ó cuendá Xítohó Jesucristú. ²⁰ Te xini ñuhu-xi sã ïo-gá cada cuendá-ndó sã ñà túú ñáyiú tecú tnùní ní ìíⁿ tnúhu sá ní chídó tnùní cue tée ní cáháⁿ tnúhu Yã Ndióxi ndéé sanaha, te núu Yã Ndióxi vá cádá-gã nãcuáa cut-nùní iní-yu nãcuáa cáháⁿ nchaa tnúhu-án. ²¹ Te cue tée-án ïo ní xíndecu yíñúhu-güedé núú Yã Ndióxi, te nchaa tnúhu sá ní cáháⁿ-güedé-án ñà túú cùu-xi tnúhu sá ní cahu iní méé-güedé, chi Espiritú Yã Ndióxi ní dácáhu iní ñáhá-xí xii-güedé nãcuáa cunduu tnúhu cáháⁿ-güedé.

2

Cue tée cachí sã cáháⁿ tnúhu Yã Ndióxi té ñà ndáa

¹ Te ndéé sanduu chi ní xíndecu cue tée ní xóo dandàhú ñáhá xii ñáyiú isràél cachí sã cáháⁿ tnúhu Yã Ndióxi té ñà ndáa sã cáháⁿ-güedé tnúhu-gá, te ðiu-ni

ducaⁿ tucu cundecu cue tée dandàhú ñáhá xii-ndo vitna, chi cachí-güedé sã cáháⁿ-güedé tnúhu Yã Ndióxi té ñà ndáa. Te cue tée-án ïo yídáhu cáháⁿ-güedé, te nchaa tnúhu cáháⁿ-güedé-án daciúta nihnu ñaha-xi xii-ndo te núu na tédóho-ndo, chi cue tée-án vã nñuu-güedé sã Xítohó Jesucristú ní xíhí-gá cuendá-güedé. Te sã dúcáⁿ cáda-güedé ïo-gá ndíhí daciúta nihnu-güedé méé-güedé. ² Te vãi ñáyiú xínu iní-yu cada-yu nándi sã cuèhé sã dúhá cuendá sã dúcáⁿ cáda cue tée-án, te cuendá xíãⁿ ngóo ñáyiú cáháⁿ úhú-yu cuendá ichi Yã Ndióxi. ³ Te mee-ni tnúhu sá ní cahu iní cue ñáyiú ñuyúú-a danèhé ñáhá-güedé xii-ndo, te quesaha-güedé sã cúú-xí tnúhu ndáa te ñà ndáa cuendá-ni sã cuñaha-ndo ðíhúⁿ xii-güedé, chi ðiu-ni xíãⁿ tnàhí culuⁿ iní-güedé, dico Yã Ndióxi sa ní cunaha ndècu túha-gá cuendá cada ndáa-gá cuèchi-güedé, te na sàa nduu te cuíta nihnu duuⁿ-güedé, chi Yã Ndióxi vá nãcuánaa-gá ìíⁿ sã ní cachí-gá cada-gá.

⁴ Te Yã Ndióxi ñà túú ní quide cãhnu iní-gá sã ní quide cue espíritu ñà túú ní cuiní cada ndáa xínu cuèchi núú-gá ní cùu, chi ní dáquihíⁿ ñáhá-gã xii-xi ìíⁿ xichi núú ïo ndòho-xi ndecu-xi, te xíãⁿ cundéá nihnu-xi ndéé sáa nduu cuíta nihnu duuⁿ-ná-xi. ⁵ Te Yã Ndióxi ñà túú ní quide cãhnu tucu iní-gá nchaa sã ní quide ñáyiú ñuyúú díhna, chi ðává-án ní dándáa-gã ndute ñuyúú ní cáhá nchaa ñáyiú ndècu ichi cuèhé ichi duha te ìíⁿ ðii-ni té Nòé ndíhí usá-gá tucu cue ñáyiú cùu ndí mee-dé ní dácacu nihnu-gá. Te té Nòé-ãⁿ cúú-dé tée ní cáháⁿ dóho-yu nãcuáa cada váha-yu cundecu-yu ní cùu te ñà túú ní cuiní-yu. ⁶ Te Yã Ndióxi ní dãngává-gã ñuhú ní dãnáa-gã ñáyiú ñuu Sòdomá ndíhí ñáyiú ñuu Gòmorrá te mee-nã yáá ní nduu ñuu-án. Te sã dúcáⁿ ní cuu xíãⁿ cùtnùní iní-ó nãcuáa cada ñaha Yã Ndióxi xii nchaa ñáyiú ñà túú quide váha. ⁷ Dico té Lót tée ní quide ndáa ní xíndecu ìíⁿ ñuu-án ðává-án chi ní dácacu nihnu ñaha-gã xii-dé. Te nchaa ñáyiú ñuu núú ní xíndecu-dé-án ïo ní xínduu cuíhna iní-yu, te mee-ni ichi díí iní ní xíndecú-yu, te sã dúcáⁿ ní xóo cada-yu xíãⁿ ïo ní ndíhú iní té Lót. ⁸ Te ìíⁿ nduu ìíⁿ nduu ní xóo cada ndàhú-xi iní té Lót-án cuendá nchaa tnúhu cuèhé tnúhu

duha ní xóo cáháⁿ-yu ní xóo cundedóho-dé, ndíhi cuendá nchaa sá cuèhé sá dúhá ní xóo cadá-yu ní xóo quini-dé, te mee-dé ní cuu-dé ìⁿ téé ní xínduu vii ní xínduu váha iní-xi núú Yá Ndiòxí. ⁹Te sá dúcáⁿ ní yáha té Nòé ndíhi té Löt, xíáⁿ cútnúni iní-ó sá Yá Ndiòxí ío chindee-gá cue ñáyiú quide ndáá ndécú ìchi-gá cuendá sá vǎ cadá-yu nándi sá cuèhé sá dúhá cuèi nándi na ndòhó-yu cundecú-yu. Te Yá Ndiòxí càchí-gá sá ncháá ñáyiú ndècu ichi cuehé ichi duha sa ndècu túha-yu sá quíhíⁿ-yu núú ùhú núú ndàhú nduu nà yáha cundáá cuèchi-yu.

¹⁰Te uuⁿ-gá cada ñaha Yá Ndiòxí xii nchaa cue téé ndècu ichi díí iní, te dàquee tíhú-güedě nchaa tnúhu sá sánú ìchi ñaha xii-o nacúaa cada-o cundecú-o, te cùu-güedé cue téé ñíí iní-xi, te yíí iní-güedé, te ñá túú yùhú-espíritú cáháⁿ úhú-güedé cuendá nchaa espíritú cúnú. ¹¹Te cue espíritú xínú cuèchi núú Yá Ndiòxí ío cúnuu-xi dacúúxí cuè téé-áⁿ, dico ñá túú cùyíí-xi cáháⁿ-xi dàtná cáháⁿ cue téé-áⁿ òré ndàcáⁿ cuèchi-xi núú Yá Ndiòxí cuendá nchaa sá quídé cuè espíritú cúndíhi yucu ñáváha.

¹²Te nchaa cue téé dandàhú ñáhá xii-ndo-áⁿ cúu-güedé dàtná cue quiti, chi cue quiti-áⁿ ñá túú ndècu sá xini tnúni-güedé, chi cue quiti-áⁿ ní cacu-güedé sá tníí-ó-güedé te cahni-o-güedé. Te ducaⁿ sátnahá-xi cùu nchaa cue téé-áⁿ, chi cáháⁿ cuèhé-güedé cuendá ndédani cǎa espíritú cuèi ñá túú xini-güedé ná espíritú cúu-xí, te diu-ni mee-güedé dácuíta nihnu-güedé méé-güedé sá dúcáⁿ quide-güedé, ¹³te sáá nduu te nacháhu-güedé nchaa sá quídé-güedé-áⁿ, te cuèi nduu cuèi níú cúdíí iní-güedé quídé-güedé nchaa núú sá cuèhé sá dúhá sàni iní-güedé. Te òré nàtacá-ndo càda-ndo ìⁿ vico chínuhu-ndo Yá Ndiòxí te chitnahá ñáhá-güedé xii-ndo, te cada dusaⁿ-güedé sá cúdíí iní-güedé sá dándàhú ñáhá-güedé xii-ndo, te dicó sácáⁿnúú cuáha ñaha-güedé xii-ndo dùcaⁿ na cada-güedé.

¹⁴Te nchaa cue téé-áⁿ òré xini-güedé ìⁿ ñáyiú díhí te ndíhi-ni sàni iní-güedé cáháⁿ ndíhi ñaha-güedé xí-yu, te ñá túú nduu vétú iní-güedé cuendá nchaa sá cuèhé sá dúhá quide-güedé chi uuⁿ-gá uuⁿ-gá sání iní-güedé cada-güedé. Te cuáháⁿ-güedé

dándàhú-güedé nchaa ñáyiú ñá túú ñíhí ndéé càda ndáá cuendá canchicúⁿ nihnú-yu nchaa tnúhu cáháⁿ-güedé. Te mee-ni ncháa sá ndécú ndíhi tnaha ñáyiú-güedé cúú iní-güedé, te cue téé-áⁿ cúu-güedé cue téé duuⁿ duuⁿ sa ní xíta nihnu núú Yá Ndiòxí. ¹⁵Chi cùu-güedé cue téé vá cáni-gǎ iní-xi cada ndáá, te nchicúⁿ nihnu-ná-güedé quídé-güedé nàcuáa ní xóo cada ndíi Bàlaám déhe ndíi Bèór, chi ndíi Bàlaám-áⁿ ní xóo tnahá iní ndíi cada ndíi chíuⁿ cuehé nàcuáa ní xóo ñíhí ndíi díhúⁿ. ¹⁶Te Yá Ndiòxí ní quide-gá ní cáháⁿ búrru ndíi ní tenáá ñáhá-dí xii ndíi cuendá sá vǎ cadá ndíi ìⁿ cuèchi sàni iní ndíi cada ndíi ni cùu. Te sá dúcáⁿ ní cuu xíáⁿ ní nguítuu ndíi ñá túú ní quide ndíi ìⁿ sá ñá túú nándíhi sàni iní ndíi ni cùu.

¹⁷Te nchaa cue téé ducaⁿ xíquide cùu-güedé dàtná ìⁿ doco yíchí, te cùu tucu-güedé dàtná ìⁿ vícú sá xídó tǎchí te ñá túú dáú nchídó-xí, te sa ndècu túha ìⁿ xichí núú ío nee quíhíⁿ-güedé cundecú-güedé ni caa ní quíhíⁿ. ¹⁸Te cue téé-áⁿ cáháⁿ-güedé dàtná cáháⁿ ìⁿ téé ío cùu cahnu dico ñá túú vèdana nándíhi nchaa tnúhu cáháⁿ-güedé, te cue téé-áⁿ dándàhú-güedé nchaa ñáyiú íchí ní dàñá ìchi cuehé ichi duha, te xáhaⁿ-güedé xí-yu sá cúu-ní cadá-yu nchaa sá cuèhé sá dúhá quide nchaa ñáyiú ndècu ichi díí iní, ¹⁹te xáhaⁿ tucu-güedé sá cúu-ní cadá-yu náni véxi iní-yu cuèi sá váha te cuèi sá cuèhé, dico mee-güedé chi mee-ni sá cuèhé sá dúhá cúnuu quide-güedé. Te nchaa ñáyiú ñá ndácú dàña nándi sá cuèhé sá dúhá cúu-yu dàtná ìⁿ ñáyiú xinu cuechi ñá túú tnàhí dàñá quee núú chíúⁿ pàtróⁿ-xi. Te ducaⁿ sátnahá-xi cúu-yu chí ñá ndácú-yu dàñá-yu nándi sá cuèhé sá dúhá quide-yu. ²⁰Te núú ñáyiú sa ní dàñá ncháa ichi cuehé ichi duha cuendá sá ní cutnúni iní-yu nàcuáa nduu tnúhu Xitohó Jesucristú, Yáa ní dácúcu nihnu ñaha xii-o núú ùhú núú ndàhú ná nànchocáva iní-yu cundecú tucú-yu ichi cuehé ichi duha, te mee-ná sá cuèhé sá dúhá tàxi tnuni ñáhá-xí xí-yu, te núu ducaⁿ te vǎ-gá tucu cadá-yu dàcúúxí dàtná ní xóo cadá-yu cútnàhá vátá cútnúni-gá iní-yu nàcuáa nduu tnúhu-gá. ²¹Te váha-gá sá vǎ ngünu ichí-yu ichi ndáá ní cùu te ñá díú sá sà ní ngünu ichí-yu te ní dàñá-yu nchaa tnúhu-gá sá sà ní

nihi-yu ndècu ndihí-yu sànu ichi ñaha-xi nacuaá cundecu-yu ni cùu. ²²Te ñáiyu ducaⁿ xiquide quèe ndáá-xi nàcuáa cuáháⁿ ñiⁿ cuèndú sá cächí-xi: “Iná ní nacaxi-dí sá ní ndusaⁿ-dí, te cùchí quiti ichí ní xichi ndute càndoo cuáháⁿ-ni tucu-dí cuchi ñuhu-dí núú ndèhyú”, duha cuáháⁿ cuèndú-áⁿ.

3

Xítóhó Jesucristú quixi tucu-gá

¹Te nchaa nchòhò ñáiyu ío cùu iní-í cùt-nuní iní-í sá ío váha sàni iní-ndó, te xéhé cúú-xí tütú cúú úú cádúha-í sá cúú-xí-ndó, te ñiⁿ-ni cáháⁿ-í dándacu iní ñáhà-í xii-ndo nchaa tñúhu sá sá ní xíndedóho-ndo. ²Chi cuini-í sá vǎ nàcuànaa-ndo nchaa tñúhu ní cáháⁿ nchaa cue téé ní xóo cáháⁿ tñúhu Yá Ndióxi ndéé sanaha, te ni vǎ nàcuànaa-ndo nchaa tñúhu ní cáháⁿ cue téé ní cáháⁿ tñúhu Xítóhó Jesucristú Yaa ní dácäcu nihnu ñaha xii-o núú úhú núú ndàhú, chi diu nchaa tñúhu-áⁿ sánú ichi ñaha-xi xii-o nacuaá cada-o cundecu-o.

³Te ío-gá xini ñuhu-xi cutnuní iní-ndó nàcuáa cada-xi òré vátá sáa-gá nduu quixi tucu Xítóhó Jesucristú ñuyú-a, te cächí tñúhu-í xii-ndo sǎ cùndècu ñáiyu cuhuⁿ iní mee-ni nchaa sá cuèhé sá dúhá te mee-ni xǎn cadá-yu, te cáháⁿ cuèhé cáháⁿ duhá-yu cuèndá tñúhu Yá Ndióxi. ⁴Te cächí-yu: “Ná ndáá sá quixí Xítóhó Jesucristú ñuyú-a, chi núu quixi-gá te sá ndéé ama-gá sa ní quexio-gá ní cùu. Te dàtná-ni quide-xi vitna diu-ni duha ní quesaha-xi quide-xi ndéé cùtnáhá ní ngáva ñuyú, te diu-ni duha quide-xi ndéé cùtnáhá ní xíndecu cue ñani tñáhá-ó ndéé sanaha, te diu-ni duha quide-xi ndéé ní sáa nduu ní xíhi-güedé, te diu-ni duha quide-xi ndéé vitna”, duha cáháⁿ-yu. ⁵Te ñucùuⁿ cadá-yu vǎ cadá cuèndá-yu sá Yá Ndióxi ní cáháⁿ-gá te ní ngúndecu andiu ndíhi ñuyú-a, te diu-gá ní quide ní quene ñuhu yichí xiti ndute ní ngúndecu-xi ñiⁿ xio. ⁶Te ñiⁿ xito ní dándáá Yá Ndióxi ndute ñuyú-a ní dánáá-gá nchaa sá ío. ⁷Te Yá Ndióxi ní cächí-gá sá cùndècu-ni ñuyú-a ndíhi andiu ndéé ná sáa nduu cada-gá nchaa nàcuáa ní cáháⁿ-gá sá cúú-xí nchaa ñáiyu ndècu ichi cuèhé ichi duha, te dàvá-áⁿ danàa-gá nchaa ñáiyu-áⁿ chi cáyú andiu ndíhi ñuyú-a.

⁸Te nchaa nchòhò ñáiyu ío cùu iní-í, ío cuhuⁿ iní-ndó tñúhu na cáháⁿ-í-a, chi Yá Ndióxi ñá tñú sàni iní-gá dàtná sání iní

méé-ó, te ñiⁿ nduu cùu-xi datná úxí cièndú cuíá, te úxí cièndú cuíá-áⁿ cúú-xí dàtná ñiⁿ nduu sá cúú-xí-gǎ. ⁹Te Yá Ndióxi ñá tñú dāna ndodo iní-gá vǎ cadá-gǎ ñiⁿ sá cáháⁿ-gǎ dàtná cächí cue ñáiyu sá dáná ndodo iní-gá cada-gǎ ñiⁿ sá cáháⁿ-gǎ, chi ñucùuⁿ tñahí dàcaca-gǎ nduu cuèndá sá ío cùndahú iní ñáhá-gǎ xii-o, te cuini-gǎ sá ncháá ñáiyu ndixi túu iní-yu sá ñá tñú quide váha-yu ndècu-yu te tuhá-yu ichi-gǎ, te ducaⁿ quide-gǎ chi cuini-gǎ sá vǎ cuíta nihnu ni ñiⁿ-yu.

¹⁰Te dàtná quidé cue ñadúhú quíhu-güedé ñiⁿ vehe dùhu-güedé òré ñá tñú yíhi iní xítóhó vehe-áⁿ, te ducaⁿ cada Xítóhó Jesucristú chi nduu ñá tñú yíhi iní ñáiyu ñuyú-a quixi tucu-gá, te dàvá-áⁿ cada-xi andiu dàtná quidé-xí òré níhi víhi cáháⁿ ñúhu, te diu-ni òré-áⁿ ndoñuhu andiu, te cáyú nchaa chódini, te cáyú tucu tñáhá ñuyú-a ndíhi nchaa sá ío.

¹¹Te vitna nchòhò sa xini-ndó sǎ náá ñuyú-a te xǎn ío xini ñuhu-xi cada váha-ndo cùndecu-ndo, te cada-ndo nàcuáa cuini méé Yá Ndióxi cunduu. ¹²Te ío nducu ndèe-ndo ducaⁿ cada-ndo cuendá ducaⁿ ndíhi-ni sáa nduu cada-gá nchaa nàcuáa cáháⁿ-gǎ, te ducaⁿ nchòhò cundecu túha-ndo sáa nduu-áⁿ. Te diu-ni nduu-áⁿ ndoñuhu andiu chi cáyú-xi, te diu-ni ducaⁿ ndòñuhu tucu nchaa chódini chi ndíhi-dí cáyú. ¹³Te nchoo ndètu-o sáa nduu cùndecu-o ñiⁿ ñuyú sáa, te quini-ó ñiⁿ andiu saa datná ní cächí Yá Ndióxi, te yacáⁿ chi mee-nǎ cue ñáiyu quide váha cundecu.

¹⁴Te nchòhò ñáiyu ío cùu iní-í, ñani ndètu-ndo sáa nduu ducaⁿ cada-xi ío nducu ndèe-ndo cada-ndo mee-ni sá váha cundecu-ndo ichi Yá Ndióxi, te cundecu nahí-ndo, te cada-ndo nchaa nacuaá vǎ cùndècu cuéchi-ndo núú-gǎ. ¹⁵Te ío cada cuèndá-ndó sǎ dàcaca-gǎ nduu ducaⁿ cada-gǎ chi cuini-gǎ sá ncháá ñáiyu naníhi tǎhú-yu. Te té Pǎblú téé ío cùu iní-ó ndècu ndíhi-o ichi Xítóhó Jesucristú diu-ni nàcuáa cáháⁿ-í-a diu-ni ducaⁿ ní tee-dé ñiⁿ núú tütú ní dáquixí-dé ndaha-ndo, te ní tee-dé nàcuáa ní dácáhu iní ñáhá Yá Ndióxi xii-dé. ¹⁶Te diu-ni ducaⁿ cáháⁿ-dé nchaa dāva-gǎ núú tütú cádúha-dé, te dāva tñúhu cáháⁿ-dé ío úhú tecú tñuní-ó, núú xǎn ñáiyu ñá tñú cùtnuní váha iní-xi, ñáiyu ío yáchí sándáá iní-xi ñiⁿ tñúhu, ñáiyu-áⁿ

tècú tnùní dátñí-yu nchaa tnúhu ní chídó tnùní-dé, ndihi nchaa dava-gá tnúhu yòdo tnuní núú tütú Yá Ndiöxí, te sá dúcáⁿ quidé-yu te dacuïta nihnú-yu mée-yu.

¹⁷Te nchòhó ñáyiú fo cùu iní-í, sa cùtnuní iní-ndó nàcuáa quède dava ñáyiú, núu xíãⁿ ío xini ñuhu-xi quíhi iní-ndó cùndecu-ndo cuendá ducaⁿ cùndecu-ni-ndo ichi-gá, te vá dáñá-ndó mée-ndo dandahú ñáhá nchaa cue téé ndècu ichi cuehé ichi duha, chi cue téé-áⁿ ñà túú sàni váha iní-güedé cuendá tnúhu Yá Ndiöxí. Te núu na dàña-ndo mee-ndo dandahú ñáhá-güedé xii-ndo te vá cùndècu váha-gá-ndó ichi-gá dàtná ndécú-ndó vitna. ¹⁸Te nchòhó uuⁿ-gá uuⁿ-gá cuita cutnùní-gá iní-ndó quíhiⁿ nchaa nàcuáa ta chindee ñaha Xítohó Jesu-crístú xii-ndo cuáháⁿ. Te ducaⁿ ío-gá cuita cutnùní iní-ndó nchaa nacuáa sàni iní-gá, te diu-gá cúú-gã Yaá ní dácăcu nihnu ñaha xii-o núú ùhú núú ndàhú. Te chí ná càchí-ó sã ío càhnu cuu-gá cuëi vitna té cuëi ndéé núú cuáháⁿ núú vëxi. Te ducaⁿ na cùnduu. Te ío chí cáda ndèe iní-nã vitna.

TUTÚ DÍHNA NÍ CADÚHA TÉ JUÁÁ

Tnúhu sá cãháⁿ nãcuáa nanhí tãhú-ó

¹ Te yúhú té Juáá cãchí tnúhu-í xii-ndo cuëndá Cristú Yáá cãháⁿ nãcuáa cundecu ndíhi-o Yá Ndiöxí. Te Cristú-áⁿ sa ndècu-gá ndéé cútñhá ní ngáva ñuyú. Te yúhú ní xiní núu-í ndíhi cue tée ní xica cuu ndíhi-í nãcuáa cãa nacuáa ndùu-gã. Te ní xíndedóho-ndí tnúhu ní cãháⁿ-gã, te ní tendaha-ndí-gã te ní cutnùní ndáá iní-ndí sá ñⁿ yiqui cuñú cúu-gã. ² Te ní quixi túu-gã ñuyú-a, te ní xiní-ndí-gã, te xíãⁿ cãchí tnúhu ndáá-ndí xii-ndo. Te cãchí tnúhu tucu-ndí sá ndécú-gã ndíhi Tãtã-gã Dútú Ndiöxí ní cùu, te ní quixi-gã ñuyú-a ní xíndecu-ndí ndíhi-gã. Te ní cachí tnúhu-gã xii-ndí sá ndúú tãhú-ó cundecu ndíhi-o Yá Ndiöxí ní caa ní quíhiⁿ te núu na quíndáá iní-ó-gã. ³ Te xíãⁿ dátúu-ndí núu-ndó nchaa sá ní xiní-ndí, ndíhi nchaa sá ní xíndedóho-ndí cuëndá cuu ñⁿnuu-o nchaa-o datná nchúhú cúu ñⁿnuu-ndí ndíhi Tãtã-ó Dútú Ndiöxí, ndíhi Déhe-gã Xítohó Jesucristú. ⁴ Te xíãⁿ núu tée-í nchaa tnúhu-a cuëndá cudí iní-ó nchaa-o.

Yá Ndiöxí cúu-gã datná ñⁿ ñuhú

⁵ Te nchaa tnúhu ní dánèhé ñáhá Xítohó Jesucristú xii-ndí, xíãⁿ dánèhé ñáhà-í xii-ndo. Te ní cachí-gã sá Yá Ndiöxí cúu-gã datná ñⁿ ñuhú dáyèhé-gã iní-ó, te ducaⁿ sãtnhá-xi cùu-gã chi ío váha quide-gã, te ñá túú quide-gã ní ñⁿ sá cuèhé sá dúhá. ⁶ Te núu cãchí-ó sã ndécú-ó ìchi Yá Ndiöxí, te quide-ni-o nchaa sá cuèhé sá dúhá, te dàcuandehnde-o te ñá túú quide ndáá-ó núu-gã. ⁷ Te núu na cada váha-o datná quidé mée-gã, te cuu ñⁿnuu-o nchaa-o. Te ndada ndoo ndada nine-gã iní-ó, chi cada càhnu iní-gã nchaa sá cuèhé sá dúhá quide-o, chi diu cuëndá-áⁿ ní xíhí Déhe-gã Xítohó Jesucristú núú cùrixí.

⁸ Te núu cãchí-ó sã ñá túú quide-o ní ñⁿ sá cuèhé sá dúhá, te dàndahú-ó mée-o, te ñá túú quide ndáá-ó núú Yá Ndiöxí. ⁹ Te núu na nahmá-ó nchaa yíca cuèchi-o núu-gã, te mee-gã cada càhnu iní-gã, te ndada

ndoo-gã iní-ó, cuëndá cada ndáá-ó cùndecu-o ìchi-gã, chi mee-gã ío váha quide-gã te ío ndáá quidé-gã, ducaⁿ ní cãháⁿ-gã te ducaⁿ quide-gã. ¹⁰ Te núu na cãchí-ó sã ñá túú quide-o ní ñⁿ sá cuèhé sá dúhá, te quide-o Yá Ndiöxí ñⁿ ñándéhné, dico ñá túú ndèhnde-gã. Te ñá túú ndècu tnúhu-gã iní-ó te núu ducaⁿ na cada-o.

2

Xítohó Jesucristú cãháⁿ ndàhú-gã cuëndá-ó

¹ Te nchòhó ñáyiu cùu datná déhe-í, chido tnuní-í nchaa tnúhu-a cuëndá sá vã cádá-ndó ní ñⁿ sá cuèhé sá dúhá. Dico núu ñⁿ-ndo quide-ni-ndo nándí sá cuèhé sá dúhá, te ndècu ñⁿ Yáá cãháⁿ ndàhú cuëndá-ó núú Yá Ndiöxí. Te Yáá-áⁿ cúu-gã Xítohó Jesucristú Yáá quidé ndáá. ² Te ní xíhí-gã sá cuëndá nchaa yíca cuèchi-o cuëndá ngúndecu váha-o núu-gã te núu na quíndáá iní-ó-gã. Te ñá díú-ní sá cuëndá yíca cuèchi nchoo ní xíhí-gã, chi tnàhá cuëndá nchaa yíca cuèchi ñáyiu ní cãa xico ñuyú.

³ Te núu cada-o nchaa nacuáa cãháⁿ Yá Ndiöxí, te cutnùní iní-ó sã ndécú-ó ìchi-gã. ⁴ Te núu cãchí-ó sã ndécú-ó ìchi-gã te ñá túú quide-o nacuáa cãháⁿ-gã, te dàcuandehnde-o, te ñá túú quide ndáá-ó núu-gã. ⁵ Te núu sãndáá ndisa iní-ó tnúhu-gã, te quide-o nchaa nacuáa cãháⁿ-gã, te ducaⁿ te cùu iní ndisa-o-gã, te cutnùní ndáá iní-ó sã ndécú-ó ìchi-gã. ⁶ Te núu cãchí-ó sã ndécú-ó ìchi Yá Ndiöxí, te xini ñuhu-xi cada ndáá-ó cundecu-o ñuyú-a datná ní quide ndáá Xítohó Jesucristú cútñhá ní xíndecu-gã ñuyú-a.

Ndudú sáá

⁷ Te nchòhó ñáyiu ndècu ndíhi-í ìchi Xítohó Jesucristú, ñá túú chido tnuní-í ñⁿ tnúhu saa sá cúu-xí-ndó, chi diu-ni tnúhu sá ní ngúndecu ndíhi-ndo ndéé díhna, tnúhu ní xíndedóho-ndo ndéé cútñhá ní sãndáá iní-ndó-gã, xíãⁿ chídó tnuní-í. ⁸ Te tnúhu-a cùu-xi datná ñⁿ tnúhu saa tée-í dándacu iní ñáhà-í xii-ndo nãcuáa ní quide Xítohó Jesucristú cútñhá ní quixi-gã ñuyú-a ní quide váha-gã, te tnàhá nchòhó ní tnúu-ndo tnúhu-gã te quide váha-ndo tnàhá-ndó. Te vitna ñⁿ nduu ñⁿ nduu ta cùu vai ñáyiu ta dàña nchaa sá cuèhé sá dúhá cuáhãⁿ, chi Xítohó Jesucristú tá dándixi

tnú-gá iní-yu cuendá cutnùnì iní-yu nàcuáa ndùu cuendá Yá Ndiòxí.

⁹Te núu cächí-ó sá quidé vâha-o, te cùu úhú iní-ó tnàha ñáiyu-o, te xíãⁿ ñá túú quide ndáá-ó, chi ndècu-ni-o ichi cuehé ichi duha sá dúcáⁿ quide-o. ¹⁰Te núu na cùu iní-ó tnàha ñáiyu-o datná cúu ñí ñáhá mèe Yá Ndiòxí xii-o ña, te quide ndáá-ó nùú-gá, te vá cànúichi-o tnàha ñáiyu-o ñⁿ ichi cuehé ichi duha. ¹¹Te núu cùu úhú iní-ó tnàha ñáiyu-o, te ñá túú quide vâha-o nùú Yá Ndiòxí, chi ndècu-ni-o ichi cuehé ichi duha, te ñá túú cutnùnì iní-ó sá quidé-ó. Chi cùu-o datná ñⁿ tée ndècu núú néé chi ñá cutnùnì núú-dé ndéé ichi quíhíⁿ-dé. Ducaⁿ sãtnahá-xi cùu nchoo chi ñá cutnùnì iní-ó ndéé ichi quíhíⁿ-ó te núu ducaⁿ na càda-o cuu úhú iní-ó tnàha ñáiyu-o.

¹²Te nchòhó ñáiyu cùu datná déhe-í, yúhú chídó tnùnì-í tnúhu-a ñⁿ núú tütú cächí tnúhu-í xii-ndo sá ñí quide càhnu iní Yá Ndiòxí nchaa cuéchi-ndo, chi ñí cuendá-áⁿ ñí xíhí Xítohó Jesucristú. ¹³Te nchòhó ñáiyu sacuéhé, yúhú tée-í tnúhu-a sá cúu-xí-ndó chi càháⁿ ndíhi-ndo Jèsús, te Yaá-áⁿ sa ndècu-gá ndéé cutnàhá ñí ngáva ñuyú. Te nchòhó ñáiyu nchícúⁿ-gá téé tucu-í tnúhu-a sá cúu-xí-ndó chi ñá túú sãndáá iní-ndó tnúhu càháⁿ yucu ñávâha.

Te nchaa nchòhó ñáiyu cùu datná déhe-í, tée tucu-í tnúhu-a sá cúu-xí-ndó, chi sa càháⁿ ndíhi-ndo Tãtá-ó Dütú Ndiòxí. ¹⁴Te nchòhó ñáiyu ñí sãhnu, yúhú chídó tnùnì-í tnúhu-a ñⁿ núú tütú chi càháⁿ ndíhi-ndo Jèsús, te Yaá-áⁿ sa ndècu-gá ndéé cutnàhá ñí ngáva ñuyú. Te nchòhó ñáiyu nchícúⁿ-gá, yúhú chídó tnùnì-í tnúhu-a chi ío ñíhí ndéé-ndó ndècu-ndo, chi tní-ndo tnúhu càháⁿ Yá Ndiòxí. Te ñá túú sãndáá iní-ndó tnúhu càháⁿ yucu ñávâha.

¹⁵Te vá cùhúⁿ iní-ndó ñí ñⁿ sá cuehé sá dúhá ío ñuyú-a, te ñí vá càni iní-ndó càda-ndo. Chi núu na cùhuⁿ iní-ó nchaa sá cuehé sá dúhá ío ñuyú-a ña, te ñá túú Tãtá-ó Dütú Ndiòxí ñúhú iní-ó te núu ducaⁿ na càni iní-ó. ¹⁶Te nchaa ñáiyu ñuyú-a quidé-yu nchaa sá cuehé sá dúhá, chi ñí nchaa xíãⁿ cúdúⁿ iní-yu cadá-yu. Te nchaa sá cuehé sá dúhá sàni iní-yu, ndíhi nchaa sá xínf-yu quidé-yu. Te xíquide ñínu-yu mèe-yu cuendá nchaa sá ndècu ndíhi-yu. Te nchaa sá ñá túú vâha ñí cacu ñihnu-xi ñuyú-a. ¹⁷Te nchaa sá ñá túú vâha ío ñuyú-a, ndíhi nchaa sá sání cuehé sání

dùha iní-yu cuita ndíhi ñihnu-xi quíhíⁿ. Te nchaa ñáiyu tní tnúhu càháⁿ Yá Ndiòxí cundecú-yu ndíhi-gá ñí caa ñí quíhíⁿ.

Tnúhu ndáá tnúhu Yá Ndiòxí ndíhi tnúhu ndehnde

¹⁸Te nchòhó ñáiyu cùu datná déhe-í, sa ñíhí-ndó tnúhu sá quíxí ñⁿ tée cunu-gá-dé cuu úhú iní-dé Crístú. Te sa xíndecu-gá ñáiyu cùu úhú iní ñáhá xii-gá, núu xíãⁿ cutnùnì iní-ó sá sá ta cuyatni nduu naa ñuyú-a. ¹⁹Te ñáiyu-áⁿ ñí xíndecu ndíhi ñáhá-yu xii-o, te ñí queé-yu cuaháⁿ-yu chi ñá túú ñí cùu ñⁿnuu-o ndíhi-yu. Chi núu dicó ñí cùu ñⁿnuu-o ndíhi-yu te cundecu ndíhi ñáhá-yu xii-o ñí cùu. Te duha ñí cuu cuendá cutnùnì ndáá iní-ó nchaa-o sá ñá túú cùu ñⁿnuu-o ndíhi-yu, chi ñá túú sãndáá iní-yu Yá Ndiòxí.

²⁰Te Xítohó Jesucristú ñí taxi-gá Espíritú Yá Ndiòxí ndécú ndíhi-o, núu xíãⁿ təcú tnùnì-ó tnúhu-gá. ²¹Te cuendá sá xini-ndó tnúhu ndáá tnúhu Yá Ndiòxí nùu xíãⁿ tée-í tnúhu-a, te ñá díu ñⁿ sá ñá cutnùnì iní-ndó cùu-xi. Te sa nàha-ndo sá ñí ñⁿ tnúhu ndehnde ñá túú ñùtnahá-xi núú tnúhu Yá Ndiòxí, chi mee ñine-ñí tnúhu ndáá cúu-xí.

²²Te nchaa ñáiyu cächí sá ñá díu Jèsús cúu Crístú Yaá ñí tendaha Yá Ndiòxí ñí quixi ñuyú-a dàcuandehnde-yu, te cùu úhú iní-yu Jèsús. Te ñí-ñí-yu cächí-yu sá ñá díu Déhe Yá Ndiòxí cúu Jèsús, te sá dúcáⁿ quidé-yu te cùu úhú iní-yu Yá Ndiòxí ndíhi Déhe-gá Jèsús. ²³Te nchaa ñáiyu ñá túú sãndáá iní sá Déhe Yá Ndiòxí cúu Jèsús, ñáiyu-áⁿ ñá túú ndècu-yu ichi Tãtá-ó Dütú Ndiòxí. Te nchaa ñáiyu càháⁿ sá Déhe Yá Ndiòxí cúu Jèsús, ñáiyu-áⁿ ndècú-yu ichi Tãtá-ó Dütú Ndiòxí.

²⁴Te nchaa tnúhu Yá Ndiòxí ñí tecú dóho-ndo ndéé díhna, tnúhu-áⁿ cuhuⁿ iní-ndó. Te núu nchaa tnúhu-áⁿ ná cùhuⁿ-ni iní-ndó, te cundecu ndíhi-ndo Yá Ndiòxí ndíhi Déhe-gá cuéi vá cundecu túu-ndo ndíhi-gá ñuyú-a. ²⁵Te Jèsús ñí cachí-gá sá ndúú tãhú-ó cundecu ndíhi-o-gá ñí caa ñí quíhíⁿ andíu.

²⁶Te cuendá nchaa ñáiyu dãndahú ñáhá xii-ndo ñí chídó tnùnì-í tnúhu-a, ²⁷dico nchòhó chi ndècu ndíhi-ndo Espíritú Yá Ndiòxí sá ñí taxi Xítohó Jesucristú. Núu xíãⁿ ñá túú xini ñuhu-ndo ñáiyu danèhé ñáhá xii-ndo, chi mee Espíritú-gá dánèhé

ñáhá-xí nchàa sá vâha. Te nchaa sá dánèhè ñáhá-xí xii-ndo cuu-xi sá ndàá, te ñá díú ìⁿ tnúhu ndehnde. Te vitna chí cánchezúⁿ nihnu-ni ichi Yá Ndiöxí dàtná ní sanu ichi ñaha mée Espiritú-gá xii-ndo.

²⁸ Te nchòhò ñáyiú cùu datná déhe-í, chí cánchezúⁿ nihnu-ni ichi Xítóhó Jesucristú, chi cuendá òrè ná quixí tucu-gá ñuyíú-a te vá yuhú-ndó te ní vá cúú càhaⁿ núú-ndó núú-gá. ²⁹ Te nchòhò sa ñaha-ndo sá mée-gá quidé ndáá-gá, te sa xini-ndó sá ncháá ñáyiú quide ndáá cúú-yu déhe Yá Ndiöxí.

3

Ñáyiú cùu déhe Yá Ndiöxí

¹ Te chí cuâha cuendá sá ìo cùu iní ñáhá Tátá-ó Dütú Ndiöxí xii-o cuendá sá cúú-ó déhe-gá, chi ducaⁿ ní cachí-gá, te déhe ndisa-gá cúú-ó. Te núu xiáⁿ ñáyiú ndècu ichi cuehé ichi duha ñá cúú quini ñáhâ-yu xii-o, chi ñá túú xini-yu nàcuáa ndüu cuendá Yá Ndiöxí. ² Te nchòhò ñáyiú ío cùu iní-í, vitna cùu-o déhe Yá Ndiöxí, te vátá cùtnuní váha-gá iní-ó ñasa cunduu-o ndéé núú cuaháⁿ núú vèxi. Dico sa cùtnuní iní-ó sá òrè ná quixi tucu Xítóhó Jesucristú te nduu-o dàtná cáá mée-gá, chi quini-ó-gá nàcuáa-ni càa nàcuáa-ni ndüu-gá. ³ Te nchaa ñáyiú sa ndètu ñaha xii-gá sa ta ngündecu túha-yu cuaháⁿ, chi ta ndüu ndoo nduu nine iní-yu cuaháⁿ dàtná cáá ndoo caa nine mee-gá.

⁴ Te nchaa ñáyiú quide nándi sá cuèhé sá dúhá ñá túú quide váha-yu núú Yá Ndiöxí, chi ní cachí-gá sá vâ dúcáⁿ càda-o. ⁵ Te sa ñaha-ndo sá ní quixi túu Xítóhó Jesucristú ñuyíú-a cuendá cada càhnu iní-gá nchaa sá cuèhé sá dúhá quide-o, chi mee-gá ñá túú quide-gá ní ìⁿ sá cuèhé sá dúhá. ⁶ Te nchaa ñáyiú ndècu ichi Yá Ndiöxí ñá túú ñùhú-yu ichi cuehé ichi duha. Te nchaa ñáyiú ñùhu ichi cuehé ichi duha ñá túú xini-yu nàcuáa ndüu cuendá Xítóhó Jesucristú te ní ñá túú xini-yu nása càa-gá. ⁷ Te nchòhò ñáyiú cùu datná déhe-í, vá dáñá-ndó mée-ndo dandahú ñáhá ñáyiú ndècu ichi cuehé ichi duha, chí cachí-yu sá cúú cündecu-o ichi Yá Ndiöxí te cada-o nándi sá cuèhé sá dúhá dico ñá ndàá. Te nchaa ñáyiú quide váha quide ndáá-yu dàtná quidé mée Jesús. ⁸ Te nchaa ñáyiú ndècu ichi cuehé ichi duha ndècu ndihí-yu yucu ñávâha, chí ducaⁿ quide mee-xi ndéé cùtnháá vátá ngáva-gá

ñuyíú. Te xiáⁿ ní quixi Jèsús Déhe Yá Ndiöxí ní dáquée òrè ñá túú nchaa sá quidé yucu ñávâha.

⁹ Te nchaa ñáyiú ní natuha ichi Yá Ndiöxí ní nduú-yu déhe-gá, te ñá túú-gá quidé-yu nándi sá cuèhé sá dúhá chí ní ndada ndoo ní ndada nine-gá iní-yu. Núu xiáⁿ ñá túú-gá quidé-yu nándi sá cuèhé sá dúhá, chí ní ngündecu ndihí ñaha-gá xii-yu. ¹⁰ Te cùtnuní iní-ó nándi cùu ñáyiú cùu déhe Yá Ndiöxí, te cùtnuní iní-ó nándi cùu ñáyiú cùu déhe yucu ñávâha. Te nchaa ñáyiú ñá túú quide ndáá, te cùu úhú iní-yu tnàha ñáyiú-yu, te ñáyiú-án ñá díú dèhe Yá Ndiöxí cúú-yu.

Cuu iní tnáhá-ó ìⁿ ìⁿ-o

¹¹ Te ndéé òrè ní natuha-o ìchi Yá Ndiöxí ní tecú dóho-o sá cúú iní-ó tnàha ñáyiú-o. ¹² Te vá cündüu úhú iní-ó dàtná ní quide ndíí Câm, chí ndíí-án ní xindecu ndíí ndihí yucu ñávâha núu xiáⁿ ní sahni ndíí ñaní ndíí. Te ducaⁿ ní quide ndíí chí ní xindecu ndíí ichi cuehé ichi duha, te ñaní ndíí ní xindecu-dé ichi váha.

¹³ Te nchòhò ñáyiú ndècu ndihí-í ichi Xítóhó Jesucristú, vá cáda cuendá-ndó sá cúú úhú iní ñáhá nchaa ñáyiú ndècu ichi cuehé ichi duha xii-ndo. ¹⁴ Te cunaha-ndo na cachí tnúhu-í xii-ndo sá núu na cùu iní-ó tnàha ñáyiú-o, te cùtnuní iní-ó sá sá ní dáñá-ó ìchi sá tá dàcuíta nihnu ñaha xii-o cuaháⁿ ní cùu, te vitna ní tñi-o ìchi váha. Te nchaa ñáyiú ñá túú cùu iní tnàha ñáyiú-xi ñùhu-ní-yu ichi cuaháⁿ-yu núú ùhú núú ndàhú. ¹⁵ Te nchaa ñáyiú ñá cúú quini ndéé tnàha ñáyiú-xi cùú-yu dàtná ìⁿ ñáyiú sahni ndíyi. Te nchòhò sa ñaha-ndo sá ní ìⁿ ñáyiú sahni ndíyi ñá túú ndècu ndihí-yu tnúhu ndee ìni sá náníhí tãhú-yu. ¹⁶ Te Xítóhó Jesucristú ní xíhí-gá cuendá nchaa yíca cuèchi-o, núu xiáⁿ cùtnuní iní-ó sá ìo cùu iní ñáhá-gá xii-o. Te xiáⁿ cùtnuní iní-ó nàcuáa cada-o cùu iní-ó tnàha ñáyiú-o, te cuèi na cùú-ó cuendá sá cúú-xí ìⁿ-yu, cuendá-ñá sá ná dàcácu nihnu-ò-yu núú tñüñdòho ndecú-yu. ¹⁷ Te núu ndècu ndihí-o sá cóhó sá cáxi-ó ndihí nchaa sá nándihí-o, te ndècu ñáyiú ndàhú ñá túú vèdana ná ndécú ndihí, te ñá túú chindee-ó-yu, te ñá túú cùu iní-ó Yá Ndiöxí te núu ducaⁿ na càda-o. ¹⁸ Te nchòhò ñáyiú cùu datná déhe-í vá cuendá-ni cùnàha

càháⁿ-ndó sã cúú íní tnáhá-ndó, chi cuu ini tnáhá ndisa-ndo te coto tnàha-ndo.

Vá yùhú-ó núú Yá Ndióxi

¹⁹ Te núú ducaⁿ na càda-o, te cutnùnì ini-ó sã ndécú-ó ìchi ndáá ìchi Yá Ndióxi, te ñá túú-gã ná quíhi ini-ó núú-gã. ²⁰ Te núú ndìhú ini-ó cuèndá ììⁿ sá ní quide-o, te sa nàha Yá Ndióxi te núú ní quide váha-o àdi ní quide cuèhé-ó, chi sa nàha ndáá-gã nàcuáa càa ini-ó. ²¹ Te nchòhó ñáiyu ío cùu ini-í, na càchí tnúhu-í xii-ndo, te núú ñá túú nã sání ini-ó te ñá túú nã quidé-ó, te vá yùhú-ó núú Yá Ndióxi. ²² Te nchaa sá vâha na càcáⁿ-ó núú Yá Ndióxi, te mee-gã taxi-gã chi tnîi-o tnúhu càháⁿ-gã, te quide-o nchaa nacuaa cùu ini-gã. ²³ Te ní cachí Yá Ndióxi sá quindáá ini-ó Dêhe-gã Xitohó Jesucristú, te cuu ini-ó tnàha ñáiyu-o dàtná ní cachí-gã. ²⁴ Te nchaa ñáiyu tnîi tnúhu-gã ndécú-yu ìchi-gã, te ndècu ndìhi ñaha-gã xii-yu. Te cùtnunì ini-ó sã ndécú-ó ndìhi-gã chi ní taxi-gã Espiritú-gã ndécú ndìhi-o.

4

Ñáiyu ndècu ndìhi Espiritú Yá Ndióxi ndìhi ñáiyu cùu úhú ini ñáhá xii Xitohó Jesucristú

¹ Te nchòhó ñáiyu ío cùu ini-í, vá cùtexínu quindáá ini-ndó tnúhu càháⁿ nchaa ñáiyu càchí sá ndécú ndìhi Espiritú Yá Ndióxi. Chi díhna-gã cada cuèndá váha-ndo te núú càháⁿ ndáá-yu nàcuáa càháⁿ tnúhu Yá Ndióxi, chi ío vâi ñáiyu ñuyúú-a cachí-yu sá càháⁿ-yu tnúhu-gã dico ñá ndáá. ² Te duha cutnùnì ini-ó nãndi cùu ñáiyu ndècu ndìhi Espiritú Yá Ndióxi. Nchaa ñáiyu càháⁿ ndáá sá Xitohó Jesucristú ní quixi-gã ñuyúú-a te ní cuu-gã ììⁿ yiqui cùñú, ñáiyu-ánⁿ cúú-yu ñáiyu cùu cuendá Yá Ndióxi. ³ Te nchaa ñáiyu ñá túú càháⁿ nàcuáa càa Jesús cùtnàhá ní quixi-gã ñuyúú-a ñáiyu-ánⁿ dándahú ñáhã-yu, chi ñá túú cùu-yu ñáiyu cùu cuendá Yá Ndióxi. Te ñu-ní-yu cùu úhú ini-yu Jèsús. Te nchòhó sa nàha-ndo sá cùndècu ñáiyu cuu úhú ini ñáhá xii-gã, dico yùhú càchí tnúhu-í xii-ndo sã sã ndécú-yu.

⁴ Te nchòhó ñáiyu cùu datná dèhe-í, ndècu ndìhi-ndo Yá Ndióxi, te ñá dàñá-ndó dándahú ñáhá nchaa ñáiyu càchí sá càháⁿ tnúhu-gã te ñá ndáá. Te ñá túú sàndáá ini-ndó chi Yá Ndióxi Yá ndécú ndìhi-ndo

taxi tnunì vîhi-gã dàcúúxi yùcu ñávâha ndècu ndìhi nchaa ñáiyu ñuhu ìchi cuèhé ìchi duha. ⁵ Te nchaa ñáiyu dándahú ñáhá sã càháⁿ tnúhu Yá Ndióxi ndécú-yu ìchi cuèhé ìchi duha, te mee-ni cuèndá nchaa sá ío ñuyúú-a càháⁿ-yu. Te tètòhó ñaha nchaa dava-gã ñáiyu ndècu ñu-ni ìchi cuèhé ìchi duha. ⁶ Te nchoo cùu-o ñáiyu cùu cuendá Yá Ndióxi. Te nchaa ñáiyu xindècu ìchi-gã tnîi-yu tnúhu càháⁿ-ó, te nchaa ñáiyu ñá túú ndècu ìchi-gã ñá túú tnîi-yu tnúhu càháⁿ-ó. Te duha te cùtnunì ini-ó nãndi cùu ñáiyu càháⁿ ndáá, te cùtnunì tucu ini-ó nãndi cùu ñáiyu dándahú ñáhá.

Cuu ini-ó tnàha ñáiyu-o dàtná cúú ini ñáhá mèe Yá Ndióxi xii-o

⁷ Te nchòhó ñáiyu ío cùu ini-í, xini ñuhu-xi cuu ini tnáhá-ó dàtná cúú ini ñáhá mèe Yá Ndióxi xii-o, chi mee-gã táxi-gã sá xini tnunì-ó cuèndá cuu ini-ó tnàha ñáiyu-o. Te nchaa ñáiyu cùu ini tnàha ñáiyu-xi cùu-yu dèhe Yá Ndióxi, te cùtnunì ndáá ini-yu sá ndécú ndìhi ñaha-gã xii-yu. ⁸ Te nchaa ñáiyu ñá túú cùu ini tnàha ñáiyu-xi ñá túú ndècu ndìhi-yu Yá Ndióxi. Te nchaa ñáiyu ndècu ndìhi Yá Ndióxi, ñáiyu-ánⁿ sãñaha-gã sá xini tnunì-yu cuèndá cuu ini-yu tnàha ñáiyu-yu. ⁹ Te cùtnunì ini-ó sã cúú ini ñáhá Yá Ndióxi xii-o nchaa-o, chi ní tendaha-gã ììⁿ díi ní Dêhe-gã Xitohó Jesucristú ní quixi-gã ñuyúú-a cuèndá sá díú-gã cada te naníhí tàhú-ó, te núu na quindáá ini-ó tnúhu-gã. ¹⁰ Te ío cùu ini ñáhá Yá Ndióxi xii-o nchaa-o. Te ñá díú sã mèé-ó cùu ini-ó-gã, chi díhna-gã mèé-gã sa cùu ini ñáhá tnàhí-gã xii-o, núu xíáⁿ ní tendaha-gã Dêhe-gã ní quixi-gã ñuyúú-a ní xíhí-gã sá cuèndá nchaa yíca cuèchi-o.

¹¹ Te nchòhó ñáiyu ío cùu ini-í, xini ñuhu-xi cuu ini tnáhá-ó, chi mee Yá Ndióxi ío cùu ini ñáhá-gã xii-o. ¹² Te ní ììⁿ nchoo ñáiyu ndècu ñuyúú-a ñá túú xini-ó nàcuáa càa Yá Ndióxi, dico nchoo ñáiyu ní tuha ìchi-gã chi cùtnunì ini-ó sã ndécú ndìhi ñaha-gã xii-o. Núu xíáⁿ cúú ini tnáhá-ó ììⁿ ììⁿ-o, te cùtnunì ini-ó sã cúú ini ndisa-o-gã. ¹³ Te cùtnunì ini-ó sã ndécú-ó ìchi-gã, te ndècu ndìhi ñaha-gã xii-o, chi ní taxi-gã Espiritú-gã ndécú ndìhi-o. ¹⁴ Te yùhú ndìhi dava-gã cue tée ní xica cuu

ndihi-gá cãháⁿ-ndí sá nǐ xini-ndí Jèsús Dêhe Yá Ndiòxí ní quixi-gá ñuyíú-a, chi Tãtã-ó Dütú Ndiòxí ní tendaha ñaha xii-gá ní quixi-gá cuendá dácácu nihnu-gá nchaa nchoo ñáyiú ndècu ñuyíú-a núú úhú núú ndàhú. ¹⁵ Te nchaa ñáyiú cãháⁿ nǐ yùhu nǐ iní-xi sá Dêhe Yá Ndiòxí cúú Jèsús, ñáyiú-áⁿ ndécú-yu ichi-gá te ndècu ndihi ñaha-gá xii-yu.

¹⁶ Te sàndáá iní-ó nǐ yuhu nǐ iní-ó sá Yá Ndiòxí cúú iní ñáhá-gá xii-o, chi ducaⁿ iní-gá. Te nchaa ñáyiú cùu iní ñáhá xii Yá Ndiòxí ndécú ndihi ñaha-gá xii-yu.

¹⁷ Te núú ndisa cùu iní-ó Yá Ndiòxí te vá yùhú-ó òré ná sàá nduu tàudíⁱⁱ ñaha-gá xii-o tñúú nchaa ñáyiú ndècu ichi cuehé ichi duha, chi quide ndáá-ó ndècu-o núú-gá ñuyíú-a dàtná ní quide mee Jèsús. ¹⁸ Chi nchaa ñáyiú cùu iní ñáhá xii Yá Ndiòxí ñá túú-gá yùhú-yu, te núú cùu iní ndisá-yu-gá. Te núú yùhú-yu te xiáⁿ sa ndòhó-yu, chi ñùhú-yu ichi cuáháⁿ-yu núú úhú núú ndàhú, chi nchaa ñáyiú yùhú ñá túú cùu iní ndisá-yu Yá Ndiòxí.

¹⁹ Te cuu iní-ó Yá Ndiòxí, chi mee-gá ndéé cùtnhá váta quíndáá-gá iní-ó tñùhu-gá sa cùu iní ñáhá-gá xii-o. ²⁰ Te nchaa ñáyiú cãchí sá cúú iní-yu Yá Ndiòxí, te cùu úhú iní-yu tñaha ñáyiú-yu, ñáyiú-áⁿ dácuañ-dehndé-yu. Te núú ñá túú cùu iní-yu tñaha ñáyiú-yu ndècu ñuyíú-a ña, te uuⁿ-gá quídé-yu Yá Ndiòxí Yáá ñá túú xini núú-yu. ²¹ Te cãchí-gá núú tñùhu-gá sá ñáyiú na cùu iní ñáhá xii Yá Ndiòxí, te ducaⁿ-ni cùu iní-yu tñaha ñáyiú-yu.

5

Nchaa ñáyiú ní ndacu ní dǎná ichi cuehé ichi duha

¹ Te nchaa ñáyiú sàndáá iní sá Jèsús cúú-gá Cristú Yáá ní quixi ñuyíú-a, ñáyiú-áⁿ cúú-yu déhe Yá Ndiòxí. Te cùu iní-yu Tãtã-ó Dütú Ndiòxí, te cùu iní-yu Déhe-gá.

² Te núú cùu iní-ó Yá Ndiòxí te quide-o nacuaá cãháⁿ-gá, te cùtnuní iní-ó sá cúú iní tñáhá ndisa-o nacuaá ndècu-o ichi-gá.

³ Te núú cùu iní-ó Yá Ndiòxí te tñí^o tñùhu cãháⁿ-gá, chi cùtnuní iní-ó sá ñá díú ñⁿ sá úhú cúú-xí dàtná cãchí ñáyiú. ⁴ Te nchaa nchoo ñáyiú cùu déhe-gá sa ní dǎná-ó ichi cuehé ichi duha, chi ní sàndáá iní-ó Jèsús núú xiáⁿ ní ndacu-o ní dǎná-ó ichi-áⁿ. ⁵ Te

nchaa ñáyiú sàndáá iní sá Dêhe Yá Ndiòxí cúú Jèsús ní ndacu-yu ní quee-yu ichi cuehé ichi duha.

Nàcuáa ní cãháⁿ Yá Ndiòxí cuendá Jèsús

⁶ Te Xítóhó Jesucristú ní quixi-gá ñuyíú-a, te ní sandute-gá. Te ñá díú-ní xiáⁿ, chi ní xihí-gá sá cuendá nchaa yíca cuèchi-o. Te Espiritú Yá Ndiòxí cãháⁿ-xi mee-ní sá ndáá, chi cãháⁿ Espiritú-gá-áⁿ sá Jèsús cúú-gá Cristú Yáá ní quixi ñuyíú-a. ⁷ Te úní testíú ndécú àndiu, Tãtã-ó Dütú Ndiòxí, ndihi Déhe-gá Xítóhó Jesucristú, ndihi Espiritú-gá. Te ñⁿ-ni tñùhu cãháⁿ ndí núní testíú-áⁿ. ⁸ Te ducaⁿ cùu-xi ñuyíú-a tucu, chi cãháⁿ Espiritú Yá Ndiòxí sá Jèsús cúú-gá Cristú. Te ní sandute-gá, te ní xihí-gá sá cuendá nchaa yíca cuèchi-o. Te xiáⁿ cùtnuní ndáá iní-ó sá díú Jèsús cúú-gá Cristú. ⁹ Te núú tñí^o tñùhu váha cãháⁿ ñáyiú, te váha-gá tñí^o tñùhu cãháⁿ Yá Ndiòxí, chi cãháⁿ ndáá-gá sá Dêhe-gá cúú Jèsús. ¹⁰ Te nchaa ñáyiú sàndáá iní sá Jèsús cúú-gá Déhe Yá Ndiòxí, ñáyiú-áⁿ cùtnuní iní-yu sá cúú-xí ñⁿ sá ndáá. Te nchaa ñáyiú ñá túú sàndáá iní tñùhu cãháⁿ Yá Ndiòxí quidé-yu-gá ñⁿ ñándéhnidé, dico ñá túú ndèhnide-gá, chi mee-yu ñá túú sàndáá iní-yu sá Dêhe-gá cúú Jèsús dàtná cãchí mee-gá. ¹¹ Te Yá Ndiòxí cãchí tñùhu ndáá-gá sá cùndècu-o ndihi-gá ní caa ní quíhíⁿ. Te duha cãháⁿ-gá chi sàndáá iní-ó Dêhe-gá. ¹² Te nchaa ñáyiú na quíndáá iní ñáhá xii Déhe-gá cundecú-yu ndihi-gá ní caa ní quíhíⁿ. Te nchaa ñáyiú ñá túú sàndáá iní ñáhá xii Déhe-gá vá cùndècu-yu ndihi-gá.

Sáhu ndéé núú ní ndihi-ná

¹³ Te cuendá sá sàndáá iní-ndó Dêhe Yá Ndiòxí núú xiáⁿ chidó tñuní-í tñùhu-a cuendá cùtnuní iní-ndó sá cùndècu ndihi-o-gá ní caa ní quíhíⁿ.

¹⁴ Te ñá túú tñùhu yùhú cãháⁿ ndihi-o Yá Ndiòxí, chi tedóho ñaha-gá xii-o núú ñⁿ-ná sá ná cãcáⁿ-ó núú-gá dàtná cuní mee-gá.

¹⁵ Te cùtnuní iní-ó sá táxi-gá sá xicáⁿ-ó núú-gá, chi ñaha-o sá tedóho ñaha-gá xii-o núú na cãcáⁿ-ó nàcuáa cùu iní-gá.

¹⁶ Te núú xini-ó ñáyiú ndècu ichi Yá Ndiòxí te quidé-yu sá ñá túú váha núú-gá, te ndèhe-o sá ñá túú ní xita nihnu duúⁿ-yu, te cãháⁿ ndihi-o Yá Ndiòxí cuendá-yu, te dácácu nihnu ñaha-gá xii-yu te núú na

nùcúnu ichi váha-yu. Chi ìó ñáyiú xìdó quidé nándi sá ñà túú vǎha te xíta nihnu duúⁿ-yu, te vá càháⁿ ndihí-gǎ-ó Yǎ Ndiǒxí cuèndá-yu. ¹⁷ Te nchaá sá cuèhé sá dúhá cùu-xi yíca cuèchi, dico ñá ncháá-xí cùu-xi sá dácúita nihnu ñaha dùuⁿ.

¹⁸ Te nàha-o sá nchóó ñáyiú cùu déhe Yá Ndiǒxí ñá túú-gǎ sání iní-ó càda-o nándi sá cuèhé sá dúhá. Te ducaⁿ chi mee Jèsús déhe Yá Ndiǒxí xító ñaha-gǎ xii-o, núu xíáⁿ ñá ndácú-gǎ yucu ñávǎha dàxínu iní ñáhá-xí xii-o cada-o sá ñà túú vǎha.

¹⁹ Te nchoo nàha-o sá ndécú ndihí-o Yá Ndiǒxí. Te nchaá ñáyiú ndècu ichi cuehé ichi duha tàxi tnuní ñáhá-nǎ yucu ñávǎha xíí-yu.

²⁰ Te nàha tucu-o sá ñùyíú-a ní quixi Jèsús Déhe Yá Ndiǒxí ní taxi-gǎ sá xini tnuní-ó cuèndá cutnùní iní-ó sǎ mée-gǎ cúú-gǎ Ndiǒxí-ó. Te ndècu ndihí-o mee-gǎ ndihí Déhe-gǎ Jèsús, te ìⁿdii díí-ni mee-gǎ cúú-gǎ Yǎ Ndiǒxí, te ndècu dava-gǎ sá nácuàca ñaha-gǎ xii-o cùndecu-o ndihí-gǎ ni caa ni quíhíⁿ. ²¹ Te nchòhó ñáyiú cùu datná déhe-í, vá quíndáá iní-ndó nchàa sá càchí-yu cùu ndiǒxí, chi dìcò ndaha cue tée ñuyíú-a ní cuáha nchaá xíáⁿ. Te ducaⁿ na cùnduu. Te ío chí cáda ndèe iní-nǎ vitna.

TUTÚ CÚÚ ÒÚ NÍ CADÚHA TÉ JUÁÁ

Tnúhu Yá Ndiöxí ndihi nàcuáa cuu ini tnáhá-ó

¹ Te yúhú té Juáá téé yindaha ñaha xii ñáiyu sàndáá ini tnúhu Jèsús, tèe-í tnúhu-a ìíⁿ núú tütú daquixi-í ndaha yòhó ñaha ní cáháⁿ ñáhá Yá Ndiöxí, te nchaa tnúhu-a cùu-xi tnahá cuèndá cue déhe-n, chi ío cùu ini ñáhà-í xii-ndo, chi ndècu-ndo ichi Yá Ndiöxí. Te ñá díú-ní mèe-í cúú ini ñáhà-í xii-ndo, chi nchaa-ndí nàcuáa sàndáá ini-ndí tnúhu-gá cúú ini ñáhá-ndí xii-ndo. ² Te cùu ini ñáhá-ndí xii-ndo chi ndècu ndihi-ndo tnúhu ndáá tnúhu Yá Ndiöxí, te ducaⁿ-ni cùndecu-o ndihi tnúhu-án ní caa ní quíhíⁿ. ³ Te xicáⁿ táhù-í núú Tátá-ó Dütú Ndiöxí, ndihi núú Dèhe-gá Xítohó Jesucristú sá ná chindèe ñaha-gá xii-ndo, te coto ñaha-gá te ío váha cuu ini-ndó cùndecu-ndo. Te duha xicáⁿ táhù-í núú-gá chi ndècu ndihi-o tnúhu ndáá tnúhu Yá Ndiöxí, te cùu ini-ó-gá.

⁴ Te ío cùdíí ini-í, chi ní naníhì-í ìíⁿ úú déhe-n, te quidé-yu nàcuáa sànu ichi ñaha tnúhu ndáá dàtná ní táuchíúⁿ mèe Tátá-ó Dütú Ndiöxí. ⁵ Te vitna yòhó ñaha ní cáháⁿ ñáhá Yá Ndiöxí, cächí tnúhu-í xii-n sá xíní ñùhu-xi cuu ini-ó tñaha ñáiyu-o. Te ñá díú ìíⁿ tnúhu saa cùu-xi, chi díu-ni tnúhu sá ní ngúndecu ndihi-o ndèe cùtnàhá ní tuha-o ìchi Yá Ndiöxí. ⁶ Te núu cùu ini-ó Yá Ndiöxí, te cùu ini-ó tñaha ñáiyu-o dàtná ní cachí mèe-gá, te tñè-o nchaa tnúhu càháⁿ-gá. Te ní cachí-gá sá cúú ini-ó-gá, te cuu ini-ó tñaha ñáiyu-o. Te tnúhu-a ní tecú dóho-o ndèe cùtnàhá ní tuha-o ìchi-gá.

Cue téé dándahú tñaha ñáiyu-xi

⁷ Te ío vai ñáiyu dándahú ñáhá xica cuú-yu ñuyú-a, te cächí-yu sá ñá ndáá sá Xítohó Jesucristú ní cuu-gá ìíⁿ ñáiyu ndisa. Te nchaa ñáiyu duha càháⁿ dácuañ-dehndé-yu, te cùu úhú ini-yu Jèsús. ⁸ Te quíhì ini-ndó sá vè dándahú ñáhá ñáiyu-án xii-ndo cuèndá sá vè cuíta chiúⁿ Yá Ndiöxí ní quide-o. Te òré ná quíxí tucu Jèsús ñuyú-a te taxi-gá nchaa sá váha cùu ini mèe-gá cundecu ndihi-o.

⁹ Te nchaa ñáiyu dàña tnúhu Xítohó Jesucristú, te nàtní-yu ingá ichi, ñáiyu-án ñá túú ndècu ndihí-yu Yá Ndiöxí. Te nchaa ñáiyu ñá túú dàña tnúhu Xítohó Jesucristú ndècu ndihí-yu Yá Ndiöxí ndihi Déhe-gá Xítohó Jesucristú. ¹⁰ Te núu véxi ñáiyu núú ndécú-ndó cächí-yu sá càháⁿ-yu tnúhu Yá Ndiöxí te ñá ndáá, te vá cuáha-ndo tnúhu danèhé ñáhá-yu xii-ndo, te ní vè cuáha-ndó-yu tnúhu ndee ini cuèndá chiúⁿ quidé-yu. ¹¹ Chi núu na càháⁿ ndihi váha-ndó-yu, te dàtná tnúhu sá chindèe-ndó-yu quidé-yu nchaa sá cuèhé sá dúhá.

Tnúhu ndéé núú ní ndihi-ná

¹² Te ío vai-gá tnúhu cuení-í cachí tnúhu-í xii-ndo, dico vá téé-gá-í chi cuení-í quixi-í núú ndécú-ndó ndàtnúhu-o cuèndá cudíí vñí ini-ó nchaa-o.

¹³ Te nchaa cue déhe cúhú-n, ñáiyu ní cáháⁿ ñáhá Yá Ndiöxí quidé ndèe ini ñáhá-yu xii-n.

TUTÚ CÚÚ ÒNÍ NÍ CADÚHA TÉ JUÀÁ

Càháⁿ váha-yu cuendá té Gǎyú

¹ Te yúhú té Juàá tée yíndaha ñaha xii ñáiyu sàndáá iní tnúhu Jèsús, chido tñuní-í tnúhu-a ìⁿ núú tútú sá cúú-xí yòhó té Gǎyú tée ío cùu iní-í, chi ndècu ndihi-n tnúhu ndáá tnúhu Yá Ndiòxí.

² Te yòhó tée ío cùu iní-í, xicáⁿ táhù-í núú Yá Ndiòxí sá cùndècu váha-n ñà túú ná cumání xii-n, te vá cùhú-n, chi sa nàha-í sá ndécú váha-n núú Yá Ndiòxí. ³ Te ío ní cudíí iní-í òré ní sáá ñáiyu ndècu ichi Yá Ndiòxí, te ní cachí tnúhu-yu sá sàndáá ndisa iní-n tnúhu ndáá diu-ni tnúhu-gá te tñi-n nchaa nacuaá càháⁿ tnúhu-áⁿ. ⁴ Te ío cùdíí iní-í ní níhí-í tnúhu sá ncháá-ní ñáiyu ní sanu ichi-í ichi Yá Ndiòxí ndécú-ní-yu ichi-gá, te quide-ní-yu nchaa nacuaá càháⁿ-gá.

⁵ Te yòhó tée ío cùu iní-í, ío váha quide-n núú Yá Ndiòxí, chi chindee-n nchaa ñáiyu véxi dava-gá ñuu xicá, ñáiyu sàndáá iní tnúhu Yá Ndiòxí. ⁶ Te nchaa ñáiyu-áⁿ càháⁿ-yu núú tàcá ñáiyu càháⁿ ndihi Yá Ndiòxí iha sá ío cùu iní-n nchàa tñaha ñáiyu-n dàtná càháⁿ Yá Ndiòxí. Te yúhú càháⁿ ndàhú-í núú-n sá cáda ndèe-ni iní-n chindee-n nchaa ñáiyu-áⁿ nchaa sá xini ñhú-yu ichi. Te núu ducaⁿ na càda-n te quide-n nacuaá cùu iní Yá Ndiòxí, te xinu cuechi-n tñahá-n núú-gá. ⁷ Chi nchaa ñáiyu-áⁿ ní tñi-yu ichi cuáháⁿ-yu càháⁿ-yu tnúhu Jèsús. Te ñá túú tñi-yu ní ìⁿ sá sãñaha ñáiyu ñá túú ndècu ichi Yá Ndiòxí. ⁸ Te núu xíáⁿ nchoo xini ñuhu-xi chindee-o nchaa ñáiyu xinu cuechi núú-gá ñáiyu càháⁿ tnúhu-gá, te ducaⁿ te cutnúní iní-ó sá tñahá-ó xinu cuechi-o ndihi-yu núú-gá.

Ñá túú quide váha té Diótrefés

⁹ Te yúhú ní tendaha-í tutú cuáháⁿ núú tàcá ñáiyu chihuhú-yu Yá Ndiòxí, dico ìⁿ tée ndècu-áⁿ nání-dě Diótrefés, te ñá sàndáá iní-dé nchaa tnúhu càháⁿ-í, chi cuiní-dé cunuu-dě núú-yu. ¹⁰ Te òré quixi-í te cada ndáá-ó nchàa tnúhu cuèhé tnúhu duha càháⁿ-dè cuendá-í. Te ñá díú-ní xíáⁿ quidé-dě, chi nchaa ñáiyu véxi ingá ñuu càháⁿ tnúhu Yá Ndiòxí ñá túú càháⁿ

ñáhá-dě vehe-dé, te ni ñá dání-dě càháⁿ ndihi ñaha dava-gá ñáiyu xii-yu. Te nchaa ñáiyu cuiní càháⁿ ndihi ñaha xii-yu, te quèñuhu ñaha duuⁿ-ni-dé ñá dání-gá-dé níhí tñahá-yu ndihi nchaa ñáiyu tàcá dácuaà tnúhu Yá Ndiòxí.

¹¹ Te yòhó tée ío cùu iní-í, vá cùndècu-n ichi cuehé ichi duha dàtná quidé nchaa dava-gá ñáiyu, cada-n mée-ni sá váha. Chi nchaa ñáiyu quide váha ndécú-yu ichi Yá Ndiòxí. Te nchaa ñáiyu quide nchaa sá cuèhé sá dúhá ñà túú ndécú-yu ichi Yá Ndiòxí.

Nchaa ñáiyu càháⁿ váha-yu cuendá té Demètriú

¹² Te nchaa ñáiyu càháⁿ váha-yu cuendá té Demètriú, chi quide ndáá-dé dàtná càháⁿ Yá Ndiòxí. Te tñahá yúhú càháⁿ-í cuendá-dé sá ío váha quide-dé, te nchòhó sa nàha-ndo sá yúhú càháⁿ ndáá-í.

Tnúhu ndée núú ní ndihi-ná

¹³ Te vai-gá tnúhu cuiní-í cachí tnúhu-í xii-n ni cùu, dico ñá ní tée-gá-í, ¹⁴ chi cuiní-í quixi ndihi-í, te càháⁿ-ó núú núú-ó.

¹⁵ Te ío cada ndee iní, te xicáⁿ táhù-í núú Yá Ndiòxí sá ná cùndècu váha-n ñà túú ná cuu cundecu-n. Te nchaa cue ñáiyu xini tñahá ndihi-o ndècu iha quide ndee iní ñáhá-yu xii-n. Te yòhó cùñaha-n nchaa ñáiyu xini tñahá ndihi-í ndécú xíáⁿ ná càda ndee iní-yu. Te ío cada ndee iní-ná vitna.

TUTÚ NÍ CADÚHA TÉ JÛDÁS

Té Jùdás càdúha-dé tutú quíhíⁿ ndaha ñáyiú ní cachí Yá Ndiòxí nduu cuendá-gá

¹ Yúhú té Jùdás ñani té Jàcóbó xínú cuèchi-í nùú Xítóhó Jesucristú, te càdúha-í tutú-a sá cúú-xí nchòhó ñáyiú ní cachí Yá Ndiòxí Yáá cúú Tàtá-ó nduu cuendá-gá, ñáyiú ío cùu iní-gá. Te dàtná-ni xìto ñaha-gá xii-ndo vitna diu-ni ducaⁿ còto ñaha-gá xii-ndo ndèé ná sàà nduu quixi tucu Xítóhó Jesucristú ñuyíú-a. ² Te xicáⁿ tànhú-í nùú Yá Ndiòxí sá ìo-gá ná chindee chitúu ñaha-gá xii-ndo, te na cùnuni-gá iní-ndó sá ìo cùu iní ñáhá-gá xii-ndo, te ducaⁿ ìo váha cuu iní-ndó cùndecu-ndo.

Ñáyiú ñá túú càháⁿ tnúhu ndáá tnúhu Yá Ndiòxí

(2 Pedro 2:1-17)

³ Te nchòhó ñáyiú ío cùu iní-í, ducaⁿ-ní ìo sàni iní-í cadúha-í ìnⁿ tutú sá cúú-xí-ndó cuendá danèhé ñàhà-í xii-ndo nàcuáa ní cuu ní naníhí tànhú-ó dico ñá túú càdúha-í, dico vitna quide cuendá-í sá xíní ñundehe-ndo tnúhu càháⁿ-ndó ndíhí ñáyiú, te càháⁿ-ndó nàcuáa nduu tnúhu sàndáá iní mée-ndó, chi diu-ni tnúhu-ánⁿ ní càháⁿ Yá Ndiòxí sá cúú-xí nchàa ñáyiú ndècu ichi-gá. Te vitna ñá túú-gá ná tnúhu càháⁿ-gá sá cúú-xí-yu, chi sa ní càháⁿ duuⁿ-gá. ⁴ Te duha càháⁿ-í nùú tütú-a sá cúú-xí-ndó, chi nihí-í tnúhu sá xicá cùu ñáyiú chìtnahá ñáhá xii-ndo, te ni ñá túú xíní-ndó ñá ñáyiú cùu-yu, te ñáyiú-ánⁿ cùú-yu ñáyiú cùu úhú iní ñáhá xii Yá Ndiòxí. Te ìnⁿ xichi nùú tütú Yá Ndiòxí cachí-xi sá ñáyiú-ánⁿ quíhíⁿ-yu nùú ùhú nùú ndàhú, te diu-ni ñáyiú-ánⁿ cachí-yu sá ìo váha iní Yá Ndiòxí nùú xíáⁿ cuu-ni cadá-yu nchaa sá cuèhé sá dúhá. Te dàquee tíhú-yu Yá Ndiòxí Yáá ío cùnuu, ndíhí Xítóhó Jesucristú.

⁵ Te nchòhó sa xíní váha-ndo nàcuáa ní quide Yá Ndiòxí ndèé sanaha dico dàndacu iní ñáhà-í xii-ndo, chi dàvá-ánⁿ ní queñuhu-gá ñáyiú isràèl nàcióⁿ Ègíptú, te dava ñáyiú-ánⁿ ñá túú ní sàndáá iní ñáhá-yu xii-gá te ní dánáá ñaha-gá xí-yu. ⁶ Te nchaa espíritú ñá túú ní cuiní cada ndáá cunu cuechi nùú Yá Ndiòxí ní quee-xi nùú

ndécú-xí, te mee-gă ní sadí nihnu ñaha-gă xii-xi ìnⁿ xichi nùú néé te vá căcu-xi, chi sáà nduu te nayáha-xi cundecu-xi nùú ùhú nùú ndàhú ní caa ní quíhíⁿ. ⁷ Te dàndacu iní ñáhá tucu-í xii-ndo nàcuáa ní váha ñáyiú ñuu Sòdomá, ndíhí ñáyiú ñuu Gòmorrá, ndíhí nchaa ñáyiú ñuu ní cáa yatni xíáⁿ, chi tnàhá-yu ñá túú ní quide váha-yu dàtná ní quide nchaa cue espíritú-áⁿ. Chi cue tée ní xóo càháⁿ ndíhí tnàha ndi mee-güedé, te diu-ni ducaⁿ ní xóo cada cue ñáyiú dñíhí tucu. Te sá dúcáⁿ ní quidè-yu nùú ní dângóyó Yá Ndiòxí ñuhú ñuu-yu ní dánáá ñaha-gá xí-yu. Te xíáⁿ cùnuni iní-ó sá nchàa ñáyiú ñá túú cuiní cada váha nùú-gá quíhíⁿ-yu nùú ùhú nùú ndàhú ní caa ní quíhíⁿ.

⁸ Te diu-ni ducaⁿ quide ñáyiú chìtnahá ñáhá xii-ndo cuiní-yu dandàhú ñáhá-yu, chi càchí-yu sá dàcòto ñaha saní-yu nàcuáa cadá-yu, nùú xíáⁿ nândi nchaa sá cuèhé sá dúhá quidè-yu sá cúú-xí yìqui cuñú-yu, te dàquee tíhú-yu nchaa nàcuáa càháⁿ Yá Ndiòxí cada-o, te càháⁿ úhú-yu cuendá nchaa espíritú cùnùu. ⁹ Te mee espíritú cùnùu-gá xínú cuèchi nùú Yá Ndiòxí nání Mìguél ní nàà-xi ndíhí sácúihná cuendá yiqui cùnù ndíhí Moisés. Te espíritú-ánⁿ ñá túú ní cùyí-xi càháⁿ úhú-xi sácúihná-ánⁿ, chi ní xáhaⁿ-ni-xi: “Mee Yá Ndiòxí ñáhá-gá te nùú nása cada ñaha-gá xii-n”, duha ní xáhaⁿ-xi. ¹⁰ Te nchaa ñáyiú ducaⁿ dàndahú ñáhá xii-ndo-ánⁿ càháⁿ cuèhé-yu cuendá nchaa sá vátá cùnuni-gá iní-yu nása nduu, te quidè-yu dàtná quidè cuè quiti chi cue quiti-ánⁿ quidè-güedi nání véxi iní-güedi, te ni ñá túú cùnuni iní-güedi nchaa sá quidè-güedi. Te ducaⁿ sá tnahá-xi cùu-yu, chi nchaa sá cuèhé sá dúhá véxi iní-yu quidè-yu, te sá dúcáⁿ quidè-yu xíáⁿ tá xíta nihnú-yu cuáháⁿ.

¹¹ Te ndàhú ní cuú-yu chi ío ndohó-yu, chi quidè-yu dàtná ní quide ndíhí Cáin. Te nándi sá quidè-yu cuendá sá cuiní-yu díhúⁿ dàtná ní xóo cada ndíhí Balaám. Te ío cùu sáá iní-yu nùú Yá Ndiòxí dàtná ní xóo cada ndíhí Còré, nùú xíáⁿ tá xíta nihnú-yu cuáháⁿ. ¹² Te dìcò sácáⁿ-nùú sàha ñáhá-yu xii-ndo òré nàtácá-ndó quide-ndo vico chiñuhu-ndo Yá Ndiòxí. Te òré xéxi ndíhí ñáhá-yu xii-ndo te mee-ni sá cúú-xí mée-yu quide

cuendá-yu, te ñá túú nèhé-yu sá yíñùhu núú Yá Ndiöxí. Te cùú-yu dàtná ìíⁿ vícó sá cuáháⁿ-xi duha cuáháⁿ-xi dácáⁿ te ñá túú dǎú nchídó-xí, ducaⁿ sà tnahá-xi cùú-yu. Te cùu tucú-yu dàtná ìíⁿ yutnu vídí sá ñá túú tnahí cùuⁿ sávídí-xi, te nchaa yutnu ducaⁿ ñá túú cùuⁿ sávídí-xi te tñuhu-güedé ndéé yóho-xi te xihí duuⁿ-xi. Te ducaⁿ sǎt-nahá-xi cùú-yu, chí ñá túú quide váha-yu. ¹³ Te cùu tucú-yu dàtná ndute lámár, chí ndute-áⁿ òré cándá-xi te quecáo tíñú-xi ìíⁿ xio. Te cùu tucú-yu dàtná ìíⁿ chódíní cuáháⁿ-dì duha cuáháⁿ-dì dácáⁿ. Te ducaⁿ sǎt-nahá-xi cùú-yu, chí ñá túú cuíní-yu cada váha-yu. Te ñáyíu-áⁿ daquihíⁿ ñáhá Yá Ndiöxí xíí-yu ìíⁿ xichi núú néé núú sà ndecu túha cundecú-yu ni caa ni quihíⁿ.

¹⁴ Te ndáquíⁿ yává ndíí Àdán téé cùu usá ní xínani Ènóc ní dácáhu íní ñáhá Yá Ndiöxí xii-dé ní cáháⁿ-dé ñáú-ni cuendá nchaa ñáyíu-áⁿ. Te ní cachí-dé: “Na càchí tñúhu-í xii-ndo sǎ Yá Ndiöxí quixi-gá ndíhi cuéhé víhí espíritu xínú cuèchi núú-gǎ. ¹⁵ Te dàvá-áⁿ cada ndáá-gǎ cuèchi nchaa ñáyíu te daquihíⁿ-gǎ nchaa ñáyíu ndècu ichi cuéhé ichi duha núú ùhú núú ndàhú, te ducaⁿ càda ñaha-gǎ xii-yu, chí mee-ni sǎ cuèhé sá dúhá quidé-yu, te càháⁿ úhú ñáhǎ-yu xii-gǎ”, duha ní cachí te Ènóc. ¹⁶ Te ñáyíu-áⁿ ño yica íní-yu chí ñá túú ndùu vétú íní-yu nàcuáa ndècú-yu ñuyíú-a, te sǎt-nuhú-yu tñaha ñáyíú-yu te mee-ni sǎ cuèhé sá dúhá sàni íní-yu quidé-yu, te quide cahnú-yu mèé-yu, te mee-ni càháⁿ váha-yu núú tñaha ñáyíú-yu cuendá cuíní-yu sá cáda váha ñaha ñáyíu-áⁿ xii-yu.

Té Jùdás càháⁿ-dé dóho ñáyíu ndècu ichi Yá Ndiöxí

¹⁷ Te nchòhó ñáyíu ío cùu íní-í, càháⁿ ndàhú-í núú-ndó sǎ ño cuhuⁿ íní-ndó tñuhu sǎ sá ní dánhé ñáhá cuè téé ní tendahá Xítohó Jesucristú càháⁿ tñuhu-gǎ núú ñáyíu. ¹⁸ Te sa ñaha-ndo sá ní cachí-güedé sá cùmání-gǎ quixi tucu Xítohó Jesucristú ñuyíú-a, te coo ñáyíu cáháⁿ cuéhé cáháⁿ duha cuendá tñuhu-gǎ. Te ñáyíu-áⁿ cáda-yu mee-ni sǎ cuèhé sá dúhá vèxi íní mèé-yu. ¹⁹ Te ñáyíu-áⁿ cùú-yu ñáyíu càháⁿ nándí tñuhu sá ñá túú nándíhi cuendá sá vǎ cùú ìíⁿnuu-ndo cundecu-ndo,

te mee-ni sǎ cuèhé sá dúhá ñuhu íní-yu, te ñá túú ndècu ndíhi-yu Espiritú Yá Ndiöxí.

²⁰ Te nchòhó ñáyíu ío cùu íní-í, ío dacuáha-ndo tñuhu Yá Ndiöxí sá ní sǎndáá íní-ndó cuendá ducaⁿ cuita cuehu ni hnu-ndo ichi-gǎ quihíⁿ, te cáháⁿ ndíhi-ndo Yá Ndiöxí nàcuáa dácahu íní ñáhá Espiritú-gǎ xii-ndo. ²¹ Te ío coto-ndo mèe-ndo cundecu-ndo cuendá cuu váha íní ñáhá Yá Ndiöxí xii-ndo, te cundetu-ndo sǎa nduu quixi Xítohó Jesucristú ñuyíú-a nacuaca ñaha-gǎ xii-ndo cundecu-ndo ndíhi-gǎ ni caa ni quihíⁿ, chí Yáá-áⁿ ño cundahú íní ñáhá-gǎ xii-o.

²² Te ñáyíu sàni ìíⁿ sàni úú íní-xi cùñaha-ndo xíí-yu nàcuáa cáda-yu cundecú-yu ichi Yá Ndiöxí. ²³ Te nchaa ñáyíu ta xíta nihnu ñuhu ichi cuáháⁿ núú ùhú núú ndàhú, ío cundíhi íní-ndó cùñaha-ndo xíí-yu tñuhu Yá Ndiöxí cuendá sá ná cǎcu nihnú-yu, te cundahú íní-ndó-yu, te quihí íní-ndó vǎ cáda-ndó tñáhá-ndó nàcuáa quidé-yu, chí daquèe tíhú-ndó nchaa sǎ cuèhé sá dúhá quidé-yu-áⁿ.

Nàcuáa ndacáⁿ táhú-ó núú Yá Ndiöxí

²⁴ Te Yá Ndiöxí chindee ñaha-gǎ xii-ndo cuendá sá vǎ cùndècu-ndo ichi cuéhé ichi duha, te cunduu ndoo cunduu nine íní-ndó càndeca ñaha-gǎ xii-ndo quihíⁿ cundecu-ndo núú ño váha cǎa ndecu-gǎ, te ío cudíí íní-ndó. ²⁵ Te Yá Ndiöxí ío ndècu ndíhi-gǎ nchaa sǎ xíní tñuní-gǎ te ñáú-gǎ ní dácǎcu nihnu ñaha-gǎ xii-o núú ùhú núú ndàhú, te ducaⁿ ní quide ñaha-gǎ xii-o chí ndècu ndíhi-o Xítohó Jesucristú. Te ío ndacáⁿ táhú-ó núú Yá Ndiöxí, chí ío cǎhnu cuu-gǎ ndécú-gǎ táxi tñuní-gǎ, te súúni váha íní-gǎ, te ndàcu-gǎ quidé-gǎ nchaa sǎ váha, te ducaⁿ-ni ño cǎhnu cuu-gǎ ndéé cùtñahá vátá ngǎva-gǎ ñuyíú, te ducaⁿ-ni ño cǎhnu cuu-gǎ ni caa ni quihíⁿ, duha xíní ñuhu-xi ndacáⁿ táhú-ó núú-gǎ. Te ducaⁿ na cunduu. Te ío chí cáda ndèe íní-ñá vitna.

NCHAA SÁ NĪ XINÍ TÉ JUÀÁ NDIHI NCHAA SÁ NĪ TECÚ DÓHO-DĒ

Xítóhó Jesucristú xáhaⁿ-gǎ xii té Juàá nchaa nàcuáa cada-xi ñuyíú

¹ Te Yá Ndiöxí ní xáhaⁿ-gǎ xii Xítóhó Jesucristú nchaa sá tá cùyatni víi-nǎ cada-xi ñuyíú-a cuendá sá cǔñaha-gǎ xii cue tée xinu cuechi núú-gǎ, te Xítóhó Jesucristú ní tendaha-gǎ ñⁿ espíritu xínú cuèchi núú-gǎ ní quixi-xi ní cachí tnúhu-xi nchaa tnúhu-án xii yúhú té Juàá tée xinu cuechi núú-gǎ, te nchaa tnúhu-án ndéé núú tütú-a.

² Te yúhú cǎchí tnúhu ndáá-í xii-ndo nàcuáa ní cáháⁿ Yá Ndiöxí, te cǎháⁿ ndáá tucu-í cuendá Xítóhó Jesucristú, ndihi cuendá nchaa sá nĪ xiní-í.

³ Te váha táhú ñáyiú dàcuaha nchaa tnúhu ndéé núú tütú-a, te váha tucu táhú ñáyiú ndédóho, te váha tucu táhú nchaa ñáyiú tñiñ nacuáa cǎháⁿ-xi, chi sa ta cùyatni víi-nǎ nduu càda-xi nchaa nacuáa cǎháⁿ-xi.

Té Juàá cǎdǔha-dé tutú quíhíⁿ ndaha ndi usá xichi cue ñáyiú ndècu ichi Yá Ndiöxí

⁴ Te yúhú té Juàá cǎdǔha-í tutú daquixi-í ndi usá xichi núú ndécu nchòhó ñáyiú ndècu ichi Yá Ndiöxí ndéú distritú Àsiá. Te mee-gǎ ná chindee chitúu ñaha-gǎ xii-ndo, te ío váha cuu iní-ndó cundece-ndo. Te cuèi ndéé sanaha diu-ni-gǎ ndécú, te diu-ni-gǎ ndécú cuèi vitna, te ducaⁿ-ni cundece-gǎ cuèi ndéé núú cuaháⁿ núú vǔxi, te diu-ni ducaⁿ ò na chindee chitúu ñaha ndi usá cue espíritu ndécú núú-gǎ xii-ndo, te ío váha cuu iní-ndó cundece-ndo. ⁵ Te diu-ni ducaⁿ na càda tucu Xítóhó Jesucristú, te diu-gǎ cǔú-gǎ Yáá cǎháⁿ ndáá, te diu-ni-gǎ ní xíhí-gǎ te díhna-gǎ ní ndoto, te dàtnúni ndéé cuèe-gǎ te ndoto cue ñáyiú ní xíhí, te diu-ni-gǎ táxí tnùní-gǎ nchaa cue tée yìndaha ñaha xii ñáyiú ndècu ñuyíú-a. Te ío cùu iní ñáhà-gǎ xii-o, te mee-gǎ ní sati níhí-gǎ te ní xíhí-gǎ núú cùdúxí sá cuendá nchaa sá cuèhé sá dúhá quide-o, te ní ndada ndoo ní ndada nine-gǎ iní-ó, ⁶ te vitna ní quide ñaha-gǎ xii-o dàtná cue tée yìndaha ñáyiú, te ní quide ñaha tucu-gǎ xii-o dàtná cue dútú xínú cuèchi-o núú Tǎtá-gǎ Dútú

Ndiöxí. Te vitna nchaa-o chí ná cǎchí-ó sǎ ío cǎhnu cuu Xítóhó Jesucristú, te ío cùnuu-gǎ, te ducaⁿ-ni na cùnuu-gǎ ní caa ní quíhíⁿ. Te ducaⁿ na cùnduu.

⁷ Te cundece-ndo àndiu! Chi ichi xití vícò quixi Xítóhó Jesucristú, te nchaa ñáyiú ndècu ñuyíú-a quini ñáhà-yu xii-gǎ, te tnàhá nchaa ñáyiú ñⁿ-ni cùu ndihi ñáyiú ní dǎnǔcuèhé ñáhà xii-gǎ quini ñáhà-yu, te nchaa ñáyiú xìndecu níhí ñuyíú, ñáyiú ná tütú cùu váha iní ñáhà xii-gǎ ndíhú iní-yu òrè quini ñáhà-yu xii-gǎ, te ndáá sá dúcǎⁿ càda-xi.

⁸ Te Yá Ndiöxí cǎchí-gǎ: “Yúhú ío cùnuu-í chi diu-í sa ndècu ndéé cùtnàhá ní ngáva ñuyíú, te diu-ni-í cundece ndéé ná sǎá nduu nàa-xi ndihi nchaa sá ío, chi yúhú cundece-í ní caa ní quíhíⁿ”, duha cǎchí Yá Ndiöxí Yáá ndácú quide nchaandi tǔhú sá váha. Chi diu-ni-gǎ sa ndècu ndéé cùtnàhá ní ngáva ñuyíú, te diu-ni-gǎ ndécú-gǎ vitna, te ducaⁿ-ni cundece-gǎ ní caa ní quíhíⁿ.

Té Juàá ní xiní-dé Xítóhó Jesucristú Yáá ío cùnuu

⁹ Te yúhú té Juàá tée ndècu ndihi-ndo ichi Xítóhó Jesucristú, tnàhá-í ndóhò-í cuendá-gǎ dàtná ndóhò-ndó, te tnàhá-í nduu táhú-í cundece ndihi ñaha-í xii-ndo núú ndécú Yá Ndiöxí táxí tnùní-gǎ. Te ío quide cahnu iní-ó cuèi nándi yáha-o ndècu-o sá cuendá Xítóhó Jesucristú. Te yúhú ní ngava-í vecaá ñⁿ ñuu nání Pǎtmós, te ñuu-án cáá xití ndute lámár. Te ducaⁿ ní cuu cuendá sá cǎháⁿ-í tnúhu Yá Ndiöxí, te cǎháⁿ váha-í cuendá Xítóhó Jesucristú. ¹⁰ Te ñⁿ nduu ndumíngú nduu nà-tacá-ó chiñuu-o Yá Ndiöxí ní quide ñaha Espíritu-gǎ xii-í nàcuáa cǎchí iní-xi, te ní tecú dóho-í níhi ní cáháⁿ ñⁿ sá ní cáháⁿ ndaa sǎtà-í te dàtná níhi cǎháⁿ ñⁿ cútú ducaⁿ níhi ní cáháⁿ-xi. ¹¹ Te cǎchí sá cǎháⁿ-án:

—Yúhú sa ndècu-í ndéé cùtnàhá ní ngáva ñuyíú, te diu-ni-í cundece-í ndéé ná sǎá nduu nàa-xi ndihi nchaa sá ío, te chido tnùní-n ñⁿ núú tütú sá ná dànehé núú ñáhà-í xii-n, te daquihíⁿ-n tütú-án ndi usá xichi núú xìndecu cue ñáyiú ndècu ichi Yá Ndiöxí xìndecu distritú Àsiá, ndaha ñáyiú ñuu Èfesú, ndaha ñáyiú ñuu Esmirná, ndaha ñáyiú ñuu Pèrgamú, ndaha ñáyiú ñuu Tiàtirá, ndaha ñáyiú ñuu Sárdís, ndaha ñáyiú ñuu Filàdelfiá, ndaha ñáyiú ñuu

Laodiceá, nchaa ñáyiú ñuú-án daquihín-n tütú-án ndahá-yu —càchí sá càhá-án.

¹² Te ní nchócuĩhnu-í ndèhè-í nñu ná cúú sá càhá-án, te ní xiní-í xĩnutnĩh úsá tñahá sá nĩ cuáha mee-ni dĩhúⁿ cuááⁿ sá ndèé dité-xi, te núú dité-xi-án yĩndodo ìhⁿ caa candíl. ¹³ Te cuádava tnuú nchaa xĩáⁿ ní xiní-í nútnĩh Yaá cáá dàtná cáá nchàa nchoo ñáyiú ndècu ñuyíú-a, te ñihnu-gá ìhⁿ dóó cání càa-xi ndéé núú sàhá-gá, te yidúcuⁿnuu ìhⁿ sìnchú ní cuáha mee-ni dĩhúⁿ cuááⁿ pèchú-gá. ¹⁴ Te idi díquí-gá cuixiⁿ quiyí dàtná cuixiⁿ idi dava mbéé, àdi yúhá sá quée òré quidé vixiⁿ-xi, te tinùu-gá quidé-xí dàtná quidé-xí òré sàá itá ñuhú. ¹⁵ Te sáhá-gá súúní dàtásaⁿ-xi dàtná dàtásaⁿ sá nání bròncé òré càyú-xi ducaⁿ dàtásaⁿ-xi sáhá-gá, te dóngha tñuhu càháⁿ-gá quidé-xí dàtná quidé-xí dóngha titnĩ vĩhí yũte. ¹⁶ Te xio ndaha cùha-gá nundàha-gá úsá tñahá chódíní, te mei yùhu-gá quéné ìhⁿ yuchí cáhnú ndèé úú xio núú-xi, te núú-gá quidé-xí dàtná quidé-xí núú nchĩcanchii òré súúní ngòyo cahni.

¹⁷ Te sá dúcáⁿ càa Yaá-án ní xiní-í nñu xĩáⁿ ní yùhú-í ní nduá-í núú-gá, te ní cuu-í dàtná ìhⁿ téé ní xĩhí sá dúcáⁿ ìo ní yùhú-í, dico mee-gá ní sacáⁿ ndodo-gá ndaha cùha-gá núú yiquí cùñú-í, te ní cachí-gá:

—Vá yùhú-n, chi ñu-ni yùhú sa ndècu-í ndéé cútñahá ní ngáva ñuyúú, te ñu-ni yùhú cundecu-í ndéé ná sàá nduu nàa-xi ndĩhi nchaa sá ìó. ¹⁸ Te yùhú cùu-í Yaá ní xĩhí te ní ndoto-í, te vitna ndècu vívù-í, te ducaⁿ-ni cundecu-í nĩ caa nĩ quihíⁿ. Te yùhú cúnùu-í núú nchàa ñáyiú ní xĩhí te ñu-ni-í cúnùu-í núú ndécú-yu. ¹⁹ Te chido tñuní-n nchàa sá nĩ xiní-n-án ìhⁿ núú tütú, ndĩhi nchaa nàcuáa cùu vitna, ndĩhi nchaa sá cádá-xí ndéé núú cuháⁿ núú vèxi-gá. ²⁰ Te na càchí tñuhu-í xii-n nàcuáa quèe-xi ndi usá chódíní nĩ xiní-n yòtnĩh-í xio ndaha cùha-í, ndĩhi nàcuáa quèe-xi ndi usá sá nĩ cuáha mee-ni dĩhúⁿ cuááⁿ, sá ndèé dité-xi te yĩndodo ìhⁿ caa candíl núú dité-xi-án. Te ndi usá chódíní-án, xĩáⁿ cúú-xí sá cútñuní iní-ó sá ndécú úsá cue téé xinu cuechi núú Yá Ndiòxí, te ndi usá cue téé-án ndécú-güedè ndi usá xichi núú ndécú ñáyiú ndècu ichi Yá Ndiòxí. Te cuèndá ndi usá sá ndèé dité-xi-án, xĩáⁿ cúú-xí sá cútñuní iní-ó sá ndécú úsá xichi

ñáyiú ndècu ichi Yá Ndiòxí —duha càchí Yaá càhá-án.

2

Tñuhu sá cúú-xí ñáyiú xĩndecu ichi Yá Ndiòxí ndécú ñuú Éfesú

¹ Te ní cachí tucu Yaá càhá-án xii-í sá chídó tñuní-í nchaa tñuhu sá vítná càháⁿ-gá ìhⁿ núú tütú, te tendaha-í quihíⁿ ndaha téé xinu cuechi núú Yá Ndiòxí ndécú ñuú Éfesú sá cúú-xí cuè ñáyiú xĩndecu ichi-gá ndécú ñuú-án, te duha ní cachí-gá: “Yùhú cùu-í Yaá nundàha úsá chódíní xio ndaha cùha-í, te xica cuu-í núú ndécú ndi usá sá nĩ cuáha mee-ni dĩhúⁿ cuááⁿ, sá ndèé dité-xi te yĩndodo ìhⁿ caa candíl núú dité-xi. ² Te yùhú xiní-í nchaa nàcuáa quide nchohó ñáyiú xĩndecu ichi Yá Ndiòxí ndécú ñuú Éfesú, te xiní-í sá ìo nducu ndee-ndo quide chiuⁿ-ndo cuendá-gá, te ìo quide cahnu iní-ndó ndècu-ndo quide-ndo chiuⁿ-gá. Te xiní-í sá ñà túú tñahí tñahá iní-ndó nàcuáa quide nchaa ñáyiú ndècu ichi cuehé ichi duha. Te xiní tucu-í sá xitó ndèé-ndó cuè téé càchí sá nĩ tendaha-í vèxi càháⁿ tñuhu-í te ñà ndàá sá càháⁿ-güedé tñuhu-í, te ducaⁿ te cùtnuní iní-ndó sá ñà ndàá sá càháⁿ-güedé tñuhu-í. ³ Te xiní tucu-í sá ìo ndòho-ndo quide-ndo chiuⁿ cuendá-í, te ducaⁿ ìo quide cahnu iní-ndó cuèi nándi yáha-ndo, te ñà túú cùu dusaⁿ-ndo quide-ndo chiuⁿ-án. ⁴ Dico ñà túú cùu vaha iní-í chi nchòhó ñà túú-gá quidé-ndó dàtná ní xóo cada-ndo cùtnahá vitna cùu ví-ñi ní sándáá iní ñahá-ndó xii-í, chi vitna ñà túú-gá cúú iní ñahá vili-ndo datná ní xóo cada-ndo dàvá-án. ⁵ Te chí dándacu iní nàcuáa ní xóo cada-ndo cùtnahá vitna cùu saa ní sándáá iní ñahá-ndó xii-í, te ndixi cuèchi iní-ndó sá ñà túú-gá quidé vaha-ndo ndècu-ndo vitna, te nucuita saa tucu-ndo cada-ndo datná ní xóo cada-ndo ndéé dĩhna. Te nchòhó cada iní-ndó sá ndécú ndĩhi-ndo ìhⁿ sá nĩ cuáha mee-ni dĩhúⁿ cuááⁿ, sá ndèé dité-xi te yĩndodo ìhⁿ caa candíl núú dité-xi. Te núu vá ndíxí cuèchi iní-ndó nàcuáa quide-ndo ndècu-ndo ña, te quixi-í xocani-í xĩáⁿ, te ducaⁿ sãtnahá-xi cada ñaha-í xii-ndo te núu vá ndíxí cuèchi iní-ndó nàcuáa quide-ndo ndècu-ndo, te ducaⁿ te vá yóo-gá nàtacá chĩñuhu ñaha xii-í ñuú-ndó. ⁶ Dico quide vaha-ndo ìhⁿ xichi chi dàquee tĩhú-ndó nchàa sá quidé cuè ñáyiú cùu nicolaitás, te yùhú tñahá-í dàquèe tĩhú-í nchaa sá quidé ñáyiú-án.

⁷Te nchòhò cada cuendá váha-ndo nàcuáa xáhaⁿ-í xii Espíritú Yá Ndiòxí xáhaⁿ-xi xii cue ñáiyu ndècu ichi-gá xĩndecu nchaa xichi. Te duha nduu tnúhu xáhaⁿ-í xii Espíritú-gá xáhaⁿ-xi xíi-yu: Cúñaha-n xii nchaa ñáiyu sá nõu na càda ndee iní-yu yáha-yu nándi sá ná yáha-yu sá cuendá-í, te yúhú cada-í te nduu táhú-yu cundecu váha-yu núu ndécú Yá Ndiòxí, duha xáhaⁿ-í xii Espíritú-gá cúu-xi ñáiyu”, duha càchí Yáá càháⁿ-áⁿ. Te nchaa tnúhu-án nĩ chídó tnùn-í sá cúu-xí ñáiyu xĩndecu ichi Yá Ndiòxí ndécú ñùú Èfesú.

Tnúhu sá cúu-xí ñáiyu xĩndecu ichi Yá Ndiòxí ndécú ñùú Èsmirná

⁸Te ní cachí tucu Yaá càháⁿ-áⁿ xii-í sá chídó tnùn-í nchaa tnúhu sá vitná càháⁿ-gá ìⁿ núu tùtù, te tendaha-í quíhíⁿ ndaha tée xĩnu cuechí núu Yá Ndiòxí ndécú ñùú Èsmirná sá cúu-xí cuè ñáiyu xĩndecu ichi-gá ndécú ñùú-áⁿ, te duha càchí-gá: “Yúhú ndécú-í ndéé cútñahá ní ngáva ñuyíú, te ñu-ni-í cundecu-í ndéé ná sáá nduu nàa-xi ndíhi nchaa sá íó, te ñu-ni-í ní xíhí te ní ndoto-í ndécú-í vitna. ⁹Te yúhú xìn-í nchaa nàcuáa quide nchohó ñáiyu ndècu ichi Yá Ndiòxí ndécú ñùú Èsmirná. Te xìn-í sá ío ndòho-ndo ndecu-ndo sá cuendá-í, te xìn-í tucu-í sá ío ndàhú-ndó dico cùu-ndo ñáiyu xĩndecu váha núu Yá Ndiòxí. Te xìn-í tucu-í sá ío càháⁿ cuèhé ñáiyu isràél cuendá-ndó, dico ñá túú quidé-yu nàcuáa tàu-yu cada-yu sá cúu-yu ñáiyu isràél, chi cùu-yu ñáiyu xĩnu cuechí mee-ni núu sàcufhná. ¹⁰Dico nchòhò vá yúhú-ndó cuèi nándi cùu nchaa sá ná ndòho-ndo cuendá-í, chi sàcufhná cada-xi te ngava dava-ndo vècaá, te ducaⁿ càda-xi chi cuín-í coto ndee ñáhá-xí xii-ndo núu ndisa sá vá ná túhú iní-ndó sá nchìcúⁿ nihnu-ndo ìchi Yá Ndiòxí. Te ndòho-ndo úxí nduu dico vá dàñá ndéé-ndó càncìcúⁿ nihnu-ni-ndo ìchi-gá cuèi na cùu-ndó sá cuendá-gá, te yúhú cada-í te nduu táhú-ndó cundecu-ndo ndíhi-gá ni caa ni quíhíⁿ. ¹¹Te nchaa nchòhò cada cuendá váha-ndo nàcuáa xáhaⁿ-í xii Espíritú Yá Ndiòxí xáhaⁿ-xi xii cue ñáiyu ndècu ichi-gá xĩndecu nchaa xichi, te duha nduu tnúhu xáhaⁿ-í xii Espíritú-gá xáhaⁿ-xi xíi-yu: Cúñaha-n xii nchaa ñáiyu sá nõu na cùndee iní-yu yáha-yu nándi sá ná yáha-yu sá cuendá-í te vá cuíta nihnú-yu na sáá

nduu cuíta nihnu nchaa dava-gá ñáiyu, duha xáhaⁿ-í xii Espíritú-gá cúu-xi ñáiyu”, duha ní cachí Yaá càháⁿ-áⁿ. Te nchaa tnúhu-án nĩ chídó tnùn-í sá cúu-xí ñáiyu xĩndecu ichi Yá Ndiòxí ndécú ñùú Èsmirná.

Tnúhu sá cúu-xí ñáiyu xĩndecu ichi Yá Ndiòxí ndécú ñùú Pèrgamú

¹²Te ní cachí tucu Yaá càháⁿ-áⁿ xii-í sá chídó tnùn-í nchaa tnúhu sá vitná càháⁿ-gá ìⁿ núu tùtù, te tendaha-í quíhíⁿ ndaha tée xĩnu cuechí núu Yá Ndiòxí ndécú ñùú Pèrgamú sá cúu-xí cuè ñáiyu xĩndecu ichi-gá ndécú ñùú-áⁿ, te duha càchí-gá: “Yúhú cùu-í Yaá néhé ìⁿ yuchí cání te ndéè úú xio núu-xi. ¹³Te yúhú xìn-í nchaa nàcuáa quide nchohó cue ñáiyu xĩndecu ichi Yá Ndiòxí ndécú ñùú Pèrgamú, te xìn-í tucu-í sá ndécú-ndó núu ío cùnuu yucu ñávaha, te ñá túú dàña ndéé-ndó nchìcúⁿ nihnu-ndo ìchi-í, te ducaⁿ ío sàndáá iní ñáhá-ní-ndó xii-í, te ñu-ni ducaⁿ nĩ quide-ndo cùtñahá ní sahani-güedé té Àntipás núu ndécú-ndó ñu-ni núu dúcáⁿ ío cùnuu yucu ñávaha. Te ndí-áⁿ nĩ quide ndáá ndí nĩ xĩndecu ndíi ichi-í chi ní càháⁿ váha ndíi cuendá-í. ¹⁴Dico ñá túú cùu váha iní-í cuendá ìⁿ úú sá quidé-ndó, chi ndècu ndíhi-ndo ñáiyu nchìcúⁿ nihnu-ni nchaa nàcuáa ní càháⁿ ndíi Balaám. Chi ndí-áⁿ ñá túú ní quide váha ndíi chi ní dácáhu iní ndíi ingá tée ní xĩnani Balác nàcuáa cada-dé canu ichi-dé cue ñáiyu isràél ingá ichi sá ñá túú váha, chi ní xáhaⁿ té Balác-áⁿ xii-yu sá caxí-yu nchaa sá ndúú táhú nchaa sá nĩ cadúha cue tée ñuyíú-a dãnani ñáiyu ndiòxí te ñá ndáá sá ndiòxí cúu-xí, te ní dácáhu iní ñáhá-dé xii-yu sá cùndècu-yu ichi díi iní. ¹⁵Te ndècu ndíhi tucu-ndo ñáiyu nchìcúⁿ nihnu sá dácuaha cue ñáiyu cùu nicolaitás. Te nchaa sá dácuaha ñáiyu-áⁿ dáquèe tíhù-í, ¹⁶te nchòhò chí dándixi cuèchi iní sá ñá túú quide váha-ndo ndècu-ndo, chi núu ñáhá te quixi-í nàá-í ndíhi cue ñáiyu-áⁿ ndíhi yuchí cání sá quéné yúhu-í. ¹⁷Te nchaa nchòhò cada cuendá váha-ndo nàcuáa xáhaⁿ-í xii Espíritú Yá Ndiòxí xáhaⁿ-xi xii cue ñáiyu ndècu ichi-gá xĩndecu nchaa xichi. Te duha nduu tnúhu xáhaⁿ-í xii Espíritú-gá xáhaⁿ-xi xíi-yu: Cúñaha-n xii nchaa ñáiyu sá nõu na càda ndee iní-yu yáha-yu nándi sá ná yáha-yu sá cuendá-í, te yúhú cuáñaha-í sá ndúú yúhu xii-yu

caxi-yu ìⁿ sá vǎtǎ quíní-gá-yu caxi-yu. Te xǎⁿ cúú-xí mànǎá sá ní xóo caxi cue ñáiyu ní xǎndecu ndéé sanaha, te cuǎñaha tùcu-í ìⁿ caa yúú cuixí^m xii-yu, te núú yúú-ǎⁿ cundeé ìⁿ ñú saa. Te ñú-ǎⁿ vǎ yóo tnàhí xini chi ìⁿ ñú dí-ñi ñáiyu na quèheⁿ cuendá ñú-ǎⁿ quíní-yu, duha xǎha-í xii Espiritú-gá cúu-xi ñáiyu”, duha càchí Yaá càháⁿ-ǎⁿ. Te nchaa tnúhu-ǎⁿ ní chídó tnùní-í sá cúú-xí ñáiyu xǎndecu ichi Yá Ndióxi ndécú ñúú Pèrgamú.

Tnúhu sá cúú-xí cuè ñáiyu xǎndecu ichi Yá Ndióxi ndécú ñúú Tiàtirá

¹⁸ Te ní caxí tucu Yaá càháⁿ-ǎⁿ xii-í sá chídó tnùní-í nchaa tnúhu sá vítnǎ càháⁿ-gá ìⁿ núú tùtú, te tendaha-í quíhí^m ndaha téé xinu cuechi núú Yá Ndióxi ndécú ñúú Tiàtirá sá cúú-xí cuè ñáiyu xǎndecu ichi-gá ndécú ñúú-ǎⁿ, te duha càchí-gá: “Yúhú cúu-í Déhe Yá Ndióxi, te caa tinuu-í dàtnǎ cáá itá ñuhú, te sǎhá-í cáá dàtnǎ cáá sá nání bròncé òré ñúhú-xí núú ñúhú cǎyú-xi. ¹⁹ Te yúhú xini-í nchaa nàcuáa quide nchóhó ñáiyu xǎndecu ichi Yá Ndióxi ndécú ñúú Tiàtirá. Te xini tucu-í sá ò cúu iní-ndó Yá Ndióxi te sǎndǎá iní-ndó-gǎ. Te xini tucu-í nàcuáa nduu chiuⁿ quide-ndo sá cúú-xí-gǎ. Te xini tucu-í sá ò quide cahnu iní-ndó cuèi nǎndí cúu sá yǎha-ndo ndecu-ndo. Te xini tucu-í sá ò-gǎ ndúú ndèe-ndo quide váha-ndo vítna dacúúxí cǔtnàhǎ vítna cúu saa ní sǎndǎá iní-ndó Yá Ndióxi. ²⁰ Dico ñá túú cúu váha iní-í cuendá ìⁿ sá quidé-ndó, chi ñá túú tnàhí ná sǎní iní-ndó ndècu ndihi-ni-ndo ñáiyu nchicúⁿ nihnu nchaa nàcuáa dǎnehé ñǎhá ñaha nani Jezabél. Te ñaha-ǎⁿ càchí-aⁿ sá càháⁿ-aⁿ tnúhu Yá Ndióxi dico ñá ndǎá sá càháⁿ-aⁿ tnúhu-gá, te cuáháⁿ-aⁿ dǎndahú-aⁿ nchaa ñáiyu xinu cuechi núú-í ndihi nchaa sá dǎnehé ñǎhá-ǎⁿ cuendá cundecú-yu ichi díí iní, te caxi-yu nchaa sá ndúú tǎhú nchaa sá ní cadúha cue téé ñuyúú-a dǎnani ñáiyu ndióxi te ñá ndǎá sá ndióxi cúú nchàa xǎⁿ. ²¹ Te ní cuu vai nduu ta dacaca-í ndécú-ǎⁿ cuendá ndixi cuèchi iní-ǎⁿ sá ñá túú quide váha-aⁿ ndècu-aⁿ, te cuèi ducaⁿ quide-í dico ñá túú cuini-aⁿ dañáⁿ ñi ìⁿ sá cuèhé sá dúhá quide-aⁿ. ²² Te vítna yúhú ò dandòho-í-aⁿ chi tnǎ ñaha cuèhé xii-aⁿ, te ñú-ni ducaⁿ ò dandòho-í nchaa ñáiyu quide datná quidé-ǎⁿ te múu vá ndixi cuèchi iní-yu sá ñá túú quide

váha-yu ndécú-yu, te dàñá-yu nchaa sá cuèhé sá dúhá quidé-yu. ²³ Te nchaa ñáiyu cundíhi ñaha xii ñaha-ǎⁿ cahni-í-yu, te ducaⁿ te nchòhó ndihi dava-gá nchaa ñáiyu xǎndecu ichi Yá Ndióxi ndécú nchàa xichi cutnuní iní-ndó ndihi-yu sá yúhú cúu-í Yaá xini ndǎá nchaa nàcuáa sǎní iní ñáiyu, ndihi nchaa nàcuáa quide-xi iní-yu. Te nchòhó nàcuáa nduu sá quidé-ndó ìⁿ ìⁿ-ndo te ducaⁿ cunduu sá táxi-í nduu tǎhú-ndó. ²⁴ Te dava nchòhó ñáiyu ndècu ñúú Tiàtirá, ñáiyu ñá túú nchicúⁿ nihnu nàcuáa dǎnehé ñǎhá ñaha nani Jezabél-ǎⁿ ñá túú xini-ndó nǎ cúú sá càchí ñáiyu nduu yuhu dacahu iní ñǎhá yucu ñáváha. Te nchòhó, ñá túú nǎgá caxí tnúhu-í xii-ndo càda-ndo ²⁵ ñú-ná sá ò nducu ndèe-ndo cada-ndo nchaa nàcuáa càháⁿ tnúhu sá ndécú ndihi-ndo, te ducaⁿ-ni càda-ndo ndéé òré quixi tucu-í. ²⁶ Te nchaa nchòhó ñáiyu na càda ndee iní yǎha nǎndí sá ná yǎha sá cuendá-í, te núu na càda-ni-ndo nchaa nàcuáa cuini-í cada-ndo ndéé nduu vǎ cundècu-gá-ndó ñuyúú-a, te yúhú taxi-í tnúhu ndee iní xii-ndo sá táxi tnùní-ndó nchàa ñáiyu ñuyúú ²⁷ dàtnǎ ní quide mee Tǎtà-í Dútú Ndióxi ní taxi-gá tnúhu ndee iní ndécú ndihi-í, te ducaⁿ càda ñaha-í xii-ndo táxi-í tnúhu ndee iní xii-ndo cuendá ò taxi tnùní-ndó, te cada iní-ndó sá cada-ndó cuè ñáiyu dàtnǎ quidé-xí ìⁿ quidi òré tǎhú-xi càchi duuⁿ-xi, te ducaⁿ chi nchòhó cada-ndo sá nchǎá ñáiyu ñá túú quide váha cuíta nihnú-yu. ²⁸ Te cada iní-ndó sá dàtnǎ dáyèhé chódini quiti quène oré sa ta tǔndaá-nǎ cuáháⁿ ducaⁿ càda-xi oré ná sǎá nduu ngúíta-xi cada váha-xi, te ducaⁿ chi yúhú cada-í nàcuáa nduu tǎhú-ndó cundècu ndihi ñaha-ndo xii-í núú ò váha càa ndecu-í. ²⁹ Te nchaa nchòhó cada cuendá váha-ndo nàcuáa xǎha-í xii Espiritú Yá Ndióxi xǎhaⁿ-xi xii cue ñáiyu ndècu ichi-gá xǎndecu nchaa xichi”, duha càchí Yaá càháⁿ-ǎⁿ. Te nchaa tnúhu-ǎⁿ ní chídó tnùní-í sá cúú-xí ñáiyu xǎndecu ichi Yá Ndióxi ndécú ñúú Tiàtirá.

3

Tnúhu sá cúú-xí ñáiyu xǎndecu ichi Yá Ndióxi ndécú ñúú Sárdís

¹ Te ní caxí tucu Yaá càháⁿ-ǎⁿ xii-í sá chídó tnùní-í nchaa tnúhu sá vítnǎ càháⁿ-gá ìⁿ núú tùtú, te tendaha-í quíhí^m ndaha téé xinu cuechi núú Yá Ndióxi ndécú

ñùu Sàrdís sá cúu-xí cuè ñáyiú xĩndecu ichi-gá ndécú ñùu-áⁿ te duha càchí-gá: “Yúhú cùu-í Yaá ndécú ndĩhi ndi usá espíritú cúu cuèndá Yá Ndiòxí, te ñu-ni-í cùu-í Yaá ndécú ndĩhi ndi usá chodíní. Te yúhú xiní-í nchaa nàcuáa quide nchohó ñáyiú xĩndecu ichi Yá Ndiòxí ndécú ñùu Sàrdís, te xiní-í sá cúu-ndó dàtná ñáyiú ní xihí cuèi càchí ñáyiú sá ñàhá. ²Te chí cuàha cuèndá nàcuáa quide-ndo ndecu-ndo vitna, te nducu ndèe-ndo cada-ndo ñⁿ úu-gá nchaa sá vaha nchicúⁿ nihnu-ndo vitna, chí sa ndètu víi-ná daña-ndo nchàa-ndi túhú sá vaha quide-ndo ni cuu, te quide cuendá-í sá ñà túú quide-ndo nchaa nacuaa cuini Yá Ndiòxí cada-ndo. ³Te chí dándacu ini nàcuáa càháⁿ tnúhu sá ní xĩndedóho-ndo cutnàhá ní tuha-ndo ichi Yá Ndiòxí, te canchicúⁿ nihnu-ndo càda-ndo nacuaa càháⁿ tnúhu-áⁿ, te ndixi cuèchi ini-ndó sá ñà túú quide váha-ndo ndècu-ndo, te núu vá nàcuàha-ndo cuèndá nàcuáa quide-ndo ndecu-ndo ña, te cada-í dàtná quide ñadúhú, chí òré ñà túú ná yíhí ini-ndó quèxio-í núu ndécú-ndó. ⁴Dico ndècu ndĩhi-ndo ñⁿ úu ñáyiú càndoo caa nine ini-xi, chí ñáyiú-áⁿ ní nduu táhú-yu cuihnú-yu dóo cuixíⁿ cuèndá cundecu ndĩhi-í-yu, te ducaⁿ chí cùdiú-yu núu-í. ⁵Te nchaa ñáyiú na càda ndee ini-xi yáha nándi sá ná yáha sá cuèndá-í, te ñáyiú-áⁿ nduu táhú-yu cuihnú-yu dóo cuixíⁿ, te vá náquète-í diú-yu núu tütú núu yódó tnùní cue ñáyiú ní nduu táhú cundecu ndĩhi-í ní caa ní quíhíⁿ, te cúnaha-í xii Tàtá-í Dútú Ndiòxí ndĩhi cue espíritú xínú cuèchi núu-í sá ñáyiú-áⁿ cúu-yu ñáyiú cùu cuendá-í. ⁶Te nchaa nchòhó cada cuèndá váha-ndo nàcuáa xáha-í xii Espíritú Yá Ndiòxí xáha-í-xi xii cue ñáyiú ndècu ichi-gá xĩndecu nchaa xichi”, duha càchí Yaá càháⁿ-áⁿ. Te nchaa tnúhu-áⁿ ní chídó tnùní-í sá cúu-xí ñáyiú xĩndecu ichi Yá Ndiòxí ndécú ñùu Sàrdís.

Tnúhu sá cúu-xí cuè ñáyiú xĩndecu ichi Yá Ndiòxí ndécú ñùu Filadelfía

⁷Te ní cachí tucu Yaá càháⁿ-áⁿ xii-í sá chídó tnùní-í nchaa tnúhu sá vítná càháⁿ-gá ñⁿ núu tütú, te tendaha-í quíhíⁿ ndaha téé xinu cuechi núu Yá Ndiòxí ndécú ñùu Filadelfía sá cúu-xí cuè ñáyiú xĩndecu ichi-gá ndécú ñùu-áⁿ, te duha càchí-gá: “Yúhú cùu-í Yaá ío váha quide ndáá te ñà

túu tnàhí cuèchi-í. Te díhna-gá ndí Dáví ní taxi tnùní ndí ñáyiú, te vitna yúhú táxi tnùní-í-yu, te yúhú càháⁿ-í te núu ndèndida càa ñáyiú ndíhu ndaha-í te ndèndida càa ñáyiú vá ndíhu ndaha-í. ⁸Te yúhú xiní-í nchaa nàcuáa quide nchohó ñáyiú xĩndecu ichi Yá Ndiòxí ndécú ñùu Filadelfía, te yúhú ní quide-í nàcuáa ní níhí-ndó ñⁿ ichi cahnu quide-ndo chiuⁿ-í, te vá yòo ñⁿ cada nàcuáa vá níhí-gá-ndó nàcuáa cada-ndo chiuⁿ-í. Te cuèi ñà túú ío níhí ndéé-ndó cundecu-ndo ichi Yá Ndiòxí dico tnñ-ndo nchaa tnúhu càháⁿ-í, te ní ñⁿ xito ñà túú càháⁿ-ndó sá ñà túú ndècu ndíhi ñaha-ndo xii-í. ⁹Te nchaa ñáyiú quide nchaa nacuaa cuini yucu ñávaha, ñáyiú-áⁿ cúu-yu ñáyiú israhél, te cuèi cùu-yu ñáyiú israhél dico ñà túú quide-yu nàcuáa tãu-yu cada-yu, te yúhú cada-í sá ncháá ñáyiú-áⁿ canehé-yu sá yíñuhu núu-ndó, te cutnùní ini-yu sá yúhú ío cùu ini ñàhá-í xii-ndo. ¹⁰Te ío quide ndee-ni ini-ndó nchicúⁿ nihnu-ndo quide-ndo nchaa nacuaa ní càháⁿ-í, te xíáⁿ coto ñaha-í xii-ndo ñà túú ná tnahá-ndó nduu na quixi nchaa tnúndòho tnúhu ndáhú ñuyúú-a. Te òré quèxio nchaa tnúndòho-áⁿ ñuyúú-a te dàvá-áⁿ cutnùní nàcuáa nduu sá quide ñⁿ ñáyiú. ¹¹Te ío ndíhi quixi tucu-í. Te vá dáñá ndèé-ndó càda-ndo nchaa sá vaha nchicúⁿ nihnu-ndo quide-ndo cuendá sá vã cuíta sá ní cachí Yá Ndiòxí nduu táhú-ndó. ¹²Te nchaa nchòhó ñáyiú na càda ndee ini yáha nándi sá ná yáha sá cuèndá-í, te yúhú cada-í sá nchòhó ío cuu càhnu-ndo cundecu-ndo núu ndécú Tàtá-í Dútú Ndiòxí, te vá ñⁿ nduu-gá xocuñí-ndó núu ndécú-gã. Te cada ini-ndó sá dàtná sá chídó tnùní-í diú Tàtá-í Dútú Ndiòxí ññ-ndo chí ducaⁿ-ni cundecu-ndo ndĩhi-gá, te cada tucu ini-ndó sá dàtná sá chídó tnùní-í nàcuáa nani ñuu-gá ññ-ndo, chí diu ñuu-gá-áⁿ cundecu-ndo, te ñuu-áⁿ nání-xí Jèrusalén Sáá, duha nani ñuu-gá. Te ñuu-áⁿ quee-xi andíu núu ndécú Yá Ndiòxí Yaá cúu Tàtá-í quée-xi ñuyúú. Te çada tucu ini-ndó sá dàtná sá chídó tnùní-í diu mee-í ññ-ndo, te xíáⁿ cúu-xí ñⁿ diu saa, te ducaⁿ càda ini-ndó chí cundecu ndíhi ñaha-ndo xii-í. ¹³Te nchaa nchòhó cada cuèndá váha-ndo nàcuáa xáha-í xii Espíritú Yá Ndiòxí xáha-í-xi xii cue ñáyiú ndècu ichi-gá xĩndecu nchaa xichi”, duha càchí Yaá càháⁿ-áⁿ. Te nchaa tnúhu-áⁿ ní

chídó tnùn-í sá cúu-xí ñáyiú xĩndecu ichi Yá Ndióxi ndécú ñùú Filàdelfiá.

Tnúhu sá cúu-xí ñáyiú xĩndecu ichi Yá Ndióxi ndécú ñùú Laodiceá

¹⁴Te cächí tucu Yaá cãháⁿ-áⁿ xii-í sá chídó tnùn-í nchaa tnúhu sá vítná cãháⁿ-gá ìⁿ núú tütú, te tendaha-í quíhíⁿ ndaha téé xinu cuechi núú Yá Ndióxi ndécú ñùú Laodiceá sá cúu-xí cuè ñáyiú xĩndecu ichi-gá ndécú ñùú-áⁿ, te duha cächí-gá: “Yúhú cúu-í Yaá quidé núú Yá Ndióxi, te cùu-í Yaá quidé ndáá chi cãháⁿ ndáá cuítí-í nàcuáa cãháⁿ Yá Ndióxi. Te yúhú cúu-í Yaá ní quide ní ngúndecu nchaa sá ní cadúha Yá Ndióxi. ¹⁵Te yúhú xiní-í nchaa nàcuáa quide nchóhó ñáyiú xĩndecu ichi Yá Ndióxi ndécú ñùú Laodiceá, te xiní-í sá ñà túú cuíní-ndó chíchíⁿ ni-hnu-ndo nchaa nàcuáa cãháⁿ-í, te ni ñà túú cuíní-ndó ãna duuⁿ-ndo. Te váha-gá sá dúúⁿ dùuⁿ cada-ndo nchaa nàcuáa cãháⁿ-í àdi núú ñáhá te duuⁿ duuⁿ ãna-ndo. ¹⁶Te sá dúcáⁿ quide-ndo ñá túú cuíní-ndó dùuⁿ duuⁿ-ni cada-ndo nàcuáa cãháⁿ-í, te ni ñà túú cuíní-ndó dùuⁿ duuⁿ-ni ãna-ndo te sáá nduu vá cundèe-gá iní-í cuendá nchaa sá quidé-ndó-ãⁿ, te daquèe tíhú ñáhá-í xii-ndo. ¹⁷Te cächí-ndó sá cuicá-ndó, te ío váha ta yáha-ndo nchaa nduu cuáháⁿ, te ñá túú tñahí ná cúmãní xii-ndo, te ñá túú cùtnuní iní-ndó sá cúu-ndó ãdná cue ñáyiú ío ndàhú yáha, te cùu-ndo ãdná ñáyiú ndàhú, ñáyiú ío cundahú iní ñáhá tñaha ñáyiú-xi, te cùu-ndo ãdná cue ñáyiú cuáá, te cùu tucu-ndo ãdná cue ñáyiú ndàhú ñá túú tñahí dóó-xi. ¹⁸Te na cächí tnúhu-í xii-ndo sá cãdá-ndó ãdná xiquide cue ñáyiú sãaⁿ ìⁿ sá ní cuáha mee-ni ãhúⁿ cuááⁿ sá ío váha càa, te ducaⁿ quidé-yu te ío-gá cúu cuicá-yu. Te cada tucu-ndo ãdná xiquide cue ñáyiú sãaⁿ dóó cuixíⁿ sácuíhnu-yu cuendá sá vá cúu-yu ãdná ñáyiú ndàhú ñá túú dóó-xi, te cada tucu-ndo ãdná quidé cuè ñáyiú sãaⁿ yúcu quèe núu-xi nàcuáa cutnúni váha núu-yu, te duha cãháⁿ-í xãhaⁿ-í xii-ndo chi cuíní-í sá nãtuha ñaha-ndo xii-í, te ío váha cundecu-ndo sá cúu-xí Yá Ndióxi. ¹⁹Te cãháⁿ-í dóho nchaa ñáyiú cùu iní-í òré ñá túú quide ndáá-yu, te dàndoho-í-yu, núu xĩãⁿ cuíní-í sá nchóhó ndixi cuechi iní-ndó sá ñà túú quide váha-ndo ndècu-ndo. ²⁰Te na cächí tnúhu-í xii-ndo sá yúhú cúu-í ãdná ìⁿ téé nùtníi yuyèhe ndaa quehé te cãháⁿ-í ñáyiú

yíhi xití vehe, te núu na càda cuendá-yu sá cãháⁿ-í te nacaáⁿ-yu yuyèhe te quíhu-í xití vehe cudini-í ndíhí-yu, te duha cãháⁿ-í chi cuíní-í cundecu ndíhi ñaha-í xii-ndo. ²¹Te nchaa nchóhó ñáyiú na càda ndee iní-xi yáha nándi sá ná yáha sá cuendá-í, te yúhú taxi-í xii-ndo ìⁿ xichi núú ndècù-í cundecu-ndo te cunuu-ndo tñahá-ndó ãdná cùnùu-í, chi yúhú ducaⁿ ní quide ndee iní-í ní yáha-í nándi sá ní yáha-í te vitna ní nduu táhú-í ndècù-í núú ndécú Tãtà-í Dútú Ndióxi cùnùu-í. ²²Te nchaa nchóhó cada cuendá váha-ndo nàcuáa cãháⁿ Espiritú Yá Ndióxi xãhaⁿ-xi xii cue ñáyiú ndècu ichi-gá xĩndecu nchaa xichi”, duha cächí Yaá cãháⁿ-áⁿ. Te nchaa tnúhu-áⁿ ní chídó tnùn-í sá cúu-xí ñáyiú xĩndecu ichi Yá Ndióxi ndécú ñùú Laodiceá.

4

Nàcuáa chíriuhu ñáyiú Yá Ndióxi andíu

¹Te sãtá ní yáha ducaⁿ ní cuu te ní xiní-í nchí andíu, te ní cãháⁿ tucu Yaá ní cãháⁿ ndíhi ñaha xii-í ãhna, te Yaá-áⁿ ní cãháⁿ níhi-gá ãdná cãháⁿ níhi ìⁿ cútú, te ní cächí-gá xii-í:

—Taquèe iha te na dànehé ñáhá-í xii-n nchaa nàcuáa cada-xi ndéé núú cuáháⁿ núú véxi —cächí-gá.

²Te òré-ni-áⁿ ní quide ñaha tucu Espiritú Yá Ndióxi xii-í nàcuáa cächí iní-xi, te ãu-ni òré-áⁿ ní xiní-í nùtníi ìⁿ xilè váha andíu te càa ãdná cáá xilè sãcõo nchíhi cue ñáyiú ío cùnuu, te núú xilè váha-áⁿ núcõo Yaá táxi tnùn. ³Te Yaá-áⁿ cáá-gá ãdná cáá yúú chàhnhí yúú váha sá nání jãspé, te càa tucu-gá ãdná cáá yúú váha sá nání cõr-nalína, te ñiuhu doco ñaha ìⁿ cóo yãhnhí xii-gá, te tãsaⁿ-di ãdná tãsaⁿ ìⁿ yúú váha sá nání èsmeraldá. ⁴Te ní xiní tucu-í nùtníi ócò cúmi xilè váha ní càndéé núú núcõo-gá, te núú xilè-áⁿ xĩnucõo ócò cúmi cue téé cùu sacuéhé te xĩfíhnu-giedé mee-ni dóó cuixíⁿ, te ìⁿ caa coròná sá ní cuáha mee-ni ãhúⁿ cuááⁿ xĩxúhuⁿ ãquí-güedé. ⁵Te núú núcõo Yaá táxi tnùn-áⁿ sãá ndúté, te cãháⁿ ñúhu te xica chíhi-xi dóndaha, te càyú úsá ití núú núcõo-gá, te sá úsá iti-áⁿ xĩãⁿ cùn-ñuní sá ndécú úsá espíritú cúu cuendá-gá. ⁶Te ndècu ìⁿ sá ndécú ndaa núu-gã te xĩãⁿ cáá ãdná cáá lámár, te ãdná cáá vidriú cáá ñíhií.

Te ni càndéé ðíñi Yaá núcõo-án x̄nutn̄í c̄umí quiti te titni v̄ihí tinuu-güedi ndeé ndaa sátá-güedi ndihi ndaa núu-güedi. ⁷Te quiti ðíhna nuu càa-di datná cáá ndicaha, te quiti cùu uú cáá-dí dàtná cáá ndicutu, te quiti cùu uní n̄éhé-dí n̄úu t̄ëe, te quiti cùu cumí cáá-dí dàtná cáá yàcolo oré cuàháⁿ-dí núú tàchí. ⁸Te ndi c̄umí quiti-án ndeé íñú ndíxíⁿ-güedi ìñⁿ ìñⁿ-güedi, te ñihí xití ndíxíⁿ-güedi ndihi ndaa sátá ndíxíⁿ-güedi ndeé tinuu-güedi, te nduu niú chíñuhu-güedi Yá Ndiõxí, te x̄haⁿ-güedi xii-gá:

Yòhó Dútú Ndiõxí ducaⁿ-ni ta quide ndáá-n v̄ëxi, te ducaⁿ-ni quide ndáá-n cuéi vitna, te ðiu-ni ducaⁿ càda ndáá-n n̄úu cuàháⁿ núú v̄ëxi, te cùu-n Yaá quidé nchaa-ndi túhu sá v̄aha, te ðiu-ni-n sà ndecu-n ndeé cútñahá ní cuáha ñuyíú,

te ðiu-ni-n ndecu-n cuéi vitna, te ðiu-ni-n cùndecu-n cuéi ndeé núú cuàháⁿ núú v̄ëxi.

Duha x̄haⁿ cué quiti-án xii Yaá núcõo núú xilé váha-án chíñuhu ñaha-güedi.

⁹Te cue quiti-án ò ndacáⁿ táhú-güedi núú Yáá núcõo núú xilé váha-án cuendá nchaa sá quidé-gá. Te Yaá-án cúu-gá Yaá ndécú nchaa nduu nchaa quíú. Te cue quiti-án càchí-güedi sá ò càhnu cuu-gá te n̄ehé-güedi sá yíñuhu núu-gá. Te ndi tñahá òré ducaⁿ càháⁿ-güedi, ¹⁰te ndi òcó c̄umí cue tée cùu sacuéhé x̄nucóo-án ngüíñi xití-güedé núú Yáá núcõo-án, chi ðiu-gá cúu-gá Yaá ndécú nchaa nduu nchaa quíú te chíñuhu ñaha-güedé xii-gá, te tàva-güedé coróná ñíhú ðiquí-güedé te tàxi ndecu-güedé núu-gá, te x̄haⁿ-güedé xii-gá:

¹¹Yòhó cúu-n Dútú Ndiõxí Yaá cúu cuendá ñahá xii-ndí,

te ò càhnu cuu-n, te ò váha quide-n,

te n̄ehé-ndí sá yíñuhu núu-n, chi ducaⁿ tàu-xi cada-ndí,

chi yòhó cúu-n Yáá ní cadúha nchaandi túhu sá ò,

te ducaⁿ ní ngúndecu nchaa x̄háⁿ chi mee-n dùcaⁿ ní sani iní-n càda-n.

5

Cuendá Yaá cáá dàtná cáá ìñⁿ mbéé quiti ní dánicuehé-güedé ndihi cuendá ìñⁿ tutú

¹Te ní xiní tucu-í sá Yáá núcõo núú xilé váha-án núndàha-gá ìñⁿ tutú ní nacáunuu xio ndaha cùha-gá, te ndeé lètrá ndaa sátá-xi ndihi ndaa xití-xi, te úsá tñahá tutú líhli ñuhu seyú ndeé sátá tütú-án cuendá sá v̄á dáñá-xí n̄acaá. ²Te ní xiní-í ìñⁿ espíritú xínú cuèchi núú Yá Ndiõxí, te ndee v̄ihí-xi te níhi càháⁿ-xi, te càchí-xi:

—¿Yoo tàu-xi xocani nchaa tutú líhli ñuhu seyú ndeé sátá tütú-a te nadacáa-xi? —càchí espíritú-án.

³Dico ní àndiu, te ni núú ñuyíú-a, te ni ndaa xití ñuhu ñá túú ìñⁿ ñáyiú tàu-xi nadacáa tutú-án te cundehé-yu. ⁴Te yíhú ní ngüíta-í ndàhyú v̄ihí-í cuendá sá ñà túú ìñⁿ ñáyiú tàu-xi nadacáa tutú-án cundehé-yu. ⁵Te ìñⁿ cue tée cùu sacuéhé x̄nucóo x̄háⁿ ní cachí-güedé xii-í:

—Vá ndàhyú-gá-n, te cada cuendá-n chi Yáá ò ìunuu cuu ndi mee cue ñáyiú cùu ñani tñahá ndí Jùdá, ðiu-ni Yaá cúu ñani tñahá ndí Dàvíí, Yaá-án cúu-gá Yaá ní ndacu ní yáha nchaa nándi sá ní yáha, núú x̄háⁿ ðiu-gá tàu-gá xocani-gá nchaa tutú líhli ñuhu seyú ndeé sátá tütú-án te nadacáa-gá —duha càchí tée cùu sacuéhé-án.

⁶Te tnuú ndi òcó c̄umí cue tée cùu sacuéhé x̄nucóo-án, ndihi tnuú ndi c̄umí quiti x̄nutn̄í-án, ndihi núú núcõo Yaá táxí tñuní-án ní xiní-í n̄utñí ìñⁿ Yaá cáá dàtná cáá ìñⁿ mbéé quiti ní dánicuehé-güedé te ní x̄hí-í ní cùu te ní ndoto-dí, te ndeé úsá ndiquí-dí, te ndeé úsá tinuu-dí, te sá úsá tinuu-dí-án cútñuní sá ndécú úsá espíritú cúu cuendá Yá Ndiõxí, ducaⁿ càa Yaá-án ní xiní-í. Te cue espíritú-án ní tendaha-gá xicá cùu-xi ní caa xico ñuyíú.

⁷Te Yaá cáá dàtná cáá ìñⁿ mbéé quiti ní dánicuehé-güedé-án ní sáháⁿ-gá núú Yáá núcõo núú xilé váha-án. ⁸Te òré ní queheⁿ-gá tutú-án te ndi c̄umí quiti x̄nutn̄í x̄háⁿ ní ngüíñi xití-güedi núu-gá, te ducaⁿ ní ngüíñi xití tucu ndi òcó c̄umí cue tée cùu sacuéhé x̄nucóo-án, te ndi ðíñⁿ n̄úu-güedé x̄inehe-güedé yaá sá nání àrpá, te x̄inehe tucu-güedé ndi ðíñⁿ n̄úu-güedé ìñⁿ caa t̄icúú ní cuáha mee-ni ðíhúⁿ cuàáⁿ, te chitu d̄usa sá sàháⁿ tñámí. Te ñíhúⁿ d̄usa sá sàháⁿ tñámí-án cúu-xí dàtná nchaa tñuhu càháⁿ nchaa ñáyiú ndecu ichi Yá Ndiõxí òré càháⁿ ndihi ñahá-yu xii-gá. ⁹Te xita-güedé

iiⁿ ndudú sáá ndíhi cue quiti-án chíñùhu ñaha-güedé xii-gá, te cächí-güedé ndíhi cue quiti-áⁿ:

Yòhó tàú-n quèheⁿ-n tutú-a te xocàni-n nchaa tutú líhli ñùhu seyú ndèè sátá-xi,

chi yòhó ní sati níñí-n te ní xíhí-n, te cuèndá xíáⁿ ní nduu cuèndá Yá Ndiöxí cue ñáyiu iiⁿ iiⁿ nacióⁿ, ndíhi ñáyiu xíndecu iiⁿ iiⁿ ñúú, ndíhi ñáyiu càháⁿ ndí dííⁿ ndí dííⁿ núú tñùhu, ndíhi ñáyiu xíndecu iiⁿ iiⁿ xichi.

¹⁰ Te ní quidé-n-yu dàtná cue tée yíndaha ñáyiu, te ní quide tucú-n-yu dàtná cue dútú sá cúú-xí Yá Ndiöxí.

Te sáá nduu te taxi tñuní-yu ñuyúú-a. Duha càháⁿ cue tée-áⁿ ndíhi cue quiti-áⁿ chíñùhu-güedé ndíhi-güedi Yáá-áⁿ.

¹¹ Te sátá dúcáⁿ te ní tecú dóho-í ní cáháⁿ cuéhé víhí espíritú xínú cuèchi ní candéé núú núcòo Yáá táxí tñuní-áⁿ, ndíhi núú xínutní ndí cümü cue quiti-áⁿ, ndíhi núú xínucóo cue tée cùu sacuéhé-áⁿ, te ní xini-í sá súúni cuéhé víhí espíritú-áⁿ xíndecu xíáⁿ, ¹² te níhi ní cáháⁿ cue espíritú-áⁿ, te cächí-xi:

Yòhó Yáá cáá dàtná cáá iiⁿ mbéé quiti ní dánícuèhé-güedé te ní xíhí ní cùu te ní ndoto,

te yòhó ío càhnu cuu-n, te ndècu ndíhi-n nchaandi túhú,

te ío ndècu ndíhi-n sá xini tñuní-n,

te ndàcu-n quide-n nchaa sá cuini-n,

te nèhe-ndí sá yíñùhu núú-n, te ío váha quide-n,

te chíñùhu ñaha-ndí xii-n, chi ducaⁿ tàú-ndí cada-ndí chi ío càhnu cuu-n.

Duha cächí nchaa cue espíritú-áⁿ xáha-xi xii-gá chíñùhu ñaha-xi. ¹³ Te ní tecú dóho-í ní cáháⁿ nchaandi túhú sá ní cadúha Yá Ndiöxí ndécú àndiu, ndíhi nchaa sá ndécú ñùyúú, ndíhi nchaa sá ndécú xiti ñuhu, ndíhi nchaa sá ñúhú xiti ndute lámár, te xícachí-xi:

Yòhó Yáá núcòo núú xilé váha, ndíhi yòhó Yáá cáá dàtná cáá iiⁿ mbéé quiti ní dánícuèhé-güedé táxí tñuní-ndó, te nèhe-ndí sá yíñùhu núú-ndó,

te ducaⁿ ío ndàcáⁿ táhú-ndí núú-ndó, chi ío váha quide-ndo te ío cùnuu-ndo,

te ñuu-ni duha cáháⁿ váha-ndí cuèndá-ndó ní caa ní quíhíⁿ.

Duha cächí nchaa sá ní cadúha Yá Ndiöxí.

¹⁴ Te ndí cümü cue quiti xínutní-áⁿ cächí-güedi:

—jDucaⁿ na cùnduu! —cachí-güedi.

Te ndí òcò cümü cue tée cùu sacuéhé xíndecu-áⁿ ní ngúñí xiti-güedé chíñùhu-güedé Yáá ndécú nchaa nduu nchaa quíú.

6

Cuèndá úsá tutú líhli ñùhu seyú

¹ Te sátá dúcáⁿ te ní xini-í sá Yáá cáá dàtná cáá iiⁿ mbéé quiti ní dánícuèhé-güedé-áⁿ ní xocáni-gá iiⁿ tutú líhli ñùhu seyú ndèè sátá tütú sá ní nadúcúⁿ nuu-áⁿ, te ní tecú dóho-í ní cáháⁿ iiⁿ quiti cümü xínutní-áⁿ, te níhi ní cáháⁿ-di dàtná càháⁿ ñùhu, te cächí-di:

—jTaquixi cundehe-n! —cachí-di.

² Te òré-ni-áⁿ ní xini-í iiⁿ cuáyú cuixíⁿ yódó ñaha iiⁿ sá yódó ñaha xii-di, te sá yódó ñaha xii-di-áⁿ néhé-xí iiⁿ arcú sá cúú tñuxíí-xi, te ní nduu táhú-xi iiⁿ coróná, te ní ndacu-xi ní cunuu-xi te ducaⁿ-ni ta cùnuu-xi cuáháⁿ.

³ Te òré ní xocáni-gá tutú líhli cùu uú ñúhú seyú ndèè sátá tütú sá ní nadúcúⁿ nuu-áⁿ, te ní tecú dóho-í ní cáháⁿ tucu ingá quiti cùu uú xínutní-áⁿ, te cächí-di:

—jTaquixi cundehe-n! —cachí-di.

⁴ Te òré-ni-áⁿ ní xini tucu-í iiⁿ cuáyú tícuèhé ní quee-di cuáháⁿ-di, te yódo ñaha iiⁿ sá yódó ñaha xii-di, te sá yódó ñaha xii-di-áⁿ ní níhi-xi tñuhu ndee ìní sá daticánuu-xi ñáyiu vá cùndècu ndíhi tñaha váha-gá-yu, te ngúíta ñáyiu cahni tñahá-yu, te ní nduu táhú-xi iiⁿ yuchí cáhnú víhi.

⁵ Te òré ní xocáni tucu Yáá-áⁿ ingá tutú líhli cùu uní ñúhú seyú ndèè sátá tütú sá ní nadúcúⁿ nuu-áⁿ, te ní tecú dóho-í ní cáháⁿ quiti cùu uní xínutní xíáⁿ, te cächí-di:

—jTaquixi cundehe-n! —cachí-di.

Te òré-ni-áⁿ ní xini tucu-í iiⁿ cuáyú tñúú te yódo ñaha tucu iiⁿ sá yódó ñaha xii-di, te sá yódó ñaha-áⁿ nundàha-xi uú yaxiⁿ libre. ⁶ Te ní tecú dóho-í ní cáháⁿ iiⁿ sá ní cáháⁿ tñúú cue quiti xínutní-áⁿ, te cächí-xi:

—iiⁿ cuártú-ná triú níhi-ndó sá iiⁿ díhúⁿ denàriú, te uní cuártú-ná cebadá níhi-ndó sá iiⁿ tucu díhúⁿ denàriú, dico acití ndíhi

ndudí ndéhé yoho yàha stilé chi vá ndíhí nihnu —duha càchí sá càháⁿ-áⁿ.

⁷Te òré ní xócání tucu Yaa-áⁿ tutú lĩhli cùu cumí ñúhú sèyú ndèé sátá tütú sá ní nadúccúⁿ nuu-áⁿ, te ní tecú tucu dóho-í ní cáháⁿ tucu ingá quiti cùu cumí xĩnutnĩ-áⁿ, te càchí-dí:

—¡Taqúixi cundehe-n! —cachí-dí.

⁸Te òré-ni-áⁿ ní xini tucu-í ìⁿ cuàyú yàhá, te yòdo ñaha tucu ìⁿ sá yódó ñaha xii-dí, te sá yódó ñaha xii-dí-áⁿ nání-xí Sá xihí, te xĩáⁿ sáhní-xí ñáyiú, te sátá xĩáⁿ nchicúⁿ sá nehé núú ndécú ñáyiú ní xihí. Te cùmí xichi cùu ñuyú, te sá sáhní ñaha xii ñáyiú-áⁿ ní nihí-xi tnúhu ndee ìní danàa-xi ñáyiú ìⁿ xichi ñuyú, te davá-yu cahni ñaha-xi ndíhi yuchí, te cada-xi sá cóo tnamá te cuú-yu, te cada tucu-xi sá cóo cuèhé cahni-xi ñáyiú, te ñu-ni tucu-xi cada sá ncháá quiti dééⁿ cahni-dí ñáyiú.

⁹Te òré ní xócání tucu Yaa-áⁿ tutú lĩhli cùu uhúⁿ ñúhú sèyú ndèé sátá tütú sá ní nadúccúⁿnuu-áⁿ, te òré-áⁿ ní xini-í núnĩ ìⁿ núú sácódó sá ndúú tãhú Yá Ndióxi, te ndàa caha xĩáⁿ ní xini-í xĩndecu nchaa àlmá ñáyiú ní sahní-güedé núú ñuyú sá cuèndá tnúhu Yá Ndióxi, ndíhi sá cuèndá sá ní cáháⁿ váha-yu cuèndá-gá. ¹⁰Te nchaa àlmá-áⁿ níhi xĩcáháⁿ-xi, te xãhaⁿ-xi xii Yá Ndióxi:

—Yòhó Dütú Ndióxi cùu-n Yàá ñá túú tnàhí cuèchi-xi, te ñá túú tnàhí quée cáva-n quide-n ìⁿ sá càháⁿ-n. ¿Te ná ndéé ama dandòho-n ñáyiú ndècu ñuyú nachinaa-n cuèndá sá ní quide ñàhá-yu xii-ndí-i? —càchí cue àlmá-áⁿ xãhaⁿ-xi xii-gá.

¹¹Te sátá dúcáⁿ te nchaa cue àlmá ñáyiú-áⁿ ní nihí-xi dóo cuixiⁿ ní quée cuíhnu-xi, te ní xitnúhu ñaha xii-xi sá ná ndètátú-xi te cundetu tnaa-xi ndéé ná xĩnu cava cuú ñáyiú nacuaa ndéé tnuí dàtná ní xihí cue ñáyiú dii àlmá-xi cùu-xi. Te ñáyiú sa ní xihí-áⁿ ìⁿ-ni cùu-yu ndíhi ñáyiú vitna cùu-áⁿ chi mee-ni chiúⁿ Xítohó Jesucristú quidè-yu, te ñu-ni ichí-gá ndécú-yu.

¹²Te òré ní xócání tucu Yaa-áⁿ tutú lĩhli cùu ìⁿ ñúhú sèyú ndèé sátá tütú sá ní nadúccúⁿ nuu-áⁿ, te ní xini-í súúni níhi ní quidi-xi ñuyú, te ní cutnuu níhi núú nchĩcanchii dàtná ìⁿ dóo tnúú, te ní cuu ticuèhé níhi níhi núú yóó. ¹³Te ní xini-í ní ngoyo chódini ñuyú-a dàtná ngóyó ngúxi yihí òré quéné tãchí níhi. ¹⁴Te ní xini-í

ní nadúccúⁿnuu andiú dàtná nádúccúⁿnuu ìⁿ tutú te ní ndóñúhú-xi, te nchaa tĩndúú ní xica ndehe-xi núú ndécú-xi, te ducaⁿ ní xica ndehe-xi tucu nchaa tĩndúú yichí ndécú xiti ndute lámár, ¹⁵Te nchaa cue téé yĩndaha ñáyiú ní nguivãha-güedé, ndíhi nchaa dava-gá cue téé ío tàxi tnuí, ndíhi nchaa ñáyiú cuica, ndíhi nchaa cue téé tàxi tnuí sandádú, ndíhi cue sandádú cue téé ío váha sáa díquí-xi nacuaa cada-güedé nã-güedé, ndíhi nchaa ñáyiú ñá túú tnàhí dàñá quee núú chíúⁿ pãtróóⁿ-xi, ndíhi nchaa ñáyiú dàñá quée núú chiúⁿ pãtróóⁿ-xi. Te dava ñáyiú-áⁿ ní nguivãha-yu xiti yaú, te davá-yu ní nguivãha-yu nchaa tnuú cava. ¹⁶Te xãháⁿ-yu nchaa tĩndúú ndíhi nchaa cava:

—Chí tãcúuⁿ chivãha ñaha-ndo xii-ndí cuèndá sá vã quini ñàhá Yàá ío tàxi tnuí núccóo núú xilè váha, ndíhi cuèndá sá vã dándòho ñaha Yaa cáá dàtná cáá ìⁿ mbéé quiti ní dãnĩcuèhé-güedé, chi Yaa-áⁿ ío cùdèéⁿ-gã núú-ndí —duha càchí nchaa ñáyiú-áⁿ xãháⁿ-yu xii nchaa tĩndúú-áⁿ ndíhi nchaa cava-áⁿ.

¹⁷Te vitna ní sáa nduu ío cùu cahnu nduu tnúndòho tnúhu ndàhú, te vá yóo ìⁿ cundee ìní-xi yãha nchaa tnúndòho-a.

7

Ñáyiú isràel ñáyiú nanihí tãhú

¹Te sátá xĩáⁿ te ní xini-í cùmí tnàhá espíritú xínú cuèchi núú Yá Ndióxi xĩnutnĩ-xi ndí cùmí xio ñuyú, te cue espíritú-áⁿ ní ngani-xi tãchí cuèndá sá vã cuicó-gã-xi ní lámár, te ní díquí yutnu, te ní ìⁿ xichi ñuyú vã cuicó-gã-xi. ²Te cue espíritú-áⁿ ndécú ndíhi-xi tnúhu ndee ìní danàa-xi sá ío lámár ndíhi sá ío ñuhu yichí, te ní xini tucu-í ingá espíritú xínú cuèchi núú Yá Ndióxi ní quee nchita-xi ndàa nacuaa quene nchĩcanchii, te nundaha-xi seyú Yá Ndióxi Yaa ndécú nchaa nduu nchaa quíú, te níhi ní cáháⁿ-xi xãhaⁿ-xi xii ndí cùmí cue espíritú-áⁿ:

³—Vá dánàa-ndo sá ío lámár, te ní vã dánàa-ndo yutnu, te ní ìⁿ sá ío ñuyú vã dánàa-ndo, chi cundetu-ndo ndéé ná tàxi ndecu-ndí ìⁿ sèñá tneé nchaa ñáyiú xĩnu cuèchi núú Tãtá-ó Dütú Ndióxi —duha càchí espíritú-áⁿ xãhaⁿ-xi xii ndí cùmí espíritú xĩnutnĩ ndí cùmí xichi ñuyú.

⁴Te ní tecú dóho-í ní cáháⁿ ìⁿ sá ní cáháⁿ, te ní cachí-xi sá núú ndí úxúú xichi cue ñáyiú isràél te ní xínu ìⁿ cièndú údico cùmi mìl-yu ní ngúndecu sèhá tneé-yu. ⁵Te núú ìⁿ cièndú údico cùmi mìl ñáyiú-áⁿ, te ní xínu úxúú mìl cue ñaní tnáhá ndí Judá ní ngúndecu sèhá tneé-yu, te úxúú mìl cue ñaní tnáhá ndí Rúbén, te úxúú mìl cue ñaní tnáhá ndí Gàd, ⁶te úxúú mìl cue ñaní tnáhá ndí Neftalí, te úxúú mìl cue ñaní tnáhá ndí Manásés, ⁷te úxúú mìl cue ñaní tnáhá ndí Mòd, te úxúú mìl cue ñaní tnáhá ndí Lèví, te úxúú mìl cue ñaní tnáhá ndí Isacár, ⁸te úxúú mìl cue ñaní tnáhá ndí Zabulón, te úxúú mìl cue ñaní tnáhá ndí Chèè, te úxúú mìl cue ñaní tnáhá ndí Benjámín, nchaandi túhú ñáyiú-áⁿ ní ngúndecu sèhá tneé-yu.

Cuehé víhí ñáyiú nihnu dóó cuixíⁿ

⁹Te sátá xíáⁿ te ní xini-í cuehé víhí ñáyiú, ñáyiú ìⁿ ìⁿ nacióⁿ, ndíhí ñáyiú ìⁿ ìⁿ ñuú, ndíhí ñáyiú cáháⁿ ndí dííⁿ ndí dííⁿ núú tñhú, ndíhí ñáyiú ní xíndecu ìⁿ ìⁿ xichi, te nchaá ñáyiú-áⁿ xínutní-yu ndàa núú Yàá táxí tñuní núcóo núú xilé váha, ndíhí núú Yàá cáá dàtná cáá ìⁿ mbéé quiti ní dánicuehé-güedé, te vá yóo ìⁿ ndàcu cahu ñaha xii-yu chi cuehé víhí-yu, te nchaá-yu xixíhnu-yu mee-ní dóó cuixíⁿ, te nundahá-yu nchaá-yu ìⁿ caa ndàha yutnu ñúú. ¹⁰Te nchaá-yu níhí xicáháⁿ-yu, te cachí-yu:

Yáá táxí tñuní núcóo núú xilé váha cùu-gá Ndióxi-ó,

te diu-gá ndíhí Yáá cáá dàtná cáá ìⁿ mbéé quiti ní dánicuehé-güedé ní dácacu nihnu ñaha-gá xii-o núú úhú núú ndàhú.

Duha cächí nchaá ñáyiú-áⁿ. ¹¹Te nchaá espíritú xínú cuèchi núú Yá Ndióxi ní nadúcuⁿndéè-xi xínutní-xi ní càndéé núú núcóo Yáá núcóo núú xilé váha, ndíhí núú xínucóo cue téè cùu sacuéhé, ndíhí cue ndí cùmi quiti xínutní-áⁿ, te nchaá-xi ní ngúíhí xítí-xí te ní ngúnu ndeyi-xi núú Yáá núcóo núú xilé váha-áⁿ, te nchaá-xi ní ngúíta-xi chíñuhu ñaha-xi xii-gá, ¹²te cächí-xi:

Na cáháⁿ ndáá-ndí núú yòhó Tàtá-ndí Dútú Ndióxi sá ìo càhnu cuu-n, te ndàcu-n quide-n nchaá sá váha cuini-n, te ìo váha quide-n, te ndècu ndíhí-n nchaá sá xini tñuní-n,

te chíñuhu ñaha-ndí xii-n, te ducaⁿ ndacáⁿ táhú-ndí núú-n cuèndá nchaá sá quidé-n, te nèhe-ndí sá yíñuhu núú-n,

te tñuhu cáháⁿ-ndí-a cùu-xi tñuhu ndáá, te diu-ni duha cáháⁿ-ndí ndéé núú cuaháⁿ núú vèxi.

Duha cächí nchaá cue espíritú-áⁿ xáhaⁿ-xi xii Yáá núcóo núú xilé váha-áⁿ.

¹³Te ìⁿ cue téè cùu sacuéhé xíndecu-áⁿ ní xicáⁿ tñuhú-dé núú-í, te cächí-dé:

—¿Yóndi cùu ñáyiú dàcáⁿ xixíhnu dóó cuixíⁿ-áⁿ, te ndéè véxi-yu núú dàcáⁿ xíndáá-yu-i? —cächí-dé.

¹⁴Te yúhú ní xáhaⁿ-í:

—Tàtá, ñá túú xini-í, dico mee-n xini-n —duha ní xáhaⁿ-í xii-dé.

Te dàtnuní ní cachí tñuhu-dé xii-í ná cùú ñáyiú-áⁿ, te cächí-dé:

—Nchaá ñáyiú-a cùu-yu ñáyiú ní quee núú ìo víhí tñuhu ndòho tñuhu ndàhú sá vā cùndèè iní-ó te véxi-yu iha, te cùu-yu ñáyiú sa ní nduu ndoo ní nduu nine iní-xj cuèndá sá ní sati níñí Yàá cáá dàtná cáá ìⁿ mbéé quiti ní dánicuehé-güedé, cuèndá xíáⁿ vitna ní ndíhí-yu ní nduu cuixíⁿ dóó xixíhnu-yu. ¹⁵Te núú xíáⁿ vitna ní nduu táhú-yu ndécú-yu núú ndécú Yá Ndióxi Yáá táxí tñuní núcóo núú xilé váha, te cuèí nduu cuèí niú xínú cuèchí-yu núú-gá vitna, te diu-gá xító ñaha-gá xii-yu. ¹⁶Te vitna ní sáa-yu núú-gá cundecú-yu te vá ndóhó-gá-yu docó, te ni vā quini-gá-yu ndohó-yu yichí-yu ndute, te ni vā quini-gá-yu ndohó-yu cahni nchíanchii, te ñá túú-gá ná cahni ndohó-yu. ¹⁷Te ducaⁿ chi Yáá cáá dàtná cáá ìⁿ mbéé quiti ní dánicuehé-güedé ndécú-gá núú núnñí xilé váha núcóo Yá Ndióxi Yáá táxí tñuní, Yáá-áⁿ coto ñaha-gá xii-yu dàtná quidé ìⁿ toli oré xító-dé mbéè-dé, te candeca ñaha-gá xii-yu quíhíⁿ núú tdo ndute, te ndute-áⁿ cùú-xí ndute candeca iní-yu, te Yá Ndióxi cada-gá sá vā quini-gá-yu tñuhu ndàhyú —duha ní cachí tñuhu téè cùu sacuéhé-áⁿ xii-í.

8

Cuèndá tícùú sá ní cuáha mee-ni díhúⁿ cuááⁿ

¹Te sátá dúcáⁿ te Yáá cáá dàtná cáá ìⁿ mbéé quiti ní dánicuehé-güedé ní xócání-gá tutú líhli cùu usá ñúhú sèyú ndéè

sátá tütü sá ní nadúcuⁿnuu-án, te òrè-án ní cunahi súúni ñavíí-ñá ní cuu andiu dàtná cuádava òrè. ²Te ní xiní-í úsá tñhá espíritú xínú cuèchi núú Yá Ndiòxí xínutñí-xi núú núcòo-gá, te ní níhí-xi ìíⁿ caa cütü xínehe-xi. ³Te dàtnùní ní xiní tucu-í ingá espíritú xínú cuèchi núú-gã ní quexìo-xi nehe-xi ìíⁿ tícùú ní cuáha mee-ni ðíhúⁿ cuááⁿ te ñuhu vai dúsa sá sàháⁿ tñámí, te ní ngúnutñí espíritú-áⁿ núú ndécú sá ní cuáha mee-ni ðíhúⁿ cuááⁿ núú sácòdó sá ndúú tǎhú Yá Ndiòxí, te xíǎⁿ núnúñí-xi ndàa núú-gã, te dúsa sá sàháⁿ tñámí-áⁿ cahmi espíritú-áⁿ núú sácòdó sá ndúú tǎhú-gã-áⁿ cuèndá ñúhmá dùsa-áⁿ cundíhi-xi nchaa tñúhu càháⁿ ñáyíu càháⁿ ndíhi ñaha xì-gá, nchaa ñáyíu cùu cuèndá-gá. ⁴Te nùndaha espíritú-áⁿ tícùú ñúhú dùsa sá sàháⁿ tñámí càyú, te quène ñúhmá núnúñí-xi núú Yá Ndiòxí, te ñúhmá-áⁿ cundíhi-xi nchaa tñúhu càháⁿ ñáyíu càháⁿ ndíhi ñaha xì-gá, nchaa ñáyíu cùu cuèndá-gá. ⁵Te ní queheⁿ espíritú-áⁿ tícùú te ní dàchitù-xi ñúhú yódó núú sácòdó sá ndúú tǎhú Yá Ndiòxí, te ní xítenuu-xi ñuyúú, te òrè ducaⁿ ní quide-xi te ní càháⁿ víhí ñúhú, te ío dusaⁿ ní quide-xi ñuyúú, te ní sáá ndúté, te níhi víhi ní tñáa.

Ndi úsá espíritú ní tiú-xi ìíⁿ caa cütü xínehe-xi

⁶Te ndi úsá cue espíritú xínehe ìíⁿ caa cütü-áⁿ ní ngúndecu túha-xi cuèndá tiú-xi.

⁷Te espíritú ðíhna nuu ní tiú-xi cütü néhé-xí, te ñuyúú-a ní ngoyo ñíñi dàcánuu-xi ndíhi ñuhú ndíhi ñíñí, te luha-ná te cuu dava ñuyúú ní càyú, te luha-ná te cuu dava tucu nchaa yutnu ío ñuyúú ní càyú, te luha-ná te cuu dava tucu nchaa cùhú ío ñuyúú ní càyú.

⁸Te espíritú cùú ùú ní tiú-xi cütü néhé-xí, te dàtná cáá ìíⁿ tìndúú cáá ìíⁿ sá ní ngava xití lámár te nchìcúⁿ ñuhú, te luha-ná te cuu dava ndute lámár-áⁿ ní nduu-xi níñí. ⁹Te luha-ná te cuu dava nchaa quití xíxúhuⁿ xití lámár-áⁿ ní xíhí-güedi, te luha-ná te cuu dava nchaa bàrcú ní quée naa-xi xití ndute.

¹⁰Te espíritú cùú ùní ní tiú-xi cütü néhé-xí, te ní ngava ìíⁿ chódíní càhnú ndéè andiu ñuyúú te nchìcúⁿ ñuhú-ðí, te ñuhú-áⁿ cáá dàtná cáá ñúhú íti. Te luha-ná te cuu dava nchaa yúte ní ngava chódíní-áⁿ, te luha-ná te cuu dava tucu nchaa núú quèñihni ndute ní ngava-ðí. ¹¹Te chódíní-áⁿ

nání-ðí: Yúcu Òá. Te ndute xìca nchaa yúte-áⁿ ndíhi nchaa ndute quèñihni-áⁿ ní cuu úá-xi dàtná yúcu ùá, te ío cuéhé ñáyíu ní xíhí sá dúcáⁿ ní cuu úá ndute-áⁿ.

¹²Te espíritú cùú cùmí ní dàcàháⁿ-xi cütü néhé-xí, te luha-ná te cuu dava nchìcanchii ñá túú ní dàyehé-xi, te ducaⁿ lùha-ná tucu cuu dava yóó ñá túú ní dàyehé-ðí, te ducaⁿ lùha-ná te cuu dava tucu nchaa chódíní ñá túú ní dàyehé-güedi, te luha-ná te cuu dava nduu ñá túú ní dàyehé nchìcanchii, te ducaⁿ lùha-ná te cuu dava niú ñá túú ní dàyehé yóó ndíhi nchaa chódíní.

¹³Te sátá dúcáⁿ te ní xiní-í xícó ìíⁿ espíritú xínú cuèchi núú Yá Ndiòxí núú tàchí, te ní tecú dóho-í níhi càháⁿ-xi, te càchí-xi:

—Ío ndàhú ndoho nchaa ñáyíu xíndecu ñuyúú òrè ná dàcàháⁿ úní-gá cue espíritú cùmání cütü xínehe-xi, chí sa xíndecu túha-ná-xi sá dàcàháⁿ-xí!— duha càchí espíritú-áⁿ.

9

¹Te espíritú cùú ùhúⁿ ní tiú-xi cütü néhé-xí, te òrè-áⁿ ní xiní-í ní quee ìíⁿ espíritú andiu te càa-xi datná cáá ìíⁿ chódíní, te ní ngava-xi ñuyúú, te ní níhí-xi ìíⁿ ndacaá néhé-xí cuèndá nacaáⁿ-xi yuyèhe yaú cùnú víhí. ²Te ní nacaáⁿ-xi yaú-áⁿ te ní ngúíta-xi ní quene ñúhmá dàtná quéné ñúhmá ìíⁿ xítnú càhnú víhi, te ní quene tàchí ní xítenuu-xi ñúhmá-áⁿ te ní sadí-xi núú nchìcanchii, te ní cunee ñuyúú. ³Te xití ñúhmá-áⁿ ní quene tíca làngóstá, te ní xítenuu-ðí ñuyúú, te dééⁿ-güedi dàtná dééⁿ nchacua. ⁴Te ní ngúndecu ndíhi-güedi tñúhu ndee ìní cuèndá sá dándòho-güedi mee-ni ñáyíu ñá túú ndéè sèñá Yá Ndiòxí tneé-xi, te ñá túú ñá cada-ðí nchaa yutnu ndíhi nchaa cùhú. ⁵Te ñá túú tñúhu ndee ìní ndécú ndíhi-güedi sá càhní-güedi ñáyíu, chí mee-ni sá dándòho ñaha-güedi xíi-yu úhúⁿ yóó. Te òrè ní ngúíta-güedi dándòho ñaha-güedi xíi-yu te tǎhú tñúhú núú dáquèe-güedi ìñu-güedi dàtná quidé-xí núú dáquèe nchacua ìñu-güedi. ⁶Te ñáyíu-áⁿ xicáⁿ tǎhú-yu sá ndíhi cuú-yu cuèndá sá ío ndòhò-yu dáquèe ñaha nchaa quití-áⁿ ìñu-ðí xíi-yu te ñá cuíní-xi cuú-yu, te ìíⁿ nduu ìíⁿ nduu sàni ìní-yu cuú-yu te ñá túú cuíní-xi cuú-yu chí ñá túú tñúhu xíhí sá cùú-xí-yu.

⁷ Te nchaa tíca làngóstá-án xíndáa-güedi dátaná ndáa nchaa cuáyú cue téé cuáháⁿ nàá, te díquí-güedi ñuhu ìⁿ sá cáá dátaná cáá còroná ní cuáha mee-ni díhúⁿ cuááⁿ, te núu-güedi càa datná cáá núu cuè téé. ⁸ Te idi díquí-güedi càa datná cáá idi díquí ñáyiú díhí, te núhu-güedi càa datná cáá núhu ndicaha. ⁹ Te yidúcuⁿnuu-güedi ìⁿ sá cáá dátaná cáá càá, te ndíxíⁿ-güedi quide-xi datná quidé-xí núu vèxi cuéhé víhí càrretá sá táñuhu cuayú cuáháⁿ-güedé ndíhi-güedi núu nàa-güedé. ¹⁰ Te ndèé iñu núu lùhmá-güedi dátaná ndèé iñu núu lùhmá nchacua, te iñu núu lùhmá-güedi-án dáquëe-güedi ñáyiú dándoho ñaha-güedi xíí-yu, te ducaⁿ-ni càda-güedi dándoho ñaha-güedi xíí-yu ndèé xínu úhúⁿ yóó. ¹¹ Te nchaa tíca làngóstá-án táxí tñuní ñáhá espíritú sá táxí tñuní yaú cùnú víhí, te espíritú-án nání-xí Àbadón tñuhu hèbreú, te tñuhu grégú nání-xí Àpoliòn, te ndi ndúú tñuhu-án quée-xí: Sá dánàa ñáyiú.

¹² Te tñundòho-a cuu-xi tñundòho díhna nuu, te vitna cùmání úú-gá.

¹³ Te espíritú cúú ìñú ní tíú-xi cútú néhé-xí. Te núu Yá Ndiòxí nùtní ìⁿ sá ní cuáha mee-ni díhúⁿ cuááⁿ núú sácòó sá ndúú tǎhú-gǎ, te ndi cùmí xíquí-xi xíndecu ìⁿ caa ndíquí, te ní tecú dóho-í ní cáháⁿ ìⁿ sá ní cáháⁿ nihnu ndi cùmí ndíquí-án. ¹⁴ Te sá càháⁿ nihnu ndíquí-án xǎhaⁿ-xi xii espíritú cúú ìñú sá ní tíú cútú-ǎn:

—Cuáháⁿ nandaxi-n ndí cùmí espíritú ndútú ndècu yúte càhnu nani Eúfratés — càhí sá càháⁿ-án xǎhaⁿ-xi xii espíritú-án.

¹⁵ Te sáta dúcáⁿ te ní nandáxí ndi cùmí cue espíritú-án cuèndá cahni-xi cuéhé víhí ñáyiú, te sa yatni dátaná cuádava ñáyiú xíndecu ñuyú cahni-xi, te ducaⁿ chi sa ndècu túha tñáhí cue espíritú-án ndétú-xí sàá òré, àdi nduu, àdi yóó, àdi cuáa ducaⁿ càda-xi cahni-xi ñáyiú. ¹⁶ Te ní xini-í nchaa cue sandàdú cùndíhi-xi xixóó-güedé cuáyú, te ní níhi-í tñuhu sá xínu úú cièndú mìl-lón-güedé.

¹⁷ Te duha xíndáa cue cuáyú-án ndíhi cue téé yòdo ñaha-án ní xini-í: Te cue téé-án yidúcuⁿ nuu ìⁿ sá yidúcuⁿnuu pèchú-güedé, te luha ticuèhé te luha cuìi datná cuìi andiu, te luha cuááⁿ, te nchaa cuáyú-án cáá díquí-güedi dátaná cáá díquí ndicaha, te yuhu-güedi quène ñuhú ndíhi

ñuhmá, ndíhi àzúfré nchicúⁿ ñuhu. ¹⁸ Te ío cuéhé ñáyiú ñuyú ní xíhí chi luha-ná te cudavá-yu ní xíhí sá cuèndá ñuhú-án ndíhi ñuhmá-án ndíhi àzúfré-án. ¹⁹ Te ndíhi núu lùhmá-güedi ndíhi yuhu-güedi dándoho-güedi ñáyiú, te núu lùhmá-güedi nèhe-xi díquí còó, te diu-ni dátaná cáá còó cáá níhí lùhmá-güedi.

²⁰ Te nchaa dava-gá ñáyiú ní cácu ñá túú ní xíhí núu ncháa tñundòho-án ñá túú ní cuìni-yu dàñá-yu ichi cuéhé ichi duha ndècú-yu, chi quide cahnu-ní-yu nchaa espíritú cùndíhi yucu ñávaha, ndíhi nchaa sá càhí-yu cùu ndiòxí ní cadúha cue téé ñuyú-a, te dava xíáⁿ ní cuáha mee-ni díhúⁿ cuááⁿ, te dava ní cuáha mee-ni díhúⁿ cuixíⁿ, te dava ní cuáha sá nání bròncé, te dava ní cuáha mee-ni yúú, te dava ní cuáha mee-ni yùtnu, te nchaa xíáⁿ ñá túú cùnuni núu-xi, te ni ñá túú tècú dóho-xi, te ni ñá ndácú-xí càca-xi. ²¹ Te ni sá sáhní tñahá-yu, te ni sá sáhní ndùu tñahá-yu, te ni sá ndècú-yu ichi díí ìní, te ni sá dúhú ndàchiuⁿ tñahá-yu ñá túú ní cuìni-yu dàñá-yu.

10

Èⁿ espíritú xínú cuèchi núu Yá Ndiòxí néhé-xí ìⁿ libré

¹ Te sáta dúcáⁿ te ní xini tucu-í ìⁿ espíritú cùnùu xinu cuechi núu Yá Ndiòxí ní quee-xi andiu, te yíhi-xi xití vícò cuànguee-xi ñuyú te ndáa díquí-xi ndècu ìⁿ cóó yáhn-chí, te núu-xi súúni chàhnchí dátaná chàhn-chí núu nchicanhii, te ndi ndúú díhíⁿ-xi càa datná cáá ítá ñuhú. ² Te nùndaha-xi ìⁿ libré líhli ní nandíca, te sáhá cùha-xi ní sani-xi núu ndute lámár, te sáhá dátani-xi ní sani-xi núu ñuhu yìhí. ³ Te espíritú-án níhi víhi ní cáháⁿ-xi, te ní quide-xi dátaná quidé ìⁿ ndicaha oré cànásaa-di, te òré ducaⁿ níhi víhi ní cáháⁿ-xi te úsá xito ní cáháⁿ ñuhú. ⁴ Te sáta ní yáha ní cáháⁿ ñuhú-án úsá xito, te chido tñuní-í ìⁿ núu tütú nàcuáa ní cáháⁿ-xi ni cùu, te mei òré-án ní tecú dóho-í ní cáháⁿ ìⁿ sá ní cáháⁿ andiu te càhí-xi:

—Vá chidó tñuní-n nàcuáa ní cáháⁿ ñuhú-án, iní mée-ní-n ná cùhuⁿ —duha càhí sá ní cáháⁿ-án.

⁵ Te espíritú sá nùtní ìⁿ xio sáhá-xi núu ndute lámár-án ndíhi ingá xio sáhá-xi núu ñuhu yìhí-án ní xini-í ní ndonehe-xi ndaha cùha-xi, ⁶ te càhí-xi:

—Yá Ndiöxí Yaá ndécú nchàa nduu nchaa quiú Yaá ní cadúha ñuyúú, ndihi andiu, ndihi lámár, ndihi nchaa sá ló, Yaá-án náhá ndáá-gá sá yúhú cáháⁿ ndáá-í, te vá cúyàa vihi ⁷ te cada-xi nchaa nàcuáa ndùu tnúhu ndùu yuhu ní cáháⁿ-gá, tnúhu ní xáhaⁿ-gá xii cue téé ní xinu cuechi núú-gá, cue téé ní xóo cáháⁿ tnúhu-gá ndéé sanaha, chi òré ná tiú espíritú cúú usá cútú néhé-xí, te òré-áⁿ cada-xi nchaa nàcuáa ndùu tnúhu ndùu yuhu sá ní xáhaⁿ-gá xii nchaa cue téé-án —duha cächí espíritú-án.

⁸ Te sáta dúcáⁿ te ní tecú tucu dóho-í ní cáháⁿ tucu sá ní cáháⁿ andiu-án, te cächí-xi xii-í:

—Cuàháⁿ te queheⁿ-n libré líhli sá ní nándicá nundàha espíritú-án, espíritú sá nútñí ìⁿ xio sáhá-xi núú ndute lámár, te ìⁿ xio sáhá-xi núú ñuhu yíchi —duha cächí sá ní cáháⁿ-áⁿ.

⁹ Te yúhú ní sáháⁿ-í núú ndécú espíritú-án xicáⁿ-í libré líhli néhe-xi-án, te ní cächí-xi:

—Iha te caxi-n, te cuvídí yuhu-n dàtná cuvídí òré xíhí-n ndúí ñúúú, dico xití-n chi cada úa-xi —cächí-xi.

¹⁰ Te ní queheⁿ-í libré líhli nundaha espíritú-án ní xexi-í, te yuhu-í ní quide vídí-xi dàtná vídí ndudí ñúúú, dico sáta ní ngava-xi xití-í te ní quide úa-xi. ¹¹ Te ní cächí tucu espíritú-án xii-í:

—Dacuití cáháⁿ tucu-ñ nàcuáa cächí Yá Ndiöxí cuèndá ñáyiu titní víhí nàcióⁿ, ndihi cuèndá ñáyiu titní víhí ñùú, ndihi cuèndá ñáyiu cáháⁿ ndí ðííⁿ ndí ðííⁿ núú tnúhu, ndihi cuèndá cue téé yíndaha ñáyiu.

11

Cuèndá úú cue téé cáháⁿ nàcuáa cächí Yá Ndiöxí

¹ Te ní níhí-í ìⁿ tnuyoo nàcuáa chicùhá-í ìⁿ sá chicùhá-í, te ní cáháⁿ ìⁿ sá ní cáháⁿ, te cächí-xi:

—Ndacuíñí te chicùhá-n vèhe Yá Ndiöxí, te chicùhá tucu-n núú sácódó sá ndúú tǎhú-gá, te cahu-n ná daha tnàhá ñáyiu chihnuh ñaha xii-gá xíndecu. ² Dico vá chicùhá-n ndàa quehé vehe-gá, chí xíaⁿ ní nduu cuèndá cue ñáyiu ñá túú cùu ñáyiu isráél, te ñáyiu-án nduu nuu-nǎ-yu núú ní cuu núú-gá, te cada-yu dàtná cächí iní méé-yu, te údíco úú yóó ducaⁿ càdá-yu. ³ Te yúhú tendaha-í úú tnàhá cue téé cáháⁿ yuhu-í nàcuáa cächí Yá Ndiöxí, te úxúú

cièndú únídico nduu ducaⁿ cáháⁿ-güedé yuhu-í cada-güedé núú-í, te cuihnu-güedé dóó tnúú sǎ sácuihnu cue ñáyiu ndihú iní-xi —duha cächí sá cáháⁿ-áⁿ.

⁴ Te ndi ndúú cue téé-án cúú-güedé dàtná úú yutnu òlívú sá xínutñí núú Yá Ndiöxí, ndihi dàtná úú sá ndéé dité-xi, sá yíndódo ìⁿ caa candíl núú dité-xi ndècu tucu núú-gá, te diu-gá cúú-gá Yaá yíndàha ñuyúú. ⁵ Te ñáyiu na càni iní-xi ná cada ñaha xii-güedé te yuhu-güedé quene ñuhú cahmi ñaha-xi xii-yu, te ducaⁿ càda-güedé cahni-güedé nchaa ñáyiu na cùu úhú iní ñáhá xii-güedé. ⁶ Te ndi ndúú-güedé ndécú ndihi-güedé tnúhu ndee iní cada-güedé sá vá cúúⁿ dàú, te ducaⁿ càda-güedé ñini cáháⁿ-güedé nàcuáa cächí Yá Ndiöxí, te ndacu-güedé nadatiu-güedé ndute nduu-xi níñí, te ndacu-güedé dandòho-güedé nchaa ñáyiu titní núú tnúhu ndòho, te ducaⁿ càda-güedé ná daha xito cächí iní méé-güedé. ⁷ Te ná yáha sá cáháⁿ-güedé nàcuáa ní cächí Yá Ndiöxí, te dàvá-án quene ìⁿ quití dééⁿ yàú cùnú víhí sǎ ò néhé cáá, te quití-án ngúíta-di nàà-di ndihi ndi ndúú cue téé-án te cahni ñaha-di xii-güedé. ⁸ Te yiqui cùnú cue téé-án cautùu-xi ìⁿ tnuú ñuu cǎhnú núu ní sahni-güedé Xítohó Jesucristú núú cùrúxí, te diu Yaá-án cúú Xítohó-ó ndihi-güedé, te cächí ñáyiu sá ñúú-án cúú-xí dàtná ñuu Sòdomá ndihi nàcióⁿ Ègíptú. ⁹ Te úní nduu dava cautùu yiqui cuñú-güedé xíaⁿ, te ñáyiu nchaa nàcióⁿ, ndihi ñáyiu nchaa ñuu, ndihi ñáyiu cáháⁿ ndí ðííⁿ ndí ðííⁿ núú tnúhu, ndihi ñáyiu xíndecu nchaa xichi quini-yu yiqui cùnú-güedé, te vá dàñǎ-yu nguíndüxi.

¹⁰ Te nchaa ñáyiu-án nduu vétú iní-yu sá dúcáⁿ cúú cue téé cáháⁿ nàcuáa cächí Yá Ndiöxí-án, te ío cudí iní-yu, te nándi sá cuàha táhú tnáhá-yu sá cudí iní-yu sá dúcáⁿ ní xíhí-güedé, te ducaⁿ chí diu-güedé ní quide ío ní ndohó-yu. ¹¹ Te sáta ná yǎhá úní nduu dava sá dúcáⁿ cùú-güedé te Yá Ndiöxí dandòto ñaha-gá xii-güedé, te ndacóo-güedé, te nchaa ñáyiu na quini sá ndótó-güedé te yúhú víhí-yu. ¹² Te ndi ndúú cue téé-án tecú dóho-güedé cáháⁿ ìⁿ sá cáháⁿ ndéé andiu, te cúñaha-xi xii-güedé:

—Chí táquene iha —duha cúñaha sá cáháⁿ-áⁿ xii-güedé.

Te cue tée-án quǎhu-güedé ìn xití vícò caa-güedé andiu, te nchaa ñáyiú cùu úhú iní ñáhá xii-güedé quini ñáhá-yu xii-güedé caa-güedé andiu. ¹³ Te òrè-án ñíhi víhi tnáa ñuyú, te úxí xichi cùu-xi ñuú núú cùndècu-güedé-án te ìn xichi ñuú-án naa, te cuú úsá mǐl ñáyiú, te nchaa dava-gá ñáyiú cácu vá cùu yùhú víhí-yu, te cachí-yu sá ìo càhnu cuu Yá Ndiòxí Yáa ndécú àndiu.

¹⁴ Te tnúndòho-a cuu-xi tnúndòho cuu úú yáha, te vitna sa ndètu víí-nà tucu sáa tnúndòho cuu uní.

Espiritú cuú usá ñuú-xi cútú néhé-xí

¹⁵ Te espíritu cuú usá ní tiú-xi cútú néhé-xí, te òrè-án ní tecú ñíhi ní cáháⁿ titní sá ní cáháⁿ andiu, te càchí-xi:

Nchaa sá cuú cuèndá nchaa ñáyiú ñuyú táxi tnùnì-yu ní cùu ní nduu cuèndá Tátá-ó Dútú Ndiòxí táxi tnùnì-gá, Te tnàhá Yáa ní tendaha-gá ní sáháⁿ ñuyú táxi tnùnì-gá nchaa xiáⁿ,

te diu-gá taxi tnùnì-gá ní caa ní quíhíⁿ.

Duha ní cáháⁿ nchaa sá ní cáháⁿ-án. ¹⁶ Te ndi òcò cùmí cue tée saçuéhé xìnucóo núú xilé váha ní ngúñi xití-güedé núú Yá Ndiòxí, te ní nuu núú-güedé ndaa núú ñúhú te ní ngúíta-güedé chíñùhu ñaha-güedé xii-gá, ¹⁷ te càchí-güedé:

Ío ndácáⁿ tǎhú-ndí núú yòhò Dútú Ndiòxí, Yáa ndácú quide nchaandi túhú sá váha, te diu-ni-n ndècu-n ndéé cúnàhá ní ngáva ñuyú, te diu-ni-n ndècu-n vitna, te diu-ni-n cùndecu-n ndéé núú cuaháⁿ núú véxi, te ío càhnu cuu-n te ní ngúíta-n ìo-gá táxi tnùnì-n.

¹⁸ Te nchaa ñáyiú xíndecu ñuyú xícudéèⁿ-yu núú-n,

te vitna ní sáa nduu dàndohó-n-yu chí ñá túú cùu váha iní-n nùú-yu,

te cada ndáá-n cuèchi nchaa ñáyiú sa ní xíhí,

te ní sáa tucu nduu cuañaha-n sá ndúú tǎhú nchaa ñáyiú ní xinu cuechi nùú-n ní cáháⁿ-yu tnúhu-n, ndíhi nchaa dava-gá ñáyiú cùu cuèndá-n, chí ñáyiú-án néhé-yu sá yíñùhu núú-n,

te cuèi ñáyiú cùnuu ndíhi ñáyiú ñá túú cùnuu cuañaha-n sá ndúú tǎhú-yu,

te ní sáa tucu nduu dànaa-n nchaa ñáyiú sàhni tnaha ñáyiú-xi.

Duha càchí ndi òcò cùmí cue tée sacuéhé-án xáhaⁿ-güedé xii Yá Ndiòxí.

¹⁹ Te ní xiní-í ní nacááⁿ yuyèhe vehe Yá Ndiòxí andiu, te xití vehe-gá-án ní xiní-í ndécú càjá ñúhú sá yódò tnùnì nàcuáa ní cundáa cada-gá sá cuú-xí ñáyiú, te òrè-án ní xiní-í ní sáa nduté, te ní cáháⁿ ñúhu te ío dusaⁿ ní quide-xi, te ñíhi víhi ní tnáa, te súuní càhnu dáú ñíhí ní cuuⁿ.

12

Cuèndá ìn ñadìhí ndíhi cuèndá ìn quiti dééⁿ nání dràgón

¹ Te ío víhi ní quide-xi ìn sá ní quide-xi andiu, te ní xiní-í ìn ñadìhí te dóo ñíhnu-án quide-xi datná quidé-xí núú nchìcanchii, te ndaa núú sàhá-aⁿ quide-xi datná quidé-xí núú yódò, te ñúhu ìn coroná díquí-aⁿ te ndèé úxúú chódíní. ² Te ñúhu déhe-aⁿ te càna saa-aⁿ sá quidé úhú ñáhá-xí xii-aⁿ chí sa ndètu víí-nà cacu déhe-aⁿ. ³ Te dàtnùnì ní quide tucu-xi sá ní quide-xi andiu, te ní xiní-í ìn quiti càhnu quiti tìcuehé, quiti dééⁿ nání dràgón, te ndèé úsá díquí-dí ndíhi úxí ndiquí-dí, te ìn caa coroná ñúhú ìn caa díquí-dí-án. ⁴ Te quiti-án luha-ná te cuu dava nchaa chódíní dǎngòyo-dí ñuyú ndíhi lúhmá-dí, te quiti-án ní ngúnu tní-dí núú ñaha ndètu víí-nà cacu déhe-xi-án cuèndá caxi-dí déhe-aⁿ òrè cacu ní cùu. ⁵ Te ñaha-án ní cacu déhe-aⁿ te tée cùu-dé, te té líhli-án ìo cumuu-dé taxi tnùnì-dé nchaa ñáyiú ñuyú, te mee Yá Ndiòxí ní nacuaca ñaha-gá xii té líhli-án cuèndá cundecu ndíhi ñaha-dé xii-gá núú ndécú-gá táxi tnùnì-gá.

⁶ Te ñadìhí-án ní xinu-aⁿ cuaháⁿ-aⁿ xití yucu núú ní quide túha Yá Ndiòxí cundecu-aⁿ cuèndá xiáⁿ ñíhí-aⁿ caxi-aⁿ, te ducaⁿ ñíhí-aⁿ sá cáxi-án úxúú cièndú únídico nduu chí ducaⁿ ndúu cundecu-aⁿ xiáⁿ.

⁷ Te sátá dúcáⁿ te andiu ní xiní-í espíritu cùnùu xinu cuechi núú Yá Ndiòxí nání Miguél, ndíhi nchaa dava-gá espíritu cùndíhi-xi, te nchaa espíritu-án nàa-xi ndíhi quiti dééⁿ nání dràgón ndíhi nchaa espíritu cùndíhi-dí. ⁸ Te quiti-án ñà túú ní ndàcu-dí ndíhi nchaa espíritu cùndíhi-dí, te ñá túú ní ñíhí-gá-dí núú cùndècu-dí andiu ndíhi nchaa espíritu cùndíhi-dí-án. ⁹ Te cue espíritu xínú cuèchi núú Yá Ndiòxí-án ní dǎngává-xí quiti dééⁿ nání dràgón-án ndíhi nchaa espíritu cùndíhi-dí

ñuyú, te quiti-án cúu-dí mèi sácufhná àdi sá càchí-ó cùu yucu ñávãha, te diu xiãⁿ ní dándàhú-xi ñáyiu nihí ñuyú, te diu-ni xiãⁿ ní nduu-xi cóó nĩ dándàhú-xi ñáyiu ndéé sanaha.

¹⁰ Te ní tecú dóho-í níhi ní cáháⁿ tucu ñⁿ sá nĩ cáháⁿ andiu, te càchí-xi:

—Vitna te Yá Ndiõxí ní quide-gá ní ngúndecu ñáyiu ndihi-gá, te ío càhnu cuu-gá, te ío tàxi tñuní-gá, te tñhá Crístú Yáá ní tendaha Yá Ndiõxí ní quixi ñuyú-a ío tàxi tñuní-gá, te ducaⁿ chí sa ní xócuñĩ sácufhná sã súúni núnúu sacáⁿ cuéchi núú Tátá-ó Dütú Ndiõxí cuendá nchaa ñáyiu ndéu ndihi-o ichi-gá, te nduu núú ducaⁿ sácáⁿ cuéchi-xi núú-gã cuendá-yu ni cùu. ¹¹ Dico ní ndacú-yu ní cunúu-yu núú sácufhná sã dúcáⁿ sácáⁿ cuéchi cuendá-yu-án ní cùu, te ducaⁿ nĩ cunúu-yu sá cuendá Yáá cáá dàtná cáá ñⁿ mbéé quiti ní dancuèhé-güedé, chí Yáá-án ní sati níñi-gã te ní xíhí-gá sá cuendá-yu, te ducaⁿ ní cunuu tucú-yu sá cuendá sá sãndáá iní ñáhã-yu xii Yáá-án, te ñã túú ní yuhú-yu cuú-yu sá cuendá-gã. ¹² Te vitna ío chí cúdí iní nchaa nchòhó espíritú xínú cuèchi núú Yá Ndiõxí, ndihi nchaa nchòhó ñáyiu ndéu andiu, dico ñndàhú ní cuu nchaa ñáyiu xíndecu nihí ñuyú! Chí súúni cudéⁿ sácufhná ní ngava-xi te nándi cada ñaha-xi xí-yu, te ducaⁿ chí cùnuní iní-xi sá sácú duha-ná nduu cudí-xi cundecu-xi —duha càchí sá nĩ cáháⁿ andiu.

¹³ Te sátá ní quee quiti dééⁿ nání dragón-án andiu ní ngava-di ñuyú quiti cùu mei sácufhná-án, te quiti-án ní chinchícúⁿ-di ñadhí ñaha ní cacu déhe téé-xi-án. ¹⁴ Te ñadhí-án ní nduu táhú-a ní quene úú ndíxí-aⁿ, te càa datná cáá ndíxíⁿ ñⁿ yacòlo cahnu vihi cuendá ndava-aⁿ nùhú-aⁿ yucu núú ní cachí Yá Ndiõxí cundecu-aⁿ, te yacáⁿ cundecu-aⁿ úní cuá dáva cuendá sá vã nihí ñáhã quiti dééⁿ quiti nání dragón-án te xiãⁿ nihí-aⁿ sá cáxi-án, te quiti-án cúu tucu-di datná ñⁿ cóó dééⁿ. ¹⁵ Te quiti-án ní quene cuéhé ndute yuhu-di, te ndute ní quene yuhu-di-án ní cuu-xi ñⁿ yúte, te ducaⁿ ní quide-di cuendá ndute-án cuido-xi ñadhí-án ní cùu. ¹⁶ Te ñuhu yichí ní chindee-xi ñadhí-án, chí ní ndátá te ní queé naa-ni ndute ní quene yuhu quiti-án. ¹⁷ Te sá dúcáⁿ ní quide-xi xiãⁿ ní cudééⁿ

víhí quiti-án núú ñadhí-án, te ní xica-di cuáhãⁿ-di núú xíndecu nchaa dava-gá cue déhe ñadhí-án cuendá nàà ndihi ñaha-di, te ñáyiu-án cúu-yu ñáyiu tñi nchaa tñuhu càháⁿ Yá Ndiõxí, te nchicúⁿ nihnú-yu nchaa tñuhu sá càháⁿ váha cuendá Xítohó Jesucristú.

13

Cuendá úú quiti

¹ Te yúhu ní ngúnu tñi-í yuhu lámár, te ní xini-í ní quene ñⁿ quiti te ndéé úsá díquí-di te úxí ndiqui-di, te núú ñⁿ ñⁿ ndiqui-di-án ndécú ñⁿ caa coroná. Te ñⁿ ñⁿ díquí-di-án ndéé tñuhu sá càháⁿ úhú-xi cuendá Yá Ndiõxí. ² Te quiti-án cáá-dí dàtná cáá cuñí, te sáhã-di càa datná cáá sáhã òso, te yuhu-di càa datná cáá yùhu ndicaha. Te quiti dééⁿ nání dragón ní sãñaha-di tñuhu ndee ìní xii quiti-án cuendá taxi tñuní víhí-dí, te dragón-án ní sãñaha-di núú ndécú-dí tàxi tñuní-di xii quiti ní quene xití lámár-án, te ducaⁿ ní quide-di cuendá sá nihí ndéé quiti-án cunuu-di. ³ Te ñⁿ díquí quiti ní quene xití lámár-án càhú víhí càa ní nicuèhé, te sa ndetu ví-ñã cuú-di sãnuu dico ní ndúha-di, te nihí ñuyú ní níhí ñáyiu tñuhu sá dúcáⁿ ní cuu, te ío ní cuñúhu-yu te ní tuhã-yu quiti-án. ⁴ Te nchaa ñáyiu-án ní cachí-yu sá ío càhnu cuu quiti dééⁿ quiti nání dragón-án cuendá sá ní sãñaha-di tñuhu ndee ìní sá táxi tñuní quiti ní quene xití lámár-án, te ní nguíta-yu ní chinuhú-yu quiti ní quene xití lámár-án, te càchí-yu:

—Vã yõo ñⁿ nütnahã ñáhã xii quiti-a, te ni vã yõo ñⁿ ndacu nàà ndihi ñaha xii-di —cachí-yu.

⁵ Te ní nihí-di tñuhu ndee ìní sá càháⁿ úhú-di Yá Ndiõxí, te cada càhnu-di mee-di, te údico úú yõo ducaⁿ ní nihí-di tñuhu ndee ìní-án cunuu-di. ⁶ Te ducaⁿ ní quide-di ní cáháⁿ úhú-di Yá Ndiõxí ndihi cuendá nchaa sá quidé-gã, te diu-ni ducaⁿ ní cáháⁿ úhú-di núú ndécú-gã, te ní cáháⁿ úhú tucu-di nchaa ñáyiu ndéu ndihi-gã andiu. ⁷ Te ducaⁿ ní nihí-di tñuhu ndee ìní sá nàa-di ndihi nchaa ñáyiu cùu cuendá Yá Ndiõxí, te ducaⁿ nàà ndihi ñaha-di xii-yu ndéé òré vã ndácú-gã-yu nàà ndihi ñáhã-yu xii-di, te tñhá ní ngúndecu ndihi-di tñuhu ndee ìní

sá táxi tnùnì-dì ñáiyu nchaa nàcióⁿ, ndihì ñáiyu nchaa ñúú, ndihì nchaa ñáiyu càháⁿ ndí dííⁿ ndí dííⁿ núú tnùhu, ndihì ñáiyu xìndecu nchaa xichì. ⁸ Te cue ñáiyu nihì ñuyúyú ní cachí-yu sá ïo càhnu cuu quiti-áⁿ, te ñáiyu-áⁿ cúú-yu ñáiyu ñá túú yòdo tnuní núú tùtú Yáá cáá dàtná cáá ìⁿ mbéé quiti ní dánicuehè-güedé Yáá ní xihí ní cùu te ní ndoto. Te ndéé cùtnàhá ní ngáva ñuyúyú sa yòdo tnuní ñáiyu nanhí tàhú, dico ñáiyu cächí sá ïo càhnu cuu quiti-áⁿ ñá túú yòdo tnuní-yu núú tùtú-gá.

⁹ Te nchaa nchòhó ñáiyu xìndedóho chí cùndedóho váha nchaa nàcuáa cuáháⁿ tnúhu-áⁿ. ¹⁰ Te nchaa ñáiyu na chihì tnaha ñáiyu-xi vecaá te sáá nduu te quihíⁿ-yu tnàhá-yu vecaá, te nchaa ñáiyu sàhni tnaha ñáiyu-xi ndihì yuchí te diu-ni ndihì yuchi cuú-yu tnàhá-yu, te xíáⁿ núú ío xini ñuhu-xi sá ncháá ñáiyu cùu cuendá Yá Ndiòxí cunduu càhnu iní-yu, te quindáá iní ñàhá-yu xii-gá.

¹¹ Te ní xini tucu-í ingá quiti ní quene-dì núú ñuhu yíchí, te ndèé úú ndiqui-dì te càa datná cáá ndiqui canerú, te càháⁿ-dì dàtná càháⁿ quiti dééⁿ nání dragón. ¹² Te dàtná ndécú ndihì quiti ní quene xití làmár-áⁿ tnùhu ndee iní sá táxi tnùnì-dì ducaⁿ ndècu ndihì quiti ní quene ñuhu yichí-áⁿ tnùhu ndee iní taxi tnùnì-dì cada-dì núú quiti ní quene xití làmár-áⁿ, te quiti ní quene ñuhu yichí-áⁿ ní quide yica-dí sá ncháá ñáiyu xìndecu nihì ñuyúyú chiñuhú-yu quiti ní quene xití làmár-áⁿ, quiti càhú víhí ní tnahá ní nìcuèhé te ní ndúha-dì. ¹³ Te quiti ní quene xití ñuhu yichí-áⁿ ní quide-dì titní núú sá vǎ yòo tnàhí ndàcu cada, te nchaa ñáiyu ní xini-yu sá ndèé andiu ní dǎngóyó-dí ñúhu ñuyúyú. ¹⁴ Te sá dúcáⁿ ní ngúndecu ndihì-dì tnùhu ndee iní ní quide-dì nchaa xíáⁿ ní quide-dì núú quiti ní quene xití làmár-áⁿ, te sá dúcáⁿ ní quide-dì te xíáⁿ ní dǎndàhú-dì nchaa ñáiyu xìndecu nihì ñuyúyú, te ní xáhaⁿ-dì xii-yu sá ndúcú-yu ìⁿ sá cǎdúha-yu nàcuáa-ni càa nacuáa-ni nduu quiti ní quene xití làmár-áⁿ, quiti càhú víhí ní tnahá ní nìcuèhé díquí-xi-áⁿ ní quée machití te ñá túú ní xihí-dì chí ní xìndecu-ni-dì. ¹⁵ Te quiti ní quene xití ñuhu yichí ní ngúndecu ndihì tucu-dì tnúhu ndee iní sá chíhí-dí iní sá ní cadúha-yu-áⁿ, sá

ní natavá-yu dàtná cáá quiti ní quene xití làmár-áⁿ, te ducaⁿ ní quide quiti-áⁿ cuendá càháⁿ sá ní cadúha-yu-áⁿ, te xíáⁿ cada-xi cuú nchaa ñáiyu ñá túú ní cuini chiñuhu ñaha xii-dì. ¹⁶ Te quiti ní quene xití ñuhu-áⁿ quidé-dí sá ncháá ñáiyu ngúndéé ìⁿ tnuní ndaha cùhá-yu àdi tneé-yu, te ducaⁿ ní quide-dì cuèi ñáiyu cùnnuu te cuèi ñáiyu ñá túú cùnnuu, te cuèi ñáiyu cuica te cuèi ñáiyu ndàhú, te cuèi ñáiyu ñá túú dàhá quee núú chíúⁿ patróóⁿ-xi, te cuèi nchaa ñáiyu dàhá quée núú chíúⁿ patróóⁿ-xi ncháa-yu ducaⁿ ní ngúndéé tnuní ñii-yu. ¹⁷ Te ní quide-dì sá ncháá ñáiyu ñá túú ndèé tnuní ñii-xi vǎ cúú cuááⁿ-yu sá cǎchí iní-yu te ni vǎ cúú dicó-yu ìⁿ sá cuini-yu dicó-yu, te tnuní-áⁿ cúú-xí diu quiti ní quene xití làmár-áⁿ àdi númerú-dì. ¹⁸ Te xini ñuhu-xi sá ncháá ñáiyu ío váha cùtnuní iní-xi ío váha cuáha-yu cuendá nàcuáa quée-xi númerú quiti-áⁿ, te númerú-áⁿ cúú-xí ñúú ciendú únídico ñúú, te cùu-xi cuendá ìⁿ ñáiyu ñuyúyú.

14

Cuendá ìⁿ ciendú údico cúmí mǐl ñáiyu

¹ Te sá tá dúcáⁿ te ní xini-í Yáá cáá dàtná cáá ìⁿ mbéé quiti ní dánicuehè-güedé nùtnii-gá ìⁿ yucu ñúú nání Sión ndécú àndiu, te nutnii-gá ndihì ìⁿ ciendú údico cúmí mǐl ñáiyu, te tneé-yu ndèé diu-gá ndihì diu tátá-gǎ Dútú Ndiòxí. ² Te ní tecú dóho-í ní quide-xi andiu dàtná quidé-xi núú xíca cuèhé víhí ndüte, te quide tucu-xi datná quidé-xi òré ñhi víhí caháⁿ ñuhu, te quide tucu-xi datná quidé-xi òré cuèhé víhí ñáiyu cǎn-yu àrpá. ³ Te ní tecú dóho-í xixita yuhu sá xitá yùhu núú Yáá núcco núú xilé váha, ndihì núú ndí cúmí cue quiti xnutnii-áⁿ, ndihì núú ncháa cue tée cùu sacuéhé xincúco-áⁿ, te xixita-xi ìⁿ ndudú sáá. Te mee-ni cuè ñáiyu ìⁿ ciendú údico cúmí mǐl-áⁿ quée díquí-yu ndudú-áⁿ, te ñáiyu-áⁿ cúú-yu ñáiyu ní dǎcǎcu nihnu ñaha Yáá cáá dàtná cáá ìⁿ mbéé quiti ní dánicuehè-güedé núú ñáiyu ndècu ichi cuèhé ichi duha xìndecu ñuyúyú, te vǎ yòo ìⁿ-gǎ quée díquí-xi ndudú sáá-áⁿ chí mee-ni ñáiyu ní cǎcu nihnu-áⁿ quée díquí-yu. ⁴ Te ñáiyu ní cǎcu nihnu-áⁿ cúú-yu ñáiyu ñá túú ní xìndecu ichi díí iní,

te cùu-yu ñáyiú cándoo canine iní-xi, te ndèni ní cuu cuáháⁿ Yaá cáá dàtná cáá ìⁿ mbéé quiti ní nícuèhé-áⁿ, te ducaⁿ-ni ndèn-daha ñàhá-yu xii-gá cuáháⁿ, te ñáyiú-áⁿ ní cácu nihnú-yu núú nchàa ñáyiú ñuyíú, ñáyiú ndècu ichi cuèhé ichi duha, te ñáyiú ní cácu nihnu-áⁿ cùu-yu ñáyiú díhna nuu ní nduu táhú Yá Ndiòxí cuu cuèndá-gá ndíhi Yaá cáá dàtná cáá ìⁿ mbéé quiti ní dánícuèhé-güedé. ⁵Te cùu-yu ñáyiú ñá túú càháⁿ ni ìⁿ tñúhu ndehnde, te cándoo canine iní-yu ndècú-yu núú núccó Yá Ndiòxí táxi tñuní-gá.

Cuèndá úní cue espíritú xínú cuèchi núú Yá Ndiòxí

⁶Te sáta dúcáⁿ te ní xini-í ìⁿ espíritú xínú cuèchi núú Yá Ndiòxí xícó-xí cuádava andíu, te ndècu ndíhi-xi tñúhu sá càháⁿ nàcuáa naníhi tãhú-ó, tñúhu sá ñá túú tñàhi ndíhi nihnu te tñúhu-áⁿ danèhé espíritú-aⁿ nchaa ñáyiú ndècu ñuyíú, ñáyiú nchaa nàcióⁿ, ndíhi ñáyiú nchaa ñúú, ndíhi nchaa ñáyiú càháⁿ ndí dííⁿ ndí dííⁿ núú tñúhu, ndíhi ñáyiú xíndecu nchaa xichi. ⁷Te níhi ní càháⁿ-xi te càchí-xi:

—Nchaa nchòhó ñáyiú ndècu ñuyíú canehe-ndo sã yíñúhu núú Yá Ndiòxí, te cachí-ndó sã ìo càhnu cuu-gá chi sa ní sáá nduu càda ndáá-gá nchaa cuèchi-ndo, te chiñuhu-ndo-gá chi diu-gá ní cadúha-gá andíu, ndíhi ñuhu yíchi, ndíhi lámár, ndíhi nchaa ndóhoyo —duha càchí espíritú-áⁿ.

⁸Te nchícúⁿ tucu ingá espíritú xínú cuèchi núú Yá Ndiòxí, te càchí-xi:

—Vitna ní naa ñúú Babilonía ñúú ìo cùnuu, te ducaⁿ ní naa chi cue ñáyiú ñúú-áⁿ ní quidé-yu ní xita nihnu nchaa ñáyiú nihí ñuyíú, chi ní sanu ichi ñàhá-yu ichi cuèhé ichi duha —duha càchí espíritú-áⁿ.

⁹Te nchícúⁿ tucu ingá espíritú xínú cuèchi núú Yá Ndiòxí te níhi càháⁿ-xi, te càchí-xi:

—Nchaa ñáyiú chiñuhu ñaha xii quiti ní quene xití lámár, ndíhi sá ní natava ñàhá-yu nàcuáa càa-dí-áⁿ, ñáyiú ní dáñá mèe-xi ní ngúndéé tñuní ndahá-yu àdi tneé-yu, ¹⁰ñáyiú-áⁿ súúni dándoho ñaha Yá Ndiòxí xii-yu chí ìo cùdèéⁿ-gá, te ducaⁿ ìo dandòho ñaha-gá xii-yu chí daquìhíⁿ ñàhá-gá xii-yu núú ñùhu núú ñúhú àzufré càyú-xi, te núú cuè espíritú xínú cuèchi núú-gá ducaⁿ dándoho ñaha-gá xii-yu,

ndíhi núú Yàá cáá dàtná cáá ìⁿ mbéé quiti ní dánícuèhé-güedé. ¹¹Te ní caa ní quíhíⁿ quene ñúhmá núú dúcáⁿ cùndecú-yu ndohó-yu-áⁿ, te cuèi nduu cuèi níú ducaⁿ ndòhó-yu. Te ducaⁿ ndòho nchaa ñáyiú chiñuhu ñaha xii quiti ní quene xití lámár, ndíhi sá ní natava ñàhá-yu nàcuáa càa-dí-áⁿ, te diu-ni ñáyiú-áⁿ cùu-yu ñáyiú ní ngúndéé tñuní ndaha-xi àdi tneé-xi —duha càchí espíritú-áⁿ.

¹²Te xíáⁿ xíní ñùhu-xi sá ncháá ñáyiú cùu cuèndá Yá Ndiòxí cunduu càhnu iní-yu, chí diu-ní-yu cùu-yu ñáyiú tñàhi nchaa tñúhu càháⁿ-gá, te ní yùhu ní iní-yu sàndáá iní-yu Xítohó Jesucristú.

¹³Te sáta dúcáⁿ te ní tecú dóho-í ní càháⁿ ìⁿ sá ní càháⁿ andíu, te càchí-xi:

—Chido tñuní-n ìⁿ núú tütú nàcuáa na càháⁿ-í-a. “Není vitna ìo váha táhú nchaa ñáyiú sàndáá iní tñúhu Xítohó Jesucristú te xihí-yu” —duha càchí sá ní càháⁿ-áⁿ.

Te Espíritú Yá Ndiòxí ní càháⁿ-xi, te càchí-xi:

—Ndáá, chi ndetatú-yu chí ñá túú-gá nágá chiúⁿ ndohó-yu cadá-yu, te Yá Ndiòxí sa ñaha-gá nchaa nàcuáa nduu chiúⁿ ní quidé-yu —duha càchí Espíritú-gá.

Nchaa sá cùú núú ñúhú

¹⁴Te sáta dúcáⁿ te dātñuní ní xini-í ìⁿ vícò cùixíⁿ, te núú vícò-áⁿ ní xini-í núccó ìⁿ Yaá, te càa-gá dàtná cáá ìⁿ tée ñuyíú, te díquí-gá ñúhú ìⁿ coroná ní cuáha mee-ni díhúⁿ cuááⁿ, te nùndaha-gá ìⁿ yuchí ndíquí te súúni dèéⁿ. ¹⁵Te ní xini-í ìⁿ espíritú xínú cuèchi núú Yá Ndiòxí ní quee-xi xití vehe-gá, te níhi ní càháⁿ-xi xàháⁿ-xi xii Yaá núccó núú vícò-áⁿ:

—Sa ní cuu nàquehndé-n nchàa sá ní cuu ñuyíú ndíhi yuchí ndíquí-n, chí sa ní cuu núcóo tñaha-xi —duha càchí espíritú-áⁿ xàháⁿ-xi xii Yaá-áⁿ.

¹⁶Te Yáá núccó núú vícò-áⁿ ní dáyàha ndodo-gá yuchí ndíquí-gá núú ñuyíú ní nataxi tñaha-gá nchaa sá ní cuu.

¹⁷Te ní xini tucu-í ingá espíritú xínú cuèchi núú Yá Ndiòxí ní quee-xi xití vehe-gá sá cáá andíu, te nùndaha-xi tñahá-xi ìⁿ yuchí ndíquí dèéⁿ. ¹⁸Te ní xini tucu-í ní quee tucu ingá espíritú xínú cuèchi núú Yá Ndiòxí núú nùtñhí núú sácódo sã ndúú táhú-gá, te ndècu ndíhi-xi tñúhu ndee iní táxi tñuní-xi ñùhu,

te espíritú-án n̄hi ní cáháⁿ-xi x̄háⁿ-xi x̄i
espíritú néhé yùchí ndíquí d̄éⁿ-án:

—Ngüíta naquehndé-n nd̄hi yuchí
ndíquí-n nd̄hé yoho yàha stilé sá ìo
ñuyú chi sa ní cuu n̄tehndé —duha càchí
espíritú-án x̄háⁿ-xi x̄i espíritú néhé yùchí
ndíquí-ǎⁿ.

¹⁹ Te espíritú néhé yùchí ndíquí-ǎⁿ n̄
dáyàha ndodo-xi yuchí ndíquí-xí n̄ú ñuyú
n̄ n̄aquehndé-xi nchaa ndéhé yoho yàha
stilé, te ní chihí-xi ìⁿ xichí n̄ú ní chihí-xi
cuèndá xíáⁿ quihni-xi quee ndudí-xi, te sá
dúcáⁿ ní quide-xi xíáⁿ cútñuní iní-ó sá ìo
cùdéeⁿ Yá Ndiòxí n̄ú ñayiu ñuyú. ²⁰ Te
ndéhé yoho yàha stilé-án n̄ quihni-xi ìⁿ
xio yuhu ñúú, te ndudí ndéhé yoho yàha
stilé-án n̄ nduu-xi níñí te ní quee-xi n̄ú
quíhni ñihnu espíritú-án. Te úní cièndú m̄l
m̄étrú ní xica níñí-ǎⁿ, te dàtná ìⁿ m̄étrú
dava ní sáá cuehnu níñí-ǎⁿ n̄ xica-xi.

15

Usá tnúndòho

¹ Te ìo vihi ní quide-xi ìⁿ sá n̄ quide-xi
and̄iu te ní cuñúhu vihi-í, te ní xiní-í
úsá tñàhá espíritú xínú cuèchi n̄ú Yá
Ndiòxí, te ìⁿ ìⁿ cue espíritú-án ndécú
nd̄hi-xi tñúhu ndee iní dandòho-xi ñayiu
ñuyú, te nà yáha nchaa tnúndòho-án, te
vá cùdéeⁿ-gǎ Yá Ndiòxí n̄ú-yu d̄andoho
ñaha-gǎ xíi-yu.

² Te ní xiní-í ìⁿ làmár te ndute làmár-án
cáá dàtná cáá v̄driú, te d̄acánuu-xi nd̄hi
ñuhú, te yuhu làmár-án x̄inutñí nchaa
ñayiu ní ndacu ní dáquée tíhú ñàhá x̄i quiti
ní quene x̄ití làmár-án, te ducaⁿ n̄ ndacú-yu
ní dáquée tíhú-yu sá n̄ natava ñàhá-yu
n̄acuáa càa-dí-án, te ducaⁿ n̄ ndacu tucú-yu
ní dáquée tíhú tucú-yu n̄umerú-dí sá cùú
d̄àtná d̄iu-dí, te nchaa ñayiu-án n̄ nduu
táhú-yu n̄ú Yá Ndiòxí àrpá x̄nehé-yu
cuèndá caní-yu. ³ Te x̄ixitá-yu ndudú sá ní
xita ndí Moisés ndí ní xinu cuèchi n̄ú
Yá Ndiòxí ndéé sanaha, te x̄ita tucú-yu
ndudú Yá cáá dàtná cáá ìⁿ mbéé quiti ní
d̄an̄icuehé-güedé, te càchí-yu:

Yòhò Dútú Ndiòxí ìo càhnu cuu-n, chi
quide-n nchaa sá v̄ yò tñàhí
ndàcu cada,
te cùu-n Yá ndácú quide nchaandí túhú sá
v̄aha,

te ìo ndáá quidé-n te ìo ndáá càháⁿ-n, te
ȳndaha-n nchaa ñayiu ñihí ñuyú.

⁴ Te nchaa ñayiu nèhé-yu sá ȳñùhu n̄ú-n,
te nchaa-yu càchí-yu sá ìo càhnu cuu-n,
chi ìⁿ d̄ii díi-ni yòhò cùú-n Yáá ìo v̄aha
quide ndáá,
te nchaa ñayiu ñihí ñuyú natacá-yu
chíñuhu ñàhá-yu xii-n,
te ducaⁿ càdá-yu chi ndèhé-yu nchaa sá
v̄aha quide-n.
Duha càchí ñayiu-án x̄ixitá-yu.

⁵ Te sáta dúcáⁿ te ní xiní-í ní nacaáⁿ
yuyèhe vehe Yá Ndiòxí and̄iu, te x̄ití
vehe-gǎ-án ndécú sá ndéè tñúhu-gǎ. ⁶ Te
x̄ití vehe-gǎ-án n̄ quee úsá tñàhá espíritú
xínú cuèchi n̄ú-gǎ, te ìⁿ ìⁿ-xi ndècu
nd̄hi-xi tñúhu ndee iní dandòho-xi ñayiu,
te x̄ix̄ihnu-xi mee-ni d̄òó v̄aha, te súuní
v̄aha càndoo, te chàhnc̄hí, te ȳidúcúⁿnuu
cinchú ní cuáha mee-ni d̄ihúⁿ cuááⁿ pèchú
ndí ùsá cue espíritú-án. ⁷ Te ìⁿ quiti cùmí
x̄inutñí n̄ú n̄utñí x̄ilè v̄aha ní sáñaha-dí
ìⁿ caa sá nàhá tícùú ní cuáha mee-ñi d̄ihúⁿ
cuááⁿ xii ìⁿ ìⁿ espíritú-án, te x̄ití nchaa
tícùú-án ñúhú ìⁿ sá ñúhú te x̄iáⁿ cútñuní
sá Yá Ndiòxí dandòho-gǎ ñayiu ñuyú, te
d̄iu-gǎ cùú-gǎ Yáá ndécú nchaa nduu nchaa
quíú. ⁸ Te x̄ití vehe-gǎ-án n̄ chítú ñúhmá, te
ducaⁿ n̄ quide-gǎ cuèndá cútñuní iní ñayiu
sá ìo càhnu cuu-gǎ táxi tñuní-gǎ, te v̄a yò
ìⁿ cuu quíhu x̄ití vehe-gǎ-án ndéè nd̄hi ndí
úsá tnúndòho cada ndí usá cue espíritú-án
ñuyú.

16

Tnúndòho cada-xi ñuyú

¹ Te sáta dúcáⁿ te ní t̄ecú dóho-í ñhi ní
cáháⁿ ìⁿ sá n̄ cáháⁿ x̄ití vehe Yá Ndiòxí, te
x̄háⁿ-xi x̄i ndí usá cue espíritú-án:

—Chí cuáháⁿ coyo-ndo sá ñúhú x̄ití
nchaa tícùú néhé-ndó-ǎⁿ n̄ú ñuyú, chi
sá ñúhú-ǎⁿ cùú-xí tnúndòho tendaha Yá
Ndiòxí sá cùú-xí nchaa ñayiu ñuyú —duha
càchí sá càháⁿ-án.

² Te espíritú d̄ihna ní sáháⁿ-xi ní coyo-xi
sá ñúhú x̄ití tícùú néhé-xí-ǎⁿ ñuyú, te
nchaa ñayiu ñuhu tñuní quiti ní quene
x̄ití làmár ñayiu ní chíñuhu sá ní natava
ñàhá-yu xii-dí, nchaa ñayiu-án n̄ quené-yu
nd̄ihyí t̄èhyú te súuní d̄andoho ñaha-xi
xíi-yu.

³Te espíritú cúú ùú ní coyo-xi sá ñúhú xítí tícúú néhé-xí núú lámár, te ndute lámár-án ní nduu-xi nííí te càa-xi datná cáá ñííí ñáiyu sa ní xíhí, te nchaa quítí ñúhu xítí lámár-án ní xíhí-güedi.

⁴Te espíritú cúú ùní ní coyo-xi sá ñúhú xítí tícúú néhé-xí nchàa yúte ndíhi nchaa núú quénihni ndute, te ndute nchaa yúte-án ndíhi nchaa ndute quénihni-án ní nduu-xi nííí. ⁵Te sátá dúcáⁿ te ní tecú dóho-í ní cáháⁿ ìⁿ espíritú xínú cuèchi núú Yá Ndiòxí, espíritú yíndàha ndute, te xàhaⁿ-xi xii Yá Ndiòxí:

—Yòhó Dútú Ndiòxí cúú-n Yáá quidé ndáá cuítí núú duha quide-n tendaha-n tnúndòho-a, te diu-ni-n cùu-n Yáá ndécú ndéé cútñàhá ní ngáva ñuyúú, te diu-ni-n cùu-n Yáá ndécú vitna te ñá túú tnàhí cuèchi-n. ⁶Chi cue ñáiyu ñuyúú ní dácácá-yu nííí nchaa ñáiyu ní cáháⁿ tnúhu-n ndíhi nchaa dava-gá ñáiyu cùu cuendá-n, te ní sahní-yu nchaa ñáiyu-án, te vitna ní dátíú-n ndùte ní nduu-xi nííí te ducaⁿ-ni càa ndute-án xíhí-yu, te ducaⁿ tàú-xi ndohó-yu cuendá sá ní sahní-yu cue ñáiyu cùu cuendá-n —duha càchí espíritú-án xàhaⁿ-xi xii-gá.

⁷Te ní tecú tuçu dóho-í ní cáháⁿ ìⁿ sá ní cáháⁿ núú nùtní núú sácódó sá ndúú táhú Yá Ndiòxí, te xàhaⁿ-xi xii-gá:

—Ndáá sá yòhó Dútú Ndiòxí Yáá ndácú quide nchaandi túhú sá vâha dândòho-n ñáiyu nàcuáa táú-xi cunduu —duha càchí sá càháⁿ-án xàhaⁿ-xi xii-gá.

⁸Te espíritú cúú cùmí ní coyo-xi sá ñúhú xítí tícúú néhé-xí núú nchíanchii cuendá nchíanchii-án cahmi-xi nchaa ñáiyu ñuyúú. ⁹Te nchaa-yu ní ndoho vihí-yu ní cáyú-yu, te cuèí ducaⁿ ní ndohó-yu dico ñá túú ní cuiní-yu ndixi cuèchi iní-yu cuendá nchaa sá ñá túú vâha quidé-yu, te ní ñá túú ní càchí-yu sá ío càhnu cuu Yá Ndiòxí chi da ní cáháⁿ úhú-yu cuendá-gá, te diu-gá cúú-gá Yáá ducaⁿ ní tendaha tnúndòho-án sá cúú-xí-yu.

¹⁰Te espíritú cúú úhúⁿ ní coyo-xi sá ñúhú xítí tícúú néhé-xí núú ndécú quítí ní quene xítí lámár-án táxí tnùn-dí, te nchaa núú táxí tnùn-dí ní cuu nee, te nchaa ñáiyu ñuyúú ndéé yàá-ná-yu nàcaxi nihnú-yu sá ndòhò-yu. ¹¹Dico ní dùcaⁿ ñá túú ní cuiní-yu dàñá-yu ní ìⁿ sá cuèhé sá dúhá

quidé-yu, chi da ní cáháⁿ úhú-yu cuendá Yá Ndiòxí Yáá ndécú àndiu sá cuendá sá dándòho ñaha ndíhiyí tèhyú ndéé-yu-án ndíhi nchaa dava-gá sá yâha-yu.

¹²Te espíritú cúú ìnú ní coyo-xi sá ñúhú xítí tícúú néhé-xí xítí yúte càhnu nani Eúfratés, te ndute yúte-án ní yíchí cuendá yâha cue téé yíndaha ñáiyu xíndecu ndàa xio nacuáa quène nchíanchii.

¹³Te ní xini-í ní quee ìⁿ espíritú cùndíhi yucu ñávâha yuhu quítí dééⁿ nání dragón, te ní xini tucu-í ní quee tucu íngá espíritú cùndíhi yucu ñávâha yuhu quítí ní quene xítí lámár, te ní xini tucu-í ní quee tucu íngá espíritú cùndíhi yucu ñávâha yuhu téé dándahú ñáiyu càchí sá càháⁿ tnúhu Yá Ndiòxí te ñá ndáa, te ndi nùní espíritú-án xíndáa-xi dàtná cáá làhvá. ¹⁴Te ndi nùní espíritú-án quidé-xí sá vâ yòo tnàhí ndacu cada, te xica datacá-xi nchaa cue téé yíndaha ñaha xii ñáiyu xíndecu nihíí ñuyúú cuendá nàá-güedé mei ndúu cachí Yá Ndiòxí coo tnúndòho cahnu vihi-gá, te diu mee Yá Ndiòxí cúú-gá Yáá ío càhnu cuu. ¹⁵Te Yáá cúú Xitohó-ó ní càchí-gá: “Cunaha-ndo chi nduu ñá túú yìhi iní-ndó quixi-í núú ndécú-ndó, te cada-í dàtná quidé ñàdúhú. Te vâha táhú nchaa nchòhó ñáiyu xíndecu túha, chi cùu-ndo datná cue ñáiyu xíndecu túha xíxíhnu-ni dóo-xi cuendá sá vâ cúcàhaⁿ núú-yu dàtná cúcàhaⁿ núú cuè ñáiyu ñá túú nihnu dóo-xi, te duha càháⁿ-í cuendá sá nchòhó cundecu túha-ndo òré quexio-í”, duha càchí-gá. ¹⁶Te ndi nùní cue espíritú cùndíhi yucu ñávâha-án ní dátacá-xi nchaa cue téé yíndaha ñaha xii ñáiyu, te ní taxi ndecu ñaha-xi ìⁿ xichi núú nání Àrmagedón, duha nani xíáⁿ tnúhu hèbreú.

¹⁷Te espíritú cúú ùsá ní coyo-xi sá ñúhú xítí tícúú néhé-xí núú tàchí, te ní tecú dóho-í ñíhí ní cáháⁿ Yáá núcóo núú xilé vâha xítí vehe-gá, te càchí-gá:

—Xéhé-nâ cùmání te xínu cava nchaa tnúndòho tnúhu ndàhú —duha càchí-gá.

¹⁸Te sátá dúcáⁿ te ní sáá ndúté te ní cáháⁿ ñúhu, te súní dusaⁿ ní quide-xi, te níhi vihí ní tnáa ñuyúú, te ndéé cútñàhá ní ngúndecu ñáiyu ñuyúú te vátá ìⁿ xitò-gá níhi tnáa dàtná ní quide-xi. ¹⁹Te ñúú càhnú ío cùnuu nani Babiloniá ní quée dava-xi ní cuu-xi úní

xichi, te nchaa ñuú cáá ñihíí ñuyúú nǐ ngoyo nchaa vehe, chi Yá Ndióxi ní ndacu iní-gá nchaa sá cuèhé sá dúhá quide nchaa ñáyiú ñuú Babiloniá-án, te ducaⁿ nǐ quide ñaha-gǎ xíi-yu chi ío cùdéeⁿ-gǎ núú-yu. ²⁰ Te nchaa tindúú nǐ ndónúhú-xí cuèí nchaa tindúú ñuhu yìchí ndécú xití làmár. ²¹ Te ní xiní-í ní cuuⁿ ñiñi nàhnu vihi ní ngaundodo-xi cue ñáyiú ñuyúú, te nchaa ñiñi-án vée-xi dàtná údico kíluú, te cue ñáyiú ñuyúú ní cáháⁿ úhú-yu cuendá Yá Ndióxi sá dúcáⁿ nǐ dácúúⁿ-gǎ ñiñi nàhnu vihi-án, chi ní cuu-xi ñiⁿ tnúndòho cahnu vihi sá cúú-xí-yu.

17

Ñadìhí ndécú ichi ðíí ìní

¹ Te núú ùsá espíritú néhé tícúú-án, te ñiⁿ-xi ní quixi-xi núú ndécú-í, te càchí-xi xii-í:

—Néhe ná quíhíⁿ-ó dānehé ñàhà-í xii-n nchàa tnúndòho sá ndóhó ñadìhí ñaha ndècu ichi ðíí ìní, te ñaha-án cúnúu-aⁿ nucóo-aⁿ núú ñúhú vihi ndute. ² Te ñaha-án ndécú ðíí ìní-aⁿ ndihi nchaa cue téé yindaha ñaha xii ñáyiú xindecu ñihí ñuyúú, te nchaa dava-gǎ ñáyiú ñuyúú ló ìní-yu nchìcúⁿ nihnú-yu quidé-yu nchaa nàcuáa quide ñaha-án —duha càchí espíritú-án.

³ Te óré ducaⁿ quide ñaha Espíritú Yá Ndióxi xii-í nàcuáa càchí ìní-xi, te ñiⁿ espíritú xínú cuèchí núú-gǎ ndécá ñaha-xi xii-í cuáháⁿ ñiⁿ xití yucu, te xití yucu-án ní xiní-í ñiⁿ ñadìhí yódó-án ñiⁿ quiti ticuehé, te ndèé úsá díquí-di te úxí ndiqui-di, te ñihí-di ndèé tnuní-di mee-ni tnúhu sá cáháⁿ úhú cuendá Yá Ndióxi. ⁴ Te ñadìhí-án nihnú-án dóó murádú ndihi dóó tícuèhé, te mee-ni sǎ ní cuáha díhúⁿ cuááⁿ, ndihi yúú vǎha sá nání pèrlá, ndihi nchaa dava-gǎ núú yúú vǎha, mee-ni nchàa xiǎⁿ ní cuáha sá yíhí lóho-aⁿ, ndihi sá ñúhú dúcúⁿ-aⁿ, ndihi sá ñúhú dúcúⁿ ndáhá-án, te nùndaha-aⁿ ñiⁿ tícúú ní cuáha mee-ni díhúⁿ cuááⁿ te ñuhu mee-ni sá cuèhé sá dúhá, te xiǎⁿ cútñuní ìní-ó sǎ cúú-án ñiⁿ ñadìhí ñaha ndècu ichi cuèhé ichi duha. ⁵ Te tneé-aⁿ ndèé tnuní ñiⁿ tnúhu, te càchí-xi: “Ñuú Babiloniá ñuú ío cúnúu, cada ìní-ndó sǎ cúú-xí mèi ñadìhí-a, te díu ñadìhí-a cùú-aⁿ ñaha sanu ichi ñaha xii nchaa ñáyiú ðihí ñáyiú ndècu ichi ðíí ìní, te nándi-gǎ nchaa sá cuèhé sá dúhá sànu ichi-aⁿ nchaa ñáyiú cadá-yu”, duha cáháⁿ tnúhu ndèé tnuní tneé ñadìhí-án.

Te vá yóo tècú tnùní ná cuendá ducaⁿ càháⁿ tnúhu-án. ⁶ Te ní cútñuní ìní-í sǎ díú ñaha-án ní dácáca-án ñiñi ñáyiú cùu cuendá Yá Ndióxi ní sahni ñaha-aⁿ xii-yu, te ñáyiú ní xihí-án cúú-yu ñáyiú ní cáháⁿ vǎha cuendá Xítóhó Jesucristú, te sá dúcáⁿ ní quide-aⁿ te ní nduu-aⁿ dàtná ñiⁿ ñáyiú quíhu. Te ío ní cuñúhu-í sǎ dúcáⁿ ní cuu ní xiní-í. ⁷ Te sáta dúcáⁿ te espíritú xínú cuèchí núú Yá Ndióxi-án càchí tucu-xi xii-í:

—Vá ndèé dúcáⁿ cùnúhu-n, chi vitna na càchí tnúhu-í xii-n nàcuáa quèe-xi cuendá quiti ndèé úsá díquí-xi ndihi úxí ndiqui-xi-án, ndihi nàcuáa quèe-xi cuendá ñadìhí ñaha yódo ñaha xii-di-án. ⁸ Te quiti ní xiní-n-án cúú-dí ñiⁿ quiti sa ní xindecu te vitna ñá túú-gǎ-di ndècu, te sáá nduu te quene-dí yaú cúnú vihi sǎ ío nèhé cáá, te dàtnuní sáá nduu te quíhíⁿ-di núú úhú núú ndàhú ní caa ní quíhíⁿ, te cue ñáyiú xindecu ñuyúú cuñúhu vihi-yu quiti-án chi cùu-di ñiⁿ quiti sa ní xindecu ní cùu te sáá nduu cùndecu tucu-di, te ñáyiú ducaⁿ cùnúhu ñaha xii-di-án ñà túú yódo tnuní-yu núú tútú núú yódó tnùní cue ñáyiú naníhí tàhú, chi ndèé cútñahá vátá ngǎva-gǎ ñuyúú ducaⁿ sa yódo tnuní cue ñáyiú naníhí tàhú.

⁹ Te nchaa ñáyiú tècú tnùní xini ñuhu-xi cani vǎha ìní-yu cuendá tnúhu-a. Te ndi ùsá díquí quiti-án cada ìní-ó sǎ cúú-xí ùsá tíndúú núú núcóo ñadìhí-án. ¹⁰ Te ndi ùsá díquí quiti-án cada ìní-ó sǎ cúú-xí ùsá tnàhá cue téé yindaha ñaha xii ñáyiú, te úhúⁿ cue téé-án ñà túú-gǎ cúnúu-güedé vitna, te ñiⁿ téé-án cúnúu-dé vitna te ingá-dé vátá sáá-gǎ nduu cúnúu-dé, te na sáá nduu dúcáⁿ cunuú-dé te sacú-ni nduu cunuú-dé. ¹¹ Te quiti ní xindecu ní cùu te ñà túú-gǎ-di ndècu vitna, cùu-di dàtná téé cùu uná yindaha ñaha xii ñáyiú, te ñiⁿ-ni cùu-di ndihi cue téé úsá yindaha ñáyiú-án, te quiti-án sáá nduu cuíta nihnu-di quíhíⁿ-di núú úhú núú ndàhú ní caa ní quíhíⁿ.

¹² Te ndi úxí ndiqui quiti-án cada ìní-n sǎ cúú-xí úxí tnàhá cue téé quindaha ñaha xii ñáyiú, dico vátá sáá-gǎ nduu cúnúu-güedé quindaha ñaha-güedé xii-yu. Te cue téé-án ñihí-güedé tnúhu ndee ìní taxi tnùní-güedé ndihi quiti-án, dico tnaa-ni taxi tnùní-güedé ndihi quiti-án. ¹³ Te ndi úxí cue téé-án cuu ñiⁿnuu-güedé

taxi tnùní-güedé, te chindee-güedé quiti-án cuèndá cuu ìḡḡuu-güedé ndihí-di cuèndá taxi tnùní-gá-di. ¹⁴ Te cue téé-án nàá-güedé ndihí Yaá cáá dàtná cáá ìḡḡ mbéé quiti ní dānícuehé-güedé dico vá ndácú-güedé nàá-güedé ndihí-gá chi cuíta-güedé. Te diu-gá cúú-gǎ Yaá ío cùnūu taxi tnuní cuēi nchaa téé yindaha ñaha xii ñáiyu, te ducaⁿ-ni tàxi tnuní-gá cuēi nchaa dava-gá-yu. Te mee Yǎ Ndiǒxí ní cachí-gá nándi cùu nchaa ñáiyu cundecu ndihí Yaá cáá dàtná cáá ìḡḡ mbéé quiti ní dānícuehé-güedé-án, te diu-ni ñáiyu-án cúú-yu ñáiyu ní cáháⁿ-gá te cùú-yu ñáiyu quide ndáá ndécú ìchi-gá —duha càchí espíritú xínú cuèchi núú-gǎ.

¹⁵ Te ní cachí tucu espíritú-án xii-í:

—Ndute ñūhu núú núcōo ñadīhí ñaha ndècu ichi díí ìní-án, ndute-án cada ìní-n sǎ cúú-xí ñáiyu nchaa nacióⁿ, ndihí ñáiyu nchaa ñūu, ndihí ñáiyu xindecu nchaa xichi, ndihí ñáiyu càháⁿ ndí dííⁿ ndí dííⁿ nūyú tnūhu. ¹⁶ Te dàtná ní cachí-í sǎ ndí uxí ndiqui quiti ní xini-n-án cúú-xí ũxí tnàhá cue téé quindaha ñaha xii ñáiyu, te cue téé-án cuu úhú ìní-güedé ñadīhí ñaha ndècu ichi díí ìní-án, te ni vǎ cáda cuèndá ñáhá-gǎ-güedé xii-aⁿ, te ndada ndàhú ñáhá-güedé, te dacàchi ñaha-güedé xii-aⁿ, te cahmi ñaha-güedé. ¹⁷ Te mee Yǎ Ndiǒxí ducaⁿ dàcaháⁿ-gá ìní cue téé-án cuèndá cada-güedé nàcuáa cùnì méé-gǎ, te xǎn nūu cuu ìḡḡuu-güedé cuèndá cūñaha-güedé xii quiti-án cada-di núú-güedé taxi tnùní-di, te ducaⁿ-ni càda-di núú-güedé taxi tnùní-di ndéé ná sǎá nduu càda Yǎ Ndiǒxí nàcuáa ní cachí-gǎ. ¹⁸ Te ñadīhí ñaha ní xini-n-án cada ìní-n sǎ cúú-án ñūu cáhnú ñūu ío cùnūu, te ñūú-án ndécú téé ío-gǎ cùnūu taxi tnuní nchaa cue téé yindaha ñaha xii ñáiyu xindecu ñuyú —duha ní cachí espíritú xínú cuèchi núú Yǎ Ndiǒxí xii-í.

18

Ní naa ñūu Babiloniá

¹ Te ducaⁿ te dàtnùnì ní xini tucu-í ìngǎ espíritú xínú cuèchi núú Yǎ Ndiǒxí, te ndéé andiu ní dátasaⁿ-xi te ní dáyehé-xi ñuyú, te espíritú-án ío cùnūu-xi. ² Te níhi ní cáháⁿ-xi, te càchí-xi:

—Ní sǎá nduu nàa ñūú cáhnú ñūu cùnūu nani Babiloniá, te xǎⁿ-nǎ natacǎ nchaa núu espíritú cundihí yucu ñávaha cundecu-xi, te vá queé-gǎ-xi xǎⁿ, te diu-ni xǎⁿ natacǎ nchaa quiti ndava núu tàchí nchaa quiti ndehe quide, quiti ná túú tnàhá ìní ñáiyu te xǎⁿ-nǎ cundecu-güedi. ³ Te ducaⁿ chi ñáiyu ñūú-án sánú ìchí-yu nchaa ñáiyu ñihí ñuyú ichi cuèhé ichi duha, te ducaⁿ-ni xínchícúⁿ nihnu nchaa ñáiyu ñuyú xíquidè-yu, te nchaa cue téé cùnūu yindaha ñaha xii ñáiyu, cue téé-án cúú ìḡḡuu-güedé ndihí nchaa ñáiyu ñūú-án quidè-güedé ndihí-yu nándi sǎ cuèhé sǎ dúhá. Te nchaa ñáiyu dico nándi sǎ díco quèheⁿ ñáiyu ñūú-án ío cùu cuicá-yu, te ducaⁿ quèheⁿ nchaa ñáiyu ñūu Babiloniá-án nchaa sǎ díco ñáiyu-án cuèndá xǎⁿ cǎnehé-yu ndécú-yu ichi cuèhé ichi duha —duha càchí espíritú-án.

⁴ Te sǎtá dúcǎ te ní tecú dóho-í ní cáháⁿ ìḡḡ sǎ ní cáháⁿ andiu, te càchí-xi:

—Nchaa nchòhó ñáiyu cùu cuèndá-í quee-ndo ñūu Babiloniá cuèndá sǎ vǎ cundècu-ndo tnàhá-ndó ìchi cuèhé ichi duha dàtná ndécú ñáiyu ñūú-án, te ducaⁿ te vá quini-ndó tnūndòho tnūhu ndàhú sǎ quíxí cùu xii ñáiyu-án. ⁵ Chi ío cuèhé cuèchi-yu ní cuu ndècu núu Yǎ Ndiǒxí, te mee-gǎ nǎhá-gǎ nàcuáa ndūu nchaa sǎ quidè-yu. ⁶ Te nchòhó ñáiyu cùu cuèndá-í, chí nánchòcava dandòho-ndo ñáiyu-án dàtná quidè méé-yu dandòhó-yu cue ñáiyu, te úú xito nanchòcava-ndo dandòho-ndó-yu, te ducaⁿ càda-ndo cuèndá ío-gǎ ndohó-yu. ⁷ Te ío quide cahnú-yu mèé-yu, te ío cùdíí ìní-yu quidè-yu nchaa núu sǎ cuèhé sǎ dúhá, te sǎ dúcǎ xidó-yu quidè-yu nchaa sǎ cuèhé sǎ dúhá nūu xǎⁿ nchòhó ío dandòho-ndó-yu, te ducaⁿ chi ñáiyu ñūú-án sánì ìní-yu, te càchí-yu: “Nchúhú cúú-ndí dàtná ìḡḡ ñadīhí ná túú queé, ñaha ío cùnūu yindaha ñaha xii ñáiyu. Te ducaⁿ sǎtnahá-xi cùu-ndí chi nchaa-ni nduu ío váha cùu ìní-ndí ndécú-ndí, te ni vǎ sǎá ìḡḡ nduu te ndihú ìní-ndí”, duha càchí ñáiyu ñūú-án. ⁸ Te sǎ cuèndá nchaa sǎ quidè-yu-án nūu xǎⁿ ìḡḡ-ni ndūu sǎá tnūndòho sǎ cúú-xí-yu, te ío ndohó-yu chi ñūú-yu coo tnamá, te coo cuèhé cahni ñaha-xi xí-yu, te ío ndihú ìní-yu, te cáyú ñūú-yu, te ducaⁿ ndòhó-yu

chi Dútú Ndiöxí ío cùnnu-gá, te diu-gá ducaⁿ dándoho ñaha-gá xíi-yu —duha cächí sá ní cáháⁿ àndi-u-áⁿ.

⁹Te nchaa cue téé cùnnu yindaha ñaha xii ñáyiú ío ndáhyú-güedé sá ndihú iní-güedé òré ná quini-güedé quene ñúhmá cäyú ñuú cue ñáyiú Babiloniá, chí diu cue téé-áⁿ cúú-güedé cue téé cùu ìⁿnuu ndihí-yu quide-güedé nchaa núú sá cuèhé sá dúhá ndihí-yu, te ducaⁿ chí ío tnàhá iní-güedé cundecu-güedé ndihí-yu ichi díí iní. ¹⁰Te cue téé-áⁿ xica-ná cundecu-güedé cundehe-güedé nàcuáa ndoho nchaa ñáyiú ñuú-áⁿ sá yuhú-güedé nchaa tnúndòho-áⁿ, te cachí-güedé:

—jNdàhú nchòhò ñáyiú ñuú cáhnú ñuú cùnùu nani Babiloniá! Chí uuⁿni ní sáá nchaa tnúndòho tnúhu ndàhú sá cúú-xí-ndó —duha cachí-güedé.

¹¹Te nchaa ñáyiú dico nchaa sá nándihí ñáyiú ñuú Babiloniá tnàhá-yu ío ndáhyú-yu sá ndihú iní-yu chí v́á yòo-gá cuaaⁿ nchaa sá dicò-yu. ¹²Te dicó-yu nchaa sá ní cuáha mee-ni díhúⁿ cuááⁿ, ndihí nchaa sá ní cuáha mee-ni díhúⁿ cuixíⁿ, te dico tucú-yu sá ní cuáha mee-ni yúú v́áha yúú nání pèrlá, ndihí nchaa dava-gá sá ní cuáha dava-gá yúú v́áha, te dicó-yu tnàhá dóó sèdá, ndihí ingá núú dǒó v́áha sá nání línú, ndihí dóó murádú, ndihí dóó tícuèhé te mee-ni dǒó v́áha cùu-xi, te dico tucú-yu tnàhá yutnu sá sàháⁿ tnámí, te dico tucú-yu sá ní cuáha sá nání màrflí, te dico tucú-yu sá ní cuáha mee-ni yùtnu v́áha sá ío ndèyáhu, te dico tucú-yu sá ní cuáha mee-ni cáá, ndihí sá ní cuáha mee-ni sá nání bròncé, ndihí sá ní cuáha mee-ni yúú v́áha yúú nání màrmól. ¹³Te dico tucú-yu canèlá, ndihí yúcu sá sàháⁿ tnámí, ndihí dúsa sá sàháⁿ tnámí, ndihí yúcu sá nání mǐrrá, te dico tucú-yu ingá núú dúsa sá sàháⁿ tnámí nàni olivánú, te dico tucú-yu ndudí ndéhé yoho yàha stilé, ndihí acítí yutnu nàni olívú, ndihí yuchi triú v́áha, te dico tucú-yu nchaa dava-gá núú triú, te dicó-yu tnàhá mbéé, ndihí cuayú, ndihí nchaa dava-gá quiti tatá, te dico tucú-yu tnàhá carrètá, te dico tucú-yu tnàhá ñáyiú xìnu cuechi, ñáyiú ñá túú tnàhí dàñá quee núú chíúⁿ patróóⁿ-xi. ¹⁴Te nchaa ñáyiú dico-áⁿ cùñàhá-yu xii ñáyiú ñuú Babiloniá:

—jNchaa sá ío cùdíí ìni-ndó cùndecu ndihí-ndo ni cuu v́á ndácú-gá-ndó ñihí-ndó vitna, te nchaa sá sání ìni-ndó sá ío v́áha càa ndecu ndihí-ndo ndihí nchaa dava-gá sá ndécú ndihí-ndo ní ndihí nihnu-xi vitna, te ní ìⁿ nduu-gá v́á nihí-ndó ní ìⁿ xíáⁿ cundecu ndihí-ndo! —duha cùñaha ñáyiú-áⁿ xíi-yu.

¹⁵Te nchaa ñáyiú ní cuu cuica ní xóo dico nándi nchaa sá ní xóo dico ní queheⁿ cue ñáyiú ñuú Babiloniá, nchaa ñáyiú-áⁿ xica-ná cundecu-yu cundehé-yu sá yuhú-yu cuèndá nchaa tnúndòho sá yáha cue ñáyiú ñuú-áⁿ, te ío ndáhyú-yu sá ndihú iní-yu sá dúcáⁿ ndòho ñáyiú-áⁿ.

¹⁶Te cùñaha tucú-yu:

—jNdàhú nchòhò ñáyiú xǐndecu ñuú cáhnú ñuú nání Bàbiloniá! Chí nchòhò cúú-ndó dàtná ìⁿ ñadihí ñaha ñihnu dóó v́áha dóó murádú, ndihí dóó tícuèhé, te mee-ni sá ní cuáha díhúⁿ cuááⁿ, ndihí mee-ni sá ní cuáha yúú v́áha yúú nání pèrlá, ndihí sá ní cuáha dava-gá yúú v́áha sá ío vji ndáa mee-ni nchàa xíáⁿ ní cuáha sá yíhí lǒho-aⁿ, ndihí sá ñúhú dúcú-aⁿ, ndihí sá ñúhú dúcúⁿ ndàhá-áⁿ. ¹⁷jTe uuⁿni ní ndihí ñihnu nchaandi túhú sá ndécú ndihí ñadihí-áⁿ, te ducaⁿ sàtnahá-xi cùu nchòhò ní cùu! —duha cùñàhá-yu xii cue ñáyiú ñuú Babiloniá.

Te nchaa cue téé dàcaca barcú ndihí nchaa cue téé tàxi tnuñí bàrcú-áⁿ, ndihí nchaa ñáyiú ñuuhú xítí bàrcú-áⁿ, ndihí nchaa dava-gá cue téé nándi chiúⁿ quide ndecu lamár, nchaa ñáyiú-áⁿ xica cùndecu-yu ¹⁸te quini-yu òré quene ñúhmá cäyú ñuú cue ñáyiú Babiloniá, te ñihí cáháⁿ-yu, te cachí-yu:

—Ní ìⁿ ñuú ñá túú nùtnahá-xi ñuú Babiloniá —duha cáháⁿ-yu.

¹⁹Te nchaa ñáyiú-áⁿ chidó-yu ñuuhú díquí-yu, te nguíta-yu ndáhí-yu sá ndihú iní-yu, te ñihí cáháⁿ-yu, te cachí tucú-yu:

—jNdàhú nchòhò ñáyiú xǐndecu ñuú cáhnú ñuú nání Bàbiloniá! Chí ío cuica-ndo ní cùu, te diu-ndo ní quide ní cuu cuica nchàa ñáyiú ndècu ndihí barcú, te vitna uuⁿni ní naa-ndo ndihí ñuú-ndó —duha cachí-yu.

²⁰Te nchaa nchòhò ñáyiú ndècu andiú ío chí cùdíí ìni sá dúcáⁿ dándoho Yá Ndiöxí nchaa ñáyiú ñuú Babiloniá-áⁿ, te diu-ni

ducaⁿ chí cùdíí ìní nchaa nchòhó cue téé ní cachí Xítohó Jesucristú cáháⁿ tnúhu-gá, te ñu-ni ducaⁿ chí cùdíí ìní nchaa nchòhó cue téé cáháⁿ tnúhu Yá Ndiòxí nàcuáa dàcahu ìní ñáhá-gá xii-ndo, te ñu-ni ducaⁿ chí cùdíí ìní nchaa dava-gá nchòhó ñáyíu cùu cuendá-gá cuendá sá dúcáⁿ dándoho-gá nchaa ñáyíu ñuú-áⁿ. Te ducaⁿ càda ñaha-gá xii cue ñáyíu-áⁿ cuendá nchaa sá quidé ñàhá-yu xii-ndo.

²¹ Te sáta dúcáⁿ te ní xini-í ìⁿ espíritú xínú cuechi núú Yá Ndiòxí, te espíritú-áⁿ ño ndee-xi te ní queheⁿ-xi ìⁿ yúú cáhnú dàtná càhnu yódó te ní dáquëe-xi xití ndute lámár, te càchí-xi:

—Dàtná ní quide-í ní dáquëe-í yúú xití ndute ducaⁿ càda-xi ñuú cáhnú ñuú Babiloniá, chí ñáyíu ñuú-áⁿ ño ndíhi naá-yu ndíhi ñuú-yu, te vá ìⁿ ndúu ìⁿ quiú-gá quini ñáhá ñáyíu xii-yu. ²² Te ni ìⁿ-gá ñáyíu càni arpá, te ni ìⁿ-gá ñáyíu tiú vílu, te ni ìⁿ-gá ñáyíu tiú cútú, te ni ìⁿ-gá yaá vá cóó ñuú-áⁿ, te ni ìⁿ-gá cue ñáyíu xini cada ìⁿ núú chiúⁿ vá cóó-gá, te ni vã yóo-gá canehe chiúⁿ yúú cúú yódó mulínú. ²³ Te ni ìⁿ-gá ñuhú vá cùndècu ñuú-áⁿ, te ni ìⁿ nduu-gá vá cóó vico tnándaha, te ñáyíu ñuú-áⁿ ñáyíu quide ndáhú cúú-yu ñáyíu ío-gá cuicá-yu dàcúuxí ñáyíu quide ndáhú xindecu nihí ñuyúú, dico nchaa-yu naá-yu chí quide nduú-yu te ío dándahú-yu cue ñáyíu ñuyúú sá dúcáⁿ quidé-yu.

²⁴ Te ñu-ni ñuú-áⁿ ní dácacá-yu nííí cue téé ní cáháⁿ tnúhu Yá Ndiòxí, te ñu-ni ducaⁿ ní quidé-yu nchaa dava-gá cue ñáyíu cùu cuendá-gá, te ñu-ní-yu quide xisahni tnàha ñáyíu ñuyúú —duha càchí espíritú-áⁿ.

19

¹ Te sáta dúcáⁿ te ní tecú dóho-í níhi ní cáháⁿ cuéhé víhí ñáyíu andú, te càchí-yu:

¡Jo càhnu cuu Yá Ndiòxí!, chí ñu-ni-gá cúú-gá Yaá ní dácacu nihnu ñaha xii-o núú ùhú núú ndàhú, te ío cùnuu-gá, te mee-ni sá vãha quide-gá,

² te mee-gá ío váha ndáá quidé-gá quidé ndáá-gá cuechi nchaa ñáyíu,

chí ñu-ni-gá ní dáquihíⁿ-gá ñadìhí ñaha ndècu ichi díí ìní núú ùhú núú ndàhú,

chí ñu-ni-gá ní sanu ichi-aⁿ ñáyíu ñuyúú ichi cuéhé ichi duha,

te ducaⁿ ní dáquihíⁿ ñáhá-gá xii-aⁿ núú ùhú núú ndàhú chí nàchinaa-gá sá ní sahani-aⁿ cue ñáyíu ní xinu cuechi núú-gá.

Duha càchí-yu.

³ Te càchí tucú-yu:

—¡Jo càhnu cuu Yá Ndiòxí!, chí nchaa nduu nchaa quiú ducaⁿ-ni quène ñúhmá núú ùhúhú ñaha-áⁿ càyú-aⁿ —duha càchí-yu.

⁴ Te ndi òcó cúmí cue téé cùu sacuehé xindecu-áⁿ ní ngúíí xití-güedé núú Yá Ndiòxí núú núcóo-gá táxí tnúni-gá, te tnàhá cue quiti cúmí xínutní-áⁿ ní ngúíí xití-güedé núú-gá, te cue téé-áⁿ càchí-güedé ndíhi cue quiti-áⁿ:

—Sá ndáá sá ño càhnu cuu Yá Ndiòxí — duha càchí-güedé ndíhi cue quiti-áⁿ.

⁵ Te sáta dúcáⁿ te ní tecú dóho-í ní cáháⁿ ìⁿ sá ní cáháⁿ mei núú núníí xilé váha núcóo Yá Ndiòxí, te càchí sá cáháⁿ-áⁿ:

Nchaa nchòhó ñáyíu xinu cuechi núú Yá Ndiòxí, ñu-ni nchòhó ñáyíu nèhe sá yíñuhu núú-gá,

càháⁿ-ndó sã ño càhnu cuu-gá cuéí cùnuu-ndo àdi ñá túú cùnuu-ndo.

Duha càchí sá cáháⁿ-áⁿ.

ìⁿ vico cùu dàtná vico tnándaha

⁶ Te sáta dúcáⁿ te ní tecú dóho-í ní cáháⁿ cuéhé víhí ñáyíu andú, te òré ducaⁿ ní cáháⁿ-yu te ní quide-xi dàtná quidé-xí núú xicá cuéhé víhí ndùte, te ní quide tucu-xi dàtná quidé-xí òré cáháⁿ níhi víhi ñúhu, te càchí-yu:

¡Jo càhnu cuu Dútú Ndiòxí Yaá cúú Tãtá-ò!

Te ío cùnuu-gá táxí tnúni-gá, te quide-gá nchaandi túhú sá váha.

⁷ Te ío chí ná cùdíí ìní-ó, te chí ná càchí-ó sã ño càhnu cuu Yá Ndiòxí,

chí vitna ní sáá nduu càda Yaá cáá dàtná cáá ìⁿ mbéé quiti ní dánicuehé-güedé ìⁿ vico, te cùu-xi dàtná vico tnándaha.

Te nchaa ñáyíu cùu cuendá-gá sa ní ndíhí-yu sa ndècu túha-yu cundecú-yu vico-áⁿ, te cada ìní-ó sã ñáyíu-áⁿ cúú-yu dàtná ìⁿ ñadìhí xíchí tnándaha ndíhí-gá,

⁸ te ñáyíu-áⁿ ní nduu táhú-yu cuihnú-yu dóó váha dóó chàhnchí sá ño váha càndoo.

Duha càchí-yu.

Te sá dúcáⁿ ní nduu táhú ñáiyu cùu cuendá Yá Ndiòxí dóó vâha ñihnú-yu, xiáⁿ cútñuní iní-ó sã cùu-yu ñáiyu quide ndáá núu-gã.

⁹Te ñⁿ espíritú xínú cuèchi núú Yá Ndiòxí ní cachí tñuhu-xi xii-í, te càchí-xi:

—Chido tñuní-n ñⁿ núú tütú nàcuáa na càháⁿ-í-a: “Vâha táhú nchaa ñáiyu ní càháⁿ ñáhá Yáa cáá dàtná cáá ñⁿ mbéé quiti ní dānicuèhé-güedé cundecú-yu vico, te vico-áⁿ cùu-xí dàtná vico tñandaha cada-gá”, te duha chido tñuní-n chi tñuhu-a cùu-xi tñuhu ndáá tñuhu Yá Ndiòxí—duha càchí espíritú-áⁿ.

¹⁰Te ní ngüññí xití-í núú espíritú-áⁿ cuendá chiñuhu-í-xi ní cùu, te ní cachí-xi:

—Vá dúcáⁿ càda-n, chi tñahá-í dicó xínú cuèchi-í núú Yá Ndiòxí dàtná quidé-n xínu cuechi-n núu-gã ndihi nchaa dava-gã ñáiyu ndècu ndihi-n ichi-gã, ñáiyu nchicúⁿ ñihnú quide ní yuhu ní iní nchaa nàcuáa càháⁿ Xítoho Jesucristú, te núu xiáⁿ càchí-í sá vâ dúcáⁿ càda-n, chi mee Yá Ndiòxí chiñuhu-n—duha càchí espíritú-áⁿ.

Te nchaa cue téé càháⁿ tñuhu Yá Ndiòxí càháⁿ-güedé nàcuáa nduu tñuhu càháⁿ Xítoho Jesucristú.

Cuendá Yaá yódó ñⁿ cuayú cuixíⁿ

¹¹Te ní xini-í nchii andiu, te ní xini-í ní quee ñⁿ Yaá yódó-gã ñⁿ cuayú cuixíⁿ. Te Yaá-áⁿ nání-gã Yaá quidé ndáá cuiti, duha nani-gã. Te quide-gã nchaa sá càháⁿ-gã, te ío vâha quide ndáá-gã cuèchi nchaa ñáiyu, te nchaa ñáiyu nàa ndihi ñaha xii-gã ío vâha xini-gã nàcuáa cada ñaha-gã xií-yu chi ío ndáá quidé-gã. ¹²Te tñunu-gã dáyèhé-xi dàtná dáyèhé ñuhú, te titní coróná ñuhú ñíqui-gã, te ñehè-gã ñⁿ sá ndèé ñíu-gã, te vá yóo ñⁿ cútñuní iní-xi nása cuáháⁿ tñuhu-áⁿ, chi ñⁿdii díí-ni mee-gã náhá-gã nàcuáa càháⁿ-xi. ¹³Te Yaá-áⁿ ñihnú-gã ñⁿ dóó ní cuu mee-ni ññí, te Yaá-áⁿ càchí tñuhu-gã nchaa nàcuáa sáni iní Yá Ndiòxí, núu xiáⁿ nání-gã Tñuhu Yá Ndiòxí.

¹⁴Te sátá-gã nchicúⁿ nchaa espíritú xínú cuèchi núú Yá Ndiòxí, te cue espíritú-áⁿ cùu-xí dàtná sandadú, te xixihnu-xi dóó cuixíⁿ dóó vâha sá cándoo, te xixódó-xi cuayú cuixíⁿ. ¹⁵Te yuhu Yaá yódónu-áⁿ quéné ñⁿ yuchí cáhnú, te ndihi yuchí-áⁿ dānicuèhé-gã nchaa ñáiyu xindecu ñuyú,

te ío dandòho ñaha-gã xií-yu, te dàtná quidé téé quihni ndéhé yoho yâha stilé ducaⁿ sātñahá-xi cada ñaha-gã xií-yu, chi ío dandòho ñaha-gã xií-yu cuendá sá ío cùdèéⁿ-gã. Te mee-gã ío cūnuu-gã táxi tñuní-gã, te quide-gã nchaandi tñuhú sá vâha. ¹⁶Te sátá dóó ñihnú Yáa-áⁿ ndihi núú ticácáⁿ-gã yódó tñuní nàcuáa nani-gã, te duha càháⁿ-xi: “Téé ío cūnuu taxi tñuní ñáhá xii nchaa cue téé yindaha ñaha xii ñáiyu ndihi nchaa dava-gã ñáiyu”, duha ndéé tñuní sátá dóó-gã-áⁿ ndihi ticácáⁿ-gã-áⁿ.

¹⁷Te dàtnuní ní xini-í ñⁿ espíritú xínú cuèchi núú Yá Ndiòxí nútñi-xi núú nchí-canchii, te ñihi ní càháⁿ-xi, te xâha-xi xii nchaa quiti ndava núú tächí:

—Nchaa nchòho quiti ndava, chí táquixi chi caxi-ndo nchaa sá ní quide túha Yá Ndiòxí, ¹⁸chi caxi-ndo cūñú nchaa cue téé yindaha ñaha xii ñáiyu, ndihi cuñú nchaa cue téé taxi tñuní ñáhá xii cue sandadú, ndihi cuñú nchaa cue téé ío ññí xĩndáa, ndihi cuñú nchaa cuayú, ndihi cuñú nchaa cue téé ní xódó ñaha xii-güedé, ndihi cuñú nchaa dava-gã ñáiyu, ñáiyu ñá túú tñahí ní dàñá quee núú chíúⁿ patróóⁿ-xi, ndihi cuñú nchaa ñáiyu ní dàñá ní quee núú chíúⁿ patróóⁿ-xi, ndihi cuñú nchaa ñáiyu cūnuu, ndihi cuñú nchaa ñáiyu ñá túú cūnuu, te nchaa cuñú-áⁿ caxi-ndo—càchí espíritú-áⁿ xâha-xi xii nchaa quiti-áⁿ.

¹⁹Te sátá dúcáⁿ te ní xini tucu-í quiti ní quee xití lámár, ndihi nchaa cue téé yindaha ñaha xii ñáiyu, ndihi nchaa cue téé cūu sandadú-güedé ní naníhí tñahá-güedé ndihi quiti-áⁿ cuendá cuu ñⁿnuu-güedé ndihi-dí nàa-güedé ndihi Yaá yódó cuayú-áⁿ, ndihi nchaa cue espíritú cūu sandadú ndihi-gã. ²⁰Te cue espíritú cūu sandadú ndihi Yaá-áⁿ ní tñii-xi quiti-áⁿ, ndihi téé ío dāndahú ñáhá xii ñáiyu càchí sá càháⁿ tñuhu Yá Ndiòxí te ñá ndáá sá càháⁿ-dé tñuhu-gã, te ñii-ni téé-áⁿ ní quide-dé titní núú sá vâ yóo tñahí ndàcu cada núú quiti-áⁿ. Te sá dúcáⁿ ní quide téé-áⁿ xiáⁿ ní dāndahú-dé ñáiyu ní sándáa iní-yu ní queé-yu tñuní quiti-áⁿ, te ní chinùhú-yu sá ní dāndácú ñáhá-yu xii-dí, te cue espíritú-áⁿ ní dāquèe-xi quiti-áⁿ núú ñuhú núú ñuhú àzufré càyú-xi, ndihi téé ducaⁿ dāndahú ñáhá xii ñáiyu-áⁿ, te xiáⁿ cuhuⁿ téé-áⁿ ndihi quiti-áⁿ, te ío ndoho-dé

ndihi-di. ²¹ Te ndihi yuchi cáhnú sǎ quéné yuhu Yaá yódó cuáyú-áⁿ ní sahní-gá nchaa dava-gá cue téé cùndihí quiti-áⁿ, te nchaa cue quiti ndáva ní chítú xítí-güedi ní xexi-güedi cuñú nchaa cue téé-áⁿ.

20

Úxí cièndú cuía

¹ Te sáta dúcáⁿ te ní xiní-í ìⁿ espíritú xínú cuèchi núú Yǎ Ndióxi ní quee-xi andiu, te nùndaha-xi ndacaá nacaáⁿ-xi yèhe ìⁿ yaú cùnú víhí núú cùndècu sácuihá, te nùndaha tucu-xi ìⁿ cadená cáhnú. ² Te espíritú-áⁿ ní tñi-xi quiti dééⁿ nání dràgón, te diu-ni quiti-áⁿ cúu-dí mèi yucu ñávǎha sá nání sácuihá, te diu xiáⁿ ní nduu-xi cóo ndéé sanaha. Te espíritú-áⁿ ní dácútú ñaha-xi xii-di, te ducaⁿ-ni cùndutu-di ndéé xínu úxí cièndú cuía. ³ Te sáta ní dácútú ñaha espíritú-áⁿ xii-di te ní dáquée ñaha-xi xii-di yaú-áⁿ chi diu yaú-áⁿ tàù-di quée-di cundecu-di. Te ní nacadi-xi yuyèhe yaú-áⁿ, te ní tee-xi sèyú yuyèhe-áⁿ cuèndá sá và quéné-gá-di dandàhú-di cue ñáyiú ñuyúú, te xiáⁿ cundedí nihnu-di ndéé xínu úxí cièndú cuía. Te sáta ná yáha úxí cièndú cuía-áⁿ te nandáxi-di te quene-di yaú núú ñúhú-dí-áⁿ caca cuu tnaa-di ìⁿ úú nduu.

⁴ Te dátñuní ní xiní-í xínutñi titní xilé váha, te xiáⁿ xínucóo nchaa ñáyiú ní ngúndecu ndihi tñúhu ndee ìni cada ndáá cuèchi nchaa ñáyiú, te ní xiní-í xìndecu tñahá cue ñáyiú ní xehndé-güedé dúcúⁿ-xi cuèndá sá ní cáháⁿ-yu tñúhu Yá Ndióxi, ndihi cuèndá sá ní cáháⁿ váha-yu cuèndá Xítohó Jesucristú. Te diu-ni ñáyiú-áⁿ cúu-yu ñáyiú ñá túú ní chìñuhú-yu quiti ní quene xítí lámár-áⁿ, te ní ñá túú ní chìñuhú-yu sá ní dándácú ñáyiú ní natava ñahá-yu xii-di, te ní ñá túú ní dàhá-yu mèe-yu quée-yu tñuní quiti-áⁿ chi ní tñéé-yu te ní ndahá-yu ñá túú ní dàhá-yu quée tñuní-di. Te ní xiní-í ní ndoto cue ñáyiú-áⁿ cuèndá tñahá-yu cùnú-yu taxi tñuní-yu ndihi Xítohó Jesucristú úxí cièndú cuía. ⁵ Te dava ñáyiú ní xihí ñá túú ní ndotó-yu, chi ndéé yáha úxí cièndú cuía te dátñuní ndotó-yu. Te ñáyiú ní xiní-í ní ndoto-áⁿ cúu-yu ñáyiú ní ndoto díhna nuu. ⁶ Te ío váha ní tñahá nchaa ñáyiú ní nduu táhú ní ndoto díhna nuu!, chi cue ñáyiú-áⁿ ío cùdiú-yu núú Yǎ Ndióxi, te nchaa ñáyiú-áⁿ vǎ quihíⁿ-yu núú ùhú núú

ndàhú, te ñáyiú-áⁿ cúu-yu dútú ndécú-yu núú Yǎ Ndióxi ndihi núú Xítohó Jesucristú, te ñáyiú-áⁿ cùnúú-yu dátñá cùnúú Xítohó Jesucristú, te cunuu ndihi ñahá-yu xii-gá úxí cièndú cuía.

⁷ Te sáta ná yáha úxí cièndú cuía-áⁿ te sácuihá quee-xi núú yíndedí nihnu-xi-áⁿ, ⁸ te ngúta tucu-xi dandàhú-xi nchaa ñáyiú xìndecu nihí ñuyúú, te cuèi ñáyiú ñúú Gög, te cuèi ñáyiú ñúú Màgög ducaⁿ quihíⁿ-xi dandàhú ñahá-xi xii-yu, te datácá-xi nchaa ñáyiú cuèndá nàa-yu, te cuéhé víhí-yu dátñá cuéhé ñuhu cúhí lámár. ⁹ Te nchaa ñáyiú-áⁿ tñi-yu ichi quihíⁿ-yu ìⁿ ichi sá cuaháⁿ núú cáá ìⁿ yodo cahnu vihi, te sáa-yu núú xìndecu ñáyiú cùu cuèndá Yǎ Ndióxi, te ñáyiú-áⁿ chidócó-yu cue ñáyiú cùu cuèndá-gá-áⁿ ndihi ñúu-yu, te ñúú-áⁿ ío cùu iní-gá, dico mee Yǎ Ndióxi dangòyo-gá ñuhú cahmí-gá nchaa ñáyiú ducaⁿ chidoco ñaha xii ñáyiú cùu cuèndá-gá-áⁿ, te nchaa ñáyiú-áⁿ cuú. ¹⁰ Te sácuihá sá dúcáⁿ dandàhú ñahá xii ñáyiú chidoco ñaha xii ñáyiú cùu cuèndá Yǎ Ndióxi-áⁿ dàquée ñaha-gǎ xii-xi núú ñuhú núú ñúhú àzufré càyú-xi, te diu-ni xiáⁿ sa ñuhu quiti ní quene xítí lámár, ndihi téé ní dandàhú ñáyiú ní xáhaⁿ-dè xii-yu sá cáháⁿ-dé tñúhu Yá Ndióxi te ñá ndàá sá cáháⁿ-dé tñúhu-gá, te xiáⁿ cuhuⁿ-xi ndoho-xi ní caa ní quihíⁿ ndihi quiti ní quene xítí lámár, ndihi téé càhí sá cáháⁿ tñúhu Yá Ndióxi te ñá ndàá sá cáháⁿ-dé tñúhu-gá.

Cùndáá cuèchi ñáyiú

¹¹ Te ní xiní-í nùtní ìⁿ xilé váha xilé cuixíⁿ, te núú xilé-áⁿ núcòo ìⁿ Yaá. Te ndèhe Yaá-áⁿ ní ndòñúhú àndiu ndihi ñuyúú-a, te ducaⁿ ní ndòñúhú-xi chí và cùndècu-gá-xi. ¹² Te sáta dúcáⁿ te ní xiní-í nchaa ñáyiú ní xihí ní cùu, ñáyiú cùnuu ndihi ñáyiú ñá túú cùnuu xínutñi-yu núú Yáá núcòo núú xilé váha-áⁿ, te Yaá-áⁿ cúu-gǎ Yǎ Ndióxi, te òré-áⁿ ní nandicá nchaa tutú núú yódó tñuní nchaa nàcuáa nduu sá ní quide ìⁿ ìⁿ ñáyiú-áⁿ, te ní nandicá tucu ingá tutú núú yódó tñuní nchaa ñáyiú ní nanñí tǎhú, te nchaa ñáyiú ní xihí ní cùu xínutñi-yu núú Yǎ Ndióxi cundáá cuèchi-yu, te nchaa nàcuáa nduu nchaa cuèchi-yu yòdo tñuní núú nhàa tutú-áⁿ ducaⁿ cùndáá. ¹³ Te nchaa ñáyiú ní

xihí xití ndute lámár, ndihi nchaa ñáiyu ní xihí núú ñuhu yichí nchaa ñáiyu-áⁿ cundáá cuéchi-yu nàcuáa ní quidé-yu ñⁿ ñⁿ-yu. ¹⁴Te vitna te vá cuú-gá ñáiyu chi ñá túú-gá tnúhu xihí, te nchaa ñáiyu ñuhu núú ñuhú núú càyú ñáiyu-áⁿ cuú-yu ñáiyu ní xíta nihnu ní caa ní quíhíⁿ. ¹⁵Te ducaⁿ chi nchaa ñáiyu ñá túú yódo tnuní núú tütú núú yódó tnuní nchaa ñáiyu naníhí tǎhú ní dáquée ñaha Yá Ndióxi xí-yu núú ñuhú núú càyú.

21

Andiu sàa ndihi ñuyúú sáá

¹Te sátá dúcáⁿ te ní xiní-í andiu sàa ndihi ñuyúú sáá, te andiu sà ndécú díhna ndihi ñuyúú sà ndécú díhna ní ndóñúhú-xí, te tnáhá lámár ní ndóñúhú-xí. ²Te yúhú té Juáá ní xiní-í ñuú Jerusálén sáá ní quee-xi núú ndécú Yá Ndióxi, te ñuú-áⁿ cuú-xí núú méé-gá, te ío víi cǎa chi cǎa datné cǎá ñⁿ ñadíhí xíchí tnándaha. ³Te ní tecú dóho-í níhi ní cáháⁿ ñⁿ sá ní cáháⁿ andiu, te cǎchi-xi:

—Chí cundédóho ñⁿ tnúhu na cǎháⁿ-í-a: Yá Ndióxi ndécú ndihi-gá cue ñáiyu vitna, te ducaⁿ-ná cundecu ndihi ñaha-gǎ xí-yu, te díu-yu cuú-yu ñáiyu cùu cuendá-gá, te vá ñⁿ ndúu ñⁿ quíú-gǎ te dañá ñaha-gǎ xí-yu. ⁴Te mee Yá Ndióxi cada-gá sá ñá túú tnáhí-gá ná caní iní-yu cundecú-yu, te ní vǎ quíní-gá-yu tnúhu xihí, te ní vǎ quíní-gá-yu tnúhu ndàhyú, te ní vǎ quíní-gá-yu tnúhu ndíhú iní-xi, te ní vǎ quíní-gá-yu tnúhu cùhú, chi nchaa sá ní xiní-yu ñuyúú díhna vá quíní-gá-yu vitna —duha cǎchi sá ní cáháⁿ-áⁿ.

⁵Te Yáá núcǎo núú xilé váha-áⁿ ní cachí tnúhu-gǎ xii-í, te cǎchi-gǎ:

—Yúhú quidé-í nàcuáa nduu saa nchàa sá cundècu vitna. Te vitna chido tnuní-n ñⁿ núú tütú nchaa tnúhu sá ní cáháⁿ-í-a, chi nchaa tnúhu-a cùu-xi tnúhu ndáá cuíti —duha cǎchi-gǎ.

⁶Te dátuní ní cachí tnúhu tucu-gǎ xii-í:

—Sa ní xínu cava nchaa chiuⁿ ní sani iní-í cada-í, te díu-ni yúhú cuú-í Yáá sa ndècu ndéé cútñáhá ní ngáva ñuyúú, te díu-ni-í cundecu-í ní caa ní quíhíⁿ. Te nchaa ñáiyu cuíní tuha ñaha xii-í te cada iní-yu sá dátñá ndute cùu-xi sá cuǎñaha tǎhú-í xí-yu candeca-xi iní-yu ní caa ní quíhíⁿ. ⁷Te nchaa ñáiyu na cundee iní yáha nándi

sá ná yáha-yu sá cuendá-í, te ñáiyu-áⁿ nduu tǎhú-yu cundecu váha-yu, te yúhú cuu-í Ndióxi-yu, te ducaⁿ méé-yu cuú-yu déhe-í. ⁸Te nchaa ñáiyu na yúhú ndoho cuendá-í quíhíⁿ-yu núú ñuhú núú càyú ndihi ñáiyu ñá túú sàndáá iní ñáhá xii-í, ndihi ñáiyu quide nándi nchaa sá cuèhé sá dúhá, ndihi ñáiyu sǎhni tnaha, ndihi ñáiyu ndècu ichi díí iní, ndihi ñáiyu quide nduu, ndihi ñáiyu chíñuhu nchaa sá cǎchi-yu cùu ndióxi ní cadúha cue téé ñuyúú-a, ndihi ñáiyu dàcuandehnde, nchaa ñáiyu ducaⁿ xíquide-áⁿ cuíta nihnú-yu chi quíhíⁿ-yu núú ñuhú núú ñuhú ázufré càyú-xi —duha ní cáháⁿ Yá Ndióxi ní cachí tnúhu-gǎ xii-í.

Ñuú Jerusálén sáá

⁹Te núú usá espíritú xñhehe tícuú ñuhú tnúhu ndòho, te ñⁿ-xi ní quixi-xi te cǎchi-xi:

—Taquxi, te na dànehé ñáhá-í xii-n nchàa ñáiyu cùu cuendá Yáá cǎá dátñá cǎá ñⁿ mbéé quiti ní dǎncuèhé-güedé, ñáiyu-áⁿ cada iní-n sǎ cuú-yu dátñá ñⁿ xíchí cuéchi vitna tnándaha, te ducaⁿ cada iní-n sǎ cuú-yu chi cundecú-yu ndihi-gǎ —duha ní cachí tnúhu espíritú-áⁿ xii-í.

¹⁰Te òré quidé ñaha espíritú Yá Ndióxi xii-í nàcuáa cǎchi iní-xi, te espíritú néhé tícuú-áⁿ ndécá ñaha-xi xii-í cuasaá ñⁿ tǐndúú dùcúⁿ, te xiáⁿ ní dànehé núú ñáhá-xi xii-í ñuú Jerusálén te ñuú-áⁿ ní quee-xi núú ndécú Yá Ndióxi, te ñuú-áⁿ cuú-xi núú méé-gǎ. ¹¹Te ñuú-áⁿ ío cǎhnu cuu-xi chí ducaⁿ ío cǎhnu cuu mee-gǎ, te dátásáⁿ-xi dátñá dátásáⁿ yúú váha sá nání jǎspé yúú cǎá dátñá cǎá vidriú sá túu ingá xio ndàa sátá-xi. ¹²Te ní cǎndéé yuhu ñuú-áⁿ súuní dùcúⁿ nchaa sá ñuhú dòco, te nchíí úxúú yuyèhe-xi, te ndí tnahá ñⁿ ñⁿ yuyèhe-áⁿ xǐndecu ñⁿ caa espíritú xínú cuèchi núú Yá Ndióxi. Te ndí tnahá ñⁿ ñⁿ yuyèhe-áⁿ yódó tnuní díu ñⁿ caa xíchí cue ñáiyu isráél.

¹³Te úní yuyèhe-xi nchíí ndàa xio nacuáa quène nchíanchii, te úní tucu yuyèhe-xi nchíí ndàa nacuáa quée nchíanchii, te úní tucu yuyèhe-xi nchíí ndàa xio datní nacuáa quène tucu nchíanchii. ¹⁴Te sá ñuhú dòco-áⁿ chí úxúú tnáhá yúú cuú cǐmientú-xi, te ndí tnahá ñⁿ ñⁿ yúú-áⁿ ndèé ñⁿ caa díu cue téé ní cáháⁿ tnúhu Yáá cǎá dátñá cǎá ñⁿ mbéé

quiti ní dánìcuèhè-güedé, te diu mee-gã ní táúchíúⁿ-gã ní cáháⁿ-güedé tñúhu-gá.

¹⁵ Te espíritú sá cáháⁿ ndihí ñaha xii-í-áⁿ néhé-xí ìⁿ sá cání ní cuáha mee-ni díhúⁿ cuááⁿ, te ndihí xíáⁿ chícúhá-xi ñúú-áⁿ, ndihí sá ñúhú dòco ñúú-áⁿ, ndihí nchaa yuyèhe-xi. ¹⁶ Te ñúú-áⁿ ìⁿ-ni nèhe-xi cuendá quèhéⁿ-xi ndihí cuendá càni-xi, te espíritú-áⁿ ní chícúhá-xi ndihí sá néhé-xí-áⁿ ñúú-áⁿ, te nèhe-xi ócò úú cièndú míl mètrú sá cání te diu-ni ducaⁿ nèhe-xi cuendá quèhéⁿ-xi, te diu-ni ducaⁿ nèhe-xi sá dùcúⁿ nchaa vehe càa ñúú-áⁿ. ¹⁷ Te dàtnùní ní chícúhá-xi sá ñúhú dòco ñúú-áⁿ, te xíáⁿ néhé-xí ùnídico cùmí mètrú sá dùcúⁿ, te ní chícúhá-xi dàtná chícúhá cue ñáyíu ñuyíú-a.

¹⁸ Te sá ñúhú dòco-áⁿ ní cuáha mee-ni yúú vâha yúú sá nání jâspé, te nihií ñúú-áⁿ cúú-xí mèe-ni díhúⁿ cuááⁿ, te càa datná cáá vidriú sá ïo vâha càndoo te túu ndàa ingá xio. ¹⁹ Te ndi ùxúú yúú cúú cimientú sá ñúhú dòco-áⁿ ndèè ndí dííⁿ núú yúú vii càa sátá-xi, te yúú díhna ndèè mee-ni yúú vâha sá nání jâspé sátá-xi, te yúú cúú úú ndèè tucu ingá núú yúú vâha sá nání zâfirú sátá-xi, te yúú cúú ùní ndèè tucu ingá núú yúú vâha sá nání àgatá sátá-xi, te yúú cúú cùmí ndèè ingá núú yúú vâha sá nání èsmeraldá sátá-xi. ²⁰ Te yúú cúú ùhúⁿ ndèè tucu ingá núú yúú vâha sá nání ònícé sátá-xi, te yúú cúú ìñú ndèè tucu ingá núú yúú vâha sá nání còrnalíná sátá-xi, te yúú cúú ùsá ndèè tucu ingá núú yúú vâha sá nání crisólítu sátá-xi, te yúú cúú ùná ndèè tucu ingá núú yúú vâha sá nání bèrilú sátá-xi, te yúú cúú ìⁿ ndèè tucu ingá núú yúú vâha sá nání tòpacíú sátá-xi, te yúú cúú ùxí ndèè tucu ingá núú yúú vâha sá nání crisopásá sátá-xi, te yúú cúú ùxí ìⁿ ndèè tucu ingá núú yúú vâha sá nání jâcintú sátá-xi, te yúú cúú ùxúú ndèè tucu ingá núú yúú vâha sá nání àmatístá sátá-xi. ²¹ Te ndi ùxúú yuyèhe sá ñúhú dòco-áⁿ cúú-xí mèe-ni yúú vâha sá nání pèrlá, te ndùu ni yúú cúú ìⁿ ìⁿ yuyèhe-áⁿ. Te tnuú cáhnú ndècu xití ñúú-áⁿ cúú-xí mèe-ni díhúⁿ cuááⁿ, te càa-xi datná cáá vidriú sá tũu ndàa ingá xio.

²² Te ní xini-í sá ñà túú vèhe núú chíñùhu ñáyíu Dútú Ndiòxí cáá ñúú-áⁿ, chi mee-ná Dútú Ndiòxí Yáá quidé nchaa-ndi túhú sá vâha ndècu ñúú-áⁿ, ndihí Yáá cáá dàtná cáá

ìⁿ mbéé quiti ní dánìcuèhè-güedé. ²³ Te ñúú-áⁿ ñà túú-gã xini ñúhu-xi nchíanchii dayèhé-xi, te ni yóó ñà túú-gã xini ñúhu-xi, chi mee-ná Yá Ndiòxí dayèhé-gá ñúú-áⁿ ndihí Yáá cáá dàtná cáá ìⁿ mbéé quiti ní dánìcuèhè-güedé. ²⁴ Te cue ñáyíu nchaa ñúú cáá ñuyíú, ñáyíu ní naníhí tãhú xĩndecu ñúú-áⁿ dayèhé-gá núú-yu, te nchaa cue tée yĩndaha ñaha xii-yu nèhe-güedé sá yĩñùhu sá cúú-xí ñúú-áⁿ, te quide cahnu ñaha-güedé xii-gá. ²⁵ Te yuyèhe ñúú-áⁿ ñà túú tñahí nàndedí, te ñúú-áⁿ ñà túú tñahí cùndiquíⁿ. ²⁶ Te nchaa ñáyíu nèhé-yu sá yĩñùhu sá cúú-xí ñúú-áⁿ te quide cahnu-yu Yá Ndiòxí. ²⁷ Te ñúú-áⁿ vâ cúú cùndecu ni ìⁿ ñáyíu ndècu ichi cuehé ichi duha, te ni ìⁿ ñáyíu ndehnde, te ni ìⁿ ñáyíu quide sá ñà túú cùu vâha iní Yá Ndiòxí vâ cúú cùndecu-yu ñúú-áⁿ, chi mee-ni ñáyíu naníhí tãhú ñáyíu yódo tñuní núú tütú Yáá cáá dàtná cáá ìⁿ mbéé quiti ní dánìcuèhè-güedé, mee-ni ñáyíu-áⁿ cùndecu-yu ñúú-áⁿ.

22

¹ Te sátá dúcáⁿ te diu-ni espíritú-áⁿ ní dánèhé núú ñáhá-xí xii-í yúte núú ñúhú ndùte candoo canine, te ndute-áⁿ can-deca-xi iní ñáyíu ni caa ni quíhíⁿ, te ndute-áⁿ quée-xí mèi núú núcõo Yá Ndiòxí ndihí Yáá cáá dàtná cáá ìⁿ mbéé quiti ní dánìcuèhè-güedé. ² Te cuádava tnuú cáhnú yãha xití ñúú-áⁿ cáá yũte-áⁿ, te xio xio yuhu yũte-áⁿ ñíhñú yũtnu cuuⁿ sávidí-xi, te sávidí nchaa yutnu-áⁿ cúú tũcu-xi sá cãndèca iní ñáyíu ni caa ni quíhíⁿ, te nchaa yutnu-áⁿ cúúⁿ sávidí-xi úxúú xito ìⁿ cuíá chi ndi tñahá yóó cúúⁿ sávidí-xi, te nchaa ndaha-xi cùu-xi tátna sá cúú-xí nchaa ñáyíu. ³ Te vâ yóo ìⁿ-gá cada ìⁿ sá ñà túú cùu vâha iní Yá Ndiòxí ñúú-áⁿ. Chi ñúú-áⁿ núcõo mee Yá Ndiòxí ndihí Yáá cáá dàtná cáá ìⁿ mbéé quiti ní dánìcuèhè-güedé xitaxi tñuní-gá, te nchaa ñáyíu xĩnu cuechi núú-gã cada cáhnú ñahá-yu xii-gá. ⁴ Te nchaa ñáyíu-áⁿ cundehe núú-yu Dútú Ndiòxí, te tñèe-yu cundeé diu-gá. ⁵ Te ñúú-áⁿ vâ quini-gá-yu niú, te ni vâ cãnèhe chiuⁿ-gá-yu ñúhú cut-nuní núú-yu, te ni nchíanchii ñà túú-gã xini ñúhu-xi dayèhé ñúú-áⁿ chi mee Dútú

Ndiöxí dáyèhé-gá, te ni caa ni quíhíⁿ cunúú-yu cundecú-yu ñúú-áⁿ.

Sa ta cùyatni nduu quixi tucu Xítohó Jesucristú

⁶Te sáta dúcáⁿ te ní cachí tnúhu espíritú xínú cuèchi núú Yá Ndiöxí-áⁿ xii-í:

—Nchaandi túhu tnúhu-a cùu-xi mee-ni tnúhu ndáá cuiti. Te Yá Ndiöxí Yáá dácàhu iní nchaa cue téé càháⁿ tnúhu-gá nàcuáa càháⁿ-güedé ní tendaha-gã ñⁿ espíritú xínú cuèchi núú-gã ní quixi-xi ní dánèhé-xi nchaa ñáyíu xínu cuechi núú-gã nchaa nàcuáa cada-gá, te vá cùyàa-gá ducaⁿ càda-gá —duha càchí espíritú-áⁿ.

⁷Te ní càháⁿ Xítohó Jesucristú, te càchí-gá:

—jío ndíhi quixi tucu-í!

⁷Te ío váha tnahá nchaa ñáyíu tñí nchaa tnúhu càháⁿ Yá Ndiöxí yódó tñí núú tütú-a! —duha càchí-gá.

⁸Te yúhú té Juáá ní tecú dóho-í nchaa nàcuáa ní ngódó tñí núú tütú-a, te ní xini núú-í nchaa nàcuáa cada-xi ndéé cuèé-gá. Te sáta dúcáⁿ ní cuu te ní ngüíí xítí-í núú espíritú sá ní dánèhé núú ñáhá nchaa xíáⁿ cuendá chiñuhu-í-xi ni cùu. ⁹Te ní cachí-xi:

—Vá dúcáⁿ càda-n, chi yúhú dicó xínú cuèchi-í núú Yá Ndiöxí dàtná cúú yòhó ndíhi nchaa dava-gá ñáyíu ndècu ndíhi-n ichi-gá càháⁿ-ndó tñuhu-gá, ndíhi nchaa ñáyíu tñí nchaa tnúhu ndèé núú tütú-a, te xíáⁿ càchí-í sá vá dúcáⁿ càda-n, chi mee Yá Ndiöxí ducaⁿ chiñuhu-n-gá —càchí espíritú-áⁿ xii-í.

¹⁰Te ní cachí tnúhu tucu-xi xii-í, te càchí-xi:

—Vá chídähu-n ñí ñⁿ tnúhu Yá Ndiöxí ndéé núú tütú-a, chi sa ní cuyatni cada-xi nchaa nàcuáa ndèé tñuní. ¹¹Te ñáha sá ncháá ñáyíu ndècu ichi cuèhé ichi duha na cundecu-ní-yu ichi-áⁿ, te ducaⁿ-ni ñáha-n nchaa ñáyíu quide nándi-gá nchaa sá cuèhé sá dúhá ná càda nahi-ní-yu nchaa sá cuèhé sá dúhá sàni iní-yu, te nchaa ñáyíu quide váha te ducaⁿ-ni na càda váha-yu cundecú-yu, te nchaa ñáyíu quide nchaa nàcuáa cùu váha iní Yá Ndiöxí te ñíu-ni ducaⁿ na càdá-yu cundecú-yu —duha càchí espíritú-áⁿ.

¹²Te ní cachí Xítohó Jesucristú:

—Cundédóho-n tñuhu na càháⁿ-í-a. ío ndíhi quixi tucu-í, te canehe-í nchaa sá ndúú tñáhu ñáyíu quixi, te nàcuáa ndúu

chiuⁿ ní quidé-yu ñⁿ ñⁿ-yu te ducaⁿ cùnduu sá cuñaha-í nduu tñáhu-yu. ¹³Te yúhú cùú-í Yáá sa ndècu ndéé cùtnàhá ní ngáva ñuyúú, te ñíu-ni-í cundecu-í ni caa ni quíhíⁿ —duha càchí-gá.

¹⁴Te váha tñáhu nchaa ñáyíu sa ní nduu ndoo ní nduu nine iní-xi, chí ñáyíu-áⁿ ní nduu tñáhu-yu quíhu-yu xítí ñúú-áⁿ, te caxí-yu sávidí yutnu nùtní-áⁿ te xíáⁿ can-deca-xi iní-yu ni caa ni quíhíⁿ. ¹⁵Te ñúú-áⁿ vá cúú quíhu ni ñⁿ ñáyíu ndècu ichi cuèhé ichi duha, ni cuè ñáyíu quide nduu, te ni cuè ñáyíu ndècu ichi ñí iní, te ni cuè ñáyíu sàhni tñaha ñáyíu-xi, te ni cuè ñáyíu chiñuhu nchaa sá ní cadúha cue téé ñuyúú-a càchí-yu cùu ndiöxí, te ni cuè ñáyíu tñáhá iní dacuàndehnde, te ni ñⁿ ñáyíu ducaⁿ xíquide vá ndúú tñáhu-yu quíhu-yu xítí ñúú-áⁿ.

¹⁶Te ní càháⁿ tucu Xítohó Jesucristú, te càchí-gá:

—Yúhú Xítohó Jesucristú ní tendaha-í espíritú xínú cuèchi núú-í cuendá cachí tnúhu-xi xii-n nàcuáa ndúu tnúhu cùñaha-n xii nchaa ñáyíu ndècu ndíhi-n ichi-í dácuaaha tnúhu-í ñⁿ ñⁿ ñúú. Te yúhú cùú-í mei ñàni tñáhá ndí Davíí, te cada iní-n sá cùú-í dàtná ñⁿ chodíní quiti quène datnéé —duha càchí-gá.

¹⁷Te nchaa ñáyíu cùu cuendá Xítohó Jesucristú Yáá cáá dàtná cáá ñⁿ mbéé quiti ní dánícuèhé-güedé, ñíu-ni ñáyíu-áⁿ cúú-yu ñáyíu cada iní-ó sá cùú-yu ñⁿ ñadíhi xíchí tñándaha ndíhi ñaha xii-gá, te ñáyíu-áⁿ ñⁿ-ni càháⁿ-yu ndíhi Espíritú Yá Ndiöxí, te xáhãⁿ-yu ndíhi Espíritú-gá xii nchaa dava-gá ñáyíu:

—Chí táquixi —cachí-yu xáhãⁿ-yu ndíhi Espíritú Yá Ndiöxí.

Te nchaa ñáyíu ducaⁿ ndédóho tnúhu-áⁿ vitna, te xini ñuhu-xi ducaⁿ càháⁿ-yu tñáha-yu cùñáha-yu xii nchaa dava-gá ñáyíu-áⁿ, te nchaa ñáyíu cùini tuha ichi-gá te na quixí-yu, te dicó ducaⁿ cùu tñáhu-yu sá cándèca iní-yu ni caa ni quíhíⁿ.

¹⁸Te nchaa nchòhó ñáyíu ndédóho nchaa nàcuáa càháⁿ tnúhu Yá Ndiöxí ndéé núú tütú-a càháⁿ-í dóho-ndo. Te núu ñⁿ ñáyíu na còdo-gá tnúhu chido tñuní-yu núú tütú-a, te Yá Ndiöxí ío dandòho ñaha-gá xí-yu chí yáha-yu nchaa tñúndòho yodo

tnuní núú tütú-a te núu ducaⁿ na càdá-yu.
¹⁹Te núú ìíⁿ ñáyíu na chidáhu dava tnúhu Yá
 Ndiǒxí ndèé núú tütú-a te ñáyíu-áⁿ vǎ ndúú
 tǎhǔ-yu cundecú-yu ñuú-gá, te ni vǎ ndúú
 tǎhǔ-yu sá cándèca iní-yu ni caa ni quíhíⁿ
 dàtná yódó trùnì ní núú tütú-a.

²⁰Te Xítohó Jesucristú Yaa càháⁿ sá ncháá
 tnúhu-a cùu-xi tnúhu ndáá ní cáháⁿ-gá ní
 tecú dóho-í, te càchí-gá:

—Ndáá sá ïo ndǎhi quixi tucu-í —duha
 càchí-gá.

Te yúhú ní xáhaⁿ-í xii-gá:

—Ducaⁿ na cùnduu, taquixi yohó Xítohó
 Jesucristú —duha ní xáhaⁿ-í xii-gá.

²¹Te Xítohó Jesucristú ïo na chindee
 chitúu ñaha-gǎ xii-ndo ncháa-ndo. Te
 ducaⁿ na cùnduu. Te ïo chí cádá ndèe iní-ñǎ
 vitna.